

GERARDI JOAN. VOSSII  
ET  
Clarorum Virorum  
AD EUM  
EPISTOLÆ.

Collectore  
PAULO COLOMESIO

Ecclesiæ Anglicanæ Presbytero.

*Opus omnibus Philologiæ & Ecclesiasticæ Antiquitatis  
Studiofis utilissimum.*



LONDINI:

Typis R. R. & M. C. Impensis Adielis Mill, apud quem prostant ad  
Insigne Pavonis in vico Ave-Mary-Lane vocitato. MDCXC.



7

1

Serenissimo & Potentissimo PRINCIPI,

**GUILIELMO**

D. G.

*Magnæ Britanniae, Franciæ, & Hiberniæ*

**R E G I;**

Fidei Defensori;

PRINCIPI Arausionensium, &c.

Serenissime Domine,



**ERARDUS-JOHANNES VOSSIUS**,  
*insigne Belgicæ Tuæ Ornamentum, dum vi-  
veret; Vir, siquis alius, Magni Nominis  
in Rep. Literariâ; in hoc Epistolari Vo-  
lumine jam Redivivus, ad genua Tua sa-  
cratissima provolvitur, supplex & gratulabundus. Te  
Principem suum agnoscit, Batavus; Te Regem suum sa-  
lutat, Anglus; utrâque civitate donatus, utriusque gentis  
nexu obstrictus: ibi in Professoratum ab Illustrissimis  
Ordinibus adlectus; heic in Canonicatum Ecclesiæ Cantua-  
riensis, beneficio CAROLI Primi, Avi Tui, τὸ μακελει, adscitus.*

A 2

*Multæ*

*Multæ mihi, eaque gravissimæ rationes (omisso jure gentilitio, cujus modò memini) hancce gloriosam Nuncupationem suadebant, imò persuadebant.*

*Primum, quòd cùm Tu Rei Britannicæ & Religionis Stator atque publicæ Libertatis Vindex, per summam Dei providentiam, extiteris; Tibi in fastigio rerum posito, ex merito, Egregium omne debeatur, Tuo imprimis Nomini consecrandum, quò æternare possit.*

*Deinde, quòd Auctor hic noster tantâ animi devotione totam Arausionensium perillustrem Familiam coluerit, quantâ cernere est in ipsâ Operis fronte, Epistolâ primâ ad Patrem Tuum GUILLIELMUM f. m. ab ipso perscriptâ: unde liquidò paret, Ipsum, si viveret, haud aliter velle decernere; aut, si moriens prævidisset has chartas aliquando juris publici futuras, in extremis tabulis non alteri quàm Tuo Nomini eas destinare voluisse.*

*Alia sunt fortasse non minora; quòd se Vir bonus pacis & concordie studiosum, in illo religionum dissidio, quo tum patria divexabatur, ubique profiteretur; quòd Majestati Tux, cujus is est sensus, minimè displiciturum confido: Et quòd jus & potestatem civilis Imperii in re Ecclesiasticâ probè tueretur; quòd passim videre est in hisce familiaribus scriptis, quâ ad Hugonem Grotium popularem suum, quâ ad Episcopos aliquot nostrates, quibuscum agitabat commercia literarum.*

*Restat hoc unum, ut vota faciam pro salute Majestatis Vestræ, & quæ eadem est, prosperitate Britanniarum.*

*Faxit*

*Faxit Deus O. M. ut Vobis omnia cadant, cedantque ex voto: Tibi, Invictissime & Clementissime Princeps, qui sic vincere amas, ut devincias; & malis leges accipere quàm dare; & quod Auctor ait, ut prosis magis quàm præsis; & Heroïnæ M A R I Æ, Augustæ Consorti Tuae, quæ ob præstantiam Formæ & suavitatem Morum Regina, si natales id ei non dedissent juris, & esse & dici merebatur: Atque Vobis stabile Regnum, constantem Victoriâ, perenne in terris Nomen largiatur; & ut, post diutissimam & feliciter deactam vitam præsentem, sempiternâ unâ in cœlis fœlicitate perfruarini.*

*Quod ita fore vovet, spondet, & animitùs precatur*

Sacratissimæ M A J E S T A T I S Vestræ

Humillimus Cultor,

&

Fidelissimus Servus & Subditus,

A D I E L M I L L S,

A 3

Editor.





## P R Æ F A T I O.

**A**Mavi, fateor, ab ineunte ferè ætate virorum doctorum Epistolas : cum propter multarum rerum non faciliè alibi occurrentium notitiam, tum ob genuinas clarorum virorum effigies, quas in Epistolis, tanquam in speculo, cernere est. Crevit amor iste cum annis ; & quas antea solum amabam, eæ nunc in deliciis mihi esse cæpere. Quid hîc eloquar quanto cum fructu Marci Tullii & Plinii Junioris Epistolas sæpius legam ? Quot egregia, quæ incassum alibi queras, me docuerint Angeli Bassi, à patria Politiani, & Roterodamensium Phœnicis Epistolæ ? reclamante licet Paulo Manutio, viro quidem politissimo, sed in cujus Epistolis, præter verba, nihil habeas. His addantur merito suo Josephi Scaligeri & Isaaci Casauboni Epistolæ ; è quibus historiam literariam plenissimè didicimus ; ut ex Hugonis Grotii, quæ nuperrimè prodire, Philologica, Politica ac Theologica multa. Agmen claudat vir seculorum memoria longè dignissimus Gerardus Joannes Vossius ; cujus Epistolas eximiam probitatem ac ingentem eruditionem redolentes oculis tuis, Lector benigne, nunc subjicimus. Frustrà sum, si in iis deprædicandis tempora tua morari vellem. Præterquam enim quòd Vossii nomen nullibi gentium est ignotum, & vino vendibili, ut aiunt, suspensa hedera opus non est ; vereor ne mihi non immeritò succenseas, si Horti hujus ingressu diutius te prohibeam. Bonis igitur avibus ingredi, & areas singulas diligenter perlustra, indeque flores decerpe, tum ad hanc, tum ad futuram vitam utiles. Dabam raptim ex Ædibus Lambethanis 8. die Martii, anni 1689. cum in summo mæore essem ob immaturum obitum viri ingenio juxta ac eruditioni præstantissimi Isaaci Vossii, Gerardi filii. Etsi enim septuagenario major is decesserit, mihi tamen, ut Plinii Junioris verba usurpem, acerbæ semper & immatura videtur mors eorum qui immortale aliquid parant. Benè vale ac eternitatem cogita.

Tuus in Christo Jesu,

PAULUS COLOMESIUS.



# V I T A

Viri Incomparabilis,

GERARDI JOANNIS VOSSII

Eloquentiæ & Chronologiæ

In incluta Academia Lugduno-Batava Professoris Celeberrimi,

*Cum ex Athenis Batavis Jo. Meursii, tum scriptis  
alijs, breviter collecta.*

**G**ERARDI nomen à parentibus accepit in memoriam proavi sui, Gerardi Vossii, Ruremondani, Viri in urbe patria, ante hos annos centum & ampliùs, genere, virtute, fortunisque spectatissimi: qui ex uxore, Gertrude Verhagens, Bartholomæi filia, reliquit filium Antonium Vossium. Huic uxor fuit Juditha Calenia, soror unica Viri Clarissimi, Christophori Calenii, Ruremondani in Crucigerorum Monasterio antistitis (quo in munere jam septuagenarius obiit anno clō 1608.) filia vero Johannis Calenii, in publicis muniis quinquaginta pene annos cum honore versati, & Catharinæ Budeliæ, Reineri Budelii, experientissimi Medici filia: amitæ autem Amplissimi Viri, Reinerii Budelii, Jurisconsulti, cujus de re monetaria uberes atque utiles commentarii Colonix prodierunt. Ex Calenia hac Antonio Vossio liberi fuere, Johannes, Gerhardi hujus pater, Arentius, & Isabella, quæ ex marito Dionysio Bylmacero, filiam unicam, Juditham, reliquit, nuptam Amplissimo Viro, Petro Bosmanno, superioris Ducatus Geldrici ordini equestri, ac Ruremondanæ item Civitati à secretis. Natus est Joannes anno clō 1609. Vix quinquennis erat, cum famigeratum illud incendium anni clō 1614. quod vix Ruremondæ parti decimæ pepercit, etiam parentem ejus, & avi utriusque ædes, absumeret. Multum illud & rei & spei parentum incommodavit. Sic tamen etiam fortunis ferentibus, urbe quotidie è favillis pulcrius exsurgente, filium Latinis Græcisque literis, ac Philosophiæ studio, in Schola patria excolendum curavere. Postea etsi tumultu belli Belgici, paullum amor studiorum refrixisset, mox tamen ardor prior rediit: etiam Italicam, Gallicam, & linguas alias superaddidit: occasioneque captæ ab Auriaco Principe Ruremondæ, Concionumque ibi habitarum nova luce accensus, in Academiam profectus est Heidelbergensem, summosque audivit Theologos, ante omnes Hieronymum Zanchium & Zachariam Ursinum, ibidem frequentabat disertas Casparis Oleviani conciones, feliciterque ipse exprimebat. Cumque magistris tantis præclaras animi dotes auxisset, nec levè jam sibi parasset nomen, anno clō 1628. adlectus est in eorum numerum, qui Ecclesiam Dei in diœcesi pascere Heidelbergensi. Quo ipso anno, bona cum venia Electoris Palatini, Friderici Pii, Wasseburgum, Juliaci urbem, ubi libertas Religioni Reformatæ erat, profectus fuit, ac genere, pietate, prudentiaque præstantissimi Viri, Matthæi à Biele, Ruremondani, qui Albani Ducis, ac Lindani Episcopi metu, eò se receperat, filiam Corneliam, lectissimam Virginem, uxorem duxit: cujus ille ut mores castifimos



simos multis annis perspexerat, ita propinquos omnes norat, Quæstoria, Senatoria, ac Consulari dignitate Ruremondæ, inque vicinis oppidis, insignes. Reversus ad Ecclesiam suam, quadrienni proximò quaternis augetur liberis. Eorum natu omnium minimus noster fuit Gerardus, qui in lucem editus, in eunte vere anni cō lō LXXVII. semestri circiter post obitum Friderici Pii. Eopse anno, Ludovico Electore Palatino, in locum Pastorum priorum surrogante alios, qui Lutheri de S. Cæna sententiam amplecterentur, parens cum uxore & filiolo Gerardo vix senum mensium, è Palatinatu in Bataviam commigravit, novæque Academiæ, & magnorum ibi Virorum desiderio, doctissimus ipse, pellectus, Lugduni potissimum domicilium elegit, atque à Rectore Petro Tiara V. Maii anni cō lō LXXVIII. inter Academiæ membra adscriptus est hoc nomine: *Joannes Alopecius Ruremondanus*. Nam ex more eorum temporum, & Græcicæ linguæ amore, Græca magis appellatione gaudebat: quam & filius Gerardus ad annum usque ætatis XII. retinuit, auctoreque tum præceptore suo Rekenario mutavit; qui appellatione vulgo haud intellecta honestatem familiæ obscurari distitabat. Lugduno dum parens degit, ad Lejemundensem Ecclesiam, quæ in Rhinlandico est Leidenfium territorio, vocatur. Unde mox, attamen ægrè admodum, Gerardo adhuc tum vix bimulo, avelitur. Sed in istis Belgicæ motibus, ingens eorum in Flandria penuria erat, qui non prudentia atque eruditione minus quam Zelo pollerent. Itaque optimi quique auctores fuere, ut à nobilitate Flandrica, quæ perhonorificam miserat legationem, persuaderi pateretur, ut Ecclesiæ curam susciperet Furnæ, oppido, ut fertilitate soli, & martyrum sanguine, ita natalibus Clarissimi Pauli Leopardi, inclyto. Anno cō lō LXXXIII. cum illud & alia Flandriæ oppida, in potestatem rediissent Hispaniarum Regis, Gerardus, jam sexennis in Bataviam reducitur. Parens Dordrecht, primaria Batavorum urbe, Ecclesiæ præfectus fuit. Hic anno proximo Gerardus dulcissimam Matrem amittit. Pater anno cō lō LXXXV. alteris nuptiis uxorem ducit Annam Wittiam, Francisci filiam, sororem Amplissimorum Virorum, Cornelii & Jacobi Wittiorum, quorum ille Consulari, hic quæstoria apud Dortrechtanos, uterque Senatoria dignitate inter delegatos Hollandiæ ac Westfrisiæ Ordinum conspicuus fuit. Tertio ab eo conjugio mense etiam patre vix octennis oratur. Utroque parente destitutus, studia nihilominus literarum excolebat condiscipulo inter alios usus Erycio Puteano, Historiarum, post Justum Lipsium, in Lovaniensi Academia Professore, viro scriptis non intermorituris toto orbe clarissimo. Inferiores classes permenfus, à Cornelio quidem Rekenario potissimum instituebatur in elegantia Latini sermonis, Philologia universa, Oratoria item ac Poësi; at Oratores & Poëtas Græcos enarrabat Franciscus Nansius, Francconatum prius in Flandria Decurio perpetuus, tum Græcæ ea in Schola linguæ Professor. Ac nunc Græcum carmen pangendo, nunc Græcè declamando, item in omni pene philosophia exercebat Adrianus Marcellus. Anno cō lō XCV. mense Septembri, Lugdunum Batavorum mittitur: inque literis Græcis porro audit Bonaventuram Vulcanium, in Matthesi Rudolphum Snellium, in Philosophia Peripatetica, cum Petrum Bertium, tum Petrum Molinæum; à quo &, cum universam Philosophiæ ἀρετὴν publicè defendisset, ex auctoritate Rectoris Magnifici, ac Senatus Academici, liberalium artium Magister ac Philosophiæ Doctor creatus fuit, quod anno contigit cō lō XCVIII. XIII. Martii. Exinde in Hebræis audivit incomparabilem Virum, Franciscum Junium, in Theologia, tum eundem Junium, tum Lucam Trelocatium Seniore, & Franciscum Gomarum, Viros præcellentis doctrinæ. Nec minus lectionibus privatis, ac disputando exercebatur à Johanne Kuchlino, Theologici illustrium Ordinum Collegii Præsidente; sub quo de summo bono, iterum

*Vita G. J. Vossii.*

iterum de agnitione miseriæ, hinc de Symbolo, rursum de Trinitate, denique de prædestinatione eas theses defendit, quæ cum Vossii nomine in lucem prodierunt. Interim & occasione Bibliothecæ à patre sibi relicte, ac ab antiquis etiam Theologis instructissima, Patrum lectioni, & Historiæ Ecclesiasticæ, sedulo vacabat: quod studium deinceps, quantum muneris ratio permetteret, cum cæteris studiis semper conjunxit. Anno clō 15 XCIX. præcipiti autumno, ac deinceps aliquot mensibus, Clarissimo Viro, Ælio Everardo Vorstio, (qui Petro Molinao in Physices professione ante annum successerat) inter Medicinæ Professores cooptato, publicè cum laude summa in Academia explicuit Aristotelis lib. V. *Φυσικῆς ἀκρόασις*, item ejusdem librum de memoria & reminiscencia. Actumque à nobilissimis Academiæ Curatoribus fuit, de eo in Professorum Philosophiæ numerum legendo. Sed dum in eo sunt toti, fato suo fungitur Dortrechtii Vir doctissimus, Isaacus Corputius, Ecclesiastes, ac cui in Præceptorum Collegio proximus ab Rēctore locus esset. Paucis post mensibus etiam obiit Rēctor ipse Hadrianus Marcellus. Eaque occasione summa gubernatio Scholæ commissā est Gerardo Vossio: desinente tum & professionem suam Joanne Polyandro, doctissimo Theologo, qui Logices & Ethices in illustri eo Gymnasio fuerat Professor. Anno clō 16c II. XII. Februar. uxorem duxit Castissimam Virginem, Elisabetham Corputiam, V. Cl. Henrici à Corput, primarii apud Dortrechtanos Ecclesiastæ, ex conjugē Adriana à Brecht filiam, neptem Jo. Corputii, Actuarii ac Consulis Bredani, ex uxore Antonina Montenia; cujus parentes fuerant, Henricus Montenius Senator, & Quæstor generalis Baronatus Bredani, & Joanna Roveria, Guilielmi Roverii, Senatoris Bredani, filia. Ex uxore hac suscepit liberos ternos. Anno clō 16c VII. VI. Februar. uxorem amisit. Eopse anno in lucem dedit Oratoriarum Institutionum libros VI. quos triennio post auctiores & emendatiores emisit. Eo opere primam sibi nominis claritatem peperit, dum magno applausu exciperetur, etiam ab ipsis eruditionis principibus, Josepho Scaligero, & Isaaco Casaubono: quorum ille cum avide sane perlegisset, profitebatur (verba ejus retinemus) se infinita ex eo didicisse: nec à veteribus quidem esse, qui palmam præripiat summo Viro: Casauboni vero apud V. Cl. Hugonem Grotium aliosque multos. judicium tale fuit, nihil Rhetoricis ejus esse elegantius, nitidiusque, nihil *κεκκοσμεν*, elucere ubique judicium & *πολυδραγυσία*. Simillima etiam aliorum judicia erant, quæ Vossio ad ea, cæteraque studia, porro excolenda, non mediocriter animum addebant. Anno vero clō 16c CVII. XVIII. Augusti, alteris nuptiis uxorem duxit Virginem honestissimam, Elisabetham Juniam, prognatam nobili & viro & Theologo, Francisco Junio, & Elisabetha Corputia, Joannis Corputi, Consulis Bredani, filia. Anno clō 16c XIV. & proximo, ad professionem S. Theologiæ in illustri Schola Steinfurtenfi vocatus est, à generosis Comitibus Benthemensibus. Sed cum eodem tempore à nobilibus Academiæ Lugduncensis Curatoribus perhonorifice vocaretur ad regimen Collegii Theologici, quod illustres Hollandiæ ac Westfrisiæ ordines Lugduni statuerant: hanc vocationem, urgentibus amicis, prætulit; etsi magis quam dicere posset, terreretur oneris difficultate, præsertim in maximo illo Ecclesiæ Schismate, juventutem etiam contraria in studia scindente, non exiguo sane pietatis ac modestiæ dispendio. Quamdiu tamen id munus gessit (id per quadriennium & amplius fuit) fortiter ea in tempestate clavum tenuit. Postea, ut lassus, sic levatus, regundæ adolescentiæ molestia (quæ annos duraverat viginti, optimamque ætatis partem sibi vindicarat) in Academia Lugdunensi Eloquentiæ, ac simul Chronologiæ Professor factus est ordinarius, stipendioque publico extra ordinem invitatus, quæ ad veteris Ecclesiæ controversias atque historiam pertinerent, fideliter

Vita G. J. Vossii.

deliter consignavit. Sub idem ferè tempus, à Serenissimo M. Britanniae Rege Carolo primo, Canonatu Cantuariensi donatus est; qui honos in Anglia à renato Evangelio in extraneos rarissime confertur. Anno clò lcc XXXIII. ad illustre Amstelodamensium Gymnasium migravit, Historiarum professioni deputatus. Is itaque fuit Vossius, qui omnibus omni studio etiam prodesse voluit, atque ita quidem, ut non valetudini curandæ (ita de seipso loquitur in præfatione præmissa lib. III. de Theologia Gentili) vel rei struendæ, studiose daret operam, sed cum prioris haud levi periculo, & certo alterius dispendio, impensius semper publicis studeret commodis: plane ad exemplum prisce Catonis, qui multo surgebat mane, atque imò ipsa etiam nocte, quo vacaret studiis, ac meditaretur quid Reip. foret utile, posthabita etiam rei familiaris ratione: Quinimo cum sciret illud:

Οὐ γὰρ πρηνύχον εὐδῆν βέλτερον ἀνδρα.

insomnes traducebat noctes & vir, & senex, qua ætate sibi jam parcere potuisset; omne id temporis perdi ratus, quod publico bono non impendisset. Quid quod ne inter ipsas quidem epulas sibi temperaret, quo minus vel lectitaret libros, vel cogitationibus inhæreret. Omne pene, quod hic in terris egit tempus, ita egit Vir summus, ut uniuscujusque momenti fere rationem reddere vellet, nec posset minus. Loquuntur id, & loquentur tot ejus labores, quos nunquam suo pretio æstimare queat justa posteritas. In iis dubiis, quid potissimum mirari conveniat; omnigenamne magis ac solidam eruditionem; an vero piam magis, ac modestam. Pulchra fuit illa Ægyptiorum consuetudo, qua non licebat aliquod præclarum inventum sacrarum ædium columnis inscribere, nisi prius ab aliis ejus artis maxime gnaris id probaretur. Legat hos, ac sanè judicet eruditus orbis, non vidit, aut videbit unquam, quod magis Æternitatis Ædi inscribi mereatur. Ut autem erat ille βιβλιοθήκη ἐμψυχόν, καὶ πατέρα μυσθόν, atque omnium artium, & doctrinarum Promulcondus: ita liberis non minus, quam libris ornavit seculum, Francisco nimirum, Gerardo, Matthæo, Dionysio, & Isaaco; ut dubium effecerit, scriberetne accuratius, an gigneret felicius, quemadmodum alicubi loquitur illustris Grotius. Atque ii quidem patri simillimi ea etiam edidere scripta, quæ non nisi cum pereunte mundo perire possint. Cum vero numero novem essent filii, filiarque, omnesque pariter linguarum peritia, ac quovis studiorum genere inter se certarent, meritò ipsius ædes, quod de Pythagoricis dicebatur, Apollinis, novemque Musarum, vocasset habitaculum. At enim horret animus (scribente Francisco Junio, in Præfatione operis Vossiani de quatuor Artibus Popularibus) dum liberos cogito. Vix viderat illos ad justam vitæ, & gloriæ, maturitatem excrevisse Parens, cum ecce turbato mortalitatis ordine, contra commune Parentum votum, videt alterum alterius quasi premere vestigia, dum ad vocantis Dei nutum se sistunt penè omnes. Quis neget omnem humanitatis sensum exuisse Tiberium, qui felicem vocabat Priamum quod superstes omnium suorum extitisset? Quis sortis suæ, suorumque memor Camillum laudet, qui amisso filio dolori succubuit; adeoque, ut non nisi inter ipsos mulierum cætus muliebrem in modum casum filii dolens inveniretur? Summus Vossius, quanquam eos amisisset filios, qui paternis passibus contenderent, quousque gloria eniti potest, quales etiam pro suo in literas amore non filios non lugere non posset, quovis tamen dolore se ostendit potentior, cui succumbere tristissimis cladibus ducebat tristius. Enimvero non Periclem, non Xenophontem, non Anaxagoram Clazomenium, constantis in adversis animi exempla, jactet antiquitas, quos nempe erigere poterat pulchra filiorum in bello pro patria Virtus; Vossius lectissimæ, atque eruditæ,



Vita G. J. VOSSII.

eruditæ filix Cornelix prope inclytam Leidam aquis hybérno frigore concretis fidem frangentibus miserrimè submersæ iturus exequias, cum corpus humandum ostendi sibi peteret, atque ægre ab amicis, quod crudum vulnus sic refricari crederent, id obtineret, ubi vidisset, dictavit ipse adstantibus solatia, monuitque divinæ acquiescendum esse voluntati, ac nihil fieri ἀλλοθεν ἢ τῆς τοῦ λόγου τῶν ἡμετέρων, καὶ ἡμῶν ὕπο φάινετο. Ita vixit hic literati orbis Imperator, & septuagesimum tertium egit annum, cum fatis cederet vir immortalitate dignissimus. Recessit à nobis anno recuperatæ per Christum Salutis clō Jc XLIX. pia placidaque morte; quanquam non recesserit torus. Reliquit enim liberos suos, Eximium nempe Virum, Isaacum Vossium, insigne sui ævi decus, ac ex Clarissimo Matthæo nepotem sibi cognominem, Gerardum, in quibus eum aliquando agnoscemus, cernemus, tenebimus, ut immuetm paullo Ambrosii illa in funere Theodosii. Addam ingeniosissimi Poëtæ Batavi, Justi Vondelii Epigramma:

IN EFFIGIEM Celeberrimi Viri

GERARDI JOHANNIS VOSSII.

*Sex denos nihil est numeret si VOSSIIUS annos,  
Candidior niveis frons erit illa comis;  
Hæc habitat cuncti sub fronte scientia secli,  
Condita quæque libris condita habet cerebro.  
Quid chartis hominem cingis, Sandrarde, librisque  
Charta, liber, quicquam si capit, ille capit.*

EPI T A P H I U M.

*Hoc tumulo plorat pietas & candida Virtus,  
Et luctu Padas Saxea dirigit.  
Invida mors ridet, ridet quoque VOSSIIUS illam,  
Dum calamo mortem vincit & ingenio.*

a

SCRIPTA.



# SCRIPTA.

- O** Ratio Panegyrica de sælici expeditione exercitus Fæderatæ Belgicæ, ductu Principis Mauritiï, 1597. 4°  
 Institutiones Oratoriæ, Lugd. Bat. 1643. 4°  
 Partitiones Oratoriæ, Lugd. Bat. 1622. 8°  
 Aristarchus, sive de re Grammatica, Amst. 1662. 4°  
 Castigationes in Vet. Tragicos Latinos, Lugd. Bat. 1620. 8°  
 Grammatica Latina, Amst. 1631. 8°  
 Grammatica Græca Clenardi aucta, Lugd. Bat. 1642. 8°  
 De Logices & Rhetorices natura, Hagæ, 1658. 4°  
 De quatuor Artibus Popularibus, Amst. 1650. 4°  
 De Scientiis Mathematicis, Amst. 1660. 4°  
 Ars Historica, Lugd. Bat. 1653. 4°  
 De Historicis Græcis, Lugd. Bat. 1651. 4°  
 De Historicis Latinis, Lugd. Bat. 1651. 4°  
 De Artis Poëticæ natura, Amst. 1647. 4°  
 Institutiones Poëticæ, cum aliis Opusculis. Amst. 1647. 4°  
 De Poëtis Græcis & Latinis, Amst. 1654. 4°  
 Etymologicum Latine Linguae, Amst. 1660. Fol.  
 De Vitiis Sermonis. Amst. 1645. 4°  
 Oratio in Obitu Thomæ Erpenii. Lugd. Bat. 1624. 4°  
 Vita Fabiani à Dhona, Lugd. Bat. 1628. 4°  
 De Philosophia & Philosophorum Sectis, Hagæ, 1658. 4°  
 De Idololatria, Amst. 1668. Fol.  
 Isagoge Chronologiæ S. Hagæ, 1659. 4°  
 Apologia pro Grotio contra Ravenspergerum, Lugd. Bat. 1618. 4°  
 Responsio ad Consilium Michaëlis Lonigi, Lugd. Bat. 1623. 4°  
 Historia Pelagiana, Amst. 1655. 4°  
 Theses Historico-Theologicæ, Hagæ, 1658. 4°  
 Theses de Baptismo, Amst. 1648. 4°  
 De Tribus Symbolis, Amst. 1642. 4°  
 Harmonia Evangelica, Amst. 1656. 4°  
 De Christi Genealogia, Amst. 1643. 4°  
 De Cognitione sui ac de Studiorum ratione, Amst. 1655. 12°  
 Commentarius in Plinii Epistolam de Christianis. 12°  
 De Jure Magistratus in rebus Ecclesiasticis, Amst. 1669. 4°  
 Epistolæ, Lond. 1690. Fol.

INDEX

# INDEX EPISTOLARUM

Ad VIROS Claros

A Ger. Joanne Vossio missarum.

## A.

<b>A</b> Brabamo vander Merio	111.
Abrahamo vander Mylio	112. 306.
Academiae Cantabrigiensi	119.
— Oxoniensi	382.
Adriano Blyemburgio	103. 120.
Adriano Hofferio	101.
Amstelodamensis Reip. Consulibus	3. 75.
Andreae Colvio	387. 397.
Andreae de Naglowitz	339.
Andreae Riveto	198. 349. 373. 396. 410.
Antonio Emilio	412. 417. 420.
Antonio Matthæo	162. 278. 441.
Arnoldo Com. à Bentheim	448.
Arnoldo Buchelio	200.
Arnoldo Ticmanno	198.
— Arcerio	290.
Auberto Miræo	377.
Axelio Oxensternio	333.
	268.

## B.

Baltazari Willio	299. 237.
Belgica Federatae patribus	19.
Bernardo Damke	199.
Briano Duppa, Principi Walliæ à studiis	261.
— Eid. Episc. Cestrensi	381.
— Borrio	417.
— Brounerio	205.

## C.

Cantuariensis Ecclesiæ Decano & Canonici	381.
Carolo Principi Walliæ	13.
Chatio & Christophero à Dbona	31.
Christianæ Sueciæ Regiæ	8.
Chr. Slupeski	293.
Christoph. Wren	109.

Claudio Salmasio	116. 143. 162. 214. 219.
	228. 229. 234. 246. 250. 252. 254. 257.
	266. 295. 315. 316. 326. 342. 343. 346.
	347. 357. 412. 413. 422. 423. 426. 432.
	439. 442. 445. 449.
Clementi Timplero	43.
Conrado Vorstio	102. 213.
Constantino Huygenio	110. 216. 284.
Constantino L'Empereur	321.
Cornelio vander Mylio	330.
Cornelio Tollio	454.
— Conemburgio Conf. Roterod.	231.

## D.

Danieli Heinsio	195. 389. 441.
Danieli Paræo	80. 135. 279. 307.
Davidi Guilielmo	101.
Davidi Wedderburno	304.
Diderico Vlamingio Dom. ab Ostborn	283.
Diodoro Tuldeno	170.
Dudleio Carletono	90. 91. 92. 96. 97. 102.
	143. 161.

## E.

Edwardo Baroni Herbert de Cherbury	435.
	446.
Edwardo Misselden	166.
Edwardo Pocockio	159. 383.
Electori Palatino	436.
Episc. Novæ Casæ	434.
Erico Oxenstierna M. Axelii Fil.	26. 457.
Erycio Puteano	79. 169. 170. 181. 184.
	185. 188. 206. 221. 231. 333.
Eust. Swartio	193.

## F.

Fortunato Plempio	287.
Francisco Gomaro	104. 134. 317. 356. 362.
Francisco Junio FF.	127. 135. 148. 178.
	252. 266. 296. 320. 388. 430.
Friderico	

# I N D E X.

*Friderico Spanhemio* 419. 455.  
*Fulconi Grevillo Baroni de Broek* 89. 93.  
 108.

## G.

*Gabrieli Benedicſo Oxenſtiern* 351.  
*Gabrieli Guſtavo Oxenſtiern* 350.  
*Georgio Abbot, Archiep. Cantuar.* 155.  
*Georgio Calixto* 211. 400. 433. 452.  
*Georgio Charleton, Ciceſtrenſi Episc.* 108. 116.  
*Georgio Ratallero Doubletio* 28. 319. 334.  
 347. 348. 352. 365. 366. 390. 397. 398.  
 416. 417. 420. 424. 427. 435.  
*Georgio Slupeski Baroni* 304.  
*Georgio Villiers, Buckinghamiæ Duci* 10.  
*Guilielmo Arauſionenſium Principis Filio* 1.  
*Guil. Boſwello, Equiti, Regis Britannici*  
*apud Belgas Legato* 90. 91. 98. 110.  
 133. 197. 292. 330. 370.  
*Guil. Dell* 260. 273.  
*Guil. Grotio* 358.  
*Guil. Fuxon Episc. Londinenſi & Angliæ*  
*Theſaurario ſupremo* 261. 286.  
*Guilielmo Laud, Barbonienſi & Wellenſi*  
*Episc.* 115. 117.  
*Eid. Episc. Londin. & Archiep. Cantuar.*  
 120. 129. 132. 136. 153. 157. 163. 168.  
 172. 182. 189. 201. 208. 212. 219. 223.  
 249. 259. 271. 273. 288. 289. 290. 298.  
 331. 361. 373. 383.  
*Guilielmo Nieuportio* 243.  
*G. Blitterſwicio* 429.

## H.

*Henrico Ernſio* 291.  
*Hieronymo Belo, Aulæ Pembroch. apud Cantab.*  
*Præſecto* 111. 131. 238.  
*Hollandiæ Weſt-Friſiæq; Ordinibus* 23.  
*Hugoni Grotio, Regis Suecici apud Gallos*  
*Oratori* 35. 37. 39. 40. 42. 44. 45. 48.  
 70. 81. 84. 95. 97. 113. 114. 121. 122.  
 140. 173. 175. 176. 207. 208. 217. 218.  
 222. 224. 226. 232. 233. 239. 240. 241.  
 245. 264. 269. 270. 276. 281. 297. 299.  
 301. 303. 309. 318. 320. 327. 328. 334.  
 336. 341. 344. 355. 359. 367. 378. 379.  
 401. 404. 406. 408. 409. 410. 421. 424.  
 428. 432. 433. 436.

## J.

*Jacobo Catſio, Equiti* 18.  
*Jacobo Corputio* 391.  
*Jacobo Crucio* 184.  
*Jacobo Golio* 393. 434. 440. 441.  
*Jacobo Gotbofredo* 453.  
*Jacobo Igadio* 443.

*Jacobo Roverio* 100. 146. 217.  
*Jacobo Uſſerio, Archiep. Armachano* 186.  
 375. 385.

*Jacobo Wittens* 74. 228. 233. 258. 308. 378.  
*Jano Grutero* 88. 89. 103.

*Joachimo Bergeſio* 300. 317.

*Jo. Adolpho Fabro* 86.

*Jo. Ant. Corvino* 255.

*Jo. Ant. vander Linden* 359. 375. 452.

*Joan. Berckio, Equiti* 21. 84.

*Joan. Beverovicio* 164. 242. 285. 294. 341.  
 364. 371. 391.

*Jo. Bodechero Banningio* 241.

*Jo. Bruno* 275. 442. 444.

*Jo. Cabelario* 316.

*Jo. Chriſtenio* 277.

*Jo. Cloppenburgio* 395.

*Jo. Cocceio* 376. 430.

*Jo. Cordeſio* 101.

*Jo. Elichmanno* 294. 298.

*Jo. Forbeſio D. à Corſe* 459.

*Jo. Fred. Gronovio* 302. 325. 399. 407.  
 419. 425. 431.

*Jo. Hulſmanno* 221. 340.

*Jo. Iſ. Pontano* 135. 275. 315. 338.

*Jo. Meurſio* 94. 99. 118. 144. 150. 156.  
 178. 180. 211. 220. 224. 236. 246. 248.  
 257. 267. 288. 301. 308. 322. 324. 331.  
 340.

*Jo. Meurſio, J. F.* 348. 376. 392.

*Jo. Rave* 399. 427.

*Jo. Rodolpho Weiſſtein* 363.

*Jo. Rouſe, Bibliothecario Bodleiano* 109. 165.  
 177. 238. 262. 374. 384.

*Jo. Sadlero* 438. 450.

*Jo. Seldeno* 109. 434. 437. 454.

*Jo. Skytte* 203. 204. 205. 210. 220. 255.  
 256. 301. 305. 335. 365. 400.

*Jo. Slupeski Baroni* 78.

*Jo. Thomæ Bangio* 394.

*Joſ. Voffio, ipſius Fil.* 138. 147. 154. 159.  
 165. 192. 244.

*Joanni Williams, Episc. Lincolnienſi* 107.

*Joſepho Laurentio* 428.

*Isaaco Bargravio* 338. 369.

*Isaaco Baſirio* 204.

*Isaaco Grutero* 456.

*Juſto Cæciliano Puteano, Erycii Fil.* 271.

*Juſto Lyræo* 250.

*Juſto Reiſenbergio* 203.

## L.

*Lancelotto Androſio, Episc. Wintonienſi* 43.

74. 85.

*Levino Warnero* 345. 351.

*Ludovico Duci Gelriæ ac Julii, Comiti*  
*Egmondæ & Zutphanii* 453. 454.

*Ludovico*

# I N D E X.

*Ludovico Crocio* 85. 87. 285. 291. 237.  
354. 356. 372. 408. 415. 447. 456.  
*Ludovico de Duen* 393.  
*Lugduno-Batavæ Academicæ Curatoribus* 24.

## M.

*Marco Zuerio Boxbornio* 251.  
*Martino Pilio* 212.  
*Matth. Berneggero* 103.  
*Matth. Martinio* 149.  
*Matthæo Wren, pōst Episc. Eliensi* 109.  
142.  
*Merico Casaubono* 155. 158. 194. 195.  
196. 214. 225. 235. 247. 274. 282. 295.  
303. 314. 330. 339. 374. 380. 389. 398.  
418. 451.

*Martin, Præf. Col. Reg. Cantabr.*  
239.

## P.

*Patricio Junio, Bibliothecario Regio* 385.  
*Paulo Seriere* 130.  
*Petro Cunæo* 167. 213.  
*Petro Staackmans* 263.  
*Philippo Paræo* 200.

## R.

*Richardo Sterne, Episc. Dunelmensi* 106.  
*Richardo Stewarto* 126. 384.

## S.

*Samueli Marefio* 491.  
*Samueli Sorberio* 457.  
*Samueli Wardo* 108. 125.  
*Simoni Bellimontio* 208. 210. 292. 312.  
*Stephano Goffe* 237. 279.  
*Stephano Joanni Stephanio* 318. 322.  
323. 377. 392. 446.

## T.

*Thomæ Farnabio* 193. 353. 386.

## V.

*Vincentio Fabricio* 329.

## W.

*Winando Rutgersio* 171. 352. 380. 444. 448.

# INDEX



# INDEX EPISTOLARUM

AD

*Ger. Jo. Vossium* missarum.

<b>A.</b>		<b>E. Duncomius</b>		277.
<b>A.</b>		<i>Edmund. Figrelius S. Gotbus</i>		284.
<i>Walwick</i>	251.	<i>Ernestus Brinck</i>		197.
<i>Abraham Bocstadius</i>	80.	<i>Ernestus Joannes Creutz</i>		217.
<i>Academia Cantabrigiensis</i>	56.	<i>Erycius Puteanus</i>		102, 103, 108, 119, 233.
<i>—Oxonienfis</i>	227.	<i>Eupantius</i>		262.
<i>Andr. Colvius</i>	66, 252.	<i>Eustathius Swartius</i>		101, 273.
<i>Andr. Helvigius</i>	236.	<b>F.</b>		
<i>Andr. Rivetus</i>	95, 172, 194, 200, 206, 219, 226, 229, 243, 246, 248, 262, 266, 280.	<i>Fran. Burgersdicius</i>		106, 116.
<i>Andr. Schottus</i>	13, 14, 19, 34.	<i>Fr. Junius</i>		2, 12, 22, 26, 27, 29, 31, 59, 64, 73, 134, 140, 143, 152, 163.
<i>Archib. Cassellius</i>	221.	<i>Fran. Mantæus</i>		6.
<i>Arn. Buchellius</i>	36, 54.	<i>Fred. Lindenbrogius</i>		271.
<i>Aubertus Miræus</i>	156.	<i>Fred. Spanhemius</i>		258, 281.
<b>B.</b>		<b>G.</b>		
<i>Bartoldus Nibufius</i>	170, 267.	<i>Gaspar Scioppius</i>		224, 241, 259.
<i>Bernbard Damke</i>	91, 96, 97, 98, 223.	<i>Georg. Andr. Richter</i>		201, 205.
<i>Bernbardus Meyerus</i>	78.	<i>Georg. Calixtus</i>		94, 132, 264, 269.
<i>Briennx</i>	276.	<i>G. Gentius</i>		270.
<b>C.</b>		<i>G. Henricus Platbnerus</i>		273.
<i>Carolus Ludovicus Comes Palatinus Rheni</i>	272.	<i>Georg. Horn</i>		285, 287.
<i>Chr. Rave</i>	190, 195, 220.	<i>Georg. Kirstenius</i>		286.
<i>Chr. Schotanus</i>	218.	<i>G. M. Kingelshemius</i>		17.
<i>Chr. Slupecius</i>	165.	<i>G. R. Doubletius</i>		28, 30, 32, 36, 37, 82, 88, 89, 112.
<i>Claudius Salmasius</i>	284.	<i>Georg. Slupeck</i>		164.
<i>Clemens Timplerus</i>	7, 8, 9, 10, 11.	<i>Georg. Vechnerus</i>		276.
<i>Conr. Vorstius</i>	9.	<i>Geverhart Elmenborstius</i>		15, 16, 18, 19, 20, 21, 22, 24.
<i>Const. Hugenius.</i>	258.	<i>Godefridus Cretschmarus</i>		217, 220.
<i>Const. L'Empereur</i>	109, 234, 242, 259.	<i>Guil. Boswel</i>		35, 39, 42, 43.
<i>Cornelius Tollius</i>	288.	<i>Guil. Brough</i>		106.
<b>D.</b>		<i>Guil. Grotius</i>		243.
<i>Daniel Gravius</i>	264.	<i>Guil. Laud, Ep. Batb. &amp; Wellensf.</i>		49, 57, 58.
<i>Daniel Heinsius</i>	1, 224, 281.	<i>Ep. Lond.</i>		62, 65, 68, 74, 86, 90.
<i>Dionys. Vossius</i>	79.			92, 100, 105.
<i>Dominicus Baudius</i>	5.	<i>Archi-Ep. Cant.</i>		125, 150.
<i>Dudley Carleton</i>	33, 35, 39, 40, 45, 45.			153, 160, 182, 199.
<i>Com. de Dorchester</i>	63.	<b>H.</b>		
<b>E.</b>		<i>Haraldus Appelboom</i>		207.
<i>Edw. Missfelden</i>	48.	<i>Henricus</i>		
<i>Edw. Pocock</i>	68, 157, 227.			

# I N D E X.

<i>Henricus à Dieft</i>	112. 260.	<i>Joan. Schildius J. F.</i>	250.
<i>Henricus Ernstius</i> 76. 118. 127. 131. 235. 286.		<i>Joan. Smith</i>	267.
<i>Herbert Dom. de Cberbury</i>	272. 275.	<i>Joes Christenius</i>	201. 204. 215.
<i>Herman. Conringius</i>	260. 274.	<i>Josephus Laurentius</i>	244. 261. 265.
<i>Herman. Ravenfperg</i>	18.	<i>Isaacus Bufirius</i>	81. 131.
<i>Hieron. Beale</i>	58.		
<b>J.</b>			
<i>Jac. Crucius</i>	84. 93.	<i>Laurentius Cocceus</i>	179.
<i>Jac. Florianus</i>	2.	<i>Laurentius Skytte</i>	178.
<i>Jac. Golius</i>	37. 49. 229.	<i>L. Cafembroot</i>	149.
<i>Jac. Gorbhofredus</i>	239. 290.	<i>Ludovicus van Bercken</i>	17.
<i>Jac. Hemmingius</i>	115.	<i>Ludovicus Crocius</i>	146. 174. 193.
<i>Jac. Lydius</i> 86. 155. 277. 282. 288.		208. 209. 214. 215. 219. 230. 241. 245.	
<i>Jac. Ufferius Armachanus</i>	188. 300. 301.	249. 253. 264. 280. 283. 285.	
<i>J. Becius</i>	10.	<i>Ludovicus de Dien</i>	228.
<i>J. van Hont</i>	298.		
<i>J. Juncus</i>	34.	<b>M.</b>	
<i>J. Skytte fen.</i>	88. 142.	<i>M. Joan. Michaelis</i>	221.
jun.	120. 244. 294.	<i>Marc. Zuernius Boxbornius</i>	87. 137.
<i>J. Utenbogaert</i>	13.	<i>Martinus Lydius</i>	1.
<i>Janus Gebhardus</i>	41. 45. 46. 48. 53.	<i>Martinus Opitius</i>	76.
<i>Janus Rutgersius</i>	3. 4. 5.	<i>Martinus Ruarus</i>	32. 105.
<i>Janus Vlitius</i>	203.	<i>Matth. Wren</i>	56. 66. 69.
<i>Jerem. Hoelzelin</i>	77. 109. 161.	<i>Maurerius</i>	28.
<i>Joachimius Matt.</i>	245.	<i>Meric. Casaubonus</i>	129. 137. 147.
<i>Joannes Beverovicus</i>	47. 83. 90. 107.		
	111. 219. 228. 254.	<b>N.</b>	
<i>Joannes Bollandus</i>	186. 263.	<i>Nathanael Conopius</i>	145.
<i>Joannes Cabellarius</i>	64.		
<i>Joannes Cocceius</i>	214. 216.	<b>O.</b>	
<i>Joannes Elichmannus</i>	162.	<i>Oligerius G. Rosencrantz</i>	128.
<i>Joannes Forbesius à Corfe</i>	268.		
<i>Joan. Fred. Gromovius</i>	111. 134. 155.	<b>P.</b>	
156. 159. 164. 173. 175. 177. 182. 187.		<i>Pet. Bertius</i>	52.
232. 255. 256. 261. 268.		<i>Pet. Cuneus</i>	118. 148.
<i>Joan. Freinshemius</i>	172. 193.	<i>P. Prataus</i>	110.
<i>Joan. Henricus Boeclerus</i>	242. 271.	<i>P. Turner</i>	119. 302.
<i>Joan. Johnstonus</i>	139.	<i>Phil. Paræus</i>	187.
<i>Jo. If. Pontanus</i>	53. 185.	<i>P. Winsemius</i>	250.
<i>Joan. Kirchmannus</i>	49.		
<i>Joan. Loccenius</i>	132. 178.	<b>S.</b>	
<i>Joan. Lydius</i>	12. 13. 61. 149.	<i>Samson Johnson</i>	197.
<i>Joan. Meursius</i> 40. 41. 42. 59. 65. 69. 72.		<i>Samuel Johnson</i>	57.
74. 79. 81. 85. 95. 100. 105. 102. 108.		<i>Samuel Marefius</i>	283.
113. 116. 127. 133. 136. 145. 151. 152.		<i>Samuel Petitus</i>	240.
154. 158. 160. 161. 169. 170. 171. 186.		<i>Samuel Wardus</i>	43.
<i>Joan. Meursius Fil.</i> 189. 193. 194. 196. 209.		<i>Simon Episcopius</i>	24.
<i>Joan. Polyander</i>	27. 257.	<i>Stephanus Goffe,</i>	à 120. ad 125.
<i>Joan. Pricæus</i>	254.	<i>Stephanus Joan. Stephanus</i>	94. 104. 114.
<i>Joan. Pyrædus</i>	211.	115. 165. 167. 176. 183. 188. 213. 281.	
<i>Joan. Ravius</i>	231. 235. 249.		
<i>Joan. Rodolph. Wetstein</i>	184. 278.	<b>T.</b>	
<i>Joan. Roufius</i>	240.	<i>Thomas Farnabius</i>	71. 85. 213. 303.
<i>Joan. Sawadiski</i>	126.	<i>Tbo. Jo. Bangius</i>	266. 287.
		<b>U.</b>	
		<i>Ubbo Emmius</i>	5.
		<i>Vincentius Fabricius</i>	104. 114. 151. 166.
			174. 178. 181. 186. 289.
		<b>Z.</b>	
		<i>Zacutus Lusitanus</i>	161. 167. 168.



# G. J. VOSSII

## EPISTOLÆ.

### I.

*Magno Principi Guilielmo; Celsissimi Frederici Henrici, maximi, invictissimi, Arausionensium Principis Filio; Augustissimi Britanniarum Monarchæ, Caroli, Fidei Defensoris, & Henricæ Mariæ, Christianissimi Regis Galliarum Henrici Magni, Filiæ, Genero felicissimo,*

*Minutum hoc maximi, ac devotissimi Animi Monumentum, offert, dicatque*

G. J. Vossius.

Celsissime Princeps,

**L**ÆT A, ac diu multumque exoptata affulsit dies, quâ Civitas hæc Amstelodamentis conspicit serenum, placidumque vultum Augustæ socrus, Henricæ Mariæ, Galliarum Regis Henrici Magni Filiæ, Magnæ Britannæ Regi Carolo nuptæ. Eoque lætior hæc dies, quod unâ videamus auream tantæ Reginæ prolem; serenissimam Principem Mariam formâ eximiam, animi dotibus pulchriorem, patris, & avitarum laudum hæredem, pluresque in suo stemmate Reges numerantem, quàm altera hodiè Regalis familia possit. Ut hanc sacris Penatibus introducenti Celsitudini tuæ; verè illud conveniat Poetæ Veronensis: *Vidit quis Venerem auspiciorem?* Comitantes etiam cernimus Divum Liberos; serenissimi heu quondam Bohemorum Regis Frederici, ex maximi Magnæ Britannæ Regis Jacobi I. Filia Elizabetha Celsiss. filios: Cordatissimum, & fortissimum Rupertum Palatinum, famâ ad sidera notum; & summæ expectationis fratrem Mauritium, grandi hoc nomine gaudentem, à sponse in sacro Baptismate, invictissimo Arausionensi Principe Mauritio, Avunculo suo magno, quem virtute, ac felicitate Belgica, ut cōfidimus, aliquando daturus est Orbi. Adest etiam ingentis animi,

ac nominis Arondelius, Comitum Illustrissimorum nulli profapiæ, antiquitate ac splendore secundus, ab Rege Augusto Augustæ Reginæ additus comes. Quid singulos Britannia ex gente memorem majorum imaginibus illustres, nec ingentium Avorum indignos? Atque his fœderatæ Belgicæ nomine adjunxit se Ipse Celsissimus Arausionensium Princeps, Fredericus Henricus, Patriæ Patrens; qui gestorum magnitudine cō res Belgarum perduxit, ut de fide apud posteros laboratura sit fama: multisque ita videatur, fortasse non tam amplius illud optandum esse, ut tellus hæc pergat fortiter tueri Libertatem, quod sub tanti Principis ductu, haud difficile erit genti ab omni ævo fortissimæ, atque inter arma natæ: quàm ut vento tot jam annos adeò secundo, ex sapienti Poetæ præcepto, paulisper sua contrahat vela, nec prosperis nimis exultet. Sequeris & ipse Principe hoc progenerate, Celsissime Princeps Guilielme Arausionensis: qui nihil æquè speras, aut spiras, quam laudes ingentium Heroum æmulas; Parentis, Patruï, Avi; & ut paucis absolvam, tot majorum, ultra etiam tempora illa, quibus ante annos trecentos, è domo vestra in altissimo Cæsareæ dignitatis gradu, vel fastigio potiùs, emittit Adolphus Nasovius. Deficeret stylus, si Belgas, Germanos, gentiumque aliarum Comites, Barones, Nobiles, recensere vellem; quos in hoc Augustæ Reginæ, & serenissimæ filiz comitatu, florentissima hæc civitas nunc cernit, ac miratur. O diem terque, quaterque beatam! quàm nulla ex hominum memoria oblivio delebit, nec unquam excellentium ingeniorum monumenta conticescent. De quo fidentius pronunciamus, non obscuram capiendo conjecturam ex iis sincerissimi gaudii signis, quæ nunc in omnium oculos incurrunt. Videmus enim, quanto studio Nobilissimi, & Prudentissimi hujus urbis Consules, & amplissimus, gravissimusque Senatus, unum hoc agant, nequid præteritum videatur quod ad ingentis lætitiæ, & devotissimi animi restitutionem pertineret.

B

fineret.



tineret. Exemplum etiam suorum Procerum universa sequitur Civitas, vestigia eorum legens, ut in sacros Augustæ Reginæ, & serenissimæ proles, fidereos vultus, tuos paulisper figere liceat obtutus: ac simul, Celsissime Princeps, in illos etiam verè maximi Parentis, ac tuos. Unde omnis ætas, ac sexus, vicos cunctos, mœniana etiam, ac podia complet: atque adeo ædes singulæ, imprimis curia, templa, ipsi urbis muri, in hac inusitata omnium lætitia, gestire mihi præ gaudio videntur. Quæ cum ego ita fore, facillè animo perciperem meo, ac tacitus revolverem; sic continuo cogitare mecum cœpi: Ergone in hac publica lætitia non amplius agam, quam unus è multis, qui augustæ domui Britannicæ plus debeo mei ordinis cunctis? Observabatur etiam Diogenes. Cùm enim Philippus, Amyntæ filius, Alexandri nomine & re Magni Parens, expeditionem adversus Corinthios moliretur; alii in urbe arma sibi parare, alii muros reficere, nonnulli lapides congerere, vel aliud agere ad præsens negotium utile: Diogenes (altæ mentis Philosophus, sic ut Alexander, nisi fuisset Alexander, Diogenes esset vellet) versare interea dolium suum, nè vivos inter obambulare mortuus diceretur. Quod animo ille quocunque egerit, mihi quidem mente candidâ, devotâque, hæcenus exemplum imitari visum fuit, ut ne totâ urbe, undique edente lætitiæ signa, non quidem dolium circumvolverem, attamen nec otiosus viderer; quin potius agerem utile aliquid, quo in hoc adventu Augustæ Reginæ, & serenissimæ filix, animæ dimidio Tuæ, gratum, devotumque animum, erga Regiam Magnæ Britannicæ Majestatem, totamque domum Augustam, testarer: saltem quantum vix præmeditato, sed, penè dixerim, in arena consilium capienti, deque paupere penu aliquid deprompturo, in ea temporis angustia liceret. Nam per Deum immortalem, cui iustiores, quàm mihi, hodiernâ se die causæ obtulerunt, testandi officii sui erga domum Regalem, pariterque Celsitudinem tuam, postquam ab Augusto Rege gener es adlectus? scio, quantum debeam invictissimo Principi, Parenti Celsitudinis tuæ, Vindici patriæ libertatis: sine qua vita quid est, nisi cadaver? sed hoc beneficium magnum adeò licet, ut nullius ingenio, vel facundiâ, satis possit prædicari; si tamen fas sit dicere, commune est mihi cum omni foederata Belgica: etsi, nisi fallor, nos qui literas, & sapientiæ studia colimus, plurimùm rectius aliis nostra intelligimus bona. Sed ego nunc in animo habeo illud in me grande meritum, quod unus è foederata Bel-

gica accepi ab Augusto Rege Carolo, Religiosissimo Principe; quem ut Trajanò scimus meliorem, ita ex veteri formula, Augusto Cæsare optamus feliciorum. Divinus ille Rex (justius enim dixero, quàm quem proximè laudavi Augustum, semper Deum dicebat Maro,) Rex, inquam, ille, cui dulcius est prodesse, quàm præesse, unum me, quanquam digniores esse alios non distear, in Metropolitanæ Cantuariensium Ecclesiæ, Præbendarios allegit. Neque unquam dies illa animo excidet meo, quâ cum gratias quas deberem, pro nobili hoc canonicatus beneficio, Augustæ agerem Majestati; Ille me hoc placidissimi oris responso dignabatur: pariter se gratias divinæ agere Majestati, à qua hoc haberet, quod me de literarum studiis benè merente, meliusque mereri parato, ipse etiam benè mereretur de me, & familia mea. Quæ quàm altè in hoc pectus descenderint; quantoperè etiam mihi stimulos subdiderint ad porro calcandum Virtutis, & Industriæ callem; rectius, quàm maligno hoc seculo fieri amat, Posteritas judicabit; si non quod satis sit, ex iis quæ ab illo tempore publici juris feci, ac vel Celsitudinis tuæ adfini, serenissimo Walliæ Principi; vel Doctrinâ, & Fide eminentissimo Ecclesiæ Anglicanæ Clero dedicavi: saltem ex aliis quæ deinceps moliar, dummodò vitam mihi, ac valetudinem concesserit divina bonitas. Sed grandè aliquid deperoperare nunc tam subito non dabatur. Gnarus igitur ejus, quod vulgo dici solet, tuscule quoque sacra fieri Diis: non dubitari hoc qualecunque de schedis nostris offerre. Selegi verò aliquid sacri argumenti; quia hoc maxime convenire putarem, quem Augustus Socer hoc potissimum sine sacro Cantuariensium ordini inseruisset, ut qui Musas antea dulces ducerem, non tam vulgares illas colerem, quàm sacras. Hujusmodi verò est labor noster, de tribus symbolis, Apostolico, Athanasiano, & Constantinopolitano: in quorum prioribus ostendo, quantoperè multos fugerit ratio, de primis eorum Authoribus; in tertio autem illos præcipuè refello, qui Constantinopolitanos Patres, de spiritus sancti processione à filio, signasse aliquid arbitrantur. Simul hoc de symbolis opere constare volui, non me in publico hoc gaudio conspici penitus Asymbolum; sed iniussimodum contulisse symbolam, quæ simul symbolum foret animi devotissimi erga Augustam Majestatem, Serenissimam Filiam, ac Generum Regium. Scio, quàm mole sit exiguum, quod pro symbola pariter, ac symbolo esse cupio: Sed argumento exiguum non debet haberi, si ab sincera symbolorum illorum fide, dependet Rerum-publicarum



publicarum tranquillitas, & æterna populorum salus : quæ duo cordatis Principibus cariora esse suis oculis oportet. Quod si deprimat fortasse laborem hunc scriptoris humilitas, attollet eundem Tua Celsitudo; unde non leve referet decus, ac splendorem; si minus genium & immortalitatem.

### CELSISSIME PRINCEPS,

Senile ac modestum votum accipe, quod facio pro universa domo, tum Augusti Magnæ Britannæ Regis, Caroli; tum Celsissimi Arausionensium Principis Frederici Henrici: Illius, soceri Celsitudinis tuæ; hujus, Parentis; Utriusque verè Optimi Maximi. Diutissime salvi, atque incolumes, orbis universi, ac præcipuè Reip. Christianæ bono, rebus interesse humanis. Et quia vita hæc, quantumcumque diuturna, fragilis tamen dicenda est, & caduca; in memoria, atque ore bonorum omnium vivite; donec ista etiam vita cum orbe terrarum finem suum sortiatur. Denique solutâ hac mundi compage, corpore, animoque æternum vivite, cœlestibus choris permixti.

Amstelodami.  
c10 Id. LXII.  
xii. Kal. Jun.

Celsitudini tuæ Devotissimus,

G. J. Vossius.

### II.

*Nobilissimis, Amplissimis, Prudentissimis Dominis, Amstelod. Reip. Consulibus.*  
Alberto Conrado Burgio, Curatori Societatis Indiæ Occidentalis, Illustrissimorum fœderatæ Belgicæ Ordinum ad Potentissimum Russicæ Imperatorem, item ad serenissimum Daniæ Regem, Ex-legato, in Collegio etiam Illustrissimum Hollandiæ, & West-Frisiæ Ordinum antehac Delegato, Illustris Amstelodamensium Gymnasii Curatori.  
Cornelio Graef, Domino in Polsbroek, Societatis Indiæ Orientalis Curatori.  
Joanni Cornelio Geelvink antehac in Collegio, tum Illustrissimum Hollandiæ, & West-Frisiæ Ordinum, tum Præfectorum rei Maritimæ Delegato.  
Gerbrando Pancratio Curatori Societatis Indiæ Orientalis;

G. J. Vossius, S. P. D.

Nobilissimi, Amplissimi, Spectatissimi viri,

**I**nter tot bona, quæ doctrinæ temporum debemus, facile principem meretur locum, quod absque hac cœca sit rerum vete-

rum memoria: non quasi non & alterum ejus lumen sit; (quam tibi honorem terrarum, locorumque peritia deprecatur:) sed quia citra commemorationem temporum, præcipua rerum gestarum monumenta, quasi tritibus tenebris, spissaque jaceant caligine sepulta. Utcumque enim ex memorabilibus, atque exemplis, de amplo Veterum penu depromptis, non levem, tam pietatis, quam prudentiæ fructum capere sit, etiam ejus, quando quidque contigerit, ignaris: In totius tamen Orbis historia, vel magni, vel diuturni Imperii, totiusve Ecclesiæ rebus, si ordo gestorum sædè conturbetur, nã illa quidem, quæ videre nobis videmur, magis cernimus, quam eximiam, & ab omni arte laudatam corporis humani fabricam conspiceremus, solum oculorum aciem defigentes in monstruosam hominis figuram; ubi pectus, capitis; venter pectoris; brachia pedum occuparent locum. E contrario autem, ubi sese extulerit aureum temporum jubar: pulsas tenebris plusquam Cimmeriis clara omnia luce vestiuntur, inque formoso corpore omne membrorum decus apparet. Atque hoc est serenum; ac splendidum illud lumen, quod in historia exigimus; non modò, quò prudentiam magis habeamus ducem, tum in vita privata, tum gerenda Republica; sed etiam ad duo alia longè maxima, quæ Christianam Religionem propius tangunt; nimirum, ad certius cognoscendam Scripturæ veritatem; & ad mentem ejus melius perspicendam; præcipuè in rebus hoc seculo controversis. Quorum utrumque ubi otium fuerit magis otiosum, futilius diducam. Suffecerit nunc rerum carpere fastigia; ne existimemur, novum magis ordiri laborem, quam Epistola simplici, quæ Liber fieri nō debet, pauca præfari, tum de minutis duobus opusculis, quæ nunc publici juris facimus; tum præcipuè de nostro, & antehac, & in posterum, instituto; cujus Vobis potissimum, Nobiles & Spectatissimi Viri, rationem me reddere æquum existimavi, quando me hanc ipsam temporum scientiam in Illustri Urbis vestræ Gymnasio docere voluistis; proque vestro, erga literas amore, atque erga literatos munificentia, bellè adeò, comiterque jam annum habetis duodecimum; nec de me præclare mereri definitis. Ut igitur à priori fructu, quem Doctrinæ temporum tribuebam, initium faciam; pace illud omnium, qui tempora non attendunt, vel morantur, exquirere paucis lubet; unde potius codices eos, qui Canonem Scripturæ constituunt, à Prophetis esse, & Apostolis profectos, colligatur, quam quòd sicuti apud Nationes lampada alii aliis dabant, decurrentes

in Vulcanalibus, Prometheis, Panathenæis : Ita longèque certius, Ecclesia, fidelis Scripturarum custos, has ipsas, quasi de manu in manus, tradiderit nobis? Nec eo offendi aliquis debet, quod de Scripturis, ut traditionibus, loquar: cum hæ in iis, quæ Apostoli tradidere, familiam ducant. Illud potiùs dolendum, quod homines Profani etiam quæ scripto tradita sunt, in dubium vocent: Nempe quia, ut aiunt, quæ libris iis traduntur, res sint longè à temporibus nostris remotæ: cuiusmodi traditionibus non minus sæpè falli homines soleant, quam nummis adulterinis. Sed qui hunc in modum ratiocinantur, ignorare mihi videntur, veluti Argentariis est Lapis Lydius, quo metalla explorent ita cunctis temporum intelligentibus esse, quo internoscant traditiones veras à falsis, siue scriptis, siue non scriptis. In quorum utrisque, ita comparatum est, sicuti in catena videmus. Minuti enim artificii est, sic annulorum alios aliis subdere, ut juncturâ referant catenam, licet eorum nexus sit nullus. Hic si luscitiosi simus, vel contenti è longinquo intueri; facile quis oculos frustrabitur nostros. Sin etiam annulos tangere grave non ducamus; mox fraudem loquentur manus. Simile quid in traditionibus usu venit. Si quis enim in temporum scientiâ nihil, vel parum videat; facile persuaseris, ea, quæ, ut Græci loquuntur, heri & nudius tertius, tradi coeperunt, esse genuina Antiquitatis monumenta; nihilque nisi veritati consentaneum, complecti. Sed in temporum ratione, & eorum scriptoribus subactus, priusquam de rebus, vel Authoribus eorum, statuatur aliquid, omnem Ecclesiæ ætatem, tacitus animo pervolvit; donec vel concatenatio temporum traditionem comprobet veram, vel quispiam in ea defectus arguat falsam. Video quidem, non cuiusvis esse hanc viam insistere. Sed hoc loco non tam de quovis è populo loquitur; quàm illis alicujus in studiis nominis, aut progressus; quorum si qui ab hac scientia fuerint imparati, sibi vitio vertant; vel quando se quilibet gestit absolvere, per me licet, ut culpam omnem transcribant Magistrorum inscitiam, vel inertiam. Interea illis, quibus volupe fuit, ut sanè debet, sæculis singulis considerare providentiam Dei in Ecclesiâ tuendâ, servandâque; planè omnis hîc futura est via; modò paulum in eam cogitationem, quam diximus animum intendant. Equidem non diffitebor, quamquam id sine mœrore facere non possum, incidisse me in nonnullos, quibus de veritate Scripturarum non liqueret. Sed fuere illi partim indocti penitus, partim aliorum potiùs studiorum gnari, quàm vetustatis.

Vel si quis non penitus hospes in iis, quæ ad seriem temporum pertinerent, nihilominus in tam sancto negotio vix aliud, quàm ollas, & cucurbitas lippiret; ad manum facile erat remedium, quo saniores ad mentem reduceretur. Quantilli enim hoc operis est, apud temporum gnaros, per priora ire secula, donec perveniatur ad Christi Vaticinia, præcipuèque miracula? Quorum si magnitudinem consideremus, omnem exsuperant vim naturæ. Imperium enim exercuit Christus in aquas, ventos, arbores, pisces, morbos, mortem ipsam; ut qui mortuos suscitavit. Nimirum tota illi serviit rerum Natura; Eumque Deum, & Dominum suum agnovit. Jam quàm miracula illa multa? quàm varia? Nimirum non hîc, illic, patrata; non subinde, sed serie continuâ, præsertim in omnis generis morbis, vel tactu, vel solo etiam verbo, sanandis. Quid præterea iis certius? ut ostendit, quod non in angulis contingere; sed tam multa, tam populosa adiit loca, & undique magno ad eum studio accurreretur. Lustrata ei omnis Judæa, Samaria, Galilæa utraque, & terra cis Jordanem. Vel Hierosolymorum magnitudinem cogitemus, & isthic agentium multitudinem; præsertim Paschali festo: quo ex Flavio Josepho scimus, non minus istic erat, quàm vices sexies centena virorum millia. De miraculis verò quæ habemus (in finitis autem partibus plura fuere quàm scimus) tunc temporis illa prodiderunt Evangelistæ, cùm adhuc superessent multa adeo millia, apud quos miracula patrasset; ut quæ fecisset, præcedente, comitante, sequente plurimorum millium turbâ; quæ & stupore illorum Regem eum voluit creare. Quare neque veritatem miraculorum in dubium vocare ausi fuere hostes Christi. Quid aliud enim dixere Judæi, quàm Jesum ea facere ope Spiritûs impuri? Quasi non eò tenderent illa, ut destrueretur Diaboli regnum. Neque Gentiles aliud ei objectare, quàm Magicas Artes, quas in Ægypto didicisset. Quasi non inde admodum Infans cum parentibus sit reversus. Ut mittam, quod Magus nullus possit adferri, qui vel millesima ex parte, ea fecerit, quæ Christus, sine carminum vi, sine herbarum succis, sine ulla observatione sacrorum, libaminum, temporum; ut Celsò Epicureo ab Origene olim responsum fuit. Sed de isto, ut miracula Christi & magnitudine fuerint stupenda, planèque Naturæ vim excedentia; ut eadem essent numero innumera; ut tunc etiam longè certissima; figillatim alibi, & accuratè agemus. Atque idem de Apostolorum etiam miraculis, inò & illis, quæ proximis contingere temporibus, dictum velim.

Nunc

Nunc institutum prosequamur. A primis hisce Christianorum temporibus per antiquiora secula ad Orbis ascendere primordia, longè fuerit pulcherrimum. Sed enim plerique omnes laboris fumus fugientes. Ut sic quoque non leve quiddam me consecuturum arbitrer, si saltem unum hoc impetrâro, ut ne illi, quibuscum nunc mihi apud vos, Magni ac Sanctissimi Proceres, negotium est, antè inire temporum rationes desinant, quàm illas de Christi Miraculis subdlexerint probè. Ubi enim ex hisce clarè iis eluxerit divina Servatoris virtus: eadem hinc constabit, non solum de veritate Instrumenti Novi, sed etiam Veteris: quandoquidem, uti Moyses, & Prophetæ testantur de Christo; sic etiam Christus ad eos nos remittit, velut testes omni exceptione majores. Utinam verò, sicuti nos ex Instrumento Novo, de Veteri fumus certi; sic Judæi ex Veteri perspicerent veritatem Novi? Mutuò enim allucent facem; atque ita allucent, ut Novum Soli, Vetus lunæ, quæ à Sole lumen accipit, conferri mereatur. Sed enim Judæis quoque horribilis ea mentis cæcitas, iusto Dei judicio, obvenit ex temporum ignorantia. Nam cum hi parum admodum videant in gestis excidium prioris Templi consecutis; sine quibus LXX. Danielis hebdomades, aliaque tam præclara de Christo vaticinia, intelligi minime possunt: tum verò longè minus conspiciunt in temporibus Christi, & Apostolorum, quæque excidium templi secundi exceperunt. Ubi non aliud elogium promerentur, quàm isthoc quo (ut apud Platonem est) Græcos dignabatur Ægyptius sacerdos, semper eos esse pueros. Atque hæc quoties cogito, non possum non ambabus, quod dicitur, ulnis amplexare grande illud beneficium Dei, in populo suo conservantis historiam temporum, non illorum modò, quæ Christum antecedunt; sed Christi ipsius nascentis, in terris commorantis, adeo digna Deo præcipientis, de numine purâ mente colendo, nec in honore, vel opibus, sed Deo, & promissis divinis, fiduciam reponendo; coram tot testium oculorum millibus, tot, tantaque miracula patrantis; tam dura, atque aspera, mortem ipsam cum infamia, spontè etiam subeuntis; tertio die, uti pollicitus erat, resurgentis; inde quadragesimo post die, in conspectu Apostolorum, quingentorum etiam fratrum, ascendentis in cælos; exinde Spiritum S. Hierosolymis mittentis Apostolis: qui homines licet simplices, nullaque honorum vel commodorum spe, potius cum magna dirorum suppliciorum, à quibus Natura usque adeò abhorret, expectatione, Religionem Christianam longè adeo latèque per

totum terrarum Orbem, breviculo temporis spatio, non sine singulari Dei Providentia, & ingentibus miraculis, propagarunt. Quid si jam ulterius persequi velim consecuta quindecim secula, quibus Dominus noster, postquam cælos repetiit, ad dextram Patris confidens, Verbo ac Spiritu Ecclesiam suam adversus omne hostium genus defendit ac conservat? Sed enim suffecerit ista carptim, ac vellicatim attigisse: quando ea meditati obscuro esse nequeat, temporum notitiâ nos de Scripturæ veritate fieri peritiores. Proximum igitur est, ut in alterum (de quo præterea me dicturum receperam) considerationem paucis intendam: quomodo nimirum hæc ipsa temporum doctrina præstet, ut Scripturarum mentem facilius, certiusque, litigioso hoc seculo, capiamus. Omnes profectò experientiâ sua docti, non contumeliosè, sed verissimè dici, Ipsas auro magis aureas Scripturas, quæ omnia ad credendum, sperandum, faciendum necessaria, perspicuè satis continent, malè nihilominus posse intelligi. Et quis diffiteatur, non id modò habere in aliis locum; sed in sese etiam, ac unoquoque nostri; quando omnes sumus homines, ac errori idcirco obnoxii? In hac verò imbecillitate humana, non temerè illud à Tertulliano, Latinorum Ecclesiæ Scriptorum, quos habemus, vetustissimo, dictum fuit, Antiquissimum quodque verissimum. Ecquid igitur ingeniis modestis (nam illa Omnisciorum pro desperatis habemus) ad veram Scripturæ intelligentiam, atque adeo etiam ad Ecclesiarum pacem, fructuosius esse possit, quàm si ante omnia quidem, animo veritatis percipido, Deum in Scripturis loquentem audiamus, præsertim eâ linguâ, quâ divinitus sunt exarata: mox verò, quia nullus sibi uni, vel paucis secum, Spiritum Dei ad Scripturas capiendas vindicare debet, audiat quoque Spiritum in Ecclesiâ loquentem; eoque homines consulat pios juxta ac eruditos; ac novellis doctoribus superaddat antiquos; ut hoc pacto cognoscat, quid in Scripturarum interpretatione constanter amplexa sit Ecclesia vetus; quando, & ubi fuerit recessum à judicio vetustatis; quid primò, quid deinde, quid postremò placuerit; atque ubi primis, ubi mediis, ubi ultimis temporibus, vel alii alios tulerint, vel Anathema dixerint dissentientibus? Si aliter nos componamus, quomodo non in hac mentium caligine, cæcoque amore sui, crebrò, quod dicitur, à janua aberremus, dum suo quisque, vel etiam æqualium aliquot judicio, Ecclesiæ doctrinam, ac gubernationem metitur; prisca verò & meliora illa tempora, eò despicit, quia ignorat? Quamobrem nihil æquè miserum statuo,



statuo, quam quod iste Antiquitatis contemptus, sive segnitie juventutis, sive alia de causa, quam dicere nihil attinet, tanta quotidie capiat incrementa. Et tamen ea est temporum malignitas, ut vix liceat ulcus hoc Chironium tangere. Et si liceat, brevitatis instituti nostri nunc non sinat. Dolor interea expressit, ut quæ dixi, illustri comprobarem exemplo; idque eorum potissimum, apud quos vitium hoc præcipue dominatur. Quales censo qui Samosatani, vel Photini dogma orbi recoquunt Christiano. Nam si cuncta Christiani nominis tempora tacite animo percurramus; nullam comperimus Ecclesiam, ab Apostolis, vel iis, quos hi miserant, constitutam, quæ aliquem ejus sententiæ agnoverit Doctorem. Equidem non diffiteor, quod obtendunt, extremis Apostolorum temporibus, fuisse Ebionitas. Sed ulla ex iis, quas dixi, Ecclesiis dare poterunt, quæ vel decimo successionis gradu, multoque etiam postea, in defuncti Episcopi, Presbyteri, Diaconi, imo vel Hypodiaconi, Lectoris, Cantoris, vel Exorcistæ locum, prudens sciens Ebionitam advocaret? foris hi cœtus suos inibant; extra Ecclesiam erant, quam oppugnabant. Ex hoc genere est censendus Theodotus Byzantius Coriarius ille; qui postquam nihil pensi habuit novum dogma inducere de Christo mero homine, ob defectionem hanc, à Victore, Urbis Romæ Episcopo, qui anno ducentesimo, & antea, claruit, Christianam meruit communionem privari. Eiusdem farinae erant duo ejus Discipuli, Asclepiodotus, & Theodotus Trapezita: à quibus Natolius, auro corruptus, cum antea Confessorum choro accenseretur, Ecclesiâ relictâ, factus est Theodorianorum Episcopus. Hic postquam divinitus graves in somnis pœnas dedisset, vix tandem à Zephyrino, qui Victori successerat, in Ecclesiam est receptus. Quid nunc de Artemone dicam, atque omnibus ab eo profectis? Quid item de Samosatensi Paulo, Antiochenæ Ecclesiæ Præsule? qui nisi ab omnibus audisset Catholicus, nunquam per varios honoris gradus ascendisset, donec in ea Ecclesia teneret primas, ubi primò auditum fuisset Christianorum nomen; quæ etiam Ecclesiarum Orientis prima censeretur. Eo in honore Ordine illum præcesserant, Euodius, Ignatius, Hero, Cornelius, Hero alter, Theophilus, Maximinus, Serapio, Asclepiades, Philetus, Zebennus, Babylas, Fabius, Demetrianus; ut Paulus iste fuerit Præfulum Antiochenorum quintus-decimus. Sed operæ est cognoscere, quid virum tantum impulerit, ut desereret fidei normam, quam observassent tot sui decessores, viri sanctissimi, plerique etiam scriptis, & martyrio inclyti.

Vivebat iis temporibus Zenobia, Odenati vidua, Palmyrenorum Regina; quæ in Oriente longè latèque rerum potiebatur; multumque metuebatur à Perlis, Arabibus, Saracenis, Armeniis, Ægyptiis, diu etiam à Romanis. Cùmque doctissima foret ipsa, doctos etiam magno in pretio habebat; ante omnes Longinum, ea eruditione virum, ut viva Bibliotheca, & obambulans Musæum diceretur. Atque ille quidem Religione erat Gentilis; Ipsa autem Judæa; unde & doctissimos secum Judæos habebat. Horum commercio tantum profecit Longinus, ut præclaro admodum Elogio Mosem ornaret, aureolo, qui hodieque superest, Libello *de sublimi dictione*. Sed ut ea cum Judæis familiaritas, Longino profuit non mediocriter; ita è contrario perdidit Samosatenum. Nam cum eâ tempestate Antiochia, Syriacæ universa, in Zenobiæ forent potestate; sapius conflictandum erat Paulo, cum Judæorum doctissimis, & disertissimis. Ac magnopere quidem adlaborabat ille, ut & hi, & Regina ante omnes, (quæ cum magni faciebat, & à qua ipse majoris fieri cuperet) deinceps agnoscerent, Jesum esse promissum illum Messiam. Sed offendeabantur illi Doctrinâ Ecclesiæ, de uno Deo, Patre, Filio, & Spiritu Sancto. Quod etiam pertinebat, receptissima gratias agendi forma; *Deo Patri, & Filio, Domino nostro Jesu Christo, cum Sancto Spiritu gloria, & Imperium, in Secula Seculorum. Amen.* Siquidem Samosatani temporibus, utebantur hac norma, eaque à majoribus acceptâ; ut testis est locuples eorum temporum scriptor, Dionysius Alexandrinus; cujus de eo verba legere est, apud B. Basilium in præclaro de Spiritu Sancto opere ad Amphilochem Iconiensem Episcopum. Paulus ergò faciliorem hoc pacto sibi victoriam ratus, neglectâ priorum doctrinâ, in Artemonis castra concessit; Judæisque illud largitus fuit, unam esse *ἑνὴς αἰνῆς* Divinæ Naturæ, nec Jesum prius fuisse, quàm de Spiritu Sancto è Virgine Maria nasceretur. Non tulit tam scdam *συνοδικῶς* Synodus Antiochena; quæ propterea Paulo Domnum suffecit; approbante hoc ipsum Episcopo Alexandrino. Nempe nihil tale hæcenus, vel Antiocheni audierant, jam inde ab Euodii temporibus; vel Alexandrini, ex quo iis præfuisset Marcus Evangelista: quorum uterque Ecclesiis illis, præcipuis totius Orientis, primus ab Apostolis Episcopus datus erat. Patriarchæ Constantinopolitani sententiam nemo hic à me requirat, quando necdum nova erat Roma. At Veteris Romæ, & cum eo totius Occidentis, idem fuisse judicium de Paulo, partim eò scimus, quia Scriptores antiqui, ac fide digni,

digni, ita de hoc prodiderunt; partim quia etiam, dum Gentiles forent Imperatores, nec universalia haberi Concilia possent; ne non Apostolica de duabus in Christo Naturis per omnis orbis Ecclesias decurreret, cum aliter cavebatur, tum præcipue commercio literarum, quas dixere Pacificas, Canonicas, Ecclesiasticas, Communicatorias, vel etiam Formatas. His enim vel maxime, quod multi non satis attendunt, continebatur illa in Christiana fide contestatio hospitalitatis, ut eam vocat Tertullianus. Nulla quippe Ecclesiarum ab Apostolis edocta, primumve ab iis facta Doctorem, ignara erat doctrinæ, quæ ab Apostolicis in ea sonuisset temporibus; ubi quicquid memoriæ hominum, etiam longævorum, deesset, Ecclesiasticis supplebatur Archivis. Quocirca nec Samosateno, vel ejus affectis, nec omnino cuiquam, qui ab Catholica se Ecclesia separasset, Epistolas dedisset Canonicas. Cujus rei complures laudare testes possum. Sed fuerint omnium instar Optatus Milevitanus, & Hipponensis Augustinus; quorum Ille, cum Lib. II. urbis Episcopos memorasset ad Siricium usque sui temporis Episcopum Romanum, subjungit deinde; *Cum quo nobis totius orbis commercio formatarum, in una communionis Societate concordat.* Alterius est Epist. CLXIII. ad Eleusium & alios; *Hic primo asserere conatus est, ubique terrarum esse communionem suam. Quærebam, utrum Epistolas, quas formatas dicimus, possent, quod vellent, dare, & affirmabam, quod manifestum erat omnibus, hoc modo facillime illam terminari posse questionem.* Ac præcedenti etiam Epistolâ idem dixerat; *Unde factum est, ut etiam ad nonnullos Donatistarum primarios scriberemus, non communicatorias literas, quas jam olim, propter suam perversitatem, ab unitate Catholica, quæ toto Orbe diffusa est, non accipiunt, sed privatas tantum.* Nec horum demum temporibus ea formatarum cœpit consuetudo. Nam ut de Laodiceno Concilio taceam, deque ipso Niceno (quorum illud literarii talis commercii meminit Canone CXLV, hoc XVIII.) etiam Eusebius Pamphili in septimo Historiæ conservavit nobis hujus generis Epistolam; & quidem à Synodo Antiochenâ ad Dionysium Romanum, & Maximum Alexandrinum, in ipsius Samosateni causam exaratam. Quin ab excessu Apostoli Joannis annis quadraginta, vel etiam minus, obtinuisse eas in Ecclesia, vel ex vita Xysti apud Anastasium conspicimus. Vereor, ne promissam brevitatem, modumque Epistolæ, excedere videar, si alterius sermonem producam de duobus illis ingentibus bonis, quæ è temporum doctrina promanare dicebam. Ea parum ipse attendebam, cum animum ad hoc studium

appellerem, in prima penè adolescentiâ. Quid mirum? quando non tam judicio ad illud deferrer, quàm occasione Bibliothecæ, bellè adeo instructæ, etiam ab antiquis Ecclesiæ scriptoribus, quam reliquerat mihi doctissimus, idemque vetustatis amantissimus Parens meus. Sed quantò cum ætate altius me postea in hoc studium penetravi; tantò magis ejus necessitatem perpexi. Præcipue verò ex laboribus istis, vidi fructum me percepisse maximum, postquam Theologico Illustrium Hollandiæ, & West-Frisiæ ordinum Collegio Præfectus, cum Scripturis cuncta Ecclesiæ tempora jungerem: atque ita nullâ spe, nisi coelesti, laborem mihi ipse duplicarem. Idem amor, ac studium mansit, cum deinde in Leideni Academiâ, præter literas Græcas, omnem omnium temporum Historiam, Sacram, Ecclesiasticam, Civilem, enarrarem. Ac quamvis ut alia omnia, ita animum quoque auferre ætas soleat: nec dum tamen mihi, in illustri Gymnasio vestro idem studium proficenti, ardorem istum ætas extinguit frigidior; quin potius gliscit. Nempe majoris mihi fuit conscientia, quàm res fluxæ: eoque penè hoc uno metior cuncta, ut in die illa, quæ animo semper obversatur, otii pariter, ac negotii mei, faciliùs Deo rationem reddam. Quomodo animatus, quicquid mihi temporis à publico munere, auctoritate vestra imposito, restat, id omne, quatenus per indigenarum, ac præcipue exterorum interpellationes licet, in eo infuso, ut literarum etiam monumentis non male promerear de studiis, præcipue juventutis. Quocirca ut in aliis me artibus, ac scientiis factum; ita in doctrina quoque temporum, multa jam literis mandavi. Sed hæcenus penè omnia in Bibliothecæ forulis delitescunt. Interim tempora labuntur, atque ætas affecta aurem vellit, ac cogitare jubet de sarcinulis colligendis. Eo igitur animo sum, ut illis dem lucis usuram, in quibus perficiendis, & emendandis, minus operæ desideratur. Solum dubitavi, utrum satius foret, initium ducere, ab orbis, an Christi incunabulis. Verum enimverò licet temporum doctrina, præstantium virorum industriâ, nunquam majora ceperit incrementa, quàm seculo proximo; multum tamen vereor, ne non unius ætatis negotium sit, priusquam hæc scientia ad id fastigii adsurgat, ad quod aliæ quædam jamdiu pertigerunt. Nec propterea tam animo, quàm otio, mihi opus sit in exasciandis nostris. Utcumque enim viribus diffidam meis; bona tamen spes est, in hoc etiam studio, ubi toties noctem omnes offendimus, quò plures plura dicent, & conferent, eò citius posse tenebras discuti. Quocirca ab illis



illis Veteris Instrumenti paulisper recedam cum animo revertendi. Nunc verò exorsus à Novo, diatribam geminam; unam de sospitatoris nostri genere; alteram de annis ejus nati, baptizati, mortui, publici juris facio. Utramque, magni magnæ urbis Antistites, columnina Patriæ omni laude majora, amplissimo nomini vestro, L. M. Q. offero, dicoque. Nec ignoro, quanto majora meritis debeantur vestris. Sed cum non possum hoc tempore, quali vellem; volui, quali poteram testimonio, cultum atque officium nostrum testari. Et fidentior me faciebat, notissima omnibus æquitas judicii vestri; ut iniqui ipse judicii reus fuerim peragendus, si metuissem, ne libellis nostris plus demeret favoris, quod exigui forent; quàm adderet argumenti non præstantia modò, sed etiam difficultas. Et stultè adeo si sapuissem, sapientia tuâ errori nostro, vel in proximo de libellis nostris sermone, longè humanitatis, & affectus plenissimo, mederi potuisses, magnifice, ac amplissime Consul, Alberte Conrade Burgi, tot jam honoribus perfuncte, non in urbe modò partiâ, cum quavis urbe certante; sed in totius etiam Hollandiæ, ac West-Frisiæ Senatu; Legationibus quoque ad Russiæ Imperatorem, & Serenissimum Daniæ Regem, magna prudentiæ laude feliciter obitis, longè latèque celebratissime: tum autem (quod multis partibus minus sit licet, me tamen, & literarum studia, propius spectat) Athenæ nostri jam ab eo tempore Curator, quo sic Deo, & prudentissimæ urbis hujus Proceribus placuit, ut Ego, & ab omni laude cumulatissimus Collega meus, Gasparus Barleus, prima illius fundamenta, jaceremus. Ut verò porro etiam structura ejus pulchrior, pulchriorque exsurgat, & voce & calamo pariter adnitimur. Ac si vita suppetat, uberior deinceps animi hujusce testes dabo, non modò publici boni amore, sed etiam vestri: quibus si placebunt nostra, magis placitura sunt aliis, & Authori; quantòque vobis per hæc carior reddat, tantò ipsi etiam mihi carior fiam. Deus Opt. Max. porrò quâ terrâ, quâ mari, urbem hanc secundet; jam nunc licet felicitate, & rerum copiâ, nulli secundam. Atque idem familias vestras cunctis animi ac fortunæ bonis locupletet. Vos ipsos, ex bonorum civium, tot etiam eruditorum votis, Urbi, Ecclesiæ, Gymnasio nostro, imò potius vestro, sospites ac propitios, diutissime conservet.

*Amstelodami*  
 c. d. Id. xliii.  
 v. Kal. Nov.

## III.

*Serenissimæ & Sapientissimæ Christinæ.*

**N**ON dubito, Serenissima Regina, quin plerique, qui prolixum tuum erga me favorem, & beneficentiam norunt, valdè mirentur, nullum me hætenus grati animi signum ostendisse, cum tamen innumeri, quos nunquam obstrinxeris, in remotissimis etiam terrarum oris, virtutes tuas uno ore laudent, celebrent, & in cælum certatim evehant. Si vel insita quædam ignavia, vel aliud animi vitium, tam diuturni esset causa silentii, tantum abest, ut delicti peterem veniam; ut ultrò potius à te pœnam criminis efflagitarem. Sed me quàm longissimè ab hac culpa abesse; nemo potest ignorare, cui & mores mei, & ingenii mensura fuerit cognita. Si nunquam præsens essem contemplatus ea, quæ totus de te terrarum Orbis prædicat, miracula; fidentius aliquanto exigente necessitate, sermonem de te instituerem. Nunc verò cum videam ea ipsa, quæ de te jactantur, longè esse infra gloriam tuam, cum omnem prorsus famam virtute excesseris; eò sum redactus, Divina & Incomparabilis Regina, ut neque loqui, neque tacere de te possim. Vetat eximia illa erga me etiam immanentem benignitas, ut taceam; alterum verò & magnitudo tua, & ingenii mei prohibet tenuitas: Sed tamen si unquam turpe fuerit aliis siluisse, cum loquendi urgeret necessitas; mihi longè fuerit turpissimum. Ingratus meritis, vel malignus habear, si destitutus ea dicendi facultate, quæ tantæ convenit Majestati, non illa saltem proferam, quæ possim. Quod itaque te alloquar, non hoc facio fretus viribus, aut ingenio meo, neque enim me mea fugit imbecillitas, sed saltem, ut, si quod tacendo crimen incurrerim, illud oratione loquendo diluam, & repellam. Nec tamen ideo silentium rumpo, ut laudes tuas aggrediar; faciunt hoc ii, qui vel sunt, vel sibi videntur facundi, & disertis, à me enim uti virtus illa, ita etiam altera ista procul abest vanitas: hoc saltem peto, & obsecro, ut benigna & serena fronte munus, quod offero, suscipias, nec indignè feras, quod post tam longam moram, aliena pro meis audeam exhibere. Quamvis ut rectius loquar, tuum est, Domina, non alienum, id quod tibi consacro opus: Tibi quippe vivens destinarat Pater meus, tibi etiam moriens ultimis reliquit ceris. Sive tamen tuum sit, sive non, accipiendo id facies tuum, eritque, ut opinor, non minus gratum, quàm si meum esset, ino etiam gratius, quoniam & melius. Argumentum.

mentum operis quod attinet, ne hoc spero, adspernabere; continet enim ætatem, & scripta eorum, quos tu libenter à mortalitate una cum suis monumentis, si per fata liceret, adfereres. Vereor autem, Domina, ne plus doloris, quàm voluptatis hic tibi adferat liber; fieri enim non potest, ut non quam gravissimè commovearis, si in tot Veteris Græciæ lumina, tot præclaros, & inestimabiles Thesauros, avaros illos tuos & insatiabiles conjeceris oculos. Nudam quippe Scriptorum famam, solos laborum titulos, & quædam quasi humanæ sapientiæ naufragia hic conspicias. Nihil hic Theopompi, nihil Timæi, nihil denique Ephori, præter nomen: periere omnes, & quod maximè dolendum, periere sine posteritate. Neque hoc idè à me dicitur, quod iniquè de Historicorum huius seculi sentiam ingeniis, ut non illa etiam ea qua debeam æstimatione prosequar; sunt illi quod voluerint, dummodò sciant, multum se abesse à sublimitate Veterum, & quantum ipsi plebem superant intellectu, tantumdem se ab illis superari. Quamvis autem ejus rei causam reddere, non sit difficile, quid tamen opus eam multis explicare, cum eventus ipse manifestè id docuerit? Quis responderit stulto, quærenti, quare desipiat, nisi qui & ipse, pro stulto velit haberi? falsum verò est, quod quidam opinantur, ex quo desierint esse Heroes, desisse etiam eos, qui facta eorum memoriæ, & posteritati traderent. Cui non Veterum Heroum comparandus gloriosissimus tuus Parens? Quis non illum Regum, Principumque omnium diceret Maximum, nisi Majorem se genuisset filiam? Nullus tamen quod sciam, facinora ejus toto Orbe, & omnibus seculis memoranda, vel potuit, vel ausus est, literis, & æternitati consecrare. Hinc adparet hodiernis Scriptoris, non deesse argumentum, verum ipsos deesse argumento. Qua quidem in re uti, & in cæteris fermè, planè adversantur præcis, & vetustis Historiæ conditoribus; Illi quippe arte, & industria Heroas ex hominibus faciebant, isti verò culpa ingenii & facundiæ, Heroas, imò ipsos Deos, in homines, & quidem vilissimos, permutant, & transformant. Sed quid ego hic aliorum crimina commemoro, cum pulcherrimam laudum præ manibus habeam materiam? Invitus, Regina, aliena persequeretur vitia, si tuis prædicandis par essem virtutibus: sed eas percerere longè fuerit difficilius, quàm aliorum carpere errores. Labi quidem & errare, res est, ut factu, ita quoque dictu facilis. Tua verò virtus cum nihil habeat humanum, sed sit prorsus Divina & Immortalis, quis eam aggredi, & exprimere possit nisi cui cœlestis

quoque contigerit facundia? Nonne ego eundem incurrerem errorem, quem paulo ante in aliis reprehendebam, si heroicas, & incomparabiles animi tui dotes, tenuitate styli & eloquiū deprimere, & tanquam de cœlo in terram deducere conarer? Permitte, Serenissima Regina, si in me ingrati videatur animi indicium, de virtutibus tuis tacuisse, ne ingratus habear. Malim tu hoc videre, quàm prodere malignitatem, cujus ego manifestè reus peragar, si te modicè, & frigidè (neque enim aliter possim) prædicavero. Licet nihil aliud in te magnum, & memorabile occurreret, quàm quod fortunæ, & natalibus debes, esset id tamen majus laude, & præconio nostro: tantum quippe abest, ut sublimia illa, sceptræ & coronæ, sermone possim assequi; ut sæpè ne verba quidem succurrant, quibus amicis, & familiaribus meis satisfaciam. Sed verò cum fortuna, licet illa omnia dederit, minora tamen præstiterit tibi, quàm sint ea, quæ ipsa adquisiveris: quum propria te virtus, etiam supra diadema evexerit; vanus essem, & ineptus, si periculum virium facerem, & verbis attenuare mallet, quàm sacro silentio venerari ea quæ in te certatim concurrunt miracula. Huc accedit, Domina, quod laudare nemo te possit, sine gravissimo aliorum Regum, Principumque vituperio. Nam sanè etiam si aliquid prædicatione dignum in his sese offerat, id tua obumbrat gloria, vixque eorum supremæ virtutes eò adsurgunt, ubi tuæ incipiunt. Honorificum est illis trium quatuorve linguarum peritiam sibi comparasse. At verò quota hæc est pars tuæ laudis, cum linguas plerasque (barbaras tamen excipio) exactissimè intelligas, multas etiam sermone exprimas, idque tam eleganter, ut ne ipsas etiam Musas elegantius, disertiusque posse existimem. Et tamen, ut multas edidiceris linguas, plures tamen sunt, quæ te celebrant. Jam verò quàm in aliis regibus gloriosum habetur, si erga literas, & literarum cultores, benigno, & benevolo fuerint animo? Tu verò, incomparabilis Domina, non solum literarum amore teneris, verum etiam tantos in iis progressus fecisti, ut ne doctissimis quidem concedas; Tuæ certè ætatis omnes longè post te reliquisti. Quodnam est enim doctrinæ scientiæque genus, cujus non etiam penitissimos perlustraveris recessus? Poetas quidem & Oratores, qua Græcos, qua Latinos, partim legisse, partim memoriæ mandasse, ludus tibi jocusque fuit. Historiarum eam tibi comparasti cognitionem, qua nec majorem illi, qui totam ætatem huic studio consecraverunt. Illud verò mirandum prorsus, & inauditum, quodque non in Juvenem, nedum

in Virginem cadere existimasset, nisi tu sola exemplo nobis fuisses, evasisse te tam citò ad illa sacra, & abdita Philosophiæ penetralia, ad quæ alii assiduo labore, continuis vigiliis, vix tandem in extrema canitie pervenire potuerunt. Nescimus adhuc, Domina, propriâ ne industriâ, an verò singulari Dei beneficio, tantam sis adepta sapientiam. Quamvis enim rapido, concitatoque ingenio, annos & ætatem tuam præcurras: Quamvis etiam ea sis diligentia, ut nullum tibi tempus frustra effluat; & licet te quieti tradas, cum demùm major noctium pars præterierit, nunquam te tamen aurora dormientem deprehenderit; vix tamen patitur imbecillitas humana, ut tantum scientiarum, rerumque usum tam subitò, & inter tot regni negotia adquirere, & comparare tibi potueris: Cælo necesse est tam cœleste ad te pervenerit donum; neque enim ex sola Platonis, Plotini, similitumve institutione tanta repenti prodiis- ses. Sed quid attinet querere, cœlitusne infusum, an verò labore partum sit, id quod in te passim colimus, & admiramur, dum cœleste, & immortale id esse fateamur? Cesset itaque curiosa nimium, & inutilis illa inquisitio, cesset etiam omnis laus; cum laudare non possumus, id quod quale sit, & unde habeas, ignoremus; sed tamen cùm Divinum id esse agnoscamus, permitte ut te adoremus. Si enim unquam honor, cultusque divinus sine crimine, & errore cuiquam conferri debuerit, debuit tibi, incomparabilis, & adoratione dignissima Regina. Merces hæc est exigua, si virtutes tuas, ingentiaque quæ in me contulisti beneficia respicias: Tanta quippe illa sunt, ut etiamsi mihi millies vita, quam dego, recurreret; millies me mors opprimeret, prius quam tuorum erga me meritorum partem, vel minimam deponerem. Sed tamen neque tu majus aliquid expetis, neque ego aliquid majus possim reddere, quàm animum purum, devotum, & intemperatum, quo te æternum colam, venerer, & adorem.

*Humilissimus Servus,*

J. V.

IV.

*Illustrissimo & Celsissimo Heroi, Georgio Villiers, Duci, Marchioni, & Comiti Buckinghamiæ, Comiti Coventriæ, Vice-Comiti Villiers, Baroni Waddonia, summo Thalassiararchæ Angliæ, & Hiberniæ, & Principatus Walliæ, Gubernatori omnium Arcium, & Castellorum Maritimorum, & Classium Regiarum, Magistro equitum Regis, Domino Wardeni, Custodi sigilli Regii, & Thalassiararchæ quinque Portuum & membrorum ejus, Dynastiæ arcis Doverensis, Justitiario in Eyre, omniumque Regis Sylvarum & Saltuum cis fluvium Trentensem, Dynastiæ Regiæ Arcis Windesoriensis, Primario Cubiculario Regis, Præfidi Synodario Ordinum & Regnorum Angliæ, Scotiæ & Hiberniæ, Equiti Nobilissimi Regii Ordinis Garterii, Cantabrigiensi Academiæ Cancellario, &c.*

*Illustrissime & Celsissime Dux,*

Tenuis ille ego conditionis, & Academicis spatiis, atque umbris assuetus, affari nunc ausus sum Celsitudinem tuam; virum videlicet, Principem, quem alma Parens natura, non solum generosâ adeo domo, prodire in lucem jussit; sed nascentem etiam oculis ita blandis intuita sit, ut cunctas illi corporis, atque animi dotes largiretur. Quem deinde sapientia pariter, ac virtus, quasi ex se natum, à teneris unguiculis educarint. Quem firmâ jam vigentem ætate, Augustæ memoriæ Rex Jacobus, sagacissimus ingeniorum, & meritorum æstimator, in arcana suæ Majestatis consilia adsciverit: Quem idem serenissimus Rex (quod ob fluxam quorundam principum fidem, & aula- rum illud incertum, non minoris duci debet) ut prudentissimum, observantissimum, fidelissimum, expertus est semper: Ita, quamdiu rebus ipse præfuit mortalium, amore complexus est incredibili: Imo quem filio, eique unico, quod omnes exsuperat titulos, anticipis plenum iter sollicitudinis facturo in Hispanias, non tam comitem dederit, quàm ducem: Quem multò etiam habuit cariorem, postquam luculentæ adeo fidei, & prudentis felicitatis conspexit indicia; partim in eo, ut varia eluderentur consilia, aliò spectantia, quàm sperabatur; partim ut salvum ac sospes Patri, Patriæque lusteretur carissimum utri-  
que,



que, & naturæ juxta ac factorum lege, tot regnorum imperio destinatum pignus. Quæ quanti singula sint, & summus Rex, & Rege eo dignissima proles, satis intellexit; & abundè testatum fecit sanctissimus Procerum conventus, cum propterea, totius regni nomine, celsitudini tuæ prosperè reduci, verbis honorificentissimis, gratias egit immortales. Nec limitibus eorum temporum continetur inclytum nominis tanti decus. Nam Rege Jacobo in meliora alterius vitæ regna translato, ille tot, & terrarum, & virtutum Patris hæres, Optimus Maximus Rex Carolus, non domestico solum exemplo, sed suo etiam incitatus judicio (quod in lubrico hoc rerum humanarum palmarium censetur) simili celsitudinem tuam affectu prosequitur, atque ita prosequitur, ut dies amore eum non imminuat, sed augeat. Adde istis, quod non solum generosæ illius vestræ, ac laudatæ undique Britannicæ gentes; verum multæ etiam præclari nominis extræ Nationes, præconiis toties in cælum tollant nomen tuum; quoties iis in mentem venit virtutis Heroicæ, è tam arduis relucens negotiis, quæ tot jam annos sustines; atque inter ea è legationibus ad Potentissimos Reges, & fœderatam etiam hanc Belgicam susceptis. Accedit denique, quod favor cœlestis, ac Regia Majestas tot unum, & tantis ornarint honoribus, ut qui non simul cogit, ut in uno etiam multorum merita, ac dotes concurrant, is nec judicium duorum Regum, nec Dei ipsius, in cujus manu sunt Regum corda, satis intelligere, atque æstimare posse videatur. Meditantem me ista, majora propè omnia, quam ut mei similes, non dico enarrare illa, sed vel concipere animo satis valeant, qualiscumque cœpit oblivio mei; quæ tantum apud me potuit, ut nunc hanc sumpserim fiduciam compellendi Celsitudinem tuam. Facile enim mihi excidi, dum totus extra me summam in admirationem rapior virtutum tuarum. Et cui non earum splendor mentis aciem præstringat, cum tantus is sit, ut, solarium instar radiorum, haut alios foriatur fines, quam eos ipsos, quos terrarum Orbis agnoscit? Attamen accessit èd alterum quoque: Nam quantum ab alloquio Celsitudinis tuæ arcebat excellens dignitas; tantum revocabat eximia, & quasi privati hominis, in fortunâ eâ publicâ, humanitas; præsertim erga eos omnes, qui feliciter literas nostras colunt. Quis enim obtusi adeo pectoris est, ut ignoret, summum Celsitudinis tuæ ardorem erga doctrinarum studia, ac Musarum Sacerdotes? Usque adeo multa magnæque hujus cœlestis animi argumenta præbuit. Sed ea melius posteris referet Britannia, quæ

uti grande adeo depositum terris exhibuit, ita èd feliciter gaudet. At solum extero mihi attingere liceat, non leve hujus amoris documentum, quod hîc vidimus, cum Legationem obires apud Belgas. Periculum erat, ne, Reip. literariæ damno, misère dispergerentur Linguarum Orientalium codices; quos summus vir, & amicissimus Collega meus Thomas Erpenius à *μαρσεῖτις*, ex Oriente, Africa; terris aliis, tot annis, maximis periculis, & impensis congestisset. Vix illud cognoras, cum ecce, Celsitudinis tuæ jussu, ac liberalitate summâ, nobilis Bibliotheca, publico, ac imprimis Cantabrigiensi Academiæ bono, quasi ab orco redimitur. Quamquam verò magnum hoc fuerit; quantum tamen est, præ aliis tam multis, quæ commemorare nunc longum foret? Et miremur quotquot, si ita fas sit loqui, Apollinis, & Pallados delubra frequentant, etiam novum hoc Britannicæ fidus respicere, velut tutelare studiorum numen? Quis igitur satis prædicaverit singularem prudentiam Almæ Cantabrigiensium Academiæ? quæ exuberanti huic erga scientias affectui, cæterisque virtutibus, cultum tributura, quem maximum posset, cumulatissimos illos honores, Cancellarii, ut nunc loquimur, adauxit dignitate: Quâ profecto nihil pulchrius, aut majus aspiciam; Orbis habet eruditus. Et quod pretium addit, præclarum hoc amplissimi, ac clarissimi *οὐλίνις* judicium, quemadmodum à præstantissimis viris accepimus, Regi ipsi Carolo eximiam attulit voluptatem. Tanti Regis exemplo, quem non modò rerum Britannicarum custodem; sed etiam doctrinarum omnium vindicem, ac statorem dicere possumus, mihi quoque ex ima Literatorum caveâ, fas, ni fallor, erit, non gaudere modò, sed etiam gratulari, tum Celsitudini tuæ, ob luculenti hujus honoris accessionem; tum celebratissimæ Cantabrigiensium Academiæ, cui exoptatus adeo, obtigerit Tutor, ac Patronus. Atque eo impensius, & illi gratulor, & mihi gaudeo, quia nescio quod astrum usque adeo me Academiæ illi temperat; ut licet terrâ marique disjungar, nec ultra vulgarem scientiæ modum quicquam mihi ausim arrogare; tamen tantillus ego, ante annos pauculos, non inidoneus visus sim, qui eodem arcefferer, ut adderer Doctoribus juventutis, sideribus sanè fulgentissimis, non modò in Britannia sua, sed universo Orbe relucens. Sed enim mihi in hisce Batavis Athenis compedes tum injectæ fuerint partim Procerum nostrorum consilio, quod penè-imperii loco ducebam; partim meorum valetudine adversa; partim conjunctissimi cujusque precibus. Attamen non eo minùs debere me

C 2

profiteor,



profiteor, & inclytæ illi Academiæ vestræ, & ante omnes, Illustrissimo Baroni à Broock, viro, seu præclara ejus erga Britanniam omnem merita, seu erga studia, ac literatos, amorem consideremus, immortalitate longè dignissimo; cujus munificentia summâ ea mihi laudis, ac gloriæ seges offerebatur. Verùm beneficium Mecænatis hujus (quod cum maximum sit, tralatitiè profectò dici non debet) alibi à nobis melius celebrabitur. Ad Celsitudinem tuam redeo, Dux inclyte, cujus nunc patrociniò, læta Cantabrigiensis Academia altius caput effert, & quamvis maxima, majora tamen de se promittit, atque, ut reor, jam in monumentis præclaris, quæ feliciter parere nunquam desinit, etiam ea meditatur, quibus excelsum nomen tuum, & memoria tot benefactorum, ad seros nepotes propagetur. O pulcherrimas in amore hoc vices! Honorem Academia detulit, & deferendo accepit. Auctior, ornatioque est tanti Herois præsidio: sed vicissim ea præsidium, ac decus suum exornabit, dum studiis in Orbe constabit honos suus. Tanta Celsitudinis tuæ conjunctio, & Cantabrigiensis Academiæ, cum animo obverfaretur meo: Equidem existimavi, eadem me operâ consequi utrumque hoc posse; ut aliquo ingenii & industriæ monumento ostenderem, tum quanti faciam heroicas virtutes Celsitudinis tuæ; tum quanto affectu prosequar, illam à tot seculis florentissimam, quam dixi, Academiam vestram, ac meritis fortasse nulli terrarum secundam. Cæterùm ita animato nulum ex iis, quæ sub manibus haberem, nobilius occurrebat argumentum, quàm hoc de Historicis Latinis. Mitto enim quod historia omnis, & otiosos oblectat, & negotiosos instruit, tum ad vitam privatam, benè beatèque degendam; tum ad eandem in imperio domi, bellique prudenter componendam. Illud solum dicam, quod, seu ea pars operis nostri spectetur, quæ tracto, de Historicis Gentilibus; proderit is labor interiorum amantibus literarum; seu pars consideretur, quæ de Historicis ago Ecclesiasticis, non ingrata aut inutilis erit commentatio nostra, Theologiæ, & Antiquitatis Ecclesiasticæ studiosis. Nempe utrumque laborem conjunxi, ut utrisque prodessem, qui in utroque illo studii genere, majorem ætatis meæ partem posuisssem. Et si autem juventuti imprimis defudavi; non tamen opus hoc, quod nomini Celsitudinis tuæ sacraretur, planè indignum putavi; partim quidem, quia, qui Academiæ nobilissimæ tutelam geris, etiam optime vis studiis omnium; partim verò, imò imprimis quia, qui ipse heroicis virtutibus, ad æterni nominis decus, magnis passibus jam tot an-

nos contendis, non potes non amare scriptores eos, qui benè malèque gesta posteris tradunt, & ea prodendo etiam alios ad immortalitatem nominis parandam accendunt. Aliquid etiam ad commendationem operæ facit, quod, quatenus potui, complectar, quotquot intra XVII. secula & ultra, rem historicam scribendo juverunt: in quibus licet aliquot, vel minuti ipsi, vel minutæ rei narratores intercurrant (idque propterea quia nihil contemnendum putavi, à cujus notitiâ, vel temporum series pendèret, vel lucis aliquid historiæ accederet) majori tamen ex parte, vel viri eximii, vel mediocres saltem se offerunt: Inque illis Senatores multi, atque etiam Consules Romani: Viri item Principes, atque adeo Reges, & Imperatores: ad hæc nobilissimæ cujusque Ecclesiæ, etiam Britannæ vestræ, antistites, viri sæpè sanctimoniam præcellentes, judicioque omnium jam diu cœlo adscripta nomina: nonnulli etiam eo commendabiles, quod ut poterant, de rebus præclaris scripsissent. Atque hi omnes, quatenus in relictis à se monumentis hodieque vivunt, pariter sese dant in Celsitudinis tuæ clientelam. Eoque id libentius faciunt, quia in iis comparent multi, quorum vel nomina hæcenus aliis prodita non sint, vel opera intercidisse falsò sit persuasum. Quales non paucos in Bibliothecis publicis, aut privatis amicorum, vel etiam propria latitantes, partim vidimus, & legimus; partim præstantium virorum judicio cognovimus; quorum singulis symbolam suam, uti mos est meus, candidè ubique refero acceptam. Ab hisce Christianis, externis, magnis, mediocribus, minutis, editis, ineditis, plusquam mille & sexcentis scriptoribus, sperat labor noster, à seculo hoc, & posteris, pretium se illud accepturum, quod alioqui ab ingenio Authoris consequi se posse desperat. Atque eâ fiducia hanc tenuem, ut videtur, operam, sed satis profectò operosam, & cui deinceps etiam, si Deus mihi otium concesserit, limando, augendo, curam sedulò impendere decrèrim, ausus sum offerre, ac dicare maximo, & illustrissimo nomini tuo. Quod si eam non ingratam, tum Celsitudini tuæ, tum clarissimis Cantabrigiensis Academiæ luminibus, fuisse intellexero; erit sanè quod gaudeam; simul ad majora mihi animus magnoperè addetur.

Inclyte Dux,

Deus Opt. max. faxit, ut tardè cœlos petas, quò tot Regnorum Regi, regisque tanti regnis, simul florentissimæ Academiæ Cantabrigiensis, ac universis literis, & literatis,

teratis, diutissime profis. Id quidem vel-  
le, & orare Deum, quamdiu potero, non  
delistam.

Ludg. Bar. pridie  
Kal. Jun. Anno  
cdo Idc xxvii.

Illustrissime Celsitudini Tue

Humilime devotus,

G. J. Vossius.

V.

Carolo, Dei gratia magnæ Britanniae  
Principi, Duci Cornubiæ, & Rosaiæ,  
Comiti Cestriæ & Carictæ; Filio Pri-  
mogenito invictissimi Monarchæ, Ca-  
roli, Magnæ Britanniae, Franciæ &  
Hiberniæ, Regis, Fidei Defenso-  
ris, &c.

**D**IES nulla, celsissime Princeps, obli-  
vione delebit memoriam eorum, quæ  
litteras, maximèque sacras colentibus conferre  
non cessat, Augustissimus Rex Carolus, tuus,  
idemque Patriæ Parens, & iis qui studia tra-  
ctant, quali numen tutelare. Cùm enim  
amplissima possideat Regna, ac præstantium  
ingeniorum adeò feracia, ut exteris minimè  
indigeat; novi tamen Triptolemi instar, be-  
nevolentiae semina, non in sua modò Britan-  
nia, sed aliis etiam terris, longè latèque spar-  
git. De se Gallia, & nationum cætera, præ-  
dicabunt. Mihi tacere sit nefas, de foederata  
hac Belgica; ubi me licet insperantem, uber-  
rimo beneficiæ naturæ suæ fructu sic ornavit,  
atque auxit, ut quoties me proprio pede me-  
tior, divinam hanc benignitatem vix cogita-  
tione, nedum verbis assequi possim. Eo ma-  
gis jam diu laboro, ut de sanctiore studio-  
rum penu quæpiam depromam, quibus me-  
morem, gratumque, saltem ut possim, ani-  
mum erga dominum, Regemque meum tes-  
ter. Sed cum ea in tam occupato vitæ ge-  
nere necdum ad editionem publicam matu-  
raverint; & nihil ita deproperari debeat,  
ut operâ tumultuariâ publico minùs prosum;  
sensim hinc in cogitationem deveni, aliquid  
interea præstandi, quod tibi, serenissimæ Ma-  
jestatis Primogenito, non incongruens vide-  
retur. Ætas enim tua, illustrissime Princeps,  
jam literaturæ est idonea. Opus autem hoc  
est de literis, syllabis, vocibus, & earum  
nexu; quorum etiam omnium causas, prout  
otium & tempus ferent, hinc poteris haurire.  
Haut equidem diffiteor, multa à nobis differi,  
quæ in regnorum ingentium spem crescenti

delibare suffecerit. Attamen, vel longè me-  
ratio fugit, vel tantulæ ætatis tanto Principe  
non indignum erit, si cara Britannicæ Nobili-  
tatis pignora, atque alii etiam, quibus nostra  
istâ, vel iis similia, plenius sint cognoscenda,  
non aliunde ea, quàm à principali tuo fatis-  
gio, velut lumen à pharo accipiant. Imo quis  
dubitat, quin laudi maximæ sit futurum, si  
quantùm stemmate Regio, tantùm universis  
etiam literis præcellas; juxta illud Mæonil  
Vatis, magno quoque Pompeio commenda-  
tum olim à Possidonio:

Αὐτὸν αἰεὶ δὲν, καὶ ἀνέειδον ἑμὲ καὶ ἄλλων.

Siquidem aureum hoc dictum, in doctrina-  
rum quoque studiis locum sibi vindicat;  
maximèque apud Magnæ Britannicæ Princi-  
pem: à quo, si à Regiæ Profapiæ quoquam,  
non Regnum hoc modò, sed verò Orbis  
Christianus, solidam potius, quàm umbrati-  
lem, & tralatitiam doctrinam exspectat.  
Quod quas faces, quos stimulos, subdere  
animo oportet? Nec obscura est ratio, cur  
tam pulchram omnes opinionem concepe-  
rint; quando si universa terrarum regna  
conferamus, nullum comperiemus, quod  
Principes tot genuerit doctrinâ non minùs,  
quàm sceptro insignes. Quin in eo videmus,  
raro prorsus exemplo, in Societatem hujus  
gloriæ etiam venire Reginas. Non jam ab  
ovo, quod dicitur, rem arcessam; ut olim  
Antimachus Clarius, sive alius potius, qui  
rem Trojanam scripturus, ab Jove est auspi-  
catus, in olorem converfo, Ledaque ovo,  
Helenam unde natam fabulantur. Et tamen  
nostra se quoque offert nobis Helena, sed  
Christiana, eaque Augusta; Flavii Constantii  
Cæsaris conjux, unica Coili, apud Britannos  
Regis, Filia, Regni que hæres, & artibus iis,  
quæ liberales dicuntur, assatim exculta, nec  
Latinis solum literis, sed Græcis etiam versi-  
bus pangendis excellens: eaque omnia, si  
Pontico Virunio fides, à Parente ipso edocta,  
quò, eo vitâ functo, digniùs succederet.  
Nec in laudes excurram Edithæ, Comitissæ  
Cantiani Filiæ, Edvardi Confessoris, Regis  
optimi, & pro temporibus iis, eruditissimi,  
Conjugis dignissimæ; quam incredibilis fu-  
isse doctrinæ, Gervasius Dorobernensis au-  
thor est. Prætereo quoque Mathildis cog-  
nomento Bonam, Milcolumbi Scotiæ Regis  
filiam, triumque in ea Regum, Edgari,  
Alexandri, & Davidis sororem, Henrico I.  
Anglorum Regi nuptam; quæ & ipsa non  
eruditionis minùs, quàm pietatis laudem me-  
ruit. Omittam quoque cæteras, quas alter-  
utrum vetusto ævo Regnum dedit; meque  
intra Henrici VIII. prolem continebo. Quam-  
quam

quam nec immorari hinc animus Mariæ, literis Latinis ac Græcis, optimisque scientiis imbuta, magnamque id partem de consilio Ludovici Vivis, viri ut variæ doctrinæ, ita sapientiæ prope incomparabilis. Nimirum, pro instituto nostro, una suffecerit Elizabetha, literarum, linguarumque scientiâ ad miraculum instructissima. Necdum ea annum implebat septimum decimum, cum tersè loqueretur, non Gallico solum, vel Italo sermone, sed etiam Romano; Græcè quoque lætaret, primum novi fœderis codicem, hinc alios atque alios, imprimis Sophoclem; imò Iſocratis illam ad Nicoclem, & alteram, quæ Nicocles inscribitur, Latinè redderet. Et quod majorem habet admirationem, non refedit ardor ille studiorum, ubi regium tenuit sceptrum; sed tum quoque, nisi per regni negotia staret, versare illa præstantissimos Latii, ac Græciæ Scriptores, inde linguam expolire, animum salubribus pascere præceptis, & exemplis. Imò hucusque ejus progressam esse industriam accepimus, ut de consolatione Philosophiæ Boëtium, de arte Horatium, de Jugurtha Sallustium, de curiositate Plutarchum, & alios qui me fugiant, Anglicè verteret, suâque manu transcriberet. Quid quod tum etiam ingenii sui aliqua condidit monumenta; in quibus non infimum locum merebantur tot orationes, non minus illæ Romani sermonis puritate, quam sententiarum pondere, commendabiles. Earum habuit alias ad exterarum gentium Legatos, alias ad Angliæ suæ Academicos; quorum studia quantoperè foverit, grandi illud argumento erit, quod curarit quotannis sibi commentariolis perscribi, qui potissimum, & qua parte excelleret, ut ita virtuti cujusque melius pretium rependeret. Atque hæc eo potissimum animo, illustrissime Princeps, à me dicuntur ne sublimem erectamque mentem, cujus femina jam exerere sese cupiunt, sic unquam demittas, ut alter sexus, etsi & ipse laudatissimus, doctrinæ nomine prævertat. Sed de sobole hac optimi maximique Regis Caroli, Jacobi sapientissimi nepote, longè alia omnes auguramur, certoque nobis promittimus. Quin igitur, quod tam generosâ indole dignius, Heroum potius, quam Heroinarum exempla ob oculos ponimus? Ante omnes Constantini Magni, qui Britanniam tuam, quamvis antea, & rebus gestis nobilem, & eo nobiliorem, quod prima Provinciarum fidem recepiſſet Christianam, partim nascendo in illa, nobilissimam fecit, partim eò quod imperator, hinc salutat, & illam, & quicquid terrarum Christum recepit, immortali sibi beneficio obstrinxit. Felicitas enim illa Arviragi esto, quod eo potissimum

Rege, in Britannia primò sonuerit Evangelii tuba, occinente sive Apostolorum aliquo, sive Josepho Arimathæo. Laus quoque ea fuerit Lucii, quod primus Regum, quos quidem legerim, palàm professus sit fidem Christianam, & illa Britanniae parte, quam tenuit, publicè jussit doceri. At quanto major hæc gloria Constantini; qui non in Britannia solum Religionem instauravit, Diocletiani persecutione atrocissima propemodum extinctam; sed primus etiam imperatorum per orbem Romanum templa aperuerit Christianis. Vestratem verò hunc, ac Romanorum juxta, Principem, literarum studiis fuisse deditum, nec legere contentum, animum etiam appulisse ad scribendum; præter nobiles Britanniae Scriptores, testes habemus locupletes, Eutropium sophistam, & Aurelium Victorem. Addit illud Cæsariensis Eusebius, quando per otium liceret, Orationes meditatam, quandoque etiam habuisse, confluentem innumerâ multitudine, ut Philosophantem audiret Imperatorem. Nec inficias ivero, studiorum decus & gratiam non mediocriter jacuisse, ex quo, fractis Romanorum rebus, Vortigenus Rex à Saxonibus majore Regni parte exutus fuit; & Christi ac literarum cultoribus non alio ferè, quam in loca ob montes ac paludes prope inaccessa, maximèque in Walliam, tutus patuit receptus. Quam tristis Britanniae tum facies fuerit, non meliori alius fide dicit Gilda sapiente; ut qui ipse fuerit Britannus, & annis non amplius quatuor & quadraginta ab Saxonum in eas terras adventu, frui cœperit hujus lucis usurâ. Sed rediisse videntur tempora aliquanto lætiora paulo ante annum à nato servatore sexcentisimum, cum Gregorii Magni discipulus Augustinus, primus Dorobernensium, sive ut nunc dicimus, Cantuariensium Archiepiscopus (à quo Reverendissimum D. Guilielmum, grande Ecclesiæ totius præsidium ac columnen, tertium jam supra septuagesimum numeramus) publicam Religionis nostræ professionem, quibus in locis à Saxonibus pago deditis propè fuerat deleta, restituit, sed ita restituit, ut omnia juxta Romanæ Ecclesiæ faciem conformaret. Hic enim ille est, qui, cum pauci adedò ut pietate, sic doctrinâ conspicui forent, eo minore negotio Angliæ Ecclesias, Orientis antea sive Græcis Ecclesiis magis convenientes, ad Romani Pontificis obedientiam, Romanæque Ecclesiæ constitutiones, primum quantum potuit, adstrinxit. Ac paucis post annis in aliis Britanniae partibus idem Paulini, & Felicis studium fuit; Illius apud Northambros, hujus in Norfolcia. Nec longo inde temporis intervallo, idem præstitum Wilfrido apud Saxones



ones Australes. Ita plurimis per Angliam locis Religione, & literis unâ redditis, difficile dictu est, quantus subito doctrinarum ardor habuerit Reges. In his Sigebertum, Orientalium Anglorum ab Uffa quintum; qui ditione suâ scholas instituit passim. Utrum verò inclyta illa, nec satis unquam laudata Cantabrigiensium Academia, ac ob privata etiam merita, multò mihi carior, Sigeberto huic sit obstrictior, an Lucio Regi, vel alii priorum, aut è posterioribus Alfredo, vel primo secundove Eduardo; nec nostri ingenii est decidere; nec, opinor, tale illud, ut vehementem animi concertationem mereatur. Eo igitur superesse, ad Inam potiùs venio, Occiduorum Saxonum Regem, Kennethi Regis filium, qui anno sexcentesimo octogesimo nono Cedwallæ successit, atque ut bellò, ita etiam doctrinâ, multum sibi gloriæ peperit. Quid jam de Celwolfo dicam, Northumbriæ Rege? quem ab literarum peritia, valde laudat Malmesburiensis, præeunte etiam venerabili Beda, qui, Anglorum Historiâ à se conditâ, tanti potissimum Regis iudicio standum putavit. Quid item de Osa, magno Merciorum Rege? à quo Bedæ non degener Discipulus, Albinus Flaccus, Legatus ad Carolum magnum missus, posteaque ejus, ut vocabant, deliciosus Magister, author tanto Regi fuit, Parisiensium in Galliis, Ticinensis in Italia Academiæ condendæ. Nec indictus mihi abibit Etelwulfus, fortissimi Regis Egberti Filius, Wentanus priùs Episcopus, postea Occiduorum Saxonum Rex, Caroli Calvi æqualis; qui doctrinæ suæ decus, magnam partem acceptum retulit Helmetano, Wintoniensi Episcopo, & Suithuno Monacho eruditissimo. Quibus præterea laudibus, prosequar Ethelwoldi hujus Filium Alfredum Regem? Qui, quamvis Parentum incuria, ab anno demum duodecimo, literis Latinis serio incubuit; qua de infelicitate suâ grandiori ætate sæpius querebatur: Incredibili tamen amore doctrinæ postea semper exarsit, eruditos multum æstimavit, & ad dignitates evehit. Ipse etiam, ut de Veteris Novique fœderis Libris taceam, Bedæ Historiam Anglicanam, Boethium de Philosophia, Orosii Orchestram, Gregorii Magni Pastoralia aliaque haut pauca, Saxonice reddidit: quod Guil. Malmesburiensis, & Ranulphus non sinunt nos ignorare. Illud verò prope fidem exsuperat, quòd tantus Rex, ut ei perfamiliaris Asser Meneventis refert, *Filios eorum, qui in Regali familia nutriebantur, non minus propriis diligens, omnibus bonis moribus instituit, & literis imbueret, solus noctu diuque non desinebat.* Ac credo, admiratione talium, Martinus Papa, Anglorum scholam, quæ Romæ erat, ab

omni tributo immunem esse jussit. Et quantum gloriæ idem Rex peperit, extremis vitæ temporibus, præclare adeò merendo, de Oxoniensium studiis! Quorum florentissima Academia nunc caput cœlo infert: Eoque majori à me cum voluptate memoratur, quia excidere animo meo nunquam poterit, quantum mihi honoris, cùm ante quinquennium pedem in ea primùm posuissem, habitum iverit immerenti. Utinam modò summis, & hujus, & illius Academiæ in Anglia viris, uti apud animum memorem stat beneficii gratia, ita possim officiis respondere. Et unâ cum iis, triga ut Charitum fiat, venerando, sanctissimoque Cantuariensium Ordini; cui quod indignus licet, dignatione tamen Augustissimi Regis Caroli additus, sub Reverendissimo, & Illustrissimo Antistite D. Guilielmo, loci hoc teneam, non plurimas solum molestias, quibus nunquam piorum caret vita, deterget; sed etiam ad melius meliusque, de Ecclesiâ, ac Rep. literaria merendum, plusquam dicere possim animi addit. Sed longius jam abeo ab Alfredo Magno; qui anno Christi nongentesimo excessit. Post eum Edvardus Senior, qui feliciter toties adversus Danos rem gessit, Alfredo patre erat, ut Monasteriensis ait, *potentiâ pariter, & dignitate gloriosior, sed literarum cultu inferior.* Qua parte longè præstitit frater hujus Ethelwardus; quippe qui, ut Asserius Author est, *divino consilio, & admirabili Regis providentiâ, cum penè totius regionis Nobilibus Pueris, & multis Ignobilibus, diligenti Magistrorum curâ traditus, utriusque linguæ Libros, Latinæ & Saxonice, assidue legeret, ac scriptioni quoque vacaret.* Sanè literis ita fuit imbutus, ut iis temporibus inter Literatorum Principes censeretur. Eruditione hinc avo Alfredo, Patruoque Ethelwardo, similior erat Æthelstanus Rex, Eduardi Filius; is qui Danis, è Northumbria ejectis, primus totius Angliæ imperium tenuit. Post illum studiis clarius, illustriusque nomen suum reddidit Edgarus, ex Eadmundo Rege, qui Æthelstano fratri in regno successerat prognatus; & ne hac solum parte laudetur, *flos & decus Regum, gloria & decus Anglorum, cujus largitas, & munificentiâ totam Europam impleverat;* ut de eo scribit Westmonasteriensis. Metuo ne longior æquo videar, si quodcumque Regum, in Anglica, ac Saxonica domo ab eruditione commendatur, intra angustos unius Epistolæ cancellos complecti velim. Ac magis etiam, si in Northmannicâ stirpe idem tentavero. Non prætereundus tamen Guilielmi Conquæstoris Filius, Guilielmi Rufi frater, Henricus Primus; quem Thomas Rodburnus, sic Cantabrigiæ ait studiis operam navasse, ut propterea

Henricus



Henricus Belloclericus diceretur. Et quod è genere Nortmannico Reges in Academiis alterutrâ postea ceperunt ingenii, doctrinæque cultum? Ut Oxoniensem nunc solum tangam, de Edvardo secundo indicant Archiva; de tertio, Rytmica Joannis Anglici: de Henrico V. Gymnasii Cadomenis in Nortmannia Conditor, Rossus Warwicensis Libro de Regibus; de Edvardo V. Oxonienses ipsi literis gratulatoriis ad Edvardum Quartum. Richardus etiam Tertius, etiam illaudatus Princeps, ubi tamen nefariis artibus regnum erat consecutus, eadem in Academia, raro prorsus exemplo, Philosophos audiit discipulantes; quod ex Academia ejus Epistola ad illum cognoscitur. Propiora afferam. Ac primum de Henrico VII. Tritavo tuo; dubium meliusne de Britannia merito, dissidia tollendo, quæ in Lancastria, & Eboracensi, Regii sanguinis familiis, tot Regum temporibus durassent; an nuptui collocando Filiam Margaritam Jacobo, Quarto ejus nominis Scotiæ Regi, Proavo Jacobi Sexti, qui jure hæreditario Angliæ, Regnum primum cum Scotico conjunxit, ac utrumque augustissimo parenti tuo Carolo feliciter transmittit. Porro Henricum hunc Polydorus Urbanus contentus est dicere, fuisse ingenio magno sagacique, & à literis non alieno. Sed enim magnum ejus erga literas amorem multa arguunt. Illud inter alia, quod qui Gallicè scirent, potius tamen Latine ei scriberent. In quibus etiam Hadrianus Castellanus Cardinalis, Herefordensis prius, Wellensis postea Episcopus. Et quis exiguæ esse doctrinæ existimet, quod à fide devium differendo ipse Cantuariæ ad fidem converterit Christianam? Quantum præterea ad gloriam illius facit, quod ejus in Anglia, uti in Scotia Jacobi IV. Atavi tui temporibus, literæ Romanæ elegantius excoli cœperint. Græcæ etiam, ut Constantinopoli antea in Italiam, ita inde tum traductæ sint in Britanniam universam. Atque in hisce humanitatis studiis, eo Rege diffundendis, maxime eluxit opera, cum Nobilis Itali, Cornelii Vitellii, qui primus Oxonii bonas literas docuit; tum indigenarum; Thomæ Linacri, quem filii Arturi studiis Rex præfecerat; & trium Guilielmorum, Grocinii, Lillii, & Latemerii; ac præterea Joannis Coleti, B. Pauli, ut nunc dicimus, Decani. Sed ad altius doctrinæ fastigium est assurrectum, regnante ejus Filio Henrico VIII. excelli planè animi Principe; qui quanto studiorum amore fuerit inflammatus, indicio erit, quod ternas ædes regias Bibliothecis totidem mirè luculentis, instruxerit. Ab eodem illud amore est profectum, quod & ipse, & una Regina Catharina, pene eo

solum consilio Oxonium sunt profecti, ut Ludovicum Vivem in collegio Corporis Christi audirent differentem. Quin idem in Academia Cantabrigiensi, pro singulari affectu, erga viros ejus doctissimos, locumque illum ubi literis navasse operam perhibetur, Collegium studiosorum, totius prope dixerim Europæ amplissimum, sacræ & individuae Trinitati dicatum, munificentissimè extruxit, & latifundiis, ac proventibus uberrimis ditavit. Quantoperè etiam elegantiorum hominum monumentis perpetuò celebrandum, quod publico sanxerit Edicto, ut barbariei, cujus reliquæ aliquæ honorem utriusque Academiae, alioqui florentissimæ, non levis affuscabant, summo studio obviam iretur ab omnibus; ac quia sermonis illa rusticitas, & stribiligo in Philosophorum Scholis, potissimum regnaret, eò Aristoteles & Plato, publicè non aliâ quam græcâ prælegerentur linguâ. Quam digna hæc Rege illo, qui omnes ætatis suæ Principes, doctrinâ faciliè anteiret; quo etiam non alius hac parte magis admirationi esset; præsertim quando privatim, sermone etiam Latino, de rebus gravissimis dissertaret; vel publicè quoque de sacris controversiis nunc constitueret, nunc tolleret. Tanto jucundior nunc quoque eorum est conspectus, quæ ad B. Augustini codicem de Civitate Dei, manu sua annotavit. Uti & horum, quæ eadem Regiâ manu exarata supersunt, de reformanda Angliæ Ecclesia cujus proximam à Deo potestatem, non alteri in terris attribui est passus. Idem antequam scriberet, Christiani hominis institutionem, deque bello in Scotos, item de Concilio Mantuano, & Vicentino, aliaque compluria, jam assertionem illam ediderat de Sacramentis: quâ non solum inter illustres obtinuit scriptores nomen; sed illud etiam, ut non quidem ignotum antea, desitum tamen, regiis reponeret titulis pulcherrimum hunc, justiusque exinde posidendum, Fidei Defensoris. Ac de Filio ejus Edvardo VI. planè obstupesco, cogitans mecum, cum ante annum ætatis sextum decimum, exactè locutum Gallicè, commodè etiam Italicè, Hispanicè, atque adeo Græcè: Romano autem sermone, sæpius bene longas habuisse Orationes tam purè & eleganter, etiam promptè aded, ut utroque hoc illos quoque, qui temporibus iis inter doctissimos referrentur, non provocaret modò, sed vinceret. Quod si non verborum tantum delectus, sed in omni sermone, rerum pondus attendetur; non suæ dico ætatuæ, sed tantula in ætate, humani penè ingenii fastigium excessisse videbatur. Præsertim animo suo reputantibus, cum ea linguarum cognitione conjunctam in artibus liberalibus, & Divinarum humanarumque

manarumque rerum scientiis subtilitatem. Quam cum Hieronymus Cardanus, homo Italus, totius naturæ intelligentissimus, atque idem *πολιτικός*, è pluribus liquido perspexisset, pro naturæ cum miraculo habuit semper, eoque Elogio non privatim modò, sed publicis etiam scriptis decoravit. Qui talis tantusque esset, verè Angliæ, vel Orbis potius delictum, ereptus est terris anno imperii sexto, ætatis decimo septimo; atque ut meliorem sui partem coelo reddidit, ita præter corpusculum, terris debitum, & tristissimam sui memoriam, commentarios reliquit gravissima quæque negotia, quæ imperante se obveniant, continentes, ac manu sua, non ad publicandum quidem, sed proprium in usum, in tantula ætate prudentissimè signatos. Post tam multa de Anglia, nec Scotiam tacitus pertransibo. Hujus Regibus amor ille studiorum fuisse dicitur multo etiam ante tempora Donaldi, Regis, ut creditur, non indocti; sed gemino magis nomine inclyti; ut qui Scotiorum Regum primus, Christianam Religionem sit professus; & tantæ fuerit fortitudinis, ut ejus imprimis metu Severus, maximus sine dubio, imperator, muro per transversam Britanniam, ducto utrinque ad Oceanum, quicquid Romanarum erat partium muniret. Hæc ducentis fuisse post Christum annis. At longè ante Reutha Regem septimus, historiam suæ gentis consignasse, & de re medica opus reliquisse dicitur. Annis enim circiter centum & quinquaginta vixit, ante Christi Natalem; ac pari temporis intervallo post Fregulium, primum Regni Scotici conditorem, Alexandri Magni, ut fertur, æqualem. Josina quoque Regum Nonus, cui Reutha Patruus fuerat, eo nomine prædicatur, quod naturæ arcana sedulo sit scrutatus, atque aded, Regis Salomonis exemplo, de viribus scripserit herbarum. Sed incertiora isthæc, nec testibus exceptione majoribus esse subnixa, non absurdè aliquis dixerit. Liquidiora verò omnia post Fregulium secundum; qui Honorii, & Arcadii Cæsarum temporibus, ut rei Romanæ Camillus, ita Imperii Scotici conditor alter fuit. Maximè quæ post annum septingentesimum, quando ardor studiorum egregiè effulit in Eugenio septimo. Hujus illud inter cætera institutum, ut in Monasteriis res à Regibus gestæ literis proderentur. Mox idem animus in Moræco & Etfino; posteaque in hujus Filio Achaio; à quo, ut traditum, eruditissimi homines magno numero, submihi Carolo Magno, quò Germaniæ, Galliæque Academiis, aut Monasteriis, præfessent. Quod si propiora, eaque de Stuartis tuis magis aves cognoscere, quid, pro temporibus illis, cultius Jacobo, ejus

nominis primo? qui ante annos ducentos Regnum tenuit. Literarum enim, ac Eloquentiæ studiis, variâ quoque Linguarum peritiâ pollebat; nec vulgaribus solum, sed Latinâ etiam linguâ versus composuit. Ut nihil mirandum sit, si eâ Rex doctrinâ, Scholas instituerit publicas, Doctores earum foverit liberaliter, aliunde etiam præmiis elegerit in Scotiam. Proditum quoque, disputationibus plerumque interfuisse, ac quando-cumque per Regni negotia liceret, tempus traduxisse sermonibus literatis. Omni autem studio hoc agebat, ut Nobilium, non floridico, sed, si sic loqui liceat, vulgo, nescio quo petilenti fidere afflato, opinionem illam eximeret, quasi literarum doctrina animos frangeret generosos, solumque Ecclesiæ, vel Scholarum Doctores, non item terrarum Dominis, converteret. Sed propero ad sapientissimum avum tuum Jacobum; in quo tot res propriæ, & singulares. Unus enim Regum Europæorum, continuâ bis mille annorum serie, centum & octo Reges numerabat. Primus etiam Britannicorum Principum Angliæ, Scotiæque Regna tenuit; & ita tenuit, ut quæ tot disiderent seculis, concordibus postea animis conspirarent. Sed non tam de genere, vel imperio, nunc sermo est nobis, quàm doctrinâ; cujus partium *alii* singulas, unus ille hauserat universas. Peritiâ dico linguarum, profam versamque facundiam, naturæ, prudentiæque Disciplinas, Historiam Ecclesiæ, & Civilem, cæterasque literas divinas, & humanas. Quare sic statuere non verear, tam variâ maximarum rerum scientiâ superâsse, quicquid Regum à mille annis, mille vero? imò, ablit dicto invidia, quodcumque à Regis Salomonis temporibus fuit. Ubi nihil auribus dari, nulli melius sciunt, quàm interioris admissionis Procures, atque Antistites; abundèque ipse Orbi id universo testatum fecit, divinis suis ingenii, doctrinæque tot monumentis. Tanti Regis imaginem vivam vides, & audis, in Parente tuo, serenissimo Rege Carolo; qui à teneris, ductu excellentissimorum virorum, sed sapientissimi Patris consilio formatus, posteaque tot annos sermone ejus firmatus, & exemplo, dubium nunc relinquit, utrum Regii fastigii amplitudine, an cellissimâ mentè, variæque doctrinâ sit eminentior. Sed non insistam ejus laudibus, quamque præcipuam fore Epistolæ hujus partem aliquis putasset, una penè decrit; neque tam id ne soli videar lucem scenerare, quando divinæ ejus virtutes, satis orbi cognitæ sunt: quam quia alibi, spero, commodior de iis dabitur dicendi locus: & nunc de his solum, qui beatum in coelis ævum degunt, loqui animus est, quo adulatio omnis

D

abesse

abesse magis videatur. Omnis verò hæc eò spectat Oratio, celsissime Princeps, ut animum tuum, majoribus maximèque Regni negotiis necdum occupatum, literarum studiis excolas; eumque fuscites Parentis, Avi, & tot Britanniae tuæ Regum exemplis, qui præclare præverunt ad illa, ut Poeta ait;

*Edita doctrinæ sapientum templa serena.*

Hæc nunquam non animo obversentur, quò faciliùs virtutes eorum æques, vel etiam, si fieri possit (hoc Augustissimus ipse Parens tuus vovet) exsuperes. Scio, ad ista nunquam desore hortatores, qui plus me valeant autoritate & doctrinâ. Attamen non propterea vel nunc, vel ubi etiam ætas adoleverit magis, ingratum fore confido, si inter alios, quem sic Regia obstrinxit bonitas, quia corpore, aut vivâ voce minus possim, pennâ saltem, ad studia nunc incitem, votumque exhibeam meum, hoc devotissimi animi symbolo; atque eadem ostendero, ut illustrissimum nomen tuum, non tacitè solum intra cordis adytum colam ac venerer; sed ipsum hoc coram orbe erudito, comprobare gestiam commentationibus nostris. Quas velut tabulam quampiam, in regalis gloriæ templo, eâ mente suspendo, ut dummodo mihi vita, ac valetudo suppetat, eadem ad majora me obligem. Accipe igitur, Illustrissime Princeps, hos labores meos; qui fortassè argumenti causa minores aliquibus videbuntur; si tamen irradiantur quibusdam splendoris tui stricturis, nihil quidem de maximo tuo nomine deterent; nec enim sol eo minor est, quia loca lustret humilia, ac res exiguas; ipsi verò de lumine tuo lumen accipiunt; eoque latius se diffundent, vivent diutius, frequentius legentur. Nec enim facile futurum, ut non existimentur bona, quæ in spem tot Regnorum nato offerantur. Vale felicissime, celsissime Princeps, & juxta vota, ac spes omnium, virtute, & doctrinâ, quæ in aliis annos consequi solent, ætatem etiam præverte.

Kal. Mart.  
A. clō Idc  
xxxv.

*Celsissimi Principatus tui*

*Submississime Devotionis Servus,*

G. J. Vossius.

# VI

*Nobilissimo, Amplissimo, & Clarissimo Viro, Jacobo Catsio, Equiti, Præpotionum Hollandiæ, ac West-Frisiæ Ordinum Syndico Supremo, Magni Sigilli Custodi,*

G. J. Vossius S. P. D.

**O**ffero munusculum vile, si vires considerem donantis; majus si illud animo ejus metiar, ac promptissima voluntate; penè maximum dixerò, si attendam erga hujusmodi illius adfectum, cui mitto. Quid enim summo Poetæ, vel gratius, vel convenientius, dare poteram, quàm de re poetica? Non quasi nunc pandam Artem ipsam; quod alio in opere, tribus à me libris factum est; attamen eò, quia scripsi de arte. Propositum enim mihi fuit, agere de Poeticæ nomine, definitione, fine, inventione, & distributione. Quæ Præcognita solent nuncupari; ac licet vix aliud, quàm gustum exhibeant disciplinæ; nec nisi confusam artis notitiam præstent, doctrinæ tamen ordine præeunt; quia viam muniunt ad scientiam ipsam. Fortassè satis erat, hanc solam attulisse causam instituti mei. Sed enim præterea compulsus sum, justissimâ admiratione nominis tui. Si ingenium cogitem, Venus & Charites illud omnium elegantiarum flore imbuerunt. Si doctrinam, quas non artes, ac scientias, capacissimâ illâ mente complexus es? quò sic laudibus pariter abundares, tum excellis illis hominis *παιδείᾳ*, quo in ordine tot jam annos præclarum nomen sustines: tum clarissimi Poetæ, cujus est animum diffundere per omne disciplinarum genus. Jam si virtutem considerem, undique ea è mentis sacrario, ubi habitat, elucet. Si dignitatem, quàm illustris est locus, in quem te prudentiæ, & eloquentiæ genius extulerunt; & ita extulerunt, ut non abducerent tamen à studiis nostris? Si humanitatem, posse hanc etiam eximiam esse, & tamen cum ingenio, doctrina, virtute, ac dignitate, concurrere, exemplo tuo comprobâsti. Denique si benefacta hominis *πολιτεία* æstimemus; quàm tibi quotidie bene consulendo, in Amplissimo Illustrum, & West-Frisiæ Ordinum confessu, universam obstringis Rempublicam nostram. Sin merita eximii Poetæ cogitemus; cui non ordini prodes poetando de civili, ac morali vita? Quod est non unius ditionis, sed tot terrarum (rem arduam) mores emendare. Jam mitto, quòd privatim etiam omnibus, imprimis literatis, benefacere non cessas. In quibus



bus etiam nomen profiteor meum. Itaque (quod præfiscini dixerim,) immortale jam nomen obtines; quò magis fruaris, postquam vixeris. Scio, quæ modestia est tua, hæc laudes potius dices tribuendas esse amori meo, quam virtutibus tuis. Sed quæso patere, ut quæ bonorum jam omnium sermone celebrantur, eadem meo quoque suffragio confirmem. Et si molestus is sermo noster fuit, cogita mea quoque interfuisse, ut omnes cognoscerent, non degenerasse me ab antiquis; quibus tantoperè placuit *προσηυπτεῖν πηλαυλῆς προκειµένων ᾤ λόγος*, Persona præfulgida sermonis, vel Libri initio constituta, ut Dionysii Halicarnassensis in præceptis de Oratione panegyricâ, verbis utar. Ac visum quoque idem fuit Aristidi Sophistæ; qui aiebat, *τὸς ᾤ τοὺς θεοῖς προσήκει καθεστῆναι τὸς δ' ἀνδράς τοὺς ἐλλογίµους τῇ ᾤ βιβλίῳ ἀνατίσσει πηλὴν*. Temppla consecrare diis; viros vero eximios decet librorum dedicatione honorare. Nimirum judicabant, splendore pulcherrimi nominis alieni hoc se consequi, ut pulchrior labor suus videretur; haut secus ac ager videbitur melior, si sole splendente Favonium spectemus. Similiter igitur & ipse volui; ut, quia laus non sufficeret ex illis, quæ scripsi; accederet altera ex eo, cui inscripsi. Quo pacto erit, ut quantum hæc nostra deprimuntur Authoris sui ingenio; tantum adsurgant splendidi tui nominis famâ.

Deus Opt. Max. te, Nobilissime ac Clarissime vir, Reipublicæ, familiæ, ac amicis, diutissime salvum ac sospitem conservet.

*Amselodami*  
c10 Idc XLVII.  
Prid. Kal.  
Sextiles.

## VII.

*Augustis Belgicæ federatæ Patribus,*  
Gerardus Joannes Vossius dicat, consecratque.

Illustrissimi, ac Præpotentes Domini,

**A**NNI sunt quadraginta, & amplius, ex quo primum ea, quæ in penitioribus literis, ac universo disciplinarum Orbe, facris etiam studiis observassem, publici juris facere cœpi; eaque veterum monitu, & exemplo, plurimum inscripti prælustri loco constitutis. Nec tamen ad vos, terrarum Rectores, unquam assurrexit animus. Sæpe interim, fiduciam inter & verecundiam constitutus, dubitavi, utrum publico non simulatæ devotionis alloquio, an silentio porro etiam,

venerari vellem Orbe toto clarissimum nomen vestrum. Perfecta quidem erat rara in tanta dignitate humanitas. Videbam fulgere non superbire, fasces vestros. Ut facile appareret, semper esse illud vobis in animo litum, non vos Reip. sed Remp. vobis incumbere: cuius onus, ut Cælum Atlas, sic vos benignâ fati Providentiâ, rectis & salubribus consiliis, sustinetis. Sed ea licet conspicerem, nihilominus me, frontis tam imbecillis homulum, assidue terrebat excelsa magnitudo vestra. Terrebant præterea, non aliis ferendæ humeris, occupationes; quibus turbida componitis, ardua exsuperatis, & utcumque res sese dederit, pari omnia ingenio, atque animo suffertis. Hactenus ita fluctuanti lætæ affulsere dies, quibus terræ tam vestræ, quam hactenus hostiles, ingenti spe complerentur pacis æternæ, post diuturnum adeò bellum, incundæ, inter potentissimum Hispaniarum Regem, & Belgicam hanc foederatam. Equidem, cum fatear lubens, multis partibus me inferiorem esse aliis multis; boni tamen civis officio, alteri cessero invitus. Quamobrem sermonibus publicis, etiam eorum, qui Remp. administrarent, excitatus, ante omnia Deum rogavi, ut secundare utrumque pacis consilia vellet: Et quia tot prudentissimi homines non vanam mihi spem concepisse animo viderentur, gratias eidem agere cœpi, quòd nato mihi anno, à funesti adeò belli primordiis quarto, ac multa interim in me ipso, pluraque in Parentibus, vi hostili perpasso, quodammodo dederit, jam septuagenario, prævidere finem ante-malorum. Præcipuè verò gratulatus sum vobis, totius federatæ Belgicæ proceribus, quòd cum Potentissimo Europæi orbis Rege tot annis eâ prudentiâ, ac fortitudine bellum gesseritis, donec tandem eò deduceretis, ut ab Hoste ipso offerrentur conditiones pacis, omnibus triumphis vestris longè, ut arbitror, potioris. Facile horum cogitatio expressit mihi, ut, positâ verecundiâ, consilium caperem, ea, quæ nunc dixi, publicè etiam testandi apud vos, præpotentes federatæ Belgicæ Antistites. Cum tamen sine donario nollem ad vestra venire templa; commodè accidit, ut hoc tempore ad umbilicum properarent tres nostri Institutionum Poeticarum libri. Ut non diu mihi quærendum videretur, cujusmodi munusculo literario alloqui, ac venerari vellem prælustre nomen vestrum. Fortasse dicent aliqui majus quid convenisse tantis Heroibus. Equidem non repugno. Sed molâ litat, qui nequit hecatomba. Neque tam exiguus est Poetices honos, quam multis videtur. Qui non cogitant Deum ipsum, bonam partem Sacræ Scripturæ, libris esse Poeticis complexum?



plexum : unde, eas partiens Christus, de se scriptum ait in Mose, Prophetis & Psalmis. Imò hymnus in ore Servatoris nostri fuit. Etiam Ezechiel Poeta Judæus, tragœdiam Græcè reliquit, de educatione Israelitarum ex Ægypto. Ex Plinio, qui Apostolico ævo, ac deinceps vixit, cognoscimus, sui ævi Christianos, hymnis Christum celebrasse. Ad hæc quantum Veteris Ecclesiæ Doctores, Poematis suis, & sibi decus pararunt, & Ecclesiæ fructum pepererunt ? Illi verò qui Gentilium poësin contemnunt, ipsam habere Philosophiam dispertui videntur. Veterum enim Poetarum alii, vitæ præcepta dederunt ; ut Solon, Tyrtaeus, & similes : alii naturæ arcana referebant ; ut Empedocles, Melissus, Parmenides, cæterique. Atque, ut ad antiquiora veniam tempora, ita ab antiquis accepimus, illa quoque, quæ Orpheï, ac Musæï, dicebantur, vel ad mores pertinuisse universa, vel ad rerum naturam ; quò etiam referebant, quæ de Deorum amoribus, conubiis, præliis, & similibus, traderentur. nec rarò sub unius fabulæ involucri, utramque Philosophiam occultabant. Quomodo, quod terrigenæ dicuntur Deos aggressi cœlo expellere, non solum de ventis intelligebant, qui è terra originem ducunt : sed etiam de hominibus impiis, templa Deorum populantibus : sicut interpretatur Apollonius apud Philostratum. Hanc carminum laudem, Maximus Tyrius pulcherrimè expressit Oratione ; quâ docet, Poeticen esse Philosophiâ vetustiorē ; re verò eandem, soloque nomine diversam. Quæ non aliter capere oportet, quàm quod antiquissimis temporibus, iidem fuerint Philosophi, & Poetæ ; sed Philosophiam fictis velarint fabulis ; quas carmine sunt complexi. Nec aliud voluit Plutarchus, libro de Musica, & eo, qui inscribitur, Quomodo à junioribus audiendi sunt Poetæ ; ubi ostendit Poësin, initium fuisse Philosophiæ. Nec enim, nisi prius Philosophi fuissent, vel fabulis occultare, vel carmine posteris prodere, sapientiæ ac prudentiæ doctrinam. Idcirco etiam traditum fuit à Poetis, fuisse sylvas cantu attractas, atque extructas civitates. Nimirum quia à sapientibus, iisque eloquentibus, & Mulicis præterea, sic versibus suavissimis, ac delenisicis, permulti fuere homines agrestes ; ut relictis rupibus, ac sylvis, in unum concesserint locum ; domos conjunxerint ; leges ac jura receperint ; humaniùsque amplexerint vitæ genus. Quare de Homero etiam sic statuimus, nomen ejus non magis Poetæ esse, quam Philosophi : neque fallere, vel falli, Veterum illos, \* qui memorant, Homerum fuisse Magistrum Platonis ; licet

\* Maxim.  
Tyr.

quatuor circiter seculis postea consecuti. A Veteribus sic accepimus, ex Oceano profluere Mæotidem (sed de Mæotide sunt decepti, verius iidem de cæteris) ex Mæotide originem capere Pontum, ex eo Hellespontum ; hinc fluere mare Ægeum ; ex hoc porrò vastum illud Pelagus, quod hinc Europam, Asiæque partem ; indè Africam ingenti separat intervallo. Haut aliter cogitandum de Homero ; ex quo Platonis, (Homericæ, dubito, an Socraticæ similioris) tum verba fluunt omnia, dictioque tota, prope adeo recedens à carmine, tum quoque omnigena illa rerum doctrina. Nimirum, sive cogitemus siderum motus, aliasque observationes cœlestes ; sive naturæ totius scientiam, sive gubernationem rei familiaris, vel Reip. sive rei bellicæ disciplinam ; ac quicquid in rebus humanis expetere, vel fugere oportet ; omnium illorum in eo non minus semina comperiet Philosophus ; quàm artis suæ exempla inveniet, tum Poeta, tum Orator. Nec sanè Alexandro, tam sublimis spei Adolescentulo, alium æque ac Homerum, proposuit Aristoteles. Videbat, non solum ex eo posse hauriri gubernationem sui, vel domûs, sed etiam civitatis, ac regni, & scientiæ militaris, & eloquentiæ. Nec moveor eo, quòd ipse Plato Poetas, ex sua exturbet Republica. Quis enim ignorat, offensum fuisse commentis istis, de pugnis Deorum, vel concubitu ; de vinculis Junoni à Jove injectis ; Saturno à Jove castrato, uti prius ille fecerat Cœlo ; & trecentis hujusmodi ? Naturæ quidem vim istis adumbrarunt Poetæ ; multumque ea res admirationis attulit, intelligentibus. Sed quid hoc ad vulgus ? quod propriè omnia capiebat. Unde fiebat, ut vel nullum esse numen crederet ; vel ejus exemplo, improba multa sibi licere arbitraretur. Itaque Dionysius Halicarnasæus Romulum laudat, quòd Græcorum Fabulas hujusmodi minimè admiserit. Cujus judicii sui tam Dionysius, quàm Romulus, multos habet approbatores. Inter cæteros fuit Hieronymus Philosophus ; ut de eo apud Laertium legas. Is aiebat, Pythagoram apud inferos ydisse animam Heliodi, alligatam columnæ æneæ, multumque stridentem ; illam verò Homericæ de arbore dependentem, ac diris circumdatam serpentibus ; propterea quod tam fœda uterque de divinâ prodidisset naturâ. Quæ cum minimè fugerent sapientiam Platonis ; ipse quidem, studiosè legendo Poetas, sapientibus eos, ut legerent, suo præbat exemplo : sed ab iis arcebat imperitum vulgus ; quod, cum solum exteriorem lamberet corticem fabularum, ad interiorem fructum neutiquam penetrabat. Optabat igitur Plato, ut Poetæ symbolis, non adeo

adeo periculi plenis, rerum naturam adumbrassent. Postquam verò res aliter cecidisset; fecit quod potuit, & debuit; solos ut sapientes ad eorum lectionem admitteret. Vellem ista magis perpendisset, magnus omninò vir, Cæsar Scaliger; qui, cum ipse fateatur Homerum de Diis suis loqui, tanquam Suis, (quo quid noxium magis simplicioribus?) Platonem tamen culpat, quod Homerum removeat à civibus suis; cum cogitar eduberit, & quos arceat, & quomodo Homerum dimittat; videlicet non indignè, sed coronà redimitum, unguentis delibutum, & omninò ut virum magnum; sed sublimiorem quàm ut captui Plebis suæ conveniret. Periculum igitur ille extimescebat, ne vulgus stupidum non distingueret inter Rosas & Spinās, inter aurum & lutum. Sed nihil hoc periculum ad sapientes, longèque minus ad nostra tempora. Postquam enim Evangelium Domini toto terrarum Orbe illuxit; fabellæ istæ tandem omnem paulatim perdiderunt; ut lutose non contaminent, spinosæ non pungant; & proclive sit omnibus aurum tollere, luto relicto; ac evitatis spinis, carpere rosas. Non ulterius uni insistam Homero; universè de Poetis videamus. De his sic

\* Epinomis ait Cæsar Scaliger \*: Poetæ fidem esse, docere cum delectatione;

Poesin verò esse politiæ partem; quæ sub Legislatore, quamquam alia facie, atque colore continetur. Nam quæ jussa sunt in legibus, quæ sunt apud concionatorem, moderatoremque populi suasiones; hæc, Poetices operâ certâ, atque separatâ, comparabuntur quibusdam amantibus ad institutionem Civitatis. Neque hoc in dubium vocarit, qui cogit, ab affectibus proficisci actiones; ac propterea Poetam, civitatis doctorem, jucundè docere affectus, tum bonos; quò cives, per affectus bonos, bonas agitent vitæ actiones; tum malos, quò malorum affectuum odio, evitent actiones malas. Ut verissimum sit, hoc differre civem, doctoremque: quod hic referat actiones propter affectus; ille componat affectus suos propter actiones. Quorum utrumque beatam facit vitam; & privatam, & civitatis, sive Reipublicæ.

Sed quid ego tam latum ingredior mare? ubi porro si provehar,

*Aute diem clauso componat vesper Olympo,*

Quàm cæteras etiam Poeticæ laudes complectar. Vela igitur contraham, & quia ab æternæ pacis spe, sermo cœpit noster, in voto simili desinam.

DEUS. OPT. MAX.  
VOS, AUGUSTI FOEDERATÆ  
BELGICÆ PATRES,

Diutissimè salvos, ac sospites conservet; perque vos aureum seculum Belgis reducat. Europâ totâ pacis tranquillitas, cœlo demissa, furores compescat Martiales. Imprimis pietas caput ubique exerat. Ardeant cuncti tanto veritatis amore, ut magis eam ament, quam seipsum. Et ne in tot votis, oblivio me capiat ordinis mei, flagret in animis fincerus amor literarum, tum humanarum, tum divinarum, præmiaque sint studiorum laboribus: quæ multis in terris, vel odio, vel contemptui esse cœperant, non minori damno, quàm dedecore publico.

*Amstelodami. An. cld  
Id. xlvii. Prid. Id.  
Sextiles.*

VIII.

*Illustrissimo, & Amplissimo, Johanni Berckio, Equiti Torquato, Supremi in Hollandia Consilii Senatori, Potentissimorum fœderatæ Belgicæ Ordinum ad serenissimam Venetorum Kemp. Legato.*

CUM multum intersit humani generis, ne pereat illa, quæ viri eruditione, & sapientiâ præstantes monumentis prodiderunt; tum in historia hoc imprimis locum habet. Nam, ut universæ interciderent literæ, doctrinaque omnis ipsis ex hominum mentibus deleteretur: non propterea posteritas fraudaretur pulcherrimâ eorum cognitione, quæ ad rationis disciplinam, vel rerum naturam, vel morum scientiam pertinerent. Quippe superesset nihilominus miranda mundi compages, & mortalium societas, & utriusque contemplator animus hominis; qui, ex rebus sese in vita offerentibus, sensim deveniret ad notitiam artium, & scientiarum, quas Magistri Veteres tradiderunt. Longè verò aliter cum historia est comparatum. Nam si omnis ea semel oblitteraretur; non magis humanâ instaurari posset industria, quàm studio cujusquam redire nunc ipsa scit hominis vita. Quare suus licet honos constare semper Socraticis debet chartis; præcipuè tamen vota ejusmodi fieri convenit, ut, qui res gestas literis signarunt, æternum vivant,

geant,

geant, floreatque. Iccirco arbitrabar, non malè à me iri publico consultum, si hoc tempore ad illustrandam historiam animum appellerem. Et hætenus quidem, in eo præcipuè opera consumpta est mea; ut non modò tractarem de Historicis, Græcis pariter ac Latinis: sed præterea res gestas, digererem omnis ævi. At quia nondum ea ad umbilicum perduxi; libellum hunc de natura historiarum, & ejus scribendæ præceptis, in antecessum dare visum fuit. Quamvis enim, ut verissimè Plinius ait, *Historia quoquomodo scripta delectat*: tamen quia non tam voluptate omnia metiri decet, quàm publicis commodis; neque exiguo emolumento contenti esse possumus, ubi frui datur ingenti: profecto nec diffiteri illud licebit, plurimùm referre, utrum negligenter tractentur res gestæ, an eadem cum fide optima, tum prudenter ornatèque memorentur. Nec temerè à me factum puto, quòd minutum hoc emitte sum ausus, sub præstantissimi nominis tui auspiciis. Cui enim hæc à me offerri æquius erat, quam illi, qui & studia hæc, & me ipsum amaret, & aberrantem in viam reducere non minùs vellet, quàm posset? Nam quamvis ætatem universam, quod minimè te fugit, in honestarum artium studiis exegi; non tamen sum ita Suffenus, ut ignorem, hæc ipsa, quæ commentabar de via, ac ratione scribendæ historiæ, multò ab iis melius intelligi, qui juxta mecum evolverunt Scriptores Veteres, & aliquanto id majori, quam ego, judicio egere; partim ob eximias animi dotes, quibus ab iis longissimè vincor; partim quia rerum civilium (quod in legendâ, condendâque historiâ præcipuè conducit) longè sunt peritiores; utpote in Rep. semper versati, & ita versati, ut ipsi etiam res egregias in ea gesserint. At cui laudes justius deferamus, quam eximio nomini tuo? Postquam enim, vernanti ætate, quemadmodum antiquâ ac nobili domo tuâ, & præcellenti ingenio, dignum erat, multijugâ eruditione, præcipuè autem æqui justique scientiâ, & doctrinâ civili, pectus imbuisses: fieri haut aliter poterat, quin Princeps, ac cordatissima Bataviæ civitas, cui vitalem hanc auram debes, excelsas animi tui dotes, statim perspiceret, ac vix adolescentiâ egressum, idoneum censeret, cujus oraculum consultum iret, in obscuris involutisque Reip. ac Civium rebus. Nec hujus eam poenituisse judicii unquam, luculentè illud docet, quod annis triginta, & quod excurrit, usque adeò feliciter usâ sit consiliis tuis. Neque urbe in patria duntaxat sese exeruit splendor iste virtutis tuæ; sed in amplissimis quoque Illustrum Ordinum concessibus; quoties nempe inclytæ civitatis

norhine, in augusto hoc loco de pace, bello, induciis, fœderibus, aliisque negotiis maximis, decerni oporteret. Ingenii verò, prudentiæ, ac fidei tuæ hunc fructum retulisti, quod oculos omnium coniectos in te vidimus: neque quicquam tam arduum creditum est, quod non rectè tibi committi posse videretur. Itaque & in supremi consilii Senatores es adlectus, & fœderatæ Belgicæ Ordinibus, patriæ patribus, præcipuè es delectus, qui de rebus gravissimis legationes tor obires. Nam semel iterumque sublimis hic honos obtigit, ad magnum magnæ Britannicæ Regem, Jacobum I. cui tantoperè placuisti, ut te virtutis ergo, dignitate equestri decoraret. Iterum amplissima legatione functus es ad potentissimum Danicæ, & Norwegicæ Regem, Christianum IV. Atque (ut de magnifica opera tua, præpotentium Belgicæ Ordinum auspiciis suscepta, ad illustrissimos Clivicæ Duces, nihil nunc dicam) quid splendidiùs hac ipsa legatione, ad serenissimam Venetorum Rempublicam? Inviçissimam illam, & beatissimam, & si formam spectes imperii benè constituti, nihilo inferiorem veterum ulla. Cujus grande, ac mansurum decus, celebrarem hoc loco non invitus; sed periculum extimesco, ne, ut nubes solis radios intercipit, ita ego, ob infantiam meam, subducam faciliùs, quàm addam lucem. Itaque laudibus ejus non infisto; nec magis tuis, Illustrissime Legate, quas meliùs potteris Annales Belgici loquentur. Mihi satis sit, devotissimo pectore, gratulari eximium hunc honorem virtuti tuæ. Cujus animi mei, quem tibi penitus obstrinxisti beneficiis tuis, libellum hunc obsidem mitto. Multùm verò gaudeo, quod ille in ea potissimùm deventurus est loca, ubi literas, & literatos pretio suo æstimare sciant viri nobilissimi, & præstantissimi; quos inter honoris causâ nomino, illustrissimum, & amplissimum Dominicum Molinum, virum majorum meritis inclytum, sed magis virtute suâ; de qua quicquid dixeris, minus erit. Tu verò, maxime, & illustrissime Domine Legate, placida & serena illa fronte, qua me ipsum soles, fuscipe nunc hoc quæcumque ingenii mei monumentum; parum illud dignum quidem, limato, politoque judicio tuo; sed quod eo pretiosius apud omnes censèbitur, quia clarissimi nominis tui sacrario fuerit appensum.

Lugduni Batav.  
vi. Kal. Mart.  
An. clc lxxiii.

Præfatus nominis tui cultor,

G. J. Vossius.



## IX.

*Illustrissimis Hollandiæ, West-Frisiæque  
Ordinibus, Dominis Potentissimis, G. J.  
Vossius Dedicat, Consecratque.*

**T**anta est laus, ac gloria vestra, Maxi-  
mi, ac Sapientissimi Proceres, ut nulla  
penè Orbis regio sit, quò non pervaserit fa-  
ma eorum, quæ, præsentiore dubium Virtu-  
te, an secundiore Fortunâ, tot jam annos  
pro libertate gessistis. Sed nihil tamen videtur  
illis majus esse, atque excellentius, quæ  
recenti imprimis memoriæ omnium inhærent.  
Quid enim novum est magis, atque inauditum,  
quàm Classe vos Mexicanâ potitos esse,  
& prope incredibili gazâ Hispaniarum Regis?  
Quod ut nunquam antea vobis, ita vicinorum  
adhuc Principum contigit nulli. Regi  
verò, atque hostibus, eò luctuosius visum,  
quò indignius putarent, jam de suo vos ad-  
versus se armari. Quis etiam satis prædica-  
rit, quòd, sine prope ullo sanguine vestro,  
Vesaliam cepistis, illam viribus suis inclytam,  
& hostili sic præsidio firmatam; illam an-  
norum aliquot manubiis, ac prædâ divitem;  
illam belli delectam contra vos sedem? Eo-  
que clarius hac parte divinus erga vos favor  
eluxit, quòd hostis illo tempore, in fœdera-  
torum visceribus grassaretur, & cum magna  
daret damna, multo tamen majora anhela-  
ret. Ita ut cepisse hanc urbem, non modò  
sit, stitisse hostilis victoriæ cursum; sed sua  
etiam recepisse, hostes finibus ejecisse, com-  
plurariaque oppida, quæ ab eo tempore in ve-  
strâ, & sociorum sunt clientelâ, addidisse  
fœderatorum terris. Denique quàm amplum  
illud, atque Augustum, quàm Araulionensi-  
um Principi, quàm vobis, quàm fœderatis  
gloriosum, quòd in vestram, sociorumque  
potestatem, redegitis Sylvam Ducis, urbem  
antea semper infestam, ac sic naturâ loci, &  
veterano milite munitum, ut opinio esset  
prope omnium, viribus eam humanis ex-  
pugnari non posse. At vos hanc quintum  
intra mensem vicistis, & quidem hostium  
duce obsessis cum ingenti exercitu suppet-  
tias incassum ferente. Atque horum singula,  
cum per se magna sint, eo tamen majorem  
admirationem cient, quòd quæcumque ad-  
huc diximus, intra annum vertentem pere-  
gissis. Neque se nominis tanti decus, cancel-  
lis gloriæ militaris; uti in nationibus qui-  
busdam videmus, quæ belli laudibus con-  
tentæ, literas studique despiciatui habent.  
Vos enim non armis modo, sed doctrinâ  
etiam excellere, pulcherrimum semper dux-

istis. Imo ægrè admodum fuerit vobis, si  
mythica illa Gentium Pallas, terrarum ulli  
posthabuisse Bataviam vestram videretur.  
Ut nihil mirandum sit, si sic animati multos  
adèd à libertate partâ numeretis, qui cum  
summos in Rep. gesserint honores, non eo  
minùs ingenii, doctrinæque monumentis  
clarissimi fuerint. Sed de illis celebris erudi-  
tionis viris, qui, ut dixi, præfuerint Reip.  
vel prælint, aliàs fortasse commodior sese of-  
feret agendi locus. De Academiæ vero, quæ  
propius me tangit, unum illud, & si non  
citra invidiam dixerò, in mediis eam bello-  
rum tempestatibus, ac procellis, ita caput  
extulisse, ut, si annos numeremus, qui non  
multo plures sunt quinquagenis, Virorum  
excellentium, & magnitudine, & numero,  
qualvis provocare Orbis Academiæ possit.  
Hæc cum animum subeunt meum, Illustrissi-  
mi Proceres, verè vos felices prædico, quo-  
rum meritis voluerit Deus tantopere Acade-  
miam hanc, & Universam debere Rempub-  
licam: Neque cives modo, sed externos etiam,  
qui auxilia vestra exposcunt; adhuc quic-  
quid uspiam elegantiorum est hominum, &  
amantium studia literarum. Quo nomine,  
ut vobis ex animo gratulor, ita mihi gaudeo,  
cui sub imperio vestro in terrâ, ut belli arti-  
bus, ita doctrinâ omni florentissimâ, à puero  
scientiis imbui, & securè hætenus vitam de-  
gere, contigerit; Imo qui jam ab annis xv.  
missum me videam fulgentissimis Academiæ  
hujus luminibus, atque id favore vestro;  
cum probe mihi conscius sim, splendorem  
me ex ea accepisse potius, quàm eo attulisse.  
Ut igitur pro affectu illo, erga me tam be-  
nevolò, quem aliis etiam beneficiis declara-  
stis, gratum animum tester, offero nunc, quo  
nihil habeo majus, memet ipsum, ac mecum  
animi nostri sortum, quem genui adolescens;  
atque ubi triennio lucem viderat, corpore, &  
viribus auctiorem produxi, in conspectum  
omnium; nunc vero post viginti Annorum  
intervallum, talem vobis sisto, ut dubium  
relinquat, magisne idem, an alius videatur.  
Quamquam vero, sobolem hanc nostram  
laudare, non est meum; eo minus, quia,  
quo plus ausus fuero promittere, hoc plus  
necesse habeam præstare: Nisi tamen indu-  
striæ saltem mihi conscius essem, minimè  
ausus fuisssem eam dicare; partim vobis,  
quos Deus, vice sua in Batavia fungi jussit;  
partim iis, quos nomine vestro præesse Aca-  
demiæ vultis. Nec parum me ad hoc anima-  
vit, quod propositum mihi fuisset, ut In-  
stitutiones hæ, Partitionibus nostris, autho-  
ritate vestra, in Scholas omnes Bataviæ in-  
ductis, Commentarii loco forent. Simul  
speravi, me, hoc labore suscepto, meliùs fa-  
tisfa-



tisfacturum muneri, quod mihi abhinc septennio à Nobilissimis Academiae Curatoribus injunctum fuit. Placuit iis tum, ut non modo temporum omnium gesta tractarem; sed illa etiam exponerem, quæ ad benè dicendi artem pertinerent. Quomodo futurum videbant, ut, quia historia est fons prudentiæ universæ, Rhetorice autem viam ad Eloquentiam munit: juvenis operâ quoque nostrâ, perduceretur ad connubium illud Palladis, & Mercurii, quod Antiquitas Hermathenam vocabat. Morem igitur iis gesti, quibus æquum erat; propensaque adeo iis obtemperandi voluntas, vobis ingrata esse non poterit; præsertim cum summo studio conjuncta, benè de publico merendi, ac potissimum de Bataviæ Scholis, & Academia vestrà. Quamobrem planè ita fore confido, ut quemadmodum ante sexennium Historiam meam de Historicis Græcis, si non pretio fui, at vobis placendi studio, æstimâstis: ita aliquo nunc loco finatis apud vos esse, Commentarios nostros de Rhetorica facultate. Ex quibus nihil, fateor, honoris, Vobis accesserit; sed vestra præcessere beneficia, quæ gratuita erant; nostrum sequitur officium, quod debetur; & quo magis debetur, eo minus poterit displicere.

Deus Opt. Max. vestrum erga studia amorem foveat, & conservet; Imprimis vero prudentiam, & fortitudinem largiatur, quo & domi quietè, & salubriter diu regatis, Bataviæque & fœderatorum proferatis Imperium, non in terris modo vicinis, sed etiam longè diffitis, imo ut facitis, etiam extra Europam. Nisi, post grave hoc, & diuturnum bellum, longa nos pax manet. Cujus spem toto sinu admifero lubens. Sed publica vincat utilitas; quæ curæ erit, & Patri Supremo, & Vobis, Patriæ Patres.

*Lugduni Bat. Anno  
c10 10cxxx.IV.Kal.  
April.*

## X.

*Nobilissimis, & Amplissimis Dominis Curatoribus Academiae Lugduno-Batavæ, Francisco ab Aerssen Equiti, Domino Sommelsdicensi, & Platenfi, Status Consiliario.*

*Nicolao Cromhoutio, Domino in Urihoven, Curiae Hollandiæ & Zelandiæ Præsidi.*

*Ægidio de Glarges, Domino in Elefmes, Reipublicæ Harlemensis Syndico.*

*Et Amplissimis, ac Prudentissimis Viris, Gerardo Leonartio,*

*Hugoni Coedicio;*

*Danieli ab Alphen Illust. Ord. Quæstori in Urbe Leidensi, & agro Rhinlandico.*

*Gerardo Lanfshot M. D. Consiliario in Collegio Rebus Maritimis Præsfecto; Reip. Lugdunensis Consulibus, Curatorum Collegis. Item,*

*Joanni Wevelinchovio, J. C. Reipubl. ejusdem Syndico, & Curatoribus à Secretis, Gerardus Joannes Vossius, Dedicat Consecratque.*

*Nobilissimi, Amplissimi Viri.*

Cum à mundi incunabulis, hanc naturæ legem fixerit Opifex ejus sapientissimus, ut qui homo fuerit, idem animal sit; quod vero animal est, carere affectu non possit; hominem Ipsum exuere non postulat, qui cum Zenone, & porticu, excindi affectus jubet. Sed cum cæteris quidem animantibus, communes sunt affectus nobis; ratione autem, & sermone, secernimur; quorum illa imperium obtinet, cum benè vivimus; hic cum benè dicimus: Illa dominatur affectui proprio; hic etiam alieno. Utroque horum nihil melius esse, ac præstantius constat. At non æquè convenit, quâ viâ ad benè dicendi vim facilius ac certius ducat. Plurimi enim contendunt, ad parandam Eloquentiam, sufficere ingenium non infœlix, modò dicendi usu roboretur. Quorum judicio operam auferimus, signandis istis de arte Oratoriâ. Sed damnari ab iis non possumus, nisi prius ejusdem culpæ ream peragant totam penè Antiquitatem; præ cæteris Aristotelem, & Tullium; acris ingenii, exacti judicii, summæque autoritatis viros; qui de facultate hac, pulcherrima ingenii monumenta posteris reliquerunt. Nec verisimile est, infirmis quoque artibus sua esse præcepta; sublimi vero

vero Eloquentiæ proprias esse observationes nullas. Si qua etiam facultas, solius naturæ beneficio nixa, nullo artis auxilio vigeret: Poësis sibi illud suo quasi jure deposceret. Atqui, ut taceam de Vetusis; quantis ingenii, doctrinæque viribus, quam copiosè etiam, Parentum nostrorum ævo, de re Poëtica, egit Cæsar Scaliger, vir veteribus par, major fortasse novis? Quare si non de nihilo dici solet, Poetas nasci, fieri Oratores: multo sanè justius hic labor apud Rhetorem infumitur. Solum cauto opus est, ut ne pueriles tantum præceptiunculae coarcentur; sed ea afferantur imprimis, quæ placere etiam nec stupidis, nec indoctis possint. Utrum hoc, quod ab aliis nunc requiro, præstiterim ipse in institutionibus nostris; penes vos, Nobilissimi, & amplissimi viri, judicium erit.

Opus ipsum est *καίτοι καλὸν* \*, ac in sex Libros, jam olim à me distributum; quorum tres agunt de Inventione, & Dispositione; ac totidem de Elocutione, & Pronunciatione tractant. Priores illos L. M. Q. consecravi Illustribus Hollandiæ, & West-Frisiæ Ordinibus; hos posteriores Votivum animi mei Specimen, jure vobis inscribo, qui eorundem nomine Lugdunensi Academiæ præstis. Nimirum studeo eos imitari, qui ædes exstruunt magnificas. Solent hi columnis Tuscanicis, Doricis, Ionicis, aut Corinthiis Operis exornare earum fores, ut continuo aliquid occurrat, quod oculos in se convertat; non eorum duntaxat modo, qui domum subire parant; sed illorum quoque, qui transeunt. Similiter volui ego, in frontispicio utroque tanta comparere nomina, ut decus illa adferant, commentariis nostris; etiam apud eos, qui, obiter adspicere contenti, fortasse legent nunquam. Et sanè si Eloquentia viris

principibus, maximè Ornamento est, ut ait Tullius \*, imo Rhetorice, pars sit scientiæ civilis, ut ab antiquis † accepimus; ad quos potius itum oportuit, quàm eos, qui tot jam annos præstitis Reipublicæ, atque iis honoribus fungamini, ubi potissimum regnare Eloquentia solet? siquidem partim in magnis Bataviæ civitatibus, vel senatui estis à consiliis, consiliorumque Interpretes; vel summum etiam tenetis consularis dignitatis gradum; partim in supremis Bataviæ Universæ Collegiis conspici estis, vel præsidendo Inclytæ Curiæ, vel confidendo inter splendidissimos, Ordinis Equestris Viros, ac Senatus Consiliarios: ut taceam (si tacere liceat, quod imprimis huc facere videtur) de obitis toties legationibus, ad Respublicas, Principes, Reges; tot etiam

annis, ad Henricum, Galliarum Regem, nomine, & re magnum. Ita ut, cum multum debeatis prudentiæ; grande tamen aliquid sibi flexanima illa vindicet Regina. Atque hanc quidem laudum vestrarum nunc solam excerpti; quia eam cum celebro, non minus prædicem artem nostram, quàm vos ipsos. Et Homerus quoque Deos, ac Heroas suos, extollere solet à parte aliquâ; quomodo Junonem ab ulnis, Auroram à digitis, Thetidem à pedibus, Achillem ab eorum celeritate commendat. Nec solum tamen Operis me argumentum compulit, ut hæc vobis dicarem; sed eodem me hortabatur vitæ meæ conditio, ac munus quod obirem. Quemadmodum enim Eloquentia, nec non tutela artis Oratoriæ, maximè convenit iis, qui civibus præstunt: Ita qui sustinet, aliquas in Academia partes, optimè Curatoribus ejus, non publicæ modò, sed privatæ etiam, industriæ suæ rationem reddit. Id nunc tacitus quodammodo præsto, loquente pro me Operâ hæc meâ: ac verbis etiam idem hoc loco facerem lubens, nisi satis vobis constare arbitrarer, quomodo triginta hos annos decurrerim, publicè docendo, scribendo, privatim plurimos juvando, idque in muneribus variis, & difficillimis, & quæ singula totum penè hominem requirerent. Quamquam verò satis videam, paulatim sic atteri vires, ac fortasse fraudi etiam fuerim meis; cum non magis operosum sit pariter sorbere, & flare, quàm totum se Musis dare, & privata sectari commoda: me tamen vitæ sic actæ per tot annos, nondum poenitet. Quippe præterquam quòd animo sic magis satisfeci meo; cui nihil unquam jucundius fuit, quàm in studiis proficere, & ore, calamo, operâ prodesse quamplurimis: Deo etiam, qui per Reip. & Academiæ Præfectos tam variam mihi provinciam mandarat, conscientiam meam melius probavi. Præterea tot bonorum mihi conciliavi amorem, etiam illorum, quos Deus in Illustri loco collocasset; ante omnes ipsius, quem debite venerationis causâ nomino, Magni Magnæ Britannicæ Regis KAROLI; à quo insperato mihi, homini extero, collatum tam grande beneficium, per quod Reverendo Cantuariensium Canonicorum Collegio, sum insertus, quiescere me neutiquam sinit; sed assidue stimulat; ad porro etiam de doctrinarum studiis benè merendum; ne unquam gratiâ hæc Serenissimi Regis, & Inclytæ Britannorum Gentis, videar indignus. Vester etiam affectus tam benevolus erga me, Nobilissimi, & Amplissimi viri, faces ad hoc ipsum animo meo mirificè subdit; eoque dulcius mihi fuerit, placere vobis hac parte, quo dulcius

E

est

\* Novum  
pariter &  
vetus.

\* Lib. 4. de  
finib.  
† Aristot.  
Cic. Fab.

est vobis, bene mereri de Academia Universa. Quod ut nunc ferè hominum sunt mores, verè est seculum corrigere. Neque deerunt, qui animum hunc vestrum, feris pandant Nepotibus: quæ post conscientiam optima est benefactorum merces. Laudi dabitur Ordini nostro, scripsisse quæ legerentur. Sed magis erit laudi Vobis, egisse, quæ scriberentur. Quantoque majora erga literas, & Academiam, merita erunt vestra; tanto etiam magis in secula vestrum ibit nomen: suumque ei decus constabit, quamdiu uspiam studiis honos erit. Votum superest, Nobilissimi, & Amplissimi Viri, ut vos Deus Reip. pariter atque Academiæ incolumes, diutissimè præstet, ac melius meliusque de utrâque merendi, & animum vobis suppetat, & vires.

Lugd. Batav. Anno cto Idccc.  
Prid. Kal. April.

## XI.

*Illustri & Generosissimo Juveni, Erico Oxenstierna, Magni Axelii filio, L. B. in Kimitho, Domino in Fiholm, & Tideun, &c.*

**E**O jam potentia provecta est, Regni Suedici magnitudo, Illustris Baro Oxenstierni, ut ad pristinam illam Gothorum majestatem, pleno, rapidoque gradu ferri iterum videatur. Nec aliter esse potest, quin Excellentissimus, & Illustrissimus Tuus Pater, Axelius Oxensternius, Regni Senator, ac Cancellarius toto Orbe Inclytus, Deo gratias agat immortales, quoties cogitat labores, & consilia sua, & domi, & per Germaniam, & terris aliis, ita prosperè cessisse, ut nihil non bene verterit Suedis: Regnumque licet antea metuendum, nunc cò pervenerit fastigii, ut horrorem pepererit inimicis, pluribus invidiam, toti verò mundo stuporem & admirationem. Gloriosum certè nasci in tali populo; sed quantò gloriosius, nasci ex illo, cujus divina in Regnum merita, honores merentur, (absit invidia dicto) iis proximos, quos vetustissimi illi Getæ Zamolxi, Legislatori suo, decreverunt; felix es itaque, quòd alterum Gothorum Zamolxin habeas Parentem. Sed si ob hoc solum fortunatum Te censerem, quam ego propriis tuis laudibus essem injurius? Neque enim sublimitas generis tui, quam Majorum potius laudem censes, tantum tibi conferre possit, quantum ipse virtute tuâ adquiris. A te igitur incipiat, qui animi tui dotes enumerare velit; ac sic etiam habebit, quod perficere vix possit. Mihi animus non est, tale quid adgredi: Et

etiam si ea mens foret, neque locus, neque tempus, neque ille cui hæc scribo, istud patiatur. Sufficit illa dicere, quæ ipsemet, dum hîc viveres, coram perspexi; quæque omnes norunt. Perspexi ipse insignem tuam comitatem, ac humanitatem: qua etiam minimis te æquasti; quæque me admonet, ut gratias quomodocumque rependam. Alterum verò nulli non cognitum, est illud, quod cum pauci admodum sint, qui de generis sublimitate Tecum certare, aut possint, aut velint: difficilius tamen sit invenire, qui valeat Tecum contendere amore, quo literas, & literatos prosequeris. Atque hæc duo tanti ego censeo, ut quamvis de cæteris virtutibus Tuis maximis, paulisper vellem cogitationem deponere: vel sola tamen potuerint me impellere ad illustri nomini tuo inscribendum literarias hæc commentationes nostras. Sunt illæ de duplici Sermone: Uno Veterum Romanorum; altero postea consecuto, earum Gentium, quæ quicquid pene in Occidente possederant Romani, in suam rede gere potestatem; cumque Imperio magna ex parte linguam ipsam transfuderunt. Nemo autem ignorat in iis, quas dicebam, Nationibus, facile primas ferre Gothos vestros. Eoque jucundius futurum, ubi in parte operis nostri conspicias tot vestigia Vocabulorum, quibus uli Gothi, & finitimæ Gentes, non tam linguâ, quam sola dialecto, diversæ. Accedit quod non parùm hinc lucis acceperit legibus, quas Gothi variis in terris tulerunt, Ut ante annos amplius centum supra milles in Hispaniis, ac Galliis (cujus pars Sidonio Apollinari Gothia vocatur) Euricys Rex, ut ex Isidoro cognoscimus. Item centum annis post Leuvigildus; posteaque alii, atque alii. In ipsa quoque Italia Theodericus, Wisigothorum Rex: à quo Leges Theodericianæ, ad instar codicis Theodosiani, sic vocati à Theodosio Juniore, qui non multo præcesserat. Ejus Theoderici est Edictum Capitulum CLIV. quod ipse se dedisse ait, *devictis tam Barbaris, quam Romanis*. Nempe, Dominus Romæ factus, loqui voluit pro more Romanorum; qui ut Græci antea præter se cunctos vocarant Barbaros; ita ipsi, præter se, & Græcos, omnes Barbaros dixerunt. Nec in Barbari nomine convitium fuerit, si, ut propriè sonat, Extraneum intelligamus; quomodo tam Romanus fuerit Barbarus, si in lingua peccet Gothica, quam Gothus in Romana. Totum enim hoc est ex genere eorum quæ relata, Græcis *τὰ ἑθνὰ*, nominantur. Itaque videmus ab Arabibus, in Asia quidem Barbaros nominari Græcos, Syros, Persas, & Ægyptios; in Africa contrà sic dici Hispanicè, vel Latine loquentes. Porro



Porro partim ex illa loquendi consuetudine Romana; partim quoque (sic sanè Veterum more, toto etiam opere loqui liceat) barbarâ illâ, conflata est hæc commentatio nostra; quâ operam dedimus, ut tum eorum inserviremus commodis, quibus nihil in sermone gratum est, nisi auribus cognitum Romanis; tum illorum etiam qui intelligere cupiunt Scriptores, linguâ usos confusancâ, ac miscella ex Veteri Romana, & illa imprimis nationum, quæ subegerunt Romanos. Dixerit aliquis, si non in alio defudâro, in re tenui hanc operam, ac tenuis quoque gloriæ fore; quia circa verba solum, non res ipsas, versetur. Sed qui sic sapiunt, parùm intelligunt, quantopere ad Romanam facundiam, ac prudentiam universam, verborum conferat scientia, ac delectus. Nec enim absque delectu, quem eloquentiæ originem esse Cæsar censebat, vel olim elegantiam consequi Romanam fuit; vel nunc, in sermone Romano, ipsam effugere barbariem conceditur. Unde hæc sic dominatur, temporibus nostris in monumentis virorum non è vulgo; inque publicis personat pulpitis, etiam eorum, qui se proferunt Doctrinarum duces. Non dubium igitur, quin majus quiddam sit multorum opinione, cum ea pedem comminus conferre; et si nimium sibi promittat, qui propterea speret, profligare se eam penitus posse. Sufficit, si illis saltem utilis navetur opera, quibus de luto meliore præcordia finxerit Prometheus; quales nunquam literis dèrunt. Alia interim est ratio ineunda seculo nostro; quàm olim Cæsaris Julii, & Augusti temporibus. Tum (quicquid alii contrâ arbitrentur) melius loquebatur vulgus rude, & indoctum, quàm nunc, (nisi duos tres excipere è numero non magno lubet) fortasse ipsi literarum Principes solent. Cui felicitati Veterum, accedebat diligens exercitatio apud Magistrum. Ad variâ etiam eruditionis laudem addiscebant elegantiores priscum ac desitum sermonem, non ad usum, sed ad intelligentiam Scriptorum, qui uno altero seculo præcessissent. Nam puerorum instar sapere judicabant, nisi qui priorum etiam temporum memorias complecterentur. Utcunque verò ex notitia obsoletorum, aliquis etiam ad nos fructus redundet; videlicet ad cognoscendam vocabulorum proprietatem, quæ ab iis originem ducunt: minutum tamen est hoc præ illis temporibus, quibus rancidi illius sermonis scriptores extarent. Nunc postquam nihil nisi laceras eorum reliquias, velut è magno naufragio, habemus; pro illo desita dicendi, alius est subeundus labor, in cognoscendo sermonis, qualis multis seculis fuit, postquam à tot gentibus exteris, dis-

cerptum est Imperium Romanum. Nec tamen ab iis hoc exigo, qui nondum è barbariei cœno pedem posuere; sed iis sedulò lectis, qui dictionem formant. Scio, delicatulos multos hanc doctrinarum partem, pejus odisse, quàm ululam fullones solent; sed defraudent illi animum, ut lubet, suavissimo tot rerum utilissimarum pastu. Cordatiores satis vident, quantum studiis decedat universis, si ob solam dictionem dispretui sit, quicquid penè scriptorum tempora nobis non inviderunt; jam inde ab Antoninis, vel Severi, filiorumque imperio, usque ad Atavos, vel Tritavos nostros. Itaque sic statuo, et si multò augustius sit sapere, quàm dicere: esse tamen dignum sapiente, intelligere omnes, etiam Barbaros; ac interim convenienter loqui auribus Romanis. Nec ita malè agitur cum studiis, ut non multi hac in re, nobiscum sapiant. His igitur consultum ivimus gemino isthoc labore nostro. Quem, tibi, illustris Baro, comitem do reliqui itineris, ac opto, cupioque, esse pius, ac monumentum devotissimi affectus. Eò gratum, acceptumque fore confido. Quid enim non mihi spondeam ab illo, cujus acre acri ingenio, judicium junctum mirabamur, priusquam Bataviâ discederes? Quid igitur nunc non promittamus nobis, post aditas, & lustratas Gallias, Italiam, terrasque alias; post cognitâ tot nationum leges, ac mores; post Principum, summorumque virorum, amicitias; imò cum divûm propagine, de orbis negotiis sermones? Nec minus probatum iri confido exactissimo illi iudicio fratris tui, D. Baronis Johannis Oxentieri, Regni Suedici Senatoris, ac Legati ad conventum Monasteriensem; ubi nunc permissus est, tot magnorum Regum, ac rerum publicarum caduceatoribus magnis, de hoc uno consultantibus, ut Orbis Christianus, armis positus, tranquillitate fruatur longâ, omnibus victoriis potiore: vel si tantus est bellandi amor, arma convertat in communem nominis Christiani hostem. Et cur non persuadeam mihi, per inclytum hoc fratrum par, nec sine laude nominandum, posse etiam laborem nostrum, impensius probari Parenti vestro illustrissimo, incomparabili viro: qui nunquam desit, aut desinet animo meo obversari, ex quo præsentem in hac urbe vidimus, loquentem audivimus, omni ab eo comitate excepti sumus. Relucebat in vultu blanda severitas, & facilis majestas. In sermone certabant verborum dignitas, & animus nihil humile cogitans. Ubique ingenium, & eloquium, gratiæ, ac eloquentia se exerebant. Imprimis in stuporem omnes trahebat cogitatio rerum maximarum, quas



ab excessu invicti Regis Gustavi, per universam Germaniam gessisset. Sed ista melius dicent variarum gentium annales, quibus sic præterita narrabuntur, ut iterum, imò semper videantur geri; terminari nunquam. Mihi verò, cui non ea est facundia, ut rerum magnitudine vinci nesciat, propositum est, ne culpâ ingenii tantas deterere laudes pergam, eas potius cum silentio venerari; ac definire hunc sermonem, simul ac non ficto officio, sed voto, ab imo pectore proficiscente, tibi, illustris Baro, totique familiæ Oxenstierniæ, omnia fuero felicia comprecatus. Magno quidem parenti, ut vegetâ & diuturnâ fruatur senectâ, diuque consiliis suis adjuvet Serenissimam Reginam, Phœben illam septentrionis, illam invictam, & nunquam vincendam Amazona. Illustrissimo, & excellentissimo Fratri, ut in tam illustri, & Orbi tam diu exoptato cœtu, ejus quoque ope, tandem aliquando, Jani claudatur Templum, & Musarum illud aperiatur. Tibi vero, illustris Domine, ut id itineris, quod restat in Patriam (quæ quasi eminens conspicata, jam brachia protendit, gnara quantum sibi de virtute tua possit promittere) pari absolvas fortuna; quamque de te universo Orbi spem fecisti, feliciter impleas.

*Amstelodami. Illustris & generosissimi nominis tui*  
c. 10. Ioc. XLV.  
Kalend. Sextil.

*Cultor Devotissimus,*

G. J. Vossius.

## XII.

*Viro Nobili Clarissimoque, Georgio Rattallero Doubletio, in suprema Hollandiæ, & Zelandiæ Curia, Senatori Amplissimo, Gerardus Joannes Vossius, S. P. D.*

*Nobilissime Amplissimeque vir,*

**O**ffero tibi librum; ambigo ipse, novumne dicere debeam, an antiquum, an utrumque eorum. Atque huc magis inclinat animus; unde novantiquum nobis liceat nuncupare. Longè maximâ ex parte antiquum esse, facile ipse cognosces; ut qui jam ante annos XXX. cùm primò hæc consignâsem, non legeris ea solùm; sed juventutem quoque sacris initiatam studiis, sub præsidio meo publicè, ut Scholarum est mos, audieris eadem defensitantem. Nec rationes tamen deficiunt, cur, ut tibi gratior sit

opera hæc nostra, ausim eam ab aliqua etiam novitate commendare. Antea enim disputationes singulæ prodierunt seorsim, justisque temporis intervallis. Nunc universas, quæ ad Baptismum quidem pertinerent, uno quasi fasce complexus fui. Nec necesse putavi, ea ubique verba appendere. Spontè enim illud prædico, siquid rectius, vel clarius, posse dici putarem, minimè veritum me esse, illud vel immutare, vel addere. Jam verò quod caput est rei, aliquas hæc dissertationes comperies, antea ineditas: scriptas quidem quadriennio, quo ab illustribus Hollandiæ, & West-Frisiæ Ordinibus commissum mihi regimen fuit, Theologici, quod Leidæ habent, Collegii: sed postquam in Academia ibidem cœpi profiteri Sacræ, Ecclesiasticæ, externæque historiæ tempora (ut de eloquentiæ studiis, curisque aliis, nihil nunc dicam) propter multiplicis oneris, ac muneris, quod susceperam, difficultatem, propè habitas pro derelictis; ac nunc demum anno ætatis secundo & septuagesimo, quo magis magisque lethi memor, mea convalesco, publici juris factas. Variæ autem & graves me causæ compulerunt, cur ista, potissimum sub præclari nominis tui auspiciis, in lucem prodire vellem. Primum quidem, quod beneficia à tot jam annis mihi præstita, ac meis, jam diu, me commonefecerint, ut si paria referre non possem, qualecumque saltem grati pignus animi reponerem. Doluit enim sæpè, fateor, quòd cùm pro aliorum in me benefactis gratiam, quo potui pacto, studuerim rependere: tibi uni, etli neminem sciam, cui videar mihi devinctior, nullo hæcenus argumento, testatus fuerim animum, atque affectum meum: tanquam per te solùm, mihi esse ingrato liceret. Accessit, quod minimè animus mihi foret, hæc cuiquam offerre, nisi in hujusmodi versato. Rarum in aliis quidem, si uno in studii genere emineant. Tua verò laus est, quòd, qui te jus audiant dicentem, omni ætate putent operam dedisse jurisprudentiæ. Quique aures, atque animos, adhibent differenti de divinis, nihil aliud nisi sacra tractasse arbitrentur. Atque idem in politioribus literis existimant, ac Philosophiâ universâ. Et sanè, de omni hoc fieri vix aliter potuit, qui Parente tanto, Philippo Doubletio, nascereris. Vir sanè is, luculentâ erat natus familiâ, cui decus etiam addebat, stemma maternum è Batavâ stirpe Dammiâ; in qua, ante annos penè ducentos quinquaginta, tres Dammios fratres, cum Dammio cognato, raro exemplo, Sigisfinundus Imperator, rogante Guilielmo, Comite Hollandiæ, equestri ornârat dignitate. Sed genus & proavos, alienas censet laudes: ac

per

per te esset, nec tangere huiusmodi liceret, quamvis jam ante annos quali quinquaginta mihi cognitissima. Sed mos hæcenus geratur. Illud igitur potius dicam, virtutibus suis fuisse longè nobiliorem. Quas cum propagari in liberis, ac nepotibus vellet; nihil æquè studuit, quàm ut tibi sic nato, à primâ etiam pueritiâ, præficeret optimos pietatis pariter, ac doctrinarum magistros. Gnarus videlicet, quantum cæteris antistarent vera animi bona; cujus rei ex se ipso capere poterat documentum: ut qui, postquam Parentem suum, quem honestissimo sciret semper loco, in avitâ Mechliniensium urbe habitum esse; perque fluctus illos decumanos decumis suis ab Albano Duce excitatos, cum multis summis viris in Hollandiam vidisset ejectionem: eam mox his terris virtutibus suis conciverit admirationem sui, ut oculis omnium in se coniectis, comitatus Hollandici rationibus, atque insuper fœderatæ totius Belgicæ præficeretur ærario. Nec leviter ejus fidem, ac merita declarat, quod in posteriori illa dignitate, defuncto suffectus sit filius natu maximus, Joannes Doubletius, Sanctæ Annæ Landiæ Dominus, vir summæ virtutis, atque existimationis: mox filius alter Philippus, vir benefactis florens; qui cum tanto omnium applausu nunc munus hoc sustinet. Sed de eximii horum laudibus dabitur fortasse aliâs melior dicendi locus. Ne propterea tamen in patre, vel fratribus, listam, facit *marcelus* mater tua, cordatissima matrona, cui multum sapienti supra sexum suum, cum antea semper, tum præcipuè post mariti excessum, nihil æquè curæ fuit, quàm ut simillimus evaderes Parentis sui, Georgii Ratalleri; quod nomen non sine numine, in sacri baptismatis fonte, imposuerunt Parentes, multum tam auspiciato vocabulo favente Avia Loïsa, Georgii Ratalleri viduâ; quicumque quoties sermo mihi fuit, non aliter judicavi, quàm conspiciere me, atque audire, reliquias aurei seculi. Nempe hoc ipso nomine excitare te à puero studuerunt, ad ejus viri vestigia premenda. In quo nec prudentia illos destituit, nec felicitas. Nam ut more Homérico, à posteriori initium capiam, vivam in te magni avi imaginem nunc omnes intuentur: Ut qui in dignitate illa senatoriâ, verè sis, quod gentilitium Ratalleri cognomen sonat, *consilio omnibus*. Quàm latus, ac latus, mihi se offerret campus de laudibus tuis disserere volenti? sed jam dudum metuo, ne ut aliis qui te norunt, jejunè dicar, atque aridè de te locutus; ita uni tibi videar fuisse nimius. Quare alteri capiti insitam, quod in hac etiam, ut Græci vocant, *ὀρεσάνδρια*, quam magnus Plato sapientis propri-

am ducebat, prudentiam non minus aperit, quàm affectum. Nam is avus tuus Ratallerus fuit, ut sapientiâ & fide, nulli esset secundus. Hoc jam omnes fore augurabantur, simul ac à Galliæ, & Italiæ Academiis, redux Patriæ se iterum stitisset. Sed magis postea in multiplici adedò dignitate, se exeruit virtus ejus incredibilis, ac propè divina. Primum cum in supremum Arteliæ Concilium est adlectus. Exinde ubi à Cæsare Carolo V. in magno Belgicæ Consistorio, quod est Mechliniæ, senator est creatus, & libellorum supplicum Magister. Postea etiam cum in ditione Provinciæ Ultrajectinæ, supremi senatus præses fuit. Quando item Belgarum suorum nomine, tanta cum gloria legationem obiit, ad serenissimum Daniæ Regem. Magna hæc, imò ingentia esse, incicias iverit nemo. Longè tamen hisce majus existimari debet, quod difficillimis temporibus istis, animum semper æquissimum, consiliaque moderatissima, attulerit rebus turbatis. Quod sub Margaritæ, Ducis Parmensis, gubernatione inter alias præcipuè Valencenarum urbs; sub Matthiæ Archiduce, tum Groningana, tum Campenlis civitas, suo & totius Belgicæ bono, ubertim fuere expertæ. Sed facile mei Ordinis hominibus persuasero, quantacunque hæc sint, magnam tamen iis accessionem exinde fieri, tum quod in tanta dignitate, singularis esset comitas, ut Gratia cum, quasi digitis suis, finxisse viderentur: tum quod ob variam, & elegantem eruditionem, à summis etiam viris, inter seculi sui decora reponeretur. Quo loco iis fuisse, mirabitur nemo; qui viderit pulcherrima ingenii, doctrinæque ejus monumenta. In quibus (ut taceam de metrica, quam adservas, Psalmorum paraphrasi) non postremus debetur locus Sophoclis, quotquot extant, tragœdiis, Latino ab eo carmine tam fide bonâ redditis; quàm postea malâ ex prima tragœdiarum trium editione, suam in versionem multa adeo transtulit Johannes Lalemantius Heduus; vir cœteroqui pereruditus; ut ostendunt quædam Hippocratis opuscula, donata ab eo latinâ togâ, & doctis illustrata commentariis. Neque ignoro, quid in Sophocle Latino requisierit vetus amicus noster, liberi satis oris, ac calami. Nobis verò arduum illud semper visum fuit, quod Nobilis Adolefcens, Latine Græcæque doctissimus, purè adeo exprefferat genuinam grandis Poetæ mentem. Et scimus, vix hominis esse in omnibus omne punctum ferre: quando etiam in dimidiato illo Menandro, quem viritum terit, teretque usus publicus, vim comicam desiderârît, (at quantus vir!) Julius Cæsar. Nempe nulli Deus omnia dat magna; quale etiam est adsequi Sophoclis cothura-

cothurnum : quo si sublimiorem novisset Poetarum Princeps, non hunc potissimum nominasset; cum laudare vellet tragœdias, live Varii sui, live Alinii Pollionis. Præterea mirum, non venire istis in mentem, translationem illam suo verius esse Authori extortam, quam sponte emissam in lucem. Itaque ipse maluisset per intervalla superaddere *τὸ ὅλον*, quod unum (quo jure id faciant in interprete, ipsi viderint) *οἱ μὲν μίαν* requirere se aiunt. Quasi non hanc etiam laudem adimpleverit in Elegiacis, Epigrammatis, atque aliis, quantum quidem sineret argumentum, curareque istiusmodi permitterent, Magni Regis & Reipublicæ negotia, quæ vellem homines umbratici (citra convicium hoc dico) magis attenderent. Utinam verò adhuc superessent commentarii ejus cedro dignissimi; quibus partim jam maturâ ætate, partim etiam senex, complexus fuit rerum se, quâ senatore, quâ senatus Præfide, judicatarum observationes exactissimas. Nunc (triste) eâ parte nihil, nisi plorare nepotibus reliquerunt obscœnæ illæ Harpyiæ, quæ in thesaurum hunc involârunt: credo ut grandia inde, atque arcana, venditantes pro suis, majori essent admirationi cæteris. Verùm his ulterius insistere si parem, metum prorsus, ne, contrâ quàm præcipi solet à dicendi Magistris, fiat *μὴ δέβασις ἀπὸ τοῦ ἀντιθέτου*. Redeo igitur eò, unde abieci; ac quia initio omnis in eo fui, ut exponerem, cur inscripserim hunc laborem nomini tuo: deque causâ principe satis mihi videor dixisse, pauca addam de altera hac; quod si putârim aliis me testari melius posse amorem tibi debitum. Ac cœptus quidem ille erga admodum adolescentulum, cum omnes caperentur indole, præclara quæque promittente; multum verò idem firmatus fuit suavissimo annorum prope XII. convictu, partim in principe Batavorum urbe, partim in Academia eorundem. Postquam verò lustratis Academiis Britannicis, Gallicis, Italicis, restitutus es tuis, cum Ulysse Homérico, mores edoctus, & urbes; tanta idem incrementa cepit, ut ad fastigium pervenisse amorem hunc putarem. Crevisse tamen video, dum pro beneficâ illâ naturâ obstringere me, meosque non cessas. Pro quo nihil occurrit, quod reponam præter affectum tibi, tuisque devotissimum, & hujus apud posteros, testandi ergo (ut mei ordinis homines solent) chartaceum munusculum; quod tamen gratissimum fore confido, vel argumenti causâ. Quid enim magis nos meditari assiduè decet, quàm sacramentum illum, unde, inter alia, duo illa magna ad nos redeunt bona? Primum quod eo inferimur Ecclesiæ, ac reddimur membra Christi; cujus spiritu vivimus,

quotquot eum induimus. Deinde quod in hac vita, perpetuis tentationibus obnoxia, suavissimum inde solatium percipimus adversus omnes mali spiritus insultus. Quorum utrumque accuratius, in opere ipso exponimus. Faxit Deus Opt. Max. Nobilissime, & Amplissime vir, ut labor hic noster aliquid adferat fructus veræ pietatis, & Antiquitatis Ecclesiasticæ, studiosis. Atque ab eodem numine precor, ut conservet tibi amorem nostri, ac diutinam largiatur valetudinem, & vitam; non modò Reip. causâ; sed etiam propter suavissimos liberos; imprimis filiorum trigam, tenerâ hac ætate nihil, nisi optatissimum, in studiis, & moribus, spirantem; Philippum, Joannem, Florentium: quorum si me precibus ad Deum commendem non minùs, quàm tanti Parentis, nihil abs re fecero. Scio, quàm illa innocens ætas grata sit Deo; cui ex ore etiam parvulorum nascitur robur, & gloria, ut divinus Pfalter ait. Illis ego pro suo erga me adfectu, vicissim opto, ut parentum insistant vestigiis, aviam etiam utriusque, & majorum deinceps longâ serie.

Amstelodami, Anno æræ Dionysianæ cō Idc XLVIII. III. Idus Martias. Quo die (ut unum hoc de nostro, Scholastici hominis, quasi jubilæo, addam, quando scis, quàm ægrè apud te sermonem desinam) annus expletur quinquagesimus; ex quo post primum ætatis septennium balbutici, & Grammaticæ datum, alterosque annos septenos Latinis, & Græcis literis impenso, ac totidem in Philosophorum præcipuè spatiis transactos; ex Senatus Academici autoritate apud Leidenfes (& fortasse hoc eo est commendabilius quod honos ille, quantum memoriâ omnes tenerent, à Lycei primordiis ante me illic contigerat nemini) summam studii Philosophici lauream mihi conferebat Theologus, ac Philosophus clarissimus, quo præceptore jure glorior, Petrus Molinæus. Hoc jam quia de me est, existimabis fortasse, melius potuisse præteriri. Nec repugno, sed facilem mihi scio apud te veniam fore; quia quâ prudentiâ es, nosti mores senum; quibus adolescentiæ, primorumque studiorum dulcis esse solet, ac jucunda recordatio.



## XIII.

*Illustribus, ac Generosissimis D. D. Chathio, & Christophoro, Achatii filiis Burgravii & Baronibus d Dhona.*

Illustres & generosissimi Domini,

**S**I res universas non iudicio infanientis vulgi, sed suo ponderemus momento, ut sapientes decet; primas pietati dabimus, prudentiæ alteras, tertias eruditioni: cui & ipsi locus in hac triga debetur, quia ad priores duas munit viam, ac fomenta iisdem, & alimentum præbet. Ac quanto hoc disciplinæ singulæ feliciter præstant; tanto propius absumt à laudibus pietatis, & prudentiæ; quibus principem locum nemo unquam denegavit. Unde illud effici puto, in doctrinarum Orbe, nihil esse commendabilius Virorum Præstantium Vitis. Ab hoc enim fonte haurimus, quorum Exemplo, earumdem virtutum æmuli fiamus, atque imitatores. Propterea nullus satis eorum laudari indultriam, qui præclare gesta posteris prodiderunt. Atque in eo quidem non temerè aliquem mihi adversaturum existimem. Sed alterum est, in quo iudicium multorum minime congruat cum iudicio nostro. Vident plerique, si memoriæ omnium temporum consulantur, nihil esse difficilius, quàm ut ita literarum monumentis consecremus res superstitum; ut non aliquid benevolentiae, vel odio, spei, vel metui demus. Hujus igitur periculi fugâ, declinantes in contrarium, de iis scribendum contendunt, quos avorum potius, aut Proavorum, quàm nostra, vel Parentum ætas conspexerit. Quales non satis expendere videntur, quàm sit operosum in rebus toto seculo remotis vera falsis internoscere. Ac ne illud quidem cogitant, quàm multorum suspecta sit fides, quia miris aliquem laudibus extollant, post unius alteriusque ætatis silentium, extinctis jam omnibus, quorum testimonium adversus illos pondus habuisset. Ut ab hoc etiam periculo immunes simus, expedit, ut mediam insistamus viam, atque eorum potius gesta, publici juris faciamus, qui non amplius rebus intersint humanis, ac ætate tamen, tum Parentum floruerint, tum nostrâ. Id nunc fecimus in Illustri, ac generosissimo Patruo vestro, Fabiano Burgravio à Dhona, Domino in Karwinden. Cujus eximie laudes, adhuc in omnium memoria versantur: cum septennium solum effluxerit ab ejus excessu. Virum hunc eum dico, non tam hominis nomen, quàm Virtutum plurimarum, mihi videor dicere.

Genere enim erat Nobilissimus; sed genus Nobilior animus exornabat: Quem ille à puero imbuerat doctrinâ, non tantum seriâ illâ, quæ prudentiam adfert; sed etiam amœniori, quæ ex Musarum, & Charitum commercio nascitur. Atque idem cum Doctrina, Eloquentiam feliciter sociarat, planè ad veterum mentem, qui cum statuerent, Palladem, & Mercurium coalescere oportere, Hegmathenam nobis effinxerunt. Nec satis fore putavit, si omnia sciret, imò nec si graviter & copiosè, de omnibus diceret; nisi idem optima faceret: Ut cum multum acceptum ferret eruditioni, & facundiæ; plus tamen cultui divino, & probitati deberet. Quibus etiam inservire voluit, quicquid studii posuerat in cognitione Naturæ: quod multum sane erat. Dicere autem solet, agnoscere se ex Operibus Dei, omnipotentiam ejus; ex horum ordine sapientiam; ex usu eorumdem, bonitatem & misericordiam ejus. Ita ille omnia referebat ad pietatem; quæ undique relucebat è dictis, factis. Cujus rei testes dare possumus, tot genere, dignitateque, tot eruditione Clarissimos viros, qui sermones ejus avidis hausere animis. Imò præclaræ hujus mentis imaginem quandam adhuc videre est, in Epistolis ejus ad summos viros exaratis: Imprimis iis, quas ad vos, Illustres D. D. Barones, & generosissimos fratres vestros, utpote sanguine proximos, imò affectu liberos, frequentes admodum dabat, interdum Germanicè, sæpius Latinè, Gallicè, Italicè, idque etiam cum septuagenario jam major foret. Hæ superstites literæ, ut Sermones nunc mittam, abundè documento fuerint, cum non, multorum instar, hæere solitum in causis, uti vocant, secundis: at nec contemnere eas; sed eousque ascendere, donec requiescat, in potenti Dei dexterâ, ac promissis ejus. Unde etiam, cum retulisset, scitum illud Imperatoris, Caroli V. ad filium Philippum, Brabantiam esse consilium suum, Hannoniam nobilitatem suam, Hollandiam robur suum: altius hoc Batavico robore assurgens, At inquit, fortitudo nostra Deus est. Per fidem enim sancti vicerunt regna: ut divinus ad Hebræos scriptor ait. Atque eo ille animo, in omni vita erat. Ubique etiam se exserit patientia ejus in adversis. Amat enim affligi à Domino, seque solatur illo Apostoli; ad bonum simul adjutare omnia diligentibus Deum. Nec eum de statu mentis dejecit, piorum infelicitas in hac vitâ: sed cogitat assidue, iudicium Domini incipere à domo sua; Eum castigare quos amat, partim ut peccata corrigat, partim etiam ut eos patientia imbuat, & filio suo reddat conformes. Negat quoque in hac vita imaginandum nobis aureum seculum;

cum



cum Davidi in summa etiam felicitate obversentur Valles mortis. Si diutius cessent auxilia divina, ita colligit secum, vel peccatis nostris quasi compedes injici divinae bonitati; vel propterea opem differri paulisper, ut postea tanto majori cum gloria liberemur. Ubi res in extrema quasi tegula consistunt, pejus quam inter sacrum, & saxum, ut dici solet; non hastas propterea abjicit; sed sic se, sic alios affatur (quid enim prohibet, quo minus hic etiam aureola ejus verba adscribam?) *Rationes Tecum, vii homulle, inear, quoties Deus te languentem recrearit, errantem reduxerit, perelitantem defenderit; quoties benignus hic hospes instruxerit tibi mensam, unxerit caput oleo, implevit calicem vino. Nemo hoc Pastore & hospite benignior, nemo liberalior. Dominus Te pascit; non egebis. Eris Ovis Dei benedicta; Conviva Dei acceptus. Vives in morte; lucebis in tenebris. Egressus ex hoc mundo, ingredieris in domum caelestem, & cum Jesu gaudebis eternum.* Hujusmodi animum omnia illius spirant. Nimirum quaelibet metiebatur consolatione illa propria filiorum Dei. Unde nec poterat adduci, ut miseris accenseret, vel Jobum ulceribus scindentem, vel Lazarum de petigine squalidum, vel Paulum in carcerem conjectum. Contendebat autem tales, in calamitatibus suis vivere palmæ instar nivibus pressæ. Quod si civiles etiam virtutes, attingi placet; in his quoque, ex Socratis consilio, operam semper dabat, ut is foret, quem haberi se vellet; quo uno non alia est melior, & expeditior ad solidam gloriam via. Ac talis ille, omnium bonorum judicio censebatur. Imò quanto nosceretur penitus, tanto majora in eo virtutum prædia conspiciabantur. Quemadmodum enim in cælo stellæ sunt, quas non videas, nisi adhibeas inventum nuper Telescopeum: Ita & in eo fuisse laudabilia multa, quæ nescirent, nisi qui curiosius observarent. Inque tot virtutibus imprimis relegebat modestia singularis; quæ fiebat ut cum summis ipse animi dotibus polleret; maximè tamen eas in aliis veneraretur. Tantus tamen vir effugere non poterat, quo minus cum ventis suis circumflarent malevoli. Quorum omni tempore tanta esse copia solet, ut eorum numerum, nec inire possit Archytas Tarentinus,

*Quem, maris & terræ, numeroque carentis arena  
Mensorem.* —

perhibet Vates Venusinus. Sed utcanque sevirerit invidiæ turbines, non ideo tam heroici animi vir animum despondebat. Sciebat, nullum esse Euripum adeo instabilem, neque Ægei maris fluctus tam turbidos esse,

sub Arcturi occasu, quàm plebis esse voluntates solent. Videbat, uti non semper sunt Alcedonia, nec terrarum uspiam, veris amœnitas semper obtinet: Ita & vices esse rerum humanarum, ac maxima quæque esse obnoxia calumniæ procellis. Videbat, si fortiter elavum occupet, suffecturam undis navem: sin propterea à gubernaculis recedat, periculum naufragii fore. Quare hominibus improbis medium ostendebat unguem: Imò lucri hoc ex iis faciebat, quòd tanto navigaret circumspèctus, quasi inter Scyllam & Charybdim. Ita ille invidiam vincebat, virtute alumnus suum facile vindicante. Et profectò qui vivere velit, ubi non sit inquietum, & nequissimum obrectatorum genus, non ei in Orbe hoc quærendæ sint terræ, sed magnis itineribus eundem sit ad Lunam ubi terram novam jam olim somniabat Xenophanes; qui & suos sectatores invenit. Neque cum laudes hæc in unum congero, morem sequor multorum, qui veluti Zeuxis, Venerem picturus Crotoniatis, pulchritudinem multarum Virginum, in unam transfulerat imaginem: Ita ornaturi aliquem laudibus, quæ in singulis commendatione digna invenerant, hæc uni tribuunt universa. Nihil enim hoc adularium artificio opus in Fabiano fuit. In quo si quis diffideat à nobis, diffundat animum per singula, ac in eo consideret nobiscum, tum summam generis vetustatem, tum liberalis educationis elegantiam, tum peritiam in Nobilissimis Disciplinis, atque Artibus, tum fecunditatem Ingenii incredibilem, tum masculam, & vividam virtutem, qua cum prisca etiam ætatis viris contenderet, tum nova decora magnitudine gestorum in penates, ac familiam illata: & tot alia quibus non insistant, ne videar actum agere, repetendo ea, quæ toto sparsa sunt Panegyrico, quem nunc edimus: eoque cum Comico dicar, in Prologis scribundis operam abuti. Sed quid sunt res mortalium sine literarum monumentis? Nam absque historia foret, tantæ virtutes, ac cuncta ejus benefacta, futura olim essent, quasi nunquam fuissent. Sola enim historia, live hanc Orator, seu Poeta, seu alius expresserit, omnes nobis ætates, ac secula conservat. Per unam hanc supersunt hætenus, quotquot fuisse quondam cognoscimus. Non jam Ninus, vel Cyrus, non Hamilcar, vel Hannibal forent, nisi historia eos servasset. Nusquam essent Miltiades, & Themistocles; nusquam Agesilaus vel Epaminondas; nusquam Alexander, aut Pyrrhus; nisi historia eos consecrasset. Non viverent in hominum memoria, duo belli fulmina Scipiones; non Pompeius, ac Cæsar; nisi perpetui hoc nominis

minis decus, ab historiâ essent consecuti. Per-  
riissent etiam Carolus Magnus, & Frederi-  
cus Barbarossa, alique Immortalitate dignif-  
simi viri, nisi, sicut olim Jupiter, si Romanis  
fides, fugientes novæ urbis cives; Ita histo-  
ria nobis fugitivi temporis memoriam stitit-  
set. Ut solus sanè Historicus dici mereat-  
ur, stator Temporis, Perennitatis sacerdos.  
Neque ignoro, plurimos eandem laudis  
perpetuitatem sperare è statuis, columnis,  
sepulchris, aliisque id genus monumentis.  
Sed eventus comprobavit, omnia ejusmodi,  
esse invidiæ ac fortunæ casibus obnoxia, ac  
sæpè brevi admodum temporis spatio, dissi-  
pari, aut consumi. Quid mirum autem, si  
quæ manuum sunt opera, naturam sequan-  
tur corporis, quod mortale nobis datum est?  
Historia verò est animi opus, qui morte ca-  
ret; cujus instar & ipsa Historia, nec Libi-  
tinam, nec Orcum extimescit. Hæc igitur  
una generosissimo Patruo vestro præstiterit,  
ut quemadmodum corpus ejus Morungæ è  
Saxo habet monumentum; Ita etiam ani-  
mus, ac tot benefacta ejus, ubique terrarum  
monumentum obtineant literarium: ac qui  
perpetua apud Deum gloria fruatur in cœlis,  
idem perpetua hominum fama fruatur in  
terris. Sed hæc quæ velut largo è penu, in  
historiæ laudem depromimus, non alteri  
convenire putandum, quàm illi, quæ verè  
historiæ nomen possidet; hoc est quæ prin-  
cipem ejus legem servat, ne quid falsi dicere  
audeat, ne quid veri non audeat. Quorum  
neutrum in signandis Inclyti Patruî vestri  
gestis, neglexi sciens. Nihil enim, vel eorum  
dissimulo, quæ objectarent Malevoli. Cum-  
que laudantium vulgus, benevolentia studio,  
utrum ficta, an facta referat, sæpè nihil peni  
habeat: sedulo hic operam dedi, ne ulterius  
verborum flumine ab ripa solverem, aut li-  
berius, ac rapidius deferrer, quàm veritas  
pateretur. Interim Editorem me Panegyrici  
hujus profiteri malui, quàm Authorem. Nam  
prævit, ut potuit, alter, qui historiæ penè  
totius scriam, atque maxima ex parte argu-  
mentum hujus commentarii complexus erat.  
Hujus ego vestigiis cum plurimùm insistam;  
cuncta uni nomini meo, sine nominis ac can-  
doris defectu, tribuere non potui: Ne qui-  
dem si tueri me utcumque parem illo Auso-  
nii ad Symmachum suum, *Quodam pacto so-  
cietatem laudis affectare, qui aliena benedicta  
primus enunciat.* Sed ut alterius opera operam  
mihi parte ex una levavit; ita parte ex alte-  
ra, multo amplius laboris reliquit. Nam &  
spissi se offerebant errores non pauci: pluri-  
ma erant omissa, quæ magnoperè ad rem  
pertinerent: multa non Davum requirebant,  
sed Oedipum: Linam exigebant universa,

iis exceptis, quæ non tam limam poscerent,  
quàm spongiam. Alia igitur rescui; alia  
supplevi; disiecta ordinavi; denique Mone-  
tam (nequid gravius dicam) parum Latia-  
lem incude magis Romanâ reinxî: Eò ju-  
stius, quia cum multa adeo à nobis forent,  
nisi cætera simili dictione exponerentur, Ora-  
tio futura erat hybrida, sui que ipsius dissi-  
millima, non sine Lectoris fastidio. Quæ  
non à me dicuntur, alium fugillandi causâ,  
qui, ut dixi, quod potuit, fecit: sed quia  
ignosci mihi volo in nonnullis, quæ præstius  
& melius à me dici potuissent. Longe enim  
molestius, per alia itur vestigia, quam cum  
libero gressu proceditur. Quod si cui ista non  
satisfacient, cogitet hæc in antecessum dari,  
ac fortasse quod desidero ipse, aliquando so-  
lutorum in probo & aspero; vel si mihi oti-  
um defuerit, non defore tamen alios, atque  
eos ætate, doctrinaque florentes, otio etiam  
abundantes; qui ex hisce nostris, monumen-  
tum aliquod condant, dignum, quod tan-  
quam Phidiæ Pallas in arce reponatur. Nobis  
nunc satis visum fuit, si Panegyricum vel  
(ut amicis, ad alliciendos magis historiæ a-  
matores, inscribi placuit) Commentarium  
hunc ederemus, qui præcipua quæque suppe-  
ditaret. Nam omnia dicere qui aulim? cum  
certus sim, in Argumento adeo fecundo  
supereffe non pauca, quæ partim ejus, cui  
bona ex parte debeo ligna, lapides, cæmen-  
tum; partim etiam nostram effugerint indu-  
striam. Sed, nisi opinio me fallit, ferè ista  
minoris erunt momenti præ iis, quæ diximus.  
Qui autem strictim aliquando, exponerem  
meliorem, gravioraque (præsertim in iis, ubi  
aliena non premo vestigia) leviora his anxie  
nimis sectari non debui. Si qua tamen mi-  
nora etiam nunc intercurrent: cogitare opor-  
tet quod Damis respondit, cum reprehende-  
retur, quia de Apollonio Tyaneo minutias  
quasdam retulisset. Aiebat, de mensis Deo-  
rum Analecta etiam colligi oportere, ne Am-  
brosiæ ejus pereat quicquam. Atque idem  
Xenophontis judicium fuit, qui dicebat, Viro-  
rum virtute præstantium, non seria modo,  
sed etiam joca, literis mandari oportere. Et  
sanè, si Lucerna Epicteti tanti fiebat, ut esset,  
qui mille eam drachmis emeret: si fuit, qui  
Protei Stoici baculum emeret talento; quanto  
magis dicta, factaque omnia Virorum Ex-  
cellentium in pretio habere convenit. Prop-  
terea rectè etiam, atque ordine, facturum  
putem, qui temporis aliquid tribuere volet,  
colligendis Illustris Patruî vestri dictis. Multa  
enim præclare ex ore ejus proficiscebantur  
quotidie. Quod si quis ex ampla segete, spicas  
exigit paucillas, hujus generis erant. Non  
minoris impietatis est Deum fingere, quàm  
negare.

negare. Cor hominis poenitens, frangit cor Dei irascens. Cum viri principes timere Deum nolunt, timere homines coguntur. Regnantibus Tyrannis, multiplicantur Adulatores. Optime ulciscitur calumniantes, qui innocentiam Deo commendat. Ubi magna regnant vitia, ibi propinqua est poena. Divinam nescit naturam, qui eam diu parcere putat scelestis. Non punitur cum malis qui se sociat bonis. Et fuere id genus plurima, aliqua fortasse etiam luculenta his magis, ac edecumata; eoque commendatiora, quod non quaereret ea Heros, sed pro rebus sponte se offerrent. Quod si non levis ejus dictis honos debeatur; quanto minus permittendum foret, ut interirent preces, ac suspiria, quæ Illustris Vir, manu ipse sua consignaverat. Spirant enim magnum Dei amorem, ac pectus verè devotum numini cœlesti: Imò vix arbitror, ex iis, quibus Religio mediocriter cordi est, ullum esse ingenium adeo segne, ac frigidum, quin iis legendis possit, non calefieri modò, sed etiam inflammari. Atqui si ulla, hæc sane tempora, in fatali Orbis Christiani motu, tantoque & animum æstu, & armorum posulant, vel flagitant verius, ut dum quotidie Dei, atque hominum amor frigeat, inque pejus abeunt seculi mores, expédiant omnes omnia, quæ pietati, ac virtuti debent. Quamobrem, etsi Illustris Patruus vester, preces eas suspiriaque, sive affatus, proprium duntaxat in usum, atque id Teutonice linguâ concepisset, publici tamen boni interesse existimavi, si ea in aliorum quoque usum Latine exhiberem. Idque liberior paulò versa, interdum fere ad Paraphraseos modum. Nam ut linguæ cæteræ, ita Teutonice suum habet genium: eoque si anxie nimis de verbis laborassent singulis, non de perspicuitate modò, sed de vi etiam, atque efficacia, plurimum decessisset. Verborum lenociniis hic studendum minimè putavi. Bene enim preces istæ olent, quæ pectoris magis sanctimoniam, quàm Rhetorum pyxides, redolent pigmentarias. Simul quoque videbam, à præstantia, tum argumenti, tum etiam authoris, pretium illud ac pondus accedere Orationi quod ab Interprete non haberet. Itaque mihi certum potius, quàm arbitrarium est, gratissimum fore utrumque hunc Laborem meum Illustri nomini vestro. Quod ut aliunde nescirem, tamen non aliud credere permetteret ferventissimus ille amor vester, erga Patrum optime meritum; atque ut de hoc etiam taceam, facile illud mihi persuaderet singularis vestra probitas, ingenium excellens, acre iudicium, prudentia eximia, humanitas incomparabilis, ac tot aliæ in vulgus etiam

notissimæ, ac vetusto adeò, & Illustri genere vestro longæ dignissimæ virtutes: de quibus filere apud vos malo, partim quia ipse ad earum splendorem connivere cogor, quemadmodum adulterini Aquilæ pulli ad radios solis; partim etiam, quia jucundius vobis est laudabilia facere, quàm laudari; in os verò laudari molestum est. Cæterum quando utilitas utriusque hujus Argumenti animum meum subit; minimè despero, non vobis modò, ac generosissimis fratribus, & Universæ Dignæque familiæ; sed etiam aliis, saltem optimo cuique, probari posse operam nostram. Nam cum, ut initio dixi, nihil majus, atque augustius, habeamus pietate, atque prudentia; est hic, quod ad utramque conducit. Sive enim Panegyricum spectemus; tum ad civilem, tum ad militarem vitam conferet notitia eorum, quæ variis in terris, ab Illustri Patruo vestro prudenter, & fortiter gesta sunt. Sive oculos coniciamus in preces, ac suspiria; quid ad alendam pietatem magis prodest, quàm si alieno in precibus ardore ipsi etiam accendamus ad invocandum Deum? Quod nemo, puto, inficias iverit, qui sanctum hoc studium, suo nòrit pretio æstimare. Nam etsi Deus non longè à nobis abest, ut in quo simus, vivamus, & moveamur, tamen ob pravam indolem, longè ab eo absumus; eoque opus est preces scalis, quibus ascendamus in cœlum, & supplices imploremus gratiam Dei, sine qua tantumdem possumus, quàm qui nunquam fuerunt. Hujusmodi igitur adminicula qui respondent; sanè ut parvi æstimant pietatem, aut de viribus propriis multa præsumunt, ignari ejus, quod Illustri Patruo vestro in ore esse solet, ritè precari esse artem artium, & scientiam scientiarum: cui affine est, quod idem crebro dicitur, fiduciam defensionis divinæ reddere nos de exitu securos; at non segnes ad precandum.

Cur autem, Generosissimi D. D. Barones, vestro potissimum Nomini Opuscula hæc offeram; neque ignorare vos potestis, neque aliis fore arbitrator obscurum. Neminem enim caligare hic finit eximius nominis vestri splendor; qui partim ex inclitis natalibus vestris relucet, partim ex summis laudibus, quas ingenium vobis peperit, atque industria. Cujusmodi mixtura occurrit in perpauis. Quemadmodum enim rara res est, lux absque umbra, ignis absque fumo: Ita perpauis etiam invenire est, qui non sui generis claritati, vel morum vitiis, vel inscitia, tenebras offundant. At vos pariter hæc tria illustant, Nobilitas vetusta, Virtus memorabilis, & insignis Eruditio: ut de dignitatibus, velut adscitis Ornamentis, nihil

nunc



nunc dicam. Duobus igitur libellis, quorum alter ab optimo, prudentissimo, fortissimo Heroe, Fabiano à Dhona, alter autem de eo scriptus foret, totidem Patronos dare volui, eosque non indecores, sed tergemina, qua dixi antea, luce illustres. Præterea putavi, recedendum mihi esse, ab more vulgi sua dicantis iis, qui, ea, quæ scribantur, non intelligant: & si intelligant, nihilo magis illa, ad se pertinere arbitrentur, quàm alium quemvis: ut non tam patrociniū operi exposci, quàm illud quæri, quod dicere nolo, res ipsa non loquatur, sed clamet. Volui igitur hæc iis offerre, quos constaret melius ista novisse, quàm scriptorem ipsum; quos etiam, unā cum generosissimis fratribus, magis hæc tangerent, quàm quicquid est hominum ubique: quos denique patrociniū scirem defugere, nec velle, nec posse. Quæ omnia me video consecutum; quis is, quem descripsimus, & cujus preces damus, naturā Patruus vobis fuit, affectu Pater: ac vos ut bonorum & opulentæ, ita gloriæ estis hæredes; atque omnibus quidem, sed potissimum vobis exemplo fuit: nec minus exemplo erit, præclaris, atque ad maxima natis liberis vestris, atque adeo nepotibus quoque & omnibus, qui seculis futuris, longo ab iis ordine (ita voveo) felicissime nascentur.

Illustres & Generosissimi DD. Burggravii & Barones à Dhona, stirpe quidem maximi, sed animo majores, vivite & valet: ac vel in ima cera inter candidos inclyti nominis vestri cultores, referte etiam nomen meum.

Lugduni Batavorum Anno clc lxxviii. Pridie nonas Junias: quo ipso die, ante septennium excessit inclytus Heros, Patruus vester, cui nunc parento; & ante annos amplius octingentos defuncta est Luitgarda, conjux Caroli verè magni, imperatoris eo magis à præclara stirpe vestra celebrandi, quia ab illo, & filio Ludovico Pio, ad pristina generis decora, Dhonani nominis, ac Burggraviatus dignitas, jam ante tot secula accessit.

*Æternitati Illustris ac generosissimæ familiæ Dbonanæ, devotissimus,*

G. J. Vossius.

#### XIV.

Hugoni Grotio, Gerardus Vossius  
S. P. D.

**I**T A me amari à te cupio, vir Amplissime, quàm verè illud nunc ad te scribo, nihil mihi videri scripto tuo, non dico elegantius

teriusque (quomodo tua laudare sit vituperare) sed doctius, nervosius, temporibus nostris accommodatius. Planèque persuasum habeo, juxta mecum sentire, quotquot animum habent affectibus minimè Mancipatum. Sed heu! quotus quisque est, quem non epidemicus provinciæ nostræ morbus, tantquam pestilenti aliquo sidere affarit? præsertim ex eo ordine, qui sub Prophetici Spiritus prætextu soli sibi omne controversiarum judicium deposcit. Equidem non sine gravi dolore coactus sum, audire maligna adeo judicia hosce homines ferentes. Non te in atramento, sed felle calamus tinxisse aiunt. Tantoperè à te contemni Sibrandum, ut non Doctoris usquam elogio ornes, nisi cūm umbraticum Doctorem appellas: Nec Theologi eum nomine digneris, nisi cūm negas cum eo, & similibus Theologis sapientiam morituram. At Sibrandum virum esse optimè de Ecclesiā & meritum, & merentem; atque ut fortè alicubi exorbitavit, non tamen malitia peccasse, sed puræ Religionis Zelo; tum autem minimè dubitandum, quin totum hoc egerit magnatum (aliquorum saltem) seu instinctu, seu permisso. Nec enim bene adeo Frisios Hollandis unquam voluisse; & nunc recentes accessisse rixarum causas ab exactiōibus, aut vectigalibus, nescio quibus, planèque metuendum, ne scriptio hæc animos eorum magis exacerbet. Negant quoque magis te potuisse causam agere Remonstrantium, uno hoc excepto, quod non apertè Zelotarum opinionem erroneam dicas. Sed longè omnium indignissimum se putare, quòd Ecclesiastas dicas expostulare, quod non interfint conventibus publicis; *Ἀρχιεπισκοπῶν* eos multis in locis obliquas per artes in se trahere, & ubi invaluerunt vindicare etiam sibi audere: *Διμαρτυρίαν* sæpè ad negotia civilia extendere; Flandriam turbulentis suis concionibus perdidisse: tempore Licestrii hoc egisse, ut Ordines redderent contemptissimos: Ordines necesse habuisse, eos publicitus monere, ut perdenda Hollandia absisterent: periculosissimo tempore ordinum detrectasse imperium, ivisseque oblatum externis. Neque quicquam te horum aliquo *σοφῶς παρρησίᾳ* edulcare, tantūm dicere, bonos te minimè horum criminum insimulare, ac mox *ἐπιτίμῃ* hujuscemodi succinere, talia in Ecclesiastico ordine esse ingenia, ut plus iis, quàm necesse sit, haud tuto committas. Subjicere te quidem mox, dolori tibi esse, quod causa hæc aliter se tractari passa non sit. Verūm hæc occinenda iis, qui necdum ære lavantur; viris enim quotquot non omnino naris sunt obesse, luce ipsa clarius esse, longè aliter causam à te tractari potuisse. Multa enim à te mitti

potuisse, & si asperiori esse necesse erat, nil tamen opus fuisse te omnia *ἀπερχόμενος* & *ἰσχυρῶς* ἐπιμένειν agere; scriptum tuum esse, *περὶ δόγμα οὐκ ἀπερχομένην, ἀλλὰ καὶ ἐξ ὁδοῦ πηλίου*. Si Religionis hostis esses intensissimus, non tamen potuisse te tuò in Batavia indignius excipere cum Ordinem, quem velle te dicis, ut à populo quàm sanctissimus habeatur. Non aliud se persuadere sibi posse, quin cum apud Frisios esses, ante biennium aut præterpropter, quoties item apud urbis nostræ Magistratum, & quosdam Zelotas Ecclesiastas, de Religionis es negotio locutus, quasi mansuetissimi esses pectoris neutrarumque partium, totum hoc animo feceris simulato; aut saltem mirandum esse, quod tantum tam cito sis mutatus ab illo, qui fuisti prior. Nominis tui autoritate, Jesuitas publicè privatimque, sese tuituros, ad exprobrandum ordini huic animum malitiosum, rebellem, & quibus non vitiis infectum. Primum te esse, saltem eruditorum qui huiusmodi posteritati dicas scriptis tuis, quæ æternatura nec ipsi disintur. Nec suffecisse, ut hæc lingua Latina legerentur ab eruditis; debuisset Ecclesiastas fabulam fieri cerdonibus ac tonsoribus, dum ea vulgarem in linguam transferri curas; si quid à paucis aliquando fuerit peccatum, non posse cæteros præstare hanc culpam. Deinde non minus peccatum esse tum temporis à Rerump. Rectoribus, utut strenuè hic Ecclesiastæ maffare cogantur. Denique cum anni tot ex eo tempore sint elapsi, maligne admodum vulnus hoc toties refricari. Ex his facillè intelligere potes, quantoperè exacerbatus sit, erga te quorundam animus. Sanè nec defunt, qui bello sibi schemate videntur librum tuum nuncupare, *impiam pietatem*. Interea melle dulcior iis circa cor gliscit iracundia, quando animo tempus illud concipiunt, quo, ut inquit, Sibrando, & forte aliis, (etiam Pontificiis, ni eos spes fallit) poenas dabis. Quanti autem Sibrandum suum faciant, quo item te loco in Theologica palæstra habeant, hinc æstimare potes; quod quemdam audierim, aptantem tibi illud Poetæ;

*Infelix puer, atque impar congressus Achilli.*

Nempe difficillimè sibi persuaderi patiuntur, tantam Theologiæ notitiam cadere in quemquam, qui Minister non sit, ut de controversiis nostri sæculi iudicium ferre, ausit adversus Theologos suos; quod à te factum credunt. Tum autem, quia in Patrum lectione plane sunt peregrini, ne hac in parte te videantur indoctiores, etiam tibi loca quæ citas, aliundè suggesta apud indoctos calumniantur, nempe ab Utenbogartio, ut sus-

picantur. Hæc ego uti cum dolore aliquo, ita nec absque risu scribo. Et te quoque risum vix tenere planè habeo persuasum. Sanè ex sermonibus tam insulsis facile iudicare est, quam haud iudicii sint ullius, vel eruditionis, utut unus alterque multijuga sibi placeat lectione. Tales profecto hostes minus tibi metuendi, quàm Sibrando Vorstius; quem tantoperè contemnit. Si tamen etiam scripto maledicere tibi non dubitabunt, (quo de vix levem susurrum hæcenus audiui) tuum erit animum firmare iis, quæ ipse scripsisti. Regium enim esse iis cum benè feceris audire malè: neque quemquam debere ad rem tam utilem, atque tam odiosam accedere, nisi qui ad ferendas calumnias benè se munierit, ut honesti consilii conscientia possit dicere;

*Omnia præcepi, atque animo mecum ante revolve.*

Et de his hæcenus.

Pag. 36. vers. ult. in Augustini verbis, *Cælestiani aut Pelagiani*. Etiam apud interpretem tuum est, *Cælestinianen*. Ac video etiam ab aliis interdum ita nuncupari. Sed planè duabus literis inductis, scribendum *Cælestiani*. Quippe, uti scis, nomen id à Cælestio Pelagii Discipulo, non à Cælestino qui Cælestianis adversatus. Id cum fugeret Vallam, scripsit Cælestinum Papam Romanum favisse Pelagianis. Nempe Cælestium & Cælestinum confudit: quo nomine merito vapulat ab Annalium Scriptore.

Pag. 50. In verbis Ammiani Marcellini, vel universa ejus verba adduci debent, vel vox *gravius* planè tollenda. Sic enim ille extremo Libro XXI. *Eratque super his adimere facilis quæ donabat, Christianam Religionem absolutam, & simplicem anili superstitione confundens, in qua scrutanda perplexius, quàm componenda gravius, excitavit dissidia plurima, &c.* Sententiam esse vides; non tam graviter componebat dissidia, quàm perplexe Religionem ruspabatur. Omnino igitur *ad gravius* pertinet ad *componere* non ad *excitare*.

Aliud quod moneam non habeo, ac fateor ne hæc quidem scriptione ullo modo digna esse. Sed cum opus non possem, operam saltem meam tibi probare volui. Superfunt tamen paucula, de quibus si præsens essem, iudicium tuum exquirerem, uti cum pag. 52. ais, Augustanam Confessionem esse mutatam. Nescio enim an id magnoperè ad rem faciat, cum privato quidem consilio Melanchthonis mutata sit, at publica, ni fallor, autoritate nunquam. Hoc saltem scio, Melanchthonem à Luthero hoc nomine objurgatum, quod fecisset id omnibus inconsultis. Scio & Germaniæ Principes, qui Confessionem sequun-

tur Augustanam, non aliam agnoscere quam eam, quæ Carolo quinto exhibita anno cō 1555. scio denique Lutheranos hoc pacto se purgare, cū à Pontificiis accusantur immutatae toties confessionis. Quod pag. 36. ais, Chrysostomum ubi necesse est, gratiæ necessitatem non obscurè inculcare. Memini me dum hic esses, tribus verbis de Chrysostomi sententia colloqui. Velim autem, si integrum, adeas τὸ ἰδιόν, Hom. XII. ad Hebr. Nihil clarius quam tolli ab eo gratiam prævenientem. Et quid mirum? Cum idem in prioribus scriptis fecerit Augustinus, quem errorem retractat, Lib. I. Retract. cap. 23. Quare cogitandum satisne solidum sit argumentum quod urges pag. 34. ubi ais, aut Remonstrantes Pelagianos vel Semi-pelagianos minimè esse, aut & Chrysostomum talem habendum, ne simus οὐκ ἀπολογιστέον. Nam dispar fortassè ratio temporis ejus, quod ante Pelagium fuit, quo, ut Augustinus alicubi scribit, securius omnino de gratia loquebantur. Interim Remonstrantes minimè ejus erroris reos esse agnosco: tantum ambigo, annon jure Semi-pelagianus sit dicendus, qui gratiam neget prævenientem; quamquam Chrysostomus, Augustinus, multique alii ante Pelagium, eam minimè agnoverint. Quod si est, non parum de vi argumenti tui decesserit: ut res in se vera sit. Possitque argumentum hoc si sapit, urgere adversus te Sibrandus.

Pag. 118. Ratio sequitur, quia alii aliorum calamitates ferre debemus. Videndum annon aliovorum torqueas Sibrandi verba. Nec enim id, puto, voluit Sibrandus, velle se Anglorum ferre infirmitatem; verum potius ut Archiepiscopus nostrarum, siquæ sunt, Ecclesiarum ferat infirmitates.

Pag. 42. Inquis, in crepusculo elucescentis veritatis. Similiter loqui scio Jul. Scaligerum in Historiam Theophrasti. Sed discere aveo, an & crepusculum liquido pro diluculo ponatur. Aliud judicare videtur Plin. Lib. XVIII. cap. 25. ac imprimis Censorinus de die natali, cap. ult.

Verum somnolentum me (nam media jam nox est) ad meras nugas delabi sentio. Quare ne molestus tibi ultra sim, manum de tabula tollo. Ignosces, quod nihil attulerim, quale expetiisti. Nec enim id mearum virium est. Et toties integro hoc triduo de die partim à discipulis, partim ab aliis sum interpellatus, ut ipsas historias, quod optassem, diligentius examinare non licuerit; ac ne has quidem literas, nisi sera nocte, potuerim exarare. Sub vesperam responsum tuum accepi, de quo nihil addo, quia demum crastino mane de eo sum cum Corputio acturus. Vale,

vir Amplissime, Belgicæ Phoenix, cui (cū cætera largè sis consecutus) unum hoc tantummodo à Domino exopto, ut valetudinem largiatur in hisce laboribus firmam, animum adversus injurias fortem.

Dordrecht cō 1653. Post. Calend. Novembris. Velim, vir Amplissime, apud neminem de literis, aut judicio meo facias mentionem. Minus enim, si suspectus esse cœperim, prodero bonæ causæ. Quamquam profecto te hoc monere, nihil necesse fuisse intelligo, qui per te isthac longè melius vides Iterum vale.

## XV.

Gerardus Vossius Hugoni Grotio S. P.

**A**Ccepi Lucanum tuum, Amplissime Groti, verè inquam tuum, quem feliciter adeo restitueris integritati. Quo nomine maximas tibi gratias debet orbis eruditus: Hispania tamen imprimis, cujus nobilem adeo civem fœdis tabescentem vulneribus sanasti: sed puto ut superba est natio, nec Batavorum laudibus satis æqua, aut nulla hoc beneficium agnoscat, aut invita. Nobis satis est, quod Lucanus ipse quantum Batavo debeat, neminem sivit ignorare. Quod si eum ob ingenuam adeo confessionem patria sua minoris facere volet, à Batavis poterit donari civitate, civis futurus nobis acceptissimus. Me quidem, (quem Batavia jam diu meritis suum fecit) mire semper delectavit, maximè sententiarum acumine. Deinceps verò tanto etiam futurus gravior, quanto posthac minus erit, quod in eo legendo remoretur ingenii nostri tenuitatem. Quantumvis verò merito suo placuerit vates tuus, tamen dissimulare non debeo, maximam eidem gratiam conciliasse donantis affectum: de quo tantoperè gratulor mihi, ut eum ponam in parte non exigua felicitatis meæ. Ut verò etiam quomodocumque gratum reapse animum tester, quod unum possum, mitto ad te *artidemy* Oratorias nostras: Impar quidem donum sapientum judicio atque etiam meo, sed minime futurum impar, si putare libeat rationes, cum fecunda gente Mene-ni. At extra omne periculum fuero, si titulum legisse contentus, mox librum in angulum aliquem abdas. Quamquam profecto gravissimæ occupationes tuæ facillè metum hunc omnem mihi eximere possint. Et tamen quasi etiam tibi otii quicquam superfit à rebus tuis, qua publicis, qua privatis, mittere ad te, judicique tui facere non dubitavi minutam



minutam quandam commentatiunculam nostram, quam ante menses paucos, occasione certâ, subito calore, ac soloci stylo effudi. Ea describenda prope triduo à redditis mihi literis tuis Amanuensis occupatus fuit: quæ ratio fuit, cur non statim rescripserim, ne forte id incuriâ factum putes. Non est autem quod chartas hæc remittas; quia servari poterunt in adventum meum. Quamquam enim propter affinium *veredum* adventum, & amicorum aliquot expectationem, his fortasse duabus, aut tribus hebdomadibus extra urbem pedem ponere non licebit, omnino tamen ad vos excurrere animus simulac potero; ut verò possim, planè adnitæ. Quid enim expectatius mihi contingat, quam ut cum eo colloqui liceat, quem unum præ omnibus mortalibus æstimo, cujus singularis prudentia; atque apud illos authoritas, qui plurimam in Rep. possunt, eam in me spem excitant; ut brevi & pacatiorem Remp. & Ecclesiam, nec horum licentia, nec illorum tyrannide æquè periclitantem, nos habituros putem? Adjeci quoque exemplar earum literarum, in quas ex Anglia ad Ecclesiastem quemdam transmissas nuper judicium feci. Tuum erit vel totum hoc de literis istis, vel illud saltem dissimulare, ex urbe nostra exemplar earum ad te transmissum esse; neque id tam mea causa peto, quam illius qui id exemplar mecum communicavit. Nec enim alioqui ei ad quem perscriptæ literæ (cujus nomen coram retuli) difficile fuerit odorari, unde earum ad te *ἀνίσταται* manarit. In urbe nostra magis magisque residet animorum fervor; quo nomine non mediocriter gaudeo. Non tamen Zelotæ sic sese comprimere possunt, quin interdum excendant quædam etiam publicitus. Nempe difficulter, ut Poeta ait, ignem celaveris,

*Lamine qui semper proditur ipse suo.*

Ita in concione hesternâ audire erat Valerium Poplicolam, intonantem graviter adversus eos, qui perstringunt Ecclesias (ita enim is loquebatur) quasi creptum ire velint Magistratibus jus suum. Duplicem, inquebat potestatem facimus; unam autoritatis, ministerii alteram, si modo ea quoque potestas dicenda est. Huic addebat; solis Magistratibus datam à Deo autoritatis potestatem; ministris non aliam convenire quam illam ministerii. Provocabat idem Stentorea voce ad omnes Doctores nostros, ex quorum monumentis aliud negabat evinci posse, quam penes ministros esse illam ministerii potestatem. Qui sic loquitur, ut fucum faciat imperitioribus, quid tamen aliud quam paratus est ab-

stinere vocabulo autoritativæ, ut loquuntur, potestatis, dummodo rem ipsam à Magistratibus obtinere possit? Nam certum mihi non arbitrarium est, haud aliud eum sentire, quam Christum sibi autoritatis potestatem, in Ecclesiasticis reservasse, ministris vero executionem totam delegasse: qui idcirco in talibus ex Magistratus voluntate minimè pendeat. Scilicet qui sic animatus est, gravem habuit causam, reos calumniarum agendi omnes eos, qui censent in vocatione ministrorum *ἐκκλησιαστικῶν* actionum Synodaliū, atque aliis Ecclesiæ rebus, qua ea publica est, penes Magistratum supremum supremam esse potestatem. Similis monetæ erat, quod idem capite concione invehebatur, in illos, qui, ut aiebat, non omne Dei verbum Ecclesiæ Dei putent proponi oportere. Quomodo, inquebat, fundamenta Religionis sufficere aiunt, cum nemo in terrenis tam stultè sapiat, ut fundamentum jecisse contentus, non insuper necessarium planè arbitretur ut domum superædificet? Quasi vero qui fundamentum salutaris doctrinæ firmiter jecerit, non ipse sit Templum Spiritus sancti superædificatum super fundamento Prophetarum & Apostolorum. Nec tamen id ab illustribus ordinibus agi puto, ut, quemadmodum ille videri volebat, sola doceantur principia Religionis nostræ, etsi sola faciant Christianum: verùm illud potius, ut cum conclusionum (quarum habitus Theologum facit) aliæ aliis clarius certiusque ex principiis consequantur, multæ etiam multorum judicio inde eliciantur, quas alii, nec pietate, nec eruditione his inferiores, consequi inde inficientur, imo vero noxias censeant homini Christiano; non omnes conclusiones alba signentur linea, sed earum fiat delectus, apud plebem præsertim; quæ minimè ea decidere vel etiam capere idonea est, de quibus mille & amplius annis summus in Christiana Ecclesia dissensus fuit. Sed si hos audimus, qui de conclusionibus ad usque seculum nostrum damnatis, aut Græcis saltem Ecclesiis plane ignotis, in Latina demum post quadringentesimum annum controversis *ἐκκλησιαστικῶν* licere arbitretur, nec eas tanquam certas, & cognitu necessarias apud plebem urgendas censeat, is (quod non semel audire me commemini) ex Christiana Religionē Pyrrhoniā cudere velit *ἀνιστάται* quod hæcenus ego persuadere mihi non possum: nec tu, scio, tibi, vir amplissime, quem cum conjuge salvere jubeo. Neque enim ultra morari te visum. 14 April. 1614.

*Tui observantissimus,*

Gerardus Vossius.

## XVI.

*Hugoni Grotio, Gerardus Vossius S. P. D.*

**E**dictum Illustrium D. D. Ordinum, Amplissime Magnificeque D. Groti, mirè hic vapulat à Zelotis, à plerisque etiam scurriliter impetitur. Qui mollissimè loquuntur, mirari se aiunt, pro Edicto Illustrium Ordinum publicari, in quod non consenserint Civitates. Nec fatentur tale ~~est~~ <sup>esse</sup> esse, quale exposcebant Dordrechtani: quandoquidem, præter horum sententiam, haud clarè exprimitur, de cæteris doctrinæ capitibus standum esse receptæ Ecclesiarum sententiæ: juxta decretum hac de re ante annum unum alterumve ab Ordinibus factum. Sugillant etiam, quod, Edictum si sit, non transmittatur ad Civitatum Proceres: sed his ipsis à Bibliopoli sit emendum. Æque admiratio eos subit, quod nulla in eo poenæ fiat mentio, manentis eos, qui fuerint transgressi. Unde boni viri colligunt, tuto se id transilire posse. Denique homines illi, quibus mire scilicet Ordinum honos curæ est, mirari se aiunt, Ordines adeo decoquere honorem suum, edicendis illis, quæ non servatum iri prævideant omnes. Talia non solum blaterant recentes de Schola pueri, Ministri tridui, sed etiam quidam de Veteranis. Quos inter immodestiam suam desiderari minimè patitur Lydius, qui etiam cæteros Ordinis sui concitat, ut adversus hoc Edictum, ad Magistratum suum scribere velint, Amstelodamentium scilicet Exemplo, qui, uti scis, scripsere adversus priorem Edicti formam. Quia vero de oppugnatione Edicti jam inter fratres consultatur, quidam ejus ordinis, sed cæteris modestior, magnoperè à me exposcit, ut scriptum illud Amstelodamentium diem unum habere liceat, quo videat ecquid in Edicto hoc relictum sit, quod reprehensionem mereatur. Gratum itaque feceris, si prima occasione ad me mitas. Si voles, intra triduum remittam. Hactenus quidem is, quem dico, nihil in Edicto culpatur: sed ex Amstelodamenti istoc scripto discere avet, quid in eo alii culpent, idque illo potissimum sine, ut si nihil videat reprehensione magnoperè dignum, Collegas ab instituto melius possit dehortari. Sunt qui testimonia Edicto addita, à Vossio congelata dicant. Nescio quis homulus Gouda cum huc nuntium apportavit. Ego hanc opinionem iis haud evello: neque enim video, quorsum id facere debeam, quando tu, vir Amplissime, non honorem hinc tibi, sed Pa-

triæ solum tuæ emolumentum quæris. Superiori hebdomade usus sum valetudine haud satis prospera: quæ ratio est, cur ex quo domum redii, parum promoverim in scribendo. Sed nunc Dei gratia melius valeo, totusque sum in detexenda tela mea, vel potius nostra, quando non solum te suafore impulsoreque aggressus sum, sed etiam te Aristarchum emendandi curam suscipiente perfici debet. Sanè & superiores literæ, & nuperus sermo tuus, multorum me monuit, quæ nunquam venissent in mentem. Quamquam autem utcumque didicerim indoctorum judicia aspernari, tamen (fatendum est) nonnihil me in scribendo moratur morosa cogitatio de quorundam, quibuscum mihi post scripti editionem negotium erit, summa in strenuè mentiendo, calumniandoque audacia. Quæ sane res me subinde incertum facit, annon satius sit opusculum hoc primum edi nomine meo haud expresso, atque adeo lingua Belgica, ne stylo prodar. Sane nihil videtur obitare, nisi Patrum testimonia, quæ in alienam transfusa linguam, vinorum instar, plurimum de gratia amittunt. Alioqui hoc pacto possim melius cognoscere hominum judicia, nempe qui similis sim futurus Apellis, post tabellam latitantis. Tum autem, si fortassis imparem me videro hominum improbitati, potero latina editione superfedere, aut alteri hunc laborem resignare, qui tutiori loco vivat. Nam quod tu, Amplissime Domine, credas è modestis adeo tractatibus, ac solius veritatis & concordie causa scriptis, periculi nihil, saltem post Ordinum hoc Edictum, metui amplius posse: Equidem verum te opinari magno optem; sed nemo id dicat, qui mores nostrorum experiundo didicit. Nudius quartus locutus sum cum fido, & modesto sacri ordinis viro. Nisi inquebat is, omnia nostrorum hominum approbaris, nihil te tantopere purgabit, ut non unus & alter Collegarum meorum sic nomen tuum per urbem differant, ut omnium sis futurus fabula. Diceris nunc quidem modestius voluisse agere: sed Eleusin sacra sua non simul pandere; latere in pectore tuo longe alia, quæ tempori sis prompturus. O Mentes viperinas? sed de his melius coram, feriis proximis, si Deus volet. Johannem Arnoldi strenuè adeo progredi, plurimum gaudeo. Si uti te facturum scribis, responsum ejus, antequam edatur, legendum transmissis, candide judicium perscribam: quod tamen eum scire nihil attinet. Non possum quin de Steinfurtenfi vocatione aliquid scribam. Ante biduum venere huc duo Ecclesiastæ Batavi, Borrii Lugdunensis frater, & alter cujus nomen excidit. Hi pro Zelo suo  
erga

erga domum Dei, muneris sui esse existimant, ut de certo nuntio Ecclesiasticas nostros facerent certiores. Retulere iis, ut ante dies paucos inciderint in Mercatorem quemdam, qui studiosè inquireret, ecquem Gerardum Vossium nossent, & quomodo audiret? Eum à D. Vorstio commendatum esse Comiti Benthemensi, sed matrem Illustris Comitis non passuram, ut quisquam ad Professionem Theologiæ Steinfurtum vocatur, nisi qui undique sit Orthodoxus, hoc est, Contra-Remonstrantium partibus addictus. Addebant dixisse Mercatorem, sibi id à Comitibus Matre in mandatis datum esse, ut Dordrechtum quoque iret, atque ibi ex Ecclesiasticis, atque alijs de doctrina vitæque mea conquireret. Ubi nostri illi audire isthæc, varia illorum animos subiit cogitatio: nescire enim se dixerunt, quid sibi de me sentiendum sit: nihil quidem se audisse ex me unquam, quod *interdixisset* ullius argumentum esse posset: sed tamen mirari à Vorstio me commendatum; nec enim sibi verisimile fieri, commendatum eum quemquam, nisi suæ farinæ hominem: eoque sibi gravissimam causam esse deponendi tam bonam opinionem, quam de me hæcenus habuerunt. Aut enim magnam mihi cum Vorstio familiaritatem clandestinum intercedere, ac Socinianum virus in pectore occultè gestare: aut vasserrimum Vorstium hoc agere, ut me apud bonos, ac urbem imprimis nostram, decoloret. Ego in utroque eos falli longissimè scio. Nam neque Vorstium vidi unquam, neque vel ipse ad eum scripsi, vel literas ab eo unquam accepi. Neque etiam opinionem ejus sequor, quatenus quidem, aut Omnipræsentiam, aut Omniscientiam Dei convellere putatur. Sed neque Vorstius, uti audio, aliquam nominis nostri deprecationem proposuit sibi: Verùm cum ex Remonstrantium causæ aperte additis neminem commendare liceret per junioris Comitis Matrem, proximum putavit, ut eum commendaret, quem concordie ac pacis, inter eos studiosum audiret, qui se à Contra-Remonstrantium causa neutiquam separassent. Hebdomade proxima affore dicitur is Mercator. Si hinc calumniandi causam ceperint Zelotæ, feram ut Christianum decet. Non potero tamen sic contemnere, ut non aliquid doloris sit allaturum, quod monstrorum insimulæ opinionum. Sed fortasse hæc res melius abibit, quam spero: præsertim quando semper paratus sum, ingenua confessione testari, me alienissimum esse ab iis opinionibus de Deo, quarum Vorstius (verè an secus haud disputo) à plurimis insimulatur. Cujus tu rei testis mihi esse potes; quando aperte sæpius apud te id factum Vor-

sii improbavi, quod is sic in libris de Deo aliquando disputet, ut videri possit monstrum, & in Ecclesia Dei inauditas opiniones voluisse hominum animis inferere. Sanè si aliud ei propositum fuit, imprudentissime egit, sequendo de tanti momenti rebus tale disputandi genus. Et tamen ut imprudentia potius quam malitia peccarit, magnopere opto. Recte omnino facturus est, si tandem sic sententiam suam de istis capitibus publicè perscribat, ut nullus sinistra de eo suspicioni posthac, saltem apud bonos, relinquatur locus. Mitto ad te Hamelmanni libellum de jure Principis in rebus Ecclesiasticis. Uteris eo quamdiu lubet. Arnobium tuum, & locos Augustini cum Synodo Diospolitana nondum remitto, quia necdum Lugduno Exemplaria recepi: sed tamen curabo, ut primo tempore restituere possim. Chartas meas si post octiduum per Tabellarium, aut fidum Nautam miseris, haut sero miseris. Tantum enim temporis minimum requiro ad perficiendum ea quæ primam constituent Libelli nostri partem: qua nempe de peccato originali, ac necessitate gratiæ, cum prævenientis, tum subsequenti, item gratiæ sufficientiæ, & arbitrii libertate tractandum erit. In Anglicano illo scripto describendo strenuè progreditur Amanuensis: sed tamen ob ductus incommodos, & plurima vitia Orthographica nondum dimidium Libri absolvit. Vale. Magnifice Amplissimeque Domine Groti.

*Tuus omni Officio,*

11. Aug. 1614.

Gerardus Vossius.

## XVII.

*Gerardus Vossius, Hugoni Grotio S.P.*

Magnifice Domine, postquam Sibrandianum responsum in lucem prodit, tam vane multa pro eo adversus Illustris Ordines, ac dignitatem tuam, à Malevolis jactabantur, ut non potuerit quidquam bonæ causæ, sive qua publicum, sive qua privatum te tangit, vel conducibilis vel opportunius accidere hoc tempore, quam Edictum Ordinum, & bona Sibrandi fides. Itaque me quidem tantopere delectarunt, ut quamquam quo tempore fasciculus mihi reddebatur, ob morosas quasdam Scholæ nugas animo esset minus defæcato, tamen literis tuis, cæterisque lectis, sic fuerim recreatus, ut totum exinde diem tam lætum hilaremque duxerim,



sim, quam si Hilaria fuissent. Quantum verò ea res gaudii mihi attulit, tantum inde doloris Malevoli ceperunt. Cum autem alia eos in Edicto male habuerunt, tum quod aperte in illo dicatur, operam tuam Illustribus Ordinibus gratam fuisse, ac Sibrandum mala tecum fide egisse. Quod quidem non minus eos urit, quam quod venditioni Libri Sibrandiani interdicatur. Eoque magis hæc res eos coquit, quod disertim addatur, hoc pleno in conventu constitutum esse. Nempe vident & dolent, minus sic deinceps fidei calumniis suis habitum iri. His vero omnibus aliud nihil opponere possunt, quam quod nec defuere ex Civitatibus, quæ Sibrandianam magis causam probarint: quasi unquam ferè sic agatur in rebus, vel publicis, vel privatis, ut idem sentiant omnes. Ecclesiastes quidam nostras retulit mihi atque aliis, ut filius suus Amstelodami viderit Edictum hoc Portæ (urbis ac Templi) affixum ab Illustrium Ordinum Viatore. Hoc quidam non factum credere malunt. Sed qui tantum scilicet seculus credere sustinent, mirari ac ringi, quod hoc perpeti voluerint ejus civitatis Proceres, in cujus constantia proram ac puppim causæ suæ constitutam sæpius sunt confessi. Bona fides tua effecit, ut nonnullis tandem scrupulus sit injectus, quibus antea persuaderi non poterat, Sibrandum mala fide agere. Imo aliqui aperte eum jam culpæ non verentur. Sane hesternæ die, cum rogasset quidam ejus ordinis, quid mihi de bona fide videretur? atque ego respondissem, metuere me, ne multum Sibrando sudandum sit, priusquam omnibus iis respondeat: confessus est quod antea nunquam, multa eo in scripto esse, quibus à Sibrando responderi non possit: ac se quoque antequam Libellus hic prodiret, quædam itiusmodi observasse: sed Libello hoc tuo (cujus tamen non te, sed Bertium, ac Joannem Arnoldi Authores suspicantur) & plura, & tam clarè probari, ut negare sit neminis, nili qui frontem perdidit. Addebat, se quid multo eruditius ab tanti nominis viro expectasse: Plurimos esse in Batavia, etiam recentes de Schola, qui Sibrando melius illam causam potuerunt tractare. Postea in alios incidi, qui similiter judicarent. Paucissimos reperi, qui non fateantur, graviter, & Sibrandum peccasse & omnes eos, qui absque ordinum insectatione de religionis controversiis agere non possunt. Utinam verò simul emisisses Scriptum tuum, de summi Magistratus jure circa Ecclesiastica: fortasse enim si Edicti tempore prodisset, hinc tacitæ aliquid autoritatis ei accessisset. Sed quia id factum non est, proximum puto, ut quam celerrimè subsequatur. Quid enim at-

tinet Crabronibus illis toties per intervalla bilem moveri? Recens nunc ira est. Si statim Liber edatur, poterunt simul bilem omnem despumare. Quod amicè me adeo Rotterodamum invitas, gratias habeo maximas. Velim quidem, sed detinet me lectio tertii Georgicon Virgilii, cum aliis rei rusticæ Scriptoribus; ex quibus bonum delectum cogar discere. Cras verò à prandio progressus mei periculum faciam. Quam tibi aliisque, vir Amplissime, grave est Rempub. gubernare; tam mihi in annum integrum ab Horthericorum Heroum cibo, quinquaginta capitibus, vel stomachis potius prospicere. Imo multo quidem hoc difficilius mihi, quia semel jam iterumque persenti, post omnes veteres consultos, ubi ad forum boarium deventum, tantumdem me sapere quam prius. Itaque post oleum & operam consumptam, aliena tandem opera uti cogor. Nec eo magis domo abesse licet, quando alieni nihil hac in re audent absque præsentia ac nutu meo. Adde quod juvenus Scholæ nostræ (cujus bona pars, pro sapientia sua, non minus desiderant boum nostratium conspectus, ac mactationem, quam olim in Circo populus Romanus gaudebat Lucarum boum spectaculo ac pugna) nunquam magis custode eget, quam hoc tempore; quo & difficillimè domi continetur, & periculossime excurrit. Quod verò, ni fallor, significas, fortasse, Dordrechtum te venturum, Utinam, Utinam fiat: Imo utinam ut amplitudo, ac dignitas tua ferat, ut pro diversorio publico subire possis pauperis hoc tugurii nostri, sed non congestum cespitem culmen. Nobis quidem ea res non voluptati minus esset quam honori. Amplius adderem, sed metuo, ne inani spe mihi blandiens alienam ex verbis tuis sententiam expresserim. Utrum sit, brevi spero, vel ex Epistola tua, vel quod malo, ex adventu tuo longè exoptatissimo recognoscam. Etiam adventum tuum expetit Lydius: ut qui & multis retro mensibus, significavit, magno se loquendi tecum desiderio teneri, & hesternò vespere dixerit, optare se ut paucis agere tecum liceat de Libello eo, cujus gratia ab Asello illo, (sic enim loquitur) Corvino Princeps, inter eos reponitur, qui τὸ ἀρεστὸν βλασφημῶσι. Persuadere mihi conabatur, scripsisse se Libellum eum in Laudem Magistratum, ejusque probandi, verba nescio quæ ex opusculo citabat. Ego cum nec tam fatuus essem ut crederem, nec irritare vellem eum quem ad coenam invitaram, consolatus sum illo, quod scriptum hoc Corvini perennaturum non putem; tum maxime quod pauci sciant, Lydium dialogi illius esse Authorem, pauciores item, per βαρύνειαν Lydium designari.

signari. Gaudebat eo sermone, sed tamen addebat, pati se non posse, ut tu de eo tam atrocem habeas opinionem: eoque prima occasione, vel Rotodami si eo proficisci contingat, vel Dordrecht, si tu prior huc veneris de Libello eo purgare se apud te velle. Vale, Amplissime Domine, uxoriq[ue] lectissimæ tuæ à me salutem dico.

*A. T. Observantissimus*

27. Octob. 1614.

G. J. Vossius.

### XVIII.

Hugoni Grotio, Gerardus Vossius S. P.

**H**esterno die, Magnifice, & Amplissime Domine, literas accepi Steinfurto, quas iussu generosi Comitum, suo & Collegarum nomine, ad me scripserat Timplerus. His offertur mihi professio S. Theologiæ in illustri Schola Steinfurtensi. Significavi statim rem totam Prætori Musio, & Syndico Berkio, quorum utrumque optimè mihi velle non dubitandis indiciis jam multos annos comperio. Dixi iis, nihil mihi in eo, quo fungor, munere displicere, quam quod videam optimum ætatis meæ florem abire, nec multum me in studiis promovere. Sæpius me comperisse, siquando die Dominico à meridie, discipulis in Templum abeuntibus, studiis domi vacem, plus me paucissimis istis horis proficere, quàm alias integris aliquot diebus. Præterea nonnihil dolere, quod nonnulli Ecclesiæ præter meritum meum, nomen meum apud plebem obstrigillent, haud alio argumento, quam quod subinde, conscientia dictante, modestè eos muneris commoneam, qui quocumque convivii genere illustres Ordines impetunt. Tum autem quod aliquando dicam, non controversiarum naturam, sed hominum, culpam esse, quod hoc Ecclesiæ dissidium componi non possit. Si etiam aliquàm multos Melancthones, & totidem Calvinos haberemus, omninò me confidere, ad deo eos amicè hoc negotium transacturos, ut nihil inde Ecclesia capiat detrimenti. Neutiquam me à contra-Remonstrantibus segregem factum: sed neque in omnia eorum dicta jurare velle. Tantum ex animo dolere sortem Ecclesiæ, quæ ita factionibus scindatur. Multa quoque alia in hanc sententiam attuli; qua quoque in re calculum mihi adjecerunt. Tantum visus sum iis minus constanti animo, quod obrectatorum sinistros ser-

mones devorare haud satis possem. Sæpius enim talia ab æmulatione aliqua, aut animi impotentia proficisci. At ea quoque non minus in Academiis ipsis habitura locum. Quod verò dicerem vix quicquam temporis à me studiis dari, id aliquamdiu adhuc concoquendum putabant. Nec enim dubitare sese quin haud perpetuo sim isthoc Sisyphi saxum voluturus. Et tamen inquiebat, habendam mihi vel maximè rationem Liberorum meorum, quibus in functione hac, si ulla alia, honestè satis prospicere possim. Nec tamen hoc sic à me accipi debere, quasi me perpetuo hoc in munere consensescere velint. Quin verò sese ipsos mei memores esse velle, si quid fortean possint in vocatione aliqua Lugdunensi. Et hoc eo se magis dicere, quia jam aliquid ea de re inaudissent. Posse etiam huic rei Steinfurtensem istam vocationem inservire. Interea Authores erant, nec acciperem conditionem, nec recusarem; sed potius scriberem, velle me de re tota cum amicis consilium capere. Parui consilio. Ac literarum etiam mearum ad Timplerum exemplum mitto. Hæc scire te volui, Amplissime Domine, ne si fortè Hagæ, quò uterque proficiscetur, ejus rei mentio incidat, tu omnium sis ignarus. Interea non est quod de me tantoperè sollicitus sis. Non possum quidem non maximas tibi pro affectu erga me tanto gratias agere: sed quædam interdum sunt, quæ moram aliquam exigunt. Sane intelligo aliquibus nihil magis in me displicere, quam quod etiam Amplitudinis tuæ nitar commendatione. Aliquis etiam nescio quid objicit de Literis quibusdam, quas ad te scripseram. Sane metuo, ne D. Bertius (quem ego alioqui ut Præceptorem optimè meritum, & virum summæ eruditionis plurimum & veneror & æstimo) nonnihil rebus meis incommodet. Scio illum literas meas, quas ad A. T. de aliquot Erasmi locis scripti, & habere, & aliis commonstrare. Inter alios est Rutgerius noster, cui bonam earum partem legit. Audio etiam ambire professionem historiæ Ecclesiasticæ; & quia nonnihil à me prius hac in re metuebat, uti prius à Vortio (nam & cum is Lugdunum vocaretur Theologiæ professionem ambiisse dicitur) & magis dictat, semper sibi aliquid remeliginis injici, vel ab aliquo Vortio, vel ab aliquo Vossio. Sed ab illo ad A. T. redeo, vel potius ad me ipsum. Equidem multa mihi ad arduam historiæ Ecclesiasticæ professionem deesse video. Accepturi quidem essemus vocationem, si vocaremur, sed non tam quod non malimus nos pauxillum adhuc in hoc pulvere hære, quàm quia metus esse possit, ne cum maximè molestissimo hoc onere liberari velim, minimè possim.

possim. Nam & interdum, vir amplissime, in animum venit, te quoque mortalem natum. Alioqui, uti dixi, temporis mihi aliquid concedi malim, quo muneri me isti præparare possim. Quod si ubi me propemodum parem isti muneri putabo, non subsequatur aliqua vocatio, & *quævis* *inmodica* sic quoque scribendo saltem prodesse Ecclesiæ Dei poterimus. Sunt alia multa, de quibus colloqui tecum a-veo, eo magis, quia me literis tuis, quas ante horam accepi, amicè ad te invitasti: sed id nunc fieri non potest, quia metuo ne, absente me, discipuli in glaciem currant, aut fortean pedem, aut brachium frangant. Tutius id poterò, ubi glacies erit soluta. Quamquam si & antè se occasio offeret, minimè eam negligam. Hæc raptissimè, ob festinationem Tabellarii. Deus ter Opt. Max. diu te Reip. Ecclesiæ, familiæ ac nobis servet incolumem.

3. Non. Martii, 1615.

Misit D. Vorstius ad me per amicum varias literas, ad se de vocatione Steinfurtenli scriptas, uti exemplar literarum, quas Ill. Comites de me vocando ad Curatores Academiæ Leidensis scribunt. Ego statim singula describi curavi. Si tanti putabis, percurrere, & vel in adventum meum adservabis, vel ubi voles transmittes ad me. *Epist. 100.*

### XIX.

Clementi Timplero.

**E**GO verò, clarissime, doctissimeque Dom. Timplere, non possum, non & plurimum mihi gaudere, & tum illustribus, & generosissimis Comitibus Bentheimensibus, Dominis meis clementissimis, tum ornatissimo ordini vestro professorio, ingentes agere gratias, pro tam honestâ de me existimatione, & luculentis adeo, erga me affectus notis. Mihi quoque partim, ne adversus adeo munificos, ac benevolos ingratus essem, partim publici boni causâ, unâ cum Tabellario hoc ad vos, excurrere animus erat; ac vobiscum super omnibus sermonem ferere: sed incommodissima anni tempestas, à perfectione deterruit; nec muneris conditio, quod nunc obeo, diutinam mei absentiam ferat; & quod familiam ducit, ea nunc rerum mearum conditio est, ut nisi desultoriæ mihi levitatis notam, merito impingi velim; cum uno alteroque amplissimo viro, mei, & publici commodi amantissimo, super re tanti ponderis, serio mihi deliberandum intelligam. Id quidem, quin neque illustres Comites, neque clarissimus Professorum ordo, vitio sit versurus, nullus dubito. Interea quia in eo

loco, illustris Scholæ vestræ res sunt, ut moram vix patiantur ullam, recipio me aut intra brevissimum tempus, excursurum ad vos, aut literis de animo meo facturum te certiorerem. Nihil enim mihi gravius sit, quam ut benè de me, & publico, mereri volentibus, sim injurius, & simul cessatione meâ, illustri Scholæ vestræ sim intertimento. Vale, Doctissime, & merito mihi charissime Domine; & si grave non est, tum illustres, ac generosissimos comites, Dominos meos clementissimos, tum clarissimos, ac præstantissimos Collegas tuos, plurima, meo nomine, salute imperti.

III. Non. Mart.  
Ann. cl. lxxv.  
Stylo Gregoriano.

*Dignitatis tuæ observantissimus,*

Ger. Voßius.

### XX.

*Reverendo in Christo Patri, D. Lancelotto Androsio, Episcopo Wintoniensi, Regi Britanniarum à Sacris & Secretis Consiliis.*

*Reverende in Christo Pater,*

**Q**UOD coram me posse, pro magno optâsem, id absens nunc agam: ac quia aliter non licet, per literas saltem fiduciam sumam compellandi tui. Jam aliquot menses sunt, quod facere id animus fuit. Sed gravis & diutinus uxoris morbus & hoc, & alia multa, quæ vel ad studia, vel ad humanitatis officia pertinerent, disturbavit. Nunc quia sextus est dies, quod paulatim convalescit, & ego quoque sentim meus esse incipio: nolo diutius illud omittere, quod tamdiu distulisse jam pudet. Ex quo Franciscus Junius, affinis meus, in Angliam venit, sæpius ab eo literas accepi, nullas vero, quin iis magnificè prædicet felicitatem hanc suam, quod tibi innotuerit, tot eximiis dotibus prædito, & ejusce dignitatis viro, à quo etiam tantopere ametur, & cui se suæque ita curæ esse videat, ut non aliter affectum hunc, quam verè paternum possit nuncupare.

Equidem non facile dixerim, quantâ res hæc voluptate animum meum perfuderit. Et quid me unum dico? imò quantopere exhilararit omnem Junii *v. marg. v.* familiam. Quæ satis etiam intelligit, plus se eo nomine debere tibi, quam exolvere possit. Etsi verò hoc per se magnum, imò maximum erat; tamen alterum etiam accessit, ut genuinâ omnino lætitiâ afficerer. Nam eadem adhuc

G 2

literæ,



literæ, tum etiam, quas nobilis & mei amantissimus juvenis Georgius Dubletius ad me dedit, testificantur mihi, non solum tibi notum esse nomen meum, sed etiam amantissimum te mei & cupidissimum esse. Quem ego affectum multo auro potiorer ducō: sed in hoc statu non aliter remunerari possum, quàm solo amore, & propensissimâ in me colendo voluntate. Hanc quidem, si non dignitati amplissimæ, saltem summæ bonitaturæ probaturum me confido. Interim mihi quidem gaudeo, potissimum verò gratulor affini meo: quem deinceps etiam commendatissimum tibi fore spero. Neque enim favore tuo plane indignum putabis, cujus ea est eruditio, & quod caput est, illa vitæ integritas, propter quam imprimis charissimus hic omnibus esse solet: si solos excepero, qui virtuti & doctrinæ, addo & Ecclesiæ paci bellum indixerunt. Sed neque iniquum videtur, ut ex segete ea beneficiorum, quæ in uberi Ecclesiæ solo maximus ei parens obsevit, horum optimus filius aliquid frugis metat: atque id potissimum per te, cui consuetudo benefacere in naturam vertit: cuique etiam excellentem pietatem, doctrinam, prudentiam, humanitatem eruditissima scripta undique spirant, ac fama etiam celebrat, & doctissimorum hominum sermones. Eò verò impensius hoc desidero, quia & affinem hunc meum juxta ac meipsum amo, & eam de virtute ejus spem concepi, ut si quid mihi humanitus contingat, hunc præcipuè fore putem, in quem dum vita ei superlit, cura liberorum meorum recumbat. Hæc sunt, quæ nunc ad te scribenda existimavi. De rebus verò meis nihil addo, partim quia nihil magnopere est quod scribam, partim quia siquid fuerit, id alteris malo literis reservare.

Reverende in Christo Pater, Deum ex animo oro, ut illum erga nos affectum: te verò ad fidei & pacis Christianæ bonum, diu Ecclesiæ suæ incolumem servet.

viii. Kal. Nov.  
cdo lœc xxi.

Reverendi & illustris nominis  
tui cultor,

G. Vossius.

## XXI.

Hugoni Grotio, Gerardus Vossius S. P.

**M**agnifice amplissimeque Domine Groti, posteaquam D. Van der Myle, & DD. Consul Syndicusque Leidensis domum re confecta abierant, mirè cum coram tibi gratias

agere, tum de variis tecum colloqui gestiebam: sed adhuc ob summam tempestatem frustra fui. Biduum quidem, imo triduum prope jam ex eo tempore exspiravit: sed venti validius etiam spirant, quàm ante: Nec ego duntaxat, qui meticulosior videri possum, quam virum decet, sed, ut audio, plerique etiam nautæ, audax & *Segetis* hominū genus, oram hinc solvere verentur. Ita abiit mihi initium feriarum nostrarum: quo tempore commodissimè domo abesse poteram. Vereor autem ne adhuc plusculis hic diebus detinear, partim quia hac hebdomade pro affinis infante in baptismo spondendum erit; partim quia Rutgerius noster impense cupit, ut intersim solemniori convivio, quo die Jovis proximo serenissimi Suecorum Regis Legatum accipere cogitat: post Paschalem verò diem animus sit uxorem Bredam ad sororem deducere: ubi fortasse diem unum aut alterum hærendum erit. Omnino tamen decretum, antequam feriæ nostræ desinant, hoc est intra quatuordecim hosce dies excurrere ad A. T. nisi interea te in Zelandia potius, quàm vel Roterodami, vel Hagæ etiam fore cognoro. Una tunc mecum feram commentationem tuam de Christi satisfactione, cujus descriptio spissè procedit, ob nimis festinatos literarum ductus: sed tamen intra hos sex septemve dies scriptionem ejus absoluturum sese sperat Amanuensis. Mitto interea Thomsoni librum præstantissimum; unà cum Augustiniana confessione, Synodi Palæstinæ gestis, & Arnobio: quibus cum diu adeo, fortassè incommodo aliquo amplitudinis tuæ, usus sum, sanè cum maximo fructu meo. Carere quod nunc iis possum, facit, quod tandem ipsè eos Antverpiæ nactus sim. De Thomsono non tantum suadeo, sed etiam rogo, quam primum edatur. Nihil ea diatriba hoc in genere, vel doctius extat, vel elegantius. Me quidem valdè in vera sententia confirmavit. Nihil tamen hoc judicium nostrum Bertiadem Heroem, nisi secus putabis, scire attinet: quippe qui, ut etiam amici mihi narrant, hoc cum magno eloquentiæ Romanæ parente habeat commune, quod silere difficulter ea possit, in quibus tacito opus erat. Quamquam vero liber iste Thomsoni multis partibus sit emendatius descriptus, quàm exemplar ipsum, tamen supersunt in eo non pauca, in Græcis imprimis quæ corrigi debeant. Ut emendanda putaram, de quibusdam ante trimestre in chartula annotaram; sed hanc licet quæsitam, nunc invenire non possum. Nec multum puto refert, quia nullo negotio corriget isthæc inter legendum Bertiæ noster. Infante (hilo an filia?) amplitudinem tuam auctam gaudeo: eoque nomine tibi gratulor; ac Puerperæ

puræ foelicia omnia opto. Vale, & præsidium  
& dulce decus meum.

14. Aprilē  
ea vesp̄am.  
1615.

T. A. Obstricissimus,

G. J. Vossius.

Hugoni Grotio, Gerardus Vossius

S. P. D.

**S**cripseram tibi ante aliquot dies, Magnifice & Amplissime Domine, malè me metuere Ecclesiæ Bredanæ à Musenholio, qui cum reprobationis absolutæ, gratiæque irresistibilis & indeficibilis dogma tanquam filiolam suam amet, atque amplexetur; tamen nec ejus quam tueri vult, opinionis satis est intelligens, nec partis adversæ sententiam (quam ubicumque & quandocumque occasionem levem videt, lineamentis distortissimis foedissimisque coloribus depingit) cognoscere vel minimum laborat. Jam ab aliquot retro annis novimus hominem per affinitatem qualemcumque. Semper uti aliis ita mihi quoque visus est nullius, vel judicii, vel industria: mirè ad hæc iracundus & pertinax: ceteroquin imis pariter ac summis, quamdiu nullæ irarum aut simultatis causæ intercedunt, comis ac affabilis; etiam Latine non paulo melius sciens, quam sui plerique ordinis solent. Is ergo cum antea semper nescio quas non monstrosas Opiniones, quas vel ipse, per febrim credo, somniasset, vel à malegeniatis quibusdam pessima fide confictas avidè arripuisset, spargere per vulgus solebat: tamen ex quo Amstelodamensium, & famosi Zelotarum Ducis, perperis pravisque consiliis dare se totum coepit, multo seipso sævior factus est; sic ut non aliud nunc speret aut speret, quam factiones, & triste Ecclesiæ vixdum florecentis, dissidium. Ad quod facinus tantum utitur, vel abutitur potius, plerisque hominibus Adolescentulis. Eorum unus est Amstelodamensium Alumnus, ac nisi me multum fallit conjectura *τὸ πλάτυνός*, & complicum emissarius, nomine Spiliardus, qui subinde Lugduno Bredam, inque ejus urbis pagos ventitat; ac paucas ante hebdomadas domum meam venit, multum Musenholianum pacis studium extollens, ac Boxhornium & Affinem, quasi non recto talo in obortis controversiis publicitatis proponendis incederent, cenforia graviter virgula notans, etiam obnixè rogans, Adfinem primis literis muneris sui commonefacere: neque enim per Musenholium statutum, quo minus ea in Ecclesia

farta tecta concordia conservetur. Quæ cum apud me audeat hominem penè sibi ignotum, & Diamantio affinitate junctum, quid non apud alios spargere ausit, cogitatu haud difficile est. Alter congerronum est Radæus, Ecclesiæ Veteraquinatis Lydii Collegæ filius, discipulus ante pauculos annos meus, sed qui immaturus adhuc disciplinæ se nostræ subdlexerit, Dordrechtque Franekeram, indeque Leidam ablegatus, Sibrandiana prius institutione, hinc Polyandri auditione, mox audiendis Homiliis parentis (qui vir nec prima Latini sermonis elementa scit, sed *αὐθάδης* non multos pares reperit) tantum & tibi & Parenti maximo intra biennium & trimestre profecisse visus, ut idoneus crederetur, qui Pastor fieret Ecclesiæ Ooster-Goudensis: quod & ambitu paterno facile est consecutus, segnes septē indies cleri-disciplina, & mutuum multis scabentibus, ridentibus & ringentibus interim veteribus condiscipulis, qui cum se ei suppare fuisse scirent cum à nobis discederet, nondum tamen eo jam Pastore ferulæ manus in schola nostra subduxerunt. Sed neque segnem Musenholio navavit operam Pollio, qui jam sic sese iis civitatibus commendabilem facere studebat, ad quas se *τὸ μαλακὸν ἔργον* Polyandri opera brevi vocando non falso sperabat. Atque hi illi ipsi sunt, qui in Bredana classe ultima, atque aliis in convivii & circulis absolutam Catecheseos subscriptionem importunius cæteris urgebant. Quam ob causam literas ad adfinem dedi, quibus subscriptionem istiusmodi, à qua jam ante abhorrebat, penitus dissuadebam. Ostendebam Synodis aliquot confessionis exigi subscriptionem, nulla verò Catecheseos, ac synodica fortassis, minimè verò classicalis esse auctoritatis, novum in Ecclesia morem inducere; tantoque hoc ferendum minus, quod nusquam in Hollandia ipsa, non in ipsa Classe Dordrechtana, cujus tot annos pars fuisset, consuetudo illa obtineret. Sed & Synodo Gorchomiensi, & edicto illustrium ordinum potestatem omnibus factam Pastoribus, tam Confessionem quam Catechesin examinandi, ad scripturarum trutinam; quo si quid alterutrius Authores humanitus passi viderentur, ejus indicium & judicium fieret in synodo consecutura: dubitandum autem minimè esse, quin aliqua contineantur catechesi, de quibus dissensus sit inter præstantes Ecclesiæ reformatæ doctores, ut de descensu ad inferos, de justitia activa, & similibus: proindeque non debere quemquam ad absolutam ejus scripti subscriptionem compelli, priusquam Synodicum judicium factum esset. Quamquam verò affinis subscriptionem nunquam *ἐπὶ τοῖς* detrectarit, sed dixerit semper, nolle

nelle tanquam Scripturis Canonicis subscribere, sed ut præstanti Theologiæ compendio, in quo si quid fortasse Scripturis ac rationi rectæ consentaneum magis dici potuerit, saltem necessaria omnia Religionis Christianæ capita salutariter explicarentur; tamen nec hoc modo aliud profecit, quàm ut diceretur, nisi *ἀλλῶς* subscribere paratus esset, redditurum sese novitatis suspectum. Nempe cassa hac terricula percelli, & à proposito dimoveri posse arbitrabantur. Postea per urbem dispersum, proclinare, ut Boxhornium jam diu, ita jam nunc Diamantium quoque in Remonstrantium partes; ut qui Catechesin subscribere formidaret, quam tamen ipse ad populum interpretaretur. Suspicionem auxere, quod duo vel tres Musenholii familiares, qui libellos nuperos *iesuicis* legissent (cæteri enim nihil insolens in Affinis concionibus animadvertabant) dicerent Affinem aliter quædam Scripturæ loca enarrare, quàm à Calvino factum esset, quem super iis consulissent; tum autem, quod cum à gratiæ divinæ contemptu neglectuque populum dehortaretur, hoc aliquanto fervidius fecisset, nec addidisset, ut Electi hautquaquam vel resistere Spiritui Sancto, vel eum excutere possent: quorum utrumque sacro verbo doceremur. Sed & de concione dixerat Adfinis, gentes non omni veri Dei cognitione fuisse destitutas, sed eam in mendacio detinuisse; planèque videri, nisi id ab iis factum esset, divinam bonitatem, ac misericordiam majori eas gratia fuisse dignaturam: nunc culpa sua perisse, quia citra gratiosum fidei donum nihil Deo placere ad justificationem, ac salutem dandam posset. Ob quem sermonem Adfinem in Consistorio reum agere non dubitavit Musenholius; sed peragere non potuit. Nempe dixisse dicebat, posse gentes salvari sine fide in Christum: contrarium autem seniores, quos vocant, se audisse profitebantur. Ad hæc contigit, ut Lansbergius, Hillerus, alii, Amstelodamensibus aperto schismati studentibus, formulam concordiæ, aut quocumque nomine appellare lubet, ad vicinas Ecclesias miserint, easque inter Bredanam: in qua cùm Boxhornius, & adfinis nihil nisi pacem Ecclesiæ spectari viderent, nec abludere ab nupero Ill. Ordinum edicto judicarent, non gravatè manu sua adfensum sunt testati. Non factum mallet, haut quidem quia mali hic videam quicquam; sed quia per quos isthæc procurentur minus tacituros putarem. Sanè vix subscripserat, uterque, primo, ni fallor, alibi, mox Bredæ res ad Musenholium indeque in vulgus dimanavit. Jamque dictorio hoc notatur adfinis, quod qui gravatus sit subscribere Catechismo, hic Illustrium Ordinum Edicto (sic formulam

nuncupant) subscriptione sua dignetur: quasi dicant, divinis humana possidere. Dixi ante, qui de Ecclesiastiarum, aut Candidatorum etiam grege Musenholio maxime studeant; sed & in urbe habet is duos, tres, qui operam ei suam commodent; hinc tanti typhi, ut cum literaturæ omnis penitus sint rudes, melius cunctis Ecclesiasticis, sese controversiarum obortarum gnaros esse jactitent. Hos inter quis familiam ducat, me non monente scies, si scias esse unum ex iis ægrorum consolatorem, quo hominum genere jam ab aliquot retro annis, nihil reperi nasutius, nihil ad turbandas Ecclesias, vel aptius, vel proclivius; Imprimis si factionis suæ ducem aliquem Ecclesiastiarum nanciscatur. Ita, ut alios mittam, memini Dordrecht, Ecclesiasticas nullum magis metuere, & concionum, & vitæ apud vulgus censuræ, quam ejus ordinis hominem: qui & cùm Lydius de reprobationis dogmate mollius sentiret, & cuidam separatistæ Roterodamensi non in cunctis assentire posset, eum passim traducere cœpit apud suos, quasi in Remonstrantium castra descivisset. Sed Lydius, cùm tam atrocem, ut ipse interpretabatur, calumniam dissipare vellet, proximis hominibus graviter in Remonstrantes detonuit, multumque ea arte hominis labefecit fidem. Verùm ad Bredanum illum minimè sanctum *μὴς ἀλλῶς* redeamus, qui similiter apud suos, ut Remonstrantem passim traducit adfinem. Quemadmodum verò olim nihil Christiani ipso nomine erat invisius, abundeque illud criminis, imo crimina omnia complecti credebatur: Itidem Musenholius, *μὴς ἀλλῶς* iste, & pauculi ejus farinae alii, sic Remonstrantis nomen apud non paucos exosum reddiderunt, ut qui Remonstrantem dixerit, hæresium omnium sententiam, & aliquem qui per schisma ad Patriæ prodicionem munit viam dixisse videatur. Sanè Musenholius his diebus in mensa Amittini nostri, apertè ac sine circuitu dicit, Remonstrantium hoc propositum esse, ut paulatim Papatum invehant. Hoc qui apud eos facit qui sunt nobis affinitate conjunctissimi, nec ob prudentiam facile admodum calumniis istiusmodi fidem habent, quid non effutiat apud imperitum vulgus? sanè jam tantùm per se suosque effecit, ut dicantur ducenti, aut circiter hac una de causa à sacra synaxi abstinere velle. Hæc malè adèò adfinem habent, ut jam menses aliquot, sed per intervalla, cum morbo graviter conflictetur, quem non aliunde quàm animi ægritudine contraxisse putamus: planeque metumimus, ne si (quod Deus avertat) res in apertum schisma prorumpat, affinis sit ferendo. Sanè major multo *μὴς ἀλλῶς* arcescere solet, ut non temerè



temerè sit, quod ex etymo hoc mœrorem à dolore distinguant Grammaticorum filii. Per adfinem non stabit uti neque per Boxhornium quo minus Ecclesiæ ejus conservetur concordia; tantum neuter adigatur ad Manichaica illa publicitus vel docenda, vel audienda. Miseret profecto Ecclesiæ, quæ vix dum papatus jugum excussit; ac jam nunc per concionatorem istum (Tulliana, non vulgari tantum consuetudine nunc vocem eam usurpo) suspicionibus ac calumniis à fide Pastorum avocatur, absterreturque. Mihi quidem omnimodo laborandum videtur, ut concordia retineatur. Qua autem ratione id confieri possit, tu, Amplissime vir, pro aequilina illa ingenii tui perspicacitate longè citrà dubium melius me vides. Dicam tamen quod in mentem venit. Non dubium mihi quin Hagæ, noris optimè Amplissimum D. Martinium, Senatorem Curie Brabanticæ, & Bredani Senatus aliquando partem, eoque qui indolem atque animos Magistratus Bredani optimè nosse possit. Quid? si is quempiam Procerum, cui maximè fidat, literis moneat, ne patiantur civitatem suam schismate distrahi miserè, sed Ecclesiasticis suis præcipiant, ut concordie studeant, nec in controversiis obortis prudentissimum Illustrum Ordinum Edictum transgrediantur, seu Manichaica seu Pelagiana docendo. Imprimis verò, quid? Si Magistratus illum ægrotum consolatorem, & unum alterum illius *amicus* monetæ ad se arceat, graviterque commonefaciat, ne ultra crepidam sapere velint, multo minus piis & doctis Pastoribus Ecclesiæ suæ hærescos notam inurere, ac vulgus à sacra synaxi absterreere velint. Equidem magni referre puto, ne ea civitas schismate turbetur, quæ & Ecclesiam habet novellam, & à Principe gubernatur Pontificio, & magna sui parte principis sequitur religionem, & quod caput, quæ hostili adeo solo est propinqua. Non dubito, quin si quid istiusmodi vel Illustris Ordines, vel Ill. Princeps Mauritius resciscat, principiis tanti mali sint oblituri. Cum ante menses duos tres adesset nobis adfinis, author ei fui, ut quod facile poterat, Hagam excurreret ad reverendum & summum virum D. Uytenbogartium, ei que statum omnem Ecclesiæ suæ exponeret. Nec à consilio eo multum abhorrebat adfinis; tantum metuebat, ne si cum eo communicasse consilia sua innotesceret, plus Ecclesiæ suæ res ea damni daret, ut nunc quidem sunt tempora. Cogitabat etiam qui Mufenholii mos est, facile si vel levem suspicionem concepisset, hoc sibi exprobraturum: nolle autem hoc committere, quod negare non posset. Hæc ego cum scirem, putavi non

malè me facturum, si vel ipse ad clarissimum Uytenbogartium scriberem, vel, quod postea prætuli, tuæ rem omnem prudentiæ committerem, qui, si consultum putabis, cum eo rem communicabis, feci autem omne hoc nullo istius rei gnaro: Affine vero tam ignaro quam qui ignarissimus. Pene hoc significare exciderat, (quamquam exigui videatur momenti) ante hebdomades duas Mufenholium fuisse in urbe nostra non tam, puto, ob nuptias Pollionis quibus interfuit, multa cum Festo (ejus latus dextrum claudebat) mussans diutissimè; quam ut cum, quem dixi, viro nova turbandæ civitatis consilia caperet. Sanè ratiocinari possim, uti de Clodio in Miloniana Tullius, nisi magnum aliquod fuisset, cujus causa urbe exiret, non tum potissimum se ad iter fuisse accincturum; sciebat enim utrumque Collegam suum valere malè. Sed absente eo famula (quicum consilia sua homo prudens communicare videtur) dixit, non posse in urbe durare, in qua videre cogatur tam multa præter animi sui sententiam. Intellego ex quodam, qui Festo utitur familiariter, eundem cum domum reversus esset Ecclesiæ Ter Heiden (cui ante inserviverat Pollio) commendasse illum, qui sub cruce Roterdami (sic loquebatur) concionatus hæcenus fuit. Nempe existimatur ille suæ constantis *adversarius* & aliquid dedisse experimentum in urbe vestra, eoque dignus putatur qui jam perpetuus certi loci Pastor fiat. Ego ab istiusmodi hominibus, in Bredana diocesi nihil boni spero, qui prius fratribus separationis, seu Separatistis, ut in Anglia vocantur, seu Donatistis novellis, ut veteri eos vocabulo insigniamus, sese factionis præbuerunt duces. Quamobrem hoc quoque ad adfinem primo tempore, perscribere animus est, quo cum Collega Boxhornio videat, ne sua pusillanimitate Ecclesiæ aliquid adferat detrimenti. Vale, Magnifice, Amplissimeque Domine; Et si occasio dabitur, ne quæso gravare salutem meo nomine dicere Clarissimo Uytenbogartio; cujus ego salutandi causa superioribus feriis Hagam excurreram; sed cum Principe prædere dicebatur; mihi autem, ob necessaria quædam negotia, diutius Hagæ hæere non licebat: ita factum ut ex quo tempore una tecum ei aderam, præstantissimum virum non viderim. Iterum Vale.

*Amplitudini Tux Observantissimus,*

3. Decemb.  
1615.

Gerardus Vossius.

## XXIII.

Gerardus Vossius, Hugoni Grotio S. P.

Quoties cum animo meo reputo, prima reformationis tempora, eaque cum proximis, & illa item cum nostris compono; toties, Magnifice, Amplissimeque Domine, se maximum mihi offert argumentum infirmitatis humanæ: neque dubito, quin idem tibi usu veniat sæpissimè. Quid enim magis Luthero, aliisque piis Doctoribus, primitus obijci solet, quàm Papæ, & Ecclesiarum multarum dissentientium autoritas? sed Doctores nostri ab Ecclesiis ad Scripturæ iudicium, à Papa ad Magistratus iudicium provocabant. Bona causa multis locis triumphavit. Sed cum Lutherus homo quoque esset, à quo idcirco humani nihil alienum putari debet, factum, ut cum bono semine zizania alicubi seminaret. Videre hoc alii, fortasse nec pietate, nec eruditione inferiores; qui idcirco sedulo sibi adlaborandum iudicaverunt, ut à bono semine zizania distinguerentur. Hic qui in sententiam Lutheri iurassent, quasi quæ de Scripturarum unico, ac perfectissimo Canone dicta essent, adversus Pontificis solum valerent; ecce ipsæ, vel geminis planè armis, aggredi eos ausi sunt, qui zizania in Ecclesiis suis recens orta eruncare vellent. Nam ut Pontificii Pontificem, ita hi Lutheri Sectatores, Lutherum; ut illi Ecclesiam Romanam, ita hi Ecclesias Saxonicas, & alias; ut illi mediæ ferè, aut infimæ Antiquitatis consilia aliquot, ita hi, tanquam quod Conciliorum sibi multorum instar esset, Confessionem Augustanam urgere adversus dissentientes cœperunt. Habuit hoc alios pessimè, imprimis eos qui in re Sacramentaria ab iis dissentientes, hac parte Zuinglium, & Calvinum sequi se profiterentur. Aurem igitur istis vellere, memoriamque priorum temporum refricare, quibus armis istiusmodi pugnandum fuisset, causa fuissent longè interiores. Sed surdo caneatur fabula. Nam qui quasi rerum dominarentur, hi, ut Pontificii olim, ita jam ipsi quoque in omnes à se dissentientes de umbone, tanquam de plaustro omnis generis convitia jactare cœperunt: communitati etiam omni in posterum renuntiarent. Atque in his tuebantur se Lutheri ipsius (quanti alioquin viri!) exemplo: qui ut multa istius farinae omittam, (commemorare enim tædet) paulò ante excessum suum, ad Jacobum Probst, Pastorem Bremensem, virum, quod nec qui Lutherum tantopere sectantur, diffiteri poterant, eximie pietatis, scribere hunc in modum non dubitavit: *Bea-*

*tus vir, qui non abiit in consilio Sacramentarium; & in via Zuinglianorum non stetit, & in Cathedra Tigurinorum non sedit.* Quod cum illis aureolum, & bracteatum quoddam dictum videretur, omnes qui non habent animum affectibus impeditum, vident esse, non dico bullatas nugas, aut ineptam, ac puerilem allusionem: sed impiam & horribilem Psalmi perversionem. Nec intra convitia, aut Anathemata res stetit: ad carceres, ad exilia deventum: uti vel sola indicium faciet Peuceriana carcerum historia, quam optimus, & doctissimus Pezelius scripsit. Tantum non quidem religio, sed perperus affectus potuit suadere malorum. Tandem divina misericordia, in Britannia, in Germania, in Galliis, in Belgica, efflorescere etiam Ecclesiæ cœperunt, quæ Papæ sic jugum excuterent, ut à Luthero simul in *ovvovias* dogmate dissentirent. Ac aliquantisper quidem hæ memores pristinae conficiationis, & cum Papistis & cum Lutheranis, nihil urere, quàm Prophetica, & Apostolica scripta, summumque in Ecclesiasticis iudicium Magistratibus sponte detulerunt. Sed postquam plerique earum Doctores rem omnem in vado esse viderunt, inque Veterum multorum locum, jam successerant Oratores novi, Adolescentuli, quam in Papistis prius, ac mox Lutheranis tantopere damnarant, hanc ipsi, cum alibi, tum imprimis in Belgica hac, calcare viam cœperunt. Si quod enim dogmatum suorum in dubium vocaretur, non jam ad scripturas solas, imò nec ad primævam Antiquitatem, provocari se patiebantur: sed ut Lutherani illi Lutherum, ita hi Calvinum, aut Bezam: ut illi Augustanam Confessionem, ita hi Confessionem Belgicam, vel Catechesin Palatinam: ut illi Saxonicarum, ita hi Reformatarum, in Provinciis hisce jactabant consensum. Et quod dolendum imprimis erat, non minùs quàm priores, omnes, à se sententiis discrepantes, tanquam hæreticos differebant, & quos possent sedibus, suis deturbabant. Quæ quoties cogito, propè animum meum subit, & ne & illi qui nunc, ob aliquem in Prædestinationis dogmate dissenfum, tanquam *adversus* traducuntur, si superiores aliquando hiant, (liberè cur non apud te loquar!) similiter excepturi sint eos, qui dissentire ab ipsis audebunt. Quippe & illi homines sunt, non minùs quàm priores: Et semper sic, ut alios mittam, cum ipso eruditum vulgo ita comparatum fuit, ut contemptis iis qui moderata suggerent consilia, iis qui extrema sequerentur, se potiùs applicarent. Sed huic spero malo providebunt tempori viri aliquot præstantes, qui inter ipsos plurimùm possunt: ac imprimis Magi-

stratus

stratus summus, quem hæc antecedentium exempla possunt reddere cautiorem. Quod autem nunc illi, qui receptiorem sententiam tuentur impensè negant, vel transversum se unguem deflectere ab illa dissertandi ratione, quam sequebantur, qui primi Ecclesias Belgicas, vel domi, vel in exilio, docuerunt, hoc istiusmodi est, ut meritò dubites, utrum magis imprudentiæ, an impudentiæ tribui debeat. Hoc cur dicam, cum alia multa, etiam in vulgus notissima, testatissimum faciunt, tum imprimis historia isthæc quam nomine Nobilissimi Johannis à Lasco, Belgicæ Ecclesiæ in Angliâ Episcopi; item Martini Micronii, eruditissimi, & fidelissimi Pastoris, & omnium Belgarum, aliorumque peregrinorum Londinio profugorum, scripsit, divulgavitque, nobilis & insignis vir Johannes Utenhovius, Ecclesiæ Belgicæ senior. Quanto profectò aliter, quàm hodie hic fit, disputabant illi cum Lutheranis Coldingæ, Wismaricæ, Hamburgi, atque alibi. Non visum hic universam istorum temporum historiam percurrere; sed contentus ero, ex multis aliqua delibasse, ex quibus de cæteris non obscura fiat conjectatio. Coldingenses quidam Pastores erant, nomine Paulus Noviomagus, & Henricus Sylveduensis. Cum his nostri pium aliquod colloquium poscebant. Negabant contra illi, eo quicquam opus esse, cum nec Rex, nec ipsi minimùm de Regni Danici doctrina dubitarent. Nempe similiter ac (lubet enim isthæc cum nostris temporibus conferre) dicentes audivimus quosdam, posse Pyrrhonios istos, ut vocabant, inter sese Catechelim examinare ad scripturarum statum: sibi hoc factu nihil opus esse, qui nec de particula ejus minima dubitarent. Sed quid hic à Lasco, Micronius, Utenhovius? Nempe tales præjudicio peccare arbitrabantur, planèque statuebant, non tantùm cum Zizania spontè, aut fortuito oculis sese offerunt, de evellendis iis consilium capi oportere, sed sollicitè etiam inquirendum, nihil ne Zizaniorum uspiam reperiatur, cum inimicus homo ea solet spargere, dormientibus iis quibus cura agri Dominici incumbit. Sed pergamus. Dicebant Lutherani, negari à nostris, clara Scripturæ verba, Hoc est Corpus meum. Nempe simili ratione, ac Ecclesiastæ illi, qui cum de Electionis & Reprobationis absolutæ dogmate disputant, clara esse aiunt verba Apostoli, Rom. IX. ac Reprobationem aliquam conditionatam inducentibus priusquàm quod volunt persuadeant, totum illud caput è sacris literis furcillandum esse. Sed quid in simili controversia à Lasco, & alii, quos diximus? *Ipsam Noviomagum superiori concione docuisse, & quidem rectè: veritatem*

*cujusque doctrinæ, probandam non esse, unius alicujus loci in Scripturis testimonio, sed unanimi totius Scripturæ consensu.* Obiciebant deinde nostris, quod omnia carnis judicio metirentur. Quis nescit hodie oggeri illis, qui absolutam reprobationem negant? sed audiamus à Lasco, & alios. *Multa sunt alia in religione nostræ capita, magis multo rationis nostræ judicio repugnantia, quæ tamen nos omnia per Dei gratiam indubitata fide amplectimur, abnegato omni rationis nostræ judicio, eo quod illa certis divini verbi testimoniis niti, atque insistere videamus; idem & hic multo libentissimè faciuri, si idem videamus.* Obiciebant item, quod per Danicæ Regnum, jam alia de cœna sententia obtineret: nempe ut nunc quidam in Prædestinationis dogmate Ecclesiarum (quam verè non disputo) autoritate se tuentur. Responderunt nostri Lutheranis istis; *Doctrinæ sanæ veritatem petendam nobis esse, non sanè è Regnorum, sed ex verbi divini certa ac solida autoritate.* Criminabantur item nostros, quod dissentirent à Luthero, ac Saxonis Ecclesiis; quod Augustana Confessione damnarentur. Nempe haut aliter, ac nunc quidam semper crepant Calvinum, Ecclesias Belgicas, Confessionem, aut Catechelin: quæ fortassè tamen non usque adeò illis patrocinantur. Sed quid hic iidem illi laudatissimi viri? Dominus, inquebant, *Lutherum, ac Saxonicas Ecclesias, denique & Augustanam Confessionem non esse Catholicam Ecclesiam: nos Lutherum pro insigni Dei organo habere, sed illi nihilominus, Spiritum Sanctum juxta mensuram datum fuisse: hunc honorem solis nos Prophetis & Apostolicis scriptis deferre, ut nihil contineant quod non certa fide sit amplectendum: ceterum in scriptis Lutheri, (de Calvino idem dicere possumus) luculenta extare testimonia, illum sibi non perpetuò, neque per omnia constare. Quare & Lutheri scripta, & ipsam adeo Confessionem Augustanam, ad Scripturæ regulam, & legitimam Ecclesiarum judicia revocanda esse: neque ex Lutheri dogmatibus, aut etiam ex Augustanæ Confessionis autoritate, ita præjudicandum esse, ut scindantur Ecclesiæ, utve sanctorum communio in Catholica Dei Ecclesia (contra fidei nostræ confessionem) videtur.* Verba profectò aurea. Porro quia Paulus Noviomagus hæresios accusarat nostros publicè in concione; respondere ad illud in hunc modum: *Contra doctrinam Evangelii factum dicimus; quandoquidem nemo de alterius condemnatione, pronunciare aut potest, aut debet in Ecclesia, quem non constat publicè à fundamento Apostolicæ Confessionis, Petri ore proditæ, excidisse.* Et aliquanto post addunt: *Nos hujus controversiæ nomine, neminem unquam aversati sumus, sed in fraterna charitate tulimus; & ferendos esse putavimus omnes, qui modo nos vicissim ferre volent, donec Dominus controversiam hæc, per gra-*



tiam suam componat, eo quod omnes fundamentum Confessionis Apostolicæ pariter retineamus. Quod ipsum in Prædestinationis controversiam multò etiam iustius dici possit. Alia quoque huius generis in isthoc Coldingensi colloquio legi possunt. Sed nihil nostros ulla iuvat defensio sui: Verum extrema in afflictione, mediæ hyemis tempestatibus, sexaginta circiter familiæ (quos inter decrepiti, pueri, matronæ gravidæ) summo cum vitæ periculo regno eiectionis sunt. Sed operæ etiam fuerit delibare dissertationem, quam Hamburgi, Micronius habuit cum Joachimo Westphalo, eo adversus quem, & Calvini exstant quædam. Is tanquam Achilleum argumentum objiciebat Micronio: De veritate doctrinæ nostræ Sacramentariæ nihil est ambigendum, cum ea in omnibus Saxonis & Orientalibus Ecclesiis, ut à sanctissimis viris, & Præceptoribus suis eam acceperunt, unanimi consensu tradatur. Falsa igitur, & repudianda est, contraria Zuinglii sententia, quæ in prædictis Ecclesiis est damnata. Præclare respondet Micronius: De controversia aliqua doctrina, non ex unanimi Ecclesiarum multarum consensu, sed tantum ex concentu Prophetiæ & Apostolicæ statui debet. Alioqui triumpharet Papa. Tum Westfalus; Ecclesiæ nostræ Saxonice sunt Ecclesiæ Dei. Hic Micronius: Ecclesiæ Dei ex loco estimari non debet. Utiq; Londinum non facit Ecclesiam Dei, ita nec Hamburgum, aut Lubeca. Nulla præterea est Ecclesiæ, præter Prophetiam, & Apostolicam, quæ non in quibusdam hallucinari quandoque possit, quod ipsum quoque Lutherus docuit. Addimus Et Calvinus. Sed quid Westfalus hic? Quod Lutherus scribit, Ecclesiam errare posse, de Papistica, non de Christiensi Ecclesia. Respondet Micronius: Imò de vera Christi Ecclesia loquitur Lutherus, qui ex humana quadam imbecillitate, in quibusdam nonnunquam impingit. Ex parte enim Prophetamus. Et fit aliquando, ut eximius aliquis doctor alicubi turpiter hallucinetur, quem mox deinde alii, præpostero quodam Zelo incitati, temerè, & pertinaciter imitantur. Hinc etiam sæpè errores in Ecclesia oboriuntur. Verissimè, Verissimè. Quare optimè ibidem sic colligit Micronius: Proinde approbanda venit doctrina Ecclesiæ omnis, non Ecclesiarum aliquot consensu, sed verbi divini auctoritate. Objiciebat Westphalo Micronius; quod in libello suo, cui titulum fecisset, de recta fide, doctrinam suam sacramentariam Ecclesiæ iudicio subiecisset, eoque examen ejus subterfugere non deberet. Respondet Westfalus: Ego doctrinam meam Sacramentariam, non Londinensi, sed Ecclesiæ Dei Hamburgensi judicandam proposui. Similiter hodie multi in Prædestinationis dogmate, nullis se Ecclesiis subicere volunt, nisi quas idem secum sentire habeant persuasum. Ait idem Westfalus: Si dubia

adhuc esset nostra doctrina, graviter peccasset senatus noster, & serenissimus Daniæ Rex, qui adversum vos decreta tulerunt. Optimè respondet Micronius: similibus argumentis facile omnes vicerit Papa. Ait Westfalus: Contra vestram doctrinam Comitibus Augustanis pronuntiaturum est. Micronium hic audiamus: Non video vos justam habere causam tantoperè gloriandi, de Augustanis Comitibus, cum ea in eum finem instituta non sint, ut ibi audita prius utraque parte certi aliquid de re Sacramentaria statueretur: Sed fuit tantum nuda fidei confessio, quæ nullo modo Concilii legitime congregati auctoritatem obtinere potest. Quod ipsum de Belgica confessione dicere possumus. Quemadmodum, & quod continuò subdit: Siquidem Concilia omnia adhuc subjacent Scripturarum Auctoritati, quanto magis Confessio Augustana? Alibi quoque recensetur in eadem historia colloquium, à Micronio habitum Wismaria cum Doct. Smetendio. Hic, cum Micronius dixisset, Magistratus possit colloquii testis esse, ac iudex: respondet Doctor ille, Magistratus? quid ille de religione intelligit? Petamus Rostochium, & ad Doctores, aut superintendentes proficiscamur, qui de colloquio judicare poterunt. Nempe non alios iudices admittit, nisi à quibus certam sibi victoriam videt. Quid Micronius autem ad hæc? Sicine, inquit, Magistratum contemnitis, Doctor? Quo iudice precor Papam principio vicit Lutherus, ab omnibus tunc Doctoribus Scholasticis passim damnatus? Sed exscribillandi modus tandem esto. Abundè sanè ea, quæ adduximus, ostendunt quod superius dicebam, illos qui primi Ecclesias Belgicas collegerunt, repurgaruntque, semper à Doctorum quorundam sensu, Ecclesiarumque quarundam consensu, ad scripturarum iudicium, & Magistratus iudicium provocasse contra eos, quibus cum illis Doctoribus nostris negotium fuit; haud secus ac hodie quidam occipiunt è nostris. Nam ovum ovo similis non est, quam illa quæ vidimus Lutheranorum Argumenta, & ista nostrorum, qui absolutam tuerentur prædestinationem, nec Magistratus iudicium in Ecclesiæ rebus admittunt. Nec tamen par omnium hoc immodestia: sed quo inperitior quisque, hic minus rationi locum præbet. Ἀλλὰ δὲ ἀπερίστην νόος ἀνδρῶν Δύσμαχες, εἰ δὲ θέλει δὲ ἀπερίστην πείθεσθαι, ut optimè olim Oppianus. Atque ut ingeniosissimus Poeta alicubi ait,

Non plus bis cordis, sed minus oris adest.

Plus modestiæ (quemadmodum & eruditione plerosque ordinis sui vincit) retinuit Antonius Walkus, cuius scriptum de jure Magistratus in Ecclesiasticis dicere possum, ἀνέγνων δὲ ἔγνω, τὸ ἐλέγγων ἀπλῶς addere non possum, ne merito

rito audiam illud quod desertori Juliano respondere Basilius, ἀνέγνως ἀλλ' ἢ ἐγγράφους, εἰ δὲ ἔγγρους, ἢ ἀν' ἐγγράφους. Ita multa in eo scripto reperi, quæ meliorem mentem, majoremque modestiam spirent. Sanè si quis ea ex opere excerpta in unum congerat, simulque oculis subjiciat, vix amplius aliquid requisitus videatur. Sed tamen duobus nominibus peccat gravissimè. Nam adversarii sui mentem, quam non capit, carpit; eumque se oppugnare credi vult, cum suum oppugnat somnium. Ad hæc quæ scribit minimè videntur ἀκόλουθα τῇ ἐπιλόγῃ. Nam cum summum in Ecclesiasticis imperium, neget esse penes αὐτοκρατορεῖς, ea tamen passim dicit, ex quibus colligere hoc potuisset, si mens non læva fuisset. Omnis erroris fons, & caput, quod confusè, indistinctèque singula consideret, & tractet, cum hic vel maximè habeat locum, illud Stagirita, Οὐκ ὀκνήσας τῷ διαλέγειν. Id quo pareat, prius quidem, universè ac generatim ostendam, Magistratui summo etiam in Ecclesiasticis jus competere summum: deinde verò aliquam multa, imò præcipua ferè, Wallæani operis ad trutinam scripturæ, & rectæ rationis expendam. Nec ignoro, quam tu hæc melius me intelligas, sed non ingratum me facturum spero, si meum quoque hac de re iudicium perscribam.

Ac penes Principem quidem, seu Magistratum summum esse imperium supremum rerum Ecclesiasticarum, quatenus quidem penes mortalium quemquam potestas earum esse potest, solidè comprobatur, partim Dei ipsius mandato, annexaque promissione, & comminatione: partim exemplis piorum Principum, quæ nobis in S. Scriptura proponuntur, & commendantur: partim rationibus, quibus, Magistratus circa religionem, tum indirectum, tum directum, habere imperium ostenditur: partim exemplis Christianorum Principum, quæ Scriptoribus Ecclesiasticis continentur: partim autoritate Veterum, recentiorumque Patrum, qui potestatem hanc tribuunt Magistratui summo: partim iudicio, ac confessione Scriptorum externorum, qui & ipsi, velut rationis quodam ductu, imperium circa impiam Religionem suam, tribuant Principi suo: ac Principum ipsorum, qui in impia Religione sua jus illud usurparunt. Hæc omnia quidem cum cura tractare velle, scio res fuerit ingentis commentarii. Verùm nos ex immensa sylva tantummodò paululam struem congeremus. Ut igitur ordiamur, jubet Christus, *Matt. VI. 33.* ut primùm quæramus Regnum Dei, ac fore spondet, ut cætera omnia adjiciantur nobis. Quod mandatum, cum privatum quemque tangat, tum eos imprimis, quibus non

fui tantum, sed publici etiam cura incumbit: quibus regnum Dei in Remp. inducendum, promovendum, curandum, conservandum. Itaque & *Psal. XI. 10, 11, 12.* Sic eos per Davidem compellat: *Nunc ergo, Reges, animadvertite, eruditionem percipite, ô judices terræ. Colite Jehovam cum reverentia, & exultate cum tremore. Osculamini filium, ut non irascatur, & pereatis in via, cùm exarserit vel minimam iram ejus. Beati omnes, qui recipiunt ad eum.* Ubi Reges compellat Deus, non velut aliquos ex societate humana, sed tanquam Reges; quos non sibi tantum colere pietatem velit, sed curare, ut eandem subditi exerceant, quemadmodum optimè ea verba declarat Augustinus, ut infra videbimus. Huc quoque pertineat, si recta interpretatio, locus ille *Psal. XXIV. 7. Attollite portas, Principes, vestras, & elevamini portæ infernales, & introibit Rex gloriæ. Psal. LXXV. 4.* ait David, *solutas columnas terræ aptabo.* Ubi Spiritus S. (ut quidam satis aptè eum locum exposuit) columnas terræ vocat, statum secularem, & Ecclesiasticum, sive imperium in rebus civilibus, & Ecclesiasticis: quæ duo imperii statumina, & firmamenta, per diuturnas Saulis clades attrita, ac penè contracta, instaurare se velle ait David. Huc pertinent quoque illustria Magistratus elogia, ut quod *Es. XLIX. 23.* dicuntur *nutritii Ecclesiæ*; quodque *Psal. LXXXII. audiunt, Dii estis, & filii altissimi.* Nam ideo Deus hoc eos titulo dignatur, quia munus gerant divinum, præcipuæque imperii pars versetur circa ea, quæ ad Dei gloriam, & animarum salutem pertineant. Quod si exempla petuntur, suppetunt ea, in Davide, Salomone, Asa, Josophata, Ezechia, Jolia, Jehu, aliis. Non inhærebo iis commemorandis, partim quia omnia inculcantur libris, partim quia selectissima illa testimonia sufficiunt, quæ ad edictum Illustrium Ordinum adscripta sunt, ex 2 *Chron. VIII. 2. XVII. 6, 7. XXIV. 4. XXIX. 4. XXX. 1. XXXIV. 3. XXXV. 2.* Nec poenarum exempla, quibus Deus punivit, ejus mandati neglectum, quicumque arbitror requirat, qui vel solum cogitet: propter Salomonis idololatriam regnum ejus fuisse divisum, multosque Samariæ Reges, ob religionis neglectum, periisse, ipsaque tandem decem tribus hac propter funditis prope fuisse deletas.

Scripturarum authoritati succedat pondus rationis. Nam si vel temporalia solum curare Reges seridè velint, ne sic quidem religionis cultum negligere debeant, cum cultus divini contemptus, ac negligentia, fons sit infelicitatis, ac multorum malorum: uti contra sincerus Dei cultus in temporalibus quoque magnam adfert felicitatem. Qua de re vide

integrum *Deuteronomii*, cap. XXVIII. quo nihil illustrius. Similiaque legas 2 *Chron.* XVII. 3, 4, 5, &c. XXVI. 5, 6, 7, 8. XXVII. 3, 4, 5, 6, 7. XXVIII. 6, 7, 8, 9, 10. XXIX. 6, 7, 8. XXXI. 21. XXXII. 27, 28, 29, 30, &c. Itaque Constantinus Magnus (uti Nicephorus scribit Lib. VII. cap. 46. *Publicitas omnes cohortatus est, ut imprimis divinum numen pie colerent: ita enim fore, ut omnia eis abunde prorsus suppetant; omniaque cepta cum spe optima feliciter cedant: sin à pietate tali, & veri Dei religione aberrarent, nihil eos & pace, & bello, quam res adversus expectare debere confirmans.* Etiam Theodosius moriens (uti idem Nicephorus scribit, Lib. XIII. *Eccl. Hist.* cap. 1.) nihil aliud filijs mandavit, quam ut veram pietatem servarent illibatam, eoque eos argumento quoque inflammabat, quod per hanc habituri essent pacem, bellum sopituri, & victoriam à Deo consecuturi. Cui geminum illud Cyrilli penè initio libri, de recta fide ad Theodosium: *Impii Reges plurimum miseri, ac mali male perierunt: contra vero pietatis cultores sine labore vincebant inimicos, & adversariis praevalabant.* Fusè deinde è Scripturis idem probat. Addamus & illud Leonis Magni ad Martianum Imp. Epist. XLII. *Magnam materiam gratulationis accepi, quia studiosissimos vos Ecclesiastica pacis agnovi: cui sancto desiderio, digna equitate conferatur, ut quem statum cupitis esse religionis, eundem habeatis & regni.* Nam inter Principes Christianos, Spiritu Dei confirmant concordiam, gemina per totum mundum fiducia roboratur: quia perfectus charitatis, & fidei, utrorumque armorum potentiam insuperabilem facit; ut propitiato, per unam confessionem Deo, simul & heretica falsitas, & barbara destruat hostilitas, gloriosissime Imperator. Pertinet huc quoque illud Tullii de Aruspicum responsis, pag. 248. *Nec numero Hispanos, nec robore Gallos, nec calliditate Pænos, nec artibus Græcos, nec denique hoc ipso ejus gentis, ac terræ domestico nativoque sensu, Italos ipsos ac Latinos; sed pietate ac religione, atque hac sapientia, quod Deorum immortalium Numine, omnia regi, gubernarique perspeximus, omnes gentes, nationesque superavimus.*

Jam verò non tantum indirectè, & propter temporalem felicitatem, curam religionis Rex debet: sed etiam directè, & propter se, ut qua pars principalis ac quasi anima sit imperii. Quippe ut Ammianus, Pag. 421. Lib. XXIX. ait, *Nihil aliud est imperium, ut sapientes definiunt, nisi cura salutis alienæ.* Atque ut idem Editiois Wouwer. Pag. 462. ait Lib. XXX. *finis justì imperii, ut sapientes docent, militas obedientium estimatur, & salus.* Atqui, qui illud Satyrici novit, optandum est, ut sit mens sana in corpore sano; is sciat salutem, non solum esse corporis, sed etiam

animæ: ac quanto anima præstantior corpore, tanto hujus salutem potiorē censendam corporis sanitate. Si igitur sapientes, ut Ammianus ait, salutem alienam, finem esse statuunt Imperii; potissimum animæ salutem curare debet Princeps: præcipua autem, imo verò animæ salus est, æterna animæ salus: quam iccirco optime finem Principis facit Thomas Aquinas, sive alius, libro de regimine Principis, cum alibi, ut infra videbimus, tum cap. ult. ubi ait, divino cultui Rex toto conatu incumbere debet, tanquam debito fini, non solum quia homo est, verum etiam quia Dominus, & Rex est.

Idem quoque eo evincitur, quod Magistratus Homero dicuntur *παιδὲς λαῶν*. Cui consentit Xenophon, cum Lib. VIII. de Instit. Cyri, Similia esse, ait, opera boni Pastoris, & Regis; nam & Pastorem præstare, ut pecora habeant feliciter, & iis uti, si pecudum ulla felicitas esse possit: & Regem itidem urbes, hominesque facere beatos, atque iisdem uti. Pag. 124. Edition. H. St. a. 1571. *Τὸν τε ὁ νοῦς αἰνῶν, ἔφη, ἐυδαίμονα τὰ κτήνη ποιῶντα, καὶ αὐτοῖς (ἢ δὴ) ἀσπλάγχνον ἐυδαίμονα τὸν τε βασιλῆα ὡσαύτως ἐυδαίμονα πῶλεν, καὶ ἀνθρώπους ποιῶντα, καὶ αὐτοῖς.* Quantum igitur, *ἐυδαίμονας* pecudum (sic loqui licet) curat Pastor: tantum Rex procurabit hominum *ἐυδαίμονας*; atqui hæc non corpus solum respicit, sed animam quoque, atque id imprimis: ut etiam in Nicomachiis Aristoteles sentit. Sed fortius etiam idem probat, quod Princeps & dicitur, & est Patriæ Parens: ut Augustinus ait, Lib. XIX. de Civitate Dei, cap. 14. *Imperant qui consulunt, sicut vir uxori, Parentes filiis, Domini servis.* Quod igitur jus competit Patrifamilias in domo sua, idem aut majus etiam (nam paternum jus à principali determinari potest) convenit Principi in Rep. Atqui patris boni officium est curam gerere, non corporis solum, aut bonorum terrenorum; sed etiam & cum primis quidem eorum quæ animam tangunt: hæc verò inter, quin Religio familiam ducat, quis sanus dubitat?

Quid si exemplis etiam Christianorum Principum movemur; inde quoque clarissimum evadet, Principis munus esse publicitatis Religionem instituire, institutam conservare, & defendere. Constantinus Magnus in literis ad Ecclesias apud Eusebium, Lib. III. cap. 16. *Τὸν οὖν οὐ γὰρ πῶς ἔστι ἀναίμωτος ἀποπνέον, ὅπως οὐδὲ τοῖς μακαριωτάτοις τῷ Καθολικῷ Ἐκκλησιαστικῷ σώματι, καὶ ἐκκλησιαστικῇ ἀρχῇ, ὁμοψύχων τε μετὰ τῷ πατρὶ καὶ διὰ τοῦτο τῆς ἐκκλησίας.* Idem Constantinus legem tulit, ut basilicæ Catholicorum, quas Donatistæ occupassent, Catholicis redderent, nec quas ipsi fabricassent, retinere



tinere permitterentur : cuius rei meminit Augustinus Epist. CLXVIII. ad Januarium, & contra Parmenianum, Lib. I. cap. ult. & contra Petil. Lib. II. cap. 92. Etiam editum contra Arrium tulit, in quo hæc inter alia : *Si quid compositum ab Arrio reperiatur, ut igni id tradatur volumus. Illud etiam mandatum, ut si quis librum ab Arrio compositum occulasse deprehensus sit, & cum non statim in medium adductum igne combusserit, morte mulctetur.* Vide Socrat. Lib. I. cap. 6. Sozom. Lib. I. cap. 20. & Nicephor. Lib. IIX. cap. 25. Etiam apud Eusebium de vita Constant. Lib. III. cap. 62, & 63. Lex ejusdem existat adversus hæreses omnes. In cuius fine, hæc legere est : *Nostræ enim prosperæ, ac beatæ vitæ ratione, qua Dei beneficio fruimur, est admodum consentaneum, ut qui etatem bona spe sustentatam degant, ab omni vago, & cæco errore, ad rectam viam, à tenebris ad lucem, ab inscitia ad veritatem, à morte denique ad salutem traducantur. Ac quo proviso hæc in curandis erroribus robur, & firmitatem sibi necessariam, assequatur ; mandavimus, ut supra dictum est, ut omnia superstitionis vestræ loca, in quibus convenire soletis, omnia dico hæreticorum templa, (si modo templa appellare convenit) sine recusatione, aut controversia diruantur, & diruta, absque mora Catholice tradantur Ecclesiæ, reliqua loca publico Reip. usui addicantur, ne ulla vobis in posterum conventus celebrandi relinquatur facultas. Sic igitur hoc ratum statutumque, ut post hunc diem in nullo loco, vel publico, vel privato, nefarii vestri conventus in unum coire audeant.* Hujus legis occasione, hæreticos, ac schismaticos, paulatim ad Ecclesiam rediisse, præter Eusebium, eopse & sequ. capite, authores sunt, Sozom. Lib. II. cap. 30. & Nicephor. Lib. VIII. cap. 52. Etiam filius hujus Constantius, priusquam Arrianus fieret, Epistola ad Tyri Episcopum, hæc inter alia scripsit : *Certi sitis, me omni ope adnissurum, ut ea quæ sunt legis Dei, quam maximè inoffensa, illabefactaque, servantur, profligatis scilicet, & contritis semel inimicis legis, qui sub specie sancti nominis, multiplices & diversas blasphemias efferunt.* Vide Athanas. Apol. II. Idem adversus Donatistas, Macarium præfectum suum misit : qua de re Optatus, Lib. III. adversus Parmenianum. Constantio successit Julianus defector : huic Jovinianus, de quo sic Gregorius Nazianzenus, Orat. XXI. quæ est in laudem Athanasii, Edit. Morell. \* *ὁς ἵνα δεικνύω τὴν ἀρετὴν τῆς βασιλείας κενήσαν, &c.* Qui Jovinianus, ut pulcherrimum imperii sui fundamentum jaceret, rectamque legum sanctionem, unde conveniebat, auficaretur, cum omnes alios Episcopos, tum cum ante omnes, qui omnibus virtute præstabat, ac ci-

tra dubitationem ullam pietatis causa oppugnatus fuerat, ab exilio revocat. Quin etiam fidei nostræ veritatem, à multis laceratam, & perturbatam, atque in sexcentas opiniones, partesque distractam, sibi tradi postulavit ; ut maximè quidem universus Orbis, si fieri posset, in fidei negotio consentiret, spiritusque auxilio in unum coiret : sin minus, ipse certè optimæ parti sese adjungeret, simulque & ei robur afferret, & ab ea vicissim acciperet, excelsè simul, & magnificè de rebus maximis cogitans. Valentinianum etiam contra Donatistas legem tulisse scribit Augustinus, Epist. CLXVI. Gratiani, Valentiniani Junioris, & Theodosii senioris lex est, apud Theodoretum Ecclesiast. Histor. Lib. V. cap. 2 : & Sozom. Lib. VII. cap. 4. Cunctos populos, quos elementæ nostræ regis imperium, in tali volumus religione manere, quam divinum Petrum Apostolum tradidisse Romanis, religio hucusque ab ipso insinuata declarat, quamque Pontificem Damasum sequi claret, &c. Item ista, Episcopis tradi omnes Ecclesias mox jubemus, quos constabit communione Necessarii Episcopi Constantinopolitanæ Ecclesiæ esse sociatos, &c. Aliam quoque vide Cod. de summa Trinit. Lib. II. De Donatistis etiam quædam à Gratiano, & Theodosio constituta esse docet Augustinus, Epist. CLXVI. Idem Gratianus Edictum emisit, quo universi hæretici, non Ecclesiis tantum, aut urbibus excedere juberentur ; sed etiam extra terras omnes propellerentur : qua de re vide Sulpitium Severum Hist. Sacra, Lib. II. numero 69. Idem Theodosius Magnus Demophilum Arrianorum Episcopum, Ecclesiis Constantinopolitanæ urbis iussit excedere : eaque ratione factum, ut reliquas etiam Ecclesias recuperarent Catholici, quas sexaginta jam annis Arriani occuparant. Vide Sozom. Lib. VII. cap. 5. & Nicephor. Lib. X. cap. 8. Idem Sozom. cap. 12. Lib. VII. Et Nicephor. cap. 10. Lib. XV. testantur ab Theodosio Magno legem latam, ut sectarii, neque conventus agerent, neque doctrinam fidei profiterentur, neque Episcopos, aut alios ordinarent. Quæ lex existat in Cod. Theodos. uti & aliæ multæ ad Religionem pertinentes : unde Hieronymus Epist. ad Paulinum, panegyrici pro Theodosio mentionem faciens his verbis : *Et utilitatem legum futuris seculis consecrasti.* Illustre etiam est, quod Socrates de eo narrat, Lib. V. Histor. Ecclesiast. cap. 10. Determinata, inquit, die cujusque religionis Episcopi, ad aulam vocati conveniunt. Aderant igitur Nestorius, & Agelius Homusianæ fidei Antistites ; Arriana vero Demophilus ; Eunomianæ ipse Eunomius ; Macedonianæ Elenus Cyzicenus. Ubi convenissent, excepit eos Imperator, & accepto cujusque dogmatis scripto, seorsum Deum impensè orat, ut se ad eligendam veritatem adjuvet. Deinde

inde lecti cuiusque dogmatis scripto; reliqua omnia, tanquam separationem sanctæ Triadis inducentia, reprehendit, ac carpit, solum verò, quod Homusianam fidem continebat, laudat, & complectitur. Hic verò videmus, ut etiam solus Imperator, Religionis controversiam decidit. Finem de Theodosio faciam, ubi adjecero hæc verba Ambrosii, de ejus obitu: *Theodosium Imperatorem dilexi: Virum, qui cum jam corpore solveretur, magis de statu Ecclesiarum, quam de suis periculis angebatur.*

Ejus verò Zelum hac parte imitati quoque filii ejus Arcadius, & Honorius, quorum hic etiam inter duos Episcopos judicans, falso Episcopo deposito, verum restituit, ut ait Turrecremata, Lib. IV. summæ, Part. I. cap. 9. Ac quemadmodum Theodosium Arcadius, & Honorius, ita Arcadium quoque, suus sequutus filius Theodosius junior, hunc item Marcianus: quorum de Religione leges, & plures sunt, quam ut huc congeri possint, & obviæ magis, quam ut nunc referri debeant. Non possum tamen præterire hæc Theodosii, & Valentiniani verba, ad Hormisdam Papam: *decere arbitramur, nostrum imperium, subditos nostros de Religione commonefacere, &c.* Et illa imprimis: *Inquisitio vere Religionis, præcipua est sollicitudo Majestatis Imperialis.* Item hæc eorundem, Epist. XVII. earum quæ vel Cyrilli, vel inter Cyrillianas leguntur: *A pietate quæ in Deum est, Reip. nostre constitutio pendet, &c.* Sed nihil illustrius verbis eorundem, quæ ad Illust. Ordinum Edicta citantur, ex Lib. II. Novellarum Theodosii, tit. 2. De Marciano verò tantum dicam, Evagrium, Eccl. Hist. Lib. II. cap. 1. & Niceph. XV. cap. 1. testari, imprimis hoc cum studuisse, ut sublatis hæresibus vera Religio, & rectus Dei cultus doceretur. Ejus quoque successor Leo, constitutiones priorum Cæsarum, pro Orthodoxa Religione confirmavit: ut scribunt Episcopi Ægyptii, Epist. Lib. I. ad Leonem Imper. Eadem mens Justinii senioris: cujus legum pro Religione meminit, Niceph. Lib. XVII. cap. 2. Justinianus quoque Epiphonio Archiepiscopo scribens: *Nos, inquit, maximam habemus sollicitudinem, circa vera Dei dogmata, & circa sacerdotum honestatem.* Et constitutione Novella XLII. de Episcopis, & Clericis, restituta ab Antonio Augustino: *Sed nos omni providentia curam Ecclesiarum gerimus, per quas, & imperium nostrum sustineri, & publicas res per clementiam Dei, ac gratiam muniri credimus.* Extat etiam, ut cætera mittam, Justiniani Edictum, de summa Trinitate, & fide Catholica: quo, ut in argumento ejus meritò scribit Ant. Contius; *vix quisquam Patrum, aut Episcoporum, plenior ac luculentior fidei ex-*

positionem emisit. Procopius verò minimè audiri debet, cum Imperatorem summum eo nomine fugillat, quod intra palatii secreta, de mysteriis fidei, cum sacerdotibus, quam de re bellica cum senatoribus colloqui mallet. Mitto Justinii junioris, Constantini Pogonatæ, aliorumque constitutiones, de quibus ex Novellis, Nicephoro, & cæteris constat. Nempe Socrates, Lib. V. scribit in proem. *Ἀρ' ὅτι οἱ βασιλεῖς χειρὶ λαίῳ ἤρξαντο, τὰ δὲ ἐκκλησιαστικά ἔργα μάλιστα ἤλπιτο ἐξ αὐτῶν, καὶ αἱ μέγισται συνέδοι, τῇ αὐτῶν γνώμῃ, γινώσκειν τε καὶ γίνεσθαι.* Similiterque postea animati fuerunt, Theodoricus Italiae Rex, qui secundum Symmachum judicans schisma fustulit: ut agnoscit Turrecremata loco ante citato. Item Carolus, Ludovicus, Lotharius, uti Ecclesiasticæ leges ostendunt, ab Aufegiso collectæ. Nec putandum vel eos quos diximus hæcenus, vel Principes Christianos (quos omnes recensere sit longum) hoc sibi juris vindicasse Episcopis invitis. Imò verò illud suscepisse volentibus Episcopis, ostendunt ea SS. Patrum loca, quibus Cæsares, ad illud capeffendum adhortantur, & gnæviter eo fungentes, summis laudibus extollunt. Hujusmodi jam adduximus aliquam multa: Addam verò & alia, quo res fiat manifestior. Justinus sanè Martyr, Apologia ad Antonium Imperatorem, \* cum paratum se \* Pag. 37. dixisset denuò, de Christiana Edit. Com. Religione cum Imperatore colloqui, addit hujusmodi, *καίνατος ἦν λέγον βασιλεὺς τῷ ἱερῷ.* Clarius etiam Gregorius Nazianzenus. † Cum consum- † Pag. 309. masset Jesus hos Sermones, &c. Edit. Morell. *Ταῦτα καὶ λαϊκοῖς νομιζοῦντο. Ταῦτα καὶ πρεσβυτέρους ἐπὶ βλάπτει, ταῦτα καὶ τοῖς ἀρχιερεῖς πικρύνει, βλάπτει καὶ ἀρχιερεῖς, τοῖς δὲ δούλοις συνέδων ἐκ δὲ τοῦ πούτου ὁ ἱμὺς λέγει, ὁ δὲ δυνάστης πλεμῶν ἐστὶν ὁ ἀγίας πειλάς, ὅστις τὸ πείραγμα.* Augustinus contra literas Petiliani, cap. 92. *Habent ergo Reges, excepta generis humani societate, eo ipso quo Reges sunt, unde sic Domino serviant, quomodo non possunt, qui Reges non sunt.* Et Lib. II. contra Cresconium Grammaticum, cap. 51. *Reges cum in errore sunt, pro ipso leges contra veritatem ferunt; cum in veritate sunt, similiter contra errorem, pro ipsa veritate decernunt: Ita & legibus malis probantur boni, & legibus bonis emendantur mali.* Rex Nabuchodonosor per-versus legem seivam dedit, ut simulacrum adoraretur: Idem correctus, veram, ne Deus verus blasphemaretur. In hoc enim Reges, sicut eis divinitus præcipitur, Deo serviunt; in quantum Reges sunt, si in suo regno bona jubeant, mala prohibeant, non solum quæ pertinent ad humanam societatem, veram etiam quæ ad divinam Religionem. Quibus gemina habet de correptione Donatistarum,

tistarum, ad Bonifacium, cap. 6. Idem eopse, hoc est, de Donatistarum correctione libro, cap. XIII. Nendum autem agebatur, quod paulo post in eodem Psalmo dicitur; Et nunc Reges intelligite, crudimini, qui iudicatis terram. Servite Domino in timore, & exultate ei cum tremore. Quomodo ergo Reges Domino serviunt in timore, nisi ea quæ contra iussa Domini sunt, religiosa severitate prohibendo, atque plecendo? Aliter enim servit quia homo est, aliter etiam quia & Rex est. Quia homo est, ei servit vivendo fideliter; quia vero etiam Rex est, servit leges iusta præcipientes, & contraria prohibentes, convenienti vigore sanciendo. Sicut servivit Ezechias, lucos & templa Idolorum, & illa excelsa, quæ contra Dei præcepta fuerant constructa, destruendo: sicut servivit Josias, talia & ipse faciendo: sicut servivit Rex Nivitarum, universam civitatem, ad placandum Dominum compellendo: sicut servivit Darius, idolum frangendum in potestatem Danieli dando, & inimicos ejus Leonibus ingerendo: sicut servivit Nabuchodonosor, de quo jam diximus, omnes in regno suo positos, à blasphemando Deo, lege terribili prohibendo. In hoc ergo serviunt Domino Reges, in quantum sunt Reges, quoniam ea faciunt ad serviendum illi, quæ non possunt facere nisi Reges. Cum itaque nondum Reges Domino servirent temporibus Apostolorum, sed adhuc mediterentur inania adversum eum, & adversum Christum ejus, uti Prophetarum prædicta omnia complerentur, non utique tunc possent impietates legibus prohiberi, sed potius excerci; hic enim ordo temporum volebatur, ut & Judæi occiderent prædicatores Christi, putantes se officium Deo facere, sicut prædixerat Christus, & gentes fremerent adversus Christianos, ut omnis patientia Martyrum vinceret. Postea vero cum caput impleri, quod scriptum est, & adorabunt eum omnes Reges terræ, omnes gentes servient illi: quis mente sobrius regibus dicat, Nolite curare in regno vestro, à quo tueatur, vel oppugnetur Ecclesia Domini vestri, non ad vos pertineat in regno vestro, quis velit esse religiosus, sive sacrilegus? Quibus dici non potest, non ad vos pertineat in regno vestro, quis velit pudicus esse, quis impudicus?

Hæc Augustinus, apud quem, & alia ejus generis non pauca legas. Leo Magnus ad Theodosium Augustum, Epist. XI. Pro integritate fidei, Christianissimum Principem convenit esse sollicitum. Vide & Epist. XXV. ad eundem. Idem Epist. LXXV. ad Leonem Augustum: Cum enim Clementiam tuam Dominus tanta sacramenti sui illuminatione ditaverit, debes incunctanter advertere, regiam potestatem tibi non solum ad mundi regimen, sed maxime ad Ecclesie præsidium esse collatam, &c. Gregorius Magnus quoque Mauritium Augustum laudat; quod conservandæ sacerdotali charitati, & custodiæ fidei, rectitudine studii spiritalis, præcipue sollici-

tudine invigilet. Vide Lib. IV. Epist. LXXVI. & CLXIII. quarum utraque ad Mauritium scripta. Ilidorus Hispalensis, Lib. III. Sentent. cap. 51. \* Cognoscant Principes seculi, Deo debere se rationem reddere, propter Ecclesiam, quam à Christo tuendam suscipiunt. Nam sive augeatur pax, & disciplina Ecclesie, per fideles Principes, sive solvatur, illi ab eis rationem exigis, qui eorum potestati suam Ecclesiam credidit. Bernardus, Serm. XLVI. super cantica. † Quomodo namque stabunt Ordines Clericorum, & administrationes eorum, si non Principum tantum videretur beneficio & munificentia sustententur, & potentia protegantur? Arnulphus Episcopus Lexoviensis, Ser-mone in Synodo habito. || Justitia regis Majestatis, per discretionem scientiæ dirigit, & informat. Informat ad virtutem, dirigit ad salutem. Et quid multis opus? cum Christiani Episcopi etiam ad Gentilem Cæsarem provocarent. Nam, uti Eusebius scribit, Lib. VII. 24. & Niceph. Lib. VI. 17. & seqq. Cum Paulus Samosatensis, à Synodo Antiochena damnatus, Episcopi ædes relinquere successoribus nollet, non dubitarunt Christiani Episcopi provocare ad Imperatorem Aurelianum, qui decrevit, ut illis Ecclesie domus tribueretur, quibus eam urbis & cæteri Italiae Episcopi adjudicassent.

Nec recentiores Ecclesie Reformatæ Doctores, hac parte à Veteribus dissentiant. Ostendunt hoc ea loca Musculi, Martyris, Bucerii, Joëlli, Witacherii, Biffoni, & Episcopi Cisterciensis. Item Confessiones Belgicæ, Helveticæ, Basileensis, quæ citantur ad Illust. Ordinum Edicta. Addam locum M. Bucerii, ex defensione Christianæ Reformationis Hermannii Archiepiscopi Colonien-sis. \* Ad unumquemque Magistratum præcipue pertinet, ante omnia providere, diligentissimeque, & efficacissime constituere, ut populo Christi, quoad curam animarum, recte consulatur. Eadem mens est H. Zanchii Miscell. T. 2. † Primum, inquit, Magistratus munus, ordinare tam illa, quæ ad Religionem, & cultum Dei attinent, quam quæ ad publicam pacem, honestatem & justitiam. Sexcenta hujusmodi sunt, in Germanorum, & Helvetiorum locis communibus, uti Polani, & aliorum cap. de Magistratu. Nec mediocres aliquot, sed libros integros describere oportet, si adferre vellem, quæ hac de re, Burtillus, Tookerus, alique Angli Theologi scribunt adversus Jesuitas. Unius tantum ex multis paucula ponam.

† Col. 704.  
Edit. Antwerp.

|| Fol. 75.  
Edit. Paris. Anno 1585.

\* Pag. 432.

† Pag. 277.  
Edit. Neosched. Anno 1603.

L. Ciske-



L. Cisceftrienfis ad M. Torti librum response, pag. 364. In Israël autem, nondum os reperi tam durum, quod negare etiam auderet, præcipuas in Religione partes, penes Regem extitisse: vel uno hoc argumento, quod per sacre historie seri in totam, mutato novi Regis animo, mutata semper est facies Religionis. Eaque in Religione mutatio Regi semper adscribitur, quasi factum ejus. Nec Pontifices unquam, vel præstare poterant, ut fieret mutatio in melius, vel ne fieret in pejus, impedire. Penes eos autem, si Religionis tam summa fuisset, aliquis aliquando Pontifex, etiam Rege secus affecto, præstisset hoc tamen, ut cultum Dei illicitum, pars aliqua populi saltem, retineret. Et pag. sequ. Regi id semper, Ecclesie nunquam, vitio datum legimus, quod Excella steterint. Regi ergo, sive declaret hoc, sive non declaret, etiam ante Ecclesie declarationem, id ex officio munus incumbit, deque eo neglecto, Deo rationem redditurus est. Et pag. 373. Conveniunt illa Regi, dare Judices in causis Ecclesie; dare Judicium Præsidentes; abusus in Religione, & corruptelas tollere; Arcam reportare, & præire reportande; Tempia dedicare, & ad eam rem cætus indicere; libro legis recitato, præcipere Pontifici de repurgando Dei cultu; fædus renovare de Religione reformanda; Templum ingredi, & anem serpentem confringere; Missiones sacerdotum facere; Pontificem ipsum ejicere, atque exauthorare, ne sit Pontifex: Hec si Regi omnia sic convenient, convenit & regimen Ecclesiasticum. Et pag. 380. Religionis cura, res Regia est, non modo Pontificia, & in Regis prima, quæmque ille non solum, foris ab externa vi, sed & domi ab incuria hominum asferere teneatur. Vos quidem ipsi, si vis instet ulla, rem Regiam clamatis: Ille vero si collapsa sit disciplina, non minus Regiam. Quod si etiam non audire lubet, hi quoque Religionis curam, potissimum faciunt Imperii curam. Ita Plato II. de Rep. ait, Præcipuè cum, qui publico præsidet, Religionis curam suscipere debere: & eandem IV. de Rep. propugnaculum vocat Magistratus: & Lib. VII. de LL. nominat vinculum legum, & honestæ disciplinæ. Cicer. II. de Natura Deorum appellat eam, humanæ Societatis fundamentum. Quæ omnia, ut de Religione falsa falsò, ita de vera verissimè dicuntur. Quemadmodum & Oraculis sacris, una Deorum voce excepta, planè consentaneum est illud Venufini Poetæ, Lib. III. Od. 6. *Dii multa neglecti dederunt, Hesperie mala lucuisse.* Quod si quis exempla desiderat, quibus Principes gentiles præcipuam Religionis curam habuisse demonstratur, adeat Greg. Tholozanum, Lib. XII. de Rep. cap. 4. Danæum, Lib. I. Polit. & alios.

Atque hæc satis ostendunt, Principem præ aliis, tam personis, quàm rebus, de Reli-

gione & Ecclesia, qua publica utraque est, sollicitum esse debere.

Estque ejus doctrinæ cognitio necessaria planè his temporibus, partim ob Magistratus ipsos, ne se putent ἀλλοτριοποιοῦν, si Ecclesiastica curent; quin verò gravissimam sibi neglecti muneris rationem Deo reddendam sciant, si non curent: partim ob Ecclesiastas, ne hujus rei ignorantia, se Magistratus imperio, in Ecclesiasticis eximentes, transilient mandatum Christi, jubentis ut Cæsari demus, quæ sunt Cæsaris, Matth. XXII. 21. Et Apostoli Petri, monentis, ut subiecti simus cuivis humanæ Ordinationi, propter Dominum, 1 Epist. II. 13. Item illud Pauli dictum, docentis omnem animam potestatibus supereminentibus esse subiectam, Rom. XIII. 1. quem locum interpretans Chrysostomus, disertim scribit: *Potestatibus ex debito obedire jubet; ostendens, quod ista imperentur omnibus, & sacerdotibus, & Monachis, non solum secularibus, id quod statim in ipso exordio declarat; cum dicit Omnis anima potestatibus supereminentibus subiecta sit, etiamsi Apostolus sis, si Evangelista, si Prophetæ, sive quisque tandem fueris. Neque enim pietatem subvertit ista subiectio.* Quæ verba etiam bonam partem excerpit Theophylactus. Idem ibidem: *Deus ita exigit, ut creatus à se Princeps vires suas habeat. Neque extenuatio ex eo est, quod Principi honorem suum reddis, sed magis ex eo, quod enim negligendo contemnis.* Eodémque respiciens Bernardus, Epist. XLII. quæ ad Archiepiscopum Senonensem; *Omnis, inquit, anima potestatibus sublimioribus subiecta sit: Si omnis, & vestra: quis vos exceperit ab universitate? Reddite Cæsari, quæ sunt Cæsaris. Scio ad secularia tantummodò referre hoc Pontificios: sed planè iis refelluntur, quæ antea de jure Magistratus in Ecclesiasticis diximus: Dolendum verò, hodie isthoc Papale ἀνευθετον, etiam ab aliquibus studiosè arripi, quos alioqui amore sinceræ Religionis, ac pietatis erga Deum serè duci judicamus. Sed sic ferè omnes sumus; ut quasi veritas Lesbia quædam regula esset, plurimùm feramur sententiam, prout quisque putamus rebus nostris maximè expedire. Itaque qui alias judicium in Ecclesiasticis utraque manu Magistratui deferimus, & ipsam severitatem principalem erga adversarios nostros, Zelum solemus appellare; hi si nobis delinquentibus, non omnia Magistratus ex animi nostri agat sententia, judicium retractamus: & quòd non minus quàm antea Zelus dici debuerat, nec conscientia bona, ac citra magnum Ecclesie dispendium poterat omitti; hoc, quia nunc sic nobis affectis videtur, partim ἀλλοτριοποιοῦν, partim etiam sævitiam appellemus. Quam bene*

benè aptari nobis possit, quod Gregor. Nazianzenus scribit Orat. XVII. quæ

\* Pag. 270.  
Edit. Morell.

Edit. Morell. *fratres, dum officium ipsi deferentes, Magistratus potestatem iniquo animo ferimus, perinde uique facimus, ac si quis certaminis Præsidem, ut improbum accuset, cum ipse in palestre leges peccet; aut medicum, ut indocuum, & audacem, quid scditionibus & cauteriis natus, cum ipse gravi morbo laboret, asperioribusque remediis indigeat. Sed Græcè quin potius ipsum audimus: 'Ἡμεῖς τοῦτο πὶ πάροωμ, ἀδελφοί, μὴ τὰ ἑαυτῶν ἡγορεῖσθαι, ἀλλὰ τοὺς πάλιν ἔχουσιν συζυγαίνουσι, ὥσπερ εἰς ἐπὶ τοῖς αἰσθητοῖς ἀγωνιστάτω ὡς μοχλῶσθαι, αὐτοὺς ἐκπαλαύνει, ἢ καὶ ἱερὰς ἀμαρτίαν ὁρῶσθαι ἐν τοῖς, καὶ ἐπὶ καυτῶν μαχημένων, αὐτοὺς πονηρῶς διακρίνειν* &c. &c. &c. *ὡς αὐτοὺς ἐπὶ τῶν δόμων ὁρῶσθαι.* Tandem verò sapere discamus, & ut (hortatione

† Pag. 269. Nazianzeni ex eadem Oratione hanc partem claudam:) † *Submittamus nos, tum Deo, tum alii aliis; tum*

*ius qui imperium in terra gerunt: Deo quidem omnibus de causis; alii autem aliis, propter charitatis fœdus; Principibus denique, propter ordinem, publicæque disciplinæ rationem: idque tanto etiam magis, quanto facilioribus illis, ac benignioribus unimur.*

Atque hæc generatim de jure summi Magistratus in Ecclesiasticis præmittere visum fuit. Porro nec abhorreat animus à speciali ejusdem juris consideratione: nempe quâ illud, circa Synodos, vel Pastorum vocationem vel legum lationem, vel jurisdictionem occupatur: sed cùm accuratè adeo hoc omne persequaris gemino scripto tuo, ut nihil (nisi forte quis mole ac numero insaniciens, exemplorum, testimoniorum, que strues ampliores requirit) desiderare ultra possit: atque ad hæc quæ superius diximus, pro instituto quidem nostro, sufficere nunc temporis possint: speciali illa consideratione vel omissa, vel in aliud tempus rejecta, accedam deinceps ad ipsum scriptum Walzei, ac si qua ejus meriti nobis videbuntur, & recensibo, & censo paucis. In ipso operis ingressu multus est in probando, reipsa distingui Magistratûs munus à munere Ecclesiastico: idque ut ostendat (quemadmodum passim indicat) Ministros verbi, non esse sui Magistratus, sed Dei Legatos, & à *deus* à Deo vocari, non ut Magistratum obeant vicem, sed ut tam Magistratus, quàm cæteros, imo Magistratus præ cæteris Dei verbo pascant. Atqui hæc vera falsa ne dicam incertus hæreo, an potius utrumque horum. Quam in sententiam magis animus inclinat, quia pro discrimine potestatis, ac judicii divertimodè hæc se habent. Potestas enim eorum qui publica sunt vocatione instructi, vel Civilis est, vel Ecclesiastica. Civilis procurat

humanum bonum, uti ευδαιμονίαν πολεσκήν.

Atque hoc respectu societas hominum, non Ecclesia, sed Respub. vocatur. Potestas verò Ecclesiastica procurat spirituale bonum, uti beatitudinem coelestem. Atque eo respectu hæc ipsa societas non jam Reip. sed Ecclesiæ nomen obtinet. Potestas verò Ecclesiastica est duplex: una interior, altera exterior. Interior versatur in his quatuor, verbi prædicatione, Sacramentorum administratione, Ordinatione Pastorum per impositionem manuum, & usu clavium. Exterior potestas in externa gubernatione consistit, qua Religio publicè sancitur, omniæque procurantur quæ ad bonum Religionis, quæ publica est, pertinent. Prior illa potestas propria est Ecclesiastarum: posterior primò & per se competit Magistratui. Quod optimè intellexit Constantinus Magnus. Is enim in sermonibus super mensam, cui accumbebant plurimi Episcopi, & in his Eusebius Pamphili, dixisse fertur, *ὁμοῖς ὡς τὸ εἶναι τὴν Ἐκκλησίαν, ὡς τὸ τὴν ἐκτὸς ὑπὸ τοῦ τοῦ ἡγεμονικοῦ ἀνέχεσθαι*. Ubi *τὸ εἶναι* sive res interiores ab Constantino vocantur, verbi divini annunciatio, Baptismi & Eucharistiæ exhibitio, impositio manuum, sive Ministrorum Ordinatio, & usus clavium; uti antea dicebam. *Τὰ ἔξω* vero sive res exteriores, vocat Constantinus, (ut optime ejus verba interpretatur vir Cæsarei juris intelligentissimus Melchior Goldastus) defensionem Ecclesiæ, custodiam Disciplinæ Ecclesiasticæ, rectè atque Ordine gerendæ, Conciliorum, seu Synodorum indictionem, Legum Ecclesiasticarum sanctionem, emendationem cultus divini, abrogationem superstitionum, & idololatriæ, obervationem Cæremoniarum Ecclesiasticarum, notationem vitæ & honestatis Clericorum, punitionem impiè & flagitiosè viventium, Ministrorum bonorum procuracionem, & malorum depositionem: & si quæ id genus alia. Hanc Constantiniani dicti interpretationem confirmat illud, quod ipse dixerit *ὅτι πᾶν κοινὸν ὄντας ἡμῶν ἐκ τοῦ ἡγεμονικοῦ*. Quo clare indicat, se Episcopis etiam in Ecclesiasticis præesse, nempe non interioris (directè quidem) sed exterioris jurisdictionis ratione. Cujus etiam ratione (non tantum ratione Civilium Legum) se ministrum Dei esse dicebat, & sequè habere potestatem Episcopos improbos coercendi, ut est apud Theodoretum etiam, Lib. I. cap. 19. Quomodo etiam capiendum calcarum illud, *Rex est Persona mixta cum sacerdote*. Neque aliud volunt illi, qui dicunt Magistratum, etiam primò cura ei competat rerum Ecclesiasticarum, non semper tamen per se exercere, sed ferè hanc aliis committere. Quod de sola exteriori jurisdictione intelligunt. Ut omnino immeritò hos fugillet Wælaus. I Hoc

Hoc ut ita esse pateat, adferam aliquot recentiorum loca, superius à nobis omissa; quibus interiorem jurisdictionem Christo, ejus Ministerium ac functionem Pastoribus, exteriorem verò in Ecclesiasticis jurisdictionem, & principalem Ministerii curam, supremo Magistratui committunt. Hier. Zanchius, Tom. 2. Miscellan. *Illud, quo regnum hoc Christi instauratur, conservatur, propagatur, est sacrum, seu, ut vocant, Ecclesiasticum Ministerium, cujus Ministerii quidem totius, non functio, sed cura penes Principes esse debet, ut in exemplis piorum Regum Juda, imò ante hos in ipso Mose, videre est. Is ut Princeps & Dux totius populi, curam imprimis, ex mandato Dei, suscepit Religionis, & totius sacri ministerii: ipsam verò ministerii sacri functionem à politica separavit, & unam sibi retinuit, alteram Aaroni Pontifici, ejus liberis Levitis, injunxit.* Muscul. locor. comm. de Magistratu: *Quid igitur Ministerii Ecclesiarum, Episcopis, ac Presbyteris relinquatur, inquirunt, si Magistratui conpctis, ut curam gerat Ecclesiarum, Ministrorum, Doctrina, Sacramentorum, rituum, ac caeremoniarum, consistorii, scholarum, ac honorum Ecclesiasticorum?* Respondeo, relinquuntur illis ministeria, ad quae obcunda eliguntur, atque constituuntur. Neque docet Magistratus, neque administrat Sacramenta, sed faciunt hæc Ministri. In schola non docet Magistratus, sed docet Ludi-Magister. In Consistorio non judicat Magistratus, sed qui ad id officii ab illo sunt constituti. Et tamen superior bonorum omnium auctoritas, & potestas ad Patrefamilias, labores verò & ministeria ad Oeconomum & familiam pertinent. Hæc distinctione satis multum relinquatur Ecclesiarum Ministris. Utinam officia sua fideliter, utiliter, & prudenter obeant.

L. Ciscetriensis responsione ad Matthæum Tortuū, pag. 370. In gubernando primatum ponimus, non docendo, & Regem non doctorem summum, sed gubernatorem dicimus; ut jam dirimi possit lis, in docendi munere, quod propriè pertinet ad primatum suum; in gubernandi Rex, quod ille sibi solū vendicat ut Rex: nec illum alterum pontificatum docendi invadet unquam. Idem

eoipse libro (quem locum & Walæus citat.) \* Docendi munus, vel dubia legis explicandi, Rex non assumit, vel conciones habendi, vel rei sacræ præcundi, vel Sacramenti administrandi, non vel Personas sacrandi, vel res, non vel clavium jus, vel censuræ; quæ ad sacerdotale munus spectant, seu potestatem ordinis consequuntur. At in iis quæ exterioris sunt politie, ut præcipiat, suo sibi jure vendicat, nosque adeo illi libenter merito deferimus. Religionis enim curam rem regiam esse, non modo pontificiam, & in regis primam, quamque ille non solum foris, ab externa vi, sed & domi ab incuria hominem asserere tenetur. Nam cum lege ipsa Dei, custos sit, ac vindex, non secunda modo ta-

bule, sed & primæ, primæ quoque curam ad se pertinere putat, & primam primæ. Clarè etiam Guilielmus Theolog. Prof. & Decanus Leichtenfeldensis, duello contra Becanum Jesuitam pro primatu Regis. † *Tota controversia & lis nostra, versatur de ea* † Pag. 59. *potestate, quæ fori exterioris est.* Quod idem sic explicat. || *Rex non est super* || Pag. 23. *pra Sacramenta, & verbum; nec super Ecclesiæ spiritualia charismata, & tamen est supremus Ecclesiæ gubernator; quia primaria Regis cura, agenda est pro rebus, ac causis Ecclesiasticis, primatusque Regis in eo munere perfungendo potissimum consistit.* Et pag. 15, 16. *Regia sublimitas constituenda est super omnes Personas, licet sint Apostoli, sint Prophetæ, sint Doctores, Evangelistæ, sint denique Pastores, non quidem supra Res, utpotè verbum Dei, sacramenta, fidem, penitentiam, quæ sunt spiritualia: per hæc enim spirituale regimen animarum Christi est proprium, et si exerceatur per sacerdotale ministerium. Itaque Ministeriorum functio, & dispensatio, quæ concredita est illis, Regum ac Principum minori antecellit perfectione & solatio: non tamen potestatis eminentia, quæ omnia bona, & salutaria jubet pro Christo & Ecclesiæ, & prohibet contraria.*

Atque ex his testimoniis constare arbitror, quid judicii ferri debeat de iis, quæ de discrimine Civilis, & Ecclesiasticæ potestatis, disputat Walæus usque ad pag. 12. Imò ex iisdem facile etiam diluuntur, quæ deinceps usque ad pag. 18. differit, ut ostendat judicium de rebus Ecclesiasticis competere Ecclesiasticis. Nam confundit judicium quod simplex sententiæ dictio est, & illud quod cum imperio est conjunctum. Optimè idem Guilielmus Tooker adversus Becanum Jesuitam, pag. 50, & 51. *Est quiddam quasi perpetuo Regis Coronæ adnexum, quod directivam cum aliis, coactivam solus habeat potestatem.* Atque addit, hoc esse quod dicit; *cum primatum Christianum Christiani Principis in Ecclesiæ Christi sub Christo habere.* Quare quod objicit Walæus, sacerdotum fuisse judicare de lepra tam interna, quàm externa, de priori illo judicio, quod directivum seu sualivum optimè vocatur, verissimum est: sed hoc non prohibet, quominus solis Magistratibus, primò & per se competat judicium imperativum, seu coactivum; quandoquidem eorum est sacerdotes, si vel munus suum non intelligant, vel negligant, officii commonefacere, in locum immorigerorum, vel non idoneorum alios surrogare, leges pro Religione ferre. Quæ omnia cum non cæco impetu ad nutum alienum, sed post disquisitionem certam fieri debeant, omnino prævium judicium requirunt.

Respon-



Respondent aliqui, iudicium quidem Magistratibus competere, cum quævis actio consequatur iudicium intellectus: nec quod iudicium privatis conceditur, magistratibus eripi possit: verum Magistratus hoc iudicium, rectè sentientium Pastorum iudicio conforme esse debere. Sed non cogitant hi, illud ipsum esse, de quo iudicare oportet Magistratum, qui illi sint rectè sentientes Pastores. Nec enim ideo ἱερεῖς sunt, quia tales se esse profitentur, cum idem faciant ἱερεῖς. Nec ideo tales habendi, quia numero vincunt: cum sæpe hæreticorum numerus sit major: ut olim cum ingemisceret mundus, seque Arrianum factum esse miraretur, ut Hieronymus scripsit. Initio item Reformationis, & omni eo tempore, quo Waldenses se, totis nempe trecentis annis & quinquaginta, ante Lutherum Synagogæ Pontificiæ opposuerunt. Nihil igitur manifestius, quam Magistratum ponderare, non numerare sententias debere. Unde colligere est, quoties Pastorum suorum potius quam aliorum, aut plurium, quam pauciorum iudicium sequitur Magistratus, non ideo sequi, quia Pastores illud dicunt, sed quia persuadent, quod dicunt.

Pag. 22. Quadrifariam probare occipit duo distincta collegia ordinari, *Denter. XVII.* unum Ecclesiasticum, alterum Civile. Verum ut duo distincta collegia fuisse concedamus, (sanè utramque in partem, non adspicienda video argumenta) non tamen ritè evincat, quod vult. Nec enim hoc impediret, quominus & prius iudices, & post hos Reges, utrique præfuerunt collegio, nec res duntaxat Civiles, sed etiam Ecclesiasticas gubernarint, cultum divinum fovendo, collapsum instaurando. Quam piorum fuisse Principum curam, argumentum illud validissimum est, quod pro iudicium ac Regum, vel pietate, vel impietate, semper Religio, aut floruit, aut jacuit, ut & ante dictum est.

Inter alia verò ait, nisi fateamur, fatendum esse, quod apud Evangelistam dicuntur, non minus sacerdotes, quam populi seniores, convenisse ad iudicandum Christum; consecuturum etiam sacerdotes, ac Levitas habuisse jus necis. Verum duplici ratione id absurdum non est. Uno nomine; quia, *erant quidam* (verbis utar Burchilli è cap. 28. pag. 294.) *privilegia sacerdotum Veteris Testamenti, quorum erat & in rebus civilibus de jure respondere: etiam Deum consulebant in dubiis, tam civilibus, quam Ecclesiasticis.* Altero verò nomine, quia dici potest, non habuisse jus necis, quia sacerdotes (nec enim omnes jus hoc habuere) sed quia pars erant summi synedrii, cujus solius erat, *iudicare, tribum,*

*sceptrum, Pseudo-prophetam, & sacerdotem magnum:* ut ex Talmudistis refert Petrus Galatinus. Iosephus etiam adversus Appionem, Lib. 2. disertim scribit, sacerdotes inspectores omnium, iudices controversiarum, punitores damnatorum fuisse à Mose constitutos.

Pag. 25. Argumentum inde pro sententia sua dicit, quod Ecclesiasticis solis jus clavium committatur. Sed distinctione hic opus, ad quam nobis præit Marilius Patavinus, secundæ partis, cap. 6. uno tamen hoc labens, quod satisfactionem Ecclesiasticam, errorem sui seculi secutus, convertit in satisfactionem pro poenis purgatorii. Ipsum audiamus. *In peccatore, inquit, verè penitente aliqua solus Deus operatur etiam absque sacerdotis aliquo proveniente Ministerio, mentis videlicet illuminationem, culpæ seu maculæ peccati purgationem, & æternæ damnationis remissionem. Alia verò sunt quæ Deus, in eodem peccatore non secundum se solum operatur, sed per ministerium sacerdotis: sicut ostendere in Ecclesiæ facie, quis solutus, vel ligatus, à peccatis habeatur in hoc seculo, ligandus aut solvendus in alio, id est cujus peccata Deus retinuerit, aut dimiserit. Amplius, est & aliud quod Deus operatur circa peccatorem per ministerium sacerdotis, &c.* Alterum, hoc est satisfactio, seu quorundam pietatis operum à sacerdote impositorum præstatio, quibus se poenitentia peccatorum verè duci declararent. Tertium ut ibidem Marilius ait, est, quod à Sacramentorum communione per sacerdotem excludantur contumaces, & resipiscentes admittuntur. De tribus quæ à Deo *divinis* præstantur, nulla est controversia: sed tantum de illis tribus posterioribus. Quod ad primum, quæ sacerdos non quidem peccata remittit, aut retinet, sed ut optime Marilius dicit, remissa aut retenta esse ostendit, sive annunciat. De hoc item non movemus. Nam jam antea hoc respectu facti sumus, administrationem clavium esse jurisdictionis interioris, non exterioris, quam solam Pastoribus tribuimus. Quid mirum? cum prædicatio Evangelii his solis conveniat: administratio verò clavium, respectu hujus primæ partis, nihil aliud sit, quam singularis Evangelicæ prædicationis applicatio, qua alii intromittuntur in Ecclesiam, alii ex ea ejiciuntur: intromittuntur poenitentes & fideles: ejiciuntur impoenitentes, & Apostatæ. Unde & idem Marilius Patavinus, secundæ partis, cap. 6. hanc clavium auctoritatem vocat, judiciariam potestatem: eamque esse ex Hieronymo, & Augustino definit, *discernendi scientiam, & potentiam quæ (sacerdos) dignos recipere, & indignos excludere debet à regno.* Nempe ex pronunciato generali scripturis contento, quod in syllogismo majus est pronunciatum, & ex cujusque Personæ quali-

qualitate, qua vel fidelis, vel infidelis est, (hæc res minus constituit pronunciatum) concludit, qua quisque conditione sit apud Deum, num Regni particeps an exfors; sive num damnatione peccato solutus, an confectus. Unde ministerii usus, sive jus hoc singularis applicationis, non modò clavibus, quibus claudimus & aperimus, sed etiam vinculo comparatur, quod vel stringitur, vel solvitur. Ad priorem translationem pertinet, quod Christus ait, *Tibi dabo claves Regni cælorum*. Ad alteram referendum quod dicit; *Quodcumque ligaveritis super terram, erit ligatum in cælis*. Utrumque igitur singulari Evangelicæ prædicationis applicatione fit, ut tum aperiamus, vel claudamus: tum ligemus, vel solvamus: sed aperimus & claudimus ratione personarum: ligamus, & solvimus ratione rerum, hoc est peccatorum. Quomodo optimè, iudicio meo, Christi verba explicat Junius, in analysi ad hunc locum: ubi sic scribit: *Ministerio servorum Dei, tum persone in Ecclesiam intromittuntur, aut eiciuntur: tum rei ligantur, solvunturque, id est peccata tenentur, aut condonantur*. Secundum erat satisfactio, qua poenitentia quædam signa, in delictis gravioribus perscribebantur: de cuiusmodi satisfactione agit Cyprianus, Ep. XII. & LIV. & alibi. Hæc signa suadere sacerdos potest, *veritas* verò loquendo imperare non potest: cùm penes eum solum, qui imperium habet, sit vis coactiva. Tertium est abstentio à cœna, sive non exhibitio signi Sacramentalis: qua minister non de aliena actione iudicat, sed de sua; peccet enim contra charitatem, si ei præbeat signa, ad quem scit non pertinere. Eoque nec ullum hic imperium, sed tantummodò Ministerium est. Atque hinc liquet, quatenus clavium usus solis conveniat Pastoribus; & tamen horum quoque ratione, ad Magistratus indirectè pertinet, hoc est non quoad usum ipsum, sed quoad curam circa eum quâ publicus est. Nam veræ Religionis cura cum primis pertinet ad curam, & potestatem Magistratus, ut Muscu-

\* Loc. com. *lus ait.* \* Quomodo & idem  
pag. 1369. antea dixerat, || *Cura Religio-*  
|| Pag. 1363. *nis publicæ, ad Magistratum non*  
*simpliciter, & utcumque, sed cum primis pertinet.*  
Quo loco non hæc Musculi mens est, magis Magistratum Religionem, quàm res civiles curare debere; sed verò curam Religionis, qua publica, ad Magistratum magis, quàm Ministros pertinere. Unde idem

\* Pag. 1371. ait, \* penes Magistratum esse, *superiorem Religionis potestatem, & curam.* Atque ex his quoque liquet, nihil efficere Walæum, seu vulgarem, seu illam Bilseno, & aliis aliquot eruditis viris proba-

tam sequamur interpretationem loci istius, *Matt. XVIII.* de qua Walæus agit, pag. 25. usque ad pag. 29.

Illud verò invidiosè, & prope dixeram malignè quod pag. 28. ait, eos qui disciplina Ecclesiastica exercitium, Magistratui primò dicunt convenire, novum cudere Christianissimum, novam planè Ecclesiæ faciem inducere: qualis nec apud ipsos obtineat hæreticos. Nam Disciplina Ecclesiastica, & qualis in primitiva obtinuit Ecclesia, & qualis nunc nonnullis locis est, partim divinæ est institutionis, partim humanæ. Divinæ est, quod Pastor impœnitenti, & incredulo regnum cœlorum claudit, hoc est, quod tanquam Legatus Christi, regnum cœlorum ei clausum esse denuntiat. Item quod palam hæretico, aut facinoroso, non exhibet signa Sacramentalia. At humanæ institutionis est, quod qui peccarit, licet poenitentia facti ducatur, præfinito tempore seorsim à cæteris inter poenitentes jubeatur consistere: atque alia id genus omnia habentia poenam positivam. Posteriora hæc non conveniunt Ecclesiasticis, quæ tales, sed ubi Magistratus est Christianus, jus omne circa ea habent à Magistratibus, quibus solis convenit jurisdictio propriè dicta. At priora competunt quidem Ecclesiasticis, ut tales sunt: sed hoc non impedit, quo minus Magistratus sit procurare, ne Pastores in munere suo sint negligentes, vel etiam seu odio, seu alio affectu, consolatione debita, vel Sacramentalis signi exhibitione fraudent, quos non oportebat. Nam (ut verbis utar Gregorii Magni in *Johan. cap. XX. Homil. XXVI.*) *Sæpe agitur ut indignus Episcopus, vel damnet immeritos, vel alios ipse ligatus solvat. Sæpe in solvendis ac ligandis subditis suæ voluntatis motus, non autem causarum merita sequitur. Unde fit ut ipsa hac ligandi, ac solvendi potestate, se prioret, qui hanc pro suis voluntatibus, & non pro subditorum moribus exercet.*

Peccat igitur Walæus cum disciplinam Ecclesiasticam posteriori tantum modo considerat; cùm jus ejus Magistratui priorum ratione imprimis tribuatur: nempe quia hæc propriè imperii sunt, solus autem Magistratus vim habet cogendi. Interim illud benè est, quamquam satis non est, quod paulo post, pag. nempe 30. agnoscit ipse, satis parere è verbo Dei, Magistratus esse officium curam gerere, ut rectè exerceatur, universum ministerium Ecclesiasticum, ac proinde etiam Disciplina Ecclesiastica. Quamquam fallitur, cùm existimat, sic Magistratus esse curare, ne quid hic peccent Presbyteri, quomodo Presbyterorum videre est, ne quid delinquant Magistratus. Nam Magistratus cura est principalis, quia imperii est, directi quidem circa priora

priora illa, quæ humani sunt instituti: indirecti verò circa posteriora, quatenus procurat, ut fiant, quæ instituti sunt divini. Quod ait, non consequi ex iis quæ confessus erat, si iure suo abutantur Presbyteri, posse ad Magistratum *vel* loquendo appellari: in eo illi minime adstipulamur. Nam omnino Magistratus cura superior est, ut benè Musculum dicentem videmus. Quid verò appellare aliud est, quàm ab inferiori iudice, ad superiorem provocare, seu voce illud fieret, seu libello? ut est *L. XIV. de Appellationibus*. Quomodo & in Veteri glossario legere est: *Appellatio est proclamatio ab inferiori, ad superius tribunal, vel gravaminis relevatio, per clamorē ex minori ad maiorem iudicem factam, prætextu iniqui gravaminis, vel injuste sententiæ*. Et quid inhirius isthac argumentatione cùm sic colligit: Ad Magistratum summum non appellari nisi in iis, quæ per se subire possit Magistratus: non posse autem Magistratum prædicare Evangelium, aut Sacramenta administrare; eoque in his ad eum appellari minime posse. Nam & multa sunt ministeria civilia, quæ per se obire Magistratus summus minime debeat; in quibus tamen ad eum licet appellare: cuiusmodi sunt ea, quæ sui utilitate offuscarent, vel etiam ludibrio prostituerent summi imperii Majestatem. Verum esto sanè, ut appellationis vox apta satis non sit; saltem concedat, si Presbyteri disciplinam injustè exercent, posse unumquemque de injuria conqueri apud Magistratum: ac quamquam huius non sit facilè querimoniis istis habere fidem, tamen nec facilè debere illis aurem obstruere; imò nec magis perpeti debere injustum clavium usum in Consistorio, quàm hæreticam institutionem in Templo. Quæ diffiteri non potest: ut qui ipse, p. 30. scribat, si tempora incidant, quibus Disciplina corrigi debeat, Magistratus esse facti rationem exigere à Presbyterio, excommunicationem innocentium sui autoritate imperii impedire: quomodo Athanasio à Synodo condemnato, Constantinus (ut Socrates testatur, Lib. II.) alios instituit conventus, quorum opera, uti & virorum aliquot doctorum, res denuò cognosceretur: quomodo item Magistratus pii, nostro seculo Ecclesias Reformatas, adversus excommunicationem Pontificis, & Concilii Tridentini defenderunt; hodieque per Dei gratiam tuentur. Atque hoc etiam (pag. 33.) Th. Bezam cognovisse ait, ubi hæc ejus citat verba adversus Erastum: *Cum etiam à rectè constituto consistorio, possit reis delatis injuria fieri, in angustioribus territoriis, citra ullam Ordinis Ecclesiastici violationem, Christianus Magistratus, ut tabulæ utriusque, & Ecclesiasticæ doctrinæ custos & vin-*

*dex, prospicere potest conquerentibus*. Mox etiam (pag. eaple & seq. 34.) ait, Magistratum tantumdem juris, in Synodos, ac Concilia quæcumque obtinere, cùm usu non raro venerit, ut his quoque decernerentur, quæ verbo Dei repugnarent. Eoque id si fiat, talibus constitutionibus obviam ire, & posse, & debere. Quæ omnia præclare ab eo dicuntur, ac istiusmodi sunt, ut principalem Ecclesiæ curam, penès Magistratum summum esse evincant. Præsertim cùm (vers. 10, & 11. pag. hujus 34.) dicat se semper loqui de iis quæ ad *bonam* Religionis pertinent, quæque verbo Dei disertim præcipiuntur. Nam si circa hæc Magistratui tribuit imperium indirectum, quo jubeat, quæ Deus jubet, eo quod Deus jubet: non dubitandum videtur, quin directum etiam imperium, Magistratui concessurus sit in iis, quæ ad ædificationem quidem Ecclesiæ pertinent, sed speciatim verbo Dei non præcipiuntur. Et sanè propter hæc, & alia istiusmodi factum credo, ut vir quidam præstans, (quemadmodum præfente D. Heintio mihi retulit Colonius) iudicium hoc tulerit de scripto Walæi; tam multa eum adversariis largiri, ut propè non videat, quid in controversia relinquatur. Ac etiam clarissimus P. Bertius præfente Collega meo dixit mihi, se ex iis quæ hæcenus, eo in scripto legisset, judicare aliud non posse, sed potius censere, impugnata ab iis eam disciplinæ rationem, quæ Genevæ obtinet, quam & alii alibi inductum ire voluerunt. Ac sic ut sentiam, magis faciunt verba, cap. 18. Confessionis Helveticæ, quæ ipse citat, pag. 35. sunt verò istiusmodi: *Cumque omnino oporteat in Ecclesia esse disciplinam, & apud veteres quondam usitata fuerit excommunicatio, fuerintque judicia Ecclesiastica in populo Dei, in quibus per viros prudentes, & pios exercebatur hæc disciplina, Ministrorum quoque fuerit, ad ædificationem, disciplinam banc moderari, pro conditione temporum, status publici, ac necessitate, ubi semper tenenda est regula, omnia fieri debere ad ædificationem, decenter, honestè, sine tyrannide, & seditione*. Et sanè nihil Musculus dicit, quod non aliis quoque Reformata Ecclesiæ doctoribus videatur; ut omnino non *exigantur*, qualem Walæus videri vult, (nempe hanc mercedem reportant qui diligentius veritati indagandæ incumbunt) sed *exigantur* dici debeat. Quod verò pag. 42. ait, malignè Utenbogartium adversariis suis impingere studium collateralis imperii; utinam verum



rum esset? Nec enim diu foedo hoc schismate inconsutis Christi toga apud nos scinderetur. Sed quis, nisi partium studio penitus occæcatus, non videt, quid rerum agatur? Nec enim mussant, sed apertè dicunt; non dicunt tantum, sed palam sic omnia sua componunt, ut quamquam dicis gratia, nonnihil Magistratibus, in rebus Ecclesiasticis tribuere videantur; tamen summum sibi in Ecclesiasticis imperium arrogant. Nempe unicuique in arte sua credendum aiunt; Theologorum verò artem esse Theologiam: eoque Magistratus, quos rerum Theologicarum nescientes fingunt, adversus suam adversari sententiam nefas putant. Illum demùm Magistratum, omne punctum tulisse videri volunt, qui iudicio suo diffidens, omnia de Pastorum iudicio exequatur. Quod quid aliud est, quam Magistratus in Ecclesiasticis subijcere Ecclesiasticis, & quod se facere negant, duo non subordinata, sed collateralia summa imperia inducere in Rempublicam? Interea placet quod Walæus ibidem, & pag. 43. agnoscit, collaterale imperium Civile, & Ecclesiasticæ potestatis noxium esse Reip. planèque doctissimorum virorum iudicio repugnare. Rectè item quod ex *Esdra* VII. 25. probat, Magistratum tabulæ utriusque esse custodem, & vindicem: ac quamquam circa spiritualia, spirituales non habeat potestatem, circa tamen ea, ut Ecclesiastica sint, potestatem Ecclesiasticam obtinere. Quod & Beza autoritate ipse (pag. 43.) confirmat, ut qui in fine libri, adversus Erastum agnoscat, Magistratus officium esse, Pastores negligentes sui muneris admonere, pertinacibus poenam infligere, ac ut meliores surrogentur in pejorum locum procurare. Pag. 44. rursus *συναμαχῆ*, cum tanquam aliquid magnum, probat Ecclesiastas non esse vicarios Magistratus, sed Christi servos: nec Magistratus circa spiritualia potestatem habere internam ac spiritualem, sed externam & corporalem. Nec enim aliud pii Magistratus poscunt, coque nihil superest, quàm ut omnes se hoc agnoscere & sermone & vita testentur.

Sed veniamus ad statum quæstionis, quem pag. eadem assignat. Ait in hoc controversiam omnem positam esse, num soli Magistratus, an verò etiam Pastores *ἐπίσκοποι* sub Deo collocantur. Negat mox sic Ministros verbi esse sub Magistratu, quomodo urbis præfectus suberat Trajano. Quod Magistratus summi potestatem *ἐπίσκοποι* à Deo esse concedit, in hoc rectè à Pontificiis dissentit. Similiter Theophilus, Lib. I. ad Autolycom in Orthodoxogr. pag. 291. *ὁ Θεὸς ἐστὶν ὁ κύριος τῆς ἐκκλησίας*. Et mox cum vocat *ἐπίσκοπον* *ἐκ τῆς ἐκκλησίας*. Rationem quoque subiungit *τὸ ἐπὶ*

*τῆς ἐκκλησίας* *ἐκ τῆς ἐκκλησίας* *ἐκ τῆς ἐκκλησίας*. Et Epiphanius imprimis hæresi 40. quæ adversus Archonticos, pag. 131. *Διὰ τὸν Θεὸν ὁ Χριστὸς (ὁ ἱερεὺς) ἐστὶν ἐκ τῆς ἐκκλησίας ἐκ τῆς ἐκκλησίας ἐκ τῆς ἐκκλησίας*. *ὁ Χριστὸς ἐστὶν ἐκ τῆς ἐκκλησίας ἐκ τῆς ἐκκλησίας ἐκ τῆς ἐκκλησίας*. Aperte indicat, ut applicatio potestatis ad Personam, quam Ordinationem dicimus, ab hominibus sit, ipsam tamen hominibus imperandi potestatem non aliunde, Regibus obtingere, quàm à summo illo Rege, cuius vicem obeunt in terris. Et ratio idem evincit. Nam homo homini potestatem dare potest, ut suo subjektivè loco imperet. At ut loco regat ejus, qui sibi non subijciatur, minimè dare potest. Atqui Deus homini non est subiectus, sed homo Deo. Non igitur hominis, sed solius Dei est dare, ut imperet loco Dei. Ac quod Walæus censet, similem penitus esse Ecclesiastarum rationem, non satis hac parte à Pontificiis recedit: Distinguere enim debuit inter ea quæ interna, quæque externa sunt: prioris generis diximus, esse prædicationem Evangelii, & jus administrandi Sacramenta; posterioris verò actiones omnes ad politiam Ecclesiæ spectantes, quarum *μερίδιος*, uti locus, tempus, numerus, modus, verbo Dei non definiuntur, eoque ab omnibus determinantur, prout ad cujusque Ecclesiæ ædificationem maximè conducit. In posterioribus his Magistratus directum imperium à Deo habet, nec Deo, sed Magistratui *ἐπίσκοποι* subiecti sunt Ecclesiastæ. In prioribus altera distinctione opus: quia vel potestas in sese consideratur, vel communicatio potestatis, vel principij alis circa eam communicationem cura. Potestas ipsa *ἐπίσκοποι* est à Christo, cuius Ecclesiastæ, sunt legati. In hoc igitur conveniunt Ecclesiastæ, & summi Magistratus, quod non minus jus Ecclesiam docendi, quàm Remp. gubernandi à solo est Deo. Imò conveniunt quoque quoad potestatis communicationem. Nam ut potestas quidem, summo cum imperio gubernandi *ἐπίσκοποι* est à Deo, at nihilominus applicatio ad personam, quam electionem dicimus, ab hominibus: ex. gr. in Cæsare ab Electoribus: ita etijus jus docendi, & administrandi Sacramenta, & imponendi manus, clavibusque utendi *ἐπίσκοποι* sit à Deo; tamen Pastoribus (Prophetas & Apostolos *ἐπίσκοποι* hoc quoque respectu vocatos excipio) per hominum consensum applicatur.

At ratione tertij disconveniunt, nimirum ratione curæ principalis procurandi ea, quæ ad publicum veræ Religionis exercitium pertinent. Cum enim publica omnia, qua publica, ei subint, qui publicis summo cum imperio

perio præest, etiam universam Religionis curam, qua publica est, summo Magistratui subiectam esse necesse est. Eoque respectu fatendum, Ecclesiasticas secundum interiora illa, nempe prædicationem Evangelii, administrationem Sacramentorum, impositionem manuum, & jus clavium à Magistratu summo dependere. Quod cum dico, non tantum Ecclesiasticas Magistratui subicio, quatenus in horum arbitrio est, quæ Religio publicè debeat obtinere; sed etiam quatenus eorundem est procurare, quæ ad Religionis puræ primitivæ institutionis conservationem, aut collapsæ instaurationem pertinent. Atque hinc planissimum fit, non in eo tantum discrimen esse, inter Magistratus & Ecclesiasticas; quod illorum munus in imperio, horum in solo directione, ac ministerio situm sit: sed etiam quod Ecclesiasticæ, in Ecclesiasticis immediatè non Deo, sed Magistratibus subsint, nempe qua Religio publica est: directè quidem ratione exteriorum, in quibus propriè dictum imperium habent: indirectè verò in cæteris, in quibus improprium habent imperium, ut quod solum consistat in procurando ea, quæ Deus imperavit. Illustremus hæc exemplo, de Coena Dominica: in qua tum essentialia spectantur, tum quæ extrinsecus accedunt. In prioribus jus Ecclesia non habet, aliquid omittendi, vel mutandi: eoque nec Magistratus, qui supremus est Ecclesiæ gubernator, potestatem habet hic aliam, quàm procurandi, ut à Presbyteris observetur Dominicum institutum. Si igitur Presbyteri vel solum calicem populo præbere velint, quod nufquam fieri arbitror, vel solum panem, uti in Pontificia Ecclesia obtinet consuetudo: est pii Magistratus (quidquid contra disputent Presbyteri, quamcumque etiam in rebus Ecclesiasticis, & scientiam, & potestatem sibi arrogent, Magistratibus derogent) itiusmodi dimidiati Sacramenti abusum omnimodis impedire. Sed de externis & accessoriis, habet Ecclesia, eoque & qui Ecclesiam moderatur Magistratus, potestatem instituendi quæ vel ad locum, vel tempus, vel numerum, vel modum pertinent. Ratione loci, ut in quibus ea templis debeat celebrari. Ratione temporis, uti, quod licet Christus Cœnam Dominicam vespere celebravit, tamen cum jubeat Scriptura omnia facere *secundum modum*, fatius sit administrari eam, quo tempore homines etiamnum jejuni esse solent: ut quod ad Religionem, piæque devotionem longè sit accommodatius. Ratione numeri, ut quoties in anno ea debeat celebrari: num Dominicis diebus, an etiam aliis, (in quo vetus Ecclesia variavit) & si Dominicis tantum, num singulis, an quibusdam, & quibusnam. Ra-

tione denique modi; ut cuiusmodi adhibendæ sint preces, gratiarum actiones, hymni, ceremoniæ: quæ quia in potestate sunt Ecclesiæ, nostro quoque seculo, in ipsis quoque Ecclesiis Reformatis, non parum varietatis cernebat. In huiusmodi igitur omnibus, Ecclesiæ jus concedunt definiendi, ac canones constituendi: Magistratui directum, ac propriè dictum imperium conceditur. Atque hac essentialium, atque accidentalium directi, & indirecti imperii distinctione, in fumos abit, quod Utenbogartio ejus pag. vers. antepr. objicit Wallæus, tantam veritatis vim esse, ut ei subinde veritas excidat invito; ut qui interdum agnoscat Pastores, *ἀμύτους*, muneris sui mandatum habere à Deo; & tamen aliàs contendat, eos ab & sub Magistratibus consequi exercendi muneris sui potestatem.

Pag. 45. Agnoscit non posse Magistratum summum renuntiare summo in civilibus imperio, nisi simul desinat esse Magistratus. Optimè. Sed idem in Ecclesiasticis locum habet. Imo in his tantò magis, quantò temporalibus præstant æterna. Nec enim civilis tantummodo beatitudo, sed etiam cœlestis, ac hæc quidem imprimis, finis est regis potestatis: ut antea ostendimus, ac rectè agnoscit Isidorus Pelusiota, L. III. Ep. 249. quæ ad Isidorum Diaconum: *Ἐξ ἡγουμένων καὶ βασιλέων τὰ πνευματικά συνίστανται· ἐν δὲ καὶ πολλὰ ἀλλήλων διαφέρουσιν, (ἡ μὲν δὲ ὡς ψυχὴ σώματος, ἡ δὲ ὡς σῶμα) ἀλλ' εἰς τὸν ὁρατὸν τέλος, τὴν δὲ ὑποκείμενην σωτηρίαν.* Cui consona scribit Thomas Aquinas, Lib. I. cap. 14. & cap. 3. Lib. III. de Regimine Principum. Quanquam is Liber, etsi in Romana quoque editione legatur, Thomæ tamen falso tribuatur, ut in quo Rodolpho Adolphus, Adolpho Albertus successisse dicatur, quorum hoc contigit, annis post Thomæ obitum 25. sed istoc utut est, optimè eo quo dixi libro legere est: *Finis ad quem principaliter Rex intendere debet, in seipso, & in subditis, est æterna beatitudo, quæ in visione Dei consistit: & quia ista visio est perfectissimum bonum, maxime movere debet Regem, & quemcumque Dominum, ut hunc finem subditi consequantur.* Quod si beatitudo supernaturalis, sit principalis Regis ac Regni finis, sanè cum regnum non sit ob Regem, sed Rex propter regnum, (quomodo non oves ob pastorem, sed pastor est propter oves) liquet Regis esse omnes subditos suos regere, tam in Ecclesiasticis, quàm Civilibus; nec posse hoc imperium summum in Ecclesiasticis in alterum transferre, quin alienet principalem imperii sui partem, ac proinde Magistratus summus esse desinat, ut qui se abdicet eo, quod, non dico imperii summi quarto modo proprium sit, sed quod de essentia est imperii, & qui-

dem

dem ut dicebamus, principalis imperii summa pars.

Quod hoc loco, & alibi Walæus ait, posse Magistratum in civilibus exequi ea munera, quæ alteri mandat: sed non posse per se obire prædicationem Evangelii, & Sacramentorum administrationem: eoque nequitiam Magistratui id juris competere in Ecclesiasticis, quod obtinet in civilibus. Hoc quanquam imperitum aliquem movere possit, revera tamen nihil officit iis, quæ hæcenus diximus. Nam jam antea confessi sumus, Ministros jus docendi, aliaque ei necessario connexa agenda, non minus *divinis* adeo obtinere, quam Magistratus summum imperium immediatè habet à Deo. Sed non de essentialibus ministerii, verùm de imperio disceptatio est, hoc est, quæritur, an non Ecclesiasticæ directio Magistratus imperio sublimet in rebus exterioribus, sive in actionibus ordinem, ac *politiarum* Ecclesiæ spectantibus: indirectè verò in interioribus, quatenus ejus est procurare, ut à Pastoribus fiant, quæ Deus jussit: atque ad hoc habet vim coactivam. Nec quidquam ad rem facit, quod Magistratus per se non potest exequi munus Presbyterorum: quia nec Magistratus multa munia, ob vilitatem sui obire per se possit; nec tamen id impedit, quominus supremum circa ea habeat imperium. Hinc Burtrillus, cap. 21. pro Tortura Torti: *Supremi*, inquit, *in quovis genere gubernatoris non est, exequi singularum officia, sed curare, ut suum quisque officium exequatur. Utque in supremo gubernatore, in rebus conjugalibus non requiritur, ut potestatem habeat conjugalem: ita nec in supremo gubernatore, in rebus sacerdotalibus requiritur, ut habeat potestatem sacerdotalem.*

Pag. 46. ait, Si Magistratus jure suo abutens, seu falsis Pastoribus, seu aliter Ecclesiam Dei perditum ire velit, Ecclesiam hoc juris habere, ut vel invito Magistratu, novos ac sanos sibi eligat Pastores. Sed confundit Ecclesiam quæ talis, & quæ publica. Nam jus hoc quidem Ecclesiæ concedimus; ut si Imperator hæreticus lupum Christiano ovili præficere velit, sibi cavere à lupo, deque vero animarum Pastore prospicere possit. Sed Minister iste, Ecclesiæ quidem Minister erit, publicæ verò Ecclesiæ Minister non erit. Ut efficeret, quod vellet, probare debuit, Ministros Ecclesiæ, quæ publica est, non à Magistratu solo jus consequi publicè docendi, aliaque exercitia Religionis publicè obeundi.

Quod sine ejusdem pag. ait, sic novum invehi papatum, imo tot Papas novos itatui, quot sint supremi Magistratus; id à Jesuitis quoque obijci scimus Theologis Anglis; à quibus id semper negatum fuit. Audiamus

Guilielmum Tookerum, S. Theologiæ Professorem, & Decanum Ecclesiæ Lichtfeldensis, in duello suo cum Becano Jesuita, pag. 13. Cum, inquit, *Regem Ecclesiæ præponimus, primatumve & regimen in Ecclesia supponimus; nec Pontificatum veterem, nec Papatum novum invehimus in Ecclesiam.* Quod plenius declarant verba serenissimi Jacobi Magnæ Britannię Regis à Tookero, pag. 5. adducta. *Regibus*, inquit, *Christianis Ecclesiam intra fines suis, non minus quam reliquum populum esse gubernandum, ut qui custodes sint utriusque tabulæ; non quidem novos articulos fidei condendo, (id enim Papæ munus est) sed efficiendo, ut Dei verbo publicè obtemperetur, Religionem repurgando, juxta divinam voluntatem, in sacris patefactam, & temporalem gladium in beneficium spiritualis potestatis distringendo, abolendo corruptelas, Ecclesiasticam auctoritatem sanciendo, quæstiones frivolas, & schismaticum licentiam, vel componendo, vel coercendo, tollendoque, quod Constantinus faciitavit; denique decorum quoddam tuendo, & leges, ac jura præscribendo de adiaphoris rebus omnibus, ordinis gratia: ad quem solum scopum collimat hoc juramentum primatus.* Hæcenus Rex, qui & paulò ante dixerat: *Reges Veteris Testamenti cuncta moderatos esse, quæ ad Ecclesiasticum regimen quoquo modo pertinerent.* Atque uti nec plus, nec minus, quam serenissimo Regi, debetur supremo nostro Magistratui: ita neque minus, vel amplius ei tribuimus, nec ipse plus sibi vindicat.

Nec enim sibi infallibile tribuit judicium in rebus Religionis, quod facit Papa: nec potestatem condendi capita fidei, quæ conscientias obligent: sed tantum jus sanciendo, quæ Religio publicè debeat obtinere, procurandique ea quæ ad *idolatriam*, & ædificationem Ecclesiæ judicat pertinere. Non se facit spirituale caput Ecclesiæ, quod scit solius esse Christi; non ipse obire vult Ministerium Ecclesiasticum, quia scit se ad hoc non vocatum à Deo: verum quia scit officium summi Magistratus, præcipuè versari circa Religionem, & cultum divinum, (ut qui imprimis debeat procurare, ut subditi consequantur beatitudinem æternam) eo conscientiam suam, sic arbitrio eorum, quos falli scit posse & solere, alligare non vult, ut ad nutum alienum omnia in Ecclesiæ rebus exequatur. Scit sibi à Deo commissum esse, officium dirigendi regimen suum, in finem verum, qui est beatitudo cœlestis: scit hoc principale officium suum esse: hoc igitur se munere abdicare non vult; nec aliis resignare, salva conscientia, potest, qui ad illud vocati non sunt, plurimum etiam ut ad illud vocentur, idonei non sunt. Non novum Papatum invehant, qui hoc Magistratui tribuunt, sed qui



qui adimant. Nam Inter elogia, quibus Anti-Christum insignit Scriptura, illud est, quod se offerat supra omne id quod dicitur Deus. Ac eundem hæc jubent esse custodem, & vindicem utriusque tabulæ. Hoc igitur, qui vel sermone, vel facto eripit Magistratui, is mores induit Anti-Christi. Facit verò illud, qui potiorum imperii summi partem sibi vindicat. Summa autem imperii pars est, quæ circa Ecclesiastica versatur. Hanc igitur qui Magistratui aufert, Anti-Christo ac Papæ, hæc saltem parte quin similis sit dubitandum non est.

Pag. 48. *ἀντιστοιχῶν* esse ait, velle alicui, quem fatearis posse errare, tribuere summam in Religione potestatem: atque hoc cum probè assequerentur Pontificii, eorum plerisque, quia Papam errare posse faterentur, Concilio eum subiecisse. Sed horum longè deterius esse opinionem, qui infimul & Magistratui tribuant iudicium fallibile, & ei tribuant supremum jus, in negotio Religionis. Mira sane argumentatio, cum negare non possit, etiam Synodos sæpenumero falli: eo-que si quid ponderis huic infit argumento, fateri ipse cogatur, nec penes Synodum supremum illud jus fore. Sanè si Synodi falli possint, quis non videt Magistratum, non debere credere propter se, sed quia consentiant cum Scripturis, & canonibus Antiquis? In quacumque igitur nos partes versemus, effu- gere illud non possumus, quin de Synodis *ἐκκλησιῶν* competat Magistratui. Si enim uni- cuique etiam privato, ex Theologorum sen- tentia iudicium convenit in causa Religionis, quomodo hoc Magistratui non competat? Ac si nec privatus quisquam adstringitur ju- dicio Synodico, quomodo non dissentire ab eo licebit summo Magistratui? Pater-familias non tantum potest, sed etiam debet exami- nare Synodica decreta ad Lydium lapidem Scripturarum; ne humanis decretis faciliè nimis fidem habens, & se errori involvat, & in eundem familiam compellat: Et Magistra- tui, Parenti Patrie, non idem faciendum erit, ne ejus segnitie, nimiave credulitate, errores noxii in Ecclesiam spargantur uni- versam? Utrumque igitur verum est, & pe- nes Synodum *κρίνειν*, & penes Magistratum summum *ἐκκρίνειν* esse; item & hunc, & illam errori esse obnoxiam: sed hoc non impedit, quominus tum Synodi officium sit, dirigere intellectum in cognitione veri, tum Magi- stratus sit, imperare, quod rectum est & sa- lutare. Quod si illa diriget malè, non ideo hic imperabit malum: Et si hic imperet ma- lum, non ideo subditi parere debent in malo: Sed & Magistratus, & subditi unusquisque agat, quod sui esse officii, & Scriptura, &

Ecclesiæ Catholicæ consensus, & recta ratio  
persuaferint.

Epistle pag. 48. adversus illud quod dixerat, non bene convenire, nec in una sede morari, ἀναμειγνύειν non esse in judicando, & tamen supremam habere judicandi potestatem : objicit sibi ipsi quod solvere potest non potest. Fatetur enim & in civilibus posse Magistratum decipi, nec impedire hoc quominus summum in his habeat imperium. Respondet autem dispare hic rationem esse, quia utut subditi in his damnum faciant, Magistratus sui errore, mullare tamen hoc, & concoquere cogantur : verum si Magistratus hæreses introductum, defensumque eat, fideles Pastores silentium tenere, minimè debere : quia hic agatur de re omnium pretiosissima, animarum nempe salute. Discrimen hoc, & ipsi agnoscimus, sed ὁ δὲν αὐτὸς ἔστω. Nec enim si Deus imperium habeat supra Reges, cò Reges in Ecclesiasticis imperium non habere consequitur ; sed illud tantum evincitur, non ἀπλῶς summum imperium habere : quod à nemine in controversiam vocatur. Fatemur igitur si aliud Rex jubeat terrenus, quàm cœlestis, hunc, non illum audiendum esse ; posseque tum nos dicere, cum B. Polycarpo, διεδιδάξμεθα ἀρχαῖς καὶ ἐκκλησίαις. καὶ αὐτὸς περὶ τῶν πνευματικῶν πάλιν καὶ τὸ σωματικόν πάλιν καὶ ἐκκλησίαν ἡμῶς ἀπονέμειν. Sed hoc non impedit, quominus nullum in Ecclesiasticis imperium sit penes mortalem quemquam, quam solum Regem, vel eum quem Rex ( summo semper sibi imperio reservato, cui renuntiare non potest, nisi Rex simul esse definat ) sub sese jufferit imperare. Quamobrem hic & imperare illud debet, quod in verbo jussit Deus, ac poenarum etiam comminatione obstringere ad illud subditos potest : & imperandi etiam ea jus habet, quibus repugnans nihil in verbo jubet Deus. Nec vel in his, vel in illis imperium detrectare cuiquam licet. Ollas lippit, qui hinc consequi non videt, tam in Ecclesiasticis, quàm in Civilibus, omne imperium esse, penes solum Regem, hoc est, summum quemque Magistratum.

Cum negat pro Synodis haberi, quæ non congregantur jussu, aut consensu Magistratus: addere debuerat, cujusmodi de Magistratu loquatur, num de eo qui Christianam Religionem probet, aut toleret; an qui eam persequatur. Nec enim quisquam in dubium unquam vocavit, an Concilia ante Constantini tempora (uti Hierosolymitanum primum, cujus *Act.* XV. mentio fit, Carthaginense de re-baptizandis, de quo Euseb. VII. 2. quod tamen ab Ecclesia improbatum; Eliberitanum item, atque alia) Conciliorum nomen mereantur: verum duo hæc

interim dicimus. Unum est, quæ hujusmodi Conciliis sunt decreta, Canonem *novus* loquendo, non legum vim habere, quia penes solum Magistratum sit vis *νομοθετικῆς καὶ ἀναγκαστικῆς*. Alterum est, Christianum Magistratum permittere, ut citra mandatum, vel consensum suum Synodi celebrentur: quæ autem sine hujusmodi Magistratus consensu Concilia fiant, hæc illegitima esse sustinuerunt Protestantes, de nullitate Concilii Tridentini: sed & cùm Magistratus in Concilium consensit, ejusdem est Synodus dirigere per se, vel legatos suos: nec debet decretis Synodicis vim legis addere, nisi de quorum veritate sit persuasus in animo suo. Quæ quidem quam utiliter moneantur, multis ex historia Ecclesiastica exemplis ostendi possit, nisi unius Athanasii temporibus hæc liquidò comprobarentur. Deinceps rursus paginis aliquot probat, Ecclesiastas non esse servos, aut legatos Angelorum, nedum hominum, sed ipsius Dei. Rectius operæ & oleo pepercisset, nec enim ejus institutum juvant quicquam. Sanè ipsi quoque agnoscimus, hæc verissima esse; tum ratione mandati, quod à Deo, non creaturis habent; tum legationis, quam Christi, non Magistratum nomine sustinent. Sed hinc minime consequitur, Magistratum summum, qui vicem Dei obit in terris, non imperare iis debere, ut tum mandatum Dei fideliter exequantur, tum legationem, nomine Christi, bona fide agant; ad hæc negligentes, & immorigeros poenis posse afficere: posse item eos legibus adstringere de rebus, ad politiam Ecclesiæ pertinentibus, quarum *μενέων* non definiuntur in verbo. Quæ omnia ostendunt Ecclesiastas, etiam in Ecclesiæ rebus, subesse imperio Magistratus, partim directo, partim indirecto, ut aliquoties jam declaravimus.

Quod pag. 57. agit, Constantinum Magnum non voluisse sapere supra Concilium Nicænum: sed & post alios sententiam dixisse, & Patrum Nicænorum sententiæ subscripsisse: id eam minime vim habet, ut iccirco Magistratus sequi semper debeant judicium Synodicum. Nec enim Synodi sententiam approbavit Constantinus, quia Synodus eam diceret; sed quia rationum pondere, sententiæ suæ veritatem ei persuasisset. Alioqui enim quot Synodi pro errore sententiam tulerunt? Etiam his calculum suum addere debeat Magistratus? Quis sanus hoc dixerit? Quamquam igitur non facilè, Pastorum suorum judicium improbare debeat Magistratus: nec tamen eis temerè, ac leviter assentire debet, eoque omnino opus ut, post *κεῖθεν συνδιδω*, consequatur *ἐκτενέως* Magistratus.

Quod pag. 58. & alibi, Constantium pro Arriano habet, (quo argumento & alii ne-

gant rectè Constantii factò Magistratus, in convocandis Synodis autoritatem comprobari) id ut aliquid est, non tamen tanti, quàm plerique putant, ponderis putari debet. Nec enim cum Orthodoxis Patribus defuere, qui existimarent, non tam Arrianum fuisse Constantium, quàm cùm videret se Arrianos, sine Reip. exitio, delere non posse, consilia iniisse de pace cum iis ineunda. Sanè Gregorius Nazianzenus, post obitum luculentè eum, non semel tanquam optimum, ac Christianum Principem laudavit, nec malitia, sed simplicitate, & unionis Ecclesiasticæ studio, Ecclesiæ statum aliquantò perturbatiorem fecisse arbitratur. Inter alia verò sic scribit, in vectiva prima adversus Judianum, pag. 64. Edit. Morell. *Ὅς γὰρ καὶ ἐν τῇ παρελύτῳ ἡμῶν, καὶ περιστροφῇ, ἐπὶ ὑβρίων, ἐπὶ ἀλλοις ποτὶ ἡμῶν χαλεκομένοις, ἀλλ' ὅτε πάντας ἐν ᾧ, καὶ συμπερινοίᾳ, παρελύτῳ καὶ μὴ διακακώσθαι, μὲν δὲ διατάγει τῆς ἡγεμονίας.* Quem locum & Nicephorus citat, Lib. IX. Hist. Eccl. cap. 50. pag. 463. At minime loci mentem perspexit Morellius, cùm ad oram interpretationis suæ adnotat, causam à Nazianzeno reddi, cur Deus Orthodoxos nonnihil affligerit. Nam nihil clarius locum inspicienti, quam de Constantio sermonem esse, quem partim simplicitate quadam, partim concordia studio, exorbitasse censet: non item quod Arrianum dogma, magis quàm Orthodoxum approbaret. Itaque idem nec dubitat Constantium vocare, *θεοφίλον βασιλέα καὶ φιλοχριστιανόν*, pag. 19. Edit. Savil. sive pag. 63. Edit. Morel.

In iis quæ pag. 65. & deinceps de excommunicatione disserit, confundit abstinentem à Cœna, sive non dationem signi Sacramentalis, cum inflictione pœnæ positivæ. Posterius hoc est humani instituti, eoque ad directum Magistratus imperium pertinet. Prius verò non negamus canone præcipi divino: eoque non nisi indirectè subiacere Magistratus imperio. Quamobrem si quispiam, vel Imperator ipse elio, impoenitens, signum petat Sacramentale, non Imperatorem hic Episcopus audiet, sed Deum, qui supra est Imperatorem. Nec enim is ab Episcopis, symbola fœderis divini, cuiquam porrigi vult, quem ex confessione, & vita, constat ad fœdus minime pertinere. Scit præterea Episcopus, adversus charitatem esse vel maximè, ut symbola hæc iis exhibeamus, qui eorum participatione judicium sibi Domini arcessunt, condemnationemque sibi edunt, ac bibunt. Sed de pœna positiva similiter judicari non debet. Ut si Imperator vel alius etiam, peccati poenitens certum tempus, extra reliquorum fidelium cœtum, in Ecclesia consistere jubeatur, qua de re nullum præceptum existat in Scripturis:

pturis : eoque & hoc & hujusmodi alia vim legis habere nequeunt, nisi sanciente summo Magistratu, qui & legem istiusmodi antiquare potest cum visum.

Improbat postea, quod Utenbogartius dixerit, Ambrosianum exemplum, viam munisse ad tyrannidem Papalem. Ac putat se illud abundè refutasse, si tergeminum aperiat discrimen, inter Ambrosii factum, & Papæ excommunicationem. Sed fallitur. Nec enim vitia intra prima consistunt initia : verùm ut scriptor Romanus ait, ubi semel à virtute descitum, non gradu, sed præcipiti cursu, ad vitia transcurritur, vetus disciplina deseritur, nova inducitur. Et sanè quisquis Romanæ sedis typhum habet perspectum ; ignorare non potest, ut Episcopi ejus loci, postquam tantum facinus, Ambrosium videre ausum, & foeliciter quidem ausum, majores conceperint spiritus, ad efferrandum magis, & magis, se supra omne id quod dicitur Deus. Nec iccirco Ambrosii factum damnamus. Tantùm dicimus id nec penitus approbatum : neque id ulli imitandum Episcopo, saltem non alii nisi qui & spiritum habeat Ambrosianum, & cui negotium sit, cum eo Principe, qui spiritum habeat Theodosianum. Sanè si vel à schismate, vel persecutione, vel etiam à scandalo metus sit ; omninò in persona Regis, indulgentiâ opus est : qua de re vide, quæ Burhillus scribit adversus Becanum, cap. 13. pag. 127, 128, 129.

Pag. 67, & 68. repetit quod antea etiam dixerat, non Pastores minus quàm Reges, à *quibus* à Deo vocari. Sed ex iis quæ antea diximus, cognoscere fuit, quatenus hoc admitti possit. Interim expendimus duos argumenta, quæ obiter firmandæ sententiæ infercit. Unum est, quod Prophetæ ac Sacerdotes, itidem ac Reges soleant inungi in V. T. alterum quod æque illi ac hi typi fuerint Servatoris nostri. Sed præstantiam muneris pastoralis non malè hinc adstruas, quàm quivis bonus agnoscit. Immediatam verò vocationem non item. Nec enim inunctio aliud signabat, vel obfignabat, quàm quod, uti oleum externum reficit corporis membra, atque ad exequendas res multas vegeta reddit atque idonea ; identidem is qui Rex, Prophetâ, aut Sacerdos ordinaretur, licet naturâ tanto muneri neutiquam par esset, tamen à Spiritu Sancto vires consequeretur ; ad administrationem muneris sibi divinitus committi. Nihil magis à *quibus* vocationem inde evincas, quod typi fuerint Christi. Nam & Isaac puer typus fuit Christi, quo tempore nec Rex, nec Prophetâ, nec Sacerdos fuit, & æneus quoque serpens in deserto, aliaque gesserunt typum Christi. Imò contra si horumce

munerum naturam consideremus, clarè conspiciemus, summum in Ecclesiasticis imperium, Episcopis ac Presbyteris tribui non posse. Nam sacerdotum tum docere erat, quod cum Prophetis eis fuit commune, tum sacrificare, tum intercedere pro populo apud Deum. At Regum erat gubernare Ecclesiam, summoque cum imperio versari, circa ea quæ ad animalem, aut spiritualem vitam pertineant. Atqui Presbyteri, & Episcopi non regibus V. T. succedere, sed sacerdotibus : ut qui & ipsi doceant, & *munus* sacrificii Christi signa administrent, & pro Ecclesia, singulisque ejus membris, in precibus, & gratiarum actionibus, intercedant apud Deum : Unde & *ipsi*, ac Sacerdotes ab omni antiquitate appellantur. Gubernatio igitur principalis, non his, sed Magistratui competit. Neque obstat, quod à Paulo, inter Ecclesiasticas functiones *regum* mentio fiat. Nam est Episcoporum, & Presbyterorum quidem regere, verùm Ministerio, non Imperio, quod solius est Magistratus : Unde illud Poetæ :

*Tu regere imperio populos, Romane, memento :*

Aut si quod etiam imperium habeat, id sub hostili Magistratu est, ubi eorum qui Ecclesiæ præsident, est ea præstare quantum licet, quæ alioquin erant Magistratus. Sub Christiano autem Magistratu, si quod imperium, vel jus in rebus externis habet, à Magistratu habet, quod idcirco non summum erit, sed subordinatum. Quam rem his verbis expressit Guilielmus Tooker, duello cum Becano Jesuita, pag. 63, & 64. *Mixtum jus & resultans ex utroque jure, & Regio, & Episcopali est legum sanctio, & Synodorum iudicio, & præsidendi in iis prærogativa, & controversiarum decisio, & beneficiorum collatio, & Clericorum investitura, & Episcoporum constitutio, & depositio, aliorumque actuum, qui his finitimi sunt, exercitium, quæ ferè ab origine primatus regii descendunt, & communicantur sacerdotibus, & ex favorabilium legum indulgentia, bona cum venia Principum maxime derivantur.*

Hactenus vidimus primam & potioremem Wakeani scripti partem. Accedit deinde *arsenalium* libri Utenbogartii. Sed non video quid multum attineat illi immorari, cum ex iis quæ hactenus diximus, nullo negotio pleraque omnia solvantur. Ad exemplum Moïsi respondet, fuisse non tantum summum Magistratum, sed & Prophetam Aarone majorem ; quod probat ex Num. XII. 6, 7, 8. sed *id est* *id est*. Nam quæ Prophetâ major, judicium habuit directivum : quæ Magistratus, imperativum. Quæ Prophetâ scientiam habuit : quæ Princeps, pote-



statem. Audiamus quod Becano, cū similitur occurrisset Episcopo Eliensi, respondeatur à Burhillo, cap. 27. pro Tortura Torti, pag. 278. Prophetam ut Mosē probes fuisse, recitas locum longiusculum ex Num. XII. 6. Quasi verò nobis horum aliquid, aut negaretur, aut nesciretur. Summum quoque sacerdotem fuisse probas. Sed hic oblitus es turpiter, in exemplo Mosi ad primatum regium, non tam quari utrum summus sacerdos fueris, quàm utrum post consecratum Aaronem fueris. Scimus enim Mosi in Ecclesiasticis, post consecratum Aaronem, obeditum ut supremo gubernatori: nec ut Legislatori, aut Propheta, credo, dixeris. Restat ergo ut obeditum dicas Mosi, in hoc negotiorum genere, vel tanquam Principi seculari, vel tanquam summo sacerdote. Nec tamen post consecratum Aaronem, facile persuaseris Mosē permansisse summum sacerdotem; ne duos summos, quasi Antipapas faciens, bicipitem facias Ecclesiam sub Mosē.

Ad Josuæ exemplum respondet Walæus, Mosē, Num. XXVII. 18. voluisse Josuā omnia faceret ad verbum Eleazari; quem iccirco, si quid agendum, consulere deberet. Quo etiam argumento pugnat Becanus, adversus Episcopum Eliensem. Sed cū ibidem addatur, Eleazarum debuisset consulere Deum, liquet Josuam à Deo accepisse responsum per sacerdotem, gestantem Urim & Thummim. Quare hoc quoque indicat, certitudinem directivi iudicii in Eleazaro: imperium non item. Egregiè vero hoc loco, adversus Becanum scripsit Robertus Burhillus, cap. 27. pag. 280. & 281. ubi hæc inter alia, quæ Walæanum responsum planè infringunt: *Si (ut videris velle) ex eo quod dicitur, Num. XXVII. 18. ad verbum ejus (id est, ut exponis, Eleazari) egreditur, & ingreditur Josua: id modo effici cupis, non quidem, ut in gubernatione civili, sed tantum ut in Ecclesiasticarum rerum gubernatione, subsit Josua Eleazaro: reclamabunt verba contextus: quæ non modo de Ecclesiasticis negotiis loquuntur; sed etiam de omnibus, de quibus Deus consulendus per sacerdotem fuerat. Nec tamen ita de his omnibus, ut in iis omnibus Josuam imperio Eleazari subiciant; sed oraculo divino: cujus tum certus interpret Eleazarus, & post eum diu successores ejus fuerant. Si Papa (idem de Pastoribus Ecclesiarum dici potest) itidem certus interpret esset voluntatis divine, fateremur, ad verbum Papæ, Principibus & egrediendum, & ingrediendum. Nec tamen ideo diceremus, Principibus omnia faciendâ ex consilio Papæ: nec enim de omnibus Deum consulebant per sacerdotem: nec cū per os sacerdotis divinum responsum acciperent, sacerdotis imperio paruisse dicuntur. Ut nec fecialis, sed Regis imperio paret, qui feciali, Regis mandatum deferenti, pareat. Nec tamen damus, quod.*

*tuo more, sine probatione sumis, illud ad verbum ejus, exponendum potius, ad verbum Eleazari, quam ad verbum Domini. Certe enim in Hebræo hoc antecedens proprius, & interpretes etiam vestri stant ab hac interpretatione, &c. Et post aliqua: Aut non omnino jubetur ad verbum sacerdotis egredi, & ingredi, sed ad verbum Dei: quod probabilius videtur: aut saltem non absolute, sed ad verbum ejus pendens à consultatione Domini, id est, quatenus internuntius est voluntatis divine.*

Deinceps respondet quoque ad exempla Davidis, Salomonis, Josaphati, Ezechiae, Josiæ: quibus non Utenbogartius tantum, sed etiam Rex serenissimus Jacobus, & Theologi Angli, supremam in Ecclesiasticis curam Regi competere, variis scriptis adversus Pontificios ostenderunt. Itaque qui sciat, ut Theologi illi, exempla ea, à Pontificiorum responsis vindicarint: is simul norit, quid ad exceptiones illas Wallæanas debeat responderi. Quare non visum huic argumento ultra insistere: sed remittere malo ad Guilielmum Tookerum, qui in duello suo cum Becano Jesuita, non tantum regium in Ecclesiasticis regimen, ac primatum exemplis his fuscè probat, sed etiam ad ea omnia, quæ oggesserat Jesuita, solidè responderet. Vide eum à pag. 113. usque ad pag. 175. Ac cō lubentiùs hanc partem prætereo, quia idem video à Burhillo factum, libro pro Tortura Torti, ut qui & ipse cap. 28. pag. 292. nos remittere malis ad responsum Doctissimi Decani Leichfeldensis, qui non alius est, ac Guilielmus Tookerus. Adde quod etiam si Walæus evinceret, singula exempla per se non satis validè probare, quod Utenbogartius volebat; tamen alia attulerat, quæ nec argumentorum subtilitate eludat, nec robore elidat. De cæteris cogitandum illud Poetæ veteris,

*Et quæ non prosunt singula, multa juvant.*

Quod verò ad illam testimoniorum sylvam, quam Utenbogartii testimoniis obducit, mihi quidem magnam partem videtur ea sententiam nostram confirmare. Itaque quamquam jam scribendo lassus, strigare malim, quam protelo ducere: tamen adferre visum aliquot istorum testimoniorum, ut pareat quam is non cum adversa sententia, sed quemadmodum Romani tyrones, Vegetio teste, solent, adversus palum plurimum pugnet.

Pag. 115. agnoscit Helveticam confessionem, Magistratui imprimis Religionis curam demandare. Respondit, hanc mentem Confessionis esse, non quidem Magistratui modo excellentiori, hanc curam demandari, quàm Pastoribus, sed potiorē Magistratui Ecclesiasticorum,

asticorum, quàm civilium, curam habendam esse. Sed quem meliorem Confessionis Helveticæ interpretem habere possumus, quàm Wolfgangum Musculum, qui superiorem Magistratus subordinatam Pastorum in Ecclesiasticis curam facit? ut antea vidimus. Nec alia Bullingeri, aliorumque Helveticorum sententia est.

Pag. 115, & 117. Agnoscit Regem, ab Anglicana Ecclesia habitum, pro capite Ecclesiæ. Verùm his verbis supremam Ecclesiæ gubernationem ei tribuisse. At neque nos Magistratum spirituale Ecclesiæ caput facimus: sed hoc ipsum quod Anglicana voluit Ecclesia, quodque à L. Cisterciensi tribui Regi docet ipse, pag. 118. Item ex Burhillo, pag. 121. uti hæc verba inter alia citat. *Regem postquam ab Ecclesiasticis consiliis, aut (si hæc non satisfecerint) ab authoribus ob fidem, & harum rerum peritiam idoneis, quorum os consulere tenetur, satis edoctus fuerit, præcipuum esse Dei servum, & exequenda voluntatis divine supremum gubernatorem.* Et ex eodem aliquanto post, cum plurima enumerasset: *Hæc ferè omnia, certè maxima, in primatu Regio quod ad spiritualia agnoscimus.* Item pag. 122, 123, & 124. quibus locis, exteriorum Ecclesiæ curam Regi tribuit, licet verbo limitatam: item ait, & Pastores, & Regem habere spiritualium curam, sed hujus curam, etsi spiritualium sit, non esse spirituales. Optimè item pag. 125. Burhillum inducit declarantem, verba Augustini in quæstionibus, Veteris & Novi Testamenti. *Rex habet imaginem Dei, regnantis in cælis: Episcopus Christi, sed ministrantis in terris.* Nempe quia sacerdos, legatione fungens nomine Christi, precibus, & hortatibus agit, non imperio regit; ut Paulus ostendit, 2 Cor. V. 20. Dicendum & aliquid de testimoniis Veterum quæ à Walæo adducuntur.

Pag. 154. vers. antepen. Cypriani locum citat, ad probandum plebem ab Episcopis consuli solere, antequam aliquem ordinarent. Sed ipse locus hic indicat, non fuisse id perpetuum, cum dicat hac in causa se facere id noluisse.

Pag. 157, & 158. insignia duo loca, adducit e concilio Nicæno, & Constantinopolitano, quibus decernitur ne ulli constituantur Episcopi, nisi de voluntate Episcoporum Provinciæ. At nihilominus Nectarium, à Theodosio Juniore electum, constat ex Sozomeno, Lib. VII. cap. 8. pluraque istiusmodi adducis, Magnifice Domine, in pietate tua, à pag. 19. usque ad 97. Quæ exempla ostendunt, hoc tantum voluisse Patres præscribere, quid maximè expediret, non item quod liceret. Sanè cum Canones Ecclesiastici, non

nisi à summo Magistratu vim legis accipiant, obstringere eum nisi volentem minimè possunt. Et si canon iste observandus fuisset, in Ecclesiarum nostrarum reformatione, quales nunc Episcopos, & Presbyteros haberemus? Quin igitur extra ordinem aliter possit Magistratus, minimè dubium videtur.

Pag. 165, & 166. Illustria duo Magni Leonis loca adfert, Calvino quoque probata, quibus ostendit, in Pastorum electione, nec honoratorum, ac imprimis Magistratus iudicium negligendum esse. Sed distinctè de quatuor his sententiam suam promere debuit. 1. Quid summo Magistratui conveniat, ut membro Ecclesiæ: in quo nihil à fidei cerdone differat. 2. Quid ei tribui possit, ut membro honorato; quod ei commune esse possit cum viro antiquæ nobilitatis, aut claræ eruditionis, aut eximie virtutis, aliove nomine præter ceteros conspicuo, non tamen Remp. capeffenti. 3. Quid præterea ei competat, ut membro habenti imperium, hoc est ut Magistratui ejus loci ubi Pastor eligendus: Sed tamen istiusmodi Magistratui, qui superiorem agnoscat. 4. Denique quid illi debeat, ut Magistratui summum imperium habenti. Ad hæc distinguere debuit, quid illi competat ordinariè, quid item extra ordinem. Nam plus ei schismatis tempore tantum pacis & concordie custodi tribui debere, agnoscit ipse, pag. 171. sub finem.

Non satis autem intelligo, quid sibi velit, cum pag. 183. ait, etiam magno loco habenda esse iudicia, non Pastorum seu Politicorum, seu aliorum, qui donum habeant Prophetiæ; eo quod Pastorum iudicio, plurimum ab his roboris accedat. Nam videri possit hoc velle, tantum sententiam eos rogari debere, cum non obscuris indiciis constet in Pastorum sententiam ituros. Verùm quid si Prophetæ illi Pastorum sententiam probare non possint? jam futurum ut potius deterant aliquid de authoritate iudicii pastoralis. Ait Prophetas Prophetis subjectos esse debere. Sed quæritur, an Prophetæ quisque Prophetas suæ ditionis præferre debeat alienæ Provinciæ Pastoribus ac Prophetis? Item an nostri seculi Prophetæ, præferendi sint Prophetis Ecclesiæ antiquæ? Hæc quidem consideratio ad electionem Pastorum, de qua nunc sermo, non pertinet primò & per se; sed tamen valdè cum ea est conjuncta. Nec solum in Ministrorum vocatione, sed etiam controversiarum dijudicatione, ad Paulinum illum locum provocari solet. Meritò igitur quærimus, an negari debeat eum Prophetarum iudicio se subicere, qui cum Prophetis consentit Ecclesiarum non ignobiliorum nostrarum: imò quicum faciunt Prophetæ omnes Ecclesiæ antiquæ?

rique? Atque ut ad externos, aut veteres non abeat, quæritur, an Prophetarum iudicio se non subiciat, qui facere secum videt, minorem quidem numerum, ex iis qui vel nullius, vel exiguae sint eruditionis: sed majorem ex eruditorum flore, eorumque qui animum habent in Scripturis subactum; idque non iudicio solum suo, sed etiam adversariorum ipsorum, qui iccirco calcatum illud in eos vibrent, quo doctrina quisque instructior, hoc esse impuriorem, perversioremque in dogmatis fidei? Sed perpetuus est hic, & scriptoris huius & aliorum innumerorum error, ut suæ tantum sententiæ homines æstiment, cæteros loco habeant nullo, aut parvo. Atque inde est, quod si quis dissentiat in re ulla, à majore Pastorum parte ejus, in quo ipse vivat: licet hunc, loci & suæ provinciæ doctiores, & exterorum plures, & veterum omnes sibi habeat consentientes, nihilominus ab Ecclesia dicant dissentire, in quo Donatistarum eos similes esse, quis non videt? Sed redeo ad Veterum testimonia, à quibus me occasione ejus quod de subjiendo se Prophetis, dixerat, paulum video deflexisse. Citat pro se Concilium Nicænum II. pag. 177. sanè qui ab Constantii exemplo argumento peti nolunt, non debent provocare ad Pseudo-Nicænam, quæ idolorum cultum stabilivit. Pag. 190. commemorat obiter Synodos quinque, Nicænam adversus Arrium, Constantinopolitanam adversus Macedonium, Ephesinam adversus Nestorium, Carthaginensem adversus Pelagium, Chalcedonensem adversus Eutychem. Sed præterquam quod Ephesinæ postponit Carthaginensem, cum hæc antiquior sit, causæ nihil video, quid inter quatuor illas Oecumenicas, quas tanquam quatuor Evangelia venerari se dicebat Gregorius Magnus, & ex eo Isidorus, mediam interferat Carthaginensem, quam adversus Pelagium celebratam rectè dicit. Num quia apud imperitos Antiquitatis Ecclesiasticæ, si qui Remonstrantes nunc dicuntur, malè audiunt tanquam inter mortuam Pelagii, aut Semi-pelagianorum sententiam in Ecclesiis Reformatis ab Orco revocantes, eo credemus tacite insinuare voluisse, eosdem ferè, qui nunc supremam Magistratus Autoritatem, in Ecclesiasticis agnoscunt, ac quibuscum sibi nunc negotium est, olim jam SS. Patrum Conciliis fuisse condemnatos? Sed ego divinus, aut veterator non sum; ariolentur illi qui *quæstiones* didicerunt.

Atque hic tandem pausam faciamus, ego scribendi, tu legendi. Occurrebant quidem & alia multa; eaque duum generum: alia momenti nullius, uti illud; (ex plurculis exemplis unicum adferam) quod pag. 103.

uti Oecolampadium, ita Bucerum inter Helvetios numerat; cum hic fuerit Scleradiensis; Scleradium verò quis nescit, civitatem fuisse Alsatæ, unde & nomen ei quasi Ellistede, ut docuit ipse Scleradiensis Beatus Rhenanus? Verum hujuscemodi si confector, nec causam juvero multum, nec rationem habeam occupationum utriusque nostri. Alia etiam erant quædam momenti majoris, sed præterquam, quod ex iis, quæ dixi, eorum parere invalentiam arbitrabar; sciebam ea omnia & eruditè, & nervosè te refutasse, aureo hac de controversia libello tuo, quem lucem, quam primum adspicere, & Ecclesiæ, & Reip. interest. Non deerunt fortasse qui ausint Anticationem aliquem scribere; nam quid intentatum relinquit humana ambitio? sed spondeo me velle defensionem ejus quovis tempore suscipere, & ore, & calamo: modo tu, vir Amplissime, me idoneum huic rei, nec Collegio hoc, aut Ecclesiæ damnosum judicabis. Vale.

x. Febr.

clō lxxvi.

#### XXIV.

Gerardus Vossius, Hugoni Grøtio S. P.

**S**umme virorum atque item amicorum; Quod amoenissimo Sylvæ tuæ vireto apium oculosque meos pascere suaviter volueris, quantas possum gratias ago. Equidem multum in ea me delectavi. Cujusmodi si primum calorem atque impetum secutus facis (quod Sylvæ nomen offendit) quid fuisset, si lenta Maronis cura placuisset? Neque enim quid nunc desiderari possit, video. Statim sanè longè post te relinquere mihi videris. Itaque toties me legere juvit, ut bonam jam partem memoria teneam. Et ne uni mihi id contingere putes: scias illustrem Legatum Maurerium, cum ei ante paucos dies in prandio adesset, complures carminis tui versus memoriter recitasse. Cui etiam optimè interpretabatur illam Olivarii & Hospitalii *melopœiam*; ubi frustra fuerat Scriverii nostri acumen. Quamquam profectò non adeo mirandum, si amplissimo Legato, gentis suæ nobiles adeo Senatores magis obversarentur. Non possum verò dissimulare apud te, ut cum primum inscriptionem longi adeo carminis conspicerem, cœperim subvereri, ne acerba adeo, ac diuturna mala fecissent, ut in veteri regno tuo minus posses, quam olim. Sanè ægrè animo meo fuisset, si qui primas tulisti quondam carminis majestate, nunc secundis contentus



tentus esse deberes. Sed ut paucos tantum versus delibavi, facile inanem hunc timorem deposui. Cum verò omnia impensè me delectarint, tum multum ex eo voluptatis cepi, quod tanta voluptate classicos quosdam Scriptores, & disciplinas omnes describas. Et tamen plus etiam me afficit, nobilis illa digressio qua celebras ornamentum sui sexus, ac verè Heroïnâ, conjugem tuam. Quam ego carminis tui partem sicis oculis legere non potui. Nempe etiam affectus absque dubio disertiorum te fecit. Quam præclarum etiam iudicium tuum, cum in religionis negotio flectere oculos jubes ad antiquos, nec graviter minus, quam iustè, quereris de moribus seculi nostri. Metuo nihilominus ne surdis canas. Etsi aliquas esse aurei generis reliquias in Britannia, quibus antiquitas sapiat, ex pluribus intelligo. Ac de Gallia etiam spem aliquam facit, quod scribis summos illos viros, quorum elogia extremo tuo carmine, mellitissimis versibus es complexus, optimè de laboribus meis sentire. Sanè hæc res non mediocriter mihi fiduciam, atque animum adderet ad audendum aliquid in aliis etiam Religionis controversiis. Sed alia sufflamant. Unum eorum dico. Nosse te arbitror, ut cum de Religione Christiana præclarum illud opus numeris Belgicis meditatus esses: plerorumque hoc iudicium fuerit, etsi nihil inesset, quod reprehensionem mereretur, tamen quanto præclariora essent, quæ scripsisses, tantò magis premi illa debere. Idque ne aliorum de te iudicia incommodaret, si & rectè de Religione sentire, atque in ea supra mystarum vulgus sapere videreris. Simile mihi aliquid usu venit. Neque enim satis videtur multis, si mea à facultate Theologica approbentur prius, quam edantur: sed malunt in totum me scripture ejusmodi abstinere, idque ne plus autoritatis accedat Operi historię meæ, quod æterna oblivione sepultum vellent. Itaque nunc nihil possum, nisi in studiis literarum, vel eloquentiæ, vel historiæ externæ aut Philosophiæ. Qui campus satis quidem est amplus, sed quanto propius ad senectutem accedo, tantò impensius flagro amore eorum, quæ Christianæ Ecclesiæ pacem, atque concordiam possint asserre. Sed dum facere haud licet, quod velim: facio quod licet. Quare duos nunc libellos emitto, ad oratoriam facultatem pertinentes. Altero eorum artis hujus exemplum sum complexus. Nec est quod vereare, ne ea res vitam eripere posset commentariis istis Oratoriarum institutionum, quas ante annos quindecim in lucem emisi, & quadriennio post auctiores recudi jussi. Nam non adeo durus Pater esse volui, ut à novella prole paterer interim,

quam prius genuissem: præsertim quæ multorum iudicio, & publico emolumentum, & mihi gloriæ ac nominis aliquid attulissent. Quare ne contingeret quod dixi, potius in novo hoc opere viam istam insitui, ut eorum, quæ ad artem necessariò pertinerent, nihil omitterem: sed aliis ferè uterer verbis; exemplis item novis, magisque illustribus. Ad hæc curavi ut multa utiliter adderem passim; priori opere mihi indicta: ea verò omitterem quæ *viar* artis non spectarent, & opere altero fusè à me essent tractata. Puto me consilium hoc meum facile tibi probaturum. Scripsi verò hoc opus potissimum in usum Scholarum, postulato eorum qui his præfessent. Commentarii mei de lingua latina adhuc domi latent. In causa est illud, quod antehac etiam scripsi. Nempe quod Germania necdum pacata, Bibliopolæ ac Typographi etiam frigeant. Sed tamen meliorem jam spem concipere incipiunt. Rumor enim est, Magnæ Britanniæ Regem pro Exrege Bohemico intercessurum: quo effici posse putant, ut hic (dummodo renunciet juri in regnum Bohemicum) Palatinatui suo restitatur. Dum hoc agitur, ego prela Typographica libellis aliis fatigare non cessabo. Synodus Roterodamensis jam desit. Etsi verò Synodo Gaudana ante annum fuerat statutum, ut ne ad Eucharistiæ Sacramentum admitterer, nisi sententiam retractarem; tamen nunc molliùs agendum mecum putant. Nam decretum ut admittat ad eam, dummodò spondeam, nihil me adversus Synodum Dordrechtanam velle moliri palam, vel occultè. Ita nihil me editurum, quod non prius approbarit facultas Theologica. Hæc si præstem, toleratum me iri, sed extra functionem Theologicam, & Ecclesiasticam. Tamen intelligo esse nonnullos, quibus nimis hæc mollis agendi ratio mecum videatur. Nam existimant, si non compellat ad subscribendum Synodo, saltem esse retractanda quædam, quæ in historia mea, ac thesibus quibusdam scripserim. Ego video hoc agi, ut opera mea inutilis in posterum Ecclesiæ reddatur. Tamen si errorem videro ullum, non pudebit retractare. Sed jam biennium est, cum errorum insimulor, neque ostenditur ubi exorbitarim. Novi quemdam qui obnixè hoc agit, ut vel unum locum in opere historiæ incommodè videar adduxisse. Scit facilitatem meam. Quare arte hac circumveniens me putat, ut agnoscam saltem quædam minus appositè citari. Hoc ego ubi fuero confessus, jam spargetur fama, me errorem in historia mea esse confessum, nec esse, quod alius eo opere moveatur, quod author ipse non ubique putet litare veritati, quæ pri-

tra

ma historiæ lex & quasi anima est. Video mihi circumspicere esse agendum, atque inter spinas, quod dicitur, calceatum me esse debere. Interea seu malos vincat constans bonitas, seu Deus misericors aliter rebus nostris providebit: servabimus animum bonum ad spes bonas. Quamquam profecto videre vix possum, quid si me potius, quam publicum spectem meliora attineat sperare. Non jam ad alienum cogor somnum dormire, nec ad alios passus eundum est. Scis ut inter ea, quæ beatiorum faciunt hanc vitam esse, olim scripseris, nulli solvere temporis tributum. Hoc nunc otio fruor. Utinam saltem molesti esse desinant, per quos hactenus quieto esse non licuit. Sed fortasse, & hoc propediem erit. Nam facultas Theologica satis benignè mecum agere videtur; uti & amplissimi Curatores. Si quid in causa mea agitur statim perscribam. Valdè desidero, ut tuorum quamplurima lucem videant. Uti commentarii in tres Evangelistas: vel si eos paulum premere adhuc voles, saltem Stobæus, aut *ῥημολογία*, & rhythmicum pro Religione Christiana, opus. De quo quia mentio incidit, præterire illud non possum, versum antepenultimum, vel illi proximum, minus probari amicis quibusdam tuis. Ais sicubi minus satisfacias, ob ætatem excusari debere, & paratum esse dicere veriora. Protritum hoc illis videtur, & illis etiam usitatum, quibus imperant *ὁ πῦλον Κασιλῆς*. At minimè convenire viro cœlestis ingenii, & eximie adeo eruditionis. Dixi ego primam hanc Christiani laudem esse, humilitatem: & summi Magistri hanc esse voluntatem, ut pueri similes simus. Sed satisfacere eo non potui. Tu cogitabis. Quod ad illa quæ de religionis controversiis, & iudicio antiquitatis scripseras; quam diffidentes sint amicorum sententiæ, arbitror jam satis te sive ex parente, sive aliunde, cognovisse. Sanè perutile est, constare vulgo quod iudicium fuerit veterum. Sed num putas, eo me inscripto, posse commendari, quo fortasse vel urbanatim, vel rusticatim, tangam, sive Agamemnona, sive Achillem, sive Chalcantis profapiam? Quare perstat animus, vel recoqui paulum oportere hoc opus, vel editionem melius differri, saltem in hebdomades paucas. Fortasse interim (ita video aliquos sperare) eveniet aliquid boni. Sin minus, exigua sanè mora est, quæ postuletur, nec quæ publico, ut puto, incommodare possit. Sæpius posthac ad te scribere statutum: fortasse autem non semper tabellarius erit satis fidus. Propterea, ubi opus putabo, aliena manu utar, ac ne nomen quidem consueto more addam. Tu verò, summe vir, vel ex argumento facile

quis scripserit cognosces, vel ex *ἰσχυρισμῶν*, ut si pro Gerardo Joanne Vossio scribam Vulturium Gratianum Bassarium. Nam illa Desiderii Alopecii metuo ne aperta sint nimis. Quandoque etiam initiales V. G. B. satis scriptorem testabuntur. De te si quid dicendum erit, vocabo Celsum: id enim prænomen tuum sonat. Gadolii cognomen nimis evidens videtur. Quare & hic suffecerint una alteraque initii Litera. Hæc non eo agam, quasi de aliis, quam innocentibus Musis loqui sit animus (nam scis ut alia captum meum superent) verum quia non desunt, qui omni sub lapide metuant serpentem. In mentem venit non inutile fore, si libri Augustini adversum secundam Juliani responsionem, cum castigationibus tuis prodeant. Multa enim felici conjecturâ emendasti. Posses & notas addere seculo nostro profuturas. Quod si quid etiam dicendum adversus dissentientes putabis, occasio de plerisque sponte se offeret. Tantum ita instituenda ratio, ut undique reluceat mitis sapientia, non Leli ut ille ait, sed Grotii, quam in te virtutem mirari soleo. Nec puto ea quæ perpessus es, hanc tibi virtutem excussisse. Scis cognomentum tuum, quod semper tibi obversari debet: & simul occurrat, quod à sapienti Seneca in libris de ira scriptum fuit. Non est magnus animus quem incurvat injuria. Scis Athenodorum id Augusto consilii dedisse, nequid iratus committeret, priusquam Alphabeti literas cum animo suo percurrisset. Soleo quid simile facere, atque aliis suadere: Nempe ut si res exigat, ut adversus alterum calamus stringendus sit; id quidem fiat dum fervet animus: nam affectus disertiorum facit: sed quia periculum est, ne aliquid caninæ facundie admisceat (homines sumus omnes) eo placet ut ad limam opus revocemus, ubi animus resederit, atque alienis malis *συμμετέχω*. Multa absque dubio vel tollemus, vel mitigabimus. Ita futurum, ut si etiam post annos multos in nos ipsos descendamus, minus nos urat scriptio vetus, quasi non satis sumus functi officio hominis Christiani. Adde quod si undique in scriptis reluceat patientia, facilius in veris inveniemus fidem. Sed ista longè melius me nosti. Maximè Thuani historiam posthumam vidi. Editam gaudeo, nisi qua parte, atque id immeritissimè, focerum Junium desultoriæ fuisse scientiæ dicit. Mirum hoc mihi de eo visum, qui etiam mediocris eruditionis homines, & pacis longè minus amantes, in opere suo tantoperè extollat. Quid Amplissimum virum ita egit transversum, ut ista Gallus de Gallo, vir tantus de tanto, posteris traderet? Scio ego multa fuisse

gisse socerum. Video in scriptis, præsertim criticis, quæ indicta mallet. Sed tamen hac parte non modò Palmerium, sed alios etiam non infimi nominis post se relinquit. Non assurgit fateor, ad gloriam Scaligeri, Lipsii, & aliorum, qui in hoc studio primas sibi vendicarunt: Verùm tamen multa præclarè observavit; quod cum Scaliger in suis ad Manilium notis dissimulat, candorem in eo requiro. Verùm isthoc studium mitto. Quem Theologum Romanæ, quem Reformatæ Ecclesiæ dabunt, in quo vasta adeò tum Linguarum, tum Philosophiæ, Historiæ externæ, Philologiæque cognitio fuerit? Quam ille sedulò Scholasticos, Thomam cum primis; quanta industria antiquos Theologos legebat? Cujus ego rei non tantum ex scriptis indicium capio, sed etiam illis, quæ ad Theologos veteres manu sua adscripsit. Sed neque hic subleat error maximi Thuani. Addit, in Batavia studuisse rebus novis, ac propterea ab illustribus Ordinibus esse hinc ejectum: tum Noribergam abiisse, atque ibi esse defunctum. Quid horum verum est? Sanè aliqui Authores fuere, ut pagellas aliquot adversus Thuani historiam ederem, quibus gloriam soceri vindicarem. Possè cum argui testimonio Academicæ, ac Illustrum Ordinum, imò & Noribergensium, atque adeo totius Orbis reformati. Verum nihil agendum putavi te inconsulto. Ad hæc videbar mihi hoc pacto tantummodò fluctus in simpulo excitaturus. Præterea cogitabam hominem etiam Thuanum fuisse, & facile potuisse contingere, ut duos Gallos, quorum uterque Lugduni sit professus, confunderet. Scis enim ut Donellus Leicestrianis partibus impensè faverit, ac propterea è Batavia ab Ordinibus exire sit iustus, Saravia quoque iisdem temporibus, fuga in Angliam sibi consulente. Scis quoque Donellum concessisse Noribergam, atque ibi docuisse jus Civile. Et potuit iustior causa esse, cur Thuanus minùs benè vellet Donello, quam Junio. Nam Cujacium, Amplissimus ille, & maxime Thuanus faciebat maximi. Et, ni valdè fallor, Præceptor fuerat. At Donellus nec causam sæpè habuit, nec modum invenit exagitandi Cujacium, quem, ut audio, ita in prælectionibus suis solet *meipsum* *homo nescio Cuius*. Quid igitur evidentius, quam Donellum animo Thuani obversatum, dum ista scriberet? Calami interim lapsus non esse, indicat, quod ista annotavit, ad illud tempus, quo Junius è vivis excessit. Vellem scire an eadem in *autographis* habeantur. Nam fuere qui suspicarentur, à Genevensibus factum esse fu-

cum Lectori, vel Italis potius, quorum in manibus liber fuit, priusquam ederetur. Mihi id minus verisimile sit, ob ea quæ dixi. Interim cogitabis, quæ ratione & Thuani & Junii nomini optimè consuli possit. Quid si filius ejus, vel alius, ad calcem libri moneat *juniorum* planè *quidam* esse, quod de Junio scriptum fuit, quem nihil minus quàm defultoriæ fuisse scientiæ constet, quique in gratia apud Ordines semper fuerit, Lugdunique Batavorum magno bonorum omnium dolore, decesserit, ubi etiam versibus ei à Scaligero, te, Heinsio, & aliis summis viris sit parentatum? Cogitabis, & quid factu opus putes, perscribes. Sed loquaci adeò Epistola ulterius molestius esse definam. Neque enim me fugit, recenti adeo uxoris adventu, & rebus vestris nondum compositis, alia majoraque esse, de quibus sit cogitandum. Rogarem te, ut me, quamvis nunc tanto disjungamur intervallo, non minùs propterea ames. Sed scio te amicam animo possidere, qui, ut Seneca ait, nunquam abest, ac quemcunque vult quotidie videt. Vale, vir, idemque Amice incomparabilis. Salutem plurimam dices maximo Tilenio; sed & Clarissimo Rigaltio: cui ante annos multos miseram Onosandrum locis pluribus à Scaligero feliciter emendatum. Accepisse mihi ipse rescripsit. Sed tamen tot jam anni sunt, cum nihil intelligo de editione nova, quam tum moliri dixerat Rutgerlius. Et quia Rutgerlii incidit mentio, scito eum loco Dyckii Legatum fore Regis Suecici ad Illustræ Ordines. Ita enim retulit ipse Regis commissarius, quem satis hanc rem nosse arbitror. Imò & Dyckium ipsum hoc perscripsisse audio. Et jam in via Rutgerlius esse dicitur. Affinis ejus D. Heinsius carmine Venetias celebravit: quapropter, (ut ipse amicis compluribus retulit) brevi legatur in Ordinem Equitum B. Marci. Verùm finis tandem esto. Uxor, Diamantiaque plurimùm te salutant. Etiam Scriverius, itemque Jacchæus, qui & plurimam mihi salutem tuo nomine dixit. Cæteris, quos adscripseras, ausus non fuit idem significare, ne suspicionem iis injiceret, quasi de rebus aliis quàm Musarum, tecum sibi commercium esset. Timori huic ignoscet.

Lugd. Bat.  
MDCXXI.

Tuus dum vivam,

G. J. Vossius:



## XXV.

Jacobo Corn. F. Wittens J. C.  
Dordrechtum.

Vir Amplissime, & affinitate conjunctissime,

**T**Andem uti receperam, libellum mitto beneficii Matthæo collati: scio jamdiu factum id oportuit, sed nosti negligentiam meam in iis, quæ res domesticas spectant. Ut de me verè dici possit, quod proverbio fertur, *Fluvius quæ procul sunt irrigat*; Libellum ubi Quæstor viderit, remittes.

Mirum alterum exemplum (scis enim in rebus hujusmodi, geminum esse solere) non reperiri in chartis tuis. Sed fortè id est in chartis foci, vel Beverii Consularis. De beneficio gratum erit, si non alibi verba fiant, quàm apud eos, quos gnaros esse rei opus. Ita enim cum offerretur, conveniat: Et causas rei, coram melius exponam. Quanquam tu eas per te satis vides.

Accepi heri Venetiis Aphorismos undetriginta, quibus Cardinales colligunt, Saxonicum etiam, & Brandeburgicum, Electorem dignitate sua, à Pontifice spoliari debere. Nec enim fas esse, ut sacrum Romani Imperii corpus, dehonestetur Electoribus hæreticis. De Palatino solo ante sermo erat. Id ubi successit, etiam utroque cornu, irruiat in Electores alios, Pontificiæ Religionis minus faventes. Ita cum fortuna Clero Romano gliscit impudentia. Operæ visum, ut Aphorismi isti, hebdomade hac in urbe nostra excudantur. Ubi prodierint, exemplum mittam: eo lubentius, quia si otium erit, præfatiunculam, aut censuram, paucis adnectam.

Vale, Ampliss. vir, & affinitate arcta mihi junctæ, sed multo conjunctior, eo quod, præter morem mortalium, ames mecum bonam mentem. Uxor, & Te, & Conjugem, sororesq; ejus, cognatas suas, plurimum salutat. Etiam sororem tuam Hogeverriam uterq; salutamus.

Lugd. Bat. Post.  
Kal. Sept. clō  
Idc xxii.

Additissimus Tibi,

G. J. Vossius.

## XXVI.

Reverendo in Christo Patri, D. Lancetotto Androsio, Episcopo Wintoniensi, Regi magnæ Britanniae à Sacris, & Secretis Consiliis.

Reverende in Christo Pater,

**A**Nnus propemodum est quod pollicitus sum, velle me proximis ad te literis perscribere, quis rerum mearum status foret. Multa adeò tum erant, cur putarem, intra breve spatium effici illa posse, quorum sponte mihi fecerant spem nobiles atq; amplissimi Academiae nostræ curatores. Sed propensissimæ illorum voluntati erga me, vel potius Academiam suam, mora hætenus injecta est, per quosdam publici boni minùs amantes, vel, quod credere malo, non satis ejus intelligentes: quibus utinam meliorem Deus mentem largiatur. Neq; hoc iis tam mei opto causâ, qui patientiâ Christianâ (itâ enim, quàm Spartanâ, dicere malo) & quicquid ista injuria, & istâ etiam majores, per gratiam divinam concoquere utcunq; didici: quàm propter illos ipsos, qui quia nunc verè, quod volunt, possunt, eo cælum sibi digito attingere videntur: quos ed ego infeliciores puto, quia dum leviculis quibusdam suam beatitudinem metiuntur, se verè infelices esse non intelligant: imprimis autem id iis opto, propter Ecclesiam Christi, quam istorum imperitiâ atq; imprudentiâ itâ lacerari, magis etiam animo meo dolet, quàm dicere possum. Hæc ed ad te scribo, non quia conqueri de illis visum sit, quod facere minime soleo: sed ut videas in me culpam non esse, quod, contra quam me facturum receperam, scribere usq; adeò diu distulerim. Pudebat enim ineptire, ac inanes ad virum adeò gravem ac serium, in ea dignitate constitutum, literas dare. Interim verò, dum ego sileo, sæpiusculè mihi literæ ab optimo & dulcissimo affine meo, Francisco Junio, quibus summas virtutes tuas prædicare non cessat: ac sibi maximopere gratulatur de egregio, ac verè patrio erga se amore, ac prolixâ humanitate tuâ. Imò eas inter literas unæ quoq; erant, quibus illud continebatur, non modò te ab affectu pristino nihil recessisse: sed verò novi etiam nominis auctario cumulare voluisse. Quippe qui minime se gravatus sis, de meliori notâ commendare illustri ac nunquam sine laude nominando inclytæ Angliæ vestræ Marefchallo. Quid ego hic primum; quid postremum eloquar? Profectò naturæ tuæ adeò beneficæ ad-

admiratione: tum autem gaudio, quod per te affini meo ita bene sit, majori quasi cœlo me sentio concitari. Quare si huic loco conveniret, quod oratoribus conceditur, neq; inutilitatem planè est Theologis antiquis: eundem animo huic morem gererem lubens, ut magnam illam animam soceri mei Junii (cujus mihi memoria magis etiam ob pietatem excellentem, & eximium pacis studium, quàm ob variam & exquisitam eruditionem sancta semper erit) verbis meis quasi cœlo deductam litterem tibi velut præsentem, orationeq; forsitan non indigna se, & meritis tuis, gratias agentem tibi, quod tantopere amore & curâ tuâ digneris carissimum illud pignus suum, cui unico ex liberis suum imposuit nomen, & à cujus ingenio ac moribus, eò ardentius, ut puto, optima semper expectavit. Et quidem quod facias isthæc eo potissimum tempore, quo liberi & affines sui, ab iis, quibus dum nobiscum versaretur, ipse contulit beneficia, negliguntur, usq; adeò etiam penè spernuntur, neq; id alio ullo merito, quàm quia & ipsi patris soceriq; exemplo ad eruditionem qualemcumq; contendunt, & paci Ecclesiæ etiam cum dispendio suo, optimè consultum velint. Sed non adeò ineptus sum, ut non videam hujusmodi orationem à simplici illo & familiari epistolarum stylo penitus abhorrere. Quare ne dum undiq; erumpente lætitiâ, quod multis evenire solet, planè ridiculus siem, illud potius agam, quod non solum sponte facere gestio, sed etiam universi his in locis Junii *fratris* liberi, generi, nepotes, requirunt, quod etiam tot Juniani nominis amantes velle scio, quod deniq; & facile possum, & sine scelere prætermittere non possum: omnium, inquam, nostri nomine epistolâ hac testabor, quantum gaudeamus de hoc judicio, & affectu tuo, quantum gratulemur Francisco Junio nostro, quantum nos tibi obstrictos fateamur universi, ob eximiam hanc benevolentiam, tantaq; merita tua. Sanè gratiam quidem ut mereris, referemus nunquam, sed habebimus, quamdiu vitam nobis Deus concedet. Hoc affectu nostro, Optime maxime præsul, cuncti rogamus ut contentus esse velis. Nec enim re aliâ ulla consequi possumus merita tua, quàm agnitione debiti istius, cui solvendo impares sumus. Sed quod nos humilis loci homulli non possumus, id largè rependet sublimis ille ac beneficus Deus.

Ad hujus me thronum devolve, hunc supplicibus votis rogo, ut propter Christum & Ecclesiam suam, cujus commodis hætenus metiris tempora tua, spiritus sui robore te porro confirmet, favoreq; hoc terras dignetur, ut

*Serus in cælum venias, diuq;  
Lætus intersis populo Britanno.*

Vale, Reverende in Christo pater, & affinem ac me amare persevera.

*Lugd. Bat.  
clōc xxii.  
Idib. Sept.*

*Illustri nomini tuo Obstrictissimus,*

G. J. Vossius.

## XXVII.

### Proceribus Amstelodamenfibus.

*Amplissimi & præstantissimi viri,*

JAM octiduum & paulo amplius est, quod me Lugduni domi meæ frustra quærebatis: sed Hagæ tamen reperistis. Judicium tum faciebatis pulcherrimæ cogitationis vestræ, de constituenda apud vos illustri schola, ne habeatis necesse rudes & improvidos adolescentulos tam cito ablegare in Academiam; quod quanto sæpe cum periculo fiat, tristibus etiam documentis cognovistis. Et sane quamquam hoc ipsi non addebatis, tamen facile illud per me video, curâ id etiam vobis esse, ut urbs vestra, undique propè beata, literarum etiam gloria magis caput atrollat. Quod autem, in tanto negotio meam quoque operam conducibilem fore existimatis: equidem gaudeo. Nec aliena mihi mens ad morem eâ parte gerendum vobis, atque adeò magno etiam animo capeßendum, quod exposcitis. Sic enim semper fui, ut in eo quod semel susceperim, non finam claudicare diligentiam meam. Sed tamen non levia etiam sunt, quæ scrupulum injiciunt. Primum illud cogito, vivere me in Academia toto terrarum orbe inclyta. Ac fruor in ea emolumentis, quantis mei ordinis quisquam. Nempe à bis millibus ea propè absunt, si etiam immunitates accenseam. Quæ cum cogito, nescio an satis ex re sit vestra, si ad me potissimum eatur. Nec enim ab hoc loco avelli possim, nisi laboris sit non multò amplius, emolumentum non paulo majus. In quo mihi non videor peccare, cum alioqui periculum sit, ne fabula multorum tiam, malignis adeò temporibus, si Academiam Schola illustri commutem levibus de causis. Sanè non hic modo male audiam sed vicinis etiam locis, ad quos vel viva voce docendo, vel industriæ monumentis nomen pervenit meum. Itaque sic existimo, nihil me posse in re tam gravis momenti statuere, nisi prius consiterit, quibus condicionibus sim avocandus, sive laborem, quem susceperem, sive

præmium respiciam. Terret etiam (ingenue ut dicam) offensa amplissimorum Academicæ literatorum. Nam poscebatis, ut iis ignaris, transigi omne hoc negotium inter nos possit. At hoc si fiat, Æolum extimesco, & Septentrionis filios: sed enim vos, velut humani Joves, si prius compellari non possint, saltem sedare queatis tempestatem istam, quam nunc formido. Quid multis opus? In tam arduo negotio, nec abnuere tantæ urbis proceribus pulcherrimum postulatam fas putavi: Et tamen graves etiam causas video, cur arbitrer, penitus aliquantò mihi explorandum esse de tota hac re animum & sententiam vestram. Deus & vobis, Amplissimi proceres, & mihi mentem illam inspiret, quæ & glorioso ejus nomini inserviet, & inclytæ urbi vestræ, atque adeo Bataviæ universæ, tum etiam mihi ac familiæ meæ sit maximè salutaris.

Lugd. Bat.  
Kal. Jan.

Nomini vestro & inclytæ vestre  
Reip. addidissimus,

G. J. Vossius.

XXVIII.

N. N.

S. P.

JAm ex amplissimo affine tuo Reigersbergio intellexeris, vir maxime, ut Amstelodamenses causis compulsi gravissimis constituere in urbe sua cogitent Gymnasium illustre: atque ut eam ad rem utilem existiment operam tum meam tum Collegæ & amici veteris Casparis Barlæi. Sed Leidenses plane habent persuasum, detrahere eam rem multum posse nomini & existimationi Academicæ suæ: eoque omnem movent lapidem, ut hoc negotium disturbent. Primum negant, juris hoc esse ulli civitatum, præterquam suæ, cui pro tolerata fortiter obsidione, præmii loco sit attributum, ut Academiam habeat, ad quam Hollandiæ & Zelandiæ ablegetur juvenus. Amstelodamenses autem arbitrantur, aliud esse Academiam statuere, quam ob rem opus sit privilegiis & immunitatibus à suprema potestate concessis: aliud autem Gymnasium erigere, in quo juvenus, & alii Musarum amantes, absque ejusmodi privilegiis, liberali imbuantur doctrinâ: quale jus penes singulas esse civitates. Existimem quoque, eam rem plurimum commodare posse Leidensibus, quia si annum unum alterum diutius apud se detineatur juvenus, &

eruditione auctior ventura sit ad Academiam, quod ex honore loci futurum: eo judicio firmatior quod efficiar, ut deinceps hic minus sit turbarum. Urgent iterum Lugdunenses, si habere Amstelodamenses velint Professores aliquos, saltem non alibi iis docendum fore, quam in scholis classicis: uti apud Dordrechtanos fecere Professores Nansius, Polyander, Marcellus. Amstelodamenses aiunt non esse laborandum Leidensibus, utrum in Auditorio aliquo Scholæ classicæ doceant Professores, an loco aliquantum distito, qui magis deceat non modo doctores ipsos, sed etiam adolescentes jam rude à ludi moderatore donatos, ac pariter tot præstantissimos cives, qui studia colant, ac de rerum natura, vel imperiis, aliisque rebus præclarissimis, publicè alios differentes audire exoptent. Denique objectant, ut hæc essent, non tamen debuissent Amstelodamenses ex Academia hac vocare: sed potiorẽ iis habendam fuisse rationem scholæ quæ totius sit Hollandiæ & Zelandiæ, quam quæ unius sit urbis futura: Præsertim cum ipsi nobile sint membrum in procerum conventu à quo Curatores Academicæ statuuntur, ut quos hi statuerint Academicæ Professores, iidem ab Amstelodamensibus ipsis præfecti fuisse Academicæ sint dicendi. Neque negant Amstelodamenses hæc alicujus esse ponderis: ac propterea delegati eorum in Ordinum conventu ante menses duos cum à Leidensibus super hoc compellati essent, eò inclinabant, ut si rogarentur, ne quemquam vocare ex Academia sua vellent, morem ea in re gererent, dummodo mihi satisfieret, quo invito facta conventa non possent reddere irrita. Leidenses vero passi sunt optimam occasionem effluere, quamquam dies dicta esset conventu, & ea de causa semel iterumque Lugduno Hagam excurrissẽ. Nimirum honestius urbi suæ putant Leidenses, si non tam rogent Amstelodamenses ut à proposito desistant, quin si in proximo ordinum conventu, qui mense Martio futurus, interdicatur Amstelodamensibus, ne illustrem scholam erigere, aut saltem ne quemquam ex Academia ad Scholam urbis suæ vocare professorem possint. Amstelodamenses negant se quidquam facere velle, quod privilegiis Leidensium adversetur. Sed si iis repugnet consilium de Gymnasio in quo doceant professores publici, solum opus esse, ut privilegium hoc sibi monstretur, eo viso, velle se ab instituto desistere. Ad me autem quod attinet, eò se potissimum de me aiunt cogitasse, quia non solum opera mea in publicè docendo Historiam pergratum toti urbi argumentum, utilis sit futura, sed etiam in dirigendis scholis duabus



abus classicis (quarum non melior facies sit, quam in cæteris Bataviæ urbibus) juvare consilio Amplissimos Consules possem: quippe qui non sine fructu annis totis xv. Dordrechtanæ Scholæ ante hos xv. annos præfuissem. Negant præterea cum in Academia professores locantur, stipulationem intercedere, qua obstricti professores non aliò ire possint, si res eorum sic ferant. Si jus est Leidenfis abrogandi munus professoribus, cujus rei exempla nuper vidimus (ut de socero Junio taceam, cui professio linguæ Hebrææ erepta invito) sane etiam professoribus jus esse abdicandi se munere quando vellent. Ac hujus rei exempla multa suppetere: ut in Danæo, se conferente in illustrem scholam Gandavensem; Gomaro Middleburgum eunte: Meursio proficiscente Soram; & compluribus aliis: si professione fungens non possit à se vocari, tantum requiri, ut professor muneri renunciet: nec dubitari posse quin eum tum vocari sibi liceat. Hæc sunt de quibus Leidenfes in proximo Ordinum conventu, controversiam Amstelodamensibus moturi videntur. Quod si sic etiam se nihil efficere posse animadvertant, puto, contenti erunt à proceribus nostris xx. aut circiter, millia expectere, ut deinceps liberalius habeant professores alicujus nominis, atque alios etiam consequantur, qui vel docendo publice, vel scribendo illustrare hanc Academiam possint. Hujus rei indicium non unus mihi eorum fecit, qui Leidenfis familiaris utuntur. Nec obscure innunt discessum meum causaturum, ut luculentiori conditione Salmasius iterum advocetur: ut paullum illud damni quod in me faciet Academia, magnitudine ejus viri abundè compensetur. Equidem si venerit gratulabor, eò magis, quia ei docendum publicè non erit; eoque defæcatori animo totus erit in scribendo. Mihi tam felici esse non licuit, cui bis de die docendum fuit, ut ignosci mihi debeat, si scriptorum præstantia ab aliis vincat. Laus hæc publica est: nec omnia omnes possumus. Ac de isto hæcenus. Ad aliud nunc venio, in quo consilio atque operâ mihi opus tuâ. Ante dies tres quatuor reddidit literæ filio meo Dionysio, à generosissimo barone Christophoro Stupesquio, quibus significat, fortasse iturum se Constantinopolim & ad alios orientis tractus: ac quia meminerit, quanto ardore filius soleat expetere, ut terras eas lustraret, & quæ deessent in Arabicis, ab Arabice loquentibus posset addiscere, voluisse se nunc occasionem offerre, quia sine parentum molestia voto suo posset satisfacere. Comitem enim itineris hujus assumpturum. Non abhorret filius, quin nihil æque desiderat, quam

ut hoc fiat. Sed quiddam scrupulum mihi injicit atque uxori. Nam quia illustrissimus hic Baro in Religione sequitur opiniones Ecclesiæ Romanæ; ac filius meus ob ætatum (necdum annorum xx. est) judicio non adeo est firmato, ut inescari promissis nequeat, aut argumentis decipi speciosis: parum tutum arbitror, eum committere itineri tam longinquo cum iis, qui rem Deo se gratam facturos putarent, si ad gremium Ecclesiæ Romanæ filium abducerent. Suspicio mihi injecta ab aliquo à rege Christiano legatum ire aliquem Constantinopolim, inque hujus comitatu Baronem Stupeskiū fore. At rex non mittet alium, ut puto, quam suæ in religione sententiæ. Eum Presbyter comitabitur, & alii *apud deos*. Quare tanto plus periculi filio sit, in tanto eorum numero, qui diversum sentiant à nobis, ut mittam, quod fortasse in iis futuri homines malis moribus, quos affricare meo possent. Ille quidem se satis firmo ad ea pectore arbitratur. Sed ego multis edoctus exemplis tuta etiam timere didici. Nec propterea consultationem omnem de hac re abjeci. Fortasse enim illustris hic Baro minus Romanæ Ecclesiæ placitis adhæret, quam cum viveret nobiscum. Fortasse etiam comitabitur Ephorus Paschalis medicus Gallus, qui tantum non juravit in verba Zelotarum nostrorum. Fortasse & unâ iturus frater generorum tertius, qui, ut intelligo, in religione plane noster est. Et si legatus mittendus, fortasse erit aliquis, qui in religionis controversiis non male sentiat de Ecclesiis nostris. Quales è politicis Gallia habet multos, qui distinguere æra possint lupinis. Hæc si essent, facilem me postulatis filii præberem. Est enim is Baro Christophorus Stupeskius, ut, si unum illud de Religione excepero, nihil in eo possit desiderari. Pius est ac numinis metuens, gravis est, modestus, & cordatus. Ingenio excellit, & pro ingenio rara ei eruditio, & mei filique est amantissimus. Quare si pulchra fuerit occasio filio visendi orientem, nullis, vel exiguis impensis meis: nec causa sit satis gravis, cur in Religione ei ab *impudens* metuere debeam, sane fore puto, ut morem ei geramus; verum haut animus annuere, antequam de eo quod dixi, penitus aliquid cognoro. Quare rem feceris longe mihi gratissimam & amicitiam nostrâ dignam, si ea quæ vel jam scias de itinere hoc, vel ex illustribus Baronibus aut aliis possis cognoscere, ad me iis ignaris perscripseris. Ego quidem & filius generoso Baroni rescripsimus, sed de metu eo, qui Religionem spectet, nè *quid* quidem. Id enim magis abalienare, quam conciliare posse videbatur. Si inconsultum plane erit, ut

filius

filius se in viam det, aliæ à nobis causæ, & veræ poterant adferri, cur id minus fiat. Accepi his diebus literas ab ornatissimo Omfio nostro, quibus significat, impense se desiderare responsum ad literas, quibus significat, quas ad te misit, postquam mihi sententiam tuam de Equestri S. Michaelis dignitate perscripseras, nihil illi acceptius fuit humanitate ea, qua morem nobis gesseris. Atque optat, ut de cætero etiam certior à te fiat. Salutant te, uxorem, liberos, omnes mei, atque una filius tuus, qui in studiis probare se pergit.

Lug. Bat.

Tuus omni officio,

G. J. Vossius.

## XXIX.

Baroni Jo. Stupeski,  
S. P.

JAm quasi annus est illustrissime & amicissime Stupeski, quod generosissimi fratris tui, Nicolai Stupeski, alloquio suavissimo iterum frui dabatur, nec quidquam ad perfectionem gaudii mei requirebatur, nisi quod qui antea nobili illo fratri pari beabar, tunc dimidium ejus non viderem, nec si nunciaretur, subinde baronem Stupeskiū velle me compellatum, è famulatio aut liberis quærere, — possem. Illud vero etiam dolorem non mediocrem adferebat, quod intelligerem te, cum jam unà in viam dedisses, valetudine adversâ coactum patriam repetere. Nam, ut amor sollicitus est, tristiora etiam metuebam. Mirabatur tum frater, me nullas à te literas accepisse, quas à te scriptas probe constaret. Ægrè erat, eas intercidiſſe. Ita enim suspicabar cum Paschali medico jam in Gallias profectus esset. Nec multo post alteræ mihi à te literæ, atque illæ à te Lutetia Parisiorum perscriptæ. Sanè utrisque literis nihil mihi carius esse potuisset: partim quia caperer mirâ sermonis elegantiam, partim quia reluceret ubique summa humanitas atque amor mei. Sed Parisinæ tamen illæ non paulo acceptiores, quia hæc metu me illo liberabant, quem valetudo incusserat. Quippe ex his cognovi, te redditum tibi, & jam e mentis itineris spatiis, cum florentissimo fratri pari, feliciter Lutetiæ agere. Hoc mihi eo jucundius fuit, quia ibidem haberetis virum illum, quo ego nihil undique consummatius novi, ac quo quanto familiarius uti licebit, tanto vos beatiores putabo. Nihil,

puto, opus addere illud, me Hugonem Grotium dicere, quod intelligerent etiam nominis Grotiani hostes. Illud potius dicam, quamquam valde gaudeo vos adeo esse felices, tamen, cum Batavicè bona confero cum vestris, & aliorum extra has terras, non vobis quidem quos sic amo, & colo, sed tamen aliis quibusdam hanc felicitatem, pœne dixerim, me invideo. Scio enim quantum damni in eo faciam, quod tot annos hoc viro careo. Neque aliud æquè opto, quam illam mentem proceribus nostris, ut eum restituant patriæ & suis. Ex epistola quam ante quadriduum ad Dionysium meum scripsisti, video te cogitare Constantinopolim & orientis tractus: nec abnuere, imo potius exposcere filium tanti itineris socium & comitem. Equidem cum illustre genus vestrum & cæteras laudes tuas cogito, non possum non summas tibi gratias agere, quod tantus tanto honore atque affectu pariter me meosque prosequaris. Nec tamen tam subito ego & uxor statuere quicquam potuimus, partim quia itineris totius rationem ac quas vocant *desideria* aliquanto saltem penitus nosse antea oporteret: partim quia animus meus nunc alio negotio plane distinetur. Quod cujuscumque sit, non defugiam exponere. Amstelodamenses decrerunt illustrem erigere Scholam in urbe sua. Atque, hoc ut faciant, duo imprimis impellunt. Primum movet liberorum cura, quos, tot tristibus edocti exemplis, tam cito in Academias licentia corruptas ablegare metunt. Nec enim idem moribus obtinet Belgarum, quod gentis vestræ: Sed apud nos ætas ea, quæ in vitia omnia maximè ebullit, maximè sine custode relinquitur. Sufficere existimant, si aliquis mores inspiciat, cum ætatis beneficio, vitia ignorant. Præterea impellit civium amor, quibus studia sunt cordi. Magnus enim eorum est numerus in hac urbe, qui & nostram & Academias alias his proximis viginti, vel triginta annis lustrarint: neque nunc minus, quoties licet, audire aliquem cupiant de rerum natura, vel rebus gestis, aliisque rebus gravibus publice differentem: Advenarum etiam non pauci ibidem degunt, quibus idem est ardor. Nempe præter illos, qui solas sectantur Musas, cum Apolline suo, habet ea urbs viros Mercuriales, quibus doctrina pariter curæ sit ac opes, Mercurii sui exemplo, non mercium modo, sed eloquentiæ etiam præsidis. Desiderium est igitur civitatis, ut quemadmodum longe supra alias urbes caput extulit divitiis, ita etiam literarum laudibus magis & magis fiat inclyta. Tanti ut voti compos existat, existimavit, eos sibi advocandos Professores, qui tum scriptis jam inclaruissent, ut nomen nascenti Scholæ dare

dare possint : tum etiam Venere aliquâ ac facundia polleant in docendo, ut facilius allicere & detinere auditores valeant. Qui ea in urbe me aliquando audire, quales etiam è proceribus sunt, persuasere cætero senatui (quam verè ipsi viderint) non esse me ab his laudibus destitutum. Itaque missi ad me è Senatu, qui postularent, ut huic Reip. operam meam addicere vellem in iis publicè docendis, quæ apud Leidenfes narro. Item præterea ad Casparem Barleum : qui cum aliis scriptis, tum præcipue poematis magnum sibi nomen non in patria modo, sed vicinis etiam regnis parasset. Quam disertè autem tetrica logices præcepta idem ante annos duodecim solitus sit in hac ipsa Academia tractare, testes plurimi supersunt, qui florentissimo auditorio docentem audierunt. Quare hunc Philosophiæ Professore designarunt ? Luculentam domum habebit, ac præterea annos florenos nostrates mille & quingentos. Mihi præter domum, quæ octingentis conducitur, annumerabuntur quotannis bis mille & quingenti. Spes etiam aliorum facta, quæ commemorare singula nihil attinet. Et jam affectum suum erga liberos testari cœperunt, Francicum meum referendo in numerum advocatorum urbis suæ, qui Hagæ degunt. Huic Amstelodamensium institutò non satis æquos se præbent Leidenfes : quibus illud unice in votis, ut disturbare consilia eorum possint. Sed procerum sapientiores negant eos quicquam effecturos ; Qua de re certiora proximis ad te scribam literis. Simul etiam plenius significabo, quid nobis videatur de postulato filii, rogantis, ut comitari te in orientem possit. Quamquam profecto vix nos extricare possimus, nisi, ut dixi, re omni, de qua consulendum, melius perspecta. Sperat igitur filius se alteris literis tuis melius de omnibus posse edoceri. Quicquid autem futurum, æternum tibi debebo, quod luculentè adeo testari volueris ; erga me & meos, quanti nos facias. Deus hanc tibi mentem perpetuo conservet, mihi autem & meis vires largiatur ad ea præstanda officia quæ animum gratum in nostri ordinis hominibus deceant. Generosissimis fratribus tuis, atque etiam doctissimo viro Paschali, plurimam meo nomine salutem dicito.

*Lugd. Bat. Generosi nominis tui, ac totius illustri domus tuæ cultor,*

*G. J. Vossius.*

## XXX.

*Erycio Puteano, S. P.*

**J**Am diu est, summe & vir & amice, quod Oratoriæ meæ & auctiores, & limatiores venire gestiunt in manus tuas. Sed occasio eas mittendi nunc demum obtulit per tabellarium, qui monitu tuo me compellavit, nec literas solum, sed commentarium etiam nostrum se procuraturum recepit. Quamquam fortasse jam à me acceperis. Nam ante quadrimestre vel præterpropter, cuidam professione medico, qui se per Brabantiam in Galliam iturum diceret, illud pro jure quodam meo in mandatis dedit, ut ne sine meis ad te literis abire vellet, atque ut à typographo geminum posceret Oratoriarum mearum exemplum, quarum unum retineret, alterum tibi daret. Is dum ego ab urbe absum, discessit, nec nisi unum exemplar rationibus meis apud Typographum addi jussit. Itaque hæreo, utrum, quia nihil ad te scripisssem, sui tantummodo rationem habendam putarit : an contra humanitatis suæ esse exiltimarit, ut alterius potius rationem haberet, quam sui : Præsertim cum eo pacto commodior esset occasio compellendi tui, cujus conspectum & alloquium ambiret. In re incerta id facere malui, quod fecisse me vides. Si medicus ille fecerit, quod optarem : Pro filiorum aliquo hic index fuerit. Reperies in eo semel iterumque mentiunculam tui : sed non pro meritis tuis in rem literariam. Quorum major ratio habebitur in commentariis nostris de lingua latina, ac imprimis Originum libris, quos circa proximum Christi natalem prelo subicere Elsevirius decrevit. Si fallit, non moror. Nam mihi ipsi horret animus, cum cogito quantum laboris exantlandum erit. Si quid enim difficile est, id profecto est eruere è tenebris causas vocum omnium : ubi ille togatorum omnium doctissimus effugere non potuit, quin crebro nugaretur. Scio ab eo tempore multa in apertum producta esse, quæ tum in obscuro latebant. Sed nec pauca sunt, quæ reliquerit, quæ pulchrum sit revocare ad natales suos, sive illi in antiqua Latii lingua, aut Æolum Dialecto : sive in Linguis Orientis, imprimis Syra, unde Cadmus genus duxit : cui etiam literas ipsas debet Græcia. Adde quod non leve iudicium requiritur, si, ut animus est, in tanto Philologorum dissensu rationes plurimum addere velim, cur illud potius sequamur, quam istud. Neque hoc eo dico, quasi multa mihi de me promittam : sed ut videas, non de nihilo esse, quod re jam etiam ante multos annos per-

†

pens,



G. J. Vossius Danieli Paræo S. P.

penſa, nihilominus adhuc horret animus ad illud laboris, quod ſuperest. Quia ſpiſſe ejus operis editio procedet ob voluminis magnitudinem, decretum tibi, ſi per Typographum licebit, per partes illud transmittere. Nempe minus tædio fuerit, ſi ſic legatur, præſertim ab homine occupatiſſimo: modo noſtra tanti putabis. Sed ſaltuatim hoc ut facias, facile ſpero, impetrabo. Magnas vero tibi gratias ago, quod toties me beas perennibus illis, ingenii, doctrinæ, induſtriæ tuæ monumentis. Quam me, ut mittam alia, tua delectavit Flavia Domicilla. O ſi multa eo in genere, ut poſſis, ita velis! Quid de hiſtoria Inſubrica dicam! magiſve doctrinæ, an ſermonis elegantiam & ſacundiam mirer? Nec poteris opera alia magis tibi, & hoc ſeculum, & poſteros obſtringere. Nam in rebus Græcis ac Romanis multum jam ſumma ingenia deſudarunt. Jacent penè diſpreta tempora quæ Imperium Romanum proximè exceperunt. In his Hypſæo cæcior ſit, qui ignoret irruptiones Barbarorum in orbem Romanum: Ab illis origo tot florentiſſimis regnis ac principatibus in Europa noſtra. Ubi vero incidi in loca ea, quibus tam amicè commendas nos, operamque in hiſtoricis noſtram, quiddam melle dulcius mihi circa cor gliſcere perſenſi. Quid enim jucundius quam laudari me ſit, uſque adeo laudata laudatiſſimi viri opera, & qui me à pueritia norit? ſane hoc boni feciſti, quod ſtimulos etiam addidiſti ad porro bene merendum de literis noſtris. Volupe etiam fuit luſtrare ſtirpem Puteanam: quam ego perhoneſtam eſſe, nec ante annos neſcivi XL, cum unà Dordrecht viveremus. Sed non paulo id nunc accuratius perſpexi, tuiſque liberis eo nomine gratulor, quod tam bene nati ſint. Quamquam proſecto ſatis haberent, quo ſe jactarent, ſi prima honoris fundamenta jeciſſes. Utrum Calenii mei Puteani ſtirpi fuerint innexa, non ſat ſcio. Neque enim qui tanto Venlovia abſum intervallo, occaſionem habui in omnia inquirendi. Sed ſi ita eſt, jucundum mihi erit ſcire, ac familiæ etiam meæ id gloriæ ducam. Nec indecores Puteanis ſimus, cum multi hodieque ex cognatis meis non his modo in terris egregio loco ſunt; ſed Ruramondæ etiam & vicinis locis, partim conſulares, partim aliis dignitatibus functi vel etiam fungentes, ſuperſint. Hæc ego III. Nov. raptim exarabam, die dominico, quod eo ipſo ante meridiem tabellarius abitum pararet. Sic quoque ſacro die ſacra tractavimus, cum ſacra res lit amicitia inter bonos & Dei metuentes: qualem te comperi à prima ætate, optime, doctiſſime, amiciſſime Puteane. Cujus idcirco amor ac cultus erit, dum terras colam.

Tuus,

G. J. Vossius.

T Ardè admodum mihi redditæ literæ tuæ, nempe tertio menſe, ex quo ſcripſeras: interim & alius menſis effluxit, non tam reſcribendi negligentia, quàm quoddam aliquem exſpectarem, per quem meæ ad te tuto mitterentur. Super quo etiam ornaſſimum juvenem Billetium compellendum exiſtimavi, ſimulac cum pedem in urbe noſtra poſuiſſe intellexi. Sed nunc demum occaſio indicatur, quam arripiendam putavi. Nec interea à me ceſſatum in iis, quæ ad te pertinerent. Nam tuâ potiſſimum cauſa Hagam excurri, ut colloquerer cum Domino Camerario, Illuſtri Suecorum regis ad Ordines noſtros legato, viro amantiſſimo ut mei, ita tui, & totius domus avitæ veſtræ. Satis video, quam ille propendeat, ut ſatiſfaciam poſtulado tuo. Sed necdum potuit, quod vult. Nec minus ipſe laboro; inque curæ hujus partem adſumo præſtantiſſimos collegas, qui te amant & æſtimant, cum ob proprias virtutes, tum etiam propter clariſſimum parentem, & maximum virum, avum tuum. Sed difficilius aliquid te dignum poſſunt, quia de pluribus populis laborandum iis hætenus fuit. Et in non paucis quidem effecimus, quod volumus. Quid deinceps poſſimus, non ſat ſcio. Sed illud ſcio affectum te & operam non deſideraturum meam. Venio nunc ad illud, quod Lucretium mihi tuum dicandum putaris, poetam eum, quem plurimi facio, non ſolum ob lectiſſimam dictionem, ſed etiam quia multa adeo in illo ad naturam rerum intelligendam. Adoleſcens in unius Ariſtotelis verba jurabam, ætate provectior ſæpe excedere cœpi è Lyceo, meque contuli vel in Academiæ, vel in porticum, vel etiam hortos Gargetti ſenis. Nempe *ἐκλεγετο* factus ſum. Nullius addiſtus jurare in verba Magiſtri: De Philoſophia dico. Nam in ſacris unicus Magiſter Chriſtus, qui & antea per Prophetas, & poſtea per Apoſtolos viros *δοκίμους*, locutus nobis. Cæterum non video, amiciſſime Paræ, quas tibi pro tanto adfectu, ſummoque hoc honore gratias rependam. Sed in elogio noſtri, ingenue dico, large nimis peccas, meque non tam honoras, quam oneras. Ego honoris illud quod mihi tribuis, ſemper aliis religno, uti debeo. Verum credo, dediſti illud non tam mihi, quam dulciſſimæ ſed miſeræ nunc patriæ noſtræ: cujus gloria tanto fuerit major, quantò illuſtriores fuerint, quos produxit. Sed de iſto & aliis, brevi ad te pluribus ſcribam. Sunt enim

enim apud nos, ut intelligo ex popularibus, Hanovienſes qui intra hebdomadam unam alteram redituri ad vos. Per eos mittam Oratoriarum exemplar, quæ hoc anno prodire, non donum proſecto aut pretium, quo me tibi ſatisfacere poſſe exiſtimem, ſed affectus ſponſorem tabellam, quo me ad majora potius obſtringam. Filii mei, quos ſenos habeo, Muſarum aſſiduos cultores plurimam tibi ſalutem adſcribi juſſerunt: Quod ſane facio lubens. Præterea vero meo nomine plurima ſalute impertias rogo præſantiſſimum parentem tuum, quem ego virum ob præclarum ingenium, & doctrinæ elegantiam, tot monumentis teſtatam multos jam annos amo & æſtimo, majoriſque deinceps faciam ſemper, poſtquam Paræa domus primo de me optimè voluit mereri.

Lug. Bat. Kal. Januarii, Quibus, more veteri, atque ex intimo animo, exopto, ut annus ſic Parææ familiæ & lætus inchoet, & lætior procedat, & exeat lætiſſimus, *καλῶς*

*Tibi tuſque merito tuo addiſſimus,*

G. J. Voſſius.

### XXXII.

Gerardus Johannes Voſſius, Hugoni Grotio, S. P. D.

**I**N rebus meis, Vir Ampliſſime, nihil actum; eo quod Curatores ſtato die non advenerint; ſed menſem diſtulerint adventum ſuum, quod nunquam antehac fieri meminī. De Wicelio uti & Strobæi eclogis, jam frater ad te ſcripſerit. Quare actum agere nolo. Nonnunquam dubitavi, annon uſui tibi eſſe poſſent Comitorum Græcorum ſententiæ, quibus tam multa bona ad oram alleviſſes. Hoc ſi eſt, ſcis tantum ſignificato opus eſſe. Gaudeo ſex tuos de vera Religione libros in lucem prodiſſe. Sunt illæ unicæ delitiæ multorum, & eos inter conjugis meæ, cui eo impenſius placent, quod domi ſuæ habet interpretem eorum, quæ circumlocutione quadam dicuntur à te, vel etiam ubi alludis ad hiftoriam minus in vulgus notam. Dubitavi interdum, an non in gratiam imperitorum utile foret, declarationem talium ad oram verbo annotari, vel ad calcem adjungi: quod jam alios ſcis in hymnis ſuis præſtitiffē. Nec tamen minutum adeo laborem ſubiri à te velim, ſed fratric, vel alio. Vellem cum his de Religione libris Latino-Belgica vel potiùs Belgico-Lati-

na tua *καλῶς* exiſſet. Parentes multi occaſionem haberent, egregia multa & diſcendi, & docendi ſuos. Loquor de hominibus bonarum literarum non ignaris, qui Latinis magis delectantur. Nam cæteris editione Belgica, toties jam repetita, ſatis jam conſultum puto. Tum autem ob oculos verſantur ſtudioſi adoleſcentes; quorum multi (dicere horret animus) vix elementa Religionis Chriſtianæ ſciunt. Imo quid illo vix opus mihi? Etiam abſque illo nihil dixerō *καλῶς*. Paucos adeo ex iis invenio, qui & Chriſti beneficium, & ſuum officium intelligant. Hæc Hogerbetio ſubito ad vos abitum parante, ſcribenda mihi exiſtimavi. De cæteris brevi per ſtudioſum quempiam, qui Lutetiam cogitat, faciam te certiorē. Salutem uxori lætiſſimā à me & mea. Item ſummis viris, Tilenō, Salmaſio, aliis.

Kal. Jun. clō  
lxxii.

*Tuus omni officio,*

G. J. Voſſius.

### XXXIII.

Gerardus Voſſius, Hugoni Grotio, S. P.

**A**mpliſſime, Clariſſime vir, jam diu expeſcto, ut de rebus meis aliquid ſtatuatur, quo, cum aliud non habeam, ſaltem hinc capere ſcribendi argumentum poſſim; ſed adhuc fruſtra fui. Nam etſi jam diu Curatoribus is animus fuiſſe videtur, ut vel Eloquentiæ, vel Hiſtoriæ univerſalis docendæ provinciam mihi decernerent: tamen ab aliquibus, partim apertè inimicis, partim *φίλοις ἀπείροις*, ſemper aliquid obſectum, quod hoc eorum propositum impediret. Attamen tam multa in hoc tempore concurrunt, ut aliud vix perſuadere mihi poſſim, quam proximo eorum conventu habitum iri rationem mei, vel potius Academiæ hujus: in qua humanitatis ſtudia magis magiſque ſordere incipiunt juventuti: ut niſi plurimum induſtria gloriſcenti malo obviam eatur, omnino futurum prævidēam, ut brevi barbaries omnia occupet. Nec cauſa obſcura eſt, cum nulla elegantioris literaturæ, humaniorumque ſtudioſorum præmia ſint; imo hæc ipſa invidiæ obnoxia ſint, apud eos, qui perſuaſum omnibus cupiunt, Neminem eſſe Theologum, vel Juriconſultum poſſe, niſi qui unum hoc per omnem egerit vitam: nec ætatis partem triverit in iis, per quæ gradus fieri debebant ad ſublimiora. Hæc ego ad te non ſcriberem, niſi nunc magis quam antehac unquam, veriſſimum eſſe comperirem illud, quod in Petro-

M

niano

niano Satyrico legere est, id quo nihil est majus, pueris indui adhuc nascentibus. Quamquam vero pestilens istoc fidus prope omnium animos inflavit: tamen non desperem posse nonnullis, quibus de luto meliore Phœbus finxit præcordia, noxiam adeo opinionem ex animo evelli, dummodo ne homines partim imperiti, partim invidi, tantum bonum impedire pergant. Interim de me utcumque erit, gaudebo, quod mihi sit mens sana in corpore sano: si insipientibus non visum uti opera nostra, dum possunt, illi, non ego infelicior fuero. Quin fortasse eo beator ero. Quod tu quidem, magne Vates, facile arbitror mihi concesseris: quippe qui alicubi cecineris, inter ea esse *Vitam quæ faciunt beatorem, Nulli pendere temporis tributum*. Sanè quamdiu ab hoc tributo immunis sum, sedulo id operam do, ut ne minùs sum negotiosus quàm soleo. Et nunc sub prelo est commentatio mea, de Historiæ natura, & scribendæ Historiæ præceptis. Quam arbitror intra hebdomadas duas lucem adspicere posse. Nisi fortasse moræ aliquid injecerint, libelli alii non absimilis planè argumenti, quos cum priori emittere propemodum stat sententia. Sed profectò quantò mallem hac ætate infumere operam meam studiis istis, quæ ad pietatem Christianam, Scripturarum illustrationem, vel Ecclesiæ historiam pertinent. Non malè, nec infelicitè puto, ornare hanc Spartam cœperamus. Sed temporum infelicitas, torrentis instar nos abripuit, ac levibus hisce literariis curis adfixit. Interim blandiorem auram exspectabo, qua provecti ad graviores curas, appellere iterum studiorum nostrorum navem, possimus. Tu verò, Amplissime vir, nunc, ut arbitror, omnia potes quæ vis. Nisi fortean excipere ea debeam, quæ ad nominis tui defensionem pertineant. Nam ex plerisque, sed minus amantibus tui, intelligo, Ordinum nostrorum Legatis, priusquàm Lutetia, ante annum, vel circiter discederent, illud fuisse promissum, nihil istic editum iri, quod Procerum nostrorum quicquam cum injuria sua conjunctum esse arbitretur. Sed longè alius animus eorum, qui in honore antea fuerunt, & illorum qui illis favent: quibus nihil adeò in voto esse videtur, quàm ut aliquid videant tui, quo mundus intelligat, quàm benè & patriæ voluerint semper & adhuc velint. Utris potius gratificari debeas; vel quid rebus tuis, aut publico magis expediat, scio à me minimè requiris, quem scis non multum sapere ultra ea, quæ ad molles Musarum Labores, ac Socraticos libellos pertinent. Adderem etiam sacros, si per eos liceret, qui, uti dixi, nihil illic sapere quemquam putant, qui non illo-

tis manibus, eos sit aggressus. Sanè video esse, qui summum Virum Tilenum Theologum esse negent; quem tantoperè Palatinorum Theologorum elogiis celebratum, ante annos aliquot vidimus. Nempe nunc minimà de plebe homines persuasum id aliis volunt, sedulo eum humanitatis studiis vacasse: atque inde esse quod sua tot bracteatis dictis, & vermiculatis emblematis ornet: cæterum quicquid istis operè infumfit, id decidisse arduo Theologiæ studio: quippe quod totum hominem requirat. Equidem nec ego quemquam velim meliorem ætatem istis unis terere, quæ tantum gradus esse ad Theologiam debent; sed quum putidum est, non posse de Religionis controversiis judicare, nisi qui linguarum trium genium ignoret, nisi qui historiam externam, & locorum situs nesciat, nisi qui differendi artem solum degustarit, tanquam canis Nilum; at animæ doctrinam, moralem scientiam, ea quæ de universalibus principiis, & affectionibus à Philosopho disputantur, ne attigerit quidem. Et quod omnium foedissimum est, non posse idoneum esse Scripturarum interpretem, nisi qui junioribus Magistris contentus, superfederit discere ex Antiquis, quid & alii senserint, & cur ita maluerint sentire. Quæ etsi profiteri minimè audent homines imperiti & malevoli: tamen quid aliud agunt, qui authores sunt juventuti, ut studia istec, quæ dixi, negligant; quippe inutilia, & sæpè etiam noxia: qui item undique produnt, nullos à se viliori loco haberi, quàm qui studiis istis adjuti ad graviora se contulerint? Sed istos missos faciamus. Ad te, maxime vir, revertor: cujus ex quo in Galliis fuisti, nihil videre contigit, præter ea, quæ de Pelagianismo disseruisti. De quibus te judicium meum jam ex aliis cognovisse scio. Sed ut illa non uno nomine magna cum voluptate legi: ita impensè desidero, ut simulac ab iis, quæ publicas curas spectant, otii aliquid nactus fueris, seriò cogites de emittendo Stobæo tuo. Exple, exple tandem augurium illud doctissimi, & de literis optimè meriti, Andræ Schotti, quod est in scholio addito Photii Bibliothecæ tmemate seu cap. 167. Præfagit, inquit, animus, (quid enim vetat ominari?) fore ut ope Photianæ Bibliothecæ, quæ latent, eruantur non pauci: & quemadmodum nunc exiverunt Hadrianus, Gelasius, Theophylactus, Simocatta, ac quædam etiam Diodori Siculi, sic quoque spes est, Stobæi Eclogas omnes capite truncas, alibi vitiosas, turbatas, mutilas, primo maxime & secundo libro, Philosophi alicujus opera, atque Philologi in integrum restitutum iri, ut apto illo colligentis ordine servato, majore cum Reip. commodo appareant. Et tibi, quod omnium primum

æcono-



*œconomiam Librorum, ac singulorum cujusque capitulum seriem, & Argumentum Photius accuratè designet: dein Augustanæ Bibliothecæ (cujus multa jam exstant in rem literariam beneficia) codex calamo exaratus: ut & nostra neque pauca, neque contemnenda fragmenta quæ ex Anton. Augustini V. C. gerimus, adferunt adjumenta. Nunc quoniam in medio palma est, huc Græcæ ac politæ Philosophiæ studiosos invito. Hunc ego locum adscripsi, quia contineret, unde peti possent, quæ novam Stobæi editionem ornarent. Gratulor vero Stobæo quod à longè illustriori manu medelam, ac decus suum accipiet, quam Schottus prælagire, vel sperare unquam ausus fuisset. Non dubito, quin scire aveas, quid sit de Seneca Tragico, quem ante annum atque amplius notis se suis illustrare velle receperat Scrivenerius noster. Ille verò lento adco pede, & verè testudineum in modum procedit, ut multum videatur timere, ne, si alius esse occipiat, quàm solet, cognomen Lentuli amittat, per quod à te patriciis Romanorum familiis sibi insertus videtur. Hæc res facit, cur neque quæ ipse in fragmenta Tragicorum meditabar, lucem adspexerint: neque item illorum quicquam, quæ transmiseras ad utrumque nostrum. Non ignoras, me à multis retro annis Originum libros moliri. Iccirco impensè aveo nosse, num brevi sint proditura, quæ de eodem Argumento scripsit clarissimus Salmasius, ut cognosco ex notis ejus ad Historiæ Augustæ scriptores. Multum metuo, ne si vir tantos suos edat labores, ego meos æternum premere cogar. Et tamen nihil magis desidero, quàm ut nobile ejus viri opus quam primùm adspiciat lucem. Potero meas copias in arctum cogere eaque solum adferre, quæ Salmasius velle dicere neglexerit, vel contempserit. Ita non planè mihi peribit labor meus, qui multis mihi vigiliis stetit. Et interim hoc lucrabor, quod si Salmasiana priùs prodierint, ego iis visis meliora, certioraque edocebor in multis ubi nunc hæreo; Nec enim vulgare quicquam ab eo expecto, cujus ego *ἐνδοξία* in corrigendis Scriptoribus Antiquis satis mirari non possum, nec prædicare unquam definam. Quod verò ad Romanorum Antiquitatum intelligentiam, quem cum eo componere possimus plantam non video. Alias ejus viri laudes prætereo, tibi magis cognitæ. Mihi quidem, quoties aliquid mei lucem videbit, prope decretum, quoties ad illud mitto, etiam exemplum addere ad summum illum virum; non quia tanti mea esse putem; sed quia committere non possum, quin ostendam quanti à me fiat. Et quod caput est, opto ei innotescere. Quod ea occasione per te commodè fiet. Nam tu, vir*

Amplissimè, qui me meaque amare soles commendatione nugarum mearum pretium illis addes, quod à se sperare non audent. Utinam verò pròdesse tibi in aliquo possem vicissim? sed jam diu est, quod affectu meo contentus esse soles. Quare verbum non addam, nisi quiddam de affine mea, & eo qui illius ambiit nuptias. Equidem optassem; & ille ut tristibus his temporibus, de conjugio minimè cogitasset, & nostra, ut magis à secundis nuptiis abhorruisset, hoc saltem tempore. Virum quidem novi ab annis triginta & amplius; etiam his annis circiter quindecim familiares fuimus, quantum loci intervallum quo plurimum distinguebamur, item temporum ratio sinebat. Indolè optima semper mihi visus fuit, moribus etiam honestis, & politiori literatura, quod rarum est in ejus professionis homine, eleganter est excultus sed cogito semper mecum, quantis, munus, quod sustinet, sit periculis involutum: tum autem si terras cogitent, alio sub sole jacentes, metuo ne ea nostræ sit corporis imbecillitas, ut longiori itineri minimè par sit futura: adhuc longè aberit à sanguine, & affinitate junctis. Propter ista & quædam alia, author conjugii esse non potui: nec tamen in dissuadendo libertate ea ausus fui uti, quæ fortassè requirebatur. Videbam enim alios hic esse qui impensius suaderent. Tum autem minimè tam obsecram naris, ut ex colloquiis & aliis non animadvertirem, quanti faceret conjugii bona. Adhuc metuebam, ne si hic alteram duxisset, non inferioris fortis, nostram verò peteret nemo nisi inferioris conditionis quàm iste est, illa fieret *ἡ αὐτὴν γυναῖκα*, quod pulchram illam, ut tum videretur, conditionem disfluere passa esset. Dixi igitur interdum, mihi sic videri, seu abnueret, seu annueret, fore ut postea poeniteret. Sed cur poenitudine duceretur si annuisset, vix aliam adferre causam poteram, quæ alicujus momenti ei videretur, nisi quod aut longissimè abeundum foret à suis, aut si maritus iis in locis, in quibus esset, remaneret, illa in perpetuo versatura sit metu, ne is experiri eandem cogatur fortunam, quam aliquot eorum, qui ejus sunt conditionis, nunc discere coguntur. Illa ad hæc; Meliora se tempora sperare: & si quid adversi Dominus immittat, confidere eundem etiam spiritu suo roboraturum. Habes, Amplissime vir, quæ nunc occurrebant. Deo immortalis primùm gratias ago, quod tibi & familiæ toti benè adeo sit: deinde eum supplicibus votis oro, ut hoc bonum diuturnum esse velit, quo diu Reipublicæ, & Ecclesiæ utilis esse possis. Uxor multum te salutatur. Etiam utriusque nostri nomine salutem dicito rari

exempli fœminæ, conjugii tuæ, quam ego post tot adversa ex marito suo solidum capere gaudium non minus lætor, quàm propria si res ageretur; si benè memet novi. Nec præterire possum Clarissimum, & *ἡμιολογιστὴν* Tilenum. Penè est ut addam magna quædam nomina, quorum extrema tua Sylva meministi. Sed metuo ne meum hic delitescentis nomen fortasse nec fando unquam acceperint.

Lugd. Bat.  
clō Ioc xxii.  
Idib. April.

Ὁ σὸς ἡμιολογιστὴν καὶ ἡμιολογιστὴν,

Tuus ex toto corde,

Ἡς. ὁ Ἀλφειῶν,

G. J. Vossius.

#### XXXIV.

Hugoni Grotio, Gerardus Vossius S. P.

**V**IR Clarissime, Amplissimeque, vellem diem unum alterumque scribendi officium differre licuisset. Potuisssem fortasse certius aliquid ad te perscribere de rebus meis. Est enim hodie octavus Augusti, quo, uti nostri, convenire Academiæ hujus Curatores solent. Sed nefas putavi, ut sine literis meis Lutetiam iret Vir Illustrissimus Anth. Maurerius. Interim planè arbitror fore, ut intra triduum de professione, si non ipse multum gaudeam mihi, saltem plurimum gratulentur mihi amici: qui causas non planè leves adferunt, cur malint, me in publico munere versari, quàm privatim mihi canere, & Musis. Tamen fuit qui insurraret, vereri se, ne aliquid incommodet rebus meis, quod inter literas interceptas quædam ad me scriptæ forent. Id mihi parùm credibile videbatur, quia de nullis rebus Epistolæ nostræ loqui solent, nisi privatis, aut innocentibus Musis. Quicquid erit brevi resciscam. Simul illud cognoscam, quid ad me libri miseris. Fuit qui putaret esse aliquid Clarissimi Salmasii. Alius intellexisse se dicebat, esse librum à Cl. Rigaltio missum. Quod si est, credo fuerit Onosander meus. Id si est, perierit fortasse mihi. Nam etsi librum amo, tot locis manu Scaligeri correctum: tamen non tanti duco, ut temporibus his, quibus suspicionum plena sunt omnia, reposcere cum digner à Procerum nostrorum conventu. Dissimulabo potius rem omnem. Hæc nunc paucis: sed intra octiduum alteras à me literas expecta: præsertim si quid actum erit in rebus meis.

Salutem Conjugi, Tileni, Salmasio, Rigaltio. V. V. C. C.

viii. August.  
clō Ioc xxii.

Tuus totius,

G. J. Vossius.

#### XXXV.

Johanni Berkio, *Belgiæ fœderatæ*  
*Ordinum Legato, ad Serenissimam*  
*Remp. Venetam.*

Illustrissime Domine,

**C**UM eximias animi tui dotes, maximè semper fecerim, & ejusce rei argumentum aliquod extare publicè cuperem; neque me fugeret, quantoperè me obstrictum teneres: Ita judicavi pusillum hoc, de arte Rhetorica, quia aliud ad manum non erat, præclaro nomini tuo, inscribendum esse; non quidem ut paria tecum facerem, quod fieri omninò non potest; imo ne quidem ut vincula, quibus sum tibi devinctissimus, paulum saltem videar laxasse: sed potius ut morem animo gererem meo, quem & tibi obligatissimum esse, & in nexu adhuc manere, ingenue agnosco. Unicè igitur rogo, ut nihil aliud hic spectes, quàm mentem devotam, lubensque à cultore id tuo accipias, quod nunc est tuum. Hæc fiduciâ tantillum minusculum viro tanto mittere non metui. Et quomodo aliter mihi persuadeam de eo, cuius, & humanitatem erga omnes, & summam erga me benevolentiam, semper sum expertus. Utinam modo mihi, de nonnullis aliis, in Batavia similia possem polliceri. Quod non temerè opto: Quemadmodum enim vitis, non sine ulmo adsurgit; ita ut optimè nosti, nec eruditio, nec virtus, se facile attollit sine summorum virorum præsidio, aut tutela. Interea gaudeo non mediocriter, de favore Amplissimorum Academiæ Curatorum erga me. Sanè quàm non omnino immemores sint mei, vel hinc vide, quod nunc quartum mensem, eloquentiæ studium, & omnis ævi historiam, vel verius *ἡμιολογιστὴν*, publicè profiteor. Ipse etiam, ne consilii hujus pernitere eos possit, sedulò Spartam meam orno. Itaque & frequentia auditorum à nemine vincor. Quamvis non ignoro hoc potius tribuendum esse gratissimo argumento, quod tracto, quàm doctrinæ meæ. Utinam enim non quantum minuto isto, quod dixi, fortasse exuperio alios, tantum à cæteris, & ingenio vincerer, & eruditione. Sed ut Poeta ait,

Non

— Non omnia possumus omnes.

Noli autem putare, quia nunc publicè docendo, tempus infumo, eò me sollicitum non esse, de iis scripto consignandis, quæ labore multo observavi. Nam quanto aliter sim animatus, argumento erunt libri mei, tum quibus de Historicis tracto, tum quibus tempora omnia digero. Volui, ut tibi, otii mei ratio constaret. Ac propterea duos priores operis, de Historicis Græcis, (qui soli excusi) ad te mitto; ut inde de cæteris conjectes. Eosdem misi ad Illustrissimum Dominicum Molinum, quem mea alicujus facere intelligo. At Libellum dicatum tibi, tum eidem seorsim cum literis transmissi; tum Clarissimo Balthazari Bonifacio; aliorum nemini; quando cum his folis literarum mihi commercium intercedit. Tertius accessisset Paulus Servita, quem virum ob virtutem, plurimum semper æstimavi. Sed non multo postquam amicissimè salutem mihi adscribi jusserat, per Illustrissimum Dominicum Molinum; Cœlestis Pater, ex misero hoc orbe eum in meliores sedes transfudit. Aliud nunc nihil habeo, quod scribam; nisi dum tanto tu intervallo à Patriâ, sed Patriæ causâ, abes; assiduè vota me facere pro salute tua, & uxoris, veræ heroinæ, ac torius familiæ tuæ, multumque me desiderare diem illum, quo in Bataviam reversis, foelicem gratulari adventum licebit. Plurima salute uxorem tuam, cognatam suam, impertit conjux. Sed etiam meo nomine salutes rogo: Uti & amicissimum Colvium; quicum utinam, priusquam in oras istas abiret, loqui paucis licuisset. Fuiſſet hoc ex re utriusque nostri. Vale, Illustrissime Domine Legate, & nos amare perge.

Lugd. Bat.  
v. Kal. Apr.  
c1010cxxxiii.

*Illustris nominis tui Cultor,*

G. J. Vossius.

### XXXVI.

Ludovico Crocio.

**G**AUDEO, Clarissime Croci, usque adeo tibi probari Amstelodamentium institutum. Et profecto, si rem suo momento, non invidorum judicio, ponderemus, nihil conducibilius fuerit, hisce præsertim temporibus, quibus literarum contemptus apud nos etiam indies gliscit. Ad eum sistendum non leve pondus afferet, si civitates illæ, quæ inter Europæas caput extulere, ostendere cœperint,

se vere esse Mercuriales, non dimidium colere Mercurium, illum nempe mercium dominum, non item eloquentiæ præsidem, quæ sine sapientiæ studiis est nulla. Sanè Amstelodamo ad perfectum laudum cumulum nihil mihi unquam deesse visum fuit præter unam literarum gloriam, ut ea quoque augeri possit, uti ei, ut non neminis alius, de quo jam quædam mustant nonnulli, sic & Willii nostri opera esse possit. At faveo ei utroque, quod dicitur, pollice. Sed utrum iis in studiis, quæ ille profiteretur, cujusquam opera uti velit, præterquam eorum, quos jam vocarint, tum demum scire potero, cum eo pedem tulerò. Quod *de Jussis*, futurum est post mensem. Sed sive id succedet nobis, sive secus erit, non patiar ulla in re affectum meum desiderari. Plane enim virum amo, non jam amplius ob commendationem tuam, sed ob egregias animi dotes, quas ex sermonibus ejus sæpius perspexi, sed imprimis ex disputatione in sacris publicè suscepta, cujus ille præmium, magno totius Academici senatus consensu, retulit, quam doctoralem lauream nuncupamus. Gratulor eo nomine & illi, & clarissimo ejus parenti, & urbi vestræ, quæ eum dedit, planeque sic auguror, hæc jam semina esse lætissimæ segetis, quam Ecclesia dei universa quandoque ex eo metet, imprimis vestris, vel, quod non minus opto, nostris terris. Vale, vir summe & amare nos perge.

Post. Kal.  
April.

Tuus,

G. J. Vossius.

### XXXVII.

*Reverendo in Christo Patri D. Lanceotto Androsio, Episcopo Wintoniensi, Regi Magnæ Britanniæ à Sacris, & Secretis Conciliis.*

Reverende in Christo Pater,

**N**ON possum non magnopere dolere propter immaturum obitum Cluverii nostri. Nam & amicum amisi, quicum multos annos conjunctissimè vixeram: & cogito, quantum damnum morte ejus fecerat Respublica literaria. Accedit quod reliquit liberos parvulos, utroque parente orbatos, & in re angusta adeò, ut quo pacto honestè possint educari, equidem non videam. Paululum tamen me recreat, ac reficit, quod puerorum avia superest, bona fœmina, gente Britannia,



tanna, atque, ut intelligo, honesto admodum genere orta. Ea nunc in patriam redire parat, eo animo ut periculum faciat, num recipere bona valeat, in quæ alios iniquè invollasse conqueritur. Utinam per te, vel per amicorum tuorum aliquem, uni alteri eorum, quorum est de talibus iudicium ferre, seriò commendetur, ut, si causa æqua est, facilius, quod cupit, obtineat. Sanè nihil melius, Deoque gratius, quàm viduas & pupillos tutari, ac juvare. Et omnium, quotquot liberalia studia non tralatitiè tractamus, hoc votum est, ut ne carissima summi viri pignora, penitus abjecta desertaque relinquuntur. Tuam verò hac in re benevolentiam ac favorem propemodum spondemus nobis, quia præter raram eruditionem ac eximiam prudentiam, hoc etiam divinâ bonitate habes, quòd ad alteri benefaciendum paratiorem noverimus neminem. Cujus ego animi tui domesticum habeo exemplum in affine meo Junio. Nam benefacta erga eum tua, cum per se magna sint, tum eò gratiora sunt nobis, quòd ferè id temporis benefaciebas ignoto, quo noti, sed virtutis inimici injuriis afficiebant. Ac ne nunc quidem erga eum minuitur paternus affectus: Sed tantò amas ardentius, quantum illi cum ætate virtutis & eruditionis amor crescit. Sed his nunc non insistam. Duntaxat orabo, ut affectum hunc porrò conserves. Ad res meas, quod attinet, profiteor in Academia hac, tum Eloquentiam, tum Historiam, tum potius Chronologiam Universalem. Munus est luculentum ac videor etiam hanc Spartam non segniter ornare. Sanè & Academiæ Curatoribus, & Collegis, & juventuti satis probatur opera mea. Interim hoc studium multum abest à sacrorum studiorum dignitate. Profectò si verum dicere licet, post Pessinuntium asellum Diaria summa. Sed Spartanâ hoc patientiâ concoquendum. Quod eò facio libentius, quia si minus ex me commodi redundet ad Ecclesiam Dei, quàm vellem: nulla tamen hic culpa est mea, sed temporum quibus veneranda antiquitas vix ullos sui invenit amatores: atque adeò solida eruditio non modo despiciatui, sed etiam odio est. Sed fortasse erit aliquando, cum hæc corrigantur. Hac spe nos solabimur. Quæ si nos destituat, bonâ tamen conscientia subnixi, meliora expectabimus post hanc vitam. Deus, Reverende in Christo pater, diu te Eccl. Anglicanæ, & bonis omnibus servet incolumem.

Lugd. Batav. v. Id.  
Jun. A. clō Ioc xxvi.

## XXXVIII.

Gerardus Joannes Vossius, Joanni Adolpho Fabro, S. P. D.

**P**Ergratæ quidem fuerunt mihi literæ tuæ, sed ita assidue distringor, ut penè, quò me vortam, nesciam, & tamen diutius tibi debere responsum incivile videatur. Præsertim cum te ob doctrinam & summam humanitatem diligam ut debeo. Atque auget non mediocriter hunc affectum, quod Spartam illam, quam nactus es, sedulo ornare studes: ut ex literis tuis facile perspexi. Perge hoc pede, mi Faber, & ominis hoc inesse crede nomini tuo, quòd affabre debeas fabricare ac formare animos juventutis. Sane melius mereri non possis de Rep. Neque ignoro, per plurimos de Ordine Scholasticos sentire & loqui. Non nemo etiam ideo lubentius facit, ut mihi ægre sit, quem scit in illud incumbere, ut melius sit studiis adolescentiæ. Sed contemnere nobis liceat contemptores muneris honestissimi: qui ne illud quidem essent, quod sunt, nisi bene iis esset ab illis, quos carpunt, cantharidum instar rosas arrodentium, è quibus nascantur. Quæris, quod Logicæ compendium maxime probem. Rarum laudas, quem non contemno, imò Adolescentulus valde capiebar. Non æque aliquanto adultior. Nam quantum mihi ætas crevit, tantum & amor Aristotelis, & Græcorum interpretum. Quare nunc quoque difficulter ab iis me avelli sino. Sed non hi ad captum pueritiæ: cui accommodatiores, Hunnæus & Crellius, quos puer didici: item Molinæus, Præceptor meus & Burgerfidiæ Collega, nec tamen alieno hac in re iudicio præscribam. Meum promo, quia petis. Quod eo lubentius facio, quia quandoque indignor, cum jacere sic video, qui Veteres sequuntur. Itaque jam videas ab hominibus non indoctis recentiores advocari ad partes, si quid dicant, quod millies dixerint veteres. Ut si Erasmus cites in Apophthegmate, quod apud Plutarchum, Laertium, atque alios legatur. Hoc qui faciunt (qui magno sunt numero) ostendunt profectò, quam hospites sint in antiquitate. Sed improbare ineptias istas possum, corrigere non possum. Nec omittere tamen potui, quia non injucundum est tecum colloqui, qui mihi visus es amare bonam mentem, quod pauci admodum faciunt. Video etiam te laborare de ratione brevissimo tempore docendi elementa Linguae Græcæ. Sane multi hîc peccant: qui non distinguunt inter ea, quæ præceptis cognosci, quæque usui addisci

addisci oportet. Si aliquando excurreris, de eo primus nobis sermo esto. Nec graver nunc pluribus eam rem exponere per literas, nisi aliis distinerer. Quamquam quid ego ista ad te, quem scire illa scio? & in vicinis etiam locis (fortasse & in urbe tua) homines habes eruditissimos, qui nec ista, ut arbitror, neglexerint. Dicas, te meum quoque iudicium cognoscere avere, fortasse ita est. Sed ego censeo, te magis ista exquirere, ut argumento aliquo scribendo aperias affectum erga me tuum. Quem ego sanè amo & amabo semper, mi Faber. Nec propterea, si omnino etiam de eo iudicium requiras nostrum, gravabor illud perscribere, & tamen, si verum dicere amemus, fateri oportet, facilius illud paucillo sermone explicari posse, quam longâ etiam Epistolâ. Pro munusculo gratias ago: sed cave deinceps idem agas, nisi remunerari me voles luculentius quam præisti.

Lugd. Batav.  
Poitr. Kal. Sept.

## XXXIX.

Ludovico Crocio S. P.

**M**agnum mihi dolorem attulit obitus summi, & viri & amici Matthiæ Martinii, Collegæ tui. Nec tamen tam meam doleo conditionem, quam Ecclesiæ, quæ magnam in hoc viro iacturam fecit. Sane quotidie mihi decreverunt eorum numerus videtur, qui aliquid in studiis vident supra vulgus. Atque hoc eo pejus me habet, quod tam paucos esse video, qui bono Ecclesiæ potius, quam affectui suo ducantur. At in eo, quem amissimus, ambo hæc erant, omnigenâ eruditione nulli in Germania cedebat, & sciebat, quantum omnes paci & concordie Ecclesiæ debeamus. Scio quosdam aliter de hoc viro loqui, sed quales profecto? nempe, ut puto, qui foris sint lyncei, domi fortasse talpe. Qui Cantharidum instar in rosis latitant, atque hoc agunt, ut, quod nec literatos, nec Christianos decet, venenum aculeo suo affundant: sed & tales ferre animus. Nam si non laborent ipsi, cuiusmodi dicant cur laborem ego, quid dicant? Quare surdis ea auribus transmittito. Apud bonos tamen & cordatos viros famam ejus & honorem tueor, uti convenit. In quo ipso aliquâ opus prudentiâ propter quosdam majoris zeli, quam scientiæ. Scripsi hæc non sine dolore. Quamquam enim jam aliquamdiu est, quod à te tanti amici obitum intellexi, quoties tamen de turbatis

adeo Ecclesiæ rebus cogito, dolor omnino recrudescit. Sperabat summus ille vir Funiant se familiæ quodammodo jungi posse, eam ducendo, quam affinis meus viduam reliquit. Neque per me unquam stetit, quo minus voti hujus compos heret. Sed ætas ingravescens scrupulum injiciebat. Et præterea minuta quædam, quæ nihil attinet referre, cum ea per te videas. Et fortasse non idem erga virum affectus omnium fuit, qui meus. Nunc tamen non successisse negotium gaudeo: partim propter liberos Martinii, quibus secundæ hæc parentis nuptiæ damnosæ fuissent: partim etiam propter fratrem, & nos ipsos, qui non tantum gaudii ex ea conjunctione cepissemus, quantum doloris ad nos, ex brevitate connubii rediisset. Desidero scire, ecquis defunctum laudavit, & an ea oratio jam viderit lucem? Nemo quidem ad hanc rem magis fuerit idoneus, quam tu, Præstantissime Croci, qui animum & virtutes viri plane perspexeras. Quare, si quid operæ in hoc à te insumptum, publicum videat. Pulchrum sit Martinio laudari à tam laudato viro. Nec periculum facile est persuasum virum fuisse majorem quibusdam, qui primas nunc ferre creduntur, opinione non sua modo, sed etiam aliena. Quæ de re plura dicerem, nisi hoc alienam quodammodo reprehensionem habere videretur.

Vale, doctissime & amicissime Croci, tanto quo semper amicio futuro, quanto sanctiorem apud te Martinii nostri memoriam semper fore intellexerim. Salutem meo die nomine optimo & eruditissimo Cochio, cuius operam in edendo Sanhedrin & Maccoth valde probo, & surgenti ejus gloriæ ex animo faveo atque applaudo.

Lugduni Bat.  
Kal. Octobr.

Tuus,

G. J. Vossius.

## XL.

Ludovico Crocio, S. P.

**V**aldè me delectavit, quod literæ tuæ sic amorem spirent erga & maxime amicum Martinium. Nimirum talis esse bonorum amor solet. Non ille cum vita amici exstinguitur, sed etiam ubi eum frigida mors sustulit, vivit tamen flamma, quam ejus virtus in pectore nostro accendit. Willius tuus imo nunc etiam meus, non solum mihi commendatione tua & paterno decore, sed & suis virtutibus carissimus est. Subinde me invisit,

ac

ac mirificè colloquiis ejus, & suavissimis moribus capior. Hyeme hac subsistere hic decrevit. Si qua in re utilis ei esse poterit opera mea, nusquam deero. Cochium Hebræas apud vos literas enarraturum intelligo. Eo nomine gaudeo, ac tum ipsi, tum illustri Scholæ vestræ gratulor; res Ecclesiæ nostræ necdum in liquido sunt. Metuoque ne Auster aliquis turbidiores reddat, quam nunc sunt. O utinam medium tenere cursum semper liceat inter Symplegadas, hinc effrenis licentiæ, inde jugi humani. Sed tum nimia curiositas, tam odium ac metus nesciunt modum. Nec ista corrigere est opus humanæ. Hoc ut cum poeta loquar *ὅτ' ἐν γύμνῳ κῆρυ.* Cui te post breve adeo alloquium commendo. Neque enim nunc multis te distinendum putavi: cum Vander-Bekius tibi futurus sit vi-væ Epistolæ loco. Ex eo igitur tum Reip. tum Ecclesiæ statum abunde, ni fallor, cognosces.

Lugd. Batav.  
Kal. Decemb.

Tuus sine fæto ac fallaciis,

G. J. Vossius.

## XLI.

*Clarissimo & undecumque Doctissimo viro,  
Jano Grutero, J. C. & Historico  
Electoral.*

CUM Historiarum notitiâ, vir Cl. comparatum est, quemadmodum tum cum Sole, Luna, & Astris, quibus Lucis nihil encommis accedit, aut convitiis decedit: tum cum Marco illo Catone, cujus gloriæ, ut ex Livio scribit Hieronymus; neque M. Tullius laudando profuit, neque C. Cæsar vituperando obfuit. Quare operæ haud existimo, de præstantiâ ejus, ac necessitate laudum corollam plectere. Illud mihi potius faciendum videtur, ut consilii mei rationem aperiâ; sed paucis. Nam quisquis te novit (& quis non novit in Europa?) Is scit quantum historiâ alios antistes. Et hæc nostra commentatio de historiâ, quæ ad scribendam historiâ viam sternit. Hui, inquit, Quis paucas istas pagellas ad virum non nisi lacte gallinaceo, certè magnis quibusque dignum? Quo colore factum hoc purgem? Num minutum quippiam me affectasse dicam, quia id quod de Poematis dicebat Aristoteles, de quibusque libris verum est, nempe quæ insanæ sunt magnitudinis, non magis esse pulchra, quàm supra modum magnum Animal. *Ὅτι δὲ αἱ μὴ ἡ διαίτα γινῆ, ἀλλ' οἷον τοῖς θηρίοις τὸ ἐν*

*τὸ ὅλον ἐν τῇ διαίτῃ.* Neque enim funeral inspectio eorum fieri potest, sed subterlabitur ex intuituum contemplatione, illud unum & totum. Atqui ut idem mihi inquit, nec quicquam admodum exiguum fuerit venustum: *οὐκ ἔστιν ὅ ἡ διαίτα ἰσχυρὴ τῇ ἀναδείξει χεῖρα γινῆ.* Confunditur statim inspectio, quæ brevissimo fit temporis momento. Sed & in rebus modus servari potest, aureaque mediocritas. An potius, quoniam multa hodie ingentia scribi volumina videmus in quibus, ut facetus Comicus ait,

*Gerræ Germanæ, atque ædopol liræ liræ,*

Idcirco dicam mihi placuisse semper, placitumque æternum Lucretianum illud,

*Parvus & est Cygni melior canor ille Gruum quàm  
Clangor in æthereis, dispersus nubibus Austri?*

At non quia *καλλιμαχὸς ὁ τεταρταῖος τὸ μέγα εἶδος* Ἰων ἐλεγεῖν *τὴν τῆς ἀρχῆς ἐξουσίαν*, ut scribit Eclogarius Athenæi: Ideo liber quilibet pusillus magnum bonum, sed sæpe pusillum, imò magnum interdum malum: ut inte in omittam, illum ipsum Cyrenensem Callimachum, tandem malevolorum calumniis adductum, ingens Hecates poema edidisse. Unum occurrit quo spero culpam hanc, si qua est, eluam. Humanitatem summam esse itatuo, in peritissimo totius humanitatis; carhque in me opinionem alit, tum relucens in tot monumentis tuis summa humanitas, tum eorum de humanitate tua iudicium, qui ro-verunt familiaris. Itaque etli,

*Non tam aversus equos nostra sol jungat ab urbe.*

Ut ignorem acre tuum ingenium, & excellentem eruditionem: tamen si id peccare est, audendo peccare fatius fuit, contra magnitudinem, quàm non audendo contra humanitatem. Aliis satisfactum spero, tibi scio: sin minùs, una superest via, ut Libellus sit tibi Ajax Augusti, tuamque in spongiâ incumbat. Atque hoc eo leniori animo feram, quòd haud magnum ei laborem impensum agnoscam. Certè si vel minimum laudis indulseris, ut Afranius in Thaide, *majorem laudem, quàm laborem invenio.* Verùm metuo, ne nimis hanc laboris, & operæ parvitem, parvitas, levitasque operis augeat, dum minute quid, ac subfrigide, at nihil observate, curiosèque scripisse iudicabor. Quod si est, nihil superest aliud, quàm ut Soricis instar, suo libellus pereat indicio: Et quia ad te emendandum mitto, urâ emendetur liturâ, quomodo Plutarchus scribit



\* Lib. 2. de  
Alexandri  
fortuna.

\* scribit Philoxenum, cūm sibi  
Liber ad emendandum esset tra-  
ditus, ἐνδὺς ἀπὸ τῆς ἀρχῆς εἶλον μήχην τῆς  
καρναλίας & μετῃ ἐλάττω. Vale, Vir Cl.

Et si mereor, imo immerentem quoque amo-  
re complectere.

## XLII.

Clarissimo viro, Jano Gruterō.

Vir Clarissime, Conjunctissimeque Affinis,

**D**olorem meum quem cepi, ex tristissi-  
mo Palatinatus casu, non mediocriter  
auxit, quod Te quoque, cujus merita, erga  
Orbem Universum, nemo unquam fatis  
prædicaverit, incendium hoc adflarit. Vo-  
lupe interea fuit, quod ex literis tuis intel-  
ligo, rectè Te valere, animoque esse constanti  
in his malis. Multum etiam me recreat,  
quod, uti complures mihi retulerunt, Fran-  
keram es vocatus; ut Academiam hanc luce  
tua illustres: Atque adeo etiam, ab serenissi-  
mo Daniæ Rege, honestissimo stipendio in-  
vitari diceris, ad ornandam Academiam  
Hafniensem. Quantum mallet, nobis ad-  
esses? Utinam hæc res iis curæ foret, qui  
consilio valent apud eos, quorum in manu ea  
res est. Sed mihi non est animus, querimoni-  
am de his temporibus instituere, quibus  
propè omnes omnia metiuntur commodo  
suo, nec alios, quàm felices colunt. Quin  
Spartana potius patientia hæc concoquemus.  
Interim impensè scire desidero, utram vo-  
cationem, si vera intellexi, cogites amplecti.  
Mallet si non nobiscum, saltem proximis  
nobis fores. Sed tamen magis consultum  
volo commodo tuo, quàm desiderio meo.  
Eloquentiam hic ego, simulque Chronologi-  
am profiteor. Honestum fateor munus, sed  
sacra malim hac ætate, præsertim quando, ni  
me nimis amo, haud impares sumus, sanè ut  
ita semper literas, & Philosophiam tractavi-  
mus, ut is potissimum nobis scopus foret:  
Interim solatiolo est, quod sic quoque profu-  
mus publico. Florentissimo quidem Audito-  
rio fruimur, si hic quisquam alius nunc, vel  
antehac etiam. Lis Computiana, ante Pa-  
schales ferias decideret, nisi fallunt penes  
quos ejus dijudicandæ est potestas. Occasi-  
onem nactus, per Commelinum Francofur-  
tum euntem, mittere ad te volui Libellos  
duos; Unum quo historiæ naturam, ac præ-  
cepta complexus fui; Alterum de Historicis  
Græcis; Tertius qui est de Historicis La-  
tinis brevi, & ipse, lucem videbit. Spero  
eos haud tibi ingratos fore, non eo tantum

nomine, quia à me proficiuntur, quem à te  
amari scio: Sed etiam quoniam fieri aliter  
non potest, quin qui tamdiu ea cum gloria  
illustri loco, historiæ sis professus, atque in-  
ter tot Scriptores, etiam Historicos, usque  
adeo multos felicissima curiositate restitueris,  
& illustraris; eorum & ipse approbes cona-  
tum, qui quomodocunque, de Historia, &  
Historicis, benè student mereri. Salutem  
plurimam Uxor Tibi dicit: Item Amplissi-  
mus Rutgerius, & Collegæ mei, Heinsius,  
Meursiusque; adhæc Scriberius, & quos ali-  
os salutari jusseras.

vi. Eid. Mart.  
clo lxx. xxiv.

Tuus omni officio,

G. J. Vossius.

## XLIII.

D. Fulconi Grevillo, Equiti aurato,  
Baroni de Brook, Serenissimo Regi  
Magna Britannia & Secretioribus  
Consiliis; S. P.

**I**ncredibili voluptate perfructus fui, cum in-  
telligerem te, generose Domine, in quo  
cum illustri Natalitium splendore, & summa  
dignitate non excellens modò virtus, sed ex-  
imia etiam eruditio, suaviter conspirant; &  
me natum scire, & præterea amare, & tanti  
quoque facere, ut dignum existimes, cui inter  
florentissima Cantabrigienfis Academiae lumi-  
na, te auspice, tribuatur locus. Equidem  
non tam habeo, quam Poeta appellat, carne-  
am fibram, ut non sentiam, quantæ, & glo-  
riæ, & utilitati, ea res mihi, & liberis meis,  
esse possit. Tum autem quid jucundius fue-  
rit Ecclesiasticæ Antiquitatis amantissimo,  
quàm in ea vivere Ecclesia, quæ, seu doctri-  
nam salutarem, seu exteriorem Ecclesiæ fa-  
ciem attendas, Apostolico ævo, & proximis  
seculis, simillima videatur? Quamobrem non  
possum non beatum me putare, quòd Deus  
animo tuo honestam adeò de me opinionem  
inspirarit. Sunt interea pauca quædam, de  
quibus aliquanto certior fieri delidero. Ut  
super lectionum de hebdomade numero, &  
imprimis de habitaculo, quod, ut arbitror,  
uxorem liberosque habenti non nisi extra Col-  
legium esse possit. Atque hæc, licet in voca-  
tionem tam præclaram magnopere propende-  
rem, scribenda nihilominus putavi. Simul  
ut quomodocumque gratum animum testari in-  
ciperem, literis meis comites addere volui li-  
bellos hæcenus à me editos: quos vel eo no-  
mine haut ingratos fore confido, quòd à  
sum-

summo excellentissimarum tuarum virtutum admiratorē proficiscantur. Quod si Deus valetudinem & otium concesserit, consequentur & plura & meliora, quorum partem jam habeo confectam. Deus te, Illustris Domine, diu Magnæ Britannæ Regno, summo literarum & literatorum bono conservet.

*Lugdun. Bat.*  
clō Iocxxiv.  
Idib. Sept.

*Illustri Nomini tuo*  
*devotissimus,*

G. J. Vossius.

#### XLIV.

*Amplissime Doctissimèq; Domine Boswelle,*

**I**ntellexi ex nobilissimo Dom. Carletono, quàm præclare de me sentias, strenuèq; operam des, ut in florentissima Cantabrigiensium Academia perhonestum teneam locum, seu Historiam profitens, seu scientiam Civilem. Equidem fore hoc pacto video, non tantum ut illustriori loco constitutus, majori nominis luce circumvestiar: sed etiam, ut amicitia & colloquiis fruens summorum Academiae ejus virorum, maxima & pietatis & doctrinæ capere possim incrementa: tum autem, ut ad plures industriae meæ, & qualiscunq; eruditionis fructus redundet: ut interea de rei familiaris incremento nihil dicam. Metuo sanè, ne pro tali ac tanto beneficio pares unquam gratias referre possim. Sed velle tamen non desistam. Interea hoc promittere habeo, nunquam fore, ut te consilii istius possit poenitere. Is enim mihi animus semper fuit, ut pro viribus & publicè & privatim quâ voce, quâ scribendo, consultum irem publico bono. Quamvis autem planè eò propendeo, ut ad honestam adeò conditionem si vocer, sequar: tamen quædam ante operæ fuerit scire. Super quibus scripsi ad Generosum Dominum Baronem de Brook. Literarum earum exemplum Epistolæ huic addendum putavi. Vale Amplissime & Præstantissime Boswelle, atq; amare nos perge.

*Lugd. Bat. Idib.*  
*Septembr. clō*  
*Ioc xxiv.*

*Tibi merito tuo Ob-*  
*strictissimus,*

G. J. Vossius.

#### XLV.

*Nobilissimo & Amplissimo Dom. Dudleio*  
*Carletono, à Secretis Concilii Regii*  
*Magnæ Britannæ.*

*Nobilissime Domine Carletone,*

**E**N tibi literas, quas exaravi tum ad Generosum Dominum Baronem de Brooke, tum ad Amplissimum Dom. Boswellum. Etiam exemplum utriusq; epistolæ vides. Si cubi peccatum putes, jucundum erit à te moneri, ut corrigatur, priusquam literæ meæ tantis viris exhibeantur. Similiter exemplum Epistolæ ad Dom. Baronem de Brook literis ad Dom. Boswellum inclusi. Mitto & quicquid hæcenus edidi, ut Dom. Baroni de Brook offeratur, minutum quidem donum, sed magni affectus. Plinii Epistolas cum Catanæi commentario tandem nactus fui. At librum Vossii de Deo, quem nunquam editum mallet, nusquam amplius in Bibliopoliis proflare scias. Arminii quæ quidem reperire potui, uti petieras, mitto. Sed fore intelligo, ut cuncta ejus viri uno volumine intra paucos menses in Germania recudantur. Quod si expectare malueris usq; dum id fiat, solum opus erit ut nunc missa remittas.

Vale Nobilissime Domine, & quo cœpisti favore, porrò me prosequere.

*Lugd. Bat. Id. Sept.*  
*clō Ioc xxiv.*

*Tuus Tuo merito,*

G. J. Vossius.

#### XLVI.

*Dudleio Carleton. Londinum.*

*Nobilissime & Ampliff. Dom.*

**R**editæ mihi sunt literæ doctissimi Boswelli, quibus ab illustri Barone de Brook, ad Professore in Cantabrigienſi Academia honorificentius vocor, quàm homo tantilli ingenii atq; eruditionis merear. Redditæ item tuæ, quibus non amanter minus, quàm prudenter mones, ut ne cum uxore ac liberis me in viam dem, priusquam peracta quædam sint, de quibus ob incerta Rerum Humanarum, constare antea satius sit, quàm stabilem cum meis sedem in florentissimâ Britannia vestrâ figam. Equidem, quantas possum, pro singulari hoc affectu, gratias ago, uti debeo. Sed scrupulus tamen

tamen non exiguus injectus est mihi quem dissimulare non possum apud tam amantem mei. Auctor enim es ut quàm primum veniam; sed solus, & ignaris iis quibus Academia cura incumbit. Neq; non video, id tibi propositum esse, ut si minus omnia ex voto reperiam, citrà honoris dispendium, sineq; Academiae nostrae Curatorum offensa, facilis mihi reditus pateat ad meos. Sed Nobilissime Domine, quid si per utrumque munus quod sustinui, & illud quod nunc oboeo, ita politionibus propè omnibus innotuerim apud nos, ut pedem vix extra urbem, nedum extra Bataviam ponere liceat, quin profectio mea dimanatura sit ad plures? Atque ut de nocte iter conficiendo, vel alium dolum nectendo, fallere omnes ad dies paucos possim: quia tamen per unum alterumque ex Anglia reducem jam rumor hic est diffusus de vocatione ad vos mea: de itinere in Angliam etiam suscepto, suspicio oborietur multis, simulac hebdomadas totas desiderabor ab Academiae hujus juventute, Senatu, foroque ipso. Quater enim de hebdomade docendum mihi: nec pars modo Senatus sum Academici; sed unus ex quatuor viris, qui rectori Academiae addident in tribunali nostro. Illud etiam reticere nequeo, literas ab ornatiss. Boswello scriptas, quarum mihi exemplum miseris Hagâ, non parùm variari in stipendii modo ab Epistola, quam ipse ab eo accepi. Hoc unde contingat, non satis conjecturâ assequi possum; nisi fortè quispiam tuis è terris sponte se minoris offert, neque desint qui nunc deprecient, ut fieri solet. Quid enim ego umbraticus sciam, quid in Anglia, quis rerum agat, sive per se, sive per suos? Quamobrem per amorem erga me tuum, etiam atque etiam rogo, ut hac in re me quamprimum pro singulari tua prudentia, consilio juves. Vale decus meum, & eum, qui beneficia tua animo inscribit, patentiissimo, nec eorum esse ignarum posteritatem finet, amore tuo porrò dignare. Salutem quoque plurimam, si occasio dabitur, meis verbis dicito Reverendissimo Wintoniensi Episcopo, Viro incomparabili, cujus erga me affectui, utinam gratias referre dignas valerem. Iterum Vale.

Lugduni Bat.  
c15 Idc xxv.  
17. Id. Feb.

Nobilitatum Virtutumque tuarum Cultor atque Observator,

G. J. Vossius.

## XLVII.

*Nobilissimo & Amplissimo Dom. Dudleio Carletono, à Secretis Consiliis Regi Magnae Britanniae.*

Nobilissime Domine,

**D**E vocatione in Angliam mea rem omnem quia longiore moram non pateretur, communicavi cum uno altero ex Nob. & Amp. D. D. Curatoribus Academiae nostrae. Aequum autem imò planè necessarium arbitrabantur, ut quicquid hujus est etiam à me in Collegio eorum exponatur. Ego ne hac parte postulato eorum refrager; partim adducor amore & gratâ recordatione beneficiorum quae praestiterunt: partim quia si dicendum, quod res est, plane pusillum est, quod exigunt. Nam post dies decem, h. e. ad octavum Maii, eorum hic conventus erit. Postquam Hagâ rediit uxor in vehementem incidit febrem: quae res effecit, ut dies aliquot scribendi ad te officium distulerim. Interim, ex medici etiam sententia, carere morbus periculo videtur. Sed Poetae illud nosti, quando ait, amorem rem solliciti plenam timoris esse. Quod si per lectiones publicas, ac imprimis valetudinem conjugis liceat, etiam ante Nobilium Curatorum adventum operam dabo, ut de nonnullis tecum loquar. Nec enim tam ignarus sum rerum humanarum, ut non, quemadmodum video undique amorem erga me tuum; ita etiam perspiciam, quantum juvare me consilio possis, non per te modo, sed etiam per illusterrimum patrem tuum, aeternum Britanniae suae ornamentum. Deus utrique vestri, & hic, & in caelis praemia rependat, amorumque istum erga me conservet.

Lugd. Bat. c15  
Idc xxv. xxviii  
April.

*Nobilissimo nomini tuo obstrictissimus,*

G. J. Vossius.

## XLVIII.

Gulielmo Boswello.

Amplissime Doctissimeq; Domine Boswelle,

**Q**uis rerum mearum ignarus, aliud sibi persuadere possit, quam diutinam hanc in respondendo cessationem inde duntaxat, aut potissimum saltem, promanare, ut Vocatione Anglicanâ aliquid mihi apud Ba-



tavos lucelli acquiram? Scimus id plerisque moris esse. Nec notam hanc effugit summus Jurisconsultus, Andreas Alciatus, cum Biturigibus Patavium vocaretur. Et ille quidem callide hoc egerat ipse, ut vocaretur. Mihi, ut scis, ne per somnium tale quid cogitanti sponte apud vos professio oblata est. Ille item, immane quantum aucto stipendio, apud Biturigas remansit. Ego, uti hoc nunquam egi, ita nec quicquam accessionis (quam quidem scio mihi minime invideres) consequar remanendo, nisi simul accessio fiat fortè novi laboris. Quæris quid igitur in causâ sit, cur tardius literis tuis respondeam, tam amanter, tam benevolè scriptis? Dicam apertè & sine circuitione. Scrupulus aliquis animo meo injectus erat, quod putarem posteriores literas minus cum illis, quæ ad nobilissimum D. Carletonum missæ erant, convenire. Nec is, nisi adventu Domini Carletoni, & imprimis alteris à te literis ad eum exemptus fuit. Alia etiam causâ accessit, ita enim officii ac muneris mei ratio ferebat, ut de vocatione mea, quicquid erat, referrem in conventu nobilissimorum Academiæ hujus Curatorum. Is conventus, præter ipsorum & meam imprimis spem, diutius dilatus est quam putabamus. Tertiam etiam causam accipe. Inciderat uxor carissima in morbum gravem, quo fiebat, ut nec in hanc, nec in illam partem, de vocatione ea certi quicquam statuere auderem. Sed ubi ea convaluit, vel convaluisse saltem visa fuit, seriò de re tota & mecum, & cum amicis, & cum Academiæ Curatoribus cogitare cœpi. Adhortari alii, dehortari alii, ut fieri solet. Sed non tam stupidus eram, ut non viderem, quæ suaderent, ut quamprimum vocationem meam amplecterer. Nam & in florentissima Academia inter summos tot viros victurus eram, & iis in terris, ubi Ecclesiæ ea facies foret, qua non alia hodie in terris veterem illam magis referret. Sperabam etiam eò me gratiorem fore, quod antiquitatis Ecclesiasticæ studio à puero me dedissem: ejus autem studii apud vos plurimi essent non intelligentes minus quam amantes; cum quibus per-jucundum fuisset, colloqui ac conversari. Sed dum hæc oculis quasi obversantur, ita Deo volente, dulcissima conjux, singularis sanè exempli fœmina, iterum in morbum incidit; ac in longè vehementiorem, quam ante. Nec enim aliud nunc (quantum futura prospicere scit infirmitas humana) conjecturâ assequi possumus, quam eam vel hoc morbo terris ereptum iri: vel saltem, diuturnum morbum fore; diuturniorem etiam languorem, qui morbum consequi solet. Proinde judicavi, non diutius spem mei fa-

cere me oportere generoso Domino Baroni de Brook: sed quamprimum eum de statu rerum mearum faciendum esse certiorum: Te verò, doctissime & amicissime Domine Boswelle, quam amo, quam æstimo, propter plurimas maximasque virtutes, ac potissimum propter eam quâ tantopere excellis, humanitatem, cujus abundè erga me indicia dedisti. Sed laudibus tuis non insistam: ne non tam judicium videar promere, quam pro ingenti beneficio verbis gratias velle referre. Atqui gratias referre opis non est nostræ: qui nihil nisi devotum tibi animum offerre possumus. Atque eo scio, quæ humanitas est tua, contentus nunc oris. Plura jam scribere domesticus dolor impedit. Sed aliàs id compensabitur. Cum enim obscurum non sit quantopere me complectaris: literis posthac meis subinde te, si grave id tibi non erit, compellabo. Amorem etiam erga te meum ubi potero, & publicè, & privatim testari non desistam. Vale.

Lugd. Bat.  
clō 1635.  
Kal. Junii.

Tuus totus,

G. J. Vossius.

## XLIX.

### Dudlæo Carletono.

Nobilissime D. Carlone,

**D**UM ego hesterno die tecum colloquor, aliud hic agitur. Quid illud? inquires. Dicam. Superiori die Sabbathi, cum literis tuis ad me venit juvenis nobilis, mihi ignotus, sed, ut ipse postea retulit, ex aula principis serenissimi, qui in urbe hac vivit. Exposuit quorsum accepisset. Literas à te accepisse aiebat. Rogavit amicè quid de negotio Anglicano decrevissem? Exposui mille Angliæ bona, quæ iter suaderent. Sed adjeci quædam quæ scrupulum injicerent. Nempe ea ipsa, quæ apud te retuli. Et quia nihil ad illa magnopere reponebatur: iterum rogatus seriò dixi, dum hi forent scrupuli vix hinc avulsum iri. Ille, etsi Angliam suaderet, tamen petiit, ut si iter illud minus capefferem, saltem veterem in Angliam affectum retinerem. Hagæ à te reversus, intelligo non solum constare jam pluribus in urbe, quæ huic nobili dixissem: sed aperte promi, me apud eum penitus detrectasse provinciam. Et illud jam in Angliam esse perscriptum. Quod si est, sanè pugnabunt nonnihil literæ tuæ cum iis, quæ Lugduno missæ. Non tum

eum scrupulum eximi posse putabas. Atque ego ostendi, non me alienum esse, si & uxori & liberis uti dicebam consuli posset. Quare arbitror satius fore ut nihil in Angliam perscribatur priusquam tecum loquar. Fiet autem id aut cras aut summum perendie. Nam & alia sunt quæ satius sit à te sciri, utpote mei amantissimo. Salve à me. Postridie quàm à te abii, horis circiter xx. postquam tecum egi, idque ob festinationem manu filioli cui hæc dictabam. Nam moræ locum nullum relinquendum putabam, ne differendo negotium corrumperem. Cras igitur, aut ad summum perendie Hagæ adero.

## L.

*Ad Illustrem & Generosum Dominum,  
Baronem de Brook, Fulconem Gren-  
villum.*

**E**GO verò, Illustris ac Generose Domine, amorem erga me tuum magis magisque cognosco: ut qui stipendio honesto non contentus, de libera habitatione etiam addendum putaris. Sed quanto excelsa illa mens tua mihi perspectior est: tanto magis vereor, ne affectui huic, ac amoris mihi habito, satis videar respondere. Equidem (dissimulare non debeo quod officii mei erat) communicavi rem omnem cum Nobilissimis & Ampliss. Academiæ hujus Curatoribus. Petiere illi ut in conventu suo proximo, proponere rem vellem. Videbatur ruora duntaxat fore hebdomadam duarum. Factæ sunt plures. Interim uxor in gravem incidit morbum: Conveniunt Curatores, & urbis Consules, qui illis à consilio sunt. Auctores esse omnes, ut hanc ne Academiam relinquam, prolixèque affectum suum testari. Potuit ea res scrupulum injicere mihi, homini minime, ut arbitror, malo. Sed nec deerant amantes mei, qui maximopere adhortarentur, ut terras hæc florentissimo Angliæ regno commutarem: atque hujusce rei causas afferebant sanè graves. Et jam uxor convaluisse videbatur. Verùm enimvero, ut nihil certi est in rebus humanis, ecce sæva tempestas. Incidit uxor in recidivam. Ad morbum accedebant symptomata gravia, ac vehementia. Quo res evasura sit, necdum scio. Periculum quidem summum omnes videmus. Atque ut Dei beneficio optimè res cadat: tamen (quantum humanus animus ex præsentibus conjectare potest) morbus hic diuturnus planè erit. Mihi interim qui mi-

seram video uxorem, illam animæ dimidium inæ; cuique in hoc statu vix horam ab ea abesse licet, dum nihil præter cruciatus specto, nec præter gemitus tristiæque suspiria audio quicquam, cor prope finditur, ac sapientia, si qua in me unquam fuit, penè tota (pudet dicere) expectoratur. Sanè studiis operam dare nec vacat, quia absentem uxor requirit, nec lubet quod absens etiam macerer. Quid enim mirum, si plurimum ei metuo, quam plurimum amo? Præsertim cum amorem augeat amittendi metus. Do quidem operam, & sedulo do, ut animum ad omnes casus, & divinis & humanis præceptis, obfirmem. Sed tamen diffiteri non possum, me tantâ curâ doloreque circumseptum esse, ut subinde ad id, quod timeo, penè invitatus revolvatur. Quare haud aliud statuere possum, quàm ita Deo Opt. Max. visum esse, ut in his terris, quod vitæ reliquum est, absumam. Id autem quantulum futurum sit, præsertim annis hæc pestilentibus, novit idem ille qui solus scit omnia, vitæque qui nostræ modum præfinivit. Interim non possum non immortales tibi gratias habere, quod illustre adeò beneficium, tam humaniter, tam liberaliter in me conferre fueris paratus. Sanè quanti me facias, istâ amoris ac benevolentiae significatione satis indicasti. Mihi quidem merita hæc tua nunquam animo excident. Nec tam arduum, aut magnum, dici quicquam poterit; quod non debere me tibi prohtear. Utinam aliquando sit, ut ostendere erga te possim cultus & observantiæ erga te meæ propensissimam voluntatem. Nunc pro illa, & honestandi mei, & augendi fortunas meas tam munifica voluntate, non aliud quàm maximas gratias ago. Nec enim pro tantis meritis, reddere vicem possum: redderem autem, si possem. Si quid tamen ab otii mei fructibus expectari possit, obnixè hoc agam, non quidem ut illustrando nomini tuo inserviat (nec enim ego soli lucem addere possum) sed tamen ne posteris pro tanto beneficio videar fuisse ingratus. Te verò, Illustris Domine, unum illud præterea majorem in modum rogo, ut ne harum literarum ergò, quicquam apud te nomini meo decedere patiaris: sed potius excusationem meam æqui bonique consulas: atque ita statuas, Providentiâ Divinâ, quæ cuncta dispensat, vocationi huic meæ injectum esse impedimentum. Plura in eam sententiam scriberem, nisi viderer diffidere præstantissimo judicio tuo, ac jam dudum mens avocaretur domestici mali cogitatione.

Deus

Deus te Illust. Dom. diu inclyto Britanniae regno incolumem servet, amorem etiam tuum mihi semper conservet. Vale.

Lugd. Bat.  
Kal. Junii.  
clō lccxxv.

*Illustris tui nominis cultor,*

G. J. Vossius.

# LI.

Gerardus Vossius Jo. Meursio *Viro Clariss. S. P.*

**D**uplex nomine gaudeo, maxime vir atque amice eximie, primum quod ut florentissimum Daniae Regnum majori luce vesties atque eruditionem Nobilissimae Juventutis augebis, ita futurum video, ut ipse etiam majora & honoris, & emolumentorum, capias incrementa. Deinde autem illud plurimum me recreat ac reticit, quod, si bene animum tuum novi, quanto magis in pretio eris, tanto magis amare studia literarum, deque hoc seculo & posteritate inlimul, praelare perges mereri. Unum illud doleo quod à te tanto, & viro, & amico, tam longe separer intervallo. Sed nunquam tam mei fuero studiosus, atque amans, ut non gloriae, ac commodis tuis, ut tuis vero? imo Reip. Literariae longissime posthabeam utilitatem, licet multo maximam quam ex suavissima conversatione tuâ capiebam. Quod ad rerum mearum statum attinet, magna quidem mei expectatio apud serenissimum Angliae Regem, & Regni proceres, concitata erat; ut his diebus ex nobilibus Britannis intellexi: sed non multo post abitum tuum, uxor in gravissimum iterum incidit morbum: qui tres pene menses duravit; Ac ne nunc quidem corpore est satis firmo. Ea res efficit, ut mihi divinitus compedes injectas arbitrarer: plane enim vitae ejus metuebam: nec ut viduus eò me conferrem ex re fuisset mea aut meorum. Praesertim cum rei familiaris parum sim intelligens quemadmodum nosti. Nec propterea hilo per abitum tuum auctior sum nisi quod Ampliss. Acad. hujus curatores, à me petierunt ut, ne penitus jaceret studium Linguae Graecae, diebus Mercurii ac Sabbati extra ordinem illud horam unam profiteri vellem: uti à me serio fit; sed stipendio plane incerto. Propterea auctores nonnulli fuerunt, ut ne ea conditione provinciam susceperem; sed nosti, quàm soleam *πῶς οὐκ ἀποδέχομαι*, ac tanto minus id Curatoribus dene-gandum putavi quod benevolentia mei du-

ctos, utcumque causam non satis perspicere hoc consilii cepisse eos arbitrarer. In opere meo de Historicis Latinis jam ad Justiniani tempora perveni. Video fore, ut non multo ante natalem Domini absolvatur. Usque adeo lentae sunt operae. Superiori hebdomade in senatu Academico Rector magnificus, Polyander, Sualenburgius & ego homullus, missi fuimus Hagam ad Illustrissimum Principem Henricum quo ei gratularemur novam dignitatem, atque Academiae nostrae statum eidem commendarem. Respondit humanissime, etsi valde infirmus, usque adeo ut eo die neminem praeter nos admiserit. Pridie misere fuere conflictatus cum morbo colico, quem esu mororum, melonum, fungorumque contraxisse ferebatur: At talium tragematum *ἢν ἀνίστασθαι* potius sanè quàm per ea male sit optimo Principi, cui vel de meis Deus annos superaddat. Sane improborum aliquod gaudium tum erat, sed bene est quod nunc valetudini restitutus videtur. Golius Arabice docet. Sed poposcit à curatoribus ut sibi potestas daretur cum Westio designato Consuli Aleppensi in Syriam suis sumptibus proficiscendi, atque impetravit. Post trimestre aut circiter se itineri accinget. Quares quis Deus hanc illi mentem inspirarit. Nempe non alio compellitur quam quod multa adeo in Arabica Lingua superint, quae nec illi nec cuiquam in Orbe Christiano cognita sint. Quaecumque Arabica Lexica suppetunt, mutila videntur. Quid dico, videntur? Imo si de iis quidem loquamur quae scripta sunt ab hominibus Christianis, desunt verba pene infinita. Ita qui interpretari quid velit, saepe ad fallaces conjecturas recurrere cogatur. Ea autem quae Lingua sua Arabes condiderunt, multo quidem sunt perfectiora; sed quia gentis suae hominibus scribere, ita breviter succincteque cuncta interpretantur ut à Christianis hominibus non intelligantur. Praesertim ubi ritus Arabum attinguntur nostris ignoti, aut ubi ad Poetarum Arabum loca alluditur quos iidem saepe ne per transennam quidem videre. Sperat itaque Golius noster si annum unum Damasci & vicinis locis, cum doctissimis Arabum atque aliarum Asiae gentium colloqui familiarius detur, posse se plus uno proficere die quam vicenis, si suo omnia labore hic ruspetur. Certe Juvenis est praeclarus magnumque aliquando virum dabit, si Deus ei valetudinem & vitam, quod ex animo voveo, cum Bataviae, tum praecipue studiorum causa. Multa enim ex Arabum monumentis erui possunt, quae à nostris sciuntur, juxta ac ab ignarissimis. Schrevelius quo hactenus Haga medico usa fuit, honore eo à Curatoribus auctus est ut inter Professores Medicos familiam



liam duceret. Et jam Orationem habuit inauguralē. Sed de principe loco sponte maluit cedere affini suo Heurnio qui tot annos, jam Medicinam in Academia hac fuerit professus. Hac tamen conditione loci gratiam fecit, ut ne Affinis primarii medici titulum sibi arrogaret. Spero eam rem aliquid ponderis habituram ad concordiam. Sanè modestiam prudentiamque Screvelii hac parte omnes commendant. Multorum sententia erat ut Screvelio etiam botanica functio mandaretur. Et maluisset ipse atque etiam amici ejus, cum ob alia, tum horti Academici amœnitatem. Sed Vorstius noster in ea opinione erat, fore eam rem sibi ignominia, si cedere illa domo nunc ipsa mater familiaque cogerentur, ubi hætenus à *vanhelms* Vorstius egisset. Utcumque hoc est, amicus ille noster Vorstius Curatoribus persuasit adjuvante imprimis Cunæo. Itaque & Ordinarius is Medicinæ nunc Professor est, & idem Doctor botanicus: quæ felicitas nescio an cuiquam ea ætate in Acad. hac contigerit. Screvelio cum in totum Parenti Vorstii succedere non posset, loco Botanicae professionis trecenti vel amplius floreni annui decreti sunt. Amplissimus Rutgerius menses multos lecto affixus fuit: deque valetudine ejus prope conclamatum esse Screvelius Medicus judicabat. Sed hesternæ die cognovi ex Heinlio, Valentium medicum Delphensem, pro certo habere, laborare eum scheloturbe: ac se eum intra octiduum vel præterproptèr valetudini restituere posse. Quod Deus faxit. Sin, quod Deus avertat, naturæ concesserit, sedulo apud sereniss. Regem opera dabitur ut in locum ejus Heinlius possit succedere. Et multi fore arbitrantur, ut compos ejus voti fiat. Nec tamen in Bataviæ proceribus defunt, qui suorum alicui decus hoc conferri præoptent, atque etiam in hoc sint elaboraturi. Vides mi amice, hominum certamina. Nos vero interim dulcia Musarum studia colamus, atque amore potius inter nos, imo & cum aliis bene merendo de bonis literis certemus. Hesternæ die à Screvelio Gymnasiarcha, vocatus fui ad nuptiale convivium (mercatori cuidam Harlemensi filiarum ejus una nuplit) Ei intererant præter alios, Cunæus & Barlæus, qui impense postularunt ut suo te nomine salutarem. Uxor quoque mea plurima te salute impertit. Utriusque etiam nostri nomine multam salutem dico lectissimæ atque optimæ uxori tuæ.

Lugd. Bat.  
clō lōc xxv.  
Kal. Octob.

Ο σός ΑΛΟΜΙΝΟ.

## LII.

Hugoni Grotio, Gerardus Vossius  
S. P. D.

**L**Egi responsum tuum, Amplissime Domine, in quo non dico permulta, sed omnia planè ita subtiliter, nervoseque à te dicuntur, ut quamquam sciam quàm plerique omnes docere quam discere simus paratiores, tamen bona me spes habeat, posse his Clarissimum Molinæum ab anticipata opinione dimoveri. Sed cum omnia mirè fuerint ad palatum meum, tum imprimis ea me delectarunt, quæ de salutis certitudine scripsisti. Omnino enim in hoc dogmate plus mihi lucis adduxisti, quàm vel alius antea quisquam, vel tute antea ipse; quamquam semel iterumque tecum de eo sim locutus, & communicaris mecum quæ de conciliatione dissidentium sententiarum scripseras nuper. Nec tamen abeunt ab iis, quæ interea temporis jam animo conceperam. Sed gavissus sum ea calculo tuo comprobari: & quod magni duco, distinctius ea proposuisti, quàm ego ea mente eram complexus. Itaque usus mihi eorundem fuit hodierno die, quo dicendum aliquid fuit de verbis istis Christi, Cap. XXIV. *Matth. 24. 14. παντα τι συντελει, & το ελεος ελεος.* Nam huc usque me in eo Evangelista series ipsa perduxerat. Nec arbitror nos, plus quam à te factum, largiri cuiquam posse, nisi simul à clara scripturarum luce, inque ea ambulantis piæ antiquitatis vestigiis, visum sit deflectere. Quod verò prohibes, ne Nobil. Langeracensis literas tuas ostendat viro doctissimo, equidem istiusmodi puto, ut nec tu imprudenter illud scribas, & Langeracensem tamen prudenter facturum putem, si nullus hac parte tibi morem gerat. Nam & Reip. & Ecclesiæ plurimùm interest, ut magni nominis Theologi, piæ antiquitatis sententiam cognoscant, super prædestinatione & dogmatibus annexis: tum verò imprimis, ut jus summi Magistratus in rebus Ecclesiasticis rectius addiscant. Quod si tamen Legatus sibi illum thesaurum servet, post illa scribi oportebit, rem omnem te ipsius permittere potestati. Nec puto hoc consilium quemquam ut candidum minus interpretari posse, nisi forte qui niger sit ipse. Qualis fortè etiam in scripto tuo minus verisimile dicit; quod ais pag. 2. vers. 9. non aliud te spectasse, quàm ut Molinæi consilio, & ipse & alii adjuvari possent ad pacem promovendam. Obducatur enim quod, pag. 17. (cujus initium ad conclusionem) ais non scripsisse te in eum finem, quod Molinæum inspecturum putaras, sed ut sententiam tuam apud

apud Nobil. Legatum deponeres. Quæ tamen licet *crasliorari*, non tamen *certa* esse patet, cum, ut ego arbitror, volueris, non scriptum Molinæo ostendi, sed dissimulato scripto, Molinæo exponi debere, quæ scripto esses complexus, quæque Legatus ad consilium ejus de procuranda pace eliciendum, significanda ei arbitretur. Porro cum ejusdem pag. 17. vers. 2. nomina conciliationem; cui subscripturi sint Angli, Belgæ, Helvetii, Germani, dubitavi certone consilio an festinatione omittantur Galli, præsertim cum in Gallias scribas. Quemadmodum nec fat scio, an quod pag. 6. vers. 7. à fine, ais, simplex donum esse non potest, quod pluribus conceditur, priori gratia aburentibus, quàm utentibus, an *ex æquo* intelligi possit; cum certum sit, si princeps tam iis qui hastam abjecerint, quam qui benè rem gesserint, armillas donet, minimè horum ratione simplex donum dici posse. Hæc sic ego non mulinabar, sed muginabar. Nam aliquid in chartam conjiciendum erat, non quale Tu scripseras, cujusmodi nihil erat, (scio Te sic ingenue scribenti fidem habiturum) sed tamen quod chartæ spatium implere posset. Bis me legisse dicere possum, etiam tertiaturum, nisi metuisssem, ne in remittendo festinatum opus esset. Superest, vir Amplissime, & supra mortales omnes mei amantissime, ut maximas Tibi gratias agam, quod priusquam responsum hoc tuum mitteres ad Langeracensem, ejus mihi legendi feceris potestatem. Nec enim majori cum voluptate, addo etiam cum fructu, meum in re alia tempus collocare potuisssem. Planeque rogo simili adfectu, & honore in posterum me prosequi velis. Est & quiddam aliud, de quo ad Te scribere aveo, quod Brethanam Ecclesiam spectet. Sed nunc serum est, coque isthac occasione potius utar, cum frater ad te Hagam iturus, quod futurum die Jovis, uti intelligo. Salutabis, Magnifice Domine, Nomine meo lectissimam foeminam conjugem tuam, quam Clemangis editor ante unam aut alteram hebdomadem præconio isthoc feriò apud me decoravit, quod suaviter se risisset versiculis rhythmicis, quia rei familiaris aliquo dispendio curasset, ut sic compellare suos posset (sic loqui liceat) confratres, Ecce hic stant, Augustinus, Hieronymus, cæterique Patres. Vale decus meum.

Prid. Kal. Decemb.  
cic loc xv.

A. T. Observantissimus,

G. J. Vossius.

### LIII.

Dudleio Carletono.

Nobilissime Domine,

**O** Pere meo tandem excuso, haut superest aliud, quàm ut cogitetur, qua ratione optimè Illustrissimo Domino Duci possit offerri. Primum videndum, quot exemplaria ad Illustrissimum illum heroem debeant transmitti, & quo potissimum ornatu id fieri conveniat. Scio melioris notæ chartam assumi oportere: nec minus posse præstari, quam ut membrana & margines inaurantur, vincula item sint byssina. Sed, ni fallor, codices destinati principibus viris vestiri solent holoserico rubri, viridis, vel alterius coloris. Vel præter illum etiam alter, qui alteri ab Cellitudine sua possit donari. Hoc si placet, jubebo mihi codices adornari eos ad modum illum, quo libri sunt plerisque Veneribus, aut Junonibus Batavis: præsertim isti quos in sacras ædes secum deferunt. Vides minutam curam, & quæ infra Vossium sit, ac longè magis infra te ejusce nobilitatis virtutisque virum. Sed postquam hætenus infumta opera, reliquo etiam videndum ut commodè defungamur. Porro etiam dispiendum, à quo vel quibus felicitatis tantum sperare Vossius tuus ausit, ut non graventur filiolum hanc suam Illustrissimo Duci sistere, ac benignè commendare, quò gravior esse possit. Quot item codices, & quo ad eos Schemate exornatæ debeant procurari. Accesseram hesternâ die aulam junioris principis Boëmici, idque eo animo, ut super illis elloquerer cum nobilissimo eo, quod ego non minoris facio, doctissimo D. Donglio. Sed ex Doctore Altingio cognovi Hagam isse, nec reversum ante diem Lunæ. Fortasse igitur, Nobilissime Carletone, occasio se offerret tibi de hac re colloquendi cum præstantissimo illo viro. Is pro amore erga me suo, ubi redierit, facile mihi exponet, quid utriusque vestri in re mea optimum factu videatur. Si tamen satius existimetis, ut Hagam ipse excurram, non defugiam id laboris diebus feriatis, qualis nobis ille Mercurii ac Saturni. Vides quantum in amore vestro fiduciæ reponam, qui nugis istis rebus maximis obstrictos viros obtundam. Sed quia felici adeo fidere natum me video, ut me non indignum amore vestro existimetis, nihil non ausus sum exquirere è vobis, quod mea scire interesset.

Lugd. Bat. clb  
loc xxvi. xiii.  
Junii, Raptim.

Tuus,

G. J. Vossius.  
LIV.

## LIV.

Hugoni Grotio, Gerardus Vossius  
S. P.

**M**agnifice Amplissimeque Domine; hodierno mane nunciavit mihi ornatissimus Collega meus, advenisse in Urbem Uytenbogartium, ac quod antea factum nunquam velle me invisere: collaturum autem de jure summi Magistratus in Ecclesiasticis. Statim in mentem venit, non id colloqui aut dissertatiunculæ ergo fieri, cum ignorare non possit, quam mihi curta sit suppellex: sed potius quia postulare statuisset, quæ hac de re nuper ad A. T. scripsissem. Nec ea me suspicio fefellit. Nam vix de valetudine mea, & statu Collegii nostri exquisierat, cum sermonem iniecit istiusmodi, ecquid sub manibus haberem, quod brevi lucem adspicere posset. Et cum negarem me ob difficultatem muneris in hisce quasi primordiis aliquod edecumatam, & seculo dignum elucubrare posse: porro institit, nihilne de principali jure in Ecclesiasticis essem commentatus. Sciebam quo tenderet, & mentiri non erat meum. Respondi igitur, ante trimestre aut amplius, sententiam me meam, ad aliquem chartæ illevisse, sed statuisse, simul ac paulum otii nactus ero, quatuor, aut quinque disputationibus eam rem in Collegio accuratius pertractare. Non improbavit consilium: sed tamen optare se interim dixit, ut sibi inspiciendi eorum quæ scripsissem, qualiacumque ea essent, facerem potestatem. Addebat, jam à tribus retro mensibus, vel amplius scisse se me aliquid tentasse. Dicebam mirari me unde hoc haberet, cum præter cum ad quem scripsissem, nemini mortalium rem communicarim, uno excepta Collega, qui fidem dedisset se cum nemine hac de re verba facturum. Respondit se ex A. T. rem cognosse. Idem dicebat D. Episcopus, qui aderat: Non tam naris obesæ eram, ut non odorarer, cur hoc mihi persusum vellent, sed tamen dissimulabam. Optarim interim magis Collegam hac parte litasse Sigalioni. Imo meipsum. Quando iniquè ab altero silentium exigit, qui ipse illud præstare non potuit. Addebat, D. Uytenbogartius, si bona mea venia fieret, velle se ab A. T. scriptum istoc exposcere. Dixi non displicere, ut prius videam, quid scripserim: putare enim alia etiam familiaria eis literis esse admitta. Velle itaque quamprimum ad te scribere. Rogavit igitur, ut hoc quamprimum facere vellem: Rem me

sibi gratissimam facturum. Nunc oratum te velim, ut si otium horulæ detur, oculo volanti percurras, & ad oram Epistolæ lineam transversam ducas, ubi quid à me prætereundum arbitreris. Si tamen id per occupationes non potes, ipse agam, priusquam alteri chartas istas exscribendas dederò, quo Uytenbogartio mittam. Illud quoque candidè scribere illi statui, siquid hic boni sit, tuæ hoc A. tribui debere, cujus hac de re sententiam, non ita pridem antea legissem. Quod si illud ipsum Exemplar, quod A. T. habet, mitti posset, opus foret simul addere, ne cui illud alteri innotesceret, quando ad te familiariter scriptum esset more Romanò, non seculi nostri, quo Inferiores non sic ad tui Ordinis ac dignitatis viros scribere solent. Vale, Magnifice Amplissimeque Domine, & Uxorem saluta *τὴν δὲ καὶ ὑγιαίνειν*.

xxiii. Jun. clō  
Ite xvi.

T. A. Devotissimus.

G. J. Vossius.

## LV.

Dudleio Carletono, Hagam Comititis.

Nobilissime D. Carlone,

**D**ixeram me postridie missurum literas, quas ad D. Boswellum scripsissem. Simul in me receperam negotium comparandi tibi prælectiones Theologicas astuti illius, sed mali Theologi, quas ab amico tuo expeti dixeras. Quæ cum dicerem, non satis cogitabam proximè diem Dominicum consequi: quo minus convenisset disquirendi molestiam facessere Bibliopolis. Quare postridie demum eam rem curavi. Sed cum plurima Socini Bibliopolæ nostri habeant, eo tamen opere, quia id maxime omnium expetitur, penitus destituuntur. Itaque cogitandum mihi erit de via alia, quâ satisfieri amico tuo possit. Mitto interim literas quas dixi, sed apertas, ut prius legas, quàm mittas. Si placuerit, mittes obsignatas, sin aliquid mutandum putes, prius mone, idque liberrime, vel etiam Hagam evoca. Plus enim tribuo prudentiæ tuæ, quàm meæ, partim quia in propriis serè cæcutimus: partim quia tibi, utpote Anglo, Anglicana omnia perspectiora sunt quàm mihi: partim quia in luce prudentissimorum hominum semper versatus, eaque in dignitate constitutus, experientiam majorem rerum omnium sis consecutus, quam mei ordinis quisquam; memorem te etiam esse velim sermonis ejus, quæritur

O



obiter de operis mei dedicatione (quod est de Historicis Latinis) unà habebamus. Sed quid ego, ut memor sis, rogo, qui prior etiam de me compellaris? Equidem, ut apertè dicam, magnam in te ejus rei, & aliarum, quæ me tangunt, fiduciam colloco. Ac simul in præstantissimo Boswello. Mihi unum hoc erit laborandum; imò & liberis meis, ut grati erga vos simus. Vale.

vii Sept. clò  
Ioc xxvi.

*Tuæ dignitatis cultor summus.*

G. J. Vossius.

# LVI.

Gulielmo Boswello, Westmonast.

Clarissime Doctissimeque Boswelle,

**V**alde mihi gratulor de constantia amoris ergà me tui: ac tantò id facio impensius, quanto minus in me, quo id merear, reperio. Equidem magna cum voluptate rumino subinde hanc felicitatem meam: & tacitus mecum cogito, ecquando visurus sim diem illum, quo coram gratias agere possim, tum Illustrissimo Baroni Brookio: tum etiam tibi, aliisque amantibus mei. At enim dixeris, ut id quamprimum fiat, in manu esse mea: hoc enim ex literis me tuis non obscurè perspicere potuiffe. Non diffiteor: attamen non levia obstant, quo minus hac parte inorem animo geram vestro, imò & meo. Quod ut verissimè à me dici videas, non abs re erit, si altiusculè rem ordiar. Jam plusquam septennium est, quod in procerum & Ecclesiastarum dissensu, me quoque, qui ab omni dissidio animum gesseram alienissimum, incendium calamitosi temporis afflavit, ac penè ambussit. Mirabar & mirabantur juxta mecum alii. Interim patienter non perferebam, quia non mihi conscius essem modò, quantopere Reip. & Ecclesiæ paci studuissem: sed idem mecum agnoscerent, quosunque non nimis abriperet affectus. Paulatim desæviebat tempestas, meaque indies innocentia testatior fiebat. Itaque numinis benignitate, Curatorum Academiæ auctoritate, aliorumque virorum præstantium operâ factum est, ut qui stipendii quidem parte bona fruerer, à docendo tamen abstinere: is Eloquentiæ & Historiarum insimul in Academiæ hac doctòr publicus & ordinarius constituerer. Quæ res & emolumentum nonnihil secum ferebat. Anno, aut circiter pòst, commissa est mihi provincia consignandi ea, quæ ad veteris Ecclesiæ tempora pertinerent. Paucis post

mensibus felicitas ea obtigit mihi, ut in Cantabrigiensem Academiam vocarer. Sed detinuit partim gravissimus uxoris morbus, partim voluntas Curatorum, qui prolixè optima spondebant. Exinde abeunte in Daniæ clarissimo Collega meo, Joanne Meursio, demandata etiam mihi est professio linguæ Græcæ. His auctior pristinam mihi seu fortunam, seu dignitatem, videor recuperasse. Nec ignoro, quantacunque hæc sint, tamen Anglicanam vocationem plus habere splendoris: idque partim ob antiquitatem & claritatem Academiæ in nobilissimo Angliæ regno constitutæ: partim quia magnum est versari in luce doctissimorum hominum, quorum ea est Angliæ copia, ut nulla ei tellus hac parte possit comparari: partim quoque, quia profectò non levis est gloria, primum alicujus cathedræ, ac potissimum talis, professorem fuisse designatum. Equidem magna esse hæc singula confiteor. Attamen ut omnia suo momento ponderemus, illud quoque in rationem venire debet, quod hic mihi non malè sit: imo stipendio hic majori fruar (præsertim si commoda quædam accenseam) quàm apud vos mihi offerantur. Fateor carior apud nos annona. Sed nimium quantum excedit, quod hic percipio, ut istoc facile compensetur, quod minori apud vos pretio omnia veneant. At illud fateor magnum, quod frequentes in Angliâ sint ex donatione Regis, Episcoporum aliorumque præbendæ, canonicatus, dignitates Ecclesiasticæ, quæ mihi, licet extero, ac postmodò etiam liberis paterent. Verum cum memet considero, non leviter mihi displiceo: planèque metuo, ne ego homullus tantorum virosorum expectationi satisfaciam: atque ita, nullâ mei amantium culpâ, sed solo defectu mei, vel etiam amicorum illorum obitu luculentæ illæ spes evanescant. Eoque postmodò, cum cane Æsopico, jure à nostratibus ridear. Nec desunt, qui hæc uxoris auribus sæpe insusurent, sive id sincerè faciant, sive ut per eam facilius me detineant. Cogitare etiam me jubent, mortalem me esse, & fieri posse, ut non multo postquam in Angliam pedem posuerim, mortem oppetam; illa autem solam se, cum octonis liberis, plerisque etiamnum parvulis, reperiat domi in solo eo, cujus necdum linguam didicerit. Hæc, si non sufficiant, cogitare etiam uxorem jubent, an quæ adhuc lienis & jecoris malis obnoxia est, par futura sit molestiis itineris: an expedire sibi valetudinariæ putet mutationem aeris: & alia, quædam profectò minuta, & non aliunde profecta, quàm quod bonitatem, & soli, & incolarum Angliæ vel ignorent, vel retinendi mei causa dissimulent. Interim tamen

tamen nonnulla ex his, & imprimis quæ superius commemoravi, tanti sunt, ut animum distraherent, diversisque in me cecant affectus, nunc eundi, nunc remanendi: nec multò aliter affecta uxor, nequid dissimulem. Sed si vel sexennium animus in dubio foret, annos, ut scis, totidem hic hæreretur. Proinde, ita planè statuo. Illustrissimo D. Baroni Brookio de altero omnino cogitandum esse, atque id, nisi aliter ei videatur, quamprimum. Serà illud ætate si fiat, non fraudabitur quidem vel benefactorum mercede in coelis: vel gratà memorià posteritatis; verum nihil prohibet, quominus superstes etiamnum diutissimè fruatur glorià honorèque Cathedræ à se in illustri adeò Academia erectæ; quæ, ut cum poeta dicam,

*Cansceat seclis innumerabilibus.*

Sed quid ego hæc ad te, cum melius, quid ex re sua sit, ipse pervideat Illustrissimus Baro? Quare loquacitati ignosces. Interim, quantas possum, gratias ago Illustrissimo D. Baroni; cujus ego beneficio ita me obstrictum censeo, ut si ille ingratus dici debeat, qui cum omnia alterius causa velit, dignas tamen gratias referre non possit, omnino moriturus sum ingratussumus. Tibi quoque doctissime & amicissime D. Boswelle, ago gratias pro hoc erga me affectu. Equidem me magnopere video devinctum nomini tuo: quod ego ob præclara merita tua, & linguâ, & calamo prædicare non desinam. Sanè jam amoris mei publica indicia prodissent, nisi ab excudendis aliquot ingenii mei monumentis sextum jam mensem operæ Typographicæ cessarent. Cujus rei causa est, quòd nonnullis Academiæ nostræ professoribus publicà auctoritate illustrium D. D. Ordinum demandatum sit, ut partim conscribant, partim corrigant libros eos, qui deinceps per omnes Hollandiæ Scholas pueritiæ prælegerentur. Ea in re non minimam ego molestiam cogor devorare. Sed bene est, quòd diuturnus admodum hic labor posthac esse non possit. Nam eousque jam perductus, ut intra tres hebdomadas perfici possit. Quibus exactis, redire postliminio licebit ad jucundiorē mihi, & doctis gratiorem operam de Historicis Latinis: cujus voluminis (sane operosi admodum, & in quo plurima sint aliis indicia, partim ad Philologos, partim ad Ecclesiasticos Scriptores pertinentia) jam multò maxima pars excusa est, ac quod residuum est, intra bimestre spatium ad umbilicum poterit perducī. Hoc opus alia atque alia, partim literas sacras, partim externas spectantia consequentur, modò mihi Deus vitam, & valetudinem concesserit. Nec

enim cessare animus est. Nihil quippe meum puto; præter tempus divinitus concessum, & quæ cudo ingenii monumenta. Itaque in hoc potissimum adlaborō, ut ne supremo judici rationem temporis reddere cogar. Atque insimul docendo juventutem, & aliqua literis mandando, quæ profutura nostris hominibus & posteris videantur, opes mihi congrego, non illas: (et si eas non penitus aspernor) quæ me defuncto alium atque alium dominum consequentur; sed quæ, ut Plinius aiebat, ubi semel nostræ esse coeperint, nunquam desinant esse nostræ. Interea, quæ lucem propediem videbunt, erunt quoque Theses meæ Theologicæ, quarum ad te exemplar transmitti petis. Nec enim ulla hic amplius exemplaria prostant, quia pauca admodum excusa fuere, & quamprimum per juventutem dispersa. Itaque jam apud nos multorum manibus describuntur, imò & apud externos. Hæc res facit, ut necesse sit de nova editione cogitare. Præsertim cum hæc non Typographi solum, sed & multi præstantes Theologi requirant. Mitto postremum exemplar quod habeo: Sed quo carere tamen possum, partim quia filius aliud habet: partim quia sex septemve alii sunt in urbe nostra, à quibus petere possum, ubi de recudendo cogitabitur. Video nimis excrecere Epistolam. Quare manum tandem de tabula tollo. Salve præstantissime Boswelle, & nomen nostrum porro ama, atque auge etiam in Anglia tua, imprimis illustrissimum apud Baronem Brookium, cui ut salutem plurimam meo nomine dicas, etiam atque etiam rogo. Adderem & alios quosdam clarissimi nominis viros, nisi vereretur, ne molestius tibi essem.

Lugd. Bar. clō  
Idc xxvi. Nonis  
Sept.

*Tuæ dignitati devinctissimus,*

G. J. Vossius.

## LVII.

Joanni Meursio.

Clariss. Vir atq; amicissime,

**E**T si aliter fieri non possit, quin permolestum sit, quod carere te cogar, tamen facilius absentiam tui ferrem, nisi mortes quorundam, quos valde amavi, non mediocriter augerent desiderium tui. De consanguineis & affinibus, quos hoc sesquianno amisi, nihil nunc dicam. Ecce superiori hebdomade ereptus Academiæ nostræ, egregium ejus lumen, Willebrordus Snellius, Vir

utriusque nostri amantissimus, dum fata Deusque linebant. Parentavit ei ex ordine nostro Gil. Jachæus. Ab Golio jam ante hebdomades complures Literæ in Bataviam perlatae, ex quibus salvum in Syriam advenisse cognoscimus. Intra octo menses, aut circiter, redibit ad Profess. Arabicam & penè est ut suspicer modo sospes in patriam pertingat, etiam Hebraicæ L. professorem fore. Nam hanc ei professionem à D. Curatoribus destinatam esse ex eo conjecto, quod hætenus nullus est constitutus. Nec verisimile est, Golium post tam longinqui itineris molestias linguarum Orientalium causa susceptas, pusillo unius Professionis Arabicæ stipendio contentum fore. Dedelius inter Ordinarios Jur. Profess. nunc agit. Corrector Doreflaer affectat professionem Poeseos in hac Academia: quid futurum sit, melius sciemus proximo conventu D. Curatorum Academiae. Qui nunc sunt exlegatus Arsenius, Præses Curiae Cromhoutius & Syndicus Pavius. Vorsius uxorem duxit filiam D. vander Meulen magnificis ædibus è regione aulae hic habitantibus. Semel iterumque Literas accepi à Jano Grutero, quibus petit, ut plurimam tibi salutem dicam suo nomine. Video ei necdum constare de decessu tuo. Gener ejus Brettæ dejectus est de munere, quod Romanæ Eccl. nomen dare nolle. Itaque pene animus ei Groeningam se conferre ubi amicos habet & aer non displicet. Fervet prælum notis Heinſianis in Nonnum. Theologi Acad. nostræ edidere opus adversus confessionem Remonst. uti & Walæus (qui etiamnum Rector est magnificus) volumen quoddam emisit adversus Joannem Arnoldi Corvinum. Rivetus Genevæ Criticum suum sacrum recudi curavit. Aliquanto is auctior est editione prima. Burgerſdicius edidit institutiones Logicas quæ non displicent. Prodiit apud nos Theo. & Aphthonius. Utriusque translationem Heinſius recensuit & interpolavit. Utinam hic fuisses qui nobis Græcum textum meliorem dare potuisses ex opt. codice, de quo aliquando te mihi quædam referre memini. Sed nihil impedit quo minus, tum editionem nobis aliam procures. Quod impense velim. Nec minus desidero alia ingenii & eximia tuæ eruditionis monumenta quæ hic habebas, partim confecta, partim affecta. Omnino & literarum & literatorum interest ut tam præclaræ observationes tuæ, quas frustra ab alio quopiam expectemus, quamprimum videant lucem. Scio tamen te nequitiam otiosi, sed serio elaborare in Historiâ Danicâ, eoque impensius opto ut Academiae vestræ brevi ab Typographo prospici possit, ne cum tum extra omnem sis culpam de-

posuisse videaris Reip. Literariæ & posteritatis amorem. Hoc ne Deus finat, quod tantopere inimici tui optent. Opus meum de Historicis Lat. ad menses aliquot intermittere sum coactus, propterea quod auctoritate Ill. D. Ordinum commissum mihi fuit, ut novam adornarem Grammaticam Lat. & Græcam, sed ita ut in illa Lithocenis, & in hac Clewardi imprimis præceptis atque exemplis insisteretur. Videbam esse inglorium laborem & difficilem satis. Detrectare tamen nolui amore scholarum. Gaudeo intra quatrimum me operam eam ad finem perducere posse. Quod ubi erit, quæ in Historicis Latinis supersunt pertexam. Nosse te arbitror ante mensẽ pronunciatam à iudicibus delegatis sententiam esse, in præfectos rei maritimæ peculatus reos. Ex quibus Berkius fiscalis damnatus est florẽ, nostratium 74800. Idem perpetuo mancipatus carceri. Ac jam in arcem Lovesteiniam deportatus. Vander Mast Delphenſis triennio carceris incola futurus multatus flor. 26667. Nicolaus Zelandus triennium exulabit. Solvet flor. 24182. Seguaert Dordracenus totidem annis exul erit. Multatus flor. 19842. Vander Heul Brielanus perpetuo carceri destinatus. Solvet flor. 13669. Duyſhusẽm multatus flor. 1476. Nobilis D. à Cronenburg ut intellexit se multatum octo mill. fl. in morbum incidit ac paucis post diebus expiravit. D. à Ralphost ejusdem criminis reus, jure contendet. Cæteros mitto. Ultra nunc nihil occurrit. Plurimam salutem dicito lectissimæ Conjugi nomine meo. Uxor etiam mea utrique vestrum salutem ascribi jussit. Vale.

Non. Novemb.  
clō 16c xxvi.

Tuus totus,

G. J. Vossius.

# LVIII.

Nob. viro Jacobo Roverio cognato.

Cognate Præstantissime,

**S**uperiori hebdomade Amstelodami fui. Unde reduci traditæ ab uxore literæ tuæ oppido quam gratae. Mitto igitur, ut petis, *divygeeta* epistolarum, quas Socer ad Musenholium nostrum dedit ut, quod res est dicam, præter unas vix ullæ tanti videntur, ut prælo committantur. Non quia non omnia ejus viri amem, uti debeo: sed quia nihil est in iis, quod scire alios interſit; jussi nihilominus, ut filius sex septem ex iis describeret, quia meminissent



minissent vocationis ejus in Gallias, item in Fritiam, & quorundam aliorum quæ nonnihil ad vitæ historiam facerent. Has apud me videbis, cum voles. Quod ad illud in epistola Sapphus:

*Molle meum levibus cor est violabile telis.*

(Quomodo & Aldina habet, & hac antiquior Veneta Bernardini Novariensis) quidam metricæ artis scriptores reponunt *levibusque*. Idque propterea, quia Ovidius ubique corripit; ut Lib. V. Trist. Eleg. VIII. Lib. I. de Ponto Eleg. IV. ad Rufinum. Et Lib. V. Met. Fab. VI. uti & Martialis. Lib. X. Epigr. XV. de Apro, item Ausonius Epigr. XLVIII. Nec qui aliter usurpet, quisquam occurrit. Vale Musarum amice atque etiam noster, meoque nomine tuos omnes saluta. Uxor etiam te *divitiarum* salutem.

Tuus,

G. J. Vossius.

### LIX.

Davidi Guilielmo S. P.

**V**IX dicere possum, quam ægre mihi sit, quod ille ego, qui claudi instar futoris domi fere confideo, meque in bibliothecam abdo, tum potissimum ab urbe abfuerim, cum tu, vir præstantissime, ac una amicissimus Goliath ad me salutandum domum meam venissetis. Jamdiu enim est, quod te aveo videre & amicitiam tecum contesserare. Addo etiam, aliqua eorum ex te discere, quæ tu variis in terris è summis viris hausisti, vel longâ & diuturnâ peregrinatione ipse observasti. At nunc, quod mearum erat partium, peragis, & ubi te frustra hic fuisse vides, prior etiam literis compellas, atque ejusmodi literis, quæ comites haberent, Themistoclis epistolas, magni sanè viri, & qui ingenium semper habuerit in numerato, ut de eo prodidit antiquitas. Sane gratum mihi hoc donum tuum, uti & alterius opusculi, in quo suffragia Romanorum Procerum, quæ tulere cum in Sanctorum numerum Andreas Corfinus referretur. Quid ego tibi pro istis rependam? sane animum, atque affectum. Tuus enim sum, eroque, non illa vulgari ac sublesta, sed antiqua Romana, vel si malis Germana aut Batava fide. Gratias etiam ago quod ignorare me non siveris, quam benigne de monumentis nostris sentiant, Querengus, Alexander, Mascardus, alii summi viri Romæ, atque alibi. Nec tamen ea res efficere un-

quam potuit, ut tantâ me laude dignum putem; melius me novi: sed ea animum addunt, ut porro etiam non pessime de nostris hominibus ac fortasse etiam posteris mereri velim, & credo eo fine hoc ad me perscriptisti, ut talium judicia judicis malignorum opponam, meque soler, qui exulcerato hoc tempore oneri propemodum succumbam. Nihil vero mihi illis magis ridiculum videtur, qui ob laudes alienas longe sibi majores videntur quàm sunt, illi umbris similes sunt, hæc nunc majores, nunc minores, sed corpuscula nostra manent eadem. Cum Illustrissimo legato Britannico Thoma Roë nulla mihi hæcenus notitia est. Absque illo esset, non paterer te absque literis meis in Daniam ire, sed si in Bataviam venerit, mei muneris erit, summum virum accedere, omnemque affectum testari coram, uti hæcenus in aliis à me factum, qui huc missi ab Illustrissimo rege Carolo, præclare adeo de me merito, nec me solum, sed etiam meis: superest non aliud, quam ut te, longe adeo iterum euntem à nobis, votis meis prosequar. Quod sane facio & faciam; ac plane fore confido, ut propediem te salvum venisse in Daniam, intelligamus, imo ut, feliciter cunctis expeditis, brevi iterum te tuis in Belgica nostra listas. Vale, vir præstantissime, meque amare perge, usque adeo redamantem tui.

Lugd. Bat.

Tuus,

G. J. Vossius.

### LX.

Adriano Hoffero S. P.

**U**Tunque me, Amplissime Hoffere, calamus apud te excuset, quod non scripserim; animus memet accuset, quod multa adeo in me recipiam, ut ne illis quidem amicorum, quos jure maximi facio, præstare ea possim, quæ debeo, vides ut non petam excusationem, unde ordiri plerique solent; verum dicam, quod res est: Nempe amicitiam colam sine pompa, eoque raro admodum, nisi necessario, in hisce occupationibus scribo. Aliam fuge causam suspicari silentii mei. Quod tamen non tam fuisset diuturnum, si fratris tui filius ab eo tempore, quo primum vidi, vel verbo unquam me compellasset. Bimestri etiam morarum me fuit iter in Britanniam. A quo ut redii, ita undique obruebar negotiis, ut nihil minus, quam meus forem. Paulatim nunc meus esse incipio, & meus dum ero, tuus quoque fucro,

fuero, amplissime vir; qui magnopere me obstrinxisti Amandi Chronico, & versibus de urbis vestrae situ & obsidione. Amo Amandum: amo versus historiae causa: sed magis tu amandus mihi.

*Munere nam plus est, & carmine gratius ipso  
Officium docti, iudiciumque viri:*

Ut paulum immutem versiculos Hispani vatis. Nec temere id dico, quid enim iucundius mihi esse possit, quam amari à te, viro ejusce & eruditionis & dignitatis? Quid turpius mihi quam non contendere tecum amore. Qui & invisere me prior, literisque compellare, eo munere etiam, ac versibus superioris ævi mihi antea invis, ditare volueris Bibliothecam nostram! Quare multum tibi debeo. Semper gavisus fui plurimum amicitia nostri Isaaci Pontani: amavi etiam illius griphum septenarium, tum auctoris, tum argumenti causa. Sed non parum hunc in me affectum auget, quod eum tibi potissimum dicavit, cujus ego sic nomini faveo, quam qui maximè. Equidem gratulor urbi vestrae de tali consule & senatore. Cujus si similes multos haberemus, melius his terris cum studiis ageretur. Nunc metuo, ne paulatim redeamus ad barbariem, ob eorum imperitiam, qui Rempublicam capeffunt. Sed hæc Deo curæ erunt: Cui te, mi Hoffere, commendo. Simul rogo, veniam mihi des per te salutandi egregiam animam Amplissimi Moermonti, uxoris meæ cognati, atque eo nomine cari, sed multo carioris, quod nobiscum Musarum sit cultor & Gratiarum. Quod si occasio se offerat, salutem etiam dices ornatissimo Belonio, & aliis eidem mecum familiæ implexis.

*Lugd. Bat.*

*Tuus,*

G. J. Vossius.

## LXI.

Gerardus Vossius Conrado Vorstio  
S. P. D.

Clarissime & eximie vir, literæ tuæ multum me recrearunt, propter summum erga me affectum quem spirant. Nec potui non multum gaudere, quo eo dignatus sis honore, ut ad me quoque partem Antipiscatoris tui mittendam putaris. Necdum tamen totum per occupationes legere licuit: sed quæ legi (legi autem plurima) non minori cum

voluptate legi, quam fructu. Adeo multa utiliter à te observata. Quæ quamquam ita sint, spero tamen te *iesuisti* illis, licet haut *iesuisti* à te tractentur, defungi propediem posse, extremamque tandem manum admove-re velle notationibus in N. T. quas ab non uno prædicari tantoperè audio. De Camerario non est quod festines. Simul ac carere eo ultra non licebit, monebo ipse. Quod si quid aliud etiam in Bibliotheca mea usui esse tibi possit, tantum significa. Ego hoc sic interpretabor, quasi beneficium à te accipiam. Molanum & Cunerdingium, Adolescentes longè optimos (quorum utinam omnes similes essent) multum amo, partim merito suo, partim propter commendationem tuam. Pelagianam & Semi-pelagianam Historiam orsus sum; certisque eam disputationibus complectar. Primam destinavi Molano, quæ jam absoluta: sed antequam prælo tradetur, consilium tecum capere volui, utrum diutius apud nos sibi vivere expediat, ubi multorum adeo displiceant mores, & perpaucos habeat sui amantes. Ego in Molano nihil nisi animi firmitudinem requiro. Vale, vir maxime, & te donaque tua æstimantem porro amare perge.

xxvii. Febr.  
clo Idc xvii.

*T. R. addictissimus,*

G. J. Vossius.

## LXII.

Dudl. Carleton. Haga.

Nobilissime Domine,

Mitto exemplar præfationis meæ, etsi ob occupationes extremam ea necdum manum acceperit. Sed quid superest, facile horulâ præstabitur, dummodò prius de re totâ iudicium tuum cognôro. Scis, quam parum mihi tribuam in iis, quæ ad viros principes pertinent: quippe qui contentus esse so-leam Spartâ meâ, rebus nempe istis, quæ non transcendunt captum hominum in umbra Academica degentium vitam suam. Quare te oro, ut de singulis moneas fidenter. Ad-dam, demam, mutabo, prout tibi videbitur, atque aded omnibus, quos mei amantes, & talium intelligentes iudicabis. Coram si fu-isssem, rogasssem ubi loci inter tot dignitates reponi debeat titulus Cancellarii Academici, cui postremus à me tributus. Item, utrum initio pro *heroe* rectius dicturus sim *principi*. Fortasse enim consuetudo fert, ut solus eo

elogio

elogio insigniatur primogenitus regis. Sed de his, & aliis quæ faciliè per te videbis, negotium tibi seriò committo. De me verò certò tibi persuade, gratum me semper fore, quibus aliquam mei meorumque curam esse intellexero.

*Nobilitatis tuæ,*

Lugd. Batav.  
clō 16c xxvii.  
Pr. Cal. Maii  
raptim.

*totiusque domus Carletoniæ*

*Observantissimus cultor,*

G. J. Vossius.

LXIII.

*Amplissimo Viro Adriano Blyemburgio.  
Dordrechtum.*

Amplissime Blyemburgi,

**P**ROPEMODUM pudet, tardè adeo quod binis tuis respondeam. Nec tamen tam ipse in culpâ sum, quàm omne hoc tribuendum necessitati; quam, ut ait ille, ne dii quidem vincere potuerunt. Planè enim meus esse desii, extremis hisce mensibus iv. eoque quicquid literarum, five ex finitimis civitatibus acceperam, five etiam, ex Britannia, Gallia, Italia, Germania, terris aliis, id unum in locum recondere sum coactus, responsurus singulis, simulac pusillum otii nactus essem. Malui nempe paulum abuti amicorum patientiâ, quàm ut in Opere, quo prælum ferveret, temporis angustia exclusus sæpius ineptirem. Sanè metuo ne nunc quoque, quando feci quod potui, sæpiusculè quàm vellem, humanitus aliquid passus sim. Quid igitur futurum erat, si de pauxillo isto, quod à publici muneris curâ superfuit, subsecare plusculum voluissim? Nec enim Vossius tuus, est divino adeo ingenio præditus, ut laudabile opus, publico labore condere possit: sed de se quoque verum esse scit, quod Aristides Orator olim aiebat, esse se ex scribentium numero, non vomentium. Quod imprimis dictum velim de Historia nostra, quam nunc de Latinis Historicis, penè ad umbilicum perduximus. Nempe quod in Latinis Poetis Crinitus, & eo non paulo doctior Lilius Gyraldus fecit: Id ego in Historicis præstare sum conatus. Poteram, more quorundam, argumentum sumere, sexcentis ante me tractatum: atque inde in triclinia nostra convasando supellectilem alienam, mirificas opes ostentare. Mihi alia mens fuit, eoque argumentum mihi delegi, in quo eruditio pariter

atque industria haberet locum. Utrum affectus sim, quod volui, alii iudicabunt. Saltem pro viribus pusillis oppidulo nostro moenia fecimus. Hæc ad te nunc scripti, non quia quicquam in iis sit, quod scire tua intersit, quam longè graviores curæ distinent; verum ut videres, me simul ac meus esse cœpi, mei quoque Blyemburgii esse, iterum cœpisse; cujus & æternum ero, quantus quantus sum, dummodò sim meus. Salutem plurimam, ubi occasio erit, dices meo nomine Amplissimis Viris, Affinibus tuis, Consuli Beverio, ac Quæstori Rufio, item Wittio urbis vestræ Quæstori, & aliis nostri amantibus, quorum catalogum non texam. Nam pauperis est numerare sua, ut aiunt. Vale.

Lugd. Batav.  
clō 16c xxvii.  
iii. Nonas  
Maias.

*Tuus sine fuce, ac fallaciis,*

G. J. Vossius.

LXIV.

*Maximo Viro, Jano Grutero. Brettam.*

*Maxime, & Coniunctissime Grutere,*

**I**Ncredibili me voluptate perfudit, Clarissimus vir Altingius, cum certior me fecit, de vocatione tua, ad Academiam Groninganam. Equidem spero fore, ut bellam adeo occasionem, benè merendi de studiis amplectaris; præsertim cum tam multa sint, quæ id suadeant. Nam habet ea provincia Proceres literarum, & literatorum mirè amantes: ut certè tibi persuadere possis, carum te, atque in pretio istic fore: Et vilior ibi annonæ, quàm aliis plerisque sœderatæ Belgicæ locis. Scis etiam quanti intersit habere Collegas, non eruditissimos tantum, verum etiam humanissimos; Imprimis, τὸ δὲ θεῖον λόγον κήρυξας καὶ διδασκαλίας, quibus, quando boni, nihil est melius, acceptiusque; quando mali, ac crabronum similes, nihil est deterius, ac magis invisum. At Collegis uteris, ut eruditione ac doctrinâ, ita virtute ornatis: ex sacro verò ordine, habebis duos eximios viros, quorum unus, affinitate tibi iunctus, ac elegantiorum literarum non gnarus modò, sed etiam in hac ætate cultor sedulus: Alter item vetus amicus, quicum tot annos in Heidelbergensi Academia vixisti. Uterque ea præditus humanitate, ut proprio quodam naturæ munere, ad eam virtutem facti videantur. Quare non tibi negotium erit, cum hominibus, qui præsentibus laudent: absentes, ut tuus Plautus loquitur, frigidam subdolè suffundant: quales ego nimis multos novi, quosdam



quosdam etiam non sine dolore experior. Accedit ad ista, quod juvenus ibi, ut audio, satis sit modesta, benèque composita. Nec duram suscipies provinciam. Leges Florum, Justinum, Livium, Tacitum, alios, quos volēs, scriptores, studiosè adeo, contentèque tibi lectitatos, sæpiusque, ut arbitror, prælectos. Interim occasio tibi erit limandi cætera, ruspandi nova, quæ Reip. literariæ bono, tuique cum nominis honore, partim in Academia illa, partim etiam in nostra, si ita tibi videatur, lucem mox videre possint. Equidem si quid huc transmiseris, non defugiam laborem corrigendi, in quibus Typothetæ aberrarint. Quare ne te hominem Belgam Belgis diutius invade. Nec ætatem objecta, quæ necdum effœta, sed ad molles Musarum labores satis est vegeta. Cogita Imperatorem stantem mori oportere. Sanè longè quidem mallem, ut una nobiscum Lugdunī, in studiis esset vivendi potestas. Sed nunc quidem non licet mihi esse tam beato. Gaudeo interim, quod iisdem Fœderatis Provinciis agemus, nec longo adeo diffiti intervallo, ut non aliquando excurrere liceat, ac literarum commercia crebra esse possint. Sanè non mihi modò id jucundissimum futurum, sed etiam uxori meæ, quæ sæpè tui meminit, & Cognatarum Smetiarum, et si non nisi puella admodum vos omnes viderit; ac plerosque ejus jam familiæ, transtulerit Deus, in meliores sedes. Edidi hoc anno libros tres de Historicis Latinis, eorum historiam perduxī usque ad Carolum V. Exemplar non mitto, ne librariam supellectilem tuam magis onerem. Sed videbis simulac pedem in Belgica nostra posueris. Felicem diem, quando te, liberosque, ac generum, amplecti licebit! Deum Opt. Max. oro, ut veniendi vobis mentem inspiret; atque etiam in itinere Angelum suum det vobis comitem, qui vos salvos in Belgicis sistat hospitibus. Vale, vir eximie, literarum columen, amor omnium eruditorum; ac cum tuis lætus, quam primùm veni; lætior iterum hæc terras vide; Lætissimus iisdem quàm diutissimè vive.

Lugdunī Bar.  
clō Idē xxvii.  
iii. Non. Maii.  
Tagea more  
meo.

Tuus sine fuco ac fallacia, more  
majorum; nec tuus modo, sed  
& tuorum omnium, totus,  
totus.

G. J. Vossius.

LXV.

Clarissimo viro, Francisco Gomaro.  
Groningam.

Clarissime vir, ac Conjunctissime Affinis,

Verissima sunt omnia, quæ ante menses quatuor de Thüano mihi scripseras; Planèque tibi assentior, non abire ita oportere. Atque adeo si cessare ii vellent, qui sanguine, vel affinitate *πρὸς μανσέτην* Junio devinctiores sunt; non tamen tam duro stomacho esse deberent quibus Ecclesiarum nostrarum honos cordi est, ut hominem tam benè de iis meritum, postquam illum cœlo dignatus est Deus, ab eo viro, qui ob summam auctoritatem, apud posteros fidem fortassè inveniret, apertissimis, & iniquissimis calumniis onerari paterentur. De me quidem ita habe, nequitiam me quieturum. Sed cur hæcenus nihil in hoc negotio egerim, causa est non una. Nam usque adeo obrutus fui mole curarum, ut ne respirandi quidem otium concederetur. Ad professionem historicam accesserat altera Linguae Græcæ. Præterea munere Assessoris sæpius occupabar, quàm gratum esset; morte Patruī novi mihi cura accesserat. Auctoritate publica corripbam utriusque linguae præcepta, ac alia quædam conscribebam, quæ deinceps in universis Bataviæ Scholis prælegerentur. Ante omnia me noctes, diesque, fatigabat opus de Historicis Latinis, cujus quia jam bona pars excusa erat, non sine damno Typographi, differri diutius poterat. Quàm autem operosa ea mihi opera fuerit, tum inde cognoscas, quod in ea agam de scriptoribus amplius, quàm mille & sexcentis: Tum exinde quod plusquam tertiam ejus partem, fervente prælo, exarare sim coactus. Itaque sæpè primâ, alterâque hora nocturnâ, non æstiva modo, sed etiam hybernâ, occupabar miser, probis, ut vocant, emaculandis. Nec propterea ullam unquam lectionem publicam neglexi. Imo nec intermisi Collegium Oratorium, aut Historicum in quo Nobilissimis juvenibus XXX. vel circiter, magna ex parte Sarmatis, Cimbris, aut Germanis, vel viam ad Eloquentiam pandebam, vel Antiquitates Romanas enarrabam, & ita enarrabam, ut historiæ non solum è φιλολογίας penu allucerem facem, sed etiam aptarem singula ad civilis prudentiæ præcepta, quod potissimùm à me exegerant; quippe non tam Scholis destinati, quàm Principum Aulis, vel gubernationi Rerum-publicarum. Nec eo segnibus alii subinde, qui vel docentem aliquamdiu audissent in Academia, aut recentis huc advenissent.

ſent, frequentare domum meam, ſive ut exquirerent aliquid, quod minus percepſſe viderentur, ſive ut conſilium meum de tota ſtudioꝝ ſuorum ratione cognoſcerent. Ac plerique eò minus officii id potui denegare, quia à præſtantiffimis viris, etſi ſæpe mihi ignotis, per literas magnoperè commenderentur. Tam multis diſtrictus, non ſolùm diſtuli reſpondere Thuano; ſed etiam coactus ſum, quicquid literarum acciperem ſive è Belgia noſtra, ſive ex Anglia, Gallia, Italia, Germania, Dania, terrisque aliis, id omne unum in locum recondere, reſponſurus ſingulis, aliquanto quidem poſt intervallo; ſed tamen ſimulac liceret, hoc eſt, ubi parte oneris levatus eſſem, nempe Collegiis domeſticis deſinentibus, & Operibus meis, quæ excuderentur, ad finem perductis. Antehac ſanè pugilicè, atque athleticè valueram: verùm hoc anno, qui ætatis fuit quinquageſimus, minus firmus eſſe coepi ac retro euntis valetudinis indicia manifeſta perſenſi; imprimis in brachio ſiniſtro: ſive id ab immodico labore, ſive à natura fatiſcente, poſt annos ſepties ſeptenos exactos. Profectò ſi longè diutius exantlare tot & tantos labores coactus forem, haud diu vitalis eſſe potuiſſem. Sed de iſto. Venio nunc ad alteram cauſam dilati in tuendo ſocero officii. Sciebam edi in hac urbe Epiſtolas Scaligeri, quas antequam vidiffem, putabam nihil hac in re fieri oportere. Quid, inquires, ea res ad Junianam cauſam? Imò plurimùm, ſcis quale fuerit illud maximi Scaligeri ingenium. Non ferebat diſſentientem. Itaque ſemper eo nomine offeſſior Junio fuit, quod in quibuſdam ad ſacram *ἡγεμονίαν* pertinentibus, ac credo in aliis etiam nonnullis à ſe diſcreparet. Offeſſam eam unus & alter Diſcipulorum alebant, malignè interpretantes apud Scaligerum, quæ vel publicè docuiſſet Junius, vel privatim dixiſſet. Scaliger ut iræ impotens erat, accuſare Junium literis ſuis, apud doctiſſimos Gallorum, eoſque inter Caſaubonum, Thuano uſque adeo familiarem, atque adeo ut arbitror, Thuanum ipſum. Itaque non committendum putavi, ut, quia alterum accuſationis caput erat de Junii deſultorio ingenio, multa corante, nec aſſequentē quod moliretur, hiſce verbis reſponderem, priuſquam vidiffem, quid Scaliger ad Caſaubonum ſcripſiſſet. Prodiit nunc Epiſtolarum opus. Præſatio eſt ab Heinſio, ſed ſub Elzevirianorum nomine. Magnifice extollit Scaligeros. Ait naturam quotidie homines parere, non miracula. Sed quid tota poſſet, voluiſſe in utroque Scaligero experiri, inque iis duobus bis omnes vires ſuas eſſe periclitatam. Quibus ego laudibus non invideo:

Etſi non arbitrer Eraſmum fuiſſe iis minorem, præſertim quando cogito tempora, in quæ huius pueritia incidit; tum etiam quàm præclare de Novo Teſtamento, à tot SS. Patribus meritus ſit. Nec enim perſuadere mihi poſſum, minoris momenti, aut fructus, eſſe Operam iſtam, quàm quæ ſubtilius ſæpe, quàm verius adverſus Cardanum Julius diſputat; aut quæ de re poetica, vel cauſis LL. idem nos docet: præſertim cùm ne filius quidem in iis, quæ de Poetis judicarat, Parentis iudicium ſequendum putarit: Et opus de cauſis LL. quærat ſæpe quod non eſt, Alchymiſtarum inſtar, ut ipſe ejus author agnovit, quemadmodum ex Bordonæ fabulæ conſutatione accepimus. Quodque ad Joſephum attinet, ut nec invidia negare poſſit, ad temporum cognitionem, plurimum eum contuliſſe in libris de emendatione temporum, & animadverſionibus Eusebianis; ita Religio quoque ſit fateri, plus inde utilitatis ad Eccleſiam redundaffe, quàm accuratà illa operà, quam Eraſmus antiquis Eccleſiæ Doctõibus vertendis, corrigendis, cenſendis, impendit. Longèque illud minus fatebor, plus profuiſſe Scaligerum, ingenioſis quidem, & doctis in Varronem conjectancis; verùm ſæpe nimis audaci conjectura nixis, uſque adeo ut, Petrus Victorius (quemadmodum ipſe Scaliger conqueritur) cum id opus vidiffet, nunquam conqueri deſtiterit, quaſi iſ in perniciem literarum eſſet natus, ac quia ingenio abuteretur, nimia ſui fiducia, corrupturus verius eſſet Scriptores veteres, quàm correcturus. Equidem longè mitius de Scaligero cenſeo: Sed tamen tantam licentiam probare non poſſum, non magis, quam candorem, cùm diſſimulat quæ in Antiquis Varronis Codd. inveniffet. Et cui perſuaſerit, ſe in Feſto corrigendo, non uſum eſſe ſchedis Læti, dum ita ſupplet quæ deſunt, prout in iis ſæpe ſchedis legebatur? Non hæc candidi animi fuere. De notis ad Priapeia, ad Auſonium, ad amorum Triumviros dicere nolo. De Manilio illud dicere contentus erò, compluria Junium ita in eoſcriptore correxiſſe, prout Scaliger in editione poſtrema emendavit. Scio, ait Scaliger, ſe ita reperiſſe in codice Gemblacenſi. Sed quid ſi iſ obiiſſet, ante reperi-tum eum codicem? Eòne peccaſſet, qui ex Palatino codice, genuinam lectionem Reipublicæ literariæ indicaret? Vaticanari Junius potuit, fore, ut Scaliger eadem poſtea, & meliora, in Gemblacenſi Cod. reperiret? Verum hæc ad Junium potius pertinere videantur, quàm Eraſmum, de quo inſtitutus erat ſermo. Ut igitur ad eum redeam, mihi utroque illo Hæroe, Eraſmus non minor videtur, præſertim ſi ſeculorum infelix attendam, quo Eraſ-

mus, inter indoctos Monachos, in tanta tot librorum bonorum penuria, qui necdum, vel corruptissimè prodierant, ad illud eruditionis fastigium potuit aspirare. Verùm ut hoc quoque concedamus, solum Italum Cæsar. Scaligerum, & Gallum Josephum filium, palmam præripuisse iis qui & ante, & post fuerunt: Non tamen quisquam laudaverit eam malignitatem animi, qua in Epistolis suis utitur. Rectè interim, ac laudabiliter quod omnibus in locis, loco Juniani nominis, Asteriscum posuere, uti & cum Manilius Junii, vel Tertullianus, vel Epistolæ ejus ad Atticum taxarentur. Mallet tamen totas periodos omisisse. Nunc sic quoque intelligent non pauci, quid dicatur, idque ex iis, quæ vel præcedunt, vel consequuntur. Ac imprimis illi sagaces fatis erunt, qui Junii, & Scaligeri temporibus vixere. Nam quomodo hi non intelligant, de quo sermo sit, ubi vident, loqui de eo, qui in Academia doceat Lugdunensi, qui Epistolam aliquam ex Arabico transferendo, jam Arabicæ se Linguae peritiam, sibi vindicasse posse arbitratur, atque alia id genus? Quam autem malignè egerit Scaliger, vel hinc vide, quod non semel dicat, usque adeo imperitum esse Junium, ut non dico Hebraicè (quamquam & illud scribat) sed ne Latinè quidem sciverit. Cujusmodi cum literis istis video contineri, dubitare non possum, quin iis Thuanus compulsus, sinistrum adeo iudicium de Junio tulerit. Imo planè persuasum habeo, haud leviora esse, quæ de eo ad Thuanum perscripserit. Quamobrem si calamum adversus Thuanum stringam, periculum video, ne filius Thuani, Juvenis eruditus, & ut genere, atque opibus pollens, ita multis in Galliis carus, & maximis honoribus destinatus, quæ de imperitia Junii modestè Parens scripserit, ea apertè, & sine circuitione prodita, ostendat à magno Scaligero, Reip. literariæ dictatore, cui doctior orbis lubens eruditionis fascies submittit. Hinc mihi nova cura, etiam tuendi eum adversus Scaligeri calumnias, incumbet. Quem ego virum laudavi semper, ac porro laudare decrevi: Non quia ejus impotentiam animi, aut maledicentiam ignorem; aut quasi nesciam, quàm multis in locis aliquid humanitus patiatur: sed quia ejus tantæ virtutes, præclaraque adeo merita sunt, erga Historiam, ac bonas literas, ut propterea, quæ peccavit, censeam ei condonari, & æterna oblivione sepeliri oportere. Nec tamen impediunt ista, quominus accuratè retellantur, quæ de fuga Junii, ex supplicii metu comminiscitur. Imo nec impedit quicquam quominus, saltem modestè, aliquid dicatur adversus illud de ingenio de-

sultorio. Nec enim desultorio is ingenio, qui à prima penè ætate Theologiæ se dedit, inque eo studio consenuit. Linguarum scio studio, & Philosophiæ incubuit: sed propter Theologiam imprimis, ut in Criticis aliquis voluit videri: Hæc ille subcivis horis, quas alæ aut compotationi, aliqui impendunt. Sed sæpius deceptus est. At nihil opus metiri Junium ex Criticis, nihilo sanè magis, quàm Scaligerum ex Cyclometricis, pusillum errorum plenissimis. Nec tamen infelix est conjector, quàm livor ait. Aliquid accusatio ea ex vero, at nec minus est, quod ex mendacio, invidia, atque odio trahit. Quare nec detrecto provinciam, isti parti quoque occurrendi: Nedom diffugiam laborem diluendi fædum errorem, quo seditionis aut complicationis, adversus summos Magistratus reum agit, ac turpis fugæ insinuat. Quæ tantò turpiora, quanto probitas eruditioni antistat. Tantummodò mihi ita agendum video, ut quàm minimâ eorum offensâ, qui Thuanus, & Scaligero impensius favent, fortissimè Junii causam agam. Utrum autem seorsum, an in præfatione operis alicujus id acturus sim, adhuc delibero. Atque ubi, ex amicorum consilio, aliquid statuero, faciam te quamprimum certior. Nec displicet, ut in Academiæ Lugdunensis Professoribus, quorum vitæ ante biennium hic cum cælata eorum imagine recusæ fuerunt, idem error paucis refellatur. Hæc nunc in mentem venerunt. Poteram fortassè paucioribus hæc proposuisse. Sed non possum in scribendis anxius esse de brevitate, nihilo sanè magis, quam de dictione. Quare si loquacior visus sim, pro amicitia nostra, facile eam rem condonabis. Plurimam salutem lectissimæ uxori, ac tuis, tum autem sorori nostræ Junia, ac præstantissimo D. Makowski.

Lugd. Batav.  
cl. 16c xxvii.  
v. Id. Maii.

Tuus sine fūco,  
G. J. Vossius.

## LXVI.

*Reverendo in Christo Patri, Richardo  
Episcopo Dunelmensi.*

Reverendissime in Christo Pater,

**O**ffero tanti & meriti & nominis præfati aliquid de paupere penu nostro, exiguum, sed magni tamen affectus, & devotissimi animi monumentum, commentarios nostros de Historicis Latinis: quos spero non ingratos



gratos fore, partim propter autorem, qui nihil æquè exoptat, quàm ut placere possit iis, quos Deus ad tantum decus in Ecclesiâ suâ evexit: partim etiam propter argumentum literarum amantibus perutile, iis imprimis, qui eo loco habent antiquitatem Ecclesiasticam quo meretur. Sanè dicere illud possim, studiosè me operam dedisse, ut facilius & legi, & refelli possint, quæ de controversiis variis ab celeberrimo Annalium Ecclesiasticorum conditore adversus nostros scripta sint. Plurimum enim refert nosse, quæ genuina, quæ supposititia sint, quâ ætate scriptor quilibet vixerit, utrum Pontificias an Cæsareas secutus sit partes, & id genus compluria: quorum usus magis apparebit, ubi, quæ nunc de scriptoribus prodidi, accommodata verò rebus ipsis, quas memoratus annalium autor, ex iis vel probare vel refellere se posse arbitratur. Deam rogo, ut ad institutum hoc nobile, & vitam, & valetudinem, imò & otium largiatur. Simul nomen ejus oro, ut incolumem Reverentiam tuam diu Ecclesiæ suæ præstet & conservet.

Lugd. Batav.  
clō 16c xxvii.  
vii. Id. Sext.

Reverendissimi nominis tui  
cultor ad obsequia paratissimus,

G. J. Vossius.

## LXVII.

Reverendo in Christo Patri Joanni,  
Episcopo Lincolnienfi.

Reverende in Christo Pater,

**E**TSI non ignoro, quæ modestia, quantæque animi submissio deceat, primum hoc alloquium, quo affari ausus sum eum, quem Deus illustri ad eò loco in Ecclesia sua collocavit: arbitror me tamen illud dicere de me posse, à prima me adolescentia summo amore captum fuisse Historiæ omnis, ac præcipuè Ecclesiasticæ Antiquitatis. Quid verò labore atque industriâ promoverim, judicium penes alios esto. Saltem, spero, nemo bonus improbabat propensissimam hanc voluntatem benè merendi de studiis literarum. Atque ego animo pergo quotidie colligere vindemiolas meas, quas & publici juris facio. Cæterum, cum in omni historia duo spectare conveniat, quis dicat, & quid dicat; seorsim de utroque melius me acturum existimavi. Atque istud in causa est, cur hoc tempore de Historiarum scriptoribus egerim.

Ac ante triennium quidem commentarios meos emisi de Historicis Græcis. Hos nunc consequuntur alii de Historicis Latinis. Priores dicavi Illustribus Bataviæ notitæ Ordinibus, patriæ patribus. Alteros hosce sacravi florentissimæ genti vestræ, potissimum Illustrissimo Duci Buckinghamiæ, imo si non tam inscriptionem, quàm argumentum præfationis notitæ ponderemus, toti infimali Academici Cantabrigienti. Nempe animo terras omnes lustranti non efferebat se natio illustrior vestrâ, seu arma spectarem, seu literas etiam, tum sacras, tum istas de quibus hoc opere tractamus. Adhæc beneficium illud, quo me per Illustrissimum Baronem à Broock, affecit laudatissima gens vestra, jamdiu ali-quod mihi testimonium grati animi imperare visum fuit. Quanquam autem non adeo Sufferus sim, ut existimem proficisci à me quicquam posse quod satisfacere possit exactissimo Reverendissimi nominis tui judicio (cujus ad limam si revocare omnia velimus, fore prospicio, ut pauciora hic reparias quæ placeant, quam quæ displiceant) tamen nihil causæ videbam, cur fidem minus haberem tam multis prædicantibus summam humanitatem tuam, ac facilitatem in cognoscendis & ignoscendis erroribus eorum, qui de publico bene mereri studuerunt. Eonæ hujus spei plenus, tantæ & dignitatis & doctrinæ præfati offero nunc monumentum hoc laboris nostri, minutum quidem si autorem consideres: sed non aspernandum tamen, seu respicias paratissimum ad cultum omnem, & obsequium tui voluntatem nostram: seu etiam spectes, quoddam hæc opera munient viam nobis ad majora: puta ad refellenda ea, quæ ex scriptoribus à nobis opere hoc memoratis ab Ecclesiasticorum Annalium conditore, atque aliis adversus Religionem nostram depromuntur. Deus Optimus Maximus longam tibi, Reverendissime Præfati, felicemque vitam largiatur, quoddam diu Ecclesiæ suæ præstis & prosis.

Lugd. Batav.  
clō 16c xxvii.  
vii. Id. Sext.

Reverendissimi nominis tui cultor  
ad obsequia omnia paratissimus,

G. J. Vossius.

## LXVIII.

*Reverendissimo in Christo Patri Georgio,  
Chichestrensi Episcopo.*

Reverendissime in Christo Pater,

**S**æpe recorder honoris mihi habiti tempore Synodi Dordrechtanæ, ac postea, priusquam pedem è terris nostris poneretis. Nam & Dordrechtis me tuâ, & quod longe majoris duco, sanctis juxta ac eruditis colloquiis tuis, & eorum quos tecum in Bataviam Ecclesia miserat Anglicana, dignari voluisti: Nec Lugduni minus persensî eximiam humanitatem tuam, & collegarum, quos dixi, virorum non præcellentis minùs pietatis, quàm doctrinæ. Beneficium hoc vestrum pluribus extollerem, nisi satius ducerem, ut ista silentii nunc sipario recondam, virtutesque vestras apud alios potiùs quàm apud te prædicem. Hinc amorem erga te meum immane quantum auxit beneficentia illustrissimi legati, viri immortalitate dignissimi, & cognati ejus regii Consilii Magnæ Britanniae à Secretis: qui & præclare de me meriti, & porro mereri non cessant. Quamobrem cum nobilissimæ genti vestræ Carletonæ multò sim obstrictissimus, nefas putavi, si non operis novi de Historicis Latinis exemplar ad te mitterem, præsertim cum illud consecrarim nunquam satis laudatæ Britanniae nationi. Quæso, Reverendissime Præsul, minutum donum non aspernare. Proficiscitur enim ab animo devotissimo, & ad obsequia tua paratissimo. Et deinceps mihi viam sternet, ad ea diluenda, quæ ex superiorum seculorum scriptoribus adversus Religionem nostram à Baronio, atque aliis, adferuntur. Utinam mihi Deus & vitam & otium concedat ad eam rem, uti exopto, fusius planiusque comprobendam. Nunc quod olim Augustus Cæsar aiebat, contentus eris hoc Catone. Reverendissime domine, consule hæc igitur æqui bonique. Deus te saluum ac sospitem servet Ecclesiae suæ bono.

*Lugd. Batav. Reverendissimi nominis tui cultor, imò  
c. loc xxvii. illustrissimæ domus Carletonæ  
vii. Id. Sextil. cliens eternam debiturus,*

G. J. Vossius.

## LXIX.

*Illustrissimo D. Fulconi, Baroni à Broock,  
Serenissimæ Regiæ Majestati à Consiliis interioribus, Mecænati suo Optimo.*

Illustrissime D. Broocki,

**P**ostquam me beneficio summo planè fecisti tuum, rectè me atque ordine facturum putavi, si tam otii quàm negotii mei, et si nihil tale poscenti, redderem rationem. Eoque animo mitto nunc novum ingenii, ac industriæ nostræ fœtum. Idque eò lubentius, quia sacratus is florentissimæ genti vestræ, cui propter meritum tuum debebatur. Nec eò minus adhuc maneo in nexu tuo, unde me exolvere nunquam potero. Sed, spero, tandiu saltem mihi vita suppetet, donec gratum etiam posteris testari liceat affectum: de quo seriò nunquam cogitare desistam. Multum gaudeo, quòd heroicâ liberalitate ac munificentia tuâ nobile adeò munus obtigerit præstantissimo nostro Dorellario J. C. Dumque oro, ut optime hoc, cum ei, tum Academiae Cantabrigien si vertat. Et profectò ex viri ejus præclara doctrina ac virtutibus, quibus ex animo faveo, ita fore auguror. Vale Illustrissime Domine, nec nostro modo, sed planè literarum ac literatorum Mecænas.

*Lugd. Batav.  
c. loc xxvii.  
vii. Id. Sextil.*

*Illustrissimo nomini tuo eternam obligatissimus,*

G. J. Vossius.

## LXX.

*Clarissimo & eximio Viro D. Samueli  
Wardo S. T. Doctori & Professori in  
alma Academia Cantabrigien si.*

Clarissime Domine Warde,

**N**OLI propter diutinum silentium putare, oblitum me suavissimi, ac doctissimi Colloqui tui, tum Dordrechtis mecum habiti, tum etiam Lugduni. Atque utinam occasio mihi antehac fuisset testandi gratum animum pro benevolentia tua, atque adeò omnium eorum, quos ad Synodum Dordrechtanam Magna Britannia miserat. Equidem meminero,

*Dum memor ipse mei, dum spiritus hos regit artus.  
Itaque & nunc mitto ad te amoris nostri  
pignus minutum, commentarios nostros de  
Historicis*

Historicis Latinis. Atque eò id facio lubentius, quia fore spero, ut non iis modò operâ hac profuerimus, qui *τὰ ἱστορικὰ* tractant assidue, sed etiam, quibus curâ est cognoscere Ecclesiæ Historiam. Nam probè scis, quanti referat nosse, qui res scripserint Ecclesiasticas, & quando, & quâ fide, atque alia quæ ad auctores ejusmodi pertineant. Itaque planè fore confido, ut si minùs tibi videar affectus, quod conabar, saltem probes voluntatem commodandi ejusmodi studiis juvenutis.

Vale præstantissime Vir, & ne amicitia nos tuâ indignos cense, qui te propter egregias dotes maximi facimus.

Lugd. Bat. clō  
Id. xxvii. vii  
Id. Sext.

Tuus ex animo,

G. J. Vossius.

## LXXI.

*Generoso & eximie eruditionis Viro D.  
Joanni Seldeno, J. C. Londinum.  
S. P.*

Quod olim fecit Cornelius Nepos, vir tantopere à Catullo laudatus, ut scriberet de Historicis Latinis: idem nunc ego tentavi, viribus quidem ingenii ac doctrinæ Nepote longè inferior. Sed tamen alio nomine magis profuturus, quia licet præclarus ille Nepotis labor superesset, non tamen ultra sua tempora, hoc est, Augusti ævum, perungere potuerit: ego verò historiam perduxerim usque ad tempora Caroli quinti. Quod ut facerem, evicit, non quidem laudum immensa cupido, ut ait ille, sed potius boni publici amor, qui me nunquam patitur cessare. Nec magnopere laboro de eo, quod commentationis nostræ lapides videbuntur minus politi, quod sponte agnosco: sed satis fore putavi, si etiam rudes ului esse possent, quare non ista modò qualiacunque in lucem dare, sed etiam ad te mittere ausus sum, Vir eximie. Cujus ego simulac aureum opus de diis Syris vidi; legere non contentus, etiam iteravi, atque tertiavi, semperque ex eo me inter tuos debitores sum professus. Atque hoc ipsum in causa est, cur nunc aliquod affectus mei testimonium mittam: quod eò, spero, gratius erit, quia id datum eximie nationi vestræ, cui me æternum fateor obstrictum. Ulterius quo me, vel hanc etiam operam meam tibi commendem, nihil, præter argumentum ipsum, occurret: quia tu quoque, scio, cultorem no-

minis tui minimè contemnes. Vale, Clarissime Seldene; nosque redamare ne grave duxeris.

Lugd. Batav. clō  
Id. xxvii. vii. Id.  
Sextiles.

Tuus totus sine fæco,

G. J. Vossius.

## LXXII.

*Reverendis, Clarissimis, & multijugæ  
eruditionis Viris, D. D. Matthæo &  
Christophoro Wrennis, Serenissimæ  
Regiæ Majestati Magnæ Britannix à  
Sacris.*

Reverendi, & Clarissimi Viri, Nobile fratrum par,

Quotidie pene novum capio experimentum veteris dicti, quo amorem gigni aiunt similitudine studiorum. Quantopere quidem capiamini amore Ecclesiasticæ antiquitatis, ex Nobilissimo Dubletio nostro abundè intellexi. Qui & me, ut studiorum eorundem cultorem, propterea amari à vobis, non semel prædicavit. Ego verò vos, summi viri, non jam uno sed gemino nomine redamo, ut eorundem studiorum sectatores, atque ut amantes mei. Rogo, ut ne in affectu eor, etiam id minimè merear, persistere gravemini. Mitto ad vos genuinum exemplar operis novi de Historicis Latinis: quod si non ingratum fore intellexero, beneficio etiam me affectum planè arbitrabor. Addidi & exemplaria altera duo, quorum si unum Doctori Hieronymo Belo, alterum conjunctissimo affini meo Francisco Junio, transmittere non gravemini, magis etiam me obstrinxeritis vobis. Valete Reverendi & summi Viri.

Lugd. Bat.  
clō Id. xxvii.

Utriusq; Vestri cultor atq;  
amicus,

G. J. Vossius:

## LXXIII.

*Clarissimo atque eximie eruditionis Viro,  
D. Jodoco Rous Bibliothecæ Bodleianæ præfecto. Oxonii.*

Vir Clarissime,

Nec summa doctrina tua, nec munus præclarum quod sustines, patiuntur te ignorari nostratum illis, qui Musas colunt severiores.



veriores. Atque ea me res impulit, ut munusculo literario animum testarer erga te meum. Mitto enim commentarios nostros de Historicis Latinis: quo in opere non mediocris mihi exhaustus est labor, nec minus fortasse superest. Multa enim limam tuam, tuoque similibus requirunt: nec operâ tuâ, aliorumque magnorum virorum, exigua ei accessio fieri possit à Bibliothecis gentis vestrae, Bodleianâ imprimis, cui præs. Utinam ita res meâ tulissent, ut tot præclaros Scriptores, quos ineditos hæcenus servat Britannia magna, coram ipse manu versare, & curiosis oculis lustrare potuissem. Equidem cælum mihi digito attingere visus fuissim. Sed quia non potui, quod optabam, optare non definam, quod fieri possit. Hoc est, ut è summis viris vestratibus intelligam, ubi opera mea claudicarit, quod quin sæpius contigerit, quam vellem, nullus dubito. Verum spero ex te, Vir eximie, atque aliis præstantissimis Viris cognoscere licebit, vel indicta mihi, vel perperam dicta. Ipse editione alterâ non finam posteritatem nescire per quos profecerim. Id enim candore nostro præcipue dignum arbitror: quippe qui non tam scriptis nostris velificemur honori nostro, ut ambitiosi solent, quàm omnia publico metiamur commodo. Imo, ut arbitror, sic sponte nos gloria, longèque eâ solidior consequetur. Quid enim pulchrius nobis, quàm si posteritas videat, quantis viris innotuerimus & quàm studiose eorum amicitiam ambierimus, nec id sine alio, quam amore virtutis doctrinaeque. Vale, præstantissime Rousi, nec grave dixeris iis me accensere, qui te ob eximias animi dotes maximi faciunt.

Plurimâ te salute impertit Dubletius noster.

Lugduni Bar.  
clō Idc xxvii.  
vii. Id. Sextil.

Tuus totus sine fūco,

G. J. Vossius.

#### LXXIV.

Constantino Huygenio.

Nobilissime, Amplissimeque Vir,

**E**X Athenæo nostro, vel si mavis, Musarum castris, mitto opus nostrum, non Mulivum quidem, ac tessellatum, sed Apollinare tamen; vel si hoc quoque nimium est, saltem exaratum, de illo genere, Apollinari virorum; quod panxerit res gestas,

magna ex parte Martialium virorum. Quod addo, ne importunè illud transmittere videar, ad Mavortia Castra vestra. Quamquam altero etiam nomine, tueri factum meum possim. Etsi enim apud paludatum Imperatorem nostrum, & tot sagatos Heroas, nihil nisi Mavortium audiatur: tamen simulac tuus paulum esse coeperis, scio, te illas de Marte cogitationes, Musarum studiis, quasi fortem Falernum, Castaliis aquis temperare. Cujus ego rei conjecturam, non obscure cepi, ex iis quæ mihi retulit, deliciae nostræ Barlaeus. Quamobrem nec rogare jam sustineo, ut me ames, cum id sedulo facias, longè etiam, supra meritum meum. Potius illud oro, ut optimi consulas munusculum meum, minutum quidem, sed magni tamen affectus symbolon. Non meretur, quod verissime, Veronensis Poeta, de Nepotis tui chartis scribebat, doctis, Jupiter! & laboriosis. Nec enim ita infansio, ut apud tui similes, de doctrina jactare me, vel commendare nostra, velim; scio quam mihi curta sit supellex. Attamen propemodum censeo, competere commendationi nostræ, posterius illud Laboriosæ Elogium. Quod re Alinis quidem invidetur, fin nobis, ne illud quidem relinquatur, iussero ego malignos adeo ætimatorum, ætatem agere in simili senticeto, quo sentire tandem dicant.

Vale, Nobilissime, doctissimeque vir; nisi jam nunc fortissime potius dicere debui; sed scio te, amantissimi tui verba non exigere ad libellam.

Lugduni Bar.  
clō Idc xxvii.  
Post. Eid.  
Sextil.

Tuus sine fūco,

G. J. Vossius

#### LXXV.

Generoso Doctissimoque D. Gulielmo Boswello, amico optime de se merito.

Præstantissime D. Boswelle,

**S**Æpe obversatur animo meo Illustrissimus Baro à Broock, Vir genere quidem & dignitate summus: sed in quo tamen virtus longè exsuperet fortunam, ut reverà in eo minimum sit, quod vulgo putatur maximum. Hujus erga me affectum, & judicium de me præclarum, tute longe melius me nosti. Quare scio, nequiquam miraberis, si dixerò, serid me sæpius cogitare quo pacto Viro huic dignissimo sanè, qui nunquam ignoretur, publicum grati animi testimonium offerre

offerre possim. Sed quia hætenus in tantâ occupationum mole præstare non potui, eos imitari proposui, qui creditoribus syngraphâ, quod debeant, obsignant. Nam & quid beneficii acceperim, ingenuè, ut decuit, agnosco: & quid ulterius cogitem, non obscurè indico. Utrumque hoc tribus, ut ita dicam, verbis, testatur præfatio operis ad Illustrissimum Buckinghamiæ Ducem. Commentarii ejusce exemplar quadruplex transmittito: unum Reverendissimo in Christo Patri Joanni Episcopo Lincolnienli, alterum Illustrissimo Baroni à Broock, tibi verò tertium, quartum clarissimo Seldeno. Fore autem spero, ut quod paulo ante me Illustrissimo Baroni recepisse aiebam, id primâ occasione exsolvam, non tam summi ejus viri causâ, cujus honori nihil à me scriptione ullâ accedere potest, quàm ut animo meo quomodocunque satisfaciam. Hæc familiariter ad te scribenda existimavi, doctissime Boswelle, Tu nos porro ama, & illustrissimi Baronis amorem erga nos deinceps etiam, quantum in te est, fove. Nihil mihi gratius facere pollis. Vale.

clō Ioc xxvii. xxv.  
Jul. Kal. Sextil.

## LXXVI.

*Clarissimo & summæ eruditionis viro, D.  
Hieronymo Belo, S.T. Doctori, &  
aulæ Pembrochianæ Præfecto. Cantabrig.*

Clarissime Domine Bele,

O mnes quidem eos maximo prosequor amore, qui literarum studiis excellunt; nullos tamen æquè æstimare soleo, quàm qui Ecclesiasticæ etiam antiquitatis sunt callentes: quales in tristi hoc religionis dissidio impenitus paci concordique Ecclesiæ consulere & possunt, & solent. Quo sanè quid utilius hoc tempore præsertim in tanto eorum numero, qui antiquitatis contemptu nova dogmata vel fingunt vel foveant. Tibi verò, ut ex Nobilissimo & utriusque nostri amantissimo Georgio Dubletio intellexi, antiquitas studio semper ac cordi fuit, ac me quoque, quia ejus capiar incredibilem amore, majoris propterea facere soles. Utrumque hoc tui etiam in me amorem longe maximum accendit: quem nunc cum aliter non possem, leviculo industriæ nostræ monumento testandum putavi. Tu, vir Clarissime, quicquid hoc

est opellæ boni consule, nec tam munus spectâ, quam animum donantis. Vale.

Lugd. Bar. clō  
Ioc xxvii. vii  
Id. Sextil.

*Tuus sine fūco ac fallaciis,  
more majorum,*

G. J. Vossius.

## LXXVII.

*Abrahamo Vander Merio, Senatori.  
Hagam.*

Amplissime vir, Cognate Ornatissime,

Quæ synodo ante triennium promiseram, ea jam ante menses xx. atque ultra sum executus, sed opus in quo id egi, (dico autem commentarios meos de Historicis Latinis) usque adeo spissè processit, ut demùm, post mensem, in lucem prodire possit. Quid mirum, cùm in eo agam, de Historicis amplius, quàm mille sexcentis? Proderit is labor meus, non solum Literarum bonarum, aut prudentiæ civilis studiosis; sed omnibus etiam, qui cum Théologia conjungunt Antiquitatem Ecclesiasticam. Locus de quo dixeram, est operis hujus pag. 213. Ubi multa brevissimè sum complexus. Nam clarè rejecio sententiam Cassiani, qui Semi-Pelagianorum Princeps habitus. Clarè subscribo Augustino, Prosperoque, qui & Pelagianis, & Semi-Pelagianis fortissimè restiterunt. Et ne videar eorum sententiam aliter capere, quam oportet, clarè addo, me ita eos intelligere, ut dicant, prædestinationem esse, fide & perseverantia priorem, h. e. ut Prædestinatio sit causa, fides & perseverantia sint prædestinationis fructus. Et quia mihi sæpe obiectum de Historia à me edita super controversiis, quæ Ecclesiæ cum Pelagio, & Semi-Pelagianis fuerunt; eo non dubitavi addere, haud assequi sententiam meam, si qui putent illa quæ opere eo attuli, de quatuor primorum seculorum sententia, adversari Augustini sententiæ, ante memoratæ: quippe plius eum dicere quàm priores, non contrarium. Denique promitto ibidem, me per occasionem aliquando fusius de istis tractaturum. Priusquam hunc locum prælo subjicerem, monstravi eum singulis facultatis Theologicæ Professoribus: Quibus abundè satisfeci. Unus Wakeus putabat, ubi scripseram, *Tanquam impia vel falsa*, rectius scripturum, *Vel etiam falsa*. Itaque eo Authore, etiam adjeci, scio me satisfecisse omnibus bonis. Nam & Ecclesiasticis compluribus domi meæ verba illa prælegi. Siquis tamen ita animatus sit, ut nunc

nunc quoque nodum in scirpo querat, non tam ille mihi crucem figet, quam animi sui ulcus prodet. Cæterum persisto in sententia, non satis ex honore meo fore, si cogar, priusquam opus meum in omnium manus venerit, ostendere pagellas, quibus præsto, quod receperam. Is enim sum, cui fides dicenti debeat haberi. Et ex facultate Theologica potuere rem omnem cognoscere, si quibus adhuc scrupulus ullus foret. Verumtamen si omnino ita necesse erit, non impedio quominus iis pagellæ illæ monstrantur, quibus videbitur. Locutus sum de re tota, cum D. Henrico Fabricio, viro præstantissimo, & integerrimo, quem Classis Leidensis ad Synodum mittit. Is nec ipse existimabat, temerè eas esse promendas. Sed permisi, ut si omnino opus sit, eas à te pagellas petat. Committo negotium omne, prudentiæ utriusque vestri. Plura vellem, sed ne sacram concionem negligam, malo abrumperè. Scripsi celerimè. Nec relegendi otium erat. Tu pro benignitate animi tui, si quid hic culpæ fuerit, facile condonabis. Salutem optimæ Conjugi tuæ, & ubi Dordrechtum vineris, affini præstantissimo Jac. Wittio quaestori, simulque uxori ejus.

iv. Jul.  
1627.

Tuus totus,

G. J. Vossius.

### LXXVIII.

Abrahamo Vander Merio, *Senatori Hagami.*

Vir Amplissime, cognate Optime, & Amicissime,

**D**E Hadriano Imp. legimus, quoties à Poetis versus afferentur, eos versiculis suis remunerari solitum. Ac placuit exemplum, Pio II. qui antea vocatus Æneas Sylvius Piccolominæus. Ejus illud circumfertur.

*Discite pro numeris, numeros sperare Poetæ.  
Mutare est animus carmina, non emere.*

Quamquam Vossius tuus, nec est Cæsar, nec Papa, tamen (vide quos spiritus gerat) decretum ei, utriusque vestigiis insillere. Itaque pro versibus, versiculos mittit, ut sit hostimentum par pari. Dices non tam versus te expectasse, quam judicium meum, de dubiis, ut Grammaticorum filiis ea visum nuncupare. Age igitur, si ita placitum, sit hoc opellæ nostræ poeticæ Mantissa, vel Corollarium. Ego interim Cathedram Gramma-

ticam ascendo, & te Auditore, vel Lectore uno, contentus (etiam Antimacho unus auditor Plato sufficit, qui erat ei instar omnium) de dubiis istis, non dubiam feram sententiam. Faciamque id (si ita cum Lovaniensibus Magistris loqui fas sit) magistraliter. Quidni enim mihi id per te liceat, qui longè etiam majora mihi permittis? Quare in rem ipsam venio. Tu Amplissime Senator, togam compone, & Grammaticum hominem audi contendentem, non in vestro illo, sed foro suo. Primum igitur aio, fuscillis quædam ex dubiis istis proculdubio expelli debere. Nec ignoro, quo tibi cine vulgus fulciat opinionem suam. Sed tibicen iste est ficulnus, ut non possit non labare, quicquid imponas. Nam de *Natrix* fefellit Grammatico, Lucani locus. In *Aleyon* decipit Servius. In *ficus* pro fructu imposuit Martialis locus malè intellectus. Muliebri enim genere usurpant Celsus, Plinius, rei rusticæ scriptores, & quicquid Classicorum est uspiam Authorum. *Camelus* Græcis quidem scæminum est, Latinis nunquam. De *Pharus* etiam sitne dubium, planè dubium est, atque incertum. Tutius saltem in muliebri genere usurpes. *Pulvis* vix inter dubia reponi meretur. Sed hoc tamen non acriter ducere velim feram cum quoquam. Hui, inquires, si tam multa ex veribus hæc expellantur in Morboniam, in arctas admodum copias cogentur dubia. Mane vir præstantissime, nos in eorum locum quos fugavimus, novos succenturiabimus. Erunt autem isti *Varix*, *Sandæ*, *Onyx*, *Sardonix*, *Canalis*, *Volucris*, *Ales*, *Palumbes*, *Artabo*, *Bubo*. Vides quàm multi, ut periculum non sit, ne armis expellantur inde, quo à me deducti. Multoque minus laborabunt, si jure vestro contendatur. Quamquam profecto ita aperta est hæc causa, judicio meo, ut minimè metuendum sit, ne priores isti, quos expulimus ex interdictione, unde vi, restitui possulent. Causa ista perorata, ut ego quidem censeo, venio ad iudicium quod poscis. De Steuchio Eugubino equidem ita iudico, malè eum mereri de Religione Christiana, quando mysteria ejus cognita fuisse docet, Antiquis Gentium Philosophis, imprimis Platoni: atque hoc ut persuasum eat, planè alioversum torquet verba ejus, quàm Philosophus ille senserat. Nec magis probo, quod ea stabilire conatur, ex Trismegisto, ac Sibyllinis Oraculis: ubi multò apertius arcana Religionis proponuntur, quàm in Prophetarum Vaticiniis. Atqui quis nescit ea tempora, quæ *ἡμετέριον* sospitatoris nostri præcedunt, ab Apostolo ipso nominari, *χρόνος ἀγνοίας*; aut quem fugit *ἡμετέριον*, eidem dici *μυστήριον ἀπαρχαίων*



Quibus gemina & alia in scripturis leguntur. Nec ignoro, quæ ab Hieronymo Floravatio, Lib. III. de beatissima Trinitate, cap. 1. adferantur, ut doceat Trinitatis mysterium, aliquo modo gentibus fuisse cognitum. Sed ille eadem ac Eugubinus chorda oberrat. Hoc est vel genuinis Gentilium scriptis, falsam affingit sententiam, vel scripta *ὑποκριμα* ac supposititia habet pro genuinis. Mihi neutrum placet. Nec enim veritas coelestis, quæ est à Christo, & Spiritu ejus, indiget mendacio, quod Patrem habet Diabolum. At Platonicos non id voluisse, quod Eugubinus putavit, nemo negabit, qui in Platone cum judicio fuerit versatus. Trismegistum autem, & Sibyllina, ut vocant Oracula, esse supposititia, & res clamat, & dictio ipsa arguit. Quod ego pluribus demonstrarem hoc loco, nisi inter alios, luculentè id fecisset Casaubonus, exercitatione prima ad apparatus Annalium Baronii. Nec nescivit hoc Magnus Civis tuus, qui brevissimè nuper pro veritate Religionis Christianæ commentariolum edidit, sanè hoc seculo potissimum, quo omnia ad *ἀδελφία* vergunt, perutilem eoque utiliorem, quod quantum hæcenus potui videre, scopulos effugerit, in quos priores impigere: Nam segregavit ille argumenta ista, quibus mysteria nostra Religionis, non sine aperto mendacio probarentur. Præterea Religio est ei, quod debemus Spiritui Sancto, & Prophetis ac Apostolis, id acceptum ferre lumini Naturæ, & cæcarum gentium lacunis. Quod parùm religiosè fecit Steuchus, & cum eo alii nonnulli. Ad duo tantum capita Epistolæ tuæ respondi: Et vides jam in tantum literas hæc excrevisse. Quid futurum est, si de cæteris, etiam quid sentiam, attexam? Sed de iis, vel coram, vel literis alteris videro. Tu, Amplissime vir, loquacitatem meam boni consule. Salutem conjugi tuæ. Desidero scire, an planè jam valetudini suæ restituta sit socrus tua *ἡ γυναικὶς*. Quare quando otium est rescribendi, velim verbum de hoc at-texas. Multam etiam salutem Senatus vestri Præsidi, ac Curatori Academiæ nostro Cromhoutio.

Lugd. Batav.  
clō Idc xxvii.  
xiii. Kal. De-  
cembria,

Tuus sine fūco,

G. J. Vossius.

## LXXIX.

Gerardus Vossius Hugoni Grotio S. P.

TAndem, maxime, & amicissime vir, prodit in lucem historia mea, de Historicis Latinis; cujus exemplar nunc mitto: quod licet nihil elucubrari subtili tuo judicio dignum, tamen, quia meum est, placitum confido. Si ausus fuisssem ulterius onerare conjugem tuam, addidisssem codicem alterum ad Salmasium. Sed fiet id per Lamerium, qui Gallias cogitat. Simul aliquid ad eum literularum addam. Dicere vix possum, quantoperè sim sermone, & literis multorum fatigatus, ut tuerer honorem soceri adversus Thuanum. Et diatribam super eo seorsim postularunt. Mihi etsi impensè honori Juniano studuerim semper, res tamen ea tanti visa non est. Quare satis fore putavi, si id fieret præfatione altera operis nostri, quæ est ad Lectorem. Ita autem respondeo, ut salvo soceri honore, modestius potuerit nemo: idem scio judicabis ipse ubi videris. Movere me non solum magna Thuanian merita, sed etiam quod filium ejus viderem tantopere à te amari: quem scirem nihil immeritò magni facere, præter me unum. Sanè hic erga nobilissimum juvenem, amor tuus tanti apud me fuit, ut vel acerbius aliquid tam multorum assiduo impulsu cogitantem, facillè posset sufflaminare. Acrius paulo insurrexi adversus Scaligerum, quia edoctus essem ab eo fonte esse, quod plerq; de Junio Thuanus hausisset: Ut fidem faciebant multa. Memor eram, qualia superstes evomuerit adversus Junium, cum totus in fermento jaceret. Et meminisse ipse potes. Adhuc in nostris, & aliorum manibus versantur codices Juniani, Scaligeri manu opereti bellis illis elogiis, simia, asinus, cojone, & aliis id genus convitiis, *συμβολαί*, non Scaligero dignis. Et hocce anno Heinsius noster in lucem edidit Epistolas Scaligeri, in quibus non urbanatim, sed rusticatim Junium tanquam Cumanum asinum tangit, homo cætera magnus, sed nimis malignus, nec ita animatus, ut se etiam hominem esse cogitaret. Vellem Heinsius periodos eas, in quibus de Junio Scaliger loqueretur, imò totas Epistolas omisisset. Nunc Asteriscum ponere fuit contentus: interim relinquit, ubi dicatur edidisse notas in Cypriani Magistrum, contulisse Manilium cum MSS. codicibus Palatinis, aliaque id genus: quasi multum intersit, utrum dicam Sophronisci filium, an Socratem; Trojani belli Scriptorem, an Homerum. Equidem vellem hanc mihi necessitatem re-spondendi

Q

spondendi non imposuisset Heinſius. Et tamen ita reſpondeo, ut qui nesciat hocce anno editas apud nos eſſe Scaligeri Epistolae, nescire etiam poſſit per eum, cujus me nomen dico parcere velle, intelligi Scaligerum. Nempe tum demum nomino, cum ejus de Junio epicedium refero: Iccirco tandem subjungo aliqui de Epistolis prestantes viri, ſive dicti ſive adhuc innominati vobis. Nempe innominati, ubi calumnia reum ago. At nominati honorifice, ubi ejus de Junio elogium commemoro. Summa autem deſenſionis noſtræ eò redit, dicere potuiſſe Junium de Criticis ſuis, & aliis ſimilis monetæ, illud Arellii Fuſci, ne quis me ex his cenſeat. Dicavi opus meum Illuſtriſſimo Buckinghamiæ Duci; nempe ut Cancellario Academiae Cantabrigienſis, ad quam honorifice vocatus eſſem; ſimul ut teſtarer affectum meum erga gentem eam, in qua tot mei amantes haberem. Diſplicebit fortaiſe nonnullis apud vos laudatio ducis: ſed ſcripta hæc à nobis, priuſquam fama increbuiſſet belli Anglicani adverſus Gallos. Nec ad ſimiles mei, innocuos Muſarum Cultores, judicium pertinet, utrius regni cauſa hoc in bello potior ſit. Equidem opto, ut genti utrique bene vortat, etſi id fieri quo pacto poſſet, minimè videam. Excusavi jam liber tuus de Religionis Chriſtianæ Veritate. Quem cum lego in cœleſti cœnaculo cum Dis mihi epulari videor. Ut quàm correctiſſimè ederetur curavi, ut potui & debui. Sed cum ſemel Ultrajectum, iterum mihi Hagam excurrendum eſſet, nec perſuadere poſſem Typothetis, ut abſente me, alia prælo ſubjicerent, filiis curam committere ſum coactus. Ita factum ut tribus quatuorve pagellis, quædam compareant negligentiùs edita, ea imprimis, unde errorem ſpiſſum ad calcem annoſavi. Fragmenta illa, quæ in rutis caſis tragicorum comparent, ſperavi propediem poſſe recudi. Sed nihil hæcenus æquè oblitit, quàm quod talia à paucis legantur: quippe, ſi *propterea* paucas exceperis, ejuſmodi ſunt omnia, ut nihil inde commodi referant alii, quam penitioris literaturæ amantes, quos Grammaticos vocamus. Sed tamen quia jam finem ſuum Hiſtoria noſtra habet, hanc etiam curam ſuſcipere animus eſt; nec urgere Lamerium deſinam qui moras ſemper neſcit, neque id alia de cauſa, quàm quia non facile Seneca cum fragmentis inveniat emptorem, ob molem tot Criticorum, qui nihil annotarint, quod ſit ad vulgi guſtum. Quod ad duos tres, ut cum Varrone dicam, phreneticos Septentrionis fillos, quibus moris magnas ciere tempeſtates, ſi quis non per omnia eorum ſequatur opinionem velut *novæ ſæculi* mihi quidem nunc aliquan-

to pacis amplius, atque opto, ut æternum eos Æolus compeſcat. Vir Clar. Janus Gruterus in Academiam Groningæ, & Omlandia vocatus eſt, ut ibi ſuccedat Ubboni Emio. Venturum ſpero, non tantum quis is vir eſt, qui, ut de Mario M. Ciceronis, *ſcavola veſter dicebat, Canefcet ſæclis innumera bilibus*: verum etiam quia affinitate eſt uxori meæ junctiſſimus, & mei amantiſſimus. Filius meus Franciſcus præclarum opus tuum de jure Belli propè ad unguem callet. Et quid ei, quem juris ſtudio deſtinavi, melius commendaviſſem? Memini enim me apud Tullium legere in primo de Legg. ex intima Philoſophia diſciplinam juris hauriri oportere. Id quidem comprobaviſſe mihi primus videris. Scire deſidero, quid poſt hunc laborem, & gnomarum opus geminum, verum ſapientiæ Theſaurum, publici juris facere cogites. Vale, & à me, uxore, & familia omni ſalve plurimum.

Lugd. Batav.  
clō loc xxvii.  
x. Kal. Sept.

Tuus æternum,

G. J. Voſſius.

#### LXXX.

Gerardus Voſſius Hugoni Grotio S. P.

Magniſce, Clariſſimeq; domine; Abbotius in Apocalypſia nec in officinarum pergulis, nec in amicorum Bibliothecis comparer. Si ſcripſit, Anglice ſcripſerit credo, de quo certior dicere poſſet affinis Junius. Habeo Abbotium de Antichriſto: quem an volueris non ſat ſcio: ſed tamen mittere volui. De reformatione Colonienſis Archiepiſcopi ſapius à me Bertius eſt compellatus: ſed habere negat, ac vel ad Hoſgerbetium vel Utenbogartium remittit. Quorum illum, ſimul ac Haga redierit, compellabo. Reſponſum Junii ad quæſtionem, num arma ad Religionis deſenſionem à ſubditis ſuſcipi poſſit, inter ea fuit, quæ ex ore ex tempore dictantis domi ſunt excepta. Habui ea prope univerſa, ſed una cum pulviſculo omnia in Friſiam abſtulit affinis Calimirus, hoc ſine, ut aiebat, ut cum ſuis conferret, & ſi non inconfultum Juniani nominis amantiſſimus videretur, ederet in lucem. Sed antequam tu, Ampliſſime vir, ejus reſponſi apud me mentionem feciſſes, cognoveram ex Codæo, hoc reſponſum in ſchedis ſuis habere. Ergo quamprimùm conveni: cui ut poſtulatum tuum expoſui, lubentiſſimè ſe communicaturum reſpondit. Sed poſt horas duas

duas rediens, invenire posse negat, & cum inter chartas deesse aliquas cognoscat, metuere ne jam diu sit, quod alteri dederit legendas, atque in iis etiam sit hoc responsum. Corvinus non arbitratur exstare apud suorum quemquam. Ita vides, ut non defuerit animus morem gerendi tibi, sed nihil effecerim, quo nomine doleo. Quod in Anglicanis tardè adeò procedatur, partim Bertius in causâ fuit, qui hesternâ demùm die, triplicis Ordinum decreti translationem ad me tulit, partim Amanuensis, industrius quidem Adolefcens, sed qui ab excipiendis, & cum schedis comilitonum conferendis Episcopi Læctionibus, quas auro contra caras non putat, ægrè avelatur. Jam tamen unum exemplar habemus. Et his feriis natalitiis, totum se his describendis dabit, nihil orsurus priusquam telam istam pertexerit. Corvini librum, quia occasio erat, mitto. Scio tamen carere eo potuisse, usque dum Anglicana sint scripta. Id intra triduum aut quatrimum fore spero. Simul tum mittam Historiæ nostræ Pelagianæ Librum quintum, qui est de prædestinatione. Nam penè jam descriptus est. Sextus erit de reprobatione: cujus appendicula est de causa Godescalci. Eam licet necdum relectam, ad te mitto. Spero non ingratum fore, quando hæcenus rectè tractata est à nemine. Si non displicet tibi Liber primus operis, qui est *εἰς τὴν σωτηρίαν*, statim à Kal. Januariis poterit prælo committi. Scis lentas esse operas. Ego quia jam opus omne absolvi, minus temporis in excubando requiram, quam illi in excudendo. Vale, Amplissime Domine. Uxori salutem maximam.

xxii. Decemb.  
c10 Idc xvii.

Tuus totus,

G. J. Vossius.

# LXXXI.

*Reverendissimo in Christo Patri Gulielmo Bathonenſi & Wellenſi Episcopo.*

Reverendissime in Christo Pater,

**S**I in equis, generosioribus quidem illis, at mutistamen animantibus, ita usu venit, ut in certaminibus applausu, & quasi gratulatione adstantium ad velocius currendum incitentur: quid fieri hominibus putemus, iis præsertim, qui in studio virtutis industriæque pro viribus bene mereri contendunt de literis studiisque. Ecquid de me illud dicere habeo, geminis Reverendissimæ dignitatibus tuæ literis amorem favoremque summum

spirantibus, posterioribus etiam indicium facientibus de præclaro Illustrissimi Ducis affectu erga me, licet immerentem, stimulos mihi subditos esse acerrimos, ad porro graviter insistendam, quam calco hæcenus, honestissimi laboris viam. Hoc cum per se magnum esset: non tamen hic felicitas mea stetit: Sed cum summi beneficii loco habendum ab alio, ac meipso etiam, foret, si Illustrissimus Dux supplicanti solum benignas præberet aures: nunc quod tanto majus est, sponte etiam per Reverendissimam dignitatem tuam, exquirere non est dedignatus, quo pacto Celsitudinem suam hoc tempore bene mereri de me posse arbitraret. Quo nomine nunc digitis mihi cælum videor attingere. Ut qui nihil post virtutem ipsam majus unquam putârim, quàm placere posse Principibus viris, & summis Ecclesiarum antistitibus: quos virtus ipsa constituisse, quasi agonothetas suos, videtur. Quare, ut dixi, hoc nomine plurimum gaudeo, aut verius triumpho. Non tamen factum à me quicquam puto, quo affectum ejusmodi sim promeritus, cum heroicæ Illustrissimi Ducis virtutes, quicquid ab umbraticorum hominum studiis proficisci potest, albis, quod dicitur, quadrigis, vel amplius etiam, excedant. Quin potius metuendum mihi fuit, ne id, quale quale est, negligendo, iratam prope virtutem habiturus mihi viderer. Quamobrem etsi haut adeò cornea mihi fibra est, ut non sentiam, quantum heroicis Illustrissimi Ducis animus possit: neque fortunæ mei, aut meorum hujuscemodi sunt, ut optatissimam hanc occasionem sine summa imprudentiæ nota negligere debeam: tamen ita existimo, nec esse modestiæ meæ eligere quasi præmii genus, ubi nullum mihi deberi putem, sed nudo tanti ducis affectu abundè sim remuneratus: nec siquid excelsa mens ulterius velit, usque adeò cæcutio, ut non videam, ipsum Illustrissimum Ducem pro benigna Celsitudinis suæ prudentia, & benevolis Reverentiæ tuæ consiliis quid in rem meam & meorum sit, longè melius perspicere & posse & velle, quàm mei ordinis ulli etiam in rebus suis cernere valeant. Nihil igitur mihi superesse video, quàm ut quam maximè me commendem Reverentiæ tuæ, Deumque votis supplicibus orem, ut perpetuum esse velit hunc erga me affectum Illustrissimi Ducis: cujus honori & obsequio, simulque etiam tuo, Reverendissime Pater, quicquid vitæ largietur Deus, deinceps decurret. Idem supremum illud numen rogo, quantum possum, ut & Illustrissimum Ducem, & Reverendissimam dignitatem tuam, non modò Britannicæ suæ, sed etiam devotissimo huic cultori

Q<sup>2</sup>

diu



diu conservet incolumes : ac mihi quoque eas conservet vires, ut ne tam præclare pro meritis unquam videar ingratus.

*Lugd. Bat. cl. 10 Ioc  
xxviii. x Kal. Feb.  
postdie nempè,  
quàm redditæ  
mihi essent ac-  
ceptissimæ illæ  
Reverentiæ tuæ  
literæ.*

*Reverendissimi Nominis tui*

*cultor devotissimus,*

G. J. Vossius.

LXXXII.

*Reverendissimo in Christo Patri, Geo-  
gio Cicestriensi, Episcopo.*

Reverendissime in Christo Pater,

**I**Nter felicissimos vitæ meæ dies, quales la-  
pillo signare albo antiquitas consuevit,  
non postremum tribuere iis locum soleo,  
quibus Reverentiam tuam, & præstantes  
gentis vestræ Theologos, unâ tecum ad Sy-  
nodum legatos, videre & affari mihi datum  
fuit; Dordrechtî primùm, mox iterum Lug-  
duni. Exinde mihi sæpe in animo, sæpe in  
ore, eruditissimi illi sermones, quibus me,  
mensâ dignati, beare voluistis; nec doctissi-  
mi illi modò, sed non minori etiam huma-  
nitate conditi: quippe quam tunc expertus  
erga me sim planè singularem. Horum me-  
moriam mihi literas Reverentiæ tuæ, longè  
acceptissimas per sese, multò etiam gratiores  
reddidit jucundioresque. Equidem avidè  
eas hausi, nec legisse eas sufficit, iterum ite-  
rùmque relegi. Et animadverto, tanti viri  
affectu erga me, magis etiam me inflammari  
ad bene merendum de studiis literarum.  
Nempe, quod vulgò aiunt, laudatam crescere  
virtutem, id in me quoque locum habere  
sentio; atque hoc etiam nomine plurimum  
tibi debeo, & deinceps etiam debebunt studia  
nostra. Nam quem non apprimè delectet,  
si, & amari se, & alicujus fieri intelligat ab  
viro in summa dignitate constituto, & maxi-  
mis animi dotibus dignitatem istiusmodi  
multùm exsuperanti? Quæ quanto magis  
cogito, tanto magis mihi operam dandam  
judico, ut affectum hunc mihi semper con-  
servem, atque adeo etiam, si fieri possit, au-  
geam: quod scio non aliter me consequi  
posse, quàm si memet vincere coner, in hoc  
vitæ instituto. Hunc animum non potui,  
quin tribus nunc verbis perscriberem. Nu-  
dius tertius demùm Reverentiæ tuæ literas

accepi. Interea Hagæ, partim ab occupa-  
tionibus, partim ab amicis detentus sum.  
Nunc autem Lugdunum subitò vocor. Nec  
ventus minus in Angliam vocat nobilissimum  
Dudleium Carletonum, quem sine meis lite-  
ris ad Reverentiam tuam venire nefas puta-  
vi. De Baronio, & Pelagii patria, nunc  
nihil addo: quia volo, ut simulac Lugdu-  
num rediero, inde alterum mihi surgat  
literarum argumentum. Deus Opt. Max.  
Reverendissimam dignitatem tuam diutissimè  
Ecclesiæ suæ salvam ac fospitem servet: nec  
Ecclesiæ modò, sed etiam mihi, qui, quan-  
tum possum, elaborabo, ut ne nunquam af-  
fectu & obsequio cuiquam eorum videar cef-  
sisse, qui inter devotos cultores Reverendissi-  
mi tui nominis, nomen profiteantur suum.

*Hagæ Comitis  
M D CXXVIII.  
vii Kal. Febr.*

*Reverendissimi nominis tui  
cultor obstrictissimus,*

G. J. Vossius.

LXXXIII.

Clarissime Salmasi,

**J**AM quadriennium est, quod me donasti  
Commentario tuo in Tertullianum de  
Pallio, nobili & victuro, ut omnia tua,  
opere: pro quo gratias habeo, quantas pos-  
sum. Nunc vero longo adeo post intervallo  
ausus sum mittere *avistuer*, historiam no-  
strum de Historicis Latinis; opus tanto, ut  
ego censeo, minus bonitate, si cum tuo com-  
paretur, quanto mole exsuperat. Sed si pa-  
ginarum numero vincimus, jam non omni  
ex parte superamur. Vide, & ride, Vir  
summe, quod mea sic, & feridè, commen-  
dem. Sed utcunque hanc insistam viam  
apud te, & paucos alios, qui ad summa evo-  
lâstis; plus tamen animi ac spiritus scito  
mihi esse apud homines mediocres, ac præ-  
cipue rudem juventutem: cui de longe me-  
liori nota mea videor posse commendare.  
Nam profecto est aliquid ei digitum inten-  
disse ad fontes, unde hauritur notitia omnis  
ævi. Quocirca nondum poenitet instituti:  
præsertim quando video quotidie in hoc ar-  
gumento etiam eos Saturnias lippire lemas,  
qui sibi, & pene sui ordinis cunctis quantivis  
pretii videntur. Qualis, inter sexcentos, est  
nuperus Editor Opusculi, quod Auctorem  
habet Gennadium Scholarium, Patriarcham  
Constantinopolitanum, atque inscribitur, *αὐτὸς  
τὸ βιβλ. τὸ συνέλ. αὐτὸς πῶς*. Academiæ is Julii  
Theo-

Theologus, agnoscat Scriptorem eum vixisse temporibus Joannis Paleologi, idque anno **CIO CCCCXXX.** variasque ad Turcam Legationes obivisse: atque inde esse, quod dissertationem hanc de Trinitate cum Amurathe Turca habitam, in Literas retulerit. Sed idem (en cor hominis!) vitam ejus nobis describit è Gennadio Massiliensi, qui Libro de Scriptoribus Ecclesiasticis agit de quodam Gennadio Constantinopolitano, qui Leonis Imperatoris temporibus claruerit. Quid scidius in erudito Theologo hac *avistenda*; Gennadius Massiliensis, ut nos opere hoc statui-  
mus, & omnes mediocriter docti sciunt, circa annum vixerit quingentesimum? Quomodo igitur Gennadius, de quo ille tractat, idem sit ac is, quem Theologus ille intra ducentos hosce annos claruisse ipse agnoscit. Non erant tales digni, quorum ratio haberetur, nisi tam multi horum similes invenirentur, qui alios omnes ad palatum ac genus suum sapere jubent. Quod equidem malo meo non semel sum expertus. Sed fortasse, qui alios culpo, culpa ipse non vaco, seu ea quæ de ætate Historicorum prodidi, seu alia ad eos pertinentia consideremus. Sane hominem esse me, non diffiteor; & quia ex aliena infirmitate de mea facio conjecturam, Opus hoc meum ad te, Vir summe, & alios aliquot eximii nominis viros mitto. Nimirum fore spero, ut ita multa, quæ me fugere, edocear; à te inter primos, qui tot bona me docuisti, cum aliis scriptis tuis aureis, tum maxime Commentario in Historiæ Augustæ scriptores non semel mihi in Historia nostra laudato, nec unquam satis laudando, quippe omni laude majori: ac in quo verè locum habuerit, quod de Ludis olim secularibus dictum, eo quidem in genere simile nec vidisse, nec visurum quæmpiam. Ex iis verò quæ ad Tertullianum adnotasti, video difficile esse dispicere, utrum in gentium Scriptoribus plus possis, an Sacris. Quare utinam in hoc Ecclesiæ ductore, quo pede cœpisti, pergas. Ad quem emaculandum atque illustrandum mihi natus videris. Quod de nemine homine præter te dixerò. Unus enim præstare illud potes, quod verius conati adhuc alii, quam assecuti. Iterum igitur opto & rogo, ut huc potissimum ingenium intendas. Habent quidem gentium Scriptores, atque universa Musarum studia, *inveniri* quiddam. Neque insignem esse eorum utilitatem negare possim. Sed tamen quis bonus non malit, ut tale ingenium, & illa Eruditione, in Ecclesiasticis potius Scriptoribus, iisque antiquissimis, & corrigendis & illustrandis operam infumat suam? Non quasi adhorter, ut *ut* Musas deserat, sed ut

deinceps illas remissius, hæc meliores nostras impensius colas, uti facere jam ferio aggressus es. Tibi inde Lux major, amicis summa lætitia, omnibus fructus uberrimus. Vive, & vale literarum pereuntium Vindex præstantissime, cui si mea utcumque probare poterò, felicem me putabo. Nihil enim malo, quam diligi à Salmasio, hoc est interiorum Literarum nostri sæculi Principe. Cujus si præsentia frui liceret, multum me adjutum iri posse confido. Habent quidem & aliæ terræ viros eruditos atque eximios; sed de interioribus nostris literis loquor. Quare lucente sole cur quærerem stellas. Iterum vale.

Lugduni Bat.  
cl. Id. xxviii.

Tuus sine fisco,

G. J. Vossius.

#### LXXXIV.

Gulielmo Episcopo Bathoniensi & Wellensi.

Reverendissime in Christo Pater, Domine æterni mihi omni Officio colende.

**S**imulac literas Reverendissimi nominis tui legi, totus ob infortunium tuum expal-  
lui atque exhorui. Nec casus ille minus animum meum perculit, quam si meus foret. Debebam dicere, & verè poteram, magis affectisse. Sed semper exultavi operam dandam esse, non modò ne quid auribus demus, sed etiam nequid dare videamur. Et tamen, quis dubitat, quin qui boni viri & prudentis, qualium protectio non est larga nimis leges, jure nomen possidere velit, is alienam salutem præponere suæ debeat, quando in alterius salute salutis publica magis laborat. Quid ergò me facere æquum erat, qui & te colerem ut communem Ecclesiæ parentem, & me inter eos meritò reponerem, quos singulari amore, ut pater filium, prosequaris? Quare assidue Deo vota facere non cesso, ut pristinas Reverentiæ tuæ vires reddat: tamen difficile dixerim quantam in hoc ipso dolore ceperim voluptatem ex tam manifestis certissimi erga me amoris signis. O felicia scripta mea, quæ sic beent autorem! Nam quid bonum aut magnum æquè censere in hac vita possim, ac si à bonis & magnis viris & laudari & amari contingat? Laudari jucundum est, sed jucundius amari. Quæ scripseram, etsi nihil ejusmodi mererentur, tamen utrumque mihi contulerunt. Neimpe vis studiis honorem esse, quod vere est seculum corrigere. Nunc illa me urget cura,  
ne

ne videar ingratus. Etsi autem quod rependam non habeo, imo nec verba reperiam, quibus me satis gratum ostendam: tamen si placere potuit prior labor noster, non despero me & alia non minora offerre posse. Famæ ac Æternitati nominis tui propriis virtutibus in omnia secula ituri. Atque ut ex parte videas, quid rerum agam, mitto Syllogen veterum disputationum mearum, mutilam quidem illam & imperfectam (nam major pars adhuc inedita est) sed decretum & quæ vides auctiora, & addere ea, quæ adhuc in Schedis nostris latitant. Nempe volumine uno complectar, quæ ad Sacramentarium negotium pertinent. Alio quæ spectant statum animæ post mortem. Et ita porro in aliis. De Baronio quid moliar seorsim alteris exponam, idque ut non tantum consilii mei rationem explicem; sed etiam, quid Reverendissimo nomini tuo videatur, intelligere possim. Nunc hoc solum dicam, non tam visum esse minutias consuetari, quam illa, ubi cardo rei potissimum vertitur. Uti illa imprimis, in quibus longius à primitiva Ecclesia recessit Romana. Etiam evolare gestiunt commentarii mei de Lingua Latina, cujus pars posterior origines ejusce linguæ ex Græcia & Oriente repetit, multaq; ex veteribus Scriptoribus, aut corrigit aut illustrat. Sed de his, & aliis quibusdam, pluribus alias agam. Interim me meaque Reverendissimo nomini tuo in cultum & obsequium perenne offero & transcribo. Deumq; Optimum Max. supplex precibus oro, tum ut Dominum meum Illustriss. Ducem Buckinghamiæ spiritu suo roboret, consiliaque ejus prosperet, Britannia totius bono, tum ut Reverendissimo tuo nomini cœlesti suâ gratiâ magis magisque adsit, corporique non pristinas modò vires instauret, sed diuturnam quoque valetudinem largiatur, ad Anglicanæ atque adedò Universæ Ecclesiæ emolumentum.

Lugd. Bar. c. 10  
Id. xxviii. viii.  
Kal. Maias.

Reverendissimi nominis tui cultor  
obstrictissimus, & qui nunquam  
tuum esse desinet,

G. J. Vossius.

LXXXV.

Joanni Meursio.

Vir Clarissime & Amicissime,

**N**on exiguum mihi dolorem attulit,  
quod tanto temporis intervallo, nihil

à te acceperim Literarum. Nam solatium hoc amicitia habet, quod eorum legere literas possumus, quos videre non possumus. Tantoque magis dolebam quod, metuerem ne silentium hoc proficisceretur ab mœrore aliquo quem privatim etiam vobis afflictæ res Daniæ attulissent. Nunc & valere vos intelligo & meliora in posterum de regno vestro augurari. Equidem prædicabo ac ambitiose, quam mihi gratum fuerit ea cognoscere præsertim ex teipso. Facile enim hoc cogitare potes: ut cui non ignotus sit amor erga te meus. Neque de eo quicquam detrahere debet quod rarius & ipse scribam. Vere enim dicere possim hætenus me non satis scisse quo pacto Literas optime possim procurare. Atque aliter ut foret non eo minus arserit amoris nostri ignis. Silere enim diutissime possum. Sed non amare Meursium non possum, nisi simul & virtutis amorem & doctrinæ deponam. Ante amorem non exuam sed tuus semper ero, tuus plane, præstantissime & charissime Meursi. Tanto impensius frui etiam cupio præsentis, cujus quod spem facis, beas profecto. Sed tamen beatorum mihi videbor ubi coram complectar. Nunc ut amantes meticulosi esse solent, male formido ne ita ætate proxima infestet vias Cæsareus miles ut spes nostra decollet, nec nisi anno post atque utinam vel tum, conspiciere vos liceat. Ubi veneris post Snellium (cujus & conjux decessit) desiderabis quoque communem amicum Jacehausum, qui Paralyti obiit die eo Martis, qui Paschales ferias proxime antecessit. Defunctum laudavit Vorstius. Hujus in scribendo ad te incuriam serio increpui. Et culpam fatetur: sed emendaturum recepit. Mitto ad te opus nostrum de Historicis Latinis. Sed (si ita placet) conditione ea, ut rescire possim, quid probes, quid improbes. Nec enim nosse id minus laboro, quam si editum id nondum foret. Quippe recudi poterit ut in Partitionibus Oratoriis factum ante paucos menses. Barleus carmine sibi multum gloriæ parat. Prodiere ejus poemata mense superiori. Cum prima hæc editio sit tamen non video quem præferat præsertim in carmine epico. At quorundam etiam benignius est judicium. Quid futurum si sæpius sæpiusque limatæ prodierint. Uxor mea ternis mensibus gravissime ægrotavit. Nunc pene convaluisse videtur. Salutat vos plurimum. Plura volebam, sed Haga jam tantum redux hæc pauca potui quod festinato opus esset si cum cæterorum Literis, meas quoque hoc tempore deferri ad te vellem. Quæ & causa est, cur opus nostrum præter morem meum miserim incompositum.

Vir



Vir amicissime, vive, vale cum familia tota, ut valere ipse melius possim, & quod caput est, ut diutissime Reip. Literariz possis.

Lugd. Bat. c. 15  
Id. xxviii. Id.  
Matis.

Tuus totus,

G. J. Vossius.

LXXXVI.

*Clarissimis & Celeberrimis D. D. Vicecancellario, & Universo Senatui Academiæ Cantabrigiensi.*

Eximie D. Vicecancellarie, & Senatus univ. al. mæ Academiæ Cantabrigiensi,

Vetus est verbum, facile esse Athenis Atheniensem laudare. Mihi verò Cantabrigiensem Academiā laudibus extollere apud Cantabrigienses perdifficile videtur; quia tanta earum copia est, ut non arduum minus sit initium quam exitum invenire: partim etiam quia neq; ingenium illud, nec ea mihi sit eruditio, ut alia possim adferre, quàm quæ à vestratibus ipse scriptoribus acceperim: qualia si Britannicis Athenis vestris reponere nunc velim, meritò audire cogar, sus Minervam, vel Noctuam Athenas. Quare veterem vestram gloriam, recentiaq; etiam merita erga Britanniam, & terras alias, non tam orationis penicillo depingam hoc loco, quàm animo ea mecum tacitus colam. Quod à prima etiam adolescentia hætenus facio sedulò. Nihil enim auribus dedero, si candide profitear, ex quo versare cœpi veteris Ecclesiæ Doctores, didicisse me imprimis venerari statum Ecclesiæ Anglicanæ, ut quem ad primævum illum proximè accedere viderem. Quique eam insisterem studiorum viam, non potui non etiam capi lectione Theologorum, quotquot ab almæ Cantabrigiensi vel Oxoniensi Academiæ uberibus pependissent, suisque postea monumentis, eas illustrassent. Facile enim apparebat, non aliunde majorem me capere posse ingenii cultum, quàm iis, quorum aureis è scriptis undique reluceret, quâ industriâ, ac judicio quanto versassent sanctos patres. Atque hæc quidem in adolescentia, ac deinceps etiam incredibilem in me excitarunt amorem Academiæ utriusque. Nec tamen sperare ausus fuisset fore unquam, ut ulterius obstringerer Britannicæ vestræ quàm propter ea, quibus obligassetis vobis universum orbem Christianum. Sed longè benignius agere mecum voluit supremi numinis favor. Nec enim mihi cornea ita fibra est, ut non sentiam,

tiam, quantum honoris inde acceperit mihi: quod non indignus visus sim, qui auspiciis ac liberalitate Illustrissimi Baronis Broock in Academia vestra inter præclara ingeniorum lumina operam & ipse meam docendo publicè impenderem. Deum immortalem! qui paulo ante profitebar tantopere studia mea debere multis Britannicæ magistris, scriptoribus florentissimis, quantum emolumenti capere potuissim, si provectiori ætate hac sermones coram cedere licuisset cum tot summis Britannicæ, ac vestræ imprimis Academiæ viris. Quod si gloria etiam in censum venit, sanè cum multi homines clarissimi locis obscuris conciliarint egregii nominis decus: ego contra qui mihi videbar tantum unus *ἄσπετος*, longè celeberrimæ Academiæ vestræ alis in sublime evectus claritatem ipse nominis acceperim. Neque eam felicitatem minus attendi antehac. Sed multa quæ repetere nunc nihil attinet fecere, ut præclari adeo muneris gratiam pene facerem ingratis. Nec eò minus me benevolentia atque amor Britannicæ vestræ censeo obstrictum. Imò nihilo secius quod præterea debeo tantum esse arbitror, ut si satisfacere maximè velim nunquam tamen possim. Quapropter & hoc de Historicis Latinis opus meum, imò jam vestrum, velut *ἐνέχυρον* creditoribus offero: unde sciat posteritas, saltem gratæ mentis conatum mihi neutiquam defuisse. Argumentum quidem, quod tracto, nulli scio ingratum erit, nisi iis forte, qui literas nunquam didicere: quales sufficere etiam putant, si eas aspernentur. At Britannicæ gentis longè aliud semper iudicium fuit: quæ præ terris aliis, cum literis sacris inter alia, omnis ævi, Ecclesiæque imprimis historiam invidenda felicitate conjunxit. Atque eò lubentius hoc quicquid est laboris suscepi, quia nobis munit viam ad refellenda ea quæ ex scriptoribus opere nostro memoratis, cum ab aliis Religionis nostræ adversariis, tum imprimis à celeberrimo Annalium Ecclesiasticorum conditore adferantur; quemadmodum planius fiet, ubi, (ut decrevimus) scriptorem eum candide ad veritatis obrusam expendemus. Quam ad rem utinam Deus & vitam nobis & otium concedat. Quare non tam illud verendum est mihi, ne materies, de qua ago, vilior obscuriorque videatur: quam ne nobili aded argumento fuerim impar, siue iccirco quia ingenii mihi vel doctrinæ non esset satis: siue quia occupationum esset plusquam satis. Quorum utrumque de me fatebor haut invitus. Verum quemadmodum in liberis, quos vel natura, vel adoptio fecerit nostros, non dotes modo amamus, quas possident in præsentia: sed

sed etiam quas egregia indoles in posterum promittit; similiter foetus hic, qui naturâ quidem est meus, adoptione autem semper erit gentis vestræ, non solum, spero, gratus erit, ob bona aliqua, quæ novellus etiam continere videbitur, sed propterea quoque, quia, modò Deus mihi diuturniorem vitam concesserit, ab annis & labore nostro paulatim sumet incrementa.

*Eximie Vicecancellarie, ac universe Senatus almae  
de florentissimæ Cantabrigienlis Academiæ,*

Diu feliciter vivite, & æqui bonique consulti, quicquid hoc est, opellæ nostræ.

*Lugd. Bat. An.  
cło Ioc xxviii.  
vii. Id. Sextil.*

*Universe Academiae Cantabrigien-  
si hætenus obstric-  
tissimus, & in nexu adhuc  
permanens,*

G. J. Vossius.

#### LXXXVII.

*Amplissimo Viro Adriano Blyemburgio,  
Gerardus Vossius, S. P.*

**S**Cis mihi bis de die differendum esse in Lycæo; Et cum illic taceo domi loquor, calamo, & manu. Nam quotidie urgeor, ut Vindemicolas meas colligere pergam. Itaque paulisper apud te filui; sed ea spe, ut pluribus alias confabularer tecum. Nunc ne longâ quidem Epistolâ, opus esse video, si, ut spero, hebdomade proximâ, excurrere ad vos licebit, nuptiarum ergo. Quod si fiet, occasionem inveniam uberius tecum colloquendi; scrupulum tamen injicit, quod hæsterna die catarrho cœpi laborare, qui in sinistrum pedem incidit, sed seu citius, seu serius veniendi ad vos potestas fuerit; in antecessum hæc tribus ad te verbis scribenda existimavi. Non quia non omnia coram melius possim; sed quoniam turpe putarem prodire in conspectum tuum, latæ admodum culpæ reum, ut qui binas à te literas acceperim, neutris responderim. Imo nec pro munere gratias egerim. Ac longè quidem gratissimum est, quod veteris contubernii, & institutionis memorem te scribas, sed, Præclare Vir, utrumque etiam, te tacente, apud me, satis sciebam: Usque adeo multa, & dicere, & facere, apud amicos soles, quæ Vossii tui amorem testentur singularem. Nunc quasi hæc satis non essent, bellum mittis calicem, indicem profusissime voluntatis tuæ.

Ego vero, satis scio minimè istac testificatione fuisse opus. Nam quod de verficulis nostris dicas; Authori eorum crede: Ipse eos tanti esse negat. Sed amor tuus iis pretium addit: Et postquam id fecerit, pretioso eos dono remuneratur. Tanto magis Tibi obstringor; amoremque hunc tuum scribendo quasi scintillis quibusdam fovendum mihi putavi. Ubi enim amoris tui ignem quotidie se clarius exerere video; nefas sit non acrius etiam amare: Amorque hic noster, in cordis nostri foco vivet, dum vivam ipse. Si cineribus fortassis tegi poterit, dum animus aliis distentus, à scribendo paulisper abstinet; extingui tamen non poterit. Imo hoc quoque nobis curæ erit, ut ne eum cineres tegant; sed flammâ suâ semper se prodant. Quod optimè, ni fallor, crebro literarum commercio consequar. Vale, Amplissime Vir, & plurimum salvæ cum lectissimâ Coniuge, & à me, & à mea, tua Cognata.

*Lugd. Bat. cło Ioc xxviii.  
xii. Kal. Jul.*

#### LXXXVIII.

*Gulielmo, Episcopo Londinensi.*

*Reverendissime in Christo Pater, ac Domine,*

**Q**uod proverbio dici solet ἀγαθὸν ἀγασθῆναι, id mihi fuere literæ tuæ. Primum illud incredibile mihi gaudium attulit, quod valetudini etsi nondum prout optarem, haut paulò tamen melius sit, & deinceps optima liceat sperare. Deinde etiam maximâ me lætitiâ perfudere tot bona, quæ de me & meis intelligo. Sane cum Poeta dicere solebam, Dulces esse ante omnia Musas. Non tamen antea erant mel merum: sed absinthio temperatum, præsertim ob temporum infelicitatem. Sed postquam placere cœpi inclyto Britannæ regno: etiam absinthii amaror edulcari cœpit. Qui nunc penitus recessit, ex quo respicere me dignati sunt Serenissimus Rex vester, & Illustrissimus Buckinghamiæ Dux. At cui tantum debeo? O Pater, ô Domine,

*Tu mihi quodcumq; hoc sortis, tu sceptrâ ducemq;  
Concilias*

Eoque mihi dulcius est tantopere debere Reverendissimæ dignitati tuæ, quod cum subductâ ratione nihil videam cur me vel tralaticitiè amares: tamen affectu me prosequare paterno, vir is, quem ipse rex serenissimus nunc præfulem esse Londinensem voluit, quo,

si

si aulæ regię deinceps propior fores, prudentissimis consiliis tuis in maximis ac difficillimis negotiis facilis & felix uteretur. Quid me beatius, quam qui tanto præfui potuerim placere? Itaque memor Pliniani illius, vitam esse vigiliam, longè etiam alacrius studiis nunc invigilabo, non tam inanis gloriæ, quam boni publici amore. Inque hoc gloriæ dispectu nihilominus fore prævideo, ut quantæ nunc voluptati est vivere, dum possum studiis prodesse, tantæ aliquando gloriæ sit, prodesse etiam postquam vixero. Nihil præterea æquè mihi cordi futurum, quàm ut erga eos, qui tam præclare de me merentur, pro modulo meo gratum possum animum exhibere. Ante ceteros autem tum Reverendissimo nomini tuo, tum etiam Illustrissimo Vicecomiti Dorcestriensi, cuius ego erga me affectum, & persensi hic curam, & abundè iterum, imò liquidius ex literis tuis ad nobilissimum & mei amantissimum Dudleium Carletonum intellexi. Nunc igitur nihil superest aliud, quàm partim ut noctes dieque gratus esse laborem: partim etiam, ut filium bonis meis monitis onustum dimittam, quo unà cum felici Magnæ Britanniæ vestræ aere hauriat succum illum bonæ mentis, quo altus & enutritus, pertingat aliquando ad illa

*Edita doctrina sapientum templa serena.*

Honestè satis annum totum in Collegio, eum sumptibus propriis alere grave non ducam: quippe qui liberum causâ omnia & velim & debeam. Quin, si opus omnino erit, ulterius etiam facere paratus sum. Quamquam, quanto celerius, imminui saltem cœperint impensæ, tanto magis consultum ibitur familiæ meæ sat numerosæ. Ergo ut orsus eram dicere, mittam filium, idque, si Deus volet, intra hebdomadas tres. Ac simul tum de aliis, ac inter ceteros de Thesibus Oxonii reculis perscribam. Quod præproperus nautarum discessus, vocante vento, nunc minimè permittit.

Reverendissime Pater, ac Domine, Deus te magis magisque salutaribus Spiritus sui donis augeat, ac locupletet: diutissimeque te & Ecclesiæ suæ, & etiam mihi meisque incolumem conservet.

*Lugd. Batav.  
clō Idc xxviii.  
iv. Kal. Sept.*

*Reverendissima dignitati, ac dominationi tue, æternam devotissimus, totique Britanniæ Magnæ Regno,*

G. J. Vossius.

LXXXIX.

Gerardus Vossius Hugoni Grotio  
S. P.

Amplicissime Vir, redeo tandem ad scribendi officium, nimis enim turpe fuerit, si tam bellam scribendi occasionem negligam penitus, Lamerio ad vos euntes. Et tamen, quod difficulter persuadebo, cum minimè scribo, maximè amo. Nempe occupationes quidem, quo minùs scribam, morantur: at interim animus te cogitat, & incrementum amoris est ex dolore, quod officium facere non possim. Quod etsi verè dicam, nihilominus aut valde fallor, aut hoc argumentum non erit tibi tanti, ut, quo sic amor meus sumat incrementum, propterea rariùs etiam, quàm facio, mihi scribendum putes. Quare hoc excusationis genere non utar: sed potius, quod te malle scio, paulùm tecum confabulabor. Maximè mihi voluptati est, quod uti partim ex literis ad me, partim ex fratre tuo intelligo, non cesses de studiis benè mereri: sed aut vetera tuæ des meliora, aut omnino proferas nova. Lætor autem tum publici causâ, cui per te melius est; tum tui, quia volo, ut indies cultus nominis tui gliscat; tum etiam mei, quia non cochleæ libentiùs rore cœlesti, quàm ego succo scriptorum tuorum pascor. Multum etiam gaudeo, quod benignè adeo sentias de laboribus meis. Quod dum facis, vere dico, hoc inter alia boni facis, quod non mediocriter erigis me, quem unus & alter depressum lubentes eant. Atque eo magis erigis, quod aliorum etiam iudicium recenses. Non quasi opus sit, ut ex consensu alieno, auctoritatis quicquam sententiæ accedat tuæ; verùm quia mihi persuadeo, eo minùs aliquid gratiæ datum esse, quia idem propè sentiant & alii apud vos. Quamquam nec multum habeo quod conquerar, de literatis apud nos hominibus, si unum alterumque excepero, quos etiam elogio non aspernando ornavi. Nempe ex spiculis eorum, ac unius imprimis, neutrius nostrum amantis, satis video, mihi subinde colluctandum fore cum hominibus fide sublesta, & falsis falsimoniis, nec Batavis patria, nec moribus. Benè interim, quod minus possint, quam quibuscumque superiori hebdomade negotium mihi tandem esse desiit. De quo, ut gaudeo, (scis enim quàm difficulter sacro ordini satisfiat) ita non nihil animum mordet, quod non possim me, meaque probare illi, quem antea dicebam. Scio enim non mereri me livorem. Quare multum

R



tum metuo, ne hæc fugillatio nostri nominis proficiscatur, non tam ab aliena invidia, quam culpa mea, sua vitia nescientis, atque interea per imprudentiam offendentis alios, exigua sermonis libertate, dum non satis didici parasitari iis, qui nihil nisi immodicas laudes sui audire sustinent. Sed quid mihi cum talibus? Probent improbent bene faciendi voluntatem, liveant vel plorent, nihil curæ Hippoclidii. Nam utcumque verear, ne qua hic culpa sit mea, tamen cum attentius mecum, malignitatem eorum cogito, non possum non contemnere censores istos, penè ut cum Comico dicam, censione bubula dignos. Ego illis relictis, me severioribus Mulis delectabo domi: atque ita vitæ innocentia & silentio me ulciscar probè. Atque eo id faciam impensius, quod non desint amantes mei in terra Britannia, quique seriò cogitent de ratione ac modo, quo in his etiam terris, mihi & meis melius esse possit. Jam super eo literas accepi, à Reverendissimo Domino, ante quidem Bathoniensi, & Wellensi, nunc verò Londinensi Episcopo. Simulatque res effectum suum penitèns sortita erit, faciam te de re tota certior, ut una gaudeamus. Scio enim quàm tibi curæ sim. Prodiit ante menses paucos, nova Partitionum mearum editio; quæ jam publica autoritate, in Britannicæ scholis præleguntur. Authores erant amici, ut, quo mihi consulerem, & familiæ meæ, Illustribus Ordinibus eas dicarem, qui quodammodo id opus fecissent suum, dum in terris suis prælegi pueritiæ mandant. Sed quia jam olim dicasssem Maurerio, non placuit prætextu alicujus emendationis, aut augmenti repetere id, quod donasssem semel. Etti fortasse jam omnis veteris facti gratia periisse apud eum videatur. Nam saltem liberi, & qui studiis eorum præst, cui ego tam bene feci, salutatiuncula aliqua debuerant dignari, siue dum egere in Italia, unde à tot honoratissimis viris crebrò adeò literas accipio: siue postquam reduces in patriam facti: Etiam nunc recudi incipiunt Oratoriæ Institutiones, longè & correctiores, & auctiores iis, quæ ante tot annos Dordrecht prodierant. Spero fore, ut similiter aliquando limatiores, melioresque lucem videant commentarii nostri de Historicis cum Græcis, tum Latinis. Quam ad rem non mediocriter mihi prodesset, si Catalogus exstaret, Bibliothecæ Medicæ, vel alterius apud vos. Sed magis tamen adjutum eas, si monere non defugas, quæ operibus nostris addi, demum, vel etiam immutari in iis oporteat: cujusmodi quin longè plurima sint, dubitare mihi nefas, cum jam non pauca id genus ipse observarim. Vale, vive, incomparabilis vir, atque amice;

cumque uxore præstantissima, & liberis, salve à me, uxore, & liberis meis.

Lugd. Batav:  
elo 10c xxviii.  
v. Kal. Sept.

Tuus totus

G. J. Vossius.

Salutem Rigaltio, Tileno; Salmasio enim scripsi. Jussi ut Lamerius filio istic tuo Partitionum exemplar compactum tradat. Posces, si negligat. *Ephoro.*

### XC.

Gerardus Vossius Hugoni Grotio,  
S. P. D.

**M**agnifice Amplissimeque Domine: Quamquam, ut apud Varronem est, bonus est honos qui sustinet Remp. tamen te novo hoc, seu onere honoratum, seu honore oneratum, multis profecto nominibus est quod gaudeam. Nam verum si dicere licet, quamquam tu externos honores non magni æstimas; tamen nefas fuerit, in hac præstantium virorum inopia, inclytum virtutis tuæ splendorem in patrio solo intra unius, honestissimum licet, syndici titulum constringi. Et lætissima uxor tua, animæ dimidium tuæ, habet tota quod mente petivit, domicilium nacta in medio consanguineorum, & familiarium, quod illi melius, quàm omnis Bataviæ & Zelandiæ capparitis lienem deducet. Nec minus consilio auxilioque hic poteris prodesse tuis, quos inter me etiam repono, cum maxima mihi abs te ornamenta proficiscantur, nec patiaris ullum mihi in te commodum claudere. Denique quod palmarium credi debet, talem senatorem hæc Reip. tempora postulant. Te quidem destina ei destinato, frustra omnes fore auguror, qui eam labefactare contiliis suis conantur: atque ne vanus inquam compariar, Deum Opt. Max. votis supplicibus oro. Libello Lucii (penè Lucidi dixeram, prope adeò ut nominibus, in doctrina conveniunt) horas sex septem impendi. Quid dicam? Doleo populari meo (uterque enim Palatini sumus) non plus inesse satis. Non de publico tantum, sed ipso etiam benè mereatur, qui tam insulsum sale candido defricare volet, ne putifcat totus. Verissimè Lingerhemius ad te quos ille reos agit Semi-pelagianismi justius arguere ipsum posse fescuinismi. Sed tamen cogitato opus, num si pedem

si pedem cum eo struere lubeat, cominus semper congregiendum, ejusque vestigiis insistendum semper putes: quod si fiat, necesse habemus respondere ad quinque illa Haganæ collationis capita, & ea quibus adversum te pugnat S. Scripturæ loca. An verò satis putes, si quæ Pelagii, Semi-pelagianorum, Catholicorum communiter, Augustini singulariter, & Prædestinatorum fuerit sententia distinctè proponam, & non uno tibiae foliè ex veritate fulciam: simul sicubi opus, argumentis alienis occurram. Quidquid præscripseris, parebitur. Nam seu hanc seu alteram insistere viam lubeat, facilem mihi victoriam hinc spondeam: nec meum est ferre, Palatinatum produxisse, qui nomen cum tuum tum Illustrissimorum ordinum decolorare cogitet, nec produxisse, cui illud curæ sit vindicare. Quocirca simulac præfuero disputationi de creatione, quam his diebus scripsi (exemplar thesium ad te mitto) bonis avibus ordiar recoquere historiam de Semi-pelagianismo, & vicinis contrariisque erroribus. Futurum hoc intra triduum spero. Hoc magis autem cogitandum erit, ut aliquid novi adferam post Corvinum, quando ille meliorem laborum nostrorum partem nobis non invitis in Antibogermanno suo exscripsit. Nam præter ea quæ Dordrecht illi per te miseram, Lugduni hic utendum dedi, quidquid testimoniorum ex antiquitate de singulis Hagenisibus controversiis, non sine labore longo congefseram. Quod cum sciret ipse, ante semestre & amplius in familiari sermone subvereri se dixit, ne dum magnam laboris nostri partem in suas cameras conveyit, non tantum honoris qualemcumque fructum interceperit nobis, qui tanti non est mihi, sed etiam reliquum quod fecit, depreciaverit planè, cum eadem à me reponi minime sit ex honore utriusque nostri. Ego securum esse jussi, quandoquidem restarent alia multa, quibus locum eorum quæ exscripsisset, supplere abundè possem. Quod verissimum est, sola temporis angustia premor, quo minus ea curâ hæc tractare possim, quâ optem. Augustini adversus Julianum Libros hætenus ineditos jam mensis circiter est quod vidi, sed otium legendi non fuit. Aliquam multa tamen folia delibavi, nec dubito, quin genuinus sit fortus. Statim igitur codicem tuum remittere debuisse dices. Ego verò cum tam multas præclaras emendationes ad oram Codicis tui adscriptas viderem, gaudio prope exsilui, nec committendum putavi, ut me fraudarem ejus libri usu, priusquam omnia ad Codicem meum adscripsissem. Quod bona me cum venia tua facere spero. Ne tamen diutius quàm par est, te libro tuo de-

fraudem, promitto non plus quàm bidui hanc moram fore. In illis ad Augustinum notis Menardi, solam culpam breviter. Tamen spero nunc aliquam quoque utilitatem nobis adferre posse. At quæ de Pelagio, & Semi-pelagianis narrat, jam ante observata nobis. Nec quantum meminisse possum, aliud quàm Baronianam Epitomen continent. Quod cum nec ipse dissimulet, candorem sanè laudamus. Meursius cum secundo ad me scriberes, Hagæ fuit, ac reversus demum die Mercurii circa vespèrum. Die Jovis mittere Balsamonem neglexit, fecit id die Veneris. Quem quin eo ipso die, quo tertio scripsisti ad me, hoc est, die Sabbathi acceperis, nullus dubito. Mirari satis non possum quod nihil ab Uttenbogartio responsi accipio. Nam nisi memoria fallor, jam sextus est dies quod ad eum scripsi. Rogaram autem ut quamprimum Epistolarem dissertatiunculam meam remitteret: si tanti putaret, curaturum me, ut intra paucos dies reciperet. In mentem venit fortasse rectà ad te mittere malle. Nisi forte aut domo jam abest, aut aliquem describendi cura interim fatigat. Herpenius super quæstionibus à te consultus, indiculum earum Amstelodamum præmisit, ad præceptorem suum Judæorum, quotquot hodie vivunt eruditissimum. Ac se diem unum alterum hic substitutum dixit, simulque de iis cogitaturum: inde cum sua etiam causâ Amstelodamum ire cogatur, rectà eo profecturum, ut cum Magistro suo de iis conferre possit. Velim apographa illa duo, in quibus tam foedum hiatum esse significas, simulac poteris remittas. Curabo ut quàm ocysimè, quicquid omisum est suppleatur. Simul ut alia quæ voles vel adjiciantur, vel corrigantur. Episcopo ante dies paucos adfui. Dixit se, magna cum voluptate diatribam tuam *de iis quæ ad Augustinum* legisse: & judicare, nihil ingeniosius, eruditius, solidius, ea in controversia à quoquam scriptum esse. Cum idem mihi videri dixissem, sed tamen hominem neminem esse, qui non aliquid inter-dum humanitus patiat, eoque impensè rogare me, ut sicubi desideraret quicquam, liberè apud te sententiam suam exponere vellet: ille in priori judicio perstitit, nec habere dixit quod requirat; nisi fortè, inquietabat, quod passionem Christi consideres ut poenam propriè dictam: Nam dispiciendum esse, an non satius multo sit, cum scripturis vocare Sacrificium, idque imperatum à Patre, & voluntarie à Christo susceptum. Nempe ut dicatur, Deum, quo foeditatem peccati & sui erga nos amoris magnitudinem commonstraret, decentius omnium judicasse, neuri-quam peccata remittere, nisi interveniente

carissimi filii sui sacrificio, quod tantæ *quædam* fuerit apud Deum, ut ejus causa omnibus in filium credentibus peccata remittere velit. Memini etiam ante trimestre & amplius, Samuelem Næranum, Ecclesiastem Amersfurtensem, hanc ipsam sententiam apud me defendisse, tanquam quâ magis fugiamus incommoda, quæ Socinus objectat, & quæ tamen minimè infringat *τὴν ἀπολυτῶσιν* veritatem, vel dignitatem. Petii ab Episcopo, ut de hoc ipso, & si qua alia essent, per literas sententiam suam communicare tecum vellet. Respondit, minimè gravaturum se hoc facere, cum omnia tua causa velit & debeat; sed non usque adeo magnam sibi familiaritatem, vel notitiam tecum intercedere; eoque malle ut ipse iudicium suum perscriberem: præterea, si quid talium literis committat, minimè satis videri ut sententiam suam quasi de tabella pronunciet, verum enimverò rationibus solidis eam firmandam fore: quod quominus facere nunc possit, obitare occupationes, quibus distineretur. De solitudine tua pro affine Junio, & illi gratulor, & mihi gaudeo, & tibi gratias maximas utriusque nostri nomine ago. Sanè consilium impensè placet. Quare & cum ipso, & cum Diamantio quamprimum rem omnem communicare decretum: Mox, quid cum mihi tum ipsis videatur, te faciam certior. De Walachriano scripto est, quod scire tua interfit. Vix octiduum erat, quod apographum nacti eramus, jam suboluerat Zelandis. Scire te arbitror, Utenbogatium describi curasse, exemplar hoc suum ad Episcopium misisse, hinc & Corvinum & Barleum, illum ut brevibus ad oram notis castigaret, hunc ut oratione fusa refelleret: sed & per aliorum manus volitavit: nihil igitur mirum, si ad plures, atque ipsos etiam Contra-Remonstrantes res emanarit, præsertim Barlæo, & ex hoc Oeconomo nostro, rei totius gnaris: de quibus hoc amicissimorum ipsis iudicium est, nihil vel sub silentii fide committi illis debere, nisi quod utile existimemus omnibus innotescere, vel saltem non damnosum. Cæterum vix Walachriani literas ex Hollandia acceperant, quibus de apographo, quod hic jam haberemus, facti erant certiores: statim ad se Amanuensum unus cæterorum nomine vocavit, Miser Amanuens, inter sacrum & saxum hærens, & magis de fortuna sua (quam à Zelandis Ecclesiastis, Bursio imprimis, pendere videbat) quàm de gloria Dei sollicitus, negavit se cum illo exemplar quopiam communicasse; atque hoc eo fidentius faciebat, quod persuadere sibi non posset, adfinem meum secum exemplar suum in Hollandiam por-

tasse, & hoc ut fecisset, Remonstrantibus fuisse communicatum. Perstabat Bursius apud eum ut verum diceret: Sed ille item in mendacio perstabat: Unum tantummodo hoc fateri voluit, adfuisse sibi adfinem exemplaria describenti, & legendo partem bonam percurrisse. Quod simulac audiit Bursius, ille impense adventum adfinis ex Hollandia desiderare: vix cognorat rediisse, quærit an cuiquam in Batavia de classis Walachriæ consilio aperuisset quicquam. Benè secum affinis agi putavit, quod non aliud rogaretur: confessus est, & putare dixit, nihil in eo peccatum esse. Bursius verò dicere, graviter peccasse, multumque in Remonstrantes debacchari, & culpæ adfinem, quod tam bonum classis consilium sua lingua disturbasset. Porro arbitratur adfinis, quantum ex Bursii sermone colligere potuit, dubitare nunc Ecclesiastas Walachrianos, utrum ex re sit, iudicia exterorum à se exquiri, posteaquam ad Remonstrantium hoc aures pervenit: facile enim alios ad se metientes, cogitare possunt, minimè eos hic cessaturos. Omnino utile sit certò constare, quid consilii coeperint Walachriani. Nam Barleana Oratio, & Corvini breves castigationes jam confectæ sunt, vel adfectæ. Et si ad externos mitti debeant, jam prelo tradi tempus sit. Locutus hac de re sum cum Episcopo: ille recepit se acturum de eo cum Utenbogatium. Hactenus in scribendo perveneram, cùm ecce adest Episcopus; narrat ut Hagam post horas aliquot sit iturus: venisse ad me ut diatribam tuam restitueret. Iterum in priorem sermonem incidimus: pauloque nunc fusiùs de satisfactione dissertabat. Hoc unum inter nos & Socinum in controversia relinqui putabat, num Christus patiendo solum apud homines aliquid egerit, an item apud Deum: posterius negare Socinum, sed mirè & misè scripturas torquere, atque id solidè à te demonstrari. Verum porro quæri, quid illud sit quod apud Deum egerit. Vulgarem esse opinionem, pœnas, quæ nobis debebantur, pertulisse. Unde & eo sit deventum, ut desperasse, & tartareos sensisse cruciatus putaretur: quæ sententia ut impia, rectè refellitur à Loensi Anglo in sua Sabbathi effigiatione. Verùm ut non eousque cum vulgo procedamus, si tamen Christum pro nobis pœnas subiisse dicamus, ne hoc ipsum quidem satis convenire cum eo, quod peccata nobis remitterentur. Nec enim gratuitam esse remissionem, si alius solvat. Dicere quidem te, hoc ipsum gratiæ esse ingentis, quod peccata nostra imposuerit filio: sed tamen non satis hoc esse, vel saltem non videri satis, ut sit vera & propriè dicta remissio.

Quare



Quare nec videri satisfactionem esse illiusmodi, qualem vulgo opinentur: sed quemadmodum in Vet. Test. sacrificio oblato peccata remittebantur nemine poenas subeunte: sic in Nov. Test. remitti peccata interveniente Sacrificio Christi; quæ melior victima ita accepta fuerit Deo, ut propter eam peccatis cunctis ignoscat. Quocirca in eo propriè Socini errorem consistere, quod negarit Sacrificium Christi esse propriè propitiatorium; quod multis Scripturæ locis adversus eum rectè à te demonstretur. Seque aliis qui in Socini sententiam proniores videbantur, subinde idem dixisse & demonstrasse. Dicebat præterea, duo tria esse, in quibus nesciret, an tuam sententiam sis probaturus Theologorum vulgo. Unum est pag. iv. ubi de materia satisfactionis tractans, eam esse dicis, tum cruciatus mortem antecedentes, tum præcipuè mortem ipsam. Adscribere quidem ad oram, non solum corporales à te cruciatus intelligi, sed vel imprimis illas animæ perpassiones, quas voce *passions*, & similibus significet scriptura. Verùm nihil dicere te, quo cognoscamus alios te animæ dolores intelligere, quàm è corporis cruciatibus provenientes. Alterum est pag. 16. ubi qualitates primitus creati ac deinde resuscitati corporis inter se ab Apostolo conferri vis; quorum illud habuerit cum naturali moriendi possibilitate, conjunctam ex divino beneficio vivendi quoque possibilitatem; hoc verò vitam ita in se habiturum sit, ut *nulla ei adsit moriendi possibilitas*. Eamdem dicebat Socini esse sententiam, ut qui corpora nos etiam *per se* spiritualia habituros putaret. Cæterum juniores omnes, atque suo judicio veteres item ad unum omnes moriendi possibilitatem concedere, solum actualem mortem negare. Tertium est pag. 51. ubi ais, posteris Davidis peccata esse remissa, non tantum ob promissiones Davidi factas, verùm etiam quia Davidis actiones Deo placuerant. Hoc quoque insolens visum iri putabat. Nihil tamen horum non probari sibi dicebat: imprimis tertium isthoc. Nempe quæcumque illuc dicis, ut ostendas solere etiam sæpe actionem gratam admitti velut in pœnæ compensationem, hoc ipsum pro ea sententia facere dicebat, qua Christus placasse Patrem creditur, non pœnarum pro nobis persolutione, sed oblatione victimæ summæ *evangelicæ*. Denique monstrabat manifestum animi minus præsentis *opdrus*, pag. 54. ubi ais, dicere Socinum, nusquam scriptum esse Deum nobis, sed semper nos Deo conciliatos esse. Mox subjicis verum non esse, quod dicat nusquam esse scriptum nos Deo esse reconciliatos. Afferis deinde locum, *Eph. XI. 16.* ubi Apostolus

ait, hominem *involuntarius* Deo. Atqui receperas, te probaturum Deum nobis reconciliatum: nunc te adversus Socinum probare ais, nos Deo reconciliatos (neque aliud evincunt verba Apostoli) quasi non hoc ipsum sit, quod agnoscit Socinus. Alia quorum mone-ret, non erant. Tamen abutimur parans, verbo indicabat, putare etiam alia à se adferri potuisse, nisi tantoperè negotiis fuisset districtus, ut Læctioni lætissimi libri tui, non eam potuerit curam impendere, quam oportebat. Hoc vix eo fine ab illo dictum arbitrer, ut ad te perscriberem. Tamen nihil te celandum putavi. Atque eo fidentius id addidi, quia scire te scio, nihil vel à te, vel mortalium quoquam tam benè scribi posse, ut non alicubi sit, quod melius dici possit. Sic nempe cum humana infirmitate comparatum est. Sed hoc ab editione detertere non debet. Si enim nihil scribi debet, quod non undique perfectionis contigerit metam, nihil profectò scribi debet. Et peccarunt omnes Catholici Doctores, quorum tot aurea monumenta ad nos pervenerunt. Nosque Hæreticis in hac vita noxios errores spargentibus, sic studia scilicet nostra componemus, quasi post hanc vitam cum iis disputare cogitemus. Quocirca te, Amplissime vir, rogo, ut nequitiam iccirco tua premere diutius velis; sed brevi nobis aut Corvino diatribam hanc tuam remittas, quò lucem quamprimum adspicere possit. In Junio negotio voto nostro Delegati D. D. Ordinum annuerunt. Maximas tibi meo, & adinis nomine gratias ago pro commendatione apud Nobil. Barneveltium. Vale vir omnibus omnium elogiis major, præsidium decusque nostrum. ix Jan. cl. lxxvii. quem annum vicissim tibi, conjugii, liberis, totique Grotianæ familiæ faustum & felicem ex animo opto.

Emendationes tuas  
jam exscripsi. Itaq;  
Augustinum tuum  
una mitto, & pro  
usu gratias ago.

Tuus totius,

G. J. Vossius.

XCI.

Samueli Wardo.

Clarissime Vir, propemodum pudore suffundor, quò tardè adeò respondeam. Sed tamen respondeo. Turpe enim putabam, si filio Joanne studiorum causâ ad vos eunte, bellam adeò scribendi occasionem prætermitterem, præsertim luculento adeò à te dono remuneratus. Cujus ego jam bonam

nam partem legi, non fructu minori, quam voluptate. Quamobrem munere hoc multum me tibi obstrinxisti: nec tu modo, sed etiam Reverendissimus Episcopus Sarisburiensis, tam præclari operis auctor; quem etsi antea facerem maximi, non parum tamen nunc ad admirationem viri accessit. Quod verò & mea ac frivola tam grata tibi sint, plurimum gaudeo. Eaque res stimulos mihi subdit, ut quod in cæteris meis scriptis facio, nec facere cessabo, dum vivam idem agam in commentariis meis de Historicis Græcis, Latinis: hoc est seridè ut cogitem, de iis, quæ indicta mihi, addendis, & si qua perperam dicta, corrigendis, & quæ bene dicta, firmandis magis. Domitius Piso dicebat, Thesaurus esse scribendos, non Libros. Libros dedi, non Thesaurum, sed siquid in me ingenii, & eruditionis, quæ scio quàm sint exigua, sed tamen quantulacunque sint, operam dabo jugi curâ, & meditatione, ut aliquando libri isti, non dico magnis viris, at tamen mei similibus, hominibus non omnino indoctis, thesaurus penè aliquis, in tali quidem argumento, esse videantur. In hoc omnino delinere: nisi unum istoc superesset, ut filium meum tibi commendem. Longè aberit à parentibus. Sed spero, quemadmodum mei Reverentissimus semper fuit, ita etiam operam daturum, ne mihi dolori sit absenti. Ad pietatem, modestiam, industriam, quod coram facere soleo, literis eum adhortari non desinam. Atque ut, cum occasio erit, idem facias apud præsentem, etiam atque etiam rogo. Ego tibi vicissim omnia amici hominis officia promitto spondeoque.

Lugd. Bat. clō  
Idc xxviii. ix.  
Kal. Octob.

Tuus ex animo,

G. J. Vossius.

## XCII.

Richardo Stuardo S. Theol. Doctori,  
Capellano Regio S. P.

**N**Oli quærere, Præstantissime Stuarde, quàm mihi jucundæ fuerint literæ Reverendissimi Domini mei, Episcopi Londinensis: ex quibus luce clarius perspexi, quantopere ei curæ sim, ut per quem tantum mihi honoris obtigerit ab Serenissimo Rege, & Illustrissimo Buckinghamiæ Duce, ut, simulac locus vacarit, Cantuariensis futurus Canonicus sim, *ovv Oup* quo nomine ita gaudeo, ut prope mihi digito cælum videar contin-

gere. Tanto me beneficio obstrictum tenet, tum Reverendissimus Dominus meus, tum Illustrissimus Vicecomes Dorcestrensis, quorum uterque & magno Regi, & inclyto Duci fuit quali *univerſus* *Zds*. Atque idem Reverendissimus Dominus, ut filium quamprimum ad vos mittam, auctor est: seque ei patris loco fore pollicetur. Ex quo ipso tuam etiam benevolentiam non obscure intelligo. Video equidem te esse, qualem hinc abiens promisisti. De me quoque ita habe, fore me eum, quem recepi, necunquam futurum, ut fallam opinionem tuam. Et sanè, si maxime vellem, hâc ætate vix alius esse erga præstantes & bene meritos possum, quàm debeo. Quippe cui jam in naturam verterit consuetudo colendi & observandi tales, tanquam reliquias quasdam aurei generis. Cum verò tanta inter nos animorum conjunctio sit, vix necesse habeam tibi commendare filium meum. Quippe mei officii esse scio non cessare, nisi re perfectâ. Atque etiam ubi jam honestus in Collegio Cantabrigienſi locus erit tributus, non semel fortasse consilio tuo egebit, sed de isto tum viderimus. Nunc, quod instat, agamus. Quæſo igitur meâ causâ etiam atque etiam filium commenda Reverendissimo Mecenati, Domino Londinensi Episcopo. Non melius me devincire tibi atque obstringere possis, quàm in tam charo pignore. *Neessiam* non addo, quia non intelligo. Sed singula curæ ac fidei tuæ committo. In quâ ob excellentem humanitatem tuam tantum fiduciæ pono, ut videar tibi injurius fore, si nimis eum anxie ac sollicitè commendem. Et tamen, quod sponte etiam te facturum scio, id peto, quam maxime possum, ut amare eum velis, Joannem potissimum mihi, natu omnium maximum. Minoribus ob lubricum ætatis magis metui, præsertim tam longè remotis ab oculis parentum. Hic jam usu, ni fallor, modum norit vitæ suæ. Aliquid etiam est, quod hic vegetâ magis ac firmâ est valetudine, quàm Franciscus, qui proximum ab eo locum tenet. Octennium jam est, quòd in Academia versatur. Sed initio (ut familiariter tecum loquar) cum imprimis venustati sermonis operam dari oporteret, industria ejus claudicabat. In quo ut aliqua ejus culpa erat, ita & aliqua temporum fuit, quibus apud nos factione omnia arderent: fortasse & aliqua erat culpa nostra, quia importunitate quorundam, ac zelo præpostero vexatus, penè etiam adhiectus, non eam potui præstare liberum curam, quam vellem. Sed illi cum ætate postea etiam judicium & studiorum amor gliscebant: sic tamen ut præcipue rerum momenta sectaretur, itaque & sub Clarissimo Snellio,

Snellio, *ms. magistri* in Mathesi se non negligenter exercebat. Magnopere etiam rapiebatur amore Scientiæ Naturalis. Cui etiam Botanicen, & præcipuè Anatomicen adjecit. Ulterius etiam iis vacaturus, nisi potius Juris utriusque studium quam Medicinam sibi proposuisset. Et jam in Jure Baccalaureus est creatus. Ac bona spes erat, posse intra menses non ita multos Licentiatum consequi honorem merito suo. Sed ubi cognovit de occasione familiæ meæ in Angliā oblata, aliquem eò filiorum mittendi, qui in Collegio Cantabrigiensi uberiorem capere possit ingenii sui cultum; serio de eo mecum egit, & quantopere S. Theologiæ amore teneretur, exposuit. Adjecit etiam, ne & postea claudicet eruditio sua, velle paullum studiorum cursum retro legere, supplendo ea, quæ in Philosophia sibi deesse animadverteret, privatim etiam se bonas literas culturum, & quicquid viam sterneret ad arces solidæ eruditionis. Ingenio valet, nec minus judicio. Solum industriæ opus erit, atque ut studia ex prudentum judicio componat. Quales etiam attendere solent, quo unumquemque ingenii geniique ardor trahat. Multi enim præclaros nobis viros dedissent, nisi ea potissimum studia secretati essent, ad quæ minus idonei forent. Tanti est nihil facere invitâ Minervâ. De sumtibus quos honestè faciet filius, præstabo quicquid in me erit. Quin malo paullo majores facere impensas, ut inter eruditores honestioresque cibum capere, & versari possit, quàm ut minori sumtu inter minores proficiat minus. Fore spero, ut in eo, & ætatis, & longi temporis, quo in Academia egit, & honoris quem adeptus, ratio etiam aliqua habeatur. Quicquid filio dabitur, id in me beneficium collatum putabo. Interim quanto celerius sumtum ratio minui coeperit, tanto magis mihi gratulabor. Quid mirum? qui in re sim non nisi mediocri, fortasse etiam infra mediocritatem, præsertim si quis attendat, ut conjugem habeam plurimum valetudinariam, & quàm numerosam in studiis prolem alam domi. Animus interim est prolixus, & dummodo liberi non abutantur patris lenitate, pro forte meâ liberaliter omnia præbebo. De ratione studiorum meorum nihil nunc addam. Volo enim inde mihi novum nascatur literarum argumentum, ubi filium in Angliam salvum venisse cognovero. Nam crebrò deinceps literas meas videbis. Juvabit tecum colloqui, à quo me ita amari video. Nempe ex te colligo, ut quisque est amore dignissimus, ita ad alios amandos esse maxime propensum. Eò magis operam dabo, ut præclaram quam de me opinionem concepisti, semper conservem.

Adhæc curabo, ut nos amicitia fuisse junctissimos, non æquales modò, sed etiam posteri intelligant. Vale Clarissime & Doctissime Stewarte, filiumque (facies scio) salutaribus monitis instruas, ne si vel apud Reverendissimum Episcopum, vel in Cantabrigiensi Collegio, vel alibi, in ipso Angliæ ingressu præ imperitiâ peccet; hat, quod proverbio dici solet, Cantherius in porta: eaque res non illius modò honori deroget, sed etiam depretiet parentem. Πάμπαν ὑπέρτατον.

Lugd. Bat. An.  
clō Ioc xxviii.  
ix Kal. Octob.

Tuus tuo merito,

G. J. Vossius.

### XCIII.

Francisco Junio, F. F. Londini.  
S. P.

CUM Cantabrigiam ante annos paucos vocarer, si Taurosthenis columbam habuissem, omnino consuluissem, quid facto opus foret. Nunc ob loci intervallum, & quia certò satis procurare literas non possem, coactus sum absque te omnia agere mei unius arbitrio. Venissem facilius, si & uxori valetudo melior fuisset, & Anglicæ linguæ intelligens forem, & ad mores externos mihi visus essem habilis magis ac paratus. Scis enim in omni vita placuisse hactenus mores Batavos, planèque simplices, utpote homini Scholastico, & Musæi umbræ assueto convenientiores. Sed quia venire ipse non potui, filium nunc Cantabrigiam mitto, ut in Collegio aliquo, ex D. Episcopi Londinensis sententia, studiis operam navet, virtutèque suâ & ejusce Reverendissimi Domini, aliorumque amicorum favore, fortunam aliquam sibi paret: vel si canina aliqua scæva has intercipiat, saltem postquam, quantum profecerit, non poenitebit, tum pietate, tum doctrinâ, ad suos redeat instructior. Atque eò fidentius mitto, quia tu, carissime Adfinis, in Angliâ vivas, cujus sapientissimo consilio, vel præsentî auxilio, si ita res ferat, juveni adolescens possit. Scio enim te, tam omnia nostri causâ velle, quàm parati nos sumus ad præstandum tibi debita officia arctissimæ conjunctionis nostræ. Quare etsi Reverendissimus Episcopus se patrem ei fore promiserit: etsi Doctor Stewartus, Ecclesiastes Regius, vir mei amantissimus, (quo hic familiariter usus sum, dum menses aliquot cum legato Carletono in Bataviâ egit) magno me amore complectatur: etsi etiam aliquid fidu-

ciz



ciæ pono in Doctore Beale, Pembrochianæ Aulæ in Academia Cantabrigienfi, præfecto, qui & ipse nos nostraque alicujus facere solet: tamen desipiam, si affectum cujusquam cum tuo comparandum putem, qui arctissimo sanguinis vinculo liberis meis, per matrem sororem tuam, junctus sis. Eum igitur tibi de optima nota commendo; sic age cum eo, quasi naturâ pater fores. Eum de manu tibi in manum trado. Et coram & per literas illum mone, objurga, juva. Nihil mihi gratius facere possis, præsertim hac ingravescente ætate, quâ interdum de colligendis sarcinulis, & migratione in patriam, aurem mihi mors vellit. Annum unum parentum erit sumtibus alendus. Exinde vel non multo post, socium Collegii fieri posse, sperat Reverendissimus Episcopus. Equidem grave non ducam, hoc quicquid est sumtuum facere, dummodò filius nihil inutiliter profundat, sed memor sit esse me *παλιν*, nec opimam parentibus hæreditatem relictam, quin nec me, nec uxorem, anxie unquam de congerendis opibus laborasse: imò mutationem Reipublicæ ante octennium aliquot millibus mihi stetisse, & quid singula persequar, quæ tibi ignota non sunt? Et in hac tamen fortuna mea malo aliquanto majores facere impensas, ut inter doctiores & honoratioris vivat filius, quàm ut cibum capiens inter rudes adolescentes erudiat minus. Audio mensam in Collegio non stare amplius quàm ducentis. Et tamen, si aliter est, vel trecentos persolvam. Et ingenii & judicii filio abunde est. Vellem in utraque lingua progressus fecisset majores. Magis id foret ex re ejus, & familiæ honore. Et ea propter non parùm hæsi, num eum mitti oporteret. Verùm miro Angliæ amore rapiebatur. Et metus erat, ne mater suorum, quàm privigni studiosior videretur, si juniorum aliquis prælatus primogenito foret. Accessit, quod hic usu aliquo rerum pollet, atque ad unguem factus videtur in rebus, quæ conversationem spectant civilem. Et defectum in *φιλολογία* compensat peritia rerum aliarum, præsertim earum, quæ partes aliquas Mathematicos spectant, etiam *τὴν γεωμετρίαν* item scientiam naturalem, botanicen, anatomicen, in qua parte sanè progressus fecit egregios. Et propter ista, ad Medicinæ studium idoneus maximè videbatur. Sed nescio, quæ caussans, vel Theologiæ vel Juris utriusque studium præoptabat. Et jam in jure utroque Baccalaurei gradum est consecutus. Ac professorum judicium erat, intra semestre, vel circiter, modò parem industriam adhiberet, Licentiatum honorem consequi posse. Et factum esset, nisi oblata hæc occasio foret visen-

di Angliam, linguam ejus moreque addiscendi, tentandi ecqua & sibi istic spes foret emergendi: sin spe excideret, saltem cum majori & prudentia & doctrina post aliquod tempus redeundi ad suos. Videtur annum ultra Philosophiæ velle impendere, intra quem se Magisterii gradum consequi posse sperat. Nec obstat ratio annorum quos numerant Angli. Ut qui octennium egerit in Academia nostra, & puto in exteris non omnia ad vivum refecari. Post illa ad S. Theologiam appellat animum: sed sic, ut non negligat Juris notitiam, quantumcumque sibi paravit, sed potius eam adaugeat, quantum licet. Seu ad sacras literas, seu ad Juris studium potissimum collimet (de quo post menses aliquot statuere melius poterit) annum sacris operam dedisse non inutile erit. Quin turpe sit Christianum, & tot annos in studiis versatum, in hoc certamine animorum quod per orbem obtinet Christianum, non mediocriter intelligere Religionis controversias, sed in omnibus omnino ab alieno pendere judicio, ut nervis alienis mobile lignum. A filio ad alia venio. Raræ admodum mihi à te literæ, atque utinam saltem raritatem earum longitudine compensares. Scis, quod olim Symmachus aiebat, odisse se parsimoniam bonorum verborum; & scribendi brevitatem, fastidio, quàm officio, propiorem esse. Non tamen id in te locum habet: qui quàm mei & meorum amans sis, abunde semper comprobasti. Quare illam literarum & raritatem & brevitatem occupationibus tribuere malo: saltem cuius rei potius quàm fastidio, vel affectus frigusculo. Opus nostrum de Historicis Græcis an videaris haut sat scio. Reperies in eo & amicam tui mentionem, lib. 2. cap. 21. ubi sermo nobis de Gelazio Cyziceno quem à focero translatus tuâ habeo munificentia. At commentarios de Historicis Latinis, quos ante annum misi, quin acceperis non dubito. In ejus operis præfatione ad lectorem focerum defendo, quem ita depinxerat Thuanus, quasi desultorius ac vagus fuisset magis quovis Scythâ. Atque hoc acerbum adeò judicium tulerat ille ob critica quædam: ad quæ focer lassus gravioribus studiis demittere se solet, instar caballi in clivo, cui sudor extricandus. Potuit itaque Junius dicere, quod olim Arellius Fuscus, nemo me ex his censeat. Simul occurrendum fuit ibidem calumniis quibusdam Josephi Scaligeri, quas Epistolis nuper hic cum Heinii præfatione editis inspersit. Asterisci quidem aliquot locis apparent indices rei alicujus præteritæ. Sed ex antecedentibus & sequentibus non est obscurum, quid dicatur: iis præsertim, quibus  
non

non incognita prorsus est Historia eorum, quæ postremis aliquot annis inter Junium & Scaligerum intercesserunt. Aut qui Paulinas aliquot Epistolas ex Arabico à Junio translata, ac Tertullianum, Manilium & alia quædam ab eo edita, non ignorant. Eò verò impudentior prorumpit, ut Junium ne Latine quidem scisse calumnietur. Valde me recreavit, quòd spem facis adventus tui in has terras, idque intra annum vel paulò amplius. Opto enim tempus videre, quo te fruar. Sæpe mihi conspectum tuum ante oculos pono. Sed non dubito, quin jam multum facies mutata sit ab ea, quæ erat cum abires in Angliam. Tanto impensius videre aveo: quanquam non tam ut dextrâs jungere, columque amplecti, quam ut sermonem liceat de variis rebus sociare, multaque ex te discere mihi penitus incognita. Habes Epistolam bene longam. Aliquanto parcius esse potuissim: & per te id licuisset: scio enim te verba mea non exigere ad libellam: Sed committere nolui, ut cum ego juxta, ac uxor mea, brevitatem tuam culpâre soleamus; tu meum mihi exemplum objectares. Plurimum te salutat conjux, quæ malè ex casu aliquo valuit ante dies pauculos sed nunc cum Hygieia prope in gratiam rediit. Liberi etiam plurimum jubent te salvere. Vale affinis conjunctissime, & longè charissime.

Lugd. Barav.  
cl. loc xxviii.  
x. Kal. Octob.

Tuus totus,

G. J. Vossius.

#### XCIV.

Guil. Londinensi Episcopo.

**O** Multis nominibus felicem nuntium, quem mihi Reverendissime in Christo Pater, ac Domine, literæ tuæ apportarunt! Iterum me, imò ter & quater beatum, quem amore tuo & curâ seriò digneris, vir, imò heros illâ pietate, illis ingenii dotibus, illâ doctrinâ, illâ dignitate refulgens, & ut verbo dicam, verè Dei Opt. Max. æmulus. Nam ut magnitudinem præter cætera ostendit, quòd illustrem ejus legatum agis in Anglia vestra, ita non nisi eximie est bonitatis, quod tanto tibi beneficio obstringas hominem tantillum, quodque magis mirandum, longo adeò distitum intervallo. Equidem primum quantas possum, Deo gratias habeo, uti & Illustrissimo Comiti Dorcestrensi, quorum operâ Deus & Serenissimi Regis, & Il-

lustrissimi Ducis animos tantoperè mihi conciliavit. Tanti Mecænatis fiduciâ innixus, non dubitavi in Angliam mittere carissimum pignus. Joannem meum, filiorum natu maximum. Quem, ut potissimum eligerem, non unâ ratione adductus fui. Primum illud movit, quòd hic ob ætatem magis videretur nôsse vitæ suæ modum. Accessit, quòd valetudine uteretur aliquantò firmiori, quam unus & alter eorum, qui proximi forent. Præterea illud spectavi, quod profiteretur se capi admodum S. Theologiæ studio: nec alibi ejus cultum æquè capere optare, quam in florentissima Britannia vestra. Denique grave videbatur, si juniorum aliquis primogenito præferretur; imò is amor & cultus erga eum est juniorum, ut si id fieret, injurios se fore ei arbitrentur. Jam circiter octennium est, quòd publicas audire lectiones cepit. Ac cum ætate magis & magis Historiæ & Philosophiæ incubuit; imprimis Mathesi, & scientiæ naturali, sub qua nunc etiam herbariam notitiam comprehendendo, uti & anatomicen, in qua progressus fecit minimè aspernandos. Ab istis animum appulit ad juris scientiam in qua jam Baccalaurei gradum consecutus, imò paucis mentibus posse Licentiatum gratum adipisci, plerorumque professorum judicium erat. Sed ubi intellexit de occasione hac continuandi in Anglia studia sua, planèque pertexendi, præoptavit paulò cursum retrò legere, ac quod tibi in Philosophia & aliis deesse animadvertet, id novâ curâ supplere: exinde autem velis remisque contendere ad studium S. Theologiæ, sic tamen, ut quod jam in Juris scientia hausit, non ventis tradat, sed horis subficivis adaugeat, modò ingenium, occasio, & res ferant. Saltem Canonicum jus haud multum à Theologia avocabit, quia quicquid illud boni habet, è Scripturarum fonte & S. S. Patrum rivis petiturum est. Sed de isto viderimus suo tempore. Imò, non tam ego, quam Collegii præfeci. Tuique etiam consilii res hæc futura, Reverendissime Præsul, ac Domine; cui ut commendatissimus sit filius meus, usque adeò exopto, ut effari id non possim, nec mihi Linguae si essent complures. Et tantam tamen rem neutiquam rogo timidè quasi assem porrigerem elephantum; sed magna cum spe consequendi, quod voveo & opto. Tanta mihi est fiducia eximie, ac propè divinæ humanitatis tuæ. Itaque etsi non ignorem magnitudinem tuam, meque etiam pede meo didicerim metiri, tamen nixus meritis tuis, & literis postremis, ausus sum filio polliceri paternum affectum tuum, sed conditione eâ, quâ Augustus suos commendabat, si merebitur. De sumptibus

quos primo potissimum anno fieri opus erit, curæ mihi res futura. Quin si satius id videatur, vel in antecessu solvam. Sin id necesse non est, collybo curabitur ne in cuiusquam ære sim. Ad Theses meas Theologicas quod attinet, vellem earum editione abstinuissent Oxonienses. Sed gravius tamen id mihi futurum, si negligenter fecerint. Sin bonâ fide, & cum cura exemplar editum expresserint, feram, quando infectum nunc fieri id non possit, & ut spero amore id fecerint, cum publici boni, tum mei. Nec eo minus adlaborabo, ut nova prodeat editio, in qua suppleam, quæ nunc defunt. Fore arbitror, ut primum lucem videant controversiæ de baptismo, unâ cum Historia rituum, quibus veteres in sacramento uti solent. Pars ea à me jam prope ad umbilicum perducta. Et nisi, ut simiarum catuli, ita me fallunt ingenii industriaeque meæ foetus, non infelicitè hæcenus sub manu negotium hoc successit. Ad huiusmodi magis magisque elaboranda, non mediocres mihi stimulos subdit, quod tu quoque, Reverendissime Domine, tantum de gravissimis remiseris negotiis, ut placido illo vultu tuo adspiceres imperfectum disputationum istarum opus. Adspiceres vero? imò legeres quoque, & quid legeres dico? quinetiam laudares. Quod cum cogito, tacitè mihi gaudium circa cor gliscit, majoresque animos sumo, deinceps etiam ea scribendi, quæ tantum Præfulem probaturum confidam. Simul etiam mihi cogitatio obversatur illud agendi, ut omnes videant mihi ad referendas gratias voluntatem non defuisse, sed facultatem. Scio, cum omnia egero, minime vel dimidiam meritorum tuorum partem expungam. Sed tamen hoc effecero, ut quantopere tantum Præfulem colere debeam, omnes intelligant. Non est mei similibus debita reponere præmia. Quod si leviter coner, humeri mox fatiscunt. Attamen benè merentes laudare licuit, semperque licebit. Nam & à mortalibus laudes reddentur Deo immortalis. Hanc devotam mentem, si scripta mea ætatem ferent, omnis laudabit posteritas. Sin (sed omen verbis absit) quod effugere coner animi ingrati, ingratum tam præclare de me meisque merito nequam esse possit.

Reverendissime in Christo Pater ac Domine, mei pariterque filii mei, Mecænas Optime, supplex oro omnipotentem Deum, & benignum Patrem, ut quemadmodum hæcenus fecit, ita porro etiam te spiritu suo gubernet, & qui tanto gaudio nostro valetudinis jam melioris initia largitus est, idem pristinam penitus restituat, & diutissime conservet,

ad gloriam sui nominis, & bonum tum Ecclesiæ tum etiam nostrum.

Lugd. Batav.  
cl. 16c xxviii.  
x. Kal. Octob.

Reverendissimo nomini ac dignitati tuæ pro voluntate tam præclaris erga me meritis testata æternum devotissimus,

G. J. Vossius.

# CXV.

Nobilissimo Viro, Paulo Seriere.  
Metas Mediomatricum.

Nobilissime & Coniunctissime Serieri,

SI vales, cum tota familia, plurimum gaudeo: Ego, uxor, & octoni Liberi, Dei gratia, valeamus. Diuturnum jam utrinque silentium fuit. Interim amor noster, non periit, sed latuit. Unum doleo, quod silentium nostrum excesserit modum Pythagoricæ *ἡσυχίας*; sed ut post longum hyemis rigorem, gratior est Zephyrus, & verna tempestas: Ita spero, post cessationem hanc, acceptiores erunt literæ nostræ. Quomodo enim aliter censeam, cum arctissimo, & indissolubili vinculo, junctus sis uxori meæ: Et ego amicitiam, quæ cum tam propinquo colitur, sanctam existimem? Pudet quidem diuturnæ adeo cessationis in scribendo: sed non tota hæc nostra, verum magna ex parte temporum, culpa fuit, quibus hic viximus. Et si quid peccatum hæcenus, id crebrioribus deinceps literis compensabitur; non à me modo, sed etiam à Liberis meis, quos superstitione propemodum amare soles: Nec illi minus jucundam tui memoriam servarunt. Non dubito, quin tibi quoque volupe sit futurum, arare nobiscum literarum officio, illum amicitiae campum. Ita crescet amor noster, qui æternus esse debet. Nihil autem æque nosse ex te aveo, quam an vivas, & valcas, an supersit sanctissima Mater tua, Matertera nostra, an benè sit uxori sanctissimæ, quot liberis te auxerit, & cuius sint ætatis, ac sexus, & quibus vocentur nominibus; utrum adhuc apud Metenses agas, & quâ apud eos, vel aliq, dignitate sis, & si quæ alia te, vel tuos spectent. Quæ si ex te cognoro, et si te semper amavi plurimum, non exiguus tamen tanto affectui cumulus accesserit. Jam sextus est annus, quod Historiam Universalem, hoc est, tam sacram, quam externam, profiteor in Academia nostra. Huic muneri ante triennium, & alterum accessit. Nam

Meario



Meursio nostro successi, in professione Linguae Græcæ. Nec sine gloria, utramque professionem sustineo. Sanè frequentissimo doceo auditorio, eoque nomine à Curatoribus Academiæ amor, & honestè habeor. Qui nec abire in Angliam siverunt, cùm in Academiam Cantabrigiensem vocarer perhonorificè, ut in ea Politicæ, & Historiæ profiterer. Nec solum viva voce docendo, sed pariter scribendo, nomen procudere, benèque de publico mereri non cesso. Sanè ex quo à nobis abiisti, multa publici juris feci. Ex quibus commentarii nostri, de Historicis Latinis, ita grati fuere Britannia, ut serenissimus Rex, jam manu sua mihi promiserit Canonatum Cantuariensem, simulatque ullus vacarit. Quæ munificentia tanti Regis eo gratior est, quod hic, & ubivis terrarum, ejus emolumentis, quæ sanè magna, frui licebit. Filiorum meorum jam quatuor, in studiis egregios fecere progressus. Quorum natu maximus, intra paucos dies in Angliam abiit, ut Cantabrigiæ, ubi plurimos habeo amantes mei, uberiorem capiat ingenii cultum. Uxor, atque Liberi jubent mecum salvere, tum optimam Matrem tuam (nam superstitem adhuc esse speramus) tum lectissimam Conjugem, & familiam universam. Vale, Cognate præstantissime, & nos ama, ut soles.

Lugd. Batav.  
clō Ioc xxviii.  
x. Kal. Octob.

Tuus totus,

G. J. Vossius.

# XCVI.

Hieronymo Beale.

**C**Larissime Doctissimeque Beale, eunte Cantabrigiam Joanne filio, nefas putavi, si eò absque meis ad te literis veniret. Sanè longè aliud jussit tuus erga me amor, quem ego non minori affectu remunerero. Quanquam autem & antea te plurimi feci, ut debeo; tamen literis ad me tuis non parvus benevolentia huic cumulus accessit. Satis enim ex iis perspicio, et si mihi adhuc videar inter cygnos anser strepere, multò tamen præclariùs te de me sentire. Qui error, uti vulgus non prensò, gnarus *non melius id quædã* ita seriò gaudeo, vel potiùs triumpho amicitia hominum doctorum. Eorum imprimis, qui in studiis sacris, novellis doctoribus sociarunt antiquos. Quos inter constans fama, te, vir doctissime, reponit, & ita reponit, ut inter paucos illos referat, qui hac in re familiam

ducunt. Ego quoque hanc Spartam pro viribus ornare studeo. Sed tamen amicorum postulato, cogor interdum ad ea relabi, quæ humanitatis vel eloquentia studia spectant. Itaque prælo jam subjeci Commentarios Institutionum Oratoriarum, sed longè auctiores melioresque quàm lucem videre ante annos viginti duos, atque iterum sexennio post. Similiter Commentarios meos de Historicis Græcis Latinisque, subsicivis horis, augeo, emendo, orno. Hoc animo veteres & novos lego, ut non modò ditare possim labores meos, sed etiam, meliora edoctus, propria cædam vineta. Imò ut Apelles judicia omnium, post tabellam latitans observabat; ita ego ubique sedulò operam do, ut intelligam, quæ ab doctissimis hominibus in scriptis meis requirantur. Nec tamen solùm limandis & corrigendis veteribus operam infumò, sed etiam nova parturio: atque inter alia Commentarios de L. L. grande de erudita literatura opus. Nempe amicissime Beale, cessare non possum. Placet egregius Atheniensium mos, ubi, ut Valerii verbis utar, inertia è latebris suis languore marcens, in forum perinde atque delectum protrahebatur, fiebat; ut facinorosa, ita erubescendæ rei culpa. Fore spero, ut in studiis suis filius apud vos paternam æmuletur industriam. Quod si fecerit, & sibi optimè consuluerit, & gaudio mihi futurus est. Proficiendi non alibi terrarum melior ei occasio esse possit, quàm in tanta luce clarissimorum hominum. Quanquam autem, quo in Collegio potissimum victurus sit filius, necdum sciam; sed de eo demùm statuet Reverendissimus Episcopus Londinensis, *id est* *id est*, qui parentis ei loco se fore, quæ humanitate est, recepit: tamen cum omnino id Cantabrigiæ futurum sit, non possum non plurimùm te rogare, ut pro amore tam propenso erga me, studio etiam tuo complectare filium meum. Quæ ratione plurimùm me tibi obstringes & devincies. Scio quidem, vel tacente me, commendatum tibi fore, sed tamen orare id te literis meis malui, qui putarem iis aliquam commendationis accessionem fieri posse. Quare iterum iterumque id rogo. Vicissim etiam omnia à me expecta officia, quæ ab homine amicissimo possint proficisci. Vale, & mutuo amare perge hominem studiosissimum tui, quique te non modò mirabiliter amet, sed etiam colat & observet.

Lugd. Batav.  
clō Ioc xxviii.  
x. Kal. Octob.

Tuus,

G. J. Vossius.

## XCVII.

Gulielmo Laud *Episcopo Londinensi.*

Reverende in Christo Pater ac Domine,

**I**llud Tartaro profectum facinus etiam ad aures Lycei nostri pervolarat: sed aliquam multis diebus postquam priores literas exarasssem. Nec primum fidem inveniebat, nisi apud paucos. In causa erat, tum quod nuncii ejus mirum in modum variarent, tum quia toto ante trimestri publicæ pacis hostes similia istis longè latèque sparsissent. Nunc enim Illustrissimus Dux mensæ assidens, nunc curui insidens, simili scelere sublatu ferebatur; quæ quia vana esse docuerat eventus, eo sperabant boni tum quoque famam mentiri, etsi, ut ingenue dicam, formidarem subinde, ne hæc ab hominibus malis spargerentur, ut inde aliquis conciperet cogitationem verè ea patrandi, quæ falsò tum diffunderentur. Sed quocunque animo hæc facta sint, nimis verum fuisse hunc rumorem docuit nos dies: maximè postquam jam filius in Zelandiam abierat, ubi hebdomadas aliquot ventos & commodam navigationem expectare coactus fuit. Quantum inde doloris perceperim, nullis literis testatum facere possim. Non jam sufficebam expediendis negotiis meis vel publicis vel privatis. Indignabar ereptum orbi illustrissimum ducem, annis florentem, magni adeo ac præstantis animi, à quo expectarentur præclara omnia, dignaque tabulis æternitatis. Cogitabam quantum in eo amisisset Britannia, quantum illustris ejus familia, quantum tot boni: quantum & ego, quod tantò sæpius in mentem veniebat, quantò apertiora erga me erant merita ejus. Spem etiam muneris fecerant literæ tuæ: atque ex aliis etiam cognoram, quàm munificus esset, planè præter mores & tempora hæc. Sed quemadmodum ventis cessantibus mare detumescit: ita voluit Deus gaudii mei redundantiam hoc infortunio refidere. Interim sic quoque Illustrissimi ducis merita erga me majora sunt, quàm sperare unquam ausus fuisssem. Nam quid mihi beneficio eo, quo coopter in Canonicorum illud nobile Collegium, vel honestius vel clarius, vel ad bene merendum de Ecclesia & Republica literaria accommodatius esse possit? Quare & nunc Illustrissimo Duci *meæ gratias* gratias habeo, quas possum, & habebò dum vixero: semper etiam operam dabo, ut ne illustrissimi ejus nominis amantes, ac præcipuè liberos, & sanguine, affinitate, vel amicitia junctos, vel talis de me

judicii, vel collatæ dignitatis, possit pœnitere. Animum autem hunc meum eo ostendere modo conabor, quo possum; imò quo illustres animæ imprimis affici solent: nempe illo, qui ad æternam laudem & gloriam confert; quæ optima maximaque omnium in hac vita semper judicavi.

De afflictæ valetudine tua mihi peracerrimum fuit cognoscere. Nam, si quis alius, is sum, cui & res tuæ secundæ incredibilem adferant voluptatem, & adversa omnia maximum dolorem pariant. Et, si vir bonus esse velim, qui aliter affectus esse possem erga eum qui me illustris adèò amoris significatione sis prosecutus, ac porro in clientelam tuam filium, carissimum meum pignus, recipias, ita ut uterque non alio, quàm parentis loco, colere te debeamus ac venerari. Atque in hanc mentem plura dicerem, nisi vel proximis literis eam in tanta dignitate tantisque meritis vidissem esse humanitatem tuam, eamque modestiam, ut laudanda facere, quàm laudari in os malis. De Collegio quod scrupulum injicere posse videatur, gradus honoris filio collatus, sanè doleo. Sed non dubito, quin pro sapientia tua facile sis perspecturus, quid nunc factò potissimum opus videatur. Cum voluptate autem in literis filii legi de eo potissimum loqui te velle, cum Clarissimo Wrenno, viro non summâ modò doctrinâ sed singulari etiam humanitate prædito, ac præterea, quod non uno indicio cognovi, amantiissimo mei. Thecium mearum syllogen accepi, proque munere quo me mihi donas, gratias habeo summas. Nam mirum in modum desiderio tenebar, jam dudum videndi novam hanc editionem dissertationum nostrarum. Gaudeo typis satis venustis, & quod caput est, non inemendatè, quantum adhuc cognoscere potui, prodiiisse. Sed disputationes illas, quæ postremum locum obtinent, nempe illas de virtutibus gentilium, deque peccato originali, & gratiæ necessitate, satius fuerat omitti, cum in Historiæ Pelagianæ opere legantur, eò quidem emendatius paulò. In controversia de Baptismo Johannis malle licuisset paulò apertius sententiam exponere vetustatis. Sed ita tum videbatur, & ne sic quidem effugi satis eorum offensas, quibus non satis antiquitas sapit. Sanè quod candidè exposuerim veterum judicium de Prædestinationis controversia, & aliis, quæ Pelagius & Massilienses movere, id quidem, (ut apud te dicam quod res est, & mussare cogor apud multos) majori mihi pretio stetit, quàm sex nostratium florenorum millibus. Sed quod in terris decessit, id Deus rependet in cœlis. Ex iis, quæ de Josephi Vicecomitis opera tam

amanter

amanter mōnes, clare fatis perspicio, quanto-  
pere me diligas, & quā curā tibi sit nomen  
meum. Verū planē confido me neutiquam  
post eum operam laturum. Ita multa bona  
observavi ei indicta. Et ubi concurrimus,  
brevius rem complectar, quia ejus operam  
excutere de manibus non est animus. Ple-  
raque etiam digeram melius, & auctoribus  
alijs firmabo. Sed de me nimis multa. In-  
terim, qui hęc promitto, necessitatem mihi  
impono hoc agendi, ut nec expectationem  
fallam. Neque de eo tam sollicitus sum  
quā doleo, quod labores mei spissius pro-  
cedant, quā vellem. Nimirum nunc pub-  
lica advocat munia vel privata mea, vel eti-  
am amicorum: nunc affatus abstrahunt ju-  
venum, qui ex variis adeo terris in Lyceum  
nostrum contulere; nunc valetudo uxoris  
moratur vel etiam mea, sane nudiustertius  
lumbagine infestatus sum, quod malum ne-  
que nunc planē cessat, multum tamen remi-  
sit. Omnino, ut medici, & amici suadent,  
paulum deinceps corporis exercitio dare co-  
gar, si diu & publico, & meis, utilis esse ve-  
lim. Spero hac etiam parte me Deo meo cu-  
ræ fore. A valetudine mea ad tuam venio.  
Reverendissime in Christo Pater ac Domine,  
Deum oro, ut ad summam tuam prudenti-  
am, doctrinam, dignitatem summam etiam à  
corporis vigore & robore pristino, felicitas  
accedat: atque id imprimis, ut diutissime  
Ecclesijs Britannicis præsides & proles; deinde  
etiam mei filique mei causā, quorum utrum-  
que ut in clientelam tuam recepisti, ita porro  
amore atque curā paternā ut foveas majorem  
in modum rogo.

Lugd. Bat. Pr. Nat.  
Dom. an. cło loc.  
xxviii. St. N.

Reverendissimi nominis &  
dominationis tue devin-  
tissimus client,

G. J. Vossius.

### XCVIII.

Gulielmo Boswello

S. P.

Quāquam, generose vir, atque idem  
amice amicissime, à corpore languero,  
ab animo vetizo, ut illa Augusti voce utar:  
tamen ea erga me sunt merita tua, is erga te  
amor meus, ut propemodum mihi piacu-  
lare aliquid videatur, si tuorum quemquam  
sine meis ad te literis dimittam: Sed, o quanto  
optatius fuisset, si, uti spem feceras, Lug-  
dunum revisisses, atque ita mihi desideratiffi-

fimo tui colloquio frui paulisper licuisset!  
Sed privatos, fateor, affectus regni vestri  
negotiis posthaberi æquum est; uno plus-  
quam æquissimum. Libellos quos ante sæ-  
culum Gravius, homo Pontificius, Ecclesiæ  
bono congestit, ad te mitto; spero munus-  
culum non fore ingratum, quia fructu om-  
nia potius quam pretio metiri didicisti. Mul-  
tum tibi debeo, quod me donaris Clave  
Apocalyptica ejus viri, qui etsi nomen dissi-  
mulet, tamen abunde prodit ingenium, do-  
ctrinam, industriam. Jam decennium est,  
quod in Collegio Theologico Illustrum Or-  
dinum hunc librum Auditoribus enarravi.  
Compluribus in locis ubi hærebam, nebulas  
mihi vir ille discussit. Atque utinam mihi  
tam lympido & defæcato esse animo licuisset,  
ut non seorsim Capita, vel Capitum inter-  
dum partes considerare licuisset; sed quod  
in hoc argumento palmarium est, à capite  
ad calcem, interpellante nemine, penicula-  
re omnia potuissim. Interim ex iis quæ tan-  
topere probantur, planē persuasum habeo,  
idem de iis judicium fieri oportere, de qui-  
bus nondum satis liqueret. Sed ista expen-  
dam accuratius ubi meus esse magis cœpero.  
Simul etiam unius alterius egregii apud nos  
viri judicium exquiram & perscribam. Hęc  
nunc paucis perscripsi. Sed, o vir præstan-  
tissime, quanto uberiores à me Literas acci-  
pies (atque ego mihi item à te promitto)  
ubi saluum ac sospitem advenisse in Britanni-  
am vestram cognō! Quorsum hoc à me  
dicatur, scio te intelligere. Nihil enim mihi  
magis volupe erit, quā commercium si  
literarium tecum intercesserit. Scio, quanto-  
pere mihi ea res esse subsidio, in studiis meis  
possit. Et, quod probe cognovi cum proxi-  
me adessem, nec id te non invito: quid in-  
vito dico? imo prope æque, ac à me sit, ex-  
petenti. Eo nunc facilius Epistolam abrum-  
pam. Quāquam nec plura si velim, possim,  
dum assidue ab alijs interpellor, & quomo-  
docunq; quā nihil scribere malo. Quæso,  
mi Boswelle, commenda me Illustrissimo  
Domino Legato, Comitū Carlilensi, cujus  
ego affectum erga me jam bis perpexi, quod  
homullum hunc tanto sit honore dignatus.  
Nunquam mihi excidet beneficium hoc ejus  
Herois. Cui nunc aliud optare non possum,  
quā ut rebus ex sententia confectis, lætus  
ac sospes se Regi Serenissimo & Britannię  
sue sistat. Quod idem tibi, generose Do-  
mine, exopto. Si valetudo & alia concef-  
serint, literas exarabo etiam ad aliquos in  
Britannia amantes mei. Sed si id minus  
nunc erit, nec intra dies paucos. Rogo ut  
me commendare digneris, ac simul filium,  
Reverendissimo Domino Episcopo Londi-  
nensi,



nenſi, Viro, cui plus uterque debeamus, quàm dicere poſſim. Quod & ipſe antea expertus ſum, & ex literis filii mei ſatis didici. Quid de CLL. & ſummis Theologis Wrenno, Belo, aliis dicam? Ego verò non auſim à te poſcere, ut hoc oneris ſalu- tandi eos ſuſcipias; alioqui de eximio Viro Seldeno non tacerem, & uno item alteroq; alio. Sed de iſto videro proximis Literis. Raptiſſimè.

Lugd. Bat. cld  
Ioc xxix. ix. Jan.

Tuus ex animo,

G. J. Voſſius.

### XCIX.

Clariffimo viro, Franciſco Gomaro.  
Groningam.

Vir Clariffime, & Coniunctiſſime,

Qui has tibi literas reddit, cùm primum in Academiam venit noſtram, de meliore mihi nota commendatus eſt, à Theologis Bremenſibus; Eoque uti nomine, mihi gratus ſemper fuerit, ita non leve amori pondus acceſſit, ubi non eruditionem modò, ſed quod longè majoris ducò, pietatem etiam, & ſingularem modeſtiam perſpexi. Parentem habuit egregium virum, D. Streſonem (ut nunc, quàm Episcopum dicere malunt) in Eccleſia principatus Anhaltini. Quo in munere, is ſucceſſorem habuit Clariffimum virum, Angelocratorem, eum, quem in Synodo Dordrechtana, non minus ab eruditione, quàm de facie noſſe potuiſti. Ut ad juvenem hunc redeam, Is partim caritate annonæ, quæ hic eſt, compulſus, partim famâ præſtantium Academiarum veſtræ virorum illeſtus, iter ad vos inſtituit: ſed vix æquè aliud in votis habet, quàm ut publicæ ſtudioſorum menſæ particeps eſſe poſſit. Quod ut conſequi liceat, commendari à me tibi voluit, & Collegis tuis. Rogo igitur, ut huius voti ſui particeps per vos fiat, vel ſi locus nondum vacet, ſaltem conſilio juvetis, ut ne diu admodum ſpe fluctuet in certâ. Erit id mihi longè gratiſſimum; nec mihi modò, ſed etiam ſummis viris, Scholæ Bremenſis Theologis, qui eum mihi, ut dixi, commendarunt. Neque dubito, quin juvenis ipſe ſemper grato animo ſit conſervaturus memoriam beneficii veſtri. Pro doctiſſimo opere de Sabbatho (quod tamen non ad omnium guſtum fuit, ut nunc tempora ſunt) gratias quas multò ante debui, nunc demum ago. Planè mihi ſuccenſeo, quod ab tam

amico viro, tam præclaro munere ornatus; (nihil auribus do, non pauca me bona docuit) tardè adeo reſcribam quicquam. Nempe jam penè in naturam abiit conſuetudo tardè reſcribendi. Primum tantummodo in craſtinum, aut perendinum diem rejicio, aut diem eum, quo Academico more ſerjamur. Hoc non facile aliquis improbârit in eo, cui bis de die publicè docendum. Sed dies unus, alter, ſit hebdomas, hebdomas menſis, menſis triemeſtra: Niſi puderet dicerem ſemeſtre, annus ultra; Imo quod quorundam literis nunquam reſpondeam: Non profeſſò contemptu cuiuſquam, nedum præſtantium virorum: ſed quia non par ſim omnibus, quæ ſuſcepi in humeros meos. Ad quæ nunc acceſſit moleſtiſſimum Aſſeſſoris Academici munus, & nova limâ Oratoriarum Inſtitutionum, quibus jam prælum fervet. Hæc eo pluribus ſcripſi, ut facilius ignoſcas, quod nihil reſcripſerim hætenus, de negotio illo *ἐπιτιμῶν*. Quamquam & alia ſunt, quæ tardiorẽ fecere. Primum iſtud, quod illa quam me ſcis dicere, ſignificaffet ſtatutum ſibi eſſe abnuere conditionem. Deinde hoc, quod ipſe hærerem, *Πολλὴ ἰδίᾳ, πρὸς τοὺς ἑαυτοῦ ἀλλὰ πολλὴν ὁδὸν ἀνέλκει ὁ ἀνὴρ ὁ νικηφόρος*. Si non magis ex compaſto Teutones noſtri, nec prudentioribus conſiliis, rem curabunt publicam, tantùm poterunt tela eorum adverſum, & cum Poetis dicam, Jovis alitem, quantum Chaonias, vel ſi mavis, Teutonicas dicunt, Aquilâ veniente columbas. Sed Omen abſit. Neque planè de Teutonum rebus deſperare poſſum; præſertim ob nonnulla, quæ viri talium intelligentiores communicarunt mecum. Quod ſi optima ſperare deinceps datur, de Germaniæ ſtatu: Et quæ poſcitur, noluit viduis noctibus floridam perire ætatem, equidem non indecorum hunc *ἀμνηſτῆρα* duxerim noſtræ familiæ. Sed porro tùm cogitandum erit, nequid liberis inde diſpendii oriatur: Hanc curabit nobiſcum ille, qui nunc, ut ſcis, Britanniam petiit, ac menſe proximo aſſuturus denuo putatur. Salutabis meo nomine plurimùm conjugem, & liberos; Imo Collegas tuos, imprimis D. Altingium, & D. Ghebartum. Uxor etiam ſalvere te juſſit, & tuos.

Kal. April. cld.  
Ioc xxix.

Tuus totius,

G. J. Voſſius.

C.

Danieli Paræo S. P.

**I**S amot est noster, Præstantissime Paræe, ut peccaturus mihi videar nisi quamprimum te facerem certiorum eorum, quæ pertinent ad statum rerum mearum. Amstelodamenses nostri decrevere scholam erigere illustrem: ac me Historiarum ad professionem & Politices vocarunt, nempe (verbo ut dicam) ut quod oneris hic sustineo, idem suscipere in Rep. sua velim. Quæ eos consilia impulerint, longum esset adscribere. Sed tamen facile cogitare possis, non nisi suavissimis de causis tantos sumptus facere velle. Quippe ut de uno me dicam, si domum accenseam, stipendium futurum centenis aliquot supra ter mille florenos nostrates. Et amici præterea pollicendo commodorum mihi meisque spem egregiam fecere. Illi quibus oculi dolent, quando literis & literatis bene est, hunc animum Amstelodamensium in calumniam rapiunt. Mihi vero certissimum est, solo studiorum, & publici boni amore hæc eos suscepisse, neque ego eorum postulo acquiescerem, nisi viderem, sic melius posse me Reipub. literariæ inservire. Quanto enim fuero animo defecatori, tanto pulchrius mereri licebit de studiis, docendo pariter, scribendoque, fortasse & sic magis prodesse potero amicis meis: quos inter te etiam, mihi Paræe, merito tuo expono. Utinam urbis ejus exemplum imitentur Haerlemenses. Id fore quondam in ea republica opinio est. Quin jam seriò de eo actum fuit. Quin & Delphenses tale quid promittere videntur. Quæ si accidunt, facilius deinceps ratio haberi poterit virorum præstantium. Nunc enim id fieri nequit, quia functiones vacant nullæ. Sed de istis propediem scribam pluribus, aut saltem post mensem. Tum enim Amstelodamum ibo: Atque eò ut venero, non desinam dispicere, ecquem fructum capere possis ex amicitia nostra. Nec eo minus idem hic, & Hagæ facient amantes Paræani nominis & nostri, scire tamen vellem quò maxime animus feratur, & in quo vel me vel amicos alios, posse aliquid exitumes. Si possumus, volupe erit; sin minus, affectum tamen testabimur. Oratoriarum mearum exemplum recipies à vestratibus Bibliopolis. His enim uti & Denarium Meursii nostri, se daturum eas recepit typographi nostratis filius, qui nunc est Francofurti. Vale egregie vir,

ac deinceps etiam nos semper mutuo amemus.

Lugd. Bat.

Tuum totus,

Prid. Kal. Aprilis.

G. J. Vossius.

CL

Jo. H. Pontano S. P.

**V**ir clarissime, Jamdiu est quod de multis tecum colloqui aveo. Prope semestrem est, cum spem feceras Hagâ Lugdunum repetendi & invisendi me. Exemplar Oratoriarum decreveram offerre præsentem. Sed occupationes credo impediunt, quo minus secundo me accederes. Quod gratularis mihi de professione apud Amstelodamenses pergratum est. Intelligo ex amicis, te crebrò huc excurrere. Tanto mihi jucundius erit hic vivere, quia sæpius unà esse licebit, deque communibus literarum studiis confabulari tecum, quem multum quidem amo, sed nec minus æstimo, sanè non alterutro cuiquam lubens cessero. Quare simulac pedem in urbe hac posueris, vel primum nos vides, vel si res tuæ illud non sinunt, saltem in primis. Elnothum, quem petieras, mitto. Destinatum diu Oratoriarum exemplar dono tandem. Uti & denarium Pythagoricum Meursii nostri, qui eum mihi dicavit. Habet hoc commune amicus noster, cum viris principibus & Rebusp. quod pecuniam cudat, sane periculi nihil est ne ei quisquam ob denarium cusum litem intendant. Quin potius ei gratias agit Resp. literaria. Plura vellem, nisi vereretur ei molestus esse, qui hæc perfert & scribentem expectat: Salutem clarissimis Collegis Bronchorstio & Zevecotio.

Tuum,

G. J. Vossius.

CII.

Doctissimo Viro, Francisco Junio.  
In Aulam Arundelianam.

**P**Lurimum me Tibi obstrinxisti, Optime, & Conjunctissime Affinis, quod tantum laboris susceperis filii mei causâ; ut eum deduceres ad cognatam Bulliam. Neque id tam gratum mihi est eo nomine, quod hoc

hoc Duce, & Comite, tutius potuerit conficere isthoc iter; quàm quod tali diebus aliquot monitore fruens, magna potuerit incrementa capere, & pietatis, & prudentiæ, & doctrinæ. Utinam hujusmodi illi felicitas sæpius obtingat. Verum quia novi, id non ferre institutum vitæ tuæ, cùm vix magis tuus sis, quàm ego meus: saltem illud precibus consequi à te licebit, ut crebrò eum literis tuis, sui officii commoneas, scis enim quàm proclivis sit adolescentia ad otium, & vitia. Sanè vero illud dico, eo me animo esse tranquilliori, quod illic talem affinem, vel potius fratrem, hoc est, ut Grammatici dicere solent, ferè alterum me habeam, qui propemodum sic amet liberos meos, quàm si ex se nati sint. Præsentia Clarissimi Petrei multùm me delectavit. Juvit pendere ab ore narrantis, tam multa pulchra, & præclara de peregrinatione suâ. Egregiè meritus est de Rep. Literariâ, quod multò magis patebit, cùm ea quæ observavit, in publicum emiserit. Gratulor tibi quod, cum tanto ejus Mæcenate, Illustrissimo dico Comite Arundelio, vivere tibi contingat; cujus auspiciis, & sumptibus, hoc iter susceptum est. Sed quod Petreus aiebat, sperare se, te quoque iturum in Græciam, id tale fuit, ut Lapides mihi loqui videretur. Eò magis, quia retulit mihi, ut sæpius in carcerem, tanquam explorator fuerit conjectus; semel etiam naufragium fecerit. Cùm hanc peregrinationem suadere tibi D. Petreus cœperit, velim ex deserto fiat infantissimus. Græcos ne tibi lustrandi veniat tam dira cupido: præsertim postquam maximè memorabilia iis è terris abstulit Petreus. Tun' spicilegii ergo, hac ætate tantùm capeffas laboris? tot te periculis exponas? Malim te ire ad Gallos, Italos, at Belgas ante omnes, ubi Nos vives, qui tanto tenemur desiderio Tui. Et facies id spero propediem, fortasse tamen antea extare voles aliquod monumentum ingenii, & diligentiae tuæ. Nam partim ex literis tuis, partim filii, intelligo te moliri aliqua, de statuaria arte, ac picturis veterum. Sanè aliqui hoc Argumentum tractarunt. Ut præter Gauricum, Cæsar Bulengerus, qui ante biennium emisit in Galliis libros duos, de picturâ, & plasticæ statuariâ. Nec dubito quin videris Joannis Molani Lovaniensis Theologi libros de historia S. S. Imaginum, & picturarum. Verùm & hi & alii, quibus argumentum hoc expositum fuit, non exiguum tibi reliquere spicilegium. Tantò impensius desidero ea videre, quibus non modò te Illustrissimo Comiti, Literarum, & Literatorum Patrono, Opt. Max. commendare possis, sed etiam Reip. toti literariæ, &

seculis futuris. Sanè, mi Affinis, præter tempus, & benefacta, nihil est nostrum. Opes post obitum nostrum, alium atque alium Dominum nanciscuntur; sed ingenii, & industriæ monumenta, non mutant dominum. Quare perge in præclaro Instituto, & brevi nos bea foetu aliquo, qui parente suo dignus sit. De liberis meis nihil addo, præter hoc unum, eos se mihi magis magisque probare: quod tibi quoque jucundissimum esse cognitu scio. Hæc raptim, atque festinantius quàm vellem, eò quod Joannes Brunæus, cum Coniuge, ad me divertisset, nec illum diutius sine alloquio mei relinquendum putarem. Jussit ut te plurimùm suo nomine salutarem. Sororis tuæ Johannæ res meliori loco, his proximis mensibus esse cœperunt: quo nomine, valdè Ego & Uxor gaudemus. Non paulo nunc sereniori animo est, quàm esse solet, Juvit tua liberalitas, sed imprimis quod quingentos, vel amplius, ex negotiatione Americana percepit; spero eam, & universam Parentis tui familiam, Deo curæ fore.

Lugd. Batav. clō  
Idc xxix. Prid.  
Kal. Quint.

Tuus totus,

G. J. Vossius.

### CIII.

*Reverendo Dom. Guilielmo Episcopo  
Londinensi.*

Reverendissime in Christo Pater ac Domine,

**M**ultiplici me gaudio perfuderunt literæ, decimo Maii exaratae, ac mense eo paullò amplius post, redditæ mihi unâ cum epistola filii mei, quæ & ipsa altero me gaudio implevit. Primum enim non mediocriter lætabar, quod viveret filius Cantabrigiæ in collegio. Eò impensius lætabar, quod locus ei datus esset inter eos, qui ætate, doctrinâ, honore, aliis antestarent: quæ res & posset, & deberet, ardorem addere studiis ejus, & occasionem præbere ex tam pulchro sodalizio majora quotidie capiendi incrementa, pietatis, prudentiæ, doctrinæque. Maxima verò lætitiâ afficiebar, quod haberet præsidem Collegii doctissimum Theologum Matthæum Wrennum, à quo amari me, & alicujus fieri scirem, ut ex voto meo non alteri filius meus meliùs certiusque potuerit committi. Ad tanta hæc nunc illud accessit, quod filius perscribit, se à serenissimo & beneficentissimo Rege Carolo (cui Deus prospera omnia, ac de annis etiam meis, huius super-



(superfuerint, largiatur) eo honore esse affectum, ut deinceps sit accensendus sociis Collegii Jesu. Quod beneficium quantum, imprimis erga hominem exterum, nili intelligam, tum verè fuero lapis. At omne hoc post Deum ac Regem, vel tui unius, vel imprimis saltem, Reverendissime Præful ac Domine, affectui tuo ac curæ debeo singulari. Magna, vel potius ingentia erga me & meos priora erant merita tua: utcunque in iis, quæ Magnæ Britanniæ deberemus, multum adeò sibi vindicaret illustrissimus *o margerius* Buckinghamiæ Dux, æternum mihi animo, sermone, ac scriptis celebrandus. Sed, sic quoque, ut dixi, magnopere eram obstrictus nomini tuo, qui, ut mittam cætera, tanti mihi herois gratiam conciliaffes. Nunc priora beneficia accumulare hoc novo voluisti. Hoc verè est patrem se præbere, & filio, & mihi. Quare cum benefacere non cesses, nec nobis cessandum est in gratiis agendis, & omnibus grati animi officiis spondendis, qualia quidem à meæ conditionis homine proficisci possint. Hæc me aliàs etiam scribere commemini. Sed facile mihi veniam dabis, ut, quemadmodum idem facere pergis, ita idem ego scribam, verbis fortasse aliis, sed in eandem sententiam: in quo recordor similiter se S. Sulpitio olim M. Tullium excusasse. Unum illud in literis tuis dolori erat, quod, cruris vitio, ne nunc quidem planè sis tuus: multum tamen gaudeo, res ita procedere, ut sperare liceat, si non penitus recuperes vires antiquas, at illas saltem adepturum, quæ ab iis proximè absint. Optimè observasti, quod ego non dolo quidem, sed studio tamen, non oblivione aliquà egeram, ut de nostris in Baronium animadversionibus, deque veteris Ecclesiæ strenuè tacerem in literis meis. Nempe non ignorabam, quæ tua & aliorum virorum præstantium expectatio foret. Ego autem, ut apertè, quod res est, nunc dicam, auctoritate Illustrum Bataviæ ac Westfrisiæ procerum compulsus, partitiones meas oratorias iterum divulgavi: quæ nunc in Scholis omnibus Hollandicis docentur. Sed quia in his brevior aliquantò fuissèm, operæ multis videbatur, ut etiam commentarios oratorios, grande opus, quod ante annos xxiii. atque iterum triennio post divulgaram, tanto post intervallo ad incudem revocarem: atque ità & rem præstarem Illustribus Ordinibus nostris longè gratissimam; & magis etiam, quàm fecissèm antehac, scholarum mihi præfectos obstringerem: ac bene in simul mererer de multis qui aliis etiam in terris studium hoc Oratorium colunt: ac si hoc quoque in censum venire meretur, eadem nonnihil honori consu-

lerem, cum non mediocriter mea interfit, ut non tam multa quam optima, victuraquæ posteris relinqam. Quòd si primogenitorum cura nos plurimum tangat, aiebant, æquum mihi videri, ut, nunc præbità mihi à proteribus nostris occasione optimà, denuo in manus sumerem primum illum nostrum ingenii *apud nos* foetum, atque operam darem, ut quæ tantoperè Scaliger, Casaubonus, atque alii summi viri tum comprobarunt, eadem nunc emendatius, & auctius, & felicius videant lucem. Atque hoc quidem futurum est, summum, ni fallor, intra trimestre, aut circiter. Vix enim tertia pars superest excudenda. Equidem mihi telam istam olim, ita postulante tunc muneris ratione, orsus fuissèm, atque etiam ut tum vires ingenii ferebant, pertexuissèm (idem autem de L. Latine commentariis dictum velim) nunquam profectò ità nunc desiperem, ut levioribus potius illis, quàm sacrorum meditationi, & antiquitati Ecclesiasticæ tempus impenderem. Et tamen sic quoque operam do, partim ut nec illa me nunc detineant totum: partim ut iis, quàm citissimè liceat, defungi, quo totus majoribus & melioribus vacem. Accepi his diebus ab iis, quibus res Britannicæ non ignotæ viderentur, adhuc metus esse aliquid, ne improvido quorundam zelo, etiam in inclyto regno vestro, schisma fortasse oriatur, ob diffensum aliquem doctissimorum hominum, in controversia de prædestinatione, & dogmatis annexis: proptereaque aiebant etiam pietatem ac prudentiam tuam sese Parlamenti postremi tempore occupasse, ut pessilenti adeò malo salubribus & moderatis consiliis obviam iri posset: sed omnino pertinacius fuisse malum, quàm ut discuti tum potuerit: eò fortasse minus, quia inter illos, qui Religionem, ut fieri solet, prætexerent, forent non pauci, qui alienæ inhiarent dignitati, ac rebus studerent novis. Non ego tam curiosus esse soleo, ut anxie inquiram in negotia publica regni vestri: sed tamen, nequid dissimulè, non leviter me ea res conturbavit. Opto enim res Britannicæ esse florentissimas, non tantùm, quia & ipse quodammodo nunc in Britannorum numerum transcriptus mihi videar favore vestro; sed vel maximè, quia salus Ecclesiæ Reformatæ post Deum, à Britannicæ regno, & hisce terris dependeat. Itaque assidue Deum oro, ut benedicere dignetur Serenissimo Regi, ac felicem largiatur successum tuo, & aliorum tui similibus, sancto proposito; quod utroque, ut dici solet, pollice hic probatur ab omnibus pacis & concordie studiosis. Sanè, si non aliud quam humanas vires spectemus, arduam suscipiunt provinciam, qui in Religionis

diffidio sequestri esse student. Imò plurimum, quod quodammodo edoctus sum malo etiam meo, præda esse victoris solent. Sed tamen, ut spero, nondum sic iratus est Deus peccatis nostris, ut etiam apud vos passurus sit in nervum erumpere triste adeò diffidii malum. Cui omnes, si ipsis de se credimus, consultum volunt: sed utut pacem utrimque crepent, tamen remedia adferunt admodum disparia. Multi enim non aliam viam sciunt, quam ut iis, qui dissentiunt, malè mulctatis atque oppressis, Regnum obtineant soli. Alii contra in omnibus, qui fundamentum Religionis retinent, longè præferunt moderationem & animorum & scientiarum: quam non desperant posse obtineri, dummodo venerandæ antiquitati, & magnis etiam viris, quos Deus serius nasci voluit, honos debitus constet. Utunque enim inter veteres & iuniores, in aliquibus fortasse dissensus aliquis appareat, tamen facile negotium componatur, dummodo abfuerint, hinc quidem temerè innovandi libido, inde autem amor dominii in conscientias alienas. Sed hoc non agnoscunt qui cœlestem veritatem postponunt ambitioni suæ: ac charitatem Christianam posthabent odio & malevolentiae propriae. Verùm dum hi, quarumcunque tandem partium fuerint, disputare acutè malunt, quam Christianè vivere, non quidem capitur Saguntus, sed quiddam vincitur longè majus & excellentius Sagunto. Quippe fraterna dilectio, sine qua esse Christiani non possumus, animis & doctorum, & populi expellitur; contrà, vires capit Regnum Antichristi. Tantò magis oro Deum, ut te, Reverendissime Domine, optimeque Mecenas, deinceps etiam spiritu veritatis & constantiae firmet, ac longam tibi vitam & valetudinem prosperam in hoc proposito largiatur, atque aliis quoque eam gratiam tribuat, quò præclaris monitis ac consiliis tuis aures præbeant vacivas, neque sua quærant, sed quæ sunt Christi.

Lugduni Bar.  
clō Ioc xxix.  
xx. Junii.

Reverendissimæ dominationis tue  
cultor devotissimus,

G. J. Vossius.

CIV.

Joanni Filio.

Dilecte Fili,

Multum gaudeo te, hominem exterum, & qui cum à nobis abires nihil ultra vulgarem eruditionem tibi posses vindicare, tanto honore tam citò à serenissimo Carolo Rege esse affectum, ut te cooptarit in numerum sociorum pulcherrimi Collegii, quod à suavissimo nomine Sospitatoris nostri Jesu nomen suum accepit. Quantum propterea magno Regi, quantum Reverendissimo Domino Episcopo Londinensi, quantum Academiae Cantabrigienfis summis viris debeam, tute melius vides, quam ego, fatis in dicendo infans, verbis possim explicare. Nunc, si unquam ante, magnâ opus erit curâ, atque industria, ut ne summi Regis & beneficentissimæ gentis gratiâ hâc te indignum geras. Equidem non desinam cogitare, quomodo optimè animum testari gratum possim. Sed nihil æquè dolet, quam quòd undique ita distringor, ut non tam citò possim omnia quam velim. Ad pecunias quod attinet, iussi, ut mercator ille qui proximè centenos tibi florenos annumeravit, idem nunc ducentos daret. Vix tanto opus esse tibi putabam. Sed malui modum excedere, quam me intra eum continere. Tuum est curare, ut parçè expendas. De avunculo quod scribis, frustra es. Facilius Herculi extorqueamus clavam, quam illi teruncium. Necdum ab eo accipi, quod mihi debet ratione domus, cui insigne Dodrechtii ruber pannus est. At scis multos jam annos esse, ex quo debet mihi ea summa. Videtur tantum hoc agere, ut mihi incommodet, & domui Junianæ. Deus illi ignoscat; sed & nobis, si forte in culpa ipsi sumus, etsi id nobis minimè videatur. Nempe ut scis, non solemus videre mantice quid in tergo est. Balthazar Lydius jam ante semestri fato suo functus est. Vix dici possit, quantum optima ejus conjux Anna Mylia, quantum liberi ejus in hoc viro amiserint. Scis enim sortem eorum esse angustam fatis. Ferè quicquid habent consistit in Bibliotheca sola, luculenta illa quidem, sed quæ alendæ illi familiæ, ut vel maximo pretio distrahatur, nullo modo suffecerit Abrahamus Beverius noster ante trimestre uxorem duxit, Velartiam, filiam natu maximam viduæ Panthusiæ, non ejus quæ ex adverso ædium nostrarum, sed quæ è regione ædium Knotterianarum degit. Nuptiali convivio ego, mater, Franciscus, & Cornelia interfuimus.

fuius. Franciscus nuptias eas verbis non inelegantibus partim Latinis, partim Belgicis celebravit. Misissim exemplar, sed ipse careo. Imò ne sibi quidem frater exemplar ullum reservavit, quæ in talibus simplicitas est adolescentis. In oratoriis meis institutionibus jam quintus excudi liber cœpit. Vix absolvi poterint ante mensem quartum. Forma est folii in quaterna complicati. Fasciculus ille literarum, quem Borrius ad Dubletium curandum suscepit, nondum comparet: quo nomine doleo. Theodorus Graswinkeilius uxorem ducit maximam natu, sororem convictoris quondam nostri Loëi, puellam & benè natam, & educatam, & egregiè cordatam. Barones nostri ante bimestre ière in Brabantiam: inde per Gallias patriam repetent. Itaque onere nunc convictorum liberati tandem sumus. Abeuntes postularunt, ut suo nomine te juberemus plurimum salvere. Dionysius in collo laboravit ingenti tubere. Jam mensis est, quod Chirurgi operâ curatur. Nec puto sanitatē pristinæ ante mensem restitui posse. Primum valde metuebamus illi, penè etiam vitæ. Nunc non modo extra periculum est, sed studiis etiam vacat, propemodum ut solet, etiam cum optime valet. Nec-dum surrogatus quisquam in locum Jacchei. Expetunt eum M. Reinerius, Pauwii liberorum præfectus, Sinapius subregens, & M. Bodecherius. Reinerio favet Curator Arsenius: Sinapio Curator Cromhautius, Bodecherio consul Brochovius. Academia Rectorem magnificum habet Burgerfidiū. Cognata Berkia, legati vidua, nunc Hagæ degit. Sipesteinia hac demum hebdomade nupit Bommio. Aiunt prolem jam diu ex marito habuisse, eamque vivere. Sed quid ad nos verène hæc sparsa sint, an per calumniam? Posterius tamen credere malo, eoque nonnihil dubitabam an etiam hoc scripturus essem, præsertim cum nostra nihil, ut dixi, intersit. Vicinas ædes, quæ Hardewinii sunt, inhabitat nunc Schreylianus medicus: quod nec mihi injucundum, nec conjugii, sæpe, ut scis, infirmæ ac valetudinariæ. Et nostri quàm is suavis sit ac lepidus, pene dixeram congerro. Arnoldus Beaumontius hesternò die publicè pro Licentiatu gradu magna cum laude disputavit. Publicè etiam opposuit Franciscus noster: ad eò alacriter & pulchrè, ut ceteros opponentes, professorum consensu facile vicerit. Nec dubitat jam quisquam, quin dignissimus sit gradu vel Licentiatu vel Doctoratu. Sed ille differre mavult, quia non tam citam ambit gloriam, quæ umbratilis esse consuevit, quàm solidam. Goliū ex Syria rediit, ante mensem. Quo nomine valde gaudeo,

ob filium Dionysium, cui ille arcana omnia linguæ Arabicæ se referare velle promisit. Et faciet scio, quæ viri est humanitas. Nec operosum hoc illi erit, vel inglorium: postquam filius jam in ea lingua, uti & aliis orientalis tantum promovit. Ubi planè sine cortice poterit natare, aliquos libellos ex Arabico vertet: ut sibi & toti familiæ nostræ inde gloriæ aliquid pariat. In translatione historiæ Reidani pervenit jam ad librum XIV. sperat quod superest intra bimestre posse absolvi. Sed ubi id erit de limando opere cogitabit. Assiduus est in Cæsare, deliciis suis, cujus dictionem ut assequi possit, impensè elaborat. Magna promittit de se, dummodo vitalis sit, & ut nunc, ita deinceps semper Dei sit reverens, qualem fore spero, imò confido. Matthæus industriâ magis se mihi probat, quàm solet. Ardor omnigenæ cum historiæ adhuc tenet. Sed Philosophiam jungere cœpit. Nunc etiam, me auctore, valde se in lectione clarissimorum Scriptorum, & imitatione eorum exercet. Diu suasi, tandem Dei benignitate persuasi. Tu quoque ut agas idem, adhortari non definam. Scio te jam gravioribus studiis detineri: sed tamen necesse est omnino, ut quotidie aliquid stylo tribuas, qui dicendi est magister. Et consequeris, quod volo, si industrius etiam hac in re esse voles. Jubeo igitur ut paternum imiteris exemplum, qui temporis unius avarus, cæterorum liberalis esse solet. Sed de priori placet: de altero memor eris fortunæ nostræ: hoc est, etiam si liberaliter suppetant pecuniæ, tu tamen parcè iis utere. Quod ego lubentius scribo, quia (si fides habenda Belgæ cuidam, qui cum altero BELGA locutus in Britannia fuit) omnino hac in parte peccas. Nam ita loquebatur, quasi supra sortem nostram faceres impensas. Aiebat te alicubi ita flore Liberi patris exceptum ut propè redditus fueris madulsa. Ego ei hoc minus fidei habebam, quia à quo hæc profecta sunt, etiam hic cum foret, dicitur nomini meo detrahare solere. Vides nec te effugere posse calumniarum spicula. Ita voco. Nam quæ retulere, credere non sustinet paternus animus. Utinam ne decipiar; si quid tamen peccatum, corrige, & cautior esse discere, quantum me, te, & totam nostram domum ames. Qualem te haberi voles, talis semper esto. Ita futurum aliquando ut ne listat se fortuna in honore quo nunc es ornatus, sed altiora pertingas, ut mihi animus præfagit, dummodò is fueris, qui debes. Muscheronio literas debeo: sed nec mater ejus scire se aiebat, an adhuc ageret Cantabrigiæ. Scribes de eo aliquid, ut sciam, quo literas mitti oporteat. Scripsi ad Re-



verendissimum Dominum Episcopum, quo gratias ei haberem pro affectu erga te & me. Eas literas mercatoris, qui tibi annuerat pecunias, Reverendissimo Episcopo vel tradet ipse, vel per suorum aliquem offerri curabit. Quid enim opus fuit eas ad te Cantabrigiam mitti, ut inde denuò Londinum referrentur: Matertera Brunæa quingentos plus minus florenos accepit ex negotiatione Indica. Hæc pecunia opportuno ei admodum tempore obtigit: ut facile intelligis. Matertera Junia, Casimiri vidua, vicit causam. Itaque bis mille quingentos florenos ei debitor solvet. Imo jam mille quingentos accepit. Quo nomine quantopere omnes gaudeamus, non opus est exponam. Si scissem nomen ejus Theologi, qui præest Collegio Jesu, commendassem te ei per literas. Proximis igitur literis fac me de eo certiores, ut ne hac parte claudicet opera nostra. Gratias egi D. Procancellario pro honore amorque erga te, literas ei trades, quas tuis addidi. Statueram primò & aliis scribere. Sed non occurrebat aliud quicquam quod scriberem, præterquam ut gratias haberem pro eo, quod tantopere te amore prosequuntur. Quamquam profectò hoc satis idoneum sit argumentum, & quod per se sufficiat. Verùm occupatio eram, ut tam multis scribere non possem, & hærebam si unum eligerem, quem esse eum conveniret, cum omnes, ni fallor, pariter te diligant. Quando ad me scribes, significa quid maximè facto sit opus. Adde & prænomena, & dignitatem, ne peccem inscriptione. Isaaci & Gerarduli studii præest filius Joannis Viterarii, discipulus cæci illius Pontani, auditoris mei. Pulchre erudit parvulos meos. Itaque ei victum omnem largior, sed eâ conditione, ut comedat cum famulatio, ut Petrus, baronum famulus, solet. Mater valetudine est satis infirmâ, sed tamen curat eam diligenter. Ne nunc quidem omnia mihi ex voto, sed malignitate alienâ & temporum. Verùm fractis etiam rebus infractò esse animo oporteat: nedum nunc, cum omnia mediocriter sese habeant, & quod magno mihi solatio est, liberi omnes virtutis insistant viam. Video me quartam jam paginam implèsse. Quare longior esse nolo. Scripsi raptim omnia, & prout in buccam, nullâ ordinis ratione habitâ: quæ negligentia fortasse non dedecet Epistolam familiarem. Sed ego, ut scis, vix aliter possim scribere, etsi velim, ob tam varias occupationes. Salutem dices V.V. CL. D. Procancellario Wrenno, item regenti Collegii in quo vivis, & D. Doct. Belo, Doct. Collino, Doct. Porter, Doct. Charterton, Mag. Critoni. Quos summos viros vide ut

observantissimè semper colas & venereris. Vale.

Lugd. Batav.  
clō loc xxix.  
xxx. Jun.

Tuus Pater,

G. J. Vossius.

CV.

Hugoni Grotio Gerardus Vossius,  
S. P. D.

Cum valdè optarem aliquem mihi dari, per quem tutò literæ ad te mitti possint: ecce à Sarmatis suis ad nos redit nobilissimus Stupeskius; unâ cum Ephoro suo Paschali, Doctore medico, Natione Gallo, domo, & placitis Genevensi, homine docto, & perhonesto. Aiebat uterque se propediem, saltem post hebdomadas paucas, Lutetiam ituros. Sed propè jam bimestre est, quod culpa eorum, qui ab utrisque partibus commeatus literas procurant, discedere iis demum licet. Alioqui non paulo celerius ex me ipso cognovisses ista, quæ de itinere meo Britannico, ex fratris, vel aliorum literis, jamdudum te arbitrò percepisse. Nihil tamen prohibet, puto, quo minus nunc quoque pauca de eo perscribam. Nempe à Rege Serenissimo, Archiepiscopo, Comitibus, Baronibus, Episcopis, utriusque Academiæ summis viris, aliis etiam vel dignitate, vel doctrina claris, eo sum honore, favoreque exceptus, qui non tam Vossio, quàm longè majori conveniret: nec recessi, nisi auctus dignitate Canonicatus Cantuariensis, idque ea conditione, ut emolumentis ejus frui liceat etiam in partibus transmarinis. Quæ res, nescio, utrum plus mihi hic peperit honoris, an invidiæ apud nonnullos, eos imprimis, quibus moderatio animi nostri est ingrata. Sed ut Diræus ille Vates ait, *ἡμεῖς ἐν ἐπιγραφῇ ὀδύνη*. Hujus meæ fortunæ recordatio cogitationem mihi injicit ejus, quod hic inter Academiæ Curatores deliberatur de Salmasio huc vocando. Inter illos, qui maximè negotium urgent, est Dominus Someldicensis. Ex ordine verò nostro, Rivetus. Occultiorque, at non minor, opera est nostra. Impensè enim viro faveo, ob multijugam, ac reconditam eruditionem. Nec parùm erga eum amorì addit amor erga eum tuus, quem literæ omnes tuæ spirant. Quæ res fortassè, cur non apertè ei studeam. Nempe, ne ei magis incommodem, quàm prosum. Scis enim negotium hoc transigi non posse, nisi tum iis volentibus, qui extrema

trema omnia, quam qui moderatiora consilia sequuntur. At prioribus illis pleraque mea sunt suspecta: nisi forte ipse nimis sum suspicax, qui hæc de iis scribam. Adde quod nec omnes, in Salmasio illo negotio consentiunt, qui nosse virtutes viri debebant. Liceat paulum tecum joculari per literas, quod præfens facere mallet. Ait Plutarchus, pictorem fuisse, qui cum Gallos depinxisset, iussit, ut puer tabulæ adlisteret, qui veros abigeret Gallos, ne, quam ineptus esset pictor, deprehenderetur. Similiter hic sunt, qui manibus, pedibusque disturbare eorum consilia nitantur, qui eruditissimum illum Gallum huc advocandum censent. Metuunt, ne tabulæ suæ fiant minoris, si omnes ex hoc Gallo videant, quantum ipsis ad Romanarum, Gallicarum, Ecclesiasticarum Antiquitatum peritiam desit. Alterum etiam est, quod obitare Salmasio videatur. Nec enim ad docendum arcefferetur (quam conditionem amplecti si volet, neminem inveniet, qui obitare volet, ut ego quidem censeo) sed ut eo & loco esset, & stipendio frueretur, quæ olim *¶ pangelms* Scaliger. Facile autem cogitare potes, in ea profitentium turba unicum esse minimum, qui sibi honoris hoc deferendum potius arbitretur. Utinam autem non de Salmasio modo huc vocando, sed de te etiam revocando cogitaretur. O quam uberem ex te messem meteret patria tua? Quantos & ipse perciperem benevolentiae tuæ fructus? sed non omnium dierum soles occiderunt. Interea me oblectabo dulci recordatione veterum meritum tuorum. Nam quod aliquando de fructibus amicitiae nostræ literis tuis scribebas in eo meas mihi eripuisti partes, qui nunquam tuorum debeo meritum oblivisci. Tanto justius filio tuo faveo. Quamquam non tui modò causa, sed etiam quia ingenii elegantia, ac bonitate indolis, sic meretur. Dolet de illo corporis vitio, quod cum Agefilao, Tyrtæo, aliis habet commune. Sed gaudeo, quod corrupto hoc seculo, quo omnium penè animi claudicant, filio hæcenus mens est recta & erecta. Petierat uxor, ut diebus dominicis semper pranderet nobiscum. Sed non facit. Subinde tamen adest, & lusat cum nostris. Nec occasionem eam negligo videndi, quantum in studiis, & moribus profecerit. Vellem tui filii causa, ut paulò felicius cum Batavia Scholis ageretur. Sed raro alii, quam fungi, præfici inferioribus classibus solent. Imo multis è fungino genere hoc ipsum vitæ genus fordet: malunt aliquid ogganire popelli auribus de ambone, & imperare imperantibus. Et profectò, quanto tales magis sapiunt, quam qui in pædido illo grege

puerorum à me ad vespertinum cramben repetunt tribus conducti nummis? Melius societas Jesuitica ac prudentius facit; in cujus Scholis, pueris classem mutantibus, mutant & ipsi Doctores, atque ad classes superiores evehi, & successorem nacti, præficiuntur sacris. Hæc si Proceres nostri imitarentur, & doctiores haberemus Ecclesiarum Præfectos, & pueritiæ Reip. seminario, melius consuleretur. De Lugdunensi tamen Schola minus, quam de plerisque aliis conqueri possumus, ob probitatem ac virtutem præfecti, qui sic satis hypodidascalorum suorum rationem habet. Libros tuos de Religionis Christianæ veritate, altera hac editione tot mendis obditos prodiisse, sanè doleo; simulac cognovimus, Lamerium novam editionem cogitare, obtuleram spontè ei operam meam, ad corrigenda Typothetæ *apud quædam*. Sed negavit ea sibi nunc opus esse, quia non manuscriptum quicquam excuderet, quod molestius procedere solet; sed jam semel excusum. Cùm ne sic, quidem satisfaceret, iterum institi, usque dum significaret, se in isto usurum opera Clarissimi Barleii. Tum demum mihi acquiescendum putavi, sed postmodo cognovi, contentum fuisse perfunctoria Opella mercenarii cuiusdam, scis autem quam parùm, hoc hominum genus sollicitum esse soleat, utrum emendatè, an inemendatè libri prodeant. De Tragœdia Euripidea, & translatione tua, omnia spero meliora. Corrigendi ipse laborem suscepi. Quamquam semel, iterumque, postremam revidendi curam, commiserim nostro Coracino; qui tum fortè hic erat. Ille si non peccarit, bene erit, sed postquam Coracinus abire coactus (historiam jamdiu inaudieris, puto) terroris aliquid injectum uxori. Ita dormitavit tragœdia aliquot mensibus. Jam dies est quartus, quod domum repetiere chartas tuas; idque eo animo, ut reliqua perficiant, filius meus Franciscus ante bimestre, publicè disputavit de gravibus in jure controversiis; nec parum laudis retulit: Laurea etiam doctorali, cum bonorum favore, ornatus est; superioris anni gesta jam penè absolvit Heinzius, sperat se intra menses duos, vel tres, prælo subicere posse. Utinam quoque tibi mens fuisset, obsidionem Sylvæducentem describendi. Mitto ad te oratoriarum nostrarum editionem novam. Quam cum dimitterem, sic munusculum meum tacitus affabar, cum vate Hispano;

*Tu qui longa potes dispendia ferre viarum,  
I liber, absentis pignus amicitiae.*

Si modò nobis pignore ullo opus, sed utcumque est, affabitur ille, cùm voles; quod ipse utinam possem. Nihil enim æquè in votis, quam

quàm ut ne æternum te fruantur externi.  
Iterùm occurrit illud Biblici poetæ:

*Sed reddare tuis iterum visure Sabinis  
(Batavis ego dixero)  
Teque tuas numeres inter amicitias.*

At desino tandem effundere, quicquid in  
buccam venit. Salve, Amicorum doctissime,  
Doctorem amicissime; imo Doctorem do-  
ctissime, Amicorum Amicissime, diuque cum  
Uxore præstantissima & liberis, Vale. Uxor  
salutem vobis omnibus officiosissime dicit.

*Lugd. Batav.  
clō loc xxx.  
Postrid. Non.  
April.*

## CVI.

Matthæo Wrenno *Procancellario Aca-*  
*demie Cantabrigiensis, nunc Magi-*  
*stro Collegii S. Petri, & Decano Win-*  
*toniensi.*

Reverende ac Clarissime Domine Wrenne.

Multum equidem lætabar, cùm saluum  
advenisse filium in Britanniam cog-  
noscerem. Gliscebatur lætitia, cum viderem  
Reverendissimum Dominum Episcopum Lon-  
dinensem, meum juxta ac filii Mæcenatem,  
tanto cum affectu curam ejus rei ac sollicitu-  
dinem suscepisse, ut filius in Collegio aliquo  
Cantabrigiæ vivere impensis suis ad tempus  
posset. Sed maximè lætitiâ delibutus fui,  
cùm eo esset res perducta, ut in eo viveret  
Collegio, cui tu, vir idem, atque amice  
summe, tanta cum laude præses, & quod  
ipsum etiam jure magni admodum ducebam,  
ubi mensâ & conversatione iis jungeretur,  
qui ut profectu, ita honore etiam primas  
ferrent. Quid istis majus eo quidem tempore  
vovere potuissem. At nunc tamen aliud  
luculentum adeo accessit, cùm idem à sere-  
nissimo Rege curâ ac intercessione Reveren-  
dissimi Domini Episcopi, & commendatione  
vestrâ, tanto auctus est honore, ut in nume-  
rum Soclorum Jesu Collegii referretur. Fel-  
licem me, qui tales habeam in Britannia ami-  
cos; felicem etiam filium, qui & ipse uberes  
adeo fructus percipiat ex vestro erga me amo-  
re. Quamquam autem nunc Collegium  
mutabit, fore tamen spero, atque adeo con-  
fido, ut qui hætenus pulchrè adeo de filio  
ac meipso meritis es, eundem erga nos ani-  
mum conserves. Opto etiam ut Collegii Jesu

præfectum talem erga se filius experiatur,  
qualem te expertus est semper. Utinam modò  
filius non indecorum se præstet, nec indig-  
num meritis vestris. Votis ille meis satisfac-  
ciet, si idem est absens, quem præsentem se  
hic gessit. Mæ interea partes erunt, ut qui  
tantum mihi amoris ac favoris exhibetis, af-  
fiduè illud cum animo cogitem, quomodò po-  
tissimùm gratum testari affectum erga eos  
possim, à quibus tanto affectus sum beneficio,  
ac qui neque nunc bene de me cessant mere-  
ri. Quos inter te, vir clarissime, optimo jure,  
cenfeo, imo in iis repono, qui familiam du-  
cunt. Cæterum nunc liceat etiam bonas  
hasce precari te preces, ut deinceps quoque  
filium si ita usu veniat, consilio aut ope tuâ  
juves; ac si forte (quod ne Deus sinit) vel  
suapte instinctu, vel suafu alieno, alius alibi  
fieret, me quam primum facias certior, et  
quo principiis obtemus. Nihil quidem metuo  
istiusmodi. Sed tamen jamdiu didici, hu-  
mana omnia incerta; eoque etiam tutissima  
metuere soleo, tantò sanè magis, quantò  
quisque mihi conjunctior & acceptior est.  
Hæc tanti mihi visa, ut vel sola (ita paternus  
est animus) ad te, vir maxime, scriberen-  
tur. Sed deinceps de aliis etiam, quoties ali-  
quid non indignum scriptione se offerret, li-  
teras à me expecta. Sed simplices, & quales  
hæ sunt, ut sine animi fūco, ita absque ver-  
borum calamitris. Nempe omnia prout in  
buccam venerint. Ita inter amicos puto fieri  
oportere. Nec vel occupationes sinunt, ut  
lenocinia ulla, more quorundam confecti;  
neque ego illis capior, scio neque tu, vir exi-  
mie. Salutem à me plurimam dices clarissi-  
mis ac doctissimis viris, Doct. Belo, Doct.  
Collino, Doct. Wardo, Doct. Porter, Doct.  
Charterton, Mag. Critoni, aliisque omnibus  
amantibus nostri; quorum ego utinam af-  
fectui erga me & filium meum possim officio  
ullo respondere.

*Lugd. Batav.  
clō loc xxix.  
Kal. Jul.*

*Virtutum tuarum admirator,  
ac dignitatis eximie cultor  
Devotissimus,*

G. J. Vossius.

## CVII.



## CVII.

Ger. Jo. Vossius Claudio Salmasio  
S. P.

**Q**uod tarde adeo responderim Literis tuis, maxime Salmasi, prius quidem in causa fuit iter à me in Britanniam susceptum unde dignitate Canonicatus Cantuariensis à Serenissimo Rege collata, auctior redii domum. Postea autem cum viderem Oratorias nostras vergere ad finem, paulisper volui expectare usque dum eas una cum Literis meis per hominem fidum mittere possem. Qui nunc obtingit, Illustris Baro Stupeskus Polonus una cum Ephoro suo Paschali, domo Genevensi professione Medico. Utinam vero placere tibi possit hic foetus meus. Sed placebit spero, si non merito suo at saltem ob pulcherrimum conatum. Nam & veterum imprimis vestigiis institutus, & multa tamen accuratius excussimus, quodque facile videbis, plane alia nobis ratio inita; quam qua vulgo tetrica artium præcepta tractari solent. De tuis in Plinium ac Solinum commentariis, qui vere ἀγαθὴν ἀγασθῆναι, gratiam sane promissi facio. Quid enim amicitia nostra recens adeo inita tam cito tibi sit fraudi. Sed siquid postmodo emiseris exigui sumptus, cujusmodi fuit ante ἀντίδοτον mihi, quale item quod nunc vides; sane si omnino liberalis esse voles gratum mihi erit donum & suo nomine & auctoris: quem ego cum Grotio nostro conjungere soleo, quoties duos nominare volo omnigenæ doctrinæ Principes, sane orbis nostri doctissimos. Quod elogium non perscriberem ad te, (metuerem enim ne quid videam auribus dare) sed idem non semel his diebus testatus sum apud Academiæ nostræ Curatores. Ex quibus Somelldicentis Dominus seriò hoc agit, ut Scaligeri locum tueri apud nos possis. O me beatum, si hoc contingat! Rivetus etiam, optimus sane ac doctissimus Theologus, negotium hoc urget, quàm qui maximè. Faveo ego utroque, quod dicitur, pollice, & eos incito, qui plus me autoritate valent. Nihil tamen certi promittere habeo: partim quia multi apud nos ad clavum Reipub. sedent, studiorum minime intelligentes: partim etiam aliis de causis de quibus fortasse aliquid scribam. Post. Non. Maii. Eum enim in diem indictus Curatorum Academiæ Conventus. Vale, summe idem vir atque amice, ac deinceps crebras à me literas expecta.

Lugd. Batav.  
cl. lxx.

## CVIII.

Dudlæo Carleton.

Illustrissime Domine,

**I**ndignus sim tantis in me meritis tuis, si à longo tempore intermissa scriptione, etiam hanc occasionem dimitterem, redeunte in Britanniam filio meo. Fateor, diu scriptum à me oportuisse, sed sublimem adeo virum interpellare sæpius verebar; ut cui tanta negotia, & regias incumbere curas nossem. Nihilominus, cum prolixam cogito humanitatem tuam, qua me humilem adeo hominem profecutus es, vicissim magnæ videbatur inhumanitatis, non facere te certiorum de rebus meis, qui satis ostenderas, quam bene mihi, & omni familiæ meæ velles. Ea itaque res, ut scriberem, induxit; nec materia deesse videbatur. Nam præterquam quod mei muneris duxi transmittere Oratorias meas (quas rogo animo potius donantis æstimes quàm pretio sui) etiam ex meipso cognoscere te volui, quòd fortasse jam ex aliis intellexeris; nempe ut mensibus abhinc propemodum quinque sedem meam Amstelodamum transfulerim, vocatus ab urbis ejus Proceribus. Nuper quippe ii Consilium cepere de erigendo in urbe ea Illustri Gymnasio, ne Civitas omnium totius Belgicæ florentissima & opibus virisque valida, sola Studiorum cultura aliis plerisque cederet. Itaque eo me vocarunt ad eandem Professionem sustinendam, quam obii Lugduni. Causæ, quæ me impulere, ad suscipiendam conditionem, variæ fuere; ut enim stipendium mittam, quod fere alterâ parte majus est, liberorum hic longè magis rationem habendam, satis luculentis indiciis perspexi. Nonnullis credo mirum videbitur me ex florentissima Academia commigrare in Illustre Gymnasium, de quo vix dicere illud possumus, adhuc messem ejus in herba esse. Necdum enim herbescit, imò ne quidem sementis facta. Veruntamen non mei unius hoc consilio egi; sed multum cum aliis summæ & prudentiæ & auctoritatis viris deliberavi, qui hujus mihi rei auctores fuerunt. Nempe omnes prope judicant, eam esse hujus urbis potentiam, illud nomen per orbem omnem: ut si aliunde splendorem petam, quam à propriis ingenii ac industriæ monumentis, cum non minus à clarissima hac maximaque Urbe, quam vicina Academia, consequi possim. Quantoque illustrius deinceps futurum urbis hujus Athenæum, tanto ubique gloriosius mihi erit, prima ejus jecisse fundamenta. Multum me etiam pel-

lexit

lexit Magistratum hujus urbis cum summa prudentia, tum etiam excellens doctrina; ita ut verissimum hic Platonis dictum comperiar, qui tum felices fore Respub. aiebat; quando, aut qui Philosophi essent, regerent, aut qui regerent, Philosopharentur. Nec ignoro esse, qui nomini Procerum plurimum detrahant, quasi iniquiores sint Ordini Ecclesiastico. Verum video, abunde huic eos favere, dummodo se ille contineat intra effata, ac pomœria sua. Nec ea ad Gymnasium nostrum controversia pertinet. Neque me deinceps ei immiscere animus, sed pacem semper & concordiam sectabor. Liticula adhuc aliqua est Lugdunensibus cum Amstelodamenis de Jure erigendi hic Illustris Gymnasii. Sed intra dies paucos ea Controversia ab utraque Curia decidetur. Nec tantillum dubito, quin sententiam latura sunt pro Amstelodamenis. Ita saltem censent, quicunque rerum Batavarum sunt gnari, atque animum habent affectibus minime mancipatum. Sed de isto fortassis nimis multa. Quod superest, Illustrissime Domine, optimeque Mecœnas, Deum oro, ut Nestoreos annos felix & fortunatus vivas, cum Illustrissima Heroïna uxore tua. Ex qua quam simillimam vestri prolem, vobis exopto, Regni Britanniae bono, simul gaudio vestro. Atque hoc Deum rogo. Te autem unum illud, ut quem hætenus tanto es favore complexus, cum porro habere velis in Clientium numero. Hoc equidem affectu erga me tuo subnixus semper ero.

*Illustrissimo nomini tuo totique Domui Carletonæ devinctus simul & devotus Cultor,*

G. J. Vossius.

## CIX.

Johanni Meursio S. P.

**O**B diuturnum adeo silentium difficilis mihi causæ dictio apud eos foret; qui me nævo potius aliquo norint, quam integrum, uti tu facis, vir clarissime. Cui, ut puto, facile persuadebo, tamdiu me nihil scripsisse, non quia minus amem te absentem, quam soleo præsentem: sed partim ob occupationes *ἰγνυλίας*, & invaletudinem meorum, ex quibus maximus natu filius, Collegii Jesu Socius apud Cantabrigienfes, plus minus mensē oculis captus fuit: partim etiam quia teipsum expectaremus, uti spem tui feceras

nobis ante sesquiannum, vel præterpropterea. Primis quidem mensibus, ex quo eas literas acceperam, irritum fore hoc promissum facile prævidebam. Sed fœdere inito inter Cæsarem, & Serenissimum Regem vestrum, omnia visa liquidiora. Itaque proximo quidem autumno avide te expectavi. Nunc nihil sperare aulim ante ver medium, vel etiam adultum. O beatum illum diem quo te amplectar! Quam de multis tum loqui licebit *σῆμα σὸς σῆμα*, quæ non tuto satis literis committantur. Sed dum te caremus, nefas sit non arripere occasionem scribendi bellam, eunte ad vos optimo doctissimo amicissimo Stephano Stephano. Jucundum quidem mihi est te salutare; sed multo jucundius erit id agere per amicum hoc caput, ex quo ea etiam cognosces, quæ non scribo. Jam mensis est, ex quo me Lugdunum iterum habet. Bimestre impensum itineri Britannico. Sane non facile dixerim quantum mihi honoris habitum sit à viris, genere, dignitate, doctrina, insignibus: ipso etiam Serenissimo Rege, nulli nostri temporis regum secundo: cui coram gratias egi pro collata mihi dignitate Canonatus Cantuariensis, & ita collata, ut frui ejus emolumentis etiam in transmarinis partibus possim. Equidem nescio, nec valde scire laboro, utrum oculi propterea doleant amicorum meorum fucatifimo, de cujus fucosissima amicitia scio etiam te non semel apud me graviter conquestum. Nempe tales sic omnia componunt, quasi sibi non esset bene, nisi aliis sit male, præsertim illis, qui studia tractant non adeo diversa. Ut facile comprobent illud vetus quo solent *ἐμοτέχων ἀνιτέχων* vocitare. Sed meliora tamen de illis speramus, ne videamur amorem omnem exuisse, cum aliud sane ob egregias quasdam virtutes mereantur. Præsertim cum tales sæpe cum obesse volunt, magis proint. Ut non de nihilo dixerit Gregorius Theologus, multa esse in quibus *ἡ ἀδελφικὴ συνέντης εἰς πάρεσι, ἡ καλὴς πάρετης ἀδελφέντης*. Curator Academiæ Arsenius, Somelldicentis Dominus, in eo strenue adlaborat, ut in Academia hac clarissimus Salmatius eo esse loco possit, quo Scaliger olim fuit. Est qui manibus pedibusque obnixè agat omnia, ut huic incommodet propositum. Parum id fore ex honore suo arbitratur. De quo ego non disputo; qui multum honoris huic loco ex viri ejus præsentia Academiæ nostræ accedere posse existimo. Utinam tantum etiam Amplissimus Grotius, tuque, clarissime Meursi, eodem vel non dissimili apud nos loco essetis. Sane ubicunque nunc vel Cimmeriæ esse tenebræ videntur, vobis lucentibus facile hæ pellerentur, nec præter vestri ingenii ac doctrinæ faciem

cern nocturna ulla lumina quæreremus, imo Titania ingenii vestri lampade, alius in hoc, alius alio in studii genere, diem ipsam reduceretis. Sed multum metuo, ne unquam nobis tam beatis esse liceat. Interea pro te mihi erunt scripta tua, quæ omnes amant præter *de duabus potius* animique livore tinctos. Sane apud Britannos, qui quidem Græcarum Antiquitatum studio tenentur, tuos labores mirè prædicant. Inter eos doctissimus Crito, Græcæ Linguae apud Cantabrigienfes Professor; ex cuius ore lubentissime audiui, quæ & illo & te digna erant, ac eo solum nomine à me reticentur, quia moris mihi magis est ista apud alios, etiam in æmuloꝝ præsentia, referre, quàm quempiam in os laudare. Ut videas quantopere scripta tua peregrinentur, superioribus annis etiam Athenæ tuæ Athenis ipsis fuerint. Eò secum detulerat illas Pitteus, Anglus longe doctissimus, quem Illustrissimus Arundelæ Comes, vir natus iuvandis literis, in orientem miserat, ut inde antiquos lapides, aliaque monumenta in Britanniam referret. Vix dici possit quam multa præclara inde reportarit. Quæ paulatim juris faciet publici. Atque idem inter alia etiam Athenas, ubi diutissime vixit, describere parat: credo ad formam eam, quæ Byzantium Gyllius descripsit. Vir est ut humanissimus, ita mihi amicissimus, ac tuo etiam dignissimus amore. Nam quod dicebam antea *quod tuus amicus* esse solere, id in neutro nostrum locum habere debet: qui cum studiis semper conjunximus animi candorem. Puto fore ut propediem hic edantur literæ Casauboni ad Scaligerum, Heinsum, Rutgerium, alios. In iis non tam multa quam vellem, sed nec rara tamen fit mentio tui. *Aurisyepa* enim vidi; nec dubito quin futurum sit, ut omnia fide bona edantur: quippe prærit editioni doctissimus ac tui etiam amantissimus Rivetus. Itaque nec displiceat, si eas huc mittas, quas magnus ille vir ad te olim scripsit. Fuerit, puto, id ex honore tuo, cui impense faveo. Quod si quid in iis sit quod divulgari non debeat, poterit à te deleri. In Scaligeri Epistolis, quæ, ut scis, ante triennium hic excusæ, quædam relicta sunt, quæ refecari longè satius fuisset. In iis quiddam etiam est acerbe ac nequiter de te dictum, sed pro nomine tuo Asteriscus positus, ut te signari pauci intelligant, præter eos qui Scaligero fuere familiares. Socerum quoque meum Junium non uno loco sugillat. Eaque res mihi præfationem magna ex parte expressit, quam historię meæ de Historicis Latinis præmisi. Seldeni opus de Diis Syris hac ætate, vel paulo ante, longè auctius hic recusum, & Heinſio nostro dicatum est. Au-

ctor ipse, cum esset inter patronos Minoris domus Britannicæ, atque se vehementius gereret adversus Regem Serenissimum (seditione multa locutus dicitur, de quo ego iudicium ferre non possum, quia & patronos suos habet) in turri custodiæ traditus est. De vita tamen periclitari negant illi, qui norunt clementiam Regis, atque amorem erga literas & literatos. Imo jam dies sunt pauci, ex quo aliquis mihi significavit, cunctos qui se Regi tantopere opposuissent, ab Rege esse custodia liberè dimissos. Sed de isto certiora propediem intelligam. Si vera narrarunt, quamprimum Seldeno literis meis gratulabor. Nam inter nos non ita magnum, culpa mea, sed aliquod tamen commercium est literarum. In Alardo, quem mihi penultimis literis commendaras, feci quod potui: nec inutilis illi fuit opera hæc mea. Quicquid feci, feci adolescentis causâ, feci & tuâ; feci etiam ob parentem ejus, qui & mihi per literas gratias egit. Video virum esse bene eruditum. Si quid in eo amplius possum, vel quocunque alio, faciam id lubentissimo animo, uti amicitiam nostram decet. Sum quidem satis negligens in scribendo, præsertim ubi nihil est quod urgeat. Sed nunquam patior operam meam desiderari iis in rebus, unde boni aliquid ad alterum redundet. Bertivm antè tres menses obiisse, jam, ut puto, intellexeris. Golius ante 4 menses rediit à Syria, vir sanè ut doctissimus, ita longè optimus, & candidissimus; ut verum Batavum decet. Is geminam obit professionem: inque Mathesi Snellianas, in Arabicis Herperianas partes suscipit, non sine gloria. Grotius Grollæ obsidionem descripsit, quæ jam excusâ. Heinſius Ordinum est Historiographus. Hoc nomine ei tributum stipendium annuum flor. 700. Occupatur in scribendis iis, quæ hoc anno feliciter Batavæ successere: imo putat intra mensem unum alterum se Historiam hanc prelo subicere posse. Non abhorrebat ab iis pangendis Grotius: Sed videtur eum sufflaminasse, quo duo vel tres hanc sibi provinciam elegissent, qui certius omnia nosse possent, ut qui Obsidioni Sylvæducentis interfuerant. Ex his esse creditur Huygenius, Principi nostro à Secretis. Barlæus victoriam hanc carmine victuro celebravit. Etiam nomine Illustrissimæ Ameliæ ingeniosam & elegantem Elegiam fecit ad Maritum suum Principem nostrum, ad modum earum, quas sub heroidum nominibus Ovidius ac Sabinus condiderunt. Eam Epistolam non ineleganter Belgicis versibus in gratiam Dominæ Principis Scriverius expressit. Institutiones meæ Oratoriæ intra bimestre erunt recusæ, multo limatiores, & alterâ



terâ parte auctiores illis, quæ secundo prodire anno clō lōc ix. Vale, vir maxime & amicissime, & plurimum meo nomine saluta optimam uxorem, Clarissimum Laurenbergium & Collegarum alios. Uxor etiam plurimam tibi atque uxori salutem adscribi iussit: & filia filia. Nempe æquum est etiam liberos paternæ esse amicitiae participes ac hæredes.

Lugd. Batav.  
clō lōc xxx.  
Id. Januar.

Tuus,

G. J. Vossius.

### CX.

Clarissimo Viro, Jacobo Roverio, S. P.  
Dordrechtum.

**N**ON studiis modò, ut putares mi Roveri, sed occupationum etiam undis (nisi hoc grave nimis est verbum) ita immergor, ut vix animus unquam emergat. Ad negotia seria accedunt Interpellationes amicorum, vel coram, vel per Epistolam. Scio nihil utilius, nihil etiam esse sanctius amicitia; sed si ea in nimis multos diffunditur, fit illud, ut quia scribendo non licet benè mereri de publico, tempus omni auro potius, non quidem ratione omnium, sed tamen ratione plurium, pereat studiis ac posteritati. Illud dicere malo, quàm bono famæ. Nam quid illa est nisi inane nomen? Et habet aliquid, quod magis noceat, quàm prosit. Quid illud? inquires. Nempe eo ferè omnes animo sumus, ut non libenter aliquid deperdi sinamus, quod nominis ad honorem pertineat. At qui ita fuerit animatus; ille famæ jam magis, quàm sibi, quàm bono etiam publico, vivere incipit. Mihi verò longè semper alia mens fuit. Subinde tamen metuo, ne non fatis me nòrim, & dum non dico famæ servio, quod omnino non facio, sed tamen paulò fortasè majoris eam æstimo, quam debebam, minus etiam placeam amicis illis, qui omnia publico metiuntur. Quos inter, conjunctissime & amicissime Roveri, lubens meritò te repono. Amo enim te ut affinem, Liberorumque meorum Consanguineum, amo ut quodammodo discipulum, cumque amantem mei, eoque, prout quidem res utriusque nostri tulere, fatis familiarem. Sed majus est, quod amo, ut præclaræ adeo indolis, præclaræque eruditionis virum, & si voles, pulchrè de Rep. literaria meritum. Itaque dolet, quod ex Britannia redux diculâ citiùs, quàm statueram, abieram Dor-

drecho. Decrêram enim aliquot horas dare amico non uni, atque in his, quos fraternus tibi sanguis, aut proxima adfinitas conjunxit. Quod si potuissem, fuisset felicior, quàm putâram. Nam in te quoque, quem ob peritiorem literaturam, urbis tuæ pothabeo nemini, simul incidissem. Non te Dordrechtî, sed Hagæ unâ cum Parente, vivere arbitrabar. Eoque simul ac Hagam excurri, rectè eam in domum, ubi me a. ud te divertisse meministi, contendi. Quid respondi acceperim, nihil attinet dicere. Dolui interim ob errorem hunc meum, & ita dolui, ut cùm per alterum excusare hoc apud te possem, ipse ad te literas dare maluerim, tardius fortasè quàm expectasses, sed ex more meo, qui usque adeo tardus in scribendo esse soleam, ut interdum nec tertio respondeam mense, interdum nunquam: quippe qui rarò, nisi necessariò scribam. Quod vitio nemo vertet, qui vitam, & occupationes meas nòrit. Absque his esset, non alter lubentius, vel frequentius ad me literas admitteret, quàm ego remitterem. De multis etiam scriberem, quæ ne nunc quidem scribo. Sed de quibus non scribo, loquar tecum cùm voles. Quando autem illud erit, Optime, & Optatissime Roveri; Audies tum inter alia, de toto meo itinere Britannico. Filium meum Franciscum non sine gloria publice, pro doctoratus, ut vocant, Laureâ disputasse v. Non. Febr. credo, jam ex aliis intellexeris. Oratoriæ meæ vix ante mensem videbunt lucem. Parte alterâ erunt auctiores, longèque emendatiores: ut novum opus haberi, vel saltem videri possint.

Vale, Doctiss. Cognate, ut nunc loquimur, vel potius Adfinis; sed tamen non minus care, quàm si sanguine tam esses conjunctus, quàm es non modò uxori, ac liberis meis; sed etiam qui paulo propius attingunt. Plurimam per te salutem dico, Amplissimo Parenti, ac conjugii optimæ; item fratribus egregiis, ac Affinium Pari Blyemburgio, Berckioque; quorum illi, tergemino antea honore inclyto, accessionem equestris dignitatis, gratulatus sum coram, ac nunc quoque feliciter ipsi, familiæque toti vertere cupio, speroque.

Lugd. Batav.  
clō lōc xxx.  
vi. Id. Febr.

Tuus,

G. J. Vossius.

### CXI.

## CXI.

Joanni Vossio.

**J**AM quarto ad te scribo ex quo veni domum. Interim unæ Literæ mihi à te ; non Literæ , nec enim Literarum nomine censerî dignæ, quibus non aliud ais, quam te Hungari Literas ad me mittere, ut domestici mei eas melius procurent, quam à tabellariorum vulgo fieri solet. Nili hoc alicujus putas, quod adjeceris, te non multò antè ad me de pluribus scripsisse, atque in his etiam consilium te poscere, utrum Theologiæ an Juris studium debeas amplecti. Ego verò eas Literas non accepi, ut quæ ambiguum reddunt animum tuum, scire non possim. Quanto satius erat, te mecum de eo egisse, cum in Britannia forem, atque ipse cum Reverendissimo Episcopo, & aliis summis viris consultare de re tota possem? Nunc illud dixero, Theologicum studium palmam præripere omnibus, & esse ei suos quoque, imo maximos, in Anglia honores. Quod de aliis terris non possis dicere. Quanquam ut nulli honores ei magis quam apud nos forent, tanta est excellentia ejus studii, ut omnes pios in amorem & admirationem illud sui rapere debeat. Quare teipsum in consilium adhibe, vide quo animus maximè feratur, consulta cum summis viris, & utriusque nostri amantibus. Ante omnia Deum ora, ut te prudentiæ spiritu regat. Mihi seu hoc, seu alterum studium amplecti volueris, satisfacies abundè, dummodo duo ista præstes. Prius est, ut pius sis, atque ita te geras, ut videam te regi Spiritu Domini. Alterum ut nihil vulgare in studiis præstes, neque indecorum te familiæ nostræ ostendas, sed gloriæ esse & immortalitatis candidatum. Quam ad rem indutria opus. Magnam in Liberiorum singulis spem reposui; Unus tu mihi, natu omnium maximus, scrupuli aliquid injicere soles: non quia non tibi ingenii abunde sit, sed quia diligentiam desiderarem. Sed cum postremò alter alteri vale diximus, ita me plenum magnæ spei dimisisti, ut non possim non pulchra quædam de te augurari. Credimus nos Parentes facile liberis nostris. Sed tamen tibi, ea jam ætate, puto me tutò credere posse. Si decipis, te potius quàm me deceperis. Adolescens, ut Poeta ait, *Cereus in vitium flecti*. Tu potius cereus esto in eo, ut facile animo imprimas monita mea; Ab his dimovere si quisquam te volet, ferreus vel adamanti similis sis. Apage igitur istos qui ad inertiam te vocant, filiamque ejus luxuriam, quæ te in Barathrum aliquod

præcipitem daret, unde cum lachrymis eximi postea optares, sed frustra. O quam mihi gratus eris, si ( ut Nazianzenus ad Vitalianum scribit ) *ἀναγκασθείης στασιδὸν ἢ πολλῶν, ἢ οὐνοῖον ἔχεις πλὴν ἀρετῆς* Fac, fac, mi fili, sic eris senectutis meæ solamen, domus nostræ fulcrum. Quid tibi cum istis negotiis, non tam pedibus valgis, quam mente distortis? Similem te sui volunt. Renuntia eorum amicitia. Quid boni ex iis discis? Nihil sanè. Omnis eorum eruditio, quod manum habeant eruditam. Sciunt ut cum Poetâ dicam,

*Quo gestu Lepores, aut quo Gallina secetur.*

Venustum in illis nihil. Quippe qui nullam sermonis Venerem nisi de Venere agnoscunt. Tuum est amare non illam vulgarem Venerem, sed alteram, *Ὀυγενίαν*, quæ coelestes inspirat amores. O quanto jucundior amor ille! Me quidem ita sacra studia afficiunt, ut omnia præ iis pudeant. Nempe tantum studium Theologiæ præstat cæteris studiis, quantum hæc voluptatibus istis adolescentiæ. Sed si Naturæ, Historiæ, Juris te magis delectat, non repugnò quo minùs totum te iis des. Hæc quoque ut usum necessarium, ita incredibilem habent voluptatem. Itaque Plinius ea studiorum voluptate tenebatur, ut & somno & cibo detraheret, quemadmodum ipse in præfatione naturalis Historiæ testis est nobis. Scis etiam ut Archimedes & cibi & potus oblivisceretur studiorum amore. Sed quid ego te ad Externa voco? Cur non sufficiat domesticum exemplum? Egone tantum laboris & in istis exhaustissem, nisi ille mihi labor fuisset jucundior, quàm ista quæ alii consecrari solent? Et voluptas illa manet. Juvat nunc recordari quoque ætatis retroactæ. Quod tu de te non dixeris. Sed ut deinceps dicere possis, de eo quidem, quod divina bonitas vitæ amplius largietur, id quidem in manu est tua, mi Fili. Quare hoc age; nec patere domum, quam ego virtute mea paullum erexi, tam cito vitio tuo collabi. In stylo omnino velim te exerceas. Neutiquam enim mihi satisfacies hac parte. Nosse desidero, quantum in Græcam tuopte Marte valeas. Item ecquos instituas Adolescentes. Optimus proficiendi modus docere alios, quæ didicimus. Et tum demum aliquid scimus, cum docere id alios possumus. Aves, credo, scire ecquid apud nos rerum sit novarum. Sed nihil sane est quod magnoperè scribi mereatur. De induciis deliberatur, in Ordinum Conventu; verum plures eam adversantur, præsertim qui in mari vivunt, vel ut scitè Græci eos vocant *ἀλιζουσι* ( nautas me vides dicere ) vel qui ex eo vivunt, ut

Negotiatores multi Magnarii, imo & quos liberos Piratas nuncupamus. Ultrajectini cogitant de Academia erigenda. Si Amstelodamenses in proposito persistunt, vocabunt in urbem suam Barlaeum, ut ibi Philosophiam & Historiam profiteatur. Colvius uxorem ducit filiam Abrahami vander Mylen. Wicfordus qui pro gradu Doctoratus in Academia nostra ante paucos annos disputavit, in Galliis dicitur coniectus in carcerem ob æs alienum, quod *ἀνάλωτος* ille conflavit, nec Patrensolvere curat, nec etiam debet ne foveat ejus luxuriam, & cæteros perdat liberos. Mater tua ægrotavit iterum aliquot hebdomades. Curæ eam valdè macerant. Scis quales dicere velim. Audio te ante menses duos vel paullo minus, Londini adfuisse Strusio. Ego utrum Strusius ille albus an ater sit nescio. Sed tamen ajunt eum convivii magis gaudere quam nostram deceat sortem. Quare malim tibi commercium esse cum hominibus literatis, & ad rem attentis. Pŕipam unam filiolarum Domini Wrenni jamdiu acceperis. Alteram non potuimus tam citò nobis comparare. Amstelodamo enim apportari necesse sit. Sed si & alteram voles, perscribe, atque adde cujus magnitudinis eam esse cupias. Quanquam hoc quoque scito opus, quomodo transmitti quam tutissimè possit. Prodiit Londini Libellus cum hac Inscriptione, Alter Ecebolius, M. Antonius de Dominis Archiepiscopus Spalatensis, Excudebat Billius, An. 1624. Ibidem prodiit Concio ad Clerum, habita Cantabrigiæ per Sam. Wardum, Excudebat Milo Flesher 1627. si comoda se offerat eos Libellos mittendi occasio, transmittes. Sin minus, ne laboro. Habui utrumque Libellum commodatum à Nouwio. Sed cum in Gallias iret, per fratrem utrumque repetiit. Retinere maluissim. Et dixerat, posse me utrumque reservare. Sed sententiam videtur postea mutasse; Nolim tamen de iis te valdè esse sollicitum. Possim enim utroque carere. Video chartam monere, ut desinam scribere qui non desinam te amare, dum tu virtutem amabis, quod ut æternum sit, Deum oro. Salutem dices iis quos toties jam literis signavi, ut repetere nihil attineat.

Lugd. Batav.  
clō Jōc xxx.  
Post. Id.  
Mart.

Tuus Pater,

G. J. Vossius.

Qui has ad te Literas defert, mihi quidem hætenus ignotus fuit, sed cum eum cognoscerem, esse filium Castellani, Gallicæ Ecclesiæ quondam Ministri, Senioris autem Trelecati, Præceptoris mei, ex filia Nepotem,

nolui eum dimittere sine Literis meis; præsertim cum & honestus & non inruditus videretur.

## CXII.

Francisco Junio, *Fr. Fil.* Londinum.  
S. P.

**R**Anis illis Seriphiis, mi Affinis, taciturnior mihi videris. Citius illis vocem, quam tibi verbum aliquod expressero. Quippe jam bimestre est, quod à nobis abiisti, ac ne illud quidem significas an salvus in Britanniam advenieris. Profecto, nisi mihi satis perspectum foret, quam tardus sis in scribendo, planè aliquid suspicarer, quod dicere nolo. Interea ut mihi, optimæ sorori, & liberis etiam meis, omnem eximas scrupulum, silentium rumpe, & nos quamprimum Literis compella. Si non ob aliud, saltem, ut ne ultra ignorem, quod me maxime tangit. Quære *ἀνὰ τὴν γαλακτοῦ καὶ γαλῆς τὸ ἀνθρώπινον*. Nam quid magnopere juvet, si nos mutuo amemus, & ne literis quidem alter alterius fruamur. Nempe sic Tantalus, jure comparemur, cui & jam deerat, quod habebat. Franciscus meus pro gradu, ut loquimur, Doctorali, publicè disputavit, ac strenuè rem gessit. Smontius ab Amstelodamentibus, urbe exactus est. Itaque apud nos domum conduxit. Oratoriæ meæ domum, post hebdomades duas, aut tres, erunt absolutæ. Filius Dionysius orsus est, ex Arabico transferre gentis ejus proverbia. Nonnihil tamen ab h.c. opera revocabit versio historiæ Reidani. Heinsius propediem editurus est historiam omnium, quæ superiori anno contigerunt. Vehementibus studiis agitur, in conventu Illustrum Ordinum, an de induciis sit cum Hispano agendum. Major pars hætenus abhorrebat ab eo consilio videtur. Desidero scire, quando sperare liceat quæ affecta habeas, de Pictura, Sculpturaque. Martinius Bremensis videtur deposuisse cogitationes, de Affine Junia. Nosse aveo, verene hic sparsum sit, Seldenum carcere liberatum. Addes quoque, quando visuri sumus Clarissimi Pittei Athenas, aliaque. Quæso urge virum. Metuo enim ne ei calcare opus sit. Sorori Brunæ ægrè est, quod ei migrandum erit ex ædibus in quibus hætenus commode vixit. Ipse Dominus ædium in iis habitare statuit. Literas à te Rotædamo ad se perscriptas, toto mense post accepit. Quod malè eam habuit. Colvius post uxorem ducit, filiam Abrahami Mylii, puellam egregiam, nec malè dotatam. Amstelodamenses cogi-



cogitant, de uno alteroque Professore, aliunde advocando, ne Parentes necesse habeant, tam cito ablegare liberos ad Academiam, ubi major pars corrumpitur, licentiâ, & malo exemplo. Jam de Barlæo super hac re actum, nondum tamen transactum. Nec dubito tamen, quin si negotium procedat, cæteris sit præferendus. Dicuntur Ultrajectini cogitare de Academiâ apud se erigenda. Quæ res incommodare Leidensibus possit. Scis enim locum esse ad eam rem satis idoneum. Nec obitare Hollandi possint, cum æquæ Provinciam constituent, ac illi, si quid ultra hic rei novæ sit, cognoscere possis ex eo, qui hæc literas defert. Est is senioris Trelcatii, ex filia Nepos, Castellani, Gallici ante annos aliquot Ecclesiæ filius. Hactenus mihi ignotus fuit. Sed cum studiorum causâ, se in Britanniam velle ire diceret, & perhonestus juvenis videretur, sine meis cum literis dimittere nolui. Speraveram fore, ut prior scriberes. Poteram sanè te compellare illo Homero, *ἄλλοι δὲ γυνὴν νόστιμον ἔσθαι*. Sed mihi majus est literarum tuarum desiderium quam tibi mearum. Scis enim quàm aveam nosse omnia, quæ ad filium pertinent. Quare prævertere te scribendo malui. Nec deinceps detrecto similem Provinciam; dummodò tantum spondeas, te propemodum, paria mecum facere velle. Ultra non exigam, etsi minus me sis occupatus; nisi valde me ratio fugit. Pergratum erit si plurimam meo nomine salutem dixeris Nobilissimo Equiti D. Guiljelmo Houardo, cui à studiis es magnæ Illustris Arundelianæ domus soci. Omnia ei à me servitia offerre, ne grave sit. Pitteum etiam salutabis, in quo candor & eruditio certare mihi videntur. Vale, Conjunctissime Af-  
finis.

Lugd. Bat.  
cl. 16c xxx.  
Post. Id.  
Mart.

Tuus Affinis,

G. J. Vossius.

### CXIII.

Matthiæ Martinio. S. P. Bremam.

Longo tempore filii ad literas tuas; sed jamdiu quoque causam ejus rei intellexeris, scio, ex Herdenio nostro. Nam id non obscure perspexi ex Epistolâ tua ad Jonstonum. Quare non tam me in Britannia fuisse dicam, quam illud dicam, ita me illic fuisse, ut qui prius eo negotii causa sum profectus, videar mihi aliquando, vel solo ex amore, eam posse repetere. Humanissimè

enim sum exceptus à Rege Serenissimo; Archi-Episcopo, Comitibus, Baronibus, Episcopis, & quid singulos enumerem, summæ & dignitatis, & authoritatis viros? Nec parum mihi honoris exhibuit, utraque Academia: uti & Cantuaria, ubi Canonicorum ejus loci ordini sum insertus, regia dignatione: Et quidem conditione ea, ut in partibus etiam transmarinis emolumentis fruar. Scis illud Bilbilici Poetæ:

*Dicitur & nostros cantare Britannia versus.  
Quid prodest? nescit sacculus ista meus.*

Video me feliciorum hoc Poeta; ut qui labores sui apud Britannos, non modo, ut illi, nomen aliquod, sed etiam rem parent. Quamquam ut sacculus ista nesciret meus: nihilominus (verè dico) affectus hujus gentis animum adderet ad majora; quippe qui publico potius bono, quàm privato, metiri omnia soleam. Reperi in Britannia etiam magnâ cum voluptate mea, complures nominis tui amatores; Et cum sermo de te incidisset, interdum ab alio, interdum à me injectus fuit, dignum virtute tuâ, doctrinaque illa singulari, præconium à nobis accessit. Qui fieri aliter poterat? Ægyptios fuisse incantatores, facile credo Homero. Nec enim omnia mentiuntur Poetæ. Te scio non Ægyptium esse, sed Germanum. Sed tamen quali Ægyptius esses, nescio quo veneficio, usque adeo imbuisi animum meum, ut cum planè illexeris, tibi quæ devinxis. Et eo magis favi amoribus tuis; utcumque in hoc rerum incerto, non possem sic me, *ἰσχυρῶς*, huic negotio miscere, ut vellem: præsertim qui scirem, quid animi aliquibus foret, qui propius viverent, & plus possent. Quanquam de eo quidem, non est quod multis loquar, postquam tu, sive quia præfens Germaniæ status non satis arrideat, sive alia de causa, satius putas, ut missa hæc facias, salve amore nostro, qui erit dum erimus. De Arnolddo Vorstio, non sine dolore, intellexi, quod ita æs, tibi sublini passus sis. Miseret me Matris quæ commendari à probitate multum solet. Metuo ne liberorum mores omnem ei prudentiam expectorent. Quid dicam? Animam debet. Nec amplius ei credam, quam donare quantum velim. Uno peccare solet, Indulgentia erga liberos. Sed metuo ne Vara Vibiam sequatur. Scis quid non tentare soleant qui constituti sunt pejor, quam inter sacrum & saxum. Non leve est, quod & debet soceri mei filiae natu maximæ. Ego illud nomen vix textivilicio emptirem. Crebro domum ejus tua causa filius meus accessit. Accessi & ego. Sed notiores omnes è familia mea sunt, quam ut admittantur. Quare sit illud Poetæ;  
Non-

Non sum, possum, non libet esse domi. Sed de isto plenius alteris literis, si opus putabis. Coniux mea aliquandiu male valuit, hac tamen hebdomade, meliuscule ei esse coepit, ut aliquid bonæ spei concipiam. Filiorum natu secundus, cui ab avo Francisci nomen, publice Theses defendit, pro Doctorali Laurea, in utroque Jure, & quod voluit, non tam favore, quàm merito obtinuit. Negotium Brugmanni iterum urgebo, hebdomade proxima, quâ Hagam ibo. Audio Philip-pum Cæsarem, ad Pontificias defecisse. Parum sit verisimile, non mihi modo, sed aliis quoque. Quippe qui arcè adeo dicatur novellitati adhæsisse; ut Papismi suspectos haberet, siquis transversum digitum ab ea abiret. Aiunt, ne te quidem, aut Collegam, qui ipsi synodo interfuissetis, fatis ei probare potuisse causam vestram. Scire aveo, an vera spargantur. Elegantissimus Synefius alicubi ait, se imitari velle Medicos, qui aquam calidam præbent ægris, ut cum aqua, educant unâ, quæ intus latent. Similiter & ego, de Philippo vestrate ad vos scribo, ut reddas mihi ea cum scœnore. Apud nos nonnulli è sacro Ordine nihilo melius rem gerunt. Hagam solam vide: ubi uterque Gallicæ Ecclesiæ Pastor deiectus de munere, ob vitam impuram. Prior tamen, nondum li-quidò fatis adulterii est convictus. Nec enim, *ἡ ἀνθρώπων* deprehensus, uti alter, in lectulo, cum scortillo, et si uxorem formosulam ipse haberet. Male diu hic audierat. Tandem misellus; sed tacere de istis malo, quæ non sine dolore animi cogito. Putabat se omnia boni Pastoris munia implere, si principibus Zelotis posset accenferi. Itaque tantæ erat pietatis, ut quanquam ego per amicos, eum Hageni Ecclesiæ commendassẽ; tamen nunquam ab eo tempore, domum sit ingressus meam. Nempe putabat, me esse ex eorum numero, qui in hoc tristi schismate, de remediis cogitandum putant. Nec male cogitabat; qui scire hoc poterat, quippe qui jam ante duennium, frequens fuerit conviva meus, cum similem se simularet, usque dum eliciisset commendationem meam. Nec longè ab Haga alius Ecclesiastes, sacrilegii miserè convictus. Solet ille suffurari pecunias Eleemosynæ nomine, in templo collectas. Hæc quanto sint scandalo nobis, facillè vides. Cristas erigunt Pontificii, eo tantum non de nobis triumphant. Gravis est hæc tentatio infirmis. Interim nos disputare malumus, quam vivere in Christi præcepto. Facillè, qui abundè sensa mea nosti, perspicis, quam hæc coquant, & macerent animum meum. Neque enim vivicomburium deprecarer, si scirem me posse, eo redimere concordiam

Ecclesiarum nostrarum, majoremque primæ-væ Ecclesiæ amorem; præ qua etiam hominibus, nec malis, nec ineruditis, nimis nunc novellitas sapit. Multi apud nos ad Pontificios abeunt. Audio idem, & aliquantò magis, in Galliis fieri; & metuunt plurimi, ne longe tristiora, intra paucos annos, intelligamus. Quid quod nec pauciores quotidie ad *ἀδύτου* vergunt. O tristes dissidii fructus! Et tamen mussare cogor; quasi aliud, quam bonum Ecclesiæ spectem, cum vel pusillum moderationis requiro. Ego vero metuo ne Deo cogar rationem reddere, quod non satis fortiter egerim causam optimam; non dico harum vel illarum partium, sed Ecclesiæ Christianæ, quæ in symbolo etiam Catholica nominatur. Quod nomen ego quantivis pretii puto, utcumque aliqui illud planè habeant suspectum, non alia sanè de causâ, quam quia, aliqui iniquissime solis sibi illud arrogant. Sed quid de tam multis moror, Amicissime Martini? Nempe rarò scribo, sed cùm scribo, tarditatem literarum longitudine compenso. Et quod mirum *οἱ ὁμοῦ μῆρας* *ἡ ἐξήλθω, ἢ τοῦ ἡμέρας πρὸς ἡμέρας*. Quod de se Socrates apud Platonem, ac Synefius quoque, ad Pylæmenem scribit. Quo tamen gloriari apud te non possum, qui hac parte, ut aliis multis, sæpius me vincis. Sed ea est virtus tua, ut lubens cedas. Eæ quoque occupationes meæ, ut ægre hanc tarditatem ferre non debeas. Absque hoc esset, quid Literas meas mittere cessarem, cùm tuis nihil mihi gratius esse possit, & te similiter affectum esse putem imo sciam? Doctissimi Cochii, de Sanhedrim, & Maccoth, laborem ante dies sex septem, accepi. Nec munere eo mihi gratius quicquam. Si apud vos agit, plurimum meo nomine salutes, rogo, & significes, me per literas gratias acturum. Id nunc non feci, quia prius rogandum ex amico, utrum Franckeræ, an Breniæ agat. Salve, optime Doctissimeque Martini.

Lugd. Bat.  
clō Jæc xxx.  
Post. Id. Mart.

Tuus  
G. J. Vossius.

## CXIV.

Joanni Meursio.

**E**Quidem summe & Vir & Amice, tam diu me siluisse ac scribis, non putabam; ac plane metuo, ne Literæ aliquæ interciderint. Gaudeo interim constantem adeo esse amorem tuum ut cessatio hæc nihil de eo detri-

detriverit: imo simulac Literas meas acceperas, ne conquerendum quidem de diuturno hoc silentio putaris. Nempe ut Symmachus ait, Amicitia cito sanatur officio. Sed quæ divina hæc bonitas tua, ut hunc cessatorem, seu triconem aut bovinatorem ( impone nomen quicquid vis ) literario munere, eoque auro magis aureo, mactes, cum Naulistrata dixerò, Vir viro quid præstat! Alterum urit si aliquid credamur; tu nomen nostrum prædicare non cessas, & seculo huic & posteris. Quas tibi ego, quas Liberi mei pro beneficio hoc grates rependent? Sane omnes plurimum nos deberi tibi fatemur: ac si, quid mihi opinione amicorum celerius contigerit, quod animum testari, ut vellem, non finat; id compensabit pietas Liberorum. Ex quibus jam quartus Dionysius meus totus est in Reidani Historia Latine vertenda, & quibusdam Arabum monumentis itidem Latiali Linguâ transferendis. Natu secundus, Franciscus, in humanitatis ac sapientiæ studiis perseverat: et si ex quo supremam in Jure lauream apud nos adeptus, Hæc simul vacet, si non tricus, ac tetricis saltem advocatorum contentionibus audiendis. Nempe scis vix aliam esse ad honores hic viam, nisi forte aliquem favor amicorum magis, vel opum gratia, extollat, quam rerum peritia, aut virtus. Tertius eorum Matthæus, satis se mihi in omnigena historia probat. Natu omnium maximus Joannes, Collegii Jesu socius est, apud Cantabrigienses. Qui, quod visum receperit, & mihi gaudeo, & illi gratulor, & Deo quantas possum gratias ago. In filiis duobus natu minimis, Isaaco & Gerardo, sumptibus non parco. Itaque domi iis præfeci Adolescentem: sed quem quia non admodum eruditus est, ex præscripto meo omnia agere velim; ne mihi deosceda discant. Quippe malim ego nihil eos à Magistro haurire, quam male imbui: quandoquidem sic gemino mihi esset labore opus, in eluendo vitio & infillando vero rectoque. Ut non possim reprehendere Timotheum Mulicum, duplicem qui mercedem exigebat, alio siqui Magistro usi forent. Quid multis opus? Hactenus non infeliciter mihi in liberis negotium successit. Quo nomine Deo gratias debeo si quisquam. Utinam misericors ille Pater beneficium hoc suum mihi diuturnum esse patiatur. Quod equidem eo magis exopto, quia video quam hæc rara sit res in multitudine liberorum. Vel summum Virum & tui amantissimum Rivetum vide. Nôras duos ejus filios natu maximos, cum apud nos viverent. Eorum alter, Vir optimus, Ecclesiastico munere apud Gallos fungens, vita sua functus est. Urit hic dolor Parentem, ut co-

gitare potes. At magis macerat, quod alter, qui Duci Tremulio à secretis erat, Domini sui exemplo ad Pontificios defecit. De meis in hoc vitæ humanæ incerto meliora non possum mihi spondere; sed tamen sperare optima licet. In quo si non eludar, habebis semper summos homines tui cultores, ut amicitiam nostram decet, cujus liberos hæredes esse convenit. Quod eo dico, ut videas non meum modo, sed meorum etiam me affectum spondere. Mitto ad te Oratorias institutiones meas tertium editas, usque adeo castigatas & auctas, ut mihi ipsi licet parenti hujus foetus subinde novum potius opus dedisse quam prius illud videar reddidisse. In quo committere non potui quin solemne meum obtinerem ut debeo: nempe ut testatum facerem posteris quid de tuis sentirem. Primo uti libro ubi de Atheniensium foris loquor. Et tamen omnia sunt infra merita tua. Verum quod hic desideret quisquam, alibi compensabitur. Proxime quid editurus sim nequeo dicere. Sed: uto illud aut commentarios fore Linguæ Latinæ, aut opuscula quædam è miscellaneis nostris. Nam de iis quæ ad Ecclesiæ historiam veterem pertinent, spissius ni fallor negotium procedet. De libris quos ex Rutgersiana petieras Bibliotheca, semel iterumque compellavi hæredem. Prius ille nec annuere, nec omnino negare, sed poscere, ut postridie vel ubi occasio daretur iterum de eo loqueremur. At cum denuo compellarem; dicere ut cum Benaventura hac de re locutus esset, qui negaret id sine certo auctionis dispendio fieri posse. Fore enim ut multi ob rariores libros huc confluant, qui si ea jam divendita cognovint quamprimum; semel iterumque elusos, eò ituros, unde venerant. Potuisse hoc fieri si Catalogus necdum editus foret; nec serum nimis esset. Et cum oggerem, vix auctionem esse ullam, in qua non pauculi saltem libri prius sint divenditi, quam publica illa venditio instituatur, respondere ille, complures etiam alios esse, qui similiter sibi quædam poposcerint, ut aut nulli, aut pluribus, magno cum dispendio suo gratificari cogeretur. Et sane ipse ( quod plane illud verisimile facit ) ex Anglia literas accepi, quibus simile quid poscunt. Quod tamen nostro significandum minimè putavi; ne quem satis aversum viderem, redderem difficiliorem. Multa interim oggessi de amicitia veteri, occasione mittendi, quâ nulla deinceps melior se esset oblatura, & similibus. Sed tandem intelligo ex eo, sic libros ( quod facile credo ) disiectos esse, ut intra paucos dies reperiri non possint, quos postulares. At is per quem mitti hos oporteret, intra biduum parabit abitum.



abitum. Cum nec plane deesset, quo his occurrerem, dixit quiddam, ut Collegam veterem deceret: puta, non alium, quam te, hos libros habiturum. Si quis alius in auctione pretium promitteret, se aucturum, & me idem facere oportere. Quod si eo pacto pretium nimis excreveret, velle se illud in tui gratiam postmodo remittere; ac si liber sex solum florenorum sit, & XV. aut XX. sit divenditus, te tamen non amplius quam denos soluturum. Perii, ut sententiam suam de eo perscriberet. Facturum se promisit; sed nunc occupationem esse. Denarium Pythagoricum tuum Lamerius est editurus: sed quia prelum multis distinetur, negat id ante sex hebdomadas fieri posse. Curabitur, ut emendatè prodeat. Forma erit folii in quaterna complicati. Significabis per quem exemplaria, & quam multa transmitti voles. Minimùm tibi XXIV. cedent. Sed quæ hic amicis donari voles, ea tuo nomine donabuntur. Imo & exteris, si ita visum: uti Puteano, atque aliis. Scottum adderem: nisi ille ad superos jam concessisset, ut te scire arbitror. Puto non displiceat de Critone & Pitteo in Anglia, Grotio & Salmasio in Gallia. Tu quos præterea voles, significabis. Operam dabo, ut supra numerum, quem dixi, aliqua accedant exemplaria, ut liberalioribus esse liceat. Quod mea etiam interesse, facile intelligis. Scire aves, qua occasione contigerit, ut Serenissimo Magnæ Britanniae Regi innotescerem, atque ab eo luculenta adeo Cantuariensis Canonicatus dignitate ornarer. Nempe jam ante annos decem in florentissimo hoc Regno aliquot magni viri æstimare cœperunt scripta mea: præsertim historiam nostram de Controversiis Pelagianis. Scis autem, si uspiam terrarum, in Britannia sane esse longè plurimos Ecclesiasticæ Antiquitatis amantes. Itaque & Oxonienses, me ignaro, recudere disputationes eas, quas in Collegio habui. Jam octennium est, cum Houterus, ad Carolum Hornes, Baronem Suecum, scriberet, se ex uno Regiorum Secretariorum audisse, ita in Aula ferri, si ab illustribus Ordinibus ob factionem illorum temporum, quæ multos perdebant, porro negligeret, fore ut mei Serenissimus Rex haberet rationem. Nec multo adeo post, actum mecum de professione Historiæ & prudentiæ Civilis in Academia Cantabrigiensi. Postmodo etiam majoribus promissis tentatus fuit animus meus. Sed uxoris valetudo, & alia quædam hic detinebant. Amici Angli dicere, sic quoque mei rationem habitum iri, & si affectum præstare non possunt præsentem quem vellent, præstituros absenti. Ego hæc habere pro affectus magni in-

diciis. Sed cum me pede meo metirer, fore non putabam, ut præter laudem & honestum de nobis iudicium perciperem quicquam. Sed hæc ipsa tanti mihi visa, ut cogitarem de opere aliquando dicando Academiæ Cantabrigiensi, ad quam vocatus essem. Amici auctores esse, potius inscriberem Illustrissimo Duci Buckinghamiæ, Academiæ hujus Cancellario. Ita enim me, Illustrissimo Duci, magno Mæcenati litteratorum, & simul Academiæ cui ille præesset, rem facturum gratissimam. Placuit consilium. Exemplar ut ad Ducem, ita ad Serenissimum Regem Carolum transmissi. Quemadmodum & tertium dedi Serenissimo Bohemæ Regi. Etiam misi ad Archiepiscopum Cantuariensem, & quosdam alios ex Ecclesiastico ordine. Ira auctores erant amici; nec videbam, quorsum hæc tenderent. Aliquanto post inopinato nuntium accipio de Canonicatu ab Serenissimo Rege Carolo mihi inter Cantuarienses collato. Multum debeo Britanniae, & plus quam exsolvere possum. Ante omnes Serenissimo Regi; hinc Illustrissimo Duci; item Episcopo tum Bathoniensi & Wellensi, nunc Londinensi. Etiam Legato tum Carletono, nunc Secretario Regis, & Vicecomiti Dorcestrensi. Sed omnes commemorare non attinet. Meum erit publicis etiam scriptis erga eos gratum animum testari. Si hebdomadibus paucis Illustrissimus Dux superfuisset, etiam de suo mirè liberalis fuisset. Jam per amicum suum, virum magnum, id mihi scribi jusserat. Audio decrevisse tria florenorum nostratum millia. Jam de eo collocutus erat cum suis. Sed immani scelere nefarii parricidæ fortuna hac excidi. Et sane sic quoque æternum obstrictus ero Duci, & Magnatum tot aliis in præclarâ hac gente. Venio ad alia. Heinsius Ordinum Generalium Historicus est. Putat se intra mensem unum & alterum posse divulgare Acta superioris anni, in quibus præcipuè erit obsidio ac victoria Sylvæ-ducentis.

In Epistolis Scaligeri ab eo editis P. 670. locus, qui te spectet, est Epistola *vers. 2.* CCCLV. ad Car. Labbæum. Ubi nomen tuum disertè in *αὐτοῦ ἐξου* exprimitur. Exteri, quis signetur, nescient, quia nunc pro nomine tuo positus asteriscus. Sed de Civibus tuis nescio an idem promittere liceat. Quippe nuper quidam qui *αὐτοῦ ἐξου* non viderat, referre mihi hunc locum, nec dubitare se, quin tu potissimum signareris. Causam, unde conjecturam hanc caperet, addebat. Sane dolet, quod quidam tam stultas opiniones, aut viro maximo inseverint, aut saltem aluerint. Nihil tamen hæc malignitas nocere tibi poterit, qui jam diu  
supra

supra invidiam es. Multa adhuc alia, quæ scribam, occurrunt. Sed inter scribendum decies sum avocatus; & jam tertio sororis tuæ filius Latius literas urget: quia tempus instat, quo nautæ Amstelodamum solvunt. Scribam de cæteris brevi: etiam de quibusdam, quæ Statum publicum pertinent.

Uxorem tuam mea salutat, filia filiam ἀνταρτή, filii vos omnes. Rivetus etiam, Barlaeus, Vossius, alii, plurimam salutem adscribi jusserunt.

Raptim cō Ioc xxx. Post.  
Kal Maias. Salutabis & V.  
clar. Laurenbergium & alios  
Collegas. Πάλην ὑπὸ  
ῥαυτο.

Tuus æternum,

G. J. Vossius.

### CXV.

*Reverende in Christo Pater, Domine Illustrissime.*

Quamquam non mediocrem ceperam dolorem ex obitu illustrissimi Comitis Pembrochii, cujus summam erga me humanitatem persenseram coram, magnumque ad promovenda studia ardorem facile perspexeram, ex tot MSS. thesauro, quo Bodleianam Oxonii tui Bibliothecam liberalissimè adauxit verèque immortalis beneficio obstrinxit: in hoc dolore tamen meo, non mediocriter illud me recreavit ac refecit, quod cum & nobilissimæ Academiæ Cancellarius idoneus & tanto heroi dignus successor quæreretur, ad te potissimum itum sit: quo his temporibus exulceratis non alter ei muneris aptior videretur: qui etiam pro boni publici amore summo humeros gravissimo huic oneri supponere (ut sperabitur) velles. Deum oro, ut hæc honoris accessio & tibi & imprimis Oxoniensibus tuis perutilis sit ac salutaris. Eodem pene tempore gratissimum hunc nuntium intellexi, ex amicis, serenissimum Dominum nostrum Regem Carolum prole, eaque mascula auctum esse, quam Deus heredem tot Regnorum & Patri & Britannię vestræ conservet, seroque succedere velit sceptris paternis. Optabamus hic itemdem felicem partum illustrissimæ Principis Arautionensis, sed illa postquam diu cum tertiana conflictata est, abortum fecit, ac mirè adhuc languet. Auctores sunt medici, ut ad discutiendas morbi reliquias se ad balnea conferat Aquisgranensia & aquas Spadanæ. Et jam ab illustrissimis Principibus itineri destinatus erat proximus dies Martis. De Comitatu & totâ itineris ratione decreta

omnia. Pro Ecclesiastè in via futurus erat collega meus conjunctissimus Andreas Rivetus Gallus Theologiæ Professor. Cum ecce triduo superiori iterum infirmior est reddita: ita ut plerique metuere incipiant, ne ea res omne hoc negotium diutius differre cogat. Nescio quàm verè, non absurdè tamen eos sentire arbitror, qui distitant coqui ac macerari eo Domini Principis animum, quod videat tantum illorum dissensum penes quos est Reip. potestas Ecclesiæque administratio. Unde illud quoque consequitur quod videt mariti sui, quem sic amat, aures oppleri variorum querimoniis, ut nihil gravius dicam. Ille nihilominus aures utrique parti præbere, concordiæ utrobique studere, omnia potius bono publico metiri, quàm lubitu paucorum. Hagæ adhuc est Dux Neoburgicus. Is hæreditaria Cliviæ & vicini soli oppida reposcit, quæ in nostra sunt potestate. Nostri se paratos reddere profitentur, simulac de hæreditate herciscunda inter eum & Electorem Brandenburgicum convenerit. Quamquam profectò utcumque nulla inter eos lis amplius foret, prius necesse esset restitui graves impensas quas iis in locis Ordines nostri fecere. Itaque, ut puto, spissè illa redditio procedet: præsertim quamdiu nobis à Cæsare metuimus. Matthiam Martinium Bremensem Theologum nosti, ut arbitror, vel ex tot Scriptis, vel ex eo quod Synodo interfuerit Dordrechtanæ. Is ante sesqui mensem decessit non levi dolore meo. Erat Vir enim undecumque doctissimus: in Germania quidem majorem virum non noram: & in hoc Ecclesiæ diffidio multum de facienda concordia cogitabat: omnino plus æquitatis in eo reperi, quàm multis aliis, cujus rei testes habeo Literas non unas, quas ad me scripserat. Et quæ viri erat ingenuitas, ad hoc studium profitebatur sibi plurimum profuisse nostram de Pelagio & Massiliensibus Historiam. Institutiones oratorias meas jam acceperis spero, sed sine Literis ullis. Tam subito enim portitor abitare parabat, ut vix sermonem cum eo mutandi tempus daretur. Spero operam quam illi studio impendimus, non displicituram ullis qui Literarum & Eloquentiæ sint amantes. Quod verò in mea ad Lectorem præfatione dico, idem hic dico; gaudere me quod opera illa sim perfunctus; ac reverti liceat ad Historiam Ecclesiæ veteris diutius quàm par erat intermissam. Nec enim ultra video quid morari possit: nisi quòd Linguae Latinæ Commentarios quidam pene cum convitiis exposcunt. De quo nihil hoc bimestri proximo statuere possim: sed potero Typographis revertis à nundinis Francofurtenibus. Interea nos antequam

riquitates Ecclesiæ detinebunt, ad quas jam diu anhelavi; non quasi à Literis unquam alienus sim futurus, sed adhibere eas volo non ut opus, sed ut operis accessorium. Non diutius te, illustrissime Domine, morabor, si unum hoc addidero, me hæc hebdomade fuisse in Aula illustrissimorum Bohemiæ Principum: atque ibi locutum mecum ex Anglia reducem illustrissimum Britannicæ Legatum, qui prolixè mihi exposuit summum erga me amorem tuum. De quo quidem persuasissimus & antea fui: sed tamen per jucundum fuit ea quoque cognoscere ex ore tanti Herois, & quidem qui ista diceret tuo nomine: ut cum tam nobile par cogitarem, & quis ego homullus forem, tacitus mecum admirarer bonitatem Dei, qui mihi conciliasset hos amatores mei.

Quamobrem Deum Opt. Max. rogo ut te Illustrissime & Reverendissime Domine diutissimè Ecclesiæ Britannicæ, & simul etiam mihi amorem hunc tuum conservet.

Lugd. Bat. cl.º Ioc  
xxx. Non. Sextil.  
St. vet.

Reverendissimi & Illustris-  
simi nominis tui devotissi-  
mus & obstrictissimus  
Cultor,

G. J. Vossius.

## CXVI.

Joanni Vossio.

Charissime Fili,

**T**Andem accepi aliquid à te Literarum. Hæ minutis illis exceptis, quibus Ungari Literas incluseras, primæ earum sunt, quas acceperim ex quo Britanniam corpore magis quam animo reliqui. Utrum plures scripseris, tu melius scies. Sed omnino diligentior te in hoc Epistolari officio esse velim. Fuit interim Epistola tua eò gratior, quòd eam comitarentur Literæ præstantissimi Halli, quem ego virum si non amarem & æstimarem, ob egregias animi dotes, at saltem diligerem ob affectum egregium erga utrumque nostri. Respondissem ei jam nunc. Sed quædam impedire. Fiet id post dies paucos: simul tum ad te copiosius, ut spero, de nonnullis perscribam. Insimul aliquod exemplar transmittam Oratoriarum nostrarum, quæ tandem (beneficio Dei) ad finem perductæ. Nunc vix alia scribendi ad te causa est, quàm ut scias, quid ex primo trimestri proventus annui ex Præbenda Cantuariensi, qui quidem hoc anno exspiravit, fieri velim.

Nempe octonæ Libræ Sterlingicæ cum dimidia tibi annuerabuntur: undecim verò cum dimidia dabuntur Joanni Nabradi Ungaro, qui Sacris Literis Oxonii operam navat. Populares ejus mihi annuerarunt hic Imperiales, sive Joachimicos Dalcros quinquaginta. Id Britannicæ monetæ tantum esse, ac dixi, cognovi ex præfecto negotiationis Anglicanæ qui Delphis in aulâ agit. Atque idem mihi Dubletius & alii affirmarunt. Nam ut aliis, sine damno meo gratificari sum paratissimus, ita iniquum est, ut beneficentia mea sit fraudi mihi. Scripsi de re tota ad Clarissimum Casaubonum. Literas eas inclusi iis quas nunc mitto. Tu postquam eas legeris obsignabis, & amicissimo viro mittes, nec ubi pecuniolæ hoc acceperis, propterea te in Libris emendis infumere universam velim, aut partem meliorem. Satis sit si istis sacri studii initiis Anglicana evolvas Biblia, assidueque rumines tum Linguae causa, tum imprimis ob argumentum divinum. Quamquam non impedio si unum, alterum, tertium scriptorem addas eadem Lingua. Sed per nimiam copiam diffundere te non debes. Scis illud Senecæ, Qui ubique est, nusquam est. Habes ornatissimum & amicissimum Hallum, habes alios, quorum ex consilio studia hæc possis componere. Nec penitus iccirco ventis tradi velim, quæ in Medicina vel Juris studio hauseris. Multis & miris casibus obnoxia est vita humana. Forte ab alterutro eorum quandoque tibi vel honos surget, vel erit unde tueri vitam cogaris. Scis optime quomodo ego postquam foeda illa tempestas nostram concussit Belgicam, nunc sacra nunc externa studia sim professus. Male mihi fuisset nisi fuisssem, quod ait ille, in utrumque paratus. Interim sacra potissimum cordi sunt. Studiis cæteris nihil si sacra exceperis, dulcius est: sacris verò nihil etiam augustius. Non sunt beati qui super aurum & gemmas calcant: sed sunt beati qui mente piâ ac devotâ Verbum Dei legunt ac relegunt, unde & religiosos vocari arbitrantur nonnulli. Nihil illo melius habet orbis, quippe auro magis aurum est, gemmis magis gemmeum. Sed frustra in eo evolvendo eris, nisi Spiritus Domini te dirigat. Hunc exposce à Deo & impetrabis. Nos etiam assidue pro te vota faciemus. Vale, Charissime fili, & quos hactenus salutare Literis meis iussi, iis iterum meo nomine plurimam salutem dicito.

Lugd. Bat. cl.º  
Ioc xxx. Prid.  
Non. Maias.

Tuus natura & af-  
fectu Pater,

G. J. Vossius.

CXVII.



## CXVII.

Merico Casaubono S. P.

**M**aximæ mihi voluptati fuit, præstantissime Casaubone, quod proximis mihi diebus retulit hic amicus Anglus, Mercenatem nostrum, Illustrissimum & Reverendissimum Dominum Episcopum Londinensem factum esse Oxoniensis Academiae Cancellarium. Outinam vera audierim! Decretum ea-propter Hagam excurrere cras vel perendie, ut certiora cognoscam. Quod si vera nunciant, mihi quidem gaudebo, & summo viro gratulabor, cui hæc honoris accessio facta sit; sed magis gratulabor publico & Oxoniensibus; quibus hæc turbidâ tempestate, quæ Reformatas Ecclesias usq; adeo concutit, tam cordatus atque idoneus obtigerit gubernator. Oratoriæ tandem sunt absolutæ. Misissimè nunc & Venerabili domino Decano, & tibi exemplar: sed occasio deerat: quæ simulac se obtulerit, non patiar eam effluere. Jam ejus mihi spem fecit quidam, qui vel ipse in Britanniam proficisci parat; vel saltem mercimonia sua in Angliam transmittit. Academia nostræ Curatores cogitant de advocando huc Clarissimo Salmasio; idque ut eo hic loco sit quo magnus olim Scaliger fuit. Faveo viro utroque quod dicitur pollice: etsi non ignorem, aliud optare amicum nostrum qui eum sibi honorem potius deberi arbitratur. Ecquid effecturus sit apud nostros difficile sit dicere. Sed post unam alteram hebdomadem (ni fallor) exploratius aliquid perscribam. De Pharnabuka, Brasiliæ metropoli à Batavis capta, jam sine dubio rem omnem intellexeris. Quare operæ in ea narranda parcam. Deus faxit, ut victoria hæc illis in terris plures alias secum trahat. Certè magna ejus rei fiducia tenet nostros. Nec alius est modus, quo magis Hispano incommodare possimus. Sanè, maximus ille Paulus Servita apud Venetos ita semper dictitabat, Non esse meliorem viam ac rationem infringendi vires Hispanorum, quàm si Batavi Americam infestent. Parum illud hosti nocere, si in Belgica pauca ei eripiamus oppida. Palmarium fore, si eum ejiciamus terris istis unde illi opes, nervus belli. Vellem idem animus fortissimæ Britannorum genti foret. Jure enim non Rebuspublicis modò, sed etiam Regnis omnibus suspecta esse debet nimia Austriacæ domus potentia. Necdum perscripti quid fieri velim pecuniâ, quæ Regiâ benignitate mihi à Cantuariensi Præbenda cedit, primo hujus anni trimestri. Velim

autem inde filio Joanni annumerari Libras Sterlingicas octo & dimidiam: undecim verò & dimidiam Nabradio Ungaro, Theologiæ apud Oxonienses studio: Uterque ea de re ad te perscribet. Residuas Libras quinque asservari à te velim, usque dum alteras literas miserò. Rogo præterea, certior me facias, quo tempore expiravit primum trimestre, ut deinceps in apochis eum addam. Quod si non bene concepero formulam apochæ, per literas mone. Video quàm tibi molestus esse cogar. Utinam gratum testari aliquando animum possim. Operam quidem dabo. Vale vir atque amice summe, meoque nomine plurimum saluta venerabilem Dominum Decanum, & Universum Collegium nostrum. Reverendus Dominus Rivetus plurimam salutem tibi adscribi petiit; uti & Clarissimus Heinsius, cui me scripturum ad te dixeram. Idem se notat suas in Horatium ad te missurum recepit.

Lugd. Bat. cl. loc xxx.

Pridie Nonas Maias.

Nocte intempesti.

## CXVIII.

Georgio Archiepiscopo Cantuariensi.

Reverendissime Pater, Domine Illustrissime,

**C**rebro ejus temporis in mentem venit quo coram licuit ut Poeta ait

— audire &amp; reddere voces :

quò etiam tanto à te adiciebar honore, què non alteri post serenissimum Regem debere malim. His non mediocriter animatus, magis & magis operam do, ut bene mereri possim de Ecclesia Dei & Republ. Literariâ. Ac partim quidem omnis sum in scribendis novis, partim in iis, quæ jam ante in lucem emisi, augendis & limandis. Ex quibus sunt Commentarii nostri Rhetorici, opus jam ante annos amplius xxiv. publici à me juris factum. Batavis jam tum illud dicâram, ut non debuerim nunc aliis quamvis nihilo secius de me meritis consecrare. Exemplar ejus operis transmittito, atque ut à cultore tui devotissimo serenâ fronte suscipias, etiam & etiam rogo. Is qui de manu, (ni fallor) in manum tradet, est nobilissimus adolescens, Adamus Jerslaus à Berg, Moravus, Joannis Christophori de Berg filius. Quo loco pater ante novennium hoc fuerit apud suos, vel unum illud indicio erit, quod serenissimus Bohemiarum Rex eum potissimum ex nobilitate, præfesse voluerit

Voluerit cunctis Moraviae terris, quas quidem hereditarias accepisset. Earum enim peres nobilissimum huic virum gubernatio fuit, cum titulo supremi praefecti. Sed majus est quod sinceræ Religionis assertor, ac meliorum partium defensor acris fuit. Tantus vir nunc patriæ extorris, bonisque patriis & avitis exutus, opem eorum implorat, qui bonis & bonæ causæ, semper optimè voluerunt. Sexennium apud nos cum Uxorē & Liberis ita vixit, ut bonis semper charissimus foret. Nihil quoque uxore ejus (ut intelligo) vel melius vel cordatius; neque item Liberis suavius quicquam. Ex quibus notus mihi natu maximus adolescens erectæ mentis, & qui omnino præclari aliquid promittat. Annos habet prope sexdecim, & pro tempore quo studiis operam dedit bene profecit. Ultimam ejus in Britannia haberi ratio possit, imo & fratrum atque adeo & parentum. Quos ego vehementius commendarem, partim quia sic eorum virtus meretur, partim quia sic postularunt aliqui ex Collegis. Sed cum intelligam & à Serenissimo Bohemæ Rege, & aliis qui auctoritate plurimum possunt, id sedulo factum esse, non operam arbitror meam vel cujusque mei ordinis magnopere eam ad rem requiri. Committere tamen non potui quin hinc proficiscētes, saltem votis meis prosequeretur, ac quomodocumque etiam apud te affectum testarer meum. Deus te, Reverendissime Domine atque Illustrissime, diu Ecclesiæ suæ totique Britanniae sospitem conservet.

Lugd. Bar.  
elo lxx.  
Id. Sextil.

*Illustrissimi ac Reverendissimi nominis  
tui cultor devotissimus & obstrin-*  
*ctissimus,*

G. J. Vossius.

### CXIX.

Johanni Meursio S. P.

**N**ON soli vivunt Gomarus & Meursius, qui Danzi aliorumque exemplo, Lugdunensem Scholam alia commutarint. Nam iis ille ego Vossius tuus accessi, qui Amstelodamum commigravi, atque ibi hæc nunc scribo. Miraris scio. Nec sane id ego unquam fore antehac credidissem. Nimirum multa hominū inopinatio obtingere videmus. Occasionem, scio, & causam consilii ejus aves cognoscere. Jamdiu est, quod Amstelodamenses vident, quanto cum periculo se liberosque suos exponant, dum carissima pigno-

ra, priusquam vitæ modum sciant, mittunt Lugdunum, ubi licentia indies gliscit. Sane paucis abhinc annis plures commissæ cædes, quam multo plurimis antehac. Ulceri huic Chironio non aliter medicinam se facere posse, judicant, quam si Professores aliquot alerent publicè. Atque ego, & Barleus, idonei vili sumus, à quibus professionis primordia ducerentur. Idem labor ac honos mihi in illustri hac Schola futurus, ac Lugduni: Sed stipendium prope altera parte majus. Præterquam enim, quod luculentam domum assignarunt, annuos numerabunt bis mille florenos, & quingentos. Ad hæc me meosque spe non unâ implerunt. Nec fallent, scio, qui jam affectum exerere cœperunt erga filium meum Franciscum, urbis suæ Advocatum. Sed Leidenfenses magnopere huic instituto refragantur. Contendunt hoc adversari urbis suæ Privilegiis. Quin & illustrium Ordinum consensu compinati fuerit, si Amstelodamenses persistant in proposito, nolle se quicquam in posterum ad bellum conferre. Tandem inter Procures harum urbium convenit, ut Curia utraque Hagensis, rebus expensis, intra mensem statuatur de mente verborum, quibus Leidenfense Privilegium concipitur. Interea Amstelodami à publicis Electionibus abstinébimur. Nihil periculi est, ne adversus eos sententia feratur, qui hæcenus vocati. De Juris prudentia verò & Medicina, ac imprimis Theologia, operosior fuerit disquisitio. Sed negant Amstelodamenses de eo disputari debere, priusquam aliquos ad eas profitendas vocarint: Prodiit tandem Denarius tuus Pythagoricus. Ac decem ejus Exemplaria mitto, idque ex xxv. quot ægerrime exsculpere potuit ab Euclione illo, qui edidit. Ex residuis duo mihi reservavi. Unum Venetias misi ad Molinum: alterum Lovanium ad Puteanum. Præterea exemplar, uti jufferas, dedi Mylio, Riveto, Cunnæo, Vorstio, Heinio, Barleæo, Scriverio, Buchelio, & præterea tribus aut quatuor aliis in dignitate constitutis. Sed tamen plura si exposces, non finam ea à te requiri. Mitto & Epistolas quatuor Canonicas Syriacæ ab Elzevirio excusas venustissimis typis, una cum interpretatione & Notis doctissimi Pocockii Angli, qui hocce anno in Syriam profectus. Cur noluerim te hoc opusculo carere, nihil æque in causa est, quam quod mihi fuerit dicatum. Pro Historia tua Danica gratias ago summas: uti & pro Ælnotho Monacho. Scis, quam mihi illa omnia sint accepta, quæ ad Historiam novissimæ etiam antiquitatis pertinent. Quanto magis jucunda sint, si tuo prodeunt beneficio & cura? Attamen magis Historia me Danica oblectavit; tanto nempe magis, quanto

quanto illa plus tibi debet. Dicitio mirè placeat; candida est & terſa, penitusque Romana. Adhæc perſpicua planè, quod ego in magna laude pono. Vellem ab hac parte tam felix eſſet Heinſius in ſua Sylva Ducis. Opus eſt quidem elaboratum, & in quo multa ſint ingeniū lumina, ac doctrinæ: ſed dum Tacitum ſe æmulari putat, ac *τῷ μάλιστα* nomen affectat, dicitio ejus ſæpe nativum illud deperdit, inque obſcuritatem tantam incidit, ut crebro nec à ſagaciſſimis & prudentiſſimis viris intelligatur. Quibus tamen Tacitus & veterum alii, ſatis ſunt plani & aperti. Hæc non mei uniùs ſententia eſt, ſed pene omnium, qui non palpum ei obtrudunt. Quod familiariter ad te ſcribere non dubitavi, pro neceſſitudine amicitiæ noſtræ. Idque eo lubentius, ut ſcias, occasione hac à multis prædicari, quæ de Auriaco Principe, atque induciſcriptiſti. Et ſcio magis eſſe prædicaturos, ubi Danicam tuam Hiſtoriam legerint, quæ pauciſſimis adhuc viſa eſt. In Heinſiano illo Commentario, quem dixi, quædam etiam Generales Ordines & alios in dignitate conſtitutos, offenderunt. Itaque abſque Beaumontio fuiſſet, vix etiam cum quædam juſſiſſet recudi, privilegium ab Ordinibus fuiſſet conſecutus. Omnino multum & ſudandum fuit, & tamen ne ſic quidem ſatiſfecit: jure ne an injuria non diſputo. Tu vero hanc partem literarum cum legeris, litura una obduces: vel totam Epistolam conſcindes. Nihil enim attinet alios poſthæc ſcire, quæ ſcriptitamus liberè inter nos. Nondum dicere poſſim, quando futurum ſit, ut Rutgerſii *τῷ μάλιστα* Bibliotheca auctione diſtrahatur. Promiſerat Heinſius id fore ante Paſchales ferias. Sed illæ jam elapſæ, nec certi ex eo quicquam potui adhuc cognoscere. Interim ſpoſpondit, non alteri ceſſuros libros, quos petiſti, ne quidem ſi juſto majus prætiū offeratur. Suaneburgio nemo hæcenus in profeſſione ſurrogatus. Ambiant id munus Hupertius advocatus, Bronchortius, Vortius junior, Vinnius & Cavellarius. Juſi-conſultus veſtras, quem mihi per literas commendâras, longe mihi tua cauſa, & ob eximiam probitatem gratiſſimus tuit. Utinam verò etiam affectum oſtendere liceret erga filium incomparabilis Herois Oliveri Roſen- crantzii: Sed de ejus adventu nihil hæcenus intellexi. Nec eas videre literas contigit, quas per eum miſiſſe te ſcribis. Suſpicio in aliam prius Academiam conferre ſe voluiſſe, priuſquam ad Batavos proficiſceretur. Ubi venerit, non ſinam te quicquam in me deſiderare. Omnino propter magnitudinem Herois omnia officia ejus filio præſtabo. Simul etiam propter commendationem tuam. Al-

terutrum horum ſufficeret; nunc ea concurrunt, quorum ſingula per ſe ſatis ponderis haberent. Solonem tuum videre aveo. Quæſo quomodocunque potius tua ede, quam ut diutius ea cum blattis & tineis rixentur. Nihil æque mihi dolet, quam quod non te ſolum carere cogar, ſed tamdiu etiam careamus tot aureis monumentis tuis. Cognoscere deſidero, annon brevi, vel anno ſaltem hoc, decrêris inviſere tuos in Batavia. Jam biennium eſt quod ſic receperas. Sed hæcenus ſpe vana læſtaſti. Ubi Amſtelodamum acceſſeris, apud quem divertere cum tuis debeas, fruſtra ſcribam. Ea enim eſt amicitia noſtra, ut liquido illa tibi ſatis præſcribat. Salutat tuam uxorem uxor mea, filiam filia, imo omnes nos vos omnes. Etiam clariſſimis Collegis tuis, præcipuè Laurenbergio & Stephanio, plurimam meo nomine ſalutem dicit.

Amſtelodami  
clō loc xxx.  
iv. Id. Maias.

Tuus ex aſſe,

G. J. Voſſius.

### CXX.

Guilielmo Episcopo Londinenſi, Gerardus Voſſius S. P.

Tardiùs quàm ſperaram literas meas vi- des, Reverendiſſime Pater, Domine- que dignitate illuſtris, ſed pietate, doctrina & meritis longè major. Nonis Decembri- bus, ut fortaſſe ex Nobiliſſimo Carletono intellexeris ſalvus ac ſoſpes Lûgdunum veni: octiduo nempe ex quo è Britannia exceſſi. Divina gratia eodem hic omnia reperi loco, quo fuere cùm abirem. Vix dicere poſſum quantas ſalutantium numerus me primis exceperit diebus: ſermo prope omnis de Sereniſſimo Rege Carolo, vel iis qui ſacræ ejus Majeſtati à conſiliis forent. Judicia diſparia, prout quiſque regiū, vel popularis ſtatus, veteris, vel recentis Eccleſiæ amantior foret. Equidem neutiquam mihi eorum tribuo intelligentiam, quæ ad regni negotia pertineant. Probè ſcio quantopere hæc captum excedant meum, quem Deus in ſtatione longè inferiore collocavit. Sed tamen pietas non fivit, ut non quorundam immodèſtiæ modèſtæ, atque amicæ occurrerem. Eos intelligo qui digito cælum ſibi attingere videntur, ſi quomodocunque nocere eorum nomini, atque exiſtimationi poſſint, quibus ſtantibus & integris, præſens regni atque Eccleſiæ ſtatus convelli neutiquam



neutiquam possit. Quanquam verò apud eos parùm profecerim, quibus, nihil nisi populare, ac novellum sapit; cordatiores tamen scrupulum sibi eximi gaudebant, quem quidam tribunitii spiritus suis calumniis injecerant. Interea totum hoc quod à me factum, pietatis causa factum, quippe qui tantùm Britannis, ac summis ejus viris (ut de Serenissimo Rege taceam) etiam deberem, si nihil deberem. Nunc quantum est quod debeo, verba non reperio *ισόπονα*, quibus satis hoc imprimam, &c. De induciis cum Hispano ineundis, vehementibus studiis in conventu Ordinum certatur. Ad bellum inclinant non pauci, qui metuunt, ne si induciæ fiant, domesticis magis dissidiis laboremus: alii tamen vel maximè, iis occurrere posse arbitrantur. Amstelodamenses ante hebdomadas paucas sua urbe exegere Ecclesiastem quendam: qui licet sæpius à Magistratu moneretur, à tribunitiis ad Populum concionibus, desistere noluisse perhibetur. Est hic ille qui ante plus minus duodecim annos edidit Heautontimorumenon. In quo ex scriptoribus Latinis Græcisque (est enim vir multijugæ lectionis, sed exigui judicii) convicia usque adeò congestit, ut ex plaustro maledicere videatur. Sanè hoc piguisset adscribere, nisi optimus quisque ringeretur, in Reformatæ Religionis hominibus inventum esse, qui Gretzeros Scioppios, & similes vinceret maledicendo. Sed illum mitto, cui ea parte saniores opto mentem, &c. Deus faxit ut longa ætate, Iliacos æquare senes, aut vincere possis. Ita ex animo voveo, meque iterùm tibi devoveo, Reverendissime Pater, Domine Illustre.

*Reverendissimi, & Illustrissimi  
Nominis tui cultor, ac  
clientis fidus addictusque,*

Idibus Jan. An.  
cio dcc xxx.

G. J. Vossius.

### CXXI.

Merico Casaubono.

Quanquam, mi Casaubone, coram abundè perspexi summum erga me amorem tuum, jucundissimum nihilominus fuit videre eundem tantopere spirantem in literis tuis. Solùm dolui ob dolorem quem conceperas ex diutina in scribendo cessatione mea. Nec possum me ab omni omnino culpa immunem dicere. Sed quædam tamen non leviter eam imminuunt. Illud maxime, quod affinis

Junius, quem sine literis meis dimittere nefas putassem, occasione quâdam subitâ præter opinionem & suam & nostram recessit. Vix abierat ille, cùm valetudo uxoris pejor pejorque esse cepit. Erat tum quidam apud nos, qui se propediem in Angliam iturum diceret. Sed totum mensem & ultra me elusit. Sed hæc fuere; quodque peccatum Lethæo poculo mergere debebis. Mihi perstat animus quantæcunque deinceps fuerint occupationes, non illis tantum in me imperii permittere, ut non crebras ad te literas dem. Id non modo exposcunt præclaræ illæ animi dotes tuæ, sed etiam conjunctio studiorum, ac quod collegæ & fratres sumus dignatione Dei & Regis atque opera communis Mecenatis. Quod ipsum etiam (ni fallor) aliquanto nos archæus conjunxit. Serenissimum Regem prole auctum gaudeo, & mascula quidem, quæ vere *ἡγεμὸν δόμων*, ut Euripides dicebat de liberis Regiis. Non legiones, non classes æque firma imperii munimenta, ut Tacitus monet. Quare spero fore ut siqui forte nova anhela-rint, nunc ad officium redeant. Literæ incomparabilis viri Parentis tui necdum prælo subjectæ. Videtur Typographus tricari. Meursius è Sorana Danorum Academia misit aliquot Epistolas ad se exaratas, quas addi petit. Jam mensis est quod Oratoriæ meæ recusæ sint. Eadem quædam Exemplaria ante tres hebdomadas mihi in Angliam ad finem Junium, qui in ædibus illustribus Comitibus Arondelii agit. Horum unum Reverendo Domino Decano, alterum ut tibi detur, mandavi postremis Literis. Vellem non ejusmodi munusculo, sed aliâ ratione, affectum erga collegas meos testari potuissem. Sed id, ut fiat, operam dabo. Tempus solum requiro. Scis enim non esse me, non ausim dicere *ἐν ᾧ ἀνεύρω*, attamen neque *ἐν ᾧ ἐμύρω*. Heinsius totus est in scribenda Historia eorum, quæ superiori anno Batavi terrâ marique gesserunt: præsertim iis quæ ad obsidionem Sylvæ-Ducis pertinent. Obiit ex professoribus Juris Swaneburgius, vir suarum rerum intelligentissimus, sed qui scribendo nullum sibi nomen paravit. Eò magis penes Cl. Cunæum deinceps Juridicæ facultatis honos stabit. Scire aveo quo loco sint res Seldeni, num eodem an meliori. Jam prope trimestre est, quod per literas petii ut Nabradio Ungaro annumerarentur libræ sterlingicæ undecim cum dimidia. Quas si necdum accepit, quæso ne diutius ea res differatur. Scrupulum illud injicit quod, ut ex popularibus ejus intelligo, domicilium pettilentiae causa mutavit. Quare fieri possit ut aberrarint Literæ, quæ ejus negotii causa missæ ad illum fuerant. Postularam etiam

ut filio Joanni de meo dentur libræ Sterlingicæ octo cum dimidia : quamquam nec repugnem, si inde fiant libræ decem. Puto enim ob Pestilentiam grassantem pluribus egero. Quia verò tardè adeo literæ procurantur, pleræque etiam intercidunt, rectè me facturum putavi, si tribus ad te verbis perscriberem quid in rebus ejus fieri velim. Cum in Angliâ essem ex pluribus cognovi, sufficere si ei quotannis annumerentur de meo libræ Sterlingicæ quindecim vel summum viginti. Quare placet ut trimestri quolibet de meo detrahantur libræ Sterlingicæ quatuor vel summum quinque, nisi *Scilicet* non obvenierit, quod in hoc morbo epidemico paulo aliam quinæ rationem cogat. Quod ad residuas libras xx. eas trimestri quoque accipiet Ackertius mercator Belga qui Londini agit. Temporis angustia non sinebat, ut ad eum nunc literas darem, sed fiet illud post paucos dies. Eas postquam ad te miserit, quæso effice ut pecuniæ illi numerentur. Ego cum damno non ita magno ab eo recipiam qui hic negotia ejus procurat. Quod si meliorem viam scias, fac me certiore. Vale, amicissime Casaubone, & à me, uxore, & meis salve, una cum lectissima Uxore, ac plurimum etiam saluta Reverendum Dom. Decanum ac venerabile fratrum nostrorum Collegium.

Lugd. Batav.  
clō loc xxx.  
xx. Julii. Stilo  
novo.  
Tēgē, nocte  
intempesta.

Tuus tuo merito,

G. J. Vossius.

## CXXII.

Doctissime & Amicissime Pococki.

Mitto ad te viginti exemplaria utilissimi laboris tui, quem iv. Apostolicis Epistolis impendisti. Spissius aliquanto processit editio quam vellem. Sed leve illud, dum emendatè satis prodeunt, uti spero. Saltem operam id dedit filius Dionysius quem coram vidisti : & imprimis de Dieu qui postremam relegendi curam in se suscepit. Non jam repetam quantopere me affectu atque honore hoc obstrinxeris. Feci alias, & tu id me scribere non pateris, quæ tua est humanitas. Quare priora non repetam. Non desinam tamen cogitare, quâ ratione affectum erga te testari optime possim. Mitto Oratoriarum ad te Institutionum mearum exemplar geminum. Quarum unum tibi reserves, alterum ornatissimo & amicissimo M. Rouse dabis.

Et tertium quartumque amicis aliis addidifsem nisi hominem amicum ad vos euntem, ulterius gravare molestum fuisset. Accedit quod ne illud quidem scirem, an Oxonii uterque sitis, an minus; audio enim totâ pene Angliâ vehementer grassare pestilentiam, eoque quibus id integrum est, penè omnes se in agros recipere longius distos. Non dubium quin ea potissimum causa sit, cur vix quisquam mihi ex Angliâ hoc trimestri proximo responderit. Pluribus rescribam, simulac cognoro non frustra me scribere. Simul tum ad D. Rouse, quem merito maximi facio, & faciam semper, de nonnullis exarabo. Salutabis plurimum amplissimum D. Cancellarium, atque omnes summos viros, à quibus tam humaniter supra merita mea me exceptum apud vos esse tute nosti, ut Catalogum hic texere non habeam neceffe. Raptim,

Lugd. Batav.  
clō loc xxx.  
vi. Id. Sext.

Tuus ex animo,

G. J. Vossius.

## CXXIII.

Joanni Vossio.

Charissime Fili,

Quas per ornatissimum Maderazi Ungarum literas miseras, accepi xix. Julii; florenos xxi. quos ab eo mutuo sumpteras restitui. Valere te gaudeo, præsertim hoc tempore, quo ut ex aliis etiam intelligo Pestilentia usque adeo apud vos grassatur. Tuum erit sedulo habere rationem valetudinis tuæ, ac quibusdam etiam amuletis uti, quemadmodum hic facere solemus cum morbus idem dominatur. Hæc plurimæ illo domus sunt infectæ; nec pauci jam decessere ex eo, sed ferè ex facie vulgi. Quod si contagio hæc latius ibi serpsit, revocabo huc Franciscum nostrum. Quanquam neque hac in urbe plane ab ea immunes sumus. Sed hætenus malum illud intra paucillas ædes consistit. Ubique sumus in manu Domini: qui dabit quod erit salutare. Interea lætor Collegium vestrum longius abesse ab Urbe; adeoque illud spaciosum esse ac loco situm salubri. Non mediocriter me excruciat, quod te videam tam parum tuâ forte esse contentum, planeque etiam metuere ne omnem vitam sic consumere cogaris. Mihi longè alia spes, atque adeo fiducia, dummodo omnes nervos contendas, uti recepisti. De studiorum genere tui rem omnem arbitrii feci. Non quasi desultorium vitæ

vitz genus amem, sed propter Poetæ illud,

*Tu nihil invita dices faciesve Minerva.*

Hæc sola res fecit, ut Medicinæ te paterer valedicere: etsi rationes essent parum validæ quibus ut ei renuntiaries, compelli te aiebas: idque eo tempore cum intra menses paucos summam te lauream consequi posse existimarem. Sæpe damnavi hanc facilitatem meam: Sed quid facerem, cum quanto ego magis adhortarer, tanto tu magis abhorreres? Postquam permisi ut vel ad Jurisprudentiam, vel ad Theologiam animum appelleres; tamen nunc quoque mihi videris animo fluctuare, cum tamen brevi temporis spatio, & hoc & illud absolvi possit; dum ne tu laborem ullum metuas, sine quo nihil præclari unquam consequeris. Non deerunt tibi in Britannia fautores, dummodo ne indignum favore te præstes. Et si cessaret Britannia, haberent tui rationem amici in Batavia, qui te aliquod ad munus revocarent, in quo te patriæ & tuis ornameto fore putarent. Nunc quid faciamus, num idoneus sis ut in Academia, vel Schola quapiam illustri profitearis vel Linguam, vel Mathesin, vel Philosophiam, vel facultatem Juridicam, aut Medicam aut Sacram? Prope omnium gustum habes: sed in uno animum defigi opus fuit: quod quia factum non est, fieri deinceps oportet, ut videamus ecquid hic pro te possimus. Fortasse malis tui rationem haberi extra Academiam. At in quo, ut urbis sis Medicus, an ut ejus Advocatus? ad neutrum satis es paratus. Longeque minus (ni fallor) ad Sacrum Ministerium. Quæ cum ita sint, excitare pectus tuum debes, ut ne indignus sis cujus vel in Britannia, vel apud nos ratio habeatur. Facilius mihi erit sacra mea omnia, ut loquuntur, commovere, ad te per amicos juvandum, quam tibi præstare aliquid egregio favore dignum. Tantum animum intende. Dimidium facti, qui cœpit, habet. Sapere aude, ut bene monet Horatius. Aude, aude, mi Fili, contemnere voluptatem, amareque laborem, quem tu si amabis, non diu querulis Literis erit opus; præsertim me vivo, cujus causa multi aliquid velint. Non dubito quin jam à Clarissimo Casaubono acceperis eam pecuniam de qua scripseram. Neque tu modò, sed etiam Nabradius Ungarus. Quanquam is jam non amplius Oxonii, sed (ut puto) Londini vivit. Crebras ille Literas ad populares suos huc misit, quibus conqueritur quòd jam tertius sit mensis, quo à me pecunias exspectat, sed frustra; quia meas necdum Literas viderit. Itaque iterum ad præstantissimum Casaubonum scripsi. Nec enim

fatis est ut tibi anumeret eam summam, quam jussi, sed Nabradius etiam satisfieri æquum est. Quippe hic populares ejus mihi CXXV. florenos annumerarunt, qui Anglicana pecunia valeant Libras Sterlingicas undecim cum dimidia, modo quamprimum persolvantur. Sin necdum accepit, iniquum haud erit, si hic Ungaris refundam unum alterumque florenum, propter damnum quod Nabradius ex mora hac accepit. Atque ita quidem facere perstat animus. Addam rationem quæ existimem tibi in posterum consuli posse. Nempe jubebo ut Clarissimus Casaubonus, vel is qui in Anglia ab eo accipiet, proventum nostrum singulis trimestribus, quando voles, modo justum tempus expirarit, tibi annumeret Libras IV. Sterlingicas. Quod si te parcum & industrium ostendas, non dubitabo pro quaternis assignare quinas, ita ut quotannis sis habiturus tum Libras Sterlingicas viginti. Quod sit supra ducentos florenos nostrates. At tu centenos poposceras. Ego sponte centenos & quinquaginta addideram. Nunc etiam ut tibi animos addam, pretium augeo sed conditione quæ dixi. Quàm sum tibi lenis pater in re angusta! Ultra si poscas, frugi non sis, nec ea liberalitate dignus. Florenos illos XXI. quos hic refudi non detrahā tibi; sed iis tu emes mihi & aliis, eos Libros de quibus scripsi nuper. Sed facies illud quum maximè opportunum erit. Nolim enim te propterea Londinum excurrere, ne inutiles sumptus facias, & tempore adeò contagioso, periculo te exponas. Tu crebro ad nos Literas da: præsertim si quis erit qui ex vobis ad nos veniat. Causam non adscribo: quæ non solum est quod sumptibus parcur, sed & quia tutius scribitur. Sed si talis non occurrat, tu quomodocumque scribe; siquidem deesse materies tibi nequit: si non aliunde, saltem argumentum fuerit idoneum ex studiis. Desidero enim scire quomodo jam studia componas tua, & an eos tibi fructus capere videaris, quorum minime poeniteat. Ex cognatis (ut aliquid de aliis rebus hisce Literis appingam) nupsit superiori hebdomade Antonina Corputia. Viviano nomen est novo marito. Vir est ut non ineruditus, ita & nobilis & honestus & prædives. Eoque hæc scilicet fororibus licet natu minima, videatur. Conviviali festo etiam interfuit frater tuus Franciscus: si non ob arctam sanguinis conjunctionem, at quia illi sponsæque eadem mater, non quæ illos pepererat, sed ut cum Plauto dicam, quæ mammam dabat. Surandyburgii defuncti locum in Cathedra ambiunt Vinnius rector Scholæ Hagienfis, Cabelavius Epitolarum editor,



editor, quas tamen an videris nescio, Bronchorstius Hubertius, is qui novam Psalmorum Paraphrasin vel Metaphrasin potius producit, & Vortius junior. O utinam eos fecisses progressus, ut inter eos nomen numeretur tuum, aut pro te liceret ambire. Non deerat animus fratri Francisco ad eum prestandum. Sed dissuasi; neque hoc alia de causa quam quia ob ætatem immaturus videretur. Absque ea esset, calcar addidissem. Nec fortasse deessent fautores. Utinam paria de te liceat dicere. Sed spero brevi id licebit. Volo enim vos in studio virtutis pariter decurrere, sive eodem illud sive diversi generis studio fiat. Vos certate inter vos; ego applaudam victori. Similiter committere Matthæum cum Dionysio velim: & Gerardum cum Isaac: — *Καλὸς θεὸς ἡ δὲ βεγγύτιον* ut est apud vatem Ascræum. Commissa est non longè à Vesalia pugna, inter nostros & hostis militem. Utrumque cedere non pauci, sed penes nostros victoria fuit. Qui & captivum & triplici vulnere faucium adduxere Vesaliæ Joannem Nassorium copiarum præfectum. Rumor hic est ex Mercatorum Literis ortus, Mexicanam Urbem undis esse absumptam. Urbs ea in paludibus sita: ut multa aggerum cura opus fuerit adversus aquarum periculum; In quo dum qui pro Rege erat negligentior est, pecuniæque eo sine erogatas in proprium transferre commodum non veretur, atrox hoc infortunium Hispano evenit, si vera est fama: de qua certiora propediem sciemus. Obiit ante sesqui-mensem Dordrechtii Anna Mylia Balthazaris Lydii vidua; obiit & Bremæ ante duas vel tres hebdomadas amicus meus summus, Matthias Martinijus, is qui uxorem depoposcerat uxoris meæ fratrem: sed voti compos factus non est, dissuadente Fr. Gomaro qui eum dicebat *ἀρμυνισίζεν*, imo in eorum castra planè abiisse. Verène an secus non disputo. Cum quotidie tot mortes intelligamus, semper cogitare nos oportet de novissimis: ut quando hora extrema supervenerit, fatalem illum ictum forti accipiamus animo, memores vitam nobis non mancupo, sed usu datam esse, *χρῆσθαι, ἢ πρῆσθαι*, ut dicunt Græci. Quare non diutius velle vivere debemus, quam visum erit Deo & Christo. In hoc fiducia firmâ recumbamus, mi fili. Dabit ille nobis quod expedit nobis. Salutem tibi dicunt mater, fratres, sorores.

*Lugduni Bat.*  
clō Idc xxx.  
xxi. Julii.

*Tuus natura & affe-*  
*ctus Pater,*

G. J. Vossius.

## CXXIV.

*Doctori Carletono.*

*Nobilissime, & amicissime Vir,*

**N**on facile dixerim, quantæ mihi fuerit voluptati nuper quod tot laudibus egregium, etiam Græcis viderem Literis capi. Sermo tuus inter alia injectus de numerum notis. Paucis rem dixi. Remisi de cæteris ad Institutiones Græcas in quibus pag. XLVIII. liquido totum hoc exposui. Mihi earum exemplar per Filium: tardius aliquanto, quam vellem. Nimirum operam dedi, ut melioris chartæ aliquot mitterem. Sed nec Typographus ipse ulla habebat. Mihi igitur non quale optabam, jure debebam: sed cujusmodi poteram. Sed nescio quid factum, utrum, quod domi non esses, an quia aliud impederit, filius te non conveniret. Dederam enim in mandatis ut ea tibi exponeret coram, quæ animum meum tibi obstrictissimum testarentur. Facilius autem illi ignosco, non modo quia filius sit (scis, quam leves parentum esse animi soleant) sed etiam quia adeo adolescens, erat enim Dionysius meus, quartus ætate ex meis, sed qui eruditione fortasse prioribus non cedat. Nunc cum Golio nostro hisce feriis autumnalibus vivit, non longe ab Haga, ut ab hominum consortio remotissimus strenuè magis persequatur, quod in Arabicis ei Literis deest. Simul operam non inalam Magistro suo præstabit, in concinnando Lexico Arabico, quod à tanto viro Christianus Orbis expectat. Nec enim sine uno altero, qui à manu sint summo viro, facile fiat, ut voti nostri compotes fiamus. Oratoriarum mearum exemplar debeo illustrissimo Mecænati meo, patruo tuo Vicecomiti. Sed nescio an tanti sint Mercuriales hi labores, ut in transmarinas partes mitti mereantur. Tamen simulac Hagam venero, colloquar de eo, tuoque ex consilio omnia faciam. Superiore Hebdomade in aulâ Principum Bohemæ locutus sum cum Illustrissimo Serenissimi Britanniarum Regis legato. Cujus ego virtutes heroicas semper sum admiratus: sed mirificam humanitatem satis extollere non possum. Locutus est mecum de liberis suis, sed ego consilio hac parte juvare non poteram; quia profectum eorum penitus ignoro. Quare vel cum ipsius, vel eo qui studiis horum præest, velim sermonem serere, ne quid consilii dem, cujus postea possit poenitere. Si huc mittantur, operam dabo, ut meum sentiant affectum. Nam cum omnia debeam nobilissimæ genti vestræ, tum maxime illustribus

Y

stribus

tribus familiis, & tam mei amantibus me obstrictum sentio. Intellexi ex illustrissimo heroe affectum erga me reverendissimi Londonensis Episcopi, cui nunc scribo. Tu quaso heroi Literas ne has tradere graveris. Nam se missum illas in Angliam recepit ad proximum Lunæ diem. Debeo & Literas illustrissimo tuo patruo. Sed has inter paucos dies mittam; nisi occasio se obtulerit excurrendi Hagam, ut feram ipse. Vale, nobilissime Carletone, & in amore nostri persevera: quod scio facies & faceres non rogatus.

Lugd. Bat. clo  
Idc xxx. xviii.  
Aug. raptim.

Tibi & illustri familie  
tue obstrictissimus,

G. J. Vossius.

### CXXV.

Ger. Jo. Vossius Claudio Salmasio  
S. P.

**J**Am ante trimestre à me rescriptum oportuit. Nec officio defuissim si satis vidissem quomodo aut quid potissimum scribere deberem. Ancipitem me reddebat, quod diversa adeo studia viderem in illo Scaligeranæ *Andrææ* negotio. Cujus illum exitum expectabam, quem virtus tua meretur. Dolebam interea livorem tantum posse. Sed de eo nihil scribere ausus eram: Imo sic semper fui ut potius vitia ferrem aliena, ac graves etiam injurias concoquerem, quam illis divulgandis operam darem. Simul cernebam, quantum tua scire ea interesset, aliunde etiam te posse cognoscere. Interim gaudeo, saltem consueque rem esse perductam, ut omnes intelligant, solum obstitisse livorem, quo minus fierent ea quæ nominis tui amantiores optabamus. Nec tamen penitus spe excidimus: postquam oblatis mille quingenti annui, tantum ut præsentia tua & scribendo Academicam hanc ornas. Sane stipendio isto majus habet docentium nemo. Et puto paulatim incrementa capere posse. Imo vero de eo non dubito. Et honesta in re es ut de minuto non necesse habeas laborare. Quare si alia non moerentur, hoc quidem non tanti putabis, ut propterea te carere cogamur. O utinam nos sic bees, ut Literarium istud oraculum consulere hic nobis coram liceat! Quod tanto magis opto, quanto me penitus penetro in Plinianas exercitationes tuas. O Thesaurum interioris doctrinæ! Jam tertia est hebdomas, quod à Provartio ex-

emplar accepi. Pro quo gratias ago, si non quas debeo, at quantas possum. Quotquot Literas amamus valde desideramus tertium quoque volumen quod promittis. Nemo tamen sic festinare te velit, ut valetudini incommodus; quantana illa quæ tamdiu detinuit te satis indicat, nec ferreum tibi corpus esse. Sed tamen quantum valetudo ferat matures, rogamus. Ex quid dissimulem? cum magnopere me illius voluminis desiderium teneat, tamen in majori apud me expectatione est commentarius tuus in Concilium Iliberitanum. In quod legi Libros tres Ferdinandi de Mendoza Madriti editos. Sed quam multa & verius & plenius dici possint facile video. At non item video à quo id melius quam à te fieri possit. Fortasse autem tutius talia apud nos edantur. Eoque impensius opto ut si sine tuo tuorumque incommodo possis ad nos venire, non detrectes. Habebis hic non paucos nominis tui & Admiratores & Cultores, in quibus nomen profiteor meum. Quis sit animus in hac re tuus brevi spero sciemus, vel ex te ipso, vel si longius Luretia absis, ex Literis iis quas Clarissimus Justellus ea de re nobilissimum Somelldici Dominum aut Rivetum Theologum dabit. Si veneris, mihi quidem gaudebo, Academicæ vero gratulabor: sin iis conditionibus, quæ nunc Colæ ad unum vel alterum offendentur venire recusabis, non desinam tamen gratulari & mihi te amico, & Literis te patrono, & tibi cui hoc Deus concefferit, ut præclare adeo de studiis mereri & possis, & velis.

Lugd. Bat. clo  
Idc xxx. IV.  
Kal. Sept.

### CXXVI.

Antonio Emilio, Gerardus Jo. Vossius  
S. P. D.

**C**larissime & *αἰνῶς* Emili, haud facile dixero, quoties & quam amica mentio fiat tui, me uxoreque confabulantibus. Quid mirum, cum utrique nostri usque adeo jucunda sit tui memoria? Eo mirandum minus, si non sine parvissima (ita mihi scio cum Varonne apud te hominem φιλολογηταίον, loqui licere) penè dixerim querimonia, miretur subinde, tantoperè te à frigido Saturni sydere afflari potuisse, ut nullos amplius igniculos cernat veteris affectus. Absque eo esset, inquit, illone paucarum horarum intervallo dissidens à nobis, nunquam faceret potestatem

potestatem videndi sui? Vides non à me solum te diligere, sed etiam uxore: vel potius (quando hoc jam vetus) quam constanti amore te prosequamur uterque, etiam postquam aliquis metus esse cepit, ne minor esset ardor tuus, quam olim. Sed si quis fortassis hujusmodi metus se insinuet, fucillis longissime fugandus, facile enim sic in animum inducimus omne hoc, quod nobis ægre est, non aliunde provenire, quam ex immensa qua premeris negotiorum mole. De me quidem id dicere possim, qui nihil nunc minus sum, quam meus. Et qui vix sum meus, volo tamen esse tuus, tuorumque. Et hac fiducia etiam meos commendare tibi sustineo. Ac hoc quidem tempore, ex uxoris meæ fratris natum, Franciscum Junium, Franc. Nep. Is postquam biennio in Academiæ Groeningana Jurisprudentiæ operam dedit, etiam Ultrajectinos sibi adeundos putavit, ut majora caperet studiorum incrementa. Propterea cum per literas commendavi, nobili urbis vestræ Jurisconsulto, paternum decus vel æquanti, vel vincenti. Quod utrique nostri pro nomine erit. Volui tamen ut tibi quoque innotesceret. Nec enim mihi satis est, si Jurisconsultum audiat: sed volo ut literarum ac imprimis historiæ studium adjungat: scio enim, imo scit Belgica nostra, quisquis sacrarum ejus accedere volet, tuas imprimis fores pulsare oportere. Multi enim Thyrfigeri, pauci Bacchi. Uxor plurimam tibi salutem adscribi petiit.

*Amstelodami, clb  
Idc xxx. vi. Id.  
Septembria.*

## CXXVII.

Gerardus Joannes Vossius, Matthiæ  
Berneggero, S. P.

**R**escripsissem jam diu, Præstantissime Berneggero; sed jam à longo tempore, in neminem incidi, qui ad vos se iturum diceret. Quanquam vero nihil mihi jucundius esse soleat, quam per literas colloqui cum hominibus eruditissimis; fateor tamen mirè me segnem esse, si metuam, ne frustra scribam; quod crebro nunc fit, milite vias passim obfidente. Absque eo esset, ne laborem quidem defugissem, commentarium quem in Justinum, aliquot abhinc annis scripsi, cum cura relegendi, eaque excerpti, quæ imprimis placitura arbitrarer, sed ut dixi defuit, per quem tutò ea mitterem. Et præterea mirè distringebar, edendis commen-

tariis nostris Oratoriis: quæ tandem ad finem perducta esse lætor. Nunc verò labor, puto iste, supervacuum fuisset, quia credo, jam lucem viderit Editio, quam adornasti. Impensè faveo studio, quod in hunc scriptorem insumpsisti: Benè de historia externa mereris, & Latinis. Nec facile alius, ad eam rem magis fuisset idoneus, quam qui ut tot Disciplinas, ita Historiam omnem animo est complexus. Nec opera nostra (de qua li-manda cogitationem abjecimus) perierit nobis; sed utilis erit ad ea, quæ de Temporum ratione aliquando, si Deus volet, juris publici faciemus. Volupe fuit cognoscere, Procures vestros, non infra se putasse, curam Grammaticam; quæ nunc apud *δοκίμοις* ita sordet, ut minor iis videar, quia studium hoc non neglexi. At quanto aliter sapuerint apud Romanos, etiam viri Principes, non ignoras. Quod verò scribis, in repastinanda Gymnasii vestri Grammatica, adjumento fuisse nostram; id mihi longè gratissimum fuit. Nam in talibus scis, non honorem spectavi, sed publicum commodum. Valdè me beasti, Grammatica Græco-Barbara Metrophonis Critobuli. Multum lucis adferet ad intelligendum linguam vulgarem. Planè lucem videre debet. Quod fiet hyeme proxima, sic enim recepit Elzevirius; qui nisi operam suam addixisset, vel ad alium issem, vel nunc remissem. Idem ubi ad nos redierit, excudet commentarios nostros de lingua Latina. Mallem hac ætate, ea in lucem dare, quæ ad Ecclesiæ antiquitates pertinent. Quod studium me à prima tenuit adolescentia, sed etsi non pauca in eo elaboravi, tamen vix quicquam prodiit post Historiam de Pelagio, & Massiliensibus. Nempe alia me tenuere: non illa mala quidem:

*Sed fugit interea breve, & irreparabile tempus,  
Omnia dum capiti circumvestimur amore.*

Vale longè doctissime Vir, & quod facimus, id porro etiam faciamus, ut nos mutuò amemus.

*Lugd. Batav. clb  
Idc xxx. Post.  
Kal. Sept.*

## CXXVIII.

Guilielmo Archiepiscopo Cantuar.

Reverendissime in Christo Pater, Dom. Illustriss.

**I**n diuturno Conjugis meæ morbo, jam tertium enim is mensem excessit, ne medicæ solatium affudit Literarum tuarum  
Y 2



Joanni Beverovicio, S. P.

quas merito magno mihi semper honori duco, conspectus: magis etiam ubi ex iis vidi, ut quo antehac affectu eo prosequi me pergas, quanto minus merentem, tanto magis illustrissimo nomini tuo obnoxium ac devotum. De globo utroque procuratum sedulo: probe enim scio non alios uspiam esse qui melius vel sydera nobis, vel terras mariaque expresse- rint. Auro tamen & scitamentis aliis, commemini ornatiores missos ad aliquos viros principes qui istis caperentur: Sed tales nunc parati erant nulli; nec Britannia destituitur viris rerum hujuscemodi intelligentibus, qui istoc suppleant: atque ut alios transmitti malis, non deerunt quos jam missis demeraris. Mitto Maimonidæ Librum jam diu excusum. Sed hæcenus hæsi vellemne comitem ei dare, excercitationem de Rabbiorum temporibus, ita præfatio dilata: interim strenue pro occupationibus quæ sic distinent, progressus sum opere in eo quo omnis Gentilis Idololatriæ causas eruo ex historia veteri vel rerum natura, hæcenus tentatum nemini. Nam quanto aliam insisterit viam Lilius Giraldus Italus, vir eruditus, nemo possit ignorare, nisi qui non legerit. Atque hæc quidem non externis modo scriptoribus, sed etiam Theologis antiquis allucent facem; subinde etiam Scripturis Sacris. Quod magis fiet omnibus iis quæ deinde consequentur, modo Deus mihi valetudinem & vitam, uti spero.

Filius meus Joannes in India Orientali factis concessit. Præclare rem gerebat, paulo tamen sumptuosius quam vellem. Manebant eum magni honores & unde intra annos tres quatuor in re unctissima redire domum possit. Sed aliter visum supremo Deo. Interim solatur tum affectus procerum nostrorum, qui summa ei destinarent: tum imprimis quod pie admodum esse defunctum intelligam.

Deum Opt. Max. oro, ut salvus & sospes annos permultos sis Ecclesiæ Anglicæ, vel potius Catholicæ, cujus Episcopos omnes suprema post Deum & Christum manet cura.

*Amstelæd. clō  
lōc cxxxvii.  
Prid. Kal. Oct.  
St. Vet.*

*Illustrissimi & Reverendissimi  
tui nominis Cliens devotissimus,*

G. J. Vossius.

**U**T ex Anglia reduci volupe erat Drechti videre te sospitem ac valentem, ita ingratum illud fuit, quod tam cito avel- lerer. Amo enim te, mi Beverovici, atque id non modo ob egregiam doctrinam & vir- tutem tuam singularem, & mellitissimæ in- dolis suavitatem; sed etiam quia me amas, neque id modo, ut bene de studiis multo- rum merentem, sed etiam ut olim meritum de tuis. Id enim nec tuæ ad me literæ diffi- mularunt, & apertè, quoties res tulit, pro- mere apud alios soles. Nempe sic animati esse solent, quibus cor magnus ille Promé- theus de meliori finxit luto. Nec ultro optare doctores debent, quam affectum. Quo amplius neque parentes à liberis, neque Deus ipse exigit à nobis. Sed ô tempora! quam multos, imprimis dum fatales istæ controversiæ Bataviam turbant, reperi, qui insignem ex eo laudem sperarent, quod pro beneficio maleficium rependerent nobis! Quanto magis à talium moribus abfuisse, tanto impensius te amari à me æquum est, & sane, absque paucis foret tui similibus (quos inter merito suo Amplissimum Blienburgium refero) pœniteret propemodum operæ totis annis quindecim urbis vestræ Gymnasio im- pensæ. Quotidie enim video sentioque, quan- tum ea res incommodarit studiis nostris. Sed eo me solor, quod ut in cæteris, ita in his etiam, cuique statutum sit, quæ viâ sit eun- dum, & quousque pertingat. Quare ulterius alii famæ quadrigis decurrant, non si eo viacamur, propterea apud Deum perierit opera nostra. Isti famæ aucupes exprobrent nobis vilem, atque ut vocare ipsi solent, asina- riam operam. At ego non propterea desinam putare, insipientis esse suo potius, quam pub- lico omnia bono metiri, & paullum aliquid honoris majoris facere in terris, quam ut Deo obedias luculentè omnia compensaturo in cœlis. Sed istos mitto: atque ad te redeo, cujus me verliculi valde delectarunt. Et ani- mus erat iis ornare frontispicia oratoriarum nostrarum, quæ ante paucos menses iterum in lucem prodire. Sed non poteram id fa- cere, nisi apponerem quoque quos scripserat affinis Næranus & Bonifacius Italus, & Col- lega Heinsius, atque alii complures. Malui igitur præterire universos, quam delectu quempiam offendere. Interim scias nihil mihi gratius fuisse vel literis vel versibus tuis.

*Lugd. Batav.  
clō lōc xxx.  
Non. Octob.*

Tuius,

G. J. Vossius.  
CXXX.

CXXX.

Ger. Jo. Vossius, Johanni Rouse, S.P.D.

Vir Clarissime &amp; Amicissime,

**V**enit ad vos Jonstons, juvenis probus & doctus, Natione Scotus, qui in variis Scotiæ, Germaniæ, Belgicæ Academiis Scholisquæ illustribus vixit. Hunc ante annum mihi commendavit Matthias Martinus, Theologus Bremensis Germanicæque Theologorum maximus ut ego cenſeo *οὐλόγητος* & *αἰνέητος*; nec tamen in studiis sacris ullo suæ gentis inferior. Ob hujusce Viri commendationem, quia arcta mihi amicitia fuit, Juvenem, dum hic fuit, amavi, præsertim ubi ita se gerere vidi, ut nihil in ejus vita culpandum videretur. Nec obscurus erga eum affectus meus fuit. Quâ fiducia non dubitavit à me poscere, ut eum uni vel alteri florentissimæ Academiæ vestræ commendarem. Id verò facio lubens. Rogo igitur ut si qua in re utilis ei opera tua esse possit, vel etiam ornatissimi & amicissimi Pococki nostri, hanc ei ne denegetis. Nullus dubito quin gratus semper sit futurus. Oratoria- rum inearum, quæ ante semestre hic sunt recusæ exemplaria pauca in Angliam mihi ad Nob. Virum Franciscum Junium affinem meum, qui in ædibus degit illustrissimi Comitis Arundelii! Plura mittere animus erat, sed juvenis ille, qui ea secum in Angliam deferrebat, pluribus onerari non debuit, nisi humanitate ejus abuti vellem. Petii autem ab affine, ut ex iis, quæ mihi, exemplar unum ad te, alterum ad amicum communem Pocockum transmitteret. Id quin fecerit non ambigo; nisi forte Literas meas non acceperat, quod non puto. Necdum tamen iis respondit. Postea etiam nobilissimus Vir Joannes Christophorus à Berg, hæreditariorum bonorum Serenissimi Bohemiæ Regis in Moravia antea præfectus, nunc autem metu Cæsaris exulans, à me accepit XX. exemplaria operæ ejus, quam Dom. Pocockus Catholicis è Syriaco transferendis impendit. Ea exemplaria jam Pocockus acceperit spero. Satis eleganter Liber est excusus, nec emendatè minus, ut arbitror. Sed de eo judicium vestrum hic expectamus. Dubletius noster tui memor vivit, impensèque te salutari iussit. Plurimam etiam salutem meo nomine dices Amplissimo Dom. Procancelario, quem nunc Doctorem esse Juxonem intelligo Collegii Jo. Baptistæ præfectum. Quod si est, gaudeo. Item saluta eum qui cum adesset vobis, Procancelarius erat, Doct. dico Fruen, præfectum Collegii Magdal. Quid de Duppa,

Prideaux, Fellio, Claytono, aliisque dicam, summis sane Viris? Quid de doctissimis & humanissimis Harrifono, Pococko, Chillingwortho? Quæso, ubi occasio erit, affectum iis meum testare. Vale.

Lugd. Batav. cło Ioc xxx:  
vii. Kal. Nov. St. Novo.

CXXXI.

Joanni Vossio:

Charissime Fili,

**J**AM prope mensis est, quod nullas à te literas viderim: ut plane ignorem, utrum ternas meas acceperis, quibus ternis tuis anxie satis de valetudine ac penuria perscriptis respondebam. Volui igitur exemplar literarum quas iterum ad amicissimum Casaubonum mihi ad te transmittere, ut facilius perspicias, quid tibi in rebus tuis facto sit opus. Sed dubitare vix possum, quin vel à D. Casaubono, vel mercatore illo Londinensi, qui Hondii nostri res procurat, voto tuo sit satisfactum. Volui hujus tamen operæ etiam te reddere certiore, quia satius duxi, quicquam in me supervacuum quodammodo videri, quàm jure à te quicquam requiri. Occupatissimus quidem semper sum, ut nosti, & indies crescit curarum sepes, quæ meum me esse non sinit. Sed vincit omnia affectus erga te meus, ac porro etiam vincet, dum tu eris qui debes, ac quem te esse planè confido. Permissi superioribus literis, ut si cum bona superiorum venia possis, & ita valetudini ac studiis expedire tui amantibus videatur, & nihil periculi à mari vel hoste timeant prudentiores, quamprimum ad nos excurras. Fortasse tamen expediat, ut aliquantum hoc iter differas, usque dum eruditione sis auctor. Sic iis, quos hic tui amantes habes, facilius satisfacies: & hominibus malignis obtrectandi occasionem adimes. Nosti hominum mores. Simul sumptibus parceretur: nec periculum erit ab hoste. Sed tamen tui rem arbitrii facio. Tantum prudenter dispice, quid facere sit opus, & cum iis qui magis hæc intelligant, consilium cape. Salutant te Mater, Fratres, Sorores. Tu quoque salute plurimâ imperties egregios Academiæ vestræ viros, quos quidem lues à vobis non fugarit. In his esse significas optimum & doctissimum Ma. Hallum, cui te curæ hoc tristi esse tempore significas. Sapè, vir tot laudibus ornatissimus, vel hoc nomine dignus est amari à nobis omnibus. Peterem etiam ut saluta-

res Magistrum Dod; suavem sane animam. Sed cum jam quoque aliò concessisse ex literis tuis intelligo.

*Lugd. Batav.*  
clō Ioe xxx.  
iii. Kal. Nov.  
St. N.

*Titus Parens,*

G. J. Vossius.

### CXXXII.

Edwardo Misseldeno Anglo. S. P.

**V**ellem, vir amplissime, priusquam in Angliam redires paucis tecum de studiis filii colloqui licuisset. Pleraque enim melius tribus verbis coram quam longo sermone per Epistolam expressero. Nec propterea deero petitioni tuæ, cum omnia tui causa velim, cujus prudentia, virtus, candor (ut cæteras nunc dotes prætermittam) à tot annis mihi non incognitæ fuerunt. Dum filius mihi adfuit tuus, alternis fere diebus exercui, nunc prosâ condendo aliquid, nunc carmen pangendo. Præterea potissima eorum exigere soleo, quæ me publice docentem audiisset, ac si qua minus fideliter percepta, ea aliquanto fusiùs diducere, aut apertius enarrare. Nec inutilis ei fuit manu ductio nostra in istis, quæ pertinerent ad terrarum situm, ac imprimis Imperii Romani: sine cujus notitia nihil aut parum in Historia videmus. Ac sibi ipsi nisi adolescens defuisset pauculis hebdomadis quibus sive Harlemi, sive in urbe nostra fuit (putabam ego aut Hagam esse aut morbo decumbere) plenius satisfecisset expectationi tuæ. Et tamen ne nunc quidem est quod poeniteat profectus: præsertim ab eo tempore quo sermonem inter nos sevimus; ego & is, quem ad me miser. Tenuia quidem isthæc initia sunt eorum quæ animo conceperam, inque tuæ spem gratiæ & filii amore acturus eram, modo diutius substitisset apud nos. Sed scis istoc vetus: Dimidium, qui cœpit, habet. Imo secundum Ascræum vatem, Dimidium plus toto. Tanti interest ut ne in studiis quoque malè incipiamus. Quia igitur non malè apud nos cœpit, velim in patriam redux pede eodem pergat: ac cum Cicerone Livium jungat. In Historico hoc primum attendat quæ ad elegantiam sermonis pertinent. Codicem habeat in quo annotet verba, & formulas, ex Livio à se excerptas, ac subiciat singulis quomodo ea hoc tempore transferre possit in usum suum. Altera cura esto Historiæ. Quemcumque Livianum leget Librum, ejus sibi compendium concinnet, minimum duplo

autius epitome veteri, quæ cuique Libro præmitti solet. Tertium esto, ut ea consideret quæ mores majorum virorum vel prudentiam tangunt civilem. Præceptaque & exempla singula ad locum referat communem. Hoc sine codicem habeat in quo chartæ distinguantur titulis virtutum moralium & capitum prudentiæ tum togatæ, tum militaris. In ordine istorum titulorum, utrum Aristotelem an alium sequatur, non multum arbitror referre. Velim etiam quia passim & in hoc scriptore & in aliis occurrunt quæ tangant mores usq; Romanos, ad manum ei semper sint collectanea Rosini, quibus complectitur gentis ejus antiquitates, de urbis situ, diis, sacerdotiis, Comitibus, Magistratibus, legibus, & alias. Nunc si quis in istis plane fuerit hospes, is exiguo fructu veteres leget. Ac hac quidem ætate Rosinus ad ista suffecerit. Postea satius fuerit ipsos legere ex quibus sua Rosinus collegit, & alios quos Rosinus videre non potuit. Postremum hæc cura esto ut luculentæ orationes illæ, quæ apud Livium extant, Dialecticorum more resolvantur ut compareat, in quo cardo rei consistat, quibus argumentis causa nitatur, quomodo occurratur adversario, quæ adferantur ad conciliandos auditores, quæ ad affectus commovendos. Nec enim facile dixerim quantum ea res conferat ad eloquentiam: præsertim si quis ad exemplum istorum argumentum eligat nostris aptum temporibus, in quo quantum licet insistant antiquis. Hæc tam multa considerare operosi videtur operis, præsertim pro ea ætate quæ nunc est filius tuus. Sed non aliam præscribo viam quam ipse insisterim bono meo: ac longe optimam esse in variis sim compertus, qui recta via grassari vellent, ad solidam potius doctrinarum arcem, quam umbratilis gloriæ. Et hæc quidem sufficere arbitror pro ratione privatim Livium legendi, quam publicè hactenus enarrantem audivit. Sed nolim in Romana consistere Historia. Sacram & Patriam præmisisse oportuit. Subungere etiam opus Græcam Orientalem & omnium gentium quæ irrupere in Romanum Imperium. Quo pacto autem ex istis universalis Historiæ notitia optimè comparetur, chartâ alterâ expono. Spero operam hanc meam boni consules. Idem facturus eram in studio Philosophiæ, nisi satius putassem, ut filius plusculum Linguae utriusque Historiarum & prosæ ac poeticæ eloquentiæ studiis insisteret. Et sub manibus habeo, imo jam olim habui, & aliquamdiu intermissum simulac potero ad incudem opus revocabo, quod partim erit de Philosophorum sectis, partim de Artium ac Scientiarum omnium utilitate ac nexu. Eo susè differo, quomodo sit Philosophandum. Summa



ma eo redit auspicandum esse à secta peripatetica, postea diffundi oportere per sectarum alias imprimis Platonicam, & Zenoniam, sive Stoicam; denique sistendum esse non in Pyrrhonia, quæ etiam ambiget in certissimis, sed Polemonis Alexandrini, quæ Electrix sive Græce *malis* *inveniens* dicitur, nec in ullius Magistri verba jurat, sed singulas singulorum suo æstimat momento. Verum hoc iudicium non nisi post Sectarum omnium notitiam in iis oritur qui veritatem prope majoris faciunt quam seiplos. Ea virtus necdum cadere potest in ætatem filii tui. Quare sufferit hoc tempore ut Philosophia sit Peripatetica contentus. Non fatigabo te meque ulterius. Deum rogo, ut filio tuo adolescenti optimi ingenii bonam mentem conservet. Omnino enim si volet præclarum quid, indoles ejus promittit: velle autem spero vel potius confido. Vale, vir amplissime, & nos tui amantes porro eo loco habe qua hæcenus facis.

*Amstelodami* clb lœc xxxviii.  
iii. Kal. Decemb. St. Gregor.

## CXXXIII.

Petro Cunæo.

Vir atque amice summe,

**G**raviter in amicitiam nostram peccarem, si in eo, quod serio adeo petis, morem minus gererem. Equidem jamdudum id fecissem, nisi, ut primo adventu domesticis negotiis, ita nunc aliis obruerer. Otium hic est, quamdiu nondum docere publice aggressus sum, cæterum id minus segnè. Nam ut de eo nihil dicam, quod totus sum in schedis meis digerendis, quæ res plus molestiæ habet, quam primò putarem; etiam exteri, qui vel à vicinis civitatibus, vel terris etiam longinquis, huc veniunt, item indigenæ ut inivis fieri solet, non paululum mihi temporis eripiunt: pene non minus, quam Lugduni unquam factum. Nec tamen dicere possum, mihi non esse otium ad literas exarandas: Sed, sic animatus sum, ut mirifice soleam procrastinare hoc officii genus: quod ubi diebus, atque adeo Hebdomadis totis factum, tandem etiam (pudet dicere) in oblivionem venit. Idem ne mihi in hac recula vitio amplius verti possit; cum literas tuas sub noctem accepißem, consellum ad Bazirium has, quas vides, exaravi. Mirabatur, scio, ille: nec enim puto, meas, post tantum silentii intervallum literas exspectat. Interim

ex his me non oblitum sui facile videbit, atque idem deinceps competiet, quoad à virtute non defecisset. Gaudeo me hic quoque reperisse, qui præclare de eo sentiant. Est sane egregio ingenio, & si, ad magna animum adjecerit, non videtur impar futurus, verum quid ego hæc ad te? qui melius me ejus indolem introspexeris. Gratias tibi ago, quod filium meum in his, quibus Lugdunenses offendit, defendis. Teneri ex officio id facere, vellem omnes scirent. Nam cum id negotium proceres hujus urbis suis commiserint advocatis, atque eos inter & filius teneat locum; honestè satis se oneri subducere non possit. Et tamen non ille ejus sunt partes, quæ forent, si hæc res non me, & Lugdunenses spectaret. Omnino enim primas etiam in iis, quæ filio, ut natu minimo competeret, alius tenet. Non quia meus impar, sed quia paternum agitur negotium. Quod si sic quoque non satisfacit Lugdunensibus, videbo, an expediat, plane hac eum controversia abstinere. Quod gratissima tibi fuerit commendatio Roscrantzii, plurimum gaudeo. Apud Hubertum non degere eam ob causam cognovi, quod in longum tempus se obstringere noluerit: quippe qui propositum habeat, ubi hic doceri publicè ceperit, quandoque hebdomadam unam alteram apud nos studiis suis dare. Tibi interea, vir amicissime, quod laborem tantum sumere volueris, gratias ago summas: invenies me promptum semper, licubi vicissim operam meam tibi utilem existimabis. De uxore mea, penè exciderat. Quod ajunt eam aerem hunc minus posse perferre, vanissimum est. Valet illa non deterius quam antehac. Quin spem concepì, prospera hic magis valetudine usuram. Vale, vir amicissime, & cum tua, à me meaque salve.

*Amstelodami.*

*Tuus omni officio,*

G. J. Vossius.

## CXXXIV.

Petro Cunæo.

**V**IR clarissime, qui has tibi literas tradit, is est filius generosi viri, Oligeri Roscrantzii, regii in Dania Senatoris, Herois, ut genere ac dignitate sublimis, ita undecunque doctissimi, & eruditorum omnium mirè amantis. Tanti viri prolem, eamque quantum per ætatem licet, paterna prementem vestigia, de meliori nota mihi commendavit utrique

utrique nostri amicissimus Joannes Meursius. Equidem si Lugduni perstitissem, nihil mihi jucundius fuisset, quam bene de adolescentis hujus studiis mereri. Idque non modo, quia sic Meursius petiisset, sed ipsius etiam adolescentis causa, ac imprimis parentis ergo, viri, vel herois potius incomparabilis. Nunc quod prestare ibi loci, nequeo, id ab iis prestari exopto, quos Collegas & amicos conjunctissimos tot annis habui: à te potissimum, quia prodesse ei potissimum potes. Atque utinam etiam in domum tuam recipias unà cum Ephoro ejus Mullenio, juvene ut perhonesto, ita egregie docto. Sane valde demerereberis parentem, qui nunquam immemor hujus affectus erit. Scio enim quantopere sibi gratulatus sit Meursius, quod ante annos aliquot convictorem habuerit filium natu majorem. Quod si res domestica id hoc tempore minime sinunt, proxima apud parentem gratia erit, si consilio juves. Mihi nunc præter Hupertium advocatum, ubi degant, nemo occurrit. Si apud civem, vivendum sit, Bibliopolam Ephorus prætulit. Sed præter Jacobum Marci, apud quem aliquandiu vixere Barones Stupeskii, Bibliopolarum qui convictores habent novi neminem. Ejus vero uxorem aiunt attentorem esse ad rem, quam oporteat. Nec video cur tanti sit apud Bibliopolam potius agere, quam alium civem honestum. Nec dubito, quin, cum tibi notiores sint cives, quam mihi, facile suggerere alium possis magis idoneum. Quod ad res meas, initia hic non displicent. Nam perhumaniter habeor. Sed non arbitror fore, ut publice doceamus primis quatuor aut quinque hebdomadis. Vel saltem non antequam sententiam tulerit utraque Curia Hagensis. Cujus judicium avide exspectamus. Nec dubitant procures hic, quin accepturi sint ex voto responsum. Tantum in causa fiduciam habent. Scripseram ad Syndicum Wevelinchovium me simulac cognoro conventuros DD. Curatores, Leidam velle excurrere. Rescripsit ille, necdum certam diem præstitutam: Sed ubi de ea intellexerit, facturum me certiorum. Quare propediem fortassis te videbo. Salutem plurimam dices uxori, & Collegis amicissimis.

*Amstelodami.*

*Tuus totus,*

G. J. Vossius.

CXXXV.

Guilielmo Archiepiscopo Cantuariensi.

*Illustrissime Domine ac Reverendissime Pater,*

JAM tertius est dies, quod de gravi convenior negotio, cujus te quamprimum certiorum facendum putavi. Hoc, quod dixi, istiusmodi est. Atque utinam præsens potius consilium capere tecum possim. Jam ab aliquot annis ex vicinis Bataviæ urbibus, ad Academiam nostram & ætate minores & doctrina inferiores, quam antehac solent, mitti Adolescentulos videmus. Mores quoque eorum quotidie sunt deteriores. Itaque non Baccho modò ac Veneri perpetuo litat pleraque omnis Adolescentia, sed crebriores etiam cædes proximo hic sexennio commisit, quam antea totis triginta annis atque amplius. Hæc res male habet parentes urbiumque procures; imprimis Amstelodamensis Civitatis, quæ hæc unâ parte infelicem se dolet, quod liberos, cum necdum modum vitæ sciunt, Studiorum causa in Academiam hanc, ubi dissolutè à magna parte vivitur, mittere cogatur. Atque illud eo magis ad animum revocat, quia hoc ipso anno primarii Civis sui inque dignitate constituti filius, Civem necavit Lugdunensem. Magis etiam sua interesse hoc Amstelodamum putat, quia tam multi ad nos ex urbe sua, studiorum causa, confluunt, quam ex septem Bataviæ civitatibus, aut plerisque etiam provinciis totis. Jure igitur optimo occurrendum huic malo arbitratur. Convenere ergo urbis ejus procures universi, omniumque consensu statutum est, non melius sibi se & liberis consilere posse, quam si in urbe sua erigat illustre Gymnasium, ubi professores duo aut tres doceant Historiam, Philosophiam, aut quæ quibus juvenus imbui debet. Atque hoc decretum eo majori favore atque applausu à Civibus exceptum est, quia in tam populosa urbe, seu indigenas spectemus, seu advenas, ex cunctis ferè Christiani orbis regionibus; magna eorum copia est, qui vel egregie ipsi eruditionis sint, vel saltem doctrinæ peramantes. Horum igitur omnium votum fuit, ut & ipsi audire quotidie aliquem possint, qui vel antiquitates gentium, aut naturæ arcana pandat. Itum hoc animo ad me, ac rogatum ut hac in re addicere operam florentissimæ Reipub. vellem. Itum quoque ad Casparum Barlaam Philosophum ac Poetam insignem. Stipendium mihi obtulere altera parte majus, quam apud nos Professores habent. Nec abhorret animus: Nam & pulchrè mereri hic de

de publico mihi licebit; & gloriosum erit primum me jecisse fundamenta Illustris Gymnasii, quod fortasse aliquando cum inclitis Academiis fama nominis contendet. Uxor etiam valde proclivis est, quia si quid mihi humanitas contingat, malit ea in urbe esse, ubi viduis bene-meritorum optime consuli à proceribus solet. Liberi etiam adhortantur, quia longe facilius illic assurgendi sibi occasio erit, in tanta dignitatum ac munerum multitudine. Eo magis quia jam Proceres ipsi & mihi & meis spem pollicitando fecere, futurum ut occasiones non dimittant, quibus familiæ meæ consuli possit. Consanguinei & amici suadent ne hanc conditionem abnuam; variasque etiam rationes adjungunt, quas longum esset exponere. Oravi Deum animum mihi ut illum inspiet, ut eligam quod Reipublicæ atque Ecclesiæ imprimis utile erit, ac mihi meisque salutare. Fortasse aliqui partium studio nimis laborantes, & quibus insitum à natura est alienam felicitatem invidis intueri oculis, mihi id vitio vertent. Sed consolor me in eo quod sapientis atque probi sit potius sequi Conscientiam ducem, & bonorum consilia, quam vanas quorundam voces. Talium imprimis, qui capropter quod Magistratus jus suum tueri satagat, adversus unius aut alterius tribunitias Conciones seditiosæque Consilia clamitant, cum partium studio in præsentibus Religionis Controversiis teneri, & ex suo ingenio proborum dimetiuntur animos, in longe melioribus ea reprehendentes vitia quibus ipsi laborant. Equidem si eò venero, ostendam me non alteri Ecclesiæ adhærescere, quam hæcenus feci, omniaque in tristis hac discordia ad pacem & concordiam dirigam, eâ prudentiâ quâ Dominus mihi servo suo conferre dignabitur, ut ita tandem quantum in me est, nostram Rempubl. (navi quæ fluctibus ac ventis agitur similis) tranquillum in portum appellari sese valeat.

Hæc raptim nunc exaravi. Post paucos dies certiora perscribam. Nunc plura non licet; quia hodie mittendæ sunt hæc Literæ Hagam, ad illustrissimum meique amantissimum Dom. Vaine, Serenissimi Regis Magnæ Britannię Legatum; qui crastino mane iter suscepturus in Britanniam, cum sine meis redire Literis nefas fuisset.

Illustrissime Domine, Pater in Christo Reverendissime, Deus Opt. Max. diu te incoluam Ecclesiæ ac Britannię, imo & mihi meisque conservet.

Lugd. Bat. cto  
Idc xxxi. xii. Jan.  
Strylo novo.

*Illustrissimi & Reverendissimi  
Nominis tui Cultor obstrictis-  
simus & devotissimus,*

G. J. Vossius.

CXXXVI.

Erycio Puteano. S. P.

Fatum quodammodo meum videtur, perpetuis occupationibus ab officio literarum impediri. Sæpius scribere cupidum gravissima retinuerunt negotia, quæ si unquam, nunc certe in me obruunt. Petis ut de statu meo faciam te certior, ego quoque non petenti purgandi causâ significassem, ut non voluntatem æque officii præstandi, quam potestatem deesse mihi intelligeres: res ita habet. Annus fere integer elapsus est, quod partim corrupti adolescentium mores, partim aliæ causæ Amstelodamenses magistratus perpulere, ut consilia de erigendo illustri Gymnasio inirent. Id & sibi jucundum & liberis utile fore prævidebant: quippe qui nullo obtentu ad Academiam festinare Lugdunensem possent, atque in parentum conspectu ac metu essent, quoad firmatâ ætate, & studiorum propemodum spatio decurso ad graviora se transferrent, ac supremum honoris gradum peterent. Ad hoc illud accedit, quod in civitate ea qua incolamus, magnitudine, non alteri, ut puto, tota Belgicâ cedit, ingens Doctorum & Semidoctorum copia est, qui vel quotidie vel quoties res sinunt aliquem de egregio argumento disputantem audire exoptent. Diu itaque re deliberatâ inter proceres utilem omnes censuere. Inde dispicientibus quos potissimum ad docendum vocarent, primas honoris ejus mihi tribuendas putarunt. Et ne transire ad se dubitarem, stipendii magnitudinem aliæque proposuerunt, multo quam hic fruor, ampliora. Illud bis mille & quingentorum in annos singulos florenorum est, additæ & ædes publico sumptu conductæ florenis nongentis. Liberorum se rationem habituros adjecere. Seni enim præter filias liberi, quorum unus & alter civilis nunc honoris capaces videntur. Vides ipse quanta hæc sint. Illud imprimis quod postremo dixi, ego nunc huc nunc illuc inclino. Et modo cum propinquis, modo cum amicis rem communico. Plerique conditionem ut accipiam suadent. Ita mihi dies itineribus & consultando, pene dixerim, pereunt; dum Haga ultro citroque commeo. Exitum brevi res habitura est. Simulatque constituero, neutiquam postrema tanto amico significatio. Opusculum tuum de Begginarum instituto accepi. Quæ vidi, perplacent; sed, ne quid dissimulem, perlegendi otium occupationes, quas retuli, non concessere. Cæterum & non lecta Puteano digna facile præfatio, quo

Z

ex



ex fonte, præter limpidas aquas, quis expectet quicquam? Audes tamen monere, ut censere tua scripta velim. Summo modestiæ argumento, ut cui eruditio censuræ jus deferat, sua ipse aliorum subicere iudicio velit. Nimirum est hæc Puteano digna modestia, in quo certare virtutes omnes videntur; quæ ut aliorum in se amorem attrahunt, ita ab annis xl, & amplius ita meum illexerunt animum, ut nunquam nisi fato indissolubile amicitiae vinculum solvi possit. Cætera proximis literis persequar. Nam nunc, quod volo, non possum. Cum *arridues* non habeam mitto translationem iv. Apostolicarum Epistolarum à Syriaco, ea scio argumenti causa grata erit, & quia meo nomini dicata est ab eruditissimo interprete. Vale, summe vir idem atque amice.

*Lugd. Batav.* clō loc xxxi.  
xiii. Kal. Feb.

Salutem Præstantissimo Tuldene, cui prima occasione rescribam, nunc eum non possum ob intempestam noctem & animum curis lassatum.

## CXXXVII.

Diodoro Tuldene S. P.

**A**liquandiu est, Clarissime Tuldene, quod tuum de sui cognitione commentarium, & dono quidem tuo, accepi. Ac licet, si unquam variis interim distringerer curis, quandoque etiam ab urbe abessem (causam fortasse jam aliunde cognōris) impetrare tamen à me non potui, quin per intervalla nunc hanc, nunc illam partem, in manus sumerem; quod majori dubito voluptate fecerim, quam fructu: unum doleo, occupationibus me iis implicitum fuisse, ut insignem adeo librum non quæ curâ oporteret, evolverem. Sed sic quoque præstantiam facile cepi, qua allectus ad eum sæpius recurram. Duo potissimum sunt, quæ commendare scriptionem valeant, argumentum & tractandi modus. Hoc si spectemus, omnes implēsti numeros. Argumentum, cuius sit pretii facile prudentes intelligant, imprimis corruptis hisce temporibus. Quam sapiens ille Chilon, aut quicumque is si resurgeret, Dicti sui utilitatem, vel potius necessitatem conspiceret: quibus te, Doctissime Tuldene, laudibus dignaretur, qui sic sistere seculi vitia nitaris, nunquam non laudando proposito? Videret & in Belgis (utut Barbara ei nominassent) nasci viros, qui Græcorum & imitarentur, & æquarent sapientiam. Quamquam parum

hic sit æquasse, qui, Christiana Religione perfusus, quicquid hic gentilis est sapientiæ, longius opere hoc exsuperes, quam luna sidera minora. Equidem, qui sæpius calamitosa hæc tempora deploro, tanto majores tibi gratias ago, quanto magis, senescente hac ætate, eorum mihi vitia videor intelligere. Atque utinam dignas referre gratias possim; sed qui vix libri pretium capio, qua ratione, iusta æstimatione metiri possim? Attamen simulatque meus esse ceperō, ac Musas ferentiori animo invisere licebit, (quod propediem fore arbitror) primam curam otio meo seposui, tuum accuratius lustrandi atque evolventi opus. Ex quo sane mihi, ac aliis cunctis discere semper licebit. Nunc aliud non possum quam pro munere gratias agere, quod data opportunitate, compensare nequam differam. Plurimam salutem dices summo & viro & amico Erycio Puteano. Imo & aliis, quos mei amantes judicabis. Vale, Præstantissime Tuldene, & diligere nos perge.

*Lugd. Batav.*  
clō loc xxxi  
iii Non. Mart.  
nocte intem-  
pesta, ut plu-  
rimum meus  
est mos scri-  
bendi literas.

Tuus,

G. J. Vossius.

## CXXXVIII.

G. J. Vossius, Erycio Puteano, v. cl.  
S. P. D.

**M**agnam capio voluptatem, quoties cogito, uti ab iisdem magistris literas docebamur adolescentuli; ita utrumque postea idem eloquentiæ studium adamasse, atque etiam iis adjutum; me quidem præcepta ejus pro viribus in literas referendo, te vero, quod non paulo majoris spiritus, bene dicendo: quo illud es consecutus, ut quos veterum potissimum tibi imitandos proposuisti, eos non provocare modo, sed tuis etiam cedere in castris videaris. Quamquam vero ea parte longissime vincas: tamen illud me solatur, quod studium non plane dissimile, eosdem fere nobis amicos plurimis interis peperit: uti variis eorum exemplis comperi qui in Germania, Italia, Gallia, Britannia, Sarmatia, aut vicinis imperiis degunt. Putidum fortasse fuerit, diu ejusmodi sermoni immorari: cum me ipsum etiam spectet: sed Sueonum regno tacere non sinit præfens occasio. Nam ut cæteros fileam, qui

qui quotidie vel huc veniunt, vel me literis suis compellant. Hisce proximis diebus non semel de tuis laudibus sermo apud me fuit generoso adolescenti Jacobo Skyttee, quem video non solum legisse omnia pene, quæ divulgasti, sed tanta eorum admiratione teneri, ut unus ei Puteanus sit instar omnium, qui triverint hunc eloquentiæ callem. Ac magnopere ille gaudebat cum ex me cognosceret, quæ inter nos animorum conjunctio foret, meque maximopere rogavit, ut simul ac ad te scriberem, suas literas adderem meis. Omnino enim se velle tibi innotescere aiebat. Hunc honestum ejus ardorem scio tibi non ingratum fore: partim quia optime semper volueris studiis adolescentiæ: partim quia publici interest, ut illustri loco nati, quando literarum ac eloquentiæ amore flagrant, in præclaro hoc proposito magis magisque animentur. Est vero adolescens is minimus natu filiorum perillustres ac generosi viri, Joannis Skyte senioris, L. Baronis in Duderoff, Domini in Grousoo, & Stronszardum, Equitis aurati. Qui quantus sit in regno Suecorum ex eo cognosces, quod idem sit ex summis regni senatoribus: idem universæ Livoniæ, Careliæ & Ingræ gubernator: idem Academiæ Upsaliensis Cancellarius. Idem Finlandiæ septentrionalis judex provincialis, nec facile dixerim, quanta indies incrementa apud Suecos ac populos vicinos literæ ac eloquentiæ capiant hujus Viri operâ: Ut vere Mecænatibus nomen mereatur. Quin ejus maximè instinctu serenissimus Rex Gustavus Dorpathi in Livonia illustre Gymnasium erexit in quo Baro Skyttius orationem inauguralem ipse habuit anno superiori iiii. Id. Octob. Imo suis etiam sumptibus in Academia Upsaliensi professorem Eloquentiæ extra ordinem alit. Ut jam ea Academia non regis modo professoribus, sed Skyttriano etiam se jactet. Nec minora sunt, quæ molitur: imprimis vero totus est in eo, ut regem non fortissimum modo sed etiam eruditissimum inflammet ad Academias, Collegia, ac Scholas excitandas in cunctis ditionis suæ terris; Etiam (quis credat?) in Lapponia illa, dubium fabulis an historiis magis decantata. Gaudeamus, mi Puteane, quod etiam sub frigido illo axe Musarum ardent amore, nec Musarum modo, sed etiam nostri utriusque. Multi enim, ut dixi initio, nostri itlic amatores, tui etiam admiratores. Quare, ut puto, nec grave tibi erit, tribus verbis respondere illustri Baroni Skyttee. Quod non ipsi modo, sed & mihi atque adeo illustrissimo parenti ejus longe erit gratissimum. Literas Amstelodamum procurabis, ibi enim alterum jam men-

sem vivo. Necdum tamen Historias ac Politicæ profiteri sum publice aggressus. Interim stipendium nobis liberaliter fuit: ac fruimur otio beato, sed minime segnè. Nam non minus interim scribendo prodero, quam si ingens corona à dicentis ore penderet. Plurimam salutem dices V. Cl. Tuldeno, Castellano, & si qui præterea ament studia nostra.

*Amstelodami.*

## CXXXIX.

Winando Rutgersio *Sa. Theol. Doct. S. P. D.*

Multis occupatus, Vir Clarissime & Amicissime, nolui tamen deesse postulatis tuis. Amstelodamum ante quinque menses commigraui. Ubi loco habeor perhonesto. Stipendium, cæteraque emolumenta, quæ ex publico percipio, exsuperant tria florenorum millia. Spes adhuc aliorum, pro liberis. Quem mihi commendas, vir mihi videtur apprimè probus. Nec opificium ei apud Batavos vel Westphalos obtinere debet. Nam itidem farcinator Batavus ille erat, qui apud Westphalos ab acu ad sceptrum pervenit. Nosti Monasteriensium fabulam? Sed extra jocum. Optime ei volo, idque imprimis tui causa. Necdum tamen video, quomodo ei valde utilis esse possit opera mea. Nam pedellatus, quem vocant, & ut sic dicam, subpræfectura bibliothecæ, & similia quæ illustrem hanc scholam spectent, iis potius concedi solent, qui vel literati sint vel saltem non *amovendi*. At hic humanitatis studiâ non degustavit. Cæterum alia sunt, ad quæ magis sit idoneus. Tantum vacare aliquid ejusmodi velim; etsi jam alii sint, qui similia à me petierint, & quidem quibus negare nihil possum: Nec hoc prohibet quominus pari cum iis loco sit hic tuus. Plura velim, quam possum. Sed faciam quicquid potero. Sic amicissime vir merentur virtus & amicitia tua, postulat autem mutuus amor, qui jam ab annis est triginta vel circiter, ut non recurram ad vetera: nempe affectum qui inter parentes utriusque nostri fuit; de quo multa prædicare mihi parens tuus solet. Intelligo te circa Paschales ferias excursurum. Advenies gratissimus. Credo optimam etiam adduces uxorem, quam non conspexi ab eo tempore, quo cum vitrica utebatur Dordrechtii hospitio meo. Sane tempus sit, ut videat has terras, quas puto, ab longo adeo intervallo non adspexit. Uxor eam salvere jubet. Multa etiam salute impertias

Collegas doctissimos & omnes mei amantes.  
Vale optime & ornatissime Rutgerfi.

*Amstelodami.*

*Tuus totus,*  
G. J. Vossius.

CXL:

Guilielmo Episcopo Londinenfi.

Reverendissime in Christo Pater, Domine Illustris.

**M**Irari te longum adeo silentium meum non solum arbitror, verum & certe scio. Quippe qui eorum, quæ in causa sunt, cur scribendi hoc officium diutius distulerim, minimè, ut puto, gnarus esse possis. Itaque rem omnem in pauca conferam. Postquam Lugdunenses viderunt, eo me propendere ut Amstelodamum commigrarem, id unum petierunt, ut saltem rem in integro relinquerem, usque dum locuti essent cum Amstelodamensium illis, qui Hagam ad illustrium ordinum conventum missi ab urbe sua forent. Interea diem illi ex die ducere, & nescio quas ob causas moras necere. Jam mensis unus & alter exspirarat, cum frustra responsum exspecto. Tandem cum Academia Curatores Lugdunum venissent, idem à me postulans quod ante. Molestum mihi erat sic animi pendere. Sed quid facerem, nisi Lugdunenses mihi aperte inimicos vellem? Aliquanto post in Hagenfi Ordinum conventu magnis studiis certatum inter Amstelodamenses & Lugdunenses Delegatos, utrum Amstelodamensibus liceret illustre erigere Gymnasium cum in propinquo sit Academia, cujus id solius jus videatur, ut in ea publicè doceant professores. Non obstitere Amstelodamenses, quo minus omnis tum controversia ab ipsis proceribus decideretur. Quod si contigisset, sine dubio pronuntiatum pro Amstelodamensibus foret. Parvi enim momenti sunt, quæ Lugdunenses pro se adferunt. Nec facile Civitates adversus seipsas sententiam tulissent. Quippe si Amstelodamensibus id non licet; nec alteri vel Hollandiæ, vel Zeelandiæ Civitati licebit, cum utriusque Provinciæ sit Academia Leidensis. Id verò nunquam dixerint vel hujus vel illius Provinciæ Civitates. Præsertim cum non una alteraque sit ex majoribus, quæ idem ac Amstelodamenses affectet. Solum eas impedit, quod sumptus essent faciendi maximi, quibus vix pares nunc videantur. Attamen meliora sperant tempora. In quorum præjudicium nihil nunc fieri velint. Adde quod Dordrecht in Batavia professi publice sint

Polyander, Nanfius, Marcellus: Middelburgi verò in Zeelandia, Gomarus, Mordisonus, alii; nec unquam se Lugdunenses opposuere: ut satis liqueat, quod nunc animati aliter sint, id totum esse ab invidia profectum erga Urbem tantæ potentæ: Nisi credere malumus ex eo id esse, quia metuant ne vehementius Lugdunensibus Amstelodamenses incommodent, partim ob loci propinquitatem, partim ob opes immensas, ut si velint, facile in Urbem suam possint summos quosque viros ex Academia Lugdunensi magnis promissis allicere. Utcumque illud est, in eo quem dixi ordinum conventu postulatam ab Amstelodamensibus & Lugdunensibus, ut utrique judicium hujus controversiæ committerent curiæ tum Hollandiæ tum supremæ. Itaque & Amstelodamenses, ne quicquam præter leges tentare viderentur, Senatorum judicio rem permittere. Quæ cum ad te perscribere vellem, intelligo paucis hebdomadis vel potius diebus negotium consummandum. Quare officium scribendi paulisper differebam. Verum tres, aut quatuor effluebant hebdomades, priusquam parati essent Lugdunenses. Paratis illis novæ iterum spes quæstionis unâ atque alterâ hebdomadâ definiendæ. Sed adhuc sub iudice lis est. Quamobrem cum iteratò me spe frustratum viderem, ulterius differendam scriptionem non putabam. Aiunt quidem fore ut intra dies paucos decidatur. Sed hoc alteris tum literis malim significare, quam diutius nunc silere, ne penitus immemor videar officii mei. Priusquam Amstelodamenses Haga domum redirent, convenit inter eos & Lugdunenses, ut Amstelodamum commigrarem, sed conditione hac, ne publicè docere aggredieremur, dum lis ea penderet. Etiam Academiae curatores, cum Hagam excurrissem, idem à me postulârunt. Quare hic otio nunc fruor, sed negotioso. Nam præterquam quod nonnihil mihi molestum est tam diu à publico docendi munere abstinere, etiâ sollicitus sum de Legibus atque aliis, quæ ad constitutionem novi Gymnasii pertinent. De his enim ut nunc cogitarem petiere Urbis hujus proceres. De controversiæ verò exitu minimè sum sollicitus. Nam nulli penè is dubius est. Nec multum cause suæ confidunt Lugdunenses. Sed aiunt plerique eo se litem movere Amstelodamensibus, ne si forte Gymnasii illius gloria quandoque vel incommodet Lugdunensi, vel etiam luminibus obstruat, à posteris accensurum, quod initio non obstitit, cum ista ab Amstelodamensibus tentarentur. Quidquid verò de Academia est Lugdunensi, in eo prope omnes conveniunt prudenter agere Amstelodamenses,



ses, ac rectè consulere, non modò Civibus suis, & Juventuti, sed etiam oppidis vicinis; cum periculo non careat si adolescentes, priusquam vitæ modum sciant, mittantur eam in Academiam, ubi non in Collegiis vivant, sed in ædibus apud cerdones in quos imperium exercent ipsi; unde fit, ut noctu bene poti per plateas grassentur, non sine periculo & suo & alieno. Invitus quicquam exaro, quod nomini Academiae ejus obesse possit, quam non amare modò debeo sed etiam venerari. Attamen & id verissimum est, etiam ab eo tempore quo postremo ad te scripsi, complures gravissimè vulneratos, ac nunc etiam Zelandum bono genere prognatum ex vulnere decumbere; de cuius vita planè conclamatum videatur. Reus verò, ut fieri istic solet, fugâ sibi consuluit. Quod suggerebas ne proceres patriæ offenderem, id quamquam antea fixum mihi erat, tamen monitu tuo incitatus, serio magis attendi. Sed neminem reperi qui agrè ferret, vel factum improbaret meum. Imo plerique ex Lugdunensibus apertè ita dicunt, tam me prudenter facere, qui meliorem Amstelodamensium conditionem sim amplexus (nam & idem se facturos meo si loco fuissent) quàm Amstelodamenses peccant subducendo eum Academiae qui bonam juventuti operam navet: nec enim conquirere id se posse Amstelodamenses ex Academia ejus Provinciae, cujus ipsi sint pars illustis, vocare quemquam in urbem suam, cùm magis rationem habere debuerint Provinciae quàm suæ Civitatis. Et sane speciosè admodum ista dicuntur. Sed obtendunt Amstelodamenses jus esse professoribus quovis commigrandi, quo velint: ad hæc se prius rem omnem communicasse cum Lugdunensibus; nec obscure iis significasse, si neutiquam parati me essent dimittere, posse de eo conveniri, dummodo mihi satisheret, cui se obstrictos faterentur. Quod si tum à Lugdunensibus, & aliquot etiam mensibus post fuerit cessatum, non esse profectò quod nunc Amstelodamenses accusent, sed se ipsos qui in me retinendo fuerint negligentiores. Alia etiam non levis momenti pro se adducunt. Sed video me jam alteram paginam explevisse. Quare ne longior sim, abruptam, si unum illud adjecero, plus omnino mihi hic otii fore, ad ea limanda ac perticienda, quæ sum exorsus. Imprimis autem quod toties tibi, Illustrissime Domine, postulatum, me ad Ecclesiasticam Historiam accingam, quantum per munus publicum licebit. Magnus est animi mei ardor ad præstandum aliquid quo Spartam illam ornem. Ac quanquam malè me habet, quod sex septem homines (quorum magna ante

annos duodecim in Ecclesia erat auctoritas) propterea quod inter extremas sententias cum antiquitate aliquid medium probarem, sic afflixerint rem familiarem, ut longe opulentior Lugdunum venerim, quam nunc recedo: tamen magis ægre est animo meo, quod relictis propemodum studiis sacris coactus sum docere bis de die in studiis humanitatis. Nam manè quidem Xenophontem, Aristophanem, aut alium ejus generis enarrare soleo: post prandium autem Florum, Justinum, aut similem. Nisi quod postremo biennio dum expono Sulpitii Severi Historiam Sacram, occasio fuit expendendi universam Historiam veteris Testamenti. Mallet eadem occasio fuisset in rebus Christianorum, propter provinciam illam quam suscepi. In qua lento admodum pede sum progressus. Absque eo fuisset his annis duodecim, si bene me novi, minimùm in Historia Ecclesiastica sex ejusmodi volumina ac est Historia Pelagiana, nec minoris bonitatis edidissim. Sed hoc fere illi non poterant, qui quod honoris mihi accederet, sibi decedere arbitrabantur. Ego vero etsi optimi cujusque aliquo etiam magnatum favore subnixus temporibus tamen cedendum putavi. Nec aliter poteram, si conjugi ac liberis consultum vellem. Nunc auctoritas eorum de quibus conquerabar, multum refrixit. Planeque omnia suo magis momento pensantur. Maxime è cordatissimo hujus urbis Senatu. Verum oblitus non tam mei, quam negotiorum tuorum iterum materiem ingredior de qua priusquam omnia dixero, diem clauso componat vesper Olympo.

Deus Opt. Max. te, Illustrissime Domine optimeque Meternas, Serenissimo Regi Carolo, Regno Britanniae magnæ, Ecclesiæ universæ ac amicis & cultoribus tuis, familiæ in his meæ, quæ assidue pro te vota facit, diuturnam ac incolumem vitam largiatur.

Amstelod. cl. Idc xxxi.  
Prid. Id. Quincties.  
St. Vet.

Devotissimus & obstrictissimus, Reverendissimus & Illustrissimus  
nomini tuo,

G. J. Vossius.

CXLI.

Gerardus Vossius Hugoni Grotio  
S. P.

JAm ex amplissimo affine tuo Reigersbergio intellexeris, vir maxime, ut Amstelodamenses

lodamenses causis compulsi gravissimis, constituere in urbe sua cogitent Gymnasium illustre: atque ut eam ad rem utilem existiment, operam tum meam, tum Collegæ, & amici veteris Gasparis Barlæi. Sed Leidenenses plañe habent persuasum, detrahere eam rem multum posse nomini, & existimationi Academiæ suæ: eoque omnem movent lapidem, ut hoc negotium disturbent. Primum negant juris hoc esse ulli civitatum, præterquam suæ: cui pro tolerata fortiter obsidione, præmii loco sit attributum, ut Academiam habeat, ad quam Hollandiæ, & Zelandiæ ablegetur juvenus. Amstelodamenses autem arbitrantur, aliud esse Academiam statuere, quam ad rem opus sit privilegiis, & immunitatibus à suprema potestate concessis: aliud autem Gymnasium erigere; in quo juvenus, & alii Musarum amantes, absque ejusmodi privilegiis, liberali imbuantur doctrina: quale jus penes singulas esse civitates. Existimant quoque, eam rem plurimum commodare posse Leidenensibus; quia si annum unum alterum diutius apud se detineatur juvenus, & eruditione auctior ventura sit ad Academiam, quod ex honore loci futurum, & judicio firmatior, quod efficiet, ut deinceps hic minus sit turbarum. Urgent iterum Leidenenses, si habere Amstelodamenses velint professores aliquos, saltem non alibi iis docendum fore, quam in Scholis classicis: uti apud Dordrechtanos fecere professores, Nansius, Polyander, Marcellus. Amstelodamenses aiunt, non esse laborandum Leidenensibus, utrum in auditorio aliquo Scholæ Classicæ, doceant professores: an loco aliquantum dif-fuso, qui magis deceat non magis Doctores ipsos, sed etiam adolescentes, jam rude à ludi moderatore donatos, ac pariter tot præstantissimos cives, qui studia colant, ac de rerum natura, vel imperiis, aliisque rebus præclarissimis, publicè alios diferentes audire exoptent. Denique objectant, ut hæc essent, non tamen debuisset Amstelodamenses ullum ex Academia hac vocare: sed potiorrem iis habendam fuisse rationem Scholæ, quæ totius sit Hollandiæ, ac Zelandiæ, quam quæ unius sit urbis futura: præsertim cum ipsi nobile sint membrum in Procerum conventu, à quo curatores Academiæ statuuntur, ut quos hi statuerint Academiæ professores, iidem ab Amstelodamensibus ipsis præfecti fuisse Academiæ sint dicendi. Neque negant Amstelodamenses, hæc alicujus esse ponderis; ac propterea delegati eorum, in Ordinum conventu ante menses duos, cum à Leidenensibus super hoc compellati essent, eò inclinabant, ut si rogarentur, ne quemquam vocare ex Academia sua vellent,

morem ea in re gerent, dummodò mihi satisheret, quo invito pacta conventa non possent reddere irrita. Leidenenses verò passi sunt optimam occasionem effluere, quamquam dies dicta esset conventus, & ea de causa semel iterumque Lugduno Hagam excurrissim. Nimirum honestius urbi suæ putant Leidenenses, si non tam rogent Amstelodamenses, ut à proposito desistant, quam si in proximo Ordinum conventu, qui mense Martio futurus, interdicatur Amstelodamensibus, ne Illustrem Scholam erigere, aut saltem ne quemquam ex Academia, ad Scholam Urbis suæ vocare Professore possint. Amstelodamenses autem negant, se quicquid facere velle, quod privilegiis Leidenensium adversetur, sed si iis repugnet consilium de gymnasio, in quo doceant professores publici, solum opus esse, ut privilegium hoc sibi monstretur: eo viso, velle se ab instituto desistere. Ad me autem quod attinet, eo se potissimum aiunt de me cogitasse, quia non solum opera mea in publicè docendo Historiam, pergratum toti urbi argumentum, utilis sit futura; sed etiam in dirigendis Scholis duabus classicis (quarum non melior facies sit, quam in cæteris Bataviæ urbibus) juvare consilio Amplissimos Consules possem: quippe qui non sine fructu annis totis xv. Dordrechtanæ Scholæ, ante hos annos xv. præfuissem. Negant præterea, cum in Academiam professores vocantur, stipulationem intercedere, qua obstricti professores, non alio ire possint, si res eorum sic ferant. Si jus est Leidenensibus, abrogandi munus professoribus, cujus rei exempla nuper vidimus (ut de socero Junio taceam, cui professio linguæ Hebrææ erepta invito: ) sanè etiam professoribus jus esse abdicandi se munere quando vellent. Ac hujus rei exempla multa suppetere: ut in Danæo se conferente in illustrem Scholam Gandavensem: Gomaro, Middelburgum eunte; Meursio proficiscente Soram, & compluribus aliis. Si professione fungens non possit à se vocari, tantum requiri, ut professor muneri renunciet: nec dubitari posse, quin saltem eum tum vocari sibi liceat. Hæc sunt, de quibus Leidenenses in proximo Ordinum conventu, controversiam Amstelodamensibus moturi videntur. Quod si sic etiam se nihil efficere posse animadvertant, puto, contenti erunt, à Proceribus nostris xx. aut circiter, millia expetere, ut deinceps liberaliùs habeant professores alicujus nominis, atque alios etiam consequantur, qui vel docendo publicè, vel scribendo illustrare hanc Academiam possint. Hujus rei indicium non unus mihi eorum fecit, qui Leidenensibus familiaris utuntur. Nec obscurè innuunt,

nuunt, discessum meum causaturum, ut luculentiori conditione Salmalius iterum advocetur: ut paulum illud damni, quod in me faciet Academia, magnitudine ejus viri abundè compensetur. Equidem si venerit, gratulabor, eo magis, quia ei docendum publice non erit, eoque defæcatori animo totus erit in scribendo. Mihi tam felici esse non licuit, cui bis de die docendum fuit, ut ignosci mihi debeat, si scriptorum præstantia ab aliis vincat. Laus hæc publica est; nec omnia omnes possumus. Ac de isto hætenus. Ad aliud nunc venio, in quo consilio atque opera mihi opus tua. Ante dies tres quatuor, redditæ literæ filio meo Dionysio à Generosissimo Barone Christophoro Stupesio, quibus significat fortasse iturum se Constantinopolin, & ad alios orientis tractus: ac quia meminere, quanto ardore filius soleat expetere, ut terras eas lustraret, ut quæ deessent in Arabicis, ab Arabicè loquentibus posset addiscere, voluisse se nunc occasionem offerre, qua sine Parentum molestia, voto suo posset satisfacere: Comitem enim hujus itineris assumpturum. Non abhorret filius, qui nihil æquè desiderat, quam ut hoc fiat. Sed quiddam scrupulum mihi injicit atque uxori. Nam quia illustrissimus hic Baro, in Religione sequitur Opiniones Ecclesiæ Romanæ, ut filius meus ad ætatem (necdum annorum xx. est) judicio non adeo est firmato, ut inescari promissis nequeat, aut argumentis decipi speciosis; parum tutum arbitror, eum committere itineri tam longinquo cum iis, qui rem Deo se gratam facturos putarent, si ad gremium Ecclesiæ Romanæ filium abducerent. Suspicio mihi injecta ab aliquo, à Rege Christiano legatum iri aliquem Constantinopolin; inque hujus comitatu Baronem Stupesium fore. At Rex non mittet alium, ut puto, quam suæ in Religione sententiæ. Eum Presbyter comitabitur, & alii *ἰψὸς*. Quare tanto plus periculi filio sit, in tanto eorum numero, qui diversum sentiant à nobis. Ut mittam, quod fortasse in iis futuri homines malis moribus, quos affricare meo possent. Ille quidem se satis firmo ad ea pectore arbitratur: sed ego multis edoctus exemplis, tuta etiam timere didici. Nec propterea consultationem omnem de hac re abjeci. Fortasse enim illustris hic Baro, minus etiam Romanæ Ecclesiæ placitis adhæret, quam cum viveret nobiscum. Fortasse etiam comitabitur Ephorus, Paschalis Medicus, Gallus, qui tantum non juravit in verba Zelotarum nostrorum. Fortasse & unà iturus, fratrum generosorum tertius, qui ut intelligo, in Religione planè noster est. Et si Legatus mittendus, fortasse erit aliquis,

qui in Religionis controversiis, non male sentiat de Ecclesiis nostris. Quales è politicis Gallia habet multos, qui distinguere æra possint lupinis: Hæc si essent, facilem me postulatis filii præberem. Est enim is Baro, Christophorus Stupesius, ut si unum illud de Religione excepero, nihil in eo possit desiderari. Pius est, ac Numinis metuens: Gravis est, modestus, & cordatus. Ingenio excellit, & pro ingenio rara ei eruditio. Et mei, filique est amantissimus. Quare si pulchra fuerit occasio filio visendi orientem, nullis, vel exiguis impensis meis: nec causa sit satis gravis, cur in Religione ei ab *ἐπεσθῆναι* metuere debeam: sanè fore puto, ut morem ei geramus. Verum haut animus annuere, antequam de eo, quod dixi, penitus aliquid cognoro. Quare rem feceris longè mihi gratissimam, & amicitia nostra dignam, si ea, quæ vel jam scias de itinere hoc, vel ex Illustribus Baronibus, aut aliis possis cognoscere, ad me, iis ignaris, perscripseris. Ego quidem & filius generoso Baroni rescripsimus. Sed de metu eo qui Religionem spectet ne *ῥῶ* quidem. Id enim magis abalienare, quam conciliare posse videbatur. Si inconsultum planè erit, ut filius se unà in viam det, aliæ à nobis causæ, & veræ poterunt adferri, cur id minus fiat.

Accepi his diebus, literas ab ornatissimo Omsio nostro, quibus significat, impensè se desiderare responsum ad literas eas quas ad te misit, postquam mihi sententiam tuam, de equestri S. Michaelis dignitate perscripseras. Nihil isti acceptius fuit humanitate ea, qua morem nobis gesseris. Atque optat, ut de cætero etiam certior à te fiat.

Salutant te, Uxorem, Liberos, omnes mei, atque unà filius tuus, qui in studiis probare se pergit.

Lugd. Bar.  
cl. Dec. xxxi.  
Prid. Id. Feb.

Tuus omni officio,

G. J. Vossius.

## CXLII.

Gerardus Johannes Vossius, Hugoni Grotio, S. P.

Magnis animis superiori hebdomade actum est, de negotio meo Hagæ in Illustrium Ordinum conventu, inter Leideneses & Amstelodamenses. Minantur Leideneses nihil se deinceps tribuere velle ad bellum adversus Hispanum, & Amstelodamenses violent privilegium sibi à Philippo Rege concessum, ut pro obsidione bis fortiter tolerata, erigere



gere possint Academiam. Aperta enim esse Privilegii verba, quibus cavetur, ne ulla Hollandiæ aut Zelandiæ urbs talem Scholam erigat. Amstelodamenses juberit attendere ad ea quæ antecedant vocem hanc *talem*, nempe privilegiatam, sive quæ honores graduum conferat, immunis sit à tot oneribus, suam habeat jurisdictionem. Quæ sint forma Academiæ: non illud, quod publicè doceatur, cum hoc multa habeant Gymnasia, quæ vocant Trivialia; omnia verò illa, quæ vocantur Illustria: ut Schola Bremensis, Sigonensis, Steinfurtensis, Dantiscana aliæque. Imo idem Dordrechtanos juris sibi vindicasse, atque Middelburgenses: nec Leidenses se unquam opposuisse. Primum hoc agebatur in Ordinum conventu, ut Civitatum Deputati sententiam ferrent de mente privilegii Leidensibus à Philippo, hoc est Principe Guilielmo sub nomine Philippi concessio. Sed ubi videre plerasque civitates eò propendere, ut pro Amstelodamentibus sententiam ferrent (quæque enim graviter ferret, jus sibi eripi deinceps in urbe sua alendi Professore publicum) maluerunt eam controversiam ad Curiam utramque devolvi. Utrum passuri id sint Amstelodamenses, necdum scio. Sed si sint, non dubito, quin Amstelodamenses sint futuri superiores. Usque adeo apertum mihi videtur, singulas civitates id juris habere. Hæc ego subito in chartam conjiciebam: quod nollem Nobilissimum illum Polonum, qui has literas perfert, & multa de laudibus tuis diceret, sine meis ad te literis venire. Propediem cætera perscribam. Hæc enim ego, quod dicitur, stans pede in uno, sane raptim adeo, ut metuum ne legere ea possis. Sed nimis festinationi ignosces. Proxima hebdomade, hoc est postrid. Kal. Maias Amstelodamum migro. Quod Deus benè vertat. Ibi judicium expectabo Curiae, si ad eam causa deferatur. Sin minus, cum Amstelodamentibus quid faciendum sit consultabo. Ita enim petiere, cum per hanc urbem Haga se domum conferrent. Vale Amplissime vir & amicissime.

Lugd. Batav.  
clō loc xxxi.  
xxix. April.

Tuus eternum,

G. J. Vossius.

## CXLIII.

Gerardus Vossius Hugoni Grotio S. P.

**A**NTE omnia, Incomparabilis vir, Deo immortalis gratias ago, quod diutinas horum temporum calamitates, temperarit dulcissimo beneficio liberationis tuæ. Quod eo majoris duco, quia ne aliud quidem sperare audebam, quam ut intercessione Principis exteri cum certis conditionibus dimittereris. Sed subinde labascebat animus, cum minimè viderem, quibus conditionibus & conscientia tuæ, & Procerum simul voluntati posses satisfacere. Nunc Deus voluit, ut planè tuus esses, neque ulli præterquam uni sibi, beneficium tantum deberes. Quanto magis propterea Divinæ sis bonitatis obstrictus, satis intelligis. Sed quia vita hæc terrestri, nihil aliud esse videtur, quàm perpetua tentatio quædam, facillè vides, quanta nunc opera danda tibi sit, ne qui à Deo corporis es custodia liberatus, à communi generis humani hoste, in carcerem longè scediorum, animi nempe, ullis ullorum blanditiis pelliciaris. Quod eò ad te scribo, quia inimici tui spem eam conceperunt, propediem huc nuncium allatum iri, quod Bertii exemplo abjuraris quæcunque à Reformatis Ecclesiis docentur, eosque omnes pronunciaris hæreticos, qui non per omnia cum Romana Ecclesia sentiunt. Equidem nihil tale de te metuo. Novi enim pietatem, animique constantiam. Sed tamen quid homuli sumus, si Salomon ipse scedè adeo sit prolapsus? Quare Deum oro, ut nec spe, nec metu, à recta te via, & conscientia integra, abstrahi patiat. Tu verò, vir Maxime, me vicissim in precibus tuis apud Deum habe commendatum, ne vel pellacia horum, vel illorum blanditiis, agere id unquam velim, quod salva conscientia facere minimè possum. Sed de me quidem propediem fortasse plura. Nam expecto, quid vel Synodus decretura sit, quæ Roterodami nunc haberi incipit; vel quid Nobiles Academiæ Curatores viii. Augusti facturi sint in rebus meis. Ad te redeo. Legi cum optimo Parente tuo, scriptum de questione ea, an Melancthoniana sententia rectè Pelagiana esse dicatur. Scis quid hac de re sentiam. Sed aliud nunc in questione est. Nempe an expediat ea, quæ scripsisti, quamprimum in lucem exire. Video de hoc ne inter tuos quidem satis convenire. Et utrimque argumenta adferuntur. Quibus id probatur, aiunt Dei, & veritatis causam agi, hanc ab omnibus causæ satis intelligentibus defendi viribus omnibus debere: à te verò imprimis,

imprimis, partim quia perpauca, quid vetus Ecclesia senserit, æque sciunt: partim quia tutius istic ubi nunc es, potes: partim quia hoc sine liberasse te Deus videatur, ut veritatis sis Patronus fortis. Accedere aiunt, quod multorum millium de te spem eludere non debeas. Item quod aliter mundo testatam facere innocentiam tuam vix possis. Sed quibus secus videtur, hi satis fore putant, si ea defendas quæ egisti ipse dum Reip. habenas moderareris. Ea quæ à Synodo decreta sunt, malunt oppugnari ab illis, qui populum docent, ut quos ea res propius tangat: si-cubi opera eorum claudicet, posse à te iuvari. Sed ut ipse rectis quali cornibus in Synodum incurras parum tutum putant, eo quod in Britannia, Belgica, Germania, ipsaque Gallia tot habeat defensores; quorum impetum metuunt ne solus possis sustinere. Scis quam duram suscipiat provinciam, cui cum Theologis negotium est. Adhæc negant res tuas ita firmo loco esse, ut non vel obitu Regis, vel alio infortunio inde ejici possis: nec debere te in totum tibi aditum præcludere in loca illa, ubi Calvinii dogma regnat. Præterea aiunt magnis passibus, eò nunc omnia tendere, ut brevi planè moderatis hominibus futurum sit opus, à quibus triste Patriæ dissidium sopiatur. Utilem verò tunc nobis operam tuam fore, si non tam Remonstrantium causam susceperis defendendam, quam unius tui; quod necessarium esse minimè dissentientur. Accedit, quod aliter si agas, minus etiam, quam nunc sunt, in gratia erunt, qui vel sanguine vel affinitate tibi juncti sunt. Utrum majoris hæc argumenta sint, an priora, satis per te vides. Quamquam vero consultore non eges, tamen non possum, quin addam, minimè mihi improbari, ut paululum saltem hoc negotium differatur. Præsertim quando conjux tua, itemque affines planè habent persuasum, tibi, liberis, sibi, plurimum posse hanc rem incommodare, nec usque adeo necessariam esse. Hæc sunt quæ Delphis scribebam. Nunc rectè Lugdunum peto, unde de aliis alteras ad te literas dabo. Neque enim plura nunc possum, ob festinationem. Deus tibi, vir Clarissime, amicorum maxime, cum animum inspiret, qui faciendæ Ecclesiæ concordie plurimum adferat emolumenti. Summo Theologo Tileno salutem si dixeris, gratum feceris. Nec enim obitare arbitror, quod de facie minus nòrim, cum animi virtute hominem æstimemus: quam qui norit, is verè mihi posse virum videtur. Vale.

xxii. Jul.

cl lcc xxxi.

Tuis æternum,

G. J. Vossius.

## CXLIV.

Johanni Rouse, *Bibliothecario, S. P.*

Quas literas vides non Lugduni Batavorum scripsi, sed in Amstelodamensi urbe, emporio per orbem totum inclyto, & Belgicæ federatæ, ut sic dixerim, Venetiis. Ea civitas viris & opibus potens hoc uno nomine visa sibi infelicio, quòd præter vulgarium Scholarum præfectos non haberet publicos juventutis doctores. Eoque erigere statuit, Gymnasium, ut vocant, illustre; cuius fundamenta, ut jacere vellem, petierunt, nec à me modo id obtinere, sed etiam Casparo Barlæo, Poeta & Philosopho egregio. Ille Philosophiæ Professor futurus, ego Historiarum ac Politices. Labor idem mihi qui Lugduni: stipendium pene altera parte majus. Nec tamen tam illud ut migrarem persuasit, quàm quòd non paulò melius liberis hic meis possum consulere, & plus otii sum habiturus ad ea conficienda, quæ animo confeci. Verè enim id dicere possum, mei me aliquam, majorem liberorum, maximam autem posteritatis rationem ea in re habuisse. Accepi à Reverendo viro Ludovico de Dieu Marianum Scotum calamo exaratum. Non dubito quin sit exemplar illud de quo mecum Oxonii verba faciebas. Nam aiebat de Dieu id sibi transmissum à Reverendissimo & Illustr. Archiepiscopo Hiberniæ: ac quanquam Literæ nullæ essent additæ, tamen quia Historici esset argumenti, mihi transmissum colligebat. Simulatque vero in manus sumsi, vidi nomen meum frontispicio ascriptum, quod omnem utrique scrupulum solvebat. Itaque primà occasione ad Reverendissimum Dom. Archiepiscopum scribam. Quod eo hoc tempore non facio, quia ob transmigrationem, & curas alias, non potui hoc volumen Mariani sic versare, uti vellem, atque uti eum oporteat, qui apud heroem illum nolit crudum promere judicium. Nam ingenuè ut dicam, quod res est, tantum carptim complura legi: quod facile mihi omnes ignoscent qui norint vitam meam, præsertim hoc tempore. Qui has tibi literas tradunt, sunt tres Fratres Adamus, Guilhelmus, & Carolus, Filii Nobilissimi Viri Leonardi Neyenburgii, qui dum viveret, primum Imperatori Rodolpho, postea Matthiæ qui in Imperio successit, à consiliis fuit. Ephorus eorum est Joannes Addon natione Bohemus: cujus & gentis sunt juvenes illi quorum studiis præest. Rogarunt obnixè me, ut ne in Britanniam ituros sine commendatitiis meis dimittere se vellem. Lubens iis morem gessi: quippe qui probita-

A a

tem

tem illorum ac modestiam haberem perspexitam. Quo nomine non mihi solum sed collegis etiam meis fuere accepti. Quare si fortasse in solo extero, consilio egeant tuo, ejus participes illos facias. Doctissimum & amicissimum Pocockum in Syriam esse profectum, ut majora ibi Orientalium Linguarum incrementa caperet, intellexi ex Britanno, qui Oxonio veniret; & Hamburgum ad Britannum legatum proficisceretur. Negabat se quicquam Literarum apportare, quod subito decedere sit coactus. Attamen securum me reddebat de exemplaribus Pococko transmissis. Unde & colligo accepisse vos duo Oratoriarum Institutionum exemplaria quae adjunxeram. Diu ea res me valde sollicitum habuit; propterea quod nihil de illis intelligerem. Heri me convenit Molenius Danus, Ephorus Nobilissimi Juvenis Rosacrantzii. Is mihi Arontii exemplar inauratum ex dono typographi obtulit, ex quo etiam cognovi eum de nova thesauri mearum editione cogitare. Itaque de isto etiam proximis vel ad ipsum vel ad te Literis scribam.

Vale, Vir Clarissime & Amicissime, meoque nomine plurimum saluta summos viros, Acc. Fruen, Gu. Juxon, Br. Duppan, D. Prideaux, Sam. Fell, Thomam Claytonum; Sed & optimum & doctissimum Harrisonum & omnes quos nostri scis amantes.

*Amstelodami*  
clō Ioc xxxi.  
iii Id. Maias.  
St. Vet.

*Tuus totus,*

G. J. Vossius.

#### CXLV.

Joanni Meursio S. P.

**Q**uod moras tantas vir atque amice summe neſtat Blauwius noſter, id non tibi tam moleſtum eſt quam mihi. Eo magis quia idem facit in Maimonide mei Dionyſii μαμαελου. Simulac literas tuas à veſtrate mercatore accepi, recta me conſulſi domum ejus. Sed aberat ab urbe. Rediturus poſtridie dicebatur. Diſtuli igitur ſcribendi ad te officium, ut perſcriberem certiora. Nunc ultra deferre non licet, quia jamjam abiturus iſt à quo Literæ mihi tuæ redditæ ſunt. Et necdum Blauwius reverſus. Compellavi interea fratrem ejus natu minorem ante meſes ſex ſeptem ex Italiâ reverſum. Expoſui illi quæ ſententia tua foret. Ille petere ne quid agerem ante reditum fratris. Hoc cauſæ cur

non remittam ſcripta tua. Simul ille quid diceret certo te viſurum ſpecimen editionis, antequam ad vos redierit Danus hic Mercator. Facilem ſe & citam ſcire ad te id procurandi viam. Negabam me credere niſi quod viderem tot annis eluſus. Omnia meliora ſpondebat, & hac ipſa hebdomade orſurum, vel ſaltem ſimulac fratrem compellare dabitur. Quid facerem? Urgebo opus filii & tua: & tua magis quam illud filii locutus ſum, & ante annum circiter & heſterna iterum die Noomſium Arlanderveniz dominum de Cretenſium editione ejus honori dicanda, & opus ipſum luſtrandum dedi. Qui valde eo capiebatur. Sed ægrè ferebat triconem Blauwium ſic nos omnes fruſtrari. Nec ultra ego quicquam commonere, vel innuere potius (eſti nec id opus fore apud honeſtam animam arbitrer) quamdiu necdum videret lucem. Peſtilentia quæ ſuperiori anno ex una Leidenſi urbe ſexdecim hominum millia abſtulit, videtur nobis nunc comminari. Sed ſperamus meliora. Obeunt de hebdomade nunc trecenti nunc quadringenti. Nihil id tam magna in urbe præ Leidenſi ubi quaque hebdomade cum lues illa maxime graſſaretur, etiam mille quingenti & ultra moriebantur. Grotii mari Libero reſponſum à Seldeno J. C. Anglo, cujus de Syris diis & marimora Arondeliana & alia extant. Illuſtres Ordines noſtri in mandatis dedere Graſwinkelio J. C. meo ante annos viginti diſcipulo & convictori ut opus hoc reſellat. Mitto ad te primam partem Annalium Batavicornum filii Matthæi. Scio quam rerum noſtrarum ſis intelligens, & tanto facilius probaturum ſe tibi conſido. Clariffimis viris Laurenbergio, Stephano Joannidæ, aliis ſalutem plurimam, imprimis leſtiſſimæ conjugi & optatiſſimis liberis. Cui & conjux mea ac filius filiaque ſalutem adſcribi petiere.

*Amſtelodami.*  
clō Ioc xxxi.  
iii, Non. Jul.

*Tuus æternum,*

G. J. Vossius.

#### CXLVI.

Franciſco Junio, F. F.

**L**iteras tuas, Conjunctiſſime Affinis, ante unam, atque alteram hebdomadem accepi: atque ex iis de tuo in Gallias diſceſſu, certior factus ſum; ſimul etiam de cauſa hujus itineris. Equidem verebar jamdudum aliquid ejuſmodi, cùm cogitarem, non alio loco



loco habitum Pettæum, cujus labores noscam. Nihilominus cum mente revolverem, tot à Comite promissa, vix poteram à me impetrare, ut suspicioni ulterius indulgerem. Interea gaudeo, tibi que gratulor, quod omnia viri boni, & fidi Doctoris, munia expleveris. Si erunt, qui te hic mercede justa fraudabunt, at non deerit is, qui venturo sæculo, cum scœnore omnia rependat. Quod quæris, an probem abitum; mihi certè videris rectè, atque ordine fecisse. Si enim eo compensare operam tuam, Illustris Comes distulit, quod in Liberorum aliis ea indigeret: fortassis, ubi viderit, nolle te amplius animi pendere, gratus esse maturabit pro beneficiis tuis: Quam ad rem plus absentia valet. Præsentia enim plurimum vilescunt. Ac magis, quid habuerimus, videmus, ubi & nobis cendum. Sin is semper ei animus fuit, vanis tantummodò promissis lactare, longè etiam magis consilium tuum probem. Nam quid æquè miserum, quàm inani spe animum sustinere, ac tempus terere? Ut omnino præstet, maturè rebus suis consulere: Scis Poetæ illud;

—*Nocuit differre paratū.*

Utinam autem occasionem hic viderem utilem tibi operam navandi: fortasse id aliquando erit. Sed nunc tamen nihil occurrit. Fortè tui ratio hic haberi posset, si Professorum numerum augere Proceres Amstelodamenses vellent. Putarem te maximè idoneum, qui Mathesin publicè tractares. Sed nec Amstelodamensium mihi animus est cognitus, nec tuus. Ac ne ipsi quidem docere aggressi sumus. In causa est, is, quàm Lugdunenses Amstelodamensibus intentant. Nec ea tamen in rebus meis sollicitum te habere debet. Ita enim prudentes omnes censent, non posse aliter fieri, quin pro Amstelodamensibus Curia utraque pronunciet. Interea occupor in digerendis iis, quæ superioribus annis scripsi; præsertim quæ ad literas, & Historiam externam pertinent. Volo enim semel iis desungi, ut reliquam ætatem sacris literis, Historiæque Ecclesiasticæ liceat impendere. Ad te redeo, mi affinis, valdè optem, ut in Galliis, commoda affulgeat occasio, qua tui, studiorumque tuorum rationem honestè, ac commodè habere possis. Gaudeo quod ea nunc sis in urbe, ubi degit summus vir, & amicus Hugo Grotius. Is enim consilio juvare possit. Sed si deinceps illustri aliqua domus in simili, ac ante negotio, opera tua uti volet; nihil monito opus, cautius tibi agendum esse, cum id abundè malo tuo sis edoctus. Nimirum paciscendum est cum iis, qui longè sortem nostram excedunt;

quia si non adstringantur; simulatque operà est præstita, amor flaccescit, spes verbis factæ in vanum abeunt: durumque cum iis certamen est inferioribus. Interdum suspicio oboritur, te fortasse, quia tam malè tibi nunc cecidit, aulas odisse, sublimiaque illa vitare. Non tamen ab uno omnes discere licet. In quo non minus peccaretur, quàm si alba omnes linea signaremus. Tu pro judicio, quo plurimum vales, facilè discrimen facies. Ego quod hæc perscribo, non alia de causa facio, quàm ut postulato tuo morem geram. Si nulla est occasio in Galliis, qua consulere tibi possis, malim te duos, tres menses, apud nos degere, ut interea aliquid discipiat boni. Nec metuere debes, ne interea oneri nobis sis. Nam affectum meum hosti. Et ut mittam alia, possis consilio meos juvare: præsertim in Mathesi. Nec mihi quicquam eruditus, ac piis colloquiis tuis suavius esse possit. Et tamen nolim te propterea, ullam prætermittere occasionem, qua prolis tibi. Nam sic simul erit, quo afflictam Germanæ domum juves. Ea nunc biestri cum tribus liberis mecum fuit. Quartana laboravit, quæ ante triduum remisit. Etiam soror Maria, cum Filiola Caziniri fratris Dantisco venit, ac nobiscum vivit. Fecimus viduam affinis certiorum de adventu filiolæ, quæ jam decennis. Ac quia prævidebat uxor, eam continuo ad nos advolaturam, coacti sumus adjicere, ut differre hoc iter velit, usque dum soror Joanna Middelburgum repetierit. Nam quia jam viginti numero sumus, nullum cubiculum vacat. Id spero fore, ut optimè interpretetur. Aliter si saperet, atroci me, & meam, injuria afficeret; qui omnia Junianæ domus, honore ac commodis metiamur, quod satis est insolens, sæculi nostri moribus, ubi nemo aliud spectat quàm se, & liberos suos. Næranus Dantisco remansit, ut expediat negotia quædam, quæ conjugis bona spectant. Nam homo simplex (veniam dabit, quod sic loquar) homini obærato quinque florenorum millia credidit: Neque nunc videt, quomodo ultra mille florenos recipere possit. Dubitat Maria utrum velit nobiscum degere, an Delphis. Conjux posterius malit. Nam quia valetudinaria est, non posset mea, ejus habere rationem, quam vellet. Et tertia esset famula opus, quæ res in tam numerosa familia, plus incommodi adferret. Quare satius sit, si fortim cum marito, & famula degat, & subinde nos diebus plusculis inviset. Id neutrius fiet incommodo, & magis erit alendi amorè fororio. Vides quàm familiariter, ac liberè omnia perscribam, haud aliter ac si præsens adesses. Hæc postquam scripisssem, intellexi quiddam ex sorore Maria, quæ id se ac-

A a 2

cepisse

cepisse aiebat, ex Barthio cognato prioris Mariti sui. Id istiusmodi est. Illustrem Comitem Arundelium, postquam literas tuas accepisset, confestim rescripisse, nihil æquè sibi gratum fore, quàm ut ad se redeas, ac deinceps, cum discipulo veteri, Italiam lustres, velleque se Tibi supra victum, ac vestes, annumerare quotannis centum libras sterlingicas. Id si est gaudeo. Verum filius meus Joannes putat, vanum esse id planè. Et causam addebat, quia discipulus tuus sponsus sit, si vera est fama: ut de Italico itinere nihil esse possit. Barthius tamen pertendebat nihil esse certius: atque ita se ex duobus Anglis fide dignis accepisse. Tu quid rei sit, quæso nos quamprimum fac certiores. Ut vel tecum gaudeamus, vel porro quod facto opus sit cogitemus. Vale, Optime, & Charissime Affinis.

*Amstelodami*  
c15 Ioc xxxi:  
viii. Kal. Sextil.

*Tuus totus,*

G. J. Vossius.

#### CXLVII.

Johanni Meursio S. P.

**C**ERTIOR factus in Daniam ire præstantissimum virum Davidem Guilielmium, nefas putavi negligere talem adeo ad te scribendi occasionem. Et tamen nihil magnopere erat quod literis committerem. Attamen ubi semel calamum in charta posuero, facile amor aliquid dictabit. Quare illud primo, jam diem esse tertium quod apud nos Erastius agit. Semel iterumque adfuit mihi etiam in cena. Quo minus semper tecum fuerit, nescio utrum modestia ejus in causa sit, an quod nobiles quidam Dani id non permiserint. Sed quod hæcenus feci ut ostenderem quanti apud me esset commendatio tua, id deinceps etiam faciam: eo lubentius, quia vir est longe optimus & candidissimus, & qui te sui instar colat atque observet, sæpe etiam non alio quam patris nomine compellat. Magnæ mihi voluptati fuit cuncta ex eo cognoscere quæ ad te pertinerent. Gaudeo etiam ex eo me intellexisse, quidquid illud erat de Bibliopola vestro, nam cum paulo aliter hic res narrabat, melius ora malevolis obstruam. *Tu mægeitv* Coddæi libri superiori hebdomade sunt divenditi. Hæc auctio erat fatum librorum Rutgerfii, sed Heinsius consilium mutavit. Formidat ne sui vilius vendant; si tam cito auctio una alteram excipiat. Et sanè non temerè ita existimat: utrum intra hebdomadas paucas, an demum post ferias longas

auctio ea futura sit, nihil ipse certi habet; sed dixit ipse ante triduum velle se tecum de re tota consultare; atque id decreturum quod maxime mihi probabitur. Unde colligo eum propendere ut ne diu admodum ea res differatur. Quando erit ut te, uxorem, liberos hic videamus? Male sit militibus illis qui sic vias infestant, ut bonis sit male, neque nos te frui possumus. Sed quæso simul ac occasio sese obtulerit, eam ne negligas, rectaque te domum nostram confer cum tuis. Nam cur alibi potius divertas quam cum homine qui tuas virtutes scit æstimare, & fratris te instar amat? In Batavia gliscit dissensus inter proceres. Disputatur de induciis. Pleræque Civitates eo inclinant. A quibus dissentiant Harlempjes & Leidenjes. Etiam pleræque Civitates aiunt in ordine cogi debere Amstelodamenses; quippe qui Smantium Ecclesiastem ex urbe exire jusserint, & è suis unum alterum velint interesse synedrio. Uti apud Leidenjes & Delphenjes sit. Item qui non minus Remonstrantibus jus concionandi facere coeperint quam Luterani, Memnonistis, Judæis. Sane male esset Magistratui nisi militum se præsidio adversus factiosos Cives tueretur. Vorstium ut aliquid tandem scriberet commonui, qui sponte eo inclinabat, sed pudebat diurni silentii. Paruit tamen. Est Vir utriusque nostri amantissimus. Quod addo, ne propter silentium hoc amorem ejus putes imminutum. Denarius tuus post duas hebdomadas prælo subjicietur. Uxor uxorem tuam, liberi omnes mei, filia potissimum filiam salutatur.

*Lugd. Batav.*  
c15 Ioc xxx.  
vi. Id. Jun.

#### CXLVIII.

Joanni Meursio S. P.

**E**UNT in Daniam Fœderatæ Belgicæ legati, in quibus è Frisia præstantif. Scæfferus, è Batavia vero nostra Amplissimi Viri Beverius & Oertgens: hic Consul Amstelodamensis, ille consularis Reip. Dordrechtanæ, filius Clarissimi illius Beverii, qui ante bimestre septuagenario, ut puto, major decessit. Nefas fuisset eos sine meis ad vos literas venire: præsertim cum etiam petieris, ut tibi quamprimum rescribere vellem, ecquid de docendis apud nos Græcis Literis sit constitutum. Equidem vocatus huc sum ea conditione, ut illos subirem labores, subibam quos Leidæ. Eoque Græcas Literas cum Historia universa conjungi oport-

oportebit. Quo in consilio nonnihil aliqui mutant: qui me totum partim in rebus Hebræorum, partim Romana Græcæque Historia esse mallent. Ecquid tamen in eo sint mutaturi, non possum dicere, propterea quod de tota hac re procures nostri sileant. Videntur nolle hæc ad animum revocare priusquam lis Hagensis sit decisa. Nullus dubito quin curia utraque sententiam sit latura pro Amstelodamenibus. Saltem hoc scio, plerosque quibuscum locutus sum cum, Amstelodamenibus sentire. Sententiam feretur post duas tres hebdomades, ut ex iisdem senatoribus cognovi. Interea ut dixi neque nos docemus publice, neque Amstelodamenses quicquam de pluribus advocandis statuere, ne Lugdunensibus, eo intellecto magis ira gliscat circa præcordia. Nam si iis diu invidia fuit urbis hujus potentia, & ad invidiam odium accessit, postquam Amstelodamenses connivendum putarant in Remonstrantium concionibus, maximeque ubi seditiosos Cives urbe ejecerunt, qui honorifice à Lugdunensibus excepti: quid futurum iis deinceps animi putas quando nostri illustre erigunt gymnasium, & Doctores Lugduno arcessunt? Præsertim si audierint eos de pluribus advocandis serio cogitare. Valde autem habent Lugdunenses professores quod sibi de discessu meo gratulentur. Nam Curatores Consulesque ne alii tam facile alio pelliciantur, singulis Professoribus auxere stipendium, aliis quidem ducentis, aliis vero trecentis Florenis. Itaque, Theologi item Cunæus & Schrevelius jam habent mille septingentos, unde de cæteris possis conjectare. De Editione Epistolarum Casauboni adhuc deliberatur. Petunt Elzevirii ut cura Heinssii vel Riveti Epistolæ excubantur commoda manu, iis deletis quæ præteriri satius sit. Sed nec Heinssius nec Rivetus laborem eum suscipere volunt, vel etiam sumptus in eam rem facere ullos. Quare fortassis tarde hæc editio procedet, si modo unquam successura. Videntur Elzevirii ex Scaligeranis non multum fecisse lucri. Id nunc minus promptos facit ad edendas Casaubonianas. Hugonis Grotii libri de Jure Belli, opus nunquam satis laudatum, hac in urbe excusi multo auctiores. Arbitror fore ut ubi Mercatores rediere à nundinis Francofurtensibus excudantur à Guilhelmo Cæcio commentarii mei de L. L. Leidenfes Professionem Linguae Græcæ obtulere Antonio Emilio qui Rector fuit Gymnasii Ultrajectini, sponteque se munere eo laboris tædio abdicavit. Sed Antonius Professionem abnuit. Mavult deinceps vivere extra munia publica. Vir est doctus, dives, & qui splendorem illum Academicum non mul-

tum moretur. Arbitror Professionem eam deinceps offerendam Mag. Jeremiæ Hoevellus, quondam correctori Ambergenfis Gymnasii Electoralis Collegæ Beckmani: nunc Brilannæ est Scholæ Rector. Vir est moribus simplex, sed trium Linguarum & Philosophiæ admodum gnarus. Salmasius putatur Leidæ affuturus proximo. Octobri aut initio Novembris. Stipendium erit bis mille florenorum. Etiam per Literas ei spes facta liberæ habitationis. De qua tamen nihil statutum postremo Conventu curatorum, quod ægre viderentur assensuri consules. Nempe ubi coram aderit, facile se id quoque affecturum censet Somersdicius. Valde totum hoc ægre fert Heinssius, ut facile potes cogitare. Unum est quod facere possit, ut abnueret vocationem. Nam solum Thyssii & Walæi filii qui studiorum causa in Galliam abeunt, Literas curatorum deferent. Scis autem solere aliquem magni nominis mitti. Tuningius Scaligeri causa in Gallias missus: Herpenius ob Rivetum. Ego minutus homo cum vocandus essem Lugdunum, missi ad me ex Curatoribus Nobilissimus Vandermilus, ex Leidenfibus, Consul Isenhautius cum Syndico Zeistio. Est vero Salmasius ingentis spiritus. Quare nisi Rivetus, Justellus, & amicorum alii moneant, ut hoc diminutum contemnat, plane futurum ut Provinciam quam quodammodo recepit detrectet. Brevi rem omnem sciemus. Salutem mei omnes tuæ tuisque, ex animo quantum possint adscribi, petiere. Etiam doctissimis Collegis, imprimis Laurenbergio & Stephanio salutem dices.

Amstelod. iii. Kal.  
Sept. 1631.

Tibi fraterno amore  
junctissimus,  
G. J. Vossius.

## CXLIX.

Erycio Puteano Ger. Jo. Vossius  
S. P. D.

Quot Epistolas à te, tot amicitiae veteris nova accipio pignora, vir atque amice eximie. Tu & sæpe, & raro absque munere, ego & rarius, & cum munere non nisi quandoque, & post longa temporis spatia ad te scribo. Certe natum te non literis modo, sed & amicis demerendis jam dudum experior. Vellem & ipse non tot aliis distringerer, quo referre paria liceret. Sed facile novi humanitatem tuam, quæ nihil ultra requirit, quam animus & occupationes privatae ac publicae sinunt. Quam nisi excusationem haberem, jam dudum puduisset, quod, ut aliis,



aliis, sic benevoli etiam affectus indicis me haecenus viceris. Non vacat jam cuncta exsequi: novissimum duntaxat munus tuum dicam: Circulum hunc, quo quid elegantius, venustiusque, quid ingeniosius? Superasti priorum industriam: imo pene dixerim ingenii humani modum: ut qui hoc pacto non de mortalibus solum bene merearis, sed de illo *μυστήριον* sole: cui haecenus nullam requiem speranti metam laborum posuisti. Certe nequeo, amicorum, qui quidem supersint, vetustissime, quin gratuler tibi super novo hoc invento: quod mihi non ob autorem minus, quam ob rem ipsam placuit. Etiam, quas possum gratias, habeo: non quasi hic primus accepti beneficii dies sit: sed quia novum prioribus cumulum addidisti. Itaque jam nunc, quem olim quoque dicaveram, animum & operam offero. Tu sicubi tenues vires nostras utiles tibi fore judicabis, prompte utere. Scis mutasse jam dominum urbes, quibus & ego & tu originem debemus. Proinde si forte vel hic, vel alibi praestari pro te quicquam posse existimas, sive id apud Procures nostros, sive apud illustrissimum etiam Principem Arausionensem erit, tantum indica. Efficiam ne voluntatem meam aut studium requiras. Jam menses sunt duo, quod praeter morem, bene longas ad te literas scripseram. Eas dederam perferendas necessario ac propinquo meo Joanni Corputio, cujus parens ante in Senatum Dordrechtanum alleetus, nunc Rotterodami est rei maritimae praefectus. Sed is cum prius per Brabantiam iter in Gallias cogitaret, post ubi de Arausionensis Principis in Geldriam expeditione intellexit, consilium mutavit, ac quas dederam literas, sexta mihi, ex quo scripseram, hebdomade remisit. In iis praeter ea quae ad adolescentis commendationem pertinerent, alia nonnulla, etiam illud erat, ut opus nostrum Grammaticarum Institutionum, quod ante annos xxx. & amplius, scribere orsi eramus, tandem praelo subijci coepisset. Jamque in secundo libro occupamur. Filius meus Dionysius cui nihil ab longo tempore jucundius & exoptatius contigit, literis tuis & iis, quas eodem tempore ab doctissimo Tuldeno accepit, Latine reddit Annales Belgicos Reidani. Quae translatio cum a magnatum multis expetere-tur, jam ante menses tres excudi coepit. Atque ex libris duodeviginti octo jam absoluti, atque arbitror intra menses sex septem ejus-te operis exemplar visurum. Eidem decretum est, Caesarem, sibi per familiarem scriptorem, plurimisque a se locis castigatum, & notis illustratum, edere in lucem. Eam ad rem usus est uno alteroque meo, & editioni-

bus vetustis; ut de variantibus Fulvii, & aliorum lectionibus nihil dicam. Sed enim impense desiderat plurium Manuscriptorum copiam. Et jam aliquorum ei spes facta. Non dubito quin apud vos, qua publicis, qua privatis Bibliothecis inveniantur. Quocirca si unum alterum calamo exaratum exemplar Caesaris nancisci ac transmittere ad nos possis, sanctè spondeo, optima fide redditum iri. Sin mittere hac non sinatur, proximum est, ut per adolescentem quempiam conferri cures. Modo tanti codices illi videantur, sumptus ut aequum, refundam. Horum alterum si consequi filius possit, obstringes non illum modo, sed me quoque, qui quidquid liberis meis sit, mihi praestitum exitimo. Vale summe vir.

*Amstelodami Prid.*  
Non. Septemb.

## CL.

Reverendissime in Christo Pater & Domine Illustrissime,

**R**edit tandem ad Cantabrigienses suos Filius meus. Diutius quidem pro opinionione apud nos haecit. Sed scis quam aegre Liberi a Parentibus divellantur, praesertim ubi aliquamdiu extra eorum fuerint conspectum. Infirmior etiam valetudo filii suavit, ne citò nimis dimitterem. At nunc postquam sibi penitus restitutus videtur, nolim eum diutius abesse ab Academia Cantabrigiensi: ubi praecellam adeo occasionem habet maximos faciendi progressus apud tot praestantes viros, quos demum aestimare didici, cum praesens doctos eorum sermones audirem: eoque nec uspiam certe lubentius versari filium meum velim. Et tamen parum abfuit, quin ei hic unius & alterius hebdomadis moram necerem: sed metuebam ne peccarem in Collegii Leges. Alioqui paulum retinuissem, idque sine eo duntaxat ut per eum significarem sententiam utriusque Hagensis curiae, super lite inter Lugdunenses & Amstelodamenses. Siquidem utrimque jam a partibus producta omnia quae potuerunt, nec superest aliud, quam ut a Senatu judicium feratur: quod intra dies XII. vel praeterpropter, fore, ex compluribus Senatoribus cognovi, cum ante dies paucos Hagam procerum nostrorum postulato exturrissem. Caeterum vel omnia me humana fallunt, vel pro Amstelodamensibus pronuntiabitur. Haecenus quidem vix in unum alterumque, atque eos partibus obnoxios incidere

dere datum, qui non rem satis liquidam putarent. Obstare consules Lugdunenses, nihil miror; partim quia damni inde aliquid civibus, si tardius eò concedant Adolēscētes: partim quia si alibi etiam publice doceatur, majora professoribus suis stipendia persolvere cogantur, ne alio se pellici patiantur. Quod quā verum sit, experimentum vidimus ante selsquimensē; quia professoribus singulis ducentis, aut trecentis florenis nostratibus auxere stipendium. Sane tantam tamque subitam liberalitatem erga singulos non persensit Academia, dum fletit. Hoc jam boni se mihi, vel Amstelodamensibus potius, debere ipsi prædicant professores. Nempe quia decessus meus & Amstelodamensium liberalitas ejus rei causa sint *ἡ ἀντιπαράστασις*. Et sperant iidem, præcipue qui magis excellunt, his non paulo majora. Quæ res ut gratissima hominibus doctissimis, ita malè habet eos, qui Lugduni minus liberaliter habere publicos doctores mallent. Interea hic à publicis (ut vocant) lectionibus abstinetur. Sed otio fruor negotioso, dum de ordine ac statutis Athenæi nostri laboro, quā possum maxime. Nec tamen in variis illis curis quibus distineor, non aliquid quotidie penè resco, quod Ecclesiasticis detur. Hæc enim summa votorum mihi uti & studiorum potissima. Eoque operam do ut cætera seponam, quæ priori potius, quā ætati huic videntur convenire. Et tamen quotidie urgeor, ut saltem ea promam in studiis aliis, quæ jam habeo parata. Quod vix video ut effugere possim. Affinem meum Franciscum Junium in Gallias profectum Literis ipsius certior factus fui. Postea etiam Epistola amplissimi Hugonis Grotii edoctus sum in Britanniam rediisse. Sed quo animo reversus sit, non addit. Neque de eo quicquam ad me affinis. Unde colligo eum à scribendo abstinuisse, quia nihil adhuc certi quod scriberet, haberet. Rogo te, Reverendissime, & Illustrissime Domine, ut commendatum eum habere velis. Non est indignus tanto Patre filius. Probitas, eruditio, & quæcumque bonos commendare viros solent, in eo non vulgaria sunt sed eximia. Fides etiam, quā in Illustrissimi Comitissæ Arundelii domum fuit, insignis eluxit: & exerciti labores graves per novennium integrum. Addit tribus verbis Hugo Grotius, sese amore Junii de eo ad te scribere ausum esse. Id mihi gratum accidit. Scio quanti sit ab eo commendari, qui Belgicæ miraculum sit. Rogo quòd mei causa, & Junii nostri gratia velle scio, id tanto facias lubentius ob magnum patrem, magnum etiam hunc familiæ Junianæ amicum. Mihi licet cætera ignotus Junius foret, tamen si serio

commendatum à Grotio scirem, tanti id esset, quā si omnem ejus vitam introspexissem, ac per omnia probassem. Tantum ego illi tribuo viro quē à prima novi adolescentia, quem suspexere etiam hic omnes ante triste illud terræ nostræ dissidium; quem denique soli non æstimant, qui virtutis pariter ac doctrinæ sunt hostes. Mihi quoque videor scire quo apud te loco sit, Reverendissime Pater, eoque liberius ea promere ausus sum: Filium etiam quid, optime Mecænas, commendem tibi? Affectus hæcenus ita eluxit, ut non ultra rogem, quā cum ut conserves. Ipsum verò hortari non desinam, ut magis magisque tanto tui favore dignum se præstet. De victoria nostri Principis nihil, puto, addere opus: quia absque dubio omnia etiam apud vos jam pervulgata. Multi hostium & in his nobiles quamplures cæsi sunt, multi submersi: ac plus quā quater mille capti. Non adeo imprudens hostile consilium fuit: Sed nebula subito coorta valde classi incommodavit. Ea enim factum ut à laterna Admiralii aberraretur, navæque singulæ telis nostrorum paterentur, unde locorum non satis gnari dedere se quā confici à nostris maluerunt. Si verum dicere licet, non exiguum est, quod & principis prudentiæ, & virtuti militum nostrorum debetur; tamen absque illa nebula, quā Deus immisit, difficilis nobis nec incruenta victoria fuisset.

Deum Opt. Max. oro

*Reverendissime Pater, Domine  
Illustrissime, Mecænas optime,*

Ut deinceps quoque terris nostris faveat adversus hostem potentissimum, magnam vero Britanniam in longa pace conservet, tibi multos in annos valetudinem prosperam largiatur, bono publico omniumque devotorum nominis tui cultorum, quos inter æternum.

*Amstelod. c. 10 Id  
xxi. Prid. Kal.  
Octob. Stil. Nov.*

*Obstrictissimus cliens tuus,*

G. J. Vossius.

CLII.

## CLII.

Erycio Puteano v. Cl. Gerardus Jo.  
Vossius S. P. D.

**L**iteras tuas avidè expectatas avidius legi. Es, & semper eris Puteanus: hoc est, totus candidus, maximusque & amicorum, & eorum, quæ faciunt, æstimator; ita ut multum ambigam, æquis vel minima in re gratificari tibi possis, cui non magnopere propterea te devinctum putes. Talis mihi visus es semper, & quo longior tecum mihi consuetudo est, eo magis crescere humanitas tua videtur. Nec dubito, quin licet istiusmodi sis quadam naturæ bonitate, tamen non parum etiam sibi vindicent studia, quibus te addixisti. Ea tu verè scribis nulli esse noxia: at ego etiam toti ea orbi utilissima esse prædico. Næ barbarum ego illum censeam, cui tantus studiorum antistes non sit cordi: nedum ut lædere, aut iniquior saltem esse audeat quisquam. Quare quod significas pro confecto jam esse puta. Est vir, inter cæteros mei amantissimus Simo Beaumontius, sive Bellimontium malis, qui in Collegio Patrum foederatæ Belgicæ jam annis aliquot magno cum honore fuit. Doctissimus ipse doctissimum quemque in pretio habet, & vicissim in pretio habetur. Is hæcenus in castris nostris, vel Leodici fuit. Nunc ab illustrissimo Principe Arausionensi Hagam missus, ut cum Patrum cæteris de pacis conditionibus, si conveniri forte possit, consultet. Sed intra diem unum alterum iterum Trajectum cogitat & castra. Huic vero te posse ignotum esse arbitraris? Præsertim Dordrechtano: ubi tot non amatores modo, sed admiratores tui habes. Ubi etiam progenies tua nobili & Patriciæ familiæ implicita. Ubi ipse cum optimo parente tot annos vixisti. Hic saltem tanto viro neciri non potes, qui nominis tui fama Belgicam & vestram & nostram (utinam communem dicere liceat) jampridem implet. Sed faxo ego, ut qui te ob egregias animi dotes & merita erga Remp. literariam, hæcenus plurimi facit, etiam ut amicum complectatur. Nec eo minus, quoties occasio se offeret, apud procerum alios corabor, quicquid potero: imprimis urbis nostræ, cujus ob summam potentiam non levis est auctoritas. Certe etsi nulla tecum amicitia fuisset (cujus diuturnitatem quoties cogito, gliscit in pectore occultum aliquod gaudium) tamen eximie eruditioni tuæ, & hoc, & majora multa, deberem. Tu vero, si quid etiam, quod ab tanto ingenio profectum est, laudaverim, id læ-

taris? Debeo & volo. Itaque si nostrum tanti tibi testimonium sit, ut ingeniosissimo operi tuo præmittere, publicèque legi velis, nequeo, quod tibi placuerit, non probare. Nam verissime dixi: neque eò quisquam impudentiæ unquam procedet, ut adulationis hic aliquod vestigium esse dicat. Quod filii mei causa laborem susceperis perlustrandi Bibliothecas quæ apud vos sunt, & me obstringis, & illum. Ego certe lætor, etiam vinctulis tuis illigatam esse sobolem meam: sic perennatura est amicitia nostra. Gratias me agere, & plurimam salutem adscribere petiit.

*Amstelodami, Prid. Id.  
Octobr.*

## CLIII.

Gerardus Joan. Vossius Jacobo Crucio  
S. P. D.

**E**tsi quas mihi tribuis laudes, agnoscere nec debeam, nec velim, irrepit tamen animo, nescio quæ voluptas, quod ab erudito doctum, à probo bonum, haberi me videam; quorum illud ut assequer, ætatem meam studiis omnem impendi, spe non tam tumidæ famæ, quàm de publico benè merendi: hoc ex æquo omnibus expetendum; ut pii, & sint ipsi, & aliis videantur. Itaque non diffiteor jampridem, Debitorem me tibi, qui immerentem me, saltem de te tale meritum nihil, cumulare laudibus, & tanta prosequi humanitate volueris. Atque eo magis dolet, tardè adeo me tibi respondere. Et utinam solus hic aliquid in me desiderares? simili modo vapulo propè ab omnibus amicis meis. Sed ita est, mi Crucio, neque ego in me tantum juris habeo, ut quæ velim, possim; neque illæ vires humanæ, ut animus eodem tempore, omnibus sufficiat. Me tum propinqui, tum exteri distinent quotidie, satis alioqui occupatum, tum publico munere, quod cæteris antehabui semper; tum iis quæ vulgare paro, aut jam emitto. Sic nunc quoque calefacimus prælum commentariis nostris de arte Grammatica, in quibus *πρὸς ἑστὴν* veterum, & nobiliorum nostræ ætatis Grammaticorum labores, ad examen revoco; plurimæque optimorum Scriptorum loca, vel mendosa corrigo, vel obscura illustro. Hoc opus mox consequentur Originum libri; tum ii quos de re Poetica fecimus. Scio non defore, qui omne hoc argumentum humile, & inferius ætate mea arbitrentur. Et ego idem sentio. Sed nolui



nolui labores tantos, quos maximam partem, ante annos propè xxx. exhausti, æternum tamenis gratificari. Nolebam etiam multorum fallere expectationem, qui jam pridem promissa mea impleri postulabant. At his defunctis, majore animo, si vitam summum numen concefferit, aggrediar, quæ jam pridem de Historia Ecclesiæ, & quæ huc pertinent mecum agitavi. Igitur tot tantisque semper penè obrutum, dixerim, occupationibus, mireretur quispiam in rescribendo amicis esse aliquanto negligentior? Ingenue & verè dico, si subinde literas ad amicos dare cupiam, plurimum adeo præcipitari scriptionem opus est, ut aliud penè agentis, eas excidisse, quisque judicaturus sit. Nec id me malè habet, quia satis profectum ad laudem arbitror, si quæ molior, utilia, quæ dico, non barbara habeantur. Quo modo animatur aliter scribere non possum, quam occupatum decet. Sed novi candorem, & prudentiam tuam. Non desertas à me literas, aut quod huic sæculo potius videtur, affecto acumine ornatas desideres. Habe igitur simplices hæc, quas solus tui amor dictavit. Habe simul animum meum, quem si non alia re, at certe eruditione tua, ne humanitatem dicam, abundè tibi conciliasti. Vale.

*Amstelodami* Post. Kal.  
Octob. An. clō Ioc xxxi.

## CLIV.

Erycio Puteano, *Historiographo Regio,*  
S. P. Lovanium.

**I**PSE credideram, vir Clarissime, primis, quas ad te daturus eram literis, scripturum me quando iniitum facturi essemus publicè docendi. Sed ut multa Opinione citius cadunt, alia in multum spatium trahuntur ita, quoque Scholæ nostræ quæstio, diu agitata, necdum conquievit. Propinqui tamen jam summæ spei sumus. Quippe Procures nostri, aliquot abhinc diebus, Hagam sunt profecti, ut Curia utriusque sententiam audiant; Et tantum non decisa lis est. Triduo, aut quadriduo, nisi plurimum me, & plerosque alios, opinio fallit, ipse scire, & quod sciam, significare tibi potero. Quid de tota censeam controversia, nihil repetere opus. Nam ante scripsisse memini; nec mutata in ullo aut spes, aut sententia est nostra, ut stabilis plurimum illis opinio, qui pro causa nituntur bona. Cæterum quod tantas mihi gratias agendas putes, pro mu-

nusculo agnosco, & præter meritum fieri, & simul humanitatem tuam. Sed jamdudum ita assuevisti me, ut cum Puteanum nomen video, ipsam me humanitatem adspicere cogitem. Profecto Musas humaniores sine causâ appellari, fere hodie dicere liceat, si earum cultores hodie lubeat æstimare. Tu unus, si alius quisquam, iis nomen asseris suum. Eoque injuriam tibi faciamus, nisi, quomodo me vocas, immerentem, te potius Musarum vindicem appellemus. Et tamen gaudeo, non minus promptam mihi esse ad hoc voluntatem, utcumque successus dispar sit. Ex eodem humanitatis fonte proficiscitur, quod laborare te scribis, ut Grammatica nostra in quibusdam Scholis apud vos recipiatur. Exilimo tamen, frustra te fore, ob partes eas quibus nunc domus Dei distrahitur. Et si nihil in Libellis iis sit, quod ea quibus nunc dissident, tangant. De Inscriptione ea quam proponis. GUSTAPHUS ADOLPHUS D. G. GOTHORUM, VANDALORUM REX, MAG. P. FINLAND. DUX ET HONICARELS NEC NON INGRI; temerè arbitror confusa postrema verba; nam Gustavi inter titulos est, *Magnus Princeps Finlandiæ, Dux Estoniæ, Careliæ & Ingriæ.* Hoc inter cætera ostendunt, variæ Rutgerii, quas huic Regi dicavit. Et ex iis qui regnum hoc describere, satis est res aperta. Quare aut peccatum in numismate, aut perperam lectum. Suspicio omissa postrema litera, sic scriptum esse, DUX ESTONI. CARELI. NEC NON INGRI. Saltem sic inscribi debuit, aut aliquid aliud est, quod me fugit. Barlæum nomine tuo salutavi, cui id longe gratissimum fuit. Ac prima occasione, ad te scripturum promisit. Nunc resalutari iussit. Vale summe, & vir, & amice.

*Amstelodami.*  
clō Ioc xxxi.  
Non. Decemb.

*Totus totus,*  
G. J. Vossius.

## CLV.

*Summo viro & amico Erycio Puteano*  
Ger. Jo. Vossius S. P.

Maxime & Amicissime Puteane,

**E**Adem hora, qua literas tuas accepi, operam dedi, ut Plectrum nostrum convenirem, ex quo intelligo (quod alioqui apud cæteros premit) Brabantia vestra aliquos, civili alios dignitate, alios doctrina insignes, atque in his etiam præstantissimum Fromondum, sedulo operam dare, ut profes-

B b

sione

sione Medica apud vos Lovanienses fungatur. Horum ille literas quotidie exspectat. Atque illud in causa est, cui negaret, cum de Bononiensi Lyceo animum ejus tentarem, responsum præcipitare adeo se posse. Sed tamen non obscura indicia perspexi, facile intelligere, quam honorifica sit futura Bononiensis illa Professio, ac quantum etiam emolumenti adferre possit. Profecto minime abhorret. Verum, antequam de ea aliquid audiisset, animum suum de Lovanio quodammodo aperuit amicis. Et negari non potest, propiorem sic Batavis suis fore. Quod longe etiam jucundius, si inter vestra & foederata hujus Belgicæ Proceres pacis negotium procedat: uti optamus & confidimus. Equidem gaudeo, sic Italos, sic Belgas de Plempio cogitare, vit est ut optimus & humanissimus, ita ingenti elegantis, Philosophus acutus, medicæque artis callentissimus. Si me, si urbem hanc spectarem, mallet non aliò pedem referret. Verum enimvero sic doctrinæ atque virtuti Plempii faveo, ut quam optime ei esse velim. Quod de Circulo tuo augendo cogitas, sane gaudeo. Nam etsi nihil in eo quisquam desiderat, non tamen ignoro, ab eo ingenio, eaque doctrina, deinceps etiam posse expectari, quæ doctissimos doceant. Et placet, si Amplissimo Simoni Bellimontio exemplar transmittas. Non desinam præstantissimum & optumum virum amore tui magis & magis accendere. Ac tacente etiam te apud procerum alios id facere non cessabo. Id enim vere amici munus esse satis intelligo. Plura nunc scribere non possum, quia tabellarius Lovaniensis, qui hodie demum me convenit, cras summo mane abitum parat solito celerius, quia, ut incessus fidem faciebat, arthritide coeperat laborare, & ne glisceret hic malum extimescebat. Sed intra paucos dies, ut spero, de Plempliano negotio certiora perscribam. Occasio erit per tabellarium Antwerpensem. Tu, amicissime, operam dabis, ne ambigæ hæ literæ meæ fraudi esse Plempio possint, fortasse fatius sit nihil hac de re ad Amplissimum Chryfogonum Flaccium scribere Bruxellas, usque dum literas à me aut Plempio acceperis, aut istic, quid de Lovanensi cathedra Medica statutum sit, cognoris. Quamquam quid ego de isto ad te? Qui, per te melius quid factò opus sit intelligis. Et quod nunc in mentem venit, credo nec præstantissimus Flaccius ignarus est, quid Lovanii in Plempii causa agatur.

*Amstelodami, Prid.  
Non. Decembr.*

## CLVI.

Jacobo Usserio, *Archiepiscopo, Armachano, Hiberniæ Primati.*

Reverendissime in Christo Pater, Dom. Illustrissime, <sup>LA</sup>  
Omnino me in ruborem dedit eximia illa humanitas tua, quæ historiam Godschalci, & Prædestinationis controversiæ, tanta à te cura elaboratam non modò transmittere, sed mihi etiam dicare volueris. Quid enim ejus non pietatis ac eruditionis modò, sed etiam dignitatis virum, hoc honore Vossium dignari? Equidem maxime Præsul, æternum tibi hoc nomine obstrictus ero, ac una mecum tot Adolescentes, studiorum amantissimi Liberi mei. Omnibus nobis atque adeo cunctis, qui vel ex Juniana familia, vel eidem innexi sumus, eadem est mens, pro hoc beneficio gratum (ut poterimus) animum & ore & scriptis testari. Nimirum singuli prope existimant sibi hoc habitum honoris, quod mihi præstitisti. Plurimum te semper, præstantissime Domine ac illustrissime, æstimavi jam ab eo tempore quo publici juris fecisti aureum illum commentarium tuum de Christianarum Ecclesiarum successionem a statu, ab Apostolicis temporibus ad nostra usque tempora perductum. Ex quo multa me bona didicisse profiteor. Atque id prædicare apud omnes soleo, eos præsertim, qui cum Sacris Literis omnem conjungere Ecclesiæ historiam amarent. Nec reperi quemquam, qui non ubi commendatione nostra avidè totum opus perlegisset, debere se mihi ob judicium hoc fateretur. Sedenim nunquam putassem me aliquando à foetus hujus parente, honore tanto maectatum iri. Etsi autem in Godschalci historia non per omnia eandem institimus viam (& quis facile duos dabit quibus in cunctis conveniat) plurimum tamen gaudeo in eo quod rei, ni fallor, caput est, probe nos consentire. Uterque enim B. Augustini sententiam amplectimur. Sed in quæstione relinquitur an illam quoque Godschalcus, & siqui Godschalcum sequantur, satis assequantur? Metuo ego ne eam Godschalcus excesserit. Nec enim doctissimo sui seculi Rabano & tot Moguntinæ Synodi patribus in Augustini Lectione versatissimis, facile fidem detrudere ausim: qui ea dixisse aiunt quæ nunquam dixisset Augustinus. Nec Remigius defendere omnia Godschalci audent: sed contentus est dicere, siqua stulte & absurdè effreni sua Lingua effuderit homo instabilis ac inconstans, non propterea etiam damnari oportere, in quibus illi cum B. Augustino satis con-

conveniret, quemadmodum optime observasti operis tui capite 6. Nec, ut ingenuè dicam, confessiones ejus dimovere me adhuc de sententia istac potuerunt. Siquidem ex *αἰγιονότου* intelligo in Bibliothecis Gallicis extare cætera de Godschalco quæ sententiam meam mirifice confirment. Ea ubi accepero (bonam illorum spem mihi amicus fecit) faciam te, uti debeo, de re tota certiozem. Atque ut nihil haberemus, præter illa quæ jam lucem viderunt: nonne potuit Godschalcus, & confessionibus suis ea sola complecti, quæ Augustino arctius hærentibus probarentur, & alia aliàs superaddere, quæ Augustini itidem amantibus displicerent. Quod eo mihi credibilis Godschalco evenisse; quia video in eadem controversia nostra ætate viris etiam eruditiss quædam excidisse, ac deinde disputando ulterius quoque protractos, dum consentanea placitis dicere allaborant. Atque in his non verear reponere optimam illam & candidam Joannis Piscatoris Theologi Herbornensis animam, cujus auctoritatem memini aliquando in disputatione publica objectari clarissimo socero meo Francisco Junio: illum autem suaviter respondere nolle se omnia Piscatoris dicta præstare. Novi & his in terris quamplures etiam *ὁ θεὸς λόγος κήρυκας*, qui non solum in regeneratione, sed in omnibus actibus piorum irresistibilem esse Dei gratiam contendunt, eoque non posse quemquam plus boni facere quam facit. Soleo illis oggerere, penitentia sic vim infringi. Nam si quicquid boni à nobis negligitur, id defectu gratia negligitur, eoque aliquid nos facere noluimus, quia Deus illud operari à nobis noluit: sane quoties cubitum ituri, acta diurna cum animo nostro revolvimus, vix serio dolebimus ob officium neglectum. Sint Preces, sint Elcemosynæ, sit Admonitio aliorum, sit Exemplum quo præire debuimus. Ubicumque cessatum, cogitabimus non fuisse placitum Deo vires nobis conferre ad agendum bonum. At quanto vividior erit poenitudo, si constet cessationem officii non esse ex gratia sed voluntatis defectu; sæpe pios aliter per gratiam Dei posse: sed non semper ex potestate gratiosè collata agere. Quanto hæc consentanea magis non scripturis modo sed etiam B. Augustino & antiquitati universæ! Ac poteram id genus etiam alia adferre, nisi rosas mallem consecrari quàm spinas, ac prope id consuetudine mihi in naturam vertisset proprias potius papulas observare quam alienas. Quare ne illa quidem attulissem, quæ cum reprehensione aliquorum conjuncta esse video, nisi necessarium putassem, ex nostris temporibus colligere de antiquis. Si enim ætate nostra

sic prædestinationis controversia tractatur à nonnullis, ut non ea modo dicant, quæ dixit Augustinus; sed superaddant quæ non dixit, imò iis contraria quæ dixit, sane nec difficile creditum, fuisse olim nonnullos qui similiter exorbitarent, & in his fuisse monachum non omni ex parte laudatum, ut qui contra præscriptum monasterio suo exierit, nulloque vocante nomen prædicatoris assumpserit; qui etiam prædestinationis dogma proponendo hoc egerit, ut (quod Remigius non diffidet) velut novus atque admirandus prædicator existimaretur: qui præterea vulgari errore implicitus ad veritatem dogmatis sui adstruendam se sponte examini aquæ, picis, & olei offerret. Quibus consideratis, statuere malo, dixisse quidem Godschalcum quæ dixerat Augustinus, sed plus dixisse quàm dixerat Augustinus, eoque & rectè illum damnatum à Rabano & Synodo Moguntina propter illa quæ non dixerat Augustinus, vel alia is mente dixerat; ac rectè quædam Godschalci capita defensa esse ab Remigio quæ etiam dixerat Augustinus, & eâ mente dixerat quâ capiebat Remigius. Valde autem placet quod idem Remigius ait, partim de illis qui Augustini sententiam amplecterentur, partim illis qui scripturas sic interpretarentur, ut priores patres & ipse ante Pelagianam controversiam Augustinus solebat. Utrorumque sententia honoranda, quia & illa ex Divina Auctoritate vera esse monstratur, & ista quædam piâ ratione non abhorre à veritate fideliter creditur. Fiduciam sumpsi, Amplissime Præsul, pluribus hac de re tecum differendi; quia id mihi per te licere existimarem, partim quia in Britannia cum essem, sic prædicari à pluribus audivi eximiam non modo doctrinam, sed etiam humanitatem tuam: partim quia excellenti adeo beneficio à te nullo meo merito affectus persuadere mihi aliud non poteram, quàm amari me à te plurimum; & majoris etiam fieri quum viderer non mihi modo, sed, ut arbitror, aliis quoque qui penitius me novissent. Quod si occasio dabitur, denuo in lucem edendi historiam meam de Pelagii & Massilensium controversiis; non dissimulabo quantum tibi debeam tum privato nomine, qui sic nomen ornâs meum, tum communi, quia Ecclesiasticæ Historiæ amantibus tantopere alluxeris ad illam de Godschalco quæstionem majori cura perpendendum. Sin illud de historia nostra spiritus procedet, aliter dispiciam si non ut merito me tuo exsolvam, saltem ne vivam ingratus. Venio ad alia. Jam biennium est quod Oxoniæ cum essem, doctissimo ornatissimoque Joanni Rousio, Bodleianæ Bibliothecæ præ-



fecto, referrem cogitare me de nova editione Mariani Scoti: cuius Librum tertium cum M. Scripto Gemblacensi; & altero collatum haberem, nec pauca me in meis de temporibus commentariis annotasse, quæ scriptori illi facem allucerent. Tum ille prædicare nobilem operam quam, illustrissime Præsul, auctori huic impendisses. Subjiciebam ego, Lubentem me, codicem meum in Hiberniam transmissurum. Ille, si rectè memini, oggerere, velle se hac de re ad te scribere, ac fortasse ejus te sententiæ fore, ut non gravate ipse communicaturus sis mecum labores tuos. Jam annus propè abierat, cum Lugduni domum meam venit Clarissimus Vir Ludovicus de Dieu; ac præfatus quædam de illustri dono, quo à te affectus esset, subjungeret, ut sibi quoque missus esset Marianus Scotus: Cæterum, cum is non faciat ad studia sua, planè se existimare, eum mihi transmissum esse, utcunque nihil de eo perscriptum esset. Mox ego firmare illius suspicionem sermonibus inter me & amicissimum Roussium habitis. Ergo ille mihi in manus dare Marianum: cuius ut primorem paginam conspexi, monstro adscriptum ei nomen meum. Subrisit ille, quod antea istoc non animadvertisset. Multis eo tempore occupationibus distringebar. Et semel iterumque domo proficiscendum erat. Post hebdomades aliquot, ubi meus esse cœpi, Marianum (quem cursim antea inspexeram) accuratius cum edito conferre cœpi. Vidi præmitti Mariano quædam ad temporum rationem pertinentia: quæ cuius sint neque nunc scio. Sequebatur deinde primus Mariani Liber, ubi, ut conspexi, octo prima capita, quæ in editis desiderantur, valde sùm exhilaratus. At duplicatum gaudium postquam animadverti hic verè esse Librum secundum: eum autem, qui vulgo habetur secundus, tertium esse. Multum etiam lætatus sum conspectis paginis aliquot Libri tertii, ad quarum oram variantes lectiones magna curâ annotasses. Dolebam cætera desiderari. Sed cum in quaternionem incidissem, ubi tempora continerentur ex Mariano ab an. 1555 usque ad 1577. animadverti ex inscriptione ea quæ desiderarentur ex Wigornienſi exscribi debere. Quemadmodum & quæ Libro primo desunt post annum Jacobi XLIII. ex eadem peti debent: si rectè capio quod post eum annum adscribitur. Scriptum quidem reliqua Libri tertii eodem modo haberi in Chronicis Florentii Wigornienſis. Verum arbitror tertii errore calami pro primi scriptum esse. Nam charta in qua id notatum, proximè Librum secundum Mariani præcedit. Nunc Reverendissime Domine, certior

fieri exopto de Mariano tuo (verè enim tuus qui tibi potissimum vitam sit debitor) quid fieri à me velis. Etsi nihil de eo mihi à quocunque perscriptum, nec ornatissimus de Dieu, à quo accepi vel tantillum ejus nosset; ex sermone tamen ab Roussio nostro Oxonii habitò ita plane colligo id te voluisse, ut beneficio tuo integer nunc demum Marianus prodiret: quem antea & capite habuimus & membris aliquot truncatum. Eoque nisi aliud tibi placitum cognôro, editurus hic sum scriptorem illum: quod jam ante fecissem, sed præesse volui editioni. Id Lugduni non potui, quia pauculis mensibus post codicem acceptum, commemorandum mihi istic erat. Deinceps melior Amstelodami occasio erat: quo commigravi ingentibus præmiis invitatus. Nempe potentissima hæc Respublica illustre crexit Gymnasium, in quo publice frequentissimo non adolescentum modo, sed doctorum virorum, primariorum civium auditorio omnis ævi historiam, ac civilem doctrinam profiteor. Sed etsi non obscure mihi videor mentem tuam perspexisse: velim tamen me sive à teipso, reverendissime Domine, sive ab aliquo tuorum, paulo penitus de ea edoceri. Interea ego quæ afferre ipse, ad ornandam hanc editionem potero, procurabo. Valde quidem distineor, & tantum non obruor negotiis. Sed (ut spero) quod dies non finunt, noctes dabunt. Divinum numen tibi undecumque, maxime Domine, diu prosperet ætatem, bono tuo & cultorum hominis tui, præcipue Ecclesiæ totius, Britannicæque ac Hibernicæ tuæ.

Amstelodami, clò  
15c xxxii. iiii. Id.  
Januar.

Reverendissimi & Illustrissimi  
nominis tui Cultor, ac Clie-  
ens devotissimus.

## CLVII.

Erycio Puteano, V. Cl. Gerardus Joannes Vossius, S. P. D.

**I**N mediis occupationibus gratissimæ literæ mihi tuæ advenerunt. Quibus licet respondere vix res sinebant, nefas tamen putavi nuncium sine meis ad te literis remeare. Quam tu legem propè mihi imposuisti assiduus officii, atque exemplo. Pulcherrimum animi tui foetum, ut vidi, exosculatus sum affectu quo debeo, & is meretur. Et tamen necdum ea cura, qua velim, lustravi. Erit id simulac cura, quæ nunc premit, paullum abscesserit: hoc est intra biduum. Nihilominus sic quoque spondere ausim, omnia parente

rente suo esse dignissima. Sed illi non insistant, nequid videar auribus dare. Exemplaribus fieri, quod petieras, jam coepit. Etiam Plempio dedi: qui lectulo jam quartum, vel quintum, ni fallor, diem æger attinetur. Hoc immoderata ei studia attulere, dum in Avicenna suo ex Arabica transferendo est perditus & pernox. Monui sedulo studia non esse inventa ad crucem. Et sic prodesse debere, ut diu prosit. Nec culpam diffitetur. Sed negat ab animo suo impetrare posse, ut corrigat. Is studiorum est ardor. Qui si modum excesserit, profecto dulcis est infania. Vix ædes eram ingressus, cum prius ipse, mox seorsim parens ejus verbo inquirat, quid sit de Medicina apud Lovanienses vestros professione. Et ecquid de eo certi sit statutum. Negavi hoc: & tamen nolui ejus ignarum esse, alterum esse, qui commendetur Serenissimo Archiduci, à quo etiam animo sit neutiquam alieno. Ex eo cognoscere possis quo propendat. Quid mirum? Minus abisset à suis. Et jure aliquid putat, esse ubi degat, ea cum gloria candida Puteani anima, & doctor suus Fromondus, ut de aliis taceam. Panegyricum & carmen filii Dionysii dubitavi an mittere ad te deberem. Postea etiam geminum offerre exemplar ausus sum. Quorum alterum dabis illi, quem inoffensum ea legere posse existimabis, omnino enim liberius aliquibus in locis est locutus. Sed, qua prudentia es, facile id dabis Patriæ amori. Scis Batavis suis scribere. Et ego sic scribentibus in partibus adversis ignoscere semper soleo. Mitto quod quiddam & calamo emendasset, si domi fuisset. Audio generum cum filia esse Dordrechtii. Si Amstelodamum venerint quæso hospitem me ne dedignentur. Beneficium mihi præstari à familia tua credam. Et volupe erit videre & audire tuam progeniem; generum etiam amplecti. Vale vetus & magne amice. Salutat te filius Dionysius, qui ipse scripsisset, nisi, ut dixi, foris fuisset, distentus: sed antequam exiret, hoc à me adscribi postularat.

*Amstelodami, Prid. Kal.  
Febr. An. nocte intem-  
pesta, ut fere soleo.*

## CLVIII.

Guilielmo *Episcopo* Londinensi  
Ger. Jo. Vossius S. P.

Reverende in Christo Pater, Dom. Illustrissime,

**T**Andem decisa est lis duarum civitatum, atque ab utraque Hollandiæ curia pro Amstelodamensibus est pronuntiatum. Quare

Deo propitio vi. Id. Jan. inauguralem habui orationem: ubi & postridie Caspar Barlaeus. Magnosq; doceo auditorum confluentibus non adolescentum modo sed virorum gravium doctorumque, in quibus & complures qui ad clavum Reip. sedent. Ut quamvis frequens mihi auditorium esse soleat Lugduni, Amstelodamense tamen hoc & numero aliquanto & præstantiâ longissimè vincat. Atque id (ut ingenue dicam) magis animum meum juvat, quam quod hætenus hic paucis doceam horis, & stipendium prope alterâ parte excedat. Amicissimi Casauboni Optatum accepi qui & gratus mihi fuit, quia Ecclesiæ rem adeo salutarem concordiam commendat; & eo gratior, quia à magni Parentis egregio ut filio, ita vindice longè exit castigatior: & hoc nomine gratissimus, quod non alterius potius quam tuo sit dicatus nomine, qui in ea dignitate quâ olim Optatus Ecclesiæ præsis & schismatico hoc ævo Optati instar sic adlabores, ut qui necessariis fidei capitibus conveniunt, Ecclesiæ etiam concordiam factam tectam conservent. Cæterum hoc Casauboni exemplum aurem mihi velle, officiique me admonet mei: qui non minus eo, ac fortasse etiam multo amplius obstrictus sum patrocini ac favori tuo. Equidem facio quod possum sedulo; sed mihi magis quam cuiquam dolet, quòd tot occupationibus distentus non iis passibus progrediar quibus vellem. Sed tamen promoveo. Atque unam hanc moram bonitate compensem. Nec despero. Reverendissimus Episcopus Armachanus dicavit nomini nostro Laborem suum de controversia quæ ante annos prope octingentes de prædestinatione cum Godschalco fuit. Sane pro honore tuo habito mihi plurimum summo viro debeo, operamque dabo, quoad vivam, ut gratum me præstem. Nec tamen per omnia nobis convenit in hoc argumento. Primus sane Reverendissimus Usserius talem Godschalci defensionem suscepit qualem non ausus olim fuit Remigius ipse, vel Ecclesia Lugdunensis. Esto, ut Hincmarus non tenuerit modum in eo premendo: non idcirco non Godschalcus modum excesserit in Dogmate suo, quem jam ante litem cum Hincmaro damnarat doctissimus sui seculi Rabanus Maurus, & una cum eo universa Synodus Moguntina, in qua tot viri simplicis antiquitatis gnari & Augustinianæ sententiæ non amantes minus, quam intelligentes? Quanto igitur satius sit existimare monachum unum exorbitasse quam tot viros eximios: Et quàm grave tot Historicis veteribus fidem derogare! Augustini sententiam amplector & ipse: sed non ut eam capiebant monachi Andrumentan, & sæculis tot postea Godschalcus:

cus : verum ut eam interpretabatur Prosper, atque is cujus de vocatione gentium Liber sub Prosperi extat nomine : hoc est, sic Augustinum capere soleo, ut non pugnet secum, ac simul cum antiquioribus quos adversus Pelagium ipse advocare in partes solet. Amplissimus vir, Hugo Grotius, suasu multorum præstantium virorum, eorum etiam, qui in dignitate sunt constituti, in Patriam rediit : sed illis ignaris, qui ante annos duodecim, perpetuo illum carceri addixerant ; item istis qui factiosis illis temporibus, dejectis cæteris, ad honores summos pervenerunt. Omnes isti paucis exceptis suâ interesse existimant, ne tantus vir (nec enim magnitudinem ejus ipsi ignorant) in luce hominum versetur apud suos. Quare adversus eum in illustrium Ordinum conventu magno ab iis studio, ac contentione certatum est. Nec Grotio luculentum defuit patrocinium vel Ordinis equestris vel trium magnarum Civitatum, Rotterodamentis ubi Syndicus fuit, Delphenis ubi natus, & Amstelodamentis, quæ non prudentia minus quam opibus & potentia valet. Attamen tanto impensius obniti Lugdunenses, quorum primarius Consularis unus è iudicibus fuit ; item Harlemensis, ubi non multum dissimilis causa. Civitatum aliarum quædam se medias gerunt ; plures se aggregant Lugdunensibus, sed ex minoribus, quæ ex placito Ecclesiastarum pendere imprimis existimantur. Proinde, quem res ea habitura sit exitum, hunc facile dixerō. Faventem quidem habet florem Bataviæ ; sed ita sæpe apud nos usu venit, ut Zelotæ, quales apud vos rigidiores Puritani, minis & clamoribus modestiam melioris partis expugnent. Quod si sic pertendant, metuo ne maximus vir, molestiarum pertæsus, sponte etiam ingrata patria excedat. Atque eo magis hoc formido, quia probe habeo perspectum quantopere eum & Reges, ac complures desiderant Principes, qui magnis honorum & commodorum promissis suas in terras pellere conantur ; sed si extra patriam ei vivendum sit, cunctis eum terris, pene dixerim, invidcam, præterquam magnæ Britannię ; ubi prævideo, quantopere & Serenissimo Regi Carolo, Domino nostro, & regno universo utilis esse possit. Academia Lugdunensis, cum videret se quotidie pejus pejusque audire ob crebras pugnas ac cædes, tandem exemplo memorabili, effrænem hanc Licentiam compescendam putavit. Nam quod in ea contigit nunquam, capitis supplicium de eo qui alterum interemisset, sumptum est. Fuit is ex famulatio principis Razevilii, ejus cujus parens ob potentiam Regi prope ipsi Sigismundo formidabilis esse solet, atque à Re-

formatis Ecclesiis maximi fit, ob summum studium erga Ecclesias nostras. Tanti principis filius Lugdunum se studiorum causa ante annum circiter contulit ; nec levem adventu suo Academiæ honorem attulit. Servum habuit, qui uno altero comitante ex eadem familia vesperi exiens, incidit in hominem nequam, qui prius, ut aiunt, & litem intentavit, & pugna adortus fuit. Hunc vulneribus aliquot confodit servus is : sed cum & vulnus ipse accepisset, non potuit sat cito sibi fuga consulere. Captus itaque vitæ multatus, etsi multum pro eo intercederat princeps Razevilii. Hoc supplicium graviter admodum Razevilii tulit. Itaque live proprio instinctu, live facellani & nobilium, quos habet, solenni die, quo Rector Magnificus novus toti denunciatur Academiæ, surgens de latere Principum Bohemicorum (nam inter eos & Academiæ Curatores mediis confidebat) non impetrata ex more venia, suggestum ascendit, atque ad Professorum Collegium orationem habuit, ac vehementer cum eis expostulavit, quod (ut verba ejus retineam) post triginta nocentium impunitatem, sanguine innocentis servi, togas suas conspurcassent : unde fieret, ut ipse qui honorem præsentia sua Academiæ attulisset, nihil inde præter ignominiam reportaret, proptereaque sibi animum quamprimum Academiam hanc relinquere. Quibus dictis non priorem locum repetiit, sed coetum continuo excessit. Hoc ejus factum indigne valde tulere Curatores ac Professores Academici, & Leidenses Proceres. Postulatum igitur ut Senatui se sisteret. Respondit, se Principem esse : eoque, si quid dicere haberent, se accederent. Petiit ut scripto traderet quæ dixisset. Negavit se de scripto recitasse ; eoque frustra illud exposci. Vix honos Academiæ permittit, ut nihil hac in re agatur. Et tamen, ut censeo, concoquet hoc factum ob illustrem ejus dignitatem, quicum illi negotium est. Et videtur non tam peccatum à Principe, qui adulescens est annorum duodeviginti, vel circiter ; quam ab iis, quos in comitatu habet, ac quorum curæ est commissus. Grave etiam ducent, offendere parentem ejus, Lithuanie ac Imperii etiam principem, maximæ in universa Polonia auctoritatis virum, si quis alius iis terris, præclare de Ecclesia merentem. Superest, ut gratias agam pro affectu erga filium, quem Literæ tuæ, Reverendissime Domine, testantur. Porro eum quoque nomini tuo commendando ; quod & ipse, ut facerem, postulavit : ego verò rescribo, me non alia ratione meos commendare solere, quam qua olim suos Cæsar Augustus, *Si merebitur*. Volo enim magis magisque se suscitet, ut tueri & ipse familiæ decus possit. Deus



Deus Opt. Max. diutissime te incolumem præstet, bono Ecclesiæ universæ, ac totius Regni Britannicæ; ac tuorum quoque Reverendissime Domine, Clientum.

Amstelodami  
clxxxiii.  
Id. Februarii.

Reverendissimi & Illustrissimi  
nominis tui Cultor ac Client  
devotissimus,

G. J. Vossius.

CLIX.

Gerardus Vossius Joanni Filio, S. P. D.

**T**Andem, mi Fili, decisa est lis, quæ de schola illustri à Lugdunensibus huic urbi mota fuit. Exitus est qualem optabamus. Itaque jam duabus hebdomadibus publice docuimus. Ac succedunt initia ex animi sententia. Magnus enim est auditorum numerus, non de Juventute tantummodo, sed etiam ex viris primariis, & hominibus eruditissimis. De negotio quod abiens mihi commendaras, abundè sollicitus fui. Sed metuo ne spissè procedat, quod uterque optaremus. Nam si qua functio se offerat non indigna te, tantus continuo est numerus ambientium ut eorum quidem qui multis & magnis fautoribus sint subnixi; ut non ego solum facile desperem, sed alii etiam, qui causam agerent nostram. Nec propterea curam hujus rei agere desinam, veruntamen facile video non posse te melius tui rationem habere, quam si nihil fiduciæ in fautoribus, plurimum post Deum in virtute doctrinaque reponas. Quare non dubito quin sedulo vel Sacris literis, vel arti Medicæ incumbas. Utrumque studium in Britannia aliquem te efficere possit: in Batavia nostra (ut nunc sunt tempora) solum posterius. Reverendissimus Dom. Episcopus nuper ad me scripsit literas humanitatis plenas: ex quibus facile perspicio, simulatque idoneus sacræ functioneris, fore ut tui habeat rationem. Attamen si Medicina magis arridet, non impedio quo minus hoc vitæ genus amplectaris. Ac seu apud Britannos seu apud Batavos tuos exercere illud velis, non deerit tibi favor & noster & amicorum. Solum curandum ne incertus semper fluctues: tum etiam opus (ut apud Tullium in oratione quadam fuit) Labore & Constantia. Quod scis postea Plantini Symbolum fuisse. Vellem te frequentiore esse in literis scribendis. Te denas misisse ais. Quid dicam? vix tertia est hebdomas, quod secundæ allatæ, nec ex eo tem-

pore alias accepi. Scripsi ad Casaubonum; ut quemadmodum ante annum fecit, ita etiam deinceps tibi trimestri quoque annumeret de meo libras Sterlingicas quinque. Si acceperis eas ex trimestri, quod Decembri Mense expiravit, bene est. Sin necdum acceperis, scio quamprimum id facturum, nisi forte jam Masio dederit summam integram, quæ mihi debebatur. Quod si est, proximo Martio dabit tibi duplum, hoc est Libras Sterlingicas decem. Ita enim fieri jussi. Frater Dionysius vocatus est in Academiam Dorpatensem, quæ in Livonia, & ad professionem publicam. Sane magnus est Rex cui se addiceret. Veruntamen filii ætas facit ut malim adhuc retinere. Et amici etiam auctores sunt, ut prius apud nos juris & politices studia absolvat, quam in exteris terris tigeat domicilium. Pergratum mihi interea, quod nomen ejus magis & magis inclarescit. Hugo Grotius in Bataviam venit amicorum suavis: ea res multos habet pessime, & turbas etiam in conventu Ordinum dedit. Præsertim Lugdunenses, & Harlemenenses infestos habet. Quem res ea exitum sit habitura dicere necdum possim. Sed nondum despero. Præsertim cum Delphenses, Roterodamenses & Amstelodamenses valde ei faveant, omnemque moveant lapidem, ne tantus vir alibi potius, quam in Batavia sua vivat. Velim ad me perscribas, quid rerum agat Affinis Junius, & ubi vivat. Nihil enim hætenus de eo intellexi, præterquam quod unis literis tuis continebatur, ac tu ex Petreio te accepisse scribebas. Jam hebdomas est quod Aurelium Londinensem Ecclesiastem obisse cognovi, de quo tu nihil perscripseras. Dolet quod Britannia tot alios Viros egregios amiserit. Id enim Literæ tuæ testantur. Gratum facies si deinceps quoque significes, qui iis successerint. Valde laboro pro Vandenburgio ut præsit vendendis rebus præfecturæ maritimæ: unde ad eum quotannis luculentum salarium rediret. Sed obstant nobis alii; in his Realius præfectus, iis à secretis, qui pro filio suo id munus petit. Nec desunt alii qui ambiant. Atque etiam traducunt nostrum illum quasi poculis sit addictior, nec suæ rei satis gesserit curam. Dolet quod non magis habuerit rationem nominis sui. Cum his diebus quempiam ex præfectis rei maritimæ ejus causa compellarem, benignè quidem respondit: sed addebat deinceps qui munus hoc sustinere velit, eum cavere oportere pro xx. aut triginta Florenorum millibus: ne iterum publicum defraudetur. At ego neminem amicorum scio, qui Vandenburgii causa tanto se periculo velit exponere. Fortasse facilius negotium succederet, si quosdam

in

in quorum manu ea res, muneribus ac promissis faceremus nostros. Sed ego artes istas non didici. Interim ex his facile colliges difficilem esse provinciam, quam suscepi, & ut nonnulli aiunt, non satis mihi honorificam. O utinam deinceps in huiusmodi negotiis non amplius utatur operâ meâ! Non possum facile aliquid amicis negare. Interea audire illa cogor, de eo quem commendo, quæ magnum mihi dolorem adferant. Etsi verum dicere licet, ex parte in causa est socrus, quæ vitia ejus patefacere aliis solet, atque etiam exaggerare ultra modum; sic pleræque foeminae sunt: nec interea cogitat se sibi & suis abesse. Archiepiscopo Armachano gratias pro honore mihi habito maximas egi. Scio in causa Godschalci nonnihil dissentire: sed facit id perhumanè. Quod cur tanto viro non æquè liceat ac mihi licet in sententia persistere, postquam ejus opus legi? Sanè vir est summus & lectionis admodum variæ; mihi que planè decretum scripto aliquo testari, quanti eum faciam. In eo tamen falli arbitror, quod existimat Godschalcum per omnia eadem ac B. Augustinum sentiisse. Omnino enim exorbitavit ea Augustinianæ appingens sententiæ, quæ beatus ille antistes nunquam dixisset. Aliter si esset, non eum damnasset Rabanus Maurus omnium ætatis suæ doctissimus, & una cum Rabano Synodus Moguntina, in qua tot viri Augustiniani dogmatis non intelligentes modo sed etiam retinentes. Nec Remigius aut Lugdunenses ausi unquam fuere Godschalci per omnia patrocinium suscipere. Ut multo minus id nunc fieri conveniat, post annos prope octingentos. Ut mittam quod pro me stat tot historicorum cohors: quos non ausim omnes falli arguere. Non tanti mihi monachus unus, præsertim qui sine consensu præfecti cœnobio excessisset, ad prædicandum istic quo nemo miserat. Serenissimus Bohemæ Rex in Palatinatum est profectus. Pleraque oppida jam occupavit Sueciæ Rex potentissimus. Superfunt Heidelbergia, Frankendalia, & quædam alia quæ veteris domini amore, ut spes est omnium, facile se dedit, nisi validissima sint præsidia Cæsarea vel Hispanica. Reverendissimo Londinensi Episcopo (ut magnopere te probes) valde & tuâ & meâ causâ exopto. Optime nobis vult. Sed opera tibi danda, ut omnes in dignum contulisse beneficium existiment. Vellem aliquid mihi temporis esset ea perficiendi, quæ jam diu molior. Affectum meum erga tam bene meritum monumento aliquo testarer. Et tibi ea res utilis foret. Sed scis, quam premar, & tantum non opprimar curis variis, quæ me urgent. In quibus non

minimum illa locum tenet, ut præclare omnes boni de te judicent. Hoc erit, si cum industria junxeris quam *σπουδή* Græci vocant, quia ut Aristotelis ait *οὐκ ἐστὶν ὁρμήν*. De affine Junio desidero scire ubi & quâ conditione vivat. Post eas literas, quas Lutetia ante annum prope scripserat, nullas ab eo accepi. Professor Bodecherus agere hoc videtur, ut & gener meus & simul collega fiat. Sed soror tua hæcenus animo ab eo est satis alieno. Habet alioqui, ut scis, inter procures hujus Urbis non paucos sanguine sibi junctos. Lugduni Batavorum ante duas tres hebdomadas capitale sumptum est supplicium de quodam ex famulitio principis Razevillii, qui vespertinis exiens horis, inque hominem nequam incidens, & ab eo male habitus, eum interemit. Vulnere ipse tardus effugere non potuit. Hoc primum est supplicium capitale, quod Academia vidit. Razevilius graviter adeo id tulit, ut oratione publicâ sit conquestus de injuria quam servo suo fecisset Academia. Nec exprobrare dubitavit quod post xxx. nocentium impunitatem innocentis sui servi sanguine togas conspurcassent. Tam liberæ voces in cœtu procerum, professorum, studioforum non impunè alteri abirent. Sed ut puto hic connivebitur. Est enim adolescens quidem qui ista dixit: Sed Lithuanie Princeps, & filius magni illius Razevillii qui Regi ipso Sigismundo prope formidabilis esse solet, qui etiam amore eo dignior, quia præclare adeo in Polonia de Reformatis Ecclesiis meretur. Barlæo nostro non bene est; & nescio quorsum hoc evasurum sit malum. Valde opto ne tam bono frauder collega. Res ea male cederet & mihi & imprimis novo Gymnasio. Oratio inauguralis quam idibus Januarii habui, typis est divulgata. Eam primâ occasione mittam. Id nunc facerem; sed tanti non erat ut propterea sumptibus & te & amicos onerarem. Quare meliorem captabo occasionem. Dionysii Reidanus propediem (ut arbitror) excudetur. Matthæus in Comitum historia magis magisque se probat. Isaacus in Græcis pulchre progreditur: & jam Evangelistas cum Actis scitè interpretatur. Præceptore utitur Brenio, erudito juvene, quem in collegio (ni fallor) nosti. Nec male Gerardus procedet aliquanto. Lusibus, ut illa ætas solet, addictior est, sed ingenio id quo plurimum valet, compensat. Vale, mi fili, ac sæpe me de studiis tuis & cæteris fac certiore.

*Tui Amantissimus Parens  
tantoque amantior fu-  
turus quanto pulchriora  
de te intellexero.*

G. J. Vossius.  
Lice-

*Amstelodami  
clō 16c xxxii.  
Kal. Feb.*

Literas hæc non uno die exaravi : quod occupationibus & interpellatione non una avocarer. Sed antequam eas absolvisssem pene eodem tempore, binæ aut ternæ mihi Literæ tuæ redditz, prope ejusdem argumenti : nempe quæreris quod nullas à nobis literas acceperis. In causa autem fuit, partim quod tuas expectaremus, partim quia initia professionis difficiliora essent, nec cæteris aliquid temporis relinquerent. Nunc postquam de pecunia ad Casaubonum scripsi, animo scio eris magis defæcato. Literas eas tuis inclusi, quia non alium putem eas melius procuraturum. Literæ sunt grandiusculæ, quia inclusi iis, quaternionem Oratoriarum, quem desiderabat. Clarissimis professoribus & amicis cæteris, in his optimo & amicissimo Hallo, plurimam salutem dices.

## CLX.

Eust. Swartio S. P.

**S**æpe doluit, mi Swarti, quod tot annorum intervallo nihil de te cognoscerem. Solum hoc retulit cogaatus uxoris meæ Roverius, visum te sibi Hagæ. Et aliquanto post Bostadius retulit, in Batavia te degere, nec id se unquam fugisse. Tanto jucundius nunc est ex teipso intelligere vivere te, & valere, & memorem esse nostri. Voluptatem etiam attulit, quod præfecturam Scholæ Sylvæducentis sis consecutus. Utinam non ea esset Civium perviciacia : quæ etsi ipsis damnosior est, quam tibi, nihilominus moleste tibi accidit. Sed etsi lautior dignior es fortuna, honestior tamen hæc Provincia, quam ut deserere eam debeas, priusquam unctior conditio obtigerit. Equidem ut antea semper, ita nunc etiam optime tibi volo : imo nunc magis, quia ex Literis tuis didici generum te esse cordatissimi Civis & optimi Viri Vanderlachi, affinem Cornelii & Nicolai Vanderlachi, quorum hunc veterem erga me affectum retinere satis ex eo colligo, quod rarius quidem quam vellem, subinde tamen Lugduni me invisere, & suavisissimis sermonibus pascere soleat. Tanto magis exoptem, ut utilis tibi esse posset opera nostra in eo munere, quod desideras in Lycæo nostro. Veruntamen necdum video, quo pacto persuaderi possit proceribus nostris, ut cogitent de advocando Politices professore, qui ut Historiam, sic civilis etiam Doctrinæ, me Professore designant : meque unum huic oneri sufficere existiment. Paulo facilius impetremus de humanioribus Literis. Sed tamen

vir est clari nominis qui eodem adspirat. Equidem utrumque vestri mihi Collegam optem. Sed certum est prius cogitatum in se Mathematico. Quid mirum ? in Mercuriali Civitate : cujus commercia sine numerandi scientia non constant, nec navigationes in omnes orbis plagas ac terras etiam ignotas sine scientia siderali. Si quid tamen cognoro, quod tua tuorumque scire interlit ; vel te, vel Vanderlanios faciam certiores : Seduloque exquiram, quæ ad hoc negotium pertinent ; ne veterem in me amorem refixisse credas. Longe tamen facilius effici posset, quod speras ; si perrexisses in illustrandis Scriptoribus antiquis, uti cœperas. Nunc tot annis siluerunt Musæ tuæ. Sed bene est, quod pristinus redit vigor, curamque suscipis castigandi & illustrandi Curtii. Multa enim post Raderi labores restant. Arbitror Janum Gebhardum popularem nostrum, idem animi habere. Sed pulchrum est in nobili hoc circo plures decurrere. De Plauto edendo, quantum ex silentio tuo colligere possum, jam cogitationem deposuisti. Quod si est, non incommode, ut arbitror, domuitionem cogitet vetus editio nostra, quæ cum variorum prodiit olim Commentariis. Sæpius mihi molestum fuit ea carere : Uti & Dutia, cui adscriptæ Scaligeri castigationes. Nam Camerariana, ad cujus oram exscripsisti illas Scaligeri, non parum abit à Dutia, ut sæpe hæserim incertus. Nec si remiseris, potius remittendi minus potestas erit. Sunt enim τὰ Ἰσθίον κοινά. Quare, quæ mancipio nostra sunt, ex usu tua esse volo. Id enim meretur egregia eruditio tua ; atque item præclarus erga me affectus tuus. Vale, præstantissime Swarti, ac deinceps etiam amore certemus.

*Amstelodami.* cio idc xxxii. Kal. Martiis, quibus scis olim munuscula mitti solere. Mitto idcirco orationem inauguralem hic à me habitam nuper. Quæ etsi tanti non est, tamen amare eam poteris propter Autorem. Vale.

*Tuus sine fisco,*  
G. J. Voßius.

## CLXI.

Thomæ Farnabio S. P.

**E**T grata & jucunda mihi fuerunt literæ tuæ, optime & doctissime Farnabi. Eo molestius mihi est quod tarde adeo respondeam. Nempe jam diu scribere cupientem temporis angustia, & negotiorum moles excludere : quæ ita me distinent, ut pæne con-

C c

ju-



jurasse videantur ad eripiendum tempus, quo amicos salutare, aut eorum satisfacere postulatim possim. Tibi certe jamdudum responsum oportuit. Quare licet nunc quoque occupatissimus, malui cætera meo in te officio posthabere. Etenim injurium me fore videbam in tuam erga me humanitatem, nisi aliquando, post multam cunctationem, non pertinax silentium, sed pene necessarium abrumperem. Imprimis vero novissimæ tuæ Literæ stimulos addiderunt; itaque dum recens tui memoria, & simul occasio opportuna erat, vel hanc, vel illam, elabi nolui. Et quia postrema maxime animo hærent, succurrit primum Martialis, quem edere cogitas. Ego Scriptorem illum, non semel à me lectum, amavi semper, ob venustatem ingenii; quod tamen odi quoties in spurcitiem degenerat. Sed illa tanquam non dicta prætermitto; sunt alia divina certe Epigrammata. Itaque optabam ipse nonnulla olim observata communicare: sed volentem retinent imperiosæ occupationes. Accedit, quod omnes meos vetustos Codices, & eos quibus multa manu sua annotarat Scaliger, jam ab annis quindecim retinet amicissimus Scriverius. Cujus penè unius nunc Editionem habeo, egregiam illam (nec hoc invidia puto negarit) sed quam tamen meliorem possit reddere, si etiam ei obtingat. Sane lib. II. Epigram. frustra sollicitat hunc versum, *Si totus tibi triduo legatur*; mavult, *Si totus triduo tibi legatur*: Atqui prior in triduum est porrecta: uti & in biduum; unde Terent. Eunuch. *Rus ibo, ibi hoc me mactabo biduum*. Qui senarius est, Lib. III. Epigr. LXVI. displicet, *Abscidit vultus ensis uterque sacros*. Atqui Lucani est in primo, *Ille comam lævo morienti abscidit ephebo*. Nempe est ex *abs* & *cædo*, ut *abscondo* ex *abs* & *condo*. Hæc ad artem pedariam pertinent; Illud ad ἀναλογία. quod ad Epigram. XCIV. Lib. VII. ait, Onychem imo solum isto loco muliebri genere usurpari; Malim dixisset, non alibi accipi eo genere pro lapide alabastrite, vel ampulla inde facta: nam pro gemma foemininum plane est. Itaque Plinius, Lib. XXXVII. cap. 6. octie continuo jungit foeminino. Sed quid minuta adeo pergam sectari: præsertim tam occupatus? Illud tamen omittere non possum, esse hic Typographum, qui jam diu aveat excudere Martialem tuum. Typos habet venustissimos, quod, vel me tacentem, judicare possis, ex Juvenali ac Persio tuo, & Horatio Bondii, quos ad te mittit, ut ipse dispicias, utrum committere ei labores tuos velis, an ipse Editioni in patrio solo præesse malis. Sane non facile, his quidem teris, reperias, qui venustius, & fortasse e-

tiam accuratius tua edat. Ego etiam Scripta tua malim eleganter excudi. Nam & hic dicere liceat, gratiora esse quæ non bonitate modo, sed etiam venustate sui commendantur. Et omnino mihi placet, quod utilissimam operam & antiquis Scriptoribus & Juventuti impendis: quum iniquum est prolixis illos Commentariis onerari. Melius tu qui supervacua omittis, ut eo magis assidua Juventus sit in fontibus ipsis hauriendis. Sed video me immemorem temporis; & nolo Londinensem illum Mercatorem, qui tuas mihi literas tradidit, & hac ipsa hora abutum parat, sine meo ad te responso venire. Itaque te, clarissime & amicissime Farnabi, optime valere opto, & nostri amorem referbare.

Amstelodami.  
clb lbc xxxii.

Nomini tuo addictissimus,

G. J. Vossius.

## CLXII.

Merico Casaubono.

Vir Clarissime,

Cujus causa sæpius scribere distuli, quodque semper primarum mihi literarum argumentum fore existimaveram, id tandem accidisse & ego lætor, & tu ubi cognoveris gavisurum nullus dubito. Est autem de Schola illustri quo eventu nescire non potes si priores meas Literas legisti: nam quod credidi ipse, & mecum plures alii, ex voto omnia ceciderunt. Judicium confessus, quorum arbitrio permessa res erat, nihil præter leges aut æquum Amstelodamenses exorsos, & falso litem à Lugdunensibus motam. Ita hæc composita; nescio tamen an id dicere liceat, nam audio Lugdunenses nondum quiescere, sed si possint (multi enim posse negant) provocare ad Urbes Hollandiæ velle. Sed faciant quodcumque videatur; nos jam solennia Illustris Gymnasii peregrimus, & quotidie docemus, Auditorio non infrequentiori, quam Lugduni solebamus, vel, si numerus paulò minor, quicquid hic jacturæ, Auditorum præstantia compensat, quos inter multi sunt grandævi, & venerabiles Viri. Sed hæc quidem hætenus; Optatum Millevitanum, à te illustratum prædiisse lætor. Et multum videre desidero. Necdum enim mihi allatus est, neque Junium aut compellavi ipse, aut ubi sit intellexi. Credo aliis distineri. Sed quamvis nondum perlegere labores tuos

licuerit,

licuerit, jam tamen prælagit mihi animus, dignissimos fore tanti parentis tanto filio. Certè, utvis multum occupatus, nequeo quin teneam desiderio Animadversionum tuarum. Fateor eas esse occupationes meas, ut quamvis nihil ultra accedat, minime tamen otiosus sim futurus. Verum nunquam tantum mea negotia poterunt, ut seponam, aut differam saltem percurrere tanti amici scripta. Ne dicam eruditi adeo viri, quod verè dicere possum, ex quo præsens tuam existimare doctrinam didici. Ut mittam etiam eruditionem, minus an facere quidquam possim, cum nostra quoque Lectione tua dignatus sis. Ingratus sim, mi Casaubone, nisi te amem, æstimem, colam; inhumanus, nisi saltem par pari referrem. Itaque ego quidem ut dixi aveo tuum Optatum habere: & ne tuum quoque desiderium morer, mitto Quaternionem quem desiderari in Oratoriis nostris scripsisti. Jam redeo ad curas quibus sæpius te oneravi; vel potius ut priorem tibi sollicitudinem eximam. Etenim de stipendio quicquid debebatur mihi accepi, excepto semestri postremo cujus dies Decembri mense expiravit. Illud expecto, & nescio quid Masium moretur; quando uti ex literis tuis cognovi, jamdudum pecunias habuerit. De Peystero quod scribis, nondum perpendere potui; quamobrem semel placita retineo. Cæterum monitum te rursus velim, amicissime Casaubone, ut filio meo Johanni, singulis trimestribus Libras quinque mittas. Credo quoque reservasse te ei summam illam de postremo trimestri, quod Decembri finitum. Si id factum non est, necessum erit de hoc trimestri, quod Martio mense expirabit, demi altera parte plus, libras videlicet X. Dolet sæpe adeo molestum esse tibi; Cæterum multum in humanitate tua reponere me facile ipse animadvertisti. Vale.

## CLXIII.

Danieli Heinſio S. P. Leidam.

**P**RO Herode tuo, & poematis annexis, quæ ab Collega Barlæo accepi, gratias habeo summas. Valdè me eorum lectio delectavit, ut omnium tuorum solet, præsertim in hoc scribendi genere, ubi certas cum Antiquis. *Aristoteles* quod mittam habeo nullum. Sed vices nunc meas supplebit præstantissimus Mericus Casaubonus: qui Optatum Milevitanum, notis suis auctiorem edidit, & exemplar quod mitto, tibi dari jussit. Non dubito, quin gratissimum tibi futurum

sit, tum editoris causâ, cujus cum maximo parente, tanta tibi amicitia fuit; tum ipsius Optati, qui utinam exulceratis hisce temporibus, magis in deliciis foret? Salve summe vir, & à Veteri Collega, cum optima coniuge plurimum salve.

viii. Kal. Mart.  
clo loc xxxii.

Tuus,

G. J. Vossius.

## CLXIV.

S. P.

**Q**Uanto magis desidero tecum, amicissime Casaubone, confabulari, quantoque negligentius plerasque meas literas ad te video perferri, tanto avidius animus est omnes arripere scribendi occasiones. Eam nunc attulit Mercator Londinensis per quem Famabii mihi literæ traditæ erant. Vellem tamen discessus ejus non tam subitus fuisset. Pluribus colloqui licuisset: Feriæ enim nunc sunt, quibus spatium datur cum amicis colloquendi. Nam cum docendum est publice, otii adeo parum relinquitur, ut sæpe vix domestica curare liceat. Adeò, ut plerumque literarum scriptionem in feriis differam: quarum bonam semper partem amicis do, maxime consanguineis vel affinibus, qui invisere tum imprimis solent. Literas tuas & simul pecunias accepi: Libras videlicet vestrates quinque & triginta. Postrema quam scripsi Epistola, quia cognoram commodius te per Peysterum procurare pecunias posse, rem totam tuo arbitrio permisi, & addidi eo consilio Chirographum. Cæterum monitum te volo, prænomen Peysteri, quod tunc non occurrebat, perperam me scripsisse, & pro Jona (nam id nomen illi esse nunc cognovi) Franciscum appellasse. Quod hic adjicere visum, ne putares alium me quam illum quem aiebas, Peysterum designasse. Itaque deinceps à Peystero, nisi Masium præferas, pecunias expectabo. Si de Peystero commodius erit, quæso ut Masio satisfacias, de impensis quas fecisse mei causa sese ait: & detrahe id de summa quæ proxime mihi cesserit. Nec tamen scio quos sumptus Masius signet: crederem aliquos fecisse in itinere Cantuariam faciendo. Utcunque est, nolim me ei debitorem. Optati tui exemplaria nonnulla Bibliopolæ Lugdunensi tradidi, qui postea indicabit quo pretio vendere ea possit. Negabam minoris venundari oportere, quam nostrati Floreno Caroleo: quod paulo minus

C c 2

est

est quam solidis duobus sive Schellingis Anglicanis. Quod si consequi hoc liceat, viginti Caroleos nostrates, pro viginti Exemplaribus, sive triginta octo Schellingios Anglicanos, demes de pecunia mea. Sed ruebat Bibliopola ne tam care posset vendere, quia paucorum ad palatum sint Antiqui: præsertim qui argumentum tractent, quale Optatus tuus. Mi Casaubone, valdè sordent hic Veteres. Quod si quid antiquorum legere velint, id vix aliud sit, quam de Prædestinatione, ut quædam Augustini, Prosperi, Fulgentii: Theologiæ Doctorem novi, qui nullum veterum in Bibliothecâ haberet: nec diffitebatur, sed dubitare tamen aiebat, an non unum cuiusdam opusculum haberet, seu Bernardi, seu Anselmi. Quod si periculum videro, ne optimus scriptor annos totos, in Bibliopolarum ferulis jaceat dispretus, aliter hoc negotium perficiam: Nempe cum Bibliopolarum variis de permutatione aliqua transigam. Faciliores hac in re esse solent. Nec ea res obesse mihi admodum possit, quoniam subinde ego, vel liberi, emere scriptores aliquos necesse habeamus. Quare nihil impedio, quo minus de proximo hujus anni quadrante, vel eo ipso qui mense hoc Martio expiravit, refeces illos XXXVIII. solidos, sive Schellingios vestrates. Decreveram aliquid addere, de studiis & laboribus nostris, sed id proximarum esto literarum argumentum. Multam salutem à me & mea, optimæ uxori, dices, item Rev. Dom. Decano, & toti Collegarum & Fratrum præstantissimorum Collegio.

*Amstelodami clb Ioc xxxii.  
Prid. Kal. April. St. Vet.*

## CLXV.

Merico Casaubono S. P.

**E**N tandem tibi Exercitationes meas Grammaticas, præstantissime Casaubone. Addidi & alterum exemplar quod dandum Reverendo D. Decano. Plura misissem, nisi scirem argumentum hoc non facere ad multorum palatum. Sed munificus magis ero, ubi edidero quæ sequuntur argumenti gravioris ac sanctioris. Literis proximè missis nihil mihi gratius fuit. Satisfactum mihi jam à te usq; ad Septembrem anni superioris, qui fuit quartus & trigessimus supra clb Ioc. Expecto igitur semestrem Præbendæ meæ, quod expiravit in Martio hujus anni quinti & trigesimi. Jam intellexeris confido, Hu-

gonem Grotium Legatum agere Regni Suecici Lutetiæ Pariliorum. Sophompareas ejus (tragedia est de Josepho Israelis filio) hîc excuditur. Eam eò justius mittam propediem, quia nomini meo inscriptis. Scio placituram. In mentem venit hoc ipso die, quo ista scribimus (is est vi. Id. April.) ab Henrico octavo, ejectis monachis in Ecclesiâ Cantuariensi constitutum esse Decanum cum xii Præbendariis ante annos xciv. Contigit semel iterumque, & sæpius fortasse, ut non nemo, me & aliis presentibus ea referret, quæ ostenderent ordinem hunc Canonicorum seu Præbendariorum eo in Angliâ loco esse, quo pauci his terris existiment. Sed ego, etsi super eo aliqua me audire memini coram, tamen non habebam, quæ de aliis certo responderem objectantibus quibusdam, non satis me decora, & dignitatem ordinis nostri scire. Si grave non erit, velim per otium tribus verbis significes, quo loco in regno Anglico Collegium sit nostrum. Video Monachos olim & Cantuariensem statuisse Archiepiscopum, dummodo Regi placeret. Sed scire malim, quæ penes eos fuerit, ex quo Præbendarii substituti. Uti eque locum obtineant in Parlamento. Quibus Secularium (ut vocant) pares censeantur. Et si qua id genus. Neque id fastu scire aveam. Alienum id à moribus meis, præsertim qui longè aded diffitus vivam. Sed ne imperitior videar illis, qui diu quidem in Angliâ vixere, sed nequitiam eo assurrexerint, quo nos regia evexit dignitas, ut nostri ideo hic mirentur eos exactius me scire, quæ ordinem nostrum spectant. Vale Reverende & Amicissime D. Casaubone, meoque nomine plurimum Reverendum D. Decanum & universum D. D. fratrum Collegium saluta. Nec minus lectissimam uxorem tuam, quam & mea salute plurimâ impertit & Filius Matthæus, quem coram vidisti. Is nunc totus est in Annalibus Hollandicis, quorum libri quinque primi excudantur. Ut spero & istos intra menses duos videbis.

*Tuus omni officio,*

G. J. Vossius.

## CLXVI.



## CLXVI.

Guil. Boswello, *Oratori Regis Britanniae.*

Nobilissime &amp; Amplissime Domine,

**R**editæ mihi sunt literæ tuæ, & illæ quas scriperas paulò antequam Bavia excederes, & alteræ ex Anglia transmissæ. Utrisque lectis non potui satis exoculari perpetuum erga me amorem tuum, & humanitatem tam prolixam. Tantoque mihi impensius curandum video, ut affectui tuo possem respondere. De Hortensio nostro ita est, ut scribis. Sed de altero ei surrogando necdum cura suscipitur urbis nostræ proceribus. Ejus rei causam accipe. Quo tempore Hortensium & *paucis* cura tenebat proficiscendi in Italiam, sæpe ab urbe aberat, nunc Hagam excurrens, nunc Leydam vel Delphos. Hæc res fecit, ut non ille solum longè alia ac juventutis bonum curaret, sed auditoribus quoque ejus amor Mathesios refrigeraret: vel siquibus ardor ille duraret, in alia Lycea deflueret. Ubi deposuit noster animus illius irineris destinati, redire quidem voluit ad labores & auditiones publicas: Sed sæpe *dictum* erat nullus, interdum unus & alter, ut locum haberet illud Perlianum è Græco expressum, *vel duo, vel nemo*. Et duorum interdum (miserum) alter erat minister Lycei, quem Pedellum dicimus. Hoc vidit & indoluit: idque eo magis, quia spem majoris stipendii habere non possit, nisi opera ejus necessaria publico magis videretur. Natura propensior erat ad tabem, quàm parentes obierunt. Accessere varia, quæ animum ejus forte suâ multo celliorem disruciarent: in his illud quod dixi. Eo absumpto consultius Urbis nostræ magistratui videtur, paulum deponere curam Professoris Mathematici, primoque circumspicere de uno altero idoneo vel ad Professionem Historiæ Romanæ, vel similis studii, cujus amore juvenus vel omnis potius flagret ætas. Nec diffiteor priusquam tuas accepissem literas, id me consilii proceribus dedisse. Spectavi tum me ipsum, tum præcipue bonum publicum. Nam nisi vel Romana Historia vel ejusmodi quid eo tempore doceatur, quo ego in sacra vel Ecclesiastica sum Historia publicè enarranda, periculum sit, ne ille quoque defectus imminuat eorum numerum; qui huc se tanquam ad studiorum mercatum receperunt. Scis enim his terris non usque adeo multos esse Ecclesiasticæ antiquitatis amantes. Homines fuisse ajunt, qui ab Apostolorum temporibus ad nostrum usque seculum scripturam enarrâ-

runt: eoque non dispiciendum quæ dogmata obtinuerint, primis etiam seculis, vel quale fuerit regimen Ecclesiæ, sed quid Deus dicat in verbo suo, hoc est, quomodo ipsi novè putent scripturas intelligi oportere. Hic novellitatis ardor, is antiquitatis contemptus, nisi pestilentis instar Sideris multorum animos afflasset, beatius in rebus ageretur humanis; & si Britannica certamina satis capio, non tantas Scotia turbas daret. Scio innumera animarum millia esse extra omnem culpam. Sed quid faciamus istis *iniquis*, qui soli sibi sapere videntur, proque talibus se venditant simplicioribus: illos vero qui antiquitati suam deferant honorem, tanquam umbras putant circumvolitare. Imo, ut intelligo, calumniis suis pudore nullo, in odium gravissimum adducere apud suos non cessant tum Regem suum, cordata animi bonitate suorumque amore, nullo Regum inferiorem, tum omnes eos quibus Deus præcipuum Ecclesiæ suæ regimen commisit. Sed quia jam in hunc sermonem incidi, literas Cantuarie accepi, quibus certior redditus sum; quia serenissimo Regi ad motus Scoticos compescendos milite fuerit opus, cuique Canonicorum Cantuariensium de Præbenda annua portionem decidendam: me qui percipere soleam quorannis libras centum sterlingas, non posse percipere ultra octoginta. Equidem non is sum qui non omnia Regis causa velim, quin quicquid habeo non modo Regià liberalitate, vel à parentibus relictum vel labore partum proprio, atque adeo vitam ipsam pro Regia dignitate impendere sim paratus. Sed tamen ambigo, cum ignorem quantum conferant fratrum meorum alii, num ego qui solum centum percipio, privandus sim libris vicenis. Arithmetica enim in hoc negotio proportionem agendum non sit: sed Geometrica, ut nosti. Utinam igitur grave non sit de isto consulere vel Illustrissimum & Reverendissimum Dom. Archiepiscopum, vel Reverendissimum Dom. Episcopum Londinensem. Non hoc peterem, nisi jam novem prope menses forent, quibus nihil percepi. Ab clarissimo quidem fratre Casaubono literis certior factus sum, mercatori meo se pro trimestri annumerare voluisse viginti libras, sed eum nisi viginti quinque (ut antè) daret, accipere quod offerebatur noluisse. Verum ego ad Mercatorem scribi curavi, ut potius trimestri quoque viginti acciperet, quàm nihil. Respondit ille (nisi ab eo qui Amstelodami habitat eludor) nec viginti illos se posse accipere. Nemo, ni fallor, æque idoneus fuerit ad consilio juvandum quam Rev. Dom. Londinensis, de cujus affectu etiam omnia mihi merito polliceor. Nam ipse abundè  
mihi

mihi eum coram comprobavit, nec alter eo intelligentior, qui ipse in Collegio Canoniorum Cantuariensium fuerit. Hæc scripti raptissime in ædibus nob. & amplissimi Dubletii, qui officiosissimam tibi salutem adscribi iussit. Scripsissem ad magnos illos Ecclesiæ memoratos Antistites, quorum laudes nulla ætas conticescet. Sed, ut vides, vix nunc potui hæc ista. Festinationi ignosces & simulac occasio sit, vel potius cum voles, omnia officia cum salute devotissima offeres Reverendis & Illustribus Dom. Archiepiscopo & D. Episcopo Londinensi. Vale.

*Tuus totus,*

G. J. Vossius.

### CLXVII.

Arnoldo Buchelio S. P.

**A** Micitia quæ jam ab aliquot annis, tecum mihi fuit, Amplissime Bucheli, omnino postulare videbatur, ut contendente Amersfurtum, filio meo, simul & adituro civitatem vestram visendi studio, te, & ipse per literas, & filii verbis salutarem. Quippe qui existimem boni viri esse, etiam sollicitum agere de amicorum rebus, & valetudine. Itaque non facile dixerim, quam gratum mihi acciderit, quod his diebus ex ornatissimo K. Marteno intellexi, valere te, bellæque pro ætate portare. Eo autem id mihi jucundius erat, qui non modò, ut tam amicum decet, optimè tibi optare, sed etiam quod publico, te plurimum benefacere posse cogitarem. Et jampridem cupidè expecto, ut patriam, ut nos omnes, tot annorum laboribus tuis bees. Sanè id si ob attenuatas corporis vires, tam citò non possis, quam vellemus, aut alia etiam de causa, adhuc premere labores tuos malis; saltem curaturum te spero, ut per propinquos, ac necessarios tuos, aut quibus aliis dare id negotii volueris, lucem quondam adspiciant. Nam dolendum profectò sit, si quæ viri, suis in studiis præstantissimi, multo studio conquisivere, publica luce careant. Accedit quod raro scripta, nisi ab Authore ipso, emendatè edantur. Ideoque, & ego his temporibus, quæ ante annos xxx. & ultra commentatus sum, protrahere in lucem molior. Hic quem vides, filius meus Matthæus Vossius, scribere ante annum aggressus est, Comitum Hollandiæ Historiam; cujus majorem jam partem absolvit, & ut arbitror post menses paucos

edet. Quare si qua tibi sint, quibus juvare eum, in egregio hoc instituto, sine incommodo tuo possis, is non dissimulabit publicè, ejus beneficio profecerit, aut fuerit adjutus. Quod eo dico, quia video hodie, adeo invaluisse morbum illum, ut homines addiscere quidem velint, sed à quibus hauserint, non agnoscant. Sed à talibus longè diversus mihi, etiam filio meo animus. Itaque si habeas, vel Manuscripta, vel olim edita, ac propè jam sepulta, quibus putes lucem addi Patriæ Historiæ posse, honor tuus erit, publici auctoritas. Et paucis diebus recepturum te, quæcumque commodaveris, fide quam optima spondeo. Vale.

*Amstelodami  
clō Idc xxxii:  
xi. Kal. Jun.*

*Tuus,*

G. J. Vossius.

### CLXVIII.

Andræ Riveto.

Lugdunum Bat.

Reverende vir, Doctissime Collega.

**E**unte ad vos ornatissimo juvene Rigaltio, non potui occasionem hanc prætermittere, mittendi ad te Optati Milevitani, quem à se castigatum, notisque auctum, ex Anglia transmisit Mericus Casaubonus, ut tibi traderem. Frustrà vero, aut scriptorem ipsum, aut Casaubonum nomen commendaverim; cum utrumque in veneratione tibi esse sciam. Dignus quoque tanto Parente Mericus. Quare ut lubenti animo donum accipias, pro me, & eruditio, & Parentis magnitudo, & ipse Optatus postulat, cujus Episcopi utinam omnes hodie similes forent. Si enim tam hi amantes essent pacis, ac concordie, non ita Ecclesia Dei scinderetur, magno hostium gaudio, & imbecillum scandalo. Verùm non tam querimoniâ nunc opus, quam remedio; ad quod tibi, & paucis tui similibus, salutaria, ut spero, consilia, inspirabit Deus, magis magisque. Salutem plurimam honorandæ Matronæ conjugii tuæ, & Collegis universis, ubi vacabit, aut oportunitas erit, meo ut nomine dicas rogo.

viii Kal. April.  
clō Idc xxxii.

*Tuus totus,*

G. J. Vossius.

### CLXIX.

## CLXIX.

Bernardo Damke S. P.

Quod hæcenus, Ornatiſſime Damke, literis tuis non reſponderim, propter occupationes meas fuit; quibus quotidie ſic premor, ut ſi otioſo, vel pauxillum eſſe liceat, vix me Voſſium eſſe credam. Verumtamen quia commoda adeo occaſio eſt, per honeſtæ admodum domus adoleſcentem, literas ad te mittendi, non patiar hanc mihi diſfluere. Major erga te amor meus. Sed ſic tamen, ut paucis deſungar. Quaris de loco Baſilii Imp. ubi ait in ſuis *περιγενετικοῖς*, ſummus juxta, ac intimos, *ἐπὶ πλείονος τειπέχους γῆς με δάνατον κληρονομήσεν*. Puto non meliorem fabulam adducere poſſe, quam à magno Marone, qui ſimiliter ait, de Coelii Mantuani ſepulchro, tres patere non amplius ulnas. Scio ut crucem fixiſſe ſe Grammaticis, magnus ille vates dixerit. Sed enim ſufficere debet, quod Cornificius, & Aſconius, ex ipſo audierint Marone, per coeli ſpatium, ſignificari Coelii illius, quem dixi, ſepulchrum. Quem enim meliorem interpretem quæramus ipſo Poeta? Nec in dubium vocare licet ſententiam hanc, quia non ipſi hoc Cornificius, & Aſconius ſcribant. Sufficere debet, quod hæc ſubnixæ ſint, non ſolum honorato tibicine, ſed etiam Junio, Phialgrio. Mens igitur Baſilii iſta erit, utcumque Imperatores, non ſolum magna habitent palatia, ſed etiam, vel totius orbis Domini fiant, non tamen domum eam, quam obitu incolunt, pluſquam tricubitalem fore. Parva certe hæc domus, ut meritò dixerit Horatius,

*Et domus exilis Plutonia.*

Valdè enim falluntur, qui vel *exilii*, pro *exilis* legunt, contra omnium codicum fidem; vel qui exiliſſimant, ſignificari amplum illud animarum receptaculum, quod Poetæ Erebum dicunt: nempe ut domus illa dicatur exilis, non quia ipſa exilis, ſed quia ut nugantur, animæ, vel umbræ ſint exiles. Quanto illud veriſſimilius, quod jam ab aliquot annis perſuaſi multis, Plutonium domum, eſſe ſepulchrum. Nam Pluto, terra, quia è terra effoditur *πλάτων*, ſive quicquid metallorum, juxta illud Poetæ,

*Effodiuntur opes, irritamenta malorum.*

Et Græcis idcirco *Ἄδης* ab Hebræo *אֲדָמָה* h. e. Terra: non uti Græculi putarunt, ab *a* & *iſeiv*. Nec ineleganter idem Baſilius ait,

*ὡς περ ἱατρὸς περὶ σωματῶν φιλοσοφῶν, ὅταν καὶ φιλοσοφῶν ψυχῆς ἱατρῶν.* Scio quod objectas *ἱατρὸς*, proprie *ἱατρῶν*, φιλοσοφῶν φιλοσοφῶν. Sed placuit Baſilio *μεταφορὰ* illa, quam veteres vocant *ἀνάλυτον*, ſive reciprocam. Qualis eſt, quod altum pro profundo dicimus, profundum pro alto, Gubernatorem pro Auriga, Aurigam pro Gubernatore, æquor pro campo, campum pro æquore, flores pro ſtellis, & ſtellas pro floribus, aliaque id genus. Venio ad Agapetum. *Παρίεργος* non magis morari debet, quam *παρὶ πύκνου*, quod apud Nazianzenum. Hoc à *σκοπεῖν*, illud ab *εἶναι*, quæ *ἰσθναμούνη*. Ut derivata *Ἐρεσι*, & *ἐπίσκοπος*, *παρὶ σμῦθος*, & *πολιτεία*, veniſſe de Romano imperio: Interim vulgaria Lexica, præſertim ex poſterioris ævi ſcriptoribus, compoſitis id genus verbis dictabit, qui volet. Eidem Agapeto, *Οἱ δὲ δῆμα ἅα ἀρχαῖοι* ſunt excubitores. Nam comparationem facit Agapetus inter utramque fortunam, ſummam illam Imperatorum, & alteram vigilum, ſive corporis cuſtodum. Superest quod quæris de *ἐρυθροῖς πεδίλοις*; qualibus Imperatores utebantur, etiam Occidentis. Nam uſi calceis Mulleis, & foli quidem jam à tempore Aureliani. Mullei autem Calcei, qui Dioni *ἐρυθροῦ χροῦ*. Sed quia Agapetus, ad Juſtinianum Imperatorem ſcribit, de Conſtantinopolitanis ſolùm videamus. Nihil enim certius, quam eos rubris uſos calceis. Hinc Paulus Diaconus, Lib. XVI. *Ut agnosceretur ex rubris calceis*. Georgius Phronza Protovestiarius, Lib. I. cap. 17. *Suffragante Nobilitate Manuelem Imperatorem creat, cocco tincta calceamenta concedit, ſucceſſorque ab omnibus agnosciuntur*. Hinc Gregorius, Lib. III. ait Alexium *ἐρυθροῖς ὑποπόδησις χρηπίσι*. Et Nicetas in Joanne Comneno, Lib. III. *τὸ πῶδες εἰς ἐπιμασίαν τυραννίδος φοινοκαφὸς ἀμφιέννυσσι πέλιδον*. Etiam Joannes Curopalates narrat Iſacium Comnenum fuiſſe Patriarchatu deſectum, quia geſtaſſet *κοκκοκαφὴν πέδιλα*, quippe quæ ſolius eſſent Imperatoris. Poſſum & alios adducere; in his Procopium, & Zonaram. Sed quia video te eſſe totum in Baſilio Imp. illum potius advocabo. Ille in *περιγενετικοῖς* ad Leonem filium, cap. 63. *Τῶν ποδῶν σε τὸ ἐρυθρὸν πηλῆσι ὑποπόδημα*. Hæc ut ad te ſcriberem, affectus compulſit. Impenſè enim faveo omnibus, qui bonam mentem amant, & ea jam ætate quæ tu es, benè de Rep. literaria mereri cogitant. Nihil tamen his meis magnoperè fuiſſet opus, poſtquam ad vos, uti ſpero, jam ſalvus, ac ſopes pervenit, ille æculi noſtri Phoenix: quod cùm dico, nihil puto addere opus, Hugonem me Grotium dicere, virum magnæ in patriam fidei, & quicquid eſt uſquam mortaliū, multijuga doctrina ſupergreſſum. Et tamen



tamen temporum hoc diffidio, habet Batavia, qui alibi, quam apud se vivere Heroem malint. Scilicet caligant eorum oculi, ad lumen hoc, cujus radiis perstringuntur. Non committes, quin cum meo nomine salutes. Quod eò addo, quia volo te perducere in notitiam tanti viri: Oraculum hic habebis majus illo Delphico. Non tam facile, tu difficultatis quicquam reperiēs, quam ille exsolvet. Fœlix Hamburgum, cui nunc sol ille illuxit, fœlicius si fœlicitatem intelligat! Saltem capere debent, qui literarum studiis capiuntur. Sed ego nimirum, dum nonnihil me effundo in laudes ejus viri, arrogantiae crimen subeo, quasi existimem, satis cuiquam virium esse, ad tollendum illum, qui supra omnem laudem est. Parenti optimo, & doctissimo Mag. Joachimo Damke, item Clarissimo Frederico Tiliobrogæ salutem plurimam dices.

*Amstelodami*  
clō Ioc xxxii.  
vii. Id. Maias.

G. J. Vossius.

#### CLXX.

Arnoldo Comiti à Benthem.  
Steinfurtum.

Illustris & Generosissime D. Comes,

**E**T sublime fastigium domus vestræ, & humilitas mea, prohibent me morem non gerere postulatō ulli, quod in vestræ spem gratiæ possim: Nedum tam æquum, tam facile liceat detrectare. Etenim magnum semper fructum studiorum meorum esse existimavi, favorem virorum Principum consequi, imprimis talium, quos non cæcus amor, sed iudicium, & intellectus scientiarum, ad æstimandos Musarum cultores duceret. Itaq; vel sola hac de me opinione, necessitas mihi imponeretur, quicquid præstare in tanti Herois gratiâ possim, promptè suscipiendi. Accedit meritum quoque, cujus sæpè mihi memoria obversatur, quod ante annos duodeviginti, ab illustri, & generosissimâ domo vestrâ, ut Theologiam profiterer publicè, ad Steinfurtense Gymnasium sum vocatus. Tanto magis elaborandum mihi intelligo, ut ne promptius commendasse ipse quemquam alumnorum tuorum videaris, quam ego ab Illustri adeo nomine, commendatos mihi suscepisse. Incitat etiam doctissimi Parentis, sed infœlicis, memoria, cujus causa adolescenti, quamdiu sibi ipsi curæ erit, non deero. Quamobrem sic existima, vel sponte me, &

hoc, & amplius velle. Solum rogo, sic persuasum habeas, non in minuto hoc solum; sed ubicumque tenues vires meæ navare utilem, Illustri nomini tuo, ac generosissimæ familiæ universæ, operam poterunt, fore me semper

*Amstelodami*  
clō Ioc xxxii.  
Idib. Junis.

*Devotissimum Illustri nomini vestro, & ad quodvis obsequium paratissimum,*

G. J. Vossium.

#### CLXXI.

Philippo Paræo P. S.

**J**AM menses sunt duo, Cl. Paræe, cū nostratium Typographorum uni dicerem, velle me, ubi nundinarum tempus instabit, quædam per eum ad te transmittere. Quod ego imprimis propter Ennium Columnæ dicebam, de quo amicum compellaram. Hodie jam eum, ante unam alteram hebdomadem discessisse intelligo, me penitus ignaro. Atque eo minus me convenisse, quia ad mercatum Francofurtensem, plenum sit periculis iter, ut nec sarcinas, nec res ulla, eò hinc advenire ausint. Etiam vereri, ne quid librorum ex Germania, aut saltem nonnisi maxima cum difficultate referre possint. Atque addebat Typographus, Amstelodamensis Janssonius Blau, absque eo fuisset, seipsum eo iturum fuisse, ut melius distraherentur libri, quos magno numero hac hyeme excudit. Quod si scribere ad te velim, id ipsa hac hora fieri oportere, quia ante vesperum nuntius esset abiturus; nec deinceps durantibus nundinis, scribendi occasionem fore. Ne igitur oblitus videar amicissimi viri, pauca hæc raptim malui exarare, quam penitus tacere. Ac primum de Columna meliorem esse occasionem expectandam. De Nonio certior fieri cupio; quando eum filius prælo subijcere cogitet. Velim enim priusquam ad notarum editionem sit devenum, quædam transmittere, quæ lucis aliquid, vel etiam medelæ, locis plusculis adferant. Et fortasse amicorum unum alterum, ad idem excitabo. Quod quæris de vocis Tropicæ significatione in sacramentis, cur eam non annotarim, in Oratoriis meis, causam accipe. Cum primum eas ederem, obtuli edendas Raphelengio. Sed is, quod ante nesciebam, Romanæ Ecclesiæ placita sequebatur. Eoque cū differtationem super hac contineri Oratoriis nostris intelligeret, gravatus fuit, opus hoc excudere,

excudere, quia negabat fore, ut in Brabantia, atque inter Pontificios, divendi liber posset. Rescui igitur, quæ ejusmodi forent, inque Commentationes transtuli Theologicas, in quibus fusè de hoc argumento tracto. Tuam vero de hac re opinionem probo, quam satis clarè, in Rhetoricis proponis, solidèque adstruis. Quamvis & Pontificii in hac locutione Tropum adnoscant, sed non signi, verùm materiæ. Cum enim nos dicamus Panem, vocari Corpus, quia signum est Corporis; illum Panem vocari aiunt, quod sit Corpus, quia ex Pane est conversum. Plura velim: sed ecce jam interpellor. Quare abrumpo, ne morer Tabellarium. Plurimam salutem eruditissimo à me filio dices. Vale egregie, ac Reverende Patre.

Amstelodami.  
clō Ioc xxxii.  
Post. Non.  
April.

Tuus totus, & tuorum,

G. J. Vossius.

## CLXXII.

Gerardus Vossius Jo. Cordesio S. P.

**P**eccaturus eram, Clarissime vir, in humanitatem tuam, si diutius retinerem schedas tuas. Sanè nisi subitæ sæpius occupationes ingruissent; non tam diu frustratus fuisset expectationem tuam, qui nostram prævenisti, in suppeditandis promptè adeo, quæ pro mea opinione, in Goteschalci causâ, faciebant. Equidem simulac negotia mea paulum expediero, decretum mihi (modo bona id tua venia fiat) in lucem dare, quæ in iis Epistolis, ad Hæretici illius historiam pertinent. Nec parum enim lucis adferent iis, quæ ante annos quatuordecim, de hac re scripsi, in septimo operis mei, de controversiis à Pelagio, & Massiliensibus motis. Tuum autem publicè beneficium profitebor, non quod ita, merito me tuo parem rependere gratiam existumem, sed ne videar ingratus. Vellem tibi, aliqua in re, utilis esse posset opera nostra: quod si posse existimes, ostendam, ne promptius te petisse, quam ego præstare videar.

Amstelodami.  
clō Ioc xxxii.  
Kal. Sextilib.

## CLXXIII.

Guilielmo, Episcopo Londinensi.

Reverendissime in Christo Pater, Dom. Illustriss.

**N**Olui hanc qualemcumq; occasionem ad te scribendi omittere, quia & iniquum erat, quemquam certæ fidei line meis Londinum literis venire, & raro eorum, quos norim, proficiscitur quisquam. Et tamen nihil magnopere quod scribam occurrit: nisi valere me, ac familiam universam: ac res Hebræorum florentissimo publice auditorio docere: quod non modo frequentent adolescentes ad magna nati, sed plurimi etiam viri Amplissimi, ac ut ætate & dignitate, ita virtute doctrinaq; insignes. Ea res ut animos addit, juxta Poetæ illud, Excitat auditor studium: ita aliquid etiam incommodi secum trahit. Quanto enim plus in rebus Hebræorum, & temporibus iis, quæ Christum antecedunt, elaboro; tanto spissius ea procedunt, quæ ad Christianas Antiquitates pertinent. Si Deus mihi valetudinem & vitam diuturnam concefferit, spero me in utrisque operæ pretium facturum. Et jam distineor utrisque: Sed non ut prælo adhuc subjecerim, quod longe minoribus fervet. Puta Commentarii Linguae Latinae: pars eorum est vel Historia rei Grammaticæ, vel excellentium Grammaticorum Censura: pars vero, origines complexa, fontes totius Linguae referat & recludit. Et comites erunt libri de Re Poetica. In quibus aliquid ausus sum post magnum Cæsarem Scaligerum. Sed utcumque in his, & aliis, non plane mihi, longeque minus meæ amantibus displiceam: dicere tamen non possum, quàm mihi hoc doleat, quod inimici mei superioribus annis me ista magis tractare compulerint, quam unde longe amplius fructus ad Ecclesiam redundaret. Ut illa sunt quæ de Hebræorum & Christianorum rebus meditor quotidie. Nunc orationem inauguralem, ante aliquot menses à me habitam mitto: Non quasi dignam lectione tua existimem, sed quia nihil tam magnum, tam minutum à Vossio proficisci debet, quin tu Illustrissime Domine ejus particeps sis. Et hoc tantum vadimonio me obstringo, majora me tibi in posterum oblaturum. Vale.

Amsteloda. clō  
Ioc xxxii. Prid.  
Id. Majas.

Reverendissimi & Illustrissimi  
Nominis tui cultor devotissimus,

G. J. Vossius.

D d

CLXXIV.

## CLXXIV.

S. P.

Quid hoc, summe vir, summe idem amice? Serione ambigere te, ecquid ejus nominis ac doctrinæ Scriptorum tuorum mittere mihi ausis? O quam mihi mens alia! nihil mei tam minutum, quod non ausim communicare. Quam vere id dicam, vel hinc vide. En tibi *ἀντίλογον*, sed quale Diomedes Glauco: puta horæ unius dissertationi unculam pro dissertationibus tot dierum: commune argumentum pro sacro: paucas pagellas pro pulchro volumine; ut alia ejus generis mittam. Sed tamen ne depuduisse me dicas, conditione ea mitto, ut ignoscas quod tanto inferiora tuis ausus sim mittere. Atque ut facilius hoc impetrem, non vereor addere, majora me destinare propediem divulganda: quæ nominarem nisi hærerem ambiguus unde potissimum velim auspicari. Quod si excurrere ad vos dabitur, de eo jucundum fuerit tecum consultare, disputationes tuas, quos miseras avidè legi, etli occupatior quam vellem. Argumentum pro temporibus nostris pene vetus. Sed video te sedulo observare illud antiquorum, τὰ μὲν καὶ ἐξ ἡμετέρων, τὰ δὲ καὶ ἐξ ἡμετέρων καὶ παλαιῶν. Nam & cautius multa ponis & solidius firmas. Ut de genio taceam, quo hæc tractes. Præsertim ubi res cum pontificiis, qua in Palæstra hodie dominaris. Testis tuus Catholicus orthodoxus, quem quoties in manus sumo, toties, quod discam, reperio. Hæc ut possis, multum quidem post Deum naturæ dotibus debes: sed enim non minor illa felicitas, quod, præter temporis nostri morem, sic veteres legeris Ecclesiæ doctores: quibus, quantopere ipse ab adolescentia capiar, coram aliquando me dicere commemini. Accedit, quod sic evolvas doctores eos, quibus se Romana tantopere jactat Ecclesia. Et hos, & priores illos multi è nostris ad partes advocant frequentes, qui, si verum dicere licet, satis in iis legendis sunt infrequentes. Nimirum neque adeo fungos putant se cæteros, ut non animadvertant, eosne, quorum labores adducunt, ipsi legerint, an ab aliis lectos memorent. Atqui ut eundem si arcum tendant Hercules & Iolaus, vel, si lubet puer hujus, utcunque neutrum cernas, eos ex telo misso discernas: ita cum eadem à duobus scribuntur, non operosum est dignoscere, ecquid ab scriptore dicatur, an exscriptore. Quanto autem magis in iis, quæ habemus, placuisti præ aliis multis, tanto avidius cætera, de quibus dicis, expectabo, ac præsertim illa in Genesin: unde auspicandum mihi, qui vestigiis Sul-

pitii Severi velim insistere, nempe novum munus à rebus ordior vetustissimis. Scis enim ut cum Civili doctrina mihi omne ævum sit emanandum. Quæ provincia cum latissime pateat, maxime insistam rebus Hebræis, Græcis, ac Romanis. Nec dubito quin in eo facile tibi probaturus sum consilium meum, nam sola Hebræorum Historia incipit à mundi incunabulis: sola Prophetas auctores habet: sola, præter novi fœderis historiam, pietatem veræ Religionis docet. Sola etiam quater mille annos, vel, si ab Abrahamo ordiri visum, bis mille annos complectitur. Tantum enim est ad captam à Tito Hierosolymam: Hebræis, uti aiebam, proxime, quemadmodum apud vos soleo, subdam res Græcas & Romanas. Nec enim extra res Hebræas, ulla est Historiarum, quæ meliora, vel uberiora, prudentiæ, justitiæ, fortitudinis, aliarumque virtutum exempla præbeat, quàm Græca & Romana. Græcaque tanto fructuosior, quanto imperium Græciæ similis est nostro. Romanæ autem hæc gloria est, quod ea gens arma circumtulerit per totum pene orbem, & dominata sit annis amplius mille & ducentis, ac tot nostri temporis imperia enata sint è Romano. Ut vides, totius orbis historiam enarraturo in tribus hæc imperiis maximè pes erit figendus. Neque hæc opera nostra vobis Lugdunensibus incommodabit, sed commodabit magis. Nam deinceps ut ætate majores, ita majori etiam doctrina ac prudentia Academiam tum vestram tum exteras accedent. Et quid melius his terris, quam cum nequitiam invidiæ sint Musarum fores, si non unis deinceps mœnibus sapientiæ studia concludantur, sed alibi etiam vigeant florentque. Me quidem consilii mei necdum pœnitet, præsertim qui, hæcenus saltem, tam frequenti præstantium virorum doceam auditorio. Archiepiscopi Usserii labores vidi ac legi, & jam per literas ei gratias egi, quod tantæ dignitatis vir eruditos suos labores nomini dicavit nostro. Nam quod de Godschalco nonnihil dissentit, id minime me movet. Sunt illi summo viro causæ suæ, sunt item mihi meæ. Sufficit, quod uterque amplectamur Augustini sententiam. Nec tanti est, utrum eam sit assecutus Godschalcus. Mihi sic secutus videtur, ut aliquantum excesserit. Atque hoc vidit Rabanus Maurus, magnus sane vir, vidit quoque Synodus Moguntina, quæ Godschalcum damnavit. At fuere in ea complures Augustinianæ sententiæ & intelligentes & retinentes. Nec unquam per omnia cum tueri ausus Remigius, vel qui Lugdunensis Ecclesiæ nomine scripserunt. Tantum conqueruntur, quod, ut exorbitavit Godschalcus, non



eo debuerit damniari sententia aliorum, qui se intra effata pomœriaque veritatis continent cum Hipponensi illo antistite. Quid multis? puto quæ de Godſcalco inedita in bibliothecis quibuldā aſſervantur, fidem faciant, me veriſſima dixiſſe: ea ubi accepero, faciam te certioſorem. Magnopere de eo gaudeo, quod de Salmatio ſcribis. Scis optime quanti eum virum ſemper fecerim. Sane non alius eſt in Belgica, qui toties ſcriptis ſuis eum celebravit, jam ab annis aliquot, præſentim opere de Historicis tum Græcis tum Latinis: optarim tantum doctrinæ communi illi amico noſtro, qui tœdè adeo eum depreſſit. Mihi ſimulac pedem his in terris poſuerit, animus eſt uti illo amico ac familiaris. Quod communi, ut ſpero, bono fiet, ſaltem meo & publico. De Aurelii exceſſu nihil hæcenus inaudieram. Valde de eo doleo, ob veterem ſtudioſorum conjunctionem, de tranſmiſſo ejus Jobo maximas gratias ago. Exemplar alterum ad Senatorem Caſimbrotium mittam. Nec enim in Batavia quemquam illo ac me habuit conjunctionem. Ac jam ab annis prope XL. triga quaſi amicorum fuimus. Si viduæ vel ipſe, vel conjux tua reſcripſerit, gratias ei meo ages nomine, atque adeo & Caſimbrotii. Id enim eum ſcio velle. Qui, niſi celerius, quam optaſſet, Jobum Lugduno remiſiſſemus, ſuis cum ſumptibus hic edere decrêrat. Facile cogitare poteſ quàm id gratum accidiſſet Aurelio noſtro. Sed id ego demum cognovi, poſtquam jam in itinere erat Molinæus per quem exemplar remiſimus. Sane ut cætera mittam, typi, ſi hic editus foret, non paulo eſſent venuſtiores. Vale vir præſtantiffime, tuarumque virtutum cultorem perpetuum in poſterum quoque ama. Uxori ſalutem.

*Amſt. lodami. Tuus ſine ſuſco more majorum,*

G. J. Voſſius.

### CLXXV.

Vir Illuſtriſſime,

**N**ihil mihi gratum æque accidere potuit, quam quod cognovi tanti me ab illuſtriſſimo Skytio fieri, ut ex parte mei quoque cauſa filium ſuum in Bataviam dimitteret. Certe non injuria de tanti viri opinione triumphari mihi poſſe videor, cujus æſtimatio eo apud me major, quod non cæco amore ſtudia, aut eorum cultores proſequatur, ſed ipſe non levem quoque hic gloriam vindicare

ſibi poſſit. Equidem inhumanitatis merito damner, ſi obſequi viro ſummo recuſem. Nihilominus duram neceſſitatis legem eſſe ipſe noſti: obſtant hinc ædium anguſtia, inde conjugis gravis ſemper valetudo, & numeroſa familia: ea tamen omnia penſare & ſtudia generoſi juvenis, ubicunque potero, juvare decretum, movet me non parentis ſolum, non tua tantum (quam ſemper feci maximi) commendatio, ſed & deſiderium operam utilem navandi illi, qui quondam Sueciæ regno, qua opera, qua conſiliis prodeſſe poterit. Faveo genti illi, & ſi quicquam, certe ego addiſtus fui, cui nihil magis in votis, quam ut magni Guſtavi grandis molimina ſecundare ſupremum numen velit: ipſe humilibus Deum precibus, pro eo rogare nunquam deſinam. Tibi interea vir illuſtris, omnem animi cultum & ubi ſervire tuis commodis potero, obſequium, & nunc, & in perpetuum offerre non ſuperſedebo. Vale.

*Amſtelodami.*

*Illuſtris nominis tui devotus cultor,*

G. J. Voſſius.

### CLXXVI.

Juſto Reiſenbergio. S. P.

**A**MO te, mi Reiſenbergi, ob communem patriam: magis tamen ob niveum pectus, & egregiam eruditionem ac facundiam, quæ abunde elucet ex orationibus nuper editis, quarum ad me ſpecimen tranſmiſeras. Reſpondere tum neglexi, partim adverſa meorum valetudine detentus, partim occupationibus multis. Poſtea etiam iter meum in Angliam acceſſit. Redux jam orationes omnes editas comperi. Ac priori ſpecimine allectus etiam cæteras legi. Profecto non eſt quod judicium virorum præſtantium reformides, nugatorculos vero contemnēs. Scis illos qui divulgant aliquid, non intelligentes ſolum habere cenſores, ſed etiam fungos, inſtar eorum qui ædificant in totius populi conſpectu. Noſtri interea nihil prodiit, præter Oratorias longe auctiores & limatiores. Nempe ſubſecivis temporibus, lubens in omnibus meis hoc facere ſoleo, ut quæ prius fugerant corrigam, quæ deerant ſuppleam. Qui has literas tradit, eſt Guilhelmus Simonius J. C. ac Regii apud Suecos judici in Livonia, Carelia, & Ingria adieſſor, vir optimus ac doctiſſimus, ac filius ejus Simonii

D d 2

qui

qui Eloquentiæ professor magna cum laude fuit, prius in Rostochiensis, posteaque in Upsalensis Academia. Hoc nomine etiam tibi gratiorem fore arbitror, qui ipse Eloquentiæ studio egregium jam nomen parasti. Amstelodamum me commigrasse, fortasse jam aliunde intellexeris. Consilii hujus causas perscriberem: sed vix ista subito in chartam licuit conjicere. Nam Simonius noster uti hodie Lugduno venit, ita confestim Frisiam cogitat, ut præstantes Franekeranæ ac Groningensis Academiæ animas videat coram. Et in his te, mi Reisenbergi, spero alias fusiustecum per literas colloquar, interim me amare perge, peramantem tui: sive salve ab eo qui perseverabit esse amicus, imo & cultor nominis tui.

*Amstelodami.*

#### CLXXVII.

*Præillustri ac generosissimo, D. Joanni Skytte, Ger. Jo. Vossius S. P. D.*

Illustrissime Domine,

**S**I gratulor mihi ipsi, quod tanta studiorum meorum apud te æstimatio sit, merito certè faciam. Ut enim mittam honorem summum, qui ea re mihi tenuis conditionis homini à tam illustri viro contingit: Quanti me facere existimas vel solam opinionem ejus qui de eruditione omni accuratè adeò judicium ferre possit? Nec satis visum fuit si tuis ostenderes literis, quam benignè de me censes, hoc est, ut ego interpretor, plane supra meritum meum: documentum etiam addere voluisti, quo non certius aliud optare unquam potuissim: quippe qui filium mihi commendes tuum. Equidem qui parentum in liberos affectum ex meo facile metiri valeo, planè nefas duxerim dubitare, quin & tibi supra omnes gazas carissima tua pignora sunt. Præsertim qui non ad propagandam solum familiam ea genueris: sed in spem etiam publicas Sueciæ res administrandi. Unde duplex meritò tibi cura, ut & tanto parente, & dignitatibus summis digna sint. Mittis autem filium ea ætate, quæ maxime idonea est, ut sapiendi dicendique scientiis imbuatur. Atque ego quidem jam brevi hac consuetudine fatis perspexi, animum ejus nihil minus esse quam degenerem, sed potius ad honestissima quæque mirificè accensum: ita ut nihil mediocre deinceps ab eo expectare debeamus. De affectu vero erga illum meo atque opera, vir illustrissime, quid ad-

dam? Sueciæ regnum florentissimum, cui votis meis semper favi, hortatur me, ut, quam optime possim, mereri de illo velim, qui quondam perutilem patriæ sit operam navaturus. Movet tua, vir illustrissime, commendatio, cui non obsequi nefas duxerim. Admonet denique ad maxima quæque erectus generosus adolescentis animus: quales ut magni semper feci, ita in illustri adeo loco natis admirari etiam soleo. Itaque nihil plane est, quod de studio hic meo dubitare possis. Ego ubicunque illum discendi invenerim cupidum, instruendi labore non fatigabor. Ut saltem hac ratione, quando alia necdum datum est, servire Sueciæ, & tuis, vir illustrissime, commodis possim, cui obstrictum me & nunc, & deinceps semper, pro humanitate hac fatebor.

*Amstelodami.*

#### CLXXVIII.

*Isaaco Basirio.*

Ornatissime Basiri,

**S**I oblivione tui longo adeo tempore scribere me distulisse existimas, injuriam facis constantiæ meæ; si negligentia, occupationes meas ignoras. Quæ certè majores sunt quam verbis exprimere ullis possum, & sæpe quo me vertam nescio, à mane ad vespertinum modo amici, modo exteri interpellant, modo eorum literis obruor, ut cui respondeam, quem differam, vix ipse certus sim. Et sic mihi sæpe non dies, non hebdomadæ, sed integri quoque menses abeunt, ita ut destinata pericere, licet invitus, prohibear. Jamdudum quippe rescribere tibi decreveram: affectus siquidem in te meus nunquam minor est, atque antehac fuit. Quemadmodum enim non facile amore prosequi soleo, nisi quos dignos existimo, ita quoque ubi semel amare quemquam coepi, non desultorius meus affectus est. Te ut dignum amore complexus fui non perfunctorio, ob ingenii tui felicitatem, neque minorem ingenio eruditionem: Unde nihil vulgare expectabam. Publicè quoque ea opinione dignissimum te fatis ostendisti, quæ disputationibus, quæ aliis in Academia nostra exercitiis; eoque ego, cum rarè egregia ingenia ad virtutem animum adpellere videamus, te quod supra vulgum saperes, semper feci maximi. Qua in sententia si perseveraveris, ut summis viris te commendabis, ita magnis quoque passibus amorem meum auctum ibis. Nec dubi-

dubitare possum, quin & talis perstas, qualem te ante cognovi: vix enim mihi persuadere possum, eum qui in adolescentia sua ad magna summis viribus contendit, nunc firmato quoque cum ætate iudicio, degenerare fore. Si itaque vera auguror, est quod gratulari & tibi possum & mihi: tibi quod collatis à natura dotibus, bene utaris; mihi quod non temere te æstimavi. Perge modo & nullis parce laboribus. Sic tandem sæculi nostri lumen evades. Sine illis consequi ægrè datur, & ubi assecutus fueris, gloriosum est. Audi ingentem illum Demosthenem. Καλὸν μὲν, inquit, ἡ δὴ, πύχυν ἐν τοῖς ἀνδραγαθίοις θαυμάζω, πολὺ δὲ κέρδιον διὰ τὴν ἐπιμέλειαν τῶν αὐτῶν μνησθὲς ὅτι ἐνδύξων ἀμείνων γυνάδεα. Tu si velis, potes: at velle & posse, satis ante ostendisti: itaque adhortari diutius nolo, ne de studio tuo diffidere videar. Quod minime facere me patitur ardor summus ad honestissima quæque quem ante in te perspexi. Quin & non vana me sperasse, ex compluribus intelligo, qui egregiam mihi virtutem tuam prædicant. Me nunc Amstelodami vivere, aliunde credo cognoveris. Nimirum urbis ejus procures luculento me stipendio vocarunt, ad Historiam ac Politicam publice profitendam, in illustri Gymnasio. Cujus mihi pulchrum erit fundamenta jacere, uti & Collegarum aliis, quos partim jam vocarunt, partim vocare decreverunt. Plus quoque hic otii spero ad consignanda ea, quibus & de hoc & venturis seculis bene mereri possim. Nec minus interea amicis in tam potenti urbe utilis fuero. Quod si qua in te prodesse etiam tibi, mi Basili, possim, nusquam operam desiderabis meam. Tu tantum quid exoptes, significa. Imo ut nihil istiusmodi occurrat, literis tamen compellare ne intermitte, quas mihi gratissimas semper futuras spondeo. Vale.

Amstelodami, vii.  
Kal. Quintil.

Tibi addictissimus,

G. J. Vossius.

## CLXXIX.

Ornatissime Brouneri,

**N**E diutius eludam expectationem tuam, et si occupatissimus, mitto tandem, quem petieras, Indicem omnium eorum, quæ continentur Politicis Justii Lipsii. Summi fanè viri, cujus de civili prudentia libros initiis istis studii tui Civilis maximè accommodatos existimavi, idque non solum ob breviter atque ordinem, sed etiam ob tot

laudabilia dicta, ex quibus, sedulæ instar apis, suum hoc mellificium confecit. Tuum nunc erit sæpius eos lectitare, quò tot aures sententiæ penitus animo inhæreant. Illustriores etiam γράμματα & exempla præclara, quæ legendo deinceps observabis, vel ad oram, vel charta inserta, è regione suo quoque loco annotabis. Ità deinceps suâ sponte oculis se offeret tuis, quicquid variè adeo dispersum repereris. Simul dum quæque memorabilia chartæ inscribes, etiam animo inscribes. De cæteris coram colloquemur à feriis nostris. Vale, & sapiendi dicendique studia sociare perge. Ita tuis eris voluptati, & uberes aliquando ex te fructus capiet Respublica.

Tuus,

G. J. Vossius.

## CLXXX.

Jo. Skyttio, Seniori.

Illustris Domine,

**Æ**Grè me à filio tuo divelli nullus mirabitur, cui ita atque mihi ejus mores atque indoles introspectæ sint. Quippe dignissimum cum illustri adeò parente, dignissimum tua commendatione comperi. Est in eo erectus ad honestissima quæque animus: est doctrina, iudiciumque supra ætatem; uti & cætera omnia longe supra hominum vulgus. Accedit, quam in eo summam animadverti, doctorum virorum æstimatio. Equidem felicem, illustris domine, qui non modo ad tantum virtutum, tantum dignitatis fastigium perveneris; verum & liberos expectationis non minoris genueris. Felicem, dum te, illustrissime Domine, fruitur, Sueciam; felicem expectatione liberorum tuorum. Ego quidem haud secus quàm aquileges ex vapore ascendente aquas latere conjectant, ita ex generosi filii tui indole maxima quæque prælagio. Et qui alius esse possit? Illo parente natus, & inspectorem ejusmodi habens, qualis est D. Simonius, in quo si magna est eruditio, majus atque acre iudicium relucet; si iudicium exactum est, probitas motum, vitæque integritas multò maxima est. Verissimè dico, plus in recessu habere eum, quàm in fronte promittit: & paucis ut absolvam, est, quicum lucere in tenebris, ut vulgò dicunt, possis. Quò magis tuam, illustris domine, prudentiam admiror, qui cautè ac circumspectè adeò hac in



re procefferis. Nihil enim æquè in lubrico quam adolescentia est. Et quæ semel hausit, firmiter retinet. Quamobrem nulli prudentius agunt, quàm qui viris indubitatè ut probitatis, ita prudentiæ ac eruditionis liberos suos commendant. Te, illustrissime vir, cuncta hæc in Simonio habere, etiamsi negare vellem, tamen tacitè mecum crederem. Itaque dignus ille filio tuo, dignusque illo filius tuus. Qui si tales porrò duces habeat, erit quondam quò se jactare Suecorum universum regnum possit. Ego pro viribus meis, pro exiguo adeo tempore quo apud nos moratus est, quod potui feci, majora si occasio tulisset præstiturus. Quæ si unquam detur, ostendam me paratum ubique navare operam illustri familiæ Skyttianæ, illi nimirum dico, quæ Sueciæ regno ceu felix aliquod astrum, illuxit. Te interea, illustris domine, ut diu supremum numen servare fospitem velit, unice rogo. Quo non regni tantum publica commoda, sed etiam studia, (quamvis & illa non levem regnis utilitatem adferant) quæ passim jam aliis in gentibus vilescent, in Sueciæ Regno, tuo beneficio affurgere, uti cœperunt, possint. Et Te, uti Suecorum gentes ob impensam Regno operam mirabuntur ac colent, ita perpetuis & nunquam intermorituris monumentis universa literaria Respublica posteritati commendatum eat. Ita sane voveo atque auguror. Vale.

*Amstelodami.*

*Illustrissimi nominis tui cultor  
devotus,*

G. J. Vossius.

# CLXXXI.

Erycio Puteano, S. P.

**V**ellem, Amplissime Puteane, quoties aut res meæ ferunt, scribendi ad te occasio daretur, aut quoties occasio datur, res meæ ferrent. Sed sæpe contingit, ut, me occupato, nuntii veniant, sæpe ut otiosus nuntios desiderem. Hinc fit, ut rarius, quam pro voluntate mea, ad te scribam. Nam quoties ad animum occurrit antiqua illa, & ætate nostri utriusque coalita amicitia, dicere nequeo, quam te alloqui desiderem, cujus amorem erga me semper sum exosculatus, ac cujus eruditionem & dotes alias quo magis considero, impensius miror. Hinc sæpe fit, ut etiam materia atque argumento destitutus, tamen confabulari tecum & jucundam veteris

nostræ consuetudinis memoriam recolere cupiam. Ita igitur prompto, commodum scribendi occasio offertur, eunte ad vos necessario ac propinquo meo Joanne Corputio, filio affinis mei, Amplissimi viri Jacobi Corputii, ante in Procerum Dordrechtanorum ac nuper in præfectorum rei maritimæ Collegium Roterodami adlecti, olim sub Orydrio ac Rekenario condiscipuli utriusque nostri. Putarunt cordatissimus is parens & ornatissimus ejus filius (qui per Brabantiam in Gallias tendit, eaque occasione Lovanium vestrum & excellentes ejus viros conspiciere exoptat, aliaque quæ urbs habet imprimis memorabilia) non aliunde posse melius de omnibus cognosci, quam ex te, neque te consilio solum, sed si opus sit, etiam commendatione posse adjuvare: itaque licet, propemodum nihil scriptione dignum haberem, nedum satis grave interpellandis occupationibus tuis: committere tamen nolui, quin & tu memorem me amicitiae nostræ, & illi, quibus optime velle debeo, facilem me amicis viderent. Sed, quod pene omiseram, ut nostram quoque rem gnarus sis, opus nostrum Grammaticarum exercitationum, quod ante annos xxx. & amplius scribere orsi eram, tandem prælo subijci cœpit. Filius meus Dionysius, cui nihil ab longo tempore jucundius & exoptatius contigit literis tuis, & iis, quas eodem tempore ab doctissimo Tuldено accepit, Latine reddidit annales Belgicas Reidani. Quæ tractatio cum à magnatum multis admodum expeteretur, hac ipsa hebdomade excudi cœpit Lugduni. Atque eidem decretum, Cæsarem, scriptorem sibi perfamiliarem, plurimis locis à se castigatum, ac notis illustratum, edere in lucem. Eam ad rem usus est uno alteroque Manuscripto, & editionibus vetustis, ut de variantibus Fulvii & aliorum lectionibus nihil dicam. Sed enim impense desiderat plurium Manuscriptorum copiam, & jam aliquorum ei spes facta. Non dubito, quin apud vos qua publicis, qua privatis Bibliothecis inveniantur. Quocirca si unum alterum calamo exaratum exemplar Cæsaris nancisci, ac transmittere ad nos possis, sanctè spondeo, optimâ fide redditum iri. Sin mittere huc non sinatur, proximum est, ut per Adolescentem quempiam conferri cures: modo tanti codices illi videantur Sumptus. uti æquum, refundam. Horum alterum si consequi filius possit, obstringes non illum modo, sed me quoque, qui quicquid liberis meis fit, mihi præstitum existimo. Vale Amplissime vir.

*Amstelodami.*

*Tuus,  
G. J. Vossius.  
LCXXXII.*

## CLXXXII.

Hugoni Grotio S. P. Hamburgum.

**H**æc qui literas tradit, est Joannes Ludovicus Wolzogen, liber Baro in Nieuhausen, Auftriacus, qui septennio exulavit, priori quinquennio in Polonia, cætero bienio Amerstorti. Vir & virtute doctrinaque egregius, eoque nomine bonis omnibus carus. Mathesi se totum pene dederat; sed nusquam solatium præterquam in sacris literis invenit. Cum familia in Germaniam nunc revertitur. Nec ei quicquam volupe adeo, quam si Hamburgum transiens, occasionem habeat compellendi tui, quem facile intelligit doctrinarum Principatum tenere, & documentum esse virtutis constantis licet infelicis, nunc tamen ut speramus, malaciam post tantas tempestates promittentis. Spem eam præbent Succorum Regis virtus, & felicitas, & magnus erga te affectus, ut si Principi extero addicere operam debeas tuam, sanè non alteri illam melius in Germania præstare possis. Sed fiet hoc non sine multorum dolore, qui & tibi, & patriæ optimè volunt, ...his, & nonnullis qui si non optimè, saltem nec malè velint, cre... mihi dissertatio, de postremo hoc discessu tuo: quem apertè improbare non verentur. Plerique etiam, quod cum is sit Reipublicæ nostræ status, credideris hic posse te sedem figere, absque illorum probatione qui ad clavum federent. Negare soleo eos intelligere, quo animo veneris aut abieris. Jam annos effluxisse tam multos, optimam ætatis partem, quò Patria careas: Effluxisse simul, tot bonas occasiones quibus optimè potueris consulere, & tibi, & familiæ tuæ. Iniquum poscerent, ut ulterius differri eas velint. Nam quousque tandem? An in effœtam senectutem, idque in hoc vitæ incerto? Venisse igitur te, ut Patria, si vellet, opera tua uteretur, potius quam exteri Principes. Hanc illa ...ac deinceps damnum quod inde sentiat, non tibi, sed sibi imputetur qui hac etiam parte fungi volueris officio optimi civis. Tantum opus est salutari *ἀμυνσία*. Si non ferat, præfens status, ut publico sanciat decreto, saltem ferre, ut conniveatur in iis, quæ cum dispendio Reipublicæ, & libertatis constituta. Vel si nec illud quidem ferat, alibi quam hic te malle vivere. Nec vi...verti oportere, si ita credideris, cùm id longè à Patria agenti perscripserint, qui hic agerent. Si quid igitur temerè speratum, culpam esse eorum, qui aliter statum hujus Reipublicæ tibi depinxerunt. Sed ut ista, & multa illiusmodi, quæ longum sit adscribere, bellè dicantur à me, tum etiam vere:

tamen & mea, & aliorum me prudentiorum in eo perstat opinio, antequam operam extero Principi promittas, cognoscendum, an non bona cum venia vivere apud nos possis. Nihil volunt posci, quod sapiat ...nem culpæ quā cares; Imo ne quidem tentari aliquid, antequam satis sit perspectum fore, ut impetretur quod petitur. Eoque ante cæteros, nos certissimos esse debere, de propensissima voluntate *τὸ προθυμὸν λαόν*. Quæro mihi veniam da, mea anima, si exposcā, ne ullis injuriis te abripi sinas, ab eo quod tibi, Patriæque & utile, & honorificum imprimis fuerit; interea utrumque hoc facere non desinam, & causam tuebor quod virtuti debeo tuæ, & amoris nostro: Et Deum simul precabor, ut salubria tibi consilia inspiret, pristinaque animi lenitatem, quam propriam hæcenus, tot injuriis pressus, possedisti, deinceps etiam conservas. Ex ædibus Georgii Doublerii, tui valdè ut debet æstimantis, qui & salutem adscribi iussit. Salutem uxori ac filio.

xxv. Augusti,  
clcc xxxii.

Tuus,

*Dum spiritus hos reget artus.*

## CLXXXIII.

Hugoni Grotio S. P. Hamburgum.

**M**E nec filere æquum puto, nec longas dare literas opus, eunte ad te Heroïna dimidio tui; quæ curatius cognoscenda cuncta expediet, quam per literas ego facturum essem. De rebus tuis nihil æquè scripto opus, quam summos, & viros, & amicos eandem retinere sententiam: nimirum rectè facturum te, si Proceres scripto compelles, sedem ut tibi in Batavia dent. Sed facile assentiunt; id antequam fiat, videndum, an Princeps fidem dare velit, effectum se daturum, quantum in se sit, ne repulsum feramus. Alioqui ille si impromptior, o quanto satius fiderit, ut opera utatur tua magnus Suecorum Rex, vel alius Principum Europæ: dummodo ne unus ille quem dicere non sustineo. De quo quid heret, valde metuo, ne unus ille dies magnorum esset malorum causa. Non possum plura scribere, quia ad hoc usque tempus me Isacius Pontanus disjunct, vir tui amantissimus; & jam ex famula mea intelligo, tuum abutuntur parare, quam & salutare, & has literas tradere coram volo.

Amstelodami.  
clcc xxxii.

LXXXIV.

## CLXXXIV.

Hugoni Grotio S. P. Hamburgum.

**J**ucundissimum fuit de prospera valetudine tua cognoscere, ex optima, & cordatissima tua uxore: quæ salva, ac sospes huc venit; & hinc Hagam abiit nudiustertius, pridie nempe non. Octobr. Die uno altero ante eodem ierant, Vlamingius, Bickerus, & hujus urbis Procerum alii, audituri Legatos hostilis Belgicæ de Pacis conditionibus. Accepi his diebus literas Merici Casauboni tibi inscriptas, quas mitto. Lamerius jam dudum à me habet tuum pro veritate Christiana codicem, in quo plusscula, & correxeras, & addideras, & jam majusculis excudere literis cœpit. Commentariorum meorum de arte Grammatica, primus jam liber est excusus, & penè secundus. In Reidano vero, quem Latinè reddidit filius Dionysius, nono nunc libro fervet prælum. Hæc paucula nunc scribenda putavi, eunte ad vos optimo, & ornatissimo viro, Matthiis Ecclesiaste inter Remonstrantes; qui Hamburgum proficiscitur, ducturus ibi uxorem, cum maximis opibus.

*Amstelodami,*  
clō Iōc xxxii.  
Postr. Non.  
Octobr.

Tuis totus,

G. J. Vossius.

## CLXXXV.

Simoni Bellimontio.

**E**TSI non nescirem, Amplissime Bellimonti, quantæ occupationes te, cum alias semper, tum hoc imprimis tempore, distineant: Non eas tamen veritus sum, interpellare. Novit me hic, quem vides, Manasses Bep-Israel, vir doctus, & probus, utinam Christianus. Sed quamvis Judæorum nobis plerumque infestius genus est; hic tamen non paulò nobis benevolentior; Imo ut multum commodare Christianis potest, sic etiam cupit: Itaque hoc nomine nonnulla etiam invidiâ laborat apud suos. At tanto mihi gratior, qui eo utor penè familiariter; magis etiam filius Dionysius, non sine emolumento literarum Hebræarum, quamvis jam ab sexennio, ut nostis, studiosus fuit. Porro cum Vir is intellexisset, mihi quoque aliquem in amicitia tua locum; rogare non dubitavit, ut significare tibi vellem, quid de se

mihi videretur. Id solum scire te volui; nec ultra distinebo. Salutem uxori, & familiæ plurimam.

*Amstelodami.*  
clō Iōc xxxii.  
Postr. Id.  
Novembr.

Tuis totus,

G. J. Vossius.

## CLXXXVI.

Guilielmo Episcopo Londinensi.

Reverendissime in Christo Pater, Domine Illustrissime,

**Q**UAS ad me dederas literas, duobus post mensibus accepi, & jam prope tantundem temporis effluxit, ex quo mihi redditæ fuerunt. Nimirum quia petieras; ut plenius aliquanto sententiam meam de Godschalciana Controversiâ exponerem: expectandum putavi, usque dum quædam hæctenus inedita ad hoc negotium pertinentia ex Galliæ Bibliothecis accepissem, & cum curâ legissem. Utrumque nunc feci sedulò: sed sic quoque perstat animus in iis, quæ ea de re ante annos xiv. complexus sum Historia de Pelagio & aliis, qui litem de gratia & libero arbitrio moverunt. Qui verò hac parte à nobis dissentiant, quod pace summorum virorum dixerim, non satis mihi attendere videntur, quinduplicem, olim de Gratia ac Prædestinatione sententiam fuisse. Media in his communis illa Patrum priorum, ipsiusq; etiam Augustini, priusquam cum Pelagio certamen susceperet. Hæc ut res docet, & Augustinus passim contendit, non comitantis modo in subsequenti, sed prævenientis etiam Gratia necessitatem fatebatur. Circum hanc sententiam quatuor sunt diversæ: duæ extremæ, & totidem inter extremam mediamque interjectæ. Extrema una Pelagii fuit, qui sic arbitrium hominis extollebat, ut necessitatem Gratia negaret. Altera erat Prædestinatianorum, qui sic Gratiam prædicarent, ut non esset libero arbitrio, eoque nec monitis aut pœnis locus. Inter extremam Pelagii, & mediam Catholicorum veterum interjecta fuit opinio Genuenium, & Gallorum quorundam, præcipuè Massiliensium: qui putabant non posse nos sine gratia salutis negotium perficere; posse tamen illud absque gratia incipere. A Pelagio igitur hæctenus abitant, quod gratiam esse necessariam agnoscerent; at in eo conveniebant, quod non necesse sit nos à gratia præveniri: unde hi reliquæ Pelagii, vel etiam Semipelagiani sunt vocati. Inter extremam Prædestinatianorum &



& mediam veterum Catholicorum erat illa B. Augustini, qui cum Patrum prioribus agnoscebat gratiæ prævenientis necessitatem: sed ut eam fortius tueretur, illud super addebat, fluere hanc ab absoluto salvandi decreto. Hac de Augustini lacinia quadruplex fuisse olim iudicium invenio. Nam ut de Pelagianis & Semipelagianis nihil dicam, etiam Catholicorum nonnulli, qui in cæteris assentirent Augustino, hoc caput, ut novum, falsum, periculosum respuebant; ut liquet ex Epistolis Prosperi & Hilarii ad Augustinum. Alii damnare non audebant, sed tamen putabant vel plane incertum, ac potius reticendum, quia multi adeo eo offendeantur: vel saltem non planè certum, de quo idcirco modeste inter eruditos posset disquiri. De priori liquet, ex iisdem Epistolis. Ad posterius fortasse referre illud liceat, quod Cælestinus Papa scribit extremo capite eorum quæ ad Galliæ Episcopos de Dei Gratia milit: *Profundiores difficilioreque partes incurrentium questionum, quas latius pertractarunt, qui Hæreticis restiterunt, SICUT NON AUDEMUS CONTEMNERE, ITA NON NECESSE HABEMUS ADSTRUERE.* Quia ad constituendam gratiam Dei SATIS SUFFICERE CREDIMUS, quicquid secundum prædictas regulas Apostolicæ sedis nos scripta docuerunt. Tertium genus, caput illud Augustini strenuè assererat: sed ita assererat, ut arbitrii libertas, Monitorumque & Correctionis utilitas non everteretur; nec cum priorum Patrum doctrina pugnaret. In his B. Prosperum Principem reponimus, præclaraque etiam opera Scriptoris de Vocatione Gentium. Denique aliqui solum attendere, quæ B. Augustinus de Gratia à Scripturis attulisset, & quomodo ea esset interpretatus, ac durissima quæque optima putare, nec laborare quicquam, quid ex iisdem Scripturis pro libertate Arbitrii doceret, aut quid de Gratia priores statuissent: unde aliud consequi non poterat, quam ut sic Augustinum intelligerent, ut secum & cum Antiquis pugnaret, nec gratia libertatem arbitrii perliceret, sed tolleretur, nec correctionum ulla esset utilitas, sed inane nomen. Ex hisce, qui ut Scripturas, ita Augustinum perperam interpretarentur, proque errore suo eorum abuterentur verbis, Godschalcum Monachum fuisse, Rabani Mauri, totiusque Moguntinæ Synodi, iudicium fuit. Cui nos ante annos plusculos, in Historia nostra de gratiæ & liberi arbitrii controversia subscripsimus: multoque nunc minus sententiam nostram mutare possumus, postquam nacti sumus ea, quæ hac de re ipse scripsit Rabanus. Sic igitur statuimus, Godschalcum hunc non per calumniam dici Prædestinatio-

num, uti illi qui Augustini sententiam amplecterentur, eoque nomine à Pelagianis & Semipelagianis vocabantur: sed jure meritoque sic appellari: ut qui verbis Scripturæ & B. Augustini male intellectis, male etiam scriberet, & doceret de Gratia & Prædestinatione. Dissidet tamen hac parte à nobis vir summæ Pietatis, Doctrinæ ac Dignitatis; qui nullos censet fuisse Prædestinianos. Quotquot enim sic vocati, per calumniam ita nominatos, ab iis qui Augustini sententiam rejicerent: Mihi vero graves causæ, cur dissentiam. Quas, quia tulus paulo hanc rem tractare malim, dissertatiuncula complectar, quam proximis literis transmittam. Idem maximus Vir improbat quod scripserim, jam Augustini ævo fuisse, qui verbis ejus male intellectis in spissum adeo inciderint errorem. Sed neque hic video, cur resiliere debeam ab opinione ea. Quæ me moveant consignavi, eaque ad te nunc mitto, ut tui, Reverendissime Pater, iudicii faciam. Cui quod displiceat, id nec placere possit Auctori suo. Vellem alteram, de qua dixi, dissertatiunculam, & majoris illam, quam hæc, momenti, comitem ei nunc addere potuissim. Sed quandoquidem ea nunc est anni pars, qua munere publico maxime distringar, & in disquisitione illa quædam occurrerunt, ubi necesse sit plusculos è mediis ævi scriptoribus ad partes advocari, quo solidius singula firmentur: facile veniam dabis, si id hoc tempore non fecerim. Exercitationes nostræ Grammaticæ, opus novantiquum, jam ab aliquot mensibus excudi cœpit. Et strenuè proceditur, me admodum lubente, qui majora scio exposci. Et quantum possum, animum ad Ecclesiæ veteris Historiam, ab istis non dico difficilibus nugis, attamen levioribus, ac vere pedilsequis revoco. Filius meus Dionysius, alter eorum, quos in Anglicano itinere comites adsumseram, ante hebdomadas aliquot transferre ex Hebræo cœpit Rabbi Moseh Maimonidis dissertationem de Idololatriæ exordiis, & progressu. Auctor ille est, de quo Hebræi vulgatum illud dicere solent, à Mose usque ad Mosen non fuisse similem Moli. Argumentum fecundum, & in quo Notas plusculas addendo, varia ostendi eruditio possit. Laborem suum hunc, si gratum erit, Illustrissimo inscribere nomini tuo filius decrevit. Ut eum non tanquam signum grati erga te, Reverendissime Pater, animi habeas; sed obidem & vadem eorum, quæ ego tibi debeo, & si Deus vitam conceperit, perfecturum me spero. Existimat intra quartum aut circiter mensem se consummaturum, & duobus aut circiter mensibus editum iri. Citius posset, nisi jam prælum ferretur excudendo translationem

ejus Annalium Belgicorum Reidani, quos pure, & ad veterum formam Latine reddidit. Jamque ex Libris XVIII. priores duodecim excusi. Hac etiam Hebdomade prælo subjiciet geminum Panegyricum dicatum Arau-  
fionensium Principi, post luculentas adeo Victorias Haghani Comitibus reverso. Unus Prosâ scriptus, alter Carmine. Nec ego hæc omnia, in lucem ea ætate (vix annum egres-  
sus vigesimum) edere eum permetterem, nisi istiusmodi fore considerem, ut etiam litera-  
rum principibus probarentur. Hæc ego ali-  
quanto apertius non gloriæ aut jactationis studio, vel nimio meorum amore; sed quia scirem, ea jucundum esse tibi cognoscere, Il-  
lustrissime Pater, qui tanto & me amore com-  
plecteris, & meos. Sed ego, Illustrissime Domine, videar mihi oblitus mihi, cui scribam, & quam occupato. Quamobrem finio, more meo, cum voto ut diu te Opt. Max. Magno Carolo, diu Britanniarum Regno, diu Ecclesiæ suæ, diu denique mihi incolumem servet, qui si privati apud te in censum veniam, debitorum tibi omnium maximum me esse, & fateri debeo, & lætor.

*Amstelodami.*  
clō Idc xxxii.  
vi. Kal. Dec.

*Reverendissimo & Illustrissimo*  
*nomini tuo obstrictissimus,*

G. J. Vossius.

### CLXXXVII.

Simoni Bellimontio. *V. Cl. Ger. Jo.*  
*Vossius S. P. D.*

**A**UT ego nimium amicis abundo, Amplissime Vir, aut alii iisdem egent. Sane eò me jam pervenisse video, ut Commendator jure appellari possim: Tu fortasse Importuni addes vocabulum. Certe si sic vocare voles, injuriam mihi fieri ne ipse quidem dixerim; quippe gnarus, quæ occupationes distingere te etiam ante soleant, quanto nunc magis, postquam arduum pacis negotium, distingere cepit Belgicæ Proceres, in quibus tam illustri es loco. Sed audeo nihilominus curis, quibus ista nunc libras, inferere me; qua fiducia scis, & sæpius dixi; nimirum amoris tui. Nunc iterum commendo, quodammodo quidem rogatu alieno, sed magis sponte mea. Non dicerem id, nisi dignum tua gratia putarem, pro quo loquor, Erycium Puteanum, Virum Doctissimum, disertum etiam, & elegantis Ingenii; ut ipse non ignoras: probum & candidum, ego imprimis scio, qui novi cum ab annis xlv. Una enim

in patria urbe tua, ab Orydrio, & Rhekenario, liberalibus disciplinis, in pueritia excultus sumus. Mireris fortasse illum tibi commendari; sed faciunt hoc tempora Reipublicæ, & spes pacis incerta. Quare unum illud, uterque petimus ut amare velis. Putat enim ipse, ut ex Literis ejus intelligo, sua non parum interesse, ut postquam Venloa, Urbs Patria ejus, nobis accessit, aliquos in his partibus amantes sui habeat; quos inter te imprimis esse cupiat. Utrum vero agris suis à milite metuat, an aliud sit, dicere non possum. Sed scribet propediem ipse ad te; & fortasse jam fecit. Itaque non longius curas tuas interpellō. Plurimum saluta lectissimam Uxorem, & Liberos optimos.

*Amstelodami* Prid. Id. Decembris clō Idc xxxii.

### CLXXXVIII.

*Illust. Joanni Skyttio Baroni, &c.*

**N**isi singularis humanitas tua, Generose Domine, nostras quoque terras personaret, & favor erga studiorum cultores mihi cognitus foret, nequaquam ea essem inducia, ut ultima prope hora, qua nlius abit, & ego à multis interpellor, quali in mediis negotiis, literis aliquid committere auderem ad virum sublimis adeo fastigii. Nunc quia famam de te scio non mentiri, & ex generosis quoque liberis tuis viva tui imagine, certum indicium capio: Non dubitavi per literas hæc officia ac venerationem tibi meam deferre. Non quasi tua id magnopere interlit; sed quia obstrictum me tibi sentiebam in liberis tuis. Vix equidem dixerim, quanta cum voluptate conspexerim remeantem, post sexennii peregrinationem generosum filium tuum: in quo prudentia, eruditio, & quæ alia tantæ dignitatis juvenem ornare queant, undique elucet. Certe gratulor Tibi, Illustris Domine, de sobole tam eximia, & te digna. Et eo magis gratulor, quia in sublimi positos multæ illecebræ à virtute sæpe avocant: quo impensius miratus sum egregium & excelsum adeo animum filii tui per vestigia paterna incedentis. Certè si qua in re opera nostra illi utilis esse potuisset, non alius me promptius eam collocasset. Nunc quia occasio illud non permisit, saltem in altero filiorum tuorum ostendam, quam devoto erga te sim animo. Juvi ejus studia quantum possit, qui diversa, vicina tamen urbe habitet. Ac deinceps animus idem futurus: partim quia hoc pacto bene mereri me de publico intelligo, cui aliquando is præfuturus; partim

partim etiam in tuæ spem gratiæ, cui placere posse pulcherrimum, & non levem studiorum meorum fructum puto. Vale.

*Amstelodami a. d. x.  
Januarii anni hujus  
c1o Idc xxxiii. quem  
illustri familiæ tuæ  
felicem & prosperum  
exopto.*

*Illustris & generosi nomi-  
nis tui cultor,*

G. J. Vossius.

## CLXXXIX.

Joanni Meursio S. P.

**V**ellem, Vir summe & amice, ante horam unam atque alteram scivissem, generosum Roscraantium quamprimum in Daniam abire. Uberiores à me literas haberes. Non committendum tamen ut abeat sine literis meis. Dicam quæ potissimum in mentem veniunt tuæque scire maxime interest. Scripseram superioribus literis, Guilhelmum Jansonium Blauwium cogitare de edendis Danicis, tum tuis, tum Pontani. Idem ad te perscripserat vicinus ejus Joannes Janssonius: sed ita perscripserat ut aliquid caliginis adspiceret. Nec enim animus illi uno volumine complecti opera vestra: quod nec Pontano gratum foret, necdum tibi, sed utraque seorsim edere parat, forma tamen eadem, typis iisdem; ita ab eo qui vult, simul compingi possint; seorsim item ab eo, cui mens alia. Quare ne quidem in unius inscriptione mentio alterius fiet. Sane puto te scire venturiores esse Blauwii typos atque eundem emendatius aliquanto sua excudere: Nec aliud me movit, cur hoc scire te vellem. Tamen & alter Vir bonus, & rerum suarum non indiligens. Quare de hoc fruaris judicio tuo. Solum ne facile nimis fidem habe quæ alter de altero perscribat. Cogitat idem Blauwius, ut tui est amantissimus, & filium habet Jurisconsultum qui prælo præest, omnia tua eleganter & emendate uno volumine complecti. Idem si tibi videatur possis perscribere quo ordine velis ea concinnari. Opus etiam sit significari quæ addi in singulis libris vel etiam mutari voles. Si voles, ipse utinam in partem veniam curæ quo magis honori & desiderio satishat tuo. Aureum laborem tuum de Atticæ regibus Jo. Janssonii tradidi, non prius tamen quam recepisset se quamprimum prælo velle committere. Hæret adhuc, utrum hic an Harderwici id agere velit: si hic, meâ; si Harderwici, Pontani interdum opera uti decrevit.

Mitto ad te exemplar Orationis nostræ de laudibus Historiæ, quam non fore ingratam spero tum argumenti causâ tum auctoris. Excudit nunc Blauwius exercitationes meas Grammaticas; Jamque in tertio libro occupatur. Utinam opera istac ad umbilicum perducta foret. Scio enim majora à me expectari. Cætera literis proximis intelliges. Id propediem erit. Nunc ob festinationem generosi Juvenis cogor manum tollere de tabula. Uxori salutem plurimam dices & liberis optimis non à me modo sed conjuge quoque & grandioribus liberis, filiæ imprimis filia mea.

*Raptim Amstelodami  
vi. Id. Jan. Anni hujus  
c1o Idc xxxiii. Qui  
ut familiæ tuæ pariter  
ac nostræ felix sit,  
Deum supplex rogo.*

*Tuus totus,*

G. J. Vossius.

## CXC.

Georgio Calixto Theologo S. P.  
Helmstadium.

**S**i amici mihi essent deligendi, Præstantissime Calixte, profecto eos, vel maxime inter eruditos quærerem. Et inter eruditos non alii se mihi commendant, quam quos pietas: Et inter pios, vel maxime mihi probantur, quorum integra in sacris judicia esse video. Unde nihil præter morem meum faciam, si te, vir Clarissime, in amicorum potissimis habeam. Imo nisi habeam, degenerem à natura mea. Etenim siue pietatem cupio, siue doctrinam, siue judicium acre, non aliis opus mihi est documentis, quam præclaris monumentis tuis; quæ cum voluptate, cum fructu, cum admiratione legi: Et gratulatus mihi sum quam maxime, reperisse me in Germania virum, qui non multorum, in damnandis dissentientibus impetum sequeretur: sed verè nosset, quid sit Catholica illa Ecclesia, quam in symbolo profiteamur. Multum hoc schismatico sæculo, profecisse mihi videtur, qui illud didicerit. Sed de isto pluribus alias, si sic videbitur, per literas colloquemur. Ad illud nunc revertar, quod orsus eram dicere, ex quo tempore, novisse te ex scriptis tuis cœpi, simul ingentem mihi amorem tui ortum. Ita ut nihil mihi gratius accidere potuerit salutationibus tuis, quibus per ornatissimum Overbequium, sæpius me, cum Lugduni agerem, es dignatus. Adeoque mirarer ipse, non citius me literas ad te dedisse, nisi amicorum quoque in-



timos mihi, super talibus sæpe queri scirem. Distentus occupationibus, crebrò tantum meminisse amicorum possum; & cum maximè scribere velim, prohibent non modò solitæ curæ, sed & subita, quæ mihi non rarò ingruunt, tanta turba, ut assiduis quorundam curis comparari possint. Huc usque egeram, & amans, & æstimator, & memor tui, cum non uno literario à te munere provocatus, & monitus à præstantissimo Wicewortio (quo non alius amicitia inter nos dignior usurpari conciliator poterat) abrupti non tam pertinax silentium, quam occupationes, quas inhumanus sim, nili vel ad tempus, tuo in me posthabeam amori. Crede, eruditissime Calixte, si aliorum colui amicitias, tanto magis me tuam expetivisse, quanto aliis dignior tu, & mihi honorem magis ac fructuosum erat, familiaritatem exercere, cum viro, veteris Ecclesiæ amantissimo, & ut veritatis, ita pacis sic studioso. Debeo ego tibi, cum ob munera, quæ auro omni præpono, tum imprimis ob affectus indicium, quod à te cæpit. Debent tibi, quotquot verè Christiani sunt, & esse volunt, hoc est, tota Ecclesia. Perge tantum benè de illa mereri, & commoto huic sæculo tranquillitatem reddere, quo nihil salutarius nobis, nihil Deo gratius præstari potest. Habebis certe optimum quemque laboribus tuis faventissimum. Ego quidem nunquam desinam te amare, cui me obstrictum esse fateor, & lætor. Nam si verè olim dictum est, firmissimam esse inter Pares amicitiam, nostra perpetua erit; quando & mihi nihil aliud unquam in votis fuit, quàm pro tenuibus, quas habebam, viribus, occurrere Christiani Orbis diffidiis. Vale, & Deum expecta laborum tuorum remuneratorem.

*Amstelodami* x. Kal. Febr.

An. cl. lxxxi.

# CXCI.

Gulielmo *Episcopo* Londinensi.

Reverende in Christo Pater, Domine Illustrissime,

**M**Agis magisq; comperio, quam vere non semel, & imprimis coram promiseris, paterno te affectu fore in me & meos. Quod enim evidentius affectus, vel *sepius* potius, habere poteram argumentum, quam postremas literas tuas? Quas non gratias tibi debeo, pro tam eximia cura, pro monitis tam fidis! Sed enim de amoribus illis non possum

non referre, quod comperisse mihi videor. Cum ante triennium in Britannia ipse essem, hæc ipsa de filio vulgabatur. Cum verò in rem totam inquirerem, atque adeo ipsum serio monuissem, negavit id per somnium sibi unquam venisse. Atque addebat extremæ fore dementiae si is, qui virgines in Batavia, & loco egregio, & opibus non spernendis, habere in matrimonio potuisset, nunc se projiceret infra sortem suam, infra honorem familiæ. Non abnuebat, sermones identidem cum ea habuisse; sed nunquam animum ducendi. Atque adeo omnibus penè Epistolis suis, quas ab aliquot mensibus ad me & meos scripsit, rogat, ut cogitare velimus de civili aliquo munere, præsertim apud Ruremondanos; quorum urbem, natalem ac sedem parentum, ac majorum meorum, Arausionensis Princeps in fœderatarum Belgarum potestatem redegit. Quæ prorsus aliena à cogitationibus ejusmodi videntur. Nam si honores ullos in Belgica cogitat, quos profecto non ita facile est apisci, ducenda ei potius uxor sit ejusdem soli, ut matrimonii vinculo novos sibi amicos & favorem paret. Nec tamen ex istis certi quicquam mihi audeo polliceri. Novi quam varius & mutabilis esse animus Adolescentiæ soleat. Et facile cogitare possum, nihil temere tam ejus, tam mei amantes, tibi, Illustrissime Domine, scripturos fuisse. Quare ab affine meo Junio, qui nunc cum Illustrissimo Principe Arundelio, in Britanniam reditum parat, petii ut simulac pedem Londini posuerit, consultare tecum vellet, atque illud exsequi, quod optimum vobis videbitur. Nec solum, si nuptias ejusmodi cogiter, revocari eum quamprimum expediat; sed etiam si vita sit dissoluta, vel æs alienum contrahat; ac utroque alterove horum, periculum sibi arcescat. Itaque illud etiam affinem meum Junium rogavi, ut Cantabrigiam ipse eat, deque omni re cognoscat. Atque utinam eò cum venerit, intelligat, jam omnia melius aliquanto se habere. Omnino enim exopto, ut si absque sui, vel Collegii, in quo vivit, honoris dispendio, atque etiam familiæ nostræ, vivere annum minimum unum istuc possit, id potius faciat; ac si non est Theologiæ amor, quem optarem, saltem in Medicinæ studio, in quo jam ante triennium egregie profecerat, seriò defudet, quo brevi, sive in Britannia, ubi suus est Medicis honos, sive apud nos, ubi non eo quidem loco, nec tamen discreti sunt, suo succo discat vivere. Nam præter eum duæ mihi filia: (& altera jam nubilis) quidni etiam filii, qui omnes studiis vacent. Quanti hic mihi sumtus sint faciendi, facile vides. Interea gratias ago Deo immortalis, quod omnes quos

quos hic habeo, & mihi & probis omnibus se probent, maximamque etiam spem sui concitarint. Tanto turpius fuerit natu maximo, si vincatur ab iis quibus præire oportebat. Macerat hæc me cura magis quam dicere possum. Sed culpam ejus præstare non possum. Si periculum in mora est, quamprimum potius veniat ad nos, quam aliquid vel ipse faciat poenitendum, vel ei contingat inhonorum. Ei vero? imo vero mihi, & omnibus meis. Deus illi meliorem mentem: mihi vero & conjugii animum fortem. Interea tibi, Illustrissime Domine, & exoptatissime Mœcenas, gratias immortales pro cura & optimo consilio habeo, ac de cætero etiam hoc negotium commendo. Quem hic mitto Panegyricum, & Carmen, nuper filius meus Dionysius composuit, & quia omnia mea, vel meorum grata tibi esse jam pridem didici, volui & hujus qualiscunque laboris te participem facere. Deus te, Reverendissime Pater, diu Ecclesiæ Catholicæ & nobis incolumem servet.

*Amstelodami,*  
iv. Kal. Febr.  
Ann. 1633.

*Illustrissimi & Reverendissimi  
nominis tui cultor devotissi-  
mus & obstrictissimus,*

G. J. Vossius.

## CXCII.

Petro Cunæo, V. Cl. Ger. Jo. Vossius  
S. P.

**Q**uanto rarius ad te scribo, maxime idem vir atque amice, tanto ad te sæpius scribere desidero. Sed video sic ferè usu venire, ut nisi quid necessarium ingruat; occupationes ante officium putem: Quas apud te commemorare opus non arbitror, qui vitam meam nosti. Neque ego, si vel maximè otium mihi fuerit, adeo ignarus sum rerum tuarum, ut literis scribendis multum vacare te posse arbitrer. Alioqui merebatur id amor noster, ut talibus etiam officiis certaremus. Sed quemadmodum ego, facile te excusatum habeo; ita nec ambigo, quin nullius me admodum culpæ accules: quem præter publicum munus, nunc quoque distinctet Editio Grammatici Operis, ante annos scripti xxx. sed cui inter edendum, lima pluribus in locis, quid mirum? accedat. At ne scriptionis causam diutius differam, sermones his diebus mihi fuerunt, cum Amplissimo Bickero, Consulari viro. Quære-

bat, an spem haberem efficiendi, ut cognatus suus, (Helmondio nomen est) in tuis viveret ædibus. Ego quia putarem id te non facturum, negavi. Jam quærit, an apud Vinnium, quem ab eruditione egregia semel iterumque hoc fine ei commendavi, habitare juvenis possit? Quin cum fructu studiorum suorum id facere possit, nullus dubito. Sed scito præterea opus, an locus in ædibus suppetat. Quare rogo, ut certiore me ejus facere velis. Obstringes, non me solum, sed & Consulare Bickerum, qui plurimum te salutat. Multam etiam salutem meo nomine dicces, præter eos quorum antehac in literis meminisse soleo, Clarissimo Salmasio, quem in Academia vestra lætor vivere. Non dubito, quin præclaris monumentis, per se alioqui Clarissimæ Academiæ, majorem etiam claritatem sit allaturus. Etiam Ornatissimum Vinnium, si cum compellandum putabis, meo nomine salutabis; de lectissima Coniuge, & Collegis taceo, quia, ut dixi, non alios nominare nunc animus, quam quos scirem urbi vestræ accessisse. Nec tamen præterire fas, præter uxorem, salutare vos omnes Dionysium meum, qui Panegyricum & carmen suum ad te mittit. Scio non ingratum tibi munusculum fore, quia sic familiam nostram amas.

*Amstelodami,*  
clō Idc xxxiii.  
ix. Kal. Febr.

## CXCIII.

Conrado Vorstio.

Clarissime & Amicissime Vorsti,

**D**Avidem de Haro, juvenem egregium, Discipulum tuum, à me tibi commendari, fortassis miraberis; cum studia illius, non tibi minus, quam mihi, postrema magis etiam nota sint. Sed rogabat hoc pro veteri notitia, ac cum liberis etiam amicitia, commendare ut se vellem, dum Medicinæ supremum cogitat gradum. Honestæ erant postulata, ac placuit mihi ingenium, ac mores. Religionem ejus, quatenus à Christiana abit, si amare nequeo, modestiam tamen ejus probo, eoque abnuendum id non putabam. Et non dubito, studia quoque ejus mereri hunc honorem; aut si quidquam in iis requiritur, eo ingenio est atque industria, ut brevi tempore supplere hoc

hoc, & efficere possit ne gradum hunc honoris indigno collatum dicturus sit quicumquam. Itaque rogatum te velim, ut favore tuo, si opus habeat, juvare cum non graveris. Compositum à filio Panegyricum mitto, quem pro amore erga me, meosque gratissimum fore confido. Plurimum is te salutari jubet. Uxori etiam tuæ, plurimam salutem adscribi petiit. Quam & dices affini optimo Backerio, & Conjugi. Et si molestum non est, tum maximo, & amicissimo, Cunæo, tum ingenti, licet novo Academicæ ornameto, Salmasio. Quod præteream candidas animas Tyfii, Constantini, Golii, ut collegarum alios taceam, id fieri, quia nolim te onerare, tute facile vides. Tamen si maximus Academicæ vestræ honos Dom. Tyfio obtigerit, optima quæque ei, meo nomine precaberis. Volo enim ut omnes sciat, memorem me esse vestri, optimæque velle cunctis, iis imprimis, quorum exploratus mihi amor, atque affectus. Vale doctissime, & amicissime vir, & amicitiam avitam, paternam nostram, ad liberos etiam propageamus.

*Amstelodami.*  
c1o Idc xxxiii.  
ix. Febr.

*Tuus,*

G. J. Vossius.

#### CXCIV.

Claudio Salmasio.

Vir maxime,

**L**iteras tuas jam ante hebdomadam certè accepisse me, jam tibi arbitror Lamerius indicaverit. Quod tum non rescripti, occupationibus meis imputabis. Alioqui animus illuc inclinabat. Nam nihil æquè volupe mihi, quàm desiderium, quod videndi habeo tui, scripture crebra sublevare, donec per anni tempus, & munus meum, excurrere Lugdunum licebit. Certè parum his proximis diebus ab itinere absui, sed tempestates & inclemens cœlum vetuere. Unde quod unum supererat, per literas te invisere malui: quia iniquum ut tu recte putas, est amicitiam nostram locorum propinquitate deteri, cum illa tanto arctius constringere eam debeat. Quæris quid agam? edere ante menses complures coepi opus Grammaticum quod annis abhinc xxx. & amplius magna ex parte scripsi. Possis dicere censuram eorum quæ veteres, ac plerique etiam juniorum de artis præceptis tradidere. Tædiosum negotium:

sed operam do, ut quantum possum ejus fastidium levem: Si non aliis saltem scholis proderimus. Et necesse fuit, ut aliquis hoc laboris devoraret. Tentavi ego, dum alii majora. Libri septem erunt, quorum tertius jam ad finem vergit. His absolutis ut puto, Origines LL. consequentur. Opus utrumque fortasse leve multis videbitur. Non levis tamen labor, quo mihi constitit; illud interea diffiteri non possum, vix esse hæc pro ætate mea. Quare animus jamdudum gravioribus incumbere ardet. Cæterum nolui mihi complurium annorum labores perire. Si Deus illos absolvere dederit, spero me ad utiliora, nempe Antiquitates Ecclesiæ transiturem. Quod te facere etiam velle scio. Quas mihi literas commendasti, ne dubita recte Hughonem nostrum accepturum. Atque utinam ipse de manu in manum tradere ei illas potuissim. Interim tanto & viro & amico amoto, nihil æquè lætor, quam te successisse. Velim Batavi omnes agnoscant felicitatem suam: Lugdunenses imprimis. In quibus non dubito quin familiariter utaris V. Cl. Petro Cunæo, viro non modo longe doctissimo & disertissimo, ac Batavici status intelligentissimo, sed præterea gravi & candido. Habui illum ego, cum istuc viverem, inter amicorum primos. Te quoque, ut idem facias, hortor. Dignissimus est ille amicitia tua. Vale, maxime Salmasi, ac nunc Bataviæ etiam nostræ ingens decus: quod spondeo magis & magis ipsa deinceps agnoscat, malevolis omnibus invitis.

*Amstelodami,*  
c1o Idc xxxiii.  
vi. Id. Febr.

*Tuus,*

G. J. Vossius.

#### CXCV.

Merico Casaubono S. P.

**J**AM ab occupationibus meis tandem ad te redeo, mi Casaubone. Quam vellem id prius factum! Sed qui vitam meam sciat, misereatur potius mei quam succenseat; Usque adeo occupationibus & molestiis premor. Et quasi non abundè id esset, novum prioribus laborem sponte accudi. Nimirum exercitationes meas Grammaticas, quarum jam tertius liber ad finem properat. Opus futurum ejusdem molis ac, quas proxime dedi, Oratoriarum institutiones. Scio alia à me expectare, cum alios, tum excellentes Britanniarum viros. Sed semel mihi defungendum commentationibus istis, quas majorem partem ante annos

nos



nos xxx. elaboravis, atque ante annos xii. cum factiosi quidam sibi solis sacrorum tractationem vindicarent, iterum in manus sumsi, & aliquot mensium spatio, partim limavi, partim observationibus novis adauxi. Sanè ad faciem eam artem Grammaticam scripsit hætenus nemo. Planeque Aristarchum ago in Grammaticos veteres, & novorum illos, qui nomen aliquod merentur. Multa scriptorum veterum loca illustro, multa emendo. Equidem mallem ipse nunquam aggressus essem hoc laboris. Poteram interim longe majora & acceptiora conscribere. Sed cum hæc orsus sum, Gymnasii Dordrechtani præfectus eram: eoque nihil alienum à munere meo faciebam, talia consignando. Postquam vero regimen cepi Collegii Theologici ab illustribus Ordinibus constituti apud Lugdunenses, non sivere antiquitatis Ecclesiasticæ hostes, qui plurimum poterant, ut aliis quam secularibus (ut vocant) studiis me darem. Illis igitur regnum tenentibus, non passus sum perire labores meos, quos nunc publici juris facio, ut totus deinde in majoribus esse, & Britannicæ atque alibi gratioribus possum. Sed quid ego hæc tam multis? Spero ubi videris operam, non usquequaque improbabis. Et qui possis tam amans mei? Verum scire hæc te volui, ut apud iudices iniquiores operam & studium defendas nostrum. Solum hæreo, quid facto opus sit, de vasto penè Originum opere: quid de rei Poeticæ libris. Nam utrumque opus jam ad umbilicum perduxi. Et tamen inter excudendum, ut scis, aliquid novæ exquiritur curæ: Quod autem iis accedit, id sacris meditationibus aufertur. Quid ergo? Missane hæc faciam? Etiamne quæ de omnibus veterum disciplinis exaravi, & tantum non ad finem perduxim? Si fas esset homini Christiano, propemodum male illis optare qui hæc potius tractandi necessitatem mihi imposuerunt, quam porro exolvendi magnos veteris Ecclesiæ doctores: quod studium sic cum altero, à prima pene Adolescentia conjunxi, ut longe illud præferrem. Itaque alterum quoque nunc sic tracto, ut melius majusque non intermittam. Utinam tantum foret tantum otii, ut ne sæpe adeo ab eo avellerer invitus. Mane publica distineor auditione, vel ut nunc loqui amant nostri, prælectione. A prandio consulor à multis, quibus non possum operam denegare. Etiam Salutatorum peregre advenientium nimium quantum est. Quid omnia referam? Videor mihi labori satis assuetus. Et tamen fateor, interdum sub sarcina ingemisco, ut iniquæ mentis aellus. Tu vero, amicissime Vir, ne propterea, quæso, minus me ama. Sed si quando tardius officium vel scribendi, vel

aliud exsolvo, ita tibi persuade, non esse me meum; magisque id mihi ægre esse, quam amantibus mei. Et ista hætenus. Pecuniam, quæ ex Cantuariensi Canonicatu, regio mihi beneficio cedit, accepi usque ad proximum Septembrem. Ut primum trimestre, quod debetur, sit mensis Decembris. Multum tibi debeo, optime virorum, qui fide ea atque industria procures res meas. Verum quid tandem pro beneficio rependam, ne videar, vel potius sim ingratus? Sane cogitatio hæc me sollicitum habet, magisque anxium haberer, nisi perspectus esset erga me amor tuus. Nec tamen dehinam cogitare de testatione aliqua animi non ingrati.

Venio ad hortense negotium, de quo seorsim literulas ad te scriptas hisce inclusi, & eas quando expedire putabis, Reverendis Fratribus ostendas. Nunc hic plenius paulo apertiusque animum meum aperire mihi visum fuit. Equidem, mi Casaubone, tametsi, ut ingenue loquar, offendere neminem velim, nihilominus non pono offensas alienas, præsertim injustas, ante jus non meum modo, sed & collegarum & fratrum meorum. Nam quod merito metuitur, si ego eripi mihi um patiar, fortasse etiam illi, qui mihi successerit, carendum erit. Saltem id contentionem non mediocrem possit excitare. Quare prævertendum omnino huic rei videtur. Sed quia mihi tam longe remoto statuere difficilius est, malo rem omnem arbitrio tuo committere. Quicquid feceris, id ne dubita me probaturum esse. Neque id de horto solum, sed etiam de pecunia annua, ut hæc, quemadmodum cæteris, uno Molinæo excepto, pro ratione proventus, vel accrescat vel decreseat mihi.

Dicere non possum, quantopere amplissimo Hughoni Grotio placuerint literæ tuæ & quanti te faciat. Is nunc Hamburgi agit; non dubito, quin illi tristissimus fuerit nuncius, de excessu fortissimi Suecorum Regis. Nam ab eo amabatur & æstimabatur. Imo Rex jam in mandatis non uni dederat, qui cum eo colloquerentur, ut operam & consilium suum sibi addiceret. Pretium offerebat, quale Legatis dari solet, uti ex fide hominibus accepi. Etiam Holsatiæ Dux & alii Principes viri hæc agunt, ut ad se veniat. Simulac certi aliquid statuisse intellexero, perscribam ad te. Binas vel ternas ab eo literas accepi. Responsum adhuc debeo. Quæ causa, credo, intra sequimensem nihil ad me scripserit. Sed facile mihi veniam spondeo, quia vitam meam novit. Nusquam cum vivere malim, quam apud nos; ut coram potius quam per literas colloqui liceret. Et facile hoc ei concederetur, si modo vivendi his

his terris potestatem libello posceret. Verum metuit, ne id sic interpretentur aliqui, quasi culpam ullam agnoscat, cum contra se præmio potius dignum ob ea existimet quæ egit solo patriæ libertatis amore ductus. Legati hostilis Belgicæ Hagham reversi, colloquantur cum proceribus nostris de conditionibus pacis. Plerique metuunt, ne convenire possint. Usque adeo grandia sunt quæ utrinque postulantur. Sed, credo, iniquum petitur, ut æquum impetretur. Plerique Sacri Ordinis bellum præoptant. Nec obscura est ratio: Nam belli tempore plus tribunitiis concionibus valent; quia multa Proceres tolerant, ne quid turbarum domi oriatur. Sed longe aliam ipsi causam prætendunt. Negant enim honestam esse pacem cum Idololatriis, quos Deus excindi in verbo jubet. Negant tutam, quia Artes Pontificæ & Austriacæ Domus plurimum se occultent specioso pacis titulo. Quod sane aliquid est. Sed neque talia Proceres nesciunt, qui providebunt semper ne quid detrimenti capiat Respublica. Filius meus Dionysius, quem vidisti mecum, Panegyricum & Poematium scripsit honori Principis Arausionensis. Id fortasse jam acceperis. Nam exemplar affini Junio mihi Hagham, qui simulac in Angliam rediisset, curaturum recepit. Jam liber decimus quartus Reidani Belgici Historiographi, ab eodem Latine redditi, sub prælo est. Spero infra menses tres universum opus posse absolvi. Et puto, nec Historici prudentia, nec Interpretis dictio displicebit. Plurimam salutem tum lectissimo uxori, tum Reverendo D. Decano, tum charissimis fratribus & Collegis meo nomine dico.

*Amstelodami*  
xiv. Kal. Mart.  
Stylo Gregor.  
Raptim.

*Tuus non uno nomine,*

G. J. Vossius.

Agnosco quicquid dignatione & beneficentia Regia ex Præbenda Cantuariensi mihi ab ejus exordio debebatur usque ad mensem Septembrem anni Millefimi sexcentefimi trigefimi secundi, esse persolutum, à Reverendo & doctissimo Merico Casaubono: ita primum trimestre quod annumerandum sit, incidat in anni ejusdem mensem Decembrem. Scripti & subscripsi Amstelodami manu propria, mense Februario anni proximi qui est clb lxxc trigefimus tertius.

G. J. Vossius.

CXCVI.

Constantino Huygenio S. P.

Quod, Nobilissime, Amplissimeque Huygeni, tu quoque sic obitum carissimi pignoris, meumque hunc dolorem doles: amicè facis, & liquido ostendis, neutiquam me in eo falli, quod te semper amantissimum mei, familiarque meæ judicavi. Nimirum pro affectu hoc tuo, non potes, non peracribum hunc mihi casum judicare. Sanè periculum fortasse esset, ne animus de gradu totus dejiceretur, nisi partim tui, & aliorum præstantium virorum alloquio Epistolari, paulatim spiritum, & vires reciperem: partim sponte mihi etiam, ob oculos sæpius ponerem, incertum vitæ humanæ, & alia, quibus ægras mentes, in casibus hujuscemodi, solari ipse antea soleo. In his familiam ducit voluntas Dei, quæ Christianis nobis, omnem penè paginam facere debet. Nam ut quanto nebula, ac caligo magis attollitur, tanto aer proximus fit purior, clariorque: sic comperio mentem etiam nostram eo reddi serenior, quo amplius elevatur ad Dei Providentiam, quæ nihil non providè immittit, aut permittit. Illustrissimo, & Invictissimo Arausionensi Principi, æternum pro ea liberalitate, debitor sum futurus. Sed si cogitem, per quem mihi conciliatus sit maximus Heros, ingratus sum, nisi hoc ita illi tribuam, ut non & tibi beneficii partem transcribam. Nec nunc præter hujusmodi verba habeo, quod rependam. Enitar tamen sedulè, ne vel munificentia Arausionensium Principem; vel te, Nobilissime, & Amicissime Huygeni, commendationis tuæ possit poenitere. Hunc animum nostrum, qui prima occasione se exeret, magnum censebis, si eum æstimes, non pro viribus ejus, quæ exiguæ, sed pro humanitate tua, quæ summa est.

Amplissimum, Optimumque Affinem tuum, David D' Willem, salvere si jusseris, gratissimum erit.

*Amstelodami*  
clb lxxc xxxiii.  
Prid. Non.  
Mart.

*Tuus merito tuo,*

G. J. Vossius.

CXCVII.

## CXC VII.

Hugoni Grotio S. P.

**N**ON facile dixerim, quantum mihi solatio fuerint geminæ literæ tuæ. Nam licet pro acerbo hoc casu, videor mihi satis fortis; tamen mentiar, nisi agnoscam subinde etiam non magna occasione malum recursare animo. Quid mirum? quando quem amisi, is erat, in quo post Deum, ingravescente hac ætate mea, plurimum fiduciæ mihi, meisque reposueram; ut non potuerint non acceptissimæ esse literæ, cum Salmasii, & Cunæi, tum imprimis tuæ, quibus erigere animum morientis voluistis. Nescio autem, num ab luctu sit, an fœda anni tempestate, an immodico labore, ac vigiliis, quod tribus mensibus malè habuerim. Sex prioribus hebdomadis, pedem domo non extuli, sex proximis unum illud potui, ut publici muneris causâ, ingrederer Lyceum, quod vix lapidis jactum ab ædibus nostris abest; sed videor mihi quotidie virium capere incrementa, & appropinquat blandior adolescentis veris aura, quæ meliora, melioraque sperare jubet: atque hæc eo etiam lubentius commemoro, ut causam videas cur plurimis literis tuis non responderim. Quarum postremis partim mihi Tragoediam misisti tuam, partim significas, ut locum quendam corrigi velis. Simulac eas accepi, quia ipse exire non poteram, per filium arcessivi Blauwium: Qui velle se excudere dixit, sed negabat id ullo modo ante proximas nundinas Francofurtenses fieri posse. Addebat, nec se, nec alium habere literas qualibus Auriacus excusatus, sed visurum quæ proximè accederent. Juro, nisi festinato opus putares, Francofurti tales procuraturum, quales petis. Video ejus prælum fervere plurimis, pluraque sub manibus habere; quare vix puto, ante duas hebdomades orsurum editionem: nempe ubi ea absoluta, quæ Francofurtum mittere cogitat. Sed ulterius si moram nectat, non patiar. Nec sanè is est qui calcaribus egeat, præsertim in tuis; unde certum lucrum: nisi vicinus Janssonius, ut solet, minoribus excudat typis, quo minori pretio divendat. Credo tandem acceperis filii *fr. pargelii* Reidanum; uti & de Terminis Vitæ variorum responsa ad Beverovicium. Epistolam ejus nunc tantum mitto, quia decretum erat includere literis meis Illustri Schitio tradendis, ubi ad vos iturus. Sed ille jam mensem, & ultra, præter expectationem suam hic cogitur hærare. Video Beverovicium hoc agere, ut judicium quoque tuum perscribas, ipse au-

tem tomo secundo inferat. Id quidem an placeat satis nescio, sed scio illud Rivetum antehac Theologiæ apud Leydenses Professore, ubi legit judicium Episcopii, dixisse se adversus illud scripturum. Et jam in eo totus esse dicitur. Salmasius, qui & ipse sententiam rogatus erat, & sic satis prolixum opus composuit, negat se passurum ut divulgetur; nempe maligno adeo sæculo metuit, ne & ipse vapulet. Et si & alteram causam habet. Scortum legi sua malit, quam ut in turba compareant. Credo, si Grotii vel Salmasii essent, quorum judicia promuntur, non invitatus se quoque Principibus permittum agnoscat Achivis. Nunc minuti quidem Heroes, & ut sic dicam Dii Patellarii, si modo Dei intercurrunt. Putavi tua interesse, ut hoc scires, & si ea sis prudentia, ut istorum etiam nescius, non sis scripturus quorum possit pœnitere. Filius tuus jam ante hebdomades duas Amstelodamo discessit. Causam nescio, sed maluisse mensem unum alterum remansisset, vel propter Blawium qui cum in Mathesi instituere jam coeperat. Sed nihil fecisse arbitror, nisi ex parentis voluntate, quibus absque dubio sua ratio constat. Uxori lectissimæ, & filio Cornelio salutem dicito. Sed & Lindembrochio, si occasio erit.

Amstelodami,  
clō Isc xxxiii.  
x. Kal. April.

Tuus totus,

G. J. Vossius.

## CXC VIII.

Jacobobo Roverio S. P.

**T**U verò, Cognate Roveri, ut libertatem tuam rectè accipiam, rogare etiam sustines? quasi aut hæc studia non ab humanitate acceperint nomen; aut illius sit excusare semet, qui utilem amicis operam navare studet. Mihi potius id reliquisses, qui ob dilatum (ex more scilicet meo) responsum, purgare me debeam, vel occupationes, vel aliud memorando, quò tibi satisfiat. Nec propterea in eo operam insutam, quam perdere nolo. Abundè enim nostri me publicè docere, privatim scribere, & quasi neutrum esset, vacare domesticis, amicis; ad hæc tot indigenis, & exteris, qui quotidie ex Germania, Gallia, Britannia, terris aliis, cum veniunt, compellare nefas putant. Quid reliquum literis? Ipse hoc tempore impeditissimus scribo. Quid mirum? Nox est, quæ plerumque curarum esse levamentum creditur. Vix est mihi qui tam multa in noctem

F f

rejjcere



reicere cogar; præsertim quæ hoc Epistolare hoc officium spectant. Quamquam sic quoque, illa mihi nunc levamentum; quia haur noctem esse sentio, quod te quomodocumque colloqui habeam pro curarum cessatione. Quæras fortasse, si ita animatus sim, cur tam tardè à nocte subsidium petierim? Plusculæ enim abiire, ex quo non respondi. Nimirum illud est commodi, in absentium amicitis, quod vacare iis tantum opus sit, ubi opportunum est; præsentibus sæpè, cum minime est integrum. Et tamen paucos ex amicis etiam absentibus habeo, quibus non partem aliquam temporis mei, utcumque illud pusillum sit, gratificari velim. Tibi verò, præstantissime Cognate, non volo modò, sed etiam debeo; Ut qui non passus sis studia tua, sine fructu meo procedere: Quod propter Epistolam tuam bonæ frugis plenam dico. Equidem ingratus sim, nisi hanc agnoscam humanitatem: Quæ si paulò maturius se exeruisset, etiam publicè fuisset utilis. Nunc quæ observasti, pleraque artem metricam spectant. De hac operis nostri Grammatici liber secundus tractat; qui jam dudum absolutus, ad quintum enim devotum, de Pronomine agit. Tamen si omniforum copia ita crescat, ut Appendicem concinnare operæ videatur; erit quòd publicè me tibi debere profitear. Utcumque enim non pauca mihi jam dicta ex iis quæ mones, tamen & reperi quod addere maluisssem. Nunc de verbis tuis quid dicam? Planè venusti sunt, sic ut Romani hominis videantur, & argumento, quod tractas, nihil convenientius. Sponsum haud dubiè, etsi haur dubiè, sua jam felicitate contentum, nova voluptatè Musa afficiet, tam suavis, & tam cari capitis. Equidem velim meo nomine, & illi, & sponsæ illius, optimæ virginis, omnia fausta apprecheris: Sed & Amplissimo Parenti tuo, & fratrum alteri Joanni, atque adeo toti domui vestræ. Præterire verò nefas sit Amicissimum Beverium, Inclytæ urbis vestræ Prætorem. Quibus omnibus, & uxor ac liberi salutem adscribi petierunt.

*Amstelodami*  
xiv. Kal. Maias.  
c10 loc xxxii.

*Amantissimus & studiosissimus tui,*

G. J. Vossius.

CXCIX.

Hugoni Grotio.

*Vir Amplissime, amicorum Optime Maxime,*

**E**unte ad vos Matthiisio, haud aliud scribere habui, quam quod his diebus haur lætus accepi, optimum, & disertissimum vium Erycium Puteanum, in periculum, aut cerè molestias aliquas incidisse. Scripsit stateram Belli, & Pacis, quo nonnullis de partium suarum impotentia prolatis, complures offendit. Notii fastum Hispanorum, & Principum aures, quorum nec hæ, neque illi veritatem accipere sustinent. Itaque nisi nosssem multos ei in aula Bruxellensi, quò vocatus est, amicos esse: nisi quoque ingenium, & eruditionem illius æstimari scirem, sinistri aliquid vererem. Nunc optima non omnino despero. Utinam non aliud audire cogantur, quam quod olim in simili ferè negotio, à Phalaride aiunt fuisse dictum Simonidi? *Μέλοισιν οὐδὲ Μουσῶν εὐκλέης πόροι.* Rerum hic novarum nihil. De Pace adhuc ambiguar opinionones. Haud dubiè, priusquam conveniat, de nostris, aut hostium armis aliquid audiemus. Opus nostram Grammaticum quotidie procedit. Jam libro quinto prælum fervet. Reidanus filii mei Dionysii intra hebdomadem unam & alteram finem accipiet. Simulac editus erit, tibi mittet, qui jure tuo non illum modò, sed quicquid etiam à me, aut meis proficiscitur exigere potes. De filio tuo subinde Rectorem Oltendorpium conveni, cujus literas accipies cum meis. Absque eo esset, fusiùs scriberem. Ingenium semper laudat. Visus tamen paulo plus diligentie requirere. Quod celare non debui, quatenus tuis, non minus quam meis benè volo. Quia una alteraque hebdomade domi eum meæ non videram, ipse accessi domum illius, & commonui, ut frequentius me, meosque inviseret. Simul aurem vellebam de Oratione quadam è Tacito, quam promiserat se carmine redditurum. Non desinam eum mone-re, & hortari, omniaque illa facere, quæ te velle scio. Vale Amplissime vir.

*Amstelodami,*  
c10 loc xxxiii.  
v. Kal. Sextil.

*Tuus tuo merito,*

G. J. Vossius.

CC.

Guilielmo Archiepiscopo Cantuariensi.

Reverendissime in Christo Pater, Domine Illustrissime,

Nescio felicem me an infortunatum appellare debeam. Quippe hinc ingens ille favor, & affectus tuus, me tantopere evehit, & singulari gaudio implet, quod tum magni, tum eruditi Præfulus cum mihi amorem obtigisse videam: inde rursus angor, quod in tanto affectu tuo quem par est animum testari nequeam. Semper occupationibus obrutus nunquam meus sum. Et si forte aliquod respirandi spatium, simul & otium spero colloquendi cum iis, quorum aut favore obstrictus sim, aut amicitia, subito plerumque nova moles ingruet, ut jam dediscam sperare vacuum à laboribus tempus, qui semper negotia nova habeam dum adhuc veteribus quam maxime distineor. Equidem non ignoro ad labores hominem natum, & quietem hic solidam habere nequire. Sed-enim cum cogito ingratum me videre posse in optimè de me meritis, quorum inter primos te, Illustrissime Domine, pono, parum abest, quin importunis adeo occupationibus indignor. Pudet dicere quod menses elapsi sint ex quo tibi, Reverendissime Pater, debeo literas & gratias pro eo quod benevole adeo cætera etiam ad Marianum pertinentia transmiseris. Ita ut si moram compensare gratiarum magnitudine æquum sit, nulla verba inveniam, quibus satisfacere possim. Animum solum tot & tam variis impeditum nihilominus semper veneratione tui plenum retineo: & quia ille bonus est, facile veniam spero apud te, Illustrissime Præfulus, qui humanitatem tuam prolixè adeo in me effudisti. Nunc tandem quas diu volui literas celerare libuit ob occasionem. quâ non aliam habere meliorem potui dum apud nos est Præstantissimus Boswellus: cujus si eruditionem æstimem, non minus miror ingentem, quâ te prosequitur venerationem. Volupe fuit mihi sermones conferre cum eo, quem pro summis virtutibus tuis tantum esse cultorem tui, viderem: cumque eo pro cuius pietate, doctrina, industria, magna in Hibernia incrementa additum iri spero melioribus studiis. Cæterum ad Marianum ut veniam, eum in lucem mittere per diversa hæc tenus nequivi. Nam & cura operum quæ sub prælo habeo obstabat, & Typographus tam multa & varia receperat ut culpæ non possem, si moræ aliquid postularet. Non committam tamen, quin primâ, quam Deus

dederit, occasione, præstem, quod & tibi & mihi in votis est. Tantum breve spatium rogo, quo in ordine redigam mea, & expedire animum liceat ab iis quibus nunc distinetur. Te interea, Illustrissime Domine, supremo numini, me & illi & tibi commendo: atque oro ita habeas persuasum, neminem te inter Belgas habere, qui Illustris ac Reverendum nomen tuum devotius veneretur.

Amstelodami  
clō lōc xxxiii.  
vi. Kal. Sextil.

Reverendissimi & Illustrissimi  
nominis tui Cultor,

G. J. Vossius.

CCI.

Claudio Salmasio S. P.

Committere, maxime Vir, nolui ut communis amici nostri Hugonis literæ ad te sine meis irent; si non ob aliam causam, certè ut hoc saltem modo tres amici simul ut possumus essemus; quorum illum iniquitas temporum, te valetudo, & cæli inclementia, & credo domesticæ etiam curæ, me publicum docendi munus congregi nondum patitur. Sed spero vigorem tibi jam pristinum rediisse, & ut homines satis æqui non sint, aëra saltem esse. Hujus duritiem adfuetudine, illorum invidiam animi magnitudine facile superabis, præsertim si cogites Sophocleum illud,

Πείρα δ' ἔχοντο τὸ φθόνου ἔργον. Optasses fortasse alio documento tuas virtutes intelligere: sed certiori non poteris. Scio quæ mihi evenerint, quatenus infra invidiam me esse debere putem. Et sic hoc inter arctiora amicitie vincula, quod quamvis bene meriti præmia parum digna pariter retulerimus. Sanè abundè solatii mihi est quando tot bonorum, & his & aliis in terris, & posteritatis simul judicia cogito. Quæ tibi, optime maxime Salmasi, excellentiora longe & jam obtigere, & deinceps erunt. Reputemus etiam mercedem hic ereptam à supremo & beneficentissimo mortalium rectore cum scœnore rependi. Salutem plurimam Uxori tuæ meo, & meæ nomine dices, quam, licet ignotam, æstimo ob egregium parentem & majorem conjugem. Summis etiam viris Cunæo, Scriverioque cum occasio dabitur, salutem impertias rogo.

Amstelodami  
clō lōc xxxiii.  
Kal. Maiis.

Tuus sine fūco & more majorum,

G. J. Vossius.

F f 2

CCII.

## CCII.

Joanni Skytte.

**V**IR Illustrissime, quamvis inexpectato generosi filii tui discessu prævntus, malui tamen tumultuarias prope ad te literas dare, quam nullas. Adstringebant me huc nupera promissa, & ipsius filii tui rogatio. Cui ego quomodo hoc negare possim, cui majora longe sponte etiam obtuli? Accedit quod non alias à me gratiores fore literas scio, quam ejus manibus perlatas, quem non possis non carissimum habere, sive naturam spectes, cum nullum reperiatur arctius vinculum, quod parentes liberis adstringit; sive indolem generosi filii tui, quæ virtutis via ad excelsa grassatur. Videor jam omnino videre mihi illum in summis regni vestri honoribus, quibus si tales multi fungantur, qualem hunc futurum confido, dubium non est, quin gloria gentis vestræ auctura etiam sit gloriæ gradum, quem virtutis suæ merito, & magni Gustavi affectu obtinet. Etenim & ingenio filius hic tuus est acris, & ætatem cum confidero, pro ea sane judicio excellenti, & pro iisdem annis studiis non leviter tinctus, præfertim quæ fortunam ejus decent. Ac nequid auribus tuis dare videar, ipse egregium hujus rei argumentum videbis, vel Panegyricum ejus. Multa adeo bonæ erectæque mentis indicia apertissima in eo se exerunt passim. Ob subitum discessum non potui legere, quæ cura vellem. Sed carptim id facere cogebar. Verum ex ungue, quod dicitur, leonem. Ut monumentum etiam sit futurum, quod posteris placere possit. Satis etiam laudare non possum generosum filium tuum Joannem. Tantus in eo est ardor studiorum: Nec præter eum retinuit illum apud nos quicquam. Existimabat enim inanes fore labores, quos apud nos hæctenus studiis impendit, si ea in medio cursu defereret. Alioqui postquam cum à te, Illustrissime Domine, arcessitum intellexi, serio hortatus sum, ut paternæ voluntati obsequeretur. Meum non fuit inquirere, cur scripsisses; sed ille arbitrabatur, nihil tibi gratius esse posse, quam ut hac ætate, qua sementis studiorum fieri debet, non destituat parentum de se & illustris familiæ spem. Itaque cum optime illi perspectum animum tuum putarem, nolui nimium urgere, ut iret, ne vel ignarus tuæ voluntati contraria consulerem, vel illo, quem sic amo, carere viderer velle. Imo vero cupio in omnibus illi prodesse; eoque nulli parcere labori animus est. Priusquam finio, debeo quoque gratias tibi agere, Illustrissime Domine,

filii mei Dionysii nomine, quod cum ad te cum liberis venire tuis iterum volueris. Nunc id opera ejus, quibus prælum fervebat, non patiebantur, sine offensa multorum, & ingenti damno Typographi. Interea tanto acrius generosi filii tui studia juvare conatur, ut se gratum ostendat pro eximia hac humanitate tua.

Deus Opt. Max. rogo, ut diutissime te saluum præstet regno Suecico, familiæ tuæ & cultoribus, quos inter ego, & mei omnes nomen præ aliis profitemur nostrum.

*Amstelodami*  
Kal. Jun.  
Styl. Greg.

*Æternum illustri tuo nomini devotissimus,*

G. J. Vossius.

## CCIII.

Joanni Meurfio.

Vir summe & nulli amicorum secunde,

**Q**uod non semel scripsi, & ut metuo, sæpius conquerar deinceps, non finit hoc vitæ genus, quod nunc dego, ut amicitias colam, quemadmodum oportebat. Unde est, quod raro quisquam literas à me accipit, nisi jam multis ante mensibus expectatas. Sed cum hoc male me habeat, in plurimis, tum nihil magis indignor, quam non licere mihi colloqui cum duobus tribus quos supra cæteros æstimo mortales. Satis nostri in his te esse uti & *τὸ μὲν* Grotium nostrum. Fateor sane jure te tuo, uti illos suo crebriores à me literas exigere. Sed quid agam, qui quo longius ætas provehitur, eo minus mei sum juris, contra veterum Romanorum mores qui ab Augusti ævo, missionem dabant vicena stipendia meritis: eos vero, qui senadena fecissent, sacramento solvebant, ac sub vexillo retinebant donec agros & præmia tribuissent. At ego jam bis senadena stipendia feci, nec labor minuitur, sed gravatur. Etsi negare non possim jus mihi esse recusandi. Sed si quid componatur, negare non sustineo, ut mihi ipsi culpam tribuere magna ex parte cogar. Nimirum sic cogito, Musarum castra non facere militiæ finem, nec certos habere stipendiorum annos, sed vel maxime hic habere locum, quod dici solet, Imperatorem stantem mori oportere. Quantum ad opera tua attinet, ea brevi aggredietur Blauwius. Sed optat, ut si qua in adhuc editis addideris aut mutâris (& fieri vix aliter potest) quamprimum ea chartæ committas, & ad nos transmittas. Adscribam deinde operibus



bus tuis, quæ hic habeo, ut auctiora & si fieri possit, meliora etiam prodeant. Jo. Janfonius ante menses jam aliquot excudere cepit, quæ miseris. Et puto jam prope absolvisse. Seorsim etiam excudet Blauwius, quæ postremo accepta. Nihil tuorum in via utcumque silentio prætereirum in Literis meis. Nempe tam occupatus scribere soleo, ut non possim non aliquorum oblivisse, eoque Literæ meæ magis animum meum quam seipsum probare tibi debeant. Dionysius meus brevi tibi Historiam Reidani Latinè à se redditam transmittet. Opus egregium est. Versionem commendare ipse nolo: illud tamen dicere audeo plurimi laboris fuisse. Mittit nunc Panegyricum & Carmen ad principem ante V. menses editum. Nunc etiam Commentarios parat in Rabbi Maimonidis libellum de Idololatria quem transtulit ex Hebræo. Mittit filia mea tuæ, quæ postulatorum comparare potuit. De corallinis operam dedit nec successit. Nunc quoque dum hæc scribo in eo occupatur. Nos adhuc de pace disceptamus & eventus, in ambiguo est. Princeps Rhenoberkam obsedit. Nec Hostes segnes sunt qui jam xx millium exercitu Mosam transiere. Vale optime maxime vir & amice, plurimumque saluta Uxorem, Filiam, Filiumque. Sed & Laurenbergium ac Stephanium nostros. Quorum alteri orationem nostram, alteri filii Panegyricum dabis. Hoc enim fieri geminum exemplar misimus.

*Amstelodami, clō Ioc xxxiii.  
Post. Kal. Jul. Styl. Gregoriano.*

*Tuus totus,*

G. J. Vossius.

## CCIV.

Ger. Jo. Vossius *V. Cl. Erycio Puteano S. P. D.*

**E**TSI valde faveo novo honori præstantissimi viri & amici Plempii, tamen vere dico, cum dolore ab eo avellor. Plane maluissem ut patrium hoc Lyceum ingenii doctrinæque suæ laudibus decorasset. Præsens ejus properus abitus hæc mihi literas, vel potius tumultuarias literulas extorsit; uberiores dari nunc oportebat, quia raro iis procurandis tam boni offerantur amici: sed nunc facere quod possum, cogor, non quod volo. Intellexi his diebus editam à te stateram pacis & belli, multis quidem ingenii & doctrinæ indiciis reluctantem, sed φιλαλληλῶς, quam tempora hæc ferunt. Quare & Bruxellas vocatus dicebare: non possum dicere quam id male me habue-

rit, sed tamen solatur eximia eruditio, & pius animus, & magni quos habes amici. Nec enim illi patientur tristius te propterea haberi. Tu quæso, si consultum putas, fac me quamprimum de rebus tuis certiores. Scis illud poetæ,

*Res est solliciti plena timoris amor.*

Summi numinis custodiæ te meque commendo. Scribebam præcipiti si unquam calamo.

*Amstelodami, vi. Cal. Sextil.  
Anno clō Ioc xxxiii.*

## CCIV.

Joannis Hulsmanno *S. P.*

**C**UM nihil, Clarissime Hulsmanne, lubentius legam, quam Præstantium virorum Literas, tamen adeo tardus sæpius sum in rescribendo, ut videri possim metuere, ne si diligentior hac parte sim, nimis multas ab iis accipiam. Quod non aliunde est, quam à negotiorum mole. Atque hæc in causa etiam fuere, cur prioribus tuis literis, tanto scriptis affectu, non responderim. Accessit fiducia facilitatis tuæ: sed nunc alteris etiam præventis, ulterius in scribendo esse remisso non licet, ne injurius videar in amicitiam nostram nuper initam. Quomodo enim, præterquam Epistolari hac via, colere eam liceat, quandoquidem tanto disjungimur intervallo? Itaque non facile committam, ut hac in re industriam nostram desideres. Multum enim, mi Hulsmanne, amo te, ac æstimo; ac crebro in mentem venit, jucundæ illius diei, quo unà de rebus divinis colloqui dabatur: sæpèque mihi optem tales recurrere; facile enim tum perspexi egregias animi dotes. Atque opinionem de te meam postea auxere duæ & viginti dissertationes tuæ eruditissimæ, quas muneri reliqueras. Deum oro, ut in hac statione diurnare contingat, quo deinceps similibus monumentis Ecclesiam bees. Nihil verò æque me in sermonibus tuis delectavit, quam quod studium pacis ac concordie junxisses amoris veritatis strenuè tuendæ adversus omnes, *ἡμεῖς καὶ ταπεινὰ τὰ πρὸς τὸ χεῖρ ὑπομνηστικὰς καὶ διδάσκαλ.* Nam quod de Ebonitis veteribus Eusebius scripsit, id nobis accomodare liceat, Novis illis, quos seunebionitas possis dicere. Rerum novarum, post Rhenoberkam captam nihil hic habemus. Etsi vero aliquot ab annis omnia fluxerint ex voto, nihil tamen æque exopto, quam ut bellum hoc pax excipiat. Cujus spem vel toto sinu admitto.

*Non*

*Non semper imbres nubibus hispidos  
Manant in agros.*

ut monte Flaccus. Quare & nobis, his locis, & Germaniæ etiam vestræ, imo & nostræ, quandoquidem in ea vitalem primo auram hausi, sperare liceat serenitatem post nubila & turbida. Quo in voto defino, idque eo lubentius, ne longior sim præter morem, qui verborum parvus esse soleo: solum rogo, ita tibi persuadeas, sicubi usui hic tibi ulla in re esse possim, vel aliis etiam, quos commendare nobis voles, operam me daturum, ut intelligas quanti te faciam.

*Amstelodami, vii. Kal.  
Septembr. An. 1633.*

*Te æternum amaturus,*

G. J. Vossius.

# CCVI.

Hugoni Grotio S. P. Hamburgum.

**E**orum quos vides, unus est nobilissimus juvenis Guldensternius Danus, cui Patrens superstes, Eques auratus, vir ut antiqui stemmatis, ita magnæ in Regno authoritatis. Alter est ornatissimus, doctissimusque Ernstius Helmstadiensis, qui in Academia Sorana juris Professor Meursiique nostri Collega fuit. Hi lustrata Gallia, Italia, ac Sicilia, nunc domum redeunt, magnæque felicitatis censent, quod Hamburgi sibi compellendi tui occasio erit. Perjucundum mihi fuit cognoscere judicium tuum de optima ratione instituendæ pueritiæ, neque mihi alius unquam animus fuit: sed proximis duodecim annis, & quod excurrit, vix ulla in Bataviæ civitate, potiri ea Doctoris, ac coetus quem describis felicitate licuit; ut omnino aut privatim domi alendus fuerit pædagogus, aut puer in scholas publicas ablegandus. Cum enim tota Reip. facies immutaretur, illud etiam cautum facit, nequis extra scholas publicas pueritiam institueret. Quo pacto hebat, ut nec Ecclesiastico, nec Scholastico munere dejectis studia sua prodesse, ad se suosque sustentandos: nec Parentibus qui Remonstrantibus addictiores forent, potestas esset liberos suos aliis committendi Præceptoribus, quam qui Synodalibus se decretis adstrinxissent: sed Decretum hoc paulatim in urbe hac, biennio proximo, aut triennio, coepit negligi. Ita ut nunc, tres quatuorve sint, qui seorsim honestiorum Civium liberos instituant, aliqui etiam in convictum recipiant: ringente admodum Gymnasiarcharum altero, nomine Stado, ejusquem de no-

mine nosti, filio, qui Patri in scholastica hac Palæstra successit. Is postquam Proceres me utriusque scholæ suæ curam gerere voluerunt, sæpe apud me conqueritur, quod Ordinum, Urbisque Decretum sic negligatur, eamque causam esse ait, quod tam paucos habeat discipulos, paucioresque convictores. Nec minus fatigat Scholarum alios, ut quicquid est scholarum hujusmodi disturbetur; sed furdis canit, quia plerisque ex ipsis Proceribus, altera magis via placet. Et sanè audio, eos gratulari sibi, de liberorum in privatis scholis profectu: sed quot numero distinctos, quam multos item in convictum habeant, nondum possim dicere, pleniusque de eo exquiram die crastino. Nunc fieri id non potuit; nec nisi hesternæ die literas de hoc tuas accepi. Intelligo ex filio tuo, uxorem tuam intra octiduum vel circiter hic fore, eamque Hamburgum cogitare. Id si est, de isto, & aliis, optima scribendi occasio erit. Habitat Lugduni Batavorum, Vir egregius & Cordatus, Matthias Overbekius, literatus ipse, ac literatorum amans; nec paucorum adolescentum, qui sacra studia excoluere Nutricius ac Mecenas. Hic nihil æque exoptat, ac studet, quam ut ex amplissima hæreditate, quam cum Cohæredibus adiit, decidatur portio, quæ sufficiat sex septem alendis, Philosophiæ, ac Theologiæ studiosis. Ac partim eo movetur, quod utile sit futurum Ecclesiæ Dei, his maxime temporibus, quibus omnes, prope in partes eunt; paucique adeo rectam insistant viam: partim illo etiam, quod certo sciat, nec ignorare Cohæredes possint, eam fuisse defuncti sententiam; cui grave est refragari, utcumque civili jure constringi fortasse non possint. Videor mihi ex Overbekio non obscure intelligere, Cohæredum esse unum (cognatum arbitror) quibus hæc non satis placeant, eoque à me mirum in modum petiit, ut ad te transmitterem, quem ipse hac de re consignarat, quo plenius mentem suam intelligas; simul rogavit, ut hoc negotium commendarem tibi, quem consilio & auctoritate aiebat plurimum apud Cohæredes posse. Hæc ea sunt, de quibus nunc ad te scribere volui. Vale, vir incomparabilis, & valetudinem tuam, pro qua innumeri vota faciunt, cura diligenter: salutatur te familia universa; simul filium tuum, de quo non dubito, quin magnis passibus, in studiis pergat; præsertim ex quo tecum assidue est, & te *Ερπιδιπντων* omnium habet.

*Amstelodami, cłoxxxiij.  
post. Kal. Octobr.*

*Tuus tuo merito,*

G. J. Vossius.

Gulielmo

## CCVII.

Gulielmo *Archiepiscopo* Cantuariensi.

Reverendissime in Christo Pater, Dom. Illustriss.

**T**Ristem nuncium huc allatum de morte Reverendissimi Domini Archiepiscopi Cantuariensis, lenivit mox fama, quæ adferebat, plurimorum eo vota, ac, ut addebant, Regis sapientissimi eo consilia tendere, ut tu in summo hoc pulcherrimoque Ecclesiasticæ dignitatis gradu locareris. Quæ mihi eo magis volupe fuit audire, quia & quo statu Ecclesia Christiana nunc sit, & quantum tibi pietatis ac prudentiæ ad eam dirigendam, quodammodo videor intelligere. Unde spem maximam concipiebam, fore, ut Dominus Deus, cujus in manu corda hominum sunt, magis magisque huc animos flecteret. Eo dum flagro desiderio, ecce Hagha mihi ab amico Literæ, quibus perscriptum, jam eam te in sedem ascendisse. Ac paucis post diebus idem disperfit fama, qua non aliam lætiorem longo tempore ad aures nostras advolasse possum dicere. Nec tamen tam bene in Batavia hac, nec puto in Britannia agitur, ut malevoli desint, vel etiam male creduli, quibus quia primæva sordet Antiquitas, exosæque est Ecclesiæ Disciplina, eo alteri hoc honoris collatum præoptent, nec linguæ id virulentia diffimulent. Sed istis moribus jam à multis annis in Ecclesia Dei vivitur: beneque agitur cum bonis si tales maledicere solum possint, malefacere non possint. Nec interim non magnus numerus eorum, qui rectius sapiant, ac mecum divinam venerantur Majestatem, cujus providentia huc fastigii perductus es, & supplices eandem rogent, ut diu te gravissimis hisce temporibus regere Ecclesiam permittat. Quæ quanto diutius prudentia tua dirigetur, tanto haud dubie felicius erit. Quantum ad filium meum Johannem attinet, cum ex tuo potissimum, Reverendissime Pater, consilio, & quorundam hic amicorum, revocavi: & agit nunc in ædibus meis. Quid facti mihi opus sit, & an remittere eum in Britanniam consultum sit, adhuc hæreo: Fortassis tempus me in hanc aut illam partem trahet. Filiorum alter Dionysius historiam patriam è Belgico sermone Latine transtulit, & vulgavit; quam hic mitto. Auctor Vir fuit doctus, gravis, prudens, & quod in Historico primum, Reipub. ejus quam describit, apprimè intelligens. Sed quorundam judicio, quia Guilhelmo Nassovio, Fritiæ Governatori, à Consiliis esset, Nassoviarum domui in hoc opere addictior, quam Historico conveniret.

Ab hoc fonte & capite esse arbitrantur, quod Vir alioqui laudatissimus & Belgicorum Historicorum facile Princeps, sic Arausionensium Principibus, & maxime Comiti Wilhelmo Nassovio bene gestorum gloriam adscribat, ut justum decus vix tribuat Federatæ Belgicæ Patribus: de quibus liberiora subinde judicia occurrunt. Ut mirandum non sit, si minus quandoque pepercerit, vel Serenissimæ Reginæ Elizabethæ, vel Gallorum Regi, vel Cæsari, vel exteris Principibus, aut Rebus publicis. Addidi huic operi alterum quod ex Lingua Hispanica proxime vertit de conciliandis Sacræ Scripturæ Locis, quæ in Pentateucho pugnare inter se videntur. Etenim utile visum est Christianis omnibus, quæ ad Quæstiones divini operis commentati essent Rabbiorum doctissimi: quorum ferè omnes opinioniones hic liber complectitur. Uterque hic labor in causa fuit, quo minus Maimonidis dissertationem de Idololatria consummaret. Nunc tamen ad eam rediit, totusque incumbit, ac vix sexta pars operis superest, ut intra quintum hebdomadem vel circiter Typographo tradi possit. Nec segnus ego desudo in Ecclesiæ Historia. Sed quotidie deploro, quod non in Villam aliquam me possim ad menses aliquot abdere. Nunc quibus horis non publico munere distringor, iis dicere non possum, quam multi interpellent, partim Belgæ, partim Exteri, plerique aut genere illustres, aut doctrina clari, quorum ego affectum non possum non exosculari: sed dum me illis do, dormiunt opera tot quæ habeo affecta. Quamobrem, adventante hyeme, gaudeo, quia tum magis meus esse incipio. Sed peccare me video, Illustrissime Domine, qui in his difficillimi muneris initiis, tam longis Literis tempus majoribus & melioribus eripiam curis tuis.

Deum optimum maximum iterum oro, ut quemadmodum te Gratia ac Providentia sua in summi Præfulis sede collocavit: ita etiam prudentia ac fortitudine roboret, & cunctis Spiritus sui donis cumulet: ut improborum consilia & conatus irrita reddat, ad Serenissimi Domini Regis, & florentissimi Regni Britannici, totiusque Ecclesiæ Catholicæ bonum.

*Amstelodami, clō Idc xxxiii.*  
postr. Kal. Octobr.

CCVIII.



## CCVIII.

Hugoni Grotio. Hamburgum.

Amplissime Vir,

**Q**UI has desert, nomine Johannes Fredericus Sliffer, Halasaxo, Lugduni aliquamdiu studiis operam dedit: unde per urbem nostram Helmstadium cogitans, aiebat, desiderio se maximo teneri videndi ac salutandi tui: quod quo honestius posset (utrum motu proprio, an consilio alieno non fat scio) obnixè rogabat, aliquid sibi literarum ad te dare vellem. Primum tergiversabar non tam quia hæcenus non vidissem juvenem, quam quia occupatissimus essem hoc tempore, & uxorem tuam quotidie hic expectamus, per quam quicquid scribendum esset, optimè curaretur: sed enim ille instare, & visus perhonestus, literarumque, ac literatorum amans. Quare tantillum nolui denegare. Proxius vero erat, ut una mitterem Reidanum à filio Latine redditum. Quippe jam mensis est quod lucem vidit, sed nolui ignotum onerare. Fortasse jam aliunde intellexeris de obitu Archiepiscopi Cantuariensis. Ei susceptus, ut audio, Episcopus Londinensis, vir ut mei tuique amantissimus, ita veritatis, & pacis admodum studiosus, & eapropter non æque carus illis, quibus novellitas, & dissidia placent. Deus diuturnam ei vitam diut. Aliquid hic cognovi de colloquio tuo cum serenissimo Daniæ Rege. Aliunde etiam percepi, ut Rex Poloniæ de te cogitèt. Mihi hæc per jucunda, qui optimè, ut debeo, tibi tuisque volui semper, nec velle desinam: scio tamen quid magis exoptarim; sed si Tardipede illo Deo, Dii Batavi tardiores esse pergunt, equidem infœlicitatis nostræ causa illis magis tribuenda erit, quam tibi, cui miserum est semper pendere. Quod cum dolore scribo. Vale, Vir, & amice incomparabilis.

Amstelodami, clolcccxxiii.  
x. Kal. Octobris.

Tuis tuo merito,

G. J. Vossius.

Postquam has literas exararam, pluribus cum Sliffero sum collocutus, & intelligo esse eundem, qui ante annum locutus mecum de recta studiorum ratione. Sæpius etiam me docentem audivit, imò & sermonem tecum habuit Hamburgi. Calixto Germaniæ, ut ego quidem cenleo, Theologo Principi, est familiaris. Hæc quia me fugerant, cum superiora scriberem, adtexere volui, quia ad commendationem ornatissimi, & doctissimi juvenis facere videbantur. Iterum vale.

## CCIX.

Cl. Joanni Meurfio S. P.

**Q**UAM tardus sit Joannes Janfonius in excudendis tuis Regibus Atticis, argumento est, quod nunc demum ad Indicem devenit. Ipse ad Nundinas Francofurtenses abiit. Petebam ab uxore & Typotheta primario, ut, quantum excusum esset, occasione hac ad te mittere liceret. Sed absente & nescio Janfonio, negabant se hoc audere. Nempe durantibus his inimiciis inter ipsum & Blauwium, sub quolibet lapide metuunt serpentem. Fortè quia Blauwio, non minus quam ipso, utor familiariter, metuere, ne Blauwio ea traderem; is verò quam celerissime recuderet, quo utraque editio simul prodiret, non levi hujus Janfonii damno. Hoc ne vererentur, jussi, ut chartas ipsi ad te mitterent obsignatas; sed furdis canebar. Quæ ad primum operum tuorum totum pertinerent, rectè accepi, inque ineditis juvit oculos & animum pascere tot bonis, quæ videre erat in lætis & latis illis tuæ Græciæ campis. Ringantur duo tres malevoli: justum virtuti doctrinæque tuæ semper pretium erit: invidi autem quid nisi pastoritia fistula excipiuntur à cunctis, qui studia hæc sciunt suo pretio æstimare. Ad editionem quod attinet, super eo ipse ad te Blauwius scribit. Metuo ne tibi longior mora videatur, quod demum post trimetris editionem auspicabitur. Sed, mihi crede, ita præsum ejus variis fervet, ut ante vix possit. Et præterea propemodum omni charta destituitur; nec ille modo, sed etiam Typographorum alii: idque quia Mercatores chartæ quod Bataviæ destinatum putabatur, id omne in Moscoviam, & loca alia, avexere. Itaque jam tertium mensem in Exercitationibus meis Grammaticis cessare operæ cogantur, me plane illibente. Nam exonerari tandem minutiis illis exoptem, quo totum me dem istis, unde & plus mihi honoris, & quod caput, publicæ gloriæ. Mitto tibi Reidanum à filio Dionytio translatus: de quo judicium tuum non anxius exquiro, gnarus ab amicis plurimum, qualiacunque etiam laudari. Hic tamen, ne quid dissimulem, satis magnis studiis labores ejus excepti sunt. Adeo & Conciliationes locorum *ἱερῶν* in Pentateucho scriptas ab docto Judæo, hac in urbe inter suos Ecclesiastâ; à filio verò meo in Christianorum gratiam, ex Hispanico translata, sed stylo qui argumento isti magis convenire videbatur, ne hosculos hic ullos expectes. Si minus ex hoc opere quicquam haurire

haurire sit, quod studia tua juvare possit, poteris donare Academiæ nostræ Theologo, vel alii amicorum, omnino invenient Theologi quod discant. Pauci enim Rabbinos legunt, vel intelligunt; At noster ille Manasses Ben-Israel (id enim Conciliatori nomen est) omnem prope ætatem in hujusmodi scriptoribus trivit. Maimonides, quem ex Hebræo filius idem vertit, & notis illustravit, properat ad finem. Rerum novarum publice vix quicquam habemus. Princeps quid agat, ambigitur; exercitum habet numerosissimum. Sed & hostium majores, quam antea, vires sunt, ut non aliud tempus, plus ei gloriæ addere possit, siquid præclari geratur. Quod si privata etiam notorum nosse cupis, Lugduni Festus suam Johannam Cuchlinam, suam Rutgersiam Daniel Heinlius, Johannes etiam Latius suam Balduiniam amisere. Festi Hommii uxor graves & diuturnos dolores, & cancro excruciatum corpus habuit. Testamentum una fecerant ambo ejusmodi, ut qui diutius viveret, meliori aliquanto loco esset, quam defuncti hæredes. Sed hæc ubi certam se mortem manere brevi videt, callide, marito ignaro, aliud fecit Testamentum. Itaque dimidia bonorum omnium parte quamprimum cedendum Hommio. Non Bibliotheca, non aliud quicquam, quin iusto sit pretio æstimatum. Sed Hommii non tam male ferre videtur, quam alii qui illi optime volunt. Cuchlina ex Bertii liberis non alios hæreditatem adire voluit quam duos illos, qui in patriam huc remearunt. Id Bertium pessimè habet, equidem doleo propter minimum natu, omni à culpa immunem, quem Bertius in memoriam soceri mei Franciscum vocarat, spondente pro eo in Baptismo uxore meâ. Heinlii uxor hydropica erat ex malo lienis, quod & alios morbos pariebat; nec multum à delirio aberat. Multum ei morbum adauxit infortunium fratris, Mercatoris Amstelodamentis, qui foro cessit. Ille verò conqueri solet de sorore, quod propemodum ex asse esset hæres Jani Rutgersii. Quasi, si qua hic culpa est, ea non omnis in Jano potius Rutgersio, quam Heinlia resederit. Salmasius Lugduni vivit, sed impetigine ita foede laborat, ut hæcenus invisere nos ausus non sit. Quanta simulas Heinlii erga eum nemo Lugduni ignorat. Et quod pejus est, traxit ille non paucos in partes, qui solo Heinlii amore, pessime de Salmasio loquantur. Foedum hoc malum obtrectationis, quo eruditi tantopere laborant. Proxus satius erat nescire literas, quàm eas foedare sic invidiæ & loliginis succo. Hugo Grotius Hamburgi adhuc degit; sed vitio stomachi mala vale-

tudine agit, ut hesternæ die ex filio natu secundo, qui studiorum causa in Urbe nostra agit, intelleximus. Equidem Deum non intermittam precari, pro incolumitate ejus viri, qui, si totum æstimemus, parem non habet, superiorem saltem neminem. In Britannia fato nuper functus est Abbotus, Archiepiscopus Cantuariensis. Successit ei Guillelmus, Londinensis Episcopus, vir pietate, prudentia, eruditione nemini secundus, mei quoque amantissimus; idem pacis publicæ summe studiosus, denique laudibus dignus majoribus, quam ego aut alius quisquam tribuere ei possit. Cætera cognosces ex nobilissimo Gulternio, & optimo doctissimoque Ernstio, qui lustrata Belgia, Germania, Gallia, Italia, Sicilia, hodie ad suos remeant. Petebant ut ad te literarum aliquid scriberem. Sed satius putavi ut Epistolam hanc Crugio tuo darem, ne fasciculo librario simul egrégium illud par onerarem. Dico salutem plurimam uxori tuæ, à mea, quam utinam meliori valetudine aliquando videam. Liberi etiam mei tuos impense salutant. Sed Collegas etiam optimos, maxime Laurenbergium & Stephanium VV. CLL. impertias salute. Vale.

Amstelodami,  
Pr. Non.  
Octobris  
cdo lxxc xxxiii.

Tuus æternum,

G. J. Vossius.

CCX.

Merico Casaubono S. P.

**S**timulac intellexi, Clarissime Casaubone, Reverendissimum Patrem, ac utriusque nostri Mecænatem, Guilielmum Londinensem hæcenus Episcopum, ad Archiepiscopalem esse dignitatem evectum, equidem præ voluptate mihi abripi extra me videbar, non tantum quod Præfulem utrique nostrum adeo faventem, summum in Ecclesia Britannica tenere dignitatis & auctoritatis locum cognoscerem; sed vel maxime ipsius Ecclesiæ causa; cujus statum indies in melius iturum non dubito, postquam nacta est Antistitem ejus pietatis, tam raræ prudentiæ, & eximia adeo doctrinæ. Non debeo apud te laudare eum, cujus mirandas dotes melius me novisti: tantum felicem prædicare libet Britanniam universam, maximeque Ecclesiam Cantuariensem, fortunatos nos, qui Præfulem hujusmodi nacti sumus. Det modo ei numen vitam longævam, & quotidie spiritu suo impleat

G g

pleat ad bonum Ecclesiæ suæ, & totius Regni Britannici; cuius prosperis ita faveo, ut patriæ alteri oportet. Hic rerum novarum non aliud est, quam quod noster & hostium exercitus iisdem in campis confederunt. Vires utrimque pares esse feruntur; nisi quod equitatu nos superemus, ex quo auxilia Suecorum (quinque millia equitum sunt) accessere. Plerique ad manus ventum iri antea arbitrabantur. Sed nunc plerorumque opinio hostem non facile se prælio commissurum, solumque hoc acturum, ut se castris suis tueatur. Magnus Hugo Hamburgi adhuc agit, & à Daniæ Rege vocatus est magni stipendii spe. An oblata sit accepturus, nondum mihi constat. Die hesternâ hinc uxor ejus ad illum profecta est, credo, ut simul de re tota consultant. Eo anxia magis deliberatio, quia & Illustrissimus Oxensternius, Suecici Regni Cancellarius amicis eum literis invitat. Quod ex conjugē ipsa accepi. Et scio in Poloniæ regno quoque de eo cogitari. Et jamdiu alicui se regno addixissent, nisi Batavorum Procerum aliqui in causâ essent, cur moras necerent. Mallent illi in patria eum vivere. Sed ita scissa studiis Respubl. efficere non possunt, quod volunt. Meus quidem animus eo magis inclinât, non diu recusatorem occasiones oblatas, quando tam averfam à se patriam experitur. Mitto tibi Historiam Belgarum, quam nuper transtulit Dionysius filius meus. Rogamus uterque gratum habeas hunc ejus laborem. Sententiam fide optima expressit; & exultatur scripsisse ea dictione, quæ historiæ conveniat. Cæsarem imprimis ac Tacitum imitatur; quos prope in sanguinem & succum vertit. Sed quid ego in judicio tibi præco, qui tuum potius judicium expecto? Solum igitur de Auctore ipso addam, fuisse virum Consularem, aliisque dignitatibus perfunctum, etiam Delegatum in Generalium Ordinum confectum, & à Consiliis Guiljelmo Comiti Nassovio, Frisicæ Gubernatori: ut non alter melius penetrare potuerit arcana hujus Reipublicæ. Magna scripsit libertate, non solum quæ externos Principes spectarent, sed etiam quæ ad Fœderatæ Belgicæ Patres pertinerent. Eoque noluit sua prodire, nisi duodecim annis ab obitu suo exactis. Nempe metuebat offensas Potentium quas prævidebat. Alterum quod Reverendo Decano Exemplar daretur, non habebat filius: sed nè *ἀδελφὸς* sit, mittit ei librum Manassis Ben-Israelis, quo conciliat ex Rabbiniis *ἐκκλησιαστικῇ* Pentateuchi loca, ex Hispanico à se translatus. Nec operam ea versione filius perdidit, cum nihil prope operosius sit, quam ostendere convenientiam locorum Scripturæ quæ pugnare videantur.

Non inutilem profecto laborem iis navarit, qui scribere posthæc in Libros Mosaicos volent. Non omnia in illo volumine probamus. Judæi est opus; in hac urbe *ἐκκλησιαστικῇ* inter suos. Sed tamen videbimus, ut qui posthac commentari in Mosaica volent, ex Rabbiniis sibi non lectis hinc deprompturi sint, quibus gratiam ac venerem suis concilient, & multijugæ lectionis honorem ab imperitis consequantur: Nimirum sic hodie vivitur. Alii vere eruditi, alii videntur. Pecunias meas quod attinet, rogo, amicissime Casaubone, per Peysterum mihi dimidii quantum anni est mittas. Tantum enim debitum jam à superiori mense, qui September fuit: Tamen tam te amo, nolim incommodo tuo facias. Etiam negotium horti mei, & quicquid me spectat, tibi quantum possum, commendo. Spero & favorem Reverendissimi & Illustrissimi Domini Archiepiscopi prodesse mihi posse in re longè æquissimâ. Salve cum conjugē lectissima à me meaque & liberis.

*Amstelodami*  
cl<sup>o</sup> Ioc xxxiii.  
Id. Octobr.  
St. N.

Nomini tuo devotissimus,

G. J. Vossius.

CCXI.

Hugoni Grotio S. P. Hamburgum.

Quam afflixerit me casus hic tristissimus, amisso filio carissimo Dionysio, me etiam tacente, facile per te æstimabis; ut qui & illum non malè, & me cognitum habueris: eoque perspicias, quantum in eo præsidii fuerit, ingravescenti, & continuis laboribus ac vigiliis paulatim defetiscenti ætati meæ. Nec possum non cogitare, quantum amiserint natu minores liberi mei, quorum ille studia, ac mores, paterno potius, quam fraterno affectu moderabatur. De uxore quid dicam? cuius unus ille molestiam, & ægritudinem idoneus erat detergere. Quid multis opus? omnes ejus obitum vehementer dolemus; non quidem ipsius causa, qui ut vitam duxit, pietatis, ac devotionis plenam, ita sanctè in Domino obdormivit: sed nostri ipsorum gratiâ: qui in recenti adeo dolore, fortasse paulo essemus infœlices minus, si infœlicitatem nostram minus intelligeremus. Et tamen cum cogito, quanto nunc meliori conditione sit filius, Deumque esse, qui & dederit, & abstulerit; cum optimè perspexisse quid filio, quid mihi cæterisque



que expediret: Illam quoque esse virtutem aliorum liberorum, ut poenitere eorum non possit; quin de plerisque, vel potius omnibus, optima maxima liceat sperare: planè, inquam, quoties hæc cogito, ingratiſſimus quidem erga Deum fuero prorsus, nisi sic quoque mihi videar admodum foelix, dummodo grata mente sciam, divina agnoscere beneficia, erga me, & meos. Dabit spero Deus, ut magis & magis hæc animo obversentur. Et credo à tristibus istis cogitationibus avertent occupationes; quæ utinam non nimis forent; Nunc unde subsidium in tali negotio foret, inde verius obruor. Non de studiis queror, quæ moderari ipse possum: sed de tam multis, qui quotidie nunc consilium, nunc operam requirunt meam. Nam vix è Lyceo nostro pedem extuli, cum interpellandi initium video, non finem, nisi quum ad cœnam vocor. Quare interdum cogito mecum de Veteribus Romanis, qui in Tusculanum, aut Pompeianum aliquod se abdebant. Ego id non possum, qui quotidie publico munere distineor. Sed ut possum, quando non ut volo; vel potius deinceps debeo, quod possum. Sic enim Deo visum. In Grammaticis exercitationibus jam tribus mensibus cessatum, quia charta Typographo deesset. Verum videtur jam redire velle ad ea quæ supersunt absolvenda. Multo diutius si differat, non ante nundinas proximas lucem videant. Est mihi hæc mora cò molestior; quia ætati huic alia conveniunt. Scies me jam Juris Canonici Doctorem factum. Publicè enim cum ex Eusebio, & veterum aliis enarrassem Historiam Ecclesiæ, usque ad Concilium Nicænum, cœpi de Conciliis ipsis tractare, & jam enarravi Canones Concilii Nicæni, Ancyran, Neocæsariensis: sed & Illiberitani, quod in codice Græco, à Justiniano confirmato desideratur. Vident nostri homines, non paulo aliam fuisse faciem Ecclesiæ Veteris quam nostræ. Vident & Pontificii, nec suas Ecclesias ex amissis antiquis temporibus respondere: Imo multa esse maximi momenti, ubi à veteribus sit recessum. Insolens & argumentum nostris terris, eoque in magna hac urbe, numerosior conventus auditur hominum honestissimorum. Candidius & modestius hæc tractare non poteram. Atque hanc laudem mihi omnes concedunt, etiam qui quædam mallent præteriri; quò facilius aliis eant persuasum, Antiquos Patres, in maximis, mediis, minimis, à partibus suis stare. Ego verò, ne Crabrone irriterem, quod verissimum est, subjicere soleo, assignatum Historici munus esse: Historiæ autem animam esse veritatem, eoque non videndum, quid horum,

vel illorum opinioni, ac consuetudini sit congruentius; sed sine partium studio exponendum, quid antiquis temporibus placuerit: Num vero ubique, an alicubi, an nusquam, ubi recessum, profectum quoque sit, id non esse hujus loci expendere: sed tamen rem utilem facturos, qui vetera tempora cum novis, novaque antiquis componere volent, & causas utrorumque expendere: ut ubi nos melius, gratulemur nobis; ubi veteres rectius, non nimirum deinceps . . . . . nobis; Videor autem mihi hoc modo, apud non paucos, non illud modo consequi, ut minus iis sordet antiquitas; sed etiam veritatem fidei, & pacis, ac charitatis studium, promovere non parum. Adfuit mihi ante paucos dies, utriusque nostri amantissimus civis tuus Verhœvius urbis nostræ Medicus; retulit autem, ut Ludovico Houwen Mercatori Amstelodamensi, cum Johanne Gualtheri Mercatore Hamburgensi, controversia sit, ex societate quadam oborta. Hic Ludovicus Houwen nihil æquè desiderat, quam ut propter rerum humanarum incertum, tandem ratio utrinque putetur: nisi enim id utroque superfluit fiat, difficilius illud postea fore, magnaue fortasse secum tracturum incommoda. Hamburgensis quem dixi, est Affinis D. Assueri Matthilii, qui uxorem apud vos duxit: Et constat omnibus Hamburgensem eum, magno te loco, ut debet, habere. Quare cum sanctissimum sit, inter Christianos paci studere, & Ludovicus Houwenus, & ejus nomine Medicus Verhœvius, obnixè me rogarunt, ut hoc negotium commendare tibi vellem. Putant enim, si paucis eum monueris, feliciter hoc negotium confici posse.

Cum hucusque pervenissem, Medicus Verhœvius intervenit. Quare desinam, ubi unum hoc adjecero, me sedulò inquirisse, de Pædagogio quale desiderabas. Sed nescio, an satis omnia hic voto possint respondere. Scio qui decem, aut duodecim feliciter instituat, sed in uno convictu habet neminem. Quare necesse esset, ut apud Patrum, vel alium Adolescentuli viverent. Alius est qui in victu octones, aut plures habet; qui & ipse ab institutione commendatur. Palatius est aliquanto addictior Zelotis; quæ res efficit, ut paulo hærerem; prima occasione Patrum conveniam. Nunc demùm intellectum mihi ubi degat.

Vale Amplissime vir, & mei in sanctissimis precibus memor esto coram Domino; ac Conjugi dic salutem.

Amstelodami.  
xii. Novembr.  
cIo lxxiii.

Tuus totus,

G. J. Vossius.

## CCXII.

Ger. Jo. Vossius, Cl. Salmasio *V. Cl.*  
*S. P.*

**Q**uas ante aliquot hebdomadas literas mihi, eas jam puto accepisti. Alebar tum spe adventus tui, non tanta quidem ac fuerat, cum primum de te agebatur: sed non omnis tamen decollarat. Interea ex curatoribus Academicæ nostræ accepi, quomodo conditionem hanc abnueres, atque honestas etiam cur ita faceres, causas adferres. Itaque ut video nunc spe mea penitus excidi, neque ego modo sed quotquot se hic tantopere præstolabamur. Neque consilium tuum hoc improbare ausim; præsertim cum ex literis tuis facile perspexerim, nunquam fugisse te quid animi alteri foret, qui omnem moveret lapidem, ut ne iis animis res ageretur, quibus oportebat. Intellego nunc prælum fervere tertio exercitationum tuarum opere, quod si est gaudeo. Quid de me mirum? qui tot bona me docueris, seu linguam utramque spectem, seu scientiam naturalem, situm locorum & prope disciplinas universas. Vere hoc quoque Exercitationum ad Solinum opus est thesaurus, non liber. Nec inferiora scio erunt, quæ consequentur. Quin tanto fortasse potiora, quanto præstat Solino Plinius, cui ni fallor nunc uni desudas. Ringantur omnes malevoli atque invidi. In eo studiorum genere nihil simile ætas nostra vidit: utinam conspiciat posteritas simile. Sed hoc voti est. Nunc quidem unus es qui ista possis. Spero brevi fore, ut non solum de Rep. literaria bene merearis: sed etiam de Ecclesiastica antiquitate, & Catholica illa Ecclesia quam Symbolo nos credere profiteamur: sed plures jactant quàm noverunt. Et jam quidem præclara hoc de argumento exorsus es. Ea ad pertexenda Deus confido valetudinem suggeret & vires. Et si te occupatissimum scirem & ipse etiam satis multis distringerer; committere tamen non potui, quin affectum hunc meum literis iterum apud te testarer. Vale maxime & amicissime Salmasi.

*Lugduni Batav.*  
clō Ioc xxxiii.  
Id. Novembr.

## CCXIII.

*Amplissimo viro Jacobo Wittens Quaestori Dordrechtano S. P.*

**F**eriis nostris autumnalibus, Amplissime, & Coniunctissime Wittii, excurreram Hagam-Comitis, unā cum filia natu majore: At eo id animo à me factum fuit, ut inde eam abducerem Dordrechtum, quo visendis amicis, tuæ ante cæteras familiæ, biduum, vel triduum daremus. Sed enim vix pedem posueram Hagæ, cum intelligo de gravissimo lectissimæ uxoris tuæ morbo: quæ res, & mihi & filiz maximum attulit dolorem. Quare importunissimum tempus ad vos proficiscendi ratus, consilium de itinere hoc mutavi. Amstelodamum redux, & quidem non una postea hebdomade, cognovi ex affine tuo Viviano, viro sanè ex reliquiis aurei generis, necdum quidem optimè esse conjugii, sed indies tamen convalescere; quod mihi non mediocri voluptati, nec mihi solum, sed universæ familiæ meæ fuit. Nam ut liberi nostri, non sanguine juncti essent; cui me familiæ benè velle æquius esset, quàm cui hinc parens, inde focer, ante annos prope modum quinquaginta fuerint innexi? Sed solidum ac diuturnum hoc esse gaudium, non fivit tristissima calamitas, quæ me domumque meam adflixit. Puto enim jamdudum ad aures tuas pervenerit, ut amiserim suavissimum Dionylium meum; quo superstiti, omnia adversa facilius ferebam. Deum immortalē! quantū ille de se, imo, prope dixerim, quid non spondebat? Quis ejus ætatis Classicos Scriptores, Latinos, & Græcos, diligentius evolverat? quàm feliciter, etiam ubi magni viri sæpe hærent, enucleabat? quanto cum genio imitabatur? Quis plurimum linguarum notitiam complexus? Non ego illas vulgares dicam, in his Gallicam, Italicam, Hispanicam; solum nominabo eruditas illas, ut Hebræam, tum antiquiorem illam, tum Rabbinicam; Item Syram, Chaldæam, Arabicam; Armenicæ etiam, ac Æthiopicæ dare sese coeperat: Vix anni spatium requirebatur, quin multa, magnaue habuisset Resp. literaria, studio, operaque ejus perfecta: Nec illa Linguarum modo variarum, & multijugarum, eruditionem testantia, sed acre etiam ingenium, limatissimum judicium, & quod ante omnia puto, eximiam pietatem. Nunc immatura mors spes omnes abcidit. Nisi quod dispiciam, quid factū optimum de Maimonidæ opusculo, ex Hebræo Latine ab eo reddito, & no-

tis

ris illustrato : Item de Julio Cæsare quem post Scaligerum ipsum, feliciter innumeris pænè locis, castigavit, & notis eruditis fecit planiorem. De cæteris consilium sequar Plinii, qui non perfecta haberi jubet pro non inchoatis. Sed feralibus illis missis, (in quibus Christianum pectus, voluntatem divinam, pro lege habere debet) ad aliud venio, de quo jam diu ad te scribere in animo habui. Credo, meministi, me cum hic esses, tecum loqui de eo, quomodo Brunæus, ex conjugis sorore natus, ex canonicalibus bonis, urbis vestræ beneficio frui posset, quod Francisco meo focer tuus, piæ memoriæ procurârat sponte. Sed serò me tum locutum cognovi, quia jam alteri facta esset promissio. Putavi nunc mihi temporis te conveniendum in re simili. Matthæus meus post Kalendas, proximus triennio roto fructurus sit hoc beneficio; quemadmodum literæ super eo datæ testantur. At ego paratus sum, beneficio illi renuntiare, ab eo tempore, quo dixi, dummodò proximis Kalendis Januariis succedere contingat Francisco Junio, ex uxoris fratrem, Joanne Cazimiro, nato: atque is deinceps fruatur usque ad annum ætatis vigesimum quintum; qua lege conferri id beneficium solet. Sic prope quadringenti floreni mihi decedant, quibus honestè fruar, partim quia liberis id beneficii collatum, ex bonis Canonicalibus, quorum honesta semper fruitio fuit, dummodò dignis conferatur; partim quia datum non malè merito de urbis juventute per tot annos: partim etiam quia accepi, in solatium plusquam decuplo majoris summæ mihi immerenti, turbidis illis tempestatibus ademptæ. Sed enim cogito mecum non tam me indignum esse hujus pecuniæ, quam domum ætatis defuncti. Vidua enim cum liberis relictis parva in re est, ut nosse te arbitror. Est genere ipsa nata perhonesto. Filius Franciscus, de quo nunc ago, ut cognomine, sic & nomine avum refert: Et avi institutum vestigiis, magna spes est. Nec debet videri alienus planè ab urbe vestra: cujus Parens studia in urbe vestra hausit, avunculus magnus Henricus Corputius, tot annos benè de Ecclesia vestra meritis. Sed quod caput est, avus illius, maximis meritis, omnes toto orbe terrarum Ecclesias reformatas sibi vehementer obtrinxit. Vir undecumque doctissimus, nec ullo Theologorum quot sunt, vel fuere, inferior. Hæc ego pluribus sum persecutus, ut mihi curæ esse videas. Puer ipse optimi est ingenii, educatio optima. Nihil requiritur nisi ut studiis subsidium sit. Decretum mihi habere pueri rationem, ne avo, vel nobis, sit indecorus. Verùm si quid

nunc serius loquar, & licet triennio toto anticipem, tamen jam alicui ex magnatum cognatis facta sit promissio. Ecce igitur conditionem aliam. Si hoc ita est, & intra annum unum alterumve expirabit alicujus annus vigesimus quintus, qui hoc beneficio fruitus sit hætenus: Non repugno, quominus alius, quisquis ille, proximis Kalendis Januariis, sibi Matthæo succedat, dummodo Franciscus Junius, Joannis Filius, Francisci Nepos, post annum vel biennium, frui eo beneficio contingat, & jam ei certa promissio fiat. Pluribus, mi cognate amplissime, non morabor te, quem occupatissimum scio. Et certè si occupationes meas scias, mireris me, præter morem, tam prolixè scribere potuisse. Sed quia non mihi me natum scirem, sed aliis etiam, imprimis cognatis meis, vel liberorum meorum conscientia non fuit, ut hac in re essem negligentior. Salutem plurimam dices optimæ uxori, & liberis, item præstantissimis viris, Consuli Beaumontio, & Syndico Catfio. Item M. Berkio, Colvio, Bewerio, Becmanno, cæterisque amantibus nostri. Sed cum occasio erit, ne me operâ tuâ, in salutationibus ullis, abuti velle censeas. Vale.

*Amstelodami,  
cl. 16c xxxiii.  
x. Decembris.*

*Tuus, ut & tuorum,*

G. J. Vossius.

#### CCXIV.

Claudio Salmasio.

**N**ON facile dixerim quanto in luctu fuerim; imo quo in dolore nunc quoque sim. Semper enim recurfat memoria tam cari pignoris. Dies scio insipientibus quoque paulatim minuit mœrorem; nec in nostri ordinis hominibus ratio minus valere debet; quin potius prævertere in nobis tempus illud continet. Sed enim carendo eo filio, cujus virtutes rarissimas mecum optime intelligis, quotidie magis & magis intelligo, non quantum publicum modo, sed quantum ipse etiam amiserim. Omnino immaturus ejus decessus, meas quoque, non meorum solum rationes in studiis conturbavit. Minores vero natu, & Doctorem suum, & vitæ omnis ducem amiserunt. In ea calamitate nulla in re æque nunc solatium invenio, atque illis quæ Deus & Pietas suadent. Jubet Apostolus ne eorum instar lugeamus qui spem Resurrectionis non habent. Alter ait, beatos esse qui in Domino obdormierunt. Præterea doce-

mur



mur bonis omnia in bonum cedere. Pater ille cœlestis optime norat quid filio, quid mihi, quid meis expediret. Quare si subinde me recolligo, & cogito mecum quàm turpe sit futurum, si qui istiusmodi præceptis præire aliis ad constantiam soleo, nunc dolori ipse, eique inutiles succumbam. Magnasque Deo gratias ago quod me spiritu suo firmet, & profecto quam ingratus fuerim erga Deum, si solum cogitem quid abstulerit, non item quantum reliquerit immerenti in liberorum cæteris. Multum vero tibi debeo, amicissime Salmasi, quod ipse non bona valetudine, dignatus tamen sis me allocutione per literas, quæ & propter argumentum, & quia à te venirent, non parum doloris absterferunt. Solatio etiam fuisse literæ quas Triumviri illi eo in casu perscribere; Clarissimi dico viri, Cunæus, Burgerdicius & Constantinus: quos licet antea amicissimos, propterea tamen magis deinceps amari debeo. Nam alloquium, eorum tam opportunum pro grandi habeo argumento amoris erga me. Et si occasio dabitur, non refugies verbo hoc iis significare. Rescripsissem id ipse singulis: sed uti hæcenus respondere tibi neglexi, itidem illis, nempe ne literas tristes huius argumenti multas scribendo, dolorem mihi refricem sæpius, quem sepultum magis expedit valetudini & studiis meis. In tuis verò illis tam amicis scriptis, mi Salmasi, unum illud valde dolorem attulit quod, de invaletudine uxoris exarasti: tum autem quod medicorum iudicium esset, ab hydropo tibi metuendum. Cohorruui cum legerem, & mei aliorumque tui amantissimorum, & magis uxoris lectissimæ & dulcissimorum liberorum tuorum, & maxime boni publici causa; de quo non alius melius hoc tempore meretur. Sed tamen in mentem venit, eo hæc medicos dixisse, ut valetudinem tuam tam caram bonis, sedulo magis curares: Omniaque coelo huic nostro aliquanto inclementiori, convenienter agas: ac imprimis ne ad animum revoces, duorum fortassis aut trium sinistra iudicia, ac laudationes malignas, sed potius grato in Deum animo, sæpe illud cogites, quo in loco cœleste numen te constituerit, quasi in Theatro omnium Doctrinarum, in quo quicquid candorem cum præclara eruditione conjunxit, tibi ac præterea uni alteri (in his scis me dicere, tuum & nro Grotium) pariter adsurgit. Et cum tam benigna bonorum omnium iudicia experiaris, ut qui non eo te loco habet, si non doctrinæ, probitati saltem bellum indixisse videatur: tamen non dubito, quin præclariora etiam futura sint posterorum iudicia, præsertim si dederit Deus, ut ea quæ ad Ecclesiasticas An-

tiquitates pertinentia jam affecta habes, vel confecta in lucem ac manus hominum evenire contingat. Utinam mihi Deus tam longam vitam concesserit, ut laboribus illis tuis frui detur. Verè enim dixero, nullum esse studium, quod me à plurimis annis magis ceperit; nec malevolis æque censeo, quod superiorum temporum tempestate non levem bonorum meorum iacturam facere firm coactus, quam illud quod ab his studiis sim abstractus, quibus eo magis animo meo morem gessissem, & magis consuluissem publico. Aphrodisium de Fato, quem petieras ex Bibliotheca mea, mitto. Nec citius remitti postulo, quam tibi videbitur. Vel tota enim hyeme eo, & additis Scriptoris carere possim, propterea quod etiam compareant in Bibliotheca huius urbis publica, cui filius meus Matthæus est Præfectus; hunc enim honorem ei proceres nostri habuere, ut *maximè* fratri surrogarent. Quare si quid vel in ea, vel in nostra usui esse possit, scias non magis te promptum esse posse in petendo, quam nos faciles in mittendo. Vel quinquagenos si ex mea eodem poscas tempore, gaudebo, quod aliquo pacto liceat ostendere, quanti te faciam; & quam omnia tui causa velim. Uxor tuam salute plurima impertit, quam doluit de adversa ejus valetudine, tam gavisa est de secunda; Quam utrique vestri, & familiæ universæ diuturnam optamus.

*Amstelodami* iii. Non. Decembr. cl. lxxiii.

Postquam, Maxime Salmasi, superiores literas scripseram, intelligo ex meis ob intensius gelu nautas non audere se itineri committere, metu ne non sine maximo periculo congelarentur in via. Nempe dies hesternus, quo tuas accepi, postremus fuit, quo hinc solverent. Superest ut terrestri itinere liber mittatur. Sed id non satis tuto fieri solet, præsertim quia ut committam librum aurigæ, tamen is non ulterius contendit quam Harlemum, ubi alio opus qui Leydam deferat. Sed operam dabo ut fidum hominem nanciscar, ex iis quibus abeundum Lugdunum. Sane dolet, quod non statim tuæ satisfaciam voluntati, sed nunquam importuni, toto penè anno, posci liber potuerat, quam hoc tempore. Credo si præscisses, bido vel triduo ante scripsisses. Nimirum, mi Salmasi, discendum adhuc cœlum Batavum, & quomodo hic vivatur. *Tuus*.

*Tuus totus,*

G. J. Vossius.

CCXV.

CCXV.

Erycio Puteano S. P.

**M**agnus me luctus tenet, mi Puteane, amisso Dionysio meo, quem ego filium amare solum poteram, ob excellens ingenium, & raram hoc seculo, ea præsertim ætate, modestiam & probitatem. Nunc tam varia accesserat eruditio, nec illa in Latinis modo Græcique literis, quæ solæ totam hominis ætatem occupare possint, sed etiam Hebræis, Syris, Chaldeis, Arabicis. Ut de Æthiopum Lingua, & aliarum Orientis gentium taceam, quia objectari possit, istarum non multo plus quam gustum habuisse. Ut quoque præteream Gallicam, Italicam, Hispanicam, quibus loquebatur. Sed istas in vulgaribus haberi scio dici posse. Et jam Cæsaris editionem novam moliebatur. Jam Maimonidem de Idololatria ex Hebræo fonte in Latinam Linguam à se derivatum, & commentario redditum illustriorem, communicare Reip. literariæ gestiebat. Jam quoque animo conceperat ex Rabbis omnibus, quorum volumina avide devorabat, ingens volumen, quod præcipue complecteretur quæ ad Judæorum conversionem pertinerent. Nunc, si Maimonidem & Cæsarem excepero, quæ non multum desiderant (ita prope absunt à perfectione) omnia jacent plane imperfecta, ut etiam pro non inchoatis debeant haberi. Quid in Reidani Annalibus transferendis præstiterit, nondum potes vidisse, & hibernâ hac tempestate majusculum volumen commode satis transmitti non potuit. Sed enim curabo meliori occasione, nequid dignum amicis nostris in me requiras. Volo enim te omnium esse participem, quæ à me, aut meis proficiantur. Sed præter eam, quam dixi causam, altera etiam cur nunc non mitterem, accessit ratio, quæ à temporibus his erat. Utcunque enim nihil nisi innocentes cures Musas, tamen non ignoras, quibus temporibus vivatur, sane suspicionum, atque utinam suspicionum modo, ac non etiam malevolentiae, & pestilentiae plenis. Contemnamus hos uterque, mi Puteane, utcunque id durum videatur, præsertim ab iis si perferendum, qui ex literis nostris humanitatem hausisse debebant. Ego vero te ob amorem pacis amo impensius. Scio te ista & amore magni regis vestri, & simul universæ Belgicæ scripsisse. Valeant sanguinarii illi, quibus nihil dulce præter bellum & opes quas inde ingentes expectant. Equidem non tam rerum sum nostrarum ignarus, ut non videam innumeris opes bello accrescere. Sed

ego pro pecuniæ ac diaboli mancipiis habeo, qui bellum præoptent, si inter partes honestis transigi conditionibus possit. Nec aliud mihi persuadere possum, quam Belgicæ vestræ proceres belli, ac tot calamitatum pertæfos candidè nobiscum negotium hoc tractare. Deum Opt. Max. uterque, optime & amicissime Puteane, oremus, ut illis quibus negotium hoc incumbit, magis magisque animum illum inspiret, eorumque consilia ad exitum, utrisque partibus felicem, perducant. Barlæo nostro literas tuas præbui legendas, cui jucundissimum fuit videre, quanti se facias. Voluit ut suo nomine plurimum salutarem.

*Amstelodami.* Anno dñi M<sup>o</sup>CCXXXIV. iii. Non. Jan. Novusque hic annus, ut tibi, conjugi, liberis, felicissimus sit, voveo atque exopto, ut debeo.

*Tuus totus,*

G. J. Vossius.

CCXVI.

Conemburgio *Consuli* Roterodamensi  
S. P. Roterodamum.

**Q**uod, Amplissime Conemburgi, ab idoneo Scholæ præfecto, jam prospectum sit florentissimæ urbi vestræ; sane gaudeo, pro amore erga Remp. literariam meo, & affectu etiam erga eam civitatem, quæ non tam meum dixerim, quam communem Orbis doctorem dedit. Nunc verò intelligo, quam laboretis de aliquo, qui proximum à primo, in Gymnasio vestro teneat locum. Est autem apud nos, Justus Rienard, quem si sollicitetis, facile assensurum video. Est juvenis, à pietate & moribus laudatissimus. Latine idem Græceque doctissimus. Poesi etiam Græcanica egregius: ut omnino sapiat supra conditionem eorum, qui munus hujusmodi solent sustinere. Equidem si quid in talibus possum videre, (& experientiâ videor aliquid mihi consecutus) non utilitati modò, sed ornamento etiam, sit futurus urbi vestræ. Tanto magis de istoc mihi certiore te faciendum putavi, quod magnæ urbis nostræ proceribus visum fuerit, Operâ uti meâ, in exposcendo Junio vestro. Successisse negotium gaudeo. Sed non eo deterius urbi vestræ volo. Imo nihil æque exopto, quam ut sæpè se mihi occasio offerat, quâ affectum erga urbem vestram meum possum comprobare. Vale, vir amplissime, & benè de urbis

bis vestrae gymnasio, atque adeo civitate universa, mereri perge.

*Amstelodami*  
c1o 10c xxxiv.  
14 Nov.

*Amplitudini tuae ad-*  
*dictissimus,*

G. J. Vossius.

CCXVII.

Hugoni Grotio S. P.

**D**UÆ propemodum, Vir Amplissime, hebdomades sunt, cum ad te literas exaravi. Etsi autem sciam, ut non Philosophi solum, sed prope omnes scholastici ambulantes: tamen jam eas spero à Cassio acceperis. Paucis post eas scriptas diebus, Blauwius J.C. me convenit, seque omnia dixit comparare malle: ex animi tui sententia: eoque animo jam scripsisse Francofurtum, ut illius notæ mittant typos ac expetiisti; sed dubitare continuo cœpi, utrum tanti tam leve characterum discrimen putares, ut Blauwium propterea paulo minoribus edere jam paratum, disferre negotium velles. Interea respondi me super ea exquirere velle sententiam tuam. Et sic quoque scribendo, ac rescribendo, una altera hebdomas abiit. Quod molestiæ devorandum tibi erit, vel potius illi, cui accelerandæ editionis spem fecisti. Nescio, an ut debui jam ante trimestre de Zorziis adolescentulis ad te scripserim, an hoc ut metuo, morbo meo, in oblivionem venerit. Summa eorum, quæ vel scripti, vel scripsisse oportuit, ista erat. Patruum eorum, qui hic habitat, paratum esse, in domum suam eos recipere, pariterque animatam esse Conjugem, quæ attendere possit omnia munditiem spectantia; sese aiebat Patruus curaturum cetera, studiis exceptis, quæ haurient à Præceptore, non longè ita ab ædibus Zorgianis habitante. Huic toto prope die aderunt, cum decem, vel circiter adolescentulis aliis: quibus instituendis fidelem operam navat. Mihi id consilii non improbatur. Hac hebdomade jam longius aliquanto ab ædibus meis procedere cœpi, cum ante pedem non ulterius domo efferrem, quam in propinquum Lyceum nostrum. Nempe augent indies vires. Putabam ego ea mente, Petrum tuum Amstelodamo migrasse, ut intra mensem Hamburgum se reciperet. Videor enim tale aliquid audisse; sed cognatus tuus Hartigfeldius retulit mihi, ante diem unum alterum literas se accepisse à fratre tuo: ex quibus cognoscat, malle, ut Amstelodamum

redeat, ac uti cœpit, porro utatur seniori Blauwio in Matheli Doctore. Hoc si est, fatius fuerat remansisse. Nam Blauwio scio id commodius esse hyeme, quam æstate ob turbam, quæ de die domum ejus frequentat. Si redeat filius, nuspiam melius puto vivat, quam in ædibus Corvini. Is Kalendis Maii huc migrabit, ac domicilium habebit, ut Lyceo nostro, sic ædibus meis vicinum; scio Corvinum omnia tua causa velle. Quare facile spero, hac in re ad paucos menses gratificabitur, dum idem tibi videatur. Nam ut ad Ostдорpium Rectorem redeat filius, vix fieri potest: quia id nimium ei incommodat. Causas exposuit, quibus mihi fidem faceret. Nec obtrudi ei potest invito. Caput querimoniz erat, quod colloquiis ejus cum famulatio, operæ domesticæ impedirentur: familiaritate item cum Classicæ scholæ pueris disciplina sibi difficilior redderetur. Non ibo per omnia excusatum filium; sed tamen, quid mirum? si filius adolescentulus more ejus ætatis, colloquia, & lusus, cum domesticis quærat? præsertim cum vivat apud hospitem, optimum illum virum, & tui amantem, sed gravem, & exigui sermonis, ac fere valetudinarium. Lætiora ei omnia apud Corvinum erunt, & in propinquo domus nostra, tam benevola, quam si arcto ei sanguine juncta foret. Plura, hoc est domo mea, offerrem, nisi arctè, ob liberorum multitudinem, habitarem, & filio etiam tuo alterum magis expedire arbitrarer: sed si de Corvino non cadet ex animi sententia, tamen opera dabitur à nobis, ut aliter ei consulatur.

*Amstelodami*  
c1o 10c xxxiv.  
Nonis Aprilibus.

*Tuus totus,*

G. J. Vossius.

Qui hæc literas tradit, est Illustris Johannes Skitte, L. Baro in Duderof, &c. maximus natu trium fratrum, quorum minimus ante mensem, & quod excurrit, Hamburgo, ad nos profectus studiorum causâ. Juvenis est eximie probitatis, literarumque cultor, literatorumque omnium amantissimus, tui imprimis nominis, & cultor, & admirator. Eique sic poscenti literas has sic deferendas, dedi, quas alioqui traditurus essem Tabellario. Nempe arbitrabatur, meliorem sibi occasionem fore compellendi tui, si literis meis tibi commendaretur. Quod facio libens; nimium nihil aliud ei in votis, quam ut conspiceret te detur; simul, semel, iterumque, dum Hamburgi pauculis diebus subsistit, compellere te possit: quod tam minutum negare nulli



nulli soles: nedum huic grave sit hoc præstare, & generose nato, inque summas spes educato, & mihi longè carissimo. Uxori ab uxore salutem dicito, & omnibus tuis. Iterum vale.

## CCXVIII.

Jacobo Wittio, *Quæstori Dordraceno,*  
S. P.

**N**on pauci, dilecte Cognate, per se, vel amicos, suos transmittere labores, meumque judicium exposcere solent. Nec facile dixerò, quantopere sapius hæream. Nam si laudem, intelligentioribus videar ineptus; si vituperem, amicis eorum, & ipsis magis videar malevolus. Nunc in nulla Charybdi laborandum. Verè enim, & ex animo dico, simulac aureolos versus tuos accepi, ferreolum me Zelotæ cujusdam scriptum deposuisse: hisque quicquid molestiæ senseram prius, penitus fuisse detersum. Sed dic, O bone, quod alterius etiam versus, tuis esse comites volueris, Batavane simplicitate factum? An callidè potius, ut purpuræ tuæ splendor magis conspicuus foret? Sanè non soleo ego cuiquam detrachere, neque nunc faciam quia utrumque vestri æstimo; sed tamen injurius tibi sim, nisi dicam in perpauca me videre illam ingenii elegantiam, illum etiam Romani sermonis candorem, qui tuis in versibus relucet. O utinam sæpe nobis tales dares, & quod dicere liceat, digniori te argumento. Nam & illud non parum conferre ad hoc solet, ut nos in istis animi scetibus vivamus; & poematis quidè, non solis tamen, te inclarescere velim: fecundius quippe ingenium, quàm ut inde solum tibi laudem pares. Emaculandus, illustrandus, unus alter tibi veterum scriptorum. Abundè tibi gloriæ à prioribus relictum. Mox etiam alia, & alius generis sequantur; de quibus coram melius colloquemur. Equidem non possum non Beverwicum meum amare, quod utrumque hoc studeat, ut benè de publico mereatur, & se quoque tollat humo. Tunc, mi Wittio, te vinci sines? Profecto si tam caro capiti irasci possem, facerem illud, & facerem vehementius. Quo nomine? inquires: eo sanè quod illo ingenio, & doctrina, illo ætatis flore, illo otio, illis fortunæ bonis, præter duo tria poemata nihil elaboraris: Et quantum vel ex te ipso, vel aliis intellexerim, necdum aliquid sub manibus serio habeas, quo nomen tuum à rubigine vindices; quo familiæ nobili, & ante in Galliis, & jam sesquiseculo in

hac Belgica, novum decus addas; quo denique non exiguo sis ornamento urbi patriæ: de cujus honore ac gloria, bene multis annis, istic habitus, & tot liberorum ibi parens factus, plus multis indigenis; etsi id minime sciant, soleo cogitare. Vellem illam urbem, copia excellentium virorum cum quavis Bataviæ, vel Belgicæ certare. Si assurgere nondum potest ad Roterodami, vel Delphorum gloriam, (quantas animas duæ illæ urbes dederint, non capiunt miselli, qui carpunt) at saltem opera danda ut habeat qui proximè absint. Cætera curæ erunt Orbis Rectori. Hic tibi, conjunctissime Wittio, illam mentem inspirent, ad quam nunc te adhortor. Idem te, & universam familiam tuam diutissime sospites conservet. Salutabis in ea omnes; ac præterea & Colvium, & Beverwicum, & quoscumque fucato hoc sæculo, vere scias amantes nostri.

*Amstelodami,*  
clō Jec xxxiv.  
post Kal. Apr.

*Tuus sine fūco,*

G. J. Voſſius.

## CCXIX.

Hugoni Grotio S. P.

**R**edit, Illustrissime Domine, ad te generosus filius Johannes: cui, quod potui, hætenus præstiti; partim juvenis causâ, cujus id virtus, & amor doctrinarum merebatur; partim tuæ in spem gratiæ, quem boni omnes, ac prudentes, suo jure maximi faciunt; non modo ob sublimem locum, in quo es constitutus, sed etiam ob singularem doctrinam, & humanitatem summam: quæ virtus cum in omnibus, in Heroibus prope est divina. Atque ista etiam prædicant, qui his degunt terris; quia statim in oculos incurrunt; qui verò propius adsunt, laudant virtutes alias occultiores, non minus Heroem decentes; de quibus nihil à me expectas, qui non de te mihi ad te scribendum, sed de literis tuis, quas mei causâ, in Bataviam misisti. Sanè illustris filius Johannes honestam admodum memoriam sui apud Batavos relinquit. Præclare de eo censent urbis hujus procures: nec dubitant, quin patriæ sit futurus præsidium, atque ornamentum. De studiis quid attinet me scribere, quandoquidem viva ipse Epistola erit? Solum igitur illud dicam, exoptare me, ut ad suos reversus, unum alterum scriptorem nobilem, & eum potissimum quo genius maximè traxerit, assidue verset, & quotidie nonnihil scribendo, magis, & magis, eum exprimere conetur. Cœperat aliquid foeliciter tentare,

H h

de

de gestis maximi Regis Gustavi. Videre est in illis bonæ dictionis lineamenta, maximè ex Cæsare, & Tacito. Nec interea diffiteor, nondum stylum satjs firmasse; eoque opus ut legendo, & imitando pergat; illo pede, quo cœpit gressum, dies formabit, haud aliter ac in pueritia videmus: nam & eloquentiæ studium habet pueritiam, habet juventutem, ac vigorem suum. Pro victu utriusque filii mihi planè satisfactum. De luculento etiam honorario pro institutione gratias ago maximas. Accepi autem in universum imperiales octingentos, & quinquaginta. Minori contentus partem recusavi: sed urgente filio recepi; & sanè care vivitur apud nos, ob maximos census, quia nobis cum potenti hoste negotium est; sed consultius videtur, ut filius generosus Jacobus, potius aliis in ædibus, quam apud me degat. Melius extra domum meam cognoscat, quid ubique rerum geratur. Nihil me occupatius, ut vix sciam quid foris geratur; studiorum verò ejus nihilominus mihi cura crit, quin & potius major. Inque partem curæ, assumam filium meum Matthæum, cum aliorum, tum maximè omnis historiæ intelligentem admodum; & jam orsi eramus uterque, quæ deesse filio potissimum videbantur; & simul quibus imprimis caperetur: cum ecce narrat, sibi in animo esse Gallias, præcipuèque Italiam visere: velle autem ante hyemem proximam reverti, ad ulterius capiendum ingenii cultum. Primitus mirabar plurimum; sed ratione consilii hujus non aspernandas adferebat; satius enim esse, ut æstate peregrinetur: hyeme apud nos degat. Præterea nunc habiturum Ducem, & Comitem Skyttium, virum & doctrina egregium, & quod huc potissimum spectat, in probitate & prudentia pariter insignem. Quo alioqui sit frustrandus, quia cum illustis frater suus Benedictus impensè desideret. Insuper malle recentem à studiis reverti in Patriam, quam ubi quædam, peregrinationis diuturnitate in oblivionem venerint. Denique aiebat, animadvertere se, me editione operis Philosophici, quo in veteres, & recentes Grammaticæ artis scriptores, Aristarchum ago, multaque antiquorum illustro, vel emendo, esse aliquanto occupationem, quam ut æque sibi vacare possim, quam futurum esset hyeme, opere interim absoluto; & similia de filio afferebat qui distineretur Annalibus Batavis concinnandis: Eaque opera intra paucos menses absolvi posse cognorat. Mirabar filii ætate in ea prudentiam; sed filium tuum esse cogitare mox cœpi; occurrebat Poetæ illud, Est in juvenis, est in equis, patrum virtus; sanè animi est excelsi, magnaque sponder. Nempe totus est in eo,

ut nobile genus, nobiliori animo illustret, in quo multum abit à Nobilium, si sic loqui liceat, vulgo, quod quia vera non intelligit bona, umbris capitur. Tuum verò hunc, imo omnes tuos, vix opus ad virtutes, ac studia adhortari, ne fiat illud vetus, Equis ad campum. Deum Opt. Max. rogo, ut hanc in liberis felicitatem tibi perpetuam esse velit, teque, Illustrissime Domine, diutissimè incolumem servet, non tibi modo, & tuis, sed potissimum Suevico Regno; cujus etsi nomen inclytum semper fuit, tamen sub Gustavo nulli Regum inferiore, maxima honoris sui, per universum orbem; incrementa cepisse, nos exteri judicamus: & puto gens Suevica agnoscit non invita.

*Amstelodami,*  
iii Id. April.  
∞ Idc xxxiv.

*Illustrissimi nominis tui*  
*cultor, ad officia om-*  
*nia paratissimus, ti-*  
*bi, & generosis li-*  
*beris,*

G. J. Vossius.

CCXX.

Cl. Salmasio, Ger. Jo. Vossius S. P.

Magnæ mihi voluptati fuit conspectus optimi adolescentis Merceri tui. Juvit enim videre eum qui & affinitate tibi esset junctissimus, tantoque & parente & avo prognatus. Solum vellem ut apud me divertisset & aliquot hic hæssisset diebus. Si quando ipse occupator fuisset, colloqui cum filio potuisset, eoque Duce & Comite urbem hanc & quicquid in ea memorabile lustrare; sed negabat id ullo pacto nunc fieri posse. Quæso si necdum valetudo tua & anni tempus terant ut nos cum uxore, liberis, affine invisas, veniat is affinis tuus. Cura ejus habebitur tanta ut sollicitum te esse nihil sit opus. De botanicis scire aveo an propediem visura sint luccem: Memini te coram de iis loqui cum essem Lugduni. Ab eo tempore nihil intellexi, nisi quod Epistola quadam Lugduno percripta Hardervicum spes quoque eorum fiat. Vellem autem Literæ illæ paulo aliter meminissent ejus operis, in quo ut in cæteris fecisti tam multa, doctissimos etiam docebis, præclareque de medicorum filiis, ut alios taceam, mereberis vetera nomina explicando: quod non potest, nisi qui naturam & vires Plantarum exacte calleat. Ecquis maligne laudet, nihil ad te quia infra te, præsertim cum perversissimè sit fieri istuc non tam quadam animi

animi malitia quam in gratiam alicujus qui ferre illud non possit, ut in istis & tot aliis sapere etiam judicis ubi is plane videat nihil. Intellexi te aliquid, imo librum justum edidisse de vitæ termino, quem lucem videre exoptem, modò nihil in eo adversus receptam sententiam his terris *οὐδὲ περὶ τοῦ θανάτου* nec eam arripèrent. Damno hoc magno meo didici, atque istoc absque dubio apertè etiam fatis vides. Pluribus nunc colloqui tecum velim. Sed affinis ait sibi abundum, ut morari non liceat eum. Et mihi nunc eundem ad Gymnasium urbis, quia est solennis examini dies, unde mihi in curatorum numerum adlecto abesse non licet. Vale, Salmasi, decus nunc Baviæ quoque hujus & seculi deliciae. *Τέλει.*

Cl. bc xxxiv.  
v. Idus Aprilis.

## CCXXI.

Merico Casaubono S. P.

**C**Ogor me ipsum ridere, mi Casaubone, quod ad aliquem scripturus, fere tanquam à solenni formula ordiar literas meas ab excusatione diuturni silentii. Sed tamen nunc scio facile veniam à te & aliis impetrabo cessationis meæ, postquam ad veteres tarditatis causas longè gravior ex morore accessit, ob amissum optimum & suavissimum Dionysium meum, de quo sæpe ad te scribere cogitavi; sed cum calamum in manus cepissem, dolor recrudescere, quem cogitationibus aliis amoliri fatius erat. Mollitiem hanc animi accusabis, meque ad Philosophorum veterum præcepta deduces, & in primis ea quæ nobis solatia sacra suggerit fortuna. Istis verè muniò pectus sedulo, qui fortasse succumberem, nisi attenderem ad illa quæ nec gentium Philosophi ignorarunt; ac præcipue nisi oculos attollerem ad divinam Providentiam, quæ suaviter sic omnia dispensat, ut ea quoque quæ molestissima sunt carni, salutaria sint spiritui. Hæc mihi propono, his me solor, quoties occurrit qualem & quantum amiserim; Quot enim ille vulgares Linguas erat complexus, in his Hispanicam & Italicam, ut de Gallica taceam? quot etiam Linguas eruditæ non modò Latinam Græcamque, sed Hebræam, Syriacam, Chaldaicam, Arabicam, ut de cæteris nihil dicam? Quos etiam Poetas, Oratores, Historicos, Philosophos non legerat? & ita legerat, ut non magis memoriam mirarer in retinendo, quam judicium in ea ad usum transferendo. Sed nihil

æquè exosculabar, quam indolis bonitatem studiumque pietatis, & contemptum voluptatum, & aliorum quibus Ætas ista capi ac decipi solet. Nec virtutes hæ occultæ esse poterant. Itaque jam à proceribus nonnullis Regni Suecici agebatur ut in Sueciam profectus, ibi sex septem mensibus linguam Gentis addisceret, atque ad Archiva admissus ex sermone etiam præstantissimorum hominum, antiquas ac recentes res Suevorum cognosceret; inde ad nos reversus Regni ejus Historiographus, mercede non exigua cuncta literarum monumentis traderet. Quod si porro etiam operam suam regno vellet addicere, longè majorum ei in regno bonorum promissa fiebant. Itaque proceribus iis flebilis occidit: nulli tamen magis quàm mihi, quia si quid affectum habeam, imo quicquid aliquousque à me scribendo perductum, id si quid humanitus contigisset, optime unus pertexere potuisset: Sed quid hæc tam multis? gratias Deo ago, quòd talem mihi filium dederat: nomen quoque ejus sit benedictum, qui cum fortasse, ne à mundo corrumperetur, illa in ætate ad se recepit. Gratiæ quoque ei, quòd tot alios mihi liberos reliquerit, qui omnes (nisi quod in Johanne meo, majorem studiorum amorem exoptarem) industria vitæque exemplo planè mihi satisfaciunt. Quid Domino pro tot beneficiis rependam? Ita cum scriberem, ecce mihi tabellarius qui tradat geminum exemplar M. Antonini Imperatoris de vita sua Anglicè à te de Græco fonte redditi, notisque illustrati. Atque utinam linguæ, quâ scripsisti, intelligentior essem; interea Græca cum Britannicis, ut poteram, conferenti, maximè libro primo, & iis de quibus differis in notis, vitum sic fuit non pauca te melius Xylandro percepisse, viro aliquo doctissimo, beneque de studiis merito. Vellem Johannes meus in duobus tribus locis explicare, hærenti mihi, (linguæ quippe Anglicæ multis partibus intelligentior) sententiam tuam potuisset. Præsertim verbis de Sexto; ubi in laudibus ejus ponit, *τὸ ἀδελφικὸν τὸ διακινῶν*, nisi *δινομιμῶν* rescribendum. Tales enim instar simplices, nec attendunt ad multa amicorum minus laudabilia: quod ad conservandam amicitiam plurimum facit. Sed nihil pronuncio, quia incertia linguæ nihil certo mihi de mente tua ausim promittere, utcumque eam adsequi viderer. Sed ubi redierit filius juvabit plenius cognoscere. Aliquantò ante ubi Antoninus ait, *ἢ ἂν ἐνεργῶς ἴκον ἀνδρα ὅτι δὲ ἐκινῶς*, nonne præstaret, *ἐνεργῶς ἴκον*; præsertim quando *ἀσκητικῶς* antecellit? Ac post aliqua, ubi Severi nomen fetines, nonne rescribendum hoc pacto, *ὅτι δὲ ἀδελφῶς μὲν Οὐίρη τὸ φιλοτίκειον, καὶ φιλάλιδες, καὶ φιλοδιδασκαλῶν*.

H h 2

καὶ φιλοδιδασκαλῶν.



καλον, ἢ τὸ δὲ ἀπὸ γυναικὸς Θεοσάν, Ελπίδων, &c.  
Sed de istis tu melius judicabis, qui scripto-  
rem eum totum nunc, quod dicitur, in san-  
guinem & succum verteris. Præclarè meri-  
tus es de Britannis, quibus ex tanto Principe  
haurire præcepta sapientiæ licebit. Quam vi-  
am si, exemplo tuo, plures insisterent, multi  
Patriæ solum Linguae gnari, frugibus potius  
quàm quiescunt, pascerentur. Sed amicissi-  
me mi Casaubone, non possum te celare  
imbecillitatem meam quantumcunque mihi  
(fortasse & aliis) fortis videar. Cum ego  
hunc præclarum laborem tuum in manus su-  
merem, mox sese obrulit pagina à titulo  
proxima, qua laborem tuum inscriberes di-  
vino Viro, magno illi Mecænati nostro. Vide  
pugnantissimos nostros affectus. Gaudio in-  
genti erat, quod & illud illustre nomen de-  
corares, & nomen illud non minus decoraret  
opus tuum. Et tamen dolor ingens me in-  
vasit, ob amissum filium Dionysium, quicum  
ego omnia communicāram de officiis, quæ  
Heroi illi familia mea deberet; qui etiam  
prope nihil non ejus auspiciis edere decrērat.  
O spes hominum incertas! Nunc ego, nunc  
mei, tanto post te unum intervallo relictū,  
ut gemino jam monumento hoc egeris, ne  
ingratus videaris. Et sæpe metuo, ne qui  
merita Illustrissimi & Reverendissimi Do-  
mini sciant, & quomodo in Batavia hīc vi-  
vam, nesciant, vel fœcundiæ me reum agant,  
vel ejus vitii, quo infestis terra nihil pejus su-  
stinet aut creat. Utinam opus meum Gram-  
maticum (quod tanto mihi labore stetit, quo  
etiam præclare me puto meritum de Repub-  
lica literariâ) liberis potius post meum obitum  
reliquissimè divulgandum, quam ut nunc vi-  
dear tam lentum nomen, atque ut veteres  
dixere, vere trico & bovinator. Sed facta  
nequeunt reddi infecta. Non deinceps curæ  
huic aliud prævorti finam. Definam, nec  
sine dolore, unum si addidero, quod scire  
debes, jam ante menses aliquos, me accepisse  
à Peistero pecuniam, quæ provenit mense  
Septembri anni superioris. Itaque mense  
Martio hujus anni, totius semestris proven-  
tus mihi debitus, quem te paratum mihi re-  
fundere, simulac literas meas videris, jam ex  
Peistero intellexi. Multam salutem dicito  
Reverendo Dom. Decano, & universo fra-  
trum Collegio, quod colo, & colam semper,  
uti debeo. Optimam verò uxorem tuam non  
meo solum sed conjugis etiam nomine pluri-  
mā salute impertias rogo. Vale.

Amstelodami.  
clō Idc xxxiv.  
Kal. Maii St.  
Vet:

Tuus, uti debeo,

G. J. Vossius.

## CCXXII.

Joanni Meursio S. P.

Careo, Amicissime Meursi, tantopere di-  
lecto filio meo Dionysio; eoque careo  
(cur reticeam?) magno cum moerore; sed  
quem leniat dies, & imprimis divinæ volun-  
tatis cogitatio. Post excessum ejus lentior  
fui in scribendo. Quod non miraberis, si  
scias quantum amiserim. Equidem sæpe co-  
gito mecum, quis ille ea ætate; quantillus  
ego hac grandæva. Sed superanda omnis  
fortuna ferendo est. Atque hæc non aliqua  
animi mollitie, sed maximo jure à me scribi,  
facile videbis, ubi in lucem ejus Maimonides  
& Cæsar prodierit. Reidanus jam excusus  
fuit eo vivente, quem mittam ubi occasionem  
suggereris, vel ipse reperero. Scio, judica-  
bis sic interpretem egisse, ut, si viveret au-  
ctor, non alium votis debuerit expetere.  
Tua de Regno Attico credo jam acceperis.  
In qua editione siquid peccatum, nulli minus  
quam mihi vitio vertas; quandoquidem  
Janfonio (ita intelligo) visum, ut Harder-  
vici potius excuderetur, utcunque aliud in-  
scriptio præ se ferat. Aderam his diebus Ar-  
landerveniæ Domino Guiljelmo Noomsio,  
viro & literarum, & literatorum amantissi-  
mo, tui præ aliis prope omnibus. Cui cum  
exposuissim, quàm præclarè hoc ipso anno  
meriturus esses, editione multorum de Re-  
publica literaria: in his etiam Bibliotheca At-  
tica, & quæ de aliis scriptoribus consignasses;  
pro familiaritate, quæ ei mecum est, dicere  
cepit, paulo aliter convenisse, & periisse sibi  
sic laborem, quem in hoc argumentum in-  
sumpsit. Attamen, ut ingenue agam, inter  
eos qui tam mihi amici, satius existimo à te  
id fieri quam alio quoquam. Non dissiteor  
post abitum tuum multum ei argumento esse  
insudatum his locis. Sed enim quis orbe to-  
to intelligentior talium Meursio meo? Et ta-  
men non plane frustrandus voto suo Noom-  
sius noster. Puto, recte te facturum, si ex  
opere eo partem aliquam ipsi dedices. Satis  
animadverto sic satisfactum ei iri. Vel si dis-  
cerpi id opus non placet, dicetur opus aliud  
non plane dissimilis argumenti. Et ausim  
dicere, si bene virum novi (nosse autem de-  
beo) non ingratum cum fore. Nec enim  
fordidus est. Blauwius necdum opera tua  
excudere est exorsus: Duas suspicor causas.  
Una, quod opere nostro Grammatico disti-  
neatur; quod & duos tres menses morari  
cum poterit. Altera, quod ei lis sit cum vi-  
cino Johanne Janfonio, quam prius componi  
velit. Siquidem vix aliquid ullius momenti  
excudit

excudit Blauwius, quin recudat Janſonius; vix quicquam Janſonius, quin par pari Blauwius det hoſtimentum. Semel iterum uterque ( ſed fruſtra ) opera uſi meâ ad controverſiam hanc dirimendam; nec tamen ſopiri poſſe diſſido, ac brevi quidem ſpatio, damno ſuo uterque diſcet ſapere; ſed ſi bene rem capio, aliquanto iniquior Janſonii cauſa. Quod ſi animus iſte perſinax, vel, ſi malis, perſinax, utrumque gravaturus diutius, non deſinam properea Blauwium urgere ut quamprimum ſatiſſaciat promiſſo ſuo, & expectationi tuâ. Nec enim neſcio, quo affectu homines eruditi non illos ſolum corporis, ſed vel maxime animi ſœtus, ament. Scripſi hæc ſubito cum Lugduno huc veniſſet noſter Mullerius, ſequæ ad Dom. Roſæcrantzium poſt horam literas diceret miſſurum. Noluî enim tam bellam ſcribendi occaſionem omittere. Intelligo ante dies paucos Elzevirium profeſſum in Daniâ. Quod ſi iſſem, fortasſe occaſio fuiſſet per eum mittendi Reidani; ſed hominem non vidi, nec domi meæ fuit. Uxorem tuam uxor mea, & liberos tuos liberi mei ſalutant.

*Amſtelodami,*  
cId Ioc xxxiv.  
Pr. Kal. Maias.

*Tuus, ſi alius*  
*quiſquam,*

G. J. Voſſius.

### CCXXIII.

Stephano Goſſe S. P.

**E**Rgone, doctiſſime Stephane Goſſe, non ſatis nuper munificentiam tuam exeruiſti, donando me nobiliſſimi Viri opere de Veritate, & longè deſideratiſſima Clementis ad Corinthios Epistoła: deruoque Bibliothecam amici immerentis augere voluiſti præſtantiſſimi Seldeni ad Hebræorum leges commentario? Quas pro multiplici dicam tibi munere grates? Nunc enim quo paria faciam nihil occurrit; ſed ſpero, occaſionem datum iri magis teſtandi affectus. Popularis ille tuus ( ſcis quem dicere velim ) recuſat ſe ſubjicere Statutis Eccleſiæ Belgicæ. Rogatur ab amantibus, ut morem gerere velit. Quod & Eccleſiæ & ipſius cauſa facere ſe aiunt; ſed ille immotus perſtat veluti Marpeſia cautes. Ac miniſtris etiam Belgicis ſtat animus, non admittere in ordinem Eccleſiaſtarum, niſi ſententiam mutet. Aliàs ſi fiat perſcribam: nec officio in eo, vel aliis, unquam deero; non amore vel odio cuiuſquam: ſed quia bono Eccleſiæ omnia metior, quam doleo ſic

ſcindi, hinc ab iis, quibus tanti eſt Papalis auctoritas, inde ab iſtis, quibus præ novellitate tota ſordet Antiquitas. Abbatis Nihufiani diſſertationes mittere non poſſum, quia jam diu repetiit, & quod unicum iſe hoc habeat exemplar, extra urbem gravatè miſſurus ſit. Sed Eirenici geminum tibi accepi exemplar ut alterius amicum participem facias, quem voles. Nemo hætenus ſe offert ad pugnam: quod illi glorioſum, noſtris ſatis indignum. Malunt diſſertare de umbone, ubi adverſarius dicat, non quæ ipſe, ſed quæ ipſi volunt, & bene, male, reſpondeant, nemo contradicat. Hoc animo meo dolet, & ſcio grave eſſe nonnullis, quos quo minus in arenam deſcendant, & publici muneris, & privatarum occupationum grave onus impedit. Unus tamen Ordinis tui ſe paratum decertare retulit mihi. Et fortasſe alii ſunt etiam, quos ego ignorem. Sed optime, amiciſſime Goſſe, num indignam hanc te provinciam putes? non imparem te jamdudum perſpexi. Animis opus; vel ſi ſic videatur, offer te eminus cominus populari tuo, qui in Patria non admodum diſſimilem inſiſtit viam. Scio te non indigere conſilio, vel auxilio meo; ſed tamen quia, ut aiunt, plures oculi plus vident, noli putare uſpiam claudicare tibi poſſe operam meam. Volo omnia tua cauſa & magis publica: & mihi quoque jucundum erit, tam amicum uſque adeo nobilem curam ſuſcipere, tamque dignam cogitationis ſuæ. Quid enim hac cauſa æquius: quemodo non juſte ab iis recedatur, qui te ferro & flamma perſequantur, & ideo perſequantur quia ab ipſis diſſentias amore ſimplicis veri in ſcripturis reſuſcitans, confirmatus etiam conſenſu ſanctorum Patrum, ſimiliter ac tu primis ſeculis Scripturas interpretantium; denique, quia credere non poſſis quæ credi non poſſunt, ut quæ contradictionem involvunt: Cujus rei manifeſtum exemplum, cum proximè unâ eſſemus in *muſcorius* dogmate, expendebamus. Sunt alia etiam multa quæ adverſus Romanæ Eccleſiæ errores ac tyrannidem poſſunt in medium adferri; ſed vel hoc unum quod dixi quantivis mihi pretii videtur! Quamobrem, mi Goſſe, cogita, quaſo, an non putridam illam clavam Nihufio qui tibi Hercules *deſignatus* videtur, vel ſi malis alteri illi in Anglia ſimilia ſpiranti, debeas de manibus extorquere. Favebo & applaudam victori quem te fore ſpondere auſim, & bonitate cauſæ nixus & ingenio doctrinaque tuâ. Vale, optime doctiſſimeque Goſſe.

*Amſtelodami,*  
cId Ioc xxxiv.  
poſt Kal. Mai.

*Tuus,*

G. J. Voſſius.

CCXXIV.

## CCXXIV.

Hieronymo Beale S. P.

**D**ignum scribendi argumentum eximie Beale obtulit mihi Illustrissimus Comes de Leshno: qui visere Britanniam nostram ardet, & compellare in ea doctrinā atque aliis animi dotibus excellentes viros. Non dubito quin vel eo nomine gratissimus sit futurus, utcumque non accederet familiæ splendor, tot imaginibus illustris hodieque inter alias præfulgens inclyto heroe, hujusce Comitæ parente, Regni Polonici Palatino, viro doctrinā, eminenti prudentiā celebratissimo, pietate nullo inferiori: cujus merita cum universum celebret Regnum, tum præcipue illi qui Ecclesiarum nostrarum potius sententiam, quam Pontificiam sequuntur. Est enim his magno & præsidio & ornamento planēque illud Polonis suis, quod Lithuanis maximus est Rzevilus. Adde quod idem ille heros serenissimo Regi nostro Carolo sit non de nomine solum, sed literis quoque cognitus, & ob raras animi dotes, summamque apud suos auctoritatem carissimus. Ut tanti herois soboles, quæ in gloriam magni Parentis feliciter adeo procreavit, non possit non gratissima esse, & tibi & aliis Academiæ vestræ luminibus, quibus conspectis clarius se quoque visurum arbitratur. Sanè non inglorium futurum . . . . inclytæ Academiæ viris si alloquio suo (quod non poterit non domino Comiti esse utilissimum) eum dignentur, ac sic demereantur, ut deinceps apud Sarmatas quoque talem suæ virtutis ac doctrinæ præconem nanciscantur. Qui ei à studiis est Joannes Jonstonus, juvenis est admodum doctus & probus, & ante diem Lugduni supremo in Medicinā titulo ornatus. Quo nomine & ille vobis, præcipueque Medicinam profitentibus, gravior esse poterit.

*Amstelodami,  
post. Id. Maias,  
An. cl. 1633. xiv.*

*Tuæ dignitati ad-  
ditiſſimus,*

G. J. Vossius.

## XCCXXV.

Johanni Rouſio, *Bibliothecæ Bodleianæ Præſecto, S. P.*

**J**amdiu est, præstantissime Rouſi, quod mille inter nos literæ commeant, non sine dolore meo, credo & tuo. Sed si silentium

hoc meum quod solis occupationibus adscribere debes, rupit illustrissimus Comes de Leshno, qui cum desiderio arderet visendi Regnum Britannicum, & inclytas ejus Academias, ac conveniendi excellentes ejus Viros; aliquid etiam à me literarum ad amicos poposcit, quod eo pacto facilius se voti competentem fore arbitraretur. Mihi tam perspecta gentis Britannicæ humanitas, ut sciam, nec humili loco natos aspernari solere; nedum vile iis sit genus, ut sic dicam, deorum. Quamobrem nihil sanè Literis meis fuit opus; & si opus fuisset, etiam tacente illustrissimo Juvene, sponte debueram hoc officii offerre. Quid enim non meretur tantus studiorum ardor, is amor doctorum, in eo qui tantum in Poloniæ spem succrescit? Parens ejus toto Poloniæ regno in pretio est maximo, præclareque meretur de eo, præsertim de iis qui nostrarum Ecclesiarum sententiam potius, quam Pontificiam sequuntur. Vereque illud in Polonia sua est, nostris hominibus, quod in Lithuania magnus ille Rzevilus. Nota etiam caraque parentis virtus magno magnæ Britannicæ nostræ Regi Carolo; quod & Literis testatum fecit non unis. Quare cum sic Rex serenissimus æstimet parentem Polonici Regni Palatinum, non poterit non acceptissimus esse præclaris Oxoniensis Academiæ Viris tanti Herois tam charum pignus. Comitatur eum, qui ipsi à studiis, vir doctissimus Johannes Jonstonus, Scotus, qui recens Lugduni in numerum Doctorum Medicinæ magno cum honore est receptus. Eoque cariorum fore arbitror doctissimo & experientissimo Thomæ Clayton, Magistro Collegii Pembrochiani, & Regio Medicinæ Professori, cujus humanitatem satis ipse coram perspexi. Avidè desidero nosse, num jam è Syriâ salvus ac sospes redierit ornatissimus & amicissimus Edwardus Pococke; quem ego juvenem æternum summo prosequor affectu; partim quia sic virtus ejus ac eruditio meretur, partim ob summum honorem, quem laboris utilissimi dicatione mihi habuit. Clarissimis Viris, Juxono, Duppæ, Fell, Prideaux, aliis, nostri amantissimis, salutem dicto plurimam. Non addo ambiciosos titulos, quia virtutem eorum supra eos esse censeo. Etiam Harrisonum & Chillingwortium salute impertias, & quos præterea nostri memores nostri.

*Amstelodami,  
prid. Id. Maii,  
an. cl. 1633. xiv.*

*Tuo nomini ad-  
ditiſſimus,*

G. J. Vossius.

## CCXXIV.



## CCXXVI.

*Doct. Martin, Præfecto Collegii Regina-  
lis, S. P. Cantabrigiam.*

**D**icere non possum, Doctissime Martine, quanto fuerim gaudio affectus, cum primum intelligerem Reverendissimum & Illustrissimum Dom. Episcopum Londinensem ad Archiepiscopalem esse dignitatem evectum. Equidem maximum ex eo amorem Dei colligebam erga Ecclesiam suam regnumque Britanniae universum: Quantas enim dotes in eum divina contulerit bonitas! quas qui non vident, si tales inveniantur, cæci sunt: Si non suo pretio æstimare norint, valde invidiæ, ac loliginis succo laborent, necesse est. Quanquam quid ego hæc apud te, qui tot annis longe me rectius herois ejus virtutes perspicere potuisti? Ac memini adhuc Sermonum, quos de iis una Londini habuimus. Quemadmodum & tanti Mecænatis erga te affectum non obscure cognovi. Atque ut istorum, ita & sæpe eorum in mentem venit, quæ de Religionis controversiis, ac ratione eas sopiendi, non injucunde vel inutiliter diserebamus. Tanto molestius est, quod tam longo tempore nullum inter nos literarum sit commercium. Hoc silentium mihi abruptum putavi, pulcherrimam mihi scribendi occasionem præbentibus Illustrissimo Comite de Leshno, &, qui ei à studiis, erudito viro Joanne Jonstono Doctore Medico. Noluere enim sine literis meis visere Academiam Cantabrigiensem: atque ego minutum hoc scribendi officium non debui Illustrissimo Comiti denegare. Nam præterquam quod turpissimum esset leviculum adedò detrectare, poscente id tam sublimis profapiæ juvene, tamque erudito, tam doctorum omnium amanti & æstimanti; etiam alia ratio debendi illud accessit: quia cognati ejus Illustrissimi Barones Stupeskii diu mecum Lugduni vixere, juvenes excellentis spei: etiam postea fratres eorum, mei unius causa, Amstelodamum venire; ac totis sex mensibus sunt commorati. Mitto alia. Unum reticere non debeo. Illustrissimi Domini Comitum parentem esse maximæ autoritatis virum per universam Poloniam, regni ejus Palatinum: quem cum æstimant omnes, tum imprimis illi qui in religionis negotio nostras potius Ecclesias quam Pontificias sequuntur. Quippe quod magnus ille Razevillius est apud Lituanos, id Palatinus ille de Leshno inclytus heros est Polonis suis. Hæc ego pluribus sum profectus;

quia nollem cum à te, vel aliis Academiæ Cantabrigiensis summis viris ignorari. Unde futurum videbam, ut nec ipse satis cognosceret, si uspiam terrarum, sane in Britannis simul conspirare eximiam doctrinam summamque humanitatem. Nunc pulcrum erit si eâ natum profapiâ, in eam spem educatum, in terris etiam longè distitis, vestri præconem habeatis. Hæc intempestâ nocte scribebam. Plurima salute impertias excellentes Academiæ vestræ viros; præsertim quos amantiores nostri existimabis.

*Amstelodami* Postridie  
Id. Maii, clō loc xxxiv.  
*Td. Jsa.*

*Tuus ex animo,*

G. J. Vossius.

## CCXXVII.

*Hugoni Grotio S. P. Hamburgum.*

**S**IC primò promiserat Blauwius, summum abhinc duabus Hebdomadis accepturum se Francofurto, Typos novos, & elegantes, quibus ex animi sententia excudantur sacra tua poemata. Sed nunc significat, haberi eos demum posse intra quatuor Hebdomadas; propterea quod quæcumque ad nundinas milisset, tardius eò pervenerint: In causâ esse, quod Dux Nieuburgicus, novum, ac grande vectigal imposuerit mercibus, quæ Dufeldorpio Coloniam, inde Francofurtum devehî soleant. Eapropter Hebdomades aliquas fuisse famulo suo Colonie subsistendum, priusquam libri, aliaque eo deferrentur. Certò autem addixit, intra quintam Hebdomadem se auspicaturum editionem. Id ego significandum putavi, eunte ad vos docto, ac prudenti viro, Ephoro liberorum Illustris familiæ Scytteanæ. Alia etiam adderem, si die uno præcissem de ejus discessu. Sed hac hora ei abeundum intelligo. Quare definam, ubi adjecero, mediocriter nos omnes hic valere, eademque sperare de te, uxore, filioque; quos omnes mei salvere jubent.

*Amstelodami*  
Postridie Idus  
Maias. Anno  
clō loc xxxiv.

G. J. Vossius.

## CCXXVIII.

## CCXXVIII.

Hugoni Grotio, *V. Cl.* G. J. Vossius  
S. P. D.

Vir Clarissime,

**M**itto ad te Guilhelmi Schikarti literas, & si non fallor, ejus פוריק, sive de Judæorum Bacchanalibus opusculum. Quam inde capio conjecturam, quia ad me miserit, quicum non ea illi amicitia, vel illud literarum commercium, hætenus fuit. Simul literas accipies Hortensii, civis tui, quem puto aliquando non inglorium patriæ urbi fore. Est & illi familiaritas, sed literaria, cum Schikarto: uti & cum Gassendo, & aliis in Mathesi claris viris. Ipse nunc disciplinas Mathematicas, in urbe hac, sed extra ordinem proficitur. Attamen is est confluxus audientium; is quoque genius docentis, ut non dubitem, quin propediem eum Collegam finis habituri. Ptolemæum sic sequitur, ut Tychonianam, & Copernicanam sententiam simul proponat, & explicet. Nec obscurum nobis in Copernicanam magis inclinare: utrumque ea Romæ sit damnata à Cardinalibus, Anno c1o 16c xvi. atque iterum anno superiori: Imo Galilæus Galilæi Florentinus, quia hanc sententiam, & viva voce, & scribendo defenderet, in carcerem sit conjectus, nec inde emittendus, priusquam poenitentia fatis egerit. Quam rem à Nuntio Apostolico Bruxellis Lovanium per-scriptam esse mihi constat, ex Fromondo: qui his diebus Antaristarchum suum hoc de argumento ad me misit. Hesternæ die iterum legi Sophompaneam tuam; sed non sine multis lachrymis. Nec enim mihi cornea fibra est. Movebar argumento ipso, de certissimis scripturarum fontibus haulto, & à te tam graphicè nobis expresso. Movebar quoque recordatione Authoris, magni sanè totius orbis eruditi, præcipui item, si non unici, Belgicæ ornamentum: cui ubivis potius, quam in Patria, maximis à se beneficiis affecta esse licet. Vellem magno civi tuo voluntas, vel potius otium esset, de eo cogitandi serio. Sed recessus animorum unus scit, quem Καρδιογράφος, in scripturis vocari propterea videmus. Amstelodamensium affectus non deferbuit. Sed quicquid sine illo tibi struitur, corrui. Et metuo, ne rigoris illud, in tuendo civitatum, suæ imprimis, jure, magis possit abalienare eum, qui plurimum potest. Omnino enim pecuniis ad bellum opus est. Nec sufficit hæc civitas una, vel etiam Batavia univèrsa. Tandem tempus putatur, ut fœderatæ quædam Provincie in commune solvant quod debent. In

hoc si Batavi persistant, spissè procedet Castrense negotium. Intelligo & eos, qui Provinciarum omnium nomine magnum illud Collegium constituunt, cogitasse, de Guilhelmo Comite in Germaniam mittendo, majori etiam stipendio promisso. Sed Batavi in illo dicuntur conspirare, quod pecunias nolint eam ad rem contribuere: quia se nesciis, non potuerit, vel debuerit, istius momenti constitui quicquam. Cætera cognosces ex Fabricio, Juvene elegante, & erudito, atque ex poematis tibi jam noto, qui Hamburgum, ob morbum matris est arcessitus. Eunte illo, paulo liberius de rebus Batavis scripsi: quæ me sæpè habent sollicitum, sed spero aderit ὁ Θεὸς quasi ἀπὸ μηχανῆς. Cui te, conjugem, filium commendo.

Amstelodami c1o 16c xxxiv.

v. Kal. Junias.

Amplissime summeque vir, superioribus ad te literis raptim, sicut nunc meus est mos, exaratis, aliud quiddam in mentem venit. Jam annus, & credo, ultra est, quod in urbe hac degit Bartholdus Nihuyfius, vir doctus, & subtilis, Lutheranus quondam, & Calixto Theologo per familiaris, postea Pontificius, atque ad Abbatis dignitatem evectus; sed ea, bello hoc Suevico exutus, & nunc extorris. Is in Germania, priusquam huc concederet, multum, diuque cum Lutheranis solitus dissertare, super Religionis controversiis: sed non ad morem vulgarem. Poscit ἀντιθέσιν, invictumque aliquid, quodque animum possit, aut debeat reddere, ἀντιθέσιν, ἢ ἀμείλιχον. Negat opus de singulis disputare. Eligere suos Lutheranos, vel etiam Calvinianos, & quosvis alios, posse, ubi maxime existiment suæ Ecclesiæ causam triumphare. Si unum viderit argumentum, velle redire ad eos, unde malum pedem extulerit. Sin disputando intelligant, nihil solidi crepare, quicquid hætenus obtenditur, æquum videri, ut redeamus ad Romanæ Ecclesiæ finem. Edidit novo anno, ut vocat ipse, Ἐπιλογὴν; quo Lutheranos in hanc formam provocat. Crebrò & me invisit. Et quamvis de aliis quoque rebus colloquamur, tamen jam iterum, tertioque, eò nos sermo provexit. Illo igitur poscente causam justam, cur parens meus à Romana abierit Ecclesia, respondi multa, de veteris, præsentis Romanæ Ecclesiæ discrimine. Sed tandem in eo pedem figebamus; Romanæ Ecclesiæ Doctoribus, ita scripturas interpretantibus, ut manifesta iis vis fiat, planèque abeant à primorum seculorum Doctoribus, imo interdum (ut in transubstantiationis dogmate) sensus interpretationi reclamet,

met, manifesta que sit contradictio : Nec solum sic interpretantibus, sed etiam, nisi simpliciter interpreteris, ferro te, & flamma perdere paratis : jure ab ejusmodi Doctoribus receditur, ac seorsim cultus Dei, celebratur, partim conscientię studio, partim vitę conservandę, quam Patrię, Ecclesię, familię, & amicis conducibilem existimamus. Si valetudo, si otium tibi, si res etiam tuę sic ferant, ut hujusmodi tractes, quod arbitror : quęso paucis saltem perscribere, quid tibi de hac re videatur, & quam potissimum viam, cum istiusmodi hominibus insistendam putes. Vale.

## CCXXIX.

Hugoni Grotio.

Maxime &amp; Amicissime virorum,

**N**ON excusabo apud te diuturnam silentium, quamvis te prope solitarium sciam vivere, eoque gratiores amicorum literas credam. Etenim satis occupationes meas nosti ; & quod scriberem, nihil magnoperę erat. Nunc scriptionem differre diutius nec volui, nec potui : Quippe mihi videbatur, Salmasii ad te literas à me, sed sine meis literis venire. Vir ille nihil æquę, quam tuam absentiam dolet. Nec multum miror, cum vivat Lugduni. Scis quid velim dicere. Ante dies non ita multos, adfuit mihi quispian ex amicis Aristarchi, qui in tantum, moribus, & doctrinę Salmasianę detractum ibat, ut non multum supra semidoctos ponere videretur. Cui cum non mediocriter adversärer, ille quodammodo mihi postea accedere, sed dicere, hæc nemo Lugduni promovere auderet. Nemo credo ex Paratrasistris Aristarchi parvulis : Nam alia mens paulo cordatioribus, qui & Salmasio, & Aristarcho, suas tribuere laudes sciunt. Cæterum præterquam quod nonnulli Salmasio non satis sint æqui, etiam aer est molestior, ut ambigat, an ætatem illic vivere possit. Hoc spero : nolim enim Batavia, postquam sole suo caret, citò adeo fraudari sydere, quod nuper accessit. Utinam hoc effici possit, ut brevi fruamur utroque. Hoc in voto optimo cuique. Procerum quidem hujus urbis animus est in te qui fuit, & debet : sed opinio est, nihil effici posse, priusquam aliquid certi de pace, vel induciis, aut bello confiterit. Gallus sedulò operam dat, ne Belgica coalescat ; multaque ad bellum promittit. Sed verendum, ne si auscultemus, facillè aliquid impediatur postea, cur pollicitis stare non possit.

Operis mei Grammatici jam dimidia pars excusa est. In quarto enim Libro occupantur Operę. Intra sex septem menses puto cætera consummanda. Mitto tibi Panegyricum, & Poematium, filii Dionysii. Gratum utrumque fore scio ego, & sperat filius : quamvis se probare tibi rudem Musam vix arbitretur. Vale, & cum filio salve. Etiam Teliobrogę salutem dices, si occasio erit.

Amstelodami.

## CCXXX.

Joanni Bodechero Banningio S. P.

**S**Imulac, Præstantissime Bodechere, paulum licuit respirare, tuis me poematis delectavi. Non leve existimo, quod tibi proposueris omne carminis genus. Multos enim qui in genere uno laudem merebantur, in alio sua vena destituit. Quod de te non dixero ; Et si maximè capiar Elegiis, & Hendecasyllabis : Idque ob *σφίσεων*, quam ego principem Orationis virtutem censeo : Ita ut si elegantiam sociare ei nequeam, malim *ἀμασσεσθαι* dicere, modò *σφίσεων*. Adolefcenti mihi mens alia ; sed ætas animum jamdiu mutavit. Quod verò meum etiam judicium exquisieris, de affectu sanè gratias ago. Sed alio potius itum oportuit, si velles aliquid, quod scribere opere videretur. Et tamen ut fidem facerem, lecta mihi tua, volui quædam annotare, quæ tui facerem judicii.

In paneg. pag. 3. Tygresque, ] Tygresque Græcè *Τύγρης*. Celtiberum ] Penultima Catullo, Martiali ; porrecta. Et Græcè *Ἰκίπης*. Belgiadum, ] video, qui non refugiant. *Ἀνατολία* tamen aliud postulet. A *Belgium* deduxeris ; sed longè aliud Belgium, ac Belgica, et si doctissimi etiam confundant. Cur non Belgarumque ?

Pag. 9. Illa dies ad d. f. quod atrox. ] Video versum quod exigere. Et fortasse habes, qui prævit. Alioqui malim, *quæ atrox* : ut Seneca ; *Venient annis secula seris, Quibus oceanus vincula rerum laxet.*

P. 10. Carbasa Celtiberum ] de quantitate penultimę jam dictum. Panopæa ] Panopæa, Græcè *πανοπεία*, non *πανοπαία*. Alta voce. ] Nihil vulgatius trivio. Sed veteres puto semper, *clara*, vel simile.

Sylv. III. p. 1. Scævior, non memini in comparativo legere. Simile tamen sit *sinisterior*, quod apud Nasonem. Et convenit significatio, quia *σκαίος*, sive scævus idem ac sinister. P. 2. Medæa ] Medea Græcè, *μυδία*, per *ei* non *ai*. P. 3. Iaspide ] Non memini me *τρυφιδάσσω* legere. Sylv.



Sylv. VI. — *Redux Professor, & omnem*] Prima in Professor, necesse, ut eundem habeat modulum quem *profiteor*. At prima est semper correpta. Eleg. IV. *Questibus*] *Questibus* quia non à *quero* hîc, sed à *queror*. Eleg. V. *Nec Polydectes ego*] Postrema in *Polydectes*, quia græce πολυδέκτις, ut παρδέκτις. Eleg. XIV. *Hesper aquas*] ab ἑσπερς, vel est vesper, vel Hesperus, non Hesper. Eleg. XVIII. *Junctas Azone*] Dicunt Latini *Azoni*, vel cum *Azone*. Serm. IV. *Id licet ipse negarim, in limine scribens.*] Festinatione in scribendo, vox præterita, quia pes deest. Carm. IV. *Hos pauculos versus habe obfides mei.* Nulla hic Triemimeris, quam Horatius, nec in epodon libro, nec alibi neglexit. Saltem nolim vox aliqua, totum pedem tertium constituat in Jambico senario. Poteras *Paucos habeto hos obfides versus mei.* Eam legem veterum, saltem elegantiorum, nec video in illo, *Ille belluo celebris, ut hic nepotulus*, Cæsura fit hoc pacto, *Celebris belluo ille, ut hic nepotulus*. Vix etiam Triemimeris in isto, *Pæana vocem addit suam Rippersius*. Carm. V. ad Tulpinum. *Largus percerebui vocibus undique*] prima in *creber* longa, ideo & in increbesco. Nec aliter Virgilius, vel alius quicumque veterum. Carm. VI. *Divium voluptas, & conviva diceris*] Placetne pari, quarta quippe sede, spondæus? Car. VII. *Præcoci sapientia*] scio in Glyconio à Catullo, prima sede poni Trochæum: sed ubi id deinceps observet? Id Horatius non facit: nec ipse facis. At secunda in *præcoci* est brevis. Nam est à *præcoquo*, *præcoquis*, & contractè *præcox*: In gignendi casu *præcoquis*, secundâ correptâ. Ita omnes antiqui juxta naturam ejus unde descendit. Hendecasyllabo 1. Epicurus dicitur Pater ipse veri, *κατὰ τὸν*, dixerit, quem me scis dicere. Sed quid de illo viro rigidiores? Pater veri, qui Providentiam negat divinam? Mittam alia. Hendecaf. II. *Dum nullo peregre pudore tacta.* Peregre non venit ab adjectivo, ut *doctus*: Eoque si Grammaticorum canonibus standum, corripere ultimam. Hend. IV. *Estne hoc postridie redire Leuwi.* Secundo in *postridie* est longa. Phalæcio, Phalæcium oppono, eumque Martialis, Lib. II. Epig. VI. *Si totus tibi triduo legatur.* Objicies amicum nostrum ibi annotare, leviculâ traiectione legendum servasse, si totus tibi triduo legatur. At refellitur hoc senario, Terentii Eunuchus. *Rus ibo, ibi hoc me macerabo biduum.* Idem in Andria: *Venit Chremes postridie ad me clamitans.* Et par ratio in aliis è die compositis. Catullus; *Jube ad te veniam meridiatum.* Solum quotidie excipitur. Hend. IV. *Nec profecto facis.*] Non improbo, quia non occurrit Poeta, qui ultimam in *profecto* corripit, vel producat. Tamen ratio posterius suadet,

quia *profecto* est, *profectio*, *Wooz-toaer*. Ergo quasi ablativus. Sed non tanti hoc *Itarum ratio modo liberat*.] Deest aliquid. Hend. VI. *Nummulisque apisci*] Puto à Typographis operis esse, quod prima in *apisci* notatur circumflexo; sanè est brevis; ut indicat compositum *adipisci*. Item *indipisci* ex *indu* & *apisci*. *Hugeno, & Chelys amulo campo*, si Chelys hic gignendi casus, chelyos dici oportuit. Hendecaf. VII. *Venusta pixis*.] pyxis Græce *πυξίς*.

Hæc ego duntaxat amore tui, & scio te non aliter accepturum, qui & me nosti, & occupationes meas. Siquid in iis fuerit, quod monuisse non erit ingratum tibi, sanè non dico operæ, sed opellæ pretium fuit, hæc exarare. Sin minus volupe erit, me studium saltem probasse. Erant alia de quibus quæsissem, si unâ fuisset. Sed id quia heri non potuit, sic mihi persuadeo, tibi rationem omnium constare: vel ecquid melius dici possit, per te satis visurum, ubi animum intenderis, non in universa poemata, sed singularim in hoc vel illud; ut fit cum Typographus tantum poscit Autographi, quantum phillyra excudenda capiet. Mihi quidem sic usu venit, ut nunquam mihi videar perspicacior, quam cum eo animo mea lego, quasi deinceps, nihil amplius juris in ea sim habiturus, ubi facta erunt publici judicii. Atque utinam mos Veterum hodieque obtineret, ut amici fideles convocarentur, coram quibus nostra recitarem. Nunc optima illa consuetudo negligitur, quia is fastus recitatoris, ut non sustineat moneri: ea vanitas, & jactatio monitoris, ut neminem, quorum monuerit amicum, sinat ignorare. Plurimam salutem optimis parentibus dicito.

Amstelodami  
clo Ioc xxxiv.  
Postrid. Kal.  
Jun.

Tuus,

G. J. Vossius.

CCXXXI.

Joanni Beverovicio, Senatori, & Medico Dordrechtano, S. P.

QUAM vellem, suavissime Beverovici, alter alterum sæpè videremus! Videremus? imo audiremus, ut ait ille, Multum oculi, sed plus aures, debere fatentur. Attamen si non licet tam foelicibus esse, saltem liceret Literarum commercio frequentiori, audire, & reddere voces. Bellè, inquires, qui, toties provocatus scribendo, Deo illo, quem Tardipedem vocant, in rescribendo tardior videaris. Quem colorem me hic quæsiturum

rum putas? aliquid adferendum ex Rhetorum meorum ἀνέδοις. Didici ex illis, & porro alios docui, incidere, & controvertiam, εἰ μὴ αἱ ἡ μικρὰ. Crede mihi siquid in me culpæ, sanè perexiguum est. Et nunc lentior me fecit, quod literas Hamburgo expectarem, ab eo, cui miseram tuas, & unà librum de Vitæ Terminis. Tardius scio accepisse, quia, cui commiseram, non habuit tam citò occasionem mittendi commodam, quam uterque optamus. Reidanum filii mei τὸ μακρὸν, quem superflus promiserat, comitem dederam. Tanto magis cupiebam, ut tuto omnia perferrentur. Nullas tamen ab incomparabili viro literas recepi. Et credo in causâ esse, quod non amplius sit Hamburgi, ut edoctus sum literis, inde ab Illustri Barone Skittio ad me perscriptis. Aliunde etiam accepi, Francofurti esse. Nec de eo dubito. Tantum spero, opto, voveoque, ut quia ingrata cum patria respuit, alibi sic habeatur, ut doctrina ejus, & virtus merentur. Mihi quidem, nihil hic magis, quam alteri feritur, aut metitur, sed sic sum ab teneris unguiculis educatus, ut alius esse non possum, nisi Bataviam amare desinam, & simul quicquid eruditum, & honestum. Valdè desidero scire, an jam Salmasii dissertatio de fatali Fine, lucem viderit. Video te hoc agere, ut me quoque producas in arenam. Nec reformido Retiarios, aut Myrmillones, quibus candor inest. Sed quid, si pro candidis, inciderem in nigros? Equidem semel nullo meo merito, habitus pessimè, nunc propè sub omni lapide metuo serpentem. Quare fiat sententia, extra teli jactum speculari, ut abiturum hoc sit uni alteri, qui suum judicium perscribere; & simul animus avidè expetit Salmasiana: qui fortassè sic, quicquid præclari exhauriet, ut nihil mei desiderare quisquam velit. Saluta plurimum amantes nostri; in his Colvium, & Roverium; quos monere debes, ut aliquod ingenii, doctrinæque suæ monumentum posteris procudant. Possunt. Et magnam in tribus vobis fiduciam habeo: quos Patriæ Civitati ornameto esse maximo exoptem. Adderem τὸ μακρὸν filium, non levi literariæ Reip. damno denatum. Sed aliter visum magno Imperatori, qui è sua statione cum evocavit, cum prodesse publico inciperet. Tamen Maimonidem ejus, ac Cæsarem, lucem visuros spero, & quidem intra hunc annum. Nunc nihil moratur, nisi quod Editione Commentariorum de arte Grammatica ipse distineat.

Amselodami  
c10 loc xxxiv.  
Jun.

Tuus.

## CCXXXII.

Guilielmo Nieuportio Consuli Ultrajectino. S. P.

CUM ante paucos dies, Amplissime Vir, tuque & duo præstantissimi viri, qui tecum venerant, me compellaretis, atque inter alia, de idoneo Philosophiæ Professore sermo esset nobis; nihil occurrebat præterea, quæ tum afferebam. Sed post abitum vestrum, altero die venit ad me vir insignis Franciscus Diuban Augustodunensis: Quem simul ac conspexi, ac quædam de urbis vestræ consilio exposui; animum quoque ejus tentare capi, quo cognoscerem, num ad hujusmodi vitæ genus magnoperè propenderet. Ac facillè cognovi, minime ab eo alienum; quin potius eo maximè proclivem. Quamobrem, cum iterum convenissetis, non leviter vobis eruditissimum virum commendavi. Ab eo tempore rursus mihi cum eo loquendi occasio fuit. Non destiti igitur monere, & hortari, ut partim publici boni, partem rei familiaris gratia, hoc de animo suo, ipse etiam vos velit facere certiores. Putavi autem pro meo, erga urbem vestram, & Rempublicam Literariam, amore rectè ordineque me facturum, si per Epistolam etiam, eorum quæ coram dixeram, memoriam refricarem: sed imprimis quædam apponerem, quæ vel tum in mentem non venerant, vel postea demum cognovissem. Est ornatissimus vir, de quo nunc sermo nobis; annorum circiter xxxviii. studuit Mussipunti, Parisiis, & aliis in locis. Annis prope xx. docuit. Ac publicè quidem in Academia Muscipuntina, variisque Collegiis; uti Flexiæ, Rothomagi, Molinis; quibus in locis professus nunc literas humaniores, vel Eloquentiam, vel Philosophiam, nunc Theologiam, & casus Conscientiæ, quos Rothomagi, in aula Archiepiscopali, præsentè etiam Archiepiscopo exposuit. Sed maximè opera ejus publica, Philosophiæ est impensa, idque circiter decennio. Nec pauci ex ejus Auditoribus, ac Discipulis, nunc in Galliis, ipsis in Academiis, vel Collegiis, publici Doctoris munus, cum laude sustinent. Vidi disputationes ab eo, publicè Molinis susceptas, & Reginæ Matrì dicatas. Sanè vel illæ fidem fecerint, quantum in Philosophia valeat; ut mittam quæ in Logicis, Phisicis, Ethicis, ac Metaphysicis elaboravit, atque ubi extrema manus accesserit, in lucem edere cogitat; & si sua vobis opera probaturus, inclytæ potissimum urbi vestræ dicabit. Religionem reformatam primum Lutetiæ Parisiorum est professus. Cum

in Hollandiam veniret, ab Illustrissimo Duce Lanspergenſi, & Heroïna ejus conjuge, ſore Illuſtriſſimi Principis Arauſionenſis commendatus admodum per literas, huic principi noſtro fuit; uti & ſeneriſſimo Bohemiæ Regi, & Reginæ. Atque hi quidem operam ejus Lugduni Batavorum ſunt experti, in inſtituendis Liberis ſuis. Etiam Rex promiſerat, ſi in Electorales Terras ſuas à Deo reduceretur, velle ſe publicâ ejus operâ uti, in Academia ſua Heidelbergenſi. Uxorem ex aula Bohemiæ puellis, patriâ Namurcenſem, Reginæque præ cæteris acceptam, duxit. Sed metuo, ne dum fuſe adeo omnia proſequor, propemodum videar velle, hiftoriam contexere. Quare aliis ejus generis miſſis, illud nunc ſolum dicam, Doctiſſimum hunc virum paratum eſſe, ſuam vobis operam addicere. Nec certum ſtipendium expoſcit. Poſſitis, menſibus aliquot, vel anno etiam periculum facere, & vitæ, morumque, & doctri-næ, inque docendo dexteri-tatis. Non recuſat, quo minus miſſum faciatis, ſi parum ſatisfaciat expectationi veſtræ. Verùm arbitror, iis & doctri-næ, & facundiæ dotibus pollere, ut nihil ultra requiratis. Sanè locutus cum iis ſum, quorum liberos inſtituit Lugduni. Hi magnoperè ſibi de opera ejus gratulabantur. Cumque Philoſophia admodum latè pateat, ut vix unus explere omnia poſſit; quid ſi hora una altera de Hebdomade ea ſuppleat, quibus Philoſophus alter non ſufficiat: Reliquum Hebdomadis impendat ſtudio Eloquentiæ; nec ſolum publicè eam doceat, ſed privatim quoque in declamando exerceat, tum ſtylum, & rationem formando, quod & Lugduni à præſtantiſſimo Cunæo, & Amſtelodami à me fit, non exiguo juventutis bono, etiam Linguam Gallicam docendo, & ejus, & uxoris operâ, conducere poſſit civium veſtrorum Liberis. Nec ſi vobis videatur, diſſugiet concionandi Gallicè munus, ut ex ipſo accepi. Hæc raptim, idque nocte intempeſta exaravi, partim quidem, ut Doctiſſimo Duban prodeſſem, ſi poſſem: partim vero ac imprimis, amore publici boni, inque veſtram ſpero gratiam. Vale Ampliſſime Nieupoſiti, & cum omni familia, ornatiſſimo filio imprimis, ſalve.

Amſtelodami  
c10 lxxxiiv.

Addiſſimus tuo nomini, & Ul-  
trajeſtinae toti Reipublicæ,

G. J. Voſſius.

Iis quæ à Clariſſimo D. Voſſio Collega meo, in commendationem Doctiſſimi viri ſcripta ſunt, libens ſubſcribo, amplitudini tuæ addiſſimus,

Caspar Barlæus.

CCXXXIII.

Gerardus Voſſius, Joanni Filio S. P.

CUM à te divellerer, ut in triſtibus Poeta loquitur,

*Vix illud potui dicere triſte Vale.*

Decrêram ea dicere, quæ ſi quid, te abſente, humanitus paterer, maximè vellem inhærere animo tuo. Sed eo me ſolor, quod illa ætate ſis, quæ ſatis per ſe intelligit, quid factò ſit opus. Potius igitur vota nunc faciendâ, ut Deus Spiritu te ſuo ſic regat, ut nihil agas, aut velis, quod non conſcientia, & honeſtas jubeat. Beatus Auguſtinus dicebat, bonâ ſibi conſcientiâ opus eſſe, propter Deum; bonâ famâ, propter homines. Ita planè conſido, & hujus, & illius, te rationem habere velle. Nam mille mortibus triſtior eſt vita, ſi diſpliceamus Deo, & probis. Non Jupiter, ſed Deus, *Ἀποστραφῆ*, vel ſi Latinè malis, averruncus, hoc unquam ſiverit, ut vel levis ſuſpicio de alterutro neglecto animo meo obo-riatur; dum vaſtum hoc iter, Deo Duce, Angelo ejus comite, capeſſis. Maluiſſem antea te, paterno & avito exemplo, ſtudiis vitam tueri. Sed video aliter placere Deo, qui noſtra dirigit, aliamque tibi voluntatem partim permiſit, partim immiſit. Feram etiam quod adverſatur animo magno. Tu tantò magis. Tantundem ubi ubi ſimus, à cœlo abſumus. Non operoſum negotium hoc ſeculo, ire ad Garamantas & Indos, & revocare gradus. Verùm ſuperas evadere ad arces, Hoc opus, hic labor eſt. Senſiſti his terris impedimenta bonæ mentis. Nec deerunt quoquo pedem feres. Quare ſemper eſto, quod dicitur, inter ſpinas calceatus. O ſi diem illum videam, quo quaſi geminis alis, per ora virûm voles, hinc inſigni pietate, inde pulcherriſſimi nominis famâ nixus! Sed ſi breve duntaxat ætatis mihi ſpatium ſupereſt, etiam poſtquam ad meliores ſedes penetrârô, eam tibi ſollicitatem à Deo precor. Sed precibus meis, tuas quoque te addere oportet, eaſque ardentes, quò facilius à Deo exaudiamur. Hoc age, mi fili, Quicquid offenſæ adverſus numen, hoc reſtinguent lacrymæ, à poenitentia proſectæ. Adulari non eſt Patris, præſertim ſenis, idque in eo negotio, ubi agitur, tum de ſalute æternâ, tum de nominis honeſtate. Addere etiam poſſis, de valetudine, & vita tui amantiſſimi Parentis. Nam ſi ſiniſter nuntius perculerit porrò aures meas, quid niſi mœrore brevi contabeſcam? Sed meliora Deus dabit, & tu quoque ſcio, cogitabis tecum Poetæ illud:

*Uique*



*Uique ego majores, sic me coluere minores.*

Et isthoc,

*Ab alio expectes, alteri quod feceris.*

Eoque majori tibi curæ erit, omnem sic vitam tuam componere, ut senile hoc cor, tot curis propè consumptum, recrees, & reficias. Hoc post Deum in manu tua est; nec divina bonitas claudicabit. Tu cum bono Deo manum move. Inter alia, illud non minimum referes, quod bonis artibus rem parabis. Tanto magis obstringes tibi, si quos reduci, ut spero, Deus liberos dabit. Miserum enim gignere ad spem famis, & esuritionis. Sed quàm in multis mihi obstitit res arcta? Quam multa enim meorum bene voluisssem, si potuisssem? Attamen fortasse, non si malè nunc, & olim sic erit. Non desinam enim familiam curare, memor Paulinæ ad Timotheum sententiæ, *Si quis suorum, & maximè domesticorum curam non habeat, fidem abnegasse, & infideli esse deteriore.* Idem tibi obversari debet. Fortasse enim deinceps, non se offeret tam commoda rei faciendæ ratio. Sed de opibus quod dixi, ita capias velim; ut imprimis commendem pietatem, & bonum nomen: sine quibus nullæ mihi opes placent. Miserum est serere Liberos ad egestatem; sed multis partibus miserius est, gignere tales, quos sui pudeat Parentis: & porro seminaturi sunt, qui non æquis auribus, avi nomen audiant. Hoc ego cavi sedulo, hoc item cavit uterque avus; cavere & Proavi; eoque indignius fuerit, te degenerare. Quare confido, oculis ita omnium in te conjectis, nunquam committes, ut non honori sis, & tibi, & tuis, tum qui sunt, tum post futuris. Pluribus si monere, & hortari velim, metuo ne videar distidere. Quamobrem finem faciam scribendi: sed non Deum rogandi, ut te salvum, ac sospitem, & ad Indos ducat, & nobis reducat. Hoc orant quoque mecum, mater, fratres, sorores; nec desistent orare, usquedum, vel te nobis iterum stiteris, vel meliores in sedes erimus relati. Vale, dilecte fili, atque iterum vale, & tertio vale.

*Amstelodami  
clbhc xxxiv.*

CCXXXIV.

Hugoni Grotio S. P. Francofurtum.

**D**Avid Lommelius, qui has literas defert, ante biennium mihi, cùm Hardervico se huc conferret, ab Isaaco Pontano de meliore nota commendatus fuit: ac comperi, favore neutiquam indignum. Parentem habuit honestum virum, cujus opera serenissimus Succiz Rex, sæpius in rebus suis, apud Hamburgenses, locisque in aliis usus fuit. Erat is Latinè, Græcèque eruditus, versumque nunc Belgicum, nunc Latinum scitè pangebatur. Πολύλωστον adeo, ut duodecim fuisset complexus Linguas dicatur. Uxorem habuisse audio, germanam illius sororem, priorque conjugis nostri Prætoris Grotenhusii. Adolescens ipse commendatione Pauli Pellii, à secretis erit Cornelio Pauwio, multumque literas amat, & literatos, te ante omnes, æstimat ut debet. Eo minus, sic poscenti literas denegare ad te potui; simul quia semper ingenium comperi. Blauwius, quod nunquam alias, tardum nomen factus, in excudendo Sophompaneo tuo. Diu novos, & elegantes Typos, Francofurto expectavit. Sperabat autem posse excudere, tribus Hebdomadibus, quæ proximè antecederent tempus professionis ad nundinas Francofurtenses, sed ubi id tempus advenit, errorem suum animadvertit. De Sophompanea solo cogitavit: exciderat autem de recudendis simul piis poematis, quæ non paulo plus spaciū requirunt; itaque dolet ob hanc culpam, ac quia inanem nunc fore conatum videt, si allaboret, ut in nundinis compareant, satius judicat differre Hebdomadam unam alteram: simul ne aliis incommodetur, quibus prælum fervet. Equidem non patiar deinde moras necti, nec sanè ille acturus, potius singulari cura, quod nunc deliquit, corrigere conabitur. Quas vero tibi gratias, & quantas debeo, amplissime vir, quod divinum opus meo nomini hujus homulli dicatu meas? Equidem quibus verbis, gaudium meum, vel quantoperè me obstrinxeris eloquar, non invenio. Sanè si duo tria mihi omni contigerint vita, quæ ad honorem meum putarim, plurimum conferre in iis reponi debet honos, quem habitum mihi ivisti. Quare gratias quidem ago, & quantum possum ago, non quas debeo. Solumque spondeo fore me; qui fui semper, vel si fieri possit, operam daturum, ut meipsum vincam. Filius tuus sedulo audit Blauwium in Mathesi; ac in Jure etiam à Corvino institui cœpit. Quotidie incrementa capit, non virtutis modo, sed doctrinæ

næ etiam ac modestiæ. Id non alia de causa, quam quia sic res habet, scribo. Quotidie est domi meæ, nec ullius utitur commercio, à quo corrumpi possit. Commentarii mei Grammatici, ut spero, ante nundinas absolventur. Sumpserunt Indices, & pauca alia. Gaudebo me onere molestissimo defunctum. Dum hæc scribo, advenit Baro Jacobus Skyttius, juvenis optimus, & sititor doctrinæ, imprimis ejus, quæ nobilitati esse usui maximo solet. Orationem molitur, de laudibus sui Regis; ait se de eo ad te scripsisse, rogasseque pauculis versibus, vel ornamentis causa ornare editionem velis. Simul postulavit plurimum te salutarem, & verbulo hoc attingerem quod dixi; scio molestum esse, sic ad placitum alienum, à gravioribus avelli. Sed tamen juvenis non est indignus, qui elogio tuo ad majora exciteretur. Et Parentem demereberis, quem non injuria, magnus Rex magni fecit, dum in terris egit. Et multum est quod in Suecico regno, magnus est studiorum Patronus. O quam gaudeo, magne vir, & amice, quod post iniquitatem, non illam Patriæ quidem, sed quorundam tamen, qui nimium in Patria possunt, virtutes tuas æstimare sciat strenua hæc Suecorum Gens: ante omnes magnus Cancellarius, vir immortalitate dignissimus, cui longam, ac foelicem vitam exopto, non solum Suecici regni, & Germaniæ libertatis ergo, sed etiam tui causâ; cui quod nunc bene est gaudeo, & ut melius meliusque sit exopto, ringentibus quantum lubet invidis, ac virtutis tuæ inimicis. Uxori, liberisque multam salutem meo, conjugis, & liberorum nomine dicitur.

*Amstelodami*  
xii. Kal. Sept.  
St. N.

*Tibi devotissimus,*

G. J. Vossius.

# CCXXXV.

Cl. V. Claudio Salmasio G. J. Vossius  
S. P.

**N**onne tibi, maxime Salmasi, à moribus meis alienum videtur, quod tuis ejus viri tam amicis literis tanto tempore non responderim? adversa quædam, quæ privatim domum meam spectarent, obstitierint: & partim inde, partim aliunde animus tristior, valetudo infirmior, non mihi solum, sed uxori etiam meæ. Et trahebant ista secum non parum curarum, quæ nos esse nostros non sinebant. Quamobrem etli de meliori valetu-

dine vestra nos omnes, magis quam dici possit, gauderemus; tamen satius fore putavi, si non ante rogarem te, ut excurrere ad nos velletis, quam & corpore essem firmior & curarum aliquid animus exonerasset. Nimirum domi primum lætiora mihi omnia optabam, ut vultu animoque hilarior essem optima dierum quæ vos exciperemus. Nunc quia melius undique mihi, venio ad veteres preces, obnixequæ te tuamque rogo, ut dum valetudo utrinque, dum etiam anni tempestas finit, amplectamini occasionem invisendi hominem amicissimum & urbem hanc florentissimam. Albo diem, lapillo notabo, quæ primum vos hic conspexero. Et quid impedit quo minus cum tuis, filio meo duce, qui nunc Lugduni est, quamprimum voto nostro satisfacias? Sin id res vestræ nunc non sinant, ac ne proximâ quidem Hebdomade, saltem ne juvet differre ultra tres Hebdomades. Sane aliqua etiam gratia magnæ est hujus urbis nundinis, quibus initium erit xlii. abhinc diebus ac durare Hebdomadem vel ultra solent. Ut tu minus istis delecteris, fortasse uxor caperetur. De opere rei vestiariæ multum gaudeo. Sed de eo & cunctis quæ studia spectant, colloquemur potius orotoli, cum urbem & nos bearis adventu tuo, quam avidè expectabimus. Mea te tuamque plurimum salutat.

*Amstelodami* iii. Non.  
Sept. clb lxxxiv.

# CCXXXVI.

Joanni Meursio S. P.

**M**itto ad te, chare Meursi, Reidanum <sup>7</sup> *μα-  
γιστρον* filii mei, quem placitum con-  
fido & filii & argumenti, & dictionis etiam  
causa. De quo judicium tuum quoque ubi  
acceperis expectabo. Jamdiu missum oportuit; quippe inter primos esse te conveniebat  
cui mitteretur: neque id solum ob amicitiam  
nostram, sed etiam quia tanta cum laude ipse  
in Historia Patriæ sis versatus. Nunc Danica  
non minori tractas gloria. Mallem ego Ba-  
tava, etli valde faveam Danicæ genti, vel ob  
tot eximios proceres, quos scriptis tuis de-  
corare jamdiu orsus es. Sed enim nulla hic  
culpa tua, verum Patrii soli, externos magis  
quam suos æstimantes. Aliter si esset, non  
alibi potius quam his terris ageret bonis  
omnibus laudatissimus nec ullis tacendus se-  
culis Hugo Grotius. Qui quanti te faciat  
scio

scio ex sermonibus, quos de te habuimus hac in urbe ante sesquiannum circiter. Quam autem ejus erga me amor perseveret, luculentum brevi argumentum videbis. Suum enim Sophompaneam nomini dicavit meo. De Josepho se aperiente fratribus in Ægypto Tragoedia est. Qua nihil omni hoc seculo eo in genere divinius scriptum puto. Editionem ejus proximo mense ordietur Blauwius: Et tuorum simul operum quæ dilata quidem hætenus: sed teltis ego esse possim, quodd nihil hic segnitie vel discordia sit peccatum, sed solum ob nimium vicinum, qui omne commodum incommodo non Blauwii solum sed etiam publico intercipere conatur, recudendis confestim quæ maxime placent. Noomius Arlandervenæ Dominus sæpius cum laude meminit tui. Et vellem ostendere ei si licuisset partem illam literarum quæ ipsum tangit. Sed utrum nunc in prædiis suis an Harlæmi vel Haghæ agat, satis dicere non possum. Intra Hebdomades duas reversurum ex famulatio intelligo. Certus sum gratissima ei fore, quæ scriptisti. Aristarchus meus sive de re Grammatica Libri VII. necdum prodierunt. Intra mensem tamen vel circiter absolventur. Salmasius prope convaluit. Itaque non dubito quin Arnobium suum & alia brevi sit daturus nobis. Non est ea apud Lugdunenses gratia, qua meretur. Imprimis ei obstat Menapilci invidia, qui non desinit erga eum esse qui esse solet erga non Batavos solum sed prope omnes eruditos. Vale singularis amice & uxorem ac liberos saluta meo, conjugis, ac liberorum nomine. Nec Stephanium vel Laurenbergium præteritos velim. Valdeque aveo scire an non tandem nobis Stephanus Saxonem Grammaticum sit daturus. Quæso de hoc quoque aliquid proximis literis scribe. Et si cessat ille, calcaria subde. Dignissimus est scriptor cui tam bonum ingenium operam impendat suam.

Amstelodami.  
Non Sept.  
clo lœc xxxiv.

Tuus æternum,

G. J. Vossius.

CCXXXVII.

Merico Casaubono S. P.

QUÆ ad Antonini loca à me producta respondes, præstantissime Casaubone, ea planè suere ad gustum meum; nec ab alio quoquam verisimiliora iis adferri posse arbi-

tror. Quodd verò alteram jam editionem Typographus cogitet, satis arguit, quam grata fuerit Britannis opera tua, quæ vertendo, quæ illustrando. Ac quanto sunt majora, quæ nunc sub manibus habes (hoc enim non obscure significant literæ tuæ) tantò, ut auguror voveoque, majus te ex iis decus manet. Et tamen non dubito tibi aurem quoque vellere de *divenditis* illis parentis tui *opus*, quorum Cantuariæ cum essem Indicem apud te vidi. Tuum & tam candidi erit, non invidere lucem jam perfectis, & tam eruditi, extremam affectis manum admove-re. Scio idem optare etiam Salmasium nostrum, quicum de te, deque parente tuo honorificus sermo fuit. Triduo cum conjugē domi meæ hîcse Amstelodamensibus fuit nundinis. Multusque nobis de interioribus literis sermo, quos meminisse juvat, si scire aves, quid nunc sub manibus habeat, primum Arnobius commentario luculento illustrior lucem conspiciet. Mox sequentur de vitæ termino Liber, & grande opus de re Vestiaria. Nosse te arbitror, ut Grotius operam suam regno addiderit Suecico. Vellem tempore sæliciori. Nunc, ut literæ consentiant è Germania perlatæ, res retro eunt, Germaniæ quidem Suevorumque malo; non item Galliæ tuæ. Cujus Rex cum Cancellario suo, seriò advigilat, ut iidem fines regni sint ac quondam, cum Rhenus terminaret. Atque eo spectat, quod Sueoni suppetias mittat, sed conditione ea, ut urbes nunc has, nunc illas, quas in ditionem redegit, oppignoret Gallo. Cancellarius Oxenslernius, ut Cæsareum Hispanique exercitum Francofurto audivit imminere, Moguntiam se recepit. Utrum & Grotius Moguntiam sit Cancellarium secutus, à quo maximi sit, an in Galliam ad Regem missus sit, non possum certo dicere. Sed non dubito quin inter paucos dies futurus sim certior. Opus nostrum Grammaticum post mensem, spero, videbis. Gaudebo me molestissimo labore defunctum. Oratori Regio Boswello misi Antoninum tuum. Cum acciperem exemplar geminum, nullæ additæ literæ erant. Cumque exemplar mittere vellem (id fuit post acceptas literas) jam is Britanniam profectus dicebatur. Filius meus diutius hîc hæsit, cum alias ob causas, tum illam, ut de maternis bonis cognosceret. Intra paucissimos dies liquida fient omnia. Apocham triennii, ut petieras, mitto. Reverendissimo Domino Archiepiscopo, Mecænati nostro optimo maximo, res meas curæ fore confido. Sed & tibi commendatissimas esse scio: Quare nihil de iis addo. Nos omnes plurimum te uxoremque salutamus. Reverendum etiam D. De-



D. Decanum totumque fratrum collegium plurima salute impertias velim.

*Amstelodami* Pr. Kal.  
Octobris anno 1634.

*Tuus tuo merito,*

G. J. Vossius.

CCXXXVIII.

Joanni Meursio S. P.

**S**I, amice optime maxime, amicitia nostra ab Epistolis dependeret, jam pridem eam extinctam credere deberem. Sed & firmior tu es, quam ut mercenariorum in hominum manu esse velis arbitria amoris nostri, & ego scio multos intervenire casus quo minus aut scribatur aut scripta cum fide perferantur. Annus jam integer est quod literas ad te dedi bene longas euntibus in Daniam legatis nostris. Sed illas, quia in oris Regni Danici subliterant legati, per nuncium ad te missas ex famulo cognovi. Nunc vero periisse eas satis animadverto: quod eo indignius fero, quia una miseram ingentem fasciculum literarum ab aliis exaratarum, quem ab affine tuo Hebrando Ecclesiaste acceperam. Ex eo tempore epistolam ego ab te unam alteram, Conjux ab uxore tua accepit. Et scio mirari vos quid prohibuerit tuis satisfacere postulatis. Cæterum nē hæreas, scito, cum primum ad cōmenda ea, quæ petieras, conjux mea exisset, non repertam esse mensam ejus magnitudinis ac uxor tua scripserat. Itaque distulit curam hanc ad dies aliquot. Nam relatum mihi erat Hebdomadem unam alteram subliturum hac in urbe eum qui literas tuas attulerat. Sed postea cum advenisset tempus morem tibi gerendi, cognovimus jam abscessisse hominem cui tradenda erant suppellectilia tua: Ita uterque spe excidimus, ego obsequii, tu suppellectilium. Eam ob rem quia Muldenius generosi Adolescentis Rozekrantii ephorus aiebat se literas meas ad te optime procuraturum, & otii aliquid dabant à publicis occupationibus nundinæ Amstelodamenses, non putavi diutius scriptionem in illud tempus rejiciendum. Collegam adhuc præter Barlæum habeo nullum. Causæ me latent: siue consules properare nolint: siue eo id fit quia bello omnium intentæ mentes & fuerunt hætenus & adhuc sunt. Etenim à multis annis non alium videmus celebriorem victoriis nostris. Subactæ sunt Venlona, Ruremonda, Strala, Trajectum ad Mosam: quin & omnis ducatus Limburgensis. In potestate Mosam habuerimus, si Mamurco potia-

mur. Etiam ad Antwerpiam castella complura & validissima expugnâvimus, in his magnum illud Antwerpia momentum aggerem Rouwenstenianum. Nec jam arma quiescunt. Princeps ipse ad Trajectum manet curandis munitionibus. Interea aliis locis sunt copiae ubi cum rei gerendæ opportunitas detur intentæ. Sed publicum gaudium longius produxit me: ad nostra redeo. Ab aliquot mensibus fervere cœpit prelum libris nostris de Arte Grammatica. Est ea pars prior commentariorum de LL. Altera consequitur quæ origines comprehendit. Habeo & paratos libros tres de arte Poetica: qui absoluto majori opere, si Deus vitam dederit, edentur. Tu quibus jam occuperis scire aveo: idque eo magis quia novi indefessum illud ingenium tuum quod otio nunquam nisi doctis omnibus fructuoso indulget. Solonis duo exemplaria accepi. Sed alterum ἀκίραλον. Nam à capite quidem primo incipit: sed solum illud desideratur ubi inscriptio & præfatio. Credo in mensa tua vel apud Bibliopolam relictum. Gratum feceris si occasionem nactus scribendi tuis literis incluseris, quo plus pro eruditissimo & utilissimo opere debeam. Integrum exemplar Barlæo tradere malui, qui gratias impense agit. Nuper is valido afflictus fuit morbo & periculoso: sed placuit Numini reddere ei valetudinem. Itaque jam mensem unum alterum publica iterum munia functus est. Tuorum vero ægritudo an animum penetraverit meum dicere si velim, frustra faciam. Nam & amorem nostri meum: & novi ego soli in externa gente habitanti (et si amicos tibi optimum quemque sciam esse) omnes casus graviores accidere. Ideo optavisssem & ipse tibi tuisque solatio esse & auxilio. Agnosceres non dubito quamvis multis hodie fides vacillet, Vossio plus constantiæ & amoris adversum te esse. Cæterum quod præterire nolim, sæpius appellatus sum à Guilhelmo Janfonio Cæsio sive Blauwio Typographo & Bibliopola urbis hujus principe, ut exquirerem ex te utrum ea, quæ ad Historiam Danicam pertinentia edidisti, postea vel emendâris vel saltem auxeris. Vel ecqua habeas ejus argumenti inedita. Quippe ei decretum omnia tua & aliena quæ ejus sint argumenti in lucem dare. Quod faciendum sibi non putavit nisi prius mentem tuam perspexisset. Adhæc ut respondeas etiam & etiam rogat. Corrigendi curam depono mihi, quamvis adeo curiosus suorum operum Blauwius sit ut nulli cedat. Filius meus Dionysius animadversiones in Cæsarem & qui adjunguntur ei auctores molitur. Manuscriptos complures nactus est. Itaque rogavit me ut exquirerem ex te ecquid in iis scriptoribus

bus tibi observatum vel emendatum esset. Si habes aliqua, nihil tibi præter curam edendi petit; gloria omnis tua publici utilitas erit. Sed cesso. Video enim excrefcere epistolam & simul quoque studium scribendi. Quod ne adeo gliscat ut abrumperc nequeam, te, vir clarissime & amicissime, & tuos omnes supremo humani generis Rectori commendo. Uxor quoque mea tuam, liberi mei tuos salutant. Plurimam etiam salutem Viris Cll. Laurenbergio & Stephanio. Cujus postulatō hoc ipse die satisfecissem, si præcissem crastino die Domino Mullenio literas esse tradendas, modo quamprimum curatas & quam optime velim. Nec enim erat qui tam cito vitam quam exposcit Stephanus, exscribere posset. Verum intra paucos dies id præstabitur. Decretum iterum tum Mullenii opera uti, qui literas vitamque eam suis & ad illustrissimum & generosum Heroa Rozekrantzium includet.

*Amstelodami,*  
clō Idc xxxii.  
vii. Kal. Octob.

*Tuus antiqua fide,*

G. J. Vossius.

# CCXXXIX.

Guilielmo *Archiepiscopo Cantuariensi.*

Reverendissime Pater, Domine Illustrissime,

**G**Audeo me tandem ad finem perduxisse labores meos Grammaticos, quibus censuram exerceo in omnes hujus Artis Scriptores, causas eruo Sermonis Romani, optimosque ejus auctores vel corrigo vel illitro. Utinam pro labore maximo, quo mihi steterunt, fructus etiam ex iis redeat ad Rempubl. literariam. Jam anni sunt triginta & amplius, quod in hocce Commentarios congesti, quicquid penè ad hanc artem pertinet ex infinitis scriptoribus observassem. Ea ne ulterius luci inviderem, flagitarunt à me homines eruditissimi, tum hisce, tum terris etiam longe diffitis. Quemadmodum & valde urgent de rei Poeticæ libris; in quibus, præteritis rei metricæ minutiis, Aristotele imprimis duce in penetralia ejus Artis duco juventutem plane *ἀριστευομένης*, sane alia facie, quam factum hæcenus à quoquam. Nec minus, qui videre exposcunt vastum Originum opus, prælo & ipsum diu paratum. Sed gravioribus dissentus, & his, & aliis id genus sepositis, de solis Artis Grammaticæ libris septem, persuaderi mihi passus sum: non quali ignorarem, quantopere jaceat hoc studium temporibus nostris; verum tanto magis necesse putabam, exsurgere ali-

quem qui hoc labore seriò fungeretur, partim ne tenera ætas diutius tot laboribus imbuatur, partim ut homines doctissimi, sed aliis studiis occupati, intereaque in hisce minutiis sapius hærentes, haberent hic, qui labore suo eorum levasset laborem; quo sine quatuor luculentos indices adjeci. Nempe quibus perlegendi non est otium, fortasse consulendi subinde voluntas non deerit. Cum autem conatus sim prodesse toti Reipub. literariæ, tum imprimis cogitavi in Editione hac de Magnæ Britannicæ Gymnasiis: quibus si utilis fuerit opera hæc nostra, cælum mihi digito attingere videbor. Sæpius etiam in mentem venit illustrissimi Principis Walliæ, uti & illustrissimi Principis Eboracensis. Nam etsi non ignoro, cœlestes illas animas haud esse diu detinendas in Grammaticorum spinetis; fortasse tamen, ubi paullum ætatis accesserit, non ingratum erit hæc quoque inspicere, ac aliquantum rosarum decerpere, præsertim si præturgida sua nomina, aut alterutrius, in librorum frontispicio conspexerint. Atque hoc est, Reverendissime Pater, de quo nunc consultum per Epistolam venio. Sane labores hujusmodi non absurde, nisi fallor, à tam excelsis nominibus humilitati suæ aliquid præsidii petunt. Scio Commentarios hosce magis convenire Artis Doctoribus, multumque jam in literarum studio provectis. Attamen fatendum, totum opus esse de literis, syllabis & voculis earumque structura; à quibus ætatu læ illustrissimorum Principum auspicandum erit. Quod possim igitur hoc tempore iis accommodatius offerre? Spero etiam tenui hoc munusculo utcumque comprobaturum me humillimum obsequium, quod debeo Domino meo serenissimo Regi CAROLO: Cujus quoties ego ingens beneficium, quod conciliante te, illustrissime Domine, accepi, mecum cogito, cogito autem quotidie, toties Deum rogo quæsoque, ut mihi largiatur, servo esse non ingrato, nec indecori magnæ Britannicæ regno. Vires quidem mihi exigæ, vel potius nullæ; sed in alio si ququam prolixissimus, in me omnis obsequii affectus. Atque ex eo aliquid capio voluptatis, quando his terris occasio se offert, retundendi malevolorum calumnias, quibus Anglicanam Ecclesiam, maximeque ejus Antistites traducunt. Facio autem id ea modestia, qua possum; neque id tam contradicendi studio, quam amore veri rectique, & quia ægre fero tam facile iis aures præberi ab imperitis. Procerumque.... studium hoc meum, quia iidem sunt homines, à quibus dicta factaque sua vident in deteriorem partem rapi. Quasi non liceat adhærescere Do-

K k

Strinzæ

ſtrinae & Ordini veteris Eccleſiae, cum occulte foveas in pectore Papam, cum Hiſpano. Nempe iſtiusmodi ſunt maledicta, quibus novarum rerum cupidi ſe ulciſcuntur, poſtquam turbare omnia volunt, nec poſſunt. Maimonidem filii mei ſi *monaſterio* proxima demum hebdomade prælo ſubjiciet. Typographus antea negat ſe potuiſſe, quod typis deſtitueretur Hebræis. Deinceps opera dabitur, ut tamdiu promiſſus non minus emendate quam eleganter exeat. Eamque ad rem mihi operam ſedulo pollicetur Typographus; qui illuſtriſſimo nomini tuo plurimum ſe debere fatetur, pro opera & affectu, eo in negotio quod ante aliquot meſes per literas commendaram. Petiit à me ut tibi, Reverendiſſime Pater, gratias ſuo nomine agerem, quod quo minus ipſe faceret, pudore impediretur. De Johanne meo quid ſcribam? non poſſum in eo excitare illum ſtudioſiorum amorem, quem requiro; & jam alia mecum agitare animo incipio, ſed ante ſequimenſem nihil certi perſcribere potero. Ita non tam meus quam filii fluctuat animus. Cætera de rebus meis cognoſces ex doctiſſimo & optimo Goſſio, quem ego vere amo, quia bonam mentem amat, teque, illuſtriſſime Domine, ſupra omnes reveretur ac colit.

Deus Opt. Max. te, Reverendiſſime Pater, Domineque illuſtriſſime, diutiſſimè Eccleſiae totique Regno Anglicano ſoſpitem conſervet.

*Amſtelodami,*  
cſo Id. xxxiv.  
vii. Kal. Nov.  
St. Vet.

*Reverendiſſimi & Illuſtriſſimi*  
*nominis tui Clienſ,*

G. J. Voſſius.

# CCXL.

Cl. Salmaſio Ger. Jo. Voſſius S. P.

**I**N gratulantium ingenti numero qui te haud dubie totos jam dies, maxime Salmaſi, circumſiſſit, nec ego quo in te amore ſum, temperare potui à ſcriptione. Felicem judico Bataviam, quæ te fruitur; ſapientes quorum beneficio fruitur. Etſi vero nunc ab Lugdunenſi abſim Academia, nihilominus ſic quoque gaudium magnum capio, quatenus & in propinquo agitantem inviſere & frequentius literis compellare erit. Adeoque nec præcipitis autumnus frigus, etſi paulo languidiorem, nunc prohibuiſſet excurrere, ni publici, quod ſuſtineo, muneris vinculum retinuiſſet. Sed dabit ſpero Deus & vitam

mihi & occaſionem compellendi ejus, quem abſentem etiam tantopere veneratus ſum ſemper. Nunc Lugdunenſi in Academia tot nominibus beata, literæ etiam, variaque omnis eruditio, atque adeo ut Romana & Græca, ſic Eccleſiaſtica etiam antiquitas, non paulo ſublimius quam adhuc caput efferent. Ac ſi Scaligero, Lipſio, aliis illa magnis viris ſe jactat, non minore deinceps incola poterit ſuperbire. Utinam quæ tam juſta æſtimatione metiri eruditionem tuam novit Batavia, alia aliquanto in magnum Hugonem fuiſſet. Doleo quotieſcunque cogito eripi publico noſtro virum eximiis adeo virtutibus quas poſteritas melius æſtimabit; doleo quoties avulſum à me amicū & te quoque eodem tam tui amante cariturum reputo. Sed variæ rerum vices ſunt, & ego uti ardentiffimis votis ſemper optavi iterum jungi Hugoni noſtro, etiam impendio diem illum videre deſideravi, qui te ſoſpitem Bataviæ ſiſteret, magnasque ſummo Deo gratias ago, cui incolumitatem tuam debemus. Vale, vir idem atque amice maxime, & ſi quando magnam in qua vivo urbem viſere (ſic meretur) animus erit; quæſo cum Conjuge & tuis, ne alibi potius quam domi divertas meæ. Id vero honori mihi ducam maxime, pleneque dignum erit amicitia noſtra.

*Amſtelodami* v. Id. Novemb.  
Nocte intempeſtâ.

# CCXLI.

Cl. Salmaſio Ger. Voſſius S. P.

**N**ON facile dixerim, quam mecum gaudeat uxor, quod tua te prole iterum bearit, ſalva ipſa ac ſoſpes: coque nomine, & ego & conjux Deo gratias agimus, nobis gaudemus, utrique veſtrum ex animo gratulamur. Vix indicium feceram meæ, cum illa rogaret (& quid curioſulæ prius exquirerent?) marem an femellam enixa eſſet tua? Ego hic ignorantiam meam profiteor. Nec enim adſcripſeras: ſed aiebam, quia de eo ſilerent literæ tuæ, putare me eſſe femellam. Conjectorum artem non didici, à parentibus vel magiſtris. Facilem igitur veniam mihi fore ſpero, ſi fallor. Sed amice, aliud etiam habe. Ut ſignificavi meæ, quod dixi, illud etiam addere ea; O ſi præciſſem cum Domina Salmaſia hic eſſet, tanto poſt tempore demum parituram, quam uſuiſſem ut pluſculos dies manere nobiſcum voluiſſet; nec ſic abiret, cum vix veniſſet. Sed eo ſe ſola-



solabatur, quod aliquando una esse poterimus, cum partus propinquus non metuitur. Deus tantum nobis valetudinem: Quæ neque nunc bona conjugii, vix etiam mihi. Et præterea etiam me detinet hic munus publicum. Absque eo fuisset alteruter nostri expositurus erat coram, quod per literas nunc facio. Nempe precibus te oro, & obsecro, ut si res adhuc integra est, alterutri honos ille exhibeatur, ut pro infante spondeat in Baptismo. Utrumque atque adeo familiam vestri studiosissimam totam obligabis. Ut aliquid ego humanitus patiar, liberi studebunt implere sponsonem paternam. Scripsissem de isto literas ad quempiam de veteribus Collegis, si scivissem annon alii jam priores tulissent, sive absentia, sive cessatione mea. Attamen verbulo si rem aperias vel Clarissimo Polyandro, sive præstantissimo Cunæo, sive optimo tuique studiosissimo Constantino, vel alicui ex eorum uxoribus, sane nemo eorum, scio, ubi de voluntate mea referas, detrectabit meo loco polliceri: Quod memini ine promisisse, non semel alieno nomine. Nihil enim apud nos usitatus: Sed tui tamen arbitrii esto, quem substituere velis, dummodo se meo sistat nomine. Perge sic, optime maxime Salmasi, bene de nobis mereri. Nam quod literis mihi gratias agis, quasi multum humanitate mea obstrinxerim, meas mihi præripis partes; ut qui probe sciam multum me eapropter vobis debere; quippe qui beneficium acceperim non dederim. Utinam tempus videam, ut denuo sic beer. Quod ubi erit, magis cognosces, quanti ab hac urbe fias: Multis ægre admodum fuit, quod prius difficilissimum, quam de adventu cognoscerent. Grotius adhuc Moguntiz est cum uxore & filiabus. Nempe iter Gallicanum paulisper dilatum. Scio illud magni esse momenti, negotia, in quibus Proceres Suevici opera ejus uti decrèrint. Sed literis omnia committi non possunt. De submersione Lymphatici fomnium est. Ut videas non Sabinos solos, quod volunt fomniare, sed gentem etiam tam vicinam. Equidem literas vidi Moguntia ab Grotio & uxore ad filium, qui hic studiorum causa vivit, Kal. scriptas Novembr. Neque tum constabat eis de die, qua in Galliam iretur. Ac fortasse aliud non minoris ponderis negotium prævertet aliquantum. Ex Anglia necdum recepi responsum. O quam molestum est animo meo, quod nihil illorum habeam de quibus scribis. Sed tamen crastino die inquiram, an aliunde possum nancisci. Verum metuo ne frustra sim. Nihilominus duos tres accedam, in quibus aliquid spei habeo. Quod si non confestim

rescribam, scias me operam lusisse. Vale, maxime vir & amice, atque cum lectissima uxore, à me & mea plurimum salve.

*Amstelodami* cl<sup>o</sup> Id<sup>o</sup> xxxiv. ix. Kal. Decembr. xii. Nocturna. Sic die toto fui à variis impeditus, ut rescribere prius non potuerim.

## CCLXII.

Marco Zuerio Boxhornio S. P.

Gratias tibi ago, ornatissime Zueri, pro munere: & magis quia scriptorem illum non uno semper nomine amavi. Quare placet, quod non tibi solum familiarem eum reddideris, sed notis etiam ornandum putaris. Sed quid tibi vult quod in Claudio scribas Baustum Syllam? vidi an in erratis ejus nos moneres. Nunc contra in indice priorum nominum in litera B. Baustum reponis nobis. Pene suspicor, ab alio eum esse indicem concinnatum. Nam scio te scire, etiam Filio Syllæ Dictatoris Prænomen fuisse Fausito, uti Filia Fausitæ. Fidem inter alios fecerint. Asconius argumento Orat. pro M. Scauro, & Plutarchus in vita Syllæ. Puto & non à te, sed librario esse, quod ais, ut Diogenes scripsit *βίος φιλοσφραν*, ita Plutarchum reliquisse *βίος περὶ συλλῶν*, nec enim sunt *βίοι περὶ συλλῶν* verum *περὶ συλλῶν*, h. e. vitæ comparatæ. Sed de istiusmodi minutis fortasse aliquando coram colloquemur. Placet quod fragmenta Tranquilli apposuisti. Utinam cætera dedisses, quæ quidem extant, id enim omnino & Suetonii intererat, & tua. Nunc in iis meministi librorum de Grammaticis & Rhetoribus, qui extant: non meministi libri de Poetis qui non extat. At B. Hieronymus loco eo quem adducis, non minus hunc respexit, quam priores. Et mox opponis ipse verba Scaligeri ex vita Lucani. Quæ tum inedita quidem, sed postea prodiit beneficio Scriverii nostri. Quare ea non debuit omitti. Uti nec vita Perlii vel Juvenalis, utcumque huic aliquid aliunde assutum. At illud maxime mirandum, quod omittis luculentam Terentii vitam: quam certum est non Donati esse sed Suetonii. Horatii vitæ, quæ corruptissimè edita, vellem castigationes Rutgerii addidisses ex editione Parisina. Non ingratum est, quod præmiseris Tranquillo, quæ de vita & scriptis ejus habemus in Historicorum historia nostra. Sed non inseruisti quæ in appendice interponenda monui, cum ea non sit aspernanda accessio.

K k 2

Voluissim

Voluissē & librarii errorem sublatum, ubi Tranquillum si Suidæ codicibus standum, fecisse de Cæsaribus, Libros VIII. sed ad minima iterum relabor. Laudo quod etiam cogites de aliis Historiæ Augustæ scriptoribus: etsi difficile sit post Homerum Iliada scribere. Verum *χαλεπὸν τὸ γράειν*. Nec tu ut censo tam messē uberem quam spicilegium promittis. Atque id colligo ex parte ea quam miseris. Legi in iis quæ satis arderent, sed cogitare de singulis non licuit, quia alia quædam magis urgerent, & Lamerius significaret proxima Hebdomade editionem inchoatam, tum autem noram quantorum virorum consilio uti Lugduni possis. Quod Salmasii te amicitia inlinuare velis, bonum factum. Quid enim non ab summo illo viro discere poteris, si eo amico utaris, facile hoc videre potuisti vel ex iis, quæ scripsit in eos Historicos, quos nunc habes sub manibus. Quem enim existimas eo in genere tam multa bona doctissimum quemque docere posse? Quare eo viro laudando non facile peccabis, potius metuendum, ne cum omnia, quæ censēs dixeris, infra veras ejus laudes substas. Plurimam salutem dicito tuis, imprimis optimo doctissimoque seni avo tuo.

Amstelodami,

Tuus,

Kal. Decemb.

G. J. Vossius.

## CCXLIII.

Clarissimo Salmasio Gerardus Vossius  
S. P.

NON dubito quin Columna Trajani plurimum commodare possit operi, quod de Re Vestitaria bono publico sub manibus habes. Prope apud omnes Bibliopolas, & eos, qui tabulas chartasque divendunt inquiri jussi: sed omnem operam lusi. Blauwius suam offerebat ad eam Romam petendam. Id tardum videatur negotium, hyeme imprimis. Tandem in mentem venit Joachimi Wickefortii, ejus apud quem nummos Velferianos hic uterque vidimus. Ex ejus igitur Bibliotheca nunc mitto. Atque utinam de Antonina idem facere potuissē. Aiebat Wickefortius, necdum eam æri incisam, attamen manu cujusdam Presbyteri in Charta expressam Romæ exstare, proque ea se obtulisse Florensis ducentos: sed non potuisse eo pretio nancisci. Arausicanæ urbis Arcus Marianus nec ipse in lucem prodiit. Pluribus sum locutus, qui Arausicæ viderint, mireque

commendent. Ac Pontanus noster qui his diebus mihi affuit, ut optimam habuerim occasionem tuas de manu in manum tradendi, aiebat se ante biennium locutum de eo cum Hugenio Arausionensium Principi à secretis, eum dixisse curaturum se ut ne diutius tam nobili monumento careant homines literati: sed nihil postea intellexisse: nec id ab eo vel alio præstitum in animum posse inducere. In electis Rubenii est Icon unius alteriusque statuæ togatæ ac tunicatæ. Volui idcirco mittere. Cancellario Frisio in hunc fere modum inscribi literæ solent;

*Nobilissimo, Amplissimo ac Magnifico Viro Domino Christiano Frys Toparchæ in Cragerup, Serenissimi Danorum Regi Cancellario ac Regni Senatori.*

Quod ubi prole iterum augebere, me vel uxorem fidei sponso rem fore promittis, id sane pergratum utrique, eoque ardentius pro salute vestra vota faciemus.

Amstelodami iv. Id. Decembr. clcxxxiv.

## CCXLIV.

Ger. Jo. Vossius, Francisco Junio, F. F.  
S. P. D.

Spero jam acceperis fasciculum, quem de rebus Joannis mei, ad te ante duas Hebdomadas, misit Filius Matthæus. Sed incuria famulæ factum, ut tum reperiri non potuerint literæ Filii Joannis tibi inscriptæ, quas nunc mitto. Necessē sit negotium ejus Cantabrigiæ expediri ante Kalendas Martias. Nam tum expiravit tempus emanandi è Collegio concessum. Rogo agas, in hoc ejus negotio, quantum honestas limit. Quod vitæ genus deinceps initurus sit filius, fortasse jam perscripserit. Sin reticuit, quod credere malo, proximis ex literis meis cognosces. Petierat Joannes, ut ex utensilibus, pluscula darentur isti, de qua jam ante sesquiannum, ad me scripseras. Si modo eadem est: quod mihi negat. Verum toties deceptus, nescio quid credere debeam. Quæ autem ei tribui velit, charta quadam complexus fuit: sed non possum nunc invenire. Sunt lectus, mensa, & similia; libros, chartas, picturam meam, & id genus, voluit huc transmitti. Sed nihil adhuc certi possum scribere. Opera dabitur, ut reperiat ipsius filii manus. Quam malè tibi istis amoribus

ribus consuluit filius? Hæc mihi devoranda; qui post quinquaginta annorum in studiis labores; aliquam mihi in liberis requiem sperabam. Nunc non minus diu, nocturne laborandum, quam adolescenti olim fuit. Quàm illas veteres delicias, Dionysium meum desidero, qui ingenio divino, probitate eximia, assiduus in omni propè doctrinarum genere studiis, moribus ad hæc suavissimis, quicquid molestiæ obtingebat, unus facile detergebat. Nunc & eo careo, & ex altero nihil nisi molestias percipio. Sic Deus castigat suos: Cui interea gratias ago, ob tot alia beneficia; & interea quod non Franciscus modò, & Matthæus, se valdè mihi probant: Verùm Isaacus etiam cum Gerardo sic vitam & studia compenunt, ut propè spem conceperim, quod damni, & familia mea, & Resp. literaria, in Dionysio fecit; per eos aliquando posse refarciri. Matthæus intra Hebdomadam, unam, alteram, Typographo excudendam dabit Historiam Comitum Hollandiæ, non dubito, quin placitura sit. Tandem ab Amplissimo D. Boswello, regia negotia apud nos curante, certi aliquid de inscriptione, sive principalibus titulis accepi. Quare nunc nihil superest, quàm ut præfatio excudatur. Maturabo, quantum possum. Scire te arbitror, ut jam tertium annum Lugduni vivat, vir summus Claudius Salmasius; qui eo invitatus pretio, quo olim Joseph Scaliger. Atque id non mediocrem ei invidiam peperit, apud unum, alterum Professorum, imprimis Gandensem. Mihi verò qui gaudeo, tantum virum his terris agere, non mediocris cum eo amicitia intercedit; nec per literas modo, sed sic etiam; ut subinde, alter alterius præsentia fruamur. Sanè triduo toto ante menses duos, cum uxore, apud me divorit. Qua occasione à me petiit, ut meo suoque nomine, à te peterem exemplar statuae palliatæ, ex monumentis Arundellianis. Habet sub manibus grande opus, de Re Vestitaria; ubi ad amussim exprimendæ formæ Togæ, Pallii, Sagi, Paludamenti, & similibus. Pollicitus est quod pictori tribueris, id quam primum se velle refundere. Conatus est aliquid, in argumento hoc, Baysius, sed tantum conatus. Adeo nihil est præ illis, quæ Salmasius præstabit. Eò minus patieris hic curam tuam desiderari. Scis cujus magnitudinis esse soleant imagunculæ quæ in libris exprimuntur: Quamquam quacunque tibi mittere visum erit, ipse facile imitabitur, sive sculptor potius pro libr. .... qua Salmasiana excudentur.

Egregium opus tuum de Pictura excudi non potest ante Kalendas Maias. Præcipue in causa est, quod Blauwius Typographus,

uxorem duxerit Goudensem; quæ non ante à parentibus poterit divelli, ut tribus hisce mensibus proximis τὸς πατέρα, ultro citroque sit com meatum, hinc Goudam, inde Amstelodamum. Quod non exiguo fiet πρὸς ἐργασίαν incommodo. Ipse autem editioni præesse malit, & quod tam multa alioqui peccare soleant Typothetæ, & alii.

De cæteris scribam, cùm Exercitationes meas transmittam. Id fore arbitror post tres Hebdomadas; nam & aliquid temporis absumetur, in exemplaribus compingendis; præsertim bellulo aliquo, quod Celsissimo Principi Carolo offeratur.

Dum in his scribendis sum, ecce mihi literæ ab Illustrissimo Suecici regni Legato, Hugone Grotio, tui, nostrique amantissimo. In iis hæc de te leguntur. "Quærenti mihi aliquem, vir præstantissime, qui me in Epistolis scribendis, aut describendis adjuvet, & quicum, de literis, præsertim illis sanctioribus, sermones conferre possim, cujusque opera simul usui esse possit, in paranda editione eorum, quæ ad Evangelia notavimus, ante omnes mihi in mentem venit, Francisci nostri Junii. Sed primum abs te scire cupiam, quæ commoda apud Comitem Arundelium habeat, ne ei offeram, quo conditio ejus deterior fiat; deinde an putes eum, & velle, & sine quo non est ut velit, honestè posse mutare Britannicam Gallica sede.

Ego ad ista quod respondeam, non habeo, priusquam te consulero. Is quicum vires, est magnus planè vir, doctrinarum facile Princeps. Si idem nunc tibi ardor esset, arcana studiorum penetrandi, quæ Adolescenti fuit, aliquanto alia ratio foret. Nunc venationes, & alia Aulæ studia, fortasse invitum etiam paulatim diversis moribus imbuere. Adde quod rei Suecicæ fortuna, in Germania quidem admodum fluctuat; tuæque conditio à Grotiana, illa à Suecica penderet. Eo excusso, fortasse operosum esset, Arundelianæ similem invenire. Spero etiam tam luculentum tibi esse nunc annum stipendium, ut Domino Legato difficile fuerit cum Illustris adeo Comitibus familia certare liberalitate. Verùm quid ego tam operosè de eo ad te, qui in rebus suis (in quibus ego prorsus cæcutio, quia de iis tam parci esse sermonis soleas) decuplo, & amplius videre possis quid facto sit opus, me etiam tacente? Attamen rogo, quamprimum mihi perscribas, quid rescribere debeam. Iniquum enim sit, si mora nostra impediamus, quominus, tempori sibi consulat vir, & amicus summus. Edidit is his Hebdomadis Sophompaneam, quod Josepho Israelis Filio, nomen



nomen in Ægypto. Tragedia est, magna arte scripta; quæ eo tibi gratior erit, quia nomini illam inscripsit meo. Propediem eam ad te, & amicos transmittam. Memini ante exemplarium, de re Grammatica, quæ ad te misi. Præter ista misi Reverendis. & Illustris. D. Archiepiscopi Secretario, duo holoserico vestita: Unum spero ab ipso, Dom. Archiepiscopo tradetur, de manu in manum, Illustrissimo Walliæ Principi: Alterum ipsi Dom. Archiepiscopo cedit, nisi aliter ipsi videatur: addidi enim & aliud solum inauratum, & hoc Chartæ Regiæ, quod cui videbitur Procerum tradere possit. Secretarius verò habet exemplar unum, inauratum, tradendum Reverendissimo D. Episcopo Londinensi. Simile item offerendum Bibliothecæ Bodleianæ, apud Oxonienses. Tria non inaurata addidi; unum Ephoro Illustrissimi Principis; alterum Bibliothecario apud Oxonienses, Rouse; tertium ipsi Secretario. Plura non misi, sed si mitti satius videatur, significa. Nolo illiberalius agendo, gratiam deperdere. Sanè si sacri fuisset argumenti, non hic munificentia mea stetisset. Sed scio, materiem ejus operis, non facere ad omnium palatum, præsertim in Magna Britannia, cui Theologica magis, & fortasse sola ardeat. Literas ad præpositum Collegii Jesu, relinquere apertas, visum fuit, quo ubi legeris, sub sigillo ceræ aliquid subdas, atque inde, si sic videatur, tradas. Sin existimes, iis de filio contineri, quæ satius sit ignorare, retineri à te poterunt. Omnino enim, qui istic es, facilius me dispicies, quid factò sit opus. Tandem tempus abrumpendæ Epistolæ, ne loquacitate obtundam. Vale, Charissime Adinis, & ab uxore & liberis salve.

Amstelodami  
c1o Idc xxxv.  
Non. Jan.  
Stylo Veteri.

Tuus omni officio,

G. J. Vossius.

## CCLXV.

Claudio Salmasio.

**D**Ausqueii doctrinam atque industriam jam ab annis novi pluribus vel ex commentario in Silium. Orthographica demum vidi mensibus abhinc duobus: nempe excuso jam opere Grammatico, appendicibus exceptis, ubi semel iterumque ejus memini, & ad eum remitto Lectorem. Video operæ fore, ut labores ejus conferam cum nostris Originum libris. Nam & ipse in ori-

ginibus de Orthographia tracto: & quantum paruit, secundum Dausqueii Tomum obiter lustranti, crebrò concurrimus. Et qui aliter potuimus, cum uterque nostrum astruamus sententiam, ex lapidibus Vett. Grammaticis & Manuscriptis? Carmen quod honori urbis hujus fecisti; non mihi solum, sed aliis quoque mirum in modum placet. Gaudeo in iis quoque esse Barlaam nostrum: Genium plane probabat. Equidem non dubito quin nisi Camænarum delubro conspiceris parvus & infrequens, quàm propitiâ habes Minervam. Tam divæ ille futuræ sint faventes; eorumque qui temporibus nostris Poetarum habentur Principes, alios se æquaturus, alios superaturus. Scis quantum usus polleat. Bene interim sit insomnia isti, quæ causa est tot bonorum versuum, ac si valetudini non incommodet, sæpe redeat. Præstabit tibi, quod *μυσπεδελος* illis, in bicipiti somniasse Parnasso. Quantumcumque autem verticuli tui placuerint, si tamen mihi credis, filebis de iis apud Leidenes tuos. Novi ego & meo & alieno experimento, ut levicula de causa plumbeas iras gerant. Non sine gravi plurium offensâ abiret, sic laudasse Amstelodamum. Scis quod olim à Platone scriptum *Πᾶσα πόλις πάση πάλῃ φέρει πολέμῳ*, ἄλλως τε καὶ ὁμοῦν χρεὼν ἔχειν, sed imprimis graviter ferrent distichon postremum. Ac nostri quoque proceres uti gaudent de affectu & augurio tuo, ita invitis illis fiat si Leidenes ut nihil non ante triennium movere in ordinem conventu cum de Gymnasio Illustri hic constituendo ageretur, ita occasione inde arrepta, quod Batavis de Athenis scribis pressum eos ire dicerent nobilem Academiam. Quod nostris & molestius forent, quoniam optimè Academicæ volunt. Quid mirum, quando non ea Leidenensium propria, sed totius Bataviæ communis est. Nisi novissem candorem tuum, non ista sine circuitione ulla scriberem. Nempe amorem tui gliscere his terris etiam apud Leidenes volo, non vero malevolentissimo omnium apud vos materiem dari, quasi averseiori sis animo ab urbe. Sic enim (novi cum intus & cute) interpretaretur. Et habet niger ille duos tres eodem in ludo edoctos per quos nihil non audet. Sed de isto satis vel potius plusquam satis. Apud te tamen facilis mihi hujus loquacitatis venia fuerit. Hugonem Grotium jam Lutetiæ esse confido: Tres enim jam hebdomades sunt & amplius, quod uxor Moguntiâ huc perscripfit postero se die cum tota familia comitaturam maritum, nec iter hoc ulterius posse differri. Quod jam bene vertisse spero. Exercitationes nostræ Grammaticales non absolventur, nisi post duas hebdomades. In causa est quod è Britan-

Britanniā exspectare debuerim quibus titulis orandus esset Serenissimi Regis primogenitus. Ei enim opus nostrum inscribemus.

Lectionissimæ uxori à me meaque salutem.

*Amstelodami c. l. d. c. xxxv.*

Pr. Nonas Febr.

CCXLVI.

N. N.

Illustris Domine,

Multum tibi debeo, quod ea cum humanitate, idque geminis literis, non gravatus sis me facere certior de victoriis serenissimi maximique regis vestri; ita arbitrator sic esse perpaucos, qui non eapropter & sibi gaudeant & magno vestro regno gratulentur: maximas etiam gratias ago, quod nolueris me celare de oratore, quem foederatæ Belgicæ ordines Constantinopoli habent. Conquestus sum super eo apud aliquos qui in Rep. nostra plurimum possunt. Sed facile cognovi nihil iis de isto negotio constare. Aliqui existimare malle hanc de eo suspensionem conceptam. Alii dicere si quid ejusmodi exisset, fortasse privata nonnullorum auctoritate compulsam, & nihil tale unquam in procerum conventu decretum. Illud quidem pro certo habeo, summates urbis nostræ viros & Regno & Regi vestro maxime favere, ac quantum in se nunquam perperuros, ut quisquam concitet Musulmannos adversus Regem Christianum, & ita Christianus, ut is tristi hoc Religionis Christianæ dissidio imperium in conscientias uni sciat Deo convenire. Quare siquid ejusmodi factum ab oratore nostro, necesse est aliquid monstri alere, qui ad hoc eum virum non communicato cum aliis consilio impulerint. Nova hic, quæ nostrum spectant Remp. pene nulla, aut parvi illa momenti. Nisi quod ab Americana Societate nostra Paraibam in Brasilia expugnatam naves postremo inde appulsæ referant. Is locus situ non longe Olinda civitate, quam nomine regionis perperam Pernambuco vocant, tribus constat castellis, non magno diffitis intervallo. Eo magis mirandum, quod exiguo adeo temporis spatio in nostrorum venit potestatem. Nec inutilem in eo capiendo operam præstitit nobilis vestras Artissimi. Quem me aliquando sic compellare meminimus. Eo autem major hæc victoria habetur, quod molæ aliæque purificando saccharo idonea nostris integra sint relicta. Accedit,

quod qui ante in talibus operam Hispanis locabant, eam nobis addiderint. Unde tantum animi Americanæ nostræ societati accessit, ut ante diem unum alterum liberum in eos tractus commercium mercatoribus concesserint, modo decimas rerum inde allatarum penderent. Fervere hic jam incipit armorum apparatus ad proximam ætatem. Vix enim dubitandum, quin grave imminet bellum ab Cardinale Hispano, qui illustrem victoriam ad Norlingam adeptus, non minores hic successus imaginatur, cæterum diversitatem belli nonnihil impeditenti allaturam confidimus. Germanis Mars apertus placet semper, raro Batavis qui multo maximam spem in propugnaculis sitam habent. Nec ratio belli, quod jam sexaginta per annos adversus potentem adeo hostem geritur, conferere semper manus permittit. Victi enim Batavi difficulter cum victoribus instaurant certamen. Nec æquum uni discrimini salutem patriæ maxima ex parte committi. Pro documento nobis sit ad quantam spem erecti nuper Germanorum principes subita clade una quasi è summo fastigio deciderint. Et hætenus quidem senserunt & adhuc sentiunt, quam futile sit, nisi necessitate summa urgente, unico prælio de summa rerum decernere. Imprimis Udenhemum à Cæsarianis interceptum, quem in locum Galli, tanquam munitissimum, aurum, argentum, annonam, cæteraque bello necessaria comportarant. Quicquid anni labore & impensis acquisitum unicæ pene horâ rapuit. Hinc plerique omnari improspere Gallorum successus. Filius is nobis, qui antea fuit, sic est commendatissimus. Nec patitur ille in vita aut studiis quicquid desiderari. Qua de re plura proximis literis scribas. Vale.

*Amstelodami,  
Prid. Kal. Mart.  
An. c. l. d. c. xxxv.*

*Illustri tuo nomini addictissimus,*

G. J. Vossius.

CCXLVII.

Jo. Arn. Corvino.

Hætenus, præstantissime Corvine, non respondi literis tuis, partim quia cognatum tuum Zeistium exspectarem, in quo me fessellit opinio mea; partim quod plane hærerem ipse, ita ut semel iterumque, manum calamo admoverim, sed mox eundem deposuerim, quia ab animo impetrare non possum, ut ullum animo scrupulum injicerem, quo

quo minus ad nos quamprimum venires. Nihil enim æque desiderabam. Et tamen metuebam, ne aliquid eorum deficiat in iis, quæ scribis, si domicilium hic fixeris. Simul videbam, de isto melius te ex avunculo tuo Perfinio posse edoceri. Quem super eo, si Hagam issem, consuluissem ipse. Illud interrim scio, tutò admodum te hic victurum. Ea enim est Magistratus prudentia ac vigilantia, ut malevoli nihil erga tui similes possint. Quam vellem, ne tantopere abjecisses voluntatem procudendi typis optima quæque. Quam bene pariter de studiis & familia tua mereris: Si vir ea doctrina ac judicio curæ illi incumberes, ut antiquorum tot monumenta aurea, quæ pene interciderunt, per te quasi ab Orco revocarentur: vel quæ passim corruptæ leguntur, tuâ operâ integrius, castigatius, ornatius prodirent. Sed eo ab consilio semper mihi visa abhorre conjux tua, postquam Lugduno abeundum sibi alio statuerat. Vi. Id. Januarii inauguralem habui orationem in Illustri Gymnasio nostro. Postridie item Barlæus. Ac uterque frequenti admodum auditorio diximus non adolescentulorum modo, sed etiam virorum eruditiorum graviumque. Literas tuas τῷ μεγάλῳ inscriptas, simulac mihi ab amico traditæ sunt, procuravi sedulo. Nunc mitto responsum ejus, ex quo facile perspicias, quanti te faciat. Itaque admodum tibi illud gratum fore scio. Uno excepto, quod addit ob odium quorundam Vatinianum, nondum adeo liquidas esse res suas, quam vellent, qui viri ejus virtutes norunt, nec doctrinæ pariter & concordie publicæ bellum indicunt. Veruntamen magna me spes tenet, propediem omnia fore loco meliori. In quo si nos opinio fallat, non diem in patria morabitur. Nam opus? præsertim cum certo familiæ suæ dispendio. Si quid tuto ad eum curatum velis, ad me mitte. Ac si quid aliud etiam exposcas, solum impera, omnia siquidem tui causa volo ac debeo. Uxori optimæ à me & mea salutem dices plurimam.

*Amstelodami.*

*Tuus,*

G. J. Vossius.

# CCXLVIII.

Generose Domine Baro,

**V**alde animo meo ægre fuit, quod nec pridie quam discederetis, Illustrissimum Dominum Legatum, vel te, quem sic amo, sic æstimo, domi reperissem. Foris cœnare quispiam è famulitio dicebat, neque postero mane minus operam luserim, quia sic maximi herois, parentis vestri, vel regni potius negotia tulere, ut jam currum ascendissetis priusquam, etsi non multis passibus ab ædibus vestris, eo venissem, & extremum vale dixissem, optima quæque & tam bonæ legationi, & itineri vestro comprecando. Sed quod facere tum non licuit, id vero nunc per literas facio, verbis quidem parcius, sed affectu non minus uberi ac devoto. Illud quoque non parum mihi dolet quod non satis perceperim mentem tuam de chartis hic relictis. Siquidem sic opinabar, non eas te legi à me vel te, sed alias, quas ipse scripseras. Has autem, quæ non amplius, ut arbitror, quam dimidiam negotii partem complectebantur, tecum ipse domi retuleras. Aliteras illas dic repertas primis aliquot diebus hic relictas ignoravi. Sed tamen fortuna bona in eas incidi, sponteque cras aut perendie eram remissurus. Opera dari cœpta, ut tumultuarie saltem à me legerentur, & aliqua castigatæ magis dictionis indiga notarentur. Sed multa adeo se obtulère, ubi prorsus hærerem, quod res Suecicas, mentemque scriptoris haud satis perspicerem, ut statuerim non posse eam rem hac nocte confieri. Nam post septimam demum vespertinam redditæ mihi ab eo cui dederas literæ tuæ: atque idem ait se cras sexta matutina Hagam repetere; utinam horis sex septem una nobis duobus esse licuisset. Plus promoverem, quam vel triduo nunc toto valeam. Nam quis mortalium rei minus intelligens, sæpius turpiter me darem. Si tamen tanti putaveris, Patrueli tuo possis Suevicum transmittere exemplar, ut is Germanicè exprimat mihi. Equidem non patiar ulla in re operam meam desiderari. Utere, fructe, me, meis, in hoc, in cæteris. Non alius vel hic, vel alibi reperiar, quam

*Amstelodami,*  
clō lōc xxxv.  
xxi. Mart. xii.  
Nocturna.

*Vestre Illustrissimæ Familiæ*  
*æternum devotus,*

G. J. Vossius.

Gratum



Gratum fuerit si illustrissimo parenti (quē equidem deinceps, non ob prudentiam, vel doctrinam maximam devotius quam ob eximiam humanitatem colam) obsequium meum fedulo in cunctis offeras. Te illustrissime Baro, & tecum pariter fratrem D. Jacobum, nobile adeo par juvenum, uxor, ac liberi plurimum jubent salvere, proque vobis mecum non desinent assidua facere vota ad Deum. Raptim.

## CCXLIX.

Claudio Salmasio, *V. Cl.* Ger. Jo. Vossius *S. P.*

**P**Apyri iconas remitto, qui Stapelio ionge gratissimæ fuerunt, multumque debere se fatetur. Nec minus mihi jucundus fuit conspectus literarum, quibus olim focer meus ad sacram professionem Leidam vocatus Heidelbergæ. Eoque gratius donum, quod nondum videram. Primaque occasione id perscribam ipse; sed dum quod mei scis non esse insolens, officium hoc scribendi differo, quæso hujus affectus mei ne penitus Puteanos fratres siveris expectes. Quod justius eo facies, quia eos amavi & colui semper ob præclara erga literas merita. Uxor mea jam mensē secundum ægrotat, non sic tamen ut perpetuo sit lectulo affixa. Et jam convalescere videtur; spero vere adulto, omnia meliora. Interea partim hæc invaletudo ejus in causa, quod longiusculo tempore non scripserim; partim etiam quod eadem mallet una cum literis meis mittere de Re Grammatica libros. Quod ne nunc quidem facio: sed fiet intra octiduum. Jam Bibliopegis exemplaria aliquot tradidi compingenda. Ex quibus prævertere necessum est, ea quæ in Britanniam mittentur. Id faciam die crastini, vel perendini. Simulque expostulabo cum affine Junio de non missis statuarum iconibus. Equidem planè nescio quid in causa sit. Nec enim suspicari possim, illustrissimum Comitem nolle exterorum quenkum aliquid è suis monumentis primum publici juris facere. An forte fasciculus literarius, quo & literæ hujus argumenti continebantur, minus in affinis manus pervenerit? Id eo minus velim, quia addita erant quædam de rebus non parvi momenti, eaque publica autoritate firmata. Sed quicquid erit, utrum acceperit exemplaria primogenito Serenissimi Regis Caroli, & aliis tradenda. Scio, jam cognoveris, amplissimum Grotium Lutetiæ agere, ac ut Legato Regni Suecici honoris ei officia esse præstita, ut post-

quam in conventu Regis ac procerum exposuisset quæ in mandatis habebat, privatim cum Rege sermones de toto negotio Suecico ac Germanico habuisse. Equidem ob hæc & alia non minus gaudeo, quam dolere illum scio, qui in castris non humanitatis quidem sed inhumanitatis & malevolentiae facile principem locum tuetur. Utinam tantum non eo loco res Suecicæ viderentur, ut Gallorum etiam Regi satis sit difficile futurum, instaurare eas, si vel maxime velit. Sed isthoc *ἡ γὰρ οὐκ ἐστὶν*. Nil desperandum: dum in Galliis est Grotius, filiarum juniorem amisit. Credo frigore hyberno, & molestiis itineris morbum contraxerit. Intellego parentem, etsi valdè amaret constantissimè hunc casum ferre, nec illum doloris indicium domesticis in vultu ejus relucere. Non eadem constantia filio ejus Petro apud nos agenti. Quid mirum, adolescens est; & ab nemine fratrum vel sororum sic se dilectum atque ab illa arbitratur. Quare sic primis aliquot diebus lachrymis indulsit, ut vix cibum caperet. Sane & ipse vocatione & alloquio conatus, sed non semel, dolorem hunc abstergere. Nunc meliuscule omnia, nisi quod ubi mentio ejus, dolor recrudescit. Sed alio potius sermonem derivamus. Vale, optime maxime Salmasi, & cum uxore lectissima ab omnibus nobis salve.

*Amstelodami, clbxcxxv.*

Pr. Kal. April.

## CCL.

Joanni Meurfio, *V. Cl.* Gerardus Vossius *S. P. D.*

**Q**Uamquam de tot ingenii, doctrinæ, industriæ tuæ monumentis, plurimum mihi que gaudeam tibi que gratuler: cogor tamen fateri, hanc eo lætitiā imminui, quod sic Blauwius in edendis iis eluserit expectationem utriusque nostri. Quod quidem facilius ferrem, si mei & aliquot tui amantium, ac non totius interfuisset reip. literariæ, tam avide omnia tua expectantis, prodire tandem quibus orbem doceas universum: si item non coqueret animum meum damnum, quod privatim familiæ tuæ dedit, dum te fraudat tot annis, tum honore apud bonos doctosque, tum etiam emolumento illo quod percepisses ab illis, quorum gratum erga te animum persensisses quod chartis perennaturis nomen eorum posteris propagares. Equidem non facile dixerim, quoties & quantopere super istoc expostulaverim; ipsumque rationem inire Blau-

L I

wium

wium iusserim quam grave tibi damni dedisset. Nec verissima ille me dicere negare vel voluit vel valuit. Non facile tamen dixerim, quam gavissus sit Historiam tuam Danicam ubi vidit. Nunc, inquiebat, ostendam, non mihi voluntatem defuisse sed facultatem in iis promulgandis, quâ elaborasses: Nempe quia hic non deficerent eum typi quibus ex animi tui sententia opus hoc prodiret. Itaque continuo typothetarum præcipuo negotium dedit ut ordiretur eam, nec nisi absoluta defisteret. Sic præter ipsum retulit typotheta quicum ignaro eo sum de tota hac re locutus. At cur in prioribus cessatum? Bis coepit; sed primis typis tam minutis quasi pulverem vellet ob oculos legentium spargere. Et progressus fuisset nisi obstitissem. Postea urgente me maioribus exorsus. Placuit coeptum; sed defistere coactus quia tot Græcis intercurrentibus typis destitueretur. Hisce nundinis instantibus famulus ibit Francofurtum qui secum afferet quantum deest. Interea nullo opere prælum ejus fervebit quam Historia tua Danica. Mense Maio, hoc est, typis Græcanicis acceptis, etiam alter typotheta in aliis occupabitur. Mihi amice optime maxime, nihil hic vel feritur vel metitur, nisi quatenus amicorum commune esse negotium solet; sed tamen tam diu tam turpiter elusus, puto verum dicere. Excudetur ab eo opus meum de Idololatriæ origine & progressu; non permittam ut in istoc pergat nisi pari pede progrediatur in tuis. Amplius vis? si non valebit utrumque præstare, jussero ut mea ad tempus cessent. Omnia tui causa volo eo magis quia pudet me non antea subodoratum quid ageretur, nimiaque simplicitate pene dixerim fovisse hunc triconem dum de mense in mensem sino hoc negotium tuum protrudi, nec omnia tua ut scripseras remitto. Sed crede mihi hic si fuisses nec ipse aliter egisses. Tam verisimilia semper attulit ut cuius bono fucum facere potuerit. Cæteroquin non is sum qui tam facile eludar; sed quid opus tam multis? ipse ait Literis suis sese sic purgare ut satisfactum confidam. Salmatius ante hebdomadas pauculas è Galliis est reversus, ubi biennium vel circiter fuit, cum ob alias causas tam propter pestilentiam Lugduni grassantem. Nihil hæcenus terris Batavis in lucem dedit; sed non arbitror ulterius cessaturum. Heinsii notæ in N. T. excudi tandem coeperunt, quæ quales sint futuræ postea uterque & alii judicabimus. Nunc non idem omnium judicium est. Filii mei *fr. Maxacius* Maimonides excusus, excepta præfatione, alioqui nunc misissem. Salutant te uxorem & liberos uxor & omnes mei. Multa etiam salute imperties V. Cl. Laurenbergium, Ernestium ac Stephanium. Ernestio proxime re-

scribam. Nunc quia tertia est nocturna, cubitum me confero. Nempe sic de die ab innumeris pene avocor, ut nihil fere nisi de nocte possim.

*Amstelodami Td. 1752.*  
vii. Idus Aprilis.

## CCLI.

Jacobo Wittio *Quæstori* Dordraceno  
S. P.

**C**Hartam mitto beneficii ab urbis vestræ Proceribus collati, Francisco Fr. F. Junio, spero hoc viduæ dabit Quæstor, ut tanto nunc promptior sit in exsolvendo, quanto ego tardior fui in negotio urgendo. Negabis fortasse tam me lentum esse debuisse, cum non possim ignorare, quam id viduæ sit molestum. Sed sic sum, nulla tamen culpa mea; quando quotidie minus, minusque meus esse incipio; si hoc ita processit, quid amicorum negotiis, imo quid tandem studiis meis fiet? Et tamen manet ardor, quod ante biennium cogitaram, excurrendi ad vos cum aliquo meorum; idque si Deus vitam, & valetudinem, feriis Autumnalibus. Juvabit videre veteres amicos, eos imprimis, quos veteris sui Doctoris necdum poenitet: In quibus jure repono, ut de Te taceam, Colvium, Beverovicium, J. Roverium. Grammaticum nostrum opus grande, & arduum jam excusum; & habet Bibliopega aliquot Exemplaria, quæ compingat. Propediem ad Te transmittam. Difficiles nugas, dicent malevoli. Quid mea? quando jam diu talium voces didici contemnere. Et certe si necdum sciam, quando futurum tandem, ut norim? Quippe jam annum ago undeseagesimum. Deo gratias ago, quod ætas sic satis vegeta, utinam de conjuge idem possim dicere. Sed illa in dies defecit; ut multum metueam, ne vita illa sit vitalis. Jam excudi coeperant Annales Hollandiæ, & Zelandiæ, quos filius Matthæus conscripsit: scio non displiciturum opus, ubi videris. Sanè priores non parvo post se relinquet intervallo. Domesticum quidem hoc testimonium meum; sed tanto religiosius hæc scribo, qui vanus nolim deprehendi, vel domi cæcus. Excusa propemodum Tragedia Groti, Sophompanæ, sive Josephus, qui altero illo nomine Ægyptiis vocatur. Placebit argumentum, nec minus Romana vere dictio: credo & eo nomine, quia meo nomini inscripta. Et illam, unâ cum nostris transmittam. Authorem, non ut dictitant aliqui, ab illustissimo

strissimo Oxensternio solum, sed à Regina, & Regni Suecici Proceribus, legatum ad Gallos missum, credo jamdiu intellexeris. Uti & illud, quod Regi fuerit longè acceptissimus; qui gaudet non modo reversum in Gallias, sed honore auctiorem redire. Spero vir ille, quo affectu erga patriam est, non Suecicis modo, sed Belgicis etiam rebus, multum in Galliis commodabit. Quod non scriberem, nisi melius nossem, quam multi, qui solis sibi iudicium vindicant, cum nulli magis ignorent. Confido illum Deo curæ fore, utcumque res Suecorum, in Germania quidem, in extrema stare tegula videantur; sed jam ad argumentum venio, quod non ita cursim possit referri. Quare abrumpo, teque multum, & uxorem optimam, & familiam totam juveo salvere: idemq; facit conjux, cum liberis. Vale, amplissime & integerrime Cognate.

*Amstelodami,*  
clo Idc xxxv.  
10 Non. April.

*Tuus omni officio,*

G. J. Vossius.

## CCLII.

Guilhelmo Archiepiscopo Cantuariensi.

Reverendissime in Christo Pater, Domine Illustrissime,

**T**Andem finem suam implent exercitationes nostræ Grammaticæ: quarum geminum mitto exemplar, unum celsissimo Walliæ Principi, alterum tibi Mecænati meo optimo maximoque; qui nunc iterum bonas mihi precandus es preces: Nempe ut tantus Princeps, non aliunde potius quàm ab illustri manu tua accipiat commentationes nostras: atque ab ore sacro tuo etiam cognoscat submississimam devotionem pectoris mei. Atque hæc quidem eâ conditione oro rogoque, si sic res ac tempora ferant. Quid enim fieri possit, vel debeat, infinitis partibus melius me perspicies. De exemplarium cæteris quid faciendum censeam, ex ornatissimo Dello cognosces. Nihil tamen acturus nisi ex consilio tuo.

Opere hoc copiosissimo, sed juventuti & φιλολόγῳ, quàm sacra tractantibus utiliori, ad finem perducto, aliquandiu seponenda video, quæ bonas literas, vel humanas scientias spectant. Et si permulta jam prælo parata sint ut præter Originum libros, vastum en opus! etiam tres de re poeticâ libri diu expetiti, quia hætenus eam disciplinam, ratione illâ, tractarit nemo. Item liber περὶ τῶν κοκλοποιδῶν, sive de scientiarum artiumque omnium naturâ, nexu, & usu. Item Græcorum Olympiades. Ad hæc

rerum Romanarum. Annales. Fluraque id genus, quibus non infistam. Nempe totum me accingo ad ea, quæ Thesibus Lugduni editis, Bellofiti recufis, ante annos multos complexus sum: castigatius auctiusque multo, idque librorum forma, divulganda; videlicet ut duo sint Libri de Baptismo, & ejus ritibus; totidem de Eucharistiâ libri, uti & de statu Animæ post mortem; Alius de creatione & fine mundi; Alius de lege, & bonis & malis operibus. Et porro ita in aliis non editis modo sed & hætenus *ἀνεκδιδόταις*. In cunctis iis nihil æque mihi propiotum est, quàm studere paci ac concordie Ecclesiæ; simul ut sacræ scientiæ candidatis notitiam atque amorem veteris Ecclesiæ instillem.

Vix ea lucem viderint quin, *ὅν δὲ θεῶν*, secuturum est opus nostrum de mundi Antiquitatibus, usque ad vocationem Abrahamæ, & inde de rebus Hebræorum usque ad Christi natalem, vel Hierosolyma à Tito deleta. In his ad duo ista imprimis collimo. Primum ut sacram Chronologiam accuratius tractem, quàm à Scaligero magno alioque viro, & aliis aliquot, factum. Deinde ut difficilia multa veteris Instrumenti loca, præsertim *ἐκκλησιολογίᾳ* enarrem: ac sententiam nostram, tum rationibus solidis, vel saltem verisimilibus, tum item auctoritate sanctorum Patrum, & Rabinorum aliorumque confirmem.

Tertia nobis cura erit de Christianorum rebus; quod opus bipartitum. Prius exponetur Historia Ecclesiæ, ut candidè ita succinctè: rationes etiam verbo uno altero inspergentur, quibus diversa sentientibus responderi queat. Posterius ea omnia seligetur, super quibus nunc controversia est. Hic modeltè cum Baronio & aliis, manus conferimus. Sic utrisque consulimus, & illis quibus sufficit scire rem gestam: & istis, quibus opus est adversariis occurrere. Hanc curarum partem optarem, vel primam lucem conspiciere, nisi multa adeo adhuc cruda intercurrent; partim quia toties, imo quando non, ab indigenis & exteris inturbor, partim quoniam in his consignandis in illo Ecclesiæ Catholicæ schismate, ac tantis partium studiis veritatis studium neutiquam sufficit, sed prudentia etiam opus est singulari. Eoque ubi paulum priora procefferint, nihil æque exoptem, quàm ut cum uno altero Magnæ Britanniæ, antiquitatis intelligenti & prudentia conspicuo, per literas subinde de talibus conferendi felicitas obtingat.

Nondum in scribendo huc usque perveneram, cum mihi à Dom. Goffio literæ tuæ exoptatissimæ. Quid primum hic, quid postremum eloquar? Tène illo dignitatis loco Dei gratia constitutum, tantis ac tam densis ne-



gotiis obrutum, hoc me honore dignari indignum, ut ea cura, eo affectu respondeas singulis literis meis? O affectum eximium! quem nisi videam nihil me fuerit arrogantius stultiusque; nisi profitear, nihil me terra proferat ingratius.

De posthumis filii mei Dionysii, similiter actu, censeo, nihil nempe ejus divulgari oportere, nisi perfectum. Quippe imperfecta, ut recte olim Plinius, censenda pro non inchoatis. Dissertationem tamen Maimonidis ab eo verfam, judico propè adeo abesse ab ultimâ manu quam edendo solet adhibere, ut haberi id opus possit pro absoluto. Et jam editum foret, nisi Blauwius J. C. uxore ducta in vicina ageret urbe, ac demum circa Kal. Jun. domuitionem cogitaret. Parenti optimo, parum eruditio extra Mathesin, non aus fuit absens committere curam operis.

Filius Joannes operam suam addixit præfectis Indicæ negotiationis. Fiscis iis fuerit advocatus. Spero idoneum magis fore seculi rebus quam eum expertus sum in humanitatis studiis vel sacris. Nihiligitur superest, quàm ut honestè alteri loco cedat in Collegio. Interim multum me Regiæ beneficentiæ tuæque sollicitudini debere profiteor; quòd hæcenus ei bene in Anglia fuerit, saltem bene esse potuerit, nisi per ipsum stetit. Quicquid superest, spero exequetur conjunctissimus affinis meus Franciscus Junius; ad quem fusè scripsi. Si qua in re opus ei fuerit consilio vel auctoritate tua, confido illam non defore. Reverendissime, Illustrissime Dom. Deum rogo, ut diutissime te saluum ac sospitem esse velit, quo Ecclesia Anglicana, illa omnium hodie Ecclesiarum Helice & Cynosura, deinceps etiam recto cursu ac secunda navigatione feratur.

*Amstelodami,  
clō loc xxxv.  
Post. Non.  
April. St. Ver.*

*Illustrissimæ tuæ Reverentiæ  
humilissimus ac devotissimus  
Cliens,*

G. J. Vossius.

### CCLIII.

*D. Dell, Reverendissimo Archiepiscopo  
Cantuariensi d Sacris, S. P.*

**F**iducia, optime Delli, quam mihi amicissimus Goffius fecit, non dubito aliquid à te exigere, in quo mihi utilis esse possit opera tua. Est hæc futura in exercitationibus Grammaticis quas mitto. Duorum exemplarium, quæ amictu holoserico eminent,

unum cellissimo Walliæ Principi destinatum, alterum Reverendissimo & Illustrissimo D. Archiepiscopo, communi Mecænati ac Patrono nostro. Si ludere nonnihil in re seria licet, cui viridi vestitum convenientius erit, quam virescenti D. Principis ætati? cui cæruleo contextum magis comperat, quàm D. Archiepiscopo, cœlestia curanti? Addidi his duo in membranis compacta, & marginibus paginarum inauratis, unum Reverendissimo Domino Episcopo Londinensi, alterum Bodleianæ Oxoniensium Bibliothecæ. Quorum ille Reverendissimo Mecænati meo D. Archiepiscopo in priori dignitate successit; hæc verò, ut præclarum Oxoniensis Academiæ ornamentum, ad curam ejusdem tanquam Cancellarii pertinet. At, inquires, tertium primis duobus chartæ par reperio. Ita est, sed hoc superpondium est. Nempe metui, ne ex proceribus cuiquam exemplar satius esset offerri, quem equidem ignorarem, tam longè à Britannis degens. De illo igitur plane agendum fuerit, ex consilio Reverendissimi Dom. Archiepiscopi. Sunt & tria chartæ secundo tertioque non disparis, sed solo hoc inferiora, quod oræ paginarum non renitent auro. Horum unum esto ejus qui studiis præest cellissimo Walliæ Principis. Intelligo esse D. Brian Duppa, antea Decanum Ædis Christi apud Oxonienses; cujus viri doctrinam pariter ac humanitatem, cum ante quinquennium & amplius Oxonii essem, abundè sum expertus. Tanto minus dubitavi ad eum scribere, & hunc novum ei honorem onerosum, sive onus malis, longè honestissimum, gratulari. Nempe & hic locum non minus habere censeo, quam in regenda Republica, quod olim à doctissimo Varrone dictum fuit, Honus est Honos qui sustinet Rempublicam. Alterum exemplar Rousii esto Bibliothecæ ejus præfecti, quam ante dixi. De tertio facile vides non posse te præteriri, quem antea incognitum ausus sum onere hoc onerare, verius quàm honestare. Sed simul putavi aliquod mittendum Symbolum amicitiae, deinceps contrahendæ. Sæpius enim mihi per literas compellendus posthac eris, occasione earum rerum, de quibus aveam cognoscere sententiam Reverendissimi Domini Archiepiscopi. Non est minutis interturbandus, qui tot tantaque negotia sustineat. Quare sic ad heroa scribam, ut quædam tibi committam qui in districtissimo commoda noris fandi tempora. Mittere etiam animus exemplar Academiæ Cantabrigienti, & Decano Cantuariensi, ac amicissimo Casaubono. Sed exilimavi non tibi hoc curæ committendum, cùm exequi liceret per ornatissimum affinem meum Franciscum Junium, qui in ædibus

ædibus agit Illustrissimi Comitis Arondelii. Multis amicorum non mitto, quia argumentum non est ejusmodi, ut faciat ad genium omnium. Sed ubi quæ sacram Historiam, vel Ecclesiæ dogmata spectant, edidero, non ero parcipromus, verum munificus & liberalis. Si tamen nunc quoque peccatum, monito opus. Mittam quamprimum iis, quibus oportebat. Vale.

*Amstelodami* clō Ioc xxxv.

7. Idus April. Stil. Vet.

G. J. Vossius.

Hiscæ literis scriptis, in mentem venit, ut amicus putavit, perperam à me Reverendissimum & Illustrissimum D. Guilhelum in præfatione ad cellissimum Walliæ Principem, statui ab primo Archiepiscopo Augustino tertium super septuagesimum. Nam inquiebat, est Archiepiscopus LXXV. Occurrebam hoc pacto, sequi me Landavensem Episcopum Godwinum, cui si ò *margéius* Reverendissimus D. Georgius Abbotus est LXXIII. sane Reverendissimus D. Guilhelmus erit LXXIV. ab Augustino autem omnium primo LXXIII. Nam si ab eo numerem, primus non veniet in numero. Ut in Ovidiano illo

*Alter ab undecimo jam tum me ceperat annus.*

Ubi non duodecimus sed tertius decimus annus signatur.

Novum eidem visum quod & Augustissimi Regis & cellissimi Principis nomen scriberem per K. Sed Latinis C. & K. non literæ sunt diversæ, sed ejusdem literæ ductus diversi. Nec judicio tam Karolus posui, quam consuetudine; quia meminissim, sic me in membranis optimis & vetustissimis exaratam hanc vocem invenisse. Atque ita quoque Petrus Pithæus, vir optimè de antiquitate meritis, in Francis Annalibus crebro admodum Karolus, vel Karolus expressit. Et si nec Carolus refugit. Nempe scribendi modus hic est arbitrarius, nec in eo versantur vectigalia Populi, vel salus Regni, ut dici solet. Sed quid minutis insisto? Utinam ne graviora sint, in quibus aliquid me fugerit. Nempe homo sum, nec humani quicquam à me alienum puto.

Iterum vale, optime D. Delli.

# CCLIV.

*Episcopo Londinensi.*

Reverendissime in Christo Pater, Domine Illustrissime,

**G**ratias Deo ago, quod cum decrevisset grande illud Ecclesiæ columnen D. Guilhelmum in Archiepiscopali sede constituere, te potissimum voluerit in Londinensis Ecclesiæ Cathedra tanto succedere heroi. Hinc enim omnes pietatis juxta & antiquitatis amantes ita fore augurantur, ut arctissimâ vestri duorum conjunctione, magis & magis fordeat novellitas, splendeat vetustas. Quem affectum meum cum optimo quoque communem perscribendi nunc occasionem arripui avidè, quod exercitationes meas Grammaticas ad cellissimum Magnæ Britannæ Principem mitterem. Putavi enim recte, & ex officio me facturum, si eadem eminentissimo nomini tuo exemplar offerrem, quod ut boni consulas rogo. Equidem ignorare non possum, quanto gratius munus foret, si in sacro argumento industriam posuissim. Sed alterum illud ætatulæ cellissimi Principis magis conveniebat. Nec in graviore re deinceps opera nostra claudicabit, modo Deus mihi concesserit valetudinem & vires. Quem ipsum rogo ut te, Reverendissime & Illustrissime Domine, diutissime saluum ac sospitem conservet.

*Amstelodami,*  
clō Ioc xxxv.  
12. Kal. Maias  
St. Vet.

Reverendissimi & Illustrissimi  
nominis tui cultor devotus,

G. J. Vossius.

# CCLV.

*Rev. & Doctiss. D. Brian Duppa, Illustrissimo Magnæ Britannæ Principi d Studiis.*

Reverende Doctissimeque Vir,

**S**æpe animum meum subit recordatio, qua me humanitate exceperis Oxonium venientem, ubi tum Decanum te esse Ædis Christi commemini. Nunc vero intelligo; admotum te studiis illius, à quo post augustissimum Regem, (cui de nostri utriusque temporibus siqua supersunt, annos Deus largiatur) spes Magnæ Britannæ potissimum dependet. Bene æternum sit optimis & sapientissimis viris, per quos Deus hanc mentem

tem insinuavit serenissimo Regi, ut ex sum-  
morum virorum abundanti tantopere Britan-  
niâ unum te omnibus præferret, cui cara  
ad eodè pignora committeret. Cœlesti etiam nu-  
mini supplicatus, tui quoque, sed magis  
Regni causâ, imo tot Regnorum, ut magis  
magisque te spiritu sapientiæ firmet. Quid  
enim homulli absque divinâ gratiâ possumus?  
Faxit illa ut te tanti Principis Epho-  
ro, ætas gaudeat præsens, & cœnis posteri-  
tas, pro tam nobili opera, præconia debita  
rependat. Quamvis verò non ea vis animo,  
nec illa felicitas, ut in huiusmodi formam nas-  
cerer, nunquam desinam erga inclytam se-  
renissimi Regis stirpem, animum testari devo-  
tissimum. Cujus primum argumentum fun-  
to Exercitationes Grammaticæ, quas si Illu-  
strissimo Walliæ Principi dicarentur, illustri-  
ores fore existimavi, & simul hoc me conse-  
qui posse, ut opere tantulæ ætati non prorsus  
inconveniente, obstringerem me ad graviora  
sanctioraque. Exemplar confido illustrissi-  
mus Princeps, jam ante has tibi redditas, ab  
Reverendissimo D. Archiepiscopo Cantuari-  
ensi acceperit. Sed nefas erat, si non tam  
bellam occasionem amplecterer, aliquo inge-  
nii nostri monumento, ut possem compro-  
bandi erga te animum & officium meum.  
Nempe isto potissimum, ut eumple fœ-  
tum ad te quoque transmitterem: non quasi  
commentatione hac usque adeo mihi placeam,  
sed quia leve, quam multi censeant, putent  
artem Grammaticam, artium & scientiarum  
omnium jantricem, eo usque perducere, ut  
non multum adeo nunc, à fastigio, ac per-  
fectione sua abesse videatur. Cessatum hæc  
parte à viris magnis. Subii ipse onus fortasse  
aliquo honoris nostri, publici dispendio non  
item. Idem spero judicabis, ubi operosam  
adeo operam nostram introspexeris. Vale, vir  
summe, & amicissime, animoque tuo ita per-  
suade dum vivam, tui me nominis cultor-  
em fore.

Amstelodami,  
clō lōc xxxv.  
14. Kal. Maii.

Tuus omni officio,

G. J. Vossius.

#### CCLVI.

Joanni Rouse, *Bibliothecario Bodleiano*  
S. P.

**G**Audeo, præstantissime Rouse, tam bel-  
lam mihi occasionem oblatam abrum-  
pendi diuturnum hoc silentium, quod non  
ab ulla tui oblivione est (melius de me meri-

tus es) sed ab occupatissimo vitæ genere,  
quod meum me esse neutiquam finit. Quam  
vero occasionem dixi, ei mihi præbita est ab  
nostris de re Grammatica libris, cellisimo  
Magnæ Britannæ Principi inscriptis, quorum  
exemplar melioris chartæ & inauratum mit-  
to, ut instructissimæ Bodleianæ Bibliothecæ  
illatum, aliquid inde honoris accipiat, & ad  
auctorem suum id transfundat. Alterum  
etiam codicem comitem esse iussi; sed hoc  
animo, ut ubi hoc officio persunctus erit, in  
privata tua Bibliotheca aliquid reperiat loci.  
Affectum hunc erga te consules boni. Non  
diffiteor argumentum operis nostri vile ha-  
beri à multis. Sed aliis cessantibus, susci-  
piendum id nihilominus existimavi. Turpe  
enim cum tanta seges sit eorum, qui quotidie  
bene mereri student de disciplinarum aliis,  
non inveniri, qui idem contentur Gramma-  
tica in arte, cum priusquam ad majora my-  
steria admittamur, minoribus illis initiari  
opus sit. Ab hac doctissimorum virorum  
circa eam disciplinam incuriâ provenit, ut  
nuspam fere crebrius peccetur quàm à do-  
ctoribus ejus, dum vulgaris insistant senten-  
tiis, nec quâ eundum, sed quâ itur, gressum  
dirigunt. Porro (quod multis minus fiat  
verisimile) satis operosa nobis hæc opera  
fuit, dum (ut cum Terentiano Mauro dicam)  
recondita quæque

*Dumas inter & aspera  
Scrupulis sequimur viis,  
Fronte exile negotium  
Et dignum pueris putes.  
Aggressus labor arduus.*

Sed de opera nostra nihil addam, maleque  
te remittere ad præfationem, quam præmisi  
ad Lectorem. In priori Epistolâ, quæ est ad  
serenissimum Magnæ Britannæ principem,  
mentionem facio Oxoniensium inclytæ Aca-  
demix, & eximix humanitatis, quâ me sum-  
mi ejus viri exceperunt. Nempe occupatio-  
nes tam densæ, quibus penè obrutus sum,  
necdum si vere, ut aliter affectum erga bene  
meritos testarer, quam debiti mei professione.  
Sed spero aliquando melius erit: quod opto,  
ne videar ingratus. Desidero scire, vivatne  
& valeat ornatissimus Edwardus Pococke, &  
utrum è Syria, ut confido, sit reversus, ubi  
item degat. Volupe erit cum eo deinceps  
colere amicitiam, ante quinquennium in-  
choatam. Salutabis plurimum meo nomine,  
excellentiissimos viros Academicæ vestræ, imo  
& nostræ, quando & me in Academicorum  
vestrorum numerum adsciscere non dubita-  
tis, xii. Nov. Ann. clō lōc xxix. ut bene  
noster Pocockius, in opere nobis dicato an-  
notavit. Sed, ut puto, non occasio jam fa-  
lutandi



lutandi Doct. Juxon, quem ad Episcopalem dignitatem evectum audio, uti & Doct. Brian Duppar studiis admotum celsissimi Walliæ Principis. Verum arbitror agere adhuc Oxonii, D. Acceptum Fruen, item D. Prideaux, ac D. Samuel. Fell: Sed & D. Claytonum. & ornatissimos viros, Harisonum ac Chillingworth, atq; alios. Quare eos, quæso, ut dixi, salute plurima imperti; imo si grave non erit, perscribere ut valeant, & an eadem quæ, cum istis forem, munia apud vos obtineant. Mihi per jucundum erit aliquid de illis ex te cognoscere. Vale, doctissime & amicissime Route.

Raptim scribebam  
Amstelodami.  
clōcxxxv. xii Kal.  
Maia St. Vet.

Tuo nomini merito tuo  
addicissimus,

G. J. Vossius.

## CCLVII.

Petro Staeckmans, in Coll. Gener. Ord.  
Deputato, S. P. Hagam Comititis.

**A** Liquid molestiæ mihi attulit, vir amplissime, quod tam avidè expectanti redditum tuum, occupationes invidcrint hanc felicitatem: nam absque his fuisset, scio, quæ humanitas tua, cùm urbem hanc transires, non expertem me fivisses jucundissimi allocui tui; siquidem, non ignoras, ut cibo corpus, ita animum sermonibus ali, illis imprimis, qui promuntur, non ab uno è multis, sed illo quem sua virtus, ac doctrina, in sublimi loco collocarunt. Benè interim quod publicis mihi occupationibus tuis ereptum, compensaris literis longè humanissimis: in quibus videre, visus sum imaginem tui. Eò magis volupe foret satisfacere illi, quod postulas; sed enim quos filius Mattheus, Bataviæ, Zelandiæque Annales condidit, nunc penes Typographum sunt: qui jam editionem aspiciatus, inque iis promittit se passibus tantum progressurum, ut intra menses duos, vel circiter, lucem videant, libri quinque priores, quibus ducentorum quidem annorum tempora, non fusè quidem, nec confuse tamen perstringit: accuratè verò persequitur proximos trecentos, qui in anno desinunt trecentesimo post millesimum. Priusquam verò partem alteram publici juris faciat, decretum ei edere, quæ observata illi, de Batavorum libertate: Quæ sanè ante Burgundorum, & Austrianorum, in has terras imperium, maxima semper fuit. Quod n. c. semper dissimulant scriptores, satis Austriacis addicti. Longum esset omnes recensere; sed multo minus instar, fuerit Pontus Heuterus Delphius, qui in secundo Burgundicorum non veritus

sit scribere, Brabant, Namurenses, ac Hannones Principibus suis in Pag. 36. gratiam Comititis obtemperarunt. Leodenses, Hollandi, ac Zelandi, minime; quantumvis Comes Albertus, omni ratione, Comiti Ludovico gratum facere studeret. Precario enim ferme Reguli hujus temporis Liberis populis imperabant. Si dicendum quod res est, vir amplissime, longè alia facies hujus Reipublicæ fuit, sub Comitibus Hollandis, atque etiam Hannoniis, & Batavis: alia sub Burgundis, & Austriacis, qui cum vellent, quod quâ jure, quâ injuriâ, possent, libertatem pene omnem pessum iverunt, partim dolo, partim vi. Nihil liquidius erit, ubi filii liber, super hoc argumento, prodierit in lucem. Quod si ea, non dico, extremam manum accepissent, sed non multa adeo, solum memoriæ ergo rudius, concepta intercurrerent, qualia qualia forent, jam nunc transmitterentur. Atque id coram etiam me dicere commemini. Porro opere eo, non solum Belgicæ, sub Burgundis statum expendit, sed ab ipsis incunabulis ejus libertatem est probaturus. Vis, vir amplissime, ut Pictorum more, lineis quibusdam, picturaque *μωρογέμια*, ac ut veteres dixere, sublesta fastigia carpiam operis universi? Erit id quadripartitum. Primum quidem Bataviâ, à Romanorum; deinde à Saxonum, Francorum, & Wiltorum servitute vindicabit. Tertius liber in eo totus versabitur, ut societatem inter Frisios Batavosque initam probet, & quo pacto illi tandem communibus votis Principem elegerint. Postremus Ordinum Comitumque collatam potestatem habet; ubi imprimis ostenduntur Principum artes, in obtinendâ Belgarum libertate maximèque Burgundicæ domus & Austriacæ: & in illâ quidem Philippum Bonum occulte, Carolum Audacem palam; in hac simulando Carolum V. Philippum vi, Republicæ libertatem evertere conatus. Istis comprobandis prope ei prora, & puppis, Leges, Privilegia, Statuta Ordinum Comitumque. Partim tamen etiam ad partes advocantur Meieri annales Flandricæ, Haræi Brabantica, Flandrica Marckantii, Burgundica Heuteri, ejusdemque Austriaca, Annales Hollandici, Belgicâ olim linguâ conscripti, Trajectina Hedæ, & Frisica Ubbonis Emmii historis, atque alii nonnulli; sed super istis fusi differemus, ubi vel tibi Amstelodami paucillum hærendi, vel mihi Hagam excurrendi occasio erit. Vale, vir amplissime, diuque fœderatæ hujus Belgicæ bono, sospes age, & incolumis.

Amstelodami.  
clōcxxxv.  
iv Id. Maia.

Amplissimo nomini tuo  
addicissimus,

G. J. Vossius.

## CCLVIII.

## CCLVIII.

Hugoni Grotio, *Regni Sueciæ Legato.*  
Parisiis.

Illustrissime vir,

**D**E honore legationis, quo longè eo dignissimum Sueciæ te regnum extulit, ex animo gaudeo, eumque, & tibi tuisque & Sueciæ universæ, atque adeo Christiano Orbi, fortunare cupio. Atque idem votum omnium, qui virtutem amant. Equidem semper rebus Suecicis optimè volui: nunc tamen impensius id facio; quia video eam intelligere & æstimare posse virtutes, laudesque tuas. Optimè diu fit Illustrissimo Heroi Oxensternio, cujus prudentia tam Sueciæ, quam tibi, consultum nunc, & porro consuletur, si in maximis expensis, quas tanti honoris exigat fastigium, malignius solvatur: ut aliqui amantes tui verentur (amor res est meticulosa) si hinc Cæsar, inde Polonus oppugnent, nec Christianissimo Regi res satis erit cordi; sed hæc curabit ille, qui Regum corda habet in manu: & ea est ingenii tui sagacitas, ut tempori scias omnibus providere. Ac prope modum metuo, ne ista legens, fortasse rideas, tam anxiam solitudinem eorum qui hic sumus: præsertim cum à Vossio proficiscantur, qui ab animo suo potuit impetrare, ut tam fero tantum tibi honorem gratularetur. Ut in me etiam conveniat, quod Ciceroni olim aiebat Augustus, Postremum accedere amicorum; sed illi ambigua voce ludere visum, quia similiter Tullius, cum laudandum diceret Octavianum, tollendumque. Meus verò animus tam perspectus tibi, ut cessationem istam nunquam sis crediturus ab imminutione amoris provenire. Et verò cum multa variaque meum hoc officium sint morata, nihil æquè tamen ac illud, quod de Sophompanea, ac cæteris poematis sacris, certi aliquid respondendum putarem, ac de hebdomade in hebdomadem, à Blauwio rejicerer. Nihil æquemihî grave in talium genere fuit, quàm quod sic eluderet, ut neutiquam satisfacere postulatis tuis possem. Bene interim, quod tandem se exsolvit, nec inelegantibus Typis excudit, & ut emendate excuderetur, mecum providit: si quid tamen oculos fugerit, vel melius nunc occurrerit tibi, quàm prius, velim perscribas, ut saltem editione ea, quæ minoribus Typis sequetur, corrigatur. Non dubium enim quin vicinus Janfoni-us, uti in opere tuo de Jure Belli fecit, ita hæc etiam poemata minori forma divulgare cogitet. Huic malo non aliter occurrere Blauwius posset, quam Typis itidem exiguis, sed

elegantioribus recudendo. Valdè hic animi hominum suspensi de Classe quam serenissimus Britannia Rex parat. Plerique metuant, ne quia multimodis offendimus, in nos cudatur faba. Cæterum, quod aiunt, Regem, vel Proceres ad Papismum vergere (ita his quoque terris prædicant vulgo) id ab animis proficiscitur exulceratis, nec quicquam probantibus, nisi quod Gallicis Ecclesiis conforme. Hoc habent optimi & doctissimi quique Britannia, quod niagni faciant Ecclesiam veterem, nec in dogmate solum libenter sapiant cum primis sæculis, sed etiam ritus, qui tum obtinere, lubentes sequantur. Hac propter Cathari, qui id Papismum vocant, non desinunt traducere sic sentientes, & simpliciores, quorum maximus numerus, magno Zelo abalienare ab Regum Optimo, & Episcoporum illis, quibus Orbis Christianus genuinae antiquitatis reverentiores non habet. Quam noxium, ac periculosum id Regno sit, siquis non intelligit, ex Zelotis plerique in Batavia capere possit experimentum. Quare Rex studet, ut qui fide conveniunt, ritibus etiam similes sint; sed audio Puritanos Anglos dicere non debere Indigenis minorem esse in istis libertatem, quam exteris; Regem, intellecto hoc, egisse, ut Gallis etiam, ac Belgis nati, sed in Britannia, ac Angliæ à pueris edocti, Anglicis se Ecclesiis jungerent, ut ita facilius Ecclesiæ istæ coalescerent. Hos propterea vehementer conquestos; regique indicium factum, ut Britannia excedere cogitent. Dixisse ad illud Regem; puerorum eos similes esse plorantium priusquam vapulent. Nec videri Regem illos diutius ursurum, dummodo tandem pausa fiat odiosæ adeo traducendi Proceres optimes, & in contemptum adducendi præsentem Ecclesiæ Anglicanæ formam. Horrescit animus referre, quibus maledictis, & mendaciis, Zelotæ (me etiam præsentem, nequid iis affingi putes) Antistites optimos, mihi que notissimos proskiderint. Quanto hic tutius, tanto id quoque hic vehementius, & frequentius fit. Quales cum in Angliam veniunt, indigenarum etiam animos magis turbant: ut ista Zelotarum utriusque gentis commercia concordiam Ecclesiæ Anglicanæ reddant difficiliorem. Quam falsum autem sit, quod Reverendissimum D. Archiepiscopum Cantuariensem aiunt cogitare de Papatu reducendo; si non aliunde mihi satis constaret, vel inde conjecturam planissimam caperem, quod me tum per alios, tum literis etiam suis, hortari non desinit, ut breviter Baronianos Annales refellam, Regique operam hanc nostram dicem. Vix etiam semestre est, quod Sacellanus Regius, coram Rege, & Archiepiscopo, in concione dixerit,

dixerit, eo anno, ac mense, ac propemodum die, centesimum annum expirare, ex quo Henricus VIII. Papatum omnem ex Anglia penitus eiecit: ac votum idem Sacellanus addebat, ut ne unquam, vel sub Rege Carolo, vel prole ejus reduceretur. Quod apertis favoris indiciis Rex, & Archiepiscopus mox approbarint, universa Ecclesia acclamantē, *Amen*. De Affine Junio multum gaudeo, quod tanti eum facias, ut operam ejus potissimum exoptes: scio quantum hoc ei incrementum in sacris, & civilibus studiis afferre possit. Sed qua conditione apud Illustrissimum Arundelium vivat, dicere non habeo, uti nec illud, an ad certum annorum spatium, se familiæ illi obstrinxerit. Existimo me citius super eo aliquid rescripturum, quam existimes. Est apud nos juvenis annorum XXVIII. nomine Justus Ruewaert, filius optimi doctissimique Theophili Ruewaert, Ecclesiastæ Remonstrantium, & ante schisma, & nunc quoque apud Britannos. Is Gallias cogitat, spe illa, quod nobilis alicujus liberis præcti honesta conditione possit. Latine non modo, sed Græcè etiam doctissimus est, ac ea lingua versus etiam edidit complures. Intellego & moliri editionem Epigrammarum Græcorum, quæ fecit. Valde ob hanc peritiam, æstimari à Cunnæo, & Heinsio solet; ut de aliis taceam. Non dubitarem eum tibi commendare, si mores mihi perspectiores forent. Disparis de eo Remonstrantium ipsorum opiniones sunt. Corvinus, & moderatiorum alii amant, ac à judicio, & probitate laudant. Alii culpant, tantum non satis sicum. Excusant amantes, eo quod nihil mirum in juvene sit, si lassus diurno labore (nam apud Wyttirium, egregium mercatorem, & liberis ejus à studiis fuit, & præfuit codici accepti, & expensi) circa vespertim horula interdum cum amico frontem exporrigat: quod cum domi suæ facere non possit, in diversorio fieri necessum esse. Raros Lugduni, etiam melioris notæ, aliter vivere. Quodammodo amasse etiam ex Catonis magis, quam B. Pauli præscripto aiebat ei inimicissimus secta Contraremonstrans. Sed constanter id pernegant amiciores: vel saltem rident nugas, quod in ingenio optimo, ita minutatim omnia ad vivum refecentur. Quorsum ista, inquires, ad me tam multis? nempe ne quem sic commendem, ut non vera, falsaque scias. Tum autem ut videas, an privatim etiam utilis esse possit. Credo, homo est, & adolescens, sed excitato ingenio, & qui si volet, (ut velle puto) altius assurgere possit, quam vulgares animæ solent. Si forte ad te literæ per ipsum dandæ, non apertè omnia scribere li-

ceat, quia experientia comperi, literas ab adolescentibus in suo negotio referari solere, priusquam tradant. Et hæc cum scribam, tamen amo juvenem ob dotes egregias. Tantum nescio, in ambiguis illis, vel discrepantibus amicorum pariter ac inimicorum judiciis, quid credere debeam. Mei interim officii erat, nihil te celare. Jam nunc enim de eo compellari incipio, ut commendem tibi, non quo utaris ipse opera ejus, (nihil enim illis de eo cogitationis) sed ut, si possis, commendes alteri. quandoquidem hic exigua spes emergendi. Nec paternæ facultates illæ, ut succo suo vivere possit. Sophompaneæ xx. Exemplaria fratri tuo tradidit Blauwius, decem melioris, totidem vulgaris chartæ. Cætera ad te utriusque chartæ mittit; sed plura missis, si voles, à Bibliopola accipies. Nam si benè Blauwium novi, non is est, qui ad exemplaria paucula attendat. Ipse ex duodecim exemplaribus, quæ mihi pro opera debet, in Angliam aliqua mittam: uti Junio, Casaubono, aliis; ante omnes Reverendissimo & Illustrissimo D. Archiepiscopo. Quod tantus egregium animi foetum nomini meo dicaris, & antea multum solatii attulit filium lugenti, & nunc magnitudinem beneficii hujus cogitanti, summam adfert voluptatem. Quare quod antea etiam feci, iterum, iterumque meo, & meorum nomine nunc facio; gratiasque agimus, quas possumus, quia debere plurimum omnes profitemur. Mitto melioris chartæ exemplaria duo librorum de arte Grammatica: unum tibi, vel filio potius; alterum ei cui voles, hoc est alicui non planè tetricum hoc, & quodammodo puerile studium aspernanti, seu is Rigaltius, seu Puteanus, seu alius erit. Si tertium, affectus testandi, cuiquam dandum putes, quamprimum mittam: vel à Bibliopola Parisiensi, cui exemplaria Blauwius mittit, per famulorum aliquem petendum. Facile inter me & Blauwium conveniet. Miserat fratrum Puteanorum alter ad Salmasium literas Lugdunensium, quibus focer meus Junius Heidelbergæ, in Lugdunensium Academiam vocabatur; miserat autem ut mihi darentur. Pro quo affectu summi viri, & per Salmasium gratias egi, & nunc quoque id facio, & occasionem opto grati animi comprobandi. Claudam eo literas hæc, quod filius Petrus, probitate vitæ, mihi, Corvino, & aliis satisfaciat, nec industriam, quandoquidem mediccris ea, magnopere desideremus. Ut sic pergat, vel potius se vincat, fortasse etiam hortatus nostri, sed paterni præcipue efficient. In me, quod curam ejus respiciat, non patiar aliquid requiri. Ego, uxor, liberi, te, Conjugem, & tuos pluri-

M m

mum



mum salutamus, Deumque rogamus, ut te, Illustrissime Domine, Sueciæ, & orbis Christiani bono, diutissime incolumem conservet.

*Amstelodami*  
c10 lxxv.  
Idibus Maiis.

*Illustrissimi nominis tui cultor,*

G. J. Vossius.

eam tribuere. Sed sic visum Deo, qui unus novit, quid illi, quid mihi, quid familiæ toti, maxime expedierit. Hoc me solor, optime Adfinis, teque salvere jubeo. Quod & facit conjux, & tota domus nostra.

*Amstelodami raptim,*  
Post. Id. Maias  
c10 c10 xxxv.

## CCLIX.

Francisco Junio, Ger. Jo. Vossius S. P.

**T**Andem, mi Affinis, silentium rumpo, atque ad officium redeo. Occasionem scribendi præbet Illustrissimus Comes de Leshno, juvenis eruditus, & Doctorum æstimator. Qui cum aliquid literarum à me posceret, ad amicos meos in Anglia, scribendum putavi Cantabrigiam ad Doct. Beale Præfectum Collegii Joannis; & Doctorem Martiæ, Collegii Reginalis præsidem: Oxonium autem ad Doctorem Fruen, Collegii Magdalenis caput, & Joannem Rouse, Bibliothecæ Bodleianæ Præfectum. Nempe sic Illustrissimus Comes arbitrabatur, facilius se innotescere posse summis his, & per eos, aliis egregiis Angliæ viris, si mea quoque commendatio accessisset. Quare si qua in re, ei opera quoque tua utilis esse possit, desugere non debes. Juvenis est in magnam ipem natus. Parentem habet Illustrissimum, Polonii regni Palatinum, magnum Columnen Ecclesiarum reformatarum iis terris: sanè non minoris à nostris fit in Polonia, quam magnus ille Razevilis in Lithuania. Horum enim erga Ecclesiam merita præ omnibus prædicantur. Etiam idem ille Heros Serenissimo Regi nostro Carolo per literas est notus, ac vicissim literis quoque Rex suum erga eum affectum, abundè testatum fecit. Hæc eo lubentius perscripsi qui Barones Stupeskii de Conari, quos scis sesquiannum mecum vixisse Lugduni, ex eadem familia sunt; ut decus tantæ domus non possit non mihi perspectissimum esse. Qui ei à studiis est, Joannes Jonstonus, juvenis est pereruditus, ac admodum probus, & his diebus in Doctorum Medicinæ numerum cooptatus à Lugdunensibus nostris. De filii mei Dionytii discessu ad superos, nihil possum scribere. Tantus me dolor premit, quoties cogito; amisi plusquam dicere possum. Deum immortalem! quanto ille intervallo Patrem post se relicturus erat! quippe qui jam nunc in non uno longè superat. Accedebat tanta probitas, ut ego hæc ætate, non ausim mihi

## CCLX.

Claudio Salmasio S. P.

**T**Andem, maxime vir, ad te mitto, quæ, paucis exceptis, olim observavi in antiquis ac recentibus artis Grammaticæ scriptoribus. Gaudeo me equidem defunctum molestissimo labore in argumento adeo tetrico & in speciem puerili. In quali me omnem deinceps quoque ætatem consumere optent malevoli. Me vero solatur quod qualis qualis materies sit, non inamœne vel incuriosè eam tractarim, modo formam operis cum priorum opera lubeat conferre. Et nisi pertæsum fuisset diuturnioris moræ in hujusmodi, ut creditur, minutiis, longe pulchriora essent interspersa. Sed Catone hoc nunc contenta sit adolescentia, & quod est scholarum, quarum præfectis consulere voluimus. Grotii eximii Sophompanem credo, vel jam acceperis, vel paucissimis diebus accipies à fratre ejus Guilhelmo Grotio Hagensi Jurisconsulto. Sin is cessarit, non committam ipse ut diutius frauderis. Maximæ mihi voluptati fuit, quod intelligerem bonis omnibus laudatissimum virum non ab Illustrissimo Oxensternio modo sed à Regno Suecico missum ad Regem Christianissimum, ac ab eo & Regni proceribus honorifice adeo exceptum. Deus tantummodo faxit ut perpetuum gaudium gaudeamus. Quod erit, si Galliæ satis cordi erit Germaniæ status, & Deus consilia Regis fortunarit. Ab Affine Junio tandem literas accepi Kalendis Aprilis exaratas. Vellem transmisisset, quæ petieramus. Verba ejus ex Epistolâ exscribi jussi, ut quid rei sit, certius intelligas. Sed fortasse interea, vel Patricius Junius vel Seldenus promissis steterint. Si quid cognoro ex literis proximis, statim perscribam. Scire aveo quando speres commentarios tuos rei vestiariæ posse Typographo tradi, item quid de Arnobio statueris. Blauwius noster post menses duos auspiciabitur editionem operum omnium Meursii quorum magna pars hætenus *divulsi* cetera meliora erunt vel auctiora. Salve plurimum à me

à me, uxor ab uxore, imo uterque salvete à nobis omnibus, & una vobiscum D. Elichmannus.

*Amstelodami,*  
clō Ioc xxxv.  
viii Kal. Jun.

*Tuus omni officio,*

G. J. Vossius.

CCLXI.

Joanni Meursio S. P.

**C**Retensia tua, optime maximeque Meursi, accepi, mihi quidem per jucundum fuit videre, opus longe eruditissimum amicissimi viri multoque etiam gratus credo futurum Arlanderveniæ Domino. Nunc ab urbe abest: sed simulac redierit faciam quod mei muneris est. Jam video, quid me scribere porro velis. Nempe quid promoverint in editione tuarum Amstelodamenses nostri. Referre piget pudetque. Dic ingenue inquires. Quid dicam, amicissime vir? Nondum auspicati. Etli mansuetum & lenem animum tuum jam à multis annis perspexi, tamen scio commoveris. Et profecto mihi idem usu veniret. Causam quæris. Dicam ego non unam. Primum est illa, quod Joannes Blauwius J. C. in quem unum hætenus onus omne recubuit, uxorem Goudæ duxit honestam, opulentam. Eapropter plusculis mensibus omnia frigide satis hic acta. Nunc demum is pedem hic figere statuit. Cur dices non quamprimum saltem inchoant? Alius diceret solatioli causa id fieri. Sed eludere aliquem à moribus meis nimium quantum abhorret. Quare sic habe. Parens Guilielmus est senex, qui derivare statuit Typographii laborem in liberos justæ ætatis. Qualis Jurisconsultus ille quem dixi, & alter, qui exteras terras hætenus lustrat, & jam ex Italia redux in Britanniam venit, unde ad nos rediturus, non quidem intra duos, tres dies, ne te fallam, sed menses circiter duos. Credo horum partiaria omnis deinceps, ut impenfa, ita cura erit. Cernis, ut ista prævideri non potuerint, cum primum ad te scriberetur. Eo facilius condonabis. Ac summum hoc sit ex infortuniis tuis. Ex animo meo tuum æstimo: itaque scire vales intra quod temporis spatium absolvi cuncta possint. Nondum potui certi aliquid resciscere, quia ne Blauwii satis magnitudo & multitudo operum tuorum perspecta. Sed hoc pro certo mihi asseveratum ab iis, velle eos, binis uti typothetis, binis prælis, ut omnia opinione celerius peragantur, & quod ne-

glectum mora diuturna, id eo pacto compensetur. Mihi quidem qui eos viros bonos novi, plane persuaserunt. Sed occasione primâ ex me plenius certiusque de singulis cognosces. Urgebo haut aliter ac si mea res ageretur. Ac ne censeas quas causas commemoravi uni tibi obfuisse, scias easdem obstetisse cur Filii mei Dionyii Maimonides non viderit lucem. Nam non ante eum aggredientur quam ubi Frater Jurisconsulti redierit. Multum autem assidua duorum typothetarum opera promoveri, & tu satis scis, & nos hic experimur in Historia Comitum Hollandiæ quam Filius meus Matthæus non sine genio, & quod majus, summa fide conscripsit. Mittam simulac opus erat absolutum. Nunc habe meos de re Grammatica libros de quibus me aliquando, cum Collegæ essemus colloqui memini. Tandem lucem vident nescio quo honore meo, scio adolescentiæ & scholarum bono. Addo & Sophompaneam maximi & tui amantissimi Hugonis Grotii. Quod eo facio lubentius, quia mihi operam hanc suam consecravit. Certus sum multum voluptatis tibi attulisse, quod homo Batavus suis ante neglectus, nullo merito suo, nunc Deo propitio ad illud fastigii decus sit evectus, ut legatus sit Regni Suecici ad Christianissimum Regem, à quo etiam honorifice admodum est exceptus. Filiam juniorem magni ingenii Puellam amisit simulac Lutetiam venit. Morbum ex hiberno itinere contraxerat. Audio nec alteram satis commodè valere. Quis Reip. nostræ status deinceps sit futurus difficile est dicere. Fœdus initum cum Gallo, quod Deus utinam fortunet. Multorum enim metus, ne minus sit salutare futurum his terris. Causas quid dicam? Non omnia literis committi possunt. Sane non dubium quin eo offenderimus Britannum. Quamquam de eo & aliæ offensæ sint causæ. Strenue rem gessimus in Flandriâ, unde magna cum clade à Philippino propugnaculo rejectus Hispanus. Galli quoque ab eodem juxta Hujam insignem victoriam reportarunt. Omnino Cardinali ut vocant Infanti infeliciter initia hæc procedunt. Sed an ut gaudendum nobis quod prælo superior sit Gallus, ita optandum sit eundem bello vincere difficile dictu esset. Plane verendum ne tam potentis vicini aliquando pœniteat. Nam quid æque nobis adversum Hispanum commodavit quam ejus longinquitas? Sed hæc curæ erunt numini supremo. Burgerfdicius post longum morbum Lugduni excellit. Uti & aliquanto ante Socer ejus Verbomius. Etiam Heinzius uxorem amisit, de quo, absque dubio, jam aliunde intellexeris, & fortasse ex meipso, nec enim satis memini: Nam annus & amplius multo est quod excelsit.

fit. Salmasius necdum Leidæ aliquid in lucem divulgavit : sed meliori utitur valetudine quam antehac. Barlæi uxor graviter ægrotat, nec extra periculum est. Mea infirma ut solet, sic tamen ut par videatur rei familiarum. Honartius Senator & Consul urbis nostræ Bickerus, legati in Poloniam missi, cum Frisio Senatore, qui Franekeræ quondam juris professor fuit. Nempe hoc fine ut dispiciant num inter Suecum est Polonum pacis negotium transigi possit. Adrianus Pauwius advocatus Hollandiæ & legatus fœderatæ Belgicæ in Galliam hæret istic hætenus sed invitatus, quia ut scribit, negotium totum, cujus causa missus erat, confecit. Multum sollicitat per literas ut redire liceat. Sed nihil hætenus efficere tot literis vel precibus potuit. Causam melius illustrissimus Princeps quam procerum multi intelligat. Simon Beaumontius qui ante in generalium Ordinum confessu locum suum tuebatur, nunc Syndicus est urbis Roterdamensis. Tamdiu cessarunt Roterdamenses novum Syndicum in Hug. Grotii locum creare, quamdiu is operam suam extero Principi nondum addixisset. In causa est quod conditione istac Grotius Syndici munus hoc susceperat, ut ne illi possent repudiare cum vellent. Itaque existimat stipendium tibi vetus deberi usque dum legatus à Sueciæ Regno constitutus. Et multorum ea opinio (si dicendum quod res est) plane hoc deberi, præsertim cum nihil egisse, nisi ex senatus præscripto fateantur. Sed tempus abrumpendi tandem hanc scriptionem. Uxor uxorem, Filia Filiam, imo omnis familia mea omnem tuam salutat. Salutem etiam Cll. Viris Stephanio & Laurenbergio dices.

*Amstelodami,*  
clodcccxxxv.  
vii. Kal. Jun.  
St. Nov.

## CCLXII.

Axelio Oxensternio *Cancellario Regni*  
Suecici S. P. Hamburgum.

**A**B discessu tuo, Illustrissime Dom. Cancellarie, plurimus inter urbis hujus Proceres sermo fuit, de maximis virtutibus tuis; quibus præcipuè attribuunt omnes, quicquid post Serenissimi Regis excessum, pro libertate Germaniæ, feliciter gestum fuit. Ac licet priusquam pedem in fœdera hac Belgica posuisses, jam omnia laudibus tuis

foelicitissimè personarunt; tantum tamen abest, ut quod multis usu venit, præsentia quicquam de iis detriverit, ut decus ejus multis partibus auxeris. Quod non scriberem, nili Amplissimos Consules, aliosque hujus, & aliarum urbium Proceres, uno id ore, dicentes, ipse audiissem. Quodque præsens facile animadvertisti, id postmodo, uberius vidi, quam gratam rem feceris, & ipsis, & cunctis bonæ mentis amantibus, eximium illud beneficium conferendo, in summum virum Hugonem Grotium: in quo nescio plus ne amem eximiam pietatem, atque ut crectam, ita suavissimam indolem; an verò magis mirer divinum ingenium, & incomparabilem doctrinam. Non equidem diffiteor, superesse aliquos, qui aliud malint, sed ferè, qui vel vehementer læserint, vel metuant, ne tantus suis obstruat luminibus. Hæc coram etiam me attingere commemini. Nunc ea, argumentum literarum esse volui, cunte ad te, Illustrissime Domine, generoso Barone, Jo. Skytte juniore, juvene ob egregias animi dotes, mihi percaro, & quem, tanto majoris scio facies, quod excellentiæ tuæ, ut alterius parentis, observantissimus sit cultor. Pluraque de eo dicerem, nisi id putidius fortasse videretur, ipso literas deferente. Ecquid etiam addam de opere nostro Grammatico, quo censuram exerceo in veteres ac recentes ejus artis scriptores? Mihi hoc in Texeliam, & credo, jam acceperis. Non stultè adeo sapio, ut existimem, cum, ut cœlum Atlas dicitur sustinere, sic res Suecicas, & Germanicas, si non unus, at longè tamen præ cæteris sustineas; illis sepositis debere tantum Heroa paucillum temporis puerili studio impendere. Longè aliò spectavi. Nempe ut opus hoc à manu tanti literarum Patroni, tantique literatorum Mecænatis, facilius, & foelicius deveniat ad eos, qui pueritiæ, & adolescentiæ studiis in Suecia præfunt. Spero, cum aliquando omnia magis erunt liquida, ac serena, quæ ad regni salutem pertinent, hanc quoque, nec ipsis regibus indignam curam suscipi à te posse, ut ne diutius tot supervacanea, tot falsa, vel incerta, prima illa, & optima ætas discere cogatur. Equidem hoc nomine, sæpè non doctoribus minus succenseo, quàm discensium miseret me. Paulò ista familiarius scripsi, quam fortasse meæ sortis homini, ad tantum Heroa conveniret. Sed divina, quam præsens comperi, in tanto fastigio humanitas aliquanto me audaciorem fecit. De publicis nihil addo, quæ spero ex aliis, & in his à Blomartio nostro cognosces.

Deum Opt. Max. oro, ut prudentiæ ac fortitudinis spiritu, porro excellens nomen tuum



tuum ornet, Sueciæ, Germaniæque, ac nostræ etiam Belgicæ, bono publico.

*Amstelodami c. 10 Id. Jun. xxxv.*  
Prid. Id. Jun. Festinantius  
aliquantò quam vellem, sed  
properatus Domini Baro-  
nis abitus ita cogebat.

*Illustrissimi, & Ex-  
cellentissimi nominis  
tui cultor æternum  
devotissimus,*

G. J. Vossius.

CCLXIII.

Hugoni Grotio S. P. Lutetiam Paris.

**Q**UO tempore, illustrissime Domine, li-  
teræ meæ Affini Junio reddebantur,  
jam itineri cum Dom. Comite accinctus, vix  
pauca ad me unum potuit exarare. Profi-  
tetur multum se tibi debere pro tanto affectu,  
nec si ante annos aliquos, ea conditio esset  
oblata, alteram fuisse prælaturam. Nunc  
ita se Arundelianæ domui obstrictum, ut  
bona cum gratia nequeat discedere. Præte-  
rea jam illi se vitæ generi adfuisse: fore  
etiam ut interrumpatur utile propositum,  
de picturis Veterum, sepulchrisque explican-  
dis: quod in gratiam serenissimi Regis, &  
Illustrissimi Comitibus sui jamdiu suscepit.  
Jam tres ad me libros transmisit, eruditos  
sanè, plurimæque lectionis; quos Blauwius  
noster edere cogitat. Sequentur postea alii,  
non tam de arte, quam de artificibus ipsis.  
Credo pictorum, sculptorumque illustrium, ab  
omni ævo indicem velle texere: sed eum ad  
modum, quo actum mihi de Historicis Græ-  
cis, ac Latinis, Giraldo de Poetis. In  
hoc opere adhuc distinetur. Vellem filius  
tibi, aut gener, vel cognatione junctus ali-  
quis, tam pulchra in opera posset commo-  
dare: Quomodo Hagæ Ill. Camerarius ge-  
nerum à secretis habet. Sed ejus, qualem  
deposcis, non paulò latius se cura diffunde-  
ret, quia non Regni solum Suecici negotia,  
vel etiam privata, respicis; sed etiam quo-  
modo studiis, sacris pariter humanisque,  
quam optimè merearis de orbe Christiano  
atque erudito. Sed dum idoneus tibi ad ista  
quæritur, fortassis non aspernanda sit opera  
Ricwaertii, de quo superioribus literis scri-  
bebam. Sagaci ingenio est, ac Latinis, Græ-  
cisque literis instructus. Ætas etiam quæ ju-  
diciū adferat: namque duodetrigesimum  
excessit. Considerem si sub tuis agat oculis,  
remissum de vitæ genere laxiori paulo,  
quam ædibus tuis conveniret. Sed super eo  
cum nemine hic loqui volui. Solum à Cor-  
vino, & aliis deposcitur, ut ne eum in Gal-

lias ire patiar, sine commendatitiis ad te meis.  
In quo me amico homini difficilem non præ-  
stabo. Utcumque enim fortassè aliquid sit,  
quod in hoc juvene culpari mereatur, si ta-  
men is esse deinceps volet, quem speramus;  
magnum sibi, & pulchrum nomen parare  
possit. Nescio an superioribus ad te literis  
scripserim, de Amplissimo Guilhelmo Noom-  
sio Arlandervenæ Domino, persistere eum  
in proposito, de acquirenda in Galliis eque-  
stri dignitate. Jam ante annos aliquos, pri-  
usquam in patriam redires, egi de eo tecum  
per literas. Nunc poscit, ut negotium hoc,  
iterum commendem. Malle tibi, quam al-  
teri se debere. De pretio memini jam annis  
superioribus, dedisse alteri in mandatis, ne  
quid moram adferret. Forte erit, quod  
paulò averfio rem te, vel uxorem reddiderit.  
Scio, quid dicatur. Sed mihi Historia omnis  
notior, quam alteri: quippe qui utrimque  
utilem sanando malo operam navarim. Sed  
parum tutum est omnia literis committere.  
Solum dixero, multis partibus minus in hoc  
culpæ esse, quam aliquis rei gestæ totius ne-  
scius existimaret. Sed de isto satis. Tu, scio,  
& illi, & familiæ tui amantissimæ, hanc ope-  
ram non denegabis. De filii tui Petri Grotii  
animo, super profectio in Indias, jam diu  
mihi constitit, ex liberis meis, & iis apud  
quos habitat. Ante sesquiannum quidem  
non abhorrebat; eoque diligentius studiis  
operam dabat, quæ ad illud vitæ genus con-  
ducunt. Nutare autem visus, ex quo hic  
sparsa quædam, de meliori forte, quæ fami-  
liam maneret. Ubi autem certus nuntius  
de summa retulit dignitate tua, planè cogi-  
tationem istam abjicere visus est. Nec leviter  
eum firmavit, quod cum in urbe hac Illu-  
strissimus Dominus Cancellarius pedem po-  
suisset, benigno admodum sermone sit ex-  
ceptus; in tantum ut quo magis ad studia,  
virtutemque accenderet, sponte filio promi-  
serit, velle se cogitationem quoque suscipere  
ejus promovendi. Volui & ipse filii tui ani-  
mum tentare, atque adeo, si non prorsus ef-  
fet alienus, magis ad iter accendere. Sed  
frustra me fore statim perspexi, & jam du-  
dum sese aiebat, ad parentem perscripisse.  
Imo si candide me velis scribere, quod cen-  
seo, (velle te scio) prope omnium qui hic  
sumus, judicium est, si nimium à Matre, vel  
maternis amicis urgeatur, sic interpretatu-  
rum, quasi ob corporis vitium minoris cen-  
seatur, longèque relegatur ad Garamantas,  
vel Indos. Novi ego commodo filii maxime  
studeri. Sed non hæc ætas statim capit: nec  
defunt, qui ubi intelligunt parentum pro-  
positum, longe aliter apud eum interpreten-  
tur; præsertim ex adolescentibus. Scis mo-  
ribus

ribus Batavis satis esse insolens, ut quis eo mittatur, nisi qui minus se vita probet. In tuo negant quicquam requiri, quod præstare ipse possit. Invisit hac Hebdomade me Realius, is qui præfuit nostris in India. Cumque de filio tuo mentio incidisset, dubitare se multum aiebat, annon eadem quæ hic, magis etiam ob stare filio in Indiis possent, quæ itinerum mari terraque difficultatem spectemus, quæ auctoritatem apud inconditos illos homines, vix homines. Spero jam ante mensem, & amplius, acceperis Sophompaneam, uti & opus nostrum Grammaticum. Intellego hic ex Amstelodamentibus nostris esse, qui ignari idem esse propositum filio tuo Petro, toti sunt in Sophompanea, Belgicis Rhythmis reddendo. Ita mihi retulit Moltardus Reip. huic à secretis. Realio, quem his diebus adfuisse dixi, valde commendavi negotium Galilæi de Galilæis. Nec facile dixerim, quantoperè optet, ut non alibi pedem figat. Aiebat se manibus pedibusque operam daturum: Et idem ut agerem volebat. Tamen de successu nihil audebat spondere. Hortensius mirè exoptat hoc ipsum, atque unà senior Blauwius, ut alios taceam. Facilius esset negotium, nisi tam multi ex iis, qui clavum tenent, pecunias majoris facerent, quam doctrinam, & urbis gloriam. Quod ipsum mihi etiam visus sum cognoscere, ex consulis Flaminii relatu. Nam & cum conveni: nec deero deinceps aliis compellendis, qui aliquid, & possint, & velint. Leonis Allatii de Pfellis, & eorum scriptis diatribam vidi, & legi, & doctrinam viri æstimo, ac jam locutus sum cum Blauwio seniore, de ejus scriptis hic divulgandis. Nec abnuo: sed exspectat reditum filii Jurisconsulti, qui jam duos propè menses Goudæ est, cum uxore. Absque ejus amoribus fuisset, non Sophompaneas tuus, tam spissum fuisset negotium, ut eo tardius scriberem, quia alieno me nomine puderet. Nihil in Blauwii ita displicet, quam quod tam multa recipiant in se, & adeo tarde promissa exsolvant. Corvino cujus mensa fruitur filius, si vel tribus verbis responderis, vel saltem literis meis salutem adscriperis, ut ostendere valeam, de affectu veteri, nihil decessisse ex eo, quod filium tuum juris scientia imbueret studuerit, rem facies, & illi, & conjugii ejus pergratum. Facile omnes suspicioni indulgemus. Mihi quidem nec seritur, nec metitur. Sed scis quid velim. Et facile vides, sic vel hoc, vel illud agendum, ut sponte istud à te profectum esse videatur. Alia quoque veniunt in mentem, sed tertiam cum paginam implem, cætera literis alteris reservo. Deus Opt. Max. te, Illustrissime Domine, cum familia

tota, diu Christiani orbis bono, & Reip. literariæ conservet.

Amstelodami,  
clō Idc xxxv.  
Kal. Quintil.

Illustrissimi nominis tui  
Cultor,

G. J. Vossius.

#### CCLXIV.

Illustrissimo viro Hugoni Grotio, Gerardus Vossius S. P.

ANTE dies paucos accessit me Optimus, & Doctissimus vir Theophilus Ricwaert, partim, ut de more inviseret, partim etiam rogatum ut aliquid ad te literularum, in gratiam filii sui Justii, qui has ad te defert, exarare vellem. Facio vero id, ac lubens, præsertim quando idem à me possunt Barlaeus, Corvinus, Hasius, quem jam ante annos viginti, ex Eglißemiano certamine cognitum tibi arbitror. Est Justus hic juvenis, ingenio valens, ac eruditus, quemque tres isti, quos proximè dixi, etiam à vita & moribus mihi commendant, & adversus obrectatores, quibus nunquam humana caret vita, magno affectu tueantur. Laudat quoque hac parte filius meus Matthæus, cui non ita magna, aliqua tamen cum eo familiaritas fuit: uti & filio tuo Petro, occasione ea quod uterque juris scientia à Corvino imbueretur. Sanè dignissimum arbitror, cujus ratio habeatur, sive ejus opera utilis tibi esse potuerit, sive alium istic noris, cujus liberis erudiendis præfici possit. Volupe fuit ex Lomelio, Pavoni à secretis, nudius tertius cognoscere de valetudine tua tuorumque, præsertim post vulnus nuper familiæ infectum tuæ, quod primo animum valde perculit, ut omnium tui amantium, ita maximè Petri tui, sic ut aliquot diebus, nunc cibo abstineret, nunc vix tangeret: mentionem verò carissimæ Mariæ etiam postea non nili lacrymans audiret. Omnino amore magno hi duo se mutuo complectebantur. Advocando, & alloquio, deterimus mœrorem, ut potuimus, memores quæ nobis præstitisses literis non unis, nec folis, sed Sophompanea comitatis, in maximo luctu nostro. Sed dicere etiam non possum, quantum solatii attulerint filio tuo, quas literas scripseras ad parentem, fortes profecto: partem enim earum à se exscriptam, mihi quoque filius ostendit. Hactenus filius tuus usus Corvini convictu; sed conqueritur hospes ejus, se angustius

angustius habitare, alia etiam prærendit, præfertim de valetudine majoris filie. Si ibi minus bene possit, ut aliis in ædibus bene filio sit, à Patruo curabitur, ac lubens in societatem hujus curæ veniam. Bina operis nostri Grammatici exemplaria, jam diu spero acceperis, uti & à Blauwio Sophompaneani, & geminas exinde à nobis literas, quibus inter alia de Junio nostro, Galilæo de Galileis, & Leone Allatio, respondi: de duobus his plenius aliquid, brevi ut spero scripturus. De publicis rebus nihil addo, quia non dubito, quin aliunde, melius certiusque ea intelligas. Salutant te plurimum uxor, ac liberi, ac mecum etiam Heroinam conjugem, ac familiam universam.

*Amstelodami* xvi. Kal. Sextiles,  
Anni clc xxxv.

## CCLXV.

Justo Cæciliano Puteano Erycii F. S. P.  
Lovanium.

**M**agnæ voluptati mihi filioque est, semperque erit, recordatio tui, Amplissime Doctissimeque Puteane; uxori item, filieque meæ, non minus jucunda est memoria suaviissimæ & cordatissimæ sororis tuæ, in quam, si ita fas loqui, Dii singuli videntur contulisse quod pulcherrimum habent. Utinam vero, sic res vestræ tulissent, ut utriusque præsentia diutius frui licuisset. Gaudeo interea quod Parentes, & omnes vestros reperitis salvos. Scis quam me, & meos, cura hæc coxerit, quandocunque pericula cogitarem, quæ nunc læti evalistis. Medicæ Historia valdè capior, tum doni causâ, tum argumenti & scriptoris. Dignus sanè fœtus Parente tuo, suoque, nec Medicæ solum Heroibus gratus, sed orbi universo. Nec venio *adversus*, qui *adversus* mitto, impar magis authore; quam dissimile argumento. Historiam pro historia, sed Vossianam pro Puteana. Spero tamen non displicituram, vel propter Batavos Veteres, quorum virtutem hi nostri æmulentur velim. Et faciunt profectò, utcumque hujus anni gesta placere non possint. Sanè Tenensium cladem dolemus. Crudelitatem in urbe exercitam, non Brabantii magis detestantur, quam Batavi. Utinam Præfectus urbis temporis impotentes Gallorum mores cogitasset. Nec tamen istud satis, vel Gallos excusat, vel si qui è Belgis Foederatis, fœdum exemplum sint secuti. Scio quàm Deus talia soleat vindicare.

Unde statuere potes, quid de edito Epigrammate Parentis tui censeam. Imperatori tamen nostro, qui furorem militum sistere non potuit, optimè & volo, & velle semper debeo, tum ipsius causâ, tum quia in eadem navi navigo. Alterius Epigrammatis, quis Author sit, non adscriperas. Sed quisquis ille, & venustate sua, & novitate rei, quam refert, me delectavit. Salutem plurimam summo Parenti tuo dicito, meo nomine. Etiam te, sororemque salute impertiant omnes mei.

*Amstelodami*,  
clc lxxv.  
ix. Kal. Aug.

*Tuæ universæ familiæ amicus summus,*

G. J. Vossius.

## CCLXVI.

Guilielmo Archiepiscopo Cantuariensi.

Reverendissime in Christo Pater, Dom. Illustris.

**Q**uanto plura majoraque esse negotia tua omnes agnoscimus, tanto majori me gaudio implevit conspectus literarum tuarum, quibus humanissime, ac pro occupationum mole, qua premeris & tantum non opprimeris, ubertim etiam, ac singulis quidem Epistolis meis respondes: unis exceptis, quas famulitii incuriâ intercidisse prædicant mihi illi ipsi quibus dederam; Sunt ii Barones Scytii, liberi Illustrissimi Legati Suecici, quorum unus ante sexennium, duo superioribus mentibus à serenissimo Magnæ Britannæ Rege equestri dignitate ornati sunt. Sed si perditâ Epistola nostra, bene est quod nihil continuerit, nisi quæ ab omnibus legi possent. Ex ornatissimi Dellii, qui dignitati tuæ illustrissimæ à Secretis, literis intelligo, opus nostrum Grammaticum tam felix fuisse, ut de manu tanta in tanti Principis manum traderetur: quod sine dubio grati animi testificationem nostram gratiorem reddidit in tot Regnorum spem crescendi. Præterea ex Epistola Clarissimi Richardi Sterne certior factus sum, ut inter gravissima Ecclesiæ, Regnique negotia, res Cantabrigienses homulli, filii dico mei, curæ tibi serio fuerit, & quantum hoc mihi commodarit. Quid aliud faciam, quam ut quas possum gratias agam ingenuæque agnoscam in me immerentem tot indies pene beneficia cura tua paterna conferri, ut post Deum immortalem plus debeam nemini. Tanto justius sic cuncta mea studia compono, ut imprimis sic de merito probentur. Ac hoc tempore quidem bonam



bonam sibi partem ejus vindicat Chronologia sacra, in qua dicere vix pressum quantopere à summis etiam viris sit aberratum. Operæ ejus non multum adeo restat: quam deinde alia consequentur. Filius Joannes Indias petiit, advocati fscalis dignitate ornatus. Spero se hoc munere dignum, dignum etiam familiâ geret. Non alia facilius ratio est rem faciendi honestè: sed sub terris vix alia quoque corporibus umbræ adfueris periculi plenior. Domino confidam, cujus est terra & plenitudo ejus. Si scisset filius uti affectu illustrissimi nominis tui, & tot Magnæ Britanniae bonis; longè melius consulisset sibi, & minus damni familiæ dedisset. Sed si frugi porro erit, facile vetera ista condonabuntur. Huc usque literas perduxeram, nec ultra scribendo avocare fas putabam, cum ad me veniunt homines honestissimi; unus etiam, ut opibus florentissimus, sic literis ornatissimus. Hi mecum sermonem ferere hujusmodi: Nostemne Scipionem Gentilem Norimbergenfis Reip. apud Altorfinos ante aliquot annos professorem Juris: nostemne item fratrem ejus Albericum Gentilem, qui Oxonii Professor fuit, filium etiam in Collegio Joannis ibidem habuit. Annui, meque sedulo scripta utriusque legisse dixi, nec sine fructu. Illi tum subjicere, esse quiddam, quod me postularent pro Scipionis hlio; nempe scire me quæ facies esset Palatinatus patriæ meæ. Hic Scipionis viduam ingentia à Cæsariis damna perpeffam, itaque quæ filiam præterea haberet, non esse idoneam hlio in studiis porro educando. Optare se ut in Angliæ Collegio aliquo apud Cantabrigienses, vel Oxonienses, ubi patruus fuisset Professor, vivere daretur. Adolescentem esse boni ingenii, indolis optimæ, & eos in studiis progressus fecisse, ut Scholas Clafficas, quas triviales vocant, emensus, jam aptus publicis Academiæ auditionibus videatur. Obnixè igitur rogarunt, ut hoc votum suum ad te, Illustrissime Domine, perscribere, & negotium verbis tribus commendare velim. Dixi non audere me toties literis in caerum mole distento obstrepere. Sed cum miritice urgerent, modestiæ meæ non fuit diutius adversari in re tam honesta. Pulchrum ac prope divinum est benefacere afflictis, præsertim qui opem postulant. Et facile commoveor erga eorum liberos, qui bene meriti de studiis: Quales Scipio & Albericus Gentiles. Quam multa enim partim ad bonas literas, partim ad Jus Civile ac Canonicum pertinentia bono publico divulgârint, satis testatum facit Bibliotheca Bodleiana, in cujus Catalogo eorum libri non indiligenter recensentur. Scio in his Ger-

maniae rebus magnam esse ejusmodi petitorum copiam. Sed fortasse huic adolescenti prederit habuisse patrum professorem apud Oxonienses tuos. Præsertim quandoquidem is videatur non tanti fecisse Zelotas hujus temporis, quam amasse cum veteribus bonam mentem. Hec enim mihi ex plerisque ejus scriptis videor non obscure intelligere. Illustrissimus Reginæ ac Regni Suecici Legatus ad Galliarum Regem Hugo Grotius, paulo antequam dignitate ea auctus, tragediam scripsit de Josepho Fratres agnoscente. Speramus eum Josephi sui instar pro magnis malis, quibus affectus à suis, in dignitate hac prælustri multa beneficia iis collaturum. Tragedia ea inscribitur Sophompaneas, nomine Ægyptio, quod Pharaon dederat, ad Græcam consuetudinem inflexo. Alioqui pro eo apud Mosem est juxta Masoretica puncta Saphnath-Pahaneach, apud Josephum Pfontomphanecus, corruptius apud Rufinum Pfontonfanicos. Exemplar mitto, propterea quia nomini inscripserit nostro. Addidi & alterum, domesticorum cui voles, ornatus missurus, si ad manum fuisset aliquod. Expeditio à nostris una cum Gallo suscepta non admodum feliciter procedit. Spe devoraveramus Brabantiam & Flandriam. Nunc non male nobiscum agi putabimus, si munitissimum illud propugnaculum Scemgkianum, quod negligentia unius, quem dicere nolo, tam fœde amissum, recipere valeamus. Utinam ne Deus vindex graviter nos puniat, propter barbaram & prope his terris inauditam crudelitatem, quam in capta Tinentium urbe exercuere Galli, admittis etiam (ut aiunt) aliquibus è Belgis, qui tamen paulo minus exuisse hominem visi sunt. Super eo varii in Brabantia circumvolitant libelli, qui non leviter iis terris depreciant nomina Ducum nostrorum. Ne vero huc etiam deferantur, publica cavetur auctoritate. O quando erit illa dies, ut nos aurea pax revifat. Deum. Opt. Max. oro, ut hanc ipsam Magnæ Britanniae perpetuam esse velit: teque, Reverendissime in Christo Pater, in tantis Ecclesiæ ac regni negotiis, animi ac corporis viribus magis & magis augeat.

clō lōc xxxv.  
iv. Kal. Aug.  
St. V.

Reverendissimi & Illustrissimi nominis tui devotissimus Cultor,

G. J. Vossius.

CCLXVII.

## CCLXVII.

Guilielmo Dell, *Domino Archiepiscopo Cantuariensi, à Secretis S. P.*

**A**usus eram, optime & amicissime Delli, opere meo Grammatico sive Aristarcho malis (vix aliud convenientius nomen dare potuisssem) non paulum tibi imponere oneris: sed excrevit illud multo amplius quam putarem, nullâ quidem culpâ meâ, sed infortunio. dum aliqui (nec culpare ausim, quia forte sic muneris ratio tulit) involant in commentationes nostras prope dixerim harpyarum instar. Sed bene sit tibi, mi Delli, qui eas tam benigno affectu ac labore ab unguibus eorum viscolis reglutinasti, si modò viscoli dici debent, quando plerique saltem sponte erant facturi officium, modo scissem quibus & à quo exemplaria itæc mitterentur.

Quas miſeras ad præstantissimum Goffium literas, eæ curaram, ut Hagam, inde in castra mitterentur. Sed post aliquod tempus eas recepi. In Angliam profectum prædicant. Simulac redierit reddentur.

Mitto ad te exemplar Tragediæ quam nuper edidit illustrissimus Regni Suecici ad Galliarum Regem Legatus Hugo Grotius. Hæc per se grata scio erit (nihil enim illa eo in genere elegantius) sed illo gratiorem fore confido, quod nomini meo inscripserit. Argumentum est de Josepho fratres suos agnoscante. Sophompaneam inscripsit, quod nomen Josepho à Pharaone impositum.

Scripti ad illustrissimum Dominum Archiepiscopum. Nihil est in literis quod moram non patriatur. Trades igitur cum commodum tempus existimabis. Præcipuum fere argumentum est, rogari me hic à quibusdam, ut quia decrèrint Reverendissimum & Illustrissimum Dominum nostrum orare, ut Scipio Gentilis adolescens annorum circiter viginti, recipi possit in Collegium aliquod Oxoniense aut Cantabrigiense, hoc postulatum suum literis meis ad Patronum nostrum Opt. Max. velim complecti. Sperant aliquantum id sibi profore. Non lubens pro aliis sollicito, qui propriis sic, per se satis superque occupatum, distineo. Tamen misericordia erga ignotum prorsus vicit. Est is adolescens filius clarissimi Scipionis Gentilis juris dum viveret Professoris apud Altorfinos in Germania. Defuncto patre studuit Ambergæ, civitatis superioris Palarinatus. Quo amisso, vidua mater non est alendo in studiis filio. Maxima enim à Cæsare damna accepit. Sperant amici posse admitti in Collegio ali-

quo Oxoniensi: nam patruus adolescentis, Albericus Gentilis juris istic professor fuit. Quamquam seu Cantabrigiæ seu Oxonii recipiatur, parum refert, dum in studiis progredi, ac patris patruique exemplum possit æmulari. Aiunt enim ingenio valere & viræ esse probæ. Mihi est ignotissimus; sed fide hæc eorum scribo, qui nosse possunt & debent. Fortasse locus nuspiam vacat, aut indigentæ alicui addictus exteris non patet. Sum rei omnis ignarus. Tamen quia memini exteros etiam admissos, passus sum mihi persuaderi, ut illustrissimum Dominum & Patronum compellarem. Tu rem ita diriges, ut ne molestus ei sim: qui satis, ut dixi, meis occupo, tantâ tanti herois gratiâ prorsus indignus, quâ abuti profecto non debeo; præsertim ubi mihi nec feritur, nec metitur. Totum quod feci, feci non mei causâ, sed Dei, qui nobis viduas ac pupillos commendat. Et scis homines eruditos facilius misericordia tangi erga prolem eorum qui studiis excelluerunt. Vale, optime Delli, & nos amare perge.

*Amstelodami,*  
iii. Kal. Aug.  
Syl. Vet.  
cdo Idc xxxv.

*Additissimus tibi,*

G. J. Voſſius.

## CCLXVIII.

Guilielmo *Archiepiscopo Cantuariensi.*

Reverendissime in Christo Pater, Dom. Illustriss.

**C**UM doleam multa adeo esse, quæ studia remorentur, tum non leviter molestiam hanc auget, quod Typographi sic moras nectant, in edendis tum Dionysianis, tum etiam meis, præsertim quæ sacram Chronologiam tangant. Gaudeo interea saltem excudisse alterius filii Matthæi (quem & ipse participem mensæ tuæ facere dignatus fuisti) quinque libros Antiquitatum Hollandicarum ab anno circiter nongentesimo, quando Comitatus dignitas in Repub. hac eminere inter optimates cepit, usque ad annum millesimum trecentessimum; ubi primo hoc volumine destinere visum, quia exinde is honos, deficiente mascula stirpe, penes Comites non Batavos, sed domo Hannoniis fuit. Uti postea penes Bavaros, hinc Burgundos, ac denique Austriacos. Univerſa hæc persequi filio animus est. modò vitam Deus, & valetudinem conceſſerit. Exemplar nunc mitto, partim quia tibi omnia mea, ac meorum grata esse scio, partim quod quæ tradit, magnam partem,

N n

tem,

tem, minime saltem Latino sermone tradita sint. Proceribus quidem nostris mire opus gratum fuit, usque adeo ut ad strenue peragendum, largo honorario sint profecti, non sine spe, cum nova pars prodierit, Historiographi sui titulo cum stipendio publico ornan- di. Etiam alterum addidi exemplar Chartæ itidem Augustæ, cuiusmodi quatuor sunt tantummodo excusa, duo hominibus Batavis ubi scripta dicataque, duo autem quæ nunc in Britanniam transmittito. Alterum hoc cui de- beatur, multis partibus melius me, Illustrissi- me Domine, perspicies. Tui igitur iudicii hoc totum esto. Spero operam non displicituram non modo quia & iudicium & fides & dictio se probent; sed etiam quia maiorem partem nunc demum Latino prodeant sermone, plu- rima etiam nec indigenis sint observata. Si- quid forte intercurreret, ut fortassis in operis ipsius initio, quod non conveniat Regum Im- perio, cogitandum hæc scripta esse in Opti- matium Republica, non regno, quæ regendi forma, si ἀπὸς loquamur, longè sine dubio optima; sed ut Alcibiades & Augustus dixe- re, boni est civis præsentem Imperii statum mutatum nolle. Deus Opt. Maximus, te, Re- verendissime Pater, & Illustrissime Domine, diu sospitem conservet.

*Amstelodami*  
clō Ioc xxxv.  
Id. Oct. St. No.

*Reverendissime & Il-  
lustrissime Domina-  
tionis tue Client  
longe devinctissi-  
mus,*

G. J. Vossius.

## CCLXIX.

Merico Casaubono S. P.

Clarissime & amicissime Casaubone,

**R**ecepi à Peistero quantum mihi è Cantu- ariensi Præbenda anni huius clō Ioc tri- gesimi quinti mense Martio debebatur. Ex- pectabo igitur ab eodem, ubi tibi integrum erit (id brevi fore spero) quod sexto post mense Septembri puta expiravit. Mitto nunc non quidem de meo quicquam, sed de cari capitis filii mei Matthæi (quem cum τῆς μακαρίας vidisti Dionysio) labore. Sunt quinque libri Antiquitatum Batavicarum: nempe annorum cccc Historia, quæ anno clō ccc terminatur: quando Comitatus honos mascula stirpe desita, à domo Batavis ad Hannoniam transiit. De fide optima scriptoris tibi sponforem me do.

Confido autem sese etiam & iudicio, & dicti- one probaturum tibi, nec minus Reverendo Domino Decano; cui alterum mitto exem- plar. Siquid vel initio erit, vel alibi, quod non satis conveniat genio Imperii Britannici, observandum: hæc scripta esse imprimis Bata- vis, quos Optimatum imperio usos, etiam sub Comitibus satis constat. De rebus publi- cis quid scribam? Amico Gallo libere signi- fico societatem hanc Gallicanam pessime nobis successisse. Sed plerique qui eam initio avide adeo amplexi, nunc vetera Britannicæ gentis merita, magis ad animum revocant. Prope- diem puto Legatos mittendos: quod & Bri- tanniæ & fœderatæ Belgicæ bono fore confi- do. Uxor & omnes mei, te una cum lectissi- ma conjuge plurimum salutant. Multa etiam salute imperties Reverendum Dominum De- canum, cum universo venerabilium fratrum Collegio.

*Amstelodami,*  
clō Ioc xxxv.  
Id. Octobr.

*Tuus tuo merito,*

G. J. Vossius.

En literarum exemplar ante mensem, vel propè sesquimensem scriptam & traditam, ut amicissimo mihi, ita optimo & doctissimo Stephano Goffio, castrensi apud nos Anglo- rum Ecclesiastæ. Is tum ituro in Angliam illustrissimo Electore Palatino comes erat fu- turus. Ac fortasse jamdiu in Anglia sunt. He- sterna tamen die ex quopiam intellexi adhuc in Zelandia hærete ob ventum adversum, vel saltem non ante hebdomadam abiisse. Exitii- mavi igitur, tutius fore, si juberem literas priores rescribi, ne reus immerito agar perti- nacis adeo silentii. De legatis quod scripse- ram, necdum processit; sed hoc nunc agi utrinque videtur, ut induciæ fiant. Spissum sane negotium, cui tamen opinione celerius accelerando haud mediocre momentum attu- lerit non illaudatus urbis Episcopus Urbanus. Quem ex viris minime vanis & talium gnaris accepi seriò hoc moliri, ut Orbi Christia- no pax reddatur, Marte qui ubique hic sævit relegato ad Mehemedanos, cujus res nostris discordiis gliscunt. Pestilentia vehementer grassatur totâ propè Belgicâ fœderatâ; Lug- duni Batavorum imprimis; ubi quandoque una hebdomade rapiuntur mille ac quingen- ti. Nostris Amstelodamensibus optime tuit diu. Nunc Lues hic quoque incrementum capit. Hactenus tamen toti tam licet nostræ optime est. Sed quid porro futurum sit, quis dixerit? Tanto ardentioribus votis opus ad Deum; cujus me meosque ac pariter totam familiam



familiam tuam, sed & universum venerabilium Fratrum Collegium commendo.

*Amstelodami*  
cl<sup>o</sup> Id<sup>o</sup> xxxv.  
12 Kal. Dec.

*Tuus tuo merito,*

G. J. Vossius.

## CCLXX.

Joanni Isaacio Pontano S. P.  
Hardervicum.

**D**E Catulliani loci emendatione, Optime & Doctissime Pontane, amplius dum cenfeo. Legis apud Poetam hoc pacto:

*Ego inuber, Ego Adolefcens, Ego Ephebus,*  
*Ego Puer.*

Sane metrum non refragatur, quod Galliam-bicum est. Prima enim sede fuerit Anapæstus, hinc Tribrachus, quod interdum fit hinc Iambus, tùm Dactyli duo, inde Anapæstus. Quæres, quid ergo assensum moretur? Nimirum illud, quod non censcam *inuberem* poni, pro ablactato, sed notare macilentum; ut quod veniat, ab *uber* adjectivo. Quare *uber* & *macer* pugnantia sunt. *Inuber* igitur idem ac *macer*; sed *inuberis* vox insolens. More suo ideo Gellius interpretationem subjecit; cum *Ostrea*, inquit, *Inuberes maceræque essent*. Est hoc ab *uber* adjectivo. Ab *uber* autem substantivo, pro mamma non videtur *inuber* dici, sed solum *sububer*, pro *σπυγδαία*, quod apud Hidorum, & fortasse etiam *exuber*, ut hoc Scaligero demus, qui ita putavit. nec authorem laudare possit suæ opinionis. Ad hæc si *abuber* substantivo veniret, *inuber* non significaret ablactatum, sed sububerem, & quasi uberibus incumbentem. Quomodo *inuber* & *exuber* contraria forent, illud significaret, *σπυγδαίων*, hoc *σπυγδαίων*. Denique ut *inuber* aliquis, post *σπυγδαίων*, diceretur, fortasse ne sic quidem. Catulliano illi loco satis conveniret. Neque enim Atys erat recenter ablactatus; sed Puer, Ephebus, Adolefcens, dici poterat. Imo cum in illis, *Adolefcens, Ephebus, Puer*, quo ordine ponit Catullus, decrescat Oratio, elegantie Catullianæ fuisset, extremum locum tribuere voci, quæ recens ablactatum signasset. Non ausim igitur, *mulier* damnare, quod est in antiquis Codd. etiam editione, quæ Regii Lepidi anno prodiit cl<sup>o</sup>cccc lxxxii. sed *Mulier* *σπυγδαίως* efferendum, ne claudicat metrum. Sententia fuerit, Mene nunc Mulierem, & Eviratum esse, qui ante Adolefcens, Ephebus, & Puer fui? Nec hoc scribo, quasi ve-

hementer tuæ sententiæ refrager. Velim enim omnes conjecturas tuas esse certas, quod nulli tamen mortalium evenit. Eo facilius veniam dabis paulum dissentienti. Quamquam ne ista quidem scripsi, quasi multum abeam, sed ut videas ad statuminandam opinionem, eam firmiori tibicine opus esse. Locus de quo scripseras est, in primo de Art. pag. xvii. uti alter libro de Constructione, pag. ccxlv. Uterque infra virtutes tuas, quod alibi foelicus præstabitur. Salutem multam imperties Consuli Amplissimo Brinkio, Collegæ item Theologo Distio, de Zevecotio adderem, nisi pauci adeo dies essent, quod nobis adjuisset.

*Amstelodami,*  
cl<sup>o</sup> Id<sup>o</sup> xxxv.  
7 Kal. Nov.

*Tuus æternum,*

G. J. Vossius.

## CCLXXI.

Joanni Brunæo, V. Cl. Quæstori Middleburgensi, S. P.

**Q**uam vellem, amplissime Vir, atque idem non animorum minus similitudine quam affinitate conjunctissime, ut si non tam diu, quam optabamus, paulo saltem diutius, frui licuisset, tui quidem mihi, uxori autem meæ, conjugi tuæ, imo & liberis meis, præsentia utriusque vestri. Omnes enim pariter vos colimus & æstimamus; & si verum scire cupis, permolestum est, quod tam longo spatio divellimur, nec sæpius una esse liceat: mihi imprimis, qui ex sermone tuo ut mirificam voluptatem, ita fructum etiam capere soleo: hac veteris nostri amoris fiducia nunc ad te scribo. Scio probe te memorem esse sermonis habiti inter nos, cum hic fores, de Annalibus Hollandiæ & Zelandiæ à filio Mattheo exaratis, dicatque illustrissimis Hollandiæ, Zelandæ, Westfrisiæque Ordinibus. Quam grata hæc fuerit opera Proceribus Hollandiæ, quid dicam? putidius id fuerit perscribere; sed ut cætera taceam, vel inde conjecturam, vir sagacissime, poteris capere, quod sint honorario protecuti (apud te non dissimulabo) florenorum ccccl, ex quibus quadringenti quidem illi pro opera assignati, quinquaginta vero pro exemplaribus. Majus illud, quod ut ex non uno nobilissimi confessus accepi, nihil æque hoc tempore obtulerit, quo minus terræ suæ Historiographum constituerent, quam quod merus foret, ne alius, qui res nostri ævi describendas suscepit, hanc

qualemcunque societatem ad infringendum honoris sui decus facere arbitraretur. Nihil vero hoc obstitit Zelandiæ vestræ, quæ, ut arbitror, nullum hoc tempore istoc honore prosequitur. Et spes à multis hic facta filio mihiq; quod nunc non fecere Proceres, facturos occasione alia, præsertim ubi alia pars operis prodierit in lucem. Plura hic addere de filii laboribus non est meum, nec tu ipse, quam modestia es, id probes. Sed te ipsum, & intelligentissimum quemque operis judicem capio. Mitto nunc exemplaria novem: tot enim in illustri illo consensu proceres esse intelligo, sed superaddidi tria. Unum seorsim antea dandum nobilissimo Knutio, quem interest nostra in tantis negotiis, quæ sustinet, prius vel fugitivo oculo lustrasse hunc laborem, quo facilius statuatur, quid facto sit opus. Scio præstantissimum virum per se satis favitorem fore operæ publico bono insudatæ. Sed nec inutilis propterea erit commendatio tua, præsertim quando, nisi valde fallor, aliqua etiam ejus est conjunctio cum uxore tua. Parum absuit quin ad ipsum scriberem. Sed nolui tibi diffidere. Eo minus quia & negotium commendavi (nihil horum ignorare debes) amplissimo senatori Cromen; cum in urbem hanc nostram his diebus ad nuptiale festum se contulisset. Is ineunte Novembri in urbe vestra futurus ad aliquam juris controversiam decidendam cum jurisconsultis & arbitris. Præterea & hic & Hagæ locutus sum, cum urbis vestræ secretario amplissimo Vanderburgio Illustris Berkii *sz margrave* genero. Et is bonam addixit in hac re operam. Huic alterum ex tribus reliquis exemplar dandum. Tertium cedat illustrium ordinum Zelandiæ à secretis: sive seorsim, sive cum novena illa proceribus exhibendum. Quid expediat facile perspicies: si scissem quando conventuri fuissent illustrissimi Ordines vestri, filio auctor fuisset ut ipse excurreret. Nunc plane de eo incerti sumus. Accedit, quod non finit ejus pudor ut Curio & Buccinator sit laudis suæ; melius ista per amicos peragantur; mitto quod lue per fœderatam hanc Belgicam grassante non secure satis in turba aliquis se navi committat. Quamobrem omne tibi commendo negotium, & illis simul quos ante memoravi; spero autem pro gratia pulchre navata gratias me vobis acturum prope diem.

*Amstelodami*  
clo Idc xxxv.  
4. Kal. Nov.

*Amplitudini tuæ*  
*addidissimus,*

G. J. Vossius.

CCLXXII.

Hugoni Grotio.

Lutetiam Paris.

Illustrissime Domine,

Quod de negotio summi viri Galilæi Galilæii tardè adeo rescribam, diutina fecit ab urbe absentia syndici nostri Guil. Borelii; qui rem omnem apud Dominos Ordines fideliter procuraturum se recepit. Nec sanè ad eam rem, alter magis idoneus eligi poterat. Sed non puto eum affore ante Christi Natalem. Magnus est affectus Procerum urbis nostræ erga Galileium, eorum saltem, quibus scientia in pretio est. Ante omnes, prædicare debeo Nob. Realium; qui nihil æque exoptaret, quam ut Galilæius, prætextu offerendi Ordinibus nostris, suas de re maxima cogitationes, has ipse in terras veniret. Poterat, inquit, opera hinc dari, ut fignere hic domicilium vellet. Sed votum hoc viri, de suo etiam largiri ad detinendum parati, metuo ne provecta in istac Galilæi ætate, planè frustrà sit. Joannes Narsius, quia veretur, ne ulla sui deinceps à proceribus Suecis ratio habeatur; operam suam præfectis negotiationis Indiæ addixit. Ac intra triduum, si ventus faverit, navem ascendet. Octoginta mentruos, Florenos assignarunt. Obtimebit in itinere locum quem vulgus supremi Mercatoris vocant. Hinc inter præfectos iustitiæ facturus. Medicam simul artem exercebit; & majoris honoris spes facta. Nec tamen hujusmodi filium tuum Petrum, magnopere commovent ad simile iter suscipiendum. Domi, vel apud externos etiam Principes, dignitatem quampiam præferret. Sed quia non ignorat, quam miserum sit, ab incerta spe pendere: Ita decrevit studia sua componere, ut vel solis illis tueri decus suum possit. Juris prudentia imprimis placet, sed licet ut, ex consilio tuo, ea sociare velit, quæ ad mercaturæ intelligentiam pertinent. Literas ad Illustres juvenes Stypeskium, & Skyttrium sedulo procuravi. Leonis Allatii labores, etiam vetera illa *avindela*, quæ habet, excudere qui paratus sit, non unum hic habemus. In iis & Blauwius est. Sed dum totus est in Atlante suo adornando, non facile dixero, quam tardè promissa exsolvat. De Tacito quod cogitas gaudeo. Metuo alicui, ne alius quispiam in tuam involet purpuram, suisque interciat pannis, dissimulato nomine tuo. Scis jam dudum esse, quod quæ meditatus es, non sint in tua potestate. Mihi quidem quicquid eorum vidi, ac legi, impensè, ut omnia tua, placuit. Berneggerum, & doctrinæ, & virtutis nomine, merito

rito æstimo, & amo. Nec officio deero si quis locus patuerit in ulla Illustrium Scholarum, his & vicinis terris. Vale Illustrissime Domine, & cum Heroïna conjuge, & familia, à me & meis salve. Salutem etiam plurimam mei amantibus dicito: Imprimis Rever. & Amplif. Bignonio, & Cordetio, à quibus quod amer, tui, ut alia, beneficii est.

*Amstelodami* cl<sup>o</sup> Id<sup>o</sup> xxxv.  
Non. Decembris.

S. P.

Dum literas, quibus hæc inclusi, plusculum detineo, quia deesset commoda mittendi occasio, ecce nobis Hagha hoc rescriptum DD. Ordinum. Partem primam Annalium Hollandicorum, quos Matthæus misit, spero, jam acceperis: Nisi forte futurum, ut unâ cum hac Epistola recipias. Spero operam non fore ingratam. Quæso commune, sicubi erratum putabis. Editione altera corrigi poterit. Filius tuus indies se magis, & magis inlignem reddit, non studiorum modo profectu, sed modestia etiam, judicioque, quo pro ætate illa, plurimum valet. Itaque honori, etiam tibi, atque familiæ fore confido.

Idibus Decembris.  
cl<sup>o</sup> Id<sup>o</sup> xxxv.

*Illustrissimi nominis tui*  
*Cultor,*

G. J. Vossius.

Geminæ literæ D. Deodato inscriptæ, ab Collega meo Hortensio sunt: Rogat is te plurimum, per famulorum quempiam deferri jubeas. Vale.

CCLXXIII.

Joanni Christenio.

Præclare, & Consultiff. Christeni,

**P**lurimum semper à prima etiam adolescentia amavi Urbem vestram, vel eo nomine, quod pueritiæ suæ studia ei barbaro illo seculo debuerit magnus Desiderius, vir nec sua ætate quoquam minor, nec nostra fortasse nec intermedia, saltem si totum consideremus Erasimum; non studium hoc vel illud, quando non ita feliciter agitur cum ingenio cujusquam, ut ei se doctrina totam indulserit, sed felicitas est (ut minimum dicam) vel in decuplam ejus partem recipi. Multum vero gaudeo, quod procures vestri

cedere nolint proavorum gloriæ, sed nunc quoque omnibus nervis contendant, ut augeant decus literarum, quibus magnus ille studiorum in urbe vestra alumnus orbi illuxit, divinarum nempe, ac præterea, non dico profanarum, ut quidam *prophanis* loqui amant, sed humanarum, quia humanæ inserviunt vitæ; ut sileam de sacris literis ad quarum intelligentiam ex iis plus redundat commodi, quam capiunt illi, qui eas nonnisi tanquam canis è Nilo degustarint. Quæ co à me sine scribuntur, ut videas, quanti faciam propensissimam voluntatem tuam, claris doctoribus, etiam extra studia sacra, augendi gloriam, illustris jamdiu, sed quæ illustrior fieri possit, Academicæ Scholæ vestræ. Ac scio eandem esse mentem Collegarum præstantissimorum, præ cæteris optimi & viri & Theolog. D. Dytii. Cæterum de Gronovio sic habe: Non alium nunc occurrere mihi, cujus & doctrinam, & industriam magis commendare sum paratus, si certo Parisiis adhuc agere constaret. Metuo enim ne visenda Italiæ & tot veterum in ea monumentorum amore flagrans, jamdudum eò concesserit. Si recte atque ordine me facturum putes, per literas Lutetiam missas exquiram, utrum Parisiis etiamnum degat, vel ut discesserit, quando iste expectetur ab amicis, quos ille, ob singularem in literis doctrinam habet complures. Memini mihi valde à summis viris per literas commendari Matthiam Barneggerum, Professore Argentoracensem ingentis & doctrinæ & nominis. Nempe rebus Germaniæ usque adeo turbatis, tertium annum nihil perceperat stipendii, eoque maluisset veteres sedes mutare Academia vel Schola aliqua Illustr. Belgicæ Fœderatæ. Sed is superiore Februario satis concessit, multis relictis ingenii & eruditionis monumentis, in his ut Historica solum dicam, Justino à se recensito. Generum habet, vel habuit potius (quando ipse ad superos ut dixi concessit) Joannem Freinheimium, satis clarum notis suis in Florum, ac Tacitum, & amplis in Curtium commentariis inscriptis Nobilissimo Equiti Joachimo Wickefortio urbe hæc degenti, tibi que ut arbitrator cognito. Idemque parat Suetonium, Sallustium, Ammianum, Thucydidem, Pachymerium, Livium, & alios. Sed enim non fat scio, utrum is tam paratus sit Germania sua excedere, ac foveri fuit. Et arbitrator Augustanæ Confessioni addictum, ut istis locis solent. Quod ut existimo, sufflaminaret procerum vestrorum animum erga virum summum. Hannoviæ adhuc agit Joannes Philippus Paræus, magni Theologi Davidis Paræi Filius, viri multis scriptis celebris. Hic facile pertrahi possit in has terras,



ras, quia misero Germaniæ statu res ejus ad incitas sunt redactæ. Posset claritas ejus nominis ac paterni simul aliquod decus addere Gymnasio. Notus est mihi, tum aliter tum etiam per literas. Notior item Jacobo Laurentio urbis nostræ optimo & doctissimo Ecclesiasticæ: quem super eo compellasse, nisi valetudo obstitisset, quæ nec scivit, ut statim literis tuis responderem. Sane si afflictam Germaniam cogitemus, non dubitandum quin plurimos habeat viros insignes probitate ac doctrina, quorum opera Reip. literariæ bono in Gymnasiis suis hæc uti provinciæ possent. Nec dubito quin complures suggeri possint, ab iis, qui terras eas lustrant, & urbe in vestra ac vicinis vivunt. Quamquam nec Belgica hæc foederata pulchris caret ingeniis & huic aptis provinciæ. Solum deest, quod ciuda sic studia propellantur in ambonem, & forum. Quæ res nobis barbariem pristinam minantur. Verum nolo in tristi omine desinere. Malim optima sperare, vel eo nomine, quod videam amplissimos urbis vestræ procures tum literarum esse & literatorum studiosos.

Raptissime *Amstelodami* scribebam.  
cl. Id. xi. Kal. Jan. St. Vet.

Rev. Dom. Dyte, viro summo & aliis Collegis præstantissimis salutem, Iurimam, ubi otium erit, meo nomine, quæso dicito. Volo enim sciant utcumque tardus sim in scribendo, probe tamen eorum me esse memorem.  
*Eppw.*

G. J. Vossius.

#### CCLXXIV.

Gerardus Vossius V. Cl. Antonio Æmilio S. P. D.

**N**ihil lubentius facio, quam ut amicis prolium, præsertim, si eadem publico commodum. Tale hoc negotium est, de quo nunc agam tecum. Est inter uxoris meæ propinquos, optimus, & doctissimus juvenis, Gorstius, qui annos multos, non literis modo, & Philosophiæ, sed sacris etiam studiis, operam Lugduni dedit. Jam ante quinquennium, cum ibidem historias profiterer, aliquo inter studiosos loco fuisse memini. Atque interea longe maxima cepit incrementa, ut ex pluribus intelligo. Sed nescio quo intortu fiat, ut ejus non habeatur illa ratio ab Ecclesiasticis, quæ debebat. Id ipsum, id nos,

& alios amicos male habet; est enim benè natus. Matrem an aliquando apud nos videris, nescio; fuit ea Davidis Ruteri, Amplissimi nunc senatus Brabantici, Hagæ senatoris soror germana. Avunculi fuere Werenstienius, & Martinus, ibidem senatores. Avia erat Montenea. Nocti familiam perveterem. Quid consanguineos omnes recenscam, plebsque Nobiles, vel saltem Patricios: suspicantur aliqui, obitare juveni, quod moderatius paulo se gerat, quam Zelotis placeat; scio ego tibi Zelotarum mores non probari; hominum natorum, ad perdendas, non Ecclesias modo, sed totas etiam Respublicas. Quod igitur minus gratum reddit talibus, id eum commendabit, non tibi modo, sed Ticmanno, quem ego virum amavi semper, non modo doctrinæ nomine, sed etiam moderationis; quæ si unquam, his temporibus requiritur; sed aliud etiam obesse ei suspicantur, puta quod suis studuerit impensis. Aiunt tantam esse eorum copiam, qui studiis suis absolutis, ut aliorum, quibus paulo auctior fors, haberi ratio non possit, aliquid dicerent, si tales annum unum, aut alterum expectare cogerentur. Nunc semper negliguntur. Hoc pede si pergatur, quotusquisque tandem, qui aliqua in re sit, liberos suos studiis sacris destinavit? sed quid his intulit? Ad rem ipsam potius venio. Intelligo Ecclesiam Lissæ (is pagus est int. r. Harlemum & Leidam) carere verbi Ministro. Gorstius autem, quem dixi, non veretur operam suam offerre, ad sacrum hoc munus; scio aliquos quoque esse, qui Ecclesiæ illi præfici exoptent; sed ubi singuli sint auditi, cogitari poterit, quis dignissimus sit. Et non solum hic Synedrii, vel Claustralis voluntas spectanda, sed etiam ejus qui jus Patronatus habet auctoritas. Eum esse scio Nobilissimum virum, Duickemburgium urbis vestræ Prætorem, quicum, ut arbitror, aliqua tibi notitia intercedit. Huic Gorstium commendari exoptem. Et si operæ putas, assumes quoque Ticmannum nostrum. Neutrum commendationis poenitebit. Perspecta enim mihi juvenis, & modestia, & doctrina. Dubitabam an ipse, ad Dom. à Duickemburg, scribere vellem. Animum audendi præbebant summæ viri virtutes, quas ab omnibus commendari video; sed tandem putavi melius, id vos coram facturum, apud Nobilissimum hunc virum. Pluribus non morabor te tam occupatum, ipse adeo usque occupatus, ut vix hæc subito poterim conjicere in chartam.

*Amstelodami,*  
cl. Id. xxxvi.  
Jan.

CCLXXV.

## CCLXXV.

Stephano Goffio, *Ecclesiastæ Castrensi*  
Colonelli *Verii*, S. P.

**C**Redo jamdudum tibi, optime & doctissime Goffi, mirum videtur quod tardè adeo ac tertiis demum literis provocatus respondeam. Tantæne inquires occupationes tuæ? sanè majores illæ, quam facile me cuiquam persuadere posse existimem. Sed tamen alia concurrerunt. Tardè enim cognovi, super quibus certior fieri desiderabas; nec erat cui tuto literas committerem. Nam filius, ad quem illas Hagam mitti petieras, is Amstelodami erat. Dampotus sæpius hic concionatus est, & gratus est non paucis, maximèque iis qui maxime faciem Ecclesiæ Britannicæ damnant. Sed necdum de eo advocando actum cum Ministris Ecclesiæ Belgicæ, multoque minus cum proceribus urbis. Videntur pattores non alieni ab eo; dummodo subicere se velit classicis decretis. Id utrum facturus sit, dicere non habeo. Sed quorundam opinio est facturum, ne Hokeri instar, spe excidat. Apud proceres nihil æque ei commodare possit, quam quod multi illis persuasum eunt, hoc agere Episcopos Angliæ, ut imperium in Ecclesias Belgicas exerçant; vanissimum hoc commentum animis eorum evellendum, inque eo adlaboro, ut debeo. Utcunque autem fautoribus non destituatur Dampotus, nihil tamen efficiet, nisi ostenderit hic literas, quibus ab sua Ecclesiâ sit honestè dimissus: tum item nisi comprobarit liquidò, sibi in Anglia solum quæstionem fuisse, de ceremoniis vel hierarchiâ; non item aliquid intercessisse, quod regem, aut regnum, spectaret. Hæc nunc sola perscribere potui. Plura ubi cognoro, faciam te quamprimum certiozem. Jucundissimum mihi fuit ex te cognoscere, de literis Clementis in Britannia editis. Nondum eas conspexi. Alioqui judicium meum perscriberem de locis inde à te excerptis. Nec propterea eas transmitti opus. Nam tuto satis id facere vix possis durante hoc gelu. Sed si quando huc excurrer, vel fidum hominem habebis, cui committas, non ingratum erit conspiciere. Nihil vero in istoc festinato opus. Vale, vir præstantissime & amicissime. Post. Kal. Jan. Anni cdo lcc xxxvi. quem tibi ac familiæ meæ, Britannicæ Magnæ, ac foederatæ huic Belgicæ salutarem exopto.

*Tibi addictissimus,*

G. J. Vossius.

## CCLXXVI.

Danieli Paræo S. P.

**V**Ellem, vir clarissime, Reverendus & ornatissimus vir, Jacobus Hintzerus, prius quam alias adiret Bataviæ urbes, pedem posuisset in Amstelodamensi, nosque compellasset: vel enim valde fallor, vel juvare cum consilio, in accedendis quibusdam Ecclesiis, vel etiam magistratibus, potuissim: nunc quia postremo in urbem hanc venit, vix quicquam potui præterquam apud Ultrajectinos. Et tamen id minutum fuit; interea præstiti quicquid potui. Nec quicquam lubentius feci. Usque adeo gratus mihi acceptusque erat, partim ob virtutem & doctrinam, partim quia à tuo filio commendaretur, jucundumque esset ex eo cognoscere, quæ ad te & Paræanam domum pertinerent. Amstelodami jam vivo comodeque habeor à proceribus civitatis. Itaque Deo gratias ago, qui eam mihi mentem inspiravit, ut non abnuerem conditionem, cum huc vocarer; scio Gymnasium hoc novum fore: sed ante annos etiam quinquaginta novum fuit Lugdunense, cujus nunc tantum decus per orbem universum. Fortasse & non exigua quandoque erit gloria Gymnasii Amstelodamensis. Ita fore confido atque auguror. Mihi vero pulchrum tunc erit, jecisse ejus Gymnasii fundamenta. At interea, dices, deteret ea res aliquid de nomine qui inclytam Academiam Gymnasio demum constituendo commutatus. Quid dicam; vir amicissime? non ignoro, quantillus sim. Sed tamen cum plurimum tota hac de re judicium hujusmodi est: nunquam me à nomine & gloria ejus Academicæ pendisse. Si doli-um Diogenis incolæ suo celebratum, posse & me oppidulo aliquid decoris dare. Atque extra illud de Academia, quanto urbs hæc alteri præstat! Quid ea opulentius! quid potentius! Quæ una ad bellum cum hoste potentissimo plus confert, quam---; sed reprimam me, ne tot magnis Bataviæ civitatibus, tot Belgicæ foederatæ provinciis, quicquam detrachere velle videar. De procerum vero & prudentia singulari & summa eruditione, penitus tacere non possum; siquidem illa res inter cætera me compulit, ut sedes hic ponerem. Sare complures novi, hic non minoris doctrinæ quam qui Collegæ mihi in Lugdunensi Academia fuerunt. Certò eam talium copiam, frustra in aliis & urbibus & provinciis quæras. Nec ignoro, vapulare eos à nonnullis, quasi non satis sint *opulentissimi* amantes. Sed hoc non aliunde est, quàm quia permittant conciones eorum, qui in Prædestinationis dogmate dissentiant à doctrina publice recepta.

Tum

Tum autem quia aliquos urbe jusserint exire, qui seditiose multa agebant; non accusabo quemquam, tamen sanguinaria quorundam consilia non ignoro. Horret animus meminisse sermonum, quos ipse, ex ore quorundam audiui; non loquor de iis, qui ab urbe jussi abesse, anno uno altero. Alios tango, quos dicere nolo. Ita enim semper animatus fui, ut de talibus non facile loquerer, nedum scriberem; sed apud te, familiarius paulo mihi agendum putavi. Sic tamen ut nulli periculum creem: postquam ab iis urbi esse periculum amplius non potest. De patria quia perscribi petis, paucis expediam. Parens mihi fuit Joannes Alopecius, sive Vossius, Ruremundanus. Is temporibus Friderici Pii in Heidelbergensi Academia, Zanchium, Urinum, & alios audivit; atque anno 1573. in agro Heidelbergensi ecclesiastes factus. Post excessum ejus electoris anno 1627. quaternis auctus liberis, sed ex quibus solus superesset, in Bataviam venit cum ecclesiasticis cæteris qui Lutheri de cena domini sententiæ subscribere nolissent. Itaque jam anni sunt quasi LIV. quod Palatinatum non viderim. Multis familiariter usus sum, quibuscum amicitia in Palatinatu parenti intercesserat; sed post tantum annorum intervallum prope omnes defuncti: Joannes Mylius Neostadensis Ecclesiastes, puer cum ibi sæpe in paternis ædibus vidit: ut mihi his etiam diebus retulit: Nam in extrema Batavia prope Gorcomium ac Sylvam-Ducis pastorem agit. Apud hujus matrem vel novercam potius Barbaram Myliam ab octavo ætatis anno vixi, usque ad XVIII. quæ multa mihi referre solet de laudibus parentis quem octennis amisi. Norat ea parentem optime, quia arcta fuerat amicitia parenti meo cum marito ejus Jacobo Mylio, viro perdocto, & fido Dei fervo in eodem Dioecesi. Horum memini quia soror Joannis Mylii, Jacobi filia nupta fuit Balthafari Lydio, quicum tibi, ni fallor, amicitia, aut saltem commercium literarum fuit. Et anno uno me natu grandior erat, superiori verò anno decessit paucis post maritum hebdomadis. Omnino pauci eorum supersumus, qui in Palatinatu temporibus Friderici pii, aut initii Ludovici nati sumus. Me vero semper illud habuit pessime, quod ab anno ætatis XXIII. priusquam dulcem patriam revisissem, scholastica fuerim functione distentus, primum in Academia paucis mensibus, mox in Gymnasio Dordrechtano annis XV. & ultra, inde Lugduni iterum, partim in Collegio Theologico, cui quadriennio præfui, partim in Academia ipsa, in qua docui circiter novennium; sed ad alia jam delabor, de quibus non rogaras, nempe mihi jucundum tecum est

per literas confabulari. Itaque calente calamo scribo, quicquid in mentem venit; neque enim gloriolæ aliquid ex epistolis quaero, qui eas sæpe ne relegere quidem soleo; nedum id otium sit cum cura aliqua eas exarandi. Abunde est, si raptim adeo scribentis manum assequi possis. Pro Christianæ institutionis elementis gratias ago, mihi opera valde probatur; nunc quod mitterem *avidebo* erat nullum, sed fore propediem spero; nec enim inutiliter tempus abire patiar, quo necdum publice docemus: verum omne illud impendam digerendis schedis meis. Puto, mox à nundinis Francofurtensibus cedendos commentarios meos de L. L. grande opus & in quo non parum operæ posuerim, & tamen nec parum restat, quod nonnihil terret, cum cæteras cogito occupationes meas: sanus subinde infelici mihi videor natus fidere, quod nunquam liceat esse otioso, ac dulcibus Musarum studiis frui ex sententia. Aiunt hoc solatio esse posse, quod ipsa illa sidera ut luceant hominibus perpetuo moveantur. Mentibus nostris, quas cœlitus habemus, aliquid esse cum cœlestibus illis corporibus commune: verum ut mihi quidem videtur, non tam sideribus, quam candelis nos comparari oportet: sidera lucent ac eadem permanent: nos lucemus aliis atque interim consumimur. Sed uterque clarissime & amicissime Paræ, hoc cogitamus ut consumantur corpuscula, manere animum, manere honorem in terris, longeque augustius præmium in cœlis. Quare me quidem laboris adhuc non pœnitet: scio nec te, qui bene de studiis ac pietate mereri non defines. Vale.

*Amstelodami.*

*Tuus totus,*

G. J. Vossius.

## CCLXXVII.

Abrahamo Vander-Mylio S. P.

**S**Cis, conjunctissime Vander-Myli, ab annis tot, ut aliquanto amplius sit, quam tertiæ ætatis meæ pars, te amari à me plurimum, & æstimari. Nec eo minus formido, ne propterea quod tot literis tuis, tam humanis, tam eruditis, non responderim. Nisi jam à doctissimo Genero tuo Colvio, & aliis (ut reliquos mittam) in urbe vestra degentibus, cognoris, quam pene mihi ex consuetudine in naturam verterit, etiam amicissimis, etiam doctrina, vel dignitate clarissimis, raro respondere, nempe vix aliter, nisi gravis, ac penè fontica causa urgeat. Nec uspiam magis hoc vitium meum dominatur, quam iis ubi mea res agitur, vel liberorum.

In quo



In quo immane quanto differo à Mercuriali urbis hujus Populo. Nulli autem tam grave, quam optimæ uxori meæ: quæ si verum dicit, prorsus valetudinem perditum eo. Quid agam? Vix ab auditorio publico revenio, cum ex urbe nostra, ex aliis Bataviæ urbibus, ex fœderatis terris, ex Britannia, Gallia, Germania, tractibus aliis compellor, idque ad nonam Vespertinam. Quare vix temporis aliquid superest vel studiis propriis, vel literis ad amicos, nili illud inter & secundam nocturnam. Tum duntaxat interpellatorem habeo neminem, interpellatricem subinde unicam, conjugem dico, sæpius tamen interpellaturam, nisi ut ipsa ait, surdo caneret. Metuo interea ne immutandum mihi sit istiusmodi vivendi genus, modo vitalem mihi diu hanc vitam velim. Cogito serid, & cogitabo perro, partim ut amantibus mei (quos inter illustrem scis te locum obtinere) satisfaciam magis, partim etiam, ut paulum temporis obtingat limandis illis, quæ annis pene XL. non inutiliter mihi videor observasse. Tu vero mi cognate, beatus mihi videris, non quidem undique (quis enim omni ex parte felix?) attamen multis nominibus, inter cætera eo, quod plus otii suppetat præclarè, & cogitandis, & signandis rebus, animum omni alimonia dulcius pasturis. Atque hoc imprimis dictum velim, propter auro contra non caros labores tuos, de Ecclesiæ concordia, quæ satis diu in propria sæviit viscera: ut tandem tempus sit desinere, si publici cura tangat ulla. Quod vero nec in hac sæculi iniquitate, tam pulchram deposueris cogitationem, mihi quidem gaudeo, tibi vero, & magis Ecclesiæ gaudeo; quam vel hoc argumento, colligo amari à Deo, etsi istis odiis, ac rixis multum degenerarit. Deus tibi hanc bonam mentem esse perpetuam velit: Et simul pro pietate hac tua, non potest hanc vitam modo, sed etiam dum his terris, teque tuosque remuneretur. Quod tempus utinam liceat videre? ut tandem pacis amantes suos etiam maneat honos. Satis autem mirari non possum, ea ætate, ac in tam gravi negotio Ecclesiæ districtissimo, etiam otium esse cogitandi ea, quæ ad Arcana pertineant Naturæ. Atque ego quidem nihil magnopere adversus ea habeo, præterquam quæ coram afferre memini: sed denuò doctissimum Collegam Hortensium collegi: Atque ut paucis, quid sibi videretur, perscriberet rogavi. Paruit quidem, sed quàm tardè hinc æstimes licet, quod nondum quartus est dies, ex quo responsum accepi. Atque hanc quoque causam esse scito, cur tardius accepérís meas. Nolebam enim scribere, quin per me, vel alium, ex parte saltem, æquissimo tuo postu-

lato satisfacerem. Accessit valetudo incommodior ex catharro: quæ nec publicam ascendere Cathedram hodie sivit. Eoque justius veniam dabis, filum hoc scriptionis abruptum: Etsi alia erant, de quibus, quia aliter non licet, saltem per literas colloqui liceret. Vale, clarissime Cognate, & cum Uxore lectissima, à me, mea, & liberis salve.

Amstelodami,  
clō 16c xxxv.  
pr. Kal. Febr.

Tuus totius,

G. J. Vossius.

## CCLXXVIII.

Hugoni Grotio S. P.

Quod tam honorificis literis, filium Matthæum compellare, hoc est, (quod tibi propositum fuisse non dubito) ad reliqua studiorum accendere volueris; ut aliis nominibus, ita illo etiam, uterque plurimum debere nos fatemur. De ἀνθολογία, tardius respondeo. In causa est quod filius Petrus Grotius jamdiu, ut mihi ante menses duos retulit, hoc munere sit perfunctus; sed addebat, suis se ad te literis addidisse, videri sibi conducibilem, ut in Galliis hoc opus edatur; quia in talibus, Triconem, & Bovinatorem, ut cum Lucilio sic dicam, Blauwio hoc majorem ex Typographis noverit neminem. Qui sic ante conjugium erat, nunc Νεβραμὼν se, (ex quo solus omne onus cum fratrum uno sustinet) justius censet lentè, ut ipse appellat, festinare. Et verè festinat, ubi semel sit exorsus; sed ad ordiendum, nihil lentius videre mæmini. Itaque omnes serè eludit, non animo quidem malo, sed quia nihil recuset unde spes lucris affulgeat, & aliqua etiam honoris: postea verò ubi singuli admonent promissi, imparem se tam multis intelligit. Atque ille quidem, cum primum de ἀνθολογία convenirem, confestim annuit, & transmitti eam postulabat: sed ego hic objectare, quod jam biennium haberet filii Maimonidem, nec satisfaceret. Quod non minoris temporis spatii detineret opus Affinis mei Francisci Junii, de Pictura Veterum. Quod aliquanto diutius, tam multa Meursii hæctenus inedita, quæ poscenti benignè transmisisset, magno cum viri dolore conservaret: Id eo virum hunc magis urere, quod Nobilissimis Daniæ, & aliorum locorum viris hisce dicasset. Nec eos hoc fugeret, qui assidue pollicita exigant: tarditate hac leviozem apud eos fore gratiam Blauwius humeros attollere; addere deinceps, se alium fore, hæctenus fratrem à Galliis

Galliis expectasse. Et jam quidem tres Julianos de pictura libros orsus. Maimonidem filii <sup>7</sup> *marcello*, post octiduum certo auspabitur. Opera Meursii intra sex hebdomades ut sperat. Nostros de poetica libros vertente hoc anno. Sed grande Originum opus, non nisi post annum exactum posse. De tuis vero valde se invito fore, ad alterum si eatur. Ne tamen statim responderem, poscebat. Velle aiebat, cum fratre dispicere de certo editionis tempore. Eam esse magnitudinem, ac dignitatem tuam, ut etiam apud cessatorem hunc, eximius esse debeas. Multa igitur aliorum dilaturum, partim in tuæ spem gratiæ, partim ne sibi minus, quam publico incommodet: sed nimis hæc verbosè apud tam occupatum. Ad Tacitum venio, quem & ipsum cum tuis castigationibus, ac notis edere paratissimum se ait: sed pro multitudine harum, vel paucitate statuere debere de forma operis; utrum ea angusta esse debeat, an ejusmodi, quæ circumferri possit, vel media aliqua. Adfuit mihi his diebus, frater germanus, Optimi, & Clarissimi Skickardi: literas ejus prælegit, de misero, & suo, & Germaniæ statu. Utinam Ultrajectini de eo cogitent? Horum Illustris Schola in Academiam convertetur: cujus inauguratio erit triduo à Paschate. Non desinam commendare. Sed raro eorum ratio habetur, qui tam longè absunt, nec nisi aliena commendatione innotescunt. De Berneggero idem & feci, & faciam porro. In Centuriones Nauticos, qui tribus circiter mensibus, Hagæ in carcere fuerint detenti; quia tam bellam occasionem perdendi Classem Dynkerkanam neglexissent, hesternum die, qui decimus quintus erat Martii, à delegatis iudicibus lata est sententia. Wander-Apt qui Thalassiarum erat, ut fertur, carceri annorum viginti quinque est addictus. Habet tamen non paucos, qui famam ejus tueantur. Codde totidem annos exulaturus. Crachtius, & Sterkius, sexennio erunt ex torres. Quod ex publico iis debebatur fisco adjudicatum. Quaskius, & alii absoluti. Filius Petrus Grotius, vita, & industria se nobis, & aliis probat. Quas literas his meis adjunxi hesterno vespero accepi. Quo in genere non soleo procrastinare, quod esse possint de re maximi momenti. Salutem plurimam lectissimæ uxori, & liberis, à me, & meis. *T. J. V.*

*Amstelodami,  
cl. l. c. xxxvi.  
xvii. Mart.*

*Cultor nominis tui,*

G. J. Vossius.

## CCLXXIX.

Merico Casaubono.

Reverende Clarissimeque Casaubone,

**L**iteræ tuæ mihi redditæ ineunte Februario, pauloque post à Peisteri procuratore pecunias recepi, quæ ex beneficio Regionis Septembri superioris anni mihi cessarent. Has multo tu ante annumeraras, ut ex literis tuis video. Sed nisi spisse admodum ab hominibus illis peccetur, non solco cum iis verba commutare. Nunc amice rogandus es, ut quantum in te est, pro veteri affectu erga me, procures, ut prima occasione percipiam pecunias semestris ejus, quod exspiravit mense Martio anni hujus post millesimum sexcentissimum trigessimum sexti; id mihi erit gratissimum. Quod acceptus tibi fuerit labor meus Grammaticus, gaudeo equidem. Uti & quod probes Annales Batavos Filii mei Matthæi. Et sane itidem cordatis & eruditis omnibus impense hic placent. De studiis nostris scribam literis proximis: nam nunc nihil eorum sub prælo; sed excuduntur hic de veterum pictura libri tres affinis mei Francisci Junii, ejus qui in ædibus agit Illustrissimi Comitis Arundellii. Rerum novarum jam hic aut nihil, aut parvi ea momenti, eo excepto quod Scenckianum propugnaculum, inter Rheni & Vahalii fluenta situm, priori ætate insidiis ab hostibus interceptum, undique à nostro sit cinctum milite. Quippe Illustrissimus Princeps Auriacus, ut fama perceperat, nova hostem opera Cliviano in agro qui ultra Vahalim ex adverso jacet, moliri, illico Wilhelmo Nassovio, exercitus, ut vulgo vocant, Marechalco, in mandatis dedit, ut quotquot militum occulto contrahere posset, quamprimum ad ea hostium conamina impedienda illuc perduceret. Quod gnauiter adeo ab eo factum, ut inopinantibus superveniret, & prius plures eorum fugam quam arma cogitarent. Qui locorum munitis, quæ Infans, ut appellant, Hispaniæ, ad retinendum Scenckianum propugnaculum fieri curarat, fidebant, post aliquot oppugnationes cessare, non exigua ante clade accepta. Solum Ferdinandi propugnaculum, in honorem Cardinalis Ferdinandi sic vocitatum, cæteris opera & natura loci validius hostes retinere, quia ad Tormientorum jactus, qui crebrò ab obsessis fierent, nostri paterent. Hoc tamen simul inclusum nunc cum ipso propugnaculo nostrorum operibus, ita ut brevi urgente rerum penuria potituri illo loco videamur, quo Hollandi, Geldri, ac Ultrajectini

trajectini carere nequeunt. Quippe com-  
mode adeo inde incurfus in hæc ditiones  
patet, ut nili mature satis, cum interciperetur,  
alia fuissent opposita propugnacula,  
magnam fuerint universi cladem accepturi.  
Subvenire nunc suis cogitant hostes. Sed  
tota adeo militum furore vastata est Clivia,  
ut pabulum equi, victum homines desiderant,  
quos jam in Gueldra Civitate equinis  
non abstinere carnibus nunciatur. Hocque  
adeo ex eo evenit, quod Illustrissimi Ordines  
qualecunque annonæ genus ex hostico in ho-  
sticum prohiberi vetuerint. Imo & interd-  
ctum ipsis agricolis, ne cibaria nisi unum in  
diem coemant, nec amplius quam sustentan-  
dæ propriæ familiæ sit opus. Reperiuntur  
tamen hic, qui auri fame insatiabiles, adver-  
sum ea nitantur, & occulto quicquid possunt  
avehant. Sed illorum jam sex septemve sus-  
pensis, cæteris haud dubie illorum casus me-  
tum incutit. Ita nunc hic ad cuncta adversa  
fortunæ edocti, animadvertere incipiunt. E-  
tiam rei maritimæ cura ex parte resumpta,  
& navium præfectorum aliqui, qui oblata oc-  
casionē priori ætate Dunkerkanos non inva-  
serant, aut carceri ad viginti quinque annos  
addicti, aut exilio ad certum tempus pro de-  
lictis gravitate multati. Omne verò æs quod  
ipsis debebatur ærario inlatum. Quamvis  
autem ita hic cuncta armorum strepitu reso-  
nant, non tamen apud multos promovendo-  
rum literarum amor cessat. Dordrechtani  
exemplo Amstelodamensium, Illustris Gym-  
nasium instituere, non quidem cum magni-  
ficis stipendiis, sed prout potuit urbs hono-  
rator quam ditior. Idem & factum ab Ul-  
trajectinis, sed illi consensu ejus loci Ord-  
inum sexto & vicesimo Martii die ad Acade-  
miæ dignitatem locum suum evexere: facta  
Professoribus Doctorum creandorum pote-  
state. Attamen in eo maximum à cæteris  
Academiis differt, quod non suo Rectori,  
sed ipsis urbis consulibus studiosi obedire co-  
gantur; imo & illis immunitates negentur,  
quas plerumque aliis in locis habent. De his  
satis. Salutem plurimam optimæ uxori à me  
& meis omnibus. Item à me Reverendo  
D. Decano & optimorum doctissimorumque  
Fratrum cæteris.

Amstelodami,  
An. cl. lxxvi.  
Kal. Apr. St. No.

Tuus tui merito,

G. J. Vossius.

CCLXXX.

Diderico Vlamingio, Dom. ab Osthorn,  
S. P. Hagam Com.

Molestè me habuit, Nob. Amplissimeq;  
vir, quod filiorum, natu majoris,  
profectus in studiis malignè adeo responde-  
rit votis nostris. Sine circuitione, & am-  
bagibus, apud virum tam cordatum loquar.  
Non minus ille, anno primo, promovisse  
debuerat, quam quarto, nunc exacto, con-  
tigisse video, doleoque. Sed factum nequit  
reddi infectum. Avolavit irreparabile tem-  
pus, optima optimæ ad studia isthæc ætatis  
pars. De cætero igitur, quod instat, aga-  
mus, ne itidem dispereat, quod puero tem-  
poris divinâ superest bonitate. A voto or-  
diar. Utinam suppeteret bonus docendi pue-  
ritiam artifex, qui sex septem pares ætate,  
ac profectu, honestè etiam eductos, imbue-  
ret Latinæ Linguae atque liberalium artium  
primordiis. Huic, citra dubium, etiam ag-  
gregandi erant bini liberi tui. Nam in illa  
quadragenorum, aut plurium. una in Classe  
turba, & eorum quidem tam ingenio, pro-  
fectu, moribus, etiam differentium, vix credi  
potest, quam minutum sit illud, quod pro-  
pter sic divisam Magistrum curam, ad puerorum  
singulos redit quotidie. Nec propterea con-  
tendero, unum uni committi oportere, quod  
nonnulli tentant, sed sæpe infelicititer. Nam  
præterquam, quod res ea magnorum est  
sumptuum, abest æmulatio, quæ studia om-  
nis ætatis, multum alit, & fovet. Et Linguae  
præterea melius addiscuntur allocutione mul-  
torum. Mediam igitur viam insisti velim.  
Sed si paucorum adeo bonum sub bono Do-  
ctore consortium nequeat obtineri, (quippe  
in quo negotio plurium parentum constan-  
tis sententiæ conspiratio requiratur) eun-  
dum nobis erit, quo ivere Parens, Avus, Pro-  
avus, & ita porro Majores nostri; hoc est ad  
Scholas Classicas quales habemus, si non  
quales optamus. Quamquam urbem ve-  
stram, non est quod suarum poeniteat, si  
cum scholarum aliis conferantur. Sanè lo-  
cum etiam hic habet illud Augusti, Con-  
tenti simus hoc Catone: vel si sic malis,  
duobus his Catonibus. Quare si in alter-  
utram mitti tuos placet, equidem, quod  
me quidem iudice, non leve adeo putan-  
dum, Vossius hic, liberique ejus, in partem  
aliquam curæ istius venire sunt paratissimi,  
in vestra, spem gratiæ, quos adeo erga me  
benevolos, hætenus pensavi. Sed ut video,  
metus est multorum, ne si liberi sui propè  
O o 2  
adeo



adeo absint à Parentibus suis, partim cor-  
rumpantur indulgentia Matrum, partim e-  
tiam consortio consanguineo, aliorumque æ-  
qualium familiari usu: qui multos avocat,  
in urbe hac usque adeo (quæ foeliciū civita-  
tum infœlicitas esse solet) luxui dedita. De  
Heroïna conjuge tua, aliud me sperare sua-  
dent prudentes ejus sermones. De iis qui  
puero noti, ac usu conjuncti, nihil, quia mihi  
ignoti, dicere habeo. Sed si aliò mittere per-  
stat animus, non displicent Harlemum, ac  
Hardervicum. Illud quia propinquum, &  
eadem habet artis Grammaticæ præcepta,  
& ludi moderator, ab eruditione, & industria  
commendatur: Hoc vero, quia Gymnasium  
ejus urbis, jam à multis annis, optimè audit,  
ac hesternæ etiam die intellexi, ex Isacio Pon-  
tano, viro utriusque nostri amantissimo, qui  
per hanc urbem Ultrajectum, ad generum  
tendebat, non incumbere istis præceptores  
partæ olim gloriæ, sed id potius agere, ut  
augeant hujus nominis decus. Unum mo-  
rari hoc consilium possit, quod mutare ex  
parte Grammaticen cogeretur; sed-enim non  
usque adeo variant, Batavica, & Hardervice-  
na præcepta. Utraque enim Grammatica  
ex Lithocomo profluxit, etsi emendatores  
non eandem ubique insistant viam. Præte-  
rea parum adeo est, quod in Grammaticis  
didicit filius, ut non multum necesse habeat  
dediscere. Sanè examini intererant Cognati  
tui, Arlandervenix Dominus, & Bronchor-  
stius. Non præteritorum, & supinorum,  
doctrinam norat: quin nec satis callebat  
primam Grammatices pagellam. Utrum au-  
tem magis expediat, eum vivere, cum Diethio  
Theologo, an Acronio Ludimagistro, difficile  
dixerim. Utrumque commendabat noster  
Pontanus; de Diethio addebat, solere eum  
habere, in convictu, qui illustrem scholam  
frequentarent. In his negotium ei non opti-  
mè successisse. Præferre igitur ætate ac pro-  
fectu minores, qui facilius illi morem gerant.  
Fufius ista scripsi, ut eo facilius certi aliquid  
statuere possis. Nec enim leve est negotium  
carissimorum pignorum, ubi de paranda agi-  
tur virtute, & doctrina. Moram diuturnam  
in deliberando non sinit ætas puero proce-  
dens. Non minutum est, sic, culpa Magistri,  
nequequam periisse tibi aurum, & impensas;  
sed longè majus periisse sic puero, auro magis  
aureum tempus. Tanto magis curandum, ut  
damni, quod factum, industria refarciatur;  
scribebam ista occupatissimus, ad occupatissi-  
mum: sed loquaciorem fecit amor tui, tuo-  
rumque.

Amstelodami,  
c10 Idc xxxvi.  
12 Aprilis.

Addiſſimus tibi  
tuo merito,  
G. J. Vossius.

CCLXXXI.

Constantino Huygenio.

CUM nulli eorum, Nobilissime Huygeni,  
tuas qui virtutes singulares suo sciant  
pretio æstimare, cedere hac parte sim para-  
tus: plurimum tamen (cur diffitear?) ve-  
reor, ne interdum sic de me cogites: O homi-  
nem rusticum, qui nec geminis literis meis  
tam amicis, ab tam longo tempore scriptis,  
responderit hæctenus? Hic si inter homines ele-  
gantiores vivere sciret, non ne minutum quid  
ab studiis, vel occupationibus, subsecaret, quo  
non avaris ejus temporis, leviter saltem satis-  
faceret? Equidem si alius sic mecum ageret,  
vir præstantissime, facilè in has cogitationes  
venirem. Eo justius suspiciones tuas formido:  
quas minimè extimescerem, si satis me tibi  
notum arbitrarer. Noffes enim viæ hoc meæ  
genus, quod me invitum licet, in hos quasi  
scopulos crebro illidit, adeo ut mihi prope  
solemne sit peccare adversus omnes, in  
epistolari hoc officio. Tam multi mihi hæ-  
ctenus veniam dedere, ut facilem etiam mi-  
hi, apud hominem tam intelligentem, veni-  
am fore sperem. Neque alia nunc excusatio-  
ne utar. Quod labores nostros sic prædicas,  
rem magis te dignam, quam meritis nostris  
facis. Habent commentationes meæ, quod se  
jactent laudibus tuis. Non quidem eas scri-  
pserim rudis ab eruditione; sed vix sperare  
ausus eram, ejus doctrinæ, ac loci homi-  
nem, se dimissurum in hæc Grammatices  
sententia. Et propterea diligentior fueram,  
in annotandis rerum fastigiis, quo doctiores  
ista saltem lustrarint, oculo fugitivo. Cogita-  
bam mecum illud Bilbilici vatis;

*Lemmata qui queris, cur sint adscripta, docebo.  
Ut si malueris, Lemmata sola legas.*

Sed ut video, opinione melius mihi apud te  
labor hic processit. Atque idem de quibus-  
dam aliis summis viris dissimulare non pos-  
sum. Utinam de omnibus etiam amantibus  
nostri, dicere idem liceat. Nempe argumen-  
tum his displicet. Nec dissentur, magnum  
illum Hipponensem Præfulem olim Gram-  
maticen scripsisse: sciunt & togatorum doctis-  
simum, & ipsum Julium Cæsarem, virum  
bellica laude tam illustrem, de Analogia li-  
bros reliquisse; & quidquid de Augusto, Clau-  
dio, cæterisque assero, sibi quoque probè  
perspectum aiunt. At negant me ingraves-  
cente hac ætate, eaque de me hominum ex-  
pectatione, ad minutias hæc, etsi non incur-  
riose tractatas, descendere debuisse. Rem  
magis me dignam, fore magis etiam utilem  
Ecclesiæ

Ecclesiæ, si animo nulli affectui mancipato, eruere adlaborem antiquitates Ecclesiasticas, multis adhuc tenebris involutas. Et sanè hoc studium fuit à prima adolescentia. Nec quidquam præter temporum iniquitatem paulum inde abstraxit. Multa quoque in hoc genere, vel confecta jam habeo, vel affecta. Eo majori voluptate redeo nunc ad studia meliora, quæ magis placitura confido, & tibi, & aliis itidem bonis. Gravioribus istis lassius fortasse iterum revertar ad eruditionis fementim, ad nuces. Non tamen ex cicure reddar avis fera, ut domum redire obliviscar. Nisi fortasse, ante me longus corripit somnus. Quippe jam annum pulso sexagesimum, ut vitæ non ita multum superesse videatur; sed hæc curæ erunt Imperatori summo, qui ubi è statione hac nostra avocabit, læti ad meliores sedes avolabimus. Pertæsi etiam ineptiarum, quibus sese, & alios diseruciant, erudituli nostri nihilo sæpè amantiore bonæ mentis, quam infrunitum vulgus, cui facilius ignoscas. Pereant studia universa, si nos duntaxat gloriæ præstant animalia, nec ad solidam pietatem, ac prudentiam ducunt. Scio te juxta mecum sapere, Vir Nobilissime, eoque lubentius hanc querimoniam apud te deposui, non quasi mihi hic quidquam feratur, aut metatur, sed quia me miserescat Ordinis nostri. Sed de isto satis, ne in Epistola hac videar velle rhetoricari. Vale, Nobilissime Huygeni, una cum Heroïna Coniuge, ac familia universa.

Amstelodami,  
cl. lxxvi.  
Id. April.

Additissimus nomi-  
ni tuo,

G. J. Vossius.

## CCLXXXII.

Ger. Jo. Vossius Joanni Beverovicio,  
V. Cl. S. P. D.

**I**Nvitus à Colvio (meo an tuo dicam?) divellor, si in candore hoc meo, locum inveniret livor, non possem tamen Dordrechtanis boni quicquam invidere. Attamen si possem, puto, & injurato credes, è sacro Ordine neminem me præoptaturum, Amstelæ urbi præ Colvio hoc: Jure dixerim, Quicum vivere amem; prope etiam porro *παρὰ φίλον*, quicum obeam lubens. De honesta illa, & erudita Beverovicii anima, idem cenfeo. Atque hoc par cum sic diligem, merito lætor de amore, quo mutuo vos, & me pariter completimini, cumque affectum, peren-

nare vobis volo. Pro novo veteris hujus amoris indicio, capio etiam, quod domo transmiseris operis de vitæ termino editionem iteratam cum accessione luculenta, quæ me valdè oblectavit. Debebit tibi posteritas quod tot bona ingenia excitâris ad disquirendum de hac re. Num placet, qui pomum Eridis, à te jactum prædicant, liquidem est hæc controversia, ex iis, in quibus liceat dissentire; dummodo nec Deo adimatur futurorum contingentium præscientia: nec homini, arbitrii sui libertas: quorum prius qui facit, Dei, qui alterum, hominis destruit naturam. Quomodo tamen hæc duo, & in isto, quod sub manibus habes, & in cæteris negotiis conspirent, non cuivis promptum est dicere. Quare istoc sanè ventilent homines acuti. Nos interea laboribus eorum suaviter fruemur, eoque avidius iis pascemus animum, quia tuo, hoc est amicissimi hominis, epulo excipimur. Scias vero, nulla à te fercula apponi, quæ magis sint ad gustum meum, quam ubi video minimum recedi à sancto vetustatis choro, *αἰὲν ἀνέστης καὶ ἰδοὺ πάλιν* jubeo sibi habere res suas. Mihi quibus antiquitas desipit, parum ipsi sapere videntur. Responsum debeo consanguineo meo Somerio, Collegæ tuo optimo & doctissimo; sed dabo operam propediem, ut me exolvem. Salutabis meo nomine, plurimum, ante omnes vero, lectissimam uxorem tuam.

Amstelodami,  
cl. lxxvi.  
7. Kal. Maias.

## CCLXXXIII.

Ludovico Crocio S. P. Bremam.

**D**IC bona fide, doctissime, & quod majoris ego facio, mi optime Croci, utrum miraris magis, quod tuis, & præstantissimi Willii literis compluribus, vir ego haud malus, & vestri utriusque amicus non è multis, non unius anni spatio neglexerim respondere: an quod nunc post cessationem vestram spontè, nullo etiam oblato scribendi argumento, Epistolam hanc mittam? Quid impulerit quæres; nempe non aliud, quam, quod cogitarem, non (venia sit verbo) matulæ solum, ut in veteri dicto est, sed incuriæ etiam modum esse oportere. Nec enim amicitie fiducia, semper licet esse negligentem. Vides, ut negligentiam ipse hoc appellem, sed hoc cum facio, nulli injurius sum præterquam mihi. Utcumque enim alius, incuriam

curiam hoc duxerit, probè tamen mihi conscius sum, nullius minus me fuisse (corum dico, qui aliquid apud me possunt) quàm mei ipsius, idque jam à biennio, aut triennio. A mane ad vesperam salutor, compellor, distineor, ab nonnullis, commodo, & meo, & publico, à pluribus dispendio, & meo, & Reipublicæ Literariæ, cui non possum præstare, quod volo, & à multis annis pollicitus sum; sed utcumque videar incuriosus in amicorum rebus, quia non facile rescribam, nihil tamen me industrium magis, in iis exequendis quæ postulor. Spero neuter vestri conqueretur usquam, claudicasse affectum meum, in illis promovendis, quos commendassetis. Non tamen foelicius unquam successit, quàm in Heilersichio. Eum confestim deduxi in ædes amplissimi Michaelis Pauwii, quem virum noris scio, partim ex Parente Consule, magni nominis, temporibus Synodi Dordrechtanæ, partim ex fratre Legato nunc, ab illustrissimis, foederatæ Belgicæ Ordinibus, ad Christianissimum Regem. Multum profecto vestri amborum literis commendatitiis debet. Nam absque illis esset, non in eam dixi domum venisset; unde auspiciato præfectus curæ, & institutioni filii, quem unicum habet illustrissimus Araulionensium Princeps. Spero majores eum honores manere paulatim, quam ipse existimet; dummodo is porro erit, qui fuit, & fortuna semper sua rectè uti sciat. Nunc eo, quo Heilersichius ante, munere fungitur Gronovius, non sacris quidem, sed literarum tamen studiis, Heilersichio superior: nam bono judicio, ut de industria taceam, in optimis quibusque Latii, ac Græciæ scriptoribus est versatus. Quod propediem fortasse testabuntur Criticarum Observationum Libri, quorum partem vidi pariter ac probavi. Magna omnino, & pulchra nobis, ab hoc ingenio speramus; sed ecce jam Bibliopola vester adest, cui has literas tradi oportet. Quare abruptam; salutem dices plurimam Doctori Willio, quem talem hic comperi, ut non possim non amare; sed & eruditissimo Cochio, cujus monumenta sic salivam mihi movent, ut in iis illum reponam, qui magnum ab eruditis, ac imprimis à posteris, pretium sint relaturi, nec æquè aliquid desiderem, quam ut pergat sic de studiis mereri. Et quid impedit quo minus salutem etiam adscribam Clarissimo Bergio? Viro raris virtutibus; sed mihi illum, quàm maximè commendat, quod intelligo, antiquitatis eum esse admodum amantem, nec tritibus hisce temporibus, affectu, sed pretio sui omnia æstimare. Te quoque sic animatum scio; planèque confido, nunquam te in hoc Ecclesiæ Schismate,

pacis, & concordiae studium velle deponere. Vale.

Amstelodami,  
vi. Id. Jun.

Tuus & Collegarum tuorum ex  
animo amicus,  
G. J. Vossius.

#### CCLXXXIV.

*Ad honoratissimum & reverendissimum in Christo Patrem Guilielmum Episc. Londin. & Magnum Angliæ Thesaurarium.*

Reverendissime in Christo Pater, honoratissime Domine,

Quod Thesauris te suis præfectum voluerit Serenissimus Dominus optimus Regum Carolus, id ingenti me gaudio perfudit. Solum dolet tarde adeo id pervenisse ad aures meas. Absque doctissimo & amicissimo Goffio esset, nunc etiam nescirem. Sed aiunt post longiusculum etiam intervallum gratulandi officium non solere esse ingratum. Quod ante igitur fecisse mallet, id nunc demum serius, quidem nec tamen serio minus facio, tantàmque honoris accessionem fortunare volo non tibi modo tuisque, sed cum Ecclesiæ tum Regno Angliæ universo. Atque ita fore auguror, siue spectem tum tuam pietatem, tum prudentiam, industriam, fidem, quibus in tractandis pecuniis Regiis opus est: siue etiam cogitem cujus rei ex quo primo in Britannia pedem posui, ignarus esse non potui, quanta tibi conjunctio animorum sit cum heroe illo Reverendissimo & Illustrissimo Domino Guilielmo Archiepiscopo Cantuariensi. Hæc spem faciunt optimam, si minus ferrea hac ætate prorsus aurum redire Ecclesiæ seculum possit, habituros nos tamen tale, quod ab aureo propius ablit. Quocirca non desinam una cum meis assidue preces funditare ad Deum boni omnis fontem, ut tum serenissimo & augustissimo Regi meo Carolo, tum toti familiæ Regiæ, tum utrique etiam vestri, tam nobili pari, ac porro aliis Ecclesiæ ac Regni antistitibus ad res Britannicas feliciter moderandas longam & prosperam vitam conservet.

Amstelodami,  
clo Jac xxxvi.  
v. Kal. Sextil.  
St. Vet.

Reverendissimi & Honoratissimi  
nominis tui cultor devotus,

G. J. Vossius.

#### CCLXXXV.



CCLXXXV.

Fortunato Plempio.

Lovanium.

**N**escio, Clarissime Plempi, utrum magis meis debeam occupationibus succentescere, an potius moribus meis, hominis, (nec diffiteor) tardissimi in officio Epistolari. Absque utroque horum esset, egone nihil hactenus respondissem Plempio? Viro tam suavis indolis, tam raræ doctrinæ, ejus etiam in Rep. literaria dignitatis? Quod si magnam aliis in humanitate tua, mihi & perspectissima, fiduciam haberem, post tantam cessationem, deinceps quoque à scribendo abstinere, tantum, quia putarem, serum esse officium hoc, teque aliorum esse similem, qui contemptum hoc sui interpretantes, plumbeas idcirco iras gererent. Sed mihi negotium cum Batavo, qui nunquam exuet simplices ac candidos suæ gentis mores. Ac talem se semper, mihi, & amicis, quos hic magno numero habes, exoptem. Videor mihi bellè satis negotium meum egisse, sic me excusando. Sed solusne Plempius candidus, in Vossio candor desideretur? Ne Deus sinit. Quare, ne, non dico alius in me, sed ipse candorem desiderem meum, cogor aliud apud te apertè promere, cur alteris literis tuis non responderim. Verbo dicam, puduit. Cur verò inquires? Meministi argumenti? Erat id de furore nostrorum in Thenensi oppido. Vix de eo scribere nunc sustinet animus. Ubi horribilis ille nuntius aures meas perculit primò, nihil fortunatum nobis speravi, usque dum supplicibus votis, & seria delicti poenitudine, Deum nobis propitium reddidissemus. Nec sanè vel me, vel alios similiter animatos, opinio fefellit. Scis ipse, quæ sint consecuta, & melius longè nobis. Nec tibi, vel ullis, in Brabantia, magis ægre est, tam crudeliter (Scapham dixero Scapham) actum esse Tinnis, quam Vossio, & amicorum aliis. Nobis, nobis, ea res maximè detrimenti fuit. Nec tam Batavorum tuorum hic culpa, quam Gallorum. Scio ut plerumque, quando res secus cadit, alter alteri impingere soleat culpam. Attamen exploratum mihi, prope omnem hic Gallis culpam tribui debere. Et tu, credo, nunc in eadem es sententia. Non quati diffiteri velim fortassè, & gentis tuæ sex septem, vel plures, etiam, si sic velis, Gallis fuisse immixtos. Etiam Bataviam scio habere, qui facile alieno, etiam pessimo, rapiantur exemplo. Ad Principem quod attinet, si pietas non abterruisset, saltem gloriæ studium, principibus omnibus innotatum, non fuisse, sic licentiam Gallicam

graffari, modò in furore illo, ullus fuisset, vel rationi, vel authoritati, relictus locus, locumque non potius habuisset Poetæ illud;

*Fertur equis auriga, neque audit currus habenas.*

Necdum placere arbitror, ut filum abrum-pam, sed velle, ut aliquid addam de opere Cl. Fromondi, quo me, quo amicorum alios, summus vir donavit. Nisi mihi tecum homine tam candido, & cui tamen candore nolim cedere, sermo foret, silentii tam longi, quam tamen nunc dicam, reticerem causam. Ipse non abhorreo ab Origani opinione; quam satis probabilem, etiam judicavi; priusquam aliquid Origani vidissem. Non tamen, ut alteram, Ptolemaicam dico, opinionem respuam. Scis quam difficulter à me impetrem, ut aliquid improbem, quod majorum comprobavit autoritas. In sacris sanè nunquam ab iis recedam, quæ consensu Ecclesiæ Veteris comprobantur. Hic aliquanto alia ratio: Accedit quod tot Antiquis, ante Aristotelem, longè alia mens fuit. Et tamen Ptolemæi opinionem haudquaquam damno: solum existimo esse hoc, inter Naturæ occulta, ac posse inter homines eruditos, de negotio illo disquiri. Vis, & aliam silentii mei causam? Is qui adversus doctissimum Fromondum sentiat, Hortentius est, Collega mihi in urbe tua patria conjunctissimus. Scis quæ hac de re scripserit: quædam scio affectu juvenili, sed magis magisque judicium crescet; ut si res integra foret, eadem fortassè, aliter tamen fuerit dicturus. Interea multum pro dono debeo Fromondo: Legi lubenter, & legisse juvat, & perstat animus, quem sæpius apud te aperui; virum esse qui inter sæculi nostri Principes doctrinarum debeat reponi: planèque animo meo ægre est, quod definat vos beare, tam multis, quorum spem, in prioribus Reip. literariæ tecit. Hæc ego recens à funere veniens, chartæ subito mandabam, metu, ne si ultra differrem scribendi munus, tandem obrepere, etiam amicissimo homini, posset opinio, quasi non idem absens forem, qui coram eram. Tu verò contra sic habe, clarissime, & amicissime Plempi, me præclaras animi tui dotes, non amare solum & æstimare; sed etiam venerari, ac porro veneraturum semper, dum memor ipse mei, dum spiritus hos reget artus. Salutem, si occasio erit, clarissimo Puterno dices; de filio cujus nosse aveo, an jam è Sarmatia fuerit reversus: Nam nihil à sex septem mensibus de eo cognovi; ita ut interdum metuam, ne quid ei in itinere humanitus evenierit. Si molestum non erit, vel ad me, vel ad Stapelium, tribus de eo verbis, perscribes. Eximio etiam

tiam sæculi hujus ornamento Tuldano, salutem meo nemine impertias; sed & summo viro Fromondo.

*Amstelodami,*  
clō Ioc xxxvi.  
jii. Eid. Sext.

*Tuus totus,*

G. J. Vossius.

# CCLXXXVI.

Joanni Meurfio S. P.

**N**unc demum forte territus Literis tuis, excudere omnia tua Blauwius cepit. Mavult enim cuncta, quam solum hactenus inedita. Et sic expedit literarum studiis, ut uno & altero volumine, vel tertio etiam, contineantur, quæ Vir illo ingenio, doctrina, industria bono elaborasti publico. Nihil inquit fraudis latet? Nam quid si cessit, ubi meus ille qui has literas defert, decesserit? Non hoc scriberem nisi tam scæva cogitatio mihi quoque in mentem venisset. Certo tamen habere jam orfos tua. Uti & filii Maimonidem toto itidem triennio post ambitus & promissa neglectum. Grotiana itidem promissa necdum cepit: & non minus *et nro* Grotium morum istiusmodi quam te poenitet. Quibus sim moribus, nisi satis haberes perspectum, hinc videres, quod magis amicorum res urgeam quam meas. Nam cum tam multa habeam parata, quid mei suscepit? sed ubi hinc in Grotianis, inde, quæ prævertent tuis & filii paulum promoverit, de meis loquar, vel alteri Janssonio, vel Henrico Laurentio, negotium committam. Noli putare te si coram adestes plus in hoc negotio, quam me posse, qui te fratris loco diligo, & si haud nimium, plus tamen aliis apud Blauwium valeo. Sed non obscure video cur primitus plus receperit, quam possit. Videor mihi videre post damnum ex æmulo vicino, post sumptus ex nupero filii conjugio, post tot annis coacervatas tot codicum editiones quarum pleræque non satis vendibiles, paulo ad rem factum attentiores, & ut sic dixerim sub omni lapide scorpionum, hoc est damnum, metuere. Magna pars Librorum ejus his duabus hebdomadis publica auctione est distracta. Multi libri minoris venditi quam ipse excuderat: & non hoc meticulosum hominem reddere possit? De tuis tamen Viri Orbe universo celeberrimi meliorem majoremque spem semper habere jussi. Nec magis opere hic mihi Suada opus qui id satis per se videt. Solum terret malus vicinus; sed jam persuasi nihil in tanti moliminis opere ausurum. Fore ut revereatur utrumque nostrum.

Spero itaque paucissimas intra hebdomadas te aliqua visurum tui. Nec magis decipi possum toties deceptus quam si nunc decipiar. Salmasius necdum è Galliis reversus. Grandes ei honores offeruntur in Galliis; sed videt non semper præstari, quidquid promittitur: nec tanti sunt æmuli ut eo non redeat ad nos. Scripsit adversus Grotium Seldenus de mari libero. Rescribit illustrium Ordinum mandato Grafwinckelius J. C. Hagensis, quondam meus Leidæ convictor, natus, si forte sic magis noris, ex Balia sorore Bafii rationalis cameræ præfecti. Comes Mauritius ad Indos Orientales abiturus gubernator futurus eorum locorum. Vides quam illustres heroes nunc cum locum sint obtenturi quam antea: nolo addere cætera. Scis me dicere, non quidem terræ filiso, attamen nihil qui forent ad tantam profapiam. Deus faxit ut bono sit Reip. nostræ. Pauwius Hollandiæ Syndicus & in Gallias ante biennium circiter legatus quotidie expectatur; sed in Syndici munere ei suffectus Catzius Dordrechtanus Syndicus. Ipse fungetur munere, quod in rationali camera obtinuit prius. Fortasse Syndicus hujus urbis Borelius Venetias iturus legatus revocato Domino de Lier; saltem honos is ei oblatus; sed an uxor assensura sit, non satis constat. Nec enim aliquid invita hac velit. Deus Opt. Max. diutissime te tuis, nobis, imprimis publico conservet. Optimæ tuæ Uxori Conjux mea salutem, filiæ filia, omnes nos omnibus vobis. Etiam CLL. VV. Lau-rembergio & Stephanio & cæteris porro Collegis plurimam dicito salutem. Raptim, ut soleo.

*Amstelodami,*  
clō Ioc xxxvi.  
Post. Idus  
Sext. St. Nov.

*Tuus æternum,*

G. J. Vossius.

# CCLXXXVII.

Guilielmo Archiepiscopo Cantuariensi.

Reverendissime in Christo Pater, Domine Illustrissime,

**U**Sum opera mea, an abusum Calandrinum dicam, propè hæreo incertus. Saltem facile mihi persuadere sinam, egisse illum magis negotium suum, quam serenissimi Regis. Negat ille quidem suum abs Regio posse divelli, de quo quid sit nescio: sed vellem, cum operam meam postularet, candide magis aperuisset, quorsum istæ tenderent. Sed ipsi porro viderint; nec enim mihi feritur, qui Calandrinis nec teruncium acceptum unquam

inquam tuli. Sed illos potius ob summam facilitatem in commendando, habeo debendi reos. Interea dolet, quod in rebus nihil ad me pertinentibus molestiam tibi, illustrissime Domine, pepererim: quod fateor, verè est in Ecclesiæ imò & Regni negotia peccare.

Tandem Typographus aggressus est filii Maimonidem de Idololatria. Deinceps omnia spero liquidiora. Ne solitarius prodatur, addam ei comitem de eodem argumento Dissertationem nostram. Quæ ex opera nostra spero lucis non parum capere posse veteres cum *ἡμεῖς*, tum imprimis Ecclesiæ Scriptores. Dum cætera majoris operæ molior, si sic illusterrimo nomini etiam tuo videatur, publici juris faciam, duos de Baptismo Libros: de quibus memini me ante aliquot annos scribere. Prior majori ex parte antea editus, alter de Ritibus nunc demum proditurus. Absolvi & tripartitum opus de Symbolo Apostolico, Athanasiano & Constantinopolitano. In quo præter alia, de eorum Auctoribus, & additione Constantinopolitano facta. Operosior labor de temporibus Hebræorum usque ad capta à Tito Hierosolyma. Hic ut de cæteris, ita & de LXX. Danielis Hebdomadis differo. Quem & ipsum spero intra annum hunc lucem videre posse. Nisi prævertat labor alius, & sæculo hoc utilis de Controversiis inter Latinam Græcamque Ecclesiam. Atque in his præpò omnibus crebri mihi sed modesta cum Baronio Dissertatio; ut grandioris operis sint quædam quasi *ὑπομνήματα* ac segmenta.

Cætera me spectantia, ubi otii tantum erit, cognosces ex optimo doctissimoque Goffio: cujus ego eandem ac pietatem magis magisque amo & æstimo. Nec facile satis predicaverò in eo, ut antiquitatis, ita rerum omnium præclaram cognoscendi ardorem. Quæ ejus modestia est, sperabat hac etiam parte ex conversatione nobiscum aliquid suis studiis incrementum. Eoque et si perhonestè adeò à nobilibus & summatibus viris hic haberetur, ægrè tamen divellebatur; sed qui suus non esset, alienis posthabere propria debuit commoda.

Propitium numen Reverendissime & Illu-  
strissime Domine, longævam tibi & prospe-  
ram vitam largiatur.

*Amstelodami,*  
cId Idc xxxvi.  
Kal. Sextil.  
St. Ver.

Reverendissimi Illustrissimi-  
que nominis tui Cliens  
devotissimus,

*Ignoscendum, Amice Lector, exscriptoris incuriæ. qua fit ut sequens Epistola (sc. in tempore prior) loco cedit superiori.*

CCLXXVIII.

Guilielmo *Archiepiscopo* Cantuariensi.

Reverendissime in Christo Pater, Dom. Illustriss.

**A**dfuit mihi hesternâ die vir honestus, nec dignitati tuæ ignotus, Philippus Calandrinus; quem tum patruelis suus comitabatur, tum aliter vir ut virtute, ita literis cultissimus, mihiq; perfamiliaris. Eorum uterque Calandrininaum mihi negotium esse commendatissimum exoptabat. Referebat vero Calandrinus, ut valdè cupiat suas literas in manus Augustissimi Regis Caroli pervenire: eoq; id desiderare impensius, qui ignarus sit, utrum priores, quas magnatibus aliquibus misit, reddita sint. Ex eodem intelligo, hoc in mandatis habere, ut monilia Regia quæ teris hisce sunt, majestati Augustæ restituantur. Sed incassum se ait laborare, frustra que etiam operam de hinc insumpturum, dum sic sunt Burlamachii res, nec eas hic pecunias recipit, de quibus ad Augustissimum Regem scribit. Necessum igitur est, ut ea summa de illa Burlamachiana detrahatur, posteaque cedat in solutionem vel imminutionem pecuniæ quæ Burlamachio numeranda sit à serenissimo Rege. Agitur res non Calandrini modò, quem auxilio dignissimum omnes arbitrantur; sed etiam ornatissimi adinis ejus, viri à multis annis mihi cogniti, quem ob virtutem ab omnibus prædicari & æstimari semper intellexi. Imo agitur negotium Regiæ ipsius Majestatis, cujus monilia se restituere posse Calandrinus desperat, nisi precibus suis apud serenissimum Regem relictus sit locus. Intelligo Calandrinum, non ignaro te, Reverendissime & Illustrissime Domine, in Eavtiam ad expediendum, Regium negotium profectum esse. Ac video eo plus præsidii collocare in bonitate & prudentia tua heroica, ne pariter mala gratia sit apud optimum omnium Regum; simulque in sui ac familiez in gravem incidat probrosamque ruinam. Equidem fateor me his argumentis compulsam esse, ut has ad te, illustrissime Domine, literas darem, measque etiam preces sociarem, quo facilius Calandrinus, voti sui apud serenissimum Regem compos fiat. Res est Deo acceptissima, erigere afflictos, tuæque id eximie dignitati consuetudine diu jam in naturam vertit: quod tot beneficiis maximis ipse obstrictissimus facilius certiusque possum prædicare. Neque in hoc negotio Calandrino solum auxiliares præbebis manus, vel etiam affini ejus: sed multos quoque sanguine ipso, vel affinitate iis junctos (in quibus & aliqui studiis & scriptis clarissimi) æternum inclyto Regi Regnoque ac illustrissimo

P p nomini



nomini tuo obstringes. Omnes pariter oramus, ut Deus Opt. Max. serenissimam Majestatem Regiam, ac pariter te, Reverendissime atque Illustrissime Domine, Magnæ Britanniae Regnis ac Ecclesiæ suæ permultos in annos conservet, salvos & incolumes.

*Amstelodami,*  
clō 16c xxxvi.  
viii. Kal. Jun.  
St. Ver.

*Illustrissimi & Reverendissimi nominis tui devotissimus pariter ac devotissimus Cultor,*

G. J. Vossius.

Justum quia hæc literas argumentum complecti putarem, nihil nunc quidem, quod proximis fiet, de rebus meis particulatim perscribo; præterquam Reverendissimæ dignitatis tuæ literas probe mihi redditas, & infinitum debere quod ea cura, in ea dignitate, in illis occupationibus, mihi tantillo rescribere non fueris gravatus.

#### CCLXXXIX.

Guilhelmo Archiepiscopo Cantuariensi.

Reverendissime in Christo Pater, Dom. Illustriss.

**M** IHI gaudeo, Britanniae gratulor, Deo gratias ago, de immissa animo tuo cogitatione sanctissima revocandi juris ejus, quo Reverendissimi Cantuariensis Præsules jam ab antiquis temporibus in lustrandis Regni Anglici Academiis uti frui solent. Sane non corpora solum nostra fluxa ac fragilia sunt, sed humana etiam instituta, licet optima, facile per incuriam in pejus vergunt. Eoque ad retinendum grande illud disciplinæ bonum nihil exoptatius à Deo & Rege potuit evenire, quam ut priscum jus tanto præfuli restitueretur, per eum potissimum labantibus moribus obviam eatur, cui ut sacrorum sic morum bonorum præcipue cura incumbit, quique sic sanctimoniam ab illis exigere sciat, ut eadem præcedat cæteros. Sunt quidem florantissimæ Academiæ ambæ: sed cura tua deinceps se vincent, ac pulchriores pulchrioresque semper exurgent. Quod bonum suum sapientissimi quique per se sine dubio vident, ac magis & magis intelligent, nec solum nostra ætas, sed posteritas etiam, ut sui temporis emendatori gratias propterea semper aget. Primus qui me jucundissimo hoc negotio lætissimus ipse perfudit, optimus & doctissimus Gossius noster fuit. Is aliquamdiu studiorum ergo hac in urbe egit, ac me usus per familiariter; quia, quæ viri modestia est, arbitraretur, studia etiam sua ex nobis aliquid posse capere incrementi. Gaudeo me incidisse in amicum tam amantem bonæ mentis, & de quo non possim non optima quæq; mihi augurari.

*Amstelodami clō 16c xxxv.*  
Pr. Non. Sext. St. Ver.

#### CCXC.

Ger. Jo. Vossius, Arnaldo Ticmanno  
suo S. P.

**Q** UI has literas deferat, optime & Doctissime Ticmanne, is est D. Jacobus Hintzerus exul Palatinus; sed dum patriæ res florebant, in Heidelbergensi diocesi Ecclesiastes: eum mihi, postulato patris, commendavit, vir eruditus & scriptis magis magisque inclarescens Daniel Paræus. Quem si non ob eruditionem & probitatem insignem multum amarem, amarem tamen ob summum erga me affectum. Nam suum mihi Lucretium, quem egregiis notis ornatum ivit, consecravit. Filius est Philippi Paræi, cujus tot scripta in humanitatis studiis habemus. Ejus Terentium ac Plautum, ut cætera taceam, visos tibi arbitror. Hic eundem magnopere commendavit nonnullis in urbe nostra. Avus est magnus ille Germaniæ Theologus David Paræus, de quo satius tacere quam pauca dicere. Hæc de Paræis, ut scias, à qua familia compluribus in urbe hac Hintzerus noster commendari meruerit. Equidem comperi ipse, virum esse ut integrum & probum, ita egregie doctum; accedit quod honeste natus, honestis etiam familiis per uxorem innexus. Uti illa Antoniorum, quæ tot egregii nominis Jurisconsultos habet. Illum Franckerae juris doctorem ac professorem, tota Germania inclutum (is Patruus est uxoris Hintzerianæ) ejus filium Collegam D. Gomari: item alium Professore Cassellensem. Adhæc Doct. Reichenbergium, qui & ipse juris Professor Franckerae. Etiam Sohnius, magni nominis, ut scis Theologus, hanc familiam attigit. Sed quid exuli profapia prodest? Quid eruditio? Quid virtus? Quamdiu cessant omnes ejus curam habere. Quod scio non sit malevolentia: sed ob exulum copiam. Tamen hic melioris notæ. Qui saltem sine aliquo liberalitatis indicio, ab Ecclesia dimitti non debet. Præit Amstelodamensis, ditior fortasse illa quam vestra: sed neque vestra, ut puto, exhausta. Non soleo ego sic alios commendare. Sed viri amor, & Paræanæ domus postulat, hoc ut facerem, fecerunt. Scito, siquid feceritis benigne, optime id iri locatum. Diu est, quod te non vidi. Videre autem desidero. Amo enim virtutem & integritatem tuam, quam à puero perspexi. Amo etiam eruditionem non vulgarem. Tanto Deum impensius rogo, ut tibi tuæque familiæ bene faxit. Salutem dices Collegis, iis imprimis, quibus

quibus me notum earumque scies. Sed & Æmilio nostro, viro longe majoris doctrinæ, quam vulgo putant.

*Amstelodami, iiii. Kal.  
Sept. raptim.*

## CCXCI.

Ludovico Crocio *Theologo S. P.*  
Bremam.

**S**IC hætenus in animum induxi meum, Clarissime Croci, etsi Epistolari officio fortasse ab aliis vincerer his terris; non tamen à quoquam superari amore tui. Nam si quis alius videbar, eo te pretio æstimare, quo dignum erat summis virtutibus tuis. At postquam, quos proximè de Theologia labores, juris fecisti publici, versare per otium cœpi; etsi maximi semper fecerim, cogor tamen non paulo te sublimiori loco collocare. Itaque me ipsum culpo, qui dum animus meus tam multis distrahitur, amicum non coluerim uti debui. Nisi fortasse nunc te ipsum hic superâris. Quod si est, non video quomodo culpari meritò possim. Ut cumque est, gratulor Ecclesiæ Dei, ac Germaniæ imprimis vestræ, quod te habeat, Deumque oro, ut diu te sospitem conservet. Atque id quidem eo iustius facio, quia magno dolore conspicio, tam in arctas copias cogi, qui bene de Ecclesia, non possint minus quam velint. Cum gemitu sæpè mecum considerans statum Ecclesiarum nostrarum, dico, *sumus Troes*. Tu & pauci similes tui, quos ut aurei sæculi reliquias colo, sistere debetis exitium, quod minatur nobis, sol dioris doctrinæ odium, aut contemptus. De me quidem ita habe, posse me concoquere malignitatem sæculi, eorum imprimis, qui esse malunt imperiti, quam videri: paulo minus istorum, qui non eruditioni modo, sed virtuti etiam bellum indixerunt. Etsi verò per iucundum mihi fuit, per se legere, doctum, & laboriosum opus tuum; tamen aliquid voluptatis inde etiam accessit, quod Vossius tuus inter summos viros, quos celebras,

*Se quoque Principibus permistum agnovit Achivis.*

Excuditur nunc Dionysii mei *re maxelre*, Maimonides, de Idololatria, Latine redditus, & notis illustratus. Comitum dabo dissertationem nostram luculentam de eodem argumento; maxime de gentium cultu. Mittam *Amstelodami*, ubi prodierint: uti & Cl.

Cochio. Quem virum intelligo Franckeram, à vobis avocari. Credo non dimitteretis, si fortunæ essent Reip. vestræ, quæ olim. Aureo esset inescandus hamo; quod fortasse tempora hæc non sinunt. Virum amo, ac eadem mens erat filii, quod Maimonides ejus luculentis indiciis ostendet. Sum ejus munificentiz obstrictus. Sed operam dabo, ut me exolvam. Collocutus sum cum Bibliopolis nostris, de summi, & amicissimi Martinii, heu quondam nostri, Originum libris. Arridet argumentum. Sed prela aliis distinentur, & status Germaniæ, ubi id genus librorum distrahi solet, tardiores nunc facit. Magnam pacis spem faciunt aliqui. Majori commodo hærendum excudatur, si ea affulerit. Sed tamen ulterius etiam tentabo, quid possim. Nihil enim laboris recusam, propter liberos ejus viri, quem mortuum etiam amare nunquam desinam. Vale. Plurimam salutem V. V. Cl. dicito, Bergio, Willisio, Cochio, Cabeliawio.

*Amstelodami, cl. Id. xxxvi.  
xi. Kal. Octobris.*

## CCXCII.

Henrico Ernstio *S. P.*  
Soram Danorum.

**V**IR eruditissime, & quod non paulo majoris facio, integerrime, credidne me ignorare, mirari te, planèque evenisse, præter opinionem, quod compluribus Epistolis tuis hætenus non responderim? Sed sine dubio, id in optimam partem interpretaberis; si scias, me hoc in vitæ genere non posse, quæ vellem, & propterea in Epistolari officio mirè esse tardum. Egone absque illo esset, non scripsissem, ad Illustrissimum Heroa Roscrantium? Ne Deus firmit, ut ejusmodi moribus essem. Sed undecunque ad me querelæ; quas innocentissimus cogor concoquere, idque Spartana patientia. Nam crede mihi, durum mihi, quod nec aliis, nec mihi ipsi satisfaciam. Tanto tamen majoris te facio, quod nullæ in literis tuis querelæ. Tuæ profecto fuissent justiores, quam aliorum quorundam qui occupationes meas melius nosse debebant. Nisi istæ obstitissent, multa ingenii, & industriæ nostræ monumenta, saltem pro modulo nostro, exarata intra hoc triennium, amici, & literatus orbis vidisset. Schedæ P. Syri tui, sedulo adeo cum Manuscriptis collati à te, pudicè hætenus adferatæ nobis. Utinam quod abutim paranti aiebam,

aiebam, triduum hic perfistere licuisset. Confectum habuisses negotium: Tardiorum postea fecit carissimi Dionysii excessus, qui negotium receperat, & ejus iter in Hispaniam, cui dicandum opus videbatur, & moles occupationum, quâ ipse urgebar. Tandem negotii hoc dedi filio Gerardo; qui & binos, ex Bibliotheca mea, codices Manuscriptos, & aliunde alios nactus, aliquot etiam editiones veteres, tibi invisas, strenuè in eo scriptore operam impendit. Planè confido fore, ut intra hanc instantem hyemem, lucem videat, tuâ, & filii gloriâ. Salve eruditissime, & candidissime amice, ac amare nos perge.

*Amstelodami,*  
clō Ibc xxxvi.  
Prid. Non.  
Octobris.

*Tuus,*

G. J. Vossius.

### CCXCIII.

Guilielmo Boswello.

Nobilissime Boswelle,

**S**cripsit affinis meus Franciscus Junius de Pictura veterum Libros tres sanè eruditos & laboriosos. Eos probantibus illis quorum auctoritas merito apud eum plurimum valet, sacrare cogitat serenissimo Regi ac Domino nostro Carolo. Opere jam excuso sola superest præfatio: quam, priusquam prelo committatur, communicari tecum voluit, ne in sermone ad tantum Monarcham forte verbo offenderit ignarus. Tuo stare & cadere judicio est paratissimus. Scit enim te ut aliarum rerum multarum, ita earum, quæ ad Regum aures pertineant, longe utroque nostri intelligentiorem. Manum ipsam Junii mihi, eoque ubi legeris remitti opus erit. Quod si molestum erit perscribere, quid potissimum mutandum existimes, saltem filio meo Francisco, qui Hagæ est advocatus, indicium eorum facere ne refugas. Is facile ad me perferret. Nuper in proprio, nunc in simili affinis negotio molestiam facesso. Tanta mihi fiducia est humanitatis & amoris erga me tui. Maimonides de Idololatria jam bonam partem excusus cum translatione & notis filii mei Dionysii ἁγ. μαργεῖτα. Eo absoluto compluria nostra consequentur: sed gravioris argumenti quam illud illustrissimo Walliæ Principi sacratum. Necdum tamen laboris ejus poenitet. Sed ætas hæc & vitæ etiam genus quod profiteor, nunc postulat majora.

Vale, Nobilissime & Amicissime Boswelle, & cum uxore, quam jamdiu redu-

cem ex Anglia spero, item cum prole suavissima. Salve.

*Amstelodami clō Ibc xxxvi.*  
iv. Id. Octobris.

### CCXCIV.

Simoni Beaumontio *V. Cl. Gerardus*  
Jo. Vossius *S. P. D.*

**Q**uod siue viduas pertæsus noctes, siue potius curas domesticas, & alia incommoda, quæ solitaria secum vita trahit, ad alteras, vir amplissime, nuptias animum adpuleris, id & jucundum mihi cognitu fuit, & planè ejusmodi, ut tibi, tuis, & quod caput est, Patriæ, fœlix, faustumque fore confidam. Hinc rei familiaris sollicitudine levatus, inde & vinulis alloquiis, & melleis amplexibus recreatus, novis viribus exsurgens ad patriam, de qua tot annos præclare adeo mereris, melius meliusque merendum. Sed & amicos tuos..... quod te velle scio, non uno edoctus experimento, quod ex fructu amicitie tuæ percepi. Hac fiducia, partim sponte mea, partim poscente ita Francisco Filio J. C. non dubitavi has literas exarare, quibus animum tentarem tuum, ut cognoscerem ecquo urbi vestræ, magni Alumnæ Erasmi, nec minoris Grotii consiliis nuper nixæ, nunc prudentia nihil minus, quam degeneris Batavi suffultæ, utilis Hagæ esse possit opera forensis filii mei, cujus me antea scis nomen dicere. Equidem velim: quod si est, spero, imo persuasissimum habeo, opera id nos tua posse consequi. Nec enim existimo, ita intra centum Advocatorum numerum, liberum opusculum constringi, ut eum excedere nefas putet. Neque is sum, qui tantoperè commendare illum vellem, nisi perspectam haberem fidem ejus, atque industriam. Quippe scio, non fore, ut te poeniteat unquam operæ impensæ. Et in grata segete beneficium obferetur, si me, si meos benè novi. De meis studiis si quid petis; nunc de Idololatriæ origine, & progressu libros edo. Quos comites do filio, à meo Dionysio ἁγ. μαργεῖτα, de fonte Hebræo, Latine reddito, ac notis illustrato. Ubi uterque prodierit, ex primis videbis.

*Amstelodami clō Ibc xxxvi.*  
v. Idus Novembris.



CCXCV.

*Illustrissimo* Chris. Stupesky.

**P**ostquam, Illustrissime Domine, cœleste numen eripuit terris, quem mihi dulcissimum dederat Dionysium, sæpius quidem propositum fuit, literis apud te testari dolorem, quem conceperam: sed mox idem dolor retrahebat, quem sic mihi refricaturus magis videbar. Nec potui facile à me impedire, ut tibi quoque molestiam afferrem, ut coram affatim perlenimus, posteaque perspeximus ex luculentis literis tuis, quibus eum decreti in orientem itineris comitem expetebas. Præterea neque his terris tam commoda scribendi Romam occasio fuit. Adeo ut ne illud quidem sciam an postremas nostras acceperis, quas dederam ad Amplissimum Senatorem Venetum Dominicum Molinum. Nunc patriæ te redditum magnopere gaudeo: atque ut post longi temporis peregrinationem ei consilio atque opera plurimum prosis, Deum, patrem luminum quæso rogoque. Judæorum de quibus scribis, miseret me prorsus: Quanto mallem sedulo ut operam darent Christiani iis convertendis. Hoc sine jam Thalmudicis & Rabbinicis totum se dare cœperat à *marcello* Dionysius meus. Nunc plerisque omnibus terris mira eorum est paucitas, qui sua tueri adversus hanc gentem sciunt: pauciores etiam qui idonei videantur iis expugnandis: merito accusamus Judæos pertinaciæ, sed nec ipsi sumus exfortes, quando apud nostros propemodum jacent Orientis literæ, sæpeque optimam causam luforiis magis armis tutamur quam decretoriis: quasi hoc aliud sit quam prodere veritatem. Non hoc scriberem nisi sæpius observassim, quam levi amictu Judæi exeant tela nostra: atque id hac in urbe Amstelodamensi magis etiam cognovi quam ante. Quamobrem valde opto, ut quia multum metuo, ne & in florentissima alioqui gente Polonica, non multum abtenuis ratio sit, ea pro authoritate qua magis & magis valebis apud tuos, in hoc prorsus incumbas, ut homines Christiani armis sint instructiores adversus Judaicam perviciam. Spiritus Dei & Scripturæ sunt pro nobis. Hæ volvendæ diu, noctuque ille exorandus. Apagema: causæ tela, ignes, ferrum. Solus Dominus conscientis præest. Nihil hic imperatorem posse, rectè olim Cæsar Maximilianus. Hæc eo lubentius scribo, quia hoc à vitio immunis est laudatissima natio vestra. Spero & ab illo, quod nec falsis criminibus circumvenire velit, opum gratia quas sæpe possident, subinde nec artibus bonis partas. O quam

multa exempla nobis omnis suggerit historia calamitatum Judaicarum, quas perpessi nunc zelo sacerdotum, sed qui non esset secundum scientiam, nunc protervia vulgi, vel incitantibus vel conniventibus, quos minime oportebat; nunc avaritia principum & aulicorum, ubi res eorum prodigalitate sunt absumptæ: unde habeant, non quæritur: sed habere oportet. Ne videar querimoniam vel accusationem instituere falso, compluria transmissi ex magni nominis scriptoribus exscripta. Abunde illa arguunt quid fere impulerit sive Christianos sive qui Christianæ saltem religioni nomen dedissent, ut ita in Judæorum bona involetur. Mea nihil interest quid in Polonia vel alibi rerum geratur. Sed horrescit animus quoties cogito quam parum solliciti omnes sumus de salute proximi; quem malis artibus nostris magis avertimus à nobis, & simul ab æterna salute sua, saltem quantum in nobis. O pulchra & nobilis anima mei Stupeskii, quam te aversum à talibus exopto! imo prorsus confido. Nota enim mihi tum prudentia, tum pietas etiam tua quibus, dum huic ageres terris, poteram dicere, familiam ducebas: contentus ero illo, quod æqualum inferior esses nemine. Itaque nihil mihi medicre de te spondeo, dum valetudinis neutiquam ferreæ majorem habeas rationem, quam cum apud nos eras. Alii Baccho & Venere eam perdebant, tu nimio studiorum amore & ardore: sic ut medicorum & intelligentium judicio, plane esses suffaminandus. Nunc ætas, ut non dubito judicium per se acre, magis firmavit: Quare de isto verbum non addam. Potius illud dicam, non solum sic quia natura hoc fert mea, sed etiam in tuæ spem gratiæ, nullum defore officii genus à me optimo & illustrissimo fratri tuo Floriano Stupeskio, quamdiu his terris agit. Atque utinam amplius possim. Hæc scripti bella adeo occasione oblata per illustrissimum Regis Poloni legatum, qui filium suum studiorum ergo in urbe hac est relicturus. Vides ut perseveret inclytæ vestræ gentis judicium de Vossio tuo. Nec dubito quin multum de nobis judicium auxerit tua & inclytæ familiæ tuæ æstimatio. Tanto æternum devinctior ero. Uxor mea & liberi mei sex (quippe & natu maximum fatum abtullit) dum artus regit spiritus, tui semper memores erunt. Impense etiam salutant. Properante calamo in tantis occupationibus scribebam,

*Amstelodami, Anno*  
Sospitatoris nostri  
cdo Idc xxxvii.  
xiii. Kal. Jan.

*Illustrissimi nominis tui*  
Cultor,

G. J. Vossius.

CCXCVI.

## CCXLVI.

Joanni Beverovicio S. P.

UT grata mihi literæ fuerunt tuæ, amplissime & amicissime Beverovici, ita haut sane libens cognovi, quod de nonnullis scribis, pleniusque ex aliis intellexi. Adeone illos transversos agi, ut ingens illud Bataviæ decus, atque ævi nostri miraculum, vivere patria in terra noluit? Hunc scilicet fructum maximus ille vir, non jam dico eruditionis, quæ sola etiam potuit detertere, sed virtutis & meritorum in patriam reportabit? Indignor profecto, mi Beverovici, multumque indignor, quoties degenerum illorum Batavorum in mentem venit: facilius externis ignoscam, qui virum ignorare possint. Sed externos habet æquissimos, quia non est illis ignorabilis doctrina ejus ac virtus. Peregrinis minus ignosco, quibus tam bene est in Batavia: sed eò se fore minoris existimant, si suus honos tanto constet viro, quicum comparari minime possunt. Attramen his quoque ignoscamus, quia suo, non Bataviæ velificantur honori. At Batavos etiam sic affici, ut sua bona ignorent? Certè ut amantes sunt meticulosi, subinde videre mihi videor turbines pene eosdem, qui innocentem Africanum naturali solo expulerunt: sed illud apud gentes erat. Christianosne homines eo abripi? Hæcine illa proximi charitas est, quam ab ipsis prope incunabulis docemur? Tantum parentum nostrorum ævo libertatis simul ac purioris religionis amor his in terris coepit. Citòne adeo res nostras in pejus labi? Te, optime Beverovici, te laudo, qui pro viribus corruptos mores sistere, ac ruentis sæculi vitii occurrere conaris; fortiter tantum perge. Incita cupidos, accende languentes, dehortare adversos: noli, quantum est in te, permittere, ut principem urbium Bataviæ suâ se exuisse gloriâ feri quoque Annales testentur, habeatque posteritas, cur ingratos adeo cives damnet. Crede mihi, ut non Africani exilium nostra tempora latet; ita ibit quoque in ævum, quomodo se Batavi adversus magnum hunc virum gesserint. Vides pravos homines nihil non movere, ut partes suas tueantur. Quanto æquius illum diligenter incumbere, qui bonam causam fovet. Dignissima profecto est, ubi omnes nervos intendas. Arrecta est in expectationem omnis Batavia, quid Batavia? arrecta est Gallia, Germania, Britannia; arrectæ sunt nationes alie, magnâ animi cura opperientes satisne animi ac fidei sit amicis pro tanto viro. Et si

labascere illos videant, expetent sibi quisque tantum decus. Ne patere, ut aliis invidemus cum, quem habere ipsi possumus. Præceps occasio est: hoc tempus est, quo tu, quo similes tui probare virtutem suam possint. Cogitandum vobis, quotquot ad clavum Reip. in urbe ea sedetis, quotquot etiam alias Bataviæ urbes gubernant, spectare omnem Europam, quam fortiter pro justitia nitamini adversus eos, qui tantâ perviciaciâ heroem illum oppressum ire conantur. Mihi sanè, si quid in hac re virium esset, ostenderem non modo, quanti amicum (nam patriæ utilitas privatis est amicitii antehabenda, sed quanti justum & æquum fratrem. Tu Beverovici, pro viribus tuis, per te in urbe vestra, per alios quoque, urbibus aliis, depellere conare adversantium turbines, demereberis non me tantum, vel etiam maximum illum. & utriusque nostri amantissimum virum: sed quoque quidquid ubique est eorum, qui doctrinam virtutemque ament. Salutem tuo nomine seu dixi, seu scripsi, summo illi viro, cui ea longè gratissime fuit, ac vicissim salutari te ex animo jussit.

Amstelodami.

Tuus,

G. J. Vossius.

## CCXCVII.

Joanni Elichmanno, Ger. Jo. Vossius  
S. P.

SI tam meus essem, quam vellem, optime, & præstantissime Elichmanne, non sivilsem profecto, ut tu quoque accessio illis amicorum fieres, qui experimento suo didicere, quam tardus, nulla licet culpa mea, sim in respondendo literis amicorum, longè licet gratissimis semper, sæpe etiam caris adeo, ut auro contra caras non putarim. Hoc si persuasissim ( & non vano homini fidem habere te confido) diuturnum hoc silentium meum in optimam capies partem. Magnum mihi dolorem attulit, obitus Stapelii nostri, tum quia me fideli amico privatum, tum Theophrasti causa; cujus editio ut video, non ea erit, quæ illo superstite fuisset; sed ne infelicitè tamen exeat, curæ imprimis erit Clarissimo Corvino. A me hac parte, non ita multum præsidii erit, qui si cum Stapelio tuum magister, & tecum vestrisque similibus comparer, tantummodo, ut in veteri est proverbio, inter Apia verfer. Nempe non omnia

omnia possumus omnes. Te verò etiam & etiam rogo, ut ea ex Arabico, & aliunde perficias, quæ ornandæ editioni novæ facere possint. Ad libros quod attinet, quos commodato à te habuit ὁ μακρίτης, præstabo, ne quid tui distrahatur auctione publica, quæ futura circa ferias Paschales. Ut nunc reposcam, nescio an consultum putes. Intra hoc semestre, quantum jam extulere, qui pestilentia decesserit. Postremus intra hanc hebdomodem excessit. Vides ut nihil Podalirius, aut Machaon, nihil Hippocrates aut Galenus, adversus τὸ δεινὸν valeant. Si quid Salmatianum habuerit Stapelius, quod restitui oporteat, quæso tempori mone. Mihi res cordi erit, ne damno sit humanitas viri summa. Quem ego Leydæ redditum, sic gaudeo, ut non facile dixerim: sed scire aveo, quibus propediem, ingenii, doctrinæque fortibus, Illustrarem eam urbem, imo totam Bataviam potius, reddere cogitet illustriorem, indignantibus iis, qui virtutis viri, & doctrinæ se hostes, utcumque aliud videri volunt, abunde comprobant quotidie. Te quoque velim, tandem juris ea publici facere, quæ scio diu, ex Arabico, & aliis Orientis Linguis observasse, eruditissimis etiam hæcenus ignota: salutem plurimam dic viro, vel Heroi incomparabili Salmasio, ac familiæ ejus universæ. Utinam tempus videam, quo iterum Amstelodamum præsentia sua decoret: sed de isto, ipse occasione prima, ad eum scribam. Nunc propter frigus non ausim poscere, ut excurrat, cum conjuge: sed verna instat tempestas.

Amstelodami, clb Idc xxxvii.  
xviii. Martii.

## CCXCVIII.

Merico Casaubono, Ger. Jo. Vossius.  
S. P. D.

**S**I tu, uxor, liberi valetis, gaudeo; ego & tota familia mea valemus. Jam menses sunt quatuor quod recepi pecunias, quarum debitor in Septembrem superioris anni inciderat. Martio igitur anni hujus clb Idc xxx. septimi debitor ceperunt proventus sex mensium. Has spero jam à reverendo & amplissimo Questore acceperis. Feceris igitur rem gratissimam, si per Peisterum pro humanitate pristina ad nos procures. Rerum novarum quas operæ sit perscribere nihil hic habemus. Multorum urit animos ingens damnum, quod ab Dunkerkanis singulis prope hebdomadibus accipitur. Non difficile adeo sit huic malo indies

gliscenti obviam iri, nec tamen occurritur. Facilius ferretur, si merum esset infortunium: nunc latissima subest culpa: quæ penes quos resideat non est hujus loci disputare. Animi omnium hic valde sunt suspensi, expectatione Classis quam serenissimus Rex Carolus parat. Votumque prope omnium, ut ea Rex utatur ad reducendos in paternam ditio-nem Principes Palatinos serenissima Bohemæ Regina prognatos. Atque eo magis id optatur, quia ut novo etiam bello involvantur Austriaci magnopere Fœderatæ Belgicæ expediret. Solum metuitur ne cessetur, quia pace magis & magis florescant res Britannicæ. Claudius Salmasius, post biennii & ulterius in Galliis, moram, rediit Leydam equestri dignitate & consilarii titulo à Christianissimo Rege decoratus. Maimonides Dionytii mei τὸ μακρίτης excusus est, solâ præfatione exceptâ. Etiam liber primus operis mei de origine & progressu Idololatriæ jam est absolutus: proximaque hebdomada alterum auspicabitur Typographus. Intellexi jam prælum fervere Epistolis à Clarissimo Parente tuo exaratis. Excuditur hic Historia Danica Meursii. Cujus & opera cætera voluminibus certis distincta ejusdem Typographi industriâ prodibunt. Plurimum uxorem lectissimam salutat uxor mea, imo potius omnes mei tibi & tuis salutem adscribi jusserunt. Meo verò nomine præterea multa salute imperties Reverendum D. Decanum totumque nostrum fratrum Collegium.

Amstelodami, xii. Kal.  
Maii. S. N. Anni hujus clb Idc xxxvii.

## CCXCIX.

Claudio Salmasio S. P.

**C**UI has ad te literas dedi, is est Henricus Ernstius, vir optimus & candidissimus, Canonicus Widburgensis, juris antehac in Sorana Academia professor, ac ibidem clarissimi Johannis Meursii Collega. Is nunc in Gallias abit, Ephorus illustris & generosi Comitæ Woldemari filii Regis Daniæ ex nobilissima matre, ac quasi uxore Regis, quippe consentientibus regni proceribus adscita, præviis etiam Sacerdotis solemnibus, non tamen in regni spem liberos datura, sed honoris Comitaten-sis, vel similis. Nimium impar obstabat genus, quo minus legitimæ prorsus uxoris loco haberetur; etsi hoc contubernium proxime ad justum connubium accederet.



ret. Hoc igitur Ernstio cum filio regio ad vos eunte non potui committere, quin litterarum aliquid exararem, si non ob aliud, saltem ut reditum è Galliis gratularer, meumque testarer gaudium, quod cum lectissima conjuge ac liberis salvus ac sospes sis reversus. Id jamdiu à me factum oportuit; sed hebdomas aut amplius abierat, antequam de adventu cognoscerem; posteaque quia aliud magnopere quod scriberem nihil erat, malo meo more de die in diem differre cœpi, donec hæc se occasio offerret. In edendo opere meo de origine & progressu Idololatriæ pervenit Typographus jam ad librum secundum. Filius Gerardus notas & castigaciones scripsit in Publii Syri sententias. Eas cum variantibus Ernstii ante memorati Lectionibus in lucem dabit propediem. Antequam tamen excudantur, ad te mittet, quia ut intelligere ex te memini, cum MSS. sedulo contuleris, variaque observaris. Ea jam ante biennium liberaliter offerebas; sed puto satius, ut prius videas, quid sine Theſeo filius potuerit. Aveo scire quid potissimum nunc habeas sub manibus; sed hoc scribes cum ab aliis curis eris lassus. Nulli ego scribendi laborem imposuero, qui tantus sum ipse in scribendo cessator. Salutem à me & meis conjugii dico.

*Amstelodami, cIdo Ibc xxxvii.*  
xiii. Kal. Maias.

Per occupationes prope exciderat addere, quod solum poterat justum esse scribendi ad te argumentum, letari me plurimum, quod à Christianissimo Rege decoratus sis pro meritis tuis Equestri dignitate, & Consiliarii titulo. Ringantur invidi magis etiam solito, dum tibi tantus honos totique familiæ tuæ perpetuus bene vertat; quod Deum oro rogoque. Vale.

CCC.

Ger. Jo. Vossius, Franeisco Junio, *Fr.*  
*F. S. P. D.*

**T**Andem prodiiſſe in lucem vides, quæ de veterum pictura elaborasti; tardè profectò, sed pro more Blawiano, sat citò, si sat benè. Urgentibus nobis prælatus es, & meis, & Meursianis, & tot aliis. Non facile dixerim, quàm multis ejus Typographi prælum ferveat, Cosmographicis, vel Mathematicis imprimis. Adde quod nobis hoc datum, ut liber ille, etsi his quidem terris, paucorum

videretur hominum, tamen nullo tuo, vel periculo, vel sumptu excuderetur. Quocirca nihil pretii annumerabis, nisi pro exemplaribus, quæ deinceps voles transmitti. Hoc non dari solet alteri, nisi jam magnum sibi nomen in studiis compararit, & argumentum ad omnium sit palatum. At tuum tantum ad elegantiores pertinet; cæteri ferè spectant illa *αἰς τὴν ἀλφίᾱ*, nisi quod aliquis cuivis historiæ sit locus. Omnes enim narratiunculis capiuntur. Utinam autem singulorum capitum argumenta concinnasses, ut inde Index conficeret? Author sim ut deinceps, id fiat in iis, quæ sub manibus habes. Imo quid si chartæ, duo, tres, adjiciantur residuis, quæ hic sunt exemplaribus? In iis, & argumenta sint, & Index. Erit opera tua hoc pacto, & commendabilior, & utilior, simul addentur iis errata, quæ in posteriori parte observaris: sola prioris excudere non erat ex re. Nec fieri potuit, quia demùm ea accepi, exemplaribus quæ mihi compactis. Cum erudito juvene, (eo nempe cujus opera usus sum, in operis nostri Grammatici Indicibus conficiendis) multis egi, ut eandem operam præstare vellet in tuis; sed nihil effeci, etsi pretium liberaliter offerrem pro labore. Negabat se veteris picturæ intelligentem: nec qui argumentum operis non caperet, sufficere periochis, vel syllabis scribendis. Tum autem Theologicis, se magis capi, nec Grammatica, quia saltem caperet, fastidisse. De pictura autem, nec capere se, nec capi. Quæ scribo ut videas, hoc in te opus devolvi. Nam nec filii in se recipere audebant, cùm tua causâ maximè vellet cuius gratia omnia debent; sed humeris diffidebant; ac satius visum, si absque iis opus prodiret, quàm aliena incititia opus corrumperetur. Præfationem, priusquam ederetur, ostendi oratori Boswello. Longiorem ille aiebat, quàm ut unquam Rex esset lecturus. Itaque se authorem esse, ut inde duæ herent, ad serenissimum Regem una, ad lectorem altera; sed argumentum erat istiusmodi, ut commodo id præstari non posset. Tentatum enim à me. Remittere autem longioris res moræ fuisset. Facile menses duo abiissent. Quamobrem edita propemodum est, uti miseris. Deinceps cautiore in hac re esse licebit. Non dubito, quin brevi, cæteros de pictura labores tuos cogites divulgare. Præstabitur à me, & meis, (hic si edi visum) quidquid possimus. Nulla hæctenus editi operis tui exemplaria sunt distracta; nec dividentur priusquam te exemplar serenissimo Regi tradidisse cognoro. Tui verò officii erit simulac acciperis exemplaria, me commonefacere, ne nimia morâ, damno sumus Typographo. Misere me Prudentiæ; sed

sed magis dolet, propter eum, qui ducendo illam, sic se, suosque afflixit. Adhuc sudandum hic in exsolvendo ære alieno quod contraxit. Unum solatur, quod qui ex Indiis veniunt, aiunt bene rem gerere, & spem esse summam maximi honoris, quem si consequatur, rem facere possit honeste, & ex voto suo, nostroque. Prudentia scio, exoptat, eum quamprimum reverti: Sed stultè profectò, nec nomini suo convenienter. Quid aliud enim exspectaremus, quàm ut liberos gignerent, in spem ciurionis? ut nihil gravius dicam. Scis quippe quanta mala, penuriam sæpe consequantur. Itaque valde me perculit, quod nec *Æras* seipsam possit alere. Egestas sæpè malefuada sexui isti, imo & firmiori esse solet. Prudentia interim in hac prudentia adjutanda opus. Iniquè enim uni omnia insumam, quali obesse fratribus debeat, quod recta ad virtutem via grassentur. Tum quid de filiabus dicam? Nunquamne illarum mihi curam suscipere licebit? Semperne comedar sic, ut nequeam frugaliter aliquid comparcere, quod eas pro dote si detur, magis reddat commendabiles? Quid si brevi Deus evocet me ex hac vita? Quid matri fieret viduæ, si magnopere oneri meo sit Britannia, & quod præstaret relinqui meæ, hoc profundatur alio? Quamobrem multum esse non debet, quod eroges, si quid omnino erogandum, urgente necessitate, judicabis. Sed de isto scribam diligentius, simulac literas à marito accepero, ex quibus intelligam, rem augere, ac solum mutuo dari, quod annumerandum, sed tuo quasi nomine putabit. Interea exiguo sit contenta, deque cætero, corpusculum animo, animum hac spe sustentet, brevi fore melius, ubi fortuna (si loqui sic licet) maritum planè inauraverit. Plurimum à me, & sorore tua, optima mea conjuge, Francisco item meo, non exigui nominis inter Hagenfes Advocato, cæterisque liberis meis salve.

*Amstelodami, c. 10 Id. c. xxxvii.*  
xiii. Kal. Mai. S. N.

CCCL.

*Illustri viro, Hugoni Grotio, Ger. Jo. Vossius S. P. D.*

**Q**UI hæc ad te literas defert, is Henricus Ernstius est, multum mihi amicus, ob eruditionem, & amorem illum quo doctos omnes prosequitur, longèque acceptior, ob eximiam animi integritatem, summumque

candorem. Fuit is in Academia Sorana, ubi jus est professus, Meurtii nostri Collega. Sed serenissimus Daniæ Rex, maxima probitate viri intellecta, voluit eum esse Ephorum filii sui, Illustris Comitis Woldemari. Est is natus ex matre admodum nobili, quamque Rex prope uxoris habuerit loco. Nam, & contentientibus eam Regni proceribus adscivit, & sacerdotali interventu, conditioneque illa, ut nascituri, Comitum essent titulo insignes; cum ex legitima uxore prognati, in spem Regni educuntur, & mox ducum titulo gaudeant. Sed de istis, si voles, plenius omnia cognosces, ex Ephoro, qui gratissimum fore aiebat, si per ipsum potissimum aliquid ad te mitterem literarum. Hanc ego scribendi occasionem eo avidius sum amplexus, quia jamdiu officium neglexi, & Arlandervenæ Dominus Guilhelmus Noomsius, interpellare non cessat, de alteris ad te literis exarandis, quibus nomine ejus rogem, ut ne gravatè onus illud procurandæ ei equestris dignitatis decus, suscipere in te digneris. Multos ego id menses facere neglexi, tantùm quia putarem, non admodum te capi negotiis hujuscemodi, & probè meminissim jam antea te authorem fuisse, ut potius hoc exposceret à foederatæ Belgicæ Legato, necessario, ac propinquo suo. Aiebat noster, nec sibi ista excidisse: sed non libenter ei in ulla re obnoxium fore: eo ad te itasse, & quia superioribus literis scripsisses, si opera illius propinqui sui uteretur, & tua quoque commendatione opus videretur, non illi à te amici hominis officium defore: eo affectum se tuum sibi ulterius etiam polliceri, in tantum, ut citra illius operam, quam nolit, haud gravatè id honori ejus sis præstaturus. Addebatur quoque rem te facturum, non ipsi modo longè acceptissimam; sed etiam amicis cæteris, præcipuè avunculis duobus, Domino ab Oithoorn, & Consulari Geeloinckio, nunc urbis Quæstori. Et verum dicere scio; cum singulari eum amore complectantur. Nec sanè ulli gravis vivit, comis, & humanus omnibus, etiam Gravæ familiæ peramicus; sic ut mutæ etiam sint vocationes. Eo facilius confido, si absque incommodo tuo possis, hanc suscipies cogitationem; sin aliis item denegar, vel aliud sit quod impediatur, tribus id verbis perscribes; si non ob aliud, saltem ne hoc scribendi officium, vel amicissimo homini, vel familiæ ejus videar negligentius egisse. Cætera ex alteris literis cognosces, quas Hagam misi, ut per Tabellarium citius perferantur. Nam de Ernstio metui, ne in via moram trahat. Is inter alia, hoc quoque Noomsianum negotium complector; ut celerius habeam, aliquid de mente tua polliceri,

Q. 9

ceni,

ceri, vel si id fieri commodè non possit, aliam insistant viam, ad quam scio non defore ei consilium tuum. Illustri Conjugi tuæ & familiæ univ[er]sæ, ego, uxor liberi, plurimam dicimus salutem.

*Amstelodami* c[on]s[il]o Id[us] xxxvii.  
Prid. Kal. Maias, St. N.

## CCCII.

Joanni Elichmanno.

Clarissime, & Amicissime Elichmanne,  
**P**AULUM hæsi, utrum hoc tempore, filium ad te mittere expediret. Et, me dubio, magis animi anceps uxor erat. Credo aliquid inaudieris, de infesto unius, & alterius animo, erga me, meosque. Mihi propterea animus non est, deferere virtutem. Ero qui fui, utcumque illi sint, qui fuere semper. Bene merendo de publico, simul etiam de ipsis, modo occasio sit, nos ulciscemur. Nec alia animus vindicta uti. Majora exuperavi. Nec ut spero nimia istæc semper lenitas abalienabit à me viros bonos; quales non paucos habet Academia vestra. Atque ut ego aliter fuisset animatus, Isaacus meus sic ardet Arabicæ Linguæ amore, ut difficile esset diutius detinere. Hunc igitur quasi de manu, in manum trado. Poterit is uno alteroque mense, opera tua uti, & præstantissimi Golii, cujus ego, ut doctrinam, sic virtutem, tot jam annos sum expertus. Omnia mihi de illo polliceor. Atque ut ille fortassis, diebus Canicularibus domo, tu, qui abesse æque ab urbe nequis, filio multorum instar eris. Pluribus nihil nunc opus, quia pro literis uberioribus, ipse filius erit viva Epistola. Magno Salmasio, quem nemo unquam satis existimaverit, plurimam salutem dices. Optimo item, doctissimoque Golio nostro. Hoc tempore non onerabo pluribus, quia filio id negotii dedi.

*Amstelodami,*  
c[on]s[il]o Id[us] xxxvii.  
xvi. Kal. Quin-  
ctiles:

*Tuus totus,*  
Ger. Jo. Vossius.

Quibus Athenis olim *μετοικισα*, in memoriam, quod cives tum sedes suas mutassent. Nempe ut vides, eopse die, quo & meus domicilium mutat. Sed ut spero, ad breve tempus, ne oneri simus, quanquam parati pariter omnia agere, in tuæ spem gratiæ.

## CCCIII.

Guilielmo Archiepiscopo Cantuariensi.

Reverende in Christo Pater, Domine illustrissime,

**E**Xegi jam annum tertium supra sexagesimum, quem climactera antiquitas dixit, ac facile negavit abire sine animi & corporis offensione. Mihi quidem cœpit à febris permolesta; mox consequebantur morbus Colicus & Nephritis; à quibus hætenus semper fueram immunis. Aliquantisper hisce malis liberatus, amitto filiam unicam, & naturæ dotibus egregiam, & linguarum artiumque studiis excultam. Nec multo post Deus ad se vocat Filium meum Gerardum, quem ego tanquam oculos, vel si quid his carius, amabam. Ingenium doctrinaque elucet ex castigationibus in Velleium jam editis. Ac propediem ejus Emendationes in Valerium Flaccum & Censorinum videbunt lucem. Extremo quem dixi anno morbus me invasit articularis, & quem magis metuo, magnus corporis languor. Nec is in totum remisit; videor tamen paulatim mihi vires recuperare. In opere de Religione Gentili & Phylice Christiana pauca solum folia supersunt. In priori argumento Deos omnes, qui vel homines fuerint, vel pars aliqua hujus compagis naturalis. In posteriori, excussi omnia de Cœlo, Elementis, Meteoris, Homine, Quadrupedibus, Avibus, Piscibus, Serpentibus, Insectis. Visum hic sistere; jam enim libri sunt quatuor fatis grandes, qui duos Tomos constituent. Nec tamen jam ante menses duos juris publici fieri poterint, quia indices erunt concinnandi, & Typographus meus aliis distinctur. Opera interim à me dabitur, ut quam citissime possim, tam diu promissa debitaque exsolvam. Multa antea de me retuli quæ non mediocriter me retardarunt, tum in Opere dicto ad umbilicum producendo, tum sæpius ut officium meum erat, Reverendissimam Dignitatem tuam literis meis compellando. Sed ad mala alia accessit perpetua anxietas sollicitudo de rebus Scoticis. Novi ego mores & animos eorum, & ut quicquid possint, aulint, quibus in Sententiis & Ritibus Ecclesiæ novella omnia magis quam antiqua placent. Tum autem justus mihi metus est, ne in Anglia etiam, quos simile Sydus afflavit, nunc rebus suis desint hac occasione, nec vel his, vel istis, flabella in oris decurrat exteris: Alii quidem solius sectæ amore, alii vero, quia interesse sua existimant diutius & infringi vires Regni tam potentis florentisque. Eo impensius Deum Opt. Maximum oro quotidie,



tidie, ut Serenissimum Regem Carolum Regum, qui hodie vivunt, optimum, prudentiæ & fortitudinis spiritu firmet, omniaque A-chitopheli consilia dissipet. Te quoque Illustrissime Domine, & quod majus duco, Ecclesiæ Catholicæ Antistes Reverendissime, precibus meis supremo numini commendo; quo porro vitam diutissime sospitem ducas, præclareque de Ecclesia Dei, ut paratissimus es, in potterum etiam annis plurimis mereare.

*Amstelodami,*  
clb lxc xxxvii.  
Id. Maias.

*Reverendissime & Illustrissime dignitatis tuæ Cultor devotissimus,*

G. J. Vossius.

Amplissimus Missfelden, qui ante annum vel ultra, Regii negotii ergo huc missus fuit, de Reverendissimo nomine tuo hic semper est locutus, & omni ubique sermone melioribus se addictum partibus ostendit. Id autem volupe mihi admodum fuit, & perscribere antè volui, sed impediunt morbi & tot adversa. Iterum vale, magnum Ecclesiæ columnen, Præsul eminentissime.

#### CCCIV.

Baltazari Willio, *S. Theol. & Philos.*  
*Doctori S. P.* Bremam.

Quamquam quod scriberem nihil erat, non ingratum tamen fore putavi; si vel hoc ipsum potius scriberem, quam in silentio perliterem. Non semel à te literas accepi; sed existimavi, belle me satisfactorum amicis, qui vitam, & occupationes meas nossent, si eorum gratia facerem, quidquid possem. Itaque quem commendatum isti, juveni qua parte potui, plura etiam facturus, in tuæ, Collegarumque spem gratiæ. De literis verò non disitear, si scribendæ illæ solum sint, affectus testandi ergo, non item, quod grave aliquod negotium urgeat, tardiorum ea parte quam ego sim, me nosse neminem. Atque hoc facile concedunt, qui sciunt, quam à mane ad vesperum distringar. Nec aliud in causa est, cur tam multa, quæ in lucem exire amici expectant (quippe quæ confecta jam sint, vel affecta) nihilominus cum blattis, & tineis rixari sinam. Spero interim summum, intra menses quatuor, opus meum, de cultu Gentium Idololatriæ prodire posse. Eo multa etiam complectar, quæ scripturis faciant illustrandis. Vale optime, doctissimæque Willii, ac sic tibi persuade, nunquam

fore, ut candidum illud Willii mei pectus, pectore excidat meo. Salutem plurimam, meo nomine, dicito clarissimis & præstantissimis Theologis, Crocio, Bergioque: quos amare, & æstimare, nemo satis possit, nisi qui nesciat, quanti reformatarum hodie Ecclesiarum interlit, ut controversiæ, quibus scindimur, mansueto potius Christi spiritu dirimantur, quam illo, qui nunc sic in plurimis dominatur. Etiam salute imperties doctissimum Parentem tuum, si vitali, ut spero, aura fruatur. Transit hanc urbem, ante mensem, vel amplius, Doctor Cabeliavius, ac compellatum me voluit: sed domi non eram. Nunc utrum in Batavia sit, an ad vos reversus fuerit, juxta cum ignarissimis scio. Iterum vale.

*Amstelodami,*  
clb lxc xxxvii.  
xiv. Kal. Quin-  
til.

*Tuus,*

G. J. Vossius.

#### CCCV.

Hugoni Grotio. Lutetiam Paris.

Illustrissime Domine,

QUI has ad te defert, est Joannes Mulenius, natione Danus, vir si alius, integra, & inculpata vitæ, eoque proceribus suæ gentis gratior, & acceptior; in his Illustrissimo Rosckransio, cujus non degenerem filium, cura sua dum Lugduni ageret, quod ante biennium, vel ultra fuit, doctrina longè reddidit auctiorem. Notus mihi, atque adeo amicus, pene est à septennio, ut eo fidentius de illo judicium feram. Nunc aliorum adolescentum studiis præest, sed itidem è primaria nobilitate Danica. Is impensè ardebat desiderio videndi, & compellendi tui; atque ad eam rem, putabat utiles sibi fore literas ad te meas. Morem gessi libens; quia gaudebam mihi sic satis in scribendo, sed nulla mea culpa, negligenti quodammodo necessitatem imponi aliquid exarandi. Et interea quid scripturus sim vix scio. Nam publica tibi in ea dignitate constituto, aliunde melius, certiusque innotescunt. Quale inter alia, utres nostræ maritimæ propemodum pessum cant: non sine magna indignatione multorum, non eorum modo, qui hunc fructum putant mutatæ ante annos quasi duodeviginti Reipublicæ; sed aliorum etiam, qui quotidiana propè damna sua deplorant, & in facili remedio dolent negligi illud, ac mirabiliter, in cessationis

Qq 2

tionis ejus causas inquirunt. Nova officina Typographica Blauwii, quam sumptibus maximis adornat jamdiu, videtur intra sexquimensem, vel circiter ad finem posse perducī. Etiam Græcos characteres, quorum penuria hætenus laboravit, indices Francofurto expectat. Emisse constat. Atque ait, quod hætenus in Meurlanis cessarit, uni istī Græcanicorum Typorum defectui debere adscribi. Quod non excuderit historiam ejus Danicam, jam ante annum transmissam, eo excusat, quod bello hoc Germanico Suecico, non habuerit chartas, ex animi sui sententia. Interim ringit Meursius, sic se quinquennio habitum ludibrio. Ubi Francofurtenses typi advenierint, specimen transmittam, ac de excudendis tuis porro exquiram. Nunc si quid certi in re spondeam incerta, metuo ne toties deceptus, falsus fallam te, & alios qui tantopere tua flagitant. Heinsius in sacris exercitationibus, jam ad Lucam devenit. Ac quo operi huic melius vacet, impetravit ab Amplissimis Curatoribus, ut aliquandiu non doceat publicē. Nobis non licet esse tam beatis; quibus quina de hebdomade Acroases incumbunt. Utrum vero elaboratiora daturus sit, non nisi post menses sex septem judicium fieri poterit. Nam severa adeo lege interdixit, ne excusorum cuiquam videndi fiat potestas, ut hætenus, non nisi Philyrum, adjutante amico, viderim. Sed alius est, *ὁ πατήρ*, qui plura conspexit. Is negat, tanti esse quam jactitat. Utcunque est, hoc unum scio, cum in hoc sacro studio planē *ἐμψυχοῦμαι*, nec satis ab aliis quibusdam studiis instructum, neutiquam daturum, quæ tuis pectus comparari. Quamobrem nihil æque desidero, quam ut divini, in divino hoc argumento labores tui, aliquando, vel apud nos, vel ubicunque videant lucem. Opus nostrum de Idololatria Gentium, vix intra menses quatuor poterit absolvi. Ita dies totos distrahor. Et simul aliqua hic culpa est nostra, dum manum nescimus de tabula tollere. Heroicæ conjugī tuæ salutem à nobis omnibus: Etiam liberis, inque iis, ornatissimo juveni Petro tuo, modo is jam ad vos redierit.

Amstelodami,  
clō Idc xxxvii.  
vi. Idus Quin-  
tilies.

Tuus totus,

G. J. Vossius.

CCCVI.

Joachimo Borgefio, Ger. Jo. Vossius  
S. P.

**E**TSI variè ut soleo distingerer, Doctissime Borgefi, minimè tamen committendum putavi, ut Junia mea, sine meis ad vos, literis rediret. Præsertim cum tuis tanto ante tempore scriptis, necdum responderim. Et tu interea de soceri mei nepote, uxore, & liberis meis, acutè adeo sanguine conjuncto, benè mereri non cesses; majoraque etiam deinceps expectemus, postquam primam ille in classē adscitus, ab tui unius ore pendebit. Puer agilis est, & an omni ingenii. Sed ætatem nostræ ceream prorsus in vitium flecti. Tanto studiosius adlaborandum nobis, ne corruptis adeo temporibus alius fiat quam vellemus. Quod quidem non modo illi, matri, familiæ toti, etiam *πρὸς πατέρα*, patri, avoque: sed universæ Ecclesiæ Dei, contumeliosum foret, in qua magnus avus, longè latèque, adeo virtutis, doctrinæque suæ radios sparsit. In partibus adversis, hoc Ithacus velit, & magni mercentur Atridæ. Quod cum juxta mecum pervideas, nihil necesse puto, pluribus tibi eum commendare. Malim ego, si meus magister forem, nec si momentis penè singulis avocarer, paulūm adtexere de studiis nostris, quæ pertinent vel ad sacram, vel externam historiam. Nam & te omnigena sic historia capit à multis retro annis, ut qui propius norint, dignissimum censeant, qui in Academicis spatiis, de lumine tuo lumen accendas juventuti. Ecce cogitandum tibi, quomodo optimè aliquo ingenii doctrinæque monumento, conceptam de te opinionem foveas, atque augeas. In Baronianis spissè mihi negotium procedit. Sed jam excusa dimidia pars operis nostri, de Gentilis Idololatriæ origine & progressu. Quo in opere multa etiam sacris illustrandis intercurrent: Francisci Junii, Fra. F. Discipuli tui Patruī, opusculum de pictura bene eruditum, ad te mitto. Gratum fore confido. Vale.

Amstelodami,  
clō Idc xxxvii.  
Non. Jun.

CCCVII.

CCCVII.

*Illustrissimo Jo. Skytte.*

**I**llustrissime Domine, post excessum optimi & eruditissimi Dionysii mei, qui totum se tum Deo, & studiis, tum inclytæ familiæ vestræ, atque adeo universæ Sueciæ regno devoverat, nihil æque mihi triste accidit, ac nuncius de obitu generosissimi Filii tui Joannis Skyttii, à cujus præclaris virtutibus cum maxima quæque expectaremus, diuturna etiam optaremus. In flore cum ætatis eripuit terris summus imperator, qui cuique stationis suæ tempus adsignavit. In hoc tamen dolore non mediocri solatio mihi fuit, quod pulchram animam (nec melius poterat) patriæ & causæ quam Deus probaret, impendit. Eoque nomine ab nostris etiam hominibus, ubi occasio se obtulerit (sit autem hoc sæpius) maxima cum laude memorari solet. Quod si Filium Matthæum, uti nunc totus est in temporibus Bataviæ antiquis, etiam, uti propositum habet, recentia describere tempora Deus permittet, neutiquam ejus historia eximias nobilissimi juvenis laudes conticecet. Quod enim majus historiæ decus, quam quod si promeritum cuique decus rependat? Ac vel me auctore idem his & aliis locis, facient alii, quibus pariter animus est res hujus temporis ad posteriores propagare. Res nostræ mari non optime procedunt, culpa pianè nostra: qui verò in vitio sint, varii varie dissertant. Mihi non animus est movere hanc odii plenissimam Camarinam. Illustrissimus Arasulionentium Princeps sic militem Breda cinxit, ut solvendæ impar videatur hostilis exercitus. Galli in eo esse dicuntur, ut obsidione cingant Grevelingam in Flandria, quod si feliciter successerit, multum terris hisce commodabit. Ad privata quod attinet, uxor carissima, lectulo adlixa plane de valetudine etiam medicis judicio periclitatur. Absque quo esset, juvaret pluribus colloqui. Pauca tamen ista non potui non scribere, redeunte ad vos nobilissimo juvene Joan. Skytte. Quem ego sic amo ut paucos. Itaque avellor invitus. Sic sane apud nos se gessit ut exemplo esse possit. Nihil ejus moribus amabilius, nec finitri quicquam de eo ad me meorumve aures pervenit. Plane etiam confido fore, ut sese probet abunde & variarum linguarum & historiæ omnigenæ & aliorum notitia, quæ sic natum ornet juvenique. Salve Illustrissime Domine, cum Heroïna conjuge, & ad maxima natis liberis optimis ac dulcissimis, quorum mihi amor durabit,

dum memor ipse mei, dum spiritus hos regit artus.

*Amstelodami, clb lxxvii.*

Prid. Kal. Sextil.

CCCVIII.

Hugoni Grotio S. P.

**R**edit ad vos, Illustrissime Domine, Filius Petrus Grotius juvenis, magnis animi dotibus, & quod ego in illo ingenio, illaque pro ætate doctrina palmarium censeo, moribus modestis, optimèque compositis. Quos quia paterno haustos exemplo, altos vero, à noverca tua injusta, necdum tamen viris bonis penitus exhausta, in Galliam secum adferet; nihil æque tecum optabo, quam ut ne illos eā terrā, bonis malisque foecunda, adolescentiæ, satis per se lubricæ, insidiatrice, uti in discipulorum non paucis comperi, immutari, ac corrumpi contingat. A quo tamen nihil verendum, quamdiu filius maiorum fugere consortium, & animum rebus agendis, vel studiis occupare perget. Hactenus quidem in urbe nostra, & aliis, optimè apud optimum quemque audit. Ipso hoc eunte ad vos, de rebus meis pauciora scribam. Futurus ille pro viva Epistola; unde etiam ut plenius, ita jucundius omnia cognosces. Salmasii uxor auxit maritum prole femella. Excuditur ejus liber de re funebri. De Noomtio curæ fore spero, eo magis, quia gratus, acceptusque non suis modò, sed illis etiam, quibus minimè existimes. *Οἷός γ' ἔτι τὴν ἐνθάδ' ἐξ ἡμῶν ἔχει παρὰ τὸν κτ' ἡμευδὲν* ut mittam cætera. Sin invitus illiusmodi rebus impliceris, vel majoribus intentus, in tantillis debere ulli Gallorum nobis: proximum est, ut consilio juves. Malit ille per te fieri, nec causam ejus rei video. De Legato nostro quod ante biennium monueras; afferebat causas cur ei debere nollet. Hæc ego urgente Arlanderveniæ Domino gnaris avunculis iterum perscripti. Sed si id nonnisi incommodo aliquo tuo confieri possit, ubi ego resciero, ita rem tractabo, ut nulla offensæ occasio sit. Mentibus proximis, libelli aliquot famoti sparsi fuerunt, imò palam divenditi; Alii adversus Consularem Oertgens Dominum à Waveren, ob affectatum Dominium Æmelandiz: alii autem contra Collegam meum Barlaam, quod Manassis Judæi opusculo de creatione carmen præposuisset, quo pietatem etiam agnosceret in homine Judæo, Deoque etiam servire fateretur. Nec libellis traduxisse



duxisse horribiliter suffecit. Editus nunc adversus cum, à Vedelio Theologiæ apud Daventrienses Professore, liber cum hac inscriptione, de Deo Synagogæ: summa ut intelligo eo redit, Deum negari ab illis, qui Christum nesciunt, imo blasphemant. Uxori à mea, liberis item à me is salutem.

*Amstelodami,*  
clō bc xxxvii.  
13. Jul.

*Tuus ut suus,*

G. J. Vossius.

CCCIX.

Joanni Meursio.

**M**ensis & ultra quod Mercator Danus tuas mihi literas attulit longe, ut semper, gratissimas. Receperat ille se ante abiturum suum ad me reversurum, ne sine responsio abiret. Sed neglexit non sine aliquo dolore meo. Decreram affectu testari, horulam cum eo comburendo, luculentiori id prandio facturus tui causa, nisi obstetisset valetudo uxoris quæ jam sextam hebdomadam vix cubiculo egreditur. Sed Daventrienli hoc an Zwollano juvene ad vos abeunte meque sponte compellante, nefas erat tam commodam negligere scribendi occasionem. Unde autem potius ordiar quam à monumentis tuis? de quibus quid factum sit scio aves nosse. Equidem Blauwium domi meæ intra tres menses non nisi hac hebdomade vidi. Aiebat se pudore solo deterritum, quo minus me inviseret. Et credo quod me visente illum domi esse negaretur, non aliunde esse quam ab eadem causa. Non posses acrius cum eo exposulare quam decies à me factum. Recensebam illi seriem scriptorum *ἀνεδέται*, unde colligere jussi cum multa à te adeo jam habeat viris magnis dicata, & ista si edidisset longe plura fuerit habiturus, an non vel bis mille Carolæorum damno te mulctarit. Attonitus ad hæc consistit ut iniquæ mentis asellus, nec habet quod opponat. Fatetur rem ingenue. Solum ait large primitus se promississe, sed postea multa intercessisse quæ hoc quod receperat redderent *ἀδυνατον*. Se uxorem duxisse. Patrem cujus folius quodammodo res agebatur transegisse interim cum liberis. Diu expectatum fratrem tandem ex Italiâ reducem factum. Hac demum hebdomade Typographiam cum operis omnibus in alteram urbis partem translata, pluresque operas, & quod caput est, toto de quibus laboratum est triennio, typos operibus tuis accommodatos Francosurto esse advectos. Nihil in his mentitur.

Sed largiter peccatum, quod tam facile promiserit, quæ præstare non posset. Dolet quod non aliqua saltem in Dania tam longo temporis spatio anticiparis. Sed quis adeo spiritum hoc fore negotium existimasset? Tu ede etus malo indicium feci illustrissimo Grotio. Sed idem cum sua ab eo excudi, quam alio malit, negat tamen transmissurum aliquid nisi prius fide data de certo temporis spatio intra quod singula lucem sint visura, convenierit. Itaque nihil Grotianum habet, sed translatis jam omnibus in decem longe majorem, & operis magis affluentem, decretum ad eum quamprimum scribere de tempore quo absolvere omnia ejus possit. Est in his *ἀνθολογία* ex Pall. codd. auctor Latinis versibus reddita, & notis & castigationibus commendatior. Opus nostrum de Idololatria gentium tardius processit quam vellem. Deinceps omnia meliora non spero: sed confido. Nec tamen ante quartum mensem lucem videbit, nempe sub manibus præter opinionem mirum in modum crescit. Mitto ad te, quia meum nihil possum, opus affinis mei Junii de Pictura veterum. Brevi Scylacem videbis Filii Isaaci, ut & alteri Filii mei Gerardi Velleium Paterculum. Forte & Matthæi mei partem alteram annalium Batavico-rum. Dum Arausionensium princeps Bredam obsidet, Vinloniam & Ruremondam amissimus. Nec existimatur ante menses duos potiri nos Breda posse. Scis quam urbs sit natura & arte munita. Atque utinam ne interea tertio oppido excidamus. Neque enim Cardinalem Hispanum cessare existimandum. Vale optime max. amice, & cum uxore ac liberis à me & meis omnibus salve. Collegis item doctissimis salutem impertias.

*Amstelodami,*  
clō bc xxxvii.  
x. Septemb.

*Tuus æternum,*

G. J. Vossius.

CCCX.

Joanni Friderico Gronovio S. P.

**S**Cire desidero, Doctissime Gronovi, an quos Nonis Quinctilibus, Sall. cod. Manuscriptos, cum editione Coleri transmisseram, acceperis. Tum autem an *ὁ παῖς* Salmasius jam sese in viam dederit, vel quando tantopere expectatum affore speretur. Equidem etli valde lentus in scribendo sum, siue naturæ vitio, siue obrutus nimis multis, quibus ferendo non sum; tamen nisi hæc mea opinio semper fuisset affore propediem, non distulisset

stuliffem tamdiu scribere. Quod verò ad te scribam, credo non mediocriter miraris. Sed in causa est juvenis quispiam, Condiscipulus Bremæ tuus, Berchemius, ex Anglia redux. Non dubito quin te, ac ornatissimum Heilderfichium Hagæ compellarit. Is quo parentem, ut ait, sumptibus leve, desiderat, ut ab aliquo in ædes receptus, studiis liberorum prælit. Scis quam gravatè id fieri soleat, nisi de moribus juvenis benè constiterit, imo & de parentibus, ut si quid peccetur, sit compellendi eos jus, vel saltem ex parentum virtute, qualecumque de juvene fiat judicium. At ille sine utriusque vestri literis, ad me venit. Rogo igitur vel uterque, vel alteruter, altero subscribente, certiorum me faciatis, de parente, & juvene ipso: ut melius dispiciam, an commendatione etiam mea dignus sit. Dubito num parens sit Ludimagister, an Pastor, an utroque munere fungatur. Vestrum judicium, quorum mihi ut doctrina, ita virtus est perspectissima, multum ponderis addet præfenti negotio. Sed festinato paulum opus erit, ne aliena alius commendatione prævertat. Quid variis tuis fit? Quid iis quæ tam foeliciter ad Sylvas Papinianas meditatus es? Mihi quidem hæc cessatio est permolesta: vel eo nomine, quia nomini incommodat tuo. Plurimum saluta summum virum Rivetum, & insignem Grafwinkellii animam, cum amico communi Heilderfichio.

*Amstelodami,*  
iv. Kal. Sept.

*Tuus,*

G. J. Vossius

### CCCXI.

Merico Casaubono.

Reverende & Clarissime Casaubone,

**A**Ccepi quinquaginta libras sterlingas, quæ debitæ extremo Martio Anni hujus Millefimi sexcentefimi trigefimi septimi, itaque nunc desidero id quod expiravit Septembri septimo, eo magis quia ut ex tuis literis intelligo, nulla in te mora erit, simulac meas receperis. Cæterum amici talium intelligentes, auctores mihi sunt, ut ne viam inistam, quam soleo Leydæ, sed potius utar Angli opera, quod in Emporio hoc inclyto facile est. Eum simulac Præbendæ id quod debetur annumerari posse cognovit, hic mihi, imo vel ante, dummodo de voluntate D. Quæstoris constiterit, numerare velle. Atque ita

jam actum. Quamobrem rogo ut ubi literas meas acceperis, Mercatori satisfiat. Sic nihil opus erit deinceps, quam ut per Mercatorem ad te vel Rev. D. Quæstorem, vel utrumque literas dem. quibus vos, tum de vita mea, tum de priori pecunia accepta faciam certiores. Cui numeranda sit pecunia, liquebit ex subscriptione libelli Anglici: ea subscriptio paulo ambitiosior præter morem meum, ut magis idem tacerem, dum muneris mentionem facio, quod quod sustineo nihil mercatoris fraudis latere. Filius meus Johannes rato excessit apud Indos, ubi magnas dignitates, & unde præclarè rem facere posset, non modo sibi ipse promittebat, sed etiam Magnates nostri illi addicebant. Sed tam beato esse non licuit, si in talibus etiam beatitas ponenda homini Christiano. Magnæ erant filii laudes, excepto quod sumptuosius viveret, ac fortunam ejus deceret. Itaque hoc non parum mihi dolori fuit. Solatur interea, quod piè ut intelligo excesserit. Ex opere nostro de Idololatria excusæ jam ut loquuntur quaterniones septuaginta. Spero propediem typis mandatam iri alteram Annalium Batavicornum partem, quam scripsit Filius Matthæus. Isaacus meus dabit Scylacem & alios Geographos Græcos seridè à se castigatos. Velleium autem innumeris locis emendatum filiorum minimus mihi cognominis. Nihil verò tam cito prodierit, quin transmittam. De Breda ab Arausionensium principe capta, scio jamdudum esse quod intellexeris. Non parum inde securitatis Batavis, & Zelandis accessit. Salutem uxori lectissimæ, tum autem Reverendissimis Dominis Decano, quæstori & universis fratribus meis, à quibus me amari maxime cupio, operamque dabo, ut ne affectus mei ignara sit posteritas.

*Amstelodami,*  
cl. bc xxxvii.  
xxi. Octob.

### CCCXII.

Hugoni Grotio. Lutetiam Paris.

Illustrissime Domine,

**Q**Uas nono Julii scripseras, eas demum ix. Octobris accepi à Wander-Burgio. Tantæ moræ causa est, quod eas literas, cum erudito Philolai opere ciſtæ suæ incluſerat: Nauta autem Rhotomagensis, cui hanc commiserat, tam fero appulerit. Hesternò die Hortensio legendum Philolaum dedi: qui valde

valde eo capitur. Ac Blauwius excudere est paratissimus. Idem excudere avet *Ανθολογίαν* tuam, sed conditione hac, si placeant Typi, quibus usus in tuo de Jure Belli: majores enim non habet. Maimonides filii *ἡσ μαχαίρα*, post mensem ut spero editus erit. Excudentur & nostra, de origine ac progressu Idololatriæ. Ringitur Meursius, quod post triennii moram, necdum sua orlus sit Blauwius. Profsus ei injurius est: si non alio nomine, saltem inedita tot retinet, eumque frustratur pretio, quod à magnatibus in Dania ex dedicatione rediret. Salmasius necdum reversus; sed ex Riveto intelligo propediem affore. Aliud metueram; sed gaudeo, quod nolit illis gratificari, qui in Galliis remansurum sperarant. In filio tuo, nihil, vel nos, vel alius, hic desiderat quicquam. Lues quæ superiori anno, plus minus duodeviginti millibus Leidæ absumpsit, vehementer satis Harlemi hoc anno grassata; minus urbe nostra; sic tamen, ut ante mensem unum alterum de hebdomade tolleretur supra sexcentos: nunc longè remisit, siquidem intra idem spatium, intra trecentos amittimus. Heinsius, ut specimen ostenderet observationum suarum in Novi Instrumenti libros, phillyram excudi curavit: sed nondum contigit videre; nec super eo laboro. Subinde fallor: sed vix arbitror illud hic fore. Jam sexennium est, quod paratum sese diceret ad editionem; si est qui fuit, non intra alterum sexennium id erit. Præclarum est ingenium, sed à majoribus studiis, ad tantam rem non satis paratum; sed ipse viderit. Nihil mihi hic feritur, aut metitur. Minus malignus esset; amore esset dignissimus utriusque nostri. De iis, quæ ad Rempub. hanc pertinent, quid scribam? Aliunde illa melius, potissimum ex Affine Reigersbergio cognosces. Illustrissimæ Dominiæ conjugii tuæ, salutem à me, & meis, uti & optimis liberis.

*Amstelodami,*  
Prid. Kal.  
Novemb.

*Illustri nomini tuo*  
*addicissimus,*

G. J. Vossius.

CCCXVI.

Georgio Slupeschio Baroni.

Illustris Domine,

**M**agnam mihi voluptatem attulerunt literæ tuæ, quas cum legerem, visus sum mihi coram loquentem audire. Et pondus etiam attulit quod de manu in manum traderentur ab lectissimo juvene fratre tuo Floriano: qui quod cum cæteris virtutibus conjungere cupit scientiam militarem facit & se & genere suo condignam. Quod autem cum apud exteros morari vellet, castra prætulit Arausionensium Principis, facile non Batavis modo, sed cordatis omnibus suum est judicium probaturus. Utinam vero ulla in re, quam petis, utilis esse illi possit opera nostra; id egregia virtus ejus promeretur, imo etiam debetur eximie humanitati atque amoris tum tuo erga me, tum duorum majorum natu fratrum: sic enim me devinxistis, ut omnia velim illustris vestrae domus causa. Quod nobilissimus & excellentissimus Dominus de Naglorice, illustrissimus serenissimus Regis Polonici ad Britannos, Belgas, Danos legatus, præstantis spei juvenem filium suum, una cum Ephoro optimo & doctissimo, apud nos potissimum studiorum causa relinquere velit, id vero mihi accidit per jucunde: ac quemadmodum gaudeo perennare præclarum nobilitatis Polonicæ judicium de me, sic opera quoque in posterum à me dabitur, ut nec heroem illum nec alium vestrae gentis quemquam conceperit de nobis opinionis possit poenitere. Vale, illustrissime Domine, tuique sic ac familiæ vestrae amantem, porro amare perge.

*Amstelodami,*  
cIdo Idc xxxvii.  
13 Kal. Dec.

*Illustrissimi nominis*  
*tui cultor,*

G. J. Vossius.

CCCXVII.

Davidi Wederburno, *Scholæ Aberdonensis Moderatori.*

**P**ergratæ mihi fuere quas miseras literæ, testes locupletes egregii erga me affectus tui, eoque gratiores quod non solum mitterentur ab homine eruditissimo, beneque promerenti de studiis juventutis, sed etiam ea

ex



ex turbe, quæ terris pariterque Reipub. literariæ dedit & maxime Jacchæum, Philosophum ac Medicum insignem, conjunctissimum, dum fata sinerent, Collegam meum & Compatrem acceptissimum. Bibliopola, quem commendasti, utinam in ulla re utilis esse potuissim; sed ille nullo in negotio nobis usui est. Monui, ut si revererit has in oras, liberius operam exposcat nostram, quam ego bono nulli negare soleo; nedum repulsam ferret qui ab homine commendaretur doctissimo & nostri etiam amanti. De originibus nostris sic res habet. Jam anni sunt XXII. quod ad umbilicum perduxeram, vel saltem id fecisse videbar. Ac tempore Synodi Dordrechtanæ, hoc est ante annos XX. monstram labores hosce præstantissimo viro & amico Martinio. Anno uno altero post cum Typographis jam transfegeram, ut in lucem ederentur; cum ecce literas Brema ab eodem Martinio accipio, prelum jam fervere Etymologico ejus edendo: itaque nomine Typographi rogare hoc impense ut Editionem operis nostri differre eoque vellem, donec bonam partem distractum suum opus foret. Dedi hoc amici postulato lubens. Proximis verò annis ita aliis semper distentus fui, ut vacare editioni non potuerim. Nunc excuduntur libri nostri de Diis Gentium sive Origine & Progressu Idololatriæ: ac spero intra trimestre posse absolvi. Hinc aliqua sequentur quæ sacri sunt argumenti; dummodo mihi Deus valetudinem largiatur; quam tibi optimam exopto, ut publico diu utilis esse possis.

*Amstelodami,*  
clō Iac xxxvii.  
4. Kal. Dec.  
Syl. Nov.

*Tui studiosis-*  
*simus,*

G. J. Vossius.

### CCCXV.

Joanni Skyttio, *Gubernatori Livoniæ,*  
S. P.

**T**Ametsi & tuas, illustrissime Domine, interpellare curas minime oporteat, nec meæ occupationes patiantur supervacuum descriptionem, generoso tamen filio tuo Joanne scribente, occasionem hanc negligere non potui, sed operæ pretium putavi non salutare modo, verum & gratulari tibi de cunctis tuis, plane ad decus paternum adsurgentibus. Etenim cum plurium ipse liberorum parens conscius mihi sim, quo amore & universos &

singulos complectar: non possum mihi aliud persuadere, quam longe tibi jucundissimum accidere, quicquid de progenie tua boni teque & se dignum cognoris; scio enim te ita credere, in quo scribo non cæco adfectu, ac longe minus ut aliquid auribus tuis dem, quorum utrumque procul à senectâ mea esse decet; sed judicio & experiendo edoctum ita scribere. Ac ut prius dicam de primogenito tuo, is jam sex mensibus, & quod excurrit, mecum prandet, & cœnat, imo ante dies paucos plane in ædes meas receptus, ut totis diebus sit nobiscum. Nimirum id, Illustrissime Domine, dandum judicavi tum sublimi dignitati tuæ, tum indoli egregiæ filii tui, & tamen longe plurimis jam primariis viris, & fœderatæ nostræ Belgicæ rectoribus, idem negavi; sed videbatur mihi filius ille tuus longè dignissimus, quem præ aliis omnibus amore complecterer. Quippe si pietatem & modestiam dicam, reliquos non sui tantum ordinis, cui indulgere plusculum solemus, sed plurimos humilioris etiam sortis antecessit. Imprimis vero incredibilem ejus ardorem in studiis amo & miror. Occurrit animo, rarum esse ut qui post Minervæ castra, secutus sit illa Martia, iterum se totum det Musis, cum duo hæc adversari maxime videantur. Ille tamen tantam ex iis voluptatem capit, ut nisi scirem, nunquam illum castra ulla vidisse crederem: imo prioris temporis recordatio etiam faces illi ac calcaria ad studia subdere videatur, tantò lubentius, etsi ob numerosam prolem, angustius habitem, in ædes recepi meas. Ubi occasionem deinceps longe meliorem habiturus, quoties vel quandocunque libuerit me, aut filiorum quem voluerit, consulendi in studiis suis; vix patiuntur occupationes ut tempora à Deo quieti destinata, reficiendo corpori impendam: nihilominus supra colloquia, quæ ultra prandium & cœnam sæpe extendimus, horam quotidie, sæpe & ultra impendo, ut quibuscunque modis possim, desiderio tuo atque illius satisfaciam. Cætera, quæ per occupationes ipse nequeo, egregie filius meus Dionysius supplet, qui tanto incensus est amore promovendi studia filii tui, ut magis non possit. Adeo ut non dubitem, quin si ardor ille filium tuum diu teneat, uti planè confido, ubi is ad te redierit, & tu in illo habiturus sis ornamentum illustriss. familiæ tuæ, & Sueciæ ingens præsidium. Atque ista de primogenito. Nefas verò mihi aliud sit dicere de filio tuo Benedicto, cujus ardens ingenium & maximarum rerum capacem animum, ut par est, æstimo. Quare uti ille nusquam sibi deest, ita neque nos sinimus vel adfectum vel industriam no-

R r

stram

fram claudicare, de quo plura adderem, nisi intempesta jam nox esset, & craftini, quos cogito, labores, me capiendæ quietis mone-  
rent. Spero propediem me iterum de eo scri-  
pturum; scio enim non posse me tibi fa-  
cere rem gratiorem, quam si de omnibus fa-  
ciam certiore, quæ ad tam cara pignora  
pertineant.

Deum oro, ut te, illustrissime heros, diu-  
tissime & Succæ Regno, & generosæ familiæ,  
addo, & nobis, quibus omni cultu te tu-  
osque prosequi animus est, incolumem  
præstet.

*Amstelodami.*

G. J. Vossius.

### CCCXVI.

Abrahamo Vander-Merio, *Senatori*  
*Curie Hollandiæ.*

**T**Andem aliquid respondeo, vir amplissi-  
me atque conjunctissime, tardene ad-  
eo? inquires. Quid dicam? sic sum: præfer-  
tim ubi publica magis urgent, uti contigit  
his muneris primordiis. Et sciebam mihi ne-  
gotium esse cum facili creditore, ut prope  
periculum fuerit, ne mensibus aliquot perge-  
retricari. Verum id minime passus es, ut  
ex filii sermone nuper, ac proximè etiam ex  
literis intelligo. Nempe credo observabatur  
tibi illud fœneratoris Alphii, vel optima no-  
mina non appellando fieri mala. Quia igitur  
ulterius morasnectere non finis, paucis  
ad ea quæ quæris respondebo. Ac primum  
de illo, ubi Cœlius causam adferat delectati-  
onis illius, quam nolo dicere. Est locus ille  
non in Epistolis Calcagnini, sed alterius Cœ-  
lii patria Rhodigini Lib. XV. var. Lect.  
C. X. Alterum fuit, An Porphyrius ad Chri-  
stianam fuerat conversus religionem? Ita vi-  
sum tum aliis plurimis, tum Annalium Ec-  
clesiasticorum conditori, Cæsari dico Baro-  
nio, cui illud imposuit, quod hodieque extat  
panegyricus hominis Christiani, qui nomen  
præfert Porphyrii. Hujus auctor creditur esse  
Tyrius ille, qui Phœnicia sua lingua primo  
Malchus, postea Græcanica Porphyrius no-  
minatus; sed-enim auctor longe alius est,  
puta Publius Optatianus Porphyrius. Ut  
cætera mittam argumenta, non pertigit Mal-  
chus ad tempora Constantini Augusti: cui  
panegyricus ille perscriptus. Nec Malchus  
Latine scribebat; nec in isto carmine genius  
Tyrii illius spirat, impii, sed magni omnino  
viri. Quæstiunculas annectis convivales cur  
συνεταρον facietis hominibus figura ea, quæ

grammaticis vocatur ὁ φ' ἐρ, dicatur ne lis?  
Causam reddit Horatius, quo iudice,

*Natis in usum Letitiæ scyphis*  
*Pugnare Thracum est.*

Cur vinum generosum vocetur Theologi-  
cum? credo miraris, quia nihilo deterius  
palatum sit Jurisconsultis, Medicis, Philoso-  
phis, quam Theologis, & fortasse etiam pu-  
tabis hoc ad injuriam aliquam eorum perti-  
nere, qui sacris præfunt. Equidem nolim  
quemquam ejus ordinis irritare, ne forte  
excitem crabronem. Quare tantum dicam, eo  
jure dici vinum Theologicum, quo Horatius  
Pontificum dicit cœnas & dapes Saliarum, quod  
item Cicero epulas Saliarum, Apuleius Sali-  
arum cœnas. Ut nihil dicam de adjuvantibus  
Augurum cœnis, de quibus Varro, Seneca,  
Plinius, Macrobius. I nunc & dic Pontifi-  
ces, Salios, Augures, palato multum valu-  
isse; hac sapientiæ parte caruisse Prætores,  
Consules, Proconsules; cave tamen existi-  
mes, hæc pertinere quicquam ad τὸ θεῖον λόγον  
κέρκεας, qui nostris in terris degant. Apud nos  
omnes fidei, ut scis. Ad Germanos ito, vel  
potius accommoda hæc illis, qui in pontificiis  
militant castris, de quibus securius sæpe men-  
tiri licet, quam de nonnullis nostrorum ve-  
rum dicere. Pergis rogare, cur melioris no-  
tæ vinum, non solum dicatur Cos. sed & Co-  
sta. Nimirum in Cos. quidem ad vi-  
num Coum, de quo Plinius in quarto deci-  
mo, verum singulæ magis literæ spectantur,  
quæ Colorem, Odorem, & Saporem signant,  
objecta trium sensuum, Visus, Odoratus,  
Gustus: ita hæc ipsa priori syllaba in Costa  
denotantur; sed altera hic syllaba accessit, ne  
solum tribus sensibus in hauriendo flore liberi  
patris opus esse videatur, sed vero universis,  
hoc est præter tres istos tactum etiam & au-  
ditum, quorum initiales literæ T. A. sylla-  
bam efficiunt, nam & calor præsertim astra-  
te, demit vino gratiam, & nimius frigus  
hyeme, calor autem & frigus tactus sunt ob-  
jecta. Nec auditum excludere licet, quan-  
doquidem vina generosa hoc habent, quod  
ob spiritus copiam tum in vase sic æstuent, ut  
audiri possit, tum etiam calici infusa, ac mox  
auribus admota. Cujus rei non semel peri-  
culum apud Dordrechtanos meos in cellis feci  
vinariis, sic jubentibus iis qui sua mihi vina  
commendatum irent. Aut valde fallor, aut  
una alteraque superest quæstio: verum minor  
Schedularum cui ea inscripta frustra nunc à  
me quæritur. Ni fallor erant ex de Periplo  
orbis, & scriptoribus, quorum lectio nego-  
tioso homini, sed φιλομαθῆι, maxime conve-  
niret; ubi se schedula ea obtulerit, respon-  
debo de priori. De altero agam fortasse in  
opere

opere meo de orbe disciplinarum & universis disciplinis. Salutabis plurimum optimam conjugem & heroinam focrum, item affines Verium & Vivianum cum uxoribus. Etiam ubi occasio erit, Amplissimum Præsidem Crom . . . . Mea etiam vos omnes salutari iussit.

*Amstelodami.*

*Tuus totus,*

G. J. Vossius.

CCCXVII.

Da. Paræo S. P.

JAM quartus est mensis, doctissime & amicissime Paræe, quod Amstelodamum veni. Ubi dum sum, redditus est mihi Lucretius Carus tuus, verè carus omnibus merito suo, nunc carior merito tuo mihi ante alios, quem, eo dicando, feceris tibi debitorem. Quare ut antea etiam scripsi, solum dispicio, quomodo me utcumque possim exsolvere, de quo cum nunc cogitarem aliquid scribere, occasione nundinarum Francofurtensium, commodior priori oblata est occasio adventu optimi & doctissimi Jacobi Hintzeri: Qui longe mihi gratissimus fuit, partim quidem ob egregias animi dotes, partim vero ob pulcherrimam operam, quam Ecclesiæ Dei & Reip. literariæ navat describendis apparandis iis, quæ magnus avus tuus in Schedis reliquit. Quantulum enim est, quod heros ille tot bona chartis commisit, si ea jaceant propemodum disperta, vel saltem nunquam videant lucem? Ex eodem cognovi, præfore te studiis liberorum illustrissimi comitis Isëmburgensis. Quod non improbo. Etsi enim is est afflictissimæ Germaniæ status, ut nec principes viri tantum possint erga bene merentes, quantum vel ipsi vel nos optaremus: ac fortasse etiam lucrosius transigi possit cum opulento ac liberali mercatore: nihilominus tanto illud magis ex honore tuo erit ac publico bono, quanto liberi excelsius nati, & ubi adoleverint, amplius etiam terris profunt. Interea non desinent amici hic tui (in quibus præ cunctis nomen profiteor meum) meminisse tui, quoties vel professio in Academia, vel illustri Gymnasio, vel regimen Scholæ, in celebri quapiam urbe vacarit. Non quasi omnia possimus in tanta Candidatorum & prestantium copia: sed quia aliquid poterit affectus erga te noster, multoque amplius virtus & rara doctrina, tum tua, tum imprimis parentis tui, maximeque in-

clyti illius avi. Necdum enim ita male agitur cum Batavia, ut magna ejus merita exciderint animis hominum, utcumque atro carbone multi procures nostros apud externos depingant, quasi nescio quid monstri in religione alant: Quod hæcenus videre non possum. Utcunque illud non inficior, plerisque in urbibus ita esse animatos, ut solis iis, qui Dordrechtanæ Synodi decretis subscribunt, publica loca & stipendia tribuunt. Iis qui in prædestinationis dogmate Melancthoni vel Lutheranis accedunt, permittant, ut Ecclesiarum suarum sumptibus, privatis in locis doceant: dummodo constet alienos esse ab iis dogmatis, quæ repugnant harmoniæ Ecclesiarum, quale imprimis est Photini ac Samosatani, quod Socinus de novo paxillo suspendit. Medulla tua Historiæ universalis valde me delectat. Quam non paucis è juventute de meliori nota commendavi. Quid enim turpius quam si ea particula Historiæ veteris contenta sit? Diffundendus est animus per omne ævum, quod pauci hodie faciunt. Tanto majorem fructum ac gloriam ex opera hac reportabis. De historiæ tuæ Ecclesiæ La-Merium conveni ipse, ac postea idem filius fecit. Sed nihil promittere voluit, qui nesciret de magnitudine libri. Solet ille magis capi iis, quæ minoris sunt molis. Addebat jam prelum fervere multis & variis. Respondi nec festinato opus esse, sufficere, si post menses sex septem editionem ordiatur. Quod si is difficilem se præbeat, non deerunt, ut spero, alii, qui lubenter id facient. Dissimulare tamen non possum, nusquam difficilius esse typographum reperire, quam apud nos, nisi quis suis sumptibus librum edat. Fit hoc ob rerum omnium summam caritatem, quam causat grave & diuturnum bellum, quod nobis est cum hoste potentissimo. Sola excipio *versus*, & nugalia quibus nihil vendibilius, ut ipsi non dissimulant typographi. De Nonio Marcello quod scribis, pergratum mihi est. Perge tantum, & quemadmodum Lucretium tibi devinxisti, ita de hoc etiam scriptore optime mereri. Non quia tantopere æstimem ejus eruditionem, sed quia tam multa ex veteribus adducit, quæ frustra apud alios quæramus. Dispiciam etiam annon juvare te hac parte possim: sive iis, quæ *divinæ* habeo ab aliis observata, sive etiam nostris. Omnino enim faveo instituto tuo: quia satis jam perspexi, quantum in posterum à te expectare debeamus. Columna olim sum usus amici beneficio, cum in tragicarum fragmenta notas ederem meas: sed ipse non habeo, & amicus ille à quo habui, nescio, an usque adeo paratus sit in exteris oras mittere, sed tamen, si ille tantillum mea

R r 2

causa



causa recusaverit, aliunde poscam ab iis, qui faciliores sint. Saltem non cessabo, usque dum misero. Crastino die Lugdunum tendo, aut summum perendie, ubi hanc curam curabo. Magnopere etiam lætor, quod Palatinorum principum ac Bavarorum vitas edere decreveris. Valde faveo huic proposito, partim quia Palatinatus mihi natale solum; partim quia illa portio est historiae universæ, quam urgere semper soleo. Sed de isto & aliis tecum pluribus loquar proximis literis. Interim, amicissime Paræ, egregia, & parentis & avi proles, mutuo nos amemus inter nos.

*Amstelodami.*

*Tuus sine dolo, moreque  
majorum,*

G. J. Vossius.

### CCCXVIII.

Jacobo Wittio S. P.

**U**T dies non fine nocte, ita nec amicorum scriptiones sine silentio. Cavendum modo ne nox longa fiat, qua ad Lethen itur. Quod ne nobis contingat, post anni hujus silentium has ad te literas mitto. Superiores tradideram Polyandro, qui se ad urbis vestrae Ecclesiasten dixerat scripturum. Verum nec ille ab Ecclesiaste, nec ego à te responsum accepi. Unde prope est ut mala fide curatas suspicer. Fortasse jam aliunde intellexeris, ut Amstelodamum à proceribus ejus urbis vocatus sim, quo in illustri Gymnasio, quod magno Bataviæ bono erigunt, Historiarum sim ac Politices professor. Stipendium annuum erit bis mille sexcentorum Florenorum. Accedit pulchra habitatio, quam hic vix octingentis aut etiam nongentis conducere: magnæ etiam factæ spes liberis meis; quorum mihi potissimum ratio habenda fuit. Jam enim plerique idonei esse incipiunt, qui munia publica capessant. Joannes Cantabrigiæ Socius est Collegii Jesu. Franciscus est advocatus Curia Hollandiæ, strenueque pro ætate sæpius jam causas egit. Matthæus paucis mensibus cogitat edere historiam comitum Hollandiæ. Dionysius quid possit, propediem ostendet, partim in Latinis & Græcis, partim in Hebræis, Arabicis & aliis Orientis Linguis. Nec malignam de sese præbent spem Isaacus, & Gerardus, omnium ille minimus, qui jam annum explet undecimum, & Latinis, Græcisque literis, historia etiam sacra, Romana, Græca, non

tinctus quidem, sed tamen pro ætate non leviter est adpersus. Filiarum natu major Cornelia jam nubilis, quippe quæ annum exegit duodevigesimum. Nec pro sexu minus se probat quam fratres. Soror ejus Joanna jam novennis est, & ipsa ingenii satis amœni. Utinam sic res tuæ ferrent, ut me cum omni cognatorum tuorum familia, ac imprimis uxorem meam & sororem ejus Mariam, quarum utraque te sæpe habet in ore, semper in corde, invisere cum præstantissima tua uxore ac liberis possis. An nunquam illa dies adveniet? mihi vero juvenescere viderer, si tam beatus forem, qui saltem vel ad paucas vos hebdomadas hic conspicerem. De nobilissima matertera, heroina matre tua, tacere cogor, quia ætatem ejus id scio minime ferre. Sed tamen volupe est, quod vivat & valeat. Quod ut diuturnum esse possit, Deum rogo. Cui te, vir amplissime ac nobilissime, & dilectissime cognate, etiam & etiam commendo. Salutem dices meo nomine & omnium nostri, conjugii lectissimæ, liberis, & dominæ matri. Sed & clarissimo Ferrio, cujus ego vindicias pro Scholastico Orthodoxo, cum fructu & voluptate legi. Tuum erit, quando occasio dabitur, præstantissimum virum monere atque adhortari, ut porro bene mereri de Ecclesia Dei pergat. Vale.

*Amstelodami  
Anno*

*Tui amantissimus, non minus  
virtutum tuarum causa,  
quam ob arctissimam con-  
junctionem ac necessitudinem  
nostram,*

G. J. Vossius.

Imperiales xxviii. quos miseras affinis mei Cazimiri Junii viduæ, accepi; deque eo per affinem meam, Mariam Juniam, certiorum ipsam feci. Aveo nosse ecqua dignitate in patria tua fungaris. Amicus retulit te vel urbis esse senatorem vel Principis Lotharingici Consiliarium. Quæso ne patere me hoc diutius ignorare. Iterum vale & ama nos: scis votum amantium, Amari volunt qui amant.

### CCCXIX.

Joanni Meursio.

**U**Tinam, clarissime & amicissime vir, de me & meis perscribere possem jucundiora. v. Kal. Februarias ipsa Gerardi mei natali amili suavissimam majorem natu filiam Corneliam, virginem ea pietate, mori

bus illis, ac rei domesticæ intelligentia & cura, illa, ut de Latina taceam, Gallicæ, Hispanicæ, Italicæ Linguæ peritia, illa notitia tum omnis generis Musices, tum & calamo, & penicillo pingendi; ut tot bonis boni numinis gratia concurrentibus, omnibus fuerit admirationi qui nossent, fatendumque sit non eam profecto minus sui sexus laudibus excelsuisse, quam suis filiorum quos habui vel habeo quemquam. Quodque dolorem auget, ea mihi momento erepta, dum per glaciem rheda cum fratre Matthæo & sorore Joanna Illustrissimique Polonici Legati Filio fidei meæ commendato, nec non Ephoro ejus traha Leidam fertur. Non quidem quicquam imprudenter existimo hic factum à meis (si quidem ea crassities glaciæ erat ut centenæ eodem tempore trahæ veherentur sine periculi formidine) sed non impudens minus quam imprudens traharius, dum invitis sefforibus prævertere vult antecedentes, ad latus ubi piscati antea fuerant, tenuique glaciæ aqua erat obducta, dessectens, omnes præcipitavit in aquas: unde prima quidem extracta Cornelia (heu nuper mea!) sed jam terrore & casu plane exanimata: Cæteri vivi educti virtute potissimum, post Dei gratiam, Matthæi mei qui ter in aquas insiliit non sine magno sui periculo, ut succurreret alieno. Prope ista Leidam contingere, qua occasione filia est avito inlata sepulchro. A tristibus veniam ad lætiora, ea nempe quæ te & tuos spectent labores. Tandem persuasum Typographo est, ut serio staret diuturnis promissis. Nec dubita quin intra mensem unum vel alterum Danica tua sit absoluturus & exorsurus ea quæ ad *πολυμάθειαν* pertinent. Opus nostrum de Idololatria Lentulum experitur non Celestem quales Metelli. Sed & minus urgeo ut tuis incumbat magis. Nec urgeo illa filiorum de quibus scripseram; facturus tamen simulac sex septem folia excuderit in Philologicis tuis. Si tum esse trico volet, cum vicino Janfonio transigam. Malim à Blauwio non uno nomine. Sed quomodocunque malim quam me eludi. Maimonides Dionysii mei jam ante annum & ultra absolutus, sed adhuc deest præfatio. Salmasius de usuris scripsit. Quod opus se transmittere tibi hesternæ die Elzevirius aiebat. Heiniana in Nov. Testament. opera credo jam in medio Paulinarum occupatur Epistolarum. Fortasse subsequenter Salmasianæ Notæ; quod fieri, plurima in Heiniana animadvertet. Imo & in hoc de usuris videre possis, adversum Aristotelis Politicorum paraphrastem (nec ignorare virum potes) accurate differentem. Hottomanni Alconium ex Filii mei Isaac Bibliotheca ad te mitto. Is, imo & Conjux

& omnes mei plurimum salvere te & uxorem optimam & liberos jubent. Estque is affectus eorum mihi longe jucundissimus. Nam profecto quid pulchrius quam quod junior ille ait Isocrates, *τὸ παῖδας ὡς πατρὶ ὕδας ὕτω καὶ τὴν ἐμὴν καὶ πατρικὴν κληρονομίαν*. Vale magna Meursii anima & æternum mihi meisque anima.

Amstelodami,  
clō lōc xxxviii.  
TΔΛΛΑ.

Tuus tuorumque totus,

G. J. Vossius.

CCCXX.

Hugoni-Grotio S. P.

JAM tertia est hebdomas, Illustrissime Domine, quod postremas tuas accepi. Iis saltem post longiusculam in scribendo cessationem, quam primum oportuit responsum dedisse; sed more suo moratus me est Blauwius J. C. cum semel, iterum, tertio, conveni domi suæ de Editione *ἀνδολογίας*, idque tui quidem gratia, sed magis, & mei, & communium studiorum. Distulit rem semper his verbis, conveniendum sibi prius esse Parentem, quia nihil nisi ex ejus sententia, statuere auderet. Velle me postea domi meæ, de omnibus facere certiorum. Ubi video me eludi, denuo accedo, casuque illius in ædibus, Parentem, & alterum etiam filium deprehendo. Prius senex dubia uti oratione; sed cum dicerem aperte agendum esse; absque eo nihil certi posse tibi respondere: in hanc sententiam absque circuitione aliqua est locutus. Nec suæ esse consuetudinis, nec sententiæ, scriptoribus addicere exemplaria compacta; imo ne incompacta quidem ad centenorum numerum: planè id sibi fore damnosum: præsertim in hoc opere; quod aliunde esset edoctus, hominum fore elegantiorum; non eorum solum, qui *αὐτὸς τὰ ἀλφίστα* attenderent. Longè magis se rem facere ex scriptis, quæ puerorum, aut vulgi, & semidoctorum manibus tererentur, quam quæ amarent, ac mirarentur pauci, de meliore luto à Prometheo efficti. Præterea terreri se malo vicino: qui simul ac à se aliquid viderit editum, recudat confestim. Aureum esse volumen, quod de Jure Belli scriptum à te fuit. Vicino tamen recudente, coactum se suam editionem, longè minori pretio divendere, quam impensæ linerent. Ita damnum fecisse Opere eo, emolumenti nihil. Nec referre, si nulla hic culpa fuerit tua, dum suo factum sit damno. Velle te *ἀνδολογίαν* tuam eleganter prodi-

re 3

re; vicinum mox expressurum Typis minoribus, charta viliori: Id fore satis majori emptorum parti, dum Opus hoc quomodocumque habeant. Tandem ita obsignare longos logos: paratum se esse excudere hoc opus, dummodo intra plus minus LX Exemplaria incomparata consistatur: neque id facturum tum se esse spe tantilli lucri, quippe damnum se magis præsentire; sed spe ista, ut excudere postea possit historiam tuam, & in Novum Testamentum notas. Hæc ego apud Atticum Asiatico sermone diffudi, ut melius certiusque mentem hominis aperirem. Omnino is ingravescente hac ætate, præsertim post Uxorem amissam (id ante tres menses factum) attentior ad rem evaluit. Præterea, vir aliqui optimus, *μελαγχολικώτερος* est, ac imaginatur, sibi non multum vitæ superesse; fortasse & terrent impensæ, post tantos sumptus, quos fecit in Atlante: Nec enim minores esse possunt, quam L. aut LX. millium Carolinorum. Et tamen non abhorret ab editione *ἀνδραγαθίας*: sed valde inhiat gemino operi jam memorato: scit historias ab omnibus expeti, ac legi: Et in tanto per Orbem, qui Theologi sint, aut videri velint, numero, non de fore uspiam emptores sacro argumento, quod tam Illustri se authore tueatur. Opus nostrum de Idololatriæ origine, ac progressu, spisse procedit; partim ob occupationes, quibus vix par sum, partim etiam, quia sub manibus crescit. Itaque jam excusi quaterniones, ut vocant, LXXX. Nec video, ut ante tertium abhinc mensem exire in lucem possit.

Credo jam intellexeris de Excessu Noomfii Arlandervenix Domini. Amabam virum, quia tam amicum se gessisset erga me, & meos; & ea pietate esset erga Deum, quam in paucis istius fortunæ hominibus deprehendas. Unum semper ejus animum cruciabat, quod stultè ante connubium egisset. Et per est verisimile hoc fatum ei accelerasse: adeo illud ad animum revocabat; etsi nihil ab eo peccatum deliberato; sed si probè ab eo sum edoctus, ebrius insidias evitare non valuerit, quas sobrius non semel effugisset. Credo & eam fuisse causam, cur equestri dignitate ornatum se cuperet; ut quia videret, uno altero obstante, in Magistratu legendo, sui rationem haberi nullam; titulis aliis, non inferior æqualibus videretur. Non tamen S. Michaelis ordinem expetebat (negabat se pro tempore eo, tantos spiritus gerere) sed suffecisset honos, quo quomodocumque nobilitatis nomen referret.

Convenit me his diebus, Thylius antea Hardervicenus, sed ab annis jam XVII. Leidensis Theologus. Is decrevit edere in lucem ea quæ pertinent ad scriptores Ecclesiæ, qui primo vixerint seculo. Quales eti-

am Ignatius, & Polycarpus, etsi ætatem ulterius continuerint: scis Latinè extare Polycarpi Epistolam ad Philipenses: Eam Græcè dicitur habere Sirmondus. Habet & Salmasius beneficio Sirmondi; à quo excipit nactus quoque Thylius; sed ait, si ex Latinis judicium sit faciendum, partem desiderari in illis quæ Salmasius, & ipse habeant Græce. Metuere igitur, ne fucus sit Salmasio factus à Sirmondo, partem Epistolæ Græcè sibi reservante; ne honos iste, editæ Epistolæ ejus, sit penes quemquam à Romanæ Ecclesiæ sententia alienum. Quæ desiderantur, quantum recorder, incipiunt ab illis verbis. *In his ergo state, & Domini exemplar sequimini*, &c. Petiit igitur Thylius, hoc ad te scriberem, plurimumque te rogarem, ut Operam des, quo Græcum Sirmondi Exemplar, ipse videas, & per Amanuensem, quæ desiderantur excipere cures; vel si Sirmondus non passurus sit codicem suum extra limen deferri, saltem per alium, tantum efficias ut etiam extrema à quocumque, sed fido tamen homine, de codice ejus excipere habeamus. Multum metuo, ne sua Thylium de Sirmondo fallat suspicio; sed ut verum esset, parum est verisimile, quod facere noluit, in gratiam eruditi Galli, id Belgæ ergo facturum. Et si in hoc aut simili negotio, frustra antehac fuisti, ut mihi relatum, merito verearis, secundo te repulsam laturum. Volui nihilominus hoc veteri dare Collegæ, nec tibi ignoto, ut perscriberem quod à me petiisset.

Meursii opera, hebdomade proxima, incipiet excudere is, qui optimum virum jam quinquennium elusit. De Philolao, quem ut petieras, tradidi Hortensio, & Blauwio, quid futurum tandem sit, juxta scio cum ignarissimo. Blauwio editionem commendavi sedulo. Postea negotium omne commisi Hortensio; qui ad se Philolaum, non me missum aiebat: ostendi igitur partem literarum tuarum, qua mihi mitteres, sed eo fine, ut judicio Hortensii, & Blauwii, velederet, vel remitteretur. Mox causatus me tribus mensibus detinuisse; Id pernegavi, qui pridie domum post vespertinam octavam accepissem. At inquiebat literis subscriptum, ante trimestre esse exaratas. Narravi ergo, ut juvenis is cui Philolaum ad me dederas deferendum, eum cum literis ad Hortensium, arcæ suæ includisset. Hanc ut ipse mihi juvenis exposuit, trimestri fuisse Rothomagi detentam. In istoc & similibus, *ἀντιόχης* Hortensii molestior mihi foret, præsertim merita mea cogitanti; nisi virtutibus hanc compensari putarem, & ad istiusmodi penè obduruissimam jam ab adolescentia. Impe, sè ab eo actum, ut publicis impensis, id autoritate Ordinem Generalium,



neralium, ad Galilæum de Galilæis mitteretur. Perhonorificum hoc foret, & ex colloquio cum viro reconditæ doctrinæ, multa addiscere daretur. Ac forte in Gallia, vel Italia, luculentior obtingeret dignitas, quam apud nos habet; sed-enim metuo, ne tam facile id nunc sit consecuturus; postquam urbicus senator Realius, Indicus antea Præfectus, vitæ huic est creptus, qui valdè hoc negotium urgebat, ut nosse te arbitror. Quamquam vero non leviter incommodare possit illustris urbis hujus Gymnasio, si compluribus mensibus, nullæ habeantur auditiones Mathematicæ: nihilominus decretum, si auxilio nostro ei opus erit, adjuvare eum apud urbis hujus Proceres: Idque ea fiducia, quod publico nomine, & stipendio missus, futurus sit devinctior ad se sistendum postea Batavis; & quodcunque fructus ex perfectione perceperit, suis potius impertiendum quam alienis.

Hæc cum scripsissem intervenit Constantinus l'Empereur, Hebræarum apud Leidenes literarum Professor, vir tui amans, & ætlimans, supra sui ordinis complures. Is se misisse ad te aiebat, quod proximè de Hebræis Legibus opus edidit; sed cùm adderet, vix esse tres quatuorve hebdomadas, quod misisset; negavi mirum esse, si responsum haberet nullum, quandoquidem magna sæpè incuria esse eorum soleat, quibus libros damus deferendos. Non pessime actum iri, si vel tertio post mense acceperis, vel quarto. Id tibi in meis, mihi semel iterumque in tuis, (ut illo quem miseras Philolao) contigisse. Recepi tamen sic poscente hujus mei mentionem facturum iis quas jam literas exararem. Idem Constantinus revidere postremo solet paginas excusas exercitationum sacrarum Heinii in Novum Testamentum. Credo partim; ob Hebræa quæ intercurrent; partim ne quid aspergatur, quod rerum sacrarum, præsertim de quibus controversantur in scholis, minus probet intelligentem. Is retulit mihi jam deventum esse à Typographo ad notas in Epistolam ad Romanos. Transiit hanc per urbem Illustrissimus Regis Polonici Legatus, vir doctus, & perhumanus, tuoque affini in Galliis, juventutis tempore, perfamiliaris. Jam credo ex eo cognoris, ut legatio hæc successerit in Britannia. Nam ad affinem tuum scripturum se aiebat. Apud nos filium, cum Ephoro relinquere maluit, quam apud Leidenes, ob tot foeda quæ proximo mense illic peracta erga mulieres, imo & adolescentes. Referre ea pudet. Heu quantum locus ille immutatus ab eo qui in utriusque nostri erat adolescentia.

Jam aliquot menses præterire, quod in

lucem prodit affinis mei Francisci Junii Opus, de Pictura Veterum: quod alia de Pictoribus Antiquis subsequenter. Is mihi commisit, ut Exemplar ad te transmitterem; sed non video, ut comode hinc fieri possit, hyberna tempestate: filio igitur exemplar dedi, quod fratri tuo optimo Guilielmo daret. Is occasionem aliquam melius intelliget.

Amstelium Vondelii, quam illustri tuo nomini inscripsit, jam ut puto videris. Diu quominus ageretur, obstitere aliqui Presbyterii, ut arbitror nomine. Tandem id Consuli Gravio commissum ut perlegere cum cura vellet. Dixit se nihil invenire, quod jure offenderet. Nam quod dicerent, *παῖς* totum drama, uti & Authorem, id sibi parvi ponderis videri; eo quod personæ debuerunt introduci, non ad tempora reformationis, sed temporibus suis accommodatæ. Nudius tertius primo actum id drama, idque majore tanto cum applausu, quanto diutius elusa fuerat populi expectatio. Cum in eo essem, ut literæ obsignarentur, domum meam venit Blauwius J. C. Quærit utrum jam ad te scripsissem. Dixi literas necdum missas. Petiit in hunc modum scribere vellem, Ita jam occupata esse prela sua omnia, ut intra tempus longiusculum nihil novi tentare ausit. Nam hac ipsa hebdomade, bina, ternave prela occupaturum solis operibus Meursianis. Quærit utrum prudenter satis rejiceret editionem tui operis, cum & *Ἀνδραγαθία*, per se opus sit gratissimum, & tanti interpretis translatione, & nobis longe futuram sit commendabilius. Causatus tum ille, & malum vicinum, & quod non posset ex animi tui sententia excudi, nisi gravioribus impensis, & alia ante memorata, ut reponere nihil attineat. Nimirum hæc verè *αἰνῶς*, quod renunciatum venerat, solum *περίστασις*.

Deus Opt. Max. diutissime te & Heroinam conjugem, & filiorum utrumque, cum filia optima (quos omnes ego, & omnes mei impensè salutari jusserunt) salvos, & sospites conservet. Scribebam festo Epiphaniæ anni hujus clb lxxviii. quem prosperum ac foelicem, ut inchoantis anni tempore fieri amat, comprecarer, nisi superiori voto, & hoc, & alia, mihi complexus viderer.

*Tuus æternum Cultor,*

G. J. Vossius.

## CCCXXI.

Simoni Beaumontio Syndico Rotodamenſi S. P.

**V**IR ampliffime, atque eximie, tertio jam & pluſculo intervallo, manum admoveo calamo ad reſcribendum; & quod de die non erat, nocturni temporis beneficio (O beatas noctes non ſtudentium minus quam amantium!) impedit nullus. Seu *juridicina*, ſeu *cauſidicina*, tuo voles in verſu, favitores habes non malæ ætatis ſcriptores, atque eos quos maximè voles, vel Jurisconſultos, vel verborum juris retinentiſſimos. De Tertulliano qui virum norit, nemo inſicias ierit. Is opere Scholaſtico, de Pallio, quod exaravit ubi Presbyter erat factus Carthaginenſis, occasione ea quod velut, ἀνεκὸς χερσὶν ἵσταν, pro toga, Pallium aſſumpſiſſet, hunc in modum ſcribit capite tertio: *Cato juridicina ſue in tempore humerum exertus, haud minus palliato habitu Græcis favit. Juridicinam dicit pro tempore eo, quo jus diceret Prætor. Prætores enim cinctu Gabino, hoc eſt nudo humero dextro, (hoc enim eſt quod Tertullianus ait humerum exertus,) jus civibus dicebant. Hoc cognoscere eſt ex veteri interprete Perſii in illud, ſatyra quinta.*

*Nullaque ſuccinctis laribus donata pependit.*

Atque item Iſidoro Originum, Lib. XIX. cap. 24. Ut autem à *juridicus*, *juridicina*, ita à *Cauſidicus* formarunt jurisconſulti veſtri, *cauſidicina*. Qua voce uſus Ammianus Marcellinus, Lib. XXX.

Pag. 452. Edit. Hamburg.

*Ad ultimum id habet cauſidicina cum cæteris metuendum & grave, quod hoc penè ingenitum eſt penè luigantibus cunctis, ut cum jurgia, mille caſibus cadant, accidentia ſecus in poteſtate eſſe exiſtiment Patronorum, &c. Dixit aliquis hunc & hominem fuiſſe Græcum, & Militem, uti ipſe de ſe reſert, extremo Hiſtoriæ ſux. Dabo igitur Aurelium Symmachum, Oratorem eumque Conſularem. Is tribus in locis hoc uſus eſt vocabulo. Ut Lib. V. Epist. XV. quæ ad Theodorum Sanctio Lampadio, germano tuo, & ad ſpem proceſſus, & ad bonam viam morum, Cauſidicinam credidi profuturam. Item, Epist. LXXIII. quæ ad Licinium. Modeſtiori cauſidicine dare numen aſſeſſiat. Alibi idem, Qui Magiſterio tuo Cauſidicine inſinuo candidatos. Sed quid his inſiſto? Præclarum quidem Symmachi nomen, quem in florido dicendi genere, nullo Veterum minorem ait Macrobius, Saturnalium Lib. V. cap. 1. Malis tamen ſcio Imperatores, qui*

ſtante Roma, & eadem qua Symmachus vixerint ætatè, ſunt hi Theodoſius, & Valentinianus.

Codicis Theodoſiani Lib. VIII. Tit. 4.

A. A. Si qui verò cohortales, vel ſubjecti cohorti, ullam ante

hanc legem geſſit militiam, aut captam dudum etiam nunc gerit, aut cauſidicinam in foro ampliffima præſectura, atque Illyrici, vel urbano proſectur judicio, in eodem latuum pridem conſtitutionum ſanctio obſervetur. Vides illuſtrem locum eo ex opere, quod mecum ſcio miraris, vir ampliffime, non magis eſſe, in manibus eorum, qui ſe Themidi veſtræ ſacrarunt. Et ſanè quid ἀναλογία utroque, quæ diximus, vocabuli. Nam ut à *Cauſidicus*, *Cauſidicina*, à *juridicus*, *juridicina*; ſic à *carnifice* *carnificina*, à *veſtiſice*, *veſtiſicina*, apud Tertullianum de Pallio, ab *Indice* *Indicina*, Apuleio VIII. Mileſiarum, & aliis alia id genus. Vale, vir maxime, & porro nos amare, ac de Republica Batava benè mereri perge.

Amſteldami  
clō Ioc xxxviii.  
Kal. Febr.

Tuus æternus,

G. J. Voſſius.

## CCCXXII.

Martino Pilio S. P.

**I**TA eſt, ut ſcribis, Ornatiſſime Pili. Planè ego, & præſtantiſſimus Patruus tuus, iſdem in pueritia præceptoribus, Oxydrio, & Rekenario, viris doctiſſimis, uſi ſumus. Sed quod in vita ejus, de viro Cl. Franciſco Nanſio, lego, longè aliter eſt. Quippe is demum poſt exceſſum Oxydrii, Latinas Græcaſque literas docere Dordrechtii cœpit: At ſuperſtite Oxydrio, jam Leidam ſe contulerat Pilius, ut vel ex Rekenarii Epistolis à te editis cognoscere licet. Imo quo tempore docere Nanſius cœpit, (id anno fuit clō lxxci) jam juris ſtudio ſe Pilius addixerat. Primum ego Nanſium, poſtremumque audivi; ſed nunquam ego, & Patruus claſſe fuimus conjuncti. Quid mirum? quando ille ut ætatè, (ſeptennio enim natu grandior erat) ita etiam eruditione longè ſuperior foret. Itaque poſtquam ille Gymnaſium Dordrechtanum reliquit, præter dulcem ſui memoriam, etiam exemplum reliquit, quod imitaremur. Sanè laudibus ejus ego, & æquales mei non leviter ad ſtudiorum amorem accendebamur. Præſertim cum Academicarum feriarum tempore, excurreret Dordrechtum, & veterem ſuum Præceptorem Rekenarium, in Gymnaſio docentem, honoris, & amoris ergò, audire

dire dignaretur. Ac licet vix egressi essemus pueritia, tamen quotquot necdum subduxeramus manum ferulæ, facillè videbamus, nihil gratius Rekenario esse ista discipuli comitate. Nunquam sane eruditius, ac disertius docebat, quam honorario hoc auctus auditore. Postea etiam multa magni erga Rekenarium affectus indicia dedit; præsertim ubi præterito Rekenario, quasi Græcè non satis gnaro, Rectori Oxydrio Hadrianum Marcellum suffectum vidit. Quam graviter id tulerit, argumento erit, quod cum audiisset à Marcello, ejusque discipulis, aliquot sic spargi, Rekenarium Græca vix delibasse; Gymnasium sit ingressus, ac nobis audientibus, in hanc sententiam, Marcellum sit affatus. Intelligo optimum, & doctissimum Præceptorem meum à te, tuis traduci, ut Græcis literis minus excultum. Accessi igitur, ut ex discipulo æstimare discas magistrum. Homerum cedo, vel Isocratem, vel quemque Græcum scriptorem voles. Experiamur, quid uterque extempore interpretando possit. De peritiâ utriusque penes Franciscum Nansium, & alios iudicium esto. Carminè & politiori literatura præstabat Rekenarius: Sed longo eum intervallo superabat Marcellus, ut Artium, & Philosophiæ scientia, quam Lovanii hauserat, ita & peritiâ sermonis Græci. Nec exiguum eo honorem reportarat aliquot ante annis, Antverpiæ, quo tempore & privatam ibi scholam aperuerat Bonaventura Vulcanius. Sanè ita vulgo ferebatur, plures Græcè eruditos è Gymnasio suo emittere Marcellum, quam Vulcanium. Equidem multum metuo, ne id magis incuriæ Vulcanii fuerit tribuendum. Nam quantus in Græcis fuerit is vir, optimè præter Academiam Lugdunensem, in qua biennio quasi docentem audiui, testantur ejus tot monumenta per universam diffusa Europam. Sed-enim ista tum nos fugiebant admodum Adolescentes. Nec aliud æque mirabamur, quam sic à Patruo tuo, vix annos nato duo & viginti, provocari ad certamen, senem, qui annos xxx. & quod excurrit in literis Græcis insumpisset. Sed hanc Pilio fiduciam gignebat, quod priusquam iret Leidam, ab Oxydrio Græcè doctissimo, præclare ea lingua esset imbutus, & cum Leidæ degeret assidue, manu tam Græcos versasset, quam Romanos. Unum tamen in se Leidæ culpabat, quod Rami, potius quam Aristotelis præceptis, à Præceptoribus esset imbutus; Primus enim Philosophiam peripateticam, in Gymnasium Dordrechtanum introduxit Marcellus. Nec dubium, quin ad amorem Aristotelis, multum eum accenderit tum Julius Lipsius, qui in Epitola quadam scrip-

ferat, non fore magnum, cui magnus esset Ramus: tum etiam Petrus Molinæus, vir omnino Peripateticus, quo utebatur per familiariter. Sic igitur claudicaret hac parte doctrina, & ipse frequentare Peripateticos cœpit: Ac initium fecit ab initiis Crellii, qui eo tempore palmam in hac arte præripuisse cæteris videbatur. Meminit ipse ejusce rei, in literis suis, ad Nob. & Cl. Joannem Polyandrum seniore: quicum & magna illi notitia erat. Cumque per varia animum diffunderet, nunquam tamen deponebat amorem Poeseos. In quo quantum præstiterit, conjecturam capere licet ex iis quæ jam editione nova ab Orco vindicasti. Sic ille Latinis Græcisque literis, & cum liberalibus artibus, tum prosa, vorsaue facundia instructus, animum ad juris scientiam appulit; cujus exemplum si imitarentur adolescentes, non tot in publicum cruda propellerent studia, meliusque & sibi & publico consultum irent. Sed hæc emendare non est nostrarum virium. Tuam pietatem erga Patrum non possum satis laudare. Quid enim iniquius fuisset, quam ut laudatissimus undecumque Patruus tuus, à quo nihil non magni Patria expectabat, paucos intra annos intercideret totus? Id permittendum nulli bono, & studiorum amanti erat. Minimè omnium tibi, fratris filio: quem, ut video, Typographus tuus in ipsa inscriptione nepotem vocat; quasi Nepos non sic se habeat, ratione avi, uti filius ratione Parentis. Sed perminutum hoc, & à quo minimè pendeant, vel salus Patriæ, vel honos Patruus. Et fecit ille non sine exemplo doctissimorum nostræ ætatis hominum; non tamen eorum, ut arbitror, qui Romanis temporibus purè loquebantur. Nam locus unus alter quem objectant è digestis, vel malè lectus, vel malè intellectus. Quod in jure sic subactus, facillè videbis; ubi tam ad pulilla etiam te dimittere voles. Illustri Dom. Exlegato Beverio, affini tuo, magno Patriæ columini, ubi occasio feret, plurimam meo nomine salutem dicito.

*Amstelodami*  
cl. loc xxxviii.  
xv. Kal. Febr.

*Tuus omni studio,*  
G. J. Vossius.



## CCCXXIII.

Merico Casaubono, Isaaci F. Ger. Jo.  
Vossius S. P. D.

Reverende Clarissimeque Vir,

**S**I Gregorianam temporum seu emendationem, seu depravationem sequimur, decurrit hodie annus vetus: cras inibit novus, quem fortunare cupio tibi ac familiæ toti & venerando fratrum Collegio. Nos hic post mortes Dionysii, Joannis, Cornelie; postque morbos graves Matthæi, Isaaci, Gerardi, & corpore interdum languemus, & animo subinde, ut Augusti utar voce, betizamus. Accedunt molestiæ aliæ pene quotidie. Sed in universis voluntati divinæ acquiescimus. Interea spissius procedunt Musarum Labores. Adde quod Typographus noster ipse moras plurimum necat, ac sæpius habet quod existimet prævertere oportere, uti nunc Barlaamam descriptionem pompæ quam hic conspiciere fuit, ingrediente urbem Regina Matre Medicæ: ea intra mensem aut circiter cum picturis elegantissimis prodibit. Hoc magis sepositis paulisper nostris in iis festinatur, ne diuturniori mora gratiam deperdant, si quæ cum Itolorum pompis collata tantum fuere mediocria, hæc nimis magno molimine tarde admodum videant lucem. Rerum hæc novarum nihil habemus, nisi de capto Brisaco nomine Galliarum Regis. Eo difficilius succedet pacis negotium in Germania. Neque enim adduci se finet Rex Christianissimus, ut reddat locum tanti momenti. Absque eo autem Cæsar omnes conditiones pacis respuit. Interea hoc inde boni proveniet foederatæ Belgicæ, quod Cæsar non poterit ætate proximâ exercitum adversum nos mittere, uti decrevisse fama undique percrebuerat. Abunde enim nunc milite suo opus ei erit tuendis regionibus iis, in quas è Brisaco fieri possit irruptio. In urbe hac intra menses duos tres non minus XL. è viris Mercurialibus foro cesserunt. At qui etiam aiunt plures esse quinquagenis. Et complures in iis qui debeant ultra trecenta florenorum nostratum millia. Hæc res perdet plurimos qui illis crediderant, nec leve hinc damnum toti mercaturæ, quod & magnopere incommodavit publico: præsertim si verum est quod aiunt, moribus antiquis verisque rem stetisse Romanam: pecuniis adversus tam potentem hostem stare cadereque Batavam. Interea hoc solatii nobis, quod hinc æstimare discimus animi bona præ illis fragilibus ac fluxilibus. De præbenda Cantuariensi quæ bono meo

expiravit hoc mense Decembri, curæ tibi fore confido, ut ea pecunia annumeretur Mercatori Amstelodamenti Custenio, sive quem ille in Anglia huic rei præcecerit. Uxor uxorem optimam, imo nos omnes salutamus vos omnes.

Amstelodami clb Idc xxxviii.  
Pr. Kal. Februarias.

## CCCXXIV.

V. Cl. Merico Casaubono Ger. Jo.  
Vossius S. P. D.

**I**N summo mœrore meo paucillum hoc literarum scribo, præstantissime & amicissime Casaubone, siquidem Dominus Deus quam mihi dederat abstulit filiam natu maiorem optimam Virginem, & multis nominibus laudatissimam, quam rem ex aliis qui norint malim te intelligere. Quodque dolorem mihi auget, erepta mihi tristi infortunio. Dum enim his ut terris, credo & Britannicis, obtinet hyeme, per glaciem rheda, sive traha malis, una cum fratre, sorore, cognato & duobus aliis fertur; nec impudens pariter & imprudens auscultare vult meorum & aliorum monitis, universi rupta glacie in aquas præcipitati. Tenella illa mœca, partim casu, partim metu exterrita, mox obrigit: ceteri, sed non absque maximo periculo, evasere. Sed plerique eorum salutem post Deum debent filio Matthæo, qui non semel in aquas insiliit sponte, ut salvaret ceteros. Sic Deus, mi Casaubone, me exercet in hac vita, qui & hæcenus dat illud, &, ut confido, porro dabit, ut in sanctissima ejus voluntate conquiescam. Jam ut scis viginti quinque debentur mihi libræ Sterlingicæ ex Canonatus Præbenda, quam vocant. Nempe expirarunt Decembri mense anni superioris clb Idc xxxvii. Tantundem hic mihi hodierno die annumeravit honestissimus & ornatissimus Kustenius ea fiducia, ut quamprimum refundatur ei Cantuariæ sibi, vel illi, qui nomine illius ostenderit schedulam à me subscriptam, spero nullam fore moram vel in te, vel fratrum charissimorum quoquam. Plurimum salutem à me & meis dicito lectissimæ uxori, sed & Reverendo D. Decano & toti Collegio venerabilium fratrum.

Amstelodami clb Idc xxxviii.  
xviii. Febr.

## CCCXXV.

CCCXXV.

Joanni Isaacio Pontano.

Hardervicum.

**J**AM credo intellexeris, Præstantissime Pontane, de excessu Corneliæ filiæ meæ, natu majoris. Ea cum fratre Matthæo, sorore minore, cognato item Junii Nepote, sed & Illustrissimi Poloniæ Legati Filio, & Ephoro ejus, Leidam per glaciem ferebatur rheda, ut nostrates ea tempestate solent. Et erat Meis ea in urbe negotii quiddam. Sed Rhedarius, niti Traharium malis dicere, minimè obsequens assiduis eorum quos veneret monitis, dum prævertere alios conatur, non impudens minus, quam imprudens, universos in glaciei tracturam, ubi piscaretur antea, sed tum leviter glacie erat obducta, conjecit. Unica illa Cornelia confestim obriguit. Cæteri sed non sine magno periculo, virtute Matthæi evaserunt: cui in hoc tristi infortunio, favore divino robur erat triplex, & pectus adamantinum. Ita ut tertio etiam ad alios liberandos, se in aquas præcipitem dederit. Ferreus sim, vel siquid ferro durius, nisi hic casus me admodum maceret, & coquat. Tamen me non mediocriter solor divina Providentia, sine qua nec capillus nobis excidat, ut Sospitator prædicat. Hic interim mœror me paulo fecit tardiorē ad rescribendum. Præterea quod cum tuæ huc literæ ferrentur. Lugduni essem, quo me receperam exequiarum ergo. Nam avita Junii sepulchro est illata. Simul illud ut deferrem fecit, quod Papiam ipse non haberem. Nam quod ad opus Grammaticum nostrum, ubi subinde memini, amici sum usus codice: qui dicit tibi ejus usum esse necessarium in Isidori glossis, quas cum commentario edere decrevit. Dolet quod non possim Stephanio gratificari, cujus ego, & virtutem amavi semper, & æstimavi doctrinam. Aveo scire ut valeas. Nam literæ tuæ ad me, injecerunt sollicitudinem non levem: Sed spero jam planè convalueris. Id Deus faxit, non tui modo, & tuorum causa; sed vel maximè propter Remp. Literariam, quæ & Geldricam tuam historiam, & alia à te avidè expectat. Omnes mei te salutant, foeliciusque hunc annum decurrere tuæ familiæ cupiunt, quam meæ cepit.

*Amstelodami,*  
clb lxxviii.  
xvii. Febr.

Tuus,

G. J. Vossius.

CCCXXVI.

Claudio Salmasio Ger. Vossius. S. P.

**N**ON absq; periculo, salvus interim ac sospes, cum filio filiaq; nunc unica Amstelodamum perveni, & eapropter gratias Deo nostro ago, quas possum. Conradum Pauli Bruntwicensem (male Heresbachium putâram) mitto quidem, sed vix video ut juvare aliquid possit. Hortomannum de Usuris nec habeo, nec hic ex amicis queo nancisci. Scio tamen Lugduni in Galliis excusum anno clb lxx. cum aliis aliquot ejus viri opusculis. Mirum præteritum esse in Oceano Juris, cujus tomo septimo (septem & viginti voluminibus constat) habentur septem de Usura Scriptores. Hoc volumen transmisissim, nisi scissem certo esse etiam in Bibliotheca Leidensi. Sed ex Bibliotheca nostra habeo nunc domi meæ, ac transmittam si verbo indices. In indice tot voluminum video & aliis tomis multa de hoc argumento interspersa esse. Sed quandoquidem Leidæ hæc habetis, quæ si ulli, tibi sane patere debent, nihil de eo addendum putavi. Sin à nobis malis, universa in arca concludam ac mittam. De honore habendo nobis in baptismatis sponsione uxor gratias agit, ut convenit, rogatq; obnixè, ut utaris vicaria ejus opera, cujus maxime velis. Sic enim apud Batavos, & credo aliis etiam terris usus est, si loci intervallum vel valetudo vel aliud obstitit quo minus, quis coram adeste perq; se obire sponsionis munus possit. O si suavissima mea Cornelia, quam sic ob virtutes dileximus ego & uxor, imo innumeri nobiscum, hoc potuisset pro nobis. Sed facta est voluntas Domini, cujus nomen sit benedictum. Conjugi tuæ lectissimæ sed & affini tuæ optimæ salutem adscribi jussit uxor mea; simul obstrictissimus tibi Isaacus meus & qui plura tamen debere exoptat, quo mancupio totus sit tuus, saltem non minus quam parentis, plurimum te & conjugem salutat.

*Amstelodami,* clb lxxviii.

Non. Feb.

S f 2

CCCXXVI.

## CCCXXVII.

Claudio Salmasio, V. Cl. G. J. Vossius,  
S. P. D.

**I**N mœrore quem conceperam ex obitu optimæ & suavissimæ Cornelix meæ, dolorem illum Leida abeunti non mediocriter auxit, quod partim ex Elichmanno, partim etiam ex Epistolio tuo, intelligerem de nephritide, adversæque valetudine, quâ impeditus, non uti ante, ita à funere etiam invisisses. Atque eo pejus me hoc habet, quod ex eo nihil intellexerim. Scis autem quam amor sit suspiciosus. Simul nonnihil molestiæ animo attulit meo desiderium cognoscendi, quid proximo Curatorum conventu factum esset de rebus tuis, & an manserint promissis. Sed si valetudo est prospera, minus laboro de cæteris: quanquam si ullus mortalium, is sim, qui magnum inde dolorem caperem, si tantum posset improbitas, ut te illud seculi decus, ac Batavix etiam Academiæ præsidium, à terris avelleret nostris. Quod ne Deus finat, ut unquam videam. Credo, jam filiam tuam Mariam sacro stiteris baptismati. Sed sive id jam factum, sive futurum propediem, ex more Batavo, arbitror & Gallico, munusculum mitto, quo adultior tua meminerit optimæ conjugis meæ: cujus utinam valetudo fivisset, ut ipsa de sacro fonte levaret; sed quia nec ipsa potest ad vos venire, nec de Cornelia dulcissima, Deo sic visum fuit, vicaria opera opus vel fuit vel erit, dum ipsa susceptrix, & sacræ initiationis arbitra censeatur. Tantum Junia mea Merceram tuam rogat, ne vili metallo, splendido luto, munusculum minutum, sed solo æstimet affectu. De Hottomanno nihil mirum, si Haga nihil receperis; nam quo ad te scripseram die, eo ad nos filius Haga venit. Ac necdum ad Hagenses reversus, & ut arbitror jam serum est ex advocatorum elegantioribus exquirere de hoc opere. Quare nisi aliter videatur, operæ parceretur; sin aliter placitum, fac ut ex Ilaaco meo intelligam. Nihil enim mihi vel meis jucundius esse possit, quàm ulla in re tibi, hoc est reipublicæ Literariæ, utilis esse possit opera nostra. Salutem plurimam tibi, Conjugi, affini tuæ, Uxor, imo omnes nos dicimus.

*Amstelodami, clō Idc xxxviii.*  
Non. Kal. Martias.

## CCCXXVIII.

Joarini Cabeliavio. J. C. S. P.  
*Ultrajeſum.*

**D**Icere non possum, mi Cabeliavi, quam grata mihi fuerit utraque Epistola tua: potterior imprimis, qua mihi carum adeo pignus, lugenti, omni solationum genere mederi voluisti. Hunc animum tuum nisi habeam pergratum, prorsus fuero ingratus. Quamobrem, etsi semper te dilexerim, non leve tamen est, quod amori accessit nostro. Nec propterea opinari te velim, molliter adeo me ferre tritissimum hunc casum, cujus gratia, tantum assumendum tibi laboris putasti. Scis ætatem senilem, & ut teneris ab unguiculis, studiis sim innutritus, sacris imprimis: quæ tractare soleo, non, ut alios solùm reddam meliores, sed ut prior sim Ipse, quales esse alios velim. Sed de isto pluribus colloquemur, ubi Amstelodamum veneris. Nam spem eam mihi fecit alloquio suo optimus Affinis tuus. Advenies exoptatissimus: Neque id modo, ob eruditionem insignem; sed etiam ob pietatem, & candorem, quibus omnem doctrinam, in summis etiam viris posthabeo, sæculo enim vivimus fucato, & maligno: adeo ut qui raram doctrinam cum excellenti probitate, animique candorem conjunxerunt, sint vix totidem, quot Thebarum Portæ, vel divitis ostia Nili. Sed mihi ut videtur, ad carceres prope decursum hoc vitæ spatium. Tibi, ut arbitror, longa restat via; in qua conficiunda multum metuo ne graviora etiam subeunda sint, quam illa, de quibus scribis prioribus literis. Non omnia, hominibus eruditis præsertim, Dei mentuentibus, evenire solent ex animi sententia. Nimirum melius novit Deus, quid cuique expediat. Literas tui amici remitto, ut volueras. De tuis fiet ut scripseras. Barlæus tui amantissimus plurimum te salvere jubet.

*Amstelodami,*  
clō Idc xxxviii.  
Post. Non. Mart.

*Tuus omni studio,*  
G. J. Vossius.



## CCCXXIX.

Francisco Gomaro, V. Cl. *Præceptor  
Veteri, affinitate conjunctissimo*, Ger.  
Jo. Vossius S. P. D.

Quod M. Tullius ait de Phidiæ signo, simul id adspectum, & probatum; id intelligentissimi cujusque judicium est, de opera tua, in Hebrææ poesios notitia quasi ab Orco revocanda. Nam & eruditissimus hic labor tuus novitate argumenti facile in oculos incurrit omnium, & quanto gratiora esse debent, quæ sacras attingunt literas, tanto magis vel prima facie se commendat, & tamen majorem allaturus fructum, quo magis inspiciatur. Sanè apud nos video extolli hanc commendationem, non ab iis modò, qui nomen nobiscum Christo dederunt; sed iis quoque qui, se aiunt, Mosais contentos sacris; laudarentque iidem impensius, si cum Hebræis literas conjunxissent Græcas. Magnas igitur gratias habeo pro Opere, quod & nostra ætas, & posteræ æstimabit semper. Altero etiam nomine, & ego & conjux hoc tempore, post tot merita vetera tibi obstringimur, quod ea ætate illis occupationibus non gravatus fueris, nos in hoc tristissimo dilectæ filiæ obitu, solatii plenissimis literis alloqui. Valdè illæ gratæ nobis, acceptæque, imprimis mœstissimæ conjugii, quam non mediocriter refecerunt. Spero Deum porro daturum, ut ea quæ scribis, ad animum revocet magis & magis. Nec illa sepniter id hætenus fecit, sed recurat vel minima occasione dolor. Nec leviter excruciat, quod erepta filia nunc ætate hac gravescens, & valetudine adeo infirma, sibi conflictandum videt cum ancillari vecordia, segnitie, ac moribus improbis. Nam antea longè maxima pars oneris in filiam recumbebat, quæ ad regundam familiam nata videbatur; non sine parentum, & fratrum admiratione. Ita circumspectè, nec moribus gravibus minus quàm placidis moderabatur, ea quæ ad rem familiarem pertinerent. Nisi hoc non minus foret, quod dixi, majus etiam de pietatè, & sacrorum intelligentia, adderem de peritia sermonis Gallici, Italici, Hispanici. Nec Latine nesciebat. Adderem de Musice universa, arteque tum calamo, tum penicillo, & coloribus pingendi. Sed dolorem talia meum quoque, qui virum, quodque caput est, Philosophum me Christianum commemini, refricant magis, quàm mitigant. Ergo his missis, ad studia nostra venio. Excuditur opus nostrum, de origine & progressu Idolo-

latræ Gentilis, & humanæ mentis ascensu ad Deum: quo ipso cum Nationum Theologia triplicem refero conflictum; historiæ præcæ unum, scientiæ naturalis alterum, ac tertium Scripturæ Sacræ. Sed opus tam varium, ac difficile, in spissis adeo occupationibus non potest non spisse procedere. Salutem plurimam dicito, non uxori modò, generoquæ; sed clarissimo etiam Altingio; item Nobilissimo Magduello. De affine Junia, & Matertera ejus Manieria nihil addo, quia hoc negotium uxoris soleo literis committere.

*Amstelodami*  
cl. l. c. xxxviii.  
vi. Id. Mart.

## CCCXXX.

Joachimo Borgefio *Gymnasiarchæ*  
Groningano S. P.  
Groningam.

Peramice à te factum, Doctissime Borgef, quod mœstum me, propter excessum optimæ carissimæque filiæ, consolandum per literas putaris. Omnino enim valdè me hic casus affecit; sic tamen, ut solidi plurimum solatii percipiam; quod jam à teneris sum edoctus, nihil nobis secundi vel adversi contingere; citra Dei voluntatem. Unus ille melius, quid filiæ, quid Parentibus expedierit, novit, quam Orbis universus. Dei sunt cuncta, dat ille, & adimit, cum visum. Nec sanè illis temporibus vivimus, ut homini prudenti ac pio valdè adblandiri hic mundus possit. De me quidem illud dixero ingenuè, longè injucundissimam mihi hanc vitam fore, absque duobus illis foret, quod voluptatem magnam capio, partim quidem in senectute hac addiscendo, porro quæ me reddere possint meliorem, partim vero, voce, scriptis, factis, benè mendi de omnibus, pro modulo gratiæ, quam mihi adensus est Dominus. Pergratum quoque fuit *Avridaggy* tuum; quod cave, ut facis, posthac depreties. Omnino contra censeo, te mihi pro scrutis & frivolis reposuisse; non contentus sum dicere aurea, malo dicere auro magis aurea. Nam quis homulus ego, pro duobus maximis Regibus, Davide, & Salomone? quid scripta nostra, imo humana omnia, præ *Davidsonis*; Præ istis aurum non est aurum, sed lutum, etsi quid illis vilius. Valdè etiam mihi probatur opera

opera tua, in pietate sic à teneris instillanda unguiculis. Hoc enim præfatione operis abundè testatum facis. Nimirum quanto corruptiora sunt secula, tanto magis gliscenti malo obviam eundum est, præsertim Scholarum Præfectis. Equidem cum te sic animatum esse videam, non possum non & mihi gaudere, & Juniolo nostro gratulari, quod talem nactus sit Doctorem. Quare quod alioqui facerem, & vehementer facerem, ut puerum de meliori nota commendarem tibi, id nunc necessarium non arbitror. Nam cum affecta etiam hac ætate omnia metiaris juventutis bono; eo imprimis quod ad viam perducit æternam, quo pacto persuadere mihi possum, cessaturam unam operam tuam in eo adolescentulo, quem cum ingenii causa ames, tum propter avi summi viri merita erga Ecclesiam Dei. Cujus etiam translationem in iis, quæ nunc à te edita, præ cæteris omnibus, versandam pueritiæ manibus putaveris. Vale, vir præstans & amice.

*Amstelodami*  
clb lbc xxxviii.  
vi. Id. Mart.

*Tuus,*

G. J. Vossius.

### CCCXXXI.

Stephanio V. Cl. Gerardus Joannes  
Vossius S. P.

**S**Æpè animo meo, Clarissime Stephani, jucundissima subit recordatio ejus temporis, quo studiorum gratia vixisti Lugduni, proque ea ætate non inglorius, præsertim editis in Saxonem Grammaticum castigatioribus, non acutis minus quam eruditis, ac mihi meique amantibus, eò gratis magis acceptisque, quod ut Heiniano, sic nostro etiam nomini dicandas putaris. Nec absens defuisti, literis testari, singularem erga me affectum tuum. Non dubito autem, quin sæpius sis miratus, fortasse & dolueris, quod Epistolari hoc officio non paria fecerim. Sed enim, amicissime Stephani, si nosces quam à mane distinear ad vesperum, sic ut non nisi interpestia nocte vacare à studiis possem, credo, qui amor est tuus, peteres ipse, ne subirem qualemcumque respondendi laborem. Nec tamen hoc à me scribi puta, ut te quoque in scribendo faciam negligentior. Nihil mihi, mi Stephani, tuis literis gratius fuit, vel erit. Tantum te in optimam capere partem velim, cessationem nostram. Neque enim provenit ex eo quod imminutus sit amor no-

ster, sed quia magis & magis definam esse meus. Absque hoc foret, crebris, non te modo, sed præstantissimum etiam Collegam tuum Laurembergium literis compellassem. Interea fore spero, ut & tibi & tot aliis amantibus mei, magis satisfaciam; jamque seriò dispicere coepi, quomodo me exolvam hisce vinculis, quæ injici totos dies video. Interea amemus nos inter nos: Eo impentius quo ætas mea hæc magis aggravescit, luctu etiam accedente domestico, de quo ex summo viro, (olim meo, nunc tuo, atque utinam nunc quoque meo Collega possem dicere) Joanne Meursio, poteris cognoscere. Neque enim quæ ad eum scripsi, iterare dolor finit. De Saxone tuo, curæ mihi antehac etiam fuit. Sed nihil certi datum respondi. Desperabat Elzevirius excudi apud nos posse: Nondum ego. Propediem certiora, vel ex Elzevirio, vel meipso cognosces. Clarissimum Laurembergium plurimum meo nomine saluta.

*Amstelodami* clb lbc xxxviii.  
Kal. Aprilis, St. N.

### CCCXXXII.

Hugoni Grotio S. P.

Lutet. Paris.

**D**Olet, Illustris Domine, quod tardè adeo ex conjunctissimo Collega meo Bartheo resciverim de itinere Cl. viri Joachimi Wichwortii; si præcissem, non passus eum forem sine meis Lutetiam literis proficisci. Nunc abierat priusquam cognoscerem eum de abitu certi aliquid statuisse. Itaque nec valedicendi potestas fuit. Molestè etiam tuli, quod Epistola mea, tot ante menses exarata ad te, diu adeo delituerit apud præstantissimum fratrem tuum Guilhelmum. Vel me non satis intellexerat Filius meus Franciscus, vel Francisci mentem non satis sit affectus frater tuus. Nam volueram, ut literas per Tabellarium mitteret. Affinis de pictura opus, per amicum mittam, ubi occasio obtulisset. Gratiissimæ mihi fuerunt literæ tuæ, quibus mortuum erigere studes. Nec tamen mihi videor, molliter ferre tam durum casum: nec id censent amici: mirantur magis, quando cogitant, cujus ipsi animi forent in simili negotio. Nempe mecum assiduè revolvō, ut curæ semper fuerim Deo meo, qui unus meus me, & omnibus mortalibus novit, quid mihi, quid meis expediat. Nec infelices censo, qui in flore ætatis discedunt. Non

†

corrum-

corrumpentur à seculo hoc, quo ab annis xx. ita improbitas, & *adversitas*, coepit incrementa, ut animus vehementer exhorrescat; quando mecum reputo, quæ tempora videantur imminere, si sic porro procedetur. Eadem aliquid solatii afferunt conjugii optimæ, nec tamen in hoc dolore suo satis cordatæ. Me quidem sæpe ejus gemitus & lacrymæ somnum capere non sinunt. Nam & mihi refricant causas doloris. Recurro igitur ad vetera solatia millies ei dicta, & quod plus sæpe valet arte, ad alias cogitationes abducere ægram ejus mentem annitor. In opere nostro excusa sunt, ut vulgo numeramus Alphabeta quatuor. Quintum quantum conjecto superest. Miraberis, scio, me non posse manum tollere de tabula. Sed primo satis visum ex prisca historia, adducere quæ ad Religionis gentilis primordia, & progressum pertinerent. Postea non sum visus mihi sat utilem operam publico navaturus, nisi mentem humanam adducere quoque ad verum numinis cultum. Itaque juvit per omnia me naturæ opera diffundere; inque iis considerare, Dei bonitatem, potentiam, ac sapientiam. Valdè enim ab iis dissentio, qui inanem naturæ speculationem arbitrantur. Collegæ Hortensii iter ægrè procedit. Delegati Provinciarum in generalium Ordinum confessa assignarunt in itineris impensas, bis mille Caroleos: quos petere jusserunt, ab rei maritimæ Præfectis, vel simili Collegio, quod Amstelodami sit. Displicet id huic urbi. Si idem fecissent Ordines Hollandiæ, negotium jam confectum haberemus. Metuitur nunc ne, si in minuto hoc foederatarum Provinciarum Delegatis gratificetur, res sit exempli non optimi, ac assuescant imperare quantum volent: immensam autem pecuniam volent semper, si urbem hanc opibus ut aiunt affluentem, habere coeperint in talibus obsequentem. Scripsi nuper cur noluerim me immiscere editioni Critolai, totumque hoc commiserim Hortensianæ industriæ. Ita factum, ut nihil ejus hæcenus sit editum. Sed paucis abhinc diebus, Salmasius ad Isaacum meum scripsit, ut cognosceret, quid de hoc opere fieret. Occasione ea compellatus Blauwius, qui retulit jam figuras, quas vocant, incisas: ac propediem opus ipsum velle excudere. Nihil homine illo tardius, in exsolvendis promissis. Commonebo Hortensium ut magis urgeat. Sed vix illi quoque sat curæ fore arbitror, quam diu incertus itineris, sic animo fluctuat. Hoc si videro post longam cessationem, curam ipsæ hanc lubens suscipiam. Isaaci mei Scylax Caryandensis, Geographus vetus serio ab eo castigatus, excudi abhinc mense coepit. Etiam Mæotidis

periplum *ἀνὰ δόρυ* addet. Conjux & liberi uxorem præstantissimam, ac filios, filiamque plurimum salutant.

Amstelodami  
clō loc xxxviii.  
Postrid. Kal.  
Maias. St. N.

*Illustris tui nominis cultor,*

G. J. Vossius.

### CCCXXXIII.

*Viro Amplissimo Georgio Ratallero  
Doubletio, G. J. Vossius S. P. D.*

**I**ntelligo apud vos, vacare Prorektoris ut vocant locum. Cogitare proinde mecum coepi, de Scholis Bataviæ; quarum plerisque succrescere video, non ausim satis dicere fungorum segetem, (nam quæ hæc Latinitas?) attamen copiam talium, qui priusquam didicerint, docere alios præsumant. Hujus mali fons caputque est præpostera quædam misericordia Procerum erga imperitos, fame fortasse, nisi sui ratio habeatur, perituros; quos dum curant, immisericordes fiunt erga innocentem illam ætatem, quæ eo magis erat curanda, quia curare se nescit. Existimavi igitur, cum tot annos instituendæ impenderim adolescentiæ, nihil me facturum à moribus meis alienum, si & publici boni ergo, & in eorum spem gratiæ, qui scholæ apud vos bonum curant, commendarem tibi Joannem Varanum, Samuelis Filium, spe illa, ut tua opera, commendetur iis quibus Scholæ cura incumbit. Juvenis hic, (nam cur dissimulem) in illo quidem capite, quod sic hodie est controversum. Melanchtonianæ est addictior sententiæ; sed quod comperi, alienus planè ab illis, qui monitri aliquid alentes, *ῥωμιάζοντες*, sive mavis *Σαυριάζοντες*. Quales à me neutiquam sperent, ut pueritiæ apud nos, censeam præfici oportere. Hac fiducia, literas istas exaravi, nec alioqui in gratiam meorum acturus. Tu quoque si eum Scholæ curatoribus commendare non graveris, facies, & rem mihi gratissimam, & pulchrè mereberis, de Parentibus, pariter ac Pueris, & eadem Curatoribus, qui digna tibi postea gratias agent. Est enim pius, sobrius, modestus. Quam raræ sunt laudes istæ temporibus nostris! Jam præterea quod in isto munere spectatur, Latine est scientissimus, Græce gnarus, carmen etiam pāngit foeliciter. Dexter est in instituendo, & industrius. Novi juvenem familiariter, norunt & liberi, ut fidentius ista scribam.

De



De rebus meis nihil habeo addere, nisi jam maiorem partem esse absolutam operis mei, de Idololatriæ origine, & progressu. Optimaæ conjugii tuæ à me, & meis, salutem plurimam dicito.

*Amstelodami,*  
cl<sup>o</sup> Id<sup>o</sup> xxxviii.  
v. Idus Maias.

## CCCXXXIV.

Hugoni Grotio.

Lutet. Par.

Illustrissime Domine,

**E**unte ad te Petro Peltio, & aliquid à me literarum poscente, et si hoc tempore valde distrahar; tamen ornatissimo id juveni, & amplissimo ejus tui amantissimo Parenti, dandum putavi, ut aliis hoc officium præverteret. Valdè jucundus mihi filii tui Petri J. C. adventus fuit, qui & aliquot nobiscum dies Amstelodami egit. Post eas literas quas veniens exhibuit, alteras tuas benè longas, ac tanto gratiores accepi. Sed nunc respondere, nec his, nec aliis licet. Fiet hoc autem Epistola proxima. Solum mitto quæ Hispanicè Manasses exaravit. Sed censeo non satisfacere ista quæritis tuis. Agam ipse cum eo accuratius. Philolaus me urgente excudi cœpit. Hactenus opera mea ab Hortensio, in promovendo itineris instituto, postulata non est. Aliunde quicquid eo pertineret, resciscendum fuit. Nunc quia meam sibi operam, apud proceres utilem fore arbitrabatur, non deero amicissimo Collegæ. Sed utinam id antea fecisset! Non debuit hoc negotium, eo pede quo cœptum transigi. Monstravi illi in literis tuis quæ ad laudem ejus, & hujus instituti commendationem pertinerent. Petiit, ut ea sibi à Filio meo exscripta traderem. Tum item ut Consulem Conradum Verburch, & Consularem Bicherium accederem, tuamque de tota hac re sententiam prælegerem. Feci id lubens, & video non leve apud eos pondus habere iudicium tuum, uti sanè debet. Facturi sunt omnia quæ salva Hollandiæ Ordinum auctoritate possunt. Verum & de hoc, & de aliis, literis proximis. Jam enim adest Peltius, & tempus abitus instat. Illustri Dominæ conjugii, & familiæ toti salutem à me meisque.

xiv. Jul.  
St. N. Anno  
cl<sup>o</sup> Id<sup>o</sup> xxxviii.

*Tui nominis Cultor,*

G. J. Vossius.

## CCCXXXV.

Francisco Junio, Fr. F. Ger. Jo. Vossius  
S. P. D.

**Q**UI has ad te literas defert, conjunctissime affinis, is est ornatissimus juvenis Joannes Roue, Professoris Eloquentiæ, in inclyta Rostochiensium Academia frater. Octennium jam in Witebergenfi, Liptensi, Rostochiensfi Academia vixit: Ac linguis, præcipuè Orientalibus, sedulam dedit operam, sub egregii nominis viris Buchnero, Smidio, Trostio eo qui & Syriaci Testamenti, & Lexici editione, non leve sibi nomen paravit. Exinde anno integro, lustrata illi Suecia, Daniaque. Sed egregius animus nequit his se spatiis continere, sed nosse aver quicquid in orbe est præclari. Itaque in Ectaviam venit, ac Leidæ sub Golio Professore, in Arabicis se exercuit: Inque ædibus vixit Elichmanni, Medici experientissimi, & quod magis huc facit, Arabicæ, Persicæ, Ægyptiacæ, & aliarum Linguarum periti. Nunc Magnam cogitat Britanniam, magnis (ita censeo) factam viris. Commendatitias eo, ut intelligo, obtinuit à præstantissimo Boswello, Gentis Britannicæ ad Belgicæ fœderatæ Proceres Oratore. Sed quem dixi Elichmannus hospes ejus, petiit ut meas quoque adderem. Quod eo lubentius teci, quia & Cornelius Grotius, Magni Hugonis Filius, eum filio meo Matthæo per literas commendarat. Postea etiam in prandiolo, quo cum Collega Hortensio, & Hasio Medico exceperam; sic tribus nobis se probavit, ut amare nostri dignum, imo bonorum omnium putarem. Non animus quidem tam occupato faceffere quicquam negotii; sed facies quod possis, quod mihi gratissimum erit, meque ad similia in tuæ spem gratiæ præstanda paratissimum scito. Ab Nobili D. Boswello spes ei facta est, posse cum Britanno natalium splendore inclyto, proficisci ad illustrissimum serenissimi Regis Caroli Oratorem, qui Constantinopoli agit. Quare quoque in istoc, si quid valeas, non patieris, scio, operam tuam desiderari. De excessu illi mei Joannis in India Orientali jam diu existimo aliunde cognôris. Scripti de eo ad Reverendissimum, & Illustrissimum Dom. Archiepiscopum, nequid ignoraret, cujus maximè scire interesset. Sic sunt spes humanæ. Post tantas impensas, benè tandem fore sperabam. Et ille meus magnam sui expectationem suscitavit. Jamque Proceres hic nostri, cogitationem susceperant, de ornando eo dignitate luculenta,

lenta, quæ eum potuisset, ut sic dicam, totum inaurare: sed Deo aliter visum. Ex Bibliotheca ejus desidero, nimium quantum librorum, quos donarum. Et in his aliqui, quos ut recuperare his terris possum, minime videam. Intellego de nova Vitruvii editione te cogitare; sanè placet animus: Et in nostris, sive <sup>7</sup> *manasse* filii malis, vetus erat editio Florentina, quam usui Tibi futuram arbitrarer. Habeo alioqui & alteram. ibidem excusam, non multo post curante Jocundo Veronense: si usui esse possit, transmittam. Clarissimus Salmasius, Vir nunquam satis laudatus, magnas Tibi gratias agit, pro Opere tuo de pictura: & *Artis* mittit. quæ de usuris scriptæ. Unum est volumen sed ejusdem Argumenti; jam alterum sub prelo est. De excessu Cornelie meæ suavissimæ, & eruditissimæ virginis scio, jam cognoris, ex sorore Brunæa. Eo magis tristitia illa refricare, mihi animus non est. Quæso, mi æfinis, ne tam segnis sis in scribendo. Tueberis te exemplo meo: sed si vitam meam tam molestam, & occupatam nosset, facile excusaveris. Uxor nunc Amersforti est, apud Neranam sororem: Idque Authore Medico, qui arbitrabatur usque adeo valetudinariam recreari posse, tum aere ejus loci meliore, tum colloquio fororis, & amicorum, quos alios in his Thinsium Affinem habet. Excuditur opus nostrum gemini Argumenti, de Theologia Gentium, & Physiologia Christiana: jamque perventum ad philyræ centesimam, sive id clarius, ad Alphabetum quintum. Excuditur & Scylax Caryandenus filii mei Isaaci, qui & de Ptolemæi Geographi-  
corum nova editione consilium suscepit. Vide ecquibus Codd. ex Anglia M-S. juvare possis. Multa enim in eo corruptissimè nunc leguntur. Quæso meo nomine salutes, quos mei in Britannia scis amantes. Catalogum nunc texere non est animus. Vale, optime Affinis, & à nobis omnibus salve; etiam Cognato tuo Brunæo, qui post suum ex Anglia reditum, nobiscum Amstelodami vivit.

cl. l. c. xxxviii. iii.

Kal. Jul. St. N.

## CCCXXXVI.

Constantino L'Empereur, G. J. Vossius  
S. P. D.

Nobilis, & Magnifice vir,

**A**ccepi hodie literas à viro Cl. Ludovico Crocio, Theologo Bremensi, quibus mihi commendat Georgium Gentium, Dhama-Saxonem, cum qui has ad te literas defert: Ac porro à me petit, ut ne cum dimittam Leidam, sine literis meis *auspiciis*, vel ad te, vel Golium nostrum, vel Ludovicum de Dieu; viros famâ nominis egregios, sed eorum judicio, qui penitus mecum norint, longè hac majores. Ac vos potissimum nominat, quia juvenis hic hæctenus Orientis linguis sedulam dedit operam: atque ut uberiorem ex iis capiat ingenii fructum, ad vos potissimum, tot Orbis Academiis insuper habitis, capessit gradum. Horam vel amplius, cum eo sum collocutus. Video esse eruditum, & quod scis, majoris me facere, modestum. Augustanæ confessioni est addictus: quod & Crocius scribit, & ipse agnoscit. Laudavi ejus propositum, quod ex fonte Hebræo, Scripturarum peteret intelligentiam; Et simul addere vellet, quæ ex translationibus, & Paraphrasibus, Orientis possent hauriri. Subjeci interim sicut soleo, ut Historia Ecclesiastica, & sanctorum Patrum commentariis legendis, partem aliquam temporis dare vellet: multaque in eam rem attuli, quæ incitare ad hoc possent. Devenimus occasione hac, cum in sermonem, ut aliquid dicendum esset, qui juniorum, de antiquis Ecclesiæ temporibus, sui quoque memoriam, apud posteros reliquissent. Apud eum quem scirem, Augustanæ esse confessionis, & præterea in diœcesi natum esse Magdeburgensi, mentionem injeci de Centuriatoribus Magdeburgensibus: quos ut multa fugisse, non est dubitandum, ita quin plurima præclare viderint, nemo sanus ambigit. At eruditus juvenis in hoc doctrinarum genere, statim inscitiam suam prodidit. Nec nomen istius operis nosse aiebat, nec vidisse unquam. Deduxi igitur in Museum meum, & opus monstravi universum. Cogitavi ego mecum, quod olim dicebat Tullius, O tempora, O mores? Sic jacere antiquitatis studium, pariter apud nos, & eos quos dixi? Irascebar non optimo juveni, & qui hac parte, penè extra omnem foret culpam: sed Doctoribus Theologis, quos audiisset tam diu. Nempe scripturarum interpretationem, ex junioribus solum petere jubent: Veteres autem Ec-

T t

clesiæ

clesiæ Doctores, uti Megarenenses olim *ἦτε τεινοὶ ἢ τε τέρπτοι*. Tanto magis te amo, Nobilissime, & amicissime vir; qui eximia Linguarum Orientalium peritia minime contentus, jam ab annis pluribus in eo operam infumas tuam, ut veteres Ecclesiæ Doctores, socies novis, & novos item antiquis. Quod si ab omnibus fieret, melius cum Ecclesia Dei ageretur. Optimæ Conjugi, ac Clarissimis viris, Golio ac de Dieu (quibus per otium hunc juvenem commendabis) plurimam meo nomine salutem dico: sed & Collegis aliis, ac amicis; verum ut dixi, ubi sponte se occasio feret. Non is sum qui ex magno pariter viro, ac amico, & munus nunc sustinenti, sub quo tam corruptis temporibus, propemodum Alcides succumbat, salutigerulum facere stultè adlaborem. Tamen committere non possum, quin extra ordinem, unum memorem: scilicet avunculum tuum, eumque conjunctiorem; mihi quoque alio nomine, quod Belgam, in foederatis hinc terris. Antiquitatis Ecclesiasticæ, (qua sic me capi scis, jam ab adolescentia) nec amantior, nec intelligentior sciam aliquem. Ni grave est, aliud quoque est, quod summo illi viro significes: accepisse me responsum, ab Illustrissimo Suecorum Legato, Hugone Grotio; in cujus literis, hæc iidem verbis legere est, *Polycarpi Epistolæ Græcæ, non puto plus habere Sirmondum, quam habeat Salmasius. Ultima sunt, Ἀλλὰ τὸ ἥδιον ἀποδιδόναι, καὶ δι' ἡμᾶς ἔσσο...* Ex Græcia quin id damnum sarciri possit, si quis allaboret, vix dubito. Danda opera est ut queratur & Hermas græcus, qua de re Anglos quosdam monui. Vale vir, amiceque eximie.

Anno cIdo xxxviii.  
Postr. Kal. Julias.

Tuus æternum,

G. J. Vossius.

### CCCXXXVII.

Stephano Stephano viro Cl. & amicissimo, Ger. Jo. Vossius S. P. D.

**D**E Saxone Grammatico jam uni alteri Typographorum sum locutus, sed nihil certi responderunt. Negant se quicquam statuere posse, priusquam constiterit quantum id sit, quod præstiteris in nobilissimo gentis vestræ scriptore. Dixi ego, quicquid molitus sis, sine dubio non deterius fore egregiis notis, quas elucubrasti jam ante annos plusculos. Aiunt ad istoc, non diffugere se iudicium meum de tuis: sed tamen necessum esse, ut videant, quæ futura sit

moles operis, ut statuere queant, quæ impensarum futura sit ratio, & quantum chartæ unius generis sit comparandum. Non potui iis hac parte satisfacere, quia nescirem Mercatorem, cui superiori Autumno thesaurum illum commiseras. De Papia Fontanus scripsit ad Jo. Lydium. Sed nihil ab eo responsi accepimus. Florilegium Fabianum meretur, ut excudatur, & manibus teratur elegantioris adolescentiæ. Sed vidi non esse ad palatum crassi Typographi, quicum sermonem de eo habui. Videbo, an alius sit futurus paratior. Omnino præla nostratia sic bonis malis fervent, ut difficulter aliquid novi recipiant: atque hæc etiam causa est, cur & in meis & illis filiorum, de quibus scribis, Tricones sint maximi: quod in suis quoque expertus est, ille tuo meus, & meo tuus clarissimus, atque maximus Meursius. Ut de Illustrissimo Grotio, atque aliis taceam. Vale præstantissime, atque Amicissime Stephani, nosque amare perge. Addeiem, ut salutem Clarissimo Collegæ tuo Laurembergio diceret; sed intelligo Hamburgi esse, relictaque illic uxore, propediem in Bataviam venturum.

Amstelodami, cIdo xxxviii.  
Prid. Id. Junias.

### CCCXXXVIII.

Joanni Meursio V. Cl. Ger. Jo. Vossius  
S. P. D.

**P**ost superiores literas de optimæ ac eruditissimæ filix meæ excessu diu alia nos tenuit sollicitudo. Filius Matthæus (is cujus de primis Hollandiæ Comitibus conmentarios habes) duos tres menses nunc ambiguas nunc adversa valetudine usus est: credo ex nimia animi consternatione, & aquæ injuria, quando pene in pos mentis, ubi sic omnes periclitantes in glacie vidit, ea rupta in aquas sæpius inhiit, nunc hunc nunc illum liberandi gratia, quod feliciter ei successit in omnibus, præterquam sorore Cornelia: addo & seipso; quando tandem in morbum hæc erupere gravem, adeo ut Medici quini (binos advocaram, sed tres amore familiæ, & ut aiebant officii ergo sponte accesserant) de vita ejus vel plane, vel pæne desperarent. Nunc ille magis magisque per Dei gratiam convalescit. Sed Uxoris morbus illum filii excepit. Quid mirum si muliebris animus non sufficiat omnibus ferendis? etiam prope constantiam meam tot adversa expugnassent, præ-



præsertim accedentibus aliis, in his nonnullis, quæ tu scio tantum pro pulicum moribus habes; illorum uti nequitia qui sibi omniscii (omniscioli potius) videntur, & tanquam ab alvo te meque sic ingentes Grotii & Salmasii animos despiciere ac deprecari non cessant. Hac hora venio à Blauwio qui certo addixit tres intra Hebdomades Historica tua & Danica & Belgica ad finem perductum iri. Bina quidem præla tuis quotide fervent, ut mihi significat filius. Isaacus cujus Scylax & nostra item de Idololatria Gentili & Philosophia Christiana eo tardius procedunt, qui unus alter ex operis Typographicis alio se recepere, & nolim ego qui in tuis distinentur inde avocari, præsertim qui semper dixerim paratum me esse ad menies aliquot differre: dummodo non in aliis sed tuis alacrius progrediretur. Cur demum postquam à te Literas acceperit missurus sit quæ petis, ex ejus Epistolâ cognoscet. Aliquid subest pigritiæ. Utcunque enim nescias, quas miserit chartas, poterat omnium mittere nunc exemplar, & ubi tuas acceperit chartas supplere in iis quæ recepisti. Sed prætexebat gravem in tantis occupationibus fore laborem ex fascibus singulis folium sive Philyrum unam eximendi. Non laudo, sed cum domus ejus vitam attendo utcunque excusaro. Heinsius vetus Collega nostra in excudendis ad N. T. notis jam pervenit ad Epistolam philippenis scriptam. Vale optime & summe vir, & cum Uxore, filio & filia à me, Coniuge & Liberis universis salve plurimum.

*Amstelodami, cId Idc xxxviii.*  
Prid. Id. Junias.

## CCCXXXIX.

Stephano Stephanio, V. Cl. Ger. Jo.  
Vossius S. P. D.

**N**Olui ulterius differre scribendi munus, præsertim redditum parante Severino vestro. Nam nunc quoque si negligam, metuo ne etiam differam in illud tempus, quo absolutum erit opus nostrum, de Gentium Theologia, & Christianorum Physiologia. Atqui ut ex voto meo acceleret Typographus, non ante tres menses ad finem poterit perducere. Ita grande futurum, non quia mole delecter, sed quia illud poscat diffusum adeo argumentum. Cæterum ubi edidero, non patiar te aliunde id habere quam à nobis. Scio ut antehac etiam id facerem, postulasse amicitiam nostram, sed multa sæpe quæ volumus, non possumus. Nec tu ut minutatim causas

addam exposcis, sanè proximi operis ne exemplar quidem dedi ullum, vel Consulibus urbis hujus, quibus sum obnoxius; vel ulli ex affinibus meis conjunctissimis. Tam multa sibi Britannia magna vindicabat. Deinceps tamen ære meo emam potius, quam te expertem sinam. Excerpta tua ex Fabio, optimo dicendi Magistro, mirificè placent, & bono juventutis videbunt lucem, sed pusilli temporis mora poscitur à Typographis, quia præla sic fervent aliis, in quibus, ut aiunt, festinato opus sit: si diu eludere volent, non sinam, sed quamprimum remittam. De Saxone Grammatico edendo, nondum hic cuipiam potui persuadere. De præstantia scriptoris, non vocant in dubium, quæ dixi: sed aiunt opus fore perpauorum hominum, se autem omnia splendido illo luto metiri. Debebat is scriptor non alibi edi, quam in ipsa Dania, idque lulentis, & elegantibus Typis, charta etiam optima. Hoc ex honore esset Danicæ. Ac si Typographi non sufficiunt, impensis Regiis, vel Nobilitatis, aut Academiæ sumptibus fieri id conveniret. Quæso siquid horum jam fuerit decretum, vel simile aliud, fac me quamprimum certiorum. Jam à multis annis sic amo Saxonem, ut nihil æque exoptem, quam eum esse in plurium manibus: nec alium scio, qui medicam illi manum admoveere foelicus possit, quam te Popularem ejus doctissimum, & jam à tam longo tempore, non minore judicio, quam industria in hoc versatum. Fuit his diebus horam unam nobiscum. præstantissimus Collega tuus, Doctor Christianus Matthias: video esse virum, ut integrum, ita egregiè doctum: spem fecerat redeundi ad me. Deceperam autem conviviolo excipere, sed ex Fischero quicum ad me advenerat, cognovi temporis fuisse angustia exclusum. Non committes quin plurimum salutes meo nomine: Uti & dignum omnium Doctorum amore, Laurembergium. Memini me coram Cluverio jam ante annos plus minus xx. conspiciere Græco-Latinam ejus Græciæ descriptionem; nunc verò nequitia illius, cui in has terras dederat deferendam, solum tabulas superesse. O factum male! Rectè interea egerit, si laborem denuo suscipiat, non dico, utraque lingua. (Quid enim opus?) sed Latina solum ea complectendi, quæ ad tabularum illustrationem pertineant. A meorum quopiam, si clarissimus Laurembergius hanc Provinciam detrectarit, postulatum fuit, sed quis illo melius hanc spartam ornaverit? Nec enim dubium quin tam longo temporis intervallo plurima observarit, non aliis modò, sed sibi etiam antea incognita. Vale, vir & amice egregie, nosque ama porro.

*Amstelodami, cId Idc xxxviii.*  
iii Kal. Oct. St. Gregoriano.

## CCCXL.

Joanni Meursio, Ger. Jo. Vossius  
S. P. D.

**F**ilius Matthæus à gravissimo morbo ut-  
cunque convaleuit. Isaacus adhuc decum-  
bit, sed indies vires recuperat. Ego, conjux &  
reliqua familia recte valeamus. Danica & Belgi-  
ca tua historia tandem ad finem perducta :  
quo nomine gaudeo. Deinceps ut cætera ma-  
turentur, urgere Blauwios non desitam. Tu-  
um quoque erit idem crebris facere literis.  
Sic quoque spisse satis procedet negotium ;  
id abunde es edoctus damno tuo, & ego atque  
alii id experimur quotidie. Absque hoc esset,  
jam diu habuisses quæ scripsimus de veteri  
Theologia Gentilium & Physiologia Christiana :  
sive de origine & progressu Idololatriæ,  
& ex mirandis naturæ eorumque causis huma-  
næ mentis adscensu ad Deum. Ut grande esse  
opus videas, quintum ejus (ut vulgo opera  
metimur) alphabetum jam excusum est. Su-  
perest sextum quod fore censeo supremum ;  
sed quando id absoluturus sit Typographus  
dicere non possum. Jam tres sunt hebdoma-  
des quod cessat in nostris, atque idem porro  
faciet minimum mense toto. Hoc enim ipse  
prædicat ; consenseram ut Scylacem filii & id  
opus quod sub manibus me habere dixi, pau-  
lum seponeret, dummodo in tuis eo esset dili-  
gentior. Nunc mihi etiam præponit homi-  
nem Gallum, cujus Philolao sive opere de mo-  
tu terræ prælum jam fervet. Nec dici potest  
quantum nos omnes moretur. Atlas ejus,  
opus multorum grandium voluminum. Pro-  
diit jam Salmasii pars prior de usuris, ac pro-  
pediem etiam alteram habebimus. Heinsius in  
Novum Testamentum jam ad Apocalypsin  
pervenit. Opinio est multum eum adjutari  
iis quæ Scaliger observarat, cujus chartas scis  
in foliis Bibliothecarii esse potestate. Adhæc  
intelligo eum à vidua Erpeniana habere om-  
nia quæ ad maritum undique transmissérant  
viri doctissimi, quando is Novi Testamenti  
editionem moliebatur cum notis à flore docto-  
rum undique subministratis. Confido candore  
eo fore nostrum illum, ut ne alienum tollat in  
armum, sed suo singula transcribat auctori.  
Quamquam quid hoc nostra, dum quæ edan-  
tur talia sint ut multa etiam doceat eruditos !  
Abrumpam si addidero, triduo proximo affu-  
isse mihi senatorem Scapium convictorem  
quondam tuum, & sollicitè inquisivisse ecquid  
dete, & omni familia tua, certi haberem :  
tandem ubi intellexisset de literario nostro

commercio, vehementer illud me rogasse ut suo  
nomine plurimum te salutarem, ac pariter  
conjugem. Nec minus conjux mea & liberi  
universi salutant te ac tuos.

Amstelodami cIdoc xxxviii.  
iii Kal. Octob. St. Greg.

Regina Medicæa conjux dum fata sinerent  
Henrici IV. perhonorifice excepta est ab urbis  
hujus Proceribus: puto pompatici illius ingres-  
sus tabulas æri incisas cum Barlæanis, & ali-  
orum versibus lucem propediem usuras. Id si  
est, curabo ut exemplar habeas. Leidæ obiit  
Meermannus advocatus melioris notæ ; item  
consul Lanscothius atque alii. Omnino his  
locis terrisque vicinis acutæ febres dominan-  
tur quæ multos tollunt. Deus & nos & tuos  
diu conservet. Iterum vale:

## CCCXLI.

Georgio Calixto Theologo S. P.  
Helmstadium.

**N**ON dubito, quin magnopere mireris  
pertinax adeo silentium meum, sed  
quid faciam ? nulli scio, probare hoc possum,  
præterquam quibus perspectum sit hoc vitæ  
genus, quod nunc Amstelodami sustineo.  
Mane doceo quotidie, nisi quod privatim Sa-  
turni diebus præsim Collegio juvenum, qui se  
apud me exercent. Pomeridianis horis usque  
ad coenam interpellor à civibus, & exteris ;  
non è vulgo. Si quid literularum mihi exten-  
dendum sit, id ferè fit post noctem intempe-  
stam, quo ipse tempore, & limandis vaco iis,  
quæ tradenda sunt Typographo. Et hoc ip-  
sum adeo spisse procedit, ut septennio, quo  
hic fui, nihil eorum, quæ affecta habeo, vel  
confecta, edere licuerit in lucem ; præter de  
Arte Grammatica libros, opus jam ante an-  
nos amplius triginta conscriptum. Hoc mo-  
numentum qualequale, nunc per ornatissi-  
mum Mag. Kinderlingium Philosophiæ, ut  
intelligo, Professore in Academia Julia  
destinatum, transmittere erat animus ; sed  
jam omnem supellestem suam miserat Ham-  
burgum. Quare per Wickfortium nostrum, id  
commodius fiet : & factum esset jam diu, ni-  
si in Galliis hæctenus fuisset ; sed intra pau-  
cos dies reducem expectamus. Excuditur  
nunc opus nostrum, de Gentilium Philosophia,  
& Physiologia Christiana. Spisse procedit,  
quia sic occupationibus avocor. Confido ta-  
men intra tres quatuor menses posse absolvi.  
Vix lucem viderit, quin mittam. Tandem  
enim

enim quorundocumque abruipendum hoc silentium, quod nulli ægrius, quam mihi: Spero mihi priorum veniam apud te futuram, ac deinceps idem fore jus Sanatibus, quod fortibus. De publicis quid scribam? Imo & privatis plerisque? Omnia melius ex D. Kinderlingio intelliges, teste oculato, & aurito. Et dum ista tumultuarie in chartam conjicio; semel ad funus, iterum à Nobili Sueco, mox ad aliud. Sic vivitur; sed spero propediem, me multis exsolvendum occupationibus: saltem hodie, nihil ultra licet. Salutem plurimam adscribi jussit Collega optimus D. Barlaeus, qui & ipse, dum hæc scribo, compellendus fuit. Meo quoque nomine salutabis plurimum, Clarissimum, verèque tecum aurei sæculi germen D. Hornæum. De doctissimis viris, D. Conringio, & aliis adderem, nisi hoc, Dominum Kinderlingium onerare satius foret.

*Amstelodami,*  
clb lœ xxxviii.  
prid. Kal. Oct.

*Tuus omni officio,*

G. J. Vossius.

## CCCXLII.

Joanni Fr. Gronovio, Ger. Jo. Vossius  
S. P. D.

**N**ON recordor tale quid ex ore meo profectum quale scribis, sed scio ex aliis, partim Leydæ adhuc degentibus, partim in oras jam profectis exteris, audisse me, juvenem illum qui à convivio tecum sermones istos habuit, & bonæ indolis videri, & pro ingenio illo præclaræ expectationis: solum metui, ne corruptatur à non nemine, quo utitur familiariter. Ut te quoque sic judicare dixerim, non sit verisimile; nec verum arbitror. Quia vero de clarissimo Golio scribis, non possum reticere, de quo præter me, & ipsum, scire puto neminem; cum insidiæ illæ structæ essent filio meo Francisco, à Leydensium seu uno, seu pluribus. Non vacat jam in hoc accuratius descendere: de Vatiniano unius odio erga me, qui à multis jam annis me perditum cupiit, non graviter minus, quam verè sum conquestus. Neque ignorabam ab eo plurimum amari illum inimicum meum (meum vero? imo tot aliorum, non paulo majorum me) verum virum esse prudentem sciebam, neque minus mei amantem arbitrabar. Atque eadem nunc quoque in opinione sum. Itaque sic convenit, ut si Amstelodamum veniret, non alibi quam apud me diverteret. Ac sponendi ego, etli affinitate conjunctos in urbe ha-

berem, tamen non commissurum, quin ubi me honore istoc dignaretur, exemplum imitarer; & sanè is est quem ex Professorum primis, invisere semper soleam. Quamobrem ut vel hoc fidis ejus commissem auribus, non tamen persuasero mihi, hujus indicium illis facturum, qui nullam negligunt occasionem nocendi mihi, & meis. Quod ego gravatè ipsum quoque ferre censeo. Si conducibile existimes, de eo ad ipsum scribam Golium; vel ipse nomine meo saluta; & literis demonstratis exquire, quid rei sit. Comperies hominem, non eruditissimum modo; sed Batavo, vel si malis Germanico candore, Tanto magis opinio hæret adolescentem, unde istud habes, hæc protulisse, ut expiscaretur ea, quæ nesciret: vel alterum illum tam ei familiarem, imposuisse illi quo abalienaret à te, viro non malarum partium, etli propter aliquas, quas in iis videas, virtutes, ferre scias malos. Tam familiariter quam ista non memini me de illis scribere; sed fortasse inde est, quod paulo commotior, simulac tuas accepi, ista in chartam conjeci. Quoties cogito, quam improbe mecum egerint, qui solis sibi masculam Eloquentiam, & reconditam omnem doctrinam vindicant, proletaria solum mihi, & me intelligentioribus concessa: non possum non deplorare stultiorum infelicitatem, ac cerdones etiam, præ multis nostri ordinis, beatissimos putare, dum bonam mentem colant. Tu vero, mi Gronovi, ita tibi persuadeas velim, amari te à nobis plurimum, & amatum iri semper, idque ob eas virtutes, quas benignitati debes divinæ. Si qua in isto de quo scribis negotio opera mea utilis tibi esse possit, perscribe: Nusquam dæro. Si molesti esse volent, potius quam ut noceant, omnem in me transfer culpam, quatenus possis. Nam obdurui ad ista. Tui dispar ratio: quem nolim cum ingeniis conflictari ejusmodi, dum pro virtutibus, doctrinaque, nondum promeritos adeptus es honores; ad quos in hac temporum malignitate, fortasse malorum etiam faventia opus est. Lugduni ubi iterum excurreris, id credo deinceps sæpius futurum, dum excuduntur tua, plurimam salutem dices *tyd mly* Salmatio, alteri cum Illustrissimo Grotio Europæ oculo. Ut illa Codris omnibus rumpantur, nulla te maledicentia, ab amore divini illius hominis avertat. Matthæus, Isaacus, Gerardus meus, te plurimum salutant.

*Amstelodami,* clb lœ xxxviii.  
post. Kal. Octobris.

CCCXLIII.



## CCCXLIII.

Claudio Salmasio, Ger. Jo. Vossius,  
S. P. D.

**I**saacus meus prope ab omni febre est immunis, interea inirmus, hodieque primum ex cubiculo in coenaculum descendit, quod ei bene vertat. Studia aliquot de die horis tractare jam coepit, & pro imbecillitate corporis aliquanto ardentius, sic ut sufflaminandus sit nobis, suadente etiam medico. Dolet admodum quod destituar Mureto ad Ethica Nicomachia. Operam dedi ut alicunde nanciscerer. Et hæc causa est cur diem unum respondere neglexerim; sed hæc quoque spes me fefellit. Philolaus de quo aliquando ad me scripseras, intra tres circiter hebdomades fuerit excusus. Id volumen, quia iisdem typis edatur ac mea, cessant in nostris: sed tanto aiunt alacrius se postea perrecturos. Nec enim minus se optare quam me ut tandem perducatur ad umbilicum. Gaudeo inveniri qui operam dent ut inter eos, qui sic in literarum studiis eminent, animorum sit consensus. Solum exopto ut qui tractare hoc negotium volent, & prudentia valeant & probi sint ac benevoli. Quæ tria ut optime nosti in eo qui suadere aliquid valet, requirebat Stagirita noster optimus, idem sapiendi dicendique magister. Imprudentiæ fuerit si quis suscipere hanc provinciam cupiat, nec mores partium satis habeat perspectos. Jam confecisse se negotium letabitur, cum magno molimine magnas egerit nugas, meliori etiam parti plus periculi crearit. Quanto enim occultius, tanto nocebitur certius. Quæ minime dicerem, nisi ter edoctus malo meo. Jam nisi quis probus sit & benevolus, metus est ne deterioris sed amicioris commodis magis velificari gaudeat. Novennium circiter est cum collegarum duo operam mihi suam offerrent, ut eum mihi conciliarent amicum quem me scis dicere. Egi iis propterea gratias, atque adjeci, nihil mihi fore jucundius, ac si hoc perfecterint multum me iis debiturum; atque ut viderent quanti eos facerem, aiebam me omne hoc negotium illorum fidei committere, præstiturum me quæcunque illis visum: postulare solum si post tot injurias acceptas animo fuerim tam humili ac demisso, ne hoc negotium aggredi velint, nisi in isto saltem gratificare velint, ut ipsi existiment solum dicis gratia acturum aliquid, non autem bonâ fide; eoque brevi fore quod dicitur anum ad armillam; illam insistant viam, ut simulatio istæ nihil det incommodi aut mihi aut meis. Receperunt se de eo cogitatuos, nec aliquid

moturos, nisi æque ratione habita utriusque nostri. Neque postmodo te unquam de eo compellarunt, sive id eo factum, quia eludendum minimè putarent candorem meum, sive etiam displicuerit hæc diffidentia mea. Cur enim non suspicari liceat in me etiam (nam hominem me scio) desiderasse? Nec ea hoc animo scribo ut minus audias, qui animis vos esse velint minime alienis; sed duntaxat, ut, quod æque noris me silente, sis inter spinas calceatus. Rem magnam præstabant qui negotium hoc component cum eo, quem ego & tot alii mecum (sed falso fortassis) credebamus amare neminem nisi qui paratitari sciat, & secundas agere, imo contemptis cæteris, ut studiorum omnium aut prope omnium principem veneretur. Quem etiam judicavimus nec supparem ferre necdum parem: quanto minus longe superiorem? Et tamen Christianum est hoc negotium, ut alii alios amemus. Quare existimo non debere te animo esse alieno ab iis qui de conciliandis vobis cogitant, dummodo ut dixi & mores alterius habeant perspectos, & si non magis æque tamen sint amantes tui. Quos inter ex iis quidem quos noverim facile principem tribuerim locum clarissimo Riveto: nam & ex sermone semper & nuper etiam ex ejus ad me Literis abunde perspexi illius erga te amorem constantissimum. Grave etiam pondus erit nobilissimi Somersdicii atque aliorum, quos nihil atinet dicere cum longe me illos melius noris. Tantum non fidei nimis habendum eis qui vel alterius imprimis vel suum pariter negotium agunt. Non tui solum amor sed etiam veneratio me compulit, ut præter consuetudinem meam in scribendo tam longus forem: sed confido id fore tibi minime molestum. Aveo nosse quando tua ad Simplicium visuri sumus. Nec tamen nimis sollicitè id quaero. Scio quo magis tua producis, hoc plura à te discere orbem Literatum. De usura Scholasticorum quos vocant plurimos habeo: sed eadem prope chorda aberrant. Aliquanto cautiores qui sæculo hoc vixere, quorum aliqui nobis; nec video tamen ut multum inde accedere tuis possit. Si quid tamen voles, tuis æque ac meis serviet commodis. Uxorem tuam uxorem, imo ei tuamque vestri omnes nos & pariter affini tuæ salutem dicimus.

*Amstelodami, cl. Idc xxxviii.  
iv Non. Octobr.*

CCCXLIV.

CCCXLIV.

Hugoni Grotio S. P.

*Lutetiam Paris.*

**M**inus minusque mihi, Illustrissime Domine, fatistacit Blauwius noster. Perfuasi de Philolao: sed (planè præter opinionem meam) notira de Idololatria intermitrit. Jam mensem in iis cessatum. Et ait altero etiam mense opus, antequam Philolauum perduxerit ad finem. Iisdem typis excuditur, quibus mea solent. Negat autem, illam sibi esse Typorum ejusmodi copiam, ut eodem tempore utrumque Opus excudi possit. Ecce aliud quod displiceat. Jam prope sexennium est, quod postulato ipsius Meursius transmisit omnia, edita, inedita, sola excepta Historia Danica; quam postremo excudi volebat. Ille contra, ab hac orsus est, quia cæteris ejus viri vendibiliorem fore arbitrabatur. Ususque propterea Typis majoribus, quam in meis. Et illa jam finem nata: Existimat igitur Meursius, strenue nunc cum progredi in istis, quæ pertinent ad emendationem veterum Scriptorum, vel Antiquitatum Romanarum, Græcarumque intelligentiam. Rogavi vehementer Blauwium, ne ultra sextum annum eludere amicum meum vellet. Ille dicere, nihil minus sibi propositum: sed non ex re sua fore, si iisdem edat formis cætera, quibus Historiam Danicam: Nec me vel Meursium passurum, ut illis edantur, quibus me invito, prope enim oculos fugiant, filii mei in Scyllacem notas divulgabit. Non superesse alias ac medias illas, quibus utitur in meis: sed ut has usurpet heri non posse, nisi & Philolao, & pariter nostris finem sortitis. Proinde— & quid opus illo Proinde? Satis vides, quid hinc colligat. Atqui in meis etiamnum restant pluscula. Minimum tribus opus mensibus antequam absolvantur. Et quis spondebit nobis, spatio hoc temporis exacto, non aliud, qui ejus mos est, excogitaturum, quo Meursium eludat? Nihil dixeris Meursiana faciunt ad ea de quibus scripseram. Imo plurimum. Ut vos non iidem sitis, idem ille, quantum video, erga vos erit. Est autem ut Meursiana ordiatur. Libris de Poetica, & Originum, & tam multis, quæ Philosophiam, & Ecclesiæ Antiquitates, vel Scripturarum Interpretationem tangant, quorum compluria jam affecta, vel etiam contexta, porro cum blattis tincisq; rixandum erit, si Meursiana patiar prævertere. Meursius autem ulterius moræ est impatiens. Si dicendum quod censeo, nec meorum aliquid, nec Meursii aggredie-

tur; Οὐ θέλωτε ἰπποκλείδῃ. Quæremus uterque alium, si hic nos talsudit Alexis. Vellem erga tua saltē, alius foret, quando tantum supereminet, quantum lenta solent inter viburna cupressi. Sed quid faciamus? Homo ille privati, quam publici boni amantior, pecuniæ etiam quam honoris appetentior nihil æque ac lucrum curat. Hoc autem ait, non aliunde æquè ad se redire, quam ex Tabulis suis Geographicis. Addere poterat & Missalibus, ac similibus quæ excudit, sed sic ut Colonienſis Typographi nomen præferant. Quando igitur laterem lavaremus, cum hoc homine agendo de tuis, meisve excudendis, visum mihi fuit compellare vicinum Blauwii Janſonium; quod & factum ab ornatissimo hlio tuo. Ac huic quidem responſum dedit, velle se transmittere specimen Typorum, Latinorum, Græcorumque, ut prius cognoscat utrum placeant tibi. Mihi vero instanti ut id fieret quam primum, dixit, non posse, hac hyeme prælo committi. Nam præla sua edendo Atlante, & aliis vastis voluminibus sic dilineri, ut res sua familiaris non ferat ulteriores impensas. Planeque persuasum habeo cum verum dicere. Magis miror tantum suscepisse quantum video; præsertim Blauwio manibus pedibusque hoc agente, ut hominem, in re non ita magna planè ad incitas redigat. Nullus tuis edendis magis idoneus esset Elzevirius Leidenſibus: non quasi sint viri, aut cives meliores, sed quia charta, & typorum bonitate vincunt. Et puto non recusarent, nisi alii in ea urbe dehortarentur; imprimis ille, qui se amicum tuum ait, nuperque ad te scripſisse. Et scripſisse etiam ex hlio tuo intelligi. Quàm vero amicus, melius ex illustri Barone Jacobo Skytte cognosceres, si is modo sermones de te, præſente altero, quem in cælum extollebat, habitos secum referret. Nobis quidem hic, recenti memoria, indignationis plenissimus exposuit. Nequitiam tum hominis ridebamus. Nec interea mores mutasse, clare ex multis deprehendimus. Hæc ego non referrem, nisi constaret de stomacho tuo, qui patientia plusquam Spartana, concoxeris multis partibus majora. Et scis invidiam illi, ac malignitatem, jam diu in naturam vertisse: nec alium erga alios esse, quos doctrinam cum virtute putet conjunxisse. Hoc ego, ut de aliis taceam, abunde meo malo didici: didicit Meursius, discere nunc cogitur maximus Salmasius: sed nemo dixerit, quam ille ejus mendacia, ac calumnias contemnat. Quod ego non æquè potui, cum eum conjuraſſe erga me viderem, cum inimicorum illis, qui toti in eo erant, ut me meosque omnibus everterent fortunis. Redeo ad edendi tua curam:

de

de qua certiora perscribam, ubi vel fratri, vel filio fuerim locutus. De Suecicis quid opus scribere quem nihil illorum fugiat? Adderem alioqui Cancellarium Oxensternium in Germaniam cogitare, ut dispiciatur de pacis negotio. Eo & iturus Comes Danus, natus ex eadem, imo iisdem, cujus filium, ante annum, vel amplius vidisti, cum Ephoro Ernstio. Sed is qui huc mittetur, major est natu illo quem vidimus. Sic mihi Nobilis Suecus retulit, ex literis, quas ab avunculo regni Suecici senatore acceperat. Putabam Collegam meum Hortensium dilaturum iter in terras externas, propter luculentam rationem quam scripsisti, & ille ex Deodato cognorat. Sed longè alia ei mens. Nec miror. Bina illi Caroleorum nostratum millia, ad hoc iter sunt assignata ab Ordinibus Generalibus. Præterea fruitur stipendio nongentorum quos percipit ab urbe hac. Vides quantum profueris. Non vidit loca externa. Nunc impensis publicis prælustri titulo iter suscipiet, quæ res, & nunc honori illi futura, & postmodo memorabitur ad ingentem ejus gloriam. Deus illi gratam tribuat mentem, & tributurum confido. Ait se primò in Britanniam iturum: unde in Gallias, tum Venetias, inde prout res dederit. Sed cum longissimo tempore nihil mecum communicasset, uti neque cum Blauwio; nempe quia credo sumus occupatores aliis, quam ferendo simus; tandem mihi significavit, de Anglia dicis gratia se spargere, quo iter hoc sit occultius. Sed recta iturum in Gallias, non Lutetiam tamen, ne de eo Italia cognoscat, ex illis quibus fortasse innotuerit, si Lutetiæ videant. Nolle enim se periculum magno seni creare. Ne Venetiis quidem agere se quicquam velle per literas, nisi ex consilio illorum, qui rei sunt planè intelligentes. Si per eum literas dare vellem, nihil committendum istiusmodi, ubi festinato opus foret. Fortasse enim ne locuturum quidem tecum. Postremum hoc plane foret, præter opinionem Consulis Amplissimi Conradi Vêrburchii. Nam eum scio ab affine tuo optimo Reigersbergio literas petiisse commendatitias, quo gravior acceptiorque filius suus, juvenis plus minus annorum xx. esse possit. Is si ad vos venerit, scio acceptissimus fuerit. Parens enim vir est, non uno nomine laudatissimus, & qui plurimum in hac urbe possit. Præsertim Consule Gravio, ante octiduum defuncto: Bichero in præfectos negotiationis Indiæ Orientalis relato. Ulamingio Oosthorno, Hagæ inter Delegatos hujus urbis degente, & ut arbitror, hoc acturo, ut vivere possit vitam privatam. Video enim, & eum horum temporum esse pertæsum. Si ab Manasse nihil ac-

ceperis literarum, mirari noli. Nam mensis, & prope etiam alter est, quod morbo decubuit. Uti & contigit Isaaco meo. Eo nihil actum in ejus Scylace Caryandenfi, & illo qui ante annos circiter septingentos, ex Scymno, Chio, & aliis descripsit Mæotidis periplum. Sed satis te detinui. Modum nescio scribendi, dum nunc fileo prorsus, nunc multiloquus tua moror tempora. Heroinæ conjugii salutem plurimam dicito, & filiæ optimæ. Nam filios intelligo, jam in Germania Martiales factos. Clarissimis viris, Bignonio, Cordesio, Rigaltio, & omnibus non aspernantibus me, sed si optima occasio sic ferat, salutem etiam impertias rogo.

*Amstelodami*  
 1638 xxxviii.  
 xiv. Octobris.

*Tuus æternum,*

G. J. Vossius.

CCCXLV.

Hugoni Grotio.

Illustrissime Domine,

Multum doleo, de excessu optimæ socru tuæ, quicum memini, me non semel domi tuæ prandere, & sermones ferere non injucundos, pro temporibus illis, quibus omnia mutationem Reip. in pejus minabantur. Interea optimè scis, magis agendas esse gratias Deo, quod ei vitam concesserit tam diuturnam, ut & tempora meliora, & tot bellos conspiceret Nepotes, Nepteseque, quam dolendum, quod non ulterius ei reliquerit vitæ usuram. Leydensibus item ereptus Petrus Cunæus, magnum ejus Academiæ columen. In Zelandiam ierat, unde æger rediit domum, Collega Barlaeus: jam tertium mensem laborat quartana, metuitur ei à *μαρτυρίῳ*. Ut convalescat, non videtur idem fore qui quondam. Afflixit valetudinem opere properando, quod nunc excuditur, & hoc de ingressu Reginæ Matris in urbem nostram, & honore pompæ ei exhibito. Typis prodibit Augustis, plurimis exornatum picturis. Atque hoc, quod dixi, non dissimulat apud amicos; sed multum metuo ne morbum hunc inde contraxerit, quod nimis ad animum revocaret, quæ adversus eum scripta sunt à Doct. Vedelio, & Magistro Skokio. Hic Ultrajecto jam in Daventriensem Scholam concessit, ac opera postrema, quod vernacula scripsit lingua, minatur librum justum, quo comprobet, te quoque in castris militare Socini. Nam illa de satisfactione Christi, tantum temporum illorum gratia, quo faci-

lius



ius falleres, scripsisse: ubi illa via non processit, te, larvâ depositâ, ostendisse, quis for- res, in libris de veritate religionis Christianæ. Ubi minimè sacræ Triados mysterium tradas, dicas Mosem populo tantum temporalia promittere; Christi præcepta nova esse, ac perfectiora Mosæicis; Christum dici filium Dei, quia natus è virgine, conceptus è spiritu sancto. Arbitror non defore his terris, qui respondeat, sed multum intererit, à quo id fiat. Etiam hoc profe advocat, quod Crello non responderis; quasi non theologorum hic æque causa agatur, ac tua; quasi item jam semel acerbi Ravenpergeri maledictis (quem à Si- brando ad hæc incitatum, mihi, ex Affine, utrique eorum amicissimo, probè constat) fœdè adeo exceptus, sapienter hoc illis relin- quas, qui nihil nisi quod ipsi faciunt, rectè factum putant. Sed de ipso satis: quem Voëtii esse hyperaspistem satis scire te puto, atque ab eo sua legi prius quam excudantur, fate- tur apertè: Eo Heinhus noster utitur amico: ut mirandum non sit, si disertim scribat, non te minus eruditum esse Heinsum; sed nomi- nis esse hunc magis honesti. Deus meliorem largiatur mentem, & Adolensenti, & Tri- umviris, qui ejus opera tam turpiter abu- tuntur. Hortensius hac hyeme hic subsistet. Interim parabat se ad hoc, ut paratior sit ad colloquendum cum Galilæo de Galilæis co- ram, vel per internuntios, aut literas, & lo- co aliquo tuto, aut propinquo. Blauwius senior vita excessit: Filiorum, quibus cura est Typographia, alter ægrotat. Quid de Meur- fianis tandem decreverint, planè ignoro. Danicam ejus impressere historiam; at non videntur facile aggressuri ea, quæ ad vet- t. Scriptorum emendationem, vel Romanas, aut Græcas Antiquitates pertinent. Jan- sonius de quo scripseram, Vir est honesti no- minis: sed partium quas Contra-remonstran- tium vocant, usque adeo studiosus, ut à pau- cis eo vincatur. De Affinis meæ junioris in Zelandia agentis, filio, si quid scripsero, Azoti is nomine, literis meis significabitur. Videtur hinc in Britanniam, inde in Gallias recta Lutetiam iturus. Nolim te amore fa- milia Junianæ decipi à quoquam. Alioqui hæc non scriberem; Et ut puto deinceps quoque aliquid exarandum erit. Salutant te, Conjugem lectissimam, & liberos, plurimum omnes mei.

Amstelodami,  
clō lōc xxxviii.  
xv Dec. st. N.

Tuus æternum,

G. J. Vossius.

CCCXLVI.

Vincentio Fabricio suo, Ger. Jo. Vossius  
S. P. D.

Multum & ego, & familia mea tibi de- bermus, pro honore, quem habitum ivisti nobis, verbis tuis elegantissimis; fecisti, ut non modò viveremus in laboribus nostris, sed etiam tuis: qui quod Juriscon- sultus Scævola frustra sperabat, de Mario Ci- ceronis, Canescent sæclis innumerabilibus. Quamquam nec Marius ejus intercidit totus, quia aliqua parte vivit in illis, quæ perenna- runt: facies autem prudenter, si deinceps etiam Poeticam hanc Spartam ornaveris: sed sic ut magis te vindicent sibi sapientiæ stu- dia. Maximi quidem facio, quâ merito eru- ditis places, *si quæ eveniant*. sed præ toto Par- nasso, cum Suadæ sacello, placent edita doctrinæ sapientum templa serena. In qui- bus & te, illo Themidos præcipue, assiduum esse intelligo lubens: Imo ab iis qui ad nos veniunt, refertur propediem fore, ut adle- garis in mystarum numerum: summæ mihi voluptati erit, quando istoc te honore auctum inaudiero. Quamquam enim quod Vallæ olim in ore fuisse ferunt, Plures sint Docto- res, quam docti: Nec tamen exiguus adeo est numerus eorum, in quibus titulus non fallat. Et facilius sic ad honores muniveris viam. Quod cùm hisce terris verissimum esse comperiamus, tum credo multo magis habere locum in Germania tua, sive malis nostra. Utinam tandem furere Mars desinat; qui nunc præclaris tot ingeniis incommodat. Tu interim durabis amicissime Fabrici, & ex monito vatis tui, rebus servabis te secundis. Atque ut spissius procederet de Patria tua, nunquam Bataviæ, aut fœderatæ Belgicæ, de- erunt, qui ingenium dignis cupiant orna- tum honoribus. Equidem ad hoc, operam omnem offero. Nam cum omnia ante volu- erim causa tua: nunc etiam velle omnia de- beo, postquam me obstrinxisti beneficio tuo. Vale, Optime, & Amicissime Fabrici.

Amstelodami, clō lōc xxxix.  
Prid. Non. Januarias.

U u

CCCXLVII.

## CCCXLVII.

Nobilissime Boswelle,

**P**erjucundum mihi fuit cognoscere, Reverendum Dom. Doct. Higgeum antehac facellanum Reginae Bohemiae, nunc regio favore pro egregiis virtutibus suis, factum esse Decanum Litchfeldensis Ecclesiae. Praeclaræ viri ejus dotes jam duo ante lustra non fuere mihi ignotæ. Nunc verò magis magisque amo, postquam perspicio quantum iis accesserit incrementi. Planeque ita mihi persuadeo hunc quem scribis honorem non tam fastigium ei, quam ulterioris fore dignitatis gradum. Tantum Deus longam ei vitam concedat, quo diutissime præclare de publico mereatur. Simsonii tui, quem aliquando mihi commendaras, candidum pectus, ei perhonesti mores magnopere mihi placent; omnino optima de eo auguror, ac cum tui tum ejus causa velim omnia. Tu modo dispice in quo porro & utilis esse possit opera nostra. Commentatio nostra de Gentili Theologia & Physiologia Christiana spissè procedit, partim Typographi segnitie, partim ob occupationes meas: quæ profectò tantæ ut hæc item literulas non licuerit exarare, nisi post noctem intempestam. Spero autem fore brevi ut te hic videamus: quo de nonnullis consilium tecum capere liceat. Sin ea felicitas non obtingat, vel primis ipse feriis excurram. Vale Nobilissime & Amicissime vir.

*Amstelodami.*  
clō lōc xxxix.

## CCCXLVIII.

V. N. Cornelio Vander-milio:

*Hagam Comitum.*

Nobilissime, &amp; Maxime vir,

**J**AM diu quidem est, quod Blauwius Meursii Danica absolvit: sed distrahi non sivit, quia de re herciscenda, inter senioris Blauwii & hæredes, necdum convenisset. Quod si priusquam divenderentur, illis amicorum, de quibus scripserat Meursius, exemplaria traderentur, metuit ne fortasse Typographus alius nancisceretur exemplar, ac dum Blauwii in vendendo cessant, id opus celerrimè recuderet. Id perscribi ad te Blauwii voluerit, quo moram hanc in optimam caperes partem. Sanè nec ipse codicem mihi destinatum urfi, ne si aliunde Typogra-

phus quis, nactus exemplar recudisset, meâ vel fraude, vel incuria, peccatum videretur. Deinceps nihil periculi futurum. Nam paucos intra dies, opus hoc publicè prostabit. Intellego ex literis à Meursio ad te exaratis, velle, ut exemplar Cunæo ante destinatum, eo jam defuncto, Bonifacio in Italiam transmittatur. Quare & istud à Blauwii poposci, qui mortuo Cunæo sperabant, hinc unius sibi exemplaris lucrum. Me id æquum negante, haud multum adversati. Multum verò doleo, quod septimum jam annum, Meursius noster eludatur à Blauwii. Nam quicquid hæcenus edidit, vel paratum habeat, se excusuros receperant grandi forma, duobus, vel pluribus voluminibus: Itaque ad eos transmisit multa ante *diversa*, item quæ antea excusis addi, vel in iis mutari vellet. Nunc post molestam, & damnosam longi adeo temporis moram, quid facere in animo habeant, planè sumus incerti. Fervet nunc prælum, opere nostro, de Theologia Gentili, & Physiologia Christiana. In quo tum originem & progressum Idololatriæ explico, tum admiranda Naturæ, & eorum causas. Cumque gentiles, admiratione naturæ, eò sint abducti, ut solem, & alias naturæ partes colerent pro Diis; mihi contra propositum est, hominem à causis secundis, deducere ad causarum omniam causam. Operam dedi, ut ne adeo diffusum Argumentum, confusè tractaremus; Multa etiam adferimus aliis indicta, omnia vero planè, alia facie, quam priores. Confido intra menses quatuor, posse ad umbilicum perducì. Mitto ad te Scylacem, & Velleium filiorum meorum; Addidi utrius Exemplar alterum, ut cum historia Meursiana, ad Clarissimum Baltazarem Bonifacium, eadem opera transmittatur. Addidi & literarum aliquid, ut me adhuc vivere, & de studiis non pessimè mereri intelligat: simul etiam, in tam longo silentio, non minus amare, quam cum in scribendo essem frequentior. Vale vir Nobilissime, benèque de patria, ac literarum studiis, ac studiosis promerere, meque tui nominis cultorem ama, vel immerentem.

*Amstelodami,*  
clō lōc xxxix.  
*Td. p. 1.*

*Tuus omni officio, idque*  
*merito tuo,*

G. J. Vossius;

## CCCXLIX.

## CCCXLIX.

Guilielmo Archiepiscopo Cantuariensi.

Reverendissime in Christo Pater, Domine illustrissime,

**N**ON leviter percellant animum meum, quæ de Armis à Scotorum gente adversus Regem suum susceptis, non ex tua modo Epistola, sed sermone etiam intelligo prope omnium, qui vel ex Britannia huc veniunt, vel literas inde accipiunt à suis. Hoc etiam me pungit, atque urit, quod homines improbi, quorum larga semper seges fuit, eritque, causam tanti mali arcessere amant, non unde oportuit, ab iis quibus in Ecclesia nihil nisi novellum placet; ut Æolis aliis, tantæ tempestatis flabris, quibus utile bellum: Sed sacro Angliæ ordine, quasi hoc agat, ut gradibus quibusdam gens purioris tenax Evangelii (sic enim loquuntur) iterum ruat in *εὐδαιμονία* papalem. Et quo excellentiori loco quemque Deus constituit in Ecclesia sua, hoc magis tanti eum criminis agunt reum. Quamobrem satis prædicari nequit sapientissimum serenissimi Regis Caroli consilium, dum auctor est, ut quæ adversus Jesuitam Fisherum scripsisti, ea denuo edantur, sed sic ut in Frontispicio testentur nomen Auctoris. Quantum mihi inde boni promittam, haud facile dixerò. Nuper sane cum avidè multi legerint calumnias adversus te Anglico scriptas sermone, Belgiceque translatis; mirum in modum illæ frigere coeperunt, simulac ejusce gentis lingua prodiret quoque oratio tua, qua malignis hominibus, humanis quam merebantur, respondisti. Majorem etiam utilitatem ac fructum mihi spondeo, simulac edideris ea, quæ promittis; præsertim ubi Latine quoque viderint lucem, imo ut confido, etiam Gallicè & Belgice: nec etiam Scotia solum Tribunitios alit Spiritus, sed exteris etiam terris haut desunt Rebellionis flabella. Hisce nunc paucis obstrepare volui occupationibus summis, quibus non premeris, sed obrueris. Nec plura nunc addam, quia metuo, ne, si ulterius sermonem producam, sine meis ad te literis veniat vir & civis optimus Griffinus Higgus. Tam malis enim temporibus malo sic virum doctissimum ac reverendissimum nominis tui & amatorem & æstimatorem laudare, quam ab aliis animi dotibus, etiam & istæ egregie in eo luceant. De opere quo præsum ferveo hæcenus, scribam paucos post dies; nunc ob causam quam dixi, manum de tabula cogor tollere. In precibus nostris nunquam desinam meminisse tui, gnarus quantum Ecclesiæ Catholicæ

præstes boni. Utinam sua satis bona intelligat.

Amstelodami, clb lcc xxxix.  
xii Kal. Aprilis.

## CCCL.

Joanni Meursio S. P.

**M**Ale me, præclare Meursi, habet, quod Blauwii fratres post patris excessum sic moras nectant in excudendis tuis; licet jam sextus sit annus, imo ut reor ultra, ex quo & parens ipse & filiorum natu maximus editionem eorum sponte promiserant. Nunc prætexunt parentis excessum cur differant. Quippe negant magni aliquid se posse ordiri, nisi de exciscundo conveniret prius inter liberos qui seni numero, ex quibus duo duntaxat ætate aliis superiores rem Typographicam suis curaturi impensis, ac vel commodis vel damnis. Atqui ut audio, longe maxima hæreditatis pars constitit in iis, quæ hoc artis & mercaturæ genus spectant. Uti sunt immensa pene librorum copia tot linguarum, tam varii typi ænei, tabulæ pene innumeræ ex eodem ære, partim terrarum ac marium, partim illustrium virorum, herbarum, & aliorum id genus descriptionem vel figuram continentes. Equidem metuo ne tam facile conveniat inter hæredes, dum hi æstimabunt ista minoris, magno alii: nec vel inter arbitros tam facile componuntur talia. Siquidem Mercuralibus leve discrimen inter animam & nummos. Hac propter metuo ne spisse hoc negotium conventionis procedat; ac si expectandum sit donec inter eos fuerit transactum, diu tibi mihiq; fieri fucus possit. Quamquam non ignorem eos dicere propediem eam rem compositum iri: nec dubium ipsimet quin longe melius res suas intelligant. Credamus igitur illis. Verum aliud ecce: negant tua se posse ordiri priusquam absolverint commentationes meas de Idololatria, sive de Theologia Gentili, & Phytologia Christiana. Cur vero, inquires: videlicet quia non sufficiant sibi characteres ad tua excudenda in quibus tot Græca intercurrent, nisi vel paratus sis, ut prodeant minutis illis oculos pene suffugientibus, talibus fere, si non iisdem, ac filii mei Isaaci notæ in Scylacem prodierunt: vel ego sinam ut labores mei de argumento ante memorato in annum unum alterum differantur, quod ego si perpeti velim, non similiter se animatos fore, ob certissima damna quæ eos maneant, præcipue opere jam pene ad finem perducto. Quid agamus, vir optime & amicissime? Ego qui te fratris in-



star dilexi semper, vim illis hac parte facere non possim, vix etiam istoc si possim velim, quia jam undique vix sine populo ab ignaris occupationum mearum magnopere accuser, quod extremam imponere manum tabulae nesciam. Attamen nisi aliter visum tibi fuerit, simulac mea lucem aspicient, non patiar quantum in me erit ulla tuis praevertere sed nostris; nam & hoc noscere tua interest, non poterit coronis imponi, si forte ante Solstitium, saltem non ante Kal. Junii. Hæc cura prope anxia perscribere ad te volui, quia non ignoro quam mecum foetus proprios ames, & ætatem etiam tuam vergere cogites subinde: simul etiam metuerim, ne Blauwius forte, quem ut ad te scriberet rogavi, Mercuriali more fucum quodammodo faceret literis suis. Tu utriusque lecta epistola melius statues quod ex re sit tua. Equidem post cessationem adeo diurnam nunc quoque expectandum censeo, donec mea perduxerit ad umbilicum, tum etiam si idem esse velit qui fuit semper, cum alio alia credo ineunda erit via. Quamquam, quod de mulieribus conjicio, ait, id de hoc hominum genere (etiam illam melioris notæ quale illud, quicum negotium nobis) merito dicere liceat, in eodem omnes videri ludo doctos, si non ad malitiam, saltem ad lucrum, cum alieno etiam dispendio. Nunc ad aliud venio. Historici operis tui nullum hæcenus exemplar accepi, nedum Mylius, vel amicorum alii quibus ea à me mitti voluisti. In causa est quod quamdiu necdum inter hæredes Blauwicos est conventum, minime conducibile existiment exemplaria his terris illa in hominum manus venire, ne suspicio oboariatur, intercepti commodi ex libris divenditis. Quam vellem ne facilem adeo te præbuissem literis ad Blauwium proximis! Simulac cognovi te, iis etiam annumeratis exemplaribus quæ inter amicos his distribui cuperes, necdum accepisse XX. hominem pro jure meo increpui ac negavi pauciora debere quam XXXVI. Proinde ad te XVIII. mitti oportere. Ille num hoc habere *χρηστέον* temet literis tuis acquiescere, si sena mittantur exemplaria. Pertendi ego, nescire me, quid ad ipsum scripseris, sed probe ex iis, quæ ad me exarasses, perspectam habere sententiam tuam. Quocirca si non possim impetrare æquam, saltem mediam insisteret viam, nec pauciora mittat duodenis. Et ita discessi, ut facturus videretur. Quod ad Academiam attinet Leidensem, in ea non sine magno rei literaria dispendio decessit vetus collega noster Petrus Cunæus: ac paulo post ejus obitum uxore etiam consecutum. Oratione ei parentavit Vorstius: versibus autem complures. Opinio multorum est, ejus in locum successurum esse Jacobum Gothofridum J. C. Dionysii filium,

Syndicum Genevensẽ; saltem literis Curatorum Leidenfium ei professio est oblata. Sed hesternæ die ex filio Isaaco Leidâ redeunte cognovi eos quibus is notior desperare propemodum. Sunt qui sermonem injiciant de amplissimo Simone Beaumontio, Middleburgensis prius Reip. nunc Roterodamentis Syndico, qui intermedio tempore inter Procures ut vocant generales foederatæ Belgicæ fuit; aiunt non abhorrire ab hoc professorio ac tranquillo vitæ genere. Sed-enim vix fore arbitror, ut in eo vocando convenient Curatores & Consules; scis quas ille partes secutus sit, scissa ante annos viginti Reip. nostræ. Jam mihi cum uno Professorum Leidenfium sermo fuit qui id fore negabat. Vides manere magnam partem malignitatem temporum, quæ te meque & tot bonos vexavit immerentes. Aristarchus sive potius exercitationes Sacræ in N. T. quibus scis Heinsium diu noctuque incumbere, vix intra menses duos vel tres juris erit publici. Utinam quoque divulgaret, quæ ejusdem argumenti elaboravit Josephus Scaliger: scis enim summum virum multum in eo defudasse; sed edere sua ausum non fuisse, quia in multis non à Beza modo, sed aliis etiam à nostris diffideret. Salmasius post excusum prius de usura volumen, nunc in alterum incumbit, in Simplicium quoque animadversiones edit. Vorstius parat scribere adversus ea, quæ Salmasius scripsit in exercitationibus Plinianis ad Solinum, ubi in eo totus est ubi doceat Saccharum veterum esse à nostro diversum. Hanc Salmasii opinionem erroneam exprobravit ei Vorstius in convivio multis præsentibus, ac postea quoque apud amicos eandem improbat: poposcit igitur Salmasius ut publice refelleret. Id se is facturum promisit. Cæterum recepit Vorstius, se amice cum eo acturum, non ut multi nunc solent à Theologis, aut Criticis; Argumentum enim de Saccharo nihil nisi dulce exigere, sanè amarorem omnem & animi & sermonis averfari. Primus quod sciam hanc controversiam movit Joannes Menardus Ferrariensis in Epistolis medicinalibus, eumque in Paradoxis Medicis est secutus nescio an gentilis, saltem cognominis mihi Leonardus Vossius, seu ut ipse scribebat Fuchsius. Verum Salmasius novis opinionem eum argumentis stabilire est aggressus. Mitto ad te literas Gronovianas cum fasciculo in quo observatum ejus libri. Juvenis est integræ vitæ, & ingenii acuminis, doctrinaque pollens, dignus planè amore tuo, & omnium bonorum. Misit antehac ad te Epistolas Casauboni, in quibus & illa comparebunt ad te exaratas, quas hoc fine, ut ederentur, miseras mihi. Inter quatuordecim dies iturus Gronovius in Gallias. Quare si quid ei scribere voles, (velle puto,

puto, quia id præclaræ dotes ejus merentur) ad me literas mittas; quia cum sum procuraturus tuas, simul etiam quibus tibi responderit, forem missurus. Scylacem Caryandenum Isaaci filii mei tandem vides. Quod mitto exemplar unicum est, nullum in ædibus superest, alioqui alterum ad D. Stephanium addidissim, sed Blauwius non perpetitur ulla ex ædibus suis exire priusquam conventum sit inter hæredes. Et vix illud quod mitto potuit impetrare. Collegæ tuo, amplissimo Doctori Christiano Matthiæ salutem dices plurimam. Dolet quod non uti decreram una cum doctissimo Fithero conviviolo excipere licuerit. Etiam salute imperties Dom. Laurenbergium. De Dom. Stephanio addiderim, nisi ad eum transmitterem hoc tempore exemplum literarum quas per Mercatorem sue cum nuper mittere statueram paucis post diebus, aut per alium, Germanum natione hominem doctum & ut putabam fidum. Sed metuo ne acceperit; & fortasse ne tu quidem eas quas tum scripseram. Uxor tuæ conjugii, filio, filiæ salutem adscribi iussit.

Amstelodami  
clb Ioc xxxix.  
xii. Kal. Apr. St.V.

Tuus totus,  
G. J. Vossius.

## CCCLI.

Auberto Miræo, Ger. Jo. Vossius  
S. P. D.

Multum tibi debeo, reverende atque eximie vir, pro luculento Chronici Belgici dono: quo longe plurima & me doces & doctissimum quemque. Quod ipsum de monumentis aliis tuæ dixero industriæ; utinam vero, mox à literis tuis acceptis, quaecunque mittere *avri de ey* licuisset, videlicet commentationes nostras de Historicis Latinis: in eo cum totus essem, ecce nuncius Leida adfertur, ad meliorem te vitam advocatum. Dolui vehementer studiorum vicem, de quibus hætenus præclare adeo meritis es, ac mereri porro non cessas, sed tamen suspectior paulo is nuncius erat, utcumque commercium sibi literarium tecum intercedere dictitaret; videbar mihi & in aliis vanitatem hominis comperisse, vel ut mollius dicam, nimiam credulitatem. Proinde Typographo nostro Blauwio in mandatis dedi, ut id exquireret ex Typographis Antwerpensibus, quibuscum sibi negotium foret. Res erat facilis: sed nimis se in eo negligenter gessit. Demum ex clarissimo Plempio (id pauculos ante menses fuit)

cognosco lætiora omnia. Petii igitur ne Lovanium hinc abiret sine literis ad te meis & volumine nostro Historico. In hoc morem se gessurum promisit. At abunde mihi perspectus viri candor, etiam amor, quo complectitur utrumque nostri. Tamen sive ab amicis, quos hic plurimos habet, sive aliis occupationibus detentus, facere neglexit. Gavissus igitur sum cum Lambertus Vossius vir ornatissimus diceret, & tecum sibi notitiam esse, nec pauca de virtutibus tuis prædicaret. Avide igitur hanc occasionem apprehendi meis te compellendi literis; sed exemplar quod mittere animus fuerat, cum vellem maxime non potui; unicum filii Matthæi habebamus, in quo nihil esset exaratum, id in morbo nuper quo ante menses paucos diutissime decubuit ei surreptum videtur. Milimus igitur ad Typographos hujus civitatis, sed nullum in ullius officina comparet, nec Leidensis ipse editor ullum præterea obtinet; tamen opera dabitur ut ab aliquo amicorum quodpiam nanciscar; nolim enim ingratus censer. Hoc duntaxat scire te velim, urgeri me undique ad editionem novam in qua non levis erit accessio. Nunc sub manibus habeo grande opus de Theologia Gentium & Physiologia Christiana. Plura nunc nequeo, quia abitum urget eruditissimus Vossius.

Amstelodami clb Ioc xxxix.  
iv Kal. Aprilis.

## CCCLII.

Erycio Puteano, Ger. Jo. Vossius  
S. P.

Jucundum mihi, maxime Puteane, fuit & nuper ex clarissimo Plempio, & nunc ex doctissimo Lamberto Vossio cognoscere de prospera valetudine non tuæ modo sed familiæ universæ. Quod vero diceris cogitare de epistolarum tuarum ineditis hætenus divulgandis, id eo mihi gratius est, quod nemo paulo humanior ignoret te in venusto hoc floridoque dicendi genere, plane regnum tenere. Interea omnes tui nominis amantes vehementer hoc cupimus, ut excuso hoc opere, quod multum ad ornandam eloquentiam facturum nemo dubitat, denuo recurras ad ea, quæ si non confecta, saltem affecta habeas in Mathesi, Doctrina civili, Historia vel externa vel sacra: in quorum singulis valere te plurimum abunde comprobasti ingenii doctrinæque monumentis, quæ jam in omnium prope bibliothecis visuntur: nimirum nihil

hil vel tibi honestius, vel publico utilius esse poterit, quam si hac varietate labores tuos diffundas. Arque ita pietatis, prudentiæ, eloquentiæ, & nos & posteritatem, pabulo pascas. Hanc in scribendi libertatem meam, ut in bonam capias partem, non est animus rogare. Novimus alter alterum à pueris, ut in facilitate tua, & amicitia nostra, abunde habeam fiduciæ. Intellego quoque cum filium tuum, tum filiam itidem, par liberorum suavissimum, connubium contraxisse se dignum, planeque ex animi tui sententia, quo nomine haut secus gaudeo, ac si sanguine juncti mihi forent. Quæso hoc iis meo nomine significa, omnia me eorum nomine velle, ac Deum rogare ut Matrimonium utrimque bene iis vertat, teque ac domum tuam nepotibus ac neptibus augeant avitæ virtutis æmulis. Mitit ad te filius Isaacus Scylacem suum, quem gratum fore confido, & ob Antiquitatem Scriptoris, & ob bonam ei operam impensam ab amici filio, qui paterno exemplo te sciat æstimare.

*Amstelodami, cId Idc xxxix.*  
iv. Kal. Aprilis.

## CCCLIII.

Hugoni Grotio, *Regni Suecici ad Regem Christianissimum Legato.*  
Lutetiam Parisiorum.

Illustrissime Domine,

**V**incentio Fabricio per Angliam in Gallias tendente, una cum Adolescente Patricio Hamburgensi, cujus studiis præest; facile perspexi, vix duos intra menses, meas tibi reddi posse literas. Nolui tamen illum sine illis dimittere, præsertim cum ipse urgeret, ut saltem minutum aliquid exararem, & itiuifmodi, ubi in mora nihil foret periculi. Eo autem lubentius morem gessi, quia amavi juvenem, obanimi candorem & egregiam doctrinam, quam ex Poematis ejus, & fortasse etiam Literis jam videris. Simul illud etiam, quum me omni officiorum genere sibi demerendum putarit. Equidem & ipse etiam, siqua possim, ei benè faxim lubens; sed nunc non alio gratificari poteram, quam paucula ad te scribendo. Cæterum intra paucos dies de aliis fufius tecum loquar, & quæ magis ad nos pertineant. Nunc illud cum dolore referam, utriusque nostri amantissimum Joannem Meursium (quemadmodum ejus Collega Sorà Danorum ad me

scripsit) graviter adeo morbo decumbere, ut jam Medici desperare incipiant: scis calculo semper fuisse vexatum. Nunc vero etiam urinam emittit planè purulentum, ulceris in renibus; vel visceribus indicem. Ita paulatim imminuitur numerus eorum qui literas colunt. Quando me quoque Imperator meus arcessere hinc velit, scis me scire juxta cum ignarissimis, sed tamen minimè terret annus quem jam ingressus sum Climactericus. Puto nec Christiano homine indignum esse illud Bilbilici vatis, summum nec metuas diem, nec optes. Ego vero etiam optarem, nisi cura meorum tangeret, & voluptatis non parum caperem ex eo, quod mihi videar de pluribus benè mereri. Hoc quodammodo divinum videtur, ita divini planè beneficii esse agnosco.

Omnis mea domus, te, Heroinam lectissimam Uxorem tuam, & liberos plurima salute impertit.

*Amstelodami, cId Idc xxxix. xviii. Kal. Mai.*  
quo die defuit Legis servantes Judæos,  
Amstelodami video celebrare primum  
Azymorum.

*Tuus eternum.*

## CCCLIV.

Georgio Ratallero Dubletio.  
Hagam Comitum

Nobilissime Amplissimeque Vir.

**L**Acrymas non tenui, cum ex ornatissimo Heemskerchio nostro de tristissimo casu tuo cognoscerem. Nec interim mihi tam quicquam solatio fuit, quam animi tui constantia. Sic enim omnem hactenus vitam composuisti, ut quotquot te novimus, possidere credamus benè præparatum pectus ad adversa quæque subeunda. Gravis Auster te percussit: sed non ut bonæ mentis naufragium facias. Gemina Anchora jam à puero fundaris, Princeps illa Christianæ Religionis, cujus tessera est patientia. Hac intravit Christus ipse ad gloriam, ad cujus exemplum vocati sumus, nec patimur sine voluntate Dei; qui solus novit quid expediat nobis; hæc & toralia ex chartis Apostolicis, animo occurrant tuo; quæ solidum solatium præstabunt. Nullus Medicus tam benè ægræ menti medebitur, quam cœlestis ille, verbo & spiritu suo. Vulnus facit, sed & Medicinam. Quare si dolor urserit vehementius, juvet alloqui Deum,



Deum, nec alteram illam aspernari anchoram, & longo à priori vincitur intervallo. Præcepta inquam, & exempla, quæ omnis nobis suppeditat Historia, & Socratica Philosophia. Sæpe à Seneca, & Epicteto, ejusque Interpretibus, cordatior sum regressus. Turpe putabam, si ὁρίζομαι, vincerent hominem à pueritia Christo sacratum. Quicquid erit, dum dolor recens, avocandus ab ea parte, qua dolet, hoc ratio nunc efficiat: Cætera præstabit dies, quæ multum etiam potest in insipientibus. Quod ad exequias me vocas, affectum tuum video, de quo nunquam dubitavi; sed à feria quarta hebdomadis Paschalis, cum morbo confliktor hæcenus. Primum me vehemens tertiana afflixit: sed vix octiduum duravit; mox colici excipere dolores, iique peracerbi; nec multo post exeruit se Nephritis, quæ dies, noctesque me cruciavit. Nunc dolor multum remisit. Virium tantum, ut etsi pedes extra ædes ponere non sustineam, tamen in Museo quasi perreptem: quique antea vel duodenis in studiis horis par eram, nunc binæ sufficere incipiunt: Interea multum metuo, ne Nephritis me, per omnem vitam comitetur, grave malum, & unâ cum Arthritide doctis perfamiliale, in senio præsertim. Sic beavit me hic annus Climactericus: id jocosius in re feriâ dictum judicabis; sed-enim vere adversa nos beant, quia ad vitam præparant beatam. Non ultra teneo te. Nam cum has accipies, occupatus exequiis, ne his quidem legendis fortasse vacabit; sed leges cum poteris. Claudam isto Epistolam, ἡ χάρις σου ἔστω, cum carissimo Christi discipulo uterque recubamus, in sinu Domini. De Velleio cras literas à Gerardo meo habebis; nunc isti simul ac tuas acceperam, volui respondere. Uxor, & omnes mei, te, socrum, & Aslines, mecum salutant plurimum.

cl̄o Ioc xxxix.  
xxiii. Maii.

*Tuus æternum,*

G. J. Vossius.

CCCLV.

Joanni Skyttio.

Illustris Domine,

**A**D aures meas pervenit, sic relatum tibi esse, filium tuum in studiis quorum gratia huc miseras, plane esse socordem ac negligentem, & quod ad vitam, inutiliter pecunias absumere: ac præterea ne Eratium quidem, quem illi Ephorum dederas, ab hoc

crimine esse alienum. Hic nuncius horrendum in modum utrumque horum perculit. Filius tanto cum mœrore mihi ea retulit, ut prope à morbo ei formidarem. Nec tamen me ipsum leviter ea res affecit. Sane filius in vicinia nostra habitat, ædes vix lapidis unius jactu à meis distat, omnes perhonestè de eo sentiunt & loquuntur: ebrium nec ego nec domus meæ quisquam conspeximus. Nec vel jurato facile crediderim, fuisse unquam in lupanari, vel cum scortis gnarum leves etiam sermones agitasse. Quare illustris domine, mirificas istas suspiciones de animo tuo depone. Siquid istorum foret, Vossius tuus non ignoraret. Ad Eratum vero quod attinet, tantum abest, ut ulla in re violet pietatem, ut potius superstitione aliqua in alteram partem peccare videri possit. Interea dicere non possum, an non paullo faciant majores sumptus quam voles. Multum interest, quo pacto quis filium velit vivere. Non idem hic parentes ejusdem etiam opulentia ac dignitatis sentiunt. Hic tuum est legem præscribere juxta quam sese componant. De nullo vero æque conqueritur filius tuus, quam quod multo carius omnia, quam alii emere cogatur. Nempe qui pannos ei divendunt aut vestes parant (& par aliorum ratio) non pretium exigunt, quale ab aliis parata solventibus pecunia, sed ut usuram forti annumerent: quippe qui spe solum solutionis vivant. Ec nuper non defuit, qui credere nihil vellet ultra, nisi pro eo sponderet filius. Hæc alteri dictabam in summis calculi doloribus, qui hocce anno climacterico meo (sexagesimum enim tertium sum ingressus) excruciare me cœperunt. Plura adderem, si dolor sineret. Sed si Deus permiserit, ut iterum esse incipiam, qui antea fui, filiùs de omnibus scribam. Nunc sic habe, & vitam filii esse perhonestam, & non aspernandos in studiis, dum hic est, præcipue in universa Historia, progressus fecisse. Mihi nec feritur nec metitur. Sed officii mei putavi ut tam foedæ calumniae occurrerem. Eadem existimavi me rem facturum gratissimam, si opinionem, quæ sine dubio vehementer te pungeret, animo tuo evellerem. Deus opt. Maximus te & omnem familiam tuam diutissime prosperam ac sospitem conservet.

*Aliena manu hæcenus: hæc mea subscripsi.*

Anno Christi,  
cl̄o Ioc xxxix.  
xi. Kal. Jun.

*Illustrissimi nominis tui  
devotissimus cultor,*

G. J. Vossius;

CCCLV;

CCCLVI.

Hugoni Grotio S. P.

Lutetiam Paris.

**V**erna hac tempestate, Illustrissime Domine, ingressum me scias κλιμακτηζ seniorum, tertium & sexagesimum, quem aiunt advenire cum periculo interitus vitæ, vel morbi gravioris: Non ut puto, præcisè, ob numeri vim, sed propter qualitates inditas naturæ. De me quidem illud dicere habeo, ex septenis quibusque, nullum non mihi morbum apportasse, præterquam sextum, hoc est ætatis meæ, secundum & quadragessimum. Credo animi ægritudinem sufficere tum ad me affligendum, divina bonitas putavit. Erat enim is annus, seculi hujus vigesimus; quo quot adversa pertulerim à malis, quam trititia conspexerim in tot bonis, imo summis, & viris, & amicis, apud nullum minus exponi opus quàm te, qui vel solus utramque feceris paginam. Sin corporis potius morbos attendero, non alius mihi annus infestior fuit Climacterico quarto, sive ætatis duodetrigesimo. Nam si quicquid morborum, vita pertuli universa, in unum confletur, vix puto æquarit, unum illius anni, tam gravem, ac diuturnum morbum; quem mox exceperit mors conjugis, itidem octavum & vigesimum annum agentis. Septimus Climactericus mihi attulit Arthridem, quæ & postmodo, me semel iterumque magna vi est adorta. Nunc ab quadriennio circiter, immunis fuit, credo, diætæ beneficio, & ratapotiocum, quibus hebdomade quaque uti solco. Hoc verò senili Climactere, post quem num alterum sum visurus, solus vitæ, ac mortis arbiter novit, primum tertiana me invalit, quem XXXV. annis proximis nulla febris corripuerat, præter unam, quam uxor arbitrari solet profectam ab scurrili vexatione inimicissimi mihi, tibi que amici, quem cum affine convivio exceperam. Nempe annus erat seculi primus & vigesimus, quo nihil obloqui fas erat, sed Spartana concoquere sapientiâ, necessum fuit, utcumque, vel cibi, & potus reliquiis conspurcassent. Sed post longos logos, redeo ad eum, unde cœperam κλιμακτηζ. vix tertiana desierat, dolor me occupavit colicus, quem non nisi adolescens semel eram expertus. Hinc secutum est grave nephritidos malum, à quo mihi metueram nunquam, quia nullum mali signum hætenus in saccato illo corporis humore animadverteram. Nunc vero me duabus & ultra hebdomadibus perpetuo propemodum lectulo ad-

fixit. Sunt tamen dies prope jam duodecimi, quod ab eo videar mihi liber, cumque Mosis in gratiam redierim, ac vires etiam paulatim recipiam. Hoc tam amanti mei significandum putavi, ut si forte, ex fratre de morbo intelligens, dolore sis affectus, literis meis hunc animo detergeam tuo. Simul illud addo, magnum Salmasium, quem diu salvum, ac sospitem esse, non paulo majoris interest Reip. literariæ, post morbum gravissimum, nunc convalescere magis ac magis. In opere de Theologia Gentili, & Christiana Physiologia, tribus jam mensibus cessatum à Typographo. Premitur quidem, dum distinetur, editione Latina Barlæanæ commentationis, de ingressu Medicæ Reginæ in urbem nostram; mox tralatione Gallica, & Belgica; ac mense proximo, etiam morbo meo. De tuis cum Janfonio locutus sum. Nunc ait, nunc negat. Nihil illo lubricum magis. Anguillam aiunt ficulno constringi folio. Hinc quo pacto te neam, vix video; sed de isto, jam frater, & filius, de te scripserint. Nec enim unquam huc veniunt, quin illud, ut Janfonium ipsi compellent, commoneam, filium imprimis. Jo. Meursius periculose decumbit: scis, ut arbitrator, calculo laborasse ab adolescentia. Nunc vehementius vexatur, quàm antehac unquam: nec ulcere, ut creditur, vesicæ profuere illi solet nisi purulentus humor; sic ad me Collega ejus Stephanus, (à quo novam & longè castigatorem Saxonis Grammatici editionem quotidie expectamus) ante mensem, & ultra perscripsit, nec devita ejus parum metu. Vale cum omni familia diutissimè.

Amelodami,  
cId Ioc xxxix.  
prid. Non. Jun.

Tuus æternum,

G. J. Vossius.

CCCLVII.

Merico Casaubono S. P.

**P**urimum tibi debeo, Reverende & Clarissime Casaubone, quod tantum mei causâ sumseris laboris, ut ista de motibus Britannicis perscriberes mihi. Licet enim non prorsus eorum ignarus forem, haud mediocriter animum juvit, ista ex te plenius planiusque cognoscere. Proderit quoque ad hoc mihi, ut majori de his fiducia sermonem cum nonnullis feram, qui unum hoc à Regiis putant, ut Romana reducatur supersticio ac tyrannis. Sic solent beare eos, quibus religio est abire à veteris Ecclesiæ consensu. Papæ mancipia sunt, qui non juniorum somnia præjudicio

præjudicio antiquitatis vitia arbitrentur. Soli sapiunt Cathari : sunt cæteri umbræ circumvolitantes, vel si quid istis levius vaniusque. Equidem in hisce turbis assidue facio vota pro serenissimo Rege meo & reverendissimo Dom. Archiepiscopo. Nihil boni ab iis spero, qui nihil pensi habent, quod dicant vel faciant, dummodo id faciat pro novellitate. Quod ad imminutionem præbendæ annuæ, scire aveo utrum in Collegio fratrum proportionem agatur Arithmetica, ut loquuntur, an Geometrica. Nec enim æquum videtur, ut qui tanto minus, quam præsentem fructus capio, is tantumdam faciam damni. Cæteroquin si omnino sic fiat sententia, ut etiam absentes damnum tangunt, non hoc agere velim, ut præster indemnus. Tam mihi Regia causa est curæ, ut longe majora velim propterea & velle æternum debeam. Ad neminem summarium super eo scribere in Angliam potui. Valde adversatur animo molestiam iis facere literis meis, quos scio Regni & Ecclesiæ negotia humeris suis sustinere; sed tamen videbo an vim facere mihi possim. Cæteroquin tam facilis esse soleo, ut omnia potius perfectam, quam ulli sim molestus. Interim recte fecerit is, qui nomine Amstelodamensis mercatoris pecunias meas accipit hoc tempore, quia semestre expiravit, si superiori trimestri nihil accepit, contentus sit quadraginta libris Sterlingicis loco quinquagenarum. Mitto ad te Velleium filii mei. Gratum fore confido & nostri causâ, & quia post summos viros non paucis vulneribus medicinam fecit. Hæc raptim scribebam : mediocriter nunc valeo. Nam jam altera est hebdomas quod rursus in publicam prodeo & in Lyceo iterum doceo. Toto antea mense cum morbo sum conflictus, & sat gravi; ne nunc quidem pristina vires redierunt.

Plurimum saluta lectissimam uxorem, reverendum Dominum Decanum & Collegium fratrum universum.

Amstelodami,  
clō lōc xxxix.  
prid. Kal. Quint. c.  
Styl. Greg.

Tuus æternum,

G. J. Vossius.

# CCCLVIII.

Ludovico Crocio S. P.

Bremam.

QUO tempore, eximie Croci, tuas priores accepi, & paulo post alteras, cum revocatione dogmatum Socini, gravi morbo decumbebam. A quo ne nunc quidem con-

valui prorsus : in tantum tamen, ut licet corpore non satis firmo, publicè tamen jam iterum doceam. In morbo autem recreavit me non mediocriter, quod non deponeres memoriam, & amorem nostri, ac munere etiam testari voluisses, quanti me faceres. Eo ardentius, paulum remittente morbo, legi tua. Pretium operæ fecisti occurrendo illis, in quibus infautus ille Faustus, à veteris Ecclesiæ consensu abeundum sibi putavit. Eadem os oclusisti malevolis, qui, si quis vel digitum latum ab iis recesserit, optimum hoc vindictæ genus putant, si sparserint eos Σοφίῃ. Hoc in te quoque successurum sibi putabant. Sed in ruborem dedit nuperus ille tam bellus fœtus tuus. Verùm non sine horrore dico, ubi mendacii, & calumniæ rei agebantur, non aliud invenere ἀποφύγιον, quam quod dicis causâ, non ex animi tui sententia, istæ scripsisses. Sed illi ipsi, qui alioqui à te abirent, hoc putidius putabant. Optimus, & modestissimus quisque, utroque, ut aiunt, pollice, extollit, quod in tristi hoc Ecclesiæ Schismate, animo sis moderato, nec defugas, quo minus illud tetteris, non obsecrè, præclaris ingenii, doctrinæque monumentis. Si qui molestiam facessant, tuum est id insuper habere, cui conscientia, publicum bonum, Dei honor, pro amplissimo sint theatrum. Vale vir, & amice summe, ac quanto major veteris est Ecclesiæ contemptus, quantoque plures, his quidem terris, (nec enim par ubique dementia) sua omnia iudicio metiuntur, tanto magis veteris Ecclesiæ honori, recentis vero concordie studeamus; imo sic animati, tantò impentius amemus nos inter nos. Plurimam, clarissimis & optimis Collegis, salutem meo nomine dicito.

Amstelodami,  
clō lōc xxxix.  
post. Kal.  
Quinct.

Tuus omni officio,

G. J. Vossius.

# CCCLIX.

Baltazari Willio, S. Theol. Doct. & Profess. S. P.

AMBIGO, clarissime & amicissime Willi, utrum magis gaudeam, quando tuas accipio literas, hominis tam amici; an impentius doleam, quando mecum cogito, sic me distringi, ut cum paria maxime facere velim, non tamen possim. Solatur illud, quod sciam, non posse te irasci tam amanti tui, jam ab illo tempore, quò primum te con-

X x

spexi



spexi Lugduni, imo erectam etiam animi tui indolem, perspicere mihi vitus sum. Valetudo quotidie fit firmatior, quæ menssem totum me, vel lectulo affixit, vel cubiculo conclusit. Etiam Salmatius, *id est* *mihi*, qui graviter decubuit, magis, & magis sibi restituitur. Magnum in eo damnum metuebam Reipub. literariæ; ac idem mecum formidabant omnes, quos non tangit nigra loliginis succus. Pro egregio munere, non uno, quo me ornasti, gratias ago, & meo nomine, & publico, de quo bene mereri non cessas. Clarissimo Parenti, & Collegis omnibus salutem dices plurimam.

*Amstelodami,*  
cl<sup>o</sup> loc xxxix.  
post. Kal.  
Quinct.

*Tuus,*

G. J. Vossius.

### CCCLX.

Joanni Isacio Pontano.

Clarissime & Amicissime Pontane,

**A**B annis xxxv. non ita graviter ægrotavi, ac omni eo tempore, quod inter Paschæ, & Pentecostes ferias intercessit. Tertianæ primum me afflixit, mox colici dolores, hinc Nephritis; à quo malo, per omnem vitam fueram immunis. Quid porro futurum sit novit Deus. Illud scio, agere me Climactericum, quem senibus periculosum aiunt, non quasi ulla vis sit numerorum, sed quia Deus naturam sic fecit, ut ad numerum, figuram, ac pondus, cuncta exequatur. Atque hoc inter alia, etiam dies critici arguunt. Nec tamen hæc eo in me dicuntur, quasi annum hunc formidem. Et si enim septimo quoque anno mihi fuerit pejus; tamen fortasse jam periculosum defunctus; atque ut aliter esset, quod præcipit Martialis, summum nec metuo diem, nec opto. Vix tamen valetudini eram restitutus, cum Matthæus denuò incidit in morbum, meo quoque graviolem: ac ne nunc convaluit prorsus. Absque his fuisset, alteruter noster, non literis modo respondisset tuis, sed etiam egisset gratias, pro insigni munificentia. Danica enim tua jam diu accepimus, & melioris quidem chartæ codicem, ut Typographo mandâras. Opus hoc plurimum tibi famæ adstruet. Jam antea quidem, eam tot ingenii, doctrinæque monumentis, sat magnam pararas; quibus vel solis, (penè singulis dixeram, nec iudicium id pœnitendum foret) immortalitatem nominis tui jam diu promeritus es. Verumtamen quia maligno vivimus sæculo,

gaudeo tui, & literarum causâ, novum nunc tibicinem, eumque benè validum accessisse. Danicam Meursii historiam necdum videris, ea intra dies paucos distrahatur publicè. Hactenus soli amici, quibus donavit, exemplar habent, iique perpauci. Mitto nunc ad te Velleum Gerardi mei; sed & Scylacem Isaacii: hunc incompactum, quod aliud hoc tempore exemplar non haberemus. Spero non displicituros utriusque labores. Multa enim pulchrè iis correctâ, observataque. Nostrium opus quod jam diu promisi, vix quartum intra mensem perducetur ad finem: Nam accrescit sub manibus. Et Typographus subinde, ommissis nostris, alia excudit: ut ante menses duos tres, Barlæi Medicæ, cum Latinâ tum Gallicâ, & Belgicâ Linguâ.

Vale Vir & Amice optime, & nos amare perge, qui etsi tardiores in literariis responsis videamur: nulli tamen cedimus amore tui, cujus pro diuturna valetudine, & vita, nec ego, nec liberi, vota facere cessamus.

*Amstelodami,* cl<sup>o</sup> loc xxxix. x Kal. Sextiles.  
Amplissimo Brinkio, & Cll. viris, Dietio, & Zevecotio salutem dices, si otium, & occasio erit.

*Tuus æternum,*

G. J. Vossius.

### CCCLXI.

Reverendo & eximio Domino Isaaco Bargravio, S. Theol. Doctori, & Venerabilis Canonorum Cantuariensis Collegii Decano observando.

Reverende & eximie D. Decane,

**C**UM gratissimæ mihi fuerint Literæ tuæ, his ipsis tamen jucundior obtigit conspectus charissimi filii tui; quem puellum me videre belle *textodidicorru* probe recordor. Jam tum ex vultu ingenuo, & scitulis moribus, in futurum pulchri aliquid de eo mihi promittebam; & volupe est, quod non vanus augur fuerim. Nunc non paulo majus est, quo placeat: animo, dico, recto & erecto. Tanto magis mihi operam esse dandam intelligo, ut ne consilii ejus, quod huc potissimum eum miseris, te unquam possit pœnitere. Equidem si qua potero studia ejus juvare (posse autem confido) non deero tuæ petitioni, atque officio meo. Quoties vero vel publicis vel rebus privatis avocabor, certatim nunc filiorum hic, nunc alius, hoc ipsum implebunt. Promissa hæc non ulterius procudam

procudam verbis, benefacere magis, quam largè promittere adactus. Sæpius posthac à me literas expecta, præsertim quoties erit, quod scire tua interesse arbitrabor. Scio enim, quàm tenerè liberos suos ament parentes: nec aliud æque desiderent, quàm dulce illud virtutis doctrinæque contubernium. Cum lectissimam uxorem & filiam (quam puellulam vidi: nunc, ut puto, maturam viro, & plenis nubilem annis) tum venerabile carissimorum & doctissimorum Fratrum Collegium, plurimum meo nomine saluta.

*Amstelodami,*  
clō loc xxxix.  
Post. Kal. Sex-  
tiles. Stil. Greg.

*Tuus tuorumque æternum,*

G. J. Vossius.

## CCCLXII.

Andræ de Naglowitze.

**J**AM plures sunt menses, Illustris, & Nobilissime Domine, quod commendatum nomini tuo ibam, negotium quoddam, ornatissimi, & præstantissimi, Johannis Wiikenfortii, verè Mercurialis pulli, quando ad instar Mercurii, foeliciter adeo, cum exoticarum mercium cura, sociat jucundos Musarum labores. Inque his nec vinci se patitur frater ejus Joachimus Wiikenfortius, vir Principibus multis gratissimus. Is ob prudentiam, & merita præclara, ante duos tres menses, è Galliis huc rediit; sed equestri dignitate auctus, à Rege Christianissimo. Multum vero, & ego, & præcipue Johannes Wiikenfortius, imo tota domus Wiikenfortia obtrahitur nomini tuo Excellentissimo, pro singulari affectu, quod rem tibi commendatam, curæ tibi esse passus sis. Nam abundè perspeximus, nihil vel à te neglectum, vel Illustrissimo, nec unquam satis laudato, Principe Razevilio. Quantum vero favoris in animis peperit vestris, æquitas causæ; tantum ea odii excitavit, in animo, tum debitoris Johannis Witmakeri, qui propter æs alienum in custodia detinetur; tum fratris ejus, negotium hoc ipsum, ut fieri solet, ad animum revocantis. Uterque enim nihil nisi vindictam sperat, & spirat; atrociam etiam comminatur: Ut mirum non sit, si haut parùm, & Domini rebus, & vitæ metuat suæ, negotiorum Wiikenfortianorum administrator. Itaque Dominus ejus Johannes VViikenfortius, plurimum à me expetiit, ut alteras Excellentissimo nomini tuo literas scriberem, quibus rogarem, ut mei, & VVi-

kenfortiorum ergo, laborem suscipias scribendi ad Illustrissimum Principem Razevilium, & Tribunal Vilnense: quo minister VViikenfortii, in solo nunc agens peregrino, tuto securèque res domini exequi possit; nec necesse habeat assiduo esse in formidine, ab improbo illo pari fratrum, quod dura, diraque comminatur. Multum etiam ad istud conferet, si simulac res ferat, decidi possit. Quam ad rem commendatio tua plurimum adfert momenti, sanè quantò celerius controversia finietur, tanto citius se nosster subducere possit periculo; quod aliqui in tam vasta, & populosa urbe effugere, perdifficile est. De nobilissimo filio tuo sic habe: virtuti, & modestiæ litare, & ab optimo quoque amari, ac magni fieri: studiis etiam non segniter incumbit, ut non planè confidam satisfacturum expectationi Patris, Patriæque.

*Amstelodami*  
clō loc xxxix.  
xii. Kal. Aug.

*Illustris nominis tui cultor,*

G. J. Vossius.

## CCCLXIII.

Merico Casaubono.

Reverende & Clarissime D. Casaubone,

**P**ER eum ipsum, cui tradideras priorum Literarum exemplum, civem se Cantuariensem ac ædibus tibi vicinis habitare ajebat, jamdudum tuis respondi. Credo ventis contigerit adversis, ut tardius acceperis, vel fortasse, quia domo abfueris. Knysterius Amstelodamensis mercator, qui hic mihi pecuniam annumerare solet, partem mihi pecuniæ ejus persolvit, quæ expirarat mense Junio adulto: sed negat se reliquum velle persolvere, antequam ex Anglia cognoverit si non quinquagenas saltem quadragenas Libras Sterlingicas esse numeratas illi, cui hætenus à te numerari solent. Quæso itaque si is forte domum tuam venerit, & quadragenis acquiescat pro quinquagenis, ne quid in solvendo moræ trahatur. Scio non te in causa fuisse, cur minus acceperit, sed ipsum qui nihil mallet recipere quam non quantum solet. Sed enim non dubito, quin animum hunc mutarit, ex quo Knysterium de re tota literis pius tuis edoctus feci certiorum. Gaudeo impense de pace reddita Britanniae. Deumque oro, nequid turbatum in posterum amplius det Novellitas. Sed scire aveo an non ab tempore pacis cessaturum sit damnum, quod in Præbenda fecimus, ac vetus sit numeranda summa. Sic requirere

rere ratio videtur, nec video quin obijci possit, præter regiam voluntatem, si forte aliter ei videatur. Reverendi D. Decani filius mihi gratus est acceptusque, qua de re abunde ad parentem pericripsi. Nec ulla in re operæ meæ parceretur, vel liberorum meorum. Diligenter etiam curabo, ut intelligat magnum apud me pondus habuisse commendationem D. Hanscombii, neque id sui modo, & D. Decani causa faciam, sed etiam reverendi D. Episcopi Eliensis, cui probare me meaque omnia & volo & debeo. Vale, dilectissime Frater, meoque nomine Uxorem optimam, & universum venerabilium Fratrum Collegium saluta.

*Amstelodami, clō Ibc xxxix.  
Postr. Kal. Aug. Stylo Novo.*

*Tuus tuo merito,*

G. J. Vossius.

## CCCLXIV.

Joanni Hulsemanno *S. Theologiæ Doctori, Professori Witebergæ, S. P.*

**V**IR clarissime, quod scribam hoc tempore, vel non scribam, non fat video, usque adeo extremâ fere horâ qua ab urbe abeundum, plena propemodum domus eorum qui compellere velint. Nec tamen tam egregia ejus anima, quem mihi commendabas, fuit dimittenda sine meis ad te literis. Quamobrem ne nihil scribam, hoc scribam quod primo occurrit, nempe gratissimas mihi tuas fuisse literas, & semper jucundam ejus temporis fore memoriam, quo una in hac urbe differebamus de illis quæ ad veritatem dogmatum & pacem Ecclesiæ pertinerent. Mitto ad te amicitie notitiam indicia quædam, liberorum labores, Scylacem Isaaci mei, Velleium cognominis filii: videbis multa in utroque scriptore feliciter correctâ. Metuo, ne tibi gravioribus studiis detento, minus integrum sit ad hæc leviora se dimittere, sed poteris istorum facere Collegarum alicui indicium, dummodo nasum habeat criticum, de quo ipse optime judicabis. Si quæras, quid agam, sub prelo est opus nostrum de Theologia gentili & Phytologia Christiana: Sive de idololatriæ gentilis origine & progressu, & naturæ mirandis, eorumque caulis, & ex iis humanæ mentis adscensu ad Deum: spero autem, intra trimestrem vel circiter, ad umbilicum posse perducî. Plura nunc addere non licet, sed brevi, ut confido, hanc brevitatem longioribus literis compensabo. Tu interim vir, & ami-

ce optime, perge & de publico bene, quod hæcenus facis, mereri, & amare etiam me, qui te facio maximi.

*Amstelodami,  
clō Ibc xxxix.  
vi Kal. Septemb.  
Stylo Gregoriano. Td. gsa.*

*Tuus omni studio,*

G. J. Vossius.

## CCCLXV.

Cl. V. Joh. Meursio. S. P.

**Q**uod meliore utaris valetudine, jucundum fuit cognoscere mihi & meis omnibus. Ego quoque mediocriter nunc valeo ac pariter Uxor & Liberi, uno excepto Mattheo. Tandem responsum à fratribus Blauwii erat qui sexennium vel ultra non dico vana te meque spe lactaverant, sed tot etiam fecerant promissa, te etiam de iis non cogitante, sponte ad tua cuncta excudenda se obtulerant. Malum factum, nec quo sese excusent inveniunt præterquam quod mors paterna consilia sua disturbârit, significavi multum me metuere ne publice de injuria hac conqueraris. Non aliud responsum, quam id quidem in te esse, sed se sibi probe conficere esse innocentie suæ. Tentavi animum Jansonii, sed is ait nullos typos sibi otiosos intra annum fore; adeo multis se edendis distineri. Elzevirius existimat se intra menses non ita multos hac in Urbe propriam adornare velle Typographiam. Sed non arbitror illi eas opes ut tam grande opus aulit suis suscipere impensis. Fortasse tamen Patruces Leidenses parati fuerint in hoc adjuvare. Laminam æream, cui vultus tui incilio, item alia, præcipue scripta tua, remisissim nisi Blauwius uterque ab urbe abesset, ut recipere nihil licuerit. Prodiere tandem exercitationes Heinsianæ in novum Testamentum. Fore puto ut adversus eas scribat ac singula pene refellat Salmasius, nisi intercessione amicorum Heinsii sufflaminetur. Existimabat Heinsius se sic cum hoc doctissimo Burgundo agere posse, uti tecum, mecum & tot aliis solet. Sed est Salmasius omnis injuriæ gravior impatiensissimus. Hæc raptim; quia jam jam currus ascendendus erat Hagam ituro, quod bene vertat. Vale cum omni familia & ab omnibus meis salve.

*Amstelodami,  
clō Ibc xxxix.  
xxv Sept.*

*Tuus æternum,*

G. J. Vossius.

## CCCLXVI.



## CCCLXVI.

V. Cl. Joanni Beverovicio suo, Ger. Jo.  
Vossius S. P. D.

**V**alde me sollicitum habuit morbus tuus, de quo ex variis inaudiveram. Nunc de restituta valetudine, gratissimum attulit nuncium præstantissimus Colvius noster, atque ita magno me gaudio implevit. Nec solum lætari me puta, quia amico melius sit, & tali quidem, qui de publico bene mereri & possit, & velit: Meipsum gaudeo liberatum auxilia de te cura. Valde enim coquebat animum meum. Nec enim ignorare potes, quanti à teneris quoque annis fœderim ingenium tuum; quo cum eximiiis quibusque certares, vulgares vero animas, albis prævertes quadrigis. Hujus me iudicii poenituit nunquam, ac poenitere, ne possit, sedulo caves, dispergendo per orbem tam præclara ingenii, doctrinæque monumenta. In his Ideam Medicinæ veteris; in qua tamen ob tam vastum argumentum, tum demum omne punctum tuleris, si iterum manum admovearis, non quidem ut cuncta quæ posses ex antiquis dicas (id enim laboris prope esset infiniti) attamen propemodum alterum tantum adtexas. Ad hoc quidem, si mei res arbitrii foret, non minorem tibi annorum numerum concederem, quam est Musarum. Nisi satius putes, ut annis Charitum numerum æques: post novennium autem, tertio prodeat idea tua, non minus consummata illo futura tempore, quam Plato esse voluit Ideas suas, vel saltem quando non finit humana imbecillitas, quam proximè abfutura, si cum aliorum industria comparatur. Vides quid de te, cui adhuc virent genua, sperare aulam. Mihi de me spem ejusmodi concipere, nefas: quando frigida senectus deinceps artus debilitabit; sanè anno hoc Climacterico, quem senum multi formidare solent, pejus valui, quam annis proximis tribus & triginta. Nam præter Tertianam, Colicus me invalidit dolor, etiam quod antehac nunquam, Renum calculus vexavit hebdomade, & ultra; ubi dolor aliquantum remitteret, quæ antea avidè legeram de calculo, accuratè à te scripta, iterum in manus sumpti: fœtumque mentis tuæ consului, quia parentem ipsum coram minus possem. Jam vero tres sunt menses, quod malum id non recurrat: credo in Morboniam, unde malum attulerat pedem, rediit, me salvo ac sospite relicto; quod utinam Deus diuturnum esse sinat? Intelligo ex Colvio nostro prodiisse jam in lucem, quæ elaborasti de fœminis eruditis, quare propediem pro hoc labore, gra-

tias tibi sum acturus; nisi vel tu ab ingenio recesseris, non mittendo, vel ego ad ingenium rediero, tardius rescribendo quam velles. Quicquid erit, non te eo minus amabimus. Tuum verò tam erit mihi ignoscere, quam amici sui ignoscebant, magno Medicæ facultatis vestræ ornamento Hieronymo Cardano: qui cur negligentior fuerit à salutationibus ac Epistolari commercio, si minus nunc locus occurrit, reperies in octavo de rerum varietate, Cap. XLIII. Hujus viri exemplo excusabis me apud alios quoque amantes mei, sed hoc in me vitium, ut vocant, culpantes: quasi ego in tot occupationibus, amicorum esse in non necessariis possim, qui ne in necessariis quidem sum meus. Præterea dices iis, hoc sive vitium, sive aliter vocandum, cum primum ab solis esset occupationibus, nunc longa consuetudine, prope in naturam venisse. Habes Epistolam verbosam, & à solo tui expressam amore. Claudam eam solemnem Tullii formulam, Valetudinem tuam cura diligenter. Et cogita hoc mecum petere, tam multos, qui adversa valetudine, ad te recurrunt; etiam illos qui te non vident, sed mecum tamen, ex utilissimis laboribus tuis, præcepta hauriunt valetudinis, vel tuendæ, vel recuperandæ. Præter morem de salutandis amicis, non adscribo. Id laboris nunc melius imponam communi amico Colvio, qui has tibi literas daturus.

*Amstelodami*

clō Idc xxxix.

post. Idus Sept.

## CCCLVII.

Hugoni Grotio.

Lutet. Par.

Illustris & amplissime Domine,

**C**UM propter urbis nundinas, Lyceo nostro hebdomadis unius feriæ forent, committere non potui, quin tam bonam occasionem amplecterer, excurrendi Hagam, partim ut inviserem amplissimum & amicissimum Georgium Ratalerum Dubletium; excessu optimæ & sanctissimæ uxoris suæ Schoterbolliæ mœstum; partim etiam, ut coram salutarè heroinam conjugem tuam; quam lætus salvam ac sospitem comperi; lætiorque audivi læta omnia referentem de te actus. Dum hic sum, redditæ mihi à te literæ ad Isaacum meum. Ex iis video, te non accepisse fasciculum illum, quem per Bibliopolam Parisiensem miseramus. In eo inter cætera, erant literæ meæ de valetudine adversa, qua usus sum Climacterico hoc anno. Video, & alias quasdam non traditas tibi, uti

uti neque illas Manassis Ben-Israel; sed de his jamdudum sum id arbitratus, ob quædam, quæ ex filiis cognoram. Exemplar igitur Amstelodamo mecum attuli, ut hinc mitterem. Unarum, quas ipse scripseram, exemplar retinui, manu filii exscriptum. Mittam ubi rediero domum, modo tanti id sit. Tandem prodire Exercitationes Heinſianæ in N. T. Credo eas jam acceperis, priusquam hæ tibi literæ reddantur. Obiter pluſcula luſtravi; ac quanto penitus inſpicio, tanto vehementius ardeo deſiderio eorum quæ ante tot annos elaboraſti in eoſdem ſacri Inſtrumenti libros. Utinam vero & clariffimo Salmaſio pertexere detur ejuſdem argumenti labores quos promiſit. In iis reſellere illi animus eſt innumera ab Heinſio dicta: imò omnia quæ de ſuo deprompſit penu. Facile credo, hanc contentionem, non parum detracturum nomini Heinſiano; ſed partim eo me ſolor, quod nemo ignoret, ipſum ſibi hoc malum intriviſſe; dum perpetuus eſt in traducendis omnibus, quibus præclarum eſt in Repub. literaria nomen: partim ac imprimis iſto, quod contentionis huius bonum ſperare liceat eventum; ſine dubio enim, multa etiam doctiſſimos quoſque docebit Salmaſius: & fortasſe etiam Heinſius hinc diſcet, modetiſſus de ſe ſentire, cæteriſque ſuis laudibus hanc addet, ut ne tam credulus ſit palpatoribus, qui eum Phœnicis, Dictatoris, Atlantis ſtudioꝝ Elogiis onerant verius, quam honorant. Sanè & Heinſius, & qui eum ſolum, hodie doctum aiunt (quid faciamus tam ſæuis?) toti jam in fermento jacent, ſolum lecta præſatione Salmaſii, quam præmiſit libro de modo uſurarum. Quamquam ego Salmaſio author fuero deinceps, non tam acerbè hominem literis clarum tractandi, modo ipſe etiam remittere velit de illo maledicendi ſtudio. Indignum mihi planè videtur, ſic inter ſe committi homines doctiſſimos; ſed iniquum etiam majores, melioresque eo, quem me ſæpius nihil attinet nominare, ſic vilipendi, quaſi in Doctorum grege, nonniſi extremum locum cum ſcabiſſis Grammaticis mereantur. Sed de iſto nimis multa. Audio *ἐξ ἀπορίας* tuam Lutetiæ excuſum iri. Gaudeo, ob Typos meliores; etſi meam, meorumve Operam Amſtelodami in mendis Typographicis emendandis, probare tibi maluiffem. Verum quid de illo ſperemus, qui poſtquam ſexennium, vel circiter (tamdiu eſt, ut exactè tempus dicere non poſſim) retinuit tot edita, & inedita Meurſii, nunc negat ſe poſſe illa excudere, & paratum dicit, remittere univerſa? Eſtque hæc eo gravior injuria, quod non Meurſius illum ambierit, ſed Meurſio, de alio cogitante, & hoc ad eam rem paratiſ-

fimo, ille poſtularit ut commendatione mea, alteri præferretur. Scripti ex ædibus ampliſſimi Dubletii, qui ut te colit, & æſtimat, ita amiſſiſſimam adſcribi ſalutem petiit.

clō Idc xxxix.  
vii Kal. Octobr.

*Tuus tuo merito,*

G. J. Voſſius.

## CCCLXVIII.

### Cl. Salmaſio.

Nobiſſime & undecunque doctime Salmaſi,

**Q**UI has ad te literas deſert, patria eſt Suecus, nomine Joannes Granius, ephorus illuſtris juvenis Bielkii, qui arcta affinitate inclytæ Oxenſterniorum familiæ eſt innixus. Uterque apud nos ſtudioꝝ causa ſeſquianum vel circiter vixit. Nunc Leidam ſe conferunt. Ac Granius quidem (nam Bielkio non iſtud ſtudioꝝ ardor quem optaremus) ut literarum & literatoꝝ eſt amantiſſimus, ita nihil prius ducit, quàm ut te videat, & compellet præcipuum literariæ ſidis Reip. Poſcenti igitur aliquid ad te literarum, denegare id nec volui nec honeſte potui. Quippe me amavit & coluit ſemper, quam qui maxime; & Bielkius iſtius cujus ſtudiis præſti à primariæ nobilitatis Sueciæ viro, dignitate Comite mihi fuit commendatus. Quamobrem non ingratum fore confido, ſi dum hæc hieme commoratur Leidæ, bis tibi ei potestas fiat compellendi tui, deque ſtudiis conſulendi. Mirè eum devincies, & pariter ipſos Bielkios & Oxenſternios qui eum multum amant, ob mores optimos & ſingularem illuſtris juvenis ſibi commiſſi curam. Tua de modo uſurarum, quando aliquid mihi à meis otii eſt, avidè lego, nec ſatiari queo. Ut in cæteris, ita hic quoque à te congeſtus doctrinarum pene omnis generis penus. Cæterum vix uſum tenui, cum me præſente vir quidam bonus doctusque diceret, ſe librum hunc emere, non propter tam multa quæ doctiſſimos quoſque in opere ipſo doceres primus, ſed ob præſationem adverſus ſycophantam, cujus virus retundi non ex tuo modo honore erat; ſed proſus è re publica. Magis vero magisque in ſumos abit illud de Lingua Helleniſtica commentum, quo ſic placebat ſibi & ſuis. Memini enim mihi amicū ejus dicere, neminem hæcenus vel veterum vel juniorum fuiſſe, qui linguam novi Inſtrumenti intellexerit. Idque ob Helleniſtica Lingue imperitiā, cujus *διότις* ille ſolus ſit gnarus, eoque unice idoneus ad abſtruſa omnia referenda. Cum non ipſe ſolum, ſed etiam amici ejus tam ſtultè ſapiant, hanc larvam

larvam ei detrahi interest Orbis Literati. De-  
ceteram aliquid addere de S. Antonii vita.  
Sed id jam à se factum retulit mihi filius  
meus Isaacus. Nec propterea quicquam  
fieri velim incommodo tuo. Cogitabis, sed  
cum aliquid otii fuerit à tuis, quæ præver-  
tere æquum est. Uxor uxorem, filia affi-  
nem tuam, filii te plurima salute impertiant.

*Amstelodami,*  
clō Ioc xxxix.  
Non. Octobr.

*Tuus tuo merito,*

G. J. Vossius.

## CCCLXIX.

Nobilissime Salmasi,

**A**B eo tempore quo domi me tuæ tam  
humanè comiterque & hospitio & men-  
se sermonisque tui epulis excepiisti, nulla qui-  
dem dies intervenit, quum adversa uxoris  
valetudo satis per se molesta, eo dolorem au-  
geret, quod tua lectissimæque conjugis & affi-  
nis tuæ præsentia hic uti speraveramus frui  
minime nobis liceret. Atque idem molestissi-  
me accidit Arlanderveniæ Domino, qui quanto-  
pere delectatus fuerit elegantissimis versiculis  
tuis, haud facile dixerim. Itaque decreverat,  
huc ubi venissetis, humanitatis officiis testari  
affectum suum. Dixerat de convivio, ad  
quod advocasset homines urbis lectissimos.  
Sed alterum quia innuebat potius quam ex-  
primebat, utrum id vasa fuerit Porcellana (ut  
vocant) melioris notæ conjugii donare tuæ;  
an aliud quippiam, non habeo dicere. Homi-  
nem tam amicum & qui me parentis instar  
coleret, ante sex hebdomadas fatum abtulit  
nobis consanguineorum dolore magno etiam  
meo meorumque. Quod filio Isaaco Scylacis  
editionem meditantem tam benigne communi-  
caris, quæ ad hoc institutum & aliorum etiam  
Geographorum pertineant, multum profecto  
omnes pariter tibi debemus, operamque ut  
possumus dabimus ut ne ingratos nos dicat po-  
steritas. Quæso, maxime vir, in hoc amore  
perliste. Spisse procedunt operæ in iis quæ  
scripsimus de Idololatriæ origine & progressu.  
Metuo ne multi hic ea expectent quæ Roma-  
nam propius Ecclesiam tangant. At nos fere  
contenti sumus differere de Diis Gentium.  
Interim in iis quæ syderum, elementorum &  
mixtorum corporum cultum spectent, non  
omnino perfunctorie pando, quæ juvare pos-  
sint naturalis scientiæ amantes. Nempe non  
satis visum ex naturæ mirandis falsam refel-  
lere religionem, nisi in iisdem etiam mentem  
humanam adducerem ad veri numinis cultum.  
Certior fieri desidero, an multum promove-  
rit Typographus in illis de usura; eoque in  
mandatis Isaaco meo dedi, ut ex te de isto &

aliis exquireret. Hoc libertatis illi lubens scio  
concedes, qui fores tuas non hominis, sed hu-  
manitatis esse hætenus expertus. Heroinam  
tuam conjugem & affinem tuam plurimam sa-  
lutamus.

*Amstelodami,* clō Ioc xxxix.  
Id. Octobris.

G. J. Vossius

## CCCLXX.

*Viro incomparabili Claudio Salmasio*  
*Equiti, G. J. Vossius S. P. D.*

**L**Eidam se ire velle dixit mihi nobilissimus  
Eques Petrus Hoofdius, quem me hic tecum  
prandiolo aliquando excipere commemi-  
ni. Est is præfectus trium oppidorum & Goy-  
landiæ. In Belgicis poematibus, quæ plurima  
edidit, plane regnat. Vita ac gestis Henrici  
IV. ab eo scriptis nihil tali in argumento vel  
elegantius vel prudentius dari possit. Scio  
quanti faciat viros virtute doctrinaque ex-  
cellentes, præcipue duos Europæ ocellos cla-  
rissimos, cum ad quem nunc scribo, & una  
popularem atque amicum suum, Illustrem  
Grotium. Quare fore prævideo, ut pedem  
Leidæ non efferat priusquam te salutarit. No-  
lui igitur committere, quin per eum aliquid  
ad te literarum darem: si non ob aliud, sal-  
tem ut ex eo, ut viva Epistola, cognoscere post-  
ea liceat de prospera valetudine tua tuorum-  
que, pro qua vota facit quicquid hominum  
est eruditorum. De studiis propriis nihil scri-  
bere habeo, nisi opus nostrum quod prælo  
subjeci tardius procedere ob occupationes sæ-  
pe minutas, semper densas. Exercitationes sa-  
cras *φίλυ ἀρίλυ*, quia necdum in Bibliothecam  
retuli, mensem adhuc occupant. Ita fit, ut  
quandoque se quasi sponte in manus ingerant.  
Sed vix dicere possim, quam non sint ad gu-  
stum meum, dum vel aliena lego vel minuta,  
vel falsa. Et tamen hoc stomacho essem, ut  
omnia possem concoquere, nisi tot experi-  
mentis compertissima malignitas male adeo  
me haberet. Sed fortasse Deo visum ope-  
ra tua uti, ut modestius de se sentire, melius  
de aliis discat loqui. Quod si fiat, scio te  
quoque paratissimum fore sic errores ejus cor-  
rigere, ut honoris & amoris ergo, quantum  
licet, homini parcatur. Vale vir nobilissime  
maximeque, & meo meorumque nomine le-  
ctissimæ conjugii & optimæ affini salutem plu-  
rimam dicito.

*Amstelodami,* clō Ioc xxxix.  
Kal. Novembris, Styl.  
Greg.

## CCCLXXI.



## CCCLXXI.

Hugoni Grotio. *Lutetiam Paris.*

Illustris Domine,

**Q**UI hæc literas desert, est Johannes Christianus Volhart, Jenensis, filius Chrittiani Volhart syndici Jenensis; Nepos Joannis Volhart, Electori Saxonico, redditum, & sacrorum scriniorum secretarii. Mater ei Anna Schræteriana, Frederici Schræteri Comitis Palatini Cæsarei, Philosophiæ, Medicinæ, & utriusque juris Doctoris, & apud Jenenses Professoris publici: Neptis vero Joannis Schræteri, Comitis Palatini, Cæsarei Archiatri, olim Maximiliani II. Imperatoris posteaque ex Austria, ab Joanne Frederico I. Electore Saxonico vocati Jenam: qui & ab Ferdinando I. Imp. sibi, & posteris, nobilitatis insignia est consecutus, scholæque Jenensis Academiæ nomen, ac privilegia est adeptus. Soror germana hujus Anna Schræter matertera juvenis, de quo sermo, nupta est Petro Kirstenio, à quo & Arabicam esse Grammaticam editam, scire te arbitror. Ipse Joannes Christianus Volhart, scholæ classicæ spatia emensus, præcipuè scientiæ naturali, & Medicinæ operam dedit; Idque in Academia Lipsiensi, Jenensi, VVittebergensi, & Leydensi. Cum Galeno autem junxit Chymicæ studium, uti videre est è Thesibus triplicis disputationis in Academia Jenensi, ab eo habitis. Hic à Principibus VVimariensibus literas acceperat, ad ducem Bernardum, P. M. cui commendabatur hoc sine, ut eo Medico uteretur exercitus. Jamque in viam se dederat, cum intelligit de tristissimo decessu ducis. Nob. & Amplissimus urbis hujus syndicus Guil. Borelius, eum in legatione sua, ad Remp. Bremensem, & Ser. Daniæ Regem, adsumplit, partim ut Medicum, partim ut Secretarium, cujus præcipuè opera, in Germanicis Latine reddendis uteretur. Circiter annus est quod novi: semperque se vita, & moribus probavit: Et hac parte etiam apud me laudarunt, qui in Germaniæ eum Academiis, ac Leydensi etiam novere. Nunc is de quo tam multa dixi, Gallias cogitat, quia rebus in dulcissima Patria turbatis, novercam ibi fortunam extimescit, ignarus interea, quid futurum sit alibi terrarum: sed scis, quod senes etiam esse debent, hoc ætatis beneficio, semper esse juvenes, hoc est *ἀεληιδύς*. Et istic igitur fortunam tentaturus, literas accepit ab syndico Borelio, ad Illust. Legatum fœderatæ Belgicæ, Dom. de Licr. Et alteras à me,

ad te, Excellentissime Domine. Quæso, si consilio, vel auxilio juvare possis, ne desis. Scio in Germaniæ hoc statu, non omnia te magis in peregrino solo posse, utcumque tam illustri scis loco constitutus, quam minutum me hominem in tua, ac quasi mea etiam Patria inter tot notos; sed confido, facies quod possis.

*Amstelodami, c1b Idc xxxix.*  
Kal. Decemb. St. Gregor.

## CCCLXXII.

Hugoni Grotio. *Lutetiam Paris.*

Illustrissime Domine,

**H**odie ex filio tuo, qui Amstelodami nunc est, lætus intellexi, decretum tibi esse tam multa, magnaque, quæ parata habes excudenda, Typographis dare: eaque occasione non pauca de Blauwiis sumus collocuti: inque his, ut tam fœdè, tot annos, Meursium eluserint: tandemque, nempe post septennii circiter moram, urgenti mihi promissa responderit, se de operibus ejus edendis mutasse sententiam, & paratos esse, omnia mihi remittere quæ huc, ut ederentur, misisset. Scripsi id Meursio, qui non multo post, hac vita ereptus. Quo tempore, & Hardervici excessit Isacius Pontanus. Utrumque fuisse Danici Regis historicum, puto te non ignorare. Ad Typographum ut redeam: Uterque Blauwius paratissimus est, recudere commentarios tuos, de jure pacis, & belli, sed censet filius, quod æquissimum, si tardi sibi velint, luculentam illam operis accellionem, aliorum etiam editionem suscipere oportere. Non abibit hinc filius, quin quo animo sint cognorit. Quare de eo nunc amplius non addam, gnarus fideliter omnia, filium ad te perscripturum. In nostris de Theologia gentili, & Phytologia Christiana, perventum ad serpentium naturam, cultumque: quibus *ὄφις* illa de Insectis subdam; ut sic absolvam, quæ ad animalium naturam pertinent. Ante eam partem, præmissi tamen de cultu Angelorum, & Animarum: tam de natura cultuque corporum Cœlestium, Elementorum, & *ἡ ψυχή*, quatenus ex mirandis eorum, ad Deum ascendimus. Ea puto, intra menses tres, summum habebis. Tum paulum strigabo, & interquiescam: sed mente ea, ut deinde alia divulgem, quæ nonnisi lineam aliquam exposcant. Placet enim consilium quod dedisti, fortasse tamen præverter, tertius memorati operis tomus;

tomus; in quo agendum mihi de stirpibus, & fossilibus: ut ita totam rerum naturam absolvam; quatenus quidem sufficit instituto meo. Item de affectionibus rerum corporearum, in Deorum numerum relatis. Nam absque hac parte, mutila fuerit historia de Gentium Diis. Ac denique de symbolica Gentium Theologia; sive de simulachris, ac ritibus sacris, eorumque causis. Atque in hac demum parte, agendum mihi vides, de questione, quam super præcepto secundo moves. Manasses quidem arbitratur, illud nec copulativum esse, nec disjunctivum, sed paragogicum: ut sententia sit, Non facies tibi sculptile ullum, cujuscumque illud habeat similitudinem. Hoc colligit ex eo, quia Deut. v. 7. Illud, omittitur. Scriptum enim לא תעשה לך פסל כל תמונה, quod Arias etiam Montanus, κατὰ λέξιν reddit, *Non facies tibi dolaturam omnis effigiei.* Ac similiter cepit Onchelos in Paraphrasi Chaldaea, cujus lic verba Fagius expressit. *Non facies tibi imaginem, cujuscumque similitudinis, eorum quæ sunt in caelis, &c.* Chaldaice est, לא תעשה לך כל צבירה, quod conveniens Hebræo reddas, *sculptile omnis similitudinis.* Sanè Chaldaeis, לא תעשה non imago modò, sed & statua, ut in Lexico suo Chaldaico reddidit Buxtorfius. Utrumque id est, videmus & Chaldaicum Paraphrasem illud, negligisse. Censeo itaque si nudis insistamus verbis, non interdici eo præcepto picturam, sed sculptilia duntaxat: nec intercedo quominus Judæi, sive Israelitæ potius, in vexillis suis signa habuerint animantium, ut Rabbinii annotarunt, ad Num. 11. 2. ubi de Israeliticis vexillis ac signis. Sed utrumque non exprimantur picturæ, præcepto secundum Hebræos secundo; satis aliunde liquet, & Dei picturam prohiberi, & cunctas cultûs gratiâ effictas. De his, se scripturum ad te receperat Manasses. Verum ut anticiparem paucillis istis, effecit quod ne, more meo, de die in diem, differret, metuerem. Planè enim alia quam studia animo agit, Lusitanis nihil, ob paupertatem synagogæ, Doctori suo persolventibus. Nempe si Judæis hdes, (ut videntur mihi verum dicere) sese in urbem receptis, nostri illis esse familiares, negotiatio etiam sæpe communis, ut facile fuerit nostris, omnes eorum artes bonas, malas, cognoscere. Sed nostri vel ad clavum sedent, vel eos habent favitores & amicos. Quare non operosum fuit siquid periculi, vel apud nos, vel in Hispaniis etiam oboriretur, illis in luto relictis, vel profunda potius palude, emergere opera eorum, qui & his, & terris aliis plus possent. Manasses igitur Brasiliam cogitat, ut istic, fortasse quidem Docto-

rem agat; sed præcipuè tamen Mercaturam exerceat. Non parum studia amat, & gloriâ sitit: sed res familiaris suadet, quod dixi. Nec enim est magna in re. Et jam ab Arausienfi Principe commendatitias accepit ad negotiationis Americanæ Præfectos.

*Amstelodami, cId Idc xl. Kal. Jan. sed St. V.*  
Planèque ineuntem hunc annum, & tuæ Illustri familiæ, & nostræ, tibi tuisque æternum addictissimæ, prosperum, ac felicem exopto.

*Devotissimus dignitati tue,*

G. J. Vossius.

CCCLXXIV.

Lævino Warnero.

Multum te amo, doctissime Warnere, quod de nequissimo illo Sacidia me feceris certior. Nunc porro opera mihi opus est tua. Nempe in hoc ut ne cesses donec ab hospita illa liber nobis remittatur; vel quod proximum eum adservandum det, vel Cl. D. Heidano, quicum hac de re sum locutus, vel Nob. & magnifico Dom. Rectori Polyandro, quem scio pro veteri inter nos amicitia, lubenter mei causa facturum quidquid poterit. Si quid juris prætere valeat in hoc pignore, hoc quoque integrum ei postea futurum. Tantum ne diutius ab ea idservetur, quæ amittere vel abalienare etiam possit. Non tam sollicitum ea me res haberet si dominus ipse forem. Nam ut nosti, est Bibliothecæ Amstelodamensis, unde à filio Isaaco datus est commodato huic re quam Judæo, ut loca quædam ex Arabico transferret, quorum usus esse possit in opere de vita & dogmatis Mahumedis. De hoc enim argumento filius, quem dixi, commentarium habet sub manibus, quem prope diem spero lucem visurum. Ipse hujus rei gratia filius Leidam erat iturus, sed id non tinit gravissimus filii Gerardi morbus, metuo enim ne diem unum alterum possit supervivere. Nec medicis multum spei superest. Tanto te scio rem curaturum promptius ac fidelius. Convenies primum D. Heidano, virum magnæ ut doctrinæ sic pietatis. Is recepit se consilio te adjuturum, atque si opus sit conventurum supra hoc negotio & D. Rect. magnificum & Amplif. D. Præto-rem: qui non modo in postulato tam honesto & æquo, sed etiam amore mei, libens in hoc negotio

Y y

negotio

negotio gratificabitur nobis. Plura nunc scribere non libet, nec licet, ita tam ægritudine filii quam aliis distinear. Propediem, ut spero, gratias tibi agam, pro negotio feliciter confecto. Salutem plurimam dicito illustri D. Baroni Kyntzy.

Tuus,

Amstelodami, An.  
1640. Mart.

G. J. Vossius.

Literariæ interest, ut diu te fruamur sospite ac salvo. Hoc tanto facilius consequentur, quanto tu constantius malevolorum artes ac furorem perrexeris contemnere. Mea ac liberi salutem plurimam lectissimæ conjugii & optimæ affini tuæ adscribi petierant.

Amstelodami,  
cl<sup>o</sup> lxxi.  
3. Kal. Mart.

### CCCLXXV.

Claudio Salmasio, Ger. Jo. Vossius  
S. P. D.

**V**ehementer, ut debui, dolui, postquam cognovi ex filio meo Isaaco de excessu nobilissimi & maximi parentis tui Senatoris, quæ malis temporibus laus est optima, integerimi, suæque commoda præcipue publico demens. Hoc enim constans de eo bonorum esse iudicium, sæpius ex iis intellexi, quos non paulo me melius scire convenit res Gallicanas. Præclara adeo famâ decessisse tanto plus luctui tuo adferre solatii oportet, quanto minus in nostra est manu quomodo nascamur vel etiam educemur; sed neque tum cogitandum quantum & quam bonum parentem amiseris, quàm quod hoc eum ætatis præmiseris. Cum enim moderata esse conveniat vota nostra, puto non multo ulterius te ausurum à Deo nunc poscere liberis tuis parentum suorum vitam, quam ætatis ejus quâ parentem tuum Deus ad se advocavit. Hæc ut cætera melius me perspicis, ut nihil attineat ea nunc ob oculos ponere quæ sacri nos docent Doctores, vel etiam optimus quem paras, Epicteti interpres Simplicius. Cujus quando incidit mentio non possum omittere, quin addam illud, multum me gaudere ac tibi æque & publico gratulari, quod jam ad finem perduxeris tuos de re fœneraria commentarios; planeque id confidere fore intra menses non ita multos, ut tibi quicquid bonorum doctorumque est hominum gratias etiam agat, pro Epicteto Simplicioque tam bene ingenii doctrinæque tuæ face illustrato. Plane enim ita habere magnam jam esse ejus operis expectationem. Interea maturandum verius quàm festinandum, non operis dico causa, sed tui: qui quomodo tam multis & operosis nunc sufficere possis in ea corporis imbecillitate, satis mirari minime possim: etsi ipse pro vitæ meæ genere (ni fallor) laboriosus satis. Quare sic publicum te attendere velimus omnes ut etiam respicias te & uxorem optimam & liberos parvulos: quorum non minus quàm Reip.

### CCCLXXVI.

Claudio Salmasio.

Vir illustris doctrinæque incomparabilis,

**F**acio non invitus, ut Deorum liberos, hoc est, juvenes præclaro genere natos, vel consilio vel auxilio juvem, præsertim si operam requirant meam. Noli igitur Nobilissimo Reii literas ad te negare, quo commodiori occasione fruatur & adspectu & alloquio tuo: Juvenis est vita & moribus probatissimus, eruditionis & eruditorum amantissimus, & ante biennium vel circiter (ex quo tempore studiorum ergo in urbe hac Amstelodamensi fuit) multum mihi commendatus ab illustrissimo suo parente serenissimi Poloniæ Regis tum Legato, partim ad fœderatæ Belgicæ ordines, partim ad Magnæ Britannicæ ac Daniæ Reges. Huic velut Achates aliquis à parente additus est Erasius vere *egregius*; quippe vitæ inculpatissimus dignus parente egregio apud suos Theologo filius, qui & non aspernandam apud Britannos in Philosophia ac Theologia doctrinam est consecutus. Confido te facilem fore in iis admittendis. Illi vero sic humanitate utentur tua, ut non abutantur, gnari satis non esse in publica peccandum commoda. Alterum quoque est de quo aliquid scribendum putavi: Adtuit mihi ante paucos dies Pastor Ecclesiæ ejus quæ in urbe hac Augustanam sequitur confessionem. Narrauit is mihi aliquando tecum colloctum Joannem Casparum Scherrenberk, qui illustrissimo Comiti à Warthen est à secretis, huic Scherrenberkio te pollicitum libros quosdam te transmissurum Dresdam ad nobilissimum Dom. à Frisen Electoris Saxonici consiliarium. Hoc si factum in mandatis habebat, ut pretium vel mihi, vel tibi, vel Bibliopolæ annumeraret. Interea jam habere se aiebat tua de usuris, Epistolæ Casauboni, Petavii Rationarium temporum, Velleium filii, & orationem nostram de Historia. Quo magis me perietro in exercitationes nostras



frī, לַחַיִּים, five Graio malis nomine Theocriti à Ganda (hoc enim titulo Poematia quædam Belgicè edidit) tanto magis in mentem venit vetus illud,

Καλὸς Θεοκρίτης ὁ μόνος ἀνδράπων ὄψι.

Id quo publico bono deluceat magis, longam tibi à Deo vitam & valetudinem exopto, teque etiam ut hanc sedulo cures plurimum rogo.

*Amstelodami* Anno clobcxxxix, vel si ab ipso natali Christi potius quam Kalendis Januariis annos putemus clobcxl: qui ut felix tibi decurrat, & felicior sæpe redeat, iterum iterumque comprecor. Uxori & tuis salutem nostris verbis dico.

*Tuus,*

G. J. Vossius.

# CCCLXXVII.

Georgio Ratallero Dubletio.

Nobilissime & Amplissime Dubleti,

**R**em veteri & arctissima nostra amicitia dignissimam fecisti, quod in luctu ob excessum unicæ & ornatissimæ filiæ meæ solandum me putaris literis tuis: quæ non leve sane apud me pondus habuerunt, sed sic divinæ visum voluntati, ut luctui illi satis magno alterum adderet dolorem non uno nomine graviozem. Quinto enim die à funere Joannæ meæ in eundem varorum morbum (morbillis vulgo nuncupant, etsi morbus sit sæpe pestilentia ipsa molestior, nec periculosus minus) incidit, deliciæ meæ tuæque, Gerardus; eumque die abstulit xvii. nempe quintæ matutinæ puncto, die xxviii Martii. O spes hominum inanes! nec enim facile dixero quantum mihi pollicitus sim ab illo ingenio cum iudicio pro ætate in literis tam exacto. Quæ cum pulcherrima putarem, magis tamen capiebar indolis bonitate, ita veritatis, sive veracitatis, ita pacis ac concordie erat studiosus, omnia domi forisque in meliorem partem interpretando, ac prout vixit, sic vivere desiit: quod magnum & conjugii solatium adfert. Multa benigne de multis prædicamus iudicio charitatis: hic non opus ex charitatis regula iudicium fieri, quia aliter de excessu iudicium ferre non licet. Omni enim tempore quo decubuit, mire patienter morbum tam gravem tulit, assidue Deum ardentissimis precibus com-

precando, nostras preces exigendo, vel ut sacri eloquii verba prælegerentur: is, qui nec parentes, nec fratres, vel sorores, nec ut arbitror quenquam, verbo aut vultu perstrinxit, deplorabat, quod non ardenti ea pietate coluisset numen, quo oportuit, sed fiduciam veniæ se repositam habere aiebat in misericordia Dei patris cœlestis, & merito ac intercessione sospitatoris Jesu Christi: talis ille ad extremum usque halitum. Sic ut vir perdoctus, cum nocte quadam vigilaret, fassus sibi sit lachrymas excussas, dum videt, tanto ea in ætacula meliorem se, magisque *χρηστὰς ὄψα*. Verbo ut dicam, exemplo cunctis, omnium iudicio fuit, nec meliorem ego mihi, uxori, liberis adhuc superstitibus exopto. Idemque de se prædicat matertera quondam Diamantia, nunc Nærana. Quæ fusius ad te unum perscripsi, ut qui præ cæteris dolebis mecum, idem mecum gaudeas, quod cum non amiserimus sed meliores in sedes præmiserimus. Editionem Valerii Flacci, & Cenforini commendavit fratri Isaaco. Utrumque enim opus absolutum. De Nobilissimi Mylii negotio meminero, hætenus nihil licuit: imo nec typographo Cornelio Blawio, qui eodem morbo amisit conjugem *νύμφαν*. Vix enim tribus ei fuerat mensibus nupta. Exequiæ filii futuræ die Saturni hora prima pomeridiana. Id non addo, ut eas cohonestes (scio in tam parvis liberis, & paterna illa sollicitudine exigi non debere nec fieri posse) sed ut omnium sis gnarus. Significabis hoc ipsum Amplissimo Senatori, & cognato, ut nunc loquimur, veteri amico Davidi Rutero, ex quo consanguineorum filii facile intelligent cæteri.

Raptissime, *Amstelodami*,  
clobcxl. xxviii. Martii.

*Tuus Totus,*

G. J. Vossius;

# CCCLXXVIII.

Claudio Salmasio, G. J. Vossius  
S. P. D.

**R**ecte sentis, nobilissime Salmasi, gravissimum esse hunc casum qui me afflixit gemina prole amissa: in quarum una Mater, in altera ego, imo ambo in utraque multum adeo fiduciæ reponebamus. Sed sic humana sunt omnia in quibus solatio nobis divina esse voluntas debet. Huic soli acquiesco quia solus novit Deus, quid Parentibus expedierit, quid Liberis. Et magni est divini erga nos amoris argumentum, quod constanti adeo in

Y y 2

Deum

Deum & Christum fide abierunt. Gerardus verò tam in gravissimo morbo cordatus & patiens, tam assiduus ad Deum precibus intentus adeoque ardentibus ut omnibus tam admirationi quàm exemplo foret. Non melior. m. mihi vel meorum cuiquam excessum exopto. Et tute aliquid etiam illud esse fateberis, quod pulchella reliquerit ingenii doctrinæque specimina, ut non abierit hinc, nisi pro ætatula bene de publico meritis. Quare omnino sic etiam illum amisisse quam nunquam habuisse quem Deus mihi non debuit, malo. Doleat verò ex animo quod intelligam male tibi à pedibus esse; Metuo subinde ne hæc tibi proveniant à studiis immoderatis, cuius ego intemperantiæ sæpius accusor ab amantibus nostris. Non possum verò mihi persuadere esse hoc imbecillitatis, inde quod nimis ad animum revoces calumnias hominum malorum, quarum specimen, etiam ex versiculis huc transmissis, perspexi. Ringebar quidem, sed neque ridebam stultitiam minus. Et video mecum sentire optimum ac doctissimum quemque. Collocutus autem sum cum multis, tum hujus incolis civitatis, tum vicinarum etiam, & qui ab oris venirent exteris. Magis magisque sordent, quod sic tecum agant, Acheronta etiam si possunt (pii scilicet homines) moturi adversus te. Sed non mereatur ut diutius iis immorer. Cætera ex filio cognosces Isaac. Uxori optimæ & affini tuæ ac liberis à me salutem conjux adscribi voluit.

Amstelodami, c. d. Id. c. xl.  
ix Kal. Aprilis.

CCCLXXIX.

Joanni Meursio Juniori S. P.

**V**alde me, mi Meursi, afflixit excessus clarissimi & summi viri, parentis tui: non me solum, sed omnes meos: Uxor mea vicem dolebat matris tuæ; filii, tuam; filia, illam sororis tuæ: interea ut nobis, sic & vobis solatio esse debet, quod terrenam hanc vitam meliori commutavit; quod æternum vivet nominis sui fama: quod etiam in liberis vivet, te imprimis, quem paternæ virtutis ac doctrinæ æmulum fore pollicemur nobis. Eam in nobis fiduciam gignit cum ingenium, & sub tanto doctore, parente tuo, educatio, tum specimen illud doctrinæ, quod, ut paternæ adderetur Cretæ, transmisisti. De eo edendo curæ mihi erit. Sed hæcenus non licuit cum Blauwio colloqui, quia uxorem

quam vix tribus habuit mensibus, amisit, & adhuc totus luctui se dat, me quoque hisce tribus hebdomadibus, intra quas literæ mihi tuæ redditæ sunt, domi detinuit, tum obitus unice ac dilectissimæ meæ Johannæ, tum gravissimus morbus filii Gerardi: de quo parum spei posse vel diem supervivere: hat voluntas Domini, quem interea oro, ut nobis conservet tam carum pignus, modo & nomini divino gloriosum, & nobis filioque salutare sit. Eripuerit mihi filiam morbilli, ut nunc vocant, morbus Epidemicus ac mire malignus: quo & filius decumbit. Huic tamen longe majus à feбри, continua & ardentissima, quam morbillis ipsis periculum est. Non potui committere, egregie & amicissime juvenis (nostri illud Isocratis *πρέπει τις παῖδας, ὥσπερ ἡ φύσις, ὅπου καὶ τῶν φίλων τὴν παῖδα κληρονομεῖν*) quin in summo licet dolore, & animi anxietate hæc pauca ad te exararem, præsertim rogante id Severino vestrate mercatore. Cui & monumenta tradidissim paterna, de quibus scripsisti; sed aiebat se terra iter facturum, coque nihil hoc tempore ad vos præter litteras posse perferre. Captabo ipse occasionem aliam nisi Blauwius mutato consilio, editioni se accingat. De omnibus colloquar tecum literis proximis, si Deus & valetudo permiserit. Ego & omnes mei matrem tuam, & liberos optimos peramanter salutamus, omniaque offerimus officia, quibus utilis his terris opera nostra esse possit. Plurimam etiam salutem dicito clarissimis viris Stephanio & Laurembergio.

Amstelodami,  
c. d. Id. c. xl.  
viii Kal. April.  
St. Gregor.

Tuis tuorumque,

G. J. Vossius.

CCCLXXX.

Georgio Rataltero Dubletio.

Nobilissime &amp; Amplissime Dubleti,

**J**AM ab aliquot retro annis graves & crebræ fuere Domini visitationes, ut *ἐκπαύσεις* cum Scriptura & Ecclesia loqui solemus. Itaque quoties cogitatio eo deflectit, metuo ne hic cesset manus Domini: ac si aliquantum temporis sine gravi incommodo labatur, in lucro illud pono, & gratias ago bonitati supernæ. Quod si plane ita divina ferat voluntas, ut alia me maneant adversa, ita fore prorsus confido, ut qui vulnerat, etiam saucio spirituale suum balsamum affundat. Nihil pium ex nobis, sed in Christo omnia possumus. Nescio ecquid audieris de nova disputandi

divia, qua sola confisi Pontificii in quovis dogmate provocant nostros. Huic se opposuerat Calixtus, Theologus Confessionis Augustanæ, & quidem, si quid iudicare de his valeo, facile omnium, qui eam in Religione Christiana sententiam profitentur, doctissimus & cordatissimus. Huic respondit vetus ejus condiscipulus, Ducis Wimariensis, qui nuper vita excessit, præceptor, sed post desertos Lutheranos Abbas Pontificius: Abbatia autem sua à Sueco milite ejectus, ac inde in Bataviam profugus, ubi nunc tertium quartumve annum agit, vir doctus, & perhumanus, nec infacetus. Hunc aliquando ad me perduxere Overbequius P. M. & Joachimus Wiikefortius: ac sine hoc illo, ut de uno altero capite eorum, quæ inter Pontificios & nostros controversa forent, dissertaremus. Postea idem sponte etiam sua ad me venit non semel: sæpiusque de nova illa differendi arte, ut vocant, collocuti sumus. Quia vero quam insitit disputandi viam, non aliunde melius quam ex apologia ejus contra Andabatam Helmfesterensem, hoc est Georgium Calixtum, cognoscere est: eo geminum ad te exemplar ex quaternis quæ dono accepi, transmittendum putavi. Unum tuo inserviat usui, cujus ego in talibus etiam iudicium magni meritò facio: alterum clarissimo Riveto vel ipse dabis, vel per famulum mittes. Causam consilii mei, ubi otium erit, facile ex te cognoscet; nempe propterea illum potissimum elegi, quia ex Theologis Fœderatæ hujus Belgicæ *republicæ*, & controversiarum quæ nobis sunt cum Ecclesia Romana intelligentiorem scirem neminem; amicus quidem meus per vetus putat Nieuhusium toto opere *principalis*nectere, cui non per omnia adsensero; sed puto etiam istis conditionibus palæstræ quas præscribit, causam nostram superiorem fore. Et illius rei semel iterumque experimentum dissertando illum in modum cepi. Sed de istis pluribus aliquando coram: ubi & valetudo meorum, & feriæ publicæ excurrendi ad vos facient potestatem. Omnes mei te plurimum salutant.

Amstelodami. clb Idc xl. pridie Idus Aprilis. Quo die si fuisset Hagæ, non commissem quin illustri legati Suecici Joachimi Camerarii recta petissem domum, eique & familiæ in multa sæcula omnia esset foelicia comprecatus: Nempe quia hic est dies ille, quo lucem primum Banbergæ ante annos cxl. vidit avus ejus Joachimus Camerarius, quo viro, ut cæteras ejus laudes taceam, nullus in Germania melius est meritis de literis Latinis pariter & Græcis. Ubi sponte se occasio obtulerit,

salutem plurimam & Dom. Legato, & filio, generoque dicit.

## CCCLXXXI.

Andreas Riveto, *summo & Theologo, & Amico*, G. J. Vossius S. P. D.

GRAVE omnino est geminum illud vulnus quod accepi: præsertim istud de filio, ea in ætate istac eruditione, ea insuper vita ac moribus, ut in illo minus desideraram quam meipso. Sed sic quoque plurimum debeo numini, quod egregiam hanc prolem mihi donarat, vel potius commodarat. Non leve est quod monumentis suis vivet in hominum memoria: Majus, quod nomen ejus inscriptum sit vitæ melioris. Quare omnino malo, hunc datum mihi filium, quam si Deus dedisset nunquam: planèque pro eo quoque beneficio debitorem me agnoscam ac profitebor semper. Non facile autem dixerò, quam mihi gratum fuerit, quod me literis tuis solandum putaris; nec Deus qui hunc tibi animum inspiravit, Epistolam tuam in me infrugiferam esse sinet. Idem dixerò de literis quas nudiustertius ad me misit *à meo* Salmafius. Cujus quando nunc mentio incidit, dissimulare non possum quam male me habeat, quod Leidensium nonnulli loliginis succo pleni, infantiendi adversus eum finem faciant nullum. Non satis erat ubique eum traducere, nisi & nescio quem, sancto Martyri, qui Tertullianum suum doctorem vocare solet, cognominem, verum moribus, ut ex scripto apparet, valde disparem, instigarent ad scribendum pro manibus, ut ipse loquitur, Cuzæanis? Profecto, si quoties quis à defuncto modestè dissentit, pro manibus ejus liber debeat prodire; contra quem non eruditorum immanes pro manibus libri scriptitentur? Te, meque etiam hæc maneat fortuna, nec enim possumus negare, quandoque à priorum nonnullis nos abire. Et quæ aliter possumus, cum illi ipsi sæpius abierint ab iis, qui fuerant, nec consenserint semper cum illis, qui essent; ad hæc quid fieret Aristarcho, à quo sæpe adeo acerbe, & præter meritum ullum vapulat Nonnus? Non metuit ne quis scribat pro manibus Nonni? Cujus sancta anima postquam mille & ultra annis in Domino obdormivit, nec ulli gravis fuit, multorum vero mentes sacro pavit alloquio, quasi inquietata, & quantum in ipso fuit Aristarcho, velut cœlo devocata fuit ad causam Leidæ dicendam pro opera honori Christi, & Evangelii illius impensa. Num ullum talis rei exemplum habemus



habemus à longe plurimis retro sæculis? Crede mihi, optime & prudentissime Rivete, non eo hæc sine à me scribi, quod lubido me teneat obstrigillandi quemquam, nedum illum, cui male licet merito, ob doctrinam & quia collega fuerit, honorem suum debeo: sed solum hæc à me dicuntur, quod ferre non possim tantum eruditionis & candoris divortium, propter quod etiam doctissimi multi ludibrium indoctis debent. Nempe sic cum iis agitur, ut domi sint talpæ, Argi foris, imo oculatioris Argo, quippe qui videant etiam quod non est. Mihi ad me his diebus versiculi virulenti in Salmasium, nempe ex eorum quos dixi officina, ut quidem ad me perscriptum, & postea sermone eorum didici qui Leida venirent. Et addunt, non hic statutam rem, sed de vi cogitari. Verum ego cassas hæc terriculas puto. Sapient magis; nec hoc boni firint. Orandus interim Deus nobis, ut meliorem hominibus mentem inspiret, ad gloriam sui nominis, & honorem ac utilitatem Reip. Literariæ, cui ab moribus istis magis magisque est contemptus, nulla literarum, magna quorundam literatorum culpa. Hanc querimoniam tutis auribus vel literis committere volui apud te, cujus ut rara doctrina, ita eximia pietas ac prudentia, & erga amicos fides, nota est omnibus iis qui penitus inspexere. Vale, vir maxime, & amare nos tui nominis cultores perge; nec optimæ solum conjugii, sed si quando otium erit, etiam clarissimo affini tuo Molinæo meo nomine salutem dic plurimam, vel huic potius scribe. Jucunda enim mihi semper fuit, eritque tam eruditi doctoris mei memoria: addo & collegæ ex quo ambo in Cantuariensium canonicorum ordinem sumus adsciti.

*Amstelodami, c15 Idc xxxix.*  
iii. Id. April.

## CCCLXXXI:

*Illustriss. atque Excellentiss. Domino,  
Dom. Gabrieli Gustavo Oxenstiern.  
L. B. in Kinutho, Domino in Torefio,  
& Stureforfa, &c. Regni Sueciæ Sena-  
tori, & Proregi, &c.*

Illustrissime & Excellentissime Domine,

**R**edit ad vos generosus Dom. Bielkius, juvenis bonorum amore dignus, mihi quidem non modo ob genus præclarum, majorumque virtutes, sed etiam propter indolem optimam longe semper charissimus, non modò dum Amstelodami fuit, sed postquam etiam

abiit Leidam: redit autem doctrina auctior; qua parte tamen non ausim dicere, plane expleturum vota & desideria vestra. Sed nihil impedit, quominus etiam in patria majora addat incrementa, partim legendo scribendoque, partim commercio hominis eruditi ac fidi: verum ea est vestra prudentia, ut de isto melius coram judicio facturi sitis, quam ego vel alius his verbis. Et habebitis optimum & doctissimum Granium, qui his diebus magna cum laude supremam in utroque jure lauream est consecutus. Ex eo omnium, quæ ad studia generosi Bielkii pertinent, optime cognoscetis. Est is vir magna pietate, ac moribus optimis, idemque ea est doctrina ac facundia, ut his etiam nominibus semper mihi fuerit acceptissimus. Sane in paucos incidi gentis Sueciæ, qui paria faciant, nedum superarent. In curando vero juvene, cum præfectus à vobis fuit, summa ejus semper eluxit fides ac industria. Non facile dixerim quoties de generoso juvene mecum sit collocutus, inque studiorum ratione, qua cum informandum putavit, non possum non utroque quod dicitur pollice, institutum ejus comprobare. Tanto dignior, cujus à te, præclare heros, & à procerum aliis, ratio habeatur; siue existimabitis operam ejus in Academia, siue in Reip. negotiis patriæ utiliore fore. Interest hoc non modo ipsius doctoris Granii, sed etiam nobilitatis Sueciæ: si enim huic viro ea virtute ac doctrina post operam generoso Bielkio summa fide navatam, publice honor expendatur: præterquam quod cum admodum vobis obstringetis, futurum etiam, ut eo ad similem industriam ac fidem accendantur alii, quos nobilibus adolescentibus in terras externas mittendis præficere cogitabitis. Ut nihil jam de eo dicam, quod illo munus istoc quod imponetis, egregie sustinente (neque enim de eo dubitandum) futurum eadem ut magna ex parte ad vos redeat honor, & illi de quibus bene merebitur, illustribus proceribus, qui tam recte sibi prospexerint, gratias agant immortales. De me sic habe, illustrissime & excellentissime Domine, devotissimo me animo esse erga florentissimam gentem Suevicam; ac jam ab viginti annis, partim Leidæ, partim Amstelodami ut potui comprobasse: ac si quos mihi commendandos putabis, nunquam me commissurum, ut ullum meum officium desideretur.

Deus Opt. Max. diutissime tam illustre caput, & patriæ, ac familiæ, ac amicis sospes ac incolume conservet.

*Amstelodami,  
c15 Idc xl. Id.*  
Aprilis.

*Illustrissimi nominis tui  
cultor devotissimus,*

G. J. Vossius.  
CCCLXXXII.

## CCCLXXXIII.

*Illustriss. atq; Excellentiss. Domino, Dom. Gabrieli Benedicto Oxenstiern, L. B. in Morby, Domino in Lindholmen & Rosersberg, &c. Regni Sueciæ Senatori & Thesaurario, &c.*

Illustrissime & excellentissime Domine,

**N**ON possum dicere quam gratæ mihi fuerint literæ ab tanto heroe ad me missæ, quæ commendasti mihi generosissimum juvenem Bielkium. Itaque cum antea eum diligere, postea etiam impensius ejus studui commodis, nec ulla in re, qua opera mea uti vellet, officium nostrum claudicavit. Nec inutiles ei fuimus; credo tamen profectus majores desiderabis. Sed enim si nobiles adolescentes omnes in studiis nervos intendant, merito & nobis gaudemus, & illis gratulamur; sin fortassis majorem requiramus industriam, lætamur tamen dummodo nobis non plane perierint impensæ; & tam corruptis seculi moribus, ita se gesserint, nihil ut sit quod vitæ probitati & honesto nomini multum adversetur. Sane indole hic juvenis est perbona, planeque ita fore confido, ut deinceps in patria si studia continuet, & docti fidiq; hominis consiliis ea dirigat; id suppleat, quod non injuria nunc deesse videatur. Sed de isto non præbo consilio, quando optime ea sine monitore perspicias. Et melius ea exponet doctissimus Gravius, qui vir sedulam semper generosi juvenis suæ fidei commissi, curam gessit, sive studia ejus, sive vitam moresque attendamus; nec dubitandum, illustrissime Domine, quin excellentissimo nomini tuo, & procerum aliorum sit charior acceptiorque futurus, quod nusquam passus sit fidem & industriam suam desiderari; sane & in hac urbe iis qui novere, & Lugdunensi in Academia, ubi supremos in utroque jure est adeptus titulos, ab optimo & doctissimo quoque & amatur, & æstimatur: atque ita eorum judicium est, non defore tam pio candidoque, tam docto & prudenti viro, qui vel ab honore Academico, vel civili munere, consultum, & illi velint & patriæ simul, quæ multum ex eo capere poterit utilitatis: Mihi quidem id si contingat, jucundissimum erit, nec mihi duntaxat, sed aliis etiam qui studiis, & Sueciæ toti bene velint. Porro si qua in re illustrissimo nomini tuo inservire possit opera nostra, ea semper erit paratissima; nec committam, si quos nobilitatis Sueciæ adolescentes commendandos mihi putaris, quin omni eos

consilio, & auxilio juvem, dummodo sibi ipsis non defint. Nihil enim jucundius mihi, quam de studiis eorum bene mereri, qui aliquando columnina futuri vel studiorum, vel regni, vel reip.

Deus Optimus Maximus perdiu te, & illustrissimam familiam tuam salvam, sospitemque conservet, bono regni Suecici, ac simul cultorum tuorum.

*Amstelodami*  
clō lxxi. Id.  
April.

*Excellentiæ tuæ devotissimus,*

G. J. Vossius.

## CCCLXXXIV.

Gerardus Vossius, Leovino Warnero  
S. P. D.

**N**ON distulisset respondere literis tuis, nisi ita fore existimasset, ut filius meus Isaacus Leidam hac ipsa hebdomade proficisceretur. Nunc video id non fore, nisi sequenti, & fortasse extrema. Quare significandum tibi putavimus, si vidua illa non minori pretio restituere librum Bibliothecæ Amstelodamensi velit, & in mora periculum esse videatur; nos satius putare, ut ei id pretium annumeretur quamprimum. Sin nihil prorsus hac pauxilla mora peccabitur, posse rem in filii adventum differri. Videtur enim plane iniquum, ut ea quod publicum est detineat, nec reglutinari illud ab unguibus suis patiat; nisi quatuor imperialibus annumeratis. Sane unus alter sufficisset solatioli causa, quia & ipsa ab homine nequissimo sit elusa. Possis colloqui cum clarissimo & amicissimo Heidano. Quicquid utriusque vestri videbitur, id utroque pollice ipse laudavero. Pecuniam simulac librum videro, refundam; vel si malis, præmittam. Gratias interim ago vobis pro opera nostri ergo hoc in negotio insumpta. Altero etiam nomine gratias habeo, quod mihi miseris virulentos vericulos illos in virum nunquam satis laudatum Claudium Salmatium. Video inde, & ex aliis multis, Lugduni habitare eum inter tam infestos, quam si in mediis viveret Jesuitis. Utinam tandem sit infaniendi finis. Sed metuo ne id non ante sit, quam, qui tantopere nunc ad-versantur, æstimare satis sciant divinas ejus viri virtutes, quas, ut videt, sic suspicit orbis universus. Sed pro animis adeo exulceratis spisse admodum id procedet. Interim orandus Deus, ut iis saniores largiatur mentem: nec cessandum viris bonis aquam potius, quam oleum

oleum huic flammæ affundere. Vale, doctissime & amicissime Warnere, plurimumque meo nomine saluta illustrem Dom. Bar. Kynzy.

*Amstelodami* cl<sup>o</sup> l<sup>o</sup> xl.  
Idib. April.

## CCCLXXXIV.

Winando Rutgerfio *S. Theologiæ Doctori.*

Vir Clarissime & Amicissime,

**J**AM pene sesquiannus est quod multis conflictor adversis, nam & febri interim laboratum & arthritide, & colico dolore & calculo, ex quibus duo posteriores morbi antea mihi fuerunt ignoti. Sed & conjux ac liberi prope omnes ægrotarunt, duo ex illis erepti nobis, vel mundo potius. Filia unica & suavissimus Gerardus, cujus extant foelicissimæ in Velleium Paterculum castigationes, ac brevi ut spero consequentur ejus Valerius Flaccus, Censorinus & alii; quæ & illi honori & Reip. Literariæ utilitati fore confido. Hæc omnia (ut taceam quædam quæ dicere nolo) non mediocriter animum meum afficiunt. Corpus interim animo, animum spe meliorum temporum sustentamus. Quod si spes ea frustrabitur, saltem non falleremur de promissis beatoris vitæ, ubi lachrymæ omnes detergebuntur. Nec tibi omnia ex voto fluere, indicant literæ tuæ, ac præterea ex optimo ac doctissimo Alberto van Filligen intelligo. Crede & hanc fortunam tuam mihi esse dolori maximo, omniaque tua causa velle accipere: neque unquam ulla occasio abit, quin te commendeim & dotes tuas. Parum absuit quin voti fuisssem compos factus Ultrajecti, ubi desiderabatur qui succederet in locum Mag. Reineri Philosophiæ professoris acutissimi. Pro te stabat professor alter Philosophiæ M. Segwertius, qui de meliore nota te commendarat, atque ea pro nomine & fama tua (hanc zelotes quispiam arrodebat) attulit apud procures, quæ ex me audierat; puto confectum haberemus negotium nisi Regina Bohemica, dum hæc agimus, Palatinum quandam commendasset præceptorem antea liberorum suorum. Is igitur à primatibus prælatus, quanquam vero majus erga te erat studium meum, tamen gaudeo non penitus esse aberratum, juvenis enim est eruditus, & perhonestus. Nec fuit tamen tale quid denegandum Regiæ, exuliquidem, sed tamen Britannici Regis forori, & cujus liberi forent Pronepo-

tes Guilhelmi Arausionensis præclare adeo promeriti de his terris. Hoc facilius reputam feres, præsertim cum nemo te eo aspirasse possit suspicari; imo quod res est, te ignarum fuisse omnium omnes sciant. Aliquid etiam per amicum tentabam Hardervici, uti & alibi. Sed nihil hætenus potui, id est, ab multitudine conpetitorum: subinde etiam ab zelotis, quibus suspectum est, quicquid loca incolit, ubi clarissimus Vorstius quondam docuit. Utinam affinis tuus mecum sociaret operam suam, plus efficereamus; sane varios variis commendat locis: in his etiam Cabelavium Amstelodamensibus nostris. Urget ut præferatur filio meo Francisco Jurisconsulto, putabam me effugisse Vatinianum ejus odium erga immerentem. Sed, ut exerior, spes me retellit. Mihi non est animus par pari dare hostimentum. Feram ut soleo; imo patientius tanto, quanto ex corporis imbecillitate sæpius subit cogitatio, brevi Deo rationem fore reddendam vitæ anteaactæ. Vale, vir & amice summe, & cum uxore à me & uxore salve.

*Amstelodami,*  
cl<sup>o</sup> l<sup>o</sup> xl.  
Non Quinct.

*Tuus æternum,*  
G. J. Vossius.

## CCCLXXXIV.

Georgio Rattallero Dubletio.

Nobilissime Amplissimeque Dubleti,

**A**B eo tempore, quo te Hagæ invisit charissimus meus Isaacus, prius quidem morbus diutinus me affixit, mox cum aliis fuit conflictandum adversis, sane duris, sed quas patientia faceret leviores. Nempe ad omnia, ut videtur, obdurandum est mihi, donec hæc vita durabit. Aspera tam multa eripueret etiam mihi animum respondendi amicorum literis, tuis quoque tam amicis, cum saltem gratulari oportuisset honorem eximium. Sed tanta erat amicitiae fiducia, ut facilem mihi apud te negligentiae hujus veniam fore putarem, præsertim filio meas quodammodo partes apud te fungente. Inertiolem etiam reddebat, quod aiunt, gratulationes etiam feras esse gratissimas; contra quam in consolationibus usu venit, ubi dolor, qui calum jam duxerat, refricatur. Cæterum non modo opto, ut nova hæc ac summa dignitas tuæ familiæ ac toti patriæ sit salutaris; sed ita etiam fore confido, nec aliud bonorum hic judicium est. Negant omnes à multo retro annis ejusmodi dignitate digniorem electum.



etum. Solum mirantur aliqui, tam malis temporibus, ac virtuti adversis non diutius te præteritum. Autumnales feriæ nostræ hac hebdomade cœperunt: nec abhorret ab eo animus, ad vos excurram. Sed uxorem domi solam relinquere non sustineo: nam ut una se in viam det, id vero nihil est. Ea est corporis infirmitas; verum Junia affinis, Cassimiri vidua, nunc est Amersforti. Ea propediem cum sorore Nerana ad nos veniet; id ubi erit, abesse domo licebit: quia sic habebit uxor, quibuscum se oblectet. In opere nostro de Theologia Gentili, ac Physica Christiana binis jam mensibus operæ typographicæ cessant; sed vehementer ac suo jure urgent Indicem ac Dedicationem. Hæc etiam causa erit, cur excurram; neque enim morari ultra typographos licet. Ita queruntur de damno quo eos mactō. Dignum laboris præmium hoc tempore, ab Anglia sperare non ausim. Ita pecuniis opus ad bellum id quod paratur. Ex præbenda accisæ mihi quinque libræ Sterlingicæ trimestribus singulis. Idem factum Canonici cæteris, quare jam biennium circiter est, quod tertio quoque mense solum viginti percipio, qui viginti quinque solebam. Sed ecce ne viginti quidem accipere hoc trimestri potui. Aiebat quæstor, quicquid parata hic foret pecunia Regi fuisse dandum: eoque expectandum mihi, dum aliæ ex agris redierint. Injurato etiam mei causa me optare credes, ut bellum componatur. Sed cum cogito animos eorum, quibuscum negotium Regi est; tum autem flabella in Anglia ipsa, item Gallia, atque utinam non his terris, vix boni quicquam sperare possum. Sed nimis me diffundo, de his & aliis propediem plura.

Amstelodami,  
cl. Dec. xl. xi  
Kal. 6.

Tuus totus,

G. J. Vossius.

CCCLXXXVI.

Thomæ Farnabio.

Præclare Farnabi, Vir pariter atque Amice summe,

**Q**uod post egregia tot ingenii, doctrinæ industriæque tuæ monumenta, in otio isto non dubitaris negotium suscipere, novæ Grammaticæ concinnandæ: id quam animis vulgaribus vulgare & ipsum judicabitur, tam mihi videtur animi esse erecti, nec imperitorum opinione, sed suo quidque pretio æsti-

mantis. Ac scio mecum probe consentire eos omnes qui necessitatem hujus studii intelligunt, & quanto olim in honore fuerit etiam apud principes viros. Quæ apud te referri non merentur, qui, quid hac de arte statuas, facto ipso comprobasti. Quod verò pulchram hanc operam tuam inscribere volueris nomini nostro, fecisti pro affectu tuo, quem jam ante perspexi, cum aliunde, tum ex eruditis in varios Poetas Scholiis: opera crudita, in qua cum candide laudare soleas; si qui probe alicujus loci mentem præ aliis affecuti videantur; ipse etiam Achivis istis me permixtum agnovi. Gratias itaque & pro istoc habeo, & præcipue pro gratissimo munere, quod nunc mittis. Et fort. se vix alteri mittere poteras, cui labor ille foret acceptior. Operam verò dabo, ut quanti te faciam, intelligas. Quod verò possis, ut sicubi discesseris à me, in bonam partem accipiam id factum nolim. Quid enim gravatè id feram, qui toties abeo ab aliis, & quotidie addiscendo abire à me ipso soleo? Non soleo morari quid scripserim; sed quid rectum putem, ac præfiscine hoc dixerim, gratior mihi esse veritatem, quam ipsemet sum mihi. Quare sicubi me fugerit aliquid, quod postmodo mutatum velim, non sum medicus tam misericors, ut urere & secare verear illos animi mei fetus. Atque hoc conspicias, si Deus tiverit, ut aliquando illi de Arte Grammatica Commentarii recudantur. Multa enim interim observavi, quæ ad oram allevi Codicis notari; multa fors observabo, si Deus hanc mihi diutinam esse vitam volet. Crede mihi, Cl. Farnabi, nihil arte hac nostra operosius, difficileque in plurimis certi aliquid consignare, nisi quis omnes veteres evoluerit cum cura, atque adeo optimos quosque Codices MSS. adierit, vel eos saltem, qui bona fide variantes Codicum lectiones annotarint. Et sic quoque in ambiguo quædam relinquentur ob tot loca corrupta à librariis imperitis, qui, quæ non intelligerent, mutare solent, magno rei literariæ dispendio. Sed septennium primum lulis. & Grammaticæ datum, alterum septennium utrique linguæ, & Elementis Rhetorices, Poetices & Logices impendi; posteaque gravioribus studiis totos insumpsi annos quinquaginta, perque varia admodum studia, pro exiguo ingenii nostri modo me diffudi. Tanto temporis spatio, tantum reperi difficultatem in hocce nostro studio Grammatico, ut citius aliquis in Theologia, Jurisprudentia & Medicina, (non apud Anglos quidem, ubi tardè honores isti conferuntur, sed aliis etiam in terris quas nominare nihil attinet) Pileolum consequi possit Doctoralem, uti vocant, quam

Z z

ut

ut consummatus ille evadat Grammaticus. Tantoque gratiores & acceptiores esse omnibus bonis labores eorum debent, qui ut aliorum ea parte labores imminuant, sedulo operam dent. In iis te quoque esse, doctissime vir, gaudeo. Rideant, an ringantur, non *ἀγέμευτοι* modò; sed etiam, qui studium hoc leviter degustarunt, nihil peni uterque ducamus; præsertim quando nihil est, quod invidemus istis Suffenis, qui, quia minora studia nesciunt, eò in majoribus majores sibi videntur; cum in his etiam tanto sint minores, quanto magis humanitatis studia neglexerint. Vale, clarissime Farnabi, ac deinceps etiam amemus nos inter nos:

*Amstelodami, cId Ibc xl.*  
 prid. Kal. Sext. St. N.

G. J. Vossius.

### CCCLXXXVII.

Ludovico Crocio *Theologo* Bremensi.

Eximie & vir & amice,

**N**ihil hæcenus, ut arbitror, ad te perscripti de gemino vulnere domestico, quorum utrumque superiori mense Martio accipi. Prius Dominus ex hac vita evocavit filiam, quam haberem, unicam, jam ea ætate, qua viro maturæ judicantur, et si nos, quodammodo septentrionis filii, non adeo calide hoc connubiale negotium terris frigidis urgeamus. Hæc res mihi pernolesce accidit: solatus me interea sum voluntate Dei: eo magis quia pie adeo, uti vixerat, obdormisset. Dolorem quidem augebat quod tam reverita esset parentes, etiam complexa esset variorum linguarum, & artium scientiam, ob quam non exigua erat laudem adepta apud eos, quibus innotuerat. Sed enim consolabar iterum me illo, quod pietatis tam cito haberet mercedem: & quod ad terras attinet, si bona mundi, sane nec mihi la ejus nosset, nec jam obnoxia sit periculo ne male nubat, vel filios nanciscatur male morigeros, ut tot alia mitam. Vix tres erant hebdomades, quod ita mecum colluctor, cum ecce nobis etiam adimitur filius natu minimus, mihi cognominis qui cum castigationibus edidit Velleium: ut propediem Valerius Flaccus & Cenforinus, sedulo castigati consequentur: postmodo fortasse Servius, & emendationum in varios scriptores libri. Hæc ille jam præstiterat, cum necdum annum expleisset primum & vigesimum. Neimpe agebat climactericum tertium si septenariis numeremus. Uti & vix paucis cum mensibus excesserat Dionysius me-

us, Reidani annalium interpres, adolescens tot vulgarium linguarum, ac præter Latinam Græcamque tot Orientis linguarum intelligens. Ejus spero versionem Maimonidæi operis de Idololatria intra duos tres menses transmittam. De castigationibus in Julium Cæsarem nihil certi spondeo. Ad Gerardum & *marcelum* redeo, cujus obitus non minus quam Dionysii ante septennium magnum mihi attulit dolorem. Nam præter mores suavissimos amabam judicium & doctrinam, qua aliis etiam ætatem vincere putabatur. Quid facerem, nisi ut me solaret eo, quod cum jure suo repetisset Dominus; nec tam amissus esset quam præmissus, nec tam ereptus nobis, qui fortasse cum brevi sequemur, quam mundi hujus miseris. Nihil quoque periculi nunc, ne corumpatur à mundo, postquam illi valedixit, & uti vixerat pie etiam in Domino obdormivit. Sane omni morbo, non fratribus modo, sed aliis etiam & quidem ætate provectis, exemplo fuit. Poteram videri jam malis defunctus, cum ipse in morbum incideret qui me lectulo aliquamdiu affixit, diutius vero detinuit domi: ita ut vix tertia sit hebdomas quod pedibus me porto meis. In adversis hæc Deus spiritu suo nos firmavit, & ut confido nos roborabit porro. Ne tibi quidem vel collegis doctissimis, ut ex literis tuis, & variorum sermone intelligo omnia ex voto procedunt. Qui lites fovere in Ecclesia malint, probare in vobis nequeunt pacis istud studium, quod focer sic in Eirenico, imo Theologorum quisque optimus, semper commendavit. At longe alia mala mihi est mens, qui vota etiam pro longiori talium vita facere soleo. Magnam partem hoc malum provenit ex antiquitatis contemptu, quam pro nobis stare certissimus sum. Sed isti *ἀδελφοί* nihil probant, quod non didicere à magistris suis, viris sæpe doctissimis, sed non minus errori obnoxiiis, quam veteres Ecclesiæ doctores, Apostolicis temporibus propiores, ac nostris (hoc enim video prope in confesso esse omnibus) pietate etiam superiores. Cumque vos acerbe adeo reprehendunt, utinam cogitarent quanto; ere à nobis alienent eos, qui Augustanam sequuntur confessionem. Merito enim illi objectant omnia omnium *εἰρηναία*, & tam amica alloquia, iis præcipue terris, ubi admissi nondum sumus, nihil esse, nisi dolosos aucupum cantus ad volucres decipiendas. Nam inquirunt, si in pauculis cum iis facientes ferre non possunt, sed secede adeo eos traducunt: quid boni expectent de iis qui distare se protitentur totis parafangis? Paulo ista liberius præter morem scripti indignitate rei motus. Vobis interea satis esto, quod probetis vos pro batissimo cuique: quod posteritas omnis hoc

hoc studium vestrum pollice utroque commendabit: quod Deus, ut confido, magis magisque huic studio benedicet: & si minus in terris luculentam, in cœlis vobis mercedem rependet. Salutem plurimam clarissimis collegis D. Bergio, & DD. Willis dicito.

*Amstelodami,*  
cl<sup>o</sup> Ioc xl.  
xx Junii.

*Tuus æternum,*  
G. J. Vossius.

Libellum mitto de reprobatione absoluta, nescio cujus auctoris, sed nuper hic editum. Anglus putatur auctor.

## CCCLXXXVIII.

Hugoni Grotio S. P.  
*Lutetiam Paris.*

Illustriss. Dom. vir undecunque maxime,

**L**iteras hæc exarabam, in Gallias iturus, Bartholo, Thoma, Casparo Bartholinis, liberis Caspari Bartholini, Philosophiæ, ac Medicinæ, dum viveret, in Academia Hafniensi Professoris, viri acutis & pereruditis ingenii, doctrinæque monumentis, per orbem celeberrimi. Præterea comitem se iis in viam dedit, Theodorus Fuirenus, eorum quos dixi Consobrinus, natus ex Doctore Medico, amplissimi Consulis nostri, Andreæ Bicheri, Consobrino Bartholinorum. Materteram uxorem habet Olaus Wormius Medicinæ in Academia ante memorata Professor, cujus extant Fasti Danici, doctum & utile opus. Item liber de Runica, sive antiquissima Danorum literaturâ, vulgò dictâ Gothicâ. Hæc de iis qui literas perierunt, juvenibus eruditis, ac ut cenfeo, non indignis, quos ad salutationem & alloquium tui admittas. Nunc de meis loquar. Pestamissam dulcissimam Joannam meam, Puellam jam nubilem, & variis artibus, ac animi dotibus instructam, filiam unicam: Post ereptum item Gerardum carissimum, in quo sen per certare putavi judicium cum ingenio, pietatem cum industria (Velleium ejus vidiisti, & Valerius Flaccus, ac Cenforinus, tortasse item alia consequentur) in alia quoque adversa incidi, quæ non mediocriter animum premerent; ne tamen opprimerent operam dedi quam potui. Vix tamen dubito, quin crebrior eorum cogitatio, & uxoris mœror, aliquid etiam contulerint ad morbum, qui me lecto aliquandiu affixit, duos etiam mentes detinuit domi. Ita factum ut cessarent operæ, in excudendis meis, qui-

bus prælum antea fervebat; ut item quasi intermitterem prorsus Epistolare officium. Quamquam de te, altera etiam cessationis causa erat. Nam interea temporis, semel iterumque adfuit nobilissimus genere, animoque, filius tuus Petrus, qui sæpius est cum Blauwii collocutus, ac quorum opus foret, omnium te facturum certiore recepit: ut hac parte opera mea non valde opus foret. Nunc valetudini melius est, etsi non ut solet. Absoluti duo tomi, Theologiæ, & Phycices Christianæ, jamque Indices concinnantur. Binos intra menses, te visurum opus id confido. A nostris jam, ad majora, melioraque, me confero. Legendis iis, quæ in Novum Testamentum fuit commentatus, nequeo satari. Aurea planè sunt quæ me, imo me longe doctiores doces. Propertianum illud leviter liceat immutare:

*Cedite Romani scriptores, cedite Graii,  
Nescio quid majus Sol opere hoc videat.*

Jamque aggressi essent Blauwii excudere, nisi responsum expectassent, num typi, ac chartæ forma placeat transmissa. Vix hæc lucem viderint, quin prælo subjuncturi commentarios de Jure Belli, & Pacis; item *de Theologia* tuam, & quæ alia voles. Diatriba de Antichristo paucis placet, qui quidem segreges sint ab Ecclesia Romana: usque adeo radices in animis omnium egit opinio illa de Urbis Episcopi, adversus Deum, & Christum, elatione, sæpe ut volunt, & clarissime scripturis prædicta. Sanè respiciens spatium omne ætatis antea, jam à prima penè pueritia, recordor sententia ea personuisse pulpita, nec preces publicas sæpius fuisse conceptas sine detestatione Antichristi Romani, & rase turbæ. Quorundam opinio est, ut vera diceret, non expedire, ut populus in eam opinionem veniat. Nempe non abeunt à notissimo utrique nostri, Bal. Lydio, *πρὸς μαχαρίτην*, qui increpitus à me, quod inter multa verissima, quædam etiam falsò impégisset Doctoribus Ecclesiæ Romanæ; ubi defendit ea quæ dixerat, *χρηστέμεται* non reperit aliud, tandem eo se contulit, nullo cuiuscumque penicillo satis fœde Romanam Ecclesiam posse coram populo depingi. Mihi verò præstabat opinio, veritatem non egere mendacio, & manifeste falsis, fidem etiam detrahi veris. Quod Ultrajectini Voetii de Diatriba super cœna judicium sit, cognoscere satis poteris ex Epistola juvenis ad me, qui coram audit docentem. Exemplum transmissi hac commodâ occasione: etsi fortasse res ipsa vix tanti, ut legere sustineas, videbitur. Mihi, & hæc quam proxime dixi dissertatio, & illa quam paulo antea commemoravi, &



aliæ mole exiguæ, pondere maximæ, plurimum placuerunt. Nec satis mirari possum, etli- divinum ingenium tuum non ignorem quomodo in Illustrissimo illo onere, & ea salutantium multitudine, sufficias tam multis, iisque plurimum iudictis, tum perspiciendis tum nos, & alios docendis. Nec minus stupent alii: credo & mali, etli dissimulent. Maximi Salmasii opus de fœnore Trapezitico, credo jam legeris. Non erit ad palatum sive Cloppenburgianum, sive Voctii. Huic opus ipsum, illi prælatio respondet, sed neque ringi desinet facer Exercitator; adversus quem, adeo multa asperguntur, sanè pererudita. Hæc sola nunc occurrebant.

Vale Illustrissime Domine, amicorum tuis meritis prime, & à me, & Coniuge, & omnibus meis salve.

*Amstelodami,*  
cId Ioc xl.  
xv. Junii.

*Tui Illustrissimi nominis*  
*cultor,*

G. J. Vossius.

CCCLXXXIX.

Ludovico Crocio Ger. Jo. Vossius  
S. P. D.

Summe vir pariter & amice,

**P**Auci sunt dies ex quo scripsi: tamen amor non finit ut hanc etiam commodam negligam occasionem. Observatur semper animo vitæ brevis, & cum tot adversis conflictatio: quæ non tacite innuunt, sed plena voce dicunt, Jesu, & sponsæ ejus amantes, dum vita divinitus conceditur, debere alios alii esse & solatio & ad durandum hortamento: quod non coram modo sermone, sed absentes etiam literis consequimur. Magnam quidem molestiam ex eo capio, quod qui reformatam Religionem proutemur, tam sumus deformes, nec vel veritatis satis studiosi, vel concordie amantes satis: verum alienam cultam nemo præliterit, satis est nos si nostram. Quare hoc solum agamus, ut omnia agamus non amore hominum, sed Dei & Christi: quem amorem depreciant, qui negitant eum secundum gradum aliquem reprobis est, cum electis communem. Credo jam videris veteris collegæ mei Heinsii ad novum Testamentum notas: fortasse & illa quæ à maximo Salmasio cum alibi tum opere de fœnore Trapezitico refelluntur. Atque (ut omnium fere expectatio est) idem suas ipse in N. T. novas edet. Verum ob parentis excessum, in Gallias ipsi proficiscendum.

Hæc res editionem annum facile, vel amplius morabitur, grande omnino opus futurum. In quo ut intelligo, comprobabit inter cætera, nihil Heintio dictum boni quod aliis fuerit indictum; quicquid de suo attulerit esse falsum, sæpe etiam ridiculum. Scio te mirari, cum hæc legis; mirarer & ipse, nisi & *ad v* Salmasium nossem; sed tute ex opere memorato tanquam ex ungue leonem existimabis, mihi enim in toto hoc negotio nec feritur nec matitur. Optem ego ut concordibus animis eruditi omnes honori studeant divino, non suo, unde illa in loquendo scribendoque acerbis multis. Sed-enim annis permultis mire Salmasius divexatus ab illo, quem, ubi improbo, rericere malo: præsertim cum sic quoque satis intelligar. Quæso per otium illi rum, quem dixi, adire grave ne duxeris: uti & præfationem operis Salmasii de modis Usurarum. Hic abrumpam, quia & is, qui literas feret, & vir quidam doctissimus, advenere. Salutem dices collegis doctissimis & clarissimis.

cId Ioc xl. iii.  
Kal. Julias.

CCCXC.

*Maximo Viro, Francisco Gomaro.*  
*Groningam.*

Vir undecumque maxime,

**R**EDIT ad vos fratria cum filio; qua occasione volui ad Te pauca perscribere, de quibus hic inter nos locuti sumus. Video illam de filio, mirè esse sollicitam; & meritò profecto, si quomodo nunc in Academiis soleat vivere juvenus, cogitemus. Nec puto authoritatis satis esse in nostra hac ad compefcendum adolescentem, si fortè, quod ne Deus finit, ab aliis seductus ad partem se applicuerit deteriolem. Plus mihi fiducia fuerit in te, & Nobilissimo Magduello, & Genero tuo. Ingenium adolescenti scelix obtingit, & bona Indoles. Interim ut ætas ea, à labore proclivis est ad otium, subinde monitoris eget *egredialis*. Qualis si obrigerit, nihil fore puto, quod magnoperè requiratur. Quod ad rerum mearum statum: spiritu suo solatur nos Deus, qui geminum rursus vulnus infligit, unicam auferendo filiam, longè suaviissimam, bonisque adeo artibus exultant; filium item ejusce ingenii, ac doctrinæ, quæ ex illius Velleio Patetulo satis relucet, ac luculentius se exerent, in censorino, & Valerio Flacco, quos innumeris locis castigavit,

& fratri Isaaco edendos reliquit. Te quoque afflixit Deus, auferendo Conjugem, quæ tibi ætate adeo provecta maximè auxilio esse poterat. Sic ubique fit voluntas Domini; qui solus novit, quid liberis suis conducatur. Gaudeo interea, quod in eadem urbe, tecum vivat Gener optimus, cum similibus morum filia tua: sed quia horum jam mentio incidit, non possum reticere, quod mihi & aliis etiam, his in locis, quandoque in mentem venit. Arbitrabantur illi mecum, non malè te familiæ, ac publico. consulturum, si adhuc superstes cogitares, de Genero tuo Curatoribus Academiæ sic commendando, ut in Professorum adfiscetur numerum. Scis numerosam illi prolem esse, & quotannis gliscere; nec defæcto satis animo tractari sacra solent. ubi anxia rei familiaris cura ab iis avocatur. Honoris etiam accessione generosa mens accendi consuevit ad majorem doctrinam ac nominis claritatem. Si aliter illi consule non possis, quid si in eum transferas professionem Hebræicæ linguæ, vel saltem ejus partem? Ut si præcepta artis Grammaticæ, curiosè ac perspicuè tradat; Tu usum eorum, quod excellentius in sacris scriptoribus ostendas. Hoc vel tale quid, curæ esse velim, dum vita manet; quia ingrato vivitur seculo, ut vix putem, si humanitus aliquid tibi contigerit, cura id Curatoribus fore, propter merita tua, licet majora quàm dicere possimus. Exemplum ex foceris familia capio. Non obolo ex publico auctior sum, propter foceri virtutes, & benefacta. Nec est, quod vel ob accessionem meorum laborum, quos totis jam 40. annis, bono publico summa cum fide subeo, melius secum iri actum existiment liberi mei. Verè nimis ille Veronenlis, omnia sunt ingrata, nihil fecisse, benigne est. Primis ventis secundis in Gallias discedet Claudius Salmasius, ad familiam herciscundam; siquidem Parens ejus obiit, fenator Divionensis. Eà conditione ab Amplissimis Curatoribus dimittitur, ut redditum se premittat. Plurimum Academiæ Lugdunensem exornat, & ab eruditissimis quibusque, oraculi instar, consultitur. Equidem varia magis ac recondita ornatum doctrinâ novi neminem. Vellem autem non tam diu rei funebris argumento fuisset dissentium. Mallem dedisset commentarios in Arnobium, Conciliumque Illiberitanum, & quæ de primatu Urbis Episcopi scripsit. Quamquam opus hoc, dum is in Gallia erit, à Lamerio excudetur. Cætera nonnisi à redditu lucem videbunt. Uri & quæ commentatus est in Novum Testamentum. Magna horum pars refillet, quæ in S. Exortationibus prodidit Heinlius: In his illa quæ

adversus Bezam differuit toto opere, propter quæ, & in Galliis esse audio, qui patrocini-um Bezæ suscipere volent, ferre nequeunt, quod religiosè adeo sibi caveat, nequid dicat adversus R. Ecclesiæ decreta; interim nihil pensi habeat, tanto conatu oppugnare Bezam; quem cum sæpè saltem verum pervidisse negare non possit, tamen ne in istis quidem, unquam nominare dignetur. Sed falli arbitror, qui, quod non nominet, aiunt à contemptu profectum. Potius fuit inde, quod sua etiam in R. Ecclesia legi velit. Nam memini eum & me commovere, ut relictis controversiis sacris, ea sola tractarem, quæ ubique legerentur. Quantula, inquit, pars est orbis, ubi Reformata obtinet religio? Literas etiam conspexi, Roma ab Holstenio, Vaticanæ Bibliothecæ Præfecto, exaratas, quibus monebatur, magis etiam, quàm in Nonni Aristarcho fecisset, cavere sibi debere, nequid in Exercitationibus offendat, si Romæ sua legi vellet. Verùm quid alienus ad me animus pertinet, qui solum præstare meam soleo culpam? Vale vir summe, Affinis conjunctissime, deque me, innumerisque aliis benè merite. Uxor, & omnes mei, plurimum te salutant; uti & Nobilissim. Magduellum.

*Amstelodami,*  
Id Idc xl.  
xv. August.

*Tuus totus,*  
G. J. Vossius.

## CCCXCI.

Claudio Salmasio, Ger. Joh. Vossius  
S. P. D.

**B**ibliothecam misisti nobis, vir nobilissime, vere ἀγαθὸν ἀγαθὸν ἀγαθόν, pro qua munificentia tanta gratias ago, quantas possum. Plurimum verò gaudeo, non modò quod tam multa me doceas, ut & cæteros; sed etiam, quod tam illustribus ingenii doctrinæque monumentis plane triumphas de iis, qui hactenus in eo sunt, ut omne nominis decus ereptum cant. Ac quantum video, non desinent spissis mendaciis traducere. Unde etiam est commentum illud de causa itineris tui Amstelodamensis. O quanto mercentur Atridæ isti, ut verum dicerent! Quanquam nec illud si foret, desinerent foliis immensis de te mendacia spirare. Imo ne quidem si persuadere possent ut eo ires, quo Meurthium fugarant. Multum me recreat, quod non revoces ista ad animum. Alioqui & ipse molestius nequitias istas ferres. De Theolo-

go qui calumniæ tibi litem intendit, semper tale quid metui ex quo sua edi petiit. Novi ego mores talium, idque magno cum malo meo. Spero, imo confido, valido te esse stomacho, ut & hoc sis concocturus. Hoc si erit, virtutibus tuis facile superabis, quod boni omnes vorent: qualium longe major est numerus quam existimares. Id quotidie video, ut ex decrefcente indies fama inimici tui (qui non definit concitare adversum te vel Acheronta ipsum, hoc est, quicquid διαβολικῇ amat) non obscure colligere possumus brevi deserviturum id malum. Placet, quod pagella una altera Copriano occurreris. Fortasse tamen non inutile, quo jam te sponte propendere coram intellexi, si ubi Lutetiam Parisiorum veneris, ostenderis quam paucae sint lectionis qui hoc quod docuisti universo Jurisconsultorum choro repugnare arbitramur. Tamen finem aliquem respondendi malevolis esse velim, quia id fiat cum dispendio literarum, si nimis sit diuturnum. Scis me ex parte scire, quam multa hactenus indicta observaris, quæ adhuc domi premas; non quia invidas ea publico, cujus amore scripsisti: sed quoniam qui nomini tuo invident, calumniis suis avocando, tantum valeant, ut editionem eorum morentur. Vel ob hoc ipsum si odisse nobis Christianis quempiam licet, odio sunt dignissimi, qui tantopere incommodant doctrinam studiis. Eruditissimum Crocii opus Blauwius se editurum recepit, simulac excusa erint Illustris Grotii in Novum Testamentum notæ. Hæc enim videre possint intra tres menses, si cœpto pede pergant. Nam cum demum cœperint quando Hagæ una eramus, jam quadraginta folia sive ut vocant, biniones excuderunt. Sed enim quid præter gentis tuæ humanitatem & eximiam indolem tuam impulit te, ut mihi gratias ageres, quod domo exceperim, quasi non meæ potius partes sint, gratias agere quod hoc mihi honoris habitum sit. Equidem magna anni parte vel sanguine aut affinitate junctum, vel quempiam aut in dignitate constitutum, aut eruditione clarum hospitem habeo: sed dicere hoc possum, nullo sic me hospite lætatum omni mea vita, quam magni Belgæ in Galliis, magni Galli in hac Belgica, quos ego dies Cressa, ut ille loquitur, nota soleo notare, & æternum meminisse juvabit, non me duntaxat, sed omnes meos. De famula tua, quasi molestiæ aliquid crearet nobis, quæso opinionem deponere. Nihil insolens vidimus. Pro itinere Gallicano non desinet domus nostra facere vota, usque dum cognoverit vos salvos & hospites venisse in Gallias. Nec minoribus vobis prosequemur, potius credo majoribus, ubi in-

tellectum erit, vos reditum parare. O felicitatem & exoptatum diem, quando iterum alii alios complectemur! Uxor & mei mecum Conjugem tuam plurimum salutant.

*Amstelodami, c15 Idc xl.*

*v. Kal. Septembris.*

CCCXCII.

Guilhelmo Grotio, J. C.

*Hagæ Comitum.*

Clarissime vir,

Planè dolet, quod cum tam opiparo à te convivio sim exceptus, nequidem licuerit, te frui familiarem in modum. Prope dixerim occupationibus istis tuis, quæ te inviderunt nobis, pessimè sit, nisi multum tibi attulerint lucri. Nam hoc si est, caruisse horis aliquot malo, quam damno ut fuero amore tui. Annumeravit mihi famulus tuus, mei ut aiebat, cognominis, florenos centum quinquaginta sex, stuferos quinos. Receperam ante à Matre tua, florenos duodeviginti, stuferos quindecim, in universum sint ex usura, floreni centum septuaginta quinque. Quantum sit redditus, centum florenorum in annos quindecim, quinis quotannis usuræ loco datis. Sed quod Parens tuus, me ignaro, in obligatione de semis, & quadrante, indignum erat amicitia veteri nostra. Quare recidendum, & Uxor, & Ego putavimus. Et nisi promptior tua fuisset liberalitas, amplius imminuissim. Sed occurrebat, fuisse centenos istos ablatos ex majori longè summa Ordinibus locata, qui quantum annumerent non ignoras. Commodè igitur hoc interpretaberis, quod vel obolum, usuræ loco receperim, præsertim, cum dimidium duntaxat fuerit meum, ut retuli coram. Mitto ἀνδραγαθῶν Illustris fratris tui, & rectè facere censeo, quod malit excudi Parisiis. Nec enim Typorum venustate Blauwius noster unquam æquipararet. Notas N. T. præter Corfellium relegit Bremius, qui priori accuratior, & in iis, quæ literaturam tangunt, eruditior: solum hoc me habet male, quod operas dividunt, usque adeo festinante Blauwio, ut citissimè hac editione defungatur. Absque illo fuisset, putasne permissurum me fuisse, ut alius operæ hoc præstaret? Sed puto eos hebdomadis singulis, excudere folia, sive Biniones decem, vel amplius. Quid hic in occupata adeo vita, possum Ego, vel Isaacus meus? Præsertim quando hic suis, illisque fratris Gerardi, qui sua ei moribundus com-



commisit, sic premitur, penè dixerim opprimitur. In meis, quibus prælum adhuc terret, vix binis par foliis sum, quaque hebdomade. Loquar tamen die crastino cum Blauwio, nec opera mea, vel meorum, ubi utilis esse possit, uspiam claudicabit; non modo, quia debitor sum virtutibus, & meritis fratris tanti, sed etiam quia literis meis promissi damnas. Uxori optimæ, & Matri venerandæ, Ego, uxorque, plurimam salutem dicimus, atque ita habere, nihil familia mea esse paratius, ad commodandum tibi, tuisque.

*Amstelodami,*  
clb lxxiv.  
Kal. Septembr.

*Tuus totus,*

G. J. Vossius.

### CCCXCIII.

Joanni Ant. Vander Linden.

Vir Clarissime,

**S**perabam pluribus nos ante abitum tuum colloqui posse, inter alia de Hesychio, ut penitus mentem tibi exponerem meam: Id melius quam literis potuissim. Sed cur compellere denuo non licuerit, sat gravis est causa, quam promissis. Quem enim magis pectus tangit uxorius, quam maritum? Jam spero prole sis auctus: aliter si est, (si sic asloqui cum illis gentium scriptoribus) facilem Ilithyiam comprecor conjugii, siue malis Junonem Lucinam.

Ad Hesychium ut redeam. Sperabam eum filii mei beneficio visurum lucem candidiorem. Nec tamen dissimulare possum, paulo id tardius fore, quia nunc totus est in Geographicis Ptolomæi conferendis & corrigendis. Imo & de Meke Avieni Ruti, aliorumque editione cogitat. Hæc aliquid temporis auterent: ut fortasse Schotani V. Cl. editio lucem videre possit, priusquam hic satis sit paratus. Non abhorret igitur animus mittere exemplar quod petis: sed si jam editio sit in procinctu: præsertim si jam contextus partem deproperaverit typographus, sic quoque temporis mittatur, ut in notis quas subjunget operi, videat ecquid melius alteri observatum. Clarissimo Rigaltio mihi Onofandrum manu magni Scaligeri emendatum, idque ante annos viginti. Editionem alteram adornare dixerat mihi clarissimus Rutgersius, sed hæcenus nihil conspeximus. Nequid timile nunc contingat, cautio esse debet, præsertim cum non ignores scriptorem esse, qui eruditus sæpius sit consulendus. Nemo quid

rei sit te melius norit. Quare solum cognosce, quousque perducta sit egregii viri opera. Pro nonno exsequar: si enim prævertere nihil possit (& posse censeo) nolim peccare in comoda publica: solum metuo, ne spissæ res procedat. Jam anni triginta & amplius sunt quod claudius Heinius promissit. Et multa ostendit mihi quæ observarat, verum aut valde fallor, aut editurus nunquam. De Clarissimo Schotano longe meliora spero, paucioribus, ut arbitror, ditentio. Quare si intellexeris ex eo, jam jam edendum nobilissimum Grammaticum nolim in me illi quicquam commodi claudicare: sin spissum erit negotium, quid impedit, quominus tum mittatur, quando res magis calebit? Interim domus meæ usui infestæ viet. Illustri Salmatio epistolam tuam mittam, necdum enim abiisse reor: secus si est, Luretiam mittetur per primum tabellarium. Scripti nocte intempestia, toto enim die ex quo tuas accepi, respondendi otium fuit nullum. Schotani salutatio meo nomine, ac dicas velle me omnia ejus causa. Si otium etiam sit & occasio comoda. Collegas salute impertias: in his summos viros Mokoski, Vedelium, Pinackerum, Winsemium, Cochium. Plures non ausim nominare, ne onerem te, velut saluigerulum quendam, qui melius tempora locare potest. Et tamen si mei res judicii fuerit, dixerem non leve esse si amicis pareat, nos memores eorum esse. Quid magis decet eruditorum chorum? *Td. 1752.*

Anno clb lxxv.  
Pr. Kal. Septembr.

*Tuus,*

G. J. Vossius.

### CCCXCIV.

Hugoni Grotio *Regni Suecici Legato, ad Christianissimum Regem.*  
Lutetiam Par.

Illustrissime Domine atque Excellentissime,

**S**imulac tuos in 4 Evangelistas commentarios accepi, avidè eos legere cœpi; sed in hac occupatissima vita, nunc carptim, nunc sic, ut sæpius à lautissimis, ad quas invitares, epulis avocarer. Hoc unum ex præcipuis est malis meis: quod uno die decies, imo vicies interpellor, atque ita bonæ mihi horæ effluant, penè cum veteribus dixerim, mala ætate. Tandem me a cedit Blauwius, paratissimum se dicens ad eos excudendos. Placuit oratio. Volui igitur ei dare tertiam, quar-

quantamve partem eorum, quæ ad Matthæum annotati: idque eo fine ut me pascere reliquis, quæ reservaram domi; simul ut viderem quid foret, quod offendere aliquem, tam malignis temporibus posse arbiträrer. Sed negavit id posse fieri; quia tria simul prela hoc operæ esset occupaturus. Quare nec alterum totum me posse retinere. Proxima erat cura, ut quam emendatissime ederentur. Dixit se domi habere Aialam, cui negotium id esset satis curæ futurum, nec sese defore huic rei: tum autem, ultimam quam artifices illi probam vocare solent, perlectum iri à D. Corfelles. Negavit ille, tanto se labori parem: Eoque adscitus socius D. Bremius. Vides quam multi distineantur curâ hac, ut omnia sint correctissima. Et quæ vidi subinde, ea bonam spem faciunt, saltem pro Editione prima, ubi quam difficile sit, non aliquando ut aliquis dormitet, sæpissime in editione meorum sum expertus. Et si quid humanitus erroris obrepserit, non poterimus propterea Corfello succensere, qui ex correctione nullum percipit lucrum; sed totum hoc lubens præstat, partim amore boni publici, partim veneratione excellentissimi nominis tui. De quo mihi optimè constat. Eo autem non leviter impellebatur Corfelles, quod negaret Typographus opus hoc, in quo tot Græca, & Hebræa intercurrerent, velle excudere, nisi tuo quis nomine, spontè se offerret, qui corrigendæ probæ ultimæ curam susciperet. Interea idem Corfelles, ut hodie ipse mihi retulit, metuit non parum ne satis suam operam, licet indefessam, probet: sed inquit, si qui irreperint errores, id tribui oportere nimis Typographi festinationi, tot simul prælis, uno opere distentis, sic ut sæpè uno die, senas etiam accipiat probas. Tum autem fieri quandoque, ut quæ ab eo, in margine sint correctæ, non emendentur à Typotheta. Quin ipse ei fortè non fuerit domi; (quod quandoque fieri est necesse) non expectari, donec redierit, sed Aialæ, qui ad manum, opera uti. Quid multis? Negat Corfelles, vel luculento se pretio deinceps adductum iri, ut tantum probarum, quinarum nempe, vel senarum, deinceps, uno suscipiat die corrigendum. Sufficere singulas occupato homini; præsertim quando canis, quod dicitur, festinans, parere cæcos solet catulos. Hic ecquid ab eo ὑπερβολικώτερον dicitur, dicere non est meum. Vir interim mihi bonus videtur, etsi non πολιτικός, saltem tanti, ac meritò virtutum possides, nominis amator, & cultor. Ne illud quidem dissimulandum putavi, aliquando, ut aiebat, culpam videri esse à festinatione, vel ejus quo uteris librarii, vel etiam tot, tantisque negotiis distenti autho-

ris. Exemplum unum alterumque, quod animo potissimum occurreret, afferebat. In Matth. I. 25. *ἡ ἡ*. Negationem hanc de tempore ante partum nihil affirmare; sed de tempore posteriore: multis exemplis, ab aliis est demonstratum; quibus addam locum, qui infra est: ubi rescribendum, de tempore post partum, & de tempore prior. Ac ni fallor, sic se reposuisse aiebat. Alibi, inquit, ubi sermo de Josepho Arimathensi, manu propria, addideras, Imitatore Samuelis: hic ille non dubitabat, quin voluisses, Simeonis, nempe justii illius, qui expectabat liberationem Israelis. Rectene, an secus, sic correxerit, melius scirem, si codex tuus fuisset ad manum. Hæc negabat se dicere, quasi plus sapere vellet, qui mortalium nemini plus, quam excellentissimo nomini tuo tribueret. Sed ut viderem, si fortè festinatione erret corrector, ignosci oportere, cum neque authores, dum festinant, attendere ad omnia valeant. Præterea narrabat se literis commonitum, ut si quis scrupulus incidisset, me compellaret. Id inquit abbat planè ἀδύνατον, quando tam longè habitans à me, non possit ire redireque intra horæ spatium: tum autem non permissurum id Typographum qui moram hanc non ferret. Postulavi igitur à Typographo, ut saltem transmitteret mihi quæ jam edidisset; ut per otium videam, ecquid offendant, quod in edendis, vel erratis debeat commoneri. Nihil tamen fiet, quin prius tuum judicium de istis cognoro. Fortasse jam videris, quæ adversus diatribam de Antichristo, scripsit Marefchius. Quorum instinctu id fecerit, facile potes cogitare. Præfatio planè est virulenta. Est is Marefchius Pastor Sylvæduensis, & ibidem Theologiam profectetur. Ut magis opus redderetur exosum, præfationem sic erat exorsus: 'Nuper prodiiisse opusculum de Antichristo, eo edente, qui & Crellii, & Volkeli Socinianum librum edidisset. Sed Janfonius, quia jam Blauwiis est reconciliatus, noluit sic excudere, ne prior eos læsisset, vel periculum creasse videretur. Itaque hæc Marefchius, si sua à Janfonio vellet excudi, adimere est coactus. Super duobus præcipue erit cogitandum. Unum est, quomodo filius peccati atque perditionis Caligula esse possit; cum Epistola ad Thessalonicenses utraque scripta sit, postquam Apostolus fuisset Thessalonice, ut ipse Apostolus indicat. Thessalonicam autem venerit demum anno Claudii XIII. ut ex Actis cognoscere est, cap. XVII. & tota temporis serie, quæ in istdem Actis antecessit. Alterum est de nomine ΟΤΑΠΙΟC ubi C non potest aliud notare quam ducenta. Nam οὐσίμων & valet quidem VI. sed in literis non habet locum, eoque in ΟΤΑΠΙΟC, nequit C haberi pro ς. Succur-

rent

rent fortasse, quibus occurrere utrique valeas; sed ut aliter esset, in argumento tam obscuro, pulchrum fuerit conjecturas suas doctis expendendas dedisse: si quid alius præterea viderit quod magis probetur, laus ea sit publica. Tantum absit calumnia, malum diabolicum: adsit amor Christianus; qui nunc toto prope Orbe Christiano exultat, ac nusquam difficilius inventu, quam apud eos, qui inimiciter adeo veteri Ecclesiæ adversantur, nec quidquam, nisi novellum probant. Intellego statuisse Blauwios, diatribas illas seorsim editas, subungere Notis in IV. Evangelistas. Verum quid si dispiciatur prius, quæ inimici contra sint allaturi. Fertilis eorum seges his terris, sub duobus, vel tribus qui pariter plantant, & irrigant. Si non ante Natalem Domini, ad eas se a cingere diatribas Typographus possit, fortasse sat temporis habeas dispiciendi, quid mutatum, vel additum velis; sin illo festinante, excludaristemporis angustia, possint post sex septem menses adungere, primo solum foliolo mutato, quod additionem diatribarum testetur postmodo. Quod ad nostra attinet, jam menses sunt quini, vel plures, quod Typographus in iis cessat. Primò fuit, quod concinnandi essent indices. Id satis molestum fuit negotium homini sic districto. Ubi ego paratus fui, (id jam ante sex hebdomadas fuit) maluerè progredi in tuis. Nec displicuit, quia interea paulum mihi licuit respirare, (ut cætera mittam) salutantium turba sat impedito. Tamen aiunt Blauwii, se meis etiam hac ipsa hebdomade vacaturos, ac breviori quam existimem spatio, omnia perducturos ad finem. Nam interesse sua, ut tandem opus hoc prodeat: cujus mora diuturna multum damni fecerint. Jam menses sunt aliquot, quod Toparchæ cujusdam uxor, femina cordata, opulenta, æmulo, mecum locuta, de Equestri honore acquirendo in Galliis marito suo. Occasio inde erat, quod non aliena esset in domo Dom. Arlandervonii. Quod ipsum tamen addo, illà ut metuo invitâ. Planè enim urfit, ut præterito prorsus, cujus id nomine exposceretur, duntaxat exquirerem, utrum, Illustris & excellentissime Domine, operâ tuâ, hoc honoris maritus possit adipisci. Id ego rogare per literas neglexi, quia alia magis animum meum occupant, quam curæ istiusmodi. Postquam tamen aurem item mihi vellit, puduit oblivionis, & negligentie; nec ultra dilaturum hoc negotium duxi.

Multum interea metuo, ne frustra sit; propterea quod invitus scio, in ea dignitate constitutus, super talibus, nihilque ad Reip. utilitatem pertinentibus, negotii aliquid facessas, quibus debere nihil malis. Verum si ut

puto, non fuerit ex honore tuo, homini huic, Religione Pontificio, cæterum optimo, tui, tuorumque, nostri etiam amantissimo, eam quam ambit operam præstare; proximum erit ut perscribas viam aliquam, quâ id confieri optimè possit. Id ipsi dixi; sed videbam, malle illud honoris debere excellentiæ tuæ, quam alteri; aiebat non profecto quod minori se id pretio, ab illis quos compellares consequi posse opinaretur, sed quia honoratius id marito sit, sibi fore arbitra-retur.

Illustrissimæ D. Heroinæ Conjugi, quam ex Zelandia jam salvam, ac sospitem appulisse confido, salutem plurimam meo, & meæ nomine dicito.

Amstelodami, dñs Ixc xl.  
v Kal. Octobr. Styl.  
Gregor.

Accepi à fratre jurisconsultissimo, de Religione Christiana opus aureum, cum accessione Notarum, quæ plurimum illud illustrant, multaque etiam doctissimos docent. Etiam in perhonorificam nostri mentionem incidi: quo nomine, excellentiæ tuæ debeo plurimum, & maximas ago gratias, quod non desinas in loco tam sublimi, prosequi me affectu veteri, vel etiam majori. Vale Decus sæculi, & sic raptim scribenti, omnia prout in buccam veniunt, vel mentem potius ignosce, prout hæcenus soles.

## CCCXCV.

D. Guilielmo Archiepiscopo Cantuariensi.

Reverendissime in Christo Pater, Domine illustrissime,

**A**ccepi ab affine Junio geminum munus tuum, auro contra non carum, quippe utrumque aureum totum, & illud, inquam, Constitutionum ac Canonum Concilii Cantuariensis ac Eboracensis, & alterum collationis inter te, tum Episcopum S. Davidis, & Jesuitam Fisherum. Utrumque me iudice, satis fuerit, saltem esse debet, calumniis retundendis, quæ adversus Ecclesiam Anglicanam, ejusque Antistites, Te imprimis, Reverendissime Domine, sparguntur à malevolis, in unum hoc præcipuè intentis, ut in odium adductis primitivæ Ecclesiæ & Dogma-



tum & Constitutionum tenacioribus, sufficiantur ocyus, qui juniorum omnia placitis metiantur. Mihi quidem utrumque opus inter *χειμήλια* semper erit, & tantillo tempore quo habui, non leviter usui fuit, malignioribus frænandis, modestioribus firmandis. Sane longè alii rumores differebantur, quam his libris edocemur. Vellem, redeunte ad vos affine, per eum mittere licuisset operosissimos labores meos de Deorum Rerumque Natura. Verum is aiebat, se promissis obstringi, quo minus diutius hic liceret commorari. Indices jam omnium librorum sunt concinnati; in quo non leve mihi tædium subeundum fuit. Solum opus excudi eos, quod mirè avet Typographus longioris moræ & ipse pertæsus. De cæteris meis rebus quid dicam? Pro me melius omnia referet Junius, qui vivæ erit Epistolæ loco. Interea nos non desinemus vota fundere pro serenissimo Domino Rege, incolumitate tua, & Anglici Scotique Regni concordia; quod tanto faciemus impensius, quanto magis Regni utriusque motus dolernus: De quibus aliqua attingis literis tuis longe humanissimis, & ante triduum acceptis (pro quibus quas possum, & debeo, gratias ago) sed minime leviora sunt, quæ post scriptas tuas accidisse ex nunciis haud vanis intelligo. Sed nondum imminutum est brachium Domini: qui licet peccatis nostris merito sit iratus, tandem tamen spero miserebitur, ac lachrymas nostras in gaudium convertet. Tempus ei præfigere non possumus: solus enim novit, quando quid expediat nobis. Attamen non diu abfore illud, magis ex divina bonitate, quam animis tantopere exulceratis sperare ausim. Ac propterea iterum iterumque Deum Opt. Max. rogo, ut errantibus, ne quid gravius dicam, mentem inspiret largiorem. Te verò, Illustrissime Domine, Ecclesiæ Anglicanæ bono diutissime sospitem conservet.

*Amstelodami, post.  
Non. Octob. St. Greg.  
Anno clō lxx xi.*

*Reverendissimi & Illustrissimi tui nominis cultor æternum devotus,*

G. J. Vossius.

CCCXCVI.

*Clarissimo Viro, Francisco Gomaro,  
Ger. Jo. Vossius S. P. D.*

JAM anni sunt triginta, quod Leidâ excuras Dordrechtum ad rem herciscundam, inter hæredes Junianos. Eo tempore memini tibi, præsentem me, sermonem fuisse cum Reverendiss. D. Compatri meo Jo. Becio de permissionis natura: Tu mecum & satis diligenter de Prædestinationis objecto. Fluctuabat eo tempore nonnihil animus meus, in hoc difficili argumento. Perstitebam in ea sententia, quàm à Præceptoribus, præcipuè scilicet Junio, teque acceperam; in qua etiam multum firmabat non indiligens B. Augustini, & Prosperi, aliorumque authoritas; sed imprimis aliquot sacræ scripturæ loca, impensius mihi favere visâ sunt sententiæ illi quàm prædestinatio creditur, fide, & perseverantia prior; non prævia ejus conditio. Sic cum affectus forem, non satis tamen videbam, quomodò eluctarer à quibusdam, si vulgatiorem de prædestinationis objecto sententiam sequeretur. Commodè sic, Deo volente, evenit ut quemadmodum dixi, Dordrechtum venire, ac plusculos illic hæreses dies. Ibi demum mentem tuam, quàm aliqui referre potius tentarant, quam exposuerant, assequi cœpi; nec postea deferui. Ita mihi visum solidè occurri istis, quæ objectari viderem, scrupulumque animo injecerant meo. Gaudebam etiam, quod viderem utcumque B. Augustinus, Prosper, & qui eamse sententiam profiterentur, non iisdem vocabulis uterentur, idem tamen voluisse, nisi pugnare eos secum velimus: quod cur statuamus, causæ nihil videbam. Quin planè æquum censebam, ut quales nobis lectores exoptamus, tales nos præstemus, tum Junioribus tum Antiquis. Interea subinde mihi, cum hominibus eruditis sermo de hoc argumento fuit; sed paucos reperi, qui satis caperent mentem tuam, D. Wallæo, & præterea uno altero exceptis. Ac profectò metuo, ne plerique ex iis, qui proximè sic adversati, nondum percipiant satis, quid voles: magisque ex suis hypothesebus judicium, quam tuis ferant. Parum alioqui credibile est, illos adeò durè, asperèque acturos adversus te, cujus sententia non uno nomine mitior est, & gravioribus subnixâ argumentis; utcumque vulgò longè aliter feratur. Eo laudabilior fuerit opera, si per otium fusius aliquanto Theses tuas diducas, vel Thesium singulis aliqua subdas, quæ lucem afferant. Omnino enim altera sententia non receptior modo,

modo, sed simplicior, iis saltem qui, ut ait ille, numero Philosophari, vel *διαλογεῖν* potius amant. Nam homini accuratiori, si penitus rem omnem introspicere volet, non obscurum fiet, longè solidius, sic objectum statuendo, tecum occurri illis, quæ adversus illam sententiam afferebantur à doctissimo Arminio. Quamquam verò sic existimo, non levi te affectum injuria, imo eo graviore, quo ætas ingravescit magis: tamen multa cenfeo fratribus condonanda, propter communem servatorem Christum: qui quid nos docuerit de remittendo, neminem fugit; tu autem propter sponfam ejus, Ecclesiam quam abundè laceram, scindi ulterius miserum sit. Malim arma converti in Romanam Ecclesiam, & illos qui sanctæ Trinitatis dogma, & Christi satisfactionem, tanto studio impugnant. Quæ omnia infinitis partibus, melius me intelligis. Et tamen persistat animus, ut aliquanto, melius non dixerò, sed aliquanto tamen, talium captui quibuscum est negotium, accommodatus, hoc tractes argumentum. Non ignore ætatem, & occupatissimum vitæ genus; sed subactum, cum in aliis, tum præcipuè infelicitate temporum, in hoc argumento, judicium, magnopere imminuet illum laborem. Nec si Deus ad meliorem evocârît vitam, quod ut serum sit exopto, alterum repertum iri existimem, qui tuam te melius sententiam exponat. In quo quantacumque sit modestia tua, facillè te mihi adfensurum puto. Non defuturus Typographus, vel his locis: & omnino expedit, sciant omnes sententiam tuam non repugnare Confessioni Belgicæ: (quin & ego quidem semper istam hætenus cepi) illam potius illustrare, dogmaque acutioribus alioquin horridiusculum mitigare, ac mollire, mirandum in modum; utcumque nonnullis, vel obtusioris pectoris, vel præjudicio laborantibus, prima facie aliter videatur. Nempe non attendunt à Confessione Electionem attendi, per modum executionis, à te, ordine naturæ, per intentionis modum. Dissimulare interim non possum, quid his diebus amicus, vir doctus, dixerit de hoc negotio, non improbari, quod eam sequaris sententiam; sed quod adversantes damnes: quasi diceret, succenseri, non ob fallitatem doctrinæ, sed ob acrimoniam censuræ. Equidem scio id in Romana Ecclesia observari ut in his discrimen faciant: quomodo damnarentur in ea, qui Thomistarum damnarent opinionem, de B. Virgine in peccato originali concepta. Quomodo scis item Bulla Pontificia damnatum Michaelm Baium; non quia ejus sententia id mereretur, sed quia improbari nolent aliorum opinionem. In Baii dogmatis erat, Pelagii esse errorem, posse peccatum

vitari solis viribus Naturæ; & quædam alia hujus generis. Hoc aliorum quoque, è Pontificiis quorundam judicium est: qui tamen damnatos se cum Baio negant. Nempe quia non aliorum opinionem condemnent. Sic illam Pii V. & Gregorii XV. bullam intelligere jubent Toletus, Suarez, alii. Sed quid ista adversus te, qui non hæreseos accuses dissentientes, uti Baius, qui dissentientes aiebat, cum Pelagio hæretico sentire? Quomodo modestius poteras dissentire, quàm isto modo quo scribis? Sed sic dum me diffundo, nonnihil otio abutor meo, magis tuo. Quare hic sisto. Pro summo affectu erga Juniam asfinem, & prolem, ego & conjux gratias agimus, quas debemus, vel saltem quantas possumus. Pro genero tuo pauca scripseram; sed ex iis quæ scribis, facillè video, nihil esse hoc tempore movendum; ne dum pro tuis adlaboras, prois alienis, & male volentibus; magisque oblis rebus tuis. Sanè quod tu metuis, id ego paucis hisce mensibus expertus sum, in negotio tam simili, ut vix ovum ovo similis esse possit. Longo tempore, magnoque molimine quædam movebam, idque ut videbatur applaudentibus, quorum ea res in manu erat. Sed in *Ases* effecti quod volui: planè autem Vulpiones illi oviculum hanc (licet aliud sonet cognomen meum) *de cordis* elusere. Vides ut nesciam vulpinari. Nam istorum mores, si præscissem, operæ perperissem. Nunc frustra mihi miltæ bonæ horæ abierunt. Verùm quid mea? Nondum mihi omnium, ut puto, dierum soles occiderant. Dominus providebit. Cui te, tuosque, ac me etiam, meosque commendo.

*Amstelodami* cl<sup>o</sup> Id<sup>o</sup> xl.  
x. Kalend. Novemb.

## CCCXCVII.

Jo. Rod. Wetstenio, Græcæ Linguae  
Professori, S. P.

**N**ON diffiteor, doctissime Wetsteni, me tertix demum Epistolæ tuæ, vel ut te video existimare, quartæ respondere: sed enim hæc querimonia tibi communis est cum plurimis, quando intra hunc sesquiannum nec decimæ eorum parti respondi, qui ad me scripsere. Itaque reposui ingentem Epistolarum vim, quibus adhuc deberem responsum. Ex primis es, cujus literas in manus cepi, ut tandem officio satisfacerem. Nempe inter illud temporis spatium non multum licuit sol-

licito esse de hoc literarum commercio. Scire enim te velim, hoc anno meo climacterico rarò me bonà fuisse valetudine, bis etiam periculose ægrotasse: semel initio ejus, item ejus exitu. Præter alia me afflixere nephritis & morbus colicus: quos morbos non perferam antea: & suaves medici jubent me optima in posterum sperare. Compluria enim exempla se nosse aiunt eorum, qui eos post climactericum, si antea nunquam, nec deinceps sint experti. Bono igitur animo sumus, mi Wetsteni, nec malo futuro, male si erit, quia nihil mali bonis. Nec illud seu malum, seu bonum dici debeat (sed bonum potius, quia bono nostro cœlestis pater immittit) in morbo meo sitit. Et uxor vehementer ægrotavit: vixdum convaluerat, in morbum incidit filia unica, literis & bonis artibus instructa. Quam Deus eripuit nobis, grande solatium nostrum, sed præcipue uxoris. Vix hebdomas erat, cum meus Gerardus, delictum illud meum, morbo arripitur. Exanthemata erant, quibus ut ante soror, ita & ipse excessit. Utrum ejus Velleium videris, nescio: reliquit & castigationes in Valerium Flaccum, ac Censorinum, quas propediem lucem puto visuras. Gravis etiam morbus Matthæum semel iterumque invalit. Is est, qui Annalium Batavicorum edidisset libros V. & intra hebdomadem alteros quinos prælo committet. Quid cætera memorem, mi Wetsteni, & miraris temerariam non negligentiam duxero, sed cessationem. Vix dicere possim quam parum processerit ob ista opus meum, quo prælum antea fervebat. Est hoc de origine Idololatriæ ac progressu, & naturæ mirandis, eorumque caulis & progressu inde ad causam principem, naturæ auctorem. Brevius si malis, est de Theologia Gentili, & Physiologia Christiana; sed ecce brevissime, de natura Deorum & rerum. Valde incusor ab Typographo, quod magno ejus dispendio, tarde adeo prodeat hoc opus; magis incusaret, nisi fortunam domus meæ nossent. Spero interea, intra menses tres, quatuor, duo volumina, quorum utrumque binis constet libris, lucem esse visura; sed de rebus meis abunde. Venio nunc ad illud de quo magis nosse aves. Equidem nihil magis exoptem, quam ut Centurias Magdeburgenses edere possim, cum brevibus nostris notis. Præclarum est opus; sed est, ubi aliquid ab Centuriatoribus illis datum affectæ & anticipatæ opinioni: homines enim erant. Est ubi humanitus error obrepserit, præcipue istis, quæ dies postea docuit, at à scriptoribus antiquis, qui tum temporis nondum viderant lucem: vel ubi doctissimi homines in scriptoribus jam ante editis locum esse corruptum observarint. Plane spissum

hoc Ecclesiasticæ Historiæ negotium est, multis vel tenebricosum, vel spinis oblitum; sæpe in rebus meis afflictis scribere volui, me provinciam hanc suscepturum, quam deposcerem; sed semper resiliui, cum viderem eam rerum mearum faciem, ut nihil promittere auderem. Juvenes esse *evangelici*, magni illius Stagyritæ est affatum. Sed senecioni mihi idem hætenus fuit animus. Verum tot incurrentibus adversis, nihil audeo polliceri. Quamobrem nihil æque exopto, quam ut alius minus negotiis distentus, viribus etiam animi corporisque florentior, hoc suscipiat negotium. Is esto, qui hoc saxum diu jam volvit, vir clarus Ludovicus Lucius: quem ex scriptis jam ante vicenos novi annos. Nulla vero libentius legi quam quæ adversus Socinianos editavit, manibus enim pedibusque obviam eundum Sectæ, usque adeo & Christi naturæ meritoque & veteris Ecclesiæ dogmatis adversanti. Ad Theses meas Theologicas quod attinet, excusæ vel potius recusæ sunt Oxonii; sed jamdiu est, quod & illa sunt distracta exemplaria. Quare efflagitant plurimi, ut novam procurem editionem, dissertationibus variis adjunctis, quæ necdum lucem viderunt, atque jam à me scriptæ & viris eruditissimis visæ ante annos viginti. Quid Vossius tuus de se spondeat, dum nihil illi otii est ab amicorum negotiis, præterquam nocte intempesta, qua & ipse has literas subito exaravi, ne amicissimo viro injurius viderer? Præter præstantiss. D. Lucium nomine etiam meo saluta pulchram Buxtorfii animam, magni parentis prolem præclaram.

Amstelodami,  
clō 16c xl. iv  
Kal. Novemb.  
Styl. Greg.

Tuus omni officio,

G. J. Vossius.

### CCCXCVIII.

Joanni Beverovicio suo G. J. Vossius  
S. P. D.

Vir Clarissime,

Scio jamdiu esse quod promiserim gratias me acturum tibi pro munere de eruditiss. foeminis: quod magnopere me delectavit. Atque isthoc quidem quod dixi, pollicebar, priusquam eo nomine obstringerer. Nempe ut credere aliquis possit, quo celerius animum meum pascere epulis inemptis. Quicquid de isto sit, ab eo tempore, quo dono isthoc opus misisti, silui strenue: non tam oblivione ulla, quam quia arbitrarer cessare aliquan-



râper posse hoc literarium officium nostrum in tot adversis ; præcipue morbo meo gemino , & conjugis , & liberorum , & ex hisce etiam mortibus suavissimi Gerardi , & pro sexu non inferioris Joannæ , unicæ filiæ meæ. Hanc taciturnitatem nostram minus te mirabitur nemo , qui scias quam alioquin etiam negligens in epistolis esse soleam. Hoc offendit non paucos : non te Clarissime & Amicissime vir , ut satis inde video , quod nihilominus mittere volueris Dordrechtum tuum , plerorumque liberorum , quos partim habeo , partim habui , natale solum , ut parentem meum mittam , quem ea in sacris doctorum habuit , & matre mea defuncta , alteris nuptiis non indecori familiæ innexuit , ut me quoque taceam , qui pueritiæ meæ studia illi debeo , & fortasse plura , quam acceperam , refundere sum conatus. Quorum ut video , ne tu quidem posteritatis pateris esse ignaram. Nempe sic stat sententia , quantum colligere possum , nullæ ut ad me , vel in publicum potius , chartæ prodeant tuæ , quæ non perhoneste meminerint veteris præceptoris : qui tamen quando tua legit , & se discipulum lubens agnoscit tuum. Atque illum affectum cognovi , ex illis etiam quæ decertata inter te , summe vir , & τὸν Σαλματίου. Huic te respondere scribis , sane magis sic elucebit veritas , sed alternatio sit non altercatio , de quo plura scriberem , nisi probe mihi notum esset , quanti virum facias ; quantopere etiam improbes Coprianæ & similium scribendi morem. Vale vir præstantissime & amice , atque intra unum alterum mensem , opus nostrum de Gentili Theologia , & Christiana Physiologia expecta. Jamdiu prodiiisset nisi & me valetudo mea meorumque impediisset , & typographus magnopere moraretur , qui sepulchris nostris totus est in edendis quæ illustri Grotius in quatuor Evangelistas pererudite elaboravit. Spero ea ante Kal. Januarias lucem visura. Eximio Colvio , & quos alios nostri scis amantes salutem plurimam dicito.

*Amstelodami* clō Ibc xl.  
post. Id. Novembris.

CCCXCIX.

Georgio Ratallero Dubletio *Senatori*  
*supremæ curiæ.*

Nobilissime , Amplissimeque vir ,

Vicinum habeo indolis optimæ , honesti nominis , & ingenii industriæque minime expertem , quique adolescentior denis pluribusve annis , varia loca , præcipue Germaniam & Sueciam lustravit. Nomen illi Danieli Giot : patria Amstelodamum , unde & parentes tam ejus , quam conjugis , & hi & illi bene semper audierunt. Is subinde domum venit nostram , inque morbis liberorum meorum præ aliis plurimis fidem , amoremque , & noctu excubando , & aliis officiis comprobavit. Hac fiducia non dubitavit à me exposcere , ut quandoquidem vacaret prætura , sive Baillivatus Bevervicensis pagi , vellem se commendare tibi , quicum mihi amicitiam esse veterem ignorare non potuit , qui liberis tam familiariter uteretur. Ego vero maluissem quidpiam petere , ubi suffragio proprio aliquid sine incommodo tuo possem , quam ubi quis commendandus esset alteri : quod sæpe non possumus , ( in te ipso expertus loquar ) sine opera molestiore , ingratioreque. Verum cum virum honestum esse cogitarem , & parem muneri quod desiderat , non potui non despicere , ecquo juvare possem. Frontine mollitiem dicam , quod negare amicis familiaribus nihil sustineam , an impudentiam , frontemque perfrictum , quod illum ad te mittam , ut auxilio vel si minus possis , consilio juves ? Id mihi gratum erit , ne putet , mihi affectum duntaxat in labris natum , sed nihil interim incommodare tam occupato , & honorato velim. Videbis ipse melius , quid non sine dispendio possis. Scribo hac de re etiam , sed paucioribus , ad equitem D. Grafvinkelium : qui sine dubio non parum valet , & ut confido , prorsus etiam volet , apud Nobiliss. præstantissimumque D. Basium avunculum suum D. de Harincaspel. De his satis : præsertim quando tempora , quibus vivitur , cogitamus ; nam multum metuo , ne irritum sit hoc totum negotium , ob copiam ( uti reor ) competitorum ; quorum aliqui vel gratia , vel pecuniis possint amplius. Etsi nec Giotto animus deest , vel facultas , pro binis spondendi florenorum nostratium millibus. Sic ipse retulit mihi , cum aliquis obiectaret , quid nunc obtineat. De rebus meis nihil habeo , nisi spisse procedere commentarios nostros. Dixeri nihil superesse , præter præfationem ,

ap-

appendicem minutum & luculentos indices. Quæ an ipsa vix duodecim conficiant quaterniones, quantum conjecto, fateor: & addo, potuisse ista excudi, intra menses duos, sed enim præla jam defudant Grotii annotatis in N. Testamentum. Atque adeo in his edendis maturant, vel festinant potius, ut existimem, quaque hebdomade, non minus quam sex folia, (in significatione qua nostri *bellen* ex pellium voce nuncupant) excudere, plurimum typothetarum opera, opere in uno occupata. Sed non mediocris hic metus meus, ut hic quoque locum sit habiturum vetus illud, quod de canis festinantis cæcis catulis dici solet. Urgeo subinde mea, sed respondent, cum sæpe eos sim moratus paratissimos, æquum videri, ut nunc moræ aliquantum ipse perferam. Et facilius sum hac parte ob causam quandam, quam me tacente etiam optime intelligis: nec alia ratio est, cur hætenus non responderim postremis literis tuis. Cæteroquin scias nihil me præfaturum operi, nisi consulto Nob. Amplissimoque regni Anglici Oratore Boswello, cui quæso quando otium erit, pl. & amicissimam meo nomine salutem dicito. Vale.

*Amstelodami cIdo Ioc xl. Tuus tuo merito,*  
Nonas Decembris.

G. J. Vossius.

CCCC.

Nobilissime Amplissimeque Dubleti,

**P**ostidie Kal. Januar. an. hujus cIdo Ioc xli. unde auspiciatius ordiar quam à voto? Id vero facio lubens meritoque; Deumque oro, ut tibi tuisque omnia succedant, non dico ex animi sententia (nec enim scimus quid expediat nobis) sed prout maxime Deus sensit conducibile esse animarum salutem. Hoc patris cœlestis iudicio fretus, facilius multa ut debeo perfero adversa: ac magis magisque in eam adducor sententiam, ut credam sospitorem nostrum in precatione ea quam edocuit Apostolos, non iussisse ut terrestris panis peteretur, sed cœlestis: non quasi nefas putem expetere illum, præsertim ubi defecit: sed quia existimem Christo apud Matthæum fuisse propositum animos nostros à terrestribus, de quibus usque adeo solliciti sunt, ad cœlestia attollere. Atque cursum animare debet quod promittit salvator, non si cessamus terrena exposcere, eo nos iis carituros: sed cum nobis curæ sunt cœlestia, & ista votis assiduè flagitemus, Deum sponte

nobis largiri velle, quæ ad vitam terrenam necessaria erunt. Præter ista quæ dixi, & plenius precationi dominicæ apud Evangelistam subjunguntur, & complurium sanctorum patrum auctoritatem, qui similiter sentire, & vocem ipsam *ἀνάσθης*, quæ non alium panem signare potest, quam *ἀνάσθης* *βίη*, valde etiam in hac sententia firmat series ipsa precationis. Quid enim convenientius quam ut duo rogemus ista, ut bona consequamur, & simus immunes à malo? Bonum spirituale, tum finem attingit, tum viam, sive ut loquuntur in scholis, media ad finem. Finis est gloria Dei, & eoque poscimus ante omnia, sanctificationem nominis divini. Via complectitur hæc tria; primum, oblationem spiritus sancti, unde petimus, ut veniat ad nos regnum spiritus, & verbi divini: deinde operationem ejusdem spiritus, per quam voluntatem facimus Dei, non nostram; denique conservationem spiritus ejusdem, ac per eum perseverantiam nostri in fide & sanctimonia, quæ per panem futuræ vitæ indicantur. Objeçant huic sententiæ adversarii, si per panem intelligamus alimoniam spirituales, *συντήριον* secundam petitionem & quartam. Sed hoc non dicerent, si cogitarent discrimen Baptismi & Eucharistiæ, ac Christum utrumque instituisse Sacramentum. Mitto alia quæ eos refellant. Ad immunitatem à malo venio, quæ respicit malum præteritum & futurum. Ad prius pertinet, ut remittantur delicta, quæ jam commisimus. At posterius, ut ne Diabolo permittatur tentatio & victoria de nobis. Ubi una erimus, pauxillum super isto si vacabit dissertabimus. Equidem cum primo calamum in manus sumerem, non putabam me isthoc argumentum, & tam fusse, ut nunc, tractaturum. Sed facilis ad amicum tantum (uno trium, quibus pro rebus humanis valde mihi placeo) & occasio scribendi offert, & argumentum. Nec negare tamen velim, fortasse me nihil fuisse scripturum, nisi Guiottus noster rogasset, ut aliquid ad aliquem exararem, quod ex re sua foret. Satis egi, eoque minus pœnit, quia sic spe video bona, quod luculentum tui & aliorum affectus indicium præbet. Bis locutus sum, & una mecum collega meus Barlaeus, cum Domino de Heemsted; is omnia prolixè pollicitus: sed volebat ut Guiottus serio secum perpenderet, num hæc conditio satis sibi conveniret, quandoquidem, si non Beverovicensem, sed alteram consequeretur, à Miropio hætenus administratam, periculum foret, ne quandoque ad Dunkerkanos auferretur. Noster metuebat, ne hæc eo dicerentur, ut absterretur, & Olikannio, vel alii faventior foret. Interim ut

ut dixi, & mihi & Collegæ large promisit; & quia Collegæ memini, scias & tertium additum hodie Cabeliavium, nepotem ejus Cabeliavii de quo in Historia Borrii an. cl. lxxxvii. orationem inauguralem hodierno habuit die: scripsi post duodecimam nocturnam. Et scio longiores non exposcis, sive quia satis occupatus, sive quoniam quod omnes jubent, parcere me etiam valetudini meæ voles.

*Amstelodami, cl. lxx. diem quid addam?*  
nolo videri obliviosus ejus quod initio Epistolæ scripsi. Quanquam si hæc culpa est dicenda, nec sic satis vitarim: nam & annum à me expressum nunc in mentem venit.

*Tuus tuo merito,*

G. J. Vossius.

Filii Matthæi alter Batavicorum Annalium tomus jam traditus est typographo; uti primus de domo Egmondana, ita hic futurus de Hannonica, & tertius de Bavarica, quartus de Burgundica. Mitto de reliquis.

CCCCI.

Hugoni Grotio.

Illustrissime Domine, vir Incomparabilis,

**P**ropè interdum est, ut adaptem mihi Catullianum itoc:

*Fulsere quondam candidi tibi soles.*

Videlicet dum mens in sano corpore sana fuit. Nunc ferè aliter est, dum vires, minus minusque solitis sufficiunt laboribus. Interea Deo gratias ago maximas, quod annis totis sexaginta, si paucos excepero morbos, qui in climactericum incidere, non corpore minus, quam animo valuerim, si deinceps pejus fuit, eò sic voluisse Deum arbitror, ut sarcinulis collectis, totum me componam, non ad exilium quidem, ut Gentiles dixere, sed patriam, quo caput Ecclesiæ suæ ascendit. Bona tamen spes familiam meam habet, melius fore, ubi blanda Zephyri aura reduxerit nobis egelidos veris tepores: qui foras sinent exire, & ambulatiuncula discutere hunc penè dixero veterum. Id enim jam binis ternis mensibus, parum licuit, ob aera, penè assidue nebulis sedum, sane magis, quam à multis retro annis memini; non in septentrionali hac Hollandia modo, sed Australi etiam, ac vicinis Provinciis. Itaque alii, alio morbo

cubant. Tussientium vero è catarrhis crebris, ac molestis plena prope omnia. Hæc qualemque solatium adferunt in morbo meo; magis tamen quod non prorsus cogar libros abjicere; & non desint amici, qui alloquio reficiunt pio, & erudito. In horum numero, nunc est, optime & egregie de Ecclesia promerens, Joannes Duræus. Jam quasi hebdomas est, quod è Germania huc venit, à suis in Britanniam revocatus. Quid promoverit, ex literis ejus intelliges, quas ad te ut mitterem jussit. Plurimum autem metuo, ne in irritum cadant, quæcumque hætenus inter Lutheranos egit. Jam decennio, antequam ille hanc provinciam susceperet, nihil æque obiectabant Lutherani, quam pacificatores omnes agere hanc causam malo dolo, ut nempe postquam pro fratribus agniti sint, simplicibus Lutheranis os sublinant, errores suos affricent, & numero auctiores facti *synodus* Lutheranos sedibus expellant. Atque hujus rei firmamenta adferebant partim ex veteribus exemplis, partim ex eo quod Synodus Dordrechtana, in damnanda Remonstrantium sententia, simul condemnarint Lutheranam; partim etiam, quod Doctores in exilium egerint, auditorum cœtus sub gravi poena interdixerint. Ergo inquiebant, ite ac prius componite controversias inter vos, & Remonstrantes, qui etiam in sacramentario negotio dissident, æque ac vos, in dogmate tamen de prædestinatione propius absunt à nobis, plerique etiam plane consentiunt. Quamquam vero adventu D. Duræi, non omnino suam opinionem mutant Lutherani: plerique tamen aliquanto meliorem de eo sententiam conceperunt, eo quod missus foret à Clero Anglicano. Nam agnoscebant, Ecclesiam, qualis sub Eduardo, Elizabetha, Jacobo, & hætenus sub Carolo fuit, seu doctrinam, seu ritus considerarent, propius secum convenire. Præterea videbant, vel rarè, vel nunquam, ab iis qui regimen, Liturgiam, & disciplinam Angliæ comprobarent, suas Ecclesias convitiis & maledictis fuisse impetitas: quod, aiebant, à maxima parte aliarum Ecclesiarum fieri solere. Sed quid animi nunc, ad ineundum cum Ecclesiis Gallicis, & Belgicis, fore putabimus, ubi cognorint, hoc agi in Britannia, ut accusatis, damnatis, ejectis omnibus, quos non longè à se abire, & omnino modestiæ, & pacis amantiore credabant, triumphant soli, quos ipsi Calvinianos, in Angliâ autem Puritanos nuncupant? Equidem horreo, quando cogito quæ Londino à plurimis, sed ferè Puritanis perscribantur; præcipuè de Reverendissimo Archiepiscopo, eum in custodiam abductum, perduellionis reum. Liber etiam his terris (urbe certe dicere non possum) Latine editur hujus argumenti,



menti; præcipes nimis fuisse Scotos, in abjurando Episcopatu; nec Anglos sine Hierarchia hac posse regi; sed recidenda stipendia, longe maximam partem; sufficere singulis ternas quaternas; summum quinas libras sterlingicas; meliores verò sufficiens in locum multorum; in his Wrenni, Montacutii, potissimum Archiepiscopi Cantuariensis, quippe intus, & in cute (utcumque adhuc aliud timulet) Papistæ. Hoc etiam abundè comprobari, ex Opere Anglicè, adversus Jesuitam; dum Menevenis [S. Davidis] esset Episcopus, percripto & postulato Regio, superiori anno, plusculis additis recuso. Objectatur quod de Ecclesiis Reformatis h.e. Puritanis, sinistros habuerit sermones; imo (quam hoc verè dicatur nescio) Calvinum vocarit Nebulonem. Et hæc propter, gravis instituitur querimonia, quod istoc ausit contra magnum illum Heroa, terræ filius, cujus Natales satis noti sint in Britannia. Quasi non ad majores etiam dignitates evecti sint alii, qui non tam honeste nati, ac ille Noster; sed neque de Papismo quod aiunt, in animum possum inducere; cum & coram, & literis non unis, me fuerit adhoratus, ut Baronio responderem. Longè aliter etiam de eo prædicant, apud me qui maximè illi familiares. Metuo igitur, ne Papissimum, ut vulgò fieri amat, vocent id omne, quod Puritani respuant, utcumque vel semper, vel primis saltem seculis obtinuerit in Ecclesia Christiana. Et sanè absolvere illum ab hoc crimine possunt, quæ in Synodo Cantuariensi & Eboracensi, sub utriusque Archiepiscopi præsidio, adversus Papistas, uti & Socinianos, sunt decreta anno superiori. Visâ tibi arbitror, Mihi quidem exemplar, ab ipso D. Archiepiscopo transmissum fuit. Et iis quibus innotuit ejus erga me affectus, vilioris me preti idcirco putant. Non soleo tamen, de ejus erga me amore quidquam jactare. Novi enim nostrorum invidiam, ac mores; sed ex Angliâ venientes hoc diffuderunt. Et in his amplissimus Dordrechtanorum Consul, in Angliam nuper Legatus, Guilhelmus Beverius, nisi is Cornelius potius, retulit non uni, quomodo, cum de variis Regni rebus, cum reverendissimo Archiepiscopo esset collocutus, & jam utriusque currus diversam insisteret viam; miserit famulum, qui paulum sisteret currum Beverianum: tum alterum alteri occurrisset: cæterum Beverium grande quiddam expectasse; Archiepiscopum verò non aliud postulasse, quam ut amicissimo suo Ger. Jo. Vossio plurimam diceret salutem. Hoc qui audire, *πολλὰ χάρις* factum negant. De salute quidem ex ore Consulis, ac Legati accepi, sed de cætero reticuit. Leve tamen delictum, & cui facile ignoscant,

qui sciunt, quàm paucos in Batavia sit invenire, qui cum mediocri Doctrina, animum ad componendas Ecclesiæ lites adferant. Neque hæc dico, quod ad rem tantam videar idoneus: sed quia ad excusationem ejus multum valeat, quod me talem putarit. Tu quoque Illustrissime Domine, multum sermone variorum vapulas, quasi istis in Angliâ Papistantibus faveas. Imo Papaturientium istic gratia, de Antichristo eam fovere sententiam diceris, quam diatriba tua complexus es: scio te istac calumnia non terri. Tamen metuo, ne & alii deinceps adversus te exurgant, & virulentum calamus stringant. Jam credo videris, & alterius Galli, sed in Gallia agentis, nec de nomine tibi ignoti Antidiatribam. Aiunt, & Voetium quædam moliri; sed *περὶ μὲν* missis, aliquid etiam dicamus de tuo in Evangelistas IV. Commentario. Is videtur intra tres hebdomadas posse absolvi. Ternis proximis excudent diatribas tuas, & Indicem, una cum erroribus commissis, quos interea temporis à te missum iri sperant. Opus nostrum de Idololatriæ origine, & rerum naturâ spissè procedit, non solum culpa Typographi, qui totus in tuis defudat, sed etiam ob invaletudinem meam, quæ non permittit, ut sim qui in meis esse soleo. Et sanè si per Typographum liceret, mallem, ad mensē unum alterum, differre editionem operis nostri, in cujus Indicibus quatuor operotis, pro totidem libris, nunc occupantur Opere Typographica. Utinam verò non morbus me etiam impediret, quo minus sæpius Typographum excurrerem, & ut tua procedant, attenderem. Nunc toto mensē, imò & altero, vix pedem extra domum pono. Et rarò satis consulor ab correctoribus. Jam aliquandiu est, quod quaternionem ad me misere, in quo pag. 768. ubi vidi in *ἀντιπαρα*, vel potius inde exscripto *ἰσχυρὸν* pro *ἰσχυρὸν*: Item *μὴ* pro *μὴ*. In postrema etiam pagina, in eodem exemplari fuit Theodotio pro Theodotio, *ἡ δὲ* pro *ἡ δὲ*, *ἡ δὲ* pro *ἡ δὲ*. Hæc similiter Typotheta posuerat, nec nosser ille correxerat. Vellem Brenius solus par fuisset labori, qui talium intelligentior est emendatore altero. Equidem sustuli illa quæ dixi; quia adhuc integrum erat corrigere, sed vereor, ne ejus generis multa relinquantur: satis præsidii, dum ponunt, in eo quod transmissum exemplar. Quasi in iis, qui absente Authore excuduntur, non opus sit, ut Typographi pretio nulli parcant, in parando sibi homine, ad emendandum idoneo; non ea modo, quæ Typotheta peccant, sed etiam auctoris Amnensis. Quod me meaque placere maximo Salmasio scribis, gaudeo. Nempe utriusque vestri, & aliquot aliorum, qui cum doctrina

vir-

virtutem & candorem, rem raram, conjungere, solari me soleo, adversus obsecrationes Phœniculi, cum suo Hyperaspille, & aliorum, qui toti ab eo pendent & in ejus gratiam, à quo laudari in scriptis exoptant, non cessant cedere te, Salmasium, & hunc homulum, qui ita scribit. Uxori heroinæ, quam salvam rediisse in Gallias lætor; & liberis tuis, meo, uxoris, & filiorum nomine salutem dico.

*Amstelodami,*  
1641. post.  
Id. Jan.

*Tuo illustrissimo no-*  
*mini devotissimus,*

G. J. Vossius.

## CCCCII.

*Reverendo & eximio viro, D. Isaaco*  
*Barggravio, S. Theologiæ Doctori, Ve-*  
*nerabil. Canon. Cantuariensium De-*  
*cane.*

Reverende Dom. Decane,

**J**amdiu est, quod nullas ad te officii atque amoris testes literas misi. Nimirum cessare volui, donec mitterem volumina bina de Gentium sacris à Deo adducentibus, & naturæ mysteriis adducentibus in admirationem & cultum veri numinis. Nec tamen diu adeo distulisssem literarium hoc officium, nisi varii rumores de Anglicanæ Ecclesiæ statu quodammodo reddidissent in nonnullis animi incertum. Sed spero, Deus desinet peccatis omnium irasci, ac veritatis, ac ordinis publici amantibus faventia sua adspirabit. Ac pro isto quidem assidue ad Deum preces fudo. Opus nostrum gratum tibi fore confido; uti & symmystis universis. Fusè satis de illo scripsisse mihi videor epistola illa, quæ non uni tibi, sed toti Canoniorum inscripta Collegio. Quare ista non iterabo, sed te solum rogabo, ut exemplar hoc, quod particulatim tibi mitto, boni consulas: nec tam in eo donum attendas, quàm affectum donantis. Atque idem de Dionysii mei Maimonide dixerò. Scivi id te facturum, me non poscente; sed metuebam, ne si de eo filuisssem, non eximie humanitatis tuæ fiducia neglexisse viderer, sed arrogantia aliqua, quasi hoc mihi deberi putarem. Tu verò Reverende D. Decane, vel paucos intra menses alia itidem expecta. Nam vobis omnibus præclare muneris vestri fatigentibus, minimè committendum mihi existimo, ut præter ea quæ publicè docendo in Illustri hoc Gymnasio Belgis præsto, aliisque huc commigrantibus, tanquam ad mercatum

bonarum artium, non etiam scribendo procudam ejusmodi, quæ florentissimis Angliæ vestræ, imo jam meæ quoque ingeniis, placere posse confidam. Nimirum in eo sum totus, ut bene merear de Ecclesiâ & Rep. literaria, non his modo terris, sed etiam exteris, Angliâ cumprimis, quæ tot jam me nominibus obstrictissimum tenet. Eadem mihi hoc consequi videor, ut orbis videat, ordinis nostri homines publicis invigilare commodis; quippe ubi in hoc tantopere etiam desudent illi ipsi, qui impediuntur variè, quominus sint præsentès.

Vale, Reverende atque eximie Domine Decane, cumque optima conjuge & liberis à me salve: præsertim salutem à me dici velim præclaræ spei filio, quem hic cum summâ voluptate vidimus coram. Utinam modò sic res ejus tulissent, ut ego illo, ille me diutius frui potuisset.

*Amstelodami,*  
Id. Dec. xli.

*Tui reverendi nominis*  
*cultor,*

G. J. Vossius.

*Paucula infra-scripta ad Epist. 424. spectare*  
*Lector facile deprehendat, huc Exscriptoris*  
*incuriâ transposita.*

Denuò te compello, magne & Reverendissime Domine; quæso ignosce. Addidi exemplari ad te misso alterum tuo simillimum, ei, si sic res ferat, dandum cui imprimis debui. Pro tua prudentia, quid factò sit opus, melius me perspicies. Item duo alia vulgari ratione compacta; unum pro eo, quem oblitus fuero; nec enim dubito, quin aliquis mihi præteritus sit, dum sic propero, cujusmodi solæcismi facilem mihi veniam fore confido, apud eximie adèò humanitatis virum. Alterum autem mitto pro ornatissimo viro, qui Reverendissimæ dignitati tuæ est à secretis. Nempe non minus potui vel debui, quando ab eo exoptem mihi hanc operam dari, ut curâ illius, per famulitium aliquem singulis mittantur ea exemplaria, quæ tanto numero mittuntur. Iterum reverendissime & illustrissime Domine, salve à Vossio, nomini tuo æternum obstricto.

*Libellus memorialis pro ornatissimo*  
*D. Secretario.*

Mitto exemplaria octodecim. Compacta quidem duodecim: quatuor Reverendissimo D. Episcopo Londinensi: duo duabus Academicis. Septimum D. Usserio Archiepiscopo Armachano. Octavum D. Episcopo Ciceriensi. Tria adhuc Cantuariam destinata; unum universo Canoniorum Collegio, al-

B b b

terum

terum particulatim D. Decano, & tertium Casaubono. Superest duodecimum affini meo, Francisco Junio, agenti in ædibus Arundelianis. Sex insuper sunt incompacta; unum Doctori Steward: tria Londini agentibus, D. Patricio Junio, D. Seldeno J. C. D. Th. Farnabio. Duo Oxonium mittenda, D. Rouse bibliothecario & D. Ed. Pococke, ex Syria reverso. Confido autem affinem meum D. Junium, paulò antè memoratum, modò in Urbe agat, simulatque cognòrit advecta esse exemplaria, lubentem se additurum socium in exemplaribus procurandis, si ita opus videatur.

*Inservire vicissim in omnibus  
paratissimus*

G. J. Vossius.

### CCCCIII.

Guilielmo Boswello *Equiti, & Serenissimi Regis Caroli ad Fæderatæ Belgicæ Ordines Prolegato.*

Vir Illustris, atque eximie,

**H**OC etiam nomine nunc debeo tibi quod certiore me facere volueris quo loco res forent Reverendissimi Dom. Archiepiscopi optimi Mecænatis mei. Non minus obstringor ista etiam parte ipsi Dom. Archiepiscopo Cantuariensi, qui, & suis & totius Regni ac Ecclesiæ Britannicæ rebus ita perturbatis, nostri tamen cogitationem non deposuit, deque statu suo me voluit edoceri, idque per te virum eo loco constitutum, & amicum communem. Atque ego quam primum Literis tuis respondissem, nisi in mentem venisset, fatius fore si unam alteram hebdomadam hoc officium differrem, quo interea cognosceremus, quem exitum istorum sperare tandem liceret. Sed jam dies illi evolaverunt, & æquè incertus sum ac dudum. Qui Literas subinde è Britannia hæc accipiunt, aiunt propediem fore, ut rejectis vetustatis quisquiliis, Ecclesia Anglica adinstar Scoticæ componatur, nec vel nomen Episcopale fando audiat, solaque obtineat Apostolica, & *iniqua*, & doctrina, quam ab anno usque cl. LXVIII. sed præcipue hoc Archiepiscopo oppressam conqueruntur. Hos si audimus, non de Archiepiscopali modo dignitate, sed Archiepiscopo etiam actum sit. Deus meliora. Tu Vir illustris quod fidei habendum sit melius perspicis. Ego interim

assidue vota fundo pro serenissimo Rege Carolo Regiaque familia, ac Regno & Ecclesia, particulatim etiam pro Reverendissimo Cantuariensi Archiepiscopo. Quem quod Papistam aiunt, id ejusmodi est ut nihil à vero alienius dici posse arbitror. Scio studiosissimum semper fuisse veteris Ecclesiæ, & Anglicanæ illius, quæ Eduardicis obtinuit temporibus. Sed hoc si fuerit Papista esse, mirum à Regina Maria tam multos, quia sic scaperent, ut hæreticos fuisse vivicomburio & aliter sublato. Nec excidere possunt sermones quos coram non semel habuit mecum. Iis semper adhortabatur, ut annalibus Baronii responderem, quod & non unis ad me Literis fecit. Tamen fore puto paucis diebus, ut Liber in lucem exeat latinè, quo hoc propositum sit auctori commonstrare Reverendissimum Dominum, quem dixi intus & in cute Papistam esse, atque hoc ipsum evincere conabitur locis quamplurimis operis ejus, quod cum Menevensis etiam Episcopus foret, adversus Jesuitam quandam perscripsit, & anno superiore postulato regio recudi Londini jussit. Intelligo & ex viris bonis doctisque qui Librum videre, hoc exprobari vehementer Reverendissimo Præsuli, quod Calvinum vocari nebulonem. Id factum non credam, nisi oculis locum conspexero. Ea igitur occasione invehitur in D. Præsulem quod tantum Heroa sic nuncupet is, cujus, ut ait, natales adhuc in Anglia omnibus sint cognitissimi. Ex hujusmodi non difficile est conjecturam capere de cæteris. Utrum vero in Batavia is Liber mandetur typis an alibi, Anglia puta, vel terra quapiam Belgicæ fœderatæ, ne illis quidem constitit unde hæc hausi. Quod ad commentarios nostros de Gentili Theologia & Physiologia Christiana, solum superest, ut excudatur index Libri quarti, ac operis præfatio, dicatioque. Index intra duas erit hebdomadas absolutus. Urgebit deinde typographus cætera: cujus interest ut opus quam citissimè prodeat. Ego quas potero moras nectam, diu tamen hominem querulum & lucri cupidissimum eludere non licebit. Vellem excurrere Hagam ut una de negotio hoc tecum consulerem, uti & Nob. & Ampliff. Dubletio. Sed non finit valetudo, quæ jam me tribus hebdomadis detinuit domi. Objectat Uxor quod ex quo scæva illa de Reverendissimo D. Præsule variorum Literis huc perscripta, pejus coepim valere. Mihi tamen satis bellè videor, & proprias ferre & amicorum fortunas: sæpeque cogito fidelibus etiam adversa omnia in bonum cedere, & ut Chrysostomus pulchre Homilia quadam comprobavit, neminem lædi nisi à seipso. Sed fortasse memet non



non fatis novi. Et diffiteri non possum cum primum hunc nuncium acciperem, vehementer me dolore fuisse affectum: partim quidem propter Reverendissimum Præfulem, & alios quosdam magni nominis, quorum ego & virtutem ac doctrinam & veteris Ecclesiæ amorem semper feci maximi: partim verò ac imprimis, quod Regno diu florantissimo à magna metuerim immutatione: quæ raro felix esse consuevit: nec nunc felix esse possit, si ut exoptare multos video, futura est imminutione Majestatis Regiæ, & non levi despectu Ecclesiasticæ vetustatis: quam si mei res foret arbitrii corruente indies Papatu toto orbe velim magis & magis triumphare. Sed spero metus nostros fore vanos, quales sæpe hominum Scholasticorum esse solent. Vale, Illustrissime & Excellentissime Vir, & cum Uxore lectissima salve ab

Amstelodami v Kal. Feb.  
clx lxx xli.

eternum tibi devo-  
tissimo,

G. J. Vossio.

#### CCCCIV.

Joanni Beverovicio Senatori & Medico  
Dordrechtano S. P.

**A**N quia & ipse Palæmonis arte non pauca consignavi, Amplissime Beverovici, eo similiter sapere me putas ac nobilem illum Grammaticum Vicentinum: qui tam stulte sapiebat, ut putaret nomen suum propterea à Marone positum esse in Bucolicis, quod prælagiisset, ipsum quandoque fore judicem poematum ac poetarum.

*Non ea vis animo, nec tanta superbia nobis,  
Nec tam aversus equus Batavis sol jungit ab oris.*

Nunquam ego vel de poetis, vel de aliis summis viris, quale hoc par quod me scis dicere, judicium mihi vindicabo. Et profecto qua parte ego, & Vicentinus ille, si artem quodammodo communem exceperis, convenimus: Ille natas secum, & morituras aiebat literas. Ego vix ausim inter litteratos nomen profiteri meum. Literatorem dici finent, qui non aliud objectant, quam quod illustris vestræ urbis procures juvenem me Gymnasio suo præferant. Præterea Vicentinus iste Varronem vocabat porcum: mihi cum illo omnium togatorum doctissimo bene convenit, nec minus cum nostri seculi Varrone, τῷ πρώτῳ Salmasio, quem toto orbe ob-

stupefcit quicquid pene est doctorum; nec minus omnis admirabitur posteritas. Dixeris, ista ἡδὲν πρὸς τὸν Θεόν. Exposui judicium meum de Metonymico isthoc loquendi genere, equidem non defugerem hunc laborem, nisi certus essem, solum dicis, vel honoris gratia, hoc judicii mihi à duobus summis, & mei amantissimis præferri. Quid enim sit statuendum videtis per vos ipsi, & hoc videre vos vident omnes: vel ex literis super eo à te scriptis quilibet, non solum Vulpus tuus, viderit sententias ambas à veritatis & pacis studio tam facile posse conciliari, quam vulpes pyrum comest. De adversa cognati Roverii valitudine multum doleo, semper enim ingenium illud amavi, eaque expectavi ab eo, quæ & Reip. literariæ plurimum prodesse, & decus tum ipsi, tum familiæ, & urbi patriæ adferrent. Sed nescio quomodo fiat, ut præclara ingenia sæpe fugitania sint laboris: præsertim si fuerint in re lauta. Contido tamen compluria jam chartis commisitisse, quæ si quid humanitatis illi obtinget, à fratre vel te aliove in lucem promi mereantur. Cum postremo eum Dordrechtum inviserem, aiebat multa se observasse in opere nostro de arte Grammatica: quæ communicare mecum vellet. Sed tam longo tempore nullas ab eo literas accepi. Si possis ex eo elicere, quæ ista sint, vel persuadere, ut ipse transcribat, rem feceris gratissimam. Nec editione proxima obliviscar grato animo ejus meminisse, unde accepi. Scio abunde, utcumque innumeros penè errores aliorum castigarim, & ab opere eo edito, alia non pauca venerint in mentem: tamen sic quoque grande me spicilegium aliis relinquere. De Cassiano sic habet, amare me eum scriptorem; sed nescire utrum sit codex bonus, & perveustus, ut operæ videatur eum à me meisve conferri: deinde multum interfit, num fuerint libri tres de incarnatione; an vero xii. de institutis renunciantium; vel xxiv. de collationibus Patrum. Primo quod opus loco dixi, omnino volupe sit conferre cum Ms°. multis adeo locis medicam manum desiderat. At posteriores commentationes Romæ ex antiquissimis codd. innumeris locis repurgatæ à viro nunquam satis laudato Petro Ciacconio, ea editione hæcenus utor: raroque omnino est ubi offendam: neque nunc tantum otii est, ut cum Ms° conferre valeam; si tamen codicem veterem venalem viderem, ære eum meo compararem, idque hoc animo ut per otium nunc hunc nunc illum locum consulerem. Ex his quid fieri velim, tute facilius judicabis, qui, ut arbitror, scriptorem elegantissimum videris. Sed ecce vix ista scripseram, cum intervenit Isaacus meus,

B b b 2

ele-

elegantiarum, & variae eruditionis mire curiosus. Is, ut audiit me literas ad te parare, de Cassiano sponte quærit, & Scriptoris ejus sibi inspiciendi, & conferendi potestatem exposcit. Quare isthoc etiam adscribendum putavi. Uxori optimæ plurimam dic salutem: simul (ne pluribus te onerem) pari optimo & charissimo Amplissimo Cos. Wittio, & φιλοσophώτατῃ And. Colvio nostro.

Amstelodami, iv Kal.  
Febr. An. 1641.

Tuus omni officio,

Ger. Jo. Vossius.

CCCCV.

Ludovico Crocio, *Theol. Doctori*,  
Ger. Jo. Vossius S. P. D.

JAM menses sunt aliqui, quod Londino nos Amstelodami invilit affinis meus Franciscus Junius, Francisci filius: is inter cætera retulit, jam diu esse, quod urbis vestræ Medico Doct. Timplero pecuniæ aliquantum mutuo dedit: Nec ea sibi refundatur. Ea propter literarum aliquid ad eum scripsit, quo aurem vellat satis hac parte oblivioso. Receperam ego me literas ejus inclusurum istis quas ad te daturus essem propediem. Ita enim fore putabam, quia raro non aliqui adolescentum, qui studiis se dederunt, hinc ad vos commeant, quorum alicui literarum hoc perferendum tradere in animo erat: sed præter opinionem contigit, ut jam longo tempore me compellarit nemo. Et credo, propter hibernam tempestatem perpauci in viam se dederunt. Accessit prius quidem morbus meus, qui me hebdomadas sex afflixit: mox pessima uxoris valetudo, quæ adhuc eam vexat, ita jacuerunt literæ prope dispretæ: ut non injuria dici possit, vix aliquid in isthoc literario genere curari negligentius, quam quod conjunctissimis commiseris. Cæterum sat peccatum adversus charissimum affinem: qui alteras jam ad me literas dedit, quibus miratur se nihil à Doct. Timplero accipere responsi. Rogo igitur, per quempiam tuorum has tuis insertas deferri ad eum cures. Dices cur non potius hoc tabellario mandasti? Sine circuitione causam exponam. Plerisque hoc in more positum, quando per literas commonentur æris alieni, ut dissimulent, quasi acceperint nullas: ac subinde etiam scrupulus injiciatur creditori, quasi tabellarius haud probe functus sit suo munere. Nec propterea existima me aliquid odiosi imponere tibi, qui nihil ultra exigo,

quam ut literas sciam traditas esse. De causa scriptionis pro tua prudentia facile dissimulabis, neque enim tam longi temporis cessatio (complurium sane annorum) sat fuerit ex ejus honore, neque fortassis literæ hæ ex meo, qui neutiquam habeo in mandatis, ut cum quopiam hoc negotium communicem. Ante hebdomadas plus minus quatuor transiit hac optimus doctissimusque Joannes Duræus, qui præclare admodum de te sentit, & loquitur: non item de ingrato illo zelota qui tibi ac veteribus collegis tuis tantum invidiæ, atque odii conflare his terris per literas conatus. Equidem permultum vereor, ne Duræo à suis domum revocato multorum refrigescat ardor in hoc *εὐνοιοῦσι* negotio: non quasi ab uno hoc pendeat negotium: sed quia qui misérant eum, non tantundem poterunt deinceps, si negotium processerit in Anglia ex sententia Parlamenti inferioris: in quo prope omnes ad faciem Geneventis Ecclesiæ reformari ecclesiam malle dicuntur, quam ad formam Edvardi vi. vel Elizabethæ tempore receptam. Non desino Deum orare, ut Spiritu S. & serenissimum Regem & procures regni gubernet, ne zelo improvido Ecclesia Catholica aliquid capiat detrimenti. Scis suum honorem Calvino, & Bezæ, magnis sane viris, deberi: sed & suum debere esse pretium antiquitati, & istis Ecclesiæ Doctores, qui ad antiquitatis normam, ubi à scripturis non abiret, instaurarunt Ecclesiam Anglicanam. In quibus non modo tot magni Angliæ viri fuere, sed etiam Pet. Martyr, & Martinus Bucerus, quem quanti Socer meus Junius facere soleat haud facile dixerim. Sine dubio jamdudum intellexeris de excessu summi viri, & mihi peramici Doct. Fr. Gomari: in quo maximæ virtutes: quas tamen aliquantum deprecia-  
bat zelo, & animi impotentia. Aggressus erat te quoque, summe item vir, & amice, publice refellere, sed sic ut nemini parceret. Contentus erat dicere (si vera mihi ejus discipuli referunt) novum Lutheranorum hyperaspistem. Multa propter Christum, & sponsam ejus concoquere debemus: non Spartana, sed Christiana patientia. Obiit xi. Januar. terræ mandatus xviii. ejusce mensis. Spero te progredi in iis, quæ & veritatis, & concordie causa præclare es exorsus. Minor eris multis hominibus cordatis qui te in cælum tollunt, si sufflaminare te valeant nonnulli omnia novellitate metientes. Mihi jam ad umbilicum perducti libri vi. de Theologia gentium, & Physiologia Christiana. E quatuor indicibus, jam postremus est sub prælo. Simulac excusum erit opus, è primis eris, quem participem faciam. E paucis  
enim

enim es, quorum pietatem doctrinamque, cum iudicio hoc tempore æstimem. Plurimam salutem clarissimo Bergio, Willioque nuncia.

*Amstelodami.* cl<sup>o</sup> Ibc xli.  
Non. Martii.

G. J. Vossius.

CCCCVI.

Andræ Riveto *Theologo.*

**S**I ego homo umbraticus, & qui angusto Scholastici titulo contentus semper fui, relatus unquam fuissim in numeros hominum elegantiorum, metuerem, ne tuo etiam viri ac pariter amici summi iudicio, inde expungerer jamdudum, quod toties peccem in leges eas vivendi, quas prudentiores, & ad unguem facti, exacte adeo observant. Nam ut mittam vetera (grandis enim est talium meorum Solæcisimorum seges) quam rusticum plane quod nunc dicam. Miseras mihi auricolum vatem veteris in Philosophia doctoris mei, nunc etiam in Canonicorum Cantuariensium Collegio, Collegæ honoratissimi. Magni Molinæ nomen adderem, si hoc inter nos esset opus, qui taciti etiam veneramur nomen, quod orbis prædicat universus. Num vero vel auctori præclari operis, vel tibi, qui miseris literalis egi gratias ut oportuit. Non Amyclæ magis tacitæ Vossio tuo: Defensitare hæc non possum: est tamen quo me purgem. Animus erat ad pauculas hebdomadas differre officium scribendi, ac unâ tum tibi pariter, tum affini tuo, transmittere qualecunque *avridueyn* nostrum de gentili Theologia & Physiologia Christiana. Jam ad umbilicum perpemodum mihi perductum hoc opus videbatur, cum in morbum prius ego, postmodo uxor incidimus. Hebdomadas ea res multas morata est Typographum. Redii postea ad labores. Opereque ut videri poterat perfecto, cogitare de luculentis indicibus coepi. Hæc res non exiguo mihi in tantis occupationibus labore stetit. Aliud accessit; Multa coepi desiderari in iis, quæ jam excusa. Itaque & auctarium suum singulis subjeci libris. Nunc tandem & ista typis commissa. Cum ecce à filio Isaaco intelligo (& is indicium ejus rei tibi se debere prohibebatur) prodisse in Galliis opus novum de Gentium Theologia. Non putavi mea in lucem protrudenda, donec isthoc vidissem. Negavit se habere Elzevirius is qui hac in urbe degit: sed ejus causa scripsit Leidam ad

cognominem Typographum. Hesternum decimum vespere, is Elzevirius, quem hic degere aiebam, domum meam venit, ac narrat, ut navis cum è Galliis appulsa sit, quæ Bolduci Otia Christiana, in quibus multum ad nostri operis argumentum pertinentia, inter alios libros apportaret, atque hac hebdomade me habiturum. Moras igitur nectam, ut videam, ecquid sit, quod necesse habeam, vel nova appendicula, aut præfatione, vel aliter commonere. Simulac vero perfecero, è primis eris, quibus sum officii ergo missurus. Atque idem habes de eximio affine tuo: cui non minus quam lectissimæ conjugis tuæ, meo nomine salutem dices, quando otium erit vel occasio scribendi. Gratularer præterea familiæ vestræ, si quod dictum mihi, filium esse sponsum, constaret; sed ubi certiora cognoro, hoc inter alia novarum mihi literarum argumentum esto.

*Amstelodami* cl<sup>o</sup> Ibc xli.  
ix. Kal. April.

*Tuus omni studio,*

Ger. Jo. Vossius.

CCCCVII.

Guilielmo Archiepiscopo Cantuariensi.

Reverendissime in Christo Pater, Domine Illustrissime,

**S**atis scribere nequeo, quam diu noctuque æstuet animus meus decumanis magnæ Britannicæ fluctibus, pariterque affectus mihi optimus quisque videtur; tanto magis quanto quisque genuinæ Reformationis à fermento Pontificio, ut intelligentior, ita amantior est. Et sane si tanti fluctus etiam Marpesiam caute commovere posse videantur: quomodo hic *avridueyn* fuerit, quem tum beneficium à Serenissimo Rege in Cantuariensi Ecclesia mihi collatum, arcè adeo Cantuariensi Archiepiscopo colligavit: tum etiam tot tantæque beneficia tua tantopere obstrinxerunt eidem. Nec solamen hic facile invenio, præterquam in voluntate Patris Cœlestis, absque cujus voluntate, nec capillus defluit nobis. Multa ille facit, multa permittit humano sæpe ingenio impervia, sed æquis semper causis subnixa: dura quidem Carni infirmæ; sed contestante Apostolo, salutaria semper diligentibus Deum. Cujusmodi prudentiæ Christianæ præcepta nihil opus memorare illi, cui ad humanos casus semper robur & æs triplex circa pectus fuit. Hæc Spiritus sui gratia nec deinceps Dominus te, ut confido, destituet. Nos interea quotidie preces



preces ardentissimas coram Deo fundimus, ut porro te spiritu suo regat ac moderetur; & si sic voluntas ejus, quæ sola est sancta, ferat, in annos plurimos Ecclesiæ suæ servet incolumem, Serenissimi Regis, ac universi Regni bono.

*Hæc Comitiss,*  
c15 Ibc xli.  
Aprilis St. Greg.

*Reverendissime tue & Illu-*  
*strissime Dignitatis filius*  
*devotissimus,*

G. J. Vossius.

# CCCCVIII.

Merico Casaubono.

Reverende & Clarissime Casaubone,

**P**ostulato id dedi filii mei Isaaci, ut Britanniam mox & Galliam visere liceret, lustrareque nobiliores Academias, & Bibliothecas, coram etiam compellere viros per orbem illustres, quo & doctior & prudentior patriæ se postea sistat. Sed quod dici solet, pecuniam esse belli nervum, id non minus in studiis & itineribus eapropter institutis locum habet. Quapropter rogo, ut dum in Britannia agit, (id non ita diuturnum erit, quando in hac senectâ nihil æque desiderem quam ut cito reducem liceat complecti) cura atque opera tua recipiat, quantum mihi ex trimetris spatio mense Decembri anni superioris, puta supra millesimum ac sexcentissimum quadragesimi cedere convenit. Sin jam Mercatori Londinensi Hoofdio id annumeraris; illas viginti quinque libras Sterlingicas percipere queat, quæ liberalitate regia meo commodo expirârunt mense Martio. Sive filio sive Hoofdio pretium hoc annumeres, perinde erit. Opus nostrum, de quo sæpius scripsi, vix ante menses binos videre poteris. Nam mense opus erit, priusquam Typographus absolverit. Inde aliquid temporis tibi vindicabit, quod nonnisi compacta mittere amicis exemplaria soleam. De motibus Britannicis quid scribam, vel non scribam planè non video. Ita hic omnia augurantur alii læta, alii tristia. Deum assidue oro ut moderetur sic corda procerum, ut omnia fiant regni & Ecclesiæ bono. De rebus meis quid scribam? Si filius Cantuariam veniet, is (ita fore confido) pro viva erit Epistola. Inter alia decretum ei in lucem dare Ptolemæi *γεωγραφικη*. Cum variis jam editionibus contulit. Si quid ad eum scriptorem observaris, vel aliquid eo perti-nens ex paterna habeas Bibliotheca; rogo

ne graveris communicare. Beneficium conferes illi qui ex Laurentum Lege, alienum nihil attollat in armum; sed candide suo quæque auctori transcribat. Vale, vir summe pariter atque amice, ac cum Uxorem lectissimam tum reverendum D. Decanum & universum venerabile fratrum Collegium plurimum saluta.

*Amstelodami,* c15 Ibc xli.  
vi. Non. Apr. St. Vet.

*Tuus tuo merito,*

G. J. Vossius.

# CCCCIX.

Johanni Rouse *V. Cl.* Ger. Jo. Vossius.

Præstantissime & Amicissime Rousi,

**H**AS qui literas defert, is Isaacus est meus, filiorum natu minimus; qui ante biennium Periplum Scylacis Caryandensis cum translatione sua ac Castigationibus *της παλαιας* Salmasio dicavit; posteaque emisit breves in Trogum sive Justinum Notas; prætereaque parata habet alia haut pauca; in his Ptolemæi *γεωγραφικη* cum variis collata Codicibus, Notisque à se illustrata. Quæ redux ad nos, si ita tulerit divina bonitas, publici juris faciet. Nunc ei me non invito, sententia sedet videre Britanniam Galliamque, occasione quidem Nuptiarum inter augusti Regis prolem & Principis nostri Araulonis filium (nam quem non capiat tam excellens Principum conspectus pompæque sublimi adeo forti conveniens?) Sed si bene filii animum perspexi, non paullo magis ut doctrinæ pectus augeat, tot florentia utroque in regno lumina cernat, & quia vocalia sunt, affatibus etiam pascatur; adhæc Bibliothecas lustrat, oculis quantumlibet curiosis; inque Britannia illam imprimis toto orbe inclitam, cui hæcenus foeliciter præes. Nunc igitur te clarissime ac charissime pariter, etiam atque etiam pro amore nostro rogo, ut adolescentem in hoc instituto suo, consilio & auxilio juves; planeque hoc agas, ut quantum potes sine tuo vel publico incommodo, debere se tibi profiteator. Si bene animum filii novi, sementem seres in agello, qui non facile eludat spem coloni. Nec enim patietur posteros esse ignaros eorum, quorum opera quæ molitur exeat perfectiora. Libros quatuor de Gentium Theologia, & Christiana Physiologia, intra duos summum menses videbis. Cæteræ quæ ad me meosque pertineant, nihil nunc epistolæ committere

tere est opus, quando filius vivæ erit Epistolæ loco. Vale, vir præclare, & plurimam meo nomine salutem dicito magnis Viris, D.D. Accepto Fruen, Prideauxio, Samueli Fell, Thomæ Claytono, quorum affectum confido non defore filio, præsertim te proxeneta.

*Amstelodami, clb Ioc xli.  
iv. Non. April. St. Vet.*

## CCCCX.

Jacobo Archiepiscopo Armachano.

Reverendissime in Christo Pater, Domine Illustrissime,

Multum equidem debeo, quod non cesses augere & Bibliothecam nostram libris, & nos doctrina. Ut mittam quæ miseris prius, quam gratum acceptumque aureolum, sive aureum potius munus tuum de Britannicarum Ecclesiarum Antiquitatibus. In quibus ambigo, magisne mirari conveniat singularem Indultriam, an summam Eruditionem, & Judicium exactum; quod etiam tum elucet, cum satius judicas judicio superfedere. Eo autem avidius hæc tua legi, quod ipsa argumenti præstantia, ac fructus mirificus, advocaret animum à cogitatione tot adverforum, quæ ab annis plurculis me circumglomerarunt; in his mortes quinque liberorum virtute doctrinaque præstantium. Atque hunc dolorem proximè auxerant motus Britannicæ vestræ, imo & nostræ; de quibus multa multorum literis, vera, falsa, ad nos deferuntur. His spero benignum Numen finem daturum propediem Serenissimo Regi, & universo Regno salutarem. Quam ad rem persuasissimus sum (atque hoc quoque constans de te est judicium) ea te consilia suggerere, quæ si sequantur, quorum maxime interest, non pacatam minus, aut florentem simus Ecclesiam habituri, quam superiorum Regum temporibus fuit. Hoc futurum, si ita caveamus Superstitionem & sordes Pontificias, ut debitis interea honores contet primis Ecclesiæ sæculis, nec medicina, quod dicitur, modum excedat. Hoc scio curæ fore, tot Ecclesiæ patriæ amantissimis, & qui (quod bonis omnibus applaudentibus tanto cum fructu facis) peritiam antiquorum temporum cum illa proximi sæculi feliciter sociarunt. Jam ad umbilicum penè perductum est opus nostrum de Gentili Theologia & Physica Christiana. Atque hoc in causa fuit, cur diutius rescribere neglexerim: Volebam enim, ut literæ meæ hoc *ἀντίδοτον*

comitarentur. Sed-enim, eunte in Angliam filio meo Isaac, adolescente ob studia & mores mihi pergrato, committendum non putavi, ut proficisceretur sine literis ad eum, qui me obstringere beneficiis suis non cessat: ut vel in proxime editis Antiquitatibus tuis, cum alibi, tum ubi de Mariano Scoto. De quo quod aurem vellas, & jure tuo facis, & mihi longè gratissimum fuit. Sed neque tot domesticarum charissimorum funera, morbi aliorum, etiam uxoris, ac meus præsertim ante annum, quem tum ego *κλυσμακτείνον* habui, meum me esse siverunt. Imo neque Typographum meum, dum opere superiùs memorato ferveret prelum, aliud esse ei subiecturum, mihi poteram persuadere. Verum hoc potius proximarum mihi Literarum inter alia argumentum esto. Interea te, Reverendissime Præful, Deus Opt. Max. saluum ac fospitem Ecclesiæ suæ conservet.

*Amstelodami,  
clb Ioc xli.  
iv. Non. Apr.  
St. Vet.*

*Reverendissimi ac illustris-  
simi Nominis tui Cul-  
tor devotissimus,*

G. J. Vossius.

## CCCCXI.

Joanni Antonio Vander Linden.

Clarissime Vander Linden,

Noli existimare, quia tam longo tempore non responderim, eo minorem esse erga te affectum meum. Sed sic statue, nec valetudinem meam, nec meorum, nec adversa alia, isthoc sivilisse, ut meus & amicorum forem. De Hesychio sic habe: tantum me expectasse, per quem tuto mitterem. Nunc juvene hoc qui à Clariss. Cocceio mihi literas reddidit, se sponte ad isthoc onus offerente, nolui ultra differre: præsertim ex quo filius Isaacus, cujus gratia diutius reservatus, in Angliam abiit, inde Gallias periturus. Haud facile dixerim, quam utilem literariæ Reip. apud Anglos operam navet, tam multis Græcis scriptoribus, tum ineditis describendis, tum jam editis cum vetustis exemplaribus conferendis. Et ut bene cum novi, nihilo magis claudicabit hac parte ejus in Galliis indultria. Interea nihil impedit, quo minus clarissimus Schotanus adnotet, quæcunque sibi ex veteris amici mei Sopingii codice ului esse possint. Ubi redierit meus perscribam. Quanquam malim, si is fortasse, ut juvenes solent, tardius reditum paret, temporius Hesychium recipiam. Subinde

inde consulendi ejus occasio mihi etiam incidere solet. Semper enim hunc scriptorem literaturæ Græcicæ non librum, sed thesaurum putavi. Nihil attinet, ut arbitror, pluribus te hoc tempore distingere: feriæ instant caniculares; quibus ut spero coram te amplexari, & sermones una jucundissimos sere-re licebit. Vale Clarissime, & Amicissime Vander Lindi.

cl<sup>o</sup> l<sup>o</sup> c<sup>o</sup> xli.  
iii. Kal. Quint<sup>o</sup>.

Tuus totus,

G. J. Vossius.

#### CCCCXII.

Clarissimo Cocceio.

**A** Mavi te & æstimavi jam ab eo tem-pore, quo Brema ad me misisti pri-mum, ut arbitror ingenii tui fœtum. Quem quanti fecerit & *mangelius* Dionysius meus (utque post tot annos in ea ætatura, annorum nempe ter septenorum, Orientis linguis im-pensos) sæpius ex ipso lectis tuis audiui, & non sivit posteritatem plane ignaram esse ju-dicii sui in notis ad Maimonidem de Idolola-tria. Id opus jam ante quinquennium prodiit in lucem, sed non manus hominum, quia dum ego aliud opus molior de Theologia Gentili, & Phylologia Christiana, jacuit apud typogra-phum, expectans duntaxat, ut nostra, ob argumenti similitudinem qualem qualem, prodeant simul. Interim me mortes meo-rum, & aliorum morbi valde affligerunt, nec vivere satis officio fungi in eo, ut amico-rum literis responderem. Tam bella tamen scribendi occasione, nolui esse negligentior: etli nondum legissem, quæ de Antichristo adversus illustrem virum observasti. Nempe paulo postquam & literas, & munus hoc ac-ceperam, intervenit amicus, vir eruditus, qui ubi in mensa conspexit dissertationem tuam, ad dies tres quatuor petiit tibi legendi fieri copiam. Nolui negare id homini amico: præ-fertim quia forem id temporis negotiis variis dissentus. Sed cras ut cenfeo, restituet: neque enim eludet eum, qui sese dicit, legendi tua desiderio teneri. Sed cave putes, auctorem qui-cum tecum negotium est, non sentire quod scribit. Quantum novi, videt multa superstitiose geri in Papatu, & tyrannicè. Sed & aliqua in Ecclesiis aliis solet improbare, & omnia metiri imprimis doctoribus antiquis. Intellico jam respondiisse iis, qui priores refutare aggressi. Sed ne *æ* quidem eorum vidi vel editum, vel ineditum. Ita distrahor, ut non possim vacare iis quibus velim. Interea gratias tibi ago pro munere, atque ita habe, multum

te diligi à me, & magnopere optare, ut quale id donum, quod olim legi, multa elabores. Ecclesiam & Rempub. literariam tibi planis-sime obstringes. Summis viris & Theologis Makoskio, & populari Vedelio, plurimam, ubi otium erit, salutem dicito: Et simul à Vossio tuo qui nihil æque quàm pacem & concordiam reformatæ exoptat Ecclesiæ, per-multum salve.

iii. Kal. Quintiles  
cl<sup>o</sup> l<sup>o</sup> c<sup>o</sup> xli.

Tuus totus,

G. J. Vossius.

#### CCCCXIII.

Joanni Meursio Joannis Fil.

Eruditissime & Amicissime Meursi,

**N**udius tertius tuas accepi literas & simul dissertationes civiles miscellaneas, lon-ge gratissimas. Quid enim jucundius esse possit, quam magni Parentis tui non dege-neris filii videre monumenta, parentis un-quam tui, quem ego semper sic dilexi, ut fra-trem non potuerim magis. Exemplar, quod jam decreram heri, transmittam cras Nobilissimo Mylio, & aliis, quos præclari patris tui amantissimos putavi. Animus erat nunc longas ad te literas dare, sed jam hora ea instat, quæ abeundum mercatori Severinio, quem sine meis ad te literis abire nefas puta-vi. Jam horas quatuor & ultra distinuit vir doctus superintendens Lippicus: quo factum ut spe exciderim omnia perscribendi, quæ vellem. Sunt ea plufcula, sed id alteris fiet literis. De Jacobo Marci solum tangam. Pu-tavi ego jam diutissime impressa esse, quæ illi & ego, & filius Isaacus, sic commendave-ramus. Quid faciam, si tanta est hominum incuria, nequid gravius, & verius dicam. Si liceret, vellem nunc scribere Clarissimo Dom. Erastio, quem intellexi jam rediisse in Academiam Soranam. Nam sero desideravi ad quædam responsum. Salutare nunc satis eos erit: uti & egregios viros D. Laurenbergium, sæpius Doct. Erastium, sæpiissime Magistrum Stephanium. Unum addam, quem, ni memo-ria fallit, vidi nunquam: Is est magnus, Joannes Raw logices & eloquentiæ Professor, cujus fratrem, nunc Constantinopoli agen-tem, me aliquoties convenire memini. Nar-rabat ille mihi de Cornelio Nepote ab illo e-dito, sed etsi inquisierim, videre illum non-dum licuit, verum Bibliopola Amstelodamum spem ejus videndi fecit: idque paucas intra hebdomadas. Vale amicissime juvenis, cu-jus



jus causa ego omnia velim, & optimæ matri, de qua ego & uxor crebro loquimur, & quam his terris vivere optaremus, plurimam dico salutem: simul elegantissimæ virgini forori tuæ.

Amstelodami,  
clō Ioc xli.  
xiv. Junii. Sr.  
No. 7472a.

Tuus æternum, & supra  
quam credere possis,

G. J. Vossius.

CCCCXIV.

Cl. Arcerio.

Eximie & Clarissime vir,

**D**IC bona fide, nonne satis diu videor tibi elusisse spem tuam? Sed ut olim Varro Satyram inscripserat, Est modus matulæ; sic ego dixerim cessationis, quam tu, ut confido, consules boni. Tandem igitur Hesychium mitto, postquam Britanniam petiit Isaacus meus; cui nihil æque in voto, quam ut ingenio industriæque tuæ plurimum eruditissimus debeat Grammaticus. Multi hæcenus Scriptorem cum promissere; sed te eum fore confido, qui spem expleas Reip. literariæ. Pluribus loquar tecum occasione alia, nam is, per quem Hesychium mitto, jam adest, & si ante vesperum abire volet, uti decretum, ultra morari non audet. Salve amicissime Arceri, & nos tui gratia omnia velle existima.

Amstelodami,  
clō Ioc xli. iiii.  
Kal. Jul.

Tuus omni officio,

G. J. Vossius.

CCCCXV.

V. Cl. Stephano Stephani, Professori  
Historiarum.

Clarissime & Amicissime Stephani,

**M**ulta me in literis tuis delectarunt, præcipue quod scribis, jam totum te esse in Saxone tuo, eumque propediem visurum lucem. Bene de te opera hac mereberis; melius de patria Saxonis, tuaque; optimè de

omni Repub. literaria, ac posteris universis. Semper mirificus me amor tenuit tam nobilis Scriptoris; nec mirari satis potui, eum dictionis cultum barbaris temporibus conspici in gente adeo ad Arcum remota, quem frustra desideraremus iis in locis, ubi vernaculus fuisset sermo Romanus. Nec debuit Scriptor ille debere alteri salutem, quam civi suo, inque tuis, ante omnes, Stephanio, cum multis aliis nominibus, tum imprimis & separatim promerenti ob civem servatum. Quid enim aliud censeam, qui jam ante Annos XIV. ex castigationibus tuis, Heinio mihi (qui & illo tempore amor erga nos fuit tuus) inscriptis, imo ut tu scribere non dubitabas, dicatis, satis perspicere mihi visus fui, nihil à te profecturum, nisi ingenio tuo doctrinaque dignum, ac magna industria elaboratum. Applausum totius eruditæ cavæ jam nunc ausim tibi polliceri. Atque utinam jam reversus è Galliis foret & mihi Salmasius; quem intra mensem vel circiter affore spero: simulac redierit, tradam ei quæ illi misisti. Interim metuere incipio ne ea jam habuerit à filio Isaaco. Scis non alienum fuisse à moribus & mihi nostris amici, ut libros grandi pretio divenderet, postquam prius exscripsisset, quod in rem suam foret. Si ausus fuisset referare, non dico literas tuas, quod nefas duxerim, sed fasciculum istum in quo liber iste, contulisset cum variantibus lectionibus codicis ejus, quem à filio meo Isaaco habuit; cujus & propterea non sine præconio meminit. Utcunque est, commendabit te satis incomparabili viro hic erga ipsum affectus tuus; & si quid deesse videbitur, id supplebit nostra oratio, qui te in oculis ferimus. Henrici Canisii Lectiones varias nancisci nondum potui: nec ipse habeo; sed quando opus, utor codice, qui est in Bibliotheca Amstelodamensi. Intra sex hebdomades Leidæ distraherentur libri Clariss. Fran. Gomar; in cujus Bibliotheca quin sit futurus, nullus dubito. Si aliter nequeo, opera dabitur, ut inde tibi mittatur. Vellem nunc plura, sed ecce jam advenit Bibliotheca vestra. Quare abrumpam. Verum inquires, nihil respondes de opere tuo, quo Idololatriæ originem atque progressum, atque adeo, ut Theologiam Gentilem, ita & Philologiam Christianam persequeris. Ita est, sed dicare statueram in Anglia summati viro. Nunc res illic turbata me consilii ejus anxium reddunt. Hoc unum obstat, quo minus habeas. Jam absoluti Libri IV. solaque præfatio desideratur. Interim sic habe, ex primis te fore, cui hoc affectus mei testimonium sum missurus. Plurimam salutem dico præclaris viris collegis tuis; quorum

C c c

rum

rum uni nunc scripsissem, nisi temporis angustia excluderet.

*Amstelodami, cło Ioc xli.  
x. August. <sup>1795a.</sup>  
Nec enim aliter nunc  
potui.*

*Tuus totus,*

G. J. Vossius.

# CCCCXVI.

Hugoni Grotio.

*Parisijs.*

**C**UM gaudio intellexi ex literis filii Isaac, ut salvus Parisijs venerit, excellentiam tuam compellarit, & quod fore sciebam, acceptissimus fuerit; Clariss. Salmasium, alterum orbis literati decus, cum dolore suo non repperit, ed quod in Burgundiam abiisset. Nec dubito, quin ab eo tempore excellentiam T. compellarit saepius: nisi forte quod factum nolim, veneratione ejus fastigii veritus sit, ne in publicum peccaret. Quamobrem licet non ignorem, alloquio neminis, reddi posse doctiorem, prudentiorem, meliorem; ab uxore tamen commonendum putavi, ut ne sine causa, & modo interpellaret: atque interea, ne paucis istis mensibus, quibus in Galliis futurus, diffuere sibi patiatur occasionem tam bellam, nec postea redituram. Tuz vero excellentiae, curae cum fore, usque adeo sum persuasus, ut neque id rogandum magnopere putem. Imo si peccandum est, in hanc filium partem peccare malim, quod saepius compellet, quam subrusticus pudor sineret. Et tamen non ignoro, heroicæ mentis tuæ negotia, partim Regni Suecici, imo aliorum etiam ingeniorum bono; partim Ecclesiæ Catholicæ, quam soli adspernantur vitiligatoribus omniscioli, Ecclesiæ veteris contemptores, qui magis magisque cornua ubique tollunt, ob foelicem in Britannia successum, ubi meliores eorum, quos dicere nolo, meliorum se mortem expectare creduntur, sequiores vero etiam, manibus pedibusque procurare. Mihi vero de talibus, vix scribere etiam tutum.

Quid moretur editionem operis nostri, ut sic dixerim, Theologico-physici, & per te, perque ea quæ proximè dixi facile vides. Tamen, ut ultra cessem, non finit res Typographi, cui prorsus injurius sum, nulla licet culpa mea. Jam sex menses sunt, quod opus id non inspezi, nempe quia etiam Indices jam excusi, solaque desideretur dedicatio. De eo, cui destinaram, fieri ut video nequit: utrum Clero Anglicano inscribatur, delibe-

rabo, ubi Hagam excurrero. Id intra tres erit hebdomadas: quando offerenda erit illust. Ordin. filii pars altera Annalium Batavicornum: ea erit de Comitibus, ex domo Hannonia. Quæres fortasse, cum tam diu non admorim manum operi de Theologia Gentili, quid interim moliar: nec enim cessare me existimabis. Equidem in tot adversis, utcumque forti sim animo, non longam adeo mihi vitam polliceor. Quare eorum instar, qui abitum parant, convalescere mea incipio. Hoc est, relego & edita, & plura inedita; qualium majorem longè copiam reperio, quam putabam: si vita, & valetudo fiverint, plura videbis nostra, intra biennium, vel circiter, quam putares; sed si prope jam ad carceres decursum hoc vitæ curriculum, manebit eorum cura liberos, præcipuè Isaacum meum, penè dixerim delicias meas: quem iterum iterumque excellentiæ T. commendo. Heroinæ conjugi salutem dicito, imo familiæ omni, à familia mea longe inferiori, sed excellentiæ T. devotissima.

*Amstelodami,  
cło Ioc xli. posttr.  
Kal. Sept. St. N.*

*Illustris excellent. T.  
obsequio, servitio-  
que paratissimus,*

G. J. Vossius.

# CCCCXVII.

*Amplissimo Viro, Jacobo Wittio.*

Amplissime D. Consul, Cognate eximie,

**H**OC semper conatus sum in liberis meis, ut tempora sua publico bono, Bataviæ imprimis, metirentur. Eoque sine Dionysius meus <sup>in margine</sup>, Annales Belgicos Reidani, prudentissimi scriptoris, Latinâ donavit togâ. Eumque deinceps erat continuaturus, nisi aliter visum fuisset Numini supremo. Matthæus meus ad vetera Batavorum tempora describenda se contulit. Et ante annos pauculos, quinque libros primos edidit, quibus complexus trecentorum annorum historiam; nempe omne id tempus, quo Hollandi Comitibus domo Hollandis paruerunt. Exinde totidem libros condidit, de Comitibus domo Hannoniis. Eam partem proxima hebdomade decrevit offerre Illustrissimis Hollandiæ & Westfrisiæ Ordinibus; suscepit verò hunc laborem spe illa, quam Ordines ipsi, cum superiorem partem afferret, fecerunt. Nempe ut cum Historiographi sui titulo, cum stipendio decorarent. Sanè Confessus nomine significatum non modò

modò gratum fuisse laborem; sed peti, ut historiam Gentis suæ eodem modo retexeret. Sed ut nunc tempora sunt, illa jam animo effluerint, aliqui fortè nec studia curant, nec honorem majorum, aut Gentis hujus à tot seculis florentissimæ. Quare planè opus est, ut in illustrissimo confessu, quidam, qui omnia suo pretio sciant æstimare, hanc operam commendent. In quo spero, facilè primos fore, qui in corona Hollandicarum urbium, jure suo primas tenent: præsertim cum id etiam futurum sit ex honore urbis, ubi meus ille, ac simul vester, natus, educatusque. Planè fore confido ut iis accenseatur, qui literarum studiis vestram etiam urbem exornarint; quod à paucis factum proximo seculo, superioribus fortasse à nullo. Tanto impensius operam dandam intelligo, ut ne honos suis defit benè de urbe, totaque Hollandia merentibus, & si Deus siverit porro merituris, saltem nunc sic animatis, quorum voluntatem promptissimam non delituerit; Inclytæ urbis vestræ favor, quem erga me & meos summum semper sum expertus. Amicus meus, quem hic habeo, vir sanè cordatissimus aiebat; nunc iis vivi temporibus, quibus proceres hujusmodi munera conferre non aliis soleant, quam gratuiti honoris ergò; non qui ornare historiam Patriam velint. Et exempla promebat eorum, qui stipendio fruuntur; sed nihil minus quàm historiam Bataviæ, vel veterem, vel novam cogitent. Respondi egome nulli nostrorum Procerum facilitatem invidere; sed ita confidere, si tam benignos se præbeant erga eos, quibus decretum nihil exequi eorum quæ suscipere; non claudicaturam eorum munificentiam erga illam domum, quæ triplici jam monumento comprobavit, quantopere honori Bataviæ studeat apud Gentes externas omnes. Sanè literas habeo à primario Magnæ Britanniae viro, qui ad me scribit, viros lectosque sibi filii Annales; talisque si opera impensa esset rebus Britannicis, fore ut grande tui laboris pretium referret. Plura adderem, nisi mallet alios, quam me, præcones esse monumentorum filii mei. Vellem autem de his scripsissem ad te prius. Metuo enim, ne has literas demùm accipias, postquam in Hagam abierint Proceres. Quod si est, necesse sit, tribus verbis per literas negotium filii iis commendari; quod aliqui melius fieri coram, dñm adhuc in urbe sunt vestra. Sanè Consul Bickerus recepit, se velle crastino mane (is dies Sabbathi erit) de eo negotio agere, cum Collegis suis, quo majori animo, rem illi urgeant Hagæ; sed quid faciendum sit, quâ prudentia es, longè me perspicies melius. Uxori lectissimæ totique familiæ, à

me, uxore, & Matthæo meo, plurimam salutem dicito.

*Amstelodami, clō Ioc xli.  
xii Kal. Octob. quo Romulum  
die natum fuisse,  
credidit antiquitas.*

*Dignitatis tuæ  
studiosissimus  
affinis cultor-  
que summus,*

G. J. Vossius.

## CCCCXIX.

Hugoni Grotio, *Lutetiam Parisi.*

Illustrissime Domine,

**G**enerosus Baro, Benedictus Skytte, relicta domi conjugæ, in Gallias redit; Parentibus, uxore, amicis, Medicis etiam authoribus, qui sic arbitrantur valetudinem adversam, quam in corpore naturâ infirmo auxit bonorum liberum amissio, corrigi posse peregrinatiuncula, & mutatione aëris. Gallias terris prætulit aliis, partim quia Medicos habeat excellentiores, partim ob aëra temperatiorem, partim etiam excellentiæ tuæ causa; quam tam sibi faventem, & propitiā exoptat, quam persensit prius: Eoque sine aliquid etiam literarum à me petiit, quo excellentiæ tuæ commendarem. Id vero facio lubens, eoque lubentius, quod & ob ingenium, doctrinamque, & genus, ac gentem, per se sciam commendatissimum. Nimirum nihil hic opus circumspicere, ex præcepto Theognidis, atque etiam Horatiano, ne mox incutiant aliena mihi commissa pudorem. Gratias excellentiæ tuæ agò immortales, pro opere immortalis, & incomparabili annotationum in quadrigam Evangelistarum: quod ex quo accepi, jam dies est quartus, avidè, sed pro occupationibus, quæ premor, cœpi devorare. Ac video esse reconditæ eruditionis thesaurum. Utinam his epulis liceret animum magis pascere? Præterquam quod evocaretur sic mens à cogitatione tot adverforum, (quæ interim mediocriter fero, & fortasse magno animo) etiam legendis tuis, meliora possem reddere, tam multa nostra in sacris, in quibus nunc limandis aliquantum occupor. Nihil in opere, de Idololatria & naturæ mirandis superest præter præfationem, secundi voluminis, hesternaque die excudi cœpit. Inscripti Clero Anglicano; quod consilium meum gaudeo, nec excellentiæ tuæ improbari. Minus uret animum Reverendissimi Archiepiscopi, si opus, (sibi destinatum quod sciat) videat saltem Clero dicari, quam si ad illustres irem Ordines



nes nostros, vel Regnum Sueciæ, ut plerique erant authores. Illa adversus Reverendissimum, de quibus scribis ἀνέγνω, ἔγνω, κατέγνω. Valdè me malè habet, quod videam tam sævum animum eorum qui Doctores sunt Religionis reformatæ. Gaudeo interea quod ipse in Galliis agas. Noli enim putare, minus excellentiæ tuæ esse infestus. Quod facile intelligo ex iis quos hic habemus. Jam mihi cum nonnullis dissertandum fuit. Illi colligunt ex postrema tua diatriba, adversus Borboritam, & Frontonem, excellentiam tuam in gratiam Cardinalis Richelieu, hoc agere, ut redeant omnes ad errores Pontificios. Contra contendi, velle & excellentiam tuam, ut Romana Ecclesia reformetur; sed putare à Reformatoribus quibusdam, in his Calvino, modum esse excessum. Quemadmodum verò non sequitur, nec Italus est, nec Hispanus, ergo nec Belga, aut Gallus; itidem neque consequi non, placet illi reformatio Lutheri, minus etiam Calvinii: ergo nec placet illi reformatio ulla Romanæ Ecclesiæ; non quam Cassander, aut ante etiam Erasmus exoptabant; quamque magnam partem secuti, qui sub Edwardi VI. reformarunt Ecclesiam Anglicanam; sive hunc in modum malis, non placet reformari, ut volunt aliqui ἰδορυόμους, καυδαστοι, veteris Ecclesiæ contemptores; Ergo nec eo modo, quem probant veteris Ecclesiæ gnari & amantes. Confido me mentem tuam, in illa diatriba, melius perspexisse, quam excellentiæ tuæ inimicos juratissimos. Qui nisi in Galliis viveres! Sed nihil cætera dicere attinet: Chartæ tamen eorum, dente Theonino, vel Leonino, aut Ursino, etsi quid efferatum magis, rodere & lacerare nomen non desinent. Nihil tam bonè, tam verè dixeris, quin detorfuri sint aliam in mentem, alii malignitate, alii imperitia, at ἀλογισία. Jam prævideo, quid sis dicturus mihi, nempe ut in Pietate ordinum facis.

*Omnia percepi, atque animo mecum ante peregi.*

Atque ita confido, Deumquæ oro, ut tanta aggressum, amore Ecclesiæ, misere scissæ, spiritu sacro firmet magis ac magis. Intellico jam Hagæ esse apud fratrem libellum illum, de quo superioribus ad me literis scripseras. Gaudeo quia inde melius excellentiæ tuæ mentem perspicere erit. Eo lubentius post hebdomadam unam alteram me Hagam conferam, ut legendi illuc potestas fiat. Etiam absque illo fortasse irem, cum filii causâ, tum meâ, ut colloquar cum Oratore Anglico Boswello, quo melius volumina nostra, Britannicæ Clero dicata, eo transmittantur: si tamen valetudo, vel tempestas, iter

impedient, per literas exequar; simul scribam ad fratrem Jurisconsultissimum, quem annotata illa ad consultationem Cassandri, ad diem unum aut alterum communicaturum, mecum non invitum, prorsus habeo persuasum. Nihil erit periculi, ne in manus veniat aliorum culpâ meâ. Vale, Illustrissime Domine, meum etiam Isaacum habe commendatum, quantum publica privataque sinunt. Dominæ conjugii, & familiæ toti, ab omnibus nobis, salutem plurimam dicito.

*Amstelodami, cl. Id. xli. xxviii Octobris, h. e. ipso natali Erasmi. Cujus herois memoria, pagina hac exeunte, penè ordirer novam. Nam cum quando cogito, & tempora nostra consero, Ecclesiæ miserescit; sed distentus exiguis, distentissimum maximis, non detinebo, seu toluiloquentiâ meâ, ut Caspi dixeret, seu aliter vitium hoc meum vocandum putabis.*

*Illustrissimæ excellentiæ tuæ devotissimus,*

G. J. Vossius.

CCCCXXX.

Winando Rutgerfio, S. Theologiæ Doctori & Professori.

Clarissime & longe amicissime vir,

**D**UM mihi adstat ornatissimus Alb. à Velgen, non omnia solum ore promenda, aliquid etiam literis committendum putavi. Valeo, ut solent, quibus animus ad multa adversa obdurefcit; tot malis pressio nova acciduntur quotidie; sed Deus, ut calamitate non una fauciat, sic oleo spiritus sui medetur. Postquam Ultrajectinæ te Academicæ commendaram, & mihi ejus scholæ professor spem fecerat, sed unus alter Zelota obstitit, & Proceres etiam judicarunt, recipiendum esse Ephorum liberorum Regiæ Bohemicæ, præsertim ea magnopere commendante. Commode cecidisse putavi, quod vir nobil. Wymenbergius, Curator Harderwicci Gymnasii me consulere de professore novo in Philosophia. Et eo majorem spem concipiebam, quod diceret non primum commendari te à me, sed Lugduni idem fecisse affinem tuum. Gavissus sum ea propter magis etiam cum adderet, idem Wymenbergius, Doctorem Cloppenburgium, quantum ex sermone colligi posset, non visum esse alienum. Dixisse

Dixisse enim, te advocato, futurum, ut si morbo vel aliter detineretur, ipse aliquando in sacris doceas juventutem; sed spes etiam illa decollavit, alio jam arcessito. Intellego ex D. Velgio te abitum huc parare; mallem ad munus vocatus venire: sed fortasse tamen ubi coram videre, foelicius sub manu succedet negotium. In me quidem nihil desiderabis, quod à fratre possis exigere. Etiam urbis hujus pastor Laurentius, amicus meus, te ob virtutes tuas, & mei etiam causa diligit, & paratum se ait facere in tuo negotio, quicquid possit. Vale mi amice Rutgerli, & animo esto forti, eundemque mihi à Domino exopta. Uxor uxori salutem adscribi petiit; nam ista subito in chartam conjectanti intervenit.

Anno cl<sup>o</sup> lxxii.  
post. Kal. Novemb.

Tuus æternum,

G. J. Vossius.

#### CCCCXXI.

*Reverende Domine Decane cæterique  
Metropolitane Cantuariensium Ec-  
clesiæ Canonici, Domini, ac fratres  
plurimum honorandi.*

JAM anni sunt duodecim, quod serenissimi Regis bonitate cooptatus sum in honoratissimum collegium vestrum, ac coram etiam cum ternis liberis omni à vobis comitate atque humanitate exceptus fui. Ex quo tempore semper animus mihi arsit cupidine, quomodocunque testandi posteris gratum erga vos affectum. Visus sum mihi nunc aliquam reperisse occasionem literario hoc munere, tum universè dicando Clero Anglicano, in quo etiam continetur egregium nomen vestrum; tum particulatim in secundo volumine vos nominatim exprimendo, tanquam eos, quibus arctius jungerer. Geminum nobis institutum est: partim enim enarro originem & causas Idololatriæ: quas ostendo non quidem fuisse nullas, sed stultas, vel saltem erroneas; partim verò pando naturæ arcana, de quâ multi quidem ante nos tractarunt: sed nos, ut puto, sicut alio fine, & crebro alia atque alia scripsimus. Quanquam verò materies sit diffusa variaque, quantum tamen licuit operam dedi, ut ne esset æquidivisa & confusanea; quod pro certissimo habere soleo à nostris argumentum. Sed de proposito nostro frustra hoc loco adferam plura, cum fusè satis de eo dicam in

utriusque voluminis proloquio. Solum igitur rogo, ut affectum hunc hominis devotissimi vobis boni consulatis, atque ita persuadeatis vobis, nulla terrarum intercapedine posse fieri, ut non eo vos affectu colam, quo prosequar præsentem.

Deus opt. max. universum Anglicanæ Ecclesiæ Clerum, inque eo particulatim vos, Domini mei, ac fratres in Christo venerandi, diutissime feliciter conservet.

Amstelodami,  
cl<sup>o</sup> lxxii.  
9 Kal. Dec. St. V.

Reverendi ac clarissimi  
nominis vestri cultor,

G. J. Vossius.

#### CCCCXXII.

*Reverendissimo in Christo Patri, Domino  
Illustrissimo, Briano Duppa, Episcopo  
Cestrensi, Ephoro Principis Walliæ.*

Reverendissime in Christo Pater, Domine honoratissime,

SI parum responderem summorum de me virorum expectationi, qui assidue à me aliqua efflagitant studiorum monumenta; plura etiam quam ut tam multis ingenio, doctrinâ, industriâ, par esse valeam, excusatione nulla æquè apud æquos judices possim excusari, quàm quod animus, publici ejusque gravissimi muneris, seu onere, seu honore sit distractissimus; & si quid otii superlit, id prope modum omne auferat, vel rei familiaris in tot adversis cura, vel officiosa nimis amicorum interpellatio. Equidem si res lautior foret domi, fortasse me urbi subducerem, atque aliquò in villam abderem, non tanquam Timon *μυροβλάτης*, sed ut perficiendo ea quæ habeo affecta, amicis, posteris, Deo ipsi melius temporis mei reddere rationem. Et tamen experior quodammodo, sic etiam animum nonnihil valere, quo intendero, posseque etiam in negotiorum mole otio ea subcisivo, si diurno minus, nocturno saltem non ineleganter dispungi. Eaque noctium fiducia aggressus sum opus arduum de Idololatriæ origine ac progressu, & mentis humanæ, ex natura adscensu ad Deum. Id vero contextui ex scriptura S. literatura, historia, veteri novæque, & naturæ admirandis. Dicavi antistibus Ecclesiæ Anglicanæ, in quibus etiam illustre nomen tuum; præsertim ad Ecclesiæ Cestrensis honorem accedente maximi Principis cura, quem tot regnorum manet fastidium. Fore tibi laborem hunc non ingratum,

tum, facile colligo ex affectu, quo me semper es profecutus. Luculentaque ejus indicia ante annos XII. Oxonii perfunsi, cum me nullo non prolixissimæ humanitatis genere dignareris. Eo minus rogandus es, ut quod sponte etiam facies, boni consulas munusculum tum meum, quod dixi, tum filii Maimonidem, utrique Angliæ Academiæ inscriptum, ut hoc etiam nomine tibi mitti debuisset videatur. Sanè sic vellet, si viveret, Dionysius meus, itineris mei Anglici comes, ac tuam etiam erga se humanitatem expertus coram. Deum optimum maximum rogo, ut Augustum Regem Carolum, serenissimum Walliæ Principem totamque domum Regiam multos in annos feliciter conservet; teque pariter, omnesque Regni Proceres, & Ecclesiæ Anglicanæ Antistites, pro quibus eò ardentius preces fundo, quo magis scissa multorum studia video, doleoque, non quali Cantuariensibus insertus Regia benignitate hic aliquid attendam mei, sed solius Regis Regniq; & in hoc Ecclesiæ amore; pro cujus concordia vel mortem appetam lubens.

Amstelodami  
Id. Id. xli.  
xiii Kal. Dec.  
Styl. Vet.

Reverendissimi & illustrissi-  
mi nominis tui cultor  
devotissimus,

G. J. Vossius.

### CCCCXXIII.

*Magnifice atque eximie Domine Procan-  
cellarie, excellentissimi inclytæ Oxoni-  
ensis Academiæ Professores, Doctores,  
ac Magistri, Domini plurimum hono-  
randi.*

**E**N vobis fœtum tenellum, quem *ὁ μακαρίτης* filius meus Dionysius, paulo antequam fato concederet, enixus apud nos fuit; prope dixerim, ut Pallada Jupiter apud priscos nationum Theologos. Sed paganicus ille Jupiter cum Minerva sua adhuc in gentibus vivit, meus non Jupiter, sed Gnatus, jam abhinc octennio vixit. Nam quadriennio, ex quo videratis coram vivere desiit in terris, qui nunc meliore vitâ fruatur in Cœlis. Utinam verò hic non tam animæ istiusmodi videatur, ut neque illum parentis sui, neque parentem, si viveret, fœtus illius posset sup-  
putdere. Hæc quidem de vestro me iudicio spes habuit, cum filio Isaaco auctor forem, ut eum. (quod ipsi utinam scriptori potius facere licuisset) undecunque doctissimis flo-

rentissimæ utriusque Academiæ Anglicanæ viris offerret dicaretque. Fecique hoc eo lubentius, quia scirem, si quid hoc in opere excidisset filio (& qui aliter esse possit in ætate adeo juvenili?) non ignoscendi minus, quam cognoscendi, vobis animum fore. Cogitabam simul, uti Halicarnassensis ille Dionysius ait, Apollinem in Panegyricis esse *ὁσπερ προσωπὴν τῆς πλεονεξίας περιέχοντος τοῦ λόγου*: ita mei quoque Dionysii Commentarium, quo Maimonidem studii illustrare, sic illustratum in jubare nominis vestri, ut non scriptionis magis, quam inscriptionis causa, conspicuus notusque fiat omnibus. Nec alter filius, editor relictorum, dubitasset istoc publice testari, nisi se, studiorum gratia, regna petente extera, à me id commodius fieri posse, haut temere exisimasset. Maimonidæ, & translationi ac Commentario Dionysiano addidi de penu proprio libros quatuor, æternum mihi venerando Anglicanæ Ecclesiæ Clero inscriptos. Iis ago de conflictu Theologiæ Gentilis, & Phylices Christianæ. Ac Idololatriæ quidem originem expono ex Literatura, Historia, mundi fabrica & sacris literis. Atque ex iisdem enarro Naturæ admiranda; quibus stulti abripiuntur in cultum Naturæ, sapientes autem deducuntur in admirationem & cultum Conditoris. Si priora nostra de Historicis Latinis, aliaque, ut annos ante duodecim coram vidi lubens, locum adepta in inclyta Bibliotheca vestra, etiam quæ nunc mitto, hoc, spero, honoris ab eximia vestra humanitate consequentur. Pro istoc affectu, etiam aliis in rebus erga me testatissimo, in laudes vestras perlubens excurrerem, præsertim quando raram atque omnigenam Doctrinam mirabundus mecum cogito. Verum & maxima perstringendo prodidero infantiam meam, & vestram, in os laudando, modestiam offendero. Et fortasse aliis istis reservatur locus. Quare hic sistam. Solum Deum Opt. Max. rogo, ut augustum & serenissimum Regem Carolum, & illustres Regni Proceres, ac vos etiam, non de Anglia modo, sed universo orbe præclare adeo merentes, diutissime salvos ac fospites feliciter conservet.

Amstelodami,  
Id. Id. xli.  
x Kal. Dec.  
St. Vet.

Ingentis vestri nominis ad-  
mirator cultorque,

G. J. Vossius.

### CCCCXXIV.



## CCCCXXIV.

Reverendissime in Christo Pater, Domine Illustrissime,

QUO magis aggravescit ætas, & fortasse adversis multis prope defatiscit: eò magis gliscit affectus iste gratum testandi animum erga tam bene de me promeritum Angliæ regnum. Ac cum magnum Magnæ Britannæ Regem cogitarem, facile eo impulsus sum, ut non alteri Grammaticos dicarem Commentarios, quàm proli ejus Augustæ. Sic enim opinabar studia prima, primæ ætati inprimis convenire, atque etiam deberi. Atque antea etiam sic ratiocinabar mecum, quia ad historiarum professionem vocatus forem in Academiam Cantabrigiensem: facturum me non absurdè, si eidem Academiæ, & præcipue ejus Cancellario Illustrissimo Duci Buckinghamiæ, Latinorum Historicorum Historiam consecrarem. Hisce sic defunctus in eo totus eram, ut gratam mentem testarer erga Clerum Anglicanum: præcipueque cui, aut quibus potissimum deberem. Scripserat filius Dionysius, (quem Oxonii vidisti mecum, & cum liberorum meorum alijs tam humaniter, comiterque exceperis) is, inquam, in Maimonidem de Idololatria Latine à se redditum Commentarium scripserat. Occasione illà amicis rogantibus, eò animum adjeci, & uno quasi fasce complecterer, quæ de Gentili Idololatria observassem. Spisè mihi negotium processit, multis adeo occupato; quæ ratio est, cur nunc demum Maimonides prodeat, et si jam ab annis quatuor, imo ultra excusus. Ac tum prodiisse mallem: sed junctum exire malebat Typographus. Nunc nostri quoque operis quatuor libris absolutis, ulterius differre nec volui, nec debui: licet si Deus vitam & valetudinem concesserit, duos præterea libros addere decrèrim: ut ita integram planè habeamus, tum Theologiam Gentilem, tum Physicam Christianam. Ac de Maimonide quidem auctor filio Isaaco fuit, ut fratris *tuus* labores offerret, dicaretque florentissimæ utrique Regni Academiæ Anglicani. In quarum altera quantum fuerit nominis tui decus, quantum etiam Reverendissimi D. Duppa, & quomodo ea doctrina ac virtus, gradum vobis fecerit, ad grandius in Ecclesia fastigium, quantum etiam honoris mihi tribueritis immerenti, apud alios potius, quàm apud Vos, memorandi fuerit locus. Quod verò ad libros quatuor à me exaratos, non per omnia quidem sed quodammodo tamen imitari volui exemplum B. Cypriani absente Episcopo Romano ad

Clerum scribentis. Utinam verò, si id de singulis expectare nimium est, saltem optimus, & doctissimus quisque è Clero hunc affectum nostrum consulat boni. Quod facient, scio, quicumque paulo penitius me, & hunc Angliæ amorem norint. Nec quia hæc nunc qualiacunque amoris mei monumenta mitto, eo me gentis humanissimæ præstantissimæque meritis ex animo exsolvi meo. Scio enim longè majora deberi, & (ut taceam heroas alios) ante omnes Augusto Regi, erga quem, non aliter quàm subditos ejus compellendo, hætenus officium probavi meum; ut facile videam, & assidue cogitem, quanto majus sit quod deinceps à me desideretur. Sed spero Deum daturum in hac etiam se nequitia, ut probi omnes videant, neque hæc parte me opinionem eorum elusisse. Velle quidem & conari non desinam.

Diutissime feliciter vale, eximie Antistes, & quod hætenus facis, porro etiam me faventis tux Zephyro affare non graveris.

Amstelodami  
clo Dec xli.  
ix Kal Dec.  
Syl. Ver.

Reverendissimi & Illustrissimi nominis tui  
cultor devotus,

G. J. Vossius.

## CCCCXXV.

Eduardo Pococke, Socio Collegii Corporis Christi.

Clarissime ac Amicissime Vir,

IN tot adversis non mediocriter mihi voluptati fuit, quod te salvum ac sospitem Constantinopoli rediisse Oxoniam intelligam: Deoque gratias pro hoc beneficio ago, cum privato nomine de amico tanto lætus, tum etiam publico, quia facile video, quantum deinceps Respublica Literaria, ac pariter Dei Ecclesia, utilitatis ex te capere possit. Si enim jam ante tria lustra tam bene potueris de studiis mereri: quid non posthac sperabimus, ex quo & ætas, & tot annorum industria, Doctrinam pariter ac judicium firmarunt? Gratulor ergo tibi, mi Pococke, gratulor Oxonio, totique Angliæ, imo literato Orbi hunc reditum tuum. De quo simulac cognovi, continuo pene hunc calamum corripui, ut affectum meum, quem coram non poteram, literis testarer. Nolui verò planè inanem esse Epistolam meam; cui idcirco adjunxi Maimonidem de Idololatria, à filio meo Dionysio (quem coram mecum vidisti Oxoniæ) Latine redditum, notisque illustratum;

item

item libros quatuor à me exaratos, de falsâ nationum Religione, humanæque mentis ex natura adscensu ad Deum: planeque confido, & τὸ μαγεῖον filii, & mei causa, grata fore hæc munuscula, præsertim cum nec Argumentum possit displicere. Vale amice πολὺ γὰρ ἔτι, ac deinceps etiam amemus nos inter nos.

Amstelodami,  
clō Ioc xli.  
ix Kal. Dec.

Tuus tuo merito,

G. J. Vossius.

## CCCCXXVI.

Ricardo Steward, *Theologiæ Doctori.*

Reverende & Clarissime Vir,

**N**ON patiar interire, vel etiam flaccesce-  
re amicitiam, quæ mihi tecum jam ante annos tot in Batavia fuit, magnam partem ferruminante eam Nobilissimo Viro Georg. Ratac. Dubletio, nunc Supremæ Curiz Hollandiæ Zelandiæque Senatore laudatissimo. Ut durare videas affectum hunc nostrum, mitto aliquod amoris *μνημόσυον*, partim de filii *μαγεῖον* penu. Ac de nostro quidem vides Paralela Theologiæ Gentilis, ac Physices Christianæ, si modo is titulus explet materiam operis; quo non minus cum Religione Gentium confero historiam veterem, quam Scientiam naturalem. At de penu filii est Maimonidis de Idololatria liber, Latine ab eo redditus, & uberi illustratus Commentario. Utinam hoc filio diutius frui licuisset! neque id mei magis, quam publici boni gratia exopto. Sed ferenda quæcunque immittit Deus. Solus quippe scit, quid mihi, quid expedierit filio. Nihil vero gratius mihi contingere potuerit, quam si intellexero utriusque nostri operam, tibi, tuique similibus, quales habemus paucos, neutiquam improbari. Hoc si consequar, non erit quod de malevolorum judicio laborem. Vale, insignis Vir, pariter ac amice; ac porro nos ama ut soles.

Amstelodami,  
clō Ioc xli.  
vi Kal. Dec.

Tui nominis admirator,

G. J. Vossius.

## CCCCXXVII.

Johanni Rousio.

*Bibliothecario* } *Collegii* } *Socio.*  
*Bodleiano* } *Orientalis*

Vir Clarissime,

**S**CIO Stagiritam nostrum dicere, silentio diuturno amicitias dirimi; & longo tempore nullum inter nos literarium fuisse commercium. Nec propterea tamen existimo vel tantillo amorem nostrum esse imminutum, ut qui non vili lucro amicitiam metiamur, sed bono publico. In quolibet cessare in scribendo licet, ubi publicum finit, imo cum damno ejus, nimium erga amicos forem officiosi. Sed nunc viderem mihi verè amicitiam violare, nisi rumperem silentium, teque Literulis meis compellarem. Quippe & ego, & filius *ὁ μαγεῖον*, quædam juris fecimus publici, quæ operam desiderant tuam, ut permaturè inferantur Bibliothecæ, non Apollinis Vaticani, tantopere veteribus celebratæ, sed multis partibus præstantioris Oxoniensis vestræ. Ac à filio quidem est Maimonides de Idololatria Latine redditus, & uberius Notis illustratus. Quod opus frater ejus utrique Anglicanæ Ecclesiæ dicavit. Et gratum erit, tum Argumenti causa, tum quia semper in ore habere Scriptor ejus Dionysius solet clarissimos Oxoniensis Academiæ Viros; à quibus paterni Itineris comes adeo humaniter, admodum adolescens, fuerat exceptus. Addidi de nostro quatuor Libros de Idololatriæ origine & progressu, & ex Naturæ operibus adscensu humanæ mentis ad Deum. Non puto, vel te, Clarissime Vir, vel ex Academiæ vestræ heroibus aliquem mihi esse orandum, ut ne gravetur opus nostrum inferre celebratissimæ toto orbe Bibliothecæ Vestræ. Hoc fecistis, cum necdum Academiæ vestræ membrum forem; & nunc non idem expectem Academiæ insitus, præsertim in opere quod æternum mihi venerando totius Angliæ Clero consecrarim? Quare de hoc tam amico postulato, verbum non addam; tantummodo peto, ut plurimum meo nomine salutes summos & florentissimos Academiæ Oxoniensis Viros, præsertim eos qui ante Annos 12. me & ternos filios tam proluxa humanitate exceperunt. Nomina adderem, nisi ut ejus temporis Procancellarium, & in Æde Christi Decanum, atque alios item aliquos ad sublimiorem gradum evectos esse cognovi jamdiu, ita de aliis idem confiderem, licet nihil habeam certi. Verum promitto

mitto mihi de eximia humanitate vestra, fore, ut vel tute, Vir Clarissime, vel præstantissimus Pocokus, vel alius nostri amans, certiolem me faciat de tot Luminibus Academicæ: de quorum conditione jucundum erit cognoscere, præterquam eorum, quos (ut fluxæ ac fragiles sunt res humanæ) magnum Numen ademerit terris; quanquam & de illis, si iusto omnia pretio æstimemus, gaudendum potius sit, postquam eos Deus ex calamitosa hac vita in sedes transtulerit beatas. Atque ut præter has, nihil magnopere mihi; ita eadem tibi sed feras exopto, quo diutissime prosis Reipublicæ Literariæ, tum Sacræ, tum Externæ.

Amstelodami,  
clō Ioc xli. vi.  
Kal. Decemb.  
St. Vet.

Tuus totus,

G. J. Vossius.

## CCCCXXVIII.

Patricio Junio, *Bibliothecario Regio.*

**D**UM, Vir eximie, prelum fervet Editione Maimonidæ de Idololatria, una cum filii mei Τῷ μαγιστρῷ Dionysii Tralatione, ac Notis; solo adducti titulo amici aliquot rogarunt, ut eadem, quæ de Gentilium Idololatria jam olim mihi observata scirent, subcivis percurrerem temporibus, & (quia metuerent, ne aliqui laboris huius fructus periret Reipublicæ literariæ) simulac possem juris facerem publici. Quæ mea facilitas est, parvi illis; ac alacriter quidem sum aggressus, sed ut fieri solet, sub manu opus crevit, & cum opere molestia, ob molem occupationum, quæ me quotidie pene avocarent. Verum sic quoque non modo quid filius, sed quid ego etiam præstiterim, si quis alius, optimè iudicabis. Solum metuo, ne, non tantum tibi abs re tua otii sit, ut legere valeas, vel etiam saltuatim percurrere. Ut hoc verear, facit operis magnitudo tanta, parens ut ipse ab relegendo quæ scripsit, possit deterri. Notum illud, *Andini vatis—Laudato ingentia vira, Exiguum colito*: Non minus dicere possumus: Ingens laudato volumen, Exiguum legito. Sed, quicquid de nostro hoc labore futurum, boni scio consules affectum; præsertim quando utrumque opus Angliæ Clero, & Academicis dicatum. Atque ut aliter foret, rara Eruditio tua cum maximâ humanitate non lineret, ut non grata tibi foret hæc voluntas nostra bene merendi de studiis literarum. Ex literis filii Isaaci intelligo, quantopere faveris studiis adolescentis

αλεξυζήτορος, pro quo gratias ago, quas possum; pluraque nunc adderem, nisi ad varios adeo scribendis literis, abrumperem epistolam citius cogeret, quam vellem.

Amstelodami,  
clō Ioc xli.  
v Kal. Decem.  
Vet. Styl.

Tui nominis clarissimi  
cultor,

Ger. Jo. Vossius.

## CCCCXXIX.

Reverendissimo & Illustrissimo Jacobo Usserio, *Archiepiscopo Armachano, totius Hiberniæ Primate.*

Reverendissime Antistes, Dom. Illustriss.

**C**UM primò solum animus foret, scribere de gentium Diis ac Sacris, eorumque origine ac causis; postea ulterius sum proventus; rerumque naturam exponere studio fuit, sine non alio quàm ut naturæ mystis ejus mystas facerem, qui condidit naturam. Hujus laboris nostri, quem officii ergo, summis Cleri Anglicani viris consecravi, exemplar nunc mitto, qualecunque ἀντίδωρον operis tui auro contra non cari, quo antiquitates Ecclesiarum Britannicarum complecteris. Adjunxi Maimonidæ simul librum de Idololatria, cum tralatione & commentario filii mei Dionysii juvenis, si fas cum à parente etiam prædicari, ingentis dum viveret & pietatis & doctrinæ. Eamque operam ille Angliæ dicare decreverat; extincto autem, duabus Angliæ Academicis inscripsit frater ejus Isaacus; is quem ante menses paucos non videri duntaxat, sed etiam usque adeo humaniter excepisti, ut de tanto affectu suis in literis non gaudium modo testetur, sed penè etiam triumphet. Nunc hic in Galliis agit, ac totus est in eo, ut exscribat, quæ in bibliothecis reperit ἀντίδωρα. Planè confido, reducem in patriam amantibus sui, & his, & aliis in terris, neque inglorium, neque inutilem fore: neque commissurum, ut nesciant posteris, quantum debeat summatibus Britannicæ, aut Gallicæ viris. Atque hoc votum meus Deus secundet. Te simul, Reverendissime & Illustrissime Domine, diu ac feliciter conservet, ut fluctuantibus Ecclesiæ rebus pro anchora esse possis. Hoc Deum assidue precabor. Plura de aliis vellem, sed charissimæ conjugis morbus, & adversa alia non sinunt: ut mittam, quodd occasione huius operis scribendum sit varias in terras. Scis enim, quàm latè pateat Respublica Literaria; atque ut

D d d

ami-



amicitiam eorum, qui ad hanc pertinent,  
nulla dissolvant regionum spatia.

*Reverendissimi & Illustrissimi  
nominis tui cultor atque  
admirator,*

G. J. Vossius.

CCCCXXX.

Merico Casaubono.

Charissime Vir, Reverende Frater in Christo,

**T**Andem prodeunt bina familiæ nostræ  
opera: unum Maimonides, cum Tra-  
latione, & Notis Dionysii mei, cujus & An-  
nales Belgicos è Rcidano Latine redditos ac-  
cepisti; alterum autem à nobis exaratum, *De  
Religione Paganica*, & triplici cum ea conflictu;  
Historiæ veteris, de qua 1° libro; Scientiæ natu-  
ralis, de qua 2° & deinceps; Scripturæ sa-  
cræ, de qua Opere universo. Dionysii mei  
laborem sacravi binis Angliæ Academiis; ubi  
ob tot S. Theologiæ Doctores, atque Lingua-  
rum Orientalium Professores, vel earundem  
bene intelligentes; plurimi erunt, qui non  
modo de monumento hoc mei, (eo, quem  
cum fratribus duobus non vidisti modò, sed  
etiam benignè adeo excepisti) benevolè ju-  
dicare poterunt, atque etiam volent. Ho-  
& laudabilis opera filii spondet mihi, & lau-  
datissimorum virorum affectus erga me, &  
meos. At labores proprios dicavi, laudis nul-  
lius indigenti Angliæ Clero; cujus Canonici-  
corum Cantuariensium Collegium pars est  
honorata. Nec propterea in generali nomi-  
ne listendum mihi putavi; sed minimùm al-  
tero in Volumine, quod majus priori, ex-  
primere nominatim volui eos, quibus con-  
junctus arctius forem. Atque utinam af-  
fectus hic gratus sit fratribus meis Reveren-  
dis; quam studiosus est vestri animus illius,  
à quo opus hoc proficiscitur. Tria mitto ex-  
emplaria, unum inauratum, ut inferatur Bib-  
liothecæ Cantuariensi, si merebitur. Duo alia  
Venerando D. Decano, ac tibi, Collega op-  
time, & amicissime. Plura addidissem, si in  
grandibus Operibus tam munifici essent Ty-  
pographi quàm deberent. Sed hoc infusurrare  
liceat in aurem, mi Casaubonè, gratum fore,  
si, ubi videris, desiderari pro singulis utrius-  
que operis, vel saltem mei, exemplar ali-  
quod, mihi id quamprimum significes. Eti-  
carissimè veneant exemplaria, proprio ta-  
men ære potius mercabor, quàm ut ulla in re  
patiar officium claudicare. Vides quàm fa-

miliariter tecum agam, quod optime consu-  
les. Uxorem, Reverendum D. Decanum, &  
fratres dilectos plurimùm saluta.

*Amstelodami,  
clō Ioc xli.  
vi Kal. Dec.  
St. Vet.*

*Tuus æternum,*

G. J. Vossius.

CCCCXXXI.

Thomæ Farnabio.

Præclare & amice Farnabi,

*Scribimus indocti, doctique volumina passim.*

**S**Anè tam multa hodie ab imperitis edi vi-  
demus, ut si sic res procedat, & lectores  
suos, ut cœpere, porro inveniant, plane sit  
metuendum, ne Nepotibus nostris vescendum  
sit glandibus, uti Atavorum temporibus fie-  
bat. Sed bene est quod non desint Triptolemi  
novi qui fruges obserant, inque his facile tu-  
um locum sustines, dum juventutem glandi-  
bus vesci veras, eamque deducis ad frugiferos  
agros optimorum Latii scriptorum, ac ingenii  
doctrinæque tuæ vomere, h. e. non perspicuo  
minus, quàm erudito stylo, facis, ut bene  
culti niteant magis & magis. Sed bellè  
de antiquis scriptoribus merendi non una  
est via. Nos eodem tendimus quo tu; sed  
aliter & indicio sunt quæ hæcenus scripsimus,  
& ea quæque ostendunt quæ nunc mitto. In  
iis duo hæc præstare conor, ut pandam pri-  
cam gentium religionem, sine qua intelligi  
nequeunt scriptores veteres, atque ut expo-  
nam quid Plato, Aristoteles, Zeno, & Philo-  
sophorum alii, imo & Poetæ cæterique scrip-  
tores de rerum natura senserint, atque scrip-  
tis consignarint. Planè confido, hæc etiam  
per quæ illis scriptoribus à te illustratis lucem  
porro aliquam affundere studuimus, non  
displicitura præstanti ingenio tuo, qui pro  
candore, & veterum auctorum amore, nihil  
æquè exoptes quàm ut multi tecum in socie-  
tatem veniant illius gloriæ, quæ paratur il-  
lustrandis auctoribus vetustis. Eoque gratio-  
ra omnia fore persuasum habeo, quia sacrata  
à me sint non exteræ genti sed vestræ, imo  
quodammodo etiam nostræ; postquam &  
ipse serenissimi Regis beneficio Anglicano  
Clero sum insertus, ab utraque etiam Acade-  
mia, ut membrum, adscitus. Addidi de filii  
Dionysii penu Maimonidem cum ejus trala-  
tione ac notis, eumque non minùs placitu-  
rum spero, quàm nostra: & affectum hunc  
augebit, quod is quoque Angliæ inscribatur.  
Quæ deinceps sim aggressurus, animi adhuc  
pendeo;

pendeo; usque adeo multa sunt quæ limare, perficereque ardet animus, modo Deus vitam concesserit, & valetudinem prosperam: quam tibi non minus quàm mihi exopto. Vale.

*Amstelodami, c. b. Id. xli.*  
iii. Kal. Decembris.

*Tuus,*

G. J. Vossius.

# CCCCXXXII.

Andreas Colvio suo, Gerardus Joannes Vossius S. P.

**E**N Tibi, Vir atque amice eximie, pro Cassiano tuo M<sup>se</sup>. ac ob devotiorem pectoris, stylique veritatem, ut quicumque editi codices conferantur, haud indigno, qualecumque *Assidue* nostrum; de cujus argumento dicerem aliqua, nisi jam abhinc biennio, partem hic bonam vidisses, pleraque etiam excurrisses. Miraberis, scio, spissè adeo opus hoc successisse. Nolim ego omnem culpam rejicere in Ty; ographum. Magis Ipsi in causa fuimus, vel potius Amici, & exteri salutatores, quorum indices crescit seges; sic ut nequeam (quod poteram ante annos plusculos) negotiorum molem subcivili temporis otio eleganter dispungere. Africanum id fecisse proditum à Velleio, scriptore fidei non sublece, præterquam in sui ævi rebus. Verum nobis non licet esse tam beatiss. Omnino enim ut metuo, valedicendum studiis, mittendique Libri, tot annorum spatio congesti, ac mihi stantes plusquam annis millenis. Vel hoc si nimis durum, publico etiam, ac Poteris noxium, subducere me aliquò cogar; putà in villam aliquam; neque desunt, ex illis facile agentibus, atque etiam amantibus nostri, qui cum mei miseres, tum amore ducti Reip. Literariæ, villam ad tempus, vel aliud offerant, ut illis ex animi sententia, vacare possim limandis, & perficiendis tam multis, quæ nunc vix inspicendi est otium, & me mortuo, fortasse æternum cum blattis, & tinea rixabuntur. Nec alienus ab hoc consilio forem; verum uxoris valetudo non finit, ut sic menses totos ab ea divellar: nec permittent Proceres nostri: mihi autem non est tam lauta res familiaris domi, carere ut velim, aut possim, liberali adeo professionis publicæ mercede. Vides quàm animi hæreant incertus. Tu cordatissime Colvi, viam dispice, quâ me expediā. Talem mihi indicari velim, quâ neque frauder amicorum

eruditorum (quos inter locum facile tuum tueris) suavissimis alloquii; neque Exteriorum variis è terris adventantium Vitorum, vel rara doctrinâ, vel prælustri genere, ac dignitate præstantium, sermonibus acceptissimis, sive de studiis nostris, sive de vita & scriptis eorum sint, quos extris in locis amo, & ælimo, sive etiam de publico rerum statu; cujus notitia quantopere requiratur in Historiarum & Civilis scientiæ Doctore neutiquam potes ignorare. Multum autem vereor, ne utcumque omnes in te partes verses, aut hisce universis fateare carendum, aut quando ista prope omne tempus sibi vindicent, quod à munere publico superest; agnoscere cogaris, ne istis me defraudem, & plurimorum offensam incurram; deinceps mihi nihil legendum, scribendumque dixeris. Si ita mecum agitur, quo pacto par fueris spissis hisce duobus voluminibus, quæ mittis? Mane, istuc ibam; Nam totas noctes in utramque aurem dormio: sed quod à decima est Nocturna, ad sequentem secundam, impendo penticulandis illis, quæ tot annis in adversaria retuli. Ac Propterea opus hoc, de Paganica Theologia, & Christiana Philosophia, poteram inscribere, Noctes Amstelodamenses. Sanè tanta est comitas, & modestia Indigenarum, & Exteriorum, ut quia tum ipsi somnum capiant, mihi studia neutiquam inturbent. Atque hoc imprimis verum est hiberno tempore, quo domi se continent studiosius, frigoris causâ, in quo ego ista tecum garrio, ut vel hinc videas amoris mei erga te ignem, quem neque noctis hibernæ frigus vincere potuerit. Sed Varro olim. Est modus matulæ: nobis etiam sit modus Epistolæ. De cæteris confabulandi tecum lubido erit, ubi Tibi otium erit amicos hac urbe inviscendi; quod nimis raro facis. Simul tùm ferram reciprocabimus, super multis, de quibus dissero in eo, quod mitto, opere, misello magis, quàm confusanco; quippe mirè admodum vario, at non *ἀμείνων* quod vitium habere soleo, pro certissimo *ἀπὸ συνείας* argumento. Ac scio te quoque hominem non *διολογῶν* modò, sed etiam *φιλοσοφῶν* in isto juxta me sentire. Vale, vir & amice Egregie, ac meo nomine, Præter uxorem Lectissimam, salutem Consulem Wittium, cum cognata nostra Coniuge; Item Doctorem Eevervicium. Quid pluribus oneremus? Si possim, velim uni & alteri novi operis exemplar mittere, videbo quid possim.

*Amstelod. c. b. Id. xli.*  
vi. Id. Decembris.

CCCCXXXIII.

Francisco Junio *Fr. F.**Londinum.*

Nob. &amp; Clarissime Affinis Juni,

**T**Andem vides commentarios nostros, de Theologia gentili, & Phytica Christiana; quos gratos fore confido, non Tibi modo, sed etiam Clero Anglicano, cui eos dicavi. Mitto etiam Dionysii mei Maimonidem, à fratre Isaac inscriptum duabus Angliæ Academiis. Isaacus adhuc in Galliis est; sed iter in Italiam adfectat; de quo non possum adfentire. Terrent non sumptus modò, sed etiam pericula. Spero, nihil acturum, me inconsulto; et si videam Illustrem Grotium, iter non dissuadere. De obitu suavissimæ Cognatæ Joannæ Brunæ, jam ex fororis literis, vel filii ejus, sine dubio intellexeris. Næranus noster gravi morbo decumbit; multumque vitæ metuitur. Franciscus meus multo me, imo omnes nos, mœrore adficit. Matthæus alteram Historiæ Batavæ partem emisit, & Historiographi Batavi Titulum ab Illustribus Ordinibus Hollandiæ est adeptus. Non levis is honos. Sed de magnitudine salarii, necdum quod scimus statutum. Sunt in Proceribus qui dicant satius videri, ut quoties pars operis nova exhibetur, filio perhonestum detur honorarium cum salario, quàm ut certum sit annum: quia tam multi pecuniâ fruuntur otiosi: Exemplum capere ex Heinio jubent, qui post scriptam Sylva-ducis captæ historiam, nunquam admovit manum historiæ scriptioni; sed in utramque aurem stertit securus, gratisque stipendio fruitur. Alii contra contendunt, ejus culpam non debere aliis obesse: quorum industria gemino jam pareat opere. Accepi his diebus minutam schedulam à te missam mihi: in ea (præter illud de stipendio Cantabrigiensi, à Casaubono accepto, & Hoofdio Londini annumerato) illud etiam erat, fascem Librariam missam à te Amstelodamum esse: In iis libris quosdam pro Amplissimo Doubletio emptos: Chartas item quasdam tradendas Hoofdii Londini agentis fratri, prope Remonstrantium Templum habitanti. Is apud me fuit cum altero fratre, hic itidem habitante. Verum nobis nihil hæcenus traditum; eoque opus erit perscribi per quem Nautam missi sint libri, cæteraque. Alioquin enim metuo, ne cuncta perierint

filio, Doubletio, Hoofdio. Doubletius sæpe ex me inquit, ecquid de libris certi habeamus. Quæro fac nos de Nautæ nomine certiores, deque cæteris etiam, quæ nos attinet scire. Hæc non intima saltem, si non princeps causa fuit, cur ad te scriberem. Desidero etiam scire, quomodo valeat Illustrissimus Comes Oxfordiæ, cujus, ni fallor, studiis es præfectus, & ecquid spei sit de vestra in has terras protectione. Spem enim qualem qualem conceperam ex schedula tua antedicta: Epistolam enim non video mihi posse nominare. Agunt hæcenus mecum bini liberi fratris tui, Calimiri Junii *de margela*. Franciscus tibi cognominis ingenio sic satis valet, & industria se mediocriter probat, foreque confido, ut ea quotidie capiat incrementum. Planè hoc ago, ut dignus sit & Avo, & Patruo; quorum non prænomine minus, quàm cognomine gaudet. Prodiere Illustris Grotii annotata in Novum Testamentum. Iis addidit tres Libellos cum Appendice, qua defendit, quod scripsit, Antichristi nomine, non intelligi in Scripturis Episcopum Romanum, sed Cæsarem illum, gentilem dico, Ecclesiæque Persecutorem. Hoc multos habet pessimè; qui judicant fore, ut omnes magis abhorreant à Romana Ecclesia, si Episcopum ejus esse ipsum Antichristum habeant persuasissimum. Sed qui statuunt cogitari debere de concordia orbis Christiani, existimant, hanc opinionem esse noxiam; foreque ut non cogitetur de remedio, quia nemo cum eo ullum sibi negotium esse velit, aut ab eo boni quicquam sperare, qui sit Anti-Christus, & in hoc solo operam omnem ponat, ut ad inferos præcipitet. At meliori Ecclesiam fore loco, si non desperemus de bonitate Dei, ac confidamus posse Deum, qui non Regum modò, sed Paparum etiam corda habet in manu sua, paulatim aperire oculos & mollire corda eorum, qui & superstitione, & Tyrannide, tantoperè à primis sæculis recesserunt. Atque ut Romæ non succederet pius conatus, multum profici posse, si in Galliis succedat, ubi ingens Illorum est numerus, qui sic Romanam sequuntur Ecclesiam, ut in præcipuis, quæ nos oppugnamus, faveant sententiæ nostræ; sed solum plus moderationis requirant à nobis, majorem etiam venerationem erga Ecclesiam veterem, quam non Parens quidem tuus, non alii multi, in Anglia præcipue; sed multi tamen *ἰδοὺ νῦν ἡμεῖς καὶ ἀντιχριστοῦ*, pretio suo nesciunt æstimare. Dum hi sic disceptant, Ego, Egregie Adfinis, vota suscipiam pro Ecclesia reformata, ut eam Deus spiritu veritatis, & pacis, regat magis & magis. Et te quoque eidem numini commendo.

Vale



Vale diutissime, & quæso subinde nos literis  
tuis compella.

*Amstelodami,*  
clō Ioc xli. Kal.  
Decembris, St.  
Vet.

*Tuus, dum suus,*

Ger. Jo. Vossius.

CCCCXXXIV.

Danieli Heinſio.

Nobilissime & summe vir,

**D**Olet rara adeo nobis esse literarum  
commercia, collegis veteribus, & par-  
vo adeo difficilis locorum intervallo. Equi-  
dem silentii pertæsus, committere non potui,  
quin novo hoc anno ineunte, fausta omnia  
per Epistolam comprecarer tibi, filio, & filiae.  
ac simul amplissimo genero tuo. Altera etiam  
ratio scribere me iussit, satis enim diu est  
quod nonnisi per filium gratias tibi egi pro  
munere acceptissimo eorum, quæ ad N. I.  
strumenti libros adnotasti. Luculentum est in-  
genii doctrinæque tuæ monumentum; atque  
utinam Deus longam tibi ætatem tribuat, ut  
porro in istiusmodi argumento defudet in-  
dustria tua. Nec deterrere debet, quod aliis  
simile studium sit. Sic enim comparatum  
est cum scripturis, ut nullius ingenio vel la-  
bore, exhaustiri possit veritas, tam profundo  
earum puteo contenta. Semper supererit  
quod discamus: ut vel sæculum vitæ nostræ  
adderetur. Quemadmodum adversus omni-  
scios istos sæpius in vitæ extremo dicere  
solet socer meus Junius. Unum opto ut qui-  
cunque in sacra hac palæstra se exercere, & pa-  
riter alios volent, sic in ea versentur, ut tum  
veritati, quatenus humana finit infirmitas;  
tum etiam modestiæ litent, ac candori. Sed  
plerique hoc pati non possumus, qui, siquid  
alteri accesserit, decedere nobis arbitramur.  
Cum quo vitio, corrupto hoc sæculo, facile  
etiam eruditissimis obrepenti, magnis viri-  
bus decertandum censeo: ne nostrapte culpa  
male adeo audiat eruditio, ut quotidie cum  
dolore conspiciamus. Sed tristibus istis missis.  
redeo ad gratissimos labores tuos: in quibus  
dissimulare non possum, inter alia mihi fu-  
isse illud jucundissimum, quod antiquum ob-  
tineas in tuendo Erasmo, viro optime de li-  
terarum studiis merito, nec minus de toto  
sanctorum patrum choro. Quem profecto  
mihi sæculi nostri dabunt, in quo duo hæc  
æque concurrant, imo si quem vel intra mille  
annos proximos ab harumce laudem cimo  
justius prædicari posse existiment, nomen  
ejus edant. Quare etli hominem fuisse sci-

am, nec jurare semper in ejus sententiam  
velim, (quem honorem nulli hominum de-  
ferendum censeo) tamen probare eos non  
possum, qui tam irreverenter illum habent:  
parum cogitantes, quibus temporibus vixerit,  
quantumque omnis ei debeat posteritas. Ve-  
nio nunc ad tertiam hujusce scriptionis cau-  
sam. *Aviſdugy* mittere volui, non quidem  
dignum præstantissimo ingenio tuo: sed no-  
stri tamen ingenio modico non penitus, ut  
puto, indignum. Est id commentationum  
nostrarum de Theologia gentium & philoso-  
phia Christiana, in quibus. si non videar ti-  
bi & eruditissimis Collegis, operam & oleum  
perdidisse, erit sane, quod hunc foetum no-  
strum deinceps amem vehementius. Sin se-  
cus; sed nolo male mihi ominari, potius in  
voto, unde orsus sum, declinam, nempe ut  
tibi tuisque omnia hoc anno felicia exoptem:  
Imo & Collegis veteribus, quibus si occasi-  
one commoda salutem meo nomine dixeris,  
longe id erit gratissimum. Filio nob. salu-  
tem adscribi sine dubio jussisset Isaacus me-  
us, nisi eum Galliæ haberent. Vere proximo  
reducem speramus.

*Amstelodami*  
clō Ioc xlii.  
Post. Kal.  
Jan. St. N.

*Nob. & maximi nominis  
tui amantissimus,*

G. J. Vossius.

CCCCXXXV.

V. C. Merico Cauſaubono, G. J. Vossius  
S. P. D.

**Q**Uantum rationes inire valeo ejus tempo-  
ris, quo navis Anglicana hinc solve-  
bat, inter merces suas etiam deferens exem-  
plaria comelura operis nostri de Paganica  
Theologia & è naturæ mirandis manu-ducti-  
one hominis ad Deum; Jam una & altera  
hebdomas paullove amplius esse possit, quod  
tuque & Fratres venerandi acceperitis La-  
bores nostros. Sed celerius aliquanto an tardi-  
us hi vobis redditi sint, parvi duco, præ istout  
ne viris doctrinæ ejus judicii que displiceant  
illa, quæ in tot occupationibus summo nihil-  
ominus mihi labore stetitisse nequeo dimiteri.  
Nec illud solum voveoque optoque ut fratri-  
bus meis placere possint, verum etiam ut  
Clero Angliæ univ. rso. Nunc quia & senio  
& tot me adversis atteri indies video, magis  
magisque cogito de sarcinulis colligendis;  
eoque totus in eo sum, ut tam multis quæ  
habeo affecta, præsertim illis minoris molis,  
extremam admoveam manum. Et jam ali-  
quid

quid prælo tradere cecepi, de quo proximis literis. Filius meus Isaacus, quem in Anglia vidisti, jam è Galliis Italiam cogitat, ut varias lustrat Bibliothecas & exscribendo *avensæ*, ubi facultas dabitur, possit melius postea mereri de Republica Literaria. Quo desiderio sanè honesto ardet more juvenum qui (ut scis) quicquid volunt, vehementer volunt. Ego & filii & publici boni amore in hoc voluntati ejus non defum, sed plus prope ago quam fors nostra finat. Impense autem rogo, ut hac parte juves quantum possis. Scis è præbenda Cantuariensi serenissimi Regis beneficio mihi duo jam trimestria deberi: unum quod superiori Septembri, alterum quod in Decembri sequenti exspiravit. Simul inde fiat quinquaginta Librarum Sterlingicarum summa. Eam refundi velim Joanni Thuiller mercatori Londinensi, istic res agenti præstantissimi beneque de me merentis Joannis Wickefortii mercatoris Amstelodamensis: à quo filio procuratur, quicquid itineri est opus. Eo minus æquum fuerit ut eum vel hic, vel in Anglia diuturniori modo illudam. Nolim pluribus hoc negotium tibi commendare, cujus prolixam humanitatem semper sum expertus. Lectissimæ Conjugi ac Liberis, item Reverendo D. Decano & universo optimorum Clarissimorumque Fratrum Collegio plurimam à me dicito salutem.

*Amstelodami*, clb Idc xlii. Idus Januariæ stylo Anglicano. Quo ipso die ante Annos xvi. Heidelbergæ, natali meo solo, abolito Papatu, reformata fuit Ecclesia. Sed peccatis nostris factum, ut nec integro sæculo licuerit hoc beneficio frui.

*Tuus tuo merito,*

G. J. Vossius.

# CCCCXXXVI.

Georgio Ratallero Dubletio, *Senatori.*

Nob. Amplissimeque vir,

**C**UM proxime ad te literas darem, videbar mihi de exemplaribus cæteris stare promisso intra octiduum posse. Sed spatium illud pene menstruum invasit, dum Bibliopegarum unus pergit esse, qui solet, hoc est, tricobovinator, & siquid ex Lucilio amplius dicere possumus: alter vero, quem prioris vitium correcturum putabam,

morte Parentis sui, & aliis causis fonticis, nequivit, quod volebat, aut velle saltem visus fuit. Tandem tamen, ut vides, me exsolvo, & tarditatem meam facilius excusabit, quod interea non licuerit toras prodire, sed tardipes tardipedi Deo assederim assiduus, ob malum subinde recurians; quod tamen satis leniter me subinde tractavit: à publico munere avocavit, non à Libris, & dulcibus Musarum sacris. Itaque interim limavi libellum de tribus Symbolis, & alterum de Dominico Anno, Mense, Die, Nativitatis, Baptismatis, Mortis. Metuo ne illi, qui orbi me quam urbi consulere malent, hunc morbum, dummodo tam placidis me luminibus semper intueatur, subinde optent revenire. Minus auditoribus decesserit, quam lectoribus accesserit. Ut redeam ad exemplaria, quæ mitto: est in iis unum grandis forma, quod tibi mitto: sed ea, si placet, conditione, ut quod prius habuisti, alteri cedat amicorum. Cum Hagam ad te irem, in mandatis dederam Bibliopegæ, ut à Typographo etiam peteret illa chartæ melioris. Non alia tradidit, quam Hagæ vidisti. Credidi igitur non tetuisse promissis. Sed redux intelligo, tria quatuorque in charta Augusta in pressisse. Curavi ex iis duo compingi, quorum alterum putavi non ad alium quam ad te ire oportere. Nam de Anglia vel domina juniore Principe, serum est, & ut vides, nec inauratæ paginæ: quæ lenocinia attendi solent. Cellis tuum curare à famulo deferri ad Nobiliss. Archiepiscopum, qui habitat non longe, si recte recorder, à Secretario ordinum Bellimontio, apud quemdam nomine Patrem, vel ex adverso. Is Pater, ambigo, sitne Oenopola an diffusor. Quicquid est, vir tam clari nominis non fuerit obscuri domicilii. Et jam diu illi debeo exemplar, quia melius est de me meritis, quam fortasse exitimares. At mittam quod teneam multiplici promisso. Vellam ejus valetudini melius esset, sed metuo ne qui tam multa fortiter consilio & manu his teris gessit, non sat fortiter ferat injurias, quas accepit. Mitto præterea exemplar Doctori Johnsono, item alia duobus Senatoribus, Reigersbergio, Dedelioque; ac denique unum Advocato G. Grotio, qui, qua in re lo am pro me operam navavit, non ignoras. Mattheus natus in Frisia est, unde propediem reducem expecto. Isaacus Lugduni fuit in Galliis: ac puto, nunc vel Florentiæ esse, vel Romæ fortasse. Ait se auctores ejus itineris habere illustres Grotii & Salmatii animas. Sed Grotianam imprimis. Nam alter, quem in Burgundia invisit (ut ipse ad me scribit) diutius apud se detinere, quam ut haberna

hiberna tempestate tam molestum iter inflieret.

*Amstelodami,*  
cl<sup>o</sup> Id<sup>o</sup> xlii. ix.  
Kal. Febr.

*Tuus tuo merito,*

G. J. Vossius.

## CCCCXXXVII.

Jacobo Corputio *Senatori, & Scabino*  
*Reip. Dordrechtanæ.*

*Dordrechtum.*

*Amplissime Corputi, Affinis Coniunctissime,*

**B**inas à te literas accepi, in ea brevitate prolixum spirantes affectum, præcipuè in promovendo Matthæi mei negotio; quod primo etiam tibi curæ esse velim, & fore confido. Is nunc in Frisia est, nec eo, cur abierit, es ignarus. Intra triduum exspecto reducem. Isaacus meus Lugduno Galliarum, in Italiam profectus: Ac puto nunc esse Florentiæ, & inde iturum Romam. Non parvo mihi stant Liberi; sed id grave non est dum illis curæ sit erudita pietas; quod hætenus de Isaac possim dicere. A summis Britannicæ magnæ viris, præclare adeo est exceptus, ut si scribam, prope metuam, ne fidem inveniam. Idem de Galliis dixero, ubi etiam Senatoria dignitate conspicui, sed quorum consanguinei illi Junianæ, non indecoræ familiæ essent innexi, invisere eum in diversorio, non gravabantur. Magni verò etiam nominis viri, opiparo convivio dignabantur. Dixeris ista, vel Parentis, vel Avi gratia esse facta. Equidem credo, & hæc aliquid valuisse. Sed tamen plus cenfeo potuisse, quæ sibi post Scylacem editu n, post Justinum, & Geographorum aliis observata, quæ secum circumfert; in aliis etiam studiis cognitissima esse, familiari sermone comprobatur, viris non ex ima cavea. Eò lubentius habenas laxavi, ut ex magnis tot terrarum hominibus, non doctrinam minus, quam nomen auget; spero & pietatem, quæ cæteroquin rarò auctior sit per tot maria, & terras currendo. Potius gentes vitia sua affricant, quàm virtutes. Et sæpè id cogito. Solum spero profore nobis preces, quas ad Deum pro eo fundimus. Tum etiam quod ejus insatiabilis discendi cupido, animum avocabit ab infanis voluptatibus, quibus capi juvenus solet. Cum postremò, una Hagæ essemus, promisi me missurum labores meos, de paganica Theologia, & Philosophia Christiana. Tandem me promissis exsolvo, ac citius fecissem, nisi valetudo deti-

nuisset, & Bibliopegæ inertia. Geminum, ut vides, Argumentum sum complexus, quorum alterutrum satis foret arduum; utramque ego provinciam suscepi: sed an operam sim probaturus, vel edocto, è grege Pastorum, vel invido, è numero Professorum, non est curæ Hippoclidì inquirere. Miserum est pendere à malignorum judicio. Paratus sum stare, & cadere eruditorum judicio his terris, magis exterorum, maxime posteritatis. Et interea hæc cuncta parvi puto, dum Deo rationem valeam reddere, & talenti, & temporis concessi. Puto autem id mihi faciendum propediem. Nec enim tam laboriosa, in tot adversis vita, longam finit sperare ætatem. Quam neque ulterius exoptem, quam opera nostra utilis esse possit Ecclesiæ, ac Reip. Literariæ. Uxori salutem dicito, præterea filio cum nuru, genero cum filia. Adderem de juniore filio, nisi eum, ut pu o, extera adhuc haberet tellus. Longam habes Epistolam, ab homine occupatissimo. Causam, si quæras, nox erat, qua ego, omnibus iis qui de die interpellant dormientibus, Tibi mi Coniunctissime Affinis, vigilabam.

*Amstelodami,*  
cl<sup>o</sup> Id<sup>o</sup> xlii. ix.  
Kalend. Febr.

*Tui tuorumque Aman-*  
*tissimus,*

G. J. Vossius.

## CCCCXXXVIII.

Joanni Beverovicio *Senatori & Medico*  
*Dordrechtano S. P.*

**G**Audeo, vir Amplissime, Clarissimeque, non me duntaxat curæ tibi esse sed etiam meos. Mitto igitur geminam Apocham, manu Francisci mei scriptam; sed in qua spatium reliquerit, ubi nomen quæstoris scribi possit: Uti & tempus, quo salarium hoc expiravit. Neque enim defubito poterat reperire formulam, quam sequi solet: Misissem eadem opera labores nostros, de Paganica Theologia, & Philosophia Christiana: quo in opere, ter quater minimum, tui facta nobis mentio. Quid minus poteramus, te nullam negligente occasionem, testandi amoris erga me tui? Sed nolui tantæ molis opere, onerare Tabellarium. Convenientius id fiet per Nautam, proxima hebdomade. Salmatius est primo vere rediturus in Bataviam. Sic suis ad me scribit literis. Respondit jam Libello, de Lingua Hellenistica, qui absente eo produit iis terris; necdum tamen perlo submisit;



submit; nec dicere possum, utrum Lugduni, an Lutetiae Parisiorum malit edere. Non arbitror visum illi esse responsum tuum. Saltem non meminit. Mallem in editione Epistolarum mearum, pro Copriani nomine, asteriscum posuisses, vel Cyprianum scripsisses. Nolim ego crabrones suscitare, cum domi sat reperiam negotii; & malo meo abunde sum edoctus, si tales digito attigeris, omnem penè sylvam accendi. Et tamen si quid moliat feremus. *Lenit albescens animo Capillus.* Non æque lacescentes procaciter ferre potuissim, quo tempore, me doctore utebaris. Quamquam tum etiam injuriarum non eram impatiens prorsus. Sed nunc illa, quæ sæculi homines pro magnis ducunt, penè despiciatui habeo; etiam illa, quæ pertinent ad nominis decus. Sat decorum nomen, si illud scriptum fuerit in cœlis. Nec eo segnior sum futurus, in benè merendo de Rep. Literaria. Abundè ad hoc calcaria, ac stimulos subdet; quod cum non multum superesse mihi vitæ possit, prope diem ratio erit Deo reddenda talenti, quod porro etiam operam dabo, ne arguar defodisse. Optimæ Conjugi salutem dicito: uti & Colvio, præcipuo tecum in urbe Patria studiorum Ornamento.

*Amstelodami, cl. Id. xlii.  
viii. Kal. Febr.*

*Tuus,*

G. J. Vossius.

CCCCXXXIX.

Gerardus Joannes Vossius *Nob. & Præstantissimo juveni, Joanni Meurfio, Joannis F. S. P.*

JAM duo sunt menses, mi Meursi, quod morbo æger fuerim, ac hesternum demum die sacram coepi concionem audire; Uxor verò plurimis mensibus domo non extulit pedem, imo vix cubiculo: Et nunc quoque, ita male se habet, ut prorsus metuam, ne vita hæc diu illi vitalis esse possit. Quid faciam in tot adversis? Nisi ut omnem in Deo meo fiduciam reponam, qui solus novit, quid expediat nobis. Interea hæc non sinunt, ut possim pro amico capite, quæ velim. Nullum enim filiorum habeo domi, cuius operâ aliquid efficiam per amicos: sed majus ecce impedimentum; ut cætera mittam, filius Isaacus, prope integrum annum, partim in Anglia, partim in Gallia fuit, & jam Florentiam, Romam, aliaque Italix loca cogitat. Nempe ardor illi, & compellendi

summos orbis viros, & visendi Bibliothecas exteras; penè ubique totus est in exscribendis, vel ære suo comparandis MSS. hætenus ineditis; præcipuè Græcis. Collybum proximè accepimus, prius ducentorum, iterum quingentorum florenorum. Hoc plus est, quam ex stipendio trimetris spatii percipiam. Itaque mirè sudandum mihi erit, ut hoc exsolvam. Nam scœnori non lubens accipiam. Et aliud aliter pecuniam urget: quod cognoscas, huc si veneris. Quare nunquam importunius potuisti, compellere de eo, quod scribis. Animus prolixus, pro affectu eo, quod magnum Parentem sum prosecutus, sed ne ipsi quidem si viveret, morem gerere possem, etiam maximè vellem. Eo æquius est; hoc te in meliorem partem interpretari. Non plus quam est, sed minus potius, me dixisse satis videbis, huc ubi veneris. Gratias ago, pro Catalogo Librorum, quos Patrens eximius, nec unquam sine laude nominandus, bono Literariæ Reipublicæ, vel juris publici fecit, vel edendos reliquit. Præclare de publicis mereberis, si inedita minimè patiaris nimis diu cum blattis, & tinea rixari, si consilium istoc juvare valeam, faxo id lubentius, quam tu operam exposcas nostram: sanè omnium Eruditorum interest, quam maximè, ut ne in tanti momenti negotio opera cesset tua. Vale Nob. & care juvenis, & non à me duntaxat, sed etiam uxore, licet ægra admodum, salve.

*Amstelodami,  
cl. Id. xlii.  
iv. Id. Febr.*

*Tuus ex animo æternum  
amicus.*

G. J. Vossius.

CCCCXL.

*Viro Cl. Stephano Stephanio, Ger. Jo. Vossius S. P. D.*

TAndem à tui amantissimo Vossio, magni, ac veteris amoris, minutum novumque symbolum accipe: Libros quatuor de Theologia Paganica, & Philosophia Christiana, placituros confido. Cur, inquires? Quia confido affectui tuo, quo & me aliquem esse putas. Et si eloquendum, quod sentio, etiam confido exactissimo judicio tuo. Probe enim mihi conscius sum, permulta me attulisse, ad hoc opus, vel alia, vel aliter dicendo. De hoc nolim me submittere judicio hominum exiguae lectionis; quales distinguere nesciunt, inter dicta, in dictaque nostra, & aliena. Ipsi interim sibi placent, licet nihi

hil adferant, nisi millies dictum, qua sperant latere posse, quæ exscripserint. Malim igitur tui similibus placere; quia jam ab eo tempore, quo Lugduni unâ viximus, abunde memini, quam φιλομαθής, & πολυμαθής, fores. Eoque avide desidero nosse, quid de Saxone tuo fiat. Hic scriptor, & genti tuæ multum gloriæ, & tibi æternum parabit decus. Tantum ne moras ulterius necte, ne & Patriæ, & propriæ gloriæ, malè confulas. Ad me quod attinet, decrevi majora, quæ partim edidi, partim confecta, vel affecta habeo, diffindere libellis septenis, vel pluribus fortasse; eo alacrior, ad ea grandioris molis rediturus: modò Deus mihi tribuerit vitam, & valetudinem secundam. Ex pluribus intelligo Clarissimum Ravium, apud vos profiteri eloquentiæ studia. Quo nomine gaudeo: nec committes, quin permultam, meo nomine, illi salutem dicas. A fratre ejus Constantinopoli reduce Londinum, literas accepi; unde intellexi quantoperè deinceps de literarum studiis possit promereri. Ingentem enim MSS. thesaurum secum attulit. De Clarissimo etiam Laurembergio scire aveo, quid moliatur. Nec enim tam nobile ingenium cessare existimem. Illum etiam plurimâ impertire salute, ne grave duxeris. Vale summe vir, & porro amemus nos inter nos.

*Amstelodami, cId Idc xlii.*  
vi. Kal. Martias. Τάχιστα.

## CCCCXLI.

Ludovico de Dieu *Theologo.*

Vir reverende clarissimeque,

**E**N tibi literas à Ravio, Constantinopoli Londinum reduce, has incluserat literis ad me datis, uti & alteras ad Golium, quas seorsum mitto: nolui vero dimittere hanc tam commodam occasionem ad te scribendi; & eadem mittendi Maimonidem Dionysii mei τὸ μαθητῆ. Accipias tanquam exiguas naufragii tabulas. Si longiorem deus vitam ei concessisset, multa haberemus ex Talmudicis ab eo scriptis illustrata, nec pauciora pro religione Christiana adversus Judæos. Ad me quod attinet, post opus quadripartitum de Theologia Paganica, & Physiologia Christiana, ante menses plures luci mandatum, magis magisque cogito semper ætatem adfectam, vires infirmas, atque ut nihil æque mihi deficiat, quam oriam: quo permulti adeo uberi affluunt. Quare totus

sum non tam in novis inchoandis, quam perficiendis & emendandis iis, quæ antehac subsecivis scripti temporibus. Neque tam operam hanc suscepi juvenum more, ut scilicet clarius nomen explendescat, quam ut me probem Deo: cui propediem fortasse ratio erit reddenda temporis mei. Te quoque neutiquam otiosos tranligere dies, & muneris ratio clamat, & tot aurea scripta, & constans fama. Eo impentius Deum rogo, ut diutissime te Ecclesiæ ac Reip. literariæ saluum ac sospitem conservet.

*Amstelodami, cId Idc xlii.*  
idibus Martiis.

*Egygii tui nominis*  
*cultor summus,*

G. J. Vossius.

## CCCCXLII.

Jacobo Golio *Matheos & Arabicæ*  
*linguæ Professori.*

**O**Rnatissimus Ravius Londinum Constantinopoli est reversus. Literis vero ex Anglia ad me exaratis, alteras addidit tibi inscriptas, quas nunc mitto per eruditum juvenem Bloemium, nisi Romano vocabulo Florum malis dicere. Tam commoda occasione recte atque ordine facturum me putavi, si τὸ μαθητῆ filii mei Dionysii Maimonidem ad te mitterem. Gratum fore spero, imo scio, pro amore, quo vivum, non modo ut Præceptor discipulum, sed pene, ut Patrens filium complecti solebas. Cum postremo una essemus, spem faciebas brevi excurrendi Amstelod. sed non licuit nobis esse tam felicibus, ut te frueremur. Quæso quantum potes, tandem fac promissa compareant. Clarissimo & amicissimo Vossio plurimam salutem dicito, imo & veterum Collegarum aliis, ubi sic occasio tulerit; uxori tamen lectissimæ ante omnes.

*Amstelod. cId Idc lxii.*  
Prid. Id. Mart.

*Tuus totus,*

G. J. Vossius.

## CCCCXLIII.

**Q**Uadriennium & ultra est, quod in ædibus meis vidisti Maimonidem filii mei τὸ μαθητῆ Dionysii, & simul locum quemdam, ubi honoris ergo, præceptoris sui clarissimi meminisset. Quod non alio à me

E c e

ad-

additur fine, quam ut facilius memoriam refricem. Tam longo inde tempore latuit opusculum apud Typographum: qui ex re sua magis fore putabat, si non ante publici juris faceret, quam perducta foret ad umbilicum, quæ ipsi de argumento similis tituli, sed dissimilis multis partibus, sub manibus haberemus. Spero non ingratum erit munusculum, siue mei causa, collegæ veteris, & qui nulli cedere velim amore tui, quem sic semper amasti. Spero si ex Italia salvus ac sospes redierit filius meus Isaacus, etiam Cæsarem ejus visurum lucem. Interea quæso hoc sis opusculo contentus. Salutabis omnes amantes nostri: Sed quando se sponte offeret occasio. Lectissimæ uxori, à me & conjugæ salutem ante omnes. Id enim mea adscribi plane iussit. Nocte intempesta.

*Amstelod. c. Id. Ioc. xlii.*  
Prid. Id. Mart.

*Tuus æternum,*

G. J. Vossius.

#### CCCCXLIV.

Thomæ Bangio, *Professori Hebraicæ  
linguæ Hafnensi S. P.*

Quod literis tuis, vir præstantissime, tam amice me compellas, humanitati tuæ magis adscribo, quam virtuti meæ, aut in Remp. literariam meritis. Quamquam famam alicujus doctrinæ non abjicio: sed sufficit, si ut in eruditis duces non sumus, ita fortasse non agmen claudamus. Dolet, quod juvare non possum illo de Cicerone relegato & revocato. Adolescentem tamen vidisse me recordor. Non parum gaudeo munere tuo de Ægyptiorum Hieroglyphicis, multa & ejus argumenti parata habeo, quæ partem operis constituent de cultu symbolico: hoc est, tertii voluminis de Theologia Paganica; cujus fortasse jam quatuor primos libros videris. Superfunt nunc illa de plantis, ac lapidibus, idem de affectionibus in deos relatis: ac denique de statuis ac simulachris aliisque religiosi cultus symbolis. Nunc tamen aliis prælum desudat, quia juvit labores istos diffundere nonnullis ad religionem nostram pertinentibus. Cujusmodi sunt de tribus symbolis, Apostolico, Athanasiano, Constantinopolitano: adhæc de annis, quibus Christus natus, baptizatus, mortuus, & alia plusscula id genus. Nempe ætatis memor sarcinulas colligo, ut solent aliò migraturi. Dunsius mihi acceptissimus est, non solum ob commendationem tuam

longe gratissimam, sed ob suave ingenium & mirum proficiendi ardorem. Quare non patiar eum in me ullum officii genus desiderare. Tam patet illi omnis bibliotheca mea, quam si arcto me sanguine contingeret. Plane persuasum habeo virtute doctrinæque aliquando patriæ & suis prædicio & ornamento fore. Si quos huic similes, commendatione tua non indignos putabis, faciam profecto, ut intelligas, quantum tui causa, & Danicæ juventutis, præstare sim paratus. Vale vir eximie, & magno animo bene de studiis mereri perge.

*Amstelod. c. Id. Ioc. xlii.*  
xvi. Kal. Aprilis.

*Tuus,*

G. J. Vossius.

#### CCCCXLV.

Joanni Thomæ Bangio *S. Ling. Prof.*  
*in Academia regia Hafniensi S. P.*

VIX hora abierat, quod per famulam Dunsio nostro literas miseram ad te perferendas: cum ecce me compellat ornatissimus Erasmus Hammerus, ac quod me tum temporis fugiebat, cum se esse ait, qui literas Dunsio datas in Daniam sit delaturus. Subjeci me, id si scissem, aliquam etiam ejus facturum mentionem in Epistola, quam ad te exarasset. Adhæc ille, gratissimum sibi fore, si nunc quoque aliquid adjungerem. Non tamen putavi reposcendas literas, cum opere æque facili liceret alteras contexere. Neque enim soleo operose scribere ad amicos, sed prout quidque in buccam venit, ita illino chartis. Quæ sepe vix aliud præstant, quam ut jubeant amicum gaudere, vel, si Græcum mavis, χαίρειν, à quo usu vetustissimo primitus το χαίρειν nomen datum fuit. Quod ad Hammerum attinet, intra hebdomadam triennium exspiravit, quod mihi eum commendares, ac pariter Ludovicum Johannis Episcopi Othoniensis filium. Sed non videntur sic res tulisse Hammeri, ut multum in urbe Amstelodamensi foret: ut qui Musarum tibi sedem Leidam esse maluerit, & Gallias etiam lustrandas putarit: Aliter animatus notter Dunsius erat, qui jam plussculis mensibus hic degit & in vicinia quidem, cui propterea nostræ semper patent fores: omnino enim juvenem diligo, ac fore spondeo, ut cum reducem licebit amplecti, nihil non sapienter ab eo factum intelligas. Nihil vel illi vel mihi jucundius, quam ut ubi domum fuerit



fuerit revocatus, afferat secum notitiam rerum variarum minime protritaram, sed quæ fugiant, ut modestissime dicam, etiam eruditorum vulgus. Nec alius erga Hammerum animus fuisset. Amo itidem ingenium ejus & probitatem. Sed alia mens iis, quibus, credo, mos ei gerendus fuit. Interea quid refert, unde doctrinam haurias, dummodo pectus ea irrigaris? Quod quin ab Hammero pulchre actum sit, nullus dubito. Neque alio hæc tunc à me scribuntur, quam ut videas, me quidem omnia juvenis causa voluisse. Simul etiam longior sum, quia non injucundum est, tecum per literas confabulari. Quod porro etiam facere paratus sum seu Argumentum scribendi erit, seu secus. Amantibus enim vel de nihilo nascitur Historia.

*Amstelodami,*  
clō Idc xlii.  
xiv. Kal. Apr.

*Tuo nomini addictissimus,*

G. J. Vossius.

#### CCCCXLVI.

*Illustrissimo Jo. Skytte Seniori, L. B.  
in Duderoff & Gronfio, Senat. Reg.  
Suec. Cancellario Academiae Upsalensis, &c.*

**J**ucundum mihi fuit, illustrissime Domine, videre nlium tuum Benedictum, quem ob eximias animi dotes plurimi semper feci. Majorem tamen ex ejus conspectu cepissem voluptatem, nisi narasset de valetudine adversa: Cujus ergo terras alias peteret, Gallicas imprimis, coeli solique lætioris & medicis experientibus felices. Dabam operam, ut mederer salutaribus ac fortibus monitis. Fortasse fallor. Nec enim morbi causam, vel naturam mihi aperuit. Attamen vereri occœpi, ne quid sit, quod generosiorum ejus animum coqueret. Novi enim ab aliquot annis, pleraque altius ad animum revocare, quam ex magni Catonis præscripto oporteret. Vellem etiam magis imbibisset sortem rerum humanarum, nulli undique & usquequaque aridentem. Quod ne quidem expediret nobis, discipulis Christi, cum Magistro ituris per Augusta ad Augusta. Atque & hæc & alia, memini me miscere sermoni, qui nec illi erat ingratus. Locutus cum eo filius meus Isaacus in Galliis eumque sui itineris comitem optabat. Sed meus Italiam cogitabat ad visendas Bibliothecas toto orbe inclytas. Multa ex iis ex-

scribit hætenus inedita, quæ redux, Deo juvante, juris faciet publici. Ptolemæum quoque dabit multis partibus ab ingenio & antiquis codicibus emendatiorem. Geographica Scylacis Cariandensis cum notis suis jam ante biennium in lucem emisit. Proximè vero divulgavit opus posthumum fratris sui defuncti Dionysii. Est id Mosis Maimonidis Rabbiorum doctissimi: cuius de Idololatria dissertationem Latine reddidit & uberi Commentario illustravit. Isaacus vero, cum pluscula in hoc opusculum præfari vellet, recte se facturum putavit, si aliquid misceret de illustrissimæ domus vestræ affectu erga fratrem nunquam satis laudatum. Vellem Isaac meo paulo plenius constitisset de primogeniti, heu quondam, tui fortissimi juvenis excessu. Accuratus quædam dixisset. Sed ea fortasse ex illustrissimi Jacobi Skyttii literis aliquando dabit cognoscere. Mihi meisque perseverat voluntas, quacunque ratione licebit, testandi posteris, quanti faciamus excellentissimam domum vestram, tum aliter, tum de studiis præclare meritam & porro mereri percupidam. Egregiæ animæ illustrissimi filii tui Jacobi Skytte, suavissima mihi sæpe memoria occurrit, nec mihi duntaxat sed & conjugis & liberis. Quæso ne grave duxeris salute cum impertiri nomine omnium nostri. Proxima occasione ad eum scribere decrevi, lubentius etiam facturum, si ipse me præverterit. Nunc ad te, illustrissime domine, scribendi occasionem nolui negligere, eunte ad vos nobili Sueco Jo. Kreutizio, qui Galliis Italiæque lustratis, anteaque annis totis apud nos literarum studiis impensis, redditum in patriam parat.

*Amstelodami,*  
clō Idc xlii. iv.  
Kal. April.  
St. Novo.

*Illustrissimo nomini tuo, totique inclytæ familiæ devotissimus,*

G. J. Vossius.

#### CCCCXLVII.

*Joanni Cloppenburgio Theologo, Ger.  
Jo. Vossius S. P. D.*

**N**ON mediocrem mihi dolorem attulit, clarissime Cloppenburgi, nuncius de excessu communis amici, doctissimi Collegæ tui Zevecotii. Quem virum, ut ante annos viginti circiter, primum vidi, amare genium ingeniumque illud continuo cœpi. Ne-

scio quæ Suada, ut de Pericle olim dictum, in labris ejus sedebat, sic ut facile cæteros literatos imprimis pelliceret in amorem sui; nec mediocriter capiebar ejus versibus facili vena profluentibus. Quanta vero cum laude historias fuerit professus, nulli melius dicent, quam qui docentem audierunt: neque id nos ignorare ea, absentes licet, permittunt, quæ ad Tranquilli Julium observavit, & Observata Politica inscripsit. Recte sentis interiorum mihi cum eo amicitiam fuisse, neque unquam in Amstelodami hac urbe ponebat pedem, quin domum peteret recta & de studiis confabularemur, aliquando etiam querelas suas de nonnullis in sinum deponeret nostrum. Quod si serenior mens foret (nunc ea nubila ob valetudinem aliquandiu adversam) pangerem aliquid in gratiam amici; sed cum non magis id corporis imbecillitas, quam occupationes finerent, cum clarissimo Collega meo Barlæo, Philosopho pariter, Poetaque eximio, super isto egi; qui cum decima nocturna de eo à me compellatus foret, postero mane versus eos misit, quos nunc vides. Nempe unus ille optimæ viduæ & eleganti adolescenti pro nobis erit duobus: præsertim quando nec valetudo sivit, ut facerem, quod vellem, & noster ille, ut nosti, in Poesi plane dominatur. Eoque nihil attineret pannum nostrum cum illius purpura componi. Atque ista de me scio facile ornatissimæ viduæ satisfacient: dummodo tu sis facundus mentis nostræ interpres. Sanè quacunque in re vel illi vel filio possit utilis esse opera mea, nupiam sentiet eam claudicare. Pro dissertatione de baptismo pro mortuis, gratias ago. *πάλυ γε λάλισ* est questio, multumque deinceps etiam, ut metuo, agitanda. Nostram nunquam habui ut *Κυεῖαν δίδω*. Sed in alienis etiam est, quod desiderem. Tuam expendere animus est; neque enim iudicium præcipitare soleo. Quod si deinceps etiam alia ejus generis de penu tuo promere voles, & ut nunc fecisti, ad dapes tuas invitari, facile me scholico illi convivio addicam, imo, pene dicam, accessero invocatus. Amplissimo Brinkio & (ne singulos nominare sit opus) universis illustribus Gymnasii vestri vel Curatoribus, vel Professoribus, si occasio se offeret, salutem meo nomine dicito, imo & clarissimi Collegæ. Utcunque enim non aderat ista scribenti, tamen id velle non dubito.

Amstelodami, cId Ioc xlii.  
iv. Kal. Aprilis.

CCCCXLVIII.

Andræ Riveto S. P. D.

**N**ON decreveram, clarissime Rivete, quem mitto de tribus symbolis, libellum, seorsum in lucem dare; sed serenissima Regina Britannica cum prole Regia, & celatissimo Principe Arausionensi Friderico, cum filio Principe Gulielmo, in urbem hanc advenientibus, putavi & me debere tam lata die officium testari non modo erga celsissimos Principes, sed etiam erga Regiam Magnæ Britannæ Majestatem. Quorum utrumque me consequi posse existimavi, si opusculum hoc regio genero dicarem. Utinam vero tibi etiam probetur hic labor noster. Quod si erit, magis quam nunc probabitur auctori; sin aliquid improbabis, quæso facias certiorum, neque in istac solum opella sed etiam cæteris, si ea lucem viderint si deinceps. In tam densis occupationibus & illa *πάλυ γε λάλισ*, nihil mirandum sit, si quid excidat. Eo soleo studiose exquirere summorum virorum judicia, ut, vel addita editis pagella aliqua, moneam lectorem, vel in editione secunda corrigam. Decrevi edere quæ scripsi de historia Dominicæ Passionis & Resurrectionis. In quibus præcipue opera desudat nostra in conciliandis scripturis, & ex literario penu conciliandis nonnullis. Utinam propius, ut Leidæ quondam, habitaremus; sed votis istoc non fiet. Quare sic quoque operam dabo, ut pro modulo nec de sacris, nec externis literis male dicar meritis: scribam, quæ scio; quæ nescio, si hic minus potero, in schola discam cœlesti. Pro nupero ingenii tui, doctrinæque dono, gratias ago summas. Et si porro, ut confido, imperties nobis labores tuos, propediem iterum grates agam. Deum rogo, ut nos omnes regat spiritu veritatis ac pacis, quo, quatenus humana sinit infirmitas, unum sapiamus omnes.

Amstelodami,  
cId Ioc xlii.  
post Pentecostes.

Tuis æternum,

G. J. Vossius.

CCCCXLIX.

CCCCXLIX.

Andræ Colvio S. P.

**P**Ræclare Colvi, qui hæc tradet literas, nobilis est Polonus, reformatæ Ecclesiæ filius, plusculis ab annis mihi notus, nec non ob virtutis studiorumque amorem pergratus. Is menses aliquot in urbe vestra sedem figere decrevit; velim igitur, ut auxilio & consilio juves, partim cogitando de domicilio, ubi honeste habeatur, partim etiam (quando molestum non est homini tam occupato & privatis & Ecclesiæ negotiis) pauxillum confabulando. Atque utrumque horum etiam peto ab egregia Beversvici anima. Pene scripsissem super ea re etiam ad communem hunc amicum; sed quid attinet isthæc iterare, quæ ex literis hisce ipse etiam possit cognoscere? Satis es expertus nulli in literis scribendis Romanum Lentuli magis nomen convenire quam mihi. Quid mirum? absque noctibus esset nihil à me expectare deinceps possit Resp. Literaria. Nunc, quod amici de die eripiunt, de somni tempore decido. Quare propediem, ut puto, aliquid nostri conspicias: in his libellum de tribus Symbolis, Apostolico, Athanasiano, & Constantinopolitano, quod Nicenum etiam nuncupari solet, quia Nicenum comprehendit. Sed tibi, tam amico capiti, irasci si possem (cujus ne causam quidem præbui in pueritia, et si ea ætas valde cerea ac lubrica) nunc sane vehementer succenserem quod non sequaris exemplum nostrum in bene etiam de posteris merendo. Quod nequitiam scriberem nisi quantum valeas scirem. Occupationes quod prætexas, aliquid, & nihil est; vires si eas tibi neges, alium quæras cui persuadeas. Cave igitur, ne cogar suspicari, placere tibi, ut cum gentili loquar Poeta, antiquæ sacra Vacunæ & Vacinales focos. Plurima salute impertias Consularem Wittium & affinem ejus Vivienum, ac pariter lectissimas conjuges; ut taceam tuam, & Bevervicium meum. Abunde salutigerulum feci, quare desino.

*Amstelodami, clb Idc xlii. eo die quo æstatem incipere non uno loco proditum Plinio.*

CCCCLI

Georgio Ratallero Dubletio, Ger. Jo. Vossius.

**Q**uantum video, nobilissime Dubleti, de Junio, ut Hagam is veniat, spissum est negotium. Fuit his diebus mecum, sed negat se ab Oxoniensi Comite posse avelli: nec Hagæ alterutri quicquam esse negotii. Huc tamen cum Comite venturum, simulac de Reginæ Britannicæ ad nos protectione facti erint certiores. Interea Hoofdius prope impatienter urget ut sibi tradantur, quæ una cum libris fuerant transmissa. Et hoc sine tradidit mihi apocham; ut constet, suo huc ea mitti periculo. Nihilominus hoc agendum, ut *κειμήλια* illa qualiacunque fido tradantur homini: ut ipsi in simili negotio nobis fieri vellemus: de quo frustra ad te, in quo dubium, utrum probitas, an prudentia præcellat. Accepi literularum aliquid à filio ad te quod mitto. Ac paulo post etiam alteram accepi Epistolam, unde liqueat quineto Aprilis etiamnum fuisse Florentiæ; paucis vero diebus Romam iturum. Totos pene dies in Bibliothecis delitescit, & describendis scriptoribus Græcis hætenus ineditis occupatur: optat se centimanum Gyan, ut eo beatius redeat domum cum *ἀνεκδότων* thesauro. Nunc enim solum se non sufficere tam multis describendis, nec unum invenire Florentiæ Græcè gnarum, vel saltem cujus opera in hoc negotio iusto pretio uti valeat. Quare subinde se tristibus oculis intueri multa & præclara reposta, quibus videndis profecto nulla deinceps affulgebit occasio. Retuli filii mentem matri. Illa nihilominus malit filium redire bimanum quam centimanum: qualem se negat peperisse, & tali conspecto ait, vel oculos clausuram, vel latebras quæsituram, ut solent, qui necdum ære lavantur. De studiis nostris si quæris, totus in eo sum, ut veteres relegam Chartas, atque inde seligam, quæ posse lucem ferre arbitrabor. Est vero tanta eorum turba, quæ jam cum blattis & tineis rixantur, ut edendis (limam enim desiderant) vix decem anni suffecerint. Longe enim eorum numerum exsuperant, quæ hætenus in manus hominum venire passus sui. In hisce igitur ad incudem revocandis, tantum sudo, quantum sinunt, qui assidue interpellant. Amplissimis viris, Reigersbergio, Dedelioque salutem plurimam.

*Amstelodami, clb Idc xlii.  
iii. Kal. Maias.*

CCCCLI



CCCCLI.

Georgio Ratallero Dubletio, *Senatori*  
*Cur. sup.*

Nobilissime, amplissimeque vir,

**I**ndolui vehementer, postquam ex eo, qui tuas mihi literas adferebat, intellexi de excessu optimæ adfinis tuæ: nec enim antea id cognoveram, neque tam id literæ tuæ significabant, quam huiusmodi quid innuebant, fortassis, quod aliunde malles me percipere id, de quo non scribere modo sed cogitare etiam foret permolestum. Ac sortem quidem defunctæ nemo sapiens lugebit. Quid enim certius, quam vitam hanc plus aloes habere quam mellis? Ego si multos ante annos defunctus forem, quot adversa non vidissem! Sed doleo vicem optimi & præstantissimi affinis tui: qui nescio an facile alteram ejusmodi vitæ comparem sit reperturus. Interea temporis eam quoque provinciam minus difficilem reddet; quod ni fallor, unica solum proles relicta & in re tanta. In hocce verò luctu, ut confido, eum se præstat, quem semper cognovimus: pectoris nempe bene præparati quamvis ferre fortunam. Quam ad rem vehementius etiam incitare eum debet Gentilis & affinis sui exemplum. Cujus tanto iustior fuit dolor, quanto molestior multiplicis adeo ac tenellæ proles educatio; sed nulla esse tanta tristitia debet, ut animum, non dico, commoveat, sed de statu dejiciat. Frustra hæcenus studiis & sacris & externis operam dedimus, si hoc non magnam partem ex iis hausimus, quomodo medela debeat fieri animis ægrotis; imo illud etiam qua ratione consequamur, ne animus multum diuve moveatur adversis, id erit, si mens ad omnem sit eventum præmunita. Nam tela, quæ prævisa, ea vel amictu evitamus, vel levius saltē ferunt, ut dici solet: Atque ista scribenti venit in mentem, si tute, qui tam fortia verba exaras, cognosceres nunc filium dulcissimum quem ante biduum Florentia (ubi tantum temporis, partim musis conferendis, partim *avenditoris* exscribendis, impendisse nosti) saluum ac sospitem venisse Romam: literis ipsius edoctus gaudebas, Si inquam eumpe nunc tristi fato excessisse audires: nonne ea res omnem illam, quam sic prædicas, sapientiam facile expectaret? Ego mox omne tam triste abominare, eo facilius, quia omnia, ejusmodi quidem, flocci facio. Huic cogitationi pauxillum insilens, non alio animo, quam ut me ipsum excuterem (valde enim difficile est illud γυνῶσι στανόν)

ut pugnantes videas affectus, risi & ingemui. Denique in eam mentem sum adductus, fore me non imparē fortunæ, per gratiam divini spiritus, qui non tentat supra vires. Quorsum, inquires, ista tendunt? Nempe, ut ostendam, omnia nos nobiscum antea revolvere debere, quæ valeant obtingere in hac vita; si nihil eorum, quæ metuemus, usu venit, lucro reputabimus; majores etiam Deo gratias agemus: sin secus, animo erimus præparato: sed noctuam Athenas, qui ista scribam. Mitto tibi exemplar opusculi de tribus Symbolis: quod gratum erit, ut omnia nostra. Addidi alterum, Amplissimo Reigersbergio, tertiumque affini tuo Dubletio, quem plurimum meo salutes nomine, rogo, uti & senatorem collegam, quem dixi. Mitto & alia exemplaria: sed de illis curæ futurum cognato Brunæo: in his unum cedit Doctori Johnsono, aliud equiti Zulichemio, tertium D. Riveto: quartum equiti Wickesfortio: quintum consulari Conradino Burgio; sextum ipsi cognato. Vix scripseram ista, cum in mentem venit, de nob. Boswello, Dedelio, Catfio. Quare & ista tibi destinavi; sed conditione ea, ut si voles, non per tuum id famulum fiat, ut recipiant, sed per Brunæum nostrum. Tantum monendus erit, vel potius significabo, ut ipse domum veniat tuam.

*Amstelodami,*  
clō lxx xlii.  
Non. Quinct:

*Tuus tuo merito,*

G. J. Vossius,

Cum ex literis affinis meæ Brunææ cognoscerem filium ejus ægrotare, consilium mutavi, omniaque ad te exemplaria misi. Si meliuscule valuerit, tuam poterit domum arcessi, per famulum, ut levet tuum illum labore discurrendi per urbem ad exemplaria tradenda. Omnia tuæ prudentiæ committo, qui facies, prout maxime tibi erit commodum. Prænomen Domini Dinglei, imo vix nomen sciebam. Id exemplar procurabit Doct. Johnsonus, ad quem de eo scribo.

CCCCLII.

Merico Casaubono.

Reverende clarissimeque Casaubone,

**J**A M facile cum animo tuo æstimare potes, cur has ad te literas scribam, nempe quia ex beneficio Regio mihi annumerandæ sunt libræ

libræ sterlingiæ quinquaginta. Nisi forte quadraginta duntaxat; nec enim, qui tam longe absum, scire possim, ecquid nunc etiam decidi oporteat de summa. Filius meus Isaacus post visas & lustratas Gallias vel potius bibliothecas cum viris doctis, in Italiam quoque abiit. Florentiæ tribus circiter mensibus substitit, ubi imprimis eum detinuit bibliotheca Medicæ. Unde multa *dividenda* se descripsisse filius pene dixerim gloriatur. Inde Romam abiit, præsertim propter Vaticanam. Neapolin etiam accessit, ubi illam lustravit, quæ Jani Parrhasii olim fuit. Romam inde rediit, ubi etiamnum erat ante hebdomades ternas, ut ex ejus literis cognosco, sed primo die, quo æstus aliquantum remiserit, ait se Venetias iturum. Hæc sine majusculis impensis fieri non possunt. Quocirca rogo, ut cura tua citra longiusculam moram (modò ullo pacto sic res vestræ ferant ut confido) mercatori Hoofdio annumerentur pecuniæ ante memoratæ. Id ego in hoc rerum mearum statu beneficii loco sum habiturus. Quin nostra de Theologia gentili & Physiologia Christiana jamdudum acceperis, minime ambigo. Quod vero ab tam longo tempore nihil acceperim responsi, id ego nulla fieri negligentia arbitror, sed ob rerum Britannicarum statum præsentem, qui animos vestros in rebus, quæ infinitis partibus sunt majores, defixos & suspensos tenet. Quod unum valeo, id volo, nempe assiduo ut preces fundam ad Deum pro sereniss. Regis Regique familiæ ac universi regni incolumitate. Augusta Regina ab Amstelodamensibus nostris magnificè excepta. Qua occasione & ipse gratulari volui libello de tribus symbolis, quem idcirco dicavi juniori Araulionensium Principi, non tam ut principis inclyti filio, quam ut genero Regio. Mittam prima occasione. Multa & alia habeo editione prope parata; sed ita à mane usque ad vespèram interpellor, ut non decuplam ejus valeam, quod possem, si in prædium aliquod me abderem ad menses pauculos liceret. Facimus tamen, quod valemus, cujus rei indicia & alia aliquot conspicias brevi, modo Deus vitam & valetudinem concesserit utrique nostris. Id Deum oro, si salutare nobis. Plurimam dicito salutem lectissimæ conjugis & Reverendo Domino Doctori Decano, & universo reverendorum fratrum collegio. Quia ab his xii. annis, quo una eramus, è collegio venerando, & fatum aliquos abstulit, & publica utilitas ad majora transtulit, scire aveo, quibus cum nunc fratribus hoc decus quodammodo habeam commune, & an adhuc vita fruatur optimus Dr. *Angan*: cujus

subinde inter alios mihi memoria occurrat.

*Amstelod.* clō lōc xlii. iii Kal. Sext. Quo die olim Londini religionis ergo combustus Rombertus Barends, Anglus, Sac. Theologiæ Doctor, cujus extat liber de Pontificum vitis. Anni nunc sunt cii.

*Tuus æternum,*

G. J. Vossius.

### CCCCLIH.

Joanni Friderico Gronovio *Hist. & Eloquentiæ Professori.*

Quas clarissimo Freinshemio literas inscripseras, confestim curavit, & nunc responsum ejus mitto. Video virum esse optimum doctissimumque, semel iterumque una fuimus, excepto quod non unà essem, cætera læti. Literas ab Isaaco meo jam binas accepi Roma, spero intra trimestre denuo affore nobis. Grotius Riveto fusius, sed una alteraque pagina Laurentio respondit. Nunc uterque responsum parat: porro Riveti illud jam excuditur ab Elzeviriiis. Polyænum mitto & unà Grosippum, unde colligo cogitare te adhuc de re nummaria. Utcunque ex literis tuis intelligam, quantopere distinear, confido tamen fore brevi, ut aliquod ejus argumenti in lucem des. Si quid ultra ex mea bibliotheca tuis possit inservire commodis, exposce. Paratior ero ad mittendum, quam tu ad petendum. De Salmasii reditu nihil certi potui cognoscere. Puto etiamnum Divione esse. Plurimam salutem doctissimis collegis dicito.

*Amstelod.* clō lōc xlii. xvii. Jun.

*Tuus totus,*

G. J. Vossius.

### CCCCLIV.

Joanni Rave, *Eloquentiæ Profefs. S. P.*

PRæclare Rave, si quis alius in adolescentia jurare in singulas Stagiritæ nostri sententias soleat, eum me fuisse commemini. Neque hoc animi mihi tantummodo fuit septennio illo, quo sub magistris acutissimis ope-

opertm darem differendi disciplinæ, & universæ sapientiæ ac prudentiæ studiis, donec tandem supremâ in illis laureâ non indignus judicaret; sed biennio etiam post, cum Aristotelis *Ἀρεταματικῆς* in Leidensi Lycæo publica auctoritate enarrarem. Quum plurculis etiam annis postea hoc animi permanfit, sed paulatim veritatis luce adactus confiteri cœpi, aliqua divini viri repertis addi, aliqua etiam melius dici posse, idque non modo in philosophia ipsâ (quod in scientia naturali etiam Hypsê cæciori clarum esse arbitror) sed in ipsâ quoque *ἑρμηνευτικῇ* & *διαλεκτικῇ*; quibus duabus omnem differendi disciplinam veteres complectebantur. Placet igitur, quod à Plinio ad Cænium scriptum video. 'Sum ex iis, qui mirer antiquos, non tamen, ut quidam, temporum nostrorum ingenia despicio. Tuum sane amo, & exosculor: cum ob ea, quæ aliis in studiis elaboras, tum ob reperiata ista in rationis disciplina: quæ non possunt non amari ab rationis amantibus. Quod si forte ea res invidiam creat, forti hoc animo devorandum. Sin iste dissensus etiam offendit bonos, & qui aliquid possunt, istum errorem quadam arte ut corrigas elaborandum. Nempe ne publice è cathedra aliud doceas, sed sententiæ tuæ arbitrum facias orbem literatum scriptis eruditis; ita non erit, quod, qui adversantur, dicant, minus à te in cathedra impleri munia, ad quæ sis vocatus, imo erroribus imbui auditores: & paulatim tamen ex monumentis ingenii doctrinæque tuæ veritas elucebit, quibus dum undique applauditur, futurum confido, ut quos nunc maximè habes adversos, pedibus in tuam concedant sententiam. Valde autem placet, quod hæc studia sic tractes, ut ostendas sectari te veritatem, quæ carior esse nobis debet, quam ipsi nobis sumus: & interea etiam litare te Modestis, quæ cum ubique sectanda, tum imprimis locum habere debet iis in rebus, quæ elegantioribus ingeniis vere sint animi pabulum, non tamen istiusmodi, ut inde vel animarum salus, vel vectigalia populi dependeant. Pluribus nunc colloquerer tecum, nisi præstantissimus frater tuus, quem ob præclaram eruditionem, præsertim orientalium linguarum scientiam multum amo, pro viva sit Epistola futurus. Ex eo igitur, quicquid ad res nostras pertinebit, ubertim cognosces.

*Amstelod. cl. Id. xlii.*  
Pr. Kal. Quint. St.  
Gregoriano.

*Tuus totus,*

G. J. Vossius.

CCCCLV.

Georgio Calixto.

*Helmstadium.*

Clarissime ac summe vir,

**C**UM omnis doctrina, vel divina sit vel humana, hæc ad Deum ducat, illa perducatur: recte me atque ordine facturum hoc tempore putavi, si opus conderem, quo ex utroque facerem cinnum, sive ut Græci dicunt, *κινεῶνα*. sed sic, ut præcipuè versarer circa humanam, quæ gestorum historiam & notitiam naturæ comprehendit; unde ad doctrinam divinam, illam pietatis nempe, sive Christianæ fidei, & vitæ præcepta, ascenditur. Hujusce laboris nostri, satis operosi, pro mole quidem occupationum, quibus distineor, exemplar mitto lubens meritoque. Nec ingratum fore confido. Addidi opusculum de tribus symbolis, & Maimonidem *ἱερομαργίτου* filii mei Dionysii. Item pænegyricum Matthæi mei illustrium Ordinum historiographi & Amstelodamensis bibliothecæ Præfecti. Pene addideram volumen ingens de Arte Grammatica; sed metuebam, velle hoc viderer, ut ejus lectione repuerasceres: vel etiam hoc agerem, ut avocarem ab labore indefesso, quo & voce & scribendo divinis vacas, veritatis pariter ac concordie assertor. Sed Grammatici illius laboris loco, alia gravioris argumenti expectata, modo Deus vitam ac valetudinem concesserit. Horneio præclaro philosopho ac Theologo plurimam à me salutem dicito.

*Amstelod. cl. Id. xlii.*  
xv. Kalen. Quintiles.

*Tui nominis estimantissimus,*

G. J. Vossius.

CCCCLVI.

*Illustri V. Joanni Skytte, Baroni, &c.*

Illustrissime Domine,

**J**AM spero literas acceperis, quas iv. Kal. April. dederam Nob. juveni Jo. Kreuzio. Ut denuo scribam, bella facit occasio, eunte ad vos V. clarissimo Jo. Freinshemio, quem Historiarum & eloquentiæ in Upsalienti Acadetnia Professore constitutum, & ante ex aliis intellexi, & nunc ex ipso audeo, gaudeoque. Atque hoc omne, præclare literarum ac literatorum Mæcnas, Tui unius est beneficium, qui & de præstantissimo Freinshemio,



Freinshemio, atque ejus familia, & de Academia patria atque adeo omni Rep. literaria pulcherrime mereri voluisti. Hæc & fidentius scribo, quia mihi & ex sermone & tot ingenii doctrinæque monumentis & aliorum etiam summorum virorum judiciis, vir hic notissimus est; dignissimus sane, quicum vel in tenebris mices, & ea ingenii elegantia, ut non facile posthabeam cuiquam; inque scriptoribus antiquis ingenio tam subactō, ut his & vicinis terris hætenus se omnibus probarit ea in palæstra versatis. Sane multa sunt, qui prima facie quantivis pretii videntur, sed si introspicias, comperimus secundum veterem adagionem, pro thesauro carbonēs. In nostro hoc contra est, qui longe plus habet in recessu quam in fronte promittat. Neque unius hoc mei judicium est. His paucis diebus locutus sum cum multis, qui uno ore omnes, ut indefessum laudant tuum studium in bene merendo de literis, ita & prudentiam extollunt in hoc viro è literatis seligendo, qui familiæ Skytitanæ, sanè illustrissimæ, si fieri potest, lucis aliquid addere porro apud posteros, & ornatissimus ipse ornamento esse, licet longè ornatissimæ, diu noctuque conabitur; & si Deus longam illi vitam ac valetudinem, quod velit, etiam poterit. Nihil attinet plura de Clariss. viro addere, qui eā est modestiā, ut si ista à me scribi sciret, verecundius tanto Heroi literas offerret nostras. Metueret scilicet ne ex compacto, hoc fieri suspicari posses: verum ne ille quidem scripturum me scivit, nisi cum jam nauta abitum pararet. Quæso ubi occasio erit, salutem dicito generoso filio Baroni Jacobo Skytte, volo enim ut sciat, me memorem esse sui, neque me solum, sed omnem familiam meam: à qua itidem salutem adscriberem, nisi hoc ipso mane Ultrajectum se cum aliis amicorum contulissent.

*Amstelodami,*  
clb lxc xlii. iiii.  
Non. Quinct.

*Illustrissima familie tue*  
*æternum devotus,*

G. J. Vossius.

#### CCCCLVII.

*II. Hugoni Grotio, Legato Suecico ad*  
*Regem Christianissimum.*  
*Lutetiam Paris.*

**P**OST perlongi temporis moram, Illustrissime Domine, ad officium iterum redeo. Binas Excellentie Tuae literas accepi; quarum priores exaratæ, octavo die Aprilis:

iis Saberium commendabas: ac placet, tum ingenium elegans, tum varia eruditio. Allocutus est Eruditorum complures; in his etiam Cl. Rivetum. Is commendavit Illustri Comiti Rhenensi, ac tantum videtur effecisse, ut præfutura sit ejus Liberis, ac præter victum habiturus sit centum Imperiales. Gaudet Domina Comes, se opera Domini Riveti, nactum juvenem modestum, doctum, & quidem reformatæ Religionis. Nam inquit, metuebam, ne cum maritus sit confessionis Augustinæ, quempiam præficeret Lutheranum. Sed denum Augustio mense est futurum, ut in Ædes Dominae Comitris, marito in castris agente, recipi possit. Nunc ea cura mordet Saberium, ne interea Lutetiam Parisiorum scribat Rivetus, & qui Eccl. statum, illi degunt rescribant, de quopiam incautius sibi dicto factore. Utcumque erit, nec ego, nec alii hujus urbis, patiemur cum quicquam in nobis deliderare. Alteræ Excellentie Tuae literæ scriptæ fuerunt x. Maii; ex quibus intelligo tandem Excellentie Tuae traditum esse opus nostrum, de Theologia Paganica, & Scientia Naturæ. Id ego jam compactum dederam, ante menses per multos illi, qui Lutetiæ distribuit libros à Blauwiis editos. Hic enim erat tum temporis. Simul mandabam, ut postquam in Gallias rediisset, adderet pro amico, cui dare velles, ex incompactis exemplar quoddam, vel etiam geminum. Item hlio Isaac, tum adhuc agenti Lutetiæ, minimum duo Exemplaria, & si plura exposceret etiam tertium, quartumve. Sed non multo post, Epistolam à filio accepi, unde intelligerem dolere illi, quod ante abitum non potuerit eos codices nancisci; quo gratum animum erga benè meritos testaretur. Quid iis Exemplaribus factum sit, exquiram ex Blauwio. Sic enim non Blauwiis nunc scribendum mihi, fratrum eo, qui junior erat, paucos ante menses defuncto. Magis ea res obesset Reip. literariæ, nisi fratrem propemodum ex asse hæredem fecisset. Absque eo foret, qui superest, impar esset sumptibus faciendis tantis. Quippe ut mittam cætera, Typographiæ ergo, alit quotidie supra homines xl. Utrum præter compactum exemplar, etiam acceperis unum, plurave incompacta, non potui ex literis Excellentie Tuae cognoscere. Si neglectum Bibliopolæ, petat famulitii aliquis; facile ei in memoriam revocabitur, quod me præsentē, stylo æneo, in charta deletili scribebat. Probè etiam Blauwius, & famulus ejus meminere, quibuscum de eo sum locutus, ubi literas Excellentie Tuae accepi; & nullam ejus rei in iis vidi mentionem. Ea quæ scripsi proximè

F f f

Excellentiæ

Excellentiæ Tuæ, probari valde gaudeo: Quod verò etiam laudibus extollas, planè triumpho. Quamquam nullius Suada possit esse tanta, ut quas mihi laudes tribuis, eas mihi arrogem. Ac tam lævam mentem à numine deprecor. Interea excessus iste amoris, in prædicandis meis, solatur me non parùm, cum alii sic depretiant, ut nec iustas laudes concedant. In quibus ille, qui Flando inanes glorias, satis docet, cujus sit gentis. Misi illi per amicum nostra, cum filii Maimonide. Rogatus, an nihil vellet rescribere? negavit, sui moris esse rescribere, nisi prius legisset. Bellè hæcenus. Post menssem literas accipio. Ait sibi gratos esse hos labores, uti alios nostros: Cæterum iudicium non apponere, quia non soleat iudicium ferre, nisi opere integro perlecto. Perlegerit credo ad Kalendas Græcas, ac iudicium tum expectabo; quod perscribat, an minus (dicam cum Comico) cicum non interdum. Quæ ad N. T. adnotasti, quanto studiosius versò, tantò magis exosculor, ac stupeo prorsus. Nihil hæcenus tale, vel tantum prodiit. Sanè inimici de iis tacere, quam vituperare illa malunt. Sed tria sunt, quibus sic eos offenderis, ut nec fullo ululam odisse pejus possit. Primum est, quod Papam negaris, illum Anti-Christum. Ac Tuæ quidem Excellentiæ propositum illud video, ut facilius coalescat Ecclesia misere adeo scissa. Illis verò hoc studium, ut quantum pote abhorreant omnes ab Ecclesia Romana, arctèque sibi adhæreant. Itaque multi existimant, expedire ut credatur Anti-Christus; nec opinionem eam evellendam animis, utcumque falsa foret. Optimè Barucephalum nosti, Dordrechtanum illum concionatorem. Nam vere id erat, si Tullii more, concionatoris utendum vocabulo. Is amicè à me monitus, nè in concionibus tribueret Pontificiis, quæ nulli eorum non vehementer improbarent. Ille querere, num ego patrocinium suscipere vellem Papistarum? Respondi alia esse satis multa, quæ verè possent culpari; nec veritatem egere falsis: Nec posse eum unicum Pontificiorum producere, qui sic sensissent; me sexcentos allaturum, qui contrarium docerent. Ad incitas redactus, torvo vultu dicere, neminem posse satis fœde Romanæ Ecclesiæ doctrinam coram populo depingere, ut magis eam abominetur. Non multum abludit oratio eorum, quibuscum sum locutus Amstelodami. Cui, inquit, bono, ulterius non haberi pro Anti-Christo, quam ut plures quotidie deficiant à nobis ad Romanam Ecclesiam? Quali non abundè eorum sit, qui hoc faciunt, rerum suarum satagentibus apud nos

Pontificiis Doctoribus; nostris plerisque omnem penè fiduciam reponentibus, partim in acerbioribus Magistratus adversus Pontificios edictis, partim in eo quod se frigide, etiam causam suam agentibus, obloqui liceat nemini. Alterum quo asciam in crura impegerris, ipsimet esse aiunt, quod omnes errores Papistarum, vel defendas, vel excuses. Magnam partem hæc eorum opinio inde originem trahit, quod Papisticum credant, coque erroneum, quicquid non conveniat Doctoribus suis. Dicere soleo, *ἀναδίστασθαι τὰ ἀνὰ τὴν οὐρίαν*, tria distingui tempora oportere, *Conformationis*, quæ in primis sæculis, quod ad multa etiam in consecutis: *Deformationis*, quæ jam ante etiam Successorem Gregorii M. Bonifacium (intermedius enim Sabinianus solum quinque mentibus sedit) in nonnullis esse cœperat; sed seu Tyrannidem, seu superstitionem attendamus, à temporibus Hildebrandinis, magna imprimis incrementa cœpit: *Reformationis*, cum & optimo, & doctissimo quoque tam Tyrannidis. quam Superstitionis pertæso undique, emendatio Ecclesiæ exposceretur, varique exulceratæ Ecclesiæ medicinam adferre conarentur. Sed plerique non sat iusto pretio antiqua tempora æstimantes: unde *αἰσθητικὰ* quadam, non ea modo rejecere, quæ à deformatis erant temporibus, sed etiam cum Apostolicis traditionibus nihil non (ut sic dicam, quando Conformationis voce uti cœpi) conforme traderetur. Jure igitur Excellentia Tua negat, alba omnia linea signari oportere, quæ Reformationis Authores immutarunt; cum non ea modo plerique sustulerint, quæ à deformatis erat temporibus, sed etiam, ut sic dicam, conformibus: hoc est Apostolico tempore convenientibus. Tercium cuius ergo sic bilis turgat, est isthoc, quod seditiosos dicas, qui Genevensi imprimis Ecclesiam sequuntur; & Calvinum, non dubites, ut crudelem incescere. De priori aiunt, te præcipuè tangere, tum Anglos, sive potius Britannos reformatos, tum Belgas fœderatos, & in his Amstelodamenses. Quod ad Britannos, plerorumque iudicium est, rectè fieri, quicquid hæcenus ab iis factum. Nam Regem esse definere, qui Supremo Regi non paret; non parere autem, qui vel Papista sit, vel papizet; papizasse vero hæcenus Ecclesiam Anglicanam, mox ab excessu Henrici VIII. cum Edvardus Ecclesiam reformaret, licet iudicio eorum, qui flos Theologorum credebatur; nec suorum omnia iudicio meliori vellet, sed externam etiam opem exposceret, in hac Buceris ac Martyris; è quibus jam tum Bucer non satistecit Calvino: Et qui Calvino adhærerent, Bucerisimum

cerissimum vocabant, si qui Calvino non consentirent; ac qui Bucero faverent, novum credebantur Papissimum, quasi dicerent Calvino-papissimum, vel Lutero-papissimum introducere. Bucerus non poterat ferre vehementiam Calvini, quem optimè norat ex quo Argentorati una vixerant, & melius nosse didicit, ex quo Genevam revocatus. Accusare igitur ejus (quo jure melius me scias) maledicentiam maximam, & quod dissentientes non ferret, sed durè adeo, asperèque persequeretur, sic ut etiam fratricidam, uti lego, nuncuparet. Calvinus sic à magno viro increpitus respondere; hæc esse genii potius sui, quam judicii; & (ut Calvini ipsius verba, ad Bucerum retineam) sic scribere, *Ut verum fatear, nulla mihi cum maximis, & plurimis viris meis, difficilior est lucta, quam cum ista impatientia; neque certe nihil proficio, sed nondum id sum consecutus, ut belluam planè domuerim.* Hæc sanè satis modestè, si id postea consecutus. Illud verò concoquere non potuit, quod idem Bucerus, qui cum vel norat, vel nosse putabat, non veritus esset scribere; *Judicas prout amas, vel odisti; amas autem, vel odisti prout lubet.* Quod cum legisset, literas scripsit, quarum hoc initium. *Cum literæ tuæ mihi sub cænâ allatæ essent, tanto gaudio perfusus fui, ut non meminero tribus totis mensibus, letiorem mihi horam affulsisse. At cum eas super cænâ, utcumque percurrissem, lectione ipsa, sic fui flagellatus, ut proxima nocte irrequies semper æstuarim, nec toto post tri-duo fuerim apud meipsum, &c.* Traducebant Calvini amici Bucerum, quasi novum Papissimum erigeret; nempe uti de tua dicunt Excellentia, interpolatum te Papissimum exhibere. Bucerum negat, à se hoc nomine accusari Calvinus. Sed optare tamen, ut ne causam præbeat calumniæ, dum sic mediam Excellentie Tuæ instar insilit viam. Quod cum ex cunctis ejus pateat scriptis, tum præcipuè, à forma reformationis, præscripta Hermanno Archiepiscopo Colonienfi; & illis quæ Anglicanæ Reformationis ergò scripsit. Cum vero Bucerus propius ad Romanam Ecclesiam accederet, quam Lutherus; Calvinus longius ab ea abiret, quam idem Lutherus; extra Lutheranismum, duæ ortæ Appellationes, Bucerismi, & Calvinismi: & fatabatur Calvinus, Bucerissimum esse magis tolerabilem, quam Calvinissimum, si non ad obrusam Scripturæ rem exigi oporteret. Nunc Bucerum paci nimium dare, se omnia metiri veritate. Sed Calvini verba audiamus. *Frustra mihi excusas, novo Papismo erigendo (quod nempe Excellentiam Tuam aiunt facitare) te non studere; sed vellem aliis omnibus, sic exploratam*

*esse puritatem tuam, ut ne suspitionis locum relinqueres. Frustra etiam id te dare operam nequid Calvinismi admisceatur. Si à scripturâ semel deflectendum sit, non ignoro, quum sit tolerabilior Bucerissimus, quum Calvinissimus, &c.* Bucerismo Excellentiam Tuam magis favere, quam Calvinismo, res clamat; Atque hæc, si Scripturis non repugnet, magis tolerabilem esse Calvinismo, agnoscebat ipse Calvinus. Solum igitur quæstio oritur, An Bucerissimus ei magis obversetur Calvinismo? Facile esset cuivis, hanc decidere Controverliam, nisi Scripturæ etiam possent malè intelligi à Calvino, & eum sequentibus. Puto igitur operæ esse videre, quomodo eas intellexerint Veteris Ecclesiæ Doctores. Quod si fiat, sine dubio, vicerit Bucerus. Existimo autem rem facturum non inutilem, qui ex Buceri scriptis colligere velit, quæ ad Controversa Dogmata, & Concordiam Ecclesiæ pertineant. Sed consulendæ sint Editiones illæ, quas nobis Germania produxit; non quæ ex Sententia Calvini castratæ, prodierunt Genevæ. Exempli gratia, Commentario in Psalmo II. sic habet Argentoratensis Editio Anni clb lxxix. *Non possum non sanum judicium optare quibusdam, qui hoc nostro sæculo plurimos admodum turbant hoc paradoxo; sola nos fide servari. Cum viderent tamen hoc corapi, ac si justitiam sola animi existimatione, finirent, & bona opera secluderent. Quæ jam illa Charitas, quæ huic malo, uno verbulo mederi dedignetur? Fide formati justificamur, aut per fidem bonorum Operum, voluntatem, ac ita justitiam consequimur. Aut fides, fundamentum, & index est juxte vitæ, ut Augustinus dixit. Neque veris enim quisquam est offendendus, &c.* Ubi pro hisce, sic habet Editio R. Stephani quæ Anno prodiit clb lcliv. nempe triennio à morte Buceri, decennio ante mortem Calvini: *Nemo gravari debet; cum videt offendi homines, quod sancti dicunt, Nos sola fide salvari; adjicere vivâ, formatâ, per dilectionem efficaci, aut quid hujusmodi. Nam qui offendantur hoc dicto, putant eos, qui illud usurpant, justitiam in inanibus animi cogitationibus collocare, bonorum operum studio tanquam frustraneo repudiato. Ut igitur ne veris quisque offendendus est, &c.* Cum vero omnia fere Buceri, sint moderatissima; tum imprimis, præfatio in Commentarios super quatuor Evangelistas, in Editione Argentoratensi Anni clb lxxx. quæ & ipsa præterita, in Editione Rob. Stephani Anni clb lcliii. Nempe probari illa iis non possunt quibus Romana illa Ecclesia, non est Apostolica, sed Apostatica: Nec sedes Christi, sed Anti-Christi; nec vivum sed mortuum est Corpus. Doctissimus focer Junius, cum nollet ab iis discedere,



qui censent, Romanam Ecclesiam esse Meretricem Babylonicam, & tamen statueret, in ea salvari innumera millia; aiebat esse vivum Corpus, sed ulceribus oblitum. Meretricem esse, sed adhuc sponsam Christi, vel Conjugem, quia Christus necdum illi miserit libellum repudii. Sed non eo satisfecit Genevensibus, qui illam dicerent Idololatricam, ac proinde neminem in ea salvari. Narravit mihi Doctor Antonius Thysius aliquando cum Genevam venisset, & foci mei nomine, multam salutem diceret D. Bezæ, illum continuo subiecisse; *Et quomodo valet charissimus frater Junius? Vir est egregie de Ecclesiis nostris meritis; quanquam in uno capite dissentiat à nobis.* Id caput erat de Ecclesia, quam Junius negabat, tam arctis limitibus concludi, ac multi volunt; sed jam metuere incipio, ne prolixitate tanta, molestus sim occupatissimo. Ad alia igitur venio. Clarissimus Rivetus responsum parat, atque id ait sibi non fore difficile. Omnibus tui, sui que scripti comparationem instituentibus fore liquidum, causam ab excellentia tua desertam. Rogare se Deum, ut dotes ingenii melius colles, quam factum proximè. Ita ille. Cur causam desertam à tua dicat excellentia, causam non video aliam, quam quod non agas de universis, quæ fuerant objecta; quasi non dicas initio, hoc tempore non alia te velle defendere, quam quæ tuam excellentiam tangant. Respondere etiam Epistolæ tuæ parat Laurentius. Indignè fert se sic remitti ad veteres, cum Theologiæ studium sibi proprium sit, & istos, ut ait, legerit; ipseque ætate non nisi triennio, ut inquit, præcedas. Inde colligi posse quanto spatio prius huic se studio dederit, & tot laboris sui monumenta habere testes, quæ jam abhinc annis circiter xxx. diversis divulgari temporibus. Culpatur à cunctis, quod Apostatam probare velit, ex sententia partis adversæ: aiunt enim eos potius ἀποστατας esse accusandos, qui non flecterunt tecum, à partibus Illustriss. D. D. Ordinum Hollandiæ. Nec tantum fiduciæ habet; ut ausit dicere, potiorum fuisse causam eorum, qui Remp. immutarint. Negat se controversiæ isti velle immiscere. Ac alii contra, jam immiscuisse sese, & animum suum aperuisse, qui ex partis adversæ judicio, iudicium ipse de ἀποστασία ferat aliena. Non solet sic loqui; nec proximis turbis male de Rep. meritis fuit. Itaque Collegis tam erat exosus, quasi Proceribus parasitaretur. Nunc placere iis studet; mirantur aliqui Procerum istam μελαμύρην. Ait ipse non potuisse concoquere quod Amstelodamenses Ecclesiastæ dicerentur seditiosi, in illo Maresii scripto. Nam in his & se nomen suum profiteri. Responsum;

sermonem tuæ excellentiæ fuisse de iis, qui tum anno fuere hujus sæculi, xix. tum item decennio post. Nihil hic magnopere ad præsentes pertinere, quia Triglandius Leidam concefferit; Smoutius sit exactus, Cloppenburgius profugerit, aliqui fato sint functi. Modestiores nunc esse adscitos, sive ea laus sit Presbyterii, sive Procerum prudentiæ. Vix habet hic quod opponat, quam illud, Quid tum? Plurimam salutem D. Conjugi, & familiæ tuæ.

Amstelodami,  
clō lcc xlii.  
xvii Junii.

Excellentiæ tuæ devotissimus,

G. J. Vossius.

# CCCCLVIII.

Hugoni Grotio, Legato Regni Suecici,  
S. P. Parisos.

**P**AUCIS diebus quum Amstelodamo me Hagam conferrem, dono ab Laurentia de accepi libellum adversus Excellentiam tuam exaratum. Ubi titulum legi, averfam paginam inspexi. Video tuis aptari ineptè Horatianum illud, de montium partu enitentium, non aliquid montibus dignum, sed murem, eumque ridiculum: unde & subji cere voluit, alterum hoc ejusce vatis: *Spektatum admissi visum teneatis avici? sed legendum admissi jusserat excudi.* Verum ut videtur, monitus, jussit vocem primam deleri, quia metro repugnaret: voluit autem pro ea, reponi, *spectandam*, vel potius *lustrandam*, genere muliebri, quia, ut inquebat, ad Grotianam Epistolam respiciatur. Quasi non sic deficiat præverbium *ad*; ut integrè sit, *ad lustrandam Epistolam*. Provehor ad libellum ipsum. In aditu ipso, video lituram; sed sic ut tralucerent hæc verba, *ex familia Oxensterniana*; delere hæc voluit, quia Axelius Oxensternius, qui Leidæ studiorum gratia agit, nollet in verba sua, tanquam oracula, illini chartis, & volitare per hominum manus & ora. Nec si pœnitendum hoc Nobilis juvenis iudicium sit, eo tam culpandus ille, quam qui uno ore talia ipsius auribus instillant assiduè. Omnino enim hoc agi video; ut Proceribus Sueciæ displiceas, inque Legati munere sufficiatur alius Excellentie tuæ. Ulterius legere cœpi. Incido in verba illa, *citius aquam è pumice elixerim.* Pene dixissem *δὲ μοι λικέονν.* Posui paulum libellum? Mox, ut sit, recipio; simul alter intervenit, qui jam

jam legerat, ostendit verba illa, *Nach groter Pot.* Ait proverbium esse potantium largius, & more Græcanico, grandius poculum exposcentium. Etiam in bibendo, ut narrabat idem, proverbium esse incipit, *Nach groter Pot.* seide Jacob Laurens, Alius referebat lectum sibi, in eodem libello, *Gotius komt al te laet in School.* Ego, inquietabat, potius dixerō, *Laurens is al te broeg gelopen uyt de School.* Melius enim discere debuisse Grammatices Latinæ præcepta, priusquam ad sacra animum appelleret, manibus illotis. Longum sit adscribere, quid singuli rideant, aut carpant. Atque ego nec ista scripti sine dolore. Amavi enim virum, nec prorsus exui amorem, quia primum hoc est viri *ἀνδρῆς*: & fortasse ad sanio rem mentem redibit. Antea enim semper ostendit displicere sibi facta collegarum, atque eo nomine, minus iis gratus fuit, at gratior Proceribus; sic ut propterea, nec invidia fratrum suorum careret, multa etiam ab iis indignè pateretur. Miranti autem tam subito mutatum, respondit, sua interesse, & liberorum, ne ipse pro seditioso haberetur. Interfuisse etiam Presbyterii, ne ad unum omnes seditionis arguerentur, ac propterea se ejus defensionem suscepisse. Dixi ego, non agi de Pastorum singulis, qui nunc Presbyterium constituent. Eos qui criminis tanti arguerentur, maximam partem vel fato concessisse, vel alibi locorum agere. Uti Triglandium Leidæ esse professorem, Smoutium, qui urbe exactus, esse Rotterodami, Cloppenburgium, qui sponte metupœnæ profugit, in Harder- viciensi Gymnasio jamdiu Theologiam docere: in locum defunctorum, eorumque quos dixi, successos alios, consentiente Magistratu; ad quos illud de Seditione nihil pertineat; imò ne ad Hanekopium quidem, qui cum Proceribus magis quam fratribus seditiosis faveret; eorum artibus, de munere sit dejectus. Addidi facta quædam, quæ non posset diffiteri: etiam quæ ex ore unius post fugam percepissem. Item oggessi querimonias de fratribus, à quibus tam multa, ob concordie studium diu esset perpeffus. Ad hæc non aliud respondere, nominandos ab Excellentia tua fuisse, qui Ecclesiastarum seditionis forent rei: nec talium se patrocinium velle suscipere: nunc cum *ἀνδρῆς* loquaris, de Amstelodamenibus Ecclesiasticis, periculum esse, ne omnes eidem crimini involvantur. Quasi non & ipse, dum *ἀνδρῆς* omnes tuetur, tam fontes quantum in se, quam infontes absolvat. Magnam interim gratiam inquit, ab omnibus crimini isti obnoxiiis; ac literas quotidie accipit ab ejus farinae hominibus, etiam ut intelligo, ex ipsa Anglia;

quibus impensè gaudet, ut propterea valdè metuam, ne quem, non alium ante quam bonum virum novi, vel saltem, quam talem, ut seditiosis se non satis probaret; is deinceps torus in zelotarum partes concedat. Hoc eo justius metuo, quia in Pontificiorum quidem lectione sedulus fuit, sed ea est *ἀνείσθη*, ut non satis sciat distinguere, quæ Romana Ecclesia ex primis sæculis retinuerit, quæque in iis mutarit: Item quæ sentiant universi, & de quibus secus judicent prudentiores. Negabam quæ subinde Pontificiis objectat, ea statui ab tota Ecclesia Romana, imo à multis negari aiebam. Ille contra, quæ in Romana Ecclesia scribantur pro dogmatis ejus Ecclesiæ habenda, quia nihil in ea nisi approbatum scribere liceret. Ego ad ista ex eodem principio colligere sententiam aliorum, qui dissentiunt, pro approbata habendam, quia horum æquè libri, cum venia superiorum, prodeant in lucem. Quæ duo cum sint *ἀνείσθη*, fatendum esse, super nonnullis non conveniri, quia nihil sit autoritate ejus Ecclesiæ decisum. Non dubium vero est, quin si respondeas viro, alia atque alia objecturus sit Pontificiorum loca, potissimum illorum, qui à cordato nemine defendi posse videantur: atque isthoc finē id acturus, ut didicent omnes, quibuscum conciliationem quæras. Hic si provocas ad eos, qui moderatius sapiant, apud cordatos multum, apud eum nihil feceris, quia dicit istos sic loqui, ut tegant execranda dogmata: alios quos ipse adducat, candidè sententiam Ecclesiæ suæ aperire. Esti multum metuo, ne qui Laconismo gaudes, hæc fuisse adeo deducta, non absque tædio legas. Mei nihilominus officii putavi, plenius tibi virum describere, quò certius statuas, an cum eo pedem figere velis. Valde id exoptat, quia nunc se contemni putat: quod impotenter fert, quia xxx. annis fuerit Pastor; & xx. ediderit volumina; sed quæ, ut aiunt, qui Typographica de re & literaria mercatura se sustinent, à paucis emanant, aut nullis: ut non mirandum sit, si antea virum non noris, fortasse nec alii in Galliis; si rescribendo gratificari homini voles, necesse fuerit historiam noris anni xxviii. vel proximi hujusce sæculi. Mirantur aliqui è Proceribus, negari à Laurentio, quæ tum ab Ecclesiasticis acta. Nec puto, iis invitis, lucem visura, quæ ad seditionis pertinent authores. Contigere ea biennio, priusquam Amstelodamum commigrarem, ut non possim exactè rem dicere. Duplo plura; quam nunc facio, scribere erat animus; sed dum hæc scribo, septies minimum sum interpellatus. Et jam nunc Doct. Johnsonus, Bohemiæ Regiæ Ecclesiastes, accedit: cui cum dicerem instare tempus,

tempus, qua literæ essent tradendæ Tabellario Gallicano, & addidissim eas ad te mittendas, rogavit, ut Excellentiam tuam plurimum suo nomine salutarem. Volebat, ut adderem, quomodo in Parlamento accusatus sit *ἐρεχδοξίας*, non ipse modo, sed & Regina, quod talem foveret: sed negotium hoc prudentia quorundam esse discussum. Propediem spero me cætera scripturum.

*Amstelodami*, cō hoc xlii. xxi Julii, Hagæ Comitit; è domo amplissimi Ratalleri Dubletii, qui & ipse petiit, ut plurimum excellentiam tuam salute impertirem.

Nimia festinatione factum, ut superioribus literis, in historia peccarem, confundendo duos libellos Laurentiadæ, quos eundem intra mensem divulgavit, eadem forma, ac magnitudine. Quorum prior adversus Excellentiam tuam, perscriptus, quem jam acceperis aliunde, scio. Alter adversus foeminam, lingua Belgica, in qua illud, *περὶ τῆς δούλης, ἡ δὲ γυναικὶς* *Por.* Quæ ea foemina sit, ipse in præfatione exponit. Vocat Helenam Jacobi, Plateam addit in qua Amstelodami habitet, ait lardum habere venale, post mariti excessum, nupsisse suo famulo Pontificio, & ab eo persuasum, ad Papatum defecisse. Accusat vehementer impudentiæ, quod venerabili Senatui Ecclesiastico fuerit ausa quæstiones proponere, & solutionem subitam exigere.

#### CCCCCLIX.

Hugoni Grotio. *Lutet. Paris.*

**M**agnopere gaudeo, Illustrissime Domine, quod, quæ ad V. T. observasti, ea à Typographo perducta sint non modò ad Pentateuchi finem, quemadmodum scribebas: sed ut ex aliis Hagæ, postea intellexi, ad Regum libros; qua appellatione credo, etiam Samuelis libros complectebantur. Sed valde mihi molestum est, quod videam excellentiam tuam, variis impeti libellis, quod metuo, ne advocet in magno illo opere. Quamquam non defunt qui existiment fore, ut non rescribas, ne quidem Cl. Riveto. Huic studiosè id actum arbitrantur, ut nos committeret: ut qui toties advocet ad partes, quæ ante hos annos xxv. in Collegio scribebam. Quasi non aliter scribendum sit, quando cum adversario comminus congregimur; aliter quando de concordia consilium initur. Non ignoravit hoc Georgius Wicelius, qui præfatione Viæ Re-

giæ ad Imperatorem Ferdinandum ait, Polemica scripta nostra tanti non facimus, quin hæc velimus, aliquanto pacatiora esse; verum tempus militiæ tunc ita postulavit, ut sentirent ii, cum quibus commissus eram, & mihi vires esse, & mea tela nocere. Puto *ἐπιμύσειον* quintum Jacobi Laurentii jam videris, in quo tuæ ad se Epistolæ quodammodo *παρυσία & οὐαζὶντες*, eadem ut arbitror ex officina, & geminum carmen Salebrii Santræ: prius utrumque Hugenii esse, satis convenit, & sponte narrarunt, qui nosse possunt. Ac tacentibus amicis, styli salebræ proderent: Idem est, qui in gratiam Heinsii, postquam audierat, Salmasium velle eum rescellere, Epigramma suum sic obfignabat:

*Te duce, qui rugiet, variâ & sine dentibus irâ,  
Nesciat hæc unguis in Daniele Leo.*

Salmasius vero iis lectis, scribebat Riveto, ab Leone illo salvum fore Daniele; sed periturum Heinsium. Is Heinsius, nunc totus in eo esse dicitur, ut novam det editionem suarum in N. T. annotationum: sic mihi retulere maximè familiares. Credo corriget, de quibus sibi à Salmasio meruit: Hic utrum propediem in Bataviam sit remigraturus, non satis scio; sed satis scio, curatoribus tam longam absentiam minus probari, tantoque fore gratiorem, quanto celerius avolarit. Marefchius, ut intelligo, immane volumen cudit adversus ea quæ in Romana Ecclesia, nostris improbata; aliquibus rescissis, Jaudem mereri, vel saltem tolerari posse docuisti. Metuo ne parum cum excellentia tua agatur humaniter, hoc est, non tanquam cum doctrinarum Principe, imo vel homine doctissimo, nedum velut cum imagine Regis, qui Dei imaginem sustinet in terris. Magnos animos duo dant, & illi, & aliis similiter animatis, antiquitatis contemptus, & Calvinii admiratio; sed de priori nolunt fateri, ut ex eo capere potes, quod sic indignetur Laurentius, ob consilium salubre sibi datum ab Excellentia tua. Ait sibi hoc jam adolescenti, instillatum à Doctoribus, ut amaret veteres: quasi uterque ignoremus, quæ mens fuerit ejus Magistris. Eorum alterum, cum antiquitas objectaretur, dixisse scimus, Et nos patres foremus, si iis vixissemus temporibus. Id verène dixerit, hinc sciri potest, quod tunc multa sint habita pro hæreticis, quæ nostra sustinent; ut quæ in Ætio, Vigilantio, aliisque improbata. Non quasi idcirco hæreticos censeam; sed quia existimabat ille, folius esse ætatis; ut aliquis pro veteris Ecclesiæ Doctore habeatur: nec simul *ἀποβροα* attendatur. Credo autem non inutile foret,



foret, si penitus cognita foret vita Calvinī. Magnæ fuere illi vitæ, & ingenii dotes; sed & ille suos manes patiebatur: quod fateri nolunt ejus unius tanti admiratores. Abominantur Bolseciana; sed in illis etiam sunt tabulis publicis subnixa. Et apud varios homines integerrimos, pariter ac doctissimos, suppetant non pauca, quæ ejus doceant animi impotentiam, & quantopere oderit semper dissentire, à se signis audere. Hæc satius foret regi; sed video plurimos, non tam virtutes Ducis sui sequi, quam vitia; idque magno Ecclesiæ damno: cui convenientior foret spiritus mansuetus, & majorum reverens. Quare cogitandum, an non expediret, candidam extare dissertationem de eo, quod de Calvino judicium fuerit suæ ætatis, & quantillum ab eo, & discipulis, antiquitati fuerit tributum. Quod Riveto necdum respondeas, sed illa ad N. T. perducere malis ad umbilicum, sanè gaudeo. Nihil magnopere, ut puto, festinato opus; Et fortasse præstiterit etiam conspiciere Marefchiana, priusquam respondeas. Poteris credo, multos parietes unâ feliâ dealbare. Quicquid est, nolim sufflaminari tam utilem laborem, quem sustines, in illustrando V. T. Nondum illa vidi, sed facile possum æstimare, vel ex illis ad N. T. ubi duo præ cæteris admiror, quod nemo antehac, tam multa *εὐαγγελιστῶν*, conciliarit: quod nullus ex humanitatis studiis plura attulerit ad sacras literas illustrandas, minusque partium studiis abreptus. Hic jam certamen gliscit de jure Magistratus in Ecclesiasticis. Defendit illud Vedelius antea Genevæ & Daventriæ Professor Theologiæ, nunc autem advenit eum scripsere Triglandus Leidæ Professor, & Revius, qui in Collegio regundo Festo Hommio successit. Is Festus, cum jam ante menses complures, se munere eo abdicasset, ante duas hebdomades, vel tres, ex hac vitâ excessit. Oratione ei Polyander parentavit. In Synodis, & concionibus, graviter agitur quæstio, de jure patronatus. Facilius puto, efficerent Ecclesiæ, quod volunt, nisi celsissimus Princeps Arausionensis, & illustrissimus Brederodius, viderent, & suam hic causam agi. Negotium Angliæ magnopere me habet sollicitum; non sanè propterea, quia inde quotannis præbendæ fructum capiam; quam quia veterem amo Ecclesiam, & vicem doleam optimi Regis: pro quo assidue vota facio. Apud cordatiores res hæc suspectiores reddit Puritanos. Negant enim se videre, quid Regale Regi velint relinquere. Et nonnulli his locis metuere incipiunt, ne si illuc effecerint, quod volent, hic novī fiant motus, quia animos addet foelix successus in Regno Britannico, & si res la-

boret, inde etiam auxilium expectent. Mihi vero, vivo Arausionensi, non ita multum periculi videtur his terris: quia & illius interest, & militem in manu habet. Vale, Illustrissime Domine, & cum uxore lectissima, & liberis salve; semperque dignum animum Excellentia tua, hoc malo sæculo conserva.

Amstelodami,  
clō Idc xlii.  
x Kal. Sept.

Illustrissime excellentiæ  
tui cultor,

G. J. Vossius.

## CCCC LX.

Joanni Frederico Gronovio, *Professori*  
Daventriensi.

Clarissime & amicissime Gronovi,

Proximis feriis autumnalibus partem bonam Hagæ fui, filius partem ibidem, partem in Zelandia; nunc vero in Frisiam abiit. Me vero subinde preffit valetudo mala. Præsertim hac nocte, urgentibus doloribus nephriticis, à quibus ante climactericum immunis semper fui: ac nunc tertio ab illo anno, denuo incurfant. Dum ego filiusque domo absumus, literæ è Galliis domum meam perlatae, quas nomini inscriptas tuo judicavi ex eo, quod inclusæ essent meis, ubi id petitur, ut ad te mittantur. Cæteroquin ex inscriptione vix aliquis ob characterem insolentem id dignovisset: cujus rei periculum hic ipse feci, cum duobus, tribus ostenderem, qui Gallicis literis non assuevissent. Vix hæc æger ad te perscribo, attramen tam longam cessationem ex absentia nostra cogitans, putavi non ulteriori moræ indulgendum. Puto esse literas à senatore Saravio: secus si est, per otium ex te cognoscam. Rescribere si voles, mittam, quo jusseris: vel includam meis ad illustrem Grotium: qui tuto rem per famulitii quempiam procurabit. Theologo Dieftio, Jurisconsulto Christenio, Isendornio Philosopho, plurimam salutem dicito.

Amstelodami,  
clō Idc xlii.  
Non. Sept.

Tuus æternum,

G. J. Vossius.

## CCCC LXI.

## CCCC LXI.

Ludovico Crocio, *Theologo Bremensi*  
S. P.

**A**Nte mensem plus minus mihi ad te, eximie Croci, opus nostrum de Theologia gentili & Physiologia Christiana: utrum acceperis, non quæram. Nam his diebus adfuit mihi quispiam qui salutem mihi ab eo diceret, cui Bremam misissem volumen antea memoratum. Nomen quærenti, negabat se scire: & solum se hoc iussum dicere aiebat, quod dixisset. Sane apertior erat circumlocutio ista, quam cum Trojani belli scriptorem dicimus pro Homero. Nam multi præterea id bellum descripserunt. Ego autem labores nostros uni tibi in Germaniam miseram. Quare recepisse te gaudeo: ac placere confido, non quali præclare de nostris soleam sentire: sed quia nec livor negarit, multa hic esse aliis indicta, eoque scripta mihi, non exscripta. Miscui vero & sacra profanis & profana sacris, ut utrique scholæ prodessem. Vides, cur tantopere confidam, probaturum te operam in hoc opere locatam. Ac eo impensius, scio, probabis, quia prohibitæ semina, dum rerum naturam tracto, inspersimus passim. Restat pars ea, quæ est de fossilibus & plantis; sed hanc nondum exasciavi, & jam alia quædam in manus sumpsi, ut ita laborem illum insititiis aliis dissindam. Argumento fuerit opusculum hoc de tribus symbolis, quod mitto. Atque hoc itidem si probabis, approbatus & ipse vudicabo. Jamque prælum fervet simili libello de tempore nativitatis ac passionis dominicæ. Sane utraque quæstio, ut nosti, perplexi est negotii. Fortasse consequentur tum liber de vitiis sermonis, tum Harmonia evangelica de passione ac resurrectione Christi, ubi duo hæc potissimum ago, ut ordinem gestorum exponam & *εναρμόζω* conciliem. Non parum hic veterum juniorumque debeo indutriæ, sed etiam spicas quasdam legendas nobis reliquerunt. Et in tanto eorum dissensu, non minoris est iudicii, quam laboris certi aliquid consignare. Illustris Grotius arduam suscepit provinciam conciliandi Ecclesias Reformatas cum Romana; non quod se vivo multum hinc boni proventurum speret, sed quod pulcherrimum etiam putet ferere arbores, quæ alteri seculo profint. Nec ignorat superstitionem & tyrannidem papalem. Sed scit innumeros esse passim ex Catholicis Romanis, præsertim in Galliis, quibus ea improbentur. Quales existimat faci-

le adduci posse ad concordiam, sed requirit idem in nostris etiam plus moderationis. Quamquam multa. Romanæ Ecclesiæ vulnera ostenderint, quædam etiam feliciter sanarint, esse tamen, ubi ipsi novum faciunt vulnus, eoque locum habeat illud Poetæ, *Excessit medicina modum*. Rectene an secus assequar ejus sententiam, optime perspicies ex ejus animadversionibus in animadversiones Riveti. Quorum idcirco exemplar mittere volui, fortasse quia deinceps controversia cum Grotio futura multo longius abeunte, missos facient Bremenses. Utunque egerint, scio vos fore semper divinæ gratiæ patronos, nec eam causam deserturos, à qua stant scriptura & ecclesia vetus. Imo ut Romanam & Augustanam ecclesiam mittam, fere optimus ac doctissimus quisque eorum, qui in reformatis Ecclesiis aliquo in pretio habuerint antiquitatem, nec planè forent *ἰδορυβάουρος καὶ ἀνδράγατος*, vel alterius sententiæ suam plane mancipassent. Salutem plurimam dico clarissimis viris, Collegis optimis doctissimisque, Bergio, Willioque. De Neufuillio adderem, nisi id officii in se recepisset filius, qui hæc traditurus.

Amstelod. c. d. Id. xlii.  
iii. Non. Quinct.

Tuus futurus dum  
suus,

G. J. Vossius.

Pag. 933. Operis nostri de Idololatria pro virtutibus tuis sat jejune te laudo. Alias v. id corrigetur. Scio humanitatem tuam, quem talibus offendere non possum.

## CCCC LXII.

Hugoni Grotio, *Legato Suecico*.

Lutetiam.

Illustrissime Domine,

**Q**UI hæc, ad Excellentissimam Tuam deferret literas, Beuningius est, patria Amstelodamensis, juvenis elegantis ingenii, moribus optimis, variæ eruditionis non minus, quam juris sui curiosus: ut meritò hæc urbs, de eo habeat sibi magnum aliquid polliceri. Patrem habet superstitem, urbis senatorem. Mater est soror Consularis Alberti Conradi Beurgii qui nunc Hagæ agit, in ordinum delegatorum Collegio. Avus is Beuningius fuit, qui ante annos sex septem, Consulatu gesto, magnâ cum laude excessit. Is juvenis, cum Excellentie Tuæ cuperet commendari literis meis; parui lubens, eoque lubentius, quia scirem non ingrata esse Excel-

Excellentiæ tuæ alloquia eorum, qui virtutis via ad decus grassantur, atque iis nati sunt, qui Remp. hic sustinent, & Illustre nomen tuum amant & colunt. Bellum Puritanicum hic multos habet sollicitos. Ecclesiastas quo affectus trahat, non obscure ex precibus publicis cognoscere est: horum aliqui non dubitant, Deum exposcere, ut bene coeptum Reformationis opus feliciter procedat; Regisque ut emolliatur animus. Quæ etsi commodam mentem capiunt, tamen satis est apertum, haud aliud exoptare, quam ut Rex inani titulo sit contentus, ac novellitas doctrinæ de Antiquitate triumphet. Sed unum est in quo non satis conveniat illis, qui se Episcopis opponunt. Multi omnem regendæ Ecclesiæ potestatem penes presbyterale collegium esse volunt: Alii vero aiunt, hoc jugum gravius Episcopali. Quare contendunt, singulis id committendum Ecclesiasticis, ut secundum Dei verbum, populum doceant, & gubernent. Atque sic ab Episcopalis & Presbyteralibus (sicuti vocant) distincti, Independentes nuncupantur. Pimius, cujus magna adeo in Parlamento est autoritas, prioris esse sententiæ dicitur, sed multi hac parte, ei adversantur, qui cætera convenire videntur. Estque plurimorum id iudicium, utrunque infraacta omni Regis potestate, & abolito Episcopatu, geminum agerent triumphum: Eos inter sese mox commissum iri; quia multi non à Presbyterii potestate minus, quam Episcoporum abhorreant. Ulterius procederem in scribendo, nisi cogitarem tarde admodum fore, quod has literas recipies. Novi enim quomodo proficiscantur juvenes, qui exterâs petunt Regiones. Vale, Illustrissime Domine, ac diutissime orbis bono superlis. Domine conjugii plurimam dic salutem, necnon Liberis.

*Amstelæd. cl. lxx. xlii.  
Post. Non. Sept.*

*Excellentiæ Tuae cultor devotissimus.*

G. r. Jo. Vossius.

### CCCCXLIII.

Hugoni Grotio, Legato Suecico.  
*Parisiis.*

Illustrissime Domine,

QUI hæc literas affert, est Johannes Duns, natione Danus, juvenis eruditus, ingenio & iudicio bonus, pietate & industria nulli secundus. Sequiannum me

dozentem hic audivit, ac privatim sæpius collocutus; eoque notior mihi & meis, quia in vicinia habitavit. Augustianam complecti Confessionem, vix necesse habeo dicere, cum Danum dixerim. Literas ad Excellentiam Tuam, non alio fine petiit, quam ut videndi & alloquendi, vel potius audiendi hoc orbis Oraculum, honestior faciliorque daretur occasio. Itidem, ante mensem unum alterum, Clarissimi Collegæ Barleii filius, patri cognominis, postularat à me aliquid literarum; sed eapse hora, quâ abeundum illi, ac mox etiam mihi publice docendum foret. Spem feceram Epistolæ Brillam mittendæ, prius quam navim Gallicanam conscenderet. Sed partim me promissi oblitio cepit, partim alia impediunt: In his cogitationes de Matthæi mei connubio. Ejus gratia ante tres hebdomadas, Leowardia n abiit. Ac post dies sex septem denuo *ad v. de q.* proficiscar; ut præsentia mea Nuptias condecorem. Pater sponsæ est Jurisconsultus, & Leowardientis Reip. Consiliarius, & Scabinus. Mater filia Verrutii Syndici, dum viveret, Groningensis, ac foror ejus, quæ nupserat Schombergio, Reip. Groningane nomine, in Collegio Ord. Generalium Delegato. Vedelius Theologiæ apud Franckeranos Professor, dum in Frisia sum, satis concessit. Moribundum cruciabat, quod terris eriperetur, priusquam potuisset Revio & Triglandio respondere. Horum uterque acerbe satis scripsit adversus scriptum ejus de Constantini Episcopatu; quo Magistratus jura circa res Ecclesiæ defendit. Collegæ defuncti mihi Franckeræ aiebant, fortasse responsum sic etiam edendum; sed deletis, quæ, ut par pari redderet hostimentum, virulentius chartis illevisset adversus Revium. Est is Revius, ut me alias scripsisse arbitror, Regens Collegii Theologici, quo in numero Fetto Hommo successit. Vedelii mors Collegæ Barleio flebilis non erit; à nemine enim horribilius fuit tractatus, quam ab isto. Prodit etiam nunc liber Marefii Sylvæ-ducentis Professoris adversus Voetium; qui prius Thesibus Ultrajectina Academia disputatis, accusarat Sylvæ-ducentis Procures Idololatriæ, quod ex Reformatis, plerique adscribi voluissent in sodalitatem B. Mariæ. Quod tamen factum erat, ut vis ejus Collegii, quæ magna, infringere nostrorum consortio. Noluerunt nostri aperte esse perjuri. Illudere maluerunt. Artificum nostrorum nescio an sis probaturus. Ubi Marefchiana videris, fortasse satius fuisset ista non in apertum proferri. Nunc ne Procures Sylvæ-ducentis in quibus, & Ill. Brederodius, Idololatriæ sint suspecti, omnibus lipariis dedu-

G g g

ctis



ctis, penè nudam Venerem cum suo Marte, solis instar ostendit. Sed de isto malim, ubi Marschiana legeris, iudicium tuum cognoscere.

*Amstelodami, c15 Ioc xlii. xxiv.  
Octob. 1692.*

*Excellentiæ Tuae ob-  
strictissimus,*

G. J. Vossius.

#### CCCCCLXIV.

*Illustri Hugoni Grotio,  
Lutetiam Paris.*

Illustrissime Domine,

**D**E filio Isaaco plurimum gaudeo, quod sospes Lutetiam redierit, & sic Excellentiae Tuae placeat, ut sponte etiam in aedes recipere sis dignatus, satius etiam censeo, ut si molestiam ea res non adferret, aliquantisper commoretur. Eum domi videbit, atque audiet, cujus dicta singula pro oraculis habere debet, foris etiam noticiam summorum virorum consequatur: Bibliothecis variis fruetur. Utrobique verò erit, unde non modo doctor fiat, sed etiam prudentior. Amo innocentes Musas: sed neque me fugit, quantum decus etiam ei, qui nunquam capesset Remp. accedat, eo, quod rerum civilium non sit penitus imperitus. Multum etiam letor; quod eculque produxeris annotata tua in vetus Instrumentum. In novo, censeo non inutilem fore Excellentiae tuae (fortè jam videris) variantium lectionum Libellum, qui, in adversariis, Ludovici de la Cerdà Hispani, caput constituit xci. De Blondelli opere, ita est ut scribis. Petierat doctor Rivetus, ut Blauwio commendarem. Primum refugit, eo nomine, quod putarem Episcopis adversari. Dixit secus esse, mediam insilire viam nec Armachano Archi-episcopo displicere. Paucae solum paginas inspexi. Mea hæc sententia est, jam Apostolicis temporibus, Episcopos Presbyteris præfuisse; facile largiur non fuisse eos, dum Apostoli adhuc continebantur Palaestina vel cum primum extra eam Ecclesie colligerentur. Sed ubi excrevere illæ, & Apostolorum numerus est imminutus, secus censeo. Atque ut verum esset; quod & nro Salmasius arbitrabatur, demum capisse circa annum centesimum, Religio foret recedere ab ea gubernandi forma, quam totius orbis Ecclesie comprobassent. Nigrinus non est mihi notus, sed vidi literas, quas qui scripserat, aiebat, se ex ore ejus audivisse, me superiorem Quadragesimam ex

more Romanæ Ecclesie observasse. Quis ei hoc persuaserit, nescio. Quanquam id verum, privatim publicæque multa me dixisse de Quadragesimæ antiquitate & usu; vehementer etiam improbasse, quod nostri homines ne quidem Passionis Dominicæ die soleant jejunare; solidè me posse evincere, semper aliud obtinuisse in Ecclesia veteri; nec tamen laudaturum, qui hoc uno nomine turbet Ecclesias nostras; posse enim quæque jejunare domi suæ, cum id non sit interdictum. De Ignatio filii, grata sunt quæ scribis; deque valetudine tuenda, quod commones, gratias Excellentiae Tuae ago. Dominæ Conjugi, ac liberis, salutem plurimam à me, meorumque dicito.

*Amstelodami, c15 Ioc xliiii.  
vii. Id. Septembris.*

#### CCCCCLXV.

*Andræ Riveto S. P.*

**N**Egotio filii in Frisia ex animi sententia confecto, domum redux, cum variæ mihi ab uxore literæ redderentur, nullas avidius ac majori cum voluptate legi, quam tuas, magne pariter & vir & amice. Primaque hæc mihi cura fuit ut clarissimi Blondelli chartas ad Blauwium ipse adferrem, & fidei ejus atque industriae, quantum possem, commendarem. Feci verò id lubens, non tantum tuâ causâ, cui scio quantum debeam, vel etiam Blondelli, quem antea de solo nomine mihi cognitum, nunc merito suo inter summos seculi hujus viros repono, mihi que hac occasione bella innotuisse, non gaudeo solum, sed penè triumpho; sed imprimis, quia opere tam erudito, multa etiam doctissimos docebit. Eorum que in numero, non quidem doctissimorum (curtam novi supellectilem nostram) sed illorum tamen, qui eruditiores redeant à lectione hujus operis, lubens etiam profiteor nomen meum. Perjucundum mihi est laudari à laudatissimo senatore Saravio: ac tanti viri affectus vehementius ad bene merendum de studiis accendit. Sed ego jam ab anno illi multum debeo, propter benevolentiam summam, qua Isaacum meum complexus in Galliis fuit. Ipse enim hoc ad me filius semel iterumque perscripsit. Dices fortasse, hoc si tam longo tempore resciverim, mirari te, quod hactenus ei nullas per literas gratias egerim. Ego vero, eximie Rivete, non quidem mi-

ror (quippe jam à multis annis nulla in re frequentiores committo solœcismos, quam in Epistolico hoc commercio) sed multum tamen doleo, quod parte hac non satis me iis probem, quibus maxime & vellem & deberem. Omne vero hoc malum inde potissimum proficiscitur, quod à mane ad vesp̄eram, nunc hic, nunc ille, vel operam desideret nostram, vel saltem alloquium exposcat. Sum vero ea frontis mollitie, ut nihil sustineam negare. Ubi igitur sic dies mihi prope mortuus est, animum subit ea cogitatio: Ergone mihi viliora erunt studia, etiam sacra, quam ars sua erat Apelli, qui, ut à Plinio accepimus, nunquam tam occupatam diem agebat, ut non lineam duceret? Continuo me in Bibliothecam proripio, ac omnium, quæ ad Epistolare negotium pertinent, securus, schedas arripio, eas ordino, & sicubi lima opus videatur, operæ non parco. Atque sic ubi non totum mihi diem periisse cognosco, suavius me ad mensam vel lectum confero. Nec eo hæc animo à me dicuntur, quasi diu scriptionem ad Amplissimum Saravium differre sit animus. Speravi hætenus filium nobis affore ante hyemem, ut pariter ei gratias ageremus. Sed hesternæ die literas à Florentia accepi, quem jam Venetiis esse, imo inde ad nos iter capeffere arbitrabar; ut nunc vix sperem ante ver adultum, videre me cum posse. Eâ quia spe excidi (& ob Florentinæ Bibliothecæ tot ἀνέκδοτα, multum metuo ne diutius moretur ac dixi) statui occasione eâ ad Amplissimum Senatorem scribere, quam probabis scio. Jam sub prælo est unus alterque libellus noster, quibus excusis commodam accipiam occasionem, & eos mittendi & testandi singularem pro tanti viri merito affectum nostrum. Clariss. Spanhemium domi meæ visum mihi, scito. Nec æque doluit, quam quod vix semihorâ alloquio ejus frui liceret: Cujuscunque is consilio Leidam vocatus, bene, imo optime meritis est de Academia. Non committam, quin me quoque his terris sui sciat amantissimum; quam ex dono jam diu Genève transmissio æstimare addidici. Et aliquid amoris serenus addidit vultus, ubi coram adspexit. Eum coram me ducebat candida Hortoni anima. Quo in viro rara Societate, cum eruditione Pietas, & Prudentia conspirant. Spem fecit, verno se tempore velle in hanc urbem redire. Utinam tum tecum etiam frui liceat τῷ πάλιν Salinatio. Quem ante hyemem nobis affore non possum in animum inducere. Difficulter credo, quæ maxime cupio. Utinam saltem videamus cum Zephyris & hirundine primâ. Exequias ire tristis soleo. Sed fu-

neri Hellenistico lætus iusta solvam. Non dubito, quin eo ex opere multa bona hauri simus docti pariter indoctique. Aliter qui sentiant, τῶτοι καὶ δ' αὖ κεῖμεν ἰσθίων. De novo labore Illustrissimi Grotii primum ex te didici. Exemplar non accepi. Sed intelligo jam in urbem hanc adlatum ad alium. Imo & ubi volo, habiturum me exemplar. Tuum quoque responsum aiunt jam pene perductum esse ad umbilicum. Planeque mihi spondeo, fore ejusmodi, ut tam modestiam laudent cordati, quam doctrinam eruditi. Omnino Reip. Christianæ interest, excuti ab hominibus doctissimis, quid nos Ecclesiæ Romanæ, quid nobis illam concedere oporteat. Sed eam si provinciam suscipiat antiquitatis nescius, ne legere quidem curem. Eo impensius gaudeo, ab utrisque vestri potius, quam ab minutis istis patellariis diis hæc controversias tractari. Nescio an videris Ulmenis illius maledicentissimum ac omnis violentiæ plenissimum scriptum, quod hic adversus Grotium prodit. Homo is docentem me audivit, ut aiunt, qui norunt. Atque aliquis qui à pluribus novit annis, mira mihi narrat de vita hominis antea acta. Liberalissimus est in donando quæ scripsit, sed hætenus me ne compellavit quidem, ἥ ἐ φερνῆς Ἰσπικλήδης. Vellem non abusus esset parte literarum tuarum, quam opusculo præmisit, quasi patrocineris tot mendaciis, quæ nihil ad Ecclesiæ negotium. Tales magis causæ obsunt quam juvant. Et video hominem fanaticum nec assis hic fieri, nec ab aliis, qui similes amant labris lactucas. Ego ne istud probarem dicendi genus, qui (quod hic promere liceat) ne in amicissimo quidem, & multis partibus ut doctiore, si modestiore, probare potui quod tam multa inspersisset, quæ nihil ad causam pertinerent? Quale illud πρὸ ἀπερσιῶς, non quidem Ecclesiasticæ sed civilis. Vide quæ non audeam in sinum tuum effundere, nunquam id facturum (non adeo læva mens nobis) nisi putarem, hanc à veteri & sincera amicitia concedi, seu licentiam seu libertatem. Pro decretali Vigili Papæ Epistola, ac dissertatione Petri de Marca, quantas possum, gratias habeo. Futurus mihi inter itineris Frisici comes libellus. De afflictâ clarissimi Præceptoris mei, conjunctissimi vero affinis tui valetudine valde doleo. Solatur vero, quod ad tantam ætatem illum Ecclesiæ suæ concesserit divina bonitas. Nulla ætas ejus laudes conticescet, & Deus in illa die mercedem rependet. Pro voto erga filium sponsum, ac gratulatione etiam de Historiographi munere gratias ago tanto majores, quanto præ aliis multis non dico affectus tu-

us apud Batavos proceres eluxit, sed etiam fidelis se opera exeruit. Nempe non finis, ut ulla in re claudicet benevolentia tua erga me meosque. Brunæus noster tradidit mihi Blondelliana illa, quæ per eum mittebas. Et jam Blauwius accepit, qui etiam reliqua avidè exspectat. Misit ad me Clariss. Mareſchius quæ scripserat pro ordine Mariano Sylvæ-Ducensium. Nec quicquam video quo offendam, dum cogito, quo in statu res fuerint. Multum promotum sic quoque. Sed alter est scrupulus, an non illud sit pontificiis, quia longe alia iis mens fuit, cum primum transigerent nobiscum. Quamquam quid illud ad me, vel etiam Mareſchium? Lectis istis fore spero, ut Clarissimus Voetius acquiescat. Planeque sic mihi persuadeo, Viro Doctissimo illud esse ab aliquo Sylvæ-Ducensium ferventiore. Quod non difficile fuit apud eum, qui ipse, quicquid vult, ita vehementer vult, ut non eat, sed currat. Uxori lectissimæ uxor mea salutem voluit adscribi. Sed & nomine nostro salutem, quando sponte se occasio offeret, Nob. Amplissimo que Hugenio, Dubletio, Gulelmio, Wickefortio, Doctissimo etiam Heilerſichio, quem eo impensius amo, quod in amore nostro annunciando, sæculo hoc maligno, bonum se virum præstare non desinat.

*Amstelodami,*  
cIdo Idc xlii. iii.  
Non. Novemb.

*Æternum tuus,*

G. J. Vossius.

#### CCCCCLXVI.

Andræ Riveto, *Theologo.*

Reverende Clarissimeque Vir,

**R**emitto tandem Salmasianam diatribam de Herode infanticida. Ex qua quantum profecerim, non poenitet. Atque hunc fructum non solum debeo *me* Salmasio, sed etiam beneficio tuo; absque quo foret, necdum conspiciere licuisset. Bene interim est, quod in libris, quos Isaacus meus è Galliis expectat, propediem comparebit. Optime id Collegæ veteri Heinſio cessit, quod extra Leidam vix quisquam de hoc Salmasiano responso inaudierit. Alioquin id studiosi adolescentis efflagitarent à Bibliopolis quotidie. At isti lucripetæ quamprimum subjicerent prælo; quod de se sponte his diebus quispiam fatebatur mihi. Nempe ut volent libri per hominum manus, vix ardentius est fuscitabulum, quam si premi constet. Ubi Leida,

atque Haga redierit ad nos Isaacus, nihil æque volupe erit ex eo resciscere, quam ut valeant veteres amici, & quid agant, quibus scribendo etiam cura est exterorum & posteritatis. Præ cæteris volo, ut exquirat de magno ſene, conjunctissimo affine tuo Molinæo; quem, post excessum clariss. Gomari, solum nunc omnium præceptorum meorum habeo superstitem. Omnia illi prospera atque fausta opto; ac pariter tibi, cui multum debeo, non solum ut Collegæ antehac quod non leve ducō, sed ut mei meorumque studiosissimo, iis etiam temporibus, quibus si mihi de me credere licet, premerent innocentem. Plurimam salutem meo & uxoris nomine dicito lectissima conjugī tuæ.

*Amstelodami,* cIdo Idc xliv. x. Kal. Decemb.  
nempe pridie ejus diei, quo hæc Amstelodamensium civitas se foederatis junxit partibus. Nempe crastino, quo nostræ tibi literulæ reddentur, ab eo tempore completus erit annus septimus supra sexagesimum. Deus faxit ut civitas grato semper animo hoc beneficium æstimet.

*Tuus omni officio,*

G. J. Vossius.

#### CCCCCLXVII.

Nobilissime Salmasi,

**V**erba B. Ambrosii sunt Epist. XV. ad Irenæum, sive lib. IV. Epist. III. ubi exponit, cur lex prohibeat ne vir muliebri stola, vel mulier virili schemate utatur. Ait vero eam legem esse naturæ subnixam. Cum enim natura nos vel mares creet, vel fœminas, ac plurimum in mutis etiam animantibus notæ sint, quibus exterius quisque sexus internoscatur, naturæ eum adversari, quisquis habitu alium mentiatur sexum, quàm dederit natura. Mendacium esse turpe in verbo, turpius in veste. Fœdum esse in fœmina, si mentiatur sexum meliorem; fœdus in viro, si mentiatur sequiorem. Malum esse, si quis in plateis conspiciatur capillis more muliebri demissis. Pejus esse, si Clericus sic se sistat in templis; ut quando Sacerdos sacra facit bene barbatus, contra qui sacra mensæ inservit, addat fœmineo more capillatus, aut etiam cirratus, ut pueri Romani. Ergo, inquit, pariant, ergo parturiant, qui crispant comam, sicut fœminæ. Verum habeant excusationem, qui patrias usque sequuntur, sed tamen barbaros:



baros: ut Persæ, ut Gothi, ut Armenii: Major quidem est Natura, quam Patria. Si non negat gentes barbaras habere excusationem, plane ad mulierum morem intonsas; quid de iis censuisse putandum quæ minus tonsæ. Nec enim puto quisquam dixerit naturam dare capillitium, ut continuo refecetur, nec eam permittere, ut hoc tempora & aures muniamus, atque adeo, ut quantum vitæ conditio & mos patrius finit, etiam decore inempto ornemus caput. Raptim scribebam, cum jam ad Gymnasium me hora vocaret. Vale.

*Tuus æternum,*

G. J. Vossius.

CCCCCLXVIII.

Claudio Salmasio S. P.

**M**ultum doleo, Nobilissime Salmasi, quoties cogito, frigescente adeo Charitate, sine qua fides est exanimis, moveri controversiam de Pilis; non quasi non hac parte etiam peccetur à multis; sed quia qui in contrarium abeunt, ipsi etiam modum excedant, dum præfinire modum student, ne aures capillis obtegantur, nedum aliqua colli pars. Profectò non pauca sunt, de quibus infinitis partibus magis erat laborandum. Sed quia in simpulo, si vera aures ad meas perlata, fluctus iis concitare visum est; non potui non gaudere, quod in eo nunc totus sis, ut malo isti, Ecclesiæ bono, medearis. Profecto non placent intonsi, quorum capilli formidant ferrum: uti usu veniebat Monachis Mesopotamiæ, Nasaræorum more κόμας γυναικείας περιβαλλομένοις; ut de iis locuples nobis testis est Epiphanius hæresi lxxx. quæ est Messalianorum; Ubi & ipse eos improbat. Sed non hoc in quæstione est, utrum intonsi esse debeamus: sed quam altè, vel demissè refecare oporteat capillos. Paulina urgent verba. Verum reverendo Bezæ adfentio, qui censet eos κομᾶν, qui forficem refugiunt, mulierum instar: eos verò κείρεσθαι, quibus capilli præciduntur: utcumque non solum tecta sit cutis, sed longius etiam diffundantur, dummodo ne excedatur τὸ πρέπον, quod variat pro temporibus & locis vitæque conditione. Græcorum erat Proverbium, δὲλθ' ὦν κόμην ἔχεις; Romani vero veteres radebant & capillos, & barbam, quod vel ex veteribus nummis conspicuum est. Servi contra alebant capillos, sed radebantur, cum pileo donarentur. Quam multæ item gentes coma-

tæ, ut pars Galliæ tuæ quæ inde nomen sortita. Item intonsi Sicambri. Et quid cæteras memorare attinet tam multas? ut omnino sicut Ambrosius ait in alenda coma, *excusationem habeant qui patrios usus sequuntur*. Nec sane qui usque ad oricillam capillos demitter, vel ulterius aliquanto, capillos alere dicendi semper. Ἀλλ' οὐκ enim si loquamur, alimus capillos, dum forceps recessit, non mensibus modo vel hebdomadibus, aut diebus, sed etiam momentis. Uti enim crevisse, non crescere arbores videmus, ita & in capillorum furculis usu venit. Eos alimus dum ipsi nutrimur. Naturalis interim inclinatio docet, turpe esse viro si mulierum instar in lumbos demittat capillos, vel etiam nates: mulieri item fore turpe, si procedat capillis usque adeo detonsis, ut non multo ultra aures protendantur, instar adolescentum vel aliorum etiam, qui se ad vulgatiorem aulæ morem componunt. Equidem ita censeo difficile esse aliquid de tonsuræ modo gentibus cunctis præfinire. Plane enim is variat non modo pro locis ac temporibus, sed etiam pro diversa adeo vitæ conditione. Aliud enim ætati convenit prætextatæ, aliud mediæ, aliud senili. Nec quod decet Regem vel aulicum, id etiam clericum. Nec quod militem, id mercatorem, opificem, rusticum. Tondere est ex iis ἀποδύχοντας τὸ μάλλον καὶ τὸ ἥϊον, ut non qualitates modo, sed etiam actiones & passionibus, sicut proditum ab Aristotele in Categoriis.

Perplacet vero, quod non de hoc solo decreris scribere argumento, utcumque multis docturus orbem literatum: sed etiam addere statueris de tonsura clericorum, ac Virginum Deo dicatarum. Video disquiri de origine hac tonsuræ. Athanasius Lib. de Virginitate, Deo sacratæ Virginis exigit τὰς πρίχας κατὰ τὴν περικεκαμμένην. Sed animadverto focerum Junium ambigere num sit is liber genuinus. Et inter alia mihi scrupulum immisit, quod paulo ante legas, si virgo observet eo Libro præcepta, fore ut nomen illius scribatur in Libro vitæ & inveniat in τῷ πρίτῳ τὰ γράμματα τῶν ἀγγέλων. Quæ suspicionem injiciunt, nescio quam certam, juniorem fuisse eum scriptorem Areopagita, qui pene seculo post Athanasium vixit, quantum variis colligere indiciiis possum. Sed utcumque istoc sit, non dubitandum saltem, quin tonsura ea in usu fuerit anno quadringentesimo. Nec tamen hoc inde adstruxero cum multis, quod Hieronymus Epistola ad Augustinum quæ est xxvi. sic scribat. *Frater duos Dominum Alipium & dominum meum Euodium, ut nomine meo saluter, precor coronam tuam.* Vel quod Augustinus ipse Proculianum Episcopum Ep. cxlvii.

cxlvii. alloquitur hoc pacto : *Honorant nos vestri, honorant vos nostri. Per coronam nostram nos adiutant vestri; per coronam vestram vos adiutant nostri.* Possumus enim his in locis per coronam non tam intelligere tonsuram capitis vel rasuram verticis, quam *πετορικὸν* regale sacerdotium. Aliqui etiam signari putant gaudium & gloriam: ut Philipp. iv. & Apocalypf. iii. His igitur argumentis non pugnabo, sed nonnullis saltem in locis obtinuisse horum temporibus, evincere posse videor ex istis B. Hieronymi in gravi illa obijurgatione ad Sabinianum Diaconum. *Moris est in Ægypti, & Syria monasteriis, ut tam Virgo, quam vidua quæ se Deo devoverint, & seculo renuntiantes, omnes delicias seculi conculcaverint, crinem Monasteriorum Matribus offerant desecandum, non intellecto postea contra voluntatem Apostoli inessuræ capite, sed ligato pariter ac velato. Nec hoc quisquam præter tondentes novit, & tonsas; nisi quod quia ab omnibus fit, pene scitur ab omnibus.*

Interea duo hic in considerationem veniunt. Prius est quod non dicit hoc ubique obtinere, sed in Ægypto & Syria: ut hinc liqueat morem fuisse particularem. Deinde item quod non ad Apostolorum provocat institutum, sed morem vocat. Quemadmodum & causas subdit non mysticas profecto ut juniores solent; sed naturales plane. Sic enim subjungit. *Hoc autem duplicem ob causam de consuetudine versum est in naturam: vel quia lavacrum non adeunt, vel quia oleum nec capite nec ore norunt, ne à parvis animalibus quæ inter cutem, & crinem, gigni solent, & concretis sordibus opprimantur.* Plerique etiam adstruere tonsuram illam conantur ex Concilio Carthaginensi iv. Can. xlv. quo interdicti aiunt *ne Clericus alat comam aut barbam.* Quomodo etiam citat Gregorius, nominis ejus notus. Sed post barbam in Gemblacenfi Codice est *tondeat*, in Gandensi S. Bavonis *radat*. Utcumque de barba est, de coma convenit. Adhæc pro se adferunt B. Augustini Librum de Monachorum opere Cap. lxxx. & duobus seqq. Ac sane Calvinus etiam Institut. Lib. iv. Cap. xix. §. xxvii. scribit ex hoc Augustini opere constare, unde originem habuerit clericorum tonsura. Nempe quia illo seculo non alii capillum alerent quam delicatuli, & elegantiarum ejusmodi studiosi, quæ virum minus decerent; eo visum mali fore exempli, si clericis illud permitteretur; eoque satius judicatum, si vel tonderentur vel raderentur, nequid effœminati præ se ferrent. Sed de rasura nihil ibi Augustinus, neque ea tum temporis exigebatur. Quid verò requirat indicant hac verba: *Quo pertinet quæso tam aperte contra Apostoli verba comari? An ita va-*

*candum est, ut nec tonsores operentur?* Et mox, vereor in hoc vitio plura dicere, propter quosdam crinitos fratres, quorum præter hoc multa & pene omnia veneramus. Adfert deinde hoc eorum argumentum *luculose ridiculum*, ut vocat Augustinus: *Virum inquit, prohibuit Apostolus habere Comam. Qui autem seipsos castraverunt propter Regnum Cælorum, jam non sunt viri. Quasi hoc vellent, proinde iis licitum mulierum instar comam nutrire.* Hæc ostendere videntur, fratrum eos, quos Augustinus designat, non modo ad oricillam usque, vel paulo ulterius demisisse capillos, sed credidisse se posse mulierum vel pene mulierum instar alere capillos. Quæ quid ad tonsuram, qualis in clericis, vel monachis, urgetur? Quare in Africa, ut puto, necdum ea obtinuerit tempore Augustini. Multi tamen vetustam adeo arbitrantur, ut originem ab ipsis arceffant Apostolis. Quod & Isidorus facit Lib. ii. de officiis clericorum Cap. IV. Atque ibidem censet ad exemplum fieri Nazaræorum: quasi non, qui Monachi esse incipiunt, tondentur; tonderentur vero qui Nazaræi esse desinerent. Nonnulli etiam qui itidem Apostolos putant tonsuræ auctores, hujusmodi se narratiuncula tument: Petrum cum ad Evangelium prædicandum missus foret, ab inimicis ita fuisse attonsum; sed ei benedixisse Christum: atque ita quod opprobri ergo factum erat, verum esse in honorem. Sic Germanus Episcopus Constantinopolitanus & Ceolfredus apud Bedam Historiæ Anglicæ Lib. v. Cap. xxii. Item tot seculis junior Jacobus de Voragine in Legenda Aurea, ubi de Cathedra Petri. Quibus tanta tonsuræ placet antiquitas, allegant Dionysium Areopagitam Cap. iv. Ecclesiasticæ Hierarchiæ, ubi monachum ait, quando initiandus à sacerdote, *συνεστῆς τῷ πρῶτῳ σφραγισθῆναι*. Id Perionius vertit, *signo crucis consignatum tonderi*. Sed puto, Dionysium hoc velle, tonsuram fieri non *σφραγισθῆναι* sive in orbem, sed *συνεστῆναι*, sive ad modum crucis: ut apud Orientales obtineret. Et sanè hujus tonsuræ *συνεστῆναι* etiam in Euchologiis Græcorum fit mentio. Interea non ex istis ea colligitur tonsuræ antiquitas, quam multi arbitrantur: modò verum sit, quod multis argumentis alibi ostendimus, atque ante nos aliis comprobatum, Dionysium cum summum extremis B. Hieronymi temporibus vixisse. Præterea citant, ut etiam Espenæus nuncupat, *vetus Marcelli decretum*. Qui ab anno ccciv. sedit usque ad ann. cccix. quinquennio nempe ante Silvestrum I. Decretum id habemus apud Gratianum, Decreti part. 11. causâ xx. quæst. 1. *Illud autem statuendum esse censuimus, ut si in minori ætate filii monasterio oblati fuerint, vel sa-*

eram tonsuram, vel velamina susceperint: dignum quidem duximus, ut xv. anno à prælatis moniti verbis inquirantur, utrum in ipso habitu permanere cupiant, an non: si verò permanere professi fuerint, ulterius penitendi locum minimè amplecti possint. Si verò ad secularem habitum reverti voluerint, redeundi licentia nullo modo denegetur: quia satis inutile est, ut coacta servitia Domino præstentur. Sed hoc decretum Gratianus quidem tribuit Marcello Papæ: ac in Glossa ibidem Martino Papæ assignatur. Et ejus temporibus magis convenire, in margine adscriptum Conciliorum editionis Biniæ. Is verò Martinus post Marcellum annis claruit amplius trecentis. Nempe anno l c x l i x. & proximo quinquennio.

Rasura autem multò est recentior, quàm tonsura. Pro antiquitate ejus Anicetum Papam adducunt, qui sedit Anno Dom. c l x v i i. usque ad ann. c l x x. Is jubet capillum radi ad modum sphaeræ, quati dicat, *σφαῖρης*, non Græcorum more, *συγχαλῶν*. Verùm Epistolam eam suspectam esse, nec Bellarminus diffidetur. Imò jam olim eam Cusanus apocrypham pronunciavit, posteaque Antonius Augustinus, Lorinus, alii magno numero, quicquid contrà contendat Turrianus. Et sane non tantam esse rasuræ antiquitatem multifariam comprobatur: inter alia eo, quod Clemens Alexandrinus lib. i i i. Pædagogi tonderi jubet, non novacula, quod illiberale ait, sed forfice. Atque ille de cunctis loquitur Christianis. Ac sacerdotes tangit Catholicos, quod Donatistarum nitem eos radentium improbat Optatus Milevitanus contra Parmenianum. Hieronymus quoque in Ezechielem cap. x l i v. ait, sacerdotes non debere comam alere, nec tamen radi. Sed ipsum audiamus: *Juxta quod dicimus, nec calvitium novacula esse faciendum: nec ita ad pressum tendendum caput, ut rasorum similis esse videamur, sed in tantum capillos demittendos, ut aperta sit cutis.* Et triplici hac motus auctoritate Bellarminus lib. i i. de Monachis agnoscit, rasuram primitus non obtinuisse. Et sane non occurrit nunc quisquam, qui quingentesimum ante annum meminerit rasuræ. Atque in iis, qui de Monachis agentes solius tonsuræ faciunt mentionem, etiam est Joannes Climacus in Paradisi scala, Gradu i v. Vixit ille, non an. quidem c c x l, ut Trithemius putavit: sed an. i o l x. quemadmodum nec Bellarminus diffidetur in scriptoribus Ecclesiasticis.

Sed cum ego hæc tam multis, obliviscor mei, inò tui. Nam quid ego, nisi *γλαυκῶς εἰς Ἀθήνας*, ac præterea, quod cujus labores mirer, eos morer? Uxori lætissimæ salutem. Spero me posse vos invisere, ubi filium re-

ducem è Galliis videro. Sed gratissimum fuerit, si prius te, & conjugem, & quos è liberis ac familia adducere præterea integrum erit, apud nos conspexero. Etiam uxor, quæ aliquanto melius valet, (vides, cur hoc addam) impensè id flagitat.

*Amstelodami, Incomparabilis doctrinæ virtutemque tuarum cultor,*  
c l o l x l i v.  
vii. Id. Jun.

G. J. Vossius.

### CCCCLXIX.

Ludovico Crocio, *Doct. & Prof. Theolog.*

Clarissime & amicissime,

**V**ellem, uti petieram, ornatissimus Dofenius me accessisset pridie quam esset abiturus; sed nunc demum in urbem venit post semihorulam rediturus, ut mox navem adscendat. Interea, etli nunc mecum sint hospitum nonnulli, in his nobilissimus Magduellus, militaris judicii præses in Frisia, nefas putavi non subito aliquot literularum exarare. Gaudeo te tam multis infestis, animo esse bono infractoque: ac Deum oro, ut semper idem esse velis; fiat à partibus tuis scriptura: stat omnis vetus Ecclesia: stat etiam ex reformatis optimus quisque & doctissimus. Amo consulem Dofenium, quod te amet, & faveat, foveatque causam optimam. Memini te literis superioribus de illustri Grotio judicium meum exposcere; de quo pluribus alias loquar. Nunc solum dixerò, injurios illi esse qui Pontificium esse factum spargunt. Arbitratur in reformatione à nostris facta, multa recte esse emendata, multa non; item, ut hic etiam locum habeat poetæ illud, *Excessit medicina modum.* Putat ea, quæ non sunt propria Ecclesiæ Romanæ, sed universæ, (qualia sane quæ continentur Canonibus Ecclesiæ universæ, codice à Justiniano etiam Imperatore comprobato) non posse pro Pontificiæ Ecclesiæ propriis haberi, nedum ut ab Antichristo profecta censeantur. Sedulo attendit, quæ semper in Ecclesia obtinuerint, quæ postea, alia aliis citius tardiusque fuerint statuta. Ac plane censet, ut in Romana Ecclesia multa à multis superstitione fiant, nec tyrannidem plurimorum Paparum probare bonus quisquam possit; ita quoque seu doctrinam, seu regimen Ecclesiæ, ac ritus spectemus, multa in nostris posse jure improbari, magis interim in iis qui Calvinum sequuntur, quam qui Augustanam Confessionem. Facilius enim censet inter

Lu-



Lutheranos conventurum (præsertim tales qualis Calixtus, præclarus sane vir) interque Pontificios, præcipue Gallos & alios, non plane Erasmm, Cassandrum, Casaubonum, Anton. de Dominis, & similes exosos: quam inter eos, qui in Calvinii verba jurarunt, & qui Romanæ Ecclesiæ placita rigidius duriusque quam necesse sit, interpretantur, aut qui ex particularibus Romanæ Ecclesiæ doctoribus putant de universa Ecclesia Romana statui oportere; nec sane quod negat Episcopum urbis esse Antichristum, ab alia æque causa est, quam quod videt, nullam esse spem reconciliationis, vel ejus etiam tentandæ, si hoc altè adeo animis sit inscriptum agi de conciliatione cum Antichristo, Diaboli Vicario. In cunctis vero, quæ ad hoc argumentum pertinentia exaravit, non hoc petit, ut alba omnia signemus linea: sed studium laudemus, & expendamus cuncta ad Scripturas ex primæva antiquitatis mente intellectas. Idem summus vir jam pene absolvit quæ duobus ingentibus Tomis ad difficilia Veteris Testamenti loca annotavit. Ac mox consequentur commentarii in Acta, & cætera N. Testamenti. Filium desidero videre. Nondum enim me convenit. Nulla in re operam meam desiderabit. Pro ingenii tui monumentis, quæ subinde mittis, gratias ago quantum possum.

CCCCCLXX.

Georgio Ratallero Dubletio.

Nobilissime & amplissime vir,

**S**emel iterumque locutus hic sum cum amplissimo Alberto Conradi Burgio, qui secundum factus Consul, ac collegas habet Pancrarium, Geelvinckium, & Gravium defuncti consulis Gravii filium dignissimum. Is Burghius retulit mihi à nemine se hætenus compellatum de negotii filii Matthæi: sed causa jam à superioris anni consulibus approbata, velle agere, quantum possit, nec videre, cur adversari aliæ civitates valeant, cum nihil eorum hic fiat incommodo. Ait se crastino die abiturum Hagam, qui erit decimus Februarii. Id volui tibi constare: etsi sic quoque spissum vereor negotium, cum raro adeo sit domi, si is Hagæ est, qui hic fuit. Itaque jam ab aliquot annis sapius cum frustra fuissem, non soleo accedere nisi constite-

rit, quâ horâ vacare possit, ut compellem. Id video Hagæ fieri non posse in tanta aduentium copia, ut nulli horam certam valeat addicere: eo magis dolet, quod tam molestum negotium susceperis. Atque utinam potius sponte obviam fiat, qui nusquam minus quam domi esse soleat. Hesterno die literas accepi à filio Venetiis, quem saluum ac fospitem gaudeo. Scribit non diu se istic hæsurum, sed intra mensem rediturum in Gallias. In sumptibus, quos facio, solatur quod sit frugi & φιλομαθής, inque omnibus bibliothecarum pluteis ac forulis rursus plane φιλόπρος. Non quidem tanquam Jasonem aliquem cum vellere aureo, attamen cum multis ἀνεδέτοις, auro contra non caris reducem me visurum confido; nisi quid mihi interea humanitus obtigerit, vel etiam carissimo isti capiti; sed ut sumptibus nonnullis mihi hoc iter Isaacii mei stat; ita majoribus connubium Matthæi, non satis sese fortunis meis metientis. Itaque decretum repetere ab illustribus Hollandiæ & West-Friiæ Ordinibus sortem bis mille & septingentorum florenorum: quorum reditus expiret xvii. Aprilis. Puto necesse esse, ut sex hebdomadibus id Myropio significetur in ante diem quem dixi. Necdum tamen certi quicquam statui: & fortasse præstiterit repolcere pecuniam à Dordrechtano Quæstore, quandoquidem istic annos xxx. ante & ultra est collocata. Quando otium erit, tribus verbis indica, siquid in hac re scitu mihi sit opus, quod nostri similes fugere soleat. Nudius tertius mihi reddidit literæ ab Illust. Grotio ex quibus intelligo intra tres menses posse absolvi, quæ annotavit ad libros veteris Instrumenti, eos etiam, quos Hebraus Canon non agnoscit. Hinc tore, ait, ut prælum defuderit istis, quæ ad Acta Apostolica. Epistolas & Apocalypsin est commentatus. Equidem exopto ut videre liceat. Sancillis in IV. Evangelistas multa me bona docuit: ac sicubi recedam, occasionem tamen accuratius meditando præbet. Imprimis desidero Apocalypseos interpretationem, quando nesciri, si Hieronymum Zan-hium & paucos alios excepero, cuncta ad urbis Episcopum solent referre, præter antiquorum mentem à quibus invitatus abire soleo. Et tamen non disliceor in Prophetiis posse esse, quæ antiquioribus invisa, nos ipsa docuerit dies, optima etiam stultorum, ut aiunt, magistra. Deus te diu familiæ, Reip. & amicis conservet. Amplissimo Reigersbergio salutem dicito; item assidui Nobili Dubletio, item reverendo Doctori Johnsono & si Hagæ fuerit Doct. Goffio. Huic debeo exemplar de Idololatria, quod diu misissem, nisi in mora fuisset bibliopega. Ante diem unum accepi compactum; sed nescio

nescio ubi degat Goffius, & gravare famulum tuum nolui.

*Amstelodami,* c15 Ibc xliii.  
ix. Feb.

*Tuus totus,*

G. J. Vossius.

CCCCLXXI.

Geo. Ratallero Dubletio.

Nobilis & Amplissime Senator,

**Q**uos ad me quadringentos misisti flores, eos hesternæ die accepi. Ac ex pecunia apud Quæstorem Dordrechtanum collocata Aprili proximo refundo. Pro cura & affectu quas debeo gratias ago. Matthæus meus, ut arbitror, intra hebdomadas duas vel præterpropter affuturus est nobis. Quod opto, ut videam, numquid in Annalibus Batavicus promoverit; omnino ex illorum est genere, quibus subinde auri sit vellenda. Ergo ubi redierit pro *ἐργασίας* ero. Ante triduum redditæ mihi ab Isaaco literæ, quibus significat, se post duos tres dies Venetiis Mediolanum cogitare, atque inde Genevam. De Mediolano, urbē hostili, non multum adlubescit. Sed solatur, quod in hujusmodi moderari linguam sciat. Et credo, si bene novi, potius quam in periculum incideret, ea diceret, faceret, quæ ego ab animo meo non impetrarem. Amplissimo Reigerbergio salutem; uti & gemino nomine conjunctissimo affini tuo Dubletio, nec minus patrueli. Et cur non suaviſſimis liberis addam, præsertim natu maximo Philippo. Ubi occasio fuerit excurrendi, erit, spero, quod de profectu ejus mihi gaudeam, tibi gratuler.

*Amstelodami,*  
c15 Ibc xliiii.  
Non. Martiis.

*Tuus omni officio,*

G. J. Vossius.

CCCCLXXII.

..... Borrio J. C.

**H**esternæ die, Cognate optime, literas miſi, Amplissimo Dubletio inſcriptas, ecce nunc alteras, quibus Senatori Reigerbergio commendando negotium tuum. Ubi diem adſcripſeris, aliquid ſigillo, quod impreſſimus, cære ſubdes. Valde exopto, ut voti tui compos ſias. Quod ſi pluribus ſcri-

bendo exiſtimabis me aliquid poſſe, tuum eſt iſthoc mihi ſignificare, qui paratior ſum ad gratificandum tibi in quocunque negotio, quam tu ſis futurus in poſcenda opera noſtra. Redditæ mihi heri literæ etiam ab ſecero tuo Ampliſſimo, cui, ut arbitror, nihil attinet hoc tempore reſpondere. Nam eadem reponerem, quæ tibi ſcribo. Plurimam autem meo nomine ſalutem dicito; uti & ſocii & conjugi & utrique adini, niſi alterum illorum Galliæ adhuc tenent. Meus Iſaacus poſt luſtratam Britanniam, Galliam, Italiam, nunc de domitione videtur cogitare. Poſtrema quæ ab eo accepi literæ Venetiis ſcriptæ erant; ſed addebat intra triduum ſe Mediolanum cogitare Genevam. Si Deus ſiverit, redibit ad nos ingenti Manuſcriptorum Codicum necdum editorum ſupelleſtile inſtructus. Aſſidue pro ejus reditu vota ad Deum fundo: negotium etiam emne divino numini committo, quod ſolum novit quid expediat utrique noſtri. Eo autem ſollicitior ſum, quod toties jam in liberorum flore novercam experior fortunam, ſi ſic ſas loqui Chriſtiano. Vale, cariſſime Cognate.

*Amſtelodami,*  
c15 Ibc xliiii.  
Poſtr. Id. Mart.

*Tuus omni officio,*

G. J. Vossius.

CCCCLXXIII.

Cl. V. Andr. Riveto *Theologo.*

Reverende ac Clariffime vir,

**M**ultum tibi, nec paullo amplius debeo Ampliſſimo Gothofredo de munere iſto Philoſorgiano. Vere miſiſti *ἀγαθὸν ἀγαθὸν*, ſive enim Philoſorgium attendem, multa docet, quæ abſque eo eſſet, nesciremus: ſive *ἡ πόλις* Gothofredum, licet magni ſemper eum fecerim, valde tamen hac opera auxit apud me exiſtimationem ſuam. Adco multa ſunt quæ non me modo & mei ſimiles, ſed longe etiam doceat doctiores. Sed quoties mecum cogito tot florentiſſima Galliæ tuæ ingenia, nescio, magiſne doleam fortem ſœderatæ hujus Belgicæ, an gratuler Galliæ, quæ tot tantivis pretii laboribus beare tempora noſtra, & poſtera ſimul ſæcula non ceſſat. Belgica vero hæc num ultra duos tres laudare poſſit (ſi modo tantus eorum numerus) qui lucem adferre veteris eccleſiæ temporibus vel velint, ſi poſſint, vel poſſint, ſi velint? Atque in horum, quos nunc culpo numerum referre etiam liceat nomen meum, quamvis pro tuo erga me

-H h h

amo-

amore benigne adeo de me loquaris, & scribas, etiam in nupero ingenii doctrinaeque tuæ monumento, pro quo munere magnas ago gratias, atque utinam possim aliquid rependere. Sed ita distineor, ut semper metuam, ne promere aliquid si velim, illud crudum adeo sit, ut non faciat ad palatum eorum, qui dapibus adfuevere exquisitis. Et tamen durat ardor ille nobis ferventissimus Ecclesiasticae Antiquitatis. Quantillum vero hoc, si ut Aspendius tibicen, mihi duntaxat canam & Musis! Id me facere negabis. Equidem facio in illis quidem, quæ ad veteris Ecclesiæ tempora pertinent. Quamquam in aliis etiam quantillum est, quod promoveo. Nunc sub prælo est Elzeviriano liber de vitis sermonis, falso suspectis, & variis glossematibus: ubi proposui mihi, tum aperire in quam multis à puro sermone abeant hodie multi non ineruditi, tum tueri quæ temere à multis culpari solent, tum lucem adferre semibarbaris superiorum seculorum scriptoribus, quorum sermo, cum allium & cepas oleat, sæpius tamen grandes habet sensus, ut non videam operam ludere, si præstem, ut melius intelligantur. Interea quid ista magnopere ad ea, quæ amici ab hac ætate mea exposcunt, ut aliqua saltem ex parte iis satisfacerem. Blauwio dedi excudendum libellum de anno Christi natali & emortuali. Qui licet necdum divulgatus sit, tamen jam ante menses sex septem ad finem perductus à Typothetis. Adjungere volui minutam diatribam de genere Christi. Tantummodo quinque est, ut vocant, quaternionum. Et nihil mei à Blauwio, his exceptis excusum intra quinque hos menses. Quæ idcirco attuli, ut videas, nihil mea obfata doctissimo operi Blondelliano. Quid igitur, inquires, moratur? Vir Blauwius est minime malus: sed ut Mercuriales omnes solent, erepto fratre, in quem magna pars oneris recumbebat, serio dispicere solet quid sit in rem suam. Habuit autem & aliunde, quæ excuderet, & quæ absolvi posse existimaret, ante proximas nundinas Francofurtenses: quod de Blondellianis non ausus erat sibi promittere. Maluit igitur illa prævertere. Accessit, quod characteres Blondelliani tam minuti forent, ut brevibus & nebulosis hyemis diebus Typotheta mira cum molestia legeret, quod fere ad candelam fuit. Propterea voluit expectare dies & longiores & sereniores. Sic vero in animum inducas tuum, atque idem clarissimo Blondello persuasum velim, nunquam ab meis ullam ornatissimo ejus labori remoram fore, sed neque passurum, ut opere illo alterius, quo nunc prælum fervet, ad umbilicum perducto, post-

habeat (si quid valeam) Blondelliana cuiusquam scriptis. De magno Salmasio quod scribis, mox à Paschalibus feriis dominationem ad nos parare velle, valde me gaudio affecit. Pene dixerim, sæculum mihi videri, quod eo caremus. Funus Hellenisticum ejus, & Ossilegium legi. Placet causa Salmasiana, & in Ossilegio etiam modestia. De funete improbarem acre illud & acerbum, nisi nossem, quam crudeliter ille, quem impetit, tractare soleat omnes bene de studiis mereri cupidos, quasi honoris illud, quod aliis accedit, illi decederet. Mihi contra semper visum fuit, à nullo omnem eruditionem possideri, sed bene nobiscum agi si cum Hercule obtineamus partem decumanam. Imo hoc ipsum arbitror obtigisse nemini, ut multum is mihi demum scire videatur, qui scit, quantum nesciat. Hoc utinam omnes non chartis (uti ego nunc facio, & ille, quem me scis dicere, assolet) sed animo inscribamur penitissimo. Gratum fuit intelligere, quis ille sit, quicum disputat in Ossilegio maximus Salmasius. Nam multa erudite objicit: ut hinc affinis tui Bocharti egregiam doctrinam non obscure intelligam. Sane si istis armis non possit defendi causa linguæ Hellenisticæ, actum de ea & conclamatum. Bene etiam sit affini, qui Salmasiano illi scripto occasionem dedit. Abrumpam, qui & alteram me video paginam impleffe. Nisi hoc addere operæ est, gemino me nomine gratias iterum tibi agere, tum pro Dissertatione tua de pace Ecclesiæ, eo magis quia fuere complura unde proficerem, tum pro opera in tramittendo Philostorgio Amplissimi Gothofredi, quem non patiar deinceps expertem esse ullius, quod juris publici faciamus. Uxori lectissimæ salutem.

*Amstelod. c. d. Id. c. xliii.*  
Prid. Kal. April.

CCCCLXXIV.

Merico Casaubono, Isaaci Filio.

Reverende ac clarissime vir, conjunctissime Collega,

**H**odie adfuit mihi Hoofdius, urbis hujus incolæ, ac significavit ut à fratre literas accepit Londino, è quibus intelligat, accepisse cum trimestre isthoc salarium, quod à mense Septembri debebatur mihi ex regia beneficentia, seque id hac ipsa hebdomade refun-



refundere mihi paratum aiebat. Sed & luculentam spem faciebat alterius trimestris, quod extremo Decembri exspiravit. Ego hac occasione scribendum mihi putavi, ac gratias tibi, & universo Reverendorum fratrum collegio agendas, quod mei, longe distiti, usque adeo turbatis Angliæ rebus memores esse pergatis. Et si nuper, pro modo ingenioli, doctrinæque nostræ, testari volui affectum erga fratres reverendos, animum istum non deponam, dum vivam. Ægre mihi est, quod tam pauca de dilectis adeo capitibus intelligam: Sed scio, peccata omnium nostri meruisse, ut tanti fiant motus in ecclesia pariter ac regno, qui non sinunt ut literaria sint commercia, sicut solent. Et tamen, ut confido, dabit Deus his quoque finem. Huc assiduo preces meæ adspirant & tot bonorum. Ætas mea, egregie vir & amice, ingravescit. Sarcinulas igitur colligo, ut potiora eorum, quæ quadraginta & amplius annorum spatio exaravi, juris fiant publici: atque id non in sacris modo, et si his imprimis, sed etiam politioribus literis & Philosophia. Quæ nunc sub manibus habeam literis proximis cognosces. Tam multa enim sunt quæ molior, ut quid primum, quid medio loco, quod postremo exsequar, equidem ne ipse quidem satis perspiciam. Uxori optinæ, Reverendo Decano, venerandorum fratrum singulis, salutem plurimam dicas, rogo.

*Amstelod. cId Ibc xliiii.*  
Kal. Maii, St. vet.

*Tuus eternum & fratrum reverendorum,*

G. J. Vossius.

# CCCCCLXXV.

Joanni Friderico Gronovio.

Clarissime Gronovi,

**P**Ergratum est, quod usui tibi esse possit bibliotheca mea: eo magis quia ipse uti nequeam, prout vellem, ob nimiam salutantium multitudinem. Absque noctibus foret, cum nunc male mecum agatur, pessime. Nam quid mei similibus, vel nostri potius infelicius est, quam assidue avelli à libris, quod mihi interdum decies de die contingit? Mitto autem ex iis quos poposceras Grammaticos methodicos, à Putschio editos. Habeo & Priscianum Manuscriptum, bonæ notæ, Aldinum & hoc antiquioris editionis. Quos misissem, si id velle scirem. Scis & mihi Nonium esse Manuscriptum longe optimum. Siquid locorum

voles inquiri, non gravate id fiet: mitto præterea Schotti observationes humanas. Item Leonartum Porcium Vicentinum de festertio, talentis, aliisque: Item Aquilæ & Mameramni libellos Aquilæ adjunctos, adhæc Henniffschium Mathematicum de Assè & ejus partibus; Chisletium de numismate antiquo, & Puteanum de ratione pecuniæ Romanæ; volui & videres Greplium de siclo & talento, licet ambigerem annon id conspexisses, tum autem num usui esse posset. Paschallii Grosippii sive Scioppii Mercurium, Prisciani, Fannii, Bedæ, & Metiani opuscula addidi, quod ad eos & Vineti notas quædam Scaliger adscripsisset. Habeo & mei consanguinei Budelii de re nummaria libros duos, cum xxv. aliis libris, quos suis adjecit, sed magis ad juris scientiam quam philologiam pertinent. Mittam tamen si ita voles. Quas tanto ante literas Clarissimo Ifendornio dederas, eas accepi ante biduum, cum pridie mihi redditæ forent à Reigersbergio, quas dedisses ornatissimo Gerardino. Isaacus meus Lutetiam est reversus & cum illustrissimo Grotio vivit. Utrum ante hyemem sit reversurus, an ea exacta, dicere nequeo. Valde triumphat de tam multis à se descriptis, quæ adhuc *à videri*. Salmasio ab illustribus ordinibus navis jam mittitur bellica, quæ eum referat Academiæ. Multum gaudeo de elegantissimi ingenii viro Vincentio Fabricio, omnino honore de quo scribis, dignissimus est. Nec hic apex fuerit sed gradus. Matthæus meus te *à videri*, ejus conjux, quantum rationes putamus, binis tuam mensibus antevertet. Utrique facilem partum opto, & ut sepius læta prole maritos faciant parentes. Clarissimis collegis, Duittio, Ifendornio, & (quem præmississe oportuit si tanti res foret) Christenio salutem. cId Ibc xliiii. xxvi. Octob. mira festinatione, ob eos qui scribenti interveniunt.

# CCCCCLXXVI.

Friderico Spanhemio, Theologo.

Eximie & Clarissime vir,

**Q**Uod coram promiseram nuper, nunc præsto. Utinam modo opusculum, quod mitto, sapiat palato tuo. Cujus ego judicium multorum instar æstimo, cæterum illi de genere & annis Christi, addidi, alterum aliquanto ante divulgatum, de tribus symbolis. Nempe ut opusculum tam minutum,

H h h 2

tum,

um, si auferret, paulo fieret commendabilius. Magnam ex eo voluptatem capio, quod omnia sic Leidæ tuis personant laudibus. Sic enim intelligo ex multis, qui inde huc veniunt. Sordeſcere cœperant veteris Ecclesiæ tempora, quæ bellè adeo ſocias cum nostris. Te tibiſcinè, non metuam, ne juvenus deinceps diſcretui habeat doctores antiquos. Nec ignoro, quantum debeamus magnis viris, quos paterna & avita ætas tulit. Ac male de nobis, pejus de Ecclesia meremur, ſi ſic eos amplexemur, ut propterea priores, præſertim primævos illos faciamus depontanos ſenes, ut cætera mittam damna, hoc pacto ne ingrati quidem animi crimen effugiamus. Illud quoque præclare de Academia ſperare jubet, quod ſalvus ac ſoſpes redierit *ἡ πόλις* Salmaſius. Vir undecunque magnus, ac ut in cætera hiſtoria ita Eccleſiaſtica, ſiquis alius penitus ſubactus. Quid non à tam nobili pare, una in urbe degenti, liceat ſperare? Quocirca non deſinam Deum rogare, ut uterque veſtri, multos in annos, letus interſit populo Batavo.

Vale, Præſantiſſime Spanhemi, atque ita tibi perſuade, nunquam fore, ut officium meum claudicet, ubi opera noſtra utilis eſſe poſſit tibi, vel tuis.

*Amſtelodami, clō Ibc xliii.*  
Poſtr. Non. Decembris.

# CCCCCLXXVII.

Andræ Riveto *Theologo.*

Reverende, ac Clariſſime vir,

**M**Inutum mitto opusculum de genere & annis Chriſti, in quo plus mihi inſumptum laboris, quam pro mole videatur. Sed utrum operæ respondeat fructus, tui eſto judicii, quod merito maximi ſemper feci. Plura, & ut conſido meliora hoc à me anno habuiſſes, niſi valetudo nunc mea, nunc conjugis obſtituiſſet. Ingentem Salmaſium ad nos ſalvum ac ſoſpitem rediſſe, impenſè lætor, magis etiam gavifurus, ſi alternis dederit nobis nunc de Scholica literarum dape, nunc de veteris Eccleſiæ rebus: Quo pertinerent, quæ ad Concilium Illiberitanum commentatus ſuit. Sed nimis diu cum blattis & tineis, ut metuo rixantur. Spero hoc duce, & ſimul clariſſimo Spanhemio, velut ab orco poſſe revocari eccleſiaſtica antiquitatis ſtadium, quod poſt tuum à Leidenſibus abitum, ac Thyſii obitum, jacuit velut ſepultum diſcretumque. Utinam & Petitus hæc in

oras, cujus mihi quidam ſpem fecerat, fuiſſet advocatus. Sic cum iis quadrigam ſeciſſes, quamvis paulum ſeparatus loci intervallo. Majori ego diſjunctus, lubens curum veſtrum eſſem conſecutus, uti olim triumphantium ſolent. Vale, vir & amice eximie, ac meo & conjugis nomine, plurimum ſaluta conjugem tuam; cujus frater clariſſimus quo pacto valeat ſcire deſiderem. Ergo, quando otium & occaſio melior erit, aliquid ſcribendi ad me (non urgeo negotium, qui ipſe uſque adeo negligens eſſe ſoleo in literario commercio) quaſo de iſthoc tribus verbis adſperge quippiam.

*Amſtelodami,*  
clō Ibc xliii.  
Poſt. Non. Decembris.

Reverendo ac clariſſimo  
mini tuo addiſſimus,

G. J. Voſſius.

# CCCCCLXXVIII.

Georgio Ratallero Dubletio *Senatori*  
*Curiae ſupremæ.*

Nobilis Ampliſſimeque vir,

**T**Andem vides libellum de annis Chriſti: cui & diatribam præmiſi de genere Chriſti, dicavi cum laborem urbis noſtræ Conſulibus. Id enim jamdiu expectabatur ab iis. Majoris aliquid molis maluiſſem, ſed non ſivit vel mea vel uxoris valetudo, quæ diu nos affixit & adhuc detinet conjugem; operi de Vitiis Sermonis accudere animus Gloſſarium latino-barbarum. Quod erit tripartitum, de vocibus penitus barbaris, de barbarorum iis quæ ortum Latio debent, de latinis quidem, ſed non more latinorum uſurpatis. Exemplum primi generis eſt, burdo, pro mulo, bannus pro proſcriptione. Alterius albedo pro albor, labilis pro infirmo. Terti, capella, pro ſacello, hoſpes pro caupone. In ſingulis harumce partium prius videbo de nominibus, tum verbis, hinc particulis. Ut claſſes ſint futurae novenæ. Tripartito gloſſario ſubdam de iis quæ falſo eruditis etiam hominibus barbara cenſentur. Ac gloſſario quidem id propoſitum mihi, ut intelligantur poſteriorum ſeculorum ſcriptores. Nam ſi res univerſæ Eccleſiæ, omniumque imperiorum ſcire volumus, intelligi opus non illos modo, qui purè caſtæque locuti, ſed etiam labantis Latinitatis, atque adeo collaſſe auctores. Malles credo, hæc ab alio fieri, ſed neque ego hoc ætatis id laboris ſuſciperem, niſi jam olim egregiam iſtorum ſylvam mihi paraſſem. Edendo igitur illa, quæ

quæ ad barbarissimum seu solceissimum pertinerent, longius sum digressus, ne periret labor iste vel mihi, vel publico. Interea opera etiam dabitur, ut priusquam ita videant lucem, (id vix ante seminatum erit, ita sub manibus labor crescit) quædam in publicum prodierint, quæ ad Philosophiam vel Ecclesiæ historiam pertineant. Filius Matthæus, in eo est totus, ut tertium Annalium tomum tradat typographo, quod proxima fore hebdomade existimat. Isaacus, postquam periculose adeo Mediolani ægrotarat, spes rediit Parisios; ubi in ædibus Illustrissimi Grotii agit. Puto, sic expedire, ut maiorem sibi & juris, & rerum civilium scientiam paret: quod vix alibi tam feliciter posset, quam ea in urbe & domo. Superest rogem, ut singula opuscula iis per famulum procures, quibus à me mitti in frontispicio adscripti. Potueram, & credo, debueram parcere hac in re occupationibus tuis. Sed si per tabellarium singulis misissem seorsim, scribendum fuerat singulis. Laboris istius fugienti ignosces. Vale, Nobilissime Senator, præsidium & delictum nostrum.

*Amst. c1b lxxiii.*  
*Post. Non. Dec.*

## CCCCCLXXIX.

Ger. Joh. Vossius, Hugoni Grotio  
*S. P.*

Illustrissime Domine Legate;

**G**Audeo Isaacum meum Mediolano saluum. Quam paucum malè me habet, quod simulac vestra urbe posuerat pedem, de reditu quidem tribus me verbis fecit certior, ac per Tabellarium proximum prolixius se scripturum promisit; at ne per secundum quidem nuncium Literarum aliquid misit: ut subvereri cogar, ne Mediolano festinanti, hoc iter tam longum confecerit, quam à querquero illo morbo, vix dum depulso, corporis finiret infirmitas. Quod si, ut spero, valetudo nunc secunda ei, nolim iterum eum moretur ..... ndia, quo minus fruendo coram Excellentia tua, cum itineris sui fructum superaddat, cujus consequendi occasionem frustra desideret postea. Intelligo etiam Lutetiæ esse filium Amplissimi Consulis Conradi Burgii. Cui quam benè velis, abundè cognovi ex Excellentia tuæ ad me literis, jam ab eo tempore, cum eum commendarem, per Gallias, ut credebatur, unà cum Hortensio iturum

ad *non uangelis* Galileum de Galilæis. Quamquam verò nullus dubito quin idem sit, qui olim fuit; tamen longè fuerit iucundissimum ex tuâ Excellentia intelligere, quid censeas de ejus vita, studiis, atque industria. Crebro enim itare in aulam vestram eoque frequentius quod ibidem habeat Amitinum suum Beuningium, narravit mihi hodièque Nobilis Filius tuus, Petrus Grotius: qui Patruo Guilhelmo, atque adeo penè ejus familia omni, Haga abeunte; nihil cauere vidit, cur non & ipse feriis fruatur, iisque Amitinos Reigersbergios in urbe visitet nostra. Avidè omnes bonam mentem amantes expectant, quæ ad veteris Instrumenti Libros annotasti. Cognosco jam Excellentiam tuam in tertio volumine desudare. Utinam mihi Deus longam adeo vitam concedat, ut qui illa in novum Fœdus plus oculis meis amo, etiam me pascam cæteris, citra dubium nihil nisi nectar spirantibus. Malevoli ringantur, certent porro non dictis, sed maledictis; quasi cuminum sererent, aut ocymum. Sol non invidet vespere. Et tamen vellem non tantas moras necti ab eo qui responsurus sit, illis sic habenas irarum in Ex. T. effluentibus, optimèque etiam dicta in deteriorem rapientibus partem; qui nihil æquè audiunt inviti, quàm quod medicina dicitur modum excessisse. Valetudo mihi ab aliquot hebdomadis, ut non pessima, ita parum prospera, credo ab eo, quod ob diurna impedimenta non sat parcam noctibus. Interim animus nihil novi auspicari. Quorsum enim? qui tam multa sum aggressus, ut me subinde stultitiæ econdemnem. Sic enim egi, quasi longissimam mihi ætatem sponderem. Sero nunc sapio. Nempe, ut olim aiebat ille, sapere incipimus plerique omnes, cum desinimus vivere. Nec tamen magnoperè id malè me habet semper. Utcunque enim illa, quæ perficere non licebit, haberi debent pro non inchoatis; tamen præter honestam voluptatem, quam ex ea studiorum varietate cepi, hoc feci boni, quod in iis, quæ jam juris publici facta, vel effecta habeo, multa ob studiorum nexum, illustrius, saltem magis ex animi nostri sententia tractavimus, quam si in studiis, scriptisque, arctiores mihi limites præfinsiissem.

Deus Opt. Max. Excellentiam Tuam, Conjugem Heroïnam, ac familiam universam, diutissimè salvam ac sospitem conservet.

*Amst. c1b lxxiii.*  
*v Id. Sextiles.*

*Illustrissime Excellentie  
 Tue Cultor devotissimus,  
 G. J. Vossius.*

Con-



Consulem Flamingium Dom. ab Osthorn nudiusfertius amisimus, magno cum bonorum dolore. Sustulere illum ingentes calculi dolores: propter quos sæpè mortem exoptavit, corde alioqui vegeto, ac firmo. Multum amisi in viro tam amanti domus nostræ: sed non paulò amplius est, quod in eo perdidit Resp. De faventia erga Excellentiam Tuam, scis ipse, & nunquam apud me occasionem, vel minimam neglexit testandi erga Excellentiam Tuam propensissimum affectum.

CCCCCLXXX.

*Viro Illustri Claudio Salmasio,  
G. Jo. Vossius S. P. D.*

**T**Andem igitur læta advenit dies, quæ de te, magne Vir pariterque amice, prospera fors Batavis reddidit, ac nobis. Quod bene prospereque vertat equidem verè dixerò, menses prope singulos, mihi annum vifos, dum amici te caremus, imò Batavia sole suo destituitur. Ex singulis qui è Galliis venirent, vel quibus scripisses, si occasio daretur, quærere de te soleo, & adventus tui spe. Malis negantibus, te de reditu cogitare; illi contra propinquam spem facere. Absque eo esset, non tam diu siluissent literæ meæ. Multum verò gaudeo, quod interea dum abes Leidenfium Doctorum numero, accesserit Clariss. Spanhemius; vir, quantum ex omnibus intelligo, dignus, quicum in tenebris mices. Quiddam grande est candor hoc seculo, nigrorum hominum tam feraci. Et ad ejus laudes accedit, quod vetera Ecclesiæ tempora æstimat, quia novit; contra quam alii tam multi, quibus est moris contemnere, quod non didicerunt. Quid verò deinceps primò à te expectabimus? Est qui Colophonem de usuris malit. Alius Arnobium. Ego Concilium Illiberitanum. Amici quidam de Episcopis & Presbyteris. Illustrissimus Princeps Arautonenfis de re militari veterum. Sanè hunc prævertere æquum est. Sed qui igneam ingenii tui aciem, acre judicium, omnigenam doctrinam novit, & quam multa jamdiu habeas parata ad prælum, is non dubitabit sperare gemino etiam prælo posse operam tuam defudare. Et tamen nihil ejusmodi ausim exposcere, vel etiam suadere. Quippe valetudini metuo, quam non esse ferream nuperus ostendit morbus in Galliis. Quare subinde animo illud obversetur, quod sapientissimo Augusto crebro in ore esse solet,

Lentè Festinandum. Atque hoc cum tibi valetudinis causa curandum existimem, mihi longe alia de causa occini possit: puta, ne non iis, quibus tu animi dotibus instructus, festinare nimis si velim, fiat illud, quod proverbio dicitur de Cane festinante. Sane dum in Galliis distineris, quædam feci juris publici, an festinantius quam oportuit, tui esto judicii. Ea sunt quatuor de Theologia Gentili, & Physiologia Christiana. Ad hæc de tribus Symbolis, & genere atque annis Christi. Ea mitto, una cum filii Dionysii Maimonide. Primum istorum, de Paganica dico Religione, & Naturæ scientia simulac edideram, Clarissimo olim Collegæ Heipsio *avindogev* (nam exercitationes illius in N. T. ab eo acceperam) L. M. Q. per adolescentem qui verbis ejus significavit, necdum se rescribere, quia non solet judicium ferre, de iis quæ necdum legerit. Plane hoc Secreticum. Quam stulte enim de necdum visis judicia vulgo ferri solent? Sed ut ne parum humanè mecum egisse censeas, mense totò post literis mihi gratias egit: ac ut constantiam videas, addidit, velle suum etiam judicium, ubi legerit, perscribere. Necdum legisse arbitror, nec fieri postulo, quia nec tanti mea facio, ut bonas horas nostris consumat, vel obiter etiam lustrat, quo vel ex ungue Leonem, quod dicitur, vel ex ungula æstimet Asinum. Hoc igitur futurum ad Kalendas Græcas. Maximas ago gratias, quod Isaacum meum tanto affectu in Galliis exceperis. Nunc Lutetiæ agere, scio te scire: Nam tribus verbis rem proxime tetigit literis ad me suis. Omnino autem in talibus cum scribendis paulo fuliorem optarem. Credo existimavit, ubi huc venisses, omnia posse melius coram cognoscere. Hyeme hac Lutetiæ cum agere permisi, quia in ædibus Illustris Legati optima ei occasio erit augendi scientiam & Jurisprudentiæ, & Civilem. Uxor mea male admodum valet, quod scis ei esse insolens. Res ea non paulum moratur studia mea, quæ satis alioqui lente procedunt, in tanta interpellantium turba. Plurimum & tibi & lectissimæ Conjugi tuæ salutem adscribi jussit. Uti & filius Matthæus, quem illustres Hollandiæ & West-Frisiæ Ordines Historicum suum creârunt, eodem pretio quo fruitor Heinsius; ut hac parte illos videas Collegas. Uxorem duxit Frisiam bono genere natam, benè educatam; quæ res mihi in plurimis adversis solatio est.

*Amstelodami, c1o Ibc xliii.  
post. Id. Decemb.*

CCCCCLXXXI.

## CCCCLXXXI.

Nobilissime Salmasi,

**V**aldè me beasti literis tuis, præsertim quæ benigne adeo sentis de laboribus meis. Utcumque enim me inferiorem laudibus tuis putem: est tamen pergratum à te laudari; non quia non putem aliquid à te dari amori, sed quia sic facilius me solor, tantum aliis odio nostri indulgentibus, ut laudes etiam iustas negent. Perjucundum mihi est legere Commentarium tuum de lingua Hellenistica; pro quo, quantas possum, gratias ago. Spero hac opera Colophonem imposueris dissertationibus tuis de hoc argumento. Quamquam Groningæ esse intelligam Scokium (Spokium nuncupant alii quod Belgis Spectrum notat) qui iis, quæ de Funere Hellenistico, & Ossilegio scripsisti, repositurus est librum adversus Vespillonem. Vel inde maledicentiam hominis vides, si fortasse antea te fugerit. Sanè vulgo omnes ex iis, quæ hæcenus divulgavit, ita arbitrantur, in calumniando non minus esse impudentem illo ipso, cujus causam suscepit. Sed vide sæculi stultitiam. Sic fertur, cogitari Franckæræ de substituendo Professore Theologo in locum *des margelins* Vedelii. De compluribus jam esse sermonem, ac in his etiam nomen esse Scokii. Spero, quamquam graves peccatis nostris poenas commeremur, nondum tamen ita exosas Deo esse Academias fœderatæ Belgicæ, ut tam nobilis Sparta huic committatur. Nosse desidero, multumne affuturus sit à sententia tua, qui existimet, dum superessent Apostoli, & ab his missi, quos & ipsos Apostolorum nomine dignabantur, penes eos fuisse quandam *ἐκκλησίαν* iis verò defunctis Ecclesiam vidisse, requiri, ad Schismata cavenda, ut penes Presbyterium esset quidem gubernatio Ecclesiæ: sed in hoc ipso eminceret is, penes quem foret Presbyterorum *ἐκκλησία*, quique propterea singulari notione, Episcopus sit nominatus. Hoc eo scribo, quia nulli cordato placet illa *ἐκκλησία*, quæ in nostris obtinet Ecclesiis. Quæ super eo sententia fuerit soceri mei Junii; quæ item necessarii ac propinqui mei Francisci Gomari, probè adhuc memini. Neuter Anglicanam Ecclesiæ gubernationem per Episcopos improbabat. Scio etiam, illam à Festo Homio apud Anglos Theologos in Dordrechtana Synodo longè prælatam formæ regundi quæ his obtinet locis: ubi quantæ sæpe in clatibus contentiones sint, quanta item *ἐκκλησία*, malim ex aliis intelligas, modo curæ sit nosse, quod vix arbitror. Hoc malum magnam partem tolli posse existimo, si Pres-

byterium habeat suum *ἐκκλησίαν*, cujus auctoritate multi pervicaces, præsertim homines adolescentes, typho plurimum inflati, melius compescerentur, quam in ista sit *ἐκκλησία*. Nec quia super eo iudicium tuum exposcebam, coabstrahere animus est ab iis, quæ publico pararas, ut orbis literati desiderio satisfacias. Dabitur, spero, super eo colloquendi locus, simulac occasio erit tibi ac uxori optimæ, excurrendi ad nos: de quo nihil superioribus scripsi literis, quia & te arthriticum intelligebam, & uxor item veteri morbo laborabat. Nunc illi meliuscule est; nec ei minus jucundus erit vester adventus, quam mihi exoptatus. Cum proximæ tuæ literæ redderentur mihi, rogabat Coniux, an jam ad te scripsissem. Annuui: Tum illa; Scin?, me iussu tuo, adservare duos fasciculos D. Salmasio inscriptos? Unde, inquam, illi nobis? Nescire se aiebat, nisi quod de altero ex Suecia putaret. Et jam annum esse & ultra fortasse quod accepissemus: nec tibi mitti potuisse, quod singulis te mensibus expectaremus. Ita mihi memoriam refricavit. Mitto igitur, quod ante octiduum missum oportuit; & simul literas, quas filius Isaacus Lutetiæ Parisiorum transmittit ad nos ut tibi redderentur.

*Amstelodami*, secundum Stylum Julianum post. Kal. Jan. anni hujus clb lxx. xlv. quem tibi ego, coniux conjugii, liberi liberis, imo omnes omnibus vobis felicem ac prosperum exoptamus.

*Nobiliss. & amplitudinis  
tue cultor,*

G. J. Vossius.

## CCCCLXXXII.

Nobilissime Salmasi,

**P**ene altera elapsa est hebdomas, ex quo non satisfacio expectationi tuæ. In causa, præter cætera fuit, quod demum die hæsterna comparare mihi potui Arcudium. Nihil occurrebat, quod magnopere juvare possit præter illa p. 612. Mittendum ramen putavi, quia negligenter satis lustrassem. Addidi Hospinianum de Monachis, qui fusc de tonsura rasuraque. Item Altenstangii Lexicon propter scholasticos quosdam, quos advocat voce Tonsura. Etiam Galenum Westcapellum, qui aliquid habet tum in Commentario de Sacerdotio Christiano, cap. 6. fol. 72. & seq. tum in Originibus Monasticis cap. 12. p.

137, & 138. a. Præterea Collectanea Efpencei, propter Concilia. Eorum loca index fuggeret in tonsura. Video & quædam habere Cornelium à Lapide in 1 ad Corinth. cap. 11. præcipue ad ver. 6. Sed mittere neglexi, quia nihil haberet Bellarmino & aliis indictum. At ut constaret melius, quo pacto à nostris jam occursum sit Bellarmino, mihi quæ adversus eum Junius & Sutlivius Anglus scripsere, cum tarde adeo de Arcudio negotium procederet, raptim quædam de argumento istos epistola sum complexus: vel hoc fine, ut videres, quam multa in hoc argumento me fugerent. Tanto jucundius erit proficere ex tuis, quibus orbem instruis universum. Iterum vale.

*Tuus æternum,*

G. J. Vossius.

Cum viderem cistellam plurium esse librorum capacem, ac scirem Bellarminum te habere, ejus loco volui mittere Gregorium de Valentia hominem doctum, & quem acuminis ergo Bellarmino Hieronymus Zanchius soleat præferre. Videbis & ab eo veterem cramben reponi.

#### CCCCLXXXIII.

##### III. V. Hugoni Grotio.

Illustrissime Domine Legate,

**M**agna cum voluptate legi, quæ reposuisti obrectatori. Eamque dissertationem tuam recudere parat Blauwius. Cæterum metuo ne alicubi, vel Amanuentis tui, vel Typographi incuria, pro *Octogesimo*, irrepserit *Octavo*. Locus est, ubi agis, de usu Bombardæ apud Venetos; unde acceperint Turcæ. Paginam exprimerem, nisi Exemplar meum Blauwius haberet. Historia sic habet.

Anno 1354. Bertholdus Monachus reperit Bombardas, sic Hieronymus Ziglerus in Illustrium virorum Historia.

Anno 1357. Lovanienses Bombardis adversus Flandros usi, eosque duodecim habuere, ac *Donderbussen* appellarunt. Sic Petrus Divæus in rebus Brabanticis.

Anno 1360. Lubecenses præparasse eas è Chronico Slavico, probat in Geldricis suis, Isâcus Pontanus. Idem Chronicor à Lindembrogio subjunctum Adamo Brementi.

Anno 1374. Hollandi iis usi in oppugnatione Gildemburgi, temporibus nempe

Dom. Jacobæ. Verba Chronici (quod hætenus ineditum filius Matthæus habet) sic sonat.

Anno 1378, vel 1380. Veneti primum usi, contra Gehuenses, in conflictu ad fossas Clodias. Unde & Itali tum primum inventas credidere.

Sanè Guido Pancirolo, de Novis repertis, Lib. ii. Tit. x. sic scribit: *Tormenta illa bellica, quæ Bombardæ dicuntur, inventa suere à Germano quodam, circa Annum Christi, 1378. Earumque prima usurpata fuerunt à Venetis, cum Gehuensibus ad fossas Clodias confligentibus, quos ibi suo conabantur subicere dominio.*

Sub Urbano Octavo, Anno 1380. repertam ait Platina.

Nempe quia Veneti, Anno 1378 & 1379. vel juxta alios 1380. usi sunt, eam tum deum repertam, uterque Italus prodidit. Interim illud extra Controverliam manet, Venetos si non Anno 1378. saltem 1380. jam usos esse. At ante Annum 1354. repertam nemo putarit, nedum tum Veneti acceperint à Germanis. Quare existimo, ubi nunc est, pro *millesimo trecentesimo Octavo* in Autographo fuisse, *millesimo trecentesimo Octogesimo*, ac sic reponi debere, cum dissertatio recudatur.

Utrum reponendus sit latius, tantum abest ut sciam, ut non arbitrer adhuc dissertationem tuam vidisse. Est hic juvenis eruditus, Discipulus Petavii, antea Minorita, qui Libellum edet de eodem Argumento; sed hic contendet Americanos esse à Phœnicibus. Nempe ut quemadmodum Carthago eorum colonia & Gades, bonaque pars Hispaniæ possessa, ita & hi Americam tempestate, vel aliter, fuerint delati. Pro se afferet, quæ de Atlantide Plato, & alia ex Aristotelis auditionibus mirandis, Diodoro Siculo, Plutarcho. Sed suam sententiam dicet; alios non nominabit, nec refellet.

#### CCCCLXXXIV.

Georgio Rattallero Dubletio, *Curie Supremæ Senatori.*

Nob. Amplissimeque Dubleti,

**I**ntelligo Nicolao Matthæi van Hulten litteram adversus Arentium (sive Aquilium vel Arnoldum) Matthæi F. Boosch. nec aliud jam superesse, quam quod revisionem vocant; te vero in iis fore, quibus incumbet rem judicatam recognoscere. Postulat igitur ab amico, ut vellem hoc negotium tibi commendare, quò (quod in omni

te



te facere negotio constans est fama) in hac etiam controversia facere ne graveris: hoc est, ut ne molestum ducas totam causam introspicere. Litis naturam nec scio, nec laboro nosse. Sed quia postulatum hoc mihi non iniquum videretur, nolui vim facere nature mee, quicquam ulli denegando. Præsertim quandoque in iis, qui hoc à me exposcerent, communis foret amicus Jurisconsultissimus Guilielmus Grotius, cujus causa omnia volo. Et fortasse ab hoc illud consilii datum vander Hultio; de quo ut inquirerem tanti non putavi. Amicas ab viro amico, clarissimo Riveto, literas accepi, quibus perhoneste iudicium fert de transmissio opusculo. Multaque adjungit de affine suo Petro Molinæo, nempe eo, quod scire averem, quid de ejus foret valetudine. Tandem ista subjungit:— Gratulor tibi reditum Isaaci tui Lutetiam Parisiorum, quem Saravius amplissimus ad me scribit venisse optimis onustum spoliis ex illustriss. Bibliothecis, quæ postea in usum literatorum sit liberaliter sparsurus. Deum precor ut eum tibi restituat gratia sua cumulatam, & ab omni superstitionis contagio, quod in Italia, & locis similibus grassatur, plane liberum.— Huic Riveti voto plane applaudo. Interim illud de locis similibus leviter me uffit. Suspicio quippe eo cogitationem retulisse, quod nunc in ædibus agat Illustris Legati Suevici: scio enim probe, quam animo semper ab eo fuerit averso, simulac pedem posuit in his terris. Simulac igitur rescribendi fuerit occasio, vel potius tempus, tribus verbis hunc scrupulum eximere adnitar. Et ipse coram plenus faciet filius. Nam summum intra tres menses se nobis affore confidit. Hoc ego & uxor vovemus, & tu scio nobiscum, amice optime maxime: quem Deus ut diutissime saluum & sospitem conservet precari semper soleo, ac quasi novo hoc Anno, ex consuetudine veteri impentius mihi faciendum existimavi. Scribebam Post. Non. Jan. Sed si Grotius noster paulo lentius ambulabit, ipsis Kal. Jan. Stylo Gregor. possis recipere literas. Sed non tanti istoc ut ineunte Anno hoc votum intelligas.

Tuus totus,

G. J. Vossius.

CCCCLXXXV.

V. Clarif. Joanni Frederico Gronovio,  
Ger. Jo. Vossius S. P. D.

Quam gaudeo de munere tuo, molem si libelli spectes, minuto; sin fusu, ingenti. Ita multa bona de Scitertio, obiter etiam de aliis doces vel doctissimos; in his etiam heroas illos Budæum, Hottomannum, Scaligerum, & tot alios in Reip. literaria principem obtinentes locum. Gratulor ingenio tuo; gratulor urbi vestræ, imo orbi, quando ut voce urbem, sic orbem calamo doces. Deus diutissime te conservet, præsertim seculo hoc ad barbariem non sensim eunte, sed gradum adeo præcipiti grassante. Que eo fidentius scribo, quia nihil periculi est, ne sermo cujusquam inflare possit, quando non minus modestiam mirari soleo quam ingenio acri acre additum iudicium, & utrique raram eruditionem, & multijugam. Utinam à publico munere amplius tibi otii sit, quo propediem fui liceat aliis etiam quæ primus docebis. Hoc vere pulchrum est, postquam multi adeo exscriptores potius quam scriptores esse coeperunt. Mitto ad te literas filii quas Lutetia Parisiorum exaravit. Simul etiam aliquid nostri, opusculum bipartitum de Genere & de Annis Christi; imo & tria addidi exemplaria, quæ, quibus tradi velim, inscriptio testabitur. Miror interdum tot bona prodire à Gymnasio vestro, cum minora quædam Academiæ præstent. Næc dubito, quin amplissimum urbis vestre senatum hoc magis magisque accendat ad bene merendum de vobis; qui urbis (jam ab eo tempore illustris doctrinarum studiis, quo finu suo fovit immortale seculi sui decus Erasmus) nomen honoremque per orbem longe lateque diffunditis ingenii ac doctrinæ monumentis. Plurimam dices salutem, tum lectissimæ conjugii, tum Collegarum iis, quibus cum mihi datum coram colloqui, & quorum scriptis frui licuit. Theologo Dietio, Jurisconsulto Christenio, Philosopho Isendorio, cui significabis accepisse me jam à Doctore Fontano etiam utilissimos ejus in naturali Scientia labores.

Scribebam *Amstelodami*, Post. Kal. Janu. Stylo, quo uti vos arbitror, Juliano, Anno partæ salutis, clxxiv. quem tibi & conjugii, imo & Clarissimis Collegis salutem & felicem precor.

Iii

CCCCLXXXVI.

CCCCLXXXVI.

Claudio Salmasio.

Illustris Domine,

**U**TI in negotio de La-Barra feci apud Proceres nostros, quod potui, ac porro etiam adlaborabo; ita & in Doctoris Bottelii de Grandi-Villa rebus velim apud Typographos quantum possim. Inter alios locutus sum cum Amstelodamensi nostro Elzevirio, qui frigide omnia: sed postea cum convenit Isaacus meus, visus ei non penitus abhorrere. Compellavi postmodo Blauwium, qui promisit, vel nullius se opera uti velle, vel hujus de quo scripseras. Sed nunc quicquam occurrere negabat, in quo transferendo aliquid Latine, Italice, Gallice sibi esse usui possit. Nam fratre defuncto, omne sibi onus incumbere Typographiæ, nec audere nimium suscipere, qui parte potius vacare malit in hac per Germaniam, & Angliam bellicâ tempestate, quæ Typographos perdat. Benignius responsum est, quod mihi narravit, conjuge suâ præsentē, Doctor Bottelius. Sed metuo ne (modo verba bene intellexerint) verba utrique dederit. Saltem aliter ille apud me; etiam ubi tuas illi literas ostenderam, licet omnia tua causa velit. Certiora ubi ex eo cognoro, quamprimum te faciam certiorem. Croii liber necdum, delatus est in urbem nostram; sed cum avide de eo inquirerem, monstrarunt mihi Gomarî Scripta, & ante omnia præfationem eam, qua promittitur de Livore & Calumniis quibus sic incomparabilis Heinlius creverit. Displicent Artes plusquam Pelasgæ; & puto, nec præstantissimo Croio erunt acceptæ: quem pariter impeti non est dubitandum. Ad quem præterea hæc pertineant, quid attinet dicere? Quam vellem, ut sincera semper fide in gratiam rediretur? Verum quantillo eruditi multi distant iis quos nolo dicere! Plurimum te, uxorem, liberos, saluta- mus ego, uxor, Matthæus, & Isaacus meus- tuus ante omnes.

Amstelodami,  
cl<sup>o</sup> Id<sup>o</sup> xlv. xii.  
Kal. Febr.

Tuus æternum,

G. J. Vossius.

CCCCLXXXVII.

Claudio Salmasio, Ger. Jo. Vossius.

**R** Etulit mihi multa de singulari humanitate tua Nobilissimus Blitterswicius, Scabinus Bruxellensis, Erycii Puteani amores; petiit verò ut ad te mitterem versiculos quosdam partim Latinos, partim Gallicos. Hæc sola nunc scribendi occasio fuit, quod alioqui occupationes vix sivere, defuncto hesternâ die Jacobo Laurentio Ecclesiastæ, & qui gemino Libello illustrem Grotium impetivit, ac fortasse memineris te cum eò prandisse aliquando domi meæ. Hunc Collegam habui in cura Scholarum; quæ præcipua est in examine ante Pascha, atque iterum senis post mensibus. Filius Isaacus *od<sup>o</sup> Id<sup>o</sup>* intra mensem unum alterum affuturus nobis. Literas tuas accepisse video, iisque magnopere gavi- sum. Hesternâ die in manus meas, nescio qua occasione, incidebant Merulæ in Ennium Commentarii, ac quidem locus iste ubi ait, plura se adferre fragmenta, quàm ab Hieronymo Columna factum. Ea se habere ex Calpurnii Pisonis libro de Continentia veterum Poetarum, viso sibi Parisiis in Cœnobio S. Victoris. Non semel, multis abhinc annis, sed frustra semper, alios de hoc opere rogavi. Nosse igitur etiamnum aveo, utrum adhuc ibi lateat, an fortè jamdudum lucem viderit. Gratum erit id ex te cognoscere: Sed imprimis quo pacto nunc valeas, & domus universa. Nec tamen rescribi velim, nisi cum non alia distinebunt. Uxor mea paulo nunc melius habet.

Amst. cl<sup>o</sup> Id<sup>o</sup> xlv.  
xi. Kal. Aprilis.

CCCCLXXXVIII.

Claudio Salmasio, Ger. Joh. Vossius,  
S. P.

**Q**UI hæc desert literas filius est Ludovici Crocii S. Theologiæ Doctoris, ac Professoris primarii in illustri Bremensium Gymnasio, eademque in urbe Ecclesiastæ disertissimi. Cum hoc ejus parente jam ab eo tempore, quo Dordrechtî Synodus fuit, amicitia mihi haud vulgaris intercessit. Id enim & viri eruditio & integritas mereri visa est. Quanquam non ignorarem esse complures, non optime affectos, quod in Synodo Dordrechtana,

drechtana, mollius aliqua interpretaretur: uti & in Calvino. Sed de isto non est nunc agendi locus. Hujus filius, quem ob probitatem, eruditionem. & quia φιλομαθής, amo, jam ante menses plures à me petiit, ut si quid ad te scribere vellem, ad se mitterem, quo literas de manu in manum tradendo occasionem haberet videndi & affandi tui. Ego promissi mei oblitus id facere neglexi. Merito igitur suis literis aurem vellit. Nec erat, quod scriberem. Quid tu? Suffecerit hoc tempore & morem gessisse adolescenti, & timul gratinaturum parenti. Quem scio ingentis nominis tui, non amatorem modo, sed admiratorem etiam cultoremque.

*Amst.* clb Ioc xlv.  
viii Kal. Aprilis.

CCCCXXXIX.

Georgio Ratallero Dubletio, Ger. Joh. Vossius. S. P. D.

**E**Quidem, Nobilissime Dubleti, multa video, quæ me trahere Hagam & possint & debeant. Atque in his facile principatum tenent tecum, hinc conjunctissimus affinis Junius, inde illustis Boswellus, quem ego ob ingentes virtutes, ac summum nostri amorem, non solum amo & æquino, sed etiam colo ac veneror. Ac præter vos tres viros, ardet animus videre & affari atque audire Amplissimum Reigersbergium, Rivetum, ac Johnsonum, Doctores Theologos, pluresque alios, quos referre mora sit. Sed hoc nostrum excurrendi desiderium sufflamant plura, jurène, an injuria te arbitrum eligo. Spisse valetudo uxoris procedit, confido autem, quantum ver hoc novum adolescet, tantum incrementi ejus valetudinem capere posse. Sic antehac fere illi usu venit. Præterea Matthæi mei quinque Annalium libri sunt excusi: uti & ipsa ad Ordines præpotentes præfatio; nihil ut præter indicem restet, qui hac proximæ hebdomade poterit absolvi. Adde nunc triduum, vel circiter compingendis libris. Vides, ut medio inter Pascha & Pentecosten intervallo comitem me itineris dare possim filio. Impense enim hoc desiderat, eo quod minori verecundia opus operamque ejus commendare valeam apud senos, septenosve procerum; & notiores mihi. & literarum amantiores. Nec tamen filio addixi, vel potui ob rerum incerta, præsertim uxoris valetudinem. Interim animus ab eo itinere minime est alienus. Et siquid impediet, proxi-

mæ erunt seriæ Pentecostes, quibus plurimum dierum seriæ futuræ. Saltem non committam, quin si Deus, & familiæ valetudo siverit, videas me ante dies caniculares exactos. Solent amantes dicere, jam annum videri, quod alter alterum non viderit. Hec illi, ubi subinde vix unus sit mentis alterve. At scis non longe à biennio esse, quod non licuit mihi trui vestro conspectu & alloquio. Spero intra menses duos nobis affore Isaacum meum. Si non ante Hagam ivero, tanto me facilius postea in viam dabo, filiorum alterutro comite adsumto, altero apud matrem relicto, ne, siquid periculi, quod Deus avertat, absente me, oboriatur, nullus sit mas domi, qui opituletur sexui imbecilli corpore pariter atque animo.

*Amstelodami* clb Ioc xlv. Postir. Paschæ: Salutem adscribi jussit Conjux. Meo etiam nomine rogo salutem impertias amantibus nostri: nec minus filiis, imprimis suavissimo Philippo: qui quantum profecerit in studiis, spero me brevi coram posse cognoscere.

CCCCXC.

Joanni Ravio, *Arabicas literas docenti Ultrajecti.*

Clarissime Ravi,

**J**AM una & altera hebdomada est, quod expecto aliquem ex notis Ultrajectum itineris, per quem literas è Gallia tibi inscriptas procurarem. Interim & aliæ ad me literæ delatæ. Porro hac ipsa hora etiam à Tabetario fasciculus mihi traditus. Pro quo tres florenos cum dimidio uxor necesse habuit persolvere. Ne igitur diutius frustrarer expectationem tuam, recte atque ordine me facturum putavi, si universa mitterem ad quempiam Clarissimorum urbis vestræ Professorum. Elegi vero amicorum in urbe vetustissimorum, quem hoc oneris, ut de habitatione tua inquirat, tua meaque causa, non invitum suscepturum existimavi. Is est summus vir Antonius Æmilias. Tuum erit præfinire quo pacto deinceps non cogar aliis esse molestus. Cum Ultrajecti habitaret conjunctissimus adfinis meus Junius, hujus opera urebar. Nunc dispar ratio, nec aulam sæpe alios, & opera & sumtu onerare. Scire aveo quid rerum geras, & quomodo tibi primordia ista Orientalium linguarum in Ultrajectina Academia docendarum hæcenus processerint.



rint. Equidem instituto tuo impense faveo. Deumque rogo, ut fortunare porro velit, cum tua, tum imprimis Reip. literariæ & Ecclesiæ causa.

*Amstelod. an. 1644.  
ix Kal. Maias.*

CCCCXCI.

Hugoni Grotio.

Illustrissime Domine Legate ;

**D**IE hesternæ hodieque Costerus, Medicus urbis nostræ, Excellentiæ Tuæ, à multis retro annis, poetæ Belgicæ notissimus, atque idem eminentissimæ dignitatis Tuæ Cultor, convenit me, filiumque, uti & ab Uxore ejus factum, de causa quadam, quæ Lutetiæ agenda. Petrus ab Oorschot, in negotiatione Angolensium se exercuit triennio apud Christophorum Gangelt. Ubi vero id tempus expirarat, quo se obstrinxerat, à Mercatore eo lis illi mota, verè quæritis, quantum intelligo, argumentis, Mercurialium more. Petit igitur obnixè Costerus, cum Coniuge, quia se is Petrus Oorschot, magisque ejus frater, cognatione, vel affinitate, propinquam attingit, ut si advocatus ejus, vel ipse Oorschotius, Excellentiam Tuam accefferit, consilio juvare velis. Quod officium eo gratius Deo fore arbitratur, quia & Adolelescens ille, annis minor est, quam ut suus esse possit, & matrem habet viduam perhonestam. Dum sermo mecum feritur, animadvertere visus sum, partibus adversis favere Heusdium, Mercatorem Parisiensem, qui vel frater, vel patruelis foret Heusdii, quem duxisse uxorem scirem filiam Consularis Wittii, nunc ad Succos Legati, ex amicitia Coniugis meæ natam. Aliud accessit, quod in Excellentia Tuæ ædibus degeret Heusdium, ex eadem familia: qui absque dubio faventior esset partibus Christophori Gangeltii. Costerus, & Uxor, sic putabant, non ita grande id esse vinculum, quod attineret Heusdium. Nam solum aliquid esse affectus ex eo posse, quod Christophorus Gangelt, quicum Petro Oorschotio negotium est, fratrem habeat Mercatori Heusdio famulantem. Quare neque me propter eum Heusdium, qui in Tuæ est Excellentie familia, neque propter Heusdium, qui nostram cognatam, Corputiam, sive Wittiam, Legati Berchii privignam, duxerit uxorem, commendare, eo minus oportere. Parui igitur, atque id lubens feci, quia bene volui semper

Costero, ut optimo civi, & nunc etiam obstringor, quia (post excessum Verhœvii, Excellentia Tuæ civis) uxoris meæ, ut plurimum valetudinariæ, curam ei committere non dubitavi. Illustrissimæ Domine Coniugi, & Nobilissimæ filia, à me, Uxore, Filioque, salutem plurimam adscribo. De Nobiliss. filio Petro, nihil addo, quia vixdum hora est, quod mecum est, ac seipsum ad Parentem velle ait scribere.

*Amstelodami,  
clō Ibc xlv. iii.  
Non. Quint.*

*Illustrissimæ Excellentie  
Tuæ cultor æternum,*

G. J. Vossius.

Ad filium scribere erat animus; sed ecce qui interpellent. Fiet id die Lunæ proximo. Unum addo. Scire aveo, ecqua intercedat notitia cum Illustrissimo Polonici Regis Legato; Vir est doctus; & quamquam inter Sueones, & Polonos, animus quodammodo hostilis esse solet, tamen antequam à Polonia pedem poneret, dixit, se velle amicitiam cum Excellentia Tua inire, nec id fore Rege invito. Ita ex eo coram accepi. Nam prandi cum eo, apud Bartelottum Mercatorem, meque domi invisi meæ. Εἰρησ.

CCCCXCII.

Josepho Laurentio, V. Clarissimo, G. J. Vossius S. P. D.

**N**Oli putare, vel lecorum, vel temporis intervallo posse non dico infringi, sed etiam imminui amorem erga te meum. Quamdiu mihi in memoria erit magnus ille Molinus, quam diu ante oculos egregia ingenii doctrinaeque tuæ monumenta, & ut cuncta dicam, quamdiu artus hos spiritus regat; firma erit amicitia nostra, quæ ex tam bono principio, Molino inquam, conflata est: nec offendere debet, quod tardius respondere amicis soleam. Id jam à lustris multis familiare mihi est malum: usque adeo, ut consuetudo pene verterit in naturam. Hoc excusationis genere cogor toties uti apud amantes mei, ut pudeat propemodum cantionem eandem canere tam crebro. Interim multum temporis auferunt salutationes tam multorum, occupationes publicæ, & privatae, valetudo aliquando mihi, longeque sæpius, ac semper pene coniugi adversa. Jam aliud etiam adjicere istis amici, qui me norunt, solent, aiunt illi, utcumque verissima sint quæ adduxerim, tamen nec postremas in causis tenere,

tenere, quod qui multa variaque sub manibus habeo, difficulter ab iis avellar, quæ publicam posse lucem ferre; vel ego, vel amici non diffidunt. Absque his esset, egone non subinde literis meis compellarem egregiam ac pèreruditam Balthassaris Bonifacii animam? Nunc (pudet dicere) nec illud scio an superfit. Potquam enim ad plures abiit Nobilissimus Cornelius Vander-Mile, qui sedulus erat in arvo illo Epistolari excolendo, non tam comoda mihi amplius occasio est exquirendi de viris Italiæ præclaris. Sed hac parte, ut confido, ero beator, ubi advenerit è Galliis filius meus Isaacus, quem intra tres hebdomades, summum mensem, expecto. Agit hoc tempore in ædibus Illustrissimi Suconum Legati Hugonis Grotii, viri de quo quicquid laudum congeiseris minus erit. Multum tibi debeo quod tam amice filium exceperis, ac si rediisset, magis eundem obstringere tibi fueris paratus. Sapius mihi per literas nunc doctrinam præstantium in Italia virorum, nunc etiam erga se, meque, affectum prædicavit. In his etiam egregia erat laus tui; sed concitius ille omnia quam vellem. Tanto impensius reducem opto, quo pendere ab ore liceat fusius omnia deducentis. Simul per illum melius exequar ea, de quibus scribis. Aggressus sum loqui de tuis cum uno altero Typographo. Nec abnuere prorsus visi. Sed aiebant se paulo frigidiores in excudendis libris, quia non æque distraherentur ac solent, idque ob grave bellum in Germania, Britanniaque, quibus nunc illud inter Danum ac Suevum accessit. Præcipue vero quærimonia erat de Germania, cujus bona pars male vastata de fame potius cogitet quam fama, aut libris. Verum de hisce, ac cæteris accuratius omnia literis proximis, ubi filius aderit. Sanctes Pagninus, juvenis optimus, mihi commendatissimus est, tum ob virtutes suas, tum quia nihil non tui causa volo, tum imprimis ob ingentem illum Pagninum, qui meritis, ac fama nominis orbem implevit universum. Equidem cum plurimum quoque illi debeant studia mea, non patiar erga nepotem gratum in me animum desiderari. Vale Clarissime & Amicissime Laurenti.

*Amstelæd. mi.*, clō Ibc xlv.  
iii. Non. Quinctiles.

## CCCCXCIII.

G. Blittersvicio *Sup. Senatus Geldrici Senatori.*

*Bruxellas.*

Vir Nobilissime,

**P**Ergratæ mihi literæ tuæ fuerunt, quas Leida scripseras: Eo gratiores, quod ex eis intelligerem, te cooptatum in collegium atque ordinem senatus Geldrici. Gaudeo vero tum tuo nomine, cui optima quæque opto voveoque; tum etiam patriæ causa, quæ deinceps multum etiam virtuti ac prudentiæ tuæ debebit. Cur enim non Geldriam pro patria habeam, quando parenti, avo, proavo ac aliis porro è majoribus meis, Ruremundæ contigit nasci atque educari? Quodque ad locum ubi primum hauri vitalem auram, quodque ob belli Belgici tempestates se receperunt Parentes, is vix senis me habuit primis vitæ mentibus. Exinde enim, relicto à parentibus Palatinatu, paucillis annis terram Flandriam, at plus quam sexaginta Hollandiam incolui. Ubi cum tam longo tempore mihi fuerit optime, cur non hanc alteram, vel tertiam liceat patriam nuncupare. Noli enim me tam angusti animi putare, ut quem patriæ amorem debeo, contringi patiar intra oppidum, vel unius ditionem: ac tantum abest, ut ejus poeniteat opinionis, ut parum absit, quin mundum mihi patriam dixerim, non tam ea mente qua Philosophus olim se mundanum respondit, quam longe alia, qua omnes ejusdem patriæ censetur, qui cives sumus unius Rep. literariæ, quotquot cum virtute, toto terrarum orbe, sociamus studia literarum. Sic Nobilissime Blittersvici, etsi tua se profapia jactet Bruxella, tamen tu meus civis es, uti ego tuus, quia una est Sparta, literaria scilicet, nobilis sane civitas, quam uterque incolimus, ac tot nobiscum alii, non illa in Peloponnesi regione sita, sed latissime in mundo diffusa: quam videor mihi, si commodum interpretem nanciscar, Spartam Spartarum posse dicere. Hoc pacto ego non Palatinatum aut Geldriam, aut Bataviam modo patriam vocâro, sed etiam patriæ partem dixerò Brabantiam tuam, doctissimorum hominum adeo feracem, ut non sit quod aliis invidentis. Et tamen fatendum, paulo arctius Brabantis adstringi mihi Geldros meos: in quibus principem facile locum tuetur grande, & immortale literati orbis decus tuus meusque Erycius Puteanus. Videm' quam te amem, amice nobilissime, quod in mediis occupationibus otiose adeo tecum confabuler? Nec tamen minus longo sermone

sermone jam senatorem & (quod tempus majores curas exigit) recentissime ad hoc dignitatis evectum; patriæ meæ bono, morari nunc animus mihi. Tamen hoc non pretereundum mihi, utcumque literæ priores Leida transmissæ admodum fuerint gratæ acceptæque; quibus acceptis gratulari quamprimum me oportuisset: (& fecissem nisi obstitisset valetudo meorum) nihilominus valde etiam me in alteris illis exosculatum fuisse tantum amorem mei, quem undique spirant. Nobilissime & Amicissime Blittersvici, porro semper alter alterum amemus, & quantum utriusque sinit tempora epistolari officio hunc aremus amoris campum. Sic habere, vix aliud mihi literis tam elegantis, ac cordati viri jucundius esse posse. Salutem adscriberem multis, nisi maximam longe partem extra Bruxellas viverent. Hoc igitur tempore contentus ero addere, me uxoremque illi seu Veneri seu Junoni tuæ (cujus ego bellissimæ bellulam adeo imaginem hic conspexi, & multo etiam belliolem animum auguror) plurimam precari salutem, ac Deum rogare, ut sæpe vos simili vestri prole faciat parentes.

*Amstelodami,*  
cl<sup>o</sup> l<sup>o</sup>c xliv. xi.  
Kal. Quinct.

*Nobilissimi nominis*  
*tui cultor,*  
G. J. Vossius.

## CCCCXCIV.

Joanni Cocceio *Viro Clarissimo*, Ger.  
Jo. Vossius *S. P. D.*

Reverende ac Clarissime Cocceie,

**M**aximâ voluptate affectus fui, quando intelligerem te in illustri Fratriorum Academia constitutum Theologiæ Professore. At quamquam tuo etiam nomine maximopere gauderem, eo quod te digna tibi Sparta obtigisset; magis tamen publico nomine lætabar: partim videlicet quia in te concurrere viderem in aliarum etiam scientiarum doctrinâ, insignem Orientalium Linguarum peritiam, in qua parte non paucos novissem valde imparatos: partim etiam quod te alienissimum semper judicasset à malo, etiam sacri ordinis viris nimis familiari, immodestia dico, quam pejus odisse oportebat quam fullo ululam. Utinam hac in re sequerentur potius exemplum magni socii mei Junii: à quo Christianam illam lenitatem animi summopere scio omni vita fuisse commendatam, etiam postremis sermonibus, quos habuit cum præstantissimo præceptore

tuo Martinio. Equidem operam dedi semper, ut ab illa maledicendi aliis prurigne, quæ vere pestis est Ecclesiarum, immunis forem, & si non satis caverim, semper perire ea scripta malim, quibus deliquerim, quam in mei opprobrium ac posterorum damnum vivere. Magnas vero atque adco ingentes tibi gratias ago pro illustri munere, quo ornatum ire voluisti, & me & bibliothecam meam; factum præclare, quod potissimum volueris operam ponere in operoso ac difficili Jobi volumine. In quo multa adeo etiam doctissimis hæcenus negotium solent facessere. Ne dubites, quin orbis literatus semper tibi sit gratias acturus, quod toties tenebras dispellas Phœbeâ illa lampade ingenii & eruditionis tuæ. Deus, mi Cocceie, longam tibi vitam & valetudinem prosperam largiatur, ut diutissime similes gignas foetus, qui te meliores ad sedes translato, non desinant pro te apud posteros loqui. Vellem aliquod ad manum fuisset *ἀντίδωρον*, quo possem affectum testari; sed cum id non possem hoc tempore, ne is qui tuos mihi attulit commentarios auro contra non caros, vacuus prorsus ad te rediret, mihi libellum, an libellulum dicam, de genere & annis Christi. Et tamen dubitabam, an non jam ante cuipiam dederim tibi deferendum; facile enim istiusmodi minutiarum obliviscor; sed id si factum, bene est, quod virtus doctrinaque tot tibi conciliarint amicos, quorum facile aliquis à tam bona manu accipere dignabitur. Majus vero aliquid deinceps expecta. Plurimam à me salutem dico Collegis, summis viris, Collegis tuis ornatissimis, Maccovio, Cloppenburgio, Pynakero, Lindio, Winsenio, Schottano, ac tanto impensius, quantoque nostri amantiorem putabis.

*Amstelodami,* cl<sup>o</sup> l<sup>o</sup>c xliv.  
pr. Non. Maias.

## CCCCXCV.

Ger. Jo. Vossius, Francisco Junio *suo*  
*S. P. D.*

Nobilissime & Ornatissime Cognate Juni,

**H**ebdomadibus duabus Hagæ fui, coque tardius rescripti, domum enim reverfus, reperi multa quæ prævertere æquum erat. Disputationes tuæ mihi admodum gratæ sunt. Pro iis gratias ago: quod & mecum facit reverendus, & tui amantissimus Hottonus. Nec displicet si nunc de suprema juris laurea cogites, dummodo titulo eo qui juventutem



ventutem inflare sæpius solet, minime de pristina modestia tua, præcipuo ætatis tuæ ornamento, quicquam deceatur. Doctor eris non doctior. Gradus vocatur non apex. Valla dicere solebat majorem longè esse numerum doctorum à recto *Doctor*, quam *doctus*; nec scio an non titulus sit magis onus quam honos. Ut hic quoque habeat locum, quod de capeffentibus Remp. à Varrone dictum fuit. Onus est honos, qui sustinet Remp. Nec hæc dico ut deterream, sed ut cogites, cum honore eo quid oneris suscipias. Quod impossibilem etiam accendere ad hoc studium debet. Scis enim, assumpto Jurisconsulti titulo, profiteri te cuius de quavis re consulenti paratum respondere. Quoties igitur hoc elogio salutaris, toties in mentem venit, quid orbi de te promittas. Quare gradus iste, ut vocant, non ut usufruere solet, remissiorem te in studiis faciet vel inanibus gloriolis inflabit: sed facies stimulosque novos subdet, ut sis, qui videri voles. Ita mihi bene sit, suavissime Cognate & filii instar dilecte, quam ego studiis tuis per omnia bene volo. Alioqui enim ista non scripsissem; sed magnus avus, focer, & præceptor meus, item conjunctissimus affinis, & condiscipulus, parens tuus, & uxor mea suavissima & cordatissima, amita tua; non sinunt quin assidue de te, sororeque, nec minus matre optima cogitem. Hoc nunc iterum nihil æque mihi gratum fore, quam si postquam laurea juridica fueris decoratus, conjungas cum juris utriusque studio *φιλολογίαν* & *φιλοσοφίαν*: nempe tum linguam & historiam universam studium; tam quæ dabunt Academia, Lyceum & Porticus, addo, & ubi iudicium erit firmatius, Potamoniam sectam, quæ familiam ducit, ubi priores prius fueris edoctus. Mallem hæc spatia antea emensus fores. Sed nunc non dispiciendum quid quandoque præstiterit; sed quid nunc ex re sit tua. Plurimam salutem dicito nobilissimo Magduello; addo & egregiæ filię, cujus suavissimæ mores nunc etiam recordatione me delectant. Item reverendo clarissimoque Theologo Marcio. Si salutigerulum ex te facere velim, addam & duos Collegas Theologos & pulcras animas Tobię Andreę, & Altingii, quem doleo hinc abisse priusquam reverterer: Et pulcre adeo de te & propterea etiam de universa magni Junii familia merenti doctori Steinbergio. Sed præ cæteris saluta matrem & sororem dilectissimas mihi, ut nosti; nec tantum nomine meo id fiat, sed etiam uxoris & Isaaci mei. Et ubi occasio erit, possit & mater Dominam Schombergiam salute plurima impertiri.

*Amst. lod. ami,*  
xxiv. Maii.

## CCCCXCVI.

*V. Cl. Jo. Fred. Gronovio.*

*Davent.*

Clarissime & Amicissime Gronovi,  
**G**Ratum mihi fuit cognoscere eam tibi desponsam quæ placuit tibi & placere erit dignissima. Ut amoribus favissem tuis, si de iis mihi contitisset; ita nunc connubium fortunare cupio: atque id ut obtingat Deum ex animo rogo. Cum tuas accepissem literas, Collegæ domum accessi; sed Hagæ apud Nobiliss. Wickfortium, erat & duas circiter hebdomadas permanfit. Vix redierat, quin animum de versiculis tentarem. Belle adeo rem egi, ut continuo addiceret. Sed cum vellem sponsæ nomen ex literis tuis significare non potui, quia eam reliqueram in mensa cubiculi, unde nescio ubi à se repositam, invenire posse famula negabat. Sed hoc leve, quando argumentum Clariss. Collegæ exposui. Interea, nempe ante triduum domum meam venit Elzevirius Bibliopola, ac tuarum ad se literarum argumentum enarrat. Quod ad priorem earum partem, nunquam ego illas Hamburgo ad te literas accepi. Omnino diligentius in rem inquirendum. Circa idem tempus Brema ad me fasciculum misit Clariss. Crocius. Non recepi; sed delatus ad me fascis librarius qui Cabeliavio inscriptus. Ego jussi in navem referri. Inde Cabeliavio delatus; sed utrum fasciculus ad me qui missus erat, ei sit traditus, dicere non possum. Per Bidellum inquilivi; respondit intricatum ei quid, & se Bremam literas missurum ut recipiam. Hoc de Bremensi fasciculo, qui nihil ad te pertinet. De Hamburgensi tuo metuo ne quis itidem fraudem fraus sit. Omnino cogitandum, quomodo resciscere valeamus nequitiam hominis hæc agentis, qui uniusne sit, an habeat sociennum, nequeo dicere: nec nimis suspitioni puto indulgendum; sæpius me fefellit. Hodierno die denuo mihi sermo fuit cum Clariss. Barlæo. Distinebatur, superioribus diebus, Epithalamio in Schouterum illum, qui Leidæ uxorem antea habuit Overbeekiam. Nunc occupari se aiebat versibus destinatis Principi Bohemiæ Elizabethæ, cui dicandum Opus miscellum Catzii ac Barlæi. Emblemata esse arbitror Catziana, sed Barlæi ac Westerburgi Ecclesiastæ Dordrechtani versibus Latinis facta illustriora. Et tamen video, certo aliquid præstiturum, si tribus versibus imo verbis, id tibi gratum fore significaris. Quid si scribas hoc pacto? verbo te antea fecisse indicium animi tui literis apud me, & cognosse summum virum non passurum ut ulla in re claudicare affectus suos videatur. Proinde te voluisse in antecessum gratias

gratias agere, pleniusque facturum, ubi acceperis optimi affectus indubitatum argumentum. Plenissime sicubi deinceps valeat. Nam (ut liberius tecum loquar) vix in occupationibus istis & tam lucrosis, facturum puto, nisi literulis digneris. At si hoc grave non erit, facturum non dubito, imo spondeo. Plurimam salutem dicito clarissimis Collegis, ac memento, si serum non est, quamprimum significare de nomine sponsæ, & quo titulo tua signetur professio. Puto Historiarum & Eloquentiæ; sed tamen peccare hac in re Collega nolit: Eo malim certius constare.

## CCCCXCVII.

Claudio Salmasio.

Nobilissime Vir,

**M**agnopere mihi dolet, de amissa suavissima filia, de quo nihil antea inaudieram. Et auxit dolorem, quod de alterius filia morbo eadem cognoscerem. Uxorem vero eo magis hæc res affecit, quod refricavit ei memoriam trium liberorum, quos eodem morbo amisit. Nec in his dolor ititit; mox, ut fieri solet, cogitatio subiit Cornelie suæ, quam tristius fatum sustulisset. Deum immortalem! Quid homulli sumus, nisi bulla, vel *σκαῖς ὄνυξ*? Te constanter hæc ferre, plane persuasum habeo. Sed & conjugem supra sexum cordatam: quæ probè novit, quod Poeta vetus ait, nemini per æquor inoffensum labi currum ad candidum calcem. Imo quod Christiani scimus, ne quidem expediret nobis fluere omnia ex voto. Commentarius tuus de Cæsarie virorum, & mulierum Coma, tam multa omnes docet, ut nunquam ejus poenitere possit auctorem; etiam solidè adeo, quod proposuerat, evincit, ut responsurum arbitrer neminem. Collocutus sum cum pluribus; in nullum hactenus incidi, quin utroque, quod dicitur, pollice laudaret. Atque ego de isthoc citius scripisssem, nisi sperasssem, coram melius id facturum, filio è Galliis reduce. Nunc ille, ut ex literis tuis intelligo, etiamnum Lutetiæ est. Ego verò putabam, jam ante duas tres hebdomadas se dedisse in viam. In quo, si fallor, quid dicam, quam videre me quam difficulter possit à Galliis avelli. Ejus causâ, quem mihi commendas, omnia faciam, quæ potero, uti debeo. Ego & uxor salvere te jubemus, totique familiæ fausta omnia comprecamur.

*Amstelodami,*  
clb Idc xlv.  
x. Kal. Sept.

Æternum tuus;

G. J. Vossius.

## CCCCXCVIII.

III. Hugoni Grotio, Legato.

*Lut. Paris.*

Illustrissime Domine,

**Q**UI hæc literas reddet, Lævinus Warnerus, patria Westphalus, juvenis est tum pius & probus, singulari in studiis industria, idemque in Orientalibus linguis apprime versatus: quod constans omnium de eo judicium est. Nec obscurum est ex iis, quæ in lucem emisit. In his proximè fuit, centuria Proverbiorum & Sententiarum Perficarum. Sexennio cum laude præfuit studiis Illustrium Dominorum Comitum de Chinitz, & Tettau. Omni eo tempore, gratus, acceptusque fuit, & maximo Salmasio, & Golio, Constantinoque L'Empercur; mihi etiam quoties Leidâ Amstelodamum excurreret. Nunc incredibili ardet amore adeundi Constantinopolin, partim ut penitus cognoscat arcana quæque literaturæ Orientalis: partim ut augeat prudentiam, videndo & urbes, & hominum mores. Nec difficile ei fuit, à me elicere aliquid literarum ad Excellentiam tuam; cum putaret, faciliorem sic fore sibi compellendi viam. Jam duæ sunt hebdomades; quod literas à filio Isaaco accepi, unde intellegebam, post dies paucos velle se in viam dare. Id si fecit, jam ante aliquot dies, Lutetia discesserit. Eo impensius cum expectamus, quod superiori hebdomade Navis Zelandica, dum Gallias petit, tempestate periiit; inque submersis, tres fuerunt adolescentescens hujus urbis, probe mihi cogniti, qui studiorum causâ, in Gallias tendebant. Immane quantum Excellentiae Tuae debeo, pro beneficiis multis, in quibus nescio equid majoris facere me oporteat, quam erga filium Isaacum, affectum, ac benevolentiam singularem. Quantum eo nomine debeamus, nequeo effari; nec tamen de illo multa impræsentiarum scribam: malo aliarum mihi id literarum sit argumentum; postquam datum erit filium amplecti, & omnem ex eo itineris rationem coram cognoro. Multi hic sumus, qui ingenti flagremus detiderio pascendi oculos, & animum iis, quæ, ad vetus Instrumentum adnotaris. Gaudeo rem eò perductam, ut nunc de solis Indicibus laboretur. Sic enim ex præstantissimo, Excellentiae Tuae fratre, intellexi. Sed nequeo satis concoquere, quod de *Ἀνδαλυσία*, atque aliis huc transmissis spîsè adeo negotium procedat. Interim aliquid est, quod jam coeperit Blauwius, novam editionem Operis

Operis de jure Belli. & Pacis. significavit mihi ipse, ante octiduum, & ultra. Uxor plurimam salutem Excellentie Tuae adscribi jussit, sed & Heroine Conjugi, ac Liberis nobilissimis, uterque faulta omnia precamur.

*Amstelodami, clō Idc xlv.  
Nonis Septembribus.*

*Excellentie Tuae  
cultor æternum.*

G. J. Vossius.

CCCCXCIX.

Hugoni Grotio.

*Lut. Paris.*

Illustrissime, & Excellentissime Domine,

**D**E reditu Isaaci mei magnopere gaudeo: hodie dies est quartus decimus, quod primum amplecti datum fuit. Ex sermonibus, quos interea commutavimus, plurimum cepi voluptatis; nec vel quantum profecerit, poenitet, vel impensæ; facile etiam video, quantum Excellentie vestræ debeam, pro honore, quem filio, ac familiæ, meo habuisti. Nec beneficium tantum, cujus & ipse è sermonibus ejus fructum percipio, unquam excidet animo cujusquam nostri. Spero me paucos intra dies, à Jurisconsultissimo Excellentie vestræ fratre, accepturum quæ ad veteris Testamenti codicem annotasti. Nunc magnas ago gratias pro eo, quod tam præclaro munere augere volueris. Bibliothecam nostram. Sed ubi licuerit, Ambrosia ejus pascere animum, diu noctuque, multis partibus amplius debebo; nec desinam profiteri. Nunc pauculi dies, quibus careo, totus mihi annus videntur. Scio aliter fore animatos, qui terris hisce succo turgent liginis. Sed oblatrent quantum volenti; ubi multi numero, mentes & operam conjunxerint, non decuma eruditionis pars exprimitur. Deus, Excellentissime Domine, vitam & valetudinem diu conservet, terrarum, atque Ecclesiæ bono. Illustri Domine Conjugi, multam, Ego, Uxor, filii, salutem dicimus, pariterque, Nobilissimæ filiae.

*Amstelodami,  
clō Idc xlv.  
ix Kal. No-  
vembribus.*

*Illustrissimæ Excellentie Tuae  
obstrictissimus.*

D.

Georgio Calixto, S. T. P.

**Q**UÆ miseras, eximie Calixte, de beatitudine æterna, Transubstantiatione, Monarchia Ecclesiæ visibili, & dominicæ nativitatibus festo, ea accepi universa, & quamquam plurimum tam egregiis capiar donis, impensius tamen lætatus sum, quod divina bonitas tibi vitam, valetudinem, vires animi conservet ad tam bene de nostris posterisque temporibus promerendum. Ac idem mecum sentiunt his locis quotquot non aliam in Religione Christiana sectam sequuntur, quam sit ab utroque nostri. Illis vero qui in cuncta Romanæ Ecclesiæ placita jurarunt, eo facilius ignoscere debemus, quod hoc concordie studium omnibus fatis probetur, qui à Romana Ecclesia recesserunt, sicuti ex Buscheri, & ejus farenæ aliorum deliriis conspiciere est. Sed his bipartito commentario solide adeo occursum video, ut nihil ultra requiratur. Nescio sitne & responsum Erbermanni vindiciis hœce anno Moguntiae editis. Ubi inter alia miror sectione tertia contendere te Papale tribunal tibi vindicare, tanquam judicium tuum haberi velis tanquam publicum omnium Ecclesiarum idque ἀναγκαστικόν. Ac qui sic argumentari solent solos se putant canones Logicos observare in fidei negotio, ceteros circumvolitare tanquam umbras. Vidi & eoipse anno editam contra te annotationem de communione Græcorum sub una specie, ut inscriptio promittit. Ubi legi non reperi quidquam quo destruantur à te adserta de communione publica quæ sit in Ecclesiis Græcanicis & Orientalibus. Sed longa mihi esset series rerum complectenda, si ceteris id genus insisterem; nec valetudo hoc tempore sinat, quæ ab aliquo retro tempore infirmior esse coepit. Credo commonet, ut magis magisque cogitem de commigrando. Tu vero, excellentissime vir, perge cum divino auxilio strenue decurrere hoc curriculum ad quod es vocatus. Pro multis testium millibus conscientiam habes. Et applaudet omnis eorum chorus, quibus dolori est inconsutilem Christi tunicam ita misere discindi. Equidem id ingenue dixero, quod apud alios prædicare non desino, nullius scriptis è Germania aut vicinis terris æque me capi, quam ejus ad quem nunc scribo. Conjunctissimo Collegæ tuo doctori Horneio summo viro salutem plurimam dicas rogo. Nam & ille nobis è reliquiis aurei generis.

*Amstelodami,  
clō Idc xlv.  
4 Kal Novemb.  
Styl. Greg.  
K k k*

*Tuus æternum,*

G. J. Vossius.

DI.



DI.

Jacobus Golio:

Clarissime vir, atque amicissime,

**F**uit his diebus mecum Samuel Costerus, vir ut ingenio ac prudentia, ita medica pariter ac melica arte pollens. Is narrabat se ad te scripsisse litteras quibus ..... Senatoris Stetinenfis filium de meliori tibi nota commendaret. Equidem non ambigo, quin multum apud te ponderis illius habebant literæ, præsertim quando ex priori connubio filia ejus sanguine tibi jungitur. Nihilominus ita habuit persuasum, aliquid apud te posse amorem nostri: eoque à me poposcit, ut ad te argumenti ejusdem litteras darem. Id vero lubenter in ejus spem gratie facturum me recepi. Solum excidit nomen juvenis. Neque schedulam, in qua annotaram, potui reperire. Quid refert? Quando tibi de eo possit constare ex literis Costerianis. Solum igitur rogatu est opus, ut quantum res tuæ finant, observes quid juvenis agat, ne fortasse malorum consortio corrumpatur. Consilio etiam in studiis, si opus videatur, juves. Id mihi quoque pergratum erit amicissimi Costeri gratia, cujus opera subinde utor in adversa meorum valetudine. De rebus meis nunc nihil addo, quia melius omnia cognosces ex filio Isaaco: quem mihi Deus ex Anglia, Galliis, & Italia prosperum ac saluum sicut, post triennii & sex mensium peregrinationem non inutilem minus quam jucundam. Conjugi à me & mea salutem dices plurimam.

Mense Novembri,  
clō Ibc xlv.

Tuus æternum,

G. J. Vossius.

DII.

Johanni Seldeno, J. C.

**E**N tibi, vir doctrina famaue maxime, *Σεργιατὴρ* nostrum contextum ex memoria gestorum, natura rerum, & monumentis sacrarum Literarum. Quo in opere hoc unice studuimus ut nationes, & qui proxime ab iis abirent, ab impia sua pietate abduceremus, eademque deduceremus ad veri numinis noticiam, amorem ac venerationem; ut deinde eos fax verbi divini, quod nequit natura vel historia externa, feliciter ad cultum perduceret Christianum.

Atque hoc quale quale munus eò gratius fore confido, quòd magnam partem eodem pertineat præclarus tuus de Diis Syris labor; qui, ut tot alia, canescet sæclis innumerabilibus: quemadmodum de Marci Ciceronis Mario scripsit Scævola Jurisconsultus. Adjunxi etiam Maimonidæ opus de Idololatria cum filii mei Dionysii *τὸ μακροῦ* tralatione ac notis. Ac neque operam istam fore ingratam, planè habeo persuasum, vel eo nomine, quòd cum studiis aliis, præcipuè duobus Philologiæ & Juris prudentiæ conjunxeris tot Orientis Linguas, ut hæc etiam parte sit difficile parem alterum reperire. Vale, vir summe, & tui admiratorem ac cultorem porrò ama.

Amstelodami,  
clō Ibc xlv.  
Kal. Dec. St. Vet.

Præclaro tuo nomini æternum  
addictissimus,

G. J. Vossius.

DIII.

Episcopo Novæ Casæ.

Leidam.

Reverendissime, &amp; eximie vir,

**R**escripsissem de iis, quæ tetigisti literis tuis, nisi valetudo oblitisset & alia quedam. Spero id à me fieri posse propediem. Quamquam quid ego de istis ad te, & quidem degentem ea in urbe? Hoc nonne fuerit ligna in sylvam? & tamen ulla in re possim gratificari, quæ omnia tua causa velim? Utcunque vero distinerer mirifice, nolui tamen eum juvenem qui tuas mihi longe acceptissimas litteras reddidit sine meis reverti. Amo enim non modo propter commendationem tuam, sed etiam propter parentem nobilissimo genere prognatum, & à Rege Bohemico olim præfectum bonis Regiis in Moravia, quicum mihi ab annis compluribus aliquis amicitiae usus intercessit. Ingemisco sæpius, quoties cogito tam multos & genere & dignitate, aliquos etiam eruditione conspicuos, nunc variis adeo terris exules agere. Sed multis melius est infeliciores videri, quam ut cuncta hic fluant ex animi sententia. Salmatio te uti familiariter gaudeo. Nam quid eo viro mentis capacioris? Simulac ad eum scripsero, de crevi affectum tuum literis testari.

Jam cogor abrumper. Vanderbergio nostro abitum necessario parante.

Amstelodami, clō Ibc xlv.  
Kal. Decemb. τὸ γλϛ.

Tuus æternum,

G. J. Vossius.

## DIV.

G. Ratallero Dubletio.

Nobilissime Amplissimeque Dubleti,

**H** Elterno die, qui Veneris erat, puta A. D. v. Kal. Jan. planè domi meæ, in Christo obdormivit filius Franciscus, postquam apud nos tribus fuisset mensibus. Eo in lectulo cubantem, ac jam tum prope desperata valetudinis adportari, primis tenebris jusseramus; quo non corpus modo bene curaretur, sed monendo, hortando, melius instillarentur à nobis, quæ versare animo oportet, brevi deserturos has terras. Nec consilii vel operæ pœnitet. Adeo negligebatur domi suæ, imo crudeliter habebatur, etli summitteremus quotidie quibus opus esse ægro putaremus. Non convitiis parcebatur à Xantippe illa, nili Alecto potius dicenda; quæ & advocabat sorores, non tanquam *Sedv dno ungaris*, sed ab orco furias binas. Itaque & verberibus sævitum in decumbentem. Quod ne sæpius contingeret, addidimus ei custodem, qui diu noctuque cum illo ageret. Interim hic ne mutire quidem verbum audebat. Sed hæc fuere. Filio nunc melius est, postquam ereptus est his malis. Ac cogito mecum, fortasse Deo visum fuisse stultitiam ejus in terris punire, quo hic diceret cogitare de cœlestibus, dum locus est pœnitentiæ: ac ut facilius hanc mentem conciperet, voluisse per eam sic adfligere cujus infano amore, tanti mœroris causa fuisset parentibus adeo bene meritis. Mordet me nunc cura de filiola *ns margelra*, ne male in tali domo educetur. Sed de isto coram aliquando. Sepeliatur noster die Mercurii proximo. Tandiu differre exequias cogimur, quia Dominicum diem excipiunt duo alii feriati ob Dominicum Natalem. Totis enim diebus hic conciones habentur in Templis. Si adhuc viverem Leidæ, scio quid postulaturus à te sim, ac pariter senatore Ruterø, viro quidem carissimo, propterea quod uxorem, & liberos sanguine contingat, magis autem, quod annis prope modum quinquaginta amicitia intercesserit sine querela. Sed longum locorum intervallum, & sæviens frigus, non sinunt, quod vellem poscere, ab alterutro vestri. In te verò tertia accedit causa, quod cum uxorem non habeas, tuto abesse domo non possis, nec soleas. Interea non displiceat, si Amplissimum Ruterum omnis rei facias certorem. Spero grave non erit, si per famulum ei legendi has literas feceris potestatem.

Ita enim hoc tempore obruor variis, ut alteras etiam Literas scribendi otii suppetat nihil.

Scribebam *Amstel.*  
viii. Kal. Jan.  
clb Idc xlv.

*Tuus toto animo,*  
Ger. Jo. Vossius.

## DV.

Nobiliss. Baroni Herbert.

Londinum.

**A** Liquot nunc effluxere menses, Nobilissime & Generosissime Baro, quod librum tuum acceperim de Religione Gentilium, errorumque apud eos caulis; idque unà cum literis serenissimi Electoris & tuis. Et pro libro, & pro literis non possum non gratias agere quam maximas. Delectatus sum plurimum & Argumento, & Scriptionis genere. Vix itaque dixerim, quam avidè, quantoque cum fructu illum devorarim. Non jam animus est, ut scribam tibi, quid de hoc opere sentiam. Scio quam difficulter audire laudes tuas possis. Audiant hæc illi, quibuscum sæpe de hoc Scripto colloquor, cum tempus & occasio patitur, quæ nunquam non sese offert. Dum itaque sæpius lego, & relego, illos tuos Commentarios, animadverti verum esse istud, nullam in bonis rebus esse satietatem. Inde factum est ut scrius tibi respondeam, gratiasque agam maximas, quod participem me feceris lucubrationum tuarum. Nec quod sit, ubi diversum à me videatur tibi, id pretium apud me imminuit. Quùm auget verius. Præterquam enim, quod nolim opiniones meas haberi, velut *xvelay dežav*: pulcherrima mihi præbetur occasio, peniculandi ea quæ scripsi; ac vel corrigendi, vel firmandi magis. Ut mittam quod multa adhuc indicta referavi postremo Volumini, quo agendum mihi primum de Plantis, & Fossilibus; hinc de Affectionibus in Deorum numerum relatis; postea de cultu Naturæ universalis; ac denique de cultu Symbolico mixto. Ac diu illa universa in lucem prodiiissent, nisi novis curis semper avocarer. Superest, ut sicuti meo nomine gratias ago pro tam præclara opera: illas agere etiam possit Orbis universus. Id maxime desidero, tantoque id citius futurum, quanto citius lucem aspiciet. Quod si in eo excudendo, utilis esse opera mea possit, vel hic, vel alibi, nisi in Anglia excudi satius existimabis, libentissime

K k k 2

sime

simè illam offero. Vale, Illustrissime & Generosissime Baro.

*Amstelodami,*  
c15 Ibc xlv.  
iii. Kal. Jan.

*Tuus æternum,*  
G. J. Vossius.

## DVI.

*Illustriss. & Sereniss. Electori Palatino.*  
*Londinum.*

Serenissime Princeps,

Quamvis opus non fuisset, ut Serenitas vestra commendaret librum Nobilissimi ac Generosi Baronis H. de Cherbury, cum bonæ merces seipsas soleant commendare; tantum tamen voluptatis percepi ex literis Serenitatis Vestræ, ut maiorem nunquam. Itaque non possum non gratias agere immortales Serenitati Vestræ; tum quod me literis suis honoravit, tum quod me dignum censuerit, cui aliquid commendaret. Liber memorati Domini Baronis, & doctissimus est, & ea qua potui attentione illum pervolvi. Sed ad sustinendum iudicium Vestræ Serenitatis, de opere illo corrigendo, modo ab ullo corrigi possit; necesse esset, ut meipsum superarem. In eo etiam video incredibilem Serenitatis vestræ humanitatem, quod tantum mihi attribuat, meque hominem minutum usque adeo obliget. Faciam ego semper quod debeo, & quod possum; plura etiam facturus si liceret. Sed neque Serenitas vestra plura à me expetit, neque plura ego possum.

Deus, Serenissime Princeps, Serenitatem Vestram tueatur & provechat ad ea quæ desiderat.

*Serenitati Vestræ*

*Amstelodami,*  
c15 Ibc xlv.  
iii Kal. Jan.

*Devotissimus,*  
G. J. Vossius.

## DVII.

*Cl. V. Hugoni Grotio.*

Illustrissime & Excellentissime Domine,

Accepi jam ante mensē quæ ad Veteris Testamenti Libros, Excellentia Vestra annotavit; Sacrarum Observationum, non Librum, sed Thesaurum. Adeo ubique

multa se offerunt, partim paucis observata, partim hæcenus inedita. Juvit etiam cognoscere, quid in tanto scribentium dissentiu, iudicio illo accurato maximè comprobasses. Magnopere præterea delectavit, quod ostendis, multa adeo in Veteri Interprete, quæ carpi à Novis solent, commodam capere Expositionem, planèque consentaneam contextui Hebræo, etiam ut nunc legunt Massoræthæ. Nempe scribere voluisti, non tantum concinna atque erudita brevitate; sed etiam non industria, quam plurimi, sed studio partium minori; quando alterum hoc corrumpere hoc sæpius Religionis negotium solet. Quamobrem immensum quid æternumque Excellentie Vestræ debebunt, qui seriò amant legere & intelligere Scripturas. Ac privato etiam nomine, non solum pro munere magnifico, sed quod majus puto, pro opera tam utili teneor atque obstringor, Eò impensius Deum rogo, ut Illustrissimæ Excellentie Vestræ, longam ætatem, ac optimam valetudinem largiatur; quo & illud, quod in Novi Instrumenti Libris enarrandis superest, perficias; atque adeo veteres resumas labores; non quasi desiderem, sed quia confidam Spiritum Domini plura deinceps consimilia bono publico edoctrum. Scribo hoc eò fidentius, quia planè censeo, Excellentiam Tuam, hac parte, non abire, à communi quondam Præceptore, focero meo Junio. Is aiebat, si vel annos centenos superesset, neutiquam se ingenio ullo vel industriâ, exhaustire posse, quæ profundo insunt Scripturarum puteo; sæpe mihi paucis ante obitum mensibus retulit, si absolvere daretur, quæ ad Bellarminum annotasset, nolle cogitationes alio adjicere, quam ad veteres suas Commentationes limandas. Sæpius itius mihi in mentem venit; nec tamen peccare desino, in procudendis novis, ac sæpè minutis, quale illud quod pauculos intra menses conspicias: Est id de Sermonis Vitiis, & Glossæmatis Latinobarbaris: opus fortasse non inutile juventuti, ad Sermonis Latini castimoniam: Aliis item ad intelligendos seculorum posteriorum Scriptores, quantivis illos pretii, sæpè interim semibarbaros. Hæcne ætati meæ conveniunt, qua cum inchoavi annum qui intra hunc ipsum, c15 Ibc xlv. ætatis erit septuagesimus? Fons caputque hujus mali est, quod si qualia præferrem, & fortasse parata habeo, publici juris facerem, calumnias malorum non injuria extimecerem; quando satis sum edoctus quantum velint & valeant. Accedit quod tam multa in tam variis studiorum generibus sum aggressus, ut quoties cogito de singulis, vix videam, quid primò



primò, quid deinde, in manus sumere imprimis conveniat. Interim existimo, è primis fore, Librum singularem de natura, & constitutione Poeticæ; duos autem de temporibus Poetarum, Græcorum & Latinorum, tum eorum qui deperiire, quam qui Libitinam effugere potuerunt; Tres verò Libros, de artis totius Poeticæ præceptis. Credo comitem addam Harmoniam Evangelicam, de Passione & Resurrectione Domini, opus jam ante annos viginti quinque laboratum. Sed postquam avidè devoravi, quæ ad Evangelistas observavit Excellentia Tua, non pauca conspexi tum quibus firmare mea possem; tum quoque propter quæ pedibus mallet in Excellentia Tuæ ire sententiam, eoque propria vineta cedere lubens. Nec siverint id mores mei, ut hoc dissimulem, ubi lucem adspiciet.

*Amstelodami*, Pridie Kalen. Jan. Stylo Juliano, clb lxxv. quem fortunare opto, Excellentia Vestræ, Heroinæ Conjugi, & Nobilissimis Liberis. Quod mecum vovet Conjux & Liberi, & ante omnes, obstrictissimus Excellentia Vestræ, Isaacus meus.

## DVIII.

Joanni Seldeno J. C.

*Londinum.*

Clarissime, virorumque Eximie Seldene, **J**ucundius mihi fuit, quam facile dixero, ex affine Junio, & ornatissimo Hoofdio, cognoscere de singulari erga me meosque affectu tuo, ac opera quoque eo in negotio, quod mea interesset plurimum. At longe illud jucundissimum, partim ex conjunctissimo Collega Pellio, partim ex optimo Hoofdio resciscere, de felici totius negotii successu. Quare nimium quantum obstrictus sum præclaris Regni Britannici Proceribus, & eximio nomini tuo, & præstantissimo D. Sadler, atque aliis qui luculento adeo argumento, amorem nostri, ac in me studiorum comprobarunt. Multum etiam hoc nomine debere profitentur, & Matthæus meus, Illustrium Hollandiæ & Zelandiæ Ordinum Historiographus, & filius alter (ut de tertio Jurisconsulto taceam) Isaacus meus, qui non semel perhumaniter adeo à te exceptus Londini; & ante duos, tres menses, Gallia, Italiaque, triennii quasi spatio, lustratis magnos præclarosque Scriptores hætenus ineditos, pene dixerim Thesaurum apportavit;

alios post alios juris publici facturus, bono literarum, nec sine testatione, quorum beneficio tantum potuerim in studiis & meis & liberorum. Ac eadem multo justius mens mea, quando fructus quidem hujus beneficii, magnam partem ad liberos redundat. Attamen me imprimis spectat, qui magno cum rei familiaris damno, cuncta publicis metior commodis. Itaque (si familiarius mihi paullo loqui tecum permisum) poteram ego, si quantum pecuniarum Bibliothecæ impendi apud Illustres Hollandiæ & Westfrisiæ Ordines collocassem, tantum inde percipere, & amplius etiam, quam ad me redit ex Britannia magnæ, magno illo, nec satis æstimando beneficio. Nempe hoc facit, ut minori molestia sumptus in studiis suseram, animoque magis defæcato limare pergam tam multa quæ habeo affecta. Quippe longè eorum excedunt numerum, quæ hætenus emisi. Ac intra hunc annum, ut spero, complura eorum conspicias, in non uno studiorum genere. Jam enim sub prælo sunt nonnulla. Nimirum nunquam cesso, quia semper cogito, quantillum absim à septuagenario. Semper igitur illud in mentem venit, prope diem mihi rationem esse reddendam temporis, quod divina hætenus bonitas concessit. Tibi vero, Magne Seldene, ingentes ago gratias pro præstita opera tam pulchra, tum etiam hoc tempore opportuno; & (ut de liberis nihil repetam) facit item mecum optima Conjux, summi viri Francisci Junii proles. Et cur non illud addere liceat; Etiam qui antea celebrarent toto orbe Celebratissimam Doctrinam tuam, non minus efferunt in cælum singularem Beneficentiam ac Humanitatem, atque in me (saltem sic judicant amantes mei, quales longè plurimi) non solum collata, vel præstita hæc putare, sed omni Eruditorum Ordini his terris. Tantum mihi meisque adlaborandum magis, ut ne præsentī seculo, vel postero ingrati unquam fuisse videamur. Neque is solum animus futurus est noster erga te; sed cunctos qui tam bene de familia mea mereri voluerunt. Quæso hanc meam, meorumque mentem, ubi orium erit, significa. Ac ipse etiam, prima occasione, uni alteri significare decrevi.

*Amstelodami*, Post. Kal. Jan. An. clb lxxv. quem tibi tuisque, & toti Regno Britannia Magnæ fortunare ex animo cupio optoque.

*Æternum tibi tuo merito obstrictissimus,*

G. J. Vossius.  
DIX.

## DIX.

Nob. &amp; Charissime Adfinis,

**R**eliquit terras filius Franciscus, atque, ut spero, iis miscetur, qui in illo die misericordiam magis quam iudicium pro meritis expectant. Satis placide expiravit, ac tribus mensibus, quibus domi nostra fuit, crebro vidimus, quam multum poeniteret, ac tum ipse veniam Deum rogavit, tum petiit, ut nos pro se ignosciam, numen assiduo postularem. Sepulturæ destinatus est dies Mercurii proximus. Suffecerit igitur, si te Martis die in viam des, ut avunculus sororis filium natu maximum, tibi cognominem & magno avo, sed virtutibus immane quantum inferiorem, extremo hoc honore cohonestes. De Cognato Brunæo nihil addo, quia hæc scripturus, intellexi ex filio Matthæo esse in urbe hac Amstelodamensi: scripsi etiam ad Amplissimum Senatorem Dubletium, sed scio stulte, & inique ab eo postulatam iri, ut hoc anni tempore, se itineri accingat, qui domi non habeat Conjugem, tot suavium Liberorum interea curam gesturam. Neque poscere ausim à Senatore Ruterio, qui & ipse vix quadriennio abest ab decimo Climacterico. Nunc plura ut addam, non sinunt occupationes, sed si valetudo hoc ferat, ut excurras, erunt alia multa, de quibus differendi erit otium. Affini Brunææ, & filiæ plurimam salutem dicito, etiam (modo vobiscum sit) Illustrissimo Comiti Oxfordio, pro cuius assurgente Gloria, licet iniquissimis temporibus, non desinam vovere, quæ virtus ejus meretur.

Amstelodami,  
clb Dec xlv.*Tuus quantum possim,*

G. J. Vossius.

## DX.

Nobilis Conjuncteque Affinis,

**T**ristem tibi nuncium apporto. Ereptus nobis est, heri vespere, filius Matthæus, postquam quadriduo circiter lectulo fuisset adfixus, & postquam biduo ante imminentis morbi nobis indicia aperuisset. Hodie est xxi. Martii; funus deducetur xxiv. hoc est proximo die Sabbathi. Itaque ego, Uxor, Nurus, & filius Isaacus, plurimum rogamus, ut quem honorem exequiis Francisci mei proximè habuisti, eo nunc cohonestare funus Matthæi nostri, ne grave ducas: neque id te solum rogo, sed etiam Cognatum

Brunæum, modo valetudo utriusque, ac res sic ferant. Perspectissima mihi est summa humanitas tua, ut hoc pluribus postulare nequitiam opus habeam. Feci etiam de isto certiorum Amplissimum Dubletium; non tamen poscendum putavi, ut denuò se huc conferret. Ne quidem id petii à charissimo Cognato Ruterio, abundè semel hoc agendo adfectum suum comprobavit. Tamen priusquam te in viam des, significabis ei de hoc dolore nostro. Scriberem ipse, sed dolor non finit, & præterea occupationes funebres. Has & similes derivare antea in Matthæum soleo. Nunc etiam hic senectæ scipio ereptus mihi. Ita ut vides longa ætas multa secum advehit mala. Sorori Brunææ salutem nostri omnium nomine dicito.

## DXI.

Joanni Sadlerio S. P.

**N**ON facile dixerim, præstantissime Sadlere, quantum voluptatis ceperim ex tuis ad me literis. Neque eo id nomine duntaxat, quod me rei longè desideratissimæ facerent certiorum: sed etiam quod ab eo proficiscerentur, qui luculenta adeo operâ, suum erga me familiamque meam amorem, ac fidem comprobasset. Quanquam verò jam alteram Hebdomadam lectulo sim affixus, nempe ob senilem morbum, pedibus non valentibus officium facere, imo nec manu sinistrâ; quia tamen paulatim remitteret morbus, à quo biennio fueram immunis, dextra etiam commodè se haberet: committere non potui, quin literulis hisce, iterum, iterumque gratias agerem, & à me ac meis, pro viribus omnia grati animi officia pollicerer. Decretum erat ad minutam mentis benevolæ testationem, Exemplum eorum mittere quæ hæcenus edidissim in lucem. Sed multorum nullum apud Typographos Exemplar amplius comparet, omnibus jam diu distractis. Sed in eo aliqui sunt ut recudantur. Quod ubi effectum, non differam quæ mei sunt officii. Nunc præmitto quos potui nancisci. Sunt autem isti Libri vii. de Arte Grammatica, quibus censuram exerceo in Veteres Recentiores Grammaticos.

Libri vi. Oratoriarum Institutionum.

Libri iv. De Gentilium Theologia, &amp; Physiologia Christiana, duobus Volum.

Liber de Genealogia Christi, deque Annis ejusdem, Nati, Baptizati, Mortui. Item dissertationes tres de tribus Fidei Symbolis, uno Volum.

Quæso

Quæso boni hæc consule, nec tam quid mittam, quam quo mittam animo cogita. Qui sanè erga te talis, qualis pro tuis meritis esse debet, & futurus semper. Mitto ejusdem generis quinque volumina ad amplissimum & præclarum Oliverium Sanct. Joannium. Quos gratiores fore confido, si à te acceperit, eademque operâ à me salutaris, & omnia grati animi officia promittas. Hæc ipse scripsisse ei; sed is est corporis languor, ut iterum in lectum cogar recipere. Deus qui coepit reddere valetudinem meliorem, brevi ut spero pristinam restituet.

*Amstelodami, clb Idc xlv.  
iii. Non. Maias, Stylo  
Gregoriano.*

*Æternum tuus,  
G. J. Vossius.*

## DXII.

Cl. Salmasio.

Nobilissime, maximeque Salmasi,

**J**ucundum fuit nudius tertius, ac quartus, bona te valetudine conspiceret; ac multum gaudii accesserit, ubi ex te cognoro, lectissimam Conjugem, animæ dimidium tuæ, salvam, ac fospitem pedem in Galliis posuisse. Mitto quæ scripti de Vitiis sermonis, & glossæmatis Latino-barbaris. Id munusculum boni consules. Addidi Minutium Baldwini, cujus præfationem, à Typographo deliderari intelligo.

*Amstelodami,  
Non. Septemb.  
clb Idc xlv.*

*Tuus æternum,  
G. J. Vossius.*

## DXIII.

Cl. Salmasio.

Eximie vir & amice,

**S**i multis exprimere velim quàm mihi jucundum fuerit, de valetudine tua cognoscere, & quid in studiis bono publico moliaris; faciam quiddam, non satis dignum veteri firmataque amicitia nostrâ, quæ non finit, ut in hujusmodi negotio dubitet alter, de alterius constantissimo affectu. Istoc igitur mittam, ac potius de rebus meis te faciam certiore. Ac primum quomodo mihi cum Arthritide fuerit consiliandum, non illa quidem, quæ me prorsus arceret à Musarum sacris, sed ejusmodi tamen, ut domi conti-

neret, quandoquidem turpe putarem, si instar Tardipedis Dei, claudicare foris. Ut autem videas haud nimium in me valuisse Divam malignam, quam nos Podagram vocamus, mitto ad te opus literarium de Vitiis sermonis, & glossæmatis Latino-barbaris, cujus partem non exiguam, morbi tempore, partim scripsimus, partim ex veteribus schedis digessimus. Exiguo id loco ducent qui literas aspernantur: non tu, vel alius, qui utilitatem cum difficultate conjunctam æstimabitis suo pretio. Equidem hic quoque cum Terentiano Mauro fas sit dicere:

*Fronte exile negotium,  
Et dignum pueris putes:  
Aggressus labor arduus,  
Nec tractabile pondus est.*

Quod magis judicabis, si alterum quoque volumen consequetur; sed hoc antequam lucem videat, edere animus est grande opus, de omnium disciplinarum naturâ & constitutione, earumque scriptoribus, tum antiquis, tum (modò magnoperè mereantur) etiam novis. De re poetica etiam, & Poetis Latinis & Græcis, quinque libros habeo paratos. Ad hæc, tres Harmoniæ Evangelicæ, de Christi Passione, Morte, Sepulturâ, Resurrectione, & Ascensione in Cælum. Item opuscula varia, quæ videbis, ubi pedem posueris in ædibus nostris. Hæc adfero, ut facilius te, ubi occasio dabitur, in viam des. Etli de me aliud promittere nihil habeo, nisi facilem mensam, lectulum mollem, frontem porrectam, & quod non in infima parte putandum, colloquia, ac sermones quales amamus uterque, quoties bonus nos Deus conjunxit. Atque utinam, aliquod tum possis Typographo, ingenii, doctrinæque monumentum committere; siue de dicatione perisset animus, quem scribis, siue aliquid melius in mentem venerit: scio enim nihil à te proficisci, nisi ingenio perfectum, atque elaboratum industria, planèque istiusmodi, quod non placiturum sit, seculo non modo nostro, sed etiam posteris. Quo in omine defino, teque pariter, ac lectissimam uxorem (illam mihi notam virginem, notam matrem, ac ut cenfeo etiam aviam) plurimum salvere jubeo.

*Anst. clb Idc xlv:  
post. Non. Sept.  
Styl. Greg.*

*Tuus totus,  
G. J. Vossius.*

## DXIV.



## DXIV.

Jacobo Golio *Matheſeos & Arabicæ  
Linguae Profefſori.* *Leidam.*

Eximie & amiciffime Goli,

**V**ellem, cum proximè forem Leidæ, magis in animo habuiſſem, vetus illud verbum, quod Cæſari Auguſto, non in animo modo, ſed ore etiam atque epiftolis, frequens eſſe ſolet. Nam, ſi ut eo præcipitur, lenius feſtinaviſſem, non excidiſſet tecum loqui de negotio quodam, cujus curam, in me ſuſceperam Hagæ, vel Ryſwici potius, ubi non me modò, ſed nobile etiam fratrum Dubletiorum par, & Boulenum Piterſhoexi dominum (ut matronas præteream) convivio opiparo, exciperat ampliſſimus Leewius, Brilanz urbis Prætor. Nonne affectus tam prolixus, in animum debuerat revocare, quod ſemel, iterumque, eidem Leewio promiſeram? Sed gratiſſimus conſpectus tuus, optimæque uxoris, & præſtantium convivarum, quibus me ſocium addidiſti, ita me abriperunt, ut ex memori priorum immemor fierem. Præſertim dum ſemper obverſatur brevitæ temporis, intra quod, necèſſe haberem, adire, & ſalutare complures veterum Collegarum, & incomparabilem Salmaſium, & maximum Spanhemium, non minus elegantis ingenii virum; quàm doctriinâ, ſacundiâque excellentem. At ſaltem imponere huic oportuiſſet, quod apud te fuerat neglectum; ſed dum cogito, jamjam currum eſſe adſcendendum, ſi temporis Amſtelodami eſſe velim, nec hic magis, quàm apud te incurrit, quod ex te, Spanhemioque, quaſiturum me receperam. Nempe utrum alteruter veſtri non gravetur, convictorem habere, ampliſſimi ejus, quem dixi, Leewii filium. Adoleſcens eſt, ſuaviſſimæ indolis, ac probè educatus; ſed facile videt parens præſtantiſſimus, qui ipſe in Academia Leidenſi vixit diu, quanti periculi ſit, eo ablegare filium uſque adeo adoleſcentem, ac penè puerum, niſi degat ſub oculis alicujus, quem ætas illa revereatur, ut debet. Rogo igitur, ut tribus verbis ſignifices, num tibi integrum ſit, optimum hunc adoleſcentulum recipere in convictum. De pretio, facile conveniet. Novit enim parens, nuſquam melius impendi pecunias, quàm ut liberi augeantur virtute ac doctriinâ. Quod ſi res tuæ non ſic ferant, ut fieri id poſſit, proximum eſt, ut & mei, & imprimis ampliſſimi Leewii cauſâ, exquiras, ex præſtantiſſimo Spanhemio, num apud eum pluribus vacet locus, ac paratus ſit, adoleſcentem eum

admittere in numerum convictorum. Quod ſi ne ille quidem recipere poſſit, hoc tempore, diſpice quaſo, ubi habitaturum hoc tempore tutiſſimè putes. Parens nihil æque habet in votis, quàm ut vivat apud alterutrum eorum, quos dicebam. Quo celerius ſuper hoc reſponſum accepero, eo gratiores erunt literæ tuæ. Longas non expecto, novi occupationes tuas. Solum ſcribe; Recipere mihi, vel D. Spanhemio integrum eſt. Aut, Cenſeo rectè, huic, vel illi commiſſum iri. Ita poſtulado meo ſatisfacies, & ego minus injurius fuero in tua, ac publica commoda. Salutem dices ſuaviſſimæ conjugi tuæ, & ſummō viro Spanhemio.

*Amſt. c. 13* Idc xlv.

Nonis Septemb.

## DXV.

Ampliſſime & Conſultiſſime Micropi,

**S**æpè mihi in mentem venit, eximie bonitatis, ac humanitatis tuæ, jam ab eo tempore, quo Dordrechtum me tenebat, & annua tibi cura veniret Auſtralem, publico nomine, Hollandiam petendi. At eo jucundior eſſe ſolet illius temporis recordatio, quod poſtea quoque, te mihi, & meis expertus ſim ſemper uſque adeo benevolum, & amicum. Tanto fidentiſſe ante has duas hebdomadas, cum ampliſſimo & integerrimo (ut cæteras laudes taceam) ſenatore Ratallero Dubletio acceſſi domum tuam; ac quia nunc, ob adverſam conjugis valetudinem, excurrere non datur, per literas compello, iterumque illi mei Matthæi, quantum poſſum, negotium commendo; idque non tui ſolum cauſa, ſed etiam, ut per te, & illuſtriſſimum Legatum Pauwium, ad quem iridem ſcripti, commendatius eſſe apud præſtantiſſimorum Collegarum alios poſſit. Vides mihi rem curæ eſſe: nec miraris ſcio, tot ipſe liberorum parens. Et cum ſemper nobis cordi ſint cariſſima pignora, in hoc vitæ incerto, tum præcipuè, ubi non vitæ multum ſuperest. Nam quid aliud mihi perſuadeam, poſtquam tam parum abſum à ſeptuagelimo, quem decimum vocant climactericum, ac ſapientiſſimus Solon vitæ terminum judicabat, indigante quidem Mimnermo, ſed non abhorrente divino Pſalte, niſi quod annos denos vivacioribus ſuperaddit. Rogo Deum, ut tu quoque vivacibus iſtis annumereris, & deiniceps quoque belle, ut cum Poeta dicam, pedibus te portes tuiſ. Id facies bono familiæ,

liæ, & Reip. & amicorum. Ita voveo, (ac pariter mihi ipsi comprecor) æternum tibi.

c15 Idc xlv.  
v. Kal. Octob.

*Ob insignem illum af-  
fectum, & amorem  
obligatissimus,*

G. J. Vossius.

## DXVI.

*Clarissimo & Amicissimo Golio.*

*Leidam.*

**A**ltero, ex quo à vobis discefferam, die, literas ad te dedi, pro argumento fanè longiusculas. Iis te certior faciebam, quomodo Ampliff. Leuwius Brilane urbis Præfectus, multum me rogarit, ut exquirem ex te & Clariff. Doct. Spanhemio, utrum filius suus habitare in ædibus alterutrius possit, quo in Academia Leidensi florētissima, ac domesticò exemplo, uberorem capere possit ingenii ac doctrinæ cultum; super eo nihil hæcenus responsi accepi. Metui ne id provenerit ab occupationibus nimis, quibus distringeris. Quare rectè me facturum putavi, si memoriam refricarem. Quæso hoc age, ne expectationem Leuwii nostri diutius eludam. Lectissimæ conjugī salutem dicas.

*Amstelod. c15 Idc xlv.  
Kal. Octob.*

*Tuus,*

G. J. Vossius.

## DXVII.

*Incomparabili Viro, Collegæ veteri,  
Danieli Heinsio, Ger. Jo. Vossius,  
S. P. D.*

**P**roximè edidi volumen de vitiis sermonis, & glossæmatis Latino-barbaris. Nimirum, mihi duo proposui, prius est ut pro viribus aliquid conferrem, ad barbariem profligandam; alterum ut lucis aliquid adferrem mixobarbaris illis, quæ legere est, apud superiorum seculorum scriptores. Eunte igitur ad vos Longermanno, juvene optimo, & arcto sanguine juncto communi amico nostro Gronovio, occasionem negligere nolui, mittendi exemplaris, non quia tanti putarem, ut inspiceres, sed quod existimarem, id officii mei esse, nec tibi nostra in-

grata esse posse, Collegæ veteris, & tui amantissimi, jam ab annis propè quinquagenis. Amorem etiam tuum vicissim perpexi vel proximè, cum una apud Golium cœnaremus. Quem ego virum maximi facio, ut debeo; si meo nomine salutaveris, rem facies longè gratissimam.

*Amstelod. c15 Idc xlv.  
iv. Idus Octob.*

## DXVIII.

*Clarissimo viro, D. Ant. Æmilio.*

*Clarissime, & amicissime Æmili,*

**Q**UI has tibi literas tradet, vir est probus, natione Græcus, nomine Nathaneal Conopius, Presbyter, & Patriarchæ Cyrilli antehac Protosyncellus: Græcè pereruditus, nō Latinè ignarus, sexennio Oxonii vixit; postmodò, ob res in Anglia afflictissimas, terris nostris commendatus. Aliquot diebus apud nos fuit. Urbis nostræ Magistratus eum centum donavit Karoleis; Ecclesia Belgica sexagenis. Minus Gallica dedit; quippe ipsa in re satis tenui; ut non sic indigentibus succurrere valeat, quàm optaret. Nunc ad vos contendit, ut Urbis, Ecclesiæque liberalitate auctior redire ad suos possit. Reformatarum Ecclesiarum sententiæ favet, ac spes nostrorum hominum est, posse eum Ecclesias Græcas arctius conjungere cum nostris. Sed SS. Patres cœmendos (sine quibus parùm in hoc sancto negotio præstiterit) non exiguis opus sit impensis. Quas cum sustinere per se non possit, opem flagitat alienam, nec iniquam. Cum verò posceret à me commendatitias, præ cæteris occurrissi, quem hoc onere bearem: Nempe ut ejus causam Procerum uni alteri commendes, atque adeo etiam eorum qui Ecclesiæ præfunt. Ad præstantissimum Niuportium, Urbi vestræ à secretis, scripsit, ejus causa, conjunctissimus Collega meus Barlæus. Eo negotium hoc apud Proceres vestros facilius processurum confido. Spero in Ecclesiastico ordine, non gravatè ad hoc conferre operam suam velle, virum magnis virtutibus Arnoldum Ticmannum; quem rogo, ut à me salutes, cum ob hanc ipsam causam, tum ut videat me non esse immemorem sui. Dolet quod non melior mihi occasio sit videndi, & complectendi utrumque vestri: & eo magis dolet, quod ab annis circiter quadraginta, cum adhuc messis vestra lateret in herba, abunde prospexerim, quantum boni,

ab tam præclaris animi dotibus exspectare Ecclesia & Resp. Literaria posset. Sed vos mihi non minus videmini, Ultrajectinæ adfixi glebæ, quàm ego Amstelodamenſi. Interea mihi facilius venia dari debet, ob grandiore aliquanto ætatem. Nam pauxillas intra hebdomades, ingrediar Climactericum meum decimum, ultra quem, nullum sibi computandum Solon putabat. De me quid facturum sit, sum unicè securus, ut qui divinx hoc Providentiæ committam; & ut Poeta Bilbilicus jubet; *summum nec metas diem, nec optes*. Vale, maxime vir, pariter & amice.

cIs Ibc xlv.  
ix. Kal. No-  
vembris.

*Tuus omni officio,*  
G. J. Vossius.

## DXIX.

V. Cl. Joanni Brunæo.  
*Middleburg.*

Amplissime vir, Cognate carissime,

**L**uculentam mihi spem fecerat filius Matthæus, superiori te Majo, ac conjugem pariter affore nobis. Sed licet vix aliud æquè in votis esset, video tamen non sic res tuas tulisse. Multa erant, de quibus alloqui decreram: quorum alia ad fratris tui filium pertinerent, alia etiam ad communia studia nostra; quiddam etiam quod me quoque tangit, quia tangit filium. Jam hoc cum dico, fatis intelligis, maximoperè me optare, ut Zelandiæ Illustrissimi Proceres desiderium nostrum expleant de eo, quod nunquam spissè adeo processurum putabamus: Nempe ut Historiographo suo annum assignent stipendium; exemplo Hollandiæ, quæ ubi prævisset, non se huic rei defore pollicebantur: nec ignoro quis moram injecerit justissimæ petitioni nostræ; sed postquam ille vita excessit, spero facilius hoc fore negotium; præsertim ubi semel sacra sua commovere voluerit Brunæus, vir, & amicus summus: quem utinam tam literis ad istoc possem accendere, quàm me posse confidam, si vel ad horas paucas colloqui daretur. Nullius equidem commodis obſisto; sed non iniquum arbitror, ut ejus potius ratio habeatur, qui mentem non in varias diviſit curas, sed tot jam annos in eo totus est, posteris ut prodant gesta inclytarum Gentium; Hollandiæ, Zelandiæ, Westfrisiæ. *Paulum sepultæ distat inertia celata virtus*. Quid majores à suis nepotibus magis requirunt, quam ut

ne virtus sua ignoretur? Quid dignius se nepotes egerint, quam ut præclare de eo mereantur, qui desiderium illud majorum expleat? Vellem inclytis ac laudatissimis Proceribus vestris, ob oculos ponere possem, quam nulli labori, imo nec impensæ parcat filius, ut veritatem in profundo Democriti puteo latitantem producere in apricum posset: Nempe totum se huic uni curæ mancipavit. Quid in alio quoque simile? Scio te ista non diffiteri. Solum opto, ut quibus commisit Deus rei patriæ curam, hoc negotium, non infra cogitationes suas putent. Ac non confido defore nobilissimum Cnutium, qui affectum mihi suum in hac re coram declaravit. Multum illi, & cunctis, quibus hoc negotium cordi erit, debebimus, si gratias agere illis liceat, pro eo quod nunc expetimus. Ego, Conjux, filii te, & tuam, & tuos plurima salute impertimus.

*Amſtelod.* cIs Ibc xlv.  
xv. Kal. Decembris.

*Tuus æternum,*  
G. J. Vossius.

## DXX.

Nobilissime, & Eximie Salmasi,

**I**mmortales ago gratias pro immortalis divinx mentis opera, De primatu Papæ: quod multum animum meum pascit, pascetque, ac Deum oro, ut reliqua pariter det tibi pertexere, simulque ut Patroni infallibilitatis ac omnipotentis Papalis videant, quam incertis ac putidis subnixæ sit tyrannis ejus, qui sic se extulit supra conservos suos. Inquirens sedulo, quid animi foret Proceribus, de advocando Professore Medico; sed negabant hæcenus de eo sermones fuisse inter se; sed solum de Professore Botanico; quod suorum civium plurimum interesse putarent, ut peritiores haberent Pharmacopæos. Et scio sic esse; Et si non ignorem, malle, qui non Botanicus modò gnarus sit, verum & profiteri artem Medicam velit. Optem me super hac re colloqui posse cum Exlegato Scapio, Lugdunensis Academiæ Curatore ac Gymnasilii nostri; sed is nemine Urbis nostræ adhuc agit Hagæ Comitum, ac vix putatur affuturus ante Natalem Domini. Non desinam urgere hoc negotium, ubi fuerit reversus: Hæc parva malui raptim exarare, quam diutius relinquere animum suspensum præstantissimi Kyperi, cujus egregia Volumina duo, de scientia naturali abundè ostendunt, quid ab eo sit exspectandum Lyceo nostro, si Proceres nostri ad eum huc advocandum adjiciant



rant animum, sed nisi cum pluribus fuero collocutus, nihil certi possum rescribere. Isaacus meus plurimam iussit salutem adscribi.

*Amstelodami,*  
cIo Ibc xlv.  
xii Kal. Decemb.

*Aeternum tuus, tuique*  
*Admirator & Cultor,*

G. J. Vossius.

## DXXI.

*Reverendo variaeque Eruditionis Theologo* Jacobo Lydio, Ger. Jo. Vossius  
S. P. D.

**T**ERNAS à te literas accepi: unas cum dono Reverendissimi Armachani, quod per mihi gratum fuit, tum propter eruditam ad Ignatii vulgarem Editionem notas, tum propter genuini Ignatii veterem translationem. Ipsum Græcum Codicem non vidit vir summus Usserius; sed ea foelicitas reservata fuit Isaaco meo, qui Florentiæ è bibliotheca Medicea descripsit, ac primus orbi Christiano dedit, opposita è regione versione antiqua ex editione Usseriana. Non possum, Amicissime Lydi, satis exprimere, quantoperè me Reverendissimus Usserius, ac imprimis filium meum, dono suo bearit: quanquam & tu quoque, in aliquam huius beneficii venerationis societatem: qui cum nobis ex Britannia apportasti, & simulac pedem in urbe patria posuisti, cum continuo misisti mihi; probe gnarus, in huiusmodi etiam negotio, locum habere, quod vulgo dici solet, bis eum dare, qui det citò. Sed ut eo nomine laudari tu mereris, ita ego metuo, ne potius castigandus tibi videar; qui nec de hoc dono rescripserim quippiam, nec ad alteras literas reposuerim quidquam. Poteram pro me adferre, tum adversam valetudinem meam, ac præcipuè uxoris mire adstrictam: tum mortes filiorum Francisci J.C. tum Matthæi Historiographi; sed enim aliud præterea est, quod me negligentior fecit, in postulato Reverendi & præstantissimi Roberti Bayllii. Scripseras in edendis nostris festinato opus esse: At Typographorum duorum, quibus hic utor, prælum in tantum distinebatur variis, & ingentibus voluminibus, ut uterque negaret, intra aliquot menses, quicquam mei posse excudi. Sed exinde nusquam non velle omnia agere in meæ spem gratiæ. Non peccassem, si quæprimum te huius responsi fecissem certior, sed nunquam in respon-

dendo sum tardior, quam quàm scribere non licet id quod ego & alter mallemus. Ita factum, ut in totum scribendi officio superfederem; sed ante menses sex septem Blauwius exorsus est libros, quos exaravi, de omnium Artium, & Scientiarum natura, usu, ac nexu. Elzevirius autem excudere coepit librum unum de natura & constitutione Poeticæ, & tres de Arte Poetica: quibus jungentur duo, unus de Græcorum, alter de Latinorum Poetarum temporibus. Sed quoniam hæc grandibus aliorum voluminibus intermiscunt, nostra vix philyram unam singulis hebdomadibus procedunt. Interea pollicentur, post duos summum menses, se in nostris assiduos fore. Quod si tum quoque eadem maneat mens, Reverendo, Clarissimoque Bayllio, non committam, quantum in me fuerit, quin ejus expectationi satisfaciam. Sin id serum tunc erit, ut metuo; non deerunt alia atque alia, quæ publici juris faciam: In his quinque reliqui Libri de Paganica Theologia, qui non affecti modo, sed etiam confecti; uti & tres de Harmonia Evangelica, in Argumento Dominicæ Passionis, Resurrectionis, & Ascensionis in Cælos. Adderem alia, sed non petiisti tam Catalogum propediem *ὡς ἀπὸ* edendorum, quam ut responderem de Editione eorum, quæ de Baptismo, & imprimis de Anabaptismo scripti, & isti Argumento vicinis. Tamen fortasse, nec ista ignorare malueris. Id enim postulat amor domus nostræ hæreditarius, jam ab annis octoginta circiter coeptus inter Avum tuum præclaræ doctrinæ virum, ac Parentem meum; postea vero continuatum, inter me, & avi tui viduam, optimamque Matrem tuam; quæ te scio non ignorare, ac stimulum esse debent, ad amorem etiam præstandum filio meo, quasi *μενογαῖν*, qui nullum in se benevoli affectus officium sinet claudicare. Vellem te aliquando hic videremus. Et si quid minuti negotii fuerit, hoc etiam impellat, quod visurus apud nos es ingentem turbam MSS. etiam hæcenus ineditorum. Hoc philtro te alliciendum putavi. Neque enim ignoro, quam sis *φιλόβιβλος* & *φιλόμυθος*. Uxor & filius te plurimum salutant, salutem etiam nostro dicito nomine, optimæ sorori, ac egregiis fratribus: per otium quoque Illustri viro Wittio Exlegato, ac cæteris quos nominis nostri amantes imprimis scias.

*Amstelodami,*  
cIo Ibc xlvi.

## DXXII.

Joanni Brunæo, J. C. V. C. Gerardus  
Jo. Vossius, S. P.

**G**Audeo, Amplissime vir, charissime cognate, quod tam te videam memorem mei, & meorum. Prout auctor fuisti, libellum mitto Illustribus D.D. Zelandiæ Ordinibus offerendum. In quo tantum abest, ut mihi videar peccare, ut potius existimem me non publici minus habere rationem, quam familiæ meæ. Nam si hac parte Proceres aliis nolint terris cedere, quæ res majorum à pluribus sæculis, posteris tradiderunt; nunc recte de publico mereor, si offeram eum, qui spartam eam non minus ornare velit quam possit: Imo non minus possit, quam illustres ipsi Proceres velint. Tot jam annos non dico, sed lustra, Historiæ Belgicæ, Foederatæ maximè, cura ac cogitatio distinxit domum nostram, ut nemo in ea non potuerit aliquid videre supra vulgus. Nunc hic unus superest, qui ut de ejus ingenio, doctrinaque, nihil nunc dicam (putidius hoc forsitan videretur) at saltem non leve videri debet, quod tot annos non minima fuerit pars sermonum, quos de Antiquis Foederatæ, imo universæ Belgicæ rebus, pœne assidue internos, in domo, ut arbitror, non prorsus illiterata, commutavimus. Accedit quod istiusmodi ad hoc negotium Bibliotheca sit instructa, ut nesciam equis alius præferri debeat. Nec de excusis id solum libris dixerò (quanquam, & hoc non leve putandum) sed maximè MSS. quos nescio numquid plures de Historia Belgica ineditos habeat, vel etiam compluribus annis comparare sibi possit. Quid dicam de filii *is margeris* observationibus multis, quas in schedis asservamus. Non ego præter morem meum ista scriberem tam prolixè, nisi putarem, id nunc à me exigì, si non publici minus quam domestici boni amans sim. Tu modo curam hanc suscipe, ut Illustrissimis Proceribus Zelandiæ vestræ, pro affectu erga me & meos, & cum his etiam tibi agere gratias possim. De nobilissimo Cnutio omnia mihi spondeo, & Procerum aliis, quos in causa filii Matthæi me Hagæ memini convenire. Ita mihi sereno vultu affectum suum testari vili sunt. Nec culpa fuit nostra, siqua velut canina scæva obturbarit, qui studium hoc non aliter quam canis Nilum degustarat. Cui tamen in cæteris laudibus nihil detractum velim. Non hoc vel moribus, vel ætati conveniat meæ. Quid ego pluri-

bus te nunc distineam, Amplissime Cognate? Ea es prudentia, ut per te videas, quid nunc factu sit opus: ea autem benevolentia atque amore, ut omnia nostri causa velis. Quod si quid præterea à me fieri posse putes, tribus verbis perscribas: sed imprimis tempus illud expectabo, ingenti cum desiderio, quo te Conjugem, & quos Liberorum unà adducere visum erit, coram amplecti licebit. Plurimam omnibus vobis adscribi salutem uxor jussit; sed & Cognato Brunæo, si adhuc hospes fuerit patruì sui.

*Amstelodami,*  
c1b 16c xlvi.

## DXXIII.

Winando Rutgersio, S. Th. Doctori.

Clarissime atque Amicissime Domine Doctor,

**V**Alere te & tuos gaudeo. Valeo & ipse mediocriter, melius valiturus, nisi male valeret conjux. Existimet aliquis me ad tam diuturnum malum paulatim obdurescere. Et foret fortasse, nisi pariter, & animi, & corporis dolore discrucietur; ut ferreus sim futurus, nisi dolore ejus doleam. Interim quantum possim, dolorem tempero, tum sapientiæ præceptis, tum etiam studiorum amoenitate; quæ non finit ut quidquam remittam de laboribus antiquis: imo nugis animum remittere, etiam innoxiiis, prope mihi idem videtur, ac animum amittere. Admodum mihi est ægre, quod non poterit vel mea, vel filii opera tibi esse utilis, in conquirendis libris de quibus scribis. Studiosè lustratæ sunt tabernæ librariæ, consulti que quos oportuit; sed incassum sudavimus. Negant eos amplius apud Bibliopolas, vel Typographos reperiri. Desidero scire an habeas Petrum Tyræum Societatis Jesu Theologum, & Professore Herbipolensem; cujus duo extant libri; unus de apparitionibus omnis generis Spirituum Dei, Angelorum, Dæmonum, & animarum humanarum; cum appendicibus, de Spirituum imaginibus, ac cultu, ac Purgatorii veritate. Alter verò liber qui est quadripartitus, tractat de Dei in V. T. Apparitionibus & Locutionibus; tam externis, quam internis. Coloniz à Cholino est excusus Anno c1b 16c folio in quaternam plicato: paginis constat quasi quingentis. Si eo destituaris, & videre desideres non patiar, ut quicquam hac parte requiras. Si quando excurre, cujus toties jam spem fecisti, sedulo uterque lustrabimus,

lustrabimus, ecquid vel mea, vel filii Bibliotheca habeat, quod doctissimis laboribus tuis utile esse possit. Salutant te & Conjugem Uxor & Filius.

*Amstelodami,  
c15 Idc xlv.*

*Tuus ut scis sine fuco more  
re majorum,*

G. J. Vossius.

DXXIV.

Claudio Salmasio, Ger. Jo. Vossius  
S. P. D.

Vir Nobilissime,

**T**Arde rescribo, nec aliter potui ob gravissimum amplissimi Schapii morbum. De eo prope fuit conclamatum: hætenus tamen convaluit, ut pedem posuerit in curia, cum maximè ejus præsentia opus foret, quia de novo creando Magistratu, agendum esset. Nec tamen ea firmitas corporis, ut novo Academiæ Magnifico Rectore designato, Leidam se conferre fuerit ausus. Facile in recidivam incidisset, cui infirmatis adeo viribus, non æque par fuisset ac ante. Nudius-quartus demum compellendi potestas facta. Deque præstantissimo Kypero, gratus ei sermo noster fuit. Jam antea de hoc locutus sum, cum Consularium duobus, vel tribus; sed negabant sibi constare de eo, quod putabam. Refricavi eis memoriam eorum, quæ semel iterumque acta essent, de advocando Medico & Botanico. Nec abnuere illi utiliter de eo posse cogitari; sed putabant quiddam esse, quod hoc tempore prævertere oporteat. Et hoc quale foret retulerunt. Quamquam satis id per me intelligerem. Pertinet autem ad Jurisconsulti professionem. Ac similia dicere Amplissimus Schapius, sed prolixè quædam addebat, de affectu suo erga Ornatissimum Kyperum. Satis vidi, non per eum staturum, quo minus, vel Leidæ, vel apud nos ejus ratio habeatur. Putavi mei muneris esse, ut tam bene affecti amorem, magis etiam accenderem. Itaque multa retuli, de Eruditione, quam ex Commentationibus illius perspexissem: Etiam in Chymia, quam ego scientiam, sed sic, ut Antiquis etiam suis constet honos, magni semper feci. Sed-enim Consul Schapius ea respondit, unde cognoscerem se non esse hujus ignarum. Ac benignè adeo dimisit, ut facile viderem, si per alios non fletir, plurimum in eo reponi fiducia posse. Equidem certi nihil habeo promittere, eo minus,

quia hoc habent ferè urbis nostræ Proceres ut diversa eorum sint studia, ac putent præterea nihil maturandum, an festinandum dicam? Propè quasi ex Lentulorum essent familia, quales etiam Austriacos magis quam Heroas Gallos esse ferunt. De me interim ita habe, me nulli defore occasione, quin eam arripiam, ut si possim, perficiam quod velles. Atque id quidem Clarissimi Kyperi causa, quem jure æstimo, tum in tuæ ipem gratiæ, cujus ergo, nihil non velle debeo. De rebus meis poteram fortasse aliqua addere, quamquam minuta, ut omnia sunt mea; sed cultore tui nominis, ac penè dixerim numinis, Isaac filio, Leidam eunte, malui ex ipso omnia à te cognosci.

*Amstelodami, c15 Idc xlv.  
v. Id. Feb.*

DXXV.

Amplissime ac Conjunctissime Adhūis,

**P**utavi ob arctissimam Conjunctionem nostram, hoc mihi agendum, ut ex me potius, quam aliunde cognosceres de obitu filii mei Matthæi, quem xx. Martii morbus (maximam partem veteris erat) abstulit mihi, intra quatrimum, quo lecto adfixus fuit. Biduo jam ante, tale quid mihi præfagebat animus, cum in mensa mea referret, ut, dum assiduus est in gestis Dominiæ Jacobæ describendis, frigore sæpius horridiusculo corriperetur. Sic res sunt humanæ. Mihi est animus cum bono Deo, qui tot adversa pertuli, hoc quoque forti animo perferre. Et ut melius possim, amicorum me precibus commendo. Scio non defore, qui ambiant apud Illustres D. D. Ordines Historiographi Officium. Equidem non possum dicere me alterum huic muneri scire magis idoneum fratre ejus Isaac; de quo plura dicerem nisi filius foret. Et posset ille una munus Geographi Ordinum implere, quod olim sustinuit Philippus Cluverius. Solum terret quod multum mihi laboris fuerit exhauriendum, priusquam id obtingeret Matthæo nostro, ut Historiographum facerent Proceres nostri. Sed fit etiam, quod cum molestia sit. Decretum per otium de hoc agere cum Ill. & Ampliss. Wittio Cognato, quem scio ita esse animatum, ut nuspam passurus sit operam suam claudicare. Et fortasse è re fuerit, si rei istius non fuerit ignarus. Nam facile obtingeret, ut aliquis cogitationes, & molimina mea, quæ cum uno duntaxat Dubletio communicavi, ob-

turbare



turbare conetur. Hæc ergo nunc raptim adeo, ut vix sciam quid scribam. Sic undique interpellor; & tamen non dimittendus erat inanis nuncius, qui hac hora ad vos contendit. Salutem uxori ac liberis, nec minus Amplissimo Cognato Witio.

clo Idc xlv.  
xxiv. Martii.

Tuus totus,

G. J. Vossius.

### DXXVI.

*Clarissimo & Præcellentis Doctrinæ viro, Dn. M. Stephano Joannis Stephano, Serenissimi Regis Daniæ Historiographo, inque Equistri ac Regia Academia Sorona, Professori Ordinario. Soram Danorum.*

Ger. Jo. Vossius S. P. D.

**T**Andem læta affulsit dies, qua non dubitandum, æternūne Cimbricæ gentis decus, Saxo Grammaticus vester, Stephanii mei popularis sui beneficio, sanus, bonæque corporis habitudine, pererudito etiam Commentario auctus, illustriorque, ac verbo, ut dicam, omnino ejusmodi, qualem hæcenus desideravimus, in lucem, manusque hominum elegantiorum venit. Explicare non possum, quam bene mihi de te ipso, de gente vestra, deque universa Republica literaria meritis videaris. Deus plurimos tibi annos largiatur, ut melius meliusque mereri posses. Quamquam tantum effectum tibi, ut si vel brevi (id ne benignum numen sirit) humanitus aliquid tristius subeundum foret, sic quoque æternum, ut in te Saxo, sic tu in Saxone tuo sis victurus; nullaque dies sit deletura beneficium utriusque vestri. Si ante annum habuisssem hos labores tuos, crebrius nomen tuum legeretur in opere nostro de Vitiis Sermonis: in quo videbis aliquando etiam ad partes advocari Suenonem tuum. Scio, quod mitto *avistæger* impar esse tuo. Sed ut quomodo-cumque æquarem, volui addere libellos duos de symbolis, unum alterum, de genere atque annis Christi. Nihil opus rogare, ut boni confulas. Novi enim quanti me meaque omnia soleas æstimare. Nec impedio, quo minus deinceps etiam huic indulgeas errori tuo. Illud vero impensissime rogo, ut pergas eruere, inque apertum proferre alios etiam rerum Danicarum Scriptores,

imo & quæ nostro sæculo, quæ feliciter, quæ secus contingere, ingenii, doctrinæque tuæ penicillo posteris prodas. Nolim tamen in hoc rogando te longo uti sermone, quia non dubito quin quotidie illud à te postulent, atque expectent, viri & Illustrissimi generis, & maximæ in Dania vestra auctoritatis; quorum præcipue valere apud te voluntas debet. In studiis gravi hac ætate, præsto quantum possum: pluraque possem, si me met corona illa adhuc cingeret octonum Librorum, qua me beatum Leidæ novisti. Nunc ad meliores sedes, Deus transtulit universos, excepto Isaaco Vossio J. C. quem confido brevi multa publico daturum. Is filiorum erat natu minimus, uno dempto Gerardo, cujus Velleium, & alia quædam videris fortasse. Nolo tristibus illis diutius immorari. Plurima salute impertias egregios viros, & mihi caros Collegas tuos, D. Laurembergium, & D. Erastium. Addo & optimum, & cordatissimum, D. Meurium, cum filio, filiaque.

Amstelodami, xi. Jun. clo Idc xlv.

### DXXVII.

*Nob. Baroni Herbert.*

Illustrissime D. Baro,

**S**Ero rescribo ob mortes meorum; unius natu maximi filiorum Francisci, in Curia Hollandiæ & Zelandiæ Advocati; Alterius natu proximi, Matthæi, Illustrium eorundem Provinciarum Historiographi, & Amstelodamensis Reip. Bibliothecarii: cujus fortasse Annalium libros xv. videris. Itaque nunc Librorum mihi nihil, præter Isaacum, qui paucos ante menses, Ignatium genuinum edendo, benè bonis de Ecclesiæ meritis videtur. Quippe antea nonnisi Latine exstabat, idque Reverendissimi Armachani Antistitis beneficio. De præclaro opere tuo, sæpius cum Typographo sum collocutus; tardius autem responsum accepi: in causa erat, quod nunc in edendis libris sint difficiliore, propter motus Britannicos, & Germanicos. Istis enim terris immane quantum hinc librorum distrahi solet. Nunc aliter est ob causam quam referebam. Quæsi tamen quantum exigenter, tuis si sumptibus prodiret. Blauwius qui mea excudere; nec semper tamen solet, paratum se post sex menses prælo committere, idque impensis suis, dummodo ipse centena exemplaria emas, & pro quoque sesquiflorenum Hollandicum, sive

xxx. stuferos nostrates, persolvas. Sed editurus aiebat forma ac Typis quibus opus meum, de Theologia Paganica, & Philosophia Christiana, lucem videt. Ambigebat quid diceret, si Typis tam grandibus excudetur, ac tua illa præclara de Veritate, ac errorum causis. Usque adeo nunc prælum ejus distinetur multis, ac ante id, quod dixi, tempus, ordiri Editionem non possit. Interea temporis, & à te responsum expectabo, & ipse semel, iterum, ac tertio, fortasse perscribam, quid censeam de iis, ubi aliud tibi videtur. Nunc solum significo, ita me animatum esse, ut non arbitrer aliquem mortalium minus moveri ob dissensum alienum. Perplacet, quod mihi, & aliis sæpius referebat fecer, summus vir Franciscus Junius: Sic ego, sic ille; eruditi viri discipiant, quid melius ego, quid rectius perpexerit alius. Imprimis hoc propter Drusium dicebat, subinde aliquid affectui indulgentem, virum interim Hebræis literis pereruditum, & aliquid observantem, alteri invisum. Nempe aliquid singuli videmus; nemo omnia: sed quidquid singuli valemus, in publicum proferamus, ut penes posteros judicium sit, quibus eo facilius erit delectus, quò candidius quisque exposuerimus, quid nobis videatur. Sæpe veritas è Democriti puteo difficulter educitur; ut multorum manibus, atque opera opus sit. Interea quia sic poscis, non defugiam laborem perscribendi minutatim de nonnullis, ubi dissentire videamur. Et quia longioris ea res operæ sit, si non unis, pluribus id literis faciam. Noli enim uspiam, ab tam illustri viro, ejus ingenii ac doctrinæ, quicquam à me desiderari. Sic planius erit, ubi mihi persistet animus, ubi aliquid à te commodius dictum putem, ubi statutam facile per se conciliari, quæ pugnare videantur. Et tibi quoque hoc opere inedito, & mihi parte commentationum alterâ, corrigendi aliquid occasio dabitur. Si hic excudi velis, & id neutiquam possit fieri, ante menses sex: salvis ac sospitibus nobis, abundè temporis erit, de variis differendi per literas, quia coram non licet. Utinam vero brevi aliquid cognoscerem de Alcyoniis Britannicis. Neque id tam dico mei causa, quam amore Regni antehac florentissimi. Nec tamen peccem, ut arbitror, si minus diffitear, agi etiam ex minuto rem meam. Nam jam menses sunt quindecim, quo nihil ad me redit ex præbenda, ut vocant, Cantuariensi. Nihil gratius facere possis, quam si sic res ferant tuæ, ut commendatione tuâ, non ita spise procedant res nostræ. Præsertim, cum rebus, licet turbatis, grande non sit ex-

solvere quod debeat, singulis enim annis, non ultra centum libras sterlingicas percipio. Nolui tamen molestiam ullam facessere, ne videar in nugis nostris, tanti Herois operâ uspiam abuti: Et tamen hominibus nostris non videor indignus, cujus ratio aliqua habeatur, qui nihil nisi assidue pro Britannicæ bono preces fundam, & supra, quam ætas linat, defudem, pro Rep. literaria, inque studiis omnia non tam metiar profecto commodo meo, quam Ecclesiæ Christi. Absque eo foret, multis partibus unctiores forent res nostræ. Deus Opt. Max. diutissime Te salvum ac sospitem, Illustrissime Domine, conservet.

Amstelodami,  
cl<sup>o</sup> Id<sup>o</sup> xlvj.  
Post. Id. Jun.

*Illustrissime dignitatis tue  
Cultor æternum,*

G. J. Vossius.

## DXXVIII.

Reverende idemque Amicissime Croci,

Quamquam in scribendo aliquanto sum negligentior; non tamen si quis è nobis hinc ad vos eat, eum sine meis ad te literis dimittere soleo. Quare & consuetudinem hanc nunc retineo, redeunte ad vos Neumanno, Juvene, & probo, & pererudito, & utroque nomine hominibus doctis acceptissimo, ante omnes *res n<sup>re</sup>* Salmatio: qui & aliquando cum per literas mihi commendavit. Quamobrem confido ei nusquam defore, tuum, & aliorum præstantium hominum favorem, si qua in re eum fortassis desiderabit. Audio, gaudeoque omnia apud vos jam quæta esse & tranquilla, postquam abiit Doct. Combachius. Equidem hæc Alcydonia, non diuturna modo, sed perpetua vobis esse velim. Sed quoties malos, pravosque hominum mores cogito, non possum mihi aliud persuadere, quam nonnullos homines, qui nisi nocerent, morerentur, ubi qualiscumque Dux obtigerit, redituros ad ingenium, velut anus ad armillum. Multum tamen bonæ spei habeo, in Procerum vestrorum prudentia; qui non sinent hujusmodi, cum urbis, atque Ecclesiæ malo, turbare, & cum ratione insanire. Edidi aliquot ante menses tomum priorem de vitiis sermonis: quò operam dedi, tum ut castigatior sit sermo, puriorque, tum etiam ut semi-barbari illi, qui post irruptiones Gothicas, atque alias, Romanum Imperium tenere, melius ab hominibus non ineruditis, intelligi possint. Et si vero sciam non ferre tua tempora, ut illis legendis vaces; volui tamen

tamen ut videres, quia indignum amicitia nostra putarem, aliquid mei prodire in lucem, cujus non facerem te participem. Cætera, quæ ad me, & alios nostri ordinis, his in locis pertinent, & præterire nunc animus est, quia melius, certiusque, ex Neumanno cognosces, qui viva erit Epistola. Et sanè gaudeo eum potissimum ad vos ire, cui & nostri Gymnasii, & Leidensis Lycei status est cognitissimus. Etsi enim mihi longe est jucundissimum, per literas colloqui tecum; tamen vel inertia quadam, vel ob assiduas occupationes, quodammodo, lætor, si in scribendo liceat esse breviori. Salutabis plurimum Clarif. Dn. Wittium, quem amo, & æstimo, nec ejus memoriam deponam. Deum rogo, ut utrumque Vestri, diutissimè conservet, cum familiæ, tum imprimis Ecclesiæ bono.

Amstelodami,  
clb lbc xlv.  
Prid. Id. Jun.

Nominis tui cultor,

G. J. Vossius.

#### DXXIX.

Antonio Matthæo, J. C. Gerardus  
Vossius, S. P.

**S**æpè mihi, summe vir, jucunda obversatur memoria ejus temporis, quo clarissimus focer tuus, atque ego, morum similitudine conjunctissimi, amicitiam colebamus, usque ad ejus extremum vitæ diem. Nec illius me temporis oblivio cepit, quo & tu atque ego, alter alterum coram amplexi sumus: cujus ego, tum doctrinam ac virtutes, amare & æstimare didici. Nec scio utrum magis, talem tibi focerum, an illi talem generum gratularer. Eo impensius gaudeo, tam bellam mihi oblatam esse occasionem, testandi affectum hunc, ab tot annis minime esse imminutum. Et qui possit? Cùm tua & eruditio inlignis, & virtus eximia, quæ sola mihi amorem mereri, in nostri ordinis hominibus semper visa sunt, quantum dies accrevit, tantum doctorum judicio, testatiora sunt cunctis. Quocirca cum unico uxoris meæ fratris filio, optimè consultum vellem, non aliud potui in animum inducere, quam ut eum tibi de meliore nota commendarem. Quem eo gratiorem fore confido, quod & bonarum sit literarum amantissimus, & probitate ac modestia egregius, & juris studio biennio jam in Academia vacarit, quæ quondam tantopere, magno Parente tuo poterat gloriari. Sed exultavi, quod non possit Parens, ὁ μακαρίτης,

id posse apud Ultrajectinos tanto Patre natum, non minorem filium. Quocirca author, nec solus tamen fui, ut ad vos potissimum se conferret, & quæ juris studio hæcenus deessent, ea suppleret de pectore tuo Papiniano. Nec dubito, quin longe sit futurus gratissimus, non solum, quia sic erecta ejus indoles mereatur, sed quia natus sit magno sanè viro, & præclare de Ecclesiis nostris merito. Est enim Francisci Junii, nobilis viri, sed nobilioris Theologi, ex filio natu maximo Nepos; quem nunquam familiæ indecorem fore confidimus. Solum rogo, idemque facit mecum Conjux, facit Juniana omnis familia, sic illum complectaris, ut studia ejus quamplurimum tibi debeant. Vale, vir maxime, & qui amor inter focerum, & me fuit; is deinceps esto inter te, meque, atque etiam duret inter liberos nostros. Quid enim pulchrius? quàm, ut junior ille Isocrates olim ad Demonicum scribebat, ὥσπερ τὸ ἰσίας, ἔτω καὶ τὸ φίλιος τὸ πατρικὴς κληρονομίαν.

Amstelodami,  
clb lbc xlv.  
Prid. Non. Jul.

Tuus æternum omni officio,

G. J. Vossius.

#### DXXX.

V. Cl. Guinando Rutgerfio, Ger. Jo.  
Vossius S. P. D.

**Q**uod tu, uxor, generque, cum filia benè valetis, equidem gaudeo; ego mediocriter valeo, quod de uxore non possum dicere; atque ad ejus adversam valetudinem accedunt, quæ non muliebrem modò, sed & virilem constantiam possent expugnare; imprimis mortes duorum filiorum, qui ætate exsuperabant cæteros: li sunt Franciscus Jurisconsultus, & Matthæus, Ordinum Historiographus, quorum uterque intra semestre proximum excessit. Cùm octonis liberis Amstelodamum veneram, unica nunc proles superest: utrùm vero hanc etiam terræ sim daturus, an potius velit Deus, ut unus filiorum supersit, qui ubi fatalis illa hōra advenerit, oculos mihi claudat, id cum Horatio dixerim, *scire nefas*: quandoquidem, ut ait idem: *Prudens futuri temporis exitum caliginosâ nocte premit Deus*. Noli autem propter tot adversa putare, sic me iis premi, ut officio desim. Propè enim nihil remitto à veteri labore, licet septuagenarius: Quia tantò sum temporis avidior, quanto citius mihi ejus rationem reddendam video. Sed mihi multas bonas horas auferrunt tum amici, tum qui vicinis, vel remotis.



motis etiam è terris salutatum veniunt. Si tam stultè saperem, quam Plautinus ille miles, nec meo me pede metiri didicissem, poteram fortasse suaviludiis quibusdam fidem habere, qui mihi similia his conquerenti, ridiculè respondebant, Nimia est miseria, Doctum esse hominem nimis. Sed mittamus affanias. Ego propter crebros adeo visitantium accessus, non possum sic limare mea, ut eruditæ cavæ usquequaque satisfaciam. Ac propterea, sæpè recessum aliquem opto, qualis ille in quo nunc degis; absque eo esset, quod Miles sæpè incommodat: ut mihi narrant, qui tuas mihi literas reddiderunt. Mitto nunc ad te iv. Tomos operis nostri de Theologia Gentili, & Physiologia Christiana. Quatuor supersunt, qui quando lucem sunt visuri dicere nequeo. Ita multa sunt, quæ forsitan prævertent. Miraberis fortasse, cur non miserim prius, sed cum Cleo dicissem Anglicano, tam multa eò exemplaria mittere necesse fuit, ut non potuerim amicorum multis donare, quibus antehac soleo. Quid Amicos dico? Negavi etiam Liberis, quia nullum superesset, præter unicum, in quo novas curas annotarem. Sed postquam intellexi, tanti tibi esse nostra, ut pretio tuo emi velis, emere ipse malui, quam ut tu nummum impenderes. Præsertim cum non indignum sit homine Theologo & Philosopho argumentum, ut planè confidam, non displiciturum. Sanè à summis viris ac studiorum principibus benigna satis judicia accepi. Operis nostri de Natura, & Nexu disciplinarum, vix octo, ut vocant quaterniones sunt excusi. Jam menses sunt aliquot quod operæ cessant: non culpâ nostrâ, sed quia scripturienti hoc sæculo variis adeo præla distineantur bonis malis. Leloyherium de Spectris non vidi; ac metuo ne idem sit ac Lu. Lavaterus, de Spectris; qui Genevæ excusus, an. clb lxxx. apud Eustathium Vignon. Forfan incideris in alicujus Jesuitæ, vel similis farinæ librum. Mos enim illis corrumpere nomina eorum, qui inter hæreticos, quodammodo familiam ducunt. In his autem Lavaterus ille, Theologus Tigurinus, Henrici Bullingeri gener; cujus scio varia videris monumenta: Et fortasse illud de Spectris. Sed hunc ab illo Leloyherio diversum putaris. Dixi, quid mihi videatur. In quo si fallor, tam pereat suspicio nostra, quam extrema faba, ut in proverbio est. Non ignoras, ut Ampliissimorum Academiæ Leydenfis curâ atque operâ, aliqua sit facta medicina inimicitis inter summos viros Salmasium & Heinsium. Saltem hætenus, ut ne alter in alterum posthac calamum stringeret. Sed non multo post Goessii Senatoris

Leidenfis (is affinis tui Heinsii gener est) liber in lucem prodiit adversus Salmasium; in quo traducit magnum illud sæculi decus, ut merum Grammaticum. Cætera tacere malo. Quare metuo, ne incassum fuerit omnis Curatorum labor. Si benè Salmasium novi, non feret hoc Heinsius inultum. Sed denuò se Salmasius accinget ad impungenda, quæ is scripsit, præsertim in N. T. O si tandem homines, in studiis excellentes, condonare multa publico possent, nec mutuo, sic dente genuino se roderent. Non modò de Rep. Literaria, sed etiam de seipsis mererentur longè melius. Nunc quid faciunt, nisi quod apud imperitos fordeant, & unà ferè cum illis studia universa? Pluribus non detinebo, partim quia jam adsunt, qui has ad te literas deferent; partim quod nolim longus videri: præsertim postquam ipse adeo in scribendo brevis esse soles. Uxori, filio, genero, plurimam salutem dicito; imo & vos omnes salutant Conjux, & filius Isaacus; qui annum & amplius redux ex peregrinatione, Britannica, Gallica, Italica; quibus penè quadriennium insumsit, non sine studiorum incremento. Quod facilius perspicias, si aliquando excurreris. Hoc fore adulto vere proximo, spem fecere illi, qui literas has tradent. Nomina adderem, si inquisissem. Sed leve peccatum, cum liceat mihi sic eos apud te *mepejzen*.

*Amstelodami*, vi. Id. Septembris.  
clb lxxvi.

## DXXXI.

Illustrissime atque Incomparabilis Salmasi,

**A** Quo hæc literas accepis, is est Christopherus Witorichius, Pastoris Aulici in Silesia filius, juvenis integræ vitæ, & hoc nomine acceptissimus bonis omnibus qui noverunt. Ante biennium mihi per literas commendatus fuit à Cl. V. Ludovico Crocio Theologo Bremensi. Ea in urbe biennio toto studiis operam dedit, inter cætera literis Græcis & Hebræis, item sacris; ac sub præsidio Crocii, publicè etiam in Theologicis disputavit, & ut intelligo, cum laude. Exinde Groeningam abiit, ubi biennio item præfuit studiis filii Steinbergii, ea in urbe Doctoris, ac Professoris; nec operæ filio impense Steinbergium pœnitet. Felicem autem se juvenis hic putaret, si etiam apud Leidenfes, similis ei posset conditio obvenire. Videtur pater in re honesta, sed plures in studiis filios educat: & in adflicto hoc Germaniæ

M m m

statu,

statu, non idem potest quod olim. Optaret igitur ut filius suus succo suo in externis Academiis possit aliquantisper vivere. Equidem vix video, quomodo magnopere, non dico consilio, sed auxilio ei hac in re esse possis; sed obnixè à me petiit, ut se tibi commendare vellem: & idem fecit natus ex conjugis fratre Franciscus Junius Franc. Nep. qui cum Groeningæ novit familiariter, eo quod noster hic sub Steinbergio juri operam daret, & Wittichius iis ædibus degeret. Hæc pluribus exposui, ne ingratum foret, si quem commendarem in negotio, ubi parum fortasse operâ tuâ possis, vel saltem non sine damno studiorum, quibus ob commodum publicum imprimis consultum volo.

clō Ibc xlv.  
vi. Id. Septemb.

Tuus ut sis,

G. J. Vossius.

#### DXXXII.

V. Cl. Justo Lyræo, Ger. Jo. Vossius.  
S. P. D.

NON est nobis, V. Cl. nuper notitia, ut suam cum Menedemo nuncupat Terentianus Chremes: sed vetus adeo, ut penè annos expleat Jubilæi; quem Israelitis suis constituisse septies septenis annis. Quæque in adolescentia vix aliud, quam Notitia dici meruit, ea firmatori ætate, Amicitia sibi nomen vindicat; præsertim postquam amorem uterque nostrum hospitali etiam tessera ob-signavimus. Eo fidentius hoc literularum ad te exaravi, quo commendarem nobilem adolescentem Franciscum Junium, ex uxoris meæ fratre natum. Et quomodo non grata esse ejus commendatio possit, cum tanto apud te in pretio fuerit semper magnus Avus, communis præceptor? Quod non existimo tecum dicere posse quemquam Collegarum. Quantum enim ex ætate eorum colligo, extincto demum Junio, in Leidense Lyceum advenerunt. Arbitror etiam aliquid tibi notitiæ intercessisse cum adolescentis parente, Joanne Calimiro Junio, viro & optimo, & doctissimo, jam ante annos LV. Condiscipulo meo, ac quinquennio post, ut arbitror, etiam tuo. Hæc vel sola poterant amorem nostri Junii conciliare apud te; sed magis illud, quod ingenio, doctrinæque valet; ac modestia est singulari; quæ ubi abest, non genus, aut proavos multum moror, ne doctrinam quidem. Hæc sæpe illi instillare soleo: sæpius etiam facturus,

nisi sic natus, sic educatus, sponte virtutis viam calcaret. Quamobrem sic planè persuasum habeo, si qua in re fortè egeat consilio, aut auxilio tuo, nunquam te ei defore, vel Juniani nominis, vel nostri etiam causâ. Ego te, uxor uxorem, imo uter utrumque vestri plurimum salvere jubemus.

Amstelodami, clō Ibc xlv.  
vi. Id. Septembris.

#### DXXXIII.

Clarissimo Joanni Sadlero.

Londinum.

Vir Eximie,

EGI antehac gratias pro egregio erga me affectu, nec insigni minùs operâ tuâ. Denuo ago, pro meritis inde consecutis, quæ fusè mihi exposuit ornatissimus Hoofdus; nec verbis modò enarravit, sed re ipsa comprobavit. Annumeravit enim mihi per fratrem octoginta libras sterlingicas, quas difficili adeo tempore adhuc, & fortasse desiderarem æternum, absque te fuisset. Atque idem bene sperare jussit de cætero. Tantum sibi in posterum etiam promittebat, de amore tuo, atque innato illo ardore bene faciendi omnibus, præsertim quos literarum studia commendant. Atque idem Hoofdus, apud me deprædicabat affectum summi viri, Domini Oliverii Sancti-Joannis, & cum aliis dotibus magni, tum in studiis nostris nullo inferiori Joanni Seldeno. Equidem vestrorum in me meritorum magnitudinem quoties cogito, tantum esse video, ut si effari coner, cogar obmutescere, neque aliud sim facturus, nisi ut Poetæ loquuntur, *Divinitus ora mihi dentur dena, ac linguæ decem*. Et tamen assidue hæc animo meo obversatur cogitatio; ut aliquo monumento, qualicumque ingenii, ac doctrinæ nostræ id ignorare non sinam nepotes nostros, & qui ab his sequuntur. Neque id mihi operosum erit, qui totus sum in limandis veteribus laboribus; sed hætenus ineditis, numero tam multis, ut contendere possint cum iis, quæ hætenus è nostris lucem viderunt. Interea valde animo ægrè est meo, quòd non desunt, qui homulum hunc, tam amantem florentissimi quondam Regni Britannici instimulant; quasi cum magno Heroe, his terris consilia capeßam de iis, quæ ad statum regni pertineant vestri: Quasi item in Remonstrantium militem castris: liceat dicere illud Lucilianum, *Pergula Piciorum, veri nihil, omnia falsa*. Assidue preces fundo, pro

pro bono Britanniae, paceque Regis & Procerum. Nec verbum ore excidit meo, unde, qui verum amet, culpae possit. Neque unquam sacra Remonstrantium accedo, vel ab annis xxv: sed sola eorum, quorum publica sonat in Templis nostris Doctrina. Quibus cum solis mensam etiam Dominicam frequento. Nec aliter his terris dicet quisquam. Arctaque mihi familiaritas, etiam literarii commercii, cum omnibus penè Theologiae Doctoribus, in Academiis, & Illustribus Gymnasiis Belgicae foederatae. Ut satis dicere non possim, unde Opiniones adversae. Equidem foci, & Praeceptoris Francisci Junii sententiae insisto, vitamque emulor, quantum possum, & liberis ejus exemplum ob oculos ponere non desino. Plura in re fortasse supervacua non addam: ne praeter morem id faciam, qui parvus verborum esse solem. Salutem plurimam dicerem, à Clarissimo Viro, communi amico, Joanni Pellio; sed ut noscere te jam arbitror, is Amstelodamense Gymnasium commutavit Bredano, ubi Philosophiam ac Mathesin docebit. Mallem hic doctissimi viri amicitia frui; nec tamen consilium ejus damnare audeo. Planè enim confido, melius illi istuc fore, favore Illustrissimi Arausionensis Principis, intelligentissimi, quantum Mathesis valeat in re militari.

Amstelodami,  
cl. Id. xvi. xvi.  
Kal. Octob.

Tuus totus,

G. J. Vossius.

#### DXXXIV.

Merico Casaubono, Isaaci Filio,  
G. J. Vossius S. P. D.

Reverende ac Clarissime Vir,

**R**Edeunte ad vos Hoofdio nostro, committendum non putavi, ut sine meis ad te literis abiret, praesertim cum tam multa mihi retulerit de affectu erga me tuo. Equidem semper de eo fui persuasissimus; sed tamen juvat hoc ex illo etiam cognoscere. De rebus meis quid scribam, aut non scribam, ipse vix video. Nam malim laetissima quaeque referre, ut communia gaudia gaudeamus. Nunc pleraque omnia tristitia. Ut de valetudine uxoris perpetuo adversa: deque moribus duorum filiorum, unius Francisci, Jurisconsulti, alterius Matthaei illustrium Hollandiae ac Zelandiae Ordinum Historiographi, ac Praefecti Bibliothecae Amstelodamensis. Prior unicam, alter geminam prolem reliquit. Atque hujus tomus quartus jam excuditur,

quo persequitur res Comitum Jacobae Bavarum: in qua Bavari praesse Hollandiae desierunt. Exinde etenim translatum imperium ad Burgundos, uti inde ad Austriacos. Cum autem volumen hoc constet libris quinque, solum quatuor absolvit Matthaeus, quintus addetur ab unica nunc prole Isaaco J. C. quem fortasse ante quinquennium videris in Anglia. Exinde Gallias, & Italiam triennio lustravit, magno cum studiorum fructu. Vix dicere possim, quam multa optimae notae, haecenus *diversa* attulerit. Quorum alia post alia lucem videbunt. Praetertamen Geographia Ptolomaei, quam cum variis MSS. contulit, & innumeris pene locis castigavit. Fortasse de his antehac quaedam scripsi. Deum rogo, ut propediem ex te laetissima intelligam de rebus Britanniae compositis. Vale, vir eximie, & cum lectissima conjuge, plurimum à me, uxore, ac filio salve.

Amstelodami, cl. Id. xvi.  
xvi. Kal. Octobris.

#### DXXXV.

Cl. Viro D. Marefio. Groningam.

Reverende & Clarissime vir,

**V**aldè capior Theologia tua *ἐλεγχικῇ*, opere docto & laborioso: ut de Nepotis Chronicis judicabat Catullus, videlicet (lubet alterius vatis vericulos *παρρησιαζέεν*)

*Gallis ingenium, Gallis dedit ore disertum  
Sacra Thalia loqui.*

Itaque quantum spissae occupationes sinunt, valdè eo me oblecto: multumque eo nomine debere me tibi fateor, quod muneri miseris, offerendum manu amicæ Hottoni, optimi virorum: spero me propediem posse *ἀντιδωρεν* mittere: sed argumento dispar. O utinam non sic distringerer, ut sacris etiam possem manum addere extremam: quorum notitiā ut longe vincar, haut minus tamen capior fortasse, quam praecari ordinis vestri quisquam. Crede enim mihi, eximie Marefi, vita mihi eo in jucundior, quod sic à melioribus avocer, & valetudine uxoris, & adversis multis, & assiduis undique interpellationibus. Et facile me id puto posse persuadere, qui sine dubio doles, ereptas tibi ab aliis bonas horas, quas adversus communem hostem maluisses impendere. Interea multum gaudeo, non tantum in animo tuo quicquam valuisse molestiarum, ut propterea careremus Elenctica tua Theologia, quae incanis lege-

M m m 2

tur



tur seculis. Affinis mea Junia nunquam desinit mihi prædicare summam tuæ domus humanitatem erga se, & suos. Quo nomine gratias ego, & uxor, habemus quantas possumus. Rogo ut hunc adfectum conserves, præsertim si quid valeas, pro nobis, & optime adolescente Francisco Junio: quem ego penè parentis instar amo: non modo propter magnum avum, focerum, & præceptorem in Hebræis, ac Sacris meum; sed etiam, quia virtutis via strenue grassatur ad honorem. Plurimam salutem Conjux uxori tuæ adscribi petiit. Meo etiam nomine, si grave non erit, salutem dicito duobus Clarissimis Collegis tuis, D. Withmaro, & D. Pafori, quem gaudeo nunc etiam sacrum in ordinem adscitum.

*Amstelodami,*  
clb Idc xlvii.  
viii. Kal. Febr.

*Virtutum tuarum*  
cultor,

G. J. Vossius.

#### DXXXVI.

*Viro Cl. Antonio Vander-Linden,*  
G. J. Vossius.

**H**esterno die convenere me Rabbi Manasses Ben-Israel, & Isaacus Rocamora, natione Lusitanus, religione Judæus. Eorum hic biennio operam medicinæ dedit, illosque in arte vestra progressus fecit, ut confidat se non indignum suprema in hac laureâ. In re tenui constitutus, putabat, ex inclytis Lyceis, illud sibi diligendum, ubi minus avare nobilissimæ artis honori pretium statueretur. Impensè mihi hunc Rocamoranum commendabat Manasses, vir tui amantissimus & in quo, si unam excipias Religionem, nihil requiras. Equidem (quod de paucis, non ejus modo sectæ, sed cæteris etiam hominibus dixero) dignum existimo, quicum vel in tenebris mices. Poscebat ille, ut literularum aliquid ad te exararem, quibus voti sui te facerem certiorum. Nihil Religionem obstare posse arbitror; quandoquidem quo tempore in urbe patria agebas Haroni Amstelodamenti, itidem Judæo, is honos à Leidensibus fuit collatus. Ac memini me ex veteri Collega τὸ μαγεῖον Vossio, audire, plane in hoc negotio, haud in considerationem venire, quæ fidei sunt, sed quæ Medicæ artis; præsertim cum his terris, Judæis etiam concedatur artem eam exercere. Valdè desidero nosse, utrum animus tibi persisteret, de nova editione elegantissimi scriptoris Cornelli

Celli. Equidem nullus dubito, quin tuo beneficio, meliori toga prodire, celliori etiam in loco Celsus licet possit collocari. De Hesychio, quæso autem velle eximio Schotano. Sæpè me ejus commonuit filius; siquidem periculum videtur, ne tam longo tempore, non redeundo unde abierat, inter aves feras incipiat numerari. Id fieri nolin, neque te sponfore tam integro, & viro, & amico, fieri æquum puto. Salutabis eum meo nomine plurimum. Uti & duo apud vos S. Theologiæ columnina.

*Amstelodami,* iv. Kal. April.  
clb Idc xlvii.

#### DXXXVII.

*Eximio & summo Viro, Georgio Calixto,* G. J. Vossius S. P. D.

**R**edit ad vos ornatissimus Duvius; per quem ante biennium accepi tum gratissimas literas tuas, tum doctissimum responsum adversus Moguntinos. Utrum gratias egerim, non possum certò dicere; factum puto. Fortasse tamen distulerim, ubi cognovi te ad Toruniense Colloquium profectum; sed si id minus à me factum, nunc ago; ed justius, quia tua omnia, ut debeo, amo, & æstimo. Nec sanè ex Germania quidquam huc locorum defertur, quo æque capiantur meliores animæ, ac illis ex Academia Julia. Valdè multis dolet, non plus effectum esse, Toruniensi Colloquio; cujus licet culpa imprimis sit penes adversarios, plus tamen sperare licuisset; si ex nostris etiam cæteri eam animi moderationem attulissent, quam tu cum Clarissimo Bergio; sed ferè ita sit, ut quod quisque didicit retineat, sicut claudus pilam. Pauci etiam, quid Ecclesia Catholica sit, sciunt, vel cogitant. Nec facile dixero, quantum mali det Ecclesiæ antiquitatis contemptus. Utinam vero, Serniss. Poloniæ Regis auspiciis instaurari simile colloquium, sed eventu dissimili possit. Sæpius ejus rei spem mihi fecit Nobilis Italus, sed Poloniæ Regi perfamiliaris. A Britannia, ut nunc se res habet, nihil ad hoc negotium auxilii expecto. Vellem hoc tempore, pro munere non uno, ἀντίδοτον mittere potuissim; sed ut spero fiet hoc propediem. Variis enim prælum fervet, partim in humanis, partim etiam divinis. Quando enim ætatem cogito (jam septuagesimum excessi) festinandum mihi video, si quid me vivo cupiam videre lucem. Deum Opt. Max. rogo, ut longam

longam ætatem, ad bene de Ecclesia merendum, largiatur tibi; sed & Clarissimo Horneio, & doctissimo Conringio, quibus si meo nomine salutem impertias plurimam, rem facies gratissimam.

*Amstelodami, clb Idc xlvii.  
iii. Kal. Maias Styl. Greg.*

## DXXXVIII.

*Cl. V. Jac. Gothofredo.*

Amplissime ac summe Vir,

JAM toti sunt anni, ex quo me donasti gratissimo munere, Philostorgium dico; qui me valde delectavit, partim quia magnam adfert lucem historiæ suorum temporum; partim ob ei impenso doctissimos labores tuos. Non parum itaque tibi studia mea debent, nec mea modò, sed aliorum quoque antiquitatis amantium. Hactenus pro opera, ac dono, gratias egi nullas. Præter tot adversa, adferre multa poteram, quæ me fecerint negligentior; sed malo culpam agnoscere, & tardè officium facere, quam nunquam. Nunc verò differre ultra si velim, nullum delicto reperire mantelium possim. Bella adeo se offert scribendi occasio; eunte ad vos, inque Galliam reliquam, foci mei, magni viri Francisci Junii, ex maximo natu filio, Nepote optimo, & doctissimo. Rogo etiam ut ne grave ducas, de manu ejus accipere minutum *ἀντίδοτον*. Videlicet quæ de Arte Poetica, proximè in lucem dedi. Excuduntur præterea, quæ de Baptismo scripsi. Item de universis veterum studiis libri plusculi; & quedam alia quæ non ingrata fore spero. Mirari vero noli, si eodem tempore, plura distineam præla. Malo cum Aristide esse, *ἐν τῇ ἀρετῇ*, quam *ἐν τῇ ἐμύρῳ* sed ista quæ dixi, aliaque multa, multos ante annos ad umbilicum perduxì, solum superest ut edantur. Nec animus est diu ulterius differre. Convalescere enim ætas jubet, cum septuagesimum excefferim. Veniam interim postulo, si non omnia faciunt ad palatum tui similia, quales sanè perpauci. Eò impensius opto, ut me porro ames, & aliquo habeas loco labores nostros. Vale, vir eximie, & maximos viros, Deodatum, & Tronchinum, quos in Batavia ante annos xxvi. cum voluptate vidi, plurimum meo nomine saluta.

*Amstelod. anno  
clb Idc xlvii.  
iv. Id. Sept.*

*Tuus æternum,*

G. J. Vossius.

## DXXXIX.

*Illustrissimo Celsissimoq; Ludovico Duci  
Gelriæ, Comiti Egmondæ & Zut-  
phanix.*

Princeps Celsissime,

SI prius fuerim obstrictus Celsitudini vestræ, quod ea dignum me censuerit, cui aliquid imperaret; certe nunc quam obstrictissimus sum, postquam video prolixam meam voluntatem, atque hanc usque adeo imbecillem, tanta excipi benevolentia, à Celsitudine vestra, non aliter, quam si quod volo, possem, & quod possem jam egissem. Utinam vero sic foret! nec incomparabilis illa humanitas Vestræ Celsitudinis, non ex benignitate tantum, sed etiam merito ex meo provenisset. Quam homulus ego mihi gratularer! Verum cum vires meæ non sustineant hoc oneris, ut exsolvere valeam, quantum vellem, & deberem: gaudeo saltem, quod vir nobilis, Mortimerus, pro solita sua humanitate indicarit Celsitudini Vestræ, utcumque mihi delit facultas, non deesse tamen desiderium, & voluntatem inserviendi Celsitudini Vestræ. Quod vero stemma attinet Celsitudinis Vestræ, summa enitar ope, ut si quis fortasse mortalium Ducale illud genus ignorat, deinceps videat, nulli illud cedere Principum in Orbe Christiano. Quo sine Comitum Egmundanorum seriem ab annis plus millenis, in Originibus suis Batavis, referet filius meus Isaacus. Hoc opus lucem conspiciere posse confido, non multo postquam ad nos reversus erit Mortimerus. Id spero brevi futurum. Puto ope ille, & consilio, non mediocriter nos juvabit. Deus Opt. Max. Celsitudini Vestræ scelericia omnia, & prospera largiatur.

*Amstelod. anno  
clb Idc xlvii. prid.  
Kal. Octob.*

*Celsitudini vestræ  
devotissimus,*

G. J. Vossius.

DXL.

## DXL.

*Celsiff. Principi Ludovico Duci Geldriae  
ac Juliae, Comiti Egmondæ & Zut-  
phaniae.*

Celsissime Princeps,

**S**Pissius video procedere spem, quam de  
reditu paulo celeriori, fecisse mihi visus  
nobilis vir Dom. de Mari-mortuo. Nec am-  
bigō quin sic tulerint res Celsitudinis Vestrae,  
ut ne reverti celerius posset. Dum verò is  
abest, cælator sublimis generis vestri, pris-  
corumque insignium, eò rem perduxit, ut  
nihil, quantum sciam, ultra requiratur, quam  
præsentia ejus viri usque adeò seduli, in Cel-  
situdinis Vestrae negotiis, quorum non alter,  
his terris, ut opinor, intelligentior. Ego  
verò absente eo meticolose rem gero. Opti-  
mè nosti, Egregie Princeps (quem non ego  
magis, ob sublime genus veneror, quam  
proprias dotes, in his, doctrinam raram ex-  
celli stemmatis comitem) quod olim dicebat  
Poeta Hispanus, non hujus temporis, quo tot  
annos cum gente ea bellum gerimus; sed  
ille prisce ævi Bilbilicus vates:

————— *Peccant  
Securæ nimium, sollicitæque manus.*

Itaque operæ illæ, juxta mecum, impensæ  
illius operam desiderant. Nec minus ille vel  
illis, vel mihi utilis fuerit aliis in negotiis sic  
nati Principis. Quod non semel perspexi,  
vel paucas ante hebdomadas, cùm Hagam-  
Comitis excurrissem, atque occasio foret, de  
Celsitudine Vestra colloquendi cum aliquot  
viris in dignitate non exigua constitutis.  
Ages quod pro eximia prudentia expedire ju-  
dicabis. Equidem ut Illustrissimum Ducem  
horum facerem certiore, mei esse officii  
existimavi: qui æternum ero

*Amstelodami,  
clō Idc xlvii.  
prid. Non. No-  
vembris.*

*Celsitudinis vestrae cultor  
devotissimus,*

G. J. Vossius.

## DXLI.

*Cornelio Tollio suo, G. J. Vossius  
S. P. D.*

**D**E laudibus Alexandri Mori multa à va-  
riis intellexi, ut de eruditione ejus du-  
bitare nequeam. Utrùm vero venturus sit,

in has oras, si ad professionem sacram à Pro-  
ceribus vestris sollicitetur, nondum dicere  
possum, sed paucis diebus, vel ego, vel filius,  
super eo rescribet. De Plutarchi mente in  
Sympotiacon, primò gaudeo te laborare.  
Nempe nondum scis mores amantium, nec  
hac ætate multum novisse attinet. Dispar mei  
ratio, qui bis amavi. Non soleo ego mea  
profundere; sed quo tempore amatoribus  
accingebar, cogebar, ne tenacior audirem,  
nunc erga famulos, nunc alios etiam libera-  
lior esse, quam consueveram. Marsupi-  
um mihi vel apertum semper, ad dandum  
aliquid, vel saltem non aliter restrictum,  
quam nodo folii Porraei, scis istiusmodi fo-  
lium, quam tenue ac fragile sit: ut nihil  
referat sitne crumena aperta, an folio ejus-  
modi nodata; sic proverbiale illud dictum  
etiam cepit Coelius Rodiginus lib. XXIX.  
Antiqu. Lect. cap. XVI. Nec sanè aliter Plutar-  
chus capi potest. Hoc abundè discas, ubi tam  
serio rem ages inter Virgines Belgicas, quam  
hactenus fecisti inter Virgines Musas. Nob.  
& Ampliff. Wiinbergio, uti & Clariff. Doct.  
Valkenirio, plurimam à me salutem dicito.

*Amstelod. clō Idc xlvii.  
Non. Novembris.*

## DXLII.

*Summo Viro Joanni Seldeno.  
Londinum.*

Summe Vir, & cui in ipso literarum initio  
sic animo dictante profiteri cogar, pluri-  
mum me debere.

**Q**UI hæc tradet, est is amplissimus Pe-  
trus Grotius, filius Illustrissimi, Regi-  
næ, regnique Sueciæ ad Christianissimum  
Regem Legati, dum viveret, Hugonis Gro-  
tii, mihi à pueritia ejus, ob præclaras animi  
dotes, longè charissimus, nunc Serenissimo  
Principi Bohemico Philippo à Consiliis. Ac  
scio, hoc lubentius conspicias, quod unde-  
cumque maximus parens, te, tuaque omnia,  
cujus ego auritus testis esse possim, semper  
fecerit maximi; etiam postquam avidè hau-  
sisset, quæ eruditè adeo de Mari clauso repo-  
sueras. Nimirum sic animi sunt illorum,  
quod de meliore luto formatos aiunt; ut  
dissentire inter se possint, salvâ amicitia;  
præsertim ubi utrumque stimulantur, patriæ  
commodis. Hoc igitur in Britanniam ten-  
dente, fortasse ob Principis sui negotia; com-  
mittere non potui, quin nuperum animi mei  
foetum, Commentarium videlicet de re Poe-  
tica,



rica, ad te, ut oportuit, transmitterem: Non quasi putarem, tantum tibi ab rebus tuis privatis, longèque minus à maximis Regni negotiis, otii esse, in hoc tempore, ut talibus legendis vacare ullo modo posses; sed quia tam commoda occasione, deesse non deberem officio meo erga illum, cujus erga me beneficia nossem; quæ modò Deus vitam diuturniorem concesserit, ne ingratus unquam posteris videar, publicè studebo proferri. Quomodo animatus porrò etiam me, mea-que tuæ benevolentiae commendo: ac pariter tam benignè erga me affecto, præstantissimo, & adeò benè apud omnes bonos audienti S. Joannio. Atque ad eum quoque literas exarare erat animus; cum ecce magnoperè avocat tristis nuntius, de subito excessu Clariss. Collegæ mei Gasparis Barlæi, contiguus ædibus habitantis: cujus numerosæ familiæ solandæ vix sufficio; sed faciam tamen quod possum.

Scribebam Amstelodami, postr. Kal. Jan. anni hujus cl<sup>o</sup> lxxviii. quem tibi, regnoque universo, scèlicem exopto, uti etiam assiduè Dominum Deum precor.

*Maximarum virtutum tuarum admirator, ac cultor obstrictissimus,*

G. J. Vossius.

#### DXLIII.

*Viro Clarissimo Frederico Spanhemio,  
G. J. Vossius S. P. D.*

D. Rector magnifice,

**Q**uid de aliis fieri cogitem, si mihi ipsi permolestum sit, quod sæpè vel nihil, vel tardè adeo respondeam summis viris? Nec tamen mirabitur quisquam, qui sciat, quantopere, dico singulis prope horis, sed momentis penè singulis interpeller, partim ab indigenis, partim à peregrinis. Accessit nunc in valetudo aliqua; nec dolor exiguus ex obitu Clarissimi Collegæ Barlæi, quæ duo & ipsa hocce quadriduo fecere, ut negligentior viderer. Noli tamen putare, quidquam mihi esse gratius literis tuis. Scio quippe quanto in loco Deuste constituerit; non modo si Batavam Academiam adtendam; sed imprimis si Ecclesiam universam. Atque utinam nec te diutius funebria, nec Salmasium scænebra, vel hisce similia distineant. Hic quoque præclare, uterque de

temporibus nostris meremini; sed satis datum argumento istiusmodi. Magis profutura posteris scio, quæ similia sint à te scriptis dubiis Evangelicis. Quo labore non capior modò; sed satiare me vix possum. Hac non scriberem, nisi accepissem, quia sic erudita tua facundia in Orando placuit, etiam alia à te exposci non valdè dissimilis argumenti. Et sanè sapiunt quos hoc argumentum tangit. Nec enim sciunt, qui tractare illud melius possint; sed enim existimo, alia aliorum vota esse, qui cogitant, sic annos ire hominis occupatissimi, æquiusque esse, ut ne pereant tot præclare in sacris observata, sed ad posteros propagentur. Verùm sermonem hunc abruptam, ne cogar audire illud, quod ipse multis occuper, longè inferioris argumenti, uti de Vitiis sermonis, de re Poetica, & similibus vix cuiquam alteri, quam adolescentiæ profuturis. Fateor, & suram præbeo, nec verbum addo. Venio potius ad Epistolam tuam, quæ de Moro fuit. Equidem putabam de eo non amplius cogitari; sic videbar mihi, non malè colligere ex verbis Cl. Gronovii, qui paucis diebus nobiscum fuit. Ut cumque est, nihil hætenus à me pro eo, vel adversus eum dictum, factumve. Senectus facit, ut quietis sim amantior, quàm ut me implicem negotio, ubi illos video dissentire, quos hætenus non solum amo; sed etiam suspicio. Aduit aliquot ante dies mihi filius Geberhardi Elmenhorstii, Patricii Hamburgensis, viri benè de studiis meriti. Absque dubio videris ejus Apuleium, Gennadium, Arnobium, aliaque. Coluit amicitiam mecum, & quod majoris longe faciendum, cum Josepho Scaligero, Andrea Schotto, Daniele Heintio, Jano Rutgersio, & quo non? Hujus igitur filius Bibliothecam paternam velit divendere: idque potissimum Lugduni, quia nusquam major numerus vacantium Theologiæ, & Philologiæ studiis. Negant id fieri sine Urbicorum Procerum consensu. Interim plurimùm in eo posse, qui Inclytæ sit Academiæ Rector magnificus. Poposcit igitur filius, & hæres unicus Bibliothecæ, ut vellem tribus de eo verbis ad te scribere; sperat non hoc negatum sibi iri, quandoquidem tanta patri amicitia fuisset cum summis Academiæ Leidensis viris. De hoc dicere poterit Cl. Heinsius; cum cujus genero, Ego & ille, de hac ipsa re, pauxillos ante dies sumus collocti. Si quid Heinlii operam in isto posse exstimeretur, dixit Gener se ei scripturum; sed judicabat nihil ultra ad sensum tuum requiri, vel præterquam ut tribus verbis significetur, æquum tibi videri, ut hoc permittatur, ob præclara merita Elmenhorstii, præsertim cum futurum sit, bono studiose juventutis. Continet

tinet enim Bibliotheca illa multos Scriptores præclaros; ut videre est ex Catalogo, quem habet Typographus La Mair. Vale diutissime, atque salve ab eo, qui æternum colet te, ob rarissimam eruditionem, & cæteras virtutes.

*Amstelodami, cId Idc xlviii.*  
xv. Kal. Februarias.

## DXLIV.

*Clarissimo Viro, Isaaco Grutero*  
S. P. D.

**A**Ccepi unas, alterasque à te literas; quibus & tertiae ejusdem ex parte argumenti à Colvio nostro acceperunt. Rescribo tandem, non tam quia sit quod scribam, (soleo autem, quoties nihil certi habeo, quod respondeam, scribendi officium differre) quàm ne te ulterius fatigem, exarandis novis. Miraris fortasse quod dicam, non satis me scire, quid sim scripturus. At qui ita est, causas accipe. Necdum à Proceribus nostris consultatur de alio, in locum defuncti Collegæ Barlæi sufficiendo. Interea non exiguus est eorum numerus, qui id munus deposcant. Et sunt in his, qui jam publicè Philosophiam sint professi, partim in Batavia, partim extra eam. Urbs hæc tres è civibus suis habet Artium ac Philosophiæ Magistros. Nec solet, si domi parem muneri habeat, querere alium foris, nisi forte, is albis, quod dicitur, equis prævertat. Vellem constaret Proceribus, quantum in Philosophia etiam operæ ac temporis collocaris. Nunc à prosa, versaque facundia iis notus es; sed filius meus retulit mihi, quantum etiam laudis promereris, sapientiæ, & prudentiæ studiis. Noli dubitare, quin bona id fide, significaturus sim Consulibus ac Curatoribus. Et tamen in tanto tam multorum ambitu, difficile sit videre, quò maxime sint inclinaturi. Si certiora cognoro, curabo, ut quamprimum de omnibus, ex meis, vel filii literis, ea intelligas. Utinam prodesse tibi in hoc negotio possim; quod non tui modò causâ velim; sed etiam optimi, & cordatissimi Ant. Vivieni, cujus te domesticum esse scribis. Amo eum, & æstimo non tam, quia artificissima inter ejus uxorem, & meam; sed quia non alterum novi, qui cum potius in tenebris micem: ut jam mittam magnam doctriinam, majoremque ejus amorem; qualis in paucos cadit. Salutabis illum, & uxorem lectissimam. Nec diffugies salute impertiri

raræ eruditionis virum, Colvium nostrum, cui nunc solum isthoc dicito; de Barlæi & vita, & obitu, propediem visurum Orationem Corvini J. C. Is enim me ob invaletudinem, ac pariter Collegâ Rufio impedito, in magna auditorum corona parentavit. Vale, Mi Grutere.

*Amstelodami,*  
cId Idc xlviii.  
Kal. Febr.

*Tuus,*  
G. J. Vossius.

## DXLV.

*Clarissimo Viro Ludovico Crocio.*

Clarissime & summe Vir,

**D**IU est quod nihil ad te literarum dedi. Nimirum ingravescit ætas, nec imminuuntur labores, vel privati, vel publici. Præterea invaletudo uxoris, tardiorum in scribendo facit, & saluatorum nimium quantum; foeliciter aliquanto vetus Collega Heinſius, cui hoc anno, licet quadriennio me natu minori, abstinere à publicis auditionibus. Mihi non licet esse tam beato: sed neque postulavi unquam, quia censeo stantem Imperatorem mori oportere. Quare nec sino claudicare munus publicum, nec quæ posteris cudo: In quibus à nobis subsidium peto. Proximè juris publici feci nonnulla de re Poetica, ex quibus libellum de natura, ac constitutione ejus artis nunc mitto, unâ cum opusculo de imitatione, & recitationibus Veterum. De artis præceptis, ad manum minimè erant. Libri de Poetis Græcis ac Latinis, propediem prælo parati erunt. Recusæ etiam viginti disputationes de Baptismo; quas dubitavi, an mitterem; quia pleræque omnes habentur in disputationibus Leidæ susceptis, ac Oxoniâ uno volumine reculis. Mihi nihilominus, quia in his luculentam accessionem videbis. Et si prioribus malis esse contentus, facilè reperies, qui non gravetur loci aliquid in libris suis impertire. De D. Amyraldi cum Clariss. Spanhemio contentione scire te arbitror; uti & illa Mori Genevensis Theologi, cum eodem Spanhemio. Credo jam videris Genevensis Reip. Ecclesiæ, Scholæque testimonia, Moro data adversus Spanhemium: sunt enim in urbe hac excusa. Quæ Amyraldus reposuit Spanhemio, vidi quidem apud amicum; sed in foederata hac Belgica, unicum tantum exemplar exstat, ab authore ipso transmissum. Miraberis postquam

quam videris. Non Spanhemium modò, sed Cl. Rivetum vehementer culpat, ob literas, quas ad amicos scripserat acerbis. Puto alteruter aliquid reponet; sic sæviunt Reformatæ Ecclesiæ Antislites in mutua viscera. Nec tamen pari culpa, in dispari causa. Tuam, Vir Clariss. in respondendo modestiam non possum non utroque pollice comprobare. Vellem hac in re imitarentur exemplum tuum, qui similes tui Theologos tepidos appellant. Equidem & ipse multis partibus malim talibus annumerari, quàm Zelotis quibusdam, qui omnes suam in sententiam jurare volunt, nisi convitiis, & quovis calumniarum genere malint obrui; scilicet hoc est, *σελογοειν*. Mihi perstat animus non degenerare, ab exemplo eorum; qui rectius præverunt; ante omnes socii mei viri nunquam satis laudati. Ac ne putes me solum hîc esse ejus sententiæ, ingenuè dico, magis magisque & Proceres, & Theologos urbis laudari vestræ, qui *ἑστιασθῆ* illa pertæsi, modestè malunt sapere: quod si esset in Britannia, non Iliada malorum, sed *ἁγασθῆ* *ἁγασθῆ* haberemus. Intelligo in urbe Bremenfi esse Cl. Goldasti Bibliothecam. Quod si est, non invitus, mei causa facies, vel amici hominis, qui hoc à me flagitavit, ut puero tradas describendum Manuscriptorum Catalogum, si consequi possis, quo deinde, hîc qui sumus, fiamus participes. Plurimam salutem dicito, Clariss. & amiciss. Doctori Balthazari Willio, item optimo Hermannò Hildebrando. Vale, magne Vir, & amice.

Amstelodami,  
iv. Kal. Maias,  
clò lxxviii.

Tuus ut sum,

G. J. Vossius.

## DXLVI.

*Illustrissimo & Generosissimo Erico Oxenstierna, Comiti in Zudermor, L. B. in Nimitho, Dom. in Fyholm, & Tideun, &c.*

Illustrissime & Generosissime Comes,

**R**Edeunte ad suos Gothardo Wolravio, Clarissimi Loccenii Privigno, officii mei putavi, excellentiam vestram facere certiorum, quomodo in hac ætate senili, non malè valeamus, & porro etiam animus sit, operam dare, ut Ecclesiæ proximus, & Reip. Literariæ. Cujus rei geminos hosce libellos, quos mitto, argumentum esse volo: Unus est de Baptismo; alter autem de constitutione Poeticæ, cui adjeci opusculum, de imitatione, ac recitatione Veterum. Vides

me non cessare. Et brevi spero me posse alia mittere; quibus prælum nunc servet. Omnino plus prope facio, quam possum, quia aliud mihi persuadere vix possum, quàm brevi me à summo Imperatore, vocatum iri in sedes meliores. Quo ut pertingam, in eo totus sum, ut facilius temporis rationem reddam, quod mihi divina bonitas concessit. Nunquam non animo meo, observantur Excellentie Vestræ virtutes, quas miratus sum præfens, nec prædicare unquam desinam. Multum optassem, diutius frui licuisset; sed literæ sunt, quæ absentes faciunt præfentes. Quia igitur pedibus venire ad tam longè distitum non licet, à manibus præsidium petit, ad me quodammodo sistendum; scio qua humanitate es, in bonam partem interpretaberis, hunc adfectum meum erga Excellentiam Tuam: pro qua assidue vota facio, uti & Illustrissimo fratre, regni negotia apud Monasterienses, tanta cum laude tractante, atque imprimis, magno parente vestro; qui & inclytæ antea domui vestræ, & maximè potentissimo Regno, tantum fulgoris, prudentissimis suis consiliis attulit, ut promeritæ ejus laudes titulos omnes exsuperent.

Amstelodami,  
clò lxxviii.  
post. Id. Maias.

Vestræ Excellentie, ac  
toti familie inclytæ  
Oxensterniæ, ad ser-  
vitia omnia paratiss-  
simus,

G. J. Vossius

## DXLVIII.

G. J. Vossius, Samueli Sorberio suo, S. P. D.

**N**EC valetudo, nec occupationes, mi Sorberi, sivere, ut celeris literis tuis responderem. Præterea sperabam, jam aliunde tibi satisfactum esse. Tu tamen urgere non desinis, ut facile intelligam, mei quoque officii esse, ut satisfaciam expectationi tuæ. Præter affectum mutuum hoc requirit amor meus erga avunculum tuum Samuelem Petitem, qui te sic diligit, & cui magnoperè sit obstrictus totus orbis literatus. De *Cynemernis* tamen, & *Trapemernis*, deque *Syphograntis*, & *Trabinoris*, nolim esse sollicitus; quia Morus ipse negat, hæc ex Latina Græcave lingua esse arcessita. Meministi verborum, Lib. 11. *Suspicio eam gentem (Utopiensium) à Græcis originem duxisse, propterea quod sermo illorum, cetera fere Persicus, nonnulla Græci sermonis vestigia servet, in Urbium, ac Magistratuum vocabulis.* Solum igitur Laborabimus de illis, quæ à Græco

N n n

fonte



fonte derivantur, uno alterove excepto, cuius Origo manifestè Orienti debetur. Quale est *Mithra*: sic enim pro *Mythra* apud Mōrum rescribi debet. Deum hoc significari Morus ait. Nempe verò id lingua Persica, qua Sol sic signatur, Hefychio teste. Is verò Persis Deus, vel unicus, vel summus. Quade re Lib. 11. de Theologia Gentili cap. 9.

*Barzanes*, ex parte priori huc etiam pertinet, si, ut arbitror, fuerit ex 𐤁𐤁 *bar*, filius, & 𐤁𐤁, sive *Zāns*, hoc est, Jupiter. Ac *Bar* etiam habes in *Bar-Jesus*, *Actorum* xiii. b. Item *Bar-Jona* & *Barthimeus*, & *Bartholomeus* sive *Bar-Ptolomeus* malis. *Zān* verò pro *Zwō*, idem ac *Zwōs*. Sed pro *Zān* etiam dixere *Zāns*; unde hic Alexandrino Chronico, sive fastis Siculis, dicitur Pater Martis. Quem admodum igitur *Maōs* Phrygiis idem ac *Zeōs*; sic Salentinis *Marzanes*, vel potius *Marzanes*, idem ac *zanes*. *Barzanes* igitur Jovis filius: quod nomen aptè impositum Syphograntorum Principi, quia Reges, Principesque, sunt Jovis progenies, si non naturalis, saltem, ut Alexander Magnus dicebat, adoptiva. Notum est illud Callimachi in hymnis, 'Εκ δὲ Δίος βασιλῆες *Cynemernos* verò, & *Trapemernos*, non esse vocabula Græcis debita, indicant hæc verba Mori: *Primos quosque dies Cynemernos ipsorum lingua, postremos Trapemernos appellant*. Sic enim locus iste legendus non uti reperio in Lovanii editione anni cō 15 lxx. *Primos quosque dies Cynemernos, ipsorum postremo lingua Trapemernos appellant*; sequitur deinde, *quæ vocabula perinde sonant, ac si primifasti & finifasti vocantur*. Poterat aliquis suspicari *Cynemernos* scribendum, quasi esset à *κυνὸς* vocabulo, & *ἡμερὸς*, ut ad caniculares dies respiciatur. Alterum item esse ab eodem *ἡμερὸς*, & vocabulo *πρωῖς*, puta *χειμεριῖς* ut brumalis dies attendatur. Sed cessare hæc commenta debent, quando sic voces forent à Græcis, quod noluit Morus; qui alioqui non apposuisset interpretationem, *primifasti, & finifasti*. Nec sanè explicatio ista convenit Græcanicæ Origini. Neque aliter de Syphogranti & Tranibori nominibus statuendum: quod si ex Græcia essent petita, non Græcis ea vocabulis Morus explicaret. Nunc prius dicit sonare *Phylarchum*, posterius, *Protophylarchum*. Inanis igitur operæ sit, nominum istorum ἔτυμα vel à Græcis arcessere. At contra *Abraxas*, non à Persis, vel Oriente, est; sed planè à Græcis; nempe ex literis Græcis, ex quibus constat numerus ccc lxx. quot dies habet annus absolutus, quot etiam orbis cœlestes esse tradebat Basilides hæresiarcha Alexandrinus, qui sub Adriano Imperatore vixit, seque jactabat Glauciæ esse Discipulum, qui B. Petri, Apostolorum Principis, interpretes fuit. Hic Basilides aiebat, supremum orbem cœlestem, sive

supremam virtutem, ex qua progeniti sunt Dii cæteri, *Abraxas* nuncupari, & hoc nomen dierum ccc lxx. numerum complecti. Ac posterius hoc verissimum esse computatio ostendit; siquidem

A	_____	valet—	1
B	_____		2
P	_____		100
A	_____		1
Σ	_____		60
A	_____		1
Σ	_____		200

Summa 365

Memineret Irenæus Lib. 1. Cap. xxiii. Epiphanius hæresi xxiv. Hieronymus Lib. 1. Comment. in Amos. Augustinus, Theodoretus, & Damascenus, in iis quæ de hæreticorum fabulis ac sectis scripsere. In gemma Fulvii Urfini erat *Αβραξας*; sed sic quoque idem manet numerus, quia solum est literæ ξ & σ trajectio. At apud Morum perperam est *Abraxa*, quia sic ducenti anni desint iustio dierum numero. Nunc cætera persequamur, quæ à Græcis esse res ipsa ostendit. Ordini verò literarum insistant. *Achoriorum* populus Utopiensibus dicitur oppositus. Puto rescribendum *Achororum*, *Αχρεος* enim, *chori* *expers*; & *Αχρεος*, *expers* *χρεος*, sive regionis; sicut igitur *Utopia*, ex *ὕ* & *τοπος*, quia nusquam est, ut Nusquamiam fortasse possis dicere; sic populus iste, quia nulla in regione degit, verè *Αχρεος* nuncupatur. Ac similiter *Ademus* Syphograntarum Princeps, cui nullus *δῆμος*, sive populus. Aliter nempe vocem *ἀδῆμος* cepit Morus, quam Sophocles, quando, teste Hefychio, ei *ἀδῆμος* absens à patria, ut sic *ἐνδῆμος* opponatur. Alaopolitarum par est ratio. Uti nusquam *Utopia*, nusquam populus *Achororum*, nusquam Rex *Ademus*, ita nusquam gens *Alaopolitarum*: quæ vox notat cives ex nullius regionis populo. Est enim conflatum ex *πλῆμ* civis, & *ἀλα*, non quatenus *ἀλα*, idem ac *πελὸς*, sed quatenus est à *πρὸς* & *λαδς* compositum. *Amaurotum* præcipua Utopiensium civitas, interim verò *ἀμαυρὸς* hoc est *obscura*, quippe hæcenus nulli visa, nec videri quita. *Anemonius* Poeta Laureatus, & ob lauream typho inflatus, atque, ut Maro loquitur, linguæ ventosæ; sanè Homero *ἀνεμῶν*, quasi *ἀνεμῶν*, ab *ἀνεμ* *ventus*. Anydrus est flumen, ad quod sita Amauroti urbs. Uti nusquam ea urbs, quæ sic in tenebris delitescit: sic nusquam fluvius *ἀνδρὸς*, sive *aquæ expers*, quæ Græcis *ὕδρ*. Nam quomodo fluvius sit, si aqua sit *expers*? *Butresca* Moro religiosi dicuntur, qui cœlibatum præferant Matrimonio, à *δυσπραξία*, quo cultus significatur religiosus, & *βῆ* *δυσπραξία*, ut in *βέλμ*, *βῆμ*, & similibus. *Butresca* igitur valde religiosi. *Hylodæus* quia mera narrat mendacia, de Utopiensibus, sic dictus quasi

quasi *nugarum peritus*, vel *nugas edocuit*: à *δύω* disco, doceor, & *νύξα*; unde cum *φλυαία* subinde conjungitur, & *νύξων* idem ferè ac *φλυαίων*. *Nephelegetæ*, gens fuisse dicitur pro qua *Utopienſes* bellum geſſerint contra *Alaopolitas*. Malim autem *Nephelegetæ*; & *νεφελογενῆς* autem ex nube geniti, hoc eſt, commentitii æquè ac *Poetarum Centauri*, quos *νεφελογενῆς* & *νεφελογενῆται* dixeris, quia ab *Ixione* ex nube genitidicuntur. Sanè *φύπνιστον* patentem, tùm etiam *ἔργον* ſive *prolem* delignat ut author *Hefychius*. *Phylarchus*, *φύλαρχος* qui & *φύλαρχος*, præſectus tribus. Ut *Protophylarchus* *πρωτοφύλαρχος*, tribubus præſectorum *Princeptis*. *Polyleritæ* ἀπὸ τῆς πολλῶν λήρων, quia *λήρι* ſint ac *nugæ* quæcumque, ſive *Hylodæus*, ſive *Morus* hoc de populo narret. *Tricius Apinnius*, quem *Hylodæus* ſodalem ſuum vocat, non aliud nomen habere debuit, quàm tale. Nam uti ille ab *νύξω* & *φλυαία* dictus, ſic hic à *triciſ* *apiniſque*, hoc eſt, *νύξω* ac *λήριſ* *Martialis* *Apophoretorum* *Epigram.* 1. *ſunt Apinæ triceque, & ſiquid vilius iſtis*. *Zapolitæ*, qui quingentis millibus diſtare ab *Utopienſibus* dicuntur, potiùs *Zapolitæ* vocandi, à *πολίτης* civis & *ζα*, quod in compoſitione augēt: ſicut in *ζαυδῶν*, *ζαυθῶ*, *ζαυθῶ*. Eſt igitur *populus civibus abundans*. Spero me iſtis ſatiſfeciffe petitioni tuæ. Niſi quod fortasſe judicabis, ſubinde quædam feliciter minùs compoſita videri, ſi hoc pacto vocabulo interpretemur. Non diſſiteor; ſed nos non poſſumus præſtare culpam *Mori*: ſanè ne ipſa quidem vox, *Utopiæ* ſatis commodè conſiſta. Dequo ſi ambigis, ſponſorem pro me dabo ſummum virum *Ivonem Villiomarum Are-moricum*, hoc eſt, *Joſephum Scaligerum*, animadverſionum in controverſos *Titii* locos lib. x. cap. ix. ubi ſic ſcribit: *Verbum Utopia, quamquam ab ornato, & docto viro, Anglo conſiſtum, tamen Græcum non eſt. Et qui Utopiam Græcum putant, ii quid ſit Græca componere neſciunt.* Ac memini idem à me dictum olim, in iv. *Oratoriarum partitionum* cap. 1. Poſtremo quærebas, utrum in præſatione *Mori*, cùm dicitur, *Joannes Clemens, puer meus filius, anſamulus* delignetur. Planè famulum cenſeo; ſic enim *Græcorum* exemplo, loqui *Romani* ſolent, etiam antiquiſſimi, quorum eſt, *Marciſor*, pro *Marci* puero, hoc eſt ſervus, ſimiliaque, *Publiſor*, *Caipor*, atque alia de quibus fuſè dixi, *Commentariorum Rhetoricorum* lib. iv. cap. xii. §. iv. ſcribebam ipſis *Kalendis Januariis* ineuntis anni cld *Idc* xliii. quem annum feliciffimum tibi, ſtudiſque tuis exopto. Atque idem precor, tum clariffimo *Riveto*, quod tu per occasionem ei ſignificabis; tum eximio *Petito*, quem meo etiam nomine, ſi quando ſcribas, plurimùm ſalutes rogo. Ipſe id nunc ſacere decreveram, ſed per *Ta-*

bellarium non licebat. Et ſciebam te avidè adeo deſiderare reſponſum noſtrum, ut malis literas ad avunculum diſferri, quàm ut propterea injiceretur mora epiſtolæ ad te noſtræ. Iterum vale.

*Amſtelodami.*

## DLXIX.

*Nobiliffimo Reverendo, & ſummo viro, Joanni Forbeſio, Domino à Corſe, S. Theologiæ Doctori eximio, inque Academia Aberdonienſi, ejuſdem Profeſſori. G. J. Voſſius S. P. D.*

**N**ON dubium eſt quin omnibus, veritatis ac concordiæ amantibus, dolorem adferat maximum, quòd antiquæ tories repullulent hæreſe; quandoque etiam ſuccreſcant novæ, & olim inauditæ, nec minus veteribus illis ſectis veritati adverſæ & paci. Cujus rei cauſam eſſe præcipuam arbitror, quod qui animum adplicant ad legendum *S. Literas*, magnam id partem faciant, vel cum ſtulta ingenii ſui fiducia, vel præjudicio ab iis proſecto, quos per omnia ſequi ſibi propoſuerint, vel ab animo haut aliter eas interpretandi, quàm iis locis, ubi degant, conducibilius videatur, ad conſequendum, vel retinendum mundi bona. Quomodo adſecti parum cogitant, *Scripturas* non eſſe *Scripturas*, quoties alio intelliguntur ſpiritu, quàm ſunt ſcriptæ. Niſi igitur de inſœlici eorum grege eſſe velimus; quemque veritatem magis amare convenit, quàm ſeipſum; ac ante omnia quidem ſcrutandum, quid *Deus* dicat in verbo ſuo: ſed ne perperam illud interpretemur, quando omnes ad errorem ſumus proclives, attendere etiam debemus, non modo quid unus & alter, ſed omnino quid conſtanter docuerit *Eccleſia Dei*. Quantoperè enim repugnat perſpicuitati *Scripturæ*, ſi ita exarata credantur, ut, ab *Apoſtolorum* exceſſu, ne in præcipuis quidem fidei capitibus, ipli eas *Eccleſiarum* doctiſſimi ceperint *Antiſtites*? Quantum item adverſatur bonitati *Dei*, & amorì erga nos, ſi per tot ſecula, ad *Scripturarum* intelligentiam, deſuiſſe ſtatuumus *Spiritum Dei*, viris licet pietate, & ſanctimonia præcellentibus, *Eccleſiæque* ſemper commendatiſſimis, atque eò melioribus, quo *Apoſtolicis* propiores erant temporibus? Nec ignoro, dicta hæc noſtra parùm deſcendere in animos multorum, quia videant etiam ad antiquitatem provocari, in cauſa deploratiſſima. Qui cogitare debebant, niſi iſti hoſpites forent in veterum lectione,

non

non tam futilibus motum iri. Viderent enim bellos hosce provocatores, incassum jactare antiquos, præterquam apud Vetustatis nescios, qualibus seos faciliè sublinere posse sperant. Cæteri autem, qui historia Ecclesiæ sunt exculsi, nullo negotio cernunt opiniones eas, quas frustra venditant pro antiquis, si non heri, vel nuper natæ sint, plurimùm saltem coepisse demum ante duo, tria, vel summùm sex septem secula, vel non multo amplius. Ut obducere illis liceat hoc Optati Milevitani lib. 6. Quæ est ista nova, & stulta sapientia, novitatem quærere in visceribus Vetustatis? Quis verò non fateatur, præscriptione istiusmodi, multum firmari animos nostros, in genuina Scripturæ interpretatione: Validius quoque, munitiusque hæreses refelli? Quare hoc armorum genere, semper pugnatum fuit à S. Patribus: qui præcipuè quidem se tuentur, Scripturæ autoritate; nec tamen prætereunt priorum temporum consensum. Hoc luce clarius est ex iis quæ differunt adversus. Marcionem, Valentinum, & his æquales: item Samosatenum, Arrium, Macedonium; nec minus Pelagium, Nestorium, Eutychem; ut præteream hæreticorum cæteros. Vellem ista adtenderent, qui territi diffuso adeò, ut aiunt, Ecclesiasticæ antiquitatis oceano, propterea, veteres Theologos non legunt; & quia negligunt, nesciunt; & postquam ignorant, aspernantur; ac ne temere contemnere, vel soli nescire videantur, etiam traducendo illos, complurium animos ab iis abalienant. Tanti mali fons, caputque est, otii amor, ac laboris fuga; dum non satis cogitant, certissimum illud Aristotelis effatum in Nicomachiis, artem ac virtutem, versari circa id quod difficilius est. Et tamen difficultatem illam, de qua tantoperè queruntur, multum leniat rectus studiorum ordo, & hoc omni historię innatum, quod delectat, & assidua ingentis boni cogitatio, quod ex historia Ecclesiæ, veterumque Theologorum lectione, ad nos redit; fidem fecerint, vel solius Magnæ Britannię vestræ, vel etiam nostræ, tot Theologi summi: Ante omnes *Χρημάσιον* illud hominis Joannes Juellus Antistes Sarisburiensis. Quis enim è Conciliis, vel Doctoribus (quotquot primis fuere annis sexcentis) non animosius modò, sed doctius quoque, vel felicius impugnavit adversarios? Non defuere quidem, quibus hoc disputandi genus minus probaretur; sed præstantissimi etiam Whittakeri judicio, timidiore hi fuere, quàm necesse erat. Poteram & alios subdere magno numero; semper enim Britannia abundavit Theologis, ut Scripturarum, sic antiquitatis etiam intelligentissimis; sed ut de iis plu-

ribus, brevis instituti non finit. Ad te itaque venio, eximie Forbeli, qui uti habuisti antea, quem sequeris, patrem tuum *† Marxgerium*, Patricium Forbelum, Episcopum Aberdoniensem, virum undequaque doctissimum; ita ipse deinceps, in hoc antiquitatis studio Patriæ præbis, ac cunctis amantibus rectam studiorum viam. Nihil me auribus tuis dare, indicio omnibus erit utraque hæc & Theologica, inquam, & Historica instructio tua, & ille signorum tuorum adpectus, adversus tot infesta Hæreticorum agmina. Quem equidem nescio, utrum comparare velim Phalangi Macedonicæ, an aciei Romanæ; sed huic potius, quando (quod defuisse Phalangi Polybius ostendit) copiis tuis semper erit locus, sic armorum viribus, sic scientia, atque arte instructis, ad nullum non pugna genus. Habet igitur sacrata Musis adoleſcentia, unde melius sapiat, dum videt eos, qui sic avocant ab antiquis, sibi semitam non sapere, licet aliis monstrent viam. Habet quoque media illa, ac constans ætas, quò accendatur deinceps ad studium antiquitatis, si prius neglexit; vel si serum id putet, saltem ab alienis videre oculis adſueſcat, ubi nequit suis. Habent denique etiam, in veteribus Theologis subacti, unde proficiant: Imò si ipsi pariter benè mereri de hoc studio volent, non deerit hinc exemplum, quod scribendo æmulentur: quo ita magis & magis gliscent Historię Ecclesiasticæ honos, ac fructus. Vides ut quod nostrum sit, de laboribus tuis iudicium, non pigitum fuerit memorare; ac confido idem omnes uno ore dicturos, quorum palato antiquitas sapit. Etsi vero nunquam tam feliciter agatur cum Ecclesia Dei, ut etiam boni omnes per omnia conspirent; confido tamen, etiam ex iis qui antea dissenserint, hisce tuis lectionibus, conventuros non paucos; saltem in illis Religionis capitibus, super quibus in sex Conciliis Universalibus, vel Africanis etiam, & Arausionensi olim convenit. In iis autem, quæ non ad fundamentum, sed structuram pertinent, non pacem minus confectet, quàm amplectar veritatem: ut qui sciam non modò, hæresin vitandam, sed etiam schismam: ac propterea licet ubique grata esse veritas debeat, aliter tamen cum fratribus, quàm Hæreticis, esse disputandum. Ultimam verò, Nobilissime ac Clarissime Forbelsi, hac cruda ac viridi senectute, pertexere tibi detur, cætera huius operis, auro magis aurei. Hoc ut contingat, rogamus omnes Dominum Deum; cui Ecclesiæ suæ causâ, curæ fore confidimus, & te & labores tuos.

*Amstelodami, 10. Kal.*

*Sext. 1645.*

*C L A*



CLARORUM VIRORUM  
AD  
VOSSIIUM  
EPISTOLÆ.

I.

*Eximie Indolis Adolescenti, Gerardo  
Vossio, bonis literis operam danti,  
in Collegio Theologico Ordinum Hol-  
landiæ.*

S. in Christo Jesu,

**C**ommemoravit mihi, mi Vossi, filius meus, tua in se officia, & quam jucundè, & amicè secum vivas: fuit id mihi per jucundum auditu; sic sanè decet Coætaneos, & Condiscipulos. Solet hæc jucunda animorum conjunctio in juventute, postea gluten quoddam esse mutui consensûs, etiam in ætate adultiore: facit hoc postea ad alendam concordiam inter eos, qui publicis functionibus, in Ecclesia, & Republica præficiuntur. Conjunctionis hujus simul & consensus, exemplum illustre fuerunt, cum alii, tum vero Basilii, & Gregorius Nazianzenus. Rogo itaq; ut cœptam hanc amicitiam, tam jucundam, & utilem, nunquam deferas, sed in ea constanter perseveres; quantumvis filio sis ætate major, & profectu longè superior. Mone igitur obsecro filium meum, ut ordine discat singularum Artium methodos; præcipuè Grammatices partes singulas sæpe relegat: exerceat se loquendo, & scribendo Latinè, ut congrue loqui, & scribere possit. Non negligat etiam studium Lingua Græcæ & Hebrææ suo tempore. Præcipuè ne abiciat tanquam inutilem & insuavem Librum precum; sed pietatis exercitiis vel præcipuè se oblectet; ita benedicet Deus magis ipsius studiis, & in illa valetudinis imbecillitate, illum confirmabit. Imo si aliud de eo statuisset Deus,

æquiore & promptiore animo emigrabit in vitam meliorem. Si hæc facies, mi Vossi, rem mihi gratissimam præstiteris, & vicissim de te; sicubi possim, benè mereri conabor. Vale, & saluta ex me Edvardum.

*Frankeræ  
11. April.*

*Mart. Lydius.*

II.

*Clarissimo, & eximio Viro, D. Gerardo  
Vossio, Gymnasiarchæ Publico.*

*Dordracum.*

Vir clarissime,

**Q**uam pro ea quam nuper ad me misisti Rhetorica tibi debeam, non aliter intelliges, quam si simul scias quantum omnes illi tibi debent, quorum interest seriò, præstantissimam artem tractare, & semel è plebeis illis naniis abire. Etenim cum ut ubique, ita hic præcipuè, regiam calcaverit viam noster Aristoteles, tamen ut nosti, non juventutem modo, sed plerosque etiam alios, deterrere solet, vel obscuritas viri, vel fatalis illa, maximo ingenio βεβηλοσία, ut paucis ad hæc sacra aditus pateret: quæ à te ita sublata esse video, ut optarim omnes qui formandis adolescentiæ studiis incumbunt, tuam illam Εισαγωγὴν, tanquam προτέλην quædam ἢ μὲν δὲ τὴν Ἀριστοτέλους μυστικὴν, præmittere, & hinc initium sumere. Quod ut seriò à me scribi scias, parvum tibi munusculum mitto: Maximum cum Alcino, Philosopho gravissimo: quorum alter præcipuas quæ apud Platonem sunt quæstiones, divino quodam & suavissimo dicendi genere,

B

exami-

examinat: alter Platonis, Lectorem præparat, & docet. Quam difficile sit in his studiis aliquid præstare, quæ jam prope ignavia quadam nostra sunt sepulta, non ignoras: Multo verò difficillimum est, Latinitate ea donare, quæ simul & scientiam requirunt, & utriusque linguæ non vulgarem peritiam. Certè minus à me præstitum scio, quam optabam: tibi nihilominus & aliis eruditis hominibus, quid de hoc studio nostro videatur seriò expecto. Quare non prætermittes, quin iudicium tuum quamprimum perscribas, & ut amicum decet, candide nobiscum & liberè agas. Vale præstantissime vir, & amicissimum virum Baltazarum Lydium, meis verbis salutabis, cui alterum Exemplar hoc trades; scribere enim ad eum non licebat.

Lugd. Batavor.  
Pridie Kal. Jan.  
c1515 c vi.

*Tui observantissimus,*

Daniel Heinsius.

### III.

Τῷ Θεῷ Δοῦλῳ.

S. P.

**R**everende ac dilecte Dom. Frater, cum ea audacia sim usus, ut Eusebium Scaligeri à te commodato petierim, quod ne recusas quidem sed summa voluntate te facturum promittis, jam cistulam meam transmittito, atq; obtestor promptum illud studium, & egregiam animi tui alacritatem me mirifice exhilarasse, ut quæ mihi sinceri tui in me amoris insigne documentum esse possit. De meo erga te non multa dicam, nisi hoc unum quod duplici nomine eum tibi debeam; cum ob pietatem & eruditionem tuam singularem, tum ob foci tui felicissimæ memoriæ D. D. Fr. Junii, summa in me merita, quorum ego, si unquam obliviscar, nimis fuero ingratus. Doctissimum velim me ne voces, nam honorifico illo nomine me indignissimum esse libenter agnosco; sed doctos & pios, ut decet, amo. Inclusi cistulæ meæ duo Chronica, unum illud est quod ex magno Cl. Viri Jo. Scaligeri volumine contexui, quod mihi quantum assequi possum, ipsius videtur esse: alterum est ipsius Eusebii: ut videas me non segniter libris tuis uti, quibus simulac usus fuero, non ingratus, si Deus volet, remittam. Non possum te celare utrumque à S. Scripturæ veritate, & verè magni Viri, foci tui doctiss. verissimis Observationibus, manifeste desle-

tere in supputatione annorum à distracto Regno Salomonis, usque ad occalum Sedekia & Hierosolymorum excidium: quod profecto non possum non dolenter ferre; nam ab illo summæ eruditionis viro D. Jo. Scaligero certe aliquid expectaveram; illum autem in exiguo illo temporis spatio 21 annorum metachronismo peccare, satis puto liquere, si diligenter consideretur, quomodo Spiritus Sanctus annos Regum, Judæ & Israelis inter se conferat, quod in adjuncta hac nostra Tabella, ductu præceptoris heu quondam nostri, putamus factum: Salvo tamen meliori iudicio, neque hoc arroganter à me dictum existimari velim. Videor mihi inaudisse Scaligerum aliquid scripsisse contra Paræum, quod Scriptum si habeas, velim magno ipsius volumini adjungas. Atque his jubeo te salvere, & gratiam Dom. nostri Jesu Christi tibi totique familiæ precor eo animo quo te amo, mi Frater colende & observande.

Non. Decem.  
An. 1607.

*Totus tuus, ut esse debeo,*

Jac. Florianus.

### IV.

Gerardo Vossio, *Præceptor, & Affini suo*, F. F. F. Junius, S. D.

**N**eræus, quo frater jamdudum familiarissimè utitur, nuper hunc ad me deferens librum, petiit ut negotium sibi à fratre meo impositum perficerem, & hunc ad te deferri curarem: cumque pluribus, num fratri Casimiro dandus esset, percontari vellem, festinanter abiit. Ego cum hæc à fratre, non sine causa, Neræo in mandatis data esse putarem; malui potius confestim hunc ad te mittere, quam morâ meâ damni aliquid inferre. Potuissim quidem, ulterius quid agendum esset inquirere, sed quoniam me in Gallorum, h. e. Interpellatorum familiaritatem, ita facile insinuare nolim, ulterius non processi. Quod si Casimiro mittendus est, nescio quid obstat quominus hinc eum ad se deferri voluerit: Sed fortè quippiam est, quod unâ eademque operâ, ad eum deferri debet. Epistolam hanc clausissem, si animum meum, de scribendo aliquid, quod ad studiorum rationem attinet, non subivisset cogitatio; de qua hæc habe. Nos collegio Græco D. Lonsii nomen dedimus, ex voluntate avunculi Gomari; itaque

## E P I S T O L Æ.

3

que usque ad proximos Caniculares dies, ad Græcas potissimum literas conferemus omne nostrum studium. Hæc ad te scripsi, quod sciam te posse, consilio, aut re juvare me, & velle. Sed de his, quoniam brevi fortè cum matertera ad vos venturus sum, coram plenius agere poterimus. Sororibus si placet, meis verbis salutem plurimam dicito. Vale.

Anno 1608.

Tuus,

Fr. Junius, F.F.

V.

*Viro Clarissimo, Gerardo Joanni Vossio, amicissimam salutem.*

Sollicitum te habent Oratoriæ tuæ scio; & quis neget merito? Sed quidam impediunt, quominus operæ pergant. Et quinam isti quæso? Si ipsi quæis ea cura mandata erat. Bertius decimum octiduum jam octiduum servat; misso qui peteret Typographorum servulo, respondit, differendum esse in adventum tuum, totum hoc negotium. Rectè sanè. Huic mandes, si quid rectè curatum velis. Quid si quædam adventum tuum impediunt, nòne hic etiam editionem Libri tui differendam putabimus? Quid? Isne, qui hætenus voluit videri omnes chartas Oratoriarum solus emendasse, isne jam nihil potest, sine te? Sed ne miremur; non tu primus Doctiss. Vossi, cujus ab illo res negliguntur; fastus hominis aliena spernit, nec fortè divino viro Literata illa amplius curæ. Ad Templum sapientiæ properat, credo, & ob hoc sibi fortè placet, quod tam pulchrè mores sapientis viri exprimat. Ubi eum compello, homo fastuosus quasi me diffat, & ego non dignus, cum illo loqui, qui & convictor, & in amicitiam receptus, viri longè disparis; quem ille fortè non nimium æstimat, imò & laticulas quarit. Sed O quam non passibus æquis incedit! Quid enim Bertius cum Budio, infœlix puer, atq; impar congressus acti illi. Nec illud tantum, sed & pudorem, quis in eo requirat? dùm omnia sibi licere putat, & iis quorum discipulus esse posset, superare cupit. Commodaverat Cl. Badius ei Hermogenem, cum Longino, in octavo editum die quarta (sic enim promiserat) redditurus. Ille tibi dat; cumque ab illo requirerem, D. Vossius habet, inquit, saluta D. Bau-

dium, & simul abit. Ego indigere cum aio: Ille, curabo, ut habeas. Vale. Hæc non dico, quod tu, Chariss. Vossi, cum habeas, non; sed quod ejus non erat, quem post triduum redditurus dixerat, jam tertium mensem, & amplius detinere. Quod si autem Longinum legeris, quæso, ut ubi huc veneris, uti conferas. Etiam rogo te, Doctiss. Vir, ut locos controversos Rob. Titii, à Lydio petas, eosque conferas, ut cum Ivone Viliom. conferre liceret. Post paucos dies perlegero. Vale & nos ama: Salutat te Vir Cl. D. Badius, mihi amore Pater.

Anno Dionys. 1605.  
à Christo nato 1607.

Tuus,

J. Rutgerfius:

VI.

*Viro Clarissimo Gerard. Joan. Vossio; Amiciss. salutem nuntio.*

Nunciatum mihi hodie est, Vir Clarissime, excessisse Josephum Scaligerum. Quo nuntio, ita consternatus sum, ut etiam nunc vix aliud mihi esse videar, quàm ambulans cadaver, & ut cum Mimo dicam, sepulchri similis. Cogita, quid perdidimus amici ejus; tam invidioso enim vocabulo divinus vir suos appellabat. Cogita, quid Academia, quid universa res literaria. Ego, mi Vossi, præ cæteris, casum meum lugeo, quod plus reliquis amisisse videar. Ego Patronum perdidit, & si benè calculum pono, Parentem. Quoties me Filii nomine dignatus est? Quoties, cum publicè literarum Pater esset, etiam privatim meus dici voluit? Dirigebat studia mea, vitam emendabat, monens amicè, quandoque reprehendens, prout medicinam morbus postulabat: ut mihi viderendum sit, ne postquam eum amisi, negligentius vivam. Instabat mihi, successus meos urgebat. Quid quaris? Nihil omittebat, quod in Parente desiderare posses. Et ego vicissim eum cultum singulari patrono præstebam, quo majorem nunquam à me requisivit. Itaque hoc effeci, ut ei gratissimus essem: Quidni ita existimem, quoties animo meo obversantur speciosissimæ voces, *Utinam te genuissem?* Quas & sæpius repetisse amici testari possunt; quibus præsentibus, me ostendere solitus erat, adjecto insuper Encomio satis invidioso, *Ecce quem Posteritas vixisse sciet.* Quid quod etiam supremo judicio suo



me prosecutus est, legata Bibliothecae parte? Quibus verbis, paucis ante obitum diebus, me adlocutus sit, mea interesse puto, ne ignoretur. Sunt hæc, amice, Ego vobis abeo. Scito te Parentem amissurum. Ita enim tibi persuadeas velim, me non minori erga te adfectu vixisse, & victurum porro, quam is cui vitam debes. Et utinam opes mihi concessisset Deus, ut non tam verbis quam re ipsa, ostendere potuissem, quanti te faciam, sed nec fortuna tua id desiderat, nec mea fert. Interim quod solum possum, imaginem vitæ meae relinquo tibi, quam & rectè, & ordine facies, si imiteris, & præmium amicitiae nostræ habiturus es: Partem etiam Bibliotheculae meae habebis, quæ te mei admonebit. Hæc ipsa verba divini senis, ipsa sunt, è quibus ne punctum quidem periisse scias; quibus largissimas lacrymas mihi excussit; quæ etiam nunc oboriuntur. Itaque vale.

Scribebam Lugduni Batavorum mæstissimus, Die XXI. Januarii, qui erat Mercurii, anno tñs Χειρωναίας 1610 c ix. Excessit nocte, quæ hanc diem præcessit, hora circiter iv.

Tuus

Rutgerfius.

#### VII.

Viro Clariss. Gerardo Joan. Vossio,  
S. D.

EN tibi Ταμίλιον tuum, quod honori Nærani feceras: Quod non prius miserim, tute nos excusabis, scio. Nosti enim occupationes meas, & quàm festinandum sit, si ante Calend. Sextil. absolvisse mihi certum sit, ut reverà est. Quadraginta plus minus Oæterniones erunt. Vides, quàm præter opinionem, excreverit Liber. Libello & ἱερωνόμων τῆς τῆς δέας γεγραμῆς, quem Tibi dedicatum imus, subjunctum est glossarium trium circiter foliorum, continens eas dictiones, quæ septuaginta duo usi sunt: Itaque Libellus ille, cui unum Oæternionem destinaveram, duo & dimidium occupabit. Isidoro itidem unum destinaveram, at ille quatuor occupabit. Nam Oæternionem unum replebit Ἑισαγωγικὸν quoddam scriptum, seu Canones quidam, quos dedit nobis Oraculum illud nostrum, Josephus Scaliger, cuius humanitati quæ debeo, candidè in notis promam. Ita celestis illa, ac divina sublimitas, sese ad hæc officia

aliquando demittit. Certè plurimum est, quod à sacro illo ore oracula petere concessum sit, non ambigua ut Phœbi olim, sed talia, quibus obloqui nemo potest. Sed nimium nos abduxit suavis. laudum divini Viri campus. Verbum non amplius addam.

Ὁ σὸς ἔστι δὲ λῆξις τῆς χειρωναίας,

Janus Rutgerfius.

#### VIII.

Viro Clarissimo Gerardo Vossio amicissimam salutem.

Iterum hic sum, mi Domine, cum Scalligero meo. Ita voco; quod ita se vocare apud me non dedignetur. Ad Editionem Libellorum meorum, magnopere hortatur Heros ille, & notata quadam promittit, hætenus propter imperitiam Arabicæ Linguae & Historiæ invisâ. Quid quæris? Hesternâ die veni in ædes Illustrissimi Viri. In Museo erat: itaque disceffi. Hodie ægrè ferre visus est, quod non putaverim quovis tempore aditum mihi patere. Tuus sum, inquit, & volo sic statuas, erisque donec magnus ille Ἀνδραγαθὸς me à statione hac discedere jubeat. Quid non colat, penè adoret dixeram, tantam demissionem in Viro Principe; in Viro, qui mihi numinis instar. Itaque fovebo amorem hunc, quem in celesti illo pectore, in plebeiam animam miramur. Caterum ecce Tyrium ab Heinio tuo, & meo. Rogat ut statim perlegas, & iudicium scribas. Vale.

Tuus,

Janus Rutgerfius.

Rogo ut meâ causâ, D. Lydium adeas, rogésque an Luifino suo carere velit, item Leopardo. Pretium persolvam quodcumque tu cum illo transegeris. Non multum ultrâ duo florenos petet, scio; aut si petat, si tu non nimium esse judicaveris, acquiescam. Vale.

Has literas rogo, ni molestum fiet, ipsi Demestio tradas.

#### IX.

## I X.

*Viro Clarissimo Gerardo Joanni Vossio  
S. P. D. Janus Rutgerius.*

Vir Clarissime,

**P**Harnutum, cujus mentionem, cum istic essem, fecimus, si permutatione pretium non excedente, meum facere potes, velim fiat. Senecam Tragicum, cum amplissimis ipsius Junii manu scriptis commentariis, En tibi. Quod munusculum eo animi candore accipias velim, quo offertur tibi. Vitam *si uangelre* Scaligeri moliri me alias dixi Tibi. Accepi cum Legatis nostris, literas à Cl. Casaubono, in quibus multa à Thuano *tu mdu*, & Puteanis fratribus pollicetur, quæ isthuc spectant. Mittit nobis muneri Suetonium suum longè auctiorem, adjectis, & Beroaldi, Sabellici, Torrentii, & aliorum, commentariis nuper Lut. recusus in folio. Munus magnificum: incompactus enim xi. flor. pretium excedit. Plura non possum, etiamnum atrocissimo, & certissimo trucidati Galliarum Regis nuncio consternatus. Vale Vir Cl. & nos ama.

*Tibi Obligatissimus,*

*xxi. Maii cl. 1600.  
Dionys. scribebam  
Lugd. Batavor.*

Rutgerius.

Josephi Scaligeri omnia Geneva in Folio eduntur, secutura mox eadem formâ Julii. Hic Josephi poemata, itémque Seneca Tragicus, cum castigationibus ejus excuduntur. Nugamenta quædam, quæ nuper fudimus, potius quàm scripsimus, En tibi; non ut legas, sed instituti mei servandi causâ, quo *tu s. pluz* meas Tibi obtrudo.

## X.

*Clarissimo Doctissimoque Viro, D. Gerardo Vossio, Gymnasiarchæ Dor-draceno.*

*Dorcht.*

**C**Larissime Vir, amplexus sum benevolentiam istam in me tuam, quam amicissimis literis tuis, & insuper dono mihi gratissimo, opere nimirum Rhetorico, à te addito, quo me ornandum duxisti, abundè declarasti! Itaque tibi certò persuasum habe, totum me vicif-

sim esse tuum. Nec possim non te amare, propter insignem, quam in opere illo tuo prospicio diligentiam, & elegantem doctrinam; unaque propter pietatem, & virtutem, de quibus ex aliis, qui te norint, audio. Opus tuum legi per intervalla. Video complexum te, eoque quidem methodicè ac perspicuè complexum, omnia illa, quæ ad Rhetoricam artem pertinent. Nec mediocriter me delectat forma sermonis, qua usus es, puri, tersi, ac nitidi, nec diffuentis nimium, nec nimium adstricti. Denique existimo utilem te Operam, hoc labore tuo, te præstitisse studiosæ juventuti, adeoque iis etiam qui docendæ juventuti præsent, atque ideo *evangelre*, te hujus rei gratia, secuturum esse. Amicitia tua mihi erit gratissima; eamque ita culturum me spero, ut nihil habiturus sis, quod quantum ad fidem, ac studium animûmque in amicitia mutuum attinet, culpæ in me possis. Misissim jam *avnduz*, cum his literis pro munere tuo, nisi fidem suam Typographus fefellisset. Oro etiam ut tarditati huic meæ in respondendo, in quam multa, ac varia me causæ, alia post alias, longa serie provenientes conceperint, ignoscas. Affinis tui Casimiri Junii doctissimi Viri amicitia valde mihi jucunda est, non solum propter eruditionem, sed etiam propter candorem & pietatem, aliâque virtutes, quas in eo deprehendo, & propter gratissimam memoriam Clarissimi, ac benè de Ecclesia Dei meriti Patris. Estque mihi dolori, quod non frequentius consuetudine ejus ob occupationes meas penè assiduas uti possim. Vale, Doctissime Vir, & me tuorum in numero habe.

*Groningæ valdè festinanter iv. Cal. Feb.  
ann. MDCX.*

*Tui Obsequentissimus*

Ubbo Emmius.

## X I.

*Insigni & Erudito Viro D. Gerardo Vossio, Dominicus Baudius S. P. D.*

**D**Olui ex animo dolorem tuum, collectum ex obitu lætissimæ conjugis tuæ, sed quoniam hæc acerba calamitas non ex improvîso te oppressit, sed diu jam ante præsagientem id eventurum, nihil in medium adferam unde exulceratæ mentes ad sanitatem revocari possunt. Ea tibi ubertim nascuntur domi-  
Causa

Causa scriptionis impræsentiarum, est ut tuæ fidei deponam horribile secretum de nostro Rutgerio, quem invasit morbus, non, ut ille ait, qui insputari solet, sed qui homines delirantes concinnat. Varia & multiplex est τέτυκται πᾶσι δὴ, quo tentari solent etiam Ἑρώων παιδες. Complura possem commemorare exempla, quorum oculatus testis fui, & si quis diligenter inquirat, nulla gens hornò & annò fecundius exuberat, quam eorum, quibus non est sanum sinciput. Nec illud dico ἡμετέριον, ut natio ex Chrysippi grege, ac porticu, qui suum solum imaginarium sapientem excipiunt è numero stultorum; ceteros insanire, furere, rabere omnes docent. Loquor humane, & communi more vulgi prorsus, μεταχρησάμενος ἀπὸ τοῦ νῦν ἔτι ὁ γεννάδας. Ei rei multa argumenta fidem faciunt, quæ malo auribus tuis, quam chartis credere. Sed nullum præstantius περικύβητον habeo, quam quod me, quem ἐν πάσι τοῖς αἰσθη, imò supra videbatur amare, atque æstimare, ita ludibrio habuerit, ὡς αὐτὸν πρὸς τὴν ἀνθρώπων φύσιν τερνόμενος. Rogarat me ut literas ad avunculum Prætozem mitterem, quibus significarem optimo illi viro, esse ipsi volenti habitare mecum, cum antea, non aliam ob causam profectus esset Dordracum, quam ut apud parentes testaretur, non posse se ulterius durare in meis ædibus. Quamquam id officium officiebat dignitati nostræ; tamen adductus prece ejus, & amore suadente, non invitus eo me dimisi. Ille quasi triumphabundus de mea credulitate, jactitavit apud ceteros convictores, se pulchrè mihi os sublevisse. Jam enim sibi decretum, quid esset facturus, nec hilum profecturas meas literas. Postea cum ex pluribus aliis indiciis compersissem, non judicium, sed morbum esse, & quidem eum qui nisi principiis obveniat, in apertam phrenitidem evadere possit, Hagam me contuli, ut de tota re Dominum Prætozem, certiorum facerem. Ille ut rescivit, me isthuc profectum, palam in mensa prædicat, iter hoc à me susceptum, ut precibus exorarem avunculum, ne contubernio nostro divelleretur. Enimverò non ferendam esse duxi hanc insignitam contumeliam nostri, & postremæ sortis arrogantiam. Ut eram recens ex ira, excepi eum atrocijugio. Ille nihil se de nobis queri, sed uxorem quædam ἀπὸ τῆς de se dixisse, quæ nullo modo animus ejus tolerare posset. Tandem fatigando impetravi, ut diceret objectam sibi fuisse πῦρ ἀνθρώπων ὁ

καὶ μᾶλλον ὅτι ἄνθρωπος ἐστὶν ἀνθρώπων. Re penitus explorata reperi nugas meras; esse nec unquam per somnium in mentem venisse uxori tam monstrosam suspicionem. Per ludum, & jocum irrisit fatuam hominis amationem, qui cognatum suum Franciscum de Wit vocare solet suas delicias, suum corculum, etiam in conspectu aliorum, osculari manum ejus, quæ prorsus ridicula sunt, & eodem tendunt, ut scilicet, evincant eum non esse incolumi capite. Sed manum tollo de tabula, invitus enim hæc scripsi; quæ lapidi dicta esse cupio. Vale, & me ama.

## XII.

*Virtute & Doctrina ornatissimo Viro,  
D. Gerardo Vossio, Præceptori meo  
in perpetuum colendo, S. P. D.*

**A** Quibus beneficium accepimus, in iis vicissim beneficia pro beneficiis referre debemus. Non omnes hoc faciunt, ac ne facere quidem possunt; quorundam enim res ita in arctum coactæ, ut præter animum cupidum hoc præstandi vix aliquid ultra habeant. Nec tamen hi ingrati. Non enim ii tantum ab hoc vitio alieni qui beneficia accepta ad æqualem lancem refundunt, sed & hi qui beneficium agnoscunt, & offerendo non quod meritum creditoris exigit, sed quod fortuna tenuis permittit, plus se debere quam posse ingenuè fatentur. Danda ergo opera sedula iis qui ingratitudinis notam effugere volunt, ut si non prioribus accenseri, saltem in posteriorum numero esse possint. Ego certè hoc studui, dum me gratum T. D. probare annitor, id quod semper facio & debeo. Conscius enim mihi sum, Præceptor Reverende, quantam diligentiam erga me præstitisti in communicatione doctrinæ, & ad virtutem assuefactione, nec me hoc latet quam istis mente recensendis, nedum re ipsa referendis impar sum. Animo igitur reputans mecum gratorum quidem esse gratiam pro gratia referre, proximum autem ab his locum eos qui beneficium agnitum quoquo modo testantur tenere, hæc Theles (ut & priores meas) T. D. in debita gratitudinis signum offerre volui; nec me quo minus hoc auderem deterruit, quod sint exiguæ ut numero, sic opere. Satiùs enim putavi tenuitatem meam in apertum producere, quam in crimen ingratitudinis incurrere. Quocirca



# EPISTOLÆ.

7

ca igitur P. R. audentiore instituto ventis vela commisi, ac Theses Metaphysicas conscripsi, DE PRIMO INCREATO DEO GLORIOSISSIMO: Ut de iis disputantes, aliquid virtutis commodum assequamur. Quod ut multum nobis *propius* adferre adjumenti potest, in confirmanda veritate hujus Articuli DE DEO: ita plurimum ad vaforum hæreticorum panurgiam & fucum detegendum. Videmus enim quantis mendacii strophis C. Vorstius conetur illudere veritati, præsertim cum ausus sit dicere, Deum sua Essentia non esse undiquaque præsentem, argumento hinc ducto, quoniam si Deus esset præsens in cloacis, in locis sordidis, commacularetur ac conspurcatur. O quantam hic hujus Viri videmus ignorantiam ac cecitatem! qui nobis corporeum quendam Deum fingit: Fortassis si Vorstius ipse conjiceretur in aliquo loco sordido aut cloaca, egregiè sane commacularetur, idem etiam verum putat esse de Deo, quia omnipræsens est. Exemplo sit nobis Sol, qui radios suos in omnibus locis spargit, nec tamen conspurcatur. Sed hæc mitto, ne te P. R. (quem scio alius negotiis distractissimum) amplius mover. Unum tantum hoc addo, si mihi vita superstes fuerit, plura & meliora (Deo volente) brevi, per me elaborata dabimus. En igitur P. R. amoris magni parvum *μυῖον*, perpetuum gratissimi subjectissimique animi symbolum:

(*Denec quid grandius ætas*

*Postera, forsque ferat melior*)

Non dubitans quin animo latissimo accipies, exemplo Artaxerxis Persarum Regis, qui (ut scriptum legimus) non tam donum quam donantis animum exosculatus est. Vale P. R. & si quid liberius scripsero, boni consule.

Franeeræ Frisiorum  
Calend. Januar. anno  
dñi 16c xv.

T. D. Observantis.

Francisc. Mantæus.

## XIII.

Clarissimo & Doctissimo Viro, D. Gerhardo Joanni Vossio, Scholæ Dordrechtanæ Reitori meritissimo, S. P.

Non ignorare Te arbitramur, Clarissime & Doctissime Vir, Theologiæ professionem in Schola nostra illustri, ob Doctoris Hermannii Ravenspergeri, ad novam Academiam Gronin-

genslem, discessum, hætenus aliquandiu vacuum, & quasi viduam fuisse. Cum autem à Nobis, quibus Scholæ cura, & administratio, ab illustri Magistratu nostro commissa est, diu multumque de alio Theologiæ Professore vocando deliberatum fuerit: tandem præ aliis, tua persona, ob insignem eruditionem, & solidam orthodoxæ Theologiæ scientiam, quæ partim ex præclaris ingenii tui fœtibus in lucem editis, partim ex aliorum rectè judicantium commendatione, nobis innotuit; digna visa fuit, quam Illustribus, ac Generosissimis Comitibus Bentheimensibus, Dominis nostris Clementissimis, de meliore notâ commendaremus. Quâ etiam re effectum est, ut illustres ipsorum Generositates, ex singulari, quò omnes literatos Viros complectuntur, favore, & amore, in tui ad professionem Theologiæ in Schola nostra vacantem, vocationem clementer consenserint. Itaque ex voluntate prædicti Magistratus nostri, provinciam illam sanctam & honorificam, jam tibi offerimus: utque eam oblatam prompto animo suscipere, & obire non graveris, etiam atque etiam rogamus. Moveat te ad vocationem illam sequendam Dei præpotentis, cujus divina providentia ea procurata est, voluntas, quâ ipse operarios in vineam suam emittere solet. Moveat te illustrium & generosissimorum Comitum Bentheimensium, bona & gratiosa erga te voluntas. Moveat te præclarum & honorificum Senatus nostri de studiis tuis ingenique dotibus judicium, ejusdem humanus, & benevolus in te affectus. Moveat te Scholæ nostræ salus, & incolumitas, quæ sine Theologiæ Professore, diu consistere non potest. Moveat denique te loci hujus salubritas, & amœnitas, annonæque in eo facilitas, cum omnium rerum ad Oeconomiam necessariarum ubertate conjuncta. Quò melius autem Scholæ nostræ statum, aliâsq; loci, & functionis circumstantias coram perspicias, & cognoscas, majorem in modum petimus, ut abjectâ omni morâ & cunctatione, cum præsentē Tabellario, Scholæ nostræ sumptibus ad nos excurrere, aut saltem primo quoque tempore, cum periculum haud exiguum in mora sit, tum ad nos adventum accelerare non graveris. Ita enim, & de stipendio, & de aliis rebus ad professionem Theologicam pertinentibus, commodior sese offeret colloquendi tecum occasio; & ipsis studiosis abiturientibus majora allectamenta, & incitamenta,

incitamenta, ad continuandum in Scholâ nostrâ studii sui Theologici cursum suggererentur. Nos etiam vicissim de te benè mereri studebimus, eâque humanitate & benevolentia te advenientem accipiemus & amplectemur, ut neque itineris suscepti, neque amicæ conversationis nostræ te unquam pœniteat. Bene vale, Vir præstantissime, cum omnibus tuis, quibus celestem juxta, & terrenam à Deo benedictionem animitus precamur.

Steinfurti xv. Febr.  
Juliani, anno à nativitate  
Christo Servat.  
nostro cdo id c xv.

M. Clemens Timplerus  
pro tempore Prorektor,  
nomine totius Collegii  
subscripsit. M. P.

## XIII.

Viro Clarissimo Conrado Vorstio S. P.

**D**iu hætenus, Reverende ac Clarissime Vir, Schola nostra novum Theologiæ Professorem, & quidem diversis in locis quæsit. Sed nondum eundem ex animi sententia invenit & nacta est. Causa hujus rei videtur esse voluntatis in iis qui vocati sint partim inconstantia, partim perversitas; quippe qui vocationes non tam publici commodi, quam privati sui honoris & lucri amplificandi gratiâ appetunt, easdemque oblatas ex prætextu causæ nescio cujus reculant & repudiant. De Vossio, quem Aula nostræ commendasti vocando, jam diu à Senatu nostro deliberatum fuit; sed propter suspiciones quasdam sinistras, quibus à calumniatoribus præter meritum gravatus est, hætenus consensus à reliquis Comitibus Bentheimensibus impetrari non potuit. Nunc autem dissipatis ejusmodi calumniarum nebulis, præter spem & opinionem, Deo ita dirigente, in Vossii vocationem tandem illustris Magistratus noster consensit. Itaque nihil amplius restat, nisi ut is vocationem oblatam prompto animo amplectatur & sequatur, nullâque interpositâ morâ sumptibus Scholæ ad nos Steinfurtum excurrat: ut ita melius coram totum Scholæ statum, singulâque functionis & loci circumstantias, exploret & cognoscat. Quâ in re, rogo nomine Collegarum, ut ipse Scholæ nostræ causam seriò & sedulò agas, bonòq; illi Viro ad capeffendam illam provinciam itérque ad nos instituendum suavisor sis, hortator & instigator. Nisi enim is maturè ante ferias Scholasticas ad nos

venerit, verendum est, ne malevolorum hominum obreftationibus cæterorum illustrium Comitum in vocationem ipsius consensus, intervertatur, ac studiosis Theologiæ, qui hætenus diu Professore magno desiderio exspectârunt, discedendi ex Schola nostra ansa præbeatur. Imprimis verò moneas ipsum ut iter ingressus recto tramite Steinfurtum cum præfenti Tabellario proficiatur, neque vel Bentheimiam vel Schuttorpium se recipiat, antequam generosum nostrum Comitum salutaverit ac compellaverit.

Hoc enim è re Scholæ videtur fore, & ad removenda omnia obstacula appositum. Cætera divinæ providentiæ & tuæ prudentiæ committo. Bene vale, Vir præstantissime, unâ cum uxore & liberis charissimis, quibus salutem plurimam omnes Collegæ & mecum uxor mea animitus dicunt.

Tuus omni studio amicus

Steinfurti xv.  
Febr. Juliani  
anno id c xv.

& Compater,

M. Clemens Timplerus.

## XIV.

Clarissimo Doctissimoque Viro Gerardo Joanni Vossio S. P.

**L**iteræ tuæ, Clarissime & Doctissime Vir, pergratæ nobis fuerunt; tum quod luculentam humani & benevoli tui erga Scholam nostram animi declarationem exprimebant; tum quod tui ad nos adventus spem non vulgarem nobis faciebant. De utroque plurimum nobis gratulamur, tibi que gratias habemus, & agimus maximas. Et quoniam ipse pro tua prudentia intelligis, vocationem illam, quæ nomine illustrium & generosissimorum Comitum Bentheimensium nuper tibi oblata fuit, esse divinam, sanctam & præclaram, eamque jam Scholæ nostræ conditionem esse, ut sine maximo detrimento Theologiæ Professore diutius carere non possit; majorem in modum te per Dei gloriam & Scholæ salutem rogamus & obtestamur, ut nulla amplius morâ interpositâ cum præfenti Tabellario, sumptibus Scholæ iter ad nos instituere, nostròque voto & desiderio satisfacere non graveris. Gratissimus eris nobis omnibus atque exoptatissimus hospes; nihilque nobis erit prius & antiquius, quam ut omnibus modis de te bene mereri studeamus. Bene

Bene vale, Vir præstantissime, cum tuis, & ut viva nos epistola primo quoque die exhilarēs, etiā atque etiā cura.

Steinfurti XVI. *Nomine Senatus Scholastici*  
Martii Juliani  
Anno à nato  
Christo  
c1610cxv.

M. Clemens Timplerus

pro tempore Prorektor  
scripsit & subscripsit.

## XV.

Reverendo & Clarissimo Viro Domino  
Conrado Vorstio SS. Theologiæ Do-  
ctori, & Professori Goudæ, Salutem  
à Deo per Christum Jesum, Serva-  
torem Nostrum.

Extrema scholæ necessitas, Reverende & Clarissime Vir, Amice, & Compater honorande, postulavit, ut denuò tabellarius, unà cum literis Senatus nostri, ad Dn. G. Vossium fuerit mittendus, ejusque ad nos profectio omnibus modis urgenda. Jam enim ut scis, feriæ scholasticæ imminēt, & exigunt, ut novus Lectionum æstivo semestri habendarum Catalogus conficiatur: In quo nisi Theologiæ studiosis futuri Professoris, & Lectionum ab eo habendarum, spes aliqua fuerit facta: Metuendum est, ne omnes hinc discedant, & sic magnam scholæ nostræ cladem inferant. Ut igitur huic malo, quantum fieri potest, occurratur, opus esse judicavimus, ut D. Vossium, ad amplectendam vocationem oblatam, sumumque ad nos adventum accelerandum, amicè hortaremur. Ac ut voti nostri, eò certius & citius, compotes fiamus; majorem in modum petimus, ut ipse pro tua prudentia, scholæ nostræ causam, ut hætenus, ita etiā nunc, diligenter, & fideliter agere non graveris: Nominatim verò procurare, ut Dn. Vossius iter ingressus, directè per Gronaviam, Steinfurtum se recipiat. Quod si etiā is alium quemdam fidum comitem, præter Tabellarium præsentem sibi adjungere voluerit; hoc ipsi liberum relinquimus, & sumptus ei à schola omnes refundentur. De Doctore Gigante in integrum restituendo, nulla amplius spes est. Intellexi enim Generosos nostros Comites, Doctori Freidagio, Medico Ofnaburgensi, hanc conditionem privatim, inscio senatu scholastico, ante aliquot septimanas obtulisse.

Utrum autem eam suscepturus sit, incertum adhuc est: & num è re Scholæ futurum sit, eum qui religione Lutheranus est, & Mathematica non callet, in Professorum ordinem recipere, tibi judicandum relinquo. Quod si Dn. Freidagius, vocationem oblatam recusaverit; equidem eam Doctori potius Neuhufio, tametsi is quoque in Mathematicis non sit exercitatus, quam alii ignoto præsertim Calvinistæ rigidiori offerri cuperem. Sed neque ego, neque quisquam ex senatu nostro, quicquam operæ ad promotionem illam procurandam conferre possumus: cum Aulam Comitum Bentheimensium, minus faventem habeat. Doctor Gigas Monasterium suæ praxis medicæ sedem, & Officinam elegit. Quam ibi fortunam expecturus sit, tempus docebit. Doctor Martenus Electori Brandenburgico operam suam addixit. Quæ vero ipsius sit conditio, & quo in loco, ignoro. Quamprimum ad me scripserit, dabo operam, ut petitioni tuæ satisfaciatur. Uxor mea adhuc infirmæ & dubiæ est valetudinis. Spero tamen Deum, tandem mei, & meorum misertum, ipsi firmioris sanitatis usuram concessurum esse. De novis nihil certi habeo: nisi quod de bello, passim varii, & tristes rumores sparguntur. Benè, & foeliciter vale, vir præstantissime, unà cum uxore, & Liberis charissimis: quibus omnes Collegæ mei, necnon Uxor mea, salutem plurimam adscribunt.

Steinfurti xvi. Mar-  
tii Juliani Anno à  
nato Christo c1610cxv.

Tuæ Reverendæ dig-  
nitatis studiosissimus,

M. Clemens Tim-  
plerus Compater:

## XVI.

Clarissimo doctissimoque Viro Ger. Joanni  
Vossio S. P.

HAbes hic alterum Tabellarium, vir clarissime, ab illustri Schola Steinfurtensi ad te missum, ut eò te deducat, si modo animus tibi est locum saltem videre, & Spartæ, quæ offertur honestissima, rationem omnem, cum annexo fructu, coram cognoscere. Ut videas, quanto tui desiderio illic flagrent, literas amici unius atque alterius, ad me datas, tibi legendas mitto; eâ lege, ut per hunc hominem retromittas, nec mihi fraudi esse permittas, tam fidenter & apertè tecum

C

hac



hæc talia communicasse. Nisi ex aliorum relatu quadantenus te nossem, non sic agerem. Tuæ prudentiæ erit, ne hoc quidem aperire, nisi fidissimis tuis, quidquam ad te scripseris. Nam siue vocationem illam complexurus es, siue omisurus, è tua re non minus quam mea fore videtur, ne vulgo hujus aliquid innotescat. Inaudiui aliquid de alia vocatione Leidenfi, jam aut delata tibi, aut saltem destinata. Hanc, si Steinfurtenfi præferes, quod facturum te suspicor, officii tui fuerit aperte mentem tuam nobis exponere; ut alibi sibi mature prospiciant (quod ægre jam fiet) qui priores te vocarunt. Si coram tecum agere mihi daretur, tuque fidere sermoni meo velles, fortè ut priores istos sequereris, tibi persuaderem. Nunc Deo, & tibi soli, rem committendam puto; amanter interim te rogans, ut saltem iter illuc tuum, quo vocaris, dirigere non graveris, & præsens cum presentibus Comitibus & Professoribus, de negotio toto tractare. Sic enim plenius statuere tecum poteris, utro in loco fructuosius Domino Jesu Christo, & Ecclesiæ ejus servitutum tu speres. Deus tibi salutare consilium adspiret, & eventum largiatur suo nomini gloriosum, quem veri boni rebus aliis omnibus auferre debeat, & soleat. Vale, Vir Clarissime, hæcenus quoad faciem ignote, deinceps melius, si placet, & in Domino & in facie noscende. Cras sub vesperam responsum tuum expecto.

Goudæ Prædie Calendas  
Aprilis, Anni 1615.

Tuus in Christo

Conr. Vorstius

Doct̃or.

## XVII.

Doct̃issimo Viro Ger. Joanni Vossio.

Ita est, ut scribis, Vir clarissime & doct̃issime, In utramque partem rationes non leves occurrunt, quæ in hoc ad Theologicam professionem vocationis negotio animum tuum impensè dubium & perplexum reddunt. At quoniam in literis tuis postremis non omnem plane tui ad nos adventus spem nobis adimere, sed plusculum duntaxat ad deliberandum temporis poscere videris: nostrarum partium esse duximus, non illico de vocationis illius divinæ successu desperare: sed duce Dei providentia ex parte nostra omnia tentare & agere, quæ tum ad te permovendum,

tum ad schola nostræ utilitatem promovendam conducere videntur. Quam ob causam etiam Clarissimum Virum Dn.M. Georgium Brinckhofium Logicæ Professore & Pædagogerarcham, Collegam nostrum honorandum ad te ablegare voluimus; ut coram tecum de omnibus rebus ad hanc causam scitu necessariis fusè & distinctè colloquatur, omnesque tum itineris ineundi, tum vocationis amplectendæ difficultates, quantum fieri potest, removere studeat. Ei igitur ut perinde, ac toti Senatui Scholastico, in omnibus fidem habere, ipsiusque rationibus locum dare velis, magnopere rogamus: Deum interim præpotentem vocis seris & piis invocamus, ut ipse totum hoc negotium ad sui nominis gloriam, ad Scholæ nostræ incrementum, tuamque ac tuorum omnium utilitatem ac salutem dirigere dignetur. Cujus divinæ providentiæ ac tutelæ, te quoque, Vir excellentissime, unâ cum tuis plurimum commendamus.

Steinfurci iv. Nonas  
Aprilis Juliani Anno  
no Χριστογῶνίας  
cld lccxv.

M. Clemens Timplerus

Prorector

Nomine totius Collegii

scripsit & subscripsit.

## XVIII.

Clarissimo, Doct̃issimoque Viro, D. Magistro Gerardo Vossio, Illust. Ord. Collegii Theologici Regenti dignissimo.

Scripsi Tibi, R. D. Compater, ante abitum meum in Walacriam, unâ cum literis publicis, quas pro Guilielmo Nicolai procuravi; simulque interrogavi, an non sufficeret, ratione muneris mei publici, chirographo proprio polliceri, sumptuum restitutionem, si filius non perseveret in studio Theologiæ: an vero publico Notarii instrumento sit opus, quale pro Nicolaide nostro misi; de quo adhuc responsum tuum expecto, ut ad feriarum istarum finem, filium meum ad vos mitam. Quamquam enim ex Walacria rediens, rumusculos quosdam subaudiui, de te sparsos, ex inconsiderato quorundam zelo: Illis tamen minimè moveor, quo minùs filium meum, fidei, ac disciplinæ tuæ committere cupiam. Et tamen pro ingenuâ, & sincerâ inter nos amicitia non potui, quin te eorum, quæ de te sparguntur certiore redderem. Sunt inter studiosos (ut ab aliis intellexi) qui dicant

dicant se tecum contulisse, de hodiernis controversiis, teque variis argumentis propugnasse sententiam, de Electione conditionali, gratiaque universali: quin & scripto quodam, quod jam in studiosorum manus pervenerit, explicuisse te sententiam tuam; Et levirum tuum D. Junium, hoc de te apertè testari inter studiosos, quàm magis tibi arrideat, sententia Remonstrantium, quàm nostra. Hæc tibi R. D. Compater, indicare volui, non quod hujusmodi rumoribus fidem adhibeam, (novi enim quam sint præcipitia his temporibus quorundam judicia, quam virulentæ quorundam linguæ, quam inconsideratus zelus) sed ut tanto magis caveas, ne ullam talibus calumniis, & pravis de te judiciis, occasionem præbeas, neque de his rebus conferas, nisi cum iis quos nosti eo pollere judicio, & ea eruditione præditos, ut mentem, ac sententiam tuam, rectè assequi possint; Et si quid sit, in quo tibi videantur Doctores Orthodoxi non satis accuratè tetigisse, aut explicuisse veritatem, de eo judicium tuum suspendas; donec assiduâ, & diligenti S. Scripturæ perscrutatione, affectus fueris ipsam Spiritus Sancti mentem.

Multa enim sunt in quibus, Viri etiam doctissimi, non satis attendentes phrasibus S. Scripturæ, & plusculum tribuentes Antiquitati & Autoritati Patrum, qui post Apostolorum tempora vixerunt; facile à puritate illa sermonis Apostolici defleant, & aberrant. Quod Ego quidem non ita te monitum velim; quali dissidam industriæ tuæ, in studio veritatis constanti, & indefesso: sed ut videas, quam sim honoris tui, & existimationis apud omnes bonos, & pios studiosus. Vale mi R. D. Compater, & me tui amantissimum, mutuo amore prosequi, ne unquam desine, meamque hanc scriptionem, ut ex sincero pectore profectam, æqui bonique consule. Salutem adscribo uxori tuæ. Salutat etiam vos mea, & intra paucas hebdomadas, filium isthuc deductura, vos spero, salutabit coram.

Datum Dordr. Id.  
Aug. 1615.

Tuus tuique Observan-  
tissimus,

J. Becius.

## XIX.

*Clarissimo, doctrinâ & virtute Præstantissimo, Dn. Gerhardo Vossio Illustris. Ordin. Regenti dignissimo.*

Leydam.

S. P.

**B**Enè & laudabiliter agis, Vir Clarissime, quod non tantum amicitia inter nos, recens contractæ cultor es constans; sed etiam scholæ nostræ fautor adeo benevolus, ut propensam tuam voluntatem, ardensque studium, de ea benè merendi, signis non obcuris, sed luculentis declarare, & testari pergas. Commendasti mihi, & senatui nostro scholastico, D. M. Winandum Rutgersium, ut Philosophum, ita Theologum notæ non vulgaris. Illa commendatio apud illustres, & generosos Comites Bentheimenses Dominos nostros clementissimos, tantum ponderis habuit; ut nullus dubitem, si modò rogatu senatus nostri, primò quoque tempore, Steinfurtum, Scholæ nostræ visendæ causâ venire voluerit: quin unanimis suffragiis, professionem Theologicam, ei sint oblaturi. Ut autem ipse promptum sese præbeat ad vocationem, & iter istiusmodi suscipiendum: post Deum à cujus providentia omnia pendent, tuâ nobis operâ, & suadâ opus est. Nec dubito, cum ad scholæ nostræ negotium promovendum, ultrò tuum studium obtuleris; quin pro tua prudentia, omnia diligenter, & fideliter sis facturus: Utque id facias meo, & senatus totius nomine, etiam atque etiam peto. Ita ad priora tua Officia, magnum, & multum adjicies, & totam Scholam nostram, tibi devincies. De nova conditione, quam Leydæ consecutus es, animitus tibi gratulor, Deique benedictionem precor. Ita enim futurum spero, ut studiis tuis major campus, ad promovenda Ecclesiæ, & Reipublicæ Literariæ commoda aperiatur.

Benè salve, & Vale Vir præstantissime, cum uxore, & Liberis carissimis, & me amare perge.

Steinfurti xxi. Julii,  
Juliani An. M. xxi.  
viii. c. l. c. xv.

Tuus omni studio,

M. Clemens Timplerus.

## XX.

FFF. Junius *Clarissimo Viro D. Gerardo Joanni Vossio, Affini conjunctissimo, precatur multijugas Domini benedictiones.*

**F**Ama malum, &c. habent hoc omnes diffensiones, eodem linguas quo animos succo perfundunt: singuli ita ut sunt animati loquuntur. Ad nos hic crebriores quàm optamus sinistri rumores, de Bataviæ vestræ turbulento statu deferuntur: Nos etsi aures nonnunquam demus, fidem non semper damus; quò imprudentiæ notam evitemus. Interim esset pectoris ferrei, hac communi Ecclesiarum nostrarum calamitate non tangi, securè quietum, quasi è speculâ, procellosos Christianæ Reipublicæ motus inspectare, & non quantum fieri potest, votis saltem & suspiriis, naufragium facientibus succurrere: Loquor ex sententia rumorum, qui indies ad nos transvolant, hi enim tales sunt, ac si res vestræ deploratæ omninò jacerent, & medicæ manus opem admittere amplius non possent: Unde enim in conciso, & penitus comminuto corpore, medicinam quis facere incipiat? Graviter vulnerata, corpori tamen annexa membra, remedium expectant, non autem à reliquo corpore avulsa. Mœremus & omninò vix consolabili dolore angimur, cum hæc & his ipsis alia magis tristitia auditione accipimus: Ego ad hanc rem nihil præter suspiria, & ardentes ad Deum preces afferre possum; Tu cum aliis divini Numinis sacrosanctam Majestatem timentibus viris communicato consilio, periculum facere potes, an ulla per Dei gratiam, restorationis spes, integra relicta sit. Optat hoc mecum D. Teelinghius, cujus hac de re literas vides. Pietas viri non eget de integro me præcone; adhuc probè meministi, quid de ipso, non exigua pietatis, eruditionis, & apud vos non minoris autoritatis vir tibi retulerit. Crede tantum ex pio pectore, non nisi sancta, & sana consilia proficisci posse; fidem scio in candore, & candorem in pietate non requires: proinde tutò, cum per otium licebit, rescribe; Omnem infidæ futilitatis suspicionem vera pietas tollit. En prior, ad communicanda Consilia provocaris. Deum Opt. Max. precor, ut vobis per spiritum suum adsit, quo Ecclesiæ ipsius prodesse possitis, & uno animo, unâ operâ, in uniendis distractis

partibus versari. Saluta sororem mei amantissimam, cum tota vestra familia, & valetudinem tuam cura diligenter.

Middelb. Anno 1615.  
20. Octob.

Nihil hîc quod aut te, aut muneris tui administrationem tangat, inaudivi; non est itaque quod te turbent hæc, quæ de sinistris rumoribus scripsi. Omnia enim quæ ad nos hic deferuntur, generalia admodum sunt, & incertissima.

*Tibi multis nominibus  
devotissimus,*  
FFF. Junius.

## XXI.

**S**Alus plurima, Reverende D. Regens Vossii. Quod serius ad te libros tuos mitto, factum diutina mea ab urbe absentia; uxor à matre avellenda erat & odi muliebres lacrymas; satis rarò rident qui Ministris nubunt; cum peregre sunt, putant majorem sibi licentiam permissam; unde hoc habeant nisi ex natura non video. Nunc Dei beneficio rediit, sed non sine ploratu. Mitto quoque indicem quorundam librorum Pontificiorum, addito pretio singulorum, & simul indicem quorundam, qui à me desiderantur, ita forte absentes mutationem poterimus instituire. Si quos ex iis mihi permutare volueris, exige alios è meis. Collega iterum abest, itaque cogor me præparare concionibus & visitandis agris. Tu Vir optime vale, & nos ut facis ama.

Veteraquino 14.  
Octobris 1616.

*Tuus tibi addictissimus,*

J. Lydius.

Cistæ huic meos vicissim includere poteris, & alios quos permutare voles. Rupertus de divino officio est inter opera Ruperti. Gorionis, dum Amsterodami fui vidi exemplar Parisium, sed sum mea sorte contentus. Ritus Moscovitarum literis Moscoviticis emi, sed carius quàm putaveram; nam expendi florenos 71. mihi Theodorecti Dialogos Romæ editos pro iis velis remittere, licebit tibi reservare, si abnuis, remitte librum meum Muscoviticum, cum reliquis meis quos expecto. Buceriana mea habes omnia, nihil reservo.

XXII.



## XXII.

*Salus plurima, Clarissime D. Regens  
Vossi. Recte dixit Poeta;  
Contrabe ventis nimium secundis,  
Turgida vela.*

**N**auta meus bene potus, quia hujus versus ignarus fuit, discedentem me non parum turbavit; vix Leiderdorpum venimus, cum navis prope everfa, tantum hausit aquæ, ut vix terram contigerimus, madidus igitur magnam viæ partem confeci pedibus; hæc Actus primi Scena prima. Tota nocte in diversorio me sub dio cubante potavit, hora tertia matutina iter confecimus declinantes pro frigore terram per omnes casus. Hæc ut rideas, scribo. Die Martis forte, crapula laborans de nulla re minus quam de professione Leydenfi cogitavit heroicus Nauta, nunc accurrit testudo, significans sibi propositum cras novam instituere volitationem, utinam melioribus avibus. Mitto ad te libros tuos, addidi Valerium Maximum & Catullum Scaligeri pro D. Barlaeo. Lyturgica Græca sunt Johannis Oorlars, cui eas addixi pro Dione; rogo uti D. Johanni Pythio illas ipsi curandas tradas. Discedens properante Nauta sub stragulo lecti in quo dormieram, reliqui librum quendam à D. Baudio scriptum, si placet unà cum reliquis illum mittito, non est meus, sed commodato accepi ab alio, & nondum plene inspexi. Uxorem tuam, D. Meurhium & Commensales tuos peramanter meo nomine salutabis. Raptim. 4. Nov. 1616. Utinam huc veniens damnum tuum refarcias.

*Tui studiosissimus,*

Johannes Lydius.

## XXIII.

*Ornatissimo, Doctissimoque Viro, D. Gerhardo Vossio, Col. Hollandici, quod Leide est Regenti solertissimo.  
Leidam.*

*S. P. in Christo,*

**S**criptum tuum, Ornatissime Vossi, tibi ita petenti cum gratiarum actione remitto: fecissem citius, nisi excipere prius quædam in usum privatim maluissem. Da igitur veniam cunctationi; Citra adulationem, dico scriptum hoc tuum ejusmodi

videri, quod unicum sufficiat convellendis iis omnibus, quos D. Walæus, reliquique levis armaturæ succenturiati milites, contra summi Magistratus in Ecclesiasticis, imperium hætenus, in aciem producere sunt ausi: Ad me quod attinet, tantum abest, ut quod autumas, ad umbilicum, opus meum perduxerim, ut jam à multis mensibus non inspexerim, quæ commentari occiperam. Causas quæ variæ sunt, jam non explico. Possem tamen brevi temporis spatio, rem expedire juvante Deo, si is qui fuit, animi esset ardor; Et per occupationes innumeras, quæ tantum non enecant me, quin & per hæc turbas, ac procellas, quæ animum de statione sua identidem dejiciunt, liceret. Audio etiam Magnificum Dominum Grotium, accuratissimum de hoc argumento scriptum jam parasse: postquam loqui velle, est semet ludibrio exponere. Vix tamen abstinere, quin denuo me operi accingam, id si utile fore Reipublicæ Christianæ mihi persuadere queam. Fortè & meâ interest, ne penitus elinguis sim, tanto cum strepitu undique impetitus. At curta nimis mihi suppellex est. Hæreo, an pergere, an vero figere arma debeam. Si quis, cujus magni facio judicium, properarit, facili momento, animum dubium impulerit. Tu imprimis, Vir doctissime, quem quanti faciam, quoque amore, tacito quamvis, complector, & Veneror, novit ille qui omnia. Huic te tuaque studia, Collegio cui præis imprimis, ex animo commendo. Salveat plurimum à me conjux lectissima.

*Hagæ 10. Januarii 1617.*

*Tui studiosissimus.*

J. Wtenbogaert.

## XXIV.

A. Schottus, Ger. Vossio *zalsen.*

**E**quidem tibi me devinctum esse, atque obstrictum, Doctissime Vossi, dum spirabo ingenue profitear, indiesque agnoscam, tuo me in ære esse, duplici nomine; cum quod Rhetoricis tuis, tam accuratè conscriptis, nihil ut Neotericum viderim hætenus melius (nihil hic gratiæ tribuo, aut auribus, sed ut debeo, candidè, sensa mentis enuntio) donaris, inaurato libello, & quidem sponte tua; tum quod eadem benignitate, animique pii inductione Basilii M. codicem calamo exaratum, veteremque, utendum miseris perlibenter,

ter, cum jam Latinam interpretationem recensuissem, denuo tamen ἀσκητῇ illa contuli diligenter, à Capite ad calcem: Etsi ordinem sæpè mutatum in Basilienfi observassem, cujus & paginas, codici tuo (quem cum ingenti gratiarum actione, restituo, ac remitto) ad oram adscripsi; bonâ, ut spero, tuâ veniâ; Lutetiæ Græco-latina adornant editionem; Nos ἀπυργῆσαι juvabimus, ne frustrâ susceptus à me labor videatur. Codex enim perantiquus est, & probæ notæ: debeo itaque vobis, quod committere licuit, cum Cornarii Basilienfi ultima: Tibi quod ultro concesseris homini nihil tale speranti: & Rutgerio, qui index, & fautor fuit; Gevartio etiam, quia attulit, amico, debeo. Si quid aliud sacrum, (vide quid mihi summam) in tua dilitescit Bibliotheca, vel Amicorum, quæso nobiscum communica. Sum enim in Patribus Græcis, Latinisque recensendis totus, ut hanc decet atatem, vitæque institutum. Grilli Alexandrini ἀνέκδοτα sub prælo sunt Nutiano, hoc est ἐκφραστῆς λ'. κ' γλαφυροῦ in Pentateuchum, sed ut lentum est omne id operarum negotium in Græcis, proximis nondum apparebunt nundinis. Quod in Rhetoricis Pet. Nunnesii, mihi quondam in Hiberia familiaris, (ut & Phrynichi Eclogas Atticorum verborum Augustæ editas, mihi duxerit inscribendas) librum laudes, ut hominis doctissimi, & de Hermogenis subtili methodo, ante Sturmium, benemeriti, scito me illius habere omnia, etiam Philosophica, ut erat etiam Philosophus excellens, græcèque doctissimus, ex ultima editione, quæ quidem typis sunt edita: si legere placet mittam, atque utinam isthic, si scholis visa sunt utilia, Typographum istic quoque reperiant, tua commendatione. Hoc te scire volebam, in eamque deferre visum qualemcumque Opellam. Vale in Dom. nosque amare, ac juvare ne desine.

Antuerpiæ, Idibus Febr. cIo Ioc xvii. quem vobis annum decurrere opto, scilicet. Strenæ vicem adjeci fasciculo Observationum nostrarum juvenilium exemplar, ut si vacat, nugas nostras, quas aliquid esse, putare videris, recenscas, doceasque. Ἐβρίστη πάλιν.

## XXV.

Andr. Schottus, Ger. Vossio V.C. χαίρειν.

**T**UÆ mihi gratæ, Doctissime Vossi, signis amoris, ac benevolentia plenius. Perge amabo, nos amare mutuo, & literas provehere bonas, quæ & bonos efficiant, humanitatisque plenos. Sed Etymologicum tuum, cujus mihi spem fecit, imo salivam commovit Gevartius noster, fac, si nos, si te ipse amas, brevi editum videamus; ut nihil nos Fungerus, nihil nos Christianus Becmannus posthac moveat. Tua cupidissimis amplectar ulnis, quando tuis Rhetoricis legendis mirè sum affectus. Colonienfes operæ Bibliothecam illam Patrum, auctiorem parant extrudere, nostram in cæteris implorant opem; ut Antonius Hiera multa expectet à nobis, multa efflagitet. Misi jam quædam, ad Pontium Paulinum, ad Sulpitium Severum, ad Eucherium Lugdun. Episc. & alios. In Vigilio Tridentino Episc. scire avebam, è tua Bibliotheca instructissima; an Simleri editio plura, libro V. adversus Eutychem habeat, quam Georgii Cassandri, Colonienfis editio; Nam in Parisiensi operum Cassandri editione, quaternio accessit è membranarum Codicis Bibliothecæ Petri Pithoei. Nam Lipsiensis hæc editio, nescio quo anno vulgata, aucta est, à Cassandriana; hanc rursus Pithoei codex amplificat, libro extremo quinto, contra Eutychem, ut dixi. Similia si quæ observata, suggeres nobis, per mihi gratum, reique feceris literariæ. Inspiciat noster Gevartius, pace tua, Simleri Editio, an melior, an locupletior. Hoc si est, liceat bona venia vestra, mihi conferre, ut & Gelasium ibidem contra Eutychem, quem non esse Pontif. Maximum, sed potius Gelasium Cyzicenum tradit Bellarm. Catalog. Eccles. Scriptorum. Cap. 494, & 495. In Cyprianum si quid suppetit, suppedita. Nam in Tertullianum laborat Jo. Lud. de la Cerda noster; cujus vasta, sed erudita vidisti in Maronem Commentaria. Chrysostomi, aut Basilii græcè scripta, quæ penes te sunt, fac ἐμυγγεῖν habere possim. Vide quam frontem perfricui? Tibi tuæque imputabis humanitati, quando ita largus es, imo & beneficus. Homo nimirum homini, bene merendo existit Deus. Vale, in Domino, nosque ama.

Antuerpiæ, Idibus Aprilis cIo Ioc xvii.

Clarissimo

## XXVI.

*Clarissimo Eruditissimo Viro, D. Gerhardo Vossio, Professore Eloquentiæ.*  
Leidam.

Vir Clarissime,

Quamquam ferè invitus, illis scribam quos de facie non novi; tamen facile hunc animum expugnavit amicissimus Holstenius noster; qui adeo mihi deprædicavit virtutes, & insignem eruditionem tuam, ut me amplius tenere non potuerim, quin cultum, & amorem offerrem. Unde & proximè tibi jussi dari Proclum nostrum: nunc V. Sidonium offero, quem velut obidem, nunc nuper natæ, sed nunquam intermoriaturæ amicitia accipe, meque ama, quod mutuo facies.

Hamburgi XVII.  
Kal Jul. Juliani  
c10 Iocxvii.

*Tui Studiofissimus,*

Geverhart. Elmenhortius.

## XXVII.

*Clarissimo, & Eruditissimo Viro D. Gerhardo Johanni Vossio Proregenti Colleg. Illust. Ordinum Holland.*  
Leidam.

Vir Clarissime,

Gratias tibi habeo summas, pro The-sibus, & Libris communicatis, quos cum contulero, illibatos tibi reddam. Si improbum non esset, peterem Catalogum instructissimæ tuæ Bibliothecæ describendum; traderes Holstenio nostro. Scio complures libros inter tuos esse, qui nobis, in nostris laboribus, mirum in modum poterunt prodesse. Syntagma Wouverianum Holstenio transmissi, ut tibi traderet. Cum primùm Epistolæ prodierint, statim etiam ad te ibunt, ut & omnia nostra, quæ deinceps provulgabimus. Propter acerbissimos calculi dolores, quos hætenus sustineo, nondum mihi licuit Theses tuas pervolutare; Inspeci tamen obiter, unum aut alterum locum, de quo proximè sententiam meam tibi aperiam; jam enim planè non vacat. Salve Vir Doctissime, & nobis responde.

VIII Cal. Octobris  
c10 Iocxvii.

*Tui Studiofissimus,*

Geverhart. Elmenhorstius.

## XXVIII.

*Clarissimo & Eruditissimo Viro D. Gerhardo Johanni Vossio Proregenti Collegii Leidenfis.*  
Leidam.

Vir Clarissime,

Literas tuas rectè Holstenius noster transmisit, ex quibus, & eruditionem tuam, & benevolum erga me animum, oppidò lubens perspexi; cui in omnibus semper, & ubique paria faciam, quod fide germana tibi dico, spondeoque. De Indice, grata sunt, quæ promittis. Desidero autem syllabum Theologicorum Librorum, cui studio, post Apuleii absolutam editionem, me totum mancipabo; perducamque multa (ut confido) profutura, veteri, & veræ Dei Ecclesiæ, cuius germanum alumnum, me in omnibus meis scriptis profiteor. Theses tuæ eruditionis diligenter perlegi, & reperi in illis multa, non publici saporis. Rogo, quicquid deinceps provulgas, mecum communicare, ut velis: Ego rursum omnia minima, maxima ad te inter primos mittam. Jam in exordio novæ hujus conjunctionis, tibi exhibeo, Mansueti Episcopi Mediolanensis Epistolam elegantem, quam Jacobo Marci excudendam dabis. Is enim omnia nostra in se recepit, nec spero tibi indecorum erit, quod non de facie plebea, sed Senatorii seminis homo, publico aliquo scripto, appellare te valuerit. Salve Vir Eruditissime, & me amare perge, quod mutuo facies. xv. Kal. Decembris Juliani c10 Iocxvii. Si adhuc extat penes te Exemplar Oratoriarum Institut. velim id committas Adolescenti probo Joanni Loccenio, qui apud Jacobum Marci habitat, qui porro id rectè curabit. Illi poteris etiam tutò literas tuas concedere. Iterum salve, & crebriter me appella.

*Tui Studiofissimus,*

Geverhart. Elmenhorstius.

*Clarissimo,*



## XXIX.

*Clarissimo, & Eruditissimo Viro D. Gerardo Johanni Vossio Proregenti Collegii Leidenfis.*

*Leidam.*

Vir Clarissime,

**E**X quo Mansuetum tibi misi, nullas à te accepi, ut nec à Collegis tuis, Viris magnis, D. Heinsio, & Meursio: quæ causa sit, expiscari non possum. Illud demiror, cur Adolefcens, qui apud Jacobum Marci habitat, multaque, & magna mihi debet, tam obstinatè taceat. Si non est grave, statim aliquem ex tuis mitte rogatum, num Collybum, quem ante mensum ipsi, per Gasparem Vinckesfort, Civem Amsterodamensem misi, rectè accepit. Et quid de Theodulpho, Mansueto, & Gebete sperare debeam. Magno beneficio me adicies, si postremam, ut vocant, probam semper inspexeris. Transmisi pronuper Nobiliss. D. Grotio, catalogum scriptorum Photinianorum, qui nùm ipsi redditus, adhuc ignoro. Valde amo, & æstimo hominem, ob ingenii excellentis admirandas dotes, quibus eruditissimos, hac ætate, facilè vincit. Poteris in occasione, hunc nostrum animum illi apperire. Clarissimus Rutgerfius, ante xiv. dies apud nos fuit, & negotiis ex animi sententia confectis, Hassniam profectus est, quod D. Heinsio nunciabis. Apuleii Philosophica Jacobo Marci eis paucos dies committam; modò à te, vel Clariss. tuis Collegis, impetrare possim, ut onus corrigendi in vos suscipere velitis. Quod non tam mei, quam Apuleii causa, vos studiosè facturos, omnino mihi persuadeo. De Indice Theologicorum tuorum Librorum, iterum tibi aurem vello: si me amas, effice, ut prima occasione illum habeam. Nihil enim gratius mihi facere poteris. Salve, mi amicissime Vossii, & si nos non planè contemnitis, responde properè.

*Hamburgi VI.  
Kal. Februarii  
Juliani Anno  
c1o 10c xviii.*

*Tui studiosissimus,*

Geverhart. Elmenhorstius.

Ante VI. Septimanas misi eruditiss. virorum, D. Heinsio, sermonem Libanii, οὗτος τὸς ἐῖς τὴν παλαιάν αὐτὸν ἀποκρίσας, inscriptum magno Rutgerfio scire percipio, quid & illi factum. Iterum salve Vir præstantissime, & responde.

## XXX.

*Clarissimo Doctissimoque Viro D. Joanni Gerardo Vossio, Proregenti Collegii Illust. Ordin. Hollandiæ.*

*Leidam.*

**Q**UId hoc causæ esse dicam, Johannes Gerardo Vossii, inter doctissimos humanissime, inter humanissimos doctissime, quod nos adeo obstinatè contemnitis, nec responsionis honore dignos putas. Longè aliud nobis promittebant candidissimi mores tui, & summus noster in te amor, quem abundè tibi in meis testatum feci probavique. Rogo te, aperias nobis, paucis saltè verbis, causam tam pertinacis silentii, ne omnino de tuo affectu incerti, nobis planè persuadeamus, te hunc procum haud magni facere. Salve vir optime, præstantissimoque harum portitori, comem, & benevolum, te exhibe. Nihil mihi gratius facere poteris:

Apuleium Scaligeri, cum Catalogo librorum tuorum Theologicorum avide expecto. Nam Holsteinius nullum mihi misit: si inceperint operæ Apuleium nostrum, rogo curæ eum tibi habeas. Sicuti Loccenio injunxi. Iterum salve, & responde si potes.

*Hamburgi VIII.  
Kalend. Aprilis,  
Juliani Anno  
c1o 10c xviii.*

*Tui observantissimus,*

Geverhart. Elmenhor.

## XXXI.

*L. Berchemius D. Gerardo Vossio S. P. D.*

**N**E amicitiae jura violasse videar, vir ornatissime, has mei amoris testes literas exaravi: tua enim benevolentia & non mediocria in me collata beneficia, arcto admodum amoris vinculo, me tibi obstrinxere, quorum facile oblivisci non humani ingenii gratique animi esse judico.

Quid in hac Synodo Nationali hic Dordrechtii habita actum sit satis superque ab aliis intellexisse te non dubito; hoc unicuique tacere nequeo, me maxima admiratione affectum esse, cum Remonstrantes Summarum Potestatum tam exiguum rationem habere viderem, tantæque pertinaciæ (quam Constantiam vocare nefas putarem) sese, Illustrum Ordinum decretis opponere. Conscientiam suam scio præ-

prætexunt: faxit Deus non aliud quid lateat. Præterea quod in corona tot illustrium Theologorum Remonstrantes sibi soli sapere viderentur, illorumque iudicium tanquam adversariorum contemnerent, absurdum mihi valde videbatur, præsertim cum illi viri sanctissimi sanctissimo juramento se obstrinxissent, se ex conscientia & veritate iudicatos: Verum quam candide & blande cum Remonstrantibus hic actum sit, ex Actis Synodi brevi vulgandis evidenter patebit. Vir ornatissime, quem, Deo teste, amo, te illorum sententiam nunquam subscripsisse scio, tēque in eo sapius coram malevolis defendi, imo quod Synodi hujus Decretis & Canonibus assensus sis, non dubito, & Remonstrantes (quod fortasse durius) suffragio tot præstantium Theologorum suffultus tanquam Hæreticos damnaturus sis. Quod si à te Viro tanto fiat, multum commodi & patriæ & bonæ causæ accessurum nemo dubitat. Nomini quoque ac famæ consulens provinciam quam nactus es cum honore tueri poteris. Varii hic Dordrechtii rumores sparsi sunt, de Collegii regimine immutando atque alio Regente substituendo, verum vanos illos esse, illis que nullam fidem adhibendam, ex D. Rocho Vanden Honaert satis intellexi; cujus verba hic subtexam: *Quid de D. Vossio futurum sit adhuc incertum est: quod ad me attinet ego boni viri causæ favero; utinam Librum de Historia Pelagiana nunquam scripsisset! tum aliquid boni in ejus causa adhuc sperandum fuisset, sed jam timeo.* Hæc tibi Vir optime, scribere volui si fortè tibi prodesse possent. Vale & me ama.

Die octava  
Junii, 1618.

Tuus ex animo,

Ludovicus Van Berchen.

# XXXII.

Viro Clarissimo Hugoni Grotio, S. P.

Amplissime Domine,

**L**iteras tuas Prid. Cal. Sept. datas rectè accepi, cum doctissimi Vossii defensione.\* Gratulor Tibi toto pectore oblatum tam industrium, tam præclarum libri tui propugnatorem. Et quando Labor tuus Ecclesiæ

\* Vossii Responsionem intellige ad iudicium Hermannii Ravenspergi de Hugonis Grotii libro contra Socinum.

Christi exantlatus pro merita gratia importuni hominis morsus sentit, gratulor tibi causam tuam à tam præstanti Patrono susceptam. Dolendum eo infantiæ apud vos deventum, ut præ factionum studio tam protervè irruant quidam, ut nihil pensi habentes quid dicant, saltem odium suum & suspensiones promant; & quid speremus porro tranquillitatis, si talibus ingeniis frena relaxantur? Certe summâ cum voluptate & fructu legi doctissimi Viri lucubrationem, & jam istum quoque in maximis Viris pono.

Quod autem etiam publicè constare voluisti, quid ego sentirem, agnosco affectum vestrum, & quamvis sciam meo calculo nihil vobis accedere posse, gratum tamen mihi est, me inter bonos recensitum, quamvis mea scriptio tam rudis & inconcinna fuerit, ut lucem adspicere non meruerit. Consideratio autem horum qui sacra apud vos tractant, facit, ut vix quidquam sperare possim de Synodo quæ apud vos indicta, ad quam Ordines etiam Electorem nostrum ut suos Theologos eo mittat invitârunt; ad eam rem designati David Pareus, Abrahamus Scultetus, Henricus Altingus & Paulus Tossanus, quamvis incertum an Pareus septuagenarius valetudinis ratione, tam incommoda anni tempestate, iter illud sustinere possit.

Bohemica turbæ, ut in universum Imperium redundant, verendum est. Cæsar magnas copias contrahit, & tamen à moderatioribus consiliis se non alienum ostendit, quâ in re nostrum habet & Saxoniæ adstipulatores, qui etiam laborem nullum defugiunt, ut Religio salva Bohemis ac libertas conservetur, & Cæsari sua auctoritas maneat.

Quod spem facis editionis scripti tui elaboratissimi De summarum potestatum circa sacra imperio, longè mihi gratissimum. Vellem & animum adjiceres ad historiam tuam promendam, quam negare diutius non debes nobis ac posteritati. De Thuani Historia nuncio tibi, reliqua jam sub prælo esse. Ut autem invidiam vitent Curatores, ita institutum est, quasi Exemplar ab auctore in Germaniam missum, jam promeretur. Excuditur autem Genevæ; qui locus tamen ob invidiam vitandam dissimulabitur.

Vale, decus nostrum.

Heidelbergæ, 25.  
Julii, 1618.

T. D. omni Studio  
& Amore

G. M. Lingelshemius.

D

XXXIII.

## XXXIII.

Clarissimo Viro Domino Gerhardo Johanni Vossio, S.

Leidam.

**I**Tâne verò cum cura legisti, ea quæ de Grotii libro scripsi? Utinam non cum præjudicio, aut animo calumniandi; cuius non pauca signa ubique paginarum, in tuo isto diffamatorio centunculo, deprehendere fuit; sanè cognovi plus satis, quid censeas de meo scripto, tametsi nullus monuisses. Cognovisses itidem tu, quid ego de tuo, ad meum scriptum responso, statuam, atque adeo quid de eo statuam, & judicent item alii viri clarissimi, & multo doctissimi, si mihi licuisset, per mandatum Senatus nostri Academici, cujus auctoritas pro eo, ac par est, mihi meritò sacro-sancta est, tuo responso respondere. Aliquatenus tamen intellexisti, ex Epistola mea, viro cuidam reverendo, & longè præstantissimo inscripta, typisque Batavici, ejusdem studio descripta. Cæterum tuas literas ad quas jam nunc respondeo, tum demum accepi, cum eas è Patria mea redux, ubi per ipsas decem & amplius septimanas egeram, in mensa positas viderem. Nempe ut scribis singuli aliquid videmus, nemo omnia, neque ego tuas videre potui, cum alibi essem. Vale.

Groningæ ad xx.  
Decembris anno  
cdo 10 c xviii.

T. S. S.

Herman. Ravensperg.

## XXXIV.

Clarissimo & Doctissimo Viro, Gerhar-  
do Johanni Vossio, Proregenti Col-  
legii Illust. Ord. Hollandiæ.

Leidam.

Vir Clarissime,

**A**Gellium manu illustris Scaligeri præ-  
nobilem, rectè transmisit nobis Hol-  
steinius. Utinam etiam ejus Apuleium,  
per te habere potuissem? Fuisset ea res  
nobis longè gratissima. Audio eum in  
margine Novi Testamenti multa notasse,  
quod si forsitan in tua Bibliotheca, oro  
ne illud nobis invidias. Asellus noster,  
in asinum longè tardiorum incidit, quem  
& repeti jussi, non sine indignatione, ut  
forsan ex Luca nostro intellexisti: si D.  
Corvinus demum revenit; velim cum eo  
agas, ut Acta Concilii Chalcedonensis

prælo subiciat; quæ sanè magno cum  
labore, ex antiquissimis membranis, locis  
indefinitis emendavimus. Poterimus & alia  
infinita in Patribus præstare; modo bo-  
num Typographum nacti sumus. Nam  
nostris sumptibus omnia edere, non est è  
re nostra; qui artem distrahendi omninò  
ignoramus. De Grotii infortunio, jam  
inaudieram: Et angebar intimè, hominis  
causa, quem propter eruditionem in-  
signem, semper amavi, & æstimavi. Vo-  
veo & animo, ut crucem suam ferat pa-  
tienter, donec Deus eum liberet, à squal-  
lore & sordibus non boni carceris. Sy-  
nodum finitam jam intelleximus, ex D.  
Heinsio: fac omnia ejus acta à te cogno-  
scam; præsertim quo loco jam res tuæ  
sint. Subtimeo enim ne incendium  
Barnefeldianum te etiam afflaverit. Sal-  
ve amicissime Vossii, & nobis de omnibus  
rescribe. Gratius mihi nihil facere poteris.

Hamburgi xxvi.  
Jun. cdo 10 c xix.

Geverhart. Elmenhorstius.

## XXXV.

Clarissimo & Doctissimo Viro Gerhar-  
do Johanni Vossio Regenti Collegii  
Leidenfis.

Leidam.

Vir Clarissime,

**D**E Orosii apologia, quæ observasti  
vera sunt, impensèque nobis pla-  
cent. Cum librum istum publicabo, Lecto-  
rem ejus rei admonebo, quod non fiet,  
sine honore nominis tui.

† Ormestam, quis nobis con-  
finxerit ignoro. Est verbum  
novitium, & planè nugato-  
rium, ex Vincentii speculo  
& recentibus editionibus,  
perperam Orosio ad fictum,  
quod optimi avi MSS. Pa-  
lat. Leid. & Lipsi. neutiquam agnoscunt.  
Magnas igitur nugas egerunt, qui recen-  
ter id nobis iverunt obtrusum. Commen-  
taria in Cantica Canticorum, non sunt  
Orosii, sed Honorii, sicuti jam dudum  
Patri Schotto scripsi. De Grotio, beasti me  
lato nuntio: hic enim omnia sæva de eo  
narrabant: fac catastrophem totius tragæ-  
diæ plenè à te cognoscam; ità tandem  
sine metu ero. Oratorias tuas rectè cura-  
vit amicissimus Holsteinius, quas scito  
gratissimas nobis fuisse. Non sperno bene-  
ficia quæ offers ex bibliotheca tua, com-  
pellaboque

† Orchestam  
legis sagacis  
vir ingenii  
Fr. Juretus ad  
Symmachum  
p. 73. Cui non  
invitus accedo.



pellaboque Holsteinium, ut hac in re, mihi manum accommodet. Cum Jacobo Marci pronuper, de nova Apuleii editione adornanda agere cœpi. Nosti illum correctorem eruditum non alere, unde & pro amicitia nostra rogatum te volo, cum opus inceperit, ut tum postremam probam studiosè perlustrare velis, ne mendosè liber prodeat, quem ærumnoso labore, cum multis MSS. contuli. Si qua in re tibi vicissim inservire potero, faciam id perlubenter. Domi. Mortuum tamdiu inibi fuisse, nec mihi literas misisse, pro certo signo animi, planè à me alienati, accipio. Monebis hominem, nisi planè memoriam nostri effuderit, antequam in Angliam proficiscatur, de omnibus rebus me scitiorum faciat. Erit id mihi pergratum. Hæc ex recenti laniena nephritidis subæger, ad amicissimas tuas amahuenti meo dictavi; ut etiam scires me, vel in mediis tormentis, memoriam tui sanctè habere. Salve, Vir amicissime, & nos ama mutuiter.

Hamburgi, xiii. Kal.  
Febr. Juliani, An.  
c15 l5c xix.

Tui studiosissimus,

Geverh. Elmenhorstius.

### XXXVI.

A. Schottus Ger. Vossio *tu* *degr'ley*.

Lugd. Batav.

Vides, doctissime Vossi, hunc rerum statum, mirari ut desinas, cur ego, in scribendo tam sim meticulosus, ne meæ literæ obfint potius amicis, quam solatio sint in turbis. Age, de literis utrique caris duntaxat disseram. Quum fratris mei Gualtheri Nepos, ad nos inviseret, seque Lugdunum cogitare, ubi juri civili det operam, affirmaret; hoc mihi sumpsi cohortante, ut ad te tribus agerem verbis. Quod in Græcis, quibus excellis, nec ego abhorreo, professionem mediteris, ad domesticas collegii curas, & Rhetorica illa tua, dono mihi misisti, narro tibi esse penes me notas aliquot in Theonis Sophistæ *αεσυμδουαλα*. Nollem mihi, posterisque perirent; quæque in antiquis notavi Rhetoribus; si spes est, istic Typographum reperiri posse, tua accedente lima, depromam, & in tuum sinum depenam; quæ habeo etiam Rhetorica, & Philosophica Nunnesii, etfi Valentini, hoc est Hiberi, vel Celtiberi potius. Fac

me de re omni certiorum, per Franc. qui has reddet, mittetque fratri meo Col. Literas.

Et quia sacra & tractas, & abundas antiquis. Amabo si magnam illam Patrum Bibliothecam Coloniae nuper editam, inspexisti, & habes quod sit addere operæ pretium, & Catholicum; scito Appendicem adornari ab Ant. Hierat qui nos visit. Quare si quid desideres, addique jubeas significa. Latent, fateor, multa adhuc abdita, in bibliothecis, quæ lucem avent videre atque existere. Cætera quæ de me meisque cognoscere lubet, Franc. hic noster, qui has reddet, narrabit. Reditum è Gallia Gasparis Gevartii expectamus, editis jam electorum Libris IV. nondum tamen rediit. Vale in Domino.

Antuerpiæ festo Sancti Augustini Mansueti Mediol. Episc. Epist. de fidei professione, tibi inscriptam nuper ab Elmenhorstio libens accepi, & adjungam in Append. magnæ Bibliothecæ.

### XXXVII.

Clarissimo, & Doctissimo Viro Gerhardo, Johanni Vossio, Pro-regenti Collegii Leidenfis.

Leidam.

Vir Clarissime,

R Emittere tibi per optimum Holsteinium nostrum, Arnobium, & Scioppii suspectas lectiones; remissurus etiam brevi, Euthymium cum Orosio tuo. Si interim poteris carere Scaligeri Agellio, rem gratam mihi feceris, si prædicto juveni cum commendaris. Pol anxie expecto, quo loco res tuæ sint; ut & magnorum virorum, quos fortunæ tristioris tempestas, conturbavit graviter. Si non est grave, velim de omnibus, & Politicis, & Theologicis rebus studiosè perscribas. Erit id mihi pergratum. Salve, amicissime Vossi, & nos amare perge.

Hamburgi xiii.  
Maii Juliani A.C.  
c15 l5c xix.

Tui,

Elmenhorstius.

## XXXVIII.

*Clarissimo, & ornatissimo Viro D. Gerhardo Johanni Vossio, Regenti Collegii Leidenfis.*

*Leidam.*

Vir Clarissime,

**B**Enè sit optimo, & amicissimo Holsteinio nostro, qui te velut longi silentii somno indormientem amica sua ammonitione excitavit, atque in viam officii, & scriptionis iterum reduxit. Ego licet sapius acerbissimis calculi doloribus oppressus sim, nunquam tamen committam, ut operam meam hac in parte desiderari queas. Librum tuum de diffidiis Pelagianistarum (quoniam incompactus erat) inspicere necdum potui. Puto eruditissimum esse, ut omnia tua, quæ frementibus invidis, cum aliis tuis limatissimi iudicii scriptis canescent, sæculis innumera bilibus. Massiliensis nostri Patrocinium, rectè suscepisti. Male-feriati homines, optimum virum pessimè onerant hæresi insana, de qua ne per somnium quidem unquam cogitavit. Baronius putat initio eum infectum fuisse labe hâc impurâ, sed postmodum ad sanio rem mentem relapsum seriò errorem emendasse; cui ego hætenus assensum accommodare non potui. De Mansueto, nihil est quod nobis gratias agas, multò potius ego tibi, eas referre debeo, qui nitidè ejus editionem

*\* Hug. Grotii.* procurasti. Viri \* Magnifici casum gravem vehementer doleo. Tribus ante capturam (ô utinam injustam!) diebus, humanissimas ab eo accepi literas, cum tua disputatione eruditissima notarum nugonis Ravenspergeri, qui stultè magno viro obvertit cornua. Earum literarum copiam tibi misi, ut videas, quàm de nobis rectè sentiat vir excellentissimus. Lubens ei scriberem, si scirem meas tutò ad illum pervenire posse. Demiror autem quod is postea, adeo sui potuerit oblivisci, ut affinis esset illarum rerum, quæ nonnisi pessimo exitu terminantur. Rogo te obnixè ut tragœdiam illius funestæ rei mihi explices, quo sciam, num etiam sine capitis & fortunarum, dispendio, ex tanto incendio evolare poterit homo eruditissimus, & nobis propter divina dona, quæ consecutus est, admodum charus. Ex Orosii scriptis si quid habes ineditum, rogo ut id communices. Non solum illius historiam, sed etiam de libero arbitrio, & quæ scripsit ad Augustinum junctim edam. Absolvi etiam Theodori Studitæ

homil. Græcas CC. Zonaram in Epistolas canonicas Veterum Patrum, & Acta concilii Chalcedonensis, quibus biennio jam Typographum quæro, necdum invenio. Vides nos in ea tempora incidisse, ubi citius decem Nugatorii, & Novitii Libelli, quam unus antiquus, & bonus Author, emptorem reperiat. Poteram quidem meis sumptibus omnia ista producere, sed artem distrahendi commodè exemplaria ignoro. Si forsan me juvare poteris, velim ne animus tibi desit; nos quacumque saltem conditione id fieri poterit, facili contenti erimus. Catalogum Theologicorum Librorum vidi lubens, in quo & mihi multos optimæ notæ libros notavi. Salve, amicissime Vossi, & si me amas, nobis de omnibus rebus, quamprimum responde.

Si quid me voles, poteris id vel Holsteinio, vel Petro de Wittenb. & Gaspari Vinkefort Mercatoribus Amsterodamensibus celeberrimis, tutò inscribere. Iterum salve, Vir optime, & Clarissimos Viros DD. Heinsum & Rutgersium meis verbis saluta, simulq; ad scribendum incita.

*Hamburgi v. Kal.  
Nov. Gregoriani  
1651*

*Tui studiosissimus,*

Geverh. Elmenhorst.

## XXXIX.

*Clarissimo, & doctissimo Viro Dom. Gerhardo Johanni Vossio Professore Leidenfi.*

*Leidam.*

Vir Clarissime,

**D**E Testamento Scaligeri, grata sunt quæ promittis. Utinam copia nobis esset, ejus exemplaris, quod Vander-milius possidet! quod impenso quidem pretio lubens redimerem? Sed ubi locorum vivit Vir ille nobilissimus, quem toties ingeniosissimi mortalium, Baudius, Heinsiusque, in cælum magnis extulerunt laudibus. Num & illum loceri oppressit calamitas miserranda, vel hosti? M. Corvino author esse debes, ut convalescis rebus suis, maturè sibi consulat, atque in Germania locum sibi eligat, ubi Officinam Typographicam instituere possit. Ita calcar nobis addet, ad illa detexenda, quæ jam pro desperatis sepelivimus. Eruditissimus Martinius jam certam spem sui adventus mihi fecerat, quem impedivit opus, quod molitur insanum magnum, *De Origine Latine Linguae*, cujus correctio-

ni omnino eum interesse oportuit. Si tibi est animus pecuniam tuam, hic apud senatum deponendi, puto me posse à Primario civitatis hujus Consule, qui mihi afinitate junctus est, impetrare, ut tuo nomine agat cum Octumviris, qui res, rationesque fisci procurant, ne gravatim eam recipiant. Poteris igitur mihi sententiam tuam plenius aperire; tum quibus conditionibus eam hic collocare possis, lubens tibi adsignificabo. Negotium Remonstrantium, partim ex literis amicorum, partim ex relationibus publicis cognovi. Nisi res citò transacta fuerint, ut has nubes coactas video, brevi daturæ sunt magnam tempestatem. Laudo prudentiam tuam, quod te ejusmodi turbelis non immisceas. Litem enim lis, & noxa noxam parit. Quod si Patres antiqui, qui non habitu, sed moribus, & vita, sapientiam Christianam exprimebant, jam resurgerent, & eos qui Trinitatis mysterium agnoscunt, Christumque, & Spiritum Sanctum Deum venerantur, adeo savidicè, de rebus, non merè ad salutem necessariis, digladiantes viderent, quid dicerent? aut quo non fugerent? N. \* N. benè Calvinianum, & acerrimum dogmatis de absoluto decreto

\* *Is est, opinor, Fetus Hominius.*

damnatorum assertorem, tibi in Rectoratu successisse, cum merore, & cum indignatione percepi. Nunquam putassem homines acutos, adeo potuisse oblivisci suorum, ut homini modestissimo, incivili-ter audacem; & optimè erudito, rusticè indoctum subrogarent. Exclamare libet

*Quo vobis mentes, rectè quæ stare solebant, Dementi sese flexere ruina?*

Equidem scripta umbratici hujus doctoris, quæ vidi, plena blasphemiarum, & fanaticarum opinionum cognovi, quæ nemo, nisi astrosus, vel exterritæ mentis, probare possit. Peream, nisi ex unica tua Thesi, plus eruditionis hausi, quam ex istius hominis divite centone. Sed hodiè audacia, pro sapientia liceat uti: nec tam benè agitur cum genere humano, ut meliora pluribus placeant. Verùm querelam non instituo; illud dico, ut exauctoratio tua, mihi divitiarum fuit, ita recreavit me in solidum fortuna benignior, quæ latum campum tibi obtulit, in quo non minus vires eruditionis tuæ, quam in principe ista facultate, quam hactenus, summa cum laude obiisti, exferas. Age igitur negotium tuum, & reconditas illas artes palam profer, ut inimicis tuis oculi

doleant; atque ita omnes æqui & iniqui intelligant, te non minus benè Oratorem, quam commodum Theologum agere potuisse. Salve, mi amicissime Vossii, & nos amare perge.

Hamburgi, A.D. xiii.  
Augusti Gregorians,  
c13 13 c xix.

Tuus

Elmenhorstius.

Testamentum Scaligeri rectè curabit Peter de Witte, Civis Amsterodamensis noti nominis, cui semper res meas soleo concedere. Iterum salve, & nobis responde.

# XL.

*Clarissimo, & Doctissimo Viro Domino  
Gerhardo Johanni Vossio.*

Vir Clarissime,

**P**UTO te postremas meas, ab amicissimo Holsteinio rectè accepisse. Si me amas, effice ut sciam quam salve agas; hoc enim mihi, vel maximum erit. Apuleius noster jam in fine laborat, in quo si unum aut alterum locum, in juventute emendasti, notatu dignum, rogo ne eum mihi invid eas. Video Typographum de la Maire, non usque adeo malè fragmenta veterum Poetarum edidisse. Magno beneficio me afficeris, si illi persuadere posses, ut Acta concilii Chalcedonensis, prælo subiceret. Ego lucrum non quero ex meis laboribus; sed id unum ago, ut prosim Ecclesiæ Christi, cujus interest, talia rursus produci, quo erubescant impudorati Novatores, qui ineptissima quæque, inficeto, & insipido sæculo, passim aggerunt. Scripsi antea de toto hoc negotio, ad doctissimum Holsteinium, quem non defuturum nobis probe scimus. Tertullianum D. Thyfii, an habere possim, scire velim. Quod si gravantius librum ipsum transmittere, saltem peto variantias, in quibus impetrandis, operam tuam non nobis denegabis: Sed & in alia re, tibi gravis esse cogor. Patronus meus magnus Rutgerius, dixit, in tua bibliotheca, extare Aldinum Exemplar Apologetici Tertulliani, quod avidè expetimus; ut & copiam variarum Lectionum, quas Galeno tuo olim adscripsit G. Falkenburgius. Nam & has, de facilitate tua securus, Professori Altorphiano D. Hoffmanno, viro insigniter docto, qui totum Galenum recens interpo-

labit,



labit, promissus liberaliter. Vides quantum mihi, de humanitate tua, pollicear. Salve, mi amicissime, & audaciae nostrae ignosce.

Hamburgi, A. D.  
xvii. Kalen. Januar.  
cIo Io c xx. ra-  
prissimè.

Tuus dum vita manebit,

Elmenhorstius.

### XLI.

Pio juxta, ac docto Viro, D. Gerhar-  
do Johanni Vossio, conjunctissime Affinis,  
S. P.

**R**E ipsa aliquoties expertus sum, adesse tibi tantam benefaciendi vim, ut indulgentiam tuam necessitas amuletur; dum enim summa in me studia, officiaque avidissime confers, tantummodò debitum explevisse videri vis. Non feci paria, defuit enim facultas; atque eo magis cupio, ut animum mihi gratum Deus, & animo isti tempus, quam longissimum tribuat. Superfint modo solvendi tempora; reddam vicem si reposes; reddam etiam non reposes. Crebras interea prolixaque literas, certissima debita benevolentiae pigora, non invitus dabo; nihil metuens ne molestus tibi fuisse videar, modum in amore excedendo; neque enim periculosum est, ne sit nimium, quod esse maximum debet; & verissime amat, qui sic se amari putat, ut tedium non pertimescat. Postularem ut vicissim quid in oppido vestro, quid in finitimis agatur (solent enim notabilia quaedam incidere) perscribas; sed temporum ratio aliud suadet: scribes igitur quando, & quantum videbitur. Exsolverem nunc promissi fidem, literasque longiores, quam lubentissime ad te mitterem, nisi sollicita commodi hospitii investigatio, in tam ingenti urbe, me usque adhuc, à cognati Junii, D. Tileni, aliorumque alloquio arcuisset. Pleniores itaque literas, proximè sequenti hebdomade, expecta. Vale, & sororem mihi plurimum colendam, cum tota vestra familia, quam officiosissime saluta.

Raptim, Lutetiae,  
Anno 1620. 12.  
Augusti.

Tuus omni officio,

F. Junius, F. F.

Opportunè admodum adolescens, qui hasce meas ad vos defert literas, per aurigam nequentem moras diem adhuc unum

Lutetiae detentus fuit. Summo itaque mane cognatum Junium visurus, intellexi unà cum Rege ad expeditionem profectum. Varii hic quotidie per urbem incessunt rumores, & pro loquentium indole, turbidi, aut pacati. Credit optimus quisque labare hostes, petendaeque pacis consilia sumere, & brevi posse bellum patrari. Nuntiant contrà alii, Reginam Matrem turbas inexplicabiles minitari, vires regni intimas, molemque belli ciere, & neque astu, neque constantia, inter dubia indigere; existimo tamen, nisi me fortè in totum fallit, meum de hac gente judicium, ipsa Regiae praesentiae fama, bellum omne statim posse profligari: faxit hoc Deus Opt. Max. pacemque diu immotam, & inconcussam Regi, ac Regno Galliae largiatur. Nihil jam mihi accomodatius sit, quam ut Nobiliss. Legatus, quem discessurus compellavi, de rebus meis quid scribat cognato reduci; poteris adhuc uti operâ alicujus amici, qui pariter, & me norit, & Nobiliss. Legato familiaris sit. Neque enim cuiquam, tam clarum statim ingenium est, ut possit emergere, nisi illi materia, occasio, fautor etiam, commendatorque contingat. Ad hæc ut apud vos, ita & hic malignorum hominum rumoribus laceramur, tanquam pacis publicae turbatores, &c. quò magis opto, ut tantæ authoritatis, & fidei Vir, animum meum pacificum vero testimonio prosequatur. Literarum mihi reddendarum hæc sit inscriptio. *Chez Mr. Piat, demeurant en la Rue St. Estienne des Grecs, vis à vis du College de Montaigu; aupres S. Genevieve: fac & sororem Diamantiam hac de re certiore.* Iterum vale, 13. Augusti.

### XLII.

Gerhar-  
do Johanni Vossio, Viro Clariss.  
Affini conjunctissimo, S. P.

Virorum integerrime, sanctissime,

**L**icet crebrioribus literis, otium tuum negotiosum interrumpam, tamen non est quod verear, ne molestus sim tibi, cui vel orbem terrarum, non esset longum circumire mea causa. Hac itaque tui erga me amoris fiducia ductus, hæc ad te secundas do literas, crebriores daturus, ubi quod scribam offeretur, imo etiam si nihil offeretur; unicum hoc debiti erga te amoris mei pignus absens dare possum; amat enim intimè, & flagrantissime,

simè, qui sic se amari putat, ut tadium non pertimescat. Nuperrimè de rebus meis literarum aliquid ad te dedi. Rex etiamnum abest, & cum Rege Nobilitas omnis; si brevi revertatur, quod plerique futurum sperant, uberrimè omnia, quæ me spectabunt, ad te perscribam. Non erit difficile: *Ἐργὰ δὲ πλείων ἢ δέλω παρὰ σοί.* Interim hic clausus intra domum, alto pinguique otio, me immergo; atque omne hoc tempus intra libros, jucundissima quiete transmittito. Nam quid agam? Alienissimus sum à consortio hominum vulgò. Vin' scire quales plerique mihi videantur. *Καλὰ δὲ πικρῶτεροι οἱ πειθήκων, ὀργισμῶτεροι οἱ κυνιδίων, φιλονεικῶτεροι οἱ ἀλεξυβόων.* Nobilitatis, nisi me fallunt plurimorum testimonia, longè diversum ingenium est.

Celare te non possum, quemadmodum 15. hujus mensis die convenerim D. Tilenum virum humanissimum, & pro veritate firmissimum; cumq; ei inter alia tuis verbis plurimam salutem apprecarer, subjungeremque me ignorare an ullam tui notitiam haberet, statim ipsissimis hîscè verbis responsum dedit, *Notissimus mihi est, & quidem merito suo.* His auditis, non erat cur porro ullam historiæ tuæ Pelagianæ, ut discedenti mihi in mandatis dederas, mentionem facerem. Et fortè adhuc judicium ejus super isthoc tuo scripto exquisivissem, nisi iter sibi ad Britanniam Regem habendum significasset, atque adeo jam sarcinas alligare affirmasset. Obstupui, percussus novitate rei; cùmque nie videret tacitè, apud animum meum ambigere, quò hæc tam insoliti itineris usurpatio spectaret; addidit ne sibi quidem causam ejus rei compertam; tantum evocari se blandè humanis Regiæ Majestatis,

\* *Lancelotti Andrews.*

& \* Episcopi Wintoniensis literis; Medicumq; Regium ad hoc missum, ut eo itineris comite uti posset. Quid opus est, in re tam dubia, suspicionibus multum indulgere? sufficere nobis debet, quod vir magnus, iniquissimam adversæ partis in fratres suos crudelitatem detestatur. Unde & ipse ego coram animosè satis spondentem audivi, nunquam se causæ melioris patrocinium perfidè deserturum. Proinde totius negotii exitum precibus seriis Deo Opt. Max. committamus. Interea tuam, tuorumque valetudinem, summus idem, atque optimus rerum humanarum Arbitrator, gratiosè promoveat. Ipse valeo; si valere est, suspensum & anxium vivere, expectantem in horas, timentemque pro capite amicissimo, quidquid accidere ho-

mini potest. Est enim suspensum, & anxium, de eo quem ardentissimè diligas, interdum nihil scire. Vereor omnia, imaginor omnia, quæque natura metuentium est, ea maximè mihi, quæ maximè abominor, fingo. Quò impensius rogo, ut timori meo, vel per te, vel (si tutius id judicabis) per alium consulas.

*Lutetiae, 18.  
Septembris,  
Anni. 1620.*

*Tuus omni Officio,*

Fr. Junius, F. F.

Hagæ Comitum vivit quispiam Vansanten Collega D. Bafii, & Kromvlietii, cujus unicus filius, Bokoldus Vansanten, hic Lutetiae mensem unum mecum vixit; adolescens est multis experimentis eruditus, & quod rarissimum est, videtur amare bonam mentem. Itaham sic satis lustravit: Me quoque in Italica lingua fideliter admodum instituere cœpit, & lubentissimus in me instituendo, porro bonam operam navasset; nisi illum pater senex, videndi unici filii desiderio captus, à septenni peregrinatione revocasset. Neque Patrem, neque Adolescentem hunc antehac datum fuit noscere mihi; tu, antequam te invisat, ex ingenio Parentis, de adolescente ipsò, conjecturam facies. Temporum ratio suavit, ut hæc scire te voluerim. Iterum vale. D. Molanus tuus quondam discipulus, spatio triduo eodem hic hospitio mecum usus est, antequam Salmurium, Bloys, Orleans, & reliquas istius tractus urbes viseret; unice verò à me petiit, ut te primis meis ad te literis, quàm officiosissimè salutarem. Dum omnia mihi videor, non minus breviter, quàm diligenter persecutus; succurrit quod præterieram, & quidem serò; sed quamquam præposterè, reddetur tamen tribus verbis. Cùm ex D. Tileno quæxivissem, qualis ipse videretur iste, quem nosti, equitatus Regii Thesaurarius, in hæc tantummodo verba respondit, *Quantus quantus est, Aulicus est, &c. Aulicus melior, quàm Medicus est.* Scis quorsum hæc narrem. Tertio vale.

*Clarissimo*

## XLIII.

*Clarissimo & Eruditissimo Viro Domino  
Gerhardo Joanni Vossio, Theologo  
& Philologo eximio.*

*Leidam.*

Vir Clarissime,

**M**irari satis non possum, te Levio nuntiasse, me ad binas tuas, nihil tibi rescripsisse. Testor numen divinum, me ab ipsis xv. septimanis, ne verbulum, imo ne datariam quidem salutem accepisse. Unde & sapius mihi oborta suspicio, te planè memoriam nostri deposuisse: Sed benè sit Levio nostro, qui hanc mihi ademit molestiam, dum salutem, & librum tuum eruditissimum, mihi obfert; qui mihi, ut omnia tua, gratissimus accidit. Lætorque plurimum tibi, favore cœlitum, iterum otium, & quietem obtigisse; quo laboribus tuis commodè, ultimam manum imponere possis. Nos etiam multa habemus, non inchoata modò, sed adfecta, quæ ob sæculi fatuitatem & miseriam temporum, extrudere jam non possumus: quæ ubi meliora nobis apparuerint, posteritati non invidemus. Testamentum Scaligeri rectè accepi, quod cum MSS. Orotianis recipies, ubi volueris. Salve Vir doctissime, & de studiis tuis, quamprimum nobis rescribe.

*Hamb. A.D. xxv.  
Septemb. Juliani,  
1610 c. xx.*

*Tui studiosissimus,*

Geverh. Elmenhorst.

Cupio scire num Grotio, sine invidia, & reprehensione scribere possim.

## XLIV.

*Clarissimo Viro D. Gerhardo Vossio,  
fratri in Christo observando.*

*Leidam.*

Vir Clarissime,

**B**easti me luculento munere tuo; quippe non tantum utili mihi futuro, hisce in locis; sed penè necessario. Cum enim hætenus controversias omnes, de Religione, disceptandas esse crediderim, ex ejusmodi fundamentis, & principiis, quibus solidè, & securè semper, inniti posset conscientia; tamen nunc in eam necessitatem, incidere me video, ut aliunde petenda sint præsidia, quibus error revincatur, & conscientia quorundam tene-

ris, aut hæsitantibus, scrupuli eximantur: Etenim his in locis nunc degere cogimur, ubi antiquitas utramque paginam facit, & omnibus licet ineptissimis, atque absurdissimis opinionibus, veluti scutum Gorgonis obtenditur, adeo ut qui eam sententiæ suæ, aut non potest, aut non curat obtendere, causa cadere; qui verò speciosè eam novit obducere, omne punctum tulisse: Et quicquid scriptura, aut recta ratio manifestè reclamare videantur, triumphare credatur. Tantum hic valet antiquitas: Unde hæc una, in omnibus, five concionibus, five colloquiis, veluti sacra quædam anchora est; ad quam, religatæ tenentur stupida plebis conscientia; usque adeo ut si hanc eximas Demagogorum declamationibus, animam Oratori adimere, & præter *exiles*, nudamque larvam, in pulpito nihil relinquere, videri merito queas. Et hæc quidem cum sint hominum ingenia, necesse planè video esse, ut quo jure meritòque, opinionibus suis, antiquitatem semper prætexant, diligenter inquiratur, non ut hac ratione persuadeatur veritas, sed ut errori inveterato fulcrum suum subtrahatur. Eam ad rem, Vir Clarissime, tuam mihi Operam vehementer necessariam esse sæpenumero credidi: Etsi enim non desint, qui de singulis controversiis luculenter, ex ipsa antiquitate multa dixerint, scripserintque, tamen nescio qua ratione fiat, ut eorum autoritate, fide, & judicio, non ita fidenter stare audeam: Video sæpenumero alios, aliorum fidem sequi; & cum in antiquorum Patrum scriptis rudes sint, & hospites, eorum tamen autoritatibus veluti Laciniis quibusdam, hinc inde sine judicio avulsis, aut detruncatis, tam temerè, tam imprudenter, sua scripta interpolare, ut pudeat, pigeatque: Et hinc ferè fit, ut qui eos sequuntur, risui sese, & ludibrio, non raro propinent apud eos, qui in illis accuratè versati sunt, & ætatem ferè totam suam triverunt. De tua vero, (absit adulationis suspicio) tum fide, tum judicio in Antiquorum scriptis, adeo apud animum meum persuasus sum, ut te judice in controversiis ferè omnibus stare, & credere ausim: Quocirca vix credas, quam mihi gratum feceris, quod disputationibus tuis, de materiis aliquot, inter nos, & Pontificios controversis, me dignatus fueris. Utinam tantum in omnibus eandem operam posuisses, nominatim vero etiam in argumento, de imaginum cultu, & adoratione! Pro hac enim superstitione, summa vi, & quod dicitur, velis remissa, hic contenditur; nec mirum, incurrit



incurrit ea maximè in oculos vulgi, & Idololatriæ crassæ, Gentilisque speciem habet, quam à se amoliri semper student, sed irritò ferè conatu, nisi canam antiquitatem, veluti tabulam in naufragio, subinde arriperent. Et fuit non nemo nuper, qui mecum eà de re per occasionem, fortè fortuna oblatam, inter pocula pluribus egit, qui reliquorum omnium more, cum causam suam tueri non posset scripturarum Authoritatibus, ad hanc Aram confugiebat, & in ea una præsidium causæ totius collocabat. Videbatur illi mihi multa dicere, ut *Θεὸν* suam posset *διαπολάττειν*, quæ ab omni ratione aliena erant, & quæ tamen Antiquitatis totius unanimi consensu confirmata fuisse, firmis lateribus adseverabat: Uti inter cætera quod Gentiles omnes semper adoraverint Idola sua tanquam Deos, quibus videlicet divina virtus, personali unione unita esset, sicut naturæ divinæ humana Jesu Christi; cum tamen Lactantium expressè contrarium dicere, manifestum sit, aliosq. quamplurimos: Præceptum de Imaginibus non faciendis, fuisse ceremoniale & positivum; de Idolis verò non faciendis, morale, illud sublatum, nova lege, hoc perpetuum esse; Imaginis & Idoli distinctionem, apud Antiquissimos Patres, semper consentientibus calculis, traditam esse, & quod ex T. R. lubens etiam, & ante omnia intelligerem, Apostolos doctrinam de Imaginibus, tradidisse in Concilio Antiocheno, idque ex bibliotheca Origenis, † Pamphilum Martyrem descripsisse. Verba verò Canonis extare apud Turrianum. Lib. 1. pro Canonibus Apostolorum c. 25. *Ne errent fideles erga Idola, sed expriment divinam humanam imaginem Dei viri, & salvatoris nostri, ac servorum ejus, ex adverso coram Idolis, & Judæis.* Hæc aliaque cum ab eo affirmari, atque asseri identidem viderem, neque tamen, libri mihi ad manum essent, ex quibus illud refellere mihi aut liceret, aut etiam luberet, cum in eo causæ cardo non verteretur; non putavi tamen abs re me facturum, si à R. T. peterem obnixè, ut paucis, quid hisce de rebus sit, significare mihi non gravetur. Tanto autem fidentius id petere me posse judicabam, quod à publicis nunc oneribus vaces, & curis nullis gravioribus distraharis, & quod operæ pretium facturus sis, si hac in re, operam tuam nobis commodaveris; Quocirca etiam atq.

† Hæc quidem apud Turrianum legere, memini. Sed statim odoratus sum, eà à Græculis, ut alia multa, fuisse conficta.

etiam rogo R. T. ut si quid à privatis, & fortasse melioribus curis temporis superfluit, trium horum capitulorum examini impendere velis. 1. An Ecclesia Antiqua, semper distinxerit inter Idolum & Imaginem? 2. An Gentiles crediderint Idola sua esse Deos ipsos, eosque ut Deos suos semper adoraverint? 3. An Apostoli doctrinam de Imaginibus tradiderint in Concilio Antiocheno; & an verba Canonis extant apud Turrianum; licet fabulosum alioquin, & vanum scriptorem? Unum addam, ut si plures disputationes habitæ sint sub præsidio vestro, eas per Kunerdiniam ad me transmittere non graveris. Dabo operam ne in ingratum beneficia hæc non contulisse re ipsa comperturus sis; Et si fortè reduces nos ab exilio hoc tristi vobis sistat Deus, quod futurum non sine causa confido, omni officiorum genere compensem. Vale, Vir Clarissime, & perfer atque obdura; dolor hic tibi proderit olim. Dominus Jesus tibi, tuisque, & quotquot bonæ causæ favent, propitius benedicat. Salveat à me D. Barlaeus.

Raptissime 6. Novembris 1620.

Tuus omni Officio,

S. Episcopus.

#### XLV.

*Præstantissimo Viro, D. Gerardo Joanni Voslio, Affini Conjunctissimo.*

S. P.

SECUNDIS ad te literis, Conjunctissime D. Affinis, de Anglicano D. Tileni itinere, nonnihil ad te perscripti: quæ si rectè, ut spero, ad te sunt delatæ, superest ut nunc eundem Clarissimum Tilenum reducem tibi narrem. Ut reversum intellexi, inter gratantes ut debui accessi; neque gravatus est vir officiosissimus, totam rerum in Anglia gestarum seriem fusè mihi narrare. En tibi itaque omnis negotii summam. Ad D. Tilenum, etiam Sedani agentem, impulsu D. Melvini, accessere duo Ministri Scoti exules. Nosti gentem istam Puritanam; cumque plus justo eorum in Regem querelæ, præsentè adhuc Jonstono quopiam ardescerent; existimavit vir magnus, salubrium rationum fomentis; animos præferoces, & Zelimumietate morbosos, potius leniundos, quàm porrò inflammandos; sed auribus eorum ad moderatiora consilia sur-

E

dis,

dis, nihil aliud effectum est, quàm ut exacerbatiores digrederentur. Non destitit interim Jonstonus, urgere D. Tilenum, ut præcipua collatiuncula istius argumenta scripto consignata sibi communicaret; quo impetrato, ad Regem Apographum transmissit, qui non indelectatus autoritate viri, & argumentorum pondere, Typis scriptum illud vulgari iussit, atque insuper desiderio videndi ejus flagrans, D. Tilenum per literas, blandè ad se evocavit, præsentemque arctissimè amplexatus, gratias ei pro navata opera egit, amplissimumque obtulit stipendium, si in Angliam transmigrare vellet. Sed is unà hac hyeme in deliberandi spatium postulatà, à Rege dimissus est, nunquam nisi me ratio prorsus fallit, sedem mutaturus. Promerem nunc hujus meæ suspicionis causas, nisi temporum ratio obstaret. Unum hoc tutius addo, virum doctum, non vanam spem animo concepissem, brevi futurum, ut non tantum sibi, sed & omnibus aliis bonæ causæ patrocinantibus, publica autoritate, libertas quilibet imprimendi, hic Lutetia concedatur; plurima ejus opuscula prelum postulant, quorum nonnulla mihi ostendit, animadversiones scil. in Canones Synodi Dordracenæ, Gallicum aliquod scriptum de causâ peccati, & plura similis notæ: scis quàm hoc alibi non liceat; sed ne longius à proposita narratione deflectendum sit, redeo ad incepta. Rex nihil aut parum admodum, cum D. Tileno de Remonstrantium rebus egit, contentus de Ecclesiarum suarum hierarchiâ ulterius quid ex ipso intellexisset. Episcoporum quoque non obscurum in se favorem narrabat, multa addebat de singulari affectu; quo abeuntem profecuti sunt. Tum ego, an tui, & Historiæ tuæ nulla unquam à quoquam mentio facta sit, sedulo exquirere cœpi; Annuit ille, & præter aliorum magnifica præconia, à D. Josepho Hall, non sine summa commendatione, sibi oblatam quominus perlegeret, adversa valetudine fuisse impeditum. Intellexi ex his destitui ipsum scripto tuo; utque fidem tibi datam explerem, quid discessuro mihi in mandatis dedisses, significavi, & triduo post tuo nomine, non historiam tantum, sed & Resp. † ad Jud. Rav.

† *Responsionem ad Judicium Ravenspergeri?*

matutinam ingressus, sollicitè admodum cœpit interrogare, quemadmodum te, ob hoc tuum scribendi genus exceperet:

Itaque post brevem rei gestæ narrationem, literulas tuas, quas solas 19. Sept. datas accepi, introspectiendas tradidi; quibus ille percursis, post varios sermones abiturus, hæc verba protulit. *Virumque Affinis tui scriptum, cum maximo fructu, & summa voluptate perlegi; hoc veni tibi significaturus; & simul ac literarum aliquid ad ipsum dabis; non tantum meis verbis, plurimam ei salutem dices, sed & spondebis me suo tempore ostensurum, quàm non apud ingratum hoc suum munus collocaverit.* Digresso D. Tileno, Pomeridianum ejusdem diei tempus D. Junio, tùm primùm ab expeditione reverso impendi; & post mutua gratulationis officia, generalioribus, ut primùm fieri assolet, & longè accersitis sermonibus, diem condidimus, cognato nunc fratris Casimiri mentionem faciente, alias fororum numerum percontante, & priores duas parentis nostri uxores, sibi visas referente, quandoque etiam de Patriæ nostræ statu nonnihil sciscitante. Septimo post primum congressum die, me unà cum aliquot Uxellodunensibus, ad prandium vocatum, magnifico lautitiarum apparatu, humanissimè & splendidissimè excepit. Atq. ita ne tunc quidem per importunam illiterati istius consortii præsentiam, de rebus meis quicquam egi. Interim proximæ cuiq. occasione manum injicere destinatum est, omniaque prout ceciderint, ad te perscribere. Sed jam dudum fortè ex me audire desideras, qualis mihi cognatus ille noster videatur; da veniam, Conjunctiss.

† H. e. Junii. si Deus volet, ad te scribam. Alludit ad Nunc jubeo salvere, &c.

nomen Hebraicum Nadabi Agmonii, sub quo in Europalate edendo latere voluit Franciscus Junius Pater, Leydensis Theologus.

Raptim. Lutetia An. 1620. 12. Decem.

Tuus omni Officio,

Fr. Junius F. F.

## XLVI.

*Clarissimo Doctissimoque Dn. Gerardo  
Joanni Vossio.*

Vir Clarissime,

**S**I mihi ad familiares meos scribendum foret, quâ ratione literas meas exor- direr, non in ipso limine, materiæ penuriâ hæsitarem. Aut enim illis salutem nuntiarem, aut meum in illos amorem testificarer: sed neutrum impræsentia usu- venire intelligo. Nam quid Vossio cum sa- lute, & amore Polyandri? Idem quod di- vitibus olim cum vocibus Clientum, manè præ foribus salutantium. Quid ergo? Num filebo? Id meritorum memoria, atque data olim fidelia præcepta vetant, eadem igitur servanda exordiendi ratio. At hæc è media Plebe, & Triviis, quæ scribo su- muntur: non mirum si à plebe Plebeia, è Triviis trivialia proficiantur. Quo- circa cum sterilis mihi calamus, aliud tan- to viro dignum, producere non queat, salvere te, Vir Clarissime, hoc rerum statu, multum jubeo, & Deum, ut meliori læ- tiorique te sæculo parcat, supplex oro, ubi sua merces pietati, laus eruditioni, & præmium concordia. Pessima enim & luctuosa hæc tempora, quo digna dicam? Tantâ ne luce? Vah, radiis ejus cæcutiunt, assueta tenebris, & eam fugere, si fugare non possunt, audentve; sedulo adlaborant. Quam miserè, proh Deum immortalem! pietas, eruditio, concordia exulant: sce- leribus, omnique nequitia generi applau- ditur; quæ natura eminere dedit ingenia, supprimuntur; Discordia, & ex ea orta Tyrannis nusquam non grassatur: sed quid ago? Æneæ regni Trojani excidi- um, & reliquiis immitis Achillei, mala, quæ perpesti sunt, narro. Præstat, quamvis sciam membra Epistolæ hujus inæqualia, ut me ad eam, quâ apud eruditos uti soleo clausulâ, conferam, oremque, cum aliud argumentum mihi relictum non sit, si quæ habeas, habere autem quamplurima scio, quæ studia mea promovere queant, cupido mihi impertiaris: Nullo id præstiteris la- bore, quod mihi maximo foret indagand- um. De meâ autem in te, Vir Clarif- sime, voluntate, sic velim judices, me, quæ- cumque postulaveris, quanquam videam, quantulus sim, & me nihil posse sentiam, tanto studio facturum, quanto tu semper, quod maximum fateor in meis rebus, cum sub regimine tuo degerem, te fuisse signifi-

casti: quod cum præstabo, animum tuum erga me imitabor, merita nunquam asse- quar. Etiam atque etiam cum conjugè charissimâ Vale, & moderata tua constan- tia fac infamet Tyrannorum injuriam.

*Roterodami, 22.  
Maii 1621.*

*Tuus,*

Johannes Polyander.

## XLVII.

*Clarissimo Conjunctissimoque Adfini D.  
Gerardo Vossio S. P. Conjunctif-  
sime D. Adfinis.*

**G**Ratissimum Doubletii nostri adven- tum gratiorem tuæ ad me literæ reddiderunt, quæ cum crebriores alias pro- lixè spondeant, spem pariter faciunt om- ninò posthac futurum, ut & alias ad Re- verendiss. Episcopum Wintoniensem iis adjungas: de cujus summi Viri erga te, om- nesque bonos benevolentia, jam nunc ad te literarum, aliquid scribit, D. Doubletius, auritus, & oculatus testis minimè vanus; mihi, tibi, publico non parum confules, si affectus integerrimi spontaneam vim ulte- rioribus doctæ necessitudinis officiis, fovere non desinas. Imo (si per tempora lice- ret) Britannos tibi tandem aliquando vi- dendos judicarem. Sed de his aliâs, cer- tiore nuntio oblato. Nunc de rebus meis, hoc tantum habeo scribere, quod omninò futurum confidam, ut per Reverendiss. Virum, de honesta aliqua conditione, prospiciatur mihi, simulac Farnamenfi Arce relicta, Londinum reversus erit. In- terim tamen tuæ ad illum literæ, si ad- volare possint, gratissimas ei fore existi- mare debes. Non patitur temporis ratio plura me his annectere; Nunc itaque fi- nem facturum, D. Erpenio brevi ad vos redituro, uberiores, Deo adspirante, lite- ras sum commissurus. Vale. Saluta sororem charissimam, & firmiter tibi persuade, me ad omnia debita gratitudinis officia para- tissimum. Itidorum MS. Sandwici olim vidi: Inquiram an adhuc apud eundem Bibliopolam venalis proffet, si quando eò excurrere dabitur.

*Raptim Londini  
Anno 1621. 18.  
Aug. St. Vet.*

*Tuus omni Officio,*

Fr. Junius F. F.



## XLVIII.

A Monsieur Vossius Professeur des  
Messieurs les Etats d' Hollande.

A Leide.

Monsieur,

\* In Partitio-  
nes Oratorias  
scilicet, quas  
illustissimo  
Maurerio di-  
carat Cl.  
Vossius.

J'AY vû l'Épître \* dedi-  
catoire, que vôtre Affe-  
ction envers moy, vous à  
dictée; Laquelle je n'ay pû  
lire sans honte, à cause des  
excessives louanges, ques  
vous m'attribués, que vous  
eussiez restraintes à beaucoup moins, si  
j'avois le bien d'être mieux connu de vous.  
A cela prés, il n'y peut rien estretrouvé à  
redire; Et puisque je ne me puis attri-  
buer tant d'Eloges, j'espereray qu'ils servi-  
ront, d'aiguillon à mes petits, pour y voir  
plustost, quels ils doivent s'efforcer d'  
être, qu'ils ne le pourroyent sur le patron  
de ma vie. Cependant je vivray en atten-  
te, de voir ce bel œuvre aujourd, pour en  
profiter moy-même; & pour l'espérance de  
l'utilité, qu'ils en pourront tirer, par l'u-  
sage des bons preceptes, que vôtre rare  
erudition, & bien-veillance envers moy  
vous sçauront mieux fournir. A laquelle  
fin, je suis resolu de les mener, au premier  
jour, sous vôtre conduite, & les commet-  
tre à vôtre tutelle. Dieu veuille qu'ils y  
fassent tel profit, que cela leur serve à  
passer leur pelerinage en ce monde, avec  
moins d'inutilité pour leur Patrie, & pour  
eux mêmes. Dequoy ils devront recon-  
noître, vous avoir la principale obliga-  
tion; que je payeray pour eux, en atten-  
dant, qu'ils en soyent devenus solvables  
eux mêmes. Apres cela il ne me reste,  
que vous prier de m'aimer, comme vous  
le ferés infailliblement, par

De la Haye Votre tres-affectionné serviteur,  
ce 22. Aoust.  
1621.

Du-Maurier.

## XLIX.

Maximo, Clarissimoque Viro, Gerardo  
Joanni Vossio.

Vir Clarissime,

Quæ postremis meis ad te transmissis  
litteris, de summo Reverendi Epi-

scopi Wintoniensis, erga te  
affectu, ex relatu \* Affinis \* Fr. Junii FF.  
tui significavi; Ea nunc  
ipse comperi, & relatione, & eâ, quæ tibi  
inde nata esse potest opinione longè ma-  
jora. Dum enim unâ cum D. Junio pro-  
fectus, ac sub ejus umbra latens, hoc ho-  
nore sum beatus, ut salutare Rev. Virum  
in Arce Farnamia contigerit, vidi me hoc  
uno nomine gratissimum accessisse R. S.  
hospitem, quod in adibus tuis educatus, de  
te tuoque, in R. S. amore singulari nun-  
tium ferebam. Hoc uno nomine tanta,  
ab hoc verè magnifico, & præcipuè au-  
thoritatè viro, humanitate sum exceptus;  
ut nunquam majorem, imò vix parem in  
ullo, vel infimæ sortis mortali sim exper-  
tus, aut experturum me sperare audeam,  
scilicet pro sua magnificentia, habere quos  
vult, potest splendide, & honorificentis-  
simè, & pro singulari comitate, ac huma-  
nitate, beare quoque vult summis hono-  
ribus, omnes quos videt R. S. amantes,  
aut à viris eruditis, (quos facit maximi)  
grata nunciantes. Non fivit nos quam-  
diu Farnami commorabamur, aut prandi-  
um aut cœnam sumere alibi, quàm unâ  
cum R. S. in aula propria: Quin & di-  
feriè professus vir Rev. nolle se nobiscum,  
aut prandium habere, aut cœnam, qua  
non se DD. Grotii, Vossii, & Erpenii  
memorem, poculo tantorum virorum sa-  
luti dicato, probaret: subinde nos com-  
monefaciens sedulò, ut si viri esse vel-  
lemus, (verba ipsa audire te scias, vir Cla-  
riss.) exemplo suo, idem faceremus stre-  
nuè. Fuit cum præfatus V. R. semel se  
Grotium, pluries Erpenium vidisse, excla-  
maret; Ecquane unquam spes erit D. Vos-  
sium in Anglia videndi? adderetque, velle  
se, & experere unicè, ut dum abest Vos-  
sius, absint duo isti alii, crebro eorum  
nomina, in mensa sua saltem audire pos-  
sit. Et ut uno verbo comprehendam om-  
nia, nulla non dedit nobis vir iste Re-  
verendiss. affectus in te propensissimi in-  
dicia, quorum aliqua jam ex hisce uti  
existimo, literis percipere potuisti, alia  
proximis, siquidem occasio se offerat tutò  
transmittendi reservo: aut, si unâ cum  
Episcopo, sperare tuum in Angliam ad-  
ventum mihi liceat, præsentem præfens in-  
dicare gestio. Velim nunc exprimere pos-  
sim per literas ego, quanto animi mei  
gaudio videam ita benè tibi, & causæ tuæ  
velle virum tanta hic, & autoritate, &  
dignitate pollentem; sed dubitare non po-  
tes de affectu meo, nisi unâ dubites, de  
studio meo, quo annitar, semper talem  
me

me probare, qualis ut sim, exigunt, & natura, & recta honestatis ratio, & quæ tandem alia esse potest, vitæ benè instituentis moderatrix. Vale, vir Clarissime, unâ cum conjuge, & liberis, & omnibus bonis.

*Dabam baptis-  
sinè Londini III.  
Kal. Septemb.  
c12 loc XXI.*

*Tuarum virtutum Insignium*

*Admirator & Cultor,*

G. R. Doubletius.

Puto fore, ut totam hyemem, in Anglia transigam, quod eò scribo, quò si id mihi à te favoris obtinet unquam, ut literas à te ullas habere possim aliquando, huc eas transmittas; nec sit quòd metuas, ne jam in Gallias forè, uti constitutum erat, trajecerim. Vale, & tui reverentem ama.

## L

*Præstantissimo Viro Gerardo Joanni  
Vossio, Affini conjunctissimo.*

*Conjunctissime D. Affinis,*

QUamquam recens de uxoris tuæ, fororis meæ, morbo Nuntius, sollicitum mihi animum, tristi imagine confuderit; tamen Deo Opt. Max. multiplices curas in gaudium vertente, de metu non queror. Quod superest, Deum Immortalem precor, ut illam tibi, unâ cum spei non dubiæ liberis, fortem, & hilarem diu præstet: fieri vix potest, quin ad vos jam dudum, perlata sit res, plurimorum rumoribus agitata. Trimestre & amplius est, cum Archiepiscopus Cantuariensis, inter venandum cervo imminens, ictu fallente, hominem sagitta confixit. Difficili conjecturâ non eget, quam gravi vulnere, casus tam luctuosus, & ipsius Archiepiscopi piam mentem, & bonorum omnium animos adfixerit. Nondum is dolor exoleverat, cum statim, non levis difficultas inde exorta, omnium aures oraque advertit, nam quatuor inter, quibus imponenda manus erat, Episcopos, aliqui ambigere cœperunt, an consecrationem hanc, humana cæde, cruentatæ manus ritè possent perpetrare: Neque deerant alii complures, qui destinatione tacitâ, in locum Archiepiscopi, summa (ut putabant) dignitate exuendi; Wintoniensem sufficerent: Wintoniense ipso multum obnitente, & nihil non obnixiè pro Archiepiscopo faciente. Vidit

\* *Georgius  
Abbot.*

tandem Rex ad curam suam negotium hoc pertinere; oculosque circumferens, decem spectatissimæ Sanctitatis, ac fidei, viros elegit, qui eruditionem suam intenderent, & genus quæstionis, aut non sat tritum, aut etiam inexpertum, ad liquidum perducerent. Erexerat ea res publicam expectationem, omnis moræ impatientissimam: summisque viris hinc inde, dum Antiquæ Ecclesiæ Canones conferunt, & excutunt, in studia per aliquot dies diductis, abruptam undique gratam saluberrimi consensus spem, timida sollicitudine non pauci augurabantur; donec Rev. Wintoniensis Episcopus, infinitam hanc sententiarum diversitatem, unico allegato Canone diremit. Clericus de quo dubitatur, an sit regularis, non est irregularis. Modestia gravitasque Rev. Viri mirificè commendavit dicti opportunitatem, præcipuè acceptam, diutinâ quasi altercatione fessis. Sententia itaque hæc, non prævaluit modò, sed omnino post tantas dissensiones sola fuit frequens. Magnam sibi tam notabili æquissima moderationis Exemplo, Vir Rev. admirationem, tam apud ipsum Regem, quàm apud omnes bonos comparavit. Monuit certè Archiepiscopum Rex, ut conservatæ gratiam dignitatis, ad unum Wintoniensem referret. In his erat curis Reverendiss. Dominus, cum tuas ei literas offerrem; quibus ille jam dudum, ut longè gratissimis respondisset, nisi priores hæc curas, ex improvviso Parliamentum excepisset, quod res quoque meas nonnihil moratur, copiâ Illustr. Comitem Arundelium conveniendi negatâ, qui jam pridem unice petiit, ut sibi operam meam integram reservarem. Brevi itaque si Deus annuat, de omnibus meis rebus te faciam certiore. Exemplar literularum, ad virum magnum datarum, descripturus, hîc me, præ temporis angustia fîstere cogor. Neque necesse habeo, quicquam super hac re scribere, cum tute omnia perspicias.

*Reprim Londi-  
ni Anno 1621.  
Kal. Decemb.  
St. Vet.*

*Tuus omni Officio,*

Fr. Junius F. F.

II.

## LI.

Maximo Viro Dom. Gerardo Joanni Vossio.

Vir Clarissime,

**T**Antopere me pudet diuturni mei silentii, ut nunc quoque scribere, & sic à longo errore, tandem in viam reverti, propemodum erubescam. Video enim non dari alium mihi reditum ad Officium tamdiu intermissi partes; quam per ingenuam, sed turpem, supinæ negligentiae confessionem: Cui tamen veniam sat scio facile dabit tua humanitas, praesertim si confideres, esse interdum hanc non minimam officii erga amicos partem, non esse officiosum nimis; saepe enim molesta magis quam grata est, frequens illa ad viros magnos, & nunquam non seriis occupationibus intentos, scriptitatio: quasi verò futilibus ineptiis, & literis inanibus legendis otium semper suppetat iis, quibus nunquam, ad volvenda Doctorum scripta, suaeque vicissim aliis tradenda Lectoribus otii, temporisve est satis. Et certe ipse etiam nunc, ita habeo pauca scripta digna, ut nisi me ad scribendum impulsisset, summum cum claritudine tua, quatenus fieri potest, colloquendi desiderium, vel hoc tempore quoque, ab hisce literis transmittendis, manum abstinuissem. Nec enim dubito, quin per D. Junium, omnia diligenter ad te perscribantur, quae hic geruntur, scitu digna: uti quam, non ita pridem utraque, hic tam Oxoniensis, quam Cantabrigiensis Academia rigida censurae subjecerit Paræum, Bucanum, & alios: quae si nondum fortasse innotuerunt, nunc accipe. Habebat Oxonii ante menses circiter tres, aut paulo amplius, concionem Juvenis quidam Theologus, & non satis temporum, in quibus vivimus, observans; sed probus alioqui & existimationis bonae. Hic cum prius generalia quaedam proposuisset, ex quibus vereri videbatur, nequid Religio reformatata, ubique ferè terrarum, nunc concussa etiam in Anglia, detrimenti caperet; tandem eousque deveniebat, ut assereret in tali casu, fas fore subditis, aut saltem inferioribus Magistratibus, etiam invito, & aliud moliente Principe, omnibus modis, atque adeo, vel armis Religionem veram, ejusque publicum exercitium tueri; addens illustrandae Thesæos suae causam, existimare se, Regem Galliarum, si (dum exercitui Reformatos in urbe aliqua obsidenti interest quotidie) ferro per manum subditi

caderet, justè & sine ullo mactationis crimine occisum iri. Quae verba cum ad Regem, nescio qua ratione delata essent, statim eum in vincula conjici, & captivum ad se adduci Rex jubebat; nemine dubitante quin capite lueret immoderatam linguae licentiam; sed cum examen super causa institutum esset, Juvenis hic (*Knicht* nomine) credidisse se profitebatur, esse hanc communem omnium Reformatorum sententiam, atque ita se à Reformatis Doctoribus esse edoctum, citans Paræum in Commentariis in Epist. ad Rom. Bucanum in locis communibus; & Stephanum Junium Brutum, five \* Authorem Libri, cui Titulus, Vindictae contra Tyrannos. Excusabat hoc aliquantum juvenem, in Theologia Tyronem, non absolvebat plura quam Authores dixerant, construentem, & hypothes

\* Is est Hubertus Languetus, Burgundus, Melancthonius, Thuanus, Pleissæus, & alii summe charus.

ses inde formantem. Itaque ipso in carcere detento, censurae Academiæ postea traditi fuere prædicti Authores. Ac Oxoniensis quidem capita aliquot selecta, pro erroneis, falsis, impiis damnans, Paræi solum commentarios ad Romanos publice conflagrandos censuit, quod etiam factum, conquisitis quotquot in Officinis Bibliopolarum, & Musæis studiosorum, reperiri poterant exemplaribus. Cantabrigiensis verò etiam Bucani locos communes, & Bruti vindicias, publice flammis tradidit: Et ipsos Authores (si modo ita senatus censuit, uti senatusconsultum scripto conceptum, nondum tamen approbatum erat, cum ego id Cantabrigiae viderem) perpetuam infamiam notavit: Fueram hæc perscripturus antea, cum omnino nova essent, nisi una cum Oxoniensi Decreto (quod nunc mitto) etiam Cantabrigiense longè elegantiori formâ, & multo acrioribus verbis conceptum, transmittere desiderassem. Quod tamen nunc quidem, post longam expectationem, editum videre contigit: Simulac haberi poterit, curabo ad te perferendum. Videbar ego in Cantabrigiensi Senatu videre plusculum bilis, in rigidos istos Genevensis reformationis Professores; five ea causa sit, quod Puritanorum omne nomen exosum habent; five quod plerique ibi Remonstrantium sententiae sunt addictissimi: Fui istic tempore Comitiorum, in convivio publico splendidissimo, cui plusquam 30. Doctores Theologiae, alique Equites ac Nobiles intererant, ubi acerrimè de prædestinatione, libero arbitrio, & reliquis



quis apud vos tantoperè controversis capitibus disputabatur, quibusdam Remonstrantium sententiam obnixè defendentibus, adversus Doctorem Balcanquallum, tibi jam pridem tempore Synodi Dordracenæ notum & alios: quo nomine, cum ego valde mirarer, dicebant mihi Doctorem unus & alter (quibus Episcopus Wintoniensis me per literas commendarat) dubium sibi esse, utra pars, plures in Academia haberet fautores, Remonstrantiumne, an contra-Remonstrantium. Quod in privatis colloquiis ipse postea, verum comperi in quamplurimis. Quin ipse, qui nunc est Academiae Vice-Cancellarius (magnæ hic authoritatis nomen) remonstrantissimus est, uti & ille qui ejus rogatu Summè certè elegantissimè conceperat, & mihi jam tum in arctissimam consuetudinem admissio, privatim perlegendum dabat, rogans interim, ne antequam prodisset, exemplar exscriberem, aut cuiquam rem communicarem; quoniam incertum erat, anne iisdem planè verbis unquam divulgaretur: Quod ego dum sanctè amico roganti servavi, non possum ultra quicquam hac de re tibi notum facere. Silere nequeo, quanquam gratiam ex aliorum erga te affectu nullam capto, quam Cantabrigiæ invenerim, multos Vossiani nominis amantissimos; ipsum quoque Balcanquallum, Scotum, qui synodo interfuit: Sed præcipuè Doctorem Hieronymum Bealum, Aulae Pembrokianæ Præsidem, virum eruditissimum, quique humanitate sua, & amore in me singulari, multum me sibi obstrinxit; & voluit quoque, ut cum occasio daretur, affectus sui in te propensissimi testis apud te essem.

Porro, ne hoc quoque ignores, Rex Angliæ, quò doceat Pontificios (ita enim ego lubens mihi persuadeo) uti majore quàm consueverunt, erga Reformatos clementia, die iv. *Augusti*, literas ad senatum, & omnes per universum regnum Officiarios dedit, quibus Pontificios omnes, ubique è carcere liberari iussit, qui, quod juramentum fidelitatis, Regi præstare recusarant, magno numero per totam Angliam detinebantur captivi; Ministris præterea omnibus interdixit, ne ulla inter Pontificios & Reformatos, controversa capita, in publicis concionibus disputarent: Solis enim Episcopis, Decanis, & Doctoribus, ea in umbone attingere, si opus sit, fas esse voluit. Quæ cum multi interpretarentur, quasi Nuptiarum cum Hispaniæ Principissa contrahendarum præambula; ego tamen potius credere malo,

ex ea quam dixi causa procedere; ne si cum vulgo sentiamus, pravis suspitionibus, & perversis ominationibus, injuria fiat Regi religiosissimo, & fidei defensori. Certè disputandi licentiam paululum coartari non est sine ratione, cum alioqui sæpè eveniat, ut argumentis adversariorum ingenuè propositis, solidè respondere nequeant, qui ea moverunt, unde fit ut causæ propriæ, magis obsint quam profint. At tu hæc, pro judicii, quo polles gravitate, melius ponderare potes, quid velint, & quò tendant, quam ego scribere. Itaque desino, teque cum lectissima Coniuge, & Liberis divinæ tutelæ commendo. Vale, vir clarissime, & quo soles affectu prosequi me devotissimum, quæso ultra prosequeris.

Londini, xvi. Aug.  
St. Vet. 1622.

Τῆς ἀποφύσεως,

G. R. Doubletius.

Salutem plurimam, quæso D. Scriverio, D. Barlæo, D. Berchoutio, meo nomine, impertiri velis. Si Deo placet, præsens rursus vobis adero, post bimestre; interim si aliquid à te literarum videre contingat, scis quam id mihi sit futurum longè gratissimum.

## LII.

*Speclatissimo Viro, D. Gerhardo Joanni Vossio.*

Conjunctiss. D. Affinis,

**SI** per sororem Brunæam literas, quas Londino discessurus, ad te pariter, atque illam raptim dabam, rectè accepisti, omnino futurum brevi confido, ut petitioni meæ satisfactum esse gaudeam; præsertim si iis quos ad me transmitti postulaveram libris, faustum de tua, sororis, omniumq; liberorum vestrorum prospera valetudine nuntium adjunxeris. Miro certè res vestras cognoscendi desiderio teneor. Nam quod sororem natu maximam attinet, ne quidem ubi terrarum vivat suspicari possum. Latere te non potest, quàm vario dubiarum opinionum æstu agitetur animus, pro conjunctissimis sollicitus, eoque omnem mihi scrupulum, festinata scriptione eximendum mihi esse cogitabis. Ego hic tertium jam mensem in aedibus Rev. D. Norwicensis vivo; qui summis me in hac mea conditione non pœnitenda honoribus

noribus dignatur. Adspiret modò Deus Opt. Max. conatibus meis, & honoratissimum totius Angliæ Marefchallum, ex gravi lapsu periculose satis decumbentem, sanitati pristinae restituat. Jamdudum boni otii partem, Grotiana ad fidem introductioni impendissem, nisi nobile aliquod conjugandorum par, illustrissimi Comitis filiolum, ad nuptiarum suarum celebritatem advocasset; & nunc quoque cum venerationi, aut equitationi nobilissima indoles intenta est, me comitem postulat. Post hebdomadas tres, quatuorve, in urbem relictis agris migrabimus; ubi si, quod spero; plusculum à talibus exercitiis vacare contingeret, efficiam, ut tibi otii mei ratio constare possit. Deum precor, ut te, uxori, liberisque, incolumem diu conservet, meq; familiæ vestrae utilem, quandoque præstet. Saluta omnes sanguinis, & amicitiaë necessitudine nobis junctos.

*Raprim, Ludhami,  
in edib. Rev. Episc.  
Norwicensis, Anno  
M. D. C. XXII.  
vi. Non. Aug. St. vet.*

*Tuus omni Officio,*

Fr. Junius, F.F.

Rudem aliquam paterni sigilli imaginem ad me transmittas velim, plumbo vel cerâ expressam.

### LIII.

*Clarissimo, Eruditissimoque Viro, Dom.  
Gerardo Johanni Vossio, Professore  
dignissimo.*

Vir Clarissime,

**V**irum reverendum D. Rivetum, Collegam vestrum quem mihi Galliam petenti, bona fors, & summa viri humanitas, viæ & consiliorum ducem dederant, longè gratissimum; ut itineri quo Bataviam repetit, accinctum videam, nec quam in perferendis literis, comiter offert operam, ambabus arripiam manibus; nec impetrare ab animo meo possum ipse, nec finit vinculum arctissimum, quo me tibi obstrictum tenes, non ad sempiternam solùm acceptorum beneficiorum memoriam, sed & eorundem agnitionem frequentissimam. Uti enim is quem Principis liberalitas, latè fundorum constituit Dominum, sub eâ lege, ne unquam se accepti muneris immemorem probet, neutiquam officio suo faciat satis, si intra se, & animum suum, semper sit gratissimus, nisi etiam quotannis, oblata re, vel minimâ, authorem

suum recognoscat: Ita & ego graviter me peccare crediderim, in sanctas officiorum leges, si simplici contentus animi gratitudine, non subinde ore quoque & calamo, summa tua in me merita, ingenuè agnoscam, & profitear. Eamque oris, & calami professionem nudam tua humanitas, pluris facit scio, quàm vulgus hominum, quicum nihil tibi unquam commune voluisti, magnos æstimat aris Thesaurus. Utinam verò, dum ego, quod officium mei est, facere contendo, unâ aliquid adjungere rerum novarum, quod te oblectet, possim; aut de virorum eruditorum in Gallia (quos tibi vel fama, vel literarum commercium, vel utrumque notos fecit) lucubrationibus, & curis habeam, quod perscriberem. Verùm quia pusillum illud temporis, quod in Gallia transegi, æquè ab aula, ac eruditorum virorum consortio transegi remotus, nihil nunc tale occurrit, hæc tantummodo scribenti, ut cùm conluetus tuus erga me, & tamdiu probatus affectus, te ex D. Riveto, inter alia querere faciat, quid de me, quem secum unâ abduxerat, egerit; ipse tum quasi rogatus, respondeam, me divini numinis auxilio, hæctenus sospitem, & optata valetudine fruientem, ac paria de te, familiaque tuâ omnibus votis sperantem, hoc unice expetere, ut quæ tibi ex animo semper vovi, & voveo, propensissimi affectus officia, aliquando tibi, aut tuis (quod nunc non sunt) usui esse possint. Vale, vir clarissime, & nunquam desine amare

*Thouarci, rapriss.  
die 17. Septemb.  
1623.*

*Tuum, tuarum virtutum pro  
viribus Cultorem Max.*

G. R. Doubletium.

### LIV.

*Clarissimo Doctissimoque Viro Dom. Gerardo Joanni Vossio, Professore  
Academiae Lugdunensis.*

*Lugd. Batav.*

S. P.

**N**isi humanitatem tuam nossem, clarissime vir, excusarem literarum mearum audaciam, ad te hominem semper in literis occupatissimum, præsertim cum sine argumento veniant; nisi tu fortassis hoc pro argumento, satis magno, (quæ tua est benignitas) reputabis, quod amorem, & cultum meum, erga virtutes tuas perpetuum testentur. Certe, mi Vossii,

fi, quamvis interea temporis, ex quo tibi Lugduni valedixi, varias, & terras & maria obiverim: (fui enim & in Britannia, & in Gallia, & in Italia, redux deinde, in Germaniam excurri, in vicinam quoque nobis Poloniam) nunquam tamen fuit, ut non sæpè de eximiis virtutum tuarum meritis, ea cogitaverim, quæ illorum admiratorem religiosum, cogitare par est; sæpè etiam apud alios, quoties fuit occasio, mentionem eorum iniecerim, quos partim inveni tibi insigniter velle, partim, (quod sine jactantia dixerim) tales ego de prædicatione mea feci. Quo meo erga te studio, quamvis alia desint, (ut rectè nihil quoque est aliud, quo me apud te efferre possim, aut velim) hoc fortassis mereor, ut non neget mihi in posterum, quamvis longè absenti, favorem eundem quo me præsentem nihil certè magis merentem prosecutus es. Vellem nunc de studiis meis, aliquid ad te, tanquam omnis, sive sacræ, sive profanæ, literaturæ promum-condum deferre: Sed hoc forsân prudentius eo differam, cum intellexero tibi non ingratum, literis à me sollicitari: nunc satis sit veluti vadium primum tentasse. Requiris tu forsân contra à me aliquid, de hujus Academiæ statu. Est sanè illa si numerum Professorum putes, sic satis rectè constituta; nec desunt inter eos viri egregiè eruditi: Interea cujus fama ad externos manarit, vix habeo nominare, præter Pelargum, & Origanum, illum in Theologicis, hunc in Mathematicis, tibi sine dubio notum. Est & Neander quidam Ethices Professor, Vir optimarum literarum, nec minus Juris Civilis, & Philosophiæ practicæ, insigniter peritus, quo nullum hic tractus in latina lingua oratorem habet elegantiorum, cujus & orationes funebres, typis descriptæ extant; sed nescio an Rhenum, & Danubium transierint. In disputationibus, nemo hic magis fervet Wolfgango Crellio Theologo, cujus præmaturum ingenium (non multum enim, ut suspicor, triginta annos excessit) longum adhuc bellum omnis generis, hæreticis minatur: Aperuit nuper eodem ferè tempore, duo collegia, alterum contra Lutheranos, alterum contra Socinianos, quos vocant. Socinianorum nomen revocat mihi in mentem, Antilirotium, quem scias Racoviam, jam sub typis fervere, & fortassis ad umbilicum esse perductum: Vidi enim jam ipse, bonam illius partem. Author illius est Joannes Crellius, Wolfgango nostro nomine quidem similis, sed nulla cognatione devinctus; juvenis ferè & ipse,

mihi jam ante plurimos annos, notus in Academia altorphinæ, ubi jam tum emicabat in illo singularis quædam ingenii acrimonia, & judicium supra ætatem, quæ tamen ille modestia planè virginali, quantum poterat, celabat, & deprimebat. Porro si quid ad me rescribere aliquando dignaberis, literas tuas mittas saltem Amsterodamum ad Remum Egbertum Episcopium, Mercatorem tibi, ut credo non ignotum: Cum illo sic constitui, ut sciat, quonam illas ad me dirigere debeat. Vale, optime Vossi, & bono Reipublicæ literaræ, quàm diutissimè feliciter vive.

*Dab. Francofurti ad  
Oderam A. D. viii.  
Eid. Nov. ann. æræ  
Chr. clc xxiij.*

*Tui observantissimus,*

Mart. Ruarus.

LV.

A. M. Vossius.

Monsieur,

**J**E vous envoie cy jointe la lettre de Monf. Boswell, la longue & dangereuse maladie du quel a esté cause du retardement de vos affaires par deçà. Maintenant vous entendrés de sa lettre la continuation de la bonne affection de Monf. le Baron de Brook envers les bonnes lettres, & envers votre personne: à laquelle lettre je n'ajousteray rien de ma part, si non, ce que j'ay entendu de mes propres oreilles ces peu de jours passéz de la bouche de Monf. le Baron c'est qu'il vos attend par deçà avec impatience; qu'il vous assure de ce qu'avez désiré par vous lettres; que rien ne manquera de sa part, qui pourra appartenir à vostre accommodement. Monf. je vous conseille de haster tant que vous pourrez vostre voyage envers nos quartiers: ne vos arrestez à ceste première fois à vostre famille qui pourra suivre commodement en bon temps: cependant ne vous desgagez pas entièrement de l'entretenement dont l'Université de Leyden vous a déjà pourveu, mais si tout ne vous agréé icy, ordonnez vostre voyage de la sorte, qu'y puissiez avoir seure retraite; je ne dis pas cecy, pour vous descourager en la moindre façon, ou pour ce que je me doute aucunement de la réelle execution des promesses de Monf. le Baron (lequel est honorable en tout & par tout) mais à cause que luy est fort âgé; & pourra faillir en un moment de ceste vie, devant que les bons desirs qu'il a conceus soyent

F

de



de tout point arrestéz. Adieu Monf. & hafftez vous de nous venir trouver, ou ne trouverez autre chose sinon les effets d'une cordiale affection.

Londres ce 15. de  
Janvier 1624. St.  
vet.

Monsieur,

De vostre tres-humble  
Serviteur

Dudley Carleton.

## LVI.

Doctissimo Viro Gerardo Joanni Vossio,  
S. P.

\* Epistolam  
hanc in Miscellaneis Historiis primis vulgavimus.

INCIDI \* nuper, doctissime Vossii, dum officinas identidem pertranseo, in opus tuum de Historicis Græcis, eruditum sanè & ad meum gustum. Coëmi, dumque investigo quæ in limine Cunnæus J. C. ait de arte Historiæ à te præmissa esse, non hîc reperi, negantque sibi vîsa. Si exiit annis prioribus, jube ut Elzevirii mihi curent. Narro tibi apud me collecta esse, veluti naufragii scalpos, Vet. Historicorum Græcorum fragmenta, ut Latinorum edidit & Fulvius Ursinus, ab Antonio Augustino collecta, ut nosti, & Ant. Riccobonus. Si putas istic tua operâ evulgari posse, non meo appposito nomine, (hac lege) mittam ad te per Tabellarium, cui tantum portandi persolves laborem, præterea nihil. Rhetores adhæc antiquos collectos habeo, & nonnihil illustratos, qui & tuam implorant opem, quia Rhetorica tam excellenter simul iterumque edenda curasti, ut & de priscis Rhetoribus libellum, quem legi libenter, ut antea Tragicorum vet. Latinorum à te digestas reliquias. Macte porro, & Græcos Latinosque Scriptores, ut cœpisti, illustrare, ac compingere perge feliciter. Vale. Salutat te tenebrio, qui Photium dedit Latine. Antuerpiæ, 24. Maii 1624.

## LVII.

Clarissimo Viro D. Gerardo Joanni Vossio, Eloquentiæ, & Histor. Professori, S.

ACEPI, mi Affinis, ante aliquot hebdomadas, opuscula tua, quæ ad me misisti; omnia perplacent, præsertim verò illa, quæ contra Lonigum edidisti, quæ non solum ego, sed & D. Scultetus, & doctissimus quidam Baro, ex Austria profugus, cui etiam dedi exemplar, quod mihi miseris, cum voluptate legimus: optamusque omnes, ut quemadmodum cœpisti, ita pergas à vocibus, aut disputationibus scholasticis, tandem ad res venire; sunt quidem illa rei literariæ utilia, hæc verò Reipublicæ utiliora, licet iis, à quibus prodeunt, periculosa. Deus tamen vivit, adestque iis, qui curam populi ipsius, eorumque quos ei præfecit, habent. Placet quod tam breviter, & methodicè responderis. Nec enim susurriones isti tanti sunt, apud nos, ut in eorum gratiam, magna volumina condi necesse sit. Si duobus, aut tribus exemplaribus carere posses, velim ea ad me mitti, ut & alios, qui à me petierunt, eorundem participes faciam. A Samuele Nerano tandem literas accepi, ut & à sorore nostra Roltochio. Ingenii satis habet, ut mihi quidem videtur: Faxit Deus tantum, ut ingenio rectè utatur. Respondi iis Kal. Maii, & quidem amicè, ut inter fratres, & affines decet, rogavique ut sese tandem cum Ecclesiis nostris reconciliet. Videbo quid præstiturus sit. Utinam diem illam mihi videre liceat, qua familia paterna audiat in causa religionis, vestigia ipsius premere! Tu, quæso, me pro viribus juva, & ipsum ad idem mone. Pro pecunia numerata mulieri isti, gratias habeo. Scribit soror, me nunc aliquo modo, in ære vestro esse. Puto tamen illud perexiguum esse. Utcumque sit, conabimur satisfacere. Vale, mi affinis conjunctissime, & Uxori Liberisq., plurimam à me, Uxore, & Matertera salutem dic. Nos omnes per Dei gratiam valemus, etiam si filiola natu minor, ante aliquot hebdomadas, in summo vitæ discrimine versata fuerit, à quo tamen gratiosè eam liberavit Deus.

Raprim, Groningæ,  
17. Junii 1624.  
St. vet.

Tuus Affinis,

J. Junius.

Quas hic conclusas vides, eas rogo ad D. Lotium perferri cures.

LVIII.

## LVIII.

*Translation d'une lettre du 27. de Juil.  
1624, écrite par le Sr. Guillaume  
Boswell (Secrétaire de Monseigneur  
le Garde Seau) au Sr. Dudley  
Carleton, Secrétaire extraordinaire  
du Conseil Privé de Sa Majesté de  
la Grand Bretagne.*

Monsieur,

**I**L vous peut souvenir de ce dont je vous ay parlé touchant Gerardus Vossius. Je vous prie encore ceste fois, de lui donner avis par la premiere opportunité, que le Seigneur Broock ayant resolu de fonder presentement une lecture d'histoire (ou *Civilis Scientiæ*) dans l'Université de Cambridge, à intention sur ma recommandation dudit Vossius, de la conférer sur sa personne. Les conditions ne seront point grandes ne difficiles; son entretien sera mille quatre cents florins par an ou davantage, & son logis franc, peut estre, en quelque College. S'il accepte le service & place, obligez le d'escire sa responce à vous ou moy, a fin que je la puisse monstre à la Seigneurie qui l'attend en grande devotion, & qu'il s'assure que je feray mon mieux d'amender des termes dessus specifiez; ou luy faites sçavoir que s'il escrit, qu'il sera necessaire qu'il face un voyage, pourveu que la Seigneurie de fraye ses dispens, en Angleterre. Je parleray à la Seigneurie de l'en assurer, & plus particulièrement de la somme. Je vous prie derechef de me faire entendre responce de cet affaire avec autant d'expedition que vos occasions vous permettront, & vous m'obligerez de tant plus à demeurer,

Monsieur,

*Du College de  
Westminster,  
le 27. de Juill.  
1624.*

*Votre Serviteur tres-  
humble,*

Guill. Boswell.

Je fus hier chez Burlamachi pour vous voir, & si je n'estois maintenant en haste sur mon partement vers Cambridge j'escrois à Vossius moy-mesme, comme il y a apparence que je feray par le premier ordinaire.

## LIX.

A. M. Vossius.

Monsieur,

**A**Yant esté nagueres à Leyden en esperance de vous y pouvoir trouver, on m'a informé que vous vous estiez retiré à Dordrecht pour quelque temps; de sorte que pour ceste fois là je faillis de la commodité que je m'estois proposée de vous parler, touchant les desirs de quelques bons amis que vous avez en Angleterre, quoy qu'incontinues encor à vous, lesquels ont complotté avec my Lord Brooke, de vous proposer une honeste condition de vivre en nostre Université de Cambridge, si ainsi n'est que vous soyez déjà mieux pourveu au lieu ou vous estes presentement entretenu: les particularitez de ceste proposition estants contenues en translat d'une lettre, qui m'a esté escrite sur mon dernier partement de Londres de la part de Monsieur Boswell, Secrétaire de Monseigneur le Garde Seaux d'Angleterre (homme tressçavant, & admirateur ensemble de la grande doctrine qui est en vous, selon qu'il a bien peu appercevoir par vos escrits) vous en delibererez s'il vous plaist & m'enverrez vostre responce demain ou après-demain; laquelle je desire d'avoir au plustost, estant dans peu de jours pour retourner en Angleterre: vous trouverez au translat de la lettre de Monsieur Boswell son affection point dissimulée de vous rendre service; & s'il vous pluit de lui escire un petit mot sur ce sujet, je seray bien aise que d'estre porteur de vos lettres: comme aussi de vous faire tout la courtoisie qui sera en mon pouvoir, quand vous aurez occasion de vous servir de moy. Ainsi en attendant vostre responce, je demeure,

Monsieur,

*A la Haye ce  
10. de Sept.  
1624.*

*Votre serviteur tres-  
affectionné,*

Dudley Carleton, au logis de  
Mons.<sup>r</sup> l'Ambass.<sup>r</sup> de la Grand  
Bretagne.

## LX.

*Incomparabili Viro Dom. Gerardo Joanni Vossio.*

Vir Clarissime,

**N**isi notum me tibi, meamque tui ob-  
servantiam, abundè tibi perspectam  
scirem, esset certè quod verer, ne om-  
nem & tui, & meorum officiorum me-  
moriā, apud me extinctā crederes.  
Adeo non me latet, quamdiu sit, quod  
nihil ad te literarum dedi. Sed nec quod  
darem fuit hætenus, imo ne nunc qui-  
dem esset, nisi ad scribendum, me com-  
pellerent infausti hic, de morbis conta-  
giosis Lugduni, & alibi in Hollandia a-  
criter grassantibus, rumores. Delatus no-  
bis hic Romæ fuit Nuncius, de morte præ-  
matura D. Erpenii, qui certè mihi rei-  
publicæ literariæ causā, fuit auditu tristis-  
simus: Nec minus alter me afflixit, de  
obitu D. Vorstii, sed postremus hic quā  
malè me initio habuerit, cū balbutiens  
amici lingua, non nimis accuratè nomen  
illud apud me proferret, potius apud alios,  
quam apud te referam, tum ne malè o-  
minari videar ei, qui plusquam mortalium  
cuiquam boni, & precor, & auguror, tum  
ne ostentabundus credar, in iis quæ debiti,  
& millies promeriti affectus, esse meus mi-  
hi indicat animus. Deus Opt. Max. quod  
temerè, & mihi, & omnibus bonis, mæ-  
stissimum, perferebat rumor, in vitam  
longiorem, omnibusque bonis, faustissi-  
mam tibi convertat, precor. Cæterum  
quanquam vix mihi, (parum adhuc ordi-  
nariæ tabellariorum profectiois, hic loci  
perito) fuerit pauca quæ vides scribendi  
tempus, & manum etiam nunc à charta  
avocet, qui hanc laturus, festinabundus  
expectat; nolo tamen ignores, interfui-  
se me hodiernā die, actioni, & congre-  
gationi solemnī, & publicæ, Cardinalium,  
& sancto officio præpositorum, inquisito-  
rum generalium, quā cadaver Marci An-  
tonii de Dominis, olim Archiepiscopi Spa-  
latensis, pendente suā cum inquisitoribus  
causā, in publico carcere, ante trimestre  
circiter mortui, igne unā cum ejus scri-  
ptis cremari iussu, ad æternam ejus in-  
famiam fuit; eo quod primum apostata  
factus, posteaquam dignitatibus restitutus,  
& in gremium matris Ecclesiæ receptus,  
denuò fuerit, ad hæreses Protestantium re-  
lapsus, licet mortuus hæreticum eum esse  
ipsa neget sententia. In qua plurima sunt  
consideratu dignissima, & talia quæ velim

magno retinere potuissem, aut bona fide  
descripta consequi possem. Adlaborabo  
quantum potero, & prima occasione ad te  
dabo hac de re largius. Cardio causæ in  
eo vertitur, quod unioni inter Ecclesiam  
Catholicam Romanam, & eas quæ Pro-  
testantium dicuntur, torus studuerit. Va-  
le, plus nec charta capit, nec permittit  
tempus.

Romæ, die 21.  
Decembris,  
1624.

*Tuus omni Affectu,*

G. R. Doubletius.

## LXI.

Arn. Buchellius, D. Gerardo Joanni  
Vossio, *Eloquentiæ in Academia Bat.  
Professori, S. P.*

Doctissime Vir,

**C**um nuper à Nepote nostro, Josepho  
Vorstio, mecum domum attulissem  
libros vestros, de Historicis Græcis, non  
tantum plurimum eorum lectione delecta-  
tus sum, sed & infinitæ lectionis memo-  
riam tuam, simul exactum de singulis ju-  
diciū, mirum in modum æstimare ceppi.  
Atque ea causa est, quæ me impulit vos  
etiam vix notos, rudibus hisce, & penè  
audacibus meis literis compellare. Et ne  
hæc me fingere putes, inter legendum  
occurrerunt, quæ animi dubium facerent:  
Nempe quod cū nobilis Vir, Theod.  
Douza, Georgium Curop. de Constant.  
capta cum sua versione olim ediderit, vos  
non Georgii, sed Joannis, eidem authori  
nomen indidistis. Quod etiam dubitatis  
Julianum Imp. vulgo Apostatam dictum,  
Historicis adscribere; cum ejus Cæsares  
historiam sapere videantur, etiamsi non  
absque aculeo scripti sunt, & in Episto-  
lis ejusdem Historica plura referantur,  
atque ad historiam pertinentia, alia ab eo  
conscripta esse, verisimile sit, cum ipse  
inter Principes doctissimus, atque gloriæ  
mirum in modum appetens fuerit, multa-  
que gesserit memoria non indigna. Sed  
hæc sint, quasi præludia vobiscum amici-  
tiæ ineundæ, quā sanè, omnibus modis,  
licet sim ab ambitione alienissimus, ani-  
bire me fateor. Doctissimum Scriverium,  
diu est quod expecto, sed ea spe cecidisse  
videor; vereor etiam, ut ab undis Haer-  
lemenensibus, ardor in illo pristinus rerum  
nostratum mergatur, eaque in studiis so-  
litis alieniorem reddant. Gratum nihilo-  
minus



minus erit, si eidem à me salutem dicere grave non fuerit; & simul petere, quid de libris suis, apud me existentibus, fieri velit. In patriâ historiâ, quæ nuper admonebas, equidem vellem, nisi tam multa deessent, & jam tardior ætas, ab omni labore abhorreret, cogitabimus tamen, si quid ad illum adferre poterimus. Interim vos, doctissime, & diligentissime Vossi, (cui studia, & literæ quamplurimum debent) optumè, & diutissimè valere, & vivere optamus.

*Trajecti in Batavis,  
calamo festinan-  
tiore, vi. Id. Jan.  
An. ineunt. 1625.*

## LXII.

*Clarissimo Præstantissimoque Viro Dom.  
Gerhardo Vossio, Eloquentiæ Pro-  
fessori.*

Vir Clarissime.

**S**I à negotiis tantum otii fuisset, decreveram diebus hisce, isthuc excurrere, uti videndi tui ac salutandi desiderio & voto, frui possem; quod tamen propediem futurum confido. Interim quum dignissima \* Oratio tua in funere istoc Christiano Orbi funestissimo habita juri publico asserenda sub prælo versetur, visum mihi fuit, rerum mutationi, atque præsentī constitutioni consonantius fore, immutari etiam nonnihil in iis, quorum tibi ego materiam suggesti; scilicet si illud supprimitur; Regem Africæ in mandatis Legato dedisse, ut Dominum Erpenium P. M. in consiliorum societatem adscisceret; sed in locum ejus substituatur, Legatum eidem nunquam quidem sibi viso, sed ex famæ claritate, & Regis erga eum benevolentia percognito, hunc honorem detulisse; non quod ibi scrupulus sit, quia ita ex ejus ore ipse accepi; sed quia præstabit in eo tempore ita obsecundasse, uti coram tibi aliquando exponam. Nosti enim minima etiam rerum politicarum momenta esse tenerrima. Pectoris tui candor, atque prudentia condonabit mihi, spero, libertatem, quod te audeam in opere tuo aliquis monere. Vale, vir Clarissime. Deus Opt. Max. Musas tuas diu prosperas, & nobis supersites tueatur, meque eorum

\* Orationem  
intellige in  
Tho. Erpenii  
obitum.

rogo, numero adscriptum velis, qui eadem amore summo, & veneratione prosequuntur, etenim dum vivam, futurus sum

*Hagæ Comitum  
Octob. Kalend.  
Febr. M. DCXXV.*

*Tui nominis Amantissimus,  
atque observantissimus,*

J. Golius.

## LXIII.

*Viro Clarissimo Doctissimoque D. Ger-  
hardo Johanni Vossio, Eloquentiæ  
Professori.*

Vir Clarissime,

**E**X literis D. Gerardi Meerman, ad fratrem suum, Italici itineris mihi comitem salutem, quam mihi mittebas, quo æquum est gaudio, accepi: Et summopere lætus intellexi, quantis indicis tandem agnoscere possis, quod ex Anglia redux sæpe præsens tibi retuli, summorum in eo regno virorum, de tua eruditione judicium. Vocat te magnæ Britannia Rex, quantum audio, ad Professionem Theologicam, in Academia Cantabrigiensi obeundam, oblatisque honestis admodum conditionibus, & stipendio luculento invitat ad mutandas, quibus ab infantia assuevisti cum Anglicanis, Batavas sedes. Quod si obviæ huic fortunæ aurem præbes, & nos deseris, serò saltem ediscent nostri, ex exterorum judicio, virtutem sublatam in pretio habere, quam præsentem negligere se, & fortasse etiam odisse turpiter ostenderunt. Cæterum quid ex re tua sit, ut in isthac causa agas, & propria abundè suggeret prudentia, & amicorum, quos frustra frendentibus invidis, habes plurimos, docebunt consilia. Ut autem ego consulere auserim quicquam ei, qui consultorem, in omnibus optem negotiis meis, non permittit ætas, & propriæ imperitiæ conscientia. Hoc tamen liberè dixerim, ut nisi talia certò offerantur, quibus & honori tuo fiat satis, & tu cum familiâ contentus vivere semper possis, etiam extra omnem augmenti, & meliorationis spem, optare me, ut ne patiaris, lactari te ulla spe incertâ, utcumque magnâ, & speciosâ. Habent hoc Angli, quod externos ament, & magni faciant eorum virtutes, sed quatenus nihil ad se, inde redire potest detrimenti. Cæterum vix quicquam ita arduum

um credunt, cui non sese, & suæ Nationis viros, sine exterorum subsidio sufficere existiment, prout in invidiam adversus eos, à quibus vinci se viderint: Atque hinc rari admodum, imò nulli in Academiis Anglicanis professores exteri. Nec crediderim expetere adventum tuum Cantabrigienses Doctores, licet certus sim, de plurimorum, & præsertim D. D. Hieronymi Beali Aula Pembrokianæ Præsidis, viri summi & eruditissimi, luculento erga te affectu; sed totum hoc negotium, nisi me conjectura fallit, à Rege est, & à propensâ Reverendissimi Wintoniensis Episcopi, in te omnesque eruditos voluntate; Ejus autem quanta sit apud Regem, & in Academia Cantabrigiensi Autoritas, unusquisque novit, & privatissimis indicis, testari ipse possem: Novi ejus favori, & benignitati esse obstrictos, qui isthic præcipui sunt Doctores, & maximeperè quidem; adeo ut dubium non sit, quin vel hoc nomine solo, gratum ipsis futurum sit, quod isti placuerit. Inaudivi hic ante biduum circiter, nescio quid incertum de Reverendissimi Episcopi morte; quæ si accidit, Vir magnus, Angliæ, & terrarum orbi, tibi que summus Mæcenas occidit: sed nihil hoc absterrebit te à commigratione, modò certa proponantur. Eo vivo plura sperare poteris, vel mortuo servabunt fidem quam dederint, & alios Deus tibi amicos suscitabit, & fautores, æstimandis pro merito tuis virtutibus pares. Non aliena ab his quæ fortasse liberius scripsi quam debueram, suadet Illustrissimus legatus, cujus quis erga te sit animus non est quod à me scire desideres: Heroem nostri bonæ mentis, & felicitissimo hoc conjugio (quo vivit fortunatus, & iterum adolescit senex) tibi uxori que tuæ affinitatis vinculo conjunctum; in cujus ædibus dum summâ, & nunquam promerendâ viri humanitate victus, jam tertium ago mensem, sæpè occasio fuit gratis de te sermonibus, ostendit serio gaudere se: Vir Illustrissimus cum primùm ex me intellexit, oblatum tibi in Angliâ munus, & nunc quoque cum referrem, parare me literas tibi, & certum esse, quantoperè gratum tibi futurum sit, tam amicæ prudentiæ, in tam gravi causâ consilium; quale suppeditare ipse poterat; jussit salutari te plurimùm, addiditque omnino, se Authorem tibi fore, ut si certi quid, & quod ex re, & existimatione tua esse possit, offeratur, neutiquam id respuas, majori te isthic loco fore, quàm in Patria, aut ea regione, quæ pro Patriâ hæcenus tibi

fuit; æque saluari aurâ istic vesci mortales, atque in Hollandia; nec sic ultra te vexatum iri molestiis, quas oblatrando semper, & maledicendo, tot continuos annos, tibi creant inficii quidam, & malevoli obtrectatores. Sed ut certus primùm sis de loco honesto, & non aspernando emolumento, antequam de commigrando statuas quicquam, idem Vir Illustrissimus suadet, consilium hoc versiculo faciet confirmans, & restringens: *sed non mutabis, nisi cum plurale videbis.* Hæc ego sic familiariter, & tibi quem res tangit scribo, tuæque prudentiæ committo, ut quibus hæc referri non interest, iis ut ne referantur interesse judices.

De iis quos hic Venetiis, nominis tui fama amicos tibi fecit, doleo non posse me comperta scribere. Illustrissimum Dominicum Molinum Consiliarium compellere nunquam mihi licuit, quanquam adferrem literas commendatitias, à cognato meo de Thienen, qui dum hic esset, ejus amicitia usus est familiariter. Salutavi virum per internuntium; scilicet, quia quasi de familia sum Illustrissimi Domini Legati, æque mihi interdictum esse censetur, ejus omniumque Nobilium alloquio, ac si ipse quoque de gravibus causis legatus advenissem, periculumque esset, ne quid in Reipublicæ perniciem moliri, eamque arcanis consiliis subvertere, & in ruinam trahere, Magnus Atlas studerem. Tanta hic pro securitate cura, tam cum exteris suspecta omnia, vel minima. Cum Patre tamen Fulgentio, quanquam & ipse omnium, ferè Reipublicæ Consiliorum sit particeps, semel iterumque loquendi datam occasionem neutiquam perdidit, summo-perè delectatus viri insignis colloquiis, omni humanitate plenis, & familiari de omnibus rebus tractandi libertate gratissimis. Nec apud illum ignotus vivis; sed ubi Pelagii historiam, à te editam audivit, incredibili se desiderio teneri ostendit, materiam illam admodum, inquiebat, confusam, & intricatam, è viri eruditi Museo prodeuntem, videndi & perlustrandi. Verum eò usque, quod libens aliqui fecissem, viri desiderio satisfacere non potui. Promissis me obstrinxi, simulac Deus me Patriæ reddiderit, operam daturum, ut exemplar nanciscatur. Propediem enim, Deo adjuvante, iter in Gallias, indeque domum, suscipere cum sodalibus nostris stat sententia. Ubi non minima pars erit votorum meorum de te, tuæque familiâ, aut grata, si discesseris, ex amicis intelligere, aut te tali loco

loco reperire, qualem insignes tuæ virtutes promerentur, tibique omni affectu precatur

Veneris die  
18. Aprilis.  
1625.

Tuus in solidum,

Georgius R. Doubletius.

Salutat te officiosissimè D. Colvius, seque totum offert, si quâpiam in re usui tibi esse possit.

#### LXIV.

A Monsieur Vossius.

Monsieur,

C'Est pour vous advenir que vostre lettre que m'escrivistes quelques semaines passées est arrivée à la Haye moy estant au Camp. d'où estant de retour, je trouvoy que Monsieur le Baron de Broock avoit fait escrire au Maistre d'hostel de la Royné de Bohème par la main d'un des principaux Secretaires d'Estat de sa Majesté pour sonder & chercher ou estoit devenu vostre résolution de venir en Angleterre, veu qu'il n'en avoit nulle nouvelle en si long temps: & si vous aviez changé d'avis, qu'il se pourvoiroit incontinent d'un autre professeur. Monsieur, je ne scay point comment vous avez accomodé vostre fait avec Messieurs les Curateurs de vostre Université; mais j'eusse bien désiré que vous eussiez voulu escrire les lettres à Monsieur Sieur le Baron & aussi à Monsieur Boswell selon que je vous avois proposé dernièrement. Je voy qu'il vous fault résoudre sans plus de delay, chose que je vous supplie de faire: car autrement on suppléera la place laquelle on vous a désignée par quelque autre. Ne vous à mettez pas trop en doute, que n'avez l'accommodement que vous desirez; & si voudriez visiter nostre Angleterre, que je puisse avoir le bien de vostre compagnie sur le milieu de la semaine prochaine, que je me mets en chemin pour y aller; ou moins faites m'avoir vostre finale résolution en cest affaire, auquel si c'estoit moy à qui on proposeroit telles conditions, & que je fusse aussi capable comme est Monsieur Vossius à telle charge, je ne ferois pas tant de scrupule pour m'y accommoder. Si vous avez envie d'escrire quelque chose à moy, ou bien de venir parler sur ce sujet, diferez le pour quatre ou cinque jours; car aussi long temps

je me trouveray absent en l'armée; cependant je demeure, Monsieur,

Ala Haye ce 19.  
de May. 1625.

Vostre tres fidele amy

& Serviteur,

Dudley Carleton.

Je vous escriray derechef quand je seray revenu du Camp, au je m'en va tout à cet heur; cependant je vous prie de faire vostre finale & absolue deliberation & résolution; à fin qu'à ma venue en Angleterre je puisse satisfaire à l'attente de Monsieur le Baron.

#### LXV.

Doctiss. Vossi,

QUamvis antea ad te scripisssem, ita ut vel teipsum, vel à te saltem literas jampridem expectarem: hanc tamen opportunitatem nactus, secundas hasce visum est exarare. Illustriss. D. Baro Brookius daturus est Academiae Cantabrigienfi pecuniae nostratis centum libras annuas, in stipendium historici Praeceptoris: Hoc & tibi (si volueris) & successoribus tuis certum erit, ac perpetuum. Adjecit insuper (me rogante) in tuam solius gratiam, domum apud Cantabrigienfes, tibi tuisque recipiendis satis amplam: pro qua viginti duæ (aut plures) librae consimilis monetae annuatim illi solvendae. Ita ut inter summam à me commemoratam, & à D. Barone promissam, differentia sit non magna. Spartam hanc vides (si placet) tuam: eam tamen lege, ut illum ornaturus, te huc quamprimum conferas. Te praeter omnibus cupit Dominus Baro; ut cunque non desint alii non obscuri nominis viri, qui has condiciones libentissime amplecterentur. Tu ergo quod facturus sis tecum quam celerrime statuas, ac me atque ipsum adeo D. Baronem facias certiores. Dudum factum oportuit. Ille enim vix æquo fert animo, nullas se jamdudum à te accepisse literas: imò nec in tuis ad alios ullam sui factam mentionem. Ac ut ingenuè dicam, quod sentio; Conditiones oblatae sunt ejusmodi, ut vel acceptandae jampridem essent, vel cum grati animi significatione reculandae, non obstinato silentio rejiciendae. Si placet veni. Sin minus rescribe, ut quid porro agendum sit Opt. D. Baro quamprimum apud se statuatur.



statuat. Vale, Vir Clarissime, meque  
confide futurum semper

*Dab. westmonasterii.  
In adibus Honoratissi-  
mi Domini Episcopi  
Lincolniensis. Mag.  
figil. Angliæ custodis.  
20 Maii. A. D. 1625.*

*Dignitatis tuæ*

*Studiofissimum,*

W. Boswell.

LXVI.

A. M. Vossius.

Monfieur,

**M**E voicy maintenant de retour en  
ceste place, après avoir fait plus  
long séjour au Camp que je ne pensois.  
Or si est ce que je vous prieray bien fort  
de vous vouloir trouver à la Haye de-  
main, à fin qu'ensemble nous nous puissi-  
ons resoudre finalement pour répondre à  
l'invitation que le Baron de Brooke vous  
a faite; j'ay reçu lettres tout fraisch-  
ment de Monsieur Boswell, par lesquel-  
les je suis bien éclairé en vostre fait, &  
à cause que mon voyage en Angleterre est  
à cette heure si proche (comme de fait  
est le commencement de la semaine  
que vient:) je desire uniquement d'en  
discourir avec vous. J'espère que Madame  
votre femme se sera remise de la sorte  
qu'elle vous permettra bien de nous venir  
voir: & quant & vous je vous supplie  
de m'apporter toutes les oeuvres Mathema-  
tiques de Simon Stevin en François selon  
qu'elles furent imprimées n'agueres in fo-  
lio desquelles je croy vostre libraire Elzevir  
vous sçaura bien accommoder, dont je  
payeray volontiers le prix que vous accor-  
derez avec luy. Ainsi je vous recom-  
mande ou tout-puissant, & demeure,

*A la Haye ce 28. Monsieur, vostre Tres-fidele  
de May 1625.*

*Serviteur Dudley Carleton.*

LXVII.

*Viro Clarissimo Gerardo Vossio.*

**N**ON dubito, Vir clarissime, quin li-  
teras à me desideres; Ego verò &  
dare eas ad te volui; verum tempus mihi  
expectandum erat, dum ad locum desti-  
natum pervenirem, & res meas ordinarem.  
Primum itaque Ottoniam veni, felicis-  
sime, Deo gratias, ad Oligerum Rosacran-  
zium; Virum ut Nobilitatis antiquissimæ,  
sic virtutibus longè maximis exornatum,

& imprimis mihi additum. Is me men-  
sem totum tenuit, benignissimèque habuit;  
nec dimisit nisi donis oneratum. Inde  
Soram me recepi, eoq; veni ad diem XXIV.  
Junii Gregoriani, cum suppellex mea  
omnis pridie adducta esset. Deo meo  
gratias ago, qui in universo itinere tam  
benigne mihi adfuit. Locus multo est  
amœnissimus; sylvâ, lacu & segetibus  
undique cinctus: itaque ambulationes præ-  
bet jucundissimas. Certe nullum domi-  
cilium Nobilitati regni sui instituendæ con-  
venientius, gratiusque Rex eligere potu-  
isset. Postridie quam advenissem, Duces  
Fridericus & Ulricus, Regis filii, qui hic  
studiorum causa commorantur, ad pran-  
dium me invitârunt; & eundem item ho-  
norem ex eo tempore sæpe mihi habuerunt.  
Quin & princeps postero die Friderici-  
burgo adveniens, ad mensam adhibuit,  
& colloquium; idque etiam hodie fecit,  
Anderchoviâ huc excurrrens, ut cum fra-  
tribus pranderet. Adfuit mihi ante paucos  
aliquot dies ejus Concionator Aulicus,  
narravit quæ ipsum perquam honorifice  
de me locutum, cum hinc primum à col-  
loquio nostro primo rediisset; & amari  
me aliquo modo, inde certè conjecturam  
facere non incertam licet, quod cum ite-  
rum huc venerit iterum ad mensam suam  
& colloquium, adhibere me voluerit.  
Retulit quoque is, quem dixi, concionator,  
ipsum Regem, antequam ad castra abi-  
ret, aliquoties verba de me habuisse, quæ  
insignem benevolentiam testarentur. Et  
præterea, supra stipendium, destinatum  
mihi etiam Canonicatum, quem vacare  
primum acciderit. Item à Proceribus Reg-  
ni, penes quos, absente Rege, summa re-  
rum est potestas, magna benevolentia  
signa accepi; ita ut pœnitere non debeat,  
quod novercam tam iniquam, neque mei  
quicquam amantem, cum benigna adeo  
matre commutaverim. Quis sit rerum  
tuarum status, quid vocatione Anglica  
factum, aut futurum, & an recusaveris il-  
lam, aut acceperis, scire aveo; & si ma-  
nes, quidnam tibi ad stipendium prius ac-  
cesserit: tum, qui Vorstio, Erpenio, mihi,  
substituti, & si quid in Academia novi ac-  
ciderit. Vale, vir amicissime, cum om-  
nibus tuis. Uxor mea te tuamque salutem  
plurimum.

*Dabam Soræ, ad di-  
em xv. Julii Juliani  
clx lxxv. Sa-  
lutant plurimum Do-  
mini Jaccheus, Snel-  
lius & Vorstius.*

*Tuus ex animo,*

*quem nosti,*

Johannes Meursius.  
LXVIII.

## LXVIII.

**L**iteras tuas, Vir clarissime, & amicorum præstantissime, prolixas illas, & affectum mihi tuum referentes, rectè accepi. De uxoris tuæ morbo, quem hæ nuntiant, ex animo doleo; verum istud recreavit, quod jam iterum meliusculè haberet; spero, jam convaluisse. Ita opto, & Deum precor. Ego, cum uxore, ac liberis & familia universa, rectè valeo, per benigni Dei gratiam: quem supplex veneror, ut hoc mihi beneficium diuturnum esse velit. Quod nuperis meis indicaveram, nunc tibi affirmare habeo; summam me humanitatem, & in me benignitatem, in hac parte experiri, apud summos, infimosque & medioximos. Quin & nuper Duces illustrissimi me invisere in adibus meis sunt dignati. Ipse Princeps serenissimus, ut affirmant, qui sunt intimæ apud illum admissionis, summa me benevolentia est complexus, & affectus certè clarum esse testimonium puto, quod hæcenus hic nunquam venerit, quin ad mensam advocaret. Et postremum cum hic esset, interesse etiam Lectioni voluit: Missio quodam è Nobilibus, semihora ante eum, qui hoc ipsum decrevisse nuntiaret. Non possum satis magnas gratias agere Deo, cujus ego manifestam benedictionem agnosco; quâ ut me quam diutissimè frui vellet, in nominis sui sanctissimi timore, preces continenter fundo. Quod Professionem meam in dies extraordinarios tibi demandatam scribis, quo consilio illud fiat, equidem non possum capere, neque te sic accepturum existimaram; potius professionem istam totam, cum stipendio quoque toto, aut certè dimidiato, in te transferendam esse. Sed eventum expectabo; de quo ut me aliquando certior facere velis, etiam te atque etiam rogo. De Schrevelio, in locum Vorstii <sup>re</sup> *uangelis* substituto, libens sane intellexi: & imprimis de modestia tam insigni, quam non possum sat laudare. Gratulor ipsi, ut & Academia nostræ. Etiam communi amico, Adolpho Vorstio: & profecto est, ut scribis; nemini felicitas ista, eâ ætate, in hac nostrâ Academia unquam obtigit. Sed meretur virtus viri, & doctrina: ac favemus illi ex animo; ut meriti causa, sic & amicitia nostræ tum memoriæ parentis tribuendum aliquid fuit, quem fuisse non exiguum Academiae ornamentum, nemo temere inficias ibit. Quæ de Golio; laudo

Juvenis præstantissimi generosum institutum: & profecto, modo vitam Deus illi largiatur, Virum patriæ aliquando magnum dabit. De Rutgerii verò morbo; tristis audio; verum illud me solatur, quod non desperare medicum item nunties: imo fore, ut non difficulter illi valetudo restitatur. Hoc ex animo ipsi precor: patriæque & amicorum, multum interesse puto, ut præclarum adeo ingenium diurnare Deus velit. In hoc desino; & salvere te, cum tua, liberisque, ex animo jubeo. Idem uxor mea facit. Salutem quoque plurimam nuntio viris clarissimis & amicissimis, Petro Cunæo, Theobaldo Schrevelio, Gilberto Jacchæo, Caspari Barlæo, Theodoro Schrevelio, & Guilielmo Noomio vestro; cujus indolem tam præclaram, ac ad studia honestissima literarum humaniorum magno nisu assurgentem certè exosculor.

*Scribebam raptim  
Soræ, ad diem vii.  
Decembris Juliani  
c10 13c xxv.*

*Tuus, quam nōsti,*

Johannes Meursius.

## LXIX.

*Clarissimo Viro D. Gerhardo Joanni  
Vossio, in Academia Batava Historiæ  
universalis, & Græcarum Literarum  
Doctori Publico.*

*Lugdunum Batavo.*

S. P.

**O**Mnia rectius, Vir Clarissime, rebus meis contulissimè, si omisâ professione in Holsatiam, apud vos substissem, atque iis me sumptibus, quibus nihil aliud, quam longinquas ac vanas spes, mercatus sum, tamdiu Lugduni tolerassem, donec tua aliorumque bonorum virorum diligentia, occasio aliqua suborta fuisset, qua me parumper, ex tot adversis attollere potuissem. Nunc quo concilio, qua ope, acceptum sinistra destinatione damnum sarciam, non expedio. Ad veris exortum, me Athenæo Batavo redonassem, si tantum viatici in hoc sinu Baltico, corrogare fuisset. Verum quoniam citius è pumice aquam, quam ab alienis, erga seorsum à se, in Religione sentientes numum intraveris, adhuc mihi heic torpendum desperatione est: spes quidem abeundi, in comitatu lautissimorum adolescentum affulserat;

G

fulserat;

fulserat; qui præter viaticum luculentum, quoque Minerval erogassent: sed istum bolum quidam à caufidicinâ latrans sibi involavit. De partibus, Græcos scriptores interpretandi Franekeræ adhuc vacuis, quid sit? Quid Cl. Grutero, super ista re animi sit, fragmento ipsius, ad D. Lingetshemium, Epistolæ ante binos menses, D. Altingo ostendi; & ut tali petitioni, meo nomine, gratiam vestram intenderetis, rogavi. Utrum successurum sit, silentium vestrum dubitare non finit. Quare alia via mihi prospicite, ut securâ mente, ac tandem agritudinum partem exoneratâ cum Musis in gratiam redire liceat. Ingenium mille curis, atque anxietatibus oppressum, ut in stuporem demigret, metuo. Nam quamvis interdum redire ad pristina studia mediter, tot tamen acerbitatibus circumfularum necessitatum, defixus animus avocari nequit à consideratione malorum, quibus indies magis ac magis obruitur. Editioni Cornelii Nepotis, quid tragulam injecerit, nisi ipsius Typographi sôcordia, non excogito. Idcirco, per ego te micissimi genii tui bonitatem rogo, atque obtestor, ut ab isto Tricone, vel ipse, vel, si non vacat, per Cl. Scriverium nostrum, scriptum meum repetas, ac vobiscum tandiu retineatis, donec denuò à me necessariis disputationibus elimato, alius, qui suis typis vulget, concilietur. Denique si quid respondere animus fuerit, ad D. Kirchmanum Lubecam mitte.

Rostochii Anno Doctrinæ ac virtutis tuæ  
 Dom. xvi. Junii.  
 1716 Id. xxvi.

admirator unicus,

Janus Gebhardus.

Salutem adscribo Pl. D. Adolfo Vorstio, & lectissimo adolescenti, Francisco filio tuo.

#### LXX.

Cum hic noster ad vos iret, virorum amicissime, & amicorum præstantissime, committendum non putavi, quin te tribus saltem verbis salutarem. Quamquam autem hyeme superiore ad te scripserim, & responsi necdum quicquam ad has acceperim; tamen meus in te amor, quem perspectum satis habes, non permisit, ut exemplo tuo uterer. Itaque per

hunc rescribe, quis sit rerum tuarum status, & quid publici literarum boni causa moliaris, quidve edas. Tum de Academia quoque, ejusque in præsens conditione, scire aveo; an Collegæ omnes vivant valeantque. Ego nihil hæcenus mearum lucubrationum vulgare potui, quia Typographo caremus: quem deinceps tamen habituri sumus. Ordiam autem à Solone, cujus vitam hic contexui; ut Pisistrati, cum apud vos commemorarer. Inquires forte, post Plutarchum & Diogenem? Ita certè; nam non pauca post utrumque observavi, & nonnulla accuratius inquisivi; ita ut confidere ausim, non te operam damnaturum. Scripsi nuper etiam ad communem amicum, Adolphum Vorstium: Saluta virum meis verbis peramanter, & responsum item pete. Saluta etiam, nisi grave est, Dominum Rivetum, cujus literas, cum humanitatis plenas, tum affectus, rectè accepi; & gratias ago, quod rescribere tam benigne nobis voluerit. Experietur meam in amore, & cultu, constantiam. De Clemencello, quod rogarat, inquisivi; sed resciscere nihil potui. Denique tu quoque salve, amice longè præstantissime, à me meaque, cum lectissima matrona, uxore tua, item liberis.

Scribebam rapidim  
 Soræ, ad diem  
 XI. Julii Juliani  
 1716 Id. xxvi.

Tuus ex animo,

fide optimâ,

Johannes Meurfius.

#### LXXI.

Doctissime Clarissimeque Vir,

Mutato tempore mutantur plerunque animi: reviso igitur, si quid animi tibi restet in Angliam te recipiendi. Locum nosti (Cantabrigiam) viris undequaque doctissimis humanissimisque repletum. Munus erit illustre, Historiarum & Civilis Scientiæ professio. Labor, trium aut duarum singulis septimanis prælectionum in Scholis publicis, tribus tantum anni temporibus (quos Terminos vocant) pro more Academiæ Scholasticæ eruditioni destinatis: Feriis enim & vacationibus (quæ dimidiam anni partem excedunt) nihil publicè ab Academicis, aut ab illustrissimo hujus Cathedræ fundatore D. Brookio exigetur; ita ut illud (quicquid erit) temporis pro arbitrio tuo, meditando, scriben-



scribendo, edendo aliquid, aut rem familiarem curando, totum poteris impendere. Salarium (suis temporibus certissime numerandum) erit quadringentorum aureorum annuatim. Quibus recensere possum & alios (qui fortasse occurrent) compendii modos, quibus etiam tuis, & tuorum commodis opportunè consulere possis. Etenim non potes nescire, frequentes esse in Anglia ex donatione Regis, Episcoporum aliorumque Præbendas, Canonicatus, & dignitates Ecclesiasticas (at omni animarum curâ vacuas) quibus exteri juxta ac nostrates, de Republica literariâ, & Ecclesia bene meriti honorantur. Sed non urgeo, peto tantum si conditio (quæ prius à me oblata, placuisse visâ est) tibi adhuc arrideat atque pedem apud nos figere in animo habeas, ut cum primis me certissimum facias per literas: quas D. Dudleio Carletono (utriusque nostrum amicissimo) ad me mittendas cures. Et etiam quod vehementer à te rogo, ut Thesium tuarum Theologicarum (quæ impressæ apud vos publicè habentur) copiam mihi faceres: rarius enim apud nos inveniuntur: Siquid autem in his partibus velis, mihi mandes,

*Dab. Westmonast.  
1. Aug. 1626.*

*Tui amantissimo,*

Boswell.

## LXXII.

*Exemplum literarum Gulielmi Boswelli ad Dudleium Carletonum ex Anglico in Latinum versarum.*

SI rectè meminì tunc cum postremum nobis sermo esset, de D. Vossio, visus mihi es hac in sententia esse, utcumq; eo tempore nec animus nec occasio ei esset conditionis in Academiâ Cantabrigiensi oblata accipiendæ, tamen, si ad sextum aut octavum mensem vacaret, fieri tamen posse eò ut inclinaret. Hactenus vacua est ea professio, idque meâ operâ, tantumque ipse mihi sumpsit libertatis (non tamen sine occulto mandato Illust. Baronis Brooke) ut iterum invitandum eò censeam, id quod tu ex literis ad eum meis perspicere potes, quas apertas ad te missas, ubi legeris, obsignare poteris, & statim mittere, urgerèque primo quoque tempore ut rescribatur: quod si ille conditionem abnuet (id quod ego haud face-

rem isthic si essem) alteri prospiciatur. Neque enim desunt multi, iique docti competitores, qui ambiant. Præter centum viginti libras Sterlinenses quas illi annuas promitto sine fraude solvendas; præter sumptuum aliquod (quod in me recipio) transvehendo ipsi, conjugi, liberis, supellectili, innui apud eum rationes, quibus ipsi liberisque in melius prospiciatur. Quàm benè Calauboni ac Molinæi liberis, aliorumque multorum prospectum sit exiguo tempore, tu mecum juxta nosti, nec ille ignorare potest. Est quod meo nomine rogatum te cupiam & illum, nimirum ut mittantur ad me omnes ejus Theses Theologicæ (quæ quidem excusæ sint) compactæ aut solutæ. Magnam autem à me inibis gratiam si primo quoque tempore mittes. Ego verò libenter vel pretium dissolvam, & quod portorii nomine impenderetur, vel alios ad te mittam libros majore pecuniâ emptos, &c.

## LXXIII.

Clarissime D. Vossi,

Academia nostra Cantabrigiensis, cum non ita pridem Literas à te acceperit, doctissimas simul & humanissimas, summa cum tuorum in se officiorum testificatione, unâ cum Libro tuo nuperrimè in lucem edito, de Historicis Latinis, æquum duxit, ut te eam humanitate tuâ primitus provocantem, literis suis resalutaret: quanto magis mihi hoc ipsum munus incumbit, cum & iisdem beneficiis me unum è multis, privatim afficere, non sit dedignata Claritas vestra, nam & eodem tempore tum literæ tuæ, tum liber mihi redditæ sunt, benevolentia tuæ erga me amplissima pignora, & necessitudinis tecum initæ, cum olim Dordraci essemus, symbola non vulgaria, cujus etiam in literis istis tuis meminisse complacuit. Cùm autem nullum officium, teste Cicerone, referendâ gratiâ magis necessarium sit; Officii ergo mei esse duxi, pro istis erga me meritis, gratias debitas referre, & habere. Quod si nulla privata hæc tua erga nos merita, gratias istas postularent, est tamen quod ipse & alii studiosi etiam, tibi meritis gratias, Reipub. literariæ nomine persolvamus, ob hoc ipsum postremo elaboratum à te opus de Historicis Latinis, quod unum si non alia superessent ingenii pariter ac laboris egregia monumenta, nomen tuum posteritati meritò consecraret. Nemo e-

nim literis aut Humanioribus, aut Theologicis, aut aliis etiam disciplinis vel parum imbutus, qui non facile perspicit, quanti momenti sit Historia & Historico- rum noticia, ad omne genus literarum accuratè & cognoscendum, & pertractandum. Gratulantur ergo tibi meritò omnes non solum Historiæ, sed & Antiquitatis studiosi, sive τῶν ἱστορίων, sive rei Ecclesiasticæ operam navent, de utroque tuo opere, tum illo de Historicis Græcis, tum hoc de Latinis. Quibus præviis operibus sapientissimè tibi viam munis, ad illud majorum vigiliarum opus, in quo cum Magno illo Annalium Ecclesiasticorum Conditore congressurus sis. Hanc etenim te provinciam in te suscepisse audio, idque non leviter innuis, in literis Academia nostræ nuper datis. Opus planè & dignum, in quo lectionem tuam multiplicem, eloquentiam, linguarum peritiam, memoriam, iudicium, omnes denique animi dotes & ingenii vires exercere possis. Sperabamus aliquando, auspiciis & munificentia, Honoratissimi Mæcenatis, Baronis à Broock nostratis, te hic apud nos pedem fixurum, & in hoc studiorum genere excolendo, operam in hac nostra Academia navaturum. Sed, compedes narras, tibi à tuis injectas fuisse. Quod si nobis contigisset, ut te Academia nostra haberet & gremialem & professorem, illud certè nobis Cantabrigienibus, longè gratissimum fuisset. Jam Dorislaum vestrum, in locum tibi destinatum suffecit illustrissimus Baro, qui in Cornelium Tacitum nuperrimè binas lectiones in Scholis publicis habuit, iisque sui tum in Historicis, tum etiam in Politicis versandis profectus, specimen egregium exhibuit. Sed ad te redeo, & præfationem operi tuo nuper præmissam, ubi operam utilissimam & bonis omnibus gratissimam posuisti, in vindicanda fama D. Junii felicitis memoriæ foci tui, Viri præstantissimi, & omni scientiarum genere exculatissimi, deque scientiarum principe, sacra Theologia, optimè meriti. Fecisti quod generum decuit, imò quod virum bonum, dum innocentiam tueris, dum ab injustis obtreptionibus virorum summorum, virum summum liberas. Præmittis in dicta præfatione te non hosce libros eo animo divulgasse, quasi in posterum omnis operis hujus curam deponere statuisses, sed potius, ut postquam ista jam prodierint, amicorum & iudicio in commissis, & indicio in omis- sis, facilius fruare. Ingenuitatem tuam amplector & veneror. Ego siquid forsan in

posterum observavero, quod opus hoc tuum, aut promoveat, aut locuplet, aut in aliquibus forsan corrigat, libere & lubenter tibi impertiam. Idque spero te non ægrè laturum, si per otium fecerimus in Historia tua Pelagiana, quam te aliquando limatorem, & correctiorem editurum & optamus & speramus. Video nonnullos ex Remonstrantibus vestris, qui in Articulo de Originali Peccato & Gratia periculose admodum, ne quid gravius dicam, errant, ad tuam Historiam non raro provocare. In quibus duobus Articulis, non leviter innuit Augustinus, \* fidem Christianam propriè consistere. In ista Historia contexenda præclare quidem de Ecclesia meritis es; sed optant viri apud nos tui nominis alioqui studiosissimi, ne quid præsidii, suis erroribus, isti homines ex illa Historia haberent, quod prætexant. Superest jam (Vir humanissime) ut cum Commentarios tuos de Historicis Latinis à te acceperim, ἀντίδοτον aliquod remittam, cum autem non habeo de meo quod rependam; en Commentarios sed alterius generis, in Epistolam D. Pauli ad Colossenses nuper hic Cantabrigiæ excusos, scriptos à D. Davenantio Collega nostro, in Synodo Dodracena, viro mihi olim dum in Academia vixit, amicissimo, & tibi non ignoto, jam merito suo evecto ad Episcopatum Sarisburiensem, quem summa cum prudentia & dignitate jam administrat. Spero non ingratum tibi futurum hoc amoris nostri pignusculum. Hosce commentarios publicè dictavit, cum in Academia nostra, Professoris Theologiæ D. Margaretæ Cathedram occuparet. In quam ipse sexennio ferè abhinc, longè indignior suffectus sum. Habet & ille alias lucubrationes luce non indignas, quas spero aliquando lucem visuras.

Vale Vir eximie, Bonis auspiciis, & alacri animo, Spartam quam nactus es, orna. Antiquam Ecclesia Catholica fidem, mores, disciplinam, ex antiquorum monumentis erue, & à novellis veteratorum imposturis, aslere, vindica. Nos habes in hoc opere obeundo omnia tibi fausta & felicia optantes, precantes.

Cantab. E Sidneyano Coll. 15.  
Kal. Jan. Anno  
MDCXXVII.

Tui amantissimus,

Samuel Wardus.

V. Cl.

## LXXIV.

V. Cl. D. Gerhardo Johanni Vossio,  
in Academia Batavorum Lugdunensi  
Professori celeberrimo. S. P.

Ludg. Batav.

**D**igressio me à vobis, Vir Cl. unà pariter  
omnis mei memoria, animis vestris  
excessisse videtur. Nihil enim per biennium  
literarum, quod vestram benevolentiam  
confirmaret, accepi: neque vulgare istud  
Ave saltem mihi annunciari audiui; unde  
colligere liceret volitare adhuc inter vos,  
qualemcumque nominis mei umbram.  
Agnosco indignitatem meam, neque in  
tantum arrogantiae progredior, ut me  
tantis Heroibus, curæ, ac sollicitudini  
esse optem. Interim humanitati vestræ  
confidebam, credebamque me, qui obviâ  
humanitate in notitiam vestram esseni re-  
ceptus, tam facile ex pectoribus vestris  
non posse excidere. Affectavi quidem  
aliquoties, Bataviam, vestrique Genii cul-  
tum repetere; sed properanti toties, ma-  
num sava fortuna iniecit, meque heic  
adeo validis compedibus religavit, ut eas,  
nisi publicè à vestris revulsis excutere ne-  
queam. Quod tua ope, atque auctoritate,  
Vir Clarissime, commode, atque ocus  
conficere posset. Frenequerani enim non-  
dum, ut ferunt, Græci Interpretis locum  
suppleverunt, jamque spes venturi eò Gru-  
teri expiravit. Quare ut pro me preles,  
etiam atque etiam rogo. Cogitavi qui-  
dem specimen mei, in Græcâ literaturâ,  
profectus, ad vos mittere. Æliani quæ  
*μικρά*, à me emendatam, atque illustra-  
tam offerre; sed me miris modis, ac mo-  
ris, jam quadriennium, ludificatus est Ty-  
pographus, ut ne *αὐτογραφον* meum, neque  
Librum in exemplaria alia propagatum,  
recipere ab eo hætenus potuerim. Cæ-  
teroque in tanta Barbariei facie, silvescit  
quoque ingenium meum, videorque mihi  
priorum annorum diligentiam, compara-  
tam dicendi facultatem detrivisse. Privati-  
tim tamen Palæstram styli, quâ Profsi,  
quâ Vossi heic aperui; quæ cum non pi-  
gendo juvenum numero frequentaretur,  
ausi sunt homines, superstitiosa suspitione,  
an impotenti invidia, silentium mihi in-  
jungere, ne scilicet perorandi exercitia,  
hæreticum virus teneriorum animis inne-  
cteretur. Hætenus molestos, junctis cum  
primoribus Academicorum viribus con-  
tempsi; sed quò minus ad Rhetoris jam  
heic vacuum munus adspirare, vel ausim,

vel velim, nostræ confessionis odium, &  
stipendii exilitas, pæne, (ut ita dicam)  
committilem faciunt. Ergo adhuc illa  
spe sustentor, quâ me vobis conjunctum  
iri, eorumdemq; sacrorum, ac parium volun-  
tatum nexu, gavisurum esse, mihi persuasi.  
Quantum ad votum hoc meum implen-  
dum, momenti adferre possis, partim jam  
dixi, partim ipse minime ignoras; si modo  
gratiæ tuæ vires interponere, ac pro me  
periclitari volueris. Accipis hic poemata  
mea, quibus Chalcographum, & Patro-  
num quem tibi libuerit, concilies velim.  
Notis meis in Nepotem, quid factum sit,  
quamvis multiplici sollicitaque inquisitio-  
ne pervestigare non potui. Idcirco five  
apud te, five alibi delitescant, des ope-  
ram protrahantur, perque hunc *βιβλιοφύ-  
λλον* Rostochiensem ad me referantur;  
ut infinitis locis limam atineam, ac plu-  
rima scabra interpoem. In Tacitum ali-  
quid molitus sum, nempe de ejus imita-  
tione libellum, quem vestris judiciis sub-  
jicere, Typographisque committere vel-  
lem, si esset, qui excudendum susciperet.  
Textum quoque ducentis vicibus emenda-  
torem adjungam. Sæpè me miratio  
subiit, imo quidem fidem cunctorum ex-  
cedet, tantum à Lipsio spicilegium reli-  
ctum fuisse. Cæterum impense illius scri-  
ptoris Lectione delector, & cum antiqui-  
tatem Græcam eruendæ Thucydidis dictio-  
ni tam curiosè incubuisse animadvertam,  
quis mihi vitio vertat, quòd idem in Thu-  
cycide Latino tentarim? In Curtio ali-  
quid experiendi ansam quoque Raderi  
commentarii suppeditabunt. Ipse, quæ  
quæso elaborasti? Auctor esto huic Au-  
gustino Ferbero, ut tua ad nos exporter,  
ac porro consilio juvato, ut delectum in Li-  
bris coemendis habeat. Vale.

Rostochii. 26.  
Martii, 1627.

T. omni cultu & obsequio,

Janus Gebhardus.

Salutem plurimam adscribo, filiis tuis  
paternarum virtutum æmulis; necnon  
D. Vorstio.

## LXXV.

Ornatiss. & Clariss. Vossi,

**L**Egi præfationem quam misisti cum  
litteris: illam Buckinghamiæ duci in-  
scriptam, pulcherrimo stylo, & sapien-  
ter admodum formatam. Paucula ta-  
men mihi videntur addenda, atque etiam  
paucula



paucula mutanda tam ex iudicio amici tui, & mei, Dinglii: (de quo coram tibi locutus sum:) quam meo proprio: quæ ego negotiis quibusdam nimis distentus, tibi non possum sigillatim præscribere. Ob eamque causam detineo mecum adhuc præfationem: remitto librum (opus egregium & longè doctissimum) nescius an tibi eo uti necesse fuerit, ad compilationem Indicis, quem temporis hoc intervallo perficere poteris: (si ita tibi videbitur quemadmodum ego consulo;) Quod ita mecum confidenter agis gratissimum facis: mihi videndum erit ut benemeritis omnibus quibus potero, tibi respondeam. Vale.

Hugæ - Comitris  
30. Maii, 1627.  
Stylo Novo.

Tui amantissimus,

Dudley Carleton.

#### LXXVI.

Dudleius Carletonus G. J. Vossio.

**A**Utor sim D. Vossio ut captata occasione (quæ se ipsa sponte offerret) ut nonnulla inferat de fide, sollicitudine, prudentiâ & felicitate Ducis in ducendo & reducendo ex Hispania rege (tunc principis) quem unicum sibi super omnia dilectum, & heredem regnorum Ducis fidei ac curæ credidit Pater Jacobus. Nec spe falsus est. Nonnulla etiam addi possint de detectis Hispaniæ fraudibus, quæ eò tendebant, ut æternum arcerentur suis ditionibus Regis filia ejusque liberi, & Germaniæ libertas opprimeretur: quo nomine in conventu publico (quem Parlamentum vocant) Duci seriò gratulatum fuit ab universo Angliæ regno: Denique quod tantâ animi magnitudine & invictâ constantiâ serenissimo suo regi operam dat, in omnium regnorum & Rerum publicarum subrotore, prædone & hoste, videlicet Hispano oppugnando. Locus pro hisce additionibus commodissimus mihi videtur, ubi mentio fit amoris quo eum regum alter complexus est, alter complectitur.

#### LXXVII.

*Imcomparabilis Eruditionis Viro D.  
Gerhardo Johanni Vossio, in Athenæo  
Batavo, Professore celeberrimo, S. P.*  
Lugd. Batav.

**Q**Uicquid spei, V. Cl. mihi facere conaris, admodum languidum, ac dubi-

um apparet. Nam quemadmodum Franequeranos; ita quoque Groningenses variis modis deludet Gruterus; ut abundè aliis subrependi materiæ, atque occasionis superfuturum sit. Et quis tunc mei longius distiti mentionem, ne dicam rationem habebit? Pari ferme distantiâ ego, & Pastor aberamus: nihilominus, cum mihi in hac studiorum parte, conferri non possit, in muneris delatione antepositus est, sic egregiè famam Gymnasii sui instaurant. Quantum in te est, amicorum smaragde, non cessabis D. Altingum, aliosque affdua mei memoria obtundere, ut oriente occasione, mihi nemo præferatur. Non inferiorem gloriam, scholis Belgicæ circumdaturum me confido, quam isti, qui nullâ proprii ingenii commendatione, tantum propinquorum præfationibus nituntur, & obtruduntur. Interea meo ingenio servire non licet, cui omne tempus in eo perit, ut acquiram, quomodo famem, & nuditatem defendam. Editionem tamen Taciti, cum libello de ejus imitatione dabo, atque ut unum Typographorum vestrorum, qui Lucubrationes meas, venustis literis, & concinnâ formâ, in vulgus diffundat, permoveas, rogo. Nostri in Nepotem Jodocus Hondius detinet, & si ab ejus viscatis unguibus, chartas meas citius reglutinare potuissem, fortassis haud pœnitendum spicilegium jam fecissem. In eum scriptorem emendationes se plures habere affirmavit mihi Cl. Scriberius, à quo vide impetres, & quàm primum ad me mittas. De Scytala Lacedæmoniorum, siquæ insigniora notasti, admetiaris velim, ut talibus gemmis, mea magis ac magis enitescant, ac preciosiora fiant. Libro tuo de Historicis Latinis, quod ad nos non exportetur, quid factum sit, fac sciam, simulque quid, de tuis originibus Latinæ linguæ, Josepho Cl. Cunæi, aliisque sperandum habeamus, adjice. Salutatio tua Paulo Tarnovio, longè fuit acceptissima; qui se impensè incomparabilem eruditionem tuam colere, atque æstimare aiebat. Vale.

Roßochii. Anno  
Dom. viii. Junii.  
Cl. 1627.

T. perpetuo cultu

atque obsequio.

Janus Gebhardus.

Sal. pl. adscribo Cl. Vorstio, & Francisco filio tuo.

Clarissimo

## LXXVIII.

*Clarissimo viro Gerhardo Vossio, Præceptoris æternum colendo, S. D.*

Quoniam nuper ad fratrem suum, misero diuturnoque morbo intabescens, à Nobilissimo Consiliario Wyngarden forcero, Lugdunum adductus, te V. Cl. Lectionibus privatis impeditum salutare, non daretur occasio; decreveram postea, per literas interpretes tecum colloqui, & memoriam, quam temporum, & locorum intervallum sæpè obliterare solet, mei apud te renovare. Quod cum hæcenus distulisset, partim argumenti inopia, partim negotia, quæ tot, & tanta summo Reipublicæ literariæ bono sustines, interpellandi verecundia: commodum se offert Tuisius noster, & salute tuis verbis significatâ, animum nutantem ad scribendum impulit. Tantus enim ad voluptatem, quam ex lectione libri de Historiis Græcis, in quo tum totus eram, totumque ferè devoraveram, cepi, accessit, voluptabili hoc nuntio, incredibilis gaudii cumulus, ut jam non solum præceptorem *παιδαγωγὸν καὶ πάλαιον*, admirarer unice: sed ipsum illud, non quintâ modo parte Nectaris, ut inquit ille, sed universo Caballino fonte imbutum caput amicissimè amplecti visus fuisset. Quandoquidem verò à Nestoreo docentis ore pendere, ut olim, mihi inviderit fatum, saltem quod concedit, eò arētius duxi amplexandum. Quare divinis operibus, quæ jam aliquot summo eruditorum applausu, protulisti (ut cum Lucr. dicam) in dias luminis oras, diurna, nocturnaue manu versandis, maximum absentis tui desiderium lenire conor. Ac veluti in febricitantibus observamus *ἰατρῶν παῖδες*,

*Quo plus sint potæ, plus situntur aqua.*

Non aliter affici soleo à scriptis tuis, quorum satietas me, nec frequentissimâ lectione potest capere. Itaque mitiges rogo, V. Cl. non meam solum, sed omnium quotquot amant literas, hanc *βουλὴν*, & da brevi quæ confecta, diu nimis retines, reliqua, non modio, neque trimodio, ut ait Plautus, verum ipso horreo. Nec illa modo, quorum spem facis, sed & Notas ad Eusebium de Præpar. Evang. Ut enim aliquis tandem exurgat, qui in illo, parem magno Scaligero, præstet operam, optare non est tuum;

*Nam tu Poeta es prorsus, ad eam rem unicus.*

Utinam & Agellium haberemus, à te perpolitum. Promiserat quid Gifanius, & alii, nemo vero quod sciam, salutare ei persanando manus attulit; cum tamen varia ejus loca, non solum à Criticis, sed & Medicis, & Jurisconsultis, passim correctâ, & explicata, animadvertem. Huic scholæ nuper Rector datus If. Becmannus, Musas, quæ tecum hinc discessisse videbantur, revocaturus. Id enim in oratione publicè habitâ promittebat quidam studiosus, quondam D. Becmanni discipulus. Mihi Mairio Typographo, Adriani Junii quædam typis suis edenda, quibus vitam ipse addidi, & doctorum elogia. Misisses tibi carmen, quod Nicolaus Græcè & Latine non indoctus, D. Æmili discipulus, brevi tuus, & Jurisconsultorum, in nuptias meas composuit, nisi satis, superque, me nugis hisce, occupationes serias turbasse putassem. Quare, ne in publica commoda peccem, desino, & æternum Numen veneror, te diu, V. Max. & amicissime, liberis, nobis, & Reip. literariæ servet incolorem. Salutem meo nomine uxori, optimæ & nobilissimæ matronæ, & filio Johanni.

*Dordr. xii. Jun.  
clō 166 xxvii.*

*Tuus meritisimo tuo,*

Johannes Beverwiickius.

## LXXIX.

*Clarissimo Viro D. Gerhardo Vossio, Leidenfis Academiae Professori, S. P.*

Clarissime D. Vossi,

Jam diu magno flagravi desiderio necessitudinis tecum ineundæ; & nisi inopinatus obitus D. Rutgerii intervenisset, jam pridem viam aliquam reperissem, quæ mihi aditum ad tuam amicitiam patefecisset. Is quoties hac transibat, honorificam semper tui mentionem facere, & insignem tuam eruditionem, ex præclaris tuis scriptis, jam antè mihi cognitam, ipsaque fama, multo majorem, crebris usurpare sermonibus solebat. Certoque mihi promiserat, se amicitia inter nos instituendâ, simulac in Belgium venisset, authorem fore. Cujus rei fundamenta, utrum jecerit, nescio. Cum vero is jam fato suo functus sit, arripiendam putavi occasionem, insinuandi me

me in tuam amicitiam, oblatione libelli nostri, de Funeribus Romanorum, ante biennium, & quod excurrit, recusi; quem ut tanquam monumentum, & pignus meae erga te observantiae, & amoris accipere velis, etiam atque etiam rogo. Commisi illum Eruditissimo juveni Johanni Christenio, qui cum duobus Nobiliss. adolescentibus studiorum gratia, ad vos proficiscitur, quandoquidem tota Germania, viæ militibus ita infestæ sunt, ut nostrarum Academiarum aliqua, præsertim superioris Germaniæ, hinc tuto adiri non possit. Istum juvenem cum discipulis, ac præsertim D. Winterfeldio, quem à teneris unguiculis, propter præclaram indolem, amavi, ut inter familiares tuos recipere, non dedigneris, etiam atque etiam rogo. Magno me beneficio affectum putabo, si intellexero has literas tantum ponderis, quantum scribens confidebam apud te habuisse. Nec ipsi adolescentes committent, ut *ærestas* nota, sibi à te jure inuri possit. Sex iplos annos jam factum est, quod commentariorum de lingua Latina spem nobis fecisti; quibus si nondum extremam manum imposuisti, rogo te per Musarum sacra, ut illos tandem aliquando ad umbilicum perductos, in publicum emittas, & hoc quoque beneficio, Republicam literariam tibi devincias. Neque enim potest non esse egregium, & omnibus numeris absolutum, quod ex Officina tua exit. Vale, & Cl. D. Cunæum meis verbis, nisi grave sit, saluta.

Dabam Lubeca,  
xxii. Julii, Anno  
1627.

Vester omni studio,

Johan. Kirchmannus.

#### LXXX.

Clarissimo Doctissimoque Viro Domino  
Gerhardo Johanni Vossio, in Academia  
Lugduno-Batavo Professori  
publico, S. P.

Lugd. Batav.

QUI Cl. Gruteri nostri senium casus aggraves, ex literis viri docti, Heidelbergæ ad me exaratis percipe: Sed & Gruterus noster domi suæ latitat, nuper Brettâ unde gener Schmentius exclusus est, huc reversus: rusticaturus ferè, in Barneldiano fundo, quem Gener instaurat, incendio corruptum. An vero eidem, hic securo, & ab Idolomania immuni vivere liceat ambigo.

Literas vix amplius agnoscit, ita vertigini se fert obnoxium. Quæ vero nos belli procella circumfuderit, ore famæ ad vos quoque perlatum esse arbitror. Pedem portâ efferre non ausimus, quin illicò adsint, qui manus corporis velamentis injiciant. Quid si oppugnatio, & obsidio nos premat? Me privatim etfi belli absistant incommoda, satis ærumnarum manet, quas quomodo à me depellam, nullam rationem inire possum. Magnam in vobis, te, Cunæo, Altingo, spem fixeram, quam fore irritam ex more conjicio. Consilium tamen aliud, nisi vos interea succurratis, in arenâ capiendum est; nisi si noluerò optimam ætatis partem, inertiam summâ interstingui. Quippe studia mihi propullandæ saltem inopiæ; non excutiendis ingenii viribus, aut promerendæ famæ dirigenda sunt, & in vindicandis extremis necessitatibus, tempus consumendum. Spicilegium quidem meum sub incudem revocassem, si ab unguis Harpyæ Amstelodamensis, Jodoci Hont reglutinare potuissim. Eo me istius Lentuli tædiosissimæ protelationes adigent, ut totum opusculum, à capite ad calcem diffingam, insigni accessione locupletatum. Si tu & D. Scrivierius, meam paupertatem vestris copiis instruere, mei panni squalorem, purpuræ vestræ hilaritate, exornare potestis; agite, adjungite meis vestra, ut aliena luce parumper emergam, & fortune caliginem vestro splendore disjiciam. C.D. Cunæo obsequium, & studia commendanda: Salvere jubeo Cl. D. Adolphum Vorstium, Franc. Vossiadem. Responde quaeso brevi, & literas tuas Joanni Maire trade, qui ad August. Ferberum nostratam Bibliopolam rectè curabit: adde quid jam moliaris, in optimis literis. Vale.

Rostochii Anno T. omni cultu & obsequio,  
Dom. 27 Sextil.  
Cl. Id. CXXVII.

Janus Gebhardus.

#### LXXXI.

G. V.

ANtæ mihi hoc tempore non præbetur alia, quam ut D. V. gratias agam & habeam, quòd dum nuper Leydæ aderam, tantâ humanitate me accipere dignabaris. Ac si verbulum adhuc addere liceat, sit, ut te faciam negotii istius memorem, quod in hac vacantia præfenti, ex humanitate tua, pro comuni



muni bono sis pollicitus. D. T. rem probè tenet: scil. ut ex Historiis, tam antiquis quàm modernis, argumenta ab exemplis & testimoniis talia qualia collegerit & deprompserit, quibus tandem Regem possim, ac si ita dicam, gregem hortari, atque ad Parlamentorum usum, quo Rex & regnum *quodvoadit* in eadem tandem sententia feliciter convenire possint. Causa, pro dolor, communis illud magis atque magis requirit, & expetit: quod quæso studiis tuis promovere digneris. Verendum est, quod invasio ista in Gallie insulas causæ Bohemicæ non profuerit: sed factionem Hispanicam auxerit: nec non Danorum Regem exanimaverit. Nova hodie accepimus mala ex Germania, Tillæum Albi transmigraffe flumen, atque in Holsatiam, Regis Ducatum proprium, invadisse fertur. Quem si vicerit Ducatum, Hamburgum vicerit & Albim; & tum, quod Deus avertat, actum est de ipso Rege. Nec sciam quibus hoc sit imputandum malum, nisi, post peccata, Parlamentorum in Anglia, atque inde Regis & Regni consensus consueti & laudabilis defectibus. Qua de causâ, si hisce in conatibus parum sudaveris, D. V. nec se pœnituerit, nec me ingratum offenderit. Quod si facias, citò quæso, ac sedulò, ac secretò feceris, ac valeas.

Dabam Delphis  
4. Non. Augusti.  
Anno Salutis  
c10 Idc xxvii.

R. T. Studiofissimus,

Edw. Misselden.

## LXXXII.

Doctissime Vir,

**P**Ræbuiſti gratissimam anſam, & aliquamprehendere mihi jamdiu in votis fuit. Quæ impediabant duo fuere: Negotia plura quàm quibus par esse possum, & stylus inæqualis & barbariem sonans: quem tamen ob male jacta in me literarum fundamenta nunquam satis limare potui. Compedes hosce, non solum Candor tuus, sed & Gratitude mea abruperunt. Accepi literas tuas, utinam scires quàm charas, cum iis solos amoris tui libros, æternum eruditionis tuæ, & ære perennius monumentum, de Historicis Latinis. De Græcis quos edidisti Commentarios, apud me quidem illi sunt, & quod non plenè perlegerim,

*Epistola hæc  
magna sui  
parte mutila  
extat inter  
Arminianas,  
p. 727.*

me invitissimum distinuit negotiorum moles. Sed quod in amorem tui me rapuit, Historia fuit Pelagiana, Historia, non magis sæculis, quàm affectibus Theologorum pugnantium diversis perplexa, seriatim tamen per ipsas laceras Ecclesias deducta, & in ipsis funestissimis Ecclesiasticorum diffidiis, non sine ingenii simul & laboris miraculo ordinata. Ad munus tuum redeo: Gratiasque ago multiplices. Quod tam eruditum opus, tam utile, nostrum, i. Britannicum adoptione feceris. Quod tam justis laudibus Academiam florentissimam Cantabrigiam apud aures æquissimas, placuit celebrare. Quod me dignum voluisti simul, nomine, inscriptione, libro, literis tuis. Præcipue verò quod Buckinghamiæ Illustrissimum Ducem, omni virtutum genere cultissimum, & mihi omnis Officii nomine observandissimum, tantis, debitis tamen laudibus, posteris consecraſti. Ego jam Duci paro literas, à me (& forte primo) audiet quid calamo tuo debet. Unum rogo: noli me in lineis hisce turbatis nimium quærere, alibi habito, rerum non verborum servus. Et quùm Erpenius tuus & Wintoniensis meus fati cessere, ipsi meritis suis immortales, socias jungamus manus, meas licet multo breviores invenias. Pater benedictionum sit cumulus tuus, & ego interim servus tibi in Christo, & ti placeat nomen Amicus.

Ex Aula Regia  
Hampton. Sept.  
25. 1627.

Guil. Bathon. & Wellensis.

## LXXXIII.

*Præstantissimo Doctissimoque Viro D.  
Gerhardo Vossio, utriusque Eloquen-  
tiæ in Academia Lugduno-Batavo,  
Professori dignissimo.*

Vir præstantissime, Collega observantissime.

**J**AM diu est, quod nihil ad te literarum dederim, non oblitus officii erga te mei, quo nullum habeo commendatius; sed quod veritus fui, te participem facere earum rerum, quæ mihi displicebant quam maximè. Et quidem videbatur mihi levior esse ægritudo, quam sustinebam solus. Nunc verò, quando eam felicius dies mihi ademit, nolo eandem te diutius latere; quo simul præsentem rerum mearum statum intelligas. Attamen cautio est, ne vulgatum, famâ, hoc malum,

H

nunc

nunc gravius mihi noceat, quam antea : Ideoque liceat mihi, hoc velut arcanum committere fidissimo pectori tuo; in quo spero praesidium fore honori meo.

Nosti ab initio, duplicem mihi fuisse curam, de itinere hoc feliciter instituendo, ut inservire publico, & tuto possem, & sine privatae rei dispendio; eamque fuisse causam, cur applicuerim me, ad illustrem Syriae Consulem : At fateor me illius facti paulo post poenituisse. Ita aliena à me apud illum omnia, vitas, mores, & studia reperiēbam; quamque in hac urbe tranquillitatem exoptabam & otium, perpetuae ferè disturbancei obnoxiam. Etenim gravis & penè continua, Consuli nostro lis fuit, modò cum suis, modò cum aliis populis, ex orbe Christiano advenis, dum in ordinem redigere nitebatur, quae paulatim hic collapsa erant. Unde iudicabis facile, quam non ego laboris partem tulerim, qui rebus omnibus interesse, & velut praesse debui. Si tamen me audisset consulentem, ex quiete forsan majorem gloriam reportasset, & ego insignem fructum. A singulis negotiis, turbarum expectabam finem; sed aliae ex aliis emerferunt, uti ex fluctu fluctus: ita ut pigere tandem me, & tædere istarum rerum vehementer coepit. Aliter significatum, aliter persuasum in patria ante discessum fuerat; facile nempe, & liberalem fore operam quae à me requireretur. At reverà permolestam, & saepe importunam comperi, ac si quis antea in locum meum suffici potuisset, omnino conditionem illam repudiasset, studiisque meis posthabuisset securitatem, & quavis commoda, quae tamen mihi nulla fuerunt. Levius mihi reddere patientia conatus fui, quod corrigere haud potis eram; donec tandem Dei Opt. Max. beneficio revixi mihi, restitutus in libertatem: nam ante dies aliquod, Dominus Consul, ob Parentis obitum, in patriam hinc discessit, pauloque ante huc alius venit, in quem onus meum commodè deposui.

Dominum Witium maximè mutatum ab eo, qui antea fuit, omnes qui eum noverunt, mirabuntur: tantum in liberalem indolem potest honoris tuendi necessitas, & seria mentis occupatio: At ex qua vereor ne res ejus familiaris, ingens detrimentum cepit inter Turcicos Harpyias. Abiturus dignitatem consularem mihi obtulit, instititque multis, ut vices suas pro aliquo saltem tempore sustinerem, ad quod capeffendum munus, hortatus me quoque fuit illustrissimus Dominus Legatus Cor-

nelius Haga: At recusatione honoris istius, atque fortunae, commonstrandum existimavi, quàm invitus alia hactenus negotia tractaverim, praeter studia mea, neque aliter posse me aut debere veniam sperare. Quae alia etiam incommoda me remorata sint, non dubito quin antehac intellexeris; scilicet, ut paulo post quam in Syriam venimus, diri contagii labe, me omni plane consuetudine eorum prohibuerit, per quos proficere desiderabam; & postquam partis, hic subsidii, amicisque uti coeperam, quomodo aurium immensus dolor, tinnitusque perpetuus, ultra tertium mensem me affligerit, omnique intentiore studio interdixerit, quantum etiam curae, molestiaeque mihi peperit adolescentis cujusdam incuria, & temeritas, qui per amicorum preces ferè invito mihi, comes obtrusus fuerat. Quaedam ex hisce malis talia fuere, ut tanquam divinitus immissa caveri non potuerint, quaedam vero prout humanae sortis erant, si initio praescivissem, evitare debueram, postmodum tamen pro arbitrio effugere non potui.

Nihilominus pro tempore, quo uti mihi licuit, satis profecisse mihi videor, & ni favente, alia atque alia occasione, & invitante, alias quoque tractassem linguas; de Arabica quae potissimum mihi incumbit, jam ferè securus esse poteram; at deinceps spero, aliud operae pretium faciam, & quidquid est detrimenti, facile sarciam, quandoquidem partis hic studiorum commodis, quiete in posterum, & ad placitum uti licebit.

Quas quidem rationes meas, proximè exposui amplissimis Dominis Curatoribus, dissimulato tamen honoris ergo, Consulis negotio; quibus ipsi permoti, haud agrè ferent confido, moram à me paululum prorogari, ultra praescriptum terminum: Quod haud dubium est, quin cum Academiae utilitate conjunctum erit: Nam tantilli temporis fructum, quem interea à me expectare posset, cum scenore uti spero, paulo post uberiores recipiet. At de melioribus amicis meis, nonnulli urge-re summopere videntur, ut quamprimum possim, in patriam revertar, ob vacantem Cathedram Mathematicae professionis: Non potui certè hunc casum intelligere, sine maximo animi dolore, atque etiam nunc deploro Academiae nostrae casum, quod occiderit incomparabile illud lumen, ad cujus laudes adspirare videtur ambitiosum; ascendere verò perdifficile est; ideoque licet ab adolescentia, stimulante genio, disciplinarum illud genus sectatus fui,

fui, & pro captu ingenii quoque penetra-  
vi: tum etiam in votis semper habui, ut  
pertractare, vel exercere aliquando pos-  
sem, in patriæ usum; non ausus tamen  
fui, ad ejusmodi felicitatem, hac occasio-  
ne sperare, vel animum adicere; præser-  
tim postquam amicorum literæ, tardius  
perlata essent, quam ut putarem me ex  
consilio eorum, hic res meas expedire pos-  
se, & ibi in tempore adesse; quamobrem  
universum negotium, divinæ providentiæ,  
& amicorum mihi benevolentium, pruden-  
tiæ, & arbitrio, committendum duxi; eo  
quidem animo, ut in stadio interim meo  
gnaviter pergerem, & quam possem ma-  
ximè reditum maturarem. At postquam  
ex postremis literis, intellexi, è patria ad  
me datis, suffragia pro me conspirare quæ-  
dam, & Dominis Curatoribus visum fuisse,  
in designando Clariss. Snellii, mei quon-  
dam Præceptoris, successore, mei quoque  
rationem habere, sententiam mutavi, om-  
nibusque modis contendendum putavi, ne  
tanto favori, summisque meis votis, ipse  
deessem. Primum quidem institueram,  
commisam mihi Spartam, quæ in hisce ini-  
tiis, nulli non tenuis, & ingloria videtur;  
amplificare atque exornare, aliarum quoq;  
linguarum orientalium accessione; sed ut  
verum fatear, revera tandem comperi,  
præposteram illam operam fore, & Rei-  
publicæ Christianæ injuriosam: Nam quid-  
quid cæteris incognitis illis linguis, studii  
impendi possit, sola Arabica sibi postulat:  
ut quæ sola continet, quidquid ferè de  
Asiæ & Africæ disciplinis, & rebus por-  
rò scire desideramus: Ita ut tanquam uni-  
versalis lingua sit, quæ à Græcæ, & La-  
tinæ doctrina, separari minimè possit, si  
humanam sapientiam, & memoriam tem-  
porum, quam maximè fieri potest, apud  
nos integram extare velimus; ideoque si  
excolendis exoticis linguis, novum ali-  
quem, & dignum labore fructum spero,  
video ab Arabica repetendum: Et si ad  
hujus professionem, etiam Mathemata  
mihi decernantur, viderer talentum qua-  
lecumque meum, melius posse collocare,  
& materiam nactus, jucundi, & utilissi-  
mi laboris: Nam & Arabica lingua, de  
Mathematicis Græcorum, & aliarum gen-  
tium inventis, multa suppeditare potest,  
nobis invisâ, omniumque votis desiderata,  
& ipsâ illâ contemplatione recreatus sub-  
inde animus, facilius superare omnia tæ-  
dia posset, quæ in prima tam amplæ, &  
implexæ linguæ culturâ non possunt non  
oboriri. Ex Græcorum monumentis, ut  
hoc in transitu significem, pridem nactus

fui, Apollonii Pergæi, summi Géometræ  
tres postremos Conicorum libros, de Græ-  
co in Arabicum elegantissimè translatis;  
scriptum à præcipuis quibusque Mathe-  
maticis maximi æstimatum, & frustra ha-  
ctenus conquistum; reperi alia quædam,  
& uti spero, plura propediem nanciscar  
quibus id quod paulo ante dixi, luculenter  
posset probari. Sæpissimè à dolore tem-  
perare nequivi, cogitans, præcipuam vitæ  
partem, in illo pulvere fuisse exactam, &  
præter muneris mei sortem fore, si in illo  
exercere manum, & mentem porro vel-  
lem: Videor nunc mihi hujusce felicitatis,  
modo capax sim, compos reddi posse,  
non sine Reipublicæ nostræ commodo;  
cui hisce temporibus, & in præsentis suo  
statu, maximè necessarium est, juventu-  
tem in ea quoque Mathematicarum parte in-  
stitui, atque exerceri, quæ in bello, præ  
reliquis ferè rebus omnibus plurimum sem-  
per potuit: *Tud ποσειδωννικου & τω τω τω τω*  
intelligo, quæ in Academiis hæctenus, in-  
iquo divortio prorsus separata, à Ma-  
thematica Encyclopædia, neglectæ fuere:  
pro modulo ingenii mei, favente eam ad  
rem commoditate idoneâ, utriusque dis-  
ciplinæ, doctrinam profectus, ipsaque de-  
lectatus multum fui: id si mihi porro li-  
ceret, de progressu, & operæpretio haud  
desperarem. Denique cum Arabicæ lin-  
guæ, aliarumque orientalium subsidia li-  
braria, quæ necessitas, & profectus, alia  
atque alia requirat, sine impensis magnis  
comparari nequeant, & Mathematica quo-  
que inventa, & Machinæ, præ reliquis  
studiis, haud leves sumptus postulent, si  
ab utriusque laboris, honesto stipendio ju-  
varer, quod tolerabilius Academiæ foret,  
quam duos Professores alere, utrumque  
fortè studium, felicius cederet in com-  
mune bonum, quam si alterutro tantum  
fungerer. Imprimis verò postquam decre-  
tum est mihi, si exorta spes ejusmodi con-  
ditionis obtinendæ affulgere perget, vi-  
rum aliquem orientalis literaturæ peritum,  
in patriam mecum perducere, meisque  
impensis ibidem alere; quod si precibus,  
& promissis, (nullis autem parcam, quæ  
ferre potero, vel potius solvere) impetra-  
vero, facile erit propitiante Divino No-  
mine, & haud multo quidem tempore,  
arcana harum literarum, publici juris face-  
re. Hæ quidem cogitationes faciunt, ut  
quò me favor, & amicorum consilia invi-  
tant, eò quoque excitatore animo, spes  
meas extendere audeam; non quod me  
cum aliis, si qui fortè competitors sunt,  
comparare velim, aut qui faciliè à naturâ,



& doctrinæ dotibus multo sunt instructiores; at si ex re Academiae, & Reip. videatur, ut ego isti muneri præficiar, ne ipse deficiam. Si tempestivè satis, ante discessum Consulis nostri, certior factus fuisset de Curatorum decreto, ita ut de libris mihi providere, & de idoneo homine modo potuissem; unà me cum illo itineri commissem, etiamsi haud ex omni parte, securum mihi videbatur. Nunc id mihi operis, ut quamprimum possim, me expediam; at quia audio omnes vias esse terræ marique infestas, hostium, prædonumque injuriis; altera me cura tenet, ut quâ possum prudentiâ, ejusmodi discrimina effugiam, & partas hic literarias copias, tutò transportem. Post pauculos ab hinc menses, expectantur aliquot naves Anglicanæ, Constantinopolin appulsuræ, quæ novum ex Anglia legatum vehent, eumque qui jam suo munere est defunctus, accipient, ut eundem cum familia patriæ reddant: Sunt quidem mercatoriarum illæ naves, sed bellicæ classis in modum armatæ: illi ego potissimum occasionem immineo; neque enim similem antea sperare possum, quamobrem brevi hinc Constantinopolin concedere statui, ut doctorum hominum, quales permulti ibidem esse perhibentur consuetudine, instituta promoveam mea, & simul novam illam Romam perlustrem: in quem finem, per literas, illustriss. Dom. Legatus noster, me aliquoties ad se humanissimè evocavit. Iple quidem commendatione sua, aliisque officiis, hætenus plurimum juvit, & majora cum summo favore obtulit, si illuc venero. Hæc quidem ad latius, ut negotia, & vota mea perspecta haberes, te autem per benevolentiam, quâ me hætenus dignatus fuisti, etiam atque etiam obtestor, ne iisdem porro gratiam tuam, & patrocinium impertire graveris, in quo spem magnam, & fiduciam pono: Novi enim te autoritate doctrinæ, & virtutis tuæ eximie multum valere, apud Dom. Curatores, omnesque cordatiores viros, amicos tuos; quò juxta cæteros amicos meos effectum reddas, ne longior præter expectationem mora, quâ vitæ meæ, & harum literarum fortunæ consulendum duxi, me damno multo maximo afficiat, quod fieret, si propterea conceptæ felicitatis spes decollaret. Quia plus satis prolixus fui, supersedebo commemoratione aliarum rerum, quæ hic contigerunt mihi, aut quæ ad statum, utriusque Imperii Turcici, & Persici, necnon Christianorum Ecclesias, in Asia pertinent, eas quidem, aliasque reservabo pro-

ximis literis, aut in reditum meum, quem cœlitus opto, expectoque, & fœlicem illum diem, quo repetere mihi licebit, fructum dulcissimæ consuetudinis tuæ: Interim toto animi affectu te complexus, me, meaque omnia, tuæ pietati, & fidei commendo, Deumque Opt. Max. supplex rogo, ut te Orbis Christiani, & Academiae nostræ insigne decus, ad longævam ætatem incolumem servet, cum carissima Coniuge tua, Liberisque tuis: Idem quoque precor, cæteris amicis omnibus, imprimis vero, conjunctissimis Collegis meis, quos unà tecum omnes officiosè saluto.

Datum Halebi in  
Syria Comagena xi.  
Kal. Sept. An. Sal.  
c10 100 xxvii.

Tui observantissimus,

J. Golius.

#### LXXXIV.

Clarissimo Viro D. Gerhardo Vossio,  
Historiarum Professore.

Lugdun. Batav.

Clarissime Vir, Domine & Amice honorande,

**TAM** mihi gratum, quam inopinatum fuit, nomen tuum conspiciere, in Instrumento publico, quod de Baptismo liberorum meorum illic, te attestante, formatum fuit. Gratias tibi ago non tantum ob operam, verum etiam, & quidem præcipuè, ob voluntatem, quam ita promptè amico veteri abfenti, & non roganti impendisti. Sed nondum habeo rem ex animi sententia consecutam. Rogo igitur ut mense, & anno baptismi singulorum liberorum meorum, (ita enim petieram, & ea gratia miseram, ad adfinem meum chartam memorialem, ex Ephemeride rerum mearum domesticarum descriptam, quæ ista omnia continebat) gratificari mihi digneris. Nam quod ille existimavit sufficere, non sufficit. Nos nunc terram Canaan describimus, rem ingentis laboris; dabimusque propediem, Eusebii Pamphili, Cæsariensis, in Palestina Episcopi librum, *μετὰ τῶν τοῦ αὐτοῦ ἐν οὐρανῷ καὶ τῇ γῆν γεγραμμένον*, cum interpretatione opposita B. Hieronymi, cui ad oram adjungam vocabula hebraica, singulorum locorum, cum designatione librorum sacrorum, in quibus ea loca nominantur. Subdam præterea, (si Deus volet,) singulis paginis notas meas, ut earum præsens conspectus lectorem juvare possit. Græca Eusebii nunquam edita fuerunt; & scis quanto à nobis

nobis postulata, quanto promissa fuerunt. B. Hieronymi liber Latinus, ingentes habuit lacunas, quas quum ex collatione gravi contextus è regione descripti,prehendissem, non ante quievi, quam in Bibliothecis S. Victoris, & D. Thuani erui exemplaria manuscripta, quorum ope huius explevi. Dici non potest, quantum is liber adjumentum allaturus sit sacrorum librorum lectoribus; nam in illis tertia fere pars continet Geographica. Sed urget Tabellarius. Vale ergo charum Caput à

Tuo,  
Bertio.

Dat. Lut. Parif. xxiii.  
Sept. An. 1627.

## LXXXV.

Clarissimo Viro D. Gerhardo Joanni  
Vossio, in Academia Lugduno-Batava  
Professori Celeberrimo,  
Lugdun. Batav.

S. P.

Obtundo te, Clarissime Vir, literis, ut silentium tuum tandem expugnem; quamvis dubitem utrum ullæ mearum, ad te pervenerint, atque etiam num hæc sint perventuræ. Cingimur enim densis undique militum stationibus, & commeatum maritimum, quo nonnihil fidebamus, propemodum nobis Danus interceptit. Urbs verò hæc necessitatem recipiendi præsidii, centenis millibus Joachimicorum redemit, neque dum insidiarum metu vacat. Quid si promptitudine dandi hostis illectus, postulata perpetuet, aut vim apertam intenter? Adeo heic animis decidimus, ut etiam ad primum ordinati militis conspectum, obedienter imperata sumus facturi. De Dano tristitia, ac misera differunt, quæ quia abominor, atque in hostium capita reprecor referre Religioni duco. Nisi Deus è Machinâ me hinc abstraxerit, video in communi interitu, & pestem meam. Nemo amicorum consilio saltem ac voce juvat, nedum addit operam. Unicum ad vos ex tanto naufragio receptum, ac portum habere me posse speravi; sed cum promissa vestra non compareant, animus componendus est, ut imminentem necessitatem, fortiter excipiat, cassæque speculæ renunciet. Antequam tamen arctiora nos circumfundant, Cornelii Nepotis Editionem ex liturariis meis extruo, & eis unam atque alteram septimanam isto labore me defuncturum esse confido. In-

stiti tibi, Vir Clarif. hætenus, ut mihi tuas, aliorumque conjecturas elargirere: Verum Orator fui minimè impetrabilis; unde suspicor vos conjunctionem istam defugere, ac dedignari. Ob id dare tibi amplius negotii non sustineo, ut lucubrationibus meis Typographum conciliares, neque in eventum mea præmittere ad vos audeo; quia nedum ista, quæ ante biennium, Jodoco Hondio credidi, ab ejusdem viscatis manibus, reglutinare potui. Mi Pater, facias me ocius certiozem, quid spei, de promotione mei apud vos, & de Typographo gerere debeam. Simul ac enim tuas accepero, non solum luculento in Cornelium Nepotem spicilegio, sed Analectis etiam in Æliani *πικρίαν*, mactabo penates tuos, atque paulo post me hinc ad vos subducam, ne belli incendio hauriar. Raderi commentarios in Q. Curtium, nondum videre contigit, de quibus tuum iudicium expecto. Post Latinorum Historicorum vitas, quid aggressus es? quo ingenii monumento inlignire cogitas Mnesiosynes templum? Cl. Cunæus Josepho quid facit? cedere certè Heinſio non debet, qui Nonno doctissimis exercitationibus solitudinem depulit, pluresque Lectores conciliavit. Non credis quanta scriptorum tuorum admiratione capiar; quanto Cunæi desiderio flagrem; ut fortunæ meæ tenuitas, obſtare non possit, quin vestra mihi monumenta, studiosè comparem. Vale.

T. T.

Rostochii A. D.  
xxi. Octob.  
cId Ipc xxvii.

Janus Gebhardus.

Salutem plurimam adscribo D. Scriverio, D. Vorſtio, filiis tuis, paternis vestigiis instantibus. Literas tuas trade vestrati Johanne Maire, qui curet ad nostratrem Civem, & Bibliopolam August. Ferberum.

## LXXXVI.

Clarissimo Præstantissimoque Viro, D. Gerhardo Joanni Vossio, Eloquentiæ  
atque Historiarum Professori.

Superioribus tuis, Clarissime, & Amicissime Vossii; quibus absolutum de Historicis Latinis opus tuum, cujus, & brevi exinde missurum te mihi exemplar significabas, jam ante respondisse me scio. Nunc illud ad me missum opus, curante Typographo vestro, recteque curatum accepi

cepi. Gratias verò, hoc nomine tibi ingentes habeo, debeoque. Nam ut referam hoc tempore, in mundo non est. Suetonium interim ecce tibi, ante semestre, & quod excurrit, minori hac formâ, typis excusum, pro munere tuo, munusculum. Est verò insignis hæc opera tua, istamque egregiè nobis exornatam Spartam dedisti, quantum ex filo operis, & eâ quâ adhuc frui licuit, inspectione subitanè, conjicere potui. Nam mihi exinde propius, sapiusque adeunda, ac repetenda hæc adyta. Primo intuitu, & modo hanc, modò illam volutanti paginam, occurrit, Orosius ejusque, ut scribunt, *Ormeſta*. De qua voce, cum tuas legerem conjecturas, ut elegantes, ita doctas oppidò, animadverti editionem quæ prodiit, Maguntia An. 1615. cum Annotationibus Fabricii, Lantii, & Notis postremò marginalibus And Schotti, visam à te haud esse. Nam ibi Schottus in præfatione, præter cætera, hoc monet, hanc Orosii, Historiam, inscriptam olim vitiosè, & barbarè, *Ormeſiam mundi*, sive *Ormeſdam*, pro *Orcheſtram*: Ut titulum scilicet ejusmodi habuerit, *Orosii Orcheſtra mundi*: quasi in eâ, ut in Scenâ, ac Theatro quodam mundi, ac mortalium clades, ac calamitates, ob oculos propositas omnibus, ac recitatas voluerit. Et addit Schottus, ita nominandam, inscribendamque, primò vidisse in Prodigio suo Pighium. Occurrit deinde & aliud, & quod me propius respicit, illud scilicet, quod in Saxone Grammatico, de S. Gulielmo Parisiensi refert, qui in Daniâ Abbas, obiit Cœnobii Ebretoſtrensis. Ejus enim vita, à Discipulo ipsius descripta si penes te sit, aut ubi haberi possit, (nam ex ea verba quædam laudas) ut mihi significare haud graveris, oppidò velim. Historia quoque Mussati, & ea præsertim cujus mentionem facis, editio Veneta, si jam prodiit, & Leydæ proſtet, ejus mihi exemplar mittat Bibliopola Johannes Maire, ut moneas, rogo. Authorum præterea veterum emendationes, passim inſperſas, variasque in eodem, observationes tuas præutiles ac necessarias vidi; quarum ego rerum, atque Authorum syllabum, sive indicem omiſſum solummodò desideravi. Sed hæc altera tua editio, aliaque talia adjicere poterit, volente Domino: Qui & te, mi Vossi, diu salvum, ac sospitem præſtet, quò ita egregiis hujusmodi laboribus, ac lucubrationibus doctissimis, sufficere deinceps, multosque in annos valeas.

Dabam Hardervic.  
Anno Dom. V.  
Novemb. 1627.

T. Joh. Ifac. Pontanus.

## LXXXVII.

Arnold. Buchellius G. J. Vossio, Phil.  
lof. & Historico Clarissimo.

Lugdunum.

Clarissime Doctissimeque D. Vossi, per-  
Curri pridem librum tuum, de Latinis Historicis; in quo admiratus sum inexhaustam tuam diligentiam, incredibilem patientiam, & exactum simul judicium tuum. Admiratus (inquam) sum quotidianis, & quasi perpetuis tuis occupationibus, tantum temporis vobis superesse potuisse, quod tam vasto operi sufficeret. At supra spem omnia inveni, adeo ut deficiant verba, quibus tanti laboris merita, dignè expreſſero. Vidi quam infinito studio pelagus illud Authorum ingreſſus fueris, quot etiam incerti nominis, & ætatis scriptores, inter tineas, & blattas delitescerent, in lucem produxeris. Et penè (ut ita dicam) miseret me tui, qui tantum laboris, impenderis istis SS. Vitæ legendis, quarum major pars impossibilibus, ac incredibilium rerum narrationibus, ne quid dicam acerbius, occupatur. Verumtamen cum hæc, non tantum nostris hominibus, sed toto erudito orbi scripseris, oportuit sanè ad sæculi hujus mores te accommodare; At interim hoc sedulo cavisti, ne quem temerè offenderes: quod licet apud bonos aequosque Lectores, te impetraturum minimè diffidam, vereor nihilominus (ut nunc sunt hominum mores) ne omnibus, vel sic in iis satisfeceris. Sunt enim quibus Religionis velum SS. vel manifestissimis prætenditur mendaciis, quod omnibus censuris superius arbitrantur. Sed ad rem venio, Vir humanissime, pauca inter legendum notavi, inter quæ, & Typographi errata, sed talia quæ veritati fucum facerent. Eorum hic specimen adjungo.

Pag. 446. *De Beka ad finem; ac prætexit usque ad annum cō cc xlv. quo & ipse in terris morabatur.*] Hic innumero erratum, & C unum omiſſum, nam vixit post annum 1300, & Chronicon suum ad Johannem Episcopum perduxit; ad annum nempe 1345. teste Trithem. MS. meum ultra 1360. producit, sed ab alio quædam assuta credo. Idem Trithemius claruisse tradit, ad annum 1348. Gesnerus in Biblioth. An. 1350. Pantaleon 1340.

Pag. 814. *In lucem primus protraxit, Bernardus Furmerius.*] At erroribus adeo plenum, ut vix linea in toto libro sit integra:



tegra: neque sanè eo nomine illi multum debemus, cum quivis faciliè in tanta copia exemplarium manuscriptorum, pessimè descriptum, lucelli tantum spe in lucem protrudere potuisset; & absque dubio, jam meliorem eum Authorem haberemus, nisi hominis ea sedulitas fuisset. Ego in tantillo libro, aliqua centena errata restitui, quæ nullo modo excusari poterant; Idque cum rursus tantum perlegissem, D. Grutero instante, ac urgente, ut Francofurtum mitterem. Quid autem denuo libro hoc factum sit, nondum intelligere potui, ut neque de Steda meo; ad quem quædam etiam notaveram: quarum Notarum, nonnullas ex Adversariis collectas, unà cum meo Exemplari, ad D. Scrivarium misi.

Pag. 839. *Johannes cognomento Palæondorus*] Videris hunc Johannem, alium facere, à Johanne de Aquâ Veteri, cujus pag. 529. memineras: cum tamen, Tempus, Patria, Scripta, Ordo conveniant, nec alium præter unum Johannem Aquaveteranum reperiam; hos unum, & eundem credo, ut & mecum Valerius Andreas, qui ante annos tres quatuorve, in lucem dedit Lovanii Bibliothecam Belgicam.

Pag. 838. Authorem hujus Polyphili, indicant literæ Capitales Titulorum, quas collegi, in hunc sensum: *Poliā frater Franciscus Columna peramavit: Ut mihi indicium fecerat, Johannes Martinus, qui hunc librum ex Italico translatus, Anno 1546. Parisiis edidit, Gesn. Veneris apud Aldum excusum, tradit Ital. neque puto Latine extare. Benedicte. Curtius ad Arresta Amorum, sic de eo scribit; Et multis Francis Columna Parentationes in Templo Polyandrios fieri finxit, his qui ob amorem periclitati fuerint. Idem Arresto 40. Fuerunt etiam qui prosâ vulgari, Amicas suas celebraverint, inter quos verò, doctior Franciscus Columna, cognomento Polyphilus, qui Poliā illam suam, omnium disciplinarum doctissimam interpretationem, ac omnium Artium Officinam instructissimam exornat, plurimisque Epithetis honestat.*

Eadem. Certe meo judicio, Thesaurum continet Antiquitatum, & Elegantiarum.] Cyriacum Anconitanum nondum vidi, sed eundem, non optimâ fide dedisse inscriptiones, at plurimas finxisse satis apertè indicat Doctiss. Ant. Augustinus, Dialogo xi. de Numis, & Antiq. inscriptionibus; eumque Anno Viterbiensi, ea in re comparat.

Pag. 827. Corius Anno 1485. Anno

rum fuit 25. ut in Præfatione ad Ascanium Sfort. Card. ipse scribit. Idemque dedit vitas Imp. Rom. à Cæsare, ad Barbarossam, sed Italicè; promittit & librum de Vitis Philosophorum, Poetarum, & Mulierum illustrium, quem nondum vidi; An ediderit nescio; Cæsares ad finem, Operi Historico adjunxit.

Sed in Reuberi Editione libri sunt viii. habeo & ejus operis editionem in fol. Basl. ap. Pernam Anno 1533. octo tantum libris constantem.

Pag. 799. *Rexisse Ecclesiam Rbemensē annis xxvii. Redomensē*, scribendum, cum nullus Marbodius hoc tempore fuerit Rbemensis Episcopus; Errorem etiam sequentia verba satis detegunt.

Pag. 327. 796. *Atque omni rep.* Certè mirum videtur, Suffridum Petri tam mordicus propugnare suæ gentis fabulas, cum vir fuerit alioqui doctissimus, & judicii præterquam in patriâ Historiâ boni: hunc pertinaci animo sequuntur Furmerius & Hamconius, quos trium viros fabularum patriarum vocare soleo. Et utinam hi non suos invenissent Assclas.

Plura attexerem, nisi vereretur hisce meis nugis utiles vobis horas adimere; neque hæc alio animo quam juvandi scribo, cum sciam non omnia omnibus eodem tempore patere: neque tu, doctissime vir, aliter hæc capies. Conatum saltem videbis, etiamsi nihil alicujus momenti præstiterim. Addo tantum indiculum Authorum, quos nescio, an videris.

Scriptores varii rerum Leodiensium quos Jo. à Chappeauville, in lucem dedit Leodici 3 Tom. An. 1612. in quarto, Inter quos Harigerus Abbas Lobienfis, Anselmus Can. Leodiensis & Joannes Placentius Dominicanus; Catalogus Episcoporum Tungrensiū; Hunc inter incerti avi Authores retulisti, sed ætatem faciliè ex ipso quem apud me est libro constabit.

Petri de Blarrorivo Parhisiāni insigne opus, Nanceidos in fol. vulgari Libb. vi. versibus heroicis conscriptum, impressum verò in pago Lotharingiæ D. Nocalai de porta; per Petrum Jacobi Perbrum, loci Paganum An. C. 1518. non. Jan. quo die etiam ipsum Nanceianum peractum est An. 1476.

Valerandi Varami de Gestis Johanne virginis Libri iv. versibus conscripti, editi in quarto Parisi. Anno 1516. Rob. inde Stephani Anno 1529. iteravit.

Horatii Poetæ Idoraria, Poema Libb. 2. ad Nic. v. Pontif. Max. de Conspiratione Portiana in ipsum Pontificem. In membr. est apud me. Ant.

Ant. Sanderus Presbyter, edidit Anno 1624. Antw. in quarto apud Guil. à Tongris, de Scriptoribus Flandriæ Libros 3. De Gandavensibus eruditione claris Lib. 3. de Brugenfibus eruditionis fama claris Lib. 2.

Est & apud me Vita Henrici Imp. Virginei quam scripsit (ita habet Tir.) Adelboldus Traiect. Epf. Mf. Vita Henrici Quarti Cæs. Aug. Ducis Bavariz vii. Paulo post, matris illius à quodam ejus temporis conscripta MS.

Item de Imp. Equivocis Henricis. MS. Vita S. Adalberti confessoris. MS.

Sed jam satis superque tuam patientiam exercuimus, si tamen hæc vobis non ingrata, aut molesta fuisse intellexero, plura me missurum recipio, summi beneficii instar erit, si sensero me vel minimum profuisse. Vale, vir Doctissime, & me tui amantem redama; ac salve, & rem mihi gratam te facere crede, si à me salutem D. Barlæo dicere non grave fuerit.

*Traiecti calamo festinante,  
X. Kalen. Decembr.  
c1c 10c xxvii. stylo nostro.*

## LXXXVIII.

Clarissime Humanissimeque Vir,

**N**ON oportebat gratias esse tam tardas. Sed locorum intervallis, injuriisque temporum dandum est hoc vitium, non meo animo. Aderant jam Natales *Σωτηρίαι*, priusquam appulere ad me amoris illa tui suavissima deposita. Atque interea dum ad Doctorem Bealum (Cantabrigiâ jam tum absentem) ad D. Junium, adque fratrem meum (longissimè distitum) transmittendi quærentur opportunitates, aliquot menses præterfluxere. Jam tandem, repono tamen, pro libro literisque summas gratias, pro amore pectus & animum. Equidem jampridem in eo ipso quod Academiæ nostræ contuleras munere, reputabas meas partes inesse; sed cum & mihi separatim atque inter paucos, viderem te clarissimum hoc pignus ultro credidisse, mirum in modum cœpi de Vossiana amicitia mihimet gratulari. Et certè si Cantabrigiam te nostram invisere contigisset, (ut aliquando spes erat) non defuissent (confido) officia mihi, quibus meum erga te studium, penitissimisque adfectus commendare præsentì tibi potuissem. Verum nunc intervulsæ sunt alæ mihi illorum officiorum, præterque gra-

tias, & pia vota, reliquum est nihil, quo amores meos probem tibi. Quanquam cum & Reverendissimo Antistite apud nos, tuique amantissimo dudum intellexerim, non deesse tibi progeniem, Parentis similem, bonæ literaturæ, famæque cupidam, erit fortasse aliquando (*ὅν θεῶν*) ut hic apud eorum aliquem possim clariùs exponere, quàm aucta in parte existimationis atque benevolentiz æternum refideas in meo pectore.

Tu, egregium decus literarum, vive diu, & benigno numine fruire, nomenque tuum, quod jamdiu fecisti, perge porro æternitati commendare. Ea affluè vota nuncupat, qui te intimis meritò adfectibus complectitur,

*Dat. in ipso Æ-  
quinoctio Vernæ  
in Cantabrigia è  
Coll. D. Petri  
c1c 10c xxvii.*

*Æterno nexu tibi devinctus,*

Matthæus Wren.

## LXXXIX.

Eximie Vir,

**Q**Uanquam est quòd doleamus excidisse nos expectatione nostrâ, quam de adventu in Britanniam tuo conceperamus: literæ tamen tuæ minuerunt nobis illam sollicitudinem, quibus præter tempus, nihil ad nos gratius acceptiusve pervenire poterat. Quòd si rerum tuarum conditio felicitati nostræ obstiterit, sive Lugdunensium tuorum affectus atque amor, quem non mediocre ex tuis in illam Academiam meritis esse conjicimus: Utinamque nobis in propensitate erga nos tuâ, quàm luculenter adeò, optimus ipse tui sensus interpret, expressisti videtur acquiescendum. Academiæ itaque Britannicæ, præsertim hanc nostram, tanto apud te in honore esse summopere gratulamur. Non enim leve aliquod momentum laudibus nostris accessisse judicamus ex tanta suffragantis amplitudine. Theologi autem nostri, si jam in vivis essent, quàm mox tibi catervatim gratias rependerent: cujus beneficio habent, quòd nec solerti Lectore, nec fideli testimonio destituti sint? Cum & integritas tua omnem assentandi suspensionem facillè summoveat, & acerrimi judicii confirmata in animis hominum opinio præster, ne in ferendâ sententiâ deceptus videare. Atque utinam te nobis vel Fortuna non invidisset, vel Numinis potius

potius indulgisset Clementia, ut quod mutis Britannia Magistris debere se profiteretur Humanitas tua, auritæ discipulorum turbæ vivâ ipse voce perfolveres. Quamquam nec illi muti prorsus sunt, imò ne mortui quidem, quibus tu quotidie vitam ac vocem suppediras. Ut si rectè rationem subducamus, tuo illi in ære sint, tibi inter ceteros, atque etiam præ quamplurimis hujus Seculi Viris Eruditissimis claritatem illam quâ etiamnum conspicui cernuntur acceptam referant. Quòd igitur in nostrorum laudibus tam copiosus fueris, & illud quidem benevolentia tuae luculentum satis indicium: quod autem insignem illam elaboratamque Ingenii tui tui sobolem (quasi Polydorum alterum) nobis servandam concedideris, hoc certissimum amoris tui *παιδείαν*, quin & arctioris cujusdam necessitudinis esse ducimus. Videris enim cum ipso fato contendere, ut nobis aliquo saltem modo prodesse valeas, & licet Scholar, quæ te anxie cupidèque præstolata est, adesse nequeas, Bibliothecam tamen lucubrationibus tuæ ornata velle. Agnoscimus (Eximie Vir) atque amplectimur hunc animi tui Candorem, & arrhabonem istum inter *καταμύλαια* nostra in perpetuam Authoris sui memoriam sanctissime custodiendum curabimus. Vale feliciter.

Cantab. datæ ē  
frequenti Sena-  
tu nostro, Anno  
c1o 10c xxvii.  
Postridie Id.  
Decemb.

*Amici tui*

*Procancellarius reliquosque  
Senatus Cantabrigienfis.*

XC.

Gulielmus Bathoniensis & Wellensis  
Cl. Vossio.

**A**Liam datam mihi occasionem ad te scribendi (Vir doctissime) libenter accipio. Et certè gaudeo (etiamsi undique mole negotiorum gravatus) hanc opportunitatem mihi se obtulisse. Non diu est ex quo literas tuas gratissimas accepi unâ cum Historicis Latinis à te novâ vitâ donatis. Ego statim acceptis libro, literisque, literas ad te dedi calamo sanè obeso & per desuetudinem titubante. Unum in tua illa pereleganti & gravissima Epistola Duci Illustrissimo nuperrimè nuncupata invitatus legi, scilicet, te suavis tuorum & pollicitis Reipublicæ illius ani-

mum tuum mutasse, & proinde cælum non mutaturum, nec accessum nunc ad nos te paraturum. Sed quod in hac re tibi placuit, mihi lex sit: Nolo sperare quod non vis. Interim Dux Buckinghamiæ (qui Deo gratias apud nos iterum salvus) amore & tuo, & tui captus omnes meditatur vias quibus te pari honore, quo tu illum, afficiat. Remora munificentissimæ gratitudinis nulla, nisi quod prorsus nescit quid potissimum eligere debeat, in quo tibi beneficiat. Et hoc ut ego tibi scriberem in mandatis dedit. Officium (etsi difficilius scribo literas) mihi gratissimum. Nunc iterum vel hanc ob rem doleo te exuisse animum ad nos accedendi. Potuisset enim heroicis animus majora quam nunc apud vos potest. Unum restat, ut te ostendas dextrum fortunæ tuæ fabrum & prudenter excogites quid tibi factum velis: sit quale optare fas est (novi autem ni tua me fallant scripta ingenium tuum) & factum puta. Fortè deliberandum esse de re ipsa judices: Delibera: tamen hoc unum peto, ut præsentem quam fieri possit responso certiore me facias literas has ad manus tuas pervenisse. Scio enim Ducem, Candoris tui cultorem eximium, responsum expectare, quod (si fieri possit) literas hæc meas anteverteret. Quod reliquum est, preces oro effundas pro peccatrice anima

Decem. 22.  
1627.

*Devotissimi tibi in communi  
Salvatore Jesu Christo,*

Guil. Bathon. & Wellensis.

XCI.

Samuel Johnson Vossio,

**M**Usæ Solonis sententiâ (Reverende Musarum Apollo) *Ζῶδες Οὐρανὸς ἄγλαα τίνα* appellantur. Patrem habent Jovem, & quid Jove majus habetur? Patrem habent adiutorem, sic enim Jovis à juvando nomen, hæc Musarum felicitas. Fœlices, nimium fœlices fuissent Musæ Cantabrigienfēs, si adventum tuum, Clarissime Vossi, quem Academia seu Jovem veneratur, si adventum tuum & influentiam tam diu exoptatum iniqua nobis fata non invidissent. Dorislaum accepimus, O si Vossium! illum laudamus, te suspicimus. Dignus ille fatis qui historiam perlegat, si non Vossius huic muneri



neri destinatus. Epistolum accepimus, quæ quidem Epistola fuit satis ampla & luculenta tui amoris tessera. Sed nobis pro amore visum est epistolum, quicquid sit, cum tuum sit, nos in bibliotheca nostra in Jacobi Scrinio memoriæ sacrum conservamus. Te absentem videt, tacentem audit & amat Academia, & ita amat ut quamvis ad familiaritatem accedere multum cupit, ad amorem certè nihil possit. Sed quo me rapit commune votum & amor tui ut mei obliviscar? Quid ego tibi pro tua in me gratia Lugduni exhibita? quod mecum indigno tanti viri alloquio dignatus es colloqui, quodque longè maximum duxi in amicorum meorum albo nomen inscribere, meque tuis laudibus (sic enim jure appello) cohonestare. Utinam tam felici esse olim contingat mihi ut qui tibi jam videor, is aliquando esse possim: tum nec falso mihi testimonio adulatus erit Vossius, nec ego tanti viri indignus amicitia. Dabo operam nec vana de me prædicarit Vossius vel hoc uno nomine dignus ut sim qui Vossium prædicem.

Miratus est Seldenus (qui tamen te amat medullitè) cur librum illum omnium applausu acceptum Duci Buckinghami diceres, ego tuis verbis responsum dedi. Cancellarius est nostræ Academicæ. In titulo epistolæ aliquantulum errabas (quod vitium certè non fuit) vel ab Anglo forsitan aliquo, vel titulo Anglicè scripto deceptus. Ego Domino meo omnia fausta & felicia ex animo precor, & si vel minimam honori tuo labeculam ab immundo cujusquam ore aspersam videro, non secus ac proprio dedecore commovebor. Vale.

*Raptim, Cantabr.  
è Bibliothec. Coll.  
Eman. Jan. 3<sup>o</sup>.*

*Tuæ humanitati in omni  
& observantia & of-  
ficio devinctus,*

Samuel Johnson.

#### XCII.

Guilielmus Bathonensis & Wellensis  
G. J. Vossio.

**N**ON profiteor (Vir Clarissime) me hisce ad tuas quas mihi tradidit Vir tui studiosissimus Dominus Carltonus, responsum dare. Sunt tantum characteres amoris mei, qui nec te negligere, nec illum sine literis novit dimittere. Quam

duobus abhinc mensibus, Majestatem Regiam, ut mihi pro officio incumbit, infauſto pede sequor (iter tum faciebat Hamptoniam) rhedâ egressus torrentem non quatuor pedes latum dum transilio pede, inequali plantâ in terram sabulosam, & minus fidam incidente, nervum posteriorem tibiæ dextræ (Tendonem vocant) fregi. Ab eo tempore incedo claudus: nec adhuc constat quando sim vires pristinas recuperaturus. Si quæras quorsum hæc? ut certior fias nactum te esse amicum claudum: Sed etsi nunc fractis nervis, non possum in gratiam tuam, quæ tu, quæ ego cupio, facere: quamprimum tamen vires accreverint strenue mihi concredita peragam. Ut sic intelligas (saltem si quid possim) me ima tantum mei parte, non corde, non affectibus claudicare. Literis meis proximis meliora forsân ad te perferentur. Quod in votis est

*Martii 26.  
1628.*

*Amicissimi tui,*

Guil. Bathon. & Wellensis.

#### XCIII.

Hieronymus Beale, G. J. Vossio.

**Æ**Grè ne feras, colendissime Domine Vossi, si expectatione tardius literæ ad te nostræ perveniant. In causâ erat nimis fera vestrarum traditio, quas diu ante libri etiam tui factam copiam, seorsim accepimus. Quin & alia, colendissimo vestri, Doctori Wrenn, à Rege, à Comitibus objecta est remora, mihi quod molestior à novis nuptiis. Tum etiam, ne clarissimus amicissimusque Dominus Dubletius non vetasse credatur, haud diffiteor vino me veteri delectari impensius, utque scias, quam studio, quam cordi mihi sit antiquitas, provectiorem ætate matronam ac propè effectam duxisse fateor. Riden' gravissime Gerarde? Hoc ipsum volebam, quia salutare est. Ut vivas Nestoris annos, ut floreat unâ tecum, ac per te vincat antiquitas, mactæ porro hilaritate ac lubentia. Et quem olim accuratissimo illo Historiæ Pelagianæ opere concinnasti tui nominis cultorem; hodieq; etiam missis elegantibus literis & libro verè aureo (Τὸ δὲ μὴ χαμῆλαιον ἔστω) arctius obstrictum tenes, prosequere oro novis æternisque amoribus; nec ante me deleas ex albo amicorum, quam patricia avitaque

avitaque veritate spretâ, in novatorum castra transfugiam. Vale literarum decus uti ex animo vult vovetque

Cantab. ex Aula  
Pemb. Apr. 2.  
An. Dom. 1628.

*Deditissimus tibi,*

Hieronymus Beale.

XCIV.

*Spectatissimo Viro D. Gerhardo Joanni Vossio, Affini conjunctissimo, S. P.*

Optime & Doctissime Affinis,

**F**acis ut te dignum est, quod literas meas frequentiores efflagitas, nec tamen de tam pertinaci silentio, grave quidpiam suspicaris. Non metuo itaque, ne me patientiæ tuæ illudere putes, si continui hujus silentii culpam, tibi quoque purgare parem. Non confugio ad solenne istoc genus defensionis, *Diu absui, & multos subinde menses, in secessu ruris exigens, fidei Tabellarii destitutus, &c.* Hæc si vera essent, tamen assiduitate nimia detrita in invidiam mendacii jam olim inciderunt. Mitto igitur decantatos desidiofarum mentium obtentus, & accusationem paranti, obijcio vigilem operam, quam Provinciæ mihi impostitæ debeo. Sciunt qui hic sunt, quàm continuo hoc sexennio, vix respirare mihi detur; ita veteribus negotiis, nova quotidie adcrefcunt; ac prioribus vix dum peractis, majus indies occupationum agmen occultis nexibus extenditur. At omne negotium, inquires, alternis otii vicibus distinguitur. Verissimè id quidem, sed illæ ipsæ feriæ quas nobilissimo adolescentulo honoratissimorum parentum indulgentia facit, tanquam injectâ manu, me ab otii portu retrahunt. Neque enim patiuntur illum parentes optimi, venationibus, & aucupis animum laxare, ac reficere corpus, ut non me perpetuum comitem prodituro addant. Non hæc eo dixi, ut quasi cum venia deinceps, negligam desiderium Affinis conjunctissimi, cum quo mihi maximum vinculum, sanctionis alicujus necessitudinis esse gaudeo; sed ut missâ præteritorum querelâ, crebriores posthac literas expectes; enitar enim posthac, ut assiduitate officii literarii, cogitationes tuas quomodocunque vincam. En tibi hic marmorum Arundellianorum specimen à D. Seldeno editum. Fertur. nescio quis Jesuita Gallus, edidisse opusculum de Plâstice, Statuaria, & Pictura

veterum, quod ad me transmitti velim, si fortè in manus tuas incider; nam ad nos hic rari è Gallia Libri nunc deferuntur. Non exhiberem occupatissimo tibi hanc molestiam, nisi jampridem, ut ardentissimo Arundellia Comitis desiderio satisfacere, horas aliquot subcisivas, impendere cœpisssem catalogo artificum hujus generis. Sed unde quæso D. Lucam pictorem fuisse liquet? Aut unde ortum quod Pictores, hoc patrono glorientur? Imparties, scio, quidquid hac de re, certè statui posse cognosces. Apochas redituum annuorum, intra paucissimas hebdomadas ad mei amantissimam sororem, Conjugem tuam, perferri curabo. Vale, & omnibus tuis, plurimam meis verbis salutem dices. Ego quantum in me erit, curabo, ut valeam, ac Deum Opt. Max. longum vitæ spatium precabor, non ob aliud magis, quam ut me tandem aliquando, tibi, tuisque gratum exhibeam.

*Tuus omni officio,*

Raptim, Londini,  
in ædib. Arund.  
An. 1628. Apr.  
19. St. vet.

F.F.F. Junius.

XCV.

Amicorum Opt. Max.

**N**uncium tam certum nactus, mercatorem Slagelosiensem, amicum meum, qui intra septimanam unam aut alteram ad nos revertitur, committendum non putavi, quin ad te quoque, quanquam magna temporis angustia circumscripta, literas darem. Tu vicissim da hoc amicitiae nostræ, ut occasione utaris: & responsum quicquid cupias, illud ad Hermannum Pisium mitti cures, qui ad me curabit rectè. Aliquantum sanè temporis est elapsum, ex quo nihil ad te scripsi: sed nec ferè ad alium quenquam, nisi ad quem necessario scribendum erat. Id tu sic interpretaberis, tanquam publica hæc tempestas, quæ in nostrum orbem sæviit, amicitia hoc officium impedierit. Certè amor in te meus, quem virtute ista tua singulari in animo meo accendisti, ardet ardebitque porro, igne semper inextincto; atque ut id facere possit, satis scio, tu non defines illum alere. Opto quantum possim maxime de rebus tuis sigillatim, publicisque Academiæ, adeoque universæ reipub. certior fieri. Nos hic, per benigni Dei immensam gratiam, sustinemus nos egregiè; quæque pridem, militum nostrorum ignaviâ,

viâ, ac prodicione foedâ, Deo ob peccata nostra nobis graviter irato, hostis cepit, nunc paulatim recuperamus. Serenissimus Rex noster cum sexaginta aut septuaginta aliquot navibus, bellicis nempe, & triremibus, aliisque è minoribus, Fimbriam insulam, vulgò Femeren appellatur, in potestatem suam redegit; & ex eâ in Holsatiam objacentem factò impetu, urbes duas, Chilonium, & Ekelfortum, expugnavit; inde porro sine dubio obviam quæque invasurus: quanquam de Chilonio quidem, qui Hafniâ ad nos inveniunt, tentatum potius illud dicunt, quam occupatum. Istuc tamen ii affirmant, & Rensburgum oppugnatum, adeo ut Hamburgum usque tota Holsatia regi pateat. Quidam aiunt, sed incertum, Athiam quoque, itidem insulam, occupatam. Ditsmar, casò ad internecionem usque præsidio hostili, sese Regi reddidit; & ut deinceps contra hostem melius se tueri possint, cum aggeribus perforatis, tum apertis emissariis, aquam undique in agros suos, quanquam cum insigni sanè detrimento, admiserunt. Sueciæ Rex noster sese arctissimo fœdere obligavit. Miserat autumno proximo huc Legatos; & in illis generosum Baronem, Carolum Bannyrum, quem Leide novimus, studiorum illic causâ commorantem; is me Soræ perbenigne est complexus. Vix abierant, cum Rex noster etiam suos in Sueciam mittit, Cancellarium & unum è Senatoribus Regni. Qui, excepti præter solitum permagnificè, novum fœdus pertractarunt. Et nunc iterum ab eo Legati Hafniæ adfunt. Lubecensibus, qui in Cæsarem propendebant, interdixit, ne hostile quicquam in nos cogitare unquam audent; quod si facerent, se illorum & commercia, quæ in Suecia frequentissima exercere ipsi soleant, perditurum; & pecunias quæ ibidem ingentes illis debeantur, in fiscum redacturum esse. Quibus minis id effecit, ut nunc nuper Legatis Cæsaris, & Hispaniarum Regis, navale auxilium exigentibus, constanter illud pernegaverint: affirmantes, nullo modo se præstare isthoc posse, nisi se, urbemque suam, plane perditum ire velint. Itaque ab iis nihil nobis metuendum; quanquam sanè etiam aliàs portum obstruere, navibus quibuscumque immergis, regi nostro facile esset: qui id item ipsis comminatus fuit. Habet porro etiam Suecus sedecim armatorum millia, in ipsis finibus, prope urbem Gottenburgum; quæ Rex noster suis navibus trajecturus in adversam Cimbriam dicitur. Cujus incolæ adeo in Re-

gem sunt affecti, ut, si alibi impressionem aliquam faciat, statim omnes arma sua sint juncturi; idque nobis certò nuntiant, qui huc veniunt. Idem animorum affectus in Holsatia est: ita ut non dubitemus, quin, benignitate Dei adjuvante, brevi ingentem aliquam mutationem istic habituri sumus. Et prodigia præcessere, hosti, ut speramus, tristia. In Holsatia, in Bredenbergensi arce sanguis quodam areæ loco copiosius emanavit; nec restingui à Præfecto, quanquam injecta arena, potuit. Hadersleviæ item in arce, equi in stabulo consistentes, reperti sudore desfluentes, ac spumantes. Et in adjacente Cimbria, in Urbe Ripensi, in Præfecti ejus mensâ, orbes sanguine maduerunt, ac remissi, ut purgarentur, & relati ac vix appositi, iterum tantundem sanguinis, omnibus convivis illud adspectantibus & horrentibus, habuerunt. Et hæc certo evenerunt; ac referri, tanquam vera, abs te possunt. Illud quoque memoratur, & pro vero affirmatur: ad Oldburgum, itidem Cimbriæ nostræ urbem, Præfectum ejus aliquando, cum ad ambulationem prodisset, puerum in via nudum, humi positum, invenisse; quem cum tollere statim pueros præcepisset, neque id illi, quanquam post conatum multum, potuissent, tum locutum ac dixisse; quam nunc, quanquam summis viribus id annisi, puerum se humo tollere nullo modo valuissent, ita quoque Daniæ sibi subjugare plane impossibile fore. Faxit id benignus ac misericors Deus, & infestam à nobis manum tandem avertat. In Scaniâ, in aere visum acre prælium navale; & tonitrua tormentorum explosorum in terra audita à spectantibus, qui scintillas quoque ignis decedentes conspexere. Et profecto, quin æstare imminente, aliquo navali, nam id solum posthæc restat, decertare debeamus, nullo modo dubitamus. Sed in Deo & iis armis, quæ hic nobis est largitus, spem repositam habemus. Instruit Rex noster classem octoginta amplius navium bellicarum, ac triremium; ad hæc Suecus, quatuordecim suas addet; idem Angli, Batavique, ut speramus, sunt facturi; sed imprimis, ut precamur, & confidimus, hosti se opponet Deus: ac nunc ejus quoque peccata respicere incipiet. In hoc voto & fiducia, finem epistolæ, quam hic satis longam habes, ad silentii anteacti justam compensationem, faciendum mihi existimo. Deum oro, ut misereatur nostri, & optatam pacem reddat: ac te mihi, longe amicissimum Caput, diutissime conserve-

cum



cum Uxore, Liberisque. Vale, ac salve,  
à me, ac meâ.

*Soræ, ad diem VI.  
Aprilis Juliani,  
Cl. Id. c. xxviii.  
Reprim.*

*Tuus prisca fide,*

Johan. Meurfius.

Si quid edidisti, potes hac occasione ad me mittere; idem Heinsum nostrum rogo, ad quem ante paucos menses literas prolixas dedi. Nunc salutem prolixissimam illi nuntio; &, ut aliquid rescribat, as suas quoque lucubrationes mittat, quando commoda est occasio, etiam atque etiam rogo. Saluto ex animo omnes veteres Collegas, quotquot sunt; nullo excepto. Amo omnes, ut solebam: etiam magis, ut solemus in absentia. Quod si Deus pacem reddat, & securum iter præster, cum uxore, liberisque, dum ætatis vigor finit, ad vos excurram, ut semel adhuc chara capita coram complectar. O si votum hoc mihi repræsentet Deus! & repræsentabit, spero, ac confido. Iterum vale, amicissime. Vorstius, ut video, planè nostri obliviscitur; non hoc merebatur noster in ipsum & defunctum Patrem, amor: neque ab eo expectaveram. Tertium, Vale.

# XCVI.

S. P. D.

Clarissime ac Reverende D. Magister Voffi,

**P**Ræterito die Sabbathi scripsit ad me cognatus meus Isaacus Lydius, te repetere Martyrologion Baronii. Profecto nesciebam tuum esse, & tardè oberans ovis septa repetiisset, nisi te monitorem habuisset; putabam me permutatione justum possessorem; credo tamen tuis verbis, nec ullius volo injustus esse hæres. Deus operi tuo in refutando Baronio benedicat, & faxit ne magno te oceano committens naufragii periculum incurras. Voluntarium mihi exilium Leydensè indixi, ne ganeo deceptus frigeat focus meus. In tertio hoc matrimonio quod ante quinquennium subivi, terna prole, ex filia Angla paupercula honestissima ditatus sum. Hinc fit ut jam emere quæ luberent non possim. Vidi apud fratrem meum nuper plurima à te edita de Historia Latina & Græca; utinam emere liceret; sed jam in re tenui sum & quos commo-

dato habere non possum, iis cogor invitatus carere. Rogo ne me (pauperem licet) fastidias, sed datâ occasione invisas. Amicorum omnia erunt communia. Ego in conscribendo Martyrologio Belgico verfor. Baronium tibi remitto & rogo ut nos visas.

— *habitârunt Dî quoque casas.*

Si neglexeris ego tibi dicam, nec eris qui mihi nunc es & manebis amicus intimus.

*Reprim Vetera-  
guino xii. Julii  
Anno 1628.*

*Tuus quem à Pueris*

*nôsti tibi amicum,*

Joannes Lydius.

# XCVII.

V. Ornatissimo J. Gerardo Voffio  
J. Seldenus S. P. D.

Vir Amplissime,

**A**Nnus est quod ad me opus tuum de Latinis Historicis egregium sanè & eruditione refertissimum mittere dignatus es; mihi gratissimum, siue Autorem (quem suspicio) siue rem ipsam spectem. A tanto viro salutari & dignum ad quem ejusmodi muntus daretur existimari, mihi permagnum erat. Gratias tibi quas possum maximas ago, & citius egissem nisi cum literis marmora simul Arundelliana, quæ sub prælo calebant, cum tuas acciperem, mittere ad te destinâissem, nec prius rescribere quàm ea, quæ compensationis aliquam figuram induerent, absolventur. Editionem, quamplurima intervenerunt; quæ ità impedière, ut superioris ætatis initium minimè anteverteret. Exemplar ad te ante mensem dedi, farcinulis V. Cl. Joannis de Laet cum aliis in Batavianis exemplaribus, commissum. Spero te antehac accepisse. Literas tuas adjicere nequibam, neq; citius in Bataviam scribere. Veniam mihi non negabit humanitas tua. Vale, Vir Eximie, & me inter eos, obsecro, fidenter numeres qui admirandam tuam doctrinam summopere amant & colunt.

*Londini Cal. Sept.  
M DC XXVIII.*

# XCVIII.

## XCVIII.

Gulielmus Londinensis G. J. Vossio.

**B**inas literas tuas accepi, utraque post fata Illustrissimi Ducis Buckinghamiar. Utraque tamen de illo silent. Priores putavi ideo tacuisse quia ad aures tuas tam cruenta mors non pervenisset. Sed prorsus obstupui quum secundas attulit filius etiam elingues. Quid est? Num fama defuit esse velox? Num mare non ita spatiosum, inter nos vosque tardius praterivolat? Num cruor, crudeli, infernali dextra effusus, & viscus famæ pennas impedit? Imò accelerat sanguis, clamatur eundo. Aliud proculdubio est, prorsus aliud, quod de re tam barbara, de persona tam illustri, de fato tam subito, eligis tacere. Nolo plura, ne iterum cordis mei fontes rumpant repagula, & effundant spiritus. Mortuus est, cui ego, tuque multum debuimus.

Priores literæ tuæ nimium mihi ascribunt. Nec enim is sum cui aut illa debentur elogia, aut cui tu tantum debes. Ducis memoriæ non minus quam nomini agnosce te debere, & sufficit. De Musis à quibus incipis, sunt certè ante omnia dulces, sed de Dominabus & Musis ipsis intelligi volo, de ancillis non item. Illæ enim sunt quæ Absinthium miscent, utpote non naturales Musarum pedissequæ. Ipsæ enim optant, eligunt alias: vi, & infelicitate temporum nunquam satis deplorandâ, hæc obtruduntur illis.

Posterioribus literæ post immeritissimas laudes descendunt in charissimum pignus tuum, filium natu maximum. Quod expectavi, secundum fecit non optio mea, ubi omnes pariter ignoti; sed in memoria erat quod amicus tuus D. Dudleyus Carltonus insinuavit. Quum aliud tibi consultius visum sit, primogenitum æquè mihi charum advenisse scito, etiam non adhibitis rationibus illis, quæ tamen ipsæ per se abundè sunt ad suadendum.

Unum est de quo quid dicam adhuc nescio. Scribis filium tuum præter progressus in Mathesi, & Scientiâ Naturali, animum tandem appulisse ad Juris Scientiam, & in ea Baccalaurei gradum consecutum esse. Timeo ne hoc ei impedimento esse possit, quominus cooptetur in alicujus Collegii societatem, si forte per statuta id exigatur, ut non Graduatús sit tempore admissionis; spero tamen hoc

non esse omnibus Collegiis commune. Ego (quod potui) statim scripsi, & spero proximâ septimanâ tale responsum me accepturum, ut filius tuus Academia Cantabrigiensi gratissimus hospes sit futurus, quod postea facile poteris & à me, & à filio audire. Si naetus aliquando fuerit Societatem, necesse est ut Academia, Collegiique Statutis obtemperet, & ad gradus ultiores tardius quàm pro meritis promoveatur, si mores loci jubeant. De sumptibus abundè est quod promittis, nec minimæ mihi curæ erit, quam primum possum de iis minuendis cogitare.

Mitto tibi Theses tuas Oxonii excusas, à quarum editione utinam abstinuissent Oxonienses mei, sic vota tua meis consona sunt. Quâ fide, quâ diligentia publicas fecerint, ipse ex hoc exemplari judicare poteris, sed amore audeo dicere, fecerunt quodcunque factum. Tu tamen quod polliceris facito. Prodeat Editio tua. Et ut scias me legisse aliqua (omnia enim nondum otium erat) velim præcipuè ea quæ à te juniore prodierunt, oculo haud nimis facili ipse jam perlegas, emendèsq; si fortè aliquid occurrat, quod te iudice, à veneranda, sanâque simul antiquitate deviet. Quod mihi leviter percurrenti factum videtur in Capite de Baptismo Johannis. Neque enim Patres me docuere undique idem fuisse cum Christi Baptismate. Boni consule libertatem hominis amicissimi. Et quid si aliquantulum differas editionem illam à te destinatam, donec ipse, nunc multò maturior, dicas: Eat liber hic priscissimæ Antiquitatis æmulus.

Consilium tuum de Baptismo, unâ cum Historia Rituum antiquorum valdè probo. Oro tamen ne omittas quod de Baronio scripsisti. Unum cave. Vides iterum libertatem meam. Nam libros quinque de antiquis Baptismi Ritibus, Cæremoniisque scripsit Josephus Vicecomes. Quod quum te latere non possit, curabis scio, ut superior sis in illo argumento. Velim enim nihil sub nomine tuo prodeat, nisi Vossio meo dignissimum, & par Historiæ Pelagianæ.

Redeo ad infandos dolores, quibus intime premor ob Ducis Illustrissimi cædem, omni sæculo dolendam. Parricida ille scelestissimus, Gentis & Religionis dedecus, eripuit non mihi tantum, sed & tibi charissimum caput, & (non obstantibus iis quibus eum denigravit hominum quorundam malitia) utrisque & animi & corporis dotibus ditissimum. Cælum non dubito

bito petiit ille: Terrarum incolæ, quos Africæ reliquit, nos adhuc sumus. Damna exinde tua cogita, mea infinita sunt. Pecuniam statuit tibi mittere statim à reditu: perit cum illo illa. Decrevit certo certius omnia in usum filii tui paratissima habere. Non dico periisse hoc, sed quod ego possum multò minus est. Diploma Canonicatus tui in Ecclesia Cantuariensi ille à Rege serenissimo impetravit, munivissetque contra quoscunque impugnatores. Ego & hic tibi non deero, nisi potestas mihi defuerit.

Nunc accipe stigmata anni hujus, mihi inauspicatissimi. Ineunte Anno (quod nosti) Tendonem fregi, & adhuc incedo claudus. Successit Concio ineunte Parlamento mihi tum admodum infirmo à Rege imposita, opus, (prout res nostræ se tum habuere) periculosum simul & difficile. Postea Dux Buckinghamiæ mihi charissimus, nescio quo fato, & cum illo ipse haud planè amico usi sumus conventu illo. Finito eo, ille miserrimè est non sine Diabolo occisus. Post multa suspiria (nam verè & sine teste dolui) morbum contraxi acre, à quo vixdum convalui. Servi quatuor variis morbis lassati, quintus à Pleuritide cæsus. Et nescio quid minatur portio anni infausti futura. Sed Deus est cui servio, qui tecum sit gratia speciali, & cum tuis: prout precatur.

*Tui Amantissimus,*

Osob. 25. 1628.

Guil. Londinensis.

XCIX.

Clarissime Vir,

**B**Inas à te accepi Literas: Alteras Cantuariæ, & alteras Lugduni datas, easque utraq; æquè gratas, quod de felici tui itineris & progressu & fine nos reddidère certiores. Neq; opus habemus ullâ tuæ scriptiõis excusatione, quibus inter innumera quoque negotia Literas tuas legendi nullum unquam deerit otium: Quin potius gratias tibi habemus, atque ad scribendum ultrò sapius provocaremus; nisi tibi jampridem constare debebat, eò nobis tuas fore gratiores quò fient frequentiores. Ista de causâ si quos ex nostratibus ad vos intelligemus transituros, eos nostris comitari, & tuæ humanitati commendare haud sumus prætermitturi. Imprimis autem quem jam nunc vobiscum

commorari ipse significasti, tibi satis censuimus commendatum, si, ut est, nostrum asseruerimus Agnatum, Comitum Westmerlandiæ filium.

Est & aliud, in quo tuam expeto operam; Misit ad me, quo de Principe Auriaco ob captam Ducis Sylvam orbi congratulatur, suum carmen D. Casparus Barlæus; quem, gratissimum quidem istud mihi fuisse, certiozem velim reddas, viderique, quod ex omni parte foret perfectum, nisi unicus inesse videretur defectus. Dum enim plurima eaque admiranda rerum operumque illius obsidionis eleganter & apprimè describit Spectacula, mirum, Poetam tam ociosè præterisse Reginam Bohemiæ & Principem Auriacam. Sunt & alii viri digni, quorum hic Honoris causâ memini, mei amici, Domini Polyander, Rivetus, Festus, Heinsius & alii quos nosti nostri amantes, quos meo nomine salvere jubeas rogo. Vale, Vir clarissime.

*Dab. Newmarket ipsis  
Kalendis Martii Anno  
Salutis MDCXXIX.  
Stylo Angliæ.*

*Tui Studiosus,*

Dorchester.

C.

*Clarissimo Doctissimoque Viro Gerardo  
Joanni Vossio, Affini Conjunctissimo,  
S. P.*

**E**T tui cultus, & mei officii gratiâ, quælibet ad scribendum amplectenda est occasio: tantum abest, ut eam præterire debuerim, quam filii tui adventus ingessit. Commodum hîc Londinii eram, quum Joannes noster, inopinato ad nos cum uberrimis tuis literis advolans, tantâ latitiâ pectus meum explevit, ut solidi hujus gaudii tacitus quidam sensus, etiam nunc memorem animum pertentare non desinat. Effusissimos illos amplexus, quibus advenientem toto pectore gratulabundus adstrinxi, rursus mihi ante oculos, cogitationes reponunt, & spem utique affirmant, tui tandem aliquando hîc videnti: summi certè homines, & quibus larga benefaciendi materia, in manu est, tam prono in filium tuum favore, te demereri student. Tu quoque beneficia, in te, tuosque congesta, tam grâtè interpretari soles; ut minimè dubium habeam, quin tibi sit in optatis, videre regnum sub Re-

gum



gum indulgentissimo florentissimo, atque in eo viros tui amantissimos, & humanitatem haud tralatitiam tuis plenissime exhibentes. Altissime animo meo insedit hæc persuasio; imo jam nunc voto, & cogitatione, præsumo diem illum latum, signandumque mihi candidissimo calculo, cum cervices tuas invadere, atque arctissimis complexibus alligare dabitur. Interpellandam video dulcedinem blandæ spei,

— nimis obstat Rhamnusia votis.

Quamobrem etiam vanis figurationibus, animi desiderio, ægri, atque æstuantis, valere jussis, hoc tantum spondeo, me in omnibus rebus, fatis nostræ conjunctioni, amorique facturum; præsertim cum nihil rerum omnium, à te mandari mihi, aut majus, aut gratius, nihil etiam à me suscipi honestius possit, quàm ut pro viribus, Johanni nostro commodem, Adolescenti singulari, nec iis tantum, quos sanguine attingit, inter propinquos amando. Ego certè tibi (repetam enim) profiteor, atque polliceor, eximium, & singulare meum studium, in omni genere officii; nec unquam dissimilem scriptis talibus dies arguerit. Divinum modò Numen faciat mecum, atque optata secundet. Quamvis autem longiores Epistolas flagites, & in nostra culpa tibi ignoscere sis paratus, in animum tamen inducere non possum, ut sim prolixior, cum occupationibus tuis, publico bono parcendum sciam. Vale, & amantissimum tui redama.

Londini in adibus  
Arundelianis, Prisdæ  
Kalend. Mart. Anno  
M DC XXIX.

Tuus omni officio,

F. F. F. Junius.

# CI.

*Celeberrimo viro, Domino Gerardo  
Joanni Vossio, Historiarum Profes-  
sori dignissimo, S. P.*

JAM diu ad te, scripturio, mi Vossi, redux in Patriam te salutaturus; sed præ occupationibus quibusdam hætenus non licuit. Nunc tantò fufius, calidiusque. Literas ad te misi non unas, nuper è Suecia. Insuper quoque exemplar Centuriæ meæ Epistolicae, ut & orationis Sixtini Amama mihi inscriptæ. Quorum quid acceperis, scire desidero. Ego vero, quid comminiscar, nescio. Nam si fuisses nactus, nequaquam dubito, quin saltem,

vel verbulo, me certiore reddidisses. Te autem nihil planè accepisse, vix mihi persuaserim. Quippe ea cuidam ex amicis, ad te rectè transferenda tradidi: Qui si minus officio suo functus fuerit, est cur hominem redarguam, atque culpem. Si verò acceperis, nec tamen integrum tibi fuerit hætenus rescribere, nunc quæso, rescribe tandem. Non ullæ nunc locorum distantia, ut nuper, nos invicem dividunt, quominus reciproco literarum commercio, gliscat indies, magis magisque, fœdus amicitia contracta quondam. Rogo itaque te, mi Vossi, ut quam nuper mihi ultro detulisti amicitiam, eam nunc porrò rogatus, ulque fovere ne graveris. Ardeo enim, & tecum, mi Heros, non intermorituram contrahere familiaritatem, si placet, ut cum Heinio contraxi meo, & sexcentis aliis. Nec ægrè tu quidem mihi, adstipulabere, si modò rectè candidum tuum perspectum habeo ingenium, quo nihil proclivius ad bene merendum, de melioribus ingeniis; fiat itaque animi, & adfectus, in me tui novatio, quâ totus tandem obsequio, studiisque tuis manciper. Ego mea parte allaboro, neu unquam, te hujus initæ mecum amicitia pœniteat. Quod fugitivo temporis committo ventilandum. Tu saltem me suscipe, & ama. Parturio nunc quædam Theologica, & à professione mea aliena. Polyander noster hic judex esto. Sed non vulgabuntur, cum bono Deo, quin tibi visa. Ubi tres contecero partes, stat ad vos advolare. Tum tecum de omnibus quam fufissimè. Si Dionysius tuus, ingens illud sæculi miraculum futurum, adhuc in vivis est, dignaberis eum, meo nomine, quàm cumulatissimè salutare. Si nunc otium esset, equidem simul, & illi scriberem: sed vice proximâ. Jacobus Dickius te plurimum salvere jussit. Omnia in Suecia adhuc integra. Rex domi est, sed restaurandis viribus occupatus. Meritò bellum ille puteo comparavit. Videmus namque passim, Principes, Dominosque Terrarum, multo difficilius finire, quàm inire bella. Novi hic nihil, quod non & vobis jam proculdubio perspectum. Ultimò quodnam edideris monumentum, velim eadem mihi operâ significes. Non addo plura. Tu ignosce calori nostro, & responde. Vale, mi Vossi Clarissime, & me ama.

Hagæ Comitum xii.  
Mart. clc lcc xxix.

Tua Dom. studiosiss.

Johan. Cabelavius.  
CIL.

## CII.

Amicorum Opt. Max:

Quamquam nihil magnopere haberem, quod in præsens ipse scribere, aut tu scire etiam cuperes, tamen bonam occasionem non putavi negligendam; ac vel saltem hoc testandum, vivere nos ac valere, per benigni Dei gratiam: ac de vobis eadem item sperare. De re publica hujus regni, nihil habeo; nisi quod legati utriusque partis sedulo de pace agant, quam speramus brevi nos, volente Deo, habituros: Siquidem conditiones quas initio iniquissimas adversarii proponebant, cum viderent planè à nostris magno animo recusari, omiserunt; aliasque magis gratas, obtulerunt. Videbimus quid bonus Deus, quem quotidie precamur, & in quo fiduciam nostram collocamus, nobis mox sit concessurus. De studiis meis, istud habeo, ut me videas, etiam si à Typographo destitutum, non ignavia tamen ideo mancipatum desedisse. Paratos itaq. habeo, *Historia Danicæ Libros III.* quorum prior res Christiani I. alter Johannis, ejus filii; tertius verò, Nepotis Christiani II. comprehendit. Est & Solon, sive de ejus Vita, Legibusque, liber singularis. *Denarius Pythagoricus*; sive de numerorum usque ad denarium, qualitate ac nominibus, ex Pythagoræ Doctrina; liber singularis. *Gorgia Leontini, Antisthenis, & Alcidamantis, Orationes*, quæ supersunt; & de eorum Vita, atque scriptis, liber singularis. *Regnum Atticum*; sive de Regibus Atticæ, libri III. ac seorsim *Theſeus*, sive de ejus Vita, ac rebus gestis, liber singularis. Et nunc *Bibliothecam Græcam*, tanto tempore intermissam; Opus sanè operosum, arduumq., seriò urgeo. Habes mea; nunc tu tua mihi redde; tum de Statu Academiæ, publicoq. item patriæ; cui, quamquam minus bene de me merita, tamen fausta omnia precor. Vale, & salve ex animo, à me meaque, cum tuâ, omnibusque tuis. Guilielmus Noomius tuus, quid agit, & ubi agit? Amo certè illum juvenem, ac virtutem ac doctrinam, vera via magno impetu contendentem, cum Lugduni vestrae agerem. An non etiam perseverat? Spero, & opto. Si etiamnum in tuis adibus commoratur, salutem, quaeso, meis verbis plurimam dicito. Ad D<sup>nam</sup>. Heinſium scripsi ante paucos menses; quare, sodes,

an acceperit: ac salutem item dicito. Iterum vale.

Rapim. Soræ, ad  
diem xii. Aprilis,  
c15 15c xxix.

Tuus,

Johannes Meursius.

## CIII.

Guilielmus *Londinensis* Ger. Johan.  
Vossio suo.

Quod tam serò ad aures tuas pervenerat Stygium facinus, & fatum Ducis illustissimi, haud dubito, miror magis. Sed oculos tunc temporis portus nostros fuisse seriùs ipse reminiscor; & dolor sic amissi Ducis, necnon mutata, aut saltem mutanda (ut sperabatur) rerum facies, quæ in fragili memoria scripta erant facile deleverunt. Quod restat nunc sola patientia est, ut ferendo leviora fiant, quæ nec ferre didicit ingenuitas nec discutere facultas erat. Quiescit in pace anima, quæ terræ indignissima, ipsa cælo dignissima. Clarescet spero post sæculi invidiam virtus, quam deprimere non potuit rabies plusquam Scythica, denigrare tantum potuit lingua rabida. Tu age, quod spondes, & (quo solo modo gratus esse potes) nomen Ducis in se clarum, posteris clarius tradere, ne totus uno ictu infernali perisse videatur.

De filio tuo quod scribam nihil aut parum habeo. Antea significavi quam inopportunus adventus fuit. Omnia tamen, prout tum fieri potuit, molitus sum, quo nihil ei moræ esse possit, aut scrupulum injiceret, se in gentem incultam advenisse, aut in amicos dubios incidisse. Cantabrigiæ jam est, in Collegio S. Petri, & Doctori Wrenno curæ: Quæ restant, suo tempore præstabo, si potero. Et scio Wrennum, nunc Vicecancellarium Cantabrigiensem esse & filii tui amicum, & nominis tui cultorem.

Gaudeo te Thesium tuarum syllogem accepisse, & Academiam Oxoniensem, quoniam edere voluit, non penitus inemendatè edidisse. Sed de Theſibus aliquibus omittendis, nempe quia in opere Historiæ Pelagianæ, & quidem emendatus legantur, sicut consilium eorum non fuit, ita nec tuum norant. Nec sub quocunque prætextu, hoc illis opinor licuisset.

K

De

De Baptismo Joh. mihi abundè est quod scribis. Et utinam licuisset ubique, aut quia illud non sperandum, utinam alicubi licuisset, aptè sententiam vetustatis exponere, sapiat illa hominibus, sive non sapiat. Sed in illa tempora mihi certè incidisse videtur Christiana philosophia, ut de ea nec loqui, nec tacere quis tutò possit. Et quàm carè libertatem illam, quàm in alia causa, non sine summo Ecclesiæ bono, usus es, redemeris facillè conjicio. Tanti tamen tibi constituisse nunc in novissimis literis primò legi. Adjicerem hic alia, sed est quod prohibet.

De Josepho Vicecomite admonui tantum, & per amorem. Et magnà me laticia afficit, te ita vestigia ejus premere, ut simul antecedas. Nec dolori tibi sit, labores si fortè tui spissius (ut loqueris) prodeant. Negotia publica, privata, uxor, filii, amici, aliquam tui partem vendicant, eà lege natus es, sed utinam de tua uxorisq, valetudine lætiora propediem audiam, & diu vivas ad Batavorum tuorum gloriam, & Reipub. Christianæ emolumentum. Mihi tendo ferè coaluit, ita tamen ut pristinae sanitatis sit spes perexigua. Deo interrim quotidianas ago gratias, quod vel sic uti crure liceat. Literis meis per omnia responsum dedisti, præterquam quod de Baronio nihil. Nolo sic prætermittere quod summum est; tu id age, ne quid aliud impediat animadversiones illas. Ecce rogator importunus accedo, id age ut sic tandem Ecclesiæ non desit Historia sua, neve accedat quæ sua non est: si hoc velis, & breviter, potes enim, sacer mihi eris Apollo. Vale.

Tuus,

Maii 10. 1629.

Guil. London.

#### CIV.

Clarissime, Doctissimèq; D. Vossi,

Nesciebam profecto, quo pacto nomen meum ad te jampridem perveniret. Ita autem pervenisse, ut egregios illos de Historicis Latinis libros (magnum existimationis tuæ, affectusq, argumentum) dono acciperem, non poteram satis mirari. Quanti verò facere donum illud, & quàm vehementer de viri optimi amicitia gratularer, per literas non multò post datas quidem D. J. Borro è familia Burlemaëtiana abunde significavi. Conjunctæ erant cum illis literis & aliæ à D. D. Bealo, atq,

à fratre meo, nonnullæ etiam ad C. V. D. Georgium Dubletium. Periere autem (quantum nuper ex filio tuo intellexi) illæ literæ; sed non periere, neq, peribunt unquam, quas debeo gratia. Certè nec vota, quæ in illis literis nuncupàram, periere. Optabam scilicet aliquando fore, ut quia temetipso hic frui non poteramus, è filiis tuis aliquis huc in Academiam nostram transmitteretur in quo exprimere possem aliquam partem Officiorum, quibus parentem meritò, atq, ex animo prosequor. Atque hujus me voti compotem jam cum fecerit Deus, haud erit opus, ut in aliquas preces descendas, quibus ad amorem (quantum in me est) opemve ipsi præstandum animum meum excites. Multum quidem laborabor, siquid illi prodesse potero, omnesq, sedulo occasiones prensabo, ut rebus ipsius studiisque usui sim. Impresentiarum verò ille quid agat, atque ubi sit, & quam gravem subito *opem* contraxerit, narraturum opinor, qui istas defert. Illud mihi curæ est, primum ut convalescat, dein ut Sociis Collegii Jesuitalem se socium exhibeat, qualem illis, non dico à me, sed à Reverendissimis Episcopis Londinensi atq, Eliensi, vel rectius, ab Augustissimo Rege, commendari par erat. Spero autem eum assiduam (*suam*) daturum operam, ut id agat, utque Clementiæ Regiæ, & Episcoporum adfectui, ut nostris omnium votis pro virili respondeat. Quod ut pergat anniti, tuum præcipue erit, pro parentis imperio, crebris subinde literis juvenem commonefacere.

Nolo te, vir summe, pluribus jam distingere, gnarus quàm multiplices tuæ occupationes sint, & meæ literæ quàm impositæ. Sed tu scio ex fide animoq, amicum æstimabis, non ex currente calamo. Salutabis igitur ex me D. Dubletium impensissimè, atque valebis, ex assiduo voto

E Collegio S. Petri  
Cantab. die dormi-  
tionis B. V. Tñs  
Θεοτῆρος.  
clō 10 c xxix.

Meritorum tuorum

verè cultoris,

Matthæi Whren.

#### CV.

Andræ Colvii *Epistola ad G. Vossium,*  
*ex Anglia perscripta.*

Vir Clarissime,

SI peccati confessio apud te culpam vel minuit, vel eluit, libens confiteor nul-  
lum



Am me patrociniū diuturno meo silentio posse prætexere: sin minus, spero eam apud te mei esse opinionem, ut tarditatem scribendi potius infatigabili mihi negligentia imputes, quàm aut tui, aut debiti muneris mei oblivioni. Si enim toties, quoties innumera beneficiorum tuorum recordatio & officium meum me admonent, scriberem: vereor ne & tu infelix, cui cum garrula mea loquacitate conficiendum esset, & ego impudens, maioribus occupato incomptis meis verbis cerebrum excutens, jure dici possem. Nunc tamen, cum & non inutilia scribere me posse existimarem, & tutius per me quàm per alium quemvis cogniturum considerem: putavi me non abs re facturum, si sumptâ fiducia te compellendi ea transcriberem quæ nosse, meo judicio tua interest. Ex quo in Angliam veni, multa vidi & audiui de quibus præstat tacere quàm judicare. Postquam Cantabrigiam appuli, multa occurrerunt de quibus impunè loqui licet; sed judicare non est meum. Id saltem dicere ausing: — *minuit præsentia famam.*

Collegia enim ista Anglicana nostratibus tantopere memorata, sunt quidem (neq. enim ego illis quidquam detractum eo) bono consilio instituta; sed, ut omnia in pejus prolabuntur, videntur mihi jam gradus doctrinæ vel honoris magis attribui temporis quàm eruditioni: quæ, nisi favore majorum subnixâ sit, tam hic quàm alibi jacet. Præcipuè si reperiatur in extero, quem Angli transeuntem amant, remanentem oderunt, utpote metuentes ne aliquando, magnatis alicujus benevolentia suffultus, beneficiis illorum incubet. Et meo judicio quicumq. exteris, citra magnam invidiam sibi pollicetur hic promotionem aliquam, longè fallitur; cum omnes etiam privatum limis oculis intueantur: & nisi instar Protei in omnes formas se mutare possit, non est quod cujusquam amicitiam expectet. Sunt tamen hic quidam quos non minùs humanitas quam eruditio ornat: inter quos familiam ducunt Wrennus, hoc tempore Academiæ Procancellarius, & Collegii Petrini Præfectus: Belus aula Pembrochianæ itidem Præfectus: Criten Academiæ Orator, & Græcæ Linguae Professor, vir, si quisquam alius, eruditus, & à quo noster Aristarchus Nonni singulis ferè lectionibus vapulatur. Sed nescio quo fato, ut & apud nos ita hic quoq. præclarissima ingenia maximo odio flagrant, idque ea de causa, quod partes in patria nostra inferiores amare & fovere dicuntur. Sicut & Episcopus Londinensis, eadem de causa, non minus

exosus est omnibus; sed ille, qui animum non minus habet Politicum quàm Religiosum, ipsemet Parlamento obtulit quasdam constitutiones adversus Arminianos: quid de illis futurum sit, proxima Parlamenti continuatio dijudicabit. Neque tamen hoc modo effugit suspicionem; & sunt qui proximo Parlamento, ruinam illius (absit omen) sperare audent. Sed spero ipsum auctoritate Regis, apud quem plurimum potest, facillè illorum si non invidiam, at machinationes evasurum. Rex enim difficulter quidquam concedet populo, cum populus in gratiam Regis vix teruncium conferre velit. Atque hanc quidem suspicantur fore causam, ut cum quibuscumque Principibus (quemadmodum hic increbuit de Hispano) quales quales conditiones pacis ineat, ne subditis suis cogatur amplius esse subditus. Vidi hic recusas theses tuas, in oppido, credo, Utopienfi; sed Bibliopola mihi dixit, procurante Episcopo Londinensi excusas esse Oxonii, quare nomen civitatis immutaret, tibi forsitan, magis quàm mihi cognitum. Si tamen mihi conijcere licet, credo ob nomen tuum, hic in Anglia suspectum, & Arminiani titulo insignitum, civitatem mutatam esse; & quod magis est adfui hic quibusdam, qui tuum cum Vorstii nomine confunderent, & mirari se dicerent tantum hæreticum tanto apud nos in loco esse. Atque hæc hæcenus: quæ quidem scripta sunt liberiori judicio quàm decet ætatem meam, & majori libertate quam convenit regno, ubi accusationibus & adulationibus omnia pervia sunt; sed ego homuncio ignoto nomine, in peregrina terra facillè latebo inter tot homines quibus terra hæc abundat. Atque eò liberius scripsi, quia ad eum cujus autumabam interesse, & cui præter hoc pusillum etiam animam debeo, quàm libens offeram, modo voluerit opera ejus uti, cum ingenuè profiteri cogar, ab ipso habere me eatenus excultam, quatenus est. Si quid sit, quod existimes per me tutius posse procurari, tantummodò literas ad sororem mittas, & comperies me in omnibus esse

Cantab. iv. Idus  
Decembris,  
CLO LDCXXII.

Tuum Usu

& Mancipio.

Salutabis plurimum meo nomine lectissimam tuam conjugem unà cum tota familia.

## CVI.

*Salut. in Christo.*

Vir Spectatissime,

QUum Literas meas novissimas darem (& parcius hoc facere cogor pro negotiis quæ urgent & premunt fatiscentem) Literæ tuæ ad me pervenerunt. Sic fitulæ nostræ mutuo fontem petiere, dum neuter quid alter ageret certior factus.

Literæ illæ jam antiquæ & adhuc præ manibus, sed sine Responsione, & quod sæpius impedivit volentem, idem est. Nonas illæ Sextiles præ se ferunt, & hæc 12. Cal. Feb. nec tamen adhuc Responsio parata; Credideris forsan me gelu quodam, etiam hac nimis temperata hyeme obriguisse; hoc te metu ut liberem, ecce jam tandem te iterum saluto, tibi omnia exopto bona. Cum anno novo incipiat, recurratque in finem felicitas.

Prima Literarum tuarum facies gratulatur mihi Cancellariatum Oxonii mei, & subridet. Gaudio sit illud tibi; Academia salus; mihi sat scio onus incumbit, & cui nunquam par ero. Quin & his exulceratis Ecclesiæ temporibus, nec Ecclesiæ tantum (nam & sic solet punire Deus) nescio, ita me Deus amet, nescio, quid agendum sit, mihi præsertim. Sed aliquid est, quod urget, & ducentem sequor.

Illustrissimus Princeps noster, pro tenella illa ætate (Deo gratias) abundè valer. Et mihi quidem gratissimum est, quod lætitiæ illius, quam nos ex felicissima ipsius Nativitate meritò percipimus, te quoque confortem præbeas. Vivat ille valeatq; diu, seriùs tamen spero paternis succedet sceptris.

Alia sunt quæ properans cogor omittere. Sed mortem Matthiæ Martinii certè eo impensius doleo, quo magis indiget Ecclesia aequitate illa quæ in eo vixit, & quæ spero tamen non est penitus cum illo sepulta. Penitus dico. Vereor tamen ne rarior multo sit quam quæ deceret togam nostram. Historia illa unde profitebatur se eam hausisse, prolixè habet in se unde eam conferre possit, nisi Lectores habeat admodum iniquos. Iterum tibi eo nomine gratias ago. Nunc accinge (promisisti enim & non semel) ad historiam aliam; veteris nempe Ecclesiæ, scribendam. Mag-nopere cupio (Deo si placuerit) antequam fata mihi aperient sepulchrum, Baronium videre sub tuis telis cadentem. Nec literas

potes à me ullas expectare sine stimulo.

Et ecce quum manum Chartulæ huc eram appositurus, aliæ Literæ tuæ ad me perveniunt. Illustrissimus Legatus rediens, non redux sine te. De te certè nec pauca nec parva loquitur. Quin & gratias egi quod nomine meo te sibi cognitum charumq; habuit.

Ad negotium, quod attinet. Academia vestra ita collapsam esse disciplinam non sine dolore audio. Sunt hæc certè semina omnium malorum, tum in Ecclesia, tum in civili statu, quod loca educationi juvenum, in Artibus simul & Religione, olim dicata, ita laxata sint in omne quod vel maximè dedecet juventutem Christianam. Ad cades verò, easque frequenter deventum esse, quis ferat?

Consilium quod petis libentissime darem, si (quod optas) præsens essem. Res certè magna & gravis; tibi honorifica & utilis futura: Amstelodamensibus forsitan non desiderata magis quam salutaris, Rationes quas proponis, primo intuitu firmæ videntur, & rotundæ sine offensione quas novi ullæ. Hoc unicum seriò considerandum, quid Ordines vestri de consilio hoc tuo senserint, & quibus fundamentis nixi. Nam si illis transitio hæc tua parum Republicæ vestrae utilis censebitur, quis scit quid inde dispendii, quid periculi tibi possit accedere? Quod ex animo deprecor: Scio te cautum fore & prudentem; & spero Deum cui servis electionem tuam ita velle disponere in melius, ut illud in te assumas quod simul & licitum, & utile & honorificum sit. Quod semper erit in votis

*Amici tui & rerum*

12. Cal. Feb. 1630.

*tuarum studiosissimi,*

Guil. Lond.

## CVII.

QUod labores meos nomini vestro inscriptos vellem, hoccine tanti (egregie vir) ut obstrictum te mihi credas? Sane hoc & si quid potuisssem majus, vestris in Rempubicam literariam meritis debebatur. Imo superbire magis videbantur vestro Patrocinio Chartæ nostræ, quam si Principem aut Magnatem aliquem ostentarent. Illum siquidem ego mihi colendum duxerim, illum ambiendum, quem vera nobilitas, virtus & eruditio supra vulgus homi-

hominum evehant, non qui ob inanes titulos & honores merita superantes adorari se ab aliis velint. Adeo satis mihi abunde fuerat, quod coli à me virtutes tuas patere: at quod aliquam mei rationem habere, quod amore me tuo dignari volueris, superabat hoc ferè votorum ambitionem. Tu verò neque hic gradum sistis; parum hoc putas (quod tenuitati tamen meæ nimium) nisi & aliorum mihi amorem concilies. Illud autem quo artificio præstes, abunde expertus sum Literis à Cl. viro D. de Dieu acceptis, quibus affectum ergà me singularem luculenter admodum testatur. Cujus viri favorem quanti æstimaverim non sum exprimendo. Ille est certè cuius amicitia nullius aut prætulerim aut æquaverim alterius, quam ejus qui illam mihi comparavit. Majus est equidem vestrum hoc in me beneficium quam ut rependi à me queat. Gratè (quod unum possum) agnoscere & prædicare nunquam definam

*Dum memor ipse mei, dum spiritus hos  
reget artus.*

Vestrum interim erga me amorem, eadem quæ excitavit bonitas vestra, extingui iterum, uti spero, non patietur. Quæ sitis præstantissimi D. de Dieu satisfacturas spero Literas has nostras, quas uti illi tradendas cures, rogo. Pollicitus est D. Roufius, ubi literas ab ampliss. D. Archiepiscopo Armachano (quas quotidie expectat) acceperit suas se ad te daturum. Salutem tibi plurimam dicit D. Harrisonus qui perquam humaniter me vestri causa tractavit. Salutat itidem Chillingworthius. Amant sanè te & colunt apud nos quamplurimi, eo & ipsi nomine à me plurimum amandi & colendi. Vale (clarissime vir) & quem erga me conceperis affectum, fovere pergas.

*Dat. Oxon. in CCC.  
2 Martii, 1630.*

*Dignitati vestræ  
addictissimus,*

Edwardus Pococke.

## CVIII.

**E**GO verò, (Clarissime Vossi) quotidie multumque gratulor mihi istas amorum nostrorum confederationes. Sed & gratias nunc quoque ex animo rependo tibi, quod tam benignos in modos tamque candide interpretari ames exiguum illud animoq; meo plane impar, quod in

accessu ad nos tuo præstare potui, in meorum (ut tum res erant) occupationum tumultu. Illud credas obtestor, ex omni Cantabrigienfium tuorum numero, (tuos autem fecisti plurimos) neminem te habere, qui libentius fideliusve tecum coeat sacrum hoc fœdus amicitia. Sed & Coniux mea (quod nescire te nolo) non infrequenter facit tui mentionem, ut hominis (quantum ipsi ex adspectu gestuq; recte augurari erat) probissimi suavissimique, & sæpius mihi precatur aliquot assiduos sodales confimiles D. Vossii. Ex illo quidem tempore, quo nobiscum adfuisti, Academicam revivere vix dum est datum, sed Windesora per hyemem hanc continuo hæsi. Nunc reditum illuc cum universa familia (*ὅν δέψ*) meditor ante mensem, filium ibi tuum, in omni re suâ, quantum poterò, curaturus. Non desint interea scio Literæ optimi parentis ad eum, quibus in hoc lubrico ætatis, ipsi Officii sui subinde commonefacias. Sed absens utcunque, non tamen sum passus frustra esse quas in Literis ad me tuis salutes perscripsisti. Procancellarius noster, Collinus, Wardus, Bealus, Duncomus, Critonus feci ut intelligerent, quam memor ipsorum vivas; quod usque ut facias diuque, omnium est votum. De Episcopali verò dignitate quod inaudieras, meræ erant fabulæ. Abundè meo voto responderet, quo me jamdudum in loco Deus Opt. Max. & benignissimus Rex collocarunt. Ardua illa atq; in sublimi posita conscendant bonis avibus, qui meriti sunt. Vale, vir egregie colendissimeque & inter tuos perge numerare

*Windesora, in Annunciatione Domini-  
cæ, 1630.*

*Æternum tuum,*

Matth. Wren.

## CIX.

Vir Clarissime,

**E**T si nihil ferè haberem, quod in præfens ipse scriberem, aut te scire velle crederem, tamen Tabellarium tam certum nactus, non dimittere eum potui, sine literis, quanquam brevibus. Non irascor quidem tibi; (nam qui possim, adeo amico capiti, adeo à me amato?) verum doleo vehementer, quod biennio plane toto tuarum mihi literarum alloquio carendum fuerit. Affirmo enim, nullas sane accepisse, post illas quas ante biennium dabas



dabas Id. Maiis cIdo Idc xxviii. Egotamen interim non defui amicitiae nostrae. Quaeso quam uberrimis defectum supple: & fac sciam, de Academia, de Repub. quicquid novi. Vidi nuper Catalogum Bibliothecae Rutgerianae, plenissimae certe librorum quorumcunque optimorum: Scribo ad communem amicum Dominum Heinsum, heredem atque venditorem, ut existimo; uti mihi hanc gratiam faciat, eximatque auctioni quos subjunxi, ac mihi vendat. Nosti id fieri interdum. Itaque si forte se difficilem praebeat, nava mihi hic operam tuam, & impelle tua Suada, ut gratificari velit. Pretium, quod etiam ipse iudicabit, ab affine meo, Ministro Wassenariensi, statim accipiet. Nam ad eum etiam hac de re scribo. Possem expectare tempus auctionis, sed quandoquidem hominem nunc certum habeam, per quem tuto deferantur, occasione utendum puto, quae non alias facile se exhibitura est. Qua de causâ etiam te atque etiam rogo, ne deesse hic mihi velis. Scripsi bis ad Elzevirium de quibusdam lucubrationibus meis, quarum editionem urget maximore Illustrissimus Molinus; sed responsum nullum accipio; mone hominem, ne contemnat veterem amicum; & si commodum ipsi non sit, quicquam edere, saltem verbo id significet, neque ultra expectatione torqueat. Tunc habeo quod respondeam Molino; communi Mecenati nostro: cui alias excusare me non possum. Nam is vehementer flagitat. Cum hac scripsissem, tua mihi exoptatissima per Stephanium afferuntur; quas profecto, ut accepi, exosculabar. In ipso initio, dolorem incussit casus filii tui maximi, quem plus minus mens scribis oculis fuisse captum; sed Deo gratia, qui restituit; quanquam id ex literis tuis magis conjectura capio, quam intelligo; nam non differtè dicis. Quod Britannicum sibi iter tantopere placuerit, tum quod viros illic plurimos quoque offenderis, qui te solide amarent, tibi gratulor, mihi que gaudeo. Libens quoque intellexi, de Critonii Petrarque in me tam benigno animo. Si fortasse aliquando literas ad utrumque dabis, officia illis mea defer, mutuumque amorem nuntia. Gratulor autem imprimis de Canonicatu illo, quo donavit Rex Britanniae Serenissimus: sed nil scribis, quam ob causam, quâ occasione dederit. Fac ut sciam ex proximis tuis, quas praesentium latori ut committas, in maiorem modum rogo. Nam cum certa mittendarum literarum occasio non se semper offerat,

quotiescunque ea datur, amplectendam esse censeo. Amicus quidam ad me scribit, librum quendam Regi abs te dedicatum, ideoque istud tibi honorarium decrevisse. Sed tu nihil tale indicas. Merito hunc Regem docti omnibus praconiis maectent, qui ab illo in hunc modum aestimantur. Sine dubio dolent oculi animusque isti \* nostro; qui \* *Don Heinso, opinor.* invidere & obrectare nunquam desinit, apud suos.

Sed alat ille perpetuum tormentum suum; nos illi non invidemus. Scripsit ad me tributum sibi nil tale expectanti (quod credat Judaeus apella) munus Historici & stipendium Scaligeri *de uangelis*: nempe Florenos bis mille, & quadringentos: quibus si stipendium addat Bibliothecarii, & Secretarii, una cum emolumentis, effici Sexcentos alios. Tu verò scribis, datum illi munus Historici, cum stipendio florenorum annuorum septingentorum. Arleni conatum praeclarissimum, de Salmatio in Scaligeri veterem locum evocando, non possum dignè satis praedicare; utinam perficiat, cum ingenti Academiae patriae gloria. Neque dubito, quin omnino obnitatur noster iste, qui pra se vix alium aestimat. Sed illum Manes sui exagitant. De Casauboni literis quod mones, est id sane perquam gratum; & accipe quas ad me scripsit: Institutiones tuas Oratorias videre aveo: nam si quisquam est, qui tua aestimat, is ego sum. Golium reduisse & duplicem Professionem obtinere sane gaudeo; neque ullum habeo dubium, eum olim non duntaxat patriae communis nostrae, sed totius adeo avi, singulare ornamentum futurum esse. Saluta illum, nisi grave est, meis verbis; & dic, fausta ipsi omnia apprecari. Sed de Heinio, antequam finiam, illud querere volebam, Ordinum Hollandiae, an Generalium, sit Historicus; fac ut sciam. Vale, amicorum omnium optime maxime. Uxor quoque tibi tuaeque plurimam salutem adscribit; tum & filia item tua. Saluto etiam V. R. Andream Rivetum; cui potes meis verbis affirmare, me in ipsius amore atque cultu, constantiam tueri. Nec Barlaam praeterebo, cujus Carmen de Sylva-Ducis obfidiōe rectè accepi. Profecto ille vir parem se summis in hoc scribendi genere viris praestat, si non superat. Iterum Vale.

*Reptim Sorae  
ad diem V.  
Martii,  
cIdo Idc xxx.*

*Tuus Fide Barava,  
Johannes Meursius.*

Quaeso,

Quæso, indica locum ex Epistolis Scalligeri, in quo acerbè quiddam, & nequiter, ut mones, de me dictum: oportet inspiciam; nam Epistolas hic habeo. Laurenbergio salutem dicam, cum redierit: nunc enim abest, Hafniam profectus. Opus tuum de Hist. Lat. summa cum voluptate legi; est præclarum, id est, Tuum; quo ut optime de defunctis es meritis, ita viventium sane studia plurimum tibi obstrinxisti. Placent quoque supra modum quæ pro Socero, Viro summo, admodum luculente dixisti. Est profecto, in tanto Historico, crassus Error; tum malignum nimis iudicium; idque in gratiam potissimum, ut verè dicis, viri illius, magni quidem, sed non candidi alienarum virtutum aestimatoris: maxime in illis, quibus, animus erectior erat, & à turpi adulatione alienior: quod & ipse sum expertus.

Sequitur in Epist. MS. Catalogus Librorum quos ex Rutgerianis poscit V. Cl. sed ut longiorem, nec Lectori ullomodo utilem omittimus.

De Noomsio tuo quærere me ex te memini, ut loci, & quid ageret; quæso fac me certiorem. Ad Dominum Heinsum, ut statueram, scribere in præsens haud licet, urgente admodum Mercatore, & vix me permittente, ut has finiam; itaque salutem illi meis verbis plurimam dicito. Te verò imprimis rogo, ut negotium hoc librarium des effectum. Ac si ille, quod non spero, se difficilem tibi præbeat, operam dabo, uti habeas unde, ac quocunque item pretio, saltem quatuor istos, Pappum, Apollonium, Orbasium & Diodorum Euchiontem. Facile autem vobis est recuperare, inter tot Auctiones, quæ passim habentur. Qua de causâ maiorem te in modum rogo, ut huic meo desiderio satisfacias. Amicissime, vix finem impono; ita planè, dum ad te scribo, sermonem tecum ferere videor. Finiendum tamen semel. Utinam autem coram colloqui daretur, quod, ut maxime ego opto, & desidero maximo cum desiderio, tamen tempora non permittunt, obsidente adhuc vias, ac potissimum circa Embdam, milite Casariano. Iterum vale, Amicorum omnium prime. Sed verò de libris istis comparandis, iterum tibi aurem vello. Oro te, obsecro & obtestor, per humanitatis tuæ, & communis Amicitiae nostræ Genium, uti desiderio meo satisfacias. In penultima Epistolarum Casauboni, si illa de Viro plane eximio, Socero tuo, minus placent, dele aut muta, prout

visum fuerit tibi. Habet Heinsius quandam epistolam, scriptam circa exitum anni 1650. quam tunc ipse mihi prælegit. In hac elogio sanè amplissimo & maxime Casaubonus me ornat: & ut memini, prædicabat meam cum ipso conversationem, dum Lutetiæ commorarer; prædicabat, præter doctrinam, etiam probitatem, gravitatem, fidem, integritatem, & alia. Nescio an is eo candore illam Epistolam sit edendam exhibiturus, quo tunc mecum communicabat: quod fortasse oblitus erit. Nosti ipse ingenium hominis. Sed videbimus, & eventus nos docebit. Rursum vale, & ignosce confundenti scriptionem. Habes Epistolam proximam, & quæ tibi affectum meum repræsentet. Vide Epistolæ hujus fatum! Nondum licet finem facere, scripseram de Elzevirio, & quarundam lucubrationum mearum editione; ac nunc literas accipio, quibus præli occupationem obtendit; id est, per ambages negat, uti ego quidem interpretor. Mihi certum, nunquam illi aut istiusmodi hominum generi supplicare. Equidem contentus esse partâ hæcenus famâ possum; & deinceps mihi, ac Musis, lucubrabo: ut canebar Antigenidas. Mitto autem ad te Denarium Pythagoricum, indelobati in te affectus quaecunque monumentum apud exteros posterosque; Panathenæa, cum Scrutero dividebas; hoc opusculum, tuum ex asse esse volo. Facile puto id excudet Commelinus, qui Athenas quoque meas pridem excudit: vel Lemæus quoque tuus, qui excudit tua omnia. Quod si uterque aspernatus, poteris ad me remittere, ut cum cæteris suo carceri mancipetur. Vale quartum.

*Tuus, sine ullo fūco, uti nosti,*

Johannes Meursius.

CX.

*Clarissimo Viro Vossio.*

**T**bine doleat, Clarissime Vossi, non convenisse me? quin tantum potius virum pudeat tam sollicitè quævisse aut etiam desiderasse hujus ordinis hominem, usque adeo intra se recedentem, atque pone se latentem, ut neque mirum sit, si tam bona hæc fortuna eum non invenerit, quem non celeberrima prius adierat fama, venisse in Angliam Ger. Jo. Vossium, quam

quam excessisset. Quod si per tempus rescivissem, jam tum me jure pernicem dixisses Ladan aut alatum Persea; quod jam dicis: nec injuria, rapidam enim illam in transcurso festinationem meam neque sine morum censurâ memorandam præproperantiam, & ipse multoties exinde damnavi quotiesque recordor, pœnitet, pudetq; Amstelodamum vestro Lugduno; Judaicæ Synagogæ ceremonias, quas instanti tum sabbato visere gestiebam; vestris sacris necessariis denique mihi die indicto reditum benignissimo tuo invitamento prætulisse. Quod sanè erratum, aut potius peccatum, ex parte redemissem, modò vel minima tui in Angliam adventus aura aures meas adflasset, diluisssem (inquam) incivilem illam præcipitantiam, omnibusque illico relictis rebus advolassem, pennatori quàm ante remigio prætervexissem: non, quod aiunt delicatuli isti manum osculaturus; verum ad pedes provolutus scientiæ illud oraculum, modestiæ miraculum veneraturus, veniam deprecaturus, tibi gratulaturus. Sed ecce prolixam tuam propeque divinam humanitatem! quæ inhumanitati meæ ultra litatum procedit, quæ offensam, quam eluctari me oportuerat, officio exceptit, neque fastidit hominem errore quidem magis quàm scelere peregrinum inter cultores admittere, imò advocare. Ah! bene sit carinæ illi, quam dicis scævæ, quæ te advocavit interturbavitque mei visendi consilium. Hinc enim suavissimæ tuæ atque literatissimæ Literæ, quas ego non auro contra, amicitiae arrha qua quia me præstinatum venis; ecce manus do, mancipio usq; tuus, utinam & fructu. Fidelem certè spondeo, ac utcumque in tanta cultorum tuorum familiâ me agnosco haudquaquam præ ceteris dignum, qui palum in parietem figam, sicubi tamen siquando si qua dabitur, ad omnia officia habes paratissimum. Sed quid agam interea? Quo non valet manus ibit mens tendet votum; quod bene omnium faxit ratum Deus, tibiq; det secundam paremque Angliam nostram videndi occasionem. Interim, Salve Clarissime Vossi, & perge quod facis, amare, tui pene contra latinitatis atque amicitiae canonicas sollecissans dixissem, colentissimum; sed quoniam ita fieri jubes, meque intra familiaritatis pomœria Civem accitum vis,

Londini, Pridio  
Nonas Martias  
clō lxxc xxx.

Tui amantissimum,

Tho. Farnabii.

Duo Nobilissima Academiae vestrae lumina Clariss. V.V.D. Heinsium & P. Scriberium veneror, quibus à me summo cum officio, aut amoris religione dici salutem percipio.

# CXL

**D**edi ad te, Vir clarissime, prolixas admodum literas ante triduum, aut quatrimum, quas non dubito quin acceperis, quando eas homini certo ferendas dederim. Iterum nunc ad te scribo: sed brevissime. Qui has tradit, cum Hollandiam cogitaret, videre Leidam nostram voluit, & te in ea ante omnes. Nec hoc tantum; sed & unice amicitiam tuam expectit: quâ experieris eum minime indignum esse. Est autem juris Candidatus, Ethicæque aliquamdiu Professore extra ordinem in hac Academia egit: nec remotus est à munere, sed removit à se ipse, studio peregrinandi, & ubique viros claros cognoscendi. Scis talem animum non posse cadere, nisi in eum qui virtutem & doctrinam, pariter amet. Facit ipse: & utramque hætenus præclare satis est sectatus. Deprehendes, si licebit experiri. Non commendo eruditionem ejus, sed virtutem, probitatem, integritatem. Uno verbo: est cum quo in tenebris micare possis. Summa voti est, si ad mensem unum, aut sesqui, (nam diutius commorari non constituit) domo tua, & mensâ uti concedatur. Id si impetrat,

*Sublimi feriet sidera vertice:*

Oro te, Vir amicissime, si id rationes tuæ ullo modo patiuntur, fac hanc gratiam & mihi beneficium imputa. Nec ingratum aut indignum ille se est præbiturus: & me item in majorem modum obstringes. Si quem unquam talem mihi commendabis, vicissim ostendam, quanti tuam commendationem faciam. Vale, amice incomparabilis, cum Uxore, Liberisque in annos Nestoris. Uxor mea te, tuamque ex animo salvere jubet.

Raptim, Soræ Danorum ad diem xv.  
Mart. clō lxxc xxx.

Tuus ex interiore animi affectu,

Joannes Meursius.

CXLII.



## CXII.

*Doctissimo Viro, Gerardo Joanni Vossio,  
Affini conjunctissimo.*

Conjunctiss. Affinis,

**B**inas jam ad te dederam literas, cum tuæ mihi sunt redditæ. Priores meas cum Libris, jam olim ad vos perlatis spero: Alteras, unâ cum Doct. Wrenni Epistolâ, te pariter cum hoc præsentî scripto, accepturum arbitror; quandoquidem hodiè ad me retulit nuntium is, qui Illust. Comiti Mareschallo à secretis est; cras demùm aut perendiè ingressurum iter, famulum istum Legati, Regis Britanniarum, cui secundas meas commiseram literas. Dolui quidem quod nondum ad te perlatum fuisset alterum illud fidei meæ testimonium: gavissus tamen sum, quod demùm scribendi, tutiusque ut puto, transmittendi occasio affulgeret; præsertim cum triduo abhinc, D. Casauboni literas ad te recepissem, & de iis rectè curandis, non parùm essem sollicitus. Tuis ad me literis, alias ad filium Johannem inclusas, ipse secundo post die Cantabrigiam ad eum detuli; non quod occasio mittendi eas deesset; sed ut promissi fidem exolverem; sedulò fidelium amicorum opera uti non destiti, & quæ de vita, moribusque Johannis nostri constare poterant, sciscitari. Ibi omnes uno ore, omnia bona prædicare, & singularem ejus modestiam, ac strenuam in studiis operam extollere non desinunt. Ac fidem mihi fecerunt, non vana hæc esse, neque auribus meis tantùm data; cum etiam dum in itinere, eò atque redeo, ex ignotis, ignotus ab his non abhorrentia intellexerim. Utut verò nunc meliorum spes facta sit, nunquam tamen porrò in rationes vitæ ejus, quotiescunque occasio erit, inquirere desinam. Otiduum hodie est, quod Comes Pembrokiæ, subita morte extinctus est: & triduo post Mater Comitissæ Arundellii functa fato est. Unde duplex, nobilem hanc familiam luctus invaluit. Initia quædam pestis hic grassaturæ, quotidie videntur deprehendi; faxit Deus, ne malum ingravescat. Da veniam, præproperæ festinationi: jam avocor; & vix otii satis relinquitur ad obfignandas literas. Saluta omnes.

Anno 1630.  
17. Aprilis  
Sr. vet.

*Tuus omni officio,*

F. F. F. Junius.

## CXIII.

*Cl. Viro G. J. Vossio, Affini conjunctiss.*

Conjunctiss. Affinis.

**L**iteras hæc Doctoris Wrenn, primâ quaque occasione ad te mitto, ne per me stetit dicatur, quominus jucundissimæ consuetudinis mutua officia scribendo exciteris. Videtur is meliora de Johanne nostro sperare, ut & Michael iste, qui Comiti nostro à sacris est; fuit hic jam nuper Cantabrigiæ, & reversus animum meum optimâ spe implevit. Aliud longè sentiunt alii: sed mihi hæctenus excurrere eò, non fuit integrum; quandoquidem post meum è Belgio adventum, præter crebra in vicinos nobis tractus itinera, longo quoque ac permolesto itinere, Comitem unâ cum liberis, in Salopiensem agrum proficiscentem, persecutus est. Dumque revertimur, diem unum in Oxoniensi urbe, ad deponendam lassitudinem, ex itinere hyberno contractam, substitimus. Ibi singularem Bibliothecarii humanitatem expertus; non sine uberrimis ad te literis abiissem, si Rever. Armachenis Episcopus, consilii sui rationem, de Mariano Scoto, per literas aperuisset: sperat tamen Dominus Rous fore, ut brevi te de Primatis Hyberniæ, super ea re animo certiore faciat. Ostendit mihi etiamnum hodiè Doctoris Utherii literas, nobilissimus Eques Henricus Boucherius, in quibus Rev. Antistes dolet, sibi nihil prorsus de tuo in Britanniam adventu constituisse. Addit se Rev. Episcopum Londinensem, per literas consuluisse, an non spes aliqua relicta sit, pertrahendi te in hæc partes; & alia multa huc spectantia, quæ referre singula supersedeo. D. Seldenus, D. Boucherius, Patricius Junius, D. Boswellus, & quotquot hic sunt literati, unicè tibi commendari optant. Pettæus noster scire avert, an unquam videris Theodoretum, de Vitis Sanctorum, quem MS. è Græciâ advexit, fac sciamus, an te iudice prælo dignus. Alia sunt de quibus agerem, si per præcipitem, quâ urgeor, festinationem liceret. Nunc tantùm addo, nihil mihi gratius obtingere posse, quàm ut te, tuosque omnes, prosperâ uti valetudine intelligam. Vale.

*Raptim, Anno 1630.  
6. Maii, Sr. vet. in  
edib. Arundelianis.*

*Tuus omni officio,*

F. F. F. Junius.

Literas ad te, unâ cum Libris, ad cognatos, & filios jamdudum misi: spero rectè perlatis.

L

CXIV.

## CXIV.

Amice Præstantissime,

**L**iteras tuas tam quas postridie Kalend. Maias, per Mercatorem Slaglofiensem, quam quas vi. Id. Junii per Davidem Gulielmum ad me dedisti, rectè accepi. In illis, pariter atque in istis, video affectum, & exosculor: quem ut sempiternum in me esse velis, id te rogo, etsi nullo modo dubito. In prioribus, magnas nimis gratias agis, pro re sanè non tam magnâ: sed est amor, qui exaggerat, & ex mulca tibi elephantem facit; tamen abeam à vero, si id mihi majorem in modum gratum negem: item illud, quod spem facis, brevi hunc Libellum nostrum editum iri. Ubi id autem factum fuerit, mitte mihi exemplaria compacta decem, & incompacta alia totidem: pretium compactionis, & ab affine, Ecclesiæ Wallenariensi, repetes. Mittes verò Amstelodamum, ad Joannem Janfonium: qui rectè ad me curabit. Exemplar quoque Hagam unum mittas censeo, ad Dominum Mylium, communem amicum. Dabis quoque Riveto, Cunæo, Heinsio, Vorstio, Barlæo, & Scriverio. In Italiam duo mittes, illustrissimo Molino, & Francisco Mariæ; in Angliam quatuor, Spelmanno, Junio, Critonio, Petæo; in Galliam, Grotio; de Salmafio, facies tuo arbitratu atque nomine: nam in illo certè viro, ut libenter diffusissimam lectionem, ac doctrinam singularem, æstimo pariter, prædicoque, sic modestiam, & candorem, merito desiderare mihi videor: ubique sedulo caver, ne me nominet, etiam ubi deberet; taxet verò quamlibet suppresso nomine, ubicumque se occasionem nactum esse putet. Ego tamen, uti fert ingenium meum, ejus mentionem honestam pridem feci, libro de Ludis Græcorum, pag. 35. Et tuam fidem an non jure & judicium requiro; cum tam multa ubique inculcet, collo etiam obtorto adducta, loco admodum alieno? Adde quod ineptum satis, cum Solinum nobis edat, & in illum commentari proposuerit, opus totum quod cum Plinio eum auctorem contulisset, Exercitationes Plinianas dicere. Quis doctorum ad hoc tempus in hunc modum commentationem instituit? Modestiam verò itidem me desiderare jure existimo; nam si qui seorsim sentiant, hos nugari, nugæ agere, ridiculè agere, ineptè agere iudex iste sine suffragio pronuntiat; sententiæ suæ, sæpe etiam minus rectæ,

nimis pertinax defensor. Ego nunc Historiam trium Daniæ Regum edo Hafniæ, impellentibus viris aliquot Primatibus; qui ut me ac mea, amant æstimantque, sic vulgari specimen istud operæ meæ plane cupiunt. Ubi Typographus absolverit, mittam exemplar. Probasse se tibi Ernestium nostrum, est quod gaudeam; gratiasque magnas ago, quod posueris tantum pretii commendationi meæ: ego paria sum facturum, sicut amicitia nostrâ dignum puto, si quem unquam huc euntem commendabis. Mira retulit, qui has adfert, Jacobus Marci, agere nunc Amstelodami Utenbogardum, Grevinchovium, & Episcopium: ac præterea, urbis ejus magistratum Scholam quandam illustrem erigere, ac Barlæum illum ad professionem amplissimo stipendio advocasse. Sed tu nullum de his verbum: fac me, quæso, proximè certiore. Doleo diffidia Patriæ, & concordiam tandem constitutam optem. Vale, amicissimum caput. Uxor mea te, tuamque salutat plurimum, Liberi, vicissim tuos: Filiam imprimis filia. Vorstii literæ gratissimæ fuerunt: atque rescriptissem ipsi, nisi Jacobus Marci noster festinatione suâ voluntatem impedisset. Fiet proximè: interim salvere multum ex animo jubeo. Salveant quoque viri alii amicissimi & clarissimi, Rivetus, Cunæus, Heinsius, Barlæus, & Scriverius; qui & ipse hætenus in Vorstianum modum fileat. Ejus quoque si potes veternum excita. Facit rem indignam amicitia nostrâ. Iterum vale.

Soræ, ad diem  
xxi. Junii,  
cIo lOc xxx.

Tuus ex animo,

Joannes Meursius.

## CXV.

*Salutem in Christo.*

**L**iteræ tuæ tres numero (Vir Clariss.) manus meas utrasque implevere, à quo te vel coram, vel per literas salutavi. Et pudet, & doleo. Amor tamen tuus, quo me frui gestio, facile huic tarditati veniam dabit, præsertim quum res meæ tibi innotuerint. Literæ enim tuæ novissimæ datæ sunt 14. Feb. 1630. quo tempore ego minus firmâ valetudine responsum nec illis, nec prioribus potui aptare. Nam post discessum tuum, Festo Nativitatis Domini nostri instante, etsi relapsus in febrem non contigit, nescio quomodo tamen

men turbata natura me iterum periclitantem vidit. Et quid per hæc potuit (cum Hilario loquor) limosi corporis gravis Anima?

Festo Paschatis sequente (quod ut nōsti incidebat hoc anno in 28 Martii) confirmator accedentem, & ascendentem solem aspexi, & me paulatim negotiis & Aulae & Ecclesiae immiscui. Fretus tamen multo magis Deo & tempore Anni, quam propriis viribus. Exinde Festo finito, Deo sic disponente, negotia undiq; me obruebant. Certè primò non sine metu mei & meorum, sed postea sub mole illa, quā vix major mihi unquam incubuit, crevere vires, & misericordiam ampliante Deo pristinam adeptus sum valetudinem. Semper tamen excipio Tendonem fractum.

Hodie primum exui paululum negotia. Et hoc Justitio dum fruer te imprimis salutare cura fuit. Salvus itaque sis mihi charissime, & à lævo recipias quicquid adhuc amplius te & studia & familiam tuam beare possit.

Ad literas quod attinet. Primæ discessum tuum tantum repetunt, & quam carus fuisti confratribus tuis Cantuariensibus. Gratiarum ego egi nonnullis eorum quos vidisse contigit, & nomine tuo. Sic illic omnia certa, & spero tibi grata sunt. Filius tuus Johannes dum redit Londinum non multos post dies me invisebat. Claudicabat, sed paululum, & tum quoque magna spes claudicationem illam non fore diuturnam. Ab illo tempore eum non vidi, studiis spero intentum. At ubi loci nunc sit non dubito quin ipse te certiore fecerit, & quam graviter Cantabrigia peste laborat. Morbus ille à vobis, militibus quibusdam redeuntibus, transmissus.

Literæ tuæ quæ his succedebant felices nunciæ fuerunt salvi & sospitis reditus tui in Patriam. Gaudio id certe magno mihi cessit, utpote cui sanitas tua, & vita in longum protracta in usum Ecclesiae, in primis votis sit. Facile credo fuisse non paucos qui tibi reditum gratularentur, quam dispari animo ipsi viderint. Sat scio quales inter vos amicos habeant qui Potestatis Regiæ, & veteris Ecclesiae cultores quoquomodo existunt. Si cordatioribus exemisti scrupulum, illud perbene: qui Tribunal olent ad populum refero; curet scilicet qui vult. Me non nominant Literæ illæ, sed satis intelligo, & multum rideo insaniam.

Promittis hic Institutiones Oratorias. Et eas jam accepi per manus doctissimi tui Junii. Ille ante mihi charus, charior nunc nomine tuo. Pollicitus est ille se unā cum

gratiis ob libros illos doctissimos & tuos, me excusatum habiturum apud te quod tum literas non dedissem. Nunc ego iterum Baronium inculco. Nosti quid velim: Et est quod vel maxime usui sit Ecclesiae. Induciæ vestrae cum Hispano precor aut non sint, aut sint cum bono & vestro & Ecclesiae. Nec imprudenter cavent meo iudicio, qui exinde domestica dissidia magis timent; præcipuè prout Religio hodie apud vos — De Scoppio vestro, & reliquis reformatæ Religionis Propudiis, quid dicam nescio, gaudeo tamen Amstelodamenses, ubi Libertatis nescio quod Asylum, in maledicum tam severos extitisse.

Novissimæ Literæ tuæ nil aliud ferè spirant quam honorem Higgii nostri. Certè multum tibi debet Oxoniensis Academia nomine ejus, nec minimum ego, qui Higgium illum virum moderatum aequè ac doctum semper quibus potui modis promovebam. Non opus est ut scribam, ille (scio) narrabit quanto amore, maximo illo certè, si prudenti, si fausto bene est, me Oxonienses, nunc alio nomine mei, profecuti sunt, & me Cancellarium, indignum simul & nolentem elegerunt. Inter eligentes Higgius. Eum sine literis remittere ad vos me graviter pupugit, sed tum vix respirare datum. Gratiarum tamen ago, & tibi & filio Francisco ob honoratum Higgium.

Quod reliquum est scias velim, etsi tempestates quæ sæculo hoc exagitant Ecclesiam sedando non sim, nolle tamen me (Deo favente) aut Causæ aut Officio desesse. Interim cuivis ferè obvium est quam periculosè jactantur Respublicæ, fluctuante Ecclesia. Ad filium tuum Johannem quod spectat, quum proxime videro (bravi id spero futurum, Deus si pro misericordia sanarit Cantabrigiam) effectum dabo quod postulas. Tu modo ut mei quotidianis in precibus memor sis obnixè rogo, ut in nomine Christi; ne dum moliuntur inimici, solus sim. Vivas interim opto, valeasque ego ut sim

*Virtutum tuarum cultor, sicut*

*sum & tui amantissimus,*

Guil. Londin.

Julii 21.  
1630.



## CXVI.

S. P. D.

POtuissem tibi innotescere V. Cl. commendatione summorum amicorum tuorum Hugonis Grotii & Sam. Nærani, quorumque uterque benevolentia me sua dignum hæcenus existimavit. Sed ego, quotiescunque singularis tuæ eruditionis mentio apud me facta est, insignem simul humanitatem tuam laudare semper audiui illos qui apud vos vixerunt, & tecum versati sunt. Itaque & me eorum numero ut ascribas, quos amore tuo dignaris, per te illud rarissimum nominis tui decus precor, quod optimis tibi in literas meritis acquisivisti. Qui sim quantoq; doctrinæ studia ardore sectari soleam, ornatissimus noster Bellimontius indicare tibi poterit, qui eadem nobiscum ædes aliquandiu habitavit. Sed & ipse te videbo, si votis meis Deus immortalis annuet, & à Sextili statim mense reditum ad meos moliri per Bataviam poterō. Interea ne hoc auspiciū nostræ notitiæ sine onere ad te transeat, maximo opere tu meos conatus provehes, si Stephani Taurini de Stauromachia librum, ante annos forte L. editum, quemq; Cluverius vester & alii sæpenumero adducunt, alicunde mihi erues, & vel ipsum, vel excerpta quæ ad rem meam faciunt, in ædes Grotianas transmittes. Quum enim Daciam antiquam aliquot annorum diligentia adornem, plurima in hoc auctore extare audio, quæ juvare me admodum possint. Et ego frustra tot Bibliothecas hucusque vel ob hanc solam causam perreptavi. Nunc ad te hæc cura redit, quem nihil eorum latere quæ ad literas faciunt publice novimus. Tu videris, an hoc officii genere obstrictiorem me tibi reddere velis, qui virtutes tuas maximamq; doctrinam illo quo debui cultu nunquam non suspexi. Vale.

Lutet. Paris.  
vii. Id. Jun.  
c1610 cxxx.

Clarissimi nominis tui

observantissimus,

Martinus Opitius.

## CXVII.

NUllus præterit dies, in quo non sapius prudentissimi mihique utilissimi tui sermonis recordor, & infelicitatem meam, quod tam egregii & divini amici, imo op-

timi patris, quem (Deus scit) super omnes mortales amo, magnifacio & admiror, colloquiis & consiliis sim orbatus. Tu enim optime D. Vossi non ignoras, quanti nostra interfit habere, quorum consilia tuto sequi possumus. Pauci certe sunt quos æquus amavit Jupiter. Alii enim, ut Cicero prudentissimus mihi narravit Magister, insipientum & indoctorum Parentum & Præceptorum præceptis sunt imbuti: Alii multitudinis stulto feruntur iudicio, quæque magistro illo erroris bona videntur, ea imitari student. Pauci tamen, siue singulari gratia Dei, vel etiam eruditorum Parentum & Præceptorum disciplina rectam tenent sapientiæ viam. Tertiū hujus ordinis amicum olim fui nactus Christophorus Heidmanum virum rarum: quem tamen statim, quum eum plusquam 60 milliaria essem sequutus, mortis amisi injuria. Eo mortuo, me utraque, quod dicitur, sede carere, mihimet ipsi videbar. Maximam enim spem in docti & pii illius viri prudentia collocaveram. Videbam namque hunc virum non solum doctrina, elegantiaq; excellere, verum etiam animi bonitate, pietate & prudentia reliquos superare. Quare etiam mihi persuadebam, hunc virum inter mortales jam non habere parem: id quod meum dolorem mediisfidius non minuebat. At enimvero Vossius errorem meum mihi ostendit. Te enim, optime Pater, satis admirari non possum. Fateor (absit omnis adulatio, Deus autem & scientia testes mihi adsint) te Heidmano esse majorem. Neque tamen quidquam egregio illi olim viro præceptorique charissimo derogatum volo. Nam Architectus omnium gradus dedit, secundum quos unus altero ut sit major ipse voluit. Ita Deus Opt. Max. illud quod abstulisse videbatur, large rependit: cui gratias ago maximas, quod me ejusmodi animo beaverit, qui bonos viros dignoscere potest, eumque veneror, ut bonorum numerum augere velit. De itinere meo, ut aliquid scribam; scito quod primo die Julii Bituriges venerim, ubi unā cum nobiliss. meo Petro Guldensterne, qui te salvare jubet, ad festum usque Michaelis commorabor. Heic offendi doctissimum & humanissimum Petrum Edmundum Merillium, quo utor familiariter. Hinc quando discedimus, profecturi sumus, divina favente gratia, Andegavum. Peto abs te, optime D. Vossi, ut has ad Patrem meum Literas, quando occasio sese offeret, Helmstadium mittas; & si forsan ad affinem meum Georgium Calixtum scriberes, mei istis in literis

literis mentionem faceres; cuius rei causam aliquando tibi, bono cum Deo, coram indicabo. Vale, unâ cum tuis omnibus. Conjugem tuam suavissimam meo nomine saluta, eique, sic ut ego tibi, pro singularibus in me beneficiis collatis gratias age. Liberis quoque tuis jucundissimis Fratribus ac Sororibus meis multam adscribo salutem. Vale iterum etiam atq; etiam.

Dab. Biturigibus  
An. cl. 10 c xxx.  
26 Augusti.

Tuus & tuorum,

Henricus Ernstius.

CXVIII.

S. P.

**A** Veritate non abhorret, Clarissime in rem literariam meritis Vir, quod quidam dixit, *Τὸν εὐεργετηθέντα οὐ εὐεργάτη ἔργον ἔδωκεν*. Nam & benemerens & opifex amabili quadam constantia eas superare solent molestias, quæ in rei absolutione capiendæ sunt. Quare non dubito, quin tum tua, tum magnifici Domini Rectoris, cæterorumq; Dominorum Professorum, nuper mihi conciliata benevolentia etiam nunc spiret & vigeat. Si enim æquabilitas ista etiam in inferiores cadit animas, sane quam absurdum foret, vel minimam de vobis, summa eruditione & virtute viris, animi mutabilitatem suspicari. At verò ut hæc sunt verissima, ita aliud quoque mihi audiendum, videlicet *ὅτι οἱ τόποι, καὶ χεῖναι ἀπορία τῶν πρὸς φιλικὰς ἐπιδόσεις διαλύονται*. Et certè *συμπέριουσι* quædam necessaria est, qua velut *ἐκ ζωοποιήσεως* semisopitus inter varia vitæ negotia favor reficiatur. Quamobrem, quoniam literæ colloqui vicem defendunt, sic statui, fore, ut facilius ex silentio supinus & negligens, quam ex tali compellatione, audax impudens censerī possim. Eccujus enim rusticiorem etiam verecundiam non evincat, & ad scribendam impellat singularis tua humanitas, atque candidissima comitas? Multum est, hominem peregrinum intueri, præclarum est ad amicam admittere colloquutionem, sed consolatione sustentare, & ad spem luculentam erigere, ejusmodi est, ut uirtutis humanitatis mensuram excedere dicendum sit. Quos exercitativissimæ tuæ charitatis fructus, cum ego tam hilariter demessuerim, ut tuus, atque adeo vester *finis* factus, & proinde vos in aliqua rerum mearum cura retinere non tam ausim, quàm debeam, haud morabor diutius rem ipsam proponere. Non

per me stetit, quò minùs ad vos, uno exacto mense, profectus fuerim, quod fore dixeram; quoniam enim necessaria itineri pecunia nimis lentè, & quasi guttatim datur, profectionem differre quotidie cogor. Nec verò alienam alicunde petere, dum mea mihi debetur, velim, nisi summa mihi imponatur necessitas. Quippe infinita hodie eorum qui egent multitudo est, & cavendum mihi, *μή πως πῶς καὶ ἀναρχήσω*. Si quidem Spiritus Sancti ore *ἐνδεδυμένοι* οἱ τὸν *ἑστὸν ἰδίαν χρεῶν πόνον ἀπολαύοντες*. Equidem huic loco perinvitus obhæresco. Nam Hispanicum hujus oppidi præsidium Tilliano est commutatum. Quod cum multi sibi gratulentur, mihi tamen *κακοδαίμων* (utinam etiam *ψευδοδαίμων*) *ὑπάλειπεν* videtur. Omnino super priora mala religionis mox appetit. In meis oculis nunc omnia sunt iter meum, quod primo quoq; tempore faciam. Interea, à te, Vir clarissime, majorem in modum peto atque contendo, ut, sic ferente facultate, in promotionis meæ opera perseveres, aliosq; ad studium simile saltem pio exemplo adhortere. Nunquam apud me non stabit magni hujus beneficii gratia, imprimisque efficiam, si Deus concesserit, ut ipsi muneris me pensique fidem satis tueri animadvertatis. Non minore autem studio te rogo, ut, si quid *σοφικῆς* in meis gestibus, importunis *ἐπιτοχῆς*, aut alibi comparuerit, Caritatis πάντα *ἐργάσεις* *οὐκ ἔστιν* involvere velis. Hexæctian Scholicam vobis ostendi, non ut aliquid magni præportarem (nec enim ita sum vel exiguitatis meæ inconscius, vel excellentiæ vestræ) sed ut aliqua significarem, non *ἀπονήμι* me in Scholis desudasse. Palatinis autem potissimum pædagogeis, ubi non pauca mihi præposterè geri visa, eandem destinavi; alios mihi ludos nec debuit esse curatio, nec potuit; utpote qui eorum *μαθήσει* æquo animo ignoraverim. Adhæc unum ferè istud ibi ago, ut doceam adolescentulos priusquam ad publicas Scholas emittantur, in inferioribus dextre esse instituendos. Qua ex *σεμνότητι* rem aestimari æquum est. Jam quod attinet ad Psalmos non solum *ἀπογεγραμμένους*, sed etiam plurimis in locis *μεταφρασμένους* cum iis omne prope modum tempus vacuum (quod tamen perexiguum fuisse etiam hinc cognoscitur, quia septenas plerumque, aut minimum senas singulis diebus horas docui) impertivissem, totum aliquando *φιλοπόνημα* in unicuique Apollinis templum deterre, & artificum trutinæ, quocunq; ingenii periculo, imponere volui. Sed his aliisque de rebus coram agendi dabitur potestas. Vale, vir præ-

præclare, & auditorii tui commodo quam plurimis annis perenna. Honoris & observantia causa salutem adscribo magnifico Domino Rectori, Domino Polyandro, Domino Heinio, Domino Professore Hebraeae Linguae, Domino Barlaeo, aliisque denique Dominis Professoribus omni doctrinarum genere excellentissimis, quorum ut aliquanto penitorem intrare familiaritatem queam, post conitar.

Hammonæ ix.  
Kal. Augusti  
An. M DC XXX.

Clar. tuae observantiss.

Jeremias Hoelzlin.

CXIX.

S. P. D.

**E**X formidine subeundi audaciae notam quae verecundia ingenuis animis innata est, clarissime excellentissimeque vir, Domine, & amice honorande; ea mentem hanc & manum abstinuisset a te per Literas compellendo: nisi fiducia summa humanitatis tuae trepidanti calcar addidisset. De facie enim quamvis alter alteri simus ignobiles; mihi tamen eruditionis tuae facies, ex fronte scriptorum, quibus nomen tuum aternitati commendasti, luculenter innotuit; eoque mihi polliceor, non tantum confidentiae veniam, sed etiam huic epistolae perfacilem ad Claritudinem tuam accessum. Addam huc, quod à filio, istuc misso velut ad mercatum quandam eruditionis ac sapientiae, comitas tua erga se insignitè laudata est; quamquam vereor etiam ut parum ex merito condigne: id quod ex sermone literarum ipsius videor conjectavisse. Cum igitur Doctoris Joannis Laurembergii, amici mei singularis, commendatio de filio ad te per scripta, magni ponderis momenti que fuerit, est quod magnopere mihi gratuler, potius quam ut eodem facientium struam verborum cumulum. Illud præterire, quin maximas tibi gratias agam, non queo, nec par est; quod à filio acceptas Tragœdias meas perlegere dignatus, iudicii quoque tui copiam tam benigne fecisti. Absit, in poëtica studio mihi ut placeam; cum unice placere debeat docendi Ecclesiam Christi, sanctum & arduum munus, quod divina quadam virgula & fato sum sortitus: & in quo jam annos viginti octo defatigor. Verum iuxta tamen in otio, si quod datum

& quotiescunque datum fuit, bene collocando partes viri boni implere volui, & ut implerem, operam dedi; seorsum à quamplurimis, hic praesertim loci, qui cum in concionando aliquid sapiant, hoc tantum sapiant, in doctrina humaniore, quae Ecclesiam Dei mirificè ornat, perparum. Quod si contra autem mihi aliquid bonorum & doctorum iudicio contigit, fructum equidem succidanea diligentiae tulisse maximum putabo. Candorem animi tui, ita sim salvus, exosculor; quo significasti, versus in Dramatibus non satis ubique esse rotundos, (nam sic filius retulit) sed horridulos nonnunquam. Concesserim sane volens; nec causam dissimulem, venire tales sub acumen styli, dum à lectione Taciti, maxime Tertulliani ad versificandum subinde revertor. Tum nescio quo pacto hac aetate mea, ad canos vergente magis magisque asperitas me quædam, quam rotundus labor delectat. Ut omittam per solennes in Ecclesia labores evenire, quod ferè necesse est, ut partim industria meae, partim iudicii obtundatur acies. Denique in Athenæo hoc Danico iudex & aestimator styli & carminis, qui censuram Romæ, hoc est, in Repub. literaria tecum mereatur, omnino nobis est opus. Atque hinc adeo fit, ut meopte consilio & remigio, sine portisculo, sine hortatore, hoc pelagus cogar navigare. Quibus argumentis si asperitatem excusare non possum, deprecor. Nam & severis rerum arbitris, ex æquo sæpe & bono visum, novos quosdam in civitate tolerare; donec vel sui radio, vel obrepente honestiore morum cultu obliterentur. Fiat ejusmodi quippiam in scriptis, quæ vel focci vel cothurni jus affectant. In Socco Lampades ex xxv. Capite Evangelistæ Matthæi ante annos aliquot dedi, Hamburgi typis excusas; Monarchicam nuper ex II. Prophetæ Danielis Capite, nunc excudendam, uti in unum corpus seu volumen coeant: Misi ad filium censuræ tuæ fascibus submittendas; ac licet iniquum plane esse fatear, homini industrio & laborioso laborem velle addere (quid enim hoc aliud, quam bonorum abuti patientia?) tamen, qui reges nescio quam belle cothurnatos suscepisti, admitte, obsecro humanitatem tuam, & Virgines decem, & Babylonium socco indutum Regem, vigilante & censorio ut advertas oculo, quo numero esse mereantur. Magno me beneficio tibi obstrinxeris, paratum promptumque, quibuscunque in rebus facultas aderit, tibi tuique aliquam gratiam referendi. Deus Opt. Max. te

inco-



incolumem, florentem, felicem cum omni familia conservet.

*Dabam Hafniae  
Danorum vi. Cal.  
Augusti Anno  
M DC XXX.*

*Claritudini tuæ addictiss.*

Bernhard. Meyerus Holsatus.

## CXX.

**M**I frater, nam quidni te sic appellem, quem ut fratrem ipsè amo. Cupio scire de tuarum rerum statu; tum quid factum sit denario rerum meo Pythagorico: quem quin commendatum habeas nihil dubito. Avet quoque animus scire, quid futurum Libris istis, quos petierim ex Rutgeriana mihi auctione comparari. Edidi hic historiae meae Danicæ Libros III. operæ majoris specimen. Mitto aliquot exemplaria, tibi & amicis reliquis, quæ te distribuere velim: Riveto, Cunæo, Heinio, Vorstio, Barlæo, Scriverio, quanquam nostri nihil amplius memori. Vorstio verò etiam alterum addi cupiam, pro Avunculo Buchelio, ad quem ille rectè mittet. Literis verò ad Mylium, quas inclusi, adde exemplaria quatuor. Eundem modum rogo ut tenere velis in denario dividendo. De pugna navali serenissimi Regis nostri cum Hamburgensibus, & victoria, jam te accepisse puto. Vale cum lectissimâ Uxore, liberisque, & salve à me, meaq; & meis.

*Dab. raptim, Hafniae,  
quo nunc excurri, ad  
diem xix. Sept.  
elo 16 c xxx.*

*Tuus affectu*

*instar Fratris,*

Joannes Meursius.

## CXXI.

*Præstantissimo Vlamingio, S. P.*

**H**umanitas tua, Præstantissime Vlamingi, qua immerentem me superioribus diebus profecutus es, permovit me, ut simulatque Lugdunum reversus essem, primam mihi curam ducerem, tuo satisfacere postulato. Atque utinam in majoris momenti re, navare tibi operam possem! cognoscere non ingrati me, pro beneficio tuo. Sed quum ea desit occasio, proximum existimavi esse, ut saltem ex levi hac re, meum in te animum perspiceres. Quod tantò apud te feci confidentius,

quod scirem, te non rem ipsam sed animum tantum, ac benignum affectum meum æstimaturum. Historia itaque quam petieras ita se habet.

Tamberlanes (qui orientalibus Timour dicitur) Patrem habuit Torgai. Natale ei solum Chougia Bilgar pagus. Patrem ejus Torgai, alii bubulcum fuisse aiunt, alii lutorem egenum: Timour ipse cum robore corporis eximio esset, ad furta animum applicuit. Nocte quadam, cum ovem furto abstulisset, Pastor id conspicatus, sagittis duabus, una femur, altera humerum percussit. Eo ex casu cognomen Lenk, *ferrum* notat, accepit. Unde conjuncta voce Timourlenk dictus est; hinc nostri corruptè pro Timourlenk, Tamberlanem vocant. Ad historiam redeo. Tamberlanem duobus impeditum vulneribus, facile Pastor assècutus est, atque ad Huseinum, Huratæ Regem perduxit. Is Timourum verberibus casum agi in crucem jussit. Erat Regi filius Giaet Eddin parum mentis compos. Is pro Timouro intercessit; atque ut sibi donaretur, à Patre, multum abnuente, tandem impetravit: eumq; humili ex loco, ad summas dignitates perduxit. Evenit ea tempestate, ut rebellaret, qui Provinciam Sigustaen pro Rege tenebat. Missus eo cum exercitu Timourus, brevi bellum confecit. Captoq; duce ipso, omnes thesauros invasit, ac contra Dominum suum, bellum parare cœpit. Cumq; eum opprimere nequicquam Rex tentaret, paulatim ita ejus crevit potentia, ut Regem Huseinum perimeret, ac filium ejus Giaet Eddin, salutis suæ Authorem, in carcerem conjiceret, ubi fame mortuus est: jurejurando enim confirmarat Timourus, nihil illi à se nocitum iri. Postea cum jam rerum potiretur Timourus; accidit ut Samarcandæ urbi Principi, erronum, atque nequam hominum magna esset turba. Ille simulatq; Timourus ab urbe discessisset, Præfectum Urbi ejecerunt, ac totam turbârunt Rempublicam. Tantaque eorum potentia erat, ut ipse eos metueret Timourus. Septies illi turbas renovârunt. Tandem cum parum proficere se videret Timourus, ad stratagemam animum convertit. Convivium ergo splendidum instituit. Eò totam hanc promiscuè turbam, summæ, atq; infimæ dignitatis homines vocavit, ac singulos in suos ordines distinxit. Postea Duces, ac præcipuos eorum ad se vocavit, usque sua manu poculum propinavit, (magni id apud orientales honoris habetur) inde purpura circumdatos, ex atrio à Ministris abduci jussit. Ille singulos extra atrium comprehensos

henfos jugularunt, donec ad novissimum perventum fuit. Atque ea ratione seditiosos hos Timourus, obtruncatis ducibus repressit. Pari ratione Persarum Rex (est is avus ejus, qui jam imperio praeest) qui toto vitae suae tempore, Timouri exemplum imitandum sibi proposuit, ad imperium pervenit. Mos est, Persis Regibus, fratrum oculos candenti ferro exurere, quo ab iis securi imperare possint in regnum affectum. Excæcarat ea ratione, fratres suos omnes, Persarum Rex, frater hujus de quo nunc nobis sermo est. Hic callidior cum visus esset cupidissimus, in Parthiam profugit. Ibi cum aliquot annos egisset, cognoscit fratrem suum defunctum, ac regnum, iustus hæres cum deesset, à Satrapis regni inter se divisum. Petit itaque à Parthorum Rege; quandoquidem iustus regni hæres sit, ut auxilio sibi esse in repetendo regno velit. Ille quod rem arduam, magnique videret negotii, hoc negato, argentum ei dedit, quo vi. militum millia scriberet. Copiis iis coactis Persa in limites Persiæ contendit. Erat Satraparum ex numero, vir ætate, ac prudentia magna, qui sive quod justam hujus exsulis causam videret, sive quod iusta portione defraudatus esset ipse; simulatque de ejus adventu cognovit, cum eo conspiravit. Cæterum cum tot numero essent Satrapæ, immensi laboris opus fuisset, omnes eos bello superare. Itaque quod viribus deerat, astu supplendum statuit. Convivio regio instituta, omnes Satrapas regni invitavit. Regem exsulem in insidiis extra urbem esse iussit. Satrapæ cum advenissent, & mero incallescere cepissent, famulos omnes, quorum magnam singuli turbam adduxerant, exire jusserunt. Ita enim moris est, Principibus orientalibus, ut nolint famulos latitiæ, atque ebrietatis suæ speculatores. Itaque postquam ii discessere, in luxum, atque ebrietatem solvuntur: interea in urbem Persa admittitur. Is sexcentis comitatus militibus, personatus in atrium introrumpit, ac singuli cum unum obtruncandum sibi propoluissent, brevi omnes conficiuntur. Inde illi, ne rem qui foris excubabant famuli cognoscerent, latis clamoribus, ac hilaritate, omnia complent. Postridie cum dominorum tardum à convivio discessum famuli admirarentur, nihil tale opinantes, capita eorum sudibus imposita, ac circum fastigium palatii exserta vident, qua re quum Dominum suum desideraret quisque, turbas dare non ausi, domum suam discesserunt; eaque ratione Persa exsul regno est potitus.

Habes quam desiderâras, ornatissime Vlamingi, historiam fusius aliquanto à me perscriptam; quia quantum venustatis, brevitatis attulisset, tantum decessisset perspicuitati. Quum ejusmodi in rebus, quando gentium mores, incogniti sunt, tota obscura sit historia. Salutem plurimam, parentibus tuis, ac cognato tuo Nomfio, à quo si videndi facultas non datur; saltem ut literas habere liceat, pro me impetra. Vale.

Lugd. Batav.  
vii. Kal. Octob.  
c1o Idc xxx.

Taus omni officio,

Dionysius Vossius.

### CXXII.

Clarissime Vir, Fautor Popularis colende,

**I**psam jam est octiduum solum, quum cum Advocato Fisci Collegii heic rebus maritimis præfeci fui. Nescio an ille vel de nomine tibi notus sit. Crappius vocatur. Multus illi mecum de te sermo fuit, eò magis cum eum tuum erga affectum jam veterem ac Patriæ communis jus non celassem. Certè eximius tui nominis ac eruditionis cultor est vir hic politici eruditione non leviter tinctus. Tanti à te profecta scripta facit, ut nihil sit eorum quod non in sua Bibliotheca habeat repositum. Index eorum postridie ab ipso mihi communicatus fidem fecit planissimè. Non edita etiam in eum relata inveni: Commentaria de Lingua Latina: Historiam omnis avi secundum tempora digestam: Notas in Gelasium de Synodo Nicæna: Anonymi vitarum scriptores. Illa certè & ego hæcenus expecto avidè: De reliquis me fugiebat. Quicquid erit non effugiet meos oculos ac manus, quamdiu fuero superstes. Ipse autem vix quidquam me dignum adhuc cogitare possum. Adeo parum restat temporis, quod ferme omne pulveri Scholastico est impendendum, quem si non excutere, saltem ea sparta, qua non alii subessem, in me non semper eidem, mutare velim. Pro re nata, ubi potes, mei memineris, enixè precor. Jam cum uxore liberisque à me meaque Salve.

Tuæ eruditionis &

Dab. 19. Octob.  
1630. Horne.

humanitatis Cultor,

Abrahamus Bocstadius.

### CXXIII.

## CXXIII.

**S**I vel unica celeberrimi tui illius calami strictura duntaxat dignatus me fuisses, vel id pro ornamento haud vulgari ducendum fuerat, Doctissime Domine; quis enim in splendidi adeo nominis gratiam non penè involer. At quod tu insuper tam copiosè scribere, ne dicam tam familiariter confabulari cum vulgarissimo homuncione non gravis: Næ id uti carissimum incomparabilis humanitatis pati cum eruditione temperamentum indicat: Ita singularem tuum erga me affectum effusè notat. Sed enimvero cum animo reputo tot tamque gravia illa (quibus, in gubernanda Republica literaria, destineris perpetuò) negotia, totus attonitus stupeo ad illam incredibilem mentis tuæ feracitatem, quæ progignit tam multa nec deferiscit: Adeo tu tuis quâ voluminum quâ Epistolarum ornamentis occupas propemodum omnia tum studia, tum loca: ut mirari non cessem, quomodo in unius animo ea pateat capacitas. Quinimo in memet conversus blandius me effero, dum me alicujus fieri sentio ab eo viro, qui usû longissimo æstimandorum ingeniorum peritissimus, quasi quodam *ἀναγνωστῆρι* Privilegio non tam conjicit quàm divinat: Id adeo reapse experior, en qui totus ante frigebam, divino tuo velut incitamento, jam de novo vivit penè ac spirat ingenium: si quid posthac promoveo, sisto me tibi debendi reum. Ceterum nostrum hic vitæ genus gloriosum est pariter & suave: vitam quippe hic traduco in adspectu illustrissimi Præsulis, viri non minus singulari vitæ sanctimoniâ, quàm rarâ eruditione nobilissimi: Ei assûm à sacris: Hic inter Theologos, perpetuo interjectus, atque in sacro munere juxta ac studio totus, cogor amœnissima illa humanioris literatura oblectamenta omittere, ne dicam abjurare: Oblivionem nostram nil opus argumentis amplificare, scilicet vel ex ipsâ desuetudine, atque exotici sermonis perpetuo usu, cernis quam lutulenta fluat oratio, quem non habeat genium: Sed enimvero ita innata tua illa facilitas perspecta mihi est, uti de venia utcunque nullus dubitem. Vale vir summe, & me tuæ dignitatis observantissimum amare perge. Utinam tuas lucubrationes (quibus Deus O. M. aspiret perpetuò) publico commodo diutius nolles invidere. Ita tuum nomen apud bo-

nos omnes & cordatos adeoque vel maxime in orbe hoc nostro Britannico summo est in pretio. Sed vale iterum atque iterum Vir *πολλὴν ἀντιξίον ἀλλαν.*

*Datum raptissime Nocte concubia. Ex Palatio Dunelmensi xv. Kal. Novemb. Anno Redemptionis nostræ cIo Ioc xxx.*

*Homo tui studiosissimus & tuarum virtutum admirator,*

Isaacus Basirius.

## CXXIV.

**S**Cripfi ad te ante aliquot septimanas, Vir Clarissime, & adjunxeram alias ad amicos literas, ut & exemplaria aliquot Historiæ Danicæ. Spero recte ad manus has pervenisse. Ego illud scire aveo; tum & quid Denario meo Pythagorico sit factum: an promissam lucem videat, aut visurus sit propediem. Etiam certiore facito, quid ab Heinsio impe-traveris in negotio librorum, quos parari mihi petieram ex Rutgerii Bibliotheca. Qui has adfert, est Ericus Rosencrantzius, magni Oligeri nostri, qui te in majorem modum amat, filius: adolescens est insignis, à quo magna expectamus. Petit Pater, ut amicis illis meis commendare eum vellem: quorum cum te unum mihi plurimorum instar habeam, uni tibi commendandum existimavi. Itaque, quod commodo tuo facere poteris, hic ostende, quod me, uti facis, ames, patrem existimes: qui, ut hactenus re amavit, sic deinceps etiam arctiore adfectu complectetur. Habet Ephorum, Joannem Melenium, ut doctrinâ, sic modestiâ pariter, & probitate perinsigni. Ipsa re experieris, me non temerè commendare. Vale, Amicorum princeps, cum lectissimâ uxore tuâ liberisq. Uxor mea liberique, tibi, tuæ, atque tuis plurimam salutem dicunt vero animi affectu.

*Sora, ad diem xviii. Novemb. cIo Ioc xxx.*

*Tuus,*

Joannes Meursius.

## CXXV.

**E**di ad te literas, Vir Clarissime, mense Septembri superioris anni, &

M

&



& adjunxi aliquot Historiæ Danicæ exemplaria, inter amicos tuâ operâ dividenda; quæ curata recte esse, ex literis Domini Vander-Miilii, quas is xii. Novembris dedit, intellexi. Spero tibi placuisse Historiam meam: Certe hic cum summo plausu est accepta. Nunc Ælnothum quoque edidi; & exemplar ecce tibi. Penè tanti non putabam; sed existimabam tamen, vel levissima quæque mea tibi exhibenda esse. Proxime Solonem mittam, volente Deo. Sed quid fit Denario meo Pythagorico? Si Typographus tricatur, quæso hunc ad me remitte: Ego hic curabo edendum. Semel enim nunc constitui, omnia mea in lucem dare; si non nitide, ut solebam, & accuratè, saltem quomodo-cunque potero: potius quam ut lucubrationes meæ tenebris semper damnentur. Et id scio viros doctos multo malle, ut benigne opusculis meis hæctenus judicaverunt. Perscribere ad me amici, obiisse etiam diem Swanenburgium, & non paucos reperiri, qui succedere ipsi velint. Scribe quæso, quis lucescit; & si quid præterea habes, quod me scire velle putes. Bene vale, amicorum Opt. Max. & salve à me meaue cum lectissima tua uxore, liberisque; quos ex animo Deum rogo, ut divina benedictione sua cumulare deinceps velit. Mea filia tuam salutat amicitissime.

*Scribebam Soræ, ad  
diem xxv. Martii  
cIo Idc xxxi.*

*Tuus sine ullo dolo,*

Johannes Meurfius.

Salutant plurimum amici omnes, Rivetus, Cunæus, Vorstius, Heinsius, Barlaeus, Scrivierius: tum si quos præterea nosti, quibus non ingrata est memoria mei. Exemplar Ælnothi, quod adjunxi, trade Vorstio, ut is ad avunculum mittat Ultrajectum. Misisses plura; verum tanti non putabam. Fiet, cum Solonem dederò: quem existimo magis fore ad palatum caterorum amicorum. Scribe etiam quid de libris ex Rutgerii Bibliotheca commendis, expectare posthac debeam. Iterum vale.

Magni Casauboni literarum, quas ad me dederat, exemplaria, bonâ fide descripta, ad te misi. Puto etiam accepisse. Sed quid fit editio? Fac, si commodum est, ut sciam: nam omnino isthoc aveo. Scripsi ad te per Othonem Rosæcrantzium, filium viri, aut herois incomparabilis,

Oligeri: neque dubito, quin incolumis jam advenerit. Commendabam eum tibi; & sat scio, commendatum omnino habebis, siue patris ejus causâ aut meâ. Et ille quidem gratias mihi agit, uti ostendat etiam quanti te faciat. Nam prioribus ad me literis, datis ad diem xviii. Decembris anni superioris ita scribit. *Pro literis Vossio meo nomine scriptis gratias maximas ago. Spero etiam me hac occasione arctiorem familiaritatem cum viro isto magno propediem contracturum.* Alteris verò, datis die vi. Martii. *Gratias iterum summas ago, cum pro aliis tuis in filium meum beneficiis, tum quod literis etiam tuis Magno isti Vossio vestro eum commendare volueris.* Si scribendum aliquid ad eum unquam existimabis, ad me mitte: ego porrò rectè curabo. Tertium Vale.

### CXXVI.

*Viro Maximo Gerardo Joanni Vossio,  
Eloquentiæ Professori dignissimo.*

Vir maxime,

QUod hæreas, nec leviter statuas quicquam, in negotio certè difficili, minime miror: quod verò, à me consilium petas, mirarer merito, nisi jamdudum id mihi neutiquam novum fecisset, toties exploratus erga me amor tuus. Qui non conscium modò me consiliorum tuorum facit, sed & calculum nostrum poscere consuevit, utut iste nullius apud te ponderis esse mereatur. Et fateor profectò interdum me, liberius fortasse quam par erat, tibi sic jubenti, ubi se obtulit occasio, sententiam meam exposuisse. Nec vereor idem hic agere, nisi quod quisquam, in tam longa peregrinatione, commodi simul & incommodi, cernere valeat, id & tu quâ vales prudentiâ, optimè discerneres, & (quod tecum nemo) filii tui genium, mores, indolem, virtutesque omnes, & vitia haberes perspectissima. Quantum quidem ego juvenem, miraculum præstantem novi, ea est in ipso eruditio, atque is solidioris eruditionis ardor, ut non nisi maximo cum fructu, peregrinationem istam, obire possit. Nec facile affulgebit commodior oportunitas, quam hæc ipsa, quâ citra peculiare dispendium ullum, in comitatu virorum illustrium, quorum probitas,

bitas, & eruditio, sunt extra dubium; Gallias, Italiamque peragraré, & Constantinopolin adire, invitatur sponte, quinimò vel beneficio adfecturus, benefactores suos, si tam amicæ petitioni obsecundaveris. At verò quousque filius tuus, in Religione fixam mentem, quousque firmum pectus gerat, adversus illecebras, quibus omnis juvenus facillimè solet, præsertim foris irretiri; & præ cæteris, ingenia, quæ cæteris præstant, sunt obnoxia: Id tu melius judicaveris, quam consultor quisquam extra aedes tuas, fuerit ille, vel prudentissimus mortalium. Ego quod non sub alio morum Magistro, quam te Patre, sit educatus hætenus, non possum non optima sperare, simul & credere: tu quousque paternæ sollicitudini aurem præbueris, & spei tuæ satisfeceris, in vitæ, & morum regimine, non potes non penitus noscere. Ego non lubens desideris filii honestissimis, & ab ardore proculdubio generoso proficiscentibus adverser, nec dissuadere professionem velim, imò suaserim potius, si eatenus meo iudicio fiderem, ut consilium impertiri statuissem. Id verò non statui, nec suadeo, nec dissuadeo: Atque eo quidem minus, quod intellexerim huc te potius inclinare, ut nondum eat foras filius, sed maturam magis ætatem, & quam unà cum annis offerret sortem Deus, sub oculis tuis expectet. Quod si ea tibi potius mens est, viro prudentissimo, & Patri tenerrimo, quid ego in re tanta dicam aliud, quam Deum Opt. Max. precaturum me, ut tibi & huic, cæterisque liberis tuis, in omnibus velit esse propitius, quod vover omni adfectu

Hagæ Com.  
die 19. Feb.  
1631.

Tuus,

G. R. Doubletius.

### CXXVIII.

Clarissimo D. G. Vossio, S. D. Johannes Beverwyckius.

**S**int Mæcenates, inquit ille, non deerunt Marones; At equidem si Marones forent, credo non defuturos etiam Mæcenates. Neque vanam esse hanc fidem, vel tu V. Cl. documento esse possis, quem in celebri Academia, amplo stipendio doctorem, Attaliciis conditionibus, in urbem suam pelliciunt Amstelodamenses. Videbat scilicet prudens Senatus, & veræ

virtutis æstimator civitati suæ, quam in emendis, vendendisque mercimoniis, apud gentes, sub utroque fitas Phœbo, latissimam lucris affecerat, indeque rerum omnium, quæcumque universus penè orbis possidet, copia abundantem, reddiderat Atlantis ille, Pleionesque nepos; videbat inquam, deesse adhuc cum choro Musarum, Divam Palladem, quarum instructi artibus beant urbes, earumque memoriam mori verant, Musarum Antistites. Ante Salaminam ipsam, Neptunus obruet, quam Salaminii trophæi memoriam, inquebat ~~οὐρανίου~~ Tullius: Verum & hanc obruisset oblivio, nisi eam præcellentium scriptorum monumenta, æternitati consecrassent. Vixere fortes ante Agamemnona, florere urbes plurimæ, quæ omnes, ut canit Horatius,

— Illacrymabiles

Urgentur, ignotæque longa

Nocte, carent quia vate sacro.

Quare, an tibi hunc honorem gratuler, cujus virtutibus digna tribui præmia, cum omnibus quibus Musa cordi est, merito lator, an verò urbi, cujus felicitati Κοροπώνα ἱμῶντος, non parum dubito. Persuader tamen singularis affectus, quo te à pueris prosequor, ut officii mei esse putarem, laudare fortunas tuas, & gratulari tibi hunc ~~αἰθέρος~~ Jovis imbrem, ac debitam tantis virtutibus ~~Εὐδαιμονίαν~~. Nec est quod miretur quisquam, te Athenas nostras, Amstelodamo mutare, cum vel ipsam Seriphon, Athenis illustriorem, reddere queat noster Themistocles. Quis sapiens abhorreret, ac non obvius ulnis, reciperet tanti thesaurum boni? quis adeo Suffenus, qui tanta munera sperneret?

Οὐ γὰρ ἀνίστασθ' ἐπὶ Θείῳ ἱερῷ στα δῖα.

His commoditatibus diutissimè, & foelissimè fruaris, ex animo voveo, simulque gratias habeo, quod humanissimis literis, testari voluisti, acceptissimum tibi esse animum meum, ob multa merita tibi devotum. Vale, Doctor æternum colende, & Beverwickium tui observantissimum amare perge.

Dordrecht xiv.  
Apr. cl. lxxxi.

M 2

CXXIX.

## CXXIX.

Doctissimo Viro D. Gerardo Vossio,  
J. Crucius S. D.

Nominis tui, Vir clarissime, ac Doctrinæ, quodam quasi splendore deterritus, scribere ad te hætenus superledi. Sed impetravit à me has qualescunque literulas, cum mei officii ratio, tum tuæ humanitatis opinio. Quorum unum impellit, alterum invitat, ut amicitiam tuam ambiam; & benevolentia tuæ erit, si exambiam. Certe quanquam amici tibi non desint, quos plures virtus tua habet, & eruditio, qui verbis aut literis te compellant, tamen & ego venire in partem gestio, & seria tui observantia, eam à te inire gratiam, qua me, qui in affectu aliis hilum non cedo, in numerum tuorum cooptare haud dedigneris. Ita mihi semper in amore, & in pretio docti, qui insignem qua pollent, eruditionem, cum virtute eximia, sociarunt, ut non minus boni audiant & sapientes, quam literati. Equidem non possum, aut tacere quæ de te sentio, aut non sentire ea quæ de illo debeam, in quo (non blandior) omnia quæ in aliis ferè singula, reperiuntur universa. Cum Poeta hoc dicam,

— potius fugientia ripas

*Flumina devincas, rapidis aut ignibus obstes,*

quam viri verè literati doctrinam venerari me vetes. Sed cum mihi non sit ea dicendi vis, ea copia, ut quæ de te sentio, verbis queam exprimere, longeque infra doctrinæ tuæ fastigia subsidant, quæ vel mente concipio, vel cogitatione completor, nec verba minus desint animo, quam rebus animus, prolixius ea emetiri calamo, non est consilium. Loquuntur ingenii tui monumenta, quæ nunc sæculum miratur, & sera aliquando venerabitur posteritas. Loquitur, ut alia taceam, subactum illud, & omnibus numeris absolutum opus Institutionum Oratoriarum tertium nuper editum. In quo, quis & quantus sis, non obscure prodit; & ita sentiunt, qui melioris doctrinæ gustum ac sensum habent. Loquitur denique & indefessa tua in studiis, hac etiam ætate, *peripatetica*, qua te affixum tenes libris, ut testæ suæ cochlea. Quam quoties ex relatu aliorum intelligo, stupeo subitque mirari, virum tantum, tam calide adhuc & *amavissimum* studiis suis desudare. Sed crescentem sequi-

tur cura & labor eruditionem, ut umbra corpus: nec quenquam minus de se sentire video, quam eos qui supra vulgum sapiunt: nullus quoque minus doctrina satiari, quam quibus Palladis leviter laciniam libasse, non est satis, sed in abditissima ejus adyta penetrare decretum, & ad doctrinæ *ædum* eniti. Quibus omnibus accedit sollicita & perpes formandæ juventutis cura. Ita enim non assuevisti solum, sed natus es, ut libenter te impendas, sæpe etiam feriis relictis, in commoda juventutis. Et si quæ seria magis sunt? & aut ego fallor, aut Reipublicæ accedit quicquid in istis, ab institutione conficitur, qui illi crescunt, & adfurgunt. Sed cum præceptorum fere mores, in adolescentum migrent ingenia, & ab iis mutuuntur, quod in omnem ætatem transmittunt, beatam ego illam judico juventutem, cui tua institutione, fini datum. A qua fieri non potest, quin ad magna exsurgant, & ad ampla Reipub. munera, cum laude obeunda. Jacent mehercle, etiam optima ingenia, si desint, qui excolant. Ita fecundissimi sterilescent, aut sylvescent, sine cultura, agri. Adde illam, etiam tesqua, frugum luxuriabunt copia. Et quis dubitet in animis, culturam posse, quod in terra? sic tamen, ut quod in terris evenit, validiori aratro, ligone, marra, rastio, ad fecunditatem provocanda sit una, molliori altera, quædam ultro fecunda, levi manu colenda, dum rudioribus altera, ac non nisi per sudorem, magna promittat. Idem in ingeniis. Felix ille qui nihil negotii secum habet; at hic de se melius dici potest meruisse, qui malignitatem naturæ suæ vicit, & ad sapientiam se non perduxit, sed extraxit. Ut nulla malignitas tanta sit, quam non assidua virtutis exercitatio corrigat, & institutio: aut minus disciplina & labor in ingeniis poterit, quam in reliquis industria. Magnos sane viros, perditâ pene ac desperata adolescentia in patriæ salutem natos accepimus. M. Torquatum ingenii tarditas in agrum tanquam in exilium ablegaverat, hic tamen periclitantem Latino tumultu patriam, insigni triumpho restituit. L. Valerium Flaccum, quem Roma projectæ libidinis juvenem, virum omnis postea modestiæ, ac probitatis, exemplum vidit. Jam quid Q. Fabii Maximi adolescentia fecidius? quid vero illo sene ornatus, quid augustius Roma tulit? Q. autem Catuli juventutem deliciis & luxu diffluentem quis credidisset in patriæ aliquando Principem, exsurrecturam? Duos in uno Sylla homines fuisse



se dixeris, turpem adolescentem, & virum fortem: duos etiam in Julio Cesare, in Vespasiano, Imperatoribus. Themistoclis vero adolescentia quid licentius? at is exinde juventutis sue maculas, rebus strenue gestis ita eluit, ut Græcorum clarissimus extiterit, & prælio navali, Persis ad Salaminem victis, patriæ libertatis assertor fortissimus. Plurima generis hujus exempla, omnis retro ætas tulit, ut non sit desperandum instructori, si primis conatibus non respondeat eventus. Præsertim hoc sæculi contagio, & morum licentia, quam tu quoque opinor, vides & doles. Benignior Deus aspiciat,

— *Qui solus opem, qui summa medendi  
Jura tenet* —

Ille te, vir clarissime, meo voto sospitet, & Reipublicæ Literariæ diu servet incolumem. Animo interim semper, interdum & literis jungamur, quæ si obtineam, inter reposita & cimelia habebō. De me factum volo, & faciam ubi occasio erit. Re hoc malo ostensum, quam verbis dictum. Vale iterum, & amplius, Academiæ (ea est tua laus) ornamentum, & φιλόνητι ἀντίπρῆξι.

Delphis 6. Cal. Maii.  
MDCXXXI.

## CXXX.

Amicorum Opt. Max.

**E**Rgo Amstelodami agis? & conditione quidem adeo lautâ? Ita me postremæ tuæ credere jubent. Gratulor profecto ex animo. Digna est fortunâ istâ virtus tua. De Barlæo inaudiveram jam ante de te nihil: & nil minus, fateor certè, cogitaveram. Sed an Græcas quoque Literas, uti Leidæ profiteris: an Historias duntaxat? illud fac ut primis Literis scire possim: tum quis tibi in Leidenfī Academiâ substitutus: insuper, quem finem illa urbium duarum controversia sortita fuerit: & quid ab utraq̃ue curiâ judicatum. Denarii mei exemplaria rectè accepi, gratiasque magnas ago pro editionis curâ. Scripsêram de Literarum Casauboni editione; ac quæfiveram quo in loco illa esset: sed tu planè nil rescribis. Nuper admodum, aliud agens, incidi & in istas duas: quas, si tempestivum est, curabis suo loco inferi. Quod invitas, ut excurrā, vellem ut vis; sed hæc tempora non permittunt, insiden-

tibus passim vias prædonibus potiùs quàm militibus. Quam jucundum mihi foret te videre & amplecti! sed lætitiā hanc congressus mox tristitia, postquam discedendum foret, oppido acerbam faceret. Mihi bene est in Dania. Dei gratia; favent procures, amant docti, nec mutare temerè velim; optem tamen, si fors ita utriusque nostrum ferat, ut corporibus jungeremur usque ad mortem individui, sicut animis juncti sumus: esset mihi id profecto omnium multo jucundissimum: sed permitto ista Deo, qui res hominum omnes ordinat; ejusque sanctæ voluntati me subjicio. De Historia amici nostri, idem planè hic Doctorum est judicium. Meam verò adeo probari tibi valdè gaudeo: neque dubito, quæ placere tibi potuit, eam etiam aliis placituram esse. Plura vellem, si liceret coram colloqui. O si tempus aliquando istud nobis donet Deus! quam utrique nostrum isthuc gratum foret! Vale, Vir clarissime, & amicissime, in ætatem usque Nestoris; & salve cum tuis omnibus à nobis. Refalutant Laurenburgius, & Stephanus.

Dabam Soræ ad  
diem iii. Junii,  
cIo Idc xxxi.

*Tuus fide optima,*

Joannes Meursius.

## CXXXI.

**P**Udet, Vir Clarissime, omitti officii cui me tam benigne à te provocatum vel per intempestivam molestiam invigilasse oportuerat. Verum omitti ad tempus potius pudere, quàm prorsus amitti pigere præstat; quia tamen video me diutini silentii rationem debere, eam paucis cape. Post illas quibus humanissimo tuo ad amicitiae munia colenda atque continuanda invitamento respondi gratiasque egi, literas: cum plerique hic omnes Panico quodam terrore lymphati, convasatis querelis, quasi publico grassante incendio, aut minitante tectis ruinam terræ motu, mortalium illam scopam pestem (recentis ante quinquennium plagæ etiamdum memores) quæ anno qui jam proximè præterit, Londini metuebatur fugientes inconsulti ruerent urbem egressi; & ipse cum Nobilibus fidei meæ commissis, in Cantium intra vicesimum ab urbe lapidem secessi. Exinde quæsitam à me reverso nec inventam diu mittendi opportunitatem jam tandem nactus, salva tibi omnia sana faustaque cum sperem, tum per

per literas hasce animi significes, propria illa perque omne ævum perennia precor atque animitus voveo. Impendio magis mihi lætitiæ ripas exuperaturo animo, si virtute tuâ, quâ mereris optimè si volente Deo qui te usque provehat maxime, omnia tibi secunda & prospera esse intellexero. Quæ vota tua, nec minus Reipub. Literariæ nomine concepta (tacitas privati Cultus atque Honoris flammas jam olim in intimis pectoris mei penetralibus accensas taceo) jubeat firma, fixa, ratæque esse summus ille bonorum Fautor Deus. Vale, vir præstantissime, & me, quod facis aut fallis, amantem redama, nunquam secus merebitur

Tuus,

Tho. Farnabius.

Multum me debere video auctori Satyræ cui nomen *Dñi vestram fidem*, cupioque tam honorificæ mentioni gratus esse, si quidem nossem cui deberem. Quod si tibi, Vir Clar. is nomine innotescat, hanc, quæso, apud te ineam gratiam. Quin & alteram; si quid habes ad Martialem, cujus secundam curam, &, uti spero, fanio-riorem, diu cogitavi, jam apparo. Scripsi ad Cl. Heinsum, si qua possit, mihi comparet P. Scriverii epistolice quæstiones ad Janum Rutgersium; ut & Tractatum de dubiis apud Martialem locis; quorum mentionem subinde facit in Notis suis. Vale, vir clarissime.

Londino Nonis Junii,  
clō 16c xxxi.

#### CXXXII.

Reverendo, Clarissimo, Doctissimoque  
Viro D. Gerardo Joanni Vossio Hi-  
storiarum Professore, S. P.

Cum postremum te, reverende, & clarissime vir, hic convenirem, inter alia beneficia, quæ mihi immerenti sponte, & benevolo animo obtulisti, memini Reverentiam tuam mihi etiam promittere emendationes quasdam, & notas, in Satyras Varronianas. Insignis tua humanitas, vir præstantissime, tam me fecit audacem, ut eas nunc a te exposulare non erubescam. Scio vix ac ne vix quidem tantum tibi à rebus gravioribus superesse otii, ut minuta hujusmodi curare, meque

voti mei compotem facere possis. Sed nihilominus rogo, ut Reverentia tua vel eas tantum emendationes, quas in numero habet, quæque accuratorem limam, curasque secundas non requirunt, mihi communicare non dedignetur. Sic amore, atque omnibus, quæcumq; à me unquam proficisci poterunt, officiis vadatum me, atque obstrictum habebis in æternum, & ad pristina in me collata beneficia, haud exiguus cumulus accesserit. Oro etiam atque obsecro, ut epistolæ illæ doctorum virorum à me descriptæ, quas Reverentia tua hinc discedens Amstelodamum secum asportavit, data occasione, ad me remittantur, quo alias iis, per otium adjungere, & Centurias aliquot colligere queam. Denique Reverentiam tuam etiam atque etiam rogo, ut eadem operâ, *autographis* E. pistolæ D. Ursini, in qua se fitiolo auctum conqueritur, restituat. Nescio enim quo fato, hujusmodi doctorum virorum nugæ, haud aliter, quam seria me delectent. Si Reverentia tua exemplar ejus desideret, & à me describi velit, occasionem clarissimo Domino inserviendi, quanquam in re levi, & exigua, me natum esse gaudebo, & quamprimum me id missurum recipio. Vale, vir humanissime, Domine, & amice plurimum colende. Saluta quæso à me; amicissimè uxorem. Deum precor, ut te, tuamque familiam quam diutissime incolumen servet. Vale iterum, vir honorande, & me quod facis, quamvis indignum, amore tuo complecti perge.

Reverentiæ tuæ addictissimus

Lugd. Batav.  
iv. Id. Septem.  
anno 1631.

& ad omnia officia paratiss.

Jacobus Lydius B. F.

#### CXXXIII.

Salutem in Christo.

L Iteras hodie tibi debeo binas: totidem enim accepi nec reddidi. Sum in hoc genere æris solvendo paulo tardior. Et certè aliquid tantum est quod possim solvere. Tanta enim mole negotiorum gravatus sum, ut aliquid sit & sapius, quod mihi met-ipsi debeo nec solvere possum, quidni ergo & amicis aliquando? Et quod nunc in hoc scribendi officio tibi non desim, gratias ago stylo huic contractiori, qui hoc unum novit, multa paucis concludere.

Intelligo

Intelligo ex utrisque literis tuis metum injectum esse Lugdunensibus, non solum ne te amitterent, sed & ne Academiam: saltem ne Professores quosque digniores ad se allicerent Amstelodamenses. Eos autem Primores Juvenum facile sequuntur, sicut illi præmia ampliora. Et quid sine his Academia? Superest ut vel stipendia adaugeant Leidenenses, quod in bonum cedit Professoribus: Aut ut Professores Amstelodamum concedant, quod malum minatur Academia: Quin & civitati etiam, quæ ex frequentia Studentium ditior facta, nec cupit scio lucrum dediscere. Reliqua, in tantum te spectant, cupio audire, sed quum causa finita est, & quum statio tua fixa.

Filium tuum saluum, & reducem gestio videre. Hoc bene est, sed male quod abiit me nesciente. Quid? Ut ad te, quem tanti facio, quanti spero nosti, abeat filius tuus sine me? Iterum (si quæ occasio detur) non faciet spero. Et unice probò quod tam cito remiseris. Non quasi de progressu ipsius, dum apud te dubium ullum, sed ne in Collegii statuta peccaret.

Si quæ parata habeas, nolim ut abscondas. Nostiquid sit, Lucerna sub modio. Nec erit male posita opera, si scripta illa quæ ut antiqua sunt, ita ante hoc sæculum penè antiquata, è pulvere suo extrahas, usque aliquid lucis addas. Semper tamen inculco Baonium, & eò magis quia Ecclesia (sic enim scribis) summa votorum tibi.

Fran. Junius rediit in Britanniam citius multo quam opinabar, utpote qui satis novi quo animo in Gallias profectus sit.

Attulit secum Literas ab amplissimo viro Hugone Grotio, ad me datas. Gratissimæ illæ (virum enim illum doctissimum semper agnovi) sed rescribendi otium non datur. Nota etiam mihi probitas & eruditio Junii, nec opus ut à te habeam illum commendatiorem. Scias velim, me & tui & Grotii & sui causa facturum quod possum.

Victoriæ Principis vestri gratulor. Cedat precor in gloriam Dei, & bonum Ecclesiæ. De prudentia ipsius, & virtute militum, non est apud me dubium; sed si iterum & in mari non rubro Israellem prævit nebula, date quæ sunt Cæsaris Cæsari, & quæ sunt Dei Deo.

De filio tuo iterum. Et iterum si placeat. Nam cur non & hic duplex primogeniti portio? Certè mihi curæ erit, quam diu ipse sibi. Tu eum hortare ut facis.

Et quo magis te & tua in eo conspexero, eo majori cura me eum profecturum spondeo. Quod reliquum, te & illum, & tuos, Deo fovendos commendo. Et quum fuerit opportunum te rogo, ut nomine meo virum illum spectatissimum Hug. Grotium, eique pro literis per Junium missis gratias agas. Hoc facto scias me

*Amicum semper tibi fore*

Novemb. 7.  
1631.

*Fidelissimum,*

Guil. London:

### CXXXIII.

*Clarissimo, & Eruditissimo Viro, Dom.  
Gerardo Johanni Vossio, Hist. &  
Linguae Græcæ Professori dignissimo.*

Vir Clarissime,

SUETONIUM hunc, scriptorem, ut ego quidem existimo, & tu non ignoras, longè præstantissimum, ac cura nostra, si non nitidiorem, certè non pejorem redditum, jam primùm ad te mitto. Per occupationes est, quod non potuerim maturius. Animadversiones nostræ, non ita multæ, aut elaboratæ sunt; sed ejusmodi tamen, ut putem tibi homini doctissimo, & antiquitatis amantissimo, non ingratas fore. Quam malè Author hic cum optimis quibusque, à Librariis habitus sit, nemo paulò humaniorum ignorat. Hi ingeniosius alieno opere plus satis esse voluerunt, omnia immutantes, trajicientes, omittentes, pro libitu, ut visâ abundare, aut hiare qualibet. Reliqui Augustæ Historiæ scriptores minores jam sub prælo sunt. Pars eorum tertia, in qua illi sex, qui conjungi ferè solent, leguntur, carceres mordet. Eam Claudio Salmasio, viro, meo quidem judicio, consummatissimæ eruditionis, inscribere est animus, ut hac via aditum mihi ad amicitiam ejus sternerem. Præscriptio nostra ejusmodi est: *Excellentissimo Viro, Claudio Salmasio.* Quod ipsum, an pro dignitate ejus, amplius satis sit, tu non ignoras, qui eum propius nosti. Velim hac in parte, tuo consilio nos juves. Quod si feceris, facturum autem confido, beneficium hoc tuum, ut & alia in me merita, æternum, & publicè aliquando, si otium Deus, & vitam longiorem dederit, agnoscam: specimen hoc



hoc animadversionum velim per otium evolvas, & si quid ineptum, aut alienum in iis sit, pro autoritate tua castigas. Vale, vir eruditissime, & me ama, qui te efflictim. Reverendissimus avus meus, fratres, & omnes nostri, te, tuosque omnes quam officiosissime salutant. Ad-filium tuum Matthæum brevi scribam: habeo quod ejus interest non ignorare.

*Raptim Lugd.  
Bar. 8. Nov.  
clō Idc xxxi.*

*Dom. vestræ dicatissimus,*

Marcus Buxhorn-Zuerius.

#### CXXXV.

*Juveni Ornatissimo, Eruditissimoque  
Dionysio Vossio.*

juvenis ornatissime, eruditissimèque,

**B**Inas tuas Epistolas, alteram xxvi. Octobris, alteram x. Novembris, hoc loci accepi, nec sine lætitiâ ingenti, & deprædicatione felicitatis meæ. Felix enim sum, quia Epistolis tuis dignus, ex quibus quantum me ames certus reddor. Neque ego de diligentia tua, neque tu de affectu meo, dubitabis unquam, qui tanta sumpsit incrementa, ut rumpi amplius nequeat. Ad me quod attiner, scribendo non defui, primam Hamburgo, alteram Lubecâ, duas hinc expedi, adeo ut hæc quinta sit Epistola, quam duplicavi: quas omnes numne acceperis ignoro, sed scire maximopere aveo; facies mihi rem gratissimam, si eo de negotio perscriperis. Jam ultimæ solvunt naves, post quarum discessum, scribendi omnis deerit occasio. Itaque hanc ultimæ volui officio Epistolæ fungi. Non dubito, quin petitionem perceperis meam, & te ad iter huc suscipiendum præpares, quamobrem ejus rei mentionem ampliorem injicere supersedeo, dicam modò quod res est, tibi profuturum iter istud. Videbis Livoniam, Moscoviam, Prussiam, Sueciam, Germaniam, quarum te non penitebit adspectus. Iter est facillimum, tempus breve, at mihi Livoniæque utile; illud quod eruditionis tuæ fieri particeps possim. Hoc quod nihil erit Liv. gloriosius, quàm tam divini ingenii juvenem habuisse. Nullas admittam excusationes, nisi legitimæ fuerint, & ejus generis, adferre te nullas posse, jam tum scio. Historiam enim tuam, quam intra

breve tempus, absoluturum te scribis, versionem Priscorum similem; Typographi fidei tuto committere poteris; ita ut non opus sit, ea causa professionem differre. Sunt & alia quædam, quibus te excusare fortè posses; sed levia sunt, teque eo esse ingenio scio, ut tot flagitantium, imo ipsius Livoniæ expectationi satisfacere, quàm ea considerare malis. Omnes enim, qui hîc sumus, in spem certissimam adventus tui venimus; nihilque restat aliud, quàm ut votorum compotes fiamus. Itaque claudo, & Deum veneror, ut tibi mentem ad iter proclivem, ima ex bonitate largiatur, & te sanum incolumemque hûc deducat. Vale, amicorum jucundissime, & hujus tenuitatem Epistolæ, precibus meis condona. Claudo iterum, voveoque ut tu viva sis Epistola, quæ videas, quanto cum desiderio te expectaverim, quodque ad supremum diem sim futurus

*Derptæ Livonum  
xiv. Nov. styl. vet.  
clō Idc xxxi.*

*Tuus totus,*

Jacobus Skytte.

Si huc veneris, habebis Professionem extraordinariam, in Academia hac, quam tot mensibus, quot hîc manere integrum tibi fuerit, retinebis, in quacumque voveris facultate, vel honorariam, vel quacumque conditione.

#### CXXXVI.

*Clarissimo Viro, D. Gerardo Joanni  
Vossio, Eloquentiæ Professori.*

Vir Clarissime,

**P**Rælegit mihi è Literis illustrissimi Molini, ad se scriptis, Dominus Thadæus Vicus, ferè id quod inde excerptum, vides hic tibi transmitti: ferè inquam; nec enim si conferatur cum Archetypo, in omnibus, sat scio, respondeat. Addidit, quod videam nihil, verùm omisit quædam, quæ imprimis ego, dum legentem assequabar, notaveram. Uti quod verecundè admodum, & magno observantia testimonio, proficetur hisce ipsis literis, vir illustrissimus, non audere se jam tantopere pro transmissio specimine tibi obstrictum, ultra esse molestum, aut importunum; ideoque poscere, ut Vicus tanquam motu proprio, nulla Molini id petentis, mentione facta, aut per se, aut per Dominum Vandermyle, aliumque prout

prout consultum judicabit, ulteriorem dicti operis perfectionem efflagitet. Quod Vicus omiserit, hic in eo quod vides apographo, certè nescio. Caterùm id ego quale accepi lubens transmittō; ac ne quid fortè, in Italico Idiomate, legentem moretur, subnectam interpretationem Latinam. Quanquam verò confido supervacaneam istam operam meam fore, malo tamen in hanc partem, si peccandum est, peccare potius, ne defuisse videar quantillum, id est, laboris, aut tædii. Ergo habe.

*Tenor in Literis à D. Molino Venetiis 14. Novemb. ad Secretarium Vicum, Hagam.*

Habui à Domino Vossio compendium, in materia Archivorum, quo elegantius eruditiusve desiderari nequeat, meisque ei literis, testatum facio, quantoperè id mihi fuerit acceptum. Verùm quoniam mihi scribit, non habuisse se plus temporis, quam diem unicum adimplendo isti operi, propter festinationem quæ urgebatur, rogo te procures, quo poteris me die opportunius, ut idem D. Vossius, insigni sua virtute, gratiam hanc perfectam reddat; Tractatum istum dilatando, & ampliando, præcipuè, quod attinet considerationes commodi, & incommodi, quod & in privatos, & in Principes, potest redundare, ex eo quod habeant, aut non habeant, habeantque bono, aut sequiori ordine composita Archiva: Videasque si inducas eundem D. Vossium, ad plenam operis perfectionem, quæ certè res erit pulcherrima, atque eo magis, quoniam non est, quod ego quidem sciam, ab aliis pertractata. Ex textura exigui illius specimenis, quod ad me misit, magni valoris D. Vossius, tam mihi videtur concinnè ordinata, ut perfectionem, uti dixi, mereatur, &c. Subjungit postea Vicus, missam ad te iri literas à D. Molino, per D. Vandermyle. Petuit à me ut si quid cognovero, non abhorreere animum tuum ab hoc labore, id ei significem, quo latum D. Molino nuntium mittere & ipse possit. Si octiduo absolvi nequit, rogat viginti dierum horas subcivas impendere, ne graveris, idque cum maximè erit integrum, quod & memini dum me recolo, in suis literis dicere Molinum. Ego de meo addam nihil, certus me frustra calcar additurum, five te impellat, five non impellat ad hoc studium, tanti viri stimulus; qualis est omnibus eruditis, & tibi præ omnibus, qui illi & præ omnibus, Molinus. Tantum rogo, ut si te operi accingas, nosse id liceat, uti satisfaciam D. Vici, & sic quoque

ipsius illustrissimi Molini desiderio. Vale vir clarissime, cum lætissima conjuge, & erudita liberorum familia, bonisque omnibus frui, quæ tibi precatur

*Hagæ Comit. xii. Decembris, 1631.*

*Tuus,*

G. R. Doubletius.

## CXXXVI.

*Clarissimo Viro Domino Gerardo Joanni Vossio, Professori celeberrimo.*

Vir Clarissime,

Stendit mihi in alteris illustrissimi Molini Literis, propensissimum tanti viri, erga te adfectum, & jam ante abundè tibi exploratum, is qui summoperè te colit Thadæus Vicus, & inde allatas quas vides chartas, ad te mitti postulavit, quod & ipsius, & tui causâ facio, quam lubentissimè. Molinus scire desiderat, cui nunc potissimum operi impendas mentemque manumque, & Molini vice Vicus iterum obnixè petit, festinari illud de Archivis responsum, de quo scripsi nuper. Pasquinius, quid de Veneti oratoris martyrio voluerit, difficile sit conjicere, nisi ante noris Româ excessisse, mandato Senatus Veneti, Legatum qui apud Pontificem erat Pisaurum, eo quod Thadæus Barberinus, urbi Romæ à Patruo Pontifice Prefectus, & sibi, & Legatis cæterorum Principum, præripere locum tentasset, quem Legati Principibus suis, præ omnibus, uno Papa excepto, deberi de jure perpetua possessione stabilito contendebant. Cùmque inde enata essent publica dissidia, & Veneti Legati veredarius armatâ manu per Thadæum immisâ, liberatus esset ex adibus Sancti Marci, Legatò inessis, in quibus ille custodiebatur, quod emptus à Thadæo crederetur, uti ipsi cederet obviis. Legatus rem omnem serenissimæ Reipublicæ nuntiavit, ac protinus mandatum accepit, domum revertendi, secutisque exemplum Legati cæteri, Urbe excessere omnes, atque in Suburbanis degunt, usque dum singuli intelligant à suis, quæ sit Domini suorum super hac re sententia. Nunc ultra non morabor tua magis seria, quam mea sunt litera. Deum precor, ut tibi, & familiæ tuæ æternum faveat. Vale.

*Hagæ Comit. raptim die 22. Octob. 1631.*

*Tuarum virtutum Cultor  
omnibus officiis,*

G. R. Doubletius.

Memor sis rogo Grotiani quem emi mihi petieram libri. Iterum vale.

N

CXXXVII.

## CXXXVII.

*Salutem in Christo.*

**N**Udius quintus scripsi ad te, Vir clarissime. Nuncius tum & Junius tuus, & Windebankus meus. Quum literas illas ad te dedi, prorsus nihil rescivi de filio tuo, nisi quod omnia bene Cantabrigiæ. Quum ecce Literæ ab amicis meis intimis, & qui tibi filioq; optimè vovent, ad me properant. Clamant filium tuum, non otiosum tantum, sed & penè dissolutum. Deus bone, qualis mutatio, & quam inexpectata! Doleo valdè, sed tua interest, ut quam proximum rescires. Aiunt illum, amore puellæ, & famæ non satis integræ (utpote degentis in diversorio) captum esse. Si matrimonium contrahat & tale, quantus dolor! Statim in ipso Nunc literarum istarum scripsi ad illos, ut omnia facerent quæ ægrum filium tuum possint sanare, aut saltem impedire ne sic miser pereat. Societas enim quâ fruitur in Collegio Jesu, illa altera Societate perditur, & unde violam quæret nescio. Consilium dant amici, nec aliud ego, ut tu quàm citissimè tanquàm aliud volens filium accersas, celerimum reditum promittas, sed quum in tuam, i. e. Patriam potestatem devenierit, potes alia & salubria consilia capere. Num Junius abeuns, eum non adiit? Num adiit, & nihil est suspicatus novi? Deus bone, quàm malè me habet animus! A tempore quo à te redux (diu id mihi videtur) me non invisit. Quum hoc audio, jubeo literas hæc meas volare, at tu jubeas reditum filii tui, saniora spero consilia inituri quum te viderit. Vale, & me ama, ut mihi molestum est hæc scribere.

Jan. 4. 1632.  
Stylo nostro.

*Tibi amic.*

Guil. Londin.

## CXXXVIII.

*Clarissimo Viro Gerardo Vossio, Præceptor æternum observando, S. D.*

**I**N causâ vestra Lugdunenses causâ cecidisse V. N. focer meus ex iudicibus unus mihi retulit. At se provocare ad Ordines huic, credo & aliis, scripsere civitati. Si rectè atque ordine olim virtutem vestram coluissent, & comitem tantæ eruditionis Majestatem conservassent, nunc non ne-

cesse haberent sublatam ex oculis invidere melioribus. Neque hic subsistunt, sed etiam si Dis placet, summo Heroi, & nunquam satis laudato H. Grotio, manus injicere, (ô flagitium) tentant, aliasq; civitates, seu potius istos, qui eadem viâ ad Magistratum grassati sunt, in consensum trahunt. Hi mores, hæc tempora, vix obductam cicatricem refricant acerrimi doloris, quem cepi ex obitu, heu nimis immaturo Magnanimi Blyemburgii, qui multis quidem flebilis occidit, nulli quam mihi flebilior. Jam ferè moriens me vocat, mi Beverwice, inquit, jam diu ex vultu indice animi dolentis collegi quam res meæ depositæ essent. Equidem confusus arti tuæ, & affectui, speraveram ex hoc malo me emerfurum, sed quandoquidem Deo aliter visum, ego, quo nunquam amittes amiciores, pro tuis in me officiis, gratias habeo immortales, & filios (adstabat major natu) æternum tibi relinquo obligatos. Quid mihi, Doctor utriusq; nostrum amicissime, animi tum fuisse censēs? ac quomodo ista, & istiusmodi plura audiendo temperare à lacrymis potuerim? Certè vix nunc hæc recordatio finit, præsertim hac tempestate, quâ rebus viri incomparabilis, aliquod pondus in hac saltem urbe, asferre potuisset. Qui è Magistratu heroicæ ejus virtutes colunt, cæteris ferè numero pares, gemere, virtute, prudentia, eruditione, longè superiores. Immo absque uno foret, quem nosti,

Ἡ ὅτι ἂν φέροις εἰς τὴν ἐκείνου, ὅτι νόημα  
Γραμμῶν ἐπὶ τῆς ἐκείνου

Cuncti animis & votis, faverent rigido, veræ virtutis custodi, neque paucis probatus potius, quam multis foret.

Qui è nostris hodie, (non aderat nuper ὁ καλὸς φιλοχῶν) ad conventum Ordd. Præfecti videbunt, ne quid Heros ab isto detrimenti capiat. Quin & ipse mihi affirmavit, se magni facere virum magnum, & gratum sibi fore ejus adventum, si autoritate publica, ut potuisse referebat, venire maluisset. Quis non indignetur Batavos inveniri, qui Bataviam eo cive carere velint, qui eam immortaliter illustravit gloria, æternum Patriæ, & seculi decus.

Τὸ δ' ἦτοι καὶ ἐστὶν ὅσον τ' ἐπαύριον ἦται.

Cum ut Zelandiam, & ultra omittam, in Gelria multos sibi faventes habeat, necnon in Frisia, inter quos affinis meus Veldnehus, qui ex collegio Ordd. gener. legatione, ad Moscoviæ Ducem functus, iterum concii-



concilio status adscriptus est. Hujus, communis foci senatoris, & meo quoque nomine rogo (nam ibi esse ex fide dignis accepi) amicissimam ipsi salutem dicas. Plura quæ tunc literis non committuntur, utinam in sinum tuum effundere liceat! Non occiderunt omnium dierum soles. Interim vivat, rarum probitatis, & eruditionis exemplar, vivat, & æternum latus bona tempora ducat; atque tu cum illo, V. Cl. cum Cl. Barlæo, aliisque literarum, ac Patriæ columinibus. Quod si amare non desinis, hunc Vossianæ Disciplinæ Alumnum, id quæso ne silentio testatum facere velis.

*Virtutum tuarum*

Dordrecht 12. Jan.  
c10 Idc XXXII.

*cultor observant.*

Joh. Beverwyck.

### CXXXIX.

*Viro Clarissimo, & Eruditissimo Gerard.  
Joanni Vossio. S. P.*

**N**ondum opinor excidit animo tuo, Vossi excellentissime, nostrum Amstelodami colloquium, cum vii. Kal. Sextil: præteriti anni, album tibi meum offerrem. Is ipse jam impensè te rogo, æquo animo feras, me his tandem literis mei apud te memoriam renovare. Locum certè amplius, pudori relinquere nullum potui, qui me à scriptione, ut olim Leydæ a crebriori accessu retardaret. Satis superque, novi tuam humanitatem. Luculentam ejus erga me significationem dedisti, cum me Lugduni, adhuc hærentem, publicè disputantem, benignè audires. Nunc Germano fretus candore tuo, me immeritum, ut in amicorum numerum recipias, obnixè precor. Sanè quanta hic omnium sit expectatio de tuis laboribus, in historia Ecclesiastica, dici non potest. Majorem ego, φίλω οἷς πατρίδα γαίῳ, reversus excitavi. Adeo ut si liberare publicam fidem velis, opere nondum integrè perfecto, ὑπαπαντα πῶ quodam nos beare opus sit. Ita omnium hic in te oculi coniecti sunt, ut qui solus es, quem Herois Casauboni τῷ μαχεύειν, partes adversus ὑποσηκὸς Loiolitas suscipere æquum est. Nemo enim te melius potest id præstare. Caterum δ' Ἰωαννῶν κλέος, scito me non sine consilio Clariss. Lindenbrogii, (qui te ut plurimum salvere jubet) commentariis illustranda, τὰ Ἀγαπίου καὶ Βα.

οὐλοῦ περιγενετῆς κατὰ λαίαν, mihi proposuisse. Illius ad Imperatorem Justinianum, hujus ad Leonem filium. Si singularem illam tuam, quæ τῷ φιλομαθῆις promovere soles, benevolentiam mihi præstiteris, & nonnullis meam editionem, ut faciliè potest capacissimus omnis eruditionis tuus animus, ornaveris, δαυμασὸν ὄσον me tibi devincies: fortè in insigni illa domestica tua, aut alius viri docti, Bibliotheca, quod scias, latet manuscriptum aliquod, aut ipse etiam, qui nihil ignoras, nihil non perlegisti, quædam monenda habes.

Certè si MS. alicujus copia mihi fieri poterit, idoneos sponsores dabo, qui me bona fide redditurum spondeant. Ignosce, Vir literatiss. Totum illud imputabis tuæ humanitati, quæ me adeo impudentem facit. Ego quidem summæ tenuitatis mihi conscius, non facile, in his studiis quid tentarem, nisi consilio amicissimi nostri Lindenbrogii id facerem, qui & Parisiensem utriusque Editionem, & excepta ex Scholiis Moschopuli in Agapetum, mecum communicavit. Descripsit ea Florentiæ, ex MS. quodam Bibliothecæ Marcianæ. Taceo gravissimas, quæ me incitant, causas, quibus obtundere animum tuum, religio est. Negare velle, & magistratus nostri, & optimorum hujus urbis virorum, de me aliquam esse spem, quem Parens jam quinto ætatis anno studium iniciavit, ἀποπύσσειον. Tentandum igitur aliquid quod & ex re mea erit, & erga literas optimas, immane ardens studium testabitur. Μὰ τὸν Διὸς, quam ego delector studio humaniorum literarum: in quibus ætatem huc usque ferè contero. Quo nissus fundamento, animum sapientiæ præceptis compositum, & excultum, posse tandem aliquid in Ecclesia, cui me devovi, utile præstare spero. Utinam δ' εἴη καὶ δαυμασὸν Vossi, rivulum tuæ benevolentiae, in me derivares, quem ego tantoperè admiror, colo, veneror. Athenienses publicis execrationibus sanciebant, ne quis ulli unquam viæ ignaro, indicium denegaret; tua id postulat excellens, & singularis scientia, Germanus candor præstat, ut φιλομαθῶν neminem, frustra dimittas. Sed quæso, Vir eruditissime, quo sensu dicit Agapetus, Τμήματι δ', οὗ διὰ δώματα περιεμύθηται. An ut apud Terentium, neglecta jacet, ut Sophocles in Ajace accipit, pag. 106. Edit. Henr. Stephani. An quia agunt excubias, & præsidii causa, ut in Principum aulis locati sunt: τμήματι β. παρ' ἡμῶν πολιτεία, & κγ. ἵππ' οὗ τῷ Διὶ, καὶ παντὶ ὄντι βλεμματῶ, numquid novum hoc est vocabulum? Basilus etiam τμήματι εγ. Imperatori

ratori *ἡ πόλις τὸ ἐρυθρὸν ὑπόδημα* tribuit. Sed quando in usu, Imper. rubri calcei? quibus etiam meretrices, & delicatiores mulierculæ, utebantur. Germanicum nobis est proverbium. *Es gehort meh, zum dantz, dan ein pah, rohter schuhe.* *ἡ δὲ αἱ αἱ ἐρυθρæ*, sunt punicei calcei; quales erant triumphalium virorum. Albanos olim Reges, puniceo pedum tegmine delicatos esse, Dion. Cassius docet lib. 43.

Expone quæso de his mihi quid sentias, Vir eruditissime; nec admitte, ut frustra ad fores tuæ humanitatis, & benevolentiae accesserim. Scio te germanis, & antiquis adhuc esse moribus; neque indigere eum amicis, quem omnes docti suspiciunt. Ætatem, & ipse meam agnosco; nondum enim xx. ætatis annum sum egressus. At eleganter Thebanus noster Vates, quem jam xiii. ætatis anno, interpretabar, nec sine Doctorum voluptate legebam. *ἦ δὲ οὐκ ἔστιν ἡ πόλις τὸ ἐρυθρὸν ὑπόδημα*. Etiam hoc novi, quantum à te omnis fastus absit, qui bonos non agrè admittis. Apud te, virorum omnium Doctiss. cepti veniam fortè impetro. Paulum sepultæ distat inertiae celata virtus. Si non subtilis ingenii, diligentis tamen, & *ἡ πόλις* testis erit labor. Hæc in finem gratiæ tuæ & *ἡ πόλις* effundere libuit. Tui enim solius, *ἡ πόλις* *ἡ πόλις*. Vale eruditissime virorum nostri seculi, me totum tuum ama, & literarum, quando vacat, alioquo dignare.

Datum feliciter  
Hamburgi  
clō lōc xxxii.  
xv. Kal. Februar.

Diffusissimæ eruditionis tuæ  
Germanarumq; virtutum  
æternus cultor,

Bernhard Damke.

Salutant te officiosè, & salvere jubent, D. Frider. Lindenbrog. & parens meus, qui inter primos colit.

Vir optime, ne fortè decipiant te Tabellarii, scito nos semper pro literis hic solvere; ut non opus sit duplum illos accipere.

Si me ut spero, responsione dignatus fueris, literæ curabuntur seu reddentur Hamburgi, qui commorer apud colendiss. Parentem meum, M. Joachimum Damke, Pastorem Templi Nicolaitani.

CXL

Salut. in Christo.

Vir Clarissime,

**A**Dmodum grata mihi sunt literæ tuæ, ut semper, ita nunc præcipuè. Diu enim expeti brevem, sed magis dilucidam sententiæ Godescalfianæ Expositionem, quam ullibi adhuc mihi videre contigit. Et certè lis illa de gratia & libero arbitrio eo inauspicatiùs mota mihi videtur, quia vix ulli, qui à primis ante S. Aug. Patribus recesserunt, tam foeliciter rem aggressi sunt, ac priores illi. Nunc literæ tuæ, & chartulæ inclusa, mihi & votis meis abunde satisfecerunt, & gratias ago. Si quæ tamen sint, quæ post uberiores disquisitionem prolixius placet scribere, mihi certe pergratissima futura sunt.

Exercitationes Grammaticæ tibi forsân (ut res tuæ sunt) necessariae editu, aliis proculdubio utiles, mihi acceptiores futuræ, nisi te à Baronio avocarent. Summopere enim cupio historiam veteris Ecclesiæ à te aut compositam, aut limatam videre: id est, à præjudiciis, & contrariarum factionum interpolationibus liberatam.

Gratulor tibi de Dionysio tuo, quod annum vix egressus vigesimum tam alta sapiat. Si Rabbi Mos. Maimonidis transferre ex Hebræo cogitat, & Author placet & Argumentum, sc. de Idololatriæ Exordiis & Progressu. De nomine cui inscribere decrevit opus tam insigne, id mihi voluptati erit, quod placet vobis. Interim carmina ejus quæ geminum implent Panegyricum, Principi Araufionensium debita, avidius perlegi, sed (ut soleo) propere nimis præ negotiis, quæ me non à studiis modo, sed & à meipso divellunt.

Et utinam hic laus Dionysii terminus esse potest Epistolæ hujus, sed Johannes id non patitur, nec literæ tuæ per Junium nostrum allata. De amoribus illis si antea audivisti, eò doleo magis, quod monitis tuis non dico spretis, neglectis tamen, ullam cum ea consuetudinem ulterius foveret. Si nolit uxorem, cur vult consuetudinem? Cur famam placet alere in proprium dedecus? Si extremæ dementia sit projicere se infra sortem suam, certe vix minoris est id agere quo magis fama frustra proscindatur sua. Negat hæc omnia audio, & spero vere. Sed vera sint illa de nuptiis, five non, certum est & horas male collocare bonas, & æs alienum contrahere,

here, quæ duo, sola ut sint, ferenda non sunt. Hæc autem ita se habere, potes è chartula hac inclusa scire. Clausula est literarum Doctoris Beli, Collegii Jesu apud Cantabrigienses Præpositi, quas nuperrimè ad me misit. Belus Lingua vernacula scripsit, literas ejus Latinas fecit inelegantior calamus.

Junius statim à reditu & me consuluit, & Cantabrigiam petiit. Rediens inde me frustra quæsit, ut quem negotia alibi magis detinent quam domi. Id tantum servo meo concedidit, intra triduum aut eo citius adfuturum filium tuum. Ecce paro literas sed nimis propere scriptas, & de filio tuo nihil habent quod addant. A Junio ea spero accipies. Si bona sint, tecum gaudeo; si alia, & non pessima, potes id agere, Deo propitio, ut quum ad te venerit filius, redimatur quam queas minimo sive damno, sive periculo. Gravia certè hæc sunt, sed ad meliorem se frugem recipiet Filius, si forte (ut fertur) aberravit. Deus te diu incolumem servet tibi, tuis, & mihi

*Nominis & meriti*

Feb. 15. 1632.  
*Comp. nostro.*

*tui Cultori,*

Guil. Londin.

Hucusque filium tuum expectavi frustra. Cantabrigiâ Londinum decessit antequam ego has literas scripsi. Si alas mutuatus est quibus ad te voler bene est. Sed timeo omnia. Iterum vale.

CXLI.

*Clarissimo Viro D. G. Vossio, Hist. Professori, Jacobus Crucius S. D.*

JAM diu factum, cum ad te nihil dedi, Vir doctissime: sed nunc ecce compellor haud invitus, ad tibi scribendum, ab illo qui juvari se commendatione mea, apud te censet, & qui amari apud nos, spero & apud vos, præbuit se dignum. Adolescentens est quem vides, Seminarii nostri planta, Scholæ discipulus, qui me juventutis suæ habuit Doctorem & Directorem ARNOLDUS VANDER-DUSSEN, gente Batavus, origine Delphensis & ex Patriciorum familia: qui indolem, animumq; ad omnem literarum ac morum elegantiam direxit, linguarum & Philosophiæ tyrocinis egregie defunctus: sed qui raras inge-

nii dotes velo modestiæ involvit. Ætas tenera adhuc (trium vix lustrorum) & liberali verecundia, qui virtutis color, se bonis omnibus commendat. Reliqua, quæ latent, elicient anni, & institutio. Mores, & judicium, virum pollicentur aptum ad altiora promoveri. Ab umbra igitur ad lucem se transfert, à pulveris situ, ad liberiores scholæ vestræ illustris auram, & à privatis subsellis ad publica. Visurus, imo collaturus cum doctis, in celebri vestro Athenæo quæ vidit, aut legit; tu visurus quoque qui humanitate & affectu in liberalia ingenia emines. Me autore se transfert, & itineris omnem fructum meis consiliis hic metietur. Tu, vir magne, benigno vultu, hunc adolescentem excipe, rege, dirige, surgentem ad magna. Jam literis amœnioribus operam daturus, tanquam solidioris doctrinæ fundamentis; ut conquiritis abunde his literarum deliciis, Astræ aliquando studia jungat pietati. Quicquid in candidatum nostrum præstitisti à parentibus haud ingratis, cum scenore referes. Ipse dignum se favore tuo, ac benevolentia (ita spondeo) præbebit; ego verò in hoc Meo beneficia accepisse fatebor, & quibuscunque potero, officiis rependam. Ex ejusmodi furculis arbores educandæ; ex uberi hac semente, messis, quæ in Rempublicam & Ecclesiam se diffundat: Tu nunc in furculum benevolentiaæ tuæ rorem, parentis & mea causa. Sic vale, Vir clarissime, tuis quoque votis faventem habere Deum, si huic, quem sisto, faveris, imo habere, uti faveas.

*Delphis in Museo  
nostro 12. Martii,  
M DC XXXII.*

Doctissimo Barlæo Collegæ tuo, sæculi nostri Poetarum facile Principi, salutem adscribo. Sed tuæ quando tandem ad me literæ? Si teneam, quis me felicior? inferam velut gemmas Epistolari mex telæ, quam nunc pertexo. Pondus procudubio & pretium ex addituræ huic operi, prælo brevi tradendo, ut si non meo, doctorum saltem nomine, commendetur.

*Cupio, opto, expecto,  
Parcentes ego dexteræ  
Odi, sparge rosas.*

Et ingenii tui stricturæ etiam ad nos volent, ut jucundissimam tui memoriam blandienti gaudio foveam; quod in maxima felicitatis parte numerabo; nam quantum tibi deferam lingua & stylus hærent efferre. Quod non ad gratiam dico, ita sentio

&c



& candidè de viro, in omnigena rerum scientia trito, ac subacto. Iterum vale doctorum ocelle, cum lectissima tua conjuge, JUNIA, & me tui amantem ama.

## CXLII.

*Clarissimo, Præstantissimo, Eruditissimoq;  
D. Gerhardo Joanni Vossio, S.*

Clarissime & Eruditissime Vir,

**D**IU est quod te tacito affectu, & amo, & colo: ex quo videlicet, de præclarissimis tuis studiis, & scriptis, non ad pompam, sed ad usum, & emolumentum Ecclesiæ, atque Reipub. comparatis, cognovi. Amicum meum amplissimum virum Matthiam Overbequium, & discipulos meos, qui apud vos, dum hic immanes calamitates, totam Germaniam inundant, delituere; te semel atque iterum amanter, & officiosè meo nomine, salutare jussi. Et nunc ex Hermanno Conringio, ad nos reverso, tibi id haud ingratum fuisse intelligo: facere igitur aliter nequeo, quin temetipsum modo compellem, quamquam mittendi occasio præproperè, (ut hic inter hæc turbas, fieri interdum solet) oblata, vix ullum scribendi spatium concedat. Id autem tibi certò persuadeas, virtutem tuam, & meum erga affectum, quicquid hujus audaciæ est, expressisse. Et meorum quos dixi relatu, & ex tuis ipsius scriptis, haud obscurè cognovi, te magno concordia & pacis, postliminio in Ecclesiam reducendæ desiderio flagrare. Quo equidem, uti & schismatum odio, me dies noctesque, quasi torqueri, neque volo diffiteri, neque possum. Summum autem mihi cordolium est, quod tanta sit sæculi perversitas, tanta animorum in plerisq; pravitas, ut vix cuiquam de pace & concordia, verba facere tutò liceat. Ego viam me muniturum credidi; si antiquitatem Ecclesiasticam, pro mea virili excolerem, & juventuti nostræ quantà maximā possem curā commendarem, atq; ita studium ejus, apud nos propemodum collapsum, instaurarem. Quod haud paulò feliciter successisset, nisi ingens, & diuturna, hæc calamitas, omnes laudabiles conatus, in herbā quasi oppressisset. Moliri tamen non nihil volui, quamquam emoliri vix quicquam potui. Id cognosces ex tractatu de Conjugio Clericorum, quem transmitto, si eum inspicere tibi molestum non fuerit. Ego sane grandis beneficii loco habebō, si non

inspicere modo, sed etiam censere, & me, ubi opus esse videbitur, vel monere, vel docere, dignaberis. Adjunxi apparatus, ante aliquot annos, inchoatum quidem, sed nondum absolutum, cum privatis curis, tum publicis tumultibus laborem operosiorē subinde interruptentibus. Quem equidem tanti non facerem, ut à te inspiceretur, nisi quæ de concordia, quasi obiter, & aliud agendo adpersi, à te cognosci cuperem. Quā fixi itidem expositionem Epistolæ ad Titum, haud magis aliàs pretii adjeci: Proœmium quod libris Augustini, de doctrinā Christiana, & Vincentii Lirinensis commonitorio præmissi, cujus apud me nullum reliquum est exemplum, ostender, ut spero, & præcipuis amicis meis, & olim quoque ex auditoribus, unus Joachimus Wiche-Wordius, civis vester, Cogor hic abrumpere. Cæterum si hæc ipsa non ingrata fuisse intellexero, commodiore tempore, pluribus tecum, nisi molestum est, sermocinabor. Vale, & virtuti, atq; comitati tuæ, audaciam meam imputa.

*Repriss. in Acad.  
Julia, xx. Mart.  
c1513c xxxii.*

*Vester quantus quantus*

Georg. Calixtus.

## CXLIII.

*Clarissimo Doctissimoque Viro D. Gerardo Joanni Vossio, Professori eminentissimo.*

Clarissime Vir, Amicorum meorum Alpha,

**N**isi tibi Stephanii tui memoria intercidit, agnoscis primo intuitu manum, quæ toties tibi, dum tempe vestra Leidensia incolerem, molesta fuit; imo vel etiamnum esse non desinit, licet nos immensa locorum intercapedo disjunxerit. Excitat audaciam meam, suavissima humanitatis tuæ recordatio, quæ tam luculentis erga me indiciis, toto illo studiorum meorum tempore enituit. In plebeiis animis dulcedo amicorum, simul eorum facta ex oculis amolitio est, restinguitur; at mihi interjectu loci desiderium tui vehementius gliscit, ut creberrimè cogitationis alā, ad te properem, videarque mihi consueta familiaritatis, tecum instaurare commercium. Nunc verò literarium quoddam negotium fuit, de quo tecum agerem. Vita S. Wilhelmi Abbatis Monasterii ad S. Paracletum, in Dania ab ejus quidem discipulo

pulo conscripta, sed per Laurentium Surium, in compendium redacta, extat tomo ii de Historiis Sanctorum, a. d. vi. Aprilis. Eam ut per Amanuensum tuum describi, & per præsentem internuntium ad me transmitti cures, per genium te amicitiae nostrae rogo, atque obsecro. Penes me etenim est volumen Epistolarum, ejusdem Wilhelmi Abbatis, in membranâ exaratum, quod olim, Deo volente, publici juris facere constitui. Huic verò instituto non parùm inservire poterit, hoc quicquid est monumenti; imprimis verò si ad calcem libri adjungatur. Si nonnulla in Saxone nostro, post meum è Belgio discessum, quæ observationem merentur, animadvertere tibi contigit, mecum communices, etiam atque etiam abs te peto. Nam indies adorno, novam illam Saxonis editionem, quam toties coram promisi. Glossas B. Vulcanii, vel veteris alicujus scriptoris, in Martianum Capellam, ad me transmittas oro; nullus dubitans, quin intra trimestre spatium, per bonæ fidei hominem restituam. Gratulor tibi auctos honores, cui jam liceat in majori luce posito, & Theatro illo urbium Belgicarum, divini ingenii claritatem, per omnes literati orbis angulos, etiam ad ultimum Septentrionem nostrum, longè latèque diffundere. Inter nova habeto Selandiam insulam hanc nostram a. d. xxix. Febr. insolitis contremuisse motibus: quid portendant, novit ille qui solus omnia novit. Plura non est dubium, quin Meursius noster suppeditet. Benè feliciterque vale, optime amicorum, & me pristino affectu tuo constanter complecti dignare.

Soræ a. d. xvi. April.  
c1o 12 c xxxii.

*Observantissimus tui,*

Stephanus Johannis Stephanius.

#### CXLIV.

*Clarissimo, & Celeberrimo Viro D. Gerardo Joanni Vossio, Histor. Professore dignissimo, S. P.*

*Amsterdamum.*

Clarif. & Doctif. Vir, Collega observande,

**A**ccepi nuper, te mittente, munus à doctissimo Casaubono, cui gratias agam prima occasione. Hæc cum se offerret, pereruditum hunc juvenem Medicinæ studiosum, petii, ut tibi redderet munusculum, nuperi mei operis, quod se tibi sistit, ut à te discat, si tanti sit, ut ab otio

tuo, aut potius à gravioribus negotiis, impetrare possis, ut in illud oculos conjicias, & censeatur ubi opus erit. Quicquid sit, animum mittentis, ut soleo, boni consules. Aliud jam sub prælo Elzeviriorum, sudat lucubrationum mearum in Genesin; sed longioris operæ, quam ut post paucos menses prodire possit. Interim paro me ad migrationem, qui in eum finem, ab Illustrissimo Principe, accepi diploma, in quo significat, quid me facere, aut procurare velit, & mihi in reliquam vitam adeo liberaliter prospicit, ut ingratus sum, nisi me totum, addicam ei muneri, ad quod me vocat, & pro viribus in illud incumbam. Quoniam autem Magnus ille puer, adhuc per ætatem, & statutam imbecillior est, quam ut hoc anno possit omnino à curâ mulierum avelli; prospexit mihi de adibus, in ipso Aulae ambitu, quæ olim fuerant Graphiarum Junii, non procul à loco, ubi convenit supremum Consilium. Si aliquando Hagam excurras, non pertransibis nos insalutatos, Statui cum bono Deo, ad viii. Maii publicè coram Curatoribus Academiae valedicere. D. Salmasius, acceptis ab utraque parte literis salvi conductus, in procinctu est, expectaturque ante Kalen. Maias. Conductæ sunt in usum ejus aedes capacissimæ, quæ fuerunt olim Equitum Melitenensium, ubi hortum habebit spatiosum. Plura pro tempore non addam, qui jamjam Hagam me confero, ut crastina die, volente Deo SS. Cœnam administrem adhuc hac vice. Saluta quæso, meo, & uxoris meæ nomine, tuam & tuos omnes.

Lugduni Batavorum X.  
Aprilis.  
c1o 12c xxxii.

*Tibi ad omnia officia paratiss,*

Andreas Rivetus.

#### CXLV.

Vir Clarissime, Amicorum maxime,

**S**uperiore anno nihil abs te literarum accepi, præter illas quæ datæ erant iv. Id. Maii: ego tamen semel iterumque scripsi post id tempus, si non tertium, & effigiem meam nisi æri incisam: neque dubito quin acceperis. Si scires quàm mihi charæ sint tuæ literæ, & quam animum exhilarent, sæpe scriberes: ac vel unum hoc te valere. Quod ut tibi diuturnum esse opto, atque tuis item omnibus, ita etiam sæpe intelligere cupiam. Jam occasio tibi est

est mittendi literas, quoties velis, & ego ipse viam tibi indicavi: quæso utere. Mitto nunc Solonem meum, qui si tibi gratum se præstare poterit, mihi quoque eo nomine multò gratior est futurus. Quod adjunctum exemplar vides, rogo ut Barlæo tradas, & salutem à me addas. Mitto etiam tres ingenii mei foetus; quos te rogo ut excudi illic cures, seu Typographi, five meis etiam sumptibus, qualicunque demum modo. Cuperem quamprimum fieri, & eâ formâ atque typis quibus mea omnia olim Elzevirii excudere. Si excudi meo sumtu illa debeant, velim tantum exemplaria quingenta excudi, & hoc quæso summâ curâ provideto, ne Typographus fraudem faciat, & seorsim sibi excudat exemplaria; quod cum meo detrimento non exiguo sit futurum: & obstringes in hanc rem ipsius fidem. Postquam absoluta erunt, mittes mihi exemplaria triginta; è quibus tamen unum tibi reservabis, duo in Italiam mittes ad Molinum & Bonifacium: duo quoque Leidam mittes, ad Cunæum Heinsumque. Peto etiam abs te in majorem modum, ne graveris meâ causâ operam dare, uti prodeant hæc Opuscula emendatè, quantum ejus fieri poterit. Quo in loco sit illustris Schola vestra, aut quo nomine appellari magistratui vestro placeat, scire aveo; tum quid tu privatim agas, ac quid etiam luci destines ex tot monumentis tuis: insuper de re domestica universâ. Ea quidem mihi hætenus quartum mensem est afflicta. Unica enim filia mea per trimestre cum gravissimo certè morbo, ac periculoso valde conflictata, postquam Dei beneficio (cui gratias summas ago, ut debeo) vix evasit, mox in tertianam incidit, quâ nunc etiam vexatur; neque sola: nam & filium iidem eodem tempore eadem invasit febris; ac præterea etiam uxor, fracta curis, (nostri animum maternum & sollicitum affectum) ac vigiliis, & laboribus diuturnis à defluxione humorum, aures pariter atque dentes crudelissime infestante, majorem in modum cruciatur. Ego inter hæc, quamquam corpore Dei gratia satis sano; tamen animi excrucior. Nosti animum Mariti, nosti Patris. Sed hæc homini Christiano æquo animo sunt ferenda, & speranda meliora. Ego fero, ego spero, neque spem evertet Deus, aut confundet. O passi graviora, ac superiore anno, quod perlatum ad te puto, quidam è Collegis meis, Theologus professione &, si Deo placet, pastor, litem mihi de Religione movit, sed coactus est desistere; adversari

sibi expertus ipsum adeo Regem nostrum serenissimum & primates Regni viros; addo Episcopos, & Theologos item alios, ac cordatos viros omnes, & prudentes extra eum quoque ordinem. Passus est estimationis suæ non exiguam jacturam. Certè istud verè dicere tibi possum, summam esse moderationem animi, & mansuetudinem eximiam, in Theologis hujus Regni: ut sunt viri si non famâ nominis clari, at virtute, & doctrinâ, & humanitate summa excellentes: quique nihil minus amant, quàm ferociam Germanicam. Et sic Dei beneficio transit tempestas ista, in tranquillitatem maximam commutata; è quâ illud boni habeo, quod didicerim quam sim charus omnis ordinis hominibus in hoc Regno: equidem id antea sciebam satis, sed nunc magis sum expertus. Ita nempe Deum timentibus, juxta dictum hoc Apostoli, omnia in bonum cooperantur; videoque manifestè, quòd me tueatur Deus, atque pietatem meam curâ habeat. Huic deinceps me commendo: & te item, Vir Clarissime, cum uxore liberisque. Uxor mea, liberique, impræsens agri, tuam & tuos plurima salute impertiunt.

Raptim Soræ ad  
Diem xxiv. Aprilis  
clō Idc xxxi.

Tuus vero animi affectu,

Joannes Meursius.

#### CXLVI.

Excellentissimo, Clarissimo Viro, Gerardo Joanni Vossio, S. P.

Quod denuò gravissimas occupationes tuas interpello, Vir literarum famâ celeberrime, facit scribendi opportunitas, per Elzevirium Leydensem Bibliopolam mihi oblata. Nec sanè essem adeo tamquam, nisi scirem maximam tuam humanitatem; quam etsi non obscurè antea cognoverim, eam tamen mirificè auxisti. Ne quid præterita commemorem beneficia, quæ C. T. mihi præstitit, vel nuperrimè, Vir Excell. quanto me beasti bono: Inscitas meas literas, benignâ fronte excipis, ac respondere etiam non dedignaris. Et pro quo æternum tibi debeo, tantam in me derivasti, incomparabilis viri Hugonis Grotii, benevolentiam, ut nihil supra. Cujus vel solius gratiâ hætenus in Patriâ hæsi. Ut postremum saltem factum deprecem, Vir seculorum memoriâ dignissime,



fime, ne nescias: proximis hisce diebus, cum Notas meas ad Agapetum, tam divino iudicio censendas, offerrem viro maximo, non tantum prorsus candidè, non nulla admonebat, verum etiam ultrò non rogatus, carmen Græcum præfigebat, dignum tanto viro. Quod ego ne expetere quidem ausus fuissèm. Agapetum igitur, Vir Clar. jam absolvi, sumque jam totus in Basilio. Antehac quippe ratio studiorum meorum, ut facerem, non admittebat, qui diligentior eram in Hebraicis. Nunc cum discesserit Judæus, qui me in Rabbiniis docebat, subripio læpius cæteris studiis tempus, idque impendo Basilii admonitionibus, qui Agapetum paucis diebus absolvi. Si ea etiam tibi, vir summæ eruditionis, spes est de meis studiis, ut lubenter ornare me velis tuo testimonio, sive in ligatâ, sive prosâ scripto, quod meis præfigatur notis Philologico-politicis, maximam tamen partem Politicis ad Agapetum, item Basilium, gratissimum, & perpetuâ colendum memoriâ beneficium præstiteris. Ut taceam quantum mihi calcar futurum sit, si & Grotio, & tibi, & Lindenbrogio, viris nostra ætate maximis, ac cum omni antiquitate comparandis, placere mea videam. Vellem herclè ita ferre tempus, ut Cl. T. legere has notas possè. Quam optarem: sic enim & meliores fierent, & emendatiores prodirent, quodque maximum, ego tanto magis erudirer. Novi E. T. genium, qui me non frustra dimitteret, ut hac in re plurimum potest. Hexastichon Grotianum sic se habet.

Ὅς ἐδίδαξο Ἀγαπῆς Ἰσχυιανδρὸν ἀνακτα  
Θεοπίη, ἀρετικὸς διαμαρτυροῦναι,  
Ὅν τοις ἰδὺν Ἀγαπῆν ἴδως Ἀγαπῆν ἔχ' αὐτὸς  
Δάμνην τὴν ἀχλὺν πᾶσαν ἀποκαθάρσας  
Ἐνιπὶς σφίσις τε σφειμα, πῶς τοῖς λύξας  
Ὅς νῦν ἀρξάμενος σάκρυα θεμεσιπολεῖς.

Multa viro maximo dictavit amor, qui tamen omnium primus, à te, Vir Clar. ortus est. In quo tam bono omine defino, obnixè rogans, velis, vir summe, me amare, id est, juvenum φιλομαθῶν, quemque inter primos cultores, tot tuarum virtutum habes. Ignosce etiam, quod stans uno pede, hac ὑπερβῶν coactus sum, ob festinationem Elzevirii, nec limatiores literas scripserim. Vale, vir optime, inter eruditos nostri seculi præcipue, & salve à δαιμονίῳ Grotio, Frederico Tiliobrogâ, parente item meo.

Hamburgi è Museo meo, cl. 10c xxxii.  
decimo octavo Kal. J.  
E. & C.T. studiosissimus Cultor,  
Bernhard. Damke.

## CXLVIII.

Clarissimo Viro Gerardo Joanni Vossio,  
S. P.

I Gnosces, Vir eruditissime, quod ab occupationibus istis tuis summis denuò obstreperere audeam. Satis impudenter fateor, cum te specto; at cum observantiam planè singularem, in te meam, quæ stimulos acerrimos suggerit, non possum non frontem non projicere. Et quamquam haud merear, ut benevolentia me aliqua complectare, humanitatem tamen, virtutem illam tibi propriam cum eximia eruditione, quam omnes admiramur, conjunctam, non meritum meum in consilium adhibebis. Utrumque horum ejus singulari splendore animos tibi eorum devincis omnium, qui eruditum esse, & humanum, quid sit sciunt, ita me fascinavit, ut omnem deposuerim pudorem. Sine dolo dico. Nulli hac finis, nisi ut tuum propellam favorem: si spes ea non decollabit, virgulam divinam tanti haud fecerim. Quare cum aliquando vacabit, non dubito, quin humanitatis jure, mecum acturus, literarum colloquio me dignaberis. Noli esse difficilis, Vir Clarissime, Clarissime, Erud. humanissimo. Numquid precari dignè satis possum? Quam avidè singulas in horas, tuum, vir optime, de proposito meo consilium, scire expectam, dici nequit. Adeo hæreo nescius, an vitam an mortem, futurus hic mereatur factus. Si vero Agapeti putâ, & Basilii περιπατικῶν editio, tua opera ornaretur, aut MS. copia fieret, bene de me actum putarem. Reipsâ me gratum præstarem, & maturè ad Dominum suum omnia redirent. Vide, vir omnium eruditissime, quid maxima facilitatis tuæ spes, apud me possit. Παγκοσμίως, quam vocem in secundo capite Agap. habet, nondum me legisse memini. Æque ignoro, quid sibi Basil. Cap. 45. per tricubitalem terram ἐπὶ πλῆθος τετραγώνων γῆς velit, in Latina versione est, non amplius quam pedes quatuor & semissem. Nec simile quid occurrit, quod est, Cap. 54. φοροστέον μετ' οὐμῶν, φιλοστέον ἰσχυρὸς διατρέων. Tu vir summe, qui lectionis inexhausta ἡμυχος ἀπονεύς es, erudi me quæso, & amore tuo æternum prosequere, sic ego, cultu, & observantia. De rubro pedum subtegmine, quod prioribus meis quærebam, rem puto esse satis claram. Et per ἀεχμεῖνους διὰ δώματα, ex-

cubias intelligo. Paucis hisce, Vir Clarissime, desino ne patienti humanitate tua abuti videar. Dignum vero te tandem, literis me tuis iudicaturum confido. Vale, vir observantissime, & salve ab eo qui te ex animo admiratur & colit. Salutem tibi adscribi jubent, D. Lindenbrogius amicus noster, summe colendus, & Parens meus, tuæ Cl. cultor.

Hamburgi,  
d. museo meo,  
CLC XXXII.  
xvi. Kal. Tertij.  
In Cameterio  
D. E.C.P. Nicolai.

Additissimus voto facto,

Bernhardus Damke.

### CLVIII.

Excellentissimo, Clarissimo Viro D. Gerardo Joanni Vossio, *additissimus cultor, adscribit* Bern. Damke.  
S. P.

QUA re satis magnas, tibi, Vir Excellentiss. agam gratias? aut quid primum extollam? diffusissimamne eruditionem, quâ summo cuique hujus seculi palmam præripis? an maximam humanitatem? Utrumque in te supra fidem certat. Rarum hoc sæculo sanè munus. Ego ob omnia illa dona, malo T. E. admirari, colere, venerari, & tanquam in Numinis alicujus intuitu attonitus hære, quam paupertini ingenii mei, cuius sum conscius, collutulare barbarie. Nulla vox est, quæ dignè ea possit comprehendere. Nam quidquid dixerò, minus id est. Hæc tua est illa gloria, Vir Clariss. ut nullius laudibus crescas, nullius vituperatione minuaris. Me tamen non planè filere, pietas postulat. Et gratitudinis est, præstita beneficia agnoscere. Quod assatim apud alios, facere malo, quam T. E. in os laudare, ne in scævam suspicionem incurram. Deo, Vir omnium eruditissime, non semper inaurata cadit victima, & placet, dummodò sit casta. Tu, vir Clariss. non me, non atatem meam videbis, qui me favore tuo indignum, libens lubensque fateor: cultum modò, & observantiam in te meam, ab omni fuci, & doli mali alieno animo profectam, benigna fronte adspicies. Utinam me citius natum Melpomene placido adeo vultu vidisset, ut tua dignus essem habitus amicitia. Nunc de tarditate annorum, meus in te, Vir Excellentiss. augetur cultus.

Quem quo etiam cunque pacto testari velim, id omne est infra dignitatem tuam. Vel hoc si videam, quantoperè, Vir Clariss. de me meisq. studiis sis meritis Leydæ, tanto jam temporis spatio, ultra duos & semi annos, Præceptorem te habui, & colui. Bis cottidie licuit tua voce erudiri. Nec tamen etiam nunc, cum corpore abs te absim, æque ac præsentem docere desinis. Literis quæ diffusissimæ, omnisque veræ eruditionis indices sunt, invisis, errantem corrigis, dubium me reddis certum, indotum erudis. Aeternum se tibi, Vir Optime, Musæ nostræ debent. Et referet grates, quoniam non possumus ipsi, ille Deus quondam, qui tua dona dedit. Nimirum adeo pauci sunt hoc seculo, quod nisi Phœbus Pater prohibesset, brevi in barbariem præceps ruer, quibus solida est eruditio. Pauciores qui fideliter docere alios satagant. Cum tamen *ἀποθνήσκω*, *quodam die*, accedit & hoc, nunquam satis æstimande D. fautor, quod me, non magni pretii juvenem, ingeniosiss. eruditiss. disertiss. D. Hugoni Grotio, de meliori, quod aiunt, nota commendasti. Quem ego virum, jam à primis ætatis meæ annis, quibus se ingenii, aut diligentia vis aliqua exerere cœpit, suspexi plurimum. Vivit ille extra urbem in villa, ut vocant, Dockinhufana prædio Civis Belgæ Guilian de Mohr. Statim eò ivi. Ne enim se animus meus diutius continere tum poterat, tanto munitus parario. Pergratum & volupe erat, viro summo, cum tuo, Vir Excellent. nomine salutarem, & ut fidem haberet, literas tuas legendas traderem. D. Grotius, ut est vir admodum humanus, in prandio me sibi adesse volebat, nec dimissionis veniam ab eo impetrabam. Et quod caput rei est, *ἡς ἰσχὺς τερπὴ τοῖς καλοῖς λόγοις*, (ut cætera taceam) quam liberalissimè me excipiebat. Hunc ego honorem, hanc, quæ obtigit, felicitatem tibi, vir maxime, debeo. Nec quidquam magis est in votis, quam ut aut parenti meo, aut mihi ulla se occasio offerat, qua gratum testemur animum: vel potius, cum satis digna referri gratia nequeat, ostendere saltem possimus, nos benefacta in me tua agnoscere. Ego sanè in tam boni nominis memoria libens acquiesco, & dum trium fila fororum patitur atra, T. Cl. in me, nihil tale merentem, affectum grato animo deprædico. Sed pecco in publica commoda, si te longis, Vir optime, moror. Nam & à continuis studiorum vigiliis, in tanta adhuc ætate non remittis: Et in te solo Amsterlodamensis

menſis Athenæi fama ſita eſt, poſtquam ut inaudio, Clar. D. Barlæus, ſublimis ſpiritus, & hoc ſæculo facile Princeps Poeta ægrotat. Deus eum priſtinæ valetudini reſtituere, & in honorem Belgii ſuperſtitare diu velit. Unum præter immortalium gratiarum actionem adhuc addam. Merito ſanè aliquem ſtudioſorum noſtrorum finem ponimus, ut & eo ſcèlicius in illis verſari, & tanto maiorem ex jugi diligentia fructum percipere poſſimus. Et is cum pro diverſa ſtudioſorum ratione varius ſit, mihi ſacrum Theologiæ ſtudium quam maximè arridet. Non ignoro, Vir Excellentiff. quantum in eo laboris, & diligentia collocandum ſit. Mihi tamen cum benè multi adhuc anni, ſi Deus volet, reſtent, ſpero, me divina adjutum opera poſſe, continuis ſtudiis exercitum, aliquid dignum Eccleſia præſtare. Non enim mihi placet præpoſtera quorundam hominum diligentia, qui hæc ſtudia, quæ ab humanitate nomen habent, at cum ſapientia gravitate amicè conſpirant, non modo non excolenda, ſed ne attingenda quidem exiſtunt, leviter, & tralaticè nescio quibus inutilibus diſciplinis imbuti, ilicò pulpitum quærunt. Cujus commatis homines, non pauci apud nos dantur, qui dum multa paſſim ex Poſtillis, ut vocant, decerpunt, concipilant, mutilant, egregiam laudem, & ſpolia ampla referre, imo longè optumè oleum ſe, & operam inſumpliſſe putant. Tales frequenti numero apud nos dantur Theologi. At ego cum ſtudii huius difficultatem video, quanta linguarum ſcientia, (quas me domi jam Rabbinica, & Thalmudica Judæus quidam converſus, natione Polonus, docet) quam diligens Patrum Lectio, & accurata Hiſtoriæ Eccleſiaſtica cognitio requiratur, non poſſum quin riſu excipiam *ἀνθρωποι* illos ſapientes. Immobilem ſæpe mulcillum pecus, mihi movet, ut doleam, eò dignitatem ſtudii Theologi rediſſe, ut ab indignis adeo tractetur. Et ſiqui ſunt qui ſpeciem quandam eruditionis veræ fingere norint, alienis ii vident oculis, & ſat habent, ſi jurent in alterius verba: In Patribus indices ſaltem perquirunt, parvi facientes, quid & quomodo ab iſtis dicatur. Quæſtiones plurimas inutiles crepant, & ſi ad verbera res perveniret, facile iſti victores eſſent: Nam vita plurimorum, multo pejor Ethnicorum. In Hiſtoria Eccleſiaſtica vix pueri, & infantes ſunt. In qua excolenda, quotquot adhuc bonam mentem amant, ii maxima quæque, de tua, Vir Clariff. diligentia ſibi

promittunt. Nec ego unquam ceſſo, omnibus bonis eruditionis, & eruditorum amantibus, plurima polliceri, de immenſa tua diligentia, & Remp. literariam adjuvandi prompta dextérité. Nunc ego, vir Maxime, Orator ad te venio, tu finito exorator ut ſim. Idq. per Muſas, per Genium tuum, per humanitatem, atq. adeo omnia quibus jam immortale apud omnem poſteritatem, tibi nomen comparavi, oro: Etiam hac in parte, pro ſumma tua eruditione, me erudias, quæ in excolendo ſtudio Theologico monenda habes, imprimis quo pacto, Hiſtoria Eccleſiaſtica, & præſertim recentior, fideliter ſit addiſcenda, & unde haurienda. Non ego ſum adeo ferus, & inhumanus, ut mei cauſa moram, velim injici continuis tuis, Vir Clariff. occupationibus, aut totam adeo Remp. literariam damnum pati. Sed ſi quando vacat, placet, & commodum eſt. T. Exc. eam mihi aliquando præſtabit gratiam. Sic, vir optime, mea ſtudia plurimum promovebis: Et ego ad extremum uſque vitæ halitum, ita me Muſæ ament, nunquam tanti benefacti immemor ero. Hoc eſt, obſervande D. fautor, quod volui addere. Nemo enim omnium *λαμπρὴν φάος ἡελίοιο εἰς ὀφθαλμὸν* feliciter & melius Spartam illam ornare, digniusque tueri te ſolo poteſt. Hæc ad te, Vir Excell. perſcribere volui, ſpe plus quam decumana ſubniſus, fore, ut non ingrata ſit tibi obſervantia meaſ. teſtificatio. Et ſi nimis longus dum ſum, peccare videor, veniam facile impetro. Non aliter certè potui, & pietas, ſeu gratitudo id poſtulavit, *μὲν καὶ ἐν τῇ βίᾳ τοῦ ἀνταποδοθῆναι τῷ ἐν τῇ βίᾳ τὰς χάριτας*, ait Baſilius Imp. Et humanitas tua cum eruditione incomparabili conjuncta, maximè me excuſabit. Vale, Vir Clariff. cum univerſa familia tua; ſoſpitem te diu ter ſanctus Deus, in gratiam tuorum, & ſalutem Reip. literariæ. Salutant te Vir Clariff. D. Grotius, & Tiliobroga; Item Parens meus. Vale, vir ſumme, me ama, & aliis commenda. Et ſiquid in hiſce oris curandum, aut inquirendum habes, impera, non tu promptus adeo eris monendo, quam ego faciend.

Hamburgi d  
Muſeo meo,  
clō Ic XXXII.  
V. Id. Jun.

T. Excell. & Cl. voto factō  
addiſſ. cultor,

Bernhard. Damke.



## CXLIX.

Vir Illustrissime,

**L**iteris tuæ Id. Februarii datæ nuper ad me delatæ sunt. In quibus, quod mihi gratissimum, lego pro Amstelodamensibus pronunciatum esse, & te ibi inauguratum. Cedant tibi in bonum omnia: Spero enim te, Numine propitio valde, Sedem, non Studia, mutasse. Stipendium altera parte majus usui erit tuis, quod paucioribus horis publice doceas, erit tibi & studiis.

Casaubonus à morte Reverendissimi Wintoniensis in meam clientelam transiit. Ego Patris nomine, & suo quæ potui feci, ut liber à curis, studiis indulgeret; quibus æque ac majoribus conatibus, (si majores sint) res domi angustiores ob stare solent. Alia & majora facturus sum quum facultas adfit, & erit opportunum. Interim gaudeo tot nominibus tibi gratum accessisse Casauboni Optatum. Si qua in re aurem tibi vellat, spero mitius agit, nollem enim ut quid durius, quum tantis sis occupationibus distentus, nec vellem ut aliis quam tuis passibus, & quibus feliciter possis, progrediaris.

Armachanus certe noster Vir doctus & gravis, Librum tibi dicatum, à se scriptum, ad me misit. Gratias egi ut par erat: nam valde mihi Præsul ille ob multiplicem Doctrinam charus. Sed quum primum inspexi, nonnulla occurrebant quæ mihi raptim (prout res meæ exigunt) legenti, not ita arrisere. Præcipue vero illa S. Aug. sensus restrictio, qui venerabilem illum Patrem nec Antiquioribus in Ecclesia, nec sibi ipsi, satis constare permittit. Gratias vero tibi ago summas, quod (etsi paucis id à te factum) significare placuit in quibus necesse tibi sit à Viro tanto dissentire. Dignare obsecro, si per otium liceat, pleniori calamo, breviter tamen, ea & si quæ alia sunt describere, & ad me transmittere, in privatum tantum usum vertenda.

De amplissimo illo Viro Hu. Grotio pauca habeo. Salutes quæso virum doctissimum meis nominibus. Fac etiam ut sciat gratum mihi admodum fuisse, quod calculo ejus dignissimo, indignissimus approbatus sim, quod ex ipsius ad Casaubonum literis intellexi. Caterum reditum ejus in patriam, fateor mihi semper fuisse inter res vix credibiles, cujusunque demum suavis fuerit. Nec deest mihi ra-

tio, etsi non hic & nunc inferenda. Si iterum sponte Patria excedat, felix est quod eum tot Reges Principesque desiderant. Hoc uno infelicior, quod non tam, aut facile, aut tuto, eligere potest, aut eligi. Quod præ aliis non invides eum Britannia, placet id quidem, & quam utilis esse potest, non magis scio quam agnosco. Sed ut nunc res sunt apud nos, de ea re ne cogitandum quidem.

Quod interjicis de turbis Lugdunensibus, & Capitis supplicio irrogato Homicidæ, certe non sine dolore audio hæc & similia de Academiis. Inter pessimos mores quid restat, si occidere, vel occidi, sit Academicè vivere? Fœlix tamen Lugdunum vestrum, quod inter tam crebras cædes, tot habet tamen Nobiles, quotidie illuc advolantes, studii & eruditionis causa, auditque Asylum Juventutis. Sed non sic olim crevere Literæ. Quod reliquum est, (nam alia me avocant) cura valetudinem, ut diu usui esse possis Ecclesiæ Christi. Ævum schismaticum dicis; nec audeo abnuere: Interim necesse est ferre, quod nec vitare potest nec corrigere. Et certe morbus adeo complicatus est, ut nescio quem potest Medicum expectare præter Deum. Authorem Salutis nostræ dum precibus sollicitas sis mei memor. Vale.

Tui Studiofissimus,

Julii 3. 1631.

Guil. Londini.

Fere inter scribendum accepi Orationem à te publicè habitam, certe doctissimam, de Utilitate Historiæ. Gratias ago maximas.

## CL.

**I**Tane te, Vir Clarissime, negligere amicum, & tam bonam occasionem, quæ vix semel toto anno sese offert! Non speraram; nec profecto tu debebas. Nimis calidè ut te amo, ita Literas tuas cupio & expecto. Ægre etiam fert Uxor, nil responsi ab Uxore item tua se ad suas accepisse. Atqui non est quod obtendas festinationem ejus, per quem respondendum erat, qui se dies decem & septem Amstelodami substituisse, & Uxorem quoque tuam (nam te convenire haud licuit) de responsio semel item, iterumque, compellasse affirmavit. Misi tibi ternas lucubratiunculas typis illic evulgandas, sive meo

meo five alieno sumptu. Admodum desiderabam scire, quid hic effecisses; nunc incertus animi pendeo. Certè cum incertitudo mittendarum literarum tanta nobis sit objecta, unam certam occasionem prætermittere nullo modo debebamus. Ego quidem minime officio desum, sed te jure hic accuso. Vide, mi amice, quid agas & quam graviter amicitiam nostram lædas, cujus munia non exeres tam fideliter ac debebas. Joannes Janssonius Bibliopola illic vester, operam mihi suam obtulit, si quid meum apud vos excusum velim. Mitto itaque *Regnum Atticum*, quod tu illi in manum trades, cum editionem voler inchoare. Interim tibi reservabis; & urgebis etiam hominem, si fortasse Lentulum ager. Vale & salve cum tuâ tuisque à me, mea, item meis.

*Rapim Soræ ad  
diem viii. Aug.  
c15 15c xxxii.*

*Tuus sine fūco,*

Joannes Meurfius.

#### CL.

SCRIPSI ad te, Vir Clarissime, ante paucos aliquot dies; & ut puto, recte Literas accepisti; nam per certum hominem mihi. Responsum tuum avidè expecto, nec conceptam in te iram, ob priorem negligentiam anteponam; ac, ne Literæ deinceps errent, sicut hætenus, ecce tibi virum certum ad quem jubeas deferri, Arnoldum van Gendt Notarium Publicum in novo biscoëti foro, propè Camelum, commorantem; ille Hafniam curabit, ad filium illic, Mercatorem notum mihi, & amicum; isque ad me sine morâ recte mittet, uti inter nos convenit. Nuper aderam illustri Cancellario Regio, & injectus de te sermo: æstimat te & scripta tua, neq; ego, ut confidere facile potes, sicut dignum amicitia nostrâ erat aliquid detractum ivi. Idem accidit apud Casparum Brochmannum, Theologiæ Doctorem, & Professorem in Academia Hafnienfi. Cupiebat ille scire, quisnam Academiæ vestræ seu Gymnasii appellandum est, status foret: an futurum existimetur; uti illic aliquando facultates universæ sint docendæ, an verò mansuri sitis intra terminos facultatis Philosophiæ. Insuper & hoc quærebat, anne Eloquentiam, præter Historiam, etiam profitereris: quod si faceres haud paucos ex alumnis nostri Regis ad te commeaturos esse. Responde, quæ-

so, ad hæc quamprimum, atq; salve cum Uxore Liberisque à me, meâ atque meis.

*Rapim Soræ ad  
diem xxiii. Aug.  
c15 15c xxxii.*

*Tuus, ut nôsti,*

Joannes Meurfius.

#### CLII.

*Clarissimo V. Gerardo Joanni Vossio,  
Erycius Puteanus S. D.*

QUAM familiaris sum, Clarissime Vir, tam liberè hoc ad te scriptum mitto, de principio *ὑπομνήσεως*, in Orbe terrarum constituendo. Res ista ut nova, ita magna est: & lineâ tamen constitui potest. Nusquam incipere hebdomadem, quis unquam consideravit? Incipere in Circulo, quem Urbanianum appellavi, & per ipsam duxi Romam, novum pariter & magnum est. Ne homines invenirem, mare petii; mare quod ab urbe Roma, quam remotissimum esset, & sic tamen proximè accederem. Nimirum summi Antistitis autoritate opus erat, ut terminum Orientis, Occidentisque homines admitterent, & hinc septem dies numerarent. Si me amas, aut aliquid industriæ meæ tribuis, judicium tuum ad me perscribe; tam liberè quoque, quam te familiarem humanitas tua, præcipuum eruditionis ornamentum, facit.

*Lovanii, in Arce, subito, cum hic  
Tabellarius discederet. ix. Kalen.  
Septemb. c15 15c xxxii.*

Doctissimo filio tuo nuper respondi; si redditæ sunt ex literæ, benè est, & gaudeo.

#### CLIII.

S. P.

ORATIO tua inauguralis, Vir Clar. quam cum literis ante aliquot menses ad me miseras, mihi salivam movit, gratulatusque denuo sum & tibi & gymnasio novello, gnarus utique nihil à tuo ingenio proficisci posse, nisi *ὑπομνήσεως* & cedro dignum. De quo munusculo tibi ingentes ago gratias, dum occasio emergat, rebus meis in tuto collocatis, te remunerandi. Jampridem autem vicem literis tuis reddidissim,

dissem, nisi lentum & anceps negotium, de quo ubertim ad te scripseram, impetum meum sufflaminasset, fidusque homo defuisset, cui Plautum tuum, cujus usura diutina tam propenso studiis meis commodandi affectu mihi concessa me tibi impense obstrinxisti. Donec nunc nuper cum familia mea ad Socerum meum Gerardum Vander Luan intervifendum huc evolavi, ubi commodum mihi obtigit oportunitas per amicum meum D. Plockium, qui in se recepit, se curaturum, ut tibi in coram bona fide testatur. Nihil autem mihi magis in votis erat, quam ut ipse te venerari gratesque agere potuissem. Sed aer inclementior compedes mihi injicit. Utinam ab occupationibus tuis tantillum temporis impetrare posses, ut uno verbo indicium faceres, te illo positum, deque Lycei vestri facie aliquid attexeres, ut liqueret ecquid speculæ relictum esset. Editionem Duficam jam illi jungere promptum non fuit, sed in aliud commodius tempus pace tua rejicere visum est. Ita aeternum valeas, Vir Clar. meque amare pergas, qui te æstimo & colo.

*Dabam Liffæ in  
pradio Soceri xvi.  
Kalend. Octobris  
c1o 16c xxxii.*

*Tuus omni fide & obsequio,*

Eustathius Swartius  
pro tempore Re-  
ctor Scholæ Syl-  
væ-ducenfis.

Officiosam salutem tibi familiæque tuæ  
à socero affinibusque meis subscribo.

#### CLIV.

*Clarissimo V. Ger. Jo. Vossio,  
Erycius Puteanus, S. D.*

**B**Enignè & eleganter, de Circulo meo judicas, Candidissime Virorum, & me obnoxium tibi, tam amicâ Epistola reddis. Equidem tuo subvectus Elogio, triumphare videor: & quia tuum impetravi, nullius jam judicium metuo. Videbis igitur propediem, dissertationem meam: videbis rem nudè nuper propositam, Theoreis suis explicatam. Unum rogo, ut elogii tui verbis, munire mihi inventionis novitatem liceat, & clarissimum nomen tuum usurpare. Verbis inquam, in Epistola tua expressis. O aurum, O gemmæ! sed ad affectum tuum venio, quem satis æstimare non possum. Cupis

enim, & me, & mea in tuto esse, atque etiam meos. Quid igitur dicam? Hoc effice, quæso, ne aut Proceribus, aut Principi ignotus sim. Ea enim studia tracto, quæ cum nemini gravia sint, vestra potissimum debent appellari: quæ cum ab humanitate nomen habeant, nullam hostilitatem agnoscunt. Utinam vero tota belli factio, securâ tandem quiete componatur! Tractari cœptum est, Deus, pacis author adfit, & saluberrima agentibus consilia inspiret! Corputi nomen antiquâ adhuc memoriâ colo. Patrem igitur, & filium à me salutes velim. Sed Grammaticarum Institutionum opus, quantum potes, promove: ut quantum Latina habet Lingua, & Elegantia, industriæ tuæ, & eruditioni debeamus. Mihi nunc à Vossio meo discere, suave erit. Optimum doctissimumque filium tuum Dionysium, & ad famam assurgentem, animo complector: quem hortari quoque audeo, ut cœptam translationem strenuè prosequatur; imò ut in Cæsare illustrando pergat. Cæsar est: & hoc ad laudem satis. Excutiam vero Bibliothecas hic nostras, & manuscripta Exemplaria quæram. In Martiniana, satis celebri, nullum est. Si quod, imo si quæ invenero, ad te mittam. Vale, & me amare perge.

*Lovanii in Arce, Postridie Kal.  
Octobr. c1o 16c xxxii.*

#### CLV.

**L**iteras tuas, Vir Clarissime, vii. Kal. Octob. datas, heri accepi. Primæ illæ à multo tempore, cum jam quintas has tibi mittam intra hoc semestre tantum. Impatenter, qui meus in te est adfectus, Literas abs te expectavi; & ægerrime mihi fuit, neglectam abs te occasionem per Slaglosiensem illum Mercatorem vicinum à duabus leucis, & amicum rescribendi: quæ non nisi semel se toto anno nobis exhibet ideoque jure occupanda erat: præsertim autem cum mittendum aliquid suppellectilis esset. Sed hæc si jam est coempta mitti vere proximo poterit, si Deus volet per eundem, tunc de more rediturum. Proximis meis ne tamdiu Literis tuis, ob latorum incertitudinem, carere cogar, indicavi cui tradere illic debeas, nempe Arnolde Van Gendt, Notario Publico, qui hic Hafniæ filium Mercatorem habet, cum quo egi. Ita



Ita recte posthac curabitur quicquid scribere cupiemus. Ad priores Literas meas addideram Syntagmata *Piræum*, *Reliqua Attica & Familias item Atticas*: ut si nemo suo vellet, meo sumptu ederentur. Maxime avebam scire quidnam illic factum, aut futurum esset: sed tu ne gry quidem indicas. Ignoras desiderium meum, vir amicissime, qui hæc præteris silentio: sed nimirum festinatio nimia in causa fuit, cur id oblivisceris; nam non dubito quin acceperis; quando Literas, quibus huc adjuncta erant, accepisti. Magis alterum me angit; quod nil item nunc significes, an acceperis eas Literas, quas Augusto Mense dedi; & addideram *Regnum Atticum*, sive de *Atheniensium Regibus*, eorumque rebus gestis Libros tres. Certe nolim periisse & nec spero; nam Mercator ille per nautam fidei perspectæ misit: & te accepisse confido: sed hujus quoque mentionem tuam illam festinationem nimiam exclusisse. Quæso proxime fac sciam, & respondendi viâ indicatâ utere. Petieram abs te, ut Joanni Jonsonio traderes, qui ad excudenda mea operam mihi suam obtulit. Hic si cesseret, aut sententiam forte mutet, nam responsum necdum accepi, libenter Gulielmo utar, quem commendas maximopere; verumtamen eâ Lege ut non tantum Danicam Historiam meam, sed & reliquas item lucubrationculas, quas subinde sum missurus, suis typis publicare animum inducat. Id si velit, stat sententia. Quod Historiam autem attinet; verfor nunc in continuatione Saxonis, usque ad Domum Oldenburgicam, à quâ inceperam, perextenda, & non multum (Dei Gratiâ) à fine absûm. Illustris Dominus Cancellarius Regius, etiamsi editâ Pontani Historiâ, operam repetere me istam voluit: quâ finitâ, quæ in domo Oldenburgica inchoavi, etiam deinceps persequar. Quæ pridem edidi de primis tribus Regibus, ea recudi à quouquam nolim, nisi ex meo exemplari, quod hic habeo à me correcto: idque ubi opus erit ad te mittam. Quæ tu nobis à te opera tam præclara polliceris, etiam atque etiam videre opto. Filii tui Dionysii instituto ex animo faveo, & hoc ipso Patris sui filium se esse ostendit, quod per ejus vestigia ad immortale nominis decus viam insistit. Utinam juvare possim; sed nil habeo quod submittam. Ante hos triginta & tres annos cum Curas Plautinas, & una cum illis Animadversiones Miscellas darem, meminî me locum quandam, ipsi Lipsio

desperatam restituere, inspiciat, si opera erit & examinet; ac, si dignum existimabit mei nominis eâ in re meminisse, gratum erit. Locus exstat Animadvers. Miscell. Lib. I. Cap. xiv. Quæ Uxor pro emenda suppellectile meo nomine expenderit, proximis tuis indicate, ut per Mercatorem tibi mox refundam. In Patriæ meæ tot victoriis serio gaudeo, atque Deum supplex quæso venerorque ut constantem ei esse hanc felicitatem velit. Eundem rogo, ut te tuosque omnes diutissime porro servet: estque id omnium nostrum votum. Resalutant te Landenbergius & Stephanus, qui expectat avidissime quæ promittes per Mullenium.

Soræ ad Diem  
iii. Novembris  
C10 Ioc XXXII.

Tuus constantissime,

Joannes Meursius.

Defectum in Solone meo proximè mittam, nam petendum Hafniæ exemplar erit.

# CLVII.

Optimo & Clarissimo V. Ger. Jo. Vossio,  
Erycius Puteanus, S. D.

NOS pergamus inter nos amare, O delictum meum, & plures erunt, qui suo affectu, utrumque complectentur. Doctissimo illi Amplissimoque Simoni Beaumontio, placere imprimis cupio. Adibo virum, & Literis meis, & ut munusculum simul adferam, Circulo. Tu facies, ut illæ gratæ sint: hic etiam quia aliquid à novitate pretii sumit, æstimate. Conor certe hoc nunc argumentum plenius illustrare; hanc maximè ob causam, ut Encomium, quod benignissime perscripsisti, aliquo modo mereri videar. Circa Manuscriptos nihil adhuc effeci. Qui prompti esse poterant, & bonæ erant notæ, ab Amplissimo V. Joanne Woverio collecti, & in Hispaniam ad Comitum Olivaresium, nuperrimè missi sunt. Mireris hos nunc etiam Thesauros, à tam Potentibus instrui; negligi viros, qui quomodò iis sit utendum Thesauris soli intelligunt. Italiâ animosior, quæ Belgas quærit, ut Cathedræ loquantur. Ecce te occupare audeo, ut expertissimum, Fortunatum Plempium, Medicinæ Doctorem, Civem urbis vestræ, nomine meo, imo Cardinalis Bentivoli, Antistitis

Antistitis incomparabilis interpelles. Si conditio placet, primo loco docere Medicinam Bononiæ poterit; conditionem autem ex adjunctis his Bentivoli, ad amicum meum Chrysogonum Flacchium Literis intelliget. Tuâ utor Operâ, quia Plempium non novi, facies autem, ut per hunc Tabellarium, mentem Plempii intelligam. Hoc rogo, & ut amare me pergas. Vale optime, Clarissimeque Vir, & suavissimam Conjugem, Liberosque à me, mea, meis, saluta.

Lovani, in Arce, quam urinam aliquando videas! Postr. Eid. Novemb. clō lōc xxxii.

## CLVIII.

Clarissimo, Doctissimoque Viro Domino Gerardo Joanni Vossio.

Clarissime, Doctissimeque Vir.

**L**icet summâ in expectatione, hætenus mihi fuerint Literæ tuæ, quibus nihil antiquius, nihilque jucundius ducō; gratissima tamen contigit peramica salutatio, quâ me nuper in Epistolâ, ad communem amicum nostrum Meursium scriptâ dignatus es. Unde advertere potui, te nondum omnem Stephanii tui memoriam abjecisse, sed vivere adhuc in pectore tuo, igniculum quemdam propensi erga me affectus, qui tunc temporis, quum Athenæ Belgicæ studiorum causâ, me detinerent, luculentis subinde indiciis, enitescere cœpit. Meum certe animum aeterno amoris mancipio devinctum tibi habebis, dum animâ spirabo meâ. Vitam Wilhelmi Abbatis quod attinet, velim eam, quam primum fuerit occasio, describendam cures. Multum enim inservire mihi poterit, in contexendis Prolegomenis quæ novæ Saxonis mei editioni, præfigere animus est. Et siquid penes te fiet præterea, quo institutum meum juvare liceat, impensè peto, ne eo me fraudari patiaris. Nam per quos profecerim, olim ingenuè confitebor. Dionysio tuo meliorem, ut comperi, vitam debebunt prope diem Commentarii Cæsaris. Deus conatus ipsius secundet! Primam commentariorum Linguae Latinae partem, quâ etiam Remp. Literariam, beare constituisti, mecum ut data occasione communices, peramanter rogo. Paria facturum me spondeo, ubi aliquem paupertini ingenii foetum, dias in luminis oras procudere,

majus mihi otium concefferit. Benè Vale, Belgii decus, & dimidium animæ meæ.

Sora ad diem iv.  
Nov. Vet. Calend.  
clō lōc xxxii.

T. omni affectu,

& officio.

Stephanus Johannis Stephanius.

## CLIX.

Viro Incomparabili Gerardo Johanni Vossio, S. P. D.

**N**ihil magis studeo, Celeberrime Vossi, quàm gratias florentissimorum hominum colligere. Inter quos cum te semper eximium habuisssem, & essem admiratus; sæpè mihi admota est voluntas, coram noscendi, & vultum, & virtutes tuas, quæ te jam pridem totius Orbis oculis exposuerunt. Sed dum hæreo inter cupiditatem pudoremque; dum molliora semper tempora aucupor, & exspecto, jam sesquiannus abiit, ex quo & compellare te desideravi semper, & nunquam ausus sum. Intereram, quoties Amstelodami fui, doctissimis prælectionibus tuis, eo quidem animo, ut cum abeunte congregarer, sed reipso expertus sum, verissimè dictum à Pallade Homérica.

—Θαυμάσιον δ' αὖτ' ἐν πᾶσι ἀμνησθὲν  
ἔργῳσι παλαιοῖσι καὶ τοῖς ἀλλοδαποῖς ἴσθαι.

Nuper admodum pulcherrimæ occasione, quasi in sinum delatæ, ipse defui. Cum enim Amstelodami, apud virum præclarum, & tibi, ut tum cognovi, familiarissimum Johannem Vikewort diverter; sponse ille, ut est humanitatis, & candoris summus, promisit prostridie, me adsumpto, te domi tuæ videre. Verum ipse, mihi ut dixi defui; non enim res me alicujus temporis moram tunc quidem patiebantur. Nunc tandem per literas, (quæ ita pudibundæ esse solent, ut tamen frontem licentius exuant) id tandem tentandi confidentiam sumpsi, cui toties nimis molesta mihi verecundia mea intercessit. Quia tamen ne nunc quidem misissem, nisi insigni humanitate Domini Vikewortii fretus; cum hunc hominem adolescentem quidem, & nulla admodum nota commendabilem; tamen tibi traditurum mihi promississem. Cæterum, ut vel navo aliquo, me cognosceres, orationem à me Nupercumali, quo plausu recitatam ad te mitto:

mitto. Quam tamen ut cederem, ego initio infra fiduciam meam posui, nisi fuisset virorum clarissimorum hortationibus impulsus: Quos ut fortasse consilii sui nondum pigeat, me tamen jam obsequii pœnitet. Sed ea ætas est, ut & commendari, & proficere queam; à te, vir maxime, summopere contendo, ut permittas mihi, insignes virtutes tuas admirari, quas intelligere nondum possum. Inter eos autem, quos favore, & amicitia dignaris, ut me colloques, si non preces meæ, at tua singularis, & toties mihi deprædicata humanitas suavissimique mores, à te imptabunt. Felicitissime Vale.

Norvici iix. Cal.  
Novembr. anno  
c1o 10c xxxii.

Excellentiæ tuæ

dicatissimus,

Vincentius Fabricius.

# CLX.

Clarissimo Viro D. Gerardo Joannidæ  
Vossio, Collegii Amstelodamensis Pro-  
fessori primario, S. P.

**T**ardiusculè præsto, quod promisi, vir clarissime; tenuit enim opinio-  
ne me mea diutius patria, quam transivi,  
& in ea, partim cognati, partim amici.  
Nunc tandem tibi mitto libros, quos de-  
signaveras, uno excepto, qui ad manum  
non erat. Tacerem de illorum pretio,  
(nec enim id parvi pendimus, quod vir  
tantus ista excutere dignaris) nisi tu pro  
tua modestia, cui gravis esse non debeo,  
aliter fieri iussisses. Hamburgi

\* Hugonem  
Grotium.

\* Τὸν υἱόν aliquoties conve-  
ni, nunquam antehac mihi  
visum, sed vidisse juvat, & in  
perpetuum juvabit, in quo verissimum de-  
prehendi, quod vulgo dici solet, omen  
nomini convenire. Utinam tandem &  
par fortuna meritis ejus responderet! Spe-  
rare juvat, uxorem ejus, quæ me præsen-  
te, in patriam reversa est, amicorum con-  
silio, atque ope, quippiam molituram,  
virtute sua dignum, ut quæ marito pri-  
mum libertatis, eadem illi tandem, & pa-  
triæ recuperandæ, sit dux atque ministra.  
Nos novum hic Deo providente Regem  
naçti Uladisslaum, defuncti primogeni-  
tum, secunda quaque auguramur. Te-  
nuit aliquandiu suspensam electionem al-  
tercatio, de pace inter diffidentes, de Re-  
ligione Regum sacramento firmari solita,

à qua Pontificii nonnullos, qui de Trini-  
tate sacra, minus rectè sentiant, exclusos  
volebant: sed audio veteri consuetudini,  
pleraque relicta, quadam etiam futuri  
Regis judicio, de quo bene speramus, sub-  
missa. Vale, vir clarissime, & mihi fa-  
vere perge.

Tuæ dignitatis

Dab. Dantisci A.D.  
iii. Cal. Oct. an. æræ  
vulg. c1o 10c xxxii.

studiofissimus,

Martinus Ruarus.

# CLXI.

Salutem in Christo.

**J**unius vester, nostræque, vos & nati-  
vum solum repetit. Causa itineris est  
Comes Arundelianus, cui jam feliciter  
servit. Comes ille non genere clarior  
quam virtutibus, Legatus Regius ad Soro-  
rem Reginam Bohemiæ, ad vos profi-  
ciscitur: tum ut ei solatio sit graviter  
amissum maritum dolenti: tum ut eam,  
si ita Deo & Reginæ visum fuerit, in An-  
gliam reducat. Hinc occasionem avidè  
arripiens Junius, me gaudio perfusus adit,  
& vos, desiderio prius quam ulnis ample-  
ctitur. Quæris ergo, cur Junius sine Lite-  
ris meis? Certè non est quod nihil ha-  
beam quod scribam, scribo enim (ut vi-  
des) etsi nihil: sed non infcio Junio aliis  
manibus Literas meas credidi, ut Juvenis  
hic, præclaræ certè indolis, qualem qualem  
occasionem habeat te videndi, & meo no-  
mine salutandi. Filius autem est, & natu-  
quidem maximus honoratissimi D. D.  
Francisci Windebanck, Regiæ Majestatis  
nuper Secretarii, & à Consiliis: viri ut  
alias dignissimi, ita mihi per annos trigin-  
ta & amplius amicissimi. Juvenem hunc  
eo amore quo amicos beare soles profe-  
quere, & omnia quæ nunc petenda sunt  
perfecisti. Velim etiam ut Junio gratias  
agas, quod hic amici mei filius ei curæ sit.  
Quod nec multis, nec sapius scribo, ne-  
gotia mea in causa sunt, non animus.  
Baronium tamen etiam nunc inculco, &  
scis quid magnopere velim. Hoc etiam  
habe: me omnia fecisse, & facturum,  
quæ Grotio nostro dignissimo, aut ho-  
nori sunt, aut usui esse possunt. Reliqua  
Dei sunt. Vale, & quoties Deum ado-  
ras pro me ores: sum enim

Lond. De-  
cembr. 26.  
1632.

Tibi in Christo amicissimus,

P

Guil. Lond.  
CLXII.



## CLXII.

Clarissimo Viro D. Gerardo Vossio,  
Franco Burgerdicius S. P. D.

Nescio quo Literatorum hominum facto fieri solet, clarissime vir, ut magna pars Literarum, quibus absentes amici, inter se colloquuntur, tam negligenter colant; imo penitus deserant, nisi occasio officium illud suadeat, aut necessitas extorqueat. Nec scio quo colore, me culpa eximam, (ne te in locietatem traham) nisi fortè occupationes meas ostendam, quas omnes prætendere solent, cum infimulantur omisso officii; atque ita apud te album calculum merear. Si tamen ista excusatio tibi non satisfacit, delibera, quid de me statuas: nihil autem statues, quod æquo animo non feram, si mihi jus non adimas de te quoque arbitrandi ex Rhadamantis Lege.

\*Εἰνα πάλαι τοι κ' ἔρεξε, δίκην δὲ δῖα γένοιτο.

Sed quid necesse erat, tam sollicitè *περὶ σοῦ*, apud te præsertim, mi Vossi, quem & facilem veniæ esse scio, & ejusdem mecum causæ socium, ut me damnare nequeas, quin teipsum quoque condemnes? quare si me audis, negligentiam hanc uterque remittamus alteri, & deinceps ita vivamus, ut amicitiae fœdus, tot annorum consuetudine firmatum, inter nos non alii scribendi necessitati alligemus, nisi quam vel occasio, vel necessitas postulare videbitur. Ac me quidem primum, ut verum fatear, occasio movit, ad hoc literarum officium, quam tribus verbis exponam. Est hic apud nos Comes Polonus, supra ætatem doctus & prudens. Is ut omnia summa diligentia investigat, quæ ad Reipublicæ spectant gubernationem; ita nuper cum sermo inter nos esset, de re monetaria, & quam illa magna momenta malorum secum trahat in Rempub. si illius ratio non sit bene constituta, quæsit ex me, num quem ego autorem scirem, qui hanc rem, ejusque in Republica bene constituenda rationem exactè tradidisset. Dixi me vidisse apud te, volumen satis grande, in quo varii tractatus continerentur, qui ad rem monetariam pertinerent, sed nomina excidisse mihi, & authorum, & illius, qui volumen istud edidisset. Ideoque rogavit me summopere, ut si molestum esset, illius libri usuram ad exiguum tempus, concedere, non dedignareris titulum saltem ad me mittere; ut ubicumque pos-

set, librum illum investigaret. Ego tam prolixè tuam humanitatem, (nec tamen supra verum) prædicavi, ut speret se librum ipsum visurum; sic tamen ut sibi satisfactum esse judicaturus sit, si titulum solummodo nanciscatur. Tu igitur vide, quo me, & illustrissimum illum Comitem, tibi velis devincire modo; & utrum eligas modum, rogo te obnixè, ut statim verbo respondeas. Non dubito, quin Vinium non ignores, post tam multas, & tam longas deliberationes, in Professorum non ordinem, sed numerum esse adscitum: & jam agitur de vocando D. Altingio, nec dubito, quin res processura sit, si ille modo velit spem Heidelbergam redeundi deponere, seseque Academiæ obstringere. Intellexi opus Grammaticum, jam cudi, quod diu promisisti: ego sanè illud avidè expecto, & avidius etiam lustrabo, cum erit editum. Fac quæso sciam quousque operæ processère, atque tulerim bene. Cum totâ familiâ Vale.

## CLXIII.

Viro Clarissimo Vossio.

Reverende Vir, ac mihi plurimum Honorande,

EN tandem Literas, ne qui per annum oblitus tui meique fuerim per avum esse videar. Gratas igitur tibi reddo maximas, vir ornatissime, pro humanissimo illo hospitio tuo (quo me cohonestasse te dicam an beasse potius) Amstelodami cum essem. Equidem quoties me in ædibus D. Vossii pernoctasse, recogitat mihi animus, superbit illico. Sed & vota fundo Deo optimo maximo ut in inceptis nuper studiis tuis, Ecclesiæque paci ac commodo destinatis, feliciter & ex tuo & tuorum animo succedant omnia. Perge, vir optime, & in Ecclesiæ bonum nate, & à Deo nutrite, donisque divinis in structe, illudque pro viribus agas indies, quod nomen tuum ad omnem deinceps ætatem, imo & æternitatem deferat. Certe qui apud omnes Theologiæ & Literarum purioris antiquiorisque studiosos magni jam nominis meritissimo es, majoris ita es futurus. Atque apud tui amantes maxime & honorantes, inter quos sunt viri & munere & merito ipsi honoratissimi, nihil gratius agi posse credo, quam ut è plerisque incognita illa Ecclesiæ primitivæ tempora morèque quasi *ἐν πύγῃ* describas. At cave sis quid agas. Astat acer Adversarius,

sarius, Damporus nomine, nuper Londinensis Minister, jam (si Dis placet) Amstelodamenfis futurus. Is multos ante hinc annos Historiæ Pelagianæ tuæ confutationem minitatus est, eamque in margine jam castigasse palam est professus. Quod si Historiam primitivorum temporum contexeris, disciplinæque nostræ (utpote simillimæ) fautor sis, nonne vapulabis à fugitivo. Quin & Tertiam da (vir inclyte) Manichæanam scilicet, qua constet se sui que similes pari cum errore insanire; sine vitio tamen, quia fato ad omnia acti. Jocari lubet cum venerabili viro. Nam, qui illum Manem, habet pro adversario. Vin' à me Historiam Dampordianam, aut Characterem potius? Brevi expediam. Maximo in pretio habitus est apud suos, & in urbe, & in orbe Britannico (Puritanos dicimus) in rebus fidei, consilii, facti, temporalibus, spiritualibus, singula verba, oracula; consilia, præcepta; facta exempla sunt; Judex consiliarius (imo &) confessarius, unicus Damporus est. Papam credas alterum, Semi-Deum, Deum. At apud sanioris cerebri homines, longè audit alius. Vir superbus magis quam doctus, novitatis avidus. In Theologia (gradum licet Baccalaureatus suffragatus sit) lippus planè & cæcus. En specimen! Is est qui in pulcherrima (Deique favore) florentissima Ecclesia Anglicana, nil videt præter navos & noxas. Det Deus illi locisque sanam mentem, & à reprobâ fervet, quæ est *ἀπολογιστικὴ* (Christianus oro.) Tibi (Vir ornatissime) vitam largiatur felicem ac longævam, ut diu sospes superstesque sis ad Dei gloriam, Ecclesiæ pacem, tuique & tuorum decus & solamen. Ita apprecatur & ex animo vovet,

Ex ædibus meis prope  
Templum Sancti Michaelis  
Corubæ Lond.  
Januarii 2. 1633.

Reverentiæ vestræ

honestissime cupiens,

Guiliel. Brough.

## CLXIV.

Clarissimo, & amicissimo Viro Ger.  
Jo. Vossio, E. Puteanus S. P.

Virorum Optime, & Doctissime,

CHryfogonum igitur nostrum suspensum tenebo, donec de Cathedra Lovaniensi serenissima Princeps pronuntiet. Ea tamen, quantum rescire potui,

in Medicum quemdam Bredanum, videtur inclinare, à Magnis hic plerisque commendatum. Eventum expectabimus. Interea, ut affectum meum, studia, & obsequia omnia, Clarissimo Plempio offeras, rogo: quod nomen mihi in Cornelio (nescio an superstite) æstimatum. De quatuor principis diei, Theoresin nunc istam ad te mitto. Si judicabis oculis amplissimi, præstantissimique Beaumontii, dignam esse, fac ut Exemplar ex his unum habeat: unum Clarissimus Plempius. Adjunge & quartum, ut per eorum ambulet manus, qui curiosi, & periti sunt. Quæstio vero orta est, utri lucrari, utri amittere diem videantur, qui cum sole, an adversus solem, iter orbis terrarum conficiunt; qui recedunt in tempore, an procedunt. Tibi quid videtur? Ego lucrum Navigationi in Occidentem adscripsi. Vale, & me ama.

Lovanii in Arce, xviii. Kal.

Februar. 1633. ICS XXXIII.

Tuos omnes salvere jubeo.

## CLXV.

Domino Gerardo Joh. Vossio

Τῷ πάλῳ, Ἐυπερίτῳ.

QUamvis non fugiat me, V. C. quantum peccent in publica commoda, qui tuis occupationibus interestrepunt, non potui tamen, cum D. Mylius, ad vos irer, & verbo, & literis, te non salutare. Imprimis cum hac occasione, videndam tibi offerre possem, quæstionem Epistolicam, de vitæ humanæ termino; de quo utinam etiam tuum judicium, habere potuissem; vel edendum cum aliis, vel inter *κειμήλια* literaria adhuc servandum. Video divinæ sapientiæ Consultos, satis sudare, antequam recondita ista planè operiant, & abstrusam in profundo veritatem eruant. Fortasse hic videri possit, *ὡς τὸν αἰῶνα, ὅς τις εἰσέλκει καὶ ἄλλος*. Diverse de termino isto, & *ὅς τις διὰ πάντων* discordantes sententiæ, ac singulis suæ rationes, etiam *ἐκ τῶν ἁλίων διδασκάλων ὁ μαρτυρεῖται* adducitur. Xenophanes apud Varronem dicebat, Hominis est opinari, Dei scire. Annon idem hic usurpare liceat? Ut tu, V. C. pro recondita, & incomparabili eruditione, judicium ferres, visum hac Clarissimo nomini tuo inscribere: & ut simul aliquod animi, grati, &

memoris, in te publicè extaret monumentum. Utinam quale debere me sentio, præstare possem. Non tu me, ut Senecæ his utar, in grege Discipulorum habuisti, sed dignum putasti propria, & peculiari cura, ingeniumque latens, & pigrum, injecta manu extraxisti, omniaque benigne adeo in me transfudisti, ut ingrattissimus essem, nisi te inter gratissimas necessitudines diligerem; imo velut alterum parentem amarem, colerem, & omni observantia, aternum profèquerer. Vale, Mi Doctor, & meritis tuis obstrictum amare perge

Raptim 2. Vossianæ Discipl. Alumnum,  
April. 1633.

Joh. Beverwyckium.

Salveant cum matre filii, è quibus Dionysio gratias habeo, pro Heroico Heroe nostro digno, referam nuper,  
Ἀλλὰ χρεῖται.

#### CLXVI.

**P**AUCIS ad te scribere cogor, Vir amicissime, quia & hic nuntius inexpectatò sese obtulit, & festinat: parum tamen, quàm omnino nihil, ad te dare malui. De Blavio tuo, quod conjunctim Opera mea edere cuncta constituerit, gratum fuit intelligere; & ut virum in proposito hoc confirmes, in majorem modum rogo. Optarem autem excudi ea charactere elegantis, & quo fere hætenus illa sunt excusa à Typographis prioribus. Optimè certè meritum de te me esse existimabo, si in curam hanc incumbere non gravaberis. Quæris quonam ea modo atque ordine digeri & edi velim; qua de re nunc hoc habeto. Puto lucubrationes meas omnes dividi posse in Tomos IV. quorum unus continebit mea Attica, uti nunc digesta mitto; alter opera historica, tertius Miscella, quartus Auctores à me primum in lucem editos, atque Notis illustratos, & alios in quos Notas itidem aut Commentarios publicavi. Singuli verò Tomi isti, quo emptori paulo magis commendare sese queant, novo etiam opere aliquo pluribusve augebuntur: tum & singula opuscula emendata & auctiora multo erunt. Initium autem fieri ab Atticis velim. De Regibus Atheniensium, quæso, aurem homini vellito, & urgeto editionem: sed de Piræo meo, Reliquiis Atticis,

& Familiæ, quid futurum est? Miror de his nullam omnino abs te mentionem fieri. Quæso proximis significa. Mitto primum folium Solonis mei, quod scribebas periisse. Tua quæ edis maxime videre aveo. Per hunc rescribe; nam non semper tales se occasiones nobis offerunt: certe tradet quicquid dederis. Uxor mea cum gravissimo ac periculoso quoque morbo diu est conflata, jam undecimam septimanam, nunc paulatim (Dei gratiâ) convalescit; ac speramus bona omnia. Salutem tibi atque tuæ plurimam dicit: ita & ego liberique, tibi, tuæ, & tuis omnibus, filia imprimis filia.

Scribebam Raptim Soræ ad diem x. Aprilis,  
Clō Idc xxxiii.

Tuus prisca Fide,

Joan. Meursius.

Quæ jam edidi, quia apud te exstare ea arbitror, ut Typographo recudenda subministres, abs te peto; quæ non edidi, mox submittam: ut & ea, quæ in singulis addidi, aut emendavi. De dedicatione postea cogitabo, cum tempus erit.

#### CLXVII.

Clarissimo, Humanissimoque Viro Ger.  
Jo. Vossio, Erycius Putcanus S. D.

**E**T Suadam & Musam Doctissimi filii tui admirati sumus. Sed ostendit ille ingenii dotibus, qualem Patrem habeat, & quid sit etiam inter doctos excellere. Jam in Patre filium, in filio Patrem amo, & me utrique ob missum munus, novo nexu obstrictum scribo. Etiam pignus vultis? has nunc urbaniani Circuli vindicias, capite, perlegite, censete. Vestras, singulari ratione; quia nomen Vossii, & judicium habent. Nautæ vestri quid omnino de Principio *ῥυχνημύς*, & linea principii statuunt, scire cupio. Sed quia per Occidentem, aperto illo novo freto Lemairio, in Orientis Insulas navigatur, & alium in Moluccis Insulis diem Batavi inveniunt; opportunè circulo nostro utentur: non enim illud Homeri audient.

Ἡ δὲ ξείνη πῆρες ἐστὶ πόντος καὶ ὕψηλός ἐστι;

Quæ reliqua hujus argumenti sunt, propediem producam. Vale, Vir Clarissime, & amicissime, & cum tuis salve.

Lovanii in Arce, Nonis Aprilis Clō Idc xxxiii.

Subito cum Tabellarius abiret.

CLXVIII.



## CLXVIII.

Excellentissime Vir,

**E**si me eorum de grege esse profiteor, qui facilius ferunt suam in curriculo scribendi Literarum reprehendi segnitem, quàm intempestivam crebritatem accusari: tamen hoc sub temporis articulo, vel amici cuiusdam mei atque illius quidem tam veteris quàm cari postulatione huc impellor, vel tuâ humanitate invitator: cujus ego dum ero, memor ero. Degit jam pridem in hac Urbe Wolfgangus Bacherus, Vir tanto magis mihi honorandus, quanto dignius, dum hæc Germaniæ diluvies Bellica sinebat, aut aliquam ibi religionis *εὐδοκίαν* ferre poterant Pontificii in superiore Palatinatu septendecim *ἐκκλησιαστικῶν* inspectorem esse concionator gessit. Filium autem habet Josephum nomine annos ipsos triginta natum, quem adolescentulum non aliis modò, sed mihi quoque nominatim in Pædagogo Ambergensi erudiendum, ut potuit, diligentissimè tradidit. Cujus me Discipuli adeo non pœnitet, ut sæpe mirer quomodo cum paucis aliis animum contra licentiæ bellicæ cœnum atque labem tenere rectum, & tam evidenter demonstrare potuerit mentem solidè bonam, ne pessimis quidem sollicitare exemplis solere. Expulsus igitur Patria statim invenit hospitium Francofurti ad Viadrum apud Franciscum Omichium, primum illum Electoris Brandeburgici Medicum, cujus cum filios domi cum cura & fide institueret, facillimè obtinuit ut in Academicis Principis alumnis numeraretur. Exinde & Angliam visere, Serenissimi Bohemiæ Regis commendatione, potuit, & reversus, quadriennium totum vixit cum Rumpfo, medico celeberrimo; denique in Gallia triennium jam commoratus, partim in Briegensium Silesiæ Principum contubernio, partim in Marchionis Forciani familia hæsit. Quibus omnibus in locis & suam abundè præstitit ingenuitatem, & Medicinæ peritiam variis curandis ægrotis mirificè auxit, & morum decas tot præstantissimorum hominum usu & convictu ita cumulavit, ut Palatinatus, si quando recludatur, vix carere eo possit. Interea quoniam nihil vehementius cupit quam ut in aliqua Italiæ Academia Medicinæ studium, cui præcipuè fuit deditus,

perpolire contingat, Patrem optimum frequentibus monet literis, omnes eo perveniendi occasiones circumspiciat. Is igitur quod reputasset, quantum vestra in urbe sit opportunitatum ejusmodi, si quis despiciat; quanta item tua sit & bene meriti & optime merituri autoritas, te & meis literis & mecum impensè rogat, ut si quis forte isthic illas proficisci in terras cum aliquo studiorum moderatore cupiat, filii sui mentionem facias, eundemque adeo dignum judices, cui talem conditionem tuto conciliare possis. Mihi sic nota est Juvenis istius summa & pietas & probitas, ut cum nos tres tanto beneficio tibi sis devincturus, tamen confidam eum non minus tibi esse debitum, qui Josephi opera uti volet. Tu, Vir amplissime, gratum parenti sollicito feceris, si significaris, quid hac in re sit sperandum. Jam ut ad me veniam, nonne tibi tandem stomacho esse incipit mea ista *ὑπαγυμνία*? Equidem in re familiari, dum necessarios emò libros & alia quædam, nihil nisi *πενυρία*. Ex alia parte, invidentiæ rictum, quem ipse muneris Academici susceptione distendi, meo labore vel claudere studeo vel mitigare. Præterea nuper aggressus sum Apollonium *Ἀρροῦαντιῶν* Poetam, idq; cum secundissimo Amplissimi Domini Heinsii judicio. Est illius interpretatio Latina Hartungi, quam Notis uberioribus & nova substituta versione emendo. Quid sim emoliturus, Deo est compertum magis quam mihi. Si manuscripti mihi codices, si antiquissimi dentur libri animus mihi crescat. Sed plura de his & aliis alibi. Vale, Vir excellentissime.

Lugd. Bat. 22. Maii Excell. & Amplit. tuæ  
Anno 1633.

Observantissimus.

Jeremias Hoelzlin.

## CLXIX.

Dionysio, magni Vossii filio, S. P.

Mi Dionysi,

**Q**UÆ mihi cum Parente tuo & unâ tecum intercessit familiaritas, ea ut ex animo meo deleatur, nunquam permittam; sed suavissimæ istius consuetudinis assidue memor, vestram amicitiam, semper colam, & ambibo. Idq; meritò, quod hac ratione,

ratione, nonnisi vestro in me animo, responsurus sim: cujus & nuper indicium ostendisti, quum licet necessariis curis implicatus, committere voluisti, ut me non compellato discederes; sed iteratò, nec sine munere, veterem amicum salutasti: inter varios sermones, ultrò citròque habitos, cum eorum mentio incideret, quæ sub prelo habebam; ubi parata essent, transmissurum spondebam. Ut fidem liberem, ecce vobis utrumq; mitto scriptum. Vos estis, qui de huiusmodi solidè judicare possitis: nam pleraque, vel linguas spectant, vel historias orientales, vel denique Theologiam. Quid vel Pater tuus, vel ipse de istis censeas, intelligere volupe erit; modo hac in parte eam *maximè* experiar, quam antehac in Parente tuo observavi. In dissertatione ad Lectorem Benjamin præmissa parum dubito, quin vestrum assensum obtenturus sim: sed magis dubito, de discursu, Danieli præmisso, ubi nonnulla, in quibus, à virorum doctorum auctoritate discedo; non ita tamen, quin id non sine ratione à me factum credam. In Medorum regno, & septuaginta hebdomadibus Danielis, præcipua discrepantia. Verum cum in iis nonnulla incerta sint, cum minori crimine, ab aliorum opinionibus discedi posse autumo. Sed de istis vos videritis. Parentes tuos cum fratribus tuis, quam officiosissimè meis verbis salutes velim. Vale, mi Dionysi, & diu vive Reip. meque ut soles redama, qui semper

Lugd. Bat. Nov.  
Mail. An. 1633.  
exacta saluti.

Tuus ero,

Const. L'Empereur.

### CLXX.

*Viro magno & perillustri D. D. Gerardo Vossio apud Amstelodamenses Historiarum & humanioris Literaturæ Professori, S.*

**H**ÆC Apologetica, Vir Magne, tibi debentur, quia ab eo profecta sunt quem tu jam potes tuo tibi jure vindicare: tum ea est ingenii tui vis, ut totam eam rem, quæ de agitur, nemo penitus introspexerit, aut de ea sententiam ferre possit æquior: præterea est auctoritas ea nominis tui, ut vel sola afferre possit, si minus assentiendi necessitatem, saltem dissentendi pudorem: Peto, Vir Clarissime, sententiam de ea re tuam, imo experto

animo suspensò & trementi: possum fortasse iniquus videri, qui velim aliquid de tuis temporibus & aliorum commodis derivare, ac mihi subducere: sed tu feres eum qui ducitur studio augendæ rei suæ Literariæ, quam agnoscit esse tenuem; & perges in eum esse liberalis, qui hac ipsa in virtute te quandoque imitabitur, & quod à te acceperit alteri tradet; imo eo quoque pacto (improbè dicam) tueberis tua beneficia. Cupido recte (quid ni enim verum fateor præsertim apud te) cupido inquam ita mihi blandior honesta me habet, ornandi ingenii & ea comparandi, quæ ad alios olim possint cum aliquo fructu dimanare. Nosti cui me voto addixerim rei: nempe in qua maximus & honestissimus eloquentiæ locus est: in quâ me non inficior aliquid per te profecisse: submisi enim me tibi, tuisque præceptis patientem aurem accommodavi: plura indies habiturus incrementa ubi ea melius concoxerim: vel paucula, Vir Magne, semina à te peto, unica pagella etiam dimidia contentus esse possum, imo & gloriari. Per illum candorem animi tui quem diligo, & quo, ex quo te vidi, splendidiori luci mihi videor: Per eam eruditionem quam suspicio ac veneror oro te, orat inquam te Prætor verè tuus, ut eorum eum moneas quæ in hac scriptiuncula desiderantur: desiderantur autem plurima. Agam tecum tuo genio, id est liberrimo, & maxime liberali: apage laudem, reprehensionem volo: enimvero si mea probentur tantum, mea tantum mihi manent: si reprehendor à te, præsertim fugient mala in quæ incideram; accedent bona quæ non eram affecutus: ego autem non ita mihi placeo, ut possim quasitis & præsentibus acquiescere. Caterum V. C. mihi si reditur, quo ego non possum me autore, plurimi convolabunt & oraculum consulent Amstelodamicum: Sin minus, ego rectè digitum ad fontem intendendo, defunctus ero eo officio quod iis debeo qui de me sunt optimè meriti: Diebus adhuc 15. Deus uti reor, hinc deducet tibi plurima debentem, & omnia felicia comprecantem,

Lugd. Bat. 1633.  
Junii 18.

P. Prætorem.

Salmasius te salutatur, atque uti par est, magni facit, eum inveni puerperam habentem & auctum prole. Dubito an Rhetorica ad Alexandrum sit Aristotelis: quia laxior stylus videtur repugnare.

## CLXXI.

Clarissimo Virorum, Gerharδο Joanni  
Vossio, salutem & observantiam.

**E**T incomparabilis eruditio tua, Gerharde Vossii, nomen omni titulo majus, & incredibilis humanitas, quam Balthazar Willius, Theol. Doctor, & Bernhardus Damke, cognatus meus, cum Francofordiæ in me inciderent, prædicare ad fatietatem se mihi posse desperant; ita in tui me admirationem pellexerunt, ut velut extra me positus, & adolescentis insuper habens pudorem, istas ad te exararem, & utramque illam tentare aggrederer. Audax facinus, fateor; sed nec infrequens iis qui literas amant, & bonam mentem; nec grave erit tibi, postquam tam arduam famæ arcem ascendere virtute tua dignum existimasti, propius à me cognosci, ut ista in te adorari dignius possit. Exspecto itaq; de uno, atque altero, Augustini, in lib. de Civitate Dei, loco, & meis emendatiunculis, severum & forte iudicium tuum, quo hæc obelo transfigi merebuntur, excusabiles tamen conatum meum comitas tua; & si hac non potero, alia via, ut expediam, mihi concede, salvo quem ambio unice, favore tuo. Lib. II. Cap. XX: *Die, noctuq; ludatur, bibatur, vomatur, diffluatur, saltationes undique concrepent; Theatra inonestæ lætitiæ vocibus, atque omni genere, sive crudelissime, sive turpissime voluptatis exæstuent.* Cod. unus Lud. Vivis, *Salutationes*, alter *Salutiones*, abrado a. Itaque prius ille videtur probare. Sed membr. MSS. quas inspexi in Bibliotheca Senatus Norici, *Saltationibus*. Ergo scribendum, *Bibatur, vomatur, diffluatur saltationibus; undique concrepent theatra inonestæ l. v. & diffuere saltationibus*, ut Apuleio, *saltatio exossa, & enervis*. Plinius Paneg. c. XXXIII. *Visum est spectaculum inde non enerve, nec fluxum, nec quod animos hominum molliret, & frangeret.* Cap. XXI. *Omnino nullam esse Rempublicam: quoniam non esset res populi, cum tyrannus eam factione capesseret, nec ipse populus, jam populus esset, si esset injustus.* Ita omnes editiones, quas vidi, Batiliensis, Genevensis, & optima omnium Parisiensis. Sed nihil puto certius, quam scribendum, *cum Tyrannus eam factiove capesseret*. Nam factio opponitur Aristocratiæ, ut Tyrannis Monarchiæ, ut patet ex præcedentibus. In Cap. XXX. Observavi plaustrum errorum doctissimi Vivis, quod etiam in omnibus editionibus repetitur. Ita Augustinus: *Illic*

*enim tibi non Vestalis focus, non lapis Capitolinus, sed Deus unus, & verus, qui nec metat rerum, nec tempora ponet, imperium sine fine dabit. Msc. ignorat ed qui. Deinde Vives ad verba, Lapis Cap.] Jovis simulacrum in Capitolio erat lapideum; hinc per Jovem lapidem sanctissimum Romanis iusjurandum, ut etiam in proverbium cesserit. Atqui nec per Jovem Lapidem jurabant Romani; sed Jovem Lapidem, & erroris dudum convictus Apulei locus, quo istud videtur probari: nec iusjurandum illud à Jove lapideo ortum, sed à formula quæ pronunciabatur ad projectum lapidem: nec Augustinus Jovem lapideum, sed Terminum intelligit, cujus pertinacia erat symbolum perennaturi Imperii; sed ego cesso poma ad Alcino-um mittere. Tu, vir maxime, quamprimum responso tuo, me dignare, ut plausum ingenii mei sciam, nec dubita an sim, quod sum, & spondeo nunquam non futurum. Salve & optimo publico optime vale, cum tuis.*

*Ampliss. famæ tuæ*

Brem. ad Visurgin,  
prid. Non. Junias. An.  
c10 Idc XXXIII.

*cultor devotissimus.*

Johan. Fredericus Gronovius.

## CLXXII.

Clarissimo & incomparabili Viro D. G. J.  
Vossio, S. P. D. Joh. Beverwyckius.

**L**iteras tuas merum nostri amorem spirantes legi, summa cum voluptate: Pro innumeris tuis in me beneficiis, nunquam satis gratus esse queam, quod serio magis opere, aliquando testatum faciam. Meminit tui in vita sua, Cl. Rutgersius, ac ejus temporis quo sub disciplina tua vixit, non sine gratissima tanti præceptoris memoria, sæpe ac libenter recordari solere scribit. Tuæ etiam institutioni, acceptos referens quoscumque postea ei Aula honores dedit. Ego licet nec dignitate, nec eruditione, sim cum hoc Heroe conferendus, quicquid tamen obtinemus, quod aliis non omnino displicere possit, tibi me debere, ut merito ita lubens profiteor. Et mecum omnes disciplinæ tuæ alumni, qui vel ipsi aliquam eruditionem consequuti, vel eruditionem saltem, & virtutem reverentur: Reliqui non æstimandi unius assis, & calumniæ poena digni. De Cl. Puteano quod scribis, valde me percussit, quamvis tale quid metuerem, cum legissem stateram, docte



doctè magis, quam prudenter scriptam. Accepi ab eo literas, statim jam edita, quam tamen præter morem suum non misit. Eam Catzius Haga (ubi impressam quoque nosti, nec hoc nostro melius) ex conventu ordinum, ubi cum plausu excepta, attulit, & mihi legendam tradidit. Deus bone! quàm bonus ille Belga, tam malus Politicus. Non hic ferremus, qui talia de nobis, quæ ille de Rege, de importuna Archid. legatione, & similia. Ac nisi amici omnia pro illo, est quod metumamus vicem optimi, & elegantissimi ingenii. Vocatus est Bruxellas, bis in concilio privato auditus, & ibi manere iussus, sæpius audiendus. Hoc totum est, quod huc Bruxellis scriptum esse, heri mihi retulit H. Oemius, qui Pastor Dordrechtanus, apud suos audit, sed ob amicos quos plurimos habet, nihil illi periculi fore putabat. Sibi addictissimum habet, Varambonum Archiepiscopum Casariensem Infanti à sacris, Chiffletium Medicum, qui plurimum apud Ser. Inf. possunt, & alios, sed infestum Rosam Præsidem Hispanis obnoxium, & paci ut dicitur, adversum, qui etiam causa esse putatur, cur decem jam mensibus, nullæ ex Hisp. literæ ad *significandis*. Infans quoque Cardinalis, qui jam in Burgundia, non minus quàm Eugenia, illi benè volunt. Deum rogo, & benè faciant, neque ob *propheta* hanc gravius animadvertant, in virum candoris melle penitus imbutum. In quo omine desino, V. C. & te cum præstantissima & Nob. uxore à me, meaq. salvere jubeo.

*Reprissimè* 8. Julii 1633.  
*expectantæ* Tabellario.

Si quid certus de illo, tecum communicabo. Hæc quamvis pauca, quia iusseras, scribenda tamen putavi.

## CLXXIII.

*Viro maximo, & incomparabili D. Gerhardo Joanni Vossio, Professore.*

Vir maxime,

**M**irum in modum, gaudio me affecit filius tuus D. Franciscus, quod tandem aliquando te nobis adfore pro certo nuntiarit. At verò displicet simul uxori, & mihi, quod conjugis tuæ unâ tecum utrique nostrum desideratissimæ adventum, nonnisi dubie referat. Atque ita quidem, ut ipse credat potius, non venturam. Quæ-

so si id fieri potest, aliter induc, ut statuas; conducet id proculdubio, ejus valetudini mirè quàm nimium firma. Tradidi Secretario Veneto Thadæo Vico tui observantissimo, fasciculum, quem miseris, Literarum ad Illustrissimum Molinum. Scire desiderare se ait, an à me tradita tibi sint, quas per Grafwinckelium misisse dicit, literæ à Pignorio, (si bene memini) Theologo Vicentino, itemque an intellexeris, id quod D. Vander-Myle significaturum se receperat; quantoperè illustrissimus Molinus de Ægyptiorum legibus & ritibus, tuum aliquid aveat videre. Præterea summopere desiderare scire Molinum dicebat, absolutusne esset Reydanus, D. Dionysii, à Typographo, quod ego asserere non dubitabam; quandoquidem id à D. Francisco acceperam, qui simul dedicatorem communicarat, meumque super ea judicium, (quod tu quam sit tenue, nosti ipse, si quisquam alius) fratris, ut inquebat rogatu, quæstiverat. Quid dicam? mihi placent omnia, quæ à tam eleganti ingenio, prodire possint, etiam invisâ. Et placent etiam multò magis, postquam videre, & perspicere contigit. Si quid tamen esset, uti diversæ sunt hominum mentes, quod placeret minus, quam cætera quæ perplacent; id ego literis significare vellem, quod ex absente causam, qua motus diversum à me senserit, intelligere, eaque intellecta, me ipsum refellere non liceret. Coram ista fiunt liberius, & accipiuntur æquius. Interim nihil ego improbo, quod probarit ille, præsertim si tuus accessit probandi calculus. Vale, & tuo, unâ cum uxore, ad nos adventu bea

Hagæ-Comitis summa  
cum festinatione, die xi.  
Jul. clc lcc xxxiii.

Tuum

Ἐὶ ὁλῆς τῆς καρδίας,

G. R. Doubletium.

## CLXXIV.

*Viro Clarissimo, ac doctissimo Dom. Ger. Vossio, Historiarum Professore celeberrimo.*

**N**ondum mihi excidit, clarissime Vossi, quam rara in primo nostro congressu, me complexus fueris humanitate: cui accessit nuper amica salutatio, per Suecum quemdam studiosum. Indignus essem tuâ amicitia, si oblivione ista sopirem, si ingratus

gratus ista silentio præterirem. Sæpius quidem in animo mihi fuit, aliquo five literario, five alio signo, meum in te affectum testari, sed fateor me à te præoccupatum, & doleo. Tum tales sunt meæ literæ, ut in tantorum virorum conspectum, vix prodire audeant. Idem ergo mihi faciendum duxi, quod olim filii Jacobi, visuri faciem Præsidis Ægyptii, non sine munere accesserunt. Ecce & hic additum munus, sed literarium. Offero, inquam, tibi exemplum laboris mei, quem exantlavi, in opere Catechetico Urfini, & Paræi, non solum contrahendo, sed & complendo, ornando; adeo ut novus omnino labor videri possit, prout in præfatione monuit. Nolui tamen tantorum virorum nomina reticere, quum & meritissimi fuerint de Ecclesia, & occasionem mihi hujus laboris dederint; maluique ipsis meos labores adscribere, quam mihi quicquam, quod ipsorum sit, stultè arrogare. Fateor, aliis similibus laboribus, & quidem minori cum difficultate, mihi majorem potuisse parari honorem; sed nos utilitati studiosorum, quam propriæ famæ consulere maluimus. Porro ubi hoc munusculum gratum tibi fuisse, vir magne, cognovero; faciam ut propediem habeas (quæ adhuc sub prælo est) necessariam instructionem, de ratione studii Theologici, in gratiam studiosorum nostrorum accuratam. Vale, & me sicut cœpisti, amare perge; atque ne desit mihi humanitatem tuam venerandi, ac grata mente recolendi occasio, sicubi ex usu tibi sint officia mea, pro jure amicitie impera, habebis me tibi semper obsequentissimum.

Dabam Hardervici  
An. 1633. 2. Julii.

Tuæ claritatis  
observantissimus,

Henricus à Dieft, Theo. Prof.

## CLXXV.

Vir Clarissime,

**L**iteras tuas, quas postridie Kal. Jun. ad me dabas rectè accepi. Admodum invitatus sanè intellexi tantas esse occupationes tuas, ut per illas vix ex voto respondere tibi liceat. Tamen mihi imprimis potes, quia semel toto anno, ac vix iterum, cum non offerat certa se scribendi occasio, ad te literæ meæ eant: & hoc ipsum efficit, ut debeas quoque; cum non possis, quando velis: itaque nunc etiam peto,

jure meo, ut per hunc amicum meum saltem verbis quam paucissimis rescribas. *Artem Grammaticam, & Origines*, sicut & *Pœticam artem*, te jamdudum promittente; valde exspecto, & à filiis *Julium Cæsarem, Rabbi Maimonidem & Historiam Reidani*. Quæso fac promissa appareant. Pro *Oratione* tua filisque *Dionysii Panegyrico* magnas sane gratias ago. Vidit uterque Cancellarius Regis ac Regni; vidit Dom. Rosacrantius; omnes laudant, idque in majorem modum. Operis mei de *Atheniensium Regibus* exemplaria avidè videre velim: & impositum esse finem literæ tuæ spem facere, quam si fallunt quæso hominem impellas, ut absolvat. Cupiam videre quoque quod futurum indicasti separatim *Piræum, Reliqua Attica & Familias*. Utinam & voti hujus compos fiam: nam exspectant, & inculcant quoque tacitè fidem meam, qui inscripta ea Opuscula sibi norunt. Quæso isthic operam item tuam nava. Mitto nunc quæ necessaria ad priorem operum meorum Tomum; nempe *Bibliothecam Atticam, Ceramicum Theseumque*; & inferenda aliis lucubrationibus jam vulgatis. Addo exemplar Solonis, ut Græcorum Auctorum loca, hic Latine tantum expressa, ob penuriam typorum, Græce quoque exhibeantur: quod omnino fieri velim. Tum poematum reliquæ multo plures, quam quæ hætenus vulgatæ, adjunguntur; minimè prætermittendæ. Ipse istæc ut lubebit arbitrare. Addo effigiem æri incisam, quæ in fronte suo loco, quem putabis convenire, collocetur. Quicquid filia tua expendit meo nomine, en remitto, gratiasq; quantas possum ago maximas. Utinam vicissim tuæ interservire mea posset: faceret libenti animo uti debet, & ut amicitia nostra suo illud jure possit, *Atticam Feriatam* meam, quæ debebat in hoc Tomo comparere, nunc omisi; nam cum eam ex *Græcia Feriata* excerpere, & seorsim exhibere, statuissem, aliud consilium cepi. Vale, vir præstantissime. Uxor mea te tuamq; liberi liberos salutant; ego seorsim Franciscum tuum, & Dionysium, & ut porro patrem imitari pergant, seriò hortor.

Rapin, Soræ, ad  
diem xx. Augusti  
1633.

Tuus sine dolo,

Joannes Meursius.

Q

CLXXVI.

## CLXXVI.

*Viro Clarissimo D. Gerardo Joanni Vossio, Mæcenati optimè de se merito,  
S. P. D.*

Amplissime Vir,

**Q**uia omni prorsus abstinere circuitione, eximia illa tua *gens* semel iussit, id quod res est, promptè eloquar, facessunt mihi negotium terni Saxonis versus, lib. 2. p. 20. qui sic habent:

*Adde oculum propius, & nostras prospice Chelas,  
Ante sacraturus, victrici lumina signo,  
Si vis præsentem tuò cognoscere Martem.*

Horum inquam ecquis genuinus sensus? Et quid hoc loco chelæ! Ego certe, & ingenio, & libris destitutus, vix assequi poterò. Apud elegantissimum Poetam Rutilium lib. 1. de reditu suo, v. 183. non ita pridem legi:

*Et jam nocturnis spatium laxaverat boris,  
Phæbus Chelarum pallidiore polo.*

Sed utrobique aqua mihi pendet. Te igitur nullus dubito, quin in solvendo hoc nodo, Oedipum nobis præstes. Alter ejusdem Saxonis locus, est lib. 6. mox initio, de liberalitate Cæsaris, & Africani, qui scriptores rerum suarum amplissimis muneribus profecuti. Sed nomina eorundem scriptorum scire discuperem. Quantum conjectura assequi datur, illorum unus Ennius erit. Verba autem Saxonis nostri, in hunc modum habent: *Eximium exigui poematis pretium, famam quoque Cæsarianæ retributionis excessit. Divus siquidem Julius, victoriarum suarum toto orbe editarum scriptorem, illustratoremque municipio donare contentus extitit: sed ne Africanus quidem, in rependendis operum suorum monumentis, munificentia Danos æquavit.*

Tuus,

Stephanus Johannis.

## CLXXVII.

*Clarissimo Viro D. Gerardo Joanni Vossio, Mæcenati optimè de se merito,  
S. P. D.*

Clarissime Vir, Amice conjunctissime,

**N**ihil equidem accideret mihi optatius, quam si longiori te Epistola, inpræ-

sens compellare liceret. Sed færale silentium stylo meo indixit, geminati vulneris acerbitas, quod mihi hoc anno infligere, voluit summus ille, vitæ necisque Imperator ille Deus. Amisi etenim, heu! amisi & dulcissimam conjugem, octiduo post puerperium defunctam, & filiulam desideratissimam, quæ jam risu cognoscere patrem incipiebat, & unicum erat viduitatis meæ solatium. Verum non tam amisi, quam præmisi, ad æternum illud, omnibusque bonis circumfluens cœlestium animarum consortium; ubi me beatæ istæ animulæ præstolantur, donec vasa colligere, & ad piorum mundum commigrare nos jusserit, cujus in manibus, sortes meæ sitæ sunt. Interim admitto consolationes, usque animum quotidie erigo, quas & sacræ nobis literæ, & humanæ conditionis recordatio, suppeditant. Quem ego casum non potui, quin in sinum tuum effunderem, quippe quem non ignorarem, æque graviter eum laturum, quam me, cujus maxime interest. Cæterum maximæ à me tibi debentur gratiæ, de divino isto, filii tui Panegyrico, quem mihi tuo nomine, tradidit suavissimus Collegarum Mearius. Cui nunc refundo longè dispar redhostimentum, Oratiunculam scilicet meam, quâ nobilissimæ juventuti, ad parandam Eloquentiam, faces subdere volui. Tuum erit benevolâ excipere mente, & me porro ut cœpisti, amare, qui æternum tibi devotus. Vale, Belgii lydus, & corculum Musarum.

Soræ, a.d. xviii Aug.  
CLXXVIII.

Stephanus Johan. Stephanus.

## CLXXVIII.

*Clarissimo Viro Gerardo Joanni Vossio, S. D. Vincentius Fabricius.*

**C**UM nuper suavissimè unâ fuissimus, Vir Clarissime, in domo Vickewortii, constitueram, ut nosti, proximo die te invisere. Sed optimi Vickewortii humanitas, dieique sequentis convivium, desiderii meis intercessit. Equidem quoties cogito lætissimi candoris tui indicia, quàm hilariter me exceperis, quibus sermonibus, ut laudandus viderer, effeceris: toties in eam devolvor opinionem; ut quemadmodum eruditione tua nihil augustius omnes novimus, ita candore, nihil arbitrar

elegant-



elegantius. Quò magis doleo, non licuisse mihi ulterius, jucunda præsentia tua frui, præsertim cum ipse invitares, & inusitata humanitate, quod flagrantissimè cupiebam, spontè exigeres. Cæterum, & alia quædam festinaverunt discessum meum. Imprimis quod Leidam resculæ meæ essent transferendæ. Quas dum convaso, poemation hoc, quod ad te mitto, excidit. Illud autem & crudum, & tumultuarium, si legere tantum dignatus fueris, jamdudum aliquid fiet, quod voto majus sit. Eruditissimum juvenem Dionysium Vossium, filium tuum ex animo diligo, & colo. Nec quicquam contingere potest, quod illius amicitia mihi jucundius sit. Si unquam honestum est, conciliaturam exercere, heic quæso, ne defrigeas, Vir Clarissime; Affectus mei eximii, & sinceri, obidem munusculum hoc, licet exiguum, à me habeat. Felicitissimè vale, vir maxime, cum omnibus tuis.

Lugd. Bat. a. d. xxix.  
Sept. clō Ioc xxxiii.

## CLXXIX.

Clarissimo Viro D. Gerardo Joanni Vossio, fautori meo, S. P.

Clarissime juxta, ac doctissime Vir,

**P**eramanter rogo, ut si tibi non sit molestum, digneris examine pensiore judicare, an verè, justaq; integritati restituerim, versus aliquot, non ita pridem in Saxone nostro mihi oblatos; imprimis fol. 4. fac. 2.

*Regum colla potentium victrici toties perdomui meorum,  
Fastus reorum turgidos exuperans potiore dextra.*

Ut constructio talis sit; Ego Gramus multoties perdomui victrici dextrâ colla potentium Regum, & multoties perdomui turgidos fastus meorum reorum, h. e. Clientum, seu meo imperio obnoxiorum, & subinde rebellantium; (Nam alioquin quid per reos suos intelligat, vix divinare possum) exuperans, (pro exuperatis) potiore dextra. Mox sequenti pagina, Sapphico extremo;

*Clarius posthac Agathum manebit  
Agnitum, &c.*

Illud Agathum, arbitror Saxonem latina incude efformasse ex Græco ἀγαθόν, pro

bona fama, five virtute, vel fortitudine. Postremò versâ pag. v. 3. & 4.

*Quando Suavinum exanimavi titulis abusum  
Nec meritum conciliantis sibi nomen.*

Pro conciliantis restituo conciliantem, ut respondeat, nō Suavinum. De his omnibus peto mihi sententiam tuam aperias, & inopportunitati meæ placidus ignoscas.

Observantissimus tui,

Stephanus Johan. Stephanus.

## CLXXX.

Vir Celeberrime,

**C**UM superiori proximo mense Hibrandus Vechterus, juvenis eruditus & elegans, adductus claritate tuæ inusitatae doctrinæ Amstelrodamum iret, nomen daturus illustri vestro Gymnasio, & tuæ divinæ inhiaturus voci, non duxi meæ esse frontis tibi, tanto sapientiæ professori, literis meis obstrepere, utcumque ille, quem dixi, adolescens quantivis pretii, ter quater id ipsum à me peteret, & ipse quoque ne quid dissimulem, intus meus animus ad aliquam notitiæ tuæ partem pervenire gestiret. Quia verò hodie, per Epistolam bene longam, idem illud officium summo à me studio postulavit, sustinui tandem, ingenuo meo pudori vim facere, & hoc literularum, ad te exarare. Est autem Vechterus noster, filius primariæ viduæ, frugi & cordatæ, nuptæ, olim consuli, municipii Damonensis, in agro Groningano. Non modo, in Scholâ, disciplinæ meæ alumnus fuit, sed & domi meo convictu usus, non pauca dedit signa, unde mihi promptum esset & morum honestatem, & ingenii alacritatem in eo animadvertere. Ego, magne Vossi, testimonii religionem, & fidem colo, neque hæc, temere, de hoc Juvene scribo: & tu ipse, ubi paulo propius ejus indolem nosces, nosces eam, sat scio, nec inertem, nec infrenuam: & cui castitas, & pietas cordi sit. His nominibus, eum impensè promotum cupio ad prædagogicam aliquam functionem, idque, à te potissimum, quâ es, Amstelrodami, auctoritate & gratiâ, in urbe, Civibus frequentissimâ, fieri posse non tam spero, quam confido. Si quid judico, dignus omnino est, cui suos quis credat liberos. Tu, vir summe, idem si

Q 2

judica-

judicabis, unice lætabor, & non mediocriter tibi debebo. Incomparabilia tua scripta quam prorsus sint ad gustum meum, & salivam, apprimè novit noster Vechterus. Amo ea, (si quid hoc, ad te, tantum Hemonem) & æstimo ea, etiam hoc nomine, quod, in tuâ arte Historica, tum libro de Nat. Rhetoricæ, honorifice de Magistro meo, Barth. Kekermanno, sentis & loqueris. Dantisci olim, adolescens, iplos tres annos, ei docenti, diligentem, & tantum non quotidianam, quâ publice, quâ privatim, operam dedi: libros verò ejus, ubi ille vivendi finem fecerat, ad unum omnes, novies à Cap. ad Calcem, non sine luculentâ, & insigni, puto, studiorum meorum utilitate evolvi. Hæc res facit, ut perindigne feram, si quis inclementer in ejus scripta dicat: de quibus, tu tantum, & tui, ad unguem, similes, rectè, vere, & incorruptè, pronunciare possunt. Hoc volo nescius ne sis, & huic meæ, inscribendo imprudentiæ, an impudentiæ, veniam pro tua humanitate, prolixè dare ne graveris. Sed non distinebo te à re tuâ diutius. Neque enim profecto, si quid mihi credis, minus hoc vereor, quam Venusinus ille, metuebat longiusculo sermone morari tempora Cæsaris.

*Emble Frisiorum*  
xxv. Octob. Ju-  
s. ani. Anno Æræ  
Christiane 1633.  
Sub sermone cre-  
pusculum.

*Vossiani Nominis*

*observantissimus,*

Jacobus Henningius.

#### CLXXXI.

**G**Ratas mihi tuas fuisse, nullus dubitas: neque est quod ego exprimam. Janfonii nostri tarditatem valde miror, ac fortasse amat ille Reges meos quasi sub custodia habere. Sed bene agitur, quod jam finem suum spectent: nisi sane, quod confido, jam acceperint. Neque enim Indices, ad quos pervenerat Typographus, diu adeo remorari illos possunt. Doleo contentionem inter duos hos librarios, cum vicinos, tum cognomines. Sed non aliter solent illi, quibus vita eodem quæstu toleratur. Magis autem inique fero, quod diffidii inter Heinsum & Salmasium est. Non debeat, inter viros tanti nominis. Misera certè & ridicula est ambitio, tum indigna quoque invidia, parem in altero honorem aut stipendium animo iniquo ferre. Quanquam de stipendio sane ut

existimo, non contenditur; nam hoc Heinsum superior. Reidani Historiam, & Judæi \* hominis \* *Manassis* Conciliatorem libens vidi: *Ben. Israël.* magis etiam quia filio Dionysio utrobique parta est gloria: Faveo ex animo, & crescentem famam gratulor. Sed quid Julius Cæsar ejus, an quiescit? altum enim in literis tuis est silentium. Pridem movisti salivam, tam præclari operis promissione. Meorum operum primum Tomum rejici in extremam hyemem, facile fero; dummodo tum seriò editio promoveatur. Quæso ne urgere cesses. Existimabam fore ut minuta illa tria Opuscula, *Piræus, Reliqua Attica, & Familiae*, seorsim excuderentur: sed spes ea, uti video, me fefellit: tamen fieri optassem; liberandæ apud amicos fidei meæ quam obstructam à biennio illi tenent. In his salve cum uxore liberisque, à me mea atque meis. Imprimis Dionysium tuum ego saluto & exhortor ad majora capeffenda; neque enim sic incepit, ut desineret. Refalutant Laurenbergius ac Stephanus. Filia mea Corneliæ tuæ plurimam salutem dicit, & gratias agit pro navata sibi opera.

*Sore ad Diem*  
xxix. Novembris,  
CIC IDC XXXIII.

*Tuus fide Batavâ,*

Joannes Meursius.

#### CLXXXII.

*Clarissimo Viro, D. Gerardo Vossio,*  
*Franc. Burgerfdicius S. P. D.*

**E**T si sciam te, Clarissime, atque Amicissime Vossi, tota vitâ sic esse Philosophatum, ut non tam inanis subtilitas, & reconditæ, atque impervestigabilis veritatis indagatio, nullum habens laboris fatigis dignum pretium, te caperet; quam fructus, quem in componenda vitâ, in coercendis animi affectibus, atque adeo in utrâque fortunâ moderatè ferendâ, sapientia suis cultoribus promittit, & præstat: tamen cum intellexissem te dilectissimo tuo filio Dionysio orbatum esse, putavi ad officium meum pertinere; non solum ut testarer, quam gravis mihi quoque, casus ille tuus sit; sed etiam ut conarer, qualicumque alloquio lenire dolo-rem, qui nunc te coquit, & versat sub pectore fixus. Sed quid scribam? aut unde ordiar? aut quo dirigam Orationem? Quæ-

Quæcumque enim in mentem veniunt, ea tu omnia jam mente præcepisti, & multo etiam plura, haud dubie, & efficaciora; quæ si malo tuo modum non ponunt, metu ut ulla meâ oratione possit mitigari. Sed tamen ad te redi paulisper, Mi Vossi, & momentum temporis discute, crassam immoderati luctus caliginem, quæ tibi fortè nunc adimit, aut impedit exercitissimæ mentis usum; deprehendes certò lugere te amissum filium, non quidem sine causâ, sed fortè supra causam: aut si hoc à te impetrare non potes, da te mihi paulisper, & patere, affectum tuum disputando oppugnari, ab homine tui studiosissimo. Amisisti filium scilicet, quid? An putabas te immortalem genuisse? An quicquam contigit tuo, quod quispiam mortalium, ausit sperare non obventurum sibi? Quin non amisisti perfectò, sed præmisisti, secuturus ipse, cum Summus Imperator vocabit. Abiit ille certè, sed ex valle lacrymarum, ex sentina malorum, ex Theatro vanitatis, ex immundo mundo, in quo optima quæque, divitiar, natales, gloria, voluptas, & quæ præterea nos homunciones stupemus, quid sunt? Vapor, fumus, umbra, nihil, aut si quid minus nihilo est. Æstima tamen hæc mundana, quanti velis, & pluris etiam quam soles; si rationem in eas, intelliges, quantum abitu suo, lucrifecit. Sperare potuerit Cresci divitias; tamen sperare tantum potuit, & quis præstitisset? At nunc quas, & quantas divitias consecutus est? Divitias ἀποδύσας καὶ ἀναπαύσας. Quippe jam hereditatem adiit, quam neque rubigo exedere potest, neque fures, aut latrones eripere: quæ extra omnem fortunæ aleam constituta, neque Dominum suum deserere potest, neque ab illo deferri. Si Natales spectes, non jam ille, Vossi filius, non Junii Nepos, (& tamen quam honesta hæc & clara nomine?) sed Dei altissimi filius, & frater J. Christi est. Efferat se mundi Civis, & gloriam suam, celebritatemque jactet; omnia sordent, collata magnificis, istis Titulis. Principes, Reges, Imperatores, pudenda nomina sunt præ iis, quos Deus adoptavit sibi, & divinæ illius ὑποστάσεως, fecit compotes. Jam voluptate quantâ fruatur! quam nec oculus vidit nec auris; nosti cætera. At filium amisisti bonum, pium, & doctum supra ætatem. Tanto minus luctui locus est; si filium amisisses improbum, & impium erga te, impium erga Deum, nulla profecto sollicitudo, nullus luctus par esset tanto malo. Nunc verò, quid luges eum, quem certò scis cœpisse

foelicem esse, ex quo defuit esse tuus? Infirmitas est, mi Vossi, aut paterni affectus violentia, animo non æquo ferre, foelicitatem obtigisse illi, qui sua observantia, maximè meritis est à te diligi. Erat sanè ille supra ætatem doctus, & quid porro pollicebatur? sed quam multa nunc intelligit? quam multa scit? quæ ante ignoravit, quæque omnes ignorabimus, quamdiu hæc vitâ fruimur, quam tuus ille cum meliori commutavit. Præterea magnum esse debet, doloris tui levamen, quod unum è multis amisisti solummodo; in quorum singulis habes, defuncti virtutem, & eruditionem superstitem. Noli ergo vicem tuam plangere, quod unum amisisti: sed benè tecum agi potius existima, quod plures tibi relictæ sint, qui aut paria jam præstant, aut certè pollicentur. Neque vero frustra est illa cura, quod fortè quereris, quam in illo educando, atque erudiendo impendisti; jam mundo testatus est, præclaro opere, quid tibi debeat, & Patri, & Præceptori: Et nunc idem testimonium, de tua diligentia, & fide, reddit apud Deum, cui omnes aliquando reddemus rationem, etiam liberorum nobis concessorum. Quid ergo? an prorsus te Stoicum esse jubeo? vel etiam Stoico durior, hoc est ad casum, tam funestum, ἀναιδοντος, aut certè ἀνέναντον, καὶ ἀπαράστων? nihil minus. Velim sanè malum sentias, etiam ut lugeas, etiam ut desleas: sed ita ut hominem te deslere memineris, qui non potuit immortalis nasci, qui non potuit fieri immortalis, nisi moreretur. Sed jam modum Epistolæ excessi, ita me quoque affectus abripuit: ut jam libentius tibi ignoscam, si tibi paternus affectus, luctum, & desiderium ejusmodi extorqueat, quod in aliis, pro mascula tua sapientia, soles improbare. Remitto etiam tibi librum, pro cujus usu, gratias tibi ago, sanè magnas, & veniam peto, tam longæ moræ. Vale cum uxore, & familia, & hoc meum alloquium amicitia tribue.

Dat. Lugduni  
Batavor. Kalen. Novemb.  
clō Idc xxxiii.

CLXXXIII.



## CLXXXIII.

*Viro Doctissimo D. Gerhardo Joanni  
Vossio Petrus Cunæus S. D.*

Vir Clarissime,

**D**E obitu filii tui, juvenis præstantissimi, & ad summas laudes evecti, aliquid ex vagis rumoribus primò, ac novissimè nunc omnia certa, ex cognati nostri, D. Barlæi literis accepi. Is casus, tam tristis, & inopinatus, quam acerbis stimulis animum patrum egerit, facile cogitare possum, cum etiam mihi ingentis doloris acerbissimam attulerit, ac me vehementer commoverit. Præterquam enim quod pro necessitudine nostra, & animorum conjunctione; quicquid tibi luctuosum est, nos amicos tuos aliqua ex parte tangit; etiam illud non exiguum est, quod ad publicam seculi causam pertinet. Qui enim prima juventutis spatia ingressus, illustribus ingenii monumentis, jam nunc promeruerat faventem omnium eruditorum existimationem, quanto majora deinceps, de se expectanda relinqueret, nemini dubium fecit. Et ille quidem gloriæ suæ, vixit satis diu: quod tibi, tuisque, esse solatio potest. Quod autem earum rerum, quas perficere, & consummare, ad literarum decus poterat; spes omnis abscissa nobis, abreptaque sit, nostrum magis, quam tuum est damnum. Sed non debent hæc apud te prædicari, qui unus omnium optimè scis, quantum amiserimus omnes. Ego inter tot officia, quæ tibi hoc tempore, repræsentat amicorum humanitas, quemadmodum penitus quiescere, aut tacere non potui, ita illud te duntaxat rogabo, ut nihil aliud ob oculos ponas, nisi luculenta illa, & præclara sapientum præcepta, quæ tute ipse in hujusmodi malis, suggerere aliis soles; uti cogites viri boni esse præbere se fato; ad hoc, nihil novi tibi accidisse, usui quadam nobis, at nihil mancipio dari: Et pro ea ipsa exigui temporis usura, grates agendas esse Summo Deo, qui & hoc munus tibi, hucusque concessit, & alios tibi superstites adhuc servat liberos, quibus meliores optare, nec ipse posses; Cetera non addam: Et jam plus fortasse dixi, quam apud te opus fuit. Nescio an intellexeris etiam, D. Vorstii domum nunc funestam esse. Obiit enim filiolus ejus, natu maximus, ex hoc Epidemico morbo. Vale, Vir Clarissime, cum lectissima Uxore, Liberisque.

*Lugduni Bata-  
vorum. 7. No-  
vembriis 1633.*

## CLXXXIV.

*Reverendo Viro & Clarissimo, Jo. Ger.  
Vossio, S. D. Henricus Ernstius.*

**E**TSI mihi nunquam dubium fuit, quin tibi essem charissimus: tamen magis id perspexi, quum Amstelodami te inviserem. Ubi mihi certe pietatem, fidem egregiamque tuam & singularem erga me voluntatem, satis abunde fecisti testatam: idque adeo, ut me tuis tuorumque perpetuum debitorem lubens agnoscam: Utinam vobis centesimam saltem ejus debiti partem solvere possem! Verum de me sic velim judices, me tibi tuisque curis semper, quoad ejus fieri potest, tanquam mihi met ipsi summo cum studio præsto futurum. Literas tuas Hugoni Grotio viro incomparabili ipse Hamburgi tradidi: ille me, quâ est humanitate, ita excepit, ut potuerim videre, commendationem tuam magni apud ipsum esse ponderis. Commemorabat mihi, se fuisse cum Serenissimo Rege nostro Christiano iv. Gluckstadtii, à quo peculiari propemodum humanitate, quam clementiam hodie Principum aura studiosi appellant, dimissus est: O miseri Hollandi qui estis, quod nescitis in propriis arare bovis, iisque idoneis. Rex Angliæ & S. Populusque Hamburgensis legatos ad Regem miserunt Scanderburgum, ubi Rex hybernabit, quorum *ἀναγορεύει*, ut equidem credo, in Regem ipsum xiv. Novemb. ut heic numeramus, audietur. Publium meum Syrum quod attinet, velim ut eum edendum quamprimum cures; quæ impendis ego bonâ fide restituar. Valde heic in Dania desideratur & Lubecæ etiam: Si nobilissimo Domino Guldensternio utriusque nostrum studiosissimo eum inscribes, de gratitudine ejus nolito dubitare. Tu, virorum egregiorum optime, vale unâ cum tuis omnibus in Christo Jesu.

*Dab. è prædio Regio Hal, in  
Cimbrica Chersoneſo xii.  
Novemb. 1633.*

Dn. Guldensternius te multa impertit salute, proxima occasione ipse tibi scriber. Peto abs te, amicitissime amice, ut mihi respondeas, & literas ad Josan thor Lippe Mercatorem Hamburgensem mittas. Iterum vale etiam atque etiam.

## CLXXXV.

CLXXXV.

*Clarissimo Viro Gerardo Joanni Vossio,  
Erycius Puteanus S. D.*

Clarissime vir & Amice,

**Q**UÆ scribenda erant, mulier hæc nuper indicaverit. Ego sum ut soleo; imo fileo, & quorundam sino perstreptentes sermones praterfluere. Interim ostendit mihi Clarissimus Plempius noster, judicia apud vos edita. Unum quidem infestum, & ab homine quantum video, malignæ mentis: duo reliqua, etiam à plerisque hic laudata. Ego rogare Deum pergo, ut inducias nobis donet; mutet homines, qui cæde, & sanguine delectantur. Rex noster ut potentissimus, ita optimus est, paratus à bello abstinere, si non iniquæ conditiones sunt: quemadmodum in ipsa Statera scripseram. Viderint, quibus universum negotium commissum est, quæ non iniquæ debeant haberi. De *Uno*, & *Omni*, librum nuper scripseram; sed ut me potius oblectarem, quam erudirem alios. Typographus ubi absolverit, exemplar faxo sine mora accipias. Clarissimum Barlæum, si me amas, nomine meo complecteris. Scriptionem differre adhuc cogor. Bonum nomen ero, cum scenore officia candoris persolvam. Vale, & scribe.

*Lovanii in Arce, Prid.  
Kal. Decemb. clō Idc xxxiii.*

*Totus tuus.*

CLXXXVI.

*Cl. Ger. Joh. Vossio.*

**I**gnosces, Vir humanissime juxta ac doctissime, quod ignotus te compello, ac seria tua leviculo negotio interpello. Jussa Honoratiss. ac Reverendissimi Archipræfulis Cantuariensis (qui nisi immensâ occupationum mole distineretur, jampridem ad literas nuper à te acceptas responderet) operam tuam implorandam habeo, providendo vellumine terso ac utrinque lævigato, quod & typorum impressionem ferat, & calami etiam ductum non aspernetur. Apud nos perit prorsus hujusmodi artificium, nec aliud habemus velluminis genus, quam quod librorum integumentis adhiberi solet. Apud vos hoc artificium vigere libenter credimus, atque inde Cla-

riss. Virum D. Th. Bodleium vellumen illud comparasse, ex quo constat Catalogus grandis Librorum in Bodleiana, partim excusus, partim calamo exaratus, qui publice prostat in Bibliotheca, quem fortasse notaveras, cum illic esses. Hujusmodi velluminis speciem aliquod, tres scilicet vel quatuor membranas, si apud vos sit parabilis annona, ad se ut transmittas, quamprimum commodè poteris, rogat H. Archipræful; simulque ut significes utrum hujus mercimonii tanta apud vos sit copia, ut suffectura sit operi, quod mille fortasse membranas aut amplius desideret. Habetis hoc nomine Honoratiss. Præfulem tibi debendi reum, meque insuper eadem operâ devinxis, sumnum jampridem

*Raptim.  
Londino  
Decemb.  
xx. 1633.*

*Virtutum tuarum Cultorem,*

*P. Turner, Soc. Collegii Merton*

*in Acad. Oxon.*

CLXXXVII.

*Clarissimo Viro Gerardo Joanni Vossio,  
E. Puteanus S. P.*

**T**Alem amittere filium, mi Vossi, quam acerbum sit, meo affectu metior. Cogita ad me quoque, tam triste vulnus pertinere; Ita quæ tua sunt, aliena non puto. Tam variam vero doctrinam, & peritiam linguarum, in ætatem tam floridam cadere potuisse! Prælegi hic Epistolam tuam amicis meis, viris doctis, qui mecum ingemuerunt. Sed tuum est fortiter ferre hanc arumnam, quæ necessitate suâ ducitur. Ita Deo placuit, cui obtemperare pietas juber. Ecce ut te recreem, certè ut à dolore avertam, Amœnitatem istam mitto, de *Uno*, & sic *Omni*, scriptam. Lege quæso, & tantum mihi otii impende, ut intelligam etiam nugæ à te meas æstimari. Alterum exemplar, ut Clariss. Barlæo, nomine meo, tradas, rogo, & amicissimam salutem nunties. Reidani Annales avidissimè expecto: in iis enim Donyfium tuum extinctum completar. Is immortalis est, & mox quoq; in Bibliotheca Belgica nostri Valerii Andreæ legetur. Vale, & tibi vendica.

*Lovanii in Arce, Prid.  
Non. Febr. clō Idc xxxiv.*

*Ad Clarissimum Barlæum proximè scripturus sum.*

CLXXXVII.

## CLXXXVIII.

Clarissime, Amplissime Vir,

SEPTIMO die, ex quo te non sine maximo dolore meo reliqui, fere Hamburgum attigi, felici atque inoffenso, Numini sint grates, itinere. Et cum milliari tantum urbe aberam, obvium habui Dominum Legatum Salvium, Bremam & ad Duces nonnullos inferioris Saxoniae pergentem. Facile illi erat avidum rerum novarum & cupidum penitus cognoscendi, quo statu res Germanicae essent, secum abducere. Ostitum & quod excurrit illo itinere absumptum. Lustravi Episcopatus Bremensem atq; Verdensensem. Quorum prior tantum Episcopum habet Principem ex Holsatia, eundemque Gustavi Regis avunculum. Inde Gluckstadium vidi. Quæstuosus ille ut Daniæ Regi, sic Hamburgensibus luctuosus est. Aderat tunc Daniæ Rex & unus liberorum, nomine Fridericus Christianus. Admissus ad colloquium convictibusque adhibitus sum & munitiones sique alia visu digna erant, spectare permissum. Vocatum illuc à Rege D. Grotium proximoque adfuturum die, rumor magis erat quam certi aliquid affirmaretur. Quare Hamburgum extemplo contendi. Hora ante adventum meum ex urbe profectus erat. Expectavi reditum jam tertium diem sed frustra. Literas quas manu mea exhibendas ad illum dedisti, in aedes ipsius deferre curavi. Dictu incredibile, quanto hoc me dolore adfecerit. Mirari satis nequeo, nihil me à fratre Jacobo literarum vidisse, doleoque sic quoque tuas, ad illustrem Parentem mihi haud missas. Quid apud Dominum Parentem prætendam quamque rationem reddam, cur nec tu nec ille mecum scripseritis, haud in promptu. Convenerat inter me & fratrem, ut proximo subsequenti Saturni die literas suas cum Tabellario Hamburgum mitteret. Quo minus mox mecum sumerem, ambiguus fratris de itinere in Gallias animus in causa fuit. Orationem fratris à filio Isaac, gnaro per quem describeretur, tibi exhibitam, correctamque & tuis adjunctam literis spero. Tabula Chronologica, quas in usum fratris describendas filio Matthæo reliqui, ubi primum descriptæ erint, & mihi mittantur, oro, simulque exiguus liber de Nominibus propriis Hebraicis, quem nimia festinatione reliquit. Frater Benedictus in Germania nunc

agit, in dubia spe eundi propediem in Gallias. Quod si Jacobus iter suum distulerit, acturus sum, ut quamprimum in Hollandiam revertar simulque peregrinas oras adeamus. Quod utilissimum utrique nostrum futurum reor. Nec abs re erit si eadem à Domino Parente frater flagitaverit. Concessurum spero, si me diutius operari literis voluerit; quod imprimis eum velle scio, sed nihil perinde in exteris me evocat regiones quam tui desiderium. Nunc primum vere cognosco quantum fuerit tecum vivere, cum id jam mihi negetur. Hocque vehementius tibi reddi æstuo quo magis divellor. Hæc summa votorum erit, ut te coniugi, liberis, amicis orbique & sic quoque mihi supremum Numen, diu superstitem esse velit. Id precor, id voveo. Saluta dilectam conjugem atque charissimos liberos. Nihil gratius erit quam ab illis cognoscere prospera omnes frui valetudine. Et ego officii mei memor ero. Vale, meque more tuo amare per siste qui

Amplissime Vir,

Dabam Hambur.  
22. die Apr. An.  
1634.

Sum eroque perpetuum

nominis tui cultor,

J. Skytte Junior.

## CLXXXIX.

Cl. Ger. Jo. Vossio.

Vir Amplissime,

CITius ad acceptatissimas tuas respondissem, si expectasses. Tandem fidam nactus manum, mitto Epistolam illam Clementis stylo gravem, sanctitate venerandam, & stylo & sanctitate Apostolicam. Nec divinari possum, cur Clementem hunc doctiss. Heinsius non Romanum velit esse, sed alium quendam. Ipsissimæ hic leguntur sententiæ, quæ apud Irenæum, Clementem Alexandrinum, Eusebium, Hieronymum, habentur; & quod antiquitati ejus imprimis favet, vix duo reperies novi Testamenti loca, eaque ex Evangeliiis, ex Epistolis nullum. Fateor *τὸ Πόπλος* ex conjectura repositum rubro notari minio; sed hoc abundè resarcitur ex nominibus planè Romanis illorum, qui Literas has Corinthiis detulerunt, & humilis tunc sedis Apostolicæ



postolicæ fuerunt legati. Quin ex illâ Constitutionum farragine aliquid astruitur, cum in quinto Libro eadem quæ hic de Phœnice narratio iisdem pænè concepta verbis habeatur; arte ut conjecto sarcientium, quæ ex genuini Clementis flosculis figmento suo fidem faciant. Mitto etiam nuper editum de Veritate librum. Nobile opus si liceat ex Authore & argumento, potius quàm ex opere, iudicium ferre. Ni fallor, hic vere latet Veritas in puteo, cum non novam quam pollicetur; sed aut nullam aut abstrusissime reconditam nobis afferat. Vestrum esto iudicium. Mihi saltem nihil scienti non licet hinc sapere, sint illic limpidissimæ aquæ, at & in profundo sunt, & ἀγτλινια ἢ ἐξω. Spero me brevi te invisurum, nec tantum amico sed eruditione ipsâ fruturum; in te enim quasi oculis cernam lucentem veritatem illam, quæ se & facile & purè proderet. Interim si per otium liceat, Nobilitati nostræ logicanti horam unam impendas rogo, sed si opus sit non sine Virgulâ censoriâ. Qui veritati itudet, non gravabitur castigari. Alterum velim exemplar Clariss. Barleao dones (viro mihi nondum noto sed plurimum honorato) simulque petas, ut breviter iudicium suum reddat; vel si placuerit, margini apponat infirmioribus medelam. Expectamus hic Epistolarum fasciculum à Dodrectano quodam medico de Termino vitæ: unaque tractatulum verius quam Epistolam præstantissimi nostri Salmasii. Quam timeo ne malo scripserit omine! In summo enim languore vivit, vel potius moritur; illum tu habes, si quem uspiam tui amantissimum, ego vero tui simillimum. Pergas vir optime, teneriores semper fovere literarum conatus, & me ama. Vale.

Lugd. Bat. iii. Non.  
Febr. An. Domini.  
1653 lxxiv.

*Tibi omni obsequio*

*devotissimus,*

Stephanus Goffe.

CXC.

Cl. V. Ger. Vossio.

Clarissime & Amplissime Vir,

**S**I non optatissima Doctissimi Viri amicitia abundè molestias omnes compensasset, me paulò infeliciorem sentirem

ex itinere meo Amstelodamensi: Quippe reverso vel paucas tantum horas indulget Nobilissimus meus Patronus Dominus Verius, quibus me aptarem longiori non tam itineri, quàm itineranti domo; Namque verè ἀμαρτυρία Scythæ fixam non debeo expectare sedem, adeoque si rudis & barbarus rediero, non est pene quod me culpet Literarum Patronus, quum studia lentè augescunt, etiam quæ maximè foventur, facile enecantur, quæ assiduè destituuntur subsidiis. Utcunque avido Literarum animo nulla elabatur hora, & si contingat Leodijum rursus adire, plenius & certius Godeschalci quæ illic sunt perquiram: interim fruatur Clarissimus Vir, historiâ istâ Chapeauvilli tribus tomis distinctâ, in quâ memini me quædam alicubi legisse de Hæresi Godeschalci, quæ tamen in hac nimiam meâ festinatione invenire & monstrare non possum. Ex paginâ verò trecentessimâ vicesimâ tomi primi certo sciet Doctiss. Vir esse quædam ejusdem manuscripta, tum in æde Lambertinâ, tum Laurentianâ Leodii: propè est ut suspicarer huic esse alium quendam Godeschalcum, sed non licet penitus examinare; Proinde omnia in manus vestras trado; ut & ipsum me, quem credas oro,

*Dignitati vestræ*

Hagæ, 23. April.

*obsequentissimum,*

Steph. Goffe.

Si quid mihi in mandatis dare cupies, Literas ad me datas (in Castris apud Dominum Verium Anglicarum cohortium Generalem) lubentissimo animo accipiam.

CXCI.

Cl. V. Ger. Vossio.

Amicissime Vossi,

**D**Oleo mihi non licere per angustias temporis tecum prolixius agere: Castra me vocant; festinanter omnia agimus. Interim necesse est ut clarissimo amicissimoque mihi viro valedicam. Te cura non tantum tuorum & Reipublicæ literariæ causâ, sed & Ecclesiæ præsertim tuæ, id est, Anglicanæ. Expectant omnes Commentarios tuos de re Grammaticâ; sed adversis imputant ventis,

R

quod

quod exemplaria Angliæ destinata nondum sint transmissa. Poteris jam officio illo superfedere erga Dominum Doctorem Mason, Principis Præfectum. Ex quo enim veni Amstelodamum, certus huc de morte ejus deferetur nuncius, ejusque in locum sufficit Dominus Doctor Duppa, Decanus ædis Christi in Academia Oxoniensi, cui si liber (utpote antea tibi noto, ni fallor) poteris Librum illum Mascono destinatum donare. Scias illum doctissimum esse, & te dignum. Vale.

Aprilis die 26.  
Hagæ.

Totus tuus,  
Stephanus Goffe.

## CXCII.

Doctissime Vossi,

QUAMVIS Regis erga te animum ante paucos dies perscripserim, nunc tamen oblatâ occasione eodem defungar munere, ne fortè primæ literæ non delatæ anxium te & suspensum teneant. Matæ sodes, Editionem matura Principi nostro dicandam. Hoc Rex non tantum boni consulit, sed videtur etiam exoptare, & quod eo sit erga te animo, optimo nostro Domino Archiepiscopo penitus deberes, nisi quod merita tua de Literis & Ecclesiâ hoc ipsum efflagitant. Scias insuper & hodie secundam de libro tuo coram Rege factam fuisse mentionem, eamque hoc pacto: Occurrebat mihi dubium ne forsân Exterus Scriptor erraret in titulo Principi nostro plene & proprie assignando, adeoque necessum habui Reverendum Virum Decanum Salisburiensem (is enim Principi instituendo jam præest) hâc de re consulere. Ille de Walliæ titulo scrupulum iniecit, ex eo quod ante certam ætatem non obtineatur, utpote qui ex Creatione quadam Principibus nostris addatur, & non ex jure nascendi. Proinde Reverendus ille Vir Comitem Arundelianum in consilio habuit; per quem tandem res ad Regem delata est. Qui statuit aperte ne Princeps Walliæ vocaretur, sed Princeps Magnæ Britanniæ, Dux Cornwalliæ & Comes Cestriæ, &c. Et ne error aliquis obveniat, uni ex specialibus mandatum est ut statim formulam aliquam secundum Leges suas componat, quam ipse ad te transmittendam curabit per manus (uti credo) præstantissimi

Domini Boswelii. Nunc restat, ut te curâ hâc literariâ, quam celerrime emancipes, & stilum illum insigniter felicem Ecclesiæ tradas, & sacrum reddas. Scias velim literas tuas ad illustrissimum Archiepiscopum fore acceptatissimas; Sed cum negotiis gravissimis undique sit confusus, breves videtur exoptare, & tales quæ studia tua narrent potius quam gratias. Vale. Salutem tuam faxo cures, & ama

Raptim. Londini, Tui observantissimum  
Novemb. die 23.  
St. vet. 1634.

& amantissimum,

Steph. Goffe.

## CXCIII.

Cl. V. Ger. Joh. Vossio.

Vir amplissime & doctissime,

SI quem unquam me certe torquent iniquiores literæ, utpote quas naturâ suâ & pulchras & difficiles amare mihi licet, assequi non licet. Tot enim negotiorum undæ me obruunt ut illis pro voto frui non possum; & certe (quod res est) mitius carerem, si facilis & celeberrima Vossiani pectoris Bibliotheca longius abesset. Quorum aculeos infixit mihi nuperus ille cum doctissimo viro congressus? in quo non tantum plenos eruditionis fontes perspexi, sed felicem diffundendi se facilitatem. Mihi enim (ea summa vestra fuit humanitas) plane patere voluisti, in sinu vestro conclusos omnes liceret aggredi Ecclesiæ Patres. Adeoque si voti mei compos esse potuerim humanitatem erga me vestram repetito itinere ultus essem; sed cum illud improvisa rerum turba non patitur, feret doctissimus hæc literarum molestias. Ex quo redii; in Clementis Romani Epistolæ nuper in Angliâ ex vetustissimo MS. exemplari editas incidi. Illas puto jamdudum ad manus vestras delatas, sin minus à me celerrime mittendas expectabis. Miram video styli simplicitatem, piam planè doctrinæ pietatem, quæ Apostolicum sapiat virum. Sed unde illud de Mose? καὶ πάλιν λέγει, 'Εγὼ δ' εἰμὶ ἀπὸ τοῦ ἁγίου ῥήματος' cum nullibi in Scripturis nec suum sensum, nec verba inveniat. Et illud; ἡ γὰρ αὐτῆς, ὅτε λέγει Ταλαίπωροι εἰσὶν οἱ δούλοι, οἱ διαζόντες τὸν ψυχρὸν, οἱ λέγοντες τῷ κυρίῳ ἡμῶν καὶ ἀπὸ τοῦ πατρὸς ἡμῶν, καὶ ἰδὲ

ἡ δὲ γυμνασία, καὶ ἡ δὲν ἡμῶν τέτων συμβέβηκεν.  
 quæ etiam verba repetuntur in Secundâ  
 Epistolâ, & vocantur Περιήκως λόγος. Sic  
 etiam in illa Secunda (cujus tantum frag-  
 mentum habemus) duos Dialogos inter  
 Christum & Discipulos nobis exhibuit.  
 De quibus fortasse dici potest ipsum à  
 Magistro suo Petro traditione edoctum;  
 sed de Molis & Prophetico dicto quid  
 conjectandum? An ut Junius in Notis  
 suis ex Chrysostomo Scripturas quasdam  
 periisse? Hoc est *Remedio magis quam*  
*Morbo laborare.* Hoc ipsum observare licet  
 ab ipsis Evangelistis & Apostolis aliquando  
 factum. Matth. c. 2. 23. ὅτι Ναζαρεῖς κα-  
 λήσονται. Actor. c. 2. 25. Μαριεὶν ὅτι διδύμαι  
 μᾶλλον ἢ λαμβάνειν. Ephes. 5. 14. διὰ λόγου  
 ἔργου ὁ κριθείσθαι, &c. Sic Ignatius in E-  
 pistola ad Magnesios de Die dominico  
 περὶ τῆς ἑλπίδος εἰς τὸ τέλος τοῦ κόσμου.  
 Jam quo pharmaco? Responsorias pro-  
 lixiores à vobis non expecto, ne Reipub.  
 literariæ injurius essem, dum publico bono  
 detrahi horas illas necesse erit, quæ levio-  
 ribus hisce quæstiunculis impenduntur.  
 Saltem unico verbulo rescribas per filium  
 qui Hagæ vivit, ut parte saltem tui fruar  
 donec liceat ipso te. At quid interim de  
 Puritanis nostris? Certe plura indies audio  
 de illo apud vos ipsorum Coryphæo, adeo-  
 que libere dicam, me rem Cl. Vossio  
 dignam de illo in manus vestras commen-  
 dâsse: nam cum sis plane non tam Ec-  
 clesiæ nostræ Filius quam Patronus, non  
 poteris rem gratam magis & Regi & ve-  
 stris Amstelodamensibus præstare quam  
 si efficias ut prudenti Magistratum cau-  
 tela statim dimittatur. Ex ipsius amicis  
 audio ipsum à Classe vestra æque ac ab  
 Hierarchiâ (ut solent dicere) nostrâ ab-  
 horrere; ipsum contra Acta publica in se  
 lata de Regno turpiter aufugisse; Ecclesi-  
 am relictam insalutatam adhuc Pastore  
 destitutam. Et cum talis sit ut Libertatis  
 Belicæ est permittere, ut lateat, ita ami-  
 citiæ non est ut promoveatur. Spero  
 dignas vobis gratias brevi reddendas. In-  
 terim vale & bono publico vivas.

*Amplitudinis vestre*

Hagæ  
 Decemb. 13.

*omni officio animique*

*affectu studiosissimus,*

Stephanus Goffe.

CXCIV.

Cl. V. Ger. Jo. Vossio.

Vir Clarissime,

L iteris tuis, elapsâ septimanâ ad Re-  
 verendissimum Archiepiscopum ma-  
 nu mea traditis, hodie ab ipsius ore hoc  
 responsum ad te properè perscribendum  
 accepi: ipsum nimirum Regi significâsse  
 consilium tuum, atque Regem lubentissi-  
 mis auribus illud accepisse. Adeoque Re-  
 verendiss. noster Dominus perlustrato tuo  
 per me misso volumine suadet, ut sub una  
 Dicatione omnes septem Libri simul  
 prodeant, atque illâ ad Illustrissimum  
 Carolum Principem Walliæ, Fratrem ejus  
 Duce Eboracensi hac vice prætermisso;  
 hoc notanter dixit. Et quoniam vestra  
 librorum compactura nostrâ & politior  
 est & apertior, convenientius visum est,  
 ut Liber ille quem Illustrissimo Carolo  
 missurus es, Amstelodami compingatur,  
 ne crassities (ut solet) sub nostra liga-  
 tura impeditior & inconcinrior videat-  
 ur. Vides quam pensiculatè res tuas  
 expendit Mæcenæ & Literarum & Ec-  
 clesiæ & noster; jam restat ut Editio-  
 nem illam matures, & si vacabit, ut sæ-  
 pius de te vel ego aliquid accipiam, ex  
 quo possim de studiorum tuorum rati-  
 one cum amicis meis disserere, atque  
 hoc ex re tua maximopere futurum spon-  
 deo. Unum insuper moneo, ne ampli-  
 us de humaniori Literatura cogites, adeo-  
 que omisâ circa Rem poeticam, & Ori-  
 ginum libros operâ, necesse est ut Theo-  
 logicis te penitus accingas. Hoc pæne  
 efflagitant Reverendissimus noster Præsul  
 & omnes eruditi. Et si consilia tua de  
 illis Theologicis quæ sub manu tenes, Re-  
 verendiss. Archiepiscopo præscribas, scio  
 (sic enim dixit) illa acceptissima fore. Nec  
 dubito quin hoc pacto tibi tuisque omnibus  
 bene consules. Me interim devotissimum  
 habes, paratissimumque fideli opera nego-  
 tiis tuis incumbere, si quæ mihi curanda  
 commiseris. Atque hoc debeo meritis illis  
 Cl. Vossii non publicis solum, sed privatis  
 erga me, quem (ut sæpe agnovit Archi-  
 episcopus) pulchro Elogio affecisti. In-  
 dignum vereor nisi quod laudes tuæ me  
 dignum facient. Vale, Vir doctissime &  
 salutis tuæ prospice.

*Totus ex animo tuus,*

Stephanus Goffe.

R 2

Brevi

Londini, decimo  
 die Novembris,  
 Sæculo veteri.



Brevi accipies Literas ab ipso Archiepiscopo, quas nunc per ingentem negotiorum molem expedire non licuit. Et quoniam Liber tuus non patitur moram, hanc mihi provinciam injunxit. Literæ tuæ ad ornatiss. Franciscum Junium missæ ad me illico deferentur.

## CXC.V.

Cl. V. Ger. Jo. Vossio.

Vir Clarissime,

**N**ON dubito quin Literæ vestræ ad me datæ de Dampporto jamdudum sint in manibus Reverendissimi honoratissimique nostri Domini Cantuariensis. Atque hoc tibi debitum fuit, ut ex illis legeret quam serio & sedulo rem nostram, nec tam nostram quam Christi agas. Hoc feci privati cujusdam amici ope, inconsulto etiam ipso Boswelio. Habet enim ille alios tibi gratias referendi modos: nam perfectis illis ad me tuis maximas egit, & pollicitus est se brevi ad te scripturum. Interim si quid habeas, ne dubites ad me dare, cogitesque in nullius manus literas vestras deventuras, quin & inde honorem & gratias ingentes reportabis. Dampportus per biduum Hagæ fuit, nec Boswelium invisit. Quid sentis? an omnia sana? an non hoc rei indicium est? Literas dimissorias nondum habet; sed jam petit ex Anglia. Quæ hæc fraus? Nam certissimum est ipsum aufugisse à grege suo: De quæstione quidem de Ceremoniis contra illum motâ, expecto quotidie Literas quæ mira narrabunt. Audio ipsum ferocissime contra Genuflectionem nostram concionatum fuisse, filiumque tuum Cantabrigiensem ægre hoc tulisse. Hoc si verum sit velim cum aliis quando occurrent scribas. Vobis utrisque maximas ago gratias. Chartulam hanc perfectam rogo ut comburas, illud enim de Cantuariensi tibi soli dictum velim. Iterum vale.

Tuus,

Stephanus Goffe.

Per latorem hunc literæ tuæ ad me certissime venient, sive hic, sive quod sapius Hagæ fuero, atque per illum, ut narrabit melius, poteris singulis septimanis, cum opus fuerit, benè mittere.

## CXC.VI.

Cl. Ger. Vossio S. P.

Vir Clarissime &amp; optime,

**Q**UANTUM doleo improvisum filii tui discessum prolixiores literas non pati: Accedit etiam crastina concionandi cura. Utcunque virum præstantissimum mihi que plane sine merito amicissimum insalutatum præterire non possum. Habes me obsequio quam intime devinctum; Utinam aliquando contingeret exprimendi facultas; Hactenus perventum non licuit ex Angliâ quicquam rescire; Plurima expecto à Chariss. nostro Boswelio, qui quantum debet meritissimo de se & Ecclesiâ nostrâ Vossio, mihi in mandatis dedit, ut vice suâ quam possum seriò agnoscerem. Forsan hoc ipse Literis suis præstitit, sic enim statuit aliquandiu Briellæ impeditus. Ex filii reditu plura velim de Nihusio Abbate intelligere. Quem provocationis suæ exitum invenit. Quid adhuc ediderit, quid agit. Et si per negotia tua liceret vehementer erudiri cupio quâ ratione, & quibus authoribus optime possem instrui adversus illud cui maxime innotantur Pontificii de Schismate nostro ab Ecclesiâ Romanâ. Sed plura nunc non licet. Hanc Seldeni nostri Diatribam quod incompectam habes, hisce temporis angustiis imputabis; Utcunque quia nondum ad manus tuas pervenisse suspicabar, obsequii mei testem mittere gestiebam. Omnia mea boni consulas oro. Vale.

vi. Idus Aprilis.  
cIdo Idc xxxiv.  
Hagæ-Comiti.

Totus Tuus,

Stephanus Goffe.

## CXC.VII.

Cl. Ger. Vossio S. P.

Vir amplissime clarissimeque,

**L**Iteras has nunc ad manus meas ex Angliâ delatas statim tibi mittendas duxi, alioqui Deo volente me latorem habituræ essent post paucos dies. Ex illis quam gratum sit quod pro Ecclesiâ nostrâ moliris facile intelliges, cum is qui scribit sit Regi à sacris, & cum Archiep. nostri (ni fallor) literis ad te missus cum Comitem

tem Arundelianum huc comitatus fuerit. Sed vereor ne propter impeditum iter diu scriptæ fuerint; videntur enim illæ, quæ ad me dantur, primis meis solis respondere; Expecto adhuc recentiores, & à viro longè potentiori; Interim ex his quædam discas; illud imprimis ratum facit Transfugam illum nunquam in quæstionem vocatum fuisse de rebus Ecclesiasticis; sed planè desertorem fuisse militiæ suæ, quod jure nostro castrensi gravius est puniendum, sin ex partium suarum zelo voti compos fiet; fruatur suo grege Pastori simillimo vere vario (& Jacobini illius instar) maculis interstincto. Tuæ utcunque pietati, & insigni erga Matrem nostram Ecclesiam amor, immortales debentur gratiæ. Raptim hæc. Vale, Vir optime, & me ama: quem vereor, ne diutius quam velim, habeas in his regionibus inquilinum. Nam & à Rege ipso & Archiepiscopo designatus sum Pastor Mercatorum Nostratum, qui Delphis habitant, in locum Forbesii; hoc est ingentis oneris & invidiæ. Sed Dii meliora! Hoc esset vel Amicorum contra proverbium ἀδελφῶν ὄνειδος. Adeoque per totum ferè mensem Hagæ versatus fui cum Prolegato nostro ut istud onus inoffenso Rege declinarem: quod spero. Boswellius festinatò petit Angliam, sed reversurus. Tu tamen ante accipies ab ipso Literas (ut ait) debitissimas. Iterum vale.

Lugd. Batavor.  
vii. Kal. Martii.  
A. D. 1634.

*Amplitudinis Vestræ*

*studiosissimus,*

Steph. Goffe.

Ecce nunc alias accipio Literas quæ afferunt Metaphysici nostri Baronis non tam protestationem quam Literarii Belli provocationem; vix licet mihi jam percurrere. Sed Clariss. Barlæo (quæso) tradas ut viri φιλαυτίαν veritati (quam jactat) inimicissimam advertat.

#### CXCVIII.

*Cl. Ger. Joh. Vossio S. in Christo.*

**A**ccipies hic (mihi merito charissime) unam, eandemque brevem Epistolam. In eâ tribus tuis mihi exoptatissimis Responsionem, sed qualem moles negotiorum (quâ penè opprimor) permittit,

rudem scilicet & incultam, solâ brevitate gratam, solo amore candidam. Reliqua tota una Litura sunt.

Et primis Literis tuis de Tempestate, quæ domum tuam invasit, & filium prostravit, tam meritis quam natura chariorem, consultius non respondi, ne manus meas in crudum adhuc vulnus immitterem. Spero jam cicatricem contraxit. Et tu quod decet, teque dignum est, fecisti, patienter te, & tua Deo, (qui suis, quæ optima novit, impertire solet) submittendo. Ibi enim aut acquiescendum est, aut in hac vita nullibi. Sed opera quædam filii tui si placet edere, quibus ille etiam si mortuus luce fruatur, aut perfecta des nobis aut nulla.

De Novatoribus nostris apud vos quæ scribis vera sunt, quæ contra illos conaris pia, & pro Pace Ecclesiæ. Si nolint se ad pacatiora studia recipere (& certè nolunt) sint quod esse cupiunt, inter pusillos Gigantes, modo sint quod & esse, & haberi merentur, inter doctos Scioli, & inter prudentes Temerarii.

Literæ tuæ secundæ Causam Blauii tantum exponunt Patris, Filique, & quo consilio Twissum typis mandarit. Certè prudenter Farnabius, qui mentionem Privilegii sui fecit; sed valdè inconsultò Londinenses Typographi Privilegia sua silentio damnarunt. Unde enim Exteri caveant quod nesciunt? Num Prophetas volunt Typographos esse? Sed responsum his Literis retulit diu abhinc Blauii Filius, utpote quem statim post Literas tuas acceptas, sine ulteriori processu, sumptibusve, dimissi è Curia in tui solius gratiam. Responsum putavi illud scripto melius, præcipuè cum tunc nihil mihi daretur ocii. Et video ex subsequentibus Literis tuis, fidum se fuisse narrando tibi Parentique suo quid in ea re fecerim. Gratias enim Literæ tuæ referunt, & tuas & Patris. In Literis autem tuis novissimè scriptis, non solum lego gratias mihi supra meritum repensas, sed hoc etiam, te labores tuos Grammaticos ad finem perduxisse. Gaudeo certè, & eò magis, quia semper cogito de Baronio. Librum etiam unum cum Literis misisti, tradidit mihi Goffius, qui & ante hæc Literas has ad te detulisset, si citius redire potuisset. Goffium antea non vidi, de eo, modestiâ, & doctrina ejus ab aliis, ut etiam à te ipso sapius audivi. Si pergat (nil dubito) possit pro meritis præmium & expectare & recipere.

Confi-

Consilium tuum in Editione horum Librorum, nempe ut sub nomine & auspiciis, aut Principis Walliæ aut Eboracensis, prodeant, valde probavi. Necessarium tamen duxi illud cum Serenissimo Rege Carolo communicare. Partim ut intelligat quàm memor & gratus sis pro Beneficio in te collato; partim ut sciat obsequium tuum non sibi solum, sed & suis paratissimum: præcipue vero, ut pones illum sit eligere utri horum Principum Illustrium Liber iste tuus inscriberetur, an utrisque? Gratosè quidem accipit Rex optimus, quod intendis. *Et forte aliquando (inquit) Nomen fronte inscriptum, invitabit filium meum ad ejus lectionem, licet fortè minus seriam.* Hoc verò jussit, ut tibi rescriberem; velle se ut Libri hujus dedicatio (quando ita tibi placuerit) sit Illustrissimo Walliæ Carolo. Perge nunc, & Librum hunc habeamus publici juris.

De Novatoribus iterum in his Literis scribis. Certè quod vellent turbare omnia, suum est, quod non possunt, Dei. Interim miserrimè laceratur Ecclesiæ Christi facies, Corpusque; neque (Disciplinâ penitus fracta & concussa) videt ipsa Prudentia, quibus artibus vulneribus hisce possit succurri.

De Johanne tuo, doleo quod nequeas in eo illum Studiorum amorem quem desideras excitare. Sed quum res ita se habeant, aliâ aggrediendum est viâ, & sapienter meo judicio facis, si alia animo tuo agitare incipias. De reditu autem ejus in Angliam noli cogitare. Nam mensis vix præterit, quo publica fama Cantabrigiæ increbuit, illum non solum fidem dedisse mulieri illi, de quâ antea scripsi; sed cum eâ solennia matrimonii publicè in facie Ecclesiæ celebrasse. Nominatur Locus Tempusque. Præpositus & Socii Collegii Jesu consilia ineunt, de alio in ejus locum, utpote sic vacantem, surrogando. Fama etiam in aures meas volat. Ego ad Ecclesiam Parochialem nominatam mitto, Registrum Matrimoniale (quo in singulis Parochiis utimur) inspiciendum curo; Nihil ibi reperitur de Solennizatione Matrimonii. Desistunt ergo ab intentione suâ Socii, nec alium eligunt. Sed vides quæ sit opinio, quæ expectatio; & si redierit filius, certo certius aliquid eveniet quod nolis. Et ut finis sit huic malo, optimè opinor consules & famæ & salutis filii tui, si ibi eum retineas, disponasq; ut ei magis congruum esse inveneris. Resignatio autem Socie-

tatis in Collegio Jesu, in forma Juris manu propriâ subscripta, si ad me mittatur, ut in manus Præpositi illius Collegii tradatur, quamprimum curabo, ut sic honestè à Collegio discedat. Aliter probabile est, illos tam diu absentem ulterius non expectaturos, sed locum ejus vacuum pronunciaturos, quod nollem factum.

Quod reliquum est, gaudeo te vinculis morbi tui liberatum, ut possis iterum Ecclesiæ, Reipub. & Amicis inservire. Valeas. Ex animo sic optat

*Dat. ex Aedibus meis  
Lamb. Febr. 27. 1634.  
Stilo nostro.*

*Amicissimus Tibi,*

Guil. Cant.

### CXCIX.

Clarissime Vir, Amice observande,

**F**Ungens non ita pridem legatione nomine Serenissimi Regis mei ad complures in hoc occidentali tractu Europæ Principes, non postremum duxi in tanta rerum mole atque continuo negotiorum strepitu, virorum virtute, consilio, doctrina præstantiorum, consortio & conversatione refici ac relaxari. Id cum ubique apprime curarem, tum in fœderatis Belgii partibus, ob hominum honore & gravitate florentissimorum frequentiam atque humanitatem, singulariter mihi non prætermittendum existimaram: Tot autem & tantis obrutus impedimentis cum remissius desiderio meo obsequi coactus essem, nihil ardentius expetivi, quam vel tibi uni innotescere, tuamque amicitiam atque amorem conciliare, utpote cujus insignis prudentia ac eruditio in pluribus Europæ partibus clarissimam meruit famam. Sed cum id mihi sive urgentium mearum occupationum multitudine sive temporis inopia & brevitate ereptum sit, pro eo ac debeo graviter molestèque fero. Interim tamen cum id quod mihi non accidit, filium meum consecutum esse videam, eumque non solum semel in amorem receptum foveri abs te, sed ex intimo affectu optimis monitis dirigi & in literis juvari probè sciam, gratulandum mihi existimo: eoque magis postquam à nonnullis intellexi qua facilitate recipias, humanitate tractes, sedulitate exerceas ingenia tuæ curæ commissa. Quippe arbitror filium etiam meum majori utilitati sibi, mihi solatio, Patriæ usui posse existere, si ei, ut ex tuæ sapientiæ fonte in  
sui



sui ingenii cultum rivulum aliquem attraheret, spatium temporis longius concederetur. Nunc cum & mea privata rationes & præsens rerum Status exigat, ut in Poloniam quamprimum revertatur, quod illum in commercium tuarum literarum sapientiaque lubens adsciveris, & in profectu ejus ita desudaveris, ut non sine insigni fructu ac emolumento tam celebris viri in bonis literis auxilia sensurus sit, eam quam possum tibi maximam habeo gratiam. Ita profecto & me in præconia laudum tuarum traxisti, & filium meum ad omne officii genus ac grati animi testificationem obligasti. Quod reliquum est vicissim mutui mei affectus declarandi occasionem exoptans, optimæ valetudinis magnæque sapientiæ maxima incrementa à Deo Opt. Max. tibi appecor. Vale.

*Dabam in Succ.  
16. Maii. 1634.*

*Clar. D. Vestræ*

*Studiofissimus,*

*Joan. Sawadski*

*Guber. Suecensis.*

CC.

*Amicorum Opt. Max.*

**Q**Uas dedisti pridie Calendas Maias nundius-tertius accepi: quibus certè percussisti vehementer, dum de obitu Dionysii tui scribis. Doleo majorem in modum exceptum tibi tantum filium, mihi verò, filioque item meo, amicorum rarum, orbi virum aliquando certe maximum: sed ostendere illum Deus voluit potius, quam concedere. Non solamen ullum offero quod abunde à te habes: ac largitur tibi ratio, quod daturum esset tempus. Maimoniden ejus, Caesaremque, & Reidanum, quos promittis avide expecto: & acculo Elzevirium, qui cum ad nos commearet te in transitu compellandum non putavit. Nollem factum. Grata mihi mentio de Noomio nostro, sed quod queritur edi à me Bibliothecam meam Atticam, & inter nos aliter olim convenisse, fallit virum optimum, & amicissimum, hic memoria. De altero quod restat, opere nempe Bibliotheca Græca, egeramus; quam si edere etiamnum est illic animus, per me licet: ego libens acquiescam: ac si à me edi velit, gratum

erit: & Laborem quoque istum impendam Reipub. Literaria. Fac me quaeso proximis tuis certior. Interim consilio tuo obsequutus, testandæ veteri amicitiae meæque in amando ipso constantiae, dedicabo ejus nomini opus sane luculentum Creticarum Antiquitatum Libros quatuor, quod secundo statim tomo comparebit. De dissidio Typographorum, sanè doleo; magis etiam quod per hoc editio meorum operum differatur. Quaeso, quod promittis, urge & effcito, ut admoveat tandem manum. Jam salivam movi multis in hoc Regno eruditis, & magnatibus: itaque ne fidem meam hic destituat; ac ridendum aut sugillandum me prostituat. Regnum Atticum admodum mendosè excusum est; ut errata tibi mitto quæ Typographus tempestivè emendabit. Perlegantur quoque Græcorum Auctorum loca, quæ festinans non insepexi. Nullus dubito quin mendorum illic plaustra inveniantur. Mitto nunc præfationem primo Tomo præfigendam; missurus statim quicquid ad secundum Tomum pertinebit, ubi primum inchoatum intellexero. Habe tamen operum illorum elenchum, quæ in eo comparebunt. Vale amico- rum maxime. Uxor mea quàm potest amantissime tuam, liberi liberos saluant, & imprimis filia filiam.

*Soræ xii. Julii.  
c1634 xxxiv.*

*Ætatem Tuam,*

*J. Meursius.*

Adjunctas ad Spelmannum, quaeso, ut primâ occasione curare velis.

CCI.

*Viro Reverendo & Clarissimo Gerardo  
Johanni Vossio, S. D. Henricus  
Ernstius.*

**I**Mmaturum obitum filii tui credo prohibuisse, quo minus mihi ad meas responderes. Incredibili sanè desiderio tuas frustra hæcenus expectavi: & nescio certè quo malo sydere ego ad scribendum eo, quum nunquam ab iis, à quibus velim, responsum auferre possim. Suspicio me incomptis meis literis vobis elegantiae Patronis talem movere nausæam ut simulac horridum & incultum sermonem quando fastiditis, mei etiam memoriam exuatis. Verum concedite aliquid nobis inferioribus;

bus; gradus posuit Architectus omnium. Caterum tui silentii id esse causæ existimo, quod egregio isto tuo filio orbatus sis. Eheu conditionem reipublicæ literariæ! quæ tot gravibus ictibus percellitur, ac pene prosternitur, quot illustria membra amittit, ex quibus filius tuus certè non infimus. Doleo tuam vicem, doleo mestissimæ tuæ conjugis dolorem; quibus elegantissimum & divinum istud ingenium maturum videre, fructumque illum colligere non licuit. Sed sufficiat vobis, Deum vos beasse filio, cujus ingenii magnitudinem viri docti mirantur, cujusque mortem boni omnes dolentius ferunt. Mortuus est, non interiit, vocatus est & non obtorto, quod dicitur, collo tractus, ab eo ad quem omnes pii pergimus. Tuum erit compescere mentem aliisque qui tua auctoritate nituntur, monstrare, virum pium esse immobilem & stare in quadrato. Peto abs te; Cl. Domine Vossi, pro tua in me singulari & maxima benevolentia, proque constanti nostra amicitia, ut mihi respondeas, meque certiorrem facias de libello meo, in quo Publii Mimi, quem apud te deposui, num excusus sit. Si putas id apud vos fieri haut posse, mihi velim eum unà cum tuis Notis remittas, tum illum heic, ubi valde desideratur, typis dabo rescribendum. Operam dabo, ut iis, quæ ad metrum faciunt, satisfacere possim. Literas tuas tradendas dare comode potes Domino Johanni Mulenio illustris & generosi Domini Oligeri Rosekrantzii filii Erici apud vos comiti. Ego enim jam sum cum incomparabili isto Heroe: cujus virtutes & eruditio in hoc vertuntur, ut Deum pura mente, hoc est rejectis hujus mundi vanitatibus, colat, proximoque suo serio inserviat. Audi factum æterna memoria dignum. Optimus hic Vir, quum per omnes gradus ad honorem & dignitatem fastigium pervenisset, illudque inter sui similes teneret, sua se sponte eo abdicavit, ut Deo suo melius servire posset. Utinam tibi vir ille familiaris esset notus! tibi dico, qui laudes ejus ad posteritatem mittere, maximè es idoneus. Plura ad te hac de re scribere non audeo, ne videar prudentiæ tuæ diffidere. Quare te rogo, ut mihi rescribas, existimans, neminem te tui amantorem habere. Salve in Christo Jesu Amicorum optime, nobilissimamque conjugem & suavissimos liberos salvere jube.

*Dab. Rosenholmi iv. Non. Julii. cId Idc xxxiv.*

Scriptâ jam epistolâ vocat me illustris noster Heros, & jubet te plurimum salvere, obnixè rogans, ut se excusatum habeas, quod ipse tibi non responderit, sed officium hoc suum mihi delegaverit: id quod jam arduis negotiis pæne obrutus præstare non potuit, proxima occasione se compensaturum pollicetur. Iterum vale etiam atque etiam.

Verum hæc frustra, siquidem generosus Dominus se ipsum ad scribendum accingit. Tu velim qua es humanitate garulo amico ignoscas.

## CCII.

*Vir Celeber. Ger. Vossi, Amice desiderate.*

Optarim utique quàm non tantum privatis tuis in me meosque, verum etiam publicis in rem literariam meliorem meritis, plurimum me juxta cum bonis omnibus debere, lubens profiteor; tam etiam commoditatem satis opportunam, jampridem atque in præsens etiam oblatam fuisse, qua id manu saltem, cum aliter nondum datum sit, ingenue tibi testatum facerem. Quando autem id mihi hætenus pluribus se ingerentibus impedimentis, denegatum esse fide sanctâ tibi testari possum, spero omnino, animum in te meum, quem tibi totum debere agnoscere non nequis, etiam officiis quibusvis deditum & promptum nunquam non debere me velle tibi, pauculis saltem lineolis facile me posse tibi comprobare. Ericum filium meum, qui se, magno tuo merito, totum tuum jam sapius mihi professus est, urgentibus de causis domum modo revoco, monitis rectis & solidis probè instruendum, priusquam mundo ulteriori, errore seculi præsentis violentiore, committatur, quem tamen intra pauculos menses ad vos rediturum, nolim omnino Belgio vestro valedicere, quam sapientia tua, quicquid dictare equidem ipsi sufficiam, confirmari sibi coram deprehenderit. Plurima aliàs essent, de quibus te convenire jam valde pridem gestio, verum intempestiva Tabellarii præsentis compellatione, temporis justâ usurâ exclusus, cum summo meo desiderio satis non posse modò fieri deprehendam, opportunam utique commoditatem mihi voto continuo exoptare non desinam, quousque etiam eâ ex parte, ipsum Fatum meum, quod nullum nisi solius Dei effectum agnosco, me ex assè bearit. Interea

terea cum tuis omnibus supercœlesti nostro  
*Beatus* religiose commendatus vale optime.

Ex Rosenholmano  
meo 3. Non. Julii  
Anno 1634.

Oligerus G. Rosencrantz.

## CCIII.

**E**T si serius aliquantò rescribam, Vir  
Clar. & à me non una ratione ex-  
cusari possit (non ignoras opinor Capituli  
Generalis Celebratione solemnem nobis  
per statuta nostra semper esse Junium; ut &  
Novembrem mensem, eaque negotiis Ec-  
clesiæ nostræ cujuscunque generis expedi-  
endis destinata esse Capitula) eò tamen  
minus mihi de excusatione laborandum,  
quod etsi non verbis, re tamen ipsa literis  
tuis dudum jam à me satisfactum est. Si-  
mulac enim tuas accepi Kal. Maii datas,  
25. libras (quantum Londoni tum casu  
versanti mihi in promptu erat:) Peistero  
ipsi numeravi; ceteras autem 25. paucos  
post dies, Beviro Peistrii Delegato, Can-  
tuariam reversus. Sed ut signatius rem  
intelligas, scripta est apocha Peysteri 23.  
Maii; Beviri autem, 5 Jun. Reliqui si quid  
hic tibi negotii, cum superioribus meis literis  
sit omnis ejus ratio tibi exposita, tu autem  
ejus mentionem in tuis omiseris, non est  
quod hoc tempore plura super eo addam.  
Illud tamen non te celabo, Illustriss.  
Dominum Archiepiscopum (cui per sta-  
tuta nostra peculiaris Cantuariensis hu-  
jus Ecclesiæ cura commissa est, summa-  
que hic post Regem autoritas) nuper  
Archiepiscopalem Visitationem per Dele-  
gatos instituisse, multaque tum ad univer-  
sùm hujus Ecclesiæ statum, tum ad singu-  
lorum Canonicorum jura pertinentia ad  
ipsum relata esse, & ab ejus cognitione  
jam pendere, quæ cum erunt judicata, ii  
quid ad te pertinebit, per me resciturus es.  
Luctum tuum ob mortem charissimi tui  
Dionysii prolixè narrabant tuæ, quem  
etsi maximum fuisse, prout à te magno  
affectu parique facundia descriptus est,  
animo concipiebam cum legerim tuas,  
non tamen aut iniquus, aut expecta-  
tione mea major mihi visus est. Si enim  
à me, si ab aliis hic plurimis, quibus ali-  
quot duntaxat ingenii sui præludiis inno-  
tuerat, ita exceptus est tristissimus ille nun-  
cius, & multos à nobis gemitus expri-  
meret, diuturnoque doloris sensu afficeret;  
quantum tuum patris indulgentissimi, do-  
ctissimi, simul & præceptoris diligentissimi

dolorem fuisse amissò tali filio necesse fu-  
erit, facile erat conjicere. Ego sanè ita  
affectus sum, ut nisi te hominem haud  
vulgari more ad pompam & fastum lite-  
ratum, sed verè ac solide sapientem cogi-  
tasset, oneri tam gravi ferendo parem  
fore planè desperasset. Sed noro plura  
de eo, ne vel testam Demeam, tuum do-  
lorem renovem; vel te consolando, ni-  
mium ipse mihi videar tribuere, quasi me-  
liora possim ego suggerere, quam quæ  
prompta tibi de tuo ac parata fuisse, quo-  
rumque utilitatem jam usu ipso perceperis,  
tuis ipse literis abunde testatus es. Reli-  
quum igitur est, ut de Antonino tibi re-  
spondeam. Narras te bina ejus exempla-  
ria accepisse; sed literarum, quæ cum ex-  
emplaribus ad te curanda Peistero tradita  
sunt, nullam facis mentionem, ut mini-  
me dubium sit, eas periisse. Rogabam te  
per illas (scripta autem sunt illa, si bene  
memini, circa medium Januarium:) ut  
binorum exemplarium alterum ad virum  
amplissimum, & doctissimum Dominum  
Boswellum, Regium istic Oratorem, nisi  
aliter tibi ipsi videretur, sive tuo sive meo  
nomine curares. Is ad vos jam redierit  
necne, compertum non habe. Audio e-  
nim nuper eum hic fuisse: sed audio tan-  
tum. Non enim hætenus accidit ut  
viderem. Jam sub prælo est, & brevi, ut  
audio, proditura secunda ejus libri editio;  
non me sane procurante, (in aliis enim  
jam pridem sum) sed Bibliopolâ, cujus im-  
pensis prima prodit, suis compendiis con-  
sulente. Valde enim, ut videtur, pri-  
mam Editionem quaestuosam expertus sit,  
cum intra paucos menses direpta sint omnia  
Exemplaria. Quod de quibusdam locis sen-  
tentiam tuam proponis, magnam in eo  
gratiam à me inivisti, qui magno redime-  
rem familiarem tibi Linguam Anglicam,  
ut plura loca comparare sine alterius ope  
potuisses. Lib. 1. ubi utraque Xil. editio de  
Sexto, τὸ ἀδυνάτητον ἢ οἰοῦναι, tu conjicis,  
τὸ ἀδυνάτητον τὸ ἀνομήναι, quasi Antoninus  
Sextum ab ingenua quadam simplicitate  
(si mentem tuam rectè capio) commenda-  
ret, quod amicorum peccata pari quadam  
cum vinolentis (qui minime perspicaces  
hic esse solent) facilitate præterirret. Ego  
per ἢ οἰοῦναι, eos intelligebam, quibus  
οἴστος & οἴναι vulgò in Philosophorum libris  
tribuitur, τὸ ἰδιώτης nempe, & ἀπαιδευτός; atq;  
inde commendari Sextum, quod talis ac  
tantus Philosophus ostendenda sapientiæ  
occasionem pro cæterorum Sophistarum,  
ἢ ἰδιωτικῶς more (illustre Exemplum  
apud Aulum Gellium, lib. 1. cap. 2.)



qui quocunque loco quocunque tempore, Theoremata & Scita Stoica crepare solebant, minime captaret ipse; sed cum inter homines idiotas & Philosophiæ rudes versaretur, ab intempestivis ejusmodi disputationibus cautè abstineret, ne se pariter & Philosophiam ipsorum odio & contemptui temere exponeret. Quo & ista Epicteti pertinent, Wolf. edit. Cap. 68.

μη λάλει τὸ πολὺ ἐν ἰδιώταις περὶ τῶν θεωρημάτων,

&c. quæ & proximo cap. repetuntur.

Qualia & ex aliis plurimis multa adduci possint. Vocem autem ἀδωρήτων, in hunc

sensum ex Laertio exponebam, ubi ex

Stoicorum Sententia virtutes alias esse

θεωρηματικὰς, τὰς ἔχουσας ὅσας αὐτὴν ἐν θεωρημάτων,

asserit; alias autem ἀδωρήτους ἐπ' ἔχουσιν, &c.

Si cui magis arridebit ut verba ista passively accipiantur, & τὰ διωκόμενα, sint dogmata

ipsa & opiniones Philosophorum, non ego

valde repugnarim; præcipuè si exemplo

non careat: Eadem autem tum fuerit

Sententia. Hæc quoque super obscuro

hoc loco, quæ etsi non tam satisfaciunt

ipsi mihi, ut pro veris & certis ausim ob-

trudere; haud minus tamen etiam nunc

arident, quàm quod tibi obiter hoc a-

genti venit in mentem. Si tamen re ac-

curatius expensâ, (quod ut facere mea

causâ ne graveris etiam atq; etiam te rogo)

in priori sententia persistiteris, tanti facio

tuum judicium, ut minime dissensus

sim. Alio loco, ubi Xyl. editio pag. 155.

ἐνεργητικόν, reponis tu ἐνεργητικόν; ita omnino

sensus postulat. Sed, quod tu non ad-

vertisti, jam in Notis Xylander ipse mo-

nuerat, & in Versione expresserat, quod

& à me factum est. p. 158. quod legitur

ὅτι τὸ ἀδωρὲ μὴ Σωφρον, τὸ φιλοκίχον, &c.

corrigendum fuisse τὸ Οὐδὲν, videris innu-

ere; nec tu solus ita censeres. Ita enim

(ut alios omittam) hunc locum edidit

præstantissimus Salmasius, in Hist. Aug.

pag. 77. Ego tamen adhuc ἐνέργειαν, cum

utrumque tam *Veri* quam *Severi* nomen

ab Antonino nostro (quem Catilium Se-

verum à materno proavo nominatum

testis Jul. Capitol.) ad hunc Lucium Com-

modum, jam imperii consortem, transire

potuerit. Imo vero ita rem habere li-

quidò affirmare possumus, si Galeno fi-

des, qui περὶ τοῦ ἀπὸ τῆς πνεύματος, exertè

Anton. Imperatorem, Severi nomen, quo

prius appellabatur ipse, in Lucium transu-

lisse prodit. At Galeni codices deprava-

tos hic censet Baron. Ann. Ch. 163. §. IV.

& pro *Severo*, rescribit ipse *Verum*. Cui

fanè sententiæ alter Galeni locus (à Ba-

ronio tamen hic præteritus) ἀνὰ τὴν αἰ-

δίαν βίβλιν. non parum favere videtur, ubi Galenus cum de mutatione nominis idem dicat, Verum non Severum scriptum præferunt editi Codices. Sed quicquid hujus sit, cum non deesse viderem, quod objici possit, si quid in Antonino, non prius expensis utrinque rationibus, mutarem; expendendi autem locum fore tuum maxime opportunum, si quando Antoninus nostris Commentariis illustratus Græce prodiret in lucem; ideo in hac editione consultò prætermissa est omnis rei ejus mentio. Nam notulæ illæ quæ nunc γράματος ἔχουσιν editæ sunt, vix centesima pars sunt eorum, quæ nobis in hunc divinum Scriptorem pridem jam notata sunt. Xylanderum Interpretem, virum doctissimum, optimè de literis meritum, agnosco libens. Eundem tamen in hujus Scripti versione negligentissimè vel infelicissimè versatum esse, negabit nemo qui Græca accuratè expensurus est, & mihi est exploratissimum. Nobis tamen Anton. legentibus, ipsum intelligere, non Interpretis errores fugillare, propositum fuit; etsi quæ inter legendum observata sunt, non ut aliis ea probarem; sed ut mihi ipsi satisfacerem; primò à me factum est. Quare, etsi iidem, qui versionis Anglicanæ, animi oblectandi causâ à me susceptæ, publicandæ authores fuerunt; iidem ut Græcam editionem adornem, valdè suadeant; agrè tamen, quantum video, præstituri sumus. Sacra enim profitentes, alia scilicet nos hic occupatos habent: inter alia, concionandi grave onus; nec otii tam felices sumus, ut ad ista divertere, utcumque gratissima & optatissima, sæpe vacet. Sed epistolæ modum jam excessi. Vale, Vir præstantissime, & amare perge

Cant. post. Id.  
Julii, 1634.

Tuum, quantus quantus est,

Mer. Casaubon.

Mitte quæso cum proxime scribes ad Beysterum talem Apocham, qualem jam ferè biennium est, cum misisti; ea nempe præscriptione, te ex præbenda tua ab initio ad Octob. mensem 1634. tibi debebatur, rectè ac plenè accepisse. Sed mitte eâ conditione, ut non nisi exacto Sept. eam mihi tradat, cum præter 25 libras, quæ jam tibi paratæ sunt; alteras 25. quæ tum debebuntur, acceperit. Plurimam quæso tuæ tuisque à me meaque & universò nostro Collegio dic salutem.

## CCIV.

*Excellentissimo, & Clarissimo Viro, D.  
Gerardo Joanni Vossio, Historiarum  
Professori solertissimo.*

Postquam, Vir Clarissime, humanitate tua illectus, amicitiam tuam ambivi, memini me semel tantum ad te dedisse literas: at quod non sæpius à me tibi fuerint redditæ, non modò non negligentia meæ, sed ne occupationi quidem tribues. Quoties enim te, vel coram vel per literas, alloqui cupio, toties pudor hunc conatum supprimit; eò quòd occupationem te credam, quam ut paululum temporis amico, novo quidem, & nuper nato, sed tui amantissimo, in tanta copia amicorum, multo me digniorum, tribuere possis. Verumtamen perfricare frontem malui, quàm pudore diutius à tua humanitate secludi. Ne autem vacuus in tuum conspectum venirem, ecce donum, quod superiori anno, non tam elaboravi, quam importunis quorundam flagitationibus, deproperans præcipitavi; ut necdum ipsi mihi satisfaciat; nempe instructionem de ratione studii Theologici. Hanc si pellegeris, maximè ubi de ratione studii Hebræi, ac Linguarum Orientalium agitur, tuumque mihi iudicium sincere communicaveris, feceris mihi gratissimum. Sanè in studio Hebræo, & Linguarum cognatarum, ut multum inde à juventute, auspiciis D. Buxtorfii, operæ locavi: ita nunc in professione experientiæ, eò usque provectus sum, ut auditores meos, non semel semestri, ac nuper diligentiores nonnullos, trimestri spatio, impensis ad summum, quinque in hebdomade horis, hucusque perfecero, ut textum quemlibet Hebræum, adhibita versione, & Lexico, facillè resolvere, ac intelligere queant. Tuâ humanitate fretus, quæ tacere mallet, scribo; sperans fore, ut tuâ me amicitia digneris, meique aliquando, ubi offeretur occasio, rationem habeas, & ubi à negotiis urgentioribus dabitur respiratio, (quod tamen vix postulare, nedum expectare audeo) rescribas. Caterum sic existimes velim, me tui non observantem modo, sed & observantissimum esse, nihilque fore tuâ amicitia majus; idque semper dabo operam, ac omnibus officiis meis efficiam, ut ita esse verè possis judicare. Deus te bono publico diu ferveat incolumem.

*Dab. Hardervici,  
Anno 1634. Aug.  
28. St. vet.*

*T. C. observantissimus,*

Henr. à Dieft, Theol. Prof.

## CCV.

*Eruditissimo, Clarissimoque Viro Amico  
æternum colendo, D. D. Gerardo Jo-  
anni Vossio, Isaacus Basirius S. D.*

Quod ad te studiis gravissimis distentum perpetuò perrumpere audeo, vir nostri sæculi eruditissime, facit insignis tua illa humanitas, quâ in tuis præterpropter Quadriennium ad me datis ad hoc officii genus, cunctantem alioquin sua mandata animavit. Nempe veteri, quâ te æternum prosequor, veneratione defungi identidem gestit animus: quinimo istuc ipsum gratitudinis leges imperant; præclaris tuis monitis ac blandis præceptionibus factus erectior, meum exinde in bonis literis profectum qualemcunque, habeo tibi quod acceptum feram. Nimirum tuis hortamentis, quibus me per literas dignatus es, obsecundare totus adnitor; votorum summam complexurus si me meaque conamina, tametsi haud ea unquam futura sunt tanti tibi aliisque Reipub. literariæ Principibus, quandoque approbem seculares literas, aliquampridem abdicare habui necesse, uti in Theologica studia totus effunderer, & Augustissimæ animarum scientiæ me measque omnes Scholasticas curas devoverem unicè: hinc in perorationum vernacularum provincia assiduo politiora omnia studia sensim obsolescunt: neque verò piget sic à Toga ad Pallium transgredi, sed id cautor, quo tu nil mirere si fluo luculentus, & quoties calamus agitandus est, frigeam totus: imprimis si incomparabile tuum illud nomen appellandum mihi est. Emoriar, ni minore negotio putem me ad Senatum integrum literatorum posse dicere. Sed (quâ es æquitate) missis defensionibus. Ad Patres subinde divertor, Græcos imprimis, quos ut secundum sacrosanctum Scripturarum Oraculum profunde suspicio: ita, Vir summe, si aliquid tuum super iis consilium, vel verbulo *ἐὶς δὲ καὶ ἀποψύξω*, exorare liceret, omnes omnino habeam causas, te quod facio æternum venerandi. Nempe tametsi in eam rem Pedariorum Scriptorum est affatim, tamen de ordine Lectionis, de delectu, de charactere quo spuria à genuinis queant secerni, si te ducem vel verbo impetrem (cujus in eo disquisitionum genere præclarum studium, Historiæ Pelagianæ, Scriptorum veterum Catalogi, præcipua atque elaboratissima singula loquantur & orbis admiratur;) nã in sacratissima illa venerabilis Antiquitatis

S 2

Pene-

Penetralia continuo involo. Tu qua es in studiosos mei ordinis incredibili pietate, meum hac in parte studium, datâ occasione, & per otium aliquando tuum adjuvare dignator. Aliquid novi ex tuis Commutationibus frequenti Doctorem hic celestimate efflagitari scito: utinam ne lucem iis, nobis autem fructum diutius invideres. Convivo illustrissimo Præsuli D. Thomæ Mortono, Antistiti Dunelmensi, cujus Apologia Catholica, causa item Regia adversus Rob. Bell. de Officio Principis Latine extant. Is me sibi à sacris adoptavit, abhinc quinquennium; qui ut est rara eruditione, ita tua, quibus collustraris, scripta apud se habet. Franciscum tuum salutavi pridem, aliquoties per literas, adeoque utroque sermonis genere, modo Latine, modo Græcè attentavi, quo aliquid literarum extunderem; sed enimvero ni meæ interciderint, ille ἰδιωκῶν. Eum ego tamen ob veterem conjunctionem deamo, adeoque meis verbis salvere perpetuo affatim cupio. Si quando syllabarum aliquot munus mihi destinās, id uti pro κοινὸν & διανεῖς semper reputabo. Ita ad clarissimum D. Cunaum transmittere erit in proclivi: is quippe me meaque studia suis identidem sustentat.

Vale, studioforum omnium Oraculum, & me juxta cum observantissimis tuis Clientibus concenturari patere. D. Opt. M. celesti suo te spiritu perpetuo impleat.

Dat. ex Arce Aucklandiana  
in Diacepsi Dunelmensi vii.  
Kal. Septem. Anno ultimi  
semporis cło Idc xxxiv.

CCVI.

S. P.

Clarissime &amp; Eximie Vir,

**S**istunt se tibi aliquot Suedicæ gentis adolescentēs, quorum pars ante vel domo vel mensā meā usā est. Dom. illustris Skittii ex fratre Nepos, Laurentius Skytte, ingenium & ἡ πᾶσι & ad præclara natum, doctrinā & judicio, quam pro ætate, majori, ut ex primo congressu deprehendes; magis cum excusseris. Mensā verò meā usus Nobilissimus Claudius Sternskyld unā cum Præceptore suo M. Erico Broms. Ille erectæ & verum nobilitatis decus spirantis indolis, hic studii moribusque optimis. Omnes famā tui exciti unice desiderant summa tua eruditione & conversatione

dulcissima frui, quam ut eis gratificari velis (quod tamen sine dispendio graviorum tuarum occupationum fiat) est quod eorum nomine peto. Illi debito id honore & redhostimento pro virili pensare insuper haud habebunt. Sed & hoc pro veteri tuo in me favore ac amore majorem in modum rogo, ut si à gravioribus paulum otii decerpere posses, me epistola tua dignari, & quid Musæ tuæ, quæ semper egregie publico laborant, editioni pararent, mihi significare velles. Mea tibi officia iterum constabunt prompta. In præmaturo charissimi tui Dionysii obitu non possum non tibi *συμπάσας*. Et quid ni? Cum ingenium tam eximium & illud Bataviæ decus, à quo tantæ eruditionis monumenta jam profecta, & majora, si per fata licuisset, expectanda erant, ut herba solstitialis ceciderit. Sed quia Deo anima ejus placuit, ideo properarat ejus finem qui melioris & veræ vitæ introitus. Illius voluntatem cum quotidianis precibus exposcemus, eidem utique fas est acquiescere, sed quid ego unguem in ulcere & solatia tibi quæro quæ ipse domi habes; & non solum ut pater sed etiam ut Christianus dolere scis. Deus te erigat ac te nobis & Reip. Lit. diu servet. Recensui notas meas in Curtium & auxi, quæ si tanti luci dabo in juventutis gratiam; cujus bono etiam scripsi periodum quandam imperiorum, in qua IV. Monarchiarum incrementi & decrementi causas strictim exposui, sed Wittebergæ indigne excepta est & publicata à Typographo mendis plena. Nunc verò castigatorem edere animus esset, si diligentiorum Typographum reperire posset. Ignosce, vir magne, nugis meis, & me quod facis, ama. B.V.

Upsalæ A. D.  
ix. Septembr.  
cło Idc xxxiv.

Tui studiosiss.

Johannes Loccenius.

CCVII.

Clarissimo, Præstantissimo, Eruditissimo-  
que Viro D. Gerhar. Joān. Vossio, S.

Clarif. præst. &amp; erudit. Vir, &amp; amice honorande,

**S**I quā te amo, & æstimo, tam prolixas quoque possem scribere literas, prolixiores à nemine unquam accepisses. Quoniam verò, non quantum adfectus imperat, sed quantum festinatio in patriam pergentis, & Hamburgum transeuntis, permittit, scribere licet; noli mirari breves

to



te nunc accipere. Mihi autem Leidam ad amicum meum Overbequium, quæ tibi, ut spero, rectè tradi faciet. Non sunt fortè tanti, quæ per tantum maris, & terræ transportentur, aut quibus lustrandis, tute tempus teras, nisi tamen digressioni, de arte nova, argumentum, & scopus ad quem collimavi, pretium statuunt. Quo pacto ad scribendum, vi quasi injectâ, pertractus fuerim, ex ipsâ intelliges. Utinam autem quidquid ejus est, ad Ecclesiæ tranquillitatem tantoperè faciat, quanto ego eam, quum meditarer, & commentarer, ob oculos positam semper habui! Quemadmodum enim molestissimum mihi est, si cum quopiam mortalium contendere cogar; ita è contra nihil accidere potest gratius, quam si publicè queam prodesse, & vel è longinquo, & obliquo viam aliquam concordiae ostendere. Utinam alii, sicut me, sine dubio acutiores sunt, ita quoque in via quam dixi reperiendâ, sint foeliciores. Gratulabor mihi, si me procul à tergo, relictum animadvertero. Scripturis equidem juxta sensum, quem ex communi intelligendi modo, in sani hominis conceptu, facere natæ sunt, acceptis, unanimem primorum V. seculorum consensum, adjungo sive subjungo: ad quem nisi respicimus, nullum ego sane controversiarum, vel ut rectius loquar, miseriarum nostrarum finem video. Non placent, qui ejus rationem non habent, sed suo saltem ingenio indulgent, & fidunt, suoque arbitrato, & judicio vetera rejiciunt, nova invehunt. Sed sententiam meam, si legere digneris, plenius perspicias; quæ eum demum, nuhmetipli probabitur, si tibi eam probari cognovero. Neque minus gratum erit, si moneas, aut corrigas, ubi monendum aut corrigendum censueris. Quamquam ego, quod hic egi, quasi aliud agendo egi; obversatur animo, genus irritabile vatum. Multi autem admittunt, ex obliquo & per ambages expetita, vel alicui hypothefi aptata, quæ si planè & nudè profferrentur, rejecturi essent. Salve plurimum & vale.

*Tui amantissimus*

Hamb. ex itinere  
raptim, vi. Eid.  
Sept. clō Idc xxxiv.

*& studiosissimus,*

Georgius Calixtus.

## CCVIII.

**L**iteras tuas, Vir Clarissime, & Reidani adjunctum exemplar à Mercatore Slagonienfi rectè accepi. In Reidano ingenium tui Dionysii mirè elucet. Dictio est tota pura, & majorem in modum elegans, quæque Tacitum felicissime representet. Laudibus ejus memorandis alibi occasio erit, idque publice: hic si faciam, metuo ne dolorem tuum aliquatenus jam lenitum, tibi refricem, ac restantem, etiam augeam. Grotii nostri Sophompaniam, quam tantopere deprædicas, admodum videre velim; quam quod tibi dedicavit nihil fecit præter amicitiae vestrae antiquissimæ dignitatem. Quod meorum operum editionem Blavius tam diu differt, malè animum meum habet: utinamque vel nunc tandem fidem liberet, inchoetque. Mitto interim quæ II. Tomi erant, & in illis Cretam meam, quam inscriptum ivi Noomfio, veteris nostræ amicitiae monumentum. Peto abs te ne è manibus id dimittas, antequam excudi debeat. Aristarchum tuum, sive de re Grammaticâ, Libros, expecto impatienter, & nunc absolutum spero. De Salmasio planè doleo: & non possum non invidiam Menapisci accusare. Stephanus noster jam Saxonem suum absolvit, & æstare proximâ se editurum pollicetur, nunc est totus nuptiarum, quas contraxit iteratò. Salutat te plurimum; uti quoque Laurenbergius. Creta mea si placuerit, mox eodem quoque modo Rhodum dabo, quam affectam nunc adservo: tum paulatim alia item, quæ concepi, subsequenter; si vitam Deus, uti spero, & otium dederit. Tu quæso, quantum potes, excita Typographum & urgere excitatum nunquam desine. Vale amice singularis, & saluta uxorem tuam liberosque meo nomine, conjugisque, ac meorum.

Soræ ad diem  
xxvii. Octobris,  
clō Idc xxxiv.

*Tuus sine dolo,*

Joannes Meursius.

## CCIX.

*Præstantissimo Viro, Gerardo Joanni Vossio, Affini conjunctissimo.*

Conjunctissime Dom. Affinis,

**E**xprimere verbis nequeo, quàm mihi gratæ venerint literæ, Glossarium Vul-

Vulcanii, Hesychium aliosque libros, ad me pervehentes: interim quod verbis nunc assequi non possum, re ipsa, Deo dante, testabor. Hesychium tribus quatuorve abhinc mensibus, in eum præter spem incidens, undecim flor. emeram; Vulcanii Glossarium nusquam reperiebam. Quapropter, ut de eo mihi gratulor, ita neque importunè missus à te Hesychius; cum melioris notæ plerisque Authores, bis coemere soleam; ut & hic Londinii, & in agris, ubi plerumque æstatem, transigere solemus, bibliothecam qualitercumque instructam possideam. Ingenuè quid de schedis, quas ad te transmissi, sentiam fatebor: Invasit me commune hominum vitium, qui arbitrantur ea quæ ipsi cum labore scripserunt, ab aliis quoque cum voluptate legi. Nunc verò cum tute eas tibi non displicuisse testeris, teneri non possum, quin porro urgeam, ut certior me facias, an tuto famam periclitari possim, deque edendis iis cogitare. Vidi Jul. Cæs. Bulengeri, atque aliorum quorundam, super hac materiâ tractatulos; mihi tamen minimè satisfacere potuerunt; requirebam in iis, nescio quid, quod an ipse assequi potuerim, iudicandum tibi relinquo. Non contemnendum commentationibus istis, adjecti auctarium, ex quo ad vos missæ sunt: spes adhuc est uberioris materiæ; prout ea se quotidie Catalogum Artificum perscripturo offert; non obstabo tamen, quominus primos istos conatus, ad periclitanda hominum iudicia divulges, per amicorum aliquem, suppresso tamen scriptoris nomine, quod non nisi curis secundis deberi puto. Cæterum de his plenius, si tu idem sentias. Literas Stephani Goffe ad te transmittito, ex quibus Reveren. Archiepiscopi consilium, à proposito tuo diversum non esse intelliges. Det Deus ut labores tui, quemadmodum merentur, Regi nostro ac Principi adlubescant. Siquid super ea re, ad Dominum Goffe Literarum perscribas, primâ quaque occasione eas ad ipsum perferam; aut si forte absit, in agris ad eum perferendas curabo; quod ut commodè fieri posset, ipse D. Goffe prospexit. Vivit Cantabrigiæ, in Collegio Divi Petri, amicissimus mihi, totiq; vestræ familiæ D. Joannes Francius, qui inclusas à se, ad filium tuum Johannem literas dedit. Ait Præfectum Collegii Jesu, Richardum Stearne, ac reliquos istius Collegii socios paratos esse, ut prorogetur tempus illud absentiae, quod filio tuo indulserant, si modo per ipsum filium tuum, aut per te postuletur. Siquid tibi, tuisque ulla in re gratificari

possim, nunquam expectationem tuam fallam. Precabor interim Deum Opt. Max. ut tibi, uxori tuæ, totique familiæ vitam, ac valetudinem firmam largiatur.

*Rapim in Aedibus  
Arundelianis Anno  
1634. 15. Novemb.  
St. vet.*

*Tuus omni officio,*

F. F. F. Junius.

## CCX.

*Clarissimo Viro Gerardo Joanni Vossio,  
Affini conjunctissimo.*

*Conjunctissime Affinis,*

JAm dudum, cum hic apud nos esses, quid de conscribendo Artificum catalogo in animo haberem, ex me audivisti; haud muto factum. Sed dum ei rei prolegomena quædam præmittenda putabam, observatiunculâ unâ aliquâ, plures alias quandoque eliciente, ac post se veluti trahente, excrevit opus, in iusti ferè voluminis formam. Ac novâ se quotidie materiâ supeditante, metuo ne in nimiam tandem excrescat molem, quicquid illud est, quod ex diversissimis Authoribus, in unum quasi corpus congeffi: Interea per otium inspicias, scio, opusculum hoc à me elaboratum; ac me iudicii tui scientem, quamprimum facies. D. Pettæus, atque alii quidam viri, optimi, meique amantissimi, ut edam suadent; minimè tamen persuadere poterunt, nisi fortè suffragio tuo juventur. Vale, conjunctissime D. Affinis, cum sorore carissima, atque omnibus liberis.

*Rapim Londini  
in Aedib. Arundelian. An. 1634.*

*Tuus omni officio,*

F. F. F. Junius.

## CCXI.

*Viro maximo Ger. Jo. Vossio, S. P. D.  
Johan. Fredericus Gronovius.*

Desiderium vestri, Vir magne, quod ipsa mora crescit, mihi in hac solitudine, incentivum fuit, ut denuo quia bella occasio erat, inficetis literis te inquietarem. Miraris solitudinem dici tantæ celebritatis locum, præsertim ibi studiis vacanti, ubi nec cogitandi, nec quiescendi spatium datur, ubi,

*Nos transeuntis risus excitat turbas,  
Et ad cubile est Haga.*

Ego verò in media frequentia, malignum secessum colere videor, qui nec amicum, nec familiarem habeam, præter unum Heilerfichium; sed & illum districtior jam cura otioso garrui tempus concedere vetat. Ampliss. D. Senator, vir est ad amissim factus, & omni comitate me excipit. Sermo quoque ipsius minus est tragicus, & potest securum convivam pati. Equidem nihil omitam, quod ratio mei muneris exigat, ut si quæ nobis exhibita sunt beneficia, ea perdidisse se fateantur. Sed pessimus mos est, promovere factum, & spiritus imperitorum adolescentium, iisque in quam minutis indere contemptum Doctorum suorum: quem profecto ego optavi, eo agro desitum esse, in quem mores malos Plautinus ille mittebar, si qua possent serendo interfieri. Ipsæ literæ sic obscurantur, & à teneris ea imbibitur opinio, potior semper pecuniæ, quam eruditionis æstimationem habendam. Scilicet cavendum est serio, ne unquam falsus sit arbiter, qui cum designare vellet, *ἐκ ἀμύμονος* mortalem, ex hac nota literatorum aiebat, eum esse, quos odisse divites solent. Ex Tobia Andree cognovisse te puto, reviviscere negotium illud, Landsbergenfis Principis, cujus conficiendi spe, Cl. Altingius me Groningua excivit. Illustrissimæ Principi Matri placui, ob istorum commendationem, & unice velit me huic Provinciæ præfulcire. Sed re non amplius integra, meque jam in aliam servitutem transcripto devolvi, à me repudii omen, in heros meos, quorum animos optimus Tobias frustra, puto, tenuit. Nemo vitio mihi verter, si serio illi de me bene mereri vellent, meque dimittere, non alienum à votis meis, esse locum, ad amplam fortunam, & honorem promptum: sin honestati potius quam commodo meo velificabor. Et gratus mihi erit nexus, in quem iniquo meo tempore me casus dimisit. Illud te oratum volo, summe fautor, ne suspiceris quicquam, me cum heris meis fidem obstrinxi, fraudis contractui nostro miscuisse. Deum testor omnem ambitionem me depositam habuisse, nec vel minima cogitatione præcepisse ea, quæ nunc evenerunt eo tempore, cum conditiones ab istis mihi propositas amplecterer. Illud consilium quod a callido homine suggestum, apud te aliquando promebam, statim a dissuasui tuo abjeci, & damnavi. Et utcumq; res cader, ipsa constantia mea demonstrabo, sincera omnia esse à me acta, quamvis multa acida, hic

& jam mihi obvenerint, & prævideam post fidelem operam, ab iis quibus maxime ea expenditur, parum nobis gratiæ, honoris nihil fore. Quod apud te solum perire cupio, & indicium esse incomparabilis fidei, quam de tuo erga me affectu, concipi; & publice nunquam diffitebor, siquidem nomen erimus posteritati non omnino oblitum. Vitam sic trudi scimus, & surgere sæpè aliquid, quod in ipsis floribus angat. Supellectilem librariam à Germania superiori recepi mense, quæ me tandem Musis reconciliabit. Mirè optem denuo, pervolutare Msc. Lucretium tuum, ut spicilegium colligam eorum, quæ in festinatissima priori collatione oculis conniventibus prætermisi. Itaq; rogo, an pati possis, ut si Lugdunum in reditu, ad vos (quæ spero, post hebdomadas, aut ad summum quatuor, non differetur) transeam, à Salmasio illum repetam. Summus ille Vir, in nuperis ad me suis prolixè se excusavit, ne putarem eo animo, se librum abstulisse, quasi in scriptorem illum aliquid meditaretur, & mihi quod enotaveram, ire vellet præreptum. Non queo comminisci, quæ ipsi causa fuerit hujus de me suspicionis. Nam nec mihi nunc otium, ut in integro edendo, aliquod operæpretium, præstiturum sperem; & sic viros de Republ. jam benè meritos, præcipuè illum, veneror, ut quidcumque ab iis discere malim, quam quæ ipse parùm certè didici alios docere. Miscellaneis meis per otium, quod breve nunc mihi, extremam manum impono. Boxhornius denuo mihi fidem fecit, se cum Janfonio de iis collocuturum. Si persuadebit gratum erit; sin jaceant, nonnunquam premantur in animo, donec mihi ipsi invisâ esse ceperint. Nam ut nosti in talibus, expirante juventutis gratia, nihil ferè est, quod ipsi authores amemus. Salve plurimum, & vale cum tuis, publico bono, cui natus es, præcipuum literarum decus. Scripsi corrente calamo.

*Hagæ Comitæ Eidib. Novem.  
Juliani An. clo 15c xxxiv.*

Miscellanea mea ex consilio tuo, secui in quatuor partes, dempto etiam Titulo, Exercitiorum Criticorum, & Saturæ, quæ nomina delicatas aures radebant. Singuli libri xviii. vel xx. habebunt Capita. Atq; adeo primam Sectionem, hic ad te mitto. Collegi in ea quæ spartim ad historicos libros notaveram. Minus placebunt vulgaria nimis historica nonnulla quæ immiscui. Sed scias, viro nobili cuidam & Jurisconsulto eam destinari, & ii non capiuntur

anda



aridâ illâ, ut vocant criticâ. Aveo cognoscere iudicium tuum, & si quid inaudivisti de optimo Fabricio; rescribe quæso duobus, aut tribus verbis, & puta familiari colloquio meo tantum temporis dari. Salve iterum & vale, præsidium nostrum. Cum obsignare has vellem, venere mihi, ab Cl. Pontano, literæ indicantes, se in mandatis dedisse filio tuo, quem saluto, ut exemplar Epistolæ ipsius adversus Jesuitam, qui C. Croii operi edidit, mihi exhiberet; id servari usque ad reditum meum peto.

## CCXII.

**V**irum utriusq. nostrum adeo amicum nactus, Vir præstantissime, nolui eum sine meis ad te literis dimittere. Scripsi anno superiore exeunte per Elzevirium, ac te accepisse puto. Nunc enixè abs te peto, ut Typographum impellas, quantum possis, nimis hætenus cunctatum; maxime pro voto meo, & meorum in hoc Regno amicorum, ac fautorum: inter quos illustris Dom. Cancellarius jure suo primum sibi locum vendicat. Ad quem quam Præfationem nuper misi, supprimendam in præsens nuntio. Siquidem ille è re meâ esse censet, uti Regi serenissimo opera mea dedificentur: itaque consilio ejus morem, uti æquum est, geram. Insuper est in Opusculis meis Atticis, quæ in primo Tomo apparent, aliquod Othoni Skielio dedicatum: sed cum diem ille suum nunc obierit, magno cum dolore meo, nam amabat me vir iste maximopere; muta pro prudentia tua inscriptionem, & præfige nomen Goudai Rosæcrantzii nostri, cui familias meas Atticas dedicavi; & repone Erii Rosæcrantzii nomen, ut succedat frater fratri. Quæ ad secundum Tomum pertinent, & in istis Criticarum Antiquitatum Libros IV. mittam proximè. Tu me, quæso, fac de rebus tuis omnibus, & librorum editione, certiore; tum quo loco etiam res meæ fixæ. Mitte quicquid ad me voles, uti pridem indicavi, ad Joannem Van Gandt, Mercatorem; isque ad me curabit rectè. Bene vale, ac salve, cum uxore liberisque à me, mea & meis.

*Rapim, Soræ, ad  
diem xi. Martii  
1610. xxxv.*

*Tuus constanti affectu,*

Joannes Meursius.

Præfationem ad Regem mittam tempestive.

## CCXIII.

**S**cripsi ad te, Vir Clarissime, Martio superiore, per Joannem Elichmannum, Medicinæ Doctorem, virum præstantem, & communem amicum nostrum. Nunc his paucis iterabo scriptionem, atq; eam festinatam; nam Mercator, qui has adfert, me discessus sui monet adeo in ipso puncto. Misi tibi per eundem Elichmannum Cretam meam; insuper & reliqua omnia, quæ ad Operum meorum Tomum alteram pertinebant. Monui quoque supprimendam Præfationem ad illustrem Dom. Cancellarium; quando Regi dedicanda opera mea ille censet. Indicabam & de Opusculo, Othoni Skielio dedicato; quando ille diem obierit, nunc Gaudæo Rosæcrantzio inscribendo, & Familiis item Atticis transferendis in Georgium, ejus fratrem, eodem titulo, tantum nomine commutato. Quæso, scribe, an inceperit Typographus, & quousque sit progressus: tum impelle, ut promoveat; nam id unicè est in votis Cancellario, aliisque in hoc regno, dignitate, & doctrina, eminentibus. Tum Rex quoq; meus Clementissimus discupit videre Historiam. Eapropter iterum rogo, urge Blavium, quantum potes, quod est sane non exiguum. Feceris mihi rem gratissimam, feceris doctis & amicis in hoc regno; feceris & Dominico Molino, qui desiderat vehementer: & nôsti viri illius adfectum in literas, & literatos, & in me quoque inter istos. Utinam hic etiam quandoq; possem tuis commodis inservire! Opera mea certè tibi prompta essent. Hic definam, & salvere te jubeo cum lætissima uxore liberisque. Idem faciunt uxor mea liberique; tibi & tuis addictissimi.

*Scripsi admodum festinanter, Soræ ad  
diem xxiii. Aprilis  
1610. xxxv.*

*Tuus antiqua fide,*

Joannes Meursius.

Quæso ne neglexeris mihi per hunc Mercatorem nostrum respondere: nam occasio tam idonea, atq; certa, vix se mihi, toto anno semel offert. Iterum vale, & atatem Nestoris vive. Scribe etiam, imo mitte, si quid pridem edidisti: tum si quid in præsens edis. O si liceat semel tantum singulis annis te præsentem compellare! quàm id velim. Nunc sufficere nobis debet, quod per literas illud ipsum concedatur. Cætera Deo committenda, qui nos curat, amicorum præstantissime. Vale iterum.

## CCXIV.

## CCXIV.

*Incomparabili Viro Domino Gerardo  
Joanni Vossio.*

Vir Clarissime,

**O**ffero tibi merito tuo opusculum, quod nuper in vulgus exire iussi, & inter summas occupationes per intervalla condidi, cum non liberet otari. Partim Emblemata sunt, ad quæ nihil dictum, nisi quod in confesso, ante me natum fuit, & nemo è plebe etiam ignorat. Aliter tamen quam vulgo, dixi, & proinde novum, atque indictum videbitur, quod unusquisque, quanquam Platonem, aut Aristotelem non legerit, quotidie loquitur, & sentit. Partim orationes sunt, in quibus nihil præter officii mei rationem, debes æstimare. Non passus sum diligentiam meam desiderari, cum aut occatio, aut alius, atque alius, quem ex Romana antiquitate explicandum susceperam, scriptor invitaret. Promittimus certè quæcumque non præstamus. Et hoc ad laudem mihi satis est, eâ ætate inquam magna eruditio non cadit, imo quâ magnus est, qui ad confessionem ignorantie profecit. Nunc Juvenalem meum pergo illustrare. De usu codicum tuorum, valde mihi gratulor, & devinctum me ostendam, ubi per me licuerit, & tibi placuerit hujus hominis affectum experiri. Sed vereor ne humanitate tua abutar. Interea tamen mox libros tuos remittam, quam primum intellexero, eos à te desiderari. Opus tuum de Arte Grammatica, avidè hic omnes expectamus. Spes nuper facta brevi proditum. In tua autem manu est, vota nostra explere. Vale, Vir Incomparabilis, & me ama.

*Rapim Lugd. Clarissimo nomini tuo  
Bat. Kal. Febr.  
Cl. Idc xxxv.*

*Dicatissimus,*

Marcus Zuerius Boxhornius.

## CCXV.

*Cl. V. Ger. Vossio.*

**N**ON erit, Vir, Cl. quod de excusanda Literarum tuarum tarditate, (quod à te non semel factum est) dein-

ceps labores, cum jam exemplo te meo tueri possis, qui literis quas Octobri mense superioris anni reciperem, nunc demum respondeam. Non tamen hoc à me factum, vel imitandi tui causa, si quando res tuæ ita tulerunt, ut serius responderes; vel ut exemplo meo fultus securius in posterum fileres. *Οὐ γὰρ τὸν φίλον τὸν ἑμὸν τὸν* (ut olim Platoniarum elegantiarum simul & dogmatum decus illud ingens Synesius loquebatur) *ἐκ τῶν* hoc in me facinus admiserim, qui non in postremo felicitatis meæ loco semper posui ponamque semper, hoc mihi tecum amicitia, mutuarum Literarum commercio firmatum excultumque, jus intercedere. Dicam igitur, quod res est, mi Vossi. Quantum video, in eo satis conspirant nostrum utriusque fatum, quod vitam vivere otiosam, neutri datum est. At in eo discrimen ingens, quod tuæ omnes curæ, omnia negotia ad Literas & Musas pertinent; quorum scilicet fructum percipiunt tum felicissimi Juvenes, qui te quotidie audiunt; tum qui tua laboriosissima scripta legunt per totum orbem literarium docti gravesque viri. Mea pleraque negotia quam diversi sint generis vel inde potes colligere, quod totos haud raro menses occupatissimo mihi transigere contingit, quibus tamen totis librum videre, aut certe studendi causa, non contingit. Hoc quo minus mireris, scias velim (ut alia nunc taceam) qui Residentes, (ut vocamus) sunt hujus Ecclesiæ Canonici, iis tum universis simul, tum singulis per vices agenda curandaque multa incumbere, quæ temporis haud minimam partem, quod unicuique suppetit, sibi vendicent. Superiori anno molestissimo Thesaurarii munere sum defunctus. Hoc anno sum Receptor Ecclesiæ, onere fateor, si genus ipsum laboris, & præcipue si præmia utriusque spectentur, non adeo molesto aut gravi; à Musis tamen, & otio literario non minus alieno, quam quod erat Thesaurarii. Quæ quidem de occupationibus meis eò fusiùs, non habita tuarum ratione, sunt à me nunc exposita, ut errorem, in quem te postremæ meæ induxerunt, tibi eriperem. Ita enim ex iis collegisse te aperte scribis, multò majora me sub manibus habere, quam quæ hætenus (Majoris ea certe mitto pro tuo erga me amore, quam pro eorum merito æstimata) à me præstita sunt. Magnam sane in eo, mi Vossi, amoris tui vim agnosco, tum quod talem me tibi fingis, à quo magno possint à te tuique similibus expectari,

T

pectari, tum quod, cum ita de me iudicas, ne ipse mihi desim, cohortatione tua, quantum in te est, providere satagis. Plurimum igitur amoris me tuo debere profiteor libens. Cum tamen hominis sit, meo iudicio, vani stultique eam de se opinionem excitare, quam desitutum se certo sciat, etiam atque etiam te rogo, ut quam opinionem de me temere concepisti, eam, me non spondente, imò alia omnia proficiente, & bonam copiam egerante, tibi quam potest celerrimè, avelli sinas. Jam enim dudum est, cum de meis studiis, non meâ sanè, quod sciam, culpâ, sed fatis ita volentibus, actum est; & ea nunc vita est, ut si hæcenus omnia pro voto successissent, nunc tamen vel invito decoquendum, & arenâ, quod aiunt, cedendum essent. Neque tamen spero ita vivemus unquam, ut *ἐν ὁρῶντι ἀπὸ τοῦ ἀγροῦ*, & fruges duntaxat consumere natos, quicquam merito nobis exprobrare possit. Absit hoc à nobis, ut eò vecordiar unquam deveniamus. Si ut prosumus aliis, Scriptis & lucubrationibus nostris non datur, at sunt alia personæ quam gerimus, & professioni Sacerdotis non minus convenientia, in quibus non inutiliter ad Dei gloriam occupatum iri quicquid in nobis est industria, confidimus. Interim si contingat, ut aliquid interdum edamus in lucem, hoc scilicet successivis horis nostris debebimus totum, magisque recreationis nostræ quam laboris erit. Ad Parentis autem *τὸ μαγεῖον καὶ ἀνέκδοτον* edenda quod hortaris, res factu facilis esset, nec à me tam diu dilata, si ea essent ejusmodi, vel quæ perfecta æstimari mererentur, vel saltem ita effecta, ut sine Authoris injuria publicari possent. Horum cum neutrum sit, & eorum quæ præcipua sunt, non sine summo labore ad perfectionem aliquam perducere possint, & argumenti sint à meis studiis, id est sacris, alieni, (quales sunt operosissimæ in Polybium animadversiones, amplissimi de re Vestitaria Commentarii, &c.) quid aliud iis præstare possim, quam ut dum vivam ipse, fideliter à me integra illibataque conserventur; & post obitum, sacræ publicæ alicujus Bibliothecæ custodiæ fideique committantur, non video. Cætera si quæ sunt, qui minore opere indigent, ut publico parentur (ut sunt fortasse Notæ in Epistol. ad Atticum, & alia nonnulla id genus) aut quæcunque sunt argumenti Theologici seu Ecclesiastici, quæ ulla mea quantacunque opera sive perfici, sive quocunque modo ad publicam utilitatem disponi poterunt; in his operam

nostram publico non defuturam, si Deus vitam nobis & otium, quæ sufficiant, audeo tibi promittere. Quamquam ut verum fatear, nupera quædam Calamitas studia mea vehementer afflixit, ex qua vereor ne longum sit, priusquam se integre recolligant. Obiit enim ante mensem unum aut alterum omnium meorum amicorum, quibuscum familiaritas mihi & de literis frequens communicatio hic intercedebat, longè doctissimus Augustinus Lindsellus, postquam Herefordiensi Diocesi, cujus erat Episcopus, annum vix integrum, sanctitate & integritate vitæ præful, etiam si olim vixisset, admirandus, præfuisset. Vix est ut tantam eruditionem in tanta modestiâ, tanta obscuritate (etsi jampridem toto hoc regno celeberrimæ famæ fuerit) latere potuisse quisquam credat, hoc præsertim seculo, quo scribendi cacoethes plerisque homines, qui aliquid sciant, tam impotenter transversos agit. Nullum genus est eruditionis, in quo non ita excelleret, ut tota vita nihil aliud egisse videretur. Nullus liber antiquus aut recens, Latinus, Græcus aut Hebraicus; nullus ferè Gallicus, Italicus aut Hispanicus, qui quidem alicujus momenti fuerit, quem notum non haberet, totumque ita excussisset, ut pro re nata suam de eo sententiam apud amicos doctè pariter ac copiosè proferre non posset. Hic ante quatuordecim plus minus annos, cum libellum quem contra patrii nominis infamatores edideram, legisset & probasset, antea sibi penitus ignotum ita complecti cepit, ut deinceps non aliter de me sollicitus esset, quam si propiori aliquo naturæ vinculo ipsi conjunctissimus fuisset. Nullum officii genus est, quo mihi commodare potuit, quod inexpertum reliquerit. Nam & studia mea quæ consulendo sapissime, quæ docendo non rarè adjuvavit; & fortunas meas aliquando tenues non ipse modò sponte sua liberalitate sublevavit, sed & ab aliis ut sublevarentur, sua apud magnos viros autoritate, nunquam à me ne minimo quidem verbo sollicitatus, effecit: Ille denique fuit, qui benignissimum Dominum ac Patronum, nuper Episcopum Londinensem, nunc Cantuariensem Archiepiscopum (in tanto dignitatis fastigio meritis quam loco longè celsiorem) primus mihi conciliavit; ut omnia propè ipsi debeam, tanquam fortunæ meæ fabro & architecto præcipuo, quæcumque mihi felicia postea contigerunt. Sed ut ad studia redeam, assiduus hic mihi *ἐργαστήριον* erat, & temporis acti severus



severus exactor, pensis etiam interdum impositis quæ pro ratione sive virium mearum, sive otii & temporis, maxime congrua judicaret. Paucos ante mortem annos, totus in eo fuerat, ut Græcorum veteris Ecclesiæ Scriptorum Scripta quædam *avâdota*, magno ære non ita pridem è diversis Europæ Asiæque locis comparata & huc allata, quam emendatissima cum Latina Interpretatione in lucem emitteret. Me quoque (magis id quidem amori erga me suo indulgens, quam humeris meis confusus) ad partem tam gloriosi propositi vocârat, mandatâ mihi veteris Græci codicis, qui Commentationes in partem Psalmorum, Chrysostomo vulgò adscriptas continet, Interpretatione. Quæ quidem eò facilius à me suscepta, quod dies ad perficiendum data, nec alia conditione imposita quam si per alias occasiones liceret. Alia quippe erant plura, seu majoris ea momenti, seu quod acceptiora futura essent, prælo designata, priusquam harum usus esset. Neque jam quicquam restabat, quam ut Typographus primò quoque tempore ad opus accingeretur, cum supremum diem obiit Præsul Illustrissimus. Sed Deo laus, quod ille superstes, diuque sit superstes oro, quo vivente nunquam Patrono carituræ sunt in Angliâ meliores literæ; cuius potissimum auspiciis, & prudentissima administratione, ut eò perductum negotium illud, quo perductum diximus, cum Præsul Illustriss. obiit, omnes hic agnoscimus; ita & in cura providentiæque ejus, nulli non pari negotio omniumque hætenus difficultatum feliciter victrici, spes nobis non exigua, tot conatus & labores, ob intempestivam præcipui instrumenti jacturam, incassum non futuros. Sed vereor ne qui modo pertinax silentium excusandum habebam, idem nunc importunæ prolixitatis crimen incurrerim; adeo hoc quoque verum illud experior, quam sit illud in omni re difficile, ut ne quid nimis. Ad literas igitur tuas redeo, etsi jam pertæsus prolixitatis, ne in tanta sermonis redundantia, me tibi non respondisse queri possis. Grotium & Salmasium, incomparabiles Heroas, quod in tuis memoras, rem fecisse mihi gratissimam. Etsi enim vitæ eam rationem inire, ut inter eruditos nomen profiteri meum possim, non datum est, in eo tamen non leve solatium, quo supra vulgus non parum assurgere mihi videor, quod viros verè doctos affectu (sed & judicio fortasse) non vulgari colo, eorumque incolumitatem in maxima parte felicitatis

meæ pono. Sed ô seculi infamiam, summum illum virum, defultoriæ vitæ incommodis tamdiu jactari, & incertis sedibus errare! Dignum certè virum, de cuius virtutis possessione omnes Europæ reges & regna, si scaperent, haud paulo majori contentione inter se decertarent, quam olim urbes illæ Græciæ de Homeri umbra. Sed nimirum tanti stant ei Libertas, & Veri amor, qua non pauciores ubique fere inimicos, quam Eruditio & divinum Ingenium admiratores illi peperere. Sed quando, ut ait ille, nondum omnium dierum Soles occidere, non est quod desperemus res ejus aliquando tranquilliore loco fore. Filium tuum Johannem reducem, ut & Opus Grammaticum, quod promittis, (illum corporis, istud ingenii tui foetum in utroque te complexurus) & libens videbo, & avidus expecto.

De re tuâ pecuniariâ, serum me tibi scribere; scribam tamen; 24 nempe die Mensis Octobris ultimo elapsi 50 libras, quæ tibi debebantur, Pæsteri Delegato Cantuariensi, persolutas esse: alteras autem 50 libras (quod jam magis tempestivum me tibi scribere:) si interim te priores illas accepisse (quod semper observandum tibi est) vel verbo significaveris, intra paucas septimanas tibi paratas fore. Res tuæ reliquæ omnes, prout feret occasio, mihi semper erunt curæ. Sed hortense illud negotium tuum (quando & Successoris tui res ad te pertinere rectè judicas) adhuc pendet & sub iudice lis est. Quando erit aliquid constitutum, quod brevi speramus, omnia per me plene resciturus es. Vale, Vir præstantissime, & amare perge

Cantuar. viii.  
Kal. Mart.  
1635. Stilo  
vet.

Tui tuorumque omnium

merito tuo amantissimum,

Mer. Casaubonum.

CCXVI.

Cl. Ger. Joh. Vossio Salutem & Officia.

IN votis quidem erat, Vir clarissime, te ante abitum Illustrissimi Comitis Lescinii in Angliam, videre; verum quia partim promotione quæ hac die fiet, distractus, partim rebus itineri parandis, id facere nequeo, per hæc mihi tecum esse agendum existimavi. Totum negotium

T 2

in

In tuis literis versatur, quibus instructi Angliam petere volumus. Magnum te in illa insula, collati à Regibus honores testantur, Illustrissimo Comiti satis erit, si tuis ibidem amicis significaveris, magnum literatorum æstimatorem eum esse. Utramque Academiam videbimus, in utraque aliquot septimanas consumpturi. Te paratio viri magni innotescet, quorum tamen & ego non paucos amicos habeo. Addere non oberit, si videbitur, Parentem ipsius unicum in Polonia Reformata Religionis patronum esse, prout Princeps Radzivilius in Lithuania, prudentissimum & literatissimum inter Palatinos haberi, & quod ad rem facere maxime videtur, in magno apud Serenissimum Magnæ Britanniae Regem favore, quem multis literis testatum fecit. Ipsius Comitis dotes ex aliorum forte relatione nosti. Sed quid ego multis in his te, Vir clarissime, turbo: sufficit petiisse, ut literas nobis ante diem Jovis vel Veneris submittantur Lugdunum. Hospitium nobis est in Pappengraft apud Dominum de la Rue. De favore erga nos tuo nihil dubitamus, quem ut continuare erga me præsertim velis, observanter peto. Vale, Vir clarissime

Lugduni 15. Maii ipso  
die promotionis meæ in  
Medicinæ Doctorem.

T.C. addictissimo,

Johanne Jonstono.

#### CCXVII.

*Præstantissimo viro Domino Gerardo  
Johanni Vossio, Affini Conjunctis-  
simo.*

Conjunctissime Adfinis,

Vides hic auctarium non pœnitendum, (nisi me fallunt amici, quorum hac in parte judicium desideravi) opusculi illius, quod olim ad te transmissi; quodque propediem typis committendum, ultimis tuis literis indicasti. Amicos dico, non Seldenum, Pettaum, Oughtredum, qui priora approbaverant; sed fratres Wrenni, quorum alter nunc est Episcopus Herefordiensis, in magna apud Regem gratia, alter verò Decanus Windforiensis. Ambo certè in omnibus ostendunt, quam benè tibi, mihiq; velint. Tertiū libri caput ultimum, quod rationem picturas dijudicandi pertractat, nonnihil reconcinnavi, ac porò quid in singulis corporis humani membris, verè pulchrum olim

judicaverint adjeci; quemadmodum & caput tuum de Statuarum materia; quoniam ea res quoque, ab hac rectè judicandi scientia, non videtur aliena: subdubitavi aliquamdiu, an septimum caput Libri tertiū cum hac, quam nunc vides, appendicula, peculiari quodam titulo vindicem, inscriberem; ac picturam veterem statim exciperet vindex, sive de ratione picturas dijudicandi. Tu facies quod consultius judicabis; aut in duo opuscula dispelles, aut conjunges. Mihi certè, si Regi nostro inscribatur opusculum, omnia conjungi debere, atque in unum volumen componi videntur debere. Miraberis fortè, nimiam hanc levis Tyrocinii fiduciam, nolisque me adeò temerè periculum famæ adire. Ego quoque, ab hac arrogantioris ausi, ut mihi quidem videbatur, temeritate, alienior eram; donec suavis, ac penè persuasit, Rev. Episcopus Herefordiensis; qui lectà hac, quam nunc transmitto, parte, multis asseveranter urfit dubium ac tergiversantem, constare sibi dicens, quàm acceptum Regi, Proceribus Regni, omnibus denique futurum sit opusculum. Dignabitur profectò Rex noster, inquit, hoc tuum scriptum inspicere, pro eo quo artes hæc prosequitur adfectu; nunquam quicquam gratius ei obtingit, quàm si post regni curas, offeratur aliquod antiquæ artis specimen, quo oculos, animumque pascat. Quinimò nuperrimè adhuc, dum tuas schedas percurro, inquit, adfui Regi super antiquorum eximia arte, nonnulla sciscitanti; atque ei spem feci, visurum brevi opusculum aliquod, suppresso tamen tuo nomine, cum cura elaboratum. Respondi non tanti mihi videri tumultuariū hoc opusculum, quod inexpectato ferè excidit majus opus, Catalogum nempe Artificum, molienti: daturum operam, ut majus hoc opus, tanti patrocinii gloriam magis mereatur. Ad hæc Rev. Vir, tanto magis hac in re, consilio meo obsequeris; quandoquidem spero fore, ut Serenissimus Rex, pro navata strenuè opera, animos tibi addat, ad reliqua pari industria prosequenda. Unam tantum in hisce tuis lucubrationibus requiritur, inquit, Rex noster inquit, ac Proceres Regni, multique alii ingenuarum artium amantes, Latine quidem intelligunt, Græcè non item. Minus gratum hoc nomine futurum erit opusculum, nisi Græcam passim Interpretationem adjicias. Multis super eâ re mecum egit. Non repetam singula. Video certè Typographo, mihi, publico, non inutilem fore hanc

hanc operam: si quid ex hac re commodi obtigerit, amicis qui hanc mihi operam non denegabunt, deberi putabo. Quædam talia sunt, ut à filiis tuis, Isaaco, atque Gerardo, fortè ad probandum Græcæ Linguae tyrocinium transferri possint; ubi major aliqua emphasis later, nemo melius exprimere ea posset, quam Adfinis noster Naranus; sed is gravioribus fortè curis distinetur; pertentabis animum, si impetrari posse putabis. Utcumque tamen, vel precibus, vel pretio invenendus erit aliquis, qui id præstet. Refundam quicquid impenderis; nolim enim nostras has qualescumque curas, minus gratas esse, ob leves aliquas impensas. Typographus quoque, si quid ea res editionem differat, moram hanc æquo animo feret, quoniam sic denique fiet, ut exemplaria magis distrahantur. Ad quod etiam conducet, si quàm minima, ac portabili (ut loquuntur) formâ, minimèque sumptuose excudatur; ne quem pretium ab emendo deterreat. Cum primum has de pictura observationes congererem, quin etiam cum eas ad vos transmitterem, nihil minus quàm de editione cogitabam; unde etiam evenit, ut de interpretandis Græcorum Authorum locis, minimè laboraverim; putaveram majori operi reservanda esse hæc, quasi prolegomena; sed quoniam præter opinionem in iusti operis formam excreverunt, est nescio quid, quod mihi suadet, famam hoc opusculo præterire, donec reliqua prodeant. Sunt multa loca ex Authoribus Græcis, quæ nudam tantum rei gestæ Historiam, aut Apophthegma aliquod, aut aliquid simile continent, ea Latine tantum imprimi velim, ne in nimiam molem excreseat opus. Reliqua loca Græca, quæ Emphasis quamdam habent, ac in ipsa phrasi præcepta quædam continent artis, integra servari velim, adjecta interpretatione; aut si Latine tantum videantur imprimenda, optem nihilominus, ut Græca verba quæ vim aliquam habent, ad oram adjiciantur, quo peritis pariter, atque imperitis Græcæ Linguae satisfiat. Dabis veniam pluribus, præter amorem meum verbis: non leviter animum meum tangit hæc cura. Quicquid posthac, Deo volente, adornabo, ipse semper hac cura defungar; neque amicis meis negotium amplius facessam. Certiorem quoque fecisti me Clarissimum Claudium Salmasium, unice optare Specimen aliquod statuae palatæ, chlamydatæ, habitus Epheborum, & similium; jam ante per D. Boswellum, ipse Salmasius tale quid petierat; quineti-

am Gallicum aliquod ipsius Salmasii scriptum penè me est, quo à Boswello petit, ut hoc à Comite Arundellæ impetraret: placet Comiti propositum, ac mecum re communicata, desiderio Clarissimi Viri, quamprimum satisfieri volebat. Negabam partem illam antiquæ eruditionis, quæ versatur circa rem vestiarum, ita mihi perspectam; ut pictori, quod exemplar potissimum describere debeat, præmonstrare ausim: Compellaturum interim D. Seldenum, ac Patritium Junium; eos enim in hac re magis fortè versatos, pictori commodius statuas delineandas assignare posse. Placuit Illustrissimo Comiti ratio consilii mei. Confestim itaque ad Junium advolavi, ostensaque Cl. Salmasii manu, quam non iniqua vir Magnus postulare docui. Rogavi ut conveniret D. Seldenum, atque ad Ædes Arundellianas, comitante Seldeno accederet: gratissimum id fore Comiti, si inspectis monumentis antiquioribus, Artifici quid delineandum videretur, ostenderent. Recepit facturum Junius; nec tamen venit; acceptis deinde tuis literis, iterum interpellavi, atque illam tuarum literarum partem, quæ id urget, prælegi: Respondit, se non immemorem fuisse promissi; sed nunquam in D. Seldenum, variis negotiis civilibus distentum, eoque raro se domi continentem, incidere potuisse: daturum operam, ut ubi primum compellare datum erit, unâ cum ipso advolet. Quatuor aut quinque sunt hebdomadæ, ex quo venturum recepit, & nihil interim fit; neque possum adsequi conjecturâ, quid tantulam rem moretur. Non desinam tamen eniti, ut tandem aliquid fiat. Nisi fortè inveniat amicum aliquem Cl. Salmasius, qui in Britanniam fortè excurrans, ex ipsius sententia, quæ delineanda sint ostendat. Si quis talis offeratur, & me, & Artificem non imperitum, ad omnia officia paratissimos experietur. Imo si fortè dum in agris sum, talem aliquem appulisse intellexero, Londinium statim excurram, neque operam meam requiri in re tantulâ patiar. Jamdudum ad te literas dedi, quibus te Cantabrigiâ reversus, de rebus Joannis nostri certiorem feci. Responsum exspecto, quod postremæ literæ tuæ, brevi promittere videntur. Etenim ex quo literas ad te, Cantabrigiâ reversus dedi, tuas quoque, cum literis Johannis nostri accepi. Sed is parè admodum, atque obscurè res suas tangit, adeo ut vix conjecturâ, quid sibi velit, adsequi possim. Varii hic atque incerti, de matrimonio  
ejus



ejus rumores: ille nihil super ea re aperte: aliquid tamen videtur innuere voluisse, deditâ tamen rursus operâ præterisse. Sunt adhuc penes me literæ ejus ad quamdam Prudentiam Greene; hanc illam esse putant; nolui compellare eam, cum essem Cantabrigiæ, nisi prius exploratum haberem animum tuum. Hoc illud est, quod ultimis meis literis, sedulo à te petii, ne me patereris ignorare, quo loco illa mihi esset habenda. Rev. Episcopus Herefordiensis, facile agnoscendam non putat, nisi prius plenius quid constiterit. Aliquantulum igitur adhuc differo Cantabrigiense iter, sperans fore, ut ad priores literas meas respondeas, & ad me transmittas Schedulam, in quâ Joh. propriâ manu perscripsit, quænam sint illa, quæ dilectæ tribui velit. Ego utar in omnibus consilio Reverendi Episcopi Herefordiensis, quem Academicarum Artium callentissimum, vestrique amantissimum quotidie experior. Hæc sunt potissima, quæ raptim ad te scribenda putavi. Interim hunc animi mei dubium, etiamnum morum de instituenda dedicatione alios celabis: nisi fortè & ipse putaveris, non inconsulte me facturum, si consilium Herefordiensis Episcopi amplectar. A quo consilio si non abhorrebis, cura sciam te, me, meaque, unico tantum verbo Archiepiscopo commendasse; quod magnum addet animum, timide alioquin tantam rem aggressuro. Scis quantum apud Regem nostrum, valeat vir merito eminentissimus. Precor interim Deum Optimum Maximum ut te, tuosque, publico, mihi incolumes servet. Vale.

*Raptim. In edibus  
Arundelianis, anno  
Domini, 1635. Cal.  
April. stylo vetere.*

*Tuus omni officio,*

F F F. Junius.

Continuatam hanc opusculo meo appendicem, ita raptim exscripsi, ac prope-  
ranter misi, ut ne quidem eam potuerim  
perlegere, antequam Reverendo Episcopo  
legendam præberem; imo ne quidem o-  
tium fuit percurrendi, postquam reveren-  
dus Vir eam restituit, propterea quod sta-  
tim videbatur ad te mittenda; maluissem  
alioqui Græcam Interpretationem, locis  
suis ex consilio Episcopi passim adjicere,  
ac primò quidem consilium erat, quam-  
primùm hoc facere; sed subibat animum  
cogitatio, posse Typographum falli, in  
voluminis formâ, ac Typorum modo eli-  
gendo; nisi ante Cal. Maias, totius operis

conspectus, certiore consilii rationem  
suggeret. Nunc aliquâ ex parte, animo  
meo satisfacisse mihi videor, & quemad-  
modum hæc prorsus videbantur addenda,  
ita nunc verbum non amplius addam.  
Unum hoc iterum rogo, ne patiaris  
propter leves aliquas impensas spem me-  
am imminui. Inveniendus est aliquis,  
aut precibus, aut pretio, &c. Grati ani-  
mi testimonium nunquam requires, sat  
scio. Etenim ut ut non accesserit, officii  
hujus gratia, tibi tamen obstrictum me esse  
semper agnoscam. Iterum vale, & me  
amare perge.

### CCXVIII.

**H**Aud abs re facturum me existimavi,  
Vir clarissime, si te quoque tot an-  
nis, tot beneficiis mihi conjunctissimum,  
brevi epistolio, sed intra præcordia nato,  
compellarem. Enimvero tanta sunt tuâ  
de me, tamque præclara merita ut cui  
plus eo nomine debere possim, velimve,  
sciam neminem. Cætera verò longe an-  
tistat ingens illud nec mea unquam me-  
moriam excessurum beneficium: quod filio-  
rum meorum, non unum, non duos, sed  
trinos, pignora mihi charissima ad optima-  
rum rerum scientiam, quâ neque majus  
aliud, neque præstabilius, non incitaris  
modo, quo solo obstringi æternum pote-  
ram; sed duxeris etiam, traxerisque; ne  
sic quidem innato tibi bene merendi studio  
satisfactum ratus, nisi & simul informa-  
tor fores. Quod quantum sit, rem ex  
vero æstimantes, etiam me tacente, nô-  
runt cuncti. Sincerum tuum in me me-  
osque affectum, & alia hujuscemodi, quæ  
deteri prædicando nullus abnuerit, ne mo-  
dum epistolæ excessisse, vel solum id e-  
gisse videar, libens & consultò præter-  
mitto. Ego saltem omnium, dum super-  
stes fuero, recordabor; sin, occasionem  
nactus, officia esse mea aliquid judicâ-  
re: non negligam actû promptus esse, bene-  
factâque benefactis reponere. Interea sic  
me animatum credas velim: Filium Be-  
nedictum, Britannia jam decedentem ma-  
rèq, transmissurum ubi ad vos appulerit, ut  
complectaris foveâsque facile te exora-  
tum iri confido, si cogitare tibi subierit,  
quam ipsi semper cultus fueris, quamque  
prolixè ei operam navare, cupereque  
jamdudum cæperis. Vellem is tuo con-  
sortio longum frui, adeoque te Doctorem  
habere posset; sed quia necessum est in  
patriam

patriam, sesquianno haud visam, regrediatur, infelicem hac parte esse oportebit. Habes Laurentium, excitatæ indolis ingenique, quem doctrina affecisse, tibi honorificum, mihi & compluribus aliis futurum est, quam maxime jucundum. Adeo non veremur, ne ab materie devinciendi ulterius familiam nostram destituaris. Quid mihi hac legatione præstitum, quanquam memorare possem, tamen filio optime relaturum quavis, supervacuum videtur. Hoc saltem profiteri licebit; nihil omnium secus quam optaram evenisse. Jam in eo sum, ut hinc discedam; Belgicis navibus, uti spero, transfretaturus. Deus te bono literarum, tuoque decori incolumem servet, & senectâ atate, quam scio expetis, dignetur. Vale.

*Virtutum & Eruditionis*

*Calendis Maii,*  
CLO C XXXV.

*tue admirator &*

*Cultor perpetuus,*

Jo. Skytte, Senior.

CCXIX.

*Spektatissimo Viro D. Gerardo Joanni Vossio, Affini conjunctissimo.*

*Conjunctissime Domine Affinis,*

**L**iteræ tuæ in quibus, librorum à te missorum mentio fiebat nonnisi decimo postquam allatæ essent die, ad me perlatæ sunt. Fasciculum librarium, tali nota insignitum, qualem inscriptio literarum tuarum fasciculo tributum testabatur, nullum invenire potui. Aliquoties ad portum advolans, & cum inquisitoribus illis, qui in portubus regia vectigalia curant, prece & pretio contendî, ut talem mihi fasciculum demonstrarent. Omnes pernegabant, quicquam sibi, de tali aliquo fasciculo constare. Subit tamen mœstum animum cogitatio, adeundum mihi esse Dominum Dell, qui Archiepiscopo à secretis est; sperans fore, ut ex ipso intelligerem, an & quâ ratione fasciculum sibi inscriptum nactus esset. Narrat ille miserum utriusque fasciculi casum: ac casû ferè libros à se recuperatos, atque ex orci faucibus ereptos. Ipse fortè super ea re ad te prescripserit. Utcumque tamen tres tantum adhuc ab ipso libros recepi.

Unum inauratum, quod tuo nomine tradidi primogenito Comitis Nepot; duo reliqua exemplaria, Cantuariam misi, ut postulabas. Spem tamen facit Dellius, duo adhuc recuperari posse, quæ Cantabrigiam, te monente, mitti debent. Quumque ostensa ea literarum tuarum parte, inauratum unum, quod Bibliothecæ Cantabrigiensi deberetur, quæcumque ratione inveniendum esse urgerem, etiam hoc spondit: scire enim se affirmabat, ubi Londini in *The High Commission Court*, ut vocant, duo exemplaria delitescant, quæ fortè inter diripientium manus, ad aliquem ibi pervenerunt, quorum unum inauratum esse arbitrat; plura se invenire non posse contendebat. Biduum tamen nunc est, ex quo nihil etiamnum de exemplaribus istis resciscere potui. Misi heri vesperi ad ipsum: respondit peregrè profectum hominem istum, intra biduum aut triduum rediturum. Et mihi hoc ipso die rus abeundum: mensem unum atque alterum in Surriâ loco quodam xxii. millia ab urbe hac transigemus. Literas itaque tuas, una cum meis, ad Doctorem Richardum Sterne; Præfectum Collegii Jesu, amico fideli committo, qui eas cum libris (si fortè restituantur) Cantabrigiam mittat. Alioqui literas ad Præfectum dare nondum statui. Quod si libros recuperari non potuisse intellexero; literis hisce meis, tuisque, quas fido amico tradidi, alias addam, quibus eum de jactura librorum certiore faciam. Sed spero non fore opus. Utcumque tamen nullum mihi exemplar relictum fuit, & si fuisset, Episcopo Herefordiensi tuo, meoque nomine lubens tradidissim. Spero acceperis prolixas literas meas, in quibus Herefordiensis Episcopi memini; doleam sanè si literæ istæ unâ cum auctario non pœnitendo, calci opusculi nostri de picturâ adjiciendo, ad manus tuas non pervenissent.

Non tanto me dignor honore, quam habuit mihi clarissimus Grotius: olim avide amplexus fuissim optatam conditionem; nunc operam meam addixi familiæ Arundellianæ, cui jam dudum, ut scis, adsuevi; & in quâ, ut forte omnia non placeant, plura tamen placent; vitæ genus quod varias interdum recreationes, severioribus curis interponit, satis indolime congruens experior. Totus jam sum in persequendis iis, quæ de picturâ cœpi. Primò per otium in vernaculam nostram linguam, ea quæ Latine dedi transfero; Quin etiam hortatu multorum, in hoc regno

regno Britannicè idem conabor. Nolim enim alium quemquam, mentis meæ non usque adeo gnarum, opus hoc interpolare; meæ industriæ hac in parte magis fido. Urgent admodum artifices, & quotquot artes illas delicatas amant, imminet deinde cura majoris operis; spondeo, ut scis, Catalogum Artificum. Non patiar quantum in me erit, fidem meam requiri. Horum nihil amplius possim, si novum vitæ genus amplectar. Plura sunt, quæ afferre possem; sed hæc præcipua: exculabis itaque non sine debita gratiarum actione; nunc intra horam unam, atque alteram conscendendi nobis equi. Ad ipsum clarissimum D. Legatum scribere non possum.

Mensēs circiter tres sunt, ex quo literas ad sororem, amicissimo mihi D. Roberto Van Voerst, sculptori eximio, iter ad vos instituenti, traditurus eram; impedit Rex tum temporis iter ejus: & stipendio annuo mille florenorum detinet eum, additis insuper quadringentis flor. conducendæ domui. Adolefcens est optimus, biduum modò aut triduum apud vos diverferetur. Experiemini non indignum amicitia vestra hospitem, atque abundè gratum. Quid ab eo expectem, ut apud vos meo rogatu faciat, in iis ad sororem literis perscripsi, quas ipse adferet. Ubi venerit, de omnibus, quæ opusculum illud meum spectant, certiorē ipsum facies, horulam unam, atque alteram lucraberis; quoniam ipse ad me perscribet, illa quæ tibi alioqui perscribenda fortè essent.

Cantabrigiam intra festum Nativitatis Christi, ac præsens hoc tempus bis excurri. Quumque post extremum reditum, deprehendissem, increfcere quotidie rumores, multosque qui avidè societati inhiabant, malis eam artibus petere. Reverendissimum quoque Archiepiscopum, multum laborasse, ut inhiberet dño tria mandata Regia, quæ obtendebantur ab iis, qui Aulicorum quorundam favore, tale quid à Rege obtinuerant, dum impudenter satis affirmabant vacare jam locum. Quum denique instaret Præfectus Collegii totius societatis nomine, ut societatem resignarem, & liberam iis electionem relinquerem, priusquam indignus aliquis obtruderetur: geminas Præfecti super ea re literas habeo; nolui Collegio injurius esse, diutius tergiversando; sed ex consilio Reverendi Episcopi Herefordiensis, Magistri Hall, qui tum temporis hic Londini erat, ante dies decem, quàm literas tuas acceperam, Collegio jus feci subrogandi

quem vellent: in locum filii tui. Gratè id acceptum. Nescio quid nunc moliantur. Neque mea porro interest. Multa tamen sunt, de quibus, filius longè aliter apud te, quàm hic rem se habere deprehendo. Longum esset singula perscribere. Georgius Stearne, cui librorum curam reliquerat, negat se ita subitò negotium hoc de libris conficere posse, quoniam plures libros, aliqui quibus pecunias debebat, utendos sumplerant, nescio, an in pignus: Et eorum aliqui Cantabrigiæ nunc non sunt; expectandum itaque aiebat, usque dum reversi essent. Spondet Præfectus Collegii operam suam; & in meis ad ipsum literis postulavi, ut me absente mitteret eos ad Jonam Peysterum, qui eos recepit ad vos transmissurum. Ex dividendis ejus receperam, cum ultimo Cantabrigiæ essem 35 libras, 18 s. 6 d. quam totam summam, gnaris, Præfecto, ac sociis expendi in eos, qui certam pecuniæ sibi debitæ rationem reddere poterant, aut ostensa manu filii, qua se iis obstrinxerat, aut testibus fide dignis adhibitis. Si unquam revertatur filius, videbit quid sit actum, neque improbare poterit. Præfectus, ac reliqui socii, authores erant, atque ipse etiam eò inclinabam; ne quam in Academia finistri rumoris occasionem, cuiquam præberem. Non sufficit tamen hæc summa. Circa festum Michaëlis, Cantabrigiam iterum excurrendum mihi erit, ut porrò quinque, aut sex libras recipiam, quæ porro dividendis accesserunt. Præsentiam meam requirunt, quia annumerari pecunia ista non potest, nisi in libro, qui acta Collegii continet, propria manu pecuniam à me receptam esse subsignem. Accessione ista ad dividendas facta, spero fore ut bonum nomen, existimeretur filius tuus. Non intermittam, quin videas, si libet, Præfecti, ac societatis testimonium, hæc sic gesta. Utcumque mihi sic prospiciam, ut filio tuo, faxit modò Deus, ut reducem videre liceat, in omnibus possim satisfacere. Vale, & me amare perge.

Londini in ædibus  
Arundellianis, anno  
1635. 22. Maii sty-  
lo vetere.

Tuus omni officio,

F F F. Junius.

Excidit de utensilibus, quod primo adventu Cantabrigiam deprehendi, omnia jam à matre Prudentiæ, in domum suam translata; fortè ne debitores in ea involarent, ut commodissime interpreter: non



non putavi inquirendum, quoniam significaveras, voluisse filium, ut auferret quidquid ei in suppellectile placeret, libris ac picturâ exceptis: quin etiam libri periclitabantur; nisi persolutum ex dividendis fuisset iis qui litem ei intentaverant, ut jam olim ad te perscripsi, quibus cum persolutum esset, quod debebatur, etiam aliis qui modestius egerant, & minus importuni fuerant, quod justum erat videbatur tribuendum.

CCXX.

*Illustrissimis Ordinibus, &c.*

Domini mei Clementissimi,

STatum rerum mearum illustrissimæ vestræ Dominationi per supplicem hunc libellum declaro. Is autem ita se habet. Cum Grajugena Dei gratia, sanctissimæ memoriæ Cyrilli Patriarchæ Constantinopolitani, prius fuisset domesticus, atque Capellanus, ante ejus obitum ab ipso commendatus, in Angliam veni, studendi gratia, ubi benignè, & humaniter acceptus, sex annos integros mansi, progressibus in Theologia, & Latina Lingua satis magnis factis. Verùm adhuc desiderio studendi veni Leidam, ubi jam annum & dimidium mansi: expertus sum ibi, benevolentiam, & benignitatem eruditissimorum virorum, certè secundum Evangelium Christi, Christianissimorum: quorum beneficiis, & munificentia libros orthodoxos, ad propagandam in patria mea Religionem, & Evangelium Christi mihi comparavi. Verùm jam tempus instat, ad Ecclesiam Constantinopolitanam redire, cujus membrum sum, & libros istos mecum habeo, satis oneris, & ponderis. Pro quorum portoriis, & navigiis, magni sumptus mihi faciendi sunt, qui vires meas excedunt, quandoquidem, & iter satis longum est: ideoque sciens vestram pietatem, liberalitatem, & clementiam, ad vestras Excellentias, cum hoc libello supplex accedo, ut vestram liberalitatem, conferre dignemini, quemadmodum & Illust. & Piet. Ordinis fecere, ut in gratiarum actione, quam hic agere debeo, similiterque vestram benignitatem annumerem: ejusdem enim Pietatis & Religionis estis. Ad me verò quod attinet, hic & in patria mea, non immemor ero, vestrorum beneficiorum, & prædicator prom-

ptissimus, ut Deum optimum oro, ut vobis omnibus semper benedicat, & omnem abundantiam concedat, ut & hic honorem, & laudes, piis hominibus debitis consecquamini, & in futurum cœlestem gloriam; quod faxit Deus optimus maximus suâ gratiâ & misericordiâ.

† Is est Nath. Nathanael † Conopius.  
Conopius Cre-  
tensis, qui Batavis pollicitus erat se Calvinii Institutionem in Græcum sermonem versurum, idque in gentis suæ usum.

CCXXI.

EQuidem scribendi ad te nullam occasionem omitto, Vir clarissime, neque cesso etiam molestus esse. Nam quantumvis sponte tua te facturum quidvis credam, quia tamen mora meo desiderio nimis longa est, nequeo non per amicos ad te iter capientes, etiam currentem ultro porro impellere. Quæso, itaque fac quod facis, lentulosque illos excita; siquidem pro uno duos, ut intelligo, nunc posthac sim habiturus. Utinam nunc tandem incipiant; & duobus, quod promittis, prælis opus ceptum urgeant. Nisi faciant; & cunctari etiam diutius velint, libros decem Historiæ Danicæ, quibus tracto eos Reges, qui familiam Oldenburgicam præcessere, hic seorsim dare cogar. Scripsi nuper per Soranum quandam civem; quæso, ut per hunc respondeas, atque certum de negotio toto facias. Qui has meas ad te affert, est egregiæ tum virtute, tum doctrina, Fredericus Andreæ, antea, ut puto, notus, cum adesset Rosacrantzio: nunc illustris Dominus Cancellarius Regius suo filio Ephorum dedit; cui rogare, ut benè, quantum possis, facias, est id hominis illam tuam maximam humanitatem ignorantis. Sophompanæas Grotii, est excellens plane opus: tui verò de Grammaticâ Arte libri ceteris in eo genere longè præstant: nec invenio, quod cum illis jure comparare queam. Ex Præfatione Grotii, uno & altero loco, video te de Poeticâ edidisse. Quod cum necdum ad me miseris, amicitia nostræ jure, & fiducia, abs te peto. In opere meo de Creta, lib. III. cap. V. post verba Dionis, libro XLV. quæ sunt de Libertate, ab Antonio restituta, *imperare decrevimus*, adde. Et apud ipsum Ciceronem, Philipp. II. *At quam cæca avaritia est? nuper fixa tabula est, quæ civitates locupletis-*

U

fina

*simæ Cretenſium veſtigialibus liberantur: ſta-  
tuiturque, ne, poſt Marcum Brutum Pro-  
conſulem, ſit Creta provincia. Tu mentis es  
compos? tu non conſtringendus? An Caſa-  
ris decreto Creta poſt M. Bruti decretum po-  
tuit liberari, cum Creta nihil ad Brutum,  
vivo Caſare, pertineret? Iterum, lib. IV.  
cap. XII ubi de Meſomede ago, poſt,  
Muſicius Poeta agnoſcitur: adde, Vide quæ  
de eo Suidas in Meſomede. & Julius Capi-  
tolinus, in Antonino Pio. Illud porro, ſi  
licebit, cupiam ex te intelligere, ecquid  
operis iſtius dedicatio Noomio noſtro gra-  
ta fuerit. Mone candidè, mutaturum, ſi  
diſpliceat. In hoc deſino, réque uxorem  
liberóſque plurimum ſalvere jubeo: quod  
& mea, ac mei faciunt.*

*Soræ ad diem,  
xxiii. Junii,  
cIo Io c xxxv.*

*Tuus antiquo affectu,*

Johannes Meurfius.

## CCXXII.

*Clariffimo Viro D. Gerhardo Joanni  
Voſſio, Eloquentiæ Profeſſori digniſ-  
ſimo.*

**N**ON tam gratus eſt ros cœleſtis hortu-  
lo meo, atque mihi ſunt literæ tuæ,  
vir excellentiſſime, amice ſumme, quas  
ex longo intervallo, abs te cupidiffime ac-  
cepi; plenæ doctrinæ, & bonæ mentis,  
in qua radiat pietas, & candor. Neque  
ego, neque Collegæ mei redhoſtimentum  
norunt, beneficentiæ tuæ exercitiæ in eos  
quos commendavimus. Utinam tandem  
aliquando, inveniamus, aut ſaltem illi,  
qui jam ſe vobis totos debent, Heilerſigius,  
& Gronovius noſter, juvenes ambo bonæ  
ſpei. Vidimus hiſce diebus, commenta-  
rios tuos de re Grammatica editos, opus ra-  
rum & immenſi laboris dignum quod in ce-  
dro ſcribatur; & ex Cabeliavio viro elegan-  
tis ingenii, accepimus, nunc quoque ſub  
prælo eſſe Lexicon Etymologicum, quod  
jam tempore Synodi Dordrechtanæ me-  
ditabar: cui operi ex animo favemus,  
idque nimio opere expetimus. Martinus no-  
ſter, & *μάρτυρ*, Lexicon ſuum ante obi-  
tum, nonnihil emendavit, & auxit, in  
ſpem editionis ſecundæ. Filiæ ipſius ſu-  
perſtitit, plurima te ſalute impertiunt, &  
pro amicitia, quam pater deſunctus te-  
cum coluit, conſilium abs te petunt. Nol-  
lent enim ſibi laborem patris perire, inter-  
tineas, & blattas; ſiquidem cum Typogra-

pho, honeſtis & æquis conditionibus  
tranſigi poſſet. Germania noſtra con-  
tinuis bellis attrita, è proximo nullam ſpem  
facit iterandæ editionis, quod Typographi  
plerique ad incitas redacti, hæredibus  
Martinii, vix præmium laboris promittunt.  
Si apud Amſtelodamienſes Janſonios, aut  
alios florentiores Typographos, aliquid  
foret ſperabile, tuam cum primis opem,  
fiducia paternæ amicitia implorarent. Vi-  
de, vir maxime, quam audacter, abutun-  
tur benignitate tua, quod ne mihi veritas  
vitio, amanter peto. Malui enim in  
hanc partem peccare, mihiq; notam  
inurere, quam Orphanianti viri, quali-  
cunque hoc officio deeſſe. Edo nunc  
S. Theologiæ libros quatuor auditoribus  
meis, ante annos aliquot dictatos, ut de-  
inceps ſcriptionis tantæ ſuperſedeant, ru-  
des quidem illos, at ſuaſu amicorum, de-  
ſtinatos in uſus Tyronum. Profuerunt mi-  
hi Theſes tuæ Theologiæ, & Hiſtoricæ,  
quas creberrimè laudo, & hiſtoria Pela-  
giana, ad cujus inſtar vellem omnes par-  
tes Theologiæ noſtræ, ab ultima antiqui-  
tate, ad ætatem noſtram, ſcitè pruden-  
terque repetitas. Quod quidem opus à  
nemine, quam abſte, vir maxime, rectius  
elaborari poſſet. In Academia Julia vivit  
D. Georgius Calixtus, vir, in parte qui-  
dem Lutheranorum; ſed pereruditus, æ-  
quus, modeſtus, & candidus, qui edita  
nuper parte Theologiæ moraliſ, cum di-  
greſſione de arte nova Nihufii, Veronii,  
aliorumque Pontificiorum, mihi ſalivam  
movit, & ſpem injecit reparandæ doctri-  
næ, altercationibus ultimi ſæculi nimis la-  
befactatæ, & implicatæ: ſi modò plures,  
cum bono Deo, in hanc rem conſpira-  
rent. Evolvit is ſerè omnem antiquita-  
tem ſacram, adhibito lumine analytico, quò  
dialecticæ, & ſophiſticæ diſputationes, à  
neceſſariis vinculis etiam certis, ſapienter  
diſſeparantur: quarum confuſio lumini-  
bus cœleſtis veri hætenus obſtruxit. Ob-  
ſtant quidem non pauci nycticoraces, qui  
ferale carmen dicere, bonorumque ſtudia  
traducere non deſinunt: ſed & horum  
crocitationes Deus facilè compeſcet, & in  
columbinos gemitus vertet. D. Polyander,  
& D. Heinfius, Epigrammatis ſuis opuſcu-  
lum meum condecorarunt. Si ferunt oc-  
cupationes, ego, quæ non inverecundius  
forte peto, ſtudium conatumque meum  
calculo tuo approbari velim. Intra men-  
ſem proximum imponam, Deo dante,  
Colophonem. Quartum Alphabetum jam  
typis exſcribitur. Primus liber agit, de  
naturâ, & conſtitutione ſacræ Theologiæ,  
ubi

nbi de illius principio, scriptura sacra : alter de summo hominis bono, & ultimo fine, alterna beatitudine, ubi definiuntur quædam hypotheses, de animæ immortalitate, de statu illius separatæ, de resurrectione carnis, de fine mundi, deque ultimo iudicio. Tertius de subiecto nempe homine, quatenus civis Dei, capax illius regni, & æternæ salutis; ubi de illius ortu, & statibus, adeoque de Deo, de creatione, de hominis lapsu. Quartus de principiis æternæ salutis, nempe gratia paternæ miserationis, fraternæ redemptionis, & supernæ, sanctæque vocationis; deque mediis quibus æterna salus obtinetur, externis, Verbo Dei, Sacramentis, Ministerioque sacro: interno, nempe fide ejusdemque consequentibus, unione cum Deo, justificatione, sanctificatione, bonisque operibus, horumque statu, Libertate Christiana, & Exercitio, Christiana Militia, & precatione; cujus fructus, est pax conscientiæ, quæ est vitæ æternæ initium. Hæc est Theologiæ meæ *seu* *theologia*. Si intellexero, piis, & doctis non displicere, quintum & alios edam, quibus describo sacra Theologiæ partem propriam, quæ continet officia Christiana, tum hieratica, tum politica, tum scholastica, tum denique œconomica. Vides quam familiariter tecum agam, amicorum oculissime, & pro candore tuo facile agnoscis. Abrumpo, & hemiolum responsum expecto. Bene vale, Vir doctissime, & salve, cum charitatibus tuis à me meisque æternum.

Dat. Bremæ, æ-  
te nobis usita-  
tæ c. l. d. c. xxxv.  
Prisd. Cal. Julias.

Qui virtutes, doctrinam,

& in Remp. Literariam.

Merita tua æstimat,

Teque colit,

Ludovicus Crocius.

D. Bergius, & D. Willius, plurima te salute vicissim impertiunt, atque diu bene agere, & gaudere jubent, viri tui juxta mecum amantissimi.

### CCXXIII.

QUas à te postremas accepi IV. Id. Oct. datas, redditæ sunt illæ mihi circa medium Novembris; nec multis interjectis diebus 50 libras quantum tibi ad id tem-

poris debebatur, Peystero tuo *ἀντίμισ* numeravi, & cum pecunia responsum ad tuas, ut memini, satis amplum dedi. Quare ut pristina non regeram, scito me haud multo post, communicatis ipsi quas in eum finem scripseras ad me literis, de Horto controverso cum B. nostro egisse, idque quo candidius secum agi intelligeret, privatim primò; quod valde ipsi gratum fuit. Non enim quantum video, publicæ sive Collegii, sive quorumcunque cognitioni causam suam libenter commissurus est, unde & bonitati ejus quantum confidat, potes conjicere. Nisi fallor, unicum hoc illi refugium superest, ut literis suis ad te five querulis five blandis (*Τῶν δ' ἀπὸ τῶν περὶ τὸν*, vel inter primos *ὑποχρησθῶν*) aliquid à te eliciet, quod vel ad obtendendum consensum tuum, vel ad amolendam ulteriorem rei disquisitionem faciat. Tui erit iudicii quid responsum sis. Sed cave ne quid ad te detrimenti rediturum inde putes, si in proposito perstiteris. Serio enim id à me cavebitur, & ut res nunc sunt, ne minima quidem metuendi causa. Nam ad Præbendarias tuas rationes quod attinet, cum binæ tibi conditiones initio propositæ fuerint, quarum alteram ea conditione amplexus es, ut alterius, si quando ita mallet, jus tibi servares integrum; si (quod ego suadere aliquando memini) optionis hujus pro re nata arbitrium, aliqua voluntatis tuæ significatione per literas mihi promississes; valde fallor, aut & novæ conditionis non poenitendos fructus hoc anno, me Thesaurario, percepisses, & ad primam redire (quodcumque velles) liberum tibi fuisset. Quod eò à me dicitur, non ut te consilii tui poeniteat, sed quo magis intelligas non admodum tibi cujusquam gratia opus esse, ut in his securus remanere possis, quas nunc obtines. Atque hæc quidem hæcenus. Mitto ad te bina exemplaria non ineleganter (ut sunt hic nostri Bibliopægarum plerique hujus artificii [valde imperiti] compacta Libri hic nuper editi. Est autem Marci Aurelii Antonini, Rom. illius Imperatoris nunquam satis laudati, *De Vitâ suâ* (ut vulgo vocant) in Linguam Anglicam versio. Dubito an liber sit tibi unquam visus: non enim opinor alioquin inter Historicos tuos Græcos penitus omisisses. Quanquam revera inter illos, nisi per publicum errorem, nullus illi locus. Est enim liber non historicus, sed philosophicus purus putus, & planè divinus: neque de Vitâ suâ, verus illi titulus, sed *τῶν εἰς αὐτὸν*, quod longè aliud est, &



ex intima Philosophia Platonica exponendum, ut paucis in notis ad librum judicatum est. Misi bina exemplaria, ut si tibi videretur, alterum ad virum amplissimum & doctissimum D. Boswellum, Regium apud vos Oratorem, five tuo five meo nomine curares. Sane hic tanto studio excepta est hæc versio, ut quamvis adhuc musteus propè sit liber, & à prælo calens, jam tamen de secunda editione cogitare incipiant. Etsi tu Anglicam non intelligas, non dubitavi tamen aliquem tibi istuc amicum vel Anglum vel qui Anglicæ Linguae non sit imperitus, cui novus liber munus sit futurus non ingratum. Vale, & ocyus (ut Hortensè negotium à me expediùs curetur) rescribere meum esto.

Lond. v. Idus Jan.

Tuus,

M. Casaubonus.

#### CCXXIV.

*Clarissimo Viro, Gerardo Joanni Vossio,  
Petrus Cunæus S. D.*

Vir Clarissime,

**A**Nte paucos dies, cum me D. Barlaeus, cognatus meus, invitasset, constitueram ad vos excurrere, ac tibi gratias coram agere, pro libris tuis de arte Grammatica, quos ex munere tuo accepi: cæterum mox casus aliquis inopinatus me hic detinuit, fecitque, ut per literas, præstare cogar hoc quidquid est officii. Utique si, quisquis grate munus accepit, jam gratiam retulit, exiguum est, quod aut ego debeam tibi amplius, aut tu à me desideres. Etenim nihil quidquam mihi, à multo jam tempore, accidit jucundius. Sed quia longè satius est, re, quam verbis, aut sola mente respondere officia, angit cruciatque me, inertiae meae conscientia, quod in publicos usus nihil evulgem; neque sit unde par pari dare hostimentum tibi queam. Ego dum opus illud hic illic inspicio, plurima reperio, quæ majoris operæ, curæque, sublimioris sint, quam promittit Titulus. Quod autem Aristarchum, noluisse te inscribere ais, in eo *εισαρκείας* tuam agnosco. Certe primum librum sine intermissione perlegi, cum summa admiratione, & percurram evolvamque sæpius. Adeo ubique ingens ubertas, lectissimarum observationum, & reconditæ cujusdam doctrinæ illic est. Ex

cæteris quos ordine perlegere nondum potui, illud tamen summatim didici, haud satis me latine scire, multaque esse, quæ male dudum percepi. Quævis in his sollicitè, an aliquid de recto usu particulae, *citra*, traditum extaret, sed non inveni. Pertinet autem ea investigatio, ad Jurisconsultorum controversiam, quæ oritur ex verbis Diocletiani, & Maximiani in L. *Transfigere* 18. Codic. de transactionibus. Quippe Cujacius lib. 6. observat. cap. 11. & lib. 19. cap. 39. Item Goveanus lib. 1. Variarum Lectionum, cap. 30. atque alii plures, statuunt voce ea, exceptionem significari, ut de nullis criminibus publicis, quæ sanguinis poenam non ingerunt, transfigere liceat, præterquam de falsi crimine. Brissonius autem lib. 3. de verborum significat. in voce *citra*, & in lib. singulari, ad L. Jul. de Adulter. & Ravardus lib. 4. Var. Lect. cap. 6. Omnino negant Idoneos Scriptores Latinos, ea voce sic usos unquam fuisse, idque passim ex legibus etiam nostris, atque ex aliis constitutionibus ipsius Diocletiani, & Maximiani, quæ sunt in eodem codice, ostendunt. Quare vocem eam pro *sine* accipiunt, ut ex ipsa illa lege nemo de criminibus, quæ sanguinis poena carent, transfigere possit, quin ex transactione illa, in crimen falsi incidat, planè & sine falsi crimine transigi de his nequeat. Disceptatio hæc omnis ex usu ejus vocis pendet. Et certè, nisi ex norma latini sermonis vox *citra*, exceptionem, quandoque denotet, & pro, *præterquam*, accipi possit, falsa est Cujacii & Goveani opinio. Nam exemplum quod ex L. *unica*. Cap. de re uxor. Act. §. *accedit*. 13. circa finem adfertur, non multum ad rem facit, cum is locus extet in novissimis constitutionibus Justiniani, qui ex seculi vitio, sæpè loquitur barbarè, nec illam secutus est latinæ linguæ puritatem, quæ superfecit adhuc Diocletiani, & Maximiani tempore. Si propediem ad vos venero, cupio ex te intelligere, quid sentias, Vir clarissime, quem Latinitatis habeo Authorem optimum certissimumque. Vale, & uxorem tuam, liberosque saluta.

Lugd. Bat. vi.  
Julii. 1635.

#### CCXXV.

## CCXXV.

*Clarissimo, Ornatissimoque Viro, D. Magistro Gerardo Vossio Historiæ Professori celeberrimo, S. P.*

Reverende D. Professor Vossi,

**R**everfus domum, obrutus sum Ecclesiasticis ac Scholasticis negotiis; me absente, pestis hic cœpit grassari, visitandi fuerunt ægri, legata Ecclesiæ accipienda, Apochæ scribendæ, & alia quæ res tempusque exigunt. Unus Discipulorum meorum peste correptus. Est is filii nostri Balivii Wassenhovii, qui filiam ante octiduum sepelivit, & tres jam habet cum morte luctantes. Deus illius misereatur, ac fœlicem largiatur catastrophem. Excusabis ergo silentium tenax, non pertinax. Mitto filio tuo Johanni, Merulæ Ennium, pro Colutho Aldino, quem exspecto cum responso ipsius, an velit me mihi servare Macrobi-um, cujus loco, (si velit) remittam ipsi, utranque partem Homeri. Si remiserit codicem Egmondanum, & Worperum, MS. remittam Euripidem, cum Authoribus Historiæ Augustæ, quos duos solos habeo; nam Coluthum remitto. Scripsi Guilielmo Blawio, ut præmia Scholastica mittat, nam unum destinatum filio Balivii ægro, qui expetit ante mortem, si possit videre, fortè impressio illa aliquid boni causaretur. Roga itaque filium, ut Blawium urgeat, ut ad me libros mittat. Causam habes. Hæc Comitum emi duobus Imperialibus, Historiam Herreræ Occidentalis Indiæ, à D. Barlæo versam, roga an non sit nimium. Mittat mihi filius tuus Coluthum meum, cum Papiæ, ac Maio, ac rescribat, an Macrobius mihi pro Homero velit relinquere, sin minus, cum reliquis ad septa redibit. Heri quod nunc occurrit in Servio legi, *septa* non *septa*, esse scribendum, quod à saepe adverbio derivetur. Ego ex te scire velim, rectene, an malè. Deus mihi testis, quam avidè desiderem legere censuram tuorum veterum Grammaticorum, hanc solum mihi fac gratiam, ut mihi significes, quo pretio Blavius tibi vendat; sic possem ad te pecuniam, pro compacto exemplari mittere, & tu pro me, quasi pro te emere, hæc pia, & mihi utilis futura esset fraus. Pro Corollario addo, me inter libros meos invenisse Q. Marium Corradum de Lingua Latina lib. 12. Venetiis excusum, apud Andream Valvassorem 1569. Is an unquam

tibi visus sit nescio; videtur mihi plus quam vulgo sapere; si eum expetas, pro filii Macrobio, aut Euripide, fac me certiozem. Hæc furtim inter scholæ murmura scripsi. Vale, & ut soles, nos ama.

Raptim 2 Kal.  
Nov. an. 1635.  
Veteraquinio.

*Tui observantissimus,*

Johannes Lydius.

Copias Epistolarum D. Fr. Junii, prima vice mittam, defuit describendi tempus.

## CCXXVI.

*Doctrina & pietate eximio Viro, D. Gerardo Vossio, Professori dignissimo.*

Vir Doctissime, & amande Dom. Vossi,

**N**untium immaturæ dissolutionis Dionysii tui antea intellectum, proximè D. Franciscus mihi ex ordine tristi retulit tristissimus. Non enim sine præcipua animi ægritudine, casus ejusmodi recenseri, vel audiri potuit. Equidem ea obstrictum necessitudine, & iis meritis obligatum me tenes, ut non propriis familiæ miseriis differar magis, quam tuarum sensu conturber. Luctum ergo mihi hoc renovavit, Leonardii ante biennium amissi, & tuæ causæ tristitiæ quam addidit plurimum propter filium omnibus affatim cumulatam dotibus. Arduum & rarum est, ætatem doctrina antevenire, rariùs fama, & scriptis illam celebrare. In illo utrumque sic eminebat, ut vix pater tanto filio dignissimus alterutrum quoque exoptatus videre potuisset. Sed fuerit hoc divinum, benigni erga te animi testimonium. Brevem tamen locupletis possessionis usuram gratè potius recordare, quam te ejus avulsione impatienter lacerari. Nec primum, nec unicum, nec gravissimum tibi hoc soli contigit. Deus revocavit donationem suam, tuum cum modo, & ratione morerem experiri vult. Etsi itaque res coacta, ingentem videatur molestiam aspergere, & humanitùs alteri, in alterum sæpè criminationis immodestiam extundere soleat. Prudens nihilominus, semper refugit ab omni specie impatientiæ; quanto magis Christiana mens fortiter illa tolerat, quæ Deus extra propositum nostrum immitit, pro plenissimo Domini jure, quod in homines habet. Hæc ego non scribo, amice intime, tanquam si dubitem, te corculi eruditæ familiæ tuæ extinctionem, non moderatè ferre,

re, atque indignando potius exagitare: sed quasi in summo sensu mœstitiæ, luctus & squaloris tui, non aliud inveniam remedium, quàm quod in cœlesti consolatione, & profundissima æternæ providentiæ meditatione, conquiescat. Abiit tuus Dionysius, & vitam innocentem felici exitu, in Christo servatore nostro clausit, memoriam nominis suavem cognatis relinquens, & Rheidani annales Latine legentibus, admirationem purissimæ dictionis, expromptique iudicii afficiens. Donum istud ultimum retinebo semper, ac æstimabo plurimum animo meo, quem conjunctionis nostræ antiquitas, & literaria tua munificentia totum occupat, fortunâ cupiditati meæ resistente ad remunerandum. Vale præstantissime amicorum, & gratuitam affectionem amoris erga me tui, fidenter conserva. Tuam conjugem, mea peramanter salutat, atque hanc calamitatem, communibus exemplis, præterire jubet. Tandiu enim variis mileris in hac vita affligemur, quamdiu volet is, qui nisi hæc pati nos veller, fieri non permetteret. Illius clementiæ vias nostras commendo, & vos iterum, atque iterum, cum tota domo salvere jubeo.

Hagæ Comitæ  
16 Nov. 1635.

Tuus, ut diu nosti,

L. Casembroot.

## CCXXVII.

### *Salutem in Christo.*

**S**Trena sint Literæ hæc (Vir clarissime) quam Calendis hinc Januariis mitto more & fide antiquis. Tres ni fallor apud me sunt Literæ tuæ & omnes gratissimæ, pro tribus unam reddat vel ipsa inurbanitas. Nec tamen inurbanitas adeo me gravat quàm negotium; nec tam illam affecto quàm hoc premor. Veniam dabit scio humanitas tua singularis, amico nimium extra se viventi.

Ad Literas tuas quod attinet, lego in secundis tibi à Dello significatum (iussi enim ut scriberet ipse tum occupator) opus vestrum Grammaticum egregium quidem & quod supra vulgaria sapit, de manu meâ in optimæ spei Principis transiisse. Quod tibi gratum fore spondere mihi ausus sum, etiamsi literis supervenientibus de ea re siluisses. Sed quid princeps? Illud enim pu- to adhuc audivisti. Quum post mensẽ

mentio Archiepiscopi coram ipso facta est, novi, inquit tenerulus, sed quando mihi alium allaturus est librum? Spero futurum ut tam libri sit tenax, quàm afferentis memor.

In his etiam lego me unam Epistolam tuam non legisse, imo ne vidisse quidem. Intercidit enim, sic scribis, incuriâ eorum quibus dederas, fortè præmissa est in Sueciam quo non sum secuturus. Huic ut respondeam non expectas.

Si Sternius meus, sic enim est, rationem tibi reddidit gratam rerum Cantabrigien- sium, fecit quod se decuit & mihi pergratum fuit. Nolui enim tibi deesse, quia sibi defuit filius tuus. Spero nunc meliora, referet ab Indiis quo advocati fiscalis dignitate ornatus abiit. Det Deus ut se te dig- num gerat.

Quod de Scipionis Gentilis filio, nepote Alberici scribis, mihi grata sunt omnia. Commendatus etiam venit à doctissimo amico meo Joan. Seldeno. Et valuissent apud me facile nota vestra & Seldeni, quin & vel nomen Alberici mihi virtutibus suis abundè noti, si quidquam in ea re potuissẽ. Sed aditus qui olim patuit nostris, jam in rem suam & literariam attentionibus multo obstructior est. Nec possum ea præstare, quæ facultas si daretur mihi in sum- mis notis semper fuere: Erigere scilicet afflictos & bene merentium, inter quos Albericus non infimus fuit, etiam seros ne- potes fovere.

Auctum dignitate Legati Suecici Hugo- nem nostrum Grotium jam antea audivi & simul gavisus sum, non ita quando re- vocatum apud nos sparsum fuit. Sed invidiæ tuba cecinit illud, & quamprimum audivi famam mentitam læticia auctior rediit. Literis etiam suis è Gallia me deco- ravit, sic enim de doctissimo illo viro sen- tio cui opto summa. Tragœdias & Poe- mata alia quæ ille dicaverit tibi, tu mihi dedisti, optatissime ad manus meas perve- nerunt. Pauca legi, utinam otium darc- tur ut reliqua possim.

De expeditione vestra una cum Gallo prima ætate suscepta vere scribis & graviter. Nolo ea de re quidquam adjicere præter hoc unum superasse vos (Gallos dicam an Belgas nescio) in urbe Tirlinensium dire- pta irruptionem illam plus quàm barbaram Gothorum & Vandalorum, de qua & ever- sis omnibus sacris toties & tam funestè con- questus est suo tempore S. Augustinus.

Restant Literæ tuæ tertiæ. Nec illæ sine dono me petunt: Cum illis enim moram ingratam neccitentibus Typographis circa Dionysiana vestra & tua alterius filii tui

Mat.



Matthæi nempe fœtum suscepi. Et certe multum me afficit videre Patrem in filio, Gerardum in Matthæo. Ita iudicium & dictio nec de fide dubito seniore in juniore adornarunt. Quæ interspersæ sunt parum cum Regum Imperio convenientia Apologiam una secum ferunt. Scripta ea esse in & sub Regimine alio, ubi populus ut alios mores, ita & alias leges postulat. Nec Proceres vestri satis honori suo consulunt, si non juvenem de illis tam egregie meritum, ut Stipendio, ita & Titulo ornent. Crescat hic in solamen tibi, & uberrime in sinum tuum refundat spes in Dionysio amissas. Et quotquot alia tibi cordi sunt, cum anno foeliciter currente & revertente, omnia tibi vovet

*Dat. ex Ædibus  
nstris Lambeth.  
Kal. Jan. 1636.*

*Amicus tuus studiosiss.*

W. Cant.

## CCXXVIII.

**E**T si semel iterumque, ad te scripsi, Vir clarissime, tamen hanc occasionem negligendam non putavi. Primis Literis commisi quæ in Cretâ suis locis inferenda cupiebam; tum & alia scribebam, quæ ad operum meorum editionem pertinebant: quam ut porro urgere velis, etiam nunc in majorem modum rogo; ac confido, semel tandem, post promissa multiplicia eam inchoatam esse. Si id fieri commode queat, Tomo historico primum locum dari velim: quem transmittam, volente Deo, primo vere; simul aliquem certum hominem, cui committere tuto possim, nactus fuero. Qui has adfert est Jonsônii minister; & se rediturum dicit circa proximum Paschatis festum; itaq; & huic trades si curatum quicquam voles. Quæso autem, uti scribas mihi quidvis quod putabis scitu non ingratum fore de Leidenfis Academiæ ac Gymnasii vestri statu. Audio Salmasium in Galliam se recepisse, forte nunquam rediturum. Ego quidem sic existimo: siquidem familiam & supellestem universum secum adduxit:

*Hoc Ithacus velit, & magno mercentur Asida.*

Ote, meque, ter felices, quorum animos transversos non ambitio ulla capit aut invidia. Tu quid novi jam moliris? Nam non cessas, satis scio. Ubi libri de Poetica, ubi filii tui Cæsar, & quæ alia expectamus. Hodie natalem celebros septimum &

quingagesimum per benigni Dei gratiam; utinam ut præsentem te adesse opto, ita votum tu repræsentare posses: magnus mihi ad læticiam cumulus accessurus esset: sed quam frustra sunt hæc verba, tam hoc animo meo dolet, quod non liceat te frui. Itaque iterum te rogo in Epistola hoc sine, ne committas, ut hunc ad me redeuntem vacuum abs te dimittas. Vale diu, amicorum præstantissime, cum uxore liberisque. Ego, mea ac mei annum hunc felicem vobis apprecamur.

*Scribebam raptim  
Soræ a. d. vi. Jan.  
1636 xxxvi.*

*Tuus antiquâ fide,*

Joannes Meursius.

Illud quoque monitum velim, ut effigies in conveniente loco Tomi primi collocetur. Iterum vale.

## CCXXIX.

*Viro incomparabili Gerhardo Johanni  
Vossio, S. D. Vincentius Fabricius.*

**J**acobus Pauli, venustate morum, rareque eruditione insignis, dum ad vos proficiscitur, pariter ad amicitiam tuam, Vir maxime, viam adfectat. Quæ si ipsi contingere potest, quod spero, non id tam mea commendatione fieri arbitror, quàm quod ipse eximiis, animi, ac morum ornamentis instructus, favorem summorum hominum meretur. Si tamen ipsi precibus meis inductus, aliquid peculiaris amicitia tribueris, facies pro solita indulgentia tua, tot beneficiis mihi nota. Cæterum ipse hoc quasi benevolentia pignore accepto, omnia luculentiora coram, propediem cum bono Deo expectabo. Imprimis velim, si qua in re possis, eas quas agitat amicus noster, consiliorum rationes à te adjuvari. Cum enim civilis juris cognitionem accuratam habeat, eam aliis cum aliquo subsidio sumptuum ac emolumento impartiri cupit. De cætero is est, qui plura eruditionis documenta, coram daturus sit, quam à me, in Epistola poni possunt. Te domumque tuam, inter illas ut audio, civitatum vestrarum strages, omnia salva esse spero. Deumque precor, ut à tam insigni capite, totque beneficiis mihi nota familia, omnem procul luem, ac calamitatem, abesse jubeat. Quam universam plurimum salvere jubeo; imprimis Mattheum nostrum, cujus Annales jam arbitror

tror prodiiſſe, & vos omnes, opto eſſe incolumes, donec coram, illam amicitia veſtræ dulcedinem, tantoperè dilatam, reſumere liceat.

Hamburgi pridie Kal.  
April. c. 10 1606 xxxvi.

## CCXXX.

**A**Nte triduum ad te ſcripſi, Vir clariſſime, per Petrum Vilhadum juvenem doctum & modeſtum: nunc nec hanc occaſionem negligendam exiſtimavi. Ac Vilhadum ſat acceptum tibi fore nullus dubito. De rebus meis iterum urgeo. Egrefero ſpei meæ, quaſi illudi. Jam triennium ſuſpendor, & de die in diem differor. Ipſe filius Literis ſuperiore anno datis, ad diem xvii. Julii ſtatim ſe editionem incepturum promittebat; & hac hyeme eoſque perduciturum, uti cauſæ nihil foret, cur Typographo Hafnienſi Danicam hiftoriam darem; ſed admoneor ab amico, Literis ad me ante duos menſes ſcriptis Amſteldamo, necdum admotam manum eſſe. Et proſecto facit res hæc, ut ulterioris moræ impatiens ſiam: itaque ſemel tandem dicat, quidnam facere conſtituerit, ut conſilium ipſe quoque aliud capiam. Si excudere opera mea detrectabit, ob impenſam, per me licet, non magnopere laboro. Quanquam enim volupe videre foret, opera mea junctim edita, non invitum curam hanc deponam tamen, & poſteritati tradam; ſemel ea evulgata, ſatis habens. In hoc caſu cupiam remitti mihi per hunc noſtrum Mercatorem, quæ non edita pridem miſi, niſi forte hæc ſeorſim ob minorem illic ſumptum ſit libentius excuſurus; quod ut uno fieri volumine poſſit commodiſſime, & in formâ (ut loquuntur vulgo) folii; ita non ingratum erit. Quod ſi neque iſtud volent, obſecro, quod dixi facito, & remitte per hunc noſtrum: etiam ex ære laminam, in quâ ſculptâ effigies. Nunc eſt commoda occaſio atque certa, quam te rogo ne prætermittendam putes, negligatve. De Creta mea illud quoque abs te peto, ut ſignifices an oſtenderis eam Noomiſio; & inſcriptio an placuerit. Erit mihi intellectu iſtud gratum, ut propoſitum dedicandi vel retineam vel mutem. De Rep. ſi quid habes, fac me item certiorum. Vale & ſalve à me, mea atque meis, cum tua & tuis diutiſſimè.

Soræ ad diem  
xxii. Aprilis  
c. 10 1606 xxxvi.

Tuus antiquæ fide,

Joannes Meurſius.

## CCXXXI.

Clariſſimo Viro D. Gerardo Joanni Voſſio, Affini conjunctiſſimo.

Conjunctiſſime Affinis,

**M**ercator ille Gemmarius, cui tuas ad me literas commiſeras, ſeriùs eas ad me detulit; eo quod metu contagionis, veſtrates naves, hic aliquamdiu portum ingredi vetabantur; neque eas exonerare licebat, niſi poſt certum aliquod præſtituti temporis ſpatium. Utcumque tamen gratulor mihi, quod tandem aliquando, exſpectatas diu ſchedas videre contigerit; quamquam doleam, quod ob hæc nugas, tuis quæ imprimenda erant ſcriptis, mora aliqua ſit injecta. Nolim factum. Dum curſum luſtro, in unum atq; aliter tantum incidi errorem Typographicum. Pag. 44. in verbis Statii leg. *Myroni*. Pag. 101. in verbis Plinii, leg. *Harpocratem*. Quamvis metuo, ne meus magis hic error, quàm Typographi fuerit; fieri enim poteſt, ut Harpocratonis nomen, cujus Lexicon in hoc ipſo cap. toties citatur, pro Harpocrate exciderit. Gaudeo alioqui, tam diligentibus Typothetis rem commiſſam. Videris urgere Epiſtolam dedicatariam, quam nunc præcipiti feſtinatione, qualitercumque elaboratam, Rever. Epiſcopo Nordovicenſi oſtendi, qui luſtratis ſchedis hiſce, ſuadere perſtitit, ut Regi noſtro Opusculum inſcriberem; probavi, rogavi, ut Archiepiſcopum Cantuarienſem, ſuper ea re conſuleret; etiam hac in parte, deſiderio meo pleniffimè ſatiſfecit Vir humaniſſimus, ac tui amantiſſimus; retulitque mihi hæc ipſa veſperâ, Archiepiſcopum non modò non improbare conſilium, ſed favere conatibus hiſce meis, paratumque porrò fore, cauſam meam apud Regem agere. Expertus es quàm prolixè Vir magnus iis ſoleat indulgere, quibus benè vult. Caterùm de his aliàs uberiùs: Nunc quod reliquum eſt perſequar. Inſolens eſt hoc mihi ſcribendi genus: neſcio quo ore tale quid aggredi auſus fuerim: adhibe, quaſo, judici tui limam, in iis quæ non ſatis commodè ſe videbuntur habere. Ingraveſcit hic quotidie contagio; quamprimùm igitur cras ſummo mane ſecedendum nobis eſt, æſtatem hanc in agris, fortè etiam magnam hyemis partem tranſacturi. Jamdudum ſcripſi commodiſſimè, ac minori cum periculo, ad me tranſmitti poſſe exemplaria, ſi Abrahamus Van Bartham, ſcæcem libro-

rum

rum commendet, Mercatori Anglo; Roterodami hic agit, M<sup>r</sup>. Quarles. Is quoniam Comitis negotia, in talibus curat, etiam hanc curam, quæ familiam Arundellianam tangit, in se suscipiet. Magnum est quod nunc peto, nulla tamen ratione tibi, tuisque fraudi futurum. Quidquid expenderis lubens refundam, simul ac de sumptuum summâ certior me feceris. Tam aliena est hæc gens ab omni commercio cum iis locis, quæ contagionis suspicione laborant, ut certus sim, me nunquam impetraturum ab ea, in qua vivo familia, ut liceat libros compingendos Londinium mittere; neque auderem Regi, aliisque Proceribus Regni, libros ibi compactos exhibere, si vel minimû ingravescat lues. Apud vos jam deferbuit, spero, malum; & post quaecumque temporis intervallum, tutius putant Britannii nostri, libros alterius cœli, ac soli, tractari posse. Debebitur Regi exemplar melioris notæ; Carolo Principi, Principi Electori, fratrique ejus, Comiti Arundelliar, ac filiis Archiepiscopo Cantuariensi, Episcopo Londinienti, Nordovicensi, Lincolnensi, plerisque Proceribus regni, & quibusdam Aulicis. Longum esset enumerare singulos. Facile est conjicere quam multorum gratia peregrino homini, aut captanda, aut tuenda sit. Pudet me certè tam importunæ audaciæ, neque ullo jure videor mihi hoc exigere, nisi quod prona benevolentis animi facilitate, quam semper paratissimè mihi exhibuisti, in spem adducor: credere adhuc debes, me prima quaque occasione lubenti, ac grato animo refuturum quidquid impenderis. Debeantur adhuc exemplaria compacta tibi ac tuæ familiæ, Affini Narano, Avunculo Gomaro, Cl. Grotio, Salmasio, Barlæo, Doubletuo, Heemskere qui scripta ad vos detulit, & quibus consultum porro videbitur. Quamquam ego lubens impolitum scriptum, tantorum virorum oculis si fas esset subtraxerim. Quod titulum spectat, omnem rem arbitrii vestri facio: bene factum judicabo, quicquid feceris; cum tibi, ac Typographo talium rerum sit major usus. Titulum quoque dedicatoriæ Epistolæ præmittendum omisi, non quidem consulto, sed quum scriptiorem hanc seriùs inchoatam, in multam notam produxissem, oculis in eam quam jamjam literis hæc involvere parabam dedicationem conjecis, titulum fortè defideravi. Magni Monarchæ tituli non sunt ambigui. Et hærenti per cognatum Franciscum succurrer D. Boswellus. Quantum Gerardo, atque Isaac, pro operâ strenuè

navatâ debeam ipsi propediem, Deo Opt. Max. nobis vitam, atque animum largiente, experientur. Vale, conjunctissime Affinis, ac meis verbis sorori carissimæ, atque omnibus tuis salutem plurimam dico.

*Raptim in Ædib.  
Arundellianis Ann.  
1636. 12. Maii.*

*Tuus omni officio,*

FFF. Junius.

CCXXXII.

*Salutem in Christo.*

Dignissime Vossi,

**L**iteras accepi tuas. Data sunt ad 8. Calend. Junias. Literæ pregnantæ erant. Nam ex illis semel apertis prodire Literæ Calendrinianæ Regium nomen perferentes & petentes manum. Quas priores misit nescio. Has sicut impensius desideratis & ille pro se & tu pro illo in manus Regias dedi.

Rex serenissimus ut vidit quo tendebant Literæ tradidit eas Secretario Domino Joanni Coco, à quo puto responsum potest Calendrinus expectare. Mihi enim nulum dedit Rex, nec ad me pertinet in rebus ad Monilia & Pecunias spectantibus responsa dare. Hoc tamen tibi ausum dicere, nisi admodum falsa mihi memoria nimis labilis suggerat, Calendrinus parum candide se gessit, in negotio de Monilium Jocaliumque Regionum restitutione. Nec hoc mihi tantum vilum est, sed & aliis & summis quidem Regni Proceribus. Sed audio nunc fere superatas esse illas difficultates, & si ita res sit gaudeo. Sin aliter, non habeo quo te amplius detineam. Nam quo in loco res Burlamachianæ jam sunt, ego planè nescio. Scio quod scribis Calendrinum in Batavianam profectum ad expediendum Regium negotium. Si ille interim operam det ad impediendum sub nescio quali prætextu (sicut nonnulli apud nos prudentes augurantur) quid est quod ego illi in gratiam præstare possim? Spero meliora de persona & familia, tam bene de te merente. Et si quid possim pro Calendrino, nihil prætermittam, ne occasionem ipsam, semel si constiterit sedulam illum Regio negotio navare operam. Hoc quamprimum volui te scire Literas Calendrinianas in manus Regias pervenisse. Vale.

*Ex Ædibus meis  
Lamb. Jun. 9. Sr.  
nostro, 1636.*

*Sic jubet tibi amicissimus,*

W. Cant.

CCXXXIII.

X



## CCXXXIII.

**C**UM Soranus iste Civis, Vir & amice præstantissime, ad te iret, sine meis eum Literis dimittendum non putavi. Tuas scriptas iii. Non. Jun. recte accepi: sed non mea, quæ omnino expectabam. Quia vero nunc Typographus serio editionem inchoare velle dixit, libet saltem hâc vice etiam fidem ejus, quam jam toties sefellit, experiri. Itaque expecto specimen, quod promisi: & ut porro sine dolo certa omnia exequatur, valde cupio. Mitto in eundem finem reliqua, ad Cretam quædam, suis locis inferenda, quod ut per amanuensem tuum cures, etiam atque etiam rogo. Filii annales legi; nec mirari satis possum, aut judicii in ætate juvenili gravitatem, aut styli quoque majestatem, Historiæ parem. Faveo nascenti famæ, quantum quisquam, & applaudo: pergat sic cum bono Deo, magnum aliquando virum Patriæ daturus suæ. Tibi gratulor talem filium, & ut diu conservet summum eum numen velit opto ac voveo. Pestem invalescere doleo, sed incolumem te tuosque servaturum esse Deum confido; utq; faciat ex animo precor; neque ego id duntaxat, verum mea quoque & mei, qui vos omnes ex interiore animo salutamus.

*Raptim Soræ ad  
diem xxviii. Jun.  
clō Idc xxxvi.*

*Tuus antiqua fide,*

Joannes Meursius.

De Patriæ rebus fac me quæso certior. Pestis Leidæ denuo grassari dicitur. Arlander-venia Domino, nisi grave est, multam à me salutem; dicito etiam Barlæo nostro, Viro non è multis & amico veteri. Ubi videro Typographum serio manum operum editioni admove, mittam Danicam Historiam. Dum cunctatur Civis noster, commodum se offert nobis Joannes David Zurmerius; itaque utendum ejus opera existimavi, hominis imprimis fidi, & utrique nostrum amici. Iterum salve, atque vale, amicorum optime maxime.

## CCXXXIV.

Vir Clarissime,

**Q**UI has adfert est Petrus Wilhadus egregius Juvenis virtute & eruditione. Commendatum tibi cupio pro veteri nostra amicitia: paucis tamen, quia mul-

tis non est opus, & seipsum satis tibi commendabit ubi videris, & cognoveris. Vixit aliquot jam annos in Clarissimi Brochmanni, SS. Theologiæ Doctoris & Professoris in Academia Hafniensi, maximi amici mei contubernio, & hoc ipsum magnæ commendationis instar puto. Honestis Parentibus honestè natus & educatus, operam studiis jam navavit prædicandam: porro ea & virtutem ante omnia colere certus. Te observat inter eruditos maximè & amari abs te petit. Quæso facito, ac facturum satis scio, vel virtutis tuæ causâ, & humanitatis etiam, quâ honesta quæque ingenia sponte tua tibi quovis genere officiorum prosequenda arbitraris. Non hic falles expectationem nostram, nec virtutem tuam desereres. Post nonnullam mansionem etiam Lugdunum cogitat: quod si quando est petiturus, Heinio eum, ac Cunæo, & id meis quoque verbis commendato. Mea opera quo sint loco, & Typographus an inceperit semel tandem fidem datam liberare, ac quousque sit progressus, fac occasione primâ scire possim. Valde velim justo meo desiderio aliquando satisfieri. Vale amicorum princeps, cum uxore liberisque diutissime. Uxor mea te, tuamq; filia filiam plurimum salvere jubent.

*Soræ ad diem  
xix. Octobris,  
clō Idc xxxv.*

*Tuus fide antiqua,*

Joannes Meursius.

Has scripseram anno ut vides superiore, sed dilatas propter ingruentem illo tempore Pestilentiam, nunc demum mitto: si quidem qui eas ferret meo hic consilio usus, iter suum ab eandem causam distulit. Iterum rogo, ut me primâ quâque occasione rerum mearum certiorē facere velis. Si procrastinare pergit, cogar Danicam Historiam nostro huic Typographo tradere. Quod si animus excudendi post dilationem triennii etiam abierit, redeant ad me quæ *dividit* pridem misi, nisi forte illa excudere sola malit, quod vel sic non improbavero. Si excudere opera nolit, statim effigiem remitte, poterisque commodissimè per Jansonium, qui ad famulum curabit Hafniæ res suas agentem. Iterum vale, Vir clarissime, at nos amare constanter perge.

*Soræ ad diem xix.  
Apr. clō Idc xxxvi.*

Adjunctas rogo uti statim Leidam cures per nautam deferri.

## CCXXXV.

CCXXXV.

*Reverendo, Clarissimo, Doctissimoque Vi-  
ro, D. Gerardo Joanni Vossio, Histo-  
riarum Professore, S. P.*

Vir Clar. Dom. & amice plur. observande,

**D**Omum reversus prospero satis, per Dei gratiam, itinere, memoriaque repetens promissum filio Isaaco Hannonis Periplum, nihil prius habui, quam ut, quod receperam me facturum, præstarem; fidemque meam liberarem, necnon literato filii tui desiderio, quadantenus satisfacerem, mittendo exemplar Latinum juxta atque Græcum, illud quidem ex Interpretatione Conradi Gesneri, hoc verò ex Basiliensi quod anno MDXXXIII. prodiit, exemplari exscriptum manu, Patris mei *τῆ μαγ-  
είας*. Notæ ad Varronis Satyras, alia occasione ad vos, si Deus volet, perferentur. Interim gratias, quas possum, habeo maximas pro insigni erga me immerentem, humanitate, ac benevolentia, tot ac tantis beneficiis, jamdudum comprobata, quibus remunerandis etsi me longe imparem sentiam, adeoque ratio accepti, atque expensi hæcenus, haudquaquam inter nos conveniat, remunerabo te tamen grato animo. Sanè voluntatem emetiar tibi abundè. Vale, Vir humanissime, cum tota familia, cui, atque imprimis uxori, multam à me salutem, ut dicas oro. Dominus Deus verus ille *Ἄλλοι*, quam diutissimè vos omnes incolumes conservet, ad Ecclesiam, Patriæque salutem, atque ornamentum.

Dordraci prop-  
rie Kal. Junii,  
1634 cxxxiv.

*R. T. observantissimus,*

Jacobus Lydius.

CCXXXVI.

*Viro maximo Ger. Jo. Vossio, Johan.  
Fredericus Gronovius salutem & ob-  
servantiam.*

**S**anctius est mihi otium tuum, quam ut tralatitia salutatione id interpellem. Quia tamen aliquid de Salmasio, scribi petieras, quod alios scire nollem, certè solus scire jussus eram, his exaravi. Reverendo D. Riveto, gratissima fuit tua salutatio, atque hanc à me, tibi vicem reddi voluit. Is de Salmasio hæc mihi. Emissarii Pontificis,

rursus variis ipsum pollicitationibus terantur, ut ad mutandam Religionem ipsum adducerent. Sed ille omnibus spretis, paravit ea quæ essent itineri: in quo non leve fuit, quod vix ullis rationibus, uxor expugnari potuit, ut reditum ad has terras pararet. Itaque tandem ipse constituerat, reverti solus, ne quid Domini Curatores, in fide ipsius desiderarent. Sed novum ecce de transverso, quod nos omnes in maximum metum conjecit. Princeps Condæus amplissimam ipsi in Gallia dignitatem, cum lautissimo salario, obtulit hac conditione, si aliam simulare vellet Religionem. Cum ille solita constantia id refutaret, commotior paulo Princeps secessit alio, ac stantem reliquit: mox reversus; sed si Rex id tibi det in Gallia stipendium, quod Lugduni accipis, eademque lege, & libertate, numquid habes rationis Patriæ te negandi? Ille rursus proponere fidem datam, obligatamque apud D. Curatores, quam infirmare nec fas esset, nec se, ut frangat, ulla spe, aut præmio proposito, adductum iri. Iratus plane Princeps, insultatum reliquit, ac postero die, per quemdam ex amicis, ipsi significari fecit, ni ille ultro maneret, atque acciperet conditionem, quam posterius ipsi obtulisset, fore ut Decreto Regis Christianissimi, Gallia egredi prohiberetur. Quæ res vehementem ipsi, omnibusque ejus amicis attulit perturbationem, adeo ut ipse, Pater Catholicus, & uxor, quæ tantopere antea repugnauerat, unum hoc jam optabile habeant, liberum pedem patria efferre, & huc reverti. Hæc ex Epistola ipsius ad Rivetum, quam ipse mihi prælegebat, & Gallicè scriptam interpretabatur. Hujus enim consilium in recrepera expetebat; neque enim dubitabat, si illud Regis edictum conficeretur, res ipsius ad incitas redactum iri, certè *πολλὰ  
χρεὶν* dicendum esse isti majorum simplicitati, cujus in Regnis non licet dicere nomen, vestri libertatem vocant. Hæc fortè non grata tibi, sed nec mihi ipsi scribenti, opto ut in vino, & aqua scripta sint; ut vovere solent, qui infaustos nuntios habent de amoribus suis, Poetæ. Vidi nuper Cl. Grafwinkeli nostri observata ad Sallustii bellum Catilinarium, affecta ferè, & quantum permittunt alia negotia, quæ nunc ipsi imposita sunt, propediem absolvenda. Quamquam merè politica sint, ipseque abhorreat, à severa Critica; gratum fore tamen sibi testatus est, si velut in Epistolam conjicerem, quæ animadversione digna haberem, quæ ipsius operi adderetur, ut ne hac in parte id mancum esset.

X 2

Existimo

Existimo juvari me posse, scripto codice tuo, quem aliquando offerebas mihi, & peto ut appareat promissum, occasione commoda. Neque enim properandum est, antequam nactus fidum fueris hominem cui thesaurum istum credere velis. At Coleri editionem & notas petii à filio tuo. Eum quæso cura, ut prima occasione habeamus. Neque enim vidit eam antehac Grafwinkeliu. Vale Clarissime Virorum, & me ama.

Hagæ raptim, iii. Eid. Jun.  
Anno c1o 13c xxxvi.

Heinsii Epistola contra Balzacam cœpit excudi.

## CCXXXVII.

Clarissimo Viro Gerardo Joanni Vossio,  
Aubertus Miræus S. P. D.

Vir Clarissime,

**A** Multis retrò annis, ingenii vestri monumenta, vidi, & legi. Audaciam nunc sumo ad te scribendi, quod de tua singulari humanitate, nuper communis quidam amicus, multa coram prædicavit. Sed & exemplar unum, Chronici nostri Belgici, unà cum Typo veteris Galliarum Belgicarum, & viarum in ea militarium transmittito: ut si tanti sint, cum otio percurras, & libere censeas. Ego certè iudicium vestrum plurimi faciam, & magni id beneficii loco habeo. Post pauculos enim menses, meditor alteram Chronici nostri Editionem: ideoque libens audiam illius iudicium, qui de tot Historicis, & Chronographis, publicam sententiam tulit. Et verò diu est, quod exemplar vestri Libri, de Historicis Latinis, hic quæro, nec venale reperio. Velim itaque meo sumptu exemplar unum Antuerpiam, ad me mitti; & quicquid expenderis promptè refundam. Si quid porro sit, in quo ego hic aut alibi, vicissim tibi gratificari queam, operam omnem meam libens offero, & rogo ut de tuis studiis, ac scriptionibus, præsertim Historicis, quibus ab ineunte ætate mirificè capior, subinde certiozem me reddas. Vale.

Raptim Antwerp. Cl. D. Vestræ Studiosissimus,  
iv. Idus Novembr.  
c1o 13c xxxvi.

Aubertus Miræus.

## CCXXXVIII.

Gerardo Johanni Vossio, Viro maximo S. D. Johan. Fredericus Gro-novius.

**C**UM in eo essem ut elegantissimis filii tui literis, responderem, nec opianti, humanissimæ tuæ, supervenerunt; adeo gratæ mihi; ut sacro eas osculo adorarem, simul manum agnovi. Sallustii omnes rectè mihi redditi sunt, & nunc quoque bene pudicèque asservantur. Quid ego inde profecerim, non sine prædicatione tuæ benignitatis, testabor fortè aliquando publicè, si tamen perrupero carceres, quibus nunc undique, & undique ne prodeam, nescio quæ iniqua fortuna me circumvenit. Nosti, non infecundos prorsus, nos esse nugarum, si in obsequentem materiam incidimus. Cl. Salmasius, cum cura dicendus, nunc tandem bona fide, propediem adfuturus expectatur. Si mandatum Dominorum Curatorum, quo ipsum revocabant, venisset in manus ejus, antequam solvit è Galliis, Ampliiff. Legatus ab Hemstede, non ultra nunc absentem desideraremus. Incidit etiam consilia Principis Condæi, & aliorum magna Salmasii cum lubentia, imminens Galliarum status, unde horribiles afferuntur nuntii, vobis proculdubio certiores. Itaque etsi dimiserint eum, nec ullo nunc sufflamine istiusmodi inhibeatur, nonnihil terrent tamen pericula itinerum, quæ ubi numinis clementia, prudentiaque sua evitandi rationem iniverit, nihil erit propius, quam ut divinum, & exoptatissimum Heroem hic amplectamur. De Benthemio lator oppido esse tibi in manibus, quo necessitates ejus subleventur. Est enim ille haud dubiè non indoctus, cæterum modestis moribus, inculpatæ vitæ juvenis: Parente natus valde honesto, proboque, & de Bremenfi Schola egregiè merito, qui plurimos eo beneficii genere juit, quo tu nunc ejus filium. Quo magis dignus est, ut paternæ bonitatis, velut redhostimentum cernat, & ipse benè moratus, de quo confirmem nunquam te commendationis tuæ pudorem habiturum, ut quidem hominem confirmare oportet. Quare ultrò meas preces, cum illius conjungo, ut de erudito, pudenti, & fortè Ecclesiæ Dei, olim profuturo juvene, quemadmodum soles, bene mereri velis. Miscella nostra, Papinnaque,



naque, quantum ab aliis studiis respirare licet, quorum & locus hic, & rationes meæ me admonent, ingenti cumulo ad-  
aucta hic sunt. Sed edendi quicquam nunc  
omnis spes mihi decollavit, postquam in  
Galliis, Salmasius licet valde adnitus, ut  
nunc ibi agitur, nihil impetrare potuit,  
& non ita pridem nova perfidia L. mihi  
illuserunt. Interim monstra librorum  
quotidie prodeunt, & ingenti cum gratia  
excipiuntur eorum, qui quidem præter ti-  
tulum, & præfationem nihil legunt; Cæ-  
terum soli faciunt, ut gaudeat, qui scrip-  
psit. Sed heu! alia major infelicitas  
mea, quis hic Bibliothecam tuam mihi  
reddit? Ego quidem etsi prolixus bene-  
ficiorum interpretes sum, & agnovi semper  
magnitudinem tuorum erga me merito-  
rum, tamen cum maximè inopia ipsa me  
docet, quantum sit, Vossianæ Bibliothecæ  
usui liberali perfrui. Promittebat nuper  
filius tuus Statii Gryphicum exemplar  
alicunde se nancisci posse. Id nollem  
eum oblivioni tradidisse. Meus hic sum-  
ptus sit, ut & pro altero Colinei: operam  
mutuam imo majorem ipsæ, imo omnes  
è gente vestra (ita de me meriti estis)  
gratissimo lubentique imperetis. Junii de  
pictura veterum, an absolutum sit, aveo  
scire. Effet fortè ubi is liber usui mihi esse  
posset, in Stadianis meis. Magnus Rive-  
tus te peramanter *ἀγαπᾷ*. Ampli-  
f. Grafwinkeliu rusticatur, vel potius in  
rure vero, barbaroque, bellum gerit cum  
Seldeno, pro libertate maris. Verum est,  
cum iussu Illustriss. Dominorum Ord-  
inum id opus meditari: atque ipse adeo  
hisce oculis diploma vidi. Vale decus  
nostrum, & literarum præcipuum, & sal-  
ve cum sanctissima Matrona tua, filiis, fi-  
liabus, familia.

*Hagæ, æs ræget, uti jufferas, ad diem  
v. Kal. Septembris, Anno Christi  
clæ lcc xxxvi.*

Vidisti proculdubio librum nuper edi-  
tum in æmulationem magni Charonen-  
sis: vidisti & non doles malè sentire de bo-  
nis, qui sic seipsum conterant.

## CCXXXIX.

Insignissime & Clarissime Vir,

Quin aliquam mei rationem (recorda-  
tionem saltem) & adhuc habeas du-  
bitare non finit ille, quem ante annos jam

aliquam multos erga me professus es amor.  
Nihil certe gratius in patriam reverso  
potest accidere, quàm ut eum etiamnum  
non defecisse intelligam. Si rationem ex-  
acti in Syria temporis ut reddam (quod  
jure poteris) expectes, vereor ne mihi ex-  
pediendo impar prorsus fuerim. In Lingua  
Arabica exercitator paulo si redierim; si  
tenui Librorum Arabicorum suppellectile  
ditatus, quid hic tanti ut melioribus studiis  
tot horas (ne annos dicam) ademisse non  
pudeat & pœniteat, nisi in his plus pro-  
fecissem? Si tanto oneri pares essent hu-  
meri mei, sunt penes me Proverbiorum  
Arab. antiquorum sex Chiliades, quas au-  
dacter dicam in lucem edi è re literaria  
esset. Est & historia quædam compendi-  
osa à Creatione ad annum Hegiræ ultra  
600. Saracenicæ isti Erpenianæ & stili  
elegantia & judicio (si quid ego censeam)  
longe præferenda, cui in Linguam Lati-  
nam transferendæ ni tenuitas me mea de-  
terrere, libenter me accingerem. Sequi  
possent & alia. Et fieri forsan potest,  
Deo volente, vitamque & otium conce-  
dente, aliquid si tu quem studiorum me-  
orum fautorem & arbitrum elegerim, cal-  
culo & præceptis tuis animos addideris.  
Plurimum certè vigoris à candore & mo-  
nitis tuis receptura sunt studia mea penè  
languescentia. Vale, magne literarum  
Antistes, & me amare perge.

*Oxon. in C. C. C.  
Decemb. 5. 1636.*

*Dignitatis tue*

*addictissimus,*

Edwardus Pococke.

## CCXL.

Lætum mihi nuntium postremæ tuæ  
attulere; scilicet, Typographum jam  
semel tandem manuum operi admovisse;  
verum de Constantia dubito, quando cum  
discederet Joannes David, nil omnino li-  
terarum ad me dederis. Credo, quia pu-  
debat scribere, ab incepto destitisse, ma-  
luisti nihil scribere. Quod si ita sese ha-  
bet, merito desidero in eo homine probi-  
tatem; nec à levitatis vitio excusare il-  
lum possim, ne quid gravius pronun-  
tiem. Certe neque probus quisquam,  
fideique suæ observans, aliter queat.  
Itane me ludibrio, nam hoc dicendum,  
annos quatuor haberi? Reddat potius  
lucubrationes meas, quæ ipsius mala fi-  
de nimis diu sunt suppressæ. Pater, in-  
quies, potius culpandus erat, nec diffite-  
or:

or: sed profecto ego metuo, ne quid filius per vestigia Patris ire animum inducat suum. Quæso itaque & obtestor, per sinceram tot annorum amicitiam, per eximiam illam tuam probitatem, ne me ultra derideri patiaris. Mitto tandem, si quid forte hominem exstimulare istud possit, Historiam Danicam, quam præverti, cæteris sepositis omnibus, maxime velim; nec cessari, antequam ad finem duxerit. Potest autem illud facere, si promoverit diligenter, intra sex aut septem Menses. Eapropter Tomi Historici partes duas esse volui, uti suo Typothetæ singulæ committi possint. Ita autem edi cupiam, uti primus iste Tomus etiam seorsim vendi cuivis possit, Historiæ magis quam Philologiæ amanti; quod ni faciat, fore sciat ut alius sic excudat. Cupio autem, sicut dixi, maxime editionem maturari. Nam si istic etiam antiquum obtinere velit, sciatur mihi *αὐτοχρον* esse; & hic edere, de superiorum quoque voluntate, planè item constitutum. In Athenis meis Batavis, cum ad me perventum erit, rogo, ut Catalogo meorum Operum ad hunc modum, quem præscripsi, exhibere ne graveris. Idem abs te fieri in tuis velim; & adjungi, quæ post illud tempus plurima juris publici fecisti. Amicorum optime maxime, à te postulo enixè, amicitia nostræ jurè, urge hominem, quantum queas; tum mortalitatem nostrum utriusque, quibus ætas jam in senectutem vergit, animo reputare velis; tum pergratum mihi fore, si priusquam vitâ excedam, consummatam Lucubrationum mearum editionem contueri concedatur. Utinam hoc votum mihi bonus Deus repræsentet. Absolvi Historicus Tomus potest, si nimirum operas Typographus sic partiatur, ad id tempus, quo Joannes David noster ad nos reversurus erit: isque exemplaria, mittenda mihi, secum non invitus deferret, suis sarcinis inclusa. Instat Blavio, ne spem meam hanc destituat: poterit culpam præcedentis tarditatis aliquatenus isto modo emendare. Etiam tamen atque etiam abste peto, ac per omnia amicitia nostræ sacra te compello, uti tuâ mihi fide universam rem exponas, quo se cunque modo habeat: ac, si denuo inchoatam editionem, quod hic animus auguratur, intermiserit, maximopere contendo, uti omnia quæ commisi tuæ fidei, mox restituenda mihi per Davidem nostrum proxima æstate cures: is suscipiet haud gravatè, & curabit bonâ fide. Ego verò, si me Blavius porro etiam fastidiet, aut inveni-

am mihi alium, aut non paullo illo rectius adservabo. Itaque permittas cave, ut deinceps meâ ipse patientiâ, quæ plus nimio est laxa, abutatur. Utinam vanus esset metus, quem concepi; certè valdè illud velim. Sed persuasum mihi habeo, si omisit inchoata, ut existimo, illum operum meorum editionem promississe, non ut ederet, at vicino, cum quo malè admodum conveniebat, ut subtraheret. Nam & ille, ut meministi, operam suam per id tempus offerebat: ac profecto longè meliore fide, quam expertus jure laudo, præstitisset: nec injuria pœnitet, quod ab ipso me abduci passus fuerim. Equidem tibi nihil imputo, qui propensum in utrumque nostrum animum habuisti, & ab eo Lucubrationes meas evulgari voluisti, sed multiplicem adeo dilationem, tot mendaciis excusatam, meritò iniquè fero. Vel nunc demum bona agere fide statuatur, & incipiat semel seriò, ac continuet; nec priusquam Colophonem imposuerit, conquiescat: & præterita condonabo. Inchoari autem cupiam, ut jam dixi, ab Historiarum Tomo: quem cur classem ducere velim, causam habeo, quam tu facile, pro prudentia illa tua, divinabis. Cum absolverit, mitte statim aliquot mihi exemplaria, quibus Regis Procerumque desiderio satisfaciam. Nam vix credas, quanta sit operis illius expectatio; tum privatim meâ quoque refert plurimum, ut editio maximopere maturetur. Da hic operam: meque ac mea, quo affectu consuevisti, porro etiam complectere. Vale, Vir eximie, diutissimè; ac salve plurimum, cum uxore liberisque, à me, meâ, atque meis. Laurenburgius & Stephanus plurimam salutem reddunt.

*Raptim, Soræ, ad  
diem xx. Decemb.  
c1610c xxxvi.*

*Tuus, antiquâ fide,*

Joannes Meursius.

Si quis possit studiosus reperi, qui in Danicam Historiam Indicem accuratum scriberet, esset ea res Lectori acceptissima, uti nosti, & Typographo non inutilis. N. B. Præfationem, ad illustrem Dominum Cancellarium, Christianum Frisium, cupio antiquatam, & illius loco poni hanc ad Regem, quam præfixi Historiæ Danicæ libris quinque prioribus.

*Viro*

## CCXLI

*Viro Maximo Domino Ger. Jo. Voffio.  
Johannes Fred. Gronovius Salu-  
tem & Observantiam.*

MUltis testarar apud te, Vir ma-  
xime, gravissimum dolorem me-  
um, quo affectus sum, simul accepi, va-  
letudinem tuam tentatam esse: nisi gau-  
derem nunc intemperantius, postquam  
pristinæ vires, sanitatemque recuperavisse,  
omniaque in melius mutata intellexi.  
Cujus rei causa ex animo tibi gratulor,  
precorque Deum Opt. Max. ut hoc sit  
proprium bonum, & talis Nestoreos an-  
nos continues, pergasque ingentia merita  
tua cumulare, docereque nos, quæ ali-  
unde, aut ex alio discere non possumus.  
Ego per numinis gratiam, adhuc benè me  
habui, nec de solito fervore studiorum,  
quicquam remisi. Quod narro tibi, quia  
omnem sectam, rationemque, vitæ meæ,  
non secus ac sollicito Patri filius, Ephe-  
meridas, approbare gestio: qui ea præ-  
cipuè de causâ magnorum Virorum noti-  
tiam, familiaritatemque appetii; ut sub  
his quasi censoribus agerem, ac volupta-  
tum illecebras, quæ in hac ætate, bonis  
etiam immodestius interdum effervescent,  
fallerem, aut metu aliquo continerem.  
Nescio an in proximis meis significaverim  
tibi, tradidisse mihi summum Virum And.  
Rivetum, Isâ. Casauboni Epistolas, magna  
pietate collectas, ut editionem earum cu-  
ræ haberem. Eæ nunc cœptæ sunt præ-  
lo dari, opus anxie expectatum, plurimis-  
que identidem reconditæ eruditionis em-  
blematis vermiculatum. Quod si unquam  
cum incomparabili Viro commercium li-  
terarum instituisti, aut aliunde quod ha-  
bes, quo amplius ornatusque id possit  
reddi; & nos optamus, & tuæ humani-  
tatis est, nec nobis, nec publico laten-  
tes ejusmodi Thesuros invideri. Ea  
quoque occasione, cum jam omnis mihi  
spes decollasset, his in regionibus quæ-  
que edendi, subita alia occasio affulsit Sta-  
tianam diatribem emittendi è Vestæ pe-  
netralibus. Uterque liber absolutus erit,  
ante proximas nundinas, si Deus volet.  
Qua in re unicum molestissime fero,  
quod nec censione, nec aliis subsidiis  
sæpe Salmasii, exactior ante editionem,  
fieri poterit labor noster. Jam enim duo  
menses abierunt, ex quo, nihil de illo  
auditur, precesque ad Deum allegamus,

ut decus illud incomparabile, Leydenfi  
Academix reddat. Te aliquando roga-  
veram, ut videres, an aliquid opis, ad-  
ferre posses deploratissimo loco, in Lib. III.  
Silv. Carm. II. quod est Propempticon  
Metii. *Sint quibus exploret rupes gravis,  
arte Molochus.* Nisi autem tu, aut ille hoc  
faciatis, vix erit, ut spes ulla superet. Et  
promiseras sanè: sed multiplicia negotia  
tua, catenataque occupationes, ne urge-  
rem, me prohibuerunt. Nunc repeto pro-  
missum, rogoque uti unius horulæ spati-  
um, isti cogitationi impendas. Quod &  
perpetua humanitas tua, studiumque benè  
merendi spondet. Et quia utcumque nunc  
cuncteris, olim in Originibus tuis, deside-  
ratissimo opere, de voce *Molochus*, ali-  
quid dicendum est, quantum est, ut in  
divotissimi tui cultoris gratiam id anticipes.  
Salustios tuos remittam, simul habebō,  
cui tutò & sine sumptu tuo, eos tradere  
possum. Haveo nunc inspicere Dauf-  
queii de Orthographia, veteris novique  
Latii Librum, & Claudianum ex Edit.  
Stephani Claverii. Illum certo scio tua  
in Bibliotheca esse: hunc arbitror. Multa  
enim ad hunc scriptorem notavimus, mul-  
ta emendavimus, aliter, quam in Rap.  
Scaliger, & sua Barthius, immiscuimus-  
que Statianis nostris. Sed nescio an qua-  
dam à Claverio sint occupata. Vehemen-  
ter itaque rogo, ut eos prima quaque oc-  
casionē per amicum, aut si non obveni-  
ret, per rhedarios ad me mittas. Brevis mo-  
ra erit, dum utar: & salvos puerosque re-  
cipies. Potuissē alterum petere ab ami-  
co nostro S. quem nosti. Sed ille absen-  
tium amicorum, non tepora aliquo, sed  
torpore, & ignavia, pæne dixeram, sed  
apud te, prorsus incuriosus est. Inclusas  
ad Hardervicensēs Tabellarios, haud gra-  
vatim, per tuas curabis. Vale, præcipu-  
um decus seculi nostri, & salve cum le-  
tissima Matrona tua, filiis, filiabus, omni  
denique familia, meque ama.

*Hæc comitis. xix. Kalend. Januarii, Anni  
MDCCXXXVII. quem felicissimum tibi,  
tuisque incipere, & decurrere, à Deo Opt.  
Max. precor.*

*Tui Observantissimus,*

Johannes Fred. Gronovius.

Jam clauseram Epistolam, ut latori  
traderem, cum ecce commodum, hæc oc-  
casio obvenit libros tuos mittendi. Atq;  
en quatuor Salustios: Nunc Silium Giun-  
ta adhuc fervo. Pro Statio Colinei, pre-  
tium



tium filio tuo Gerardo debeo. Libellum Gretseri etiam meum, adhuc penes te esse credo. Sed hujus nunc non usus, ut illorum, quos petii, & iterum peto, ut mittas quamprimum.

## CCXLII.

*S. in Christo.*

Vir Clarissime,

**L**iteræ tuæ (prout semper sunt) mihi gratissimæ fuerunt. Recepi eas per anni ferè abhinc spatium, sed ut libere dicam quod veritas postulat, majora negotia quolibet ferè momento animum satis ad hoc officium propensum plane ad alia avocârunt.

In illis gratularis huic Regno, mihi quod jus lustrandi Academiæ Præsulibus Cantuariensibus ab antiquis temporibus debitum revocavi. Opus sane arduum & revocare quod diu intermissum, & exercere quod semper invisum. Sed quum misericordia Dei atque optimi Regis justitia potestas visitandi Academiæ mihi & meis multis retro annis debita jam denovo decreta sit, dabo operam & spero non inutilem ut Academiæ floreat & ut Academici moribus cultiores, doctrinâ polities, Religione primævis temporibus conformiores evadant. Et ut ab ineuntibus studiis ea principia imbibant, quæ & Dei cultum & Ecclesiæ pacem, & Academiæ honorem promoveant. Nec quicquam verius est quàm illud quod scribis humana instituta omnia, etiam optima, facile per incuriam in pejus vergere. Quid igitur fit, quum malitia nonnullorum qui inordinata tantum amant, aliorum incuriæ superadditur?

Goffius hic interfuit diu à receptis literis vestris, sed adeo occupatum me invenit expectatione adventus Regis & Regina, ut vacuum eum remittere necesse fuit. Gradum tantum Professoris in Theologia obtinuit rogatu (jussu i.e.) Frederici Principis Electoris Palatini, qui una cum Rege Oxoniæ petiit. Præco est Goffius ille virtutum tuarum; nec immerito, sensit enim & fatetur quantum tibi devinctus sit, dum Amstelodami Musis inservit.

De Calendrino nolo ego plura, & quod aperte satis in scriptis tuis video, tu forte de illo pauciora, si quæ mihi & tibi quodque innotuissent. Nolo tamen ut illud ullo

modo molestiam tibi creare possit. Soleo enim ego quæ ab amicis tui simillimis in gratiam alicujus tertiæ personæ scripta sunt facere si possim & justa sint, sed deliberare si suspecta. Ignoscas quæso moram harum literarum, & quando iterum placuerit scribere, sperabo me posse, tu autem semper puta me velle multo citius responsum dare. Vale, & dum quotidie Deum colis, sis, quæso, memor in orationibus

*Dat. ex Ædibus Amici tui perquam fidelis,*  
*Lambeth. Junii.*  
1637.

W. Cant.

Oro ut Globos terrestrem & cœlestem magnitudine ampliori, Topographia aliisq; descriptionibus eruditè delineatos, & pro more undique aptatos, placeat tibi emere & ad me mittere. Vir iste mercator nobilis & mihi perquam gratus Job Harbye pretium tibi solvet. Solum cupio opera vestra, uti ne fraudem patiatur in re illi non satis nota.

## CCXLIII.

**P**aucis scribo, Vir & amice summe, quia opprimor; tuas tradidit Joannes David, in quibus bona de Typographo hætenus tricone maximo mihi nuntias. Faxit Deus, ut promissa semel tandem exequatur; accepi etiam specimen Historiæ Danicæ, quod per Elzevirium ad me mittebas. Utinam tam sedulò pergat, quam est hætenus cunctatus; scribo ad eum, postuloque ut quæ forte excusa erant, ei tradat, qui has affert. Tu negotium, quæso, urge pro adfectu in me tuo. Ernstius apud te fuit, utinam mecum & amplecti ex intervallo tantum amicum licuisset, sed hoc voti est, nec speramus ultra quicquam. Fiat Domini voluntas, in quâ est acquiescendum, ac si nobis, ut videtur, non licebit, filiis aliquando dabitur per benigni Dei gratiam, ad quos amicitia nostra hæreditate devolvetur. Opus tuum de Idololatriæ origine & progressu utinam videam, sicut etiam Maimonidem filii tui parægetu. Poteris commodè ad me mittere per hunc Mercatorem nostrum Slogosiensem, qui negotiorum causa ad vos excurrit, si decennio minor mihi ætas esset aut nos iter tam longinquum non disjungeret, una item, uti, ante vitæ finem, adhuc semel te complecterer, nunc oportet ut

ut ponamus cogitationem istam, & nos Deo permittamus. A Salmasio jam reduce mirum est nil nobis dari. Heinsii in Novum Testamentum Notas, quarum specimen Elzevirius hic ostendit, avidissime expectamus. Misit mihi Historiam obsidionis Sylva-ducis, sexto ab editione ejus anno: idem mihi in mittenda Historia Danica faciendum esse censeo. Nempe hoc est recte amicitiam colere, & amicum aestimare; cujus desiderio ab ipso initio satisfactum oportebat. Tu & ego non sic agimus, ac prohibeat praesens amicitia Deus, qui conjunxit corda nostra. Is nos servet diutissime. Uxor Liberique mei te & tuam atque tuos plurima salute impertiunt; Resalutant officiosè Laurenbergius & Stephanius.

*Rapim, Sorae ad  
diem xxvii. Maii.  
c1o Idc xxxvii.*

*Tuus, constanti affectu,*

Joannes Meursius.

## CCXLIV.

**L**iteras tuas, Vir praestantissime, rectè accepi, hac ipsâ horâ. Gratum mihi maximopere fuit videre Commentarium de re Grammaticâ, quem non dubito famæ tuæ responsurum: legam ubi compactus erit. Summæ sane mihi voluptati fuit, cum viderem. Idem dixerim de Sophompaneâ Grotii, cui & ingenii hunc foetum gratulor, & honorem splendidæ Legationis. Faxit Deus ut fruatur diutissime: quod ex animo illi opto. De meorum operum editione adeo lenta fieri haud potest certe quin commovear: siquidem ut acrius promoveatur, non exiguum est cur velim. Quæso urge ut facturum te confido, & si potes paula certiora scribe per hunc, qui hæc tibi adfert: qui quandoquidem festinat finem nunc imponere cogor. De Rep. tecum sentio, Deum Opt. Max. rogo uti porro fortunare eam velit. Vale diutissime cum Uxore Liberisque quibus ego, Uxor, mei plurimam salutem dicimus.

*Sorae Danorum ad diem vii. Junii.  
c1o Idc xxxvii.*

Quæ in dedicationibus mutare volui, quarto uti observentur, & imprimis ut Typographus, quantum potuerit, matura; nam Historiæ Danicæ Libros decem quibus totum Pontani opus retractare jussus

fui, flagitant hic optimates atque docti; metuoque si nunciari vestri pergant, ne excudi apud nos superiores mei velint; quod & aliquod detrimentum Blavio sit allaturum; sic enixè etiam rogatum cupio ne necessitatem mihi hanc imponat. Iterum Vale, mi Vossi, animæ dimidium meæ. Præfationem ad illustrem Dominum Cancellarium, quanto Regi serenissimo opus dedicandum erit concerpere poteris.

*Tuus,*

Joannes Meursius.

## CCXLV.

Oratorum Summe, Philosophorum maxime, Belgice Varro,

**O**peribus tuis velut saccharo, & ne-ctare dulcissimo quotidie recreor: nam quæ scribuntur à te cuncta, tuum sapiunt salem, ac te referunt. Hac sapientia, facundia, artibus optimis satis instructus, ne despicias nostra, quæ si mutila inveneris, hiulca, & nec satis excusa, ea dele, refeca. Si laudaveris conatus nostros, gaudebo nimis, quia à te omniscio, licet falso merui laudari. Summe doleo quod unum exemplar non mittam, nam unum solum habui pro meo usu. Ita avari sunt Typographi, qui solum sibi omnia assument. Amicus noster D. Fontanus indicabit. Vale ergo bonarum artium specimen, Plinius, aut \*Lucius ipse meus, me- \* f. Lucilius. que amare perge.

*Ex Museo nostro  
1636. die vero 2.  
April. Amstel.*

*Te reverenter colis,*

Zacutus Lusitanus, M.D.

## CCXLVI.

S. P.

Vir Excellentissime,

**H**unc Joh. Ludovicum in urbem vestram misi negotiorum causa. Ei ut utrumque librum Logicum tradas rogare veritus essem, si scissem illis te diutius uti velle, aut præ aliorum mole negotiorum posse. Apollonium filio tuo restitui: cujus mihi vehementer probatur eruditio; quamvis videatur alicubi ad emendandum

Y

Scylacis

Scylacis contextum, aut potius *παύση* esse calidior. Utilissima sane illius est opera. Quæ ego in ora exemplaris mei *ὑποτάξις*, in aliquot ipsi dieculas concessissem ut immatura invitor, concessissem tamen tui respectu, nisi ille accipere recusasset. Equidem nunquam negabo tantum me tibi debere quantum nulli. Mearum in Rhodium illum lucubrationum edendarum spes nunc est certior. Nam Dominus Le Maire edendas suscepit; utinam in proposito perseveret! Oblata mihi nuper est Harderwikensis Professio Græcæ Linguae & Logicæ, quam quo minus acceperim per meum stetit *ῥῆμα*. Indignabatur enim stipendii, & minoris quidem stipendii solutionem tardam, atque adeo annuam. Tu nihilominus vides opus esse ut illa *λογικὴ* aliquando regustem, & me ad quidvis parem. Vale, Vir præclarissime, & meis verbis saluta nobilissimam tuam Matronam, & filios filiasque.

Lugd. Bat.  
15. Septem-  
bris, Anno  
1637.

Tui observantissimus,

Jeremias Hoelzlin.

#### CCXLVII.

Clarissimo & Doctissimo Viro, D. Gerhar-  
do Joanni Vossio; Johannes E-  
lichmannus S. P. D.

**E**x vulnere, quod in communis amici immaturo funere sensit, Stapeliorum familia; ego quoque haud eximium dolorem cepi; tum quod *τὸ μαργεῖον*, raram in schola nostra, diligentiam, & ingenuitatem, adamarem magnoperè, tum etiam ob incommodum, quod exinde circumvenit amplissimam Th.... Nec dubito quin ad te hujus damni sensus pervenerit quoque imprimis. Novi enim quam calido affectu, & non sine singulari iudicio, is tuam nobilissimam Polymathiam prosequeretur constantissimè; novi etiam, & mecum novit literatus orbis, quàm impensè tu amare studeas, ac fovere, literarum, atque artium cultum, atque cultores, & de nostro *μαργεῖον* præsertim. Faciet aliquando ut spero, fidem, opus illud Posthumum, si ut fecisti *μαρτυροῦμαι*, ita nunc pergas *ἐκπαιδεύειν*. Et facit quidem tuæ *εἰς τὸν μαργεῖον* pietatis apud me opinio, ut æquiore animo feram, quod ut non acciderit, no-

stris lacrymis, nunquam possumus efficere; solatium etiam percipio, cùm animo volvo perennaturam amici memoriam, cuius posthumum fortuna manet, tam nobilis tutelæ. Licet autem ego præter amorem rerum cùm nostrarum, tum etiam elegantioris Scholæ publicarum, quod aliquid momenti ad earum curam, & ornatum possit afferre, penes me vix inveniam; molitus sum tamen, nonnihil ad ornatum, jam dictæ editionis, ut Authoris desiderio aliquo modo obsequerer. Ea res te habeat arbitrum nunc oportet, ac moderatorem; ideoque rogo, ni molestum sit, aliquo responso mihi edices, quod faciendum videbitur. Dixeram *τὸ μαργεῖον* me in volumine aliquo Arabico, inter legendum deprehendisse, ex Græcorum traditione de Thalete narrari quiddam aliter, quàm apud Laertium, præcipuè quod scripta, quorum Author dicitur C. Th.... Ille tunc statim impellere, darem operam, ut & inde aliquid, novæ lucis suæ editioni accederet; quod promisi futurum, si præterea quoque se offerrent, quæ varietatem eam, illustriorem possent reddere, & contra Laertii auctoritatem, majus aliquod pondus adderent, novæ Antichesi. Cessit autem ea res ex voto. Nam inveni in iis, quæ Arabes à Græcis habent, inter alia ad istum scopum, insignem indicem omnium scriptorum Aristotelis, quem in Tr. de vita, morte, & testamento Aristotelis, secutus sententiam Andronici Rhodii, ponit Ptolomæus ille, qui summus Philologus Peripareticus sua ætate. Laudatur Longino, uti refert Porphyrius in vitâ Plotini. Istum indicem animus erat inferere vitæ Th.... ex Arab. Interpretamentis petita; quia Aristoteli tribuit pleraque scripta, quæ apud Laertium dicuntur esse Th.... Et sic illorum sententiam egregiè firmat, qui aliunde persuasi, apud Laertium in Catalogum scriptorum Th.... multatetere intrusa, ibique redundare statuunt. De his volui *τὸν μαργεῖον*, paulò antequam nobis ereptus esset te rogare, num placeret, ut hic unus aut alter denuò Typis Arabicis, cum Vers. Lat. imprimeretur, qui operi possit præfigi, post textum Laertii. Sed fata hoc iudicium in te devolverunt, in quo si cessandum statuas, parcam operæ quæ restat; paratus aliàs amici communis manibus fidem servare integram. De variis lectionibus ex tribus diversis Manuscriptis Vaticanis, spem quoque mihi fecerunt Holstenius, & Dormatius, uti ex hujus (quo Leidæ sum usus familiarissimè) literis



literis additis cognovit quoque, *o maxeius*. verum quia tandem silent ad meas monitorias, spem quoque illam incipio amittere. Amicitia uti video, vitium Romæ facile contrahit. Cæterum molestus adhuc ero, si peram, quod vix absque verecundia cogito. Verum dabis veniam, spero, pro solita humanitate. Accepit à me mutuo *o maxeius* noster, duos Libellos Joannis Lalemantii, alterum com. in lib. De Diebus criticis Galeni, Lyon 1560. 4°. Alterum, De Varia Anni Ratione, Ibidem, 1571. 8°. Vellem commoda occasione moneri parentem *o maxeius*, libros istos mihi esse restituendos, mutuo concessos à sesqui-anno. A D. Salmasio literas postremum accepi datas Calend. Decembris è portu Diepenfi, in quibus conqueritur, se toto bimestri ibi frustra transitum operiri. Ejus familia omnis cum tota supellectili, hic jam fuit in tertium mensem. Comitari eam non potuit, ob naufragium vehementissimum, quod ipse & uxor passi sunt adeo, ut maluerint, relictâ ventis familiâ littus repetere, & secundiorem navigationem expectare. Hoc consilium male cessit hætenus, & quidem cum majore incommodo, quia nihil è nave secum sumplerant, earum rerum, quæ quotidie sunt ad commoditatem vitæ necessaria. Ignosce, Vir clarissime, quod tam multis te fatigem, aut distineam. Unum adhuc addam, quod omnium est maximè cordi, me nimirum uti debeo, suspicere te, ac colere, ob celebratissimam virtutem, atque eruditionem, quæ famam intermortuam nunquam sinent; optare etiam quamplurimum, ut possint hujus observantiæ testes, tibi dare officia, quæ grata habeas. Ea interim dicabo, præstiturus, ubi jusseris. Vale, Vir Doctissime,

Dabam Leide Cal.  
II. Januarii, 1637.

## CCXLVIII.

Clarissimo Viro D. Gerardo Joanni  
Vossio, Affini Conjunctissimo.

Conjunctissime Affinis,

Octo menses atque amplius, in agris transeginus, dum pestis Londinii grassatur; tantaque iis, qui hic in nobili aliquâ familiâ vivunt, & Nobilium liberos curant, cautela opus est, ut nihil cum

Londinio, aut Londiniensibus commercii habere possint. Excusabis itaque, quod nullas hætenus literas ad vos dederim. Pridiè antequam in agros secederemus, die 13. aut 14. (si bene memini) mensis Maii, dedicationem misi: neque leviter gavisus sum quod eam ad manus tuas rectè perlatam, ex literis tuis V. Cal. Quint. datis intellexi; augebat hoc meum gaudium propinqua, quam feceras, spes videndi tractatulum de pictura: scribebas enim, intra duas hebdomadas absolvi tum potuisse. Quorundam certè expectationem obviâ credulitate plusquam nunc factum voluissim fovi: non desinunt enim quidam, quotidiano ferè convitio, promissi fidem efflagitare: sed juxta mecum ferant necesse est quod aliter se habere non potest. Ne quidem vacaverat adhuc, cum Epistolam dedicatorem transmitterem, xiv. quaterniones percurrere; leviter tantum inspexeram, & unum atque alterum errorem (si bene memini) annotaveram. Nunc per otium tribus hisce hebdomadis, quibus hic Londinii sum, perlustravi, atque alios quosdam errores Typographicos annotavi, eosque tibi misi: serius fortè quàm voluisses, sed citius non potui propter diutinam absentiam. Metuunt plerique, ne malè per hyemem repressa contagio, rursus ineunte vere, ingravescat; statuit itaque Comes Arund. Nepotulos suos intra hebdomadam unam, atque alteram, in remotiora quædam loca ablegare. Viderit summus rerum humanarum arbiter. Nihil mihi interim grâtius obtinget, quàm ut lato de vobis nuntio, aliquando perfrui detur, usquedum idonea gratum animum testandi tempora affulgeant. Quum cogitarem cui rectè literularum aliquid ad vos commissurus essem, obtulit sese vir humanissimus Dominus Hermannus Mylius, qui spondit se Amstelodamo rescripturum, si quid ad me perscribi velles. Si otium tibi non erit, libentissimè faciet vir humanissimus, quod facturum recepit. Cantuariensi Archiepiscopo pro me, meaque, per literas, quas ipsi tradere possim, commendabis; neque enim obscura proni favoris indicia, hætenus exhibuit immerenti: confido plus exhibentur gratiæ habitura, quæ, te commendante, mea enim interest, ut tanto antistiti probentur qualescumque labores mei, priusquam eos Regiæ Majestati offeram. Subinde literas ad me scribit Prudentia, quibus ut tibi unice commendari cupit, ita subveniri sibi angustia rei familiaris miserè laboranti postulat. Ego nihil ad

hæc respondi, quoniam nullas adhuc Joannis nostri, neque tuas literas vidi, quæ me instruant, quatenus ei subsidium ferendum sit. Non deero afflictæ, si certior me feceris, quid consultum iudices. Nihil non faciam pro viribus. Universæ familiæ tuæ plurimam meis verbis salutem dices. Vale.

Raptim in A-  
dibus Arundel-  
ianis, An. 1637.  
18. Febu.

Tuus omni Officio,

F F F. Junius.

### CCXLIX.

*Viro Maximo Domino Gerardo Jo-  
hanni Vossio: Jo. Fred. Gronov.  
salutem & observantiam.*

Vir Summe,

Cum præstantissimus Christenius nos-  
ter advenisset, sub ipsum articulum  
temporis, quo perficiebatur Libellus meus,  
non potui eum dimittere, sine exemplari,  
quod tibi perferret. Id tu quidem acci-  
pies, ut profectum ab homine observan-  
tissimo tui, quodque siquidem legere  
dignatus fueris, lima tua exornetur: non  
quasi ego dignum iudicem, ut eruditissi-  
mos oculos tuos subeat. Fortasse habebit  
interdum Gerhardus tuus, quò se delectet;  
atque utinam tam doctæ pueritiæ satis-  
facere potuissem. Illud fortè non opus  
est, ut addam, quum legeritis, & errores  
meos notaveritis, gratissimum futurum  
mihi, si de omnibus simpliciter monear.  
Nostis enim ingenuitatem, & φιλομάθειαν  
meam; & is vester erga me est amor, ut ab  
derisu, & reprehensione malignorum, ve-  
stris monitis, & amica reprehensione, se-  
curum præstare non sitis gravaturi. Su-  
perest ut aurem tibi vellam, Vir amicissi-  
me, de Epistolis If. Casauboni ad Meur-  
sium, tum de MSS. Ovidii, aut excerptis  
potius eorum, quæ cum hic esses, mihi  
promiseratis, tuque puerque tuus. Vale,  
& salve, cum lectissima matrona tua,  
filiis, filiabus, totaque domo: & ama-  
natus nostros, ut effectui impari ignoscas.

Hæc raptim, ad  
diem xviii. Calen.  
Jul. ann. Christi,  
elo 16 c xxxvii.

Tuo Nomini devotissimus,

Johan. Fred. Gronovius.

CCL:

*Cl. Viro, D. Gerardo Joanni Vossio.*

Clarissime & Excellentissime Vir,

Soleo mihi sæpenumero revocare in  
mentem gratissimam temporis illius  
memoriam, quo eruditissimos sermones  
tuos coram excipere, teque ipsum exem-  
plar omnis honestæ vitæ intueri mihi li-  
cebat. Atque ideo majori cum voluptate re-  
colo, quod tanti boni magnitudinem (non  
ut plerique solent) tum demum intellexi  
cum amiseram, sed tum maxime capie-  
bam, cum maxime eo fruebar. Sed  
quantum tunc gratulabar mihi de con-  
suetudine tua; tanti nunc impensius doleo  
quod non solum conspectu tuo caream,  
verumetiam ne per literas quidem quibus  
absentium amicorum animi refoveri so-  
lent, tecum colloquar. Et mihi quidem  
maxime id conveniebat, fateor, ut te  
primus compellarem; sed primum gra-  
vissimis occupationibus tuis, quibus non  
præsenti solum, sed etiam futuro sæculo  
prodesse conaris, obstrepere literis meis  
vix audebam: deinde etiam reputando  
tenuitatem, tum ingenii, tum styli mei,  
metuebam subire iudicium ejus viri, cui  
nihil nisi limatum & exquisitum placeret.  
Sed tandem vicit fiducia humanitatis &  
moderationis tuæ, qua futurum spero, ut  
me etiam balbutientem libenter audias:  
deinde vicit etiam præsens necessitas, ne  
charissimum fratrem meum in Hollan-  
diam abeuntem sine meis ad te literis di-  
mitterem, quem ego tibi quam commen-  
datissimum esse cupio. Etsi enim ille eo  
animo propositum iter ingrediatur, ut in  
re militari, cujus peritiâ quemvis Christiani  
Orbis populum provocare possitis, juveni-  
lem ætatem suam exercere valeat: tamen  
id multum momenti ad incipiendum &  
perficiendum Deo volente hoc studium  
afferet illi, si eum tutelâ ac patrocinio  
tuo dignum existimaveris. Quapropter  
ita eum tibi commendo, ut quicquid re-  
sidet in te amoris erga me, id omne in eo  
amando atque fovendo ostendas. Reddet  
paria huic tuæ bonitati primum quidem  
Deus, deinde nos omnes, qui jampridem  
unicè id conamur exprimere, quantum  
tibi pro summis tuis erga nos meritis de-  
bere nos sentiamus. Vale, Vir clarissime,  
Deum ter optimum maximum enixè ve-  
neror.

neror, ut te quam diutissime conservet, ad gloriam nominis sui & bonorum omnium emolumentum.

*Dabam Opolie, Clarissime Domin. tuæ  
die 4. Aug.  
anno 1637.*

*ad quævis officia*

*paratissimus,*

*Georgius Slupect, de Conari  
Capitan. Pilsnensis.*

## CCLI.

*Clarissimo Doctissimoque viro Gerhardo  
Johanni Vossio, Mæcenati meo co-  
lendo.*

*Clarissime ac Doctissime Vir, Mæcenas ætatem  
colende,*

**Q**uemadmodum nulli quondam, ad oraculorum adyta, aut Deorum immortalium pulvinaria, obstructus erat aditus, qui modò serium, sincerum, debitoque numinis cultu, compositum adferret animum: ita & omnibus, ad augustissimum illum sapientiæ tuæ Tripoda, liberum patere accessum, & testari potest studiosæ juventuti, potissima pars, quæ agmine factò, ad te consulendum in dies, in horas, confluit, doctior à te semper rediens; & ego expertus sum sapius, quem nunquam non voti compotem, juxta ac saluberrimis consiliis abundè instructum, solitus es à tuo colloquio dimittere. Quæ tua facilitas, rarum in nostri seculi doctis bonum, me novis his ausis animavit; ut magnis meis in patria fautoribus, specimen aliquod diligentia, propediem exhibiturus, tuam operam in partes mihi accersendam, non dubitaverim. Ut itaque verba conferam in compendium, constitui, Deo adjuva, hibernis his mensibus, labori non reprehendendo, vim omnem ingenii impendere. Nempe cum animadverterim, quæcunque uspiam typis divulgata sunt, nobilissimi illius historici, Saxonis Grammatici, exemplaria non solum innumeris mendis scaterere, quæ properantem Lectorem facile effugiunt; sed & locis nonnullis dubiis, ac parum integris undique secus obrita esse, quæ ipsi historiae obscuritatem haud exiguum offundunt; impetum cepi Augiæ hoc stabulum perpurgandi, & notas quasdam tam historicas, quam censorias in libros ejusdem omnes

ac singulos procudendi: amoris in patriam arcano potius jussu, quam ostentationis gratiâ. Sed quia simul perspectum habeam, tuis auspiciis hanc rem optimè geri posse, eâ quâ par est, submissa animi mente, abs te contendo, digneris mecum lubens, volensque, communicare, si quæ vel ipse habeas, ad Saxonem nostrum (quod tuum esse solet, in emedullandis melioris notæ scriptoribus, acumen,) jamdudum annotata, vel ab aliis Criticis scias esse observata. Quinimò si hæc te exorare non liceat, (quomodo mihi tamen persuadeo) velim mihi subinde petenti, ex instructissima Bibliotheca tua, suppedites bonorum Authorum monumenta, quæ scilicet aliquid ad institutum meum faciant; imprimis Achillem Gasserum, Bocerij cujusdam annotationes, in Reges Danicæ, & similes. Præbe te mihi, quæso, benevoluntiam, magne Doctor, conatibus meis fave, & exangui fronti ignosce.

*Observantissimus tui,*

*tibi quæ addictissimus,*

*Stephanus Johannides Stephanus,  
Hafniensis Danus.*

## CCLII.

*Clarissime atque Excellentissime Vir,*

**R**umpendum tandem erit silentium, neque tamen & illud excusare velim, quin potius deprecem ut à te veniam; quid enim dicam, aut quam excusationem adferam tam diuturni silentii mei? Occupator eram, defuit scribendi occasio, vel materia. Scilicet ulla esse potuit tanta cura: difficile literarum commercium: aut destitutus unquam esse possum, quid ad te scribam, ad te inquam, Vir incomparabilis? Si nihil enim aliud, nisi tua erga me eximia merita propensum illum animum, summam qua me complectebaris benevolentiam, commemorem; an non satis ampla & opulenta scribendi materia? quod si nunc meum tibi gratias referendi studium, & promptissimam voluntatem testari velim; videnturne hæc vel longissimis literis posse comprehendere? Sane, si quid est, quod iusta excusationis loco adferri mereatur; verecundia erit, quæ me sapius ad te scribere incipientem deterrebat. Nimirum, grave mihi admodum videbatur ad te scribere, à quo Latini Sermonis magna



magna quondam hauseram incrementa, cujus nunc jam pridem usum posthabui. Sic hærebam, atque à meipso diffidebam; sed vicit tandem officii necessitudo, vicit amor tui; cessit & ipsa verecundia pudori: pudebat nempe tanto te tempore exigere à me scribendi officium, non tamen adhuc exegisse. Accessit hortator vehementens, tui, unà mecum, uti debet, amantissimus Germanus meus, quem ego, patria limina deserentem, hac una re beatum judico, ac prope invideo quod te conspecturus brevi amplexurusque sit; jamque mihi intueri videor illam tuam humanitatem, illos amores, quos illi exhibiturus es. Dabis igitur veniam, siue quod tam diu cessatum à me sit, siue quod nunc audenter nimis te laceßam literis. De me omnia, quæ voles ex fratre meo cognoscere; unum hoc ex me velim scias, neminem esse cui plus, libentiusque quam tibi, debeam: nihil esse, quod me magis sollicitum habeat; quam ut intelligas, in quem beneficia contuleris, cui operam tuam, cui tot labores impenderes. De te autem tuisque qui valeas, quid agas aut potius quid orbi profuturum pares, ex tuis potissimum literis scire cupio. Hic finem facerem, sed venit in mentem, quod nos anno proximo elapso mirè omnes exercuit. Id ut tibi perscribam, vel ipsa me cogit scribendi ad te dulcedo. Judæorum genus adeo diffudit se per universum hoc Regnum Poloniæ, ejusque provincias, ut omnes pene infederit urbes, oppida, villas, hac maxima in finitima Germania, bellorum tempestate. Tanta hæc multitudo, fieri non potest, quin multorum offendat animos, Mercatorum imprimis & Subditorum, qui Judæis subesse ægre ferunt, quibus eorum operæ & Nobilibus locari solent. Inde odia immortalia, perpetuæ de illis querelæ. Sed imprimis frequens est, quod reos deferant cædis infantium Christianorum. Crimen, sæpe nimis, quia impune licet, objectum, nescio an unquam satis fuerit probatum. Proximo hoc anno Lublini, inventus à matre diu quæsitus puerulus, aquis submersus dexterâ aure præcisâ, venisq; omnibus acu apertis tenui; atque adeo supremo Regni nostri Tribunalitio Lublinensi judicio oblatus est: cunctorum mox animos ingens adversus Judæos suspicio pervadit; hinc sine mora capti, quos violentissimæ præsumptiones urgebant, tormentisque tam diu quæsi, ut unus eorum vi doloris superatus, paucos post dies obierit; cæteri tandem, quia fateri renuebant, dimissi: fecisse tamen Judæos immane hoc

homicidium publica fama est. Accusatos, convictos, damnatosq; ob idem hoc crimen Tridenti Judæos scripsisse commemini Sabellicum, ex eoq; refert in Annalibus suis Dlugissus noster, quin & in vestro Belgio, nisi me fallit memoria, accidisse, prodit Historia. Mirum ni nocentes sunt, quos tanta toto orbe premit invidia, fama accusat. Odione dicam Christiani sanguinis tantum eos patrare facinus; an quia forte opus ad remedia habent, aut ad sua sacra, siue denique ad Magicas artes, quibus plerique impense delectantur? An dicam impleri maledictionem illam Moysi? Deut. 28. *Omni tempore calumniam sustinentes.* Tu quid de toto hoc negotio sentias, aut sentiendum putes, rogo plene me doceas: tum enim judicium in utramvis partem lubens sequar. Sed vide, quo provectus sum voluptate tecum loquendi. Ergo jam vale, mi suavissime Vossi, meque amare perge; tum si quid in hac Epistola mea vel rude vel inconditum (vereor ne omnia) teneras & insuetas talibus aures tuas offenderit, corrige, cæterum mihi ignoscas precor. Iterum vale.

*Tui observantissimus,*

*Dabam ex Rure meo  
paterno Klickovix.  
Prid. Kal. Aug. Ann.  
Sal. MDCXXXVII.*

*Chr. Slupcius de Conary,*

*Secr. Ser. R. Polonia.*

### CCLIII.

*Viro incomparabili Gerhardo Joanni  
Vossio, in Amstelred. Gymnasio Pro-  
fessori celeberrimo.*

*Vir incomparabilis,*

Post tot, tantæque tua in me officia, puto ambiciosum non esse, si amoris tui liberalitatem, inter amicos, latissima prædicatione circumferam. Id quod facio libentissimè, & frequenter, quoties incido in homines, honestarum artium, modestæque pietatis amantes. Cæterum cum tam uberem, & penè immensam eruditionem ingenio complexus sis, nihil tamen in laudibus tuis, commemoro frequentius, quam sanctissimos illos, & defæcatos mores, amoremque Religionis purissimæ, & innocentis. De qua quoties judicandum est, animum imperturbatum, sine fastu omni, sine pugnandi libidine semper affers. Hæc tamen idcirco non scribo, quasi tu non potius virtute tua, quam meis laudibus

laudibus censeris velis: sed ut ostendam, quibus rebus motus, familiaris iste meus, qui has tibi reddit, ad notitiam tuam pervenire cupiat. Ordinatur is studia nobilissimorum juvenum, quos sui mores, & contubernium, mihi fecit amicissimos. Eos si benignè admiseris, non tam te, id mea commendatione motum, facere arbitror, quàm quod in humanitate, semper tuos mores tenere soles. Porro de rebus meis prolixius dicet *Gregorius*. Leiden- ses frigore tactos, ipse coram sensi, & nuper amicus monuit. Quid causæ sit, facile suspicor. Habe summam culpæ meæ: semper sordidum esse putavi mutuis adulationibus atteri. Maxime tamen insidiatur existimationi meæ *diva* nugacissimus, & fumo suo turgens. Quod mirum videri non debet, cum ingenti supercilio etiam viros maximos ad censuram vocet: adeo post emissas aliquot tumentes declamatiunculas sibi bellus videtur. Si vixero, non tam paribus nugis hominem, quàm solida studiorum, & cordata severitate obruam. Idque jam ago sedulo. Sed abeant ista: fida Vossiorum, & priscae integritatis amicitia, mille fricatorum, gloriosorumque mortalium, simulatis blanditiis, mihi contra cara non est. Felicitissime vale, & salve cum universa familia, Vir maxime, meque amare perge, quæ meorum votorum summa est.

Col. Agrip. xvii. Sept.  
An. c1613c xxxvii.

Tuus,

Vincentius Fabricius.

## CCLIV.

*Lecltissimo Domino Doctori Gerardo Vossio, Historiarum Professore longè eminentissimo, Varroni verius nominando.*

CUM nomen tuum toto terrarum orbe celeberrimum ad unguem contem- plor, parum abest quin obstupescam; mente enim capere nequeo, unde tantos scientiarum omnium thesauros exhaustas, doctrinâ, facundiâ, & omniscia eruditione refertissimos, quos in publicum mortalium usum quotidie depromis. Nos milites puilli, sub vexillo fecundissimo solertis ingenii tui stipendium facimus, scripta tua eruditissima venerantes. Ergo fortissimus Antesignanus, rudia hæc, & inermia ne despicias: Imò corrigas rogo. Scio quam sis rara indole præditus, & quam rectissime

de omnibus sentias, amoreque genuino studiosos prosequaris, & maxime me, qui auctoritate tua, scripta sua tuetur, munit, ac defendit, lege lib. 3. in com. hist. 47. Ad aras solertissimi ingenii tui, hæc prolegomena appendo, ut pretium quod ex se non habent inde possint demereri. Vale ergo Belgicus Varro, & Zacutum tuum, te amantem, redama.

Amst. 1637. die  
vero Septemb. 3.

Te veneratur

Zacutus Lusitanus, M. D.

Non possum remittere priora folia; hanc præfatiunculam lege, & parce meo tardo ingenio, quod ut aliud naturale agens, ultra metas activitatis suæ agere non potest:

## CCLV.

*Clarissimo, Doctissimoque Viro, D. Gerardo Johan. Vossio.*

Clarissime Vir, Amice fidelis. gratiâ conjunctis.

QUEM in Daniam quotannis, Janfonius vester Librorum vendendorum causâ solet ablegare, exoptatissimo me beavit nuntio, quum sub initium præteriti veris, apud nos consuetâ exerceret commercia. Spem etenim fecit mihi non exiguam fore, ut tu Saxonis nostri edendi curam in te suscipere velles, tuaque suadâ Typographorum vestrarium quempiam eò adducere constitueres, qui nitidissimis Typis, augustiore formâ, & prorsus ex voto meo, florentissimum hunc scriptorem procuderet, ac divulgaret. Quod si his verbis ipsius indubitata constare fides debeat, & si tuo me rogatu, tam largis implevit promissis; uberrimæ profectò tibi debentur gratiæ, non tam à me, cujus honori ac famæ tantopere faves, quàm à bonis omnibus ac doctis, qui desiderium Saxonis nostri hæcenus ægerrimè tulerunt. Biennium certè jam integrum est, quod incomparabilis ille Historicus, debito per me nitori restitutus, faventem Typographi alicujus operam frustra imploravit: quid igitur suavius, quid jucundius, quid auditu gratius unquam accidere mihi potuit, quam te talem, tantumque virum, diligenter curaturum, ut divinus hic author, splendidior, & ornatio, dias in luminis oras exeat? Edoceas me, quæso, primâ quaque occasione, quid sperare habeam, & cuinam Sa-

xonem

xonem excudendum tutò committere liceat. Quod me attinet, nullam planè laboris mercedem aliam postulo, quam ut viginti, aut summum triginta exemplaria Typographus mihi impertiat, ut primum lucem viderit nova editio. Post Saxonem editum, proximam sibi curam vindicabit Quinctilianus; in cuius duodecim Institutionum Oratoriarum, totidem Commentariorum libros panè affectos habeo. Sed quia animadverti te in libris de arte Grammatica, parte ultimâ pag. 202. ad partes vocare membranas quâdam MS. Quinctiliani, quæ olim Joachimi Camerarii fuerunt; omnibus abs te precibus contendo, ut variantes Lectiones ex codice isto excerptas mecum benevole communices, & si quid insuper ad manum sit subsidii, eâ quâ soles humanitate, suppedites. Id quod ego olim beneficium grato animo ingenue profitebor. Præterea quoniam frontem jam apud te deponere cœpi, per amorem istum quo me complecteris, rogo, atque obsecro, ut libros hosce omnes, & singulos, quorum in adjunctâ schedulâ, notatos vides titulos, per filios tuos, vel in Auctione quâdam, vel si in Bibliopoliis reperiantur, meam in gratiam, quocumque tandem pretio, isthic coëmas; nullus dubitans, quin quicquid meo nomine argenti exposueris, eâ quâ par est *ἐὐχαιστῶς* tibi restituam. Cæterum licetne mihi jure amicitia nostræ tecum expostulare, quod clarissimo viro, & communi amico nostro, D. Meurfio, tot subinde variorum opera, recens edita, transiiseris, me præterito, quem non minus, in intimam familiaritatem admittere dignatus es? Habet à te Reidanum filii tui, *ὃν μαγεῖται*, habet alterius Annales Hollandicos, habet tuas Institutiones Grammaticas, Franc. Junii de Piecturâ veterum libros, & quid non? Nobis non licet esse tam beatis? Verum emenda, quæso te; nisi Mulas meas iratas habere tibi cupias. Imprimis fac tractatum tuum, de Historicis Latinis, juxta ac libros de arte Grammatica, quamprimum à te habeam, quibus vehementer indigeo: finem scribendi faciam, ubi unum, alterumve proposuero. Locus est Saxonis, me iudice, valdè corruptus, qui extat Hist. Danicæ lib. vii. pag. Edit. Francofurtensis 123.

*En pia progenies trucibus concurrere telis  
Ausa perit, sudo prognati sanguine fratres  
Illata sibi cæde ruunt.* —

Ubi quid *Sudus Sanguis* significet, non satis intelligo. Ego *Socio* legerem; nisi mox sequeretur: *Exitiale malum socio Styga fu-*

*nere visent.* Tu mihi sis Apollo. Deinde edoceas me rogo, quænam sit *Insula Lachmiorum*, vel *Latbmiorum*, cujus meminit Valerius Maximus, lib. viii. cap. xiii. Exemp. extern. vii. sub finem. Ejus etenim mentio apud Geographos nulla, quod sciam, occurrit. Vale, decus Belgii, & delicia literati orbis, & cum omnibus, qui circa te sunt, æternum salve.

Soræ a. d. xxviii.  
Septemb. Anno  
c1o 1o c xxxvii.

*Tuus omni*

*affectu & officio,*

Stephanus Johan. Stephanus.

Quas heic adjunxi literas, velim per te rectè curentur, Viden' os hominis?

#### CCLVI.

D. Doctori Gerardo Vossio, Philosophorum oculo, & in Academia inclita Amstelodamensi humanarum Literarum Professori celeberrimo, viroque omnis Literature cultissimo.

**M**iraberis, Vir solertissime, quænam me capiat fiducia tuam sic meis literis compellendi & amplitudinem & magnificentiam. Certè selectissimæ virtutes tuæ unâ cum candidissimis moribus conjunctæ id efficiunt, & aliæ animi & corporis dotes ita te omnibus amabilem præbent, ut non aliud abs te contendam, quam ut me in amicorum tibi arctissime conjunctorum album adscribi patiaris, qui te non solum diligam, verum & unice observem. His fretus, tuâque in studiosos humanitate confusus has tandem ad te dare decrevi, quas comitabitur liber meus pusillus, rudis & tenuis, cui novato nomine de Praxi Medica Admiranda titulum dedi: licet enim Medicus re & opere non sis; in arduis tamen medicinæ clivis emedullandis te versatissimum esse, & putavi, & puto: nam ingenii acumine polles, eleganti facundia, & rerum omnium cognitione es præditus, ita ut non solum celeberrima Amstelodamensis Civitas, illustre Lycæum Leydense, sed Europa tota, imo universus orbis te omniscium vocet, tua amplectetur opera, Lemnisco ornanda, dignissima Cedro, eaque plenissimis, ut aiunt, tibiis jactet, & prædicetur. Quare, Zacuti, tuarum laudum acerrimi propugnatoris, licet ignoti, tui tamen



tamen amantissimi, libellum inermem ne despicias: nec enim Dii croco infecti semper cinnamoma eructant, sed pulsem in casa furnaria, Reges rapam in tuguriato, & ipsæ Gratiæ fraga, myrtillosve sæpe in montibus, & sylvis prodelicatis epulis comederunt. Quare illius errores mentis tuæ sagacissimæ limâ solerti castiga: id enim feram libentissimè. Hanc curam si non molesto animo pro me sumferis, habebis Zacutum tuum tuarum laudum vocalissimum præconem, atque omni tempore memoriæ tuæ clarissimæ non ingratum. Quocirca si quid est, quod tui causâ me valere existimes, impera, exequar enim libentissimè. Vive ergo diu cum dilectissima familia tua, & ita videas filios tanta prole beatos, ut ii tanquam novelli olivarum, usque ad quartam generationem in circuitu mensæ tuæ adessè queant. Vale ergo, Vir omniscie, nostri quoque gloria seculi. Ex Musæo nostro.

Ex Musæo nostro  
Amstelod.

*Te amat, colit, observat*

D. Zacutus Lusitanus.

### CCLVII.

QUanquam bis jam ad te scripserim, tamen nec hunc Mercatorem Slaglofensem sine meis ad te Literis dimittere potui: per quem uti ne graveris respondere etiam te atque etiam rogo. Opus tuum de Idololatria Gentium, ut Velleium Scylacemque, & Batavicos Annales filiorum maxime videre aveo. Pro navatâ mihi operâ, apud Typographum cunctatorem, gratias, quantas possum, ago; & enixè abs te peto, ut pro amicitia nostrâ, hominem urgere pergas; quod facturum te confido. Quæso, effice uti operas partiatur, alterumque Typothetam etiam abhibere velit; in quem finem Historicum Tomum in duas partes separavi; ita meo, & multorum in hoc regno Procerum, desiderio satisfaciet. Simul autem editio absoluta fuerit, velim Hagam exemplaria duo mittas: unum Mylio, alterum Riveto; tria Leidam, Heinsio, Cunæo & Vorstio: unum tibi vindicabis: cætera viginti minimum, aut, si potes, etiam quatuor, statim huc ad me curabis. Poteris id commodissime per Ludovicum Elzevirium; quem deinceps apud vos commoraturum, libens sanè ex illo ipso intellexi. Sæpe nobis ejus opera, ad curandas Literas nostras, ului erit. Misit nu-

per ad me Typographus, duo exemplaria primi tantum ternionis, cum certe plures expectarem, & progressum longius existimarem: sed causam affert, satis frivolum, nec sufficientem sanè. At placebit, si deinceps quod prolixè pollicetur, culpam suam, maturanda gnaviter editione, emendaverit. Quæ interea folia excusa erunt, quando nunc tam bona occasio sese offert, quæso mitte, ut quid expectare habeam, scire possim. Vale, Vir, & amice magne. Uxorem tuam, quam convaluisse speramus, liberosque ego, uxor, liberique ex interiore animo salutamus.

Raptim, Soræ, ad  
diem xii. Octobr.  
c1515c xxxvii.

*Tuus, constanti affectu,*

Joannes Meursius.

Si ad Dominum Rivetum aliquando es scripturus, quæso, Viro, quem omnino magni facio, plurimam salutem nunties; & constantem, etiam in silentio, affectum meum: tum hoc munus literarium qualecunque meis verbis itidem pollicearis. Iterum vale.

Est hic vir quidam doctus, penes quem sunt libri aliquot Manuscripti Græci, quos ut amplissimo magistratui urbis vestræ, ad Ornamentum Bibliothecæ illic publicæ, cui præfectus filius tuus, venales offerrem, à me petiit: neque ego id negare homini amicissimo potui. Sunt autem isti uno volumine comprehensi:

1. *Athenæi Παιδ μαχανήτων.*  
*Bitonis Κατασκευαί πολεμικῶν ὅργανων, καὶ ἱστιατικῶν.*  
*Heronis Χρηστικαὶ καὶ σαρκῶν, καὶ σπουδαίων.*  
*Heronis Τεχνικῆς Βελονητικῆς.*  
*Apollodori Πολιτορικῆς.*  
*Bitonis Μυχανῆς.*  
*Julii Africani Κεκοί.*  
*Heronis Alexandrini Βελονητικῆς.* Idem liber cum superiore, nisi quod figuræ variant: ideoque nonnullius plane pretii. Hos indicat quadringentis Florenis Hollandicis.
2. *Libanii Epistolæ,* plus minus trecentæ, trecentis Florenis.
3. *Callisthenes de Vita Alexandri,* Scriptori ævi mediæ, centum Florenis. Et hæc quidem exemplaria sunt in folio perscripta, ut loquuntur. Quæ sequuntur verò in Quarto.
4. *Nicephorus Imp. Παιδ τῆς πνευματικῆς πόλεως.* Florenis centum. Et hi quidem sunt in charta omnes scripti; qui sequitur verò in membranâ.

Z

5. *Mele-*



oblivione factum sed dilatione tantum qua differri talia solent, & post cætera absoluta demum excudi. Ubi absolutus fuerit primus Tomus, quæso cures ad me mitti exemplaria viginti; quædam aliis meo nomine distribuito Leidæ & Hagæ amicis, quorum nomina scio me in literis superioribus perscripisse: imprimis verò, quod vel me tacente debes, tibi unum retineto. Filio tuo Isaacò quantas possum gratias ago pro Asconio: etiam tibi qui mittendi illi auctor. Vivite ac Valete omnes, tu Uxor Liberique, & salvete à me, mea, atque meis interiore animo quem addictum vobis universis scitis.

*Raptim, Soræ ad  
diem xxi. Maii.  
Cl. Id. CXXXVIII.*

*Tuus ac tuorum*

*constanti Affectu,*

Joannes Meursius.

## CCLX.

Vir Nobilissime & Amicissime,

**B**inas tuas quas dedisti xxvi. die Martii item xvi. Maii recte accepi. Doleo sane vehementer, quod Historica mea opera Blaviis non acceperis. Petenda tibi sunt per communem amicum virum Gerardum Vossium quem rogarem ut exemplar ad te mitteret, idque nunc effectum spero. Cum acceperis otiumque ad legendum nactus eris, ut de eo judicare ne graveris etiam atque etiam velim. Quando verò tres priores Libros meos de familiæ Oldenburgicæ primis Regibus placuisse tibi memini, etiam istos minime displicituros esse, spero. Certe optem: nam abs te probari eos magni fecerim, qui iudicium tuum æstimo. Bonifacii constantem affectum planè osculor, amo virum, æstimoque quantum quisquam seu insigne Italiæ suæ ornamentum: cuperemque operis mei itidem exemplar mittere, si id commodè fieri posset. In Cunæi morte indolui. Magnam Academiæ jacturam fecit, & amicum ego amisi non è multis. Ipse quoque per hanc hyemem pessimè habui. Vexabat Nephritis, ut excernerem calculos plures: accedebat novum ulcus quod per totum quadrimestre sanguine, & pure manavit: etiam tertiana febris eaque duplex: insuper magna lassitudo, dejectio virium & appetitus. Sed nunc Dei Opt. Max. singulari beneficio omnia hæc mala evasi; is me porro quamdiu videbitur

servet sanum, ut inservire ipsi etiam ultra possim in vocatione meâ, ac cætera vita. Idem tibi ex animo precor & in eo voto finio. Uxor mea Liberique tibi, tuæ, atque tuis officiose se commendant.

*Soræ ad diem xxix. Tui observantissimus,  
Maii. Cl. Id. CXXXIX.*

Joannes Meursius.

Si exemplar commode ad Bonifacium mitti posse existimabis, pete à Vossio illud ut ad te transmittat quod Cunæo jam defuncto destinaveram.

## CCLXI.

*Clarissimo, & Celeberrimo Viro D. Gerardo Jo. Vossio, Historiarum Professore dignissimo S. P.*

*Amstelodamum.*

Cl. Doctiss. & Celeber. Vir, amice Coniunctissime.

**N**ON possum, nec debeo, nostrum Heilerfigium ad vos abeuntem dimittere, sine literis meis. Quamvis enim talis sit, qui meos sensus norit, & quomodo erga te & tuos sim affectus, testari possit; nolui tamen id ejus verbis committere, sine speciali Syngrapha. Non libenter obductam familiæ tuæ cicatricem refrico: id tamen coram Deo, apud te debeo profiteri, vulnus illud tuum, me graviter affecisse, & mali non ignarum, tibi & lectissimæ uxori tuæ, unâ cum mea, seriò condoluisse; sed qui te novi non Philosophiâ tantum, sed Christiana etiam sententia, & opera, non dubitavi quin consilio Dei acquiesceres, & manum ejus osculareris, vel percutientem. Id te fecisse & forti animo casum hunc tulisse, significavit nuper mihi amicus noster, nobiliss. Salmasius, qui hic aliquot dies, sui nobis usuram fecit, totus in Usuris describendis, & distinguendis, in quibus tale specimen edidit omnigenæ eruditionis, & diffusissimæ lectionis, ut qui, nonnullo arte secus de eo senserant, nihil vulgare deinceps à tali ingenio expectent: in quo nec tu falsus fuisti, nec pro eo qui est in te candore, unquam dissimulasti, quam tibi displicerent sequiora illorum iudicia, qui ei raram & exquisitam eruditionem derogarent. Quantum tibi deferat, testis esse possum, ex iis quos unâ de te contulimus sermonibus, in quibus id

Z 2

interea



interea enumerabat, quæ sibi infelicia accidissent, quod eo tempore Leidam venisset, quo Clariss. Vossius emigraverat, cujus communicatione & consortio frueretur. Sed ita Deus sedes, & habitationes nostras determinat, ut nullibi simus, ubi nobis nihil sit desiderandum, donec sedes illas incolamus, in quibus Deus est, omnia in omnibus. Ei te, tuosque omnes, ex animo commendo; & reliqua de quibus apud te libenter garrirem, nostro Heilergio committo, teque cum tuis, à me, & mea, salvere, plurimum cupio.

Haga-Comitis. Po-  
stid. Kal. April.  
C10 I0C XXXVIII.

Tuus ut suus omni

Studio & affectu,

Andreas Rivetus.

Novi, quam benè velis affini meo Molinæ, ideo existimavi tibi gratissimum fore, si significem eum adhuc athleticè valere, Dei beneficio, quamvis septuagenarius sit, & auctum esse numerosâ prole, superstitibus ex secunda uxore, quinque liberis impuberibus. Addam Samuelem Petitem, qui tibi ex scriptis notus est, conditionem à Franckerensibus oblatam, in locum Bogermanni acceptasse, & venturum proximo Augusto.

## CCLXII.

*Extrait de la Lettre envoyée à Monsieur Vossius, par Freinlhemi, en datte 11. Julii. Juliani 1638.*

**T**Acito, ipse ut spero, locum aliquem assignabis in Bibliotheca tua. Tum cum libebit introspicere, infinitum devincies homines tui studiosos; si quæ minus rectè vel commodè se habent, annotes, atque moneas. Est enim præ manibus alia major editio, quam multorum annorum opere, atque labore paratis subsidiis, tendimus fieri ornatissimam. Institutum nostrum probavimus, & alibi viris magnis, quorum ille Grotius jam misit aliquot, suspicionum, atque emendationum, in Authorem paginas: eas nos inferemus locis suis, cum fide, & gratitudine. Non dubitamus autem, quin tibi, dum scriptorem istum tractas, egregia notarum ejusmodi, missis succreverit. Ad quam annonam dividendam, si nobis dispensatoribus uti placet, aliqua fortè peccabimus,

per imperitiam, aut levem aliquam culpam, sed tamen dolus aberit. Idem te rogatum puta de Curtio. Quamquam enim ejus Notæ, jam aliquatenus sint progressæ, ut vides ex pagellis, quas censuræ tuæ subicio, multa tamen adhuc inferi poterunt sequentibus: sed & indici, cui, ut poteris animadvertere, multa reservantur, quæ vulgo commentariis adsparguntur: ne dicam omissa posse subijci etiam absoluto jam operi. Eum Authorem edo, sumptibus Viri Nobilis, atque docti, Joachimi Wicfortii, civis vestri. Utque jam sentias, quam obnoxia sit excellens humanitas impudentibus desideriis, audeo rogare, ut fasciculum ei inscriptum, reddi cures; mercedem quæ expendenda erit, ipse libenter, aut solvet, aut restituet; molestiam non conciliarem tibi, si certam aliquam occasionem nossem, quâ admittendas ei literas uti liceret. Est & alia causa, quam & ipsam non dissimulo: ut nimirum viro illi, qui fortassis, oblata hac occasione, consilio tuo uti cupiet, suadeas quod ad Authorem eum rectè atque ordine perornandum pertinere, arbitraberis. Atque ut summatim instituti nostri ordinem teneas, post notas has, subijcietur ipsa Curtii Historia; capitibus, atque versiculis, distincta, cum annotatione, similium locorum, ad Taciti ferè formam. Inde priorum Librorum qui perierunt vicem scribam, stylo, atque genio, quantum poterit Curtiano: quem interjecto tempore, tum occasione notarum penitus meditor, & inter ipsam textus editionem sæpius relego, aliquanto familiarem mihi reddere potero. Totum opus Index finiet, quem præcedet variarum Lectionum Libellus. Ad decus simul, & explicationem locorum aliquot illustrium, accedunt rerum variarum simulacra, Typis æneis expressa. Ita hanc editionem censemus fore omnibus aliis, quæ quidem hætenus processerunt, longè ornatiorem, locupletiore, commodiorem, atque utiliore. Sunt autem quæ ob stare possent ex mole operis, (nam si ita pergamus, duo volumina implebit) sumptuum gravitas, & mora paulò longior. Cum enim id nobis in votis sit, ut edere possimus hos Authores, ad usum hominum quam accommodatissimos: semper conamur ut quicquid ab aliis in eos observatum est, si tamen aliquid momenti adferre judicamus, suo loco, atque ordine inferamus, idque quo longius sit ab invidia, ipsius ferè Authoris verbis. Jam autem scripserunt in Curtium; Popma, Loccenius, Acidalius, Glareanus,

nus, Modius, sed verbosissime Raderus, cujus ex prolixis commentariis, quamquam recido, (ut ex ipsa collatione, cum vacabit, cognosces) quantum possum; non tamen evado, quin magna accessione, Notas meas onerem. Tamen si Wicfortio nimis prolixum fore videbitur id opus, reliqua, dum tempori monear, impensius detumere jubebo.

## CCLXIII.

Gerhardo Joanni Vossio *πρὸ πάντων*  
Johannes Fredericus Gronovius  
*Salutem & observantiam.*

**L**Uctus ille vester, Vir maxime, tristissimus, & inopinatus, omnes quidem ubi auditus est, mirificè affecit, me verò profus exanimavit. Quare et si magno perè cupiebam, quia non voce possem, & planctu, literis saltem, adesse complorationi vestræ: tamen adhuc sive me, sive te respicerem, refugit animus, nec huic descriptioni vacare permisit. Sciebam *ἐν λόγῳ καὶ φιλοτιμίᾳ* te esse, & in acerbissimo hoc vulnere, veterem cicatricem rescindi. Sciebam amississe te puellam obsequentissimam, probatissimam suis, quæ simulacrum erat paternæ maternæque virtutis, ingenii, morum: unde dulcis illa spes nepotum proximior, & hoc avidior. Nec leto tristius leti genus ignorabam venisse ante diem, haut fato, ut veteres loquebantur. Quare ausus non sum admonere te, dum

— *Stat pectore demens luctus,  
Et admoto larrant præcordia tactu.*

Nunc tandem Religio mihi officio deesse diutius: & parandum fuit alloquium, sive mavis, lacrymæ cum amici, quem Parentis instar veneror, cujus liberos amore, & studiis ut æquales, fratres, sorores, ingenio, doctrina, & spe, ut majores amplector, lacrymis miscendæ. Cur tamen lacrymæ modo? Vir es magnus, bonus, Christianus, in hac palæstra, qua Deus ascetas suos castigat, ab ineunte ævo exercitatissimus: ad hæc venerabilibus annis, & multa hujuscemodi exempla legisti, vidisti, cognovisti. Quare non debes aptare tibi vulgaria ista, quibus exulceratæ mentes, ad sanitatem revocantur; sed ab ipso casu sumere animos, & ab iis quæ maximè cruciant, & faciem subdunt

dolori, petere solatia. Nam quoniam amas illum, qui se vult solum amari, qui jubet Parentibus, conjugibus, liberis, dicere, non novi vos; imo odi vos; quoniam non vulgarem in modum, ipse ab illo Zelote amaris; non debes mirari, si ea eripit tibi, quæ inter carissima etiam benè compositis affectibus reputantur, quæ aliqua parte amorem tuum, qui sursum vocatur, terræ alligabant. Nec enim parvo constat, mortalibus vera sapientia, aut amor summi boni, sine magnis documentis habetur. Quod verò præmisisti imaginem tuam, virginem, unicum pietatis, pudicitiae, modestæ elegantiae exemplar, quid aliud est, quam petiisse à te Deum has suorum munerum primitias, quasi in sacrificium, quantum humanitus provideri poterat, mundum, sanctum, inviolatum, purgatum, & regnitum agni immaculati sanguine: quod velut sponzor, & vas esset aliquis, secutura olim tuæ in eadem beata loca profectio. In quo, quod tibi, spei tuæ, mundo ereptum, id servatori ejus, & castissimo Cœlitum choro acquisitum est. Ipsa vero fors mortis, seu ut magis ex formula sacramenti nostri loquar, ipse commeatus, quo summus ei arbiter hujus militiæ vacationem dedit, est ille quidem illatabilis, lugubris, & præfestinus, si hominem roges; nequaquam verò deplorandus, si roges eum, vel ipsam potius, quæ semper ita se gessit, ut eam modo horam felicem arbitraretur, ut huc solum adspiraret. Quid enim luctuosum, per quod ad lætitiæ solidam transitur? ad peccati immunitatem, quod solum illatabile, flebile, miserum in nobis? Neque tamen metum, aut cruciatus, aut tabem lentam, vivi sepulturam cadaveris, non mortem denique ipsam sensit: sed uno ictu, levi corporis vulnere, momento æternam animæ sanitatem redemit, & spiritum semper in hoc paratum, non flens, repugnans, vix appellata Creatori suo reddidit. Quomodo autem præpropere, & ante diem, (ut pueriliter, & stultè Pagani loquebantur) venit, quod ad voluntatem Dei, & mandatum, & præstitutum rebus volvendis, ordinem evenit? Vivit ergo illa purissima, & beata anima, pulchri corporis aliquandiu hospes, & tuum amorem ab se, ad id quod solum amabile est, revocat; jamque haud dubium amplius curæ vestræ testimonium, coram omnibus sanctis perhibet, quod à Deo acceptos, Deo servetis, veri *δικονόμοι καὶ χειροκέρων αὐτοῦ* data in antecessum, & supposita pignori futura vestra ascen-

ascensionis, abiit non invita, non impa-  
rata, non gemens, & tum cum cito ab-  
solutis stipendiis evocata, missionem me-  
ruit. Nihil ergo hic lugendum; sed ado-  
randa voluntas *tu* *et* *tu* *tu*, quæ cum tot  
præstantium pignorum tibi numerum lar-  
gita sit, eam tecum rationem duxit, ut  
fecunditatem, felicitatemque conjugii  
tui, inter cælum, & terram partireris.  
Omitto nunc de incerto humanarum re-  
rum, de varietate discriminum, & ipsius  
bonæ fortunæ insidiis, de conditione com-  
muni: omitto omnia illa, quæ ex literis  
*tu* *tu*, contra iacturas tales, præsidia  
comparantur. Nempe has cum unus  
optimè omnium calleas, semper tamen sa-  
cras habuisti potiores, & hinc demum sa-  
lubria *tu* *tu*. Nec ignoro omnium ho-  
rum te quoque meminisse; sed quia loquax  
res dolor est, videtur, & hanc solatus ne-  
cessitatem imponere, ut similiter sint, &  
sæpe nota nimis repetant. Deus Opt.  
Max. animum tuum erigat, honorandum  
senium vegetet, & quod censeretur, queat,  
abruptum Liberos tuorum, qui præ-  
iverunt, annis id in tuis, in gravissimæ  
Matronæ tuæ, in fratrum, & sororis su-  
perstitum augeat. Vale Vir *tu* *tu*  
& hoc officium meum, ut à pietate pro-  
fectum interpretare.

Hagæ-Comitis, Idib. Februar. Anno  
c15 l5c xxxviii.

Grafwinkeliuss *tu* *tu*, & egregius Hei-  
lerfichius, salutant te officiosè, dolent  
cum dolente, & in mei alloqui cupiunt  
venire partem. Inclusas, ni grave est, jube-  
bis ad Hardervicenos Nautas deferri.

## CCLXIV.

Clarissimo Viro, Gerhardo Johanni  
Vossio, Professori Celeberrimo.

Vir Clarissime,

**E**A mea felicitas fuit, ut quantum  
apud te possem, non rarè etiam in  
amicis meis experirer. Quos cum ea co-  
mitate excipias, qua me soles, illi, quod  
tuæ humanitatis est, mecum beneficium  
interpretantur. Utrum huiusmodi homi-  
nes errent, an verò rectè sentiant, id ex-  
plorare, quæ mea ambitio est, non lubet.  
Si quis tamen hodie vivit, quem amari à  
te valde velim, is omnino est Jacobus

Seertlingius, qui has tibi tradit. Is in eadem  
mecum urbe natus, hic apud Ubios ita me-  
cum vixit, ut nihil possit dici conjunctius.  
Unus sanè fuit, qui ægritudinem animi  
mei leniret, & hoc in loco molestissimo,  
vivendi tedium suavi contubernio solare-  
tur. Cum enim omnes in hac civitate,  
magis fatui sint, quàm fabrorum betæ,  
idque ab ineunte ætate addiscant, ut crasse  
& loquantur, & sentiant, nitorem o-  
mnem, à verbis pariter, & judicio ar-  
ceant: apud hunc unicum, cordatè sapere  
licuit. Adderem alia, sed nescio, quo-  
modo hominis familiaris, semper suspi-  
cæ laudes sunt. Nosti invisum morem  
quorundam, qui alios Alceos faciunt, ut  
ipsi Mimnermi videantur. Unum dicam;  
justæ sanæque indolis est, & rectè judicat.  
Quod in omni laude palmarium esse, tu  
me sæpe, Vir Optime, & Candidissime,  
docuisti. Excute solum, in manus lumen,  
attrecta, & miraberis ineptam sollicitudi-  
nem meam, qui aliunde causas, cur  
Seertlingium ames, conferam, cum ipse  
domi plures habeat. Vir incomparabilis,  
felicitissimè Vale.

Colonia Agrippina  
Propriid. Kal. Apr. An.  
c15 l5c xxxviii.

Tuus ex asse,

Vincentius Fabricius.

## CCLXV.

Clarissimo Viro, D. Gerhardo Joan.  
Vossio, Eloquentiæ & Historiæ Pro-  
fessori Celeberrimo.

**D**E obitu filix tuæ, Vir Excellentis-  
sime, & summe, virginis ornatif-  
simæ, sex Linguarum peritæ, aliisque vir-  
tutibus supra sexum, & ætatem suam con-  
decoratæ, mihi renuntiatum est. Quem  
ego casum familiæ tuæ, non sine maximo  
dolore, ac *tu* *tu*, accepi. Digna enim  
illa erat, quæ Parentibus honoratissimis  
gaudium pareret, & familiam augeret.  
Verum supremo Imperatori aliter visum,  
qui eam jussit subito, à statione sua disce-  
dere, ne seculi plures molestias devorare  
nobiscum cogeretur, qui in horas cupi-  
mus dissolvi & esse cum Christo. Eapro-  
pter sancto pectusculo, ne sanè felicitate  
invidiamus; sed illud processisse  
in locum omnibus piis communem, in  
quem serius, ocius sequemur, omnino  
statuamus. Uxorem lectissimam, cum  
filio pristinam valetudinem jampridem  
recu-



recuperasse spero, quam utrique, tecum firmam, & perpetuam, ex animo precor. Pro Theſium tuarum Theologicarum Theſauro, mihi dono dato, immortales ago gratias; pro quibus licet *ισχυρον*, dare nequeam; tamen quasdam meas olim in Auguſtanam Confeſſionem, à me diſputatas mitto, quas tanquam ſignum nexus mei, in quodam Bibliothecæ tuæ angulo reponere, ſiquidem id mereantur, haud graveris. Qui verò harum lator eſt, juvenis eſt Linguarum Orientalium amantiſſimus; qui jam in Græcis, Hebraicis, Chaldaicis, & Syriacis, mediocriter profecit, ac Rabbinos legere cœpit. Qua de cauſa etiam tibi ſiſti voluit, ut auctoritate tua Linguarum Profeſſoribus, in Academia Leiſenſi, D. D. L'Empereur, D. Golio, & D. Ludovico de Dieu, commendatus, in penetralia Orientis, ſeſe facilius ingerere; & Arabicæ cum primis Linguae notitiam ſibi, tantis Ducibus, atque Magiſtris, comparare poſſit. Quod illius propoſitum non potui non probare, & illius amore, hanc tibi faceſſere moleſtiam. Des hoc, amabo te, amicitiae noſtræ, quod toties, tamque audacter, ſanctiſſima tua ſtudia interpello. Antequam claudam, de ſycophantarum quorundam morſibus, apud te queri cogor, qui ſyn-tagma meum, clam & palam, inceſſunt tanquam Photinianum, & Socinianum, à quorum hominum erroribus ita abhorreo, ut à veneno præſentiſſimo Chriſtianæ Religionis. Calumniæ Author eſt Flockenius, diſcipulus quidam olim meus, quem tibi; Vir ſumme, & Polyandro noſtro unicè commendaveram, quem me propter variè ornatiſtis, juviſtis. Is, is hanc mihi nunc rependit gratiam. Sed Deus qui innocentiae meae teſtis eſt, veritati patrocina-bitur, & vitiligatores confundet. Ignolce, quod hanc animi mei agridudinem, in ſinum tuum effundere audeo; & cum charis tuis longum, ac benè vale, & ſalve.

Dat. Bremæ Anno.  
c1515c xxxviii.  
18. April. juxta ve-  
terem formulam.

Excellentiæ tuæ

Devotiſſimus,

Ludovicus Crocius.

## CCLXVI.

Reverendo, & Maximo Viro, Gerhardo  
Jo. Voſſio, Canonico Cantuarienſi  
Salutem & obſervantiam.

Vir Maxime,

QUam prolixè nuperam tuam, tuarque domus benignitatem interpreter, quoſque grates debere velim tibi præſenti, ſignificare paucis literis, ſi cupiam, nihil agam aliud, quàm ut infantiae meae quarum exemplum. Animus meus, qui ſi tibi notus non eſſet, nec tanta me eſſes gratia dignatus, æternum meminerit. Nunc ut ad te ſcriberem, non tam factum eſt, quod tua ſtudia, & arctum otium morari neceſſe ſit, quàm uti ſatisfaci-am petitioni ejus, qui has fert; quod etſi faciam lubentiſſimè, tamen quia meae erga te obſervantiae potiore ſemper rationem duco, in ejuſmodi officiis, præmi-um me ferre exiſtimo urbanæ frontis. Illi ergo, nomen Joannes Cornerus; juvenis eſt, & doctrina, & omni virtutum genere cumulatiffimus, ex diſciplina optimi, & eruditiffimi Bernegeſi. Venit in has regiones comes, cujuſdam genere, & dignitate Comitum, ut ſtudia ejus ordinaret: cæterum quoniam iſte, neſcio quo animi morbo, nihil minus curat, quàm ſtudia, & militiae ſe dedit, prorsus inhoneſtiſſimè hætenus ab illo, Cornerus noſter habitus eſt. Eo magis, quod eum domo longè abſentem norit, vix alias rationes inire poſſe, ut ſœdum ſervitium ef-fugiat. Illaque ergo ei præcipua cauſa ſalu-tandi tui fuerit; ut quem virum ex famâ, & ſcriptis veneratur ut qui maximè, ejus videndi honorem habeat: tamen & ſic petiit ſtudia ſua commendari, ut ſic ubi locare eum poſſes, ubi inſervire aliis, & illa ſua ſtudia promovere poſſet, velis hominis fortuna meliore digni memor eſſe. Scimus autem iſtiusmodi occaſiones, ſæpè ad te deferri. Hoc promitto tibi, nunquam fore, ſi tale quid eveniret, ut te hujus commendationis poenitere poſſit. Talem ſe, opinor, probabit ipſe tibi. Nam mihi quoque gratiſſimum fieri hoc pactum, adjungere non audeo, qui tantos fructus, benevolentiae tuæ percepi, ut majores à nemine optare poſſim. Vale.

Tuae Dignitatis Obſervantiſſimus,

Johannes Freder. Gronovius.

Hagæ ad diem iii. Eid. April. An. c1515c xxxviii.

Hoc

Hoc quoque scito; Satageus ille Ultrajectinus, de quo narraveram tibi; scripsit Epistolam furiosam ad *τον νικητην* Theologum, qui hic in aula agit: in qua ineptissime judicat, de nupero scripto Salmasii, à se, ut ipse fatetur nondum visi. Rogat ut persuadeat summo Viro, ne dedignetur opinionem suam, aut revocare, aut valde mollire in secunda parte: quod ni fiat, minatur ab omnibus J. C. & Demagogis, velut signo dato scripta in contrarium. Nicol. Heinsius nuper hic fuit, & valde conquestus est de silentio Isaaci tui. Eum saluto, & gravissimam matronam tuam, filiosque & filiam, mera parentum vota, & gaudia. Iterum vale. Scripsi raptissime expectante latore.

## CCLXVII.

*Clarissimo, Doctissimoque Viro Domino Gerardo Johanni Vossio, Fautori meo.*

Clarissime Vir, Fautor, & Amice, fidelissimâ gratiâ Coniunctissime,

**S**axonem meum Grammaticum, nil nisi faventem expectare Typographum, ultimis ad te Literis meis significavi, quas Mercatori cuidam nostrati, ad vos proficiscenti, superioris anni Autumno, me dedisse memini. Vehementer scire discupio, num apud vos reperiatur propitius, & velut è machinâ Jupiter, qui florentissimi hujus scriptoris, editionem in se fuscipere dignetur. Cujus rei te diligentem spero indagatorem fore, imò suasorem, & impulsorem. Et si quid tuâ ope, atque consilio efficere poteris, quæso te, per hunc ipsum internuntium certior me facias. Interea verò dum latâ spe solor, atque sustento animum meum, sententias quasdam, ex Quinctiliani institutionibus Oratoris excerptas, ad te transmittō: enixè abs te contendens, ut si bono publico id fieri posse existimes, Typographo alicui des quamprimum imprimendas. Ego laboris nullam postulo mercedem aliam quàm viginti, aut summum triginta exemplaria. Pervelim autem typis nitidissimis, & quidem majusculis, quicquid hoc est oppellæ, prodeat & formâ portabili; quâ ferè solent lucem aspicere hæ studiorum minutia. Imprimis te per amicitiam nostram oro, atque obsecro, ut totum hunc libellum, à capite ad calcem sedulò perlegas, videas-

que ne quid sit, quod existimationem meam lædat, aut nomini meo maculam aspergat: & simul des operam, ut voto nostro satisfiat, hoc est, ut præsens hic Tabellarius, propediem *ὅν δὲ*, redux, ad nos aliquot exemplaria referat. Hac in parte, rem feceris mihi longè gratissimam, quam ego vicissim, omni studiorum genere demereri conabor. Tractatum tuum de Idololatriæ origine, juxta ac filii tui Scylacem, & Velleium Paterculum, avidè desidero. Vale, Vir præstantissimi Belgii decus, deliciæ Musarum, & me solito amore, ac favore prosequere.

*Sorae a. d. xiv. Maii, Observantissimus tui,*  
clo 13 c xxxviii.

Steph. Johan. Stephanius.

## CCLXVIII.

*Gerardo Johanni Vossio, Excellentissimo Viro, Steph. Joh. Steph. S. P. D.*

Clarissime Vir, corculum Musarum, deliciæ & decus Reipublicæ Literariæ.

**L**iteras tuas Amstelodami xvi. Calend. Aprilis scriptas, tandem accepi, ad diem Maii xx. stylo veteri. Eas statim ad os & pectus appressi; cum intimo voto, ut te tam charum mihi caput, eundem in modum complecti possem. Nullum sanè verbum, in istis literis fuit, non plenum humanitatis, officii, benevolentia. Et non sine summa voluptate sentio vivere, etiamnum in animo tuo, scintillas veteris erga me amoris tui: quas utinam nulla unquam extinguat dies! Quod me attinet, non possum non tam impensè amantem me redamare, quamdiu animâ spirabo meâ. Summo equidem honori mihi erit, & apud vivos & posteros, innotuisse me tanto viro, cui divina scripta æternam circumdederunt famam. Affectus quoque tui, luculentum hoc est indicium, quod Saxonis mei editionem, tam esse tibi curæ, & cordi esse patiaris; quâ tamen nunc ego te libero sollicitudine. Generosus etenim Præses noster, cui Deus æternum benedicat, sumptus se hanc in rem liberaliter suppeditaturum promisit. Itaque propediem ferrum ejus, quod dicitur, in igne erit, præloque committam, ut primum chartæ tantum comparaverit sibi Typographus, quantum toti operi excudendo sufficiat. Utinam felicitibus prodeat

deat auspiciis! Fiduciâ etiam amicitiae nostrae, nuper ad te transmissi, Florilegium Sententiarum M. Fabii Quintiliani, quas ut Elzevirius, vel La Maire tuo, excudendas, maturè tradas, si modò dignae sunt istae minutiae, quae lucem aspiciant, omnibus abs te precibus contendo. Si tergiversentur illi, quomodo vix mihi persuadeo, aedum per Laurembergicum nostrum Autographum meum restituas. Tractatum tuum de Historicis Latinis, juxta ac Institutiones Grammaticas, quælo te, ornatâ veste munitas Bibliotheca mea, quæ avidè eos libros desiderat, transcribas. Rara etenim hic prostant exemplaria; Sed vide hominem exanguis frontis! Si pecco, fiduciâ amicitiae nostrae pecco. Librum tuum de Idololatriæ origine, adhuc sub prælo sudare intellexi, ex literis tuis, ad Cl. Dom. Meursium, Collegam meum dilectissimum. Ubi Lucem viderit, unâ cum Scylace & Velleio Paterculo, filiorum tuorum, mecum etiam exemplar communices, etiam atque etiam rogo. De obitu filiae tuae dulcissimae, vel potius de funesto illo, quo periit, casu, posteaquam mihi renunciatum est, sanè quàm pro eo ac debui, graviter molestèque tuli; sed patienter ferendum est quod mutari non potest, & imprimis divinæ voluntati acquiescendum. Ego huic rei diutius immorari nolo, ne refricem dolorem tuum, & domesticum vulnus, sat inopinatum. Pauca hæc volante calamo exaranda duxi, ne *ἀνέμω* planè ad vos veniret Collega noster suavissimus D. Laurembergius. Amicissimam salutem ascribo uxori tuae, & filiis.

Soræ, ad diem  
xxiv. Maii. sty-  
lo vet. 1638.

Tui observantissimus,

Steph. Johan. Stephanus.

#### CCLXIX.

Viro Maximo, Gerardo Joanni Voffio, Johannes Fredericus Gronovius salutem & observantiam.

Post longum silentium, alloqui statui te, Vir clarissime, non quali de observantia mea, sine isto officii genere, minus certum te arbitrarer: sed quia post aliquot dierum nimiam contentionem, ociari hodie, & salutare amicos constitueram. Scelus esset me ex consuetudine tua filendi, de sanctissimo verissimoque amore tuo erga me malè suspicari: cujus ea

habeo, sensique *παρρησιας*, ut siue studia mea, siue vitæ rationes inspiciam, tantum tibi acceptum feram, quanto nunquam paria tecum, aut cum tuis facere quivero. Nec de meo in te animo ambigere te posse puto, quin ingratisimum bipedum me esse existimes, quod in tam probos mores, tam simplex, & venerandum senium non cadit. De meis nunc studiis pauca: quæ quidem tota in civili jure occupantur, quando hoc urgebant cognati, & hanc mihi unicam anchoram restare providebam. Itaque libris tuis rarè, nec nisi ex intervallo utor: nec enim unquam adeo in istud mare immergar, ut dulcium ante omnia Musarum, quas tanta ambitione procatus sum obliviscar. Epistolarum Casauboni opus ipsum absolutum est; in appendice nunc hæremus, cui si per me staret, non per moras Typographi, jamdudum Colophonem addidissimus: cupio enim nimis molestissimo labore levare, quum immenso temporis dispendio, fructu præ lectoribus quibuscumque exiguo, gloria ut in alieno opere nulla, hætenus exantlavimus. Ad Meursium *τῷ πρῶτῳ*, scripseram rogaveramque, ut à Casaubono ad se scriptas nobiscum communicaret. Ex literæ missæ ad Cracovium Agentem Ordinum, integrum annum in Dania peregrinata, vix tandem ad destinatas manus pervenerunt. Interea cum tua comitate, Epistolas illas summi viri accepissimus, ante duos fere menses respondit Meursius, easdemque in fasciculum collectas, una misit. Egi igitur gratias illi, ut exemplar diatribæ Elzevirii, uti poterat, curandum Soram dedi. Sed quoniam horum quoque fides suspecta sit mihi (certè cum Brema ad Salmasium scripissim; usus officio Bibliopolar, qui meas ad illos miserat, responsum detinuerunt semestre integrum, & detinuissent diutius, aut perdidissent, nisi ipse in has oras profectus poposcissim) has scripsi, & alia via, si potest, per Blauwium velini quamprimum mitti; idque ut per filiorum aliquem mihi effectum dares, rogare ausus sum. Reverendus Riverus sub incude habet Apologiam pro beata Virgine, in duas tributam partes: quarum prior historiam, quatenus vera sciri potest, & commentitiâ de vita ejus persequitur. Posterior de cultu ejus ager. Heilerfichius Burræ est cum Domina Principe, & illustrissimo Discipulo suo. Uxorem tuam, sanctissimam Matronam, & liberos omnes saluto officiosissime. Ad Isaacum scribam propediem. Est enim penes me Justinus, quem ille Peiraredo Comitem dederat,

A a

cum



cum fœnore conjecturarum ejus. Vale,  
Vir *Zuſcapudruſe*, & me ama.

*Hage, ad diem, Prid.  
Calend. Sextil. Anno  
cdo Id c xxxviii.*

## CCLXX.

*Clarissimo Viro* Gerhardo Johanni Voſſio S. P.

Vir Clarissime,

**C**urtium ad te mitto, & in eum meas notas, de quibus ut ingenuè fatear, judicium Poetæ in partes vocare liceat:

*Sunt bona, sunt quadam mediocria, sunt mala plura,  
Qui legis hæc, aliter non fit, amice, liber.*

In re ardua, etiam citra operis effectio- nem, honestus conatus, bonis haut impro- bari solet. Si Deus vitam & vires dederit, quod nunc minus limatum, ut iterata edi- tio, (modo eam sperare liceat) ac dies posterior, prioris magister farciat, operam dabo. Libelli quidem mei indignè ab ho- mine, cæterarum rerum omnium, nisi lucri incurioso habiti sunt, ita ut pudeat me editionis. Omnia scatent mendis. Et aliquem ex malignitate inferuisse credi- dissem, nisi hominis (Jacobum Marci à me significari scis) supinam negligentiam perspectam haberem. Altera editio *ov* *ov* *ov*, emendatior & acutior prodibit. Ut autem summæ tuæ eruditioni semper af- surgo, ita tuum de notis meis in Curtium expecto judicium, cui lubens acquiescam. Ut aliquid in Curtium commentarer, post alios, Superiorum iussa, & hujus loci ju- venum desiderium urserunt; quorum etiam captui, non eruditis hæc scripsi. Quid tuæ Musæ, jam nobis parent, unicè scire aveo. Si me responso dignaberis, harum lator Daniel Jonæ juvenis erudi- tus, ex fide curabit. Vale, virorum eru- ditissime, & me amare perge.

*Upsalæ, a. d.  
xvii. Augusti,  
cdo Id c xxxviii.*

*Tibi addictus,*

Johannes Loccenius.

## CCLXXI.

*Admodum Reverendo Viro* Gerhardo Voſſio *Ecclesiæ Cantuariensis Cano- nico, & Chronologiæ in Amstelred. Gymnasio Professore.*

Clarissime Vir,

**N**on opinor excidisse tibi preces meas, quas pro amico meo, viro specta- bili & summè erudito, nuper interpo- sui, de Literis, ad Grotium incomparabi- lem, amicum tuum, tuo nomine perfe- rendis. Arbitratur ille hac ratione, viam sibi muniri posse, ad amicitiam sum- mi viri, qui præter mortales cæteros plurimum tibi desert. Nisi scirem memoriam tuam bene faciendi tenacissimam esse, plura conjungerem ad impetrandum ab humanitate tua hoc officium. Nam & de doctrina, & cæteris virtutibus fa- miliaris mei, dissererem aliqua, & quam nos ambos, tibi devincturus sis, ostende- rem. Sed sufficit tui te promissi admo- nere, quod noles evanescere; quando- quidem deferere mores tuos non potes. Multum augebis beneficium tuum, Vir maxime, si id sine mora præstiteris. Cum enim itineris ratio ipsū festinare jubeat, omnia quæ tardare illud possunt noxia erunt. Felicitissime vale, Vir in- comparabilis, & meæ confidentiæ ignosce.

*Utrajecti 29.  
Augusti, 1638.*

*Tuus omni studio,*

Vincentius Fabricius.

## CCLXXII.

Venerandissime Vir,

**S**i negligentiam officii mei excusare a- pud te cœpero, vereor ne rationes meæ omnes quæ te ab his illiteratissimis hætenus liberarunt, unica illa ratione maximorum tuorum erga me meritum vincantur. Quamquam enim fatear me pepercisse summis occupationibus, quibus dies noctesque jugiter obrueris; æquissimo dolori, cui ob amissam incomparabilem filiam parentis affectu indulges: non ta- men debuissim te mea gratitudine, infi- nita hac cunctatione fraudare. Interea id tibi interposita fide spondere possum af- fectum gratamque memoriam quam  
stylo

ſtylo aut non expreſſi aut uſquequaque non potui, animo verbiſque hæcenus fuiſſe proſecutum, atque impoſterum novis incrementis aucturum. Humaniffima enim tua, triennii quaſi, converſatio, liberri- mus ad tua omnia accellus, & quod ma- xime veneror, diligens eruditiffimæ in- formatio, omnes gratitudinis ſpecies me excogitare experiri jubet. Ut ſi ego grata mentis tantum teſtimonium dare poſſem, quantum tu ſummi affectus, Apollineo tuo iudicio, quo me ut audio coram aliis ornas: Prædicarem me ſclicem quod condignas gratias referre ſcirem, quemadmodum te digniſſimum qui ita multorum gratias me- reare. Vulnus, clariffime Vir, quod tibi filia lætiſſimæ mors infligit, & quidem variis nominibus nimis grave, hac epiſtola non refricare, niſi & defunctæ magnæ virtutes & tuus amor à me quoque teſtem aliquem doloris exigerent. Nam quemad- modum ipſa propter tot in ea virtutes, qui- bus omnibus notabilis atque exemplar erat, meritò à me laudari debet: ita tu privato nomine proſecto mereris ut acerbiffimum hunc caſum tanquam immaturum in ſinu tuo deſeam. Sed quid ego tam glorioſam memoriam exili hac charta, quæ dignas laudes non capit, proſequar; cui ſi par eſſem maximum æternitatis monumentum vellem erigere? quid te in memoriam græ- viſſimi luctus reducam, cui præſtaret ut ſo- latia adhiberem & tanto dolori paria? Re- verentia mea erga mortuam hanc recor- dationem ejus expreſſit. Sublimis tuus ani- mus tam ſapientia præceptis quam altero domeſtico caſu antea inſtructus mea ſo- latia tanquam minora ſupprimat. Quineti- am domi præter tot egregios filios filiam ſolatio habes, ex qua id adhuc ſperare po- tes quod graviffimus caſus, humanus tamen tibi in altera præripuit, cui quoque ego opto, ut ſorori virtutibus par, fato felicior ſit. Porro quæ huculque tuis tanquam me- is exolvi, ea nunc verè meis dabo, quo ſi calculo tuo facta mea probaveris, perſua- deam mihi nihil me egiſſe aut deinceps acturum cui non ſua ratio conſtet. Vitam quam per annum quietam in patria vixi placuit tandem hac peregrinatione muta- re, ut & ſtudia hac velut cote acuantur, & ætas his laboribus ad majores præparetur. Poſt Angliam ubi jam trimeſtre tranſegi propediem Gallias inviſam, & illis tuum Grotium; tuum malo dicere, quanquam & patriæ meæ ſit, quia mihi de ejus bene- volentia veſtræ amicitia nomine promit- tam. Potes etiam tu data occasione tua commendatione eandem pro me parare:

ſi modo hac mea petitione tantum à te qui plura quoque ſoles amicis indulgere, poſſum impetrare. Ex Galliis dein quem locum meæ peregrinationi ulterius deſti- nem certius cognoſces, cum nihil tam fla- granter cupiam quam habere te & con- ſcium & rectorem eorum quæ à me lauda- biliter ſuſcipiantur. Poſtremum, Vir cla- riſſime, tu ne deſinas eadem conſtantia qua ego te venerari, tuo viciffim affectu me complecti, ne aut ego hoc deſideratiſ- ſimo paratoque amoris præmio fruſtror, aut tu videaris meum cultum non putare tanti. Vale.

*Tuus, tuique*

*Lond. xx. Dec.  
cdo DC XXXVIII.*

*obſervantiſſimus,*

*Laurentius Skytte.*

### CCLXXIII.

**A**ffectus in te meus ex Arte Historica tua genitus, primævos emiſit vagitus in Patria; nutritus eſt Romæ ex opere iti- dem tuo de Historicis Græcis; grandior demum factus eſt in Hiſpania ex altero quod in lucem dedidiſti de Historicis Latinis. Tandem nunc properat in ſinum tuum, evolalletque antea, ut hoc qualecunque obſequii, & venerationis ſpecimen præbe- ret aſſiduus laboribus tuis, floridiori Doctrina, & eruditione multijuga refertis. Sed vacuis manibus non eſt auſus properare. At quamvis propria ad hoc temporis non poſſit afferre, aliena tibi tamen dare non reformidat: à præſationibus, quas ad Le- ctiores ſumma humanitate, & modeltia tua in veſtibus operis ejusdem de Historicis Latinis præfixiſti, invitatus. Mitto tibi igitur quatuor antiquos Chronologos, ſcilicet Herempertum Longobardum, Lupum Pro- teſpatham, Anonymum Caſſinenſem, & Falconem Beneventanum ab Antonio Ca- racciolo Clerico Regulari Viro Ill. & om- nibus numeris abſoluto in lucem emiſſos: & Epitomen orientalis & occidentalis Bi- bliotheca, hoc eſt, Elenchum Scriptorum ferè omnium, qui de novo Orbe historicè ſcripſerunt uſque ad annum MDCXXIX. Hiſpano Idiomate pro tempore conſarci- natum ab Antonio de Leon excellentis in- genii Viro, & in rerum Indicarum noticia, eruditione magna ornato: quam plane præſtat in multis quidem operibus, quæ ſi lucem aſpicient, argumentorum, materi- arumque novitate, ac excellentia, omni- bus

bus certe probabuntur, auctoritateq; apud omnes valebunt; ac ætatem nostram ornabunt profectp, Indicaque regiones, & res oculis omnium aperient. Sed ejus potissimum doctrina, & multijuga Lectio in Bibliotheca & de Scriptoribus Indiarum elucet; quæ adhuc inedita, ducenta & amplius folia complectitur. In ea enim quid egregie scriptum docet, quid falsè rejicit, quid apocryphe monet, & omnia demum in sani judicii sui tutrina expendit. Quod pariter egregie quidem, & peraccurate agit singulari ingenii acrimonia, Ibericorum Literatorum decus, & Amicorum suorum delictum V. C. Thomas Tomagus de Vargas Toletanus Historiographus Regius Castellæ, & Indiarum primarius in MS. Catalogo propediem edendo, quem de Scriptoribus Hispanis materno idiomate exaravit.

Chronologi igitur prædicti, & qui in præcitata Epitome orientalis, & occidentalis Bibliothecæ (quique modo sint) recensentur, tui exercitus Latinorum Historicorum signa augere poterunt. Augebunt & ducenti ferè Historici Latini, & Græci aliqui, à me inter legendum observati, quos in schedas relatos habeo; tibi; eos polliceor, & dabo si Appendicem novam, vel secundam cogitas editionem. Quamq; multi, & major ferè eorum pars cum vestibus aliis, quàm propriis nominibus inducti, imò & omni alio prorsus, sive ornatu, sive notitiæ, etiam temporis in quo peculiariter floruerunt, destituti. Ita enim extra proprium solum, imò in extraneo, jam Latinam Linguam non minus quam omnem aliam, quæ materna non sit minus amante, nudi, & vagantes sunt à me deprehenfi. Patriam, si post septennem peregrinationem quam ago cum Illustriss. & Reverendiss. D. D. Laurentio Campegio Senogallienfè Episcopo, & Comite Sereniss. D. N. Domini Urbani Papæ VIII, & Sanctæ sedis Apostolicæ in his Hispaniarum Regnis cum potestate Legati de Latere Nuncio, cui à secretis famulantes unde vigesimum jam annum calcamus, incolumiter nobis repetere D. O. M. conceder; fortunà si non comptos, ac perornatos, saltem non adeo nudos eos tibi proferam, nec desperandum, comites alios sibi adscituros. Utinam & majores symbolas vigiliis tuis conferre valerem, non renuerem quidem; sed me summa hilaritate id facturum compertum habere potes. Is est amor in te meus; inque maxime proficuos labores tuos de Republica Literaria, sed summo loco de Historica bene merentes,

cui facem addidisti diligentia, & eruditione tua, imò oculos efformasti. Utinam cætera opera tua, scilicet, Partitiones & Institutiones Oratorias; de Rhetoricis Græcis, itemque de Latinis, de Historicis antiquis; de Anonymis Vitarum Scriptoribus; & res gestas omnis ævi abs te digestas mihi videre contigisset; in omnibus summam doctrinam tuam contemplari mihi licuisset; & fortè symbolulas aliquas conferre non desperassem; id profectò minimè præteribo, si ullo unquam tempore ad manus meas devenient.

Vitam & miracula Sancti Demetrii Martyris Thessalonicensis Græciæ Procos. ego scripturus, ut habebis ex adjuncto folio typis dato, unde quaque monumenta ad opus conquiro. Inter cæteros autores, qui hucusque mihi in manus inciderunt, unus Demetrius est Chrysoloras, Thessalonicensis, ut conjicio ex Panegyrico ab eodem scripto, in magnum hunc Martyrem, ejusque unguentum. Sed quo tempore floruerit, quod summo opere noscere cupio, me latet adhuc. Septem alios reliquit Panegyricos, sive Homilias, ut ex codicibus Vaticano, & Regio in Bibliotheca Monasterii S. Laurentii in Elicuriali apparet; suntque de Transfiguratione D. N. Jesu, &c. De sancto ejus sepulchro; in sanctam Resurrectionem; in Annunciationem Deiparæ, & semper V. Mariæ; in Dormitionem ejus; de Domini nostri nativitate; & gratiarum actio ad sanctissimam Deiparam. In Regio autem codice additur alius sub nomine ipsius ad Pulicem, quem exscribendum curavi. Addo insuper Indicem Manuscriptorum Græcorum, & Latinorum de Sancto prædicto apud me, vel re ipsa, vel notitia tenuis existentium; teque perenixe rogo, ut si quid de Demetrio Chrysolora præfato innotuerit, & ubi cæteri qui desunt Autores reperiri possent; & an fortè aliquis istic in Græcis codicibus Bibliothecæ Theodori Doufæ, quos secum è Græciâ advexit Georgius frater ejus latet, mihi indicare ne graveris. Officia enim quæcumq; tua in his, summi beneficii loco adscribam. Spero equidem, ac consequar, ut te de me optime meritum esse jure læteris, officiaq; tua in hominem nullo non tempore memorem, gratiæque referenda studiosum sentias.

Sanctæ Syncreticæ vitam quam Divus Athanasius Episcopus Alexandrinus scripsit, & Baronius in suis Annotationibus ad Martyrologium Romanum sub die v. Januarii, deperditum non sine gravi totius orbis Christiani jactura deplorabat, in tenebris



bris jacentem à blattis & tineis subtraxi, ac describendum curavi è Græco Codice Regio, adeo perverſto, ut jure credatur annis mille ſenior, & forte ætatis ipſuſmet Autoris. Dignum Athanaſio opus, & verè genuinum ejus, ut tu in Græcis eruditiffimus ſpero cognosces. Et typus vitæ aſceticæ, & norma ad perfectionis viam. Delituit hucufque ſub nomine vitæ Sanctæ Theclæ. Titulus enim operis ejuſdem corruptus erat, & in limine ejus, & in Indice Bibliothecæ Regiæ prædictæ, quem Guiljelmus Lindanus eques Ruremondensis legerat, & tali pacto de eo notitiam attulerat Baronio, qui poſtea ex iis in Annotationibus ſuis ad Martyrologium Romanum ſub die xxiii. Septembris aſſeruit Divum Athanaſium S. Theclæ vitam ſcripſiſſe, ut ad eandem vitam Sanctæ Syncreticæ fuſius demonſtro in Prolegomenis meis, quibus, & notis eam exorno, & propediem publici juris faciam. Folia communia quatuordecim Græcus textus complectitur, totidem Latine factus à Davide Colvillo Scoto, omnia denique erunt quadraginta plus minus. Onus eam excudendi ſi Typographus aliquis in ſe ſuſcipere vellet, libenter illi traderem, ſi pecuniæ aliquæ ſummam, & exemplarium certum numerum inter amicos dividendum conferat; quam tamen pecuniam non accipiam, ſed tot libros quot eorum pretium conventæ ſummam implebit. De his ſi cum Typographo amico, ſive Lugduni Batavorum, ſive Amſtelodami, ſive alibi tractari poſſet, & ſcire quicquid in hoc certo ſtabilire liceret, me tibi devinctiſſimum ſaſſurum pro comperto habeas. Iis enim intellectis quid expediet conſtituam. Fortè B. Antonii quoque vitam dabo, eodem Divo Athanaſio Autore, & priſtino genuinoq; nitore, ac ſplendori reſtitutum; unde nonnulla ei erepta & fraudata liquido conſtabit ex collatione ejuſdem vitæ, quam David Hoſchelius è Codice Boico edidit anno M DC XI; cum quatuor antiquiſſimis exemplaribus Bibliothecæ Regiæ Monafterii prædicti, quorum unus non ſolum ætatis illius, ſed peculiari ipſuſmet Athanaſii ſcriptione, vel ſaltem ejus Amanuenſis exaratus, ut piæ memoriæ Antonius Mauritiuſ Monachus Hieronimyſanus, eruditus, & cordatiſſimus vir, archiſſimo neceſſitudinis vinculo mihi conjunctus, eidem Regiæ Bibliothecæ Præfectus, ac Monafterii prior, ex clariffim. ſpectatiſſimorumq; virorum in iis autoritate, opinabatur. Modeſtiæ enim ſummæ B. Athanaſii tribuitur, autoris nomen in inſcriptione deſiderari, cujus in aliis tribus

honorificentiffimo ſanctitatis titulo mentio habetur. Sed quia legi lib. 4. c. xiii. de Historicis Græcis, te in dubium revocare opus hoc genuinum eſſe B. Athanaſii, ego (humanitate tua fretus, quod perenixe abſ te flagito) deſperare non audeo te probaturum mihi aperte, quibus ſententia tua nitatur rationibus; ut ſi quando vita hæc per me edatur, ut dixi, eas producere poſſim, dum neceſſario mihi de his aliqua libanda erunt. Interim te etiam atque etiam oro, ut neminem atque me habere credas, vel firmioris in te animi, vel præclarioris in te benevolentia; quæ etiam ad præſtantis ingenii adoleſcentem D. Matthaum, catæroſque filios tuos jam nunc prolatari incipit; eamque quibuſcunque potero officiis, ac ſtudiis illis ſemper probabo, & quia virtutibus illos perornatos audio, & quia tuos. Ratio enim hæc tantummodo ad illos per diligendos me ſemper alliceret; facietq; qui ab omnibus in oculis ferantur. Ea ornamentorum eſt præſtantis animi tui vis; ea laborum, ac vigiliarum tuarum apud philaretos autoritas. Salvere igitur ipſos meo nomine jube, & cura, ut perpetuo eorum unicuique, ut tibiſmetipſi, me additiſſimum credant. D. O. M. tibi cum renati anni principio perennes, felicitates auſpicari, & ea poſſidenda, ac tenenda concedat; quæ tuo, familiæ tuæ, publicæ rei literariæ, & amicorum tuorum commodo, ornamento, & jucunditati, vitam tuam adeo incolumem, longævam, ac in utroque homine beatam efficiat, ut nulla magis. Ita optat, ita vovet intimo cordis affectu ex merito, & Juſticia.

Mantua Carpe-  
tanorum, v. Id.  
Jan. MDCXXXIX.

Servus tuus ſtudioſiſſimus,

Laurentius Coccus.

#### CCLXXIV.

Eximio Viro Gerhardo Joanni Voſſio,  
Hiſtoriarum Profeſſori digniſſimo.

Vir Incomparabilis,

Poematum meorum exemplar ad te mitto; ineptiſſimum libellum, & qui de authoris infelicitate prolixè teſtatur. Agnoſces te, cum de rebus omnibus incorruptè, & divinum in modum, judicare ſoleas, de me ſaltem parùm accuratas hæcenus ſententias dixiſſe. Quæ enim ipſo tecum ſentire, aliſque magnificè de meis ſtudiis

studiis promittere consuevisti, in hoc opusculo planè nulla apparent. Nunquam ineptè astimare ingenia soles; utique, in me uno falsus es. Itaque opinor jam nolle, perfectam editionem, cuius me prope modum suppedere cœpit; & jam te laboris sumpti, dum hæcenus, maximo studio editionem promoveo, quemadmodum me consilii poenitet. Sed memineris ad hebetudinem ingenii mei, accessisse, fortunæ vitæque varietatem. Quæ me tot annos hinc inde iactatum, & alia omnia diu potius conantem, si qui essent, ardoris poetici igniculos bona fide colligere vetuit. Diversis enim agitationibus dispersi, antequam solida aliqua flamma fieret, evanuerunt. Atque hoc quoque narratis amicis tuis, ut non tam in iudicando deceptum, quam tantam meam calamitatem prospicere non potuisse sentiant. Animadverto quoque præterea, quam propè absum à peccato, qui aliqua opusculi parte, clarissimo nomini tuo inscripta, quasi vili quadam commissione, obsolescere te audio. Sed vulnerata jam causa, non alibi præsentius remedium, quam in incomparabili tua æquanimitate invenero. Vale, Vir maxime, & summam tuam benevolentiam mihi perpetuam esse patere.

Ultraj. x Kal.  
Januar. Anni  
cId Idc xxxix.  
Quem tibi &  
clarissimæ familiæ tuæ, feliciter evenire opto, ro-  
veoque.

Tui obsequentiissimus;

Vincentius Fabricius.

CCLXXV.

Viro maximo Gethardo Johan. Vossio,  
Johannes Freder. Gronovius S. P. D.

**E**N tibi, Vir venerande, observationes nostras, hoc est, vitrea fracta, & somniorum interpretamenta. Quarum etsi ea est indoles, ut exferat potius domo tua, & tot oculos, auresque eruditæ subterfugerent: tamen quia id posse desperant, veniunt ultrò, & plausum suum, sive benignus is sit, sive Eumolpianus, & solitus aspiciantur. Adde quod bona pars muneris tui est, & luculentissimæ Bibliothecæ debetur: absque qua fuisset, nunquam ad eas, Kal' òvap, adspirassemus. Si beneficium optimè intelligit, qui dedit, te ergo nemo verior arbiter, utrum nos prudenter an secus, eo simus usi. Sane maiore ingenio,

doctrinæque, ac ego homines, quales vel adolescentes tui, maiora erueri potuissent. Neque tamen spernenda omnino sunt levæ, & aliquam laudem nanciscitur, qui ea colligit, etiam ideo, quod illi se dignis intenti hæc lubentius prætereunt, certè non subtiliter confectantur. Vidisti olim aliquas; sed accessit nunc nova vestis, & descriptio tota immutata est; multa quoque superflua recisa: brevitas quippe in proponendis singulis studuimus, ut gratiam quæ ipsis deerat, ubertate, & copia mererentur. At non potuit abhiberi omnibus, ea meditationis, ut sic dicam, coctura, & maturitas, quam in nonnullis pro captu, & modulo nostro apparere putamus, cum præsertim liber tertius inopinanti, dum operæ exercentur, seligendus, & dirigendus fuerit. Hos morbos vitiaque, ex edito Ædiliū palam recte apud te pronuntio: ut siquidem indignum censeatur munus hoc quod offerretur tibi, sine fraude tamen ac simpliciter egisse videamur; sin placuerit, id bonitati magis tuæ, quam ipsius merito acceptum feramus. Vale, ac salve, Vir maxime, cum gravissima Matrōna, uxore tua, liberisque, & me amare perge.

Dabam Hagæ, a. d. xiii. Kal.  
Feb. cId Idc xxxix.

CCLXXVI.

Salutem in Christo.

Vir eximie,

**B**Inas à te accepi Literas. Diu hæserunt apud me quasi mutum & nihil respondentem. Harum priores ad me datæ sunt pridie Kalend. Octob. 1637. Posteriores vero 12. Kalend. Augusti, 1638. Puderet me certe tanti silentii tali amico, nisi satis tibi nimium mihi nota essent intestina pericula (pene jam bella) quibus laboramus. Causa horum malorum è scandalo accepto, sed non dato, prorupit, sed cum gravi scandalo dato Religioni reformatæ, quæ apud multos Scotorum (in tenebris illiteratorum illiberaliter versantes) didicit contra Regem suum arma sumere & assumpta defendere. Spero meliora, sed vix habeo quod promittam.

Nolo particularia Literarum vestrarum examinare, non solum quia non datur otium, sed quia negotia cum tempore ut plurimum aut variantur aut finiantur. Prac-

cipue

cipue post tam longa intervalla, quibus necessitate pene cogente prorsus silui. Spero tamen uxorem tuam, è longo illo quem meministi morbo liberatam.

Quod verò nunc me impellit te Vir literatissime & otia tua si quæ habes interpellare hoc est: Voluit Rex serenissimus (i. e. apud me iussit) ut scripta quædam mea non tamen sub nomine meo tunc edita contra Filherum Jesuitam iterum prelo & sub nomine proprio committerem. Interim scripsit contra illa mea Jesuita A. C. Fisherus ipse, an alius nescio. Multa impediunt quo minus illi possem respondere; præcipue verò multiplicitas negotiorum quibus quotidie fatigatus & qualibet fere horulâ avocatus fui, me penitus ineptum reddidit huic operi. Sed institit Rex serenissimus; ego obtempero; & sine læsione octavi præcepti temporis quædam fragmenta furatus sum, & lucubrationes meas quales quales sint perfeci, & in lucem edidi. Nolui te hoc ignorare, & libellum tibi misissem nisi quod Anglico idiomate conscriptum tibi prorsus inutilem fore putarem. Sed audio ita quibusdam hic placuisse, ut in se suscipiant è malo Anglico bonum Latinum facere, saltem quod ad Phrasin attinet. Nam aliter quid poterit à me jam sene & per annos totos duodecim ad minimum à libris literisque avulsus expectari. Quamprimum liber iste meus utcumque imperfectus Latine loqui didicerit, tibi exemplar mittam, & acerrimo iudicii tui acumini subdam, libentius à te amico auditurus in quibus erravi, quam ab inimicis apud quos utriusque factionis scio decretum esse non parcere. Vivas, valeasque, & me, ut soles, ames, & contra malevolos Orationibus tuis quoties coram Altari Dei & Christi nostri sis devotus, tutum præstes

*Dat. ex Aedib.  
Lambethan pri-  
die Cal:n. Mart.  
1639.*

*Tibi tuisq; amicissimum,*

W. Cant.

#### CCLXXVII.

*Excellentissimo Viro Ger. Jo. Vossio,  
Stephanus Joh. Stephanus S. P. D.*

**Q**UOD binis jam literis tuis nihil planè responsi loco reposuerim, veniam à te magis exposcere, quam excusationem aliquam, intermisso officio pratexere pa-

ratus sum. Imprimis tibi, maxime Viro-  
rum, uberrimas debeo gratias, de singula-  
ri diligentia tua, quam in Saxone meo ist-  
hic edendo hæcenus adhibuisse, te postre-  
mis tuis significasti. Demirari satis nequeo,  
quo facto fiat, quod florentissimus hic scri-  
ptor, Typographorum vestraium favorem,  
quem tantopere ambiit, nondum exorare  
potuerit: præsertim tua commendatione  
accedente, quæ nihil non persuadere ipsis  
merito debuisset. Hac itaque spe fallus,  
ac fraudatus, consilium cepi, vel te ipso  
suasore, & Authore, Magnates hujus regni  
subinde sollicitare, ut honestum propo-  
situm meum, suâ munificentia juvent, ac  
provehant. Quæ res etsi moram nonnul-  
lam injicit expectationi, Doctorum viro-  
rum, quorum in animis spem satis amplam,  
de meis in tantum Historicis notis, ac  
observationibus, jamdudum concitavi; pro-  
derit tamen, plurimumque momenti ad-  
fert, ad augenda, & accuratius expendenda,  
conjectanea nostra, quæ nondum ulti-  
mam receperunt manum. Florilegio meo  
Fabiano quid contigerit, edoceas me ve-  
lim. Si & hac in parte, operam suam mihi  
denegaverint Typographi, fac ad me re-  
deat, primâ quaque occasione. Meæ post-  
hac lucubrationes, quas non paucas affe-  
ctas habeo, longum, imo ultimum vale,  
Belgio vestro, se dicturas cum indigna-  
tione minantur. Opus tuum de Gentium  
Theologia, & Christianorum Physiologia,  
prorsus absolutum jam esse, ut nullus du-  
bito, ita exemplum ejus avidè desidero.  
Tuum est me voti damnare, fidemque tu-  
am apud me liberare, quam antehac non  
semel ultrò dedisti. Cl. D. Meursius noster,  
proh dolor! ad desperationem usq; Me-  
dicorum decumbit. Stillicidio urinæ labo-  
rat, quod plurimum puris admixtum ha-  
bet. Ulcus in vesica enatum hariolantur.  
Deus Opt. Max. pristinae sanitati restituar,  
diuque nobis, incolumem, florentemque  
servet optimum hunc virum, & de Re-  
publica literariâ tam præclare meritum!  
In quo voto finio, teque charum caput, di-  
vinæ protectioni seriò commendatum sal-  
vere jubeo, atque ex animo exopto. Offi-  
ciosissimis te verbis ut resalutarem, roga-  
runt virorum par incomparabile, D. D.  
Christianus Matthias, & Johannes Laurem-  
bergius; hic famâ eruditionis, & longâ fa-  
miliaritate tibi notus, ille inter ornamen-  
ta seculi numerandus, & recentioris tibi  
amicitiæ vinculo conjunctus. Vale, decus  
Belgii. De cætero, ut propensum illum  
affectum in me tuum, quem tot tamque  
luculentis indicis expertus sum, perpetu-  
um,



um, atque constantem conserves rogo, atque obsecro.

Soræ, a. d. v. Mart.  
cIo Ioc XXXIX.

*Observantissimus tui,*

Steph. Joh. Stephanus.

# CCLXXVIII

*Viro Celeberrimo D. Gerhardo Joanni Vossio, Historiarum Professore S. P.*

*Amsterdam.*

UT scilicet cum bono Deo ad meos redii; ea sedulo mecum ruminare cepti, quæ & commissa acceperim, & quorum me maxime recordari deceret. Tu, Vir Clarissime, tuæ dicta, & facta, cum primis obveniebant. Nempe qui me humaniore benevolentia, te acceperat, vix meminisse quemquam poteram. Singula percernere nihil attinet. Hoc saltem profiteor, tantum tibi obstrictum me agnoscere; ut vehementer viribus meis diffidam, sintne ullæ aliquando in me reperiendæ, quibus utcumque grati animi signum dare valeam. Si quas tamen Deus suffecerit, tibi tuisque lubens, meritoque dico. Cæterum Clariss. nostris D. D. Buxtorfio, & Lucio, salutem tuo nomine diligenter (ut par erat) nuntiavi: quorum ille jamdudum aliquas tibi destinasse se, significabat. Isti autem alteri, maxima tecum communicandi, injecta est cupiditas. Itaque à me postulavit, te ut ipsius nomine peramanter, ac officiosè resalutarem. Tum quodnam tuum de Historia Ecclesiastica propositum rogarem. Narravi enim illi, quæ tecum de Centuriis Magdeburgensibus collocutus fuerim. Inter alia; tibi hucusque latuisse, eas Basileæ, operâ ipsius D. Lucii, reculas, ac tribus Tomis distinctas prodiisse. Tibi item animi fuisse, tuis cum notis easdem emittere; postea eam curam certis de causis deposuisse. Porro, tibi etiam indicasse; ipsum D. Lucium, reliquas Centurias addere constituisse; meque ad hoc, quæ ex Antonini tertia parte haberi potuerint, excerpta illi tradidisse. Hortatus itaque me est, ut de hoc ipsius instituto denuo ad te scriberem; ac quodnam esset tuum ea de re consilium expeterem. Nam seculum illud decimum quartum, in quo desiere Centuriatores, adeo jejunum à nobis deprehensum est, ut post Occam, vix secundum inveniamus, ex quo, quæ Ecclesiasticam doctrinam concernunt excerpamus. Novimus Wiclefi

esse ea tempora: verum cum ne in ipsa quidem Angliâ, quidquam nuper de illo, sive indagare, sive corrolare quiverim; quid deinceps speremus incertum est. Relatum fuit ibi terrarum, à præclaræ eruditionis Theologo; Anglum aliquem, qui hodieque in vivis, universam Wiclefi historiam conscripserat, sed vernaculâ, neque tamen illum hæcenus, abs Typographis, editionem impetrare potuisse. Quod si Clariss. Vir, tuas aliquas notas, in dictas illas Centurias, aut concinnatas habeas, aut concinnare velles; equidem non solum rem præstares omnibus historiæ Ecclesiasticæ studiosis gratissimam; quippe, qui norunt, quantum tibi, tum in Theologia, tum Historiâ, universa Respublica Christiana, ac literaria, tuo merito deferat: sed & si illasdem ad nos permittere tibi videretur, omnino daturi essemus operam, ut Appendicis in modum, fideliter præcedentibus tomis annecterentur. Præter ista, percipere etiam ex te optarim: ubi, & quando, & quo ordine, in lucem prodierint, Excellentiss. D. Salmasii, de Ecclesiis Suburbicariis libri? Nam ab eo tempore, quo mihi Heroem illum, ejusque scripta tantoperè commendasti; sedulo investigare utrumque sægei. Alterum processit. Nam Lugduni Batavorum, colloquium, aut potius colloquium, ad unam atque alteram horam, summa ejus humanitas mihi indulgit. Inde desiderium operum ipsius multo intensius me incescit. Lugduni frustratus aliis, quàm quæ ibidem impressa essent, (ut Lib. de usuris) pro cæteris, Luteriam sum remissus, ubi primitus procusa fuissent. Eo postquam venissem, De Ecclesiis Suburbicariis, præter Eucharisticon ad Sirmondum, nil aut exhibere, aut indicare poterant. In hoc Eucharistico, deprehendo mentionem Epistolæ, ad amicum, Censuræ, & aliorum, quorum nunc memoriam non recordor: libro autem ad amicum amisso, revidere nequeo. Itaque nisi suggeras editionis cujusque locum, & Typographum; ubi inquiram? Invitus posthac carebo istis. Nostris omnino omnibus, & Bibliopolis, & aliis magnum Salmasii nomen inauditum: nisi uni, qui recenter Lugduno vestro rediit. Tandem obnixè rogo, Clariss. D. Barlaam, vicinum tuum, haud gravatim meo nomine plurima salute impertias: ejus præsepe Christi, abs te mihi indigitatum, tandem Hagæ Com. inveni. Magis nunc cupio, & alia ejusdem inspicere opera. Illud præsertim, quod deprædicas Grammaticæ tuæ, lib. 1. cap. 3. fine. Nescio tamen, Typisne descri-

descriptus, & publicatus, huc usque fuerit. Saluto familiam tuam dilectissimam, ac nominatim in eâ, D. D. Matthæum, & Gerhardum, (si probè recordor nominum) filios tuos; quibus mea officia promptissima offero. Si tamen quid reliquum habeam, quod tibi, tuisque offeram, ac non verius debeam; sum enim, maneoque,

Basil. nonis Mar. Tibi, Vir celeberrime,  
c1510c xxxix.

tuisq; cultu, ac officiis,

addictissimus,

Joan. Rodolphus Wettstein. B.

### CCLXXIX.

*Viro Clarissimo Gerhardo Joanni Vossio, in Academia Lugduno-Batava Professori dignissimo S. P.*

JAM vir es, mi optime Clarissimeque Vossii, qui rogatus à me, ut ad illustrationem Idoli Vandalorum, quod illis triplici vertice, Trigla dictum, locum mihi & verba Eustathii, qui ad manus non est, suggereres, quod is Dianam etiam Triglam nuncupatam, ut volunt, asseruerit; tu non modò Eustathium, sed & plures adducis, qui Dianam Tricipitem describunt. Quibus, (ut sunt hæ literæ nostræ humaniores dico, inexhaustæ propemodum, ut eruditionis, ita & disquisitionis) addi, & alii idem dictitantes possunt, & inter Græcos Aristophanes, & Lucianus, & præter etiam hos, Burdigalensis Ausonius, qui in Ternario suo, versum Maronis sic expressit.

*Tergemina est Hecate, tria virginis ora  
Dianæ.*

Sed quod erat præcipuè in quæstione, Triglam etiam Dianam appellatam non dicunt. Et ut redeam ad Eustathium, ejusque verba quæ adducis, nec ille iis Triglam Dianam nuncupatam ait, sed sacrum fuisse Dianæ Triglam piscem, qui Latinis Mullus appellatur. Cur autem illi sacer fuit? An ut vult Charicledes à te laudatus, quia Triglis, five Mullis Hecate delectabatur? Et iterum cur delectabatur? An quia apud inferos, quod Erasmus ha-

bet, Hecatæ cœna vilibus piscibus, ut erant Mænides, Triglaque, perficiebatur? At Erasme doctissime, Triglane five Mullus, adeo tibi vilis, qui, teste, apud Macrobius nostrum, Sammonico, septem millibus nummum Romæ divendebatur? Quod autem Athenis locus fuerit, Trigla dictus, & inibi Hecatæ simulacrum, cum inscriptione *Hecatæ Trigla-thenæ*, hic an *Hecatæ Mullo Minervæ*; an ut legisse videtur Erasmus, *Hecatæ Triglatinæ* reddendum, ecquis docebit? Jam quas adducis notationes, & quod simile aliquid sonet, *Trigla* cum *Tetastry* & *Trigone*, quis illa ut vera etyma probabit? Sed mitto hæc haud fortasse magis expedienda nobis, quam Grammaticus ille, qui cum omnes solvere posset, ut refert Suetonius, quæstiones, unum difficile expediebat nomen. Interim clarum certumque esto, amari à me Vossium, & id ut mutuo fiat, porro semperque optare. Hæc ad egregium illud doctumque responsum tuum, super quæsito de loco Eustathii meo; sed Laconicè & è lectulo: nam ad Musas, Museumque respicere, quomodo in afflictissima hac valetudine possem?

Hardervici, 23. Mart. 1639.

T. Joh. Isacius Pontanus.

### CCLXXX.

*Clarissimo Viro Gerhardo Vossio Ecclesiæ Cantuariensis Canonico, & in Amstelredami Gymnasio Professori dignissimo.*

Vir Clarissime,

POPULARIS meus Seertlingius, quem aliquando adduxi ad te, quique Colonia quasdam à me chartulas tibi attulit, cum ad vos iret; denuò per me redire in memoriam pristinæ benevolentiae tuæ voluit. Arbitratur ille profuturum me ipsi, ad colligendam gratiam tuam; teque putat multum conferre posse, ad id negotium de quo Gronovius scripsit. Meministi fortasse, quæ aliquando tibi dixerim, de moribus, & indole conjunctissimi sodalis: pro quo procurare nullum beneficium poteris, quod non ego ad meas utilitates pertinere existimem. Exiguum hoc fortassis momentum est, apud alios, qui amicos, atque ignotos perinde habent.

B b

habent. Tu verò, vir iudicii pristini retinentissimus, desciscere à veteri benignitate non potes. Vale, felicissimè cum omni familia.

Hagæ, vii. Kal.  
April. Anno  
clo 16cxxxix.

Devotissimus Tuus,  
Vincentius Fabricius.

## CCLXXXI.

Clarissimo Viro D. Gerhardo Joanni  
Vossio, *Historiarum Profess. digniss.*

Clarissime Domine,

**S**esquiannus est ferè, cum ad exemplar Libri recens in Hispanià excusi, de nescio quibus sanctorum reliquiis, aliisque antiquis monumentis, misit Laurentius Cocchus, Vir humanissimus, qui Senogalliensi Episcopo, Pontificio Nuntio à secretis est; alterumque addidit Exemplar, ad D. T. destinandum; sed non prius quam literas adjungendas dedisset. Eas tandem à paucis diebus accepi, sive oblivio obreperat, seu quæ illum avocarant curæ. Eâ nunc utor occasione, D. T. salutandi, offerendique ei obsequium meum. Notus Opinor, Dominationi tuæ, fuit Heribertus Rosweyds. Et vastum opus, de sanctorum vitis, meditabatur, collegeratque jam plurima, nihil adhuc digesserat, cum eum mors, anno ætatis 60. oppressit. Ne frustra ei labor susceptus esset, adjeci ad ea, quæ congesserat, ordinanda animum. Chaos est vastum, præsertim ob mediæ avi barbariem. Eluctor quâ possum. Sub prælo mihi jam Januarius sudat, qui duos tomos haud sanè tennes, complectetur. Lucem sæpenumero mihi doctissimus tuus, de Historicis commentarius, præbet. Audieram eum recudi, avidèque id expetebam: præsertim, quod pleraque vitas, posse se certo auctori tribuere, D. T. pollicetur. Optem id profectò, & lubens quos observaro aucthores suggeram. Vitarum vetusta probataque exemplaria MSS. quæ dominationi tuæ sint ad manum, non vulgo trita, si indicârît, beneficium agnoscam, & lubens quo licebit, obsequio munerabor. Vale Vir Clarissime.

Antuerpiâ 20.  
Aprilis. 1639.

Clarissime D. T.

servus in Christo,

Joannes Bollandus,  
è Societate Jesu.

## CCLXXXII.

**L**iteras tuas, & adjunctum filii Isaaci Scylacem, rectè accepi, Vir amicissimè. Laudo profectum, & gratias ago. Plura ab ingenio isto, & doctrinâ, jure expecto. Næ tu admodum beatus, cui ita in liberis quoque summus Deus benedixit. Blavii tricas, dudum expertus, & nunc animo prævidebam: adeoque nihil mihi præter expectationem hic contingit; quanquam tamen spem conceperam, fore, ut servaret fidem semel tandem, quam tamdiu fefellerat. Nunc quod restat, saltem absolutis tuis, quod futurum ad Solstitium, aut Calendas Junii, scribis, animum inducat pergere; aut, si porro etiam me ludos faciat, vide, an cum alio, quod ipse suggeris, tractare possis, de inceditis edendis, sive singulis seorsim, sive junctim universis. Habeo etiam inter alia Antiquitatum Laconicarum libros quatuor, & de Regibus Lacedæmoniorum, à primo usque L. librum singularem. Forte alter Jansonius, sicut opus de Atheniensium Regibus pridem excudit, neque ista detrectabit. Explorare viri animum per occasionem poteris, ac me certiore facere. Blavio verò, illud ut denunties velim, ni deinceps gnaviter in excudendis meis pergat, me injuriam ulturum esse; & Moltkenio Historiam Danicam recudendam traditurum, cum Auctario rerum Friderici Primi interregni atque Christiani III. tum & curaturum ei privilegium, quo in Regnum hoc importari Blavii editio prohibeatur. Itaque seriò secum reputet, quid hic sibi faciendum esse putet. Ego certe non diutius sum passurus me deludi etiam porrò, neque patientiam meam ultra ladi. A Vorstio heri accepi literas, & Orationem in Cunæi obitum, itaque accusare desino. Quas adjunxi ad Gronovium, ut curare, cum occasio erit, velis, valde rogo. Valetudo per hanc hyemem admodum mihi mala fuit. Divexabat me Nephritis, calculosque aliquot excrevi: postea ulcus in sinistro rene erupit, quod per totum quadrimestre pure & sanguine manavit. Accedebat febris tertiana duplex: insuper magna lassitudo, dejectio virium, & appetitus. Sed nunc Dei beneficio singulari, omnia hæc mala evasi; qui me porro ut conservet, supplex peto. Idem tibi ac tuis omnibus, ab eodem seriò precor. Vale, amicorum maxime,



maxime, cum uxore liberisque. Mea & mei, plurimam salutem nunciant.

*Raptim, Soræ, Kal. Constanter tuus,  
Junii c1o Ioc xxxix.*

Joannes Meursius.

### CCLXXXIII.

*Viro maximo & reverendo Gerardo  
Jo. Vossio, Jo. Fredericus Grono-  
vius S. P. D.*

CUM aliquandiu hic egissem, Vir magne, incidi fortuito in Bibliopolam, qui Theses tuas Theologicas olim recudit. Ego, ut jusserant filii tui, exposulare cum eo, quod non exemplaria plura in Bataviam mitteret, constare cum lucro suo & studiis doctorum hominum, qui magno ejus libri copiam redimerent. Ille unicum tantum ex omni numero restare sibi aiebat, egisseque ideo cum Typographo, ut propediem editio repetere-  
tur. Ut vero me audiret domui tuæ familiarium esse, exultabat, prensansque manum meam ne ipsi beneficium negarem, orabat, promississe te olim cum hic esses aiebat sibi secundas curas, & non parvum augmentum operis. Jam esse tempus, ut promissi admonearis. In quo literis suis meas petebat adjungi, & tanto certius egregiam ejus voluntatem tibi nuntiari. Vitum id fore non ingratum tibi, ideo libens parui homini bono, testis & index ferri illius desiderii, si modo tibi otium veteres tuas delicias retractandi. Vix certe ullum scriptum tuum in Anglia notius est, & majore cum gustu plausuque legitur. Et designabit ipse puto hominem Londini, ad quem tuto schedas tuas mittere possis. Nos ex hac Insula jam incipimus pedem movere. Vidimus hic multos Thesauros, sed inter aquas Tantali, frui enim defultoria hæc vita non permisit. Tarde ad eos accessus peregrinis patet, quem posse tamen patientia multa pauci exemplo nostro didicere. Ipsa Bibliotheca Bodleiana tot Statutorum cassibus adversus externos munita est, ut duas integras hebdomadas hic exegerim, antequam tractare ullum MS. Codicem mihi licuerit. Nec licuisset unquam (adeo sæpè obstat nobis pudor noster) absque V. C. Patricio Junio fuisse, cui soli debetur, si quid studia nostra hic ad-  
puta sunt. Interim respondimus futilissimæ  
cujus pater, quantum in ipso fu-

it, nihil reliquit, quo minus stuporem suum, inscitiam, malignitatem publicaret. Cum itaque tam male seipsum traduxerit, nos tantum Judicis vice functi sumus, & involucris quibusdam, quibus vix tamen latere posset, nudum evolvimus. Forte is libellus in Gallia edetur, unà cum textu Silvarum. Codices Arundellianos, quos ad Rivetum *τῶν πάλιν* destinaram, ut vobis redderentur, curatos rectè puto. Tuam de Idololatria Veterum Commentationem & Gerhardi Vellejumi avidè videre gestio. Nos cras discessuri hinc Cantabrigiam sumus; inde Londinum, ac cis dies paucissimos in Galliam *ὅν ὅσῳ* transfretabimus. Vale, Vir summe, & salve cum uxore & liberis lectissimis.

*Scripti raptim Oxon. prid. non. Sextil.  
Stylo vestrate Anno c1o Ioc xxxix.*

Nomen Bibliopolæ est Guiliel. Webbius.

### CCLXXXIV.

*Viro Clarissimo Domino Gerardo Joanni  
Vossio, Historiarum Professori Cele-  
berrimo.*

Clariss. Vir, Patrone, & amice Colendissime,

DIU inter nos siluimus; vicissitudine inquam literarum, non autem animorum *συνδυαζ*, atque affectu benevolo. Id tu quidem ex omnibus iis, quas ad communem amicum nostrum, Dominum Laurentium, crebro scribere soleo, affatim intelligere potuisti. Nunquam enim in illis, tui gratissimam memoriam intermisi, neque omittere etiamnum cogito, quoad vixero. Ita totus in pectore meo hæres defixus, ut vel tædeat, vel pudeat etiam, nullum mihi superare argumentum, te condigne demerendi. Tristissima etiam tempora, me huc usque ita exercitum tenuerunt, ut unde vitam sustentarem, vix invenirem: prout & meis aliquot ad Laurentium nostrum scriptis, satis superque tibi constare arbitror. Obtuli nuper Domino Henrico Laurentio, Parentis mei *τῷ μαρτυρῶν*, Chronologiam sacram, quam apud nos typis edi voluit. Sed cum in Germania, tam misera sit ratio Typographica rei, hac tempestate, in animum induxit, apud vos illam in lucem producere. Quo nomine mihi valde gratulatus sum. Meministi, Vir Clarissime, te antehac desiderium tuum, hujus libri,

mihi in literis explicasse. Nunc igitur il-  
lius compos factus es. Maluisssem quidem  
apud nos, edi potuisse, eo fini, ut ipse  
prælo præsssem, ac mendas præcaverem.  
Quare cum res nunc aliter ferat, oratum  
te velim, mi amantissime Domine Vossi,  
ut manibus paternis hanc gratiam facere  
ne dedigneris, atque operis Typographi-  
cis, interdum sicubi ulus fuerit, succur-  
ras. Argumentum hoc scio, tuum *ἔργον*  
esse. Proinde planissimè persuasus sum,  
laborem hunc Patris tibi fore gratissi-  
mum. Nosti quem adversarium, dum  
in vivis fuit, in spinosa hac materia habue-  
rit, qui scilicet nimium sibi placere soli-  
tus fuit, planèque ut tu alibi loqueris,  
*ἰδιωτάων, ὃ ἀνδρείος*, vehemens alieni no-  
minis insectator. Utinam superviveret,  
& Pareanum hoc opusculum videre pos-  
set? non quod placitum credam, sed  
ne in aliis quoque dona Dei despiceret.  
Tu quæso *Ἐργον* te præbe, ac si quid  
perperam scriptum offendes, tuæ pruden-  
tiæ velo contegas. Quam libertatem lu-  
bens tibi transmittito. Spero viris doctis  
hunc laborem probatum iri, quo præser-  
tim Historiæ suam majestatem, masculè  
assertum ivit, fideique Christianæ, non  
ex profanis, ac Gentilibus Scriptoribus,  
*Συμύλιον* suum constabilivit. De cæteris  
abundè scripsi ad Dominum Laurentium,  
ex quo rerum mearum statum intelliges.  
Sensi animo liberalem *Ἐργον* vestra-  
tum: & Deum laudo. Interim spes me-  
lior apud nos nulla adhuc dum affulget:  
sub quâ tantum non lentè conficimur.  
Mihi quidem in senectâ hac ætate, nihil  
durius, vel acerbius, unquam accidit, quam  
sub paupertate ingemiscere, cui adsuetus  
nunquam fui. Eoque sæpiusculè fit, ut  
me vitæ hujus pertædeat. Sentio tamen  
altissimi benedictionem; quâ largiter me  
sustento. Vale, Clarissime Vir, meque  
amare, ac juvare perge.

Hanovia, Anno  
1639. ad diem  
 $\frac{1}{2}$  Junii.

Tui studiosissimus,

Ph. Pareus.

CCLXXXV.

Cl. V. Ger. Vossio.

Clarissime Vir,

Operis mei de Primordiis Britannica-  
rum Ecclesiarum, simulatque sum-  
ma manus ipsi imposita fuerat, atque à  
prælo exierat, aliquot exemplaria in Hol-

landiam transmissi, illic inter præcipuos  
amicos meos distribuenda, in quo nume-  
ro, quum te tuis meritis habeam, ac per  
hosce multos annos habuerim; negotium  
illi dedi, cui hanc provinciam demandavi,  
ut tibi quoque unum ex iis curaret exhi-  
beri. Totam ferè Historiam Pelagianam  
ipsi intexui, idque quâ potui diligentia &  
fide, ubi fortasse invenies, quæ aliquan-  
tum te juvare possint, si quando alteram  
Operis tui editionem adornaveris: quod  
spero te facturum, & Marianum Sco-  
tum quoque cujus in \* Libro  
meo commotam videbis ex-  
pectationem, aliquando prælo  
commisurum, atque publico  
donaturum. Mihi simul † De  
Scriptoribus Hiberniæ, qui  
eodem tempore prodierunt,  
D. Jacobi Waræi, libros duos, quia tibi non  
ingratos futuros illos augurabar. Ego quan-  
quam vergente jam ætate, atq; in ingressu  
senectæ, integra tamen ac vegeta valetu-  
dine (Deo laus) perfruor: idemque de te  
ominor ac opto; & rem ita se habere ex  
literis tuis latus intelligam. Vale Cla-  
rissime Vir, ac Deo commendatus esto.

Dublinii, die 3. Aug. Tui amantissimus,  
MDCXXXIX.

Jac. Usserius Armachan.

CCLXXXVI.

Clarissimo Viro D. Gerhardo Joanni  
Vossio Historiæ Professori.

Maxime virorum Vossi, decus & lumen seculi  
nostri,

SUB initium veris elapsi, ministro cui-  
dam Janfonii vestri domuitionem pa-  
ranti, aliquid ad te literarum dedi, qui-  
bus diuturno silentio meo excusationem  
qualemcumq; prætexere conatus sum, & si-  
mul de singulari diligentia tua, quam in  
Saxone meo isthic edendo hætenus adhibu-  
isti, gratias egi maximas. Vix ille abierat, ec-  
ce, mox à te literæ, seu verius exemplum  
literarum, quas ante semestre, & am-  
plius, rectè commodumque acceperam.  
Animadverti *μνημονικὸν* hoc *ἀμάρτημα* esse;  
quum & posteriores à te haberem perscri-  
ptas iii. Kalen. Octob. ejusdem ferè argu-  
menti, cujus erant illæ, Prid. Id. Junias  
exarata. Attamen exosculatus sum vehe-  
menter luculentum adeo propensi in  
me affectus indicium, quod malueris me  
gemina

gemina beare Epistola, licet rescripta, quam me prorsus carere unâ. Nunc vero consuetâ illâ ad te scribendi materiâ omisâ, nempe de Saxone nostro, cujus apud vos edendi omnem plane spem decollasse video; non possum non in finem tuum novam deponere sollicitudinem, quam animo meo afferre cœpit Typographorum vestrarum lenta nimis mora in excudendo Florilegio nostro Fabiano; quod ultimam jamdudum manum recepisse omnino speraveram. Haud equidem diffiteor, indi es hic fervere præla scriptis Clarissimorum Virorum, quæ Republicæ literariæ summopere interest, ut maturè lucem aspiciant: verum quam brevi aliquot horarum spatio absolvi possent istæ minutiae nostræ, quæ vix quatuor, aut summum quinque, chartæ plagulas excedunt? Proinde te per amorem illum, & favorem, quibus me, jam multis ab annis prosecutus es, rogo, atque obsecro, ut negotium istud seriò, seduloque etiamnum urgeas, & quantum in te erit, procures, ut civis ille noster, qui has ad te perfert, libellum hunc Typis elegantioribus exscriptum, ad nos redux secum referat. Sin autem, nollem isthoc loci diutius hære; quum fixa stet animo sententia, aliam quæcum, ut in proverbio est, concutere, & demum experiri, quid Danica præla valeant. Cæterum quod mea nunc studia attinet, totus sum in limandis, ac perpoliendis notis meis in Saxonem: qui Deo volente, circa ver adultum sequentis anni, lucem videbit. De statu rerum nostrarum, nihil alioquin est scitu dignum. Clarissimus Meursius noster, utcumque convaluit: sed vereor, ne hæreat lateri arundo; utinam non lethalis! Te quoque æstivis hisce mensibus febriculam infestasse fando comperi: verum lætiora nos propediem audituros confidimus. Opus tuum de Gentilium Idololatria, & Christianorum Physiologia, avidè expectamus. Noli quæso te, exemplari me defraudare, sicut antea, abs te factum, jure conqueri possum. Filium etiam tuum, qui Scylacem nuper edidit exores velim, ut exemplar mecum communicet. Erit aliquando, cum paria vobiscum faciamus. Dominus D. Christianus Matthias, eminentissimus ætatis nostræ Theologus, Collega huc usque meus conjunctissimus, brevi vobis aderit, eo fine ut apud vos in posterum, sedem fortunarum suarum, ac domicilium figat. Dignus est omnium favore, & patrocinio. Vale feliciter, ac plurimum salve, He-

ros incomparabilis, & me constanter ama.

*Sor. æ. v. Id. Augusti, Tui observantissimus,*  
CICERO XXXIX.

Stephanus Johannis Stephanus.

## CCLXXXVII.

*Viro docto, & incomparabili Domino,  
Doctori Gerhardo Johanni Vossio.*

NON dubito, Clarissime, & Celebrissime Vir, fautor plurimum honorande, quin rumor de obitu Patris mei, ad excellentiam vestram fuerit allatus. Quare dolore, & tristitia, me affectum judicabis facile. Hoc etiam, Vir celeberrime, te angere, mihi non absque re persuasum habeo. Primum propter jacturam rei literariæ, (quam lugent omnes Musæ, Gratiæque omnes) cui tu solus nunc servator existis. Secundo propter sincerè ante annos xl. initæ amicitiaæ foedus, quod fati invisum, à morte jam interruptum videtur. Ego igitur abs te peto, Clarissime Vir, prosequaris tali amore, Meursium filium, quasi Patrem prosequutus es, ut in statu tristiori, hoc solatium mihi supersit, Vossium benevolam habere; & profectò me repulsam laturum non confido: quandoquidem æqua & justa sit petitio. Actus funebri habitus est, die viii. Octobris, more Magnatum, & Equestris ordinis hominum. Diem etiam obiit magnus Cancellarius. Christianus Fris, Patris mei amicus singularis. Celebrissime Vir, fautor plurimum, videtur mihi Blavius, in excudendis Historiis tardus admodum fuisse, sed jam sane in cæteris lucubrationibus, quæ ad secundum tomum operum pertinent, tardior. Intellexi autem ex tua Epistola, nuper per Sartorem nostrum accepta, quod lucubrationes excudendas, velles remittere, quod si ille Typographus nolit inceptis finem imponere facias quæso. Et hac de re me certiore reddas, Vir summe, summopere rogo. Huic Epistolæ, incomparabilis Vossi, adjunctam invenies dissertationem, contra Anonymum, qui falsò conatur Majestatem debitam Republicæ serenissimæ Venetorum, de bono titulo, & jure Insulæ Cretæ, atque Cypri adimere. Quod autem Specimen meum, antequam prælo subiciatur, quæso corrigas, & in illo



illo delenda deleas, & inferenda inferas: spero etenim mihiq; persuasum habeo, hoc in negotio, me consilio tuo, & iudicio uti posse, propter amorem erga patrem meum, etli mortuum, tamen vestigia cordi tuo perpetuò impressa. Vale, Vir summe, fulcrum rei literariæ, ornamentum patriæ, &c.

*Datum Sor. æ. an.  
clō b c xxxix.  
die xvi. Octobr.*

*Tuus omni Cultu,*

*& Observantiâ,*

*Joannes Meursius Filius.*

### CCLXXXVIII.

*Viro Incomparabili & Maximo, Gerardo Joanni Vossio, Salutem & officia paratissima.*

Incomparabilis & maxime Vossi, Eruditionis numen mihi venerandum,

**E**Cquid habeo, quod referre possim, quo liceret mihi esse grato? Pro maximis erga me beneficiis tuis, nihil habeo, quanquam quædam velim, vel si hoc admittis, parum daturus, qui multa conceperam. Quid illud quæso est? Totus ego. Nescio, quomodo me carius vendam, qui sic inducere debitum queam. Sic mihi feliciter cedet mea solutio. Neque maxima tua benevolentia, humanitas eadem tua, summe Vir, dubitare me finit, utrum sic tibi satis solvendo sim, qui nihil mihi relictum vides, quo ultra respondere possem. Habes itaque me, & mea omnia, quem me si insolutum acceperis, nunquam putabo foelicius magna mihi redemisse. Quanquam aliis jacturam fecisse videri queas, qui tam ineleganti homine beneficia maxima, sic dicam, vendideris, posthæc cautiùs mercaturam esse instituendam. Quibus ego quidem non habeo quid respondeam, nisi quod videam Deos quoque non satis cautè mercari, quibus sæpè pro maximis votis rei farre & polenta satisfaciunt, & sic olim religiosi essent, qui ab iis aurum, argentum, magistratus, victorias, triumphos, sex consulatus, Pontificatum, innumera trophæa, summa omnia in spem gratiæ acceperant.

Atque utinam, sicut per ista, quibus decori sumus, vultus lineamenta, qualis intra animus sit, deprehendi sæpe potest, sic etiam per hæc manus impedimenta effluere posset, qui intra me regnat, gratus

animus: de cætero nollem esse majorem in modum sollicitus, maximè apud te, incomparabilis Vossi, qui, *Quantum lenta solent inter viburna cupressi*, sic Philosophos inter emines omnes, alioque genio, ingenia judicare, & discernere didicisti. Non fucus hic aliquid fecerit, & quasita sub lingua verba quæ fundum in animo non habeant, non pressa manus, non dextrum prehensum genu, & si demissius quid imitatur facilis imponere levitas; alia tua bonæ probæque mentis argumenta sunt, quæ mihi apud te enotavi, quæ non afferro, ne docere velle videar. Fratrem quoque, eadè operâ, dum me respiceres, cogitare & agnoscere cœpisti, iussisti præsentem me, ut inquirerent in ejus Cornelium Nepotem, Sleusingæ, vel Erfurti prostantem, quod ut fieret tacitus precatus sum. Cui frater meus ita de recto stylo dissertationem præfixit, ut quod sæpè testatur, tuo ore loqui malit quam suo, ut non tam Augusti Buchneri magni profecto Witebergæ viri, Præceptoris nostri Discipulum agnoscas, quam ex tua exisse domo, scholæque videri queat. Non poenitebit spero, operæ, quam recognoscendo admiratori tuo impendes, cum non minus impurorum hominum, maximi aliquando viri, & qui veritatem eruditionis supergrediuntur, scripta de se judicia repetere legendo debeant, quanto rectius peccabis, si quid ex altera parte docti ubique de te viri sentiant, non gravaberis agnoscere. Inter quos quidem nescio, an frater meus, non suo quodam jure sit reponendus, qui non gratis quidem hæc scripsisse putat, si tu, maxime vir, suum de te sensum non intelligas, cum bene sciat, non semper dari occasiones summis viris, ut quid minuti aliqui de se Dii sentiant, intelligere ordine possint, & si dentur, malle evitare, ne in suam gloriam cupidi videantur; ut possim præterea fratri esse testis, nunquam ipsi spem mutui amoris tui, ne nunc quidem, etiam si intimè desideret, esse factam, ut eò minus causam habere queas aspernandi, cum nihil adulationi scripserit, iudicio, & hinc amoris omnia. Quæ propterea pro fratre afferro, quod tres annos natu major me sit, & hoc meæ ætatis, quam ago juventute, Erfurti scripserat, & ante quasi biennium, eodem sensu in discursu suo, de sacra eloquentia Rostochii impresso, ubique scilicet maxima cum tui admiratione loquitur. Quo foelicius spero posthæc frater in tuam gratiam illabetur, si vel semel quis, vel qualis sit aspi-ciatur. Hæc perorare pro fratre volui, eò confidentius

confidentius, quia eum, sicut præpostera hic fortuna lufit, ex me agnoscere incepisti, quod verso ordine debuisset. Hic autem qui literas offert, sub peregrina specie non parum tegit, & est Anhaltinorum Principum Consiliarius, qui ut haberet occasionem tui colloqui, secum has sumpsit, de quo plura scriberem nisi vetasset. Frater certè ejus sub Veranglio, generalis auditor est, suntque Francofurti ad Oderam oriundi, mei contrerranei.

Pro me autem, summe Vossi, maximore rogo, ut quia animus adhuc est, Constantinopolin abire, navibus in principio Septembris, Octobris, stylo veteri discessuris, ornare me tuis ad Pocockium, quod facile erit, literis, & velut commendare velis; ego dabo ubique operam, ut non indignus tua maxima amicitia videri queam. Prolixissime vale, incomparabilis maximeque Vossi, etsi mereo, vel licet non mereo, quia vis me ama.

*Totus tuus quantus quantus*

M. Christianus Rave.

CCLXXXIX.

*Viro undequaque maximo, Gerardo Joanni Voilio, Cantuariensis Ecclesie Canonico, & Historie sacre Professore.*

**P**oenitet me jamdudum fidei, quam discedenti dabam, Vir maxime, fore ut intra octiduum ad te redirent, duo isthæc quæ nunc mitto, insignis tui Idololatriæ operis volumina. Nec enim licuit interea percurrere, nedum accuratè legere universa. Ubi reliqua quoque absolverit Typographus, iteratà lectione, si Deus vitam dederit, animum explebo. Caterum uti jusseras, indicavi locis aliquot, quæ legenti obiter, occurrere Typographi errata, aut festinantis calami *mesesjua*. Porro cum inciderim in locum de anno Ægyptiaco, qui est pag. 209. Et geminam quam habeo Hori Apollinini editionem inspicerem, inveni, ut si alterutrâ sit usus Petavius, versionesque tantum inspexerit, mirum non sit si negaverit, lib. 2. cap. 89. reperiri quod ex illo capite Scalliger allegaverat. Sed cum non sit verisimile, virum tantum versionibus in materia controversa contentum fuisse; neque ad Contextum Græcum voluisse recurrere,

probabili mihi conjecturâ duci videor, ut credam usum eadem Editione Græca, qualiscumque illa sit, quam in versione sua secutus est Bernardinus Trebatius Vincentinus, uti Trebatium Interpres Galus. Caruisse enim illa videtur libri secundi capitibus II. *Τὸ ἀπὸ νότον*. Et V. *πὺς πολέμια σῶμα*. Et XXIII. *Πῶς μέλλον ἔργον*. Atque inde factum, ut qui quærebatur locus, octogesium sextum caput, non octogesium nonum illic occuparet. Prodidit Trebati Horum latinè, ac Chunrado Peutingero dedicavit, anno 1313. Istam autem, quam ego Græcam, cum Latina Interpretatione Trebatii habeo, in Octavo expressisse se ad Aldinum exemplar, curante Angelo Argonensi, testatur Typographus Petrus Vidovæus, sub scuto Basiliensi, Parisiis scilicet anno 1521. quanquam postremum hoc, de loco, & tempore editionis certo asserere non ausim, probabili tantum nixus conjectura, deest quippe solum unum meo exemplari. In hac ipsa ergo Editione Græcus Contextus, habet ista tria capita supra recensita; Latinus non habet, uti nec Gallico-Latinus, qui Parisiis prodit, anno 1574. ex Officina Galesti à Prato, & Joannis Ruellii; nisi quod hic sub Appendicis titulo, ad veterem codicem tria illa cum octo aliis capitibus sit reperire. Typographi autem isti Parisienses anno 1574. dolosè suppresso Trebatii nomine, tum primum quas dabant prodire versiones lectori persuasum voluerint, cum tamen Latinam Trebatii darent. Hæc monenda duxi, ut scires quid fefellerit Petavium, interea neutiquam excusandum, quod non proxima saltem capitula percurrendo vacare voluerit. Erat & coram sermo nobis de Lapide porcino, seu Piedra de Puerco, qualem quod hinc discedens affini meo ..... à me restituere, non fueris gravatus, habeo gratias. Tantæ virtutis lapidi poterat locus fuisse non incommodè, pag. 1087. Curaboque ut intelligas quid senserit de eo, dum viveret Elichmannus, ubi rescivero sub Appendicis, vel Addendorum nomine animum tibi esse aliqua adhuc calci operis attexere. Id si statuas, deliberes velim an & horum quæ sequuntur, operæ fuerit meminisse.

Pag. 676. Ubi de aquis in lapides crescentibus sermo est, locum meretur Wookevium seu Ocheium, antrum in Mendippiis collibus Minerariis prope urbem Welles, quam eundem cum Bathoniensi sortitur Episcopum, in Agro Somersetenfi Angliæ situm. Mentionem ejus obiter  
in

in Belgis habet Cambdenus, cum accolas non minora de eo somnia narrare ait, quam de Sybillino commenti sint Itali. Somnia equidem sua de utroque narrantes, audiui & ipse utriusque accolae: sed & pererravi utrumque, & obstupui fatetor, ad stupenda naturæ in hoc Anglico opere cum comitante Heemskerchio nostro, Strias lapideas innumeras, ex aquæ intramontanæ stillicidio, sua capere incrementa, ad oculum simul & contactum cernerem: hic postes integros ex concretis aquæ guttulis, longo temporis lapsu sic efformatos, ut ad summam altitudinem concavum montis sustinerent, hic figuras lapideas varias, ac multiplices, uno loco pendulas, altero in alterum succrescentes, ac paulatim sibi mutuo quasi procedentes obviam conspicerem, taliaque viderem, quæ magno nolim non vidiſſe. Maximam autem stillicidii, quod nunquam cessat, & de tribus binas nobis faculas extinxerat, partem rivuli abripiunt, per diversos anfractus, uno omnes antri ostio effluentes, ortique ab insigni fontis scaturigine, quæ non minus dimidio ab ingressu milliari Anglico meta nobis erat, istius subterranei erroris. Mea nunc quoque me narrare somnia crederes, nisi me nosces. Atque hæc nisi sufficerent, ac nimia jam essent, poteram singularia quædam tum temporis non injucunda visu observanti, ex meo itinere adicere. Cæterum habet & Gallia, in Agro Turonensi, antrum huic non omnino abſimile, quod cellam guttulem dicunt, seu *la Cave Gouttiere*, sed longè magis admirandus mihi videtur, & situs, & lapidescentia hujus Anglicani.

Ad pag. 758. Et sagittæ & fulmina, uno eodemque vocabulo Italis, *Sagitta*, Anglis *Shafts* dicuntur, idque non poeticè, sed usitato, & plebeio quoque loquendi modo.

Ad pag. 762. Memoratu dignus est, seu tonitrus, seu fulminis ictus, qui ante annos sex septem, prope Middelharuisse, & Sommersdicum, claudo gressum restituit, arbores radicitus erutas, in altum sustulit, & in vicina pomaria, ultra sèpes, arborisque altiores alias trajecit, & molendini in frustra disparſi vela, inspectantibus pluribus, trans amplum illud maris an fluvii istic ostium, ita diripuit ut in adversam oram conjecerit intervallo duorum ad minimum Italicorum Milliariū. Uti hæc omnia mihi paulo postquam accidissent, ipso illo in loco, narrarunt, & partim commonstrarunt, accolæ fide dignissimi.

Quod Pag. 837. Principis Condæi nulla fiat mentio, etsi XIII. mense nati, & tamen

sententia supremi Parlamenti Regii, extra natalium dubium constituti nihil miror.

Pag. 858. Ægyptios hominem mysticum cicadâ picta expressisse, ait Horus Apollo, lib. 2. cap. 55. quod non ore canat, sed *διὰ τῆς πάσης φθεγγόμενα*. Pertinet illud ad ea quæ coram disceptabamus nuper.

Pag. 1041. Talpis cutem detrahi, ut appareant oculi, non est opus, cum satis conspicui sint etiam in vivis, quod non semel exploravi ipse.

Pag. 1045. aut alioquin pag. 2137. Adduci potuisset nec *ἀλγος*, id quod de Simia Christum Legislatorem verum esse demonstrante, non miraculo simile, sed verè miraculum; modo verum, ex relatione, & literis Anglici apud Mogolem Legati Thomæ Rouvi, adhuc puto superstitis, narrat Purchasius eo, quem coram ante annos aliquot ostendisse me tibi memini loco.

Pag. 1162. Pergamenorum spectaculo annuo, aut melius, Pag. 1196. Atticæ legi adjungi potuissent, Anglorum *Cock-Pits*, seu creberrimæ apud Anglos pugnæ Gallo- rum, in amphitheatris quoque adhuc extructis, exhiberi solitæ, uti & tauros, urſosque inter se & canibus quoque committere publicè consueverunt, disco etiam jacto certare, & luctas singulis diebus festis, & quotannis coram supremo urbis Londonensis Magistratu, præpositis victori præmiis exercere iidem solent, circa campos *Wool-fields* dictos. Quæ omnia cum bellicæ virtutis, & disciplinæ sint argumenta, in honorem Nationis obiter attingi possent; Textui tamen quam Appendici convenientiora putem. Tuo interim iudicio, permittens singula, finem imponam, longiori, & fortasse non sine tædio legenda tibi Epistolæ. Vale, Vir maxime, cum lectissima conjugē, & præstantissimis liberis.

Haga-Comitis  
duodecimo Oct.  
1639.

Tuus in æternum,

Georgius R. Doubletius.

CCXC.



CCXC.

*Clarissimo, & Incomparabili Viro, Domino Doctori Gerardo Vossio.*

Vir Incomparabilis, Magne Vossii,

**I**terum ad te scribere, me inter alia, præcipuè observantia compellit. Etsi mihi nullum sit dubium, quin ad manus tuas, Literæ ab Elzevirio tibi tradendæ rectè pervenerint: tamen etiam adhuc sedulo abs te petiturus sum, remittantur omnes, ineunte vere, piæ memoriæ patris mei, lucubrationes, unâ cum ad eas pertinentibus Epistolis dedicatiis; exceptâ autem Cretâ, illam excudendam quæso tradas, Elzevirius, quibus hac de re jam scripsi; quare non dubito, quin excudendum hoc Cretæ opus in se susciperent. Ideoque nunc curam in erratis Typographicis, tibi soli committo, ac te facturum, si Meursii tui memor sis, persuasum mihi habeo, absque repulsâ. Causa autem, celeberrime Vir, cur ita Cretam urgeo, est hæc, cum etenim in dissertatione mea, sæpius Cretæ patris mei, mentionem faciam. Sed hæc ut se habent, quæso solummodo responsione, data occasione, mihi digneris, ac certiores facias de iudicio tuo, super dissertationem meam; utrum, ut luci publicæ exponetur, digna fuerit.

*Dabam Soræ Danorum ad diem xii. Januarii, anno 1640.* Cujus auspiciis felicis, feliciorem progressum, foelicissimum exitum tibi, uxori tuæ, ac liberis, omnes ex animo precamur.

*Tuus omni Cultu & Observantiâ,*

Johannes Meursius *Filius.*

CCXCI.

*Excellentissimo Viro, Domino Gerardo Joanni Vossio, S. P. D.*

**E**xcessum Matthiæ Berneggeri socii mei amantissimi, merito inter primos ejus amicos, significandum tibi duxi, excellentissime Vossii. Quippe & prolixi affectus, observantiaque, quâ te constantissime prosequutus est, ipsi præ cæteris conscius fui; & documentorum quibus, amorem tuum, in illum vicissim declarasti.

Nihil dabo conjunctioni nostræ; sed profecto amisisti amicum, quotquot ipsi in deliciis fuistis, qualem optare haud paulò facilius est, quam reperire. Ego in tanta jactura literaria, negotia pro solatiis accipio, cum maximè Curtio perorando intentus: in quem supplementi mei specimen, tibi non ineptum esse visum, Vicofortii nostri literis compertum habeo. Id nuncium me liberavit à metu reliquorum judiciorum. Nec enim vereor, ut cuiquam displiceat, quod tibi tantæ eruditionis, tamque subacti iudicii viro placuit. Quamquam sanè, neque sperem magnum assensum, tumultuario opusculo, neque aliam ejus infamiam deprecor, præterquam ut vetere supplemento deterius habeatur. Vale, Vir excellentissime, cum eruditissimo filio, & quam socero meo dum vivebar, benevolentiam præstitisti, quum mereri videbor, in me transfunde; tantam amicitiam si non pari dignitate, certè fide non minori culturum.

*Dabam Argentorati, ad diem v. Cal. Mart. 1640.*

*Excellentiss. Famæ*

*Doctrinæque tuæ*

*Candidus Aestimato Cultorque,*

J. Freinshemius.

CCXCII.

Excellentissime Vir,

**Q**uam verum sit Comici illud, *Veritas odium parit*, experimur quotidie, qui illius constante professione plurimos in nos concitamus: à quibus clam & palam impugnamur, nunc ut Pelagiani, nunc ut Arminiani, nunc ut Sociniani; cum ab omni partium studio alieni unam veritatem omnibus hominum opinionibus & affectibus antiquiorem censeamus. Ingrati quidam discipuli calcibus nos suis petunt & tantum non conculcant, tanquam jurati hostes GRATIÆ UNIVERSALIS, qualem omnibus sufficientem in Christo offerre Syntagmate meo doceo. Id Belgis quibusdam vestris displicuit, quorum Academicis præjudiciis, hi facti sunt ferociiores & in nos iniquiores. P. Polyander, vir alioquin candidus & nobis amicus, jam plane filet, ut nesciam an sibi amor nostri constet. Æmuli nostri artibus suis effervent, ut Combustus quidam è Schola Castellana huc vocatus sit, qui unguis

C c

est

est in vulneribus nostris, quæ consolidare deberet. Verum ita sibi Suffenus est, ut tum hic, tum alibi non benignè de scriptis D. Bergii, D. Willii & meis iudicet & parti adversæ, à qua vocatus sit, apertè velificetur. Nos solatur causa, iustitia & conscientia. In arcem sum doctissimi filii tui, qui triumphum classicum Trompii vestri dono mihi miserat per amicum, qui, eo mihi in limine ædium mearum exhibito, *ἀπαύσας ἐξήνευ*. Doleo autem nimis quod neque *ἀντιδωκεν* nunc ad manum mihi sit, neque humanitas mea viro optimo innotuerit, adeoque barbarus illi videri possim jure meritissimo. Excusa nos, amato utrique. Sed & quæ in Docenium, filium Consularem, pronuper contulistis, ut ille non prolixè satis prædicare potest, ita nos vobis obnoxios æternum faciunt. Qui has tradit, auditor noster est brevi huc rediturus, cui tuto tradi possunt, si quas ad nos dare velis. D. Calixtus Professor Helmeftadiensis, peculiari nunc libro à suis impugnatur, quod concordia sit studiosior, quam morosi Stentores, quibus classicum è suggestis suis canere prolubium est. Sic impulsus sumus utrinque à domesticis fidei, quibus pacis censores sumus. Adeo sedit animis plurimum illud:

*Nulla salus paci: bellum te poscimus omnes.*

Claudo & salutem cum officiis Cl. T. Scytte à D. Bergio utroque Willio & me.

Bremæ prid.  
Non. Maii,  
Anno 1640.

Clarit. Vestræ  
devotissimus Servus,

L. Crocius.

#### CCXCIII.

Clarissimo, & Doctissimo Viro D. Gerardo Joanni Vossio, Historiarum & Chronologiæ, Professore celeberrimo.

Clarissime & celeberrime Vir, olim Collega, semper Amice,

**N**ON possum verbis exprimere, quam fuerim commotus, quando præstantissimus Dubletius, mihi per occasionem communicavit, quas à te acceperat literas, super iterata illa tam paucis diebus probatione, qua Deus patientiam tuam, & lectionissimæ Matronæ uxoris tuæ, voluit non quidem sua causa experiri, qui vos intimè

novit, sed aliis in exemplum exhibere. Et certè opus fuit vobis, speciali gratia spiritus divini, ut hanc jacturam lucro deputaretis, præsertim iis quos Deus ad se recepit, hujus seculi incommotis, & corruptelis exemptos, & Cælo exceptos. Taceo unicæ quæ supererat puellæ carentiam: sed qualis fuit juvenis ille, qui in ea ætatula poterat, quæ pauci attingunt, post multorum annorum labores? At non quamdiu, sed quam benè vitam hanc duxerit, cogitasti; & quam foelicem finem Deus laboribus ejus imposuerit. Et certè, hoc præsertim corruptissimo seculi statu, admiranda sunt quæ de ejus victoria narras. Cur enim hoc nomine, non indigitarem, beatum illum excessum, & fidem illam ac constantiam, ejus ad extremum usque vitæ halitum edidit testimonia? Beati estis, tali filio cælorum cive, qui in terra, sui memoriam tam suavem, omnibus bonis, & doctis reliquit? Beati qui quæ humanitus vobis accidunt, divinæ Providentiæ, adscribitis, & in ea acquiescitis; siquid possunt, amicorum *συμπαιδείας*, si *κατὰ τὴν ἀντιλήψιν* *ὡμαλὴν* *ἔστι φίλον*, tot sunt qui vobiscum lugent amici, quot sunt, quibus non ignotus erat maximæ spei juvenis; sed quem spes melior non fefellit, quem etiam non lugeatis, quomodo lugent ii qui spem non habent. Prævit, sequemur ad nos non rediturum, qui ad eum tendimus, id est ad Deum. Det tibi, Vir clarissime, in iis qui supersunt gaudia diuturniora, eosque benedictionibus suis, coram oculis tuis cumulet, teque iis diutissime conservet, cum lætissima uxore, quam tecum cum mea, saluto officiosissimè, cum reliqua familia. Vale.

Hagæ Comitæ,  
postrid. Kal. Apr.  
cl. lccxi.

Tuus omni

officio & affectu,

Andreas Rivetus.

#### CCXCIV.

Viro Incomparabili Domino Doctori, Gerardo Joanni Vossio.

**L**iteræ tuæ, Vir celeberrime, cum doctorem nostrum augerent, ex tuo, quem non minus domesticum nobis, Paterna conjunctio effecit; è vestigio tibi responderi mandabant: Ne à fidelissimis amicis destitutus, cum solacium non potes expectare

expectare videreris *opum dñar*. Ipse enim nosti, simplex quidem, & vulgare, sed unicum esse nostrum, adversus mala omnia præsidium; voluntatem Dei; quæ nullum à Christianis patitur murmur, quia quod infixit, non malum vulnus est. Quippe quo firmitas, & constantia, imo ipsa animæ valetudo, ac sanitas quæritur. Nos quidem cum Patrem, caput amiserimus, sic fermè, veluti naturale est, extruimus. Et tamen resumimus spiritum, tanquam surculos edituri, postquam cladem maximam fortuna fecit. Tibi membrum aliquod abreptum, quamquam charissimum, si nihil aliud, leviorẽ præ nobis dolorem, esse patietur. Cumque orphani nos paululum erigamur, quid tanto viro defuerit, cui solidum est omne Christianum robur; & in hac causâ, viridique senectute, virenti palmæ non absimile. Sed hætenus quidem; ne quod dici solet, Sus Minervam. Quod dissertationem meam spectat; si præter spem Blauvius manum non admovisset, Elzevirius eam tradi peto, qui non hanc modo, sed & Cretam ipsam, absque omni morâ edituros, polliciti sunt. Quicquid fuerit (nam & Cretam non videor sic urgere nunc debere) quæso, ut dissertationem meam, cum Elzevirius mitti impressa valeat, quos proximè speramus. Paucarum pagellarum est, iacturæ, aut impensæ illius, quæ ob exilitatem vix æstimari possit. Alias, præter Cretam omnes Parentis lubricationes, quotquot fuerint, remitti peto; hoc enim regno, excudi facilius curabo. Spero autem antequam de Cretâ quicquam fiat, me literas à te recepturum; quibus me certiorẽ facies, an Parentis dedicatoria, ad Franciscum Molinum annexa sit. De quibus omnibus, porro te etiam atque etiam rogatum volo, Vir maxime, ut molestiam imputare fidei, ac benevolentia tuae cupias; mihiq; ad omne genus, tam officiorum, quam literarum laudis faciem præbere, imo ut rectius dicam, calcæ addere. Potes enim, potesque. Mater, foror, tui, tuorumque causa, sollicitæ ac prorsus anxie salutem tibi dicunt plurimam, & decumbenti filio, meliora omnia per me, & mecum simul apprecantur. Vale, decus unicum avi nostri, nostræ domus præsidium.

*Dat. Soræ, a. d.  
xii. Aprilis, An.  
1640.*

*Tuus omni cultu*

*& observantia,*

Joan. Meursius Filius.

Hæc scripsi, etenim dubito, num Epistola mea per Hamburgensem nuntium missa, tradita sit.

CCXCV.

*Viro Illustri, Excellentissimoque Gerardo Joanni Vossio, Rhetori ac Polyhistori dignissimo, Salutem plurimam ac debitam observantiam.*

Illustris ac Excellentissime Vossi,

**T**uis Literis plurimum me debere, iis quas in Angliam abitu gratiosè communicabas, meis ex Anglia ad T. Exc. datis literis, libentissimè agnovi, veluti hæc agnitione, partem grati animi monstrassem. Illustriss. quoque Hugo Grotius earum causa me Parisiis honorabat. Constantinopoli quoque, hic inquam, ubi jam decem ferè menses, cum Cl. Pocokio tuo dego non ingratus, earum, quas non viderat, nomine sum susceptus. Ita ut gratias agere maximas debeam, pro istis tuarum in me benevolentia tesseris, adeo utilibus in meam rem. Et eo ipso me veluti aliquem tuorum ascitum commendasti, ut ingratus sim, nisi singularem, & ut foelicer credam, paternam quandam curam deprædicem. Gratitude causa impræsentiarum, hoc ex animo suadeo tuarum Exc. ut aliquem tuorum filiorum, Isaacum, vel Gerardum, navi Hollandicâ, vel si ista desit, Anglicâ, quæ in initio Augusti, vel ad finem Julii ex Douvrâ solvit, & Generalis vocatur, quod totius Societatis Turcicæ Mercatores, merces suas imponunt, huc mittas, ubi maximum pro eruditione orientali commodum facere queat, cum & hic librorum sit copia, emendique potestas satis magna, licet pretia cara sint; & si quis Græcas visitare Ecclesias velit, quæ hic in Oriente sunt, queat manuscripta quædam reperire, quæ præsentem pecuniam redimat. Vivendi ratio, filio tuo foret facilis; cum Illustriss. confœderati Belgii Residens D. Cobs, vel mihi biennii mensam, domumque, & hospitium liberale promiserit, quodque recepissim, nisi quædam alia me interceptissent, Pocokius scilicet, & Anglicus Legatus. Quod quum mihi fecerit peregrino, quid tuo non faciet filio, cui multis nominibus, Belgium quoque ipsum debet esse obstrictum? Et nullius hic quoque æstimatur adesse tabulæ, cum omnes Legati cogantur hic splendide, & liberaliter vivere, veluti versantes in oculis Turcarum, qui ex splendore externo, gratiam suam favoremque inclinant, cum Legatis honorificum sit, splendoris secum habere domesticos, nobilesque, quo ipso modo

C c 2

modo



modo P. Golius, per quatuordecim menses, gratis vixit, in ædibus Cornelii Hagæ, & ego ipse si magis ducerer deliciis, quam studiis, vel decennium hic commorari queam. Perfidem verò, cum Dei aspirante gratiâ, intra mensem, vel aliquanto ultra, petiturus sum, consilio meo ea inde reportaturus, quæ per propriam diligentiam potero, cui interdum pecunia deficit, sed nunquam constans firmusque, & quadratus animus, quo aliquid certè reportabimus, aliisque viam, quam ex nostra Religione nemo studiosorum ingressus est, aut doctorum virorum monstravit, inveniam unde & nostra Respublica literaria ditari queat, cum indignum sit, Mercatoriam Rempulicam, ex Oriente suos advehere Thesaurorum, nobis inde nihil, aut parum divitiarum venire. Id quod quemadmodum ferre nequeo, ita spero, me cum filio tuo Isaac posse, nostris doctis viris, oculos aperire; ut sciant non minus sibi, quam Mercatoribus Orientem esse petendum, cujus scientias, historiarumque, & millena eruditionis genera, non melius spernimus, quam illi nostras ignorant, quibus ut optima quoque nostra ex animo optamus, ita plurima nostra, ex illorum reliquiis lucem sine dubio magnam accipient. Quod verò id hæcenus factum non est, non defectu librorum scientiarumque sit, sed quod docti nostri, adeo diligenter Orientem non investigant, uti Mercatores, magno mehercule nostro damno, & ignominia. Concedes itaque, Excell. Vossi, ut cujuscunque ex præclaris filiis tuis animus cupidine has videndi oras ducitur, eum permittas suis votis, neque in itinere plus periculorum est, quam domi, magnoque in mari, quam parvo, id quod pro dolor! Filiorum subita mors ostendit. Et hic Constantinopoli pericula tanta non sunt, quanta vulgo creditur, & ab iis spargitur, qui peregrinationibus suis, ex periculorum commentis ordinibus majorem adstruere gloriam, & admirationem contendunt, qualibus ingenii, & nunquam delectatus sum, & nunquam credidi. Quot hic per decennium, imo per vicennium vivunt, qui tale quid non sentire! Uniuscujusque prudentia, post divinam providentiam omnibus iis, quæ accidere queunt præveniet. Quod itaque P. Golius, Pocokius, Greefius, & is quem commendasti, Christianus Ravius hic aut fuere, aut sumus, ut Dasam, aliosque taceam, hoc amorem filio tuo, facile concitabit, maximè cum ex Golio, Pocokioque conjecerit, quantum eruditionis hic comparari queat. Quod si vero Pro-

lomæum prius edere velit, amarem ut eum Græco-Arabicè magis, quam Græco-Latinè ederet, pluribus ad eum perscriptis de causis. Utinam vestri Amstelodamenses, aliquot juvenes mitterent, alerentque in diversissimis Orientis partibus, ut duo aut tres conjunctim omnia inquirerent; quoniam impossibile est, ut unus aliquid singularis perficiat, quod semper miror melius intelligere Mercatores, quam Doctos. Hisce vale, Excellentiss. & Illustriss. Vossi, & me ama.

Constantinopoli  
13. Apr. 1640.

T. Exc. observantissimus,

Christianus Ravius.

# CCXCVI.

Viro incomparabili, D. Doctori Gerardo Joanni Vossio.

NON potui, Vir amplissime, datâ occasione, quin literarum aliquid, iterum ad te darem: & iis favorem tuum mihi conciliarem. Vir summe, utinam jam mihi ferè desiderio tabescenti, paterna monumenta transmitti possent, si tibi forsân occasio sit denegata, quæso Ludovico Elzevirio, qui ea omnia, ut rectè ad me perveniant, operam dabit. Dissertatiunculam meam pari desiderio expecto; in cujus frontispicio, hanc imaginem præponi benevole etiam volo: te magne Vossi, rogo, propter charitatem, & amorem tuum, quo semper candidè Patrem meum profecutus es, sit tibi de dissertatiunculâ edendâ cura. Quod adeo urgeo, quæso, mihi ignoscas; nam in causa est peregrinatio mea, quam, volente Deo, hoc autumno, vel futuro vere ad ultimum, instituere cupio. Dissertatiunculæ meæ triginta exemplaria benè compacta inauratis foliis, tradas quæso meo nomine, illustri Domino, Cornelio Vander Mylen, qui curabit, ut Veneriis, inter Patritios, & Senatores, distribuantur. Vale, decus avi nostri, nostræ domus præsidium. Mater mea, & soror, tibi, tuisque per me, salutem plurimam officiosè annuntiant.

Scribebam Soræ  
Danorum, a. d. iv.  
Jun. An. cl. loc xl.

Tuus omni cultu,

& observantiâ,

Joannes Meursius filius.

# CCXCVII.

## CCXCVII.

*Clarissimo, & Doctissimo Viro, D. D. Gerardo Joanni Vossio, Historiarum & Eloquentiæ Professori eximio. Salutem ab Authore salutis.*

Clarissime & Doctissime Vir, Literatorum decus.

**D.** Laurentius nuper Amstelodamo red-  
dux, post salutem mihi impertitam  
tuo nomine, (de qua officiosa salutatione  
mihi summè gratulor,) retulit, & inter  
alia, te cupidum esse scire, quæ observavi  
circa Echonem illam admirandam, Romæ  
extra portam Capenam, hodie D. Laurentii  
vocatam. Cum meum unicum studium  
fit, benè mereri de literis, & præcipuè de  
literatis, (inter quos te ut Coryphæum, &  
Antistitem veneror, & amplector) nolui  
deesse hac in re, tam exigua, imo gratula-  
rer mihi, & laudi ducerem, si sæpius (de  
ejusmodi rebus interpellatus) vobis possem  
intervire, opella mea, & talento exili. De

Echone ergo illa, hæc habeo, quæ  
ipse observavi. Extra portam  
*Ann. 1614.*

D. Laurentii, in via Appia ex-  
tat, Cæciliæ Metellæ sepulchrum, seu po-  
tius Turris, Sphæricâ extructa figurâ, vul-  
gus hodiè Caput Bovis nominat, scilicet à  
Boum Capitis, quæ circumcirca exscul-  
pta spectantur. Hujus Mausolei muri,  
crassitudinem habent 50. meorum pedum,  
ut ipse dimensus sum. Exterior structura  
est ex solidis quadratis lapidibus, interior  
ex lateribus constat. Prope hanc Turrim,  
audivi memorabilem illam Echonem, quæ  
quaternis vicibus successive, sine interpel-  
latione, perfectè, & particulatim repetit  
omnia verba, quæ pronunciantur, nempe  
totam dictionem, sententiam, vel versum  
integrum; cum inclamarem, *Arma virum-  
que cano, Trojæ qui primus ab oris*, repetit  
quater istum versum integrum: eo loci  
unde procedit sonitus, extant 4. muri, seu  
arcus potius, unus post alium, à se invi-  
cem paulo disjuncti. Ultra illas quaternas  
vices, seu clamores, audivimus quidem so-  
nitum, & murmur, sed imper-

*Anno 1602.*fectum. Observavi & Lutetia

Parisiensium, in horto Regio Ar-  
cis Luparæ, similem ferè Echonem; Con-  
tre une muraille de la hauteur de 10. ou 12.  
pieds, en un coin du jardin est une Echo,  
laquelle refère parfaitement, un long  
ordre des paroles, quand on chante, ou  
crie. Exempli gratia, *Si cest pour mon  
puellage*: Omnia hæc verba uno sonitu,

simul exprimebat aliquoties. Longe alia  
est Echo illa, quam audivi, 2. Leucis Lu-  
teria distantem, nempe in Pago Charen-  
ton, illam enim audivi ipse, Quatorze  
fois repeter les paroles, distinctement &  
clairement, Lesquelles se finissent, &  
abaissent, petit à petit, dont est referé  
grandement, *ben, ben*, comme la voix &  
complainte, d'un qui meurt. Hæc Echo  
admirationem quidem meretur, ob toties  
repetitum unum verbum (si enim clama-  
veris, Jan, nihil aliud respondebit quam  
Jan, Jan,) sed versus integros, integrè, &  
sæpè etiam recitat. Talis est &  
illa Echo, quam Cardanus lib. 18. *Ticinè*.  
de Subtilitate, testatur vocem red-  
dere decies & ter. De tali etiam loquitur  
Lucretius;

*Sex etiam ac septem, loca vidi reddere voces,  
Unam eam faceres. —*

Ejusmodi Echonis mentionem facit &  
Plinius, lib. 36. cap. 13. quæ fuit Olym-  
pis, & Athenis, diciturque fuisse Hepta-  
phonem; idem tradit Plutar. lib. de Gar-  
rultate, & refert rem quasi admirabilem.  
Colophonis loco addam, verba Boissardi,  
quæ habentur prima parte Typographiæ  
Romanæ, de supradicta illa Echone; *Ad  
radices collis, in quo Mausoleum Cæciliæ Me-  
tella situm, si quis integrum versum heroicum  
pronunciet, Echo admiranda eundem reddet,  
integrum, & articulatam sæpius. Ego Vir-  
gilianum illud primum Aeneidos distinctè  
repeti, octoties integrum audivi, & postea  
confusè aliquoties. Nusquam gentium ejus-  
modi Echo auditur, quæ ideo tanto dicitur  
excitata artificio, ut in funere hujus Cæciliæ,  
Plorantium ejulatus, Exclamationes, & plan-  
ctus funebres, in immensum multiplicarentur.*  
Et Franciscus Schottus, eadem ferè refert,  
in suo itineraio de hac Echone.

Hicce, Vir Clarissime, te Deo Opt. Max.  
commendo, unà cum familia.

*Hardervici,  
8. Jul. 1640.*

*Tui observantissimus,*

Ernestus Brinck.

## CCXCVIII.

*Cl. V. Ger. Vossio.*

Clarissime & doctissime Vir,

**E**Cce hic habes summaria vitæ hucusq;  
præteritæ Reverendissimi Archiepi-  
scopi Cantuariensis: cui Nestoreos annos  
optare omnes cordati debent.

*Iri*

In Collegio Sancti Johannis Oxonii enutritus, in quo optimam sui memoriam posuit; auxit enim illud ipsum Collegium, tum ædificiis splendidis, tum redditibus duplo amplius quam prius.

Oxoniensem Academiam, cui præest ut Cancellarius, decoravit multis beneficiis; primo privilegiis firmioribus quam antehac: locupletavit Bibliothecam publicam, rarioribus Manuscriptis codicibus in omni genere Linguarum & Artium, ab extimis Orbis finibus petitis, Indicis, Arabicis, Persicis, Græcis, Hebraicis, Latinis.

In Academia propriis sumptibus Lecturam Arabicam fundavit, & annuo stipendio honoravit.

Universæ Ecclesiæ quanta testimonia Curæ, Pietatis & Providentiæ addidit!

Corruptiones præcipuè Simoniacos corrigendo, doctos & pios commendando, fovendo omnes qui eruditione & ingenio valent.

Collapsam Ecclesiæ Anglicanæ disciplinam restaurando, ad primam primorum Reformatorum scopum perducendo, Ecclesiæ paci & securitati per nuperam Nationalem Synodum optime & provide consuluit.

Ecclesiæ Paulinæ Londinensis per totam terrarum orbem celeberrimæ magnitudine columnas contra ruinam appoluit, curavit reparari splendidissime.

Succurrit quotidie innumeris pauperioris fortis hominibus; qui litibus vexantur facilem ipsis præbens aurem, & operam, curam & consilium.

A latere Serenissimi Regis adstat fidissimus Consiliarius, honoris Gentis avidus, Consiliis incorruptus, sincerus, cordatus.

In juventute semper ingenii acumine celebris, summus & acutus Philosophus, postea demum Concionator sedulus, & doctus: scriptor eruditus contra Pontificios, de præcipuis Fidei capitibus & corruptionis Pontificiæ columnis. Teste lib. ab ipso edito judicio omnium doctissimo, & antiquitatis puræ propugnaculo.

Collegii Joannensis primò Socius deinde Præses. Demum quod concionibus erat celebris & frequens, concionator Regius è Capellanis (ut loquuntur) domesticis. Decanus Glocestriæ brevi factus; à Glocestria promotus in Episcopatum S. Davidis; & inde Bathonienfis & Wellensis Ecclesiæ præfuit Episcopus, & inde ad sedem Londinensem evectus, & inde propter vitam inculpabilem, singularem integritatem, & rerum Ecclesiasticarum experientiam, Metropolitanus totius Angliæ, sedem Cantua-

riæ jam occupat, & in bonum totius reformatæ Ecclesiæ diu occupet, votis ardentibus contendo ad Deum.

Vale, Vir doctissime, vix errare potes nimia Hyperbole, omni Rhetoricâ major est summus Archiepiscopus; in hoc inter multa felicior, quòd te nactus est amicum, & clientem. Me quæso calci Catalogi amicorum adicere dignare.

Ex Aula Seren.  
Reginæ Bohem.  
Hagæ comitis  
13<sup>to</sup> August. An.  
salutis Christ.  
MDC XXXX.

Tuus in omni

observantia &

officio Amicus,

Samsonus Johnsonus.

### CCXCIX.

Memorand. de Reverendissimo in Christo Patre Guilielmo Domino Archiepiscopo Cantuariensi totius Angliæ Primatè & Metropolitano: Serenissimo Magnæ Britanniæ Regi Carolo à SS. Consiliis, Academiæ Oxoniensis Cancellario, &c.

1. **P**rofectum in Philosophicis & Theologicis studiis debet Collegio D. Johannis in Academia Oxoniensi; ubi postquam alia cum publica in Academia tum privata in Collegio munera, perpetua cum laude sustinuisset: à Collegii Sociis (quibus ex plurimorum annorum necessitudine & experientia abunde perspecta esset ejus Prudentia, Probitas, Doctrina) in Præpositum Collegii electus, non tam præesse, quam prodesse illi voluit.

2. Vacante supremo magistratu Academiæ (qui non nisi Magnatibus & meritissimis deferretur) *Desertur autem pro viâ.* ipsa seipsam ejus custodiæ & clientelæ commisit; Academico Senatu in Academiæ Cancellarium ipsum eligente; quod quanto beneficio, atque gloriæ Academiæ atque rei literariæ universim versum est, appareat ex ejusdem Privilegiis stabilitis, auctis: legibus & Statutis in ordinem usumque digestis, &c. Ut respublica Literaria in illa unica Academia suos numeros implevisse videatur. Ratio tam accurata in admittendis, instruendis, exercendis, promovendis, moderandis, &c. studiosis; & negotiis Academicis omne genus administrandis, &c. ex ejus voto & dire-



directione in illa habetur. Vide Statuta Acad. Oxon. impressa Oxon. 1638.

3. Religionis Orthodoxæ, atque uniformitatis in cultu divino, per Ecclesiam Anglicanam, ex legibus & constitutionibus Patriæ; moribus antiquis & probatis: adeoque regula & mente (qua queat assèqui) primorum Reformatorum illius Ecclesiæ, acerrimus assertor: ab omni confusione, immunditie, profanatione Sacrorum, &c. abhorrens. Utque major reverentia sacris conciliatur, ordinis Ecclesiastici atque Facultatum, quibus honestius, & liberalius se sustentent, quâ justè poterit, vindex & promotor studiosissimus.

4. In Theatro Theologico sive cominùs certandum cum adversariis, sive concionandum è Cathedra promptissimus, æque ac nervosus & strenuus. Quo etiam loco habet Jesuitarum & Romanensium superstructiones stramineas & superstitionem; juxta ac aliorum (Socinianorum, &c.) in re religiosa, dogmata & deliria perniciofa, nemini constare non poterit, cui cæcutire non lubet; ex operibus ejus publice impressis.

5. Templum Divi Pauli Londini (opus ingens, &c.) ab ætate suâ æque ac incuria temporum non leviter passum, ejus consiliis & auspicio reparari inceptum, propediem (in maximum & urbis illius & Ecclesiæ Anglicanæ ornamentum) pristinum suum decus & splendorem recuperaturum.

6. Ardor ejus sumptusque immensi in conquirendis Orientalium Scriptorum Monumentis, publico & æterno usui in Academia Oxon. destinatis. Ubi etiam liberalitate & sumptibus propriis jam amplo atque annuo Salario dotavit Professore, qui Linguis illis studiisque propagandis omnino infuder. Vide Epistolam D. Joh. Seldeni præmissam ejus de Successoribus ad leges Ebraeorum, &c.

7. Mira in precibus divinis, Consiliis Regiis, Foris Justitiæ (quibus aut præesse aut interesse illi incumbit) assidue & zelo: ab omni largitione atque corruptione (quod nemo non fatetur de ipso) alienissimus.

8. Virtus invidiæ carere non potest, &c.

CCC.

Cl. V. Ger. Vossio, Salutem in Christo.

**A**Nnus elapsus est (Vir eximie) à quo Literæ priores vestræ (sed quibus re-

sponsum non dedi) ad me pervenerunt. Sed annus occupatissimus fuit, & in quo vix libere spirare, ne dum scribere potui. Regis in partes Regni Boreales discessus: negotia quæ eo absente mihi aliisque incubuerunt: pacificatio illic sancita, sed vereor an satis tuta: à reditu Regis Consilia inita: Parliamentum indictum, conventum & dissolutum, negotiis Regis & Regni non compositis: statim à soluto Parlamento seditiosa & furiosa in me, & domum meam, hominum malè feriatorum & conditionis infimæ Insurrectio, quingentis ad minimum domum meam horâ noctis mediâ obsidentibus, sed Deo gratias frustra: Convocatio sive Synodus Nationalis sequuta est ut (si fieri posset) res Ecclesiæ turbas non darent, nec Religio (ut ubique gentium solet) pallium fieret. Interim apud nos omnia arma sonant. Et inter hæc quæ me, & animum meum pacis cupientissimum pessimè habuerunt, quî potui de literis tuis, utcumque semper mihi gratissimis cogitare?

Sed omissis quæ me distinuerint, & manum à tabula, gratias tibi summas ago, quod memor mei Literas misisti. Junius charissimus attulit tuas, meas etiam refert; sic enim decreveram, sed abiit literis meis nondum transcriptis. Breviores sunt quam aut res postulant aut quæ tam diuturnum silentium possunt expiare. Sed non ignoras (idipsum enim lego in tuis) quantas turbas, & quam malas nobis hic in Anglia res Scoticæ dederunt: furiosi novatores quo tendunt scio, quo pervenire dabitur novit Deus, & jam Angliam armati invaserunt. De his autem nec vacat nec placet scribere, ne quid fellis Chartulas meas nigraret, quum video ubique, & apud externos etiam, nomen meum, famamque, illorum virulentis calamis, laceratam & foedatam undique.

Redeo itaque ad privata. Et certè doleo annum tuum Climactericum tam malè te multasse. Sed non eripuit cum sanitate vitam, nec diu detinebit spero revertentem sanitatem. Et (quod impensius opto) Deus dabit solatium pro malis illis quibuscunque quæ annus iste tibi parum faustus intulit.

Mitto per Junium Librum meum superiori anno editum, sed Idiomate Anglicano. Promisi fateor editionem Latinam me tibi antehac missurum. Nec fallus sum in hoc, sed deceptus. Vir enim satis doctus, & cui satis otii est, hoc in se suscepit, & ut apertè tecum agam perfecit: Sed quum paulo penitiùs inspexi, vidi non pauca in quibus sensum, plurima in quibus stylum non

non est assequutus. Et melius multò duxi suppressere Translationem, quæ nec me, nec mea loqueretur, quam talem edere, unde exteri omnes, quibus Lingua Anglicana non satis nota est, me quidem, sed speculo male fido, intuerentur. Si corrigi poterit potes adhuc expectare, sed vereor transferentis socordiam magis quam calammum; cum hoc libro meo Canones mitto novissima Synodo constitutos, quibus videre potes me nec Ecclesiam nec veterem Ecclesiæ tramitem deseruisse. Reliqua, sicut & te ipsum Deo, & gratiæ ejus commendando, efflagitoque ut temporibus hisce quibus tam subdole, tam violenter res nostræ undique petuntur, velis jugi oratione Deum & Salvatorem nostrum fatigare, ut incolumem servet servum suum, &

*Dat. ex Ædib.  
meis Lambeth.  
Aug. 31. 1640.*

*Tibi (Vir doctissime)*

*amicissimum,*

Will. Cant.

### CCCI.

*Clarissimo, Doctissimoque Viro D. Gerardo Joanni Vossio, Artium & Philosophiæ Doctori celeberrimo.*

Clarissime & celeberrime Vir, Amice honorande,

**N**Udius tertius interfui funeri, *ὃς μάρτυρ*, Antonii Thysii, in Academia Doctiss. duobus Theologis orba, in tantillo temporis spatio. Spes aliqua affulget, D. Bistfeldium, qui ad defuncti D. Walæi professionem vocatus est, affuturum circa ver proximum. Nisi jactura tanta brevi refarciatur, & Academiæ de celebri etiam J. C. & Philosopho provideatur, frigebunt studia, & vicini ad se florem studiosorum pertrahent. Cum ibi essem exiit in lucem, novus affinis mei Molinæi fetus, quem Decano, & Capitulo Cantuariensi placuit dedicare. Mitto hodie exemplaria Cantuariam operâ D. Boswelli. Unum tibi retinui, qui inter eos es allectus, & affinis mei in Canonicatu Collega. Accipies igitur illud à me, nomine Authoris, qui erga nomen tuum, non minus affectus est, quam tu erga illum, quod ei etiam nuper testatus sum. Cellissimus Princeps cum filio craftina die, huc Groningam versus tendit, ob causam tibi notam. Ego interim hic quiesco, ubi si opera mea tibi, aut tuis esset

necessaria, eam vobis libenter impenderem. Heri tumultatus fuit D. Bouchortius, cujus locum in Concilio ordinum Generalium implebit D. Aersenius. D. Salmasius tandem appulit Diepam, post agitationem periculosissimam, dierum octodecim, in quorum quarto amisit filiam majorem natu, quæ in corpore imbecillo, ferre non potuit tantam concussionem. Rhotomagi aliquamdiu egit, apud Senatorem Sarra- vium, virum doctissimum, & doctorum amantissimum, ac tandem Lutetiam Parisiorum pervenit. Boxhornius sub prelo habet, librum de Trapeziticis, an hic tolerantur tantum, vel approbentur? Audio eum satis modestè rem illam tractare, quia eum vestigia terrent. Hæc habui quæ pro tempore, & raptim, ad te scriberem, quæ boni consules, & me amare perges, qui tibi & tuis, omnia prospera voveo. Vale.

*Rapt. Hag. Com.  
xv. Kal. Dec.  
c10 10 c XL.*

*Tui studiofissimus,*

Andreas Rivetus.

### CCCII.

*Excellentissimo, & Clarissimo Viro D. Gerardo Joanni Vossio, Athenæi Amstelodamensis Professori celeberrimo, cum debita honoris præfatione S. P.*

**D**UÆ sunt causæ, Vir undequaque clarissime, quæ me ad hoc quicquid est literarum ad te exarandum impellunt. Una quidem humanitas tua, & *φιλοξενία* singularis, cujus utriusque amœnus radius, me quoque calefecit non ita pridem, dum non tantum colloquio minimè pœnitendo, sed & ejusdem eximio condimento, vini scilicet nectarei tecum alternato haustu, seorsim me dignatus es; pro qua utraque beneficentia, quantas possum maximas etiamnum tibi gratias ago. Altera est D. Professoris Hoelzlini, & affinis mei nunquam non veneranda mihi auctoritas, qui me ad hanc scriptionis aleam ipse quoque instinxit, his & similibus verbis; Heus tu, qui semel hortatu meo, virum tantum, tam amicum, coram ausus es compellere, cur non etiam per literas tandem? Quod si ego amicitiam ejus tanti æstimare debeo, tu multo magis favorem ejus, hoc præsertim rerum tuarum tam flebili statu, conciliare tibi necesse habes. Sic illo me monente, meus ipse me porro mo-  
nuir

nuit animus, quantam rerum mearum, non ita pridem fecerim jacturam, quantis fatorum fluctibus, infelix ego sim volutatus. Quid enim non patitur is, qui in Dynkerkanas istas Harpyias incidit? Cujus tamen cladis, oblivionem potius, quam memoriam optavi sapiculè; sed hanc invito subinde refricant, non tam pecunia, & sarcinarum jactura, quam cicatrices illæ post vulnera in pectore meo, tum accepta, etiamnum residuæ. Postquam enim prædones illi nos debellassent, nostramque navim, post cruentum satis, & novem horis continuis durantem conflictum, tormentorum ictibus plusquam ducentis, jam pessum dedissent, vulturum instar, uti solent, advolantes, omnia ex hoc naufragio, nobis reliqua surripere, nec ipsam interulam, nedum vestem reliquere: dumque ego sic partim reluctor, partim precibus ab eis impetrare conor, ut vel interiorem tunicam, pudoris gratiâ non raperent, perditissimus quidam nebulo, furibundus in me irruens, me non tantum nudavit penitus, sed & pectus meum unguibus suis uncis, sic dilaniavit, ut sanguis inde largiter efflueret. Taceo nunc cætera, ne & mihi non minus ac tibi, velut crambe quadam bis cocta, molestus sim. Ad has igitur redactus incitas, tantisque studiorum meorum viduatus subsidiis, ad te V. C. tanquam ad naufragii hujus sospitatricem tabulam, me converto, rogans efflictim (quod & coram feci) ut si quam peregrinandi studiorum causa, pro digno aliquo stipendio, cum Mercatorum filiis, vel id genus, aliam nôris commoditatem ea me languentem beare, & hoc modo studiis meis succurrere ne dedigneris. Satis credo Palatinorum exulum plorabilem sortem, quæ me quoque premit, jam ultra quindecim annos perspectam habes, plerosque nimirum, imo ferè omnes, non suis, sed aliorum subsidiis, & facultatibus adjutos, ex hoc communis sibi calamitatis Oceano emergere, & sustentari. Ad pulverem tamen pædagogicum mallet non revolvi denuo, quippe qui tot annos jam in eo sudaverim, idque cum studiorum meorum damno, vix reparabili; sed si quæ essent, jam robustiora paululum ingenia, & quæ manum ferulæ subduxissent, eis ego me comitem, & ductorem optarem præfici. Nec enim me latet, multos cordatos & haud infimæ fortis Parentes, in hujusmodi filiorum suorum cura, ad te, tanquam ad proram & puppim consiliorum se recipere. Quod si talis, te dirigente, conditio obtingeret, efficerem ego, *Θι*

*Δδδ*, ut nec me susceptæ provinciæ, nec te commendationis tuæ, unquam pœniteret. Peragravi Germaniam, jam aliquoties, in Gallia totum biennium Clarissimus Molinæus me habuit auditorem, ac mare decies ingressus, Daniam Borusciam, ipsam denique vastam perlustravi Poloniam, & jam Angliæ, seu, ne imprudens committam solœcismum *εις τὴν ἀγγλίαν*, Magnæ Britannię obeundæ propinquus eram, ni lamentabilis ille, & horrendus casus me repressisset. Tantis deniq. (quod citra omnem dixerim jactantiam) asperimorum itinerum reciprocis ambagibus, sum volutatus, ut in his Tyro quispiam, & qui nido suo nondum evolavit, me duce, & Achate, ad hujusmodi profectiões, non infeliciter, spero, ulurus esset. Talem porro ut ambiam conditionem, aurem mihi subinde vellit, Domini Professoris, & affinis mei, jam per aliquammultum temporis afflicta satis, & nimis quam incerta valetudo, quæ quidem eum tam male habet, etiamnum, ut munere suo publico, ultra sex hebdomadas, jam intermisso, pedem domo efferre, nondum valeat. Cum Apollonio suo, eo jam progressus est, ut quomodocunque res cadat, modo sic pergat Typotheta, totum opus sub finem mensis Januarii, commodè absolvi possit. Amplissimisque Curatoribus, paulò post illud tempus, hic adfuturis, insinuari. Nimirum octo circiter folia, ut appellant, tantum restant imprimenda, jam omnibus, præfatione & indice exceptis, à me descriptis. Cæterum Deus Opt. Max. cujus judicio tot pericula, & labores exantlavi hætenus, me ipse tandem, spero, respiciet. Meam interim vult exercere patientiam, meque ad se precandi studium tanto magis excitare. Sed ne te morer diutius, en tibi pagellas illas, vel potius commentationes in Genesin Molinæanas, omnes quidem quas toto illo biennio dictavit: quas gratâ manu, quæso accipe, iisque quantumlibet utere. Verum totus iste tractatus, post tot alia Theologica, viri hujus & satis famigerabilia scripta, ipse quoque in lucem tandem prodibit. Ego nunc in eo sum, ut hoc ipse per literas, ex eo velim cognoscere, eademque opera commendatitias illas literas, & alia id genus testimonia, quibus me tum dignatus est quæque ego cum cæteris hujusmodi chartis, hostium & durioris metu captivitatis, in mare tum projeci, recuperem. Et quamvis satis ille habeat commendationis, quem virtus sua commendat, hoc tamen avo, sic comparatum est, ut literis talibus,



talibus, quam ipsi personæ plus fidei tribuatur. Te quoque, V. C. iterum iterumque rogo, ut me tibi commendatum habeas. *Tā ſi nūnties, ſi unquē dē, ſi tūc iā nūntia omniū ſi amittit.* Etiam atque etiam vale, Germaniæ noſtræ decus, & inter cultores virtutis, nominisq; tui, non falſe cenſe

Lugd. ad Rhenum  
x. Kal. Decemb.  
Anno 1640.

Georg. Andr. Richterum.

Dom. Profeſſor Hoelzlinus cum uxore, tibi, tuiſque officiolaſam quoque ſalutem nuntiant.

### CCCIII.

*Celeberrimo & undiquaque Eruditifſimo  
Viro D. Gerhardo Joanni Voſſio,  
Profeſſori digniſſimo, S. P.*

Vir Clariſſime, fautor, & amice honorande,

QUOD ſæpè ante hoc tempus, facere decrevi, ut tot benevolentiaſ officiis à te affectus, cultum, & obſervantiam meam, etiam calamo declararem, id ulterius ne differam, præſens occaſio me monet. Vacat in illuſtri Lycæo noſtro, Profeſſio Hiſtoriarum & Eloquentiaſ, quæ cum ante biennium, ab ampliſſimo huius urbis ſenatu, in commodum ſtudioſæ juventutis, inſtitueretur, ex commendatione Doctōris Vedeliſ, Martino Schoockio fuit demandata: qui nunc eam derelinquit, hinc in Academiam Groninganam, ad Profeſſionem Phyſicæ, & Logicæ evocatus. De Succellore igitur jam laboramus, qui munus iſtud deinceps cum laude adminiſtret. Commendatur nobis à Leydenſibus, & Ultrajectinis, filius Giſberti Voetii, & ut amicorum literis, plus ponderis adderetur, ipſe ſe nobis præſentem ſtitit: ac undecimus jam dies eſt, ex quo in urbe hac moratur. Sed quantum animadvertere poſſumus, ipſi hæc provincia non obtinet: præterquam enim quod valde juvenis adhuc eſt, nec illis dotibus videtur ſatis inſtructus, quæ ad munus iſtud exornandum requiruntur: noſtri etiam in cooptando novo Doctore, cautiores jam erunt. Ideo de alio cogitandum eſſe exiſtimo. Hæret in animis multorum, nomen & fama Gronovii noſtri, cujus etiam mentio fiebat, ante biennium, cum Hiſtoriarum, & Oratoriaſ Profeſſor vocandus eſſet, nec ille, credo, tunc temporis ab ejuſmodi

conditione alienus fuiſſet, præſertim cūm & ingenium, & ſtudia illius, ad otium literarium tunc propendere, ipſe deprehenderim. Nunc vero de ejus voluntate & inſtituto judicare nequeo, cūm toto eo tempore, quo à nobis diſceſſit, nihil de ipſo cognoverim; nec ipſe Gronovius, quod vehementer miror, quicquam ad me ſcripſerit. Id quidem ſcio, quæ ejus eſt virtus ac eruditio, non defuturas ipſi emergendi occaſiones, cūm habeat in ſua familia, tot præcipuæ dignationis cognatos, per quos honeſtiſſimam conditionem, exambire poterit, ſi modo in Patria pedem figere voluerit. Obſiſtet nihilominus eunti iſtis in locis, Lutheraniſmo ſic addiſtis, Religionis profeſſio. Hoc ipſum forſitan permoveret, ad ejuſmodi functionem in hiſce provinciis amplectendam: quamvis & alia adſint, quæ reditum in Patriam bellorum incendiis adhuc ardentem, non parum remorentur. Præterquam verò, quod Gronovius à me, cæteriſque Profeſſoribus noſtris commendatur, fama ejus quoque innotuit aliquibus ex Senatu noſtro, qui Hagæ Comitum in Collegiis Ordinum hanc civitatem ſubinde repræſentant. Ab illis igitur juſſus, & à Collegiſ meis monitus, præſentem ejus conditionem inquirere, non potui hoc officium ſcholæ noſtræ denegare, imprimis cūm pro ea quæ inter Gronovium, & me intercedit amicitia commodum illius omni ratione promovere allaborem. Rogo itaque te, Vir clariſſime, ne grave putes, quod ſuper hac re ſentias, num Gronovium hanc vocationem, ſi offerretur, accepturum putes, & ubinam locorum nunc degat, paucis indicare, vel ſi nihil de eo ſperandum judices, alium quempiam ſi quis occurrat, nominare. Præſtabis ea in re, nobis omnibus gratiſſimum officium, & de ſchola noſtra, ſtudiisq; humanioribus optime mereberis. Conditio ſanè non eſt ſpernenda, tali præſertim loco, & inter tales cives, literis ſic addiſtos. Stipendium eſt ſeptingentorum florenorum, & forſitan augebitur, ſi condignum hominem, quem unice quærimus, nanciſci poſſumus. Finem facere cogor. Vale, Vir præclariffime, cum univerſa familia, & me inter cultores tuos numera. Reſponſum vero quamprimum exſpecto.

Dab. prid. Kal.  
Dec. Jul. An. 12.  
c1o 1o c xl.

Præclariff. Dominationi tuæ,  
omni fide, & officio addiſtiſſ.

Joann. Chriſtenius, J. U. D.  
& Profeſſor Illuſtris Gymnaſii,  
P. T. Reſtor.

CCCIV.

## CCCIV.

*Gratiam & Pacem à Deo Patre, & à Domino nostro Jesu Christo. Amen.*

**P**eroptassem Reverendi admodum Doctissimi viri, fieri potuisset, ut ipse coram, hæc apposita deliberationum capita, vestris Reverentis obtulisset. Sed quamvis multis, magnisque adducar argumentis, ut id expetam, pluribus tamen, & longè multo majoribus retrahor, à conatu, quo id effectum dari posset. Revocor enim in Magnam Britanniam, maximisque precibus à me contendunt amici, ut nullibi nec ullam ob causam, me detineri patiar, donec eò pervenero: quoniam ibi omnino insperatam, & exoptatissimam, rei bene gerendæ anslam, mihi offerri autumant: meque per omnia sacra adjurant, ne tantæ occasione deesse velim. Ergo illorum vocationi nunc obtemperandum erit, ita ut simul debitus erga Dignitates vestras respectus non intermittatur. Spero igitur vos in optimam partem accepturos hanc affectus mei erga Ecclesias vestras propensi testificationem, quâ honorem suffragii in re tanta, quæ omnes concernit Evangelicos, vobis delatum volui. Et ne forsân istud quod in Appendice, de Confessionum particularium usu, non legitimo, dicitur aliqua cum sermonis libertate, sit vobis offensionem, velim ut rectè mentem meam de eo percipiat; atque causam cur ita loquutus sim intelligatis. Constat haud dubie vestris prudentiis complures esse libros in Ecclesia Lutherana Symbolicos, præter Augustanam Confessionem, de cujus etiam exemplaribus variatis, & invariatis, ac horum autoritate non parùm disceptatur. Nostis Catechismos, Majorem, Minoremque Lutheri, Articulos Smalcaldicos, & Catechesin Hutteri, in superiori Saxonia, & alibi Symboli loco esse; nostis & ibi, & aliis in locis, aut formulam concordiæ Jacob-Andræanam, aut cum ea particulares formulas, qualis Confessio est Wirtembergica, aut corpus doctrinæ Jul. aut corpus doctrinæ Philippi, &c. instar Canonis haberi; si non primarii, saltem paulò plusquam secundarii. Has tot Confessionum distinctas formulas, (quamvis & inter ipsos Lutheranos, per sæpe acris pariant, suis de opinionibus concertationes, & nobiscum, in opere quæsitæ reconciliationis, non paucas afferant remoras, & difficultates:) facile tamen omnes ad-

mitto: ut extent, & quantum possunt, valeant, si modò unum absit, quod omnino intolerabile videtur, & nihilominus ubique locorum fermè invaluit: nempe quod eousque attollant, atque extendant plerique suarum Confessionum loquendi formulas, utiis tam suos ipsorum Doctores Academicos, quam aliarum Ecclesiarum Pastores, ita circumscriptos & limitatos velint, ut nec sibi suisque in prophetando ullam libertatem, ultra præciosos Confessionum terminos concedant, nec cum exteris pacificè agant, aut amicitia Christianæ jura observent cum ullis, nisi cum iis, qui in ipsorum verba jurare parati sint. Hinc est quod mihi de Confessionum fine, atque usu legitimo, cum Hamburgensibus, cum Lubecensibus, cumque D. Buschero Helmstedtensium Professorum Censore, (quod scilicet, ex præscripta formula non semper loquantur) & aliis quibusdam præsertim Lutheranis disceptanti, illud quod in Appendice dicitur de abusu Confessionum, in mentem venerit: ut ab errore quo, & privatam suam, & publicam quantum in se est, omnium Evangelicorum pacem, impediunt, & inturbant, revocentur.

Hoc igitur quod Lutheranis, qui vularum quarundam aucupio delectantur, dictum est; nolim à vobis, aliter quam à me prolatum est, accipi; quoniam existimo, Confessiones publicas, non solum utiles, sed etiam necessarias Ecclesiis esse; necessarias esse dico, non tantum ut extent, in veritatis Evangelicæ testimonium, adversus Pontificiorum, & aliorum graves errores, humanasque traditiones, quibus conscientias credentium sub jugum cæcæ obediendi, mittere conantur; sed etiam ut confederationem fraternam initio Reformationis inter pios veri Dei cultores, in fundamento puræ Religionis, antea constitutam porro confirmet. Ac proinde utiles quoque posthac fore judico, ad communem Ecclesiæ cuiusque sententiam, in præcipuis doctrinæ capitibus agnoscendam, & ad concordiam inter eos qui dissidiis non necessariis distrahantur, promovendam. Haudquam igitur oportet eas abolere, aut flocci fieri; sed tamen nec ita usurpari, ut loquendi formulæ iis comprehensæ, vel in aliarum Ecclesiarum, vel in Prophetice libertatis, vel in Concordiæ religiose, vel in Communionis Christianæ, vel Conscientiæ scrupulosioris præjudicium adhibeantur. Ideoque, observandum erit, me Lutheranis in memoriam revocare voluisse ipsorum confessiones esse scripta humana,

quibus illaqueare conscientias minime convenit. Nullus enim tenetur ulla humanorum verborum formulas, aliter admittere quàm quatenus agnoscit sibi permiffum fore, bonâ cum illorum pace, quorum causâ id facit, illas ita interpretari, ut cum fidei analogia, sibi in Dei verbo revelata, possit eas conciliare: quod si permittatur, tum etiamfi verba nova, atque priscis inaudita, (qualia tamen, nollem temerè à quoquam usurpari:) in confessionibus humanis, inveniantur, & possit ea quispiam, aliquali adhibitâ interpretatione sano sensu accipere; judico illum pacis causâ, id tutò facere posse; imo & debere potius, quam ut otiosa certamina, de phrasibus & loquendi modis excitet; ex quibus lites, maledicentiam, invidiam, & suspiciones malas oriri dicit Apostolus. Atque hoc illud est, quod ego in meis, cum Sueciæ, & Daniæ Theologis, agere, pro mea in Christo libertate volui, quando phrasès Lutheranas, de orali manducatione, deque omni præsentia Corporis Christi, me certo sensu admittere posse professus sum; atque ita interpretatus sum, ut fidei analogiæ mihi revelatæ, non repugnarent in conceptu meo, quamvis eas nec approbarem, nec iis me teneri vellem, nec promiscuè adhibendas esse censerem; hoc tamen aliqui ex nostris, non rectè attendentes, meam hanc parrhesiam, animo non satis æquo, ferre videntur; putant enim agnitæ in Ecclesiis veritati, hac ratione aliquid derogari; à qua sententia ego ingenuè fateor me alienum esse, cum sciam non his, aut illis, loquendi modis, sed in rebus ac sententiis, sensuque verborum, analogiæ fidei consentaneis, veritatem consistere; nec unius hominis particularem, & certo sensu limitatam, phrasèos hujus, aut illius acceptationem, præjudicium ullum afferre posse, omnibus Ecclesiarum Confessionibus, quæ mentem Reformatorum manifestè produnt. Nec denique meæ qualicumque phrasèos, licet incommodioris admissione, Orthodoxiam labefactari posse, quamdiu in præparatoris tanti operis solummodo versamur. Etenim hoc jam præcipuè agitur, ut ad Tractatus ordinatos, constantes & universales, amicabiliter intendendos, de mediis, modoque procedendi, in concordia ritè constituenda, perducantur affectus illorum, qui hætenus maximam studii sui partem collocarunt, in clamoribus, & insanis verborum pugnis; à quibus ut tandem abducantur, & ad res ipsas pertrahantur, mihi non videbatur inconsultum, hoc

pacto agere: præsertim cum hoc agens, nihil præter veritatem sensus mei proferam. Jam autem si quis velit à mea interpretatione dissentire, faciliè id permittam, dummodo id fiat pacificè; & nolit propter ejusmodi opinionum diversitatem, omnia Christianæ Communionis vincula dissolvere, quod, proh dolor, inter multos, nimis sæpe fieri solet hodie!

Hæc paulo fufius apud vos edissero, Reverendi in Christo fratres, quoniam non sum nescius, quantum possint aliqui, in præjudiciis, aut aliorum animis instillandis aut apud multitudinem fovendis: nec ignoro, quantis obnoxium sit suspitionibus, & sinistris imperitorum interpretationis, hoc quod præ manibus habeo negotium. Conor itaque hac ratione, huic mederi malo: atque ideo à vestris pietatibus efflagitabo, ne faciliè aliud de nostro instituto apprehendatis, præter illud, quod re ipsa præ se fert. Stamus enim in conspectu Domini, qui judicabit propedem secreta cordium. Nolite igitur aste tempus, de proximo judicium ferre, aut ex invidiosis conjecturis, præposterè à quibusdam hausta judicia temerè admittere; sed ex hisce de nobis judicate. Libenter enim, quicquid de re tota statueris, excipiemus: quando id nobis communicare non gravatè volueritis: quod rogo etiam ut faciatis: quo mens vestra, iis quorum intererit eam intelligere, patefiat ad multorum ædificationem. Valete.

*Dabam Amstelædami,  
Jan. 17. anno 1641.*

### CCC.V.

Vir Clarissime, Fautor & Amice summa Observantia honorande,

**N**ON voluntate mea vel incuria, sed inopia Tabellariorum, qui hac anni tempestate rarius iter faciunt, distuli in hunc usque diem respondere literis tuis; quæ certe voluptati mihi fuerunt, cum tot annis cognitam erga me benevolentiam, quantaque sollicitudine rei Literariæ prospectam esse cupias, abunde testarentur. Utinam verò talis nobis Collega contingeret, qualem hæc tempora, politici doctrina parum propitia, desiderant! Ita enim est, Vir clarissime, ut scribis, videmus barbariem ubique locorum magno impetu ingruere, cum multis in locis præsertim in Germania propter assiduas bellorum clades studia



studia Literarum paulatim intercitant, & in his quoque provinciis hic studiorum ordo à plerisque observetur, ut postquam discentes vix prima elementa perceperunt, statim ad superiores disciplinas animum adijciant, nullis vel exiguis linguarum ac solidioris Literaturæ adminiculis instructi. Quod vitium etiam in hac Schola experimur, dum plurimi ex Classibus promoti, quia aliunde adveniunt confestim sacra Theologiæ & Jurisprudentiæ invadant, nec in illis studiorum gradus fieri patiuntur, ut legitimo ordine proficiant; sed cum vix prima quatuor folia alicujus compendii perlegerunt, in disputationum campum prosiliunt; inque eo exercitio aliquot mensibus exactis, ad Sacerdotium vel Præturam viam affectant. Huic incommodo ut apud nos ex parte obviam eatur, summis votis expetimus virum eruditum, qui studiosæ juventuti ad elegantioris ingenii cultum viam præeat. Hanc operam de Gronovio nobis pollicemur, adducti egregii animi dotibus, quibus apud multos commendabilem se fecit. Ideoque unice id agimus, ut eum consequamur. Professio ipsi est decreta, nostrique Proceres mihi significarunt in stipendio nihil fore difficultatis, sibi que curæ fore, ut honestissime hic excipiat. Jussu illorum ad Gronovium jam scripsi, eumque sedulo hortatus sum, ne hanc occasionem, non omni die obviam, temere prætermittat. Eum quidem in Italia nunc esse cum discipulis suis, sed reditum eorum circa Ver proximum Amstelodami expectari, intellexi. Multum faceret ad rem, si clarissimus Dominus Vossius eo quoque nomine paucis ad Gronovium scriberet. Literæ possent curari per matrem istorum juvenum quibus est præfectus. Habitat illa ad fossam Cæsaris, uti vocant (*tegen over Schout Wlas*, vocatur, *Jouffrow Gerarts*) præstabis nobis rem gratissimam, siquidem de hoc negotio sumus valde solliciti: metuimus enim, ne ineptus aliquis magistrullus, qui per fautores suos potentes hanc provinciam ambit, nobis obtrudatur, si forte Gronovius illam suscipere recuset. Hic finem facio, cum ad alia jam avocer, nec te ulterius interpellare deceat. Clarissimus Dominus Dieffius, nosterque Ilendoornius amicissimam salutem per me tibi nuntiari volunt. Vale, Vir eximie, cum universa familia, quam perofficiosè saluto, & me amore tuo porro persequere.

*Dabam Davenriæ III. Cal. Feb.  
Gregoriani An. clō Dc xli.*

Clarissimum Dominum Barlaam officiosissime saluto.

*Celeberrimo tuo nomini*

*toto pectore devotus*

Joos Christienus

CCCVI.

S. P.

Vir Excellentissime, Clarissime, Celeberrime,

EX Literis superiori mensē raptim ad te perscriptis, statum rerum nostrarum satis luctuosum non dubito quin perceperis; quæ, quo loco nunc sint, paucis accipe. Postquam affinis meus ultimum naturæ jam persolvisset debitum, de honesta ejusdem sepultura præcipuè fuimus solliciti: dumque ei sic anxii quærimus sepulchrum, amplissimus Paets, Reipublicæ hujus Exconsul, præter omnem spem ultro se obtulit, huncque defunctum nostrum suo quod hic habet in Templo S. Pancratii, sepulchro donavit. Quod tamen ne ille in totum haberet gratis, nescio cujus vel negligentia vel invidia factum sit, ut tardius paulò funus ad locum destinatum deduceremus, unde xii. florenorum multa viduæ fuit imposita. Poëtæ suo Rhodio, *ὁ μαργετῆς* noster, quinto demum ante obitum die, cum jam gravissime decumberet, manum ultimam imposuit, nec durante morbo, nisi sex diebus novissimis, lecto fuit affixus, atque sic moriendo studuit, & studendo mortuus est. Nec absque providentia Dei singulari contigit, ut ego, qui nil minus sperabam, per hoc tempus adesset, meamque ipsi qualem qualem commodarem operam. Absque me enim fuisset suum hoc opus, cui tot annis jam insudaverat, necdum, imò fortè nunquam ad hunc umbilicum perduxisset. Unde mihi sæpe gratulor ipsemet, quod Deus me dignum habuerit, qui non tantum huic tanquam affini, sed & præceptorī meo olim fidelissimo *τῷ ἀντιπαλαιῷ* vicem, quamvis, quod fateor, non *ἰσοῖστον*, hoc modo rependerem. Quod tamen citra omnem dictum volo jactantiam, cum id solum mihi datum fuerit negotiū, ut quæ ille scripsisset intricatiùs, ego describerem, autorum scripta, quæ ipse præ nimia corporis imbecillitate, non valebat amplius inspicere, prælegerem, Indicem colligerem, Errata denique quæ commisisset Typographus, emendarem. Simu-

Simulac igitur hoc opus lucem aspexit publicam, tu Vir Excellentissime, primus es inter ceteros, omniumque dignissimus, cui unum muneris loco mitteremus exemplar. Quin & ipse author hoc donum tibi jam pridem, tanquam suo non solum fautori & amico meritissimo, sed & horum laborum uni non è multis, & *omnibus* Judici, jam pridem destinaverat. Tu illud quæso, vultu dignare benevolo, charamque defuncti hujus, cui tu vivo nunquam non fuisti charissimus, habe memoriam. Nec dubito, quin, si adhuc vixisset, ad vos ipse hoc onustus munusculo, transisset, tibi que coram obtulisset. Meum verò erat, hoc ejus loco præstare officium, sed dum amita mea tam in recenti adhuc est luctu, nolui eam tam diu solam relinquere. Boni igitur & optimi consule hunc illius Libri latorem, patria Silesium, Consulis apud suos amplissimi filium, hujus Academiæ civem non postremum, mihi quoque amicissimum; isque jam pridem hunc ambivit honorem, ut te aliquando videre, tuoque humanitatis radio, qua licet, illustrari queat. Quem tu scio repulsam pati non patieris; ceterum opus jam toties nominatum, D. D. Curatoribus, eo ipso die quo Rectorem nobis crearent magnificum, & in Curia congregati essent, auctoris & viduæ nomine insinuavi, qui quidem illud tam benigno & liberali respexerunt oculo, ut viduæ CL florenos pro oblatione, & supra hos CCCC alios, in stipendium annuum & quo ad dies vitæ frueretur, decernerent. Equidem multi hic sunt, qui hanc munificentiam mirentur, vel potius invideant, dictitantes, nulli unquam hujusmodi viduæ tam largiter prospectum esse. Quibus ego respondere soleo, nullam forsitan hæcenus fuisse, quæ tali beneficentia magis indigeret. Me quod attinet, penes eam hic tantisper morabor, donec illustris Domina de Donaw ex Galliis Hagam advenerit, quam quidem instante mense Martio sperant illic affuturam esse. Quæ quandoquidem Virum desiderat, qui ipsi sit ab epistolis, mihi que hæc provincia jam pridem oblata sit, suscipere eam est animus. Tu verò si quod consilium possis impertiri salubrius, ne, quæso, detrecta. Etiam atque etiam vale, V. E. *paroni*, & me tibi commendatum habe.

Lugduni Batavor. Honoris & famæ  
viii. Kal. Martias  
cIo Ioc xli.

tua deditissimus,

Georgius Andreas Richter.

Vos & omnes officiose saluta mea amita; à me quoque salvete omnes.

# CCCVII.

Clarissimo, & Doctissimo viro Domino  
Gerardo Joanni Vossio, *Historiarum & Chronologiæ Professori celeberrimo* S. P.

Clarissime & Eximie Vir, & mihi plurimum honorande,

Sufficiebat mihi quod ex Doctiss. juvene filio tuo, certus fueram factus, redditas fuisse tibi literas meas, cum opusculo affinis mei, neque quid ultra expectabam, cum Ampliss. Dubletius, tuas mihi attulit, ex omni parte gratissimas, nisi quod de tua, & lectissimæ uxoris tuæ adversa valedudine, addisco primum, sed cum lenitivo melioris sortis, quæ priores tuas, & publicæ rei literariæ, utilissimas curas, non amplius remorabitur. Exoptatissimus est ubique hic labor tuus, & Galli nostri inter alios, ejus publicationem impatientius expectant. Det Deus, ut intra paucos dies, fiant votis compotes. De Bolducii Oggio, ut appellat, Christiano, egeram cum filio tuo, eique librum ostenderam, in Bibliopolio Elzevirii, putabamque ad te fuisse delatum. Sunt nonnulla quæ censuram tuam merentur. Totius operis scopus est, ut ostendat, ab ipsis mundi primordiis, per omnes ætates, oblatas fuisse Deo placetas, figuras Sacramenti Eucharistiæ, etiam in Orgiis, & Bacchanalibus, & in eum finem multa colligit ex gentilium sacris. Ordine Capucinus est, Natione Gallus, homo Octogenarius, qui etiam scripsit libros, de Ecclesia ante legem. Magnus Salmasius ex quo Lutetiam venit, variis calamitatibus fuit impetitus. Socrum amisit, Uxorem habuit tam graviter laborantem, ut quatuor continuis diebus, iterata sanguinis missione opus fuerit. Variè etiam fuit tentatus, ne ad nos rediret, nec se potest penitus extricare, quamvis ei ster redeundi animus. Sperat saluum conductum, aut potius dimissionem, ex publicatione Libri, de Primatu, qui sub prælo sudat, & vires acquirit eundo. Mittit subinde ad Typographos, materiam novam, quam ei subministrant regiæ membranæ. Reliquit tibi Librum nostri Croii, de Versionibus antiquis, ut aliquem ex Typographis vestris excitares, qui illum typis

typis describeret. Nuper accepi literas ab Authore, qui ferè desperat de editione, his in locis, petique, ut si obtineri non possit, ad eum remittatur scriptum. Rogo ut me certiore facias, an aliquid sit sperandum. Idem Author mihi significat, se opus Heinſii in N. Testam. ad examen revocasse, animadvertisse innumera Authoris *σφάλματα*, & Bezam defendisse. Primam partem absolvisse, quam missurus sit Genevam, nisi sit hic qui excudere velit. Vir doctus est, & in linguis ad id necessariis apprimè versatus. Postquam à te responsum accepero, ad eum rescribam. Opus esset festinato, quia Celsissimus Princeps, voluit ut unicum suum in Angliam comitaret, nec satis scio, an mihi tempus superpetet, nuptiis mei filii interesse, quæ Leydæ celebrari debent nono Aprilis. Hæc res inopinato nobis accidit, cum missus est Buram, & Leydæ apud amicum vicinum, viduæ Burgesdikia diverteret, invitatus fuit ad cœnam, cum hospite suo, ubi cum vidisset puellam octodecennem, defuncti Collegæ filiam, in eam vota sua convertit, & communicato mecum consilio, cum viderem eum eousque processisse, ut protestaretur se non posse dimoveri, sciremque puellam, honestis parentibus ortam, & mediocres esse facultates, annui, quando quidem ille, xxxvii. ætatis annum attigit, & amici ex Gallia, ab initio mihi suassissent, ut occasione data, eum huic jugo alligarem, quod foelix faustumque sit, Deum precor, & ab amicis, qualis es inter primos, peto, ut vota sua meis jungant; qui etiam tibi, & tuis omnia prospera vo-veo, & si voluerit Deus me in Angliam deducere, fac ut mihi significetur, si quid in re tua, aut tuorum, possim, habebis me promptum, & paratissimum. Salutem plurimam D. uxori, à me, & mea. Vale.

Hagæ-Comitis. Tibi addictissimus, & ad  
xxvi. Martii.  
c1o lxx xlii.

omnia officia paratissimus.

Andreas Rivetus.

### CCGVIII.

Clarissime Vir,

**N**ON mihi excedit benevolentia & summa humanitas tua quam mihi domi tuæ non uno testimonio probasti. De qua si hæcenus filii gratias agere per literas, tempori, amicis & continuis amico-

rum visitationibus imputabis, in quibus tuum tamen nomen semper nobis sacrum fuit, eritque mihi quamdiu spirabo. Nec prætermisi animum tuum in Patriam nostram summis (ut potui) viribus deprædicare, non solum Illustrissimis Regni Proceribus ubi ad eorum colloquium fui admissus, præsertim summis in Republica nostra Viris Domino Comiti de la Gardie, Regni Marſcho & magno Cancellario, qui eruditionem tuam summam & piam maximi merito tuo faciunt; verum etiam omnibus bonis, quibus ingens ac divina tua virtus satis nota, mihiq; nuspam tacenda. Literas quas Hamburgo filio tuo Viro Clarissimo Isaaco destinavi, jam (ut opinione metior) acceperat: Optarem per literas ejus continuationem amicitia nostræ intelligere. Amicorum visitationes, tum iter de loco ad locum invisendi amicos & cognatos mihi adhuc ad silentii veniam suffragabuntur. Quamprimum hic amoris mei error aliquam mihi requiem indulerit, locabo eam honori & reverentia eorum, qui mihi in Belgio doctrina & honesta conversationis duces exstiterunt. Præteritis diebus Academiam nostram invisi reperi, inter alios Loccenium Bhemiumque viros tibi addictissimos. Loccenius varia sub manibus habet, imprimis tres libros Antiquitatum Sueo-Gothicarum; in quos conferre constituit quicquid habet patria antiquorum institutorum, laudisque. Parat etiam translationem legum Suecicarum eamque bono Esthonorum, Livonorum & Ingriorum. Cæteri pro sua quisque professione varia ediderunt & adhuc sub prælo habent. Eorum tamen nunc memoratone abſtineo. Quoad publica exercitia & diligentiam docentium & discipulorum, vix dicere possum, quanta hic mutatio, quamq; graviter bonæ menti litent. Numeravi, ut cæteros taceam, præsentis una disputatione è nobilium filiis nostræ nationis 97, & quotidie plures accedunt. Adeo ut vel ex hoc ego conjiciam, Musas extorres sedibus prioribus in septentrionem migrare & hic tantisper sedem figere dum alibi Mars detonuerit. Sed ignosces mihi, virorum eruditissime, si amore Patriæ meæ ejusque incrementis abductus de studiis aliter forte judico, quam tenuitatem meam decet. Video otia hæc & prætia etiam esse literis qualia in pacatissima Republica sub optimo Magistratu poni solent. Neque in aliis rebus divinæ benevolentia indicia latent. Nunquam hæcenus tanta fodinarum copia, tantæque in iis divitiæ reperta sunt, atque præteritis



teritis annis effoderunt. Quibus jam in omnibus hujus Regni Provinciis succenturiantur officinae fabrorum, ut non dicam amnes sed rivos excoli hic videas & elaborandis metallis adhiberi. Provida hic ut ubique fuit rerum natura quæ maximis metalli rupibus adposuit sylvarum densitatem & aquæ mira profluvia, utpote sine quibus neque solvi neque procudi metalla potuissent. De hisce ultra quam volui scribo, sed non ut debui. Taceo tamen, hoc confidentia virtutis tuæ, quæ nihil in me contempsit, illud vero ex contemplatione rerum in patriâ cujus speciem adhuc in animo gero, eamque invitus in chartam conjicio.

Vale Virorum mihi maxime, & me optimæ honestissimæque tuæ familiæ officiosè commenda.

Holmiæ ix. Apr. *Claritatis Tuæ*  
Anno 1641.

*Filiali affectu*

*observans,*

Haraldus Appelboom.

### CCCIX.

Gerardo Jo. Vossio, *Viro summo*, Ludovicus Crocius S. P. D.

CHRISTOPHERO Timplero inscriptas à F. Junio affini tuo literas Rudgero fratri illius, Reip. nostræ Physico, homini Zelotas nostros in omni occasione in nos extimulanti actutum tradi curavi; qui non sibi, sed fratri ante quinquennium defuncto datas aiebat. Impetravi tamen responsum, quod hic inclusum accipies. E morbo gravi te iterum eluctatum gaudeo, & assimilem in modum ut honoratissima uxor tua morbi sui reliquias edomet & vincat, Deum sospitatorem obnixè precor. Zelotæ nostri Acheronta movent, ut candorem, veritatem & concordie studium nobis extorqueant: sed vanas scimus sine viribus iras. Virtus enim invicta omnem pravum affectum sui-ipsius agnoscit ultorem. Res agitur putidis calumniis domi forisque. Colliguntur hinc inde suffragia Academicarum & Classium vestrarum, quibus à plebe minores habeamur ac prope inauditi per provincias vestras passivitus damnemur. Hoc seculum est! Quid aga-

mus? Nil conscire sibi, hic murus ahenus esto. Detonant in nos omnia pulpita, omnes cathedræ vestræ, siquidem fama vera est. Sed nec bona, nec mala fama nos à Christo avellere debet. Duraus, Vir eximius, in Angliam profectus, ne iota quidem ad nos perscripsit, ex quo hinc discessit. Miramur tam longum viri silentium, ac veremur ne quid illi vel in via vel in regno contigerit finistri. Capita rerum hæcenus in negotio *isomus* ab ipso gestarum à Lutheranis cupidè quaruntur ac leguntur. Domino Calixto exemplaria aliquot misi & aliis istarum partium. Sciret Deus moderata ingenia quæ veritatem simul amant & pacem. Audio naves in exteras regiones de Anglia solventes in porta diligenter excuti, ne quid literarum transvehant, quibus creperus regni status exteris intempestivius reveletur. Triste est quod de Parlamenti inferioris sensu scribis. An enim una Genevensis Ecclesiæ facies præ omnibus placet? An hæc est illud Apostolicæ Ecclesiæ *εὐρίπρου*, sine omni macula, sine ruga; ceteræ omnes imbubinata? Magni sanè Viri, Calvinus, Beza, alii, & de populo Dei seculo præterito præclarè meriti; sed Petrus Martyr & Martinus Bucerus istis nihilo sunt inferiores. Fatebuntur ipsi illi, quos modestius de se sentire novimus, quam infruniti quidam eorum admiratores, quibus omnis pia Antiquitas præ illis sordet. D. Gomarum è vivis excessisse dudum acceperamus, cujus immoderatum & improvidum Zelum jampridem frenâssem, siquidem id è publica re judicavissem. Malo bonas horas aliis tribuere, & quicquid in me iniquius dictum scriptumque fuit, amore pacis publicæ concoquere. Horret enim animus intestinas fratrum & Symniistarum lites. Nunc Antipapismum sub incudem revoco & Antifocinismum. Si Typographi vestri fortean sint adeundi, velim, siquidem integrum est, edoceri, an sit qui libellos quosdam nostros Typis suis exscribat. Nam amuli nos forsan ita devenustarunt, ut deinceps nemo suam nobis collocet operam. Theologiam Gentium & Physiologiam Christianam, opera eruditissima ad indices usque jam Typis exscripta, ut primum ad Colophonem perducta fuerint, cupidissime expectamus. Deum ex animo veneror, ut prospera valetudine & aquilæ senectâ te, Vir summe, beet, quâ hæc & alia plurima reconditæ eruditionis monumenta à manu tua habeat & admiretur posteritas.

Salutem

Salutem plurimam officiosissime scribo tibi, favior maxime, matronæ honorandissimæ & filiis eruditissimis à D. D. Bergio, Willio & me quoque. Bene valeto & salve æternum, o maximum Decus nostrum.

Bremæ x. Kal. Apr. Anno æræ nostræ c1o 15c xli.

## CCCX.

D. Gerhardo Jo. Vossio πρὸς παῖρα  
S. P. D. Ludovicus Crocius.

**E** Sectatoribus nostris, Vir maxime, fores tuarum Charitum nunc pulsât doctissimus Juvenis Daniel Succius Anghaldinus, Hebræis, Chaldæis, Græcis Latinisque literis mediocriter excultus, & ad prædicationem Evangelii Christi præparatus, osor litium & Epicuræ morum licentiæ, quæ hoc ævi passivus dominatur. Is voluit in transitu uberimos doctrinæ & pietatis tuæ latices coram degustare, eorumque adspersione fragrantior per Belgium vestrum ad Britannos & Gallos abire, ea fieri, ut patriæ tandem aliquando redditus debita cum prudentia partem reipub. Christianæ gubernare posset. Id propter, me paratio, *οὐσαντις* à manu tua sperat ac petit obnixè, quibus summis in Anglia viris, Academicarum & Ecclesiarum aliquot præfulbis innotesceret, ac sua Officia qualiacunque & servitia literaria offerret. Virtutes edecumata, quibus hic ingenium radiat, omnium bonorum favorem merentur. Præfuit quibusdam liberis Baronibus domi meæ tanta cum laude & dexterritate, ut eum habeam inter eos, qui sunt intimæ admissionis & magnæ spei. Iudicio valer, & antiquitatem rursari incipit, ut in dogmatibus venetur Catholicum consensum. Hortaberis eum, ut hoc tramite pergat & privas sæculi opiniones & noveltates constanter evitet. De rebus nostris nihil dico, quoniam eas caller hic noster & candida vobis voce enarrabit, siquidem id ferunt vestra severiora studia. Monumenta, quæ ad umbilicum à vobis perducta sub prelo nuper fervebant, spero brevi manibus nostris versatum iri, ut ex iis nostra locupletemus. Deum veneror cum Collegis meis D. Bergio & D. Millio, ut Nestoris trisecli ætatem, eamque firmam tibi, Vir maxime, elargiatur, ut elucubra-

ta opera & omnigena eruditione referta, quibus armaria tua sunt expolita, felicissimo obstetricatu tuo omnia in lucem edantur. In hoc voto finio, salutis perennitates universæ familiæ tuæ calidè apprecatus.

Brem. Kal. Maii An. c1o 15c xli.

## CCCXI.

Celeberrime & Amplissime Vir,

**A** Deptus certissimam occasionem per hunc studiosum Gothofridum Kretschmarum, iterum ad te scribere non omittendum illud, sed faciendum mihi putavi. Tum etiam progressum Dissertationis meæ exquirere: Quam quidem, etsi paratam spero, tamen dubito. Ideoque nunc abs te peto, responsione me digneris, ac hac de re certiore facias, quam celerrimè. Clarissime Vir, Typographus ille Lugdunensis Jacobus Marci, certè non præstat se erga me, honestum, probum aut sincerum Virum, sed mendacem & nebulonem. Et profecto, si ille Jacobus Marci Dissertationem meam brevi temporis spatio non absolverit, hoc in regno excudi curabo. Sed tunc faciam ad Lectorem præfatiunculam, in qua Jacobum Marci (causis meis iustis adhibitis) ut hominem mendacem & nebulonem, apud omnes declarabo. Quæso maximopere, Jacobo Marci hæc epistola ad perlegendum detur. Clarissime Vir, Patrone Patris instar colende, exemplaria quædam Dissertationum mearum tibi etiam transmittito, quæ pro arbitrio tuo inter amicos dividere velis, obnixè peto. Præterea etiam habeo sub prælo Typographi nostri tractatum de Tybiis: cujus exemplaria data alia occasione quoque accepturus es. Vale ac vive diutius & patriæ.

Scribebam Soræ  
Danorum ad diem  
6. Maii An.  
c1o 15c xli.

Tuus omni cultu

& observantia,

Johannes Meursius Filius.

E e

CCCXII.

## CCCXII.

Domino Gerhardo Jo. Vossio, eruditi  
Orbis Principi, Ludovicus Crocius  
S. P. D.

Virorum & Patronorum maxime,

**V**Aletudinis gratia à Principe sua Vir reverendus Henr. Thumelejerus Superintendens Ecclesiarum Lippiacensium, olim discipulus meus, concionator facundissimus, sed hemiplegia in suggestu lingua & memoria privatus, in Belgium vestrum missus, per me voluit adpectu & alloquio tuo, tanquam Numinis cujusdam propitii, vel ad momentum recreari. Id ut ambirem, nimio opere & efflictim à me expetiit. Si gratissimæ meditationes tuæ, quibus publico litas, ferunt, patere, amabo, ut, quod tanto affectu quæsierit, impetret. Filium habet probioris notæ, quem, si commodè fieri posset, præfici vellet puerulis quibusdam informandis pietate & literis, de quo forsan in Academia quadam Belgica bono civi commendando ipse coram laborabit. Ea re calamum hic sufflamur. Affinis meus Hagam nuper profectus, literas meas nuper in transitu Claritudini tuæ haud dubiè tradidit. Professor est Oratoriæ & Poeseos in Academia Castellana, & fratrem Juris professorem in Academia Sedanensi, nunc Hagæ rerum Principis sui causâ commorantem invisit. Res Anglicanæ non leviùs quam Germanicæ animum afficiunt meum. Diata Ratisbonensis causam Palatini, turbato Angliæ statu, minus feliciter tractabit. Sed ταῦτα ἐστὶ γέγραπται Θεῷ καὶ ταῖς. Salutem scribo honoratissimæ Matronæ, Uxori tuæ & familiæ universæ, virorum maxime. Bene & jugiter vale, Salve.

Breme, 3 Idus Maii Anno æræ  
nostræ. c10 10c xli.

## CCCXIII.

D. Gerhardo D. Vossio, τῷ πρίνυ,  
L. Crocius S. P. D.

Virorum maxime,

**M**ore nostro Juvenes literatos ad vos iter suscipientes & immensum eruditionis vestræ pelagus admirantes literis meis fores vestras pultare jubeo, quæ mea est confidentia. Eapropter ignoscetis si in

publica simul & privata tua commoda ita pecco. Neque enim aliter possum, quando discipulis meis multum inde emolumentum cupientes, ut gratè fatentur, servire cupio. Nunc sisto Henricum Oldenburgium, Collegæ quondam mei in hac Schola filium, in Academiam Ultrajectinam abeuntem, ex quo cognoscetis quam male nobiscum agatur ab Rectore novo, Johanne Combailio, qui publica hodie disputatione Syntagma meum propter assertam universalem gratiam allegatis verbis meis in Theſibus suis ut Heterodoxum & Huterianum traduxit & fugillavit, non sine magno multorum offendiculo. Collega meus D. Bergius, qui Excellentiam vestram mecum officiosissime salutat, partes nostras contra eum piè simul & cordatè egit; sed furdo narratur fabula: quoniam Palladio suo, absoluto Reprobationis decreto, ex quo omnes, qui non sunt singulariter electi, nulla prorsus ratione damnationem evitare possint. Quid ad hæc dicent Lutherani ad contestationem Ecclesiarum Evangelicarum toties à piis Majoribus nostris provocati, si videant nos viperinis moribus invicem confici, & gratiam universalem omni modo negari, qua conciones Evangelicas enervari ad ravum usque inculcant: Moderata docendi ratio sordet huic seculo, & ἀρετῆς multis bonis utrinque improbata plerisque allubescit. Conscientiam liberabimus, quantum possumus, & patientiam deinceps omnibus malis, Deo juvante, opponemus. Acta Alenconienſia hisce diebus à D. Theſtreſaito Parisiensi Theologo, Viro moderato, accepi, quibus causa Testartii & Admiraldi cognita & definita fuit. Vobis ea haud dubiè nota sunt. Quid verò de iis videatur, velim mecum amiciter communicari. Utinam Buceros, Junios & his similes Theologos haberemus redivivos, viros sapientia & charitate maxima præditos; nam aliter sentirent quam proletrarii, aut etiam ὁσὶνδεσμοὶ quidam novitii. Sunt nunc multi in vulneribus Ecclesiæ ungues. Sed quid quiritor? Claudio, advocatus laboribus Officii. Bene vale, Vir maxime, & salve παννίχι.

Breme. ii. Kal. Jun. An. c10 10c xli.

## CCCXIV.



## CCCXIV.

*Doctissimo & Paternæ Laudis æmulo  
Adolescenti H. Vossio, J. Pyrædus, S.*

**T***ἡρώτων ἢ δ' ἐπείδῃ.* Liceat enim mihi cantatissimo illo versiculo te affari, doctif. adolescens, dum in animo reputo, quam benignè quam honorificè à Patre tuo, non jam dicam quod universo orbe celeberrimum est, clarissimo & doctissimo sed virorum optimo exceptus sim, quot insuper à te & fratre, heu quondam tuo! charitatis officiis cumulatus, non possum me *ἀχαρείας* crimine, quod ego foedissimum semper duxi, nisi ex parte exsolvere; quod animo tamen meo non inedisisse penitus Deum verè testor. Præterquam enim quod hac in parte non omnino mihi defui, datis ad filium meum sæpe literis, quibus illi haud maxime in mandatis dabam, ut aut vos præfens verbis meis saluaret, aut saltem per internuncios salutem deferri curaret, etiam illud in causa fuit, quod didiceram duas aut tres Epistolas, quas ad clariss. & nobiliss. V. Constant. Huggenum dederam, interceptas fuisse, aut intercidisse, & cum iis plurimas ad Statium & Tacitum emendationes, quas per eundem nobiliss. V. tecum & Gronovio mihi per te amicissimo communicatas volebam. Accidit insuper ut dilata, præter spem, in longum tempus, quam in hanc urbem institueram profectio, eadem opera scribendi ad te tempus protulerim. Sed tam pudendæ moræ pudorem auxit Clariss. Salmasii tam optatus nobis adventus, quam vobis gravis illius discessus. Ab eo didici de Patre tuo quæ me statim summâ lætitiâ perfudere, quam augebant reliqua de vobis, nisi subito turbasset & absterfisset fere omnem de fratris tui acerbato fato facta mentio, qui cum Patri chariss. fratri tibi amantissimo, toti familiæ vestræ, universo denique literatorum ordini æternum lugendus occiderit, nulli tamen flebilior quam mihi. Quem si fata virum! sed in tanto luctu & negotiorum quibus obvolvor & involveris, nihil à me jam expectes, quo aut desiderium illius vestrum, aut meum solari possim. Illud enim in tanta clade verè expertus sum, Parvi dolores loquuntur, magni tacent. Quod ut maxime vellem *εἰς βοήθημα τῆς λύπης*, tempus fortè & verba quæ præpedit dolor, nec mihi satis in expedito sunt, me deficerent. Itaq; ad lætiora, dilata in aliud tempus tam gravis calus memoria, desle-

ctam. Nam quid, obsecro, jucundius aut honorificentius à Clariss. Salmasio audire potui, quàm te exquisitissimis tuis ad Justinum notis æternum mihi nomen adstruxisse, nullo tamen aut perexiguo meo merito? Potes certè tu sine ullo famæ tuæ damno & intertrimento, quæ tecum nata per te in immensum crescit aliquid mihi de tua luce impertire, idem faciens ut qui lumen de lumine accenderit; vereor tamen ne apud eos qui me penitius norunt, tantum affectui tuo dedisse, quantum veritati detraxisse videaris. *Οὐκ οἶμαι τοι δεῖς εἶναι, ἢ μ' ἀδανδριστὸν εἶσθαι.* Nescio enim, ex animo dico, pudore an lætitiâ suffusus sim, dum me quoque principibus permixtum agnovi. An obsecro te tanti erant observatiunculæ illæ, quæ mihi Amstelodamo Lugdunum naviganti *ὁδῷ πέραν* inter Nautarum & Vectorum strepitus notatæ erant, ut me tot titulorum & elogiorum mole fortè an invidia onerares. Hac quidem parte legis illius immemor quæ prætia rerum ex affectu æstimari vetat. Sed paucis tam parvo fama posteritatis constitit, quam mihi, qui quod ab ingenio meo aut doctrina sperare non poteram, à commendatione tua tam facile, tam præclarè impetraverim. Quod nescio an tibi acceptum & inter beneficia referre debeam, qui me è tenebris eruere, & sic melius latentem in tantam lucem producere conaris. Etenim aut tibi tantæ ignoti hæcenus hominis laudationis invidia sustinenda est, aut mihi contra anteaactæ vitæ institutum & virium mearum conscientiam adnendum est, ne tu temerè aut nimia charitate hæc de me prædicasse videaris. Unde autem id consequi possim non video, nisi ad pueritiæ studia quæ mihi satis fœliciter cesserant, recurrendum, aut de novo triginta annorum miserè in summis ferè calamitatibus, aut agrorum cultura deperdita tempora refarcienda sint; quod ut vellem maxime & per negotia liceret, ætas jam fessâ & ingravescens, totque insuper adversis fracta, in tanta præsertim ingeniorum vilitate, non fineret; nisi igniculis quibusdam gloriæ, cujus apud bonos, non leve præmium est, succenderet, quos aut tu cum patre & fratre tuo, aut Gronovius noster mihi è Batavia discedenti subdidisti. Quamvis enim ruri delitescere & unius memet dominum fecisse latebræ, unica mihi cura esset: quamvis omni libraria supellectile destitutus essem, quam fratri juniore, abjecto omni instrumento artis clausaque taberna tradideram, ut tamen Gronovio, qui tum Statium excolebat

fatisfacere; cepi etiamnum fallendo labori Poetam illum in manus, in quo aut emendavi aut notavi non pauca, quæ serò ad Ampliss. & longe Clarissim. Virum Sarravium Senatorem Paris. misi, tam ipsius gratia quam Gronovii, quem Lutetiam venturum ab ipso Sarravio per literas didiceram. Quo factum est, ut cum tantisper hic Gronovius commoratus esset & Sarravius paulo post cum delectis à Senatu Parisiens. Senatoribus, Rothomagum juri provinciam dicundo à Rege missus esset, ego interim utroque exciderim brevique postea Gronovium Massilia solvisse tum peragrata Gallia, & Venetias profectum esse, per Literas ejusdem Sarravii ad Salmasium didicerim. Post exactum autem Statium quum unicum penes me Tacitum ex reliquis libris haberem, ausus sum etiam quædam in tantum Authorem, post tot tantorumque virorum, quorum scripta omnino, nomine fere, mihi ignota erant, cujus postremi conatus *ἀποστολὴν* quædam ad te misissem, nisi quotidie messis sub falce cresceret, brevi omnia missurus ad te; & quia hæc & alia in lucem edere amicis & magnis viris impellentibus animus est, gratissimum facies si quæ ad illum observatæ tibi aut Doctiss. Patri tuo, eorum me participem esse velis, ut aliquatenus te retaliare possim. Habebis interea summarium eorum, quæ ad Statium elucubravi. Etiam quædam olim mihi puero notata ad Lucanum addidi, quia à Salmasio spes nobis injecta est te nobis illum terribissimum daturum propediem. Quo successu tenuem hunc laborem susceperim tuum erit judicium; interim meliora à te expecto, ipse meliora à te monitus daturus. Utrumque candidus imperti, aut his utere mecum, tam bene quam tibi pararis, modo ne in publicum prodeant quæ ad Statium pertinent, quem brevi editurus sum, & ad vos missurus. Cum autem hæc scriberem, opportunè reddita mihi est Clariss. Huggenu honorifica & amica pariter Epistola, ad quem protinus rescripsi, & in eodem fasce & sub eodem involucri omnia quæ ad te pertinent obsignavi, eumque oravi, ut postquam ea aut percurrisset aut exscribi curasset, ad te perferri curaret; vicissimque si quid ad me rescripturus esses, per eum illorum mihi copia fugerit, quod ut certius & citius procurari possit, obsecro te ut non contentus ea via, uti velis opportunitate negotiatoris Bergeracensis, qui Amstelodami agit nomine Villepontus, qui quicquid à te venerit Burdegalam deferen-

dum ad Henricum Boudeüyns, quæ illius est humanitas & affectus erga me curabit. Adjecissem his quædam Epigrammata à me nuper effusa potius quam elaborata, nisi ea fere jam sub prælo essent, & te tanta mole ineptiarum obruere vererer. Satis in præsentia harum veniam impetrare. Sed jam finem faciam, postquam Chariss. Patri tuo, lectissimæ Matronæ Matri tuæ mihi summopere colendis, totique adeo sanctissimæ familiæ tuæ prospera omnia ex animo voverim. Vale tu, atque iterum vale, merito tuo mihi amicissime Adolefcens, meque; tui tuorumque observantissimum porro quod facis amare perge.

*Dat. Lutetiae xii. Cal. Maias,*  
Salutis nobis per Christum  
partæ, 1641.

## CCCXV.

Præstantissime Vossi, & quia religiosum me Cultorem tui non aspernaris numero amicorum adscribere, eoque nomine censere, Amice summe,

**S**ollicitè mihi anquirenti qua usus opportunitate responderem ad priores quas ad me dedisti Literas pr. Kal. Sextiles c15 15c xli. ecce alteræ à te scriptæ quidem Kal. Decemb. mihi verò redditæ Kal. Maiis superveniunt. Tantum moræ desiderii nostrum mutuis, (ut etiam de meis hinc ad te missis suspicari datur) post emensum mare non ita magnum creat tantilla intercapedo terræ, xx. sc. à Londino milliarius. Tanquam verò parum foret me nihil tale meritum literarum tuarum humanitate dignari, pergit propensa tua benignitas, jam ante satis obligatum, irremunerabili librorum beneficio ulterius mancipare, quos ab ingeniis vegetis, judiciis solide tersis profectos, ab amicissima manu quam semper admiratus exosculabar missos, nisi venerer, dispeream male, mortalium omnium stupidissimus, ingrattissimus. Ut enim de exactissima Maimonidæ editione eruditissimi filii tui tralatione notisque exornata taceam: (quis enim juvenis ad literas nati & formati, jamque *μαγεστρα*, merita verbis consequi velit, æquare valeat?) quàm altè atque ex ipsis adeo reconditissimæ Scientiæ archivis, Theologiæ Gentilis & Philosophiæ Christianæ (tanquam Nili ex Goyome & Lunæ montibus per Zaire & Zambre lacus, Abyssinos populos, Nubias regiones, Æthiopiam, Ægyptum, septena dein ostia in Mediterra-

raneum deflui) originem & progressum ex Antiquitatis rupibus & ruderibus, per Theologorum scita, Philosophorum placita, Poetarum mysteria, Historicorum factos & fidem ad nos deducis, omnigenâ fretus eruditione, Linguarum cognitione penitissimâ, ingenii vena mascula, iudicii acie heroicâ, methodi luce plane divinâ. Sed unde mihi hunc calculum? Homini à Musis averso, quarum castra Academica adolescens olim deserui, nomenque dedi ad Colonias Martias? atque inibi florem ætatis diu exercui: Terra tandem mariq; per Galliam, Hispaniam, Hiberniam jactatum me paupertas impulit audax in hoc pistrinum, docere coactum antequam didicissem, redegitque dura Dea ut necesse haberem ad studia per fastidium relicta me recipere. Ubi nec inutili nec planè ingloria defunctus opera *Strophilulæ* & *mesnilulæ* emensus, *amoraustulæ* jam sperare cepti. Sed & hujus spei incisus est nervus, exorto apud nos diffidio usque ad arma civilia; quorum furorem avertat precor Deus, qui te, Vir clarissime, mihiq; charissime, tuos tuaq; tueatur. Ita vover

Merito tuo,

Ex agro Cantiano,  
prid. Kal. Quin-  
tilis, 1641.

voto meo tuus,

Tho. Farnabius.

### CCCXVI.

Excellentissime, Clarissime, Doctissimeque Domine Vossii, amice fidelissimâ gratiâ conjunctissime,

**A**B excessu communis amici nostri Clariss. Domini Meursii *de maximo* tanta exercuit animum meum consternatio, ut in unico isto viro omnium ferè amicorum me fecisse jacturam putaverim. Id causâ fuit, quod & tui quædam quasi temporaria me inceserit oblivio; quam consueta literarum misiculatione in præsens abstergendam duxi. Te etenim ex omni amicorum numero, quos Belgium mihi concitavit, solum me reliquum fecit *in ætate nra*. In primis nemo illic mortaliū præter te nunc est; cui debent aliquid studia mea, posteaquam heu! amisi chariss. caput D. Johannem Isacium Pontanum, etiam *vultu et vultu dñi*. Nisi si etiamnum in pectore Cl. Scriverii nostri, amoris erga me pristini vivat scintillula. Nam de Heinii affectu vereor ne certi aliquid sperare mihi liceat; quippe quem verilis animi hominem & in amicitia in-

constantem esse perhibent. Utut sit, ipsius benevolentiam tantopere non ambio, modo tu me favore, quo soles, prosequi non desinas. Salmasio equidem, Viro celeberrimo, & sæculi nostri Varroni, innotescere vehementer discuperem; si idoneus mihi pararius & proxeneta obtingeret, qui animos nostros mutui amoris vinculo conjungeret, aut saltem ad amicitiam ipsius facilem mihi aditum pararet. Huic rei cum neminem te aptiorem sciam, peramanter rogo, imò omnibus abs te precibus contendo, ut fidelem hac in parte operam mihi præstes, & quacunq; poteris ratione (poteris autem plurimis) tanti viri favorem & benevolentiam conciliare mihiq; comparare studeas. Ut vero ipse, fortasse ardui, hujus negotii initium facerem & velut fundamentum ponerem, literas Salmasio inscriptas exhibendas duxi; quas velim prima quoque occasione Lugdunum Batavorum, per bonæ fidei internuncium, ad Salmasium perferendas cures; verum non sine adjunctis tuis literis, quæ nostris gratiam pariant & auctoritatem. Epistolio meo comitem dedi Simplicii Commentarium in Epictetum, manu Clariss. Meursii ad exemplar Manuscriptum diligenter emendatum, quem ipsi fore gratissimum confido. Cæterum nullus dubito, quin lucem aspexerit Tractatus tuus de Origine Idololatriæ. Si ita est, obsecro te istius libri unico saltem exemplari me bees atq; impertias. Quinimo nisi grave tibi nimis sit, majorem in modum abs te peto, ut Henrici Canisii Antiquas Lectiones, quocunque tandem pretio, isthic cœmere, & huic Bibliopecto nostro domuitionem paranti committere digneris: cui in mandatis dedi, ut meo nomine solveret quicquid petieris. Vehementer enim indigeo istius libri usu. Quod me attinet, totum nunc habet Saxo meus; quem tandem aliquando post tam diu frustratam multorum expectationem publici juris facere constitui, Deo juvante & vitam ac valitudinem clementer suppeditante. Vale, Vir eminentissime, & me, ut soles, ama.

Soræ v. Id. Junii,  
clō Io c xli.

Tui observantiss.

Steph. Johani. Stephanus.

### CCCVII.



## CCCXVII.

Nescio sane, Vir celeberrime & amicorum maxime, an Dantis canus ad vos iturus certaminum nostrorum initia proculdubio exhibuit, in quæ conjecti sumus à malefico & ingrato discipulo. Nos stamus pro Gratia universali ac sufficiente, quam cum speciali Electionis gratia nihil pugnare existimamus. Nisi illam asseramus, non videmus quomodo Evangelium satis plenè docere & iustitiam Dei damnantis eos, qui non credunt in Christum, tueri possimus. Sed sunt qui hanc doctrinam dicunt putidam & humani cerebri figmentum. Mirum, inter Theologos Christianos esse, qui secius quam Jurisconsulti de favoribus humanis, de favore divino sentiant. Illos enim prudentes juris ampliandos censent. Nunc iterum exemplar mitto Thesium nostrarum, si prius forsitan non sit redditum. Synodus Suyd-Hollandica nuper Rotodami coacta de Liticula Scholæ nostræ ad Senatum simul & nos scribere non dubitavit, & nobis impropere hæreses antiquitus damnatas, Sabellianismum, Photinianismum, Pelagianismum, Socinianismum, imo Sadducæismum & Atheismum; de quibus ne per febrim unquam somniavimus. Respondebimus consilio senatu, qui ipso die nos in Curiam vocat, ut de hac re deliberaretur, & quod controversiosum est prudenter sopiretur: quod ut fiat, Deum veneror. Vorstius & Glaneus harum latores, vivarum instar epistolarum erunt, & statum nostrum vobis prolixè exponent. Quapropter ego nolo latius. Bene vale, Virorum maxime & salve à nobis *travini*.

Brem. xxiii. Sex-  
til. clc lxx xli.  
secundum veterem  
formulam.

Clar. Tue

observantissimus,

J. Crocius.

## CCCXVIII.

Vir clarissime, Domine observande,

Jamdudum gestit animus aliquid ad te literarum dare, quibus significarem, quanti faciam, quod tibi innotuerim. Merebatur id summa humanitas tua, qui per varios amicos meos sapius me salu-

tari, benevolentiamq; mihi tuam declarari volueris. Impellebat me admiratio eruditionis tuæ. Ei proposito exequendo, quæ hætenus defuit, nunc data est occasio. Neque enim debuit, sine literarum familiariori alloquio, te adire libellus hic, qui his diebus ex Musæo meo erupit: quem, quæso, ita recipias, ut ab æstimatore tui profectum, receptum ita judices, ut nec veritati amicum, si forte, officere, nec ea, ubi non affecutus fuerit, carere permittas. Certè enim tuum est in hoc negotio veritatem clarissimam facere, qui eam & prophana & ecclesiastica Historiæ cognitionem, sacrarumque literarum peritiam, itaque subactum iudicium habes, ut melius quàm quivis alius ea de re disserere possis. Meum certè nihil nisi voluntatem sacras Literas illustrandi consensumque cum orthodoxa Ecclesia laudari, aut potius probari volo. Magnus, ut aiunt, est vir ille, cuius sententia à nostra dissidet. Quem tamen non possum mihi persuadere seriò id spectasse, quod quidam volunt, ut Papa non sit Antichristus. Potius est, ut credam, voluisse ipsum ostendere, quo loco is, tanquam Antichristus, habendus sit, qui nihilo melioribus encomiis in S. Literis afficiatur, quàm quibus Caius aut quivis alius Impius, Idololatra, Tyrannus, Impostor, affici potuerint. Si tamen alia mens ipsius est, *ἀγὼν ἀντιχρίστου τοῦ ἀληθινοῦ*. Ego cum magno isto viro litigare non volui, quod quovis tempore mihi licebat, quid in istis sacris textibus dici putarem, exponere visum est. Si alius aliter iudicat, præstare non possum. Comparet dicta, Lector, & verum vincat. Tu verò, Vir clarissime, si me iudicii tui certiores feceris, maximo me affeceris beneficio. Vale & bono Literarum perenna.

Clar. Tue

observantissimus,

Johannes Cocceius.

## CCCXIX.

Eminentissime Vir, Amice maxime,

CUM ad vos rediturus esset amicissimus noster Fontanus Medicus, qui per aliquot dies nos Daventriæ dignatus est præsentia sua, dimittere eum

eum nolui sine Literis meis ad te, quem ego perpetua Observantia mihi colendum sumi, & cujus memoriam non nisi cum vita deponam. Ejus affectus mei testimonium perhibebit hic noster, qui has ad te defert, eademque opera renunciabit, quanto cum honore, cum & præsens adesset noster Isendornius, sermo nobis fuerit de clarissimo Domino Vossio, non sine ingeminatione illius voti, ut is diu nobis sit superstes. Utinam vero, Vir clarissime, occupationes tuas, quas promovendis Literis perpetuo impendis, aliaque curæ domesticæ tantum otii tibi concederent, ut ad exemplum Fontani excursionem aliqua in hæc oras, suavissimoque amicorum alloquio ac hospitalitate, mentem aliquatenus reficeret; foret id nobis supra quam dici potest acceptum. Optamus id quidem vehementer; sed si respicimus incommoda ingravescentis ætatis, voto isto potiri vix licebit. Spero autem me circa Nundinas Amstelodamenses, si Deus volet, in vestram urbem venturum, tunc & te videbo, coramque jucundum os oculosque suaviabor. Interea summo cum desiderio exspectamus Literas à Gronovio, vel potius eum ipsum, ut subeat apud nos Professionem, ad quam illum vota & studia nostra jam pridem destinarunt. In suis, quas ante tres menses ab eo accepi, valde miseratur jacturam nostrarum Literarum quibus statum & conditionem hujus Professionis pluribus perscripseram; ideoque jam in alium id munus collatum esse existimat. Respondi autem, rem adhuc esse integram, nostraque intercessione effectum, ut Proceres nostri, redditum illius se expectaturos, promiserint, modo certiores reddamur, ipsum hanc vocationem suscepturum. Postquam redux factus fuerit in Hollandiam, sine dubio te compellabit, antequam ad nos scribat, vel ipsum se sistat. Rogo itaque, Vir clarissime, ut rei Literariæ hoc officium præstes, optimoque Gronovio calcar addas, ne ulterius tergiversetur, oblatam hanc felicitatem, quam multi concupiverunt, pauci verò sunt adepti, serio amplecti. Experietur sane, rebus ac studiis suis hac ratione optime consuli, multumque præsidii in amicorum benevolentia hic sibi repositum esse. De Professione Trajectina necdum aliquid certi est statutum. Deliberant adhuc à quorum suffragio res pender. Fervor iste, quo pridem terebantur ad tertium Juris Professorem vocandum, videtur frigore aliquo contactus. Interim nostra sorte hic contenti vivimus, si non æquè splen-

dida, certè non minus quieta, & studii nostris accommoda. Nostrum quondam spectrum nocturnum Trajecti jam moratur. Si is favorem illum, quo nonnulli è primariis in nos propensi videbantur, poterit imminuere, sine dubio ostendet se ea in re non alium quàm à multis bonis viris, quos arrodere consuevit, hætenus est cognitus. Nisi molestum tibi est, Vir clarissime, data occasione uti me infines in gratiam clarissimi Domini Lyræi, summo opere rogo. Eam quippe commendationem mihi multum utilitatis allaturam certo scio. Deus Optimus Maximus te, Vir clarissime, cum tota familia benignissime protegat.

*Dabam devotissimo  
affectu Daventriæ  
Idibus August. ann.  
clō lxx xli.*

*Tuæ Eminentie*

*Omni Fide & Officio*

*addictissimus,*

*J. Christenius.*

### CCCXX.

**P**lacuit, Vir maxime, harum latori, prælustri Proconsulis Dantiscani ab Hobten filii præfecto, in Academiam Leidensem profecturo in conspectum tuum me venire paratio, ex quo didicerat omnibus bonis adhuc à me missis fores Musarum tuarum fuisse apertas. Patere igitur Virorum amicissime, ut & hic experiatur id nos ex vero sibi testatum fuisse. Concerationum Scholasticarum, in quas nos Zelotarum quorundam importunitas conjecit, ἀποκαταστάσις quoddam mitto, ut intelligas in quo nunc versemur pulvere. Synodus Sudhollandica Roterdami nuper celebrata, ut & Professores Leidenenses pessimè de nobis informati videntur: quippe qui literis suis tum ad Magistratum nostrum, tum ad Collegium Scholasticum & Ecclesiasticum datis deplorant quod Schola & Ecclesia hæresibus variis contaminetur, quæ hic fuerit prælustri officina Veritatis & Orthodoxias. Putant enim hic foveri Sabelianismum, Pelagianismum, Semipelagianismum, Photinianismum, Sadducæismum, Atheismum. Vix Monstra horribiliora Orcus habet, quàm apud nos stabulari credunt optimi illi viri. Nimirum quos dogma de universali & sufficienti gratia non poterat de ponte dejicere; illi tot ab antiqua

tiqua Ecclesia damnatis hæresibus erant gravandi. Miror vestros tam præcipientes fuisse, ut se ad æmulatorum nostrorum prava desideria rebus nostris immiscuerint & præjudiciis suis gravare voluerint. Spero Deum & Magistratum illius Ministrum remedium inventurum tanto malo & morbo. Precibus & Consilio nos juvabis, ne causam bonam malè agendo perdamus. Bene vale, & salve *מוסי* à D. Bergio, D. Willio & me, Virorum optime, maxime.

R. D. T.

*Brem. Aug. 4.  
cl. 10 cxli. se-  
dum veterem  
formulam.*

Observantissimus,

L. Crocius.

## CCCXXI.

Vir celeberrime, Domine &amp; Fautor observande,

**P**lus tibi debeo, quod me Literis tuis manu tua scriptis dignatus es, quam si per Amanuensem nitidius, ut ais, scriptæ essent. Nec meas ego nitore quam affectu æstimari epistolas malim. Candidæ mihi quàm politæ magis placent. Si ita est, ut scribis, illustrem Virum H. G. esse Authorem Commentarii locorum de Antichristo, isque ita sentit, ut is Commentarius præ se ferre videtur; doleo sanè ipsius vicem; & hoc mihi restat dicere quod solent Rabini non absurdè *שרא ליה מריה*. Ego verò de Authore ita scripseram, non quod omninò ambigerem, quis esset, aut quasi ignorarem, magnos etiam viros labi posse, & eorum plerumque magnos lapsus esse; sed quod ad illum ipsum virum illustrem hoc scripseris, vel saltem illa mente, quæ omnis Ecclesiæ Reformatæ sententiam uno ictu tollit, scripseris nollem, idque illo viro indignum, atque eum scopum, quem indigebat Epistola mea longè minùs absurdum judicabam. Mihi verò dolet, (ita æstimo eruditionem tanti Viri) accidisse, ut, qua in re laudatorem ipsum me habiturum confidebam, si quid conatus essem, in ea haberem adversarium. Nam si quis putet, ea me causâ delatum esse ad hanc descriptionem, ut me componerem magno Viro, isme ignorat planissime. Utinam voluisset ingenium suum veritati accommodare! Quàm exactè, quàm eruditè, quàm ornatè, quàm copiosè, ac perspicuè idem argumentum, contractis clarissimis Scripturarum testimoniis, Prophetarumque comparatis vaticiniis, phrasibus enucleatis, ænigmatibus solutis, additâ luce Historia-

rum, gravi & solido interposito de singulis rebus iudicio potuisset illustrare! Quàm gestirem in illis confertissima doctrina Commentariis habitare, quæ imaginor ab ipso proditura fuisse, si verum quæreret! Nunc rei indignitas miseris nobis & pueris, qui alioqui tantos viros vix contra contueri audemus, vocem extorquet. Quod si videt, multa superstitiosè ac tyrannicè geri in Papatu (quæ certè tot ac tanta sunt, ut animus pius non possit non cohorescere) suadebit nobis, ut redeamus ad illud regnum Superstitionis & Tyrannidis? Et annon videt, Superstitionem & Tyrannidem capitales Antichristi notas esse? Si quid verò etiam in aliis Ecclesiis non probat (nec miror: sunt enim varæ Ecclesiæ quædam plus, quædam minus de Antichristi doctrina & moribus trahentes) hæcine illas sanandi commoda ratio erat, ut persuaderet nobis, Papatum ut Antichristianum non damnari sacris Literis, in quo tamen multa superstitiosè & tyrannicè fiunt; ut scilicet ad illum tanquam sinceritatis exemplar redigantur & reformentur. Meritur omnia Doctoribus antiquis. Potes nos (Vir excellentissime) omnium optime erudire, quantum deferendum sit Doctoribus vel antiquissimis extra Scripturam loquentibus; & an hodiernus Papatus cum antiquis illis verè Doctoribus, non seductoribus consentiat. Hoc tamen, quod de Antichristo nos docet, scio, quod nec veterum Doctorum sit sententia, nec Pontificiorum. Sed quo dilabor? Neque enim tecum, Vir excellentissime, mihi agendum est, tanquam cum ipsius advocato: qui tibi, ut rerum harum gnarissimo & locupleti arbitro conatum & studium meum, ut aliis piis & doctis Viris, vehementer cupio probari, qui alias non perfunctorius laborum meorum sat tenuium laudator es. Qua fiducia audeo à te contendere, ut & consilium meum (qui non tam in H. G. illustri Viro, adversarium legi, quam occasionem datam de iisdem rebus, de quibus ille dixit, & pro Conscientia & pro Officio dicendi, non omisi) benignè interpreteris, lapsus meos ac defectus humaniter feras & indices. Quod porrò me ad similia veteribus elaboranda exstimulas, pro lege accipio: & in eo sum, prout cura mihi demandata efflagitat, quantumq; labores quotidiani permittunt, totus. Fateri tamen audeo tibi, Vir eximie, non mediocriter studium aliquando nostrum hebetari temporum, an hominum iniquitate. Quò enim multum laborasse, toruisse se noctes & dies, collegisse, scripsisse, descripsisse,



descripsisse, si perfecta cum blattis tineisque certare debent? Nihil ego magis cum officio meo atque scopo studiorum conjunctum invenio, quàm sedula meditatione Scripturæ sententiam ex genio linguæ illustrare. In istiusmodi genere aliquid nonnunquam nascitur apud me, quo, ut mihi ipsi profecisse, ita me rudioribus prodesse posse videor. Inter ista est Jobus meus. Sed exerior hic tantam editorum (qui respuunt quicquid non statim sortem cum centesima redditurum est) morositatem, dum à Typographis (sunt autem qui dimidium impensarum pro copia sua vellent subire) rogantur, ut mihi videar à Midis istis stultis & ingratis operam meam ut indignam luce & oculis hominum ignominia notatam domum referre: quod indignum & intolerabile est. Si sic pergitur, pereunt studia & tandem nihil nisi fabulæ & cantilenæ legentur. Vide quo me abducatur humanitas tua. Ita enim te abutor, ut mihi jam videar *improbus*. Quod aliquando vix effugimus, quum lubenter scribimus & tempus, ut mihi nunc, conceditur. Convector enim meus Eques Polonus, qui his Literis aditum ad tuam comitatem querere voluit, in tempore me de itinere suo admonuit. Sed hic abrumpo, Vir eximie, teque divinæ curæ commendo. Vale, & me ama.

Scribam die 18. Cl. T. Observantissimus,  
Ostob. 1641.

J. Cocceius.

### CCCXXII.

Excellentissime Domine,

**V**Ereor ne Literarum à me officium requiras, quod pro summis tuis in me meritis jam sæpe misissem, nisi usque ad meum ex Italia distulissem reditum, cujus forsitan celeritatem miraberis. Istitis itaque literis complectere placuit, me salvum & sospitem huc ex Italia rediisse, felicissimumque finem meæ imposuisse peregrinationi, sic quidem ut ego qui ingredi illam diffidebam, semper magis adversos rerum exitus metuens, quàm sperans secundos, animadvertam summam Dei ter Opt. Max. in me conservando clementiam. Multas casus me tibi varietates, itineris incommoda, quæ optabiles in experiendo fuerunt minime, nihil attinet exponere, quoniam confido securam illarum recordationem, tandem jucundam allaturam

delectationem. Quid tantarum gentium, nationum, linguarumque varietatibus delectabilis! Helvetos, Grifones populos more humanæ cupidinis vidi non minimis difficultatibus emensus Alpes perennis nivibus obrutas, illas cum ascenderem insolentia itineris interdum timebam, nam omnia natura opere velut atque consulto præceps. Basiliam quoque tetigi, unde Argentoratum proficiscebar, ibi invisi D. Freinshemium. Is plurimam salutem tibi, excellentissime Domine, jussit nuntiari. Ejus Viri ingenium, à multis admiratum, Argentoratenfes non magni faciunt, sicuti ab iis, qui quotidie simul ibi cum illo vivunt habeo. De toto statu meo si scire cupias, quid hic nunc post reditum agam, quam longum meum discessum à patria, & à te futurum putem, ex istis intelligere poteris; me fere adhuc per tres menses hic commoraturum, si mihi id esse emolumento sciam. Exercitia tam animi quàm corporis, quæque me digna putem interdum tracto. Dilectum tuum filium Dominum Isaacum sæpissime inviso, & gaudeo illam ipsam conversandi cum illo facultatem obvenisse hic mihi rursus, quæ Amsterodami. Quod superest etiam atque etiam rogo, ne meo nomine dilectissimam tuam conjugem, & filios tuos charissimos graveris salutare. Celeritati mearum Literarum ut indulgeas, utque me inter tuos ames ad meam Observantiam. Vale.

*Æternum tuus,*

Datum Lutetie  
Parisiorum die  
xiii. Septembris  
clō Io c xli.

qui excellentiss. Nomini tui

omnia Officia desert,

Ernestus Johannes Creutz.

### CCCXXIII.

Clarissimo & incomparabili Viro Domino  
Gerardo Joanni Voslio Salutem &  
Observantiam, D. D. Godefridus  
Cretschmarus.

**D**A veniam, Vir Clarissime, si etiam nunc mihi gratulor, ac pio quodam animo deprædico summam illam virtutem tuam & humanitatem, qua me non ita pridem accipere dignatus es, hominem ignotum & parum à se commendabilem,

F f

nisi

nisi forsan vel cultu tui, & observantiae professione, vel Literis Meursianis quas exhibui. Quanquam non magis istis adscribo, quam virtuti tuae, quippe quae tam generosa est, ut neminem bonum ab aditu excludat, admittat omnes, si non hominum, saltem humanitatis causa, ne non semper optimus sis. Rara bonitas in tam illustri dignitatis ac famae fastigio, quo tua te Virtus & Doctrinae meritum eminare voluit, sed quo rarior, eo major laude dignior haberi meretur. Quanquam satius duco silentii Religione venerari, quam exiguissimae scriptionis conatu deterere: ea enim magnitudine animi es, ut malis te Virum bonum esse quam dici, ac propensius facere quam audire praecleara. Quae incredibilis tua bonitas in eam me libertatem excitat & fiduciam, ut non solum gratias, sed majus etiam beneficium tibi me debere velim. Panegyricum enim sermonem, quem ante biennium, cum adhuc Sorae viverem, meritis ac memoriae clarissimi Viri Domini Johannis Meursii consecravi, ea qua decet reverentia ad te defero, defero autem non sui, non Autoris, sed humanitatis vestrae, sed argumenti, id est, Meursii fiducia securus. Accipe, Vir summe, & si quid exorare me pateris in honorem Meursii tui, lege & cense; illud cuiusvis est, hoc iudicium requirit, & imprimis tuum, cujus tanta me & omne literarum nomen incescit observantia atque auctoritas, ut omnibus me compendiosè probatum iri existimem, si tibi me prius, & nominis tui patrocinio probavero. Da veniam, clarissime Domine, & si quid vel pravi erit, vel ambigui, pro libera iudicii tui auctoritate, & quo teneris gratificandi hominibus studio, mone & corrige, admonitio tua tam grata mihi erit quam honorifica ac salutaris; inter eos enim sum, qui à vobis moneri partem laudis putant & eruditionis. Non possum equidem non vereri, ne aut ignarus videar virtutis vestrae ac dignitatis, aut oblitus meae cum modestiae tum tenuitatis, quod tam exiguum pietatis erga Praeceptorem documentum iudicio submittam tuo, & quod majus nomen est, tempora tua morari audeam, quae non nisi publico literarum bono destinantur; sed solatium habeo humanitatem & praecellentem animi tui moderationem, quae tam magnanima est, ut etiam publice prodesse putet, si quos ipsa ornare possit aut juvare plurimum. Accedit praeterea Meursii nomen, quod facile mihi veniam à te impetrabit, qui tam bonus quam doctus es, & bene de ingeniis mereri non

alia causa velis quam quatenus Viro bono dignum est. Vale, gloriosum seculi decus, decusque nostrum, & libertatem hancce meam, si non alio nomine, saltem pietatis professione, & fiduciae erga te meae vel proba vel excusa. Deus te conservet tam semper felicem, quam semper cognovimus optimum & benignum.

Ex Museo meo Lugduni Batav.  
16. Cal. Octobris An. 1641.

## CCCXXIV.

Vir Praestantissime,

Non eram tanti, quem amicissimus Collega meus D. Lindanus tibi commendaret, & in notitiam benevolentiamque vestram insinuaret. Jam vel hoc nomine Hesychie editio allubescit, quod tantam rem mihi *καὶ ἀσχετὴ* confecerit. Tu enim eruditorum eximie & tanti in orbe literato nominis & meriti prolixè omnia polliceris, quod mihi sperare improbum fuisset, nisi *τὸ φιλοφιλὲν* σε innotuisset. Hesychieum autem tarde & cunctanter, hortantibus Collegis amiciss. D.D. Lindano & Cocceio apprehendi, vergente quidem huc & trahente prona mea voluntate, rapiente autem necessitate penè rei ob publicam utilitatem & ad exornationem muneris suscepti; at repellebat conscientia tenuitatis, quae optaret tanto Grammatico doctiorem operam ad moveri. Caterum, quod intelligo de eruditissimo Viro, filio vestro, eum cogitare de hac re, id me tantum reprimat, quantum tua pollicita impellunt. Itaque velim scire, quanti temporis res sit & quantae lubentiae. Si enim magnopere velit & in propinquo spes exitus sit, resilire me praestabit & locum cedere meliori. Sin autem, fervide urgebo *τὸ ἐκδοῦν τὸ ἐπὶ μὲν*, fretus vestra tam benigna pollicitatione, simulque aliorum insignium virorum, qui Symbola conferre ultro etiam promiserunt. Tui autem, Vir maxime, exemplaris cuius usus erit, significabimus, & post brevissimi temporis usuram, fide optima, remitteremus. Plura hoc tempore, incumbentibus aliis & tabellario festinante, non addo: proximis prolixior ero, nisi offendendi metus inhibeat. Publica à Domino Lindano intelliges. Vale, & nos ab his initiis amare perge. Salutem autem plurimam Domino Barlaeo, Viro summo, praeter tuos,

tuos, & inter eos Clarissimum Ifacium, quem tibi & Reipublicæ Literariæ Deus velit diurnare.

*Raptim ad diem  
xvi. Kal. Octob.  
Jul.*

*Tuus & tuus,*

Christ. Schotanus.

G. L. Profess.

CCCXXV.

Clarissime Virorum,

**S**ummo cum gaudio accepi ab his, qui Amstelodamo veniunt, prospera te frui valetudine, quam bono publico propriam tibi faxit, Deum veneror. Misi nuper Exercitationem de Calculo, in cuius pag. 44. si inspexeris verba tua, non verba has quarere, aut cineres, ut inquit ille, videbis, sed quæ dicere vetat ingenuus pudor. De Nobilissimo Salmafio diu est, quod audio, venturum, mallem feliciter advenisse. Non turpe puto talis Viri dextra cecidisse, honorificum vero, amica. Ego post responsum illam ad vernacula deflexi, quibus prælum hic sudat. Meditor & de Tabe quid, ac Hydrope, quale dedi de Calculo. Tu, cum aliud vix possis, conatum proba, & discendi desiderium, quod ipse instillasti. Consul filia cras nubet Capitoni, qui foceri favore Senatoris Dordrechtani munus jam biduum obit, antequam (ut Christiana Charitate credere par est) implevit sponsi. Mallem tibi uni & soli adesse, quam turbæ nuptiali. Sed vel absens nobis aderis, & si quid ad salutem hoc, non omitteretur tuæ spumans patera. Vale, Vir magne, & salve ab eo qui semper fui, sum & ero

*Nomini tuo æternum*

*grato animo devotissimus,*

Joh. Beverovicus.

Nobilissimæ Uxori tuæ & eximiis filiis amicissime S. D.

*Dordrecht præd. Kal.  
Octobr. cl. Dec. xli.*

CCCXXVI.

S. P.

Vir Clarissime & Celeberrime, Amice conjunctissime,

**H**AS Literas trado D. Junio filio D. Junii olim Parisiis apud procures nostros magni nominis. Matrem habet matronam honestissimam, quæ hunc suum filium amicorum consilio huc misit militatum, jussitque ut occasione data saluaret posteros nostri Junii *vis mangeltra*. Statuit igitur hoc exequi apud vos, & memoriam renovare stirpis communis. Scripsit ad me Saravivus Senator Vir doctissimus & doctorum amator, se videri Pandectas, sic enim loquitur, Doctissimi Vossii de Idololatria, & mirari quod sine præfatione emissæ fuerint. Causam ei aperui in mea responsione. Vidi hic in transcurso libellum Annotatorum in Cassandri Consultationem, cujus usuram obtinui spatio bihorii. Si prostraret eum cum otio expenderem. Mira item mihi videntur quæ à tali Viro Papatui conceduntur. In miserimos seculorum fines incidimus. Deus meliora! Quem tibi & tuis, Vir Clarissime, propitium & in omnibus faventem adprecor. Vale.

*Tuus & tuorum*

*Raptim x. Nov. 1641.*

*omni officio & affectu,*

Andreas Rivetus.

CCCXXVII.

**D**IU sane est, Virorum & Amicorum maxime, quod nequicquam colloquimur. Matthias noster Mœsum iturans, postremæ vicem fecit Epistolæ. Cura valetudinis vestræ & amor calamum me jubent corripere, quo te laceßam. Quæ nos intemperies homullorum aliquot infruntorum agitet, ex publica credo, fama nostri. Quum enim dogma de Universalis ac sufficiente gratia illis non videretur sat virium habere ad defamandum nos in Belgio vestro, & apud amicos alios in Academiis & aulis Principum, affinxerunt nobis hæreses nefandas, Sabellianismum, Photinianismum, Pelagianismum, & nescio quid non. A Synodis vestris ea de re moniti sumus, quibus ante menses

F f 2

aliquot



aliquot nos excusavimus. Earum Depu-  
tatos nunc Hagæ congregatos rem arbi-  
trari audimus. Utinam feliciter! Hæreses  
& Schismata, quæ dividunt Ecclesiam, a-  
versamur. Veritatem antiquitus & à ma-  
joribus veluti per manus traditam vene-  
ramur, & consensum Catholicum omni-  
um Orthodoxorum inde à tempore Apo-  
stolorum sequimur. De salute vestra cu-  
pio fieri certior. Vale, Vir amicissime,  
& salve *muoni*.

Brem. 24. Novembris Clarit. T.

cl. De xli. secundum  
vererem formulam.

omnio officio & affectu,

Lud. Crocius.

### CCCXXVIII.

#### *Salutem & Observantiam.*

**F**Ateor, clarissime Vir, verecundiam  
in me desiderari posse, quod ineptis  
hiscæ literarum formulis gravissimas occu-  
pationes tuas interpellare audeam; sed so-  
latium habeo virtutem tuam & excellen-  
tiam, quæ, quanquam maxima, ita ta-  
men ab humanitate temperatur, ut possim  
ex quacunque occasione animum erga te  
meum profiteri. Quod tantò nunc facio  
lubentius, quantò aut majora beneficia tibi  
me debere agnosco, aut expectare quoti-  
die videor ab incredibili benignitate tua,  
quæ, ut nemini bono interclusa est, ita  
propensè in eum devertit, à quo & coli  
te intelligis & observari. Nuperius episto-  
lam ad te dedi, Vir incomparabilis, si-  
mulque Panegyricam orationem, quam  
Præceptor olim meo Cl. V. Domino Jo-  
hanni Meursio conscripsi, ut extaret levi-  
dente aliquod animi & pietatis meæ ar-  
gumentum; utrumque cum despiciere pos-  
ses, admisisse te intelligo & quod huma-  
nius nomen est, perlegisse; non quod tanti  
erat, sed ut ostenderes tam judicare te  
posse maxima, quam in minimis probare  
conatum & navatam operam. Patere,  
Clarissime Domine, agnoscere me & ad-  
mirari summam hanc bonitatem tuam, &  
ab eadem illa polliceri mihi aut testimo-  
nium iudicii tui, aut fructum benevolæ ad-  
monitionis, ambitiose fortasse sed utiliter.  
Quemadmodum enim sol quodcunque  
tangit, non illustrat modo, sed accendit;  
ita splendor nominis tui tam excitabit in-  
genium meum, quam fovebit, ut in spem

ac frugem feliciter exsurgat, & conari ali-  
quando velit, quod tu ad exemplum admi-  
rationis potes. Da veniam arrogantiae  
meæ ac credulitati; non hoc ago, ut eli-  
ciam literas à te publicitus occupatissimo,  
quanquam ad aliquam mei five commen-  
dationem, five excitationem, nihil hono-  
rificentius contingere mihi posse persua-  
deo; sed ut profitear eo me nomine tibi  
plurimum debere, & observantiae testifica-  
tione, necnon admiratione tuæ virtutis, id  
aliquando intendere, ut beneficium re-  
ferre videar voluisse. Vides animum me-  
um, Princeps literarum, quem non plus ex  
scriptione mea quam ex meritis tuis æsti-  
ma, & quem semel admisisti æternum ti-  
bi devinctum patere. Quo in nomine vi-  
vere ac valere te exoptat.

Lugd. Batav. d.

2. Dec. An. 1641.

T. Godefr. Cretschmarus.

### CCCXXIX.

#### *S. P. & Observantiam.*

Excellentissime Vossi, Fautor & Amice Venerande,

**C**onstantinopoli redux factus, quod ibi  
literis intellexissem optimi & cla-  
rissimum Filium tuum Isaacum hic in An-  
glia esse, sperabam hic invenire, & aliquod  
optimæ notæ Manuscriptum Arabicum ex  
Bibliotheca mea Orientali, quam per Dei  
gratiam satis magnam reportavi, donare  
decreveram, sed abitu in Galliam meum  
reditum præverterat. Nunc quod intelli-  
gam reditus mei famam in Belgio sparsam,  
non possum facere, quin amicis & fauto-  
ribus eundem indicem, tibi que certe pluri-  
bus nominibus obstrictus sum, nam hac ad  
Magnatem me recommendabas, & Illu-  
strissimus Grotius eo me nomine amavit,  
ut plurima ab eo prona erga me volunta-  
tis signa retulerim. Quod si itaque filius  
tuus Isaacus meum ad vos adventum præ-  
vertat ex Gallia reditu, quem ipsi fau-  
stissimum voveo, ut tam præclari filii sum-  
mis virtutibus quasi revivifcas Pater, licet  
nunquam mori ipse queas, hoc rogo, ut  
meo nomine salutes, & postquam Cata-  
logum meæ Bibliothecæ perlegerit, quem-  
cunque librum usui desiderabit, non dene-  
gatum iri meo nomine rogo promit-  
tas. Quadringentorum Manuscriptorum  
Græcorum, Ebræorum, Arabicorum,  
Persicorum, Turcicorum, Russici &  
Armenii Catalogum penes Leidenfenses  
imprimi

imprimi credo. Clariss. ac Doctiss. Filium Matthæum Amicum meum colendum salutabis, ipsumque Gerhardum præstantissimum Juvenem, quos vos Deum rogo ut sanos propediem & florentissimos reperiam. Gratias autem ago ingentes etiamnum pro veteri illo literarum tuarum beneficio, rogoque tibi persuadeas non apud decoratorem ea deposuisse. B. V.

Londini ex Coll. à Tui Nominis  
Gresham. 21. Jan.  
St. V. 1642.

Observantissimo,

Christiano Ravio.

Inclusas rogo literas Cl. Golio transmitti, ni grave, jubeas, ita novo beneficio me obstringes. *Epistola.*

CCCCXXX.

S. P.

ET si, Clarissime Domine Vossi, religio mihi sit, gravissimas illas publici boni causa à Cl. T. susceptas occupationes intempestivis interpellationibus ullo modo turbare; cum tamen ex illo, quem præterito autumnò cum Cl. T. habebam, discursu non obscuris indiciis deprehenderim, eam de negotiis literariis, & imprimis Chronologicis animi sensa haut gravatim explicare; idcirco cum id negotii mihi datum sit ab amico quodam, ut tuam, Vir Clarissime, sententiam super una atque altera Controversia Chronolog. perquirerem, quæso te per omnia literarum sacra, ne id in sequiorem partem rapias, sed audaciæ huic meæ pro summa humanitate tua ignoscas. Primum de quo informari desiderat amicus prædictus, hoc est; Quanam vi rationes solidæ contra vulgatam Æram Christianam pugnent, quo minus eandem sartam tectam retineamus: Quorum unam, si rectè memini, Cl. T. tunc temporis ex Josepho adducebat, sed (quæ est vacillantis memoriæ meæ infelicitas) planè istius argumenti summa mihi excidit, & ni fallor, remittebat me Cl. T. ad quendam Tractatum à se editum, in quo planius mentem suam hac de re explicasse se, asserbat; quem vellem, nisi molestum esset, una cum ratione prædicta per literas exoptatas de tuo mihi in memoriam revocari. Porro etiam edoceri expetit, quod Cl. Dn. Vossius sentiat de

magno illo numero quem invexit Joseph. Scaliger (à quo vocatur magna Periodus Juliana) ex tribus Cyclis confecto, Lunæ, Solis, & Indiæ. Rom. ane illa firmo talo subsistat, nec ne? De hisce, ut quamprimum fieri potest, Cl. T. mihi rescribere dignetur, submisce rogo. Et cum semel de benevolentia tua, Venerande senex, optima quæque animo conceperim, proinde obnixè insto, ut insuper quoque Auctores quosdam insignes, qui de Particulis tam Græcæ quàm Latinæ Linguæ ex professo aliquid prodiderunt mihi indices, quarum collatione Hebræas aliqua ex parte collustrare liceat. Vale, Vir Excellentissime, & importunitati meæ hominis peregrini quidem, attamen Excellentie tuæ observantissimi ignosce.

Lugd. Batav. An. vulgata Æra Christi.  
Cl. Dn. XLII. d. 14.  
Februarii.

M. Johan. Michaelis,

Straelsund. Pomeranus.

E Musæo meo qui est apud Bibliopolum nomine Pieter Hercules propè Templum D. Petri.

CCCCXXXI.

QUam libenter & quam sæpe (Vir amplissime, doctissime & plurimum dilecte) de te & vicino tuo Domino Barlæo cogito, ipse mihi sum conscius, non conabor tibi literis exponere. Superioribus diebus cum vos honoris causa viderem, quos vehementer observo, casu accidit ut in tua mensa sermo oriretur, de iis rebus de quibus vos tam Philosophice quam Theologice solenter differentes audiebam cum summa delectatione: te quidem de tormentis futuri seculi, an satius sit miseris omnino non esse, quam pœnas sub quibus sunt, sustinere; illum autem de Animæ essentia, perfectione & virtute. Sicne tota in toto corpore, & tota in qualibet parte; de quibus mihi ingenio vix mediocri instructo, otio certe nunquam abundanti, adversa etiam per annos multos modo valetudine, modo fortuna vexato, liceat cum vestra bona venia paucis quid sentiam subscribere: Ut sic absens tacitus vobiscum loquar, & leniatur sic desiderium meum, quod facere me nolo credatis expectatione literarum aut responsionum vestrarum, quæ etsi me incredibiliter delectarent; ego tamen vos mea causa à gravioribus studiis ad nugas revocari nolo: Satis me habere

habere putabo, si & meas tibi esse redditas, & tibi vicinoque tuo, ut cupimus esse intellexero, sententiam vestram pluribus (quando favente Deo rediero<sup>Amstelod.</sup>) auditurus, eique acquieturus, qui non ignorem vobis ab omni cura expeditis, ingenioque florentibus, quotidianum esse cum libris usum, & cum omni doctrina, utpote in ista luce viventibus Batava, summa omnium virtutum ingeniorumque præstantia, feminibusque eloquentiæ & reconditoris intelligentiæ referta. Accedo ergo primum ad miseros istos in quibus, quæ erudit nos natura, inveniri tormenta hæc sunt.

Invidia, de qua Poeta ait, Siculos non invenisse Tyrannos tormentum majus. Dolorem, omnes sciunt quam grave sit malum, eum scilicet quem Tristitiam dicimus. Desiderium præterea Narcissi fabula, & alia experimenta testantur quantum habeat mali. Metu denique multos esse mortuos non est rarum meminisse. Sed quis quæso invidus unquam fuit, qui non ipsam invidiam ornaverit. Desiderium celebrant Poetæ, quasi nullus alius sit amantium fructus. Mæstos tenebras, & omnia quæ malum augeant quærere quotidie experimur. Malum fugiunt Mericulosi, sed ipsum timorem adamant. Hæc si vera sint, vide num hi miseri velint esse sine his pœnis? Et si non velint his cedere, cur eos credat aliquis malle non esse, quam istas sustinere? Omnis porro Spirituum pœna voluntaria est, & non potest (quoniam à Voluntate proficiscitur) non voli: & si volitur ipsa miseria, potestne credi eos malle non esse, quam hanc pati? Constat enim multa proverbialiter dicta esse, ad exprimendam pœnæ gravitatem. Tormenta & Cruciatu qui in futuro seculo animabus impiorum parati sunt, tantos esse ut præstet omnino non esse, in ipsa Theologia videtur indubitatum: sic enim Christus suo ore enunciavit, Melius fuisse proditori, ut natus non fuisset ille homo. Tormenta etiam futuri seculi agnoscit Philosophia ipsa; neque si his quæ præsens vita patitur compares, Ludicra nostra hæc præiis, flores, rosas & delicias, ipsa Philosophia jurare dubitaverit. Novit enim animæ, post hanc vitam, potentiam, cum ea quam in materia habet, non pati proportionem. Novit affectus quos hic colligit, illic ad proportionem status & existentiae excreturos. Novit itaque in immentum & bona & mala non per Hyperbolen sed ipsa re augenda. Verum cum hæc omnia doceat nos Philosophia, huc usque tamen attingit, ut melius illis non

fuisse censeat. Quod si hoc certum sit in Theologia, ex iis quæ naturam superant contigisse putandum videtur. Cum hoc iudicium (quod melius fuerit illis non esse) vel ex natura rei vel ex opinione personarum, sit pensandum. Personas duas video examinandas, ipsum illum qui pœnis irretitus manet, & prudentem aliquem qui rem humanitus existimet. Priorem pœnas suas fovere iisque delectari ostendimus. Prudentis iudicium non tam certum esse, sed falli posse videtur. Si naturam consulam; quid quæso facit aliquid alio melius in Natura? Seu in qua ratione Melioratio est consideranda? Melioratio haud dubio est in ratione Entis; Et illud melius est in ratione Entis, quod plus de Ente habet. Et potest quæso quis dubitare, num id quod est, & quantum homo est, & plus quam homo est, & ita plus quam homo est, ut comparatio inter ipsum & hominem nulla maneat, plus habeat de Ente, quam nihil, quam quod non existit. Præterea quid respondebimus eis qui docent, omnes actus nostros ab ipsa æternitate, catenatis à causarum necessitate passibus, usque ad ipsum liberi arbitrii exercitiū alligatos & perductos? Videbiturne Deus tot hominum Myriadum Myriadas, æternis horrendis & ineffabilibus pœnis ante omne ævum addixisse gratis, viam munivisse, gressus coegisse, fatalem pœnam perstruxisse? Quæ si ita sint, quorsum post hæc cum gemitu fundemus preces? Quorsum per aspera exercitia carnem domabimus? Quorsum solitudinem & extentum ad futura animum, vel ipsi colimus, vel aliis ad colendum commendabimus? Sed excrevit calamus. Hæc sunt illa varia in utramvis partem quæ colloqui & exercitationis gratia exciderunt, donec te videro, ut de tuo promptuario sumantur, &c. Quod ad ista attinet quæ à Domino Barlaæ accepi de anima, ego cum Ang. lib. 6. de Trin. 6. existimo totam animam in toto esse corpore, & totam esse in qualibet ejus parte. Sed nisi me in hoc destituat memoria mea, memini didicisse me secundum triplicem divisionem esse triplicem totalitatem. Est totum quod dividitur in partes quantitativas, totum aliud quod dividitur in partes rationis & essentialis. Est & tertium potentiale totum, quod dividitur in partes virtutis. Prima hæc totalitas quantitativa non convenit animæ nec per se nec per accidens. Secunda totalitas convenit, & sic anima tota secundum totalitatem Perfectionis & Essentialis est in toto corpore & qualibet corporis parte. Sicut Albedo tota recte dicitur



dicatur esse in tota superficie & tota in qualibet ejus parte, si totalitatem speciei & essentia intelligimus. Sed si de totalitate quantitativa mentio fiat, quam albedo per accidens habet, non erit tota albedo in qualibet superficiem parte: neque si totalitatem Virtutis notemus; cum magis possit movere visum albedo, quæ est in tota superficie quam quæ est in aliqua ejus particula. Sicut anima non est tota secundum totalitatem Virtutis in qualibet corporis parte, sed secundum visum in Oculo, secundum auditum in Aure, &c. Et licet sit tota in qualibet parte, non tamen eodem modo compartitur ad partes, & ad totum: cum ad totum primò & per se respiciat tanquam ad propriam & proportionatam perfectibile: ad partes autem per posterius, secundum quod partes habent ordinem ad totum. Porro anima cum unitur corpori, non ut motor tantum, sed ut forma non mediante aliquo Corpore, necesse est sit in toto & in qualibet parte, cum sit forma substantialis quæ est perfectio totius, sicut & cujuslibet partis, non vero accidentalis, ut forma domus posita in compositione & ordine, quæ etsi toti domui non tamen dat esse singulis partibus. Quomodo autem potentia animæ distinguuntur, quem habeant ad invicem ordinem: Utrum una potentia ex alia oriatur; & utrum omnes potentia animæ remaneant in ea post mortem; & denique sit ne alia forma præter intellectivum in homine animum; hæc & alia ejusmodi Domino Barlæo viro eruditissimo cum his quæ raptim de Anima scripsi relinquo. De rebus meis nihil scribo; sed me tibi Dominoque Barlæo totum, salutemque meam quam serio possum commendans. Negotii administrandi rationem singulari vestra sapientia permitto in Domino. Literas inclusas Domino Johanni Nebstero reddendas, cures, vehementer oro, cui me multum debere & plurimum devinctum esse profiteor, ejusque officium tam benignum ab excelsio quodam animo liberalique profectum libenter amplector. Etsi interim, ulli privato etiam nobilissimo esse oneri nunquam cogitavi; quod si compensare meis officiis non potero, memoria tuebor, & prosequar laudibus, quamdiu vita fruor, apud omnes, ipsumque serenissimum Regem Reginamque: ut ex optima saltem voluntate qua boni omnes & sapientes Viri metiri beneficia consueverunt, aliquam sibi relatum esse gratiam existimet. Δὲν ἔλαθ' ὁ κύριος τῆς ὁδοῦ ἀπὸ τοῦ Νεβστερου, ὅτι πολλὰς με ἀρετὰς πολλὰν, ἢ καὶ γὰρ ἀλλοτρίαν

μὴ ἐκ ἐπιγνώσεως ἀλλὰ ἡρωικῶς ἐν ἀμειψιότητι ἐξήγησέν με καὶ εὖρε δὲν αὐτῷ ὁ κύριος εὖρετ' ἔλαθ' ὅτι καὶ ἐκείνη τῇ ἡμέρᾳ. Vale, Vir ornatissime, & me tuæ humanitatis summae semper memorem, sicut & dignitatis tuæ studiosum valde, amplectere; Dominisque Barlæo & Nebstero meis verbis salutem plurimam, quem accerses, &c. Iterum vale à tui amantissimo

Archib. Cassellius.

Hag. 19. M. 1644.

### CCCXXXII.

*Celeberrimo Viro Domino Johanni Gerhardo Vossio, ἔνι Ἀθήναις.*

TOT annorum V. C. intervallo ad te redeunt à me literæ, quarum importuna inveniuntati propensius in me favor tuus veniam largietur. Desiderii sanè mei necessitas id postulavit, cui explendo, non inoratus mihi sis. Ac Deos non sine precibus adimus. Anni V. C. non pauci effluxere, ex quo tum liberalioribus literis, tum Jurisprudentiæ Sacris sedulo incubui, cui fini Academiæ plures florentissimas maturo consilio elegeram. Nunc è peregrinationibus Gallia ac Germania demum in patriam redux, parente optimo, (in quo spes opesque meæ omnes sitæ erant) supremi Numinis arbitrio ad plures evocato, quid inceptem, ac ubi gentium certam sedem figam, incertus sum. Frequens hic eorum leges est, qui se eruditos jactant, titulisque sed meris ac inanibus splendent. Opulentiores atque impudentiores priori loco sunt. Ego, dum lenior mihi benigniorque aura adspiret, fortunæ ac temporis cedere constitui. Quamobrem V. C. si lautioris apud vos fortis quispiam doctrinæ morumque præfectum filio quæreret, non invitus id mihi oneris imponi paterer. Nec quidquam, quod jure deceat, in me desideratum iri confido. Dari conditiones ejusmodi scio. Verum uti non exiguum harum est discrimen, sic avidè sine dubio ambiuntur: Si spes aliqua mihi fieret, expectato volarem citius. Præsentia enim in hoc promotionis genere potissimum requiritur. Rogo per tuum te Genium V. C. beneficium hoc ei præstes, quem satis ubere benevolentia prosequi antehac solebas. Neque in ingratum conferes, neque penitebit, hunc hominem commendasse cui iteratus tui visus alloquiumque

animum

animum addent, ut inter dubios fortuna  
 fluctus de rebus suis melius speret. Vale  
 V. C. fratrem mihi colende, Reipublicae  
 tuusque diu superstes, delitescens affectus  
 ut me scintillas excita, meque responso  
 dignare. Dionysium filium plurimum  
 salvere jubeo.

Hamburgi A. D. C. V. addictiss. studiosiss.

cl. 165 XLII.

xv. Febr.

Bernhardus Damke.

### CCCXXXIII.

Reverende & Excellentissime Vir,

**A**ccepi nuper illa quae ad me misisti  
 munera. Quo nomine & hunc  
 animum & me debere tibi fateor. De qui-  
 bus aliisque pluribus, ut spero, sum scri-  
 pturus, cum ordine perlegero. Nosti  
 enim qui & ipse aliquando maxima cum  
 laude inter nos versatus es, quam hoc tem-  
 pore, ex instituto Academiae, quo & re-  
 censendi studiosi, & alia nonnulla pera-  
 ganda sunt, ab octavo Februarii ad pri-  
 mum sequentis septimanae, distrahi sole-  
 am. De affectu meo & observantia si  
 queris, nemo nescit, quomodo te scri-  
 ptisque nris judicare soleam. Quis magis  
 delectandi fuit, qui Varus quoddam, quos  
 in maledicum, qui de facundia aliorum  
 judicare solet, conscripsi, de te scriptis,  
 tibi aliisque persuaserunt: quod amici jam  
 non semel indicaverunt nobis: cum id ne  
 in mentem quidem venisse nobis sciam.  
 Homo, de quo cogitabam, natione Ba-  
 tavus, aliquandiu Professor tandem ludo  
 literario praefectus est, in qua cura expi-  
 ravit. Qui non magis fortasse tibi, cum  
 privatum de omnibus sententiam ferret,  
 quam alius peperit. Simile est, quod cum  
 nemo olim magis Rhetorica tua, non se-  
 mel nec eodem modo edita, commendat-  
 rit aliis, ea à me perstringi, non quidem  
 forte crediderunt ipsi, persuasum tamen ti-  
 bi distrahendis inter nos animis nonnulli  
 voluerunt: quo nihil diabolicum magis,  
 nihil magis hodie usitatum. Cum de  
 Loyola quodam egerim, qui de autoribus  
 antiquis petulanter ac sinistre judicat;  
 quod à te factum non memini, quem ob  
 eruditionem singularem semper veneratus  
 sum, qui sum ac futurus semper sum

Lugd. Bat. An.

cl. 165 XLII.

Febr. xxvii.

Reverentia tua devotiss.

Daniel Heinsius.

### CCCXXXIV.

Clarissimo Doctissimoque Viri Ger. Joh.  
 Vossio, Gaspar Scioppius S. P. D.

Clarissime & Praestantissime Vir,

**N**ihil planè dubito, quin ornatissimi  
 Juvenes Justus Riccovartius & Cor-  
 nelius Vuerchovius, qui me perfamiliariter  
 hic usi sunt, satis tibi confirmarint, quanti  
 tuas excellentes ingenii animique dotes fa-  
 ciam, quantumque aetati nostrae de lu-  
 mine tanto gratulandum putem. Quo  
 minus mihi nunc laborandum intelligo, ut  
 ambitiosa mei erga te amoris ac studii pro-  
 fessione tuam mihi mutuam voluntatem  
 conciliem. Missis igitur ambagibus pro  
 amico te in partem voco negotii, in  
 quo cum consilii & prudentiae tuae vi-  
 res maxima cum laude tua experiri, tum  
 ab omni Republica, inprimis a Ba-  
 tavis tuis magnam & solidam gratiam  
 me judice inire poteris. Id cujusmo-  
 di sit, ex Italica Relatione, quam una  
 mitto, intelliges. Galileus i. margenis pro  
 veteri, quae mecum exercebatur, ami-  
 citia mihi curae esse cupiebat: ut relictis  
 ... inventis sui experimentum caperetur,  
 idque tanto impetius, quanto gratus ei  
 fuit, quod Hieronymum disciplinam eius alum-  
 num in contubernium meum adlativissem,  
 propterque spectatam ejus fidem & singu-  
 larem in omni genere virtutem omnium  
 meorum bonorum heredem fecissem. Is  
 jam triennium apud me fecit, & usque eo  
 mihi se probare pergit, ut eum in senectu-  
 tis meae praesidium coelo demissum statuerem.  
 Caterum verba non invenio, quibus divi-  
 ni ingenii ejus vim satis digne praedicem.  
 Nam quicquid dixerò, minus erit. Pro-  
 mittit ille quidem in hoc Patavino Athe-  
 nae Juris civilis interpretationem, in qua  
 tam cumulate omnibus satisfacit, ut in  
 hoc uno studio videatur quoddam quasi  
 tabernaculum vitae suae collocasse. At il-  
 lum sui propemodum poenitet ac piget, cui  
 necessitas incumbat ista professione vitam  
 tolerandi, quam genio suo magnopere ali-  
 enam ac modo non adversam experitur,  
 cum sit maxime ... pectusque ca-  
 jusque modi ardentius instructum gerat, qua-  
 rum una quavis vitam aliis satis laudem  
 ex se praebere possit. Si suis ea fata au-  
 spiciis vitam ducere permitterent, ille  
 quodcumque Mathematicarum disciplina-  
 rum generis & Philosophiam liberam nū-  
 lusque Magistri verbis addictam profiteri  
 ac

ac docere alios impendio præoptaret, satis quippe sibi conscius, posse se non verbis doctisq. dictis auditores pascere (quamvis nec ab istis non satis sit paratus) sed res nemini unquam nec visas, nec auditas, omnemque humanam admirationem exhausturas manuum & oculorum sensibus subicere, quas magni principes, satis scio, ut videre possent, impenso pretio depecisci nihil dubitarent. Ego quidem, cui tam admiranda oculis & manibus usurpare contigit, planissimè mihi persuadeo, si Pythagoras, Plato & Aristoteles, in terris nunc existerent, nec suum illud discendi studium abjecissent, nihil eis prius futurum, quam ut ad veri istius Philosophi acroasin certatim convolarent. Madaurensis autem Philosophus, nisi omnia me fallunt, non jam Hippium, sed Pieruccium floriloquio suo dignam censeret, ejusque *πικροεργον* distinctè explicanda ingenium delassare mallet. Tanta tamen hominis est modestia, ut istas ingenii ejus divitias nemo nisi diu multumque eo usus possit animadvertere. His accedit quod ego palmarium duco, quoque nomine plus hominem amo, ardens divinarum literarum amor, & mirificum S. Scripturæ studium, unde sibi mentem scientia augeri, sensusque ad boni ac mali discrimen exercitatos fieri gaudet (quod Apostolus perfectorum esse testatur) ne ipsum fallant animi vasa sub vulpe latentes (quales ab Alphonso meo de Vargas descriptos vidisti) neve inveniatur *ὁ νόμος τοῦ κυρίου ἡμῶν ὁ θεός* *ἐν τῇ καρδίᾳ* *καὶ οὐκ ἐν τῇ διανοίᾳ*. Hunc ergo talem virum tibi nunc concilio, ejusque demerendi occasionem tibi offero: quam tanto avidius arrepturum te arbitror, quanto plus Batavorum publice privatimque interest, ipsis non intercidere fructum illum, quem eis Galilæus ex invento suo augurabatur. Si ergo istic sint, qui rem tantam cordi habeant, sive per te, sive per P. Fulgentium Servitum Reip. Venetæ Consiliarium, seu denique per quos visum eis fuerit, cum Pieruccio transigere poterunt; quem studii, quod Galilæus erga nomen Batavum singulare profitebatur, heredem esse præstabo, sicut etiam fide mea tibi recipio ac polliceor, futurum ut ex rebus ipsis homini omnium gratissimo operam te navasse intelligas, nec minimum mihi velut amicitia vestra interpreti ac parario debere nolis.

De me ipso meisque consiliis, studiis & actionibus alias te certius faciam, nunc in antecessum hoc tantum narro, me jam Exegeſi seu *Prophetia Scripturæ* (quam

S. Petrus vocat) plus quingenta folia explevisse, ea ipsa Clave ad aperienda ejus mysteria usum, quam idem Apostolus nobis reliquit, vix tamen à quoquam adhuc intellectam. Prophetæ scilicet præter mandata de credendis & faciendis (quæ Isai. 45. *Justitia & Recta*; Johan. 16. *Omnis veritas* dicuntur) & an *Secreta* seu Ventura (Amos 3. 7.) sive Christi & Ecclesiæ passiones ac glorias cum singulorum temporibus exquisiverunt & scrutati sunt, & à Christi spiritu sibi revelatas nobis ministrarunt (1 Pet. 1. 10, 11.) & dies istos annunciarunt tempora refrigerii & restitutionis omnium; sive adventum Christi antecessuros (Act. 3. 20, 21, 24.) ut scrutando Scripturas scire possemus, quæ primi temporis seu diluculi passiones & gloriæ, quæ medii diei passio seu tribulatio magna à multis Pseudochristis & ab uno Antichristo sine ulla externæ gloriæ parte, quæ horæ novissimæ (postquam tempus non erit amplius) præſenti seculo veniente Patre futuri seculi (Apoc. 10. 7. Isai. 9. 6. Heb. 2. 5, 8.) sine ulla passione gloriæ futuræ essent. Ista trium temporum unius diei 12 horarum sicut & triduanæ mortis Ecclesiæ, vel 40 horarum eventa, comparatis inter se Scripturarum locis lucidissimè exposui: quæ ut minori negotio intelligi queant, omnemque altercandi occasionem omnibus præcidat, quatuor libellos, istis indicibus seu titulis jam confectos habeo.

1. Fons sapientiæ intento digito monstratus, hoc est, Eclogæ ex S. Scriptura & Sanctis Patribus de S. Scripturæ studio, ejusque studii necessitate, utilitate adjumentis & temporibus.

2. Clavis Scientiæ ad aperienda regni cælorum mysteria propediem consummanda, hoc est, specimen Exegeſeos Prophetiæ in Psal. 45.

3. Annunciatio regni Christi ac populi Christiani in orbem terræ futurum usque ad novissimum annorum & expeditionem Gog & internecionem ejus.

4. Systema artis Prophetandi, continens ejus artis finem, officia, materiam subjectam & instrumenta, exemplo Galeni in Systemate artis Medicæ.

Vix autem sperare audeo, fore ut quicquam istorum in Italia edendi venia mihi detur, non quod quicquam in eis vel decretis Romanæ Ecclesiæ de fide, vel bonis moribus adversetur, sed quod mores Curia Romanæ omnes Ecclesiæ leges jam olim in potestatem suam perduxerint, nec jam cuiquam fas sit quicquam tale dicere aut



scribere, quale ipsi Pontifices in D. Bernardo, Brigitta & Catharina Senensi non modo verè rectèque dictum facti sunt, sed etiam pro saluberrimo fidelium dogmate religiosè observari voluerunt; quicquid autem hujus edi contigerit, ad te quamprimum curabitur perferendum, cujus ego me discipulum perhiberi minime erubescam, quæque à me proficiuntur, ea iudicio tuo stare aut cadere facile patiar. Deus te, Vir Clariss. publico Literarum bono diu vitalem servet ac prosperet.

Patav. ad diem 20. Febr. 1642.

CCCXXXV.

S. P.

Clarissime & Doctissime Vir, Collega & amice conjunctissime,

**E**Xpectavi tempus quo prodiret meus Apologeticus, ut gratias tibi agerem pro elegantissima & amica Epistola tua, simulque ad nonnulla responderem quorum in ea memineras. Videbis Libellum meum non in D. Grotium sed in illius votum, quod à te perlectum non dubito. In quo certe ipse quasi D. Grotium, nec talem inveni qualem olim & non ita pridem existimavi. Quis enim ab eo tantum virulentia, & tam odiosas digressiones expectasset? Coegit me ut veritatem & innocentiam tuerer, acrius aliquanto quam voluisssem ei respondere, spero tamen te ipsum iudicaturum, neque me modestia & gravitatis munere & ætate mea digna limites transgressum fuisse, nec potuisse aliter agere quam feci, nisi nostram causam prodere volluisssem. Quod spectat Suevum illum, nihil mihi est cum illo commune, cujus ab initio culpavi petulantiam, nec dissimulavi in Epistola quam à me extorsit ejus importunitas, cum mihi plane ignotus esset, quantum à candore & modestia recessisset. Cum autem abusus sit particula meæ Epistolæ in sua illa invectiva, non potui etiam quin lectorem meum moneam quantum illius agendi modum improbarem. De cætero libenter submitto scriptum hoc meum iudicio tuo, postquam collatione cum adversario scripto facta, utrumque expenderis. Misi nudiustertius ad D. Corsselum folium unum operis Blondeliani cum duabus Epistolis ad te & eum scriptis; spero te accepisse. Aliud folium miseram antea ad

Blavium, à quo nondum accepi responsum. Hæc duo folia multa habent notatu digna, circa potestatem ordinationis, in quibus etiam nonnihil habet de Novato, Ilchyra, Zachæo, contra sententiam D. Grotii. Amicus noster nobiliss. Salmasius, expectabat partum uxoris propinquum, ut ad nos rediret. Nunc existimo omne impedimentum fore sublatum, postquam Cardinalis eminentiss. fuit; nihilque amplius eum remoraturum. Accepit per diligentiam filii tui, qui ei descripsit Florentia, exemplar Expeditionis in Alanos per Arianum, in quo dicit se mira habere de Militia Romana, & quæ ad eam spectant. Ab eadem opera expectare Urbicium, ut opus Principi nostro promissum, his adjumentis instructus possit absolvere. Ejus Hellenisticus nunc, post absolutum meum Apologeticum, diligentius procedat. Significaveram Ampliss. Saravio, quæ in literis ad me tuis, de eo habebantur. Ille quanti te, & tua omnia faciat, non posse se verbis exprimere dicit. Expectaturum reditum filii tui, ut illum rursus amplectatur, & ab eo audiat quantos ex Italia thesauros sit allaturus. Interim semper urget apud me, ut te inducam ad ea promenda quæ habes de Antiquitatibus Ecclesiasticis. Si quid ad Blondellum rescribere velis, meam offero operam, in literis tuis curandis, ejusque & meo nomine à te peto, ut opus illud Typographo subinde commendes, & ut emendatè prodeat hortaris. Princeps noster affligitur chiragra & podagra, quæ curis hodierni temporis addita, eum macerant, reipublicæ tamen huic, etiam ad multos annos, necessarium. Deus eum nobis servabit, quem tuis omnibus faventem & propitium precor. Vale, Vir amicissime.

Hagæ-Comitis,  
x. Kal. Febr.  
finiente anno  
clo 1642.

Tibi addictissimus

& ad omnia officia

paratissimus,

Andreas Rivetus.

CCCXXXVI.

## CCCXXXVI.

Præstantissime & Clarissime Vir,

**C**umulatè me beasses vel solis Literis tuis, ex quibus & valere te & nostri memorem adhuc esse percepi. Non enim celare debeo quanta & in felicitatis & in gloriæ parte ponam à tali Viro amari. Jam verò adjunctum munus, quibus verbis prædicabo? Istum primo Maimonidis tractatum, Latine redditum, notisque eruditissimis illustratum à tanto tanti Patris Filio, Dionysio Vossio. Quam stupendi ingenii & industriæ Juvene? qui antequam eo ætatis pervenerat, quo qui bonas Literas vel primoribus labiis delibaverint, satis properasse videantur, totam abolverat *ἡ κυκλοποιεῖας*, nec quicquam quod hominibus scire datum, intactum reliquerat. Quam illi ex voto cessisse videatur, qui tam sciendi avidus fuit, quod nobis minime, ut præmature è terris, in quibusdum peregrinamur, qui plurimum norunt, ex parte tantum sciunt, in celestem patriam transferretur, ubi & scientia & beatitudine *ἰσάγγελος* fieret. Huic annexum mirandum illud opus tuum de falsâ Nationum Religione, humanaque mentis ex natura ascensu ad Deum, quo & filii *μαγεῖται* & tuæ simul gloriæ magis quam Mausoleo vel superba Pyramidis mole extracta confulisti, & quam pene supra humanæ naturæ terminos ipse scientiæ gloria ascenderis, ostendisti: Opus (ut illa C. Plinii de Avunculi sui Hist. Nat. cui merito debeantur adscribam) diffusum, eruditum, nec minus varium, quàm ipsa natura; quo cum omnes studiosos tibi mirum in modum devinctos reddideris, tum me, singulari præ ceteris beneficio devinctissimum, cui per tot annos à literis & libris politionibus exulanti, in hoc uno Bibliothecam instructissimam aperuisti, ut nulla sit alia volumina conquærendi necessitas. Quin & ne vel hic Thesaurus ullo, qui nullo contra carus fuisset, mihi pretio redimendus esset, munere tuo cavisti. Dum igitur donum & donantis simul affectum perpendo, quas tibi gratias debeam scio, quas referam nescio. Tibi vero, utriusque beneficii *Ἄντῳ ἐν μαγείᾳ ἀντάξιον ἀποδοῖν*. Quod ad studia nostra, magis turbata sunt, quam ut aliquam eorum rationem tibi reddam. Nescio an plantis Arabicis faveat Cœli nostri temperies. Quod si Deus otium & vitam concesserit, dabo forsan operam, ut lucem videant, vel Editio in saltem parentur, libri sex am-

plissimi Viri Hugonis Grotii de Veritate Religionis Christianæ in Linguam Arabicam versi: uti & Catechismus brevior, & Articuli Ecclesiæ nostræ. Certe quam maxime è re Christianorum in partibus Orientalibus, crassissimis ignorantiae tenebris miserè demersorum, esset, ut hujusmodi libri illis communicarentur, unde quid credere se profitentur, haurire & ipsi possent, & alios docere. Aliis, è contra, si qua operæ pretium viderentur, è Lingua Arabica in Latinum sermonem transferendis manum admoveere non pigebit, si à te discere liceat, quo præcipue modo, studiis nostris vel Arabicis vel Rabbinicis Respublica literaria, vel tantillum, juvari poterit. Vale, summe Vir, & favere perge

Oxon. è C. C. C.  
VI. Id. Aprilis.  
1642.

*Sincere atque ex animo*

*Te colenti,*

Edwardo Pococke.

## CCCXXXVII.

Clarissime Domine,

**E**X diserto Vossianæ Familiæ penu, & quantum librorum accepimus, quinque numero Volumina, pondere Bibliothecam: spectantibus deauratam, inspectantibus auream! Longè fecundiorẽ te Jove Ethnico celebramus, Minervæ non solum Patrem, sed Avum; dum & libros in lucem edis, & patrizantem in libris conscribendis Filium. Cerebri ac spinæ medullam vel hinc cernimus continuam, quod ex vase utroque sobolem germanam suscepisti; ex altero scientiam, ex altero tam scientem. Filius ille tuus Dionysius, priusquam fato concessit, tibi fatum enixus est, cui concedat fatum. Maimonidem bis ille fidissimus transtulit, verbo & sensu; novi Idiomatis Januæ clavim aptando Commentarii. Postquam ipsum Deus in vitam beatiorẽ transtulit, huc etiam transtulisti Monumentum ejus in vitam Musarum. Verum quod vivet in scriniis nostris, ac multo pollice versabitur, illud minimum est. Nam ex Musis Oxoniensibus, quas ille non solum scriptionis auxit beneficio, sed Inscriptionis titulo decoravit, unà cum æternitate honorem & amplexus reportabit. Indignum esset liberalibus ingeniis sub eodem quo ingressa Frontispicio non posse regredi charitatem, omniaque honoris vestigia nos adversum spectare at nulla retrorsum; vivet itaque tam in pectore quam in oculis;

G g 2

lis;

lis; aliorum scripta legemus, judicabimus; illius diligemus, effereamus laudibus. Talia si meruit Filius, quod Seminarium doctrinae rigavit ingenii flumine, quid meruisti Pater, qui exundasti in universum Cleri Anglicani hortum? Nam in fronte quatuor tuorum voluminum inscriptionem praefigis, Clero Anglicano; amplam quidem, sed inscriptorum praestantia angustam. Libros ab omnibus legi dignos, ornare si velles iuxta mensurae titulo, non Literarum genti, sed omnium gentium Literatis dicere debuisses. Verum hac in re singularem tuam agnoscimus dilectionem. Cum enim unicus tu extraneorum omnium praeter unum alterum ab orbe toto selectus fueris, & in primaria nostratis Ecclesiae sodalium adoptatus; mutui honoris ergo, confratribus huc in gremium illud thesauri conjicis, quod lati orbis fructu debetur. Nemo in toga nostra perstare jam potest indoctus, nisi perstet etiam inhumanus, ac ea nolit perlegere quae ad ipsum humane mittuntur. Nam ex promptuario tuo haurire datur omne genus Eruditionis, Artes, Historiam, Philosophiam, Theologiam. Dum in isto quem vocas Gentilis Theologiae & Christianae Physices conflictu, Dei speculationem e creaturis eruere proponis, a naturae cultu Idololatriae vindicare, secernere, elevare, disponere, prima facie promittis non solum veram scientiam mundi, sed mundum scientiae. Elaborata haec mysteria suspicemus vehementius, nisi tuo prodirent nomine: admirationem operis mergit Autoris excellentia; in sylva quercum, in Oceano Balanam non miramur, nec in Vossio magna, quia nihil is profert minus maximis. Proinde cum satis laudet, qui dicit te similem tui, nos reliqua praerogativa mole gratiarum supplebimus, similia haec tui incrementa inferemus donorum registro, reponemus cum Sociis in Bodleiana, ubi Classsem Vossianam fulgidis protendent foliis, & aemulatione accendent Heroas calami. Custodi te sanum, servet te Deus felicem, nos te fore vivacem curabimus.

*E domo nostrae  
Convocationis,  
Maii 24.*

*Eximiiis tuis meritis  
charissime devincta,  
Oxonienfis Academia.*

## CCCXXXVIII.

Amplissime, clarissime Vir,

Opportune admodum advenit hodie ad me D. Ravius, cujus Literas ad me misisti, ut & harum mearum ad te vicissim lator esset. Maximas tibi habeo gratias, quod praclaro munere laborum praclarissimi filii tui *fr. mangey*, Juvenis longiori vita digni, beare me volueris. Nec dissimulare possum, inter ceteras ejus praclaras doctissimasque Annotationes, vel maxime oblectasse me, quod Servatoris nostri aeternam divinitatem fideliter tueatur, eumque Angelum illum foederis fuisse asserat, qui nomine Jehovah insignitus cum Patribus egit. Vivat nomen ejus inter eruditos, dum Sol & Luna splendebunt. Te autem, Vir doctissime, qui jam orbem nostrum tot luculentis operibus illustrasti, & plura non minoris eruditionis & utilitatis affecta habes, de valetudine conqueri doleo. Opto menti tuae, vegetae adhuc & doctrina onustae, validum vegetumque corpus, quo quos parturis foetus eniti feliciter atque ex animi sententia queas, unde Reipublicae literariae splendor novus nascatur. Ravius noster ex Oriente redit Persicae, ac praesertim Turcicae Linguae peritissimus, quam promptissime hic cum suo, quem adduxit Arabe Christiano loquentem non sine admiratione audivi. Gratulor ipsi ac Reipublicae literariae quam exinde splendidiorem iri redditum spero. Solpitet labores ejus Deus Optimus Maximus, qui ut & optima tua studia secundet, atque valetudinem tuam firmet, etiam atque etiam rogo.

*Datum Lugd. Bar.  
25. Martii, 1642.*

*Reverentiae tuae*

*studiofissimus,*

Ludovicus de Dieu.

## CCCXXXIX.

Venerande Vir,

Mitto serius quam voluissem filio tuo salarium utriusque anni, quod non sine difficultate obtinui, praesertim posterioris. Obiciebatur enim non amplius eum Hagae vacare causis agendis, ideoque causam cessare. Utinam in majoribus ostendere liceat memorem me gratumque esse tuorum beneficiorum, quae & olim in me



me contulisti, quæque non desinis cumulare indies novis. Nescio certè quibus verbis tibi gratias habeam, non tantum pro tam insigni munere, quod me in ruborem dedit, sed & quod in eo non semel honorificè nominis mei meminisse dignatus es. Monstravit Colvius locum de vitæ termino. Ego omnia à capite ad calcem diligenter perlegam, videborque in ejus lectione à te ipso, ut olim, erudiri, & ab ore docentis pendere. Tu certè cum paucis potes, quod ego cum multis conor. Prodit brevi Thesaurus insalubrium nostræ lingua, cum tabellis æneis, & versibus D. Catii, qualis editus est, ac jam quintum Amstelodami edetur Thesaurus salubrium. Munus parum te dignum, ex nomine tamen, & hoc animo tuis rependendum. Decrevi tum vernaculis valedicere, & redire ad magis seria. Quamvis ista tantum habeam pro occupatæ mentis diviticulis, & quæ nonnihil Bibliothecæ affricent. Miror in responsione mea, te movere Coprianicam vocem. Ego etiam ea usus, sed nullo quenquam lædendi animo. Neque ullam causam offensionis video. Tu perge, Vir reverende, de Republica literaria optime mereri, & me, ut soles, amare, qui sum & ero,

*Innumeris meritis tuis*

*æternum devinctus,*

*& devotus,*

Joh. Beverovicus.

Salutat te D.D. Colvius & Corputius, qui etiam causæ cum Consulari Wittio favit, cum jam nummos astu recepissem. Uxor mea puerperio (quod nonnum erit) vicina, tibi, optimæ conjugii, & liberis omnia fausta mecum precatur.

CCCXL.

S. P.

Celeberrime & Clarissime Vir, Collega & Amice observande,

Post repetitas gratias pro munere doctissimarum lucubrationum tuarum, quas mihi nomine tuo dedit amplissimus Dubletius: Reddo nunc χάρις ἀντὶ χάριτος Animadversiones meas in Viri magni An-

notata ad Consultationem G. Cassandri. Quid memoverit ut onus illud susciperem in præfatione videbis, nec spero improbabis agendi modum, nec modestiam desiderabis, quam observare conatus sum, cum mihi res sit cum adversario cujus dignitatem colo, & eruditionem admiror. Sed cum veritas magis nobis esse cordi debeat, quam deserere non possumus oppugnatam ab iis qui ejus assertores esse debuerant, eam, prout debui, & semper observaturus sum, præferam omnibus quæ alias laudanda agnosco in præstantissimis alioquin ingeniis. Nec te judicem & censorem rejiciam, sed potius appellabo, si tibi vacet oculos in hanc lucubratiunculam conjicere. Maresius suas ad appendicem vindicias, commisit Typographo, & qui malè exceptus fuit, vix abstinebit à retaliationē. Audio eminentissimum Cardinalem, præsentē Cardinale-Mazarino, graviter increpasse Milletorium & Veronum pro Hæreticis scriptis & concionibus. Videbimus, si Deus vitam prorogaverit, quo tandem istiusmodi conatus perducentur. Opto tibi & tuis omnibus omnia fausta & prospera.

Hagæ-Comitis,  
7. April. 1642.

Tuus omni Officio

& Affectu,

Andreas Rivetus.

Filius tuus vidit Salmasium Divioni, ei-que dedit unum exemplar Annotatorum, quorum habebat quatuor in Italianam deferenda, Salmasius promittit se post Pascha venturum Lutetiam & omnia dispositurum ut redeat ad nos. Absolvit opus suum satis spissum de Lingua Hellenistica, quod brevi ad Typographum missurus est.

CCCXLI.

Clarissime atque eruditissima Vir,

ÆGrè mihi accidit nuper, quod ornatissimus Ravius sine meis ad te literis dimittendus esset; siquidem discessurum se ipso demum discessus momento indicaret. Exinde optimi parentis, jam plus quam octuagenarii valetudo, & alia atque alia sæpius mihi, ut forte ad te scribere volui, inopinanti remoram iniecerunt. Quapropter per veterem tuam erga me, quam de novo comprobasti, benevolentiam

volentiam rogo, ne præmissi Officii culpam velis imputatam affectui erga te meo; quippe quo te pro summis meritis tuis summopere diligo & observo. Inprimis verò, cum tam mirificè me affecerint, certantibus inter se laticia & mœrore, literarium quod misisti munus, comitesque literæ tuæ. Nam cum tua tuorumque, quàm privatim & publice profiteri visum fuit, amicitia exultarem, tum præstantissimi filii tui *mauricius* posthumus fœtus me graviter commovit. Non potuit enim non refricari pristinum vulnus, ab immatura ejus morte mihi inflicto, cum præfixum charissimum illud nomen, & extrema, quæ in terris reliquit, cœlestis animi vestigia conspexi. Alias per se nunquam non ob animum versatur ille dies, quo postremum hic adfuit mihi. Nam cum supra ætatem sapuisset semper, tunc quidem tantum cœlestis Sapientiæ spirabant ejus dicta, & quæ communicaret mihi, cogitata atque instituta vitæ, ut jam in cœlitum ordinem transcriptus videretur. Ut autem paulo post vitæ id ipsum meæ, & omnium, qui norant, delictum ereptum intellexi, majus mihi, qui forte tunc iniqua valetudine confictebar, vitæ tædium obrepfit. Nec secus, quam si de proximis unus fuisset, uti vero affectu eram, solatio opus habebam, qui te consolari deberem. Nolo autem redintegrare tibi luctum, præfertim cum defuerim leniendo: sed occasione ita ferente non potui non, quod ubique facio & facturus sum, dum vivam, intimum testari amorem, quo Dyonisium tuum vivum complexus fui, & defuncti memoriam colo. Leve fuit, equidem fateor, quicquid à me potuit in illum proficisci: & quamvis permagna contigerunt aliunde, nihil tamen existimo fuisse, ut non majora meruerit & virtus & eruditio ejus. Cum itaque amanti nihil jucundius nihilque optatius sit quam redamari, sicuti volupe mihi fuit, ab illo, dum in vivis esset, vicissim diligi: ita gratissimum mihi accidit, vestri etiam amoris erga me testificatione id ipsum approbari. Cui quidem atque humanitati vestræ acceptum fero, quicquid hac parte laudis gratiæ aut laticia mihi accessit; maximalque pro eo, uti & gratissimo dono, gratias ago. Quamprimum, volente Deo, istuc venero, nihil mihi prius erit, quàm ut te salutem, & sincerum animi mei affectum coram quoque tester. Maxime autem beaveris me, si subinde etiam domi meæ conspectu tui, & dulcissimi consortii parte aliqua frui possim. Interim, Celeberrime Vir,

& tibi & lectissimæ conjugii liberisque tuis plurimam salutem dico, atque omnem felicitatem precor; pro me enixurus sedulo, ut amicitiam quæ & olim inita inter nos, & nunc renovata fuit, quibuscunque possum studiis colam. Vale, & amantem tui ama.

Dabam Lugd.  
Bar. xv. April.  
c10 l0c XLII.

Clar. tuæ Totus devinctus,  
atque ad omnia officia

paratissimus,

Jacobus Golius.

### CCCXLII.

Maxime Vossi,

**E** Tiam si intra anni decursum nihil ad meas responderis diversis occasionibus scriptas literulas, quibus vel amicos, vel res nostras pietati tuæ à multis jam annis commendare consuevi: tamen solenne meum observaturus Musarum tuarum fores pultare haud desino, etiam atque etiam rogans ne festivissimos obdās pessulos meque deinceps habeas pro exclusissimo. Non ita tetricus es, sat scio, tot jam exemplis antehac edoctus. Idpropterea ac modestum juvenem Georgium Huldericum Wenningium Archipalatinum nunc mitto, iturum in Bataviam & Angliam, ut Ecclesiarum statum coram penitus cognoscat & reversus cum prudentia operam suam populo Dei collocet. Is vivæ instar epistolæ res nostras explicabit, siquidem eum audire lubet & vacat. Olores universalis gratiæ etiamnum scripta nostra sollicitant. Nescio an videris, quæ D. Triglandius in Syntagma meum nuper commentatus sit. Miratus sum viro collibuisse ipsissima Syntagmatis verba exagitare & cum aliorum placitis, imo & Pelagii erroribus confundere, ubi de universali gratia cum Orthodoxa antiquitate & Catholica Ecclesia differo. Præjudicium causæ nostræ peperit, quam tamen bonis me approbaturum confido. Ubi Dissertationes meæ exegeticae & apologeticae ad umbilicum perductæ fuerint, id quod propediem futurum spero, eas censuræ tuæ submittam. Interea gratiæ verbi Dei commendo te, Vir maxime, *maurici.*

Brem. xx. April. veteris  
c10 l0c XLII.

Excellentiæ tuæ

Devotissimus,

L. Crocius.

CCCXLIII.

## CCCXLIII.

*Summo Viro, Gerhardo Joh. Vossio  
S. P. D. Joh. Ravius.*

**E**ST utique permagni affectus, nec, uti modestia tibi dicitavit, minutum, sed quod reapse experior, probum justumque Symbolum, quod ad me destinasti. Qui enim inter meritos de Arte Logica me referre tantus ipse vir aggressus es, quid facis aliud, quam ut nomen meum consecres? Ego autem qui mereri primum volo, & hæcenus fui incertus, an aliqua me via sic etiam duxerit, ne prorsus eam à bonis desertus, post tot obrectatores meos te primum invenio laudatorem: Principem utique & summum Virum, quemque unum non reverear omnibus opponere. Cui si primum placuero, facile bonis probatum me confidam. Ego quoque ut debeo tibi jam à pueritia mea, & Magistrum te mihi publice præstitisti, ut erudis me ac doces quotidie, ita non possum vel hoc ipso non agnoscere beneficium tuum, qui in Arte Logica studium atque operam meam confirmas. Ita enim undique pressus sum calumniis & malevolorum insultibus, ut jam ante annos tres ipsos omnem spem atque animum abjectum; Quid enim facerem unus adversus tot multos? Quod tam disparibus armis? Loco iniquo? Ubi sola autoritas, nulla ratio placet. Ubi omnis conatus nixusque, contumacia ipsa virtus sibi exitio erat. Tacui ergo hæcenus, & ista equidem lege, ut scilicet antibus etiam Collegis, ne sententiam ausus fuerim proloqui. Ad pedes abieci ultro, deserui; tantum ut ne fraudi esset veritati patrocinium. Itaque evenit ut quæ conculcanda projeceram, servata sint jam omnia. Utique enim demandata mihi Professio Logica, tamen ista evanuit conditio, ne novarem. Dimidium ergo nunc Soræ licet, ut alibi liceant omnia. Quæ ipsa tamen ex veteri documento intra spem metumque comprehensa sunt. Ego quoque si alter ille perditis rebus mereri potuit gratias, quod de Republica non desperasset, possum ostendere similiter aliquot parvos bonæ indolis ac virtutis igniculos. Et credo utique non aberratum me à favore illorum, in quorum potestate sita apud nos est libertas literarum, si primum audeant ipsi credere. Qui enim istis coloribus depictus sum, quibus male-nominati homines aliaque omnia

obsceni omini solent, non possum sic mea ultro virtute renidere, nisi magnorum virorum judiciis ante omnia sublevatus. Quapropter, mi Domine, si vel à te, quod longè credo facillimum, vel ab aliis impertrare possis, ut honestè de me sentiant, ut jubeant velint me hanc Philosphiæ ancillulam pudicè ac liberaliter Dominae suæ erudire, absolveres beneficium, & quam mereri volentem habes, benè merentem ipse efficeres. Quanquam non ausim hæc plura à te petere, qui jam satis in me munificus extitisti. Quod scias, omnia mea, ut video, intercepta mihi, hoc munusculo restituiisti omnia. Quicquid enim sani bonique est in multis illis, ut libellus titulo promittit, quæ ab aliis Logicis non tradita sint de forma Enunciationum & Syllogismorum simplicium, id omne meum est. Et admiror Nihufi mentem, quare ille veteranus tanta ambitione annixus sit, ut esset inter Philosophos τῶ ἀλλήλων κλέπτης. Præcipue cum etiam juvenis scrinia compilare non reveritus sit. Non me conviciari, ex istis collige. Nunquam Nihufio venisse in mentem de Forma hac enunciandi (*Id, quod est homo, est id, quod est animal.*) nisi post illa quæ anno cōpōc xxxviii. iv. Kal. April. edideram, quæque statim eodem anno Colonia Agrippinæ in Bibliopoliis visâ mihi Nobilissimus Conradus Labun, Eques Pomeranus, recens tum à contubernio, ipse homo doctissimus, rescripsit. Non alia afferre eum, quàm ex editis odorari potuerit, & ideo illum in multis falli, quia rationem principiorum nondum viderit; quorum ergo præscripta ratio est, hæc dexterrimè tenere; quorum autem occasio se non præbuit, hæc statim corrumpere. Istam à se constitutam formam Enunciandi [aliquid, quod est homo, est aliquid quod est animal] esse quidem apud imperitos, quod interpolat rem domini, apud doctos, judicium. Nihil enim aliud dictum, nihil factum, nisi quod factum. Istam quoque constitutam formam enunciandi à nemine aut inveniri aut asseri potuisse, nisi qui ex suis cunctis principiis eam eduxerit, in quæ ille adhuc impingit. Ex ista forma enunciandi multa sequi infallibiliter, quæ ipsi adhuc non videntur. Quâ de causâ? quia illa pars principii, ex qua derivantur, adhuc latet. Ideoque illum in forma enunciandi & ejus primis principiis parcum, in forma Syllogismi fermè omnem esse. Quæ causâ? Scilicet constituta forma enunciandi, omnes errores in Syllogismis, qui



qui illi debebantur, dissipati erant. Illum tantum Appendicem demonstrationis edidisse à me in fine libri istius promissam, discentibus necessariam, mediocriter doctis superfluum, & à quocunque etiam homine expectatam. Hæc summa duntaxat capita sunt. Taceo modos loquendi, five non evitatos & alias recentes ac meos, five etiam de industria leviter inflexos, reapse *tautis*. Dolum statim in principio deprehensum habui. Quæ quæso *apogon* illa hujus libelli, & præcipue istarum pollicitationum, de forma enunciandi & Syllogismorum? Sanè ut in Modalibus autor ipse itaque à me laudatus est, qui primus recentiorum ostenderit, ad Prædicatum modos pertinere, ut partem Termini: ita negare non potest, formam enunciandi, ex qua istud fluit, sibi tum ignotam, imo aliam fuisse. Nam qui veram Copulam non habet, veterem autem malam Copulam avellit à Prædicato cujus pars erat, & pro vera copula substituit, ille erravit in tota forma enunciandi, tam in Terminis quam in Terminorum connexionem. Demere enim Termino, & ex parte materiali facere formalem adeoque copulam, est offendere in universum formæ logicæ fundamentum. Totam ergo formam enunciandi immutavit, ut etiam manifestissimum est, minime defendit. Imo, quid in causa fuit, quod cum anno c10 Ipc xxxiii. Horneius illum refelleret ex Copula, ab eo tempore nihil ex Copula, hoc est, ex forma enunciandi responderit. Ego autem sequente statim anno aggressus sum Horneium, & ex vera enunciandi forma, tum à me primum multo studio & pro maximis convitiis reperta, defendi Nihusium. Ita quidem, ut Horneius admiratus sit, quomodo id in mentem venerit, quod aliam Copulam præter consuetam exigere, & alio igitur fundamento, niti cœperim. Unde ipsius hoc pulchrum exstabat consilium, ad Henricum Rhanium J. U. D. & Professore, tum Collegam meum, pro se quidem non malè initum, ut in herbis istas disputationes opprimerent; longè enim alia ex iis principiis sequutura, quàm quæ apparent. Hæc ego tum frequentissimis Collegiis, in Academia florentissima M. DC. studiosorum publicè ac privatim agitare. Undequaque ad omnes Academies delapsa, sententia meæ, nec in Anglia neque Tubingenibus incognita, locis maxime diffitis. Tabulas producere possum & homines; sed causam videamus, quæ Nihusium confidentem in isto voto

suo reddiderit. Claritas nominis sui, obsecritas mea, aut ætas, juvenis tum xxiv annorum. Quomodo me opportunum vidit ad omnes injurias facile ferendas. Sed istarum rerum quicquid sit, patiar, ut cœpi, & suffecerit mihi conscientia & fructus in publicum. Non enim necesse est, querere quibus autoribus literæ beatæ ac felices sint, dum sint modo. Et potest ille à Deo missus esse, ut vel autoritate sua adjuvet verum, quod ea sola hæcenus pressum est, vel nisi gratus exstiterit, etiam materia nominis mei fiat. Id enim certum est, utcumque ego tacuero, posteritas non tacebit. Dum vestra me judicia nostris Mecænatis, in has Logicorum, ut putant, calumnias minime otiosis, antiqua fide & bona, quod aiunt, de nota commendarint.

Tu autem, fortunate Senex, ignosce homini sic in tot tantisque negotiis tuis strepenti, & existima hæc talia esse *τὰς ἀνδρῶν Οὐρίην*, & non tam disertum me à calamitate, quam loquacem factum. Tibi quidem parvum semen verborum ad me, in tantam usque segetem excrevit, ab homine minime Philolopho, quia non sylabas modo, sed ne verba quidem numerare aut appendere cœpi, sed fundere. Non videbor pratexere causam miserabilem, si quemadmodum ad tantum virum hæcenus scribere non sim ausus, jam ante nosti. Et profecto video sæpe ineptos homines ambire vestram gratiam, & negotium scribendo facessere; nec unquam hæcenus in me reperi, quod dignum esset tantorum virorum personis. Nunc vestra me benevolentia, ut solet insperatis fieri in gaudiis, ne temperare quidem permittit, & ex contrariis admodum causis idem fermè novum crimen pecco. Bene sit Hemerodromo, qui me non finire, sed abrumperere jubet. Vale optime, & fratrem & me tibi asserere ac vendicare, si merebimur.

Sora Dan. viii. Id. Maii c10 Ipc xliii.

#### CCCXLIV.

Reverendo & Incomparabili Viro  
Gerhardo Jo. Vossio, Jo. Fredericus  
Gronovius S. P. D.

Reverende & maxime Vir,

J Amdudum argumentum non unarum  
ad te Literarum habui, cum de aliis  
rebus tum quod Libros interdum ex Bibli-  
otheca

otheca tua desiderarem, sed quia desideria ista fere momentanea sunt & serum est quod non fit statim, paupertate mea plerumque me involvo. Ad graviores autem scribendi materiam, præterquam quod tibi non valde vacare scio, me quoque tardior efficit, quod in duplici hac professione publice sustinenda privatisque habendis Scholis tantum invenio quod agam quotidie, ut facile alias cogitationes cessatum demittam. Eo autem laboro vitii, ut nihil eorum, ex quibus qualemcunque fructum manare putem debere, negligenter agere possim aut perfunctorie; ita fit ut delassatus in iis quæ revera occupare nos haud erat tanti ad alia meliora osciter & minime sufficiam. Jacent ergo illa quæ multa moliebar, immo festinabam, & jacebunt aliquandiu, dum non nisi fastidiose & ex intervallo tangere licet. Sed tanto credo fient maturiora. De cætero hæc quidem solitudo vehementer me delectat. Amamur, colimur, audimur frequenter satis pro numero, qui hic est studiosorum; nemo obtrectat, æmulatur nemo. Itaque nulla de re, quæ animum torqueat solliciti in diem vivimus. Isaacum tuum valere & rem bene gerere spero & cognoscere haveo. Item quid fiat iis, quæ sub prælo habebas. Inklusas rogo ut haud gravatim tradi cures Cl. Freinshemio qui me magna affecit injuria, quod adventum suum in vestram urbem celatum me habuit. Comode enim per ferias Pentecostes ad vos excurrere potuissem & hebdomadem illam, quæ alias magis Bacchanalium quam festi more hic agitur & acta est, ficius sanusque apud vos ponere. Vale Vir maxime & gravissimam Matronam tuam, filium Matthæum & Hufwedelum, nisi grave est, à me saluta.

*Daventriæ postrid. Eid. Jun. 1700*

Pascalium Grosippum & Polyænum Casauboni desiderabam his diebus; si iis egere paululum potes, rogo ut ad me mittas. Leviter chartæ rejicula involuti tradi possunt Tabellario Daventriensi in de Warmerstraet in den Iffel in de blinde Man, destinati ad me domi D. Christenii qui te observanter salutat.

CCCXLV.

*Clarissimo Viro Gerhardo Jo. Vossio.*

*Optime, Clarissime, & Amicissime Vir,*

**D**utius quidem filii, non amoris defectu, sed temporum vitio, hominumque, qui nihil literis, aut amoris nostro concedunt. Hic sanè à literis ortus est, & ab iis artibus, quibus quieti non factiosi, eruditi non ambitiosi sumus, in suo uterque munere occupati, ut bene de omnibus mereamur. Ego certè, quod tu præstas, conari me profiteor & post quadraginta duorum annorum publicas continuasque dissertationes, audienti me juventuti, vocem ingeniumque impendo. Omne quidem sic Scriptorum genus attingi; ausus, amœnitatis causâ, etiam Censorini de die Natali librum explicare: quo deinde argumento, ad curiosam temporum doctrinam, converti stylum, & plurima hæcenus non observata, produxi. Cum alios docerem, discere ipse potui, qua ratione tempora omnia, ex tempore computarentur. Specimen aliquod in meo libro, de Bissexto est: qui adjunctam dierum Diorthosin habet. De Circulo Urbaniano nihil jam dico: totus enim editus adhuc non est: nihil de Olympiadicis, quæ limam exspectant. Amici de Nundinis jam quoque molesti sunt: quas distuli, ut tabulam prius expenderem Nundinalem, in Gruteri inscriptionibus, Pag. cxxxvi. Torquent me Circuli isti abrupti, & numeri: an ad Lunam referendi? Si quid in te opis est, si quid in amicis, fac juver, gratiamque à me uberem exspecta. Theatrum nunc adorno heroicum, sive Elogia Imperatorum Austriacorum, Ducum Burgundiæ, Regum Hispaniæ, sed ex illis utrisque stirpem trahentium; ad alios deinde Principes, exemplo Jovii, (cujus olim Musæum perlustravi) operam translaturus. Jucundum sit, Viris etiam locum Doctis, & Amicis dare. Statui verò & imagines, à meliore manu addere, & his auxiliis opus commendare: quæ si ulli libro, Elogiis certè conveniunt. Ut Scriptionis formam videas, geminum hoc specimen mitto, Albertum inquam, & Fredericum. Burgundiæ Duces unâ Orchestrâ absolvi, mox etiam transmittendos. Exemplaria enim à Typographo quotidie exspecto. Sed quid audio? In Aulo Gellio te esse? Laudo consilium. Hic ille scriptor est, quia magnam Anti-

H h

quitatis

quitatis partem noctibus suis illustrat, varius, Latinus, accuratus. Quantum, O Musæ, damnum! Librum viii. intercidisse! Quantum bonum, suppleri posse! Vide etiam an Caput ultimum Libri xx. præfatio operis totius fuerit potius quam conclusio, ut nunc habetur. Plurcula observabam nuper, cum selecta totius voluminis hujus capita publicè explicarem: si tempestivum sit, mittere velim, & meam quoque Symbolam, ut ita dicam conferre. Tu me ama, & ad me scribe; ut intelligam amari me; si silentium autem hætenus meum, pro delicto non censi. Sic nunc toto animo te complector, qui totus,

*Levamis in arce regia iii. Kal. Septemb.  
Clodoc xlii.* Tuus sum & ero semper,

Erycius Puteanus.

Hanc utinam aliquando videas, quem admodum Anna Romeria Clarissima Matrona nuper vidit! Det mihi hæc, priusquam moriar, gaudia Bonus Deus. Vale.

Mi Vossi.

Licetne addere? Temporum hominumque vitium, in principio Epistolæ hujus accuso. Sed unus hic potissimum est, totus malus, ac perversus; dives tamen, & instrumentis nequitiae abundè instructus; qui (ô nefas) Epistolas meas, & ad me missas, fraude interceptare, & referare, elegantiam, & ingeniosum facinus putarit. Deprehensus tandem, accusatus, convictus, evadere pœnam potuit; adhuc mihi, & amicis meis timendus. Tantum nummi possunt, qui scelere gubernantur. Magis mireris, si narrem omnia. Fecit hic igitur, ut quia amicorum nomina occultanda erant, de Anagramatismo Theoresin scriberem: quæ parata est, ut in lucem veniat, ad te sic quoque transmittenda. Si igitur Raselramium leges, quem notare velim, intelliges. Sed de hoc homine aliàs. Quomodo & literas, sed alieno ingenio, attingat, Viri docti indignentur. Iterum Vale, & me semper ama.

CCCXLVI.

D. G. V. S. P.

Celeberrime Vir, & amice integerrime,

**L**iteras, quas prid. Id. Maii ad me dederas, reversus domum inveni. Iisque avidè perlectis magno perfusus sum gau-

dio; quod non tantum veterem & indelebilem amico licet absenti in me favorem permanere, ex dono literis conjuncto perciperem; sed reipsa quoque ex utriusque filii tui scriptis experire, tuum in me affectum hæreditario jure in posteros tuos propagari. Ne quid jam de utilitate & fructu dicam, quem multiplicem ex munere literario isto persentisco, & porro ulteriori Lectione hauriam. Sunt juniores, qui eadem cum filio tuo Dionysio tentarunt, eademque conati fuere. Quis tamen ignorat, quid distent æra Lupinis? Dionysius: *μαγεῖται* ea præstitit, quæ non facile quis imitetur: cum Maimonidæ verba & phrasin latinissimè & tanta fidelitate expressit, ut consignificationes (liceat ita cum Philosophis audacius loqui) etiam non prætermiserit. Id quam sit arduum in orientalium scriptis occidentali quadam lingua exprimendis norint, qui id sapius aggressi fuere. Præterea nobis omnibus abundè suam probavit *πολυμάθειαν*, in doctissimis, quas singulis paragraphis subjecit, notis. Fratris sui vestigia premit filius tuus Isaacus, quod vel sola ad Lectorem præfatio ostendit; adeoque spem facit, fore ut quæ frater ad meliores occupationes se recipiens perficere nequivit, ipse tandem omnibus literatis exhibeat. Quod non parum conducit iter ad Italos Judæos susceptum; quos eruditione præcellere, indicio sunt tot præclara volumina ibidem excusa. Imo quum eò Græci, Syri, Persæ, Arabes se conferre non rarò soleant, quid D. Isaaco deerit, quin in isto studio ad eruditionis culmen ascendat? D. O. M. eum faciat reducem; quo parentis gaudio delibutos reddat; nobisque omnibus sua dona impertiat. Cæterum volui quidem *ἀντίδωρον* remittere; verum præ avaritia Typographorum nequeo; qui in Orientalibus excudendis remissiores sunt. Attamen, Deo volente, intra menses tres debitum exsolvam. Interea Patrem Jesu Christi veneror, ut tibi tuisque omnia secundet, & una cum lætissima tua, ab uxore mea & eo salvebis qui est

*Lugd. Bat. 14. Kal.  
Maii Anno parisiæ  
salutis, 1642.*

Dignitatis vestræ

observantiss. & amantiſſ.

C. L' Empereur.

CCCXLVII.



## CCCXLVII.

*Χαῖτε ἐς Χρῆσιν.*

Clarissime & humanissime Vir, Domine & amice plurimum honorande,

**S**I vales cum suavissima conjuge & liberis tuis gaudeo. Quum adolescens hic istuc iturus esset, mihi que id significaret, aliquid ad te dandum censui literarum; etsi vix otii mihi ad scribendum satis concedunt labores, quibus vix eram ferundis. Neque dubitabam, quin tibi studium hoc meum qualecunque gratum esset facturum; quippe cujus in me benevolentiam pridem perspexerim. Nec est tamen magnopere quod scribam. De rebus enim nostris hic ipse adolescens te docebit. De vestris certior fieri per vos cupio. Te oro si per occupationes tuas licet, perscribas ad me aliquando, Publii Syri mimos quando filius tuus edet. Mea studia & conatus quod attinet, Valerium Probum de Notis Romanorum ad Janfonium edendum misi, Notas & observationes meas ad eum, optarem ut tu, præstantissime Vir, antequam publicentur, videres & emendares: quo certè nihil mihi hac vice incidere possit gratius. Bibliopolam rogavi, ut tibi meo nomine det exemplum Catalogi Bibliothecæ Medicæ. Peto abs te boni consulas, neque spernas prorsus; etsi industria & diligentia nullam in partem cum vestratibus, rei literariæ proceres, mea conferri possunt. Quæ ratio, quod aliis magnis viris mittere ea non ausus sum. Tu spero, mea qualia qualia sunt, vel mea causa non planè abjicies: quod te rogo, & me de erroribus in notis meis ad Valerium Probum paternè admoneas. Vale & me tui amantissimum contra amare perge.

*Dab. ex Arc. Soranaj. Id. Maii  
c10 l3 c xlii.*

T. C. ἐν Ἰωῦν,

Henricus Ernstius.

## CCCXLVIII.

*Summo Viro Gerhardo Joh. Vossio  
S. P. D. Johannes Ravius.*

**D**Udum mecum delibero, an hoc quidquid est chartarum ad te mittam. Nam ut legas, nec necesse nec volupe est, nisi quod jacturam facias temporis optimasque horas tam male colloques. Ut au-

tem ex iis, tanquam exemplo quodam, judicium eruditionis meæ capias, nulli hominum æque incommodum est, quam mihi, meo enim me indicio instar, soricis prodiderim. Quapropter, mi Domine, si ulla alia de causa in conspectum tuum venire patior hos fœtus meos, nisi boni animi, & mediocris industriæ, interque continentissimos docendi labores otii reddendi gratia, procul adhuc ab omni virtute me existimato, cujus tamen primordia & mediator quotidie & exerceo. Et ignoscas ipse conatui meo, si intellexeris, quam impium sit, altissima pace istaque crudissima simul viridique senectute communis omnium Patris tacere velle beneficium Dei. Quanquam derisus satis fuerim hoc regno, quod de magno Climacterico prædicare multa cupiam, cum apud se moris atque instituti non sit, istos annos observare. Ita ipsi plus æquo ridiculi erant! Mihi non tam annus, quem ipsum nec sibi homo nec usque adeo Naturæ debet, quam Dei gratia ostento erat. Et cum Regnorum mutationes, præsentibus ubique turbas, machinationes aliaque confidero, videor mihi gravissimis ex causis ad hanc pietatem excitatus esse. De me ac nomine meo sollicitus non sum; non enim existimo homines nobis, quàm actiones, aut actionum summas bonamque in iis mentem spectanda, &c. Confiteor tamen, gratissimum & mihi fuisse, si aliter gratulari licuisset. .... autem quam fatale mihi extiterit, agrotare ad ipsius editionem. Cum enim initium sic satis procederet, & jam morbi vis ingravesceret quotidie, ego tamen nollem desistere, pervicit malum. Absolveram nihilominus fermè ultimas laudes Academiæ nostræ. Interea fama malum toto Regno exierat, quemadmodum contra rationem status & privilegia Nobilitatis dixissem. Alii qui speciosius me obruere cogitabant, febri imputare, & quod Soræ non potuerim edere, itaque domi me non fuisse. Eratque tam gravis & acerba prorsus invidia, ut latere debuerim per biennium, donec furor iste poneret. Rediit itaque xv. Aprilis, ad quem tentanda erat editio, sed redit simul valetudo; & de vita mea desperant omnes. Itaque cætera non licet ex Schedis ne exscribere, nisi aliqua ultima eaque incompocita. Maturandum tamen erat, quod & tempus idoneum & virum nactus essem, opprimendis penitus calumniis. Quapropter existimabam satius esse, partem, eamque ferè meliorem relinquo, quam deesse bonæ hominum existimationi,

H h 2

mationi, quam profecto mihi tutiorem esse iudico omni alia fortuna. Atque ita de statu nostræ Ecclesiæ, de conditis ubique locis sacris, totisque urbibus & propugnaculis, de modo imprimis tenendæ pacis, de pace ipsa, & aliarum gentium spe atque expectatione anxia, nemo quicquam legat, etiam si dicta sunt omnia & perscripta omnia. Quod quidem cum alii deprehenderint, quia causas nesciunt, vituperabunt. Quamque & plura longè metuerim. Omnino enim & lapsus subinde fui, & oneri cessi, & indulsi mihi, nec semper intendi animum, nonnunquam fatigatus, & tanquam inclinans. Quod quidem in magnis viris opprobrium non est, quibus alia & multa & maxima incumbunt; mihi autem prorsus turpitudini est; quia hoc cum magnis viris non pecco. In quo tamen (vide ingeniosam hominum socordiam!) hoc mihi exco-gitavi ultro solatii, quod quis non videat immodulata poemata iudex. Et certè agnoscis istius juvenilis exemplum ambitionis, quod melius dicere voluerim, quam poteram. Itaque nihil amplius affero ad excusationem, quam bene veterem ignavorum querelam, quod ad meliora tibi omne quondam in juventute præsidium defuerit. Defuit tamen, ut mire video, quamplurimum ab aliis, nec minimum à meipso. Nunc enim vir ista errare incipio, quæ juvenis cum laude poteram. Et vides ubique ista. In illis equidem Commentatiunculis ad Miltiadem, Casarem, Livium; proletaria valde sunt, & quorum me statim pœnitet & revera pudet, quamprimum scripsi. Video me voluisse, deprehendo lapsum, sæpe de emendatione cogito, sæpe de non amplius conando. Sed istæ disceptationes meæ tandem in ista stulticia desinunt, quod putem, nomen & gloriam hominis spectari, non ejus fructum in Rempublicam. Sive autem ista *αἰσχρονομία* quædam, sive arrogantia ipsa est, confiteor tibi, mi Domine, non licere mihi, quæ sic edam, considerare. Qui enim publicè bis, privatim per tres quatuor horas quotidie doceo, variisque admodum & studiis & ingenii & profectibus impeditus sum, memoriæ usque adeo infirmæ, ut mea ipsius præcepta logica, stans in cathedra & heri interpretatus, reminisci non possim, valetudine plerumque adversa, & post vexatus undique calumniis, malisque amicis; non possum meliora edere. Et profecto hæc talia pro editis, nec habeo nec agnosco, neque quisquam extraneus facile ac-

cipiet. Tantum pro usu & manu ductione Juventutis sunt, ut jactis quibuldam fundamentis cætera à nobis superstruantur. Ego enim existimo & vos ipsos longè majorem ubique gentium in literas fructum laturus, si alii vobis idoneos Auditores Lectoresque pararent. Occlusis enim initis ipso itineris capite, quis Viator erit? Itaque existimo tam necessarium esse habere Philoponos, quam Varrones. Necessarium, inquam, non salutare aut gloriosum. Et hæc est altera pro me scripta defensio, quæ sic iterum parata est, quasi prorsus ea opus sit. Tu autem, maxime Vir, qua per virtutem simul & gloriam in minorum gentium patres modestia & comitate es, fave cœpris atque animo meo, & existima me in literis adorare, potiùs Occidentem quam Orientem Solem, nec unquam ingratum fore adversus te, istud nostri seculi, omniumque lumina & oculos accendens, sydus. Deus modo te nostro Hemisphærio diuturnum porro & saluum præstet. V. B.

Sora, Id. Martii,  
clō lxx xlii.

## CCCXLIX.

Χαίρων εἰς τὸ διδασκῆναι καὶ Χαίρων ἰσοῦ.

Clariss. & Præstantiss. Vir, Dom. mi & Amice honoratissime.

**Q**UIA constat ἀντισημαίνειν τὰς αἰχμαλώτους, non dubitavi Præst. Tuam per ingenii monumenta satis cognitum, hisce literis audacius affari. Mitto quoddam *μυλῆμα* meum *ἡγεμονικόν* nuper editum, idque censuræ tuæ, quoad fieri potest, sub-jicio; quæ quo acrior fuerit, ac rationibus pollentior, hoc futura mihi est gratior, & ad scopum veritatis tuendum, vel contin-gendum obtinendumq; conducibilior. Non equidem inficior, hoc mihi studium à multis jam annis ita cordi fuisse, ut nec ingenii (si quid in me est) laureolam quasi-erim, nec commodis meis servierim. Unica meta fuit Christi Salvatoris nostri gloria & Ecclesiæ decus. Quicquid assecutus sum, divinæ id acceptum fero gratiæ. Assecutus autem mihi, si quid videre possum, videor tantum, ut omnium qui alicujus sunt nominis in hoc genere scriptorum, quos legi, calculos ad normam judicii revocare, erroresque singulorum deprehendere possum. Veruntamen ne meo fortè

forte iudicio falsus temere in publicum prodire, ac mea proferrem immaturus, in animum induxi aliorum hominum doctiorum explorare iudicia, atque audire sententias. Contradicientes nonnullos haecenus habui; sed auctoritatibus ac opinionibus magis pugnantes, quam certis rationibus. Quumq; animadverterem, magnos quosdam hodie scriptores, velut defatigatos in novis subinde cudendis mundi Epochis, periodum istam pridem à Jos. Scaligero excogitatam amplecti, quippe quæ Cyclos ubique promptos, & in his quoque (si Musis placet) Indictionum Romanarum in annis mundi methodum repræsentet; pertæsus ego jampridem vani hujus Pagnii, cœpi tandem de canonibus iudicii Chronologici, & legibus generalis ac veræ mundi æræ serio cogitare. Has igitur simpliciter breviterque consignatas benevolo Lectori publicè offero, ut, quid in iis jure desideretur amplius, cognoscam, & deinceps vel adjungam vel corrigam; aut, si me id pia fata verabunt, aliis me doctioribus ac tanto negotio perfungendo dignioribus expolienda relinquam. Liber ex iis unam considerare. Nimirum veram hanc esse regulam, nemo negaverit: Ex Sacræ Scripturæ testimoniis fundamentaliter extrui oportere sacrum hunc Orbis creati computum; sed iis recte ad rem accommodatis: e. g. Queritur ad quem mundi annum referenda sit Exodus, seu Quoto M. anno filii Israël ex Ægypto duce Mose migrarint? Non te fugit, quanta hic Chronologistarum sit discrepantia. Judæi quidem in suis parvis Chronicis exprimunt annum mundi 2448. quamvis æræ suæ universali (qua numerant usque ad æram Christianorum annos integros saltem 3760.) minime coherentem. Sed nostrorum Chronologorum hæcenus nemo fuit, quin plures numeraverit annos; donec tandem ante annos 17. (Anno & 25.) prodiiit Philip. Lansberg. Gasanus, qui in sua sacra Chronologia annos 2448½ numerat, quod & Judæos ait agnoscere. Tamen idem Gasanus à justis illius anni M. Cyclis procul aberrat, propter reliquarum suæ Chronologiæ partium inconvenientiam. Exinde queritur, quamdiu in Ægypto commorati sunt filii Israël? Respondet Moses in Ex. 12. v. 40. annos 430. habitasse eos in Ægypto. Hosce jam annos si quis à descensu Patr. Jacobi in Ægyptum velit denumerare, actum egerit cum Gilb. Genebrardo Theologo Parisiensi, cumque Reimaro Urso Ditmarso Mathem. Casareo. Neque enim ultra 210. annos

ab illo descensu ad hanc solennem excessum elapsi fuerunt, ut verus calculus arguit. Quum itaque reliqu. 220 anni altius ordiendi sint, quæro unde? Plerique omnes hodie eos petunt à 75 anno ætatis Abrahæ à Charris discedente. Qui sic? quia ibi primum (inquiunt) accepit promissionem seminis. Itan' ergo nulla promissio facta ei ex Ure patriæ evocato? Nulla (aiunt) nisi terræ quondam hæreditario jure possidendæ. Eho nonne hæc est promissio? Quare ergo terræ hæreditatem pollicebatur, annon ille simul promittebat semen? Et qui semen, nonne & Christum semen illud Benedictionis complectebatur. Hæc nempe statim illa *σπέρματός τῆς διαθήκης εἰς Χριστόν*, de qua Paulus Gal. 3. v. 16. quæ annis 430 ante legem datam facta est, ipso tempore Abrahæ vocati, non ex Harane, sed ex Ure Chald. Gen. 15. v. 7. atque assumpti è regione trans flumen, Josuæ 24. v. 3. priusquam habitaret in Haran five Charris. Sic enim Vocationem hanc (unam, non geminam) cum verbo promissionis (quæ velut anima est Vocationis) conjunctam describit B. Lucas in Actis 7. v. 2, 3, 4. Et Apostolus ad Hebræos c. 11. v. 8. Per fidem vocatus Abr. auscultavit Deo, abeundo in locum, quem accepturus erat in hæreditatem, & exivit nesciens quo. Jam si per fidem vocatus exiit, utique habuit promissionem, tamquam materiam fidei circa quam sive objectum. In omnibus hisce testimoniis, Vocatio illa & egressio atque obedientia Abrahæ astringitur ad primam ex Ure migrationem; nusquam v. ad discessum ex Haran. Sequitur ergo illos 430. annos *τὸ περιπάτησεν Ἰσὴρ ἰσὴρ Ἰσραὴλ, ὃν περιέκλειον ἐν γῇ Ἀρρὴν καὶ ἐν Χαρραν, ἀπὸ τοῦ καὶ οἱ πατέρες αὐτοῦ* (ut est in Græcis Bibliis) à prima illa vocatione Abra. ex Ure & primum susceptâ inde peregrinatione ordiendos esse; minime v. quinquennio post, à perfectione ex Haran. Alias forent tum annis 425. Sic in Lib. Judicum anni Servitutis accommodandi & includendi sunt legitimorum Judicum annis. Item in Historiis Regum Judæ & Israelis magna requiritur diligentia & *ἀκρίβεια* in collatione annorum Successionis rectè instituenda, ne inter-regna & alia inconvenientia admittantur: qua in re plerique omnes hallucinantur. Sic in multis aliis, de quibus suo loco.

Ante octennium edidi Prodromum quendam Chronologicum de veritate & certitudine æræ Christianæ, necnon de numero Paschatum Ministerii Christiani. Illum



Illum verò ego nollem editum propter plurimas mendas in eo residuas, quas non sine magna molestia tollere ac mea manu corrigere me oportuit in iis exemplariis, quæ amicis hinc inde communicavi. Vix unum mihi restat, idque variè interpolatum, si quæ se occasio det ejus denuo edendi.

Paschata Ministerii Christi numero saltem tria, quorum uni tantum primo Christus solenniter celebrando interfuit, anno *Æ. C.* 32. ætatis 31. (30. videlicet completo, excurrentibus diebus 110. Cyclis Lunæ 14. Solis 13. Bissextili Juliano 19. Exodico 355. Mundano 967. die 13. Apr. f. 1. A secundo, quod à Judæis peractum est 4. Apr. f. 7. Luna 16. (quum ex Lege debuiſſet pridie, feriâ 6. celebrari) abſuit, ut patet ex Collatione Textus Joh. 6. & 7. cap. v. 1, 8, 30. anno *Æ. C.* 33. ætatis 32. annis elapsis 31. & diebus insuper 100.

Tertium denique fatale Pascha, secundum Legem, celebrandum erat die 26. Mart. (quæ fuit Lun. 15. à primâ *φάση*) f. 6. & prid. f. 5. maſtandus & comedendus fuerat Agnus Pasch. quod & à Christo discipulisque ejus factum. Verum obſtitit traditio veterum, ne ſcilicet Paſchatos celebratio Sabbato ordinario anteferretur, ac favit hac in parte instituto Seniorum, Pontificum & Scribarum, ut nempe Dominum Jeſum abolerent ac tollerent ante Feſtum, Matt. 26. v. 5. Anno *Æ. C.* 34. ætat. C. 33.

Feſtum autem illud *ἀνθρῳπον*, Joh. 5. quod attinet, pro Paſchate non habendum eſſe planè ſentio. 1. Quia *ἐορτή* quoties Paſcha ſignificat, habet præfixum ſibi articulum *ἡ*, qui hic deſideratur. Sic diſtinguitur etiam in Bibliis Græcis, Exod. 23. v. 15. & 16. Item Ex. 34. verſ. 18. *τὴν ἑορτὴν ἀζύμων φυλάξῃ*, Feſtum illud Azyumorum obſerves. At Verſ. 22. ſic *ἡ ἑορτὴν ἑβδομάδων τῆς ἑσθῆς καὶ ἀρχῆς θυσίᾳ πρῶτην*. Et Feſtum ſeptimanarum feriaberis mihi initium meſſis triticeæ. Eſti enim cum articulo & uſurpatur de Feſto Tabernaculorum, Job. 7. manet tamen hæc obſervatio, ut ſine Art. non uſurpetur de Feſt. Paſch.

2. Quia Evangel. Johannes, qui ultimum ſcripſit, hoc ſibi propoſitum habuit, teſte Irenæo, ut conderet quot Paſchata Miniſterio Chriſti tribuenda ſint. Jam verò non niſi tria tandem commemorat: I. Joh. 2. verſ. 13, &c. Ejuſdem præteriti mentio ſit Joh. 4. verſ. 45. II. Inſtantis mentio ſit, Joh. 6. verſ. 4. præſentis aut

præteriti nuſquam, niſi implicite, ſit mentio, vel potius veſtigium extat, Joh. 7. verſ. 12. Non enim ad hoc Paſcha II. venit Chriſtus, neque Hieroſolymam aſcendit ante Feſtum Judæorum Scenopægiæ. Interea loci continet ſe in Galilæa, nec vult in Judæa verſari: quod in ipſo culpant & fratres & cognati ejus, Joh. 7. verſ. 3, 4, 5. Requiritur Judæi, verſ. 11, 12. Occidere eum cogitarant, verſ. 25. III. Indicatur Joh. 11. verſ. 55. & deinceps ſequentibus cap. deſcribitur, nec minùs è reliquis Evangeliſtis.

3. Quia ſic ordine ſequuntur Feſta apud Evangeliſtam commemorata; Primum *ἡ ἐορτὴ τῆς πάſχα τῆς ἱεῖ*. Joh. 2. Cujus memoria bis renovatur, Joh. 4. verſ. 45. Deinde mox ſubjungitur, Joh. 5. verſ. 1. *ἐορτὴ τῆς ἱεῖ*, Feſtum Judæorum, videlicet illud quod designatur, Exodi 23. verſ. 16. Feſtum Hebdomadum ſive Pentecoſte. Hinc ſequitur Joh. 7. Feſtum Judæorum *ἡ οὐλομένη*, de quo Chriſtus, *ἐγὼ ἔγω ἀναſταίνω εἰς τὴν ἑορτὴν ταύτην*, q. d. Ego qui non aſcendi proxime *εἰς τὴν πάſχα τὴν ἑορτὴν τῆς ἱεῖ*. (Joh. 6. verſ. 4.) *ἐγὼ δὲ νῦν ἔγω ἀναſταίνω εἰς τὴν ἑορτὴν ταύτην*, idem ego ne nunc quidem ad hoc feſtum Scenopægiarum aſcendo. Et videtur Chriſtus in hoc feſtum, quod erat complementum cæterorum, ipſius Paſchatis feſti (à quo abſuerat) honorem hoc pacto uſurpatione Articuli, velut de indiſtriâ conſerre velle.

4. Quia Chriſtus ipſe Luc. 13. verſ. 6, 7. trium duntaxat annorum indicinam facit ſub parabolâ ficûs. Item verſ. 32. Ecce (inquit) ejicio dæmonia, & ſanationes facio hodie & cras, & tertia die conſumabor. Itaque tria tandem fuerunt Chriſti operantis Paſchata, tribus annis incompletis. Nam quod Vinitor, Luc. 13. verſ. 8. etiam quartum annum ſterili ficui indulgeri poſtulat, ad ſubſequens Apoſtolorum tempus prædicationemque pertinere videtur.

5. Feſtum iſtud Joh. 5. non fuiſſe Paſcha, ſed potius Pentecoſten, probatur autoritate cum veterum, tum recentiorum; ut puta Ignatii, Irenæi, Hieronymi, Epiſphanii, Chryſoſtomi, Auguſtini, Cyrilli, Euſebii, Caſſiodori, Oroſii, Theophylaſti, Petri Lombardi, Guillermi, Bedæ, Hoſpiniani, Maurolyci, Panvinii, Lucæ Oſiandri, Eraſmi, Maldonati, Pererii, &c. Denique D. Cramerii, qui in Germ. ſuis Bibl. ad Margin. capitis S. Johan. aſcripſit Perſingſteſt.

Maldonatus

Maldonatus ex illis Domini verbis, Joh. 4. vers. 35. *Ὁυχ ὑμεῖς λέγετε, ὅτι τῆς μέλουσας ἡμέρας, ὅς ἐστιν ὁ σπέρματος ἐργάται, negat secundum Pascha rectè statui posse; cenlet enim proverbiale esse dicendi genus Judæis usurpatum de frugibus serotinis. Nam quoties mense Nisan, vel Isar, propter anamalam quandam aëris constitutionem, nondum ita maturuissent fruges, ut meti possent, dicebant, superesse adhuc anno vertenti absolvendo menses quatuor, intra quos (aiebant) satis maturescent fruges, & metentur; atque adeo tempus esse expectandum. Hæc Christus ad spiritualem Evangelii segetem, messiemque transferens, inquit, *ἰδὲ λέγω ὑμῖν, ἐπὶ τῆς τῆς ὁρῆς ὁμῆς, καὶ διασπασθῆναι τὰς χόρδας, ὅτι λέγουσιν εἶναι σπέρμα τοῦ σπέρματος ἡδὺν*. Instabat nempe messis altera triticea, quo tempore Christus hæc ad discipulos loquebatur, mense Ijar decurrente, ubi peractò primo Paschate, ex Judæo in Galilæam revertens per Samariam transiret (Johan. 4. vers. 3, 4.) ante Festum Pentecostes. Inde ergo paulò post rediit Hierosolymas ad Festum Hebdomadarum, de quo Joh. 5. vers. 1. Videatur etiam Samuel Petrus in Eclogis Chronologicis, c. 12. Et Gerh. Mercator, qui quatuor annos statuit, nihilominus in præfatione suæ Harmoniæ, Tamerli (inquit) veteres omnes, tres tantum annos posuerint. Quæ cum ita sint, relinquatur omnino illud Festum, Johan. 5. minime Pascha fuisse, adeoque tria tantummodo Paschata ministerii numeranda esse.*

Sed desino jamjam pluribus tibi negotium faceßere legendis, quæ alteri reservabo occasionem, siquidem T. P. suis me vicissim literis beare non dedignabitur. *Ἐπὶ τῶν ἐν τῷ Χριστῷ ἀναστάντων ἐν νεκρῶν, καὶ ἡμεῖς ποτὶ ἀναστάντων ἐν ἐσχάτῃ ἡμέρᾳ.*

*Dabam Stralsundi ex Museo meo propriid. Festi Resurrectionis Dominicæ. An. Æ. C. 1644. à Pass. C. 1608. Estque hic præfatus dies 6. Id. seu 8. April. juxta meum computum à rebus conditis 2000676. h. e. anni 5477. & d. 202. Ex his nimirum colligat T. P. quem statuam primum rerum conditarum diem. Eum nempe quem Ægyptii quondam (teste Plut. in Osiride) ἐοικέντες τῷ ἑρμῇ, υἱὸς καὶ σὺν ὡν ἡδίων, ἐπὶ λέγουσιν. ΓΑΤΚΤ' Ἡ' ΑΛΗ' ΘΕΙΑ.*

T. P. & Humanitatis studiosissimus,

Andreas Helvigius R. Sch.

CCCL

*Clarissimo & Celeberrimo Viro Domino Gerhardo Vossio, Jacobus Gothofredus S.*

**E**T si me dudum in tui amorem pertinax tuum meliores literas juvandi studium, collectæque inde famæ celebritas, quam alii alioquin sæpe merentur, alii habent, pertraxerit, nondum tamen opportuna sese mihi hactenus interpellandi tui occasio obtulisse videbatur: sed commodum nuper accidit, ut cum Reipublicæ nostræ nomine Divionem Legatus issem, in Salmasium nostrum *τὸν πάλιν* prope Belnam inciderem: Ibi statim, atque inter primores sermones, jucundissima tui memoria habita: deque operibus tuis hactenus præclare editis utriusque judicia concinere; mox & in id convenire Historiæ potissimum Ecclesiasticæ illustrandæ studium tibi, neque alii temere melius deinceps impingendum, eamque gratissimam laborum tuorum summam metamque imposterum esse oportere. Id quod abs te impetratum tam enixe cupio, quam in hoc studii genere *ἀμύμον* meam subinde oblectare soleo; cujus rei exiguum ad te specimen propediem mittere jam olim constitueram, eamque primum scribendi ad te materiam mihi seposueram. Sed enim cursoriâ hæc prævertere nunc visum in gratiam ornatissimi & doctissimi Viri D. Henrici Alers, ad vos proxime ni fallor recursuri. Ita credas mihi velim, vir clarissime, non temere hospite ullo gratiore multos annos heic usos nos, quàm eo ipso. Ita publicè is hæc morum elegantia, eo animi candore, hisce ingenii dotibus, hic egir, ut proborum primorum quorumvis affectum animamque sibi conciliarit. Uno tantum infelix, quod spes ejus privatas, liberalesque operas eventus aliquà eluserit; Trippii, inquam, egregii cæteroquin juvenis, dispar in literas quibus excolendus traditus fuerat, saltē ne inter idiotas haberetur, affectus; eâ re liberioris vitæ studium, custode remoto. Id summatim ad te perferri operæ putavi, ne alioquin alterutrius fama sui dissidio laboraret, vel aliunde causas ejus maligna interpretatio arceßeret, præ illa quam verissime nunc perstrinxi: quæ ubi semel tibi comperta, hac fide mea, explorataque fuerit, ad alios, ubi opus propagandam spero cupioque. Publice enim interest opinari eorum

rum qui ad magna nati sunt, existimationem ad nos pertinere, ne aliqua sui parte unquam per susurros labascere queat. Rem verò te candoreque tuo dignam feceris, si hæc apud matrem Juvenis propinquosque extuleris: Eademque me tibi devinxeris, si Alerfium, cui ego factum cupio, commendatione tuâ juveris: simul & responso bearis. Interea dum Philostorgium tibi submitto, in amicorum tuorum censum referri cupio. Vale Vir Cl. & Celeber. annos multos.

Dabam Kal. Junii 1642. Genevæ.

## CCCLI.

*Viro incomparabili Gerardo Johanni Vossio, Samuel Petitus S. P. D.*

QUanquam non sim nescius, Vir summe, quam religiose adiri debeas, ne in publica commoda peccetur, tamen mei esse putavi officii, beneficiis tuis in Samuelem Sorberium meum è sorore nepotem provocatus, testatum tibi facere quantum tibi debeam, vel eo maxime, quod meus Sorberius me à te amari perscripsit, quod cum unice velim, facile mihi persuaderi passus sum: Bea me igitur *τὸ πρῶτον* tuo amore, & certus esto te à me omni observantiæ genere coli, meque omnia tua causâ velle: certè quicquid imperaveris, à me impetrabis. Vale, Vir maxime.

Nemaugi Nonis Sextilibus anni  
Dionysiani cto lxx xlii.

## CCCLII.

*Clarissimo Viro Ger. Jo. Vossio,  
J. Rousius S. P. D.*

Amplissime Vir, doctissime Amice,

Fato quodam meo fieri videtur, ut cui plus debeam, illi fere minus persolvam. Id cum in aliis vitæ meæ actionibus non semel adverti, tum nusquam magis (quod sciam) quam literis amicorum respondendo, ubi cessator intolerabilis vix unquam ad diem solvo. Causari possem fortasse occupationes, quibus in munere meo fungendo distineor; verum ejusmodi excusationes ut quotidianæ nimis & jejunæ, ita amicitia nostra prorsus indignæ. Ut enim cujusvis generis impedimenta ob-

tendam, leve quidem esset unum vel alterum officiosum vocabulum in Epistolam conjicere, præsertim ad Heroem Ger. Jo. Vossium, qui me toties nec merentem non solum literis tuis humanitate plenissimis provocavit, sed & libris eruditione consummatissima refertis à se compositis iterum atque iterum donavit. Vides, Amplissime Vir, quam tecum agam ingenue, me fisto ipse propriæ negligentia reum, cum non aliud habeam quo me apud te honestè purgem. Literas tuas cum librorum fasciculis, quos mihi, doctissimo Pococko, & Bodleyanæ nostræ dono misisti, accepi, post unum vel alterum mensem quàm à te datæ, de quibus, ut & aliis reconditæ & stupendæ eruditionis tuæ operibus mihi antea donatis, immortales gratias ago. Illos verò quos Bodleianæ destinâras, Reverendissimo D. Procancellario, astantibus Collegiorum præfectis, eaque fere horâ quâ mihi à Tabellario allati, tuo nomine in manus tradidi. Neque opus sciscitari, quo vultu quove animo ab illis accepti: nempe ut ancile de cœlo delapsum, five ut reliquias sacras certatim contrectant & suspiciunt. Humanitatem & eruditionem Doctoris prædicant, de *ἀνδρίᾳ* reponendo aliqui cogitant. In hoc autem omnes consentiunt, ut in solenni Ordinum Academicorum conventu, gratiæ per literas Academiæ nomine (qui honos apud nos maximus) tibi decernantur. Postremò mihi injunctum (quod & alias ipse sponte fecissem) primo quoque tempore locum illis in Armario Bodleiano nobilissimum assignare, nomen verò Cl. Vossii in Registro Magno cum aliis Heroibus in perpetuam rei memoriam inscribere.

Doctissimum filium tuum Isaacum, quem superiori anno cum filio D. Heinii mihi per literas commendasti nondum vidi. Audio eum cum Legato Christianissimi Regis, (id quod & literis mihi ipse significavit) in Galliam trajecisse. Si in reditu nondum abiecit consilium Oxonium invisendi, dabo operam ut intelligat quanti & quam chara familiæ Vossianæ apud nos memoria. Valemus hic omnes per Dei gratiam amici tui quos Oxonii cognovisti. Reverendissimus Prideauxius Episcopus Vigornienfis, Academiæ Procancellarius, nunc brevi Cathedram Theologicam relicturus; Archiater Claytonus, vir bonus & summe doctus qui de te & honorifice & sentit & loquitur; D. Fellius Professor Margaretæ, cum tu hic esses, nunc verò Ædis Christi Decanus; D. Fruinus Col-



legii Magdalenenſis Præſes frater tuus, Eccleſiæ Gloceſtrenſis Decanus, & alii qui te officioliſſime ſalutant. Ignoscas clariſſime Vir feſtinenti calamo, dabitur occaſio brevi iterum ſcribendi. Interim vale & habe in numero cultorum tuorum,

Oxon. 17. Kal. *Obſervantiſſimum Tui,*  
Jul. 1642. St.  
Ver.

Jo. Rouſium,

*Acad. Oxon. Bibliothecar.*

## CCCLIII.

Clariffime & Præſtantiſſime Vir,

**J**AM quatuor ſunt meſes, cum literas ad te dedi, unâ cum Synopſi Syſtematis mei, quo artem prophetandi, evangelizandi vel prædicandi ſum exſecutus. Cum autem tanto tempore nullum à te reſpoſum acceperim, aut meas aut quas reſcripſiſti interdiſſe ſuſpico. Et quoniam illuſtriſſimus Alexander Syncleticus, domo Cyprius, ex nobiliſſima Roncaſiorum Comitum familia, primarius in hoc Athenæo Antecellor, me certior fecit, filium ſuum Aloyſium ad nos nunc profeſſionem parare ſub Auriaci Principis militia adoleſcentiæ rudimenta poſiturum, viſum mihi eſt iſtam tui literis iterum ſalutandi occaſionem non amittere. Una igitur cum iſtis accipies priorum exemplum, quodque mihi humanitas ſua ſpondet, nos quamprimum certiores facies, quid animi ſit Bataviſuiſ, cum ex te quæ Pierrucciſ à ſe expectari jubet cognoverint. Is ſalutem tibi amoris ac ſtudii pleniffime per me nunciat: cujus ſi familiaris uſus tibi contigiffet, ſat ſcio, non me quicquam amicitia magis, quàm veritati, in laudibus ejus prædicandis tribuiſſe fatereris.

Ego etiamnum hic hæere neceſſe habeo, mirifice geſtiens Alpes tranſvolare, ut aliquo in loco, ubi libertas æqua ſit omnibus, vulgandis lucubrationibus meis vacare poſſim. Dux Mantuanus pro veſtigalibus, quæ ex Monteferrato capere ſolebam, cum ea miniſtri ejus plures annos in ærarium ejus intuliſſent, tandem mihi Feudum Cavadoro (vulgo Cavatorre) cum Marchionis appellatione in Monteferrato tranſcripſit, ut id cui velim vendendi poteſtatem habeam. Ceſſit mihi quoque fundum optimum maximum Goſdio vel Goito finitimum, à flumine Min-

cii ad Veronenſes uſque fines pertinentem, qui tantum complectitur ſpatium, ut eum equo vectus non niſi decem horis circuire poſſit. Solum ejus eſt uberrimum & rerum omnium præterquam ſalis & olei feraciſſimum, quod Marchiones Piſcaria fundi dominos, cum familia centum capitum alere ſolebat, fuitque poſtea bene diu Mantuanorum Ducum deliciæ, cum præſertim venationis, aucupii & piſcatus maxima ſit ibi commoditas: eſt nunc & pleraque agri Mantuani poſt diuturnum bellum ibi verſatum fundus eſt ſatis incultus & ſylveſtris: quem tamen Pierucciſ, qui ſuperiore anno poſſidere eum nomine meo cœpit, uno triennio affirmat tam fructuoſe coli poſſe, ut videatur non minus quatuor Ducatonum millibus annuiſ redditurus. Sed Marchionatus nihil domino affert emolumentum, adeoque non tam facile oratorem inveniet, niſi quem præter juridiſſionem in ſubjectos & venationem, cujus multiplex ibi eſt commoditas, Palatium ampliſſimum Principe non indignum alliciat, ſi præſertim æſtates in loco ſatis edito, unde in mare Liguſticum proſpectus patet, jucunde exigere gaudeat. Iſtorum venditione cum pecuniæ aliquantum redegero, non erit, opinor, quod ultra me cis Alpes derineat. Cum quid ejus ex ſententia tranſactum fuerit, egoque de loco, qui ſenectæ meæ ſedes ſit, conſtitutum habuero, curæ mihi erit, ut ne quid rerum mearum diutius ignoreſ. Te interea, Vir præſtantiſſime, proſpere valere beneque rem privatam & publicam gerere opto & auguror.

Patavio ad diem *Tui obſervantiſſ.*  
3 Julii 1642.

Gaspar Scioppius.

## CCCLIV.

**S**iſto tibi, maxime Voſſi, Academia Rostochienſis Oratorem, D. Laurentium Bodocum Polonum, qui Belgicæ veſtræ vult eloquentiam ſuam innotefcere. Commendatus fuit D. Bergio, *πρὸς τοὺς ἀδελφούς*, à D. Jeremia Elborough Paſtore Eccleſiæ Hugle-Hamburgeniſ; ſed, hoc fatiſ functo, literas mihi reſignandas exhibuit, ut, me parario, tuas auderet pultare fores. Ad innumera beneficia, quæ tibi debeo, amicorum principi, hoc jam dignare coaddere, ut generoſus animus intelligat, præces meas apud te pondus habere.

bere. Inclinare videtur ad partes nostrarum Ecclesiarum. Hortatus sum eum, ne se mancipet partibus, sed verum è solis Scripturis & Orthodoxa eruat Antiquitate. Nos in eodem hæremus luto, & ob amorem pacis & conciliandæ Ecclesiarum concordia domi forisque vapulamus. Præter D. Hug. Grotii, & D. Riveti collationes incidi hisce diebus in ea, quæ D. Revius cum D. Vedelio acius disputat de potestate Magistratus in rebus Ecclesiasticis, & quæ de Adoratione Christi, qua Mediatoris, in Academia Ultrajectina disceptantur. Si hæc non avocabunt vestratum animos à nobis ad sua, quid tandem de nobis omnibus fiet? Theologia gentilis cum commentario in Symbola me cogunt ingratum mori. Nihil enim à me expectari potest, quo tanta munera minima ex parte penssem. Nautæ cuidam nostrati commisi Dissertationes nostras & Declarationem D. Hermannii Hildebrandi, Collegæ mei, ut ad pedes tuos deponat. Siquando vacabit, limis saltem inspice, ut videas quibus de rebus male feriat quidam nobiscum litigent; & sicubi animadvertas me à janua veritatis aberrare, in viam revoces. Vera enim docenti, lubens cedo. Bene vale, virorum & amicorum maxime, & vive quam longissimè Deo, Reipublice, nobis.

Brem. Kal.  
Sept. Julianis  
c16 loc xlii.

Tui observantissimus,

L. Crocius.

## CCCLV.

Salve, Princeps Ingenii ac Doctrinæ  
Gerarde Johannes Vossii,

Quem non suo nomine magis quam hoc elogio compellare debeo, cum primum compellare audeo. Nemini me adulari vel natura patitur, vel conditio adigit: sed Germano more sensuque testor, à te expectari, quæ hoc tempore, inter summa etiam ingenia, à nemine expectantur. Præstitisti enim ea quæ hæcenus nemo præstitit. Singularis Providentia Dei te in curas incomparabiles excitavit: id quod serio existimo, & sæpe pro tua incolumitate vota facio; quippe qui nihil habeam, quod me à veneratione tui abstrahere possit, sicut interdum malignitate sæculi videmus accidere apud eos,

qui nec beneficia cœli æstimare, neque officia humanitatis exercere didicerunt. Esto hoc argumentum ingenuæ simplicitatis, quod cum calamo statim cogitationes animi huic chartæ se infundunt, postquam scribendi ad te consilium amicissimus noster Freinshemius instauravit apud me confirmavitque. Nam Velleium istum, ad tantum Virum, nisi fors testandæ observantiæ, mittere tanti non putassem. Verum, ut audio, non minor quam eruditio, & humanitas tua, quæ vel venia vel favore meam hanc scriptionem dignabitur, spero. Deus te servet, Vir Illustris.

Scribebam Ar- Illustri tuo nomini dicatissimus,  
gentorati 1642.  
9. Septemb.

Jo. Henricus Boeclerus.

## CCCLVI.

D. G. V. S. P.

Vir Celeberrime,

Harum exarandarum occasio sese obtulit ex itinere Johannis Ramyghii; Viri sane, si quisquam in isto ordine, longè doctissimi. Quem à multis annis novi familiariter, & quia in literis humanioribus erat versatissimus, favore profectus sum. Per plures annos nepoti meo ex affine in ædibus meis præfuit; ibique suam mihi probavit diligentiam, in docendo dexteritatem, probitatem, pietatem ac fidelitatem. Adeoque nihil in ipso desideratur, quod ad perficiendum virum bonum requiritur; vel in eo exoptamus, qui Scholæ alicui præficiendus est. Quocirca cum Correctorem virum huc vocaverint N. & A. Curatores, hunc de meliori nota tibi commendare non sum veritus: ut qui de ipsius dotibus certus essem. Id certissimè scio, si vestræ Scholæ præficiatur, me optimam initurum gratiam apud omnes, qui me eo quidpiam contulisse noverint. Ipse satis ex colloquio, me nihil favori dare, experieris. Itaque ejus promotioni faveas, peto; ut quandoquidem dignus est, Correctoris munus nancisci queat. Porro munusculum literarium mitto; in quo an aliquid præstiterim, ex Epistola præfixa cognosces. Quod de Salmasio ibidem scripti magnam mihi crearit invidiam dicam, an inimicitiam. Quid agas? difficile est placere omnibus. Nostri indolem meam, omnibus placere studeo; imprimis viris probis, doctis ac piis.

piis. Sed coram brevi fortassis plura.  
Hic subsisto, tibi ex animo tuique bene  
precatus: atque permaneo

Lugd. Bat. 13. Jul. *Amplitudinis tue*  
*An. partæ salutis*  
1642.

*observantissimus,*

Constantinus L' Empereur.

## CCCLVII.

**F**ilios meos, Vir Clarissime, ætate quidem impares, studiis vero pares in gymnasium vestrum missurus, tibi eos potissimum commendo, cujus amicitiam uti mihi semper utilem ita & honorificam expertus sum. Quare etsi magnorum tibi beneficiorum debitor sum, hoc tamen pro colophone flagitare audeo, ut in meorum studia digneris inspicere.

Extremum hunc, Vir summe, mihi concede laborem. Quibus Libris opus sit ad audiendas tuas cum fructu Lectiones, quæso indices, & quo pacto se ad eas præparare valeant; uno verbo ut absolvam, methodum ipsis studiorum præscribere, si volueris, spero eos dicto audientes fore, me certe, satis jam devinctum in æternum porro devincies. Hoc meum est consilium ut antequam ad jurisprudentiam accedant humanioribus studiis non perfuntorie imbuantur, præcipue vero in arte oratoria & cognitione historiarum, quæ tibi meritissimo mandata est provincia. Hac in parte, te manu-ductore haud parum præstituros confido, si avum si patruium cogitabunt, neque unquam commissuros ut à literis, quibus familia nostra se in clientelam dedit, dicantur alieni. Vale Virorum & eruditorum decus, & eam qua me semper profecutus es benevolentiam filiis quoque impertire ne graveris.

Hagæ Comitæ  
xix Sept. 1642.

*Celebritati nominis*

*tui addictissimus,*

Guilhelmus Grotius.

## CCCLVIII.

S. P.

Clarissime & doctissime Vir, collega & amice  
conjunctissime,

**E**X reditu nostri Heilersieg comperi quam benigne & amice cum eo & aliis de me fueris collocutus, & memoriam mei apud alios es testatus, quo nomine non solum in hac occasione, sed in aliis multis plurimum tibi debeo. Clariss. & Rever. David Blondellus scripto tibi brevi significavit gratitudinem suam, pro ea opera quam ei impendisti in opere suo commendando D. Blavio, qui ejus Editionem suscepit & specimen ad me misit. Per D. Spanhemium, qui heri nobis adfuit accepi folia quæ ad te mitto, ut ea tradas Typographo aliis jungenda. Quæ reliqua sunt brevi sequentur. Additionem huic Epistolæ conclusam jubebis suo loco reponi, & D. Blavio meis verbis salutem dices, urgebisque ut properet & ad me mittat folia quæ singulis septimanis excidentur, ut ea auctori mittam qui, si quæ menda irrepant, ea notabit. Amici quidam ad me miserunt Epistolam Vigilii de quinque capitulis à P. de Marca editam cum sua dissertatione, in qua multum laborat ut Pontificem illum ab inconstantiæ nota liberet. Mitto ad te unum exemplar ex duobus quæ accepi, quod levidense munus ab animo tibi addictiss. accipies. Saravius Senator qui unum ad me misit de te sentit & loquitur tanquam de Viro hoc nostro seculo eruditissimo & à quo nihil prodit nisi tersum & exactum. Rogat per me ut doctissimas lucubrationes non finis diu doctorum hominum gaudia morari, præsertim quæ ad Antiquitatem Ecclesiasticam pertinent. Expecto novum laborem à D. Grotio, qui examini meo opponit, ut quidem ille ait, postea quieturus, Votum pro pace Ecclesiastica adversus Riverum & alios irreconciliabiles: Ego, si Deus dederit eum excipiam cum solita modestia & si possim majori. Nosti quo in statu sunt res Sedanenses; Princeps sua ipsius confessione reus intercessionem Celsiss. nostri Principis salva vita elabatur, ea tamen lege ut Rex novum præfectum Sedanum mittat cum decem cohortibus, nec loci Domino & ejus familiæ ibidem habitandi potestas fiat. In Religionis negotiis nihil mutabitur. Noster Molinæus paulatim declinans ex morbo continuo eo adspirat ubi

li 2

nulla



nulla mutatio. Constitui Deo dante ad vos excurrere, sed hucusque impedimenta mihi fuerunt obiecta, etiamnunc expectanda mihi est D. Spanhemii inauguratio; postquam, si Deus dederit, te & tuos ibi sum salutaturus & cum Typographo acturus. D. Salmasius serio promittit se ad nos venturum ante hyemem. Misit ad Elzevirios librum de Græca Lingua & ejus variis Dialectis & de Hellenistica. Bisterfeldius adhuc detinetur à Principe Transilvano nec spes est eum facile inde iri creptum. De alio erit cogitandum. Rogo ut occasione data certior me facias te hunc fasciculum accepisse & in eo contenta. Salveasque interim & semper à me & à mea cum Domina Coniuge & Liberis tuis, inter quos gratulor D. Matthæo, quod re ipsa aliquid pro eo fuerit præstitum, ut deinceps alacrius operi insistat. Deus tibi alterum reducem sistat auctum omni eruditionis genere sanum & sospitem.

Haga-Comitis Tuis omni officio & affectu,  
3. Octob. 1642.

Andreas Rivetus.

## CCCLIX.

Clarissime & præstantissime Vir,

**N**ON dici potest, quam grata mihi fuerint literæ tuæ, quas Creutchio & Freinshemio ad me perferendas tradidisti. Et cum in iisdem plenissime referas, quæ semper fuerit ac etiamnum sit animi tui in me & filios propensio, vix ac ne vix quidem lucis hujus usurâ dignus existimarer, nisi eandem summo observantiæ cultu prosequendam mihi judicarem; potissimum verò hoc nomine, quod & filium Benedictum in Galliam proficiscentem salutaribus mōitis & exemplis instructum dimiseris, & filio tuo Isaaco sine dubio suasor & autor exstiteris, ut in præfatione sua R. Moïsis Maimonidæ de Idololatria libro apposita & mei & filiorum mentionem faceret præclarissimam, ipseque promittas, te præclariora tuæ in nos omnes voluntatis in posterum & ad omnem posteritatis memoriam spectantia editurum documenta. Quibus quidem officiorum generibus te nobis vehementer devincies, ut omni tempore parati simus & de te tuisque bene sentire, & optime mereri. Freinshemius cum præter literas meas evocatorias, commendatione testimonioque

tuo instructus ad nos ante perpaucos menses venerit, talemque se in omnium conspectu 25. die præterlapsi mens. Aug. exhibuerit, qualem monumenta ejus in publicam lucem antehac enissa eum declararunt, ingenio scilicet acerrimo & omni eruditionis genere refertissimo, non dubitabis, quin eundem singulari amore simus complexuri. Imò verò cum tot in eo conspiciantur multiplicis scientiæ ornamenta, vere profiteri possum, Academiam Upsalensem adventus illius felicitate mirifice recreatam. Et cum iis dotibus jam sit cumulatus, ut multorum in re literaria tenuitati & ariditati facile possit consulere, procurabimus, Deo juvante, ne eum professionis in Sueciam susceptæ poëniteat. Quantum tibi debere cupiat filius Jacobus, literis ad te datis ostendet. Benedictus, quem Deus præpotens hæsterna luce salvum & incolumem nobis omnibus restituit, & felicissima quæque domui tuæ & tibi longissimum diuturnioris vitæ curriculum comprecatur. Vale omnium literatorum decus singulare.

Fenecopià Australium Geothorum 4. Oct.  
Anno 1642.

Tibi tuisque & obligatiss.

& addictissimus,

Johannes Skytte.

## CCCLX.

Clarissime & eruditissime Vir,

**I**Saacus filius tuus juvenis virtutis spectata, & supra ætatem probitatis antiquæ Italiam perlustrans animi & studiorum causa, me Lucam humanissime adivit. Thyrsus voluptatis decumanæ meum pectus percussit admirantis, suscipientis indolem tantam. Tibi gratulor, mihi gaudeo, te tanto filio, me tantâ lætitiâ auctum, tui ipsius vivam imaginem in eo intuentem, quem tibi deprecor incolumem superstitemque ad annos Nestoreos. Hospitalitatis nostræ mutuam tesseram literariam agnovit, quam in Cimeliarchio sacrariove servo. Mea illi antiqua vota indicavi de recudenda Polymachia, & Amaltheâ etiam aucta emendataque. Pararium mihi ascivi in meis schedis interpolandis, si per te liceat, postliminio patriæ restitutum. Interim quæ obsequii in eum signa præ me tuli, eadem tu in me candidioris animi argumenta agnosce; & ignosce, si meritis vestris paria facere per meas opes non licuit.

licuit. Et quia meæ nugæ canoræ tantam lucem literatorum ferre nequeunt, calculum, oro, suspende, clientem patronus defende, & quid Critici sentiant de Amalthea, veluti Jovis suffragium, tuam opperior Crisim. Deus te, tuaque fortunet æternum.

Luce. Kal. Nov.  
c1o Idc XLII.

*Tibi addictissimus,*

Josephus Laurentius.

Responsione si me dignabere, eam Gulielmo Bartilotto per Lucam Donatum ad Balthasarem de Judicibus Bibliopolam Lucensem curabis tradendam quàm primum.

CCCLXI.

S. P.

**N**Autæ culpa, Vir maxime & amicissime, dissertationum mearum sarcina, perditis duobus fasciculis, unâ cum adjunctis Literis, huc rediit. Excussus enim fatetur, se ades D. Cabeliavii, ad quas sarcinam amicis Leidensibus & Hagienfibus destinatam deponere jussus erat, invenire non potuisse. Quippe quas mutaverat, me inscio, cui notum eum non procul à nobilissimo Domino Grootehusen habitare. Inde factum ut cum indignatione reperierit, navique suæ reddiderit. Id scire te volui, ne fides D. Cabeliavii, communis amici nostri, fieret suspecta. Doleo autem vehementer, quod Dissertationes illæ meæ neq; vobis neque aliis amicis fuerint exhibitæ. Mitigassent forsan iram quorundam fratrum, qui utramque Synodum Hollandicam iterum concitarunt, ut tum ad Magistratum, tum ad Ministerium hujus loci de periculis ab doctrina de Universali gratia à nobis asserta veritati & Ecclesiæ Christianæ imminetibus denuo scripserint, quamvis stylo paulo leniore, quam anno 1641. nisi quod jam etiam deputatos Synodicos reliquarum provinciarum in consensum adversum nos attraxerint. Idem queritur etiam extra Provincias Belgicas in Helvetia, Galliis & alibi, ex consilio D. Altingii, qui pro Opinionibus Piscatoris, præceptoris olim sui, tanquam pro aris & focis pugnare videtur. Quid tandem de nobis fiet? An hæc doctrina tantopere in Belgio fuerit? An Ecclesia Christi ministros Belgas

deinceps habebit perpetuos Censores & fidei Dictatores? D. Spanhemium, novellum Leidenfium Theologum audimus rigorem Allobrogicum in prælectionibus suis ad Vaticanam V. T. de Christo strenuè inculare. Sic gratiam, pacem & misericordiam, imo reditum in patriam speramus & ambimus? O miseriam! Ignosces, Vir candidissime, dolore meo & favore tuo me meosque constanter complectaris. Duo mihi filii sunt sacre Theologiæ destinati, quos Philologiæ causa vellem aliquantisper in Belgio vestro pedem figere, quippe quod hac parte excellit, si patronos inibidem invenirent, qui pædagogias commodas eis ad minuendum sumptus procurarent. Pietatem ac Modestiam spondeo. Consilium verò tuum hac in re obnoxie peto. Alter in Hebrais, Chaldeis & Syris mediocriter exercitatus est, & jam attingit Arabicas literas. Alter, præter Philosophiam, Græcas, Latinas & Hebræas Literas, *ἑκαστὴν* tractat. Si quid in me vicissim superest, quod Excellentie tuæ gratum sit, id tam paratum tibi, quam paratissimum credat. Calamum sisto. Bene vale, Vir excellentissime, & salve *μυνοίη*.

Brem. 22. Jan. c1o Idc XLIII. *Quem cum pluribus subsequeturis vobis prosperum decurrere animatus precor.*

*Excellentie tuæ devotissimus,*

L. Crocius.

CCCLXII.

Joacimus Matt. J. C. fil.

S. P. D.

**S**Alve & tu mihi tandem aliquando, Optime & maxime Virorum, Vossi, jamdudum honorate, sed nondum salutate. Aliis enim hætenus eam concessi felicitatem, ut si non coram, saltem per literas tecum colloquerentur, & virtutem inde suam, atque eruditionem augerent. Ego tanto Viro negotium facessere, & meliores aliquot ipsi horas perdere nolui. Ac sic perrexissem, nisi admodum nuper Gothofridus noster Cretsmarus Juvenis elegantis Ingenii, nec proletariæ Eruditionis, ex Gallia redux, quam è Belgio adierat, inter alia à me rogatus mihi tuam erga Germanos meos Humanitatem, quique

Que tibi proprius perhibetur, Candorem Oppido prædicasset. Forsitan & ille tibi, quem absens colit, veneratur, æstimat, nondum excidit, sed locum adhuc obtinet tuos inter cultores non postremum. Ejusmodi inter nos sermone habito, occasione scribendi insuper à probo & modesto Viro Juveni Joanne Selfischio Germ. cujus opera his in locis Jansonius vester in vendendis Libris usus est, oblata, diutius infelix esse nolui. Venio igitur ad te litteratorum hodie Dictator, levidensi aliquo munere (sine eo enim accedere, religioni mihi duxi) quod ut benevole accipias etiam contendo à te. Etiamque tædet alloqui mei quo olim Danorum Regem sapientem & comem honoravi, exemplum offerendum esse tam comto Capiti in villore Charta, cum reliqua omnia quæ nitebant, jamdudum distributa sint; sed tu animum offerentis trutinabis, non scripti vestem. Quod si hac ratione tibi, Vir clarissime, filiisque tuis doctissimis innotescere potis essem, sicuti jam *H. Grotio D. Heinsio, Aug. Bucknero* immortalibus undique nominibus innotui, horam profecto qua has ad te exaravi, ponerem inter felicissimas. Sæpe quidem optavi illam mihi diem illucescere, quâ mundi ocellum Amstelodamum adire, teque in eo miraculum convenire possem; verum cum res meæ miserrima illa bellorum continuatione incredibilem in modum attrita sint, hætenus me frustra illud optare animadverti. Si autem Deus mihi per te aliquem illic loci Mecanatem impoterum excitaret, grato animo beneficium ac studium illud agnoscerem, & perpetuis laudibus prosequerer. Priusquam has literas finiam, tibi Philologo excellentissimo, aliquod pro bellariis ex penu literario apponi Problema, non spero molestum futurum. Hospes meus Simon Paul. Anatom. & Botan. Prof. hæc in Acad. solertissimus, nuper ex Epistola Hippocratis ad S. P. Q. Abderitanum ΠΑΔΑΟΤ ΑΝΑΗΥΙΝ deprompsit ac sese nondum à quopiam Criticorum, quid sibi ipsa veller, edoceri potuisse, cum ne quidem P. Castellanus Medicus doctiss. in Syntagmate de Festis Græcorum quicquam de illo Festo sibi lectum scriptitet. Cum mihi pro ea, quæ cum Viro illo optimo intercedit familiaritate, potestas fieret de hoc loco meum exponendi, Litteratorum infimi, judicium, diligenter expenso loco, adverti eum talem esse, qui citra ullum detrimentum ignorari possit. Et facile concesserim neminem illorum quos ille de Hip-

pocratici loci intellectu percontatus est, rationem reddere potuisse: cum mea sententia privata illa fuerit solennitas quæ ipso Hippocratis tempore vix pluribus in Græcia, quam Cois Civibus nota fuerit, ab iisque peculiarem ob causam celebrata. Quod enim si aliquem Italum aut Gallum, imo, ex ipsa hac Siolandia aliquot miliaribus Hafnia remotum hospitem ad *Χωαζίας* Amakeranam, quæ plurimum quotannis in vico ad unum miliare hinc distante in Bacchanaliorum stultitia peragitur, invitarem, an conjiceret quid rei indicato in loco peragendum spectandumque esset. Suspenditur ab Agricolis, quos è Belgio huc vicinæ olim commigrasse aiunt (nomen enim Belgarum hodieque retinent) ad funiculum anser, cui collum sebo & smegmate quam potest fieri pinguius inungitur. Illic incitatis equis periculum faciunt ricolæ, an pedibus suspensæ avis collum cursu illo veloci apprehendentes possint avellere, quod cum ob glabram illam, Nervis, Ossibus, Cutemque firmiter concretam cervicem, plerumque frustra ab iis tentetur, equiti illi pro epinicio risum pro anserino capite avulso, probe adipe illitas manus deportant. Si tu Vir. Clar. aliqua de VIRGÆ istius assumptione ejusque festo nos pro immensa tua lectionis & antiquitatis notitia docere poteris erit illud longe nobis gratissimum. Vale, Vir candide, & adfuturum cum illo qui has adferet Joachimum de cætero tuum futurum Epistolio aliquo exhilara. Ego hocce meum obsidem impoterum observantiæ cultusque in te mei fisto.

*Scrib. Hafn. xvii. Calen. Janu. ann. serv. humano generi dati MDCC XLIII.*

## CCCLXIII.

Clarissime & celeberrime Vir,

**R** Eddidit mihi ampliss. Dubletius munus tuum auro mihi carius, nodos te vindice dignissimos. Ego pro ratione temporis celeriter percurri pleraque, eadem postea cum otio expensurus: sed tamen ex ea lectione agnosco me multa didicisse, vel quæ nesciebam, vel quæ non ita accurate noveram. Methodus qua usus es exacta & facilis Lectorem allicit, perspicuitas ubique elucet, variorum autorum opiniones exacte ad trutinam revocantur, & quæ maxime probari debeant, ita asseruntur & confirmantur, ut nihil supersit quod



quod desideremus, nisi ut porro in talibus pergas de Ecclesia & Repub. literaria bene mereri, & antiquitatem illam illustrare, quam maximi facere debemus. Gratiarum autem tibi summas ago, quod me inter alios amicos hoc munere beare volueris. Nobiliss. Salmasium salutavi Leidæ, adhuc claudicantem ex pedum infirmitate, post labores maris, quibus addita fuit podagra. Promittit se ad nos venturum cum primum convalescit. Eum hortatus sum quantum potui, quod etiam fecerunt amici Parisienses, ut neglectis parum utilibus controversiis, & vitiligationibus, deinceps se traderet seriis illis in quibus plurimum potest, & ex quorum tractatione major utilitas, in bonum Ecclesiæ, sperari potest, & laudabilior fama expectari, quod nos ab illo impetraturos confido. De Cl. Petito non magna spes affulget, præsertim si quod Sorberius ad me scripsit, periculum sit ne in Marasimum incidat, ad quem prævertendum coactus est, sepositis aliquantulum studiis rusticari. Deplorandum erit si quæ cum maximo sumptu & labore collegit in Josephum imperfecta maneat. Quod de optimo Affine meo Molinæ petis, dabo operam ut situm tuam in eo expleam. Oëtimestre totum in suscepta peregrinatione ad Alvernenses impendit, cujus temporis maximam partem transegit in loco qui dicitur S. Meon, ubi sunt acidulæ quas medici judicaverant aptæ pellendis Symptomatibus quibus vexabatur. D. Grassus Reipub. Lugdunensis expertissimus Medicus, propria sponte per dispositos equos eum invisit, dies quinque continuos cum eo egit, ut morbi naturam detegeret, & quibuscumque quæ secum attulerat pretiosis medicamentis eum donavit; nec quicquam ab eo præter preces & benedictionem postulavit. Non planè fuerunt inutiles aquæ, quæ tamen morbi inveterati pertinaciam vincere non potuerunt, sed utcumque imminuerunt. Itaque Maringam veniens ad Elaveram, ubi est Ecclesiola reformatorum, ibidem concionem habuit, & navigiolum conscendens in Ligerim descendit Bleas versus, ubi aliquot dies apud generum suum quievit. Exinde ad filium profectus Castellodunum in Agro Carnotensi, aquas quas secum asportaverat sumpsit per dies quindecim, & ibidem habita Concione & distributa Eucharistia, cum totius Ecclesiæ admiratione, Lutetiam Parisiorum venit, ubi à veteri grege cum maximo gaudio fuit exceptus Carentoni ad Matronam, & post duas Hebdomadas, quibus cum

familia ab amicis fuit exceptus lautissime, duobus florenorum millibus ab Ecclesia acceptis, (quæ ei etiam Schedam tradidit, quæ spondet, si in Acad. & Eccles. Sedanensi deficient ordinaria professorum & pastorum stipendia, omnia ex ærario Parisiensis Ecclesiæ quamdiu vixerit, ei refundenda fore) Sedanum rediit, unde nudius tertius literas habuimus à filia ejus quam hic vidisti, quæ prosperum ejus adventum, cum totius Ecclesiæ lætitia nobis narrat, additque medicos conjectare, si nihil aliud accadat, posse eum adhuc integrum decennium in eo statu durare. Itaque illa ad nos reditum meditatatur. Habes historiolum in qua libentius tecum excurri, quod sciam te ex affectu de talibus inquirere, quem amicum semper testatus es & propensum in optimum illum Dei servum. Gratulor tibi reditum Isaaci tui Lutetiam Parisiorum, quem Saravius ampliss. ad me scribit venisse optimis onustum spoliis ex illustr. Bibliothecis, quæ postea in usum literatorum sit liberaliter sparsurus. Deum precor ut eum tibi restituat gratia sua cumulatam, & ab omni superstitionis contagio quod in Italia & locis similibus grassatur planè liberum. Tibi insuper, Vir Clariss. & D. uxori tuæ, valetudinem firmam & prospera omnia exopto, quod mecum facit uxor mea, quæ vobis plurimam salutem dicit.

*Vale Haga-Com. xv.  
Kal. Jan. cio idc xliii.  
Quis vobis cum toto  
anno brevi inchoatu-  
ro, felicissim. precor.*

*Clariss. & celeberrimo*

*Nomini tuo addictissim.*

Andreas Rivetus.

Ausimne à te petere ut D. J. Blauvio aurem vellas, qui tamdiu cessat ab opere Blondeliano? Non potest causare defectum copię quam vocant, quam adhuc habet satis uberem. Efficit hac sua perendinatione, ut autor etiam cesset, quasi de foetus sui obstetricatione desperans. Vocarunt eum Lutetiam illustres quidam Viri, qui eum sumptibus suis alunt, ut studiis illis vacet à quibus avocabatur, per ordinariam Ministerii Functionem. Pauca supersunt capita ad priorem illam partem, quæ si Blavius aliquot folia mittat, intra paucorum dierum spatium absolvet. Interea Choppini in libris de Politia Ecclesiastica errores non paucos nec leves annotavit, in Macenatum suorum gratiam. Milleterius tandem quod faciebat fecit, & Pontificiis se adjunxit, factus exinde Redemptor Vectigalium.

CCCLXIV.

## CCCLXIV.

S. P.

Clarissime & celeberrime Vir, amice, Collega conjunctissime.

**M**isit ad me Gothofredus Syndicus Genevensis ante bimestre, quatuor exemplaria Philostorgii sui. Sed Literæ quibus mihi indicabat amicos quibus ea destinaverat, in via perierant. Scripsi ergo & petii ut mihi significaret quid de exemplaribus factum vellet. Te, Vir Cl. inter alios nominavit, cui unum destinaverat, quod nunc ad te mitto, & simul peto ut te accepisse significes. Misi ad te inter primos tertiam lucubratiunculam meam de pace Ecclesiæ. Non dubito quin nauta eam domum tuam detulerit, quamvis de ea nihil quicquam ex te audiverim. Spem mihi fecit Blavius brevi scriptum aliquot tuum absolutum iri, & se postea nostri Blondelli opus curaturum. Multum eum devincies, si aliquando Typographum hortari digneris, ne deinceps sit cessator. D. Salmasius promittit se post festum Paschatis iter ad nos inchoaturum. Interim emisit Funus Hellenisticum, quod erit eristicum. Sed non potuit ab eo proposito dimoveri. Is adversus quem Offilegium scripsit est Sam. Bochartus meus affinis, occasione colloquii habiti Rothomagi apud ampliss. Saravium. Non probat quod quæ privatim inter eos transacta fuerant, eliminaverit. Plura pro tempore non addo ne feria tua remorer. Tibi & tuis omnia fausta precor.

*Tuus omni affectu*

Hag. Com.  
24 Martii,  
1643.

& officio,

Andreas Rivetus.

## CCCLXV.

**R**efocillârunt animum meum Literæ tuæ, maxime Vossii, quas Dozenius noster felici manu mihi 3<sup>o</sup> Jun. exhibuit, quod veterem mei amorem spirarent ac niveum candorem, ob quem te literatus orbis mecum admiratur ac colit. Eodem momento cum tuis accipiebam optimi D. Calixti eruditissimam Commentationem de Bono perfectæ summo sive æterna beatitudine suspensam ad aram beatæ memoriæ Georgii Ducis Lunenburgici; quæ, ut & antehac, Georgii Cassandri de Com-

munione sub utraque dialogo & annexis, *Bischoffs* meum locupletavit. Is in concordia Ecclesiasticæ studio sibi constat adversus exserta capita Orci galea quantumvis munita Sycophantarum, ut præfationes horum Libellorum canora voce attestantur. Judicium tuum de illustrissimo Grotio mihi apprimè arridet. Interpretatio tamen dictorum præcipuorum de Antichristo à diversis jam examinata, mihi non satisfacit. Ego Romanum Episcopum, qualis jam diu est & infallibilem se scripturarum interpretem & Hildebrandinum ..... conscientiarum, totiusque Christi Ecclesiæ ostentat, eo loco habeo, quo Casaubonus noster *à me* olim in exercitationibus doctissimis ad Annales Baronii. Etsi enim non sit maximus ille Antichristus, qui paulo ante ultimum ac decretorium hujus mundi diem, tyrannidem suam in Sanctos Dei exercebit, ut D. Zanchius meo animo rectè in Miscellaneis suis judicavit: tamen magnus videtur: quo hodieque in domo Dei vix major est, siquidem eum cum hierarchia sua integrè consideremus. Non tamen dubium est, quin pii quidam Urbis Episcopi fuerint & porro esse possint, qui mysterium illud iniquitatis abominentur. Vapulat eruditissimus Grotius tam à Lutheranis quibusdam, quàm à nostratibus hoc nomine, quod in partem Pontificiam, quàm Evangelicam non paulò pronior videatur. Classicum belli sacri, adversus eum ab omnibus Lutheranis suscipiendi decantatum à Johanne Peysterto Ulmenfi ..... scatet maledicentia. Laurentius vester satis calidè in eum scribit. D. Riverus acutè quidem, sed, ut mihi videtur, moderatius. Utinam tandem aliquando disceremus omnes, quæ veræ Christi Ecclesiæ sit nota, unitas videlicet, quam declarant mutua officia charitatis à Christo nobis tantopere commendatæ. Collegarum quidam hujus notæ obliviscuntur, dum hujus studium nobis vertunt in notam hæreseos. Et vestri frigidam more fabrorum ferrariorum nonnunquam suffundunt & litium favillas sponte sua emorturas redaccendunt. Nam non sine pacis nostræ impedimento ejecta quadam in Belgicam Linguam vasa invulgata sub titulo Hoornste Sorghe, continens Epistolam ad Magistratum nostrum directam, in qua horrendæ hæreses, Sabellii, Photini, & aliorum nobis impropèrantur: sed & Synodici Nordhollandici Deputati nova Epistola, in qua repetunt, ad quæ antehac respondimus, tanquam gladio ignem nostrum

nostrum iteratò fodiunt, & Æmulos nostros, quamvis præter intentionem, animant. Concordiam illi quidem suadent, sed quia hypothesen quasdam nostras cum reformata Ecclesia pugnare putant, bellum propè sopitum & patientia nostra depugnatum, facile instaurabunt. Recordor nunc ejus quod D. Rivetus alicubi ad D. Grotium testatur de Confessione quasdam T. Claritatis qua Ecclesiis Belgicis satisfactum sit. An illa edita est? Quæ & ubi? Vellem sane eam videre, si forsàn illa ad redintegrandam Concordiam nostram faceret! Si ea ad manum est, ne quæso, eam nobis inuide. Nihil enim antiquius nobis est, quam magnorum virorum exemplo veritatem juxta ac pacem colere. Pro voluntate in me filiumque meum hodie degentem Leidæ, quantam possum ac debeo gratiam habeo. Est ille quidem Linguarum Orientalium & Medicinarum studiosus, sed paulo quàm vellem verecundior. In occasione Excellentie tuæ serviet mecum. Tempore exclusus, claudò, teque cum amoribus tuis salvere jubeo.

Brem. rapt. <sup>21 Jun.</sup>  
<sub>2 Jul.</sub>

Excellentie  
tuæ devotissimus,

L. Crocius.

Inclusæ per famulum, quæso curentur  
& audaciæ meæ ignoscetur.

#### CCCLXVI.

Clarissime, maximeque Vir,

**P**erpetua mihi est agendarum gratiarum apud te necessitas, sive meum fratrem, vere alterum me, sive meipsum intueor. Qua enim benevolentia illum sis complexus, non opus est referre ad te, & quem mihi animum ostenderis, alibi dicendum erit, cum licere mihi rectius & prolixè potest non immemorem esse. Nunc quidem cum præter opinionem redire ad suos Elzevirius instituit, pauca eaque incondita necessàrio mihi ad te perscribenda sunt, ne prorsus negligere humanam voluntatem tuam videar. Librum tuum de Symbolis Ecclesiæ & cupidissime & non uno cum fructu pervolvi. Præter enim operis argumentum alia quoque pro meis usibus excepi. Scilicet quæcunque de forma & charactere Symbolico sparsa per totum sunt librum, transtuli in Commentarios meos de Brevitate. Quam materiam ad-

miror veteribus ipsis adeo relictam. Neque enim mihi contigit aliquem Græcorum Latinorumque Authorem offendere, qui istam persecutus sit Ideam. Primum igitur est, quod à te peto, ut si absque molestia tua fieri possit, mihi aliquas erigere veluti Hermas velis, & succurrere aliqua submonitione ad istud opus. Video enim per totum Oratoris opus fufam esse hanc dicendi formam. Et laborem incipio intelligere, quo plura mihi nunc demum adminicula paro. Instituo enim Anathemata Authorum, & in minima resolvo, quæ toto opere continebantur: More Concordantiarum, ut vocant. Ciceronis ergo Rhetorica, Asconium, Photium, Agellium, sic habeo dissectos; ultimusque mihi hætenus exstitit Demetrius: quem pro bono juventutis editum ante omnes cupio. Causas allegare non opus est apud te; modum formamque describere necesse est, ut tuo judicio labor meus probari Elzevirius possit. Quia enim spes mihi facta ab ejus filio, non possum deesse studiis Tironum, & defungi libenter incæpto velim. Contuli autem Victorii & Morelli editiones. In capita distinxì, ex ipsius auctoris instituto & more, in versus autem sive Periodos ex editione Victorii. Indicem fere absolutum, quem spero non inutilem fore. Præterea aliquid Notarum adjicio; quod qualecunque sit, existimavi non prætermittendum esse. Victorii & Casellii Commentationes justo mihi videntur prolixiores, alterius sane bona fide exscriptas. Tabulæ quoque illæ Cyllenii, non necessariae. De Autore Victorii & tuum judicium præscripturus sum. Hæc sunt propositi mei. Mitto autem initium Notarum mearum & Indicis, ut æstimare possis, an aliquid digni sit ..... publica. Et sane utrumque sic descriptum est, velut Canis ex Nilo bibere dicitur & fugere. Elzevirius enim properat, ego pessime habeo, ita ut Disputationem publicam habere non potuerim, etiamsi jam datum erat signum. Quapropter oro à te, ut speres etiam meliora, quam nunc ex Schedis meis excerpta sunt. Sero enim mittenda erant necessàrio, ut confirmari possunt ii, qui sumptum facere debent. Unicum addo. Hieroclis nescio quantus amator factus sum; nescio an plura habeantur, quam in Aurea, de Providentia, & quæ existant in sermonibus Stobæi. Et incepti eum pari modo *ἀνατρίτων*. Ignosce Domine, quod tam audacter de his talibus ad te scribo. Ego enim existimo in eruditione vos pro Oraculis nobis publice constitutos. Eaque

K k

utinam



utinam aut consulere aut sequi etiam velint plerique, non utique tam.....multum & malorum librorum. Vale Domine. Ego enim propter valetudinem scribere plura non possum, quam salutem fratris mei. Vale, inquam vale.

*Tui nominis*

Soræ 28. Jan.  
1643.

*cultor perpetuus,*

Joh. Ravius.

### CCCLXVII.

Clarissime & Celeberrime Vir,

**C**UM juvenis hic, qui per hoc caniculare otium visurus vestram Batavi-  
am est, à me petiisset, ut transiturum Ci-  
vitatem vestram orbis, qua commercii  
aditur, emporium, tuæ celebritati com-  
mendarem; istud officii honestissimo Juve-  
ni negare non potui. Inprimis cum præ-  
ter Philosophiæ studium, in quo lauream  
adeptus est, eloquentiæ quoque flagranti  
desiderio teneatur, cujus veram imaginem  
nostro seculo repræsentas. Quod elogium  
cum omnis gens, quæ literarum cultu non  
destituitur, tuo ingenio, tuæ famæ tribuat,  
recte judicabis, si à me per adulationem  
effusum non existimes. Hoc enim vitii in  
istos quam rarissime cadere solet qui li-  
bertatem, in qua nati sunt, servilibus pro-  
bris non defœdant, & si quod animo te-  
nent, professione veritatis emuniunt. Ego  
certe illo tempore quo filius vester Mat-  
thæus V. Cl. apud nos in amoribus erat,  
sæpe colloquium vestrum exoptavi, sed  
præproperum iter, etiam inter imbres ac  
naturæ inclementias, quæ festinationem  
intempestivam tardare debuissent, illam  
felicitatem mihi invidit. Quam tamen  
ipsam nisi fati lex prohibeat, melior ali-  
quando dies dabit. Interea Juveni huic  
accessum velim facias, ut, quod omnis  
eloquentiæ cultor admiratorque merito  
optare possit, desiderium suum meæ sal-  
tem commendationis interventu expleat.  
Bene vale Clariss. & Celeberr. Vir.

Franc. vii. Eid. Aug.  
c1o Idc XLIII.

*Amicus tui*

*observantiss.*

P. Winsæmio.

Historiæ meæ libri 7. in folio hic excu-  
duntur, quam ubi expressa fuerit, curabo  
ut inter primos V. Cl. habeas. Mathæo  
filio multam à me salutem.

### CCCLXVIII.

*Summo Viro, D. Gerardo Joanni Vos-  
sio, Joannes J. F. Schildius Bre-  
mensis S. D.*

**V**IX mihi bona sua satis intelligere  
videntur, quibus divina quadam vir-  
gula excellentium virorum voluntates con-  
ciliantur. Nam si priscorum, quos nun-  
quam vidimus, non libros solum, verum  
etiam imagines conquirimus, quid iis for-  
tunatus esse potest, qui vivorum gratia,  
& amicitia florent, qui non admirantur  
solum homines admiratione dignissimos,  
sed vident, alloquuntur, consulunt, comple-  
ctuntur? Sane refert Plinius secundus Ga-  
ditanum quendam, Titi Livii nomine glo-  
riaque commotum, ad visendum eum ab  
ultimo terrarum orbe venisse, statimque,  
ut viderat, abiisse. Tanti putabat Barba-  
rus, etiam vultum celeberrimi viri cogno-  
visse. Ac ne longius hæc arcessam, me  
quoque insitum illud mortalibus studium,  
magna & inusitata noscendi, in hæc Pro-  
vincias excivit. Non est quod ipse me  
differam. Ardeo cupiditate incredibili, ne-  
que ut ego arbitror, reprehendenda, ut hu-  
manitatis ac benevolentiae tuæ sensum alli-  
ciam, qua sola propemodum mercede in  
Belgium profectus mihi videor. Nihil præ-  
stantius, nihil amabilius, nihil quod im-  
pellat magis homines ad suspiciendum,  
quàm virtutis magnitudo. Adde, ad vir-  
tutem si inusitata eruditionis Gloria acce-  
dat, incredibilem quadam hominum ad-  
mirationem accedere. Diu te, Vir maxi-  
me, eo loco consentiens hominum existi-  
matio collocavit, quo multis seculis vix  
aliud. Jamdudum nomen tuum iisdem,  
quibus Lingua Romana, spatiis pervaga-  
tur. Meruit hoc singularis, ac prope di-  
vina quadam virtus tua; meruere tot im-  
mortalis ingenii monumenta, quot per-  
egisti volumina,

*Hæc quæ secula, posterique possint  
Arpinis quoque comparare chartis.*

Ut taceam ex filiis honorem, quorum duos,  
ni fallor, immatura mors abstulit, non  
minus ob egregias animi dotes tibi charos,  
quàm quod filii fuere. Non est autem  
verendum, ne assentatiuncula quadam au-  
cupari tuam gratiam videar, cum, quic-  
quid de te dixerò, omne infra dignitatem  
tuam fuerit. Equidem Cl. Virum Ludo-  
vicum Crocium non sine grata animi me-  
moria

moria recordor, cujus commendatio maximo nobis apud te adjumento & ornameto fuit. Ei lubens debeo, quod cum mense Maio istic ad te adiremus, integram ferè horam doctissimis sermonibus nobiscum transegiſti. Nihil ibi audiſſe me, niſi profuturum, memini, nihil didiciſſe, quod neſcire rectius fuerit. Ut omittam, quàm tu omnia iſta mira in ſermone, mira etiam in ore ipſo vultuque ſuavitate, condideris, planè inſtar Homerici Neſtoris, cui

— μέλιθ' γλυκίων ῥέεν αὐδῆ.

Itaque illa horula, quantum admirationem animi mei, tantum auxit deſiderium. Exinde ſcribere ad te ſæpe conantem deteruit pudor meus, & tenuitatis meæ conſcientia. Quid enim? Annon ipſi noſtræ modeſtiæ vim facimus, cum te tot diverſis functionibus diſtictum impeditumque literarum inſuper alloquio fatigamus? Annon ipſum me pudeat mei, quod homo adoleſcens, nulla vel ingenii vel doctrinæ laude commendabilis, ad incomparabilem Heroa Voſſium ſcripturiam? Oneravit iſta triſtis de invaletudine tua nuncius, de qua ipſe Cl. Crocii filio, amico meo perſcribebas. Qui hercle nuncius graviffimo me dolore confudit, cum mihi non unus homo ſed literæ ipſæ, omneſque bonæ artes in uno homine ſummum periculum adire viderentur. Nam qui voluptatibus dediti, quaſi in diem vivunt, vivendi cauſas quotidie finiunt: qui verò poſteros cogitant, & æternitatem laboribus ſuis ſibi devinciunt, hiſ nulla mors non repentina eſt, ut quæ ſemper inchoatum aliquid abrumpat. Enimvero jam ante perculerat me præſatio in partem quandam Theologiæ gentilium, diſſuſiſſimi illius operis, nec minus varii, quam eſt ipſa natura. Sed, quæ Dei Opt. Max. fuit indulgentia, hætenus ſeculo noſtro ſervatus, teque & domum & literas ſuſtentas; ſperamus etiam porro ſuſtentaturum. Nihil enim tam certum eſt ex hiſ, quæ timentur, ut non certius ſit, formidata ſubſidere. Quamobrem ſpe metum temperabimus; præſertim quando nihil ſcævum iſtinc allatum meminimus. Non morabor te diutius. Quod ſi ad me quoque, velut rivi ex illo benigniſſimæ naturæ tuæ fonte decurrant, næ ego creſcam & exultabo, næ ego non dicam aliud mihi, quam numen adſuiſſe. Offero tibi exiguum obſervantiæ meæ pignus, avi mei oblectamenta Metrica, quibus ille, tanquam ocio quodam literato, intervalla negotiorum diſpungebat. Aliud, te dignum, munus haud invenio. Ipſum me, ſi alicu-

jus precii putas, totum tene, habe, poſſideque. Impendam me tibi, ſi poſcas; impendam, etſi non poſces. Vale.

Lugd. Bat. cId Idc xliiii.  
xviii. Kal. Septembris.

## CCCLXIX.

Ampliſſime Vir, Reipub. literariæ Princeps, Doctor, & Fautor plurimum honorande,

**N**ON temere illi aſſentior, qui principibus placere viris, non ultimam laudem eſſe cecinit, cum ex iis ſibi quiſque, prout virtutis & induſtriæ capax ſit, magnum decus addere & conciliare arbitretur. Quo nomine ſi ullus ſibi blandiri audit, mihi imprimis illam laudem & felicitatem gratulari poſſum; cui, dum ex fortuna majorum meorum, iniquior ſors obtrigit, ſummorum & inſtar principum hominum, pietate & favore ita compenſata eſt, ut ea nunc lætus vivam. Non enim ſolum ex illuſtriſſimi Herois piis benigniſſimiſque manibus, corporis pabulum ſuppetit, ſed & animi incrementis, ad bonæ mentis & eruditionis metam contendo: id quoniam ductu & auſpicio tuo fiat, ſerio triumpho, & palmarium ducō, cum te nunc, ipſius Reipub. literariæ principem, non Batavica tantum Regnorumque & Regionum vicinarum, variæ Eruditionis præclara ingenia agnoſcunt; verum etiam diſſita illa ſeptentrionalis plaga, chariſſima patria mea, Muſarum ſuarum præſidem, inſtar magni Apollinis meritò veneratur. Et quis tandem Orbis Chriſtiani angulus eſt, in quo non nomen Voſſii, pro ſapientia legitur, & colitur? Vera hæc eſt laus, quæ mihi ex tanti principis favore deſcendit, eademque ad vitam beatam ſufficeret, niſi quod præter voluntatem in fortunis meis non ſit, quo tantum favorem tantaque merita tua remunerare poſſem. Superest, ut pro ſingulari benevolentia tua & humanitate, qua omnes amplecteris, imprimis Suecos, tantam meam voluntatem, gratiſſimumque animum, magis quam remunerandi vires, reſpicere velis. Non ego ignorabo, quo animo beneficia tanta celebrem, coram præſentibus ſemper, & ſi fieri aliquando poteſt, coram toto orbe, quotidie verò coram Deo, remuneratore omnium beneficiorum optimo & largiſſimo; imprimis ex prædicatione mea, patria hoc totum ſibi acceptum referet, pondusque hoc nomine, reliquis, in

suam prolem, meritis, addidisse te existimabit. Non exprimo nunc pluribus, vel industriam & fidem, quas informationi meae collocas vel favorem, quo saluti meae & successui, commendatione tua, de meliori nota, apud bonos quosque consulis; ne forte dum virtutes tuas & merita vivis coloribus depingere conarer, turpis adulationis suspicionem incurrerem indignam, quae de me omnibusque candidioris ingenii hominibus susciperetur. Haud tamen & ita quicquid in me plane paterno animo contuleris, apud alios, silentio præteribo, quam potius assidua prædicatione meritorum tuorum, gratissimo animo celebrabo, omnia quae in bonae mentis & eruditionis cultum ingessisti. Deus amplitudinem vestram diu sospitem conserve, & corporis vires, tanti tui incomparabilis animi facultatibus, pares largiatur, mihi, charissimae patriæ, & toti omnino orbi, ornamento & bono: ad hæc voluntatem ingerat, quae voluntatem meam, magis quam remunerandi magnorum beneficiorum vires, respicere velit.

*Dabam ex Museo  
meo, quod Amstelodami est  
Octobris, Anno  
1643.*

*Amplitudinis vestrae,  
omni cultu & veneratione  
dicatissimus,  
A. Wallwick.*

## CCCLXX.

Vir Reverendissime,

**E**N Epistolas ab Avunculo meo Samuele Petito, qui eo est in me affectu ut tanquam collata sibi ducat quae mihi contulisti humanitatis officia. Vadem ego illum accersivi assiduum bonique nominis, ne quid tibi perire possit beneficiorum, & ne in posterum te pigeat benevolentia nos ornare, qua nihil exoptamus ambitiosius; quod enim magis ornamentum accedere potest nobis *τὸν βελτίονα καὶ*, quibus negatum est nos tollere ingenio & eruditione, quam si viris utroque pollentibus æternitatemque famae consecutis non solum noti sed charissimus. Hæc certe non ultima laus erit, sed quod ego potissimum specto, favor ille tuus addet mihi animos ad bonam mentem, ad quam nemo non debet contendere. Vale igitur & favere perge, Vir Reverendissime,

*Hagæ-Comi-  
tis xxv. Aug.  
clō lxx. xliii.*

*Tui observantissimo  
addictissimoque,  
Samueli Sorberio.*

Clarissimum filium tuum Matthæum plurimum meo nomine salutatum velim.

Amico cuidam meo eadem nunc ob sunt Lutetiae quae mihi nuper obfuerant, prospiciendum illi esset de honesto quodam loco, qua in re pergratum mihi faceres, necnon, scio, Domino Grotio, cui unà mecum innotuerat. Iterum vale.

## CCCLXXI.

Præstantissime Vir,

**S**chedas hæcce reperi, quas mitto, ut stem promissis, non quia dignas iudico, ut eas legas, aut eas tibi usui fore existimem. Locutus etiam sum viduae p. m. Vander-Merii, super arcanis Papatus, quae penes eum deposita fuisse putas. Illa mihi promisit se inquisitionem ea Delfis (ubi Manuscripta apud filiam adservantur) & secum allaturam quae simulac mihi tradita fuerint, transmittam.

Salutavi D. Voetium tuo nomine, illud ipsi gratissimum fuisse animadverti; qui de te summa cum laude locutus; præsertim quod antiquitatis arcana penes te hoc in seculo propemodum suo adserventur, & summa cum constantia propugnentur, præsertim contra Dogmata F. Socini, quod à D. Grotio non ita fieri dolemus: quem volubilem esse quis non animadvertit? habent profecto suos naves præclara ingenia. Adfuit nobis D. Heinsius nuperrime, qui illustrissimi Salmasii adventum nullo carmine celebrabit. Rogum funeris Hellenistici Hyperaspistes ejus Schoockius præparat. Et profecto magnum incendium. D. Voetius habebit etiam qui causam ejus agent contra D. Cartesium. Scripsit ante paucos dies ad me illustrissima & doctissima Elizabetha, Bohemiarum princeps: dolet & ridet doctos ita digladiari; & ita contemptui exponi una cum eruditissimam scientiam. Theologis hoc quasi proprium antehac creditum fuit. Sed & Critici & Grammatici de lana caprina bellum excitare noverunt. Nolo autem hanc camerinam movere, præsertim apud te quem pacificum semper agnovi. Salutem te communis noster Beverovicus, qui summo cum desiderio epistolas tuas expectabit, super anno climacterico: quia jam novum opus epistolarum questionum parat. Ignea enim hæc ingenia à scribendo vix se temperare possunt. Ego Ecclesiam meam pro Epistola habere gaudeo. Vale, Vir Clarissime, cum tota familia.

*Dordrecht 10.  
Sept. 1643.*

*Tuus omni obsequio,  
Andreas Colvius.  
Vidi*



Vidi apud D. D. Arminium scripta quedam de Arte Magnesia, quæ si meis sumptibus transcribi possent, faceret mihi magnus Barlaeus insignem gratiam. Sed hæc vix ab eo petere auderem. Quocirca ejus de Magnete philosophicas quæstiones expectanda nobis erunt. Interim salutabis peramanter Virum celeberrimum meis verbis.

## CCCLXXII.

Virorum maxime Vossi, & Amicorum,

**H**Ei! lachrymas, quibus Bergii fatum de-  
fleo, semivivus in sinum tuum effun-  
do, ut exculem *ἀχαιῶν* meam, qua non-  
dum me delendi reum professus sum tibi  
pro divino opere, Gentilium Theologia  
& tribus Symbolis, quod te tui similem,  
hoc est, *παραστήματα* ostendit. Efficit il-  
lud ut tibi ingratus moriar. Nullum enim  
redhōstimentum tanto dono dignum à me  
est sperabile, à quo nil nisi humiles myri-  
cæ. Deum obnoxie veneror, ut te nobis  
& Republicæ Christianæ superstitare ac  
diurnare velit. Æmuli nostri ne defun-  
cto quidem hic parcunt, sed varias de eo  
spargunt calumnias, quas præfatione dis-  
sertationum mearum abstergo, ut prope-  
diem, ut spero videbis. Saniores Gentili-  
um olim sapiebant rectius, quorum vox  
erat

*Pascitur in vivis livor, post fata quiescit.*

Item,

*Pugna suum finem, cum jacet hostis habet.*

Ququam hic vir nemini erat inimi-  
cus. Sed nobis, quoad sumus, pugnandum  
est pro veritate, justitia, pace. Hac enim  
lege ad Christi commilitum vocati sumus.  
Et ut pia olim anima canebat,

*Nunquam bella piis, nunquam certamina de-  
sunt,*

*Et qui cum certat mens pia semper habet.*

Hæc raptim. Salutem tibi scribo, Vir  
summe, & familiæ à Collega D. Willio  
superstite & me, cum officiis & gratiis pro  
honore mihi immerenti in Theologia ve-  
stra delato.

Brem. xiii.  
Cal. Sept.  
cio idc xlii.

*Tuus, omni officio & affectu,*

L. Crocius.

## CCCLXXII.

Εὐ δεῦτέρ.

**A**Nte trimestre, maxime Vossi, farci-  
nulam librorum nauta quidam no-  
stras ad pedes tuos deponere jussus, unà  
cum duobus fasciculis, quorum alter tibi,  
alter D. Heinsio cum adjunctis literulis in-  
scribebatur, aliisque amicis: Sarcinulam, in-  
terveniente quodam studiis nostris non  
satis propitio, à nauta isto ad nos repor-  
tatam video, sed absque adjunctis literis &  
prædictis fasciculis: Ubi verò hæreant,  
nescio. Hæc propter peramanter peto, ut  
in proxima occasione me doceas, an cum  
literis Dyoderadem Dissertationum mea-  
rum & orthodoxam delarationem D. Hil-  
debrandi, Collegæ mei, acceperis, necne:  
& si quid in his desideres, nos liberè mo-  
neas. Sumus enim dociles. In locum  
D. Bergii, conjunctissimi quondam Colle-  
gæ mei, plebs nostra vocavit D. Crellium,  
D. Pezelii ex filia nepotem, affinem me-  
um, virum doctissimum, antehac in Aca-  
demia Viadrina Professore Theologum,  
sed rigidum Pisentorianorum placitorum  
assertorem & Bergianæ moderationi con-  
trarium. Hic proculdubio præsentia  
sua à foliis nostris inflatus Came-  
rarium denuo movebit, nisi Deus singu-  
lari gratia alium ei animum inspiraverit.  
Summum Virum, D. Hugonem Grotium  
ad Pontificiorum castra jam transiisse,  
publica fert fama & eoipse excidisse gra-  
tia regni Suecici, quod ob mutatam Reli-  
gionem ei non fidat. Dolerem sanè, si id  
factum. Quid hujus sit, vos rectius scive-  
ritis. Theologia vestra gentilis & physio-  
logia Christiana, divinum opus, quotidie  
pascit animum meum. Vivit in eo Vossius  
noster & æternat, quem cum universa fa-  
milia sospitem perpetim salvere jubeo,  
eique sum

Breme V. Cal. Dec.  
ver. cldo Idc xlii.

*Devotissimus,*

Lud. Crocius.

## CCCLXXIV.

Clarissime Vir,

**I**Ntroducō ad Medicinam indigenam,  
quàm vernaculo sermone scriptam nu-  
per ad te misi, nunc Latino excuditur, bre-  
vi mittenda. Addo Encomium Medici-

na

nae longè auctius, celeberrimo nomini tuo consecrabunt: necnon Epistolicas Quaestiones, cum responsis nobilissimae Virginum Annae Mariae à Schurman, multis D. Heinssii, pluribus D. Salmasii, & aliorum. Quare rogo & tuum ibi nomen legi ne graveris. Quod eo lubentius te facturum confido, quoniam intellexi simile quid te meditatam, mihi quidem videtur, plane dubia & incerta, sive alio quovis argumento. In eo mihi gratificari, ut velis, vehementer abs te peto. Nec serò, etiam post unum aut alterum mensem, veniet. Vale, mi Doctor aeternum observande, & studiis meis favere perge.

Dordrecht,  
11. Cal. Jun.  
cl. 1643.

Meritis tuis aeternum obstrictus,

Joh. Beverovicus.

## CCCLXXV.

Vir clarissime,

**L**ibellus hicce, quem transmittito, lucem videre vix aulus est; fuerunt enim, qui suppressendum eum esse dicerent, quod pessime consultum foret Religioni Christianae, si ejusmodi de Christo opiniones vulgarentur. Certè Theologica facultas religioni habuit, ut testimonio aliquo librum munirent. Cordatior fuit Dominus L'Empereur qui quod pretii, lubens volensque praestitit. Sed hæc coram malo. Dominum Salmasium brevi rediturum, constans nunc omnium vox est; sin moreretur diutius, locum forsan apud multos inveniat, quod Dominum Heinssium Hagæ Comitum dixisse intelligo, honorarium Professore verius onerarium vocari posse. Dominus Spanhemius suos hichabet admiratores; sed nec desunt, qui ipsi invidiant: planè diversa hominum experitur judicia. Inventus est nuper vir doctissimus, qui in magna copia (sermo fuit de facundia Spahemii) maximam sæpe reperiri inopiam, dixit. Alii alia dictitant, quæ ubi Amsterdamum venero, audacius promam. Vale, Vir Clarissime, & studiis meis favere perge. Dominus Baro salutatur Clarit. T. quam potest officiosissime; idem rogat obsecratque, ne, si quando Lugdunum veniat alio quam suo uti velit hospitio.

Anno 1643.  
20. Julii.

Claritati tuae devotissimus,

Levinus Warnerus.

## CCCLXXVI.

Vir doctissime, amicissime,

**O**lim ad te Literas non mitto, non desidia, non oblivione tui, sed longis & assiduis peregrinationibus impeditus. Annis superioribus Germaniae partem non exiguum lustravi; post (quasi antea non vidissem) in Italiam contendi. Secuti sunt itinera duo Hibernica, breviter quidem illa, sed incommoda, & nisi insignium amicorum quorundam conciliatio & convictus molestias repensasset, maxime ponenda. Nunc demum lares colo Londinenses meos. En tibi rationem silentii illius cui tamdiu indormivi. Causas ex alto non peto, nec circuitu ago. Impræsentiarum si quæris quid agam, scito pauca at bella minantem vivere nec recte nec suaviter. Non utique quod à fortuna subsidii imparatus sim, sed quod positus in querulo & moroso corporis statu, gravibusque ac diutinis languoribus (duntaxat calculi vellicationibus quæ me indies premunt) lassus & conqussatus, etsi victus alioquin parci ac restrictioris, *Ὁυδὲ ζῶντος ἀσφάλειας ἀλλὰ θανάτου παράσιον ἑμάντῳ περιαιδῶμαι, καὶ θανάτῳ τὸ μὴ ἀποθανεῖν σφοδρῶς φοβούμαι.* Accessit cumulus his malis mors Straffordiae Comitum eximii Mecanatis mei, Regnorum trium exempli ac convicii, extincti magna bonorum sapientiumque civium penuria, alienissimo Reipublicae tempore, ac majore ingratae patriae quam suo damno. Loquor liberius fateor quam pro conditione temporum ac rerum nostrarum, ergo hæc soli commissa tibi celare memento: Ac tacitus nostras intra se fige querelas. *ὅτι πάντα μὲν εἰς τὰύτην.*

Commendo qui has Literas reddet tibi Isaacum Vossium ex Gerardi filius. Juvenis probus est, & modestus, ingenium habet non publici examinis, amatque bonas literas ac bonam mentem. Eum tu, pro insigni humanitate tua, quam ego olim adeo prolixè expertus sum, complectèris: dum in vestra celeberrima civitate commorandi animum habuerit, ornabis commodabilisque, & cum abeundi consilium formaverit, faustis votis prosequeris. Ita veteribus tuis erga me officiis ac studiis novum pondus accedet. De cætero (urget enim nec me longius evagari finit) cum primum commode potueris, de salute tua velim me certiores facias, & quid eruditi vestrae novi moliantur, quid tu imprimis, ex cujus scriptis nil lego nisi profuturum, nil discio quod nescisse

nelcisse rectius & utilius fuerit. Ignosce, Vir amice, quod officium istud tamdiu debitum tam serbo tamque parum cumulate reddo, & si potes, pristinam tuam erga me voluntatem conserva.

*Londini Prid. Amicitia ac humanitati tue  
Cal. Sept.*

*devotissimus,*

Joannes Priceus.

CCCLXXVII.

*Incomparabil. Viro, Gerardo Jo. Vossio,  
Johannes Fredericus Gronovius  
S. P. D.*

QUod sapius Author fuisti mihi, Vir maxime, ut quæ de Sestertiis, ab doctissimis viris perperam tradita mihi viderentur, in unam aliquam dissertatiunculam conjicerem; id tentatum non semel, semper autem hæcenus per occupationes intervenientes abruptum; his tandem feriis, & summo studio sum aggressus, & pro captu meo, non infeliciter perfeci. Dedi cum primis operam, ut rem sententiamque meam, ita dilucidè proponerem, ut non possit ab ullo, mediocriter docto, paulò attentius legi, quin intelligatur: iis deinde rationibus, ac autoritatibus munirem, ut neminem contradicendum, qui intellexerit, liceat sperare. Atque hoc eo magis, quod deprehendi ex scriptis divini Salmasii nostri, cum nusquam hanc materiem ex professo tractet, quæcumque tamen obiter, aut explicat, aut corrigit, cum sæpe non conveniant illis, quæ alii tradiderunt, nostra cum ratione ubique ad amussim consentire. Curabo fortassis; imò constitutum est omnino curare, ut circa paucas tempestates hic edantur, quæ concepimus: non prolixum est hoc quicquid est scripti, trium putà, aut quatuor philyrarum. Authores quibuscum res est mihi, sunt Budæus, Georg. Agricola, Hotmannus, Scaliger, Paschasius Grossippius. Hos diligenter legi, & expendi. Cæterum Agricola, & Hotmannus, citant quemdam Portium, qui eodem ferè tempore, cum Budæo scripsit: habeo Libellum Matthæi Hosti, de numerandi ratione emendata, in qua suam historiam rei nummarie allegat: ni fallor etiam, Eric. Puteanus aliquid hujusmodi edidit, & P. Ciacconius. Hos quos non vidi non-

dum, videre tamen, si fieri posset, nimis quàm cuperem: eaque de causa oro, quos eorum Bibliotheca tua servat, eos ad me commodato transmittere quamprimum ne graveris. Valde etiam indigeo Grammaticorum opere Putschiano: nam cum eorum loca quædam examinanda sint, id hæcenus, nisi ex ipsis verbis, quæ allegant Authores mei, facere nequivi. Collega noster Cl. Isendornius in Hollandia est, ei dederam in mandatis, ut Grammaticos hos, & Andreæ Schotti observationes humanas, meo nomine à te peteret. Eo enim indigeo propter Livium, quem à nobis recensitum, & plurimis locis saniores futurum Elzevirii sub prælo habent. Nunc quod commodò fiat tuo, ejus adventum exspectare te nolim, sed prima quaque occasione, designatos libros, aut quorum eorum tibi copia est, mitteres. Vides quàm simpliciter humanissimis verbis tuis credam, quibus aliquoties, adversum te, adeo audacem me esse jussisti. Vale, & salve, vir incomparabilis, cum gravissima matrona tua, Liberisque & Nuru. Annon addendum erit propediem, Nepote, vel Nepte? Et quomodo rem gerit, & *id est* Matthæus? Mea uxor (gratias Deo) intumuit admodum, & ut spero, intra tres menses, tres erimus. Iterum valete, & me amate.

*Daventræ, ad diem III. Eid.  
Octobr. anno clō 1704 xliii.*

Isaacus autem ubi, & quàm benè agit? sed & quæ spes, de Salmasii reditu?

CCCLXXVIII.

*Admodum Reverendo, & Incomparabili Viro, Gerardo Johan. Vossio,  
Canonico Catuariensi, salutem & observantiam.*

Reverende & Maxime Vir,

ACcepi lepidissimum Epithalamium, disertissimi Poetarum Collegæ tui, inque eo magnum beneficium, quod non auctori magis, quam tibi debeo, cujus interventu, & delenifica facundia id impetratum est. Nec minuit ejus pretium, quod setius, & post expectationem representatum est, triduo nempe, post peractas nuptias; quia nullam hic vestram culpam esse scio, & ipse statim editione facta



facta curavi, ut temporis illud damnum resarciretur. Integer igitur est tanti applausus honor, integra vobis apud me gratia, tibi præcipue, cujus ingentibus erga me meritis, ingentem accessionem factam, tam diligenti tua opera, lubens profiteor. Agnosco imprimis candorem tuum, quod adeo sollicitè me doces mollia verba, quæ me apud occupatissimum, & quibus delinimentis soleat ambiri, haud ignorantem voti compot..... Quibus quod opus non habui, tuæ adscribo solertia, paratus alioquin accuratissimis precibus, emere bona tanti Vatis omina, si citius tuæ mihi redditæ fuissent. Nunc unà cum optimis versibus accipe malos, nisi tamen ingenii largitor, Amor, homini non Poetæ, qualem esse authorem, æque ac meipsum novi, brevem poetandi prosperè calorem subjecerit. Sed istos maneat, vel Eumolpi plausus, ficcum haud interdum: quod autem præcipuum est, dies jam noctesque sunt duodecim, quod cum uxore vixi: nunquam autem credidissim ante, tam perditè amare me posse; nec gratiarum satis persolvere possum supremo illi *παρὰ μὲν*, qui tam amabilem mihi conjugem adjunxit. Intueor suavissimos mores, jucundum obsequium, pudorem, & castitatem singularem, periciam rei familiaris, frugalitatem sine confinio sordium, animos sine superbia, modestiam in cultu & vestitu, studium soli marito placendi *τὸ δαλαμυδρῶν*, ut sic loquar, odiumque sordalitorum etiam muliebrum, & futilis garrulitatis, omnia denique quæ ego, in tua gravissima Matrona (genus nobile excipio; id quoque tamen honestissimum est) paucisque aliis ad hoc exemplum semper, & admiratus sum, & contingere mihi in mea exoptavi. Atque hæc ipso flore juventæ, & non minima corporis gratia, dote etiam honesta, sed longè uberiori spe hæreditatis, siquidem superstites erimus, commendari adeo me adfuit, ut indies magis non *ἐπαύλησθαι*, sed prorsus *ἐπαυμάνας* reddar. Audeo hoc apud te confiteri virum & optimum, & *φίλοστονον*, sine metu ludibrii, quo laudantis impatientia traducitur. Fasciculum Epistolarum, periisse nobis doleo: malo tamen periisse, quàm malè redditum esse. Inerat unà ad *τὴν ἐπαύλησθαι* quam commiseram homini soli conficio deliciarum mearum: & utramque incidere nolebam in manus eorum, quos licet proximos hic mihi, hætenus iustus de causis celatos ejus negotii habueram. Ideo ad te potius direxeram, præterito illo, qui plerumque, quæ ad me veniunt Ham-

burgo, quæque à me eodem comitantur recipit. De filio Isaac nihil adjecisse te miror, cui per hanc peregrinationem eandem, quam fratri sollicitudinem præsto, precorque ut salvus, multis cum egregiis monumentis, ad vos salvos redeat. Scire itaque aveo ubi nunc sit, quosque de eo ultimos acceperis nuntios. Rogo etiam, ut ex tomis antiquarum lectionum Canisii, illum in quo Aldhelmi carmen de laudibus virginittatis ad me mittas. Mira petitio, inquis, post zonam nuper solutam pactasque nuptias istum librum velle legere. Sed literarum negotium hic ago: contuli enim libellum istum cum MS. in Anglia bonæ notæ: inde omnes suppleri lacunas, multa etiam corrupta restitui. Eam opellam recognoscere libet; quamvis nec mirum, si ut intelligere discam mea bona, cupio Encomium legere ejus rei, quæ non ita pridem in prædam mihi cecit. Vale, Vir incomparabilis, & ut divinæ clementiæ, quæ senium tibi vegetum concessit, quamque ut diutissime concedat, oro, vivendi tenore te accommodes, interdum ride, ac hilaritate curas tempera.

Daventria,  
ad diem vii.  
Cal. Febr.

Merito deditissimus,

devotissimusque tibi,

Johannes Freder. Gronovius:

Collegæ mei te vicissim humanissime, & observanter salutant. Ego quoque omni cum reverentia, Matronam tuam, & nobilissimum Junium tuum. Ad Cl. Barlæum de eodem oleo scripsi.

CCCLXXIX.

Incomparabili Viro Gerhardo Joanni Vossio, Johan. Freder. Gronovius S. P. D.

Audaciz meæ castigationem, & merebar, & metuebam, tanto munere Bibliotheca tuæ impetrato, Vir maxime, tu benignitate tua etiam, ut modesta videretur petitio mea, effecisti. Rectè igitur & in tempore accepi utrumque fasciculum; gratias egissem citius, nisi una, quomodo beneficio tuo fuerim usus, cognoscere te voluissem. Et nunc igitur id facio lubens privatim, & publicè fecisse gaudeo, in commentario quam mitto, Pag. 85. & 23: de Sessertius: atque hoc unum fortassis

fortassis in Opusculo, cætera expectatione tua inferiori, credo, tibi probabitur. Nilominus rogo, obsecroque, ut vacuum aliquam horam nactus, lectione tua digneris, etsi quidem emendationem recipit, nec una litura satis absolvitur universum, in quibus excidisse videbimur, comiter moneas. Quid enim mirum, ubi tot errorum diverticula, summi viri vitare non potuerunt; ibi me quoque interdum à vera via aberrasse? quodque in illis in eam revocandis præstiti studium, id ab aliis, te præsertim, qui præter cæteros, & præcipuè potes, me expectare? Hoc effecisse me spero, ut nonnulli è turba eruditorum, qui hæc legerint, in Veteris rei Nummariæ summis enuntiandis, attentius, & consideratius sint locuturi: quod si illud accedit, ut aliquis ex vobis literariæ rei Principibus, meo conatu incitatus, præcipuam quæstionem, doctius, & accuratius explicet, non minus id gratum erit, quàm si ipse rem acu tetigisse judicabor. Erant nonnulla, quibus non inutiliter, opinor, plures paginas produxissem: sed quia inter edendum natis, & operarum instantia, & labores ordinariæ functionis, otiosius expendendi (in quo rarò mihi satisfacio) spatium denegabant, in aliam occasionem, ea reservavi. Libros per occasionem remittam, aut si citius indigebis, ut quosque petes. Illud scire velim, constetne tibi, uter prior Budæus, an Portius sua publicarint: Nam neuter alterius meminit, & primus videri vult observasse, decies sestertium, decies centena millia, nummum significare: item sestertia, non nummum esse unum, sed pecuniam seu collectionem mille nummum. Ego Budæo primùm adscripsi, quem legeram; post, altero inspecto, dubitare cœpi. Isaaci tui fortuna non delector minus, quam si ipsi mihi contigisset; Deumque precor, ut sospes ad vos sospites cum Thesauris suis redeat, & tam doctam, sapientemque peregrinationem, summo cum literarum emolumento, & æterna (qualis tamen ante est) Vossii nominis gloria sæculis commendet. Petri Fabri semestribus aliquando uti velim, si lubet, & carere potes. Adjeci tuo exemplaria tria incompacta, quorum unum Matthæus tuus, ad se recipiet, alterum Amplissimo Hoofdio, tertium Cl. Corvino, quod commodò fiat tuo, trades, cum officiosissima salutatione. Velim cognoscere, satisne tibi Latine videamur dicere *Locum* Authoris, quod Galli appellant, *un passage*, & vulgo receperunt omnes: *Locus Ciceronis*, &c. *correctus*; &

similibus; etenim cœpi & hic hæsitare. Unum rogo fortassis nimium familiariter, ut si legeris Libellum, & aliqua probaveris, verbo scribas, non sine aliquo fructu publico editum: Id autem peto, non vanæ ambitionis causa (à qua procul absum, & sic nunquam me ita frontem perfricuisse, ut hoc peterem) sed ut viso hoc testimonio, gaudeant illi, qui sumptum editioni præstiterunt, Curatores nostri. Eadem causa admisi, in fronte Operis triatum illum, post maximos Viros, &c. cujus me sanè pudet; sed hoc illice fuerunt invitandi ad nummos. Vale, & salve, Vir incomparabilis, cum gravissima Matrona tua, Liberisque, à quibus auctam tibi domum feliciter, & auguror, & opto.

*Daventriæ: Postrid. Eid. Decembris.*

Cl. Barlæo proximè scribam, & mittam exemplar una cum observationibus, quas promisi ipsi, necdum habet. Collegæ mei Diestius, Christenius, Isendornius, te plurimum salutant.

## CCCLXXX.

Vir admodum reverende & Princeps Historicorum nostri Seculi,

SUMMAS T. R. gratias ago pro dono utriusque scripti tui pereruditi atque elaborati. Prius in quo de Christi genere annisque accuratè disseris, evolere incepi. Quamvis cum tussi senili interdum conflictet, non tamen ea sicca est, atque adeo aspera, ut pulmonem meum nimium quatiat, vimque molestam mihi aliquando pituitam pectore meo expellendi impediatur. Qua vi munitus, utrumque munus meum; Academicum scilicet, atque Ecclesiasticum fortiter ac constanter etiamnum præsto. Quo nomine quamplurimi amici mei probitate atque ingenuitate tibi similes, mihi & coram & per literas familiares suas tecum gratulantur. Pro qua amica gratulatione, sicuti me tibi tuisque, ita me illis illorumque liberis ac propinquis summo perè devinctum esse lubens agnosco. Epithalamii in nuptias unicæ filiz meæ cum Johanne Pollione Edamensis Ecclesiæ quondam Pastore ante annos viginti septem connubio junctæ à T. R. conscripti, probe memini, illudque aliis carminibus tuis in Doctoratus mei Theologici honorem compositis adjungere decrevi, nec non cæteris versibus intimorum amicorum

L I

meo-

meorum, tam veterum, quam recentiorum : sed priusquam illud faciam, ea de re privatim tecum, oblata occasione, colloquar, & cum eximio vate ac vicino tuo D. Barlæo, qui nuperrimè suo quoque epithalamio nuptias nepotis mei Johannis Pollionis condecoravit. Jussi nepotem meum nunc civem vestrum, ut amicitiam vobiscum inchoatam, quibuscunque poterit rationibus, foveat. Unum exopto, ut quanta, tum propter te, tum propter Conjugem tuam vultum ac mores magni Patris sui repræsentantem, liberos vestros complectar benevolentia, aliquando ipsis reipsa demonstrare possim. Uxor mea te tuamque officiosissime resalutat, ac mecum precatur Deum Opt. Max. ut sanctis lucubrationibus tuis è cœlo cumulatissime benedicat.

Dat. Leidam  
27. Decemb.  
1643.

T. R. addictissimus,

Joh. Polyander à Kerckhoven.

#### CCCLXXXI.

Vir Celeberrime,

**A**Ccepi præstantissimum munus tuum, quod eo mihi commendabilius est, quia id à manu tua habeo. Fecisti sane, ut cujus eruditioni omnia summa hætenus tribui, ejus etiam humanitatem ac benevolentiam deprædicare debeam. Serius verò vices scribendi ad te occupandas censui, ut spatium haberem lucubrationes tuas evolvendi, quæ diffusam lectionem, raram eruditionem, & subactissimum judicium, adeoque characterem tuum ubique referunt. Gratulor mihi cæteroquin, quod pleraque quæ de Genealogicis Controversiis, & Anno Natalitio in dubiis meis annotaveram, suffragio tuo comprobari videam. Quod ipsum non parum me in eâ, in quâ hætenus fui, sententiâ confirmat: Dissertationem tuam de tribus Symbolis summa cum voluptate etiam excussi, ubi ea nos doces, quæ nondum animadversa à viris etiam eruditissimis fuere. Nosti verò ipse melius omnibus, in argumentis id genus varia occurrere, in quibus licet *intelligam*, propter multa veterum dicta, in quibus non usquequaque sibi constant. Antiquitatis studium meritò à te commendatur, & eruditis omnibus commendatum esse debet, modò summa semper primæ antiquitatis habeatur ratio, & ad eam revocentur secula omnia sequiora. Quod & tibi ita videri certus sum. No-

bilissimum Salmasium reducem habemus, & ab ipso habebimus propediem varia Opera eximia, quæ affecta hætenus reditum Authoris, & ultimam manum expectarunt. Nihil nisi magnum & inusitatum ab utroque vestrum nobis & orbi literario polliceri debemus. Vale, Vir Celeberrime, & me ingentem eruditionem tuam suspicere, & Vossiano nomini, cujus summa ubique meritò Claritudo est, devotissimum esse persuasum habe. Scripsi *de re ipsa*.

Lugd. Batav. Id. T. omni cultu & officio,  
Jan. cl. loc XLIV.

Freder. Spanhemius.

#### CCCLXXXII.

**E**Lige sis, Vossi Amplissime, socordizne hoc silentii imputatum velis an occupationibus quarum in perpetuo me rotata & conficta versari scis cum Politicorum, tum Aulicorum, item & præcipuè Militarium. Quidquid sit, fatale fuit, Barlæum, semel mihi elapsum, denuo inter nos commear, ne quid à me literarum traderetur, nisi tam amica manu. His omiſſis, gratiam habeo & referre velim, de munusculo imprimis grato; docto denique & præstanti, ut sunt tua; sine fuco dicam, supra seculum omnia & ejusmodi, ut cum esse tu quidem desieris, paucis animus sufficiet talia aggrediendi, nemini vires exequendi. Perculisti me vero, mi Amice, adversa valetudine quacum te tres totos menses conflictatum nuncias. Absit, absit ingenti animo ægre ut sit in hoc tugurio! Neque vero desici te pateris, qui in ipso corporis languore tantæ rei manum mentemque adjeceris. Maçte, mi senex, hoc vigore & stando quidem tu, id est hoc agendo quod agis mori destina. Differ autem hoc & protolle, quantum pote, si Patriam, si tuos, & in his me amas, qui te integerrimo affectu;

Haga-Com. Non. Feb. Tuus,  
cl. loc XLIV.

C. Hugenus.

Narrabam hodie Barlæo epigrammatia mihi hac nocte excidisse, quorum numeros non verba, tenerem. Occurrit unum commode quod eum ad ætatis fluxum & senii quasi *opponitur* spectet; ecce hic adscribo, ut vel rideas, si tanti est, quæ in incendium



cendum hoc nostrum properè lusimus.  
Barlæus secum portat.

In Clepsydram.

*Verto vitram? versa redeunt ad munia stillæ:  
Quisquis beril liquor hac transit, hic bodie  
est.  
Dicite, quis summo jam descendantibus ævi  
Monte parit primas ultima bruma nives.  
Vespillo non esuriat, si fata senectæ  
Clepsydram dederint vertere cuique suæ?*

CCCLXXXIII.

Vir Præstantissime,

**P**ostquam D. Warnerus, unâ cum pri-  
stini favoris testimonio, à te donum  
eximium mihi obtulisset; iter meditabar  
ad amicos Amstelodamenses, quibuscum,  
partim meo, partim aliorum nomine, ex-  
pedienda erant negotia. Verum aliis cu-  
ris iter remorantibus tandem laso pede im-  
peditus, consilium mutare necesse habui:  
adeoque quam ore gratiarum actionem  
cogitabam, scripto consignare fas fuit.  
Siquidem limatum & eruditum scriptum  
tam multa me docuit, docetque, ut me-  
rito ingratus habear, ni id apertè fatear, &  
saltem gratitudinem pollicear. Jam de-  
mum verò agnosco, doctum eum demum  
censeri, in quo omnium scientiarum genera  
est invenire; unam atque alteram scien-  
tiam, licet exactissimam, non perficere  
eruditum virum. Quam se mutuo pro-  
vehunt disciplinæ, si in una mente unam  
sedem fixerint; & ibidem de gloria cer-  
tent! Sed quia rarò fit, rarò huiusmodi  
orbis lumina conspiciuntur, qualia Scali-  
ger, Salmasius, Vossius aliique paucissimi;  
quorum scripta ubi lego, & relego, cum  
summa voluptate, maximam percipio uti-  
litatem, neque etiam satius me unquam  
tener istorum librorum, qui abundantia  
sua, semper nova præbent fercula, quæ fa-  
mem exasperant. *Arrius*, spero, initio  
æstatis accipies, at dissimillimum muneri, quo  
me beasti; dissimillimum inquam valore  
& materia ipsa; quippe in quo Judæorum  
Leges forenses novo codice, puta, secundo  
cum Romanis conféro: Humi serpens, &  
mediocribus insudans, cum nonnisi summa  
meditemini, interim eo animos sumo,  
quod vobis etiam placeam, meaque grata  
esse & fore confidam. Vale amicorum  
decus, & salvebis cum tua dilecta liberis-

que à nobis omnibus, imprimis ab eo  
qui permanet

*Lugd. Bat. 5. Kal. Virtutum & eruditionis  
Mart. a. peractæ  
Salutis 1644.*

tua Admirator,

C. L'Empereur.

CCCLXXXIV.

Salve Vir Clarissime & Præstantissime,

**E**t si multo gratissimæ mihi fuerunt li-  
teræ tuæ, quas Nonis Novemb. anni  
1642. datas mense demum Augusto anni  
superioris accepi, rescribere tamen adhuc  
distuli, partim quod non esset, de quo  
scribendum videretur, partim quod Isaaci  
tui, vel nostri potius, literas expectabam,  
quibus me de itineris sui processu exituque  
certiorem faceret. Sed quoniam ille no-  
stri omnino oblitus videtur, *Aio* certe lo-  
cuto litare, quomodo Lipsius noster aie-  
bat, parum pensi habet, nolui hanc tui  
salutandi occasionem amittere, quam mihi  
offert nobilissimus & literarum amantiss.  
Juvenis, Eques Danus, qui has tibi reddet,  
vivæque Epistolæ fidem de præsentī vitæ  
meæ statu distinctius omnia narrabit. Ipse  
quid rerum geras aut moliaris, scire qui-  
dem studeo, recteque omnia esse magna  
cum voluptate accipiam; nec tamen pro-  
pterea te ullam temporis partem seriis tuis  
subtraham mihi expensam ferri postulo,  
cum satis mihi sit, ex Isaaci literis de vo-  
bis quæ velim cognoscere. Tu fac ne-  
cessare eum patiaris, utque illis Pervigili  
verbis subinde aures ei perlonent,

*Perdidi vocem tacendo, nec me Phœbus  
respicit.*

*Sic Amyclas cum tacerent, perdidit silen-  
tium.*

Pieruccius noster, Pandectarum publicus  
jam Interpres, utrique vestrum plenissi-  
mam amoris & officii salutem verbis suis  
adscribi petiit, quos & ego ex sententia  
rem gerere ac valere precor ac voveo.

*Paravis ad diem Tui amantiss. & observantiss.  
12. Mart. 1644.*

Gaspar Scioppius.

L 1 2

CGCLXXXV.

CCCLXXXV.

S. P.

CONstitueram equidem, Vir longè clarissime maximeque, literis meis nunquam tibi molestus esse; ut tamen nunc tandem aliquando veniam polliceri mihi ausim apud te, facit eximius tuus erga me favor, quam ne apud illos nostros quidem dissimulasti qui in transcurso tantum te salutarunt. Tum vero officii mei esse iudico saltem semel manu & scripto testari, me esse inter singularis doctrinæ ac virtutis tuæ admiratores ac cultores non unum è multis. Id quod uti tibi persuadeas, est profecto quod etiam te atque etiam rogem. Ejus rectius testandi ergo nunc mitto quæ elapso anno edidi historici argumenti. In quo genere quoniam te primum æstimo, tuæ censuræ unice omnia submitto. Haud diffiteor procul à meo munere & vitæ genere, (ut qui totus praxi Medica occuper) esse quicquid istuc est studiorum, sed protractus sum invitus in hanc scenam, ab iis qui novis artibus clarissimæ veritati nebulam objicere in laude collocant. Calixtus noster longam tibi vitam ac vegetam senectutem juxta mecum precatur: mittique per me voluit tibi disputationes quas proxime habuit de Transubstantiatione & visibili Ecclesiæ Monarchia, quas totidem ejusdem argumenti haud multo post sequentur. Haud dubito non ingratum fore munusculum hoc profectum ab homine ut tui studiosissimo, ita ejusdem tecum in sacris negotiis sententiæ, hoc est, animi Ecclesiasticæ concordia cupidi, cujus (proh dolor!) hodie sunt paucissimi. Vale Vir optime & maxime, & me porro benevolentia prosequere.

Helmstadii.

Tui Cultor,

cl<sup>o</sup> loc xlv.

27 Martii.

Herm. Conringius.

CCCLXXXVI.

Clarissime Vir, Amice &amp; Fautor exoptatissime,

Dissertationem tuam geminam, de Genealogia & tempore Nativitatis & Passionis Christi, à te donatam mihi, gratissima manu ac mente accepi: & ut legi, miratus sum summam in Antiquitate experientiam, ac Nestoris annos tanto auctori precatus sum, ut ex tanta experientia complures ejusmodi tractatus, in Ecclesiæ commodum, protruderentur.

Quàm vellem de nonnullis istius dissertationis tecum conferre, nisi molestum tibi esset: Sed accipe hæc pauca. Quæ de Panthere affers, non parum me erudivere. Est inter Judæos liber Blasphemus, Sopher-Tholedoth Jesu inscriptus, quem olim descriptum habui, sed D. Buxtorfio concessi, eo quod publicationem ejusdem cum Notis promitteret: in illo, memini me à D. Buxtorfio audire, Petri filium ex adulterio Mariæ fingi Jesum; hinc suspicabar Petri nomen esse פֶּטְרוֹ, pro פֶּתֶר, quum soleant Dagesh in Nun resolvere alicubi Chaldaei: Buxtorfius affert nomen פֶּתֶר in Lexico Chald-Rabb-Thalmudico, ibique allegat eundem libellum פֶּתֶר יֵשׁוּ: sed apud neminem ex Scriptoribus Christianis illud nomen inveniri scribit, quam apud Damascenum; id quod video, ex Dissertatione tua, aliter se habere, quum & Epiphanius, & Origenes, hoc habeat. Porro, in assignanda causa Festi Natalis Christi, constituti in Decembrem, miror à te non fuisse additas duas alias, quas observavi. Prima est ex Joh. iii. 30. Illum oportet crescere, me vero minui. Verba sunt Johannis Baptistæ, de Christo. Hinc Johannis Baptistæ Festum in Solstitium æstivum, quo incipiunt decrescere dies, Nativitatis Christi in hybernium, quo crescere, constitutum videri possit: ut insinuat alicubi Prudentius, si recte memini. Altera est, quia mense Decembri celebrabatur Festum Matris Deorum; cui surrogatum Festum nati filii Dei; idque pia, ut loquuntur, fraude; quam & tu ipse alicubi insinuas, de Christi mense dieque natali, Thesi III. Hæc nunc sufficiant, ne te ceteroqui satis occupatum obruam. Cæterum

Qui has tibi offeret, doctissimus Juvenis, Polonus est, Rutgerus Hermannides, olim meus Convictor, nuper in Gallia magnis rebus addibitus, nisi mors Richelii intercessisset. Philosophia ille ac Theologia hætenus operam dedit, quidque profecerit in sermonis elegantia, tu ipse rectius judicare poteris. Patriam hoc rerum statu repetere vix audet: & sunt, qui tantum ingenium hic detinendum, atq; majoribus aptandum, judicant. Id vero, si fieri debeat, scio, nullum se in Hollandia certiorum atq; promptiorem commendatorem aut promotorem inventurum, Clarissimo Vossio. Hoc igitur nomine eundem tibi commendare volui, ut sive Pædagogia aliqua inter Mercatores vestras, (aut Procures aut alios) requiratur, sive Rector Scholæ, aut Professor alicubi petatur, sive quocun-

quocunque alio modo, eum commendes, quo vel sumptus studiorum continuandorum tolerare, vel talentum creditum rectè locare possit. Non dubito, ingenium huius Juvenis ipsum tibi placitum, vel nemine commendante. Quocirca confusus humanitate & benevolentia tua, abrumpo; & ut me amare pergas etiam atque etiam rogo. Vale. Deus te diu nobis incolumem præstet.

*Dabam Daven-  
rie An. 1644.  
vi. Idus Aprilis.*

*T. Cl. observantissimus,*

Henricus à Dieft.

Iusseram Janfonium tibi offerre meo nomine Theologiam Biblicam, nuper à me editam. Eam si necdum acceperis, procurabit, qui has tibi offerret, Rutgerus Hermannides.

#### CCCLXXXVII.

Excellentissime Domine,

**N**ostræ antiquæ familiaritatis tesseram bonis avibus, sub auspiciis magni Molini olim initæ, fractam deprecans coram tuo Isaaco filio Lucæ, Juvene eruditione modestiæque singulari eam interpolandam curavi, eique ad te literas mittendas tradidi, quarum responsionem adhuc desidero. Juvenem illum tui vivam imaginem præ se ferentem, eâ, quâ potui, humanitate sum prosequutus, quem iterum Lucam petiturum summis votis operiebar. Sed spe frustratus, en iterum ad te literas exaro amoris, & observantiæ in te meæ testes locupletissimos. Te semper veluti numen literarum colui, tuæque typis edita exosculor, veneror. Rhetoricam, Grammaticamque tantum habui; si quid præterea in lucem editum, cura ad nos perferendum.

Hujus Epistolæ lator erit Sanctes Pagninus adolescens indolis præstantia, natalium splendore, modestiæ dote præclarus, nepos magni illius Sanctis Pagnini Sacræ Scripturæ interpretis, ubique terrarum notissimi. Istam petit urbem, negotiis operam navaturus. O quam vellem hunc tibi de meliori nota commendatum! Tuo patrocinio, clientelæ tuorum filiorum trado, addico. Hic à patriâ non degenerabit claritate, & probitate. Huic, obsecro, responsionem, literasque tradas ad me: illæ non aberrabunt. Operum tuorum Indicem mitte, vel si quid habes levi ma-

nu promulgatum illi trade; tua enim mihi aurum coronarium, tuæ literæ ad me exarata in Cimeliarchio repositæ servantur. Te numen & lumen passim deprædico: Quare te obsecro, ut tui Cultorem benignus respicias, tuis responsis digneris.

Amaltheam Onomasticam jam diu in lucem edidi; bonis avibus? ignoro. Tuum de ea judicium opperior, quod semper in me benignissimum sensi in Polymathia, quam auctam, & Amaltheam etiam, ex unis geminas factas video. Quid si per te ibi typis recuderentur? Sublimi ferirem sydera vertice. D. Isaacum filium, si ibi tecum, meo nomine salvere jube. Ille saltem mihi tuo nomine rescribat. Tibi denuo ex animo commendo Pagninum, meque tuo patrocinio singulari. Deus te fortunet ad Pylios annos.

*Lucæ Non. Eruditioni probitæque  
Apr. 1644.*

*tuæ ex asse mancipium,*

Josephus Laurentius.

#### CCCLXXXVIII.

*Incomparabili Viro Gerardo Joh. Vossio, Jonannes Fredericus Gronovius S. P. D.*

**A**ccepi, Virorum maxime, redhostimentum ingens pro munere exiguo totque nominibus debito, ut omnem muneris gratiam dudum perdiderit: accepi nihilo minoris pretii epistolam, non qualem mereor, sed planè qualem desiderabam, & aliquid amplius. Si expectasti ut ex gratiarum actione mea magnitudinem uberis tuæ & prodigæ humanitatis æstima- res, oportet te falli: neque enim studio meo & cupiditati faciendi eam quam amplissimam verbis sufficio: sed quandoquidem optimus es, animum, ita me Deus, optimum facile interpretaberis. Collegæ debita cum reverentia lætitiæque acceperunt aureum munus tuum, meque gratias ingentes agere suo nomine iusserunt; id quod etiam coram faciet Clar. Christenius cis paucos dies, siquidem has, quemadmodum promisit, cras profectura uxor ejus portatura est. Libros nondum remitto, quia per studiorum varietatem nondum illis usus sum satis; neque tamen in mora ero, si te aut omnibus aut aliquo ex iis indigere te significaveris. Gratissimæ fuerunt



runt literæ Iſaaci tui, ſed miror nihil eum cogitare de reditu, certè ne verbo quidem ſpem de eo propinquam facit; itaque &, quibus reſpondi, quaſi Lutetiam iturum inſcripſi. Faſciculum ad Crocium noſtrum pridem deſtinatum, quia non habeo, cui commendem, denuo te reſpicere fidemque tuam interponere neceſſè habui. Quia enim interdum ad eum ſcribis, offerri tibi occaſiones puto, aut facile reſciscere per tuos lubet, ſi Nautæ Bremenſes adſint, quibus committatur. Addeſ igitur hoſ tuis erga utrumque noſtrum meritis, niſi grave eſt. Vale, Vir incomparabilis, & ſalve à me meaque cum tua & gente & animo Junia, totaque domo.

*Daventriæ ad diem x. Kal. April. clō Iōc XLIV.*

Si ſcirem ubi nunc ageret Franciſcus Junius V. Cl. affinis tuus, libenter ad eum exemplar mitterem, & memoriam ei humanitatis, qua Londinii ſibi me devinxit, conſiterer.

CCCLXXXIX.

S. P.

Vir Clariſſime & Doctiſſime, Amice & Collega obſervande,

PETIT à me D. Roſayus ut ei ad te viam aperirem. Vir eſt elegantis ingenii, promotus Doct̃or Medicus, in Mathematicis & aliis Philoſophiæ partibus bene verſatus. Quid quærat vel optet, ipſe tibi exponet. Si poſſis eum in ſuo propoſito juvare, non conſeres beneficium in ingratum aut indignum. Scripſi ad D. Caſaubonum, eique gratias egi pro munere, quod ipſius nomine à te accepi. Nunc tibi & D. Matthæo filio tuo gratias ago maximas pro tertia parte Hiſtoriæ, quam mihi, ipſius nomine, reddidit D. Senator Dubletius. Adſuit mihi hodie Doct̃or Forbeſius autor Lucubrationis cuius primam partem tibi communicavit Elzevirius. Ipſe Amſtelrodamum ſe confert, ut cum Typographis agat; habet enim tertiam partem abſolutam. Te inter primos ſalutaturus eſt, & dignum iudicabis tua admiſſione & benevolentia. Affinis meus Molinæus adhuc cum diuturno illo morbo conſiſtatur; ſubinde tamen aliquas Conciones habet, cum ea iudicii lima, quæ nihil redolet morbi. Miſit huc Philoſophiam ſuam, id eſt,

præter Logicam, Phyſicam & Ethicam eadem Methodo brevi & perſpicua. Expectamus hic D. Salmaſium, cum Epiſtola de Coma, quæ valde comata eſt, quia cum promiſiſſet unum folium, excrevit ad octodecim vel viginti. Reliqua ipſe tibi indicabit. Nos hic valemus, Deo gratia, tibiſque & tuis omnia fauſta expetimus.

*Rep. v. Id. Maias Tuus omni affectu & officio,*  
clō Iōc XLIV.

Andreas Rivetus.

CCCXC.

Eupantus Tyłbertucio \* ſuo, \*Tyłbertucius,  
avide haſtenus expectato & eſt Błłterſynje.  
expetito, S.

TANDEM igitur ades! Gaudeo & lætor vehementer. De dignitate Senatoria intellexeram, quam & tibi & Dominae Coniugi, totique familiæ quam ſolenniter tam candide gratulor, plurimum proſecto & ipſe in hoc honore tuo conſecutus. Indigebam & apud Sicambros noſtros amico, indigebam Tyłbertucio, qui & ingenii & eruditionis & prudentiæ ornamentis ſplendens literarum, quaſi in nocte jacentium, fortunam illuſtraret. Non adhuc pretium ſuum apud gentem, ſive Mercurio ſive Marti deditam, ingenuæ Artes invenere. Atque ego cum in hiſtoria Patriæ occupari potuiſſem, neglectus ſum. Jam quid præſtem? Conſenui: niſi poſt Imperatores Auſtriacos, quos abſolvere nunc ſtatui, Duces quoque Geldriæ repræſentem. Te expecto, ut uberioſorem de omnibus ſermonem inſtituam: imo ut audiam tuis tot Amicos verbis loqui qui honorem genio tuo, & ſic meo habuerunt. Sed quid ais? † Verultham  
gravi Morbo affligi vehe- † Verultha  
menter doleo, noſtra, Litera- eſt Walther.  
rum & reipublicæ cauſa. Servet Deus Virum, qui in exemplum veræ bonitatis humanitatis & elegantie natus eſt; ille meus, ille tuus, ille bonorum omnium. Votis locus eſt, quæ ſummum Numen ut ſpero, audiet; & magnum nobis Pacis conficiendæ momentum corroborabit. Caterum res meæ, ut ſolent; valetudo pro ætate, ſtudia pro valetudine. *Bivium* tamen *vita humana* paratur ut publici juris fiat. Aphoriſmi Politici partem ruriſus lectionum atque diſſertationum conſtituunt: quod opus, niſi fallor, decumanum erit, & decumanis quoque typis dignum:  
Quid

Quid etiam? Imperatores in manu sunt una quidem opera Fredericus & Maximilianus, ut reliqui deinde Carolo adjungantur. Hæc Angellistini Epistola te vel maxime spectat, & quasi ad te directæ. Mitti sibi optimus eam parenstus cupiebat. Mitto sed ut à te accipiat, cum uberrimo salutis voto. Arcis negotium quod in se suscepit, hac occasione commendando. Te rogo ut cum venies, conferre utrumque Diploma literasque Regias à sanctiore Ærario confirmatas, velis. Sic nunc te complector toto animo & lætum felicemque esse jubeo, lætam Dominam quæ tam feliciter te recepit. Salveat Eubisæ noster: tu salve, vale, iterumque vale.

Lovanii in Arce 3. Eid. April. clō Dc XLIV.

Siquid de *Mentalco* \* certi, quæso sciam. Stemma ejus apud Eubisam videris, hic te exemplar expectat. Remitto fasciculum, Caramveli inscriptum, is enim in Germaniam jam Abbas profectus est.

Lovanii in Arce Eidib. April. clō Dc XLIV.

O tristem optimi Verulthæ & nimis repentinum calum! In uno malo plura mala. Sed unum tamen maximum; quia qui dignissimus longiori erat vita, sic nobis & Regi & Reipublicæ ereptus. Hæret & mihi animus, hæret calamus, & quasi obstupescit. Idcirco quæ scribenda erant differo vel etiam ut in sermonem conjiciantur. Ergo nec de Arce jam dico, nec de altera petitione, quam non unis jam literis Hamirefio commendavi. Mentalcus & suas partes exequetur. Te videre & complecti cupio. Vale.

xvii. Cal. Maias clō Dc XLIV.

Ab Aheno alterum jam fasciculum accepi, in quo præter tabulas Geographicas imago D. Vossii erat vere pulchra & venerabilis, in pretio habenda mihi & honore, sed tu nimis in me effusus es & propemodum liberalitate peccas: bene rursus meritorus: si gratum me esse fiveris. Erat quidem in Epistola fasciculus, & sic tamen loqui vel maxime videbaris, ego potius qui nunc scribo mutus sum quia munus nullum mitto. Veni, veni, ut dare possim.

CCCXCI

V. Cl. Gerardo Joanni Vossio  
Janus Vlitius S.

IMmemor profecto omnis beneficentiæ & benevolentię tuæ fuisset, Virorum decus, quæ etiam puerum me totum tibi devinxisti; si non isthac saltem occasione memoriæ studioque tuo, quo omnes vel mediocriter *φιλοκύς* prosequutus semper es, me insinuarem. Aut si id nimium audaciæ est, mandata exhibeo. Fasciculum isthunc à Cognato Blittersvicio Bruxellæ mihi commissum, ab Affine tuo Fr. Junio, quem Antuerpiæ, dum Arondellium Comitum resalutatum ibam, & jamdudum in domuitone nostra ex Anglia familiarem habere contigit, salutem plurimam tibi, tuæ, tuisque. Parem à Puteano Heroe, quocum aliquandiu Lovanii otium egi, quod regioni isti intensissimus calor indixerat. Ibi dum essem, de reditu Isaacitui (at quanti Viri!) rumor increbuit, quem faustum illi omnes fovebamus, quanti interesse censebamus. Vivat dignus patre filius; & dignissimus, qui vivat, pater. Ego interim rei domesticæ infuso; Uxo-rem, Senatoris Hesseli filiam, duxi; apud quem commoramur. Quo mandata tuæ, si qua pro jare, quod summum in me habes, imperas, ut dirigeres, scire hoc te volui. Vale, Decus meum, & quo olim cœpisti favore, prosequi porro ut digneris rogo. *de te.*

Datum pridie Idus Sextiles, Hage. clō Dc XLIV.

Quas addo, Daventriam ad communem nostrum amicum deferendas, quia discesserat hinc tabellarius, ne grave sit curare.

CCCXCII

Amplissime Domine,

INclusas Alosto ad me misit Guilhelmus Hessius, ut ad Amplissimam Dominationem tuam destinarem. Nuper scripsit ad me Madrito D. Laurentius Cocchi Italus, aliquot Nunciorum Papæ in ista Aula Secretarius, percunctatusque est quid iis literis sit factum, quas ante annum alterumve Domino Vossio inscriptas, mihi tradi unâ cum libro Hispanico curat.

rat. Si otium esset eruditissimo Viro, ut paucis ei rescriberet, rem mihi gratissimam faceret; vereor enim ne, ut est genius Italarum, se vel ab eo contemptum, vel à me delusum existimet. Vale, Vir amplissime, eique & à me & obsequia omnia defer, & salutem plurimam precare.

Antwerpia vi. Ampliss. Dominationis tue  
Junii 1644.

Humillimus Clienſ,

Johan. Bollandus.

### CCCXCIII.

Clarissime & eximie Vir, Domine & Amice plurimum honorande,

**L**iteras tuas, unà cum adjuncto Librorum tuorum eruditissimorum dono, scriptas xv. Kal. Quint. anno cpo c xlii. hoc demum anno iv. Kal. April. accepi. Miror, ubi tam diu delituerint; nec ipse minus, sine dubio, miraberis. Ante annum & quod excurrit, proficiscebatur ad vos quidam meorum familiarium, Mauritius Bonerus. Ei nonnulla ad te perferenda tradideram, quæ an reddiderit, nondum me docuit. Credo literis ejus idem contigisse, quod tuis; & forte adhuc è latibulo alicunde advolaturas. Pro munere autem illo tuo, si quantas meretur, aut quam acceptum fuit, tantæ agendæ sint gratiæ, fateor mihi verba defore. Impri- mis verò animi tui candorem & moderationem cum summa eruditione conjunctam veneror. Has tibi reddet nobilissimus juvenis Johannes Christianus à Boineburg, dignus sanè, quem tuâ benevolentia complectaris. Hyemem quæ præterit, apud nos hîc exegit, commendatus quidem à serenissimo Principe Ernesto Saxoniz Duce, sed à suâ ipsius virtute & discendi cupiditate longè commendatior. Quali latratu artifex novus, qui à nobis ad partes transiit, & apud vos hodie degit, me infestat, non potes ignorare. Sed feci ei potestatem latrandi, quantum & quamdiu libuerit. Moguntiz pari rabie in me nuper insurrexere: quibus tamen respondebitur, ut veritas vindicetur. Prodebunt etiam hâc ætate, si Deus annuat, Exercitationes de visibili Ecclesiasticâ Monarchia, Transubstantiatione, Sacrificio, Pontificiis oppositæ. Tenuia sunt quæ his adjunxi; inspicies

si vacat. Deus te diu servet incolumem bono publico. Vale.

Tui amantissimus

Ex Acad. Julia quæ  
est Helmſtadii x. Kal.  
Jun. cpo c xlii.

& observantissimus,

Georg. Calixtus.

### CCCXCIV.

Vir maxime,

**N**æ malum nomen sum, qui tamdiu sum in ære tuo, necdum me à nexu libero. Præclara ingenii tui monumenta me totum tibi obstringunt, ut nihil dicam de humanitate, qua filium meum adolescentulum illotum, tam arctè complecteris. In prima occasione tentabo an officio meo satisfacere possim. Emerſi hiſce diebus per Dei gratiam è gravi & periculoso morbo. Pituita enim cerebrum meum ita pertinaciter occupaverat, ut per menses aliquot à suggestu Ecclesiastico me excluderet, defluens ad asperam Arteriam & cannas pulmonarias, unde raucedo, in senibus vix sanabilis, oborta fuit; quam tamen per Dei gratiam diætæ & phar- macis hac vice absterſi. Ignosces, Vir summe, quod meritis tuis non respondeam, ex quo plurima discō. Jam commendo Henricum Thalemejerum, Theologiz studiosum, Lippiatum, qui venerandæ canicie tuæ manus exdſculari & salutigerulus esse amat. Hoc volui. Bene vale & salve, amicorum & virorum, quos suspicio, maxime.

Excell. tuæ studioſissimus,

Brem.  $\frac{1}{2}$  Jun.  
cpo c xlii.

Ludov. Crocius.

### CCCXCV.

Vir Clarissime,

**E**X quo humanissimis pariter ac doctissimis colloquiis me dignatus es, varius me & infelix casus volvit ac revolvit. Invalescente enim, qui jam à multis mensibus inceperat, parentis mei morbo, vix Flandriam, habitationis locum, pedibus calcaveram, quin illico reducem me in Hollandia non exoptant modo, sed & quam maxima festinatione revocant. Et ut



ut quamplurimum malum unum premit aliud, ita funestum illud, de desperata parentis optimi valetudine, nuncium, alio multo tristiori comitatum ad aures meas pervenit, nempe eum miseram hanc vitam beata morte commutasse. Qui quamvis ultimus Christianorum & exoptatissimus sit terminus, ut qui animam è miserrimo hujus corporis ergastulo demigrantem, sperata beatitudinis possessione beat, dici tamen non potest quanto hoc ipsum mœrore animum meum percusserit; præsertim cum oculos in fratres sororesque converterem, parvulos adhuc, qui pio pariter ac solerti patre orbi, variis rerum casibus subiecti, & diluvio declinantis orbis obiecti videntur. Hæc in causa sunt, V. Clar. quod promissis meis de mittenda Ecclesiarum Zelandicarum *οεγοφώνησι* ad Ecclesias Anglicanas, hæcenus non satisfecerim. Verum tristissima animi fluctuatione ut-cunque pacatâ, ubique sollicitè inquisivi, ut quod addideram effectum darem. Quod nunc præsto. Si quid hic est præterea in quo opera mea aliquod tibi commodum afferre queat, felicem me prædicavero, si literis hoc indicaveris. Porro, summopere mihi & Ecclesiis nostris gratulor, quod & tu V. Clar. super intricata de pilis controversia sententiam tuam aperire volueris, utinam id aliquanto prolixius factum fuisset. Sed non video quomodo Cl. D. Salmasius p. 25. f. tantam alendis comis licentiam concedat, cum ipse ore mihi dixerit, intonsos capillos, vel intonsos similes virorum naturæ prorsus contrarios esse, quum sane (ut dicebat) gestari non possint efflui, sed necessario, foeminarum instar, sollicitè repurgari, religari & variis nodis vinciri debeant, quod viros utique non decet. Hac de re tecum Vir Cl. præsens, si occasio ferret, libenter sermones miscerem, ut & de aliis nonnullis, quod in aliud tempus differre cogit necessitas. Sed gravissimas tuas, quibus Ecclesiæ & Reipubl. bono implicatus es, curas, literis prolixioribus interrompere religio mihi est, eoque finem facio, summum numen supplex orans ut te, Vir Clar. Ecclesiæ suæ & orbi literato diu servet incolumem.

Dabam Ardenburgi  
17. Aug. Æræ Chr.  
1644.

*Illustriss. nomini*

*tuo dicatissimus,*

Daniel Gravius.

## CCCXCVI.

Gerardo Johanni Vossio, V. Clariss. &  
*Eruditiss. D. Joseph. Laurentius*  
S. P. D.

Totus in lætitiâ diffusus frontem ex-  
porrexî, cum tuas tamdiu exoptatas  
vidi, legi, relegi, spirantes adhuc antiquum  
in me amorem, Lethæis nunquam delend-  
um aquis, vel locorum longinqua inter-  
capedine. Te enim semper ut literarii  
cœli solem colui, tuum filium suspexi, tua  
scriptâ Palatino cimeliarcho non indigna  
tanquam sacrosancta cum veneratione  
pertracto; sed vix unum atque alterum  
exemplar in nostra urbe, adeo rara, quia  
præclara. Ego Rhetoricam contractam,  
Oratorias Institutiones, & Grammaticam,  
& nihil præterea habeo, aveo tamen reli-  
qua typis tradita nosse, quæ curabo ad me  
perferenda. De recudenda Polymathia  
cum Opusculis Philologicis, item Amal-  
thea cum auctario multo ad trientem us-  
que, adeo ut opus ferme in duplum excre-  
verit, imprimendum in folio, ut dicitur,  
utrumque te obsecro pro eâ, quæ inter  
nos maxima intercedit familiaritas, ut  
urgeas, instes, omnem moveas lapidem  
pro amico tam charo, qui se suaque tibi  
nexa mancipioque devovit. D. Isaacus si  
redit (ut spero) incolumis, à me pluri-  
mum salveat, quem sequestrem voveo  
inter me & Typographum, cum quo agat  
sedulo, serio peragat, meque certiore  
reddat per eundem Pagninum, quem tibi  
de meliore nota commendavi. Si quid in  
Italîs oris scire cupis, aut habere, me tibi  
Jovi Mercurium cense, qui statim tabellis  
alatis nunciabit, aut asportabit, quæ tibi  
in votis. De D. Balthassare Bonifacio  
mihi amiciss. nihil mihi certi, per proxi-  
mum Tabellarium aliquid scribam. Hein-  
sius, Farnabius, adhuc in vivis? Literato-  
rum procures ibi & alibi agentes nosse  
percipio. Italia nostra destituta lumi-  
bus jacet in tenebris. A tuo filio de hoc  
certior, oculato teste fies. Mihi vivere  
cupiens & amicis sexagenarius ad coronî-  
dem perduxî publica stipendia, rude jam  
donandus, emeritum meritis, sed non  
recepturus, quæ est publica horum tem-  
porum calamitas. Literis aliquando te  
compellabo, (ah ne dedignere) respon-  
deat D. Isaacus, ut tibi parcas bono pub-  
lico valde laboranti. Me tibi commenda-  
tum ex corde amantem redama. Ita Deus

M m

te

te tuaque fortunet, felicitateque maectet  
æterna. Vale.

Lucæ Id. Aug. c1515 c111v.

## CCCXCVII.

S. P.

**B**iennium est & semestre, cum binas  
tuas literas grata manu & mente ac-  
cepi, viva certè Vossianæ humanitatis &  
nivei candoris exemplaria. Etenim ex  
iis intellexi commendatitias meas, quas  
optimi juvenes Dunsius & Erasmus  
Hammelius tibi meo nomine tradide-  
runt, plurimum ponderis apud tuam  
humanitatem habuisse. Hunc affectum  
in me & meos gratissima mente, uti par  
& æquum est, complector; ac voveo vi-  
cissim datum iri mihi occasionem de te  
tuilve bene merendi. Hocce mutuum ac  
meritum gratificandi tibi studium auxit  
donum illud eximium, quod humanissi-  
marum literarum velut benignum quod-  
dam auctarium esse voluisti. Posthumum  
scriptum indigito à filio tuo charissimo  
*b. m.* DIONYSIO VOSSIO elaboratum  
maximâ cum ingenii & eruditionis laude.  
Ego illud inter rara meæ Professionis *αυτῆς*  
*αἰα* numero. In eo non unum Musarum  
certamen iniri jucundo quodam oculorum  
spectaculo observare licet. Interpres *ὁ να-  
υαῖς* ætate minor grandævo Moli Mai-  
monidæ (sit venia Homericæ & Virgilia-  
no Patronymico in Prosa) autori scripti  
Rabbinici de Idololatria, viro magnæ au-  
thoritatis & celebritatis apud Rabbinos  
& Christianos Ebraicæ Linguæ æstimato-  
res haut cedit. Imo quo magis præstat  
puritas Linguæ Latinæ Rabbinismi farra-  
gini, eò laudabilior est interpretatio ipso  
textu. In Commentariis verò tres Linguæ  
cardinales certant de Primatu. Agmen  
ducit Rabbinicæ Antiquitatis peritia, &  
Ebraicæ Literaturæ cognitio ætate juvenis  
unum & viginti annos nati major, atque  
veteranos in admirationem rapit. It co-  
mes Græca & Latina, notisque grande  
decus & lumen addit. Etiam Ecclesiasti-  
cæ antiquitatis radius subinde Lectoris ocu-  
los ferit. Hæc omnia in Drusii monu-  
mentis & aliis id genus paucis comparent.  
Aulim affirmare, si, postquam ex ephe-  
bis excessit, tanta dexteritate Codices  
Rabbinorum evolvere potuerit, atque eru-  
ditis Commentariis illustrare; quod ætate

grandior redivivus Drusius audiisset, si  
cceptam horum studiorum telam pertexere  
ipsi fuisset propositum: sed aliter visum  
sapientissimo Deo, humanarum rerum mo-  
deratori summo, cuius opera & judicia  
quia nobis sunt abyssus, ideò sola venera-  
tione metiri ac complecti ea obligamur.  
Ut autem debitam animi gratitudinem ali-  
quo indicio adprobarem tuæ humanitati:  
ecce prodit de paupertinâ musei mei sup-  
pellectile gemina Exercitatio antiquitatis  
literariæ, si non tuo muneri dignitate par,  
saltem ob mittentis affectum & gratifican-  
di studium, haut ingrata, uti spero, tibi  
futura. Claudet epistolam, qui eam ex-  
hibet, Nicolaus Matthiæ juvenis ab eru-  
ditione, modestia, vitæ integritate, aliis-  
que virtutibus commendatissimus, quem  
ut tuo amore & favore in posterum com-  
plecti velis, salutaribus studiorum consiliis  
sublevare, atq; peregrino patrocinari haut  
grave ducas, inter maxima publicarum ac  
privatarum occupationum gravamina, qui-  
bus te in dies, imò horas districtum teneri  
novi, præsentis scriptionis votum & sum-  
ma est. Raram tuam humanitatem erga  
se literis ad me scriptis oppido deprædi-  
vit Dunsius, adeo ut aditum ad tu-  
as Musas subinde sibi patere gratus agnos-  
ceret. Quod si præsentem, qui in poste-  
rum à tuo ore pendere constituit, simili  
benevolentia dignum judicaveris, præ-  
ero collati hujus in Nicolaum nostrum  
favorabilis beneficii te haut penitebit, &  
parens honoratus Regiæ hujus Metropolis  
civis maximopere demereri conabitur,  
apud me verò ejus memoria erit semper-  
na. Vale, Vir summe, summoque studio  
bene de literis ac literatis mereri perge.

Hæmie Kal. Oct.  
c1515 c111v.

Tui nomini addi&fif.

Tho. Jo. Bangius, M. S.

## CCCXCVIII.

Clarissime & Celeberrime Vir, Amice & olim Colle-  
ga conjunctissime,

**N**ON possum pro nostra amicitia quin  
tibi gratuler felicem reditum Isaaci  
tui, quem in transcursu tantum vidi, &  
velut fulgetrum. Occupati fuimus tum in  
S. Cœnæ præparatoriis; quæsi vi eum sub  
vesperam diei dominicæ apud Senatorem  
Dublerium, apud quem existimabam eum  
divertisse: qui mihi significavit hospitio  
materteræ fuisse usum, & abiisse paulo  
ante

ante Leydam, ubi expectabatur à D. Salmasio qui conquestus est se prateritum fuisse. Causam satis conieci, quod à me ipso intellexerit recenter, morbum illum qui tibi duos abstulit filios, filias ejus binas intra paucorum dierum spatium letho dedisse. Sed id refarciri facile poterit per literarum commercium, missis, si quos habet pro illo, fasciculis. Cum autem ad te redierit auctus divite suppellectile intus & extra, spero eum deinceps tuo consilio, & amicorum flagitationibus concessurum, ut publici juris faciat nonnulla, quorum editione doctos & pios sibi devinciet; præsertim si Ignatii Epistolas quas habet pleniores ex Manuscripto Florentino nobis communicet. Qua de re paucis apud eum egi, monitus ab ampliss. Sarravio, qui id enixe petierat. Samuel Bochartus affinis meus per literas suas testatus est, quantum debeat filio tuo, qui ipsius causa à via tantopere deflexerit, ut Cadomi eum inviseret, qui ex communicatione cum eo non dubitat quin patris vestigia sit sequuturus. Narrabit etiam tibi quid moliatur vir ille doctus, & quæ ipsi fuerint objecta impedimenta ne quod susceperat peregerit, aut isthic peragere spes aliqua superfit, ubi tyrannis etiam in bonas literas sævit, erit à nobis juvandus in parturitione foetus utilissimi. Tentabimus [nempe quia Cl. Viri L'Empereur & Golius possent emendationi præesse.] J. le Maire, quod se facturum suscepit D. Salmasius. Si minus succedat videndum erit, an commodè Amsterodami cudi poterit opus tam varium & tot Linguarum Characteribus aspersum. Tu cum filio poteris juvare & nobis consilio præire. Hic expectamus brevi nostros bellatores, & intra biduum Gynecæum, qui hætenus per semestre solitarii viximus. Causam intellexi à D. Dubletio, cur spe nostra frustrati fuerimus qui te expectabamus, ut hic in amplexus tuos veniret filius. Firmet Deus valetudinem tuam, & D. uxoris tuæ, efficiatque ut diu filii superstitibus senectutem vestram solentur, & pulchra prole beent, tam corporis quam animi. Affinis Molinæus semper cum veteri morbo confluetur, ita ut tamen supersint vires quibus die & nocte perambulet; & subinde conciones habeat elegantes & efficacissimas. Ego & uxor valeamus (Deo gratia) vobisque omnia prospera vovemus. Vale.

Hage-Comitis  
xiii. Octobr.  
cio d c xlv.

Tibi & tuis  
addictissimus,

Andreas Rivetus.

CCCXCIX.

Clarissime Vir,

Mitto legenda, tum quæ disputanda brevibus proposuit Canonicus, tum quæ edidi per Moguntinum quendam: qui tamen menda reliquit satis multa. In Latino opusculo prodidi quæ vulgo hic terrarum sunt incognita. Placetne perfrustrare, ac mihi dein reddere? Necdum enim suppetit mihi exemplar aliud. Ambiunt ut video, tuum contra me iudicium & evulgaturi quidem. Per me tibi licet quod lubet. Hoc tamen scio neminem posse quidquam definire contra me solide, qui non audierit me penitus, postquam objectionibus impeti cœpi ab iis, qui, ut candide eloquor, pugnare contendunt, quæ non pugnant, & sequi evidenter, quæ non sequuntur: ac profecto nostrorum omnium sententia, res ita habet, ut scribit Petavius in schedula, hisce inserta. Prudenter Lutheranus, libris editis clarus, non ita pridem, epistola quadam ad me; malle se audire partem utramque, quam iudicem agere. Sapit item piscator, qui ante ictum sapit. Id est, per quem tibi creatur molestia, rectius ille curaret res magis necessarias. Ego non vacillo; tuiturus matrem facile; qui tela conjiciuntur in eam non fortiora quam est juncus. Hæc animo scribo candido, atque in te tuosque amicissimo. Utinam gratus reapse esse possim de benevolentia, quam à tot jam annis, indignus ego expertus insigniter. Salve, Vir optime, mihiq; omnibus modis honorande.

xxvi. Octobris  
cio d c xlv.

Bartoldus Nihufius.

CD.

Clarissimo & Venerando D. D. Ger. Jo.  
Vossio, Joh. Smith S. P. D.

TAM prolixa, Vir Clariss humanitate Commentarium de Batavorum oppido scriptoremque ejus antehac complexus es, ut ille à Typographica fornace calens ante alios ad te merito properat, cujus beneficio quoque & opera lucem videt. Si nunc æquè, atque nuper expectationem sui apud te sustinet, & tueretur, est quod mihi gratuler & de aliorum iudiciis securus serio cogitem de excutiendo suppellectile antiquaria. D. Blauwium multis negotiis distrahi

M m 2



distrahi sentio, eadem tamen qua exemplaria ad Bibliopolas mittit opera, mihi amicisque vacabit spero, inprimis ad externos, in exemplari quod doctissimo Sam. Bocharto, Reformatæ Cadomenis (Caen vocant) Ecclesiæ Pastori inscribo qui nobis omnium gentium origines, ex Cap. Genes. X & Orientalium Linguarum monumentis recludit, & altero quod D. H. Grotio quanquam ignotus, cum Literis destino, illius opera quam in Batavicæ Reipublicæ antiquitate describenda posuit, meretur, ut qui illum ducem sequimur, illi nostra quoque probemus. Si tamen res apud Blauwium secus cedat, prius exemplar D. Riveto commendabo, super altero te consulere cogar. Interea bene vale, Vir Clarissime, publico rei Literariæ bono, & fave.

Scrib. Noviomagi xxiii.  
Greg. A. cō d c xlv.

## CDI.

*Incomparabili Viro Gerardo Joanni Vossio, Johannes Fredericus Gronovius S. P. D.*

**A**Nte paucos dies scripsi ad te unas, Vir maxime, easque ad amicum misi, ut tibi traderet. Si tamen moratus esset, præbente occasionem politissimo illo juvene, qui has adfert, non committerem, ut ipse in mora essem mihi, sed *et dñm mñ* de eodem argumento te interpellare constitui. De sefertius, quod suaseras, diatribam habemus paratam, & ornatam, sic ut aliqua secunda, cum spe lucem videre possit. Budæi, Hotmanni, Agricola, Scaligeri, Grosippi, virorum longè eruditissimorum plurima *перечисляю*, ea modestia, qua par est deteximus: Nostram sententiam dilucidè exposuimus, & argumentis tantum non apodicticis adstruximus. Libellus erit sex aut septem philyrarum: & consenserunt amplissimi curatores nostri, ut sumptibus iis, quibus Theses describuntur, impena impressionis adscriberetur. Itaque nunc in eo sum, ut extremam manum imponam: nam ni properem, liber fiet grandis; Ita quotidiana plura subnascuntur. Caterum præter illos, quos nominavi, quosque vidi, scripserunt, ni fallor, de re nummaria, Portius, Matt. Hostus, P. Ciacconius, Erycius etiam, ni fallor, Puteanus. Quamquam eos magis descripsisse ex illis putem

sua, aut de reducendis veterum summis, ad nostræ pecuniæ summas, sollicitos fuisse, quàm quippiam attulisse novi, aut inquisivisse in formulas veterum: tamen videre eos gessit animus, antequam nostra edantur. Eos igitur, si servat Bibliotheca tua, commodato ad paucos dies petii: ipsum quoque Grosippum: non enim satisfacio mihi, in legendis denuo, & considerandis eorum sententiis, cum quibus mihi res est; præsertim cum brevi corrigere nostra omnibus permissurus sim. Petieram præterea Grammaticorum corpus, & Schotti Observationes Lutschianas. Quod commodò fiat tuo; repeto illam petitionem, & ut sine mora, siquidem potest, compotem me facies voti, per primos Tabellarios; nam sumptum hunc lubenter faciam, dummodò, uti desideratis potiar. Vale, Vir incomparabilis, & salve cum gravissima Matrona, omnibusque tuis.

Daventriae a. d. xii.  
Kal. Nov. cō d c xlv.

Fabricius noster, ab Episcopo Lubecensi Duce Holsatiæ; ad Consiliorum munus est evocatus: cujus honoris, fortunæque causâ ex animo gaudeo.

## CDII.

*Clarissimo & doctissimo Viro D. Gerardo Jo. Vossio, Amico charissimo, S. P.*

**A**Ccipe, Vir clarissime, promissam dissertationem de consensu doctrinæ Augustini de Gratia Dei, cum perpetua Catholicæ Ecclesiæ Doctrina. Qua dissertatione inspecta, facile perspicies, tui dilectionem, & doctrinæ tuæ reverentiam & existimationis tuæ curam, etiam tunc cum te de facie non nossem, tantum apud me valuisse, ut nisi muneris divinitus impositi necessitas me impulisset, non fuero palam daturus hanc (licet mitem & benignam & cum honoris tui Præfatione conjunctam) significationem dissensionis meæ ab eo quod abs te profectum esset. Tametsi persuasum habeo, & jam ex diuturna consuetudine comperisse mihi videor te non ægre ferre, si quisquam, sincero veritatis studio, & recta ratione suffultus, seorsum abs te aliquid se sentire amice & modestè profiteatur. Et te ita esse animo affectum confido, ut malis *et idia dñm*

ἐπὶ σωτηρίᾳ τῆς ἀληθείας, absit enim à nobis Christianis ut in hoc φιλαλληλίας officio nos ab Ethnicis anteverti sinamus. Laudatur Princeps Apostolorum quod alterius postmodum nati Apostoli justam reprehensionem non spreverit. Nec minus audientis celebratur ἀλληλία, quàm monentis παρηγορία. Homines sumus & mutua ope sublevamur. Amicam justī monelam psaltes suaveolentis & refocillantis olei loco habuit. Tu mihi in legendis nostris, ut pari libertate ac benevolentia fidum te præsentes monito-rem, & amicū censorem, etiam atque etiam rogo. Vale, Vir humanissime, amice charissime, & quod facis nos ama.

Amst. 17. Jan.  
1643.

Tibi additissimus,

Joannes Forbescius, à Corfe.

### CDIII.

Clarissime & eximie Vir, Domine & Amice magnopere honorande,

**R**arè sunt occasiones ad vos scribendi vel mittendi, nec mihi commodiores aliæ sese offerunt, quàm si forte ex auditoribus nostris unus & alter ad vos iter instituunt. Literæ quæ variantibus Tabulariis per diversa loca transeunt, inter vicissitudines plerumque pereunt. Hâc igitur occasione per eum, qui hæc offert, oblata, si nihil aliud, saltem te, quē ex animo amo & æstimo, salutare volui. Adjunxi nuperum meum maledicis Moguntinorum vindiciis oppositum Responsum: de quo quæ tua sit sententia si candidè & libere me docueris, magno me affeceris beneficio. Discordiam & odia mutua Christianorum doleo, imo detestor: & concordia aliquam viam invenire discupio. Interim fieri potest, ut aberrem, & scopum parum dextrè feriam. Sed aliorum judicia & correctiones lubens audiam & admittam, neminis autem lubentius & avidius, quàm à te profectas, quem multiplici & perfectâ eruditione pollere, & pari concordia desiderio teneri certus sum. E nostris nonnulli quod primæ & prisca antiquitatis in constituendâ religione rationem haberi volo, damnant: alii, quod rem per colloquia tentari suadeo, improbant; neque desunt qui omnem conatum, curam & spem instaurandæ concordia rectius abjici quàm suscipi censeant. Quod meditatur & molitur ferenissimus Poloniae Rex, opus est planè pium, Regium & Christianum,

nec tamen desunt, qui dehortentur nostros, ne controversias in colloquium deduci patiantur. Magis propemodum turbant & terrent, quæ in Anglia aguntur, quorum nihilominus propter locorum intervalla & itinerum difficultates rara & tenuis ad nos dimanat notitia. Angit sanè animum, tranquillitatis auram, quæ ex iis locis adspirare cœperat, & nos in spem malacia erexerat, in diram & truculentam tempestatem conversam esse: Hyems, quæ exacta est, nobis propter viciniam & transitum exercituum inquieta fuit & turbulenta: idque adeo est causa, quod responsum contra Moguntinos nondum integrè prodierit. DEUS Ecclesiae suæ & tantopere afflictæ Germaniæ tandem misereatur, teque, Vir eximie, bono publico incolumem servet diutissime. Officiose te salutatum cupit clarissimus Collega meus D. Horneus. Vale.

Ex Acad. Julia.  
v. Kal. Apr.  
clō 1643.

Vester quantus quantus

usu mancipioque,

Georgius Calixtus.

### CDIV.

S. P.

Clarissime & eximie Vir, Domine & Amice magnopere honorande,

**N**escio an nuperas meas, quibus exemplum Responsi Moguntinis oppositi junxeram, acceperis. Non est autem alia scribendi vel mittendi opportunitas, quam per Juvenes studiosos, qui hinc ad vos commigrant, quibus volupe est aliquid ad te ferre, quo facilius tui compellandi fiat copia. Equidem tua tempora salutationibus & alloquiis deteri, nefas propemodum esse existimo. Tantum enim egregio publico decedit, quantum iis decerpitur, ut ex multis tuis præclaris scriptis, & insigniter ex ultimo illo πολυτιμῶν de Idololatria, magni laboris & diffusissimæ Lectionis opere, est intelligere. Deus tibi vitam diu servet, & valetudinem firmet, ut & hoc ipsum & similia plura perficias. Scio tamen eâ te esse humanitate, quàm omnes, qui à te ad nos veniunt, prædicant, ut ingenuos & literarum cupidos tuique celeberrimi nominis studiosos Juvenes aditu non prohibeas; quorum proinde votis, qui ex meis familiaribus vel auditoribus per

per me conciliari sibi eum cupiunt, nec ego deesse debeo. Inter eos est, qui hæc offert, Augustus Bussius, recti animi adolescens, optimi parentis, olim in mea patria Cancellarii bene meriti filius, cui pietatis, virtutis & optimarum disciplinarum studiis nihil est antiquius. Talibus quamvis aliàs pareas, quum me tamen pararium sibi deposceret, hæc deproperare malui, quam operam denegare, vel vacuum dimittere. Salve & vale diu & feliciter, bono publico.

Ex Acad. Juliâ.  
vi. Id. Aprilis  
CLO DC XLV.

Vester quantus quantus,

Georgius Calixtus.

## CDV.

Clarissime Domine Proffor,

**E**N tibi donum Reverendissimi D. Ufserii Archiepiscopi Armachani, quod jamjam discessuro ipse quoque Oxonio abscedens ad te perferendum tradidit: opus inter *παλῶς ἀκρῶτα* hæc & plusquam Civilia bella mediumque armorum strepitum natum, fato adeo adverso, ut vixdum editum incendio, quo ante annum præterpropter oppidum correptum fuit, penè totum conflagrarit. Sed dimidia exemplarium pars commodum paulò ante ex ædibus Typographi alio translata ignem evitavit. Atque ita ille Ignatius nunc flammaram, ut olim ferarum rabiem omnino effugere non valuit. Tarditatis autem meæ (utpote cui ex Anglia reduci jam quarta septimana labitur) culpam aut excusarem aut deprecarer rationibus, quæ mihi suppetunt, compluribus, nisi metuerem, ne non satis summæ humanitati & æquitati tuæ tribuere ac confidere tibi viderer, quod crimen ita plane detestor, ut priori isti tarditatis vitio sive culpæ affinis esse multo malim, quam ut huic obnoxius habear. Sed vel hæc ipsa effuendo vereor ut satis utrique nostrum consulam tua negotia studiaque interturbando, meoque qualicumque otio abutendo. Itaque manum tollam de tabula, ubi tibi, Uxori lectissimæ, filiisque eruditissimis plurimam salutem impertitus fuero. Valere ergo & vivite diu felices atque incolumes patriæ, familiar, mihi.

Dordraci Kalend. Reveren. Tuae observantiss.  
Jun. CLO DC XLV. & addictissimus,

Jacobus Lydius.

## CDVI.

Illustri & Incomparabili Viro,  
Ger. Jo. Voilio S. P.

Illustris & Incomparabilis Vir, sol, & sal ævi nostri, Decus præsentium, Exemplum Posterorum.

**D**Efunctus, ut nosti, mihi in peregrinis versanti, Anslonius, exterrita mea studia, quæ propter gravissimas Patriæ clades, per biennium retro externorum beneficio, sustentata fuerunt, & porro debent: quapropter te, Maxime Vir, etiam atque etiam rogo, ut inusitata, ævo nostro tua benevolentia, humanitate, & comitate, studia mea foveas, & promovere velis, quæ certè promoveris, si viris Illustribus commendaveris; ut Hofdio, & aliis, tibi sine numero notis: ut illorum beneficio, & quantalacumque munificentia, quæ optimè cœpi, emoliri queam: utque turbata Anslonii obitu, Musæ animentur Amicorum certitudine, omnisque generis difficultates, & procellas, per Orientem, foeliciter illorum favore, propellere queam. Alterum quo mea studia promoveris, & tibi devinctissima reddideris, si à societate Indica, literas commendatitias ad Ind. Orient. Rectores procuraveris: cum enim Perfidem petere omninò debeam, ubi excolendis Persicæ Amœnitatis floribus, aliquamdiu subsistendum erit: gratum & tutius erit Indicæ societatis patrocinio frui: Offerri illi quoque mea qualiacumque possunt studia, in remotissimis illis equidem Provinciis; non est dubium, quin omnis generis indigeant opera. Max. Vir, si huic necessitati meæ obstetricatus fueris, me foelicem, & ad tua, tuorumque imperia promptissimum reddideris. Res equidem est digna commendatione, & promotione; ut scilicet illa studia, quibus Arabes tot annos floruerunt, tandem etiam Christianis innotescant Europæis. Quantum licuit per improbos labores, & adversos casus, in hoc studiorum campo, futuros, eluctari animus est, modo tu, & alii, animum favore tuo addideris. Non dubito, quin è re mea acturus sis, pro tuo in me favore, quid possis, non quidem quàm mereor; sed quàm totum terrarum orbem demereri studes. Quæ hic geruntur; ex præsentī literarum latore, summo mihi amico, Mercatore Amstelodamensi, Byzantii florentissimo uberius cognosces; etiam quæ de nostris sentiant, externæ nationis doctissimis studiis. Mercator no-

ster



ster est virtute rarissima præditus, quem ideo si amaveris, doctioribus, prout quidem natura fictus, & factus esse videtur, faventiorum reddideris. Mirantur Proceres hujus Imperii, aliorum regnorum Legati, quænam causa esse possit, quare Ill. Ordines huc denuò Legatum mittere torpescant: alii eos huic amicitiae indignari, alii parùm sua de gloria sollicitos, interpretantur: factum mihi nunquam videtur, si factum nunquam probatum, & si probatum nunquam probandum; Gentis gloriam armis ubique claram, literis, & omnibus artificijs locupletem, unius ignaviâ obscurari. Satiùs certè erat, ignotum esse, quàm ignobilem: actiones multæ perversæ; imò ne fingi quidem possunt: Doctioribus Græcæ Ecclesiæ infidiatur, exilium minatur. Hinc lamentationes, & querimonie Græcorum, qui aliud non crepant in sermonibus; nisi Belgarum Ministros, Ecclesiæ Græcæ exitio huc missos, ut qui præter pietatis normam, & Ecclesiæ formam, Turcarum potentia ære Ecclesiæ Græcæ effuso, Græcis miseris, atque invitis, Patriarchas impiè obtrudunt: prout nuper factum, ubi 100000 Imp. in Turcas effusis, incerto populo, & reclamante, *ἀνέστη*, obtrusus fuit: hinc debitis Ecclesiæ Græcorum oppressa; miseri vexati. Plura ex Mercatore senties, Viro certè ingenio dulcissimo, Ital. Hisp. Turcicæque peritissimo, doctis addictissimo, quem quo majori honore, & amore prosecutus fueris, quod certè pro usitata tibi, tuisque, humanitate facies, tanto tibi tuis mihi omnibusque doctis, faventiorum reddideris: ille equidem est unus, qui hic mihi pecuniolam, liberatissimè mutuo dare solet: Mihi perplacuit Mercatoris modestum, & omni doctorum favore, laudeque dignum ingenium, quique si tibi, Maxime Vir, tuique operam præstare poterit, promptum deprehendes; meaque animi studia, quæ tibi, tuisque quamdiu vixero debeo, semper offero, tu illis cum tuis ne abuti quidem poteris. Mihi enim nullum gratius fieri potest officium, quàm si amicis officium facerem, proinde cum tuis liberrimè imperare licet, imperata lubenti animo exequar. Et sine dubio multis doctis gratum præstare potero officium, pro ea quæ mihi, cum Græcorum, Muhammetanorumque intercedit doctissimis familiaritate, ut facile quicquid hic extat, per me impetrari possit. Hic literarum limites sisto, Vir Maxime, etiam

atque etiam rogans, ut me cum tuis amare pergas, habebis certè semper qui te coluit, colet, & suspiciet, tuis tuorumque nutibus

*D. Byzantii*  
*7. Maii An.*  
45.

*Addictissimum,*

G. Gentium.

## CDVII.

S. Clarissime Doctissimeque Vir,

QUI tibi literas hæc adfert, Nepos \* est ex forore viri religiosissimi doctissimique Lucæ Holstenii, Romæ nunc degentis: cujus solius nomine, eo juvenem hunc favore dubio procul prosequeris, ut commendatitia aliorum opus non habeat. Quamvis etiam sine meis literis hinc discedere potuisset, magnopere tamen eas à me desideravit, majus inde sibi augmentum benevolentiae tuæ persuadens. Dabis igitur hoc communibus studiis, dabis juvenis bonæ mentis amantissimi propriis meritis, ut mea adjutus intercessione obtineat, quod suoapte ingenio, ubi adnitus fuerit, impetrare potest. Vale.

\* Fuit is Petrus Lambecius.

*Hamburgi xxiv.*  
*Anno Christi*  
*1610 Id. C. xlv.*

*Tuus,*

Fridericus Lindenbrogius.

## CDVIII.

Illustris Domine,

AN acceperis literas, quibus aliquoties observantiam erga te meam testatus sum, nescio; neque responsum efflagito, gnarus tuarum occupationum, quæ publico debentur. Sed repeto tamen nunc quoque id quod dixi officium, fretus tua æquitate, quam videor mihi absens etiam tanquam apud præsentem perspexisse. Adeo non sum alias cupidus creandi magnorum Virorum curis molestiam, ut ardentissimos quoque affectus, quibus in venerationem eximiarum virtutum & doctrinarum feror, potius intra animum & pias voces contineam, quam more seculi ambiciosius fatagam promulgare. Sed quia semel cepi te per literas venerari, vel ob hoc ipsum in eo genere officii perseverandum duco, ne parum constanti proposito, quod semel destinaui, videar suscepisse. Accessit nova causa, ex

ex sermone cujusdam studiosi, qui à Vobis ad nos pervectus tuo nomine me salutavit; adjecitque te scripturum fuisse, si temporis ratio tulisset, in causa Filii, à quo in notis Velleianis dissentirem. Præterea nihil explicare poterat de tua mente. Itaque me ambiguum reddidit ac pænè sollicitum, si quid forte mihi excidisset, quod tibi displiceret. Sed cogitanti diligenter nihil occurrit, quod à veneratione, quæ tibi, ab æstimo, quod Filio tuo debetur, alienum esset. Honorifice aliquoties laudari filium, sive potius laudes ejus stilo meo majores nominatim agnovi. De cætero, vix est ut dissentire meminerim in re alicujus momenti: interdum sustinui assensum, non quod parum probarem felicissimas ejus emendationes, sed quod in hoc genere ~~exemplum~~ omnimodam certitudinem vix dari crederem. Fuerit forte, ubi meam quoque sententiam attulerim: sed absque omni proposito contentionis, quod sancte testor: quippe qui nihil magis semper solitus sim execrari, quam altercationes literarios quæ hodie in genus quoddam tralatitii moris transmigrarunt. Editio Velleiana filii tui adeo certe mihi placuit, ut omisurus fuerim omne consilium edendi ejus Auctoris, nisi aliam propositi formam, uti per se apparet, destinassent. Maximopere itaque rogo, ut me certiore facias, si quid desideratis, reperieris eandem, quam hætenus fovi, mentem, venerandis tuis meritis, Vir summe, & æstimandis filiorum doctrinis, Germano candore fideque deditam. Vale, incomparabilis Domine, & mihi fave.

Dat. Argent. Illustri nomini tuo devotus,  
3 Aug. 1645.

Jo. Hen. Boeclerus.

#### CDIX.

Carolus Ludovicus *Dei gratia, Comes Palatinus Rheni, S. Romani Imperii Archidapifer & Princeps Elector, Dux Bavariæ, &c.*

Salutem & Benevolentiam nostram, Reverende & Doctissime, Nobis fincerè dilecte. Petiit à Nobis nobilissimus & generosus, tam prosapia quam literis & armis clarus Baro Herbertus de Cherbury, ut librum quendam à se scriptum, de Religione Gentilium, Errorumque apud

eos Causis, in quo multa allegat loca, ex tuo libro, de Origine & progressu Idololatriæ extracta, tibi commendaremus. Quâ in re ideo libentius ipsi gratificari placuit, tam quod dictus ipse liber te aliquo modo respicit, quam quod omnia in eo contenta tuo judicio submittit. Argumentum (prout ab illo tractandum suscipitur) adeo novum est, ut accuratam mereatur disquisitionem. Te igitur valde rogamus, ut præfatum Librum diligenter perlegere, & quicquid visum fuerit in eo corrigere, explicare aut amplificare ne graveris. In quo Nobis gratissimum feceris, tum etiam ipsi supradicto Domino Baroni, ut qui eximiam tuam doctrinam cum primis suspiciat, tuoque frui favore multum desideret. Nos igitur hoc Nobis ab amicitia tuâ promittentes, te bene valere, & de propensissimo nostro in te affectu te certum esse cupimus.

Dab. Londini  
14. Aug. Anno  
1645.

Amicus tuus benevolus,

Carolus Ludovicus.

#### CDX.

Reverendo, & Doctissimo Viro, Domino Gerardo Joanni Vossio.

Reverende, & Doctissime Vir,

Opus hoc à me concinnatum, sed ex tuo præcipue Libro, De Origine, & progressu Idololatriæ, descriptum; tibi cum primis subjiciendum curavi, quem facile Authorum hujus sæculi Coryphæum agnoverim. Sed & id quoque me permovit, quod alicubi, à te discrepans, an in errore meo, vel tuo evenerit, haud illicò dixerim. Ut fateri tamen necesse sit, homini senio laboranti, & calamitatibus publicis afflicto, plurima excidere posse, quæ accuratorem normam desiderarent. Tu igitur, Vir præstantissime, ubi ita visum fuerit, corrige, emenda, explica; sed & pro humanitate tua, adjice, auge, amplia. Quùm enim à te præsertim profectum sit opus, tuâ interest etiam, ut numeris omnibus absolutum prodeat. Providentiam quidem Universalem, summum Dei attributum semper agnovi; cujus (obscuris scilicet) vestigiis in ipsa Gentium Religione insisto. Neque obstitit, quod Ecclesiæ Patres, (Egregii scilicet Authores) sæpè contra Gentiles invehantur. Plurima enim ficta, & falsa, & inania; ut in eorum Religione deprehendi queant, eundem

eundem tamen Deum Opt. Max. ac Nostrum, ex eadem virtute coluerunt. Præmium bonis, Pœnam malis etiam post hanc vitam statuentes. An inde verò salutem æternam consequi possint Gentiles, viderint alii: nihil enim hic decerno; sed eousque saltem, Providentiam Divinam Universalem, pertigisse contendo. Ceterum hæc ex operis contextu peti malle. Unâ cum hisce, literas serenissimi Principis Electoris accipies; quibus ad ea, quæ à D. Tuâ peto, exequenda hortatur. Tu benè quidem Vale, Vir Doctissime, & rem literariam eruditissimis tuis lucubrationibus promove.

*Dabam ædibus  
meis prope West-  
Monasterium ½  
Augusti 1645.*

*D. Tuâ addidissimus,*

Herbert de Cherbury.

Librum nostrum hic simul accipies; in quo vitii Amanuensis facile, (ut spero) condonabis.

## CDXI.

*Clarissimo & Spectatissimo Viro Domino  
Gerardo Johanni Vossio Eustathius  
Suartius S. P. D.*

**R**eligioni mihi fuit, Vir Cl. ac Venerande, Waesburgium nostrum velis remisque ad vos evolantem post silentium diuturnum absq. meis literis constantis mei & religiosi in te affectus cultusq. indicibus dimittere. Quam impensè te semper æstimarem ob eminentes ingenii tui dotes & luculenta oppidò in Rempub. literariam merita, quibus præclaras disciplinas feliciter tot annorum decursu illustrasti, quæque per totum eruditum orbem diffudisti, non ~~omnibus~~ <sup>non</sup> omnibus bonis palam fecisti, idque ego quoque apud alios profiteri malo, quam laudes tuas culpa ingenii mei deterere. Vel nuperrimus, ut innumeros alios silentio premam, foetus tuus, ~~tuus opus~~ <sup>tuus opus</sup> acclamantibus eruditis, nitidus exasciatus ita salivam mihi movit, ut spem certam inde conceperim, nos propediem absolutissimis tuis quoque Originum libris iri beatum, quorum spem jampridem nobis in operibus tuis cedrinis præluxisti; in qua palæstrâ Incomparabilem Virum, Cl. Salmasium, cui olim Lutetiæ innotueram, cum opus illud de Ecclesiis Urbicar. & Suburb. contra Sirmondum moliretur, feliciter quoque defudasse, recondita ejus eruditio nobis fidem facit. Deus omnis boni fons & dator vobis

totius eruditionis Duumviris vires animi corporisque integras præstet. Ad me quod attinet, ego verò jam nunc totus nova editione Curtii adornanda in hoc otio liberali post tot spinosos & ærumnosos labores juventuti impensos, distineor, publici juris facturus, quæ olim & nunc in cultissimum istum Auctorem mihi observata, in quo me non adeo indiligenter fuisse, operamque & oleum in eo perpoliando non penitus perditurum, editio quamvis accuratissima doctissimi Freinsheimii spondet, meque inflammat. Iccirco te etiam atque etiam oro quæsoque Vir Clariss. conatibus meis impigrè subvenias, comiterque impertias, quo meliorem ac tersiorem fieri Curtium posse autumes. Modii editionis mihi copiam facere digneris, aliarumque veterum, quas habes, ut & Gualteri Paraphraseos Poeticæ, quæ omnia post collatum contextum, cui cis paucos dies manum admoveve gestio, optima fide ad te illibata remittam, deprædicaturus publico præconio tuum literas juvandi ardorem, propensumque in me affectum. Unum superat, Vir observande, quod resciscere aveo, fandone aut reapse compertum habeas, prodiisse nuper Parisiis, ut mihi antè aliquot menses amicus quidam se ibi vidisse prostantem adfirmavit, novam editionem Curtii cum Commentariis, nisi forte, ut didici in Commentario in Silium, Dausqueii, qui promittere inibi videtur. Vale, Vir clarissime, ex animi sententia, cum honoratissima conjuge, quam à nobis officiosè salvere jube, & doctissimos filios tuos, meque amare perge,

*Dab. Ultrajecti  
prid. Id. Octobr  
cl. 16c xlv.*

*Nominis tui celeberrimi*

*Religiosum Cultorem,*

*Eustathium Suartium.*

## CDXII.

*Viro Amplissimo Gerardo Joanni Vossio,  
Guntherus Henricus Plathnerus Ge-  
tus, D. Consl. Saxon. S. P. D.*

**L**Egi, Amplissime Vossi, plerasque lucubrationes tuas, quibus eruditum hoc seculum illustrare dignatus es; legi, quam, atque ex illis, magnam, & utilitatem, & voluptatem percepi. Diu enim jam factum est, quod ingenti tenebar desiderio, Theologiam Gentilium, à Viro aliquo tui simili, ex veterum scriptis deductam videre. Nam quæ de Mimisi Dia-

N n

bolica



bolica, Cacozelia Gentium, Theologia Philosophica, Viri doctissimi hactenus ediderunt, egregia quidem sunt, sed nescio quomodo ad finem explendam, non sufficiant. Tu verò magnis nos invitas poculis, & vel *αυδομην* jubes; quod lubentius facimus, quia ex eruditissimis tuis horreis, non tantum,

*Bellorophonteis promitur humor equi.*

sed etiam suavissimum Philosophiae merum, Divino Theologiae Nectare permixtum, adeò ut omne mihi punctum tulisse videaris; qui tanta dulcia tot utilibus miscuisti. Elegantissimi porrò Libelli tui, de genere, anno, & mense Nativitatis, & passionis, Salvificatoris, & D. Nostri Jesu Christi, non potuerunt me non magno perfundere gaudio, tum quod undique Vossiana i. e. Doctissima quæque spirent; tum quod eandem tractantem materiam, in multis confirmarint, in multis quoque juverint. Postquam enim Illustrissimus Wilhelmus Dux Saxoniae, me non tantum in Consiliarium Aulicorum, sed etiam Assessorum supremi Consistorii Ecclesiastici, album recepit, ab officio meo non alienum fore duxi, si ex Philologicis; vel ad ipsam *τὴν διδασκαλίαν κατέλθω*, vel beatorum Patrum monumenta, congestis observationibus Historiam sacram Domini nostri Jesu Christi, horis subcisivis per texerem.

Quod igitur Natatoriam qui expetunt, facere solent, ut antequam verticosis se committant fluminibus, vada tentent; idem mihi faciendum censui. Exercitationem nempe de Vaticinio Jacobi, Gen. xlix. sub ficto Phabetrani Nomine, in publicum ideo præmisi; ut Doctorum judicia, de hoc Scriptionis genere experirer. Et si autem non desint, qui Theatricum illud *σπαίς καὶ κλέψ*, acclamitent: Verum quia mihi maxime verendum, ne isti amoris affectu minus *φιλαλίδους* judicent, ad te Amplissime Vossi, hominem quem mihi fama humanissimum, scripta eruditissimum demonstrant; ignotus licet ad ignotum venio, tuoque exactissimo judicio submitto exercitiunculam istam, ex qua tanquam ex ungue de toto *κυμαίνω*, (hoc enim titulo Historiam illam sacram insignire fert animus) systemate judicare poteris; multo perè rogans, ut & audacia mea ignoscere, & vel inter ultimæ admissionis amicos, eum numerare sustineas, qui te ob edecumatam eruditionem semper fert in oculis. Quod si porrò quid de conatibus nostris sentias, certiore me reddere

dignatus fueris, profectò me non tantum tibi reddes amicissimum, sed omnibus quoque meis officiis efficiam, ut ista esse verè judicare possis. Vale Amplissime Vossi, & ut tibi, tuis, bonoque publico diu valeas, cura.

Vimar. x. Kal. Nov.  
An. cl. loc. xlv.

Vossio addictissimus,

G. Plathnerus.

### CDXIII.

*Viro summe Eruditionis, Clarissimoque,*  
Gerardo Johanni Vossio S. P.

Nullus dubito, Vir Maxime, rectè tibi tradita quæ fratris mei curæ commiseram, de Germanicorum corporum habitu, simulque Programmata quædam Academica. Erat tum consilium propediem, literis te adire, non tamen nisi edito majoris nonnihil molis libello. Verum illa spes decollavit, quam de edendo opere conceperam, præ multitudinem negotiorum, quæ mihi partim ars mea, partim Magistratus pepererunt insperato. Ne itaque nimis silentio peccem, visum fuit saltem has chartas transmittere, donec cætera lucem videant. Inter hæc, quas adolescens Nobilis Theses heic proposuit disputandas, ex Scholæ more, cum primis optarim, abs te severo judicio expendi: ac quidem ipsius mei causâ; utpote qui urgeor hoc argumentum in illam quæ proposita est sententiam latius diductum publicare; quod tamen ego haud ausim, nisi benigna doctiorum censura invitet. Programmata à memet ipso sunt profecta, leviora tamen, neque nisi ad adolescentum fortassis captum; ut etiam hæc cum aliis meis sacris, in unum Opusculum haud competant jungi. Ipse tu quid suadeas, Vir Maxime, utinam liceat intelligere! Etenim tua mihi sententia pro plurimis est. Librum meum de sanguinis generatione, ac motu naturali, altera editione apud vos, recoctum dabit frater, qui si haud displicuerit, gaudebo. Calixtus noster navatâ tam præclara Ecclesiæ operâ, id impetravit, ut qui hactenus fuit Semi-papista, nunc Semi-calvinista audiat Zelotarum Ordini. Quam virulenter illum sit infectatus Jesuita Erbermannus in Irenico, quod vocat Catholicum, fortè jam vidisti; ejusdem novas *διατριβὰς*, indubiè dabunt nobis Nundinæ Francofurtenses. Omni-

bis

bus illis oculis generosum contemptum, innocentia fretus, Calixtus opponit. Erbermanno tamen fortè aliquid regeret. Vide quam sit misera conditio eorum, qui tranquillandæ Ecclesiæ dant operam. Quam veremur, ne etiam te, ab ejus argumenti scriptis, absterreant mores hi seculi nostri, pari omnium animorum immoderatione infesti? & tamen heic quidem, istis tuis nihil est desideratius. Neque enim facile expresseim, quanti etiam in hac doctrinæ parte faciant te, cum alii, tum Calixtus, & Hornejus Nostrates. Uterque illorum, juxta mecum te, summe Virorum, salvere, atque valere jubet plurimum.

*Tuæ doctrinæ cultor,*

Herman. Conringius.

fimo alloquio tuo fruerer, & circa dubia, quæ occurrunt, sententiam tuam exposcerem! Multa quidem in hoc argumento, expleri vellem, cum fieri nequeat, quin ut plurima defint, quæ ad rem totam illustrandam faciant. Sed ea præsertim quæ circa quinque Articulos nostros Cathol. proferri possint equidem expiationum genera varia, quæ in remedia criminum, excogitabant, sive vafri, sive inepti sacerdotēs, à nullo adhuc satis tractata esse, pro dignitate argumenti puto. Circa hæc omnia igitur, responsum tuum cum bona venia expecto. Benè vale, magnum literarum Decus, & Ornamentum, Meque si placet, ama.

*Dabam adibus  
meis Westmon.  
Jan. 2<sup>o</sup>.*

*Tuus æternum,*

Herbert.

#### CDXIV.

*Clarissimo Doctissimoque Viro Domino  
Gerardo Joanni Vossio.*

Præstantissime, Colendissimeque Domine,

**L**iteras tuas, quas mihi curavit Excelentissimus vester Orator, accepi. Ex quibus intelligo, te perlegisse Lucubrationes meas, de Gent. Religione, Errorumque apud eos causis; neque displicuisse tibi, vel Opus, vel descriptionis genus. Tuum judicium tamen circa ea, quæ inter nos controversantur, desidero. Eoque magis quod tumultuaria opera, (mediis bellorum intestinorum cladibus) apud Castrum meum de Montgomery (ubi per biennium commorabar) scribenti, in errores dilabi proclive fuit. Sed & errare tecum minus probrosum esset aliquando, quam rectè cum aliis sentire. Is enim es, Vir Magne, ut Authoritatem tibi ipsi, etiam in argumento quovis conciliare possis. Sicubi tamen aliquid à me rectè animadversum esse arbitreris, id pro ingenuitate tua significa: quò ita reliqua omnia expungam, quæ in te redundant, prodeatque tandem in lucem meus qualiscunque Liber. A te porrò, Vir Optime, scire vellem, pretium quod Typographus, pro impressione libri exigat, ut Nummos ita pro valore tibi transmittam. Cum enim haud ab aliis, quam idoneis Lectoribus evolvi vellem librum, eum sumptibus meis excudam. Utinam mihi per valetudinem, & negotia, liceret vere proximo, Bataviam tuam invisere, ut dulcif-

Quod operam tuam, mihi commodare, in libro meo excudendo, polliceris, gratias quam maximas tibi ago. Serenissimus Princeps Electoralis, mihi monstravit literas tuas, quibus me summo honore cumulas; quo nomine me tibi devinctum esse scias.

#### CDXV.

*Clarissimo Eruditissimoque Viro  
Gerardo Joanni Vossio.*

**H**ÆC est semperque fuit magnorum Virorum fors, & calamitas, ut etiam si maxime velint, talem nec possint latere, nec immunitatem consequi, ab officiosis venerantium molestiis. Fœlices ter & amplius, inquis, quos irrupta tenet cum Musis suis copula; nec ulla divellunt è tam jucundis amplexibus ingrata Clientum Consortia. Cuperes, proculdubio, cuperes, si fata sinerent, circumvolitantes umbras, levesque populos dispellere, & quam ardenti studio optares, perpetua tranquillitate, nullisque violanda interpellationibus inaccessus perfrui, credo equidem, eruditissime Vossi,

— Sed te decor iste quod optas  
Esse vetat, votoque tuo, tua forma repugnat.

En igitur ego inter tot procos, novus tuarum virtutum, inexhaustæque eruditionis cultor accedo, tam tibi nunc ignotus, quam tu universo Orbi literario notissimus;

mus; nunc inquam, Vir Clarissime, quondam enim per biennium, auditor tuus, dum in Academia Lugdunensi, Sulpitii Severi sacram historiam enarrares, à te dilectus, & suavi colloquio sapissime honoratus fui. Ab eo tempore in Galliam nostram redux, totum me foro dedi, donec valetudini, & indoli meæ indulgens, iussi Stichum, Mævium, & Semproniam res suas sibi habere, & me in Ciceronis, Senecæ, Virgilii, Scaligeri, & Vossii dulcissimos ac nimis abditos sinus recepi. Ita est certè abhinc aliquot annis singula tua scripta & miror, & verso nocturnâ diurnâque manu; & dum recentissimè hæreo poetis tuis institutionibus, repente quasi in bicipiti somniaffem Parnasso, Poeta fio, effluuntque nobis hi otii nostri, Præceptorumque tuorum informes fœtus, pro quibus, si quod superesset in Musæo tuo exemplar Historiæ Pelagianæ, illud omnibus votis efflagitarem, non tam meo, quàm Bocharti nostri, quàm multorum Doctorum nomine: Sic eruditissime Vossi, vilissimo rete, Aureum Tripodem piscarer, & crepundia, Orbisque nostri quisquillas, Eois mercibus commutarem. Sed O pudor, quam te violò, & tua jura resolvo! Indoctus nihil unquam de te meritus, vix notus, gravissima tua studia summe importunis Epistolis interrumpo, delicatissime auribus obstrepro rauco cantu, nec veniam, quam solam tamen vix sperare debueram, sed præmia posco. Ignosce tam effræni audaciæ, quam nobis fecit, & olim perspecta singularis tua humanitas, & incuria, aut egestas, quotquot sunt Librariorum, non dicam, in hac nostra Cadomeni Academia, sed & Rothomagi, & Lutetiis; omnium quippe summâ cum curâ excussæ sunt officinæ, nec in ulla repertus aureus iste liber tuus, quem si suppliciter petentibus concesseris, habebis tunc pro tanto munere, debendi reum, tibi, devotissimum me, qui jam propter incomparabilem tuam doctrinam sum & ero in æternum

Cadomi 18.  
Kal. Dec.

Tui Observantissimus,

D. Brieux.

Si quid dignaberis ad nos vel mittere, vel scribere, illud si placet, fidei & curæ, committes Domini Adriani Fyk Delfis nunc degentis,

In suprema Mediomatricum Curia  
quondam Senatoris.

# CDXVI.

Clarissimo Viro Domino Gerardo Joanni  
Vossio, apud Amst. Professori celeberrimo S. P.

Clarissime Vir, fautor mihi plurimum colende,

CUM tuæ submitterentur mihi nuper Dantisæ literæ, eademque & vitæ mihi tuæ, & affectus erga me amici, existerent testes desideratissimæ: ausim dicere, vix olim (si Plutarchus vera narrat) majus gaudium Alexandro Magno accidisse, ex nuntio, quod redivivus factus esset Homerus; ac mihi tui causâ submesto tum accidit ex eo, quod superesse te, mihi que haud leviter etiam favere intelligerem. Nam ita me propriedem amicorum quorundam literæ occuparant, ut Vossium inter mortales esse desuisse, persuasus essem. Igitur ubi sic ex adverso, & manus, & mens tua mihi comparuit, superstitis, atque optimè precantis; quid potui potius, vel debui etiam, quàm exultare, atque in futurum quoque benè tibi vicissim apprecari. Ac Magno quidem Alexandro illi, gaudium, quod dixi, existit, ob gloriæ privatorum spem, vanam illam, & inanem. Mihi dum Vossium superesse video, spes adfirmatur publici boni, reique communis literariæ: quam si quisquam graviter, gnaviterque promotum ivit; ipse certe hoc præstitit, idemque proponi locupletissimè est præstiturus; dum vita eum dignetur Deus. Minime me de expectatione hac dubitare finunt, quæ præfari, in gravissimis diatribis illis de tribus Symbolis, & Christi genealogia. Quarum nomine, & gratias ago multò maximas, & ut sarcinulas (quod minutaris) colligere amplius pergas, publicoque exponere nihil differas, opto. Hostinenti loco an esse ex me possit, quod nuper de Pauli ..... expromsi, equidem ambigo. Interim quod voluntatis est propensæ, testari ita volui; cum præsertim & Ornatissimus ..... Et literæ tuæ mihi affatim attestentur ne λεπτολογήματα istiusmodi mea displicere tibi. Quod si quid de Pauli isto loco succurrit, quod submoneas, de exquisitissimis observationibus tuis, gratissimum profectò accidet. Cum tempore sequentur alia forte, quæ affecta apud me hæcenus latitant aliqua, nescio, an à Commentatoribus, ac prorsus etiam quædam antehac præterita, Quod vale dicturiens requiris, ut amemus nos mutui, ego cum cultu



cultu etiam nominis tui perpetui memor observabo; tanto etiam ad nomen numero sexagenario ipse accedens, quantò tu, cum Dei beneficio nunc excedis. Compleat in te verò, Vir Maxime, Deus Opt. Max. atque superexaugeat etiam, quod vitæ mortalis summum esse dicitur; neque id sinat in te obtinere locum, quod animum auferat. Quæ nisi vim nimiam, vel corporis etiam respectu, mihi pridem intulisset, sanè vel coram te etiam, Vir faventissime, venerar; Patronis præsertim magnis quibusdam in Belgium vestrum me invitantibus. Sed si in terris visuri unquam nos non sumus, conjunget nos certè cælum in beata visione, ad quam per labores, sudores, vigiliasque nostras hinc enitimus, reddituri Deo, otii, negotiique nostri rationem, atque isthic demum defuturi *ἡρώδην ἐν μέσῳ, ὃς ἐν αἰνίγματι*. B. V.

*Lisne Polonorum*  
An. MDCXLVI.  
x. Cal. Febr.

*Celeberr. Nominis tui*

*Cultor perpetuus,*  
Georg. Vechnerus.

## CDXVII.

*Clarissimo Viro Domino Gerardo Joanni Vossio Professori Historico.*

Clarissime Domine,

**I**ncidi hic fortean in carmina quædam non omnino invenusta, composita ab Anglo generoso in Beat. Mem. Clarissimum virum D. Hugonem Grotium: & licet ferè idem sonant, Iliada post Homerum, & Epitaphia post Barlæum vestrum, velle conscribere: duxi tamen me operæ pretium facturum, si ea qualiacunque tandem sint, velim exscribere, & amicis Dom. Grotii Viri nunquam satis laudati, vel mittere, vel ostendere. Non quod sit mihi in animo Poëtastrum hunc cum D. Barlæo velle committere; absit! Sed tantum ut D. V. & alii apud Belgas Doctissimi Viri intelligant, Gentem nostram universam (quæ modo callet literas) cujus mentem hæc carmina satis, opinor, exprimunt, cum reliqua literatorum per Orbem cæterva, quasi pacto, & foedere inito, amicè conspirare, in hoc scilicet, quod extra aleam dubitationis apud posteros habebitur: nempe D. Hug. Grotium illustrissimum fuisse Heroa; usque ad stuporem ferè & miraculum doctum, simul & sapientem,

omni laude majorem, universa tam divinarum, quàm humanarum omnium literarum supellectile cumulatifimè instructum. Non opus est pluribus, imo nec omnino istis, præsertim in literis ad D. V. conscriptis. Gratias habeo D. V. ob officia, & beneficia mihi immeritò in ædibus vestris collata, cum nuper veteris amicitiae recolendæ gratiâ, D. V. inviserem Amstelodami.

Deum Opt. Max. quæso, quod quotidie facis, obnixissimè supplex obtestari non desinas; ut pacem, & pietatem, ab Ecclesia, & Regno (olim florentissimis) apud Anglos, jam ferè exules factas, tandem aliquando utrique in integrum restituere, propitius dignaretur: in hisce piis votis, multos habet D. V. Collegas comprecantes, & inter eos, servulum D. V. omni obsequio obstrictum

E. Duncomium.

*Bruxellis in ædibus Domini Henrici Devie*  
Angli Legati. Febr. 2. in festo Purificationis. 1646.

## CDXVIII.

Vir Clarissime,

**E**T si pro veteri necessitudine atque amicitia quæ tibi olim cum parente utroque intercessit non exigua & quam jure quasi hæreditario ad me aliquatenus devolutam jactare soleo, nihil optatius mihi accidere posset quàm si de re aliqua Theologica, Historica aut Philologica sententiam tuam interdum exquirerem; attamen tibi penitus literis involuto negotiorumque mole districtissimo, ne dicam obruto, novam subinde te interpellando molestiam creare hæctenus mihi fuit religio. Nihilominus ut id quod ante cavi sedulo, nunc tandem committere audeam fecit doctorum virorum, quos mihi in Anglia amicos paravi postulatio, cui ut morem gererem, æquum fuit. Nescis, Vir eruditissime, quàm te regni istius viri literati, & imprimis illi qui in eruditorum choro funem ducunt, uti in ipsis Musarum Gratiarumque manibus doctum & educum, omnigenæque antiquitatis promum-condum venerentur ac suspiciant. Eorum complures (inter quos nunc D. Rob. Baylius Deputatus Scoticus imprimis mihi nominandus) rogant te & obsecrant oppidò quam obnixè, ut opus illud tuum adversus errores Anabaptisticos (quod affectum habes, quodque

quodque oculis obiter lustrare, cum te Amstelodami officiosè salutaret, sibi datum fuisse D. Baylius amicis denarravit) quam fieri poterit ocyssimè in lucem edere digneris. Si verò ad omnia perpoliendā non suppetat otium, illam partem quæ de Pædobaptismo tractat publico uti non invidas. Existimant enim, nec abs re hac rerum tempestate perquam necessariū esse ut id scriptum Anglorum manibus teratur, utpote apud quos errores isti Anabaptistici (ut alios penè innumeros prætereā) Ecclesiæ faciem miserè deturparunt. Dabis ergo hoc, uti spero, viro- rum pietate & doctrina conspicuorum justis precibus, dabis Ecclesiæ Regnoque Anglicano, dabis veritati utroque quasi cornu nunc inibi laboranti. Ego verò, Vir doctissime, per quem vota sua ad te deferri voluerunt, meum quoque ipsorum votis votum adjungo, Deumque oro ut otium ac valetudinem tibi largiatur ad ea perficienda quibus de omnibus Christi Ecclesiis bene mereri poteris. Vale cum uxore lectissima totaque familia, quibus plurimam salutem impertit

Dord. 22. Feb.  
1646.

C. T. deditissimus

Jacobus Lydius.

# CDXIX.

S. P.

**S**emel atque iterum tuis, Clarissime Vossi, rescripti. Anno superiore, hæc ipsa anni tempestate, nostris vid. Francofurtum descendentibus, per ornatissimos duos studiosos Tigurinos, (Lavaterum alterum) Dissertationes VII. vel VIII. Cl. D. D. Buxtorfi nostri, misi; quarum unam atque alteram D. Cappello placuit arro- dere. Nempe, prævidit is, Revelationibus suis arcani punctationis ambos quod aiunt oculos, effossum iri, sic si pergat noster ille. Verum, ex vindictis, quas modoque mitto, judicium, Cl. V. facies, quibus præ- fidiis uterque ad suum opus accesserit. Si, quod sperare jubet, cum bono Deo, de Punctorum origine processerit; curabo maturè tibi quoque perferatur. Puto e- nim non ingratum accidere (etiāsi diu nullis responsis ejus abs te factus sim certior) si sic gratam, tuæ in me olim exercitæ humanitatis memoriam, integram meo animo perstare, utcunque contester.

Quando enim de meo id facere adhuc dum nequeo, spero, quod in nostra saltem ter- ra obnatum fuerit, si mea ad te pertin- gat opera, tantisper meam penuriam sup- pleturum, maxime cum ad eam nondum maturitatem assurgere mea messis potuerit. Nolo autem te, Vir Cl. ignorare, diu mul- tumque me desiderare ac optando quærere illum de merito Christi Scriptorem, cujus in præfatione lib. de Satisfactione Amplif- simi Viri Hugonis Grotii, meministi. Desii tamen mirari, cur id à maximi in- genii Viro, cum eundem hæreticum op- pugnaret acerrimè ac solidissimè, præter- missum: Cur abs te non suppletum, quod gemina præstare, facili negotio, & proximè ad sententiam summi Viri, po- teras? Desii, inquam, mirari, ex quo no- strorum Theologorum certamina vidi & expertus sum, quæ imprimis apud nos (Po- lano olim præcinente) hodieque vigent; sic tamen ut, Dei gratia, nullæ inde turbæ. Expertus vero ista sum, quando Cl. D. Lucio nostro D. M. succedere jussus, vin- dicias controversiæ de Causa meritoria Ju- stificationis, ab eodem mihi delegatæ, sus- cipere, aliquorum consilio & instinctu, sive debui, sive etiam volui ac tentavi. Oppugnavit enim illum gravissimus ac doctissimus pariter Anglorum Theologus, D. Thomas Gatakerus, ac iis quidem ar- gumentorum plerunque præfidiis, quibus ego verba reponi posse cernebam, aut verius offucias: paucissima verò alia, quæ rem tangerent, minus refutarent. Tua, in eā lite, authoritas, V. Cl. me non parum intricavit, quod sic d. l. ad Lect. præfatus es. Cum duo nobis pepererit Christus, impunitatem & præmium, illud satisfactioni, hoc me- rito Christi distinctè tribuit vetus Ecclesia, Mox: Satisfactio consistit in peccatorum tra- latione: Meritum in perfectissima obedientia pro nobis præstita imputatione. Nam, quod ad prius, distinctionis illius, in Patrum scriptis nullum invenio vestigium; sed meritum & satisfactionem Christi promiscuè usurpare videntur: unde frequens meritum mortis ipsius appellatur. Quan- quam fateor, hæc distingui ex accurata eruditione sic posse: planè uti explicas Resp. ad Ravensp. c. 1. p. 3. Itaque si quæ vetustatis loca tibi observata sint: de- nuo id rogo, illa mihi suggerere ne gra- veris. Posterius, quod ad alterum lemma, candido eget Interprete. Neque enim satisfactio videtur Peccatorum tralatio; sed hæc, velut effectum, sequitur ad illam. Al- terum verò, si de imputatione loquitur O- bedientiæ PRO NOBIS, h. e. loco nostro

parta:

*partæ*: quemadmodum vulgo nunc scribunt, *imputari nobis alteram hanc satisfactionem Christi partem*: (esse namque eam geminam, alteram pro pœna, alteram pro obedientia.) Fateor nullum me in Sacris Literis hujus Opinionis deprehendisse fundamentum. Atque ea quidem sententia, si sic grassari pergat, uti hætenus; brevi (mea conjectura) nobis novam Theologiam refingeret. Nam, ab imputatione obedientiæ progrediuntur, ad vicariam illius præstationem: inde ad satisfactionem; inde ad sacerdotium. Tum, ut veri speciem magis obtineat, nobis imputari, faciliusque obtrudant, aiunt; nostrâ vice præstitam à Christo, quod homo fuit, seu secundum humanam naturam. Qui perniciosus error, prope abest quin meritum Christi funditus nobis evertat. Video D. Paræum mature sat valuisse occurrere gliscenti malo, Epistola ad S. Comitem Witgenstenium, in ultima Edit. Explicat. Catech. Palat. à Philippo vulgarâ. Sed & à D. Gomaro, nupera editione Operum, excussam illam video, parum (si liberè licet) solidè. Maluisssem, vindicasset is (Gomar.) Elencticam suam Disp. de Mat. & Form. Justificationis: quam doctè castigavit illi, cujus suprâ mentionem feceram, Theologus Anglus. Plerosque omnes modernos videre videor ad illud impingere; *sola satisfactione passiva* (sic enim catè distinguunt ab Activa, sicut pariter, de Obedientia & Justitia loquuntur, cujus Script. vel Ecclesiæ auctoritate, nescio: ) *Nobis remitti peccata: &*

\* Sic Bellar.  
lib. 2. de Justif.  
c. 6. sub fin.  
cui resp. D. Paræus lect. 251.  
Chamier. To. 3.  
l. 21. c. 15.  
Sect. 47. 49.

tantum peccata remitti, non item concedi vel tribui gloriam ac beatitatem. Ego verò certus sum, neque Script. S. talia docere, neque talia dogmata constare posse cum fidei principiis; neque in eam sententiam ituros, quotquot Ampl. V.

Cap. VIII. extremum te satis probant: vel ei saltem non contradicunt, quod est in universa Ecclesia receptum, Christi sanctitate & innocentia nostram contegi impuritatem, culpamque ac pœnam deleri, &c. Summa, *Justum esse mortuum pro injustis*, 2 Cor. V. 21. 1 Pet. III. 18. Jam, dum novis & puriori antiquitati inauditis distinctionibus illis invehunt, & satisfactionem (dicto modo) duplicem sic partiuntur, ut altera quidem valeat pro culpa, altera pro pœna; vel altera pro debito pœnæ, altera pro debito obedientiæ; vel altera pro redemptione à malo, altera

pro acquisitione bonorum: vel (nondum enim certi sunt quod horum teneant) altera pro vita æterna privativè, altera pro eadem positivè considerata, &c. (taceo plura: ) Non satis est sibi hæc somniare, ni & spissis libris propalent, & insciis tyronibus sedulo instillent, eo quod putent, actum esse de Lege & Evangelio, Satisfactione & Merito Christi, (quæ tamen perpetuo confundunt) nisi strictè observetur ea discriminatio: scilicet, Passionem & Mortem Christi *solum* valere ad remissionem peccatorum tantum; quia scriptum sit, *si peccaveris morte morieris*. Itemque, activam obedientiam *solum* valere ad jus vitæ æternæ promerendum, secundum illud: *Fac hoc & vivet*. Hinc miræ phrasæ. Imputari nobis meritum; & Christi quidem ipsius meritum; adeo ut nobis non minus atque Christo debeatur vita æterna; adeoque Jure experiri peccatoribus nob. cum Deo liceat. Mira profectò Gratia, quod jure deposcitur & expostulatione obtinetur! Si hoc est *Evangelium*; de re nihil dicam, jam in nomine adhuc hæsito. Verum quid ego hæc ad te? Ut studia nostra nonnihil, V. Cl. cernas, & javes. Nam ea quæ suprâ attigi, intricant & impediunt. Unde maximopere peto, ut explicatius nonnulla ad me perscribere digneris: Quibus si addideris conciliationem eorum quæ Disp. de Pecc. Orig. cont. Pelag. par. 2. antith. 4. nomine Catholicorum proposuisti, cum dictis à Chamiero, eodem nomine Panstrat. Cathol. To. 3. lib. 1. cap. 4. Sect. 7. Theodoret. in Cap. V. 12. ad Rom. imo Augustin. cont. adversar. Leg. & Prophet. lib. 1. cap. 16. To. 6. Oper. col. m. 599. nihil posset accidere optatius. Certus sum, sine Script. S. obambulare utramque phrasin: *Imputari nobis à Deo primum peccatum Adami: & imputari nobis Christi meritum*, Obedientiam, Justitiam. Non nego horum vel alterutrum: sed sanè & Script. S. convenienti sensu intelligo; quem nescio an assequantur, qui putant, rationem imputationis peccati primi esse, arctissimam nostri cum Adamo conjunctionem, quippe patre, capite & radice totius generis humani. Hæc si militaret ratio, nil fingi potest, cur non perinde alia omnia, post primum illud, imputentur nobis peccata: quando non desinit esse Pater, Caput, Radix, inde à Lapsu. Sic pariter falluntur, (nisi ego valde fallor) qui fundamentum imputationis Justitiæ, ponunt Vicariam Legis per Christum impletionem; quâ, nos redemptos à Legis perfectâ observatione aiunt. (Palan. Lucius Macc.)



Macc.) Certe nihil aliud credo Ampliff. Virum abstinuisse ab illa tractatione de Merito, præter istam disceptationem quam in Apologetico, sibi inter Tilenum & Molinarum auditam scribit. Si quid enim judicare valeo (novi autem meam tenuitatem) non minus nostri Theologi castigandi veniunt, quam refutandus hæreticus, ob negatum Christi Meritum. Et quid durius est, datis principiis plerorumque modernorum, maxime illo (Christum, *qua Homo est*, meruisse) dubito, an solidè ullatenus hæreticus possit convinci. De his tamen tuum V. Cl. iudicium subactissimum, quod iterum iterumque peto, expecto; quod sciam, & in his te posse plurimum, & Antiquitatis premere vestigia fortiter. Opto autem te, commune Studiorum columnen, Deus Opt. Max. Ecclesiæ Scholæque suæ diuturnum indulgeat fospitem. Salut. plur. quæso, Cl. D. Barlæo, tuoque F. D. Mattheo, cum Officiis paratiss. nomine

*Dab. Basileæ Prid. Tui V. Cl. Studios.*  
*Non. Mart. St. Vet.*  
cl. l. c. xlvj.

Joh. Rad. Wetstein.

### CDXX.

**O** Brutus sum abs te, maxime Vossi, mole beneficiorum, quibus filium meum hodie unicum, quum in Belgica vestra degeret, affatim ornasti, neque video qui sim solvendo, juxta cum illo. Quod redhostire nequimus, id perpetuâ & grata recalemus memoria, & Dominus è cælo remunerabitur. Germania nostra intestinis bellis dissociata, exteris abijt in prædam. Diata Monasteriensis & Onabrugensis etiamnum est in ancipiti. Pax si coeat & cum Hispano Gallis conveniat, Provinciæ vestræ dabuntur in dotem Regiæ filiz, ut fama est, non sine maxima rerum vestrarum, fortassis & nostrarum, conversione. Colloquium Turonense in Prussia diffluit præter votum nostratum D. Bergii & D. Calixti, qui concordiam Ecclesiarum calidè ac sincerè quæsierunt. De infallibili Controversiarum iudice, quem pars Pontificem Romanum statuerunt, nostris enixè repugnantibus, conveniri non potuit. Atque ita, quantum scimus, re infectâ discessum & domum itum est. Audio spissum opus contra universalem Gratiam D. Amiraldis Salmuriensis Theologi à D. Spanhemio

in Academia vestra opponi. Quid verò est quod de hoc argumento tantopere inter nos digladiemur? Quasi Dei gratia nimis ampla esse possit, quæ ipso cælo amplior est. Harum lator Adolphus Pulekenius Medicinæ studiosus, Medicis in Academia Leidensi amat commendari. Quod si abs te obtineat, pergratum erit. Bene vale, Vir maxime & amicissime, cum amoribus tuis, & salve jugiter.

*Brem. 5. Mart. Greg. Omnigenæ doctrinæ*  
cl. l. c. xlvj.

*et virtutis tuæ,*

*Admirator et Cultor,*

L. Crocius.

### CDXXI.

S. P.

Clarissime & doctissime Domine Collega & amice integerrime.

**Q**UO ipso tempore accepi exoptatissimum ingenii Isaaci tui fœtum, eodem triste nuntium mihi allatum fuit, de inexpectato obitu Matthæi tui; in quo non tua tantum & familiæ tuæ, sed etiam Reipub. Batavæ & Literariæ gravis jactura, me graviter affecit. Doleo certè tam paucis annis, tot nobilissima ingenia nobis fuisse erepta, & te tantum virum in plerisque culturâ te dignâ fuisse privatum, & penè orbem redditum. Sed id me solatur, quod non solum sis Philosophus sententia, sed etiam fortissimus opera, & in talibus ita exercitatus, ut quos ostenderunt terris tantum fata, nec ultra esse siverunt, Deo cujus erant sine murmure reddideris. Eum precor ex animo, ut Isaacum tuum superstitem diu servet, vivat coram illo, & tibi in omnibus succedat, non degener filius, sitque tibi & afflictissimæ matri solatio, toto vitæ vestræ tempore. Hac ipsa hora monuit me filius meus se Amsterodamum, ab amico invitatum, proficisci. Quod pluribus fecissem, tribus verbis ago festinatò, iussique ut præsentia sua suppleret, tibi & D. Uxori, à me & mea quæ non ignara mali, vobis condolet, omnia officia & servitia deferret.

*Haga-Comitis*  
*ix. Aprilis,*  
cl. l. c. xlvj.

*Tibi addictissimus,*

Andreas Rivetus,  
CDXXII.

## CDXXII.

*Summo Viro, Gerardo Joanni Vossio,  
S. P. D. Fridericus Spanhemius.*

**E**Ruditissimum munus tuum accepi cum gaudio, & non parum me tibi obnixum profiteor, quod me non publicè tantum cum aliis, sed & privatim tibi obstringere volueris. Ego omnia tua cum summa voluptate, & fructu pari lego; & ingentem eruditionem tuam, non miror tantum, sed etiam colo. Mitto ad te *Ἀντιστοχάριον* aliquod, Exercitationes nostras, de gratia universali, quas mihi expressit *οὐρανία* hominis, qui non tam in me, quam in Academiam nostram invasit: si dogmata minus tibi probentur, aut valdè fallor, aut probabis *ἀντιστοχάριον* eorum, quæ docemus, & deprehendes illum, quocum commissus, docere *ἀντιστοχάριον*, & quæ se invicem pervertunt. Autim etiam à te contendere, Vir celeberrime, ut causam cum causâ conferre, & aliquot horas nobis indulgere velis. Judicium tuum expecto, cui plurimum tribuere soleo. Non dubito quin istam Theologorum *σπίρρα* deplores. Idem me tecum facere, persuasissimum habe, & quanvis de bonitate causâ certus sim, infelicitati tamen meæ imputo, quod ingratis meis, in certamen istud litigiosum pertractus fui. Vale, Vir summe, cum clarissimis filiis, & me nominis vestri gloriæ dicatissimum amare perge. Scripsi raptissimo calamo.

*Lugd. Batav. xx. Mart.  
c1510c xlvj.*

## CDXXIII.

*Reverende & Clarissime Vir,*

**N**uper cum ad nos Heidanus noster rediisset, maximo cum animi dolore, tuum intellexi. Ereptum nempe filium tibi charissimum, qui ætate ea esset, ut quæ maxime optares, expectare ab eo posses. Ego candide ac bonâ fide testor, quæ amicis eveniunt, evenire & mihi. Cum interim non dubitem, quin magno, quin composito ac forti animo ferenda ea esse ac toleranda scias quæ, præside Monarcha illo maximo summoque homuncionibus his miseris objiciantur nobis, quibus idem, cum eidem videbitur, expectandum est;

ne de eo quidem dubitare possem, quin à te tibi quàm à me fortiora suppeditari possint remedia, quæ quotidie in usum tuum promas: cui hæc jampridem animo infixæ sedent; postquam toties præsertim cum adversis jam commissus es; sed & aliis constantiæ jam toties exemplum fuisti. Hæc obiter, cum ad vos quidam properaret juvenis, qui ut verbo se commendarem tibi petiit. Neque jam comparet, cui & Rutgerfii, quam vides, vitam, & ab ipso conscriptam, & à genero meo hic editam, tradidissim. Reverende & Clarissime Vir vale, & nos, qui te veneramur, ama.

*Lugd. Bat. Ann.  
c1510c xlvj.  
Aprilis xviii.*

*Nominis tui observantiss.*

Daniel Heinsius.

## CDXXVI.

*Salutem & incolumitatem perpetuam!*

**T**Andem me Saxone suo dignatur Stephanus noster. Bonum factum, inquit, summe virorum. Fateor ingenue, in amicitiam nostram non parum deliquisse me, quod tamdiu defraudaverim te novello hoc ingenii nostri fœtu, cujus tibi primum exemplar jure merito debebatur. Sed hanc moram imputes velim Batavis tuis, quorum verum elogium extat lib. xxx. Livii **GENS INIQUIS REGUM TEMPORIBUS IMMINENS.** Illi etenim perfidis Suecis supparasitantes, dulcissimam patriam nostram iis involvere calamitatibus, quæ omnibus bonis omnem de amicis bene merendi alacritatem prorsus excusere. Illi mare hætenus infestum reddiderunt, imò maria omnia. Illi vias omnes & aditus, qui antehac negociatoribus nostris ad vos patuerunt, suis armis excluderunt. Sed **JUSTUS JEHOVAH JUDEX.** Vereor ne grave fatum impendeat Belgis, qui contritionem Joseph nihil pensi habuerunt, sed ex injustâ prædâ sibi exiguum lucelli quæfiverunt, de quo non tertius gaudebit hæres. Verum quorsum ista *μνησμοσύνη*? Te potissimum alloquor, ad te orationem converto, quem triennium est, quum alloquutus sum. Peramanter rogo, si quid emendatione dignum in Notis hîc animadverteris, candidus ut impertias. Erunt, cum bono Deo, curæ secundæ meliores. Totus nunc

O o

in

in eo sum, ut Historiam Christiani III. Danorum inclyti Regis, post Beatum Meursum, ad finem perducam. Editurus sum & alia rerum Danicarum monumenta, quæ propediem, *ὦν Σὺς*, lucem videbunt. De tua valetudine, quam non adeo prosperam, utpote septuagenarii senis, esse inaudivi, vehementer sollicitus sum. Deus te incolumem præstet, Vir incomparabilis, egregio Reipub. literarum bono, in annos Nestoreos! Salutem tibi plurimam ascribit D. Laurenbergius noster & D. Ernstius.

*Sora, τὴν 22α Die xxiv. April.*  
Anno Messie Regis æterni  
cl. lxx. xlvj.

*Tui observantissimus,*

Stephanus Johannis Stephanus.

#### CDXXV.

Clarissime Domine,

**E**Lapsis jam aliquot septimanis ex quo te per literas salutavi, & aliquod responsum frustra expectavi, subiit suspicari literas meas, nescio cuius culpa, haud fideliter tibi traditas fuisse, aut (quod absit) valetudine non satis integrâ te frui. Alioquin negotii ipsius gravitatem aliquid literarum à te extorturam fuisse vix mihi dubium est. Est autem negotium de quo scripseram ejusmodi. D. Rob. Baylius Scotus ante biennium hac iter faciens, uti fortassis meministi, ex officio te Amstelodami salutavit, & opus scriptumque palato ejus admodum arridens, obiter apud te oculis suis lustravit, quod hac rerum tempestate in lucem prodire unice optat, & cum eo viri pii, probi, docti; existimantes cum Ecclesiæ Christi ubivis, tum imprimis in Anglia cum Anabaptisticis Erroribus confligenti, te utilissimam operam navaturum. Est enim opus, quod designabam contra Anabaptistas adornatum, & ut ejus editio maturetur te per me quàm obnixè rogari voluerunt, & quidnam impetrare potuerim avidè cognoscere desiderant. Quod si forte ad integrum opus edendum tempus vireſce minus suppetant, eam partem saltem quæ de Pædobaptismo differit, ut publici juris facias obsecrant. Ad hæc aliaque complura perficienda, ut Deus te, Vir Reverende ac doctissime, quàm diutissimè sospitem incolumemque conservet orans, vel brevissimum à te tuiſſe (quibus juxta cum uxore lætissima fa-

lutem plurimam impertior) responsum ut feram summopere desidero, quo amicorum desiderio atque expectationi aliquatenus satisfieri possit.

*Dordrecht xxv. Maii* Reverentie tuæ  
cl. lxx. xlvj.

*observantissimus,*

Jacobus Lydius.

#### CDXXVI.

Clarissimo Viro D. Gerardo Joanni Vossio, Professore Historico.

Vir Clarissime plurimùmque Reverende,

**L**iterarum tuarum amoris, ac benevolentiarum significationibus refertæ, mihi sanè fuerunt oppidò quàm gratissimæ. Illud tamen animum meum, in doloris sensum rapuit, ubi verè *μυάγχα καὶ χόλιμα*, tristis duorum filiorum fati mentione conspexi; quo magis Deum rogo, ut filium superstitem (quem magis ex virtutum, doctrinæque fama, imo & monumentis, quam ex vultu novi) D. Isaacum Vossium quàm diutissimè incolumem conservet, ad senectutis tuæ fulcimentum, & oblectamentum. Equidem, nisi te, ad casus istiusmodi adversos, forti constantique animo excipiendos divinarum, humanarumque literarum præsidio, beneficioque probe munitum, mihi planè persuasum, perspectumque fuisset; jamdudum officii mei esse duxissem, mœstitudinem quæ animum tuum pervellere potuit, literis meis, qua poteram, evellere. De Baptismo, & Anabaptismo, commentationes tuas, etsi nunquam non tempestivas fore arbitrer; tamen nunc vel maximè fore, si eo quo scripsi tempore, lucem aspiciant; ut credam, faciunt amici cujusdam mei, qui Rev. D. Baylio, familiariter utitur, ex Anglia datæ, ad me nuper literæ. Ceterum quemadmodum salivam mihi moverunt scripta varia, quæ memorasti, ad prælum parata, ita non mediocriter me affecit Manuscriptorum quos peregrinando filius collegit, Librorum mentio. Quod autem, amicissime Domine, velle te scribis, ac desiderare meum adventum, utique egometipse id nimis quàm velim. Nihil enim animo meo objici potest magis *ἀλυστιδόν*, quàm istud ipsum quod proposuisti illicitum, præsertim ubi pristinam, & avitam amicitiam una atque eadem opera,



opera, refarcire, atque statuminare dabitur. Simulac Deus otium mihi fecerit, grallatorio, ne dicam, Pegaseo gradu, ad vos advolabo. Interim salutem plurimam, tibi juxta, atque Uxori lectissimam, filioque D. Isaaço impertio. Salutant vos quoque fratres mei, sororesque quotquot hic degunt. Vale, Vir Doctissime, & me quod facis, amare perge.

*Dordrechtii Idib. Reverentia tuae*  
*Sextil. clō Dec xlv.*

*observantissimus,*

Jacobus Lydius.

### CDXXVII.

*Summo & Excellentissimo Viro, Domino*  
*Gerardo Joanni Vossio, & πρῶτο*  
*Professori Historico.*

**N**Euermannus noster, Virorum & Amicorum maxime Vossi, redux à vobis, Epistola exhibita, cum eruditissimis Commentariis tuis, de Vitiis sermonis, me mirificè affecit, quod humanitatem, ac benevolentiam tuam, non satis prædicare posset. Sed & munus transmissum, ipso tacente, egregium affectum in me tuum esse voce proclamat. Verè & sine fuco affirmo, nullas tuis chariores mihi literas ab amicis dari, quibus tanquam divino Nectare, & Ambrosia, quando languo, reficior, quando suavissimum, & candidissimum spiritum tuum ex iis haurio. Debendi reum me tibi, quod sum fateor. Nihil enim à me proficisci posse scio, quo dignam aliquam remunerationem faciam. Pro incolumitate tua, tuorumque Deo litare interim haud cessabo. Alcyonia nobis sunt, singulari Dei beneficio concessa, ab abitu Combachii. Turbabit si possint, quidam balatrones, si quis fibulam à prudentia Magistratus restrictam fortassean luxaret. Non desunt enim, qui vestros sollicitent, ut in nos caninam exercent facundiam. Scripsi dissertatiunculam, de sopiendis Ecclesiæ dissidiis, anno nuper præterito, quæ à quodam Polono, Torunum ad suos missa fuit, quum Colloquium Charitativum, quod vocant, auctoritate regia institueretur: in quo Pontificii, nostris parum charitatis, Lutherani vero etiam minus ostenderunt. D. Calixtus vir egregius, & ad concordiam pronus, à suis pessimè ibidem habitus fuit. Mo-

guntini Jesuitæ in eundem sæviunt. Neque Nihufius vetus, nisi fallor, discipulus ei parcit, qui mirum concordia modum, nupero scripto, apud vos, ut suspicor, edito excogitavit, quo tergiversantem, aut succumbentem damnat, ad panem, & aquam. De quo, quid sentias, candide, quaeso, ut soles, mecum communica. Cogor calamum sistere, quia Glaucus, juvenis probus, & non indoctus, harum lator festinat. Benè vale, & salve, Vir summe, πρῶτος, à D. Willio & me, qui sum

*Bremæ 1<sup>o</sup> Sext. Eruditionis ac virtutum*  
*clō Dec xlv.*

*tuarum Aestimatores,*

*& Cultor quoad sum,*

Ludovicus Crocius.

### CDXXVIII.

*Celeberrimo Viro Domino Gerardo*  
*Johanni Vossio Historiæ Professore.*

Reverende, Clarissime, ac Celeberrime Vir,

**I**TA semper apud me reputavi, faciendum esse mihi contrarium ejus, quod facit D. Voetius, dum affectibus suis obtemperat, si quid benè factum velim. Ea causa me movit, ut cum Tribunal suum iniquum inchoarit, alloquio ad Clarissimos, & Celeberrimos Belgii Professores, Ego præsentem meam Apologiam, maluerim per Apostrophem, ad illos claudere: & cum illustrem vestram Scholam (quæ in te, Celeberrime Domine, & egregio Barlæo, plus splendoris fundit, quàm Novella Voetii Academia per se, & mille sibi similes possit unquam sperare) in sua compellatione prætermiserit; Ego putaverim etiam illius judicio me, meaque esse subjicienda; ut saltem apud plures meam contester innocentiam, quam ille voluit eligere, apud quos me calumniaretur. Te igitur rogo, Doctissime Virorum, ut æqui bonique consulas, quod graviora tua studia his naniis interpellem. Spero brevi me daturum solidiora, & utiliora Ecclesiæ: sed neq. fama in ea fuit negligenda. Perge benè velle mihi, qui reverà sum, & manebo in ævum,

*Groningæ 1<sup>o</sup> Aug. 1646. Tibi ad omnia obsequia paratiss.*

Sam. Marenius.

O o 2

CDXXIX.

## CDXXIX.

*Viro Incomparabili Gerardo  
Joanni Vossio, S. P.*

*Vir Incomparabilis,*

**M**agnorum hominum famam, ita semper veneratus sum, ut singula quæ ostendunt favoris signa, singula honoris testimonia esse credam; nam ut onerosa res est, Viro jam dudum, ad celebritatis fastigium evecto, crebras multorum compellationes, gratulantium vota, longos sermones, & cætera pretiosi temporis dispendia ferre: ita vilioribus ingeniis, plausibilis honor est, quantillum in usurpandæ patientiæ, ac humanitatis occasionem duci. Neque ignorare potes, Vir Excellentissime, quæ me causa, in hunc sermonem egerit; cum non ita pridem ad te venerim, Ignotus, Peregrinus, ac Hospes, ut Virum sapientiæ & doctrinæ gloriâ latè per terras notum, coram adspicerem, obfirmaremque ita gratiori argumento fidem, antea solum ex fama, & admiratione suspensam. Tum expertus abundè sum, omnia in te ad raræ cujusdam virtutis, ac humanitatis modum esse composita, neque te sollicita ambitione, aut gravi supercilio, longas ac inanes honorum præstigias, à gratulantibus exquirere; sed simplici insonitque affectu, quod in homine, præsertim magno, pulcherrimum est, tuorum animos ad spontanea officia, commendandumque justiore encomio, virtutis tuæ pretium incitare. Memoria enim teneo quod à te audiivi, cum diceret: numquid externi quicquam in me vides? Quod sanè rarum est in magna fama; sed eò illustrius quò censentur internæ animi dotes, omnibus aliis externi splendoris, & fortunæ ludibriis præstare. Verùm tuam modestiam irritare nolo. Vir Celeberrime, quod si auderem, jam tuæ laudes, utramque in Epistola paginam facerent; sed quoniam & melior, & honestior, semper est virtutis apud alienas aures commendatio, apud te hac omitto; contentus non ignorare, quale de tanto homine judicium ferri debeat. Ignosce præterea facienti, quod ipse permiseras, cum juberet uti frui tua facilitate, quâ lubitum esset; scribendi libertatem intelligo, quam si officiosam magis, quàm molestam interpreteris, luculentissimum habebō, & bonitatis tuæ, & non repudiati obsequii mei argumen-

tum. Literas ad illustrissimum Salmasium, cum prima occasione ipsemet perferam, ut etiam vigore tuæ commendationis, in cognoscendo illo literarum miraculo, ingens meum desiderium quodammodo possit acquiescere. Cogitavi tum quidem Lugdunum; sed alius me casus, huc appulit, ubi Illustr. Banerius, stationem per hyemem elegit. Vale æternum, Vir Amplissime, quem perenni famæ, jamdudum literarum gloria assignavit. Vale, & cogita me virtutem tuam non his caducis verbis; sed pectore magis, & æterna, tacitaque mentis Religione venerari, cum magna quæquæ laudum merita, animo justius, quàm oratione soleant censerī.

*Dabam Ultra. T. Devotissimus Cultor,  
jecti 1<sup>o</sup>. Sept.*

1646.

Emund. Figrelius S. Gothus.

## CDXXX.

*Gerardo Joanni Vossio,  
Claudius Salmasius.*

*Clarissime, & Celeberrime Vir,*

**H**Agam profecturus, & cum jam essem in procinctu tuas accepi: quod erit mihi pro excusatione tarditatis in respondendo. Gaudeo te cum dilectissimo filio valere; sed Lectissimæ Uxoris morbus me sollicitat, ac tuo pro illa minus sana dolore doleo. Deum precor, ut citò liberetur isto malo, tuque eo metu, in quo nunc es propter illam. Te non cessare tamen æternum victuris scriptis posteritatem demereri, latus etiam accepi. Bonum factum quoque, quod *sæ pangeis* Matthæi tui Annales excudantur, & quod eorum series, ut egregiè potest, ita etiam vult Isaacus tuus pertexere, serio tibi, illique gratulor. Vellem ut velles de Provincia Historiæ, ei ab ordinibus Hollandiæ mandanda. Nemo hac tempestate id melius posset præstare quàm ipse: & faxo omni occasione, id ita esse intelligent illi Procerum, quibus notus sum. Non multi illi sunt, non enim sum ambitiosus, nec pluribus innotescere cupio: præcipuè Magnatibus, qui quos putant se inferiores valde despiciunt; ita eos non admodum ipse suspicio. Sed nostris qui fortasè aliquid volent in meam gratiam, ut etiam in hac causâ vobis sint suffragatores, instabo. Mitto tibi Librum alterum Verini de Transubstantiatione. Dubitavi diu an mitterem, quia contra Grotium eum scriptum accepi.

cepiſti. Quoniam omnes volunt me Verinum eſſe, quàm verè, viderint; non credidi te diverſam orbitam ſecare à communi ſententia. Malicia tota vergit adverſus Pontificios, & Lutheranos. Et velim ſcire, quid tu, & Iſaacus tuus de eo ſentiat. Uxor mecum vos officioliſſimè ſalutat Te, Uxorem, & filium. Vale.

Lejdæ Idib. Septemb. clō Idc xlv.

## CDXXXI.

**P**Ullat hodie, amicorum maxime, fores Charitum Muſarumque tuarum Burchardus Cnipplingius noſtras, ſalutigerulus tui Crocii, qui eruditiffimos labores ingenii tui æſtimat & admiratur. Quærit ille in Belgio veſtro Pædagogiam honeſtam, quæ, ſi te parario, ipſi obtingat, tuus erit homo. Patre natus eſt viro bono, Scholæ noſtræ Collega. Sin, agnoſcet tamen cum obſervantia affectum. Ad-

\* Is eſt Joh. Lud. Wolzogenius, poſtea Fauſti Socini affecta haud indoctus.

fuit mihi non ita pridem Baro \*quidam à Wolzogen profectus in Poloniam, qui ſpem mihi fecit Hiſtoriæ Eccleſiaſticae de Myſterio ſacroſanctæ Trinitatis, manu tua conſcriptæ & edendæ in morem Hiſtoriæ Pelagianæ. Imple ſpem noſtram & votum, ſi potes, & matura. De poſteritate ut es meritiffimus, ita meritis tuis hanc coronidem impones. Sic vive, virorum ſumme, & Crocium tuum redamare, quod facis perge. D. Willius, Collega meus plurima te & tuos juxta mecum impertit ſalute.

Raprim, Breme  
xix. Octobris  
clō Idc xlv.

devotiſſimus,

Ludovicus Crocius.

## CDXXXII.

*Viro maximo, Incomparabili D. Joh. Gerardo Voſſio Theologiæ Doctori Samuel Sorberius S. P. D.*

**E**N Epistoas, Vir ſumme, quas ad me miſit & ad te ſcribit Ægidius Gaillardus nobilis quidam Gallus, qui à caſtris Pontificiorum ad noſtra aliàs tranſiit, & edito libro pietatem & doctrinam ſuam

probavit. Illi nuper venit in mentem neſcio quid circa Neſtorium, quaſi perperam in Ephesine Synodo fuerit livore Cyrilli hæreſeos inſimulatus damnatusq; eaque de re edidit librum, cui titulus eſt *De Suppoſito*, cujus verò, ut puto, copiam ſibi fecit optimus reverenſiſſus Curcellæus. Efflagitat autem Gaillardus, ut à te reſponſum, ut & à Salmaſio Spanhemioque extorqueam. Sed imprimis à te, cujus æquitatem & ſubactiſſimum in expendendis veterum dogmatis judicium novit. Si quid igitur ad illum, vel ad me quibus mentem tuam ſignifices, literarum per Curcellæum noſtrum ſcribas, gratiſſimum feceris, & quo tibi devincies Virum nobiliſſimum. Tu vale, Senex venerandiſſime, ſeculi noſtri decus primarium, cum tuis omnibus, quibus ſalutem quaſo plurimam meo nomine dices.

Lugd. Batav. iiii. Nov. clō Idc xlv.

Audio Joh. Crocium in eadem ſententia eſſe in qua Gaillardus noſter.

## CDXXXIII.

Clariffime & Celeberrime Vir,

**N**ifi cognita orbi humanitas tua eſſet, haudquaquam ignotus, graviffimas occupationes tuas, intempetiſſimis literis, interpellare auſus eſſem. Ea mihi & ſpem fecit diſcendi à te, quod docere ſolus potes, & pudorem qui cum peregrinitate mea conjunctum eſſe debebat, ademitt. Quæſtio his diebus apud nos mota fuit, de vera origine vulgarij Arithmetices notarum, quas Ziphras vocant, 1. 2. 3. & varie ea res agitata. Sed de Antiquitate, & qua occasione, apud nos in Europa, quibuſque temporibus, uſurpari primum cœperint nemo quicquam. Additum & hoc, rationem non apparere, cur apud Latinos V quinque, L quinquaginta noſet. Recondita penes te omnis Antiquitatis cognitio, hæc aliis ferè inacceſſa, facillime expedit. Quod ſi graviffima negotia tua patiantur, ut vel tribus verbis, mentem tuam, Domino Richtero harum latori aperias, felicem me arbitror, & maximo beneficio affectum. Brevem me eadem nominis tui reverentia facit. Deuſte, incomparabile ſeculi noſtri decus, ſoſpitem.

Leida ex adibus  
Spanhemianis. iiii. Id.  
Dec. clō Idc xlv.

Cl. nominis tui  
Cultor additiſſ.

Georgius Horn.  
CDXXXIV.



## CDXXXIV.

*Viro summo D. Gerharδο Joanni  
Vossio, Χαίρειν & Κυεῖω.*

Clarissime & humanissime Vir, D. & Amice  
plurimum honorande.

**C**UM Cretzmarus noster, isthuc tran-  
siturum se diceret, sine meis eum  
literis ad te, amicum meum singularem,  
venire nolui: etsi nihil ferè erat, quod ad  
te scriberem, qui meis nunquam respon-  
des; & inanibus te literis non magnoperè  
delectari existimabam. Nisi tu eas fortè,  
non prorsus inanes judicas, quæ benevo-  
lentiam, & officii habent significationem.  
Ego quidem mihi conscius sum, mei in te  
animi; quem suscepi, ex quo tuum per-  
spexi. Te quoque amicitiam meam non  
omnino adspernari, non quidem è tuis,  
quas nullas ad me dedisti, sed ex amicorum  
salutationibus intelligo. Simus inter nos  
hoc perpetuo animo, mi Vossi, & quod  
pauci serio faciunt, sincerè amemus; eti-  
am quod uterque nostrum cupit, de juven-  
tute bonarum artium studiosa, suo quisque  
loco, porrò benè mereri studeamus. Ego  
id, quoad consequi, per tenuitatem me-  
am possum, facere non desinam. Ar-  
gumento tibi erit libellus Anonymi Scri-  
ptoris, quem notis meis illustrare conatus  
sum, quemque superioribus mensibus edi-  
di, in usum eorum, qui Historiarum tra-  
ctant studia. Tibi mitto, ut & videas, &  
lectione ejus te oblectes, existimesque ec-  
quid in eo dignum à me præstitum, operâ,  
& sumptu. Vale, quam optime, & salve.

*Ex Academia Sorana Prid. Non. April.  
C10 Idc XLVII.*

Si Pub. Syri mimos, quos aliquando  
fidei tuæ commisi, mihi remitteres, rem  
profectò faceres te dignam, & mihi ca-  
rissimam.

*Tui studiosissimus,*

Henricus Ernstius.

## CDXXXV.

*Viro summo, Gerharδο Joanni Vossio,  
Seculi Ornamento S. P. D.*

**Q**Uanquam, Vir summe, mirari possis,  
quod ego, homo ignotus, & ex Po-  
meraniæ oris id ad te ausini: credo tamen  
me excusari posse, vel una ista fiducia,  
quâ præsentem olim veneratus sum, &  
loquentem audiui. Res quidem tanti mo-  
menti non est, ut hac scriptione forsân,  
interpellare debeam tuos labores, & gra-  
vissima studia: quia verò ad alium ire non  
licebat, à quo erudirer, condonaturum te  
spero importunitati meæ. Et ne multis  
te remorer, Vir Magne, statim in limine  
scribam, quid te velim. Notum est, quam  
hodiè nimium insaniat turba Chymico-  
rum, circa laudes Medicinarum, quæ ex  
Metallis, & Mineralibus petuntur. His  
ut fidem adstruant, Argumentum sumunt  
maximè ab antiquitate, & quidem Ægypti-  
orum: à quibus Mineralia, & Metalla,  
ob præclaras in Medicina dotes, ac vires,  
in numerum Deorum relata, & tanquam  
Deos, ac Numina quædam culta fuisse,  
magno hiatu clamant, ac testantur. Me-  
mini hanc in rem, de cultu fossilium, in  
Theologiæ Gentilis ad Lib. iii. & iv. præ-  
fatione, quædam moneri; atque alibi in  
libris istis tradi; Paganos multis rebus,  
unde insigne aliquod commodum ipsi sen-  
sissent, divinos nonnunquam honores tri-  
buisse; sed hæc parùm facere ad notitiam  
Theologiæ Gentilis; ad symbolicam ta-  
men plurimum conferre. Quia ut con-  
stat, & allium, & porrum, & capræ, inter  
numina accipiebantur; ob utilitatem scili-  
cet, quam hæc talia præstabant hominibus.  
An autem tale quid, Metallis, ac Mine-  
ralibus præsertim, ob hanc causam, quam  
nominari contigerit, difficile est sine  
gravi aliquo Authore affirmare. Nec cor-  
dato unquam homini hoc in mentem cre-  
do venire posse, uti id sentiat, aut credat.  
Quis enim tam graviter desipiat, ut quia  
Solis vires maximè conspicuæ sint in  
sole terrestri, hoc est auro; huic ob id  
Metallo, nomen ab ipso inditum esse ve-  
lit, & religiosè postea tanquam numen,  
ab Ægyptiis adoratum? Quis item Martis,  
Veneris, Jovis, Saturni, Lunæ nomina,  
nostrati Ferro, Argento, Stanno, Plumbo,  
Cupro, Mercurio tribuat, ob Naturæ, &  
Virium cognationem? Quod hodie Chy-  
mici faciunt; quo jure, & quibus funda-  
mentis,

mentis, ipsi viderint. Quas tantoperè vires jactant, de illis puto parum constitisse Antiquis; nec ipsis hodie Chymicis quicquam certi de illis constat. Interim multa infruñti oblateralant, de auro potabili, de auri anima, & tinctura, de cæterorum Metallorum, & Mineralium extractis, Essentiis, Spiritibus, & Tincturis, de quibus ne somniasse quidem credo Ægyptios. Alios quidem usus Metallorum, non negaverim. De Chymicorum verò nugis, an certi aliquid ex Antiquitate adstrui possit, à te, Vir summe, erudiri velim, & quidem si dignus videar, uno vel altero verbo, ego tam grande beneficium, si non alio, saltem observantiæ, & pietatis in Præceptorem redhostimento, submissem, ac devotè, compensare studebo. Vale, & diu vive bono Reipub. literaria.

Dab. Stetini 5. Maii 1547.

*Magnific. T. observantissimus,*

Georgius Kirstenius Med. D.  
& Professor Reginus.

CDXXXVI.

*Viro Incomparabili, Gerardo  
Joanni Vossio.*

Celeberrime Vossii,

Quas nuper pagellas Sulpicianas, per doctissimum Richterum, misi, eas à te pari humanitatis affectu, ac cætera, exceptas fuisse, cum gaudio intellexi. Gratiæ pro tanta in opus nostrum ~~sedula~~ agere nunquam possum: debebo semper. Nunc quoniam paulatim, ex Historia Veteris Testamenti, ubi pede magis inoffenso pergere licuit, ad amplissimos Historiæ exoticæ campos pervenimus, & nobis Imperium Græcorum, Judæisque formidati Syriæ Reges, tum Romani dicendi erunt; quantum humanitatem tuam fas est, oro, & obtestor, ut Lectionis tuæ, & historiarum fontes nobis pandas, ac quæ videntur impertias. Imprimis quod Historiam Arrianam spectat, in qua noster cum cura, & apparatu majori versatus videtur, nescio an pari ubique fide, & absque ira ac odio. Eam igitur, Celeberrime Vossii, commendatam tibi præ cæteris habe, & quicquid videris dignum observatione tua, fac tibi debeamus. De vita Martini, & Monachorum Orientalium, nosti quid deside-

rem. Ea vel omninò sine decènti notarum veste, publicanda erunt: vel tu succurrere, & inopiam sublevare tua copia debes. Occurrunt ibi multa Antiquitatis Ecclesiasticæ monumenta, de Monachorum prima origine, habitatione, institutis, vestitu, victu, & quantum posteriores, ab antiqua illa severitate, declinarint ad socordiam. Quæ omnia requirunt tantam antiquitatis illius peritiam, quantum in te solo, seculum nostrum agnoscit, & veneratur. Sed ego & prioribus tui in Sulpitium affectus documentis, & optima, quam Richterius fecit, spe incitatus, polliceor nobis, Sulpitium tua opera insigniter illustratum. Interea vale, Vir seculi nostri Maxime, & me, cætera omnibus, affectu in te, & cultu nemini inferiorem, amare, & ornare perge.

Leide xviii. Maii  
cl. lxx. clvii.

*Clar. Nominis Tui,*

*Cultor addictissimus,*

G. Horn.

CDXXXVII.

*Viro Excellentissimo, Gerardo  
Joanni Vossio.*

Paucis lineis prolixam *Συνοψιν*, signaturus, tuique sic florentis status nuncio brevi gavifurus, faventissime Vossii, subjicio acri tuo judicio, & candido, geminam exercitationem: alterà undequaque doctissimum Junium vindicatum, & ab acerbiorè censura maximi Josephi Scaligeri, omninò non malè, sed veritatis perstudioso. Etenim viri summi eximias, & ingenii vastissimi opes, ut numero plurimas, ita pondere gravissimas, ex animo veneror. Eadem est penè controversia literaria, quam hic duo, Doctissimus Joan. Buxtorfius, & ingeniosissimus, atque eruditissimus Ludovicus Capellus, ventilant. Sed hæc melius publica loquuntur scripta. Porro passus sum meis manibus extorqueri sponsalia, quæ si Excellentissimus Vir, vel oculo emissitio, saltem lustrare dignatus fuerit, & probaverit; conabor efficere, ut mixtus hic severitate ingenii à Musis tristioribus, respirantis, Lusus, lucem à vestratibus Typis sit mutuaturus: sin minus, mihi etiam displicebit. Tuam igitur Celeberrimo Typographo Janlonio sententiam super hac lucubratiuncula (uti super

super aliis de literis Antidiluvianis Adami, Sethi, Enochi, Noachi, &c. item de literis Hieroglyphicis Ægyptiorum, quæ tibi muneri missa sunt) si indicare haud grave duxeris, sempiterna erit apud me hujus beneficii memoria. Quod si haud nossem insignem tuam humanitatem, & candom, quem optima anima, Meursius, mihi sæpè deprecavit, & telegendi, & met met scribendi liberarem labore: quem tantæ nunc publicæ occupationes circumstant, ut Lictores olim, Consulem Romanum. Quod si suaseris in aliis, quæ domi peperi, foris vestiendis, & nutricandis, haud ero in posterum difficilis. Metuo saltem genio loci: nihil ne inquam, abmoros ungues sapiat, ex angulo insularis septentrionis venire putatur. Sed festinantius hæc, quàm oporteret, ad virum tam eximium, & celeberrimum; quem plurimum salvere jubet

Hauniae  
ii. Junii  
1647.

Thomas Jo. Bangius.  
Acad. Hauniensis. P.T.  
Rector M.S.

## CDXXXVIII.

*Illustri & summo Viri, Gerardo Jo. Vossio, Cornelius Tollius S.P.D.*

**S**I quidem in me grati animi, & officiosa mentis est, quod sanè quamplurimum, Vir incomparabilis; illud omne exposcunt sibi immensa tua erga me, & cumulatifima beneficia. Defero etiam grates omnes, officia omnia, operam, & laborem meum, & quod maximè possum, memoriam non obliterandam. Sed nolo pietatem meam hic multis jactare; cum ego quanti te faciam, semperque fecerim, qualem item me à te fieri abundè cognorim; ipse mihi sim testis. Mitto dicatorem Epistolam, ad Curatores nostræ Academicæ, ut ex te intelligam, Vir summe, anne aliquid in ea me, ut meum fefellit. Scio enim quam sit magnum, dare quid in manus hominum, sæpè Vitiligatorum; ac facile persuadere mihi possum, non solum mecum sapissimè, sed etiam tecum tractanda, quæ placere omnibus, necnon tibi, velim. Rogo igitur obnixè, ut quid de illa sentias, queam cognoscere. Ero enim in edenda confidentissimus, si illuc judicium tuum, & autoritas accesserit. D. Gronovius nudius tertius, vocationem sui remisit Nobilissimo Winbergio, cum

illa centum quinquaginta florenos, quotannis apud suos esset lucratus. Ea res urit graviter Curatorem, qui legendas mihi exhibuit ejus literas, & suo cum labore, lulum esse indignissimè fert. Magna enim, nec digna Gronovio levitas, postquam prius tum literis, tum coram conditionem accepisset, jam quasi cum pueris esset negotium, spernere omnia, & flocci habere. Viderit ne hoc aliquando se offendant. Verum desinam ipsi malè ominari. Fuit item hic Ilendornius, & professionem adeptus est. Excusavit se de literis; ac scriptas aiebat, priusquam cum Curatoribus Zutphanix esset locutus, & à nebulone diutius, quàm oportebat, retentas. Vale Vir incomparabilis, & aeternum mihi suspicende, atque amare perge tibi devotissimum. Salutem adscribo plurimam ornatissimæ Conjugi, ut & clarissimo filio, ac instar omnium, Isaaco.

Hardervici. xi. Kal. Septemb. clō Idc xlvii.  
Stylo Juliano.

## CDXXXIX.

*Clarissimo Viro, Gerardo Joanni Vossio.*

**L**iteræ ex Anglia nuperrimè ad me data, tristia omnia nuntiant. Exercitus enim Farfaxii, qui maximam partem constat ex Anabaptistis, jam rerum potitur, Regemque captivum detinet, nec minus Presbyterianorum (uti eos appellare Angli assolent) quàm Episcoporum, Ecclesiastico regimini, bellum indixisse videtur. Independentibus, qui idem agunt, haud segniter, auxilium ferentibus: adeo ut duabus partibus infelicitè contententibus, tertia jam palmam præripuisse judicari possit. Nunc certè redeo in memoriam, Vocum asperrimarum quorundam in Anglia Virorum, non imi subsellii, & cætera Piorum, & Doctorum, pacem (tanquam consiliis ipsorum inimicam) cum Rege, procul esse jubentium. Quæ utique sicuti tunc Aures meas raserunt, cum eas audire contigit, ita nunc me conturbant vehementius, animique mei serenitatem obducunt. Miserrima Anglia! Miserrima Ecclesia! cui suppetias ferre quemadmodum non est cujusvis, ita Deo acceptissimum fore nemo sanus dubitet. Tui, Vir Doctissime, auxilium quod præstare potes, ne denega, & quod jamdudum Viri docti ac probi desiderant; Opus illud contra Anabaptistas, saltem quatenus

Pædo.



Pædobaptismum asserit, fac quæso lucem aspiciat. Etenim amici tui, meique idipsum rursus efflagitant, hoc te afflictæ Angliæ daturum sperantes. Sperâram mihi hac ætate tempus, locumque, datum iri coram, de hisce, aliisque sermones ferendi. Sed spei jam successit *adventus*. Rogo, ut quid de libri editione, amicis promittere possim; ubi per occupationes licebit, mihi indicare non dedigneris. Interim vale, Vir clarissime atque humanissime, & me, (quod facis) amore ac favore tuo amplecti perge. Uxorem lectissimam filiumque D. Isaacum salvere jubeo.

Dordr. iii. Id.  
Sept. 1647.

R. T. observantissimus,

Jacobus Lydius.

## CDXL

Clarissimo, Doctissimoque Viro, D. Gerhardo Joanni Vossio.

Reverende admodum, clarissime & doctissime Vir,  
Avuncule ætatem honorande,

COMplures jam misi literas, quas non ingratas fuisse scio, modò bona fide sint traditæ omnes. Dubium quodammodo me facit, quod unas tantum à clarissimo Cognato, binas verò à Matre exaratas, viderim hæcenus, licet per quatuor menses, jam in Gallia fuerim, aut saltem id spatium effluxerit, ex quo vobis ultimùm precatus sum, Vale. Prospera omnes uti valetudine spero: ut utamini hoc instanti, & compluribus annis, Deum continuis precibus oro. Quod si certior me faceret clariss. Cognatus, acceperitne nostras, acceperitne illa ampliss. D. Saravii, multum sanè mihi gratularer. De Manuscriptis, qui hic in Bibliotheca publica sunt, jam scripsi; quod si opera nostra in conferendo uno, vel altero, ei utilis esse possit,

*Libenter hoc & omne militabitur  
Bellum in tuæ spem gratiæ.*

Ampliss. D. Gothofredus, creberrimam tui mentionem facit, ut & Clar. D. Tronchinus, hospes meus; uterque verò multum te præ aliis omnibus æstimat. Ampliss. Gothofredus aliquoties me jam convenit, & se accedentem excipit perquam humaniter: non habet hic alium quempiam discendi jura avidum; quæ res facit, ut

tantò me amet impensius. Optarem, ut bono viro melius conveniret cum uxore, quæ ab ipso separatam, ob quas nescio rixas, vitam agit. Opus Institutionum Poeticarum, necdum hic vidi: Pudet me quotiescunque, ipsum sine libro tuo convenire necesse habeo. Dabis veniam huic nostræ temeritati, qui exemplar illi dandum, dedimus alii; nec te ita id in sequiorem partem, interpretatum putem, ut aliud ejus loco, mihi submittere nolis: humanitas enim tua, ac singularis erga me amor facit, ut propediem me id accepturum putem. Typographus Elzevirius, dubio procul hic quem habebit Librarium, cum quo ei sit negotium, ad quem id facile mitti possit. Sed nolim pluribus te detinere. Inclusi hic literas ad reverendum D. Hortonum, & Matrem, quæ expensâ, pro omnibus literis reddet. Interim tibi, clarissime D. Avuncule, Amitæ, ac D. Cognato carissimis, instantem hunc, & sequentes complures annos foelicissimos precor; Deumque rogo, ut Te, Amitam & Cognatum, quam diutissime servet incolumes. Idem se tibi precari ex animo scribere jussit D. Tronchinus.

Dab. Genev.  
v. Kal. Dec.  
St. Juliano,  
c. 16c. xlvii.

Ampliss. & clariss. nom. tui

observantiss. Cognatus.

Franc. Junius, F. N.

## CDXLI

Viro incomparabili Gerardo Jo. Vossio,  
Vincentius Fabricius S. P. D.

NON patitur candor tuus, & eximia erga me benevolentia, prolixè apud te de me depradicare, quot nominibus, & quantoperè, tibi, tuisque devinctus sim. Postrema profectò Epistola tua, ejusmodi fuit, ut etiam si absque cæteris tuis beneficiis foret, planè certius ipse possim de paterno tuo in me affectu, quem pluris æstimo, quàm quicquid satis indulgens fortuna hæcenus suggestit. Id unicè Deum precor, ut tanti Viri amicitia, ac amore dignus inveniar, quem Reipub. literariæ maximè interest, præter cæteros mortales, in vegeta illa senectute, diutissime esse superstitem. Isaaci filii crescenti gloriæ, ex animo faveo, gaudeoque quod tam dignè sustineat onus, quod humeris ejus incumbit; ut nempe tam parentibus sanctissimis,

P p

quam

quam bono publico, fratres repræsentet, jacturaque tantas compenset. Uti hætenus consuetudine plane fraterna convincti viximus; ita spero illam inter nos animorum conjunctionem æternam fore. Nec puto aspernari ipsum veterem amicum, quem tenuitas primò ingenii, aliaque adversa, mox Reip. negotia, à literarum gloria arcuerunt. Nunquam tamen ulla negotia ita me occupant, ut non meminerim benevolentia vestra, aut mihi tempus doesse patiar, ad diligenter evolvendos incomparabilis ingenii tui fœtus, quos provecta quidem, sed fecundissima illa senectus quotidie parit: in quibus profectò nihil senile est, præter admirabilem, judicandi, & scribendi maturitatem. Ista unica mihi voluptas in posterum supererit, implicito tot negotiis, & à pristinis meis amœnitatibus, per mille divortia miserrimè distracto. Filio Viri Cl. Manassis Ben-Israel, libenter affectum meum, luculenta aliqua opera fuisset testatus, si uterque in molliora, & oportuniora tempora incidissemus. Sed ipsè coram accuratius omnia edisseret. Uxori matronæ laudatissimæ, ut à me, meaue, officiosissimam nunties salutem, observanter oro. Uxor mea illam utri matrem colit, & veneratur, hætenus sibi ignotam, sed ex institutione mea, gnarissima illius erga me inusitata benevolentia. Ego dum vivo, me clientem tuum, tuæque familiæ profitebor. Deus vos servet optimè volentes, omnique exoptata felicitate perfruentes.

Gedani propriè Kal. Dec. 1647.

#### CDXLII.

*Reverendo admodum, Clarissimoq; Viro,  
D. Gerardo Joanni Vossio, Historiarum ac Politices Professore.*

Reverende admodum, Clarissime & Doctissime Vir,  
Avuncule plurimum honorande,

**B**INæ hodie sunt hebdomades, quod literas ad præstantissimum filium, cognatum carissimum, Geneva miserim. Hospitem hic habeo, Reverendum D. Tronchinum, virum singularis pietatis, ac modestiæ, summum verò tui æstimatorem. Amplissimo Gothofredo, tuæ fuerunt acceptissimæ; tum quod ex iis rectè ad te delatum suum Philostorgium cognoverit, tum vero, quod opus Institutionum Poe-

ticarum ei mittis. Lutetiæ Parisiorum cum adhuc hærerem, sæpissimè inquisivi, num eo jam misisset Exemplaria Elzevirius, abs Mercatoribus, & Librariis, emissem enim aliud loco ejus, quod ampliss. D. Cromon filio natu maximo dedi, cum Hagæ essem tam liberaliter ab amplissimo parente exceptus. Simulac Genevam veni, id ipsum etiam sedulo curavimus: sed non invento ullo exemplari, literas nudas amplissimo Gothofredo tradidi, spem ei faciens, proxima occasione id te missurum. Multum mihi gratulabor, si miserit huc ad Typographum quædam exemplaria Elzevirius, ut unum mihi emere queam, D. Gothofredo dandum. Bis me jam invisit Vir summus, atque ad se venienti humanissimè quidvis offert. De editione corporis Juris Civilis, ac Codicis Theodosiani, cum locupleti ejus commentario, ad præstantissimum cognatum jam scripsi. Inveni hic in Bibliotheca publica, quatuor vel quinque Manuscriptos, qui videbantur satis antiqui. Ii sunt Juvenalis, Ovidii Metamorphosis; quædam Ciceronis; quædam Senecæ Philosophi, & Nonius Marcellus. Quod si opera nostra, hic præstantissimo cognato in conferendo utilis esse possit, unico verbo id significare non gravabitur; ego in me nihil patiar desiderari. Salutem officiosissimam quæso, carissimis Amitæ & Cognato impertiri ne sit molestum. Avidissimè verò exemplar aliquod expectabo. Facile verò pro amore erga me tuo, audaciæ nostræ dabis veniam, quod exemplar illud D. Gothofredo dandum, D. Cromon donaverim.

Dabam Genevæ viii. Id. Decemb.  
St. Julian. clxxxvii.

Officiosissimam salutem adscribi tibi iussit Reverend. D. Tronchinus.

*Clarissimo nomini tuo*

*æternum devinctus,*

Franc. Junius, F. N.

#### CDXLIII.

*Celeberrimo & Clarissimo Viro, D. Gerardo Joanni Vossio.*

Celeberrime Vir.

**A**D tuas quas mihi reddidit, Junius vester, bene doctus & moratus Juvenis,

nis, quem ideò quoque animo complector, nondum respondisse me scio, neq; adhuc responsurus eram, ob non redditum adhuc commentarium de Poetica, nisi fontica quadam eò causa me nunc adigeret; candoris quoque tui fiducia fretum. Nullus dubito, Vir de literis, & literatis meritissime, quin Reverendi & Clarissimi Viri, Alexandri Mori, Pastoris, & Professoris in hac Ecclesia & Academia celeberrimi, fama, meritumque tibi innotuerit; tum ex aliis, tum ex eo quoque, quod jam in Belgium quoque ad professionem Theologicam invitatur. Et is tamen, ut summæ virtutis comes invidia esse solet, jam ab aliquot annis ab æmulis, non una ratione laceffitur, lancinatur: quorum impetus feliciter semper non elusit, sed elisit, doctrinæ partim sanctitate, partim morum innocentia. Neque dum tamen confectam rem video: novum ecce, horrendumque crimen impingi audio, & blasphemiam in spiritum sanctum. Quo quidem nuntio, totum me cohorruiſſe fateor, protinusque de innocentia ejus tutanda cogitare cœpi: nam etsi calumnias illas, ex Orci faucibus erutas ipse, quæ valet integritatis fiducia, quibus ingenii dotibus, nemo melius quam ipse diluere possit, & magnificè diruere; non potui tamen, quia amici mei summi, imò Ecclesiæ nostræ hac parte res geritur, mihi temperare, quin *Cumtulas* meæ testimonium, in candidissimum sinum tuum effunderem, simul & vicem apud te seridè dolerem, temporum horum iniquissimorum; quibus pax Ecclesiæ indies, magis magisque turbatur. Certò enim scias velim, Vir candidissime, pacisque studiosissime, agnovisse me in Moro nostro, doctrinam constanter finceram, sobriam, & à variis quæstionibus abhorrentem, vitam inculpatam, mores candidos, ingenuos, ab omni fūco alienos, cum charitatis ardore vivo. O si Deus nobis ubique benè multos ad hanc formulam, & characterem factos sufficeret! Certè paci Ecclesiarum optumè consultum esset, quæ nihil habitura esset vel insidiarum, vel aucupii. Sed quid facias iis, qui procul ab ira, & studio, bona fide nunquam abesse possunt? sensit ut modo dixi, Morus noster quorundam ex hoc ordine insidias: qui ideo propter nonnulla doctrinæ capita, antehac ipsi litem moverunt, quæ cessare visa, posteaquam is publicè certissimis argumentis præbitis, nulli suspicionis nebula locum reliquit. De Spiritu Sancto, nemini adhuc male feriato in mentem venit, ut dicam, scribere: imò hoc

ipsum doctrinæ caput, sæpius pro concione ad populum tractavit felicissime, & summa cum Orthodoxia: etiam cum anno Symbolum quod dicitur Apostolorum tractaret. Ad summum, adeone stipites esse nos hic, adeone Ecclesiasticos hic nostros, Ecclesiæ curam abdicasse, qui hujusmodi erroribus, culpæque affinem tolerare, in animum inducerent suum, neque tolerare modò, sed etiam operosè retinere, quoties vocatio aliqua, ut alias Londino, ita novissime Lugduno Galliarum contigit? Velut merito suo nobis charissimum, decessoribusq; suis summis dignissimum: cui & ideo triplex eodem tempore munus impactum, Ecclesiæ, Professoris ac Rectoris: quibus omnibus, tam gnaviter, tam sincerè defungitur, ut si singula tantum incumbèrent. Quare oro te, Vir omnium humanissime, juxta nobiscum in hanc sollicitudinis partem, venire velis, quo inculpatissimo viro, sua constet apud vos fama, & existimatio: præjudicioque hoc etiam meo juvare laborantem apud vos digneris: sequentur propediem publicæ Literæ & testimonia in eandem rem. Feceris ipse hac in re, negotium dignum nomine tuo, verè Christiano: feceris mihi rem longè gratissimam, quasi mihi exhibitam: Ego vicem referam tibi, tuisque, ubi ubi potuero. Vale, Vir summe, meque amare perge.

*Tuus ad omnia studia,*

Jacobus Gothofredus, J. C.

*& Ex-Consul.*

#### CDXLIV.

*Clarissimo Viro Gerardo Joanni Vossio,  
Professori Historico.*

Clarissime Domine,

**N**ON una mihi ad te scribendi causa est; primum enim se offert tristissimus Domini Barlæi obitus; in quo viro omnis literatura magnam fecit jacturam; ideoque communem meum cum aliis mœrorem, tibi potissimum honoratissimo ejus Collegæ, testandum duxi. Deinde petiit à me ante aliquot menses Typographus Baertius, ut ad te transmitterem Poemata aliqua Belgica fratris *fr. uangelis*, quod jam primum facio. Quia Epistolam Joannis hætenus frustra expectatam nunc primum Roterodamo accepi, addidi expli-

P p 2

cationem



cationem Capitis LIII. Eliaæ, & ultimi Proverbiorum, ubi de scemina forti agitur, itemque hymnos aliquot veteres, ab eodem Belgico nostro versos. Quæ omnia si mereri videntur, ut in publicum prodeant, iudicio tuo permitto, & potestatis tuæ facio. Si aut tu, aut filius fortè Haggam brevi excurritis, gratissimum mihi erit, de valetudine tuâ, & uxoris optimæ edoceri. Interea si quid est, in quo opera mea tibi possit esse usus, confidenter impera. Vale.

*Celebritati nominis*

*Raprim Hage*  
xxv. Jan. 1648.

*tui addictissimus,*

Gulielmus Grotius.

#### CDXLV.

*Clarissimo & celeberrimo Viro, Gerardo Joanni Vossio, Cl. Salmasius.*

**A**ccepi nuper Londino, Vir celeberrime, literas à Seldeno nostro, cum quibus, & has simul inclusas reperi, quæ filio Isaaco inscriptæ sunt. Resignatas vides; quia ita mandavit Seldenus, ut si prædictus Isaacus in his oris amplius non esset, eas aperirem, quia ad rem meam, quod in his scriptum est pertinet. De filio tuo doctissimo, vellem scire an adhuc hæreat Monasterii. Audio res turbatas esse, inter Reginam & Parliamentum. Si quid habes de his certi, gratum feceris, si vel tribus verbis scribas. Terribilem Britannia magnæ tragediam, omnes jam sciunt, mirantur, & detestantur. Tanta me tenet indignatio, & dolor, ut plura de eo non possim. Jam nostri sunt certissimi Regum occisores, quod Jesuitis solis antea objiciebatur. Deus tales terris pestes avertat. Meam ad Tollium, quæso te ut cures. Vale, & me ama.

*Leide xviii. Feb. clō Idc xlix.*

#### CDXLVI.

*Clarissimo, doctissimoque Viro, D. Gerardo Jo. Vossio, Historiarum Professori celeberrimo.*

Reverende admodum, Clarissime & doctissime Vir, Avuncule ætatem honorande.

**C**omplures jam misimus literas, quarum aliquas rectè delatas esse, exinde mihi constat, quod mater, & Clariss. D. Hattonus, jam ad quasdam mihi responderint. Id unicum hic mihi in votis est; ut vel unis saltem literis dispositionis tuæ, ac charissimæ Amitæ, cognatique præstantissimi, certior fieri possem. Nec dubito quin id jam diu fuisset factum, si vel morbus tuus annuus (quanquam sperem hoc anno te ab eo fuisse liberum) vel cognati fortè absentia, non fuissent impedimento. Amplissimi Godofredi librum indies expecto, quia non dubito te Elzevirio Amstelodamensi, in mandatis dedisse, ut ejus rei curam gereret, sed quominus hæcenus acceperim, hyberno tempore adscribo. Invisit me hesternò die Reveren. D. Alexander Morus, Theologiæ Professor, hujusque Academiæ Rector, jussitque scribere, nihil optare se magis, quàm occasionem testandi observantiam, & affectum, quibus te, & carissimum cognatum prosequitur. Genevæ adhuc per mensem unum aut alterum morabor; vix enim, & ne vix quidem ausim discedere, nisi prius traditis amplissimo D. Godofredo Institutionibus tuis, idque eò magis quòd creberrimam earum mentionem faciat. Non addam plura; quia tempus instat, quo Tabellario discedendum est: Deum rogo, ut te, carissimam Amitam, & præstantissimum Amitinum, quam diutissimè servet incolumes.

*Rever. & amplissimi*

*Dab. Gen. ipfis Kal.*  
*Mart. Sr. Jul.*  
*clō Idc xlviii.*

*nominis tui,*

*Observ. affinis filius,*

Franciscus Junius, F. N.

#### CDXLVII.

*Celeberrimo Viro, Gerardo Joanni Vossio, S. P. D. Fredericus Spanhemius.*

**D**llata fuit negotii, quod mihi commendaveras expeditio, quamvis non defuerim officio, nec Academia, in ea apud

apud amplissimum Magistratum nostrum promovendo. Non cessavi tamen in eo urgendo, nec destiti, donec res confieret ex voto. Integrum itaque erit hæredibus Cl. Elmenhorstii auctione publica bibliothecam *in manus* hinc distrahere. Quod tibi significandum duxi. Philippicæ cujusdam in me à Moro ex mera æruginè scriptæ, evulgationem, vobis curæ esse audio; cui speciosum pacis nomen præscripsit, ut & panegyrici potius, quam *evulgationem*. Quamvis verò nihil tale ab iis expectarim, quos semper sincero animo colui; & iteratis juramentis Morus coram Magistratu, & Proceribus Genevensibus, testatus fuerit, se de me, haudquaquam in ista oratione cogitasse; demonstrare tamen possum, non exiguam ejus partem, in me unum destinatam esse. Quod suo loco, ad hanc necessitatem mei defendendi adactus, profiteri cogar, & me publicè purgare, quia publicè traducor. Videbit etiam Lector, quid de incomparabili isto Heroe judicandum sit, quia Cicerone, dubio procul didicit singulis promodum pagellis, pedagogica affectatione Græca, suæ orationi miscere, & versus. Quod quàm ex regulis artis fiat, nemo te melius novit. Qui etiam testimonia illa Genevensibus extorta fuerint, & quibus artibus, quam multis ex fide mihi narrandum erit; qui ejus rei documenta complura evidentissima habeo, à primariæ dignitatis, in Republica & Ecclesia Genevensi viris. Constabit inde omnibus, qui ab hoc Heroe in hoc negotio actum fuerit. Nec dubito Genevenses ægerrimè laturos, literas suas, & suorum Ministrorum evulgari. Publicè etiam narranda erit historia, qui & alibi, & Genevæ vixerit, ut constet omnibus, quid de eo judicari debeat. Nec hic verebor, ad acta, & conscientiam Genevensium ipsorum provocare. Et quamvis mei haudquaquam meminerit, Genevæ in Testimoniorum istorum petitione, non quidem amore mei, sed ne paterer repulsam, haudquaquam tamen permittere debeo, me eo nomine apud multos, & à multis traduci, qualia ex odio, vel invidia, ea de homine isto dixerim, quæ aliena sunt à candore, & veritate. Nec ob certum id genus *evulgationem*, & emendicata elogia, à scriptore profecta (qui nihil aliud se cupere dixit, quàm ut inflatis velis eum in Hollandiam propellere, ulla ratione posset) sententiam mutò; sed constantissimè, & verissimè profiteor; cum & heterodoxia Salmuriensis; & ambitiosi, ac turbulenti, & inquieti

ingenii, si ullum mortalium, meritò à me accusatum fuisse, Cl. Viri etiam ..... & Bornius non patientur se cruentari, & famam suam proscindi. Scio quos habeas Panegyristas, & quibus de causis. Ego meà me innocentia includo, donec cogar publicè latus, publicè etiam famam meam tueri. Ut me potissimum malè habet, illorum opera negotiorum istud vel commendari, vel urgeri, quos ego toto animo semper suspexi. Eo te loco semper cum Cl. filio, fuisse sincerè, & verè testari possum. Eventum Deo committo, qui & Mori, & meum animum novit, & quid in tota hac causa actum fuerit utrinque. Ille & *Kazdovskus* est, & judex aliquando erit. Nihil à me officii, vel studii in nobilissimo Viro, qui hoc negotium primus novit, mihi conciliando, prætermisum fuisse, & gaudeo, & gaudebo semper. Vale, Vir celeberrime, cum Cl. filio, utut Mori summè studioso.

*Scripti raptissimo calamo* Lugd. Bat.  
xxxiii. Mart. clc lxxviii.

Quanti Godofredi elogia facienda sint, & multis demonstrare possum, & probare ea ex mera loligine erga me proficisci, cujus causæ ipsi parum honorificæ sunt. Nobiliss. Salmasius, professus est, haudquaquam suo vel consilio, vel operâ, ista omnia evulgari. In viros itaque consilii istius authores, inquirendum nobis erit.

## CDXLVIII.

*Celeberrimo Viro D. Gerardo Joanni Vossio, Historiarum Professore.*

Reverende admodum, Clarissime, & Doctissime Vir,  
Avuncule ætatem honorande,

**T**Res sunt Hebdomades, quod literas tuas, & carissimi cognati, suis inclusas mihi misit Reverendus D. Hattonus; exosculatus eas sum sæpius, ac lætum diem notavi, quo non alius mihi Genevæ affulsit jucundior; siquidem ex iis, & prosperam tuam, carissimæ Amitæ, ac suavissimi Cognati valerudinem, non tantum licuit intelligere, sed & pristinum illum vestrum erga me affectum, qui sanè ad omnia obsequia, obligatum jam ante multo semper reddit alacriorem; ita ut ubicumque, & quandocumque gratum animum testandi se obtulerit occasio, nunquam officium meum claudicare passurus sim. De laboribus tuis quod scribis, gaudeo

deo equidem, quod nunquam desinas bene velle mereri de posteris; sed & ignosces mihi, si dolere me ex parte dicam, quod tot simul suscipias labores, quibus ferendis, an par sit quisquam alius dubito. Cogito nempe ingravescentem aetatem tuam, quæ sane jam aliquam requiem, suo jure sibi poscere videtur. De Institutionibus tuis poeticis amplissimo Gothofredo tradendis, nihil scribis; unde conjectare ausim, Elzevirio ejus rei curam demandatam à te esse: scribam primo die Mercurii, ea de re ad Elzevrios Parisienses, ad quos proculdubio, Amstelodamensis noster, jam diu puto, quid literarum exararit. Non ausim sanè Geneva discedere, priusquam amplissimo Gothofredo suum dederim. Doleo sanè summi Viri vicem, qui uxorem habet, quæ quotiescunque ferè lubet, ab eo divertit, eumque res suas sibi habere jubet. Interdum huic mulieris furori, à Collegio Ecclesiastico (Consistorium vocant) obviam itur. Interim officiosissimam salutem tibi jussit adscribi, ut & reverendus Tronchinus, Cl. Deodatus, Clariss. Morus, qui maximo hic in pretio est. Scripsit ad ipsum illustris Salmasius, cogitare vos de eo Amstelodamum vocando. Tradidit mihi nuper Oratiunculam aliquam D. Salmasio tradendam, & quidem mihi, quia conquerebatur, siquid tale mitteret, id ab aliis plerumque detentum iri; siquidem ut favitores, ita & malevolos, ac invidos, hic magno numero habet Vir optimus. Obsignavi igitur sigillo meo, meaq; manu, ejus rogatu inscriptionem addidi. Tradet vobis fasciculum istum, Mercator quidam Amstelodamensis, Dompfeler, cujus filius hic mecum, ædes Reverendi Tronchini habitat, qui aliis à se ad Patrem missis, fasciculum istum involvit. Deum rogo, ut te, cariss. Amitam, accognatum suavissimum, quam diutissimè servet incolumes.

Rever. & ampliss.

Dabam Genev. iii. nominis tui, observantiss.  
Kal. April. Sr. Jul.  
cl. lxxviii.

Franciscus Junius. F.N.

CDXLIX.

Viro celeberrimo D. Gerardo Joanni Vossio, Historiarum Professori dignissimo.

Vir Clarissime,

L iterarum raritatem non oblivio aliqua tui fecit, sed quia aliis plerumq; negotiis occupatus, non existimabam fidem amicitiae nostræ, istis tantum niti oportere. Sæpius tamen affectus, & studiorum tuorum, quæ mihi olim declarasti memor, laudum tuarum hic præconium feci. Testimonium & velut vadem hujus affectus filium habebis, quem 12. annorum & animi, & ingenii viribus, secundum vota mea, pulchrè efflorescentem, charissimum & vitæ, & familiæ nostræ pignus, ad vos mittere destinavi: Ille, Vir amplissime, cum venerit; si per horulæ spatium, quotidie erudito colloquio tuo dignatus fueris, ampliori me debito devinxe- ris; suavit enim hoc mihi, cum amenitas urbis vestræ, Literarum decus, hominum, & nationis illius elegantia, & lepos, tum præcipuè fiducia humanitatis, & amoris tui, in me, meosque. Expressit id nulla alia necessitas; neque inopia Literarum & Literatorum, quorum sub hac demum Regina, spero pulcherrimam messem futuram: ut ad *Graduum* illum Patrem *Martem*, *Apollinem* adjunctum iri præsidem nostris arvis, læto augurio ominemur. Vale lumen literati Orbis, & me pari affectu benevolentiae per literas tuas dignare. Salutabis ex me charissimos filios tuos, quorum nunquam apud me memoria intercidet.

Tui observantissimus,

Dab. Lincopie Ann.  
Christ. M DC XLIX.  
v. die Februar.

Jacobus Skytte.

CDL.

Viro clarissimo, Præstantissimo D. Gerardo Johannidæ Vossio, *Historiographo celeberrimo*, S. P. D. *Andreas Essenius*.

Vir clarissime, literarum, & seculi nostri decus præstantissimum.

L ibrum celeberrimi viri Hugonis Grotii adversus Socinum, pro fide Catholica, de Satisfactione nostri Jesu Christi exaratum



aratum, rectè virorum insigniter doctorum calculo comprobatum, docuisti jam pridem, in responsione ad Judicium Hermanni Ravenspergeri de eodem opere. Utinam ab illo tempore pari studio, tum Papismi tyrannidem, tum Socinianismi effrænem licentiam vitasset, refutasset, compescuisset, Vir celeberrimus! Jam nobis serò post illius excessum; at serò potius quàm nunquam: & per me tandem (multorum tamen hortatu inductum) at per me potius, quàm per neminem, tot annos desertum opus suscipiendum fuit. Nequaquam isto (ingenue enim quod res est fateor) omnigenæ eruditionis apparatu; indubitatis tamen, uti confido, SS. literarum testimoniis, genuinis eorum vindictis, firmisque rationibus, ubi opus, è naturâ petitis. Exemplum huius scripti tibi, tum in multis aliis, tum speciatim in hoc ipso labore insigni magistro, prorsus debitum, quo par est animi affectu, ac reverentia L.M.Q. mitto, offero. Certè scriptis tuis quàm plurimis, multijuga eruditione refertissimis, quibus hac etiam ætate, non minus vegetâ quàm grandi, strenuam operam impendis, in re literaria, & antiquitatibus communis dudum factus es Magister. In magnis tenebris sidus tam fulgidum, in ambiguis ducem peritissimum, meritò nobis gratulamur: sed mihi speciatim in hoc opere, propter doctissimam Grotiano Tractatui, præfixam præfationem, & laudatam pro illo responsionem, quibus non parum me hic adjuvum serio confiteor. Unum tamen, de singulari tua humanitate, certò mihi persuasus, hic commemorare audebo, ubi sicut à Grotio, ita etiam à te in alia concedendum putavi; sed tam humili verrecundia, quàm vel à filio juvene requiras. In negotio liberationis nostræ, Deum non esse considerandum, ut partem offensam, non ut creditorem, non ut judicem superiori subiectum; sed ut Rectorem, & quidem summum planè assentior: neque enim illis, quâ talibus, jus puniendi competit; isti autem competit quidem, sed non præter legis formulam. At quaeritur, qualis sit Dei in isto negotio actus? Actum esse jurisdictionis Rectori competentem necessum est: Legis abrogationem ac derogationem, omninò vobiscum nego: Legis *ὡς ἔχειτο καὶ νόμος* strictam executionem, prout noxa caput sequitur, & nostra pœna infinita, ob infinitam Dei maiestatem, Legis transgressionem læsam, in obligatione erat, pariter rejicio. De dispensatione, an interpretatione καὶ ἐπιένευσιν manet controversia. Illam hic non ag-

nosco: dispensatur de lege, cùm personæ alicui permittitur, quod alii istius ordinis per legem prohibentur, aut res aliqua similiter ab obligatione tollitur. Sic dispensatio definiente Grotio, est actus superioris, quo legis manentis obligatio circa quædam personas, aut res tollitur. Sicut Derogatio est partialis abrogatio: sic dispensatio est objectiva quædam derogatio, quæ id quod per legem alias obligaretur, ab obligatione eximitur, cæterum lege ipsa manente integrâ. Porro ut lege non existente non committitur peccatum: καὶ ἡ ἀμαρτία οὐκ ἔστιν ἡ ἀνομία; sic facta dispensatione non est peccatum, quod aliàs futurum erat peccatum, ut conjugium inter Liberos *περὶ τοὺς ἀσυν,* ablatio opum Ægyptiarum ab Israelitis facta, &c. At fideles non simpliciter impunè auferunt peccata sua, quasi peccata non essent, quæ esset dispensatio, ratione personarum; nec certa quædam peccata, quæ esset dispensatio ratione rerum: sed pœnas dederunt æquivalentes, optimaque proportionem, peccatis suis respondentem, per sponsores conjunctissimum. Ita nos absolute lege soluti non sumus, nec à legis vinculo relaxati, *ὅτι οὐκ ἔστιν πᾶσι τὸν ἀπολύτῳ, ἀλλὰ ἀπὸ τῶν ἀπολύτῳ;* 2 Cor. v. 15. Sic non solum νόμον ἢ κατὰ γράμματα διὰ τῆς πίστεως, ἀλλὰ νόμον ἰσχύον, Rom. iii. 31. *ὅπως τὸ διακρίματα τοῦ νόμου πληροῦν ἐσθὴν,* Rom. viii. 4. Καὶ τίς ὁ νόμος Χριστοῦ εἰς διακρίματα πᾶσι τοῖς πιστοῖς, Rom. x. 4. *Ἐπιένευσιν* qualemcumque adhibere cuiusvis est; ea vero quæ legis in puniendo executionem spectat, solius Rectoris est: quaeritur autem de liberatione nostri, à pœna, per pœnam succedaneam καὶ ἐπιένευσιν. Huiusmodi interpretatione Deus in Evangelio declarat, pœna secundi Adami, nos præstari immunes, iustitiâ ipsius constitui iustos; sicut ex primi Adami reatu juxta legem (verbis tamen synecdochicè acceptis) omnes reatum infinitum contraximus; sic per legem, nos eramus obnoxii: at satisfactionem per nos in propriâ personâ necessario præstandam non expressit Lex; per sponsores faciendum non exclusit; sed neque admissibilem pronuntiat, *ὡς καὶ νόμος καὶ πᾶσι.* In Evangelio est, *ἐπιένευσιν νόμος, ἢ ἰσχύον διὰ τὸ καὶ νόμος:* sic *Ἐπιένευσιν* admissus est sponfor, & ob solutionem illam pœnalem, quæ καὶ ἀκριβοῦς videbatur recusanda, saltem erat recusabilis, nos liberati sumus à pœna. Tractatio ista pœnæ non est quidem formaliter actus interpretationis, sed est actus iudicii, secundum jus *ἐπιένευσιν* interpretatione (quæ nobis Evangelio expressa est) mollium, atque

atque ea ratione relaxatum. Confer sodes laudatæ responsionis tuæ paginam 78. cum nostra pag. 459. Ignosce, Vir præstantissime, ut calamo libero, sic animo stupendæ eruditionis tuæ, & lucubrationum accuratissimarum observantissimo scribenti. Ignosce iterum interpellanti, dum convales tua (ut nuper loquebaris) cedro dignissima, & antiquæ veritatis, ac veræ antiquitatis studiosis desideratissima. Hoc denique munusculum, maximæ observantiæ exiguum monumentum, pronus accipe. Sicubi à veritate aberro, benignè in viam reducere discipulum, utinam vacaret, ac liberet! Deus Optimus Maximus te sæculi nostri decus, & validum Reipublicæ Literariæ columen, quam diutissime incolumem nobis servet.

*Dabam in Neder-Langbroeck, xiv. Cal. Mart. anno vulgaris æræ Christianæ clc lxx.*

## CDLI.

## A Mademoiselle Vossius

Mademoiselle,

à Amsterdam.

S'il étoit des afflictions, comme des fardeaux, qui se trouvent plus légers, quand plus de personnes les soutiennent; celle dont il a plu à Dieu de vous visiter, en retirant à soy feu Monsieur Vossius votre Mary, ne vous devoit point être fort pesante; puisque s'intéressent en votre perte, tous ceux qui ont eu l'honneur de le connoître, & qui ont profité de ses travaux. Je me sens obligé de devoir, & d'affection, de me professer de ce nombre; reconnoissant qu'en sa mort, les bonnes Lettres ont perdu une grand lumière, le public un rare ornement, vous un bon Mary, & moy un bon Ami. Cependant & à vous, Mademoiselle, & à nous tous, ne reste, que de metre le doigt sur la bouche, & d'aquiescer, en la bonne volonté de celui, qui est le souverain Arbitre de la vie, & de la mort. Nous n'entrons en ce monde que pour en sortir; en tous les contrats de Mariage, il se parle de la mort; pour ce que le Ciel, qui fait les Mariages, se réserve le droit de les dissoudre; & vous n'avez point perdu votre Mary, mais seulement, il est allé le premier au rendez-vous general de tous les enfans de Dieu: Car ayant vécu comme il a fait, de la vie des Gens de bien, il est mort de la mort des justes; & ayant si bien fait profiter les

talents, que le Souverain Maître luy avoit départi, il est maintenant reçu en la joie de son Seigneur. Et outre cette commune consolation des Chrestiens, que *Bien heureux sont ceux qui meurent au Seigneur.* Vous en devez tirer une particuliere, de ce qu'il est mort ancien, & rassasié de jours, vous laissant un fils heritier de son nom, & de son Erudition, & s'étant acquis par ses doctes labeurs tres utiles au public, & à l'Eglise de Dieu, une reputation immortelle. Aussi ne doute je point, que la sagesse, & la resolution, avec la quelle il s'est composé de longue main à ce depart, n'ait fait d'assez fortes impressions sur votre Esprit, pour l'admettre avec moins de perturbation. Vous n'avez garde en cette occurrence, de parler comme une femme mal sage, ainsi que faisoit celle de Job, étant fille d'un si excellent Pere, que Dieu vous avoit donné, veufve dun tel Mary, qu'il vient de vous retirer, & Mere d'un tel fils, qu'il vous a conservé, d'un plus grand nombre d'enfans, pour être votre Benjamin, & le Baston de votre vieillesse. Veuillez ce Pere de toute miséricorde essuier vos larmes par la main de sa grace; je l'en supplie de tous mes vœux, & vous de croire, que comme je cheriray, tant que je vivray, la memoire de M. Vossius, aussi demeurerai je sans varier, & à Mr. votre Fils, du quel je plains l'absence en cette occasion:

Mademoiselle, Votre tres humble,

A Groningue ce 26. Mars. & tres obeissant Serveur,

5. Avril. } 1649.

Des Marets.

## DCLII.

Clarissimo Viro Isaaco Vossio Historiographo dignissimo.

Clarissime, & incomparabilis Vir,

CUM ante octiduum Groningham profectus sit præstantissimus D. Junius, & ea de causâ tuis respondere non potuerit, mei officii esse duxi, de iis certiores te reddere, quæ per literas quasivisti. Quod igitur ad Bibliothecam *vi maxime* Sixtini attinet, primum habe. Eam hodie lustravi, & quidem ex præstantissimis constare scriptoribus comperi, interque alios Manuscriptos inveni, *Priscianum Grammaticum* in Pergameno antiquiss. *Senecam Tragicum* uti & *Philosophi Epistolas*, itidem in Pergameno.

meno. Adhæc *commentaria Græca Anonymi in Aristotelem* nitidissimè descripta, aliosque Manuscriptos codices multos, quorum catalogum post octiduum fortè transmittam. Plurimos quoque auctores vidi tam Græcos, quam Latinos, qui à Grutero aut emendati, aut cum Manuscriptis collati erant. Interrogavi denique, utrum venales essent libri, sed quoniam de vero hærede Sixtini nondum constat, & hinc de iis litigatur, divendi minime possunt. Valdè solliciti sunt Proceres nostri Amstelodamenses, deacquirendo aliquo viro erudito, & digno, qui in locum præstantissimi parentis tui succedat.

Interea tamen ad eam professionem, valde commendari audio Davidem Blondellum, quem aiunt Historiæ Ecclesiasticæ esse peritissimum. Alii Procerum animos putant eò inclinare, ut muneris id, Rectori Junio committant. Sed nihil de his, ante reditum tuum futurum, alii mecum existimant. Ad Professionem Theologicam in Leidenf Academia, ob D. Spanhemii obitum vacuam, à Riveto commendari dicitur Bochartus. Ante octiduum, per filium illustri Salmasii, ad te misimus diatribam quamdam Samuelis Petiti, nunc primum à Sorbiero editam. Editus quoque nuper est libellus Boxhornii, de jure Majestatis Regiæ, ejusdemque responsio, ad calumnias Anonymi, sed eum tibi comparare operæ pretium non videbatur, quia parum laudis, eo labore apud doctos meruit. Ad finem jam vergit fratris mei Palaphatus, quem ubi absolutus fuerit transmittam, & si quid interim novi edatur, addam. Vale, celeberrime Vir, & me ama.

Amstelodami,  
3. Julii,  
clō 10 c xlii.

*Præclarissimo tuo nomini*

*æternum devotissimus,*

Alexander Tollius.

### CDLIII.

*Clarissimo Viro Francisco Junio Leydam honorificè vocato S. P.*

† Literas hæc  
à Puteanis fra-  
tribus habuit  
Cl. Vossius,  
Salmasio teste  
in Epistolis p.  
149.

† Vir Clarissime,

**N**ihil videmur præter officium nostrum facturum; si quod ante decennium tentavimus, idem nunc denudò, Literis hisce, quasi

succedaneis, aliquando iteremus: hoc est ut te, (quod absque incommodo tuo fiat) in Academiam Leydensem, ad primarium Theologicæ Professionis munus capessendum evocemus. Fiduciam petitioni nostræ tribuit, Scholæ hujus herbescantis (cui nos Curatores dati) ac doctrinæ cum primis sacræ promovendæ cupiditas; tum verò obvia ista humanitas tua, piis ac doctis omnibus perspectissima. De qua, ut omnia nobis promittere audeamus, literarum tuarum ruminatio facit; quibus ante decennium illud (quod diximus) prolixè, cumulatèque, ad priores nostras rescripsisti: quas etiamnum (uti meritum est earum) in Tab. .... nostris conditas asservamus. Summa conditionis, quam deferimus, hæc est; ut (& ex rei ipsius dignitate, & tua) principem in Lycæo hoc nostro, in sacrarum Literarum professione ordinem ducas, atque obtineas; Collegam habiturus M. Lucam Trelcatium (quem honoris causâ nominamus) Virum literatissimum, juxta ac modestissimum; proque eo munere, decreto publico, octingentorum Caroliorum nostratum (quos Florenos vocant) mercedem annuam ordinariam in stipendium, tibi constitutam esse scito: (cujus ita apud nos ratio constare solet, ut ex ærario Academico de summâ, quâ convenit, singulis trimestribus, quadrans deductus, in partem rei solutæ Professoribus procedat.) Viatici præterea loco Daleros ducentos, qui tibi recens advenienti, quamprimum à Quæstore publico ultro repræsentabuntur. Dispice, Vir clarissime, quantum incrementi, ac præsidii Lycæo huic nostro sis allaturus; quantum subsidii Bataviæ Ecclesiæ, ac veræ pietatis cultoribus; quantum denique tibi ipsi solidi honoris & gratiæ. Nos verò à nominis tui splendore lucem mutuaturi, & doctrinæ tuæ plurimum debemus. Et ut alii debere in posterum velint, grata animorum significatione, omnibusque officiis, quâ privatim, quâ publicè, ex parte nostra studiosissimè adnitemur. Tuæ comitatus fuerit, per Tabellionem hunc Academicum (hujus solius rei causâ isthuc ad vos ablegatum) quamprimum nobis, super hoc negotio, quidquid constitutum habueris, ex animi tui sententiâ, liberè ac planissimè prescribere, sine circuitione inquam, more Majorum: nec in Lycæo hoc nostro (si tibi placuerit hæc conditio) Theologicæ Disciplinæ Candidatos tuæ eruditionis desiderio pati oblanguere diutius. Deus te quam diutissimè incolumem sibi, atque

Q q

Ecclesiæ



Ecclesiae conservet. Vale, Vir Clarissime.

Lugduni Bat.  
anno Christi  
xix Augusti,  
clō lo xci.

Ex Decreto Curatorum

& Consulum

J. van Hont.

CDLIV.

Clarissimo Viro Jano Grutero, J. V.  
Doctōri dignissimo. S.

**R**Aræ quidem inter nos Literæ, Vir doctissime, tum intervallo magno locorum, tum hominum injuria. Sed quid agamus? Manebit tamen conjunctio animorum, studiorumque integra, quam tuæ suaves Literæ, admodum confirmarunt. De Seneca, quod plura polliceris, operam bene locatam puto: etsi meminisse nos interdum oportet illius, manum de Tabula. Plautus multa quidem adhuc habet vindice digna: & Camerarii in eum operam dilaudant certè docti: si religiosè lectionem veterem (nisi quid manifesto *ὑπερβολὴν* videris) servabis, illud equidem malo, quàm ut conjecturis agatur. Nam est in conjecturis nescio quis malus genius, quo allubescunt Authoribus, primo illo auditu, sed in pericula conjiciunt eos plurimum. Grave est ex alea conjecturæ subire iudicii alieni aleam. Epistolas ad Atticum attingi brevitate mea: mallet, & longius & clarius: sed alio me vocant alia, nec me decet, in hoc genere valdè curiosum esse. Commulcium à commulcando ut dicitur, non iniquè fero: sed illud magis placet. Videtur enim Tullius, de toto illo concursu bonorum dicere, in quo primas Cato occupavit, & fuit *πρωτεύων*. Accessit Hortensius, &c. Epistola 13. Lectiones alias reticui, eo quod non placeret aliena distringere: eadem simplicitate ago, qua viri boni, qui promercaleis res suas proponunt, alienas intactas sinunt. Hotomanni lectionem probare non possum, quia alius sermo est, quod mihi satis principio illius notæ videbar observasse: ideoque aliena est, iudicio meo, ab hoc loco rei nummariae metaphora. Fabæ ego quidem opponi malo *ἀποδείξω*, & ita sibi constar argumentum. De rebus prolatis, quod scripti, puto, me ita scripsisse, ut

principium ostenderim, cætera non excluderim, quæ ad ceremoniam illam accesserunt: Nam locutionem dico, ab solenni ritu profectam esse. Ut autem locus sit illustrior (cogis me obsoleta repetere) Legationem liberam à Casarē Tullius postulaverat Epist. 13. Eiusdem libri 14. sed non ante Liberalia legari voluerat, Epist. 5. quo die, Tullius fugiens tumultum, legatione usus est, ut reprehendit Atticus, Epist. 10. Erat enim bi-duo post parricidium, ut vocabant. De hoc die sentit Tullius, quum ait, *ante res prolatas*. Bina autem Liberalia, multi fuisse putant malè. Hæc liberalia verò, non à Libero Patre Baccho, sed à Libero Deo dicebantur, qui virorum semini præerat, ut Libera semini mulierum. Author mihi Augustinus, lib. 4. de civitate Dei, cap. 11. & lib. 6. cap. 9. his Liberalibus Togæ dabantur pueris xvi. Calen. April. & per totum oppidum, sedebant sacerdotes Liberi hedera coronati anus, cum libis, & foculo, pro emptore sacrificantes, ait Varro, l. 5. de L.L. Sed quid ago? *ὑλαὶν' εἰς ἀδελφῶν*. Ego quoque manum de Tabula. Et te salvare jubeo cum filiola tua.

Lugd. Batav.  
Cal. Aprilibus.  
1595.

Tuus,

Fr. Junius.

CDLV.

Francisco Junio, F. F.

**I**ncolumem te isthuc pervenisse, Francisce fili, gaudeo, & oro Dominum prout iter secundavit, sic etiam studiorum tuorum secundet cursum. Cursum dico, non quod te putem currere, qui à tergo multorum subsidis, sed quod velim te id facere, & quod Deo, & mihi debeas. Nil à te mihi gratius potest accidere, quàm si te studentem videro, & in iis literis, quæ te ornare, & publicum juvare possunt, provehentem; si feceris, me uteris, dum vivo, bono, & favente Patre: si non feceris, (avertat Deus) meam offensam scito, non fore tibi adjumento. Exsuscita illam tuam animulam, & postpositis nuciis, & jocis, (quibus adhuc indulxisti plus satis) arripe libros, & ad studia rapere, ut puerum virtutis amantem decet. Deum time; Præceptores cole, cum bonis versare, abstine amatorum consuetudine, & in eo

torus

tôtus esto, dum me habes superstitem, ut hæc commoda bene occupes; quæ si Deus ex hac vita me evocaverit, essent te momento fugitura. Nos tibi omnes salutem dicimus.

Lugd. Batav.  
die Dominico  
xxviii. April.  
1602.

Tuus Pater,

Fr. Junius.

CDLVI.

Gerardo Joanni Vossio V.C.

Lugd. Bat.

**P**UDORE suffusus sum, cum literas tuas vidi, illas ad exemplum candoris & elegantiae scriptas. Tanti fecisti PUTE-ANUM, ut quem in Scholarum primo quasi pulvere noveras, adhuc amicum censeretur. Si pectoris mei adyta lustras, talis fui semper: & quemadmodum olim suavissimam vivacissimamque ingenii tui indolem, rapiente velut naturâ, puer dilexi, ita postquam ad aliquem nominis gradum veni, clarissimam doctrinae tuae famam venerari non desii. Quantum me, bone Deus (ut reliqua jam taceam) ultimi de Historicis Græcis libri ceperunt! Tam felici industriâ usus es, ut quicquid à veteri ævo Græcia sudavit, ignorare jam docti indoctique definant, quos omnes unus docuisti. Quæ divitiæ! quæ deliciae! Nihil tam abditum, quod non legeris; tam dubium, quod non expenderis; tam obscurum, quod non illustrâris. Sed si hæc destinati laboris pars est, possumus tuo unius ingenio contenti esse, & omnis porro ævi Historiam accuratam in compendium serie collectam expectare. Imperfectum est, & sæpe hincum, quicquid in hoc genere hæcenus vidi. Sive tuo igitur nomine; sive hominum commodo gloriam metiaris, æternus es; citiusque nulla Scriptorum Græcorum memoria erit, quam tuam ventura sæcula involvant. An te amem igitur, an te æstimem, vides: causas dixi: inhumanus, indoctus, barbarus sim, nisi amem. Sed ut ad literas tuas redeam, ea velut flammæ quædam sunt, & magis magisque ardentem jamdiu animum corripunt. Ignem amorem esse etiam illum honestum, nunc sentio; claudi aut constringi nequit; sed nec impediri. Nihil intervallum locorum potest, præsentibus sumus: nil belli dissidium, amici sumus, & amoris causas à publicâ irâ removemus. Studia nostra Humanitatis sunt, & ad

pacem ac tranquillitatem diriguntur: admonemur homines nos esse, ut à furore & feritate absumus. Pugnent alii, sive verbis sive armis, imò armorum loco verba habeant: mihi jucundum semper erit, Virtutem Doctrinamque, ubi eminent, colere; uni vitio & ignorantiae infestum esse. Dabit Deus publicis ærumnis aliquando finem, ut quemadmodum amor noster nullâ temporis injuriâ impediri potest, ita in quiete rerum, plenos liberosque amicitiae fructus capiamus. Atque ita est: unus tibi è tam vasto numero reliquus sum, qui spretis tot vitæ diverticulis, tot vitatis bonæ mentis scopulis, Musæ & Palladi adhæsi, honestam famam *aristoteli* vivendo divitiis præferens. Producere igitur stilo ingenium ausus sum, & quasi humo me tollere, quia primus ille Literarum bonique nominis amor exstingui non potuit. Tandem tuo unius exemplo excitari vehementius ceppi, quam felicibus ad immortalitatem pennis videbam eniti. Redibant in mentem studiorum incunabula, & pueriles æmulationes. Recolebam sermones, lusus, jocos; & tanquam familiariter amari adhuc posses, aperire continuo affectum studui. Tu qui in aliis superas, hic quoque victoriam tibi vindicasti. Prior scribis, & ad perennem amicitiam invitas: quam à me flagitatam non esse, doleo. Crede candori meo, ita se rem habere, quemadmodum initio dixi: Pudore suffusus sum, cum literas tuas vidi; felicior nescio, quia amorem tuum intellexi: an infelicio, quia serò indicare meum coactus sum. Bene est: juncti animis sumus. Tuæ benevolentiae fuit, stringere hunc nodum: meæ constantiae erit, id agere, ne unquam dissolvatur. Vale.

Lev. in Arce, xv. Cal.  
Octob. clj. lxx. xxiv.

CDLVII.

Gerhardo Joanni Vossio, V.C.

Lugd. Bat.

**L**ibera tandem aliquando humanitatis nobis officia erunt, decumana belli severitate impedita. Patet enim jam tabellariis iter, quod affectui meo nunquam clausum fuit. Homo non essem, nisi te amarem; à Literis & honestis artibus alienus, nisi singularem doctrinam tuam & excellentem ingenii vim etiam tacitus suspicerem. Mirum etiam in modum accendit animum meum nupera illa epistola tua, amantius

amantiùs nescio, an eruditiùs exornata, an etiam modestiùs. Qui hoc agis, ut mente complectaris optima, adhuc ignorare videris, quantum tibi docti omnes tribuant. Magnus es, qui docere omnes potuisti. Ejusmodi libri tui sunt, de Historicis Latinis incredibili industria scripti; nequid jam de Græcis dicam, quos omnes tibi obstrictos habes. Laudo, imò summopere admiror utrumque hoc opus. In altero enim totam exhausisse Antiquitatem videris; in altero veteribus adjunxisti novos, claris obscuris nonnullos; sed ut illustrares simul omnes. Pulchrum mercede facinus, neminem prætermisum esse. Quisquis enim Historiam attingit, bene de genere humano meritis est; & quia aliquam rebus lucem dedit, luce ipse dignus erat. Inter sordes & fumum nonne gemmam interdum invenias? Ad famam satis erat, eminentes scriptores, tanquam lucida quædam sidera recensere: sed ut amplius publicæ utilitati dares, viliores etiam calamos pulcherrimo & semper victuro Volumine complexus es, nequid deinceps omnino in Historia nesciremus. Juvat profectò & illos, ut sic dicam, capite censos intueri, hætenus utiles, quia ingenium occuparunt. In tenebris tenue etiam lumen veram aliquam imaginem distinguunt: & quis est, qui non malit luscus esse quàm cæcus? Non potuit igitur diligentia tua in vitum excedere; nemini supervacua, nisi nuperum ævum, & Monasteria omnia, in quibus Literæ conservatæ sunt, fastidiamus. Quid mihi verò doctissimus ille labor tuus profuerit, publicè in Commentariis meis Insulicis, quibus Irruptiones Barbarorum in Italiam illustro, profitebor. Historicum, & simul Interpretem egi: Ita enim videbar & purius narrare, quæ cadente Imperio Romano gesta sunt; & facilius explicare, quæ, ut sæcula illa, plus noctis quàm diei habuere. Prope diem, ut spero, mittam ad te opus, sed tanquam ad Censorem suum. Nam qui omnem examinasti Historiam, meam etiam emendare poteris. Nunc illam de S. FLAVIA DOMITILLA Observatiunculam vide, & Clarissimo simul HEINSIO ostende: ad quem mox & literas & exemplar missurus sum. Nuperas verò meas ab ARCERIO an acceperis nescio. Summum crimen putem, in tanti viri affectum silentio peccare. Partitiones Oratorias non Batavicis tantum scholis, sed omnibus omnium provinciarum dignas judicio. Faxo & hinc Eloquentiæ priscæ specimen sibi filii mei

proponant. Vale, & me amare perge. Hem, CHRISTOPHORUM CALENII video Avunculum tuum magnum fuisse: sed CALENII Venlonenses sunt: an igitur & Patriæ nexu jungimur? Iterum vale.

Levanii, in Arce, XIII. Cal.

Junii, cl. 13c. xxix.

# CDLVIII.

Jacobus Armachanus, Gerhardo  
Johanni Vossio, Viro Cl. Salutem.

Pervenerunt in manus meas abhinc amplius annis XIII. Johannis Latii de Pelagianis & Semi-pelagianis Commentarii: quibus eorum originem & progressum usque ad tempora Johannis Papæ, qui Severino succcessit, studiosè diligentèrque est persecutus. Delectatus descriptionis genere, ab anno in quo ille desuit ducto principio, proximorum temporum Historiam adjeci: ex Lugdunensis Ecclesiæ scriptis & Flodoardo, majore ex parte, eam contexens; de meo vero (illius, quem suscepi continuandum, exemplo) *nihil adferens nisi ordinem*. Vix dum autem ista absolveram, cum Historia tua Pelagiana prodiret, & curâ & vigiliis elaborata: in cujus parte extremâ, ea ferè omnia occupata à te comperi, quæ ego tumultuariâ operâ in Adversaria mea conjeceram. Itaque tum quidem *παρὰ* illud *ἀγναπὴν* abjeci penitus: verum ubi obtulissent sese mihi postea alia ad *Gottschalki* causam pertinentia, quæ in nostri utriusque Collectaneis desiderari videbam; antè exorsâ retexere placuit, & ad priorem illum centonem etiam ista attexere *ὁμολογία*. Quæ, cujusmodicunque sint, ad te allegare visum fuit: si cui fortè usui, in novâ Historiæ tuæ editione adornandâ, esse poterint. Ea tu, ut ab homine existimationis tuæ cupidissimo profecta, æquo ac libenti animo accipies. Vale.

Dublinii, V. Calend. Julias:

anno æræ nostræ Christianæ

M. DC. XXXI.

# CDLIX.



## CDLIX.

Clarissimo Gerhardo Joanni Vossio.

**A**Ccepi, Vir Eximie, Literas tuas; quibus dum amorem quo te prosequor, ex leviori saltem muneri indicio, rectè quidem colligis, nobilissimum tum pectus instar fertilioris alicujus agri aperis, qui plus multo adferat quam acceperit. Aded munusculum nuper tibi à me oblatum extollis, ut quo te merito meo exsolvere studebas, eo me tuo totum implices, & beneficium longè majus reddere videaris, cum te debere aliquid mihi profiteris. Utcunque verò aliqua inter nos in Gottschalci Historiâ oboriatur differentia; gaudeo tamen, & tibi ex animo gratulor, nos, (quod ais) in eo, quod rei caput est, consentire: uterque dum B. Augustini sententiam amplectimur. Quam sive Gottschalcus per omnia fuerit secutus, sive aliquando exceßerit, nolim ego multum contendere: modò (quod libenter audio) nobis ipsis cum Augustino conveniat, cujus sententiam in causâ Gottschalci tuendam susceperat Remigius. Qui verò duriores sunt, vel fuerunt, Augustini interpretes, nunquam mihi placuerunt: minimèque omnium inertes illi *τὸ ἀργὸν λόγον κήρυκας*, qui faciunt agendo, ut nihil agamus, & homines sponte suâ ignavos ipsis quoque truncis reddunt stupidiores: quum divinus ille gratiæ præco, ex eo ipso quòd Deus is sit qui efficiat in nobis *τὸ πρὸς θεὸν καὶ τὸ ἐνέργειαν ἰσχυρὴν τῆς ἐκδοχῆς*, contrarium planè deducat *πείσμα* studendum idcirco, ut cum timore & tremore salutem nostram operemur. Quippe quod verendum sit, si ab Religione officii hic declinaverimus, &, vel nihil agendo, vel malè agendo, eum à cujus *ἐκδοχῆς* illa quam habemus volendi & faciendi potestas tota pendet, irritaverimus; ne Deus ita à nobis laceßitus jure suo nobiscum agat, atque nos desertus deferat, & novas ad volendum & agendum vires (absque quibus, ipsi nos ipsos lapsos erigere nequeamus) ultrà non impertiat.

De Mariano nostro, quì factum ut mutus omnino ad vos venerit, amantissimo utriusque nostrum D. Ludovico de Dieu rationem reddidi. Mens verò quæ nunc est mihi, tum erat eadem: nempe ut, si cut tuâ operâ ita etiam sub tuo nomine, integer prodiret Marianus. Integrum verò in unico Cottonianæ Bibliothecæ

exemplari repperi: si tamen integrum. Postrema enim pars Chronici, à Dionysianæ æræ anno 900. usque ad finem (quam inde descriptam totam seorsim ad te miseram) integrior in Sichardi editione legitur: cui siquid desit, ex tuo supplendum erit exemplari; quod illud Gemblacenſe esse suspicor, ex quo novam <sup>Miræus, in</sup> Mariani editionem promisit <sup>Sigeberti</sup> nobis Miræus, quam non præstitit. Nactus sum & alia tria <sup>Chronici</sup> exemplaria, in quibus Anglicanum Florentii Chronicon cum Universalis Mariani hoc Wigornienſis quidam Monachus Regis Stephani temporibus commiscuerat. Ex eorum uno, Florentium (vel potius Marianum) suum edidit nobilissimus D. Guilielmus Howardus de Naworth, Thomæ Norfolciensis Ducis filius. Duo alia apud Oxonienses vidi; in Bodleianâ unum, in Collegii Corporis Christi Bibliothecâ alterum: quorum utrumque præter Proemia, integrum librum secundum habuit, qui à primo aberat.

Initio Cottoniani codicis verba ista præfixa inveni, *Meum nomen, ut dignum, Cronica Cronicarum: cum præ illis servo verba Evangelistarum. Nulla enim Cronica conservat diem Mensis Solaris Resurrectionis Christi, juxta historiam Evangelii, nisi ista sola.* Sequebantur deinde, tanquam ipsius Mariani, Tabellæ illæ Chronologicæ quas in apographi mei principio descriptas vides: quæ commodius, ni fallor, ad calcem operis essent rejiciendæ. Earum aliquot in Bodleiano quoque habentur codice (qui à Consulum Indiculo incipit;) & in altero, Collegii Corporis Christi, plures; Romanorum Episcoporum Catalogo usque ad Eugenium III. perducto, cui aliâ adscripti erant manu, *ann. 8. mens. 4. die 20.* quod Argumento est, Eugenii tempore illud fuisse exaratum. Ut autem intelligas, quibus in locis Cottonianum libri *primi* & *tertii* Chronicon à vulgato differat: Florentium Wigornienſem nunc ad te mitto, quem Francisci Quarlesii operâ (qui mihi tum erat ab Epistolis, vir ob sacrationem Poësin apud Anglos suos non incelebris) cum illo conferendum curavi; ad annum usque Domini DCCCC. Dionysianum, à quo quaternio prius missus initium duxit. Ubi quæ lineis subtilius ductis sunt notata, à Cottoniano exemplari absunt, & ex Florentii Annalibus à Wigornienſi de quò dixi Monacho sunt hæc intexta.

Mitto simul & Epitomen à Roberto Lotharingo Herefordensi Episcopo, eodem quo Marianus mortem obiit anno, con-

cinnatam:

cinnatam: cujus in quarto de Pontificibus libro Gulielmus Malmesburiensis ita meminit: *Erat tunc temporis monachus Marianus apud Magontiam inclusus, qui longo solitudinis otio Chronographos scrutatus, dissonantiam cyclo- rum Dionysii Exigui contra Evangelicam veritatem, vel primus vel solus animadvertit. Itaque ab initio sæculi annos singulos recensens, 12. annos, qui circulo deerant, superaddidit; magnam & diffusissimam Chroni- cam facere adorsus. Eum librum Robertus miratus unicè, æmulatus mirificè, Angliæ in- vebendum curavit. Denique captus Mariani ingenio, quicquid ille largius dixerat, in arcum contrabens defloravit, adeo splendide, ut magis valere videatur defloratio quàm in- gentis illius voluminis diffusio.*

Ad calcem hujus Epitomes in Cottonia- no codice appendix adjecta, ab altero Bodleianæ Bibliothecæ aberat: quam vel eo nomine negligendam non putabam, quod magnæ illius Periodi Julianæ, cujus usum magno Scaligero acceptum referimus, prima vestigia in eâ deprehenderim. De magnis Cyclis Appendicem non diffi- milem ad finem libri primi ipsius Mariani in Collegii Corporis Christi Manuscripto appositam inveni: quam hic inclusam mitto; alia quoque de Mariani patriâ & variis editionibus Collectanea missurus si- militer, si ad Editionis tuæ ornatum aliquid inde accessurum à te intellexero. Deus laboribus tuis benedicat: & omnia tua stu- dia in honorem gratiæ suæ, Ecclesiæ bonum atque Reipublicæ Christianæ ver- tat emolumentum. Vale, Vir Clarissime; & si quæ sunt alia, ex latore harum Lite- rarum D. Freyo fusiùs intellige.

Dublinii, anno Tuæ Dignitatis studiosissimus,  
MDCXXXII.  
4. Id. Jun. Jac. Usserius Armachanus.

CDLX.

Clarissimo Gerardo Johanni Vossio.

IGNOSCES, Vir Humanissime juxta ac Doctissime, quod ignotus te compello ac seria tua leviculo negotio interpello. Jussu Honoratissimi & Reverendissimi Archiepiscopi Cantuariensis (qui nisi im- mensa occupationum mole distineretur, jampridem ad Literas nuper à te acceptas respondisset) operam tuam implorandam habeo in providendo vellumine terfo ac utrinque lavigato, quod & Typorum im-

pressionem ferat, & calami etiam ductum non aspernetur. Apud nos perit prorsus hujusmodi Artificium, nec aliud habemus velluminis genus, quam quod librorum in- tegumentis adhiberi solet. Apud vos hoc artificium vigere libenter credimus, atque inde Clarissimum Virum Dominum Th. Bodleium vellumen illud comparasse, ex quo constat Catalogus grandis Librorum in Bodleianâ, partim excusus, partim calamo exaratus, qui publicè prostat in Bibliotheca, quem fortasse notaveras, cum illic esses. Hujusmodi velluminis specimen aliquod, tres scilicet vel quatuor membranas, si apud vos sit parabilis annona, ad se ut transmittas, quamprimum commodè poteris, rogat Honoratissimus Archipræsul; simulque ut significes utrum hujus mercimonii tanta apud vos sit copia, ut suffectura sit operi, quod mille fortasse membranas, aut am- plius desideret. Habetis hoc nomine Ho- noratissimum Præfulem tibi debendi reum, meque insuper eadem operâ devinxis, summum jampridem

Raptim. Lon-  
dino Decem-  
bris xx. 1633.

Virtutum tuarum Cultorem

P. Turner, Soc. Collegii  
Merton in Academia Oxon.

CDLXI.

Cl. V. Gerardo Vossio.

QUæ populum scire, uti nunc sunt res nostræ par erat, ex Epistola quam nomini tuo, Vir Clarissime, inscribere au- sus eram, nota sunt: quæ sapientes, ex ista si vacat, seductus accipies. Quum Grammaticam Scholis apud nos Edicto imperatam omnes propemodum docti at- que indocti clamarent alii curtam, pro- lixam alii, hi methodum, illi materiam in- cularent, Danesius quidam Epitomen Grammaticæ edidit: hanc Haineus (quem Misum ego, quia Gallis *Haine* odium sonat, agnomino) apud Archiepiscopum Can- tuariensem, Episcopum Cicestrensem, alios mancam clamat, suam ex regia Danesiana consutam promovere studet; res ad Regiam Majestatem deferretur, cujus mandato evocatus ego huic operi de- signor: quod à me absolutum Rex ad proceres qui illi à Sacris Consiliis deman- dat, hi ad Scholarchas tres & his adjectum Haineum, pernicioso credo consilio, ne & hic novas res moliri arguerentur qui mihi

mihi autores. Plura cum publicus tum privatus super recenti vulnere ex obitu dilectissimi filii adicere non permittit dolor. Si quid erit, quo, vel consulendo, vel monendo, aut etiam, si promerebitur, cohortando, me beare dignata fuerit nota mihi dudum prolixa tua humanitas; faciam ne apud ingratum aut immemorem pereat illud beneficium, verum trabali fixum clavo stet apud eum, qui te meritissime semper coluit, religiosissime usque colet, est eritque Tuus,

Londini, Maii No-  
nis anno Domini  
MDCXLI.

*Tbo. Farnabius.*

Ego jam per quinquennium secessi in rus meum ad vicesimum ab urbe lapidem. Londinum subinde viso. Si quid ad me voles, tradet mihi Assuerus Regemorterus, alumnus quondam meus, qui Lugduni studuit, suscepitque gradum Doctoris Med. Habitat is Londini, in Vico qui vocatur *Time street.*

CDLXII.

*S. & Obs.*

**Q**UOD dulcisonos audientibus concentus evenire solet, Vir longè celeberrime, idem mihi suavissimo tuo colloquio Amstel. dimisso nuper accidisse fatendum. Ut enim illi exoptatæ in auribus circumferunt vocis sonum: sic mihi non auribus tantum obversatur, sed etiam penitus pectori infixus, hæret & hærebit, quamdiu sanguis in venis caluerit, sermonis tui, quo me dignatus es, lepos pater & candor. O dulces & frugiferas dapes, quibus tunc frui datum fuit! Homini grati, piorumque monitorum audientis vix responderem officio, nisi has ipsas & obsequiosâ mente exoscularer &

in succum sanguineum meum, quoad vires in hac nostrâ infirmitate tulerint, convertere studerem. Non ergo temporis senectus nec loci longinquitas, nec rei ipsius difficultas aequè ac à multis neglectus hoc apud me, (ut cum bono Deo spero) efficient, ut ejus amorem studiumque menti meæ vel excutiant vel exosum reddant. Fruantur alii suo judicio, ego & quid sanis istiusmodi debeatur consilii & quantum ex rei illius studio hauriatur utilitatis, per Dei gratiam non sum ignarus. Quamprimum igitur per alia, quibus etiamnum distrahor, licuerit ad amœnissimos & aquæ vivæ uberrimos antiquitatis fontes degustandos me conferam: cumque multum mihi ad hanc rem adjumenti adferre possit eminentia tua, si efficiat apud Cl. Dominum Franciscum Junium, ut interdum unius atque alterius auctoris antiquioris usus ex Bibliothecâ Arundelianâ studiis meis concedatur; ne in hoc mihi desit obnixè rogo. Ipse quidem benevolentiam dicti Dn. Junii præfens hîc ambivi, & mentione tuæ eminentiæ benevolentiaque mihi exhibita exambivi; quin tamen largiorem illius fructum sim sensurus; si recommendatore insuper te apud eum uti mihi daretur nullus dubito: ego inter eminentiæ tuæ cultores animo non facile ulli secundus, & Deum venerans, ut eadem superstite rempub. literariam quam diutissime frui ac gaudere, clementer largiatur. Vale Literatorum ocelle, meque tua prosequi benevolentia perge.

Dab. Londi-  
ni 12. Julii  
c1610 c xli.

*Celeberrimæ Tuæ Eminentia*

*Observantissimus,*

Daniel Sachsius.

P. S. Si Theses tuæ antehac editæ et nunc prostant venales, quaeso te eminentissime Vir, indices exhibitori præsentium ubi, ut exemplar earum accipere possim.

*FINIS.*

**ERRATA**



## ERRATA sic emendabit Benignus Lector.

Pagina 1. Columna 2. Nassovius. pag. 3. col. 1. pro LXII. reponere XLII. p. 10. c. 1. pro I. V. reponere *Is. Vossius*. p. 15. c. 1. Alcuinus. p. 31. c. 1. pro *Chasio* lege *Achatio*. p. 45. c. 2. *viduata*. p. 54. c. 2. Anselmo. p. 56. c. 1. Cicestriensis. p. 58. c. 1. Cicestriensis. p. 59. c. 1. Burhilli. p. 69. c. 1. Cicestriensis. p. 70. c. 2. pro *Cui* reponere *Qui*. p. 77. c. 2. Slupeklum. Sic etiam lege ubicunque nomen istud in his Epistolis invenies. p. 84. c. 1. Auberius-Maurerius. pag. 85. c. 2. Confiliis. p. 86. c. 2. Scholastico male sentire. Ibidem. Ideo. p. 89. c. 2. Grenvillo. p. 95. c. 1. *Alapin*. p. 100. c. 2. Lithocomi. p. 101. c. 1. Davidi de Willem. Ibid. c. 2. Hofferio. p. 102. c. 2. Hagam. p. 105. c. 2. Herce. p. 113. c. 1. *Admima*. c. 2. *Samuelsson*. p. 114. c. 2. pro *quis* reponere *quis*. p. 127. col. 2. Londinum. p. 181. c. 2. pro *Hoelclius* forte reponendum *Hoelzelius*. Ibid. Curatorum. Ibid. provinciam. p. 186. c. 2. Archiepiscopo Armachano. p. 188. c. 1. pro *M. Scripio*. reponere *MS.* p. 190. c. 1. Radzivil. p. 193. c. 2. pro *Dutiac* lege *Doufiaca*. Ibid. Doufiaca. p. 194. c. 2. prodissie. p. 195. c. 1. lectione. p. 199. c. 1. Junio Philargyrio. Ibid. Phranza. p. 200. c. 2. Blacu. p. 202. c. 1. reponere *Andr. Rivois S. P.* p. 206. c. 2. sumptus. p. 210. c. 1. Hagam. p. 214. c. 2. Hugonem. p. 216. c. 2. de Willem. p. 217. c. 1. Skytlio. p. 221. c. 1. *Salomonsson*. Ibid. c. 2. Joanni. Ibid. Semiebiolitas. p. 222. c. 1. pro *monte* reponere *monet*. p. 232. c. 1. Sorigianis. p. 239. c. 2. Scytliana. p. 241. c. 2. Tl lobroga. p. 257. c. 2. *Wander-Myllo*. p. 252. c. 2. Regis. p. 253. c. 1. Goudenfem. p. 258. c. 2. Grotli. p. 265. c. 1. bis Rykwaert. p. 330. c. 1. Vander-Myllo. p. 416. c. 1. Sorana. p. 454. c. 2. cogor. p. 446. c. 2. Ecclesia. p. 441. c. 1. Langermanno. p. 426. c. 2. unum aut alterum. p. 391. c. 1. aut contemptum. c. 2. heredum.

## In Clarorum Virorum ad VOSSIUM Epistolis.

Pagina 14. Columna 1. pro Grilli reponere Cyrilli. pag. 1. col. 15. pro V. reponere *vero*. Ibid. Elmenhorstius. p. 22. c. 1. Anti-Grotium. Ibid. c. 2. Altorphina. p. 31. c. 1. A Londres. p. 31. c. 1. paré. Ibid. nécessaire. p. 26. c. 1. mortuum. p. 49. c. 1. Commentarii. p. 66. c. 2. Wren. Ibid. c. 1. puto legendum esse *Burlamichiani*. p. 67. c. 1. Creighton. p. 104. c. 2. divertat. p. 121. c. 1. pro *Equi* reponendum puto *Episcopus*. p. 191. c. 2. Galeotti à Prato. p. 192. c. 2. pro *Kewi* legendum esse *Reo*. p. 196. c. 1. *Greipus* reponere *Gravimus*. p. 210. c. 2. pro *Tesirejano* lege *Mejrecato*. p. 211. c. 1. Peyraredus. p. 222. c. 2. Aug. p. 226. c. 2. procedit. p. 229. c. 2. Millererium. p. 232. c. 2. *Amas*. p. 240. c. 1. Nemaufi. p. 244. c. 2. Polymathia. p. 245. c. 2. *Stoloz*. p. 20. c. 2. Peiro de Witte. p. 100. c. 2. vitare potes. p. 210. c. 1. Joh. Rod. p. 276. c. 1. *De Brieux*. in *suprema Mediomavricka curia quendam Senator*. Ita lege, & dele euz habentur in infima parte columnae. p. 276. c. 1. post *degenis* appone punctum. p. 276. c. 2. attestentur nec. p. 268. c. 2. pro *Lajibiasa* vide an legendum sit *Humana*. p. 272. c. 2. an errore.

Cetera Lectoris Judicio permittimus.

